


Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

Contents

Matêwre	1
Makre	85
Rukre	133
Juãw	220
Atre	282
Rõmãn	356
Wam Korît	399
Sikũn Korît	438
Karatas	462
Epes	477
Piripos	491
Korosẽ	500
Wam Tesarõn	509
Sikũn Tesarõn	517
Wam Ximotre	521
Sikũn Ximotre	532
Xitre	540
Piremõ	545
Eprêw	547
Xiakre	577
Wam Pêtre	587
Sikũn Pêtre	598
Wam Juãw	604
Sikũn Juãw	613
Hapuhã Juãw	615
Jutre	617
Apokarip	621

Matêwre Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwýnh na pre. Nê kêp Ijaew. Hixi hõ pê na Rewi. Tã na pre mẽ pamã kagàja nhĩpêx nê kamã Jejus kot pika hwýr wrýk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mẽ panhõ pahшти mex o mex ã harê nê hã kagà. ã na pre Matêwre mẽ pamã Jejus jarê nê hã kagà anê.

Apraãw kanrêhã hkra nê htãmnhwýjê nhĩxi

Rukre 3.23-38

¹ Amnepêm Jejus Kris kormã pika hwýr wrýk kêt ri hkukamã higêtjê nhĩxi na jajaja. Wýj ri higêtjê hõ nhĩxi na pre kêp Tawi. Nê Tawi xwýj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mẽ htõjaja.

³ Nê Juta hkra na pre wa kêp Pere nê Jera. Nê Pere mẽ Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahihti Tawija. Nê Tawi hkra na pre kêp Sarumãw.

Sarumãw katorxàja Uristi hprõ na pre.

Tã nhũm pre Uristi ty nhũm Tawija hãmri mýrpê Uristi hprõ ho hprõ nê kamã hkra. Nhũm wa hkraja kêp Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti.

Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

¹¹⁻¹² Nê Josis kra na pre kêp Jekonĩs mẽ htõjaja.

Kormã mẽ htĩr ri na pre Papirõn nhõ xwýnhjaja kot mẽ hkurê kaxàr kaxyw mẽ hwýr hprõt nê mẽ unê. Ijaew piitã unênh pa nê ma akupým mẽ õ pyka hwýr mẽ ho hapêx nhũm mẽ hpãnhã Papirõn kamã pa ho pa. Jakamã nhũm Josis mẽ hkra Jekonĩs mẽ htõjaja mẽ hipêxà pyrã nê Papirõn kamã pa ho pa.

Nê Jekonĩs kra na pre kêp Saraxi.

Nê Saraxi hkra na pre kêp Joropape.

¹³ Nê Joropape hkra na pre kêp Apiux.

Nê Apiux kra na pre kêp Eriakĩ.

Nê Eriakĩ hkra na pre kêp Ajo.

¹⁴ Nê Ajo hkra na pre kêp Satok.

Nê Satok kra na pre kêp Akĩ.

Nê Akĩ hkra na pre kêp Eriux.

¹⁵ Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

¹⁶ Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jejus.

Mẽ kot kãm: “Tĩrtũm kot mẽ pakaxyw ãm xwýnh” anhỹr xwýnhhta na pre.

¹⁷ Nhũm Apraãw kanrêhã axte axpên kanrêhã mẽ àptàr nywjaja Tawija wýr kêp 14. Nê Tawi nhĩrõ pê Papirõn hwýr mẽ hapêx kêt ri axpên kanrêhã mẽ àptàr nywjaja mããnhn kêp 14. Nê ra Papirõn kamã mẽ pa nhĩrõ pê axpên kanrêhã Jejus pê Tĩrtũm kot mẽ pakaxyw ãm xwýnhhta wýr mããnhn kêp 14. ã na pre Jejus Kris xwýj ri higêtjê nhĩxi anê.

Jejus Kris kator

Rukre 1.26-38, 2.1-7

¹⁸ Tã ã mẽ hixi jarênh kot anhỹr kanrêhã na pre ã Jejus Kris kator anê. Nhũm pre kormã Jujeja Marir o hprõ kaxyw. Nom

kormã ho hprô hkêt ri nhũm htujarô. Kormã hkukrit tâ nhũm Tirtũm Karô tanhmã ho nhũm htujarô.

¹⁹ Hãmri nhũm Jujeja harênh ma nê tee ri hamaxpêr nê htýx nhãm mêhõ kot kêp htu hã hkamnhĩx. Juje kot tãm amnhĩ nhĩpêx nê tãm hamaxpêr jakamã tee ri kot ho hprô hkukamã hamaxpêr. Nê hamaxpêr o:

—Nà pa mãn ixte hturê hã. Nhãm mêhõ ra kot ã hipêx anhÿr kênã. Nà kot paj ho ixprô hkêt nê. Nom kot paj ixkwýjê mã ã kot amnhĩ nhĩpêx anhÿr o amnhĩrit kêt nê. Kot paj anê nhũm mē kuma nê ho kapêr punuj nhũm amnhĩ kamã hpijaam tÿx nê. Ja pymaj kot paj ixkatat kôt hkaga kurê kumrêx. Nom ixkwýjê hkàx ã hkaga. Anê.

²⁰ Nê ã hamaxpêr anhÿrja o ra gôr nê nō. Nhũm Tirtũm kapêr o mē wrÿk xwÿnhjê hõ hwÿr wrÿ nê hwÿr axàn kuri xa. Hãmri nê kãm:

—Pa Juje? E ot pa awÿr tē. Kwa tee ri Marir o aprô hkukamã ajamaxpêr punuj kêt nê. Mãmri ho aprô. Mêhõ kot apê tanhmã ho hkêt. Tirtũm Karô na pre ã hipêx anê. Jakamã kwa tee ri ajamaxpêr kêt nê mãmri ho aprô nê war apa.

²¹ Koja hkrare kato nê myre nê hprêk. Hãmri nê mē kot hkôt amnhĩ xunhwÿr xwÿnhjaja mē kot amnhĩ tomnuj piitã pē mē utar pa. Jakamã koja kato ka wa hã hixi mē nhũm kêp Jejus. Anê.

Nhũm pre ã Tirtũm kapêr o mē wrÿk xwÿnhja kãm kapêr anê. Ijaew kapêr kãm Jejus jarênhja te kêp “Tirtũm kêp mē papytâr xwÿnh” anhÿr pyrâk. Jakamã nhũm Tirtũm kapêr o mē wrÿk xwÿnhja Juje ôt kãm ã kãm Marir jarênh anê.

²²⁻²³ Nom kormã ã kãm kapêr anhÿr xwÿj ri na pre ra Tirtũm nhÿ hã kapêr xwÿnhjê hõja kukamã tanhmã harênh to nê hã kagã. Nê hã kagã ho:

E mē inhma nê inhmar tÿx nê ho apa. Koja nhÿrmã pyka já kamã mēhõ kormã hkukrit tâ htujarô. Nê hkra kato nê myre. Nhũm mē omu nê hã hixi mē nhũm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tirtũm mē pahkôt pa ho pa” anhÿr jarênhja pyrâk. Jakamã nhũm pre Tirtũm nhÿ hã kapêr xwÿnhja Jejus kukamã ã harênh anê nê hã kagã.

²⁴ Jakamã nhũm Tirtũm kapêr o mē wrÿk xwÿnhja Juje mã kapêr par mē nhũm hkrãkato. Hãmri nê kot kãm ujarênh xá hkôt Marir o hprô.

²⁵ Nom kormã tanhmã ho hkêt nê ri o pa rãhã nhũm hkrareja kato. Hãmri nhũm wa hã hixi mē nhũm kêp Jejus nê mãânênh kêp Emanuew.

2

Kanhêti ho studa xwÿnhjê jarênh

¹ Nhũm pre Jejus Perêj kamã kato. Pika pē Jutej kamã. Pahi Eroxo kormã kot Jutej nhõ xwÿnhjê ho amnhĩptâr o pa ri nhũm õ pika kamã kato. Hãmri nhũm Tirtũmja kaxkwa kamã Kra kator jarênh xá hã kanhêti raxta õ nhõ nhũm pika hõ kamã kanhêti ho studa xwÿnhjaja omu. Kanhêti pumu nê hkĩnh nê axpên mã:

—Kwa ga mē kanhêti raxti mÿj pumu. Mãn ra Ijaew nhõ pahi nywta kato nhũm kanhêti mÿj kêp ho amnhĩrit xá hã ajêt. Kwa pu mē ma hapêr o mō nê nhÿri tokyx omu nã.

Anê hãmri nê amnhĩ to pikuprõnh pa nê ma hapêr o pa. Ma myt gjêx xá hwÿr hapêr o pa hã apkati xohtô nê. Hãmri nê ra Ijaew nhõ pika hwÿr pøj nê krÿ pē Jerujarê hwÿr hapêr o mō. Pahi Eroxo nhõ krÿja wÿr nhũm mē hapêr o mō hãmri nê kamã pøj nê mē hkrare nywta ã krÿ nhõ xwÿnhjê kukjêr o mō

² nê mē kãm:

—Pa? Ot pa mē apê Ijaew nhõ pahi nywreta pumunh kaxyw mō. Ham kator xwÿnhja. Mē inhõ pika kamã na pa prem kaxkwa hkrax rÿm kot ho amnhĩrit xá hã kanhêti raxta pumu. Hãmri nê nhÿri pahi nywre pumunh nê kutã mē ixkôn krã ho ixtêm nê ixkrÿ nê kãm mex o mex ã harênh kaxyw nêtãnh mē inhõ krÿ rÿm hapêr o mō. Kwa mē inhmã harê. Nhÿri na? Na pa mē inhmã omunh prãm tÿx kumrêx.

Anhÿr o hã mē hkukjêr o mōr jakamã nhũm mē piitã pahi nywja jarênh ma nê axpên mã harênh o hprôt.

³ Nhũm pahi Eroxo jarênh ma nê tee ri amnhĩ kukamã hamaxpêr. Pahi nyw kot mē ho amnhĩptâr ã hkamnhĩx nhũm já kêp omnuj tÿx nê. Nhũm krÿ nhõ xwÿnhjaja ã

hamaxpêr anhÿr ã omu nê tee ri amnhÿ kukamã hamaxpêr o ra kãm ma nê.

⁴ Hãmri nhÿm pahi Eroxa amnhÿ wÿr hkwÿjê hã karô. Mê ô patre krãhtÿmjaja nê Tÿrtÿm kapêr tÿm o mê ahkre ho mê pa xwÿnhjaja nhÿm amnhÿ wÿr mê hã karô nê Tÿrtÿm kot nhÿrmã mê hwÿr mênh mã xwÿnhhta ã mê hkukjêr kaxyw. Nê mê kãm:

—E Tÿrtÿm kot nhÿrmã mê pahwÿr mênh mã xwÿnhhta ã na pa mê akukjêr kaxyw mê ato akuprô. Kwa mê atô inhmã harê. Koja nhÿrmã kator kaxyw nê nhÿri koja we kato? Xà jar mê panhõ krÿ kamã nà? Xà nhÿri krÿ hõ kamã? Anê.

⁵ Hãmri nhÿm mê kuma nê kãm:

—Nà mê panhõ pika pê Jutej kamã koja xep kato. Krÿ pê Perêj kamãã. Na pre Tÿrtÿm nhÿ hã kapêr o mê pa xwÿnhja ra hkukamã mê panhÿgêjtê mã tanhmã harênh to nê hã kagà. Nê hã kagà ho:

⁶ Pa Perêj nhõ xwÿnhjaja? E mê anhõ krÿ grire htã kamã koja nhÿrmã mê panhõ Pahi Maatija kato. Koja mê pahpê Ijaewjê piitã mê pahto amnhÿptàr mex o pa. Jakamã mê anhõ krÿ grire htã koja Ijaew piitã axpên mã mex ã harênh o pa.

Ã na pre Tÿrtÿm kot mê pahwÿr mênh mã xwÿnhhta kukamã mê kãm harê nê hã kagà anê. Anê.

⁷ Hãmri nhÿm pahi Erox tee ri ã harênh anhÿrja ma hãmri nê amnhÿ wÿr mê kot hã àhkukjêr o mör xwÿnhjê hã karô. Nom nhÿri Ijaew kàx ã. Hãmri nhÿm mê ma hwÿr mra nê agjê nhÿm mê omu nê pahi nywta ã mê hkukja nê mê kãm:

—E mê aprÿ hã inhmã pahi kator nywta jarê. Tanhmã na pre ra mê ate kanhêti pumunh ã mytwrÿ kute? Xà ham na ka prem omu nà amnepê mã? E mê aprÿ hã tanhmã inhmã harênh to. Anê.

Hãmri nhÿm mê ihõja kãm:

—Nà na ra hã amgrà axkrut kaxyw. Na pa prem omu hãmri nê inhnojarê nê man ixpa ho ixpa ry rax nê mê awÿr pøj. Anê.

⁸ Nhÿm mê kuma nê mê kãm:

—Tÿ. Nom jar amrakati. Perêj kamã na xep kato. E mê mãmrÿ ma hwÿr mô nê kamã hapêr. Hãmri nê nhÿri omu nê akupÿn ixwÿr mô nê inhmã harê. Pa ijaxwÿja ma hwÿr mô nê omu nê mê apyrã

nê kãm mex o mex ã harê. Ijaxwÿja inhmã omunh prãm tÿx kumrêx. Anê.

Nom hêx rom ã ri mê kãm kapêr anê. Kot nhÿri harênh mar nê hã àmnênh nhÿm mê kot hpÿr kaxyw nhÿm hêx rom ã kãm omunh prãm tÿx ã amnhÿ jarênh anê.

⁹⁻¹⁰ Jakamã nhÿm mê kuma hãmri nê kato nê ma Perêj wÿr mör kurê kumrêx. Hãmri nê kormã mê ô pika kamã mê pa ri kanhêti ho studa xwÿnhhta nhÿm mê axte amnhÿ kukamã omu nê hkÿnh nê. Nhÿm ma Perêj wÿr mê hkukamã mô nhÿm mê omunh pê ma hkôt pa rãhã hwÿr pøj. Nhÿm kanhêtiya pahi nywre nhörkwÿ mÿri ajê.

¹¹ Jakamã nhÿm mê ma hkôt mra nê ixkreja wÿr pøj nê kapem xa. Hãmri nê mê kãm kapêr nê mê hwÿr agjê nê Jejus mê katorxàja wa omu. Hãmri nê Jejus kutã hkôn krã ho hkrÿ hpa nê kãm kapêr nê kãm:

—Pa Xugitre. Hêxta waa nê. Nà amex o amex. Kot kaj nhÿrmã axàptàr hãmri nê apê mê inhõ Pahi Maati. Nà ãm hãmri na pa mê apumu nê ixkÿnh nê. Anê.

Hãmri nê ahpÿnhã kãm hkÿnh xà gô. Kãm ôr kwÿ gô nê kãm mēhkuxwa xà hkwÿ gô nê kãm te kot ràmre kuxware pyrãk pê mÿraja nhÿm mê kãm hkwÿ gô. Mê hkÿnh xà hã kàxpore xohtô nhÿm prem kãm ôr pa.

¹² Hãmri nê ra akupÿm Jerujarê kamã pahi Erox wÿr nojarê. Nhÿm kamàt nhÿm mê gôr nê hikwÿ hãmri nê ra amÿti. Nhÿm Tÿrtÿm mê hpimtir kãm mê kãm kapêr nê mê kãm:

—Pa? E mê inhma. Kêr ka mê akupÿm pahi Erox wÿr amrar nê kãm mê hkrata jarênh kêt nê. ãm kwarÿ ho kwarÿ. Nê kêr ka mê pry hõ hã mãn ma mê anhõ pika hwÿr akupÿm apa ho apa.

Anhÿr o mê kãm kapêr jakamã nhÿm apkati nhÿm mê kãnhmã hkrÿ hãmri nê Tÿrtÿm kot mê kãm hã karô xà hkôt ma akupÿm mê ô pika hwÿr pa kurê kumrêx nê akupÿm pahi Erox wÿr mrar kêt nê.

Juje mê hprô wa kot Erox pymaj ma Jejus o mör Apokarip 12.1-6, 12.13-18

¹³ Tã nhÿm kanhêti ho studa xwÿnhjaja ma akupÿm hapêx hãmri nhÿm Tÿrtÿm axte Marir mjên Juje hwÿr kapêr o mê wrÿk

xwÿnhjê hõ mẽ. Nhũm kê axte hpimtir kãm hwÿr wrÿ nê kãm kapêr nê kãm:

—Pa Juje. E kwa kànhmã nhÿ. Na ra pahi Eroxa aprõ pê hkrata ã amÿnê. Koja tokyx pôristi hkwyjaja mẽ anhõ krÿ hwÿr pôj nê war apê hpÿr kaxyw ri hapêr. Jakamã kwa wa tokyx akato nê ma pika pê Ejit wÿr amôr kurê kumrêx. Nê Ejit kamã apa rãhã pa nhÿrmã akupÿn amnê war amê. E kwa tokyx. Anê.

¹⁴ Hãmri nhũm kuma nê kànhmã nhÿ nê Marir mra nê war amnhÿ to akuprõ nê ra nojarêt. Hãmri nê krÿja pê Jesus o kato nê ma o môr kurê kumrêx. Wa môr ryy nê hãmri nê Ejit wÿr pôj nê kamã pa ho pa.

¹⁵⁻²⁰ Rôm nhũm pahi Eroxa tee ri amnhÿ wÿr kanhêti ho studa xwÿnhjê kamã hamak o pa nom nhũm mẽ akupÿm hwÿr mrar kêt nê. Jakamã nhũm mẽ kamã gryk nê hamaxpêr o:

—Tk. Kwa nã. Na mẽ ãm inhmã hêx nê akupÿn ixwÿr mrar nê nhÿri inhmã pahi nywta jarênh kêt nê. Nã kwâr mẽ mãmri ã inhÿpêx anê. Mẽ kot ixpê ho hpimxuure kaxyw ã. Nã kot paj mẽ kêp kupÿ nhũm mẽ rÿ amnhÿ pumu. Na xep prem kanhêti kot harênh xàja pumunh ã ra hã amgrà pyxi nê hkôt mytwrÿ kêp 6. Jakamã mãn mẽ hkrata ra hã amgrà axkrut kaxyw. Nã na pa ra ijamaxpêr. Kot paj Perêj kamã mẽ hkra myjaja ra mẽ hã amgrà axkrut xwÿnhjaja nê kormã mẽ hã amgrà axkrut kêt xwÿnh piitã mẽ himex pa. Jao ra mẽ kamã pahi nywta pÿ. Nã ixte hpÿr mã kênã. Koja hprêk nê ixpãnhã Ijaew o amnhÿptar kêt nê.

Anhÿr o hamaxpêr hãmri nê amnhÿ wÿr õ pôristi hkwyjê hã karõ nê mẽ kãm mẽ hkrajê hã amÿnê nê mẽ kãm:

—E kêr ka mẽ ma Perêj wÿr mra nê kamã mẽ kêp mẽ hkra myrejaja ra mẽ hã amgrà axkrut xwÿnhjê nhÿmex pa. Nê kormã mẽ hã amgrà axkrut kêt xwÿnhjaja mãânên mẽ himex par kumrêx. Nê Perêj pu hã ri krÿ hkryre hkôt mãânên ri ajapôj nê ã mẽ himex par anê. Anê.

Hãmri nhũm mẽ kuma nê ma mẽ hwÿr mrar kurê kumrêx. Hãmri nê Perêj wÿr pôj nê mẽ kêp mẽ hkra myre piitã mẽ himex pa. Jakamã nhũm mẽ katorxà nê mẽ hipêxàjaja tee ri mẽ hkra htyk xwÿnhjê

pumu nê hkaprÿ htÿx nê mÿr rÿnh nê. Nom na pre Tÿrtũm nhÿ hã kapêr jarênh o mẽ pa xwÿnh finat Jeremÿstija ra amnepê m ã mẽ kot amnhÿ nhÿpêx anhÿrja kukamã mẽ panhÿgêjtê mã mẽ harê nê hã kagà. Na pre mẽ kãm Ijaew kurê xwÿnhjê pynênh nê ma mẽ õ pika hwÿr mẽ ho hapêx par kaxyw. Hãmri nhũm mẽ panã Rrakewja te ra kot tee ri ja hã mẽ omunh nê tanhmã amnhÿ nhÿpêx to pyrãk nhũm Jeremÿstija tanhmã Ijaewjê jarênh to nê hã kagà. Nê hã kagà ho:

Amnepê m Perêj kamã na pre mẽ panã Rrakewja hpïjagri ho nôrja ã ra htyk kaxyw nê tee ri hkra kator mã xwÿnhhta kukamã hamaxpêr nê mÿr o nõ. Nhũm hkwyjaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra urãk nê tee ri mẽ hkrare ho hamak xàj mÿr o pa. Mẽ kot mẽ kêp utar nê mẽ himex par jakamã nhũm mẽ tee ri mẽ ho hamak xàj mÿr o pa. Anê.

Nhũm pre finat Jeremÿsja mẽ hkukamã ã mẽ harê nê mẽ hã kagà anê. Tã ra jarãhã mênÿ piitã Rrakew pyrã nê hkrajê o hamak xàj mÿr o pa.

*Wa kot akupÿm wa õ pika hwÿr Jesus o môr
Juãw 7.41-42*

Tã nhũm mytwrÿ grêre nê hapêx nhũm pahi Eroxa ty. Jakamã nhũm kamãt nhũm Jujaja gôr nê nõ. Nê kê õt kãm axte amÿti. Nhũm Tÿrtũm kapêr o mẽ wrÿk xwÿnhja axte hwÿr wrÿ nê kãm:

—Pa Juje? E na ra Marir pê hkra pÿr mã xwÿnhhta ty. Jakamã kwa wa mããmri ma akupÿm mõ. Ma akupÿm mẽ apê Ijaewjê nhõ pika hwÿr axãmnhÿx aprõ mẽ hkrata wa o mõ.

Anhÿr o kãm kapêr. Na pre ra amnepê m Tÿrtũm nhÿ hã kapêr o mẽ pa xwÿnhjê hõja ja kukamã mẽ panhÿgêjtê mã ja jarê nê hã kagà. Nê hã kagà kot: “Ixpê Tÿrtũm kot paj nhÿrmã Ejit rÿm ma akupÿm õ pika hwÿr ixkrata wa mẽ kumê.” Anhÿr o kot hkukamã harênh nê hã kagà.

²¹ Jakamã nhũm Tÿrtũm kapêr o mẽ wrÿk xwÿnhja ã Juje mã karõ anê hãmri nhũm

kuma nê ma akupÿm wa o mō. Ma akupÿm mē ò pika hwÿr wa o mō.

²² Tã ra akupÿm hpôx kaxyw htêp o mō. Hãmri nê pahi Erox kra Akêrawja ra hipêêxà mÿr pê kot Jutej kamã mē ho amnhĩptàr hã harênh ma. Hãmri nê tee ri mē amnhĩ kukamã hamaxpêr nê kãm mē hwÿr wa o mōr puma nê.

Tã nhũm kamàt nhũm Juje ra gōr nê nō nê kê axte amÿti. Nhũm kê axte Tĩrtũm kapêr o mē wrÿk xwÿnhja hwÿr wrÿ nê akupÿm ò pika hkwỳ pē Jutej wÿr mōr nē wa mē hkurê nē kãm:

—Pa Juje? E kêr ka Jutej wÿr wa mē amōr kêt nê. Pãnhã nhãm mē anhō pika hō hwÿr mãn mō nê kamã ri apa.

Anê nhũm kuma nê hpãnhã wa mē ma mē ò pika hkwỳ pē Garirej wÿr wa mē juk nê ma mō.

²³ Nê kamã pōj nê krĩ pē Najare hwÿr mō nê kamã amnhĩm òrkwÿ nhĩpêx nê kamã wa mē pa ho pa. Nhũm pre ra amnepêp Tĩrtũm nhÿ hã kapêr o mē pa xwÿnhjê hōja ra ã mē kot amnhĩ nhĩpêx anhÿrja kukamã mē panhĩgêjtjê mã mē harê nê hã kagà. Nê hã kagà kot:

Tĩrtũm kot mē pahwÿr mēnh mã xwÿnhhta koja kêp Najare nhō xwÿnh. Anê.

3

Juãw Paxis kot Tĩrtũm kapêr jarênh o pa Makre 1.1-6; Rukre 3.1-14; Juãw 1.19-23

¹ Nhũm pre Juãw Paxisja ã amnhĩ nhĩpêx anê. Nê pika pē Jutej kamã mē kãm Tĩrtũm kapêr jarênh o pa. No ãm krĩm pa hkêt nê. ãm mē hpu hã krĩ pē amÿm ri kapôt ã ri mē kãm Tĩrtũm kapêr jarênh o pa.

²⁻³ Tĩrtũm nhÿ hã kapêr o pa xwÿnh finat Ijais ra kot Juãw kukamã mē panhĩgêjtjê mã tanhmã harênh to nê hã kagà xá hkôt. Na pre hkukamã hã kagà ho:

Koja nhÿrmã mēhō mōn pōj. Kapôt ã mōn pōj nê mē kãm tanhmã mēmoj tã karō hto ho ri pa. Nê mē kãm: “Koja Tĩrtũm tokyx mē pahwÿr mē panhō Pahihtija mē nhũm wrÿ nhũm mē piitã omu. Jakamã kwa mē tokyx kutêp tãm amnhĩ nhĩpêx o ri apa. Te mē kot mēhō kutêp pry ho mexta pyrà nê amnhĩ nhĩ ho tãm amnhĩ

nhĩpêx nê tãm ajamaxpêr mex o ri apa. Kêr ka mē Pahihti kutêp ã amnhĩ nhĩpêx anhÿr o ri apa.” Anhÿr o koja mē kãm ujarênh o pa. Anê.

Na pre finat Ijaisja Juãw Paxis kukamã ã mē kãm harênh anê nê hã kagà. Tã nhũm hã kagà xàja kôt nhũm Juãw Paxisja mōn pōj. Hãmri nê Ijais kot hkukamã harênh xà hkôt kapôt ã ri mē kãm ujarênh o pa nhũm mē kãm mar prãm xwÿnhjaja ma hwÿr mra. Nhũm mē kãm kapêr nê mē kãm:

—E koja Tĩrtũm tokyx kot mē pakaxyw ãm xwÿnhja o amnhĩrīt. Jakamã kwa mē tokyx kutêp amã amnhĩ tomnuj kaga hprãm xàj tãm amnhĩ nhĩpêx o apa.

Anhÿr o Jesus kutêp mē kãm kapêr o pa.

⁴ Juãw Paxisja hikàxpore hkêt jakamã na pre ê mex kêt nê pa. ãm mēmo mry pē kamer kĩ ho amnhĩm ê nhĩpêx nê hagjê nê hã pa. Nê mēmo mry hkà ho amnhĩ pre nê ri pa. Nê mēo mex kur kêt nê ãm krit ku nê menh ôr o ri pa.

⁵ Jakamã nhũm kapôt ã ri mē kãm Tĩrtũm kapêr jarênh o pa nhũm mē kot mar kaxyw ma hwÿr mra. Pika pē Jutej kamã ri mē pa xwÿnhjaja. Nê Jutej kamã krĩ pē Jerujarê nhō xwÿnhjaja. Nê pyhti pē Jotãw mÿri mē pa xwÿnhjaja. Nhũm prem piitã harênh ma nê kot mar kaxyw ma hwÿr mra.

⁶ Hãmri nê kapêr ma nê Tĩrtũm noo mã mē kot amnhĩ tomnuj xwÿnh ã kãm amnhĩ jarê. Mē kot amnhĩ tomnuj kaga nê tam amnhĩ nhĩpêx o pa hprãm xàj ã kãm amnhĩ jarênh anê. Nhũm Tĩrtũm kaxkwa kamã hkrĩ htã mē kuma nê amnhĩ katut kôt mē kot amnhĩ tomnuj rēnh pa nê axte kãm hamaxpêr kêt nê. Jakamã nhũm pre Juãw Paxisja Tĩrtũm mã gōx kãm mē hkrã kumrãr pa. Pyhti pē Jotãw kamã mē hkrã kumrã.

⁷ Tã nhũm Parijew mē Satusew nhō xwÿnhjaja mãânēn mē hkôt ma Juãw Paxis wÿr mra. Mē uràk nê mē kêp Ijaew jakamã haxwÿja Juãw Paxis kot mē hkrã kumrãr kaxyw ma hwÿr mra. No ãm hkwỳjê hkĩnhã mē kot amnhĩ tomnuj kaga hprãm xàj kãm amnhĩ jarênh kêt nê. ãm amnhĩ krã hkôt hkwỳjê hkôt hwÿr mra nê amnhĩ to kuma. Nom nhũm Juãw Paxisja ra hprĩ hã ã mē

hamaxpêr anhÿrja kôt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nê? Nà koja já kãm mex kêt nê. Koja ja mÿrapê nhÿrmã tanhmã mẽ atomnuj tÿx to ka mẽ tee ri umaj apimxur prãm kaprÿ.

⁸ Na htem amnhĩ tomnuj kaga nê tãm amnhĩ nhĩpêx nê tam axpên nhĩpêx. Jakamã e kwa mẽ ã amnhĩ nhĩpêx o apa anê pa rĩ kormã mẽ akrã kumrã.

⁹ Na ka htem atÿx ri ajamaxpêr o: “Mẽ ixpê finat Apraãw kanrêhã htãmnhwÿ hkwy na pa mẽ. Jakamã koja Tĩrtũm ja hã mẽ ixpumu hãmri nê mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nê. Koja mẽ ixto mex nê.” Anhÿr o atÿx ri amnhĩ kukamã ajamaxpêr. Nom ja kot anhÿr kêt. Mẽ apê Apraãw kanrêhã htãmnhwÿ htã mẽ ate urak nê tãm amnhĩ nhĩpêxre hã. Kot kaj mẽ apê htãmnhwÿ htã amnhĩ tomnuj o ri apa hãmri nê Tĩrtũm noo mã te mẽ apê pikap kênre nhĩkwÿ pix pyrak.

¹⁰ Na ra Tĩrtũm mẽ ate amnhĩ tomnuj mÿrapê tanhmã mẽ ato kaxyw. Te ho mēhõ nhõ mẽmo hpâr ô hkêt nhũm kot tee ri omunh nê krãhyr nê kuwy kamã mēnh nê ho kaxàr par pyrak o koja mẽ anhĩpêx. Jao amnhĩ nê kuwy hwÿr mẽ arê ka mẽ kamã amnhĩ xà htÿx kamã ajamak rãhã ho ri apa. Anê.

Nhũm pre ã Juãw Paxisja Parijew mẽ Satusew nhõ xwÿnhjê mã kapêr anê.

¹¹ Hãmri nê hpãnhã axte mẽ kot mar kaxyw hwÿr mẽ mrrar xwÿnhjê mã kapêr nê mẽ kãm:

—E ra mẽ ate amnhĩ tomnuj kaga xwÿnhjaja. Na pa Tĩrtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tĩrtũm kot mẽ pakaxyw ãm mã xwÿnhhta tãm mẽ pahwÿr pôj. àhpumunh tÿx o kot ijakrenh par jakamã na pa hte ãm kukwak ri ixpa nê amnhĩ tã hã ixpijaam o ri ixpa. Koja mẽ awÿr Tĩrtũm Karõ rē nhũm mẽ akarõ mã agjê. Ka mẽ ÿ hã tam amnhĩ nhĩpêx o ri apa. Nom kormã mẽ kot tãm amnhĩ nhĩpêx kêt xwÿnhjaja koja Tĩrtũm kot mẽ pahwÿr mēnh xwÿnhja ja hã mẽ omu nê mẽ hipêx o

te kuwy kot mẽmoj to kaxàr par pyrak o mẽ hipêx.

¹² —Na htem pur kãm harôj nhĩkê nê ho grã nê hpãnhã kahtwÿ. Nê kahuk pa hãmri nê hkapĩ nhũm kôk apê nê pryhka ho htor pa. Nhũm mẽ hpãnhã hy ho pa nê ixkre kamã gôj kãm unhwÿ. Ja pyrã nê koja tokyx Tĩrtũmja mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhĩ nhĩpêx o mẽ pa xwÿnhjaja koja ma amnhĩ wÿr mẽ ho api nhũm mẽ kuri mex rãhã nê pa ho pa. No mẽ kot amnhĩ tomnuj rãhã ho mẽ pa xwÿnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wÿr pa nê kamã amnhĩ xà htÿx kamã hamak rãhã nê pa ho pa.

Anhÿr o mẽ kãm kapêr.

Juãw Paxis kot Jejus krã kumrãr

Makre 1.9-11; Rukre 3.21-22; Juãw 1.32-34

¹³ Tã nhũm Jejus pika pê Garirej rũm kato nê ma Juãw Paxis wÿr mō. Juãw kot pyhti pê Jotãw kamã hkrã kumrãr kaxyw ma hwÿr mō. Hãmri nê omu nê kãm:

—Pa. E ot pa awÿr amnhĩ to tē. Ate mẽ kuxwar ixkrã kumrãr kaxyw. Anê.

¹⁴ Hãmri nhũm tee ri kuma nê kãm:

—Kwa nà. Aa ate amnhĩ tomnure hã kot pa kêt ri akrã kumrã. Nà ka kot kaj ixkrã kumrã. Anê.

¹⁵ Hãmri nhũm kãm:

—Kwa nà. Mãmri ixkrã kumrã Juãw Paxis. Tĩrtũm kãm ja prãm kênã kot ka kêt ri axtem nê ixkaga. Kot puj mẽ Tĩrtũm kãm hprãm xà hkôt tanhmã amnhĩ nhĩpêx to ho ri papa. Anê.

Hãmri nhũm kuma nê kãm:

—Tôe. Nà kot paj akrã kumrã. Anê.

¹⁶ Hãmri nê pyhti hwÿr o wrÿ nê kamã hkrã kumrã. Hãmri nê wa akupÿm api nê gô mÿ ri ãm rãhã nhũm kaxkwa axkjê. Hãmri nhũm kurũm Tĩrtũm Karõja Jejus wÿr te tuuti pyrã nê ahpar mã hwÿr wrÿk o tē nê ïkre hã xa. Nhũm Jejus arĩ amnhĩ wÿr wrÿk o htēm kãm omunh o xa.

¹⁷ Hãmri nhũm Tĩrtũm kaxkwa rũm kãm kapêr nê kãm:

Pa? E apê ixkra mex na ka. ãm hãmri na ka hte ixkanrêhã ã amnhĩ nhĩpêx mex

anê. Inhmã ajapê kamã na ka ri apa ho apa. Anê.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mãänên Eprêw 2.18, 4.15

¹ Tã nhũm Jejus Tirtũm Karõ nhỹ hã ma kapõt ã ri pa. Satanasti kot amnhĩ tã kamã hamak kaxyw nhũm ma kapõt ã ri pa.

² Ri pa hã apkati xohtõ nê. Ra hã arĩgro pê 40. Nê kormã apkur kêt jakamã ra kãm prãm tỳx kumrêx nê ri pa.

³ Hãmri nhũm Satanastija nhỹhỹnh hwỳr tẽ nê hêx rom kãm kapêr nê kãm:

—Pa. E kwa mãn ka ra amã prãm tỳx nê nà? Nom xep apê Tirtũm Kra jakamã apê mẽmoj hihtỳx kêt. Tirtũm pyrã nê axàhpumunh o axàhpumunh kênã. Jakamã kwa kên nhĩkwỹ mũj mã anê kê amã pãwti hã amnhĩ jahkre ka aku nê tokyx ho amnhĩ xihtỳx. E kwa tokyx kãm akapêr. Anê.

⁴ Hãmri nhũm kuma nê kãm:

—Tk. Nà kot paj amar xà hkõt ã ri amnhĩ nhĩpêx anhỹr kêt nê. Koja Tirtũm kãm inhmã mẽmoj nhõr prãm nê inhmã mẽmoj gõ pa rĩ kormã kukrê. Kapêr ã kagã htũm kot ja jarênh kot:

Na htem mẽ apkur xà pix kukwak ri htĩr nê pa hkêt nê. Na htem mãänên Tirtũm kapêr ma nê hkõt amnhĩ nhĩpêx nê htĩr nê pa. Anê.

—Ã kapêr ã kagã kamã kot harênh kot anhỹr jakamã kot paj akapêr kõt ri ã amnhĩ nhĩpêx anhỹr kêt nê. ãm kwarĩ ho kwarĩ. Anê.

⁵ Hãmri nhũm Satanastija tee ri kuma hãmri nê hpãnhã ma Jerujarê hwỳr o mõ. Nê Tirtũm mã amnhĩ jarênh xà hã ixkre hprêk nhĩmõk wỳr ho api nê kỳxpê hatur xà hã ãm nhũm xa. Hãmri nê amnhĩ parpê kên rũnh nhĩkwỹ xwỳnhja pumunh o xa nhũm Satanasti kãm:

⁶ —E apê Tirtũm Kra jakamã kwa ja rũm ahpar mã ajarĩ nê ma tẽ nê pikap tẽm. Koja Anhĩpêxàja apumunh mex nê ka tanhmã amnhĩ to hkêt nê. Kapêr ã kagã htũm kot harênh kot:

Tirtũm koja kapêr o wrỳk xwỳnh kwỳjê mã ajarê ka ajarĩ nê ahpar mã tẽ nhũm

mê kỳx pê amỳ nhũm mẽmoj akã hyr kêt nê. Anê.

—Ã kapêr ã kagã htũm kot ajarênh anhỹr jakamã e tokyx ajarĩ. Anê.

⁷ Hãmri nhũm Jejus kuma nê kãm:

—Tk kot paj ri ate inhmã karõ xàja kõt ã amnhĩ nhĩpêx anhỹr kêt nê. Koja Tirtũm tãm inhmã ijarĩ hã karõ pa rĩ mar xà hkõt ijarĩ. No kot pa ri amar xà hkõt ijarĩ hkêt nê. Tirtũm kapêr ã kagã htũm kot ja jarênh kot:

Kêr ka mẽ amnhĩ krã hkõt amnhĩ tã ixkamã ajamak kaxyw inhĩxi jarênh kõt tanhmã amnhĩ nhĩpêx to hkêt nê. Anê.

—Ã kot ja nê kapêr kot anhỹr jakamã kwarĩ ho kwarĩ. Kot paj ri amar xà hkõt ijarĩ hkêt kumrêx. Tirtũm tãm kot inhmã ã ixte amnhĩ nhĩpêx anhỹr ã karõre hã. Anê.

⁸ Hãmri nhũm Satanasti tee ri kuma nê hpãnhã ma nhỹri kên prêeti hwỳr o tẽ nê himõk ã axte o xa. Hãmri nê kãm pika piitã ahkre hpa. Nê mẽ hikukrêx piitã nhũm kãm ahkre ho xa. Kàxpore nê mẽmoj mex piitã nhũm kãm ahkre nhũm Jejus piitã omunh o xa.

⁹ Hãmri nhũm kê Satanasti axte kãm:

—E mãn ka kam ri mẽmoj mex mũj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarê pa ama nê amã piitã õr pa. Ka kam mẽmoj piitã ho anhõ nê ho amnhĩptãr o apa. Jakamã e kwa tokyx. Anê.

¹⁰ Hãmri nhũm kuma nê axte kãm kapêr nê kãm:

—Tk kwa ma nhỹhỹm tẽ Satanasti. Kot paj ri amã amex o amex ã ajarênh kêt kumrêx. Tirtũm kapêr ã kagã htũm kot ja nê kapêr kãm hihtỳx kênã. Kapêr kot:

Kêr ka mẽ ixkapêr pix ma nê ixkutã pix mã akõnkrã ho akrĩ nê inhmã inhmex o inhmex ã ijarê. Kêr ka mẽ ã amnhĩ nhĩpêx anhỹr o ri apa.

—Anhỹr o kot hã karõ jakamã kot paj amã amex o amex ã ajarênh kêt kumrêx. Anê.

¹¹ Hãmri nhũm tee ri amnhĩ tã kuma hãmri nê ma tẽ. Tee ri kãm kapêr kaprỹja ã amnhĩ pumu hãmri nê hkaga nê ma tẽ. Hãmri nhũm Tirtũm kapêr o mẽ wrỳk xwỳnhjaja Jejus wỳr wrỳ nê tanhmã ho mex to nê kãm õ nhũm kukrê nê akupỹm hihtỳx.

*Jejus kot Garirej kamã kapêr o pa
Makre 1.14-15; Rukre 4.14-15*

¹² Tã nhũm Juãw Paxisja mëmoj tã pahi Erox mã akir nhũm amnhĩ tã kuma nê gryk xàj haxà nhũm hkrĩ ho hkrĩ. Hãmri nhũm Jejusja harênh ma nê ma akupÿm Garirej kamã krĩ pê Najare hwÿr ma akupÿm tẽ.

¹³ Hãmri nê ra pøj nom kamã ri pa hkêt nê. Nê hpãnhã kurũm kato nê ma krĩ pê Kapanaũ hwÿr tẽ. Gô rax pê Garirej mÿri na pre. Pika hkwÿ pê Jepurõ mẽ Natari wa mẽ kamã na pre nhũm Jejus ma hwÿr tẽ. Hãmri nê kamã pa.

¹⁴ Nhũm ra amnepêm Tĩrtũm nhÿ hã kapêr jarênh o mẽ pa xwÿnh finat Ijaisja Jejus kukamã ra mẽ panhĩgêjtjê mã ã kot amnhĩ nhĩpêx anhÿr ã harê nê hã kagà. Jejus kot ã mẽ hwÿr mör anhÿrja kukamã nhũm pre harê nê hã kagà.

¹⁵ Pika hkwÿ kamã mẽ pa xwÿnhjaja nhũm pre mẽ hkukamã mẽ harênh mex nê. Nê pika pê Garirej kamã mẽ pa xwÿnhjaja nhũm pre mãänên mẽ hkukamã mẽ harê. Nê pyhti pê Jotãw mẽ gô xujanãr wa hkaêx kãm pika piitã kamã mẽ pa xwÿnhjaja. Nê krĩ pê Garirej kamã mẽ kêp Ijaew kêt xwÿnhjaja nhũm pre mãänên mẽ harê. ã na pre finat Ijaisja mẽ hkukamã Tĩrtũm nhÿ hã mẽ piitã mẽ harê nê hã kagà anê. Jejus kot ma mẽ hwÿr mörja kukamã nhũm ra hprĩ hã harê nê hã kagà. Nê hã kagàja o:

¹⁶ E. Kot paj mẽ amã mëmoj mex jarê ka mẽ inhma. Mẽ ate Tĩrtũm pumunh kêt jakamã te mẽ ate kamãt kô kamã ri apa pyrãk. Tã koja Tĩrtũm mẽ amã amnhĩ to amnhĩrit ka mẽ hpãnhã te mẽ ate hirã kamã ri apa pyrãk o amnhĩ nhĩpêx nê ra hkôt amnhĩ xunhwÿ.

Anhÿr o mẽ hkukamã mẽ harê nê hã kagà.

¹⁷ Tã nhũm ra kot hkukamã mẽ kãm ujarênh xà hkôt nhũm Jejusja mẽ hwÿr mō nê mẽ kãm Tĩrtũm kapêr jarênh o ri mẽ hkôt pa. Nê mẽ kãm tanhmã amnhĩ jarênh to ho pa. Nom kormã hprĩ hã mẽ kãm amnhĩ jarênh kêt nê. Te ho nhãm mëhō jarênh pyrãk o mẽ kãm amnhĩ jarê nê mẽ kãm:

—E na ra Tĩrtũmja kot mẽ akaxyw ãm xwÿnhta mẽ nhũm mẽ awÿr wrÿ. Jakamã kwa mẽ tokyx tee ri ate amnhĩ tomnuj ã

amnhĩ pumu nê ã ate amnhĩ nhĩpêx anhÿr kaga nê hpãnhã Tĩrtũm kôt mãn amnhĩ nhĩpêx o ri apa.

Anhÿr o mẽ kãm kapêr o pa pê mẽ ahkre ho ri mẽ hkôt pa.

*Jejus kot amnhĩ wÿr tep pynênh xwÿnhjê
hwÿr*

Makre 1.16-20; Rukre 5.1-11

¹⁸ Tã nhũm Jejus ma gô rax pê Garirej mÿ ri pa nê gôx kãm ja wa omu. Simãw Pêtre mẽ htō Andreja nhũm wa gôx kãm kryhti rênh o wa xa. Hãmri nhũm Jejus wa hwÿr tẽ nê wa omu nê amnhĩ kôt wa kuwÿ nê wa kãm:

¹⁹ —Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarênh o ri apa. Mẽ kot war amar nê ra ixkôt amnhĩ xunhwÿr kaxyw. Anê.

²⁰ Hãmri nhũm wa kuma nê kryhti re nê wa ma hkôt htêm kurê kumrêx.

²¹ Hãmri nhũm mẽ ma nhãm axte mō nê ra jajê hwÿr kato. Jepetew mẽ hkra Xiakre mẽ Juãwja nhũm wa mẽ hwÿr kato. Nhũm mẽ õ pãr kãm kryhti ho mex o wa mẽ nhÿ. Hãmri nhũm mẽ hwÿr mra nhũm Jejus amnhĩ kôt ja wa kuwÿ nê wa kãm:

—Pa Xiakre mẽ Juãw. E wa ma ixkôt mãn wa apa. Anê.

²² Hãmri nhũm wa kuma nê hipêêxã mã amnhĩ jarê nê ma hkôt pa ho pa kurê kumrêx.

*Jejus kot tanhmã amnhĩ nhĩpêx to
Rukre 6.17-19*

²³ Tã nhũm Jejus Garirej kamã Ijaew mã Tĩrtũm kapêr jarênh o pa. Na pre hte Tĩrtũm kapêr o mẽ ahkre xà hã ixkre hwÿr agjê nê kamã mẽ kãm Tĩrtũm kapêr jarênh o hkrĩ nê mẽ kãm:

—E mẽ tee ri ate amnhĩ tomnuj ã amnhĩ pumu nê hpãnhã Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anê nhũm ja hã mẽ apumu nê mẽ ato hkra kurê kumrêx. Anê.

Hãmri nê akupÿm mẽ kãm mẽ à xwÿnhjê ho mex. Ahpÿnhã tanhmã mẽ à kute xwÿnhjaja nhũm akupÿm mẽ ho mex o pa.

²⁴ Jakamã nhũm mẽ piitã pikaja kamã ri axpên mã harênh o hprôt. Nê pika pê Sir kôt mãänên ma ri axpên mã harênh o hprôt. Nhũm mẽ piitã harênh ma nê ma hwÿr mẽ à xwÿnhjê ho mra. Ahpÿnhã ri tanhmã mẽ

à kute xwýnhjaja. Mě à htỳx xwýnhjaja. Ně mẽ ĩ kamã mẽ htyk xwýnhjaja. Ně mẽ hkrã pipãnh xwýnhjaja. Ně mẽkarõmnuti kot Satanasti nhỹ hã tanhmã ri mẽ ho xwýnhjaja. Nhũm prem mẽ hamỳ mẽ ma Jejus wỳr mẽ o mra nhũm mẽ omu mẽ akupỳm mẽ ho mex pa.

²⁵ Jakamã nhũm mẽ ohtô mẽ ma hkôt pa. Krĩ pê Garirej rũm mẽ Tekap rũm mẽ Jerujarẽ rũm mẽ pika pê Jutej rũm. Ně pyhti pê Jotãw nhĩkjẽ rũm mẽ pa xwýnhjaja. Nhũm mẽ ã ohtô mẽ ma Jejus kôt omunh o pa anẽ.

5

Jejus kot tanhmã mẽ ahkre hto

Rukre 6.20-23

¹ Nhũm Jejus amnhĩ kôt ri mẽ kot omunh o mẽ pa xwýnhjẽ pumu hãmri mẽ mẽ ahkre kaxyw ma tẽ mẽ hixêt ã api mẽ himõk ã nhỹ. Hãmri nhũm mẽ ma hkôt mra mẽ pu hã hkrĩ pa.

² Hãmri nhũm mẽ ahkre mẽ mẽ kãm:

³ E mẽ inhma. Kot kaj mẽ atõ amnhĩ kaxyw tanhmã Tĩrtũm mẽ wa inhmã ajamaxpẽr to mẽ ajamaxpẽr o: “Koja Tĩrtũm inhihko hã pa hkêt pa ixtỳx ri tanhmã amnhĩ tomnuj to ho ri ixpa rãhã ho ri ixpa.” Anhỹr o ajamaxpẽr. Hãmri nhũm Tĩrtũm ã ajamaxpẽr anhỹr ã apumu nhũm ja kãm mex mẽ. Hãmri nhũm apê hkra hã ato mex mẽ atãnopxar o akôt pa ho pa ka ajamakêtkati mẽ axãmnhĩx akĩnh mẽ ri apa.

⁴ Nẽ kot ka mẽ atõ tanhmã amnhĩ tomnuj to. Hãmri mẽ tee ri ja hã amnhĩ pumu mẽ apijaãm mẽ akaprĩ mẽ. Nẽ akaprĩ xàj amỳr o nhỹ. Amỳr rax mẽ. Hãmri nhũm Tĩrtũm ja hã apumu nhũm ja kãm mex mẽ. Jakamã nhũm anẽ akaprĩ hta mẽ ato mex mẽ ka ajamakêtkati mẽ axãmnhĩx akĩnh mẽ ri apa.

⁵ Nẽ kot ka mẽ atõ agryk tokyx anhỹr kêt mẽ. Nẽ kritpẽm amnhĩ tã amã mẽ hkaprĩ ho ri apa. Hãmri nhũm Tĩrtũm ja hã apumu nhũm ja kãm mex mẽ. Hãmri nhũm ato mex mẽ ka ajamakêtkati mẽ axãmnhĩx akĩnh mẽ ri apa.

⁶ Nẽ kot ka mẽ atõ amã Tĩrtũm kãm hprãm xà hkôt amnhĩ nhĩpêx o ri apa hprãm

nẽ. Nhũm amnhĩ tã apumu nhũm ja kãm mex mẽ. Hãmri nhũm ato mex mẽ tanhmã akrã hto ka hkôt pix mã amnhĩ nhĩpêx o ri apa. Jao ajamakêtkati mẽ axãmnhĩx akĩnh mẽ ri apa.

⁷ Nẽ mẽ kamã mẽ axukaprĩ ho ri apa xwýnhjaja na hte Tĩrtũm ja hã mẽ apumu nhũm ja kãm mex mẽ. Jakamã na hte mẽ hã mẽ apyrã mẽ mẽ akamã ukaprĩ ho pa. Jao mẽ ato mex mẽ ka mẽ ajamakêtkati mẽ axãmnhĩx akĩnh mẽ ri apa.

⁸ Nẽ kot ka mẽ atõ ã ajamaxpẽr anẽ mẽ ajamaxpẽr o: “Nà kot paj ãm Tĩrtũm kapẽr kôt pix mã ri amnhĩ nhĩpêx o ri ixpa. ãm ja pix na inhmã hprãm.” Anhỹr o ajamaxpẽr. Hãmri nhũm Tĩrtũm amnhĩ tã mẽ apumu mẽ mẽ ato mex mẽ. Ka mẽ ajamakêtkati mẽ axãmnhĩx akĩnh mẽ ri apa. Nẽ nhỹrmã Tĩrtũm wỳr api mẽ kuri amex rãhã apa ho apa.

⁹ Nẽ kot ka mẽ atõ mẽhõ wa kot axpẽn kutã amnhĩ xãm xwýnhta axpẽn tã wa omu mẽ wa kot tanhmã axpẽn nhĩpêx tota nẽ tanhmã wa kãm akapẽr to mẽ akupỳm tãm wa ãm. Hãmri nhũm Tĩrtũm ja hã apumu nhũm ja kãm mex mẽ. Nẽ apê hkra hã ajarẽ ka ajamakêtkati mẽ axãmnhĩx akĩnh mẽ ri apa.

¹⁰ Nẽ koja mẽhõ mẽ ate Tĩrtũm kapẽr marxà hkôt amnhĩ nhĩpêx o apa hã mẽ apumu mẽ hã tanhmã mẽ anhĩpêx kati hto. Tã nom koja Tĩrtũm arĩ mẽ ato mex mẽ. Mẽ apê hkra jakamã mẽ kot tanhmã mẽ anhĩpêx hto htã ka mẽ ajamakêtkati mẽ axãmnhĩx akĩnh mẽ ri apa.

¹¹⁻¹² —Kwãr mẽ mãmri ixtã mẽ ato kapẽr rỳ mẽ ato hêx rỳ tanhmã ri mẽ atomnuj to. Kwãr mẽ mãmri ã mẽ anhĩpêx anẽ. Nom kêr ka mẽ arĩ amnhĩ kaxyw inhmã ajamaxpẽr tỳx rãhã pê ajamakêtkati mẽ axãmnhĩx akĩnh mẽ ri apa. Kwãr mẽ mãmri ixtã ã mẽ anhĩpêx anẽ mẽ amex kêt ã mẽ ajarẽ. Amnepẽm na prem ã Tĩrtũm nhỹ hã kapẽr jarẽnh xwýnhjẽ nhĩpêx anẽ. Jakamã koja mẽ urak mẽ ã mẽ anhĩpêx anẽ. Hãmri nhũm Tĩrtũm ja hã mẽ apumu mẽ

amnhĩm mẽ amex ã mẽ ajarẽ. Hãmri nẽ nhỹrmã kaxkwa kamã wa inhõ krĩ kamã mẽ ato mex nẽ. Jakamã kêr ka mẽ ã amnhĩ kukamã ajamaxpêr anhỹr pê mãmri akĩnh nẽ ajamakêtkati nẽ axãmnhĩx ri apa. Kwãr mẽ mãmri ã wa ixtã mẽ anhĩpêx anẽ. Anẽ.

Jejus krajaja te kot kaxwa mẽ kanê hpôk wa urak

Makre 9.49-50; Rukre 13.34-35

¹³ Nhũm Jejus arĩ mẽ kãm kapêr nẽ mẽ kãm:

—Nẽ mẽ ate ixkôt amnhĩ xunhwyr xwýnhjaja te mẽ ate kaxwa pyrãk. Kaxwaja mẽ apkur xã ho ành mã mex. No koja mẽhõ tẽn kamã pika hkwy mẽ nẽ ho ahkã. Hãmri tanhmã kot wem ho nẽ akupỹm ho mex? Nã koja akupỹm mex kêt nẽ. ãm mẽ kot hkapĩr pix kaxyw koja mex. Ja pyrã nẽ kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarẽnh tã gaa nẽ rĩ amã ixkôt amnhĩ nhĩpêx prãm kêt nẽ. Hãmri nẽ ra te apê kaxwa mẽ pika pihkãrta pyrãk. Kwa mẽ ixujarẽnh ma nẽ kãm ajamaxpêr tỹx rãhã ho ri apa.

¹⁴⁻¹⁶ —Nẽ te mẽ ate kanê hpôk pyrãk. Nẽ te mẽ ate hixêt prêk nhĩmõk ã krĩ xãm pyrãk. Koja krĩja hixêt prêeti nhĩmõk ã xa nhũm mẽ piitã omu. Nẽ kanêja. Xã na htem kanê hpôk nẽ poti ho hpro? Nã na htem hpôk nẽ kỹx pê mẽmoj nhĩmõk ã unhwyr nhũm mẽ piitã mẽ kãm hirã nhũm mẽ hirã kamã mẽmoj pumunh mex nẽ. Ja pyrã nẽ kot kaj mẽ tãm amnhĩ nhĩpêx o ri apa nhũm mẽ piitã ja hã mẽ apumunh kôt ra kaxkwa kamã Tĩrtũm mex ã harẽnh o pa. Anẽ.

Jejus kot tanhmã Mojes kapêr jarẽnh to Rukre 16.16-17

¹⁷ Nhũm Jejus arĩ mẽ kãm kapêr nẽ mẽ kãm:

—Nẽ amnepêm Mojes kot Tĩrtũm nhỹ hã Ijaewjê mã tanhmã mẽ kot amnhĩ nhĩpêx to hã mẽ kãm karõja. Nẽ amnepêm Tĩrtũm nhỹ hã kapêr jarẽnh o mẽ pa xwýnhjê kapêrja. Ixte mẽ kapêr o ijapêx kaxyw na pa pre mẽ awyr ixwryk kêt nẽ. Jakamã kwa mẽ ri ã axpên mã ijarẽnh anhỹr kêt nẽ. Kêt ixprĩ hã ixte mẽ amã mẽ kapêr jarẽnh nhũm mẽ ate mar mex kaxyw na pa pre kaxkwa rũm mẽ awyr wrỹ.

¹⁸ —Tĩrtũm kapêr ã kagã htũm kot mẽmoj jarẽnhja. Koja ujarẽnh xã hkôt mẽmoj tanhmã amnhĩ to hpar mẽ nhũm rĩ kormã kaxkwa mẽ pika wa hapêx pa nhũm kapêr ã kagãja mããnên hapêx. Nom nhũm Tĩrtũm kapêr koja mẽmojja pyrã nẽ aa hapêx kêt nẽ. Koja rãhã ho rãhã nẽ aa ihkjê ho tanhmã mẽn to hkêt nẽ. ãm hãmri na pa ã mẽ amã harẽnh anẽ.

¹⁹ —Nẽ kot ka mẽ atõ Tĩrtũm kapêr o pixire nẽ hirõp xa. Hãmri nẽ ra amnhĩ pyrã nẽ anhõ mã ja hã amýnê. Apyrã nẽ kot hirõp ãm kaxyw ka kãm hã amýnê. Kot kaj ã amnhĩ nhĩpêx anẽ hãmri nẽ apê Tĩrtũm kra hkêt ã amnhĩ to amnhĩrit. Nom kot ka kêt mẽ tãm amnhĩ nhĩpêx o ri apa. Nẽ amnhĩ pyrã nẽ tãm mẽ kot amnhĩ nhĩpêx kaxyw mẽ kãm akapêr o ri apa hãmri nhũm Tĩrtũm ja hã apumu nẽ ato hkra nẽ ato mex nẽ.

²⁰ —No Parijew nhõ xwýnhjaja nẽ Tĩrtũm kapêr tũm o mẽ ahkre ho mẽ pa xwýnhjaja. Mẽ kot Tĩrtũm kapêr kôt amnhĩ nhĩpêx mex ã amnhĩ jarẽnh tã no ãm hkôt ã amnhĩ nhĩpêx anhỹr kêt nẽ. Jakamã kot kaj mẽ hkôt amnhĩ nhĩpêx o ri apa hãmri nẽ mẽ urak nẽ nhỹrmã Tĩrtũm mẽ wa inhõ krĩ kamã apa hkêt nẽ. Anẽ.

Mẽ gryk o mẽ pa xwýnhjê jarẽnh

Rukre 12.58-59; mããnên Rõmãn 12.19; Epes 4.26; Wam Ximotre 2.8; Xiakre 1.19-20

²¹ Nhũm Jejus arĩ mẽ kãm kapêr nẽ mẽ kãm:

—Nẽ amnepêm na prem mẽ panhĩgêjtê mã Tĩrtũm kapêr kwý jarẽnh o pa nẽ mẽ kãm:

Kêr ka mẽ axpên par kêt nẽ. Kot kaj mẽ mẽhõx pĩ nhũm mẽ ja mýrapê atom-nuj nẽ. Nẽ ma mẽ anhõ pahihiti hwyr ato tẽ nhũm mýrapê tanhmã ato rý hkôt apĩ. Anẽ.

ãm hãmri na prem mẽ kãm ja jarẽ.

²² Tã kot paj ixprĩ hã mẽ amã tanhmã harẽnh to ka mẽ inhma. Kot kaj mẽ mẽmoj tã anhõ kamã agryk. Hãmri nhũm Tĩrtũm tee ri ja hã apumu nhũm ja kãm mex kêt nẽ. Jakamã koja mẽ anhõ pahihiti tanhmã ja hã mẽ ato japêr hã koja ja mex nẽ. Rý kot kaj mẽ tanhmã mẽhõ japry hto. Ho hagrõ rý ho rop. Mýrapê kop apu akwý kot apynênh nẽ anhõ pahihiti hwyr ato htêm nẽ ãhkram

ajaxàr ronhÿx ja inhmã mex nê. Rÿ kot kaj mẽ tanhmã anhÿõ mã akapêr punuj to nê kãm: “Tk. Ate ho warêhti hã. Te apê hagrô pyrãk kênã.” Anhÿr o kãm akapêr. Tã kop apu Tÿrtũm ra ã akapêr anhÿrja mÿrapê mẽ kot amnhÿ xà htÿx kamã hamak tũm xàta wÿr amênh ronhÿx ja inhmã mex nê. Ja pumaj kwa kêr ka mẽ ã axpên mã akapêr anhÿr kêt nê. Kêt mẽ axpên mã tãm akapêr pix o ri axpên kôt apa.

²³ —Nê kêr ka mẽ tanhmã ate anhÿõ nhÿpêx hto kamã Tÿrtũm mã mex o mex ã harênh kêt nê. Kêr ka mẽ kãm amnhÿ jarênh o akrÿ hãmri nê ra mêhõ kot mẽmoj tã akamã gryk xwÿnh mã ajamaxpêr japêr.

²⁴ Hãmri nê akato nê ma hwÿr atêm kurê kumrêx nê wa tãm axpên mã akapêr nê tãm akupÿm axpên xãm. Hãmri nê rÿ kormã ma akupÿm tẽ nê Tÿrtũm mã amnhÿ jarênh jatur xãm amê nê kãm mex o mex ã harê. Kêr ka mẽ ã amnhÿ nhÿpêx anhÿr o ri apa.

²⁵⁻²⁶ —Na htem tanhmã axpên nhÿpêx to hãmri nê kot tanhmã war axpên to xwÿnhjê hõja ma õ pahi hwÿr tẽ nê kãm tanhmã kot ho xwÿnhta jarênh kaxyw nojarê. Hãmri nhũm ra kamã gryk xwÿnhta kot pahi mã harênh kaxyw nojarê ã harênh ma nê tee ri amnhÿ kukamã hamaxpêr nê ma hwÿr tẽ nê wa akupÿm tãm axpên xãm. Na htem ã amnhÿ nhÿpêx anê. Pahi kot wa harênh mar nê tanhmã axpên tã wa ho pymaj na htem ã amnhÿ nhÿpêx anê nê tokyx tãm akupÿm axpên xunhwÿ. No koja mẽ anhÿr kêt nhũm pahija wa harênh ma nê wa kot tanhmã axpên to xwÿnhta õ jaxà nhũm tee ri kãm kator prãm. Hãmri nê tanhmã amnhÿ to nê ra amnhÿ pãnhã kãm amnhÿrer pa nhũm pahitija rÿ kormã pòristi mã anê nhũm kãm ure nhũm kato. Ja pyrã nê kêr ka mẽ Tÿrtũm tanhmã kot mẽ anhÿpêx to pymaj tokyx mẽ ate amnhÿ tomnuj kaga nê hkôt amnhÿ nhÿpêx rãhã ho ri apa. Anê.

Tanhmã mẽ pahte mẽ pahprõjê nhÿpêx to Matêwre 19.3-9; Makre 9.43-47, 10.2-9; mãânên Rukre 16.18

²⁷ Nhũm Jesus arÿ mẽ kãm kapêr nê mẽ kãm:

—Nê na pre finat Mojesja mẽ panhÿgêjtê mã Tÿrtũm kapêr tũm kwÿ jarê nê mẽ kãm: “Kêr ka mẽ amnhÿ prõ pix tânopxar o ri apa. No mẽ kuhpa hã nhãm mêhõ ho amnhÿkati

ho ri apa hkêt nê.” Anê. ãm hãmri na pre mẽ kãm ja hã karõ.

²⁸ Tã kot paj ixprÿ hã mẽ amã tanhmã harênh to ka mẽ inhma. Kot kaj mẽ nhãm mêhõ pumu nê amã ho amnhÿkati hprãm mã ajamaxpêr. Jao te ra ate ho amnhÿkati pyrãk o amnhÿ nhÿpêx. Kormã ate ho amnhÿkati hkêt tã ra hkukamã ajamaxpêr jakamã te ra ate ho amnhÿkati pyrãk o amnhÿ nhÿpêx.

²⁹ ã mẽ hamaxpêr punuj anhÿr xwÿnhjaja koja mẽ nhÿrmã ma mẽ kot amnhÿ xà htÿx kamã hamak tũm xàta wÿr ma mra nê kamã pa rãhã ho pa. Jakamã kêr ka mẽ nhãm mêhõ pumu nê amã hkÿnh japêr hãmri nê te ate ano kaxàr nê mênh nê axte ate omunh kêt pyrãk o amnhÿ nhÿpêx. Jao hkàx ã rÿt nê ma nhÿhÿm atêm kurê kumrêx.

³⁰ —Nê kot kaj mẽ anhÿhkra ho tanhmã amnhÿ tomnuj to kaxyw. Hãmri nê tee ri ja hã amnhÿ pumu nê te ate amnhÿ nhÿhkra krãhyr nê mênh pyrãk o amnhÿ nhÿpêx nê tanhmã amnhÿ tomnuj to hkêt nê. Mẽ ÿhkra ho mẽ kot tanhmã amnhÿ tomnuj to ho mẽ pa xwÿnhjaja koja mẽ nhÿrmã ma mẽ kot amnhÿ xà htÿx kamã hamak tũm xàta wÿr ma mra nê kamã pa rãhã ho pa. Anê.

Mẽ pahte axpên kaga hkêt

³¹ Nhũm Jesus arÿ mẽ kãm kapêr nê mẽ kãm:

—Nê na pre finat Mojes mẽ panhÿgêjtê mã Tÿrtũm kapêr tũm kwÿ jarê nê mẽ kãm: “Kot kaj mẽ atõ aprõ kaga kaxyw hãmri nê ate hkaga hã amnhÿ jarênh ã kagà nhÿpêx nê kãm agõ nê rÿ kormã hkaga.” Anê. ãm hãmri na pre ã mẽ kãm Tÿrtũm kapêr tũm jarênh anê.

³² Tã kot paj ixprÿ hã mẽ amã tanhmã harênh to ka mẽ inhma. Kêr ka mẽ atÿx ri amã hprãm xà hkôt aprõ kaga hkêt nê. Nom koja aprõ akuhpa hã nhãm mêhõ ho amnhÿkati ka harênh ma hãmri nê amã ja hã hkaga hprãm nê mãmrÿ kam nê hkaga. Ja tanhmã kute hkêt. Nom koja ã amnhÿ nhÿpêx anhÿr kêt tã ka amnhÿ krã hkôt hkaga. Hãmri nhũm mêhõ apãnhã ho hprõ nê o pa. Hãmri nê ra kot apê aprõ ho amnhÿkati ho pa pyrãk o hipêx. Nê nija haxwÿja. Te

arĩ kêp aprõ htã akuhpa hã nhãm myja o amnhĩkati o pa pyrãk o amnhĩ nhĩpêx. Anê.

Tãm mẽ pakapêr ã Jejus kot mẽ pamã karõ

Xiakre 5.12

³³ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêt nê pahpãmjê mã Tĩrtũm kapêr tũm jarênh o: “Kêr ka mẽ Tĩrtũm mã mẽmoj to anhỹr ã amnhĩ jarê hãmri nê amnhĩ jarênh xà hkõt kãm tanhmã amnhĩ nhĩpêx to. Nom kêr ka mẽ atỳx ri kãm tanhmã amnhĩ jarênh to ho amnhĩ to axêx kêt nê. ãm akatãt kõt mẽ ate amnhĩ jarênh to xà hkõt kãm tanhmã mẽmoj to.” Anê. ãm hãmri na pre mẽ kãm ja jarê.

³⁴ Tã kot paj ixprĩ hã mẽ amã tanhmã harênh to ka mẽ inhma. Kêr ka mẽhõ mã tanhmã amnhĩ jarênh to. Tĩrtũm mã pix mã amnhĩ jarênh kêt nhãm mẽhõ mã mããnên tanhmã amnhĩ jarênh to. Nê akatãt kõt kãm amnhĩ jarê. Na ka htem mẽ kot mẽ axêx kêt kõt mẽ apumunh kaxyw mẽmoj nhĩxi jarênh kõt amnhĩ jarê. Nom kêr ka mẽ axte ã mẽmo nhĩxi hã amnhĩ jarênh anhỹr kêt nê. Mẽmoj tã amnhĩ jarê nê akatãt kõt amnhĩ jarênh kurê kumrêx. No mẽ kot axêx kêt kõt apumunh kaxyw mẽmoj nhĩxi hkõt amnhĩ jarênh kêt nê. Tanhmãnh kaxkwa nhĩxi jarênh kõt mẽmoj tã amnhĩ jarênh kêt nê. Kaxkwa kêp Tĩrtũm krĩ xà maati kênã kot ka kêt mẽ axtem nê atỳx ri amnhĩ kaxyw hixi jarê.

³⁵ Rỳ mẽ kot axêx kêt kõt apumunh kaxyw pika nhĩxi jarênh kêt nê. Pika kêp Tĩrtũm par xãm xà kênã kot ka kêt mẽ atỳx ri amnhĩ kaxyw tanhmã hixi jarênh to. Nê krĩ pê Jerujarêja mããnên kêr ka mẽ ri amnhĩ kaxyw tanhmã hixi jarênh to hkêt nê. Koja nhỹrmã Tĩrtũm mẽ awỹr Jerujarê hwỹr ixpê pahi maati hã inhmẽ pa kamã mẽ ato amnhĩptãr o ixkrĩ. Jakamã kêr ka mẽ ri atỳx amnhĩ kaxyw tanhmã hixi jarênh to ho ri apa hkêt nê.

³⁶ —Nê kêr ka mẽ kot axêx kêt kõt apumunh kaxyw mẽ ri tanhmã amnhĩ krã hkĩ jarênh to hkêt nê. Kot kaj mẽ anê nê ãm tanhmã hã harênh to kaprỹ. Xà kot kaj mẽ ajamaxpêr pix o tanhmã amnhĩ krã hkĩ

hto? Nà kot kaj mẽ ho anhỹr kêt nê. Jakamã mẽ ri atỳx tanhmã harênh to hkêt nê.

Nê mẽ atỳx ri mẽmo nhĩxi jarênh kõt mẽmoj tã amnhĩ jarênh o apa hkêt nê.

³⁷ ãm akatãt kõt tãm amnhĩ jarênh kurê kumrêx. Jao mẽ kãm: “Tỳ. Nà kot paj ho anê.” Anhỹr o mẽmoj tanhmã ho. Rỳ mẽ kãm: “Nà kot paj ho anhỹr kêt nê.” Anhỹr o mẽmoj tanhmã ho hkêt nê. ãm akatãt kõt tanhmã mẽmoj tã amnhĩ jarênh to xà hkõt ho anhỹr kurê kumrêx. Mẽ kot Satanasti hkõt amnhĩ nhĩpêx o mẽ pa xwỹnh pixjaja na htem hêx rom mẽmoj nhĩxi jarênh kõt tanhmã amnhĩ jarênh to ho pa. Anê.

Mẽ pahte tanhmã axpên nhĩpêx to hã Jejus kot mẽ pamã karõ

Rukre 6.27-30, 23.34; mããnên Atre 7.60; Rõmãn 12.14

³⁸ Nhũm Jejusja arĩ mẽ kãm kapêr nê mẽ kãm:

—Na prem amnepêm mẽ panhĩgêtjê mã Tĩrtũm kapêr tũm jarênh o: “Koja mẽhõ apê ano katõk nê hkapa hã koja mẽ anhõ pahija atã mã ho anê nê kêp no kapa. Rỳ koja mẽhõ apê axwa hõ hkwỹr hã koja atã mã ho anê nê atã kêp wa hõ hkwỹr.” Anhỹr o mẽ kãm hã karõ. ãm hãmri na prem ã ja jarênh anê.

³⁹ Tã kot paj ixprĩ hã mẽ amã tanhmã ja jarênh to ka mẽ inhma. Koja mẽhõ tanhmã mẽ anhĩpêx to ka mẽ ãm amnhĩ tã omu nê tanhmã amnhĩ tã ho hkêt nê. Koja anhĩnep akura ka ãm omu nê tanhmã amnhĩ tã ho hkêt nê. Te ate kãm ihkjê hpêr nhũm kot ihkjê kamã hkuranh pyrãk o amnhĩ nhĩpêx nhũm ja amã mex nê. No amnhĩ tã tanhmã ho hkêt nê.

⁴⁰ —Nê koja mẽhõ anhĩnõhkã hã awỳ nhũm mẽ anhõ pahija amã anê ka mãmrĩ kãm agõ nê tanhmã hã kãm nê hkêt nê. Te ate hkõt kry pê kãm anhĩnõhkã hpakã ry jagjênh xwỹnhta nhõr pyrãk o amnhĩ nhĩpêx. Nom kêr ka mẽ kamã agryk kamã kãm õr kêt nê.

⁴¹ —Nê koja mẽhõ ate kãm jênh tur nê hkõt ho amõr ryy kaxyw amã kapêr ka mãmrĩ kãm ho anê. Nê kot amã nhỹri hã karõ xãja wỹr o põj nom kamã kãm õr kêt nê. Kãm ho hakrenh ryy nê rĩ kormã akupỹm kãm agõ.

42 –Nê koja mēhō ò mēmoj kêt nê awȳr tē nê mēmoj tā awȳ ka mām̄rī kām agō. Rỳ nhũm awȳr tē nê apē mēmoj to ĩpresta kaxyw ka mām̄rī kām ho ĩpresta. Kêr ka mē ã axpēn nhĩpēx anhỹr o ri apa. Anē.

Mē pamā axpēn kĩnh ã Jejus kot mē pamā karō

Rukre 6.32-36; mǎānēn Rōmān 12.14

43 Nhũm Jejus arī mē kām kapēr nē mē kām:

–Nê na prem amnhĩ krā hkôt axtem nē tanhmā mē panhĩgētjē mǎ mēmoj jarēnh to nē mē kām: “Kêr ka mē amā mē akrāmnhwỳjē pix kĩnh nē tanhmā mē ho mex to. No kêt mē kot tanhmā mē ato xwỳnhjaja kêr ka mē mām̄rī mē kamā axàhkurê ho ri apa.” Anhỹr o mē kām karō.

44 Nom pa kot paj mē amā Tĩrtũm kot tanhmā ja hǎ karō hto hǎ harē ka mē inhma. Kêr ka mē kot tanhmā ri mē atomnuj to xwỳnhjaja amnhĩ tā tanhmā mē ho hkêt nē. Ām tanhmā mē ho mex to pix hkukamā mǎn ajamaxpēr. Nê mē ho Tĩrtũm wỳr pix kukamā mǎn ajamaxpēr.

45 Na hte ã kaxkwa kamā Mēpahpām Tĩrtũmja amnhĩ nhĩpēx anhỹr o pa. Mē kot amnhĩ tomnuj xwỳnhjaja nē mē kot amnhĩ to mex xwỳnhjaja nhũm hte mē ho hpimràatā mē ho mex o axpēn pyrāk. Jao hamē wa hwỳr na rē nē hamē wa hwỳr myyti rē nhũm hamē wa kām hirǎ ho pa. Jakamā kêr ka mē urāk nē mē piitā tām mē hipēx o axpēn pyrāk. Mē kot amnhĩ tomnuj xwỳnhjē mē mē kot amnhĩ to mex xwỳnhjē mē ho apimràatā mē ho mex o axpēn pyrāk.

46 –Nê xàt kaj mē amā mē piitā mē ho mex prām kêt nē ãm mē kot mē ato mex xwỳnh pixjaja ka mē amā mē ho mex prām nhũm Tĩrtũm ja hǎ mē apumu nhũm ja kām mex nē nà? Nà koja kām mex kêt nē. Koja mēhō ato mex kêt tā kêr ka ãm amnhĩ rom ho mex nē. Nhũm Tĩrtũm ja hǎ apumu nē amnhĩm amex ã ajarē. Mē kot amnhĩ tomnuj xwỳnhjaja na htem ãm mē kot mē ho mex xwỳnh pixjaja nhũm mē amnhĩ xwar mē ho mex. No tām mē kot amnhĩ nhĩpēx xwỳnhjaja na htem mē piitā mē ho mex o axpēn pyrāk. Mē kot tām amnhĩ nhĩpēx xwỳnhjaja nē mē kot amnhĩ tomnuj xwỳnhjaja nhũm mē ho hpimràatā mē ho mex o axpēn pyrāk.

47 –Nê na hte mē hkwỳjaja ãm amnhĩ kwỳjē pix mǎ kapēr mex o pa. Nom mē piitā tām mē hipēx kêt nē. Nom kêr ka mē ã amnhĩ nhĩpēx anhỹr kêt nē. Kêr ka mē kurom mē piitā tām mē hipēx o axpēn pyrāk. Mē akwỳjē mē mē akwỳ hkêt xwỳnhjaja ka mē hipēx o axpēn pyrāk. Nê tām mē kām akapēr o axpēn pyrāk.

48 Kaxkwa kamā Mēpahpām Tĩrtũm pyrā nē mē kot amnhĩ tomnuj xwỳnhjē mē mē kot amnhĩ to mex xwỳnhjaja mē ho apimràatā mē ho mex o axpēn pyrāk. Na hte ã Tĩrtũmja mē panhĩpēx anē. Anē.

6

Mē pahte mē kēp amrakati xwỳnhjē ho mex rǎhǎ hǎ mē pamā karō

1-2 Nhũm Jejus arī mē kām kapēr nē mē kām:

–Nê na htem mē piitā hkwỳjē noo mǎ tanhmā mē kēp amrakati xwỳnhjē ho mex to. Nom kām mē hkaprī kamā tanhmā mē ho mex to hkêt nē. Ām hkwỳjaja kot ja hǎ mē omunh nē mē mex ã mē harēnh pix kaxyw na htem krī hkôt ri mē kēp amrakati xwỳnh piitā mē ho mex o pa. Nê mē pikuprōnh xǎ hǎ ixkre kamā kuhê nē tanhmā mē ho mex to. Mē hkwỳjaja kot ja hǎ mē omunh nē amnhĩm mē mex ã mē ho jarkrar kaxyw. Jakamā koja nhỹrmǎ Tĩrtũmja axte ja hǎ mē kām mēmoj mex nhōr kêt nē. Ra jar mē hkwỳjaja kot ja hǎ mē omunh nē amnhĩm mē mex ã mē harēnh kēnǎ. Jakamā kwa kêr ka mē ho mē urāk kêt nē. Nê tanhmā mēhō ho mex to kaxyw nē akwỳjē no kuhpa hǎ mē hkàx ã tanhmā mē ho mex to. No kot kaj mē noo mǎ tanhmā mē ho mex to. Mē kot hǎ apumunh nē ato jarkrar kaxyw tanhmā mē ho mex to nhũm kaxkwa kamā Mēpahpāmja ja hǎ apumu nē mē hǎ tanhmā ato mex to hkêt nē. Koja ãm hǎ apumu.

3 –Ja pymaj kêr ka mē mē kēp amrakati xwỳnhjē mǎ mēmoj nhōr kaxyw hāmri nē mē piitā mē no hkàx ã tanhmā mē ho mex to. Hāmri nē nhām ri ja hǎ mē kām amnhĩ to jarkrar kêt nē. Aprō mǎ rỳ akrajē mǎ rỳ akrāmnhwỳ mǎ hǎ amnhĩ jarēnh kêt nē.

4 Kot kaj mē no hkàx ã tanhmā ho mex to no nhũm Tĩrtũm tapxipix apumunh o nhỹ.

Hâmri nê ja hã ato mex rax nê ka amex nê apa. Anê.

Tanhmã mē pahte Tirtūm mā amnhī jarēnh to hã mē pamā karō

Rukre 11.1-13, 18.9-14

⁵ Nhūm Jejus arī mē kām kapēr nê mē kām:

—Nē mǎānēn ja. Na htem hakwa pix o amnhī mex ā amnhī jarēnh xwŷnhjaja Tirtūm mā amnhī jarēnh kaxyw nê mē kot Tirtūm kapēr o mē ahkre xà hã ixkreja wŷr agjê. Nê mē piitā mē noo mā kām tanhmã amnhī jarēnh to. Rŷ gǎp kuhê nê mē piitā mē noo mā kām amnhī jarē. Tã mēmo kaxyw na htem mē noo mā Tirtūm mā amnhī jarē? Nà ām mē kot ja hã mē omunh nê mē mex ā mē ho jarkrar pix kaxyw. Nê mē harēnh o: “E mŷjti pumu. Na hte apkati mē ā Tirtūm mā amnhī jarēnh anê. Kot amnhī to mex xwŷnh mǎn.” Anhŷr ā harēnh kaxyw. Tã ra mē piitā mē kot ja hã omunh nê amnhīm mex ā ho jarkrar jakamã koja Tirtūm axte ja hã tanhmã ho mex to hkêt nê. Ra pika ja kamã mē kot mē omunh nê mē mex ā mē harēnh kēnã.

⁶ No mē kajaja. Kêr ka mē uràk nê ā amnhī nhīpêx anhŷr kêt nê. Ām Tirtūm mā amnhī jarēnh kaxyw nê akwŷjê no hkàx ā hitom wŷr agjê nê hitom kām ahte kām amnhī jarē. Hâmri nhūm Tirtūm tapxipix ja hã mē apumu. Mē amã amnhī to amnhīrīt kêt tã mē apumu. Hâmri nê mē ato mex nê.

⁷ —Nê mē kēp Tirtūm kra hkêt xwŷnhjaja na htem sǎnti mā amnhī jarēnh kaxyw nê xatã kām amnhī jarē. Nê xatã kàx péê kām amnhī jarē. Nê hamaxpēr o: “Kot paj xatã sǎnti mā amnhī jarē nhūm inhmar japêr.” Anhŷr o hamaxpēr jakamã xatã kām amnhī jarē. No ām htŷx ā hamaxpēr anhŷr kaprŷ.

⁸ Jakamã kwa kêr ka mē ho mē uràk kêt nê. Tirtūm ra kot mē ate mēmojtã hwŷr xàta ra ja kukamã kot omunh mex kēnã kot ka kêt mē xatã hã hwŷr o akuhê.

⁹ —Nê kêr ka mē kām amnhī jarēnh kaxyw nê amnhī krā hkôt tanhmã kām amnhī jarēnh to rŷ kām amnhī jarēnh o:

Pa Mēinhīpēêxà maati pē kaxkwa kamã ri apa xwŷnh? Amex o amex Tirtūm.

¹⁰ Apê mē ijamār mex xwŷnh maati na ka.

Na hte kaxkwa kamã mē kot ri amã tanhmã amnhī nhīpêx to ho mē pa xwŷnhjaja akôt pix mā amnhī nhīpêx o ri pa. Tã ijaxwŷja inhmã mē uràk nê akôt pix mā amnhī nhīpêx o ri ixpa hprām.

¹¹ Nê kwa jarāhã mē inhmã mēmojtã gō pa mē akukwak ri ho apku.

¹² Na pa hte tōhã amnhī tomnuj nê Tirtūm. Nom mē kot tanhmã ixtomnuj to xwŷnhjaja na pa hte ām mē omu nê amnhī tã tanhmã mē ho hkêt nê. Nê ja ho ijamakêtkati nê axte kām ijamaxpēr kêt nê. Ā ixte amnhī nhīpêx anhŷr jakamã kwa ja hã ixpumu nê ixpyrà nê ixte tanhmã amnhī tomnuj to hã ixpumu nê hã tanhmã ixto hkêt nê. Ām ho ajamakêtkati kurê kumrêx nê axte kām ajamaxpēr kêt nê.

¹³ Nê kot paj nhŷrmã tanhmã amnhī tomnuj to kaxyw ka ja hã ixpumu nê ixte ā amnhī nhīpêx anhŷrja nê ixto htŷx nê pa tanhmã amnhī tomnuj to hkêt nê. Ām mēmojtã punuj pē ixpytār rāhã ho apa Tirtūm. Tã ām ja pix na hapêx. Anê.

—E kêr ka mē ā Tirtūm mā amnhī jarēnh anê. Anê.

¹⁴ —Nê koja mēhō tanhmã anhīpêx to htã ka ho ajamakêtkati nê axte kām ajamaxpēr pix o ri apa hkêt nê. Hã koja kaxkwa kamã Mēpahpām maati ja hã apumu nê apyrà nê tanhmã ate amnhī tomnuj to ho hamakêtkati nê axte kām hamaxpēr kêt nê.

¹⁵ Nom kot kaj mē ā amnhī nhīpêx anhŷr kêt nê. Nê tanhmã mē kot mē atota ā anohtŷx rāhã ho apa hāmri nhūm Mēpahpām maati mē apyrà nê mē ate tanhmã amnhī tomnuj to ho hamakêtkati hkêt nê. Ām hã nohtŷx rāhã ho pa ho pa. Anê.

Tanhmã mē pahte Tirtūm mā mex o mex ā jarēnh to

Rukre 18.11-12

¹⁶ Nhūm Jejus arī mē kām kapēr nê mē kām:

—Nê mē kot amnhī to jarkrar xwŷnhjaja na htem Tirtūm mā amnhī jarēnh kaxyw hāmri nê tōhã ho apkur kêt rāhã kām amnhī jarēnh jakamã hkuk kaprī nê hkŷjê hkôt

pa. Tã mo kaxyw na htem ã mẽ noo mã amnhĩ nhĩpêx anê? ãm mẽ apkur kêt rãhã Tĩrtũm mã amnhĩ jarênh ã mẽ omunh pix kaxyw. Tã ra jar pika ja kamã mẽ kot ja hã mẽ omunh jakamã koja Tĩrtũm nhỹrmã ja hã tanhmã mẽ ho mex to hkêt nê. Jakamã kwa kêr ka mẽ ho mẽ uràk kêt nê.

¹⁷ Kêr ka mẽ tũhã Tĩrtũm mã amnhĩ jarênh ryy kaxyw axàpkur kaga hãmri nê amnhĩ krã kahõ nê amnhĩ jaxwỳr mux nê akuk kĩnh nê ri akwỳjê hkôt apa.

¹⁸ Hãmri nê nhỹri mẽ hkàx ã ahte kãm amnhĩ jarê nê kãm mex o mex ã harê. Kot kaj mẽ ã mẽ hkàx ã amnhĩ nhĩpêx anê nhũm mẽ akwỳjaja mẽ axàpkur kaga hã mẽ apumunh kêt nê. Nhũm Tĩrtũm pix ja hã mẽ apumu. Hãmri nê nhỹrmã ja hã mẽ ato mex nê. Anê.

Kaxkwa kamã mẽmoj mex

Rukre 12.33-34; mããnên Sikũn Ximotre 4.8; Wam Pêtre 1.4; Eprêw 10.34

¹⁹ Nhũm Jesus arĩ mẽ kãm kapêr nê mẽ kãm:

—Nê mããnên ja. Kêr ka mẽ jar pika ja kamã akukrêx rũnh o apa hkêt nê. Kêt jar mẽ hikukrêx koja kritpêp mex kêt nê. Kot kaj mẽ ho akuprõ nhũm amnhõre apê homnu rỳ paratre apê homnu. Nê kàx o mẽ akukrêx nhũm haxwỳja apê omnu rỳ nhũm mẽhõ apê hkwỳ ho ahkĩ.

²⁰ Jakamã kêr ka mẽ akukrêx rũnh o apa hkêt nê. Kaxkwa kamã Tĩrtũm kot mẽ akutêp mẽ akukrêx o pikuprõnhja na kêt mex kumrêx o jar mẽ hikukrêx jakrenh par. Jakamã kêr ka mẽ amã nhỹrmã kaxkwa kamã akukrêx mex prãm xàj tãm mẽ piitã tãm mẽ hipêx nê mẽ ho mex o ri apa. Nê mẽ kamã axukapri nê. Nê Tĩrtũm kôt ri amnhĩ nhĩpêx mex nê. Hãmri nhũm ã mẽ ate amnhĩ nhĩpêx anhỹr ã mẽ apumu nê mẽ akutêp mẽ amã mẽmoj mex kwỳ jaxwỳ. Kaxkwa kamã mo amnhõre nê mo paratre? Nê kamã mo mẽ ahkĩnh xwỳnh? ãm kamã amrakati kumrêx.

²¹ Kot kaj mẽ jar akukrêx rũnh hãmri nê ãm tanhmã apê homnu hto pix kukamã ajamaxpêr. Nom kot kaj mẽ apê Tĩrtũm kra hã kaxkwa kamã akukrêx mã ajamaxpêr rãhã ho ra akĩnh nê ri apa.

²² —Nê kot kaj mẽ ixkapêr ma nê ixkôt amnhĩ nhĩpêx hãmri nê tãm amnhĩ nhĩpêx.

Nê tãm axpên hipêx. Jao te hirã kamã arĩt mex pyrãk o amnhĩ nhĩpêx.

²³ No koja mẽhõ ixkapêr ma nê ãm kuma nê ixkwỳm ri amnhĩ nhĩpêx o pa. Hãmri nê te kamãt kô kamã mẽhõ rĩt mex kêt kot amnhĩ nhĩpêx pyrãk o amnhĩ nhĩpêx. E kêr ka mẽ ã amnhĩ nhĩpêx anhỹr pymaj ixkapêr ma nê kãm ajamaxpêr tỳx rãhã ho ri apa.

²⁴ —Nê kot kaj apyxi nê anhõ patrãw hamêxkrut hãmri nê arĩgro pyxi hã hamê wa kãm axapênh o amỹkry hkêt nê. Kot kaj anê nê hõ gryk ã ihõ kaga. Ja pyrã nê kot kaj mẽ jar akàxpore nê akukrêx pix mã ajamaxpêr nê amã hapê ho akwỳjê pê ho anhõxỳ ho ri apa. Nê gryk ã Tĩrtũm kãm hprãm xà hkôt tanhmã ho mẽ ho mex to hkêt nê. Jakamã kwa kêr ka mẽ Tĩrtũm pix mã mãn ajamaxpêr rãhã nê. Jao akàxpore nê akukrêx pix kukamã ajamaxpêr o ri apa hkêt nê. Anê.

Mê pahte tee ri amnhĩ kukamã pajamaxpêr kêt ã mẽ pamã karõ

Rukre 12.22-31; mããnên Piripos 4.6; Wam Pêtre 5.7

²⁵ Nhũm Jesus arĩ mẽ kãm kapêr nê mẽ kãm:

—E. Kwa kêr ka mẽ tee ri mẽmoj tã amnhĩ kukamã ajamaxpêr kêt nê. Tanhmãn axàpkur xà rỳ axê ka mẽ tee ri hkukamã ajamaxpêr kêt nê. Mẽmoj piitã hkukamã tee ri ajamaxpêr o ri apa hkêt nê. Tĩrtũmja àhpumunh tỳx o àhpumunh tỳx xwỳnh na. Na pre àhpumunh tỳx o mẽ anhĩpêx ka mẽ kukwak ri atĩr nê apa. Jakamã xà kot mẽ amã mẽ anhõ ho pa kaxyw àhpumunh kêt? Nà ja kaxyw àhpumunh tỳx kênã. Kêp mẽ anhĩpêx xwỳnh jakamã mããnên kêp mẽ amã mẽ anhõ xwỳnh. Nê kêp mẽ amã mẽ axê nhõr xwỳnh.

²⁶ —Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkapri nê ri pa hkêt nê. Mẽ anhĩpêxà maati tãm na hte kãm õ ho pa. Tã kãm mẽ ajapê htỳx o kot kuwênhre jakrenh jakamã koja uràk nê mẽ amã mẽ anhõ rãhã ho pa.

²⁷ —Nê xà kot kaj mẽ kritpêp atĩr prãm xàj ja pix kukamã ajamaxpêr rãhã nê ra ajamaxpêr kôt kritpêp atĩr nê apa? Nà kot kaj mẽ anhỹr kêt nê.

28 —Mãn ka htem akunĩ kamã pixôrà pumu. Na hte tee ri tanhmã kute hkukamã hamaxpêr o ra hkaprĩ nê harir kêt nê.

29 Tã nom muxre nê harir ka mẽ omu. Te ho amnepêm pahĩti Sarumãw xê mex pyrãk nom mex o hakre.

30 Pixôràreja koja mẽmo arĩgro hã htĩr nê mux nê harir tã mẽmo arĩgro hã ra grã pa nê hapêx. Kêp pixôrà pix nê hapêx tokyx anhỹr tã nhũm Tĩrtũm ho mex nê nhũm mux nê harir. No mẽ kajaja na hte mẽ ato mex o pixôrà ho mexta jakre. Jakamã kwa mẽmo kaxyw kot ka kêt mẽ tee ri amnhĩ xê hkukamã ajamaxpêr o ri akaprĩ nê apa? Kot kaj mẽ ã ajamaxpêr anhỹr jao kormã amnhĩ kaxyw Tĩrtũm mã ajamaxpêr tỳx kêt nê.

31 —Kwa mẽ tee ri axàpkur xà hkukamã ajamaxpêr o ri akaprĩ hkêt nê. Nê tee ri amnhĩ kukamã tanhmã ajamaxpêr to ho ri akaprĩ hkêt nê.

32 Mẽ kot Tĩrtũm kôt amnhĩ xunhwỳr kêt xwỳnhjaja na htem ã ri hamaxpêr anhỹr o pa. Tã nom kêr ka mẽ ho mẽ urãk kêt nê. Tĩrtũm ra kot mẽ panhõ mẽmoj kêt kôt mẽ pahpumunh mex kênã.

33 Jakamã kêr ka mẽ hkôt ri tanhmã amnhĩ nhĩpêx to rãhã ho ri apa. Nê amã ja pix tânopxar prãm. Hãmri nhũm Tĩrtũm amnhĩ tã mẽ apumu nê apkati mẽ mẽ amã mẽmoj nhõr o pa.

34 —Jakamã kwa kêr ka mẽ tee ri amnhĩ kukamã ajamaxpêr o akaprĩ nê apa hkêt nê. Tĩrtũm kot apkati mẽ mẽ pajamãr mex jakamã kêr ka mẽ jarãhã amnhĩ kukamã apkati mẽ ajamaxpêr kêt nê. Kê apkati mãn. Æm jarãhã pix mã mãn mẽ ate tanhmã amnhĩ nhĩpêx tota kukamã ajamaxpêr. Tĩrtũm kot mẽ pahpumunh mex o pa rãhã kênã. Anê.

7

Mẽ pahte axpên to pakapêr punuj kêt ã kot mẽ pamã karõ

Rukre 6.37-38, 6.41-42; mããnên Rõmãn 2.1-3; Wam Korĩt 4.5; Xiakre 4.11-12

1 Nhũm Jejus arĩ mẽ kãm kapêr nê mẽ kãm:

—Nê kêr ka mẽ atỳx ri amnhĩ krã hkôt tanhmã akwỳjê hõ kot amnhĩ tomnuj to hã harênh kêt nê. Kot kaj mẽ ã harênh anê

nhũm Tĩrtũm ja hã mẽ apumu nê mẽ kajaja ã mẽ ajarênh anê.

2 Na hte tanhmã mẽ pahte axpên nhĩpêx to hã mẽ pahpumunh kôt tanhmã mẽ panhĩpêx to.

3-5 Jakamã kwa kêr ka mẽ mẽhõ kot tanhmã amnhĩ tomnuj to hã omu hãmri nê hã kãm kapêr tokyx anhỹr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hãmri nê rĩ kormã ate mẽmoj tã omunh xwỳnhhta wỳr tẽ nê hã tanhmã kãm akapêr to. Kêr ka mẽ ã amnhĩ nhĩpêx anhỹr o ri apa.

—Nê xà koja mẽ akwỳjê hõ tanhmã amnhĩ tomnuj to grire. Ka ate amnhĩ tomnuj tỳx o hakrenh tã ã kot amnhĩ nhĩpêx anhỹr ã omu nê hã kãm akir nhũm amã ja mex nê nã? Nã koja amã ja mex kêt nê. Kot ka akumrêx ate tanhmã amnhĩ tomnuj tota kaga hãmri nê rĩ kormã anhĩõ tanhmã kot amnhĩ tomnuj to gireta nê kãm akapêr nhũm ja amã mex nê.

6 —Nê xà na htem mẽ apkur xà mex jamỳ nê rop mã kurê? Nã na htem anhỹr kêt nê. Ja pyrã nê kêr ka mẽ kot Tĩrtũm kaga xwỳnhjê mã kapêr jarênh o ri apa hkêt nê. Anê.

Mẽ pahte mẽmoj to presija hã amnhĩ to Tĩrtũm wỳr

Makre 11.24; Rukre 11.5-13; Juãw 14.13-14; mããnên Wam Tesarõn 5.17; Xiakre 1.5-8, 4.1-3

7-11 Nhũm Jejus arĩ mẽ kãm kapêr nê mẽ kãm:

—Nê xà kot we akraja kãm prãm nê tep ã awỳ ka axtem nê kagã hõ py nê kãm agõ? Rỳ nhũm krãhyre gre hã awỳ ka axtem nê makre hõ py nê kãm agõ? Nã na ka htem ã mẽ hipêx anhỹr kêt. Na ka htem kot mẽmoj tã mẽ awỳr xà hkôt kãm mẽmoj gõ. Mẽ ate amnhĩ tomnuj tã na ka htem akrajê ho mex o ri apa. Tã kaxkwa kamã Tĩrtũmja na hte mẽ ato mex o mẽ ate mẽ akrajê ho mex jakrenh. Kãm mẽ ajapê htỳx kôt na hte mẽ amã mẽmoj mex nhõr o pa. Jakamã kot ka mẽ mẽmoj tã awỳ nhũm mẽ ama nê mẽ ate mẽmoj tã hwỳr xàta kôt amã kugõ. Æm xatã mẽ ate hã axàhwỳr o ri apaja nhũm mẽ amã hprãm xwỳnhhta gõ. Æm mẽmoj tã hwỳr rãhã ho ri apa nhũm mẽ ama nê mẽ

amã mẽmoj tanhmã hipêx to. Te ho mẽhõ kãm tep xành nẽ teprênxà hpyr nẽ xatã gôx kãm rênh o ãm pyrã nẽ xatã mẽmoj tã awý. Hãmri nhũm mẽ ama nẽ mẽ amã hprãm xwýnhhta gô. Te tep kanhêr xwýnhhta jatã kot tep kanhêr pyrãk. Jao mẽ amã mẽmoj prãm xwýnhhta gô.

12 —Nẽ mẽ piitã mẽ kot tãm mẽ anhîpêxja na mẽ amã hprãm. Tã kêr ka mẽ amnhî pyrã nẽ tãm mẽ piitã mẽ hipêx o ri apa. Mẽ kot tãm mẽ anhîpêx kêt tã kêr ka mẽ axãmnhîx mẽ kêp anhõxý hkêt nẽ tãm mẽ hipêx. Kot kaj mẽ ã axpên nhîpêx anê nẽ finat Mojes mẽ Tirtũm nhỹ hã mẽ kapêr o mẽ pa xwýnhjê xujarênh xà hkôt axpên nhîpêx mex o ri apa. Anê.

Pry pijakrut jarênh

Rukre 13.24; mãânên Piripos 3.19-21

13-14 Nhũm Jejus arĩ mẽ kãm kapêr nẽ mẽ kãm:

—Tirtũm kapêrja mẽ kêp hihtýx jakamã na htem ohtô nẽ hkôt amnhî xunhwýr kêt nẽ. Na htem ãm hpýnhre nẽ hkôt amnhî xunhwý nẽ hkôt amnhî nhîpêx. Jakamã te Tirtũm nhõ krĩ hwýr pry grireta ã hpýnhre nẽ pa pyrãk. No nhũm Satanasti hkôt mẽ kot amnhî xunhwýr xwýnhjaja na htem Satanasti kôt pix mã tanhmã amnhî tomnuj to hprãm. Mẽ kãm mex jakamã nhũm mẽ amnhî nhîpêx o te pry krepak rax ã axpên kôt mẽ ohtô nẽ pa pyrãk o amnhî nhîpêx. Axtem kuwy hwýr pry krepakja nõr tã nhũm mẽ htýx kuwyja wýr amnhî to pa. Jakamã Tirtũm kapêrja mẽ apê hihtýx tã kêr ka mẽ mãmrĩ hkôt amnhî xunhwý. Jao Tirtũm nhõ krĩ hwýr pry grireta ã mãn apa. Anê.

Mẽ kot amnhî to hêx xwýnhjê jarênh

Rukre 6.43-44; mãânên Xiakre 3.9-12; Wam Juãw 3.10, 4.4-6

15 Nhũm Jejus arĩ mẽ kãm kapêr nẽ mẽ kãm:

—E kwa mẽ o kora. Mẽ akwýjaja kot kêp Tirtũm nhỹ hã kapêr jarênh xwýnh ã amnhî jarênh tã na htem ja hã amnhî to hêx. Nhũm htem kãm mẽ kapêr mar prãm nẽ. Te mẽ kapêr mex pyrãk tã no nhũm htem ãm mẽ kãm amnhî to hêx pix o ri mẽ hkôt pa. Mẽ kot mar nẽ axtem nẽ Tirtũm kapêr kwým tanhmã amnhî nhîpêx

to kaxyw nhũm htem hêx rom tanhmã mẽ kãm kapêr to. Jakamã kwa mẽ o kora. Mẽ axkãm ajamak rom nẽ amnhî nẽ mẽ omunh mex nẽ.

16 Kêr ka aprĩ hã mẽ piitã mẽ kot tanhmã amnhî nhîpêx to hã mẽ omu nẽ rĩ kormã tanhmã mẽ harênh to. Mẽ hamaxpêr punuj xwýnhjaja kêp Tirtũm nhỹ hã kapêr jarênh xwýnh kêt. No koja mẽ tãm hamaxpêr nẽ tãm amnhî nhîpêx ka ja hã mẽ omu nẽ mẽ kêp Tirtũm nhỹ hã kapêr jarênh xwýnh ã mẽ omunh kurê kumrêx. Na htem hprĩ hã mẽ kot tanhmã amnhî nhîpêx to ho pa hã mẽ omu nẽ rĩ kormã tanhmã mẽ harênh to.

17 Na htem hamaxpêr punuj hãmri nẽ hkôt tanhmã amnhî tomnuj to. Nom koja mẽhõ hamaxpêr mex nẽ hãmri nẽ hkôt tãm amnhî nhîpêx mex o pa.

18 Na htem tanhmã hamaxpêr to xà hkôt tanhmã amnhî nhîpêx to ho pa.

19 —Nẽ koja mẽhõ õ pĩ hpàr ô hkêt japêr nhũm tee ri omu hãmri nẽ krãhta nẽ kuwym kumê. Ja pyrã nẽ koja mẽhõ tanhmã amnhî tomnuj to ho pa nhũm Tirtũm tee ri ja hã omu hãmri nẽ ã kot amnhî nhîpêx anhýr o paja mýrapê kuwy hwýr kumê.

20 Jakamã kot kaj mẽ tanhmã mẽ kot amnhî nhîpêx to ho pa hã akwýjê pumu nẽ ra aprĩ hã tanhmã mẽ kute hã mẽ omunh kurê kumrêx. Mẽ kêp Tirtũm nhỹ hã kapêr xwýnh ã mẽ omu rý mẽ kêp hkwým ri kapêr xwýnh ã mẽ omu. Anê.

Mẽ kot Tirtũm nhõ krĩ hwýr gjêx mã xwýnhjê jarênh

Rukre 13.25-27; mãânên Sikũn Korĩt 13.5; Wam Juãw 2.3-6

21-23 Nhũm Jejus arĩ mẽ kãm kapêr nẽ mẽ kãm:

—Nẽ Inhîpêxà Tirtũm mẽ wa inhõ krĩja wýr koja mẽ piitã gjêx kêt nẽ. ãm mẽ kot kapêr kôt amnhî nhîpêx o mẽ pa xwýnh pixjaja koja mẽ nhýrmã ma hwýr agjê. Na hte mẽ hkwýjaja ixto “Pahihti” anhýr ã ijarênh tã no ãm ixkôt ri amnhî nhîpêx kêt nẽ. Jakamã koja mẽ nhýrmã wa inhõ krĩ hwýr àpir kêt nẽ. Kot paj nhýrmã mẽ piitã mẽ htír ri tanhmã mẽ kot amnhî nhîpêx to ho pa hã mẽ omunh xà hkôt tanhmã mẽ harênh to. Mẽ mex ã mẽ hkwýjê jarê nẽ mẽ kot amnhî tomnuj ã mẽ hkwýjê jarê. Hãmri nhũm mẽ hkwý kot ixkôt amnhî nhîpêx o

pa hkêt xwýnhjaja kuwyta wýr ma pa pymaj tee ri amnhĩ kukamã hamaxpêr hãmri nê tanhmã inhmã amnhĩ jarênh to nê inhmã: “Kwa Jejus. Xà ate ixpumunh kêt? Na pa pre amnepêm ixtĩr ri pikap ixpare ri anhỹr hã aa mẽ kot mẽmoj pumunh kêt kwý ho anhỹr rax nê. Nê ixkwýjê nê mẽkarõmnuti jano nê mẽ kãm akapêr jarênh o ri ixpa. Kwa xà ate ja hã ixpumunh kêt?” Anhỹr o inhmã amnhĩ jarê.

—Nom mẽ htĩr ri ã mẽ kot amnhĩ nhĩpêx anhỹr o pa htã ixkapêr kôt amnhĩ nhĩpêx kêt jakamã kot paj mẽ kuma nê ãm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mẽ apê ixkwý hkêt. Mẽ ate ixkôt amnhĩ nhĩpêx o apare hã. ãm mẽ ate amnhĩ tomnuj xwýnh na ka mẽ. E mẽ ma kuwy hwýr amrar kurê kumrêx.” Anhỹr o kot paj amnhĩ nê mẽ hano. Hãmri nhũm mẽ kot ixkôt amnhĩ nhĩpêx o mẽ pa xwýnh pixjaja ma Tĩrtũm mẽ wa inhõ krĩ hwýr gjêx pa. Anê.

Ixkre pijakrut jarênh

Rukre 6.46-49; mãânên Xiakre 1.22-25; Wam Juãw 2.3-6

²⁴ Nhũm Jejus arĩ mẽ kãm kapêr nê mẽ kãm:

—E kot paj mẽ amã awjarê ka mẽ ixu-jarênh ma. Nà mẽ kot ixkapêr mar nê hkôt amnhĩ nhĩpêx o mẽ pa xwýnhjaja te mẽ kot ixujarênh ja pyrãk. Mẽ kot amnhĩ nhĩpêx o te mẽhõ kot amnhĩ kukamã hamaxpêr mex nê aptýx kãm amnhĩm õrkwý nhĩpêxja pyrãk.

²⁵ Koja mẽhõ aptýx kãm amnhĩm hipêx nhũm mẽmo arĩgro hã na wrýk rax nê gô htãm rax nê hanhi no nhũm arĩ ãm týx nê xa. Tã kot kaj mẽ ixkôt amnhĩ nhĩpêx o ri apa hã kot kaj mẽ te ixkre ja pyrãk. Jao amex nê ajamakêtkati nê ri apa. Te ho gô htãm kot ixkre janhir nhũm arĩ ãm týxta pyrãk.

²⁶⁻²⁷ —No mẽ kot ixkapêr mar nê ãm mar xwýnhjaja. Te mẽ kot mẽhõ kot amnhĩ kukamã hamaxpêr mex kêt nê htýx mõi nê gô mýri gyw rerek kãm amnhĩm õrkwý nhĩpêx pyrãk. Koja mẽmo arĩgro hã õrkwý hã kôk xapêr týx nê na wrýk rax nê. Nê gô htãm nê hanhi nê kêp grãnh pa. Jakamã koja mẽhõ ixkôt amnhĩ nhĩpêx kêt nê te kot

ã kot amnhĩ nhĩpêx anhỹr xwýnhhta pyrãk. Jakamã kwa mẽ ixkapêr mar týx nê hkôt amnhĩ nhĩpêx rãhã ho ri apa. Te mẽhõ aptýx kãm õrkwý xãm xwýnhhta pyrãk. Anê.

²⁸ Nhũm pre Jejusja ã mẽ kãm ujarênh ry anê nhũm mẽ amnhĩ jaêr pê kot tanhmã mẽ ahkre htoja mar o hkrĩ.

²⁹ Hãmri nê axpên mã harênh o:

—Hêxta waa nê. ãm hãmri na ã mẽ pamã kapêr anê. àhpumunh týx kôt na hte ãm hãmri tanhmã mẽ pamã ujarênh to. Pêr ãm Tĩrtũm kapêr tũm o mẽ ahkre xwýnhjê kurom àhpumunh týx kumrêx. Anê.

8

Kà nhy hkro xapêr o pa xwýnh jarênh

Makre 1.40-45; Rukre 5.12-16

¹ Tã nhũm Jejus mẽ kãm kapêr pa hãmri nê hixêt prêêta rũm akupýn wrý nê ma tẽ nhũm mẽ ohtô nê ma hkôt mra.

² Hãmri nhũm mẽhõ my hkà nhy hkro xapêr o pa xwýnhja omu nê hwýr tẽ. Hãmri nê kutã hkõnkrã ho tẽm nê hipô nê nhỹ nê amnhĩ to kuwy nê kãm:

—Pa Pahihti. E ot pa awýr amnhĩ to tẽ. Akupým ate mẽ ixto mex kaxyw axàhpumunh týx jakamã kot ka amã akupým ixto mex prãm nê mãmrĩ ixto mex. Anê.

³ Hãmri nhũm Jejus kuma nê hkà punuti hã ãhkra xi. Amnhĩ kamã kahak kêt nê hã ãhkra xi nê kãm:

—Nà kot paj ato mex. E akupým akà mex. Anê.

Hãmri nhũm hkà akupým mex kurê kumrêx.

⁴ Hãmri nhũm Jejus kãm:

—E kër ka amnhĩ tã mẽ kãm tanhmã ijarênh to hkêt rãhã ma patre hwýr tẽ kê akupým akà mex ã apumu. Hãmri ka hpãnhã amnepêm finat Mojes kot mẽ ate akupým amex ã Tĩrtũm mã tanhmã amnhĩ nhĩpêx to hã karõta ka kãm ho anê. Kê mẽ piitã akupým akà mex ã apumu. Anê.

Põristi krãhtũm mã àpênh xwýnh jarênh

Rukre 7.1-10

⁵ Tã nhũm Jejus ma krĩ pê Kapanau hwýr mõi. Hãmri nê hwýr pøj nhũm Rõm nhõ xwýnh pê põristi krãhtũmja omu nê hwýr tẽ. Kêp Ijaew kêt tã hwýr tẽ. Na pre kãm àpênh xwýnh kêp à htýx nê nõ nhũm omu nê tee

ri hkukamã hamaxpêr. Hãmri nê Jejus ra ò krî hwÿr hpôx ã omu nê hwÿr tẽ nê kãm harê nê kãm:

⁶—Pa Jejus? E ot pa awÿr tẽ. Inhmã àpênh xwÿnhja na ixpê à htÿx nê. Ra ï kamã htyk pa nê nô. O mÿj inhôrkwÿ kamã nô. Anê.

⁷Nhũm Jejus kuma nê kãm:

—Tÿ? Tôe. Nà pa ma akôt tẽ nê akupÿm amã ho mex. Anê.

⁸⁻⁹Hãmri nhũm tee ri kuma nê kãm:

—Kwa akĩnhã ixpê Ijaew kêt jakamã ixte amnhĩ kuk ã ixpijaam. ãm ja rũm mã akapêr pix o akupÿm inhmã ho mex nà? Ixpê mẽ hkrãhtũm na pa hte inhõ pòristi mã mẽmoj tã karõ nhũm mẽ inhmar xà hkôt inhmã mẽmoj tanhmã ho. Na pa hte mẽ kãm: “E mẽ ma mra nê ã amnhĩ nhĩpêx anê.” Anê nhũm htem inhma nê ma mrar kurê kumrêx. Rÿ pa mẽ kãm: “E mẽ amnê ixwÿr mra nê ã amnhĩ nhĩpêx anê.” Anê nhũm mẽ inhma nê ixwÿr mra. No kêt ixrom axàhpumunh tÿx kôt na ka hte mẽ àja mã akapêr nhũm ama nê mẽ kêp hapôx nê ma mrar kurê kumrêx. Jakamã kwa ãm ja rũm akapêr pix o akupÿm inhmã ho mex nà? Anê.

¹⁰Hãmri nhũm Jejus amnhĩ jaêr pê kot kãm ã kapêr anhÿrta ma nê hkĩnh nê. Hãmri nê hã hkôt ri mẽ mör xwÿnhjê mã kãm:

—Kwa xà na ka mẽmyja kapêr ma? Mẽ pahkĩnh ã kêp Ijaew kêt tã mẽ arom amnhĩ kaxyw inhmã hamaxpêr tÿx nê. Aa mẽ atõ uràk nê ã amnhĩ kaxyw inhmã ajamaxpêr tÿx anhÿr kêt tã nhũm mẽ arom kãm àpênh xwÿnh kaxyw ã inhmã hamaxpêr tÿx anê.

¹¹Nà koja nhÿrmã mẽ hkwÿjaja kêp Ijaew kêt tã ohtõ nê pika piitã kurũm ma Tirtũm mẽ wa inhõ krî hwÿr api nê hwÿr agjê. Nê wa ixkuri wa inhõ krî kamã Ijaew pàr krax pê Apraãw nê Ijak nê Jako mẽ pimràatã pa ho pa. Mẽ kêp Ijaew kêt tã mẽ ìhkô hã apkur mex o hkrî nhũm Tirtũm mẽ ho mex rax o pa.

¹²No pêr mẽ apê Ijaew kwÿjaja kot kaj mẽ hkôt hwÿr agjêx kêt nê. Tirtũm kãm hwÿr mẽ agjêx prãm tã ka mẽ axtem nê hkaga. Jakamã kot kaj mẽ ma kamàt kô xihtÿx rax wÿr ajapêx nê mẽ kêp awry rax nê mẽ kot amnhĩ xà htÿx kamã hamak tũm xàta kamã apa ho apa. Hãmri nê tee ri mẽ ixwÿr agjêx prãm kaprÿ nê akaprÿ xàg mur nê amnhĩ

kamã agryk tÿx nê. No ãm tee ri amnhĩ kamã agryk kaprÿ. Mẽ ate Tirtũm kapêr kaga nê hkôt amnhĩ xunhwÿr kêt jakamã kot kaj mẽ nhÿrmã ã amnhĩ nhĩpêx anê. Anê.

¹³Nhũm pre ã Jejusja mẽ kãm kapêr anê. Hãmri nê pòristi krãhtũmta mã kãm:

—E mãmrÿ ma akupÿm tẽ nê amã àpênh xwÿnhja pumu. Ra ate kaxyw inhmã ajamaxpêr tÿx jakamã na pa ra akupÿm amã ho mex. E akupÿm tẽ nê omu.

Anhÿr o kãm kapêr rôm nhũm ra akupÿm kãm mex kurê kumrêx.

*Jejus kot ahpÿnhã mẽ à xwÿnhjê ho mex
Makre 1.29-31; Rukre 4.38-41*

¹⁴Tã nhũm Jejus ma Simãw Pêtre nhôrkwÿ hwÿr tẽ nê hwÿr axà. Nhũm Simãw Pêtre xupãnhgêx ra à nê hkà kagro htÿx nê nô.

¹⁵Hãmri nhũm Jejus hwÿr axà nê omu nê ìhkra hã kupy nhũm hkà hakry nê akupÿm hihtÿx kurê kumrêx. Jakamã kãnhmã nhÿ nê mẽ kãm mẽõ hã àpênh o ri mra.

¹⁶Tã nhũm ra awjakry. Ra kamàtre ho mō nhũm mẽ piitã Jejus wÿr mẽ à xwÿnhjê ho mra. Nê mẽkarõmnuti kot mẽ hwÿr gjêx xwÿnhjaja nhũm mẽ hwÿr mẽ o mra. Hãmri nhũm mẽ omu nê akupÿm mẽ piitã mẽ ho mex. Mẽ à xwÿnhjê ho mex nê mẽ hkwÿjê nê mẽkarõmnuti jano. ãm kapêr pix o mẽ nê mẽ hano nhũm mẽ kêp hapôj nê ma hapêx.

¹⁷Na pre ra Tirtũm nhÿ hã kapêr xwÿnh finat Ijaisja ã amnhĩ nhĩpêx anhÿrja kukamã amnepêm mẽ kãm harênh o:

Tirtũm kot mẽ pahwÿr mẽnh mã xwÿnhja koja nhÿrmã wrÿ nê mẽ panê mẽ paxà piitã rênh pa nê akupÿm mẽ pahto mex pa. Anê.

Na pre ã finat Ijaisja Jejus kukamã harênh anê. Tã nhũm wrÿ nê kot harênh xà hkôt ã amnhĩ nhĩpêx anhÿr o pa.

*Wa kãm Jejus kôt amnhĩ xãm prãm xwÿnh
wa harênh
Rukre 9.57-62*

¹⁸Tã nhũm Jejus amnhĩ pu hã rÿt nê tee ri hwÿr mẽ mrar xwÿnhjê pumu hãmri nê hkôt mẽ pa ho mẽ pa xwÿnhjê mã kãm:

—E ma pu mẽ pàr mã agjê nê ma xarmã mō. Anê.

19 Hāmri nhũm mẽ nojarêt rôm nhũm Tĩrtũm kapêr tũm o mẽ ahkre xwỳnhjê hõ Jejus wỳr tẽ nẽ kãm:

—Pa mẽ ijahkre xwỳnh? E pa ma akôt ri ixa pa ho ixa nà. Anẽ.

20 Hāmri nhũm kuma nẽ kãm:

—Ko ka mã. Kam nẽ rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwỹ. Nẽ kuwênhre pĩ nhĩmõk ã hikwỹ. No pa ixpê Tĩrtũm kot mẽ awỳr inhmênh xwỳnh tã mry hkĩnhã inhõrkwỹ hkêt. Na pa hte amarĩ nhãm krĩ hwỳr ixa nẽ nhãm hõ hwỳr ixa. Tã xà kot ka ixpyrà nẽ ã amnhĩ nhĩpêx anhỹr o ri apa nà? Anẽ.

21 Hāmri nhũm pãnhã hõja hwỳr tẽ. Ra mẽ kot hkôt amnhĩ xunhwỳr xwỳnhjê hõja hwỳr tẽ nẽ kãm:

—Pa Pahihti. E pa amã amnhĩ jarẽ ka inhma. Kot paj ma akôt ixa pa ho ixa no ãm kormã. Koja nhỹrmã inhĩpêxà tanhmã amnhĩ to nẽ ty mãn. Pa haxà hāmri nẽ rĩ kormã ma akôt ixa pa ho ixa. Anẽ.

22 Hāmri nhũm kuma nẽ kãm:

—Kwa nà ri ã ajamexpêr anhỹr kêt nẽ. Ma ixkôt apa ho apa kurê kumrêx. Kê mẽmoj inhnê ano kupyrry apê àmnàr kêt nẽ. Kwār mẽ htĩr tũm nẽ mẽ pa hkêt mã xwỳnhjaja mãn axwakre kamã amã anhĩpêxà jamãr o pa nẽ haxà. Anẽ.

*Jejus kot kôk o pinhkrênh jarênh
Makre 4.35-41; Rukre 8.22-25*

23 Tã nhũm mẽ ra xarmã nojarêt nhũm Jejus mẽ hkôt mẽ pa ho mẽ pa xwỳnhjaja pàr wỳr agjê hāmri nẽ himô raxja ã ma xarmã mõ.

24 Hāmri nhũm Jejus ra õtxwa nẽ ra gõr nẽ nõ. Puh nhũm naja hkoko ho mõ nẽ kôk xàpêr tỳx kumrêx. Nhũm gô kànhmã harĩ nẽ axpên tak tỳx nẽ. Xatã axpên tak nẽ pàr kre kamã axkapĩ nhũm ra àr o mõ. Hāmri nhũm mẽ tee ri omu nẽ kãm ma htỳx kumrêx. Nẽ tee ri amnhĩ nhĩpêx. No nhũm Jejusja htỳx gõr nẽ nõ.

25 Hāmri nhũm mẽ hwỳr hprôt nẽ kumra nẽ kãm:

—Kwa Pahihti. Kot puj mẽ jarãhã pahtyk pa. Kwa tokyx kànhmã nhỹ nẽ ri tanhmã amnhĩ nhĩpêx to wehe. Anẽ.

26 Hāmri nhũm hkrãkato nẽ kànhmã nhỹ nẽ kôk mã kapêr nẽ kãm:

—E kwa hāmri anhĩkrê. Anẽ.

Puh nhũm hpinhkrênh pa nhũm gõja tãm nõr kurê kumrêx. Hāmri nhũm Jejusja hkôt mẽ pa ho mẽ pa xwỳnhjê hwỳr apkjê nẽ mẽ kãm:

—Hêxta waa nẽ. Kwa pêr ãm kormã te mẽ ate amnhĩ kaxyw Tĩrtũm mẽ wa inhmã ajamexpêr tỳx kêt pyræk. Hã na ka mẽ amã ma xàj tee ri amnhĩ kukamã ajamexpêr. Anẽ.

27 Hāmri nhũm mẽ amnhĩ jaêr pê ã kot amnhĩ nhĩpêx anhỹrja ã omu nẽ tee ri hamexpêr nẽ axpên pumunh pê omunh o kuhê. Hāmri nẽ axpên mã:

—Kokỹỹ. Pêr Jejus kêp mẽ panhĩõ hkêt. Mẽ pahtõ kot pu we te kot amnhĩ nhĩpêx pyrà nẽ kôk mã pakapêr nhũm hpinhkrênh kurê kumrêx? Nà Jejusja mẽ pakurom àhpumunh tỳx o àhpumunh tỳx. Anẽ.

*Jejus kot wa nê mẽkarõmnuti janor
Makre 5.1-20; Rukre 8.26-39*

28 Tã nhũm mẽ ra himô rax pê Garirejja ã rê nẽ pika pê Geras wỳr pøj nẽ kamã mõ. Hāmri nhũm ra mēhõ myja wa hamêxkrut nẽ mẽ kutã tẽ. Ra mẽkarõmnuti kot hamẽ wa hwỳr gjêx xwỳnhja wa. Mẽkarõmnuti xohtõ kot tanhmã wa ho jakamã nhũm wa oprê htỳx nẽ hihtỳx rax nẽ wa pa. Jakamã nhũm mẽ piitã kãm wa uma nẽ amnhĩ nẽ mẽ htykjê jagjênh xà hã kên kre kaêx kãm wa kumê nhũm wa kamã pa ho pa. Jakamã nhũm wa Jejus kutã tẽ nẽ amnhĩ wỳr omu hāmri nẽ amnhĩ nẽ tanhmã kãm kapêr to. Nom mẽkarõmnuti nhỹ hã àmra kamã kãm kapêr nẽ kãm:

29 —Pa Tĩrtũm Kra Jejus? Mo kaxyw na ka mẽ ixwỳr tẽ? Kwa tanhmã mẽ ixtõ hkêt nẽ. Ate tanhmã mẽ ixtomnu hto hã arĩgrota kormã katoore hã. Anẽ.

30 Nhũm ra krĩ nhõ xwỳnhjê hkrit hagrô ohtõ nẽ ri mẽ hpum pa.

31 Nhũm mẽkarõmnuti mẽ omu hāmri nẽ amnhĩ to Jejus wỳ nẽ kãm:

—Kwa kot ka jahti wa nê mẽ ijapôx japêr nẽ mẽ kot amnhĩ xà htỳx kamã hamak tũm xàta wỳr mẽ ixrênh kêt nẽ. Hagrô hkwy mũj wỳr mãn mẽ ixrê pa mẽ hpãnhã hwỳr mãn hagjê nà? Anẽ.

32 Hāmri nhũm mẽ kuma nẽ mẽ kãm:

—Tõe mẽ tãm mẽ hwỳr mãn mra. Anẽ.

Hāmri nhūm mē kuma nē myta wa kēp hapôj nē hagrô hwÿr mrar kurê kumrêx nē hpānhā kām gjêx pa. Hāmri nhūm hagrôta mēkarōmnuti pymaj amÿra nē ma hprôt nē himô hā hixêt prêk ã axpum rôrôk nē gôx kām mrô nē pikaprār pa.

³³ Hāmri nhūm hagrô jamār o ri mē pa xwÿnhjaja tee ri omu hāmri nē ma akupÿm krīm hprôt nē mē kām awjarē. Nē myta wa akupÿm tām hkrā hā harēnh o hprôt.

³⁴ Hāmri nhūm krī nhō xwÿnhjaja tee ri mē hkrit jarēnh ma nē ma piitā Jejus wÿr mra nē hkaxpa. Hāmri nē amnhī nē kām:

—E kwa mē ma amrar kurê kumrêx. Anē.

Hāmri nhūm mē kuma nē awjanā nē ma akupÿm pan rê.

9

ī kamā htyk xwÿnh jarēnh

Makre 2.1-12; Rukre 5.17-26; Juāw 10.37-

38

¹ Nhūm Jejus mē hkôt mē pa ho mē pa xwÿnhjaja awjanā nē ma akupÿm pâr wÿr mra nē gjêx pa nē akupÿm xarmā rê nē akupÿm Jejus nhō krī hwÿr mō.

² Hāmri nē hwÿr pôj nhūm krī nhō xwÿnh kwÿjaja mē omu nē ī kamā htyk xwÿnhja mÿ nē Jejus wÿr o tē. Nōr xà kamā nōr rāhā nhūm mē hā hije nē kumÿ nē hwÿr o tē. Hāmri nhūm amnhī tā mē omu. Ra mē kot hkrāmnhwÿta kaxyw kām hamaxpēr tÿx ã mē omu nē ī kamā htyk xwÿnhhta mā kapēr nē kām:

—Pa? Kwa tee ri amnhī kukamā ajamaxpēr kêt nē. Na pa ra apê tanhmā ate amnhī tomnuj to ho ijapêx pa. Kot paj axte kām ijamaxpēr kêt nē. Anē.

³ Hāmri nhūm Tirtūm kapēr tūm o mē ahkre xwÿnhjaja tee ri ã kot kām kapēr anhÿrja ã kuma nē axpēn mā:

—Tk. Kwa mēhō myti mÿj kēp Tirtūm kêt tā te ri kot amnhī nhīpêx pyrāk ã amnhī nhīpêx. Tirtūm pix na kot mē nē mē kot amnhī tomnuj o hapêx xwÿnh. Anē.

⁴ Hāmri nhūm Jejus amnhī tā mē kuma nē mē kām:

—Kwa mē ã ajamaxpēr anhÿr kêt nē.

⁵ Ixte mē nē mē kot amnhī tomnuj o ijapêx par ã amnhī jarēnh tā mē ate ja kôt ixpumunh kêt jakamā na ka mē ja kaxyw ixkôt ajamaxpēr kêt nē. Nom kot paj mē

anoo mā akupÿm ī kamā htyk xwÿnhhta o mex ka mē apiitā hā ixpumu hāmri nē ixkôt ajamaxpēr kurê kumrêx. Ixpê Tirtūm kot mē awÿr inhmēnh xwÿnhhta na pa. Ixte mē anē mē ate amnhī tomnuj rēnh kaxyw na pre mē awÿr inhmē pa mē awÿr wrÿ.

⁶ Tā mē ate ja hā ixpumunh kaxyw kot paj mē anoو mā ja ho mex.

Anhÿr o mē kām amnhī jarē hāmri nē ī kamā htyk xwÿnhhta mā kām:

—E kànhmā xa nē anōr xàta py nē ma akupÿm anhōrkwÿ hwÿr tē. Anē.

⁷ Puh nhūm kànhmā ãm kurê kumrêx nē nōr xà py nē mē noo mā kato nē ma akupÿm ōrkwÿ hwÿr tē.

⁸ Hāmri nhūm mē piitā no hapôx rūnh nē omunh o kuhê nē kamā no puma htÿx nē. Nē tee ri omu nē axpēn mā:

—Kokÿÿ. Kwa aa mē pahte ã mēhō kot amnhī nhīpêx anhÿr ã omunh kêt tā jarāhā ja pumu.

Anhÿr o Jejus jarē hāmri nē ÿ hā Tirtūm mā mex o mex ã harē.

*Jejus kot amnhī kôt Matêwre hwÿr
Makre 2.13-17; Rukre 5.27-32*

⁹ Tā nhūm Jejus mē kēp kato nē hkôt mē pa xwÿnhjê mē nhūm mē ma mō. Hāmri nē pa ixpê Matêwre ixpumu. Ixte Rōm kām mē ho amnhīptār xwÿnh mā krī nhō xwÿnhjê pē kàxpore hkwÿ jamÿnh xwÿnh na pa pre. Nom mē kot ho tewēn kryre htā ixte amnhīm hkwÿ ho ixârīk prām xàj na pa pre hte mē kām ho rūnh nē harē. Jakamā nhūm mē piitā kām ixkīnh kêt nē. Tā pa pre mē kēp kàxpore jamÿnh xà hā ixkre kamā mē kēp hamÿnh o nhÿ nhūm Jejus mē hkwÿjaja ijānh mra nē ixpumu nē amnhī kôt ixwÿ nē inhmā:

—Pa? E axapēnhhta kaga nē hpānhā amnē mē ixkôt mǎn tē nē ixkôt mǎn ri apa ho apa. Anē.

Hāmri pa kuma nē ixapēnh kaga nē ma hkôt tē. Nē hpānhā hkôt ixpa ho ixpa.

¹⁰ Hāmri nē mēmo arīgro hā amnhī nhōrkwÿ hwÿr Jejus nē hkôt mē pa ho pa xwÿnhjaja mē ixkrāmnhwÿ hkwÿjê hwÿ. Nhūm mē piitā mra nē inhōrkwÿ hwÿr agjê nē ixkutā apkur o hkrī. Nē ixpyrà nē Rōm nhō pahi mā mē kēp kàxpore hkwÿ

jamÿnh xwÿnh kwÿ haxwÿja ixwÿr mra nê mē ixkutā apkur o hkrī.

¹¹ Hāmri nhūm Parijew nhō xwÿnhjaja mra nê inhōrkwÿ kapem mē ixàpkur ā mē ixpumu. Nē tee ri mē ixkaêx ā Jejus pumu hāmri nê hkôt mē pa ho mē pa xwÿnhjê hwÿr agjê nê mē ixtā mē kām akir nê mē kām:

—Kwa mē kot jajê kutā apkur kêt tã mē akrāhtūmja axtem nê mē kutā apkur o nhÿ. Kwa nà mē kot amnhī tomnuj xwÿnh kênā. Jejus kot amnhī to mex ronhÿx mē kutā apkur kêt nê. Anê.

¹² Hāmri nhūm Jejus amnhī tã ā mē kapēr anhÿrja ma nê mē kām:

—Tk. Nà ixte tām mē unhwÿr kaxyw na pa mē kutā ixàpkur o nhÿ. Xà na hte tōtōja mē mex xwÿnhjê hwÿr mra nê mē hkane? Nà ām mē à xwÿnhjê pix wÿr na hte mra nê tanhmā mē hkane hto. Ra mē ate ja pumunh mex. Tã ja pyrā nê na pa pre mē kot amnhī to mex xwÿnhjê hwÿr ixwÿrÿk kêt nê. Mē kot amnhī tomnuj xwÿnhjê pix wÿr na pa pre wrÿ. Ixte tām mē unhwÿr kaxyw mē hwÿr wrÿ nê ā jajê kutā ixàpkur o inhÿr anê.

¹³ Ga mē ma mra nê Tirtūm kapēr ā kagā htūm kot ja jarēnhja kamā harê nê ama. Harēnh kot:

Na ka htem inhmā tanhmā amnhī jarēnh to kaxyw hāmri nê inhmā mēmoj gō nê tanhmā ixto mex to. Nom kêr ka mē ām ja pix ho anhÿr kêt nê. Mē määnēn mē piitā tanhmā mē ho mex to ho ri apa. Anê.

—Ā Tirtūm kapēr ā kagā htūm kot ja jarēnh kot anhÿr. Tã ja pyrā nê na pa pre mē kot amnhī tomnuj xwÿnhjê hwÿr wrÿ nê mē kamā ixukapri ho ixpa. Mē kot amnhī tomnuj kaga nê hpānhā tām amnhī nhīpêx kaxyw na pa pre ā mē hwÿr ixwÿrÿk anê. Tã ka mē ri atÿx amnhī krā hkôt ā ixto akapēr anê. Anê.

Mē kot mēmoj tã Jejus kukjêr

Makre 2.18-20; Rukre 5.33-35

¹⁴ Tã nhūm Juāw Paxis kôt mē pa xwÿnhjaja Jejus wÿr mra nê mēmoj tã hkukja nê kām:

—Pa? E ot pa mē awÿr mra. Kwa mē inhmā mēmoj jarê. Na pa htem tōhā Parijew nhō xwÿnhjê pyrā nê ixàpkur kêt kām

Tirtūm mā amnhī jarê. Tã nom akôt mē pa ho mē pa xwÿnhjaja na htem àmnhīx apkur o pa kamā kām amnhī jarēnh o pa. Kwa mo na htem mē ixpyrà nê tōhā apkur kêt kamā kām amnhī jarēnh kêt nê? Anê.

¹⁵ Hāmri nhūm mē kuma nê mē kām:

—Nà mo kaxyw kot kêt mē apkur kêt rāhā kām amnhī jarê? Mē hkaprīre hā. Mē kot ixkôt pa ho pa hā amnhī pumunh jakamā na htem hkīnh nê ixkôt pa. Kormā ixte mē kamā ixpa kênā kot kêt mē apkur kêt rāhā Tirtūm mā tanhmā amnhī jarēnh to. Xà na htem hkrāmnhwÿ hā hkīnh kaxyw hā akuprō nê hkaprī nê apkur kêt o kamāt nê mÿr o hkrī? Nà na htem anhÿr kêt nê. Na htem hā akuprō nê hkīnh nê hā apkur rūnh nê. Ja pyrā nê na hte ixkôt mē pa ho mē pa xwÿnhjaja ixkôt kormā àmnhīx hkīnh nê apkati mē apkur o pa. Nom koja mē kām ixkurê xwÿnhjaja nhÿrmā tanhmā ixto hāmri nhūm mē hkaprī htÿx nê rī kormā tōhā apkur kêt rāhā Tirtūm mā amnhī jarê. Anê.

Mē pahte Jejus kôt amnhī nhīpêx

Makre 2.21-22; Rukre 5.36-39

¹⁶ Nhūm Jejus mē piitā mē kām kapēr nê mē kām:

—Mē kot amnhī tomnuj xwÿnhjaja ra mē kot amnhī nhīpêx tūm o amnhī pyrāk jakamā na htem tanhmā mē kot amnhī nhīpêx nyw tota kaga.

¹⁷ Tã ixte amnhī nhīpêx nywja te kot mē ate amnhī nhīpêx tūm pyrāk kêt jakamā na ka htem ixkapēr ma nê ām ama. Kwa mē inhma nê mē ate amnhī nhīpêx tūmja gryk ā ixkaga hkêt nê. Anê.

Mē hkra htyk nê mēhō ni kamrô wa harēnh

Makre 5.21-43; Rukre 8.40-56

¹⁸ Nhūm pre ā Jejus mē kām kapēr anhÿr o xa. Rôm nhūm mēō pahihtija tē nê mar o xa. Hāmri nê hamaxpēr o:

—Kokÿÿ. Jejusja ām hāmri kēp pahi maati kumrêx. Hā na ri ā kapēr mex anê. E pa hwÿr tē nê ixkrare ho kuwÿ. Anê.

Hāmri nê hwÿr tē nê kutā hkōnkrā ho nhÿ nê kām:

—Pa akupÿm mē ixto mex xwÿnh? E ot pa awÿr tē. Kwa ma ixkôt tē nê inhmā ixkra nire pumu nê tanhmā inhmā ho kē

akupÿm inhmã htîr. Na ham ixpê ty pa kaxyw amã ijamaxpêr nê man awÿr tẽ. Anê.

¹⁹ Hãmri nhũm kuma nê kãm:

—Tôe. Nà kot paj ma akôt tẽ. Anê.

Hãmri nê ma hkôt tẽ. Mẽ ixpê hkôt ixpa ho ixpa xwÿnhjê mẽ pa mẽ ma hkôt mō.

²⁰⁻²¹ Nhũm mēhō ni kamrō rāhã ho pa xwÿnhja ma mẽ ixkôt tẽ. Na pre hte hkamrō hkryre rāhã ho pa hã amgrã pê 12 nê tee ri kãm amnhĩ mex prãm o pa. Jakamã Jejus jarēnh ma nê amnhĩ kaxyw kãm hamaxpêr kurê kumrêx nê hamaxpêr o:

—Ma pa kop ma hwÿr tẽ nê kêp ê nhîrê pix kupênh tã akupÿm inhmex japêr. Anê.

Hãmri nê ma mẽ ohtôjê kaêx kôt hwÿr tẽ. Nê katut kôt tẽ nê kêp ê nhîrê kupê.

²² Hãmri nhũm Jejus ho hakêx nê amnhĩ tã omu nê kãm:

—Pa? Kwa tee ri amnhĩ kukamã ajamaxpêr kêt nê. Ate amnhĩ kaxyw inhmã ajamaxpêr tÿx jakamã na ka ra akupÿm amex. E mãmri ajamakêtkati nê ri apa. Anê.

Hãmri nhũm akupÿm mex nê hkînh tÿx nê ma akupÿm tẽ.

²³ Hãmri pa mẽ ma htyk xwÿnh nhîpêêxà hkôt mra nê ôrkwÿ hwÿr agjê nê mẽ pikuprōnh xwÿnhjê pumu. Nhũm mẽ ra mẽ hã htu rax nê. Nê omũj ri kaprĩ xaj pifti kakôr o hkrĩ nê omũj ri mur. Kàx pê mur nê amnhĩ tak o hkrĩ.

²⁴ Hãmri nhũm Jejus mẽ hwÿr axà nê mẽ omu. Nê ra kot my hkrata htyk ã omunh tã kuri mẽ mÿr o mẽ hkrĩ xwÿnhjê mã kapêr nê mẽ kãm ãm ôt nê nôr ã harê nê mẽ kãm:

—Pa? Kwa mon ka mẽ ri akaprĩ nê amÿr o akrĩ? E mẽ ma mra. Na wa hkrata wa kêp htyk kêt nê. Na ãm gôr nê nō. Anê.

Hãmri nhũm mẽ kot ra htyk ã omunh mex jakamã kuma nê ãm kuma. Nhũm mẽ hkwyja axtem nê ri axpên mã hã hpêr o pikênh o hkrĩ.

²⁵ Hãmri nhũm kapôt mã mẽ hano nhũm mẽ hapôj nê kapôt ã kuhê. Hãmri nhũm Jejusja htyk xwÿnhhta wÿr axà nê hpa hã kupy nê kãnhmã ãm nhũm akupÿm htîr nê kãnhmã ãm kurê kumrêx.

²⁶ Hãmri nhũm mẽ piitã akupÿm htîr kãm omu nê ma ri krĩ piitã hkôt ri mẽ kãm harēnh o hprôt.

Wa nohkre xwÿnh wa harēnh

Matêwre 20.29-34

²⁷ Tã nhũm Jejus kato nê ma tẽ. Pa mẽ hkôt ixpa ho ixpa xwÿnhjaja ma hkôt mō. Hãmri nhũm wa myja wa hamêxkrut. Hamê wa nohkre xwÿnh wa Jejus jarēnh ma nê hã ajêt nê hkôt rôrôk o mō. Nê xatã amnhĩ to hwÿr o hkôt rôrôk o mō nê kãm:

—Pa Jejus? E Tirtũm kot mẽ ixkaxyw axãm jakamã kwa wa ixpumu nê wa ixkamã axukaprĩ kêt wehe. Anê.

²⁸ Hãmri nhũm wa kuma nê wa hkukamã nhÿri ixkrem axà nhũm wa hkôt axà nê xa nhũm wa omu nê wa kãm:

—Pa? E xàn ka wa ra amnhĩ kaxyw inhmã ajamaxpêr tÿx nê nà? Anê.

Hãmri nhũm wa kãm:

—Tÿ. Wa ixte amnhĩ kaxyw amã ijamaxpêr tÿx kênã. Anê.

²⁹ Hãmri nhũm wa kuma nê hamê wa no hã ìhkra xi nê wa kãm:

—Tôe. Nà war ate tanhmã amnhĩ kaxyw inhmã ajamaxpêr to xà hkôt kot paj war anhîpêx. Anê.

³⁰ Hãmri nhũm wa akupÿm rît mex kurê kumrêx. Hãmri nê akupÿm kato nê ma htêm kaxyw nhũm wa kãm:

—E kêt ka wa nhãm mẽ kãm ixte war ato mex ã ijarēnh kêt nê. ãm kwarĩ ho kwarĩ.

³¹ Anhÿr tã no nhũm wa kuma nê ãm kuma nê wa ma tẽ nê krĩ pu hã mẽ piitã mẽ kãm ri war amnhĩ tã harēnh o mra.

Kapêr kêt xwÿnh jarēnh

³² Tã nhũm Jejus ma axte nhÿhÿm mẽ ixto mō. Hãmri nhũm mēhō my mẽkarōmnuti kot hwÿr àr nê tanhmã ho nhũm kapêr kêt nê pa xwÿnhja nhũm mẽ Jejus wÿr o tẽ.

³³ Hãmri nhũm omu nê nê mẽkarōmnuti jano nê kãm:

—E kêp akato nê ma tẽ. Anê.

Hãmri nhũm kuma nê kurũm kato nhũm akupÿm kapêr mex kurê kumrêx. Hãmri nhũm mẽ kot hã omunh xwÿnhjaja tee ri kot mẽkarōmnuti janor ã omu nê kamã no puma nê. Nê axpên mã:

—Kokÿÿ. Aa mẽ pahte ã mēhō kot anhÿr pumunh kêt kumrêx tã na pu mẽ jarāhã ja pumu. Anê.

³⁴ Nom nhũm mẽ hkwy pê Parijew nhō xwÿnhjaja axtem nê hã mẽ kãm kapêr o:

—Tk. Kot amnhĩ krã hkôt mẽ hanor kêt kênã. Mêkarõmnuti nhõ pahi nhỹ hã kot mẽ nê mẽ hanor kênã. Anê.

Jejus kêp mẽ pakamã ukaprĩ xwýnh Makre 6.34; Rukre 10.2-3; Juãw 4.35

³⁵ Tã nhũm Jejusja krĩ ho ohtô nê hkôt ri mẽ kãm Tĩrtũm kapêr jarênh o pa. Pa mẽ hkôt ixpa. Na pre hte nhỹri krĩ hwýr pøj nê mẽ kot Tĩrtũm kapêr o mẽ ahkre xà hã ixkre hwýr mra nê hwýr agjê nê mẽ pikuprõnh xwýnhjê jahkre. Nê mẽ kãm:

—E mẽ inhma. Tĩrtũm kãm mẽ apiitã mẽ ato hkra hprãm. Jakamã kwa mẽ ate amnhĩ tomnuj kaga hprãm xàj hkôt amnhĩ xunhwý nê kapêr kôt amnhĩ nhĩpêx. Jao amnhĩ nhĩpêx nyw o amnhĩ nhĩpêx o ri apa.

Anhỹr o mẽ kãm kapêr. Hãmri nê ahpýnhã ri tanhmã mẽ à kute xwýnhjê ho mex. Nhũm mẽ ohtô nê hkôt mar o pa.

³⁶ Hãmri nhũm mẽ omu nê kãm mẽ hkaprĩ nê. Na prem tee ri amnhĩ kukamã hamaxpêr o pa jao ra hkaprĩ nê. Nhũm Jejus ja hã mẽ omu nê hamaxpêr o:

—Hêxta waa nê. Na mẽ mex kêt nê pa. Te mẽ kêp ôwêhti jamãr xwýnh kêt kot amnhĩ nhĩpêx pyrãk o htýx ri pa. Mêhõ koja kãm mẽ hkaprĩ nê tanhmã mẽ ho mex to ho pa? Anê.

Hãmri nê mẽ kamã ukaprĩ nê.

³⁷ Hãmri nê mẽ hã mẽ ixpê hkôt ixpa ho ixpa xwýnhjê mã kapêr nê mẽ inhmã:

—Nà na mẽ kormã ohtô rax nê Tĩrtũm kapêr mar kêt nê. No ãm kormã mẽ ate mẽ kãm kapêr jarênh o apa kaxyw mẽ agrêre. Te pur rax kãm ra harôj kamrêk par nê ãm tã no ãm kaxyw hikênh xwýnhjaja grêre pyrãk.

³⁸ Jakamã kwa mẽ ho Tĩrtũm wý kê axte mẽ kaxyw mẽ akwýjê rê kê mẽ apyrã nê ma mẽ hkôt ri mẽ kãm kapêr jarênh o pa. Anê.

10

Jejus kot mẽ ho 12 nê mẽ rênh Makre 3.13-19; Rukre 6.12-16

¹⁻⁴ Tã nhũm Jejusja hkôt mẽ ixpa ho mẽ ixpa xwýnhjê ho 12 nê mẽ ixrê. Mẽ ixte ma krĩ piitã hwýr inhmarr nê ý hã mẽ ahkre nê tanhmã mẽ à kute xwýnhjê ho mex o ixpa kaxyw. Nê ý hã mẽ nê mẽkarõmnuti janor o

ixpa kaxyw nhũm mẽ ixrê. Na pre mẽ ixto 12 nê mẽ ixrê. ã mẽ inhĩxi kot anhỹr.

Pêtre kumrêx na pre kuta. Hixi hõ pê Simãw.

Nê hkôt htõ Andreja ta.

Nê hkôt Jepetew kra Xiakreja ta.

Nê hkôt Xiakre htõ Juãwja ta.

Nê hkôt Firiptija ta.

Nê hkôt Patoromewja ta.

Nê hkôt Tomasja ta.

Nê hkôt pa ixpê Matêwre nhũm pre mẽ hkôt ixta.

Ixpê pahi nhỹ hã kãm mẽ kêp ixu-jamýnh xwýnh tã nhũm pre jajê hkôt ixta.

Nê ixkôt Apew kra Xiakre hõja ta.

Nê hkôt Tatewja ta.

Nê hkôt Simãw Jeroxja ta.

Nê hkôt Jut Kariotja ta.

Kormã kot mẽ kãm Jejus kurê xwýnhjê nhĩhkram õr mã nhũm Jejus kot amnhĩ kukamã omunh mex tã mẽ hkôt amnhĩ kaxyw kuta.

ã mẽ ixte ý hã mẽ ahkre o ixpa kaxyw mẽ ixrênh xwýnhjê nhĩxi kot anhỹr.

Jejus kot mẽ kêp 12jê mã mẽ àpênh ã karõ Makre 6.7-13; Rukre 9.1-6, 10.1-12, 10.14; mãânên Atre 13.50-51, 18.6

⁵ Hãmri nhũm Jejus mẽ ixrênh pa nê ma mẽ hwýr mẽ ixrênh kaxyw tanhmã mẽ inhmã kapêr to nê mẽ inhmã:

—E. Kêr ka mẽ ma mẽ piitã mẽ kãm ri ijarênh o apa. No ãm kormã mẽ kêp Ijaew kêt xwýnhjê nhõ pika hwýr apa hkêt nê. Rý mẽ kêp Samar nhõ krĩ hwýr ka mẽ apa hkêt nê.

⁶ ãm mẽ pahpê Ijaew nhõ krĩ kôt pix mã mãn ri apa. Mẽ kot tee ri amnhĩ kukamã hamaxpêr o pa jakamã te mẽ kêp ôwêhti pikunor nê htýx ri mex kêt nê pa pyrãk.

⁷ Jakamã kêr ka mẽ ma mẽ hwýr apa nê ã mẽ hkôt ri mẽ kãm akapêr o apa anê nê mẽ kãm: “E kot kaj mẽ ate amnhĩ tomnuj kaga nê Tĩrtũm kôt amnhĩ xunhwý hãmri nhũm amnhĩ tã mẽ apumu nê mẽ ato hkra. Jakamã e kwa mẽ tokyx hkôt amnhĩ xunhwý.” Anê. Kêr ka mẽ ã mẽ kãm akapêr anhỹr o ri mẽ hkôt apa.

⁸ Hãmri nê akupým mẽ à xwýnhjê ho mex o ri apa. Nê mẽ htyk xwýnhjaja ka mẽ akupým mẽ ho htĩr o ri apa. Nê mẽ hkãnhy

rũnh xwỳnhjaja ka mẽ akupỹm mẽ ho mex o ri apa. Nẽ mẽ kamã mẽkarõmnuti xwỳnhjaja ka mẽ nẽ mẽ hano. E kêr ka mẽ ã inhỹ hã mẽ ho mex o ri apa anẽ. Na pa amarĩ tanhmã mẽ ato ka mẽ inhmã amnhĩrer kêt tâ ra mẽ ate tanhmã mẽ ho mex to mã tãm. Tã kêr ka mẽ amnhĩ xwar amarĩ ri mẽ ho mex o ri mẽ hkôt apa. No ri mẽ ho mex pãnhã kàxpore hã axàhwỳr kêt nẽ.

9-10 —Nẽ kêr ka mẽ ma mẽ hwỳr apa kaxyw anojarêt hãmri nẽ amnhĩ kôt akukrêx rũnh o apa hkêt nẽ. ãm anhỹ kamã mẽ hwỳr apa. Nẽ akàxpore ho rax nẽ ho apa hkêt nẽ. Rỳ akawà kamã axê hkwỳ rỳ aparkà hõ xàr nẽ ho amõr kêt nẽ. Rỳ kô hõ py nẽ ri ho apa hkêt nẽ. ãm anhõ mrykà pix jamỳ nẽ ma ho apa. Kêr kê mẽ ate Tĩrtũm kapêr o mẽ ahkre nẽ mẽ ho mex xwỳnhjaja mãn amnhĩ pãnhã mẽ amã mẽ axàpkur xà gõ ka mẽ kutã axàpkur o ri mẽ hkôt apa.

11 —Nẽ kêr ka mẽ nhỹri krĩ hwỳr ajapôj nẽ kamã mẽhõ kot amnhĩ to mex xwỳnh japêr. Nẽ ra omu hãmri nẽ kuri mãn pôj nẽ hkôt apikamênh tãmã kurũm akupỹm ajapôj nẽ ma nhãm krĩ hõ hwỳr mra.

12 —Nẽ kêr ka mẽ mẽhõ nhõrkwỹ hwỳr pôj nẽ mẽ kãm: “E ot pa mẽ awỳr mõ. Nà koja Tĩrtũmja mẽ ato mex nẽ.” Anhỹr o mẽ kãm akapêr.

13 Koja mẽ ama nẽ amnhĩ wỳr awỳ ka mẽ amnhĩ tã mẽ omu nẽ mẽ kãm: “E koja Tĩrtũm mẽ ato mex nẽ ka mẽ ajamakêtkati nẽ ri axàmnhĩx apa.” Anhỹr o mẽ kãm akapêr. No koja mẽ amnhĩ nhõrkwỹ nẽ mẽ akurê nhũm Tĩrtũm ja hã mẽ omu nẽ mẽ ho mex kêt nẽ.

14 —Nẽ koja nhỹri krĩ hõ kamã mẽ akaga nẽ akapêr mar kêt japêr. Ka mẽ tee ri amnhĩ tã mẽ kamã ama hãmri nẽ tokyx mẽ kurũm ajapôj nẽ ma akupỹm apa. Nẽ akupỹm anojarêt nẽ mẽ noo mã akuhê nẽ amnhĩ par ã awjagrô kapĩ nẽ ma apa. Mẽ kot Tĩrtũm kaga hã amnhĩ pumunh kaxyw ka mẽ ã mẽ noo mã amnhĩ nhĩpêx anẽ. Hãmri nẽ ma nhỹhỹm hpãnhã apa.

15 Koja nhỹrmã Tĩrtũm mẽ kot amnhĩ tomnuj mỳrapê tanhmã mẽ ho. Na pre ã Sotõ mẽ Komo nhõ xwỳnhjê nhĩpêx anẽ. Na prem amnhĩ tomnuj tỳx nẽ nhũm Tĩrtũm tee ri ja hã mẽ omu nẽ tanhmã hã mẽ homnuj tỳx to. Tã jar mẽ kãm ixkapêr mar

prãm kêt nẽ mẽ kot ixkaga xwỳnhjaja koja ja hã mẽ omu nẽ kot Sotõ mẽ Komo nhõ xwỳnhjê nhĩpêx o mẽ hipêx. No ãm tanhmã mẽ ho htỳx o mẽ hakre. Anẽ.

Nhũm pre Jejus ã mẽ inhmã mẽ ixàpênh ã karõ anẽ.

Jejus kot mẽ kêp 12jê hkukamã mẽ harênh Makre 13.9-13; Rukre 12.11-12, mããnênh Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

16 Nhũm Jejus arĩ kot mẽ ixrênh xwỳnhjê mã kapêr nẽ mẽ inhmã:

—E kot paj ma mẽ hwỳr mẽ arẽ. Ma mẽ ate Tĩrtũm kapêr o mẽ ahkre ho ri mẽ hkôt apa kaxyw. Jakamã kot kaj mẽ te ôwêhti kot mry xoprê hwỳr amnhĩ to mrar nhũm kot hkwỳ hpar pyrak o amnhĩ nhĩpêx. Koja mẽ hkwỳjaja mẽ ate mẽ ahkre ma nhũm ja mẽ kêp omnuj nẽ nhũm mẽ hã tanhmã mẽ anhĩpêx to. Tã nom kêr ka mẽ tee ri amnhĩ kukamã ajamaxpêr nẽ amã mẽ uma hkêt nẽ.

17 —E kwa mẽ o kora. Kêr ka mẽ ma mẽ hwỳr mra nẽ amnhĩ nẽ mẽ htãnopxar o ri apa. Koja mẽ hkwỳjaja mẽ akapêr ma nẽ kêp mẽ aprãm nõkati. Nẽ mẽ apynê nẽ ma mẽ utàr xwỳnhjê hwỳr mẽ ato mra nẽ mẽ kãm tanhmã mẽ ato hêx to. Hãmri nhũm mẽ mar xà hkôt mẽ atak. Tĩrtũm kapêr o mẽ ahkre xà hã ixkre kamã koja mẽ ã mẽ anhĩpêx anẽ.

18 —Nẽ koja mẽ ixtã tanhmã mẽ ato kaxyw mẽ apynê nẽ ma mẽ õ pahi hwỳr mẽ ato mra nẽ tanhmã kãm mẽ ato hêx to. Nom kwâr mẽ mamrĩ ã mẽ anhĩpêx anẽ. Koja mẽ ato anẽ ka mẽ kutã akrĩ nẽ mẽ kãm Tĩrtũm kapêr jarê. Ijaewjê mã nẽ mẽ kêp Ijaew kêt xwỳnhjê mã.

19 —Nẽ koja mẽ ma mẽ õ pahi hwỳr mẽ ato mra nẽ ã mẽ anhĩpêx anẽ nom kêr ka mẽ tee ri tanhmã mẽ kãm amnhĩ jarênh to hkukamã ajamaxpêr kêt nẽ. Koja Tĩrtũm Karõ tãm tanhmã mẽ akrã hto ka mẽ õ ri mẽ kãm akapêr mex nẽ.

20 Nẽ kot kaj mẽ amnhĩ krã hkôt ri mẽ kãm akapêr kêt nẽ. Tĩrtũm Karõ nhỹ hã kot kaj mẽ õ ri mẽ kãm tanhmã axujarênh to.

21-22 —Nẽ koja mẽ hkwỳjaja ixtã mẽ akamã gryk nẽ. Nẽ mẽ atã ãmnênh pix o pa. Nẽ mẽ kot mẽ apar kaxyw mẽ akwỳjê hã amỹnê. Koja mẽ anhĩpêxà hkwỳjaja mẽ

apê mē hkra hã amÿnê. Nhũm mē akra hkwyjaja mē apê mē hipêêxà hã amÿnê. Nhũm mē atõ hkwyjaja mē apê mē htõ hã amÿnê. Nhũm mē akatorxàjaja mē atã amÿnê. Hãmri nhũm mē apa. No ãm kwãr mē mãmri ã mē anhîpêx anê. ã mē kot mē anhîpêx anhÿr tã kêr ka mē tee ri amnhî kukamã ajamxpêr pê ixkaga hkêt nê. Mē ãm amnhî to htÿx rãhã ty. Hãmri nê akaxwÿnhja ma Tirtũm mē wa inhõ krî hwÿr axàpir kurê kumrêx nê wa ixkuri akupÿm amex nê atîr tũm nê apa ho apa.

²³—Nê koja mē nhÿri krî hkwy kamã ixtã tanhmã mē anhîpêx hto ka mē mãmri mē kurũm ajapõj nê ma nhÿhÿm krî hõ hwÿr apa. Nê hpãnhã kamã mē kãm ri ijarênh o mē hkõt apa. Kot kaj mē kormã Ijaewjê nhõ krî piitã hwÿr apa hkêt ri pa akupÿn mē awÿr wrÿ. Kwa kêr ka mē ixkapêr mã ajamxpêr tÿx rãhã ri apa.

²⁴⁻²⁵—Mē ate ixkõt apa ho apa xwÿnh na ka mē. No pa na ixpê mē ajahkre xwÿnh. Jakamã koja mē kot tanhmã inhîpêx to ho mãânên mē anhîpêx. Koja mē nhÿrmã tanhmã inhîpêx to nê mã ixkõt mē ato anê nê. Mē pahte amnhî nhîpêxja kot axpên pyrãk. Jakamã koja mē ixpê Satanastî hã ijarê nê mãânên tanhmã mē ajarênh punuj to ho pa. Mē pahte amnhî nhîpêxja kot axpên pyrãk jakamã koja mē panhîpêx o axpên pyrãk.

²⁶—Tã nom kêr ka mē tee ri amnhî kukamã ajamxpêr pê amã mē uma ho apa hkêt nê. Na htem piitã axpên pê tanhmã hamaxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mē hamaxpêr piitã amnhîrit pa. Nê mēmoj piitã ra hpimxur mex tã koja nhÿrmã amnhîrit par kumrêx.

²⁷—Nê koja nhÿrmã mē piitã ixte amnhî nhîpêx kõt ixpumu. Na pa ra mē hkãx ã mē amã ixujarênh rax nê. Tã kêr ka mē ma mē piitã mē kãm harênh o ri apa. Nê ra ixte mē hkãx ã ahte ixte mē amã mēmoj jarênhka mē hpãnhã ma mē kãm harênh o ri apa kê mē apyrã nê harênh ma.

²⁸—E kêr ka mē amã mē kot tanhmã mē ato mã xwÿnhjê puma ho apa hkêt nê. Mē kot mē apar mã tã koja mē ãm mē akrãhkã pix pa nom tanhmã mē akaxwÿnh to hkêt

nê. Tirtũmja tapxipix na hte mē hkrãhkã nê mē hkaxwÿnh mē ho pimràatã kot amnhî xà htÿx kamã hamak tũm xàta wÿr mē rênh pumunh. Tã kot hwÿr mē arênh pymaj kêr ka mē amã kapêr kwÿm ri tanhmã amnhî nhîpêx to puma ho ri apa.

²⁹⁻³¹—Nê Tirtũm kot mē pahto hapêx par pumunh tã mãânên kot mē pajamãr mex. Mãn ka htem kuwênhre pumu. Na hte Tirtũm kuwênhre jamãr mex o pa. Mē piitã mē kot ãm omunh tã nom nhũm Tirtũm mē kurom hamãr mex pê mē htãnopxar rãhã ho pa. Tã kãm mē pajapê htÿx o kot kuwênhre jakrenh jakamã kwa mē tee ri amnhî kukamã ajamxpêr o ri akaprî nê apa hkêt nê. Koja Tirtũm mē pahtãnopxar rãhã ho pa. Kot mē panhî piitã omunh par. Nê ahpÿnhã tanhmã mē pahkrã hkî kute hkõt mē pahpumunh par. Tã kot mē pahtãnopxar rãhã jakamã mo kaxyw kot kaj kêt mē ri amã mē uma ho apa? Anê.

Mē pahte Jejus kõt amnhî xunhwÿr rÿ mē pahte hkaga jarênh

³² Nhũm Jejus arî kot mē hwÿr mē ixrênh xwÿnhjê mã kapêr nê mē inhmã:

—E kwa mē mãmri akwÿjê mã mē apê ixkwÿ hã amnhî jarênh o ri apa nê amã mē uma xàj tee ri amnhî nhîpêx kêt nê. Kot kaj mē kãm ra ate ixkõt amnhî xunhwÿr ã amnhî jarê. Pa ja hã mē apumu hãmri nê mē apyrã nê kaxkwa kamã Inhîpêêxã mã ra ate ixkõt amnhî xunhwÿr ã mē ajarê.

³³ Nom kot kaj mē kot ixtã tanhmã mē ato pymaj apê ixkwÿ hã amnhî jarênh kêt nê. Pa ja hã mē apumu hãmri nê nhÿrmã amnhî xwar Inhîpêêxã mã mē apê ixkwÿ hkêt ã mē ajarê. Jakamã kwa mē mãmri mē kãm apê ixkwÿ hã amnhî jarênh o ri mē hkõt apa kê mē ama nê amnhî kaxyw inhmã hamaxpêr japêr. Anê.

Mē kãm Jejus ã hkwyjê kurê xwÿnhjaja Makre 8.34-35; Rukre 9.24, mãânên Rukre 12.51-53, 14.26-27; Apokarip 12.11

³⁴ Nhũm Jejus arî kot mē hwÿr mē ixrênh xwÿnhjê mã kapêr nê mē inhmã:

—Ra mē awÿr ixwrÿk tã koja mē piitã ixkukwak ri hamakêtkati nê àmnhîx ri pa hkêt nê. Kormã. Koja mē akwÿjaja ixkapêr ma nê mē apyrã nê amnhî kaxyw ixkõt hamaxpêr. Nhũm mē akwÿjaja axtem nê

kuma nê ãm kuma. Hãmri nê ixtã tanhmã mẽ atomnuj to ho pa ka mẽ amnhĩ xà htýx kamã ajamak o ri apa.

³⁵ –Koja mẽ akrajaja ixtã mẽ apê mẽ hipêêxà nê mẽ katorxà kutã amnhĩ xunhwý. Nhũm mẽ wýjjaja ixtã mẽ umregêxjê kutã amnhĩ xunhwý.

³⁶ –Koja mẽ ã mẽ akwýjaja ixtã mẽ akutã amnhĩ xunhwýr anê. Mẽ anhõrkwy kamã mẽ akukwak ri pa htã ixtã mẽ akutã amnhĩ xunhwý.

³⁷ –Nê mẽ amã mẽ anhĩpêêxà nê mẽ akatorxà japêê. Nê mẽ amã mẽ akrajê japêê. Tã nom kot kaj mẽ gryk ã ixkõt amnhĩ nhĩpêx mex o ri apa hkêt hãmri nê apê ixkwý mã tãm kêt.

³⁸ Rý nhũm mẽ nhỹrmã ixtã mẽ apar kaxyw ka mẽ tee ri amnhĩ kukamã ajamaxpêr nê mẽ kot mẽ apar pymaj ixkaga hã kot kaj apê ixkwý mã tãm kêt nê.

³⁹ Koja mẽ nhỹrmã ixpĩ pa mẽ anê ty. Tã mẽ ate ixkõt amnhĩ nhĩpêx o apa xwýnhjaja. Koja mẽ ixpyrà nê ixtã mẽ apar mã tã kwa kêr ka mẽ amã atyk pymaj ixkaga hkêt nê. Kwãr mẽ mãmrĩ tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xà kamã ajamak kêt nê atĩr tũm nê amex rãhã apa ho apa. Nom kot kaj mẽ jar amã amex nê apa hprãm xàj ixkaga hãmri nê nhỹrmã wa ixri atĩr tũm nê apa ho apa hkêt nê. Anê.

Mẽ kot Jejus krajê ho mex xwýnhjê jarênh
Matêwre 25.34-40; Makre 9.41; Juãw 13.20

⁴⁰ Nhũm Jejus arĩ kot mẽ hwýr mẽ ixrênh xwýnhjê mã kapêr nê mẽ inhmã:

–E koja mẽhõ nhỹri mẽ apumu nê mẽ apê ixkra hã tanhmã mẽ ato mex to nê te pa kot ixto mex pyrãk. Nê kot kaj mẽ tanhmã pa ixto mex to nê te Tĩrtũm o mex pyrãk.

⁴¹ –Nê kot ka mẽ nhỹri Tĩrtũm nhỹ hã mẽ kãm kapêr jarênh xwýnhjê hõ tanhmã ho mex to nhũm Tĩrtũm hã apumu nê nhỹrmã hã ato mex nê. Rý ka mẽ mẽhõ kot Tĩrtũm kõt amnhĩ nhĩpêx xwýnhjê hõ pumu nê tanhmã ho mex to. Nhũm Tĩrtũm hã apumu nê mãânênh hã ato mex nê. Te ate mẽhõ ho mexta pyrã nê mãânênh ato mex nê.

⁴² Nhũm mẽhõ nhỹri mẽ kot ixkõt kormã amnhĩ xãm nyw nê kormã àhpumunh tohtuj anhýr xwýnhjê hõ pumu. Nê kãm kôr ã omu

nê hamaxpêr o: “Kwa Jejus kõt ri pa xwýnh mũj kãm kôr. Kormã kot Jejus kõt amnhĩ xãm týx kêt tã kêp hkwyý. E kot paj kãm gô hkwy kê ho ixkõ.” Anê hãmri nê kãm hkwy nhũm ho ixkõ. Hãmri nhũm Tĩrtũm hã omu nhũm kot kãm gô pix nhõr nhũm kot ho hkõm tã nhũm ja hã ho mex rax nê. Anê.

Nhũm pre ã Jejus kot mẽ hwýr mẽ ixrênh xwýnhjê mã kapêr ry rax anê. Mẽ ixpê 12jê mã ã kapêr anê.

11

Juãw Paxis kot Jejus jarênh mar

Rukre 7.18-23, 7.5, mãânênh Rukre 4.16-21

¹ Tã nhũm Jejus ra kot mẽ hwýr mẽ ixrênh xwýnhjê mã kapêr pa hãmri nê kato nê ma krĩ pu hã krĩ hkwyýê hkõt ri pa. Nê mẽ kãm Tĩrtũm kapêr jarênh o ri mẽ hkõt pa.

² Nhũm Juãw Paxisja arĩ kêp prês nê mẽ hagdênh xà kamã hkrĩ. Nhũm pre hte hkõt mẽ pa ho mẽ pa xwýnhjaja hwýr mra nê kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nê tee ri hkukamã hamaxpêr. Hãmri nê hkõt mẽ pa xwýnh wa ho axkrut nê wa kuta

³ nê hwýr wa kumê nê wa kãm:

–Kwa wa ma Jejus wýr tẽ nê hkukja nê kãm: “Xà ka na pre Tĩrtũm mẽ ixwýr amê nà? Xà kormã axtem mẽhõ na pa mẽ ri hamãr o ri ixpa?” Anhýr o hkukja hãmri nê tanhmã kot amnhĩ jarênh to hã ama nê man akupýn ixwýr tẽ nê inhmã harê. Anê.

⁴ Hãmri nhũm wa kuma nê ma hwýr tẽ. Nhũm Jejus kormã tanhmã mẽ à kute xwýnhjê ho mex o xa. Mẽ nohkre xwýnhjaja nhũm akupým mẽ ho mex. Nê mẽkarõmnuti kot mẽ hwýr gjêx xwýnhjaja nhũm mẽ nê mẽ hanor o ãm rãhã nhũm Juãw kõt wa pa xwýnhhta wa hwýr tẽn pøj. Nê kormã mẽ hã omunh o wa xa. Hãmri nê kãm Juãw Paxis kapêr jarê nhũm wa kuma nê wa kãm:

–Tý. Nà ãm hãmri na ja hã ijarê. Ixpê mẽ ate ixkamã ajamak o apa xwýnhhta na pa. Na ka wa kam ã ixte amnhĩ nhĩpêx anhýr ã ixpumu. Jakamã wa ma akupým tẽ nê aprĩ hã kãm ijarê.

⁵ Na pa hte akupým mẽ nohkre xwýnhjê ho mex. Nê mẽ hkãnhý xwýnhjaja pa akupým mẽ hkã ho mex. Nê mẽ hyk o mẽ pa xwýnhjaja pa akupým mẽ hte ho mex.

Ně mẽ htyk xwýnhjaja pa akupým mẽ ho mẽ htír. Ně mẽ kêp amrakati ně ri mẽ pa xwýnhjaja pa mẽ kãm mẽmoj mex jarěnh o ri mẽ hkôt ixpa. Ā na pa hte mẽ hipêx anhÿr o ri ixpa. Jakamã e wa ma akupým Juãw wÿr tē ně ã kãm ijarěnh aně.

⁶ Kê ijarěnh ma ně ixkôt hamaxpêr tÿx ně tee ri ixkukamã hamaxpêr kêt ně. Koja ã amnhĩ nhĩpêx aně ně hamakêtkati ně ri pa. E wa tokyx ma akupým tē ně kãm ã ijarěnh aně. Aně.

Jejus kot tanhmã Juãw Paxis jarěnh to Rukre 7.24-35

⁷⁻⁹ Nhũm pre ã Jejus Juãw Paxis kôt wa pa ho wa pa xwýnhja wa kãm amnhĩ jarěnh aně ně akupým hwÿr wa kumě nhũm wa ma akupým hwÿr tē. Hãmri nhũm Jejus mẽ kot mar o kuhê xwýnhjê mã tanhmã Juãw Paxisja jarěnh to ně mẽ kãm:

—Na ka pre htem kapôt ã Juãw Paxis mar kaxyw ma hwÿr mra. Nom ê mex ã omunh kaxyw rÿ hpijaam kãm tanhmã kapêr to hã mar kaxyw na ka prem hwÿr amrar kêt ně. Tirtũm nhÿ hã kapêr o pa jakamã na ka prem ate mar kaxyw ma hwÿr mra. Tirtũm nhÿ hã ixkukamã ijarěnh o pa xwýnh na. Ixpê Tirtũm kot mẽ akaxyw ixãm xwýnh ã na hte ijarěnh o pa. Ně hprĩ hã tanhmã mẽ amã ijarěnh to. Jakamã kapêrja mex o kot wam Tirtũm nhÿ hã kapêr jarěnh xwýnhjê kapêr piitã hakrenh par.

¹⁰ Tirtũm kapêr ã kagà htũm kot Juãw kukamã tanhmã harěnh to ně harěnh kot: Kot paj Ixkra hkukamã ma mẽ hwÿr harěnh xwýnhja mẽ nhũm ma ri kutêp mẽ kãm harěnh o pa. Mě kot mar ně kutêp tãm amnhĩ nhĩpêx o pa kaxyw.

—Anhÿr o Tirtũm Juãw Paxis kukamã harê nhũm prem hã kagà. Tã nhũm ixkukamã mẽ awÿr kumě.

¹¹ Juãw Paxisja na mex kumrêx. Na pre hprĩ hã ixkukamã tanhmã ijarěnh to ho pa. Tã nom ixkôt mẽ pa ho mẽ pa xwýnhjê hkĩnhã na pre ixkôt pa ho pa hkêt ně. Jakamã ixkôt mẽ pa ho mẽ pa xwýnhjaja kot ixkôt hprĩ hã ixkapêr mar o pa jakamã na mẽ mex o mẽ kot Juãw Paxisja jakrenh. Aně.

¹²⁻¹³ —Na pre finat Mojes kumrêx mẽ kãm Tirtũm kapêr kwÿ hã kagà. Tã nhũm hpãnhã Tirtũm nhÿ hã kapêr jarěnh xwýnhjaja Mojes mÿr pē hwÿ hã kagà. Nhũm prem kamã harê ně kuma ně hkôt amnhĩ nhĩpêx o pa. Hãmri nhũm Juãw Paxisja mẽ mÿrpê kato ně tãm Tirtũm kapêr o mẽ ahkre ho ri pa. Tã pa hpãnhã ho mẽ ajahkre ho ri mẽ akôt ixpa nhũm mẽ ohtô ně inhma ně ixkôt amnhĩ xunhwÿ ně kãm ixkapêr kôt pix mã amnhĩ nhĩpêx o ri pa hprãm ně.

¹⁴ —Amnepêm na pre Tirtũm nhÿ hã kapêr jarěnh xwýnhjaja mēhōja kukamã tanhmã harěnh to ho pa. Ně mẽ kãm harěnh o: “Koja nhÿrmã mēhō te Eris kot amnhĩ nhĩpêx pyrāk o amnhĩ nhĩpêx ně mẽ awÿr mō. Ně mẽ amã Tirtũm kot mẽ awÿr mēnh mã xwýnhja jarěnh o pa ka mẽ ama.” Anhÿr o mẽ kãm mēhō jarē. Tã kot paj mẽ amã kot hkukamã harěnh xwýnhhta nhĩxi jarē ka mẽ inhma. Nã Juãw Paxisja kukamã na prem ã harěnh anhÿr o pa.

¹⁵ —E kot pa mẽ amã mẽ piitã htÿx ri tanhmã mẽ hamaxpêr to ho mẽ pa hã mẽ amã mẽ harê ka mẽ harěnh ma.

¹⁶ Te mēhprĩre kot amnhĩ nhĩpêx pyrāk o na htem amnhĩ nhĩpêx. Mēhprĩrejaja na htem mẽ ōrkwÿ kapem mẽmoj to amnhĩkati ně tee ri hwÿjê kot amnhĩ nhĩpêx pumu ně mẽ kãm:

¹⁷ Kwa na pa mẽ amã gre htã ka mẽ ixkutã anhōkrepōx kêt ně. Pa mẽ ja hã mẽ apumu ně hpãnhã mẽ amã mẽ htyk jarē htã ka mẽ akaprĩ ně amÿr kêt ně. Kwa mẽ ri ã amnhĩ nhĩpêx anhÿr kêt ně. Aně.

—Mēhprĩjaja na htem ã axpēn mã kapêr aně. Tã te mẽ ate mẽ urāk. Tirtũm kot mẽ awÿr ÿ hã kapêr jarěnh xwýnhjê rēnh tã ka mẽ te mēhprĩre kot amnhĩ nhĩpêx pyrã ně mẽ ama ně ãm mẽ ama ně mẽ hkôt amnhĩ nhĩpêx kêt ně.

¹⁸ —Juãw Paxis na pre mẽ awÿr mō ně ixkĩnhã apkur mex o ri pa hkêt ně. Ně ixkĩnh ã wĩhti ho hkōm kêt ně. Ka mẽ ja hã omu ně hkaga ně atÿx ri Satanasti nhÿ hã tanhmã kot amnhĩ nhĩpêx to hã hkamnhĩx. Hãmri ně mēhprĩre kot amnhĩ nhĩpêxta pyrã ně hkôt amnhĩ nhĩpêx kêt ně.

19 Tã hãmri pa hpãnhã mẽ awÿr mō mẽ Juãw Paxis rom apkati mẽ ixàpkur mex o ri mẽ akôt ixpa. Nẽ kurom mẽ akutã wĩhti hkwȳ ho ixkōm o ri ixpa. Tã ka mẽ ja hã ixpumu mẽ atÿx ri ixàpkur rũnh mẽ ixpipãnh o ri ixpa hã ixkamnhĩx mẽ ã axpẽn mã ixto akapẽr anẽ. Nẽ mẽ kot amnhĩ tomnuj xwÿnhjê hkôt ri ixpa xwÿnh ã axpẽn mã ijarẽ. Á na ka htem axpẽn mã ijarẽnh anẽ. Jao te mẽ ate Juãw Paxis nhĩpêx pyrã mẽ ixkaga mẽ ixkôt amnhĩ nhĩpêx kêt mẽ. Na hte ã htÿx ri tanhmã mẽ hamaxpẽr to ho mẽ pa xwÿnhjaja amnhĩ nhĩpêx anẽ. No tãm ri mẽ hamaxpẽr xwÿnhjaja na htem ahpÿnhã wa ixte amnhĩ nhĩpêx ã wa ixpumu mẽ axpẽn mã wa ijarẽnh o: “Nà ahpÿnhã wa kot amnhĩ nhĩpêx tã no ãm hamẽ Tĩrtũm nhĩ hã kapẽr mex o pa. E pu mẽ wa uràk mẽ Tĩrtũm kôt amnhĩ xunhwÿ.” Anhÿr o axpẽn mã wa ijarẽ. Anẽ.

Mẽ kot Tĩrtũm kôt mẽ hamaxpẽr kêt xwÿnhjê jarẽnh

Rukre 10.13-15

20 Na pre hte Jejus krĩ piitã hkôt pa mẽ krĩ nhõ xwÿnhjê mã kapẽr mẽ mẽ kot amnhĩ tomnuj ã mẽ kãm kapẽr. Korajĩ mẽ Pese nhõ xwÿnhjê kumrêx mã kapẽr mẽ mẽ kãm:

21-22 —E mẽ inhma. Amnepêm krĩ pẽ Sitõ mẽ Xir wa kamã mẽ pa xwÿnhjaja na prem tanhmã amnhĩ tomnuj tÿx to ho pa nhũm Tĩrtũm tee ri ja hã mẽ omu mẽ mẽ kot amnhĩ tomnujta ã tanhmã mẽ ho. Tã kwa mẽ o kora Korajĩ mẽ Pesêj nhõ xwÿnhjaja. Ra ixte mẽ amã aa mẽ ate mẽmoj pumunh kêt kwÿ ho anhÿr rax tã ka mẽ omu mẽ ãm omu mẽ amnhĩ tomnuj kaga hkêt mẽ. Arĩ tanhmã amnhĩ tomnuj to ho ri apa. Mÿrapê kot kaj mẽ amex kêt mẽ. Kop apu Sitõ rÿ Xir kamã mãn ixte mẽ kãm aa mẽ kot mẽmoj pumunh kêt kwÿ ho anhÿr o ri ixpa ronhÿx mẽ omu mẽ mẽ arom amnhĩ kaxyw ixkôt hamaxpẽr tÿx kurê kumrêx. Nẽ tee ri kot tanhmã kot amnhĩ tomnuj to hã amnhĩ pumu mẽ hkaprĩ mẽ hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwÿ ho anhÿr o ixpa kaprÿ. Ka mẽ ja hã ixpumu mẽ ãm ixpumu mẽ amnhĩ tomnuj kaga hkêt mẽ. Jakamã koja nhÿrmã Tĩrtũm tanhmã mẽ atomnuj tÿx to. Nẽ tanhmã Sitõ mẽ Xir wa

kamã mẽ pa xwÿnhjê jarẽnh to nhũm mẽ kot amnhĩ tomnuj mÿrapê amnhĩ xà htÿx kamã hamak rãhã ho pa. No mẽ kajaja mẽ ate amnhĩ tomnuj tÿx o mẽ hakrenh jakamã koja Tĩrtũm mẽ hkĩnhã mẽ atomnuj tÿx kumrêx. Ka mẽ amnhĩ xà htÿx kamã ajamak rãhã ho ri apa kãm ga. Anẽ.

23-24 Nhũm pre ã Jejus mẽ kãm kapẽr anẽ. Nẽ hpãnhã Kapanaũ nhõ xwÿnhjê mã kapẽr mẽ mẽ kãm:

—No mẽ apê Kapanaũ nhõ xwÿnhjaja. Kot kaj mẽ ajaxwÿja mẽ uràk mẽ amex kêt mẽ. Ra ixte mẽ amã aa mẽ ate mẽmoj pumunh kêt kwÿ ho anhÿr rax nhũm mẽ ate hã ixpumunh tã amnhĩ tomnuj kaga hkêt tã Tĩrtũm mẽ wa inhõ krĩ hwÿr akrã. No ãm hwÿr akrã kaprÿ. Kot kaj mẽ atõ hwÿr axàpir kêt mẽ. Kop apu Sotõ nhõ xwÿnhjaja mãn kot ã ixte amnhĩ nhĩpêx anhÿr ã ixpumunh ronhÿx mẽ ra kot amnhĩ tomnuj kaga mẽ ixkôt amnhĩ xunhwÿr kurê kumrêx. No mẽ kajaja na ka mẽ ã amnhĩ nhĩpêx anhÿr kêt mẽ. Jakamã kot kaj mẽ nhÿrmã ma kuwy maatita wÿr ajapêx pa kãm ga. Anẽ.

Jejus kot õ Papaj mã amnhĩ jarẽnh

Rukre 10.21-22

25-26 Tã nhũm Jejus Tĩrtũm mã amnhĩ jarẽ nhõ kãm:

—Pa Papaj? Nà apê mẽ inhõ Pahi Maati na ka. Pikap ri mẽ pa xwÿnhjaja mẽ kaxkwa kamã mẽ pa xwÿnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tÿx ã mẽ kot amnhĩ to jarkrar xwÿnhjê mã axàhpumunh tÿx o amnhĩrĩt kêt mẽ. ãm mẽ àhpumunh kêt ã mẽ kot amnhĩ jarẽnh xwÿnhjê pix mã na ka hte axàhpumunh tÿx o amnhĩrĩt nhũm mẽ tapxipixjaja ja hã apumu. Nà ãm hãmri. ãm hãmri na ka hte amã hprãm xà hkôt ã mẽ piitã mẽ hipêx anhÿr o ri apa Papaj. Jakamã mẽ kot amnhĩ to hkryre xwÿnh pixjaja na htem hprĩ hã ate amnhĩ nhĩpêx kôt apumunh o pa. Anẽ.

Nhũm pre ã Jejus Tĩrtũm mã amnhĩ jarẽnh anẽ.

27 Hãmri mẽ hpãnhã mẽ kot mar o kuhê xwÿnhjê mã kapẽr mẽ mẽ kãm:

—Nà na pre ra Inhîpêêxàja inhîhkra kamã mêmôj piitã hagjênh pa. Ixte kãm ho amnhîptâr o ixa kaxyw. Jakamã tapxipix na kot ixpê Kra hã ixpumunh par. No jar pika ja kamã mē pa xwÿnhjaja na mē kot ja hã ixpumunh kêt. Nē papxipix na ixte Inhîpêêxà kot tanhmã amnhî nhîpêx to hã omunh par. Jakamã na pa hte ã amnhî nhîpêx o ri ixa anê nē inhmã hprãm xà hkôt mē hkwÿjê mã ho amnhîrît o ri ixa. Jakamã nhûm mē ixpyrà nē Inhîpêêxà kot tanhmã amnhî nhîpêx to ho pa hkôt omu.

²⁸⁻³⁰ —Nē tee ri amnhî kukamã mē ajamaxpêr o ri apa xwÿnhjaja te mē ate mêmôj pytî rax tur nē ahte ho apa pyrâk. Kwa mē ixkôt amnhî xunhwÿ nē ixte amnhî nhîpêx ã ixpumu. Ixte mē akamã ixukaprî xwÿnh na pa. Na pa hte mē akutã inhnojarêt rãhã ho ixa. Jakamã kot kaj mē ixkôt amnhî xunhwÿ pa te ixte mē anê mêmôj pytî ho ixwrÿk pyrâk o mē anhîpêx nē tãm mē axunhwÿ ka mē tãm ajamaxpêr nē tãm amnhî nhîpêx o ri apa. Mo kaxyw koja ixkôt mē kot amnhî nhîpêx o pa xwÿnhjaja tee ri amnhî kukamã hamaxpêr o pa? Nà na htem ixkamnâr rom hamakêtkati nē àmnhîx ri pa ho pa. Anê.

12

*Jejus kêp arîgromnu hpãm
Makre 2.23-28; Rukre 6.1-5*

¹ Tã nhûm Ijaew nhõ arîgromnu pê sapja kato. Hãmri nhûm Jejus mē hkôt ri mē ixa ho mē ixa xwÿnhjê mē pa mē ma mē hpur kôt ri nhÿhÿm ri ixa. Hãmri nē ra mē inhmã prãm nē mêmô hy te kot harôj pyrâk xwÿnhja kwÿ rê nē kugrà nē ma Jejus kôt hkanhar o mō. Mē ixpê Ijaew na pa htem axpên pur kãm ã amnhî nhîpêx anhÿr o ixa.

² Hãmri nhûm mē ixkwÿ pê Parijew nhõ xwÿnhjaja kãm mêmôj tã Jejus o kapêr prãm jakamã ã mē ixte amnhî nhîpêx anhÿr ã mē ixpumu nē mē ixtã Jejus kukjêr kurê kumrêx nē kãm:

—Kwa Tîrtûm kapêr tûm kot mē panhõ arîgromnu hã mē pahte mē hpur kãm mêmôj nhîkênh nē mē pahkurê htã nhûm ri akôt mē pa ho mē pa xwÿnhjaja axtem nē ã amnhî nhîpêx anhÿr o ri akôt pa. Mêmô

hyta rê nē akôt hkanhar o pa. Kwa mē kãm anê kê mē ã amnhî nhîpêx anhÿr kêt nē. Na htem arîgromnu hã mêmôj tã àpênh kêt kênã. Anê.

³⁻⁴ Hãmri nhûm mē kuma nē hprî hã mē kãm Tîrtûm kapêr jarê nē mē kãm:

—Tk. Xàn ka htem Tîrtûm kapêr ã kagà htûm kot pahi Tawi kot tanhmã amnhî nhîpêx tota kamã harênh nē mar kêt nē? Na pre hkôt ri mē pa xwÿnhjê mē nhûm mē prãm xàj Tîrtûm mã amnhî jarênh xà hã ixkre hwÿr agjê. Hãmri nhûm mē õ patre maatija mē kãm prãm tÿx ã mē omu nē kãm mē hkaprî nē mē kãm mêmôj gō. Mē kot Tîrtûm noo mã pãwti jaxwÿr xwÿnhhta gō nhûm mē kuku. Tîrtûm kapêr ã kagà htûm kot ja nê mē hkurê htã nhûm mē kãm prãm tÿx ã mē omu nē mē kamã ukaprî xàj mē kãm kugō. ãm mē õ patre pix kot ja hkur kaxyw tã nhûm mē kãm kugō nhûm mē kuku. Tã nom nhûm Tîrtûm ja hã mē omu nhûm ja kêp omnuj kêt nē. Kot mē kamã ukaprî nē mē kãm õr ã omu nhûm ja kãm mex nē.

⁵ —Mē panhõ arîgromnu htã na hte patre-jaja arî hã Tîrtûm mã amnhî jarênh xà hã ixkre kamã àpênh o pa. Tîrtûm kapêr ã kagà htûm kôt na htem arîgromnu htã nhûm mē arî hã apê nhûm Tîrtûm pê jamnuj kêt nē. Kumã mē àpênh xwÿnh kênã.

⁶ ãm hãmri na pa mē amã ja jarê. Tîrtûm mã amnhî jarênh xà hã ixkreta mex tã nom ixpê Tîrtûm Kra jakamã inhmex o ixte ixkreta jakrenh.

⁷ Tîrtûm kapêr ã kagà htûm kot ja harênh kot:

Kêr ka mē inhmã amnhî jarênh kaxyw nē ãm inhmã mêmôj nhõr pix pê inhmã amnhî jarênh kêt nē. Mē mãânênh mē kamã axukaprî o ri apa pê inhmã amnhî jarê. Ja na kêt inhmã hprãm.

—Ã harênh kot anhÿr. Tã mē ate aprî hã ja mar ronhÿx ka mē ixkôt mē pa xwÿnhjê kot mêmô hy rênh nē hkanhar o mör ã mē omu nē ri tanhmã mē ho akapêr to hkêt nē. ãm mē kãm prãm ã mē omu nē mē kamã axukaprî nē.

⁸ —Kêt pa na pre Tîrtûm mē akaxyw ixãm nē mē awÿr inhmê. Jakamã papxipix na pa hte arîgromnu hã tanhmã mē kot amnhî

nhîpêx to hã mẽ kãm karõ. Kwa mẽ jajê pumu nê mẽ kamã axukaprî kêt wehe. Kwãr mẽ mãmri mẽmo hyta rê nê hkanhar o ixkõt mō. Anê.

ĩkra grà xwỳnh jarēnh
Makre 3.1-6; Rukre 6.6-11

⁹ Nhũm pre ã Jejus Parijew nhõ xwỳnhjê mã kapêr anê hãmri nê Tĩrtũm kapêr o mẽ ahkre xà hã ixkre hwỳr tẽ nê axà.

¹⁰ Nhũm Parijew nhõ xwỳnhjaja tanhmã ho kapêr to kaxyw htãnopxar o kuhê. Jakamã nhũm ixkre kamã mēhõ my ĩkra grà xwỳnhja mẽ pikuprõnh xwỳnhjê nhĩhkõ hã nhỹ nhũm Parijew nhõ xwỳnhjaja omu nê axpẽn mã:

—Kwa pu mẽ jar pakuhê nê Jejus kot tanhmã amnhĩ nhĩpêx to hã omu. Xà koja arĩgromnu hã mũjti ho mex nà? Koja ho anê nê Tĩrtũm kapêr tũm kuhpa hã amnhĩ nhĩpêx. E pu mẽ kop xa nê hã omu. Anê.

Hãmri nê hã Jejus kukja nê kãm:

—E mẽ inhmã mẽmoj jarê. Xà na htem arĩgromnu hã akupỹm mẽ ho mex nhũm Tĩrtũm kãm ja mex nê nà? Anê.

¹¹ Hãmri nhũm mẽ hamaxpêr kõt mẽ omunh mex nê mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit òwēhti ahkrehti kamã tēm ka omu nê ãm omu nê arĩgro mex jamãr pē ho axàpir kêt nê? Nà kot kaj mẽ tee ri omu nê ho axàpir kurê kumrêx.

¹² Arĩgromnu hã mẽ ho mexja ja mex kēnã. Tĩrtũm mã mẽ pahpê panhĩja na mẽ pamex o mẽ hkrit jakrenh jakamã kêr pu mẽ tee arĩgromnu htã pu mẽ hã tanhmã axpẽn to mex to ho papa. Ja na Tĩrtũm kãm hprãm.

Anhỹr o mẽ kãm kapêr.

¹³ Hãmri nê hpãnhã myta mã:

—E anhĩkra katàt. Anê.

Hãmri nhũm ĩkra katàt nê mex kurê kumrêx.

¹⁴ Hãmri nhũm Parijew nhõ xwỳnhjaja tee ri ja hã omu nê Jejus kamã gryk nê. Arĩgromnu pē sap ã kot ho mex jakamã nhũm mẽ kamã gryk tỳx nê. Hãmri nê ma mra nê hapõj nê hã axpẽn kukjêr o kuhê nê axpẽn mã:

—Kwa ã kot amnhĩ nhĩpêx anhỹrja mỳrapê tanhmã kot puj wem ho? ã kapêr

anhỹrja o te mẽ papamjaja mẽ pahte hkĩnhã mẽ kamã paxukaprî kêt pyrãk ã mẽ pajarê. Koja mẽ pahkwỳjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkõt pix mã hamaxpêr. Kwa tanhmã kot puj wem ja nê ho?

Anhỹr o axpẽn kukjêr o kuhê.

Jejus kēp Tĩrtũm kot mẽ pahwỳr mēnh
xwỳnh ã harēnh
Makre 3.7-12

¹⁵ Hãmri nhũm Jejus amnhĩ tã Parijew nhõ xwỳnhjê jamaxpêr kõt mẽ omu hãmri nê mẽ kēp kato nê hpãnhã ma nhỹhỹm krĩ hõ hwỳr ma tẽ. Nhũm mẽ ohtõ nê omu nê ma hkõt mra nhũm mẽ omu nê akupỹm mẽ kãm mẽ à xwỳnh piitã ho mex.

¹⁶ Hãmri nê mẽ kãm:

—E na pa akupỹm mẽ ato mex. Nom kêr ka mẽ amnhĩ tã ixto axàmra ho ri apa hkêt nê. Ixpê Tĩrtũm Kra hã mẽ kãm ijarēnh kêt nê. ãm kwarĩ kumrêx.

Anhỹr o mẽ kãm kapêr.

¹⁷ Na pre ra amnepēm Tĩrtũm nhỹ hã kapêr xwỳnh finat Ijaisja Jejus kukamã mẽ kãm tanhmã harēnh to nê hã kagà. Te Tĩrtũm tãm kapêr pyrãk o harē nê hã kagà. Nê hã kagà ho:

¹⁸ Ota ixkõt amnhĩ nhĩpêx o pa xwỳnhhta xa. Pa na pa amnhĩ kaxyw ãm. Inhmã hapêê. Na pa hte tanhmã kot amnhĩ nhĩpêx to ho pa hã omu nê ixkĩnh tỳx nê. Kot paj hwỳr amnhĩ karõ mẽ nhũm hwỳr axà nhũm ma ÿ hã pika piitã hkõt mẽ piitã mẽ kãm ijarēnh o ri mẽ hkõt pa. Mẽ kot hprĩ hã ixte tanhmã amnhĩ nhĩpêx to nê tanhmã ijamaxpêr to hã ixpumunh kaxyw.

¹⁹ Nom koja ri amnhĩ to àmra o pa hkêt nê. Rỳ kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nê.

²⁰ ãm kapêr xukaprĩ pix o koja mẽ hirerek xwỳnhjê mã kapêr o pa. Nê mẽ kot tee ri amnhĩ nhĩpêx ã amnhĩ pumunh xwỳnhjê kamã ukaprĩ o pa. Nê mẽ kot htỳx ri amnhĩ nhĩpêx o mẽ pa xwỳnhjê kutã nojarêt rãhã ho pa jakamã nhũm mẽ hpãnhã tãm amnhĩ nhĩpêx o pa. Koja ã amnhĩ

nhîpêx anhÿr o ri mē hkôt pa rāhā ra akupÿm mēmoj piitā tām haxwÿr pa.

²¹ ā kot amnhî nhîpêx anhÿr o pa jakamā koja pika piitā hkôt mē pa xwÿnh kwÿjaja kukwak ri amnhî kaxyw Tîrtûm kôt hamaxpêr nē hkôt amnhî xunhwÿ. Anē.

Na pre ā finat Ijaisja Tîrtûm nhÿ hā kormā Jesus wrÿk nē kator kêt ri tanhmā kot amnhî nhîpêx to ho pa hkukamā harēnh nē hā kagā anē. Tā nhÿm mē hwÿr wrÿ nē ā mē hkôt amnhî nhîpêx anhÿr o pa.

Jejus mē mēkarōmnuti wa harēnh

Makre 3.20-30; Rukre 11.14-23, 11.31-32, 12.10

²² Tā nhÿm prem Jesus wÿr mēhō myja o mō. Mēkarōmnuti kot hwÿr àr nē ho nohkre nē ho kapêr kêt xwÿnhhta nhÿm mē hwÿr o mō. Hāmri nhÿm omu nē nē mēkarōmnuti jano nē akupÿm ho mex kurē kumrêx nhÿm akupÿm rît mex nē akupÿm kapêr mex nē.

²³ Hāmri nhÿm mē amnhî jaêr pê omu nē kamā no pyma nē hā axpên kukjêr o:

—Kokÿÿ. Jesus na hte ām mē ho mex o mē ho mex o pa. Mān kêp Tîrtûm kot mē pahwÿr mēnh mā xwÿnhhta na nà? ā na hte ā amnhî nhîpêx anhÿr o pa. Mān kêp pahi finat Tawi kanrēhā tāmnhwÿta na nà? Anē.

²⁴ Nom nhÿm Parijew nhō xwÿnhjaja ā Jesus kot amnhî nhîpêx anhÿr ā omu nē kêp mēkarōmnuti hkwy hā hkamnhîx. Jakamā mē kot hā axpêr kukjêr ā mē kuma nē mē kām:

—Tk pêr hinhu nhîkôôti nhÿ hā na hte mē nē amnhî kwÿjê japôx o pa. Anē.

Hinhu nhîkôôti nhîxi hō pê Satanasti nhÿm prem ā Satanasti nhÿ hā Jesus kot amnhî nhîpêx ā hkamnhîx anē.

²⁵ Nhÿm ra mē hamaxpêr kôt mē omunh mex jakamā mē kām:

—Kwa mē inhma mē ate ixpê Satanasti hkwy hā ixkamnhîx xwÿnhjaja. Koja pika nhō xwÿnhjaja axpên kutā amnhî xunhwÿ nē axpu hāmri nē angrā nē ma ahpÿnhā ri pa. Hāmri nē amnhî krā hkôt ri tanhmā amnhî nhîpêx to ho pa. Jakamā nhÿm mē ō pahija mē hamār kêt nē. Nē koja krî nhō xwÿnhjaja. Rÿ mē kot axpên to hkwy xwÿnhjaja mēmoj tā axpên kām gryk

nē axpên kutā amnhî xunhwÿ. Hāmri nē ahpÿnhā awry hā pa nhÿm mē ō pahija tee ri kām mē hamār prām kaprÿ. Mo mē hkwyjaja kot ri mē hamār o pa? No koja pahija tām amnhî nē amnhî kwÿjê janor kêt nē.

²⁶ Tā ja pyrā nē ixte Satanasti nhÿ hā tanhmā amnhî nhîpêx to ho ri ixpa ronhÿx pa ri mē nē amnhî kwÿjê janor kêt nē.

²⁷ —No mē akwyjaja? Xà Satanasti nhÿ hā na htem mē nē mēkarōmnuti japôx o pa? Kêp apu pa ixte ÿ hā mē nē amnhî kwÿjê japôx ronhÿx mē akwyjaja ixpyrā nē ÿ hā mē nē amnhî kwÿjê japôx o pa. Nà Tîrtûm nhÿ hā mē ixte mē nē mē hapôx o ixpa kēnā. Jakamā mē ate ā ijarēnh anhÿrja mex kêt.

²⁸ Tîrtûm Karō nhÿ hā ixte mē nē mē hapôx jakamā kwa mē ja hā ixpumu nē ixte mē ato amnhîptār kaxyw Tîrtûm kot mē awÿr inhmēnh kôt ixpumu kêt wehe. Pa na ka htem ijamār o apa.

²⁹ —Satanastija àhpumunh tÿx jakamā na htem tee ri kêp hkôt mē kot amnhî xunhwÿr xwÿnhjê pytār kaxyw nhÿm mē nē mē omunh mex nē. Tā nom ixàhpumunh tÿx o ixte Satanasti jakrenh par jakamā na pa hte kêp mē utā nhÿm mē hpānhā ixkôt ri amnhî nhîpêx.

³⁰ —Ra mē amā ixkapêr mar prām tā nom kormā ixkôt amnhî xunhwÿr kêt nē. Kwa wem ma amnhî to amōr gri nē tokyx ixkôt amnhî xunhwÿ kêt wehe. Kot kaj mē anhÿr kêt hāmri nē mē apê ixkutā amnhî xunhwÿr xwÿnh pyrāk o amnhî nhîpêx.

³¹⁻³² —Nē koja mēhō ixkapêr ma nē kām ixprām kêt nhÿm Tîrtûm ixtā omu nom tokyx tanhmā ixtā ho hkêt nē. Koja kormā amnhî tā hamā. Karō kot axte kām ijarēnh o amnhîrît nhÿm jatā kot mar nē kām ixprām nē ixkôt amnhî xām prām xàj nhÿm kormā amnhî tā hamā. Nom koja Karō xatā mē kām tanhmā ixto amnhîrît to htā nhÿm mē kuma nē ām kuma nē te mē kêp amnhî jamak pro pyrāk. Jao ra Karō hā hpijaàm kêt o amnhî nhîpêx. Mÿrapê koja Tîrtûm nhÿrmā amnhî xwar te kêp amnhî jamak pro pyrāk o mē hipêx nhÿm mē tee kām amnhî kaprî kaprÿ. Hāmri nē amnhî xà htÿx kamā hamak o pa xàta wÿr ma pa nē kamā pa rāhā nē pa ho pa. Anē.

Mê pajamaxpêr xà hkôt tanhmã ri mê pakapêr to

Rukre 6.43-45

³³ Nhũm Jejus arĩ Parijew nhõ xwýnhjê mã kapêr nê mê kãm:

—Nê kot kaj mê atõ anhõ mẽmo pàr nhũm amã ô mex nê. Ô rax nê. Ka omu nê akĩnh nê amnhĩm mex ã harê. No koja apê ô hkêt ka tee ri omu nê mex kêt ã harê. Na htem ã amnhĩm mẽmo xõ hpàr pumunh kôt tanhmã kute hã harênh anê. Ja pyrà nê na htem tanhmã mê kot amnhĩ nhĩpêx to hã mẽ omunh kôt tanhmã mẽ harênh to. Mê kot amnhĩ tomnuj xwýnh ã mẽ harê rý mẽ kot amnhĩ to mex xwýnh ã mẽ harê.

³⁴⁻³⁵ —Nê koja mẽhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htýx ri tanhmã amnhĩ tomnuj to ho pa. Na htem ahpýnhã amnhĩ jamaxpêr xà hkôt tanhmã kapêr to ho pa. No mẽ kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt nê. Na htem tanhmã hamaxpêr to xà hkôt tanhmã ri kapêr to ho pa.

³⁶⁻³⁷ Koja nhỹrmã Tĩrtũm mẽ piitã tanhmã mẽ kapêr to hã mẽ mar xà hkôt tanhmã mẽ harênh to. Jakamã mẽ akapêr mex o mẽ apa xwýnhjaja koja mẽ amex ã mẽ ajarê. Nom mẽ atýx ri akapêr punuj o mẽ apa xwýnhjaja koja mẽ amex kêt ã mẽ ajarê. Hãmri nê mẽ akapêr punuj o apaja mýrapê mẽ atomnuj týx nê. Anê.

Jejus kot Jõhti jarênh

Makre 8.11-12; Rukre 11.29-32

³⁸ Hãmri nhũm Tĩrtũm kapêr tũm o mẽ ahkre xwýnh mẽ Parijew nhõ xwýnh kwýjaja mẽmoj tã Jejus wý nê kãm:

—Kwa Pahihti. Mê inhmã aa mẽ ixte mẽmoj pumunh kêt õ ho anê. Kot paj mẽ omu hãmri nê Tĩrtũm kot mẽ ixwýr amênh ã apumunh kurê kumrêx. Jakamã e mẽ inhmã mẽmoj to anê nà. Anê.

³⁹ Hãmri nhũm mẽ kuma nê mẽ kãm:

—Tk. Pêr ãm mẽ ajamaxpêr punuj pix o na ka htem apa. Ixpê Tĩrtũm kot mẽ awýr inhmênh xwýnh tã mẽ ate ja hã ixpumunh kêt. Nê mẽ ate ja hã axpên mã ijarênh kêt tã ixte mẽ amã aa mẽmoj pumunh kêt õ ho anhýr kaxyw hã ixwý. Nà pa mẽ amã ho

anhýr kêt nê. Kormã. ãm amnepêm Jõhti kot tanhmã amnhĩ nhĩpêx toja pix kot paj mẽ amã harê.

⁴⁰ —Tĩrtũm nhỹ hã kapêr xwýnh Jõhtija amnepêm na pre tep rax kumrêxja htĩr rãhã kukrê. Nhũm õxàhkre kamã htĩr nê hkrĩ hã apkati axkrunêpxi hãmri nê htĩr rãhã õxàhkre rũm kato. Tã ixpê Tĩrtũm kot mẽ awýr inhmênh xwýnh kot paj nhỹrmã kên kre kamã ixtyk nê inhnõr ã apkati axkrunêpxi. Jõhti hkĩnhã ixtyk kumrêx nê inhnõr ã apkati axkrunêpxi hãmri nhũm Tĩrtũm akupým ixto ixtĩr.

⁴¹ —Nê koja nhỹrmã Tĩrtũm akupým mẽ htyk nê mẽ hikwý xwýnh piitã akupým mẽ ho htĩr hãmri nhũm mẽ piitã Inhĩpêêxã mẽ wa ixkutã hkrĩ pa wa tanhmã mẽ harênh to. Tĩrtũm mẽ wa ixkuri mẽ htĩr tũm nê mẽ pa ho mẽ pa mã xwýnhjê hã mẽ hkwyjê jarê nê wa ixkuri mẽ pa ho mẽ pa hkêt xwýnhjê jarê. Mê piitã ã ahpýnhã mẽ harênh anê. Amarĩ mẽ pa xwýnhjaja nê mẽ õ pahijaja. Jakamã nhũm Nĩnĩwe nhõ xwýnhjaja tanhmã wa inhmã mẽ ajarênh to. Jõhti kot mẽ hwýr mõi nê mẽ kãm Tĩrtũm kapêr jarênh o pa xwýnhjaja nhũm mẽ tanhmã wa inhmã mẽ ajarênh to nê wa inhmã: “Na pre Jõhtija man mẽ inhõ krĩ hwýr mõi nê mẽ inhmã akapêr jarênh o ri mẽ ixkõt pa. Pa prem kuma nê mẽ ixte amnhĩ tomnuj kaga nê akõt amnhĩ xunhwýr kurê kumrêx Tĩrtũm. No or war akutã mẽ hkrĩ xwýnh kwý ata mẽ na pre Akra Jejus tãm mẽ hwýr mõi nê mẽ kãm kapêr o ri mẽ hkõt pa nhũm prem mar tã mẽ ixkĩnhã mẽ kot amnhĩ tomnuj kaga nê hkõt amnhĩ xunhwýr kêt nê. Mê ixkurom mẽ kot Akra mar tã amnhĩ kaxyw kãm hamaxpêr kêt nê.” Anhýr o koja mẽ wa inhmã mẽ ajarê ka mẽ tee ri mẽ ama nê ra mẽ amã ma nê. Nom ãm mẽ amã ma kaprý.

⁴² —Nê sur kãm mẽ õ pahi nitita koja mẽ hpãnhã tanhmã wa inhmã mẽ ajarênh to nê wa inhmã: “Na pa pre inhmã pahi Sarumãw kot war anhỹ hã àhpumunh týx ã harênh ma hãmri nê inhmã mar prãm xàj ma awry hã õ pika hwýr mõi nê omu nê kapêr ma. Hãmri nê ma akupým inhõ pika hwýr mõi nê ixkwýjê mã àhpumunh týx ã harênh o ri ixpa. Tã Akra Jejus na kot àhpumunh týx o pahi Sarumãw jakrenh tã

or war akutã mē hkrī xwýnh kwý ata mē. Mē kot kapēr mar tã ixkīnhã kãm mar prãm kêt. Na prem kuma nē ãm kuma.” Anhýr o koja wa inhmã mē ajarē. Hãmri nē ja hã mē amã akir ka mē tee ri mar o akrī nē amnhī kamã agryk o akrī. Nom ãm amnhī kamã agryk kaprý. Anē.

Mēkarōmnuti kot tanhmã mēhō hto hã harēnh

Rukre 11.24-26

⁴³ Nhũm Jejus arī Parijew nhõ xwýnhjê mē Tirtũm kapēr tũm o mē ahkre xwýnhjê mã kapēr nē mē kãm:

—Te mē ate ixte mēhõ nê mēkarōmnuti japõx xwýnhta pyrãk. Nhũm te kēp kator nē ma htēm pyrãk. Nē nhýri amgrã kamã ri pa pyrãk. Koja ja kēp omnuj nhũm tee ri kamã nhýri hkõt xã japēr o pa. Nom tee ri hapēr o pa kaprý.

⁴⁴ Hãmri nē tanhmã amnhī kukamã hamaxpēr to nē hamaxpēr o: “E kot paj ma akupým mē kot nē ixkator xwýnhta wýr tē nē axã nē kamã mãn ri ixpa.”

⁴⁵ Anhýr o hamaxpēr hãmri nē ma akupým hwýr tē. Nom kormã akupým hwýr ãr kêt ri nhũm kamã amrakati nē ri pa. Jakamã nhũm akupým hwýr axã. Nom ahte hwýr ãr kêt nē. Amnhī kõt hkwýjê ho 7 nē hwýr mē ho gjêx pa. Mē kēp 7jaja nē wamta mē nhũm mē piitã hwýr gjêx pa. No mē kēp 7jaja na omnuj týt o kot wamta jakrenh jakamã nhũm mē kot hwýr gjêx xwýnhta mē ý hã ra amnhī tomnuj týt nē oprê htýt o pa. Wam pyxire kot hwýr ãrta nhý hã nhũm amnhī tomnuj o ri pa nom kawax pē oprê. Tã nhũm ra axte hwýr mē ohtõ nē gjêxta nhý hã hãmri oprê htýt kumrêx. Ja pyrã nē kot kaj mē tokyx ixkõt amnhī xunhwýr kêt nē hãmri nē amnhī tomnuj týt pix o ri apa. Anē.

Jejus kot tanhmã hkwýjê jarēnh to hã harēnh

⁴⁶ Nhũm Jejus arī mē ahkre ho nhý. Rôm nhũm katorxã nē htõjaja nhýhýnh hwýr mõn pøj. Nom kormã hwýr gjêx kêt nē. Mē kot hã htu rax jakamã nhũm mē tee ri hwýr gjêx kaxyw kormã kapõt ã hã mē omunh o kuhê.

⁴⁷ Hãmri nhũm mēhõja kapõt ã mē omu nē Jejus mã mē harē nē kãm:

—Kwa Pahiht. Ota akatorxã mē atõjaja awýr mõn pøj nē tee ãr kaxyw. O mýj mē kapõt ã kuhê. Anē.

⁴⁸⁻⁵⁰ Hãmri nhũm kuma nē kãm:

—Tõe. Nã kot pa ixkato nē mē omu. Inhmã mē hapêê. Nom kot kaj mē atõ Tirtũm kapēr ma nē hkõt amnhī xãm nē hkõt amnhī nhípêx. Hã kot kaj te apê ixtõ rý ixkatorxã pyrãk o pu mē axpēn nhípêx o ri papa. Pa inhmã ixkatorxã nē ixtõjê japê pyrã nē mããnēn inhmã mē ajapê nē. Anē.

13

Mēmo hy hkre xwýnh jarēnh

Matêwre 13.18-23; Makre 4.1-9; Rukre 8.4-8

¹ Hãmri nhũm Jejus mē kãm kapēr pa nē ixkre rũm kato nē ma himõ rax wýr tē nē gõ mýri mē kãm ujarēnh kaxyw nhý. Pa mē ixpê hkõt mē ixpa ho ixpa xwýnhjaja ma hkõt mra.

²⁻³ Hãmri nē gõta wýr pøj nē mýri ixkrī. Nhũm mē Jejus ã htu rax nē nhũm tee ri mē omunh o nhý. Hãmri nē hamaxpēr nē kãnhmã xa nē tē nē pãr krem axã nē pãr kre kamã mütũm awry rũm mē ahkre ho nhý nhũm mē piitã omunh nē mar mex o hkrī. Nhũm mē kãm ujarēnh o mē ahkre ho nhý. Nom mē kãm tãm ujarēnh kêt nē. Mē kot Tirtũm kapēr mar nē tanhmã hkõt amnhī nhípêx to ho paja nhũm hã kuxi nē mē kãm harēnh o nhý nhũm mē amgrã kamã kýt pē mar o hkrī. Nhũm mē kãm:

⁴ —E mē inhma. Koja mēhõ ma pur mã mõ nē pur kãm mēmo hy ho ukapēr o ri pa. Nom nhũm hy piitã amex kãm rôrõk kêt nē. Koja hkwýja ahpýnhã nhýri rôrõk. Kwý aptýt kãm rôrõk nhũm kuwēnhre omu nē hwýr mra nē hkrēr pa.

⁵ —Nē koja kēn kãm hkwý rôrõk nē ra higrõt kutã nojarêt nē higrõt pa. Nom nhũm kamã aptýt nē kēp pika hkryre.

⁶ Jakamã nhũm higrõt nhũm hã myt ahpa nē arĩgro htýt mē nhũm grã pa. Harē hkryre jakamã grã pa.

⁷ —Nē koja mrõnhī kamã hkwý rôrõk nē higrõt tã no nhũm utĩa kēp amýtã nhũm õ hkêt nē.

⁸ —No kêt hirã kamã pika mex kãm rôrõk xwýnhja hirã kamã rôrõk jakamã higrõt mex nē piitã õ rũnh nē. Kamã õ hkwý kēp

30 nê kamã hkwỳ kêp 60 nê kamã hkwỳ kêp 100. Æ mẽ ujarênh kot anhÿr.

⁹ Kwa kêr ka mẽ ixujarênhja ma nê kãm ajamaxpêr tÿx rãhã ho apa. Anê.

Mêmo kaxyw Jejus kot mẽ ujarênh o mẽ ahkre

Makre 4.10-25; Rukre 8.9-15

¹⁰ Hãmri pa mẽ ixpê Jejus kôt mẽ ixpa ho ixpa xwÿnhjaja Jejus kot mẽ kãm ã ujarênh anhÿrja ã kuma nê tee ri hkukamã ija-maxpêr. Hãmri nê hã hkukja nê kãm:

—Kwa axujarênhta na pa mẽ ixprÿ hã hkôt mẽmoj pumunh kêt nê. Mon ka hte ãm mẽ ujarênh pix o mẽ ahkre? Anê.

¹¹ Hãmri nhũm mẽ inh mã:

—Tõe. Nà kot paj mẽ amã harê. Tÿrtũm kãm mẽ ate aprÿ hã mar prãm jakamã kot paj ixprÿ hã mẽ amã harê. Mẽ kot amnhÿ tomnuj kaga nhũm Tÿrtũm kot ja hã mẽ omunh nê mẽ ho hkra. Ja na pa harê. No mũjjaja mẽ akĩnhã kãm ja mar prãm kêt jakamã na htem ixujarênhja ma nê ãm kuma nê htÿx ri pa.

¹² —No kêt mẽ kajaja na ka mẽ ixkôt ri apa ho apa. Nê xatã ixkapêr mar o apa jakamã na ka mẽ aprÿ hã ixkapêr ma. Tã mẽ ate ixkôt amnhÿ nhÿpêx o apa jakamã na pa tanhmã mẽ akrã hto ka mẽ aprÿ hã mar mex o mō. No mẽ kot ixkapêr mar nê ãm mar xwÿnhjaja na mẽ akĩnhã inhmar tÿx kêt nê. Jakamã nhũm Tÿrtũm tanhmã mẽ hkrã hto nhũm mẽ hã no hkêt tokyx anê htÿx ri pa.

¹³ “Ixte mẽ kãm aa mẽ kot mẽmoj pumunh kêt kwỳ ho anhÿr rax tã nhũm mẽ omu nê ãm omu. Nê ixte amnhÿ nhÿpêxja nhũm mẽ kãm hkĩnh kêt nê. Nê mẽ kot ixkapêr mar tã ãm inhma nê kãm hprÿ hã inhmar prãm kêt nê.”

—Jakamã na pa hte ã mẽ kãm mẽmoj te ho tãm pyrã nê harê no ãm hã haxwỳ nê mẽ kãm ixujarênh anê.

¹⁴⁻¹⁵ —Na pre ra Tÿrtũm nhÿ hã kapêr o pa xwÿnh Ijaisja amnepêr mẽ hkukamã tanhmã mẽ harênh to nê hã kagã. Mẽ kot inhmar nê ãm inhmar xwÿnhjê jarê nê tanhmã mẽ hkukamã mẽ harênh to nê mẽ harênh o:

Koja mẽ ujarênh mex mar pymaj amnhÿ jamak pro nê amnhÿ no hpro nê hkôt hamaxpêr kêt nê. Jakamã koja mẽ

kãm mẽ kot amnhÿ nhÿpêx mex prãm kêt nê harênhja ma nê ãm kuma. Nê omu nê ãm omu. Mẽ kãm hprãm kêt jakamã koja mẽ ã amnhÿ nhÿpêx anê. Æ mẽ kot amnhÿ nhÿpêx anhÿr kêt ronhÿx mẽ ra Tÿrtũm kapêr ma nê hkôt amnhÿ xunhwỳ. Hãmri nhũm amnhÿ tã mẽ omu nê mẽ nê mẽ kot amnhÿ tomnuj rênh pa. Hãmri nhũm mẽ hkôt amnhÿ nhÿpêx mex nê kapêr mar mex o pa. Tã no nhũm mẽ Æ amnhÿ nhÿpêx anhÿr kêt nê. Anê.

—Æ Ijaisja mẽ hkukamã mẽ harê nê mẽ hã kagã anê.

¹⁶ —No kêt mẽ kajaja na ka htem ano ho ixte tanhmã amnhÿ nhÿpêx to ho ixpa hã ixpumunh o ixkôt apa. Nê mẽ ajamak o ixkapêr mar o ri ixkôt apa.

¹⁷ Amnepêr mẽ akukamã pahijaja nê Tÿrtũm nhÿ hã mẽ kãm kapêr o ri mẽ pa xwÿnhjaja na prem kãm ixpumunh prãm tÿx o pa. Nê mẽ kãm ixkapêr mar prãm tÿx o pa. No ãm mẽ akĩnhã ixpumunh nê ixkapêr mar kêt rãhã htyk pa. Kormã ixwryk nê jar ixkator kêt jakamã na prem arÿ htÿr nê pa ri ixpumunh kêt rãhã ra htyk pa. Æm mẽ kapxipixjaja na ka mẽ mÿr pê ixte amnhÿ nhÿpêx ã ixpumunh nê ixkapêr mar o ixkôt apa. Tã mẽ kurom mẽ ate ano ho ixpumunh nê ajamak o ixkapêr mar o ixkôt apa jakamã kwa mẽ ja hã amnhÿ pumu nê tãm amnhÿ nhÿpêx o ri apa pê akĩnh nê ri apa. Anê.

Nhũm pre ã Jejus mẽ ixpê hkôt ixpa ho ixpa xwÿnhjê mã kapêr anê.

Jejus kot hprÿ hã mẽmo hy jarênh

Makre 4.13-20; Rukre 8.11-15

¹⁸ Hãmri nhũm Jejus mẽ ixpê hkôt ixpa ho ixpa xwÿnhjê mã hprÿ hã mẽ ujarênhta jarê nê mẽ inh mã:

—E kot paj ixprÿ hã mẽ amã mẽmo hy ho ukapêr xwÿnh ã ixujarênhta jarê ka mẽ inhma. Nà mẽmo hyta te kêp Tÿrtũm kapêr pyrãk. Nê ahpÿnhã mẽmo hy rôrôk ã pikata te kêp mẽ apê panhÿ ahpÿnhã mẽ ate Tÿrtũm kapêr mar nê ahpÿnhã hkôt tanhmã amnhÿ nhÿpêx tota pyrãk.

¹⁹ Jakamã mẽ kot mar xwÿnh kwÿjjaja te mẽ kot aptÿx kãm hy rôrôk nhũm kuwênh kot hwÿr mrrar nê hkrêr par xwÿnhta pyrãk.

Jao Tirtûm kapêr ma no nhûm Satanasti te kuwênh kot hy krêr parta pyrâ nê mē kot mar nê amnhî kaxyw hkôt hamaxpêr nê hkôt amnhî xunhwÿr pymaj hāmri ra tanhmā kapêrja nê mē hkrā hto. Jakamā nhûm mē kuma nom ho hamakêtkati tokyx anê nê axte kām hamaxpêr kêt nê pa.

²⁰ —Nê mē kot mar xwÿnh kwÿjaja te mē kot kênre kamā hy hkwÿ rôrôk nê higrôt nê grà par tokyx anhÿr xwÿnhhta pyrâk. Jao Tirtûm kapêr ma nê hkînh nê. Nê kām mar prām nê.

²¹ Tã nhûm mēhō Tirtûm nê tanhmā mē kām kapêr to nhûm mē kuma nê Tirtûm kaga. Te mēmo hy higrôt nom ra grà par tokyx anhÿrta pyrâk.

²² —Nê mē kot mar xwÿnh kwÿjaja te mrônhi kamā hy hkwÿ rôrôk nê higrôt nhûm mrônhi kot kêp àmnâr xwÿnhhta pyrâk. Jao mē kām Tirtûm kapêr mar prām tã määnên kām mē hikukrêx rûnh nê mē hikâxpore rûnh prām. Hāmri nê am ja pix kukamā hamaxpêr o pa. Nê ja gryk ã axte Tirtûm kapêr mē hamaxpêr nê hkôt amnhî nhîpêx kêt nê.

²³ —Nê mē kot mar xwÿnh kwÿjaja te hirã kamā pika mex kām hy hkwÿ rôrôk nê higrôt nê ô rûnhhta pyrâk. Jao ixkapêr ma nê amnhî krã him hagjênh tÿx nê. Nê ixkôt ri amnhî nhîpêx mex rãhã ho pa. Jakamā te mēmo hy ô rûnh nê ô mex pyrâk o amnhî nhîpêx. E ã ixujarênhja kot anhÿr. Anê.

Harôj kaàkre jarênh

Matêwre 13.36-43; Makre 4.26-29

²⁴ Nhûm Jejus axte mē kot mar o hkrî xwÿnhjê mē awjarê nom hprî hã mē kām ujarênh kêt nê. Axte mē kām mēmoj tã kuxi nê awjarê nê mē kām:

—Nà nhÿrmã Tirtûm mē kot kormã htîr ri tanhmā amnhî nhîpêx to ho pa hã mē omunh xà hkôt ahpÿnhã tanhmā mē harênh toja te mē ujarênh ja pyrâk. Koja mēhō harôj y mex o ukapêr kaxyw ma hpur mē mō. Hāmri nê hkre hpa nê ma akupÿm mō.

²⁵ Tã nhûm kamàt nhûm ra gôr nê nō. Hāmri nhûm kām hkurê xwÿnhja ma kêp ihpur wÿr tē nê harôj mexta nhîpy axtem nê kêp harôj kaàkre hkre. Harôj kaàkreja te kot harôj mex pyrâk nom mē kot hkur kêt.

Tã nhûm kêp harôj y mex nhîpy hkre hpa hāmri nê ma akupÿm tē.

²⁶ —Tã nhûm hamē higrôt nê anhîpê ô.

²⁷ Nhûm kām mē àpênh xwÿnhjaja tee ri harôj mex kaêx ã harôj kaàkreta pumu nê hpur nhō dôn wÿr tē nê kām harê nê kām: “Kwa ate harôj mex pix kre htã pêr hkaêx ã harôj kaàkre määnên kato. Kwa tanhmā na pre amnhî to nê hkaêx ã kato?” Anê.

²⁸ Hāmri nhûm tee ri mē kuma nê mē kām: “Nà mēhō kām ixkurê xwÿnh na pre ã inhîpêx anê.” Anê hāmri nhûm kām mē àpênh xwÿnhhta kām: “Kwa xà kot paj mē tokyx ma hwÿr mra nê nê harênh pa nê kurê nà?” Anê.

²⁹ Nhûm mē kām: “Nà kot kaj mē anê nê harôj mexta mē ho apimràatã ixpê harênh pa.

³⁰ Kwâr māmri harôj mex mē hpimràatã ô hpa mân. Ka mē rî ma hwÿr mra nê harôj kaàkre kumrêx jarênh pa nê axpên tã harê ho ê nê ma o mra nê hpôk. Hāmri nê rî kormã hpãnhã harôj mex jakà nê ho akuprô nê ô ho mra nê ixkre kamã haxwÿ.” Anê. ã mē ujarênh kot anhÿr.

Anhÿr o mē kām kapêr.

Jejus te kot mēmo hy hkryre pyrâk ã harênh

Makre 4.30-32; Rukre 13.18-19

³¹⁻³² Hāmri nhûm Jejus arî mē kām amnhî tã kuxi nê ujarênh o nhÿ. Nê tanhmā mē kām amnhî tã ujarênh to nê mē kām:

—Nà Tirtûm kot mē awÿr ixte mē ato amnhîptâr kaxyw inhmênh ã ijarênhja. Te ixte mēmo hy pixire nhûm mē kot hkre nhûm higrôt pyrâk. Koja gaa nê hprêk. Hāmri nê hpa anhgrà nhûm kuwênhre hwÿr mra nê hôptî kamã amnhîm haê nhîpêx nê kamã hikwÿ. Tã kot paj nhÿrmã mēmo hy jarênhhta pyrâ nê ixpyxi htã pika piitã hkôt mē ho amnhîptã nê mē omunh mex rãhã ho ixpa. Anê.

Jejus te kot pãwti kaxkrit xà pyrâk ã harênh

Rukre 13.20-21

³³ Nhûm Jejus arî mē kām amnhî tã kuxi nê ujarênh o nhÿ nê mē kām:

—E kot pa hpãnhã mē amã tanhmã pãwti kaxkrit xà jarênh to ka mē inhma. Na hte mēnijaja pãwti nhîpêx kaxyw hāmri nê

kaxkrit xà hkwy ho grire nê kupy nê trik xôm mē ho ahkà. Hāmri nē ho pāwti nhīpēx. Kaxkrit xàja grire htā pāwti piitā ho kaxkrit mex nē. Tā ja pyrā nē ixpyxi htā koja mē nhǎrmā pika piitā hkôt ixkôt amnhī nhīpēx mex o pā.

Anhǎyr o mē kām amnhī jarē.

Jejus kot mē ujarēnh pix kām mē ahkre hā harēnh

Makre 4.33-34

³⁴ Na pre ā Jejusja mē ujarēnh o mē ahkre ho pa anē. Ām mē ujarēnh pix o mē ahkre ho pa. Te tām ujarēnh pyrāk no ām mēmoj tā haxwý rý amnhī tā haxwý nē mē kām tanhmā amnhī jarēnh to.

³⁵ ā kot mē ahkre ho pa anhǎyr kukamā na pre ra amnepēm Tirtūm nhǎ hā kapēr o mē pa xwýnhjē hōja harē nē hā kagà. Te Jejus tām tanhmā amnhī jarēnh to pyrāk o hkukamā harē nē hā kagà nē hā hkagà ho: Kot paj mē kām ixujarēnh pix kām mē ahkre ho ri ixpa. Mēmoj te ho tām pyrā nē harē nom mēmoj tā haxwý nē tanhmā mē kām ixujarēnh to. Nē aa mē kot mēmoj mar kēt xwýnh kwý kot paj mē kām harē kê mē kuma. Anē.

Jejus kot hprī hā harōj kaàkre jarēnh

Matêwre 13.24-30, 13.47-50

³⁶ Tā nhūm Jejus mē kām ujarēnh pa nē mē kure nē ma tēn ixkrem axà. Hāmri pa mē ixpē hkôt ixpa ho ixpa xwýnhjaja ma hkôt mra nē ixkrem agjē. Hāmri nē harōj kaàkre hā ujarēnh ta ā hkukja nē kām:

—Kwa aprī hā mē inhmā harōj kaàkre jarēnh ta jarē nà. Na pa mē kormā ixprī hā mar mex kēt nē. Anē.

³⁷ Hāmri nhūm mē inhmā:

—Tōe pa ixprī hā mē amā harē. Ām paa. Ixpē Tirtūm kot mē awýr inhmēnh xwýnh te ixte mēmo hy mex o ukapēr xwýnh ta pyrāk.

³⁸ Nē purta te kēp pika piitā pyrāk.

Nē harōj mexta te ra mē ate ixkôt amnhī xunhwýr nē ixkôt amnhī nhīpēx o apa xwýnhjē pyrāk.

Nē harōj kaàkreta te mē kot Satanasti hkôt amnhī nhīpēx o mē pa xwýnhjē pyrāk.

³⁹ Nē kot harōj kaàkre hkre xwýnh ta te Satanasti pyrāk.

Nē harōj jakār xà hā arīgrota te Tirtūm kot ahpýnhā tanhmā mē harēnh to xà hā arīgrota pyrāk.

Nē mē kot harōj jakār xwýnhjaja te Tirtūm kapēr o wrýk xwýnhjē pyrāk.

⁴⁰ Mē ujarēnhja kamā na prem harōj kaàkre kumrēx jarē nē hā hpōk jarē. Ja pyrā nē koja nhǎrmā Tirtūm kot ahpýnhā tanhmā mē harēnh to xà hā arīgrota ā hāmri ā mē kot amnhī tomnuj o mē pa xwýnhjē nhīpēx anē.

⁴¹ —Kot paj nhǎrmā kām mē piitā mē ho amnhīptār kaxyw hāmri nē kapēr o mē wrýk xwýnhjē mā anē nhūm mē ma mran wrý nē mē kot amnhī tomnuj xwýnhjē pix o akuprō. Nē mē kot nhām mē hkwyjē kot mē urāk nē tanhmā amnhī tomnuj to ho pa kaxyw mē kām anhǎyr xwýnhjaja nhūm mē māānēn mē ho akuprō.

⁴² Hāmri nē mē ho pikuprōnh pa nē te mē kot harōj kaàkreta nhīpēx pyrā nē kuwy kamā mē rēnh pa. Hāmri nhūm mē kamā amnhī xà htýx kamā hamak rāhā nē pa ho pa. Nē amnhī xà htýx ā maj tee ri mýr rāhā ho pa. Nē tee ri amnhī xà hā maj amnhī nham o axpēn kamnhar týx kaprý.

⁴³ —No ixkôt mē kot amnhī nhīpēx xwýnhjaja koja mē mē kurom mex kumrēx nē pa. Kot paj mē ho mex rax nē nhūm mē mex rāhā nē pa ho pa. Tirtūm kot kormā pika nyw nhīpēx mā xwýnh ta kamā nhūm mē mex kumrēx nē pa ho pa. E kēr ka mē ixujarēnhja ma nē kām ajamaxpēr týx rāhā ho apa. Anē.

Mē hikukrēx mex o hpimxur jarēnh

Piripos 3.7

⁴⁴ Nhūm Jejus arī mē ixpiitā mē inhmā tanhmā ujarēnh to. Nom hprī hā ujarēnh kēt nē. Kē axte mēmoj tā kuxi nē mē inhmā tanhmā ujarēnh to nē mē inhmā:

—Mē ate ixkôt amnhī xunhwýr xwýnhjaja te mē apē mē hikukrēx mex ā pika japrōr xwýnh ta pyrāk. Koja mēhō mē hikukrēx mex jamý nē o tē nē nhǎri amnhīm ho amūxu. Kaxyw kakwý nē kamā hagjē nē hity hpa nē ma akupým tē. Hāmri nhūm jāā nhūm mēhō tēn kām kato. Hā pikata kakwý nē kām kato nē omu nē hkīnh nē. Nē

hamaxpêr o: “E pa ma tē nē inhōrkwỹ kamã ixkukrêx piitã ho wênê hpa nē hpãnhã kàxpore jamý nē ho amnhĩm mẽ hikukrêx mex ã pika japrô nē amnhĩm mẽmoj mexta o ixàrik pa.” Anhỹr o hamaxpêr nē akupỹm hity hpa nē ma akupỹm tē. Hãmri nē mẽmoj mexta gryk ã õ mẽmoj piitã ho wênê hpa. Hikukrêx nē òrkwỹ nhũm piitã ho wênê hpa. Hãmri nē hpãnhã kàxpore jamý nē ma o tē nē amnhĩm pikata japrô. Hãmri nē ma akupỹm hwỹr tē nē kamã mẽ hikukrêx mexta kwrynh pa nē ho õ kumrêx.

—Tã te mẽ ate mẽhõ kot ã amnhĩ nhĩpêx anhỹr xwỹnhhta pyrãk. Na ka mẽ urak nē inhgryk ã amnhĩ tomnuj kaga hpa nē hpãnhã ixkõt amnhĩ nhĩpêx. Te mẽhõ kot mẽmo mẽ hikukrêx mex gryk ã hikukrêx tũm piitã kaga hpar nē mẽ hikukrêx mex o hpimxur xà hã pikata japrô pyrãk. Anẽ.

Mẽhõ kot kên jaxênh japrô jarênh

⁴⁵ Nhũm Jejus arĩ mẽ inhmã awjarẽ nē mẽ inhmã:

—Nẽ ja. Na htem kãm hkĩnh nē hamakêtkati nē ri hpa hprãm xà Tĩrtũm kõt amnhĩ xunhwý nē hkõt ri amnhĩ nhĩpêx rãhã ho pa. Te mẽhõ my kãm kên jaxênh mex prãm nē ma ri hapêr o pa xwỹnhhta pyrãk.

⁴⁶ Nẽ ra nhỹri omu nē ma tē nē prês ã mẽ hkukja. Nhũm mẽ kãm hã ho ohtô nē harẽ nhũm ma akupỹm tē nē kãm ho õ hprãm xà hikukrêx piitã ho wênê hpa. Hãmri nē kàxpore jamý nē o tē nē amnhĩm ho haprô. Kên jaxênh mexta pix gryk ã hikukrêx piitã ho wênê hpa nē hpãnhã ho amnhĩm haprô.

—Tã ja pyrã nē na ka htem amex nē ajamakêtkati nē axãmnhĩx ri apa hprãm xà ixkõt amnhĩ xunhwý nē ixkõt pix mã amnhĩ nhĩpêx o apa. Anẽ.

Kryhti jarênh

Matêwre 13.24-30, 13.36-43

⁴⁷⁻⁴⁸ Nhũm Jejus arĩ mẽ inhmã awjarẽ nē mẽ inhmã:

—E Tĩrtũm kot nhỹrmã tanhmã mẽ harênh to xà hã arĩgro kot paj ixprĩ hã tanhmã mẽ amã harênh to. Te ho mẽmyjaja kot himô kamã kryhti rênh pyrãk. Koja mẽ gôx kãm kumẽ nē akupỹm ho api nhũm kamã tep ohtô nē. Nhũm omu nē kýx pẽ amgrã kamã hkapĩ nē ahpỹnhã ri tanhmã

kamã kute kawrà. Nẽ kamã mex kawrà nẽ kawã kamã kugjê nẽ mẽ kot hkur kêtja nhũm nhãm kurẽ.

⁴⁹ Ja pyrã nē Tĩrtũm kot ahpỹnhã ri tanhmã mẽ kot amnhĩ nhĩpêx to hã mẽ omunh xà hkõt tanhmã mẽ hipêx to kaxyw arĩgrota ã ã mẽ hipêx anẽ. Koja kapêr o mẽ wrỹk xwỹnhjaja mẽ kot hkõt amnhĩ xunhwỹr xwỹnhjê nē mẽ kot amnhĩ tomnuj o mẽ pa xwỹnhjê kawrà hpa.

⁵⁰ Nẽ te mẽ kot tep mex nē tep punu kawrà nē nhãm rênhta pyrãk o mẽ hipêx nē ma kuwy hwỹr mẽ o mra nē kamã mẽ kurẽ. Nhũm mẽ tee ri amnhĩ xà htỹx ã maj amỹra nē tee ri amnhĩ nhĩpêx kaprý. Anẽ.

Nhũm pre ã Jejusja axte mẽ ixpê hkõt mẽ ixpa ho mẽ ixpa xwỹnhjê mã ujarênh anẽ.

⁵¹ Hãmri nē mẽ inhmã:

—E xàn ka mẽ atã aprĩ hã ixujarênhhta ma nã?

Anẽ pa mẽ kãm:

—Tỳ. Nà na pa mẽ atã ixprĩ hã mar mex nẽ. Anẽ.

⁵² Hãmri nhũm mẽ inhmã:

—Tõe. Nà ãm hãmri. Na ka xep mẽ ra ixte mẽ ahkre nywta mar mex nẽ. Nẽ mẽ akwýjaja mããnên Tĩrtũm kapêr tũm mar mex nẽ. Te mẽ apê mẽhõ apkur xà rax pyrã nē ma ho mẽ piitã mẽ hipêx o ri mẽ hkõt paja pyrãk. Ja pyrã nē kër ka mẽ ma mẽ piitã mẽ hkõt Tĩrtũm mẽ wa ixkapêr o mẽ ahkre ho ri mẽ hkõt apa. Anẽ.

Najare nhõ xwỹnhjaja kot Jejus kaga hã mẽ harênh

Makre 6.1-6; Rukre 4.16-30; Juãw 1.11

⁵³ ã Jejus mẽ inhmã ujarênh par anẽ.

⁵⁴ Hãmri nē ma akupỹm Najare hwỹr mō nē Tĩrtũm kapêr o mẽ ahkre xà hã ixkre hwỹr tē nē axà nē mẽ ahkre ho nhỹ. Nhũm mẽ amnhĩ jaêr pẽ tanhmã kot mẽ ahkre hto hã kuma nē tee ri hkukamã hamaxpêr nē axpên mã:

—Tk. Kwa kêp mẽ panhĩõ htã tanhmã kot we amnhĩ to nē ã àhpumunh tỳx kõt mẽ pamã kapêr anẽ nē ri mẽ kãm aa mẽ kot mẽmoj pumunh kêt kwý ho anhỹr o pa?

⁵⁵⁻⁵⁶ Na pre mẽ panoo mã hprêk nhũm mẽ pahte pahprĩ hã hkwýjê pumunh. Kêp pĩ kuprãr xwỹnh Juje mẽ hprô Marir wa hkraa. Nẽ kêp Xiakre nē Jujê nē Simãw nē Jut mẽ htõõ. Nẽ htõxjaja jar mẽ pakamã pa

nhùm mẽ pahte mẽ piitã mẽ omunh mex kênã kot kêt we mẽ kurom ã àhpumunh tỳx anê. Anê.

⁵⁷ Hãmri nê kamã gryk nê hkaga. Hãmri nhùm tee ri amnhĩ tã mẽ omu nê mẽ kãm:

—Nà Tĩrtũm nhỹ hã kapêr jarênh o mẽ pa xwỳnhjaja na htem krĩ hkwỳ kamã kãm mẽ mar prãm nê. Nom ò krĩ kamã mẽ kot karàre rũm hprêk kãm omunh xwỳnhjaja na htem kuma nê ãm kuma. Anê.

⁵⁸ Tã mẽ kot amnhĩ kaxyw hkôt hamaxpêr kêt jakamã nhùm tee ri mẽ kãm aa mẽ kot mẽmoj pumunh kêt kwỳ ho anhỹr rax prãm. No ãm mẽ kãm mẽmoj to grêre nê ho anê.

14

Mẽ kot Juãw Paxis pĩr ã mẽ harênh Makre 6.14-29; Rukre 9.7-9

¹ Tã nhùm pika pê Garirej kamã mẽõ pahihiti Erox Jejus jarênh ma

² nê tee ri hkukamã hamaxpêr nê hã ò pôristi mã kapêr nê mẽ kãm:

—Kwa pêr Juãw Paxis na nà? Ra ixte hã ixãmnhênh nhùm mẽ kot hpĩr tã mãn tanhmã amnhĩ to nê akupỹm htĩr. Nà pêr tãm kênã. Jakamã na hte aa mẽ kot mẽmoj pumunh kêt kwỳ ho anhỹr o pa. Anê.

³⁻⁵ Na pre ra Erox htõ pê hprõptàn ho hprõ. Tõ arĩ htĩr tã nhùm axtem nê kêp utà nê ho hprõ. Hãmri nhùm Juãw Paxisja harênh ma nê hã kãm akir nê kãm:

—Kwa Eroxis kêp atõ hprõ kênã na ka kêt axtem nê kêp utà nê ho aprõ. Kwa ja omnuj tỳx o omnuj tỳx. Anê.

Hãmri nhùm amnhĩ tã kuma nê kamã gryk nê kot hpĩr kaxyw. Tã nom nhùm Ijaew kot axpên mã kêp Tĩrtũm nhỹ hã kapêr jarênh xwỳnh ã harênh jakamã nhùm mẽ umaj hpĩr kêt nê. ãm ho prês nê haxà nhùm hkrĩ ho hkrĩ.

⁶ Tã nhùm jãã nhùm Erox kator ã arĩgro kato nhùm mẽ hã akuprõ nê hã hkĩnh. Hãmri nhùm hprõ nyw kra niti mẽ hwỳr axà nê ahte mẽ hipòk ri mẽ kãm gre. Mẽ kot omunh nê kamã hkurê kaxyw nhùm mẽ noo mã hpijaam kêt nê mẽ kãm grer o xa. Hãmri nhùm pahi Erox omu nhùm ja kãm mex nê nhùm hkĩnh nê kamã nopyma nê.

⁷ Hãmri nê kãm:

—Nà ãm hãmri na ka ã mẽ inhmã amnhĩ nhĩpêx anê. Jakamã kwa mãmri mẽmoj tã ixwỳ. Amã mẽmoj prãm xà hkôt hã ixwỳ kot paj amã kugõ. ãm hãmri na pa amã anê. E mẽmoj na amã hprãm? Anê.

⁸ Hãmri nhùm kuma nê kãm:

—Ma Juãw Paxis krã na pa inhmã hprãm. Inhmã hkrã krãhta nê pasiiti kamã axà nê ixwỳr o tẽ nê inhmã agõ. Anê.

Ra katorxà kot kaxyw kãm karõ jakamã nhùm ã hã hwỳr anê.

⁹ Hãmri nhùm Eroxja tee ri kuma nhùm ja kêp omnuj nê. Nom ra mẽ pikuprõnh rax xwỳnhjê nhĩpòk ri mẽ noo mã kot kãm: “E mãmri amã mẽmoj prãm xà hkôt hã ixwỳ pa amã kugõ.” Anhỹr jakamã kãm kot kêp nê hprãm kêt nê. Hãmri nê Juãw Paxis wỳr ò pôristi hkwỳ rê

¹⁰ nhùm mẽ ma mẽ hagiênh xàta wỳr mra nê unê nê mut krãhta.

¹¹ Hãmri nê hkrã mỳ nê pasiiti kamã kuxà nê ma akupỹm nita wỳr o tẽ nê kãm kugõ nhùm kumỳ nê ma katorxà hwỳr o tẽ nê kãm kugõ.

¹² Hãmri nhùm Juãw Paxis kôt mẽ pa xwỳnhjaja tee ri mẽ kot hpĩr ã harênh ma nê ma hwỳr mra nê kumỳ nê ma o mõi haxà. Hãmri nê ma Jejus wỳr mra nê kãm harê.

Jejus kot mẽ ho ohtõ nê mẽ kãm mẽ ò hã harênh

Makre 6.30-44; Rukre 9.10-17; Juãw 6.1-14

¹³ Hãmri nhùm Jejus Juãw Paxis jarênh ma nê hkaprĩ nê. Nê ma himô nhĩkjê hwỳr kapôt ã mõi kaxyw pàr krem axà nê ma mõi. Pa mẽ hkôt ixpa ho ixpa xwỳnhjaja ma hkôt mra. Hãmri nhùm krĩ hkwỳ kamã mẽ pa xwỳnhjaja harênh ma nê ohtõ nê ma mẽ inhĩhkrej pikap mra. Nê ra amnhĩ to wa nê mẽ inhmõi xàja wỳr pøj nê mẽ ixkutêp hkrĩ.

¹⁴ Jakamã pa mẽ mõi nê mẽ hwỳr pøj nê mẽ omu. Hãmri nhùm Jejus mẽ omu nê kãm mẽ hkaprĩ nê mẽ kãm mẽ à xwỳnhjê ho mex pa.

¹⁵ Tã nhùm ra myt àr kaxyw pa mẽ hkôt ixpa ho ixpa xwỳnhjaja tee ri mẽ omu nê Jejus wỳr mra nê kãm:

—Kwa na ra amỹkry htỳx nê. Amnhĩ nê mẽ hano kê mẽ ma nhỹri krĩ hkwỳ hwỳr mra nê tokyx amnhĩm mẽmoj japrõ

nê kuku. Mo jar mē apkur xà hã mēõ? Jar akunĩ pix kēnã. Anē.

¹⁶ Hãmri nhũm mē inhma nē mē inhmã:

—Nà kot paj mē hanor kêt nē. Mē kajaja kot kaj mē kãm ô nhũm mē apku. Anē.

¹⁷⁻²¹ No nhũm mē ohtô rax kumrêx. Memyjaja kêp 5.000. Nē kaxyw mē hprô nē mē hkrajaja. Jakamã nhũm Jejus ã mē inhmã kapêr anē pa mē tee ri mē hkukamã ijamaxpêr nē kãm:

—Kwa nà mē panhõja raxti hã. Mē panhõ pãwti kêp sík pix. Nē kaxyw tep grãja pi-jakrutre kēnã kot kêt mē piitã mē hipêx. Nà xà kot paj mē ma mra nē nhÿri mē kãm mē mēmoj japrô nhũm mē kuku? Anē.

Hãmri nhũm mē inhmã:

—Nà pu mē kãm mēmoj japrôr kêt nē. Kot puj mē kãm mē panhõta o anhgrã. E mē kãm anē kē mē ahpÿnhã ri hije nē hkrĩ hpa. Anē.

Hãmri pa mē kuma nē mē kãm anē nhũm mē piitã hkrĩ hpa. Hãmri nhũm Jejus pãwti mē tepja jamÿ nē kaxkwa hwÿr rĩt nē ho Tĩrtũm wÿ nē kãm:

—Pa Papaj? Nà apê mē inhmã mē inhõ ho apa xwÿnh jakamã amex o amex. Anē.

Hãmri nē mē kãm ho hkry hpa nē hkôt mē ixpa ho mē ixpa xwÿnhjê mã kugõ pa mē ô ri ho mē hipêx pa. Nhũm mē piitã apkur o hkrĩ. Mēõja grire htã nhũm Jejus tanhmã mē kãm ho rax to nhũm mē ohtô rax kumrêx tã piitã kuku nē ho õhy htu hpa nhũm arĩ mēõ jakrêx prã. Hãmri pa mē akupÿm hakrêx o akuprô nē ho kawã ho 12 nē ho nyt pa.

Jejus kot gô krãhkã hã ãm nē htêm ã harênh

Makre 6.45-52; Juãw 6.15-21

²²⁻²³ Tã nhũm Jejus mē ixpê hkôt ixpa ho ixpa xwÿnhjê mã anē pa mē akupÿm pãr mã agjê nē ma xarmã hkukamã mō. Hãmri nhũm mē kot mar o kuhê xwÿnhjê jano nhũm mē ma akupÿm hapêx. Hãmri nhũm Jejus kot Tĩrtũm mã amnhĩ jarênh kaxyw ahte tē nē hixêt ã api nē himõk ã kãm amnhĩ jarênh o nhÿ.

Gaa nhũm ra kamãt nhũm arĩ ahte hixêt nhĩmõk ã nhÿ.

²⁴ Rôm pa mē pãr kãm mē inhmõr xwÿnhjaja kormã himõ nhĩpõk ri mō. Pu nhũm kôk xapêr tÿx mē ixkaxpa. Nē gô

axpên tak tÿx nē pa mē tee ri rrêmti ho gô rênh nhĩpêx nē tee ri axpên pumu.

²⁵ Tã nhũm krãhyre kã nhũm Jejus man mē ixkôt gô krãhkã hã xan tē

²⁶ pa mē amnhĩ wÿr omu. No nhũm kormã hirã mex kêt jakamã pa mē ixprĩ hã omunh mex kêt nē. Hãmri nē tee ri omu nē mēkarõ hã hkamnhix nē umaj ixãmra rax nē.

²⁷ Hãmri nhũm mē inhmã kapêr nē mē inhmã:

—Tk. Kwa mē amã ma hkêt nē. Pa na pa mē akôt tē. Anē.

²⁸ Hãmri nhũm Simãw Pêtre kuma nē kãm:

—Kwa xà ka na ka tē? Tôe apê mē inhõ Pahihti jakamã kwa amnhĩ wÿr ixwÿ pa apyrã nē gô krãhkã hã xa nē awÿr tē nã? Anē.

²⁹ Hãmri nhũm kãm:

—Tôe mamrĩ amnê ixwÿr tē. Anē.

Hãmri nhũm kuma nē pãr rũm kato nē hwÿr tē. Urãk nē gô krãhkã hã hwÿr tē.

³⁰ Hãmri nē kormã htêp o htêm mē kôk xapêrta kamã ama nē tee ri amnhĩ kukamã hamaxpêr pê ra àr o mō. Hãmri nē àmra kamã Jejus mã amnhĩ to akir nē kãm:

—Kwa tokyx ixto api Pahihti. Anē.

³¹ Hãmri nhũm hpa hã kupy nē ho àpir kurê kumrêx nē kãm:

—Kwa pêr ãm kormã ate amnhĩ kaxyw inhmã ajamaxpêr tÿx kêt. Mon ka we ixkamnãr rom mãmrĩ man ixwÿr atêmre hkêt nē? Anē.

³² Hãmri nhũm wa akupÿn mē ixwÿr tē nē wa axã. Hãmri nhũm kôk katãt kôt pinhkrênh pa nhũm gô tãm nõr kurê kumrêx.

³³ Hãmri pa mē Jejus kot ã amnhĩ nhĩpêx anhÿrja ã omu hãmri nē kãm mex o mex ã harê nē kãm:

—Kwa ãm hãmri na hte amnhĩ pê Tĩrtũm Kra hã amnhĩ jarê. Nà apê Kra kēnã. Anē.

Jenêjare kamã Jejus kot akupÿm mē ho mex ã harênh

Makre 6.53-56

³⁴ Tã pa mē ra himõ hã rê nē Jenêjare hwÿr pøj.

³⁵ Hãmri nē ma kapê hã ri ixpa. Hãmri nhũm pika nhõ xwÿnh kwÿjaja Jejus pumu nē mē piitã mē kãm harênh o hprôt nē ahpÿnhã hwÿr nhÿhÿnh mē à xwÿnhjê hã karõ. Nhũm mē man mē ixwÿr mē o mra

³⁶ nê mē ho Jejus wỳ nē kām:

—Pa? Kwa kê mē à xwỳnhjaja akupỳm mex kaxyw apê axê kupê nà? Anê.

Hāmri nhũm mē kām:

—Tôe. Kwār mē māmri mran hkupê. Anê.

Hāmri nhũm mē kuma nē axpēn pānhā hwỳr mra nē kêp ê pix kupēnh tã ra akupỳm mex nē ma akupỳm mra.

15

Parijew nhõ xwỳnh mē Tirtũm kapēr tũm o mē ahkre xwỳnhjê jarēnh

Makre 7.1-13

¹ Tã nhũm Parijew nhõ xwỳnh mē Tirtũm kapēr tũm o mē ahkre ho mē pa xwỳnhjaja Jerujarē rũm ma Jejus wỳr mra. Na htem mē ixkukamã mē inhīgētjê pyrã nē apkur kaxyw nē amnhĩ nhĩkra kuhõnh ryy nē. Amnhĩ nhĩkra htyk pix kuhõnh nē hkrĩ hkêt nē ãm amnhĩ nhĩkra kuhõnh japjêê nē. Nê õ prat kuhõnh japjêê nē kormã apkur kaxyw hkrĩ. Tirtũm kot ja hã mē omunh nē mē mex ã mē harēnh ã amnhĩ kamnhix jakamã na pre ã amnhĩ nhĩpêx anhỳr o pa. Jakamã nhũm mē ma Jejus wỳr mra.

² Hāmri nē omu nē kām:

—Pa Jejus? E kwa mē inhmã mēmoj jarē. Amnepēm mē panhīgētjaja na prem apkur kaxyw nē amnhĩ nhĩkra kuhõnh japjê nē rĩ kormã apku. Tã pa htem arĩ ijaxwỳja ã amnhĩ nhĩpêx anê. No akôt mē pa ho mē pa xwỳnhjaja na htem mē ixpyrã nē ã amnhĩ nhĩpêx anhỳr kêt nē. Kwa mo na htem amnhĩ nhĩkra tyk kuhõnh tokyx anê nē hkrĩ nē apku? Anê.

³ Hāmri nhũm mē kuma nē mē kām:

—Tk. Na ka htem ãm mē panhīgētjê hkôt pix mã amnhĩ nhĩpêx o apa no Tirtũm kapēr kôt amnhĩ nhĩpêx kêt nē.

⁴ Tirtũm na pre mēmoj tã mē pamã karõ ho:

Kêr ka mē anhĩpêxã nē mē akatorxã wa hã apijaàm nē mē ho ajuta rãhã ho ri apa. Kot kaj mē ã amnhĩ nhĩpêx anhỳr kêt nē tanhmã mē kãm akapēr punuj to ho ri apa. Hã koja mē akwỳjaja ja mỳrapê mē apa. Anê.

—Na pre ã Tirtũmja mē pamã karõ anê.

⁵ No mē kajaja na ka htem ã akwỳjê mã karõ anhỳr kêt nē. ãm kapērja kwỳm na ka htem mē kãm karõ nē mē kãm:

Kot kaj mē mēmo arĩgro hã akàxpore japêr nom kêr ka mē ho tanhmã akatorxã rỳ anhĩpêxã ho ajuta hto kaxyw wa kãm hkwy nhõr kêt nē. ãm ho ate wa ho ajuta hkêt ã wa kãm amnhĩ jarē hāmri nē Tirtũm mã amnhĩ jarēnh xã hã ixkre hwỳr o tē nē mē ixte tanhmã ixkreta ho mex to kaxyw mē inhmã agõ. Kot kaj mē ã amnhĩ nhĩpêx anê nhũm Tirtũm ja hã mē apumu nhũm ja kãm mex nē. Kêr ka mē ã amnhĩ nhĩpêx anhỳr o ri apa.

—Anhỳr o na ka htem mē kãm karõ ho ri apa.

⁶ Nom Tirtũm kapēr tũm kot ã ja jarēnh anhỳr kêt. ãm amnhĩ krã hkôt na ka htem ã mē kãm karõ punuj o ri apa anê. Te mē akapērja mex o kot Tirtũm kapēr jakrenh pyrãk.

⁷ Mē ate Tirtũm kôt amnhĩ nhĩpêx ã amnhĩ jarēnh tã ãm amnhĩ to axêx nē hkôt amnhĩ nhĩpêx kêt nē. Na pre Tirtũm amnepēm mē akukamã tanhmã mē ajarēnh to. Nhũm ÿ hã mē kãm kapēr jarēnh xwỳnh Ijaisja ô ri mē kãm mē ajarē nē hã kagã. Te Tirtũm tãm kot mē ajarēnh pyrãk.

⁸ Na pre mē akukamã mē ajarēnh o:

Mē kãm ixkĩnh ã mē kot amnhĩ jarēnh tã mē kãm ixkĩnh kêt. Na htem kãm ixprãm ã amnhĩ jarēnh kaprỳ.

⁹ Mē kot ixkuhpa hã amnhĩ krã hkôt mēmoj tã hkwyjê mã karõ ho pa jakamã na htem kot ixkôt amnhĩ nhĩpêx o pa hã amnhĩ jarēnh kaprỳ. Anê.

—Na pre ã Ijaisja Tirtũm nhỹ hã mē akukamã mē ajarē nē mē atã kagã anê. Anê.

Nhũm pre ã Jejus Parijew nhõ xwỳnhjê mē Tirtũm kapēr tũm o mē ahkre xwỳnhjê mã kapēr anê.

Mēmoj kot mē pahomnu hã harēnh

Makre 7.14-23

¹⁰ Tã nhũm Jejus amnhĩ wỳr mē kot mar o kuhê xwỳnhjê hwỳ nē axte mē kãm kapēr nē mē kãm:

—E mē inhma nē inhmar tỳx nē.

11 Na hte Tirtûm kapêr tûm o mē ahkre xwÿnhjaja amnhî krâ hkôt mē ate amnhî nhîhkra kuhõnh japjê hã mē amã karõ ho pa. Nê amnhî krâ hkôt mē axâpkur xà hã tanhmã mē amã karõ hto ho pa. Tirtûm kot ja hã mē apumunh kôt mē amex ã mē ajarênh kaxyw ã mēmoj tâ mē amã karõ anê. Nom na hte Tirtûm tanhmã mē kot amnhî nhîhkra kuhõnh to hã mē omunh xà hkôt tanhmã mē harênh to hkêt nê. Rÿ mē axâpkur xà pumunh kôt mē mex ã mē ajarênh kêt nê. Ja tanhmã kãm kute hkêt. Na hte ã mē kot amnhî nhîpêx anhÿr ã mē omunh xà hkôt mē mex ã mē harênh rÿ mē mex kêt ã mē harênh kêt nê. Na hte mēmoj kur ã mē omu nê ãm mē omu nê hã tanhmã mē harênh to hkêt nê. ãm mē kapêr punuj rÿ mē kapêr mex ã mē mar kôt pix mã na hte tanhmã mē harênh to. Anê.

12 Nhûm pre ã Jejus mē kãm kapêr anê pa mē hkôt mē ixpa ho mē ixpa xwÿnhjaja kuma hãmri nê hwÿr mra nê kãm:

—Kwa na ka ã mē kãm akapêr anê nhûm Parijew nhõ xwÿnhjaja tee ri ama nhûm ja mē kêp omnuj nê. Anê.

13-14 Hãmri nhûm mē inhma nê tanhmã mē inhmã Parijew nhõ xwÿnhjê jarênh to nê hprî hã mē hkukamã mē harênh o:

—Tk. Kwâr mãmri mē kêp omnuj. Mē kot Tirtûm kapêr tûm o mē ahkre ho pa htã na htem hkôt amnhî nhîpêx kêt. Jakamã te mē nohkre xwÿnh kot amnhî nhîpêx pyrâk. Koja mēhõ nohkre htã amnhî kôt nhÿhÿm nohkre hõ ho mõ hãmri nê wa hamê pry pumunh kêt nê htÿx mõ hãmri nê nhÿri ahkrehti kamã tēm. Tã Parijew nhõ xwÿnhjaja te kot wam htēm xwÿnhhta pyrâk nhûm mē kot mē mar xwÿnhjaja te kot wam htēm xwÿnh kôt hõ htēmta pyrâk. Jakamã Parijew nhõ xwÿnhjaja mē kot mē mar o pa xwÿnhjê mē koja mē hpimràatã nhÿrmã te ahkrehti kamã rôrôk par pyrâk o amnhî nhîpêx nê mex kêt nê pa ho pa. Koja kaxkwa kamã inhõ Papaj nhÿrmã amnhî nê mē hanor pa.

—Inhõ Papaj te kêp mēmo hy hkre ho pa xwÿnhhta pyrâk. Na htem mēmo hy hkre nhûm higrõt hapôj nê higrõt mex nê. Hãmri nhûm mē hwÿr mra nê omu nê nê mēmoj nhîgrõt punuj jarê nê kurê. Ja pyrã nê koja nhÿrmã inhõ Papaj amnhî nê Parijew nhõ

xwÿnhjê janor pa nhûm mē mex kêt nê pa ho pa. Jakamã kwa kêt ka mē hkôt ri amnhî nhîpêx kêt nê. Anê.

Nhûm pre ã Jejus mē ixte hkôt ixpa ho ixpa xwÿnhjê mã hprî hã Parijew nhõ xwÿnhjê hkukamã ã mē harênh anê pa mē mar o ixkrî.

15 Hãmri nhûm Simãw Pêtre tee ri Tirtûm kot mē apkur xà hã mē omunh xà hkôt tanhmã mē harênh to hkêt ã harênh ma. Nê ãm tanhmã mē kapêr to pix ã mē mar kôt tanhmã mē harênh toja ma hãmri nê hã Jejus kukja nê kãm:

—Kwa mon ka ri ã ja jarênh anê Pahiti? Anê.

16 Hãmri nhûm kuma nê hprî hã mē inhmã awjarê nê mē inhmã:

—Kwa xàn ka mē kormã aprî hã ja mar kêt nê?

17 E pa ixprî hã mē amã harê ka mē inhma. Nà na htem mēmoj ku nhûm hte mē hkrã hi hwÿr gjêx kêt nê. Na hte mē õhy pix wÿr agjê nê gaa nê nhãm hapôj nê hapêx. Na htem mē apkur xàja ku nê ÿ hã tanhmã amnhî tomnu hto hkêt nê. Jakamã na hte Tirtûm ja hã mē omunh xà hkôt tanhmã mē harênh to hkêt nê.

18 ãm mē hkrã kamã mē hamaxpêr punuj pix nhÿ hã mē kot tanhmã amnhî tomnuj to jakamã na hte Tirtûm mē hamaxpêr ã mē omunh xà hkôt tanhmã mē harênh to.

19 Koja mēhõ tanhmã hamaxpêr punuj to nê ra hkôt amnhî tomnuj pix o pa. Na htem nhãm mē hpar o pa nê mē kêp ahkî nê amnhî to hêx nê mē hakwa kamã nhãm axpên mã mē hixi jarênh o pa. Nê nhãm mē kêp mē hprõ ho amnhîkati nê mē hkuprÿ hwÿr mra nê mē ho amnhîkati. Nê tanhmã ri axpên tomnuj to ho pa.

20 Mē hamaxpêr punuj nhÿ hã na htem ã amnhî nhîpêx anhÿr o pa. No na hte Tirtûm mē kot amnhî nhîhkra kuhõnh japjê hkêt ã mē omunh xà hkôt mē kot amnhî to mex xwÿnh ã mē harênh kêt nê. Ja tanhmã kãm kute hkêt. Anê.

Jejus kot Ijaew kêt xwÿnh ni kamã ukapri hã harênh
Makre 7.24-30

21 Tã nhûm Jejus mē inhmã kapêr pa hãmri nê mē inhmã anê pa mē ma hkôt mõ. Ma Xir mē Sitõja wa pu hã ri ixpa.

22 Nhũm mēhō nija omu nē hwÿr tē. Mē ixkīnhā kēp Ijaew kēt tā hwÿr tē. Kanaā nhō xwÿnh na pre. Tā Jejus wÿr tē nē kām:

—Ka Pahihti Jejus? Apē Tirtūm kot mē ixwÿr amēnh xwÿnh jakamā xē ixujarēnh ma nē ixkamā axukaprī hkēt wehe. Na mēkarōmnutija tanhmā ixpē ixkra ho nhũm ixpē omnuj tÿx kumrēx. Anē.

23 Hāmri nhũm Jejus kuma nē ām kuma nē kām tanhmā nē hkēt nē. Jakamā pa mē ixpē hkôt ixpa ho ixpa xwÿnhjaja kām:

—Kwa hano kê ma akupÿm tēē ri. Na ām ri mē pahkôt xatā hkrata jarēnh pix o ri pa. Anē.

24 Nom nhũm kot amnhī tā kamā hamak kaxyw tanhmā mē inhmā hā kapēr to nē mē inhmā:

—Nà ām Ijaewjē pix wÿr na pre Tirtūm inhmē. Te mē kēp ôwēhti pikunor pyrāk o na htem htÿx ri amnhī nhīpēx o pa. Jakamā ām mē hwÿr pix mā na pre inhmē. Na kormā inhmā tanhmā nhām mē hkwÿjē jarēnh to hkēt nē. Anē.

25 Hāmri nhũm nitita tee ri amnhī tā kuma nē hwÿr tē nē kutā hkōnkrā ho htēm nē nhÿ nē kām:

—Xē ma we ixkamā axukaprī hkēt wehe. Anē.

26 Hāmri nhũm kām:

—Nà kormā. Na pre Tirtūm mē kēp Ijaewjē pix wÿr inhmē. Jakamā na pa kormā nhām tanhmā mē akwÿjē ho mex to hkēt nē. Anē.

27 Hāmri nhũm kām:

—Ma ām hāmri na ka akapēr. Nom ixpē Ijaew kēt tā mē kuxwar ām ixto mex grire kēt wehe. Anē.

28 Hāmri nhũm kuma nē kām:

—Nà ām hāmri na ka ā akra kaxyw inhmā ajamaxpēr tÿx anē. Jakamā kot paj nē mēkarōmnutita jano. Koja axte tanhmā apē ho hkēt kumrēx.

Anhÿr o kām kapērja rôm nhũm hkraja akupÿm mex kurē kumrēx.

Jejus kot mē à xwÿnhjê ho ohtô nē mē ho mex ā harēnh

Makre 7.31-37

29 Tā nhũm Jejus mē inhmā anē pa mē ixrohā krīja pē ixkato nē ma himô rax pē Garirej wÿr mō. Nē nhÿri gô mÿri hixēt wÿr mō nē hā anē nē ixkrī.

30 Hāmri nhũm mē ohtô nē ma mē ixkôt mra. Nē mē à xwÿnhjaja nhũm mē hamÿ nē Jejus wÿr mē o mra. Na prem ohtô rax kumrēx. Ra ri mē pa hkēt xwÿnhjaja nē mē nohkre xwÿnhjaja nē mē hyk o mē pa xwÿnhjaja. Nē mē kapēr kēt xwÿnhjaja nē ahpÿnhā ri tanhmā mē à kute xwÿnhjaja nhũm mē hamÿ nē ma Jejus wÿr mē o mra nē kutā mē haxwÿ. Hāmri nhũm mē omu nē ahpÿnhā akupÿm mē ho mex pa.

31 Jakamā na pre mē kapēr kēt xwÿnhjaja akupÿm kapēr mex nē. Nē ri mē pa hkēt xwÿnhjaja akupÿm mrar mex nē. Nē mē hyk o mē pa xwÿnhjaja akupÿm tām ri mra. Nē mē nohkre xwÿnhjaja akupÿm rīt mex nē. Ā ahpÿnhā akupÿm mex par anē. Hāmri nhũm mē kot hwÿr mē hamÿnh nē Jejus wÿr mē o mrar xwÿnhjaja amnhī jaēr pē akupÿm mē mex ā mē omu nē mē kamā no puma nē hkīnh nē. Hāmri nē Tirtūm mā mex o mex ā harē nē axpēn mā harēnh o:

—Nà ām hāmri mē panhō Tirtūmja ām mex o mex. Anē.

Jejus kot mē ho 4.000 nē mē kām mē ô hā harēnh

Makre 8.1-10

32 Tā nhũm Jejus mē ixte hkôt ixpa ho ixpa xwÿnhjaja amnhī wÿr mē ixwÿ nē mē ixkôt mē mrar xwÿnhjê jahkre nē mē inhmā:

—E. Ka mē rī kam jajē pumu. Na pa ra inhmā mē hkaprī nē. Na mē pahkôt ri pa hā apkati axkrunēpxi nhũm ra mē kēp mēōja hapēx pa. Koja mē apkur kēt rāhā ma akupÿm mē ô krī hwÿr pa hāmri nē pry hā hirot nē rôrôk o pa. Mē ô krī hwÿr awryy. Anē.

33 Nhũm pre ā mē inhmā mē harēnh anē pa mē tee ri kuma hāmri nē kām:

—Kwa nom nhÿri kot pu mē kām mēmoj japrô nhũm mē tokyx kuku? Ja kapôt pix kēnā. Nē mē ohtô griiā. Anē.

34 Hāmri nhũm mē inhmā:

—No mē panhō pāwtita? Tanhmā na arī kute nē hikwÿ? Anē.

Hāmri pa mē kām:

—Nà ām kēp 7 pix. Nē kaxyw tep kwÿ no ām grēre. Kot mē ho dare kaxyw ā. Anē.

35 Hāmri nhũm mē inhma nē mē ixkôt mē mrar xwÿnhjê mā anē nhũm mē hkrī pa.

³⁶ Hāmri nhūm pāwti mẽ tep grêreta jamy nê ho Tirtūm wỳ nê kām:

—Pa Papaj. Nà apê mẽ inhmã mẽ inhõ ho apa xwỳnh jakamã amex o amex. Âm amex kumrêx. Anê.

Hāmri nê mẽ kām mẽmojta o hkry hpa nê mẽ inhmã kugõ pa mẽ ô ri ho xa nê ho mẽ hipêx pa.

³⁷⁻³⁸ Hāmri nhūm mẽ piitã apku nê õhy htu hpa. Nhūm prem mẽmyjaja kêp 4.000 nê kaxyw mẽnijaja nê mẽhprĩjaja. Mẽ ohtõ rax kumrêx tã nhūm Jejus mẽõ ho mẽ hipêx pa. Hāmri pa mẽ hakrêx o akuprõ nê ho kawà ho 7 nê ho nỳt.

³⁹ Hāmri nhūm Jejus ma akupỹm mẽ õ krĩ hwỳr mẽ hano pa mẽ pàr krem agjê hāmri nê ma ijaxwỳja mõi. Ma pika pê Makatã hwỳr mõi.

16

Parijew nhõ xwỳnh kwỳ kot aa mẽ kot mẽmoj pumunh kêt õ ho anhỳr ã Jejus wỳr ã mẽ harênh

¹ Tã pa mẽ ra hwỳr pøj nhūm Parijew mẽ Satusew nhõ xwỳnhjaja Jejus pumu nê hwỳr mra. Nê hêx rom kot kamã hamak kaxyw hwỳr mra nê kām:

—Pa Jejus? E kwa mẽ inhmã aa mẽ ixte mẽmoj pumunh kêt õ ho anê nà? Pa mẽ ate ho anhỳr ã apumu nê Tirtūm kot mẽ ixwỳr amênh ã akõt ijamaxpêr kurê kumrêx. E kwa tokyx. Anê.

²⁻³ Hāmri nhūm mẽ kuma nê mẽ kām:

—Tk. Nà kot paj mẽ amã ho anhỳr kêt nê. Mẽ ate hã ixpumunh nê ixkõt ajamaxpêere kaxyw ã. Na ka htem kaxkwa kamã kakrã pumu nê axpên mã na wrỳk ã harê. Nê kaxkwa mex pumu nê axpên mã amgrã hã harê. Tã ixte tanhmã mẽ amã mẽmoj nhĩpêx to hã ixpumu nom Tirtūm kot mẽ awỳr inhmênh xwỳnh ã ixkõt ajamaxpêr kêt nê.

⁴ âm mẽ ajamaxpêr punuj pix o na ka htem ri ajamaxpêr o apa. Ixpê Tirtūm kot mẽ awỳr inhmênh xwỳnh tã ka mẽ ja hã ixkõt ajamaxpêr kêt nê. Tã mẽ ate aa mẽmoj pumunh kêt kwỳ ixte mẽ amã ho anhỳr kaxyw ka mẽ inhmã hã karõ. Nà kot paj mẽ amã ho anhỳr kêt nê. Kormã. Kot paj âm nhỹrmã te amnepêm Jõhti kot amnhĩ nhĩpêx pyrãk o amnhĩ nhĩpêx. E ja pix kot paj mẽ

amã harê. Nom kot paj mẽ amã aa mẽ ate mẽmoj pumunh kêt õ ho anhỳr kêt nê. Anê.

Nhūm pre ã Jejus mẽ kām kapêr anê hāmri pa mẽ ixrohã mẽ kêp ixkato nê ma ixpa.

Jejus kot hkõt mẽ pa xwỳnhjê jahkre hã harênh

Makre 8.14-21

⁵ Tã pa mẽ Jejus mẽ ixrohã ma mõi nê pàr mã agjê nê ma xarmã akupỹm rê nê hikjê hã mõi. Hāmri nê tee ri mẽ ixàpkur xà japêr nê axpên mã:

—Kwa na pu mẽ panhõ pāwti ho pajamakêtkati nê kure. Anê.

⁶ Hāmri nhūm Jejus mẽ inhma nê tanhmã mẽ inhmã Parijew mẽ Satusew nhõ xwỳnhjê jarênh to. Nom pāwti hã kuxi nê mẽ inhmã mẽ harê nê mẽ inhmã:

—Kwa mẽ o kora. Kêr ka mẽ Parijew mẽ Satusew nhõ xwỳnhjê mẽ kêp pāw kaxkrit xà hkwy hpyr kêt nê. Anê.

⁷ Hāmri pa mẽ tee ri kuma nê ixprĩ hã mar mex kêt nê. Nê arĩ kapêrta ã axpên kukjêr o hkõt mõi nê axpên mã:

—Kwa mẽ pahte mẽ panhõ pāwti rer jakamã măn mẽ pahte mẽ õ pāw kaxkrit xà kwỳ hpyr nê mẽ pahkurê nà? Anê.

⁸ Hāmri nhūm mẽ inhma nê mẽ inhmã:

—Hêxta waa nê. Mon ka mẽ âm axpên mã mẽ panhõ pāwti hkêt pix jarênh o mõi? Pêr kormã mẽ ate amnhĩ kaxyw inhmã ajamaxpêr tỳx kêt.

⁹ Jãã ixte mẽ anoo mã pāwti kêp 5 pix tã nhūm ixte ho mẽ kêp 5.000tajê nhĩpêx par. Nhūm mẽ kot hkur nê ho õhy htu hpar nhūm mẽ ate mẽõ jakrêx o apikuprõnh par nê ho kawà ho 12 nê ho hipu.

¹⁰ Nê ham pāwti kêp 7 o mẽ kêp 4.000 nhĩpêx par nhūm mẽ kot hkur nê ho õhy htu hpar nhūm mẽ ate mẽõ jakrêx o apikuprõnh raxja.

¹¹ Ra ixte mẽ anoo mã ja ho anhỳr o axkrut tã ka mẽ ra hã ano hkêt nê arĩ axpên mã mẽ paxàpkur xà pix jarênh o ixkõt mõi. Nà mẽ paxàpkur xàja na pa harênh kêt nê. Parijew mẽ Satusew nhõ xwỳnhjê nhõ pāwti kaxkrit xà pix na pa hã kuxi nê mẽ amã tanhmã harênh to. Anê.

¹² Nhūm pre ã mẽ inhmã kapêr anê hāmri pa mẽ atã kuma nê kām:

—Nà na pa xep mē hāmri tã ama. Xep mē ixte Parijew mē Satusew nhõ xwýnhjê kapêr kôt amnhĩ nhĩpêx nê na ka mē ixkurê nê ã mē harênh anê. Anê.

Jejus kot amnhĩ tã hkôt mē pa xwýnhjê kukjêr ã harênh

Makre 8.27-30; Rukre 9.18-21

¹³ Tã pa mē axte Jejus kôt mō nê pika pē Sejarej Piripos kamã kormã mō nhũm Jejus amnhĩ tã mē ixkukja nê mē inhmã:

—E mē inhmã mēmoj jarê. Tanhmã na hte mē akwýjaja axpên mã ijarênh to wehe? Anê.

¹⁴ Hāmri pa mē kãm:

—Nà na htem ahpýnhã tanhmã ajarênh to. Na hte kamã mē hkwýjaja ajarênh o finat Juãw Paxis ã ajarê. Nhũm kamã mē hkwýjaja ato finat Eris ã ajarê nhũm mē hkwýjaja tōhã apê Tirtũm nhỹ hã akapêr o apa xwýnhjê hõ akupým atĩr ã ajarê. Nê tōhã finat Jeremĩstija rý axtem hõ hã ajarê. Æ na htem ahpýnhã axpên mã ajarênh anê. Anê.

¹⁵ Hāmri nhũm mē inhma nê mē inhmã:

—No mē kajaja? Ixpê mēhõ hã na ka htem axpên mã ijarê? Anê.

¹⁶ Hāmri nhũm Simãw Pêtre kãm:

—Nà apê Tirtũm kot mē ixkaxyw axãm nê mē ixwýr amênh xwýnh na ka. Nê apê mē ixpiitã mē inhõ Pahi Maati na ka. Æ na pa htem axpên mã ajarênh anê. Anê.

¹⁷ Hāmri nhũm kuma nê kãm:

—Nà ãm hāmri na ka ã ijarênh anê Simãw Pêtre. Nom amnhĩ krã hkôt na ka ã ijarênh anhýr kêt nê. Tirtũm tãm kot amã ixto amnhĩrĩt xà hkôt na ka ã ijarênh anê.

¹⁸ Nà akumrêx na ka ã ijarênh anê. Tã koja mē apyrã nê nhỹrmã mē kot ixkôt amnhĩ xunhwýr xwýnhjaja ma hkwýjê mã ja hã ijarênh o ri krĩ piitã hkôt pa. Hāmri nhũm mē hkwýjaja mē kuma nê mē apyrã nê ixkôt amnhĩ xunhwý. Hāmri nhũm mē kêp ixprãm nõkati xwýnhjaja tee ri tanhmã mē kot ijarênh toja ma nê ã ijarênh anhýrja nê mē kãm kapêr tã nom ho hkaprý. Æ koja ixkôt mē kot amnhĩ xunhwýr xwýnhjaja mē kãm ijarênh o pa anê. Jao te mē apê kên nhũm ixte mē ato amnhĩm inhõrkwý nhĩpêx pyrãk. Tã akumrêx ate ã ijarênh kot anhýr jakamã kot paj te ixte akumrêx amýnh nê ato ixtêm nê inhõrkwý nhĩpêx kaxyw

amnhĩm akumrêx axãm pyrãk o anhĩpêx Simãw Pêtre.

¹⁹ —E kêr ka ma inhỹ hã tanhmã mē piitã mē kãm ijarênh to ho ri apa. Mē kot hprĩ hã amar kaxyw. Koja mē hkwýjaja ama nê amnhĩ kaxyw ixkôt hamaxpêr nê ixkôt amnhĩ xunhwý. Ka ja hã mē omu nê mē kãm: “E ra mē ate Jejus kôt amnhĩ xunhwýr jakamã kot ka mē nhỹrmã ty nê ma kaxkwa hwýr api nê Tirtũm mē wa kuri amex kumrêx nê atĩr tũm nê apa ho apa.” Anhýr o mē kãm ijarênh o apa. No mē kot akapêr mar nê ãm mar nê ixkôt amnhĩ xunhwýr kêt xwýnhjaja ka mē kãm: “No mē kajaja mē ate Jejus kôt amnhĩ xunhwýr kêt jakamã kot kaj mē nhỹrmã Tirtũm mē Krata wa kuri atĩr tũm nê apa ho apa hkêt nê.” Anhýr o ã inhỹ hã mē kãm akapêr anhýr o ri mē hkôt apa. Jao te ate kaxkwa hwýr saf pyr nê Tirtũm krajê mã kahê xà rênh nê Tirtũm kra hkêt xwýnhjê pê kahê pyrãk o amnhĩ nhĩpêx o apa. Anê.

Nhũm pre ã Jejus Simãw Pêtre mã kapêr anê.

²⁰ Hāmri nê hpãnhã mē ixpiitã mē inhmã kapêr nê mē inhmã:

—E. Kwa kêr ka mē kormã mē piitã mē kãm Tirtũm kot mē awýr inhmênh ã mē kãm ijarênh o ri apa hkêt nê. Kormã. Anê.

Jejus kot amnhĩ kukamã amnhĩ jarênh ã harênh

Makre 8.31-33; Rukre 9.22

²¹ Hāmri nhũm Jejus hprĩ hã amnhĩ kukamã tanhmã mē inhmã amnhĩ jarênh to nê mē inhmã:

—Nà mē kajaja mē ate aprĩ hã ixpumunh mex. No mē pahkwýjaja kãm hprĩ hã ijarênh mar nê ixpumunh prãm kêt. Ijaew krãhtũmjaja nê Tirtũm kapêr tũm o mē ahkre xwýnhjaja nê patre krãhtũmjaja. Mē kãm hprĩ hã ixpumunh nê kãm ixkapêr mar prãm kêt jakamã kot paj tokyx ma Jerujarê hwýr mō nhũm mē kamã ixpynê nê ixtak rax nê ixpĩ. Nom kot paj ixtyk ã apkati axkrunêpxi nhũm Tirtũm akupým ixto ixtĩr. Anê.

²² Hāmri nhũm Simãw Pêtre tee ri kot ã mē kãm amnhĩ jarênh anhýrja ã kuma nê hwýr tē nê hpa hã kupy nê mē ixpê ho kato nê mē ixkãx ã o xa. Nê ã kot amnhĩ jarênh anhýrja nê kãm kapêr nê kãm:

—Kwa nà Pahшти. Ri ã amnhĩ jarênh anhÿr kêt nê. Mo kot kêt mē ri axtem nē ã anhĩpêx anê? Anê.

²³ Hāmri nhũm kuma nē hwÿr apkjê nē omu nē kām:

—Tk. Te apê Satanasti kapêr pyrāk o na ka ã inhmã akapêr anê. Kot kaj ã akapêr anê hāmri nē ixkôt apa hkêt nê. Tĩrtũm kām hprãm xà hkôt na ã mē kot inhĩpêx anhÿr kaxyw kênã. Tã ka Tĩrtũm jamaxpêr o ajamaxpêr kêt nē amnhĩ jamaxpêr o ã inhmã akapêr anê. Te apê ixpê axàmnr xwÿnh pyrāk o amnhĩ nhĩpêx. Anê.

Jejus krajaja kot tanhmã amnhĩ nhĩpêx to hã mē harênh

Makre 8.34-9.1; Rukre 9.23-27; Juãw 12.24-26; mãânêh Rômãn 15.1; Wam Korĩt 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhũm pre ã Jejus Simãw Pêtre mã kapêr anê hāmri nē hpãnhã mē ixpê hkôt ixpa ho ixpa xwÿnh piitã mē inhmã kapêr nē mē inhmã:

—E kot kaj mē ixkôt amnhĩ xunhwÿr ã amnhĩ jarê hāmri nē mãânêh amnhĩ jarênh o: “Jesús kêp inhõ Pahшти jakamã kot paj kapêr kôt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã hã inhĩpêx hto.” Anhÿr o amnhĩ jarê.

²⁵ —Koja mē ixtã mē atõx pĩ rÿ tanhmã mē atõ hto ka ty. Tã nom koja akaxwÿnh ma ixwÿr àpir kurê kumrêx. Hāmri ka ixkuri atĩr tũm nē amex rãhã nē apa ho apa. Nom kot kaj mē jar atĩr prãm xàj ixkaga hāmri nē inhõ krĩ hwÿr axàpir kêt nê.

²⁶ —Nê koja mēhõ hikukrêx rax gryk ã Tĩrtũm kaga. Tã nhÿrmã ty hāmri nē amnhĩ kôt hikukrêx õ hpyr nē o mōr kêt nê. Kojã tee ri kuwy hwÿr mōr pymaj amnhĩ nê hikukrêx rax o amnhĩ pãnhã amnhĩrer prãm kaprÿ. Tanhmã kojã amnhĩ to nē Tĩrtũm mã amnhĩre nē ma õ krĩ hwÿr api? Kojã ã amnhĩ nhĩpêx anhÿr kêt nê.

²⁷ —Nê ixpê Tĩrtũm kot mē awÿr inhmênh xwÿnh kot paj nhÿrmã kaxkwa rũm akupÿn mē awÿr wrÿ nhũm Tĩrtũm kapêr o mē wrÿk xwÿnhjaja man ixkôt wrÿ. Hāmri pa inhõ Papaj nhÿ hã ixte mē piitã tanhmã mē kot amnhĩ nhĩpêx to hã mē omunh xà hkôt ahpÿnhã tanhmã mē harênh to.

²⁸ ãm hāmri na pa ã mē amã amnhĩ jarênh anê. Kot paj nhÿrmã akupÿn ixte mē ato amnhĩptàr kaxyw man mē awÿr wrÿ. Tã kot kaj mē akwÿjaja akupÿn ixwrÿÿta kukamã tokyx ixte tanhmã ixte amnhĩ nhĩpêx to hã ixpumu. Anê.

17

Jejus kot hixêt prêk nhĩmõk ã hirã kamã ãm ã harênh

Makre 9.2-13; Rukre 9.28-36; mãânêh Sikũn Pêtre 1.16-18

¹ Tã nhũm semãnja hapêx nhũm Jejus ma nhÿri hixêt prêk wÿr mō. Nê kaxyw Simãw Pêtre nê Xiakre nê Xiakre htõ Juãwja nhũm ma amnhĩ kôt wa mē o mō. Nhũm wa mē mō nê hixêt prêk ã api nê himõk ã kuhê.

² Hāmri nhũm Jejus xep ra axtem nē xa. Axtem hkuk nhĩrã htÿx nē xa. Te myyti nhĩrã htÿx pyrāk. Nê ê haka htÿx kumrêx.

³ Hāmri nhũm xep ja wa kaxkwa rũm hwÿr wrÿ nê kuri kãm kapêr o xa. Mojes mē Erisja wa nhũm hwÿr wrÿ nê kuri xa. Tĩrtũm amnepêh amnhĩ wÿr wa ho àpir tã wa akupÿn wrÿ nê Jejus mã kapêr o xa.

⁴ Hāmri nhũm Jejus kôt mē mōr xwÿnhjaja wa mē omu nhũm Simãw Pêtre tanhmã hamaxpêr to nê Jejus wÿr tē nē kãm:

—Kwa Pahшти. Nã ãm hāmri na pu mē amnê mō. Kwa pu mē kritpêh jar axkamê nê tokyx panojarêt kêt nê. Pa mē amã pô nhĩrõnh o axkrunêpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mē kamã akrĩ. E kwa pa mē amã ho anê nà?

Anhÿr o kãm kapêr. Nom amnhĩ krã hkôt ã kapêr anê.

⁵ Hāmri nê kormã ã kãm kapêr anhÿr rôm nhũm ra kakrã jaka htÿxja wrÿ nê wa mē hkunor pa nhũm wa mē kamã kuhê. Nhũm kakrã kamã Tĩrtũm mē kãm kapêr nê mē kãm:

—E ota Ixkra xa. Inhmã hapê ho inhmã hapê. E kêr ka mē kapêr mar tÿx rãhã ho ri apa. Anê.

⁶ Hāmri nhũm mē tee ri kuma nē kãm ma htÿx nê umaj pikap rôrõk nê htu mÿrpê hikwÿ.

⁷ Hāmri nhũm Jejus mē hwÿr tē nē mē hã ãhkra jaxwÿ nē mē kãm:

—E mẽ kànhmã akuhê nê amã ma hkêt nê. Anê.

⁸ Hãmri nhũm mẽ kuma nê kànhmã rĩt nê Jejus pix pumu nhũm ahte xa nhũm kuri wa ãm xwýnhta wa ra ma akupým api.

⁹ Hãmri nhũm mẽ kormã akupým hixêt nhĩmõk rũm mẽ ixwýr wrýk o mõi nhũm Jejus mẽ kãm:

—E kêr ka mẽ ham ate mẽmoj pumunh xwýnhta kormã nhãm mẽ kãm harênh kêt nê. Kot paj nhýrmã ty nê akupým ixtĩr ka mẽ rĩ kormã mẽ kãm ja hã ijarênh o ri apa. Anê.

¹⁰ Hãmri nhũm mẽ kormã akupým mẽ ixwýr wrýk o mõi nhũm mẽ Jejus mã:

—Kwa mẽ inhmã mẽmoj jarê. Na htem Tĩrtũm kapêr tũm o mẽ ijahkre xwýnhjaja mẽ inhmã: “Eris kumrêx koja Tĩrtũm mẽ pahwýr kumê nhũm Krisja kormã hapu hã wrý.” Anê. Na htem ã mẽ inhmã war ajarênh anê. Tã ka ra wrý nom kormã akukamã Erisja wrýk kêt. Anê.

¹¹ Hãmri nhũm mẽ kãm:

—Nà ãm hãmri na prem ã wa ijarênh anê. Na pre ra ixkukamã te Eris kot amnhĩ nhĩpêx pyrãk xwýnhta tẽ nê ixkutêp mẽ kãm ijarênh o pa.

¹² Tã nom nhũm mẽ ja hã omunh kêt nê. Na prem axtem nê kãm hprãm xà hkôt tanhmã hipêx to nê kupĩ. Tã koja mẽ nhýrmã ã hipêx anhýr pyrãk o inhĩpêx. Anê.

¹³ Hãmri nhũm mẽ ra hprĩ hã kuma nê axpên mã:

—Kwa Juãw Paxis pimràata na ã mẽ pamã harênh anê. Tapxipix na pre te Eris kot amnhĩ nhĩpêx pyrãk o amnhĩ nhĩpêx o pa. Tã tãm na mẽ pamã harê. Anê.

Jejus kot mēhō hkra nē mẽkarōmnuti kator ã harēnh

Makre 9.14-29; Rukre 9.37-43

¹⁴ Tã nhũm mẽ ra akupým ahpar mã man mẽ ixwýr hpõx o mõi nhũm mẽ ohtõ rax nê Jejus kutêp kuhê. Hãmri nhũm mẽhõ myja mẽ omu nê mẽ kutã tẽ nê mẽ hkaxpa nê Jejus kutã hkõn krã ho tẽm nê nhý nê hkra ho kuwý nê kãm:

¹⁵ —Pa Jejus. Kwa inhmã ixkra kamã axukaprĩ nê. Na hte mẽkarōmnutija xatã tanhmã ixpê ho nhũm hte ý hã mra nê rôrõk nê tõiã kuwy kamã rôrõk nê tõiã gõx kãm mran mrõ nê ixpê homnuj tỳx nê.

¹⁶ Tã pa akôt mẽ pa ho mẽ pa xwýnhjê hwýr o tẽ nom nhũm mẽ kot inhmã ho mex kaxyw tee ri tanhmã ho hkaprý. Kwa xà kot kaj akupým inhmã ho mex nà? Anê.

¹⁷ Hãmri nhũm kuma nê mẽ ixte hkôt ixpa ho ixpa xwýnhjê mã kapêr nê mẽ inhmã:

—Hêxta waa nê. Ra mẽ ate ixte Tĩrtũm nhý hã mẽ ho mex ã ixpumunh o ixkôt apa ryy htã kormã ixpyrà nê ã mẽ hipêx anhýr kêt nê. Nà kormã mẽ kaxyw Tĩrtũm kôt mẽ ajamaxpêr tỳx kêt jakamã na ka mẽ tee mẽ ho mex kaxyw. Anê.

Hãmri nê myta mã kãm:

—E amnê ixwýr akrata o tẽ pa omu. Anê.

¹⁸ Hãmri nhũm kuma nê hwýr o tẽ nhũm omu nê nê mẽkarōmnutija kator nhũm akupým mex kurê kumrêx.

¹⁹ Hãmri pa mẽ ixte Jejus kôt ixpa ho ixpa xwýnhjaja ja hã omu mẽ hkàx ã amnhĩ tã hkukja nê kãm:

—Kwa na pa mẽ axwakre kamã tee ri nê hanor prãm kaprý. Kwa mon pa mẽ apyrã nê nê hanor nhũm kator nê ma htẽm kêt nê? Anê.

²⁰⁻²¹ Hãmri nhũm mẽ inhmã:

—Nà kormã mẽ ate mẽ kaxyw Tĩrtũm kôt ajamaxpêr tỳx kêt. Nom kot ka mẽ kaxyw hkôt ajamaxpêr tỳx hãmri nê hkôt amnhĩ nhĩpêx kukwak ri mẽmoj tã awý nhũm mẽ ama nê mẽ ate mẽmoj tã axàhwýr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapêr nê kãm: “Kwa amnhĩ jarê nê ma tẽ nê gõ xujanãr kãm mãn mrõ.” Anhýr nhũm kot amar nê amar xà hkôt ã amnhĩ nhĩpêx anhýr kurê kumrêx pyrãk. Ja pyrã nê kot kaj mẽ amnhĩ kaxyw Tĩrtũm kôt ajamaxpêr tỳx kukwak ri mẽmoj tã awý nhũm mẽ ama nê mẽ amã mẽmoj tanhmã ho rý mẽ amã mẽmoj gõ. Anê.

Jejus kot htyk kukamã amnhĩ jarēnh ã harēnh

Makre 9.30-32; Rukre 9.43-45

²²⁻²³ Tã hãmri pa mẽ Jejus kôt ma mõi nê nhýri pika pẽ Garirej kamã kormã ixpa. Hãmri nhũm Jejus axte amnhĩ kukamã mẽ inhmã tanhmã htyk ã amnhĩ jarênh to nê mẽ inhmã:

—Nà koja mẽ tokyx mẽ kãm ixtã amýnê nhũm mẽ ixpĩ. Mẽ kot ixpĩr tã kot paj ixtyk

ã apkati axkrunêpxi nhũm Tirtũm akupỹm ixtõ ixtĩr. Anê.

Hãmri pa mẽ tee ri ã kot amnhĩ jarênh anhỹrja ã kuma nê ixkaprĩ htỹx kumrêx.

Jejus kot Tirtũm nhõrkwỹ hwỳr àr Rõmãn 13.5-7; Wam Korit 10.32-11.1

²⁴ Tã pa mẽ Jejus kõt ma mõ nê ra Kapanau hwỳr pøj. Hãmri nhũm mẽ kot Tirtũm mã amnhĩ jarênh xà hã ixkre ho mex kaxyw mẽ kêp kàxpore hkwy jamỹnh xwỹnhjaja mẽ ixpumu nê mẽ ixwỳr mra nê Simãw Pêtre mã kãm:

—Pa. Kwa xà na hte mẽ ajahkre xwỹnhja mẽ pahpê hkwyjê pyrã nê Tirtũm mã amnhĩ jarênh xà hã ixkre ho mex kaxyw kàxpore hkwy nhõr kêt nê nà? Anê.

²⁵ Hãmri nhũm mẽ kuma nê mẽ kãm:

—Tỳ kot mẽ kãm õr o pa kênã. Anê.

Hãmri nê ma mẽ ixkõt tẽ nê mẽ ixkõt mēhõ nhõrkwỹ hwỳr axà. Hãmri nê kot Jejus mã mẽ harênh mã tã nhũm ra hamaxpêr ã omu nê kumrêx kãm kapêr nê kãm:

—Kwa inhmã mẽmoj jarê Simãw Pêtre. Xà na hte pahi hkrajaja õ papaj mã kàxpore hkwy nhõr o pa nà? Xà na hte ãm hkra hkêt xwỹnh pixjaja kãm hkwy nhõr o pa? Anê.

²⁶ Hãmri nhũm kuma nê mẽ kãm:

—Nà mẽ kêp hkra hkêt xwỹnh pixjaja na hte kãm õr o pa. Anê.

Hãmri nhũm Jejus kãm:

—Tỳ. Nà ãm hãmri na ka ja jarê. Na hte pahi hkrajaja õ papaj mã kàxpore nhõr kêt nê. Mẽ kêp hkra kênã. Tã ixpê Tirtũm Kra jakamã mo kaxyw kot pa kêt õrkwỹ hwỳr inhgêx kaxyw kãm kàxpore hkwy gõ?

²⁷ Tã nom kot paj õr kêt nhũm kàxpore hkwy jamỹnh xwỹnhjaja tee ri ja hã ixpumu nê axpên mã ixte amnhĩ tomnuj xwỹnh ã ijarê. Jakamã e ma gõnhmã tẽ nê tep õ kanhê. Hãmri nê ho api nê apy nê hakwa jakjê nê kamã kàxpore htỹxre pumu. Nê apy nê man o tẽ nê pahpãnhã kàxpore jamỹnh xwỹnhhta mã agõ. Anê.

Nhũm pre ã Jejus Simãw Pêtre mã karõ anê nhũm kuma nê ma hwỳr tẽ nê kot kãm karõ xà hkõt ã amnhĩ nhĩpêx anê.

18

Mẽ kot amnhĩ to rũnh xwỹnhjê jarênh Makre 9.33-37; Rukre 9.46-48; mããnhên Piripos 2.3-7; Wam Pêtre 3.4, 5.5-6

¹ Tã mẽ ixte Jejus kõt ixpa ho ixpa xwỹnhjaja amnhĩ kukamã ijamaxpêr nê amnhĩ tã Jejus kukja nê kãm:

—Kwa mẽ inhmã mẽmoj jarê Pahihti. Nhỹrmã mẽ ixpê pahi nê anhĩhkõ hã mẽ ho amnhĩptâr o ri ixpata ã mẽ ixtõ kot paj we mẽ ho amnhĩptâr rax o ixkwỳjê jakre? Anê.

² Hãmri nhũm mẽ inhma nê amnhĩ wỳr mēhprĩre hõ mã hpa ho apê nhũm hwỳr tẽ nê mẽ ixkuri xa.

³ Hãmri nhũm Jejus omu nê hã mẽ inhmã:

—E mẽ inhma. Kêr ka mẽ apê pahi pyrãk o tanhmã amnhĩ jarênh to ho ri apa hkêt nê. ãm te amarĩ ri mẽ apa pyrãk o amnhĩ nhĩpêx. Te mēhprĩre kot amnhĩ nhĩpêx pyrãk. Kot kaj mẽ ã amnhĩ nhĩpêx anhỹr o apa hkêt hãmri nê nhỹrmã inhĩhkõ hã mẽ ho amnhĩptâr kêt nê.

⁴ Jakamã kot kaj mẽ amã nhỹrmã inhĩhkõ hã mẽ ho amnhĩptâr o apa hprãm. Hã kot kaj mẽ te mēhprĩre kot amnhĩ nhĩpêx pyrã nê amã amnhĩ to rũnh prãm kêt nê apa.

⁵ —Nê kêr ka mẽ apê pahi kot amnhĩ nhĩpêx pyrãk o tanhmã amnhĩ jarênh to ho apa hkêt nê. ãm te amarĩ ri mẽ apa pyrãk o amnhĩ nhĩpêx. Jao nhỹri mēhprĩjê hõ pumu nê kamã axukaprĩ nê kãm mẽmoj tanhmã ho rỳ kãm mẽmoj gõ. Hãmri nê te pa ate tanhmã ixto mex to pyrãk o amnhĩ nhĩpêx. Kot kaj mẽ ã amnhĩ nhĩpêx anhỹr o apa hãmri nhũm Tirtũm ja hã mẽ apumu nê mẽ ate amnhĩ to rũnh kêt tã mẽ ate amnhĩ to rũnh xwỹnh ã mẽ ajarê. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhỹr o ri apa. Anê.

Mẽ kot amnhĩ tomnuj xwỹnhjê hkukamã mẽ harênh

⁶ Nhũm Jejus arĩ mẽ inhmã mēhprĩ jarê nê mẽ inhmã:

—Nê mēhprĩre na htem amnhĩ kaxyw ixkõt hamaxpêr o pa. Tã koja mēhõ inhnê tanhmã mẽ kãm kapêr to. Mẽ kot tanhmã amnhĩ tomnuj to hprãm xà tanhmã mẽ kãm kapêr to ho pa. Hãmri nhũm mẽ kuma nê mẽ kapêr xà hkõt tanhmã amnhĩ tomnuj to. Hã koja Tirtũm ja hã omu hãmri nê kot inhnê tanhmã kãm kapêr to xwỹnhhta pumu nê homnuj tỹx nê. Te mẽ kot mēhõ pynênh nê mut ã kên pytĩ hõ nhõr nê ma o

htêm nê gê xupÿm kãm mênh pyræk o hipêx. Te ho ja pyræk no âm homnuj tÿx o hakre.

⁷ —Nê koja mênhō inhnê tanhmã mē kot ixkôt amnhĩ xunhwÿr xwÿnhjê hō mã kapêr to. Kot tanhmã amnhĩ tomnuj to hprãm xàj tanhmã kãm kapêr to. Rÿ kot ixkaga hprãm xàj tanhmã kãm kapêr to. Hãmri nhũm kuma nê mar xà hkôt ixkapêr kwÿm tanhmã amnhĩ tomnuj to. Tã koja Tirtũmja ja hã omu nê mãânên kot inhnê kêp àmnàr xwÿnhhta pumu nê ã inhnê kãm kapêr anhÿrja mÿrapê homnuj tÿx kumrêx.

⁸⁻⁹ —E kwa mē okora. Kot kaj mē anhĩhkra ho tanhmã amnhĩ tomnuj to rÿ apar o tanhmã amnhĩ tomnuj to. Hã kêr ka mē axte ã amnhĩ nhĩpêx anhÿr pymaj te mē ate amnhĩ pē krãhyr nê mênh pyræk o amnhĩ nhĩpêx nê axte ã amnhĩ tomnuj anhÿr kêt nê. Rÿ ka mē ano ho mēmoj punuj pumu. Hã kêr ka kãm ajamaxpêr pix o apa pymaj te mē ate amnhĩ pē ano katøk nê kaxàr nê mênh pyræk o amnhĩ nhĩpêx nê nhãm arĩt kurê kumrêx. Kêr ka mē ã amnhĩ nhĩpêx anhÿr o ri apa. Hãmri nê nhÿrmã ty nê ma Tirtũm nhō krĩ hwÿr api. No kot ka mē arĩ akutã ano nê arĩ akutã apar nê arĩ akutã anhĩhkra rãhã ri apa htã ho amnhĩ tomnuj o apa. Hãmri nê nhÿrmã ty nê ate amnhĩ tomnuj mÿrapê ma mē kot amnhĩ xà htÿx kamã hamak tũm xà hwÿr ma mō.

¹⁰⁻¹¹ —Nê kêr ka mē mēhprĩrejê kamã axukaprĩ rãhã ho apa. Na hte kaxkwa kamã Tirtũm kapêr o mē wrÿk xwÿnh kwÿjaja Tirtũm mã mē hamãr mex o pa. Tã koja mênhō tanhmã kêp hō hto nhũm mē hã omu nê ma tē nê Tirtũm mã harênh kurê kumrêx. Anê.

ôwêhti pikunor jarênh
Rukre 15.3-7

¹² Nhũm Jejus arĩ mē inhmã kapêr nê mē inhmã:

—E pa mē amã awjarê ka mē ixujarênh ma. Nà koja mênhō my hkrit ôwêhti xohtô nê. Nê apkati mē ma hamãr o pa. Hãmri nhũm pyxire nê tanhmã amnhĩ to nê kêp akunok. Kwÿ kaga nê ma nhÿhÿm ahte tē nê kêp akunok. Hãmri nhũm mytita ma akupÿm o mōr kaxyw hkwÿ ho pikuprōnh pa hãmri nê tee ri hkwÿ kaêx ã pikunor xwÿnhhta japêr nom nhÿri omunh kêt nê.

Hãmri nê tee ri hkukamã hamaxpêr nê ma hkwÿ ho mō nê nhÿri kure. Kutêp apkur kaxyw nhÿri kure hãmri nê ma akupÿm pikunor xwÿnhhta japêr o tē.

¹³ Hãmri nê hapêr rÿy nê nhÿri hwÿr kato nê omu nê hkĩnh nê. Hãmri nê kutu nê ma akupÿm o tē. Na hte pikunor kêt xwÿnhjê nhÿ hã hkĩnh tã pikunor xwÿnhhta mã kato nê hkĩnh tÿx nê. Krit xohtô htã nom âm kãm ho pixi nê ho hpikunor prãm kêt. ã mē ujarênh kot anhÿr.

¹⁴ Ja pyrã nê Tirtũm kãm mênhō pyxi nê nhÿrmã ma kuwy wÿr mōr prãm kêt kumrêx. Mē piitã mē kot hkôt amnhĩ xunhwÿrja na kãm hprãm. Anê.

Jejus kôt mē pahtôjê hō kot mē pahtomnuj jarênh

¹⁵ Nhũm Jejus arĩ mē inhmã kapêr nê mē inhmã:

—Nê ja. Koja ixkôt mē atō rÿ mē atōx tanhmã atomnuj to. Hã kêr ka ma hwÿr tē nê kot tanhmã anhĩpêx to hã amnhĩ tã kãm akapêr. Nom kêr ka mē nhãm mênhō mã harênh kêt nê. Âm tanhmã kot ato xwÿnhhta pix wÿr tē nê kumê war axpên mã akapêr nê war axpên ma. Nhũm ama nê akupÿm tãm anhĩpêx hã kêr ka akupÿm te ixkôt kêp atō rÿ atōx pyræk o ka wa axpên nhĩpêx nê axte jam ajamaxpêr kêt nê.

¹⁶ Nom koja ama nê âm ama rÿ tanhmã ato hkêt ã amnhĩ jarênh japêr. Hã kêr ka ma akupÿm tē nê akupÿm amnhĩ kôt Kris kôt atō rÿ atōx o axkrut rÿ mē ho axkrunêpxi nê amnhĩ kôt hwÿr mē o mra kê mē axpên tã war ama. Amnepêm Tirtũm kapêr ã kagà htũm kot ja jarênh o:

Kêr ka mē atō tanhmã axpên nhĩpêx to. Hãmri nê hã axpên mã akapêr kaxyw nê amnhĩ kôt akwÿjê ho axkrut rÿ ho axkrunêpxi nê akupÿm hwÿr mē o mra kê mē axpên tã war ama. Anê.

—ã Tirtũm kapêr ã kagà htũm kot ja jarênh kot anhÿr.

¹⁷ Jakamã kêr ka mē amnhĩ kôt akupÿm kot tanhmã ato xwÿnhhta wÿr mē o mra kê mē atã kuma. Hãmri nhũm arĩ mē kãm kot tanhmã ato hkêt ã amnhĩ jarê ka tee ri amnhĩ tã omu nê ikrêsti hwÿr tē nê Kris kwÿ hã mē pikuprōnh xwÿnhjê mã harê. Kê mē ama hãmri nê ja hã axte kot tanhmã ato

xwÿnhhta mã kapêr. Nhũm mẽ mar kêt nê arĩ kot tanhmã ato hkêt ã amnhĩ jarẽ ka mẽ amnhĩ nê hanor kurê kumrêx. Hãmri nê te kêp Kris kôt mẽ atõ rÿ mẽ atõx kêt pyræk o hipêx.

18 –Nê koja mēhō ixkôt amnhĩ xãm nê Inhĩpêxà Tĩrtũm kôt ri amnhĩ nhĩpêx o pa. Ka mẽ ja hã omu nê inhÿ hã tanhmã kãm akapêr to nê kãm: “E ra ate Jejus kôt amnhĩ xãm jakamã kot kaj nhÿrmã Tĩrtũm mẽ wa kuri amex kumrêx nê atĩr tũm nê apa ho apa.” Anhÿr o kãm akapêr. Nom mẽ kot ixkôt amnhĩ xunhwÿr kêt xwÿnhjaja ka mẽ ã mẽ kãm akapêr anhÿr kêt nê. ãm inhÿ hã mẽ kãm: “No mẽ kajaja mẽ ate Jejus kôt amnhĩ xunhwÿr kêt jakamã kot kaj mẽ Tĩrtũm mẽ Krata wa kuri atĩr tũm nê amex nê apa hkêt nê.” Anê. Kêr ka mẽ inhÿ hã ã ahpÿnhã tanhmã mẽ kãm akapêr to ho apa anê.

19-20 –Nê kot kaj mẽ Tĩrtũm mã amnhĩ jarênh kaxyw te axkrutre rÿ axkrunêpxire htã axpên wÿr akuprõ nom mẽ kapxipixjaja apikuprõnh kêt nê. Kot paj mẽ akaêx ã mẽ anhĩhkô hã mẽ amar o xa. Mẽ ate ano ho ixpumunh kêt tã pa wa mẽ anhĩhkô hã mẽ amar o xa. Jakamã kot kaj mẽ axpên wÿr akuprõ nê mẽmoj tã Tĩrtũm wÿ nhũm kaxkwa kamã ja hã mẽ ama. Nê mẽ ate hã axàhwÿr xwÿnhhta nhũm mẽ amã tanhmã ho. Kêr ka mẽ ã ixkamnàr rom axàmnhĩx amnhĩ to Inhĩpêxà hwÿr anê. Anê.

Nhũm pre ã Jejus mẽ inhmã kapêr anê.

Mẽ pahte tanhmã axpên nhĩpêx to hã mẽ pamã karõ

Matêwre 6.14-15; Rukre 17.3-4; mãänñ Epes 4.32; Korosẽ 3.13

21 Tã nhũm Simãw Pêtre Jejus wÿr tẽ nê mẽmoj tã hkukja nê kãm:

–Kwa inhmã mẽmoj jarẽ Pahihti. Xà koja akôt ixtõ rÿ ixtõx tanhmã inhĩpêx to pa amnhĩ tã omu nê ãm omu nê amnhĩ tã tanhmã ho hkêt nê. Nhũm axte tanhmã ixtõ nê axte tanhmã ixtõ ho 6 tã pa ãm amnhĩ tã omu nê amnhĩ tã tanhmã ho hkêt nê. ãm ho ijamakêtkati nê axte kãm ijamaxpêr kêt nê. ã amnhĩ tã hipêx anhÿr o 7 nhũm ja amã mex nê nà? Anê.

22 Hãmri nhũm kãm:

–Nà kot kaj ã amnhĩ tã hipêx anhÿr o 7 pix kêt nê. Koja mēhō xatã tanhmã ato rãhã

nê ka amnhĩ tã omu nê ajaxwÿja amnhĩ tã xatã tanhmã ho hkêt nê. ãm amnhĩ tã omu nê ãm omu nê tãm hipêx rãhã ho ri apa. Mãmri ho anhÿr o apa rãhã nê aa jam anhÿrer kêt nê.

23 –E kot paj ixprĩ hã mẽ amã tanhmã ja jarênh to ka mẽ inhma. Tĩrtũm na hte xatã mẽ ate tanhmã amnhĩ tomnuj to hã mẽ apumu nê mẽ anê rênh o pa. Te kot pahi kot ã hkwÿjê nhĩpêx anhÿr pyræk. Koja mẽ õ pahija kãm mẽ àpênh xwÿnhjaja kot kêp kàxpore ho ãpresta hã mẽ omunh kaxyw nhÿ.

24 Hãmri nhũm mẽ hwÿr ja ho tẽ nê kutã ãm. Ra kot kêp hikàxpore ho ãpresta rax xwÿnhja.

25 Tã no ãm aa akupÿm kãm õr kêt nê ra kêp ho hapêx pa. Hãmri nhũm pahija tee ri amnhĩ tã omu nê hkwÿjê mã hã amÿnê nê mẽ kãm: “E. Mẽ ma o tẽ nê hprõ nê hkrajaja nê õrkwÿ nê hikukrêx mērohã ho wēné hpa nê hpãnhã kàxpore py nê man inhmã o tẽ. Kot ixpê ixkàxpore ho ãpresta nê akupÿm inhmã õr kêt mÿrapê.” Anê.

26 –Hãmri nhũm kot ho ãpresta xwÿnhhta tee ri amnhĩ tã kuma nê kutã hkõnkrã ho nhÿ nê amnhĩ to hwÿr kãm hihtÿx nê kãm: “Kwa nà ri ixto anhÿr kêt nê pahihti. Ixkamã axukapri nê hkêt wehe. Nà kot paj akupÿm amã kugõ kãm ga.” Anê.

27 –Hãmri nhũm amnhĩ tã kuma nê kãm hkapri nê. Hãmri nê kãm: “Tõe. Nà kot paj ã anhĩpêx anhÿr kêt nê. Kot paj anhõ kôt kaxõnh pa nê kumẽ ka mãmri ma aja-makêtkati nê axàmnhĩx apa.” Anê.

28 Nhũm ã kãm kapêr anê nhũm kuma nê hkĩnh nê. Hãmri nê ma tẽ nê kato nê ixkre kapem pōristi hō pumu. Na pre ra kêp kàxpore hkwÿ ho grire nê ho ãpresta nhũm kato nê omu. Hãmri nê hwÿr tẽ nê amnhĩ kĩnhã õkre hã kumÿ nê kãm: “Kwa tokyx akupÿm ate ixpê kàxpore ho ãpresta pãnhã inhmã agõ.” Anê.

29 Hãmri nhũm tee ri amnhĩ tã omu nê ra ham kot pahi kutã amnhĩ nhĩpêxta pyrã nê kutã hkõnkrã ho nhÿ nê kãm: “Kwa nà. Kwa ri ixto anhÿr kêt nê. Nà kot paj hpãnhã amã kugõ. Kwa ixkamã axukapri nê hkêt wehe.”

30 Anhÿr tã nom nhũm kuma nê ãm kuma nê hã amÿnê. Hã hkwÿjê mã amÿnê nê mẽ

kâm: “E mẽ ma jahti ho tẽ nẽ haxà. Koja kot ixpê kàxpore ho ìpresta pãnhã inhmã kugõ nẽ rĩ kormã kato nẽ rĩ amnhĩ pumu.” Anẽ. Hãmri nhũm mẽ kuma nẽ ma o tẽ nẽ haxà.

³¹ –Hãmri nhũm hkwýjaja tee ri mar o kuhê nhũm mẽ kęp ja omnuj nẽ nhũm mẽ pahi hwýr agjê nẽ kãm harẽ.

³² Hãmri nhũm tee ri harẽnh ma nẽ kamã gryk týx nẽ akupým amnhĩ wýr hã karõ nhũm akupým hwýr axà nhũm kãm: “Tk. Kwa na ka pre amnhĩ tomnuj týx nẽ. Ate amnhĩ to ixwýr nhũm inhmã akaprĩ nẽ ixte anhõ kõt kaxõnh nẽ mẽn̄h tã

³³ ka amnhĩ kĩnhã anhĩõta kamã axukaprĩ hkêt nẽ ri ã hipêx anẽ.” Anẽ.

³⁴ Hãmri nẽ kamã gryk nẽ hã õ pôristi mã amýnê nhũm mẽ ma o tẽ nẽ haxà. Mẽ kot mẽ hagjênh xà hã ixkre kamã apkati mẽ tanhmã mẽ kot hipêx to kaxyw nhũm mẽ kãm hã amýnê. Tanhmã mẽ kot hipêx to rãhã nhũm kot akupým kàxpore raxta nhõr par nẽ rĩ kormã kator kaxyw nhũm mẽ ma o tẽn̄ haxà. ã mẽ ujarênh kot anhýr. Anẽ.

³⁵ Nhũm pre ã Jejus mẽ ixte hkõt ixpa ho ixpa xwýnhjê mã kapêr anẽ. Hãmri nẽ mẽ inhmã:

–Ja pyrã nẽ koja ixkõt mẽ atõ rý mẽ atõx tanhmã mẽ atomnuj to ka mẽ amnhĩ tã omu nẽ ãm omu nẽ ho ajamakêtkati kurê kumrêx nẽ axte kãm ajamaxpêr kêt nẽ. Te pahi kot mẽhõ nhõ kõt kaxõnh par nẽ axte kãm hamaxpêr kêeta pyrãk. No kot kaj mẽ ã amnhĩ nhĩpêx anhýr kêt nhũm kaxkwa kamã inhõ Papaj ja hã mẽ apumu nẽ te ho pahi tee ri kot amnhĩ tomnuj xwýnh̄ta kot amnhĩ nhĩpêx ã omunh nẽ hã àmnên̄h nhũm mẽ kot apkati mẽ tanhmã omnuj tota pyrãk o mẽ anhĩpêx. Anẽ.

19

Jejus kot mẽ pahte axpên kaga nê mẽ pahkurê

Matêwre 5.31-32; Makre 10.1-12; Rukre 16.18; mãânên̄ Wam Korõt 7.10-16

¹ Tã nhũm Jejus mẽ inhmã kapêr pa nẽ mẽ inhmã anẽ pa mẽ ixrohã Garirej rũm ixkato nẽ pyhti pê Jotãw hã rê nẽ hpãnhã ihkjê hã ri ixpa. Pika pê Jutej kamã.

² Hãmri nhũm mẽ ohtõ nẽ Jejus pumu nẽ man mẽ ixwýr mra nhũm mẽ omu nẽ mẽ kãm akupým mẽ ã xwýnhjê ho mex.

³ Hãmri nhũm Parijew nhõ xwýnh kwýjaja hwýr mra. Hêx rom kot kamã hamak nẽ tanhmã ho kapêr punuj to kaxyw hwýr mra nẽ kãm:

–Pa? Kwa mẽ inhmã mẽmoj jarẽ. Tanhmã na pre amnepêm finat Mojesja mẽ pahte mẽ pahprõ kaga hã mẽ panhĩgêjtê mã karõ hto? Xà kot mẽ pahprõ pahkwým ri tanhmã amnhĩ nhĩpêx to pu mẽ hkaga nhũm ja Tirtũm mã mex nẽ nã? Anẽ.

⁴ Hãmri nhũm mẽ kãm:

–Nã na ka mẽ aprĩ hã Mojes kot tanhmã ja jarênh to mar mex kêt nẽ. Ja kot anhýr kêt. Amnepêm mẽmoj piitã hkrax kãm na pre Tirtũm my nẽ nija wa hipêx. Axpên kaxyw wa hipêx.

⁵ Hãmri nẽ wa hkukamã tanhmã wa kot amnhĩ nhĩpêx to hã wa harẽ nẽ wa harênh o:

Koja mẽmyjaja hprõ kaxyw hãmri nẽ gryk ã katorxà mẽ hipêexà wa hkaga nẽ ãm hprõ kõt pix mã pa ho pa. Te wa tipxi nẽ ri wa pa pyrãk o amnhĩ nhĩpêx. Anẽ.

–Na pre ã Mojes Tirtũm nhý hã mẽ kãm ja jarênh anẽ.

⁶ Jakamã koja te wa tipxi nẽ ri wa pa pyrãk o axpên nhĩpêx o pa. Tirtũm tãm kot axpên mã wa õr kênã kot kêt wa axtem nẽ ri htýx ri hamaxpêr nẽ axpên kaga. Anẽ.

⁷ Hãmri nhũm mẽ kuma nẽ kãm:

–Tý. Nom finat Mojes na pre mẽ pakukamã mẽ panhĩgêjtê mã ã ja hã karõ anẽ nẽ mẽ kãm:

Kot kaj mẽ aprõ kaga kaxyw hãmri nẽ ra kęp aprõ hkêt ã hã kagã nhĩpêx nẽ kãm agõ nẽ amnhĩ nê hano kê ma tẽ.

–Anhýr o na pre mẽ kãm hã karõ. Tã ka na ka mẽ ixte axpên kaga hkêt ã mẽ inhmã karõ. Anẽ.

⁸ Hãmri nhũm mẽ kuma nẽ mẽ kãm:

–Tý no ãm mẽ kãm Tirtũm kapêr kõt amnhĩ nhĩpêx prãm kêt jakamã na pre ã mẽ kãm ja jarênh anẽ. No amnepêm mẽmoj piitã hkrax kãm na prem ã amnhĩ nhĩpêx anhýr o pa hkêt nẽ.

⁹ Jakamã kêr ka mẽ aprõ kaga hkêt nẽ apa. Kot kaj mẽ hkaga nẽ hpãnhã nhãm mẽhõ ho aprõ nhũm Tirtũm noo mã te ate wam aprõ kamã nhãm aprõ nyw o amnhĩkati pyrãk. Tirtũm pê ja omnuj týx nẽ. Rý koja mẽhõ hprõ kaga ka hpãnhã ho aprõ

nhùm Tirtùm noo mã te ate wam mjên pê ho amnhîkati pyrâk. Ja mãânên Tirtùm pê omnuj tỳx nê. Anê.

Nhùm pre ã Parijew nhõ xwỳnhjê mã kapêr anê.

¹⁰ Hãmri pa mẽ ixte hkôt ixpa ho ixpa xwỳnhjaja ã kapêr anhỳrja ã kuma nê kãm:

—Xà na hte mẽ mjên ra kãm mẽ hprõ hkĩnh kêt tâ hkaga hkêt nê arĩ hkôt pa ho pa nhùm hte Tirtùm mã ja mex nê nà? Jakamã kwa xà kot paj mẽ nhỹrmã ixprõ kaga pymaj ixprõ hkêt kumrêx nê ixpa ho ixpa nhùm ja mẽ inhmã mex nê nà? Anê.

¹¹ Hãmri nhùm mẽ inhmã:

—Nà ãm hãmri na ka mẽ ja jarê. No mẽ ate harênhja na mẽ piitã mẽ kãm mex kêt. Koja Tirtùm tãm amã aprõ hkêt ã ajarê ka rĩ aprõ hkêt nê ahte ajamakêtkati nê ri apa.

¹² Na htem piitã hprõ nê pa hkêt nê.

Na hte kamã tanhmã mẽ kute xwỳnhjaja kormã hprĩre ri tanhmã kute mỳrapê kãm hprõ hprãm kêt nê pa.

Nê kamã tanhmã mẽ ho mỳrapê nhùm mẽ hkurê hkêt nê hprõ hkêt nê pa.

Nê kamã mẽ kãm Tirtùm mã tanhmã amnhĩ to ho pa pix prãm xàj kãm hprõ hprãm kêt nê pa.

Tã kot kaj mẽ jajê pyrã nê ã amnhĩ nhĩpêx anhỳr prãm nê rĩ kam nê aprõ hkêt nê apa. Anê.

Jejus kot amnhĩ nê mẽhprĩjê janor kêt ã harênh

Makre 10.13-16; Rukre 18.15-17

¹³ Tã nhùm Ijaew kwỳjaja Jejus pumu nê hwỳr mẽ hkrarejê jamý nê mẽ o mra. Kot mẽ hã ãhkra jaxwỳr nê mẽ ho Tirtùm wỳr kaxyw hwỳr mẽ o mra. Hãmri pa mẽ ixte hkôt ixpa ho ixpa xwỳnhjaja tee ri mẽ omu nê tanhmã nê mẽ kãm ixkapêr to nê mẽ kãm:

—Tk. Mo kaxyw na ka mẽ Jejus wỳr mẽ o mra? Kormã mẽ raxre kênã. Kwa mẽ ma akupým mẽ o mra nà? Anê.

¹⁴ Hãmri nhùm Jejus mẽ inhma nê mẽ inhmã:

—Kwa nà mẽ ri inhnê mẽhprĩjê kurê hkêt nê. Kwãr mẽ mãmrĩ ixwỳr mẽ o mra. Anê.

Hãmri nê amnhĩ wỳr mẽ mẽ kãm hpa ho apê nhùm mẽ hwỳr mẽ o mra nhùm mẽ kuri kuhê nhùm mẽ omu nê mẽ hã mẽ inhmã:

—E mẽ jarejê pumu. Na htem hamakêtkati nê hkĩnh nê ri pa. Nê mẽ kãm amnhĩ to rũnh prãm kêt nê. Tã Tirtùm kôt mẽ kot amnhĩ nhĩpêx o mẽ pa xwỳnhjaja te mẽ kot jajê pyrã nê kãm amnhĩ to rũnh prãm kêt nê pa. Anê.

¹⁵ Hãmri nê mẽ hã ãhkra jaxwỳr nê mẽ ho Tirtùm wỳr hãmri nê mẽ inhmã anê pa mẽ ma axte mẽ kurùm mō.

Kàxpore rũnh xwỳnh jarênh

Makre 10.17-22; Rukre 18.18-23; mãânên Rômãn 3.19-20; Wam Ximotre 6.6; Xiakre 2.10

¹⁶ Tã nhùm Ijaew òja Jejus wỳr tẽ nê kãm:

—Pa mẽ ijahkre xwỳnh? Kwa inhmã mẽmoj jarê. Tanhmã kot pa nhỹrmã Tirtùm ri ixtĩr tũm nê ixpa ho ixpa kaxyw amnhĩ nhĩpêx to wehe? Anê.

¹⁷ Hãmri nhùm kãm:

—Tk. Ra Tirtùm kot nhỹrmã mẽ atĩr tũm nê apa kaxyw mẽmoj tã mẽ amã karõ nhùm ate mar mex kênã kot ka kêt ri axte ja hã ixkukja. Nà Tirtũmja mex o mex jakamã kot kaj amã kuri atĩr tũm nê apa hprãm hã kot kaj kapêr kôt amnhĩ nhĩpêx no ri apa. Anê.

¹⁸ Hãmri nhùm kãm:

—No nhỹ kapêr kôt kot paj amnhĩ nhĩpêx o ri ixpa wehe? Anê.

Hãmri nhùm kãm:

—Na pre mẽ amã mẽmoj tã karõ ho:

Kêr ka mẽ axpên par kêt nê.

Nê nhãm mẽ hprõ ho amnhĩkati hkêt nê.

Nê mẽ kêp axàhkĩnh kêt nê.

Nê tanhmã mẽ ho axêx to hkêt nê.

¹⁹ Nê anhĩpêxà mẽ akatorxã wa hã api-jaam nê wa ho mex pê wa kutã anojarêr o ri apa.

Nê amã akwỳjê hã ma ho te ka amã amnhĩ tã ma pyrãk o mẽ hipêx. Jao tãm mẽ hipêx o ri apa.

E kot kaj amã nhỹrmã Tirtùm kuri atĩr tũm nê apa hprãm hã kêr ka ã amnhĩ nhĩpêx anhỳr o ri apa. Anê.

²⁰ Hãmri nhùm kuma nê kãm:

—Ku nhùm. Ra ã ixte amnhĩ nhĩpêx anhỳr o ri ixpa kênã. Nom te kormã ixtĩr tũm nê ixpa kaxyw ixte tãm kêt pyrãk. Kwa axte inhmã mẽmoj jarê nà? Anê.

²¹ Hãmri nhùm kãm:

—Nà kormã mẽmoj pyxi nê arĩk. Na ka amã akukrêx rax prãm tỳx o amã Tirtùm

prãm jakre. Jakamã ma akupÿm tẽ nẽ akukrêx rax o wẽnê hpa nẽ hpãnhã kàxpore jamÿ nẽ ma mẽ kêp amrakati xwÿnhjê mã òr pa. Hãmri nẽ rĩ akupÿn ixwÿr tẽ nẽ rĩ ixkôt apa ho apa. Anẽ.

²² Hãmri nhũm kuma nẽ tee ri amnhĩ kukamã hamaxpêr. Kãm hikukrêx rax japê nẽ kãm kamã ìhkra karo hprãm kêt nẽ. Hãmri nẽ tee ri Jejus kot ã kãm hã karõ anhÿrja ma nhũm ja kêp omnuj nẽ nhũm ma akupÿm htêm kurê kumrêx.

²³ Hãmri nhũm Jejus tee ri omu nẽ mẽ inhmã:

—Hêxta waa nẽ. Koja mẽ hikukrêx rũnh xwÿnhjaja ohtô nẽ kãm mẽ hikukrêx japê xàj Tirtũm mẽ wa ixri htĩr tũm nẽ pa ho pa hkêt nẽ. Wa ixte amnhĩ nhĩpêxja mẽ kêp hihtÿx.

²⁴ Mẽ kãm hikukrêx rũnh mã ìhkra karo hprãm kêt rãhã tee ri kãm Tirtũm kôt amnhĩ nhĩpêx prãm kaprÿ. Te ho mēhõ kot menh kagô hã hkre nẽ kãm kagô katõk prãm kêt rãhã kãm guhkrax kãm àr prãm kaprÿta pyræk. Anẽ.

Nhũm pre ã Jejus mẽ inhmã kapêr anẽ.

²⁵ Hãmri pa mẽ kuma nẽ tee ri amnhĩ kukamã ijamaxpêr nẽ kãm:

—Kwa mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhÿrmã war ari ixtĩr tũm nẽ ixpa ho ixpa hkêt nẽ nà? Anẽ.

²⁶ Hãmri nhũm mẽ inhmã:

—Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt nẽ. ãm Tirtũm pix na hte ja kaxyw tanhmã mẽ akrã hto ka mẽ amã akukrêx japê hkêt nẽ. Jao ra mẽ apê Tirtũm mẽ wa ixri atĩr tũm nẽ mẽ apa ho mẽ apa mã xwÿnh. Anẽ.

²⁷ Hãmri nhũm Simãw Pêtre kãm:

—Kwa no we mẽ pajaja Pahihti? Na pa prem agryk ã mẽmoj piitã hkaga hpa nẽ akôt ixpa ho ixpa. Jakamã kot paj mẽ nhÿrmã war ari ixtĩr tũm nẽ ixpa ho ixpa nà? Anẽ.

²⁸ Hãmri nhũm kuma nẽ mẽ ixpiitã mẽ inhmã:

—Tÿ. Kot paj nhÿrmã mẽmoj piitã ho nyw pa hãmri nẽ ixte mẽ ho amnhĩptar o ixkrĩ xà maati kamã nhÿ nẽ mẽ piitã mẽ kot tanhmã amnhĩ nhĩpêx to hã mẽ omunh xà hkôt tanhmã mẽ harênh to. Tã mẽ kajaja

mẽ ate ixkôt apa ho apa xwÿnhjaja kot kaj mẽ inhmã Ijaew kot amnhĩ nhĩpêx ã mẽ omunh xà hkôt ahpÿnhã tanhmã inhmã mẽ harênh to. Mẽ mex ã mẽ harê rÿ mẽ mex kêt ã mẽ harê. Kot kaj mẽ ã inhmã mẽ harênh anẽ. ãm hãmri na pa mẽ amã ixkapêr anẽ.

²⁹ —Nẽ ka mẽ atõ inhmã tanhmã amnhĩ nhĩpêx to ho apa kaxyw akwÿjê re nẽ ma inhmã mẽmoj to anhÿr o ri apa. Tanhmã anhõrkwÿ rÿ atõ rÿ atõx re. Rÿ aprõ nẽ akrajê re. Rÿ akatorxà mẽ anhĩpêêxà war are. Rÿ akukrêx piitã rer pa hãmri nẽ ma mẽ piitã mẽ kãm ixkapêr o mẽ ahkre ho ri mẽ hkôt apa. Hã kot paj mẽ apumu nẽ mẽ ato mex rax nẽ. Hãmri ka mẽ ma mẽ hkôt apa nẽ mẽ kãm ixkapêr jarênh o apa nhũm mẽ kot mẽ amar xwÿnh kwÿjaja mẽ ama nẽ kãm mẽ akĩnh nẽ. Nẽ ra mẽ ate akwÿjê rer par tã mẽ tãmjaja te mẽ apê mẽ hkra rÿ mẽ htõ rÿ mẽ htõx pyræk o mẽ anhĩpêx nẽ mẽ ato mex o pa. Hãmri ka mẽ nhÿrmã ty nẽ ma Tirtũm mẽ wa inhõ krĩ hwÿr api nẽ wa ixkuri amex kumrêx nẽ atĩr tũm nẽ apa ho apa.

³⁰ Nom kwa kêr ka mẽ amnhĩ tã ja ma nẽ amnhĩ to rũnh xwÿnh ã amnhĩ kamnhix kêt nẽ. Jar mẽ kot amnhĩ to rũnh ã amnhĩ to jarkrar xwÿnhjaja koja mẽ nhÿrmã amnhĩ to hkryre hã amnhĩ pumu. No jar mẽ kot amnhĩ to hkryre xwÿnh ã amnhĩ jarênh xwÿnhjaja koja mẽ nhÿrmã amnhĩ to rũnh ã amnhĩ pumu. Anẽ.

20

Jejus kot nhÿrmã hkrajê ho mex ã harênh Rõmãn 9.14-16

¹ Nhũm Jejus arĩ mẽ ixte hkôt ixpa ho ixpa xwÿnhjê mã awjarê nẽ mẽ inhmã:

—Nẽ kot paj nhÿrmã tanhmã mẽ ato mex to. Te ixpê hpur nhõ dõn kot amnhĩ nhĩpêx pyræk o mẽ anhĩpêx. Koja pur nhõ dõnja ihpur kãm mẽmo xõ ra hkà hpa nhũm omu hãmri nẽ kaxyw mẽ àpênh xwÿnhjê japêr kaxyw ma gãm tẽ. Nẽ gáp xa nẽ mẽ kãm akir nhũm mẽ hã akuprõ.

² Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axàpênh o amÿkry pa hpãnhã mẽ kot apkati pixi hã mẽ àpênh pãnhã mẽ kãm amnhĩrer xàja kôt mẽ amã amnhĩre.” Anẽ

hāmri nhūm mē kuma nē kām: “Tôe. Nà kot paj mē amā apê.” Anē nhūm pur wÿr mē kurē nhūm mē ma kām àpênh mǎ mra.

3 —Tǎ nhūm arī kÿx mǎ myt tē nhūm pur nhō dōn akupÿm gām tē nhūm mē hkwyjǎ arī kuhê.

4 Nhūm tee ri mē omu nē mē kām: “Kwa mon ka mē axàpênh kêt nē arī akuhê? E. Mē ma wantajê hkôt mra nē inhmǎ apê pa hpānhǎ mē amā amnhīrer mex nē.” Anē.

5 Hāmri nhūm mē kuma nē ma mē hkôt mra. Tǎ nhūm ra myt kaxkwa nhīpōk ri ajêt nhūm hpur nhō dōnja mǎ hkwyjê ho anē nē. Kê axte mē hkôt jajê jano nhūm mē ma mē hkôt mra. Tǎ nhūm ra myt ahpanh grire nhūm ma akupÿm kêwe gām tē nē mǎ mē ho anē nē axte mē hkôt jajê rē.

6 —Tǎ nhūm ra myt grire nhūm ma akupÿm kêwe gām tē nē jajê pumu nhūm kê wem arī gáp kuhê. Hāmri nhūm tee ri mē omu nē mē kām: “Kwa mon ka mē axàpênh kêt nē atÿx gáp akuhê ho akuhê?” Anē.

7 Hāmri nhūm mē kām: “Nà mēhō kot mē inhmǎ mē ixàpênh ã karōre hǎ.” Anē. Hāmri nhūm mē kām: “Tôe. Mē ma mē hkôt ixpur wÿr mra nē inhmǎ mǎn apê.” Anē hāmri nhūm mē kuma nē ma hkwyjê hkôt mra.

8 —Tǎ nhūm ra kamàt. Hāmri nhūm hpur nhō dōnja kām àpênh xwÿnhjê krāhtūm wÿr tē nē kām: “E. Ma mē hwÿr tē nē mē kām anē kê mē àpênh kaga nē man akôt mra ka inhmǎ mē kām amnhīre. Nom kê ka hapu hǎ mē mōr xwÿnhjê kumrêx mǎ amnhīre nē wam mē mōr xwÿnhjê ho hapu nē mē kām amnhīre.” Anē. Hāmri nhūm kām: “Tôe. Nà kot paj mē ho anē.” Anē.

9 Hāmri nē ã mē kām amnhīrer anē. Hapu hǎ mē mrar xwÿnhjê kumrêx mǎ amnhīre. Te mē kot kwÿhtǎ àpênh o amÿkry pyrāk o nhūm hpānhǎ mē kām amnhīre.

10 Hāmri nhūm wam mē mrar xwÿnhjaja ja hǎ mē omu nē hkīnh nē. Hāmri nē htÿx hamaxpêr o: “Nà kot paj xep kàxpore jamÿnh rax o mē hakre. Ixàpênh rax o ixte mē hakrenh kēnǎ.” Anhÿr tǎ no nhūm mē piitǎ mē kām amnhīrer o axpên pyrāk. Ra pur nhō dōn kot kām hǎ karō xà hkôt.

11 Hāmri nhūm mē hamÿ nē tee ri hkre kamǎ omu nē we ra hpur nhō dōnja kamǎ gryk nē.

12 Hāmri nē hwÿr mra nē kām: “Kwa jajaja na mē amā àpênh o ore pyxi nē. No kêt mē pajaja na pa mē kwÿhtǎ ixàpênh rax o kamàt. Arīgro htÿx kām ixàpênh o ixām o ixtǎ kamàt tǎ ka pêr ãm mē inhmǎ amnhīrer o axpên pyrāk. Kwa na ka mē ixtomnuj nē.” Anē.

13 Hāmri nhūm mē kuma nē mē kām: “Tk. Nà na pa mē atomnuj kêt nē. Na pa kwÿhtǎ tanhmǎ mē amā amnhīrer to xà jarê ka mē inhma nhūm ja mē amā mex nē ka mē ma hwÿr axàpênh mǎ mra.

14 Kwa mē akàxpore jamÿ nē ma mra. ãm pa inhmǎ hprām xà hkôt na pa ã mē amā amnhīrer anē.

15 Ixkàxpore jakamǎ kot paj nhām inhmǎ mēhō mǎ òr prām xà hkôt kām kugō. Tǎ ka mē ã mē hǎ ixkamǎ agryk anē. E mē akàxporeja mÿ nē ma mra.” Anē. Nhūm ã hpur nhō dōn mē kām kapêr anē. ã mē ujarênh kot anhÿr. Anē.

16 Nhūm pre ã Jejus mē inhmǎ ujarênh anē nē mē inhmǎ:

—Ja pyrǎ nē wam mē ate ixkôt amnhī xunhwÿr xwÿnhjaja nē hapu hǎ mē kot kormǎ ixkôt amnhī xunhwÿr mǎ xwÿnhjaja kot paj nhÿrmǎ mē apiitǎ mē ato mex kumrêx o axpên pyrāk. Anē.

*Jejus kot htyk kukamǎ amnhī jarênh
Makre 10.32-34; Rukre 18.31-34*

17 Tǎ nhūm Jejus mē inhmǎ anē pa mē ixrohǎ ma Jerujarê hwÿr mō. Mē ohtôjê hkôt mō. Hāmri nhūm Jejus mē ixpê 12jê mǎ anē nē mē ixkwÿjê hkàx ã mē inhmǎ kapêr kaxyw ahte hapu hǎ mē ixto mō.

18 Hāmri nē mē inhmǎ amnhī kukamǎ tanhmǎ amnhī jarênh to nē mē inhmǎ:

—E na pu mē ra Jerujarê hwÿr mō. Kamǎ koja mē pahkwÿjaja inhīpêx kati nē. Koja mē patre krāhtūmjê mē Mojes kapêr o mē ahkre xwÿnhjê nhīhkram ijaxà nhūm mē kot ixpīr kaxyw ixtǎ amÿné.

19 Koja mē kām ixkurê xwÿnhjaja ixpynê nē Rōm nhō xwÿnhjê nhō pôristijê hwÿr ixto tē nē mē kām tanhmǎ ixto hêx to. Hāmri nhūm mē kuma nē mē mar xà hkôt tanhmǎ inhīpêx to. Nhūm mē hkwyjaja ixtǎ hpêr o axkê nē ixtǎ akunha nhūm mē hkwyjaja ixto kapêr punuj nē tanhmǎ ijapry hto nē ixtak. Hāmri nē ma ixto tē nē pī kahpa hǎ

inhô nê ixpî. Æ koja mē inhîpêx anê. Nom kot paj ixtyk ã ixtâ apkati axkrunêpxi nhûm Tîrtûm akupÿm ixto ixtîr. Anê.

Xiakre mē Juãw wa katorxà kot wa ho Jejus wÿr ã harênh

Makre 10.35-45; mãânên Rômân 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêtre 5.3

²⁰ Tã nhûm Jepetew prôja amnhî kôt Jejus wÿr hkra Xiakre mē Juãwja wa o tē. Kot wa ho Jejus wÿr kaxyw hwÿr wa o tē. Mē ixpyrà nê wa kot Jejus kôt pa ho pa xwÿnhjê hõ na pre wa nhûm wa katorxàja Jejus wÿr wa o tē. Hãmri nê kutã hkônkrã ho tēm nê nhÿ

²¹ nhûm kãm:

—Pa mo na? Anê.

Hãmri nhûm kãm:

—Ma ixkrata na pa ixte wa ho awÿr kaxyw awÿr wa o tē. Xê kot kaj nhÿrmã ate mē piitã mē ho amnhîptâr kaxyw nhÿ nhûm ixkrata wa akutã anhîjê nê wa kêp anhõ kôwenatô nê akutã anhîjê nê wa ato nhÿ. Ja prãm xàj na pa ã wa ho awÿr anê. Anê.

²² Hãmri nhûm kuma nê Xiakre mē Juãw wa omu nê wa kãm:

—Nà na war akatorxàja htÿx ã war ato ixwÿr anê. Koja mē tokyx ixpî kot paj amnhî xà htÿx kãm ijamak kãm ty. Tã xà koja mē ixpyrà nê ã war anhîpêx anê ka wa ixpyrà nê amnhî xà htÿx kamã ajamak rax kãm ty nà? Anê.

Hãmri nhûm wa kãm:

—Tÿ. Nà kot pa wa ijaxwÿja anê nê apyrã nê amnhî xà htÿx kãm ijamak kãm ty. Anê.

²³ Hãmri nhûm wa kãm:

—Nà ãm hãmri na ka wa amnhî jarê. War ate ixpyrà nê ixkôt amnhî xà htÿx kãm ajamak kãm atyk mã kênã. Tã nom war akatorxà kot war ato ixwÿrta ã kot paj tanhmã war amã nê hkêt nê. Kêt inhõ Papaj tãm koja ixkaxyw mēhõ japêr nhûm inhîhkô hã nhÿ. No pa kot paj amnhî kaxyw mēhõ jarênh kêt nê.

Anhÿr o wa kãm kapêr.

²⁴ Hãmri pa mē ixte wa uràk nê Jejus kôt ixpa ho ixpa xwÿnhjaja wa katorxà kot ã wa ho Jejus wÿr anhÿrja ã kuma nê wa kamã inhgryk nê. Hãmri nê axpên mã ixkapêr o:

—Tk. Nà koja Juãw mē Xiakre wa nhÿrmã kêp õ kôwenatô nê mē pahto amnhîptâr kêt kumrêx. Anê.

²⁵ Nhûm Jejus mē inhma nê amnhî wÿr mē ixpiitã mē inhma hpa ho apê nê mē inhma:

—E mē amnê ixwÿr axkamê pa mē amã awjarê mãn. Anê.

Hãmri pa mē hwÿr axkamê nhûm mē inhma:

—E mē inhma. Na hte Ijaew kêt xwÿnhjê nhõ pahijaja ã amnhî nhîpêx anhÿr o ri pa nê amarî hkrî xà kamã hkrî ho hkrî. àhpumunh tÿx jakamã amarî ixkre hkre jakry kamã hkrî ho hkrî nê kãm mē àpênh xwÿnhjê pix mã mēmo mē àpênh ã karõ. Na htem ã amnhî nhîpêx anhÿr o hkrî. Nê mē kot mex ã harênh kaxyw tanhmã mē ho mex to ho pa.

²⁶⁻²⁷ Tã no mē kajaja. Kêr ka mē ho mē uràk kêt nê. Æm te amarî ri mē apa pyrãk o axpên nhîpêx o ri apa. Nê te mē apê mē kãm axàpênh xwÿnh pyrãk o amnhî nhîpêx o ri mē hkôt apa. No kêr ka mē ho amnhîptâr mã ajamaxpêr o ri apa hkêt nê.

²⁸ Mē ate mēmoj tã pa ixkutã anojarêt ho apa kaxyw na pa pre mē awÿr ixwrÿk kêt nê. Ixte amarî mēmoj to mē kamjaja mē akutã inhnojarêt o ixpa kaxyw na pa pre mē awÿr wrÿ. Nê mē ate ixkôt amnhî xunhwÿr xwÿnhjê nê ixtyk kaxyw na pa pre wrÿ. Anê.

Jejus kot no hkre xwÿnh wa ho mex ã harênh

Matêwre 9.27-31; Makre 10.46-52; Rukre 18.35-43

²⁹ Tã pa mē Jejus kôt kormã Jerujarê hwÿr ra Jeriko htêp o mō. Hãmri nê kurûm ixkaton mō nhûm mē ohtô nê mē ixkôt mra.

³⁰ Nhûm pry nhîhkjê hã no hkre xwÿnh wa àhwÿr o hkrî xwÿnhja wa amnhî wÿr mē inhmrar mar o nhÿ. Mē ohtô nê Jejus kôt mē mrar xwÿnhjê mrar ma nê mē kãm:

—Kwa mo na? Mēmoj wÿr na ka mē axohtô nê mra? Anê.

Hãmri nhûm mē wa kãm:

—Nà Jejus pê Najare nhõ xwÿnhhta kôt na pa mē mra. Anê.

Hãmri nhûm wa mē kuma hãmri nê kàx pê Jejus mã kapêr nê kãm:

—Pa Pahihti? E apê mē inhō Pahihti mex na ka. Te apê amnepēm anhīgēt pahihti Tawita pyrāk. Jakamā kwa wa ixkamā axukaprī nē akupŷm wa ixto mex. Anē.

³¹ Hāmri nhūm Jejus kōt mē mōr xwŷnhjaja wa kuma nē wa kām:

—Tk. Kwa war akapēr kēt nē nhŷ nà. Anē.

Tā no nhūm wa ām mē kuma nē xatā amnhī to kuwŷ. Kàx pē amnhī to kuwŷ.

³² Hāmri nhūm Jejus wa kuma nē xa nē wa omu nē wa kām:

—Pa mo na? Tanhmā kot pa wa ato? Anē.

³³ Hāmri nhūm wa kām:

—Nà akupŷm wa inhmā wa ixrīt mex prām. Anē.

³⁴ Hāmri nhūm kām wa hkaprī nē wa no htok nhūm wa akupŷm rīt mex kurē kumrēx. Hāmri nē rīt mex ā amnhī pumu nē hkīnh tŷx nē ma Jejus kōt hkwŷjê hkōt mō.

21

Jejus kot Jerujarē hwŷr àr ā harēnh

Makre 11.1-11; Rukre 19.28-40; Juāw 12.12-19

¹ Tā nhūm Jejus kormā Jerujarē hwŷr kormā mō. Pa mē hkōt mō nē ra Petake hwŷr ixàhtêp o mō. Hixêt pē Oriwêhti kahti ri na pre krīja xa. Jakamā pa mē wa hwŷr ixàhtêp o mō nhūm Jejus mē ixte hkōt ixpa ho ixpa xwŷnhjê wa ho axkrut nē amnhī kukamā wa kumē.

² Nē wa kām:

—E wa ma krī mŷj wŷr mē ixkukamā wa tē. Nē wa hwŷr axà nē nhŷri jumēnre mē hkra wa kām ê nē wa ām xwŷnh wa omu hāmri nē kām ê xà hpôt nē man akupŷn amnē hamē wa o tē.

³ Koja mēhō ja hā war apumu nē hā tanhmā war amā kapēr to ka wa kām ā ijarēnh anē nē kām: “Nà mē panhō Pahihti na hā karō pa wa hwŷr tē.” Anhŷr o wa kām ijarē. Hāmri nhūm war ama nē war amā ōr kurē kumrēx. E wa ma hwŷr tē. Anē.

⁴ Tirtūm kapēr ā kagà htūm ra kot ja kukamā harēnh. Na pre ra Tirtūm nhŷ hā kapēr xwŷnhjê hō ja jarē nē hā kagà ho:

⁵ Pa Jerujarē nhō xwŷnhjaja. Kwa mē tee ri amnhī kukamā ajamaxpēr ho amā ma hkēt nē. Ota mē anhō pahi nywta ra jumēnre hā nhŷ nē mē awŷr hpôx

o tē. Te kot amnhī to grire xwŷnh pyrāk o amnhī nhīpêx nē tē.

⁶ Anhŷr o kot hkukamā harēnh jakamā nhūm Jejus amnhī kukamā ja wa kumē hāmri nhūm wa ma hwŷr htēm kurē kumrēx.

⁷ Nē krīta wŷr pōj nhūm Jejus kot wa kām harēnh xà hkōt nhūm wa jumēnreta pumu. Hāmri nē hamē wa kām ê xà hpôt nē ma Jejus wŷr wa o tē. Hāmri nē kaxyw amnhī xê hkwŷ hkwŷr nē kām ho jumēnre nywta kō kahty. Nē kām ho htŷx nē o xa nhūm Jejus hā nhŷ nē hā mō.

⁸ Kormā Jerujarē hwŷr hixêt ā àpir o mō. Nhūm mē kot omunh o kuhê xwŷnhjaja hkīnh nē ma hkukamā pry ho mex kaxyw amnhī xê hkwŷptyr ho mō. Nē pō hkwŷ jakà nē utyr o mō.

⁹ Nhūm mē hkwŷjaja Jejus kukamā mra nhūm mē hkwŷjaja hapu hā hkōt mra. Nē piitā kàx pē Tirtūm mex o mex ā harēnh o hkōt mō nē harēnh o:

Ota Tirtūm kot mē pahwŷr mēnh xwŷnhra pōj. Ām hāmri na mē pahwŷr wrŷ. Ja na mex kumrēx. Kêp mē panhō Pahihti mex na. Ām hāmri na pre Tirtūm mē pahwŷr kumē. Tirtūm mex kumrēx. Ām mex o mex.

Anhŷr o Jejus kōt Jerujarē hwŷr harēnh o mō. Kot mē ho amnhīptār kurē kumrēx ā hkamnhīx jakamā hkīnh nē hkōt ā harēnh anhŷr o mō.

¹⁰ Hāmri nhūm krī nhō xwŷnhjaja tee ri mē kuma nē axpēn mā:

—Kwa mēhō na we hpôx o mō nhūm mē ā hkōt harēnh anhŷr o mō? Anē.

¹¹ Hāmri nhūm Jejus kōt mē mrrar xwŷnhjaja mē kuma nē mē kām:

—Nà Tirtūm nhŷ hā kapēr jarēnh xwŷnh pē Jejus na. Kêp Garirej kamā krī pē Najare nhō xwŷnhra na. Anē.

Jejus kot Tirtūm nhōrkwŷ hwŷr àr ā harēnh

Makre 11.15-19; Rukre 19.45-48; Juāw 2.13-22

¹²⁻¹³ Tā hāmri nhūm Jejus Jerujarē wŷr axà nē jumēnre rūm wrŷ nē ma Tirtūm mā amnhī jarēnh xà hā ixkre hwŷr tē nē axà. Hāmri nē tee ri mē kot tanhmā ixkre kamā amnhī nhīpêx to hā mē omunh o xa. Nhūm mē axtem nē môx nē ōwêhti nē tuuti ho

wênê ho kuhê. Mě kot haprôr nê Tirtûm mã amnhĩ jarênh kaxyw kãm hpar nê òr kaxyw mẽ kãm ho wênê ho kuhê. Nom axtem nê mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nê tee ri mẽ omu nhũm ja kêp omnuj tÿx kumrêx. Hãmri nhũm mẽ hwÿr tẽ nê mẽ kot kàxpore ho pinhpanh xwÿnhjê pê mẽ ò mẽsti rênh pa. Nê mẽ kot tuuti ho wênê xwÿnhjê pê hkrĩ xà hkujate nê rênh pa. Hãmri nê mẽ kãm:

—Tk. Kwa Tirtûm kapêr ã kagà htûm kot ixkreja jarênh kot:

Inhõrkwÿja ãm mẽ ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhĩ nhĩpêx anê. E kwa mẽ ajapôx tokyx anê. Anê.

Hãmri nê mẽ kator pa nhũm mẽ ma hapêx.

¹⁴ Hãmri nhũm mẽ no hkre xwÿnhjaja nê mẽ hyk o mẽ pa xwÿnhjaja mra nê agjê nê Jejus kutã kuhê nhũm mẽ omu nê akupÿm mẽ ho mex.

¹⁵⁻¹⁶ Hãmri nhũm mẽhprĩ hkwÿjaja hwÿr mra nê kuri kãm mex o mex ã gre nê kãm grer o:

Amex kumrêx Pahihti.

Tirtûm na pre mẽ ixwÿr amê.

Kot kaj te anhĩgêt Tawi pyrã nê mẽ ixto amnhĩptãr o apa.

Anhÿr o kãm grer ò kuhê. Hãmri nhũm patre krãhtûm mẽ Tirtûm kapêr tûm o mẽ ahkre ho mẽ pa xwÿnhjaja tee ri ã mẽ grer anhÿr ã mẽ kuma. Nê tee ri Jejus kot mẽ no hkre xwÿnhjê mẽ mẽ hyk o mẽ pa xwÿnhjê ho mex ã omunh o kuhê nê gryk nê Jejus wÿr tẽ nê kãm:

—Kwa na mẽhprĩjaja mẽ grer kãm ã ajarênh anê ka mẽ mar kêt nê? Mě grerja nexti hã. Anê.

Hãmri nhũm mẽ kãm:

—Tÿ ixte mẽ mar kênã. Tirtûm kãm hprãm xà hkôt na mẽ ã inhmã inhmex o inhmex ã ixtã grer anê. Tirtûm kapêr ã kagà htûm kot ã mẽ hkukamã harênh kot anhÿr. Mě harênh kot:

Koja mẽhprĩjaja Pahihti mã mex o mex ã grer o kuhê.

Anhÿr o kot mẽ hkukamã harênh kênã. Tã mãn ka mẽ kormã kamã harênh kêt jakamã

na ka mẽ ja jarênh mar kêt nê. Kwãr mẽ mãmrĩ ã inhmex ã grer anê.

¹⁷ Anhÿr o mẽ kãm kapêr hãmri nê mẽ inhmã anê pa mẽ ixkreta rûm ijapôj nê ma akupÿm Petãn wÿr mra nê kamã amnhĩm hikra.

Jejus kot mẽmo hpãr mã kapêr ã harênh Makre 11.12-14; mããnên Xiakre 1.6

¹⁸ Tã nhũm kwÿhtã nhũm Jejus kãnhmã nhÿ nê mẽ inhmã anê pa mẽ ixrohã ma akupÿm Jerujarê hwÿr mra. Hãmri nê kormã mō nhũm Jejus pry kahti ri ra kãm prãm nê.

¹⁹ Hãmri nê mẽmo pĩ pê fikêhti jarênhja pumu nê kot ô hkwÿ rênh nê hkrêr kaxyw hwÿr màt. Hãmri nê tee ri ô japêr nhũm ô hkêt nê ãm hô hpix harir. Hãmri nhũm tee ri omu nê kãm:

—E kot kaj axte axô hkêt kumrêx.

Anhÿrja o nhũm grã par kurê kumrêx.

²⁰ Hãmri pa mẽ ixte hkôt ixpa ho ixpa xwÿnhjaja omu nê Jejus mã:

—Kokÿÿ. Kwa tanhmã na we amnhĩ nhĩpêx to nê grã kurê kumrêx? Anê.

²¹ Nhũm mẽ inhmã:

—Nã kot kaj mẽ ixpyrà nê fikêhti kot tanhmã amnhĩ nhĩpêx to kaxyw Tirtûm mã ajamaxpêr tÿx nê nhũm amã hprãm xà hkôt amã tanhmã hipêx to. Nom kêr ka mẽ ajamaxpêr kati ho tee ri hkukamã ajamaxpêr kêt nê. ãm kaxyw Tirtûm kôt ajamaxpêr tÿx nê nhũm mẽ amã tanhmã mẽmoj nhĩpêx to. ãm hãmri na pa mẽ amã ja jarê. No ãm ja pix kêt. Kot kaj mẽ mããnên hixêt mũj mã akapêr nê kãm: “E anhÿr xàta rûm akato nê ma tẽ nê gô rax kãm mrõ.” Anê nhũm amar xà hkôt ã amnhĩ nhĩpêx anê.

²² —Nê kot kaj mẽ mẽmoj tã Tirtûm wÿ nê kaxyw kãm ajamaxpêr tÿx kãm hã awÿ nhũm amã mẽmoj prãm xwÿnhhta gō. Anê.

Mêhõ nhÿ hã Jejus kot mẽ ahkre hã harênh

Makre 11.27-33; Rukre 20.1-8

²³ Nhũm arĩgro hō hã nhũm Jejus kêwe axte Tirtûm mã amnhĩ jarênh xà hã ixkreja wÿr axà nê kamã mẽ ahkre ho nhÿ. Mě kãm tanhmã mẽ kot amnhĩ nhĩpêx to nê nhÿrmã Tirtûm mẽ wa kuri htĩr tûm nê pa kaxyw tanhmã mẽ kãm kapêr to ho nhÿ.

Hāmri nhūm Ijaew krāhtūmjê mẽ mẽ õ patre krāhtūmjaja hāmri hwÿr mra nê hêx rom mẽmoj tâ hkukja nê kām:

—Kwa mẽ inhmā amnhĩ jarê. Mêhõ nhÿ hã na ka hte ã amnhĩ nhĩpêx anhÿr o apa? Na ka hte akupÿm mẽ ho mex o apa nê tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anê nà? Anê.

²⁴ Hāmri nhūm mẽ kām:

—Nà kot pa ixkumrêx mẽmoj tâ mẽ akukja. Ka mẽ inhma nê tanhmã inhmã harênh to pa rĩ kormã mẽ amã amnhĩ jarê.

²⁵⁻²⁶ Finat Juãw Paxis ã kot paj mẽ akukja. Mêhõ nhÿ hã na pre hte mẽ hkrã kumrãr o pa? Xà amnhĩ krã hkôt nà? Xà Tĩrtūm nhÿ hã? E mẽ atõ inhmã ja jarê. Anê.

Hāmri nhūm mẽ kuma nê tee ri kot tanhmã kutã kām harênh to hkukamã hamaxpêr pê axpên pumunh o kuhê nê axpên mã:

—Kwa tanhmã kot puj wem kām ja jarênh to? Or mẽ kot mar o kuhê xwÿnhjaja na htem kêp Tĩrtūm nhÿ hã kapêr jarênh xwÿnh ã harê. Tã kot puj mẽ kām kot amnhĩ krã hkôt kot mẽ hkrã kumrãr ã harê nhūm mẽ tee ri mẽ pama nê mẽ pakamã gryk tÿx nê. Nê mẽ paxêx rom ã mẽ pahte kām pakapêr anhÿr ã mẽ pahpumu nê kên o mẽ pahtak o mẽ panhĩmex. No kot puj mẽ kām Tĩrtūm nhÿ hã kot mẽ hkrã kumrãr ã harê hāmri nhūm mẽ pamã: “Kwa ã kot anhÿr kênã na ka prem kapêr ma nê hkôt ajamaxpêr kêt nê?” Anê. Jakamã kot puj mẽ ja pymaj tanhmã kām harênh to hkêt nê. Kot puj mẽ ãm kām aa te mẽ pahte ja jarênh mar kêt pyrãk o harê. Anê.

Mẽ kot tanhmã Jejus mã nê nhūm kot ta pãnhã tanhmã mẽ kām nê pymaj nhūm mẽ tee ri kām tanhmã nê hprãm kaprÿ o kuhê.

²⁷ Hāmri nê kām:

—Konên. Mẽ ixte mêhõ nhÿ hã kapêr o pa hã omunhre hã. Anê.

Hāmri nhūm mẽ kuma nê mẽ kām:

—Tk. Tôe kot pa xep ijaxwÿja mẽ amã tanhmã amnhĩ jarênh to hkêt nê. Ijaxwÿja ixte mêhõ nhÿ hã ã ixte amnhĩ nhĩpêx anhÿr o ri ixpa hã amnhĩ pumunhre hã. Anê.

Mêhõ my mẽ hkra wa pijakrut ã wa harênh

Matêwre 7.21-23; Rukre 7.29-30

²⁸ Hāmri nhūm Jejus axte Ijaew krāhtūmjê mẽ mẽ õ patre krāhtūmjê mã kapêr nê mẽmoj tâ kuxi nê tanhmã mẽ kām ujarênh to nê mẽ kām:

—E pa mẽ amã awjarê ka mẽ inhma. Koja mêhõ hkra my hamêxkrut. Hāmri nê hkra kot waja mã tanhmã kapêr to nê kām: “E kêr ka jarãhã ma tẽ nê inhmã pur kām apê.” Anê.

²⁹ Hāmri nhūm kuma nê pur mã htêm kaga nê hitõt nê. Tãã no ãm hã ahtūmre nê tanhmã hamaxpêr to hāmri nê ma hwÿr tẽ nê kamã àpênh o xa.

³⁰ Hāmri nhūm wa hipêêxaja hpãnhã hkra kot hapu hwÿr tẽ nê mã kām kapêr anê nê kām: “E kêr ka ajaxwÿja atõ hkôt tẽ nê wa inhmã apê.” Anê nhūm kuma nê kām: “Tôe. Nà kot paj ma tẽ.” Anhÿr tâ no ãm hõta kĩnhã htêm kêt nê.

³¹ —Jakamã e. Nhÿ hkra na pre hipêêxã kapêr ma nê hkôt amnhĩ nhĩpêx nê kapêr nhĩrõp ãm kêt nê? Xà kot waja nà? Xà kot haputa? E mẽ atõ tanhmã inhmã wa harênh to. Anê.

Hāmri nhūm mẽ kuma nê kām:

—Nà kot wata. Kot wata na hitõt tâ tanhmã hamaxpêr to nê ma tẽ nê kām apê. Anê.

Hāmri nhūm mẽ kām:

—Tÿ ãm hāmri na ka harê. No mẽ kajaja te mẽ ate hkra kot haputa kot amnhĩ nhĩpêx pyrãk. Mẽ ate Tĩrtūm kapêr kôt amnhĩ nhĩpêx o apa hã amnhĩ jarênh tâ hkwÿm ri amnhĩ nhĩpêx o apa. Te mẽ ate kot hapu kot hipêêxã mã àpênh ã amnhĩ jarênh tâ kām àpênh kêeta pyrãk. No kêt mẽ kot amnhĩ tomnuj o mẽ pa xwÿnh kwÿjaja na mẽ arom Tĩrtūm kapêr ma nê hkôt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwÿr pa kaxyw ra tãm nê. ãm hāmri na pa mẽ amã ixkapêr.

³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nê ãm ama nê aa kapêr kôt amnhĩ nhĩpêx kêt nê. Nom mẽ kot amnhĩ tomnuj o mẽ pa xwÿnh kwÿjaja mẽ arom kuma nê Tĩrtūm kôt amnhĩ nhĩpêx. Ka mẽ ja hã mẽ omu nê ãm mẽ omu nê mẽ urãk nê ã amnhĩ nhĩpêx anhÿr kêt nê. Anê.

*Mê àpênh punu xwýnhjê jarênh
Makre 12.1-12; Rukre 20.9-18*

³³ Nhùm Jejus arĩ Ijaew krãhtũmjê mê mẽ õ patre krãhtũmjê mã kapêr. Nê mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nê mẽ kãm awjarê nê mẽ kãm:

—Koja mēhõ mẽ kot kãm pur kãm àpênh kaxyw hkwýjê mã karõ nhùm mẽ ma hwýr mra nê kamã mẽmo hy hkre nê hkre pa. Hãmri nhùm hpur nhõ dõn nhỹhỹm nojarêt nê kãm mẽ àpênh xwýnhjê mã tanhmã hpur jarênh to nê mẽ kãm: “E or ixpur nõ. Kê kamã mẽmoj kà hpa ka mẽ mãmrĩ kamã axujamýnh pa nê ho axkjê. Nê ixkutêp inhmã inhõ jaxwý nê mãmrĩ anhõ tanhmã ho hprãm xà hkõt tanhmã ho.”

—Anhýr o mẽ kãm kapêr hãmri nê ma nhỹhỹm mẽ.

³⁴ Tã nhùm ra pur kãm mẽmoj hkà pa nom nhùm hpur nhõ dõn arĩ krĩ hõ kamã hã ujahkre ho ri pa htã kuri kãm àpênh xwýnhjê ho axkrunêpxi nê akupým mẽ hwýr mẽ kurê. Mê kot mẽ kãm hkwý nhõr nhùm mẽ ma kot kãm o mör kaxyw nhùm ma mẽ hwýr mẽ kurê.

³⁵ Nhùm mẽ ma hwýr mẽ. Mõõ nê ra hwýr pøj nhùm mẽ amnhĩ wýr mẽ omu nê axtem nê mẽ homnuj nê. Nê mẽ unê nê ja tak nê ja pĩ nê hõja nhùm mẽ kên o htak hãmri nê amnhĩ nê wa hano nhùm wa ma akupým ý kamã mẽ.

³⁶ Hãmri nhùm mẽ õ patrãwja tee ri wa omu nê hamaxpêr o: “Kwa nà na mẽ ixpê inhmã mẽ àpênh xwýnhjê homnuj tỳx nê. Nà kot paj axte mẽ hwýr mẽ hkwýjê rê. Nom hpãnhã mẽ ho ohtõ nê mẽ kurê. Kê mẽ ohtõ nê mẽ hwýr mẽ nê tã inhmã inhõ hkwý jamý nê man ixwýr o mẽ.”

—Anhýr o hamaxpêr hãmri nê mẽ hwýr jajê rê nhùm mẽ ma akupým mẽ hwýr mẽ. Nhùm mẽ amnhĩ wýr mẽ ohtõ hã nê mã mẽ ho anê nê mẽ hipêx kati nê nhùm mẽ ý kamã ma õ patrãwja wýr akupým mẽ.

³⁷ Hãmri nhùm tee ri mẽ omu nê hamaxpêr o: “Hêxta waa nê. Tanhmã kot paj amnhĩ nhĩpêx to? Nà kot paj pêr mẽ hwýr ixkraja mãn mẽ. Inhmã hapê htỳx tã kot paj mẽ hwýr kumê kê ma mẽ hwýr mẽ. Hãmri nhùm mẽ kêp ixkra hã omu nê

tanhmã ixpê ho hkêt nê. Nê tã inhmã kãm inhõja kwý gõ.” Anê.

—Hãmri nê mẽ hwýr kumê nhùm ma mẽ.

³⁸ Tã hãmri ra mẽ hwýr hpõx o mẽ nhùm mẽ amým amnhĩ wýr omu nê kêp hkra hã omu nê axtem nê hã axpên mã amýnê nê axpên mã: “E onêj hpur nhõ dõn krata tẽ. Koja nhỹrmã õ papaj mýr pê amnhĩm hpur ã pykata pytà nê ho õ. Jakamã kwa pu mẽ hpĩr kurê kumrêx nê kêp hpur ho arĩk nê ho panhõ. E tokyj pu mẽ kupĩ ri.” Anê.

³⁹ —Hãmri nhùm ra tẽ nê mẽ hwýr pøj nhùm mẽ unê nê hpur nê ho kato nê mã ho anê nê kupĩ. ã mẽ ujarênh kot anhýr. Anê.

⁴⁰ Nhùm pre ã Jejus mẽ kãm ujarênh anê. Hãmri nê hã mẽ hkukja nê mẽ kãm:

—E koja pur nhõ dõnja hkra jarênh ma hãmri nê tãm mẽ hwýr mẽ hãmri nê tanhmã mẽ hipêx to wehe? Anê.

⁴¹ Hãmri nhùm mẽ kãm:

—Nà koja ma akupým mẽ hwýr mẽ hãmri nê mẽ homnuj tỳx nê mẽ himex pa. Hãmri nê hpãnhã nhãm hpur ã mẽmojjê rê nhùm mẽ tã katàt kõt kãm àpênh o pa. Anê.

⁴² Hãmri nhùm Jejus mẽ kãm:

—Tỳ ãm hãmri na ka ã mẽ harênh anê. Kot mẽ ho anhýr mã tãm kênã. Mãn ka prem ra Tĩrtũm kapêr ã kagà htũm kot tanhmã ja jarênh toja ma? Harênh kot:

Mê kot kên o amnhĩm òrkwý nhĩpêx kaxyw nê kên maati pumu nê htỳx omnuj ã hkamnhĩx nê hkagata. Mê kot hkaga htã nhùm Tĩrtũm mẽ kurom mex o kot kên piitã hakrenh par ã omunh kurê kumrêx. Tĩrtũm kot kên maati mex ã harênh xwýnhhta mẽ pamã mex o mex.

ã Tĩrtũm kapêr ã kagà htũm kot ja jarênh kot anhýr.

⁴³ Ja pyrã nê na pre ra Tĩrtũm amnhĩ kaxyw mẽ apê Ijaew xunhwý. Mê apê hkra nê hkõt mẽ ate amnhĩ nhĩpêx kaxyw amnhĩ kaxyw mẽ axunhwý. Tã ka mẽ axtem nê hkaga. Te mẽ kot kên maati pumunh nê mex kêt ã hkamnhĩx nê hkagata pyrãk. Jakamã koja mẽ apãnhã Ijaew kêt xwýnh kwýjê xunhwý nhùm mẽ arom hkõt amnhĩ nhĩpêx mex o pa. Jao ra mẽ kêp hkra nê. Anê.

⁴⁴ Nhũm pre ã Jejus mẽ kãm te kêp kên maati pyræk o mẽ kãm amnhĩ jarênh anê. Hãmri nê axte amnhĩ tã kuxi nê mẽ kãm axte kên jarênh pyræk ã amnhĩ jarê nê mẽ kãm:

—Nà kot kaj mẽ atõ ixkaga hãmri nê te mēhõ htỳx htēm nê kên pumunh kêt nê hã htêk nê tēm pyræk o amnhĩ nhĩpêx. Jao ixkutã amnhĩ xãm. Rỳ ka tanhmã aja-maxpêr to nê ixkaga nhũm te kên maati kot anhĩpy tēm nê axôm par pyræk o anhĩpêx ka mẽ amex kêt kumrêx. Anê.

⁴⁵ Nhũm pre ã mẽ kãm ujarênh kãm mẽ harênh anê. Hãmri nhũm patre krãhtũmjê mẽ Parijew nhõ xwỳnhjaja tee ri amnhĩ tã kuma

⁴⁶ nhũm ja mẽ kêp omnuj tỳx jakamã nhũm mẽ kãm unênh nê haxàr prãm nê. No mẽ ãm amnhĩ tã kãm mẽ kot mar o kuhê xwỳnhjê puma nê. Mẽ kurom Jejus kêp Tĩrtũm nhỹ hã kapêr xwỳnh ã hkamnhĩx jakamã nhũm mẽ kãm mẽ uma nê. Hãmri nê kormã tanhmã ho hkêt nê.

22

Pahi kot hkra hprõ kaxyw hkwỳjê hwỳr ã harênh

Rukre 14.15-24; mãănēn Wam Korĩt 6.9-11; Epes 5.5-6; Apokarip 19.7-8

¹⁻² Tã nhũm Jejus axte mẽ kãm awjarê. Ijaew kot Tĩrtũm kaga hã mẽ kãm hã kuxi nê awjarê nê mẽ kãm:

—E pa mẽ amã ahpỳnhã mẽ kot Tĩrtũm kapêr mar nê tanhmã amnhĩ nhĩpêx to xwỳnhjê jarê ka mẽ inhma. Te mẽ kot pahĩhti kot hkra hprõ kaxyw nhũm kot amnhĩ wỳr hkwỳjê hwỳr nhũm mẽ kot harênh mar nê ahpỳnhã tanhmã amnhĩ nhĩpêx to xwỳnhjaja kot amnhĩ nhĩpêx pyræk. Koja pahĩhtija hkra hã hkĩnh nê hã apkur mex kaxyw amnhĩ wỳr hkwỳjê hã karõ.

³ Hãmri nhũm kãm mẽ àpênh xwỳnhjaja ra kot amnhĩ wỳr mẽ hã karõ xwỳnhjê hwỳr mra nê mẽ kãm nojarêt nhũm mẽ kuma nê ãm mẽ kuma nê axtem nê mẽ kêp hitõt nê. Hãmri nhũm mẽ tee ri mẽ kuma nê akupỳm tē nē pahĩhti mã mẽ harê.

⁴ —Hãmri nhũm tee ri amnhĩ tã mẽ harênh ma nê hpãnhã mẽ hwỳr axtem kãm àpênh xwỳnh kwỳjê rē nhũm mẽ ma mẽ hwỳr mra nê mẽ kãm: “Pa. E kwa mẽ tokyx. Na ra pahĩhti mẽ akutêp mẽõ nhĩpêx pa. Na

mẽ môx kwỳ hpa nê ho àr mex nê. Nê mẽ akutêp mẽmoj nhĩpêx par jakamã e kwa mẽ tokyx nà.” Anê.

⁵ ã mẽ kãm kapêr anhỹr tã nhũm mẽ kuma nê ãm mẽ kuma nê ma ahpỳnhã nhỹhỹm mra. Nhũm ja ma àpênh mã mra nhũm ja ma ihpur kãm àpênh mã ma tē nhũm ja ma nhỹhỹm mẽmo to wēnê ho tē.

⁶ Nhũm mẽ hkwỳjaja mẽ kãm ujarênh xwỳnhjê pynê nê mẽ htak o mẽ kupa.

⁷ —Hãmri nhũm pahĩhtija mẽ harênh ma nê àhkurê nê. Hãmri nê mẽ hwỳr pōristi hkwỳ rē nhũm mẽ ma mẽ hwỳr mra nê mẽ unê nê mẽ kupa nê mẽ õ krĩ hã hpòk pa.

⁸ Hãmri nhũm pahĩhti kãm mẽ àpênh xwỳnh kwỳjê mã kãm: “Kwa ra ixte mẽ kutêp mẽõ mex kwỳ xunhwỳr tã nhũm mẽ ixwỳr mrar kêt nê. Ixtỳx ho mẽ mex ã mẽ hkamnhĩx nê amnhĩ wỳr mẽ hã karõ no mẽ mex kêt. Mẽ kot mẽ ixkutã apkur mã tãm kêt.

⁹ E kwa mẽ ma krĩ hkôt axtem mẽ hkwỳjê japêr o mra. Nê nhỹri mēhõ pumu nê kãm awjarê kê man ixwỳr tē nē ixkra hã hkĩnh nê mẽ ixkutã apku. Mẽ ã mẽ kãm axujarênh o amrar anê.” Anê.

¹⁰ —Hãmri nhũm mẽ kuma nê ma mẽ hapêr o mra nê mẽ piitã mẽ kãm anhỹr o mra. Nhũm mẽ kuma nê wam tajê rom ma mẽ hkôt mrar kurê kumrêx. Mẽ kot amnhĩ to mex xwỳnhjaja nê mẽ kot amnhĩ tomnuj xwỳnhjaja hãmri piitã ma mẽ hkôt mra. Hãmri nê ixkreja wỳr mra nê hwỳr gjêx kaxyw nhũm mẽ kãm mẽ ê mex gõ nhũm mẽ hagjê hãmri nê kormã mẽ apkur xà hã ixkre hwỳr agjê nê ho nýt pa.

¹¹ Hãmri nhũm pahĩhtija mẽ hwỳr axà nê mẽ piitã mẽ omu. Nhũm ja pixi nê axtem nê hkwỳjê hkĩnhã mẽ kot kãm ê mex nhōrja jaxàr kêt rãhã axà nê apkur o nhỹ.

¹² Hãmri nhũm tee ri ja hã omu nê hwỳr tē nê kãm: “Pa. Tk. Kwa na htem ixkrem gjêx kaxyw nê mẽ kot mẽ kãm mẽ ê mex nhōr jagjê nê rĩ kormã hwỳr agjê nê apku. Tã mon ka akwỳjê hkĩnhã haxàr kaga? Kwa na htem ã amnhĩ nhĩpêx anhỹr kêt nê.” Anhỹr o kãm kapêr nom nhũm kuma nê ãm kuma nê tanhmã kutã kãm nê hkêt nê. ãm htỳx apkur o nhỹ.

¹³ Jakamã nhũm tee ri omu hãmri nê hã mẽ kot kãm àpênh xwỳnhjê mã amỳnê nê

mê kãm: “E mê hwÿr tẽ nẽ unê nẽ hpa nẽ hte hpre nẽ ma o tẽ nẽ kamàt kô kamã amẽ. Kê tee ri mur nẽ amnhĩ xà htÿx kamã hamak o amnhĩ nham o axpên kamnhar tÿx kaprÿ ho nõ nẽ rĩ amnhĩ pumu.” Anẽ. Hãmri nhũm mê kuma nẽ kãm ho anẽ. ã mê ujarênh kot anhÿr. Anẽ.

¹⁴ Nhũm pre Jejus ã mê kãm ujarênh anẽ hãmri nẽ mê kãm:

—Nà Tĩrtũm kot pahihita pyrã nẽ amnhĩ wÿr mê ho ohtô nẽ mê hwÿr tã na hte mê piitã hkôt amnhĩ xunhwÿr kêt nẽ. Jakamã na hte ãm mê ho grêre nẽ amnhĩ wÿr mê ho api. Anẽ.

Parijew nhõ xwÿnh kot Jejus kamã hamak ã mê harênh

Makre 12.13-17; Rukre 20.20-26; mãânên Rômân 12.1, 13.7

¹⁵⁻¹⁶ Tã nhũm Parijew nhõ xwÿnhjaja ã Jejus kot mê kãm ujarênh anhÿrja ma hãmri nẽ kurũm kato nẽ tanhmã hkukamã axpên mã hã àmnênh to. Hãmri nẽ hwÿr mê hkwyjê mê Erox kôt mê pa xwÿnh kwÿjê rẽ. Hêx rom mê kot mêmoj tã hkukjêr kaxyw hwÿr mê kurê nhũm mê ma hwÿr mra nẽ omu nẽ kãm:

—Kwa Jejus. Nà ãm hãmri na ka hte Tĩrtũm kapêr o mê ahkre mex o ri apa nẽ mê kamã akahak o apa hkêt nẽ. Mê kot tanhmã ato kapêr punuj to htã ka aprĩ hã mê ahkre mex o ri apa.

¹⁷ E kwa mê inhmã mêmoj jarê. Rõm nhõ pahihiti kot mê pahpê Ijaew mê pahte kãm kàxpore hkwy nhõr ã mê pamã karõta. Kwa xà ja amã mex nà? Xà kot pu mê kãm hkwy gõ? Nà xà kot pu mê kãm õr kêt nẽ? E kwa mê inhmã tanhmã ja jarênh to. Anẽ.

¹⁸ Nhũm prem ã hêx rom àhkukjêr anhÿr tã no nhũm ra mê hamaxpêr ã mê omu nẽ mê kãm:

—Tk. Kwa mon ka mê ã axêx rom ja hã ixkukjêr anẽ?

¹⁹⁻²⁰ E mê atõ inhmã kàxpore htÿxre hõ gõ pa omu. Anẽ.

Hãmri nhũm mê kãm ja gõ nhũm kupy nẽ kànhmã mê kãm kupê nẽ mê kãm:

—E mêmõ nhĩxi nẽ mêmõ karõ na ja hã? Anẽ.

²¹ Hãmri nhũm mê kãm:

—Pahi Sesti karõ nẽ hixi na hã. Anẽ.

Hãmri nhũm mê kuma nẽ mê kãm:

—Tÿ. Tô kêr ka mê mãmrĩ kãm hkwy nhõr o apa. Hã hkarõ nẽ hã hixi. Tãm kot hipêx xwÿnh jakamã õ na. No mê kajaja na pre Tĩrtũm mê anhĩpêx nhũm mê apê õ jakamã kwa kêr ka mê kapêr kôt pix mã ri amnhĩ nhĩpêx o ri apa. Anẽ.

²² Hãmri nhũm mê amnhĩ jaêr pê ã kot kàxpore jarênh anhÿrja ma nẽ axte kãm tanhmã nẽ hkêt nẽ. Hãmri nẽ akryk omu hãmri nẽ ma akupÿm mra.

Akupÿm mê htĩr ã mê harênh

Makre 12.18-27; Rukre 20.27-40; Juãw 5.21, 6.39-40; mãânên Wam Korĩt 6.14, 15.12-28; Wam Tesarõn 4.13-18

²³ Tã nhũm Satusew nhõ xwÿnh kwÿjaja mê kot akupÿm mê htĩr kêt ã mê hkamnhĩx kêt xwÿnhjaja na pre mê. Na pre htem mê htyk nẽ mê hapêx kumrêx ã mê hkamnhĩx jakamã axpên mã tanhmã Jejus jarênh to nẽ axpên mã:

—E kwa pu mê hwÿr mra nẽ mêmoj xihtÿx ã hkukja. Kê mê pama nẽ tee ri tanhmã mê pamã kapêr to hkukamã hamaxpêr kaprÿ. Kê mê piitã ja hã omu nẽ àhpumunh kêt ã omunh kurê kumrêx. E tokyx pu mê hwÿr.

Anhÿr jakamã Parijew nhõ xwÿnhjê pyrã nẽ hêx rom ma hwÿr mra nẽ hkukja nẽ kãm:

²⁴ —Pa Jejus? Kwa mê inhmã mêmoj jarê. Na pre finat Mojesja Tĩrtũm nhÿ hã ã mê panhĩgêtjê mã karõ anẽ. Mê hkra hkêt rãhã mê pa nẽ mê htyk xwÿnhjaja nhũm mê harênh o:

Koja mêmõ hprõ nẽ kamã hkra hkêt rãhã pan ty. Hã koja hkôt htõja hpãnhã hprõ ho hprõ nẽ kamã hkra. Hãmri nhũm kato nẽ te kêp htõ htyk xwÿnhhta hkra pyrãk. Anẽ.

ã na pre Mojesja Tĩrtũm nhÿ hã mê kãm karõ anẽ.

²⁵ Jakamã kwa ga mê ixujarênh ma. Koja mê kot axpên to htõ xwÿnhjaja kêp 7. Nhũm kot waja hãmri hprõ nẽ wa pa nhũm kamã hkra hkêt rãhã ty. Nhũm hkôt htõja hpãnhã ho hprõ

²⁶ nẽ wa axpên to pa. Nhũm mãânên kamã hkra hkêt rãhã ty. Nhũm htõ hõta haxwÿja hpãnhã tãm o hprõ nẽ we wa axpên to pa grire nhũm haxwÿja kamã hkra hkêt rãhã

ty. Hāmri nhūm htō hkwỳjaja ni pyxi nē axpēn pānhā ho hprō hpa no mēhō kamā hkra hkēt rāhā htyk pa.

²⁷ Hāmri nhūm mē hprōta mē hkōt amnhī to hitep nē ty.

²⁸ Tā Tīrtūm kot akupỹm nhỹrmā mē ho htīr ronhỹx nhỹ nhỹx kēp nija mjēn kumrēx? Ra piitā kot ho hprō kēnā. E mē inhmā ja jarē. Anē.

²⁹⁻³⁰ Hāmri nhūm Jejus mē kuma nē mē kām:

—Nā kaxkwa kamā mē kot amnhī nhīpēxja axtem na. Mē htīr ri mē kot Tīrtūm kōt amnhī xunhwỳr xwỳnhjaja na htem ty hāmri nē Tīrtūm nhō krī kamā axte kām hprō hprām kēt nē pa. Jakamā hprō hkēt nē pa. Rỳ ni japēr nē mjēn kēt nē pa. Nom ri kām mjēn rỳ hprō hprām kēt nē pa. Hāmri nē Tīrtūm kapēr o mē wrỳk xwỳnhjē pyrā nē axte htyk kēt nē. Ām htīr tūm rāhā nē pa ho pa. Pēr mē ate Tīrtūm kapēr ā kagā htūm mar mex kēt jakamā na ka mē ā ja hā ixkukjēr anē. Tīrtūm āhpumunh tỳx o āhpumunh tỳx jakamā kumā mē ate mēmoj tā ixkukjēr xwỳnhhta na tanhmā kēp kute hkēt. Ra ja kukamā āhpumunh tỳx kēnā.

³¹⁻³² —Nom mē ate akupỹm mē htīr kēt ā mē hkamnhīxja kot paj ixprī hā mē amā harē. Amnepēm na pre Tīrtūm pī hpōkja kamā tanhmā Mojes mā kapēr to. Mān ra mē ate mar. Na pre kām:

Ixpē Apraāw nhō Tīrtūm na pa. Nē mǎānēn
ixpē Apraāw kra Ijak mē htāmnhwỳ
Jako wa ō Tīrtūm na pa.

Anhỹr o Mojes mā amnhī jarē nhūm kuma nē hā kagā. Kēp apu arī mē htyk rāhā nhỹx pre ā mē harēnh anhỹr kēt nē. Nhỹx pre mē harēnh o: “Amnepēm Apraāw nē hkra nē htāmnhwỳ mē htīr ri ixpē mē ō Tīrtūm na pa pre.” Anhỹr o nhỹx pre mē harē. Nom na pre ā amnhī jarēnh anhỹr kēt nē. Mē pamā te Apraāwja mē htyk nē mē hapēx pyrāk. Nom nhūm prem ra Tīrtūm ri ra akupỹm htīr nē mex nē pa ho pa. Tā ka htem Tīrtūm kapēr kwỳm ri akupỹm mē htīr kēt ā mē harēnh o apa.

Anhỹr o Satusew nhō xwỳnhjē mā kapēr.

³³ Hāmri nhūm mē kot mar o kuhē xwỳnhjaja amnhī jaēr pē kot mē ahkreja ma.

Tīrtūm kapēr maati jarēnh

Matêwre 10.37; Makre 12.28-34; Rukre 10.25-28; mǎānēn Wam Juāw 5.3

³⁴ Tā nhūm Parijew nhō xwỳnhjaja Satusew nhō xwỳnhjē jarēnh ma. Mē kot tee ri kām hamaxpēr o Jejus jakrenh prām kaprỳ hā mē harēnhja ma hāmri nē axpēn wỳr akuprō nē Jejus wỳr mra. Kot mē urāk nē hēx rom àhkukjēr nē hamaxpēr o hakrenh kaxyw hwỳr mra.

³⁵ Hōja kēp Tīrtūm kapēr tūm o mē ahkre o mē pa xwỳnh jakamā hēx rom kamā hamak kaxyw kām kapēr nē kām:

³⁶ —Kwa Jejus. Ot pa mē awỳr mra. Kwa mē inhmā mēmoj jarē. Na pre Tīrtūm ahpỹnhā mēmoj to 10 nē hā mē pamā karō. Mē pahte hkōt amnhī nhīpēx kaxyw hā mē pamā karō. Tā nhỹ kapēr na mex o kot hkwỳ jakrenh wehe? Anē.

³⁷ Hāmri nhūm kuma nē mē kām:

—Nā kot mē pamā hā karō kot:

Kēr ka mē anhi piitā ho amā Tīrtūm kīnh tỳx o apa. Mē amā hkīnh tỳx o mēmoj piitā hakrenh par o apa.

³⁸ E Tīrtūm kot mē pamā hā karō ja na mex o piitā hakrenh par.

³⁹ Nē hkōt ja:

Kēr ka mē amā akwỳjē hā ma ho te ka amā amnhī tā ma pyrāk. Jao ra tām mē hipēx.

⁴⁰ ā Tīrtūm kapēr ā kagā htūm kot mē pamā hā karō kot anhỹr. Ā mē pahte amnhī nhīpēx anhỹr o papaja na Tīrtūm kām hprām tỳx kumrēx. Kot kaj mē ja wa hkōt amnhī nhīpēx rāhā ho ri apa nē mǎānēn ra Tīrtūm kot mē pamā mēmoj tā karō xwỳnh piitā hkōt amnhī nhīpēx. Ja na pre Mojes mē Tīrtūm nhỹ hā kapēr xwỳnhjaja amnepēm Tīrtūm nhỹ hā mē panhīgētjē mā hā karō ho pa. Anē.

Jejus kot amnhī tā mē hkukjēr ā harēnh

Makre 12.35-37; Rukre 20.41-44; mǎānēn Rōmān 1.3-4

⁴¹ Nhūm Parijew nhō xwỳnhjaja arī Jejus mar o kuhē nhūm amnhī tā tanhmā mē hkukjēr to. Nom te nhām mēhō hā mē hkukjēr pyrāk o mē hkukja nē mē kām:

⁴² —E mē inhmā mēmoj jarē. Tanhmā na ka htem axpēn mā Tīrtūm kot mē akaxyw

ãm mã xwÿnhhta jarênh to? Kêp mēhō kanrēhā htāmnhwÿ koja wehe? Anē.

Hāmri nhūm mē kām:

—Nà koja kato nē kêp pahi finat Tawi kanrēhā htāmnhwÿ koja.

⁴³ Anē nhūm Jejus mē kuma nē mē kām:

—Tÿ. Ām hāmri na ka mē harē. No mo na htem axpēn mã kêp pahi Tawi hkanrēhā htāmnhwÿ pix ā harē nē mãānēn kêp ō pahihiti hā harēnh kêt nē? Tawi na pre Tirtūm Karō nhÿ hā tanhmā harēnh to nē harēnh o:

⁴⁴ Na pre Tirtūm inhō Pahihiti mã ā kapēr anē nē kām: “E amnē ixwÿr tē nē inhīhkō hā nhÿ nē inhmā mē ho amnhīptār o akrī. Kot paj mē kot kām akurē xwÿnh piitā mē unēnh pa nē awÿr mē o mra nē anhīhkram mē haxār pa.” Anhÿr o pre kām kapēr.

⁴⁵ ā Tawija Tirtūm kot Kris mã kapēr jarēnh nē kêp ō pahi hā kagā anē. Mē kajaja na ka htem ām kêp Tawi tāmnhwÿ pix ā axpēn mã harēnh o ri apa. No kêt Tawija na pre kêp ō Pahihiti hā harēnh o pa. Anē.

⁴⁶ Hāmri nhūm mē kuma nē tee ri kot tanhmā kutā kām kapēr to hkukamā hamaxpēr nē axte mēmoj tā hkukjêr kêt nē. Tanhmā kot mē amnhī to nē hamaxpēr o hakre? Na prem tee ri kām hamaxpēr o hakrenh prām kaprÿ. Jejus mēmoj piitā hkukamā àhpumunh tÿx o àhpumunh tÿx.

23

Jejus kot tanhmā Parijew nhō xwÿnhjê jarēnh to

Makre 12.38-40; Rukre 11.43-46, 20.45-47

¹ Tā nhūm Jejus mē ixte hkôt ixpa ho ixpa xwÿnhjê mē mē kot mar o kuhê xwÿnhjê mã kapēr nē mē inhmā tanhmā Parijew nhō xwÿnh mē Mojes kapēr o mē ahkre xwÿnhjê jarēnh to nē mē inhmā:

² —Nà Parijew nhō xwÿnh mē Tirtūm kapēr tūm o mē ahkre xwÿnhjaja na htem hprī hā Tirtūm kapēr ā kagā htūm mar mex nē.

³ Jakamā kêr ka mē mar tÿx nē mē kot ho mē ajahkre kôt amnhī nhīpêx. No mē kot amnhī nhīpêxja kêr ka mē hkôt amnhī nhīpêx kêt nē. Mē kot Tirtūm kapēr tūm o mē ajahkre htā hkôt amnhī nhīpêx kêt nē.

⁴ Te mē kot mēhō kot mē katut ā mē kām mē jênh pytī janhōr tā no ām mē kuxwar hkwy htur kêt kot amnhī nhīpêx pyrāk o na htem amnhī nhīpêx o pa. Jao mē amā mēmoj tā karō nē mē amā: “E kêr ka mē ā amnhī nhīpêx anē nē ā amnhī nhīpêx anē.” Anhÿr pix o mē amā kapēr o pa. Nom mē tāmjaja amnhī kapēr kôt amnhī nhīpêx kêt nē.

⁵ —Na htem hkwyjê kot mē omunh nē mē kot amnhī to mex ā mē harēnh kaxyw mē noo mã tanhmā amnhī nhīpêx to. Nē mē mē noo mã mē ê mex pix kām pa. Nē amnhīm Tirtūm kapēr ā kagā htūm kwÿ hā kagā nē amnhī nhōkrā hā hanhō nē amnhī pa hā hanhō nē hā pa. Mē kot hā nohtÿx rāhā hā mē hkamnhīx kaxyw nhūm htem ā amnhī nhīpêx anhÿr o pa. Nē mē kām mē piitā mē kot amnhīm mē rūnh ā mē harēnh o paja nhūm htem kām hprām.

⁶ —Nē mē pahpê Ijaewjê nhō Tirtūm kapēr o mē ahkre xà hā ixkre kamā mē kot amnhī to rūnh xwÿnhjê hkrī xà mex pix kamā kām hkrī hprām. Nē mēmoj tā mē apkur xà mex ā arīgro hā nhūm htem ma mē apkur xà hā ixkre hwÿr akuprō nhūm mē kot amnhī to rūnh xwÿnhjê hkrī xà mex pix kamā kām hkrī hprām.

⁷ Nē nhÿri pry hā mra nhūm mē kot mē omunh nē mē kêp mē ahkre xwÿnh maati hā mē hā hpijaàm kām tanhmā mē kām kapēr mex toja nhūm htem kām hprām. Ā na hte Parijew nhō xwÿnh mē Tirtūm kapēr tūm o mē ajahkre xwÿnhjaja hêx rom mē anoo mã amnhī nhīpêx anhÿr o pa.

⁸⁻¹⁰ —No mē kajaja. Kêr ka mē ho mē urāk kêt nē. Kê mē axpēn mã mē ajarēnh o: “Pahi Maati” anhÿr o mē ajarēnh kêt nē. Rÿ mē ajarēnh o: “mē ijahkre xwÿnh maati” anhÿr o axpēn mã mē ajarēnh hkêt nē. Kêt paxipix na pre Tirtūm mē akaxyw ixām jakamā paxipix na ixpê mē anhō Pahi Maati. Nē paxipix na ixpê mē ajahkre xwÿnh maati. No mē kajaja ixkôt mē apê axpēn to atōx nē atō na ka mē.

—Nē kêr ka mē ri axpēn jarēnh o: “Mēpahpām” anhÿr kêt nē. Kêt kaxkwa kamā na Mēpahpāmja.

¹¹⁻¹² —Nē kot ka mē amnhī to rax prām xāj tanhmā amnhī to jarkrar to ho apa htā

no nhũm akwỳjaja ama nẽ ãm ama nẽ akôt hamaxpêr kêt nẽ. No kot kaj mẽ piitã mẽ kutã tanhmã anojarêt to ho apa nhũm mẽ amnhĩ tã mẽ apumu nẽ axpên mã mẽ amex ã mẽ ajarê. Jakamã kot kaj mẽ amã mẽ piitã mẽ kot mẽ amex ã mẽ ajarênh prãm hãmri nẽ ri mẽ piitã mẽ kãm tanhmã amnhĩ nhĩpêx to pê mẽ kutã anojarêt rãhã ho ri apa. Anẽ.

Jejus kot mẽ hkwỳjê mã kapêr tỳx ã harênh

Makre 12.40; Rukre 11.39-52, 20.45-47

13-14 Tã nhũm Jejus hpãnhã Parijew nhõ xwỳnh mẽ Tĩrtũm kapêr tũm o mẽ ahkre ho mẽ pa xwỳnhjê mã kapêr. Nẽ mẽ kãm kapêr kãm hihtỳx nẽ mẽ kãm:

—E mẽ apê Parijew nhõ xwỳnh mẽ Tĩrtũm kapêr tũm o mẽ ahkre xwỳnhjaja. E mẽ inhma. Kot kaj mẽ amex kêt nẽ. Mẽ apê mẽ no kupyw xwỳnh na ka mẽ. Nẽ mẽ amã Tĩrtũm kôt amnhĩ nhĩpêx prãm kêt. Nẽ nhỹrmã atyk nẽ mẽ amã õ krĩ hwỳr axàpir prãm kêt. Nẽ akwỳjaja kot hwỳr àpir pymaj na ka htem akwỳjê nẽ tanhmã mẽ kãm axêx to ho apa. Mẽ kot mẽ apyrã nẽ Tĩrtũm kapêr kwỳm amnhĩ nhĩpêx prãm xàj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwỳr kahêxà kahê htỳx pyrãk o apa.

15 —Nẽ mẽ akwỳjaja kot mẽ akôt amnhĩ xunhwỳr nẽ mẽ akôt amnhĩ nhĩpêx prãm xàj na ka htem ma awry hã nhỹhỹm tanhmã mẽ kãm ri axujarênh to ho ri apa. Jakamã nhũm mễhõ mẽ ama nẽ mẽ akôt amnhĩ xãm hãmri nẽ ra amnhĩ tomnuj tỳx o mẽ ajakre. Jakamã koja mẽ nhỹrmã mẽ apyrã nẽ ma mẽ kot amnhĩ xà htỳx kamã hamak tũm xàta wỳr pa. Jakamã kwa mẽ o kora. Kot kaj mẽ amex kêt nẽ.

16 —Hêxta waa nẽ. Mẽ apê Parijew nhõ xwỳnhjê mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt kumrêx. Na ka htem mẽ kêp mẽ hikàxpore jamỳnh prãm xàj atỳx ri tanhmã mẽ ahkre hto ho apa nẽ mẽ kãm: “Kot kaj mẽ ãm hãmri mẽmoj tã amnhĩ jarênh kaxyw hãmri nẽ Tĩrtũm mã amnhĩ jarênh xà hã ixkre nhĩxi jarênh kôt mễhõ mã amnhĩ jarê nhũm ama nẽ hamaxpêr o: ‘Ko. Apu ãm hãmri na inhmã amnhĩ jarê rỳ ko na apu ãm

amnhĩ to hêx.’ Anhỹr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwỳ gõ hãmri nẽ ate mẽ kãm õr xàta jarênh kôt ãm hãmri mẽmoj tã mễhõ mã amnhĩ jarê. Hãmri nhũm ama nẽ hamaxpêr o: ‘Nà ãm hãmri na ã inhmã amnhĩ jarênh anẽ. Kot ixkre ho mex kaxyw kàxpore hkwỳ nhõr kôt ã amnhĩ jarênh anẽ. Jakamã na amnhĩ to hêx kêt nẽ.’” Anhỹr o hamaxpêr. Na ka htem ã mẽ ahkre ho apa anẽ.

17 Nom mẽ ate mẽ ahkre mex kêt. Pêr mẽ ajamaxpêr mexti hã. Tĩrtũm mã amnhĩ jarênh xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nẽ mẽ kot kãm kàxpore nhõrta mex o ixkre jakrenh ã harê. No mẽ pahte ãm hãmri mẽmoj tã amnhĩ jarênh nẽ aa paxêx kêt rãhã ho papaja na Tĩrtũm kãm hprãm.

18 —Nẽ na ka htem mẽ kêp mẽ hikukrêx jamỳnh prãm xàj ã atỳx ri mẽ ahkre anẽ nẽ mẽ kãm: “Kot kaj mẽ ãm hãmri mẽmoj tã amnhĩ jarênh kaxyw nẽ Tĩrtũm mã mẽmoj nhõr xà hã mễstija jarênh kôt mễhõ mã tanhmã amnhĩ jarênh to. Hãmri nhũm mẽ ama nẽ hamaxpêr o: ‘Nà ãm hãmri na inhmã amnhĩ jarê rỳ ko na apu ãm inhmã amnhĩ to hêx.’ Anhỹr o hamaxpêr. Nom kot kaj mẽ Tĩrtũm mã mẽmoj nhõr xà hã mễstija ã kãm mẽmoj xi. Hãmri nẽ ra mẽ ate kãm õr xàta jarênh kôt ãm hãmri mẽmoj tã mễhõ mã amnhĩ jarê. Hãmri nhũm ama nẽ hamaxpêr o: ‘Nà ãm hãmri na ã inhmã amnhĩ jarênh anẽ. Kot Tĩrtũm mã mẽmoj nhõr ã amnhĩ jarênh kôt kot amnhĩ jarênh anhỹr jakamã na amnhĩ to hêx kêt nẽ.’ Anhỹr o hamaxpêr.” Anẽ. Na ka htem ã mẽ ahkre anẽ.

19 Mẽ ajamaxpêr kêt xwỳnh na ka mẽ. Tĩrtũm mã mẽmoj nhõr xà hã mễstija na mex o mẽ kot hã kãm mẽmoj nhõrta jakrenh. Tã na ka htem axtem nẽ mẽ kot hã kãm mẽmoj nhõrta mex o mễsti jakrenh ã harê.

20 Nom Tĩrtũm mã mễsti mẽ mẽ kot hã kãm mẽmoj nhõrta te kot axpên pyrãk jakamã kot kaj mẽ mễstija jarênh kôt mẽmoj tã amnhĩ jarê nẽ mãânên mẽ ate hã Tĩrtũm mã mẽmoj xirja jarênh kôt amnhĩ jarê. Hamẽ wa kot axpên pyrãk jakamã hamẽ wa harênh pê amnhĩ to axêx kêt nẽ. Jakamã kêr ka mẽ mẽmoj tã amnhĩ jarênh kaxyw

nê hamê wa harênh kôt âm hămri mẽmoj tâ amnhĩ jarê nê ho axêx kêt nê.

21 Tâ kot kaj mẽ âm hămri amnhĩ jarênh ã mẽmoj tâ amnhĩ jarênh kaxyw nê Tĩrtũm mã amnhĩ jarênh xà hã ixkre hkôt hã amnhĩ jarê nê mãânên Tĩrtũm kêp ixkre hpãm kôt hã amnhĩ jarê. Jakamã kêt ka mẽ hamê wa harênh pê amnhĩ to axêx kêt nê.

22 —Nê kot kaj mẽ âm hămri amnhĩ jarênh ã mẽmoj tâ amnhĩ jarênh kaxyw nê kaxkwa jarênh kôt amnhĩ jarênhja o mãânên kaxyw kaxkwa kamã Tĩrtũm krĩ xà maati hkôt amnhĩ jarê. Nê mãânên Tĩrtũm kôt amnhĩ jarê. Jakamã kwa hamê wa harênh pê amnhĩ to axêx kêt nê.

23 —Hêxta waa nê. Mẽ apê Parijew nhõ xwýnh mẽ mẽ apê Tĩrtũm kapêr tũm o mẽ ahkre xwýnhjaja kot kaj mẽ amex kêt nê. Mẽ ate mẽ no kupyw xwýnh na ka mẽ. Na ka htem Tĩrtũm kapêr piitã hkôt amnhĩ nhĩpêx kêt nê âm hkwy kôt pix mã amnhĩ nhĩpêx o ri apa. Na ka htem âm kapêr o hpýnhre nê hkôt amnhĩ nhĩpêx ã amnhĩ pumu nê ate amnhĩ to mex xwýnh ã amnhĩ jarênh o apa. No Tĩrtũm kãm hprãm xà piitã hkôt amnhĩ nhĩpêx kêt nê. Mẽ ate tãm mẽ hipêx nê mẽ ho mex nê mẽ kamã axukapri hã kot mẽ amã karõja. Nê mẽ amã Tĩrtũm kĩnh ã kapêr kôt amnhĩ nhĩpêx hã karõja ra mẽ ate mar tâ hkôt amnhĩ nhĩpêx kêt nê. Mẽ ate kapêr piitã hkôt amnhĩ nhĩpêx ronhỹx ja mẽ amã mex o mex.

24 Mẽ ate âm kapêr o hpýnh nê hkôt amnhĩ nhĩpêx jakamã te mẽ ate atýx ri tanhmã axâpkur to ho mẽ akrĩ pyrâk. Jao te mẽ axâpkur xà hã mẽõ kamã pure pumunh nê nê hanhir nê rênh tâ mãânên kamã kên rax pumunh tâ nê hanhir nê rênh kêt rãhã hkur pyrâk. Jao Tĩrtũm kapêr o hpýnhre nê hkôt amnhĩ nhĩpêx no piitã hkôt amnhĩ nhĩpêx kêt nê. Pêr mẽ ajamaxpêr kêt tâ na ka htem atýx mẽ ahkre ho ri apa.

25 —Hêxta waa nê. Mẽ apê Parijew nhõ xwýnh mẽ mẽ apê Tĩrtũm kapêr tũm o mẽ ahkre xwýnhjaja kot kaj mẽ amex kêt nê. Mẽ ate mẽ no kupyw xwýnh na ka mẽ. Nã mẽ apê Parijew nhõ xwýnhjaja te mẽ ate mẽ kot apkur kaxyw prat kre kuhõnh punuj tâ mex ã harênh nê kamã apkur pyrâk o na ka mẽ. Jao âm mẽ akrãhkã rũm pix mã mẽ amex. Nê mẽ noo mã te mẽ amex

pyrâk no mẽ anhõxàhkre kaxwýnh kãm mẽ ajamaxpêrja mex kêt. Mẽ akapêr prãm nê mẽ axàhkurê nê mẽ anhõxyy.

26 Mẽ ajamaxpêr mex kêt kênã. Kwa kêt ka mẽ tãm ajamaxpêr o tãm akwýjê nhĩpêx o ri apa. Nê axãmnhĩx ri mẽ kêp amrakati xwýnhjê mã mẽmoj nhõr o ri apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nê amnhĩm mẽ amex ã mẽ ajarê. No na ka htem amã mẽ amnhĩ to mex prãm xàj âm tee ri amnhĩ kuhõnh japjê kapry.

27 —Hêxta waa nê. Mẽ apê Parijew nhõ xwýnhjê mẽ mẽ apê Tĩrtũm kapêr tũm o mẽ ahkre ho mẽ apa xwýnhjaja kot kaj mẽ amex kêt nê. Te mẽ ate mẽ htykjê jagjênh xà pyrâk. Na htem mẽ hagiênh xà ho mex o pa nom kamã mẽ hi nê ahpunuj pix.

28 Ja pyrã nê ã mẽ ate amnhĩ nhĩpêx anhỹr. Kapôt rũm mẽ anhĩja na mex. Te mẽ ate mẽ ho mex o apa pyrâk o na ka htem amnhĩ nhĩpêx nhũm mẽ âm akrãhkã pix pumu nom âm mẽ akrã hi kaxwýnh kãm mẽ ajamaxpêr punuj rãhã hã mẽ apumunh kêt nê. Mẽ ate tanhmã mẽ no kupyw to pix kukamã ajamaxpêr jakamã te mẽ ate mẽ htykjê jagjênh xà pyrâk.

29-30 —Hêxta waa nê. Mẽ apê Parijew nhõ xwýnh mẽ mẽ apê Tĩrtũm kapêr tũm o mẽ ahkre xwýnhjaja kot kaj mẽ amex kêt nê. Mẽ ate mẽ no kupyw xwýnh na ka mẽ. Na ka htem ma mẽ hã pika hwýr apa nê Tĩrtũm nhỹ hã kapêr o mẽ pa xwýnhjê hã pika ho mex. Nê mẽ kot amnhĩ to mex xwýnhjê hã pika ho mex. Nê axpên mã mẽ harênh o: “Hêxta waa nê. Na pre amnepêm mẽ pakukamã mẽ panhĩgêtjaja Tĩrtũm nhỹ hã mẽ kãm kapêr xwýnhjê homnuj nê mẽ kupa. No kêt mẽ papajaja mẽ kamã ri papa ronhỹx pu prem mẽ urâk nê ã mẽ hipêx anhỹr kêt nê.” Anhỹr o axpên mã mẽ hkapri ho ri apa.

31-32 Nom âm amnhĩ to axêx. Mẽ ate ã amnhĩ nhĩpêx anhỹr o apa kênã. ã mẽ ate amnhĩ nhĩpêx anhỹr jao ra apê mẽ hkanrêhã mẽ hkra kumrêx ã amnhĩ to amnhĩrit mex o apa.

33 Te mẽ ate kagã xoprê kot mẽ hkamnhar nê mẽ homnuj týx pyrâk jakamã koja Tĩrtũm nhỹrmã ma mẽ kot amnhĩ xà htyx

kamã hamak tũm xàta wỳr mẽ ajano ka mẽ ma hwỳr ajapêx. Hãmri nẽ tee ri amã ajapôx prãm kaprỳ nẽ rĩ amnhĩ pumu.

³⁴—Kot paj nhỹrmã ma mẽ awỳr inhỹ hã ixkapêr jarênh o mẽ pa xwỳnh kwỳ rẽ. Nẽ inhỹ hã mẽ àhpumunh xwỳnh kwỳ rẽ. Nẽ ixkapêr o mẽ ahkre xwỳnh kwỳ rẽ. Nom kot kaj mẽ ãm mẽ kapêr ma nẽ apê mẽ hprãm nõkati nẽ tanhmã mẽ homnuj tỳx to ho apa. Nẽ ixpê mẽ hkwỳjê hpar o apa. Jao pĩ kahpa hã mẽ hanhôr o mẽ hkwỳjê hpa. Nhũm mẽ hkwỳjaja Tĩrtũm kapêr o mẽ ahkre xà hã ixkre kamã mẽ ahkre ho hkrĩ ka mẽ omu nẽ mẽ unê nẽ ixkreja kamã mẽ htak. Hãmri nhũm mẽ apymaj nhãm ahpỳnhã krĩ hkwỳ hwỳr hprôt nẽ mra. Ǻ kot kaj mẽ inhỹ hã ixkapêr jarênh xwỳnhjê nhĩpêx anhỹr o apa.

³⁵⁻³⁶ Na prem ra mẽ himex rax nẽ. Amnepê m panhĩ kator krax rũm Atãw kra Apewta na pre Tĩrtũm nhỹ hã kapêr o pa nhũm htõja kãm mar prãm kêt nẽ kupĩ. Tã nhũm Tĩrtũm axte mẽ hwỳr ỹ hã kapêr o mẽ pa xwỳnh kwỳjê rẽ nhũm prem mã mẽ ho anẽ nẽ mẽ hkwỳjê nhĩmex. Nhũm pre xatã mẽ hwỳr mẽ hkwỳjê rẽ nhũm mẽ xatã mẽ kupa. Apew rũm Parakis kra Jakaris wỳr na prem mẽ himex rũnh nẽ. Hãmri nhũm prem Tĩrtũm mã amnhĩ jarênh xà hã ixkre kamã Jakarisja pĩ. Tã mẽ kajaja mẽ ate mẽ urak nẽ mẽ amã Tĩrtũm kapêr mar prãm kêt nẽ mẽ urak nẽ amã Tĩrtũm nhỹ hã kapêr xwỳnhjê nhĩmex prãm nẽ. Ǻ mẽ ate mẽ anhĩgêjtê pyrã nẽ mẽ hipêx anhỹr mỳrapê koja Tĩrtũm mẽ apê mẽ hkanrêhã mẽ hkra nẽ mẽ htãmnhwỳjaja mẽ ato hpim-ràatã tanhmã mẽ ato htỳx to ka mẽ amnhĩ xà htỳx kamã ajamak rãhã ho ri apa. Anẽ.

Jejus kãm Jerujarẽ nhõ xwỳnhjê japê htỳx ã harênh

Rukre 13.34-35; mããnên Rõmãn 11.25-27

³⁷ Hãmri nhũm Jesus te ra kot Jerujarẽ nhõ xwỳnhjê pumunh nẽ mẽ kãm kapêr pyrak o tanhmã kapêr to ho xa. Nẽ mẽ kãm:

—Hêxta waa nẽ Jerujarẽ nhõ xwỳnhjaja. Tĩrtũm kot xatã mẽ awỳr ỹ hã kapêr jarênh xwỳnhjê rênh nhũm mẽ kot mẽ akôt mẽ amã kapêr jarênh o pa htã ka mẽ kapêr mar kêt kumrêx. Nẽ axtem nẽ kên o mẽ htak o mẽ himex o apa. Ǻ na ka htem amnhĩ

tomnuj o apa anẽ. Tã nom arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwỳ pyrak o na pa inhmã mẽ anhĩpêx prãm nẽ. Nom mẽ amã ixprãm nõkati nẽ mẽ ate ixkaga kumrêx.

³⁸ Mỳrapê koja Tĩrtũm mẽ anhõ krĩ jamãr kêt nẽ.

³⁹ Kot paj tokyx ty nẽ mẽ apiitã mẽ are nẽ ma akupỳm api ka mẽ axte ixpumunh kêt nẽ. Ǻm akupỳn ixwryk xà hã arĩgrota pix ã koja mẽ akwỳjaja mẽ amỳrpê krĩ ja kamã ixpôx ã ixpumu. Hãmri nẽ mẽ akurom ixpumu nẽ hkĩnh tỳx nẽ. Nẽ tã ixkôt amnhĩ xunhwỳr kurê kumrêx. Hãmri nẽ axpên mã ijarênh o:

Ota Tĩrtũm kot mẽ pahwỳr mênh xwỳnhhta wry. Nà ãm hãmri na mẽ pahwỳr wry. Ja mex o mex.

Koja mẽ ã axpên mã ijarênh anẽ. Anẽ.

24

*Jejus kot mẽ pakukamã mẽmoj jarênh
Makre 13.1-13; Rukre 21.5-19; mããnên
Wam Ximotre 4.1-3; Sikũn Ximotre 3.1-9;
Apokarip 6.1-17*

¹ Tã nhũm Jesus Tĩrtũm mã amnhĩ jarênh xà hã ixkre rũm kato nẽ ma tẽ. Pa mẽ ixte hkôt ixpa ho ixpa xwỳnhjaja kormã ixkreja pumunh o ixkuhê nẽ kãm harê nẽ kãm:

—Kwa Pahihti. Hêxta waa nẽ. Ixkreja ãm mex kumrêx. Anẽ.

Hãmri nhũm mẽ inhmã:

² —Tỳ mex nom koja nhỹrmã mẽ kãm Tĩrtũm kurê xwỳnhjaja grãnh pa. Koja arĩ kên õ axkrutre nẽ axpên mỳnh nẽ nõr kêt nẽ. Koja piitã anhgrã nẽ ahpỳnhã ri hikwỳ. Anẽ.

³ Hãmri pa mẽ kuma nẽ tee ri hkukamã ijamaxpêr. Hãmri nhũm Jesus ma tẽ nẽ hixêt pê Oriwêhti hã api nẽ hã nhỹ pa mẽ ma hkôt mra nẽ mẽ kot ã ixkre nhĩpêx anhỹrta ã hkukja nẽ kãm:

—Kwa xà ãm hãmri koja mẽ ã ixkreta nhĩpêx anẽ? Kwa mẽ inhmã aprĩ hã harê. Xà koja mẽ nhỹrmã ho anẽ nà? Xà koja mẽ tokyx ho anẽ? Nẽ akupỳn mẽ ixwyr awryk nhũm mẽmoj piitã hapêxja. Kwa mẽmo koja we wỳj ri tanhmã amnhĩ nhĩpêx to wehe? Anẽ.

⁴ Hāmri nhũm mẽ inhmã hprĩ hã tanhmã mẽmoj kot amnhĩ nhĩpêx to hkukamã ujarênh o nhỹ nẽ mẽ inhmã:

—Nà nhỹrmã mẽmoj piitã hapêx kaxyw tanhmã amnhĩ nhĩpêx toja kumrêx kot paj mẽ amã harê ka mẽ inhma. Nà koja mẽ ohtô nẽ mẽ awÿr mra nẽ hêx rom te pa ixte amnhĩ nhĩpêx pyrãk o amnhĩ nhĩpêx o mẽ akôt pa.

⁵ Nẽ mẽ amã amnhĩ jarênh o: “E Tĩrtũm na pre mẽ awÿr inhmẽ. Ixpê kaxkwa rũm ixwryk xwÿnhhta na pa.” Anhÿr o mẽ akôt mẽ amã amnhĩ to hêx o pa. Jao ohtô nẽ mẽ nokupyr o pa.

⁶ —Nẽ koja mẽ nhỹri awry hã axpên par o pa nẽ mẽ atã axpên par o pa. Nom kêr ka mẽ harênh ma nẽ ri tokyx mẽmoj piitã hapêx ã hkamnhĩx kêt nẽ. Kormã mẽmoj piitã hapêx xà hã arĩgroja kormã.

⁷ Koja mẽmoj piitã hapêx kaxyw nhũm ahpÿnhã ri pika piitã hkôt mẽ pa xwÿnhjaja pika hõ nhõ xwÿnhjê kutã kuhê nẽ pijapu ho kuhê. Jao ra axpên par o pa. Hāmri nhũm nhỹri pika hkwy htertet tÿx kumrêx. Nẽ mẽ hpur kãm mẽõja hapêx nhũm mẽ kãm prãm tÿx nẽ pa. Jakamã nhũm mẽ ohtô nẽ prãm xàj axkaprã.

⁸ Nom ja kormã mẽmoj hapêx kaxyw krax pix na. Te ho mênijê hõ hpijagri kaxyw nẽ kormã kawax pê õhy xà pyrãk.

⁹ —Nẽ koja mẽ piitã ixkôt mẽ akamã gryk nẽ kãm mẽ akurê htÿx o pa. Nẽ mẽ awÿr mra nẽ ixtã mẽ apynê nẽ mẽ atomnuj tÿx nẽ mẽ apa.

¹⁰ Jakamã koja mẽ kot ixkôt amnhĩ xunhwÿr xwÿnh kwÿjaja mẽ umaj tee ri amnhĩ kukamã hamaxpêr hāmri nẽ ixkaga. Nẽ ixkôt mẽ kãm axpên tã amÿnê nẽ axpên kãm gryk o pa.

¹¹ Nhũm nhỹri mẽ hkwyjaja Tĩrtũm nhỹ hã kapêr jarênh xwÿnh ã amnhĩ to hêx o pa. Jao mẽ ohtô nẽ mẽ nokupyr o pa.

¹² Koja mẽ ã amnhĩ nhĩpêx anhÿrja o ra piitã kãm axpên kamã ukaprĩ hkêt o pa.

¹³ Koja mẽ ã ixtã mẽ atomnuj o pa anê. Tã nom kêr ka mẽ amnhĩ to htÿx nẽ ixkaga hkêt nẽ. Mẽ kot mẽ apar tã ka mẽ kaxkwa kamã akupÿm atĩr kurê kumrêx.

¹⁴ —Nẽ kot kaj mẽ apê ixkwÿjaja ma krĩ piitã hkôt Tĩrtũm kapêr o mẽ ahkre ho apa.

Mẽ kot amnhĩ tomnuj kaga nẽ ixkôt amnhĩ xunhwÿr nhũm Tĩrtũm kot ja hã mẽ omunh nẽ mẽ ho hkra hã mẽ kãm harênh o ri mẽ piitã mẽ hkôt apa. Kot kaj mẽ piitã mẽ kãm ijarênh pa pa rĩ kormã akupÿn mẽ awÿr wrÿ. Anê.

Mẽ pahtomnuj tÿx xwÿnh maati hã harênh

Makre 13.14-23; Rukre 21.20-24; mãänên Sikũn Tesarõn 2.3-4

¹⁵ Nhũm Jejus arĩ mẽmoj kukamã mẽ inhmã kapêr nẽ mẽ inhmã:

—Amnepêm Tĩrtũm nhỹ hã kapêr xwÿnh finat Tãniwja na pre tanhmã mẽ atomnuj tÿx xwÿnh maatija jarênh to. Tã koja nhỹrmã ra kot harênh xà hkôt axtem nẽ Tĩrtũm mã amnhĩ jarênh xà hã ixkre hwÿr axà nẽ Tĩrtũm xãm xà kamã xa. Ka mẽ ja hã omu hāmri nẽ mẽ kot krĩ granh par ã hkamnhĩx kurê kumrêx.

¹⁶ Koja ã amnhĩ nhĩpêx anê ka mẽ amÿm amnhĩ wÿr mẽ omu hāmri nẽ ajapôj nẽ ma aprôt nẽ amrar kurê kumrêx. Mẽ apê jar pika pê Jutej kamã mẽ apa xwÿnhjaja kaj mẽ omu hāmri nẽ mẽ kot mẽ apar pymaj aprôt nẽ ma amrar kurê kumrêx.

¹⁷ Rÿ ka mẽ anhõrkwy hkrãmnênh o akrĩ japêr nẽ amÿm amnhĩ wÿr mẽ omu nẽ akukrêx wÿr axàr nẽ hõ hpyr mã ajamaxpêr kêt nẽ. ãm wrÿ nẽ aprôt nẽ ma atêm kurê kumrêx.

¹⁸ Rÿ ka mẽ apur kãm axapênh o apa japêr nẽ amÿm mẽ omu hāmri nẽ akupÿm anhõrkwy hwÿr axê jamÿnh kaxyw atêm kêt nẽ. ãm mẽ umaj aprôt nẽ ma atêm kurê kumrêx.

¹⁹ —No mẽ htujarô nẽ mẽ hkra karàre xwÿnhjaja koja mẽ kêp mẽmoj omnuj tÿx nẽ. Tanhmã kot mẽ amnhĩ to nẽ mẽ umaj hprôt tÿx? Nà pika ja kamã koja mẽ mex kêt o mex kêt. Mẽ kot amnhĩ tomnuj mÿrapê koja Tĩrtũm tanhmã mẽ homnuj tÿx to.

²⁰ —Nẽ kwa kêr ka mẽ amnhĩ to Tĩrtũm wÿr kê ã mẽ kot amnhĩ nhĩpêx anhÿr xà hã arĩgroja na wrÿk pê ã amnhĩ nhĩpêx anhÿr kêt nẽ. Rÿ mẽ hkôt xà hã arĩgro pê sap ã ã amnhĩ nhĩpêx anhÿr kêt nẽ.

²¹ —Nẽ ã mẽ kot amnhĩ nhĩpêx anhÿr ã arĩgroja ã koja mẽ piitã amnhĩ xà htÿx kãm hamak tÿx kumrêx. Amnepêm Tĩrtũm kot pika ho kator krax rũm amnê mẽ pa

xwÿnhjaja kormã aa kot ã amnhĩ xà htÿx kamã hamak anhÿr kêt tã arĩgroja ã koja mẽ amnhĩ xà htÿx kumrêx kamã ama. Hãmri nê axte pika ja kamã ã amnhĩ xà htÿx kumrêx kamã hamak anhÿr kêt nê.

²² Kop apu Tĩrtũm kot mẽ kot amnhĩ xà htÿx kamã hamak xà hã arĩgro hkwÿ ho gri hkêt ronhÿx ka mẽ apiitã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwÿnhjê japê xàj mẽ amã ho gri.

²³⁻²⁴ —Tã ã mẽmoj kot amnhĩ nhĩpêx anhÿr jakamã koja mẽmojaja tanhmã mẽ amã ixto hêx to nê mẽ amã: “Ota ra Kris akupÿn wrÿ. Kwa mẽ hwÿr mra nê omu.” Anê. Rÿ mẽ amã: “Krisja krĩ mũj kamã na raa. Kwa mẽ ma hwÿr mra nê omu.” Anhÿr o mẽ amã ixto hêx o pa. Rÿ mẽ awÿr mra nê mẽ amã amnhĩ to hêx nê mẽ amã: “E. Ot pa ixpê Kris ã mẽ awÿr wrÿ. Tĩrtũm na mẽ awÿr inhmẽ pa wrÿ.” Anê. Rÿ mẽ amã: “E ixpê Tĩrtũm nhÿ hã ixkapêr xwÿnh na pa mẽ awÿr mōn pōj.” Anhÿr o mẽ amã amnhĩ to hêx. Hãmri nê mẽ anokupyr kaxyw mẽ amã aa mẽ kot mẽmoj pumunh kêt kwÿ ho anhÿr o pa. Tĩrtũm kot amnhĩ kôt mẽ arênh xwÿnhjaja kãm mẽ ate ja hã mẽ omunh nê mẽ gryk ã ixkaga hprãm xàj koja mẽ ã mẽ anoo mã amnhĩ nhĩpêx anhÿr o pa. Nom ãm ã amnhĩ nhĩpêx anhÿr kaprÿ ka mẽ ixkaga hkêt nê.

²⁵ —E kwa mẽ inhmar tÿx nê. Na pa ra ixprĩ hã ã mẽ kot amnhĩ nhĩpêx anhÿrja kukamã ã mẽ amã mẽmoj jarênh anê. Tã kêr ka mẽ amnhĩ nê ã mẽ kot amnhĩ to hêx anhÿr o mẽ pa xwÿnhjê pumunh mex o apa nê axkãm ajamak rom.

²⁶ Rÿ koja mẽ tanhmã mẽ amã ixto hêx to nê mẽ amã: “Ota Tĩrtũm kot mẽ pahwÿr mēnh xwÿnhhta kapôt ã mōn pōj. E mẽ tokyx ma hwÿr mra nê omu.” Anhÿr o mẽ amã ijarê ka mẽ ama nê ãm mẽ ama nê hwÿr amrar kêt nê. Rÿ nhũm mẽ amã: “Ota hitom kãm xa. E mẽ mamrĩ hwÿr agjê nê omu.” Anê no ka mẽ ãm mẽ ama nê ãm mẽ ama nê hwÿr agjêx kêt nê.

²⁷ Kot paj nhÿrmã akupÿn mẽ awÿr ixwrÿk kaxyw hãmri nê ixpimxur kãm ixwrÿk kêt nê. Koja pika piitã hkôt mẽ pa xwÿnhjaja anhĩpê ixwrÿk kãm ixpumu. Te

mẽ piitã anhĩpê mẽ kot na haxênh pumunh pyrãk o kot kaj mẽ anhĩpê apiitã ixpumu.

²⁸ Te nhÿri mẽmoj kro nê nōr nhũm nhōnhti kot omunh nê hã htor nê hpinhpanh nhũm mẽ piitã hã omunh pyrãk o kot paj amnhĩ nhĩpêx. Anê.

Jejus akupÿn wrÿk xwÿj ri mẽmoj kukamã harênh

Makre 13.24-31; Rukre 21.25-33; mãânēn Wam Tesarōn 4.16-17

²⁹ Nhũm Jejus arĩ mẽ ixte hkôt ixpa ho ixpa xwÿnhjê mã kapêr nê mẽ inhmã:

—Nê kot paj akupÿn mẽ awÿr inhnojarêt nhũm rĩ Tĩrtũm kaxkwa kamã tanhmã mẽmoj nhĩpêx to. Kapêr ã kagà htũm kot tanhmã ja kukamã harênh to nê harênh kot:

Koja Tĩrtũm kaxkwa ho àk nhũm kanhêti pitã rôrôk pa nhũm myyti ahtyk nhũm mytwrÿre urãk nê axte hpôk kêt nê. Anê.

³⁰ Koja ã mẽmoj amnhĩ nhĩpêx anhÿr pa hãmri pa kaxkwa hã mẽ amã mẽmoj nhô. Hãmri nhũm pika piitã hkôt ri mẽ pa xwÿnhjaja piitã omu nê tee ri amnhĩ kukamã hamaxpêr o hkaprĩ nê mÿr rax kumrêx. No mẽ kajaja kot kaj mẽ omu hãmri nê akupÿn mẽ awÿr ixwrÿk nê mẽ ato amnhĩptar mã ajamaxpêr kurê kumrêx. Kot paj kakrã kamã hirã htÿx kãm akupÿn ixihtÿx kãm mẽ awÿr wrÿ.

³¹ Hãmri nê Tĩrtũm kapêr o mẽ wrÿk xwÿnh maati mã anê nhũm pifti kakô hãmri nhũm hkwÿjaja kuma nê ma mẽ awÿr pika piitã hkôt angrã nê ma mra nê inhmã mẽ ato akuprô. Ixte amnhĩ kaxyw mẽ axunhwÿr xwÿnhjê o akuprô nê man akupÿn ixwrÿ mẽ ato hapêx. Anê.

Jejus kot mẽmo pàr o ejêp jarênh

Makre 13.28-31; Rukre 21.29-33

³² Nhũm Jejus arĩ mẽ inhmã kapêr nê mẽ inhmã:

—E ka mẽ pĩ hpàr mũj pumu. Na hte mẽmo mytwrÿ hã rã nhũm mẽ omu nê ô hkukamã hamaxpêr kurê kumrêx.

³³ Ja pyrã nê koja ã ixte mẽmoj jarênh anhÿr xwÿnhja amnhĩ nhĩpêx par mẽ ka mẽ omu nê akupÿn mẽ awÿr ixwrÿk mã ajamaxpêr kurê kumrêx. Kot paj te ra

mê anhörkwÿ kapem ixâm pyrâk o amnhÿ nhÿpêx.

³⁴ Nom akupÿn ixwrÿk kêt ri koja â mê kot mëmoj kot amnhÿ nhÿpêx anhÿr pumunh xwÿnhjaja kormâ piitâ htyk kêt ri pa akupÿn wrÿ.

³⁵ —Nê koja nhÿrmâ pika nê kaxkwa wa hapêx pa. Tâ no âm ixkapêrja koja wa urâk nê aa hapêx kêt nê. Koja âm râhâ ho râhâ. Kot paj aa ihkjê ho tanhmâ mënh to hkêt nê. Anê.

Mê pahte akupÿn Jesus wrÿk xâ hâ arÿgro pumunh kêt â mê pajarênh

Makre 13.32-37; Rukre 12.37, 17.26-30, 17.34-36; määnên Wam Tesarôn 5.2

³⁶ Nhÿm Jesus arÿ mê inhmâ kapêr nê mê inhmâ:

—Nê ixte akupÿn mê awÿr ixwrÿk xâ hâ arÿgroja mê ate omunh kêt. Nê kaxkwa kamâ Tÿrtÿm kapêr o mê wrÿk xwÿnhjaja haxwÿja kot ja pumunh kêt. Nê ijaxwÿja ixpê Tÿrtÿm Kra htâ ixte ja hâ amnhÿ pumunh kêt. Âm inhô Papaj pix na kot ja pumunh.

³⁷ —Nê kot paj nhÿrmâ man akupÿn mê awÿr wrÿ. Akupÿn mê awÿr ixwrÿk xâ hâ arÿgrota â koja mê htÿx ri amnhÿ tomnuj o pa. Te amnepêm Noehti kormâ htÿr ri mê pa xwÿnhjaja kot htÿx ri amnhÿ tomnuj o pata pyrâk.

³⁸ Na pre htem amnhÿ kaxyw Tÿrtÿm mâ hamaxpêr kêt nê. Âm jar mê kot amnhÿ nhÿpêx pix kukamâ hamaxpêr kêt pix mâ amnhÿ nhÿpêx o pa. Rôm nhÿm Noehtija gô htâm pymaj pâr rax nhÿpêxta mâ axâ.

³⁹ Nhÿm mê ja hâ omu nê âm omu nê tanhmâ ri amnhÿ kukamâ hamaxpêr to hkêt nê. Hâmri nhÿm naja mê haêr pê wrÿ nê wrÿk rax o mê hanhir pa. Tâ akupÿn ixwrÿk xâ hâ arÿgroja â koja mê htÿx ri â amnhÿ nhÿpêx anhÿr o paja o pa mê haêr pê naja pyrâ nê akupÿn wrÿ.

⁴⁰ —E kot paj mê amâ nhÿrmâ akupÿn ixwrÿk nê tanhmâ mê anhÿpêx to hâ amnhÿ jarê. Te kot ja pyrâk. Koja mëmyjê hō wa hamêxkrut nê hpur kâm âpênh o xa. Nhÿm hōja ra ixkôt amnhÿ xâm nhÿm hōja ixkôt amnhÿ xâm kêt japêr. Hâmri pa amnhÿ wÿr ra kot ixkôt amnhÿ xâm xwÿnhhta o api nhÿm kot ixkôt amnhÿ xâm kêt xwÿnhhta hpur kâm

ahte arÿ xa. Hâmri nê tee ri hkrâmnhwÿ japêr rÿt o xa.

⁴¹ Rÿ nhÿm mënijê wa hamêxkrut nê harôj kahuk o xa. Nhÿm hōja ra ixkôt amnhÿ xâm nhÿm hōja ixkôt amnhÿ xâm kêt japêr. Hâmri pa amnhÿ wÿr kot ixkôt amnhÿ xâm xwÿnhhta ho api nhÿm kot ixkôt amnhÿ xâm kêt xwÿnhhta tee ri hkrâmnhwÿ japêr rÿt o xa hâmri nê hamaxpêr rax kumrêx. Kot paj nhÿrmâ akupÿn wrÿ nê â mê anhÿpêx anê.

⁴² Tâ mê ate akupÿn ixpôx xâ hâ arÿgro pumunh kêt jakamâ kwa kêr ka mê ijamâr râhâ ho ri apa.

⁴³ Na htem htÿx ri nhÿri tanhmâ amnhÿ nhÿpêx to ho pa nhÿm mê kêp âhkÿnh xwÿnh mê ôrkwÿ hwÿr agjê nê mê kêp ahkÿ.

⁴⁴ Tâ mê ate akupÿn ixwrÿk xâ hâ arÿgro pumunh kêt jakamâ kwa kêr ka mê ixwakre kamâ te mê apê mê ôrkwÿ nhô dôn kot amnhÿ nhÿpêx pyrâ nê atÿx ri tanhmâ amnhÿ tomnuj to ho apa hkêt nê. Ixkutêp axkâm ajamak rom nê ri apa. Jao tâm ixkutêp amnhÿ nhÿpêx râhâ ho ri apa. Anê.

Mê kâm mê âpênh mex xwÿnhjê jarênh
Rukre 12.41-48

⁴⁵ Nhÿm Jesus arÿ mê inhmâ kapêr nê mê inhmâ:

—E koja mê kâm âpênh xwÿnhjê hō âpênh mex o pa hâmri nhÿm ô patrâw âpênh â omu hâmri nê ma nhÿhÿm mōr kaxyw nê îhkram mëmoj piitâ haxâr pa nê kâm: “E kêr ka ixwakre kamâ inhmâ inhörkwÿ tãnopxar mex nê. Nê inhmâ mê âpênh xwÿnhjê mâ mê apkur xâ nhôr o apa.” Anhÿr o kâm mëmoj tâ karō hâmri nê kato nê ma nhÿhÿm mō.

⁴⁶ Hâmri nhÿm kot kâm âpênh mex xwÿnhhta wakre kamâ kâm âpênh mex o pa. Jakamâ nhÿm ô patrâw akupÿn hpôx o mō nhÿm amnhÿ wÿr harênh ma nê hkÿnh nê. Nê tee ri amnhÿ kukamâ hamaxpêr o kâm uma hkêt nê. Kot wakre kamâ kutêp kâm âpênh mex jakamâ tee ri tanhmâ amnhÿ kukamâ hamaxpêr to hkêt nê.

⁴⁷ Jakamâ nhÿm ô patrâwja akupÿn pôj nê kot kâm âpênh mex â omu nê hkÿnh nê. Hâmri nê kot kâm ô mëmoj piitâ hamâr o pa kaxyw îhkram haxâr pa.

⁴⁸ No koja axtem nê wakre kamã kãm àpênh mex kêt japêr. Nê hamaxpêr o: “Tk. Nà koja tokyx akupÿn môr kêt nê.” Anhÿr o hkamnhÿx.

⁴⁹ Hãmri nê wakre kamã kãm mē àpênh xwÿnhjê htak nê pipânh pix o pa. Nê kãm kagôxÿhti xành xwÿnhjê kôt pix mã pa.

⁵⁰ Hãmri nhũm ò patrãwja haêr pê akupÿn pôj nê tee ri ja hã omu.

⁵¹ Hãmri nê kamã gryk tÿx nê tanhmã homnuj htÿx to nê kãm mē àpênh punuj xwÿnhjê mē mē ho hpimràatã amnhÿ nê mē kator pa. Hãmri nê mē kot kapêr kwÿm amnhÿ nhÿpêx xwÿnhjê mē mē ho hpimràatã tanhmã mē homnuj to nê amnhÿ nê mē kator. Hãmri nhũm mē tee ri amnhÿ kukamã hamaxpêr nê mur nê tee ri amnhÿ nhÿpêx. Tã kêr ka mē ixwakre kamã ho mē urak kêt nê. Mē kurom ixwakre kamã ixkapêr kôt amnhÿ nhÿpêx mex rãhã ho ri apa. Anê.

25

Kormã mē mjên kêt xwÿnhjê ho 10 nê mē harênh

Wam Tesarôn 5.1-3

¹ Nhũm Jejus arÿ mē inhmã kapêr nê mē inhmã:

—Nê mē ate Tÿrtũm kôt amnhÿ nhÿpêx o mē apa xwÿnhjaja kêr ka mē akupÿn amnhÿ wÿr ixkãm ajamak rom nê ri apa. Nom mē kêp Tÿrtũm prãm nôkati xwÿnhjaja koja mē akÿnhã ãm htÿx tanhmã amnhÿ to pix kukamã hamaxpêr o pa. Te kormã mē mjên kêt xwÿnhjaja kot amnhÿ nhÿpêxta pyrãk. E pa mē amã tanhmã mē harênh to ka mē inhma. Kojã kormã mē mjên kêt xwÿnh kêp 10jaja ma hkrãmnhwÿ mjên mã xwÿnh kutã pry hã mra. Amnhÿ kôt kanê jamÿ nê o mra nê kutêp pry nhÿkrep hkrÿ.

²⁻⁴ Nhũm mē kêp 5jaja hkwÿjê rom amnhÿ kukamã hamaxpêr mex nê kanê kaxyw amnhÿ kôt orti hkwÿ ho mō. No nhũm mē kêp 5 nê mē hkÿnhã ãm htÿx kanê pix jamÿ nê o mra.

⁵ Hãmri nê mē mjên mã xwÿnhja kutêp axpên mã kapêr o hkrÿ. Nhũm tokyx htêm kêt nhũm mē kutêp hkrÿ nê gaa nê ra ôtxwa nê gaa nê hikwÿ nê ra ôt pa.

⁶ —Tã nhũm kôt ã kamãt hãmri nhũm mjên mã xwÿnhja hpôx o tẽ. Hãmri nhũm

kot hkukamã harênh xwÿnhja mē ôt o mē hikwÿ xwÿnhjê mã amÿra nê mē kãm: “Kwa mē hãmri. Ota mjên mã xwÿnhja tẽ. Mē tokyx kãnhmã akrÿ pu mē kutã mra.” Anê.

⁷ Hãmri nhũm mē hkrã hapôj nê kanê hpôk.

⁸ Nom nhũm mē hkwÿjê hkÿnhã ò kanê kaxyw orti ho pa hkêt xwÿnhjaja ra mē kêp mē kanêja hkaprÿ hpa nhũm mē tee ri kot hpôk kaxyw. Hãmri nê orti hkwÿ hã hkwÿjê hwÿ nê mē kãm: “Xê mē inhmã orti ho inhõ kanê go.” Anê.

⁹ Nom nhũm mē kêp nê nê mē kãm: “Ma mē inhõ kanê kamã orti grire kênã kot pa kêt mē amã ho go. Xê mē tokyx ma mra nê nhÿri amnhÿm hkwÿ japrô mē.” Anê.

¹⁰ Hãmri nhũm mē tee ri mē kuma nê ma amnhÿm hkwÿ japrô mã ma mra.

—Rôm nhũm mjên mã xwÿnhja mē hãnh tẽ nhũm kanê kamã arÿ mē orti xwÿnhjaja omu nê hã jêt kurê kumrêx. Hãmri nê ma hkôt mōn mē pikuprôn xà hã ixkreja wÿr wa hã hkÿnh nê apkur kaxyw gjêx pa nhũm mē hã kahê. Mē gjêx xà hã oreja ra hwÿr hpôx jakamã nhũm mē hã kahê.

¹¹ —Tã nhũm ma mē kot orti japrô mã mrar xwÿnhjaja hãmri amnhÿ to hapu nê mra nê tee ri mē hã hakwakre kupê nê htatak nê tee ri mē kãm akir nê mē kãm: “Xê mē inhmã kahê xà mē pa mē awÿr agjê.” Anê.

¹² Hãmri nhũm hprô mã xwÿnhja mē kuma nê mē kãm: “Tk. Nà ixte mē apumunhre hã kot pa kêt mē amã kahê xà mē. Kwa mē ma akupÿm mra.” Anê. ã mē ujarênh kot anhÿr. Anê.

¹³ Nhũm pre ã Jejus mē inhmã ujarênh anê. Hãmri nê mē inhmã:

—E kêr ka mē te kot amnhÿ kôt orti hkwÿ ho mōr xwÿnhjaja kot amnhÿ nhÿpêx pyrãk. Mē ate akupÿn ixwrÿk xà hã arÿgro pumunh kêt jakamã kêr ka mē apkati mē ixkamã ajamak rãhã ho apa. Anê.

Mē kãm mē àpênh xwÿnhjê jarênh

Rukre 19.11-27

¹⁴ Nhũm Jejus arÿ mē inhmã kapêr nê mē inhmã:

—E kêr ka mē ixwakre kamã inhmã tanhmã amnhÿ nhÿpêx mex to ho ri apa pa hpãnhã mē amã amnhÿrer mex nê. Mē ate tanhmã inhmã amnhÿ nhÿpêx to ho

apa xà hkôt kot paj mẽ amã amnhĩre. Te mēhõ my kot kãm mẽ àpēnh xwýnhjê nhĩpêx pyræk. Koja nhỹhỹm nojarêt nē kãm mẽ àpēnh xwýnhjê mã hikukrêx piitã hkaga hpa. Ôrkwỹ nē hpur nē hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa.

15 Hãmri nē ahpýnhã mẽ kãm kàxpore hkwy gõ. Mẽ kot kutêp kãm tanhmã ho rũnh to kaxyw ahpýnhã mẽ kãm ôr pa. Kot kàxpore pumunh mex xwýnhja mã nhũm ho 5.000 nē kugõ. Nē kot hkôt kax pê omunh xwýnhja mã nhũm ho 2.000 nē kugõ. Nē kormã kot omunh tỳx kêt xwýnhja mã nhũm ãm ho 1.000 pix nē kugõ. Hãmri nē mẽ kãm amnhĩ jarê nē ma nhỹhỹm mõ.

16 Hãmri nhũm kot ho 5.000 nē hamýnh xwýnhja kàxporeta py nē ma o mõi kurê kumrêx nē tanhmã ho àpēnh to ho mõi kãm ra hipy axte ho 5.000 nē kumẽ.

17 Nhũm kot ho 2.000 nē hamýnh xwýnhja mããnhēn tanhmã ho àpēnh to ho mõi kamã ra hipy axte ho 2.000 nē kumẽ.

18 Nom nhũm kot ho 1.000 pix nē hpyr xwýnhja wa hkĩnh ã axtem nē ma o tẽ nē kãm kakwý nē kamã haxà nē hity hpa nē ma akupým tẽ.

19 —Tã nhũm mẽ õ patrãwja akupýn mõn põi nē mẽ kãm: “E mẽ amnẽ ixwýr mra nē ixte mẽ amã kàxpore ho ixpigrãnh xwýnhja jarê. Tanhmã na ka prem ixkutêp inhmã hipêx to?” Anẽ.

20 Hãmri nhũm kot ho 5.000 nē hpyr xwýnhja kumrêx hwýr tẽ nē kãm: “E ota akàxporeta. Ate inhmã ho 5.000 pix nē ôr tã pa amã ho rax nē amã hipy axte ho 5.000 nē kumẽ nhũm ho axkamur nē ra ho 10.000. Tã ota.” Anhýr o kãm kapêr hãmri nē kãm kugõ

21 nhũm amnhĩm hamý nē omu nē hkĩnh nē. Hãmri nē kãm: “Nã ãm hãmri na ka inhmã ho anẽ. Ixte amã ho 5.000 pix nē ôr tã ka ra inhmã ho rax jakamã kot kaj apê inhmã mẽ àpēnh xwýnhjê hkrãhtũm. E amnẽ ixwýr axà pu mẽ apku nē pahkĩnh.” Anẽ.

22 —Hãmri nhũm hpãnhã kot ho 2.000 nē hpyr xwýnhja hwýr tẽ nē õ patrãwta mã kãm: “E ota akàxporeta. Ate inhmã ho 2.000 pix nē ôr tã pa amã ho rax nē amã hipy axte ho 2.000 nē kumẽ. Tã ota.” Anẽ.

23 Hãmri nhũm kuma nē amnhĩm hamý nē omu nē hkĩnh nē. Hãmri nē kãm: “Nã ãm hãmri na ka ã inhmã ho rax anẽ. Ixte amã ho 2.000 pix nē ôr tã ka inhmã ho rax jakamã kot kaj apê inhmã mẽ àpēnh xwýnhjê hkrãhtũm. E amnẽ ajaxwýja ixwýr axà pu mẽ apku nē pahkĩnh.” Anẽ.

24 —Tã nhũm kot ho 1.000 pix nē hpyr xwýnhja hapu hã wa hkôt tẽ. Hãmri nē õ patrãw mã tanhmã kapêr to nē kãm: “Nã ra ixte apumunh tũm. Pêr axàhkurê pix kãm na ka hte apa. Nē amã akàxpore ho rax nē anhõ ho rax pix kukamã ajamaxpêr o ri apa. Nom mẽ pajaja mẽ ixàpēnh rax pix kukwak ri na ka hte akàxpore rax nē apa.

25 Jakamã na pa inhmã apyma nē. Nē akàxporeta py nē ma o tẽ nē kaxyw kre nē kamã haxà. Tã ka akupýn mõn põi pa ajarēnh ma hãmri nē hkapa nē man akupýn amã o tẽ. Tã ota anhõ 1.000ta.” Anẽ.

26-27 Hãmri nhũm tee ri kuma nē kãm: “Tk. Kwa amã ixpyma nē ate ixpumunh mex anhýr tã na ka ixte amã kàxpore nhõrta pyr nē ma ho atēm. Nē mẽ kot mẽ kêp kàxpore jamýnh o kuhê xà kamã mẽ kãm ôr nhũm mẽ ixkutêp tanhmã inhmã ho rax to hkêt nē? Pêr ãm amã kaga nē ate amnhĩ tomnu pix o ri apa xwýnh.” Anẽ.

28-30 Hãmri nē kêp kàxporeta py nē nhãm jam kugõ nē kãm: “E amý nē o tẽ nē kot inhmã ho 10.000 nē ôr xwýnhja mã agõ. Hãmri nē jahti pynê nē ma o tẽ nē kamãt kõi kamã amẽ. Apēnh mexti hã. Koja tee amýra nē amnhĩ xà htỳx kamã hamak xàj tee ri amnhĩ nham o axpēn kamnhar tỳx kaprý nē rĩ amnhĩ pumu.” Anhýr o kãm kapêr nhũm kuma nē hpa hã kupy nē ma o tẽ. Hãmri nhũm mẽ õ patrãwja mẽ àpēnh xwýnhjê mã kãm: “E mẽ ate ixwakre kamã mẽ axàpēnh mex xwýnhjaja kot paj ã mẽ ato mex rax anẽ ka mẽ akĩnh nē. Nom mẽ kot inhmã mẽ àpēnh mex kêt xwýnhjaja kot paj mẽ kêp mẽõ mẽmojta jamý nē nhãm mẽhõm kugõ nhũm hkaprĩ nē.” Anẽ. ã mẽ ujarēnh kot anhýr. Anẽ.

Jejus kot nhỹrmã mẽ piitã tanhmã mẽ harēnh to hã harēnh

Matêwre 13.35-43, 13.47-50; mããnhēn Apokarip 20.11-15

31 Nhũm Jejus arĩ mẽ inhmã kapêr nē mẽ inhmã:

—Ně kot paj nhÿrmã akupÿn mẽ awÿr wrÿ nhÿm Tÿrtÿm kapêr o mẽ wrÿk xwÿnh piitã man ixkôt wrÿ. Kot paj wrÿ mẽ ixpê pahî maati hã ixkrÿ xà maati kamã inhmex mẽ nhÿ.

³²⁻³³ Hãmri mẽ Tÿrtÿm kapêr o mẽ wrÿk xwÿnhjê mã anê nhÿm mẽ ma krÿ piitã hkôt mẽ apiitã mẽ ato pikuprõnh pa mẽ akupÿn ixwÿr mẽ ato hapêx. Pa mẽ apumu mẽ tanhmã mẽ axunhwÿr to. Te ôwêhti jamâr o pa xwÿnh kot ôwêhti kaêx ã motre pumunh mẽ nhãm nê motre xunhwÿr parta pyrâk.

³⁴ Hãmri mẽ ixupôk rÿm mẽ ate ixkôt amnhÿ xunhwÿr xwÿnhjê mã ixkapêr mẽ mẽ amã: “E mẽ kajaja kot kaj mẽ amex kumrêx mẽ ri apa ho apa. Amnepêm kormã mẽmoj piitã hkêt ri na pa pre Inhÿpêêxã mẽ wa mẽ akukamã tanhmã ijamaxpêr to mẽ mẽ amã mẽmoj mex xunhwÿr rÿnh mẽ.

³⁵ Tã ka prem ajapôj hãmri mẽ ixkôt amnhÿ xunhwÿ mẽ tanhmã ixto mex to ho ri apa.

Na pa pre inhmã prãm mẽ ixpa ka prem ixpumu mẽ ixkamã axukaprÿ mẽ inhmã mẽmoj gô pa kuku.

Ně na pa pre inhmã kôr mẽ ixpa ka prem ja hã ixpumu mẽ inhmã gô pa ho ixkô mẽ akupÿm ixihtÿx.

Ně aa mẽ ate ixpumunh kêt tã ka prem nhÿri ixpumu mẽ amnhÿ nhôrkwÿ hwÿr ixwÿ.

³⁶ Ně na pa pre ixê pynajti mẽ ri ixpa ka prem ja hã ixpumu mẽ inhmã axê gô pa haxà mẽ ri hã ixpa.

Ně na pa pre ixà mẽ inhÿkwÿ ka prem ixwÿr mra mẽ ixkane mẽ tanhmã ixto mex to pa akupÿm inhmex.

Nhÿm prem ijaxà pa mẽ hagjênh xà kamã ixkrÿ ka prem ixwÿr mra mẽ tanhmã ixto mex to.

Ã mẽ ate ixto mex anhÿr o ri apa jakamã nhÿm inhô Papajja ixtã mẽ apumu. Tã koja ixtã mẽ ato mex rax mẽ.” Anê.

³⁷ —Kot paj ã mẽ ate tãm amnhÿ nhÿpêx xwÿnhjê mã ixkapêr anê. Hãmri ka mẽ tee ri inhma mẽ amnhÿ tã ixkukja mẽ inhmã: “Kwa xà mẽ pajaja na pa prem ã ato mex anê? Nà mẽ ixte ã anhÿpêx anhÿr kãm amnhÿ pumunh kêt tã na ka ã mẽ ijarênh anê. Kwa nhÿri na ka pre amã prãm mẽ apa pa prem apumu mẽ amã mẽmoj gô ka aku?

Ně nhÿri na ka pre amã kôr mẽ apa pa prem amã gô hkwy ka ho ixkô?

³⁸ Ně nhÿri na pa prem apumu mẽ amnhÿ nhôrkwÿ hwÿr awÿ? Rÿ ka pre axê pynajti mẽ apa pa prem amã inhÿnôhkã gô ka hagjê?

³⁹ Ně nhÿri na ka pre axà mẽ anhÿkwÿ pa prem apumu mẽ akane? Ně nhÿri na prem ajaxà pa mẽ hagjênh xàja wÿr mra mẽ kamã tanhmã ato mex to? Nà mẽ pa hkêt.” Anhÿr o amnhÿ tã ixkukja.

⁴⁰ Hãmri pa mẽ amã: “Nà mẽ kêp amrakati xwÿnhjaja na pre htem pa pyrâk. Tã ka prem mẽ kamã axukaprÿ hã tanhmã mẽ kutã anojarêt to ho ri apa jao te pa tanhmã ixto mex to ho apa pyrâk. ãm hãmri na ka prem ã mẽ ho mex anhÿr o ri apa.” Anê. Kot paj ã mẽ ate amnhÿ to mex xwÿnhjê mã ixkapêr anê.

⁴¹ —Hãmri mẽ hpãnhã apke rÿm mẽ kot ixkôt amnhÿ xunhwÿr kêt xwÿnhjê mã tanhmã ixkapêr to mẽ mẽ kãm: “No mẽ kajaja kot paj ixupôk rÿm mẽ unhwÿr xwÿnhjê hkÿnhã mẽ ato mex kêt mẽ. Amnepêm na pre Tÿrtÿmja Satanasti mẽ mẽ kot tanhmã kãm amnhÿ nhÿpêx to ho mẽ pa xwÿnhjê mẽ mẽ ho hpimràatã mẽ kaxyw kuwy rax kumrêxja nhÿpêx. Mẽ kot amnhÿ tomnuj tÿx mÿrapê nhÿrmã kamã amnhÿ xà htÿx kamã hamak rãhã mẽ pa ho pa kaxyw. Tã kot kaj mẽ ajaxwÿja ma mẽ hkôt hwÿr ajapêx. Mẽ apê Satanasti hkôt mẽ ate amnhÿ nhÿpêx o apa xwÿnh jakamã kot kaj mẽ uràn ma hwÿr ajapêx pa.

⁴² Aa mẽ ate tanhmã ixto mex to hkêt. Na ka pre htem inhmã prãm mẽ ixpa hã ixpumu nom inhmã mẽmoj nhôr kêt mẽ. Ně inhmã kôr mẽ ixpa hã ixpumu nom inhmã gô hkwy hkêt mẽ.

⁴³ Ně nhÿri ahte ixpa hã ixpumu nom amnhÿ nhôrkwÿ hwÿr ixwÿr kêt mẽ. Ně ixê pynajre mẽ ixpa hã ixpumu nom inhmã axê nhôr kêt mẽ. Ně ixà mẽ inhÿkwÿ hã ixpumu nom ixkane hkêt mẽ. Ně mẽ kot ijaxàr nhÿm arÿ ixkrÿ hã ixpumu nom ixwÿr amrar mẽ tanhmã ixto mex to hkêt mẽ. ã mẽ ate inhÿpêx anhÿr o apa jakamã e mẽ ma kuwy hwÿr apa kurê kumrêx.” Anê. Kot paj ã mẽ kãm ixkapêr anê.

⁴⁴ Hãmri nhÿm mẽ tee ri inhma mẽ amnhÿ tã ixkukja mẽ inhmã: “Kwa nà ã mẽ ijarênh

anhÿr kêt nê. Aa mē ixte ã anhîpêx anhÿÿre hã. Nhÿri na pa prem tanhmã akute hã apumu? Nà aa mē ixte nhÿri ã ate amnhî nhîpêx anhÿr ã apumunhre hã.” Anê.

⁴⁵ —Koja mē ã inhmã amnhî tâ aprâr anhÿr kaprÿ. Kot paj mē kãm: “Nà na ka pre htem mē kêp amrakati xwÿnhjê pumu nê ãm mē omunh o ri apa nê mē kamã axukapri hkêt nê. ã mē hipêx anhÿr jao te pa ã inhîpêx anhÿr pyrãk. Jakamã kwa mē tokyx ma kuwy hwÿr ajapêx kurê kumrêx.” Anê. Kot paj ã kuwy hwÿr mē hanor anê.

⁴⁶ Hãmri nê hwÿr mē rênh pa nhÿm mē ma hwÿr hapêx nê kamã amnhî xà htÿx kãm hamak rãhã nê pa ho pa nê aa kator kêt kumrêx. No kêt mē ate tãm amnhî nhîpêx o mē apa xwÿnhjaja kot kaj mē kurom ma Tirtÿm mē wa inhô krî hwÿr api nê kamã amex nê atir tÿm nê apa ho pa. Kot paj ã ahpÿnhã mē apiitã mē anhîpêx anê. Anê.

Nhÿm pre ã Jejus akupÿn wrÿk ã amnhî kukamã mē inhmã ujarênh anê. Hãmri nê mē inhmã ujarênh pa.

26

Mê kot Jejus ã àmnênh ã amnhî jarênh

Makre 14.1-2; Rukre 22.1-2; Juãw 11.45-

53

¹ Tã nhÿm Jejus mē ixte hkôt ixpa ho ixpa xwÿnhjê mã ujarênh pa nê mē inhmã:

² —E kot puj mē axte pahtã apkati axkrut hãmri nhÿm arîgro pê Pas kato. Jakamã koja mē piitã amnepêm Tirtÿm kot Ejit nhô xwÿnhjê pê mē pakukamã mē panhîgêjtê kator mã hamaxpêr nê hã hkînh kaxyw Jerujarê hwÿr akuprô. Kamã koja mē ixpynê nê pî kahpa hã inhô nê ixpî. Koja mē tokyx ã inhîpêx anê. Anê.

Nhÿm pre ã amnhî kukamã mē inhmã amnhî jarênh anê.

³ Rôm nhÿm Jerujarê kamã patre krãhtÿmjê mē Ijaew pigêjtaja patre maati Kajpasja nhôrkwÿ kamã axpên wÿr akuprô.

⁴⁻⁵ Ra mē kãm Jejus pîr prãm tâ mē kãm mē kot hkôt kapêr mar o pa xwÿnhjê puma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupî? Kot puj mē pahkînh kãm tanhmã ho nhÿm mē hkînh xwÿnhjaja hã

mê pakamã gryk tÿx nê. Pu mē hã axpu nê hã tanhmã axpên to. Jakamã kwa pu mē kormã tanhmã ho hkêt nê.

Anhÿr o axpên ma.

Mêhõ ni kot Jejus krã gregrer ã harênh

Makre 14.3-9; Rukre 7.36-50; Juãw 12.1-8

⁶ Tã nhÿm Jejus kormã krî pê Petãn kamã Simãw nhôrkwÿ kamã apkur o nhÿ. Simãwja na pre hkà kro xapêr tÿx o pa nhÿm Jejus ra arîgro hõ hã akupÿm hkà ho mex. Hãmri nê akupÿm ô krî hwÿr pøj nê ôrkwÿ hwÿr tē nê kuri apkur o nhÿ.

⁷ Hãmri nhÿm mêhõ nija hpôx ã omu nê hamaxpêr o:

—Ma koja pêr Jejusja pa hã apkati grêre hãmri nê ty. An pa ma hwÿr tē nê mêhkuxwa xà ho hkuxwa.

Anê hãmri nê kên jaka ho kàx kãm mêhkuxwa xàja nhÿm kumÿ nê ma hwÿr o tē. Hãmri nê ho hkrã gregrer nê hã hkapîr pa nê ho hkuxwa hpa. Mêhkuxwa xà hã kàxpore xohtô rax tâ nhÿm ã hã hkapîr par anê.

⁸ Hãmri pa mē ixte Jejus kôt ixpa ho ixpa xwÿnhjaja tee ri ã kot hipêx anhÿr ã omu nê axpên mã:

—Tk. Kwa na hã mêhkuxwa xàta kapîr pa.

⁹ Kop apu ma kot o htêm nê ho wênê nê hpãnhã kàxpore ho rax kumrêx nê hamÿnh nê ho mē kêp amrakati xwÿnhjê nhîpêx par o nhÿx ja kãm mex nê. Kwa mo na we ã amnhî nhîpêx anhÿr kêt nê? Anê.

¹⁰ Hãmri nhÿm Jejus amnhî tâ mē inhma nê mē inhmã:

—Kwa kot ixto mex kaxyw kênã na ka mē axtem nê ixtã kãm akir.

¹¹ Mê kêp amrakati xwÿnhjaja koja mē arî mē akôt pa rãhã nê. Ka mē amã mēmo arîgro hã tanhmã mē ho ajuta hto hprãm nê tanhmã mē ho ajuta hto nê mē kãm mēmoj gô. No pa kot paj ri mē akôt ixpa ka mē ixto mex ry ho apa hkêt nê. Kot paj tokyx mē apiitã mē are.

¹² Ixtyk nhÿm mē kot ijaxàr kukamã na ã ixkuxwa anê. ãm hãmri na ã inhîpêx anê.

¹³ ãm hãmri na pa mē amã kot ã inhîpêx anhÿrja jarê. Koja mē krî piitã hkôt axpên mã ijarênh ã kagã kamã ijarênh o pa nê kamã nija kot ã inhîpêx anhÿr kamã harê nê kuma. Anê.

*Jut Kariot kot mē kām Jejus ā àmnēnh
Makre 14.10-11; Rukre 22.3-6*

¹⁴ Tā nhūm Jut Kariotja. Kêp mē ixpê Jejus kôt ixpa ho ixpa xwýnh pê 12 hô htā ra tanhmā hamaxpēr to nē axtem nē Satanasti nhỹ hā ma patre krāhtūmjê hwýr tē nē tanhmā Jejus o mē mar to nē mē kām:

¹⁵ —E ot pa mē amā Jejus jarēnh o tē. Xà kot paj mē amā hā amýnē ka mē hpānhā inhmā amnhĩre nà? Anē.

Hāmri nhūm mē kuma nē hkĩnh nē. Hāmri nē kām:

—Nà kot paj mē amā amnhĩre.

Anē hāmri nē kām kàxpore ho 30 nē òr kurē kumrēx nhūm hamý nē hkĩnh nē kato nē ma tē.

¹⁶ Hāmri nē mē kām Jejus pynēnh kaxyw tãnopxar o ri hkôt ri pa. Mē kot mar o ri pa xwýnhjê hkàx ā unēnh nē ma mē hwýr o htēm kaxyw.

*Jejus kot hkôt mē pa xwýnhjê kutā apkur
Makre 14.12-21; Rukre 22.7-13; Juāw
13.21-30*

¹⁷ Tā nhūm mē hkĩnh pê Pasja kato. Amnepēm kormā Ejit kām mē pa ri na pre mē inhĩgētjaja ôwēhti hkrare hkwy hpa nē ho anē nē kuku. Tĩrtūm kot ja hā mē omunh nē Ejit nhō xwýnhjê nē mē kator kaxyw nhūm prem ā amnhĩ nhĩpêx anē. Tā mē ixpê mē hkanrēhā mē htāmnhwýjaja na pa htem arĩ amgrā mē arĩgro pê Pasja ā axpēn wýr akuprō nē jam ijamaxpēr pê mē uràk nē ôwēhti hkrare hkwy pa nē pāwti kaxkrit kêt kām kuku. Jakamā pa mē ixte Jejus kôt ixpa ho ixpa xwýnhja wa axkrut nē Jejus wýr tē nē amnhĩ tā hkukja nē kām:

—Kwa nhỹri kot paj we wa tē nē mē akutêp Pas ā mē panhō hā apê? Anē.

¹⁸ Hāmri nhūm wa kām:

—Nà wa māmri ma Jerujarēja wýr wa tē. Nē krĩm axà nē mēhō myti pumunh kurē kumrēx nē kām: “E Jejus na wa inhmē pa wa awýr tē. Na awýr hpēr mēnh o: ‘E na pa ra inhnojarêt. Jakamā nhỹri kot paj we ixkôt ri mē pa ho mē pa xwýnhjê mē Pas ā axpēn kutā apku?’ Anhỹr o awýr hpēr mē.” Anē. E wa ā kām akapēr anē kē war ama nē war amā òrkwý nhĩmōk ā ixkre rax ò jahkre. Kamā ra kaxyw mē paxàpkur xà hā mēmoj piitā. Ka wa omu hāmri nē māmri mē ixkutêp kamā mēmoj tā apê. Anē.

¹⁹ Hāmri nhūm wa kuma nē ma Jerujarē hwýr tē. Nē hwýr axà hāmri nē ra kot wa kām mēmoj jarēnh xà hkôt mēmoj piitā omu hāmri nē mē ixkutêp mēō hā àpēnh o wa xa.

²⁰ Tā nhūm kamàt pa mē Jejusja kôt ixkreta wýr ixpôx pa nē hwýr agjê nē ixàpkur kaxyw ixkrĩ. Mē ixte Jejus kôt ixpa ho ixpa xwýnhjê pê 12jaja pa mē ixpiitā Jejus kutā ixàpkur o ixkrĩ.

²¹ Hāmri nhūm Jejus tanhmā mē inhĩo jarēnh to nē mē inhmā:

—E pa mē amā mēmoj jarē ka mē inhma. Kot kaj mē atō mē kām ixkurê xwýnhjê nhĩhkram ijaxà. Anē.

²² Hāmri pa mē tee ri kuma nē ixkaprĩ htýx nē. Hāmri nē axpēn pānhā amnhĩ tā hkukja nē kām:

—Kwa xà pa? Nà pa hkêt. Kot paj ā anhĩpêx anhỹr kêt kumrēx Pahihti.

Anhỹr o axpēn pānhā kām amnhĩ tā aprā.

²³ Hāmri nhūm mē inhmā:

—Nà am hāmri na pa mē amā ixkapēr. Mē ate ixkutā guhkrax kām anhō pāwti ho mry kagô nhek o akrĩ xwýnhjê hô kot kaj mē kām ixtā amýnē.

²⁴ Tĩrtūm kapēr ā kagà htūm ra kot ixkukamā harēnh xà hkôt koja mē tanhmā ixto rax nē ixpĩ. Nom kot mē kām ixtā àmnēnh mā xwýnhta hēxta waa nē. Ā kot amnhĩ nhĩpêx anhỹrja mýrapê koja amnhĩ xà htýx kām hamak rax kumrēx. Kop apu aa ò māmāj nhōxà hkre rūm kator kêt ronhỹx ja kām mex nē. Anē.

²⁵ Hāmri nhūm Jut Kariot kot mē kām hā àmnēnh mā xwýnhta hāmri amnhĩ tā kuma nē kām:

—Kwa xà we pa Jejus? Xà pa kot paj ā anhĩpêx anē? Kwa nà pa hkêt. Anē.

Hāmri nhūm kām:

—Tý. Ka ā ate inhĩpêx anhỹr mā kēnā. Anē.

*Jejus kot amnhĩ kamrô pikapĩr kukamā
harēnh*

*Makre 14.22-26; Rukre 22.14-23; määnēn
Wam Korit 11.23-26*

²⁶ Tā nhūm Jejus pāwti hō py nē Tĩrtūm mā harē nē mē inhmā ho hkry nē ho mē inhĩpêx pa nē mē inhmā:

—E na pa ā mē amā pāwti ho hkry nē mē amā òr anē. Ja pyrà nē koja mē ā inhĩpêx anē nē te ixto hkry hpar pyràk o inhĩpêx pa

amnhĩ xà htỳx kamã ijamak kãm ty. Nom mẽ anê kot paj ty. E mẽ mãmri aku.

Anhỹr o mẽ inhmã amnhĩ jarê pa mẽ kuma nê kot mẽ inhmã ho hkry xwỳnhja ku.

²⁷⁻²⁸ Hãmri nhũm hpãnhã kop py nê mã ho anê nê Tĩrtũm mã harê nê mẽ inhmã kugõ nê mẽ inhmã:

—Mẽ kot ixpĩr xà hã arĩgroja ã koja ixkamrô axkapĩ. Nom koja mẽ amarĩ ixpĩr nhũm amarĩ ixkamrô hpikapĩr kêt nê. Âm paa. Pa kot paj mẽ anê mẽ ãnhĩpêx anê nê ixpĩ. Koja ixkamrô axkapĩ nhũm Tĩrtũm omu nê ixkukwak ri mẽ ate ixkôt amnhĩ xunhwỳr xwỳnhjê nê mẽ ate amnhĩ tomnuj piitã te amnhĩ katut kôt rênh par pyrãk o hipêx nê mẽ ato hkra. Ra amnepêm kot ã amnhĩ jarênh anhỹr xà hkôt. Jakamã e mẽ ixkamrô pikapĩr mã ajamaxpêr pê wĩhti ho akõm o axpên nhĩpêx.

²⁹ ãm hãmri na pa ã mẽ amã amnhĩ jarênh anê. Kot paj axte wĩhti ho ixkõm kêt rãhã nhũm nhỹrmã inhõ Papaj akupỹn mẽ awỳr inhmẽ. Hãmri pu mẽ akupỹn ixwryk xà hã arĩgrota ã pahkĩnh rax kumrêx. No ãm axtem tanhmã hã pahkĩnh to. Anê.

Nhũm pre ã Jejus mẽ inhmã amnhĩ jarênh anê. Pa mẽ axpên pãnhã kopta py nê wĩta kwỳ ho ixkõ.

³⁰ Hãmri nê mẽ ixpiitã ho ixkõm pa nê Tĩrtũm mã mex ã gre. Hãmri nê ijapõj nê hixêt prêk pê Oriwêhti hwỳr ma mra.

Jejus kot Simãw Pêtre mã kapêr ã harênh Makre 14.27-31; Rukre 22.31-34; Juãw 13.36-38

³¹ Tã nhũm Jejus tanhmã mẽ ixte hkôt ixpa ho ixpa xwỳnhjê jarênh to nê mẽ inhmã:

—E Tĩrtũm kapêr ã kagà htũmta kot tanhmã mẽ akukamã mẽ ajarênh to nê mẽ ajarênh kot:

Kot paj ôwêhti jamãr o pa xwỳnhja pĩ hãmri nhũm ôwêhti hpigrãnh pa nê ma anhrã nê ri mra.

Anhỹr o kot mẽ ajarênh. Te ho mẽ apê ôwêhti pyrã nê ã mẽ ajarênh anê. Tã kamãt ja kamã koja mẽ tanhmã inhĩpêx to ka mẽ ixtã mẽ omu nê mẽ umaj ôwêhti pyrã nê apiitã ixkaga hpa nê ma aprõt nê mra.

³² Nê mẽ kot ixpĩr tã kot paj akupỹm ixtĩr. Hãmri nê ma akupỹm mẽ akukamã pika pê Garirej wỳr mõ. Kamã kot puj mẽ axte axpên pumu. Anê.

³³ Hãmri nhũm Simãw Pêtre tee ri tanhmã mẽ kot amnhĩ nhĩpêx to hkukamã amnhĩ jarênhja ma nê hkaprĩ nê kãm:

—Tk. Nà kot paj ã amnhĩ nhĩpêx anhỹr kêt nê Pahihti. Koja pahkwỳja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

³⁴ Hãmri nhũm Jejus kãm:

—Nà ra ixte akukamã ixãhpumunh mex. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tã axaprãr o axkrunêpxi kãm ga. Kwa jam ajamaxpêr tỳx nê. Anê.

³⁵ Hãmri nhũm tee ri kuma nê axte kãm:

—Kwa nà. Mẽ kot ajaxàr nê apĩr tã kot paj arĩ akôt ri ixpa nhũm mẽ pahto amỹrà nê tanhmã panhĩpêx to. Nà kot paj aa akaga hkêt nê.

Anhỹr o kãm amnhĩ jarê. Pa mẽ ijaxwỳja ã kãm amnhĩ jarênh anê.

Jejus kot Tĩrtũm mã amnhĩ jarênh Makre 14.32-42; Rukre 22.39-46

³⁶ Tã nhũm Jejus mẽ inhmã anê pa mẽ ma nhỹri mẽ kot kãm “Gesêm” anhỹr xwỳnhja wỳr mra. Hãmri nhũm mẽ inhmã:

—E mẽ jar ixkutêp akrĩ. Pa ma mũtũm tẽ nê Tĩrtũm mã amnhĩ jarê mãn. Anê.

³⁷ Hãmri nê mẽ ixkwỳjê ho axkrunêpxi nê amnhĩ kôt mẽ kuwỳ. Simãw Pêtre nê Jepetew kra pijakrut pê Xiakre nê Juãwja wa nhũm amnhĩ kôt mẽ kuwỳ nhũm mẽ ma hkôt mra. Hãmri nhũm Jejus tee ri mẽ kot tanhmã hipêx tota kukamã hamaxpêr o hkaprĩ nê amnhĩ kamã kahak tỳx nê.

³⁸ Hãmri nê mẽ kãm:

—Hêxta waa nê. Na pa tee ri amnhĩ xà htỳx kamã ijamakja kukamã ijamaxpêr nê amnhĩ kamã ixkahak tỳx o ra ixkaprĩ nê. Te ixkaprĩ kot ixpĩr o mõi pyrãk. Jakamã e mẽ jar anohtỳx nê ixto Tĩrtũm wỳr o akrĩ kê tanhmã ixto pa mẽ kot tanhmã ixtoja kutã ixihtỳx nê. Anê.

³⁹ Hãmri nê mẽ kurũm htêm grire nê Tĩrtũm mã amnhĩ jarênh kaxyw htũ mỳr pê tẽm nê pikap nõ nê kãm:

—Kwa Papaj. Hêxta waa nê. Inhmã amnhĩ xà htỳx kãm ijamak prãm kêt kumrêx. Na pa tee ri amnhĩ kukamã ijamaxpêr nê amnhĩ kamã ixkahak tỳx nê. Jakamã kot kaj amã inhnê ja ho ajapêx prãm nê mãmri inhnê ho ajapêx nhũm mê kãm ixkurê xwỳnhjaja tanhmã ixto hkêt nê. Rỳ ko. Kot kaj amã mê kot tanhmã ixto hprãm kê mê mãmri tanhmã inhĩpêx to. Nom pam inhmã hprãm xà hkôt kêt. Anê.

⁴⁰ Hãmri nê kànhmã xa nê akupỳm Simãw Pêtreja mê hwỳr tẽ nê tee ri mê omu nhũm mê ra ôt pa nê hikwỳ. Nhũm mê omu nê Simãw Pêtre mã kãm:

—Kwa Simãw Pêtre. E mê hãmri akrã hapôj. Kwa wem anohtỳx grire

⁴¹ nê ixkutêp amnhĩ to Inhõ Papaj wỳr o akrĩ kê mê ixkôt tanhmã mê ato htã ka mê amã mê uma xàj ixkaga hkêt nê arĩ mê kutã amnhĩ to htỳx nê akuhê. ã mê amã mê ate amnhĩ nhĩpêx anhỳr prãm nom kormã mê amã maa.

⁴² Anhỳr o mê kãm kapêr hãmri nê akupỳm tẽ nê axte Tĩrtũm mã amnhĩ jarẽ nê kãm:

—Kwa Papaj. Nà inhmã amnhĩ xà htỳx kãm ijamak prãm kêt. Na pa amnhĩ kukamã ijamaxpêr nê amnhĩ kamã ixkahak tỳx kumrêx. Jakamã kot kaj amã inhnê ja ho ajapêx prãm nê mãmri inhnê ho ajapêx kê mê kãm ixkurê xwỳnhjaja tanhmã ixto hkêt nê. Nom ko. Kot kaj amã mê kot tanhmã ixto hprãm kê mê mãmri tanhmã inhĩpêx to. Nom pam inhmã ja prãm xà hkôt kêt. Anê.

⁴³ Hãmri nê kànhmã xa nê Simãw Pêtreja mê hwỳr akupỳm tẽ. Nê mê omu nhũm kê mê axte gõr nê hikwỳ. Ra mê õtxwa htỳx nê axte gõr nê hikwỳ. Nhũm Jesus tẽ nê tee ri mê omunh o xa

⁴⁴ nom axte tanhmã mê kãm nê hkêt nê. ãm awjanã nê akupỳm tẽ nê kê wam kot Tĩrtũm mã amnhĩ jarênh xà hkôt axte kãm amnhĩ jarẽ.

⁴⁵⁻⁴⁶ Hãmri nê akupỳm mê hwỳr tẽ nê mê kãm:

—Kwa xàn ka mê arĩ gõr nê anhĩkwỳ? E mê tokyx akrã hapôj. Na mê ra mê kot ixwỳr mrar nê ixpynênh mã. Kojã mê tokyx ixkutã mê kot amnhĩ xunhwỳr xwỳnhjaja mê kãm ixtã amỳnê. Ota ra kot ixtã mê kãm

àmnhênh xwỳnhta tẽ. E mê tokyx kànhmã akrĩ pu mê kutã mra. Anê.

Mê kot Jesus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhũm Jesus mê kãm kapêr o ãm rãhã nhũm Jut Kariot pê mê inhĩõja hwỳr tẽ. Nê amnhĩ kôt mê ohtô nê hwỳr mê o tẽ nhũm mê wapohti nê kô jamỳ nê hkôt o mra. Patre krãhtũm mê Ijaew krãhtũmjaja kot Jesus wỳr mê rênh xwỳnhjaja nhũm mê man hkôt Jesus wỳr mra.

⁴⁸ Na pre ra Jut Kariot amnhĩ kukamã mê kãm amnhĩ jarênh o:

—Kot paj ixkumrêx hwỳr tẽ ka mê ixkôt hapu hã mra. Kot paj hwỳr tẽ nê kãm ixkapêr nê kahti hkôt kumỳ. Ka mê hã ixpumu nê hwỳr mra nê unênh kurê kumrêx. Ixte kahti hkôt mỳnh xwỳnhta kot kaj mê unê. Anê.

⁴⁹ Hãmri nê Jesus wỳr tẽ nê kãm:

—Pa Jesus? Xàn ka kormã anhõt kêt nê xa?

Anê nê kahti hkôt kumỳ.

⁵⁰ Hãmri nhũm amnhĩ tã omu nê kãm:

—Kwa Jut. Ate tanhmã ixto kaxyw mã xwỳnh jakamã e kam nê mãmri tanhmã ixto. Anê.

Hãmri nhũm Jut kôt mê mrar xwỳnhjaja Jut kot kahti hkôt mỳnh ã omu nê hwỳr mra nê unênh kurê kumrêx.

⁵¹ Hãmri nhũm mê inhĩõja tee ri ja hã mê omu nê õ wapo kapa nê patre maati mã àpênh xwỳnh kot mê hkôt htêm xwỳnhta mã ho apê. Nê kot ho hkrã nhĩpônã mã tã kuhpaw nê upôk rũm hamak nhĩkjê pix krãhta.

⁵² Hãmri nhũm Jesus omu nê nê kãm kapêr nê kãm:

—Kwa akupỳm awapota hkãm haxà nê amarĩ xa. Na htem wapo ho mê oprê ho pa nhũm mê amnhĩ xwar wapo ho mê kupa.

⁵³ Xà kot paj amnhĩ to Tĩrtũm wỳ nhũm ãm inhma nê tanhmã jajê pê ixpytãr to hkêt nê? Nà kot paj amnhĩ to kuwỳ nhũm ixwỳr kapêr o mê wrỳk xwỳnhjê rênh kurê kumrêx nhũm mê ohtô rax kumrêx nê wrỳ nê mê kêp ixpytã.

⁵⁴ Nom kot paj ã amnhĩ to hwỳr anhỳr kêt nê. Tĩrtũm kapêr ã kagã htũm kot amnepênh ixkukamã ã mê kot inhĩpêx anhỳr ã mê

harênh jakamã kwâr mẽ mãmri Tirtûm kãm hprãm xà hkôt ã inhîpêx anê. Anê.

⁵⁵ Hãmri nê hpãnhã mẽ kot unênh xwýnhjê mã kapêr nê mẽ kãm:

—Kwa na pa pre apkati mẽ Tirtûm mã amnhî jarênh xà hã ixkre kamã mẽ kãm ixujarênh o ixpa. Ka prem tokyx ixpynênh kêt tâ jarãhã te ixte amnhî tomnuj xwýnh pyrãk o inhîpêx nê ixwýr wapohti nê kô hã akapên nê ixwýr tẽ.

⁵⁶ Tã nom ra Tirtûm kapêr ã kagà htùm kamã Tirtûm nhỹ hã mẽ kapêr xwýnh kot mẽ akukamã mẽ ajarênh nê mẽ atã kagà xà hkôt na ka mẽ ri ã inhîpêx anê. Anê.

Nhũm pre ã Jejusja amnhî tâ mẽ kãm kapêr anê. Hãmri pa mẽ ixte hkôt ixpa ho ixpa xwýnhjaja mẽ omu nê tee ri amnhî kukamã ijamaxpêr nê mẽ umaj ixprôt nê anhrã nê ma inhmarr kurê kumrêx.

Mẽ kot patre maati hwýr Jejus o mõi ã harênh

Makre 14.53-65; Rukre 22.54-55, 22.63-71; Juãw 18.12-14, 18.19-24

⁵⁷ Nhũm pre Ijaew krãhtũmjê mẽ Tirtûm kapêr tùm o mẽ ahkre xwýnhjaja ra patre maati Kajpas nhõrkwỹ hwýr akuprõ nê Jejus kutêp hkrî. Hãmri nhũm mẽ kot unênh xwýnhjaja ma mẽ hwýr o tẽ.

⁵⁸ Hãmri nê mẽ hwýr ho axà nê hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nê kítare hwýr axà nê pôristi nhĩkô hã nhỹ. Hãmri nê tee ri Jejus kukamã hamaxpêr o nhỹ nê hamaxpêr o:

—Kwa tanhmã koja mẽ ixpê mẽ inhõ Pahiht nhîpêx to? E pa jar amým tanhmã mẽ kot hipêx to hã mẽ omunh o nhỹ. Anê.

⁵⁹ Hãmri nhũm patre krãhtũmjê mẽ juis-tijaja kãm Jejus pĩr prãm tỳx nê. Jakamã na prem Ijaew wa ho hamêxkrut nê axpên kôt tanhmã mẽ kãm ho hêx to nhũm mẽ kot hã wa mar nê ra hpĩr kaxyw mẽ pikuprõnh xwýnhjê kapi.

⁶⁰ Jakamã nhũm prem axpên pãnhã mẽ hwýr mra nê tanhmã ho hêx to. Nom axpên kôt harênh kêt nê. ãm ahpýnhã tanhmã ri harênh to nom wahõ wa axkrut nê axpên kôt harênh kêt nê. Jakamã nhũm mẽ tee ri hã mẽ kuma.

Tã nhũm ja wa mẽ hwýr tẽ nê axpên kôt harê nê mẽ kãm:

⁶¹ —Nà na pre tanhmã Tirtûm mã amnhî jarênh xà hã ixkre jarênh to nê harênh o: “Kot paj nhỹrmã inhmã ixkreja grãnh par prãm nê kugrà hãmri nê ãm ixtã apkati axkrunêpxi pix nê akupým hipêx pa. Ja kaxyw ixãhpumunh tỳx.” Anhýr o na amnhî jarê pa wa kuma.

⁶² Anhýr o mẽ kãm ho hêx. Hãmri nhũm patre maatija wa kuma nê kãnhmã xa nê Jejus mã kapêr nê kãm:

—Kwa xà ãm hãmri na wa ã ajarênh anê nà? Xàn ka pre ã amnhî jarênh anê? E mẽ inhmã tanhmã amnhî jarênh to. Anê.

⁶³ Nom nhũm amarĩ mẽ kãm xa nê mẽ kãm tanhmã nê hkêt nê. Hãmri nhũm patre maatija tee ri omu nê axte kãm kapêr nê kãm:

—Kwa aprĩ hã mẽ inhmã tanhmã amnhî jarênh to. Tirtûm noo mã amã ixkapêr jakamã kêr ka akatãt kôt mẽ inhmã amnhî jarê nê amnhî to axêx kêt nê. Xà apê Tirtûm Kra? Xà ka na pre Tirtûm mẽ ixkaxyw axãm? Kwa akatãt kôt mẽ inhmã amnhî jarê. Anê.

⁶⁴ Hãmri nhũm tâ hprĩ hã mẽ kãm amnhî jarê nê mẽ kãm:

—Tỳ. Nà ãm hãmri na ka ã ijarênh anê. Ixpê Tirtûm kot mẽ akaxyw ixãm xwýnhta na pa. Na pre mẽ awýr inhmê pa mẽ awýr wrý. Tã kot paj nhỹrmã axte kaxkwa rùm amnê akupýn kakrã kamã mẽ awýr wrý. Hãmri nê Tirtûm xãhpumunh o ãhpumunh xwýnhta nhĩkô hã nhỹ hãmri nê pam tanhmã mẽ ajarênh to ka mẽ amnhî tâ ixpumu nê inhma. Anê.

⁶⁵ Hãmri nhũm patre maatija tee ri ã kot amnhî jarênh anhýr ã kuma nê kamã gryk tỳx nê. Hãmri nê gryk xàj kêp patre maati hã ê kapa nê hkaxõnh pa nê kumê nê hkwýjê mã kãm:

—Tk. Kwa mo kaxyw kot puj mẽ axte ri tanhmã kot amnhî tomnuj to hã harênh xwýnh õ japêr? Tãm kot amnhî pê Tirtûm Kra hã amnhî jarênh ã amnhî to hêx nhũm mẽ pahte mar kênã.

⁶⁶ Jakamã e kwa tanhmã kot puj mẽ hipêx to? Anê.

Hãmri nhũm mẽ kãm:

—Nà ã kot amnhî jarênh anhýr mýrapê koja ty. Ra htyk mã tãm kênã. Anê.

⁶⁷ Hāmri nê tanhmã hipêx kati hto. Mẽ hkwyjaja hkuk kuhtô nê ïhkra ho htaknhũm mẽ hkwyjaja ïhkra hpo ho htak nê hã hpêr o axkê nê kãm;

⁶⁸ —E apê Tirtũm Kra hã ate amnhĩ jarênh jakamã mãn urak nê axàhpumunh tỳx. Jakamã e mẽ kot atak xwỳnhhta nhĩxi jarê pa mẽ ama. Anê.

Simãw Pêtre kot Jejus kôt pa hkêt ã amnhĩ jarênh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rôm nhũm Simãw Pêtre arĩ kítare kamã nhỹ. Hāmri nhũm mẽ kãm àpênh xwỳnh nitita omu nê hprĩ hã omunh kurê kumrêx. Hāmri nê kãm;

—Xê pêr apê Jejus kôt mẽ pa xwỳnhjê hõ na ka. Anê.

⁷⁰ Hāmri nhũm tee ri amnhĩ tã kuma nê kãm mẽ uma xaj mẽ kãm amnhĩ tã aprã nê kãm;

—Tk. Kokỹ. Ixte mēhõ my ata pumunhre hã. Anê.

⁷¹ Hāmri nê mẽ umaj kànhmã xa nê tẽ nê kítare hwỳr hakwakrem ahte mẽ hkàx ã xa. Tã nhũm hpãnhã hõja omu nê hã mẽ kãm;

—Xê ma pêr ãm hāmri na mẽ harê. Kêp Jejus kôt ri mẽ pa xwỳnhjê hõ na pêr. Anê.

⁷² Hāmri nhũm amnhĩ tã kuma nê kãm;

—Tk. Nà mẽ ri ã amnhĩ krã hkôt ri ixto axêx anhỹr kêt nê. Ixte aa mēhõta pumunh kêt kumrêx. Anê.

⁷³ Tã nhũm mẽ hkwyjaja hwỳr mra nê kãm kapêr nhũm tanhmã mẽ kãm kapêr to nhũm mẽ kuma nê kãm;

—Kwa pêr ãm hāmri na mẽ ajarê. Apê Jejus kwỳ na ka. War akapêr kot axpên pyrak kênã. Anê.

⁷⁴ Hāmri nhũm tee ri mẽ kuma mẽ kãm amnhĩ tã aprãr kãm hihtỳx nê mẽ kãm;

—Kwa nã. Na pa Tirtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà urak ãxpê Garirej nhõ xwỳnhre hã. Ixte mēhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwỳnh ã ixkamnhĩx o xa.

Anhỹrja o ra mẽ kãm amnhĩ tã aprãr o axkrunêpxi nhũm krãhyre hkàr kurê kumrêx.

⁷⁵ Hāmri nhũm Simãw Pêtre kuma nê ra Jejus kot hkukamã krãhyre hkàr kêt ri kot hã amnhĩ aprãr o axkrunêpxi hã harênhta

mã hamaxpêr kurê kumrêx. Hāmri nê kànhmã hakry hpar o tẽ nê hkaprĩ htỳx kumrêx nê kítare pê kato nê tẽ nê awry hã xa nê mỳr rax nê.

27

Mẽ kot pahшти Pirat wỳr Jejus o htêm ã mẽ harênh

Makre 15.1; Rukre 23.1-2; Juãw 18.28-32

¹ Tã nhũm ra myt kator o mör mẽ nhũm mẽ hkrãhtũmjê mẽ patre krãhtũmjaja axpên wỳr pikuprõnh pa. Hāmri nê Jejus ã axpên mar o hkrĩ nê axpên mã;

—Nà kot puj mẽ hã amỹnê kê mẽ kupĩ. Kêp Tirtũm Kra hã kot amnhĩ jarênh o amnhĩ to hêx kênã. Anê.

² Hāmri nê mẽõ pòristijê mã anê nhũm mẽ hpa hpre hpa nê ma pahшти Pirat wỳr o tẽ. Pirat kêp Rôm nhõ pahшти nhỹ hã mẽ ãxpê Ijaewjê ho amnhĩptar jakamã nhũm mẽ ma hwỳr o tẽ nê ïhkram haxà.

Jut Kariot kot amnhĩ pĩr ã harênh

Atre 1.15-19

³ Rôm nhũm Jut Kariot tee ri mẽ kot Jejus pĩr kaxyw mẽ harênh ma nê hkaprĩ nê. Ra kot mẽ kãm hã àmnênh tã mẽ kot hpĩr kaxyw ã mẽ harênh ma nê tee ri amnhĩ kukamã hamaxpêr o hkaprĩ htỳx nê. Hāmri nê hamaxpêr o:

—Hêxta waa nê. Mo na pa pre ri axtem nê ã amnhĩ nhĩpêx anê? Nà na pa pre amnhĩ tomnuj tỳx kumrêx. Anê.

Hāmri nê ra mẽ kot kãm kàxpore ho 30 nê òrta jamỳ nê ma akupỹm patre krãhtũmjê mẽ Ijaew pigêtjê hwỳr o tẽ. Hāmri nê mẽ kot Tirtũm mã amnhĩ jarênh xà hã ixkreja wỳr mẽ hwỳr axà

⁴ nê nhỹri mẽ omu nê mẽ hwỳr tẽ nê mẽ kãm;

—E ota mẽ akàxporeta. Na pa ã mẽ amã Jejus ã ixàmnênh anhỹrja o amnhĩ tomnuj tỳx nê. Kot tãm amnhĩ nhĩpêx o pa htã pa axtem nê ã mẽ amã hã ixàmnênh anê. Jakamã e mĩ. Mẽ akupỹm akàxporeta jamỳ. Kot paj amnhĩm hamỳnh kêt nê. Anê.

Hāmri nhũm mẽ tee ri kuma nê kãm;

—Kokỹ. Nom ka na ka pre mẽ ixwỳr tẽ nê ho mẽ inhmar kênã. Anê.

⁵⁻⁷ Hāmri nhũm tee ri mẽ kuma hāmri nê pikap kàxpore rênh pa nê ma tẽ nê kato.

Hămri nê hkaprĩhtỳx kumrêx nê hamaxpêr o:

—Kwa tanhmã kot pa we amnhĩ to? Nà kot paj amnhĩ pĩ. Anê.

Hămri nê krĩ pê kato nê ma mẽ kot pika kakwỳnh nê ho amnhĩm poti nhĩpêx xà hã pika hwỳr tễ hămri nê amnhĩ mut mã ê nê ho amnhĩ pĩ. Hămri nhũm patre krãhtũmjaja harênh ma nê tee ri kot kàxpore rênhta kawrà nê hã axpên kukja nê axpên mã:

—Kwa tanhmã kot puj wem ja ho? Jut kot mẽ pamã Jejus ã àmnênh nhũm mẽ pahte hpĩr xà hã kàxpore na. Jakamã kot puj mẽ ho Tĩrtũm mã amnhĩ jarênh xà hã ixkre ho mex kêt nê. Finat Mojes kot ja nê mẽ panhĩgêjtjê kurê jakamã na htem mẽ hpar xà hã kàxpore ho ixkreta ho mex kêt nê. Jakamã kwa tanhmã kot puj mẽ ho? Anê.

Hămri nhũm ja mẽ kãm:

—E na pa ra ijamaxpêr. Pu mẽ ho Jut kot amnhĩ pĩr xà hã pikata japrô hămri nê kamã jar mẽ kêp mẽ pahkwỳ hkêt htyk xwỳnhjê jagjênh o papa. Anê.

Hămri nhũm mẽ kuma nhũm ja mẽ kãm mex nê. Jakamã nhũm arĩgro hõ hã nhũm mẽ ma hwỳr mra nê haprô.

⁸ Hămri nê hã hixi mẽ nhũm kêp “mê hkamrô pikapĩr xà kamã pika”. Mẽ kot Jejus pĩr xà hã kàxpore ho haprôr jakamã nhũm prem ã hã hixi mênh anê. Nhũm htem arĩ axpên mã ã hixi jarênh anhỳr o pa.

⁹⁻¹⁰ Nhũm pre ra amnepêm Tĩrtũm nhỹ hã kapêr o pa xwỳnh finat Jeremĩsti mẽ hkukamã hprĩ hã ja jarê nê hã kagà. Nê hã kagà o:

Koja Ijaew nhõ patrejaja mễhõ kot mẽ kãm mễhõ my hã àmnênh pãnhã kãm kàxpore ho 30 nê òr xwỳnhja jamỳ. Hămri nê ma o tễ nê nhỹri mẽ kot amnhĩm pika kakwỳnh nê ho poti nhĩpêx o pa xà hã pika hkwy japrô. Ra Tĩrtũm kot inhmã mẽ harênh xà hkôt koja mẽ ã amnhĩ nhĩpêx anê.

ã finat Jeremĩsti kot Tĩrtũm nhỹ hã mẽ hkukamã mẽ harênh nê hã kagà anhỳr xàja kôt nhũm prem ã amnhĩ nhĩpêx anê.

Pahihti Pirat kot Jejus kukjêr ã harênh

Makre 15.2-5; Rukre 23.3-5; Juãw 18.33-

38

¹¹ Rôm nhũm mẽ pahihti Pirat wỳr Jejus o tễ nê hwỳr ho axà nê kutã ãm nhũm xa nhũm Piratja omu nê kãm:

—E. Kwa inhmã amnhĩ jarê. Xà apê Ijaew nhõ pahi na ka nà? Xà ka na htem amnhĩ wỳr ajamãr o pa? Anê.

Hămri nhũm kãm:

—Tỳ. Nà ãm hămri na ka ijarê. Anê.

¹² Hămri nhũm mẽ hkrãhtũmjê mẽ patre krãhtũmjaja pahihti Pirat mã tanhmã ho kapêr punuj to. Nhũm amnhĩ tã mẽ kuma nom tanhmã kãm amnhĩ tã àprãr to hkêt nê.

¹³ Jakamã nhũm pahihti Pirat tee ri ja hã omu nê kãm:

—Kwa xà na ka ã mẽ kot ato kapêr anhỳrja mar kêt nê nà?

¹⁴ Anhỳr tã nom nhũm Jejus akryk xa nê axte tanhmã kãm nê hkêt nê. Hămri nhũm Pirat tee ri kot ã amnhĩ nhĩpêx anhỳr ã omu nê hamaxpêr o:

—Kokỹỹ. Mẽ kot ho kapêr punuj tã nhũm ãm mẽ kuma nê te kãm mẽ uma hkêt pyrà nê tanhmã inhmã amnhĩ tã àprãr to hkêt nê. Anê.

Pirat kot Jejus pĩr kaxyw hã àmnênh ã harênh

Makre 15.6-15; Rukre 23.13-26; Juãw 18.39-19.16

¹⁵⁻²¹ Tã nhũm Pirat kormã mẽ kot axpên mar xà hã ixkre kamã ỳr rãhã nhũm hprõja hwỳr hpêr mẽ nê kãm:

—Xê tanhmã mẽ kãm Jejusja ã axàmnênh to hkêt nê. Na pa kamàt ja kamã hkôt amỹti nê tee ri hkukamã ijamaxpêr. Kot amnhĩ to mex xwỳnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axàmnênh to hkêt nê. Kwarĩ. Anê.

Hămri nhũm Piratja kuma nê hamaxpêr o:

—Nà ixte Ijaew krãhtũmjê pumunh tũm. Ijaew kwỳjaja kãm Jejus kĩnh nhũm mẽ hkrãhtũmjaja kot mẽ hã Jejus kamã gryk nê. Jakamã ixte tanhmã mẽ kãm hã ixàmnênh to kaxyw na mẽ ã ixwỳr o htêm anê. Anê.

Na htem Pas nhõ arĩgrota hapôx mẽ nhũm pre htem Ijaew o amnhĩptàr xwỳnhja mẽ kãm mẽ hagjênh xà kamã hkrĩ xwỳnhjê ho hpỳnh nê mẽ hapôj. Mẽ kãm hprãm xà hkôt nhũm mẽ kãm mẽ hapôj nhũm mẽ akupỹm kapôt ã hamakêtkati nê amnhĩx pa. Jakamã nhũm ra mẽ hagjênh xà kamã

mêhõ my pê Parapasja hkrĩ. Na pre tanhmã amnhĩ tomnuj to nhũm mẽ mýrapê unê nê haxà. Jakamã nhũm Ijaewjaja mẽ ho amnhĩptàr xwýnh Pirat wýr akuprõ nê kuhê nhũm mẽ kãm:

—E kot paj jarãhã mẽ amã mẽ hagiênh xà kamã mẽ hkrĩ xwýnhjê hõ mã inhũre kê àmnhĩx kato nê ri pa. Nhỹ kot paj mẽ amã kãm inhũre? Xà Parapas nà? Xà mẽ akwý kot amnhĩm ho mẽ anhõ pahihti Jejus pê Tĩrtũm kot mẽ akaxyw ãm xwýnhhta kot paj mẽ amã kãm inhũre? Nhỹ wehe? E mẽ inhmã nhỹ jarê. Anê.

Pirat na pre mẽ inhõ patre krãhtũmjê pumunh mex nê. Ijaew kãm Jejus kapêr mar prãm týx ã nhũm mẽ hã kamã gryk týx nê hwýr o mrarja kôt nhũm mẽ omunh mex nê. Jakamã ã hã mẽ hkukjêr anê. Hãmri nhũm mẽhpigêt mẽ patre krãhtũmjaja kuma hãmri nê mẽ pikuprõnh nê mẽ kuhê xwýnhjê mã kãm:

—Kwa mẽ kãm anê kê mẽ pamã Parapas mã mãn ure nê mãmri Jejus Kris pĩ. E kwa mẽ tokyx kãm anê kê Parapas mã ure. Anê.

Hãmri nhũm mẽ mẽ kuma nê pahihti Pirat mã kãm:

—Nà mẽ inhmã Parapas mã mãn anhũre. Anê.

²² Hãmri nhũm tee ri mẽ kuma nê mẽ kãm:

—Kwa no mẽ ate Jejus pê Tĩrtũm kot mẽ akaxyw ãm xwýnh ã harênh xwýnhhta? Tanhmã kot paj hipêx to? Anê.

Hãmri nhũm mẽ kãm:

—Apĩ ri. Tokyx pĩ kahpa hã anhõ kê ty. Anê.

²³ Hãmri nhũm tee ri mẽ kuma nê mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhõ nhũm ty. Anê.

Hãmri nhũm mẽ xatã àmra kamã kãm:

—Kwa pĩ kahpa hã mãn anhõ kê ty. Kwa tokyx ã mẽ inhmã hipêx anê. Anê.

²⁴ Hãmri nhũm tee ri ja nê tanhmã mẽ kãm kapêr to no nhũm mẽ mar kêt nê. Nhũm tee ri mẽ àmra mar o xa. Hãmri nê kãm Jejus pĩr prãm kêt jakamã amnhĩm gõ hkwy janhi nê mẽ piitã mẽ noo mã amnhĩ nhĩhkra kuhõnh o xa. Mẽ kot hã omunh xà hkôt kãm hpĩr prãm kêt ã omunh kaxyw. Hãmri nê mẽ kãm:

—E na pa mẽ anoo mã ã amnhĩ nhĩhkra kuhõnh anê ka mẽ ja hã ixpumu. Nà inhmã hpĩr prãm kêt. Tanhmã kot amnhĩ tomnuj tore hã. Mẽ kaxipixjaja mẽ amã hpĩr hprãm jakamã mẽ kam nê tanhmã ho. No pa kot paj tanhmã ho hkêt nê. ãm kwarĩ ho kwarĩ. Anê.

²⁵ Hãmri nhũm mẽ kuma nê mẽ kãm:

—Tõe. Nà ãm hãmri. Kot paj mẽ pamjaja amnhĩ tã htykja nhõ. Nê mẽ ixkra nê mẽ ixtãmnhwýjê mẽ amnhĩ to ixpimràatã amnhĩ tã kunhõ. Kê Tĩrtũm kãm tanhmã hã mẽ ixtõ hto hprãm nê mãmri tanhmã hã mẽ ixtõ hto. Anê.

²⁶ Hãmri nhũm mẽ kuma nê mẽ mẽ kãm hprãm xà hkôt mẽ kãm Jejus ã amýnê nê mẽ kãm Parapas mã ure. Ra Parapas kot pahi Pirat pê õ pôristi kutã amnhĩ xãm nê kêp hõxpĩrja mýrapê nhũm mẽ kot unênh nê haxàr tã Ijaew kãm hprãm xà hkôt akupým kãm ure. Hãmri nê õ pôristijê mã anê nhũm mẽ Jejus tak. Nê htak rax nê hãmri nhũm Pirat mẽ kãm hã amýnê nhũm mẽ kot pĩ kahpa hã nhõr o hpĩr kaxyw ma o tẽ.

*Pôristi kot Jejus ã hpêr o pikênh ã harênh
Makre 15.16-20; Juãw 19.2-3*

²⁷ Tã nhũm pôristijaja mẽ kot pĩ kahpa hã Jejus nhõr kaxyw ma o tẽ nê pahihti Pirat nhõrkwý kamã ixkre hõ hwýr ho axà. Nhũm pôristi ohtõ nê hwýr akuprõ nê hã pêr o pikênh kaxyw axpên mã:

—E kwa tokyj pu mẽ kãm pahi xê jaxà ri. Kêp pahi hã kot amnhĩ jarênh kênã. Anê.

²⁸ Hãmri nê kêp ê kapa nê hpãnhã kêp pahi hã mẽ ê kamrêk mexja py nê kãm haxà.

²⁹ Nê kãm pahi hã mẽ ahkà nhĩpêx nê hkrãm haxà. Nom axtem akunĩ kamã mẽmo mrõ nhĩ te kot ronh kanêre pyrãk xwýnhja nhũm mẽ hikãx nê hkrãm haxà. Nê kãm pahi hã kô gõ nhũm kupy nê o xa. Hãmri nhũm mẽ ho anhýr pa nê kutã hkõn krã ho rôrõk nê hkrĩ hpa nê hã pêr o pikênh kamã kãm:

—E ãm hãmri. Apê Ijaew nhõ pahi punuti na ka. Anê.

³⁰ Hãmri nê kãnhmã kuhê nê hkuk kuhtõ nê kêp kô pytà nê xatã ho hkrãx pê htak. Nhũm prem ã pêr o pikênh kãm hipêx anê.

31 Hāmri nê kêp pahî hã ê kapa nê akupÿm kãm ê jaxà nê mē kot pī kahpa hã nhôr kaxyw ho kato nê ma o tē.

*Pôristi kot pī kahpa hã Jejus nhôr ã harēnh
Makre 15.22-32; Rukre 23.27-43; Juãw
19.17-25*

32 Nhũm pôristijaja Jejus o kato nê ma kapôt mã o tē. Nê kãm pī kahpa pytĭja gō nhũm kumÿ nê mē hkôt o hkwÿ. Nom ra hirot tÿx nê nhũm mē tee ri ja hã omu nê mēhō kot ho ajuta kaxyw mē kot omunh xwÿnhjê kapi ho xa. Hāmri nê Sirēn nhō xwÿnh Simãw kà htyk pumu nê unê nê kãm kot Jejus o ajuta kaxyw hã karō nhũm hwÿr tē nê kêp pī kahpata mÿ nê hkôt kãm kumÿ nê o tē.

33 Hāmri nhũm mē kēn nhĭxēt te kot mē hkrã hi pyrãk xwÿnh ta wÿr mē o pōj. Mē kapēr kãm na prem hixētja jarēnh o: “Korkot.” No mē pakapēr kãm Korkot jarēnhja kêp “mē hkrã hi xà” nhũm mē ma hwÿr Jejus o pōj.

34 Hāmri nê mē kot pī kahpa hã nhôr kaxyw nhũm à htÿx kumrēx kamã hamak pymaj kãm mēmo mē hkanexàja gō. Wĭhti mē mēmo mry ma xà ho pihkãr nhũm mē kãm hkwÿ gō. Nom nhũm hkaki nê mē kot amnhĭ xà htÿx kamã hamak kêt xà hã omunh kurê kumrēx nê hkaga. Nhũm mē tee ri ja hã omu hāmri nê kêp ê kapa nê kumē nê pī kahpa hã kuxi nê prek o ĩhkra nê hpar o htÿx pa. Hāmri nê kãnhmã pī jarĭ nê ahkre kamã ãm nê ho htÿx nhũm kÿxpê ajêt.

35 Hāmri nhũm pôristi hkwÿjaja axpēn mã ê hkwÿ ho pigrãnh kaxyw hã kēnre ho jōka.

36 Hāmri nê ho anhÿr pa nê pikap Jejus jamãr o hkrĭ.

37 Na htem mē hpar kaxyw nê tanhmã mē kot amnhĭ tomnuj to hã kagà nê mē mÿri pī kahpa hã hanhō. Jakamã na prem tapti hō py nê tanhmã Jejus ã kagà hto nê hã kagà ho:

IJA EW NHŌ PAHI NA JA
HIXI PÊ JEJUS

Hāmri nê hwÿr ho api nê mÿri kunhō. ã Jejus kot amnhĭ jarēnh anhÿrja mÿrapê na prem kupĭ.

38 Hāmri nhũm mē hpãnhã wa àhkĭnh xwÿnh wa ho axkrut nê mããnhēn pī kahpa

hã wa kunhō. Nê akutã ho Jejus nhĭjê nhũm war ajêt.

39 Tã nhũm pry hã mē mrar xwÿnhjaja Jejus pumu nê hã hpēr o pikēnh o mra nê kãm:

40 –Kwa ka na ka pre ate Tĭrtũm mã amnhĭ jarēnh xà hã ixkre grãnh par nê atã apkati axkrunēpxi nê akupÿm hipêx par ã amnhĭ jarē. Nê apê Tĭrtũm Kra hã amnhĭ jarē. Nê axãhpumunh o axãhpumunh jakamã e kwa amnhĭ kapa nê wrÿ pa mē ja hã apumu. Kwa tokyx. Anē.

41 Nê patre krãhtũmjê mē Tĭrtũm kapēr tũm o mē ahkre o mē pa xwÿnh mē mē hkrãhtũmjaja piitã hwÿr mra nê hã hpēr o axkē.

42 Nê axpēn mã harēnh o:

–E jahti na xep pre mē kamã ukapĭrĭ ho pa nê tanhmã mē ho ajuta hto ho pa. Tã nom tãm tanhmã amnhĭ to nê wrÿk kêt nê. Kwa pu mē arĭ pakuhê nê kot amnhĭ kaxàr nê wrÿk kãm omu. Koja wrÿ pu mē omu nê kêp mē panhō pahĭhti hã hkôt pajamaxpēr kurê kumrēx. E tokyx wrÿ Jejus. Pa mē awrÿk kãm apumu. Nà kot kaj awrÿk rax nê.

43 Na hte amnhĭ kaxyw Tĭrtũm mã hamaxpēr o pa. Nê kêp Kra hã amnhĭ jarēnh o pa. Jakamã e. Kê Tĭrtũm tãm hwÿr tē nê kêp Kra hã akupÿm mē pahpê utã. Anē.

44 Hāmri nhũm wa kot akutã hijê nê jêt xwÿnh ta wa haxwÿja mē mar xà hkôt mã ho kapēr anē.

Jejus tyk ã harēnh

*Makre 15.33-41; Rukre 23.44-49; Juãw
19.28-30; mããnhēn Eprêw 10.19-20*

45 Tã nhũm kaxkwa nhĭpôk ri myt ÿr mē nhũm te kamãt pyrãk nhũm kamãt kô rax kumrēx. Jao hã awry mē nhũm ra akupÿm myt katêr o mō.

46 Hāmri nhũm Jejus kapēr kãm hihtÿx nê àmra htÿx kãm Tĭrtũm mã kapēr nê kãm:

–Inhō Tĭrtũm inhō Tĭrtũm. Kwa mon ka ixkaga? Anē.

Nom kapēr kamã kãm kapēr o:

–Eri Eri. Rãmã sapatani. Anē.

47 Hāmri nhũm mē kot mar xwÿnhjaja kot Eri jarēnh ã kuma nê htÿx ho finat Eris mã kapēr ã hkamnhĭx.

48 Nhũm Jejus par pê guhkrax kãm wĩhti punure xa. Jakamã nhũm mẽ ã kapêr anhÿr ã kuma nhũm mēhõ kãm hkaprĩ nē. Hãmri nē mēmo rerek py nē o tē nē kaxyw pĩ rytija py nē ho hkanhwÿ. Nē akupÿn o tē nē ho wĩhti nhek nē Jejus kot hkaôr kaxyw kãm kupē.

49 Hãmri nhũm hkwÿjaja tee ri ja hã omu nē nē kãm kapêr nē kãm:

—Tk. Kwa nhãm xa. Pu mẽ kop Eris jamã mãn. Koja hwÿr tē nē ho wrÿk japêr. Anē.

50 Hãmri nhũm kamãt kô mẽ nhũm Jejus ra htyk kaxyw nē axte àmra htÿx nē hãmri nē ty.

51 Tykja kôt nhũm Tĩrtũm mã amnhĩ jarēnh xà hã ixkre kamã hakwakre hã kupēxêja kýj rùm ahpar mã axkjê nē amnhĩ kahê xà mēnh kurê kumrēx. Utĩ rax tã axkjê nē amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mēnh pyrãk o ã amnhĩ nhĩpêx anē. Nhũm pika htertēt tÿx kumrēx o kēn rũnh kwÿ ohtô nē hkrakrak pa.

52 Hãmri nhũm mẽ htyk ã pika kamã mẽ htykjê nhõrkwȳ ho ohtô nē mẽ hã axkjê nhũm mẽ hikwȳ xwÿnhjaja akupÿm htĩr nē hapôj nē kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mẽ ohtô nē akupÿm htĩr nē hapôj nē kuhê.

53 Nom kormã nhÿhÿm mrar kêt nē. Arĩ mẽ hã pika nhĩpy Jejus akupÿm htĩr ã hamãr o kuhê. Tã nhũm Jejus apkati hõ hã akupÿm htĩr ã arĩgrota ã nhũm mẽ rĩ kormã ma Jerujarē hwÿr mra nē hwÿr agjê nhũm mẽ ohtô nē akupÿm mẽ htĩr ã mẽ omu.

54 Nhũm kormã Jejus htyk o mörta ã nhũm pôristi krãhtũm mẽ pôristi hkwÿjaja hãmri hparpê hamãr o kuhê nē htyk kãm omu. Nē pika htertēt kamã ama nē mēmoj kot tanhmã amnhĩ nhĩpêx toja pumu nē tee ri hamaxpêr nē kãm ma htÿx kumrēx. Hãmri nē axpēn mã:

—Hêxta waa nē. Pêr ãm hãmri na pre htyk xwÿnhta amnhĩ jarē. Kêp Tĩrtũm Kra kēnã. Tã pu mẽ amarĩ pahtÿx kupĩ. Anē.

55-56 Nhũm pre mēnijaja ohtô nē amÿm Jejus tyk kãm omunh o kuhê. Marir Matarēn nē Xiakre mẽ Juje wa katorxà Marir nē

Xiakre hõ mẽ Juãw wa katorxàja nhũm mẽ kormã htyk kãm omunh o kuhê. Na prem Garirej rùm hkôt tanhmã ho ajuta hto ho hkôt Jerujarē wÿr mō.

Mẽ kot Jejus jaxàr ã harēnh

Makre 15.42-47; Rukre 23.50-56; Juãw 19.38-42

57 Tã nhũm ra myt grire nhũm krĩ pê Ari-matej rùm hikãxpore rax xwÿnh pê Jujeja tē. Nom axtem Juje hõ na pre. Ra kot Jejus kôt amnhĩ xãm jakamã kãm ho wrÿk nē haxàr prãm nē.

58 Hãmri nē ma pahi Pirat wÿr tē nē ã hã kuwÿ nē kãm:

—E ot pa awÿr tē. Kwa inhmã htyk xwÿnhta gō pa ma o tē nē haxà nã? Anē.

Hãmri nhũm kuma nē kãm harē nhũm ma o tē nē haxà.

59 Kaxyw kupēxê mex õ py nē ho hkupu pa

60 nē ma o tē nē õ kēn kre kamã haxà. Na pre htyk kukamã kēn kre kakwȳ nhũm mẽ kot kormã kamã mēhõ jaxàr kêt tã kamã na pre Jejus jaxà. Hãmri nē hã kēn rax õ xãm nē ho hitom nē ma akupÿm tē.

61 Nhũm Marir Matarēn mẽ Marir òja wa kēn kreta kapem omunh o wa nhÿ.

Pôristi kot kēn kre jamãr o kuhê ã harēnh

62 Tã nhũm apkati nhũm mẽ inhõ arĩgromnu pê sap kato. Hãmri nhũm Parijew nhõ xwÿnhjê mẽ patre krãhtũmjaja ma pahi Pirat wÿr mra nē kãm:

63 —Kwa pahihiti. Nà amnhĩ to hêx o pa xwÿnhta na pre kormã htĩr nē pa ri tanhmã amnhĩ jarēnh to ho pa. Nē nhÿrmã ty nē htyk ã apkati axkrunēpxi pix nē akupÿm htĩr ã amnhĩ jarē.

64 Jakamã kwa hwÿr anhõ pôristi hkwÿrê kê mẽ ma hwÿr mra nē hamãr mex o apkati axkrunēpxi. Kot ka anhÿr kêt nhũm hkôt mẽ pa ho mẽ pa xwÿnhjaja ma hwÿr mra nē ho ahkĩ nē ma o mra nē nhÿri haxà nē mẽ piitã mẽ kãm ra akupÿm htĩr ã harēnh o hêx o pa. Te tãm kot amnhĩ kukamã amnhĩ jarēnh pyrãk. Nom mẽ kot axte ã harēnh anhÿrja koja omnuj tÿx o tãm kot ã amnhĩ jarēnh anhÿrja jakre. Anē.

65 Hãmri nhũm mẽ kuma nē mẽ kãm:

—Tôe. Nà koja mẽ ho anê. E mẽ ma hwÿr amnhĩ kôt pôristi hkwȳ ho mra kê mẽ hakwakre kahê xà jamâr mex o kuhê. Anê.

⁶⁶ Hãmri nhũm mẽ kuma nê ma hwÿr mra nê hakwakre hã kên raxta o htÿx pa. Nê mẽhõ kot omunh nê kahê mẽnh pymaj menh ê ho hkukõ. Hãmri nê ho anhÿr pa nê pôristi mã kãm:

—E Kêr ka mẽ jar kuri hamâr mex o akuhê. Kê mẽhõ tẽ nê tanhmã ho hkêt nê. Anê.

28

Jejus akupÿm htĩr ã harênh

Makre 16.1-8; Rukre 24.1-12; Juãw 20.1-

10

¹ Tã nhũm apkati nhũm tãmĩk. Hãmri nhũm Marir Matarên mẽ Marir ôja kwÿhtã kãnhmã nhÿ nê ma akupÿm kên kreta wÿr wa tẽ.

² Puh nhũm pika htertet tÿx nê nhũm Tĩrtũm kapêr o mẽ wrÿk xwÿnhja kên kre wÿr wrÿ nê nhãm hakwakre nê kên raxta mẽ nê hã nhÿ.

³ Hirã htÿx kãm nhÿ. Te na jaxênh pyrãk. Nê ê haka htÿx kumrêx.

⁴ Nhũm pôristijaja tee ri omu nê kãm ma htÿx nê htertet nê umaj pikap rôrøk pa nê te htyk pyrã nê hikwÿ.

⁵ Hãmri nhũm wa nita kên kre hwÿr pøj nê tee ri Tĩrtũm kapêr o mẽ wrÿk xwÿnhja pumu. Nhũm wa kãm:

—Kwa wa amã ma hkêt nê. War ate Jejus pumunh kaxyw na ka wa tẽ. Mẽ kot pĩ kahpa hã nhôr xwÿnhja.

⁶ Nom jar amrakati. Na ra akupÿm htĩr nê kato nê ma tẽ. E wa kam nê amnê axã nê nõr xà kaprÿ pumu. Anê.

Hãmri nhũm wa kuma nê tee ri kên kre kamã Jejus japêr nhũm kamã amrakati.

⁷ Hãmri nhũm Tĩrtũm kapêr o wrÿk xwÿnhja wa kãm:

—E wa tokyx ma akupÿm tẽ nê hkôt mẽ pa ho mẽ pa xwÿnhjê mã harê. Koja ma Jejus mẽ akukamã akupÿm Garirej wÿr mō. Garirej kamã kot kaj mẽ axte axpên pumu. Ra kot mẽ amã amnhĩ jarênh xà hkôt. E kwa wa tokyx ma akupÿm mẽ hwÿr tẽ. Anê.

⁸ Hãmri nhũm wa kuma nê ma akupÿm hprôt nê htêm kurê kumrêx. Kãm ma htã hkĩnh nê. Nê ma Jejus kôt mẽ pa ho mẽ pa

xwÿnhjê mã ujarênh kaxyw ma mẽ hwÿr hprôt nê wa tẽ.

⁹ Pu nhũm ra Jejus tãm wa kutã tẽ nê wa hkaxpa. Hãmri nê wa haêr pê wa kãm kapêr nê wa kãm:

—Pa? Nhÿhÿm na ka wa tẽ? Anê.

Hãmri nhũm wa omu nê hkĩnh tÿx kumrêx nê hwÿr hprôt nê hpar pê hkõn krã ho tẽm nê akutã hpar ã kumÿ nê kãm mex o mex ã harê nê kãm:

—Hêxta gàu nê. Ma amex kumrêx. Amex o amex. Anê.

¹⁰ Hãmri nhũm wa kãm:

—E war amã ma hkêt nê. Mamrĩ ma tẽ nê ixkôt mẽ pa ho mẽ pa xwÿnhjê mã ijarê kê mẽ ma Garirej wÿr mra. Kamã kot paj mẽ axte axpên pumu. Anê.

Pôristi kot kãxpore hprãm xaj Jejus o hêx ã harênh

¹¹ Rôm nhũm pôristi hkwȳjaja akupÿm tãm hkrã hãmri nê ma kên kreta rũm akupÿm krĩm mra. Hãmri nê patre krãhtũmjê hwÿr mra nê mẽ kãm ujarênh pa.

¹² Hãmri nhũm mẽ tee ri mẽ kuma nê mẽhpigêtjê ho akuprõ nê mẽ hã axpên mar o hkrĩ. Hãmri nê axpên mar pa nê pôristi mã amnhĩrer rax nê mẽ kãm:

¹³ —E mẽ amnhĩm kãxpore jamÿ nê ma ri ã mẽ kãm amnhĩ jarênh anhÿr o apa. Nom kêr ka mẽ kãm amnhĩ to axêx nê mẽ kãm: “Na pa prem kên kre kapem ixtÿx gôr nê inhĩkwÿ nhũm Jejus kôt mẽ pa ho mẽ pa xwÿnhjaja mra nê mẽ ixpê ï ho ahkĩ nê ma o mra.” Anhÿr o mẽ kãm amnhĩ to axêx o apa. Mẽ ixte kãxpore ho mẽ amã amnhĩrta pãnhã.

¹⁴ Koja pahĩti Piratja mẽ anhõt ã mẽ ajarênh ma nê hã tanhmã mẽ ato kaxyw hã kot paj mẽ axy pê tanhmã kãm ixkapêr to nhũm tanhmã mẽ ato hkêt nê. Jakamã e. Mẽ tee ri amnhĩ kukamã ajamaxpêr kêt nê. Mẽ mãmrĩ ma mra nê ã mẽ kãm axujarênh anhÿr o ri apa. Anê.

¹⁵ Hãmri nhũm mẽ kuma nê mẽ kot amnhĩ to hêxta pãnhã kãxpore jamÿ nê ma mẽ mar xà hkôt mẽ piitã mẽ kãm Jejus kôt mẽ pa xwÿnhjê ho hêx o pa. Tã na htem arĩ jarãhã Ijaewjaja ã axpên mã mẽ harênh anhÿr rãhã ho pa.

Jejus kot hkôt mẽ pa ho mẽ pa xwýnhjê mã mẽ àpênh ã karõ

Makre 16.14-18; Rukre 24.36-49; Juãw 20.19-23; Atre 1.6-8

¹⁶ Tã pa mẽ ixte Jejus kôt ixpa ho ixpa xwýnh pê 11jaja hãmri akupỹm Jejus htír ã harênh ma hãmri nẽ ma Garirej wýr mra. Nhỹri Jejus kot mẽ inhmã mẽmo hixêr prêk jarênhja wýr.

¹⁷ Nẽ ra hwýr ixpôx o mrar mẽ Jejus pumu. Tã nom nhũm mẽ ixkwýjaja tee ri omu nẽ htýx ho nhãm mêmõ hã hkamnhĩx. No kêt mẽ pajaja na pa prem ixprĩ hã omunh kurê kumrêx nẽ ixkĩnh týx nẽ. Nẽ ixkĩnh nẽ hwýr ixprõt nẽ kãm:

—Pa Jejus? Hêxta waa nẽ. Amex o amex. Anẽ.

¹⁸ Hãmri nhũm mẽ inhmã:

—E na pre Tirtũm ã inhmã kapêr anẽ nẽ inhmã: “E kêr ka amnhĩ nhỹ hã mẽmoj piitã tanhmã ho ho apa. Kaxkwa kamã nẽ pika kamã. Mamrĩ nhỹhỹm amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anẽ. Na pre mẽ akaxyw ã inhmã kapêr anẽ.

¹⁹ —Jakamã e. Kêr ka mẽ ma pika piitã hkôt ri mẽ kãm ijarênh o ri apa. Kê mẽ ixte mẽ nẽ tanhmã amnhĩ nhĩpêx to hã ijarênh ma hãmri nẽ ixkôt amnhĩ xunhwý nẽ ixkôt ri amnhĩ nhĩpêx o pa. Nẽ kêr ka mẽ ja hã mẽ omu nẽ Tirtũm mẽ wa inhmã mẽ hkrã kumrã. Wa ixkarõ nhỹ hã mẽ hkrã kumrã. Mẽ kot wa inhỹ hã pix mã tanhmã amnhĩ nhĩpêx to ho pa kaxyw.

²⁰ —Nẽ mẽ kãm anẽ kê mẽ ixkapêr piitã hkôt amnhĩ nhĩpêx rãhã ho pa. E kêr ka mẽ ma mẽ kãm ã ijarênh anhỹr o ri mẽ hkôt apa. Kot paj mẽ anhĩhkô hã ri ixpa rãhã nhũm nhỹrmã pikaja hapêx o hapêx. Anẽ.

Na pre ã Jejus mẽ inhmã mẽ ixàpênh ã karõ anẽ.

Matêwre kot Jejus jarênh nẽ hã kagàja ja kôt na hapêx.

Makre Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwỳjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tĩrtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tĩrtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarêt xwỳnh ã harê nê hã kagà. ã Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkrãmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tĩrtũm Kra na. Tãm na pre mẽ pakaxyw ãm nê mẽ pahwỳr kumê. Tã tãm kot mẽ pahwỳr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwỳr wrỳk xwỳj ri na pre Tĩrtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mõi xwỳnh Juãw Paxisja nhũm pre määnênh hkukamã tanhmã harênh to nê hã kagà. Te Tĩrtũm tãm hamaxpêr pyræk o harê nê harênh o:

E kot paj Ixkra hkukamã ma mẽ hwỳr kot harênh xwỳnhjê hõmê kê ma kutêp mẽ kãm harênh o ri pa. Kê mẽ kuma nê kutêp tãm amnhĩ nhĩpêx mex o pa.

³ Koja kukamã harênh xwỳnhja ma kapôt ã ri hwỳr mẽ mrar xwỳnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Kojã Tĩrtũm tokyx mẽ pahwỳr mẽ panhõ

Pahihti mẽ nhũm wrỳ pu mẽ pah-piitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mêhõ kutêp pry ho mex pyræk o amnhĩ nhĩpêx. Nom pry kumrêx o mex kêt nê. ãm amnhĩ nhĩ ho tãm amnhĩ nhĩpêx nê tãm axpên nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrar mex prãm kaprỳ pyræk. Jakamã kot kaj mẽ Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mẽ kot pry nhĩnur o mex nê ho katat nhũm ra katat mux nê nõi pyræk o amnhĩ nhĩpêx. E kwa kêt ka mẽ ã kutêp amnhĩ nhĩpêx anê.” Anhỳr o koja mẽ kãm harênh o pa. Anê.

Na pre ã Tĩrtũm Juãw Paxis kukamã harênh anê nhũm ÿ hã kapêr xwỳnh pê Ijaisja mẽ pamã hã kagà.

⁴ Tã ra kot harênh xà hkôt nhũm Juãw Paxisja tẽ. Hãmri nê kapôt ã ri mẽ kãm Tĩrtũm kapêr jarênh o pa nê mẽ kãm:

–Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tĩrtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hãmri nhũm mẽ ohtõ nê kot kapêr mar kaxyw ma nhỹhỹnh hwỳr kapôt mã mra. Pyka pê Jutej rũm nê Jutej kamã krĩ pê Jerujarê rũm nhũm mẽ ohtõ nê hwỳr mra. Hãmri nê nhỹri omu nê kãm:

–E ixte amnhĩ tomnuj kaga hprãm xàj na pa awỳr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nê ixkaprĩ nê. Hãmri nê ra inhma amnhĩ tomnuj kaga nê tãm amnhĩ nhĩpêx prãm nê.

Anhỳr ã amnhĩ jarê. Hãmri nhũm Tĩrtũmja kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj piitã rênh pa nê axte kãm hamaxpêr kêt nê. Jakamã nhũm Juãw Paxis gõi kãm mẽ hkrã kumrã. Pyhti pê Jotãw kamã.

⁶ Juãw Paxisja hikàxpore hkêt jakamã na pre ê mex kêt nê pa. ãm mẽmo mry pê

kamer kī ho amnhīm ê nhīpêx nê haghê nê hā pa. Nê mēmo mry hkà ho amnhī pre nê ri pa. Nê mēō mex kur kêt nê âm krit ku nê menh ôr o ri pa.

⁷ Hāmri nê mē kām tanhmā Jejus jarênh to ho pa nê mē kām:

—E mē inhma. Koja tokyx Tīrtūm kot mē pakaxyw âm xwýnhhta mē pahwýr wrý. Ahpumunh týx o kot ijakrenh jakamā na pa hte âm kukwak ri ixpa nê amnhī tā hā xpijaàm rāhā ho ri ixpa. Te ixkràm ā xpijaàm o amnhī nhīpêx pyrāk.

⁸ Na pa hte gô pix o Tīrtūm mā mē akrā kumrār o ri ixpa. Nom mē pahwýr wrýk mā xwýnhja koja mē awýr Tīrtūm Karō rē nhūm mē akaxwýnh mā agjê. Ka mē ý hā tām ri amnhī nhīpêx rāhā ho ri apa. Anê.

Juāw Paxis kot Jejus krā kumrār ā harênh Matêwre 3.13-17; Rukre 3.21-22; Juāw 1.32-34

⁹ Tā nhūm Jejusja tām Juāw Paxis wýr tē. Garirej kamā krī pē Najare rūm ma hwýr tēn pōj. Hāmri nhūm Juāwja hkrā hkumrā. Pyhti pē Jotāw kamā hkrā kumrā.

¹⁰ Hāmri nê wa gôj rūm api nê mýr ri kaxkwa pumunh o xa. Nhūm kaxkwa axkjê nhūm kurūm Tīrtūm Karō te tuuti pyrā nê Jejus wýr wrýk o tē nê ikre hā xa nhūm amnhī tā omunh o xa.

¹¹ Hāmri nhūm Tīrtūm kaxkwa rūm kām kapêr nê kām:

E apê Ixkra mex na ka. Âm hāmri na ka hte ixkanrêhā amnhī nhīpêx mex o apa. Inhmā ajapê kamā na ka ri apa ho apa. Anê.

Jejus kot Satanasti kaga hā harênh Matêwre 4.1-11; Rukre 4.1-13; mǎānēn Eprêw 2.18, 4.15

¹² Tā nhūm Tīrtūm Karōja ma kapôt mā Jejus o mō

¹³ nhūm kapôt ā mry xoprê kaêx ā ri mrar o hā arīgro pē 40. Hāmri nhūm Satanasti omu nê ma hwýr tē nê ri hkôt pa. Kapôt ā ri hkôt hêx rom tanhmā kām kapêr to nhūm kot mar nê hkôt amnhī xām prām xāj ma hkôt pa. Nom nhūm Jejus hkaga kumrêx nhūm tee ri ho anhýr kaprý nê ma akupým tē. Hāmri nhūm Tīrtūm kapêr o mē wrýk xwýnhjaja Jejus wýr wrý nê tanhmā ho mex to.

Jejus kot Tīrtūm mā àpênh krax ā harênh Matêwre 4.12-17; Rukre 4.14-15

¹⁴ Nhūm pre ra mē ixpê Ijaew o amnhīptār xwýnh pē Eroxa Juāw Paxis kot mēmoj tā kām àkjêr mýrapê nhūm pre ra unê nê haxà. Tā kot haxàr jakành pē nhūm Jejus ma akupým pyka pē Garirej wýr mō nê kamā mē kām Tīrtūm kapêr jarênh o pa. Nê Tīrtūm kot mē hwýr mēnh ā amnhī jarênh o pa. Nom te nhām mēhō jarênh pyrāk o amnhī jarē

¹⁵ nê mē kām:

—E na Tīrtūm kām mē ato hkra hprām nê. Jakamā na ra kot mē awýr âm xwýnhhta mē nhūm mē awýr wrý. Kwa mē tokyx kapêrja ma nê amnhī kaxyw hkôt ajamaxpêr. Hāmri nê ate amnhī tomnuj kaga nê Tīrtūm kôt mǎn amnhī nhīpêx o ri apa. Kot kaj mē ā amnhī nhīpêx anê nhūm Tīrtūm amnhī tā mē apumu nê mē ato hkra. Anê.

Jejus kot amnhī kôt tep pynênh xwýnh wa hwýr ā harênh

Matêwre 4.18-22; Rukre 5.1-11

¹⁶ Tā nhūm Jejus ma Garirej kamā gô rax pē Garirej mýri mō. Hāmri nê Simāw mē htō Andreja wa hwýr kato nê wa omu. Wa kot tep pynênh xwýnh jakamā na pre wa gôx kām kryhti rēnh o xa nhūm Jejus wa hánh tē nê wa omu.

¹⁷ Hāmri nê amnhī kôt wa kuwý nê wa kām:

—E war amnê ixkôt tē nê ixkôt mǎn apa. War apê tep kanhêr rax o ri apa xwýnh tā kêt ka war axápênhta kaga nê hpānhā ixkôt apa ho apa. Kot paj tanhmā war akrā hto ka wa tep pynênh pānhā ma ri mē hkôt mē kām ixkapêr jarênh o ri apa. Mē ohtō nê mē kot war amar nê Tīrtūm kôt amnhī xunhwýr kaxyw. Jao kot kaj te war ate tep kanhêr rax nê Tīrtūm mā ôr pyrāk o amnhī nhīpêx.

Anhýr o wa kām kapêr.

¹⁸ Hāmri nhūm wa kuma nê kryhti kaga nê ma hkôt pa ho pa kurê kumrêx.

¹⁹ Hāmri nê mē gô mýri mō nê Jepetew kra Xiakre mē htō Juāw wa hwýr kato nê wa omu. Nhūm wa kormā hipêêxā nhīhkô hā pàr kām kryhti ho mex o wa nhý nhūm Jejus wa mē hwýr kato nê wa omu nê amnhī kôt wa kuwý.

20 Hāmri nhūm wa kuma nē ma hkôt pa ho pa. Pàr kre kamā mẽ kām àpênh xwýnhjê ri hipêêxà re nē ma Jejus kôt pa ho pa.

Jejus kot mēhō nē mẽkarōmnuti janor ã harēnh

Rukre 4.31-37

21 Hāmri nhūm Jejus mẽ hkôt mẽ pa ho mẽ pa xwýnhjaja ma krī pê Kapanau hwýr mō hāmri nē hwýr pōj. Hāmri nhūm mẽ ixpê Ijaewjê nhō arīgromnu pê sap kato nhūm Jejus ma Tirtūm kapêr o mẽ ahkre xà hã ixkre hwýr tē nē hwýr axà. Hāmri nē kamā mẽ kot Tirtūm kapêr mar kaxyw axpēn wýr mẽ pikuprōnh xwýnhjê jahkre ho nhỹ.

22 Nē mẽ ahkre mex nhūm mẽ kuma nē tee ri hamaxpêr nē axpēn mã:

—Hêxta waa nē. Pêr âm hāmri na ã mẽ pamā mẽmoj jarēnh anē. Tirtūm kapêr tūm o mẽ ahkre xwýnhjê rom àhpumunh tỳx kôt na hprī hã mẽ pajahkre mex nē. Anē.

23 Hāmri nhūm mẽhō myja mẽ hwýr axà. Na pre ra mẽkarōmnuti hwýr axà nhūm ý hã amnhĩ tomnuj o pa. Hāmri nē mẽ hwýr axà nē Jejus pumu nē kām kapêr. Nom tām kapêr kêt nē. Mẽkarōmnuti nhỹ hã kām kapêr. Kàx pê kām kapêr nē kām:

24 —Pa Jejus? Kwa tanhmã mẽ ixto hkêt nē. Ixte apumunh mex. Apê Najare nhō xwýnh tã mãânēn apê Tirtūm kot mẽ ixwýr amēnh xwýnh maati na ka. Tirtūm rūm na ka pre mẽ ixwýr wrý. Kwa xà kot kaj mẽ ixto ajapêx nà? Anē.

25 Hāmri nhūm kām:

—Tk. Kwa anhīkrê nē myta kurūm akator kurê kumrêx. Anē.

26 Hāmri nhūm kuma nē àmra htỳx kām myja o àk tỳx nē kêp kato nē ma tē nhūm akupỹm mex.

27 Hāmri nhūm mẽ piitã omu nē kamā no puma nē. Hāmri nē xatã axpēn mã harēnh o pa nē axpēn mã:

—Kokỹỹ. Jejus na pre àhpumunh tỳx kôt mẽkarōmnuti jano nhūm kuma nē mẽ kurūm hapôx kurê kumrêx. Anē.

28 Hāmri nhūm Garirej kamā mẽ piitã ri axpēn mã harēnh o pa.

Jejus kot akupỹm Simāw xupānhgêx o mex ã harēnh

Matêwre 8.14-15; Rukre 4.38-39

29 Tã nhūm Jejus Xiakre mẽ Juāw mẽrohã Tirtūm kapêr o mẽ ahkre xà hã ixkre rūm kato nē ma Simāw mẽ Andre wa òrkwỹ hwýr mō.

30 Hāmri nē mẽ hwýr agjê. Nhūm Simāw xupānhgêxja ra à nē hkà kagro htỳx nē nō nhūm Jejus mẽ hwýr axà nhūm mẽ kām harē.

31 Hāmri nhūm mẽ kuma nē hwýr axà nē omu nē hpa hã kupy nē kànhmã ýr nhūm hkà hakry nē akupỹm mex kurê kumrêx. Hāmri nē kànhmã xa nē tē nē mẽ kām mẽmoj nhĩpêx nhūm mẽ hkur o hkrī.

Jejus kot akupỹm mẽ hkwýjê ho mex ã harēnh

Matêwre 8.16-17; Rukre 4.40-41

32-33 Tã nhūm myt axà nhūm mẽ ohtô nē Simāw mẽ Andre wa òrkwỹ hwýr mra nē hakwakrem Jejus ã akuprô. Nē amnhĩ kôt mẽ à xwýnhjê ho mra. Nē mẽkarōmnuti kot mẽ hwýr gjêx xwýnhjaja nhūm mẽ hwýr mẽ o mra.

34 Hāmri nhūm Jejus mẽ omu nē akupỹm ahpỹnhã mẽ piitã mẽ ho mex pa. Nē mẽkarōmnutija nhūm mẽ kurūm mẽ hapôj. Mẽkarōmnuti kot kêp Tirtūm Kra hã omunh tã no nhūm kapêr nē mẽ hkurê nē mẽ hano nhūm mẽ kapêr kêt rãhã mẽ kurūm hapôj nē ma mra.

Jejus kot Tirtūm mã amnhĩ jarēnh ã harēnh

Rukre 4.42-44

35 Tã nhūm apkati nhūm kormã myt kator kêt ri nhūm Jejus kànhmã nhỹ nē tē nē kato. Hāmri nē ma kapôt ã ahte nhỹhỹm tē nē nhỹri Tirtūm mã amnhĩ jarēnh o nhỹ.

36 Hāmri nhūm Simāw Pêtre mẽ hkwýjaja hkrã hapôj nē tee ri ixkre kamā hapêr. Hāmri nē hapôj nē ma hpri jakop o mō.

37 Hāmri nē hwýr kato nē omu nē kām:

—Pa. Kwa na mẽ piitã tee ri ajapêr. Anē.

38 Hāmri nhūm mẽ kām:

—Tô ma pu mẽ mō. Nom kot puj mẽ akupỹm mẽ hwýr pamôr kêt nē. Kot puj mẽ hpãnhã nhãm krī hkwý hkôt măn ri pajapôj. Pa kamā mẽ kām Tirtūm kapêr jarē măn. Ja kaxyw na pre mẽ awýr inhmê. Krī piitã hkôt mẽ pa xwýnhjaja kot kapêr mar kaxyw. Anē.

39 Hāmri nē mẽ ma axte Garirej kamā krī hkwý hkôt pa. Nē krī piitã hkôt Tirtūm

kapêr o mẽ ahkre xà hã ixkre kamã mẽ kãm Tĩrtũm kapêr jarênh o pa. Nẽ mẽ kurũm mẽkarõmnuti japõx o pa.

Jejus kot akupỹm mẽhõ hkãmnu ho mex ã harênh

Matêwre 8.1-4; Rukre 5.12-16

⁴⁰ Tã nhũm mẽhõ hkà hkro xàpêr tỳx xwỳnhja Jejus wỳr tẽ. Hãmri nẽ hã hpijaàm kaxyw kutã hkõnkrã ho tẽm nẽ nhỹ nẽ kãm:

–Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axàhpumunh tỳx jakamã kot ka akupỹm amã ixto mex prãm nẽ mãmri akupỹm ixto mex. Anẽ.

⁴¹ Hãmri nhũm kuma nẽ kamã ukapri nẽ hã ìhkra xi nẽ kãm:

–Nà kot paj ato mex. E akupỹm akà mex.

⁴² Anhỹrja kõt nhũm akupỹm hkà mex kurê kumrẽx.

⁴³⁻⁴⁴ Hãmri nhũm Jejus kãm kapêr kãm hihtỳx nẽ hano nẽ kãm:

–E kêr ka amnhĩ tã akwỳjê mã tanhmã ijarênh to hkêt rãhã ma patre hwỳr tẽ kẽ akupỹm akà mex ã apumu. Hãmri ka amnepem Mojes kot mẽ ate akupỹm mẽ amex ã Tĩrtũm mã tanhmã amnhĩ nhĩpêx to hã karõ xwỳnhhta ka kãm ho anẽ. Kẽ mẽ piitã akupỹm akà mex ã apumu. Anẽ.

⁴⁵ Hãmri nhũm kuma nẽ ma tẽ. Nom axtem nẽ ma mẽ piitã mẽ kãm amnhĩ jarênh o ri mra. Jejus kot kãm karõ xà kuhpa hã ma mẽ kãm amnhĩ jarênh o ri mra. Jakamã nhũm mẽ kuma nẽ piitã nhỹhỹnh Jejus wỳr mra. Mẽ ohtõ rax kumrẽx nẽ hwỳr mra nhũm tee ri mẽ noo mã nhỹri krĩm pa mã. Hãmri nẽ ãm krĩ pu hã ri pa htã nom nhũm mẽ arĩ ohtõ nẽ hwỳr mra.

2

Jejus kot akupỹm ã kamã htyk xwỳnh o mex ã harênh

Matêwre 9.1-8; Rukre 5.17-26; Juãw 10.37-38

¹ Tã nhũm Jejus hã apkati grêre nẽ hkõt mẽ pa ho mẽ pa xwỳnhjê mẽrohã ma akupỹm Kapanaũ wỳr mõ. Hãmri nẽ hwỳr pøj nhũm mẽ piitã nhỹri mẽhõ nhõrkwỹ kamã hpõx kõt harênh ma nẽ hã akuprõ.

² Ra hã pikuprõnh rax nẽ ixkre nhĩtom pa. Nhũm mẽ hkwỳjaja kapõt ã kuhê nhũm Jejus Tĩrtũm kapêr o mẽ ahkre ho nhỹ.

³ Hãmri nhũm mẽmyjaja kêp kwat nẽ ã kamã htyk xwỳnhja mỳ nẽ Jejus kot ho mex kaxyw hwỳr o tẽ.

⁴ Hãmri nẽ tee ri hã mẽ pikuprõnh rax xwỳnhjê pumu nẽ nhỹhỹnh kot hwỳr o àr kaxyw tee ri amnhĩ kukamã ho ukapi ho pa. Hãmri nẽ hamaxpêr nẽ ixkre nhĩmõk po hwỳr ho api nẽ himõk kwỳ grã nẽ hkõt ã kamã htyk xwỳnhhta nõr xà mẽrohã hkõt Jejus wỳr haxã.

⁵ Hãmri nhũm mẽ kot kaxyw kãm hamaxpêr tỳx ã mẽ omu nẽ ã kamã htyk xwỳnhhta mã kapêr nẽ kãm:

–Pa? Kwa tee ri amnhĩ kukamã ajamaxpêr kêt nẽ. Na pa ra anê ate amnhĩ tomnuj piitã ho ijapêx. Kot paj axte kãm ijamaxpêr kêt nẽ. Anẽ.

⁶ Hãmri nhũm Tĩrtũm kapêr tũm o mẽ ahkre xwỳnhjaja tee ri ã kapêr anhỹrja ã kuma nẽ hamaxpêr o:

⁷ –Tk. Kwa pêr mẽhõ myti mỳj kêp Tĩrtũm kêt tã te kapêr pyrãk o amnhĩ nhĩpêx nẽ mẽ nẽ mẽ kot amnhĩ tomnuj o hapêx ã amnhĩ jarê. Tĩrtũm pix kot mẽ nẽ mẽ kot amnhĩ tomnuj o hapêx kênã. Anẽ.

⁸ Nom nhũm Jejus mẽ hamaxpêr kõt mẽ omunh mex nẽ. Mẽ kot Tĩrtũm pix kot mẽ nẽ mẽ kot amnhĩ tomnuj rênh nẽ akupỹm mẽ à xwỳnhjê ho mex kõt mẽ hamaxpêrja nhũm mẽ omunh mex nẽ mẽ kãm:

–Kwa mẽ ã ajamaxpêr anhỹr kêt nẽ.

⁹ Ixte mẽ nẽ mẽ kot amnhĩ tomnuj o ijapêx par ã amnhĩ jarênh tã mẽ ate mẽ ano ho ja kõt ixpumunh kêt jakamã na ka htem ja hã ixkõt ajamaxpêr kêt nẽ. Nom kot paj mẽ anoo mã akupỹm myja o mex. Ka mẽ ja hã ixpumu hãmri nẽ ixkõt ajamaxpêr kurê kumrẽx.

¹⁰ Ixpê Tĩrtũm kot mẽ awỳr inhmênh xwỳnh na pa. Ixte mẽ anê mẽ ate amnhĩ tomnuj rênh kaxyw na pre mẽ awỳr inhmê pa wrỳ. Tã mẽ ate ja kõt ixpumunh kaxyw kot paj mẽ anoo mã mytija ho mex.

¹¹ Anhỹr o mẽ kãm kapêr hãmri nẽ ã kamã htyk xwỳnhhta mã kapêr nẽ kãm:

–E kãnhmã xa nẽ anõr xà mỳ nẽ ma akupỹm anhõrkwỹ hwỳr tẽ. Anẽ.

¹² Hãmri nhũm kuma nẽ kãnhmã ãm kurê kumrẽx. Hãmri nẽ akupỹm mex ã amnhĩ pumu nẽ hkĩnh tỳx nẽ nõr xà mỳ nẽ mẽ noo mã kato nẽ ma akupỹm õrkwỹ hwỳr

tē. Hāmri nhūm mē kot omunh xwýnhjaja amnhĩ jaêr pê omu nē no hapôx kaxyw nē hkôt omunh o kuhê nē kamā no pyma htýx nē. Nē tee ri omu nē axpên mā:

—Hêxta waa nē. Aa mē pahte ā mēhō kot amnhĩ nhĩpêx anhÿr ā omunh kêt kumrêx tā jarāhā ja pumu. Nà Tĩrtũmja ām mex o mex. Anē.

Jejus kot amnhĩ wÿr Rewi hwÿr ā harēnh Matêwre 9.9-13; Rukre 5.27-32

¹³ Hāmri nhūm Jejus mē ma mra nē akupÿm gô rax pê Garirej wÿr mra nē gô mÿr ri pa. Hāmri nhūm mē piitā omu nē hwÿr mra nē hā akuprō nhūm Tĩrtũm kapêr o mē ahkre ho nhÿ.

¹⁴ Hāmri nē mē kure nē axte hkôt mē pa ho mē pa xwýnhjê mērohā ma axte mra nē nhÿri Apew kra Rewija pumu. Rôm kām mē ô pahihtĩ mā amnhĩ kwÿjê pê kàxpore hkwÿ jamÿnh xwýnh na pre. Jakamā nhūm àpênh o nhÿ nhūm Jejus hānh tē nē omu nē amnhĩ kôt kuwÿ nē kām:

—Pa? E kwa axàpênhta kaga nē hpānhā amnē mē ixkôt mân ri apa ho apa. Anē.

Hāmri nhūm kuma nē àpênh kaga nē ma hkôt mō nē hkôt pa ho pa.

¹⁵ Hāmri nhūm mēmo arĩgro hā nhūm Rewi nhō mē apkur xà hā mēō rax nē. Jakamā nhūm amnhĩ nhōrkwy hwÿr hkrāmnhwÿjaja nē Jejus mē hkôt mē pa ho mē pa xwýnhjê hwÿ. Hāmri nhūm mē ma hkôt mra nē ôrkwy hwÿr agjê nē kuri apkur o hkrĩ. Nē mǎānēn mē kēp Rôm nhō pahi mā mē kēp kàxpore hkwÿ jamÿnh xwýnh kwÿ nē mē ohtō nē mē kutā apkur o hkrĩ.

¹⁶ Hāmri nhūm Tĩrtũm kapêr tũm o mē ahkre xwýnh kwÿ pê Parijew nhō xwýnhjaja mra nē mē apkur ā mē omu. Nē tee ri mē hkaêx ā Jejus pumu nē hkôt mē pa ho mē pa xwýnhjê hwÿr agjê nē hā mē kām akir nē mē kām:

—Kwa na htem mē kot amnhĩ tomnuj xwýnhjê kutā apkur kêt tā ka mē Jejus mē apimràatā axtem nē mē kutā axàpkur o akrĩ. Mē ate amnhĩ to mex ronhÿx ka mē kutā axàpkur kêt nē. Anē.

¹⁷ Hāmri nhūm Jejus amnhĩ tā mē kapêr ma nē mē kām:

—Tk. Ixte tām mē unhwÿr kaxyw ixte mē kutā ixàpkur o inhÿr kēnā. Xà na hte tōtō

mē mex xwýnhjê hwÿr mra nē mē hkane? Nà na hte ām mē à xwýnhjê pix kane ho pa. Ra mē ate ja pumunh mex. Ja pyrā nē na pa pre mē kot amnhĩ to mex xwýnhjê hwÿr ixwÿr kêt nē. Ām mē kot amnhĩ tomnuj xwýnhjê pix wÿr na pa pre wrÿ. Ixte tām mē unhwÿr kaxyw mē hwÿr wrÿ nē jajê kutā ixàpkur o nhÿ. Mē ate amnhĩ tomnuj mā anhÿrer nē hpānhā tām amnhĩ nhĩpêx o apa kaxyw na pa pre mē awÿr wrÿ nē mē akamā ixukaprĩ ho ri mē akôt ixpa. Tā ka mē atÿx ā ixte mē kutā ixàpkur anhÿrja ā ixto akapêr anē. Anē.

Mē kot Tĩrtũm mā amnhĩ jarēnh kaxyw mēō kaga hā mē harēnh

Matêwre 9.14-17; Rukre 5.33-39

¹⁸ Juāw Paxis kôt mē pa xwýnhjê mē Parijew nhō xwýnhjaja na prem tōhā Tĩrtũm mā amnhĩ jarēnh kaxyw nē apkur kêt rāhā kamā kām amnhĩ jarē. Nom nhūm Jejus kôt mē pa ho mē pa xwýnhjaja na prem kām amnhĩ jarēnh prām nē apkur kām amnhĩx kām amnhĩ jarēnh o pa. Jakamā nhūm Ijaew kwÿjaja tee ri ja hā mē omu nē Jejus wÿr mra nē mē hā hkukja nē kām:

—Pa? Kwa aprĩ hā mē inhmā mēmoj jarē. Na hte Parijew nhō xwýnhjê mē Juāw Paxis kôt mē pa xwýnhjaja tōhā Tĩrtũm mā amnhĩ jarēnh kaxyw nē apkur kêt rāhā kām amnhĩ jarē. No akôt mē pa ho mē pa xwýnhjaja na htem àmnhĩx apkur o pa kamā kām amnhĩ jarēnh o pa. Kwa mo na htem mē urāk nē tōhā apkur kêt rāhā kām amnhĩ jarēnh kêt nē? Anē.

¹⁹ Hāmri nhūm Jejus mē kām:

—Tk. Mo kaxyw kot mē ā amnhĩ nhĩpêx anē? Mē hkaprĩ hkêt kēnā. Mē kot ixkôt pa ho pa hā amnhĩ pumunh jakamā na htem hkĩnh nē pa. Kormā ixte mē hkôt ixpa kēnā kot kêt mē Tĩrtũm mā kapêr kaxyw nē ho apkur kêt kamā kām amnhĩ jarē. Xà na htem hkrāmnhwÿ hā hkĩnh kaxyw hā akuprō nē hkaprĩ nē apkur kêt nē mÿr o hkrĩ? Nà na htem hā akuprō nē hkĩnh nē apkur rũnh nē. Ja pyrā nē na hte ixkôt mē pa ho mē pa xwýnhjaja ixkôt kormā àmnhĩx hkĩnh nē apkati mē apkur kām kām amnhĩ jarēnh o pa.

²⁰ Nom koja mē kām ixkurê xwýnhjaja nhÿrmā tanhmā ixto hāmri nhūm mē rĩ

kormã hkaprĩ htỳx kãm ho apkur kêt rãhã Tĩrtũm mã amnhĩ jarẽ. Anẽ.

Nhũm pre ã Jejus mẽ kãm hkõt ri mẽ pa ho mẽ pa xwỳnhjê jarẽnh anẽ hãmri nẽ axte mẽ kãm kapẽr nẽ mẽ kãm:

21-22 —Mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga. Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã na ka htem inhma nẽ ãm inhma. Kwa mẽ inhma nẽ mẽ ate amnhĩ nhĩpêx tũm gryk ã ixkaga hkêt nẽ. Anẽ.

Jejus kêp arĩgromnu hpãm ã kot amnhĩ jarẽnh

Matêwre 12.1-8; Rukre 6.1-5

23 Tã nhũm mẽ ixpê Ijaew nhõ arĩgromnu pẽ sap kato nhũm Jejus mẽ hkõt mẽ pa ho mẽ pa xwỳnhjaja ma nhỹhỹm mỗ. Ma mẽ hpur kahti hkõt nhỹhỹm mỗ nhũm hkõt mẽ pa ho mẽ pa xwỳnhjaja ra kãm prãm nẽ. Hãmri nẽ prãm xaj purta kamã amnhĩm mẽmo hy te kot harõj pyrãk xwỳnhhta kwỳ rê nẽ ma Jejus kõt hkanhar o mỗ. Mẽ ixpê Ijaewjaja na pa htem axpẽn pur kãm ixpa nẽ ã amnhĩ nhĩpêx anẽ.

24 Hãmri nhũm Parijew nhõ xwỳnhjaja mẽ hkõt mra nẽ tee ri ja hã mẽ omu nẽ Jejus wỳr mra nẽ mẽ hã kãm akir nẽ kãm:

—Kwa jarãhã sap tã akõt mẽ pa ho mẽ pa xwỳnhjaja mẽmo hy hkwy rê nẽ akõt hkanhar o pa. Tĩrtũm kapẽr ã kagà htũm kot mẽ panhõ arĩgromnu hã mẽ pahte mẽmoj nhĩkênh nẽ mẽ pahkurê kênã. Kwa mẽ kãm anẽ kê mẽ ã amnhĩ nhĩpêx anhỹr kêt nẽ. Anẽ.

25-26 Hãmri nhũm Jejus mẽ kuma nẽ hprĩ hã mẽ kãm Tĩrtũm kapẽr tũm jarẽ nẽ mẽ kãm:

—Kwa xàn ka mẽ kormã Tĩrtũm kapẽr ã kagà htũm kamã pahi Tawi kot tanhmã amnhĩ nhĩpêx to kamã harẽnh nẽ mar kêt nẽ? Kormã Apiatar kêp patre maati ri na pre Tawi hkõt ri mẽ pa xwỳnhjê mẽ prãm xaj Tĩrtũm mã amnhĩ jarẽnh xà hã ixkre hwỳr agjê. Hãmri nhũm Apiatar mẽ kãm prãm tỳx ã mẽ omu nẽ mẽ kamã ukaprĩ nẽ mẽ kãm mẽmoj gõ. Mẽ kot Tĩrtũm noo mã pãwti jaxwỳr xwỳnhhta nhũm mẽ kãm kugõ nhũm mẽ kuku. Tĩrtũm kapẽr ã kagà

htũm kot ja nẽ mẽ kurê htã nhũm mẽ kãm prãm tỳx ã mẽ omu nẽ mẽ kamã ukaprĩ xaj mẽ kãm kugõ. Patre pix kot ja hkur kaxyw tã nhũm mẽ kãm kugõ nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nẽ. Patre kot mẽ kamã ukaprĩ nẽ mẽ kãm õr nhũm ja hã omu nhũm ja kãm mex nẽ. Anẽ.

Hãmri nẽ mẽ kãm:

27 —Na pre Tĩrtũm panhĩ kumrêx o kato nẽ kormã mẽ hkókõt nẽ Tĩrtũm mã hamaxpêr o hkrĩ kaxyw arĩgromnu ho kato. No na pre arĩgromnu kumrêx o kato nẽ hpãnhã kaxyw panhĩ ho kator kêt nẽ.

28 Tã pa na pre Tĩrtũm mẽ akaxyw ixãm nẽ mẽ awỳr inhmẽ. Jakamã papxpix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Jakamã kwãr mẽ mãmri mẽmojta rê nẽ ixkõt hkanhar o mỗ. Anẽ.

3

Jejus kot akupỹm ãhkra grã xwỳnh o mex ã harẽnh

Matêwre 12.9-14; Rukre 6.6-11

1 Tã nhũm mẽ ixpê Ijaewjê nhõ arĩgromnu pẽ sapja axte kato. Hãmri nhũm Jejus Tĩrtũm kapẽr o mẽ ahkre xà hã ixkreja wỳr tẽ nẽ axà nẽ kamã Tĩrtũm kapẽr o mẽ ahkre ho nhỹ. Nhũm mẽhõ my ãhkra grã xwỳnhja mẽ ãhkõ hã mar o nhỹ.

2 Nhũm Parijew nhõ xwỳnhjaja kãm mẽ hkrãhtũmjê mã Jejus o kapẽr prãm jakamã htãnopxar o kuhê nẽ axpẽn mã:

—E kwa pu mẽ jar pakuhê nẽ kot tanhmã amnhĩ nhĩpêx to hã omu. Xà koja jarãhã ãhkra grã xwỳnh mũj o mex nã? Jarãhã arĩgromnu kênã kot kêt kãm ãhkra ho mex. Koja ho anẽ nẽ ra Tĩrtũm kapẽr tũm nhĩrõp xa. E pu mẽ xa nẽ hã omu. Anẽ.

3 Hãmri nhũm Jejus ãhkra grã xwỳnhhta pumu nẽ kãm:

—Pa? E kãnhmã xa nẽ amnẽ ixwỳr tẽ. Anẽ.

Hãmri nhũm kãnhmã xa nẽ hwỳr tẽ nẽ mẽ piitã mẽ noo mã xa.

4 Hãmri nhũm Jejus mẽ kot omunh o hkrĩ xwỳnhjê hwỳr rĩt nẽ arĩgromnu hã tanhmã mẽ kot amnhĩ nhĩpêx to hã mẽ hkukja nẽ mẽ kãm:

—E mẽ inhma. Tanhmã na htem arĩgromnu hã axpẽn nhĩpêx to wehe? Xà kot ka mẽ arĩgromnu hã axà htỳx nẽ amex prãm xaj ma mẽhõ hwỳr amnhĩ to tẽ nhũm apumu nẽ apkatim arĩgro mex jamãr pẽ akane hkêt ka ty nhũm ja amã mex nẽ? Rỳ nhũm apumu nẽ tanhmã atomnuj to nẽ akupỹm amnhĩ nẽ ajano nhũm ja amã mex nẽ? Nà koja ã anhĩpêx anẽ nhũm ja amã mex kêt nẽ. E mẽ inhmã mẽmoj jarẽ. Tanhmã na pre finat Mojesja Tĩrtũm nhỹ hã arĩgromnu hã mẽ pahte axpẽn nhĩpêx ã mẽ pamã karõ hto? Xà kot puj mẽ hã axpẽn kãm paxukapĩ rỳ hã mẽ pamã axpẽn kurê ho papa? Xà kot puj mẽ hã mẽmoj punuj pẽ mẽ utà rỳ kot puj mẽ ãm arĩgro mex pix ã mẽ utàr kaxyw arĩgro mex jamã? E mẽ atõ inhmã ja jarẽ. Anẽ.

Ra kot hprĩ hã mẽ hamaxpẽr ã mẽ omunh mex nẽ ã hêx rom mẽ hkukjêr anẽ. Nom nhũm mẽhõ tanhmã kutã kãm nẽ hkêt nẽ. Mẽ ãm piitã akryk mar pẽ omunh o hkrĩ. Mẽ kot tanhmã kãm nẽ nhũm ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ.

⁵ Hãmri nhũm Jejus tee ri mẽ ukapĩrĩ hkêt ã mẽ omu nẽ hkapĩrĩ nẽ mẽ kamã gryk nẽ. Hãmri nẽ ãhkra grã xwỳnhja mã kãm:

—Tk. Mẽ kot tanhmã inhmã ujarẽnh tore hã. E anhĩkra katat. Anẽ.

Hãmri nhũm ãhkra katat nẽ akupỹm mex kurê kumrêx.

⁶ Hãmri nhũm Parijew nhõ xwỳnhjaja tee ri ã Jejus kapêr anhỹrja ã kuma nẽ kot sap ã akupỹm myta o mex ã omu nẽ kamã gryk tỳx nẽ. Nẽ hapôj nẽ ma pahi Erox kôt mẽ pa xwỳnhjê hwỳr mra nẽ mẽ kãm harẽ nẽ tanhmã hã axpẽn kukjêr to nẽ axpẽn mã:

—Kwa tanhmã kot puj mẽ ho? Na ã kapêr anhỹrja o mẽ pahto kapêr punuj nẽ. Te hkĩnhã mẽ papamjaja mẽ kamã paxukapĩrĩ hkêt pyrãk ã mẽ pajarẽ. Koja mẽ pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkôt pix mã hamaxpẽr o pa. Ja pymaj kwa tanhmã kot puj mẽ ho? Anẽ.

Mẽ ohtô nẽ kot Jejus kapêr mar kaxyw hwỳr mrrar ã mẽ harẽnh

Matêwre 4.23-25; Rukre 6.17-19

⁷⁻⁸ Tã nhũm Jejus mẽ hkôt mẽ pa ho mẽ pa xwỳnhjê mẽrohã ma akupỹm gô rax wỳr mõ nhũm mẽ ohtô nẽ omu nẽ ma hkôt mra. Pyka pẽ Garirej mẽ Jutej wa kurũm nẽ krĩ pẽ Jerujarẽ rũm nẽ pyka pẽ Itumêj rũm nẽ pyhti pẽ Jotãw nhĩkjê hã krĩ hkwỳ rũm nẽ krĩ hkwỳ pẽ Xir mẽ Sitõ wa pu hã krĩ hkwỳ rũm ohtô nẽ ma hwỳr mra. Na prem ra harẽnh ma nẽ nhỹhỹm mõr ã omu nẽ axpẽn mã harẽnh o:

—E kwa tokyj pu mẽ ma hwỳr mẽ ã xwỳnhjê o mõ kẽ akupỹm mẽ ho mex. Anẽ.

Hãmri nẽ hwỳr mẽ o mra nẽ hã pikuprõnh rax nẽ.

⁹⁻¹⁰ Hãmri nhũm Jejus akupỹm mẽ ã xwỳnhjê ho mex. Gô mỳri xa nẽ tanhmã mẽ ho mex to. Jakamã nhũm mẽ axte ohtô nẽ hwỳr mra nẽ piitã kot htok nẽ akupỹm mex kaxyw hwỳr axpẽn nhĩgã. Hãmri nhũm tee ri amnhĩ wỳr mẽ omu nẽ hkôt mẽ pa ho mẽ pa xwỳnhjê mã:

—Kwa mẽ ma mra nẽ amnẽ kanõre jêt mũj kjênh o tẽ nẽ jar inhmã anhõ. Kẽ mẽ ixtã axpẽn nhĩgãnh o ijanẽnh japêr pa hwỳr axà nẽ amỹm mẽ ho hpỹnh nẽ akupỹm mẽ ho mex. Anẽ.

Hãmri nhũm mẽ kuma nẽ ma mra nẽ kãm ja o tẽ nẽ kunhõ.

¹¹ Na pre mẽkarõmnuti hkwỳja mẽ hkwỳjê hwỳr agjê. Jakamã nhũm mẽ Jejus pumu nẽ mẽkarõmnuti nhỹ hã kêp Tĩrtũm Kra hã omunh kurê kumrêx. Hãmri nẽ hã hpijaãm kaxyw kutã hkõnkrã ho hkrĩ nẽ mẽkarõmnuti nhỹ hã kãm kapêr nẽ kãm:

—Kwa apê Tĩrtũm Kra na ka. Anẽ.

¹² Hãmri nhũm tee ri amnhĩ tã mẽ kuma. Kãm mẽkarõmnuti ã kot harẽnh anhỹr prãm kêt nẽ. ãm mẽ piitã mẽ kot kapêr mar nẽ kot amnhĩ nhĩpêx ã omunh pẽ kêp Tĩrtũm Kra hã omunhja na kãm hprãm. Jakamã nhũm mẽkarõmnuti ã harẽnh anẽ nhũm ja nẽ mẽ kãm kapêr nẽ mẽ kãm:

—Tk kwa nà kêt ka mẽ tanhmã ijarẽnh to hkêt nẽ. Anẽ.

Jejus kot amnhĩ kaxyw mẽ kêp 12 rênh ã harẽnh

Matêwre 10.1-4; Rukre 6.12-16

¹³ Tã nhũm Jejus hkôt mẽ pa ho mẽ pa xwỳnh kwỳjê mã kãm:

—E pu mẽ ma mõ nẽ krãhakỳx mũj ã api. Anẽ.

Hāmri nē mẽ ma hwỳr mō nē hã api

¹⁴ nhũm Jejus amnhĩ kaxyw mẽ ho 12 nē mẽ kurê. Mẽ kot ma ỹ hã Tĩrtũm kapêr o mẽ ahkre

¹⁵ nē ỹ hã mẽ nê mẽkarõmnuti janor o pa kaxyw.

¹⁶ ã mẽ hixi kot anhỹr.

Na pre ja kêp Simãw no nhũm Jejus hpãnhã hã hixi hõ mẽ nhũm hpãnhã mããnên kêp Pêtre.

¹⁷ Nẽ hkõt Jepetew kra Xiakre mẽ htõ Juãwja wa kuta.

Hāmri nē kot Simãw nhĩpêx pyrã nē wa hã hixi hõ mẽ nhũm wa hpãnhã mããnên kêp Poanes. Wa kot amnhĩ prêprêk jakamã nhũm ã wa hã hixi mẽnh anẽ.

¹⁸ Nẽ hõ pê Andreja ta.

Nẽ hkõt Andre htõ Firiptija ta.

Nẽ hkõt Patoromewja ta.

Nẽ hkõt Matêwreja ta.

Nẽ hkõt Tomasja ta.

Nẽ hkõt Arpêw kra Xiakreja ta.

Nẽ hkõt Tatewja ta.

Nẽ hkõt Simãw õja ta.

Simãwja na pre kãm mẽ ixpê Ijaewjê nhõ pika pê Ijaew kĩnh tỳx nẽ. Jakamã na pre kãm nhãm pika hõ nhõ pahi kot mẽ ho amnhĩptâr prãm kêt nẽ pa.

¹⁹ Nẽ hkõt Jut Kariotja ta.

Kormã kot mẽ kãm Jejus kurê xwỳnhjê nhĩhkram õr mã nhũm Jejus kot amnhĩ kukamã omunh mex tã mẽ hkõt amnhĩ kaxyw kuta.

Ã mẽ kot ỹ hã mẽ ahkre o pa kaxyw mẽ rênh xwỳnhjê nhĩxi kot anhỹr.

Jejus mẽ mẽkarõmnuti wa harênh

Matêwre 12.22-32; Rukre 11.14-23, 12.10; Juãw 10.19-21

²⁰ Hāmri nhũm Jejus hkõt mẽ pa ho mẽ pa xwỳnh kwỳjê rênh pa nẽ ma amnhĩ kõt mẽhõ nhõrkwỹ hwỳr mẽ o mō. Na prem apkur kêt ry rax nẽ ra kãm prãm tỳx nẽ nhũm ma mẽ apkur kaxyw amnhĩ kõt mẽ o mō. Hāmri nhũm axte mẽ à xwỳnhjaja mẽ omu nẽ Jejus wỳr pikuprõnh rax nhũm mẽ tokyx apkur kêt nẽ.

²¹ Hāmri nhũm Jejus katorxã nẽ htõjaja tee ri mẽ apkur kêt ã mẽ harênh ma nẽ axpên mã:

—Kwa mãn ãm ra tanhmã hkrã amnhĩ to nã? Hã na mẽ kot omunh kaxyw hã hpikuprõnh rax jakamã nhũm kormã apkur kêt nẽ. E tokyx pu mẽ ma hwỳr mra nẽ omu nẽ mẽ kêp utã nẽ akupỹn amnhĩ kõt o mō. Anẽ.

²² Rôm nhũm Tĩrtũm kapêr tũm o mẽ ahkre xwỳnhjaja Jerujarẽ rũm Jejus wỳr mõn pøj. Hāmri nẽ tanhmã ho kapêr punuj to. Kêp mẽkarõmnuti hkwỳ hã hkamnhĩx jakamã harênh o:

—Tk pêr hinhu nhĩkõoti nhỹ hã na hte mẽ nê amnhĩ kwỳjê japõx o pa. Anẽ.

Hinhu nhĩkõoti nhĩxi hõ pê Satanasti nhũm prem ỹ hã Jejus kot amnhĩ nhĩpêx o pa hã hkamnhĩx.

²³ Hāmri nhũm amnhĩ tã mẽ omu nẽ amnhĩ wỳr mẽ kãm hpa ho apê nẽ mẽ kãm amnhĩ jarẽ. Nom amnhĩ tã kuxi nẽ mẽ kãm mẽmoj jarẽ nẽ mẽ kãm:

—Kwa mẽ inhma mẽ ate ixpê Satanasti hkwỳ hã ixkamnhĩx xwỳnhjaja. Xã na hte Satanasti mẽ nê amnhĩ kwỳjê janor o pa? Nã na hte ã amnhĩ nhĩpêx anhỹr kêt nẽ.

²⁴ Na hte pika nhõ xwỳnhjaja axpên kutã amnhĩ xunhwỳ nẽ axpu hãmri nẽ angrã nẽ ma ahpỹnhã ri pa nẽ amnhĩ krã hkõt ri tanhmã amnhĩ to ho ri pa. Jakamã nhũm mẽ õ pahija mẽ hamãr o pa hkêt nẽ.

²⁵ Nẽ krĩ nhõ xwỳnhjaja haxwỳja. Mẽ kot axpên to hkwỳ xwỳnhjaja koja mẽmoj tã axpên kãm gryk nẽ axpên kutã amnhĩ xunhwỳ hãmri nẽ angrã nẽ ahpỹnhã pa hãmri nhũm mẽ õ pahi tee ri kãm mẽ hamãr o pa hprãm. Mo hkwỳjaja kot kêt ri mẽ hamãr o pa? Nom tãm kot amnhĩ nê mẽ hanoore hã. Mẽ tãmjaja na prem axpên kãm gryk nẽ angrã nẽ ahpỹnhã pa.

²⁶ Tã ja pyrã nẽ ixte Satanasti nhỹ hã tanhmã amnhĩ nhĩpêx to ho ixpa ronhỹx pa ri mẽ kurũm amnhĩ kwỳjê japõx o ri ixpa hkêt nẽ. Mẽkarõmnutijaja kêp Satanasti hkwỳ kênã. Koja Satanasti ixte mẽ kurũm mẽ hapõx kaxyw tanhmã inhã nẽ hkêt nẽ.

²⁷ àhpumunh tỳx jakamã na hte mẽ kot hkõt amnhĩ xunhwỳr xwỳnhjê pumunh tỳx o pa nhũm mẽhõ tee ri kêp mẽ utãr kaxyw.

Tã ixàhpumunh tỳx o ixte hakrenh jakamã ixte kêp mẽ utàrja inhmã tanhmã kute hkêt. Na pa hte kêp mẽ utà nhũm mẽ hpãnhã ixkôt amnhĩ nhĩpêx o pa nhũm Satanasti tee ri mẽ hã ixpumunh o pa kaprỳ.

28 — ãm hãmri na pa mẽ amã ixkapêr. Kot kaj mẽ tanhmã amnhĩ tomnuj to ho apa. Nê amnhĩ tomnuj tỳx kumrêx rãhã ho apa. Rỳ tanhmã akapêr punuj to ho apa. Rỳ tanhmã Tirtũm o akapêr punuj to ho apa. Tã tee ri ja hã amnhĩ pumu nê akaprĩ nê ã ate amnhĩ nhĩpêx anhỹrja kaga nê Tirtũm kôt amnhĩ xunhwỳ. Hãmri nhũm amnhĩ tã mẽ apumu nê amnhĩ katut kôt mẽ ate amnhĩ tomnuj nê mẽ akapêr punuj rênh pa nê axte kãm hamaxpêr kêt nê. Koja ho hapêx par kumrêx.

29 Nom koja Tirtũm Karõ xatã mẽ amã ixto amnhĩrĩt tã ka mẽ ama nê ãm ama nê te kêp amnhĩ jamak pro pyrãk o amnhĩ nhĩpêx. Jao Tirtũm Karõ hã apijaãm kêt ã amnhĩ to amnhĩrĩt. Ja mỳrapê koja Tirtũm nhỹrmã amnhĩ xwar te mẽ apê amnhĩ jamak pro pyrãk o mẽ anhĩpêx ka mẽ tee ri kãm amnhĩ kaprĩ kaprỳ. Hãmri nê mẽ kot amnhĩ xà htỳx kamã hamak o pa htũm xà wỳr ma apa nê kamã apa rãhã apa ho apa. Anê.

30 Mẽ kot Satanasti nhỹ hã mẽ nê mẽkarõmnuti janor o pa hã hkamnhĩx jakamã nhũm pre Jesus ã mẽ kãm kapêr anê.

Jesus katorxà mẽ htõjê jarênh
Matêwre 12.46-50; Rukre 8.19-21;
mããnê Eprêw 2.11-12

31 Rôm nhũm Jesus katorxà mẽ htõjaja hwỳr mra no ãm kormã hwỳr gjêx kêt nê. Mẽ kot hã htu rax jakamã nhũm mẽ tee ri hwỳr gjêx kaxyw kormã kapôt ã kuhê. Hãmri nê mẽ kot mar o kuhê xwỳnhjê hõ mã kapêr nê kãm:

—Kwa ma tẽn Jesus mã mẽ ijarê kê mẽ ixwỳr kato. Anê.

32 Rôm nhũm ixkre kamã mẽ hkrĩ xwỳnhjaja mẽ omu nê Jesus mã mẽ harê nê kãm:

—Kwa Pahihti. Ota akatorxà mẽ atõjaja awỳr mra nê pøj nê tee ri awỳr gjêx mã nê kormã kapôt ã kuhê nê atã karõ. Anê.

33-35 Hãmri nhũm mẽ kuma nê mẽ kãm:

—Tõe pa ixkato nê mẽ omu. Inhmã mẽ hapêê. Nom kot kaj mẽ atõ Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixto rỳ ixkatorxà kot amnhĩ nhĩpêx pyrãk o pu mẽ axpên nhĩpêx. Pa te inhmã mẽ hapê pyrã nê inhmã mẽ ajapê nê. Anê.

4

Mêmo hy hkre xwỳnh jarênh
Matêwre 13.1-9; Rukre 8.4-8

1 Tã nhũm Jesus axte gô jakax ã mẽ ahkre ho nhỹ. Hãmri nhũm mẽ axte hã htu rax jakamã nhũm tee ri mẽ omu hãmri nê pàr krem axà nê gôx kãm amỳm mẽ ahkre ho nhỹ. Nhũm mẽ piitã kỳxpê omunh nê mar mex o kuhê.

2 Hãmri nhũm mẽ ahkre ho nhỹ. Nom mẽ ujarênh pix kãm mẽ ahkre. Mẽ kot Tirtũm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm hã ujarênh o nhỹ nê mẽ kãm:

3 —E mẽ inhma. Koja mẽhõ ma pur mã mõ nê pur kãm mẽmo hy ho ukapêr o pa nom nhũm hy piitã amex kãm rôrôk kêt nê. Koja ahpỳnhã rôrôk.

4 Koja hkwỳ aptỳx kãm rôrôk nhũm kuwênhre omu nê hwỳr mra nê hkrêr pa.

5-6 Nê koja kên kãm hkwỳ rôrôk hãmri nê higrôt kutã nojarêt nê higrôt pa. Nom nhũm kamã aptỳx nê kamã kêp pika hkryre jakamã nhũm higrôt nhũm hã myt apha nê arĩgro htỳx mẽ nhũm grã pa. Harê hkryre jakamã grã pa.

7 Nê koja hkwỳ mrõnhĩ kamã rôrôk nê higrôt tã no nhũm utĩja kêp amỳtã nhũm ô hkêt nê.

8 —No koja hirã kamã pika mex kãm hkwỳ rôrôk. Hãmri nê hirã kamã rôrôk jakamã higrôt mex nê piitã ô rax nê. Kamã ô hkwỳ kêp 30 nê kamã hkwỳ kêp 60 nê kamã hkwỳ kêp 100. ã mẽ ujarênh kot anhỹr.

9 Kwa mẽ ama nê kãm ajamaxpêr tỳx rãhã ho ri apa. Anê.

Jesus kot hprĩ hã mẽmo hy jarênh
Matêwre 13.10-23; Rukre 8.9-15

10 Hãmri nhũm mẽ Jesus xujarênh mar pa nê anhrã nê ma akupỳm mra nhũm hkôt mẽ pa ho pa xwỳnh pê 12 mẽ hkwỳjaja pix

Jejus ri arĩk. Hãmri nẽ ujarẽnh̃ta ã hkukja nẽ kãm:

—Kwa mon ka hte ã mẽ kãm axujarẽnh̃ anẽ Pahĩti? Na pa mẽ ixprĩ hã amar mex kêt nẽ. Anẽ.

11-12 Hãmri nhũm mẽ kãm:

—Nà kot paj ixprĩ hã mẽ amã harẽ. Tĩrtũm kãm mẽ ate aprĩ hã mar prãm jakamã kot paj ixprĩ hã tanhmã mẽ amã harẽnh̃ to. Nà mẽ kot amnhĩ tomnu kaga nhũm Tĩrtũm kot ja hã mẽ omunh̃ xà hkõt mẽ ho hkra hã harẽnh̃ja na pa hte mẽ kãm harẽ. No mũjjaja mẽ akĩnh̃hã mẽ kãm mar prãm kêt jakamã na pa hte mẽ kãm mẽmoj tã haxwỳ nẽ awjarẽ nhũm mẽ ãm ixujarẽnh̃ pix ma.

Na htem kuma nẽ ãm kuma nẽ htỳx ri hã pa. No kęp apu mẽ kãm hprĩ hã mar prãm ronhỳx mẽ ra hprĩ hã kuma nẽ Tĩrtũm kõt amnhĩ xunhwỳ nhũm amnhĩ tã mẽ omu nẽ mẽ kot amnhĩ tomnuj o hapêx. Nom mẽ kãm mar prãm kêt. Anẽ.

13 Tã mẽ ate aprĩ hã ixujarẽnh̃ja mar mex kêt jakamã tanhmã kot kaj mẽ amnhĩ to nẽ ixujarẽnh̃ piitã ama? E kot paj ixprĩ hã mẽ amã mẽmo hyta jarẽ ka mẽ inh̃ma.

14 —Nà mẽmo hyta te kęp Tĩrtũm kapêr pyrãk. Nẽ ahpỳnhã rôrôk xà hã pikata te kęp ahpỳnhã mẽ kot Tĩrtũm kapêr mar xwỳnhjê kot mar nẽ ahpỳnhã tanhmã amnhĩ nhĩpêx to pyrãk.

15 Jakamã mẽ kot mar xwỳnh̃ kwỳjaja hte kot aptỳx kãm hkwỳ rôrôk nhũm kuwênh̃ kot hwỳr mrar nẽ hkrêr par xwỳnh̃ta pyrãk. Jakamã na htem Tĩrtũm kapêr ma nom nhũm Satanasti te kuwênh̃ kot hy hkrêr parta pyrãk o mẽ hipêx. Nẽ mẽ kot amnhĩ kaxyw hkõt hamaxpêr nẽ hkõt amnhĩ xunhwỳr pymaj tanhmã nẽ mẽ hkrã hto. Jakamã nhũm mẽ Tĩrtũm kapêr ma nom ho hamakêtkati tokyx anẽ nẽ axte kãm hamaxpêr kêt nẽ.

16 —Nẽ mẽ kot mar xwỳnh̃ kwỳjaja te kot kênre kamã hkwỳ rôrôk nẽ higrôt nhũm te hã myt apha nhũm grã par tokyx anh̃r xwỳnh̃ta pyrãk. Na htem Tĩrtũm kapêr ma nẽ hkĩnh̃ nẽ. Nẽ kãm mar prãm nẽ. Te hy higrôt tokyx anh̃rta pyrãk.

17 Tã nhũm mẽhõ tẽ nẽ Tĩrtũm nẽ tanhmã mẽ kãm kapêr to nhũm mẽ kuma nẽ hkaga.

Rỳ nhũm mẽ Tĩrtũm ã tanhmã mẽ homnuj to nhũm mẽ tee ri amnhĩ tã mẽ omu nẽ hkaga. Te mẽmo hy higrôt nẽ grã par tokyx anh̃rta pyrãk.

18 —Nẽ mẽ kot mar xwỳnh̃ kwỳjaja te kot mrônhi kamã hkwỳ rôrôk nẽ higrôt nhũm mrônhi kot kęp àmnar xwỳnh̃ta pyrãk. Nẽ mẽ kãm Tĩrtũm kapêr mar prãm nẽ.

19 Nom mãânên kãm hikukrêx rax nẽ hikãxpore rax prãm jakamã ãm ja pix kukamã hamaxpêr o ri pa. Jao ra gryk ã axte Tĩrtũm kapêr mã hamaxpêr nẽ hkõt amnhĩ nhĩpêx kêt nẽ. Te mrônhi kot higrôt pê àmnar nhũm ô hkêeta pyrãk.

20 —No mẽ kot mar xwỳnh̃ kwỳjaja te hirã kamã pika mex kãm hy hkwỳ rôrôk nẽ higrôt nẽ ô raxta pyrãk. Na htem ixkapêr ma nẽ amnhĩ krã him hagiênh̃ tỳx nẽ. Nẽ ixkõt ri amnhĩ nhĩpêx mex rãhã ho ri pa. Te mẽmo hy hkre kamã ô hkwỳja kęp 30 nẽ kamã kęp 60 nẽ kamã kęp 100ta pyrã nẽ Tĩrtũm kapêr kõt amnhĩ nhĩpêx mex rãhã ho pa. E ã ixujarẽnh̃ja kot anh̃r. Anẽ.

Kanê hpimxur ã harênh̃

Rukre 8.16-18, 8.24-25; Matêwre 13.10-15, 25.14-30

21 Nhũm Jejus arĩ hkõt mẽ pa ho pa xwỳnhjê jahkre nẽ mẽ kãm:

—Xà na htem kanê hpôk nẽ poti ho hpro rỳ hitom kãm par krak ri unhwỳ? Nà na htem hpôk hãmri nẽ kỳx pê mẽmoj nhĩmôk ã unhwỳ.

22 Ja pyrã nẽ mẽ piitã kot hkwỳjê pê tanhmã hamaxpêr punuj to ho hpimxur prãm tã tee ri kot ho hpimxur prãm kaprỳ. Kojã nhỹrmã mẽ hamaxpêr piitã amnhĩ to amnhĩrit pa. Nẽ mẽmoj piitã ra hpimxur mex tã kojã nhỹrmã amnhĩ to amnhĩrit pa. Te mẽ kot kanê hpôk nẽ kỳx pê unhwỳr nhũm amnhĩrit mex pyrãk. Ja pyrã nẽ na pa hte Tĩrtũm kapêr o ri ixpimxur o ixpa hkêt nẽ. Na pa hte ixprĩ hã mẽ amã harẽnh̃ mex o ixpa.

23 Kwa mẽ ixujarẽnh̃ja ma nẽ kãm aja-maxpêr tỳx rãhã ho ri apa. Anẽ.

Nhũm pre ã Jejus mẽ kãm kapêr anẽ.

24 Hãmri nẽ mẽ kãm:

—Nẽ kêr ka mẽ axpên kãm axukapri ho ri tanhmã axpên to mex to ho ri apa. Kêr kê

Tirtüm ja hã mẽ apumu nẽ mẽ apyrà nẽ mẽ akamã ukapri pẽ mẽ ato mex o pa.

²⁵ Koja mẽhõ inhmã tanhmã amnhĩ nhĩpêx mex to pa ja hã omu nẽ kot inhmã àpênh mexta pãnhã ho mex nẽ. No koja inhmã àpênh mex kêt pa ja hã omu nẽ hã ho mex kêt nẽ.

—Nẽ koja mẽhõ kãm ixkapêr mar prãm nom kormã hprĩ hã mar mex kêt tã arĩ mar o pa nẽ gaa nẽ mar tỳx o mõi. No koja kuma nẽ ãm kuma hãmri nẽ gaa nẽ hã no hkêt. Anẽ.

Pur kãm mẽmo hy hkre xwỳnh jarênh

Matêwre 13.24-30

²⁶ Nhũm Jejus arĩ hkôt mẽ pa ho mẽ pa xwỳnhjê jahkre ho nhỹ nẽ mẽ kãm:

—E pa mẽ amã tanhmã mẽ kot ixkapêr mar tỳx xwỳnhjê jarênh to ka mẽ inhma. Koja mẽhõ ixkapêr mar tỳx nẽ ra hkôt ri amnhĩ nhĩpêx o pa. Hãmri nẽ hamaxpêr nyw o hamaxpêr o pa nẽ amnhĩ nhĩpêx nyw o amnhĩ nhĩpêx o pa. Te mẽ hpur kãm mẽhõ kot mẽmo hy hkre xwỳnh kot amnhĩ nhĩpêx pyræk. Na hte hyja kre ho pa.

²⁷ Hãmri nẽ hkre hpa nẽ kamát mẽ õt o hikwỹ nẽ arĩgro mẽ mẽmoj tã àpênh o pa. Rãhã nhũm mẽmo hyja arĩ hikwỹ ho hikwỹ hkêt nẽ. Koja amnhĩ nhĩpêx õ ho amnhĩ nhĩpêx nẽ higrõt kato nẽ hprêk. Kre xwỳnh kot tanhmã kot amnhĩ nhĩpêx to hã omunh kêt tã nhũm kãm hprêk.

²⁸ —Na hte hpõm hapõx o pa nẽ higrõt o pyka kahte. Hãmri nẽ hprêk nẽ hô axpõt nẽ gaa nẽ hpãnhã õ. Hãmri nẽ hkamrêk pa nẽ xa.

²⁹ Hãmri nẽ mẽ kot hikênh mã mex nẽ nhũm kot hkre xwỳnhhta omu nẽ amnhĩm hamỳnh pa. Tã mẽ kot ixkapêr mar mex xwỳnhjaja te mẽmo hy ra higrõt kator nẽ hprêk nẽ hô pipõt nẽ õ xwỳnhhta pyræk. Nẽ uræk nẽ amnhĩ nhĩpêx õ ho amnhĩ nhĩpêx o pa. Anẽ.

Jejus te kot mẽmo hy pyræk ã kot amnhĩ jarênh

Matêwre 13.31-32; Rukre 13.18-19

³⁰⁻³² Nhũm Jejus arĩ mẽ ahkre ho nhỹ nẽ mẽ kãm:

—Tirtüm kot mẽ awỳr ixte mẽ ato amnhĩptàr kaxyw inhmênh ã ijarênhja. Te ixte mẽmo hy pixire pyræk. Koja mẽhõ mẽmo hy hõ pixire nẽ hkre nhũm ra higrõt.

Nẽ gaa nẽ hprêk. Hãmri nẽ hpa anhgrà nhũm kuwênhre hwỳr mra nẽ hôptĩ kamã amnhĩm haê nhĩpêx. Mẽmo hyta grire htã nhũm hkre nhũm higrõt nẽ ã amnhĩ nhĩpêx anẽ. Tã kot paj nhỹrmã urà nẽ ixpyxi htã kot paj pika piitã hkôt mẽ ho amnhĩptà nẽ mẽ omunh mex rãhã ho ri ixpa. Anẽ.

— ã na pre Jejusja hkôt mẽ pa ho mẽ pa xwỳnhjê mã amnhĩ tã kuxi nẽ ujarênh anẽ.

³³ Mẽ kãm ujarênh kãm mẽ ahkre ho pa. Te nhãm mẽmoj jarênh pyrà nẽ amnhĩ tã haxwỳ nẽ harẽ. Mẽ kot tanhmã mar to hã mẽ omunh xà hkôt tanhmã mẽ kãm ujarênh to.

³⁴ Na pre ãm ujarênh pix kãm mẽ kãm kapêr mar prãm kêt xwỳnhjê mã amnhĩ jarênh rãhã ho pa. No mẽ kot hkôt pa ho pa xwỳnhjê mã nhũm hprĩ hã ujarênh jarê nhũm mẽhprĩ hã mar mex nẽ.

Jejus kot kòk o pinhkrênh ã harênh

Matêwre 8.23-27; Rukre 8.22-25

³⁵ Tã nhũm amỹkry nhũm Jejus arĩ pàr kre kamã nhỹ. Hãmri nẽ hkôt mẽ pa ho mẽ pa xwỳnhjê mã kãm: “E pu mẽ ma xarmã mõi.”

³⁶ Anẽ hãmri nẽ mẽ kot mar o hkrĩ xwỳnhjê re nẽ pàr mã agjê nẽ ma xarmã mõi. Garirej rùm kato nẽ ma xarmã pika hõ hwỳr mõi. Nhũm pàr kwỳja ma mẽ hkôt mõi.

³⁷⁻³⁸ Nhũm Jejus ra õtxwa nẽ tẽ nẽ pàr kre kamã hkrã japar xà hã hkrã xi nẽ ra õt tỳx nẽ nõ. Nhũm kòk àpêr tỳx nẽ nhũm gò kànhmã harĩ nẽ axpên tak. Ra ri xatã axpên tak nẽ pàr kre kamã axkapĩ nhũm ra mẽ kêp àr o mõi. Hãmri nhũm mẽ tee ri amnhĩ nhĩpêx nẽ tee ri amnhĩ kukamã hamaxpêr nẽ Jejus wỳr hprõt nẽ kumra nẽ kãm:

—Kwa kànhmã nhỹ Pahihtì. Kot puj mẽ jarãhã pahtyk pa. Anẽ.

³⁹ Hãmri nhũm hkrãkato nẽ kànhmã nhỹ nẽ kòk mẽ gòta pumu nẽ wa kãm kapêr o:

—E kwa wa anhĩkrê. Anẽ.

Hãmri nhũm gò mẽ kòk hpinhkrênh kurê kumrêx.

⁴⁰ Hãmri nhũm Jejus hkôt mẽ pa ho mẽ pa xwỳnhjê mã kãm:

—Hêxta waa nẽ. Kormã mẽ ate amnhĩ kaxyw Tirtüm mẽ wa inhmã ajamaxpêr tỳx kêt. Hã na ka mẽ ri amã ma nẽ tee ri amnhĩ kukamã ajamaxpêr. Anẽ.

⁴¹ Hãmri nhũm mẽ amnhĩ jaêr pẽ ã kot amnhĩ nhĩpêx anhỹr ã omu nẽ tee ri axpên

pumunh pê omunh o kuhê. Hāmri nê axpên mã:

—Kokÿÿ. Jejus kêp mẽ panhĩõ hkêt. Mẽ pahtõ kot pu te kot amnhĩ nhĩpêx pyrã nê kôk mã pakapêr nhũm anhĩkrê? Nã mẽ pakurom àhpumunh tÿx o àhpumunh tÿx. Anê.

5

Jejus kot mēhõ nê mẽkarõmnuti janor ã jarēnh

Matêwre 8.28-33; Rukre 8.26-34

¹ Tã nhũm Jejus mẽ hkôt mẽ pa ho mẽ pa xwÿnhjê mẽrohã mõ nê xarmã Geras wÿr pôj.

²⁻⁴ Hāmri nê pàr rũm hapôj nhũm mēhõ myja Jejus pumu nê hwÿr tẽ. Mẽkarõmnuti kot hwÿr àr nhũm ÿ hã oprê htÿx kumrêx. Hāmri nê hkwyjê hkàx ã kapôt ã mẽ hã pika kamã ri hkênh nê pa ho pa. Nhũm mẽ xatã kàx o hte hpre nê hpa hpre htã no nhũm kurê.

⁵ Nê kamãt kãm nê arĩgro hã àmra htÿx o mrar pê kên o amnhĩ tak o mra. Mẽ hã pyka kamã nê kapôt ã hixêt ã amnhĩ tak tÿx rãhã ho mra.

⁶ Tã amÿm Jejus pumu nê hwÿr hprõt nê hã hpijaam kaxyw kutã hkõn krã ho tẽm nê hparpê nhÿ.

⁷⁻⁸ Hāmri nhũm omu nê nê mẽkarõmnuti mã kapêr nê kãm:

—Kwa kurũm akato nê ma tẽ. Anê.

Hāmri nhũm kuma nê tanhmã myta o nhũm tãm mẽkarõmnuti nhÿ hã Jejus mã kapêr nê àmra kamã kãm:

—Pa Tĩrtũm Kra Jejus? Mo kaxyw na ka ixwÿr tẽ? Kwa tanhmã ixto hkêt nê nã?

⁹⁻¹⁰ Anê nhũm kãm:

—Tanhmã na anhĩxi te? Anê.

Nhũm kãm:

—Nã ixpê Mẽohtõhti. Mẽkarõmnuti ohtõ nê kot ixwÿr gjêx jakamã na htem ã inhĩxi jarēnh anê. Kwa nê mẽ ijanor kêt nê nã? Anê.

¹¹⁻¹² Hāmri nhũm mẽkarõmnuti tãm amnhĩ to kuwÿ nê kãm:

—Kwa kêr ka jahti nê mẽ ijapôx japêr nê mẽ kot amnhĩ xà htÿx kamã hamak o mẽ pa htũm xàta wÿr mẽ ixrēnh kêt nê. Hagrõ hkwy mũj wÿr mãn mẽ ixrê pa mẽ hpãnhã hwÿr mãn hagjê? Anê.

¹³ Hāmri nhũm mẽ kãm:

—Tõe. Mẽ tãm hwÿr mra. Anê.

Hāmri nhũm mẽmyta pê hapôx pa nê ma hagrõ hwÿr mrar kurê kumrêx nê mẽ kãm gjêx pa nhũm myja akupÿm tãm hkrã. No nhũm hagrõja mẽkarõmnuti pymaj amÿra nê axkahkũm nê hprõt nê himô hã krã hixêt ã axpum rôrôk nê gôx kãm mrõ nê hpikaprãr pa. Ohtõ rax kumrêx. Kêp 2.000 tã hpikaprãr pa.

¹⁴ Hāmri nhũm hagrõ jamãr o ri mẽ pa xwÿnhjaja tee ri ja hã omu nê ma mẽ õ pa-trãw wÿr akupÿm mẽ piitã mẽ kãm harēnh o hprõt nê mra. Hāmri nê mẽ kãm ujarēnh pa.

¹⁵⁻¹⁶ Nhũm mẽ tee ri mẽ kuma nê ma Jejus wÿr mra nê hkaxpa nê kuri myta pumu. Nhũm ra akupÿm tãm hkrã nê ê kamã tãm amnhĩ nhĩpêx nê nhÿ. Nhũm mẽ kot hã omunh xwÿnhjaja mẽ kãm ujarēnh pa nhũm mẽ kuma nê myta pumu hāmri nê tee ri amnhĩ kukamã hamaxpêr o kãm Jejus puma nê.

¹⁷ Hāmri nê amnhĩ nê kãm kapêr nê kãm:
—Kwa mẽmo kaxyw na ka mẽ ixwÿr rê? Mẽ ma akupÿm amrar tokyx anê. Anê.

¹⁸ Hāmri nhũm mẽ kuma nê akupÿm pàr wÿr agjê nhũm akupÿm mex xwÿnhhta tee ri ja hã mẽ omu nê mẽ hkôt hkrã.

¹⁹ No nhũm Jejus kãm:

—Nã kot kaj mẽ ixkôt amõr kêt nê. Ma akupÿm anhõ krĩ hwÿr mãn tẽ nê mẽ kãm Tĩrtũm kot akupÿm ato mex ã amnhĩ jarēnh o ri mẽ hkôt apa. Anê.

²⁰ Hāmri nhũm kuma nê ma akupÿm tẽ. Hāmri nê õ pyka pê Tekap kãm mẽ kãm Jejus kot tanhmã ho mex to hã harēnh ri mẽ hkôt pa nhũm mẽ amnhĩ jaêr pê kuma nê tee ri hkukamã hamaxpêr.

Jejus kot akupÿm mēhõ ho mex nê akupÿm mēhõ ho htĩr ã harēnh

Matêwre 9.18-26; Rukre 8.40-56

²¹ Tã nhũm Jejus mẽ hkôt mẽ pa ho pa xwÿnhjê mẽrohã akupÿm xarmã mõ nê rê. Hāmri nê pàr nhõ nê api nê gô mÿri kuhê nhũm pika nhõ xwÿnhjaja Jejus pumu nê hã pikuprõnh rax nê.

²²⁻²³ Hāmri nhũm mẽhõ my pê Jajtija hwÿr tẽ nê kutã hkõnkrã ho htẽm nê nhÿ. Kêp Tĩrtũm kapêr o mẽ ahkre xà hã ixkre jamãr xwÿnh maati na pre. Nhũm hkra nija

kêp à htỳx nễ htyk kaxyw nễ nễ. Kormã nyw. Kormã hã amgrà pê 12 pix tã ra kêp htyk kaxyw. Hãmri nhũm Jajtija tee ri hkukamã hamaxpêr nễ ma Jejus wỳr tễ nễ hpar pê hkôn krã ho tễm nễ ho hwỳr kãm hihtỳx nễ kãm:

—Pa akupỳm mẽ ixto mex xwỳnh maati. E awỳr na pa tễ. Na ra ixkra ixpê htyk kaxyw. Pa tee ri omu nễ kaxyw amã ijamaxpêr nễ awỳr tễ. Jakamã kwa ma ixkôt inhõrkwỳ hwỳr tễ nễ inhmã omu nễ hã anhĩkra xi nễ akupỳm inhmã ho mex. Anễ.

²⁴ Hãmri nhũm kuma nễ ma hkôt tễ. Nhũm mẽ ohtô nễ axpên nhĩgãnh nễ axpên kujahêk o wa hkôt mra.

²⁵ Nhũm mẽhõ nija haxwỳja wa hkôt tễ. Na pre hte hkamrô hkryre rãhã ho pa hã ra hã amgrà kêp 12.

²⁶ Nễ tồtô mã amnhĩrer rax nễ nhũm mẽ tee ri kot ho mex kaxyw nom xatã hkane kaprỳ. Hãmri nhũm ra hikàxpore kêp hapêx nhũm arĩ ãm rãhã nễ pa.

²⁷⁻²⁸ Hãmri nễ tee ri amnhĩ kukamã hamaxpêr nễ Jejus jarênh ma nễ hamaxpêr o:

—Ma kot paj ma hwỳr tễ nễ kêp ê pix kupênh tã akupỳm inhmex japêr. Ma kot paj ho anễ.

Anhỹr o hamaxpêr hãmri nễ ma mẽ hkôt hwỳr htễm kurê kumrêx. Nhũm mẽ ohtô raxja kaêx ã mẽ hkôt hwỳr tễ. Hãmri nễ katut kôt kêp ê nhĩrê kupê.

²⁹ ãm ê pix kupênh tã akupỳm mex ã amnhĩ pumunh kurê kumrêx.

³⁰ Hãmri nhũm Jejus kot kêp ê kupênh ã amnhĩ tã omu nễ hêx rom xa nễ mẽ ho hakêx nễ amnhĩ tã mẽ kãm kapêr nễ mẽ kãm:

—Kwa mẽ atô na ka ri amnhĩ kaxyw inhmã ajamaxpêr tỳx pê ixpê ixê kupê? Anễ.

Hãmri nhũm mẽ piitã kuma nễ tee ri axpên pumu nễ kãm amnhĩ tã aprã.

³¹ Hãmri nhũm hkôt mẽ pa ho pa xwỳnhjaja kãm:

—Mễ kot apê amnàr griã kot ka kêt ri mẽhõ kot apê hkupênh xwỳnh ã ri mẽ hkukja. Kwa mãn ãm mẽhõ amarĩ apê hkupê. Anễ.

³² Hãmri nhũm mẽ kãm:

—Nà na amarĩ ixpê hkupênh kêt nễ. Na amnhĩ kaxyw inhmã hamaxpêr tỳx pê ixpê

hkupê. Tã na ixàhpumunh tỳx xà ho akupỳm mex. Nom ra ixte mẽhõ kot ixpê hkupênh xwỳnhhta pumunh jakamã na pa ixêx rom ã amnhĩ tã ri mẽ hkukjêr anễ. E kwa mẽ atô inhmã amnhĩ jarê. Anễ.

³³ Hãmri nhũm nija kuma nễ tee ri kêp kot amnhĩ to hpimxur prãm. Hãmri nễ hpijaàm nễ hwỳr htertet o tễ nễ kutã hkôn krã ho tễm nễ nhỹ nễ kãm amnhĩ jarê nễ kãm:

—Ma pa na pa inhmã inhmex prãm xà apê axê kupê. Tã na pa akupỳm inhmex. Anễ.

³⁴ Hãmri nhũm kuma nễ kãm:

—Tỳ. Nà ate amnhĩ kaxyw inhmã ajamaxpêr tỳx kôt ã ate amnhĩ nhĩpêx anhỹr jakamã na ka akupỳm amex. Kot kaj axte akamrô rãhã ho ri apa hkêt nễ. E mãmri ajamakêtkati nễ ma akupỳm anhõrkwỳ hwỳr tễ. Anễ.

Hãmri nhũm kuma nễ hkĩnh nễ ma akupỳm tễ.

³⁵ Rôm nhũm Jajti mã mẽ àpênh xwỳnhjaja õrkwỳ rùm ma õ patrãw kutã mra nễ wa hkaxpa nễ Jajti mã kãm:

—Kwa na ra akra apê ty. Mo kaxyw kot ka kêt amnhĩ kôt Jejus o mỗ? Kwãr mãmri ma akupỳm awjanã nễ tễ. Anễ.

³⁶ Hãmri nhũm Jejus mẽ kuma nễ Jajti mã kãm:

—Kwa tee ri akra hkukamã ajamaxpêr kêt nễ. ãm kaxyw inhmã mãn ajamaxpêr tỳx rãhã nễ. Anễ.

³⁷⁻⁴⁰ Hãmri nhũm mẽ axte mỗ nễ mẽ õrkwỳ hwỳr pỏj nễ mẽ omu. Nhũm mẽ ra hã hturax nễ mỳr o hkrĩ. Hãmri nhũm Jejus mẽ hwỳr axà nễ mẽ omu nễ kot mẽ hkra htyk kumrêx ã omunh tã mẽ kãm:

—Kwa mẽ hãmri amỳr kêt nễ. Na nireta htyk kêt nễ. Na ãm gờr nễ nễ. Anễ.

Hãmri nhũm mẽ kot ra htyk ã omunh mex jakamã kuma nễ ãm kuma nễ axtem nễ ri axpên mã hã hpêr o axkê. Hãmri nhũm Jejus mẽ hanor pa nễ hitom kãm htyk xwỳnh wỳr àr kaxyw nễ amnhĩ kôt Juãw nễ Xiakre nễ Simãw Pêtre nễ kaxyw htyk xwỳnh katorxà nễ hipêêxà pix amnhĩ kôt mẽ ho axà.

⁴¹ Hãmri nễ htyk xwỳnhhta wỳr tễ nễ hpa hã kupy nễ kãm kapêr nễ kãm:

—Pa? E kwa kànhmã nhỹ. Anễ.

Nom amnhĩ kapêr kãm harê nễ kãm:

—Tarit kũm. Anẽ.

⁴² Hãmri nhũm kànhmã ỹr kurê kumrẽx nẽ kànhmã xa nẽ ri mra. Na pre ra hprêk nẽ ty. Na ra hã amgrà kêp 12 tâ ty nhũm Jejus akupỹm ho htĩr nẽ kànhmã ỹr nhũm kànhmã xa nẽ ri mra.

⁴³ Hãmri nhũm kuri omunh xwýnhjaja amnhĩ jaer pê omu nẽ kamã no puma nẽ hkĩnh tỳx kumrẽx. Hãmri nhũm Jejus katorxà mẽ hipêêxàja wa kãm:

—E mãn ra kãm prãm nẽ. Wa tokyx kãm mẽmoj japêr kê kukrê. Nom kêr ka wa inhmar kumrẽx. Kêr ka wa akupỹm ixte ho htĩr ã ri mẽ kãm ijarẽnh o ri apa hkêt nẽ. ãm kwarĩ ho kwarĩ. Anẽ.

6

Najare nhõ xwýnhjaja kot Jejus kaga hã mẽ harẽnh

Matêwre 13.53-58; Rukre 4.16-30; Juãw 1.11

¹ Tã nhũm Jejus ma õ krĩ pê Najare hwýr ma akupỹm mõ nhũm hkôt mẽ pa ho mẽ pa xwýnhjaja ma hkôt mõ.

² Hãmri nẽ hwýr pøj. Nhũm mẽ õ arĩgromnu pê sap kator jakamã nhũm Jejus ma Tĩrtũm kapêr o mẽ ahkre xà hã ixkre hwýr tẽ. Hãmri nẽ kamã mẽ ahkre ho nhỹ nhũm mẽ amnhĩ jaer pê kapêr mex ã kuma nẽ tee ri axpẽn pumunh pê hamaxpêr o hkrĩ. Jejus kêp mẽ hkwy hã hkamnhĩx nom nhũm mẽ kurom àhpumunh tỳx nẽ kapêr mex jakamã nhũm mẽ kuma nẽ tee ri hamaxpêr o hkrĩ. Hãmri nẽ axpẽn mã:

³ —Kwa kêp mẽ panhĩõ htã tanhmã kot we amnhĩ to nẽ ã àhpumunh tỳx kôt mẽ pamã kapêr anẽ nẽ ri mẽ kãm aa mẽ kot mẽmoj pumunh kêt kwý ho anhỹr o pa? Mẽ panoo mã na pre hprêk. Kêp pĩ kuprãr xwýnh Juje mẽ hprõ Marir wa hkra na. Nẽ htõ Xiakre nẽ Juje nẽ Simãw nẽ Jutja ra mẽ pahte mẽ kêp htõ hã omunh mex. Nẽ htõxjaja jar mẽ pakamã pa nhũm mẽ pahte mẽ omunh mex kênã kot kêt we mẽ kurom ã àhpumunh tỳx anẽ. Anẽ.

Anhỹr o axpẽn mã harẽ. Hãmri nẽ kamã gryk nẽ hkaga

⁴⁻⁶ nhũm tee ri amnhĩ tã mẽ omu nẽ hamaxpêr o:

—Hêxta waa nẽ. Mẽ kãm amnhĩ kaxyw ixkôt hamaxpêr prãm kêt kumrẽx. Anẽ.

Hãmri nẽ mẽ kãm:

—Nà Tĩrtũm nhỹ hã kapêr jarẽnh o mẽ pa xwýnhjaja na htem krĩ hkwy kamã kãm mẽ mar prãm nẽ. Nom õ krĩ kamã mẽ kot karãre rũm hprêk o mõi kãm omunh xwýnhjaja na htem kuma nẽ ãm kuma. Anẽ.

Hãmri nhũm mẽ kot amnhĩ kaxyw hkôt hamaxpêr kêt jakamã nhũm tee ri mẽ kãm aa mẽ kot mẽmoj pumunh kêt kwý ho anhỹr rax prãm kaprỹ. Nẽ ãm mẽ à xwýnhjê ho grêre nẽ mẽ hã ãhkra jaxwý nẽ akupỹm mẽ ho mex. Hãmri nẽ mẽ kurũm kato nẽ ma krĩ hkwy hkôt ri Tĩrtũm kapêr o mẽ ahkre ho pa.

Jejus kot mẽmoj tã mẽ kêp 12jê mã karõ hã harẽnh

Matêwre 10.5-15; Rukre 9.1-6, 10.1-12; mããnhẽn Atre 13.50-51, 18.6

⁷ Tã nhũm Jejus amnhĩ wýr mẽ kot ỹ hã mẽ ahkre ho pa xwýnh pê 12jê hwý. Ra kot amnhĩ kaxyw mẽ rênh xwýnhhtaja nhũm amnhĩ wýr mẽ kuwý. Hãmri nẽ axpẽn kaxyw mẽ ho axkrut nẽ mẽ kurê nẽ mẽ kãm mẽ àpênh ã karõ nẽ ma mẽ hkwyjê hwýr mẽ kurê. Nẽ mẽ kãm:

—E kêr ka mẽ ma mẽ pahkwýjê hwýr mra nẽ inhỹ hã Tĩrtũm kapêr jarẽnh o ri mẽ hkôt apa. Nẽ mẽ kurũm mẽkarõmnuti japõx o ri mẽ hkôt apa.

⁸⁻⁹ Nom kêr ka mẽ amnhĩ kôt akukrêx rax nẽ ri apa hkêt nẽ. Nẽ kawà htu nẽ ho ri apa hkêt nẽ. Nẽ amnhĩ kôt axàpkur xà ho ri apa hkêt nẽ. Rý akàxpore rax nẽ ri ho apa hkêt nẽ. ãm mẽ anhõ Kamis nẽ mẽ apar kà ho pixire nẽ agjê nẽ ri hã apa. Nẽ mẽ amnhĩ kaxpar xà hã mẽ anhõ kô pix o apa. Mẽ ã anhỹ kamã mẽ hkôt ri apa anẽ.

¹⁰ —Nẽ kêr ka mẽ nhỹri krĩ hõ hwýr pøj. Nẽ apõx xà kamã mẽhõ nhõrkwy kamã hkôt ri apikamẽnh tãmtã kurũm akupỹm ajapõj nẽ ma hpãnhã nhãm krĩ hõ hwýr apa. Nom atỳx ri nhãm mẽ hwýr amrar nẽ nhãm mẽ hwýr amrar kêt nẽ.

¹¹ —Nẽ koja mẽ nhỹri mẽ akapêr kaga ka mẽ tee ri amnhĩ tã mẽ kamã ama hãmri nẽ tokyx mẽ kurũm ajapõj nẽ ma apa. Nẽ anojarêt nẽ mẽ noo mã akuhê nẽ amnhĩ par ã awjagrõ kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrà nẽ mẽ hkaga hã omunh kaxyw ka mẽ ã

mē noo mā amnhī nhīpêx anē. Hāmri nē hpānhā ma nhỹhỹm apa.

¹² Anhỹr o mē kām mē àpênh ã karō. Nhũm mē kuma nē hapôj nē ma mē hkwýjê hkôt pa. Ma krī piitā hkôt Tĩrtũm kapêr o mē ahkre ho ri mē hkôt pa nē mē kām:

—E kwa mē tokyx amā ate amnhī tomnuj kaga hprām xàj Tĩrtũm kôt mǎn amnhī xunhwý. Anē.

¹³ Hāmri nē mē nē mēkarōmnuti jano. Nē akupỹm mē à xwýnhjê ho mex kaxyw mēmo htwým o mē hkrā gregrer nē Jejus nhỹ hā akupỹm mē ho mex.

*Mē kot Juāw Paxis pĩr ã mē harēnh
Matêwre 14.1-12; Rukre 9.7-9*

¹⁴ Tā nhũm mē piitā Jejus jarēnh ma nē axpēn mā tanhmā harēnh to ho pa. Nom ahpỹnhā tanhmā harēnh to. Na prem kamā harēnh o:

—Nā Juāw Paxis pimràata na. Pêr akupỹm htĩr jakamā na hte ã mē kot aa mēmoj pumunh kêt kwý ho anhỹr o pa. Anē.

¹⁵ Nē kamā axtem harēnh o:

—Nā tām kêt. Pêr finat Eris na. Anē.

Nē kamā axtem harēnh o:

—Nā tām kêt. Pêr Tĩrtũm nhỹ hā kapêr jarēnh xwýnhjê hō na. Te kot amnepê mā mē kot Tĩrtũm nhỹ hā tanhmā amnhī nhīpêx to xwýnhjê kot amnhī nhīpêx pyrāk o kot amnhī nhīpêx kēnā.

Anhỹr o ahpỹnhā harē.

¹⁶ Hāmri nhũm Ijaew o amnhĩptār xwýnhjê pē Erox āxipasja mē kot ã harēnh anhỹr ã mē kuma nē Juāw Paxis mā hamaxpêr kurê kumrêx. Hāmri nē mē kām:

—Nā pêr Juāw Paxista na. Ixte mē kām hā ixàmnênh nhũm mē kot inhmā mut krāhyr xwýnhta mǎn ra tanhmā amnhī to nē akupỹm htĩr. Anē.

¹⁷⁻²⁰ Na pre ra pahi Erox āxipasja htō Pirip pē hprō Eroxis pytà nē ho hprō nhũm hkra niti mē wa hwýr aha. Hāmri nhũm Juāw Paxisja tee ri ja hā pahihti Erox āxipasja pumu nē hā kām akir nē kām:

—Tk. Kwa Tĩrtũm kêp ja omnuj. Ra kot ja nē mē pahkurê htā ka axtem nē ã amnhī nhīpêx anē.

Anhỹr jakamā nhũm hprō Eroxisja amnhī tã kuma nē kamā gryk tỳx nē. Nē kām hpĩr prām nē. No nhũm pahi Erox

āxipas kām hpĩr prām kêt nē. Juāw Paxis kot Tĩrtũm kôt amnhī nhīpêx nhũm kot hā omunh mex jakamā kām hpĩr prām kêt nē. Juāw na pre hte xatā kām Tĩrtũm kapêr jarēnh o pa. Nhũm pahihti Erox āxipasja kormā hprĩ hā mar mex kêt tã hā hpijaàm nē kām mar prām nē. Nom nhũm hprō kām hpĩr prām jakamā nhũm kêp mē kām hā amýnê nhũm mē ma o tē nē haxà nhũm mex nē mē hagiênh xà kamā hkrĩ ho krĩ.

²¹⁻²⁴ Tã nhũm jāã nhũm pahi Erox āxipas kator ã arĩgro kato nhũm mē piitā hwýr mra nē hā akuprō nē hā hkĩnh nē hā apkur o hkrĩ. Ō kōwenatōjaja nē hkrāmnhwýjaja nē krĩ hkwý kamā mēō pahijaja nhũm mē ohtō nē hā akuprō nē hā hkĩnh. Hāmri nhũm hprō Eroxis kra nitija mē hwýr axà nē mē kām gre. Mē kot omunh nē kamā hkurê pix kaxyw mē noo mā hpijaàm kêt nē ã mē kām gre anē. Hāmri nhũm pahi Erox omu nhũm ja kām mex nē nhũm mē piitā hkĩnh nē kamā nopyma nē. Nē gre kām hpijaàm kêt nē tanhmā mē kām gre to nhũm mē omu nē kamā no pyma nē. Hāmri nhũm pahi Erox āxipasja kām:

—Nā ãm hāmri. Na ka mē inhmā agrer mex nē. Jakamā kwa māmri mēmoj tã ixwý. Amā mēmoj prām xà hkôt inhmā mēmoj jarē pa amā kugō. ãm hāmri na pa amā amnhī jarē. Na pa Tĩrtũm noo mā ã amā amnhī jarēnh anē. Ka mamri ixkukrêx mex kwý hā ixwý pu axpēn mā ho axkjê. E mēmo na amā hprām? Anē.

Hāmri nhũm kuma nē ma katorxà hwýr tē nē kām harē nē kām:

—Xê mēmoj tã kot paj we kuwý? Anē.

Hāmri nhũm kuma nē hamaxpêr o:

—Ma ãm hāmri koja mē tã jarāhā inhmā Juāw Paxis pĩ. Anē.

Hāmri nē hkrata mā kām:

—Ma Juāw Paxis krā hā kot kaj awý kē mē amā kugō ka man ixwýr o tē. Anē.

²⁵ Hāmri nhũm kuma nē akupỹm pahi hwýr axà nē kām:

—Ma Juāw Paxis krā kot kaj inhmā agō. Pasiiti kamā axà nē inhmā agō pa ma amnhĩm o ixtēm kurê kumrêx. ãm ja pix na inhmā hprām. Anē.

²⁶ Hāmri nhũm tee ri kuma nē hkapri nē. Nē hamaxpêr o:

—Hêxta waa nê. Inhmã hpîr prãm kêt. Nom ra ixte ixkutã mẽ hkrî xwÿnhjê noo mã inhmã kãm mẽmoj prãm xwÿnh nhôr ã amnhî jarênh nhũm ixte kãm ôr ã amnhî jarênh nhũm mẽ piitã mẽ kot inhmar jakamã tanhmã kot pa we amnhî to nê kêp nê? Nà pa nê hkêt nê. Anê.

²⁷ Hãmri nê ô pôristijê mã kãm:

—E mẽ ma Juãw Paxis wÿr mra nê mut krãhta nê pasiiti kamã hkrã xà nê akupÿn o tẽ nê kãm gô. Anê.

Hãmri nhũm mẽ kuma nê ma mẽ hagiênh xà hwÿr mra nê Juãw wÿr axà hãmri nê mut krãhta.

²⁸ Hãmri nê pasiiti kamã hkrã xà nê akupÿm o tẽ nê kot hã hwÿr xwÿnh mã kugô nhũm kumÿ nê ma katorxà hwÿr o tẽ nê kãm kugô.

²⁹ Hãmri nhũm Juãw Paxis kôt mẽ pa ho mẽ pa xwÿnhjaja tee ri harênh ma nê hkaprî htÿx nê. Hãmri nê pahî Erox ãxipas wÿr mra nê ì hã kuwÿ nhũm mẽ kãm kugô nhũm mẽ kumÿ nê ma o mra nê kên kre kamã haxà.

Jejus kot mẽ ho 5.000 nê mẽ kãm ô hã harênh

Matêwre 14.13-21; Rukre 9.10-17; Juãw 6.1-14

³⁰ Tã hãmri nhũm mẽ kot Jejus nhÿ hã mẽ ahkre ho mẽ pa xwÿnhjaja akupÿn Jejus wÿr môn pôj nê kãm amnhî jarê. Tanhmã mẽ kot mẽ ahkre hto ho pa nê tanhmã mẽ ho mex to ho pa hã kãm amnhî jarênh pa.

³¹ Tã nhũm mẽ piitã axpên pãnhã kot Jejus mar kaxyw mẽ hwÿr mra nhũm mẽ kormã apkur kêt nê. Jakamã nhũm Jejus hkôt mẽ pa ho mẽ pa xwÿnhjê mã:

—E ma pu mẽ awrã kaprÿ hwÿr mō nê nhÿri pahkrî nê pakôkôt nê apku.

³² Anê hãmri nhũm mẽ gôx kãm kanôre wÿr agjê nê ma ahte xarmã awrã kaprÿ hwÿr mō.

³³ Nhũm krî hkwÿ nhô xwÿnhjaja mẽ omu hãmri nê nhÿhÿm mẽ mōr xà hã mẽ omunh kurê kumrêx. Hãmri nê krî hkwÿ rÿm ma mẽ ìhkrep mra nê mẽ kãm amnhî to wa nê pôj nê mẽ kutêp hkrî.

³⁴ Hãmri nhũm mẽ mō nê mẽ hwÿr pôj nê kre kura nê kanôre nhô. Hãmri nhũm Jejus mẽ hwÿr api nê mẽ omu nê hamaxpêr o:

—Hêxta waa nê. Na mẽ omnu nê pa. Te mẽ kêp ôwêhti jamãr xwÿnh kêt nê htÿx ri pa xwÿnh kot amnhî nhîpêx pyrãk. Mêhō kot mẽ kamã ukaprî nê tanhmã mẽ ho mex to ho pa? Anê.

Hãmri nê mẽ kamã ukaprî nê xa nê Tirtũm kapêr o mẽ ahkre rax nê.

³⁵⁻³⁶ Tã nhũm myt àr kaxyw nhũm hkôt mẽ kot pa ho pa xwÿnhjaja hwÿr mra nê kãm:

—Kwa hãmri na ra amÿkry htÿx nê. Mẽ hano kê mẽ ma nhÿri krî hkwÿ hwÿr mra nê tokyx amnhîm mẽmoj japrô nê kuku nê hikwÿ nê gôr. Mo jar kapôt ã mẽ apkur xà? Anê.

³⁷ Hãmri nhũm mẽ kuma nê mẽ kãm:

—Kwa nà mẽ kamjaja mẽ kãm mẽmoj gô kê mẽ kuku. Anê.

Hãmri nhũm mẽ kuma nê tee ri hamaxpêr nê kãm:

—Kwa mo mẽ kaxyw mẽ pakàxpore rax? Kot pu mẽ pakàxpore ho 200 nê ho mẽ kãm mẽmoj japrôr tã nom nhũm mẽ ãm ho hkryre nê kuku nê ho ôhy htu hkêt nê. Mẽ ohtô rax kumrêx kênã. Anê.

³⁸ Hãmri nhũm mẽ kãm:

—Nà kot puj mẽ kãm mẽmoj japrôr kêt nê. No mẽ panhō pãwtita? Tanhmã na arî kute? E mẽ atô tẽ nê omu nê akupÿn tẽ nê inhmã harê. Anê.

Hãmri nhũm ja ma tẽ nê omu nê akupÿn tẽ nê kãm:

—Nà pãwti ãm kêp 5 pix. Nê kaxyw tep ãm pijakrutre. Anê.

³⁹ Hãmri nhũm Jejus kuma nê mẽ kãm:

—Tôe. Mẽ kãm anê kê mẽ ahpÿnhã ri hije nê hkrî. Anê.

⁴⁰ Hãmri nhũm mẽ piitã ahpÿnhã kêp 50 nê hije nê hkrî hpa.

⁴¹ Nhũm Jejus pãwti mẽ tepta jamÿ nê kãnhmã kaxkwa hwÿr rît nê Tirtũm mã kupê nê kãm harê nê kãm:

—Pa Papaj? Nà ka na apê mẽ inhmã mẽ inhô ho apa xwÿnh jakamã amex o amex. Anê.

Hãmri nê mẽ kãm ho hkry hpa nê hkôt mẽ pa ho mẽ pa xwÿnhjê mã kugô nhũm mẽ ô ri ho mra nê ho mẽ hipêx pa. Pãwti mẽ tepta nhũm mẽ ho mẽ hipêx pa.

⁴²⁻⁴⁴ Nhũm mẽ piitã apkur mex nê. Mẽôja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã

kuku nê ho ôhy htu hpa. Měmyjaja kêp 5.000 nê kaxyw mẽ hprô nê mẽ hkrajaja nhũm mẽõja ho mẽ hipêx pa nhũm arĩ hakrêx prã. Jakamã nhũm Jejus kôt mẽ pa ho mẽ pa xwýnhjaja akupým hakrêx o pikuprôn̄h pa nê ho kawà o 12 nê ho nýt.

*Jejus kot gô krãhkà hã htêm ã harênh
Matêwre 14.22-33; Juãw 6.15-21*

⁴⁵⁻⁴⁶ Tã nhũm Jejus hkôt mẽ pa ho mẽ pa xwýnhjê mã kãm:

—E mẽ kanôre mã axà nê ma akupým ixkukamã krĩ pê Petsêj wýr rê. Pa jajê jano hãmri nê ma tẽ nê nhýri Tirtũm mã amnhĩ jarê nê rĩ ma mẽ akôt tẽ. Anê.

Hãmri nhũm mẽ kuma nê kanôre mã gjêx pa nê ma mō nhũm Jejus mẽ kot mar xwýnhjê janor pa nê ma hixêť prêk ã api nê Tirtũm mã amnhĩ jarênh o nhỹ.

⁴⁷ Tã nhũm kamàť nhũm arĩ ahte kýxpê nhỹ. Nhũm hkôt mẽ pa ho mẽ pa xwýnhjaja kormã kanôre kamã mō.

⁴⁸ Hãmri nhũm Jejus amým mẽ omu nhũm kôk ra mẽ kutã àpêť týt kumrêx nhũm mẽ tee ri amnhĩ nhĩpêx nê tee ri rrêmti ho gô rênh nhĩpêx o hkrĩ.

Tã nhũm ra krãhyre kà nhũm Jejus Tirtũm mã amnhĩ jarênh pa nê kãnhmã xa nê ma mẽ hkôt tẽ. Nom kanôre kamã htêm kêt nê gô krãhkà hã xa nê mẽ hwýr hpar o tẽ.

⁴⁹⁻⁵⁰ Hãmri nê mẽ hwýr kato nê mẽ kamã hamak kaxyw hêx rom kot mẽ hakrenh mã. Nhũm mẽ amnhĩ wýr omu nê mẽkarõ hã hkamnhĩx nê tee ri amnhĩ kukamã hamaxpêť nê umaj htertet nê àmra rax nê. Hãmri nhũm mẽ kãm:

—Tk. Kwa mẽ amã ma hkêť nê. Pa na pa mẽ akôt tẽ. Anê.

⁵¹ Hãmri nê mẽ hwýr kanôre hkrem axà nhũm kôk xàpêť týtã hapêx. Hãmri nhũm mẽ Jejus kamã no puma nê tee ri hamaxpêť nê axpêť mã:

—Kokýỹ. Tanhmã na we amnhĩ to nê gô krãhkà hã hpar o man mẽ pahkôt tẽ mẽ pahwýr àr mẽ nhũm kôk hapêx par kurê kumrêx. Anê.

Hãmri nê tee ri kot ã amnhĩ nhĩpêx anhýrja kukamã hamaxpêť o hkrĩ.

⁵² Kormã mẽ kot hprĩ hã Jejus tanhmã kute hã omunh kêt jakamã. Tirtũm pyrã nê àhpumunh o àhpumunh ã omunh mex kêt jakamã tee ri pãwti grêre ho mẽ hipêx par

nê gô krãhkà hã htêm nê kôk o pinhkrênh ã omu nê tee ri ã kot amnhĩ nhĩpêx anhýrja kukamã hamaxpêť.

Kenêjare kamã Jejus kot akupým mẽ ho mex ã harênh

Matêwre 14.34-36

⁵³ Tã nhũm mẽ xarmã rê nê krĩ pê Jenêjare hwýr pøj. Hãmri nê kanôre nhô

⁵⁴ nê api nê kuhê nhũm krĩ nhô xwýnhjaja Jejus pumunh kurê kumrêx nê axpêť mã:

—Kwa pêť Jejusta na mō. Nà tãm kênã. Anê.

⁵⁵ Hãmri nê hkĩnh nê ma kape hã mẽ à xwýnhjê hkôt mrar kurê kumrêx nê mẽ harir xà rãhã mẽ hamý nê akupým Jejus wýr mẽ o mra. Nhýri hpôx xà kamã omu nê hwýr mẽ o mra.

⁵⁶ Na pre htem ã Jejus nhĩpêx anê. Jakamã nhũm hte ma nhỹhým mra. Krĩ rũnh kôt mra nê krĩ hkryre hkôt mra nhũm mẽ omu nê hwýr mẽ à xwýnhjê ho mra nê mẽ ho kuwý nê kãm:

—Pa? Kwa kê jajaja akupým mex kaxyw apê axê pix kupê nà? Anê.

Hãmri nhũm mẽ kãm:

—Tôe. Nà kwãr mẽ mãmri hkupê. Anê.

Hãmri nê mẽ kot kêp ê kupênh xwýnh piitã akupým mex pa.

7

Mê higêť hkôt mẽ kot amnhĩ nhĩpêx xwýnhjê jarênh

Matêwre 5.21-48, 15.1-20

¹⁻⁴ Tã nhũm Mojes kapêť o mẽ ahkre o mẽ pa xwýnh kwýjaja Jerujarê rũm Jejus wýr mō. Hãmri nê hã akuprô nê hkôt mẽ pa ho mẽ pa xwýnhjê kot amnhĩ nhĩpêx ã mẽ omunh o kuhê. Ijaew na prem mẽ hkukamã mẽ higêťjê kapêť kôt ri tanhmã amnhĩ nhĩpêx to ho pa. Jakamã mẽ uràk nê apkur kaxyw nê xatã amnhĩ nhĩhkra kuhõnh japjê nê rĩ kormã apku. No mẽ amnhĩ nhĩhkra grã pix kuhõnh nê hkrĩ nê apkur kêt nê. Kuhõnh japjê nê kormã hkrĩ nê apku. Tirtũm kot ja hã mẽ omunh nê amnhĩm mẽ mex ã mẽ harênh ã amnhĩ kamnhĩx jakamã na prem ã amnhĩ nhĩpêx anhýr o pa. Nê nhýri amnhĩm mẽõ hkwy japrô nê akupým ôrkwy hwýr o mra nê haxwý nê mẽ higêť pyrã nê wýr japjê rũnh kumrêx nê rĩ kormã apku. Nê mẽ uràk

nê poti nê gôj nê papêre hkre kahõnh japjê rûnh nê rî kormã kamã õ nhîpêx. Mê higêt pyrã nê ã amnhî nhîpêx anhÿr o pa. Tîrtûm kot ja hã mê omunh nê amnhîm mê mex ã mê harênh prãm xàj. Nom nhûm Jejus kôt mê pa xwÿnhjaja na prem ã amnhî nhîpêx anhÿr kêt nê. Na prem apkur kaxyw nê katàt kôt amnhî nhîhkra kuhõ nê àmnhîx apkur o hkrî. Jakamã nhûm Parijew nhõ xwÿnh mê Tîrtûm kapêr tûm o mê ahkre xwÿnhjaja tee ri ã mê kot amnhî nhîpêx anhÿr ã mê omu nê mê hã Jejus kukja nê kãm:

⁵—Pa Jejus? Kwa mê inhmã mëmoj jarê. Amnepêm mê panhîgêtjaja na pre htem apkur kaxyw nê amnhî nhîhkra kuhõnh japjê rûnh kumrêx nê arî kormã hkrîn apku. Jakamã na pa htem mê urak nê ã amnhî nhîpêx anê. No akôt mê pa ho mê pa xwÿnhjaja na htem ho mê ixpyrà kêt nê. Kwa mo na htem ã amnhî nhîpêx anhÿr kêt nê? Anê.

⁶Hãmri nhûm mê kuma nê mê kãm amnepêm Tîrtûm nhÿ hã kapêr xwÿnh pê Ijais kapêr jarê nê mê kãm:

—Nà ãm hãmri na pre finat Ijaisja amnepêm tanhmã mê ajarênh to. Te Tîrtûm tãm kapêr pyrãk o mê ajarê nê mê ajarênh o:

Mê kãm ixkînh ã amnhî jarênh tâ mê kãm ixkînh kêt. Na htem ãm kãm ixprãm ã amnhî jarênh kaprÿ.

⁷Mê kot ixkapêr kuhpa hã amnhî krã hkôt mëmoj tâ hkwyjê mã karõ ho pa jakamã na htem ãm kot ixkôt amnhî nhîpêx ã amnhî jarênh kaprÿ. Anê.

Ã na pre mê ajarênh anê.

⁸⁻⁹ ãm hãmri na pre mê ajarê. Na ka htem mê panhîgêt kapêr kôt pix mã amnhî nhîpêx o apaja gryk ã ra Tîrtûm kapêr kaga hpa. Te mê akapêr mex o kot Tîrtûm kapêr jakrenh pyrãk.

¹⁰ Na pre finat Mojes Tîrtûm nhÿ hã mëmoj tâ mê pamã karõ ho:

Ker ka mê anhîpêxã nê mê akatorxã wa hã apijaãm o ri apa. Jao wa kutã anojarêr rãhã nê. Nom kot kaj mê ho mex hkêt nê tanhmã mê kãm akapêr punuj to hãmri nhûm mê akwÿjaja ja mÿrapê mê apa. Anê.

Na pre ã finat Mojesja Tîrtûm nhÿ hã mê pamã karõ anê.

¹¹ No mê kajaja na ka mê axtem nê tanhmã akwÿjê mã ja hã karõ hto nê mê kãm: “Kot kaj mê mëmo arîgro hã akàxpore hkwy nom anhîpêxã ho ajuta kaxyw kãm hkwy nhõr kêt nê. ãm wa kãm ate ho ajuta kêt ã amnhî jarê hãmri nê Tîrtûm mã amnhî jarênh xã hã ixkre hwÿr mãn o tê nê mê ixte ixkre ho mex kaxyw mê inhmã agõ. Kot kaj mê ã amnhî nhîpêx anê nhûm Tîrtûm ja hã mê apumu nhûm ja kãm mex nê. E kêr ka mê ã amnhî nhîpêx anhÿr o ri apa.” Anhÿr o na ka htem akwÿjê mã karõ.

¹² Jao mê kot mê hipêxã nê mê katorxã ho ajuta nê mê hkurê.

¹³ Te mê amã mê panhîgêt kapêr mex o kot Tîrtûm kapêr jakrenh pyrãk o na ka htem amnhî nhîpêx. Jao te Tîrtûm kapêr mex kêt pyrãk o hipêx nê mar kêt nê apa. ã na ka htem Tîrtûm kapêr kuhpa hã amnhî nhîpêx anhÿr o ri apa. Anê.

Mê pajamaxpêr punuj kôt mê pahtomnu hã harênh

Matêwre 15.10-20

¹⁴ Tã nhûm Jejus Parijew nhõ xwÿnhjê mê hkwyjê mã kapêr pa hãmri nê amnhî wÿr ra mê kot mar o kuhê xwÿnhjê mã hpa ho apê nê mê kãm:

—E pa mê amã mëmoj jarê ka mê inhma nê inhmar mex nê.

¹⁵⁻¹⁶ Na hte Tîrtûm kapêr tûm o mê ahkre xwÿnhjaja amnhî krã hkôt mê ate amnhî nhîhkra kuhõnh japjê hã mê amã karõ ho pa. Nê amnhî krã hkôt mê axàpkur xã hã tanhmã mê amã karõ hto ho pa. Mê ate ã amnhî nhîpêx anhÿr nhûm Tîrtûm kot ja hã mê apumunh kôt amnhîm mê amex ã mê ajarênh kaxyw nhûm htem ã mëmoj tâ mê amã karõ anê. Nom na hte Tîrtûm tanhmã mê panhîhkra kuhõnh to hã mê pahpumu nê ãm hã mê pa hpumu. Nê mëmo mê paxàpkur xã hã mê pahpumu nê ãm hã mê pahpumu. Ja kãm tanhmã kute hkêt. Na hte ja hã mê omunh xã hkôt amnhîm mê mex ã mê harênh rÿ mê mex kêt ã mê harênh kêt nê. Rÿ mê hakwa ho mëmoj kur ã mê omunh xã hkôt tanhmã mê harênh to hkêt nê. ãm mê hakwa ho tanhmã kapêr to pix ã mê mar kôt na hte tanhmã mê harênh to.

Anhÿr o mẽ kãm kapër.

¹⁷ Hãmri nẽ mẽ kot mar o kuhê xwÿnhjê re nẽ hkôt mẽ pa ho mẽ pa xwÿnhjê mẽ mẽ amnhĩm hikranh xà hã ixkre hwÿr agjê. Hãmri nhũm hkôt mẽ pa ho mẽ pa xwÿnhjaja tee ri Jejus kot tanhmã mẽ hakwa jarënh to hã kuma nẽ hã hkukja nẽ kãm:

—Kwa mon ka ri mẽ inhmã ã ja jarënh anẽ? Anẽ.

¹⁸ Hãmri nhũm mẽ kãm:

—Kwa xàn ka mẽ kormã aprĩ hã ja mar mex kêt nẽ? E pa ixprĩ hã mẽ amã harẽ ka mẽ inhma. Nà mẽ apkur xà na hte mẽ hkrã hi kamã mẽ hamaxpër wÿr gjêx kêt nẽ.

¹⁹ Na hte âm mẽ õhy pix wÿr agjê nẽ gaa nẽ nhãm hapôj nẽ hapêx. Na htem mẽ apkur xà nhÿ hã tanhmã amnhĩ tomnu to hkêt nẽ. Jakamã na hte Tirtũm mẽ apkur xà hã mẽ omunh xà hkôt tanhmã mẽ harënh to hkêt nẽ. Anẽ.

Nhũm pre ã mẽ kãm kapër anhÿr o mẽ paxàpkur xà piitã mex ã harẽ. Jakamã na hte Tirtũm krajaja àmnhĩx mẽmoj piitã hkur o pa nẽ kãm mẽmoj kur puma hkêt nẽ. Jakamã nhũm Jejus ã mẽ kãm kapër anẽ nẽ mẽ kãm:

²⁰ —Mẽ hkrã hi kamã mẽ hamaxpër punuj pix nhÿ hã na htem tanhmã amnhĩ tomnuj to. Jakamã na hte Tirtũm tanhmã mẽ hamaxpër to ho pa hã mẽ omunh xà hkôt tanhmã mẽ harënh to. Nom mẽ kot mẽmoj kur ã mẽ omunh xà hkôt rÿ mẽ ìhkra kuhõnh japjê hã mẽ omunh xà hkôt tanhmã mẽ harënh to hkêt nẽ. Ja tanhmã kệp kute hkêt.

²¹⁻²² Nom koja mẽhõ hamaxpër punuj nẽ ra hkôt tanhmã amnhĩ tomnuj to.

Jao axpën kamã hpijaàm kêt nẽ.

Rÿ mẽhõx pĩ rÿ mẽ kệp ahkĩ.

Rÿ mẽ kệp mẽ hprõ rÿ mẽhkuprÿ ho amnhĩkati.

Rÿ ri axpën pẽ õxÿ.

Rÿ tanhmã hkwyjê homnuj to.

Rÿ tanhmã mẽ ho kapër punuj to.

Rÿ hêx rom mẽ no kupyri o ri pa.

Rÿ mẽmoj tã amnhĩ to jarkrar o pa.

Rÿ axpën kukrêx pumu nẽ kãm ho õ hprãm xàj hã õ xwÿnhhta kamã gryk.

Rÿ htÿx ri tanhmã amnhĩ nhĩpêx to.

Mẽ hamaxpër punuj jakamã na htem ã ri amnhĩ nhĩpêx anhÿr o pa.

²³ Tã ã mẽ kot amnhĩ nhĩpêx anhÿr ã mẽ omunh xà hkôt na hte Tirtũm mẽ kot amnhĩ tomnuj xwÿnh hã mẽ harẽ. Anẽ.

Mẽhõ kot hkra kaxyw Jejus mã hamaxpër ã harënh

Matêwre 5.21-28

²⁴ Tã nhũm Jejus mẽ hkôt mẽ pa ho mẽ pa xwÿnhjaja nhÿhÿm nojarêt hãmri nẽ krĩ rũm hapôj nẽ ma krĩ pẽ Xir pu hã ri pa. Hãmri nhũm Jejus hkwyjê mã:

—E kwa pu mẽ tokyx ixkre mũj wÿr mẽ mẽ kuri pôj nẽ kamã amnhĩm hkra. Pu mẽ pahpôx tokyx anẽ kê krĩ nhõ xwÿnhjaja mẽ pahpôx ã mẽ pahpumunh kêt nẽ.

Anhÿr tã nom nhũm mẽ piitã mẽ harënh ma nẽ mẽ hã akuprõ.

²⁵⁻²⁶ Nhũm mẽhõ ni haxwÿja Jejus hpôx ã harënh ma nẽ ma hwÿr tẽ. Nom kệp Ijaew kêt axtem Gres nhõ xwÿnh na pre. Pika pẽ Sir kamã krĩ mẽ kot kãm “Wênĩs” anhÿr xwÿnh kamã na pre kato. Nhũm pre mẽkarõmnuti kệp hkra ni mã axà. Hãmri nhũm õ mãmaj tee ri omu nẽ ra Jejus hpôx ã harënh ma nẽ ma hwÿr tẽ. Hãmri nẽ hwÿr axà nẽ hparpê hkõnkrã ho htẽm nẽ nhÿ nẽ kãm:

—Xê Pahihti. Inhmã ixkra nẽ mẽkarõmnuti jano kê ma tẽ kê akupÿm inhmã mex. Anẽ.

²⁷ Hãmri nhũm kãm:

—Nà kormã. Na pre Tirtũm taxy kormã Ijaewjê pix wÿr inhmẽ. Jakamã na pa kormã nhãm mẽ akwyjê hõ tanhmã mẽ ato mex to hkêt nẽ. Anẽ.

²⁸ Hãmri nhũm tee ri amnhĩ tã kuma nẽ kãm:

—Ma âm hãmri na ka ja jarẽ. Ixpê Ijaew kêt tã nom mẽ kuxwar we ixto mex grire kêt wehe. Anẽ.

²⁹ Hãmri nhũm kãm:

—Nà âm hãmri na ka ã akra kaxyw inhmã ajamaxpër tÿx anẽ. Jakamã kot paj nẽ mẽkarõmnutita jano. Koja axte tanhmã apê ho hkêt nẽ. E ma akupÿm hwÿr tẽ nẽ omu. Anẽ.

³⁰ Hãmri nhũm kuma nẽ ma akupÿm òrkwÿ hwÿr tẽ nẽ omu. Nhũm ra mẽkarõmnutija kệp kato nẽ ma tẽ nhũm akupÿm tãm hkrã nẽ hkĩnh nẽ par kãm hkôkôt o nõ.

Hamak kro nẽ kapër krok xwÿnh jarënh
Matêwre 15.29-31

³¹ Tã nhũm Jejus mẽ hkôt mẽ pa ho mẽ pa xwýnhjaja krĩ pẽ Xir rũm hapôj nẽ akupým gô rax pẽ Garirej wýr ma mra. Pyka pẽ Sitõ jakre nẽ mō nẽ pyka pẽ Tekap jakre.

³² Hãmri nẽ kormã hpôx o mōr rôm nhũm mẽ amnhĩ wýr Jejus pumu nẽ hwýr mẽhõ myja o tẽ. Kapẽr krok nẽ umar kêt xwýnhta nhũm mẽ wýr o tẽ nẽ kãm:

—Pa? Ot pa mẽ awýr ixkrãmnhwýta o tẽ. Kwa hã anhĩkra xi kê akupým mẽ inhmã mex. Anẽ.

³³ Hãmri nhũm omu nẽ hpa hã kupy nẽ mẽ kêp o kato nẽ nhýri mẽ hkàx ã o xa. Nẽ akutã hamak kre kupẽ nẽ argôx mẽ nẽ ho õhto htok.

³⁴ Hãmri nẽ kaxkwa hwýr rĩt nẽ htyk xà mẽnh týx nẽ kãm kapẽr. Mẽ pakapẽr kãm kãm: “E ajamak katêr nẽ anhõhto kaxkrit.” Anẽ. Nom kapẽr kãm kãm: “Epata.” Anẽ.

³⁵ Hãmri nhũm hamak katêr nẽ õhto kaxkrit kurê kumrêx nẽ tãm kapẽr nẽ tãm ama.

³⁶⁻³⁷ Hãmri nhũm mẽ kot omunh xwýnhjaja amnhĩ jaêr pẽ Jejus kot ho mex ã omu nẽ kamã no puma nẽ. Hãmri nhũm mẽ kãm:

—Kwa kêr ka mẽ akwýjê mã ja hã ijarênh kêt nẽ.

Anhýr tã no nhũm mẽ kuma nẽ ãm kuma nẽ ma mẽ piitã mẽ kãm harênh o ri hprõt nẽ mẽ kãm:

—Kwa Jejus na mex o mex. Na hte mẽ ho mex o pa nhũm mẽ umar kêt xwýnhjaja akupým tãm ama nhũm mẽ kapẽr kêt xwýnhjaja akupým tãm kapẽr. ãm hãmri na hte ã mẽ hipêx anhýr o pa. Nà ãm mex o mex. Anẽ.

8

Jejus kot mẽ ho 4.000 nẽ mẽ kãm mẽ õ hã harênh

Matêwre 15.32-39

¹⁻² Tã nhũm arĩgro hõ hã nhũm mẽ ohtõ nẽ nhýri kapôt ã Jejus ã htu rax nẽ kot mẽ ahkre mar o kuhê hã apkati axkrunêpxi. Nhũm mẽ apkur xà hã mẽõja ra mẽ kêp hapêx. Hãmri nhũm Jejus ja hã mẽ omu hãmri nẽ hkôt mẽ pa ho mẽ pa xwýnhjê mã akir nẽ mẽ kãm hpa ho apê nẽ mẽ kãm:

—E mẽ amnẽ ixwýr mra nẽ ixkapẽr ma. Anẽ.

Nhũm mẽ hwýr mra nẽ kuhê nhũm mẽ kãm:

—Kwa na pa inhmã mẽ kot inhmar o kuhê xwýnhjê kaprĩ nẽ. Na mẽ ra mẽ pahkôt ri pa hã apkati axkrunêpxi nhũm mẽ apkur xà hã mẽõja mẽ kêp hapêx.

³ Mẽ õ krĩ hwýr awry jakamã koja mẽ mẽmoj kur kêt rãhã ma akupým pa hãmri nẽ pry hã hirok nẽ rôrôk o pa. Hãmri pa inhmã mẽ hkaprĩ nẽ. Anẽ

⁴ Hãmri nhũm mẽ kuma nẽ axte tee ri hamaxpẽr nẽ kãm:

—Kwa nà nhýhýnh kot puj kêt mẽ kãm mẽmoj to mra? Jar ãm kapôt pix kêñã. Anẽ.

Hãmri nhũm mẽ kãm:

⁵ —Nà tanhmã na mẽ anhõ pãwtija kute? Anẽ.

Nhũm mẽ kãm:

—ãm kêp 7 pix. Nẽ kaxyw tep kwý no ãm grêre. Anẽ.

⁶ Hãmri nhũm mẽ kuma nẽ mẽ kot mar o kuhê xwýnhjê mã anẽ nhũm mẽ kuma nẽ hkrĩ pa. Hãmri nhũm pãwti jamý nẽ ho Tĩrtũm wý nẽ kãm:

—Pa Papaj. Nà ka na apê mẽ inhmã mẽ inhõ ho apa xwýnh. Jakamã amex o amex. ãm amex kumrêx. Anẽ.

Hãmri nẽ mẽ kãm ho hkry pa nẽ hkôt mẽ pa ho mẽ pa xwýnhjê mã kugõ nhũm mẽ ho mẽ hipêx pa.

⁷ Nhũm hpãnhã tepta py nẽ mã ho anẽ nẽ ho Tĩrtũm wý. Hãmri nẽ hkôt mẽ pa ho mẽ pa xwýnhjê mã kugõ nhũm mẽ mã ho anẽ nẽ hamý nẽ ho mẽ hipêx pa.

⁸⁻⁹ Hãmri nhũm mẽ ohtõ rax kumrêx tã piitã apku nẽ õhy htu pa. Mẽmyjaja kêp 4.000 nẽ kaxyw mẽ hprõjaja nẽ mẽ hkra-jaja. Tã nhũm Jejus mẽ apkur xàja o mẽ hipêx pa. Nhũm hkôt mẽ pa ho mẽ pa xwýnhjaja hakrêx o akuprõ nẽ ho kawà ho 7 nẽ ho nýt. Hãmri nhũm Jejus ma akupým mẽ õ krĩ hwýr mẽ kot mar xwýnhjê jano nhũm mẽ ma akupým hapêx.

¹⁰ Hãmri nhũm Jejus hkôt mẽ pa ho mẽ pa xwýnhjê mẽ ro hã kanôre hkrem agjê nẽ mẽ hkwým ma Tamanut wýr mō.

Parijew nhõ xwýnh kwý kot mẽmoj tã Jejus kamã hamak ã mẽ harênh

Matêwre 12.38-42, 16.1-4; Rukre 12.54-59

11 Tã nhũm mẽ Tamanut wỳr pøj nhũm Parijew nhõ xwỳnh kwỳjaja Jejus pumu nẽ ma hwỳr mra nẽ mẽmoj tã kuwỳ nẽ kãm:

—Pa. Ot pa mẽ awỳr mra. Kwa mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu nẽ Tĩrtũm kot mẽ ixwỳr amẽn hã akõt ijamaxpẽr kurẽ kumrẽx. E tokyx. Anẽ.

Kot tee ri mẽ kãm mẽmoj to anhỳr kaxyw nẽ ho anhỳr kêt nhũm mẽ kot hã omunh nẽ ma hkwyjẽ mã ho kapẽr punuj kaxyw nhũm mẽ ã hẽx rom kãm kapẽr anẽ.

12 Nhũm ra kãm mẽ kot amnhĩ kaxyw hkõt hamaxpẽr kêt kãm ã kapẽr anhỳr mar kaga nẽ. Hãmri nẽ tee ri amnhĩ tã mẽ hamaxpẽr ã mẽ omu nẽ htyk xà mẽnh tỳx nẽ mẽ kãm:

—Hẽxta waa nẽ. Mẽ ajamaxpẽr punuj pix o na ka htem ri ajamaxpẽr o apa. Ixpẽ Tĩrtũm kot mẽ awỳr inhmẽn hã xwỳnh tã ka mẽ ja hã ixkõt ajamaxpẽr kêt nẽ. Nà mo kaxyw kot pa kêt mẽ amã mẽmoj to anẽ? Kot paj ho anẽ ka mẽ omu nẽ ãm omu nẽ ixkõt ajamaxpẽr kêt nẽ. Nà kot paj mẽ amã mẽmoj to anhỳr kêt nẽ. Anẽ.

13 Hãmri nẽ mẽ kure nẽ hkõt mẽ pa ho mẽ pa xwỳnhjẽ mẽrohã ma mra nẽ akupỳm kanõre hkrem agjẽ nẽ ma xarmã mõi.

Jejus kõt mẽ pa xwỳnhjaja kot hprĩ hã omunh kêt ã mẽ harẽn h

Matêwre 16.5-12; mããnẽn Makre 6.52

14 Tã nhũm mẽ kormã kanõre kamã xarmã mõi rôm nhũm Jejus kõt mẽ pa ho mẽ pa xwỳnhjaja tee ri mẽ apkur xà japẽr nẽ axpẽn mã:

—Kwa hẽxta waa nẽ. Na pu mẽ panhõ pãwti re nẽ amnhĩ kõt o pamõi kêt nẽ. Nẽ ãm pixire nẽ o mõi. Anẽ.

15 Hãmri nhũm Jejus tee ri mẽ kuma nẽ tanhmã hã mẽ kãm kapẽr to. Nom mẽmoj tã kuxi nẽ mẽ kãm awjarẽ nẽ mẽ kãm:

—Kwa oko kêt ka mẽ amnhĩ nẽ Parijew nhõ xwỳnh mẽ Pahi Eroxo nhõ pãw kaxkrit xà pumunh mex nẽ. Anẽ.

16 Hãmri nhũm mẽ kuma nẽ tee ri kapẽrja kukamã hamaxpẽr pẽ hã axpẽn kukjẽr o hkrĩ nẽ axpẽn mã:

—Kwa mo na ri ã mẽ pamã pãw kaxkrit xà jarẽn anẽ? Mãn mẽ panhõ pãwti hkêt

ã mẽ pahpumu hã na ri ã harẽn anẽ nà? Anẽ.

17 Hãmri nhũm Jejus mẽ kapẽr ã mẽ kuma nẽ mẽ kãm:

—Kwa mon ka wem ãm xatã axpẽn mã mẽ panhõ pãwti hkêt jarẽn pix o mõi? Xàn pa hte mẽ apyrà nẽ tee ri mẽ paxàpkur xà hkêt kukamã ijamaxpẽr o ixpa? Nà inhmã ja tanhmã kute hkêt.

18 Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nẽ mẽ ajamak o ixkapẽr mar mex tã aprĩ hã mar tỳx kêt. Kwa wem ixte amnhĩ nhĩpẽx mã ajamaxpẽr tỳx nẽ. E mẽ inhmã mẽmoj jarẽ.

19 Jãã ixte mẽ kệp 5.000 mã pãwti kệp 5 nhĩrẽnhta. Tanhmã na ka prem hakrẽx o akuprõ nẽ ho kawà ho nỳt to? E mẽ atõ inhmã harẽ. Anẽ

Hãmri nhũm ja kãm: “Na pa prem ho kawà ho 12 nẽ ho nỳt.” Anẽ.

20 Nhũm kuma nẽ mẽ kãm:

—Tỳ na pre hakrẽx ã kawà kệp 12. Tã ham ixte mẽ kệp 4.000 mã pãwti kệp 7 nhĩrẽnhta. Tanhmã na ka prem hakrẽx ho akuprõ nẽ ho kawà ho nỳt to? Anẽ.

Nhũm ja kãm: “Na pa prem ho 7.” Anẽ.

21 Hãmri nhũm kuma nẽ mẽ kãm:

—Tỳ ra ixte mẽ anoo mã ã ja ho anhỳr o axkrut tã ka mẽ ra hã ano hkêt nẽ arĩ axpẽn mã mẽ panhõ pãwti hkêt pix jarẽn o ixkõt mõi. Kormã mẽ ate ixàhpumunh tỳx ã ixpumunh kêt. Anẽ.

Jejus kot akupỳm nohkre xwỳnh o mex ã harẽn h

Juãw 9.1-7

22 Tã nhũm mẽ ma krĩ pẽ Pesêj wỳr mõi nẽ ra hwỳr pøj. Hãmri nhũm krĩ nhõ xwỳnh kwỳjaja mẽ omu nẽ Jejus wỳr mẽhõ myja o tẽ. Ra nohkre nẽ rĩt kêt nẽ pa xwỳnhja nhũm mẽ hpa hã kupyn hwỳr o tẽ. Hãmri nẽ ho kuwỳ nẽ kãm:

—Pa Pahihti? Ot pa mẽ awỳr ja ho tẽ. Kwa hã anhĩhkra xi nẽ akupỳm mẽ inhmã no ho mex. Anẽ.

23 Hãmri nhũm mẽ kuma nẽ nohkre xwỳnhhta pumu nẽ hpa hã kupy nẽ o tẽ nẽ krĩ pẽ hõ kato nẽ nhỹri mẽ hkàx ã o xa. Hãmri nẽ no hã argõx mẽ nẽ hã ãhkra xi nẽ kãm:

—E mãn ka mẽmoj pumu nà? Anẽ.

²⁴ Hāmri nhūm kuma nē hkrākato nē ri rīt hāmri nē kām:

–Tỳ na pa mẽmoj pumu. Nom ixprĩ hā omunh mex kêt nē. Te mẽmo pĩ hpār kwỳ ri mrar pyrāk. Anē.

²⁵ Hāmri nhūm axte no hā ìhkra xi nhūm tã rīt mex nē. Ri hprĩ hā mẽmoj piitã omunh mex nē.

²⁶ Hāmri nhūm Jejus akupỹm òrkwỹ hwỳr kumē nē kām:

–E kēr ka kape hā ri amrar kêt nē. Ām ma ma akupỹm anhōrkwỹ hwỳr atēm kurē kumrēx. Anē.

Jejus kot amnhĩ tã hkôt mẽ pa xwỳnhjê kukjēr ā harēnh

Matêwre 16.13-20; Rukre 9.18-21

²⁷ Tã hāmri nhūm Jejus ma hkôt mẽ pa ho mẽ pa xwỳnhjê mẽ mẽ ma mō. Ma krĩ pē Sejarej Piripos pu hā krĩ hkwỳ hkôt mō. Nē kormã pry hā mō nhūm Jejus amnhĩ tã hkôt mẽ pa ho mẽ pa xwỳnhjê kukja nē mẽ kām:

–Kwa mẽ inhmã mẽmoj jarē. Tanhmã na htem ahpỹnhã ri axpēn mã ijarēnh to wehe? Anē.

²⁸ Hāmri nhūm mẽ kām:

–Nà na htem ahpỹnhã tanhmã ajarēnh to. Na hte kamã mẽ hkwỳjaja axpēn mã ato finat Juãw Paxis ā ajarē. Nē kamã mẽ hkwỳjaja ato finat Eris ā ajarē nē mẽ hkwỳjaja apē Tĩrtũm nhỹ hā kapēr o pa xwỳnh ra htyk xwỳnhjê hō hā ajarē. Ā na htem ahpỹnhã axpēn mã ajarēnh anhỹr o pa. Anē.

²⁹ Hāmri nhūm mẽ kuma nē mẽ kām:

–No we mẽ kajaja? Ixpē mēhō hā na ka htem axpēn mã ijarē? Anē.

Hāmri nhūm Simãw Pêtre kām:

–Nà mẽ pajaja na pa htem apē Tĩrtũm kot mẽ ixkaxyw axãm nē mẽ ixwỳr amēnh xwỳnh ā ajarē. Nē apē mẽ ixpiitã mẽ inhō Pahi Maati hā ajarē. Ā na pa htem axpēn mã ajarēnh anē. Anē.

³⁰ Hāmri nhūm kuma nē mẽ kām:

–Nà ãm hāmri na ka htem ā ijarēnh anē. Ā ixte anhỹr. Kwa nom kwa kēr ka mẽ inhma. Kēr ka mẽ kormã ā akwỳjê mã ijarēnh anhỹr kêt nē. Anē.

Jejus kot amnhĩ kukamã amnhĩ jarēnh ā harēnh

Matêwre 16.21-23; Rukre 9.22

³¹ Tã nhūm Jejus amnhĩ kukamã hkôt mẽ pa ho mẽ pa xwỳnhjê mã tanhmã amnhĩ jarēnh to nē mẽ kām:

–Nà ra mẽ ate Tĩrtũm kot mẽ akaxyw ixãm ā ixpumunh mex. No mẽ pahkwỳjaja kãm ja hā ijarēnh mar nē ixpumunh prãm kêt. Ijaew krãhtũmjê mẽ Tĩrtũm kapēr tũm o mẽ ahkre o mẽ pa xwỳnhjê mẽ patre krãhtũmjaja na mẽ kãm ja hā ixpumunh prãm kêt. Jakamã koja mẽ nhỹrmã ixpynē nē ixtak rax nē ixpĩ. Nom kot paj ixtyk ā ixtã apkati axkrunēpxi hāmri nhūm Tĩrtũm akupỹm ixto ixtĩr. Anē.

³² Hāmri nhūm mẽ kot hpĩr ā amnhĩ jarēnh ma nē tee ri hkukamã hamaxpēr. Hāmri nhūm Simãw Pêtreja hwỳr tē nē hkwỳjê pē ho kato nē mẽ hkàx ā o xa nē kām:

–Kwa nà Pahihti. Koja Tĩrtũm anē mẽ omunh mex nē nhūm mẽ ā anhĩpêx anhỹr kêt nē. Kwa ri ā kapēr anhỹr kêt nē. Anē.

³³ Hāmri nhūm kuma nē hwỳr apkjê nē pu hā hkôt mẽ pa ho mẽ pa xwỳnh piitã omu. Hāmri nē mẽ hamak mã Simãw Pêtre mã kapēr nē kām:

–Tk. Kwa na ka ā inhmã akapēr anhỹrja o te Satanasti nhỹ hā akapēr pyrāk. Tĩrtũm nhỹ hā na ka ā inhmã akapēr anhỹr kêt nē. Ām jar mẽ kãm Tĩrtũm kapēr mar prãm kêt xwỳnhjê jamaxpēr o na ka ajamaxpēr nē ā inhmã akapēr anē. No Tĩrtũm jamaxpēr o ajamaxpēr kêt nē. Anē.

Jejus krajaja tanhmã kot amnhĩ nhĩpêx hto hã mẽ harēnh

Matêwre 6.24-28; Rukre 9.23-27; Juãw 12.24-26; mããnēn Apokarip 2.10, 12.11

³⁴ Tã nhūm Jejus amnhĩ wỳr mẽ kot mar o kuhê xwỳnhjê mẽ hkôt mẽ pa ho mẽ pa xwỳnhjê mã anē nhūm mẽ hwỳr axkamē nē kuhê. Hāmri nhūm tanhmã mẽ ahkre hto nē mẽ kām:

–E mẽ inhma. Kot kaj mẽ ixkôt amnhĩ xunhwỳr ā amnhĩ jarē hā kot kaj mẽ mããnēn amnhĩ jarēnh o: “Jejus kēp inhō Pahihti jakamã kot paj ãm kapēr kôt pix mã amnhĩ nhĩpêx rãhã ho ri ixpa. Kwār ixkwỳjaja tanhmã hā inhĩpêx to pa arĩ hkôt amnhĩ nhĩpêx rãhã ho ixpa.” Anhỹr o amnhĩ jarē.

³⁵ –Koja mẽ ixtã mẽ atõx pĩ rỳ ixtã tanhmã mẽ ato ka ty. Ate tanhmã ijarēnh to ho apa hã nhũm mẽ apĩ. Tã nom koja akaxwýnh ma inhõ krĩ hwýr àpir kurẽ kumrẽx nẽ kamã atĩr tũm nẽ amex rãhã nẽ apa ho apa. Nom kot kaj mẽ jar atĩr prãm xàj ixkaga hãmri nẽ hwýr axàpir kêt nẽ.

³⁶⁻³⁷ –Nẽ koja mēhõ hikukrẽx gryk ã Tĩrtũm kaga. Hãmri nẽ nhỹrmã ty nẽ ý kamã kuwy hwýr ma mõ nẽ amnhĩ kõt kukrẽx õ hpyr nẽ o mõi kêt nẽ. Koja tee ri kuwy hwýr mõi pymaj amnhĩ nẽ hikukrẽx rax o amnhĩ pãnhã amnhĩrer prãm kaprỳ. Tanhmã koja amnhĩ to nẽ Tĩrtũm mã amnhĩre nẽ ma õ krĩ hwýr api? Koja ã amnhĩ nhĩpẽx anhỹr kêt nẽ.

³⁸ –Nẽ koja mēhõ ixte mẽ ahkre hã inhma nhũm ja kęp omnuj japēr. Nhũm kot mẽ kãm ixprãm nõkati xwýnhjẽ hkõt pa gryk ã ixkaga. Hã kot paj nhỹrmã mẽ ato amnhĩptàr kaxyw akupýn wrỳ nẽ amnhĩ xwar kot ixkaga xwýnhta kaga. ãm hãmri na pa mẽ amã ja hã amnhĩ jarẽ. Kot paj nhỹrmã inhõ Papaj nhỹ hã ixte mẽ ho amnhĩptàr kaxyw akupýn wrỳ nhũm kapēr o mẽ wrỳk xwýnhjaja man ixkõt wrỳ. Pa mẽ wrỳ hãmri nẽ ra mẽ kot ixkaga xwýnhjaja pa amnhĩ pyrã nẽ amnhĩ xwar mẽ hkaga hpa. Anẽ.

9

¹ Nhũm Jejus arĩ mẽ kãm kapēr nẽ mẽ kãm:

–ãm hãmri na pa mẽ amã amnhĩ jarẽ. Kot paj nhỹrmã akupýn ixte mẽ ato amnhĩptàr kaxyw mẽ awýr wrỳ kãm ga. Tã kot kaj mẽ akwýjaja kormã atĩr ri ja kukamã tanhmã ixte amnhĩ nhĩpẽx to hã ixpumu. Anẽ.

Jejus hirã htýx kãm ãm ã harēnh

Matêwre 17.1-9; Rukre 9.28-36; mããnẽn Sikũn Pêtre 1.16-18

² Tã nhũm arĩgro kęp 6 nẽ hapêx nhũm Jejus ma nhỹri hixêt prêk wýr tẽ. Nẽ Simãw Pêtre nẽ Xiakre nẽ Juãwja nhũm ma amnhĩ kõt wa mẽ o mõ. Nhũm wa mẽ ahte mõ nẽ hixêt prêk ã api nẽ himõk ã kuhẽ. Hãmri nhũm Jejus axtem nẽ xa.

³ Ra ê haka htýx kumrẽx nẽ xa.

⁴ Hãmri nhũm ja wa kaxkwa rũm hwýr wrỳ nẽ kuri kãm kapēr. Finat Mojes mẽ

finat Erisja wa wrỳ nẽ kuri kãm kapēr o xa. Tĩrtũm amnepêm amnhĩ wýr wa ho àpir tã nhũm wa akupýn wrỳ nẽ kãm kapēr.

⁵⁻⁶ Nhũm wa mẽ mex kumrẽx nẽ hirã htýx kãm kuhẽ nhũm Jejus kõt mẽ mõi xwýnhjaja wa mẽ omu nẽ mẽ kamã no puma nẽ. Nẽ tee ri mẽ kãm tanhmã kapēr to hkukamã hamaxpēr. Hãmri nhũm Simãw Pêtre hamaxpēr nẽ Jejus mã kãm:

–Kwa Pahihti. Nã ãm hãmri na pu mẽ amnẽ mõ. Kwa pu mẽ kritpêm jar axkamẽ nẽ tokyx panojarêt kêt nẽ. Pa mẽ amã pô nhĩrõnh o axkrunẽpxi nẽ hipêx. Amã nẽ Mojes mã nẽ Eris mã hõ nhĩpẽx ka mẽ kamã akrĩ. Kwa xat pa mẽ amã ho anẽ nã? Anẽ.

⁷ Hãmri nhũm kakrã jaka htýx wrỳ nẽ wa mẽ hkunor pa nhũm wa mẽ kamã kuhẽ. Hãmri nhũm kakrã kamã Tĩrtũm mẽ kãm kapēr nẽ mẽ kãm:

–Ota Ixkra xa. Inhmã hapê ho inhmã hapê. Kêr ka mẽ kapēr mar týx rãhã ho ri apa. Anẽ.

⁸ Hãmri nhũm mẽ kuma nẽ amnhĩ pu hã rĩt nhũm ãm Jejus pix mẽ kuri xa nhũm Mojes mẽ Erisja wa ra ma akupým api nhũm mẽ ãm Jejus pix pumu.

⁹ Hãmri nhũm mẽ ma akupým hkwýjẽ hwýr wrỳk o mõ nhũm Jejus mẽ kãm:

–Kwa kêr ka mẽ ham mẽ ate mẽmoj pumunh xwýnhta kormã nhãm mẽ kãm harēnh kêt nẽ. Koja mẽ mẽmo arĩgro hã ixpĩ hãmri nhũm Tĩrtũm akupým ixto ixtĩr ka mẽ rĩ kormã mẽ kãm ja hã ijarēnh o ri apa.

¹⁰ Anẽ hãmri nhũm mẽ kuma nẽ mẽ kãm harēnh kêt nẽ. ãm axpẽn mã pix mã harẽ nẽ kot akupým htĩr ã amnhĩ jarēnhja ã axpẽn kukjêr o pa nẽ axpẽn mã:

–Kwa mo na ri ã akupým htĩr ã amnhĩ jarēnh anẽ? Tanhmã kot we amnhĩ to nẽ htyk tã akupým htĩr? Anẽ.

Hãmri nẽ tee ri hkukamã hamaxpēr o hkõt pa.

Juãw Paxis te kot Eris pyrãk ã harēnh

Matêwre 11.13-15, 17.10-13

¹¹ Hãmri nhũm mẽ kormã ahpar mã wrỳk o mõi mẽ nhũm Jejus kõt mẽ mõi xwýnhjaja mẽmoj tã hkukja nẽ kãm:

–Kwa mẽ inhmã mẽmoj jarẽ. Na hte Tĩrtũm kapēr tũm o mẽ ahkre xwýnhjaja mẽ inhmã: “Eris kumrẽx koja Tĩrtũm mẽ

pahwÿr kumê nhÿm Krisja hapu hã wrÿ.” Anê. Na htem ã mē inhmã war ajarênh anê. Tã ka na ka ra wrÿ nom nhÿm kormã Erisja akukamã wrÿk kêt nê. Anê.

12-13 Hãmri nhÿm mē kãm:

—Nà ãm hãmri na htem mē amã ã ja jarênh anê. Na pre ra ixkukamã te kot Eris kot amnhÿ nhÿpêx pyrãk xwÿnhnta tē nê ixkutêp mē kãm ijarênh o pa. Nom mē kot ixkukamã ijarênh xwÿnh ã omunh kêt jakamã na prem axtem nê kãm tanhmã hipêx to hprãm xà hkôt tanhmã hipêx kati hton kupÿ. Tã koja mē ã hipêx anhÿr pyrã nê mã ixto anê nê inhÿpêx kati nê tokyx mē kãm ixprãm kêt xwÿnhjaja ixpynê nê ixpÿ pa amnhÿ xà htÿx kamã ijamak kãm ty. Tÿrtÿm kapêr ã kagã htÿm kot wa ijamê wa ixkukamã wa ijarênh xà hkôt. Anê.

Jejus kot mēhō hkra nê mēkarōmnuti janor ã harênh

Matêwre 17.14-21; Rukre 9.37-43

14 Hãmri nhÿm Jejus nê Simãw Pêtre nê Xiakre nê Juãwja mē akupÿm hkwyjê hwÿr hpôx o mra nê amnhÿ kukamã hkwyjê pumu nhÿm mē ohtô nê mē hã akuprô nê mē kãm kapêr. Nhÿm Tÿrtÿm kapêr tÿm o mē ahkre ho mē pa xwÿnhjaja mēmoj tã mē hkukjêr o kuhê.

15 Jakamã nhÿm Jejus mē hwÿr hpôx o tē nhÿm mē pikuprônh xwÿnhjaja amnhÿ wÿr omu nê hkÿnh nê. Hãmri nê kutã hprôt nê kãm:

—Pa. Nà ãm hãmri na ka akupÿn mē ixwÿr tē. Anê.

16 Hãmri nhÿm mē kãm:

—Kwa mēmoj tã na ka mē axpên mã axàkjêr o akuhê? Anê.

17-18 Hãmri nhÿm mēhō myja kãm:

—Nà ixkra hã na pa mē axpên mã ixkapêr. Na pre mēkarōmnuti ixpê hwÿr axà nê tanhmã ixpê ho nhÿm kapêr kêt nê pa. Nhÿm hte xatã tanhmã ixpê ho nhÿm pykap amnhÿ rē nê hakwa jamrô ho hikwÿ. Hãmri nê à htÿx kamã ama nê amnhÿ nham o axpên kamnhar tÿx kumrêx pê htÿx pa nê hikwÿ nê ixpê omnuj tÿx nê. Na hte ã mēkarōmnuti nhÿ hã amnhÿ nhÿpêx anhÿr o pa. Jakamã na pa ate inhmã ho mex kaxyw man o tē nê tee ri ajapêr. Hãmri nê ho akôt mē pa ho mē pa xwÿnhjê hwÿr nhÿm mē

kot inhmã ho mex kaxyw tee ri tanhmã ho hkapyr. Anê.

19 Hãmri nhÿm Jejus kuma nê hkôt mē pa ho mē pa xwÿnhjê mã kãm:

—Hêxta waa nê. Ra mē ate Tÿrtÿm nhÿ hã ixte mē ho mex ã ixpumunh ryy htã ixpyrà nê ã amnhÿ nhÿpêx anhÿr kêt nê. Mãn ka mē kormã kaxyw Tÿrtÿm kôt ajamaxpêr tÿx kêt nê. E amnê ixwÿr akra ho tē pa omu. Anê.

20 Hãmri nhÿm mē hwÿr o tē nhÿm mēkarōmnuti Jejus pumu nê tanhmã hkrata o htÿx to nhÿm pykap tēn nê hakwa jamrô nê amnhÿ rēnh o nō.

21 Nhÿm Jejus omu nê hipêx mã:

—Kwa tanhmã na ra kot amnhÿ nhÿpêx ã mytwrÿ kute? Anê.

Nhÿm kãm:

—Nà hprÿre rÿm na hte ã amnhÿ nhÿpêx anhÿr o pa.

22 Na hte mēkarōmnuti xatã ixpê hpÿr kaxyw kuwy kamã kurê nê gôx kãm kurê. Kwa kot ka ate ho mex kukamã axãhpumunh japêr nê wa ixkamã axukapÿr nê akupÿm inhmã ho mex. Anê.

23 Hãmri nhÿm Jejus kãm:

—Xàn ka tee ri ixte ho mex kaxyw ixkukamã ajamaxpêr? Nà ixte mēmoj piitã ho anhÿr kaxyw ixãhpumunh tÿx kênã. Kot ka mē atô mēmoj tã amnhÿ kaxyw ixkôt ajamaxpêr tÿx hã kot paj amã ho anê. Anê.

24 Hãmri nhÿm kuma nê kãm hkra mex prãm tÿx xàj kapêr tÿx nê kãm:

—Nà na pa amnhÿ kaxyw akôt ijamaxpêr. Nom kot kaj tanhmã ixkrã hto pa akôt ijamaxpêr tÿx rãhã ho ri ixpa Pahihti. Anê.

25 Rôm nhÿm mē ohtô rax nê hwÿr kormã mra nhÿm Jejus amnhÿ wÿr mē omu hãmri nê mēkarōmnutija mã kapêr kurê kumrêx. Nê kãm kapêr kãm hihtÿx nê kãm:

—Pa mēkarōmnuti. E apê mē ho mē kapêr kêt nê mē umar kêt o apa xwÿnh ã pa amã ixkapêr ka inhma. Kêr ka mē hkrata pê akato nê ma amôr o mō nê axte tanhmã ho hkêt nê. Anê.

26 Hãmri nhÿm tee ri kot kãm karôja ma nê gryk xàj xatã amÿra nê mē hkrata o htÿx kumrêx nhÿm htertê tÿx o nō. Hãmri nhÿm kêt kato nê ma tē nhÿm te htyk pyrã nê nō nhÿm mē tee ri omu nê ra htyk ã hkamnhÿx.

27 Hãmri nhÿm Jejus hpa hã kupy nê kãnhmã ãm nhÿm akupÿm mex nê kãnhmã

xa nê ri mra. Nê tãm kapêr o mra nê umar mex nê.

²⁸ Tã nhũm Jejus hkôt mẽ pa ho mẽ pa xwýnhjê mērohã ma akupỹm amnhĩm hikranh xà hã ixkreja wýr mra nê hwýr agjê nê hkrĩ. Hãmri nhũm Jejus kôt mẽ pa ho mẽ pa xwýnhjaja amnhĩ tã hkukja nê kãm:

—Kwa mẽ inhmã mẽmoj jarê Pahihtı. Na pa mẽ tee ri axwakre kamã mẽ hkrata nê mẽkarõmnuti janor kaprý. Kwa mon pa mẽ apyrà nê ja ho anhýr mex kêt nê? Anê.

²⁹ Hãmri nhũm mẽ kãm:

—Nà axtem na mẽkarõmnuti ja. Na htem mẽ nê hanor tokyx anhýr kêt nê. Na htem ho Tirtũm wýr tỳx nê rĩ kormã hano. Anê.

Jejus kot htyk kukamã amnhĩ jarênh

Matêwre 17.22-23; Rukre 9.44-45

³⁰⁻³¹ Tã nhũm Jejus mẽ hkôt ri mẽ pa ho pa xwýnhjê mẽ krĩja rũm hapôj nê ma nhãm mõ. Nê ma pyka pê Garirej kahti hkôt mõ. Nom mẽ piitã mẽ hkàx ã mõ. Jejus kormã kot amnhĩ tã tanhmã hkôt mẽ pa ho mẽ pa xwýnhjê jahkre hto ho pa jakamã kãm mẽ hkàx ã mẽ o pa hprãm nê. Hãmri nê amnhĩ kukamã mẽ kãm tanhmã amnhĩ jarênh to nê mẽ kãm:

—E kot paj mẽ amã tanhmã amnhĩ jarênh to ka mẽ inhma nê inhmar tỳx nê. Kojã mẽ kãm ixprãm kêt xwýnhjaja tokyx mẽ kãm ixtã amýnê nhũm mẽ ixpĩ. Kot paj ixtyk ã ixtã apkati axkrunêpxi hãmri nhũm Tirtũm akupỹm ixto ixtĩr. Kwa kêr ka mẽ ja ma nê hã anohtỳx nê ho apa. Anê.

³² Hãmri nhũm mẽ tee ri ã kot amnhĩ jarênh anhýrja ma nê axpên mã:

—Kwa mo na ri ã mẽ pamã amnhĩ jarênh anê? Nà kêp mẽ panhõ Pahi Maati hã kot amnhĩ jarênh kênã kot kêt mēhõ kupĩ.

Anhýr o axpên mã harênh o hkôt mõ. Hãmri nê ã kot amnhĩ jarênh anhýr mar prãm kêt jakamã hprĩ hã tanhmã hkukjêr to hkêt nê. ãm akryk hkôt mar o mõ.

Mẽ kot amnhĩ to rũnh xwýnh jarênh

Matêwre 18.1-5; Rukre 9.46-48

³³⁻³⁴ Tã nhũm Jejus mẽ hkôt mẽ pa ho pa xwýnhjaja kormã ma krĩ pê Kapanau hwýr mõ nhũm hkôt mẽ pa ho mẽ pa xwýnh pê 12jaja tanhmã amnhĩ kukamã hamaxpêr to hãmri nê axpên mã:

—Kwa mẽ pahtõ kot puj we nhýrmã pahpê pahi nê mẽ ho amnhĩptar rax o ri pahkwýjê jakre?

Anhýr o axpên kukjêr o Jejus kôt mõ. Nê axpên mã: “Nà pa.” Nhũm mẽ hkwyjaja: “Nà kêt pa.” Anhýr o hkôt mõ. Hãmri nhũm Jejus mẽ mar o mõ. Hãmri nhũm mẽ mõ nê nhýri amnhĩm hikranh xà hã ixkre hwýr pøj nê hwýr agjê nhũm mẽ kãm:

—Kwa mẽmoj tã na ka mẽ pry hã amnhĩ jarênh o mõ? Anê.

Hãmri nhũm mẽ tee ri kuma nê hpijaam nê. Nê kãm tanhmã amnhĩ jarênh to hkêt nê.

³⁵ Jakamã nhũm Jejus nhý nê mẽ kãm anê nhũm mẽ kuri hkrĩ pa nhũm mẽ kot mẽ kãm mẽ ho amnhĩptar rax prãmta ã mẽ kãm kapêr nê mẽ kãm:

—E mẽ inhma. Ka mẽ atõ amã mẽ ho amnhĩptar rax prãm. Hã kêr ka te apê mẽ piitã mẽ kãm amarĩ axapênh xwýnh pyrak o amnhĩ nhĩpêx o mẽ hkôt apa. Jao mẽmoj to mẽ kutã anojarêt rãhã nê. Anê.

³⁶ Hãmri nê amnhĩ wýr mēhprĩre hõ mã hpa ho apê nhũm hwýr tẽ nhũm kumý nê o nhý nê hã mẽ kãm kapêr nê mẽ kãm:

³⁷ —E mẽ inhma. Kêr ka mẽ apê pahi pyrak o tanhmã amnhĩ jarênh to ho ri apa hkêt nê. ãm te amarĩ ri mẽ apa pyrak o amnhĩ nhĩpêx o ri apa. Jao nhýri mēhprĩre hõ pumu nê kamã axukaprĩ nê kãm mẽmoj tanhmã ho rý kãm mẽmoj gõ. Hãmri nê ã amnhĩ nhĩpêx anhýr o te pa ate tanhmã ixto mex to pyrak o amnhĩ nhĩpêx. Nê kot ka mẽ atõ pa tanhmã ixto mex to nê te ate Tirtũm o mex pyrak o amnhĩ nhĩpêx. E kêr ka mẽ amã amnhĩ to rũnh prãm nê ã amnhĩ nhĩpêx anhýr o ri apa. Anê.

³⁸ Hãmri nhũm Juãw nhýhýnh tẽn mẽ hwýr axà nê Jejus mã:

—Kwa Pahıhtı. O mũj mēhõ kêp mẽ pahkwý hkêt tã anhý hã mẽ nê mẽkarõmnuti janor o pa. Pa mẽ tee ri ja hã omu nê kêp mẽ pahkwý hkêt jakamã pa mẽ ã kot amnhĩ nhĩpêx anhýrja nê kãm ixkapêr. Anê.

³⁹⁻⁴⁰ Hãmri nhũm kuma nê kãm:

—Kwa nà nê tanhmã kãm nê hkêt nê. Kojã mēhõ inhý hã aa mẽ kot mẽmoj pumunh kêt kwý ho anê hãmri nê kêp mẽ panhõ nê ri mẽ pahkwým tanhmã mẽ

ahkre hto ho pa hkêt nê. Ra mẽ pahkôt kot amnhĩ nhĩpêx mã kênã. Jakamã kwa mẽ ja nê tanhmã kãm nê hkêt nê. Kwãr mãmrĩ ã amnhĩ nhĩpêx anê. Ja mex kênã.

⁴¹ —Koja mẽhõ nhỹri mẽ atõ amã kôr ã apumu nê hamaxpêr o: “Kwa Jejus kôt ri pa xwýnh mũj kãm kôr. E pa kãm gô hkwý kê ho ixkõ.” Anhỹr o hamaxpêr nê apê ixkwý hã amã gô hkwý ka ho ixkõ. Nhũm ãm kot amã gô pix nhõr nhũm ate ho akõm tâ nhũm Tĩrtũm atã omu nê ho mex rax nê. Anê.

Mẽ pahte amnhĩ tomnuj pymaj tanhmã amnhĩ nhĩpêx to hã mẽ pajarênh

Matêwre 18.6-9; Rukre 17.1-2

⁴² Nhũm Jejus arĩ hkôt mẽ pa ho mẽ pa xwýnhjê mã kapêr nê mẽ kãm:

—Nê mẽ kot ixkôt amnhĩ xunhwýr tohtuj anhỹr xwýnhjaja. Koja mẽhõ ma mẽ hwýr tẽ nê inhnê mẽ kãm kapêr. Mẽ kot mẽ mar nê tanhmã amnhĩ tomnuj to hprãm xàj hêx rom mẽ kãm kapêr nhũm mẽ mar xà hkôt tanhmã amnhĩ tomnuj to. Hã koja Tĩrtũm ja hã omu nê kot inhnê tanhmã kãm nê xwýnhta pumu nê homnuj týx nê. Te mẽ kot mẽhõ pynênh nê mut ã kên pytĩ hõ nhõr nê ma o htêm nê gô xupým rax kãm mẽnh pyræk o hipêx. Te ho ja pyræk no ãm homnuj týx o hakre.

⁴³⁻⁴⁷ —E kwa mẽ o kora. Kot kaj mẽ anhĩhkra rý apar o tanhmã amnhĩ tomnuj to. Hã kôr ka mẽ axte ã amnhĩ nhĩpêx anhỹr pymaj te ate amnhĩ pê anhĩhkra rý apar krãhyr nê mẽnh pyræk o amnhĩ nhĩpêx nê axte ã amnhĩ tomnuj anhỹr kêt nê. Rý ka mẽ ano ho mẽmoj punuj pumu. Hãmri nê kãm ajamaxpêr pix o apa pymaj te ate amnhĩ pê ano katøk nê mẽnh pyræk o amnhĩ nhĩpêx nê nhãm arĩt kurê kumrêx. Kêr ka mẽ ã amnhĩ nhĩpêx o apa rãhã nê. Hãmri nê nhỹrmã ty nê ma Tĩrtũm mẽ wa inhõ krĩ hwýr api. No kot ka mẽ arĩ akutã ano nê arĩ akutã apar nê arĩ akutã anhĩhkra rãhã ri mrar tâ tõhã tanhmã ho amnhĩ tomnuj to. Hãmri nê nhỹrmã ty nê ma mẽ kot amnhĩ xà htýx kamã hamak tũm xà pê kuwy maatita wýr ma apa.

⁴⁸ Kuwyja kamã na htem mẽ kot amnhĩ tomnuj mýrapê amnhĩ xà htýx kamã hamak rãhã ho pa ho pa hãmri nê aa hapõx kêt nê.

⁴⁹ ã koja mẽ kot amnhĩ tomnuj o mẽ pa xwýnh piitã amnhĩ nhĩpêx anhỹr rãhã nê pa ho pa.

⁵⁰ Jakamã kwa kêr ka mẽ axpên to mex rãhã ho ri apa. Nom axpên kãm agryk nê tanhmã axpên nhĩpêx to ho ri apa hkêt nê. Anê.

Nhũm pre ã Jejus hkôt ri mẽ pa ho mẽ pa xwýnhjê jahkre anê.

10

Mẽ pahte axpên kaga nê Jejus kot mẽ pahkurê

Matêwre 5.31-32, 19.1-12; Rukre 16.18; mããnên Wam Korĩt 7.10-16

¹ Tã nhũm Jejus mẽ hkôt mẽ pa ho pa xwýnh mẽrohã ma pyka pê Jutej wýr mõ. Hãmri nê pyhti pê Jotãw ã rê nê hpãnhã ma xarmã mõ. Nhũm mẽ axte mẽ hã akuprõ nhũm kê Jejus axte mẽ ahkre ho xa.

² Hãmri nhũm Parijew nhõ xwýnh kwýjaja hwýr mra. Mẽ kot hêx rom kamã hamak nê mar nê tanhmã ho kapêr punuj to kaxyw hwýr mra nê kãm:

—Pa. Ot pa mẽ mẽmoj tâ akukjêr kaxyw awýr mra. Kwa tanhmã na pre amnepêm finat Mojesja mẽ pahte mẽ pahprõ kaga hã mẽ panhĩgêjtjê mã karõ hto? Xà koja mẽ pahprõ mẽ pakapêr hkwým tanhmã amnhĩ nhĩpêx to pu mẽ mýrapê hkaga nhũm Tĩrtũm ja hã mẽ pahpumu nhũm ja kãm mex nê nã? Anê.

³ Hãmri nhũm mẽ kãm:

—Tanhmã na pre Mojes Tĩrtũm nhỹ hã ja hã mẽ amã karõ hto? Anê.

⁴ Nhũm mẽ kãm:

—Nã na pre harênh o:

Kêr ka mẽ aprõ kaga kaxyw hãmri nê ate hkaga hã amnhĩ jarênh ã kagã nê kãm agõ nê rĩ kormã hkaga. Anê.

Na pre ã mẽ inhmã ja hã karõ anê. Anê.

⁵ Hãmri nhũm mẽ kãm:

—Tý nom mẽ kãm Tĩrtũm kapêr kôt amnhĩ nhĩpêx prãm kêt jakamã na pre ã mẽ kãm ja jarênh anê.

⁶ Amnepêm mẽmoj piitã hkrax kãm na prem axpên kaga hkêt nê. Na pre Tĩrtũm wam myja nhĩpêx nê hpãnhã kãm hprõ nhĩpêx. Axpên kaxyw wa hipêx.

⁷ Jakamã na hte mëmyjaja hprõ kaxyw nê gryk ã katorxà nê hipêêxà wa hkaga nê ãm hprõ kôt pix mã pa ho pa.

⁸ Te wa tipxi nê ri wa pa pyrãk o axpën nhîpêx o pa.

⁹ Tirtûm tãm kot axpën mã wa õr kênã kot kêt mëhõ wa kot axpën kaga kaxyw tanhmã wa hipêx to rý tanhmã wa kãm kapër to. Anê.

Nhùm pre ã Jejus më kãm kapër anê.

¹⁰ Hãmri nê hkôt më pa ho më pa xwýnhjê më akupým ixkrem agjê nhùm më kãm:

—Kwa aprî hã më inhmã më kot axpën kaga hã më harênhta jarê pa më ixprî hã kuma nà. Anê.

Hãmri nhùm më kãm:

¹¹ —Nà kot kaj më aprõ kaga nê hpãnhã nhãm mëhõ ho aprõ nhùm Tirtûm noo mã te ate wam aprõ kamã nhãm aprõ nyw o amnhîkati pyrãk. Tirtûm pê ja omnuj tỳx nê. Rý koja mëhõ hprõ kaga ka hpãnhã ho aprõ nhùm Tirtûm noo mã te ate wam mjên pê ho amnhîkati pyrãk. Ja mãânên Tirtûm pê omnuj tỳx nê.

¹² —Nê mënijaja. Koja mëhõ ni ra mjên kaga nê hpãnhã nhãm mëhõ ho mjên. Ja mex kêt. Mjên krax kêp mjên kumrêx kênã kot kêt hkaga nê hpãnhã nhãm hõ ho mjên. Koja anê nhùm Tirtûm noo mã te kot wam mjên kamã nhãm hõ ho amnhîkati pyrãk nhùm Tirtûm pê ja omnuj tỳx nê. Anê.

Jejus kot amnhî nê mëhprîjê janor kêt ã harênh

Matêwre 19.13-15; Rukre 18.15-17

¹³ Tã nhùm Ijaew kwýjaja Jejus wýr më hkrarejê jamý nê më o mra. Kot më hã ìhkra jaxwýr nê më ho Tirtûm wýr kaxyw hwýr më o mra. Hãmri nhùm hkôt më pa ho pa xwýnhjaja tee ri ja hã më omu nê më kãm:

—Kwa mo kaxyw na ka më Jejus wýr më o mra? Kormã më ràxre kênã. Më ma akupým më o mra nà? Anê.

¹⁴ Hãmri nhùm Jejus ja hã më kuma nê më kãm:

—Kwa nà kwãr më mãmrî ixwýr më o mra. Më ri inhnê mëhprîjê kurê hkêt nê. Anê.

Hãmri nê më kãm hpa ho apê nhùm më hwýr më o mra nhùm më kuri kuhê. Hãmri nhùm më hã hkôt më pa ho më pa xwýnhjê mã kãm:

—E më jarejê pumu. Na htem hamakêtkati nê hkînh nê ri pare. Më kãm amnhî to rûnh prãm kêt nê ri pare. Tã Tirtûm kôt më kot amnhî nhîpêx o ri më pa xwýnhjaja na htem më urãk nê kãm amnhî to rûnh prãm kêt nê ri pa.

¹⁵ —Na hte jarejaja hipêêxà nê katorxà wa kapër ma nê wa hkôt ri amnhî nhîpêx o ri pare. Tã ixpê Tirtûm kot më awýr inhmên xwýnh na pa. Kot ka më amã ixkôt amnhî xunhwýr prãm hã kot kaj më jarejê kot amnhî nhîpêx pyrãk o amnhî nhîpêx. Jao ixkapër ma nê ixkôt ri amnhî nhîpêx mex o ri apa. Anê.

¹⁶ Hãmri nê mëhprîrejê jamý nê më hã ìhkra jaxwý nê më ho Tirtûm wý nê kãm:

—Pa Papaj. E kêr ka jarejê ho mex rãhã nê kê më mex nê pa. Anê.

Hikàxpore rax xwýnh jarênh

Matêwre 19.16-22; Rukre 18.18-23; mãânên Wam Ximotre 6.6-10; Xiakre 5.1-6

¹⁷ Tã nhùm Jejus më hkôt më pa ho pa xwýnhjaja nhýri pry hã mõ nhùm Ijaew krãhtûmja omu nê hwýr tẽ nê mëmoj tã hkukja nê kãm:

—Pa më ijahkre xwýnh maati? E kwa inhmã mëmoj jarê. Nhýrmã Tirtûm ri ixtîr tûm nê ixpa hprãm xàj mëmo kot pa we ho anhýr o ri ixpa? Ate amnhî to mex pix o ri apa xwýnh jakamã kwa inhmã tanhmã ja jarênh to. Anê.

¹⁸ Hãmri nhùm kãm:

—Xà ate ixpê Tirtûm kwý hã ixpumunh kôt na ka ixte urãk nê amnhî to mex xwýnh ã ijarê? Tirtûm pix na kot amnhî to mex rãhã xwýnh jakamã kot kaj ã ijarênh anê nê ixpê Tirtûm Kra hã ijarê. Jao urãk nê ixte amnhî to mex xwýnh ã ijarê. Nà xàn ka ãm atỳx ri amnhî krã hkôt ã ijarênh anê?

¹⁹ —Tirtûm mex o mex jakamã kot kaj amã nhýrmã kuri atîr tûm nê apa hprãm hãmri nê ra kot mëmoj tã më amã karõ xà hkôt amnhî nhîpêx o ri apa. Ra ate mar mex kênã. Na pre më amã:

Kêr ka më axàhkînh o ri apa hkêt nê.

Nê më hpar kêt nê.

Nê tanhmã axêx kêt nê.

Nê axêx rom tanhmã më nokupyr to hkêt nê.

Nê më kêp më hprõ ho amnhîkati hkêt nê.

Ně anhĩpêxà mẽ akatorxà wa hã api-
jaàm nê wa ho mex pê wa kutã ano-
jarêt rãhã ho ri apa.

E kot kaj amã nhỹrmã Tĩrtũm kuri atĩr tũm
nê apa hprãm hã kot kaj ã amnhĩ nhĩpêx
anhỹr o ri apa. Anê.

²⁰ Hãmri nhũm kuma nê kãm:

—Kwa ixprĩre ri ra ã ixte amnhĩ nhĩpêx
anhỹr o ri ixpa kênã. Nom te ixtĩr tũm nê
ixpa kaxyw ixte kormã tãm kêt pyrãk. Anê.

²¹ Hãmri nhũm kuma nê hprĩ hã omu nê
kãm hapê nê. Hãmri nê kãm:

—Nà kormã mẽmoj pyxire nê arĩk. Na
ka amã akukrêx rax kĩnh tỳx o Tĩrtũm
jakre. Jakamã kêr ka ma akupỹm anhõrkwỹ
hwỳr tẽ nê akukrêx rax o wênê hpa. Nê
kaxpore jamỹ hãmri nê ma mẽ kêp amrakati
xwỳnhjê mã õr o ri apa. Hãmri nê akupỹn tẽ
nê arĩ ri ixkõt apa ho apa. Anê.

²² Hãmri nhũm kuma nê tee ri hikukrêx
rax kukamã hamaxpêr. Kãm hapê jakamã
kãm kãm ãhkra karo hprãm kêt nê. Hãmri
nê tee ri Jejus kot ã kãm hã karõ anhỹrja
ma nhũm ja kãm mex kêt nhũm awjanã nê
hkaprĩ nê ma akupỹm tẽ.

²³ Hãmri nhũm Jejus tee ri omu nê hkõt
mẽ pa ho mẽ pa xwỳnhjê mã kãm:

—Hêxta waa nê. Koja mẽ hikukrêx rũnh
xwỳnhjaja ohtõ nê kãm mẽ hikukrêx japê
xàj Tĩrtũm mẽ wa ixri htĩr tũm nê pa ho pa
hkêt nê. Wa ixte amnhĩ nhĩpêxja mẽ kêp
hihtỳx. Anê.

²⁴ Hãmri nhũm mẽ tee ri kapêrja ma nhũm
Jejus mẽ hamaxpêr kõt mẽ omunh mex
jakamã axte tanhmã mẽ kãm harênh to nê
mẽ kãm:

—Nà Tĩrtũm mẽ wa ixte amnhĩ nhĩpêxja
na mẽ hikaxpore rũnh xwỳnhjaja pê ja hi-
htỳx.

²⁵ Mẽ kãm hikukrêx rax mã ãhkra karo
hprãm kêt rãhã tee kãm Tĩrtũm kõt amnhĩ
nhĩpêx prãm kaprỹ. Te ho mẽhõ kot menh
kagõ hã hkre nê kãm kagõ katõk prãm kêt
rãhã kãm guhkrax kãm àr prãm kaprỹta
pyrãk. Anê.

²⁶ Hãmri nhũm mẽ kuma nê tee ri amnhĩ
kukamã hamaxpêr nê kãm:

—Kwa no mẽ ixpiitã mẽ inhmã mẽ
ixkukrêx japê kênã. Jakamã xà kot paj mẽ
ixpiitã nhỹrmã war ari ixtĩr tũm nê ixpa ho
ixpa hkêt nê? Anê.

²⁷ Hãmri nhũm mẽ kãm:

—Nà kot kaj mẽ amnhĩ krã hkõt mẽ amã
mẽ akukrêx japê mã anhũrer kêt nê. ãm
Tĩrtũm pix na hte ja kaxyw tanhmã mẽ
akrã hto ka mẽ amã akukrêx japê hkêt nê.
Jao ra mẽ apê Tĩrtũm mẽ wa ixri atĩr tũm nê
mẽ apa ho mẽ apa mã xwỳnh. Anê.

²⁸ Hãmri nhũm Simãw Pêtre kãm:

—Kwa Pahihti na pa prem agryk ã mẽmoj
piitã hkaga hpa nê akõt ixpa ho ixpa.
Jakamã xà kot paj mẽ nhỹrmã war ari ixtĩr
tũm nê ixpa ho ixpa kêt nê nà? Anê.

²⁹ Hãmri nhũm kuma nê hkõt mẽ pa ho pa
xwỳnh piitã mẽ kãm:

—Nà ka mẽ atõ inhmã tanhmã amnhĩ
to ho apa kaxyw akwỳjê re nê ma inhmã
tanhmã amnhĩ nhĩpêx to ho ri apa.
Anhõrkwỹ re rỳ atõ rỳ atõx rỳ aprõ nê
akrajê re. Rỳ akatorxà nê anhĩpêxà wa
are. Rỳ akukrêx piitã rer pa hãmri nê ma
ixkapêr o mẽ piitã mẽ ahkre ho ri mẽ hkõt
apa.

³⁰ Hã kot paj amnhĩ tã mẽ apumu nê mẽ
ato mex rax nê. Hãmri ka mẽ ma mẽ kãm
ixkapêr jarênh o mẽ hkõt apa nhũm mẽ kot
mẽ amar xwỳnh kwỳjaja mẽ ama nê kãm
mẽ akĩnh nê. Nê ra mẽ ate akwỳjê rer par
tã mẽ tãmjaja te mẽ apê mẽ hkra rỳ mẽ htõ
rỳ mẽ htõx pyrãk o mẽ anhĩpêx. Jao tanhmã
mẽ ato mex to ho pa.

—Nê koja mẽ kãm ixprãm kêt xwỳnhjaja
ixtã tanhmã mẽ atomnuj to hã ka mẽ
nhỹrmã ma Tĩrtũm mẽ wa inhõ krĩ hwỳr api
nê wa ixkuri amex nê atĩr tũm nê apa ho
apa.

³¹ Nom kêr ka mẽ ja hã amnhĩ pumunh
kõt amnhĩ to rax xwỳnh ã amnhĩ to jarkrar
kêt nê. Mẽ kot amnhĩ to rũnh xwỳnh ã
amnhĩ jarênh xwỳnhjaja koja mẽ nhỹrmã
amnhĩ to rũnh kêt ã amnhĩ pumu. Nê
mẽ kot amnhĩ to hkryre xwỳnhjaja koja mẽ
nhỹrmã amnhĩ to rũnh ã amnhĩ pumu. Anê.

*Jejus kot amnhĩ kukamã axte amnhĩ
jarênh*

Matêwre 20.17-19; Rukre 18.31-34

³² Tã nhũm Jejus hkõt ri mẽ pa ho mẽ
pa xwỳnhjê mã kapêr pa hãmri nê ma Jeru-
jarê hwỳr mẽ o mõ. Ra kamã kãm hkurê
xwỳnhjaja kot hpĩr ã amnhĩ jarênh tã ma
hwỳr mẽ o mõ. Jakamã nhũm mẽ tee ri
hkukamã hamaxpêr o hkõt mõ. Nhũm mẽ

amarĩ mẽ hkôt mrar xwỳnhjaja haxwỳja kãm ma nẽ. Hãmri nhũm Jejus mẽ kęp 12ta o mỗ nẽ hkwỳjê hkàx ã amnhĩ kukamã tanhmã mẽ kãm amnhĩ jarẽnh to ho mỗ nẽ mẽ kãm:

³³ –E na pu mẽ ra Jerujarẽ hwỳr mỗ. Kot puj mẽ hwỳr pøj nhũm mẽ kãm ixkurê xwỳnhjaja patre krãhtũmjê mẽ Tĩrtũm kapër tũm o mẽ ahkre xwỳnhjê nhĩhkram ijaxà. Hãmri nhũm mẽ kãm Tĩrtũm kapër kôt amnhĩ nhĩpêx prãm kêt xwỳnhjaja ixpĩr kaxyw mẽ kãm ixtã amỳnê

³⁴ nhũm mẽ mar xà hkôt tanhmã inhĩpêx kati hto. Nẽ mẽ hkwỳjaja ixtã hpër o axkê nẽ ixtã akunha. Nẽ mẽ hkwỳjaja tanhmã ijapry hto nẽ ixtã argôx rẽ nẽ ixtak hãmri nẽ ixpĩ. Koja mẽ ã inhĩpêx anẽ. Nom kot paj ixyk ã ixtã apkati axkrunêpxi nhũm Tĩrtũm akupỹm ixto ixtĩr. Anẽ.

Xiakre mẽ Juãw wa kot amnhĩ to Jejus wỳr ã wa harẽnh

Matêwre 20.20-28; Rukre 22.24-30; mããnẽn Piripos 2.3-8; Wam Pêtre 5.3

³⁵ Tã nhũm Jepetew kra Xiakre mẽ Juãw wa tanhmã hamaxpër to nẽ Jejus mã kãm:

–Kwa mẽ ijahkre xwỳnh. Pa wa amã mẽmoj jarẽ ka wa inhmã “ỳ” anẽ nà? Anẽ.

Hãmri nhũm wa kãm:

³⁶ –Ko wa mamrĩ inhmã mẽmoj jarẽ pa wa ama mãn. Anẽ.

³⁷ Hãmri nhũm wa kãm:

–Nà kot kaj nhỹrmã ate mẽ piitã mẽ ho amnhĩptar kaxyw nhỹ pa wa akutã anhĩjê. Nẽ wa papxipix ixpê anhõ kôwenatô nẽ akutã anhĩjê nẽ ato nhỹ. Ja na pa wa inhmã hprãm. Anẽ.

³⁸ Hãmri nhũm wa kãm:

–Nà na ka wa ãm atỳx ri ã amnhĩ to ixwỳr anẽ. Koja mẽ tokyx ixpĩ pa amnhĩ xà htỳx kamã ijamak rax nẽ ty. Tã xà koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

³⁹ Hãmri nhũm wa kãm:

–Tỳ. Nà kot pa wa ijaxwỳja anẽ nẽ apyrà nẽ amnhĩ xà htỳx kamã ijamak kãm ty. Anẽ.

Hãmri nhũm wa kãm:

–Nà ãm hãmri na ka wa ja hã amnhĩ jarẽ. War ate ixpyrà nẽ ixkôt amnhĩ xà htỳx kãm ajamak kãm atyk mã kênã.

⁴⁰ Tã nom war ate amnhĩ to ixwỳrta ã kot paj tanhmã war amã nẽ hkêt nẽ. Inhõ Papaj tãm koja ja kaxyw mẽhõ japêr nhũm inhĩhkô hã nhỹ. No pa kot paj ri ja kaxyw mẽ atõ rênh kêt nẽ. Anẽ.

⁴¹ Hãmri nhũm wa urak nẽ Jejus kôt mẽ pa ho mẽ pa xwỳnh kwỳjaja ã wa kot amnhĩ to hwỳr anhỹr ã wa kuma nẽ wa kamã gryk nẽ.

⁴² Jakamã nhũm Jejus mẽ piitã mẽ ho akuprô nẽ mẽ kãm:

–E mẽ inhma. Na hte Ijaew kêt xwỳnhjê nhõ pahihtijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh jakamã amarĩ ixkre kre jakry kamã hkrĩ ho hkrĩ nẽ kãm mẽ àpênh xwỳnhjê pix mã mẽmo mẽ àpênh ã karõ ho hkrĩ. Na htem ã amnhĩ nhĩpêx anẽ. Nẽ mẽ kot amnhĩm mex ã harẽnh prãm xaj tanhmã mẽ ho mex to ho pa.

⁴³⁻⁴⁵ Tã no mẽ kajaja kêt ka mẽ atõ amã amnhĩ to rax prãm hãmri nẽ ho mẽ kot amnhĩ nhĩpêx pyrak kêt nẽ. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axapênh o apa kaxyw na pa pre mẽ awỳr ixwryk kêt nẽ. ãm pa ixte tanhmã mẽ amã amnhĩ nhĩpêx to ho ixpa kaxyw na pa pre mẽ awỳr wrỳ. Mẽ ate nhỹrmã kuwy wỳr apa pymaj mẽ anẽ ixtyk kaxyw na pa pre mẽ awỳr wrỳ. Jakamã kot kaj mẽ atõ amã amnhĩ to rax prãm hã kêt ka ixpyrà nẽ akwỳjê kutã anojarêt rãhã ho ri apa. Hãmri nẽ inhmã te ate amnhĩ to rax o amnhĩ nhĩpêx pyrak o amnhĩ nhĩpêx. Anẽ.

Jejus kot akupỹm Paximew o mex ã harẽnh

Matêwre 20.29-34; Rukre 18.35

⁴⁶ Tã nhũm Jejus mẽ hkôt mẽ pa ho mẽ pa xwỳnhjaja kormã Jerujarẽ hwỳr mỗr ri ra krĩ pê Jeriko hkôt mỗ. Hãmri nhũm mẽ ohtô nẽ mẽ hã ajêt nẽ mẽ hkôt mỗ. Nhũm mẽhõ myja pry nhĩhkrep nhỹ. Ximew kra Paximew nohkre xwỳnhja pry kamã ahwỳr o hkrĩ.

⁴⁷ Hãmri nhũm Jejus mẽ hkwỳjaja hwỳr htêp o mỗ nhũm amnhĩ wỳr mẽ kuma nẽ mẽ kot Jejus nhĩxi jarẽnh o mỗr ã kuma hãmri nẽ kàx pê kãm kapêr nẽ amnhĩ to kuwy nẽ kãm:

—Pa Jejus? Nà apê mẽ inhõ Pahihti mex kumrêx na ka. Te apê amnepêm anhîgêt pahihti Tawi kot amnhĩ nhĩpêx pyrâk. Jakamã kwa we ixkamã axukaprĩ nê akupỹm ixto mex kêt wehe. Ixte amnhĩ kaxyw akôt ijamaxpêr xwýnh na pa. Anê.

⁴⁸ Hãmri nhũm Jejus kukamã mẽ mrar xwýnhjaja kuma nê kãm:

—Tk. Kwa akapêr kêt nê nhỹ nà. Anê.

Tã nom nhũm ãm mẽ kuma nê xatã amnhĩ to kuwý. Kýt pê amnhĩ to kuwý nê axte kãm:

—Kwa ixkamã axukaprĩ nê akupỹm ixto mex Pahihti. Anê.

⁴⁹ Hãmri nhũm Jejus kuma nê xa nê hkôt mẽ pa ho mẽ pa xwýnhjê mã kãm:

—E mẽ atõ hwýr tẽ nê hpa hã apy nê amnê ixwýr o tẽ. Anê.

Hãmri nhũm mẽ kuma nê nohkre xwýnhhta mã kapêr nê kãm:

—E tee ri amnhĩ kukamã ajamaxpêr kêt nê. Na atã karõ. E tokyx kãnhmã xa. Anê.

⁵⁰ Hãmri nhũm mẽ kuma nê hkĩnh týt nê. Nê kãnhmã harĩ nê amnhĩ nê õ kajaati mẽ nê hwýr htêm kurê kumrêx.

⁵¹ Hãmri nhũm Jejus kãm:

—Pa mo na? Tanhmã kot pa ato? Anê.

Hãmri nhũm kãm:

—Nà akupỹm inhmã ixrĩt mex prãm Pahihti.

⁵² Anê nhũm kãm:

—Tõe. Nà ra ate amnhĩ kaxyw inhmã ajamaxpêr týt jakamã kot kaj akupỹm arĩt mex kurê kumrêx. E mãmrĩ ma akupỹm tẽ. Anê.

Nhũm akupỹm rĩt mex ã amnhĩ pumu nê hkĩnh o hkĩnh. Hãmri nê Jejus ã ajêt nê ma hkôt hkĩnh nê tẽ.

11

Jejus kot Jerujarê hwýr àr ã harênh

Matêwre 21.1-11; Rukre 10.28-40; Juãw 12.12-19

¹ Tã nhũm Jejus mẽ hkôt mẽ pa ho mẽ pa xwýnhjê mẽ kormã Jerujarê hwýr mõi. Hãmri nê krĩ pê Petake mẽ hõ pê Petãn wýr ahtêp o mõi. Hixêt pê Oriwêhti kahti ri na pre krĩja wa xa. Jakamã nhũm Jejus hkôt mẽ pa ho mẽ pa xwýnh wa ho axkrut nê mẽ amnhĩ kukamã wa kumê

² nê wa kãm:

—E wa ma krĩ mũj wýr mẽ ixkukamã wa tẽ. Hãmri nê hwýr pøj nê nhỹri jumênre nyw mã ê nê ãm xwýnhhta pumu. Kormã mẽ kot hã hkrĩ hkêt kumrêx xwýnhhta.

³ Ka wa omu nê kãm ê xà hpôt nê man akupỹn ixwýr o tẽ. Koja mêmõ war apumu nê hã tanhmã war amã kapêr to ka wa ã kãm ijarênh anê nê kãm: “Nà mẽ panhõ Pahihti na hã karõ pa wa hwýr tẽ.” Anhýr o kãm ijarê. E wa ma hwýr tẽ. Anê.

⁴ Hãmri nhũm wa kuma nê ma hwýr htêm kurê kumrêx nê hwýr pøj. Nhũm Jejus kot wa kãm hã karõ xà hkôt jumênre nywreta pumu.

⁵ Hãmri nê kãm ê xà hpôt o xa nhũm kuri mẽ kuhê xwýnhjaja tee ri hã wa omu nê wa kãm:

—Kwa mo kaxyw na ka wa kãm ê xà hpôt o xa? Kwa kot ka wa mẽ ixpê ho ahkĩ nà? Anê.

⁶ Hãmri nhũm wa mẽ kãm:

—Nà mẽ panhõ Pahihti na wa inhmã hã karõ pa wa hwýr tẽ. Wa ixte ma hwýr o ixtêm kaxyw. Anê.

Hãmri nhũm mẽ wa kãm:

—Týt? Tõe wa mãmrĩ ma kãm o tẽ. Anê.

⁷ Hãmri nhũm wa ma akupỹm Jejus wýr o tẽ. Hãmri nê kaxyw amnhĩ xê hkwý hkwýrý nê kãm ho hkô kahty hpa nê kãm ho htýt nê o xa nhũm Jejus hã nhỹ nê mõi.

⁸ Nê kormã Jerujarê hwýr hixêt ã àpir o mõi. Nhũm mẽ kot omunh o kuhê xwýnhjaja hkĩnh nê ma hkukamã pry ho mex kaxyw amnhĩ xê hkwý hkwýrý nê ho kãm uty. Nhũm mẽ hkwýjaja nhỹri pô hkwý jakà nê o mra nê hkukamã kãm uty.

⁹⁻¹⁰ Nhũm mẽ hixêt ã api nê ahpar mã wrýk o mõi nhũm mẽ piitã kàx pê Tĩrtũm mex o mex ã harênh o hkôt mõi. Nhũm mẽ hkwýjaja kukamã mra nhũm mẽ hkwýjaja hapu hã mra nhũm prem piitã hkôt Tĩrtũm mex o mex ã harênh o mõi. Nê harênh o: E ota Tĩrtũm kot mẽ pahwýr mênh xwýnhhta ra pøj. Nà ãm hãmri na mẽ pahwýr wrý. Ja mex kumrêx.

Kêp mẽ panhõ Pahihti mex na. Koja mẽ panhîgêt pahi Tawi pyrã nê mẽ pahto amnhĩptã nê mẽ pahto mex o pa.

Ãm hãmri na Tĩrtũm mẽ pahwýr kumê.

Tirtũm mex kumrêx. Æm mex o mex. Kukwak ri pix mã na pu htem paja-makêtkati nê paxàmnhĩx papa rãhã ho papa.

Anhÿr o Jejus kôt harênh o mō. Kot mẽ ho amnhĩptâr kurê kumrêx ã hkamnhĩx nê hkĩnh nê ã hkôt kapêr anhÿr o mō.

¹¹ Jao ra Jerujarê hwÿr pøj nhũm Jejus Tirtũm mã amnhĩ jarênh xà hã ixkre hwÿr tẽn axà. Nom nhũm ra amÿkry htÿx jakamã nhũm hwÿr axà nê ãm hkre pumunh o xa hãmri nê akupÿm kato nê hkôt mẽ pa ho mẽ pa xwÿnh pê 12jê mẽ nhũm mẽ ma akupÿm Petãn wÿr mra.

Jejus kot pĩ hpàr pê fikêhti mã kapêr ã harênh

Matêwre 21.18-22

¹² Tã nhũm apkati nhũm Jejus mẽ hkôt mẽ pa ho pa xwÿnhjê mērohã Petãn rũm hapøj nê ma akupÿm Jerujarê hwÿr mra. Nhũm Jejus ra kãm prãm nê mō.

¹³ Hãmri nê amÿm mẽmo pĩ hpàr hoptĩ rax pê fikêhti pumu nê hamaxpêr o:

—E pa hwÿr tẽn nê ô hkwy rê nê kuwô mãn. Anê.

Hãmri nê hwÿr tẽn. Nhũm kormã ô kaxyw õ mytwrÿ kator kêt jakamã nhũm ô hkêt nê ãm hô pix nê xa.

¹⁴ Hãmri nhũm hwÿr tẽn nê tee ri ô japêr nê ãm hô pix pumu. Hãmri nê tee ri omu nê kãm:

—E kot kaj axte axô hkêt kumrêx.

Anhÿr o kãm kapêr nhũm hkôt mẽ pa ho mẽ pa xwÿnhjaja hã kuma.

Jejus kot Tirtũm nhõrkwy hwÿr àr ã harênh
Matêwre 21.12-17; Rukre 19.45-46; Juãw 3.13-22

¹⁵⁻¹⁷ Tã nhũm Jejus mẽ hkôt mẽ pa ho mẽ pa xwÿnhjaja Jerujarê hwÿr agjê nê Tirtũm mã amnhĩ jarênh xà hã ixkre hwÿr agjê. Nhũm Jejus tee ri kamã mẽ kuhê xwÿnhjê pumu. Nhũm mẽ ra ixkre kamã axtem nê môx nê ôwêhti nê tuuti ho wênê ho kuhê. Ixkre hwÿr mrar xwÿnhjaja kot haprôr nê Tirtũm mã amnhĩ jarênh kaxyw kãm hpar nê ôr kaxyw mẽ kãm ho wênê. Nom axtem nê hã ohtô rax kãm mẽ kãm ho wênê nhũm mẽ hkwyjaja mẽ kãm mẽ hikãxpore ho anhĩpa. Hãmri nhũm Jejus mẽ hwÿr axà nê tee ri mẽ kot ã amnhĩ nhĩpêx anhÿr ã mẽ omu nê mẽ kãm akir nê mẽ kãm:

—Tk. Kwa Tirtũm kapêr ã kagà htũm kot õrkwy jarênh kot:

Inhõrkwyja ãm pika piitã hkôt mẽ piitã kot inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhĩ nhĩpêx anhÿr o akuhê. E kwa mẽ ma mra nê ajapôx tokyx anê. Anê.

Nhũm pre ã mẽ kãm kapêr anhÿr pê mẽ ahkre hãmri nê ixkreja nê mẽ kator pa.

¹⁸ Hãmri nhũm patre krãhtũmjê mẽ Tirtũm kapêr tũm o mẽ ahkre xwÿnhjaja tee ri ã mẽ hipêx anhÿr ã omu nê kapêr ma nê kamã gryk tÿx nê. Hãmri nê mẽ kot hã àmnênh kaxyw tanhmã axpên mar to nê axpên mã:

—Tk. Kwa na mẽ ohtô nê kãm mar prãm nê. Koja mẽ anê nê gryk ã mẽ pahkaga nê axte mẽ pakapêr mar kêt nê. Kwa pu mẽ kupĩ ri. E tanhmã kot puj mẽ ho nê kupĩ? Anê.

¹⁹ Tã nhũm myt axà nhũm Jejus mẽ hkôt mẽ pa ho pa xwÿnhjaja Jerujarê rũm hapøj nê ma nhÿri amnhĩm hikranh kaxyw mra.

Mê pahte tanhmã mẽmoj tã Tirtũm wÿr to hã mẽ pamã karõ

Matêwre 6.14-15, 17.20; Makre 11.13; Juãw 14.13; mãänên Xiakre 1.6; Wam Juãw 3.22

²⁰ Tã nhũm apkati nhũm Jejus mẽ hkôt mẽ pa ho mẽ pa xwÿnhjaja Jerujarê hwÿr akupÿm mra. Hãmri nê axte pĩ hpàr pê fikêhtita pumu. Jejus ra kot kãm kapêr xwÿnhhta pumu nhũm ra grà pa nê xa.

²¹ Hãmri nhũm Simãw Pêtre Jejus kot tanhmã pĩ mã kapêr toja mã hamaxpêr nê hã kãm:

—Kwa mẽ ijahkre xwÿnh. Ga mẽmoj mũj pumu. Jãã ate fikêhti mã akapêr xwÿnhhta na grà par kumrêx nê xa. Anê.

²²⁻²³ Hãmri nhũm kuma nê mẽ piitã mẽ kãm:

—Tÿ nã ãm hãmri na pa mẽ amã ixkapêr. Kot kaj mẽ mẽmo kaxyw Tirtũm mã ajamaxpêr tÿx pê mẽmoj tã awÿ nhũm ama nê amã hprãm xà hkôt tanhmã amã hipêx to. Ka mẽ amnhĩ kaxyw Tirtũm mã ajamaxpêr tÿx pê hixêt mũj mã akapêr nê kãm: “E xa nê ma tẽn nê gô xujanãr kãm mrõ.” Anhÿr o kãm akapêr nhũm amar xà hkôt ã amnhĩ nhĩpêx anê nê tẽn kamã mrõ.

²⁴ Kot kaj mẽ mẽmoj tã Tĩrtũm wỳ nẽ kaxyw ãm pix mã ajamaxpẽr tỳx nẽ nhũm amã ho anẽ.

²⁵⁻²⁶ –Nẽ kot kaj mẽ Tĩrtũm mã amnhĩ jarẽnh kaxyw nẽ ra mẽhõ kot tanhmã ato mã ajamaxpẽr. Hãmri nẽ ja ho ajamakêtkati kurẽ kumrẽx nẽ axte kãm ajamaxpẽr kêt nẽ. ãm mẽmoj nyw pix mã ajamaxpẽr o tãm amnhĩ nhĩpêx o apa. Hãmri nhũm Tĩrtũm kaxkwa rũm ja hã apumu nẽ apyrã nẽ ate tanhmã amnhĩ tomnuj to ho hamakêtkati nẽ axte kãm hamaxpẽr kêt nẽ. Anẽ.

Mẽhõ kapẽr kôt Jejus kot mẽ ahkre hã mẽ kot hkukjêr

Matêwre 21.23-27; Rukre 20.1-8

²⁷ Nhũm mẽ akupỹm Jerujarẽ hwỳr agjê nhũm Jejus kê axte Tĩrtũm mã amnhĩ jarẽnh xà hã ixkre hwỳr axà. Nhũm hkôt mẽ pa ho mẽ pa xwỳnhjaja hkôt hwỳr mra nẽ hkôt agjê nẽ kormã kamã kuhê. Hãmri nhũm Ijaew krãhtũmjê mẽ mẽ kot Tĩrtũm kapẽr tũm o mẽ ahkre xwỳnh mẽ mẽ õ patre krãhtũmjaja Jejus pumu nẽ hwỳr mra nẽ hêx rom tanhmã kãm kapẽr to. Na pre ra Jejus ixkreja nẽ mẽmoj to wẽnê xwỳnh mẽ kãxpore o mẽ hpinhpanh xwỳnhjê jano nhũm mẽ tee ri ja hã omu nẽ kamã gryk tỳx nẽ. Jakamã nhũm akupỹn mẽ hwỳr axà nhũm mẽ axte omu nẽ hwỳr mra kurẽ kumrẽx

²⁸ nẽ kãm:

–Kwa mẽ inhmã amnhĩ jarẽ. Mẽhõ nhỹ hã na ka hte ã amnhĩ nhĩpêx anhỹr o ri apa? Mẽhõ na pre mẽ ixwỳr amẽ ka pre mõi? Nà xà amnhĩ krã hkôt na ka hte ã amnhĩ nhĩpêx anhỹr o ri apahti? E kwa mẽ inhmã amnhĩ jarẽ. Anẽ.

²⁹ Nhũm Jejus kot tanhmã mẽ hamaxpẽr to hkôt mẽ omunh mex jakamã mẽ kãm:

–Nà kot pa ixkumrẽx mẽmoj tã mẽ akukja. Ka mẽ inhmã harẽ pa rĩ kormã mẽ amã tanhmã amnhĩ jarẽnh to.

³⁰ Finat Juãw Paxisja ã kot paj mẽ akukja. Mẽhõ nhỹ hã na pre hte mẽ hkrã kumrãr o pa? Xà amnhĩ krã hkôt nà xà Tĩrtũm nhỹ hã? E mẽ atõ inhmã harẽ. Anẽ.

³¹⁻³² Hãmri nhũm mẽ kuma nẽ tee ri kot tanhmã kutã kãm harẽnh to hkukamã hamaxpẽr nẽ axpẽn mã:

–Kwa tanhmã kot puj mẽ kãm ja jarẽnh to? Mẽ kot mar o kuhê xwỳnhjaja na htem

Juãw Paxis kêp Tĩrtũm nhỹ hã kapẽr jarẽnh xwỳnh ã axpẽn mã harẽnh o pa. Jakamã kot puj mẽ kãm kot amnhĩ krã hkôt mẽ hkrã kumrãr o pa hã harẽ nhũm mẽ tee ri mẽ pama nẽ mẽ pakamã gryk nẽ. Nẽ mẽ paxêx rom ã kãm mẽ pakapẽr anhỹr ã mẽ pahpumu nẽ kẽn o mẽ pahtak o mẽ panhĩmex. No kot puj mẽ kãm Tĩrtũm nhỹ hã mẽ hkrã kumrãr ã harẽ nhũm mẽ pama nẽ mẽ pamã: “Kwa ã kot anhỹr kẽnã na ka prem kapẽr mar tã ixkôt amnhĩ xunhwỳr kêt nẽ?” Anẽ. Nà kot puj pẽr mẽ kãm tanhmã harẽnh to hkêt nẽ. Kot puj mẽ ãm kãm aa te mẽ pahte ja jarẽnh mar kêt pyrãk o harẽ. Anẽ.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ tee ri tanhmã kãm nẽ hprãm kaprỳ ho kuhê.

³³ Hãmri nẽ Jejus mã kãm:

–Konẽn. Mẽ ixte mẽhõ nhỹ hã kapẽr o pa hã omunhre hã. Anẽ.

Hãmri nhũm mẽ kuma nẽ mẽ kãm:

–Tk. Tõe kot pa xep ijaxwỳja mẽ amã tanhmã amnhĩ jarẽnh to hkêt nẽ. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

12

Mẽ àpênh punuj xwỳnhjê jarẽnh

Matêwre 21.33-46; Rukre 20.9-18

¹ Nhũm Jejus arĩ Ijaew krãhtũm mẽ mẽõ patre krãhtũm mẽ Tĩrtũm kapẽr tũm o mẽ ahkre xwỳnhjê mã kapẽr o xa. Nẽ mẽ kãm mẽ kot tanhmã hipêx to hkukamã mẽ kãm tanhmã amnhĩ jarẽnh to. No ãm hã kuxi nẽ mẽ kãm awjarẽ nẽ mẽ kãm:

–Koja mẽhõ hpur ã hkwyjê mã karõ. Mẽ kot kamã kãm àpênh kaxyw mẽ kãm karõ. Hãmri nhũm mẽ ma hwỳr mra nẽ kamã mẽmo hy hkre nẽ hkre pa. Hãmri nẽ pu hã kahê hpa nẽ pur kaêx kãm ixkre hprêk nhĩpêx. Mẽ kot himõk ã mẽ kot kêp àhkĩnh pymaj mẽ hapêr o hkrĩ kaxyw. Hãmri nẽ hipêx pa nhũm mẽõ patrãwja awry hã krĩ hõ hwỳr nojarêt nẽ mẽ kãm tanhmã hpur jarẽnh to nẽ mẽ kãm: “E or ixpurta nõ. Kê kamã mẽmoj kà hpa ka mẽ mãmrĩ kamã awjamỳ nẽ ho axkjê. Hãmri nẽ ixkutêp inhõ

jaxwỳ nê māmri anhõ tanhmã ho hprãm xà hkõt tanhmã ho.”

—Anhỹr o mẽ kãm kapêr hãmri nê ma mõ.

² Tã nhũm ra pur kãm mẽmoj hkà pa. Nhũm hpur nhõ dõn arĩ krĩ hõ kamã hã ujahkre ho pa htã kuri kãm àpênh xwỳnhjê hõja nhũm akupỹm mẽ hwỳr kumê. Mẽ kot kãm õ hkwy nhõr nhũm ma kot kãm o mõi kaxyw ma mẽ hwỳr kumê nhũm ma akupỹm mẽ hwỳr mõ. Mõi nê ra mẽ hwỳr põi.

³ Hãmri nhũm mẽ omu nê axtem nê homnuj nê. Nê unê nê htak nê akupỹm hano nhũm ỹ kamã ma akupỹm mõ.

⁴ Hãmri nhũm õ patrãwja tee ri omu nê hpãnhã ja mẽ nhũm ma mẽ hwỳr mõ. Mõi nê mẽ hwỳr põi. Hãmri nhũm kê wem omu nê mã ho anê nê. Unê nê htak nê hkrãx pê htak nê akupỹm hano nhũm wamta pyrà nê ma akupỹm ỹ kamã mõ.

⁵ Hãmri nhũm axpên pãnhã kãm mẽ àpênh xwỳnh kwỳjê rê nhũm mẽ axpên pãnhã ma mẽ hwỳr pa. Ma mẽ hwỳr pa nê põi nhũm mẽ te ho wamtajê mẽ hipêx pyrà nê mẽ hkwyjê pynê nê htak rax nê mẽ hano nê mẽ hkwyjê pa.

⁶ Nhũm mẽ õ patrãw mẽ harênh ma nê tee ri amnhĩ kukamã hamaxpêr nê hamaxpêr o: “Hêxta waa nê. Tanhmã kot paj we amnhĩ nhĩpêx to nê inhõta kwỳ jamỳ? Nà kot paj mẽ hwỳr ixkrajã mẽ. Inhmã hapê htã kot paj mẽ hwỳr kumê kê ma mẽ hwỳr mõ. Hãmri nhũm mẽ kêp ixkra hã omu nê tanhmã ixpê ho hkêt nê. Nê jatã inhmã kãm inhõja kwỳ gõ nhũm man ixwỳr o tẽ. Nà kot paj anê.”

—Anhỹr o hamaxpêr hãmri nê ma mẽ hwỳr hkrajã mẽ nhũm ma mẽ hwỳr mõ.

⁷ —Tã mẽ hwỳr hpõx o mõ nhũm mẽ amỹm amnhĩ wỳr omu nê kêp hkra hã omunh kurê kumrêx nê hã axpên mã amỹnê nê axpên mã: “E. Nà onêj hpur nhõ dõn krata tẽ. Koja nhỹrmã õ papaj mỳrpê amnhĩm pur ã pyka pytà nê ho õ. Jakamã e pu mẽ kupĩ nê kêp hpur ho arĩk nê ho panhõ. E kwa tokyj pu mẽ kupĩ ri.” Anê.

⁸ —Rõm nhũm ra mẽ hwỳr hpõx o tẽ nê ra põi nhũm mẽ unê nê pur nê ho kato nê ahkã kamã kupĩ. ã mẽ ujarênh kot anhỹr. Anê.

⁹ Nhũm pre ã Jejus Ijaew krãhtũmjê mã ujarênh anê. Hãmri nê hã tanhmã mẽ hkukjêr to nê mẽ kãm:

—E mẽ inhmã mẽmoj jarê. Koja pur nhõ dõnja tee ri mẽ kot hkra hpĩr ã harênh ma hãmri nê tãm mẽ hwỳr mõ hãmri nê tanhmã mẽ hipêx to wehe? Nà koja ma mẽ hwỳr mõ nê mẽ himex pa hãmri nê hpãnhã nhãm hpurta ã mẽmojjê rê.

¹⁰ Mãn ka prem ra Tĩrtũm kapêr ã kagà htũm kot ja jarênh ma nà? Harênh kot:

Na prem kên o amnhĩm õrkwỹ nhĩpêx kaxyw hãmri nê kên maati pumu nê htỳx omnuj ã hkamnhĩx nê hkaga. Mẽ kot hkaga htã nom nhũm Tĩrtũm mẽ kurom mex o kot kên piitã hakrenh par ã omunh kurê kumrêx.

¹¹ ãm hãmri na pre ã mex ã omunh anê. Anê.

ã Tĩrtũm kapêr ã kagà htũm kot harênh kot anhỹr. Anê.

¹² Nhũm pre ã Jejus mẽ kãm ujarênh kãm mẽ harênh anê nhũm mẽ amnhĩ tã kuma. Tĩrtũm kapêr tũm o mẽ ahkre xwỳnh mẽ mẽ õ patre krãhtũm mẽ Ijaew krãhtũmjaja nhũm mẽ kot mẽ kãm kên maati kaga xwỳnhjê jarênh o te mẽ tãm harênh pyràkja ma nhũm ja mẽ kêp omnuj nê. Jakamã nhũm mẽ kãm unênh nê haxàr prãm nê. Nom amnhĩ tã kãm mẽ kot mar o kuhê xwỳnhjê puma nê.

¹³ Jakamã na prem ma mra nê hapõi hãmri nê Jejus wỳr Parijew nhõ xwỳnh mẽ pahĩ Erox kõt mẽ pa xwỳnh kwỳjê rê. Mẽ kot hêx rom mẽmoj tã hkukjêr nhũm kot mẽ mar nê tanhmã Rõm nhõ xwỳnhjê nhõ pahĩ Sesti kapêr kuhpa hã ri tanhmã mẽ kãm nê nhũm mẽ kot mar kaxyw.

¹⁴ Jakamã nhũm mẽ ma hwỳr mra nê hêx rom kãm kapêr nê kãm:

—Kwa Jejus? Nà ãm hãmri na ka hte Tĩrtũm kapêr o mẽ ahkre mex nê. Na ka hte mẽ kamã akahak o apa hkêt nê. Nê mẽ kot tee ri mẽ kot tanhmã ato kapêr punuj to htã ka hte arĩ aprĩ hã mẽ ahkre mex o ri apa. E kwa mẽ inhmã mẽmoj jarê. Rõm nhõ pahĩhti kot mẽ pahpê Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nà? Xà kot pu mẽ kãm kugõ? Xà kot pu mẽ kãm õr kêt nê? E kwa mẽ inhmã harê. Anê.

¹⁵ Nhũm prem ã hêx rom ja hã hkukjêr anhÿr tâ no nhũm Jejus mẽ hamaxpêr ã mẽ omunh mex mẽ mẽ kãm:

—Tk. Kwa mon ka mẽ axêx rom ja hã ixkukja? E mẽ atõ inhmã kàxpore htÿxre hõ gõ pa omu. Anê.

¹⁶ Hãmri nhũm ja kãm ja gõ nhũm kupy nê kànhmã kupê nê mẽ kãm:

—E mẽhõ nhĩxi nê mẽhõ karõ na hã? Anê. Anê nhũm mẽ kãm:

—Pahi Sesti karõ nê hixi na hã.

¹⁷ Anê nhũm mẽ kãm:

—Tÿ. Tô kêr ka mẽ mãmri kãm hkwÿ nhõr o apa. Hã hkarõ nê hã hixi. Tãm kot hipêx xwÿnh jakamã õ na. No mẽ kajaja na pre Tirtũm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anê.

Nhũm pre ã mẽ kãm kapêr anê nhũm mẽ piitã mar o kuhê. Nhũm mẽ kot hêx rom hkukjêr xwÿnhjaja amnhĩ jaêr pê ã kàxpore jarênh anhÿrja ã kuma nê axpên mã:

—Kwa mẽ paxêx rom mẽ pahte hã hkukjêr tâ nhũm ãm hãmri mẽ pakutã mẽ pamã harê. Kwa tanhmã kot puj wem hkukjêr to nhũm pahi Sesti kapêr kwÿm ri mẽ pamã mẽmoj jarê? Anê.

Hãmri nê tee ri tanhmã hkukjêr to hkukamã hamaxpêr o kuhê.

Akupÿm mẽ htĩr xwÿnhjê jarênh

Matêwre 22.23-33; Rukre 20.27-40; Juãw 6.21, 6.38-40; mãänên Wam Korõt 6.14, 15.12-28; Wam Tesarõn 4.13-18

¹⁸ Tã nhũm Satusew nhõ xwÿnh kwÿjaja. Mẽ kot akupÿm mẽ htĩr mã hamaxpêr kêt xwÿnhjaja na pre mẽ. Tã mẽ kot mẽ htyk nê mẽ hapêx ã mẽ hkamnhĩx jakamã na prem axpên mã Jejus jarênh o:

—E kwa pu mẽ ma hwÿr mra nê mẽmoj xihtÿx ã hkukja kê mẽ pama nê tee ri tanhmã mẽ pamã kapêr to hkukamã hamaxpêr. Hãmri nhũm mẽ piitã ja hã omu nê àhpumunh kêt ã omunh kurê kumrêx. E tokyx ma pu mẽ hwÿr. Anê.

Hãmri nê ma hwÿr mra nê Parijew nhõ xwÿnhjê pyrã nê hêx rom kãm:

¹⁹ —Pa Jejus? Kwa mẽ inhmã mẽmoj jarê. Na pre finat Mojesja Tirtũm nhÿ hã ã mẽ panhĩgêjtê mã karõ anê. Mẽ hkra hkêt rãhã mẽ pa nê mẽ htyk xwÿnhjaja nhũm mẽ harênh o:

Koja mẽhõ hprõ hãmri nê kamã hkra hkêt rãhã pa nê ty. Hã koja hkôt htõja hpãnhã hprõ o hprõ nê kamã hkra. Hãmri nhũm kato nê te kêp htõ htyk xwÿnhta hkra pyrãk. Anê.

Na pre ã Mojes Tirtũm nhÿ hã ja hã mẽ kãm karõ anê.

²⁰ Jakamã kwa ga mẽ ixujarênh ma. Koja mẽmojjaja mẽ kot axpên to htõ xwÿnhjaja kêp 7. Nhũm kot waja hprõ. Nê wa pa nhũm myja kormã hprõ kamã hkra hkêt rãhã ty.

²¹ Nhũm hkôt htõ hõta hpãnhã hprõ ho hprõ nê wa axpên to pa. Nhũm haxwÿja kamã hkra hkêt rãhã ty. Nhũm hkôt htõ hõta haxwÿja ho hprõ nê wa axpên to pa grire nhũm wamta wa urãk nê kamã hkra hkêt rãhã ty.

²² Hãmri nhũm htõ hkwÿjaja piitã nija pyxi nê axpên pãnhã ho hprõ nom mẽhõ kamã hkra hkêt rãhã htyk pa. Hãmri nhũm mẽ hprõta mẽ hkôt amnhĩ to hitep nê ty.

²³ Tã Tirtũm kot akupÿm nhÿrmã mẽ ho htĩr ronhÿx nhÿ nhÿx kêp nija mjên kumrêx? Ra piitã kot ho hprõ kênã. E kwa mẽ inhmã ja jarê. Anê.

²⁴ Hãmri nhũm Jejus ã mẽ ujarênh anhÿrja ma nê mẽ kãm:

—Tk. Nà mẽ ate Tirtũm kapêr ã kagà htũm mar mex kêt. Nê mẽ aprĩ hã tanhmã Tirtũm kute hã omunh kêt jakamã na ka mẽ ã atÿx ja hã ixkukjêr anê.

²⁵ Kormã mẽ htĩr ri mẽ kot Tirtũm kôt amnhĩ xunhwÿr xwÿnhjaja na htem ty hãmri nê Tirtũm nhõ krĩ kamã axte kãm hprõ hprãm kêt pa. Rÿ ni japêr nê kãm mjên prãm kêt nê pa. Hãmri nê Tirtũm kapêr o mẽ wrÿk xwÿnhjê pyrã nê axte htyk kêt nê. ãm htĩr tũm rãhã nê pa ho pa.

²⁶ —Nom mẽ ate akupÿm mẽ htĩr kêt ã mẽ hkamnhĩxja kot paj ixprĩ hã mẽ amã harê. Amnepêm na pre Tirtũm pĩ hpôk kamã tanhmã Mojes mã kapêr to. Mãn ra mẽ ate mar. Na pre kãm:

Ixpê Apraãw nhõ Tirtũm na pa. Nê mãänên ixpê Apraãw kra Ijak mẽ htãmnhwÿ Jako wa õ Tirtũm na pa.

Anhÿr o Mojes mã amnhĩ jarê nhũm kuma nê hã kagà.

²⁷ Kêp apu arĩ mẽ htyk rãhã nhÿx pre ã mẽ harênh anhÿr kêt nê. Nhÿx pre mẽ harênh o: “Amnepêm Apraãw nê hkra nê

htàmnhwý mẽ htír ri ixpê mẽ õ Tírtùm na pa pre.” Anhýr o nhýx pre mẽ harê. Nom na pre ã amnhĩ jarênh anhýr kêt nê. Mẽ pamã te Apraãwja mẽ htyk nê mẽ hapêx pyræk. Nom nhùm prem ra Tírtùm ri akupým htír nê mex nê pa ho pa. Tã ka htem Tírtùm kapêr kwým ri akupým mẽ htír kêt ã mẽ harênh o apa. Anê.

Tírtùm kapêr maati jarênh

Matêwre 10.37, 22.34-40; Rukre 10.25-27; mãânên Wam Juãw 2.15, 5.3; Apokarip 2.4

²⁸ Tã nhùm Tírtùm kapêr tùm o mẽ ahkre xwýnhjê hõ mẽ hwýr tẽ nê mẽ kot axpên mã kapêr ã mẽ omunh o xa. Hãmri nê Jejus kot tanhmã Satusew nhõ xwýnhjê mã kapêr mex toja ma nê kãm:

—Nà ãm hãmri na ka ã mẽ kãm ja jarênh anê Pahihti. Kwa inhmã mẽmoj jarê. Na pre Tírtùm ahpýnhã mẽmoj to 10 nê mẽ pamã hã karõ. Mẽ pahte hkôt amnhĩ nhípêx o ri papa kaxyw hã mẽ pamã karõ. Tã nhý kapêr na mex o kot hkwýjê jahkrenh wehe? Anê.

²⁹ Hãmri nhùm kãm:

—Nà Tírtùm kapêr xohtôô. Kapêr piitã hkôt mẽ pahte amnhĩ nhípêx o papaja na kãm hprãm. No pixi na mẽ pahte hkôt amnhĩ nhípêx o papaja nhùm kãm hprãm týx o kot hkwy jakrenh. Kapêr mex maati na ja. Na pre kapêr o:

E mẽ apê Ijaew nhõ xwýnhjaja. Ixpê mẽ anhõ Tírtùm ã ixpíxi mex na pa.

³⁰ Jakamã kêr ka mẽ amã ixkính týx o mẽmoj piitã hakrenh pa. Jao mẽ anhĩ piitã ho amã ixkính týx kumrêx o ri apa.

³¹ Anhýr o na pre mẽ pamã karõ. Nê hkôt ja:

Kêr ka mẽ nhãm mẽ hipêx o te ka amã amnhĩ tã ma pyræk o mẽ hipêx o ri apa. Jao tãm mẽ hipêx rãhã ho ri apa. Anê.

E ja wa kumrêx na Tírtùm kãm mẽ pahte hkôt amnhĩ nhípêx o ri papa hprãm týx nê. Anê.

³² Hãmri nhùm kuma nê kãm:

—Nà ãm hãmri na ka ja jarê Mëijahkre xwýnh. Tírtùm pyxi mex kênã.

³³ Amnepêm na pre htem kãm amnhĩ jarênh kaxyw nê kãm mẽmoj gõ nê rĩ kormã tanhmã kãm amnhĩ jarênh to. Tã nom kot puj mẽ ã ate harênhta kôt amnhĩ nhípêx

anhýr o papa jao mẽ panhĩ piitã pamã Tírtùm kính. Nê mẽ pamã hkính o mẽmoj piitã hakrenh pa. Nê nhãm mẽ hipêx o te mẽ papamjaja pamã amnhĩ tã ma pyræk o mẽ hipêx. Jao tãm mẽ hipêx rãhã ho ri papa. Kot puj mẽ ã amnhĩ nhípêx anê nhùm Tírtùm kãm ja mex o mẽ pahte kãm mẽmoj nhõrta jakre.

Anhýr o kãm kapêr.

³⁴ Hamaxpêr mex pẽ ã Jejus mã kapêr anê nhùm kuma nê kãm:

—Nà ãm hãmri na ka ja jarê. Na ka ra mẽ kot Tírtùm kôt amnhĩ nhípêx o amnhĩ nhípêx nyw pumunh mex o mõi. Nà te ate tokyx hkôt amnhĩ xãm kaxyw pyræk. Anê.

Hãmri nhùm mẽ kãm hkurê xwýnhjaja tee ri wa kot axpên mã kapêr mar o kuhê nê axte kãm mẽmoj tã hkukjêr puma nê. Ra tee ri mẽ kot hêx rom mẽmoj tã hkukjêr kaprý jakamã axte tanhmã hkukjêr to hkêt nê.

Jejus kêp pahi finat Tawi nhõ Pahihti hã harênh

Matêwre 22.41-46; Rukre 20.41-44; mãânên Rõmãn 1.3-4

³⁵ Hãmri nhùm Jejus arĩ Tírtùm mã amnhĩ jarênh xã hã ixkre kamã amnhĩ tã mẽ ahkre. Nom te nhãm mēhõ hã mẽ hkukjêr pyræk amnhĩ tã mẽ hkukja nê mẽ kãm:

—E mẽ inhmã mẽmoj jarê. Tírtùm kapêr tùm o mẽ ajakre xwýnhjaja na htem tanhmã mẽ amã Tírtùm kot mẽ akaxyw ãm mã xwýnh jarênh to nê mẽ amã harênh o: “Koja kêp pahi finat Tawi kanrêhã htàmnhwý koja.” Anhýr o kot mẽ amã harê. ãm kêp kanrêhã htàmnhwý pix ã mẽ amã harênh o pa. No na pre pahi Tawija kêp kanrêhã htàmnhwý hã harê nê mãânên kêp õ pahihti hã harê. Tã nom nhùm Tírtùm kapêr tùm o mẽ ajakre xwýnhjaja na htem urà nê kêp pahihti hã mẽ amã harênh kêt nê. ãm kêp kanrêhã htàmnhwý pix ã harê. Kwa mo na htem Tawi pyrã nê kêp õ pahi hã harênh kêt nê?

³⁶ Na pre Tawi tãm Tírtùm kapêr tùm kwý hã kagã nê tanhmã Tírtùm kot mẽ akaxyw ãm mã xwýnhhta jarênh to. Tírtùm Karõ nhý hã tanhmã harênh to. Tírtùm mex ã mẽ grer xãja kwý hã kagã nê hã kagã ho:

Tírtùm na pre inhõ Pahihti mã ã kapêr anê nê kãm: “E amnê ixwýr tẽ nê inhĩhkõ hã nhý nê inhmã mẽ ho amnhĩptàr

o akrĩ. Kot paj mẽ kot kãm akurê xwýnh piitã mẽ unênh pa nê awýr mẽ o mra nê anhĩhkram mẽ haxàr pa.” Anhýr o pre kãm kapêr. Anê.

³⁷—Na pre ã Tawi Tĩrtũm kot Kris mã kapêr jarênh nê kêp õ pahi hã kagà anê. Tã nom Tĩrtũm kapêr tũm o mẽ ajahkre xwýnhjaja na htem kêp Tawi htãmnhwý pix ã ri axpên mã harênh o ri pa. No kêt Tawija na pre kêp õ Pahihti hã harênh o pa. Anê.

Nhũm pre ã Jejus mẽ kãm amnhĩ jarênh anê nhũm mẽ mar o kuhê xwýnhjaja kuma nê hkĩnh nê. Nê kãm axte mar prãm nê.

³⁸Hãmri nhũm arĩ mẽ ahkre ho nhý nê mẽ kãm:

—Kwa mẽ o kora. Kêr ka mẽ Tĩrtũm kapêr tũm o mẽ ahkre ho mẽ pa xwýnhjê kot amnhĩ nhĩpêx o amnhĩ nhĩpêx kêt nê. Mẽ omu nê ãm mẽ omu nê mẽ kot amnhĩ nhĩpêx kôt amnhĩ nhĩpêx kêt nê. Na htem piitã mẽ hã hpijaãm kaxyw ê mex pix kãm ri pa. Nê mẽ kot amnhĩm mẽ rũnh ã mẽ harênh nhũm mẽ kot amnhĩ jarênh marja na htem kãm hprãm.

³⁹Nê Tĩrtũm kapêr o mẽ ahkre xà hã ixkre kamã mẽ kãm amnhĩ to rũnh xwýnhjê hkrĩ xà mex pix kamã na mẽ kãm hkrĩ hprãm. Nê mẽmoj tã mẽ apkur xà hã arĩgro hã ma hkwyjê hkôt mẽ apkur xà hã ixkre hwýr akuprõ nê kãm mẽ kot amnhĩ to rũnh xwýnhjê hkrĩ xà mex pix kamã hkrĩ hprãm.

⁴⁰—Nê mẽ kot mẽ mjên htyk xwýnhjê ho mex o pa hã amnhĩ jarênh tã amnhĩ to hêx. Nê na htem axtem nê mẽ nokupyr kaxyw mẽ hwýr mra nê mẽ kãm: “E ot pa awýr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anê hãmri nê mẽ kêp mẽ õrkwý pytà nê amnhĩm mẽ kêp mẽ hikukrêx piitã ho hapêx. Te tãm kot mẽ hipêx o pa pyrãk nom tãm mẽ hipêx kêt nê. Nê te tãm amnhĩ nhĩpêx pyrã nê Tĩrtũm mã amnhĩ jarênh japjêê ho kuhê. Te mẽ kot Tĩrtũm mã ãm hãmri amnhĩ jarênh pyrãk tã hkwyjaja kot ja hã mẽ omunh pix kaxyw nhũm mẽ ã kãm amnhĩ jarênh anê. Mýrapê koja mẽ mex kêt nê. Koja Tĩrtũm tanhmã mẽ hipêx kati hto. Jakamã kwa kêr ka mẽ ã mẽ kot amnhĩ nhĩpêx anhýr o mẽ pa xwýnhjê kôt amnhĩ nhĩpêx o ri apa hkêt nê. ãm kwarĩ ho kwarĩ. Anê.

Kêp mjên htyk xwýnh jarênh

Rukre 21.1-4

⁴¹Nhũm Jejus arĩ Tĩrtũm mã amnhĩ jarênh xà hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwýnhjê mã hikàxpore hkwy nhõr o pa. Nhũm mẽ hikàxpore rũnh xwýnhjaja hwýr agjê nê kàxpore gjênh xà kamã hkwy ho rax nê hagjê nê ma akupým mra.

⁴²Tã nhũm mẽhõ ni pê mjên htyk xwýnhja haxwýja hwýr axà. Kêp amrakati kumrêx. Nê hikàxpore týxre ãm pijakrutre htã kàxpore rũnh xwýnhjê hpãnhã ixkreta wýr tẽ. Nê kãm Tĩrtũm kĩnh xaj kàxpore gjênh xà kamã hamê kumê hãmri nê kato nê ma akupým tẽ.

⁴³Hãmri nhũm Jejus amým ã kot amnhĩ nhĩpêx anhýr ã omunh o xa nhũm ja kãm mex nê. Hãmri nê hkôt mẽ pa ho mẽ pa xwýnhjê mã harê nê mẽ kãm:

—E mãn ka mênire htêm mũj pumu. Na pre mjên kêp ty nhũm kêp amrakati nê hikàxpore grire htã amnhĩ pê õr pa. Kwýjê rom kãm Tĩrtũm kĩnh xaj amnhĩ pê õr pa. Apkur xà hã hikàxpore na.

⁴⁴Kêt mẽ hkwyjaja na hte hikàxpore hkwy pix o mra nê gjênh xà kamã hagjê nom arĩ mẽ hikàxpore rũnh. No nija na mẽ urãk nê kãm hikàxpore japê hkêt nê. Nê ho õxy hkêt nê ãmnhix piitã o tẽ nê õr pa. Anê.

13

Jejus kot nhýrmã mẽmoj piitã ho hapêx ã harênh

Matêwre 24.1-14; Rukre 21.5-9, 21.17-19; mããnênh Wam Ximotre 4.1; Sikũn Ximotre 3.1

¹Tã hãmri nhũm Jejus kôt mẽ pa ho mẽ pa xwýnhjaja arĩ Tĩrtũm mã amnhĩ jarênh xà hã ixkre kaxwýnh pumunh o kuhê nê hã Jejus mã:

—Hêxta waa nê. Ixkreja mex kumrêx Pahihti. Kên rũnh o mẽ kot hipêx jakamã mex o mex. Nê mẽ kot ri Tĩrtũm mã hkĩnh xà nhõr nêj haxwýja piitã mex kumrêx. Anê.

²Hãmri nhũm mẽ kãm:

—Nã mex tã koja nhýrmã mẽ kãm Tĩrtũm kurê xwýnhjaja grãnh pa. Koja arĩ kên axkrut্রে axpên mýnh nê nõr kêt kumrêx. Koja piitã anhgrã nê ahpyñhã ri hikwy.

Anhýr o mẽ kãm kapêr.

³ Hāmri nē ixkreja rūm kato nē ma tē nē hixēt pē Oriwēhti hā api nē hā nhỹ. Tĩrtũm nhõrkwỹ kutā hixētja nhũm hā api nē hā nhỹ. Hāmri nhũm Simāw Pētre mē Xiakre mē Juāw mē Andreja ma hkõt mra. Ahte hkõt mra nē mē kot Tĩrtũm mā amnhĩ jarēnh xā hā ixkre grānh par ā hkukja nē kām:

⁴ —Kwa xā ām hāmri koja mē ā ixkreja nhĩpēx anē? E aprĩ hā mē inhmā harē. Xā koja mē nhỹrmā kugrà nà xā koja mē tokyx ho anē? Kwa mēmo koja we wỳj ri tanhmā amnhĩ nhĩpēx to? Anē.

⁵⁻⁶ Hāmri nhũm mē kām:

—Nà kot paj mē amā harē. Nom nhỹrmā mēmoj piitā hapēx kaxyw tanhmā amnhĩ nhĩpēx to kumrēx kot paj mē amā harē ka mē inhma. Koja mē ohtō nē mē apē ixkwỳjē hwỳr mra nē hēx rom te pa ixte amnhĩ nhĩpēx pyrāk o amnhĩ nhĩpēx o pa. Nē tanhmā mē amā amnhĩ jarēnh to nē mē amā: “E pa na pre Tĩrtũm mē awỳr inhmē. Ixpē kaxkwa rūm ixwryk xwỳnhnta na pa.” Anhỹr o mē akõt mē amā amnhĩ to hēx o pa. Nē mē amā: “E na pa mē ato amnhĩptār kaxyw mē awỳr wrỳ.” Anhỹr o mē amā amnhĩ jarē. Nom kēr ka mē ama nē ām mē ama. Mē kot amnhĩ to hēx xwỳnh na mē. Kormā akupỳn ixpōx xā hā arĩgroja kormā.

⁷ —Nē koja mē nhỹri awry hā axpēn par o pa. Nē mē atāā axpēn par o pa. Nom kēr ka mē harēnh ma nē ri tee ri tokyx mēmoj piitā hapēx ā hkamnhĩx kēt nē. Mēmoj piitā hapēx xā hā arĩgroja kormā.

⁸ —Nē koja mēmoj piitā hapēx kaxyw nhũm ahpỳnhā ri pika piitā hkõt mē pa xwỳnh piitā pika hõ nhõ xwỳnhjē kutā amnhĩ xunhwỳ nē axpu nē axpēn pa.

—Nē koja pika piitā hkõt tanhmā mē ā kuteja mē hamỳ nhũm mē amnhĩ xā htỳx kām hamak o pa. Nhũm nhỹri pika httert tỳx nē. Nē nhỹhỳnh pika hkwy kamā mē pa xwỳnhjaja prām xāj pikaprār pa. Tā nom kormā mē kot amnhĩ xā htỳx kām hamak xā hkrax pix na ja. Te mēnijaja pijagri kaxyw nē kormā õhy xā hpỳnh pyrāk. Koja mēmoj piitā hapēx kaxyw nē ā amnhĩ nhĩpēx anē.

⁹ —E pa hpānhā mē kot Tĩrtũm mā amnhĩ jarēnh xā hā ixkre grānh par xwỳj ri mēmoj tanhmā kot hkukamā amnhĩ nhĩpēx to hā hā harē. Mē ate hā ixkukjēr xwỳnhnta kot

paj mē amā harē. Nà koja mē kām ixkurē xwỳnhjaja mē awỳr mra nē ixtā mē apynē nē mē atomnuj nē. Nē ma mē pikuprõnh xā hā ixkre hwỳr mē ato mra nē kamā mē kām mē ato kapēr punuj nē nhũm mē kuma nē ma mē ato mra nē mē ajagjē. Mē ate ixkõt apa ho apa xwỳnh ā ā mē anhĩpēx anē. Nē mē õ pahihiti hwỳr mē ato mra nē mē kām tanhmā mē ato kapēr punuj to.

¹⁰ Tā nom kwa kēr ka mē kutā akuhē nē māmri tām mē kām ijarēnh o akuhē.

¹¹ Nom kēr ka mē kām amnhĩ jarēnh kukamā tee ri ajamaxpēr o ri amā mē uma hkēt nē akuhē. Rỳ mē ajamaxpēr o: “Hēxta waa nē. Mē kot ixkukjēr ā arĩgrota ā tanhmā kot pa we ri mē kām amnhĩ jarēnh to?” Anhỹr o tee ri amnhĩ kukamā ajamaxpēr kēt nē. Koja Tĩrtũm Karō tanhmā mē akrā hto ka mē ý hā akatāt kõt tanhmā mē kām amnhĩ jarēnh to.

¹² —Nē mē atō nē mē anhĩpēxā nē mē akrajaja koja mē ixtā mē atā amỳnē nē ma pahĩ hwỳr mē ato mra nē kām mē ajarē nhũm mē kuma nē mē ajagjē nē mē akwỳjē pa.

¹³ Koja mē piitā ixkõt mē akamā gryk nē ā kām mē akurē ho pa anē. Nom mē kot ā mē anhĩpēx anhỹr mā tā kēr ka mē amnhĩ to htỳx nē ixkaga hkēt nē. Mē kot mē apar tā ka mē kaxkwa kamā akupỳm atĩr kurē kumrēx. Hāmri nē mē kurom Tĩrtũm mē wa ixri atĩr tũm nē amex rāhā nē apa ho apa. Mē kot tanhmā mē ato htā mē apē akupỳm kaxkwa kamā atĩr tũm nē apa mā xwỳnh jakamā kwa tee ri amnhĩ kukamā ajamaxpēr o ri apa hkēt nē. Anē.

Mē pahtomnuj tỳx xwỳnh maati hā harēnh

Matēwre 24.15-28; Rukre 21.20-24; mǎānēn Sikũn Tesarõn 2.3-4; Apokarip 13.11-17

¹⁴⁻¹⁶ Nhũm Jejus arĩ mē kām kapēr nē mē kām:

—Nē koja nhỹrmā kot mē atomnuj tỳx kumrēx xwỳnh maatiya axtem nē Tĩrtũm mā amnhĩ jarēnh xā hā ixkreja kamā amnhĩ xām. Hāmri ka mē ja hā omu nē mē kot krĩ grānh par mā ajamaxpēr kurē kumrēx. Koja ā amnhĩ nhĩpēx anē ka mē amỳm amnhĩ wỳr mē omu hāmri nē ajapõj nē ma aprõt nē amrar kurē

kumrêx. Mě apê jar pika pê Jutej kamã mẽ apa xwýnhjaja mẽ omu hãmri nẽ mẽ kot mẽ apar pymaj ma aprôt nẽ amrar kurê kumrêx. Hixêt prêk wýr ajapôj nẽ aprôt nẽ ma mra. Nẽ jar Jerujarê nhõ xwýnhjaja kê mẽ umaj haxwýja hapôj nẽ ma hprôt nẽ ma mrrar o mra. Nẽ kapôt ã ri mẽ pa xwýnhjaja kê mẽ ê jamýnh kaxyw akupým krĩ hwýr gjêx kêt nẽ. Æm ma mẽ umaj hprôt nẽ mrrar o mrrar kurê kumrêx.

¹⁷—Nẽ mẽ htujarô xwýnhjaja nẽ mẽ hkra karàre xwýnhjaja. Jajê pê koja mẽmoj omnuj týx nẽ. Tanhmã kot wem amnhĩ to nẽ hprôt týx? Nà pika ja kamã koja mẽ mex kêt nẽ. Mẽ kot amnhĩ tomnuj mýrapê koja Tirtüm tanhmã mẽ homnuj týx to.

¹⁸⁻¹⁹—Koja ã mẽmoj amnhĩ nhĩpêx anê hãmri nhũm mẽ piitã amnhĩ xà htýx kãm hamak rũnh o pa. Tirtüm kot mẽ piitã mẽ ho kator krax rũm amnẽ mẽ pa xwýnhjaja na mẽ kormã à htýx kamã hamak rũnh kêt nẽ. Kormã amnhĩ xà kamã hamak kryre. No nhýrmã mẽ hprôt xà hã arĩgrota ã koja mẽ amnhĩ xà htýx kamã hamak rax kumrêx.

—Tã akupýn ixte mẽ awýr ixwrýk xà hã arĩgrota ã kot pa mẽmoj punuj o ijapêx pa ka mẽ axte ã mẽmoj kot anhýr pumunh kêt nẽ. Nom kormã akupýn ixwrýk xwýj ri kot kaj mẽ amnhĩ xà htýx kamã ajamak o apa. Jakamã kêr ka mẽ ã amnhĩ nhĩpêx anhýrja kukamã amnhĩ to Tirtüm wý nẽ kãm: “Pa Tirtüm. Kwa kê mẽmoj ã amnhĩ nhĩpêx anhýr kaxyw hãmri kê amgrà pê ã amnhĩ nhĩpêx anê. Koja na pê ã amnhĩ nhĩpêx anê nhũm omnuj týx nẽ.” Anhýr o amnhĩ to awý.

²⁰—Mẽ hprôt xà hã arĩgrota ã koja Tirtüm kãm mẽ apê hkrajaja mẽ atyk par pymaj mẽ anê mẽmo punuta ã arĩgro hkwy grà nẽ mẽ akukamã mẽ amã ho grêre. Koja mẽ akamã ukapří xaj ã mẽ anê hipêx anê.

²¹—Nẽ koja ã mẽmoj amnhĩ nhĩpêx anhýr kaxyw hãmri nhũm mẽ hêx o mẽ pa xwýnhjaja ma mẽ awýr mra nẽ hêx rom tanhmã mẽ amã kapêr to nẽ mẽ amã: “E ota ra Tirtüm kot mẽ pakaxyw ãm xwýnhhta pôj. Kwa mẽ tokyx hwýr mra nẽ omu nẽ hkôt ri apa.” Anhýr o mẽ amã hêx. Hãmri nhũm mẽ hkwyjaja tee ri mẽ kuma nẽ mẽ amã: “Nà tãm kêt. Jar mẽ ixkamã na. E

mẽ tokyx amnẽ hwýr mãn mra nẽ omu.” Anhýr o mẽ amã hêx o pa. Nom kêr ka mẽ ama nẽ ãm mẽ ama nẽ mẽ hkôt amrar kêt nẽ.

²²⁻²³—E kwa mẽ inhma. Na pa ra ixprĩ hã mẽmoj kot ã amnhĩ nhĩpêx anhýrja kukamã mẽ amã tanhmã harênh to. Tã kêr ka mẽ axkãm ajamak rom nẽ ri apa. Koja mẽ kot amnhĩ to hêx xwýnhjaja axpên pãnhã mẽ awýr mra nẽ mẽ amã kêp Tirtüm kot mẽ akaxyw ãm xwýnh ã amnhĩ to hêx. Nẽ mẽ hkwyjaja kêp Tirtüm nhý hã kapêr jarênh xwýnh ã amnhĩ to hêx. Hãmri nẽ aa mẽ kot mẽmoj pumunh kêt kwý ho anhýr o pa. Te Tirtüm nhý hã kot ho anhýr pyrãk nom hêx rom mẽ apê Tirtüm kot amnhĩm mẽ arênh xwýnhjê nokupyr kaxyw ã amnhĩ nhĩpêx anhýr o pa. Anê.

Akupýn Jejus wrýk xà hã arĩgro jarênh Matêwre 24.29-31; Rukre 21.25-28; mããnên Sikün Pêtre 3.10; Apokarip 1.7, 19.11-16

²⁴⁻²⁵ Nhũm Jejus arĩ mẽ kãm kapêr nẽ mẽ kãm:

—Tã koja mẽ kot amnhĩ xà htýx kamã hamak xà hã arĩgrota hapêx nhũm Tirtüm ã mẽmoj nhĩpêx anê.

Koja kaxkwa ho àk týx nẽ nhũm myyti ahtyk.

Nhũm mytwrýre axte hirã hkêt nẽ.

Nhũm kanhêti piitã axrê nẽ rôrôk pa.

²⁶ Hãmri pa man akupýn pika hwýr wrý nhũm mẽ piitã ixwrýk kãm ixpumu. Kakrã kamã kot paj ixihtýx o inhĩrã rax kãm akupýn mẽ awýr wrý.

²⁷ Hãmri nẽ ma krĩ piitã hwýr Tirtüm kapêr o mẽ wrýk xwýnhjê rê nhũm mẽ ma mra nẽ annepêm ixte amnhĩ kaxyw mẽ axunhwýr xwýnh piitã ho akuprô nẽ akupýn ixwýr mẽ ho mra. Anê.

Jejus kot mẽmo pĩ hpàr ã ejêp jarênh

²⁸ Nhũm Jejus arĩ mẽ kãm kapêr nẽ mẽ kãm:

—E ka mẽ pĩ hpàr mũj pumu. Na hte mẽmo mytwrý hã rã nhũm mẽ omu nẽ ô hkukamã hamaxpêr kurê kumrêx.

²⁹ Ja pyrã nẽ koja mẽmoj ã amnhĩ nhĩpêx anhýr mẽ ka mẽ akupýn mẽ awýr ixwrýk mã ajamaxpêr kurê kumrêx.

³⁰ Koja akupýn ixpôx kêt ri ã mẽ kot mẽmoj kot amnhĩ nhĩpêx anhýr pumunh

xwýnhjaja kormã piitã htyk par kêt ri pa akupÿn mẽ awÿr wrÿ.

³¹—Nê koja nhÿrmã pika nê kaxkwa wa hapêx pa. Tã no ãm ixkapêr koja wa uràk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê. Anê.

Mẽ pahte akupÿn Jejus wrÿk xà hã arÿgro pumunh kêt ã mẽ pajarênh

Matêwre 24.36-44; Rukre 12.37-40; mããnên Atre 1.9-11; Wam Tesarôn 5.2; Sikün Pêtre 3

³² Nhũm Jejus arÿ mẽ kãm kapêr nê mẽ kãm:

—Nom akupÿn ixwrÿk xà hã arÿgroja mẽ ate omunh kêt. Nê kaxkwa kamã Tirtũm kapêr o mẽ wrÿk xwýnhjaja kot ja pumunh kêt. Nê pa ixpê Tirtũm Kra htã ijaxwÿja ixte ja hã amnhÿ pumunh kêt. ãm Mẽpahpãm maatija tapxipix kot ja pumunh.

³³—Tã mẽ ate akupÿn ixwrÿk xà hã arÿgro pumunh kêt jakamã kwa kêr ka mẽ axkãm ajamak rom nê ri apa. Nê apkati mẽ amnhÿ wÿr ijapêr arÿt rãhã ho ri apa.

³⁴⁻³⁵—E pa tanhmã mẽ amã akupÿn ixwrÿk xà hã arÿgro jarênh to ka mẽ inhma. Koja mênhõ nhÿhÿm nojarêt hãmri nê kãm mẽ àpênh xwýnhjê mã mẽ àpênh ã karõ nê òrkwÿ jamãr xwýnh mã tanhmã kãm karõ hto. Hãmri nê òrkwÿ kahê xà jamãr xwýnh mã kãm: “E kêr ka ixwakre kamã ijapêr arÿt rãhã ho ri apa.” Anê hãmri nê ma nhÿhÿm mõi. Tã mẽ kot ijapêr rÿt rãhã ho mẽ pa xwýnhjaja te kot ixkre kahê xà jamãr xwýnh kot amnhÿ nhÿpêx pyrãk. Ô patrãwja akupÿn hpôx xà hã arÿgro hã omunh kêt jakamã na hte kahê xà jamãr rãhã ho pa. Koja apu axpêr kamãt nhũm akupÿn hpôx japêr. Rÿ kôt ã kamãt rÿ krãhyre kà nhũm akupÿn hpôx japêr. Rÿ kwÿhtyk nhũm akupÿn hpôx japêr. Tã uràk nê mẽ ate akupÿn ixwrÿk xà hã arÿgro pumunh kêt jakamã kêr ka mẽ ijamãr rãhã ho ri apa. Jao ixkutêp inhmã tanhmã amnhÿ nhÿpêx to rãhã nê. Ra ixte mẽ amã hã karõ xà hkôt.

³⁶ Kop ixkre kahê xà jamãr xwýnhjaja tee ri ò patrãw kamã ama hãmri nê ra òtxwa nê htÿx òt o ÿr rôm nhũm haêr pê hwÿr hpôx ronhÿx ja kêp mex kêt nê. Ja pyrã nê kêr ka mẽ ixkutêp ixkôt amnhÿ nhÿpêx rãhã ho ri apa. Nom tee ri amnhÿ wÿr ixkãm ama

hãmri nê axte inhmã ajamaxpêr kêt pê atÿx ri tanhmã amnhÿ tomnuj to ho apa hkêt nê.

³⁷—E ixte mẽ amã mẽmoj jarênhja na pa hte ixkwÿjê piitã mẽ kãm harê. Jakamã kwa kêr ka mẽ akupÿn ixwrÿk ã ijapêr arÿt rãhã ho ri apa. Anê.

Nhũm pre ã Jejus amnhÿ kukamã mẽ kãm ujarênh anê.

14

Mẽ kot Jejus pÿr kukamã hamaxpêr ã mẽ harênh

Matêwre 26.1-5; Rukre 22.1-2; Juãw 11.45-53

¹ Tã nhũm Ijaew hkÿnhã ã arÿgro pê Pas wÿr apkati axkrut. Pas ã na hte mẽ ixpê Ijaewjaja amnepêm Tirtũm kot pika pê Ejit pê mẽ inhÿgêt nê mẽ ixpãmjê kator mã ijamaxpêr kaxyw axpên wÿr akuprõ nê hã ixkÿnh. Na pa htem arÿgroja mã: “Pas” anê. Nê harênh o: “Mẽ pahte pãw kaxkrit kêt kur ã arÿgro” anê.

² Jakamã nhũm mẽ inhõ patre krãhtũmjê mẽ Tirtũm kapêr tũm o mẽ ahkre xwýnhjaja kãm Jejus pÿr prãm nê. Nom mẽ kãm hkôt kapêr mar o mẽ pa xwýnhjê puma nê. Nê tee ri hã amnhÿ jahkre nê axpên mã:

—Hêxta waa nê. Tanhmã kot puj wem ho nê kupÿi? Kot puj mẽ pahkÿnh kãm tanhmã ho nhũm mẽ hkÿnh xwýnhjaja hã mẽ pahpumu nê mẽ pakamã gryk tÿx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê. Anê.

Mêhõ ni kot Jejus krã gregrer ã harênh

Matêwre 26.6-13; Rukre 7.36-50; Juãw 12.1-8

³ Rôm nhũm Jejus Simãw nhõrkwÿ kamã kormã apkur o nhÿ. Krÿ pê Petãn kamã. Simãwja na pre hkà kro xàpêr tÿx o pa nhũm Jejus akupÿn ho mex. Jakamã akupÿm ò krÿ hwÿr pøj nê kutã apkur o nhÿ. Hãmri nhũm mênhõ nija harênh ma nê mẽ hkuxwa xà hã kàx ò py nê ma hwÿr o tẽ. Nê mẽ hwÿr axà nê nhÿhÿnh kàx kahte nê mẽ hkuxwa xà ho hkrã gregrer pa.

⁴ Hãmri nhũm mẽ apkur o hkrÿ xwýnhjaja tee ri ã kot amnhÿ nhÿpêx anhÿr ã omu nê kamã gryk nê. Nê axpên mã:

—Tk. Kwa nà na hã mẽ hkuxwa xàta kapÿr par kumrêx.

⁵ Kop apu ma o htēm nē ho wēnē nē hpānhā kàxpore ho rax kumrēx nē hamýnh nē ho mē kēp amrakati xwýnhjē nhīpēx par nhýx ja kām mex nē. Mo na ri ā amnhī nhīpēx anhýr kēt nē?

Anē nē hā kām akir.

⁶ Hāmri nhūm Jejus mē kuma nē mē kām:

—Tk. Kwa mē kām axàkjēr kēt nē. Ām hāmri na ā inhīpēx anē.

⁷ Mē kēp amrakati xwýnhjaja koja mē arī mē akôt pa rāhā nē. Ka mē amā mēmo arīgro hā mē ho ajuta hprām nē tanhmā mē ho ajuta hto nē mē kām mēmoj gō. No pa kot paj ri mē akôt ixpa ka mē ixto mex ry ho apa hkēt nē. Kot paj tokyx mē are.

⁸ Ixtyk nhūm mē kot ijaxàr kukamā na ā ixkrā gregrer anē. Ām hāmri na ā inhīpēx anē.

⁹ Ām hāmri na pa mē amā ja jarē. Koja mē krī piitā hkôt axpēn mā ixte tanhmā mē anē amnhī nhīpēx to hā ijarēnh o pa nē määnēn kot ā inhīpēx anhýrja määnēn harēnh o pa. Nhūm mē piitā kot tanhmā ixto mex to hā harēnh ma. Anē.

Jut Kariot kot mē kām Jejus ā àmnēnh kaxyw ā harēnh

Matēwre 26.14-16; Rukre 22.3-6; Juāw 13.21-30

¹⁰ Tā nhūm Jut Kariotja. Jejus kôt mē pa ho mē pa xwýnhjē pē 12 hō na pre. Tā axtem nē Satanasti nhý hā ma patre krāhtūmjē hwýr tē nē axtem nē tanhmā Jejus o mē mar to nē mē kām:

—E ot pa mē amā Jejus jarēnh o tē. Xà kot paj mē amā hā amýnē ka mē hpānhā inhmā amnhīre nà? Anē.

¹¹ Hāmri nhūm mē kuma nē hkīnh nē. Hāmri nē kām:

—Nà kot paj mē amā amnhīre. Anē.

Hāmri nhūm mē kuma nē kato nē ma tē nē Jejus pynēnh kaxyw htānopxar o hkôt ri pa.

Jejus kot ý hā kapēr o mē pa xwýnhjē kutā apkur ā harēnh

Matēwre 26.17-19; Rukre 22.7-13

¹² Tā nhūm arīgro pē Pas kato. Amnepēm mē inhīgētjaja na prem ôwēhti hkrare hkwý pa. Tīrtūm kot ja hā mē omunh nē Ejit kām mē kām mē hkurē xwýnhjē nhīhkra nē mē kator kaxyw na prem ā amnhī nhīpēx anē. Jakamā na pa htem arī mē

ixpē mē hkanrēhā mē htāmnhwýjaja Pas ā axpēn wýr akuprō nē jam ijamaxpēr pē mē urāk nē ôwēhti hkrare hkwý hpa nē pāwti kaxkrit kēt kām kuku.

Jakamā nhūm Jejus kôt mē pa ho pa xwýnhjē pē 12jaja Pas ā mē apkur xà hā Jejus kukja nē kām:

—Kwa nhýri kot paj mē akutēp Pas ā mē panhō hā apē? Anē.

¹³ Hāmri nhūm mē kuma nē ja wa ho axkrut nē mē amnhī kukamā wa kumē nē wa kām:

—E wa ma Jerujarē hwýr wa tē. Nē hwýr axà nē mēhō myja pumunh kurē kumrēx. Nhūm amnhīm gō ru nē amnhī kre hā poti xām nē o tē ka wa omu nē hā ajēt nē ma ôrkwý hwýr hkôt tē.

¹⁴ Hāmri nē ixkre nhō dōn pumu nē kām: “E Jejus na wa inhmē pa wa awýr tē. Na awýr pēr mēnh o: ‘Nhýri kot paj we ixkôt ri mē pa ho pa xwýnhjē mē Pas ā axpēn kutā apku?’ Anhýr o na awýr pēr mē.”

¹⁵ —Wa ā kām akapēr anē kē war ama nē war amā ôrkwý nhīmōk ā ixkre rax ô jahkre. Ra kamā kaxyw mē paxàpkur xà hā mēmoj piitā. Ka wa omu nē māmri kamā mē ixkutēp mē panhō hā apē. Anē.

¹⁶ Hāmri nhūm wa kuma nē ma hwýr tē. Nē krīm axà nē ra kot wa kām mēmoj jarēnh xà hkôt mēmoj piitā omu nē mē kutēp mē kām mēō hā àpēnh o wa xa.

Jejus kot mēhō kot mē kām hā àmnēnh ā harēnh

Matēwre 26.20-25; Rukre 22.21-23; Juāw 13.21-30

¹⁷ Tā nhūm kamàtre nhūm Jejus mē hkôt mē pa ho pa xwýnhjaja wa hkôt mō.

¹⁸ Hāmri nē kýxpē ixkreja wýr api nē hwýr agjē nē apkur kaxyw hkrī hpa nē kormā apkur o hkrī nhūm Jejus mē kām:

—E pa mē amā mēmoj jarē ka mē inhma nē amnhī krām haxàr týx nē. Kot kaj mē ixkutā axàpkur o akrī xwýnhjē hō mē kām ixkurē xwýnhjē mā ixtā amýnē. Anē.

¹⁹ Hāmri nhūm mē tee ri kuma nē hkaprī htýx nē. Nē axpēn pānhā amnhī tā hkukja nē kām:

—Kwa xà pa kot paj ā anhīpēx anē? Nà pa hkēt. Anē.

²⁰ Hāmri nhūm mē kām:

—Nà mẽ apê 12jê hõ kot kaj ã inhîpêx anê. Mẽ ate ixkutã guhkra xãm anhõ pãwti ho mry kagõ nhek o akrĩ xwýnhjê hõ kot kaj ixtã amýnê.

²¹ Tĩrtũm kapêr ã kagà htũm kot ixkukamã harênh xà hkõt koja mẽ tanhmã ixto rax nê ixpĩ. Nom kot mẽ kãm ixtã àmnênh mã xwýnhta hêxta waa nê. ã kot amnhĩ nhîpêx anhýrja mýrapê koja amnhĩ xà htýx kãm hamak rax kumrêx. Kop apu aa õ mãmj nhõxà hkre rũm kator kêt ronhýx ja kãm mex nê.

²² Anê nê kormã mẽ apkur o hkrĩ rôm nhũm pãwti hõ py nê ho Tĩrtũm wý. Hãmri nê mẽ kãm ho hkry nê mẽ piitã mẽ kãm õr pa nê mẽ kãm:

—E na pa mẽ amã pãwti ho hkry nê mẽ amã kugõ. Ja pyrà nê koja mẽ ã inhîpêx anê nê te ixto hkry hpar pyràk o inhîpêx pa amnhĩ xà htýx kamã ijamak kãm ty. Nom mẽ anê kot paj ty. E mẽ mãmrĩ aku. Anê.

²³⁻²⁴ Nê hpãnhã wĩhti hã kop py nê mã ho anê nê Tĩrtũm mã harê. Hãmri nê mẽ kãm kugõ nê mẽ kãm:

—E mẽ kot ixpĩr xà hã arĩgrota ã koja ixkamrõ axkapĩ. Nom koja mẽ amarĩ ixpĩr nhũm amarĩ hpikapĩr kêt nê. ãm paa. Pa kot paj mẽ anê mẽ ãhkram amnhĩ jaxà nhũm mẽ ã inhîpêx anê. Koja ixkamrõ axkapĩ nhũm Tĩrtũm omu nê ixkukwak ri mẽ anê mẽ ate amnhĩ tomnuj piitã amnhĩ katut kõt rênh pa nê mẽ ato hkra. Ra amnepêm kot ja hã amnhĩ jarênh xà hkõt. Jakamã e. Mẽ axpên pãnhã ixkamrõ pikapĩr mã ajamxpêr pê ixte mẽ amã kop kãm wĩhti nhõrta o akõm o axpên nhîpêx. Anê.

Nhũm pre ã mẽ kãm amnhĩ jarênh anê nhũm mẽ piitã ho hkõm o axpên nhîpêx.

²⁵ Hãmri nhũm mẽ kãm:

—ãm hãmri na pa mẽ amã amnhĩ jarê. Kot paj axte wĩhti ho ixkõm kêt rãhã nhýrmã Inhõ Papaj akupýn mẽ awýr inhmê. Hãmri pu mẽ rĩ kormã akupýn ixpõx xà hã arĩgrota ã pahkĩnh nê. Nom axtem tanhmã hã pahkĩnh to. Anê.

²⁶ Nhũm pre ã mẽ kãm kapêr anê hãmri nhũm mẽ Tĩrtũm mã mex o mex ã gre hãmri nê hapõx pa nê ma hixêt pê Oriwêhti hwýr mra.

Jejus kot Simãw Pêtre hkukamã tanhmã harênh to

Matêwre 26.31-35; Rukre 22.31-34; Juãw 13.36-38

²⁷ Tã nhũm Jejus hkõt mẽ pa ho pa xwýnhjê hkukamã tanhmã mẽ kãm ujarênh to nê mẽ kãm:

—E mẽ inhmã. Tĩrtũm kapêr ã kagà htũm kot ã mẽ pajarênh kot anhýr.

Kot paj ôwêhti jamãr o pa xwýnhja pĩ hãmri nhũm ôwêhti hpigrãnh pa nê ma angrã nê ri mra.

Anhýr o te ixpê ôwêhti jamãr xwýnh nhũm mẽ apê ôwêhti pyràk ã mẽ pajarênh. Tã kot puj mẽ ã amnhĩ nhîpêx anê.

²⁸ Mẽ kot ixpĩr tã koja Tĩrtũm akupým ixto ixtĩr. Pa akupým ixtĩr nê ma mẽ akukamã pika pê Garirej wýr mõ. Kamã kot puj mẽ axte axpên pumu. Anê.

²⁹ Hãmri nhũm Simãw Pêtre tee ri mẽ amnhĩ tã kuma nê kãm:

—Kwa nà. Ri ã mẽ ijarênh anhýr kêt nê Pahihti. Kot paj akaga hkêt nê. Jajaja koja angrã nê hprõt nê ma mrar japêr no pa kot paj anhýr kêt nê. Anê.

³⁰ Hãmri nhũm kãm:

—Nà kot kaj anê Simãw Pêtre. Koja apkati hkõt krãhyre hkàr kêt ri ka ra mẽ umaj ate ixkõt apa hkêt ã mẽ kãm amnhĩ tã axaprãr o axkrunêpxi kãm ga. Kwa jam ajamxpêr týx nê. Anê.

³¹ Hãmri nhũm tee ri amnhĩ tã kuma kãm amnhĩ tã aprãr kãm hihtýx nê kãm:

—Tk. Kwa nà. Kot paj ã amnhĩ nhîpêx anhýr kêt nê. Koja mẽ tee akõt ixpĩr mã tã no pa ãm aa akaga hkêt kumrêx. Kot paj akõt ixpa ho ixpa rãhã nê. Anê.

Hãmri nhũm hkõt mẽ pa ho mẽ pa xwýnh kwýjê piitã ã kãm amnhĩ jarênh anê.

Jejus kot Tĩrtũm mã amnhĩ jarênh

Matêwre 26.36-46; Rukre 22.39-46

³² Tã nhũm Jejus ma nhýri mẽ kot kãm “Gesêm” anhýr xwýnhja wýr hkõt mẽ pa ho pa xwýnhjê ho mõ. Hãmri nê mẽ kãm:

—E mẽ jar ixkutêp akrĩ. Pa ma mütũm tẽ nê Tĩrtũm mã amnhĩ jarê mãn. Anê.

³³ Hãmri nê amnhĩ kõt mẽ ho axkrunêpxi nê mẽ o mõ. Simãw Pêtre mẽ Jepetew kra pijakrut pê Xiakre nê Juãwja nhũm amnhĩ kõt mẽ o mõ.

³⁴ Hāmri nē amnhī kukamā mẽ kām hkurê xwýnhjaja kot tanhmā hipêx tota kukamā hamaxpêr o ra amnhī kamā kahak tỳx o ra hkaprī nē. Hāmri nē hkôt mẽ mrar xwýnhjê mã kām:

—Hêxta waa nē. Na pa tee ri amnhī xà htỳx kamā ijamakja kukamā ijamaxpêr nē amnhī kamā ixkahak tỳx o ixkaprī nē. Te ra ixkaprīja kot ixpīr o mōr pyrāk. Jakamā e mẽ jar anohtỳx nē ixto Tirtũm wỳr o akrī kē tanhmā ixto pa mẽ kot tanhmā ixtoja kutā ixihtỳx nē. Anē.

³⁵ Hāmri nē mẽ kurũm htēm grire nē amnhī kamā kahak o Tirtũm mã amnhī jarēnh kaxyw htũ mỳr pē htēm nē pikap nõ nē kām:

³⁶ —Kwa Papaj. Hêxta waa nē. Inhmā amnhī xà htỳx kām ijamak prām kêt kumrêx. Na pa tee ri amnhī kukamā ijamaxpêr nē amnhī kamā ixkahak tỳx nē. Jakamā kot kaj amā inhnê ja ho ajapêx prām nē māmri ho ajapêx nhũm mẽ kām ixkurê xwýnhjaja tanhmā ixto hkêt nē. Rỳ ko. Kot kaj amā mẽ kot tanhmā ixto hprām kē mẽ māmri tanhmā inhīpêx to. Nom pam inhmā hprām xà hkôt kêt.

³⁷ Anhỳr o Tirtũm mã amnhī jarē hāmri nē kànhmā xa nē akupỳm Simāw Pêtreja mẽ hwỳr tē nē mẽ omu nhũm mẽ ra htỳx gōr nē hikwỳ. Hāmri nhũm tee ri mẽ omu nē Simāw Pêtre mã kām:

—Kwa Simāw Pêtre. E mẽ hāmri akrā hapōj. Kwa wem anohtỳx grire nē ixkutêp amnhī to Inhō Papaj wỳr o akrī

³⁸ kē mẽ ixkôt tanhmā mẽ ato htā ka mẽ amā mẽ uma xàj ixkaga hkêt nē arī mẽ kutā amnhī to htỳx nē akuhê. Ā mẽ amā mẽ ate amnhī nhīpêx anhỳr prām nom kormā mẽ amā maa. Anē.

³⁹ Hāmri nē akupỳm tē nē axte Tirtũm mã tanhmā amnhī jarēnh to.

⁴⁰ Nē akupỳm mẽ hwỳr tē nē mẽ omu nhũm mẽ axte ôt pa nē hikwỳ. Nhũm tē nē tee ri mẽ omu hāmri nē tanhmā mẽ kām nē hkêt nē. Ām awjanā nē ma akupỳm tē nē axte Tirtũm mã amnhī jarē.

⁴¹⁻⁴² Hāmri nē akupỳm mẽ hwỳr tē nē mẽ kām:

—Kwa xàn ka mẽ arī gōr nē anhīkwỳ? E mẽ tokyx akrā hapōj. Na mẽ ra ixwỳr mrar nē kot ixpynênh mã. Koja mẽ tokyx ixkutā mẽ kot amnhī xunhwỳr xwýnhjaja mẽ kām

ixtā amỳnê. Ota ra kot ixtā mẽ kām àmnênh xwýnhta tē. E mẽ tokyx kànhmā akrī pu mẽ kutā mra. Anē.

Mẽ kot Jejus pynênh ã mẽ harênh

Matêwre 26.47-56; Rukre 22.47-53; Juãw 18.1-11

⁴³ Nhũm Jejus kormā mẽ kām kapêr o ãm rāhã nhũm Jut Kariotja tē. Mẽ hkôt mẽ pa ho mẽ pa xwýnhjê hō htā nhũm ra amnhī kôt mẽ ohtô nē Jejus wỳr mẽ o tē nhũm mẽ wapohti nē kô jamỳ nē hkôt o mra. Patre krāhtũm mẽ Ijaew krāhtũmjê mẽ Tirtũm kapêr tũm o mẽ ahkre xwýnhjaja ra Jut kôt mẽ kurê nhũm mẽ man hkôt Jejusja wỳr mra.

⁴⁴ Na pre ra Jut Kariotja mẽ kām tanhmā amnhī jarēnh to nē mẽ kām:

—E kot paj nhỳri mẽ pahte unênh mã xwýnhta pumu nē hwỳr tē nē kahti hkôt kumỳ nē tanhmā kām ixkapêr to. Ka mẽ ixpumu nē hwỳr tē nē unê nē ma akupỳm o tē.

Anē hāmri nē ma hwỳr mẽ o tē.

⁴⁵ Nē Jejusja pumu nē hwỳr tē nē kām: “Pa mẽ ijahkre xwýnh.” Anē hāmri nē kahti hkôt kumỳ.

⁴⁶ Hāmri nhũm hkôt mẽ mrar xwýnhjaja omu nē Jejus wỳr mra nē unênh kurê kumrêx.

⁴⁷ Hāmri nhũm Jejus kôt mẽ pa ho mẽ pa xwýnhjaja tee ri ja hã mẽ omu nhũm hōja õ wapo kapa nē patre maati mã àpênh xwýnh kot mẽ hkôt htēm xwýnhta mã wapo ho apê. Nē kot ho hkrā nhīpôn mã tã kuhpaw nē upôk rũm hamak nhīkjê krāhta.

⁴⁸⁻⁴⁹ Hāmri nhũm Jejus amnhī tã mẽ kot unênh xwýnhjê mã kām:

—Kwa na pa pre apkati mẽ Tirtũm mã amnhī jarēnh xà hã ixkre kamā mẽ kām ixjarēnh o ixpa ka prem tokyx ixpynênh kêt nē. Tã jarāhã te ixte amnhī tomnuj xwýnh pyrā nē ixwỳr wapohti nē kô hã akapên nē ixwỳr atēm rax nē. Nom ra mẽ ate tanhmā ixto kaxyw arīgro kator jakamā mẽ māmri tanhmā amā ixto hprām xà hkôt tanhmā ixto. Tirtũm kapêr ã kagà htũm kot mẽ akukamā ã mẽ ate inhīpêx anhỳr ã mẽ ajarēnh xà hkôt. Anē.

⁵⁰ Hāmri nhũm hkôt mẽ pa ho mẽ pa xwýnhjaja tee ri mẽ kot unênh ã mẽ omu

hāmri nē mẽ umaj Jejus kaga nē ma hprõt pa nhũm ahte mẽ kuri xa.

⁵¹⁻⁵² Hāmri nhũm mẽ ma o tẽ. Nhũm kormã mēhõ nyw xwýnhja tee ri ja hã mẽ omu nē ma Jejus kõt tẽ. Nhũm mẽ amnhĩ kõt omu nē kot unēnh kaxyw kahty xà hã kupy nhũm mẽ umaj mẽ ìhkra kamã kahty xàja re nē ma hkēnh nē hprõt nē tēn akunok.

Ijaew nhõ patre maati kot Jejus kujêr ã harēnh

Matêwre 26.57-68; Rukre 22.63-71; Juãw 18.12-14, 18.19-24

⁵³ Tã nhũm mẽ ma mẽ õ patre maati nhõrkwỹ hwýr Jejus o tẽ. Hāmri nhũm patre krãhtũmjê mẽ Ijaew krãhtũmjê mẽ Tĩrtũm kapēr tũm o mẽ ahkre xwýnhjaja õrkwỹ hwýr Jejus ã akuprõ.

⁵⁴ Hāmri nhũm Simãw Pêtre mẽ hkõt tẽ nē mẽ hkõt patre maati nhõ kítare hwýr axà nē amým hã mẽ omunh o xa. Nhũm ra pôristijaja kítare kamã amnhĩm kuto nē hã ànhunh o hkrĩ nhũm mẽ hwýr tẽ nē mẽ ìhkõ hã ànhunh o nhỹ.

⁵⁵⁻⁵⁶ Rôm nhũm ixkre kamã mẽ pikuprõnh xwýnhjaja tee ri Jejus ã krĩ nhõ xwýnhjê kujja nē mẽ kãm:

—E mẽ atõ na ka pre Jejus kot tanhmã amnhĩ tomnuj to hã omu? Mẽ atõ mẽ inhmã harē pa mẽ ama nē Rôm nhõ xwýnhjê nhĩhkram haxà kê mẽ pamã kupĩ. Anẽ.

Hāmri nhũm mẽ axpēn pãnhã tanhmã harēnh to. Tanhmã kot amnhĩ tomnuj to hã harēnh to htã nom ri ho hēx jakamã axpēn kwým ri tanhmã ri harēnh to nhũm mẽ tee ri mẽ kuma nē mẽ kãm:

—Tk. Kwa mẽ axpēn kwým ri tanhmã harēnh to hkēt nē. Axpēn kõt mãn ri tanhmã mẽ inhmã harēnh to. Anẽ.

⁵⁷ Hāmri nhũm mẽ hkwyjaja kãnhmã kuhê nē axpēn kõt tanhmã ho hēx to nē mẽ kãm:

⁵⁸ —Nà kot paj mẽ amã tanhmã kot amnhĩ nhĩpêx to hã harē. Na pa prem ã kapēr anhýr ã kuma. Na pre tanhmã Tĩrtũm mã amnhĩ jarēnh xà hã ixkreta jarēnh to nē harēnh o: “Kot paj ixkreja grãnh pa hāmri nē ixtã apkati axkrunēpxi nē akupým hipêx. Nom kot paj amnhĩ nhĩhkra ho hipêx kēt nē.” Anhýr ã ã amnhĩ jarēnh anẽ pa mẽ kuma.

⁵⁹ Anhýr o harēnh tã nom axpēn kõt harēnh kēt nē. Arĩ axpēn kwým ri harē.

⁶⁰ Hāmri nhũm mẽõ patre maati tee ri mẽ kot tanhmã ho kapēr toja ma nē mẽ aptàr tũmjê noo mã kãnhmã xa nē Jejus mã kãm:

—E na ka ra mẽ kot ã ajarēnh anhýrja ma. Xà kot kaj tanhmã mẽ inhmã amnhĩ tã axaprãr to hkēt nē? Xà ãm hāmri na mẽ ajarē? E kwa mẽ inhmã tanhmã amnhĩ jarēnh to. Anẽ.

⁶¹ No nhũm akryk xa nē tanhmã kãm nē hkēt nē. Hāmri nhũm tee ri ã kot amnhĩ nhĩpêx anhýr ã omu nē axte kãm:

—Kwa mẽ inhmã amnhĩ jarē. Xà apê Tĩrtũm Kra na ka? Xà ka na apê Tĩrtũm kot mẽ ixwýr amēnh xwýnh na ka? Anẽ.

⁶² Hāmri nhũm tã kãm amnhĩ jarē nē kãm:

—Tỳ. Ixpê tãmta na pa. Ra mẽ ate jarãhã tanhmã ijarēnh to kaxyw apikuprõnh tã nom kot paj nhýrmã mẽ kamjaja tanhmã mẽ ajarēnh to ka mẽ amnhĩ tã ixpumu. Kot kaj mẽ Tĩrtũm kot mẽ ato amnhĩptàr xà kutã akrĩ hāmri pa hwýr tẽ nē ìhkõ hã nhỹ. Kakrã kamã kot paj hwýr tẽ nē ìhkõ hã nhỹ hāmri nē ý hã tanhmã mẽ ajarēnh to ka mẽ amnhĩ tã ixpumu. Anẽ.

⁶³⁻⁶⁴ Hāmri nhũm tee ri ã kot amnhĩ jarēnh anhýrja ã kuma nē gryk xàj amnhĩ xê kaxõ nē mẽ àptàr tũmjê mã kãm:

—Kwa mo kaxyw kot puj mẽ axte ri ho tanhmã kot amnhĩ tomnuj to hã harēnh xwýnhjê hõ japêr? Ra tãm kot amnhĩ pê Tĩrtũm Kra hã amnhĩ to hēx nhũm mẽ pahte pajamak o mar kēnã. E tanhmã kot puj mẽ ho? Anẽ.

Hāmri nhũm mẽ kãm:

—Nà kot puj mẽ kupĩ. Ra htyk mã tãm kēnã. E kwa tokyx pu mẽ ma Rôm nhõ pahihtu hwýr o tẽ kê mẽ pamã hã amýnê kê mẽ kupĩ. Anẽ.

⁶⁵ Hāmri nhũm mẽ hipêx kati rax nē. Nē hkuk kuhtõ nē hpãnhã no hpro nē hta nē kãm:

—E mẽ kot atak xwýnhjê nhĩxi jarē. Apê Tĩrtũm Kra hã ate amnhĩ jarēnh jakamã mãn uràk nē axàhpumunh tỳx. Jakamã e mẽ hixi jarē. Anẽ.

Nhũm prem ã hipêx anẽ hāmri nē pôristijê nhĩhkram haxà nhũm mẽ hta nē rax o kuhê.

Simãw Pêtre kot Jejus kôt pa hkêt ã kot amnhĩ jarênh

Matêwre 26.60-75; Rukre 22.54-62; Juãw 18.15-18, 18.25-27

⁶⁶⁻⁶⁷ Rôm nhũm Simãw Pêtre arĩ kítare kamã mẽ ìhkô hã ànhunh o nhỹ. Hãmri nhũm mẽõ patre maati mã àpênh xwýnh nitita mẽ hwýr kato nê xa. Hãmri nê hirã kamã hprĩ hã Simãw Pêtre pumu nê omunh mex kurê kumrêx nê kãm:

—Xê pêr apê Najare nhõ xwýnh Jejus kôt mẽ pa ho mẽ pa xwýnhjê hõ na ka. Anê.

⁶⁸ Hãmri nhũm tee ri kuma nê ra kãm ma nê. Nê kãm amnhĩ tã aprã nê kãm:

—Tk. Kokỹ. Ixte mẽhõ my ata pumunhre hã. Anê.

Hãmri nê kànhmã xa nê ma tẽ nê kítare hwýr kahê hkôt ã mẽ hkax ã ahte xa nhũm krãhyre kà.

⁶⁹ Nê gaa nhũm hpãnhã mẽ kãm àpênh xwýnhjê hõja omu nê hã mẽ kãm:

—Xê ma ãm hãmri na harê. Kôt ri mẽ pa xwýnhjê hõ na pêr. Anê.

⁷⁰ Hãmri nhũm amnhĩ tã kuma nê kãm:

—Tk. Kwa nà. Mẽ ri ã amnhĩ krã hkôt ri ixto axêx anhỹr kêt nê. Aa ixte mẽhõ ata pumunh kêt kumrêx. Anê.

Hãmri nhũm mẽ hkwyja gaa nê kê axte hprĩ hã omu nê kãm:

—Kwa ãm hãmri na mẽ ajarê. Apê Jejus hkwy na ka. Ajaxwýja apê Garirej nhõ xwýnh kênã. Anê.

⁷¹ Hãmri nhũm tee ri mẽ kuma nê kãm ma htýx nê. Hãmri nê mẽ kãm:

—Kwa nà. Na pa Tirtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà uràn ixpê Garirej nhõ xwýnhre hã. Ixte mẽhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwýnh ã ixkamnhĩx o xa.

Anhỹr o ra mẽ kãm amnhĩ tã aprãr o axkrunêpxi.

⁷² Hãmri nhũm axte krãhyre kà. Jao ra hkàr o axkrut. Hãmri nhũm Simãw Pêtre kuma nê Jejus kot ra hkukamã ã amnhĩ nhĩpêx anhỹr ã harênhja mã hamaxpêr kurê kumrêx. Krãhyre kormã hkàr o axkrut kêt ri kot mẽ kãm amnhĩ tã aprãr o axkrunêpxi hã harênhja mã hamaxpêr. Hãmri nê ra kànhmã hakry hpar o tẽ nê

hkaprĩ htýx kumrêx. Hãmri nê tee ri amnhĩ kukamã hamaxpêr nê amnhĩ mã:

—Hêxta waa nê. ãm hãmri na pre Jejus ijarê. Tã pa kot ijarênh xà hkôt ã amnhĩ nhĩpêx anê. Kwa mo na pa axtem nê ã mẽ kãm amnhĩ to ixêx anê?

Anê hãmri nê hkaprĩ xaj mýr rax nê.

15

Pirat kot Jejus kukjêr ã harênh

Matêwre 27.1-2, 27.11-14; Rukre 23.1-5; Juãw 18.28-38

¹ Tã nhũm myt kato nhũm mẽ axte Jejus ã axpên wýr akuprõ. Patre krãhtũmjê mẽ Ijaew krãhtũmjê mẽ Tirtũm kapêr tũm o mẽ ahkre xwýnhjê mẽ Ijaew nhõ juistijaja nhũm mẽ piitã hã akuprõ. Hãmri nê pòristi mã anê nhũm mẽ Jejus pa hpre nhũm mẽ ma Rôm nhõ xwýnhjê nhõ pahĩ Pirat wýr o tẽ. Piratja na pre hte Rôm nhõ xwýnhjê nhõ pahĩ Sesti nhỹ hã Ijaew o amnhĩptar o pa nhũm prem ma hwýr o tẽ.

² Hãmri nê kutã ãm nê tanhmã kãm harênh to nê kãm:

—E ot pa mẽ awýr jahti ho tẽ. Na hte mẽ inhmã hêx rũnh o pa. Mẽ ixte Pahĩti Sesti kapêr kwým ri amnhĩ nhĩpêx prãm xaj tanhmã mẽ inhmã hêx to. Nê axtem nê mẽ ixte Sesti mã kãxpore hkwy nhõr kêt ã mẽ inhmã karõ. Nê Tirtũm kot mẽ ixkaxyw kêt mẽ inhõ pahĩ hã ãm ã amnhĩ jarênh o pa. Na hte ã mẽ inhmã amnhĩ to hêx anhỹr o pa. Anê.

Hãmri nhũm Pirat mẽ kuma nê Jejus pumu nê tanhmã hkukjêr to nê kãm:

—E inhmã amnhĩ jarê. Xà ãm hãmri na mẽ ã ajarênh anê nà? Xà apê Ijaew nhõ pahĩ na ka? Xà ka na htem amnhĩ wýr akãm hamak o pa? Anê.

Hãmri nhũm kãm:

—Tý. Nà ãm hãmri na ka ã ijarênh anê. Anê.

³ Hãmri nhũm patre krãhtũmjaja tanhmã kãm ho kapêr to.

⁴ Nhũm mẽ kuma nê axte hkukja nê kãm:

—Kwa na mẽ ã ajarênh anê ka mẽ ama nê ãm mẽ ama nê inhmã tanhmã amnhĩ tã axaprãr to hkêt nê. Anê.

⁵ Nom nhũm Jejus ãm akryk xa nê tanhmã axte kãm nê hkêt nê. Jakamã nhũm Pirat tee ri omunh pê hamaxpêr o nhỹ.

*Pirat kot Jejus p̄r ã àmnênh ã harênh
Matêwre 27.15-26; Rukre 23.13-25; Juãw
18.39-19.16*

⁶ Na pre hte pahi Pirat arĩgro p̄e Pasja ã Ijaewjaja kãm hprãm xà hkôt mẽ hagjênh xwýnhjê ho hpýnh mẽ mẽ kãm ure.

⁷⁻¹⁰ Jakamã nhũm Ijaew kwýjaja hwýr mra mẽ kãm:

—Pa. Kwa xà kot kaj jarãhã mẽ inhmã mẽ hagjênh xwýnhjê hõ mã anhũre nà? Anê.

Hãmri nhũm mẽ kuma mẽ hamaxp̄er o:

—E paj Jejus ã mẽ kuma mẽ kãm inhũre. Mẽ piitã mẽ kãm kap̄er mar prãm nhũm mẽõ patre krãhtũmjaja pix kot mẽ hkôt kamã gryk mẽ ã ixwýr o mrrar anhýr kênã. Anê.

Hãmri mẽ mẽ kãm:

—Tý. Nà kot paj mẽ amã hõm inhũre. Kwa xà kot pa mẽ amã mẽ anhõ “pahihti” jarênhja mã inhũre nà? Anê.

¹¹ Hãmri nhũm patre krãhtũmjaja tee ri kuma mẽ mẽ kãm:

—Kwa mẽ kãm anê kê Parapas mã mãn ure. Anê.

Hãmri nhũm mẽ kuma mẽ Pirat mã kãm:

—Nà Jejus mã anhũrer kêt mẽ. Parapas mã mãn anhũre. Anê.

¹² Hãmri nhũm mẽ kãm:

—No mẽ ate mẽ anhõ pahi hã harênh xwýnhhta? Tanhmã kot paj ho? Anê.

¹³ Hãmri nhũm mẽ àmra kamã kãm hã amýnê mẽ mẽ kãm:

—Kwa pĩ kahpa hã anhõ kê ty. Anê.

¹⁴ Hãmri nhũm tee ri mẽ kuma mẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa ã hipêx anê.

Anhýr tã nhũm mẽ xatã anhĩpê kãm kap̄er kãm hihtýx mẽ mẽ kãm:

—Kwa pĩ kahpa hã mãn anhõ kê ty. Tokyx ã mẽ inhmã hipêx anê.

Anhýr o kuhê. Kàx p̄e kãm anhýr o kuhê.

¹⁵ Nhũm tee ri mẽ kuma hãmri mẽ mẽ kãm hprãm xà hkôt mẽ mẽ kãm Parapas mã ure. Nẽ p̄oristi hkwyjê mã Jejus ã amýnê mẽ mẽ kãm:

—Tõe. Mẽ mamrĩ hwýr tẽ mẽ htak hãmri mẽ kapôt ã mẽ hpar xà hã pika hwýr o tẽ mẽ pĩ kahpa hã anhõ. Anê.

*Mẽ kot Jejus tak ã mẽ harênh
Matêwre 27.27-32; Juãw 19.2-3*

¹⁶ Tã nhũm p̄oristijaja akupým ixkreja wýr Jejus o axà mẽ amnhĩ wýr hkwyjê hã karõ nhũm mẽ hwýr agjê mẽ Jejus ã akuprõ.

¹⁷ Hãmri mẽ kêp pahi hã hp̄er o pikênh kaxyw kãm pahi hã mẽ ahkã nhĩpêx mẽ hkrãm haxà. Nom axtem mẽ akunĩ kamã mẽmo mrõ nhĩ te kot ronh kanêre pyrãk xwýnhja nhũm mẽ kãm hikãx mẽ hkrãm haxà. Hãmri mẽ kêp ê kapa mẽ pahi hã mẽ ê kamrêk õ py mẽ mẽ kãm haxà.

¹⁸ Hãmri mẽ mẽ kãm:

—E apê Ijaewjê nhõ pahi na ka. Anê.

¹⁹ Hãmri mẽ xatã axp̄en pãnhã hwýr mra mẽ pĩ ho hkrãx p̄e htak mẽ hkuk kuhtõ mẽ hã hp̄er o pikênh p̄e hã hpijaam pyrã mẽ kutã hkõn krã ho hkrĩ.

²⁰ Hãmri mẽ kêp pahi xê kapa mẽ akupým kãm ê jaxà mẽ pĩ kahpa hã nhõr kaxyw ma o kato mẽ o tẽ.

²¹ Nom nhũm ra hirok týt mẽ nhũm mẽ tee ri omu hãmri mẽ mẽhõ kot ho ajuta kaxyw mẽ kot hkôt omunh o mõr xwýnhjê kapi ho xa. Hãmri mẽ Sirên nhõ xwýnh Simãw hkã htykreja pumu. Aresãn mẽ Rupti wa hipêxà na pre. Nhũm htýt hamakêtkati mẽ mẽ kutã krĩm tẽ. Hãmri nhũm mẽ haê mẽ unê mẽ mẽ kãm Jejus o ajuta kaxyw hã karõ nhũm kãm pĩ kahpaja mý mẽ mẽ hkôt o tẽ.

Mẽ kot pĩ kahpa hã Jejus nhõr ã mẽ harênh

Matêwre 27.33-44; Rukre 23.33-43; Juãw 19.17-27

²² Nhũm mẽ ra kên nhĩxêt te kot mẽ hkrã hi pyrãk xwýnhja wýr Jejus o p̄õj. Mẽ kot kãm “Korkot” anhýr xwýnhja wýr. Mẽ pakap̄er kãm na htem Korkotja jarênh o: “Mẽ hkrã hi xà” anê. Jakamã nhũm mẽ ra hwýr o p̄õj.

²³ Hãmri mẽ kot pĩ kahpa hã nhõr kaxyw wĩhti hkwy ho mẽ mẽmo mẽhkanexà p̄e mĩra ho ahkã. Kot ho kõm mẽ amnhĩ xà htýt kãm hamak kêt kaxyw hipêx mẽ mẽ kãm kugõ nom nhũm hkaga mẽ ho hkõm kêt mẽ.

²⁴⁻²⁶ Hãmri nhũm myt kaxkwa nhĩpõk wýr tẽ nhũm mẽ pĩ kahpata ã Jejus xi mẽ prek o ãhkra ho htýt mẽ hpar o htýt. Nẽ hpãnhã kaxyw kakwý mẽ kãnhmã pĩ kahpa jarĩ mẽ kre kamã ãm mẽ hity hpa. Nhũm Jejus kýx p̄e amnhĩ xà htýt kumrêx kamã hamak o ajêt. Nhũm p̄oristi hõja tẽ mẽ tapti hõ py mẽ hã kagà ho:

IJA EWJÊ NHÕ PAHI NA JA

Hāmri nê Jejus wÿr ho api nê mÿ ri kunhõ. Hāmri nhũm hparpê pôristi hkwyja axpên mã ê hkwy ho hpigranh kaxyw hã kênre ho jõka ho hkrĩ.

27-28 Tã nhũm mẽ wa kot amnhĩ tomnuj xwÿnh wa ho axkrut nê mã wa ho anê nê. Nê pĩ kahpa hã prek o wa ìhkra ho htÿx nê wa hpar o htÿx hāmri nê akutã ho Jejus nhĩjê nhũm wa ajêt.

29 Hāmri nhũm mẽ kot omunh mã mrar xwÿnhjaja Jejus pumu nê hã hpêr o pikênh punuj nê hkrã ho apê nê kãm:

—Kwa na ka pre ate Tĩrtũm mã amnhĩ jarênh xà hã ixkre granh par nê atã apkati axkrunêpxi nê akupÿm hipêx par ã amnhĩ jarênh o apa. Nê axàhpumunh o axàhpumunh ã amnhĩ jarênh o apa.

30 Jakamã e kwa amnhĩ kapa nê wrÿ pa mẽ ja hã apumu. E kwa tokyx. Anê.

31 Nê patre krãhtũmjê mẽ Tĩrtũm kapêr tũm o mẽ ahkre xwÿnhjaja piitã hwÿr mra nê hã hpêr o pikênh o kuhê. Nê axpên mã kapêr o:

—E jahti na xep pre mẽ kamã ukaprĩ ho pa nê tanhmã mẽ ho ajuta hto ho pa. Tã tãm tanhmã amnhĩ to nê wrÿk kêt nê.

32 Kwa pu mẽ arĩ pakuhê nê kot amnhĩ kaxàr nê wrÿk kãm omu. Koja wrÿ pu mẽ omu nê kêp mẽ panhõ pahiti hã hkôt pajamaxpêr kurê kumrêx. E tokyx wrÿ Jejus pa mẽ awrÿk kãm apumu. Nã kot kaj awrÿk rax nê. Anê.

Hāmri nhũm akutã wa kot hijê nê jêt xwÿnh wa haxwÿja kãm kapêr punuj o ajêt.

Jejus htyk ã harênh

Matêwre 27.45-46; Rukre 23.44-49; Juãw 19.28-30

33 Tã nhũm ra kaxkwa nhĩpõk ri myt nhÿr mẽ nhũm te kamãt pyrãk. Nhũm kamãt kô rax kumrêx o ra hã awry mẽ nhũm akupÿm myt katêr o mõi.

34 Hāmri nhũm Jejus àmra kamã Tĩrtũm mã kapêr nê kãm:

—Inhõ Tĩrtũm inhõ Tĩrtũm. Kwa mon ka ixkaga? Anê.

Nom kapêr kãm kapêr o:

—Eri Eri rãmã sapatani. Anê.

35 Hāmri nhũm mẽ kot mar o kuhê xwÿnhjaja kot Eri hã harênh ma nê htÿx ho finat Eris mã kapêr ã hkamnhĩx.

36 Hāmri nhũm ja hprõt nê mẽmo rereeti py nê pĩ ho hkanhwÿ nê o tẽ nê ho wĩhti nhek nê Jejus wÿr o tẽ nê kot hkaôr kaxyw kãm kupê. Hāmri nê hkwyjê mã kãm:

—E hāmri pu mẽ jar hkàx ã pakuhê nê Eris jamã mãn. Koja kuma nê hwÿr tẽ nê o wrÿ nã? Anê.

37 Nom nhũm Jejus ra htyk kaxyw nê àmra htÿx nê ty.

38 Hāmri nhũm Tĩrtũm mã amnhĩ jarênh xà hã ixkre kamã hakwakre hã kupêxêja axkjê nê amnhĩ kahê xà mênh kurê kumrêx. Utĩ rax tã kÿj rũm ahpar mã axkjê nê amnhĩ kahê xà mẽ. Te Jejus htyk o mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mênh pyrãk o ã amnhĩ kaxôn anê.

39 Nhũm pôristi krãhtũmjê hõja Jejus parpê kutã htyk kãm omunh o xa. Hāmri nê tee ri omu nê hamaxpêr o:

—Hêxta waa nê. ãm hāmri na pre hte kêp Tĩrtũm Kra hã amnhĩ jarênh o pa. Tã pa mẽ amarĩ kupĩ. Anê.

40-41 Rôm nhũm mẽni kwÿjaja amÿm htyk kãm omunh o kuhê. Na pre htem Garirej kamã Jejus mẽ hkôt mẽ pa ho mẽ pa xwÿnhjê mã mẽ apkur xà hã àpênh o mẽ hkôt pa nê mẽ hkôt Jerujarê hwÿr mõi. Marir Matarênh nê Xiakre mẽ Jojes wa katorxã Marirja. Nê Sarome. Nê mãânên mẽni hkwyjaja nhũm mẽ amÿm Jejus htyk kãm omunh o kuhê.

Mẽ kot Jejus jaxàr ã harênh

Matêwre 27.57-61; Rukre 23.50-56; Juãw 19.38-42

42 Nhũm prem arĩgro pê sêsta hã Jejus pĩ nhũm ra amÿkry htÿx nê. Sap kukamã na pre htem Ijaewjaja amnhĩm apkur xà hã mẽõ nhĩpêx pa nhũm sap kato nhũm mẽmoj to anhÿr kêt nê.

43 Jakamã nhũm Juje hõ pê Arimatej nhõ xwÿnhja. Kêp Ijaewjê nhõ juisti hõ na pre. Nhũm mẽ piitã kãm hkĩnh nê axpên mã mex o mex ã harênh o pa. Na pre Tĩrtũm kot mẽ pahwÿr Jejus mênh kôt hamaxpêr o pa. Tã Jejus htyk ã omu hāmri nê hamaxpêr o:

—E pa ma pahi Pirat wÿr tē nē Jejus nhĩ hã kuwÿ. Inhmã uma htã kot paj ma hwÿr tē nē hã kuwÿ kē inhmã kugõ pa ma o tē nē tokyx haxà. Kot paj ho anhÿr tokyx anhÿr kêt nhũm mē panhõ arĩgromnu pē sapja wÿr ra myt axà hãmri pa haxàr kêt nē.

Anhÿr o hamaxpēr nē ma Pirat wÿr tē nē hã kuwÿ.

⁴⁴ Hãmri nhũm amnhĩ jaēr pē ra htyk ã harēnh ma nē amnhĩ wÿr pōristi krãhtũmjē hõ hã karõ nē hã hkukja nē kãm:

—Kwa xà na ra Jejus ty? Anē.

Hãmri nhũm kãm:

—Tÿ na ra ty. Anē.

⁴⁵ Hãmri nhũm kuma nē Juje mã kãm:

—Tõe. Mamrĩ ma o tē nē haxà. Anē.

⁴⁶ Hãmri nhũm kuma nē akupÿm Jejus wÿr tē nē pōristi mã anē nhũm mē kãm ho wrÿ. Nhũm kumÿ nē kupēxē ho hkupu hpa nē o tē nē kēn kre kakwÿnh kãm haxà. Hãmri nē kēn rax o hitom mex nē ma akupÿm krĩm tē.

⁴⁷ Nhũm Marir Matarēn mē Juje katorxà Marir òja wa ma hkõt tē nē kot haxàr kãm omunh o xa. Kot mē hkuxwa xà ho gregrer kêt rãhã haxàr kãm omu.

16

Jejus akupÿm htĩr ã harēnh

Matêwre 28.1-10; Rukre 24.1-12; Juãw 20.1-10

¹⁻² Tã nhũm apkati. Nom nhũm ra mē inhõ arĩgromnu pē sap kator jakamã nhũm mē kormã akupÿm kēnkreta wÿr mrar kêt nē. Hãmri arĩgro mex jamãr pē kôkõt o hkrĩ. Hãmri nhũm axte apkati nhũm tãmĩk nhũm ra mē inhõ arĩgromnu hapēx nhũm Marir Matarēn mē Sarome mē Xiakre katorxà Marirja mē ma akupÿm kēnkreta wÿr mra. Kormã kwÿhtãã. Kormã myt kator o mōr mē nhũm mē kãnhmã hkrĩ hãmri nē mē kot Jejus gregrer kaxyw mē hkuxwa xà hkwy jamÿ nē ma hwÿr o mra.

³ Hãmri nē kormã mōr ri tee ri amnhĩ kukamã hamaxpēr nē axpēn mã:

—Xê gàa nē. Mēhõ koja mē pamã nhãm kēnkre nē hitom raxta xãm pu mē Jejus wÿr agjē nē gregrer? Utĩ rax kumrēx kēnã. Anē.

⁴ Hãmri nē hwÿr pōj nē omu nhũm ra hitom xàja kàx ã nõ nhũm mē tee ri omu. Utĩ rax tã ra kàx ã nõ.

⁵ Hãmri nhũm mē kēnkre hwÿr agjē nē upòk rũm mēhõ nyw pumu. Nhũm ê jakajre kamã nhÿ nhũm mē amnhĩ jaēr pē omu nē tee ri hamaxpēr.

⁶ Hãmri nhũm mē kãm:

—Kwa mē amã ma hkēt nē. Mē ate Najare nhõ xwÿnh pē Jejus pumunh kaxyw na ka mē mra. Mē kot pĩ kahpa hã nhôr xwÿnhnta. Nom jar amrakati. Na ra Tĩrtũm akupÿm ho htĩr. E mē kam nē amnē agjē nē ano ho nõr xà kaprÿ pumu

⁷ nē tokyx ma akupÿm mra nē hkõt mē pa ho pa xwÿnhjē mã harē. Koja ma Jejus mē akukamã akupÿm Garirej wÿr mō. Garirej kamã kot kaj mē axte axpēn pumu. Ra kot mē amã amnhĩ jarēnh xà hkõt. Kwa mē tokyx ma akupÿm mē hwÿr mra. Nē kwa kē Simãw Pētreja harēnh mar mex nē. Anē.

⁸ Hãmri nhũm mē kuma nē awjanã nē ma akupÿm hprõt. Nē tee ri hamaxpēr nē kãm ma xàj htertēt tÿx jakamã kormã nhãm mēhõ mã harēnh kêt nē.

Jejus kot Marir Matarēn wÿr kator ã harēnh

Juãw 20.11-18

⁹ Nhũm semãn nyw mã àr xà hã arĩgro pē tãmĩkja ã nhũm Jejus akupÿm htĩr. Hãmri nē Marir Matarēn kumrēx wÿr kato. Kot nē mēkarõmnuti ho 7 nē nē hanor xwÿnhnta kumrēx wÿr kato.

¹⁰ Hãmri nhũm akupÿm htĩr kãm omu nē hkĩnh tÿx kumrēx. Nē ma akupÿm tē nē Jejus krãmnhwÿjē mã harē. Nhũm mē hkaprĩ nē mÿr o hkrĩ nhũm mē hwÿr axà nē mē omu nē mē kãm:

¹¹ —Xê mē amÿr kêt nē. Na ra Jejus akupÿm htĩr nē ham ixwÿr kato pa inhno ho omu. Xê mē hãmri axte amÿr kêt nē.

Anhÿr tã nom nhũm mē htÿx ho amnhĩ krã hkõt kot ri ã harēnh anhÿr ã hkamnhĩx jakamã kuma nē ãm kuma.

Jejus kot hkwyjē hwÿr kator ã harēnh

Rukre 24.13-35

¹² Tã nhũm Jejus axte ja wa hwÿr kato. Kõt mē pa ho pa xwÿnh wa ho axkrut nē wa hwÿr kato. Na pre wa Jerujarē rũm kato nē akupÿm wa ò krĩ hwÿr mōr mē nhũm wa hwÿr kato. Nom axtem tanhmã amnhĩ nhĩpēx to nē wa hwÿr kator jakamã nhũm wa tokyx hprĩ hã kēp Jejus ã omunh kêt nē.

13 Tã kêp Jejus ã omu hãmri nê akupÿm Jerujarê hwÿr mō nê hkwÿjê mã harênh kuré kumrêx. Nom nhũm mẽ wa kuma nê ãm wa kuma nê akupÿm htĩr kôt hamaxpêr kêt nê.

Jejus kot hkwÿjê mã mẽmoj tã karō hã harênh

Matêwre 28.18-20; Rukre 24.44-49; Juãw 20.19-23; mããnên Atre 1.6-8

14 Tã nhũm Jejus tã hkôt mẽ pa ho mẽ pa xwÿnh pê 11 wÿr kato nhũm mẽ kamã no pyma nê hkĩnh tÿx nê omunh o kuhê. Hãmri nhũm mẽ kãm:

—Kwa hêxta waa nê. Marir Matarênh mẽ akwÿta mẽ kot akupÿm ixtĩr kãm ix-pumunh nê mẽ amã ijarênh tã ka mẽ ama nê ãm mẽ ama. Pêr ãm mẽ akrã hihtÿx jakamã na ka mẽ ama nê mẽ hkôt aja-maxpêr kêt nê. Anê.

15 Hãmri nê mẽ kot tanhmã kãm amnhĩ nhĩpêx to ho pa hã mẽ kãm karō nê mẽ kãm:

—E kêr ka mẽ ma krĩ piitã hkôt mẽ kãm ijarênh o ri mẽ hkôt apa. Ixte tanhmã mẽ nê amnhĩ nhĩpêx toja ka mẽ aprĩ hã mẽ kãm ijarênh o ri mẽ hkôt apa.

16 Nê mẽ kot mẽ akapêr mar nê amnhĩ kaxyw ixkôt hamaxpêr xwÿnhjaja kêr ka mẽ hkrã kumrã nhũm mẽ nhÿrmã Tĩrtũm mẽ wa ixri htĩr tũm nê mex rãhã nê pa ho pa. No mẽ kot amnhĩ kaxyw ixkôt hamaxpêr kêt xwÿnhjaja koja Tĩrtũm nhÿrmã amnhĩ nê mẽ hano nhũm mẽ ma kuwy hwÿr pa.

17 —Nê amnhĩ kaxyw ixkôt mẽ aja-maxpêr xwÿnhjaja kot kaj mẽ inhÿ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwÿ ho anê nê inhÿ hã inhĩxi jarênh kôt mẽ nê mẽkarõmnuti janor o ri mẽ hkôt apa. Nê mẽ ate nhãm mẽ kapêr mar kêt tã inhÿ hã ho akapêr mex o apa. Mẽ ate mar kêt tã ra ho akapêr nhũm mẽ kot mẽ kapêrta mar xwÿnhjaja hprĩ hã mẽ amar mex nê.

18 Nê kot kaj mẽ nhÿri atÿx kagã xoprê hō hpyr tã no nhũm tanhmã mẽ ato hkêt nê. Rÿ atÿx mẽmoj to mẽ hpar xà hkwÿ ho akõm tã no nhũm tanhmã mẽ ato hkêt nê. Nê inhÿ hã mẽ à xwÿnhjê hã mẽ anhĩkra jaxwÿ nhũm mẽ akupÿm mex. Kot kaj mẽ amnhĩ kaxyw ixkôt mẽ ajamaxpêr

xwÿnhjaja ã inhÿ hã amnhĩ nhĩpêx anhÿr o ri apa. Anê.

Jejus kot akupÿm kaxkwa hwÿr àpir ã harênh

Rukre 24.50-53; mããnên Atre 1.6-11

19 Tã nhũm mẽ panhō Pahihti Jejusja hkôt mẽ pa ho mẽ pa xwÿnhjê mã kapêr pa hãmri nhũm Tĩrtũm ma akupÿm amnhĩ wÿr kaxkwa hwÿr ho api. Hãmri nhũm kaxkwa kamã Tĩrtũm nhĩhkô hã upôk rũm nhÿ. Kot ìhkô hã mẽmoj piitã ho amnhĩptàr kaxyw hkrĩ ho hkrĩ.

20 Hãmri nhũm hkôt mẽ pa ho pa xwÿnhjaja ma akupÿm àpir kãm omu hãmri nê angrã nê ma krĩ piitã hkôt mẽ kãm Tĩrtũm kapêr jarênh o pa nhũm Pahihti Jejus mẽ ìhkô hã pa ho pa. Nhũm mẽ ma ÿ hã hkwÿjê mã aa mẽ kot mẽmoj pumunh kêt kwÿ ho anhÿr o ri mẽ hkôt pa nhũm mẽ ja hã mẽ omu nê axpên mã mẽ harênh o:

—Nà ãm hãmri na mẽ pamã Tĩrtũm kapêr jarênh o pa nê ho hêx kêt nê. ÿ hã mẽ kot aa mẽ pahte mẽmoj pumunh kêt kwÿ ho anhÿr o pa kênã. Nà ãm hãmri na ã mẽ pamã kapêr jarênh anhÿr o pa. Anê.

Ja kôt na Makre kot Jejus jarênhja hapêx.

Rukre Rukre tanhmã Jejus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwýnh na pre. Tã amnhĩ kaxyw Jejus kôt hamaxpêr. Na pre kêp tôtô nê mē hkane ho pa. Nê Jejus nhỹ hã kapêr o pa xwýnhjê hõ pê Pawreja kôt pa ho pa. Tã tanhmã hamaxpêr to nê hkràmnhwý Teopre mã kagàja nhĩpêx nê kamã tanhmã Jejus kot amnhĩ nhĩpêx to ho pa hã harê nê hã kagà.

Nê Jejus kêp Tirtũm nhỹ hã kapêr o pa xwýnh ã harê. Nê mē pahpyrà nê ĩ ho ĩ hã harê. Nê kêp mē pakamã ukapri xwýnh ã harê. Nê kêp mē pahte amnhĩ tomnuj o hapêx xwýnh ã harê. ã na pre Rukreja hkràmnhwý Teopre mã Jejus jarê nê hã kagà anê. Nê mãânên mē pahpiitã mē pakaxyw harê nê hã kagà.

Rukre kot Teopre mã amnhĩ jarênh Atre 1.1-2

¹ Pa pahi Teopre. Xà amex? E ot pa awýr kagà nhĩpêx nê awýr kumê. Ixte amã Jejus jarênh kaxyw. Na prem ra ohtô nê jar mē pahkôt Jejus kot amnhĩ nhĩpêx o pa hã kagà rax nê.

² Jejus nhỹ hã Tirtũm kapêr jahkre ho mē pa xwýnhjaja na prem Jejus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mē inhmã harê nê hã kagà nhũm mē ohtô nê mē mar xà hkôt mē urà nê kot tanhmã amnhĩ nhĩpêx to ho pa hã kagà.

³ Tã pa mē harênh ma nê ijamaxpêr o:

—E kot paj ijaxwýja Jejus kot amnhĩ nhĩpêx kwý hã kagà. Nà kot paj ho anê.

Anhýr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar týx nê mē kot amã harênh xwýnhjê hkôt ajamaxpêr týx o apa. ãm hãmri na prem mē amã harê. E kot paj amã hkwý hã kagà. Ixpê akràmnhwý Rukre kot paj ixprĩ hã amã harê nê hã kagà.

Tirtũm kapêr o wrýk xwýnh kot Juãw Paxis jarênh

⁵ Juãw Paxis nhĩpêxà finat Jakarisja kumrêx kot paj amã harê. Kêp finat Apiasti kanrêhã htàmnhwý jakamã urak nê kêp mē apê Ijaew nhõ patre na pre. Pahihti Eroxja kormã kot mē anhõ pika kamã mē ho amnhĩptar ri nhũm Jakaris kêp patre nê pa. Nê hprõ Ijapew mē wa kêp Parãw kanrêhã htàmnhwý.

⁶ Nê wa hamê na pre Tirtũm kôt tãm amnhĩ nhĩpêx o wa pa. ãm Tirtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx týx nê.

⁸ Jakamã nhũm Jakaris ma mē kot Tirtũm mã amnhĩ jarênh xà hã ixkre hwýr tẽ. Kwýjê pyrà nê kot Tirtũm mã tanhmã amnhĩ nhĩpêx to kaxyw ma mē hpãnhã hwýr tẽ nê axà.

⁹⁻¹⁰ Hãmri nê kamã Tirtũm mã amnhĩ jarênh pê kãm mē hkuxwaxà ho xêt o xa. Nhũm Ijaew kwýjaja ixkreta wýr akuprõ nê kapem kutêp Tirtũm mã amnhĩ jarênh o kuhê.

¹¹ Pu nhũm kaxkwa rũm Tirtũm kapêr o mē wrýk xwýnhja wrý nê Jakaris kutã xa. Mē hkuxwa xà ho xêt xà hã mēs kunĩhti xupók rũm xa.

¹² Hãmri nhũm amnhĩ jaêr pê amnhĩ kutã omu nê akryk omunh o xa.

¹³ Hãmri nhũm kãm:

—Pa Jakaris? Kwa tee ri ajamaxpêr o amã ma hkêt nê. Na pre Tirtũm ate akra hã hwýr o apa hã ama nê hã apumu. Jakamã koja tanhmã aprõ hkra xà ho ka kamã akra. Nhũm nõ nê rax nê kato nê myre. Ka wa hã hixi mē nhũm kêp Juãw.

¹⁴ Koja kato ka wa omu nê akĩnh týx kumrêx. Nhũm akwýjaja haxwýja ohtô nê war akra jarênh ma nê war anhỹ hã hkĩnh nê.

¹⁵ Koja kormã akra kator kêt ri nhũm Tirtũm Karõja hkarõ hwýr axà. Hãmri nhũm kato nê gaa nê hprêk nê Tirtũm mã tanhmã amnhĩ nhĩpêx to ho pa. Tirtũm kãm hprãm xà hkôt pix mã tanhmã amnhĩ nhĩpêx to ho pa. Nom kêr ka inhmar kumrêx. Kê mēmoj to wĩhti ho hkõm kêt nê

pa. Nē kagôxyhti ho hkôm kêt nē pa. Æm kwarĩ ho kwarĩ.

¹⁶ Koja hprêk hãmri nē mẽ apê Ijaew mã Tĩrtũm kapêr jarênh o mẽ hkôt pa. Nhũm mẽ ohtô nē kuma nē kot amnhĩ tomnuj kaga nē Tĩrtũm kôt amnhĩ xunhwý nē hkôt amnhĩ nhĩpêx mex o pa.

¹⁷ –Tĩrtũm kot mẽ awýr mẽ apytàr xwýnh maati mēnh mã xwýnh kukamã koja mẽ kãm harēnh o pa. Te Tĩrtũm nhỹ hã kapêr jarēnh xwýnh finat Eris kot amnhĩ nhĩpêx pyràk o koja amnhĩ nhĩpêx. Nē uràk nē Tĩrtũm Karô nhỹ hã mẽ amã Tĩrtũm kapêr jarēnh o mẽ akôt pa. Jakamã nhũm mẽ akwýjaja kuma hãmri nē amnhĩ tomnuj kaga hpa nē Tĩrtũm kôt pix mã amnhĩ nhĩpêx o pa. Nē tãm mẽ hkrajê nhĩpêx o pa. Koja mẽ ã akra Juãwja kôt amnhĩ nhĩpêx anē. Jao Tĩrtũm kot mẽ awýr mēnh mã xwýnhhta kutêp tãm amnhĩ nhĩpêx o pa. Anē.

¹⁸ Nhũm pre ã Tĩrtũm kapêr o wrýk xwýnh Jakaris mã hkrata jarēnh anē. Hãmri nhũm tee ri kuma nē kãm:

–Kwa xà we ãm hãmri na ka ã inhmã ixkra jarēnh anē nà? Ra ixprô mẽ wa ijamē wa ixpigêx týx kēnã kot pa kêt wa ixkra. Anē.

¹⁹ Hãmri nhũm kãm:

–Nà ãm hãmri na pa ã amã harēnh anē. Ixpê Gapriew na pa ã awýr ixwrýk nē Tĩrtũm nhỹ hã amã harēnh anē. Ixte Tĩrtũm nhĩhkô hã ixkuhê xwýnhjê hõ na pa. Tãm na awýr inhmē pa awýr wrý nē ã amã akra jarēnh anē.

²⁰ Tã ate ixkôt ajamaxpêr kêt jakamã kot kaj axte axumar kêt nē akapêr kêt rãhã nhũm akra kato. Koja kato ka rĩ kormã akupým akapêr nē akupým ama. Ate ixkôt ajamaxpêr kêt jakamã kot kaj ã amnhĩ nhĩpêx anē nē rĩ amnhĩ pumu. Æm hãmri na pa ã amã ixkapêr anē. Anē.

Nhũm pre ã Tĩrtũm kapêr o wrýk xwýnhja Jakaris mã kapêr anē. Jakamã nhũm tokyx ixkre rũm kator kêt nē.

²¹ Hãmri nhũm ixkre kapem mẽ kuhê xwýnhjaja tee ri kamã ama nē axpēn mã:

–Tk. Kwa mo na we ri hitom kãm ho anhýr kãm unē nē tokyx kator kêt? Anē.

²² Tã nhũm akupým mẽ hwýr kato. Nē tee ri kot mẽ kãm kapêr kaxyw no ãm ìhkra pix o ri mẽ kãm tanhmã ujahkre hto. Hãmri

nhũm mẽ amnhĩ jaêr pê kot ã amnhĩ nhĩpêx anhýr ã omu nē tee ri hkukamã hamaxpêr nē axpēn mã:

–Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anē nà? Anē.

²³ Hãmri nhũm Jakaris ixkre kamã mẽmoj tã àpēnh pa hãmri nē ma akupým òrkwy hwýr tē.

²⁴⁻²⁵ Tã nhũm hprô Ijapewja htujarô. Hãmri nē amnhĩ tujarô hã amnhĩ pumu nē hkĩnh týx nē. Nē hamaxpêr o:

–Hêxta gàa nē. Ma ãm hãmri na pa pre ixkra hkêt nē amnhĩ kamã ixpijaam o ri ixpa. Tã ra ixtujarô. Kot paj wa axte ri amnhĩ kamã ixpijaam kêt nē. Ma ãm hãmri na Tĩrtũm ã wa inhĩpêx anē. Na pa wa ixkĩnh týx kumrêx. Anē.

Nhũm pre ã hamaxpêr anē hãmri nē arĩ òrkwy kamã hkrĩ ho hkrĩ. Aa nhỹhým kator nē mõi kêt rãhã hã mytwrý kêp 5.

Tĩrtũm kapêr o wrýk xwýnh kot Marir mã hkra jarēnh

Matêwre 1.18-21

²⁶ Tã nhũm Ijapew ra htujarô hã mytwrý kêp 6 nhũm Tĩrtũm axte kapêr o wrýk xwýnh pê Gapriewja mẽ. Nhỹri Garirej kamã krĩ pê Najare hwýr kumē nhũm ma hwýr wrý.

²⁷ Mēhõ pê Marir wýr wrý. Nhũm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrà nē kêp pahi finat Tawi kanrêhã htãmnhwý na pre.

²⁸ Jakamã nhũm Gapriew Marir wýr wrý nē kãm:

–Pa Marir? E ot pa amã Tĩrtũm kapêr jarēnh kaxyw awýr wrý. Kot akôt pa ho pa jakamã koja ato mex rax kumrêx. Anē.

²⁹ Hãmri nhũm amnhĩ tã kuma nē tee ri hamaxpêr nē hamaxpêr o:

–Xê mẽmo na we ri ã inhmã kapêr anē? Tanhmã koja we Tĩrtũmja ixto mex rax to? Anē.

³⁰ Hãmri nhũm Gapriew kãm:

–Kwa tee ri amnhĩ kukamã ajamaxpêr kêt nē. Tĩrtũm kãm ajapêê.

³¹ Kot kaj atujarô nhũm akra kato nē myre. Ka hã hixi mẽ nhũm kêp Jejus.

³²⁻³³ Koja Tĩrtũm amã ho mex rax nē. Nē koja mẽ piitã mẽ kãm kêp amnhĩ Kra hã ho amnhĩrit. Nē mẽ apê Ijaew o amnhĩptàr

kaxyw koja mẽ akaxyw ãm nhũm higêt pahì Tawì pyrà nẽ mẽ ato amnhĩptàr o pa. Mẽ ate amnhĩ wỳr kamã ajamak o apa xwỳnhhta koja. Tĩrtũm kãm hprãm xà hkôt koja mẽ ato amnhĩptàr rãhã ho pa. Anẽ.

³⁴ Nhũm pre ã kãm kapër anẽ nhũm amnhĩ tã kuma nẽ tee ri amnhĩ kukamã hamaxpër hãmri nẽ kãm:

—Xê gòa nẽ. Tanhmã kot pa kêt we amnhĩ to nẽ ixtujarô? Kormã ixkukrit nẽ mo kormã inhmjên? Mẽ. Xà Juje kot ixkamã hkra hkukamã na ka ã ri inhmã axujarênh anẽ? Anẽ.

³⁵ Hãmri nhũm kãm:

—Nà koja Tĩrtũm Karõ tãm tanhmã ato ka ã hã tanhmã amnhĩ to hkêt tã atujarô. Jakamã koja akra kệp Tĩrtũm Kraa.

³⁶⁻³⁷ Na ra haxwỳja anã Ijapewja htujarô. Ra hpigêx tỳx nẽ aa hkra hkêt nhũm hkwyjaja kot axpên mã ôhy kamã hkra hkêt kumrêx ã harênh o pa htã ra htujarô. Tĩrtũm kot tanhmã mẽ ho nhũm mẽ htujarô tanhmã kệp kute hkêt. Jakamã nhũm tanhmã ho nhũm mjên tãm htu nhũm ra htujarô hã mytwrỳ kệp 6. Tĩrtũm tãm kot mẽmoj piitã tanhmã ho kaxyw àhpumunh xihtỳx. Jakamã koja uràk nẽ mã ato anẽ nẽ ka kormã akukrit tã atujarô. Anẽ.

³⁸ Nhũm pre ã Gapriew Marir mã kapër anẽ nhũm amnhĩ tã kuma nẽ kãm:

—Ko. Kê mãmrĩ kãm tanhmã ixto hprãm xà hkôt mãmrĩ tanhmã inhĩpêx to. Inhmã Tĩrtũm kapër kôt amnhĩ nhĩpêx prãm. Kê mãmrĩ kãm tanhmã ixto hprãm xà hkôt tanhmã inhĩpêx to.

Anẽ nhũm kuma nẽ ma akupỹm api.

Marir kot Ijapew wỳr mõi ã harênh

Rukre 11.27

³⁹⁻⁴⁰ Tã nhũm Marir amnhĩ tujarô hã amnhĩ pumu nẽ nã Ijapew wỳr hkrà kurê kumrêx. Hãmri nẽ nojarêt nẽ õ krĩ rũm kato nẽ ma hwỳr mõi. Ma Ijapew papxà hwỳr mõi. Ijapew nhõ krĩa pika pẽ Jutej kamã nhỹri hixêt kamã na pre. Nhũm ma hwỳr mõi hãmri nẽ hwỳr pøj nẽ Ijapew wỳr axà nẽ omu nẽ kãm:

—Ka? Xà wa amex? Anẽ.

⁴¹ Hãmri nhũm kuma nẽ kãm:

—Ỗ ma wa inhmex na pa wa ixpa.

Anhỹrja kôt nhũm ôhy kamã hkraja haxwỳja te kot Marir kapër mar nẽ amnhĩ

nhĩpêx pyràk o htu kamã àxôn timer o nõ. Hãmri nhũm Ijapew Tĩrtũm Karõ nhỹ hã tanhmã Marir mã kapër to.

⁴² Kàx pẽ kãm kapër nẽ kãm:

—Xê gòa nẽ. Ra Tĩrtũm kot ato mex jakamã na ka akĩnh rax o mẽ inhni hkwyjê jakrenh pa. Anhõhy kamã akraja koja Tĩrtũm amã ho mex rax nẽ.

⁴³ Xê mon ka ã ixto mex nẽ ixwỳr amõi anẽ? Apẽ inhõ Pahihti katorxà htã ixto mex nẽ ã ixwỳr amõi anẽ. Hêxta gòa nẽ. ãm hãmri na ka ixwỳr mõi Marir.

⁴⁴ Na ka ixwỳr mõi pøj nẽ inhmã akapër hãmri nhũm ixtu kamã ixkrare akapër ma nẽ hkĩnh xàj ixtu kamã ixkamnãr tỳx o nõ.

⁴⁵ Na ka pre Tĩrtũm kapër o wrỳk xwỳnh kot amã kapërja ma nẽ hkôt ajamaxpër tỳx nẽ. Jakamã kot kaj Tĩrtũm nhỹ hã akĩnh nẽ ajamakêtkati nẽ amex nẽ ri apa. Anẽ.

Marir kot Tĩrtũm mã mex o mex ã greer ã harênh

Rukre 6.20-26

⁴⁶ Hãmri nhũm Marir Ijapew kot ã kãm kapër anhỹrja ma nẽ kãm Tĩrtũm mex o mex ã gre nẽ greer o:

Tĩrtũm na mex o mex.

⁴⁷ Kệp ixkaprĩ xwỳnh na.

Kệp ixkaprĩ xwỳnh jakamã na pa inhmex nẽ ixkĩnh nẽ ri ixpa.

⁴⁸⁻⁴⁹ Ixte amnhĩ to grire nhũm ja hã ixpumu nẽ ixkamã ukaprĩ nẽ ixto mex rax kumrêx.

Jakamã koja mẽ piitã axpên kanrêhã axpên mã ijarênh rãhã ho pa. Tĩrtũm kot tanhmã ixto mex to hã ijarênh rãhã ho pa.

Tĩrtũm na mex o mex nẽ hihtỳx o hihtỳx. Tã na ã inhĩpêx anẽ.

⁵⁰ Ma na hte ã amnhĩ nhĩpêx anẽ nẽ axpên kanrêhã mẽ kot hã hpijaam xwỳnhjê pumu nẽ mẽ kutã nojarêt rãhã ho pa.

Nẽ mẽ kamã ukaprĩ rãhã ho pa.

ã na hte mẽ hipêx mex anhỹr o pa.

⁵¹ Nẽ hihtỳx o hihtỳx jakamã na hte mẽ kot amnhĩ to jarkrar o ri mẽ pa xwỳnhjaja tanhmã mẽ ho nhũm mẽ axkaprã.

⁵² Nẽ pahihti hkwy kot kapër mar nẽ ãm mar xwỳnhjaja.

Na hte amnhĩ tã mẽ omu nẽ mẽ àpênh nẽ mẽ hapôj nẽ mẽ hpãnhã mẽ kot amnhĩ to hkryre xwýnh kwý jagjê.

⁵³ Na hte mẽ kãm kapêr kôt amnhĩ nhĩpêx prãm xwýnhjê ho mex o pa nhũm mẽ mex nẽ pa.

No mẽ kãm hprãm kêt xwýnhjaja nhũm tanhmã mẽ ho mex to hkêt nẽ.

⁵⁴⁻⁵⁵ ãm hãmri na pre amnepê mã mẽ panhĩgêt mã amnhĩ jarênh xà hkôt mẽ pahpê Apraãw rũm axpên kanrêhã hkrajaja mẽ pahto mex o pa.

Mẽ pahpê Ijaew mẽ pahte kãm tanhmã amnhĩ nhĩpêx to ho papa nhũm kãm mẽ pajapê xàj mẽ pahto mex rãhã ho pa.

Nẽ mẽ pakamã ukaprĩ rãhã ho pa. Anẽ.

Nhũm pre ã Marir Ijapew mã Tĩrtũm mex o mex ã grer anẽ.

⁵⁶ Hãmri nẽ ri hkôt pa hã mytwrý axkrunêpxi nẽ ma akupým õ krĩ hwýr mō.

Juãw Paxis kator ã harênh

⁵⁷ Tã nhũm Ijapew hpijagri kaxyw õhy xà nhũm hkrare kato nẽ myre.

⁵⁸ Hãmri nhũm omu nẽ hkĩnh tỳx nẽ. Hãmri nhũm hkwyjaja Tĩrtũm kot wa kamã ukaprĩ hã wa kãm wa hkra myre nhõr ã harênh ma nẽ wa ý hã hkĩnh nẽ.

⁵⁹ Tã nhũm wa hkraja ra hã arĩgro pê 8 nhũm mẽ hkwyjaja kot my kwryt kã krãhyr kaxyw hwýr akuprõ. Tĩrtũm kot mẽ kãm hã karõ xà hkôt nhũm mẽ kot kãm õr ã amnhĩ to amnhĩrit kaxyw ã hipêx anhýr kaxyw. Na htem ã mẽ kêp Ijaew krajê piitã mẽ hipêx anẽ. Jakamã nhũm prem ã hipêx anẽ hãmri nẽ hpãnhã tanhmã kot hã hixi mênh to kaxyw ri hã axpên kukja. Hãmri nẽ hipêxà hkôt kot hã Jakaris mênh kaxyw.

⁶⁰ Hãmri nhũm katorxà tee ri axpên tã mẽ kuma nẽ mẽ kãm:

—Ma koja kêp Jakaris kêt nẽ. Koja kêp Juãw. Anẽ.

⁶¹ Hãmri nhũm mẽ tee ri kuma nẽ kãm:

—Koký. Mo jar mẽ pahtõ pê Juãw kot kêt ri kêp Juãw? Jar amrakati kênã kot ka kêt wa ri ã hã hixi rênh anẽ. Anẽ.

⁶² Hãmri nẽ hixi hã hipêxà kukja. Nom nhũm arĩ umar kêt nẽ kapêr kêt jakamã nhũm mẽ tanhmã ri kãm mẽ ìhkra nhĩpêx to.

⁶³ Hãmri nhũm ìhkra ho kagà hã ahwý nhũm mẽ kãm ja gõ nhũm kupy nẽ hã mẽ kãm hixi nhĩpêx. Nhũm mẽ kupy nẽ omu hãmri nẽ hixi pê Juãw kôt omu. Hãmri nẽ tee ri hixija kukamã hamaxpêr.

⁶⁴ Rôm nhũm Jakaris akupým ama nẽ kapêr mex kurê kumrêx nẽ Tĩrtũm mã mex o mex ã harênh o xa.

⁶⁵⁻⁶⁶ Hãmri nhũm mẽ omu nẽ ma mẽ piitã mẽ kãm wa hkra jarênh o ri axpên kôt hprõt. Pika pê Jutej kamã hixêt kape hã krĩ hkôt nhũm mẽ ri mẽ piitã mẽ kãm harênh o hprõt. Tĩrtũm kot wa hkra kôt tânopxar o pa nẽ ho mex ã harênh o hprõt. Hãmri nhũm mẽ kuma nẽ tee ri hkukamã hamaxpêr nẽ axpên mã:

—Hêxta waa nẽ. Tĩrtũm tãm na xep hte jare hkôt ri pa ho pa. Jakamã koja nhýrmã hprêk hãmri nẽ tanhmã koja we amnhĩ nhĩpêx to ho pa wehee? Anẽ.

Jakaris kot Tĩrtũm nhỹ hã kapêr ã harênh

⁶⁷ Hãmri nhũm Jakaris Tĩrtũm Karõ nhỹ hã Tĩrtũm mex o mex ã harênh o xa. Tĩrtũm kot mẽ kêp Ijaew o mex ã harê nẽ mẽ kãm:

⁶⁸ Hêxta waa nẽ. Nà Tĩrtũmja mex o mex. Na pre hte mẽ pahpãmjaja ãm hkôt pix mã amnhĩ nhĩpêx o pa. Jakamã nhũm hte Tĩrtũm mẽ pahpê hkrajê kamã ukaprĩ nẽ mẽ pahto mex o pa. E kwa pu mẽ kãm mex o mex ã harênh rãhã nẽ.

⁶⁹ Ra kot mẽ pahwýr mẽ pahkaprĩ xwýnh pê mẽ panhõ pahihtĩ mênh mã. Ja kaxyw àhpumunh xihtỳx o hihtỳx jakamã na pre ra mẽ pahwýr mênh ã amnhĩ jarê.

Koja kêp amnepêm Tĩrtũm mã tanhmã amnhĩ nhĩpêx to ho pa xwýnh Tawija hkanrêhã htãmnhwý.

⁷⁰ Amnepêm Tĩrtũm nhỹ hã kapêr xwýnhjaja na prem mẽ kãm Tĩrtũm kapêr jarênh o pa nẽ mẽ kãm:

⁷¹ “Koja Tĩrtũm mẽ panê mẽ kãm mẽ pahkurê xwýnhjê pumunh mex o pa.” Anẽ.

⁷² Tĩrtũm ra kot mẽ pahpãmjê mã amnhĩ jarênh xà hkôt kãm mẽ pakamã ukaprĩ rãhã ho pa hprãm.

Koja aa ja ho anhýr o hamakêtkati hkêt nẽ.

73-75 Na pre ra mẽ pahpãm Apraãw mã mẽ pakukamã ã mẽ pahãtã amnhĩ jarẽnh anẽ nẽ kãm: “Kot paj mẽ anẽ mẽ kãm mẽ akurẽ xwýnhjẽ pumunh mex nẽ mẽ ãhkra nẽ mẽ ato ixkato. Jakamã kot kaj mẽ amnhĩ kamã amã mẽ uma hkêt nẽ axãmnhĩx ri ajamakêtkati nẽ mẽ kamã apa. Nẽ kot kaj mẽ mãmrĩ axãmnhĩx ri inhmã tanhmã amnhĩ nhĩpêx to ho ri apa rãhã nẽ. Nẽ ixkõt amnhĩ nhĩpêx o ri apa rãhã ty.” Anhÿr o na pre Tĩrtũm mẽ pakukamã mẽ pahãtã amnhĩ jarẽ. Anẽ.

Nhũm pre ã Jakaris mẽ kãm Tĩrtũm kapẽr jarẽnh anẽ. Hãmri nẽ hkrareja my nẽ o xa nẽ kãm:

76 —No ka Xugitre. Kot kaj aprêk hãmri nẽ apê Tĩrtũm maati nhÿ hã kapẽr jarẽnh o apa xwýnh. Jakamã kot kaj Pahihti hkukamã mẽ piitã mẽ kãm harẽnh o ri mẽ hkõt apa. Mẽ kot amar nẽ kutêp tãm amnhĩ nhĩpêx kaxyw.

77 —Tĩrtũm kot mẽ nẽ mẽ kot amnhĩ tomnuj rẽnh nẽ mẽ ho hkra hã harẽnhja kot kaj mẽ hkõt mẽ kãm harẽnh o ri apa.

78 —Na hte Tĩrtũm mẽ pakamã ukaprĩ ho pa nẽ mẽ pakamã gryk tokyx anhÿr kêt nẽ. Jakamã koja mẽ pahwÿr mẽ pahkaprĩ xwýnhja mẽ. Kormã mẽ pahwÿr wrÿk kêt jakamã te mẽ pahte kamãt kô kamã tee ri mẽ paxãhkupênh o ri papa xwýnh pyrãk.

—Nom koja mẽ pahwÿr wrÿkja o te ra myt kator nẽ mẽ pamã hirã nẽ mẽmoj to amnhĩrĩt mex pyrãk o mẽ panhĩpêx. Ja kaxyw koja Tĩrtũm mẽ pahwÿr mẽ pahkaprĩ xwýnhhta mẽ nhũm man mẽ pahwÿr wrÿ nẽ mẽ pamã mẽ pahtyk pyma xwýnhjẽ mã Tĩrtũm kapẽr o amnhĩrĩt o pa. Mẽ pahte mar nẽ ra pajamakêtkati nẽ paxãmnhĩx ri papa nẽ pahtyk kaxyw.

79 —Mẽ kãm mẽ htyk pyma xwýnhjaja te kamãt kô kamã ri pa pyrãk. Tã koja mẽ pahkaprĩ xwýnhja wrÿ hãmri nẽ tanhmã mẽ hkrã hto nhũm mẽ te arĩgro hã ri mẽ pa xwýnh kot amnhĩ nhĩpêx pyrãk o amnhĩ nhĩpêx. Jao hamakêtkati nẽ axte kãm htyk pyma hkêt nẽ ri pa. Anẽ.

Nhũm pre ã Jakaris Tĩrtũm Karõ nhÿ hã hkrare mã kapẽr anẽ.

80 Tã nhũm Juãwja gaa nẽ aptãr. Nẽ Tĩrtũm kõt amnhĩ nhĩpêx o pa. Nom kormã kot Ijaew jahkre ho pa hkêt ri kapõt ã ri mẽ puhã pa.

Ã na pre Juãw kator nẽ amnhĩ nhĩpêx anhÿr o pa anẽ. Na pre kato nẽ hã mytwrÿ grẽre hãmri nhũm Jejusja hkõt kato.

2

Jejus kator ã harẽnh Matêwre 1.18-25

1-2 Na pre ã Jejus kator anẽ. Nhũm pre Rõm nhõ xwýnhjẽ nhõ pahi Sesti Akusja õ pika piitã hkõt mẽ ho kõtã kaxyw. Aa kot mẽ ho kõtã hkêt tã ra kot mẽ ho kõtã kaxyw. Kormã pahi Sirẽn haxwÿja kot pika pẽ Sir kamã mẽ ho amnhĩptãr ri nhũm pahi Sesti Akus kot mẽ ho kõtã kaxyw. Jakamã kãm ãpênh xwýnhjẽ mã kapẽr nẽ mẽ kãm:

—E kêr ka mẽ ho kõtã kaxyw nẽ mẽ piitã mẽ hixi hã kagã hpa. Anẽ.

3 Hãmri nhũm mẽ piitã ã kot mẽ hipêx anhÿr ã amnhĩ tã harẽnh ma hãmri nẽ mẽ kot mẽ hixi hã kagã kaxyw piitã akupÿm papxã hwÿr ma hapêx.

4 Nhũm pre Marir mjên Juje haxwÿja ma krĩ pẽ Perẽj wÿr mõ. Garirej kamã õ krĩ pẽ Najare rũm kato nẽ ma hwÿr mõ. Pika pẽ Jutej kamã na Perẽjja. Kamã na pre Juje nhĩgêt Tawija kato.

5 Nhũm Juje kêp kanrêhã htãmnhwÿ jakamã na pre ma akupÿm hwÿr mẽ hkwyjẽ hkõt mõ. Nẽ ma amnhĩ kõt kot ho hprõ mã xwýnh Marir o mõ. Arĩ htujarõ rax rãhã nhũm ma amnhĩ kõt o mõ.

6 Nhũm wa mõõ hãmri nẽ hwÿr pøj. Nhũm Marir hpijagri xã hã mytwrÿ mã àr jakamã nhũm kamãt nhũm õhy xã.

7 Nom nhũm Perẽj wÿr mẽ hpõx nyw xwýnhjaja ra ixkre piitã ho nÿt pa nhũm wa tee ri hpijagri kaxyw amnhĩ to ukapi ho pa. Hãmri nẽ nhÿri mõx nhõrkwyõ punajre hwÿr axã nhũm Marir kamã hpijagri. Nhũm hkra kato nẽ myre. Kra kot wa na pre. Hãmri nhũm kumÿ nẽ kupêxê ho hkupu hpa nẽ mõx xãpkur xã hã kõi sti kaprÿ kamã kuxi nhũm hamakêtkati nẽ gõr nẽ nõ.

õwêhti jamãr xwýnhjẽ jarẽnh

8 Rôm nhũm ôwêhti jamâr o mẽ pa xwýnhjaja kapôt ã ri hkrit ôwêhti jamâr o pa. Nhũm ra kamàt nhũm mẽ hamâr o hkrĩ.

9 Pu nhũm kaxkwa rũm Tĩrtũm kapêr o wrýk xwýnhja wrý nê mẽ mýri ajêt. Hãmri nê tanhmã amnhĩ to nê mẽ hpuhã ho hirã rax kumrêx. Nom nhũm Tĩrtũm tãm ã mẽ hipêx anê. Hãmri nhũm mẽ tee ri jawý Tĩrtũm kapêr o wrýk xwýnhja pumu nê kãm ma htýx nê akryk omunh o hkrĩ.

10 Hãmri nhũm mẽ kãm:

—Pa? Kwa mẽ amã ixpyma hkêt nê. Ixte mẽ amã mẽmoj mex jarênh kaxyw na pa mẽ awýr wrý. Kot kaj mẽ harênh ma nê akĩnh nê. Nom mẽ kapxipixjaja kaj mẽ akĩnh kêt nê. Koja mẽ piitã ja jarênh ma nê mẽ apyrã nê hkĩnh nê pa.

11 Na ra ham mẽ akamã ukaprĩ xwýnhhta kato. Pahi Tawi nhõ krĩ mẽ mẽ anhõ krĩ pê Perěj kamã. Kêp mẽ apiitã mẽ anhõ pahihti na. Mẽ ate amnhĩ wýr kamã ajamak o apa xwýnh pê Kris na. Tãm na ham kato.

12 E pa ixprĩ hã mẽ amã tanhmã harênh to ka mẽ inhma. Na kato nhũm katorxã kupêxê ho kupu hpa nê kôsti kamã kuxi nhũm nõ. Kwa mẽ tokyx ma hwýr mra nê kêp mẽ anhõ pahihti hã omu. Anê.

13 Nhũm pre ã mẽ kãm ujarênh anê. Hãmri nhũm hkwyjaja wamta kôt ohtô nê mẽ hwýr wrý nê puhã harir. Hãmri nê Tĩrtũm mã mex o mex ã grer o harir.

14 Nê hã grer o:

Tĩrtũm maati na mex o mex.

Jakamã mẽ kãm hprãm xà kôt pix mã amnhĩ nhĩpêx o mẽ pa xwýnhjaja koja amnhĩ tã mẽ omu nê tanhmã mẽ ho nhũm mẽ hamakêtkati nê àmnhĩx hkĩnh nê pa ho pa.

15 Anhýr o grer o harir hãmri nê ma akupým kaxkwa hwýr àpir pa nê akunok. Hãmri nhũm ôwêhti jamâr xwýnhjaja mẽ kapêr ma nê ma akupým àpir ã mẽ omu nê axpên mã:

—E tokyx pu mẽ krĩm nê Tĩrtũm kot mẽ pamã ho amnhĩrĩt xwýnhhta japêr nê tokyx nhýri omu. Kwa ma pu mẽ tokyx hwýr nê omu. Anê.

16 Hãmri nhũm mẽ ma hwýr mra. Hãmri nê krĩm agjê nê môx nhõrkwý wýr agjê nê mẽ hkrareta pumu. Nhũm kôsti kamã nõ nhũm mẽ omu nê kuri Marir mẽ Juje wa omu.

17 Hãmri nê akupým hapôj nê ma mẽ piitã mẽ hkôt ri mẽ kãm harênh o pa. Ra Tĩrtũm kapêr o wrýk xwýnh kot mẽ kãm harênh xãja kôt nhũm mẽ ma mẽ kãm harênh o ri mẽ hkôt pa.

18 Nhũm mẽ amnhĩ jaêr pê mẽ kot harênh ma nê tee ri hkukamã hamaxpêr.

19 Nom nhũm Marir mẽ kot kãm hkrax rũm tanhmã hkra jarênh to xàta kukamã pix mã hamaxpêr rãhã ho pa.

20 Jakamã nhũm ôwêhti jamâr xwýnhjaja ma akupým hkrit wýr mra. Tĩrtũm kapêr o wrýk xwýnh ra kot mẽ kãm ujarênh xà hkôt nhũm mẽ kot Jejus pumunh jakamã ma akupým hkĩnh nê Tĩrtũm mã mex o mex ã harênh pê hã grer o akupým mra.

Mẽ kot Jejus ã hixi mẽnh ã harênh Matêwre 1.21; Rukre 1.31

21 Tã nhũm wa hkrareta ra hã arĩgro pê 8 nhũm mẽ hwýr akuprõ nê kãm my kwýr kã krãhta. Na hte Ijaew mẽ hkra myre piitã ã mẽ hipêx anê. Mẽ piitã mẽ kot Tĩrtũm mã õr ã mẽ omunh kaxyw. Jakamã nhũm mẽ kãm ho anê nê hpãnhã hã hixi mẽ. Marir kormã kot ho htujarô hkêt ri Tĩrtũm kapêr o wrýk xwýnh kot hkukamã kãm hixi jarênh xãja kôt nhũm mẽ hã hixi mẽ nhũm hixi kêp Jejus.

Mẽ kot Tĩrtũm mã Jejus nhõr pyrãk o hipêx

22-24 Tã nhũm Marir hpijagri ho hapêx. Jakamã nhũm Juje ma krĩ pê Jerujarê hwýr mẽ kot Tĩrtũm mã amnhĩ jarênh xà hã ixkre hwýr amnhĩ kôt o mô. Na pre ra finat Mojes amnepêm Tĩrtũm nhý hã mẽ hkukamã mẽ hpãmjê mã ja hã karõ. Nê mẽ kãm hã karõ ho:

Koja mẽ aprõ hpijagri. Hãmri nê hpijagri ho hapêx ka mẽ ma Tĩrtũm mã amnhĩ jarênh xà hã ixkre hwýr o mra nê hpãnhã Tĩrtũm mã mẽmoj gõ. Kãm tutre ho gõ rý kãm tuuti hõ ho axkrut nê agõ kê patre hamý nê kãm kupa. Kot ja hã omunh nê hpijagri xwýnhhta akupým mex ã harênh kaxyw.

Anhýr o kot mẽ kãm ja hã karõ jakamã nhũm wa ma ã amnhĩ nhĩpêx anhýr kaxyw hwýr mô. Nê amnhĩ kôt Jejus mý nê o mô. Tĩrtũm kot mẽ kãm ja hã karõ nhũm mẽ kot

hã kagà xà hkôt. Na pre ra finat Mojes mẽ kãm ja jarẽ nẽ mẽ kãm:

Kot kaj mẽ akra my kot wa hãmri nẽ te mẽ ate Tirtũm mã òr kaxyw hipêx pyræk o hipêx. Kê tãm amnhĩ nhĩpêx o pa nẽ ÿ hã tanhmã kãm amnhĩ nhĩpêx to ho pa.

Anhÿr jakamã nhũm wa ra Jerujarẽ hwÿr nojarêt nẽ amnhĩ kôt Jejus mÿ nẽ ma amnhĩ kôt o mỗ.

Simeãw kot Jejus kukamã harênh

²⁵⁻²⁶ Rôm nhũm Jerujarẽ kamã Simeãwja. Tirtũm Karõ nhÿ hã kot tanhmã amnhĩ to mex to ho pa xwÿnh na pre. Na pre hte Tirtũm kapêr kôt pix mã tãm amnhĩ nhĩpêx o pa. Jakamã nhũm pre ra Tirtũm Karõ ã kãm kapêr anẽ nẽ kãm:

—E inhma Simeãw. Kot kaj atĩr rãhã nhÿrmã Tirtũm kot mẽ akaxyw ãm mã xwÿnhja ka ano ho omu nẽ rĩ kormã ty.

Anhÿr o kãm kapêr jakamã nhũm kuma nẽ hkĩnh nẽ ãm pix kamã hamak o pa. Mẽ kêp Ijaew wÿr wÿrÿk nẽ mẽ ho mex mã xwÿnhhta pix kamã hamak rãhã ho pa.

²⁷ Jakamã nhũm Jejus katorxà mẽ hipêêxà purota wa Tirtũm mã amnhĩ jarênh xà hã ixkreja wÿr Jejus o axà nẽ kormã o xa. Finat Mojes kot mẽ kãm hã karõ xà hkôt. Hãmri nhũm Tirtũm Karõ mẽ hwÿr Simeãwja mẽ nhũm ma mẽ hwÿr tẽ nẽ axà.

²⁸ Hãmri nẽ wa hkrata pumu nẽ hkĩnh tÿx nẽ. Hãmri nẽ wa kêp kumÿ nẽ o xa nẽ hã Tirtũm mã mex o mex ã harẽ nẽ kãm:

²⁹⁻³² Pa Pahi Maati. E ot pa ixte amã tanhmã amnhĩ nhĩpêx to ho ixpa xwÿnh ã amnhĩ jarẽ.

Nà ãm hãmri na ka pre ã inhmã jare hkukamã harênh anẽ. Tã ate inhmã harênh xà hkôt pa ra inhno ho omu. Kêp mẽ ixkamã ukaprĩ xwÿnh ã omu. Nẽ kêp ate mẽ ixwÿr mênh xwÿnh ã omu.

Nà koja te arĩgro hã myt hirã nẽ mẽmoj piitã ho amnhĩrĩt mex pyræk o koja mẽ inhĩpêx o pa. Jakamã koja hprêk hãmri nẽ ma Ijaew kêt xwÿnhjê mã apê Tirtũm ã akapêr o amnhĩrĩt o pa nhũm mẽhprĩ hã ajarênh ma. Nẽ mẽ ixpê Ijaew kot paj mẽ ijaxwÿja kuma nẽ hã ixpijaàm o ri ixpa.

Jakamã kot paj ixàmnhĩx ri tanhmã amnhĩ nhĩpêx to ho ri ixpa nẽ ixàmnhĩx ty. Ra ixte inhno ho ate inhmã harênh xwÿnhhta pumunh kênã. Anẽ.

³³ Nhũm pre ã Simeãw Jejus jarênh anẽ. Nhũm katorxà mẽ hipêêxà purota wa amnhĩ jaêr pê kot ã harênh anhÿrja mar o xa.

³⁴⁻³⁵ Hãmri nhũm Simeãw wa ho Tirtũm wÿ nẽ kãm:

—E Tirtũm. Kêr ka ja wa ho mex nẽ. Wa ho mex o wa ho mex rãhã ho apa. Anẽ.

Hãmri nẽ Marir mã kapêr nẽ kãm:

—Nà ãm hãmri na pre Tirtũm mẽ pakaxyw akrata xãm. Mẽ pahpê Ijaew kaxyw ãm. Jakamã koja hprêk nẽ ma Tirtũm kapêr o mẽ piitã mẽ ahkre ho ri mẽ hkôt pa. Nhũm mẽ kuma hãmri nẽ ahpÿnhã tanhmã hamaxpêr to xà hkôt tanhmã hipêx to. Jakamã nhũm mẽ hkwyjaja kuma nẽ hkôt amnhĩ xunhwÿ nẽ hkôt amnhĩ nhĩpêx o pa. Jao tãm hipêx o pa. No nhũm mẽ hkwyjaja kuma nẽ axtem nẽ kãm hkĩnh kêt nẽ. Hãmri nẽ tanhmã hipêx to. Jakamã kot kaj tee ri ja hã mẽ omu nẽ akaprĩ htÿx nẽ. Te mẽ kot wapo ho akanhwÿr nẽ akamã ho kaxkep nhũm apê omnuj tÿx pyræk o kot kaj amnhĩ kamã ama nẽ mẽ omu. Anẽ.

ãnti kot Jejus pumunh ã harênh

Wam Ximotre 5.5

³⁶⁻³⁸ Rôm nhũm mẽhõ ni pê ãntija mẽ hwÿr axà nẽ Jejus pumu. ãntija Panuew kra na pre. Nẽ Ase hkwy na pre. Ni htã kêp Tirtũm nhÿ hã kapêr jarênh o pa xwÿnh. Na pre ra mjên no ãm kormã mjên nẽ pa hã amgrà pê 7 pix nhũm pre kêp ty. Hãmri nhũm axte mjên kêt nẽ pa rãhã ra hpigêx tÿx nẽ. Ra hã amgrà pê 84. Na pre hte Tirtũm mã amnhĩ jarênh xà hã ixkre hwÿr pa nẽ kãm amnhĩ jarênh rãhã ho pa. Nẽ kot kãm amnhĩ jarênh kaxyw nẽ apkur kêt rãhã kãm amnhĩ jarẽ. Nẽ arĩgro hã hwÿr pa nẽ kamàt kãm hwÿr pa. ã na pre hte amnhĩ nhĩpêx anhÿr rãhã ho pa anẽ. Jakamã mẽ hwÿr axà nẽ Jejus pumu nẽ hkĩnh nẽ. Hãmri nẽ hã Tirtũm mã mex o mex ã harẽ nẽ kãm:

—Hêxta gàà nẽ Tirtũm. ãm hãmri na ka mẽ ixwÿr Jejus mẽ. Ma amex o amex. Anẽ.

Hãmri nẽ Ijaew kot amnhĩ wÿr mẽ kamã ukaprĩ xwÿnh kamã hamak xwÿnhjê mã ra Jejus kator ã harênh o ri mẽ hkôt pa.

Marir mẽ Juje wa kot akupỹm Najare hwỳr mōr ã wa harēnh

Matêwre 2.19-23

³⁹ Tã nhũm Marir mẽ Juje wa Tĩrtũm kapēr ã kagà htũm kôt Tĩrtũm mã amnhĩ jarēnh xà hã ixkre kamã tanhmã amnhĩ nhĩpêx to hpa hãmri nẽ kato nẽ ma akupỹm mō. Ma Garirej kamã õ krĩ pẽ Najare hwỳr wa ma akupỹm mō.

⁴⁰ Tã nhũm wa hkrata ra wa kãm hprêkre ho mō. Nẽ mex nẽ àhpumunh tỳx nẽ. Tĩrtũm kot tãnopxar nẽ mẽmoj to kutã nojarêt rãhã ho pa jakamã nhũm mex nẽ hkĩnh nẽ pa.

Marir mẽ Juje wa kot tee ri Jejus japêr ã wa harēnh

Rukre 4.22

⁴¹ Nhũm pre hte Marir mẽ Juje wa amgrà mẽ hkwỳjê hkôt ma Jerujarē hwỳr pa. Mẽ kot arĩgro pẽ Pas ã hkĩnh kaxyw. Pas ã na hte mẽ kęp Ijaew amnepêm Tĩrtũm kot pika pẽ Ejit rũm mẽ hpãmjê katorja mã hamaxpêr kaxyw axpên wỳr akuprō nẽ hã hkĩnh. Jakamã nhũm wa ma mẽ hkôt hã hkĩnh kaxyw Jerujarē hwỳr hkwỳjê hkôt mō.

⁴² Nhũm ra Jejus hprêk o mō. Ra hã amgrà pẽ 12 jakamã nhũm wa ma amnhĩ kôt o mō.

⁴³⁻⁴⁴ Tã nhũm mẽ hkĩnh pa hãmri nẽ akupỹm nojarêt nhũm Marir mẽ Juje wa ma hkwỳjê hkôt akupỹm mō. Nhũm Jejus Jerujarē kamã ahte arĩk nẽ akupỹm wa hkôt mōr kêt nẽ. Nhũm wa htỳx wam ma hkwỳjê hkôt htēm ã hkamnhĩx jakamã wa hapêr kêt nẽ. Hãmri nẽ wa hapu hã hamakêtkati nẽ mẽ hkôt mōr o mōr ã ra hã kamàt. Hãmri nẽ mẽ kot amnhĩm hikranh xàja wỳr mẽ hkôt pøj nẽ tee ri mẽ hkaêx ã hkra japêr o ri mra nom omunh kêt nẽ.

⁴⁵ Jakamã nhũm apkati nhũm wa awjanã nẽ ma akupỹm Jerujarē hwỳr mō nẽ kamã hapêr o ri pa.

⁴⁶ Nom tokyx kãm kator kêt nẽ. Mẽ hkaêx ã tee ri hapêr o pa hã apkati axkrut. Nẽ nõ nhũm apkati nhũm wa tã Tĩrtũm mã amnhĩ jarēnh xà hã ixkreja wỳr hapêr o mō nẽ hwỳr axà. Hãmri nẽ omunh kurê kumrêx. Nhũm arĩ mẽ kot Tĩrtũm kapêr tũm o mẽ ahkre xwỳnhjê mar o mẽ kutã nhỹ. Nẽ mẽmoj tã ri mẽ hkukja nẽ tanhmã mẽ kãm ujarēnh to.

⁴⁷ Nhũm mẽ kot mar xwỳnhjaja tee ri kapêr ã kuma nẽ àhpumunh tỳx ã omu hãmri nẽ akryk mar o hkrĩ.

⁴⁸ Hãmri nhũm Marir mẽ Juje mẽ hwỳr axà nẽ mẽ kuri wa hkraja pumunh kurê kumrêx. Hãmri nhũm katorxàja hwỳr tẽ nẽ kãm:

–Xê Jejus. Mon ka axtem nẽ ã ri amnhĩ nhĩpêx anẽ nẽ akupỹm wa ixkôt amōr kêt nẽ? Na pa wa mō nẽ mẽ pahkwỳjê hkôt pøj nẽ tee ri mẽ hkaêx ã ajapêr nẽ tee ri akukamã ijamaxpêr. Anẽ.

⁴⁹ Hãmri nhũm amnhĩ tã wa kuma nẽ wa kãm:

–Tỳ. Nom Inhĩpêxà nhōrkwỹ kamã ixarĩk kênã na ka wa tee ri ixkukamã ajamaxpêr nẽ ijapêr o ri apa. Anẽ.

⁵⁰ Hãmri nhũm wa kuma nẽ ã kot amnhĩ jarēnh anhỹrja kukamã tee ri hamaxpêr.

⁵¹ Hãmri nẽ mẽ ma akupỹm mō nẽ Najare hwỳr pøj nẽ kamã pa. Nhũm pre Jejus wa kapêr kôt ri amnhĩ nhĩpêx rãhã ho pa. Hãmri nhũm katorxàja hkrax rũm mẽ kot kãm tanhmã hkra kot amnhĩ nhĩpêx to hkukamã harēnhja pix kukamã hamaxpêr rãhã ho pa.

⁵² Gaa nhũm Jejus ra àptàr o mō. Nẽ àhpumunh tỳx nẽ. Nhũm mẽ piitã ã kot amnhĩ nhĩpêx anhỹr ã omu nẽ kãm hkĩnh nẽ. Nhũm Tĩrtũm haxwỳja kãm hapê nẽ.

3

Juãw Paxis kot Tĩrtũm kapêr jarēnh o pa hã harēnh

Matêwre 3.1-10; Makre 1.1-8; Juãw 1.19-28

¹⁻² Tã nhũm kormã pahшти Tipeja mẽ ho amnhĩptàr o pa. Na pre ra mẽ ho amnhĩptàr ã amgrà pẽ 15. Nhũm Põn Piratja pahшти Xipe mã pika pẽ Ijaew nhõ xwỳnhjê ho amnhĩptà. Nhũm Eroxa kãm pika pẽ Garirej nhõ xwỳnhjê ho amnhĩptà. Nhũm Erox tō Firipja kãm pika pẽ Iturej nẽ hõ pẽ Takonĩt wa kamã mẽ pa xwỳnhjê ho amnhĩptà. Nhũm Risãnja kãm pika pẽ Apirēn kamã mẽ ho amnhĩptà. Nhũm Anas mẽ Kajpasja wa kęp Ijaew nhõ patre maati.

Rôm nhũm Jejus mẽ Jakaris kra Juãwja wa ra hamẽ anhĩpê àptàr. Jakamã nhũm Tĩrtũm tanhmã Juãw mã kapêr to. Kormã kapôt ã ri pa ri nhũm kãm kapêr nẽ kãm

tanhmã kot amnhĩ nhĩpêx to ho pa hã kãm karõ nẽ kãm:

—Pa Juãw. E inhma. Kêr ka ma mẽ kãm ixkapêr jarênh rãhã ho ri apa. Anẽ.

³ Hãmri nhũm kuma nẽ ma ri mẽ kãm kapêr jarênh o pa. Pyhti pê Jotãw mýri mẽ piitã mẽ kãm harênh o ri pa nẽ hpãnhã ihkjê hã ri mẽ pa xwýnhjê mã harênh o ri pa. Nẽ mẽ kãm:

—E kwa mẽ tokyx amã amnhĩ tomnuj kaga hprãm xàj tãm ri amnhĩ nhĩpêx. Kê Tĩrtũm ja hã mẽ apumu nẽ mẽ anẽ mẽ ate amnhĩ tomnuj o hapêx pa. Pa mẽ piitã mẽ kot mẽ apê Tĩrtũm kra hã mẽ apumunh kaxyw mẽ akrã kumrã.

Anhỹr o mẽ kãm kapêr o ri pa.

⁴⁻⁵ Na pre ra amnepêm mẽ hkukamã Tĩrtũm nhỹ hã kapêr o pa xwýnh Ijais ra Juãw kukamã kot tanhmã amnhĩ nhĩpêx to hã harẽ nẽ hã kagã. Nẽ hã kagã ho:

Koja nhỹrmã mẽhõ mõn pøj. Kapõt ã mõn pøj nẽ mẽ kãm ujarênh o ri pa. Nẽ mẽ kãm ujarênh o: “E mẽ inhma. Koja Tĩrtũm tokyx mẽ pahwýr mẽ panhõ pahihtĩ mẽ nhũm wrý nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o apa. Te ho mẽ kot mẽhõ kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nẽ tãm axpên nhĩpêx. Pahihtita kutêp. Mẽ pahte amnhĩ nhĩpêx te kot pry nhĩnur pyrãk nhũm mẽ tee ri kot kãm hã mrrar mex prãm kaprý pyrãk. Hinur nẽ krã hakýx nẽ pry juk pyrãk o na mẽ pahte amnhĩ nhĩpêxja. Jakamã kot kaj mẽ ate amnhĩ tomnuj kaga nẽ tãm amnhĩ nhĩpêx. Nẽ tãm axpên nhĩpêx. Hãmri nẽ te mẽ kot pry nhĩnur o mex nẽ ho katat nhũm katat muux nẽ nõr pyrãk o kot kaj mẽ amnhĩ nhĩpêx. Pahihti nywta kutêp. Kwa kêr ka mẽ ã amnhĩ nhĩpêx anẽ.

⁶ Kot kaj mẽ anẽ nhũm mẽ ohtõ nẽ ja hã mẽ apumu hãmri nẽ mẽ apyrã Tĩrtũm kot mẽ ho hkra kaxyw amnhĩ to kuwý.” Anhỹr o mẽ kãm ujarênh o pa. Anẽ.

Nhũm pre ã finat Ijaisja Juãw Paxis kukamã mẽ kãm ujarênh anhỹr o pa.

⁷ Jakamã nhũm àptàr nẽ Ijais kot ra hkukamã harênh xà hkõt ma Tĩrtũm kapêr o mẽ ahkre ho pa. Nhũm prem kuma hãmri nẽ kot mẽ hkrã kumrãr kaxyw hwýr amnhĩ to mra. Nhũm mẽ omu nẽ tanhmã mẽ ahkre hto. Nẽ mẽ kãm kapêr kãm hihtýx nẽ mẽ kãm:

—Tk. Kwa kormã. Mẽ ate amnhĩ tomnuj pix o ri apa xwýnh kênã. Xà kot paj mẽ ate amnhĩ tomnuj rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nã? Nã koja ja kãm mex kêt nẽ. Koja ja mýrapê nhỹrmã tanhmã mẽ anhĩpêx to ka mẽ tee ri umaj apimxur prãm kaprý.

⁸ —Na htem amnhĩ tomnuj kaga nẽ hpãnhã tãm amnhĩ nhĩpêx. Nẽ tãm ri axpên nhĩpêx. Jakamã e kwa mẽ ã amnhĩ nhĩpêx anhỹr o apa. No na ka htem atýx ri ajamaxpêr o: “Mẽ ixpê finat Apraãw kanrêhã htãmnhwý jakamã koja Tĩrtũm ja hã mẽ ixpumu hãmri nẽ mẽ ixte amnhĩ tomnuj mýrapê tanhmã mẽ ixto hkêt nẽ. Koja ãm mẽ ixto mex rãhã nẽ.” Anhỹr o atýx ri amnhĩ kukamã ajamaxpêr o apa. Nom ja kot anhỹr kêt. Mẽ apê Apraãw kanrêhã htãmnhwý htã urãk nẽ tãm amnhĩ nhĩpêx o apare hã. Kot ka mẽ apê kanrêhã htãmnhwý htã amnhĩ tomnuj o ri apa hãmri nẽ Tĩrtũm noo mã te mẽ apê pikap kênre nhĩkwý pix pyrãk.

⁹ —Na ra Tĩrtũm kot mẽ ate amnhĩ tomnuj mýrapê tanhmã mẽ ato kaxyw. Koja mẽ anhĩpêx o te mẽhõ nhõ mẽmoj pàr ô hkêt nhũm kot tee ri omunh hãmri nẽ krãhyr nẽ kuwy kamã mẽnh nẽ ho xêt par pyrãk o mẽ anhĩpêx. Jao amnhĩ nẽ kuwy hwýr mẽ arênh pa ka mẽ kamã amnhĩ xà htýx kamã ajamak rãhã ho ri apa. Anẽ.

Nhũm pre ã Juãw Paxisja mẽ kãm kapêr anẽ.

¹⁰ Hãmri nhũm mẽ kuma nẽ tee ri amnhĩ kukamã hamaxpêr nẽ kãm:

—Kwa xõ wehe? Xà koja ã mẽ inhĩpêx anẽ? Kwa tanhmã kot paj mẽ kot ã mẽ inhĩpêx anhỹr pymaj amnhĩ nhĩpêx to wehe? Anẽ.

¹¹ Hãmri nhũm mẽ kãm:

—Nã kêr ka mẽ axpên kãm axukaprĩ ho ri apa. Nẽ mẽ kêp amrakati xwýnhjê mã amnhĩ kutã mẽmoj nhõr o ri apa. Nẽ mẽ anhĩnõhkã axkrut nẽ mẽhõ hinõkã hkêt

xwýnhjê mã ho pyxi nê agõ nê pyxi nê ho arík. Nê mẽ axàpkur xà ho anhõxý ho apa hkêt nê. ãm axàmnhĩx ri mẽ kêp amrakati xwýnhjê mã amnhĩ kutã mẽ kãm mẽmoj to hkryre nê agõ. E kêr ka mẽ ã axpên nhĩpêx anhỹr o ri apa. Anê.

¹² Hãmri nhũm Rõm kãm mẽ õ pahihti mã mẽ piitã mẽ kêp kàxpore hkwy jamýnh xwýnhjaja mẽ uràk nê hwýr mra. Kot mẽ uràk nê mẽ hkrã kumrãr kaxyw hwýr mra nê kãm:

—No we mẽ pajaja? Tanhmã kot paj wem amnhĩ nhĩpêx to? Anê.

¹³ Hãmri nhũm mẽ kãm:

—Nà mẽ kajaja kêr ka mẽ Rõm nhõ pahi kot mẽ amã mẽ ate mẽ kêp kàxpore hkwy jamýnh jarênh xà hkôt pix mã hamýnh o ri apa. No mẽ atýx ri amnhĩ krã hkôt amnhĩm hkwy jamýnh prãm xàj mẽ kãm hkre kamã ho rũnh nê mẽ kãm harênh o ri apa hkêt nê. Anê.

¹⁴ Hãmri nhũm hpãnhã pôristi hkwyjaja hwýr mra nê kãm:

—Kwa no we mẽ pajaja? Tanhmã kot paj wem ri amnhĩ nhĩpêx to ho ixpa? Anê.

Hãmri nhũm mẽ kãm:

—Nà kêr ka mẽ anhõ pahihti kot mẽ axàpênh pãnhã mẽ amã kàxpore nhõrta pix jamý nê ajamakêtkati nê axàmnhĩx ri ho amnhĩm axujaprõr o ri apa. No mẽ akwyjaja kãm apyma nê mẽ amã kàxpore nhõr prãm xàj ri mẽ kãm tanhmã amnhĩ pyma hto ho ri apa hkêt nê. E kêr ka mẽ ã amnhĩ nhĩpêx anhỹr o ri apa. Anê.

Juãw Paxis kot tanhmã Jejus jarênh to hã harênh

Matêwre 3.11-12; Makre 1.7-8; Juãw 1.19-28; mããnên Atre 19.4

¹⁵ Nhũm pre ã Juãw Paxisja mẽ kãm kapêr anê. Nhũm mẽ kuma nê htýx kêp Tĩrtũm kot mẽ pakaxyw ãm mã xwýnhta ã hkamnhĩx.

¹⁶ Hãmri nhũm amnhĩ tã ã mẽ hamaxpêr anhỹr ã mẽ omu hãmri nê mẽ kãm amnhĩ tã aprã nê mẽ kãm:

—Nà pa hkêt. Na pa hte ãm Tĩrtũm mã gõ pix o mẽ hkrã kumrãr o ri ixpa. No koja tokyx ixpãnhã Tĩrtũm kot mẽ pakaxyw ãm xwýnhta tãm mẽ pahwýr pøj. àhpumunh týx o kot ijakrenh jakamã na pa hte ãm kukwak ri ixpa nê hã ixpijaãm o ri ixpa. Tĩrtũm kot mẽ pakaxyw ãm xwýnhta koja

mẽ awýr Karõ rê nhũm mẽ akaxwýnh mã agjê ka mẽ ý hã tãm ri amnhĩ nhĩpêx rãhã ho ri apa. Nom kormã mẽ kot tãm amnhĩ nhĩpêx hkêt xwýnhjaja koja ja hã mẽ omu hãmri nê mẽ hipêx o te kuwy kot mẽmoj to kaxàr par pyrãk o mẽ hipêx.

¹⁷ —Na htem pur kãm harõj nhĩkê nê ho grã nê hpãnhã kahtwý. Nê kahuk pa hãmri nê hkapĩ nhũm kòk apê nê pryhka ho htor nê ho hapêx pa. Nhũm mẽ hy ho pa nê ixkre kamã gõj kãm unhwý. Ja pyrã nê koja tokyx Tĩrtũm mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Mẽ kot tãm amnhĩ nhĩpêx o mẽ pa xwýnhjaja koja ma amnhĩ wýr mẽ ho api nhũm mẽ kuri mex nê hkĩnh rãhã nê pa ho pa. No mẽ kot amnhĩ tomnuj xwýnhjaja koja mẽ hkĩnhã tanhmã mẽ hipêx to nhũm mẽ ma kuwy raxja wýr pa nê kamã amnhĩ xà htýx kamã hamak rãhã nê pa ho pa. Anê.

¹⁸ Nhũm pre ã Juãw Paxis Tĩrtũm kapêr o mẽ ahkre anhỹr o pa.

Juãw Paxis kot Jejus krã kumrãr ã harênh Matêwre 3.13-17; Makre 1.9-11

¹⁹ Tã nhũm Ijaew nhõ pahi Erox ra htõ hprõ pê Eroxis pytà nê ho hprõ nhũm Juãw Paxisja harênh ma nê ma hwýr tẽ nê hã kãm akir. No ãm ja pix ã kãm àkjêr kêt nê. Mããnên tanhmã kot amnhĩ tomnuj týx to ho pa hã kãm akir.

²⁰ Nhũm amnhĩ tã kuma nê kamã gryk týx nê amnhĩ tã mẽ kãm hã amýnê nhũm prem unê nê haxà. Jao amnhĩ tomnuj týx nê.

²¹ Nom kormã mẽ kot haxàr kêt ri nhũm Juãw Paxis Ijaew kwýjê krã kumrãr o xa. Rõm nhũm Jejusja hãmri tãm nhỹhýnh hwýr tẽ nê kot hkrã kumrãr kaxyw kãm anê nhũm kuma nê hkrã kumrã. Hãmri nhũm Jejus gõj rũm api nê kormã gõ mý ri Tĩrtũm mã amnhĩ jarênh o xa.

²² Pu nhũm kaxkwa axkjê nhũm kurũm Tĩrtũm Karõ te tuuti pyrã nê hwýr wrýk o tẽ nê ìkre hã xa. Hãmri nhũm kaxkwa rũm Tĩrtũm kãm kapêr nê kãm:

Pa? E apê Ixkra mex na ka. ãm hãmri na ka hte ixkanrêhã amnhĩ nhĩpêx o apa. Inhmã ajapê kamã na ka ri apa ho apa. Anê.

Jejus kukamã higêt nê hpãmjê nhĩxi hã harênh

Matêwre 1.1-17

²³ Tã nhũm Jejus Tĩrtũm mã kapêr o mẽ ahkre ho pa hkrax. Na pre ra hã amgrà pê 30 hãmri nê kãm ho hkrax.

E kot paj hpãnhã amã Jejus kukamã hpãmjê nhĩxi jarê Teopre. Ijaewjaja na prem htýx ho Juje kêp Jejus nhĩpêêxã kumrêx ã hkamnhĩx nom kêp hipêêxã kumrêx kêt ãm kêp hipêêxã puro na pre.

Jejus kêp Eri htãmnhwý na pre.

²⁴ Nê Eri kêp Matat kra na pre.

Nê Matat kêp Rewi hkra na pre.

Nê Rewi kêp Mewki hkra na pre.

Nê Mewki kêp Jãnaj kra na pre.

Nê Jãnaj kêp axtem Juje hõ hkra na pre.

²⁵ Nê Juje kêp Matatis kra na pre.

Nê Matatis kêp Amõs kra na pre.

Nê Amõs kêp Naũ hkra na pre.

Nê Naũ kêp Eri hkra na pre.

Nê Eri kêp Nakai hkra na pre.

²⁶ Nê Nakai kêp Mate hkra na pre.

Nê Mate kêp axtem Matatis õ hkra na pre.

Nê Matatis kêp Semeĩ hkra na pre.

Nê Semeĩ kêp Juje hõ hkra na pre.

Nê Juje kêp Jotre hkra na pre.

²⁷ Nê Jotre kêp Joanãn kra na pre.

Nê Joanãn kêp Rej kra na pre.

Nê Rej kêp Joropape hkra na pre.

Nê Joropape kêp Saraxi kra na pre.

Nê Saraxi kêp Neri hkra na pre.

²⁸ Nê Neri kêp axtem Mewki hõ hkra na pre.

Nê Mewki kêp Axi hkra na pre.

Nê Axi kêp Kojã hkra na pre.

Nê Kojã kêp Ematã hkra na pre.

Nê Ematã kêp Erti hkra na pre.

²⁹ Nê Erti kêp Jojue hkra na pre.

Nê Jojue kêp Eries kra na pre.

Nê Eries kêp Jorĩ hkra na pre.

Nê Jorĩ kêp Matat hkra na pre.

Nê Matat kêp axtem Rewi hõ hkra na pre.

³⁰ Nê Rewi kêp Simeãw kra na pre.

Nê Simeãw kêp Juta hkra na pre.

Nê Juta kêp axtem Juje hõ hkra na pre.

Nê Juje kêp Janã hkra na pre.

Nê Janã kêp Eriakĩ hkra na pre.

³¹ Nê Eriakĩ kêp Merea hkra na pre.

Nê Merea kêp Mena hkra na pre.

Nê Mena kêp Matata hkra na pre.

Nê Matata kêp Natã hkra na pre.

Nê Natã kêp Tawi hkra na pre.

³² Nê Tawi kêp Jese hkra na pre.

Nê Jese kêp Opex kra na pre.

Nê Opex kêp Poas kra na pre.

Nê Poas kêp Sarã hkra na pre.

Nê Sarã kêp Nasõ hkra na pre.

³³ Nê Nasõ kêp Amĩnatap kra na pre.

Nê Amĩnatap kêp Amĩ hkra na pre.

Nê Amĩ kêp Ari hkra na pre.

Nê Ari kêp Erõ hkra na pre.

Nê Erõ kêp Pere hkra na pre.

Nê Pere kêp Juta hkra na pre.

³⁴ Nê Juta kêp Jako hkra na pre.

Nê Jako kêp Ijak kra na pre.

Nê Ijak kêp Apraãw kra na pre.

Nê Apraãw kêp Tera hkra na pre.

Nê Tera kêp Nako hkra na pre.

³⁵ Nê Nako kêp Jeruk kra na pre.

Nê Jeruk kêp Rakau hkra na pre.

Nê Rakau kêp Parek kra na pre.

Nê Parek kêp Epti hkra na pre.

Nê Epti kêp axtem Sara hõ hkra na pre.

³⁶ Nê Sara kêp Kajnã hkra na pre.

Nê Kajnã kêp Apaxat kra na pre.

Nê Apaxat kêp Sêre hkra na pre.

Nê Sêre kêp Noehti hkra na pre.

Nê Noehti kêp Ramek kra na pre.

³⁷ Nê Ramek kêp Metujarê hkra na pre.

Nê Metujarê kêp Enok kra na pre.

Nê Enok kêp Jarate hkra na pre.

Nê Jarate kêp Marerer kra na pre.

Nê Marerer kêp axtem Kajnã hõ hkra na pre.

Nê Kajnã kêp Enos kra na pre.

³⁸ Nê Enos kêp Set kra na pre.

Nê Set kêp Atãw kra na pre.

Nê Atãw kêp Tĩrtũm kra na pre. Tĩrtũm

kot wam my pê Atãwja pika ho hipêx jakamã te kêp hkra pyrãk.

Ã Jejus kukamã hpãmjê nhĩxi kot anhÿr.

4

Satanasti kot amnhĩ tã Jejus kamã hamak ã harênh

Matêwre 4.1-11, 16.23; Makre 1.12-13, 8.33; mããnên Eprêw 2.18, 4.15

¹ Tã nhũm Jejus pyhti pê Jotãw rũm akupÿm ma mõ. Hãmri nê Tĩrtũm Karõ nhÿ

hã mẽmoj kutã amnhĩ to htỳx nẽ. Jakamã nhũm nhỹhỹm ma kapôt wỳr o mỗ

² nhũm Satanasti omu nẽ ma hwỳr tẽ nẽ ri hkôt pa. Kapôt ã ri hkôt hêx rom tanhmã kãm nẽ ho pa. Kot mar nẽ Tĩrtũm kapẽr nhĩrôp ãm prãm xàj ma hkôt tanhmã kãm kapẽr to ho pa. Hãmri nẽ hkôt pa o hã arĩgro pê 40 nhũm Jejus kormã apkur kêt o hã arĩgro pê 40 nẽ hapêx nhũm ra kãm prãm tỳx nẽ.

³ Hãmri nhũm Satanasti kãm:

—Kwa mãn ka ra amã prãm tỳx kumrêx nà? Nom xep apê Tĩrtũm Kra jakamã mẽmoj tanhmã apê kute hkêt. Kwa kẽn nhĩkwỹ mũj mã anẽ kê amã pãwti hã amnhĩ jahkre ka aku nẽ tokyx ho amnhĩ xihtỳx. E kwa tokyx kãm anẽ. Anẽ.

⁴ Hãmri nhũm kuma nẽ kãm:

—Tk. Nà kot paj akapẽr mar xà hkôt tanhmã amnhĩ nhĩpêx to hkêt nẽ. Koja Tĩrtũm kãm inhmã mẽmoj nhõr prãm nẽ inhmã mẽmoj gõ pa arĩ kormã kukrê. Kapẽr ã kagà htũm kot ja jarênh kot:

Na htem mẽ apkur xà pix kukwak ri htĩr nẽ pa hkêt nẽ. Na htem mãânên Tĩrtũm kapẽr mar xà hkôt tanhmã ri amnhĩ nhĩpêx to ho pa ho htĩr nẽ mex nẽ pa. Anẽ.

Ã kapẽr ã kagà kot ja jarênh kot anhỹr jakamã kot paj amar xà hkôt ã ri amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

⁵ Nhũm pre ã Jejus Satanasti mã kapẽr anẽ nhũm tee ri kuma hãmri nẽ hpãnhã ma nhỹhỹm o mỗ nẽ nhỹri kỳx pê mẽmoj prêêti nhĩmõk ã o xa. Hãmri nẽ kãm pika piitã ahkre ho xa. Nẽ kãm mẽ hikukrêx piitã ahkre. Kàxpore nẽ mẽmoj piitã nhũm kãm ahkre hpa nhũm anhĩpê omunh o xa.

⁶ Hãmri nhũm Satanasti kãm:

—E mãn ka kam ri mẽmoj mũj piitã omu. Piitã inhõ na. Inhmã na pre Tĩrtũm piitã õr pa. Kot paj inhmã mẽhõ mã õr prãm nẽ kãm kugõ.

⁷ Tã amã kot paj kugõ. Jakamã e. Kwa tokyx ixkutã tẽm nẽ inhmã inhmex o inhmex ã ijarê pa ama nẽ rĩ amã piitã õr pa. E tokyx. Anẽ.

⁸ Hãmri nhũm kuma nẽ kãm:

—Tk. Kot paj amã amex o amex ã ajarênh kêt kumrêx. ãm kwarĩ ho kwarĩ. Amexti

hã. Tĩrtũm kapẽr ã kagà htũm kot ja nẽ kapẽr kãm hihtỳx kênã. Kapẽr kot:

Kêr ka mẽ ixkapẽr pix ma. Nẽ ixkutã pix mã mãn akõnkrã ho akrĩ nẽ inhmã inhmex o inhmex ã ijarênh o ri apa. Kêr ka mẽ ã amnhĩ nhĩpêx anhỹr o ri apa.

Anhỹr o kot harênh jakamã kot paj ri amã amex o amex ã ajarênh kêt nẽ Satanasti. Anẽ.

⁹ Nhũm pre ã Jejus amnhĩ nẽ kãm kapẽr anẽ. Hãmri nhũm tee ri kuma nẽ hpãnhã ma krĩ pê Jerujarê hwỳr o mỗ. Nẽ mẽ kot Tĩrtũm mã amnhĩ jarênh xà hã ixkre hprêk nhĩmõk wỳr ho api nẽ kỳxpê hatur xà hã ãm nhũm xa. Nhũm amnhĩ parpê kẽn rũnh nhĩkwỹ pumunh o xa. Hãmri nhũm Satanasti kãm:

—E apê Tĩrtũm Kra jakamã kwa ja rũm ahpar mã ajarĩ nẽ ma tẽ nẽ pikap tẽm. Koja Anhĩpêêxà apumunh mex nẽ ka tanhmã amnhĩ to hkêt nẽ.

¹⁰⁻¹¹ Kapẽr ã kagà htũm kot ja jarênh kot:

Tĩrtũm koja kapẽr o wrỳk xwỳnh mã ajarê ka ajarĩ nẽ ahpar mã tẽ nhũm mẽ kỳx pê amỳ nhũm mẽmoj akà hyr kêt nẽ.

Ã kapẽr ã kagà kamã ajarênh kot anhỹr jakamã e tokyx ajarĩ nẽ ma tẽn pikap ahto. Anẽ.

¹² Hãmri nhũm kuma nẽ kê axte amnhĩ tã kãm kapẽr nẽ kãm:

—Tk. Kwa nà. Kot pa ri amar xà hkôt ã amnhĩ nhĩpêx anhỹr kêt nẽ. Koja Tĩrtũm tãm inhmã ijarĩ hã karõ pa rĩ mar xà hkôt ijarĩ no kot pa ri amar xà hkôt ijarĩ hkêt nẽ. Tĩrtũm kapẽr ã kagà htũm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nẽ.

Ã ja nẽ kapẽr kot anhỹr jakamã ãm kwarĩ ho kwarĩ. Kot paj ri amar xà hkôt ã amnhĩ nhĩpêx anhỹr kêt nẽ. Tãm kot inhmã ijarĩ hã karõre hã. Anẽ.

¹³ Nhũm pre ã Jejus Satanasti mã kapẽr anẽ hãmri nhũm tee ri mẽmoj piitã ho mar kaprỳ hãmri nẽ hkaga nẽ ma nhỹhỹm tẽ. Hãmri nẽ kot nhỹrmã axte hwỳr htẽm nẽ kot mẽmoj punuj o mar kaxyw kormã amnhĩm hamãr o ri pa.

Jejus kot Tirtüm kapër o mẽ ahkre ho hkrax ã harënh

Matêwre 4.12-17; Makre 4.14-15

¹⁴ Tã nhùm Jejus ma akupÿm Garirej wÿr mō. Nê Tirtüm Karō nhÿ hã àhpumunh tÿx nê hkwÿjê mã kapër jarënh o ri pa. Nhùm mẽ kuma nê piitã pikaja kamã axpën mã tanhmã harënh to.

¹⁵ Na pre hte mẽ kot Tirtüm kapër o mẽ ahkre xà hã ixkre hwÿr agjê nê kamã mẽ ahkre ho hkrĩ. Nhùm mẽ piitã kuma nê kãm mar prãm nê. Hãmri nê axpën mã mex ã harënh o ri pa.

Najare kamã mẽ kot Jejus kaga hã mẽ harënh

Matêwre 13.53-58; Makre 6.1-6; Juãw 1.11

¹⁶ Tã nhùm Jejus ma akupÿm krĩ kamã àptàr xàja wÿr ma mō. Najare hwÿr. Hãmri nê kamã pøj.

Nhùm Ijaew nhō arīgromnu pè sap kato nhùm Jejus ma mẽ hkôt Tirtüm kapër o mẽ ahkre xà hã ixkre hwÿr tẽ. Hãmri nê hwÿr axà nê mẽ kuri nhÿ. Hãmri nê kamã mẽ kãm Tirtüm kapër ã kagà htüm kamã harënh kaxyw kànhmã xa

¹⁷ nhùm mẽ omu nê kãm ja gō. Finat Ijais pè Tirtüm nhÿ hã kapër xwÿnh kot Tirtüm kapër kwÿ hã kagàja nhùm mẽ kãm kugō. Hãmri nhùm kupy nê kamã kormã Tirtüm kot tanhmã mẽmoj jarënh to hō japêr o xa. Nê kãm kato hãmri nê mẽ kãm kamã harë. Nom amnhĩ tã kamã mẽ kãm harënh o xa nê mẽ kãm:

¹⁸ Na pre ra Tirtüm Karōja ixto ixàhpumunh tÿx nê mẽ kêp amrakati xwÿnhjê hwÿr inhmẽ pa ra mō. Ixte mẽ kãm mẽmoj mex jarënh o ixpa kaxyw. Nê Satanasti kot amnhĩ kôt mẽ unhwÿr xwÿnhjê hwÿr nhùm pre mãânën inhmẽ. Ixte mẽ nê Satanasti japôx o ixpa kaxyw. Nê mẽ kot hprĩ hã Tirtüm kapër mar kêt xwÿnhjê hwÿr nhùm pre mãânën inhmẽ. Ixprĩ hã ixte mẽ kãm kapër jarënh o ri mẽ hkôt ixpa kaxyw. Nê mẽ kot amnhĩ tomnuj o mẽ pa xwÿnhjê hwÿr nhùm pre mãânën inhmẽ. Ixte mẽ nê mẽ kot amnhĩ tomnuj rên pa nhùm mẽ hamakêtkati nê àmnhix ri pa kaxyw. Æ na pre Tirtüm jajê piitã hwÿr inhmên anê pa ra man mōn pøj.

¹⁹ Nê amgrà ja kêp Tirtüm kot mẽ ato mex xà hã amgràja nhùm ixte mẽ amã harënh o ixpa kaxyw na pre inhmẽ pa mōn pøj. Anê.

²⁰ Nhùm pre ã Jejus Tirtüm kapër ã kagà htüm kamã mẽ kãm amnhĩ jarënh anê. Hãmri nê akupÿm mẽ kãm kagàja gō nê ho mẽ ahkre kaxyw akupÿm nhÿ nhùm mẽ piitã omunh pè mar o hkrĩ.

²¹ Hãmri nhùm mẽ kãm tanhmã amnhĩ jarënh to nê mẽ kãm:

—E ra Ijais kot ã ixkukamã ijarënh anhÿr xà hkôt na pa mẽ awÿr wrÿ nê mẽ anoo mã ã amnhĩ nhÿpêx anhÿr o hkrax. Anê.

²² Hãmri nhùm mẽ amnhĩ jaêr pè ã kot amnhĩ jarënh anhÿr ã kuma. Nê tee ri kuma nê axpën pumunh pè hamaxpêr o hkrĩ. Jejus mẽ kurom àhpumunh tÿx nê kapër mex tã nhùm mẽ ãm kêp amnhĩ kwÿ pix ã hkamnhix kãm hihtÿx nê. Hãmri nê axpën mã:

—Tk. Kwa kêp Juje hkra pix kênã koja we ri ã amnhĩ jarënh anê. Anê.

²³ Hãmri nhùm amnhĩ tã mẽ kuma nê mẽ kãm:

—Nà na ka mẽ ixte amnhĩ jarënh ma nom ixkôt ajamaxpêr kêt nê. Jakamã axpën mã ijarënh o: “Tk. Kêp mẽ pahkaprĩ xwÿnh ro nhÿx jar mẽ panhō krĩ kamã aa mẽ pahte mẽmoj pumunh kêt kwÿ tanhmã mẽ pamã hipêx to pu mẽ hã omu. Te ra kot krĩ pè Kapanaũ kamã mẽ kãm mẽmoj kwÿ ho anhÿrta pyræk. Pu mẽ omu nê hkôt pajamaxpêr kurê kumrêx.” Anhÿr o ri axpën mã ijarê.

²⁴ Koja nhãm krĩ hō kamã mēhō kêp Tirtüm kapër jarënh xwÿnh ã amnhĩ jarê ka mẽ harënh ma nê amã ma hwÿr amrar nê mar prãm nê. No kêt jar mẽ panhō krĩ kamã ixpê mẽ anhĩ hã ã amnhĩ jarënh anê ka mẽ amã inhmar prãm kêt nê.

²⁵ —Kwa mẽ inhma. Amnepêm kormã finat Eris htir ri na pre mẽ hã na wrÿk kêt ry rax nê. Jao hã amgrà axkrunêpxi nê hkôt mytwrÿ pè 6. Nhùm mẽ ò hkêt nê pa. Ra mẽ kêp mẽmoj grà pa nê hapêx nhùm mẽ kãm prãm tÿx kumrêx nê pa. Nhùm mẽ kêp mẽ mjên tyk xwÿnhjaja kãm prãm xàj hirot o pa.

²⁶ Tã nom Tirtüm mẽ ho mex kaxyw mẽ hwÿr Eris mēnh kêt nê. Erisja mẽ uræk nê kêp Ijaew tã nhùm Tirtüm kot mẽ ho

ajuta kaxyw mẽ hwỳr mẽnh kêt nê. Mẽ kot amnhĩ kaxyw Tĩrtũm kôt hamaxpêr kêt jakamã nhũm mẽ hwỳr mẽnh kêt nê. Axtem Ijaew kêt xwỳnhjê hõ hwỳr na pre kumẽ. Nhãm Sitõ kamã krĩ pê Sarep kamã mjên htyk xwỳnhhta wỳr. Tokyx kot tanhmã ho mex to kaxyw. Jakamã nhũm ma hwỳr mõi nê tanhmã kãm kapêr to nhũm kuma nê amnhĩ kaxyw Tĩrtũm kôt hamaxpêr kurê kumrêx.

²⁷ –Nê finat Eriasti haxwỳja. Eris pyrà nê kêp Tĩrtũm nhỹ hã kapêr o pa xwỳnh tã amnhĩ kwỳ pê Ijaew tanhmã mẽ ho ajuta hto hkêt nê. Na prem ohtõ nê hkà nhy nê hkro xàpêr o pa. Jao ra omnuj tỳx nê. Tã nhũm Tĩrtũm kot akupỹm mẽ ho mex kaxyw mẽ hwỳr Eriasti mẽnh kêt nê. Amnhĩ kaxyw mẽ kot hkôt hamaxpêre hã. ãm Sir nhõ xwỳnh Namãja pix na pre Tĩrtũm Eriasti mã anê nhũm akupỹm ho mex. Kêp Ijaew kêt tã nhũm akupỹm ho mex. Tã ja pyrà nê na pa ãm mẽ kot amnhĩ kaxyw ixkôt hamaxpêr pix xwỳnhjê mã tanhmã amnhĩ nhĩpêx to ho ri ixpa. No mẽ ate amnhĩ kaxyw ixkôt ajamaxpêr kêt xwỳnhjê mã tanhmã ri amnhĩ nhĩpêx to hkêt nê. Anê.

Nhũm pre ã Jejus mẽ kãm amnhĩ jarênh anê.

²⁸ Hãmri nhũm mẽ kuma nê kamã gryk tỳx nê axpên mã hã amỹnê nê axpên mã:

–Tk. Kwa pu mẽ ixkre nê kator nê ma o tẽ nê kupĩ ri. Anê.

²⁹ Hãmri nê kaxyw kànhmã kuhê hpa nê hwỳr hprõt nê unê. Mẽ kot ma o htêm nê hixêt prêk jatur xà hã hkujaêk nhũm ahpar mã tẽn htêm nê htyk kaxyw. Mẽ õ krĩa hixêt prêk nhĩmõk ã na pre. Jakamã nhũm prem unê nê hatur xàta wỳr o tẽ.

³⁰ Tã nom nhũm tanhmã amnhĩ nhĩpêx to nê mẽ kêp akunok nê hpãnhã nhãm ma tẽn nhũm mẽ tee ri hapêr nom nhỹri omunh kêt nê.

Jejus kot mēhõ nê mẽkarõmnuti kator ã harênh

Makre 1.21-28

³¹ Tã nhũm Jejus ma akupỹm Garirej kamã krĩ pê Kapanau hwỳr mõi. Nhũm mẽ õ arĩgromnu pê sap kato nhũm ma mẽ kot Tĩrtũm kapêr o mẽ ahkre xà hã ixkre hwỳr tẽn nê mẽ ahkre ho nhỹ.

³² Hãmri nhũm mẽ kot mar o hkrĩ xwỳnhjaja kuma nê kãm mar prãm nê. Nê axpên mã:

–Hêxta waa nê. ãm hãmri na ã mẽ pamã kapêr anê. Àhpumunh tỳx xà hkôt na hte ãm hãmri mẽ pamã awjarê. Anê.

³³ Nhũm mēhõ myja mẽ ãhkõ hã haxwỳja mar o nhỹ. Mẽkarõmnuti na pre ra hwỳr axà nhũm ã hã tanhmã amnhĩ tomnuj to ho pa. Hãmri nê mẽ ãhkõ hã Jejus mar o nhỹ nê ra àmra kamã tanhmã kãm kapêr to. Nom nhũm tãm kãm kapêr kêt ãm kamã mẽkarõmnutija kãm kapêr.

³⁴ Nê kãm:

–Pa? Jejus pê Najare nhõ xwỳnh? Nà ate mẽ ixto ajapêx par kaxyw na ka mẽ ixwỳr mõi. Ra ixte apumunh mex kênã. Apê Tĩrtũm kot mẽ ixwỳr amēnh xwỳnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwỳr mõi? Anê.

³⁵ Hãmri nhũm kuma nê mẽkarõmnuti kot kãm ã kapêr anhỹr ã omunh kurê kumrêx. Jakamã kutã kãm kapêr nê kãm:

–Tk. Kwa anhĩkrê nê kêp akato. Anê.

Hãmri nhũm kuma nê myta o pika kura nê kêp kato nê ma tẽn. ãm ho pika kuranh pix nhũm nõ. Hãmri nê akupỹm kànhmã nhỹ nê akupỹm mex.

³⁶ Hãmri nhũm mẽ piitã omu nê kamã no puma nê. Hãmri nê axpên mã:

–Kokỹỹ. Na hte Jejus amnhĩ krã hkôt àhpumunh tỳx xà hkôt mẽkarõmnuti mã kapêr nê mẽ hano nhũm htem kuma nê mẽ kêp hapôx kurê kumrêx. Anê.

³⁷ Hãmri nhũm mẽ mẽõ pika kamã piitã ri axpên mã harênh o pa.

Jejus kot Simãw Pêtre xupãnhgêx o mex ã harênh

Matêwre 8.14-15; Makre 1.29-31

³⁸ Tã nhũm Jejus Tĩrtũm kapêr o mẽ ahkre xàja rũm kato nê ma Simãw Pêtre nhõrkwỹ hwỳr tẽn. Nê mẽ hwỳr axà nhũm Simãw Pêtre omu nê kãm upãnhgêx tanhmã kute hã harê nê kãm:

–Kwa Pahihti. Tẽn nê inhmã ixupãnhgêx pumu. Na hkà kagro htỳx nê amnhĩ to àpêr o nõ. Kwa tẽn inhmã omu. Anê.

Hãmri nhũm kãm:

–Tõe. Nà kot paj amã omu. Anê.

³⁹ Hãmri nê hwỳr tẽn kuri xa nê kãm:

—Pa? E kwa akà hakry. Aně.

Hāmri nhũm kuma ně hkà hakry ně akupým hihtýx kurê kumrêx. Hāmri ně kànhmã nhỹ ně mẽ kãm mẽõ hã àpênh o ri mra.

Jejus kot mẽ ho ohtô ně mẽ ho mex ã harênh

Matêwre 8.16-17; Makre 1.32-34

⁴⁰ Tã nhũm ra amýkry htýx mẽ nhũm mẽ Jesus wýr ahpýnhã ri mẽ à xwýnhjê ho mra. Nhũm amnhĩ wýr mẽ omu hāmri ně mẽ piitã ri mẽ hã ìhkra jaxwý ně akupým mẽ ho mex pa.

⁴¹ Nhũm ra mẽkarõmnuti mẽ hkwyjê hwýr agjê nhũm mẽ kurũm mẽ hano nhũm mẽ tee ri amnhĩ tã omu ně mẽ kêp hapôx kurê kumrêx. Hāmri ně mẽ kêp hapôx kaxyw ně àmra kamã kãm kapêr ně kãm:

—Kwa tanhmã kot pa wem amnhĩ nê ato? Hêxta waa ně. Apê Tirtũm Kra hã axàhpumunh týx kênã.

Anhýr o kãm kapêr. ãm hāmri na prem ã harênh aně. Kêp Tirtũm kot mẽ pakaxyw ãm xwýnh kênã. No nhũm Ijaew nhõ pahijaja kot mẽ kapêr mar ně kêp mẽkarõmnuti hkwy hã hkamnhix pymaj nhũm Jesus amnhĩ nê mẽ kãm kapêr ně mẽ kãm:

—Kwa mẽ ri ã ijarênh anhýr kêt ně.

Anhýr o mẽ kãm kapêr hāmri ně mẽ hano nhũm mẽ hapôj ně ma mra.

Mêmo kaxyw Tirtũm kot mẽ pahwýr Jesus mẽnh ã harênh

Makre 1.35-39

⁴² Tã nhũm apkati ně myt kator grire nhũm Jesus kot Tirtũm mã amnhĩ jarênh kaxyw kànhmã nhỹ ně kato ně ma nhỹhým kapôt mã tẽ. Hāmri nhũm krĩ nhõ xwýnhjaja hkrã hapôj ně tee ri hapêr ně ma hkôt hpri jakop o mẽ. Ně nhýri hwýr kato ně omu hāmri ně ma nhỹhým mör nê kurê ně kãm:

—Kwa Jesus. Kêr ka tokyx ma nhỹhým amör kêt ně. Kritpêm mẽ ixkôt axkamẽ mãn. Aně.

⁴³ Hāmri nhũm mẽ kuma ně amnhĩ tã mẽ kãm:

—Nà kot paj kritpêm mẽ akôt ixpikamênh kêt ně. Kot paj ma krĩ piitã hkôt ri Tirtũm kapêr o mẽ ahkre ho ri mẽ hkôt ixpa. Tirtũm kot tanhmã mẽ ho hkra hto hã harênhja kot paj mẽ hkôt ri mẽ kãm harênh

o ri ixpa. Ja kaxyw na pre Tirtũm mẽ awýr inhmẽ. Aně.

⁴⁴ Nhũm pre ã mẽ kãm amnhĩ jarênh aně. Hāmri ně mẽ kêp kato ně ma Ijaew nhõ pika piitã hkôt Tirtũm kapêr o mẽ ahkre ho ri pa. Ijaew nhõ Tirtũm kapêr o mẽ ahkre xà hã ixkre kamã mẽ piitã ho mẽ ahkre ho ri pa.

5

Jejus kot amnhĩ kôt mẽ hkwyjê hwýr ã harênh

Matêwre 4.18-22; Makre 1.16-20

¹ Tã nhũm Jesus ma gô rax pê Jenějare hwýr mẽ. Hāmri ně hwýr pôj ně gô mýri Tirtũm kapêr o mẽ ahkre ho xa nhũm mẽ ohtô ně pu hã mar o kuhê. Ně kot hprĩ hã mar ně hkôt omunh kaxyw hã axpên nhĩgãnh o kuhê.

² Hāmri nhũm tee ri amnhĩ tã mẽ omu ně amnhĩ pu hã hakêx ně rít ně gôx kãm pàr kapry hamêxkrut ně jêtja wa omu. Nhũm õ dön wa gôx kãm kryhti kuhõnh o xa. Nhũm pàr hamê hkapry ně ajêt nhũm Jesus omu.

³ Hāmri ně hwýr tẽ ně hõm axà nẽ õ dön pê Simãwja mã aně nhũm hkôt axà nẽ kii mẽ kêp pàrja amým kunhõ nhũm ajêt. Hāmri nhũm pàr kre rũm amým mẽ ahkre ho nhỹ nhũm mẽ piitã omu nẽ mar mex o kuhê.

⁴ Tã nhũm mẽ ahkre hpa nẽ Simãw mã kãm:

—E gô xupým wýr anhõ pàr o axkamẽ nẽ axte anhõ kryhti mẽ nẽ ho amnhĩm tep kwýmne. Aně.

⁵ Hāmri nhũm tee ri kuma ně kãm:

—Kwa na pa mẽ ra kamàt kãm tee rênh o apkati nẽ ho hõmnênh kêt tã ka ri inhmã aně. Nom kot paj amar xà hkôt kop kumẽ. Aně.

⁶ Hāmri nẽ upým wýr pàr o axkamẽ nẽ htõ Andre mẽ wa axte kryhti mẽ. Ně ãm mẽnh tipxi htã ho tep pynênh rax kumrêx. Jakamã nhũm kryhtija ra pikaxõnh kaxyw.

⁷ Hāmri nhũm wa tee ri ho aně nẽ amnhĩ wýr pàr õ ho mrar xwýnhta wa kãm akir. Jepetew kra Juãw mẽ Xiakreja wa nhũm wa amnhĩ wýr wa kãm akir nhũm wa hwýr pàr õ ho tẽ hāmri nẽ mẽ kryhti hã hije nẽ pàr wýr ho api. Hāmri nẽ pàrta hamê tep o ho nyt pa nẽ hamê ho hipu mex nẽ. Jaõ nhỹx gõnh mã wa axà.

8-10 Hāmri nhūm mẽ amnhĩ jaêr pê tep xohtô raxta pumu nê kamã no puma nê. Hāmri nhūm Simãwja Jejus kutã hkõn krã ho tēm nê hipô nê nhỹ nê hã hpijaàm kamã kãm kapêr nê kãm:

—Kwa Pahihti. Kii tamũ axkamẽ. Akĩnhã ixte amnhĩ tomnuj tỳx xwỳnh na pa. Anê.

Hāmri nhūm kuma nê ãm kuma nê kãm:

—Kwa nà tee ri amnhĩ kukamã aja-maxpêr kêt nê. Kot kaj jarãhã hpãnhã tãm amnhĩ nhĩpêx o apa. Na ka ra tep pynênh rũnh o apa. Tã kot kaj ja kaga nê hpãnhã ma ri mẽ hkôt Tĩrtũm kapêr o mẽ ahkre ho ri apa. Koja mẽ ohtô nê ama nê Tĩrtũm kôt amnhĩ xunhwỳ nê hkôt amnhĩ nhĩpêx o pa. Jakamã kot kaj te ate tep pynênh rũnh nê Tĩrtũm mã òr pyrãk o amnhĩ nhĩpêx o apa. Anê.

Nhūm pre ã Jejus Simãw mã kapêr anê.

11 Hāmri nhūm mẽ gô jakàx ã pàr janhòr tỳx nê kamã hikukrêx piitã hkaga hpa nê ma Jejus kôt pa ho pa.

Jejus kot hkà nhy kro tỳx xwỳnh o mex ã harênh

Matêwre 8.1-4; Makre 1.40-45

12 Tã nhūm Jejus ma krĩ hõ hwỳr mō. Hāmri nhūm mẽhõ my hkà nhy hkro htỳx xwỳnhja omu nê hwỳr tẽ nê hã hpijaàm kaxyw kutã hkõnkrã ho nhỹ nê kãm:

—Pa Pahihti. E ot pa awỳr amnhĩ to tẽ. Kwa akupỹm ate mẽ ixto mex kaxyw axãhpumunh tỳx jakamã kot ka akupỹm amã ixto mex prãm nê mãmrĩ akupỹm ixto mex. Anê.

13 Hāmri nhūm kuma nê hkà punuti hã ìhkra xi. Amnhĩ kamã kahak kêt nê hã ìhkra xi nê kãm:

—Nà kot paj ato mex. E akupỹm akà mex kurê kumrêx.

Anhỹrja kôt hāmri nhūm hkàja akupỹm mex pa.

14 Hāmri nhūm Jejus kãm:

—E kêr ka amnhĩ tã akwỳjê mã tanhmã ijarênh to hkêt rãhã ma patre hwỳr tẽ kê akupỹm akà mex ã apumu. Hāmri ka amnepêm Mojes kot mẽ ate akupỹm amex ã Tĩrtũm mã tanhmã amnhĩ nhĩpêx to hã karõta ka kãm ho anê. Kê mẽ mẽ piitã akupỹm akà mex ã apumu. Anê.

Hāmri nhūm kuma nê kãm:

—Tõe. Nà kot paj anê. Anê.

Hāmri nê ma hwỳr htēm kurê kumrêx.

15 Hāmri nhūm mẽ piitã axpên mã Jejus jarênh o ri hprõt nhūm mẽ kot kapêr mar kaxyw ma hwỳr mra. Nê mẽ à xwỳnhjaja nhūm kot mẽ ho mex kaxyw nhūm mẽ hwỳr amnhĩ to mra.

16 Jakamã nhūm pre hte Jejus tõiã mẽ kêp hapôj nê ahte ma kapôt ã Tĩrtũm mã amnhĩ jarênh kaxyw mra. Nê kãm amnhĩ jarênh pa hāmri nê ma akupỹm mẽ hwỳr mra.

Jejus kot ì kamã htyk xwỳnh o mex ã harênh

Matêwre 9.1-8; Makre 2.1-12; Juãw 10.37-38

17 Tã nhūm Jejus ma Tĩrtũm kapêr o Ijaew jahkre ho pa. Jakamã nhỹri mẽhõ nhõrkwy kamã ho mẽ ahkre ho xa nhūm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja kot mar kaxyw ma hwỳr mra. Na pre ra Garirej rũm mẽ hkwỳjaja ma hwỳr mra. Nê pika pê Jutej rũm mẽ hkwỳ haxwỳja ma hwỳr mra. Nê krĩ pê Jerujarê rũm. Á na prem ohtô nê krĩ piitã kurũm kot mar kaxyw hwỳr akuprõ nhūm mẽ ahkre anê. Nê Tĩrtũm kot ho ãhpumunh tỳx jakamã nhūm ÿ hã akupỹm mẽ à xwỳnhjê ho mex.

18 Hāmri nhūm hkwỳjaja ì kamã htyk xwỳnh mỳ nê Jejus wỳr o tẽ. Nõr xà kamã nõr rãhã nhūm mẽ hã hije nê hwỳr o tẽ. Hāmri nê tee ri kot hwỳr ho àr kaxyw ri mẽ hkupu ho pa.

19 Nom nhūm mẽ ra ixkre ho nýt rax jakamã nhūm mẽ tee ri amnhĩ kukamã ho ukapi ho ri pa. Hāmri nê ra hamaxpêr nê ixkre nhĩmõk po hwỳr ho api nê ixkre nhĩmõk kwỳ grã nê hkôt ì kamã htyk xwỳnhhta jaxã. Nõr xà kamã nõr rãhã Jejus wỳr haxã nê mẽ hipòk ri ho wrỳ nê kutã kuxi nhūm nõ.

20 Hāmri nhūm Jejus amnhĩ tã mẽ kot kaxyw kãm hamaxpêr tỳx ã mẽ omunh mex nê. Hāmri nê ì kamã htyk xwỳnhhta mã kapêr nê kãm:

—Pa? E na pa ra anê tanhmã ate amnhĩ tomnuj to ho apaja o ijapêx pa. Kot paj axte kãm ijamaxpêr kêt nê. Anê.

21 Hāmri nhūm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja tee ri kot ã kãm kapêr anhỹrja ã kuma nê axpên mã:

—Tk. Kwa kêp Tirtûm kêt tâ te ri kot amnhî nhîpêx pyrâk o ri mē nē mē kot amnhî tomnuj o hapêx ã amnhî jarēnh o kuhê. Tirtûm pix na kot mē nē mē kot amnhî tomnuj o hapêx xwýnh kênã. Anê.

²² Nhûm mē ã axpēn mã Jejus jarēnh anê nhûm amnhî tâ mē kuma nē mē hamaxpēr kôt mē omunh mex nē. Jakamã mē kãm:

—Kwa mē ã ajamaxpēr anhÿr kêt nē.

²³ Ixte mē nē mē kot amnhî tomnuj o ijapêx par ã amnhî jarēnh tâ mē ate ja kôt ixpumunh kêt jakamã na ka mē ixkôt ajamaxpēr kêt nē. Nom kot paj mē anoo mã akupÿm ï kamã htyk xwýnhta o mex ka mē apiitã ja hã ixpumu hãmri nē ixkôt ajamaxpēr kurê kumrêx.

²⁴ Ixpê Tirtûm kot mē awÿr inhmēnh xwýnhta na pa. Ixte mē anê mē ate amnhî tomnuj rēnh kaxyw na pre mē awÿr inhmē pa mē awÿr wrÿ. Tã mē ate ja kôt ixpumunh kaxyw kot paj mē anoo mã myja o mex. Anê.

Hãmri nē hpãnhã ï kamã htyk xwýnhja mã kapēr nē kãm:

—E kãnhmã xa nē anõr xà py nē ma akupÿm anhõrkwÿ hwÿr tē. Anê.

²⁵ Nhûm kãnhmã ãm kurê kumrêx. Hãmri nē amnhî pumu nē hkĩnh týx nē nõr xà py nē mē noo mã kato nē akupÿm õrkwÿ hwÿr ma Tirtûm mã mex o mex ã harēnh o tē.

²⁶ Hãmri nhûm mē amnhî jaēr pē omu. Nē no hapõx kaxyw hkôt omunh o kuhê nē kamã no puma nē. Nē tee ri omu hãmri nē axpēn mã:

—Kokÿÿ. Aa mē pahte ã mēhõ kot amnhî nhîpêx anhÿr ã omunh kêt tâ na pu mē jarãhã ja pumu. Anê.

Hãmri nē Tirtûm mã mex o mex ã harēnh o kuhê.

Jejus kot amnhî kôt Rewi hwÿr ã harēnh Matêwre 9.9-13; Makre 2.15-17; Rukre 15.1-2

²⁷ Tã nhûm Jejus ma hkôt mē pa ho mē pa xwýnhjê mērohã ma nhÿhÿm mō. Hãmri nē nhÿri Rewi pumu. Rewi nhÿxi hõ pē na Matêwre. Rõm kãm mē õ pahшти mã amnhî kwÿjê pē kãxpore hkwy jamÿnh xwýnh na pre. Jakamã nhûm ujamÿnh xà hã ixkre kamã mē kêp hkwy jamÿnh o nhÿ nhûm Jejus mē hkôt mē pa o mē pa xwýnhjaja

hãnh mra. Hãmri nhûm Jejus àpēnh ã omu nē amnhî kôt kuwÿ nē kãm:

—Pa? E kwa axàpēnhta kaga nē hpãnhã amnē mē ixkôt mãn tē. Nē ixkôt mãn ri apa ho apa. Anê.

²⁸ Hãmri nhûm kuma nē àpēnh kaga hpa nē ma hkôt mō nē hkôt pa ho pa.

²⁹ Hãmri nhûm mēmo arĩgro hã nhûm Rewi nhõ mē apkur xà hã mēõ rax nē. Jakamã nhûm amnhî nhõrkwÿ hwÿr hkrãmnhwÿjaja nē Jejus mē hkôt mē pa ho mē pa xwýnhjê hwÿ. Mē kot kutã apkur kaxyw nhûm amnhî kôt mē kuwÿ nhûm mē ma hkôt mra nē õrkwÿ hwÿr agjê nē apkur o hkrĩ. Nē mē kêp Rõm nhõ pahi mã mē kêp kãxpore hkwy jamÿnh xwýnh kwÿjaja nē mē ohtõ nē hwÿr akuprõ nē axpēn kutã apkur o hkrĩ.

³⁰ Hãmri nhûm Parijew nhõ xwýnhjê mē Tirtûm kapēr tûm o mē ahkre ho mē pa xwýnh kwÿjaja mra nē mē apkur ã mē omu nē tee ri mē hkaêx ã Jejus pumu hãmri nē Jejus kôt mē pa ho mē pa xwýnhjê hwÿr agjê nē hã mē kãm akir nē mē kãm:

—Kwa mē kot amnhî tomnuj ho mē pa xwýnhjê kutã mē apkur kêt tâ ka mē apytãr xwýnhja mē apimràatã axtem nē mē kutã axàpkur o akrĩ. Kwa mē ate amnhî to mex ronhÿx ka mē kutã axàpkur kêt nē. Anê.

³¹ Hãmri nhûm Jejus amnhî tâ mē kapēr ã mē kuma nē mē kãm:

—Tk. Nã ixte tãm mē unhwÿr kaxyw na pa mē kutã ixàpkur o nhÿ. Xà na hte tõtõja mē mex xwýnhjê hwÿr mra nē mē hkané? Nã ãm mē à xwýnhjê pix wÿr na htem mra. Ra mē ate ja pumunh mex kênã. Ja pyrã nē na pa pre mē kot amnhî to mex xwýnhjê hwÿr ixwrÿk kêt nē. Mē kot amnhî tomnuj xwýnhjê pix wÿr na pa pre wrÿ. Ixte tãm mē unhwÿr kaxyw na pa pre mē hwÿr wrÿ nē ã jajê kutã ixàpkur o inhÿr anê.

³² ãm mē kot amnhî tomnuj xwýnhjê hwÿr na pa pre wrÿ nē mē kamã ixukapri ho ri ixpa. Mē kot amnhî tomnuj mã urer nē hpãnhã tãm amnhî nhîpêx o pa kaxyw na pa pre mē hwÿr wrÿ. Tã ka mē atÿx ã ri mē ixto akapēr anê. Anê.

Mē hpãmjaja kot amnhî nhîpêx gryk ã Jejus kaga hã mē harēnh Matêwre 9.14-17; Makre 2.18-22

³³ Tã nhũm Ijaew kwỳjaja Jejus wỳr mra nẽ kãm:

—Pa? E ot pa mẽ awỳr mra. Kwa aprĩ hã mẽ inhmã mẽmoj jarẽ. Na hte Parijew nhõ xwỳnhjẽ mẽ Juãw kôt mẽ pa xwỳnhjaja tõhã Tĩrtũm mã amnhĩ jarẽnh kaxyw nẽ apkur kêt rãhã kãm amnhĩ jarẽ. No akôt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarẽ. Kwa mo na htem mẽ urak nẽ tõhã apkur kêt ri kãm amnhĩ jarẽnh hkêt nẽ? Anẽ.

³⁴ Hãmri nhũm mẽ kuma nẽ mẽ kãm:

—Tk. Nà mo kaxyw koja mẽ apkur kêt rãhã kãm amnhĩ jarẽ? Mẽ hkaprĩ hkêt kênã. Mẽ kot ixkôt pa ho pa hã amnhĩ pumunh jakamã hkĩnh nẽ pa. Kormã ixte mẽ kamã ixpa kênã kot kêt mẽ Tĩrtũm mã amnhĩ jarẽnh kaxyw nẽ apkur kêt rãhã kãm amnhĩ jarẽ. Xà na htem hkrãmnhwỳ hã hkĩnh kaxyw hã akuprõ nẽ hkaprĩ nẽ apkur kêt nẽ mỳr o hkrĩ? Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkôt mẽ pa ho mẽ pa xwỳnhjaja ixkôt kormã àmnhĩx ri hkĩnh nẽ apkati mẽ apkur o pa.

³⁵ Nom koja mẽ kãm ixkurẽ xwỳnhjaja nhỹrmã tanhmã ixto hãmri nhũm mẽ rĩ kormã ixtã hkaprĩ htỳx kãm apkur kêt ri tanhmã amnhĩ nhĩpêx to. Anẽ.

³⁶ Nhũm pre ã Jejus mẽ kãm hkôt ri mẽ pa ho mẽ pa xwỳnhjẽ jarẽnh anẽ hãmri nẽ mẽ kãm:

—Nà mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrak jakamã na htem mẽ kot amnhĩ nhĩpêx nyw kaga.

³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tũm pyrak kêt jakamã ka htem inhma nẽ ãm inhma. Kwa mẽ ixkapêr ma nẽ mẽ ate amnhĩ nhĩpêx tũm gryk ã ixkaga hkêt nẽ. Anẽ.

6

Jejus kệp arĩgromnu hpãm ã harẽnh Matêwre 12.1-8; Makre 2.23-28

¹ Tã nhũm Ijaew nhõ arĩgromnu pê sapja axte kato. Hãmri nhũm Jejus mẽ hkôt ri mẽ pa ho mẽ pa xwỳnhjẽ mẽ ma mẽ hpur kôt ri nhỹhỹm ri pa. Hãmri nhũm hkôt mẽ pa ho mẽ pa xwỳnhjaja ra kãm prãm nẽ mra hãmri nẽ prãm xàj mẽmo hy te kot harôj pyrak

xwỳnhta kwỳ rê nẽ kugrà nẽ ma Jejus kôt hkanhar o mō. Ijaew kot amnhĩ nhĩpêx xà hkôt.

² Hãmri nhũm Parijew nhõ xwỳnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhỹr ã mẽ omu nẽ mẽ hã Jejus kukjêr kurẽ kumrêx nẽ kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkẽnh nẽ mẽ pahkurẽ htã nhũm ri akôt mẽ pa ho mẽ pa xwỳnhjaja axtem nẽ mẽmo hyta kwỳ rê nẽ akôt hkanhar o mō. Kwa mẽ kãm anẽ kê mẽ ã amnhĩ nhĩpêx anhỹr kêt nẽ. Na htem arĩgromnu hã ã amnhĩ nhĩpêx anhỹr kêt nẽ. Anẽ.

³⁻⁴ Hãmri nhũm Jejus mẽ kuma nẽ hprĩ hã mẽ kãm Tĩrtũm kapêr tũm jarẽ nẽ mẽ kãm:

—Kwa xà na ka mẽ Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx tota kamã harẽnh nẽ mar kêt nẽ? Na pre Tawija hkôt ri mẽ pa xwỳnhjẽ mẽ nhũm mẽ prãm xàj Tĩrtũm mã amnhĩ jarẽnh xà hã ixkre wỳr agjẽ nhũm patre maatija mẽ kãm prãm tỳx ã mẽ omu nẽ mẽ kãm mẽmoj gō. Mẽ kot Tĩrtũm noo mã pãwti jaxwỳr xwỳnhta nhũm mẽ kãm kugō nhũm mẽ kuku. Tĩrtũm kapêr ã kagà htũm kot ja nẽ mẽ kurẽ htã nhũm mẽ kãm prãm tỳx ã mẽ omu nẽ mẽ kamã ukaprĩ xàj mẽ kãm kugō. Patre pix kot ja kur kaxyw tã nhũm mẽ kãm kugō nhũm mẽ kuku. Tã nhũm Tĩrtũm ja hã mẽ omu nhũm ja kệp omnuj kêt nẽ. Kot mẽ kamã ukaprĩ nẽ mẽ kãm òr nhũm mẽ hã omu nhũm ja kãm mex nẽ.

⁵ Tã pa na pre Tĩrtũm mẽ akaxyw ixãm nẽ mẽ awỳr inhmẽnh jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Ixpê arĩgromnu hpãm na pa. Anẽ.

Jejus kot ìhkra grà xwỳnh o mex ã harẽnh Matêwre 12.9-14; Makre 3.1-6

⁶ Tã nhũm Ijaew nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkre hwỳr tẽ nẽ axà nẽ Tĩrtũm kapêr o mẽ ahkre ho nhỹ. Nhũm mẽhõ myja upôk rũm ìhkra grà xwỳnhja mẽ ìhkô hã mar o nhỹ.

⁷ Nhũm Parijew nhõ xwỳnhjẽ mẽ Tĩrtũm kapêr tũm o mẽ ahkre ho mẽ pa xwỳnhjaja mẽ kãm mẽ hkrãhtũmjẽ mã Jejus o kapêr

prām xàj htānopxar o kuhê. Nê ïhkra grà xwýnhta pumu nê hã axpên mã:

—Kwa pu mẽ jar pakuhê nê Jejus tanhmã kot amnhĩ nhĩpêx to hã omu. Xà koja jarãhã mũjti ho mex nà? Jarãhã arĩgromnu kênã kot kêt kãm ïhkra ho mex. Koja anê nê Tĩrtũm kapêr kwým ri amnhĩ nhĩpêx. E pu mẽ kop pakuhê nê hã omu. Anê.

⁸ Nhũm Jejus ra kot mẽ hamaxpêr kôt mẽ omunh mex jakamã amnhĩ wýr myta mã hpa ho apê nê kãm:

—Pa? E kànhmã xa nê amnê ixwýr tẽ. Anê.

Hãmri nhũm kuma nê kànhmã xa nê hwýr tẽ.

⁹ Hãmri nhũm Jejus amnhĩ pu hã ri mẽ ho hakêx nê mẽ kot mar o hkrĩ xwýnhjê pumu nê mẽ kãm:

—E mẽ inhmã mẽmoj jarê. Tanhmã na htem arĩgromnu hã axpên nhĩpêx to ho pa wehe? Xà kot ka arĩgromnu hã axà htýx nê nõ hãmri nê amnhĩ mex prãm xàj ma mẽhõ hwýr amnhĩ to tẽ. Hãmri nhũm ãm apumu nê apkatim arĩgro mex jamãr pẽ akane hkêt ka ty nhũm ja amã mex nê nà? Rý nhũm tanhmã atomnuj to nê akupým amnhĩ nê ajano nhũm ja amã mex nê nà? Nà koja ã anhiêpêx anê nhũm ja amã mex kêt nê. Na ka htem ã amnhĩ nhĩpêx anhýr o apa hkêt nê. E mẽ inhmã mẽmoj jarê. Tanhmã na pre finat Mojesja Tĩrtũm nhý hã mẽ pamã arĩgromnu hã mẽ pahte axpên nhĩpêx ã karõ hto? Xà kot puj mẽ axpên kãm paxukaprĩ ho papa nà? Kot puj mẽ pamã axpên kurê ho papa? Xà kot puj mẽ hã mẽmoj punuj pẽ axpên pyta nà? Xà kot puj mẽ hã axpên pytar pymaj arĩgro mex jamã? E mẽ atõ inhmã ja jarê. Anê.

Nhũm pre ã mẽ hkukjêr anê.

¹⁰ Mẽ hamaxpêr ã mẽ omunh mex pẽ ã mẽ hkukjêr anhýr o xa. Nom nhũm arĩ mẽhõ tanhmã kutã kãm nê hkêt nê. ãm akryk mar pẽ omunh o hkrĩ. Mẽ kot tanhmã kãm nê nhũm ta pãnhã tanhmã kot mẽ kãm nê pymaj nhũm mẽ tee ri kãm tanhmã nê hprãm nom akryk mar o hkrĩ. Hãmri nhũm Jejus tee ri mẽ omu hãmri nê myta mã kãm:

—Tk. Mẽ kot tanhmã inhmã kapêr tore hã. E anhĩhkra katàt. Anê.

Hãmri nhũm ïhkra katàt nê akupým mex kurê kumrêx.

¹¹ Hãmri nhũm mẽ kãm Jejus kurê xwýnhjaja tee ri ja hã omu nê kamã gryk týx nê. Arĩgromnu hã kot ho mex jakamã nhũm mẽ kamã gryk týx nê. Nê hã axpên kukjêr o kuhê nê axpên mã:

—Kwa ã kot amnhĩ nhĩpêx anhýr mýrapê tanhmã kot puj wem ho? Na ã kapêr anhýrja o tanhmã mẽ pahto kapêr punuj to. Te mẽ papamjaja mẽ pahte hkĩnhã pahkwýjê kamã paxukaprĩ hkêt pyrãk ã mẽ pajarê. Koja mẽ pahkwýjaja kuma hãmri nê mẽ pahte amnhĩ nhĩpêx kaga nê amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anê.

Jejus kot amnhĩ kaxyw mẽ ho 12 nê mẽ rênh ã harênh

Matêwre 10.1-4; Makre 3.13-19

¹² Tã nhũm arĩgro hõ hã nhũm Jejus ma kot Tĩrtũm mã amnhĩ jarênh kaxyw ma hixêt prêk wýr tẽ nê hã api. Hãmri nê kãm amnhĩ jarênh o apkati.

¹³ Tã nhũm kwýhtã nhũm amnhĩ kôt kot ri mẽ o pa xwýnhjê hwý nê amnhĩ kaxyw mẽ ho 12 nê mẽ kurê. Nê mẽ kãm:

—E mẽ kajaja kot paj ma mẽ pahkwýjê hwýr mẽ arê ka mẽ ma inhý hã Tĩrtũm kapêr o mẽ ahkre ho ri mẽ hkôt apa. Kot kaj mẽ apê inhý hã mẽ ahkre ho apa xwýnh. Anê.

¹⁴ Kot amnhĩ kaxyw mẽ rênh xwýnhjê nhĩxi na jajaja:

Simãw kumrêx na pre kuta nê axte hã hixi mẽ nhũm kêp Pêtre.

Nê Simãw Pêtre hkôt htõ Andreja ta.

Nê hkôt Xiakre hta.

Nê hkôt Juãw ta.

Nê hkôt Firiptija ta.

Nê hkôt Patoromew ta.

¹⁵ Nê hkôt Matêwreja ta.

Nê hkôt Tomasja ta.

Nê hkôt Apew kra axtem Xiakre hõja ta.

Nê hkôt Simãw Jeroxja ta.

¹⁶ Nê hkôt Xiakre hõ hkra Jutja ta.

Nê hkôt Jut Kariot ta.

Jut Kariotja na pre kormã kot mẽ kãm

Jejus kurê xwýnhjê nhĩhkram õr mã.

Nhũm kot amnhĩ kukamã omunh mex tã mẽ hkôt amnhĩ kaxyw kuta.

Ã mẽ kot Jejus nhỹ hã mẽ ahkre o pa kaxyw mẽ rênh xwỳnhjê nhĩxi kot anhỹr.

Jejus xàpênh ã harênh

Matêwre 4.23-25

¹⁷ Tã nhũm Jejus akupỹm ỹ hã mẽ ahkre ho pa xwỳnhjê mẽ hãmri hixêr prêêta kurũm wrỳ nê nhỹri hinur kãm kuhê. Hãmri nhũm nhỹhỹnh mẽ kot mar mã xwỳnhjaja hã akuprô. Kôt mẽ pa ho mẽ pa xwỳnh kwỳjaja nê nhỹhỹnh krĩ hkwỳ rũm mẽ hkwỳjaja. Pika pê Jutej kurũm mẽ hkwỳjaja. Nê krĩ pê Jerujarê kurũm mẽ hkwỳjaja. Nê gô mỳ ri Xir mẽ Sitôja wa kamã mẽ pa xwỳnh kwỳjaja. ãm ahpỹnhã ri nhỹhỹnh krĩ hkwỳ rũm mẽ kot mar mã xwỳnhjaja hã pikuprôn rax nê.

¹⁸⁻¹⁹ Mẽ kot kapêr mar nhũm kot akupỹm mẽ ho mex kaxyw nhũm prem ma hwỳr amnhĩ to pa. Mẽ hkwỳjaja tanhmã ri à kute. Nhũm mẽ hkwỳjaja mẽkarõmnuti kot mẽ hwỳr gjêx xwỳnhjaja nhũm mẽ piitã ma hwỳr amnhĩ to pa. Na prem ra amnhĩ kaxyw kãm hamaxpêr o:

–E pa ma hwỳr tẽ nê ãm hkupênh pix tã akupỹm inhmex japêr. Anê.

Hãmri nê ma hwỳr mra nhũm mẽ omu nê Tĩrtũm xàhpumunh tỳx o akupỹm mẽ ho mex pa.

Jejus kot hkôt mẽ pa ho mẽ pa xwỳnhjê jahkre hã harênh

Matêwre 5.1-12

²⁰ Tã nhũm Jejus hkôt mẽ pa ho mẽ pa xwỳnhjê jahkre nê mẽ kãm:

E kot kaj mẽ atõ amnhĩ kaxyw tanhmã inhmã ajamaxpêr to nê ajamaxpêr o: “Nà ixkukrêx rax kêt tã na hte Tĩrtũm ixkôt pa ho pa. Kojã ixkôt pa hkêt pa ixtỳx ri tanhmã amnhĩ nhĩpêx to ho ri ixpa rãhã nê. Tĩrtũmja mex kumrêx o kot mẽ hikukrêx raxta jakrenh par.” Anhỹr o ajamaxpêr. Hãmri nhũm Tĩrtũm ã ajamaxpêr anhỹr ã apumu nhũm ja kãm mex nê. Hãmri nhũm apê hkra hã ato mex nê atãnopxar o akôt pa ka ajamakêtkati nê akĩnh nê axãmnhĩx ri apa.

²¹ Nê kot kaj mẽ atõ amã Tĩrtũm kãm hprãm xà hkôt tanhmã amnhĩ nhĩpêx to ho ri apa hprãm tỳx nê. Nhũm amnhĩ tã

apumu nhũm ja kãm mex nê nhũm ato mex nê. Nê tanhmã ato ka hkôt pix mã amnhĩ to mex o ri apa nê ajamakêtkati nê akĩnh nê axãmnhĩx ri apa.

Nê kot kaj mẽ tanhmã amnhĩ tomnuj to. Hãmri nê tee ri ja hã amnhĩ pumu nê ajamaxpêr. Nê apijaàm nê akaprĩ xàj amỳr o nhỹ. Amỳr rax nê. Hãmri nhũm Tĩrtũm ja hã apumu nhũm ja kãm mex nê. Jakamã nhũm anê akaprĩ hta nê ato mex nê. Ka ajamakêtkati nê akĩnh nê axãmnhĩx ri apa.

²²⁻²³ Nê kwãr mẽ mãmrĩ ixtã tanhmã mẽ ato kapêr punuj to nê tanhmã mẽ ato hêx to nê tanhmã ri mẽ atomnuj to ho pa. Kwãr mẽ mãmrĩ ã mẽ anhĩpêx anhỹr o pa. Ka mẽ ãm inhmã pix mã ajamaxpêr rãhã ho apa pê ajamakêtkati nê axãmnhĩx ri apa. Kwãr mẽ mãmrĩ ã mẽ anhĩpêx anê nê mẽ amex kêt ã mẽ ajarênh o pa. Amnepêr na pre Tĩrtũm nhỹ hã kapêr xwỳnhjaja nhũm prem ã mẽ hipêx anê. Jakamã kojã mẽ urak nê ã mẽ anhĩpêx anhỹr o pa. Nhũm Tĩrtũm ja hã mẽ apumu nê amnhĩm mẽ amex ã mẽ ajarê. Hãmri nê nhỹrmã kaxkwa kamã wa inhõ krĩ kamã mẽ ato mex rax nê. Ka mẽ akĩnh nê ajamakêtkati nê axãmnhĩx ri apa. Jakamã kwãr mẽ mãmrĩ pika jakamã ã ixtã mẽ anhĩpêx anê. Anê.

Jejus kot arĩ mẽ kot mar xwỳnhjê jahkre hã harênh

Xiakre 5.1-5

²⁴ Nhũm Jejus nhãm hkôt mẽ pa ho mẽ pa xwỳnhjê nhĩhkô hã mẽ kot Tĩrtũm kôt amnhĩ nhĩpêx o pa hkêt xwỳnhjê hwỳr apkjê. Nê mẽ omu nê tanhmã mẽ kãm kapêr to. Mẽ hikukrêx rũnh xwỳnhjê kumrêx mã kapêr nê mẽ kãm:

E kwa mẽ o kora mẽ akukrêx rũnh xwỳnhjaja. Na ka htem ãm akukrêx rũnh pix mã ajamaxpêr o ri apa nê gryk ã Tĩrtũm mã ajamaxpêr o apa hkêt nê. Jao mẽ amã kapêr mar prãm kêt nê. Nê ãm akukrêx rũnh mã ajamaxpêr pê akĩnh nê ri apikunhar

o ri apa. Tã kot ka mẽ nhỹrmã ty hãmri nhũm akĩnh xàja apê hapêx.

25 Nẽ mẽ amã Tĩrtũm kôt ri amnhĩ nhĩpêx prãm kêt xwỳnhjaja. Kot kaj mẽ nhỹrmã akaprĩ htỳx kãm tee ri amnhĩ to hwỳr kaprỳ kãm ga. Kojã mẽ amar kêt nẽ.

Nẽ mẽ atỳx ri mẽ ate tanhmã amnhĩ tomnuj to hkukamã ajamaxpêr nẽ apikunhar pê amnhĩ tomnuj o apa xwỳnhjaja. Kot kaj mẽ nhỹrmã ã mẽ ate amnhĩ nhĩpêx anhỹrja mỳrapê mẽ kot amnhĩ xà htỳx kamã hamak o pa htũm xà hwỳr ma apa. Hãmri nẽ kamã akaprĩ xàj amỳr rãhã ho ri apa. Jakamã kwa mẽ o kora mẽ amã Tĩrtũm prãm kêt xwỳnhjaja. Kêr ka mẽ ixkapêr ma nẽ axkãm ajamak rom nẽ ri apa.

26 Amnepêr mẽ pakukamã mẽ pa xwỳnhjaja na prem Tĩrtũm kapêr o hkwỳjê jahkre ho pa. Nom axtem nẽ hkwym ri tanhmã mẽ kãm ho hêx to nhũm mẽ kuma nhũm ja mẽ kãm mex nẽ nhũm mẽ amnhĩm mẽ mex ã mẽ harê. No ãm mẽ mex kêt. Tã mẽ kajaja. Mẽ kot mẽ urak nẽ axpên mã mẽ amex ã mẽ ajarênh tã Tĩrtũm mã mẽ amex kêt. Jakamã kot kaj mẽ amex kêt nẽ. Anẽ.

Mẽ kãm mẽ pahkurê xwỳnhjê jarênh

Matêwre 5.38-48; Rukre 23.34; mããnên Atrê 7.60; Rômãn 12.14

27 Hãmri nhũm Jejus hpãnhã mẽ piitã mẽ ahkre nẽ mẽ kãm:

—E mẽ ate inhmar xwỳnhjaja. Kêr ka mẽ kot mẽ atomnuj xwỳnhjaja amnhĩ tã tanhmã mẽ ho hkêt nẽ. ãm mẽ ho mex pix o ri apa hkukamã mãn ajamaxpêr.

28 —Nẽ mẽ kot mẽ ato kapêr punuj xwỳnhjaja. Kêr ka mẽ amnhĩ xwar amnhĩ tã tanhmã mẽ ho akapêr punuj to hkêt nẽ. ãm tãm mẽ kãm akapêr pê mẽ kãm akapêr mex o ri apa. Nẽ mẽ kot tanhmã ri mẽ ato ho pa xwỳnhjaja ka mẽ ho mex pix o ri apa. Nẽ mẽ ho Tĩrtũm wỳr pix kukamã mãn ajamaxpêr.

29 —Nẽ kojã mẽhõ anhĩnep akura ka ãm omu nẽ tanhmã amnhĩ tã ho hkêt nẽ. Te ate kãm ihkjê pêr nhũm kot ihkjê kamã akuranh pyrak o amnhĩ nhĩpêx nhũm ja amã

mex nẽ. No kêr ka mẽ amnhĩ tã tanhmã mẽ ho hkêt nẽ.

—Nẽ kojã mẽhõ apê anhĩnhkã py ka tanhmã hã kãm nẽ hkêt nẽ. Kwãr mãmrĩ apê kupy. Ka mããnên te ate kry pê anhĩnhkã hpakã ry jagjênh xwỳnhhta anhĩnhkã hkôt kãm ôr pyrak o hipêx. Nom kamã agryk kãm kãm ôr kêt nẽ.

30 —Nẽ kojã mẽhõ kêp amrakati kumrêx nẽ awỳr tẽ nẽ mẽmoj tã awỳ. Ka anhõ mẽmoj japêr nẽ mãmrĩ kãm mẽmoj gõ. Kêp anhõxỳ hkêt kamã kãm mẽmoj gõ. Rỳ kojã mẽhõ apê mẽmoj to ahkĩ ka axãhkurê hkêt nẽ. Nẽ tanhmã hã ho hkêt nẽ.

31 Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nẽ tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axãmnhĩx ri anhõxỳ hkêt nẽ tãm mẽ hipêx o ri apa.

32 —Nom kot kaj mẽ amã mẽ piitã mẽ ho mex o apa hprãm kêt japêr. Nẽ ãm mẽ kot mẽ ato mex xwỳnhjê pix ka mẽ amã mẽ ho mex prãm. Xà kojã Tĩrtũm ja hã mẽ apumu nhũm ja kãm mex nẽ? Nã kojã kãm mex kêt nẽ. Kojã mẽhõ mẽ ato mex kêt tã ka mẽ amnhĩ rom ho mex nẽ nhũm Tĩrtũm ja hã mẽ apumu hãmri nẽ mẽ amex ã mẽ ajarê. Mẽ kot amnhĩ tomnuj o mẽ pa xwỳnhjaja na htem ãm mẽ kot mẽ ho mex xwỳnhjê pixjaja nhũm htem amnhĩ xwar mẽ ho mex o pa. No tãm mẽ kot amnhĩ nhĩpêx o mẽ pa xwỳnhjaja na htem mẽ piitã mẽ ho mex o pa. Mẽ kot tãm amnhĩ nhĩpêx xwỳnhjaja nẽ mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpên pyrak o pa.

33-36 —Nẽ mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm htem amnhĩ xwar mẽ ho mex o pa. No mẽ kajaja. Kêr ka mẽ mãmrĩ mẽ piitã mẽ kamã axukaprĩ pix nẽ. Jao axãmnhĩx ri mẽ piitã mẽ kãm mẽmoj nhõr o ri apa. Nhũm Tĩrtũm ja hã mẽ apumu nẽ ja hã mẽ ato mex nẽ.

—Jakamã kêr ka mẽ amarĩ mẽ kãm akurê xwỳnhjê ho mex nẽ. Nẽ mẽ kamã axukaprĩ nẽ. Nẽ mẽ piitã mẽ kãm mẽmoj nhõr o ri apa. Kê nhỹrmã Tĩrtũm maati mẽ hã mẽ amã mẽmoj nhõr rax nẽ. Nẽ mẽ ate kot amnhĩ nhĩpêx kôt amnhĩ nhĩpêx xwỳnh ã

mě ajarẽ. Tĩrtũm na hte mẽ kot amnhĩ tomnuj xwỳnhjê kamã ukaprĩ ho pa. Jakamã kêr ka mẽ uràk nẽ ã mẽ hipêx anhỹr o ri apa. E kêr ka mẽ ã axpẽn nhĩpêx anhỹr rãhã nẽ. Anẽ.

Mẽ pahte axpẽn to pakapěr punuj kêt ã mẽ pamã karõ

Matêwre 7.1-5; mããnẽn Rõmãn 2.1-3, 14.1; Wam Korĩt 4.5; Xiakre 4.11-12

³⁷ Nhũm Jejus arĩ mẽ ahkre nẽ mẽ kãm:

—Nẽ kêr ka mẽ atỳx ri amnhĩ krã hkõt tanhmã mẽ kot amnhĩ tomnuj to hã tanhmã axpẽn jarẽnh to ho ri apa hkêt nẽ. Kêr kê Tĩrtũm mẽ apyrà nẽ ã mẽ ajarẽnh anhỹr kêt nẽ.

—Nẽ kêr ka mẽ tanhmã mễhõ kot ra atomnuj tota mã ajamaxpěr rãhã hkêt nẽ. ãm ho ajamakêtkati tokyx anẽ nẽ axte kãm ajamaxpěr kêt nẽ. Kêr kê Tĩrtũm ja hã mẽ apumu nẽ mẽ apyrà nẽ axte tanhmã mẽ ate amnhĩ tomnuj to mã hamaxpěr kêt nẽ.

³⁸ —Nẽ kêr ka mẽ axpẽn kamã axukaprĩ pê tanhmã axpẽn to mex to ho ri apa. Kêr kê Tĩrtũm ja hã mẽ apumu nẽ mẽ apyrà nẽ mẽ akamã ukaprĩ pê tanhmã mẽ ato mex to ho pa. Na hte mẽ pahte axpẽn kamã paxukaprĩ hã mẽ pahpumunh xà hkõt tanhmã mẽ pakamã ukaprĩ to.

³⁹ —Nom kêr ka mẽ atỳx ri tanhmã axpẽn to akapěr to hkêt nẽ. Mẽ ate aprĩ hã axpẽn jamaxpěr kõt axpẽn pumunhre hã. Jakamã kot kaj mẽ atỳx ri mễhõ ho akapěr punuj hãmri nẽ te mẽ nohkre xwỳnhjê hõ kot mẽmoj pumunh kêt tãã te kot no ho omunh nẽ tanhmã harẽnh to pyrãk o amnhĩ nhĩpêx.

⁴⁰ Tĩrtũmja tapxipix na kot mẽ pajamaxpěr kõt mẽ pahpumunh par. Mẽ axàhpumunh tỳx o mẽ pahte hakrenh kêt jakamã kwa kêr ka mẽ ãm hkõt pix mã amnhĩ nhĩpêx o ri apa. Kot kaj mẽ ã amnhĩ nhĩpêx anẽ hãmri nẽ gaa nẽ uràk nẽ mẽ piitã mẽ kamã axukaprĩ pix o ri apa.

⁴¹⁻⁴² Jao mễhõ kot tanhmã amnhĩ tomnuj to hã omu hãmri nẽ tanhmã hã kãm nẽ tokyx anhỹr kêt nẽ. Akumrêx ate tanhmã amnhĩ tomnuj to hã amnhĩ pumu nẽ hkaga hãmri nẽ rĩ kormã mễhõta hwỳr tẽ nẽ kot tanhmã amnhĩ tomnuj to hã kãm akapěr to. Anẽ.

Mẽ pajamaxpěr xà hkõt mẽ pakapěr ã mẽ pajarẽnh

Matêwre 7.16-20, 12.33-37

⁴³⁻⁴⁵ Nhũm Jejus arĩ mẽ ahkre nẽ mẽ kãm:

—Nẽ koja mẽmo pĩ hpàr mex nẽ ô mex nẽ.

Nom koja pàr punuj hãmri nẽ ômnuj nẽ.

—Nẽ na htem mẽmo xõ pumu nẽ hkõt tanhmã pàr kute hã omu. No na htem rãrãj pumu nẽ kêp akunĩ kamã mrõnhĩ xõ hã hkamnhĩx kêt nẽ. Na htem mẽmo xỳ hpàr pumu nẽ ô xànhre hã hkamnhĩx kêt nẽ. Ja pyrà nẽ koja mễhõ hamaxpěr punuj nẽ mããnẽn hakwa ho kapěr punuj pix nẽ. Nẽ htỳx tanhmã amnhĩ tomnuj to ho ri pa. Nom koja hamaxpěr mex nẽ hãmri nẽ mããnẽn hakwa ho kapěr mex o pa. Na htem ahpỳnhã amnhĩ jamaxpěr xà hkõt tanhmã hakwa ho kapěr to ho ri pa. Anẽ.

Ixkre pijakrut jarẽnh

Matêwre 7.24-27; mããnẽn Xiakre 1.22-25; Wam Juãw 2.3-6

⁴⁶ Nhũm Jejus arĩ mẽ hkõt mẽ pa ho pa xwỳnhjê jahkre ho nhỹ nẽ mẽ kãm:

—Nẽ kot kaj mẽ ixpê mẽ anhõ pahihtĩ hã ijarẽ hã kot kaj mẽ ixkapěr kõt amnhĩ nhĩpêx rãhã ho ri apa.

⁴⁷ —E pa mẽ amã ixprĩ hã mẽ kot ixkõt amnhĩ nhĩpêx xwỳnhjê kot amnhĩ nhĩpêx jarẽ ka mẽ aprĩ hã inhma.

⁴⁸ Mẽ kot amnhĩ nhĩpêxja te mễhõ hamaxpěr mex pê aptỳx kãm amnhĩm òrkwỹ nhĩpêx pyrãk. Koja aptỳx kãm òrkwỹ nhĩpêx nhũm mẽmo arĩgro hã na wryk rax nẽ. Nẽ gõ htàm rax nẽ hanhi nom nhũm arĩ ãm tỳx nẽ xa. Tã kot kaj mẽ ixkõt amnhĩ nhĩpêx ã kot kaj mẽ te ixkre jarẽnhja pyrãk. Jao amex nẽ ajamakêtkati nẽ ri apa. Te gõ htàm kot ixkre janhir tã nhũm ãm tỳxta pyrãk.

⁴⁹ Nom koja mễhõ hamaxpěr mex kêt nẽ htỳx mỗ nẽ gõ mỳri gyw rerek kãm amnhĩm òrkwỹ nhĩpêx. Hãmri nhũm mẽmo arĩgro hã na wryk rax nẽ. Nẽ hã gõ htàm rax nẽ òrkwỹ janhi nẽ kêp grành pa. Tã koja mễhõ ixkõt amnhĩ nhĩpêx kêt nẽ te ho mễhõ kot gõ mỳri gyw rerek kãm ixkre nhĩpêxta pyrãk. Jao mex kêt nẽ pa. Jakamã kwa mẽ ixkapěr mar tỳx nẽ te gõ htàm kot ixkre janhir nẽ grành parta pyrãk o amnhĩ nhĩpêx o apa hkêt nẽ. Anẽ.

7

Jejus kot mēhō mā àpēnh xwýnh o mex à harēnh

Matêwre 8.5-13

¹Tā nhūm Jejus mē kām ujarēnh pa hāmri nē ma akupým Kapanaū hwýr mō.

²Nē mōō nē ra hwýr pōj. Nhūm krī kamā pōristi krāhtūm mā àpēnh xwýnhja à htýx nē nō. Ra htyk kaxyw nē nō nhūm ō patrāw tee ri omu nē kām hapē jakamā tee ri hkukamā hamaxpēr o hkaprī nē.

³Hāmri nē Jejus pōx ā harēnh ma nē hwýr Ijaew pigēt kwýjē rē nē mē kām:

—Kwa mē ma Jejus wýr mra nē kām ijarē kē tokyx man ixwýr tē nē inhmā àpēnh xwýnhnta o mex. Anē.

⁴⁻⁵Hāmri nhūm mē kuma nē ma hwýr mra nē omu nē kām:

—Pa. Na pōristi krāhtūm na awýr mē inhmē pa mē mra. Mē pahkīnhā kēp Ijaew kēt tā kām mē pahkīnh nē. Tām na pre mē inhō krī kamā mē inhmā Tirtūm kapēr o mē ahkre xà hā ixkreja nhīpēx. Tā na kām àpēnh xwýnhnta kēp à htýx nē nō nhūm apōx hā ajarēnh ma nē man awýr mē inhmē. Kwa ma hwýr tē nē kām ho mex nà? Anē.

⁶Hāmri nhūm mē kuma nē mē kām:

—Tōe. Ma pu mē hwýr. Anē.

Hāmri nē ma mē hkôt tē. Hāmri nē kormā ōrkwý htēp o htēm mē nhūm axte kutā hkrāmnhwý hkwy rē nhūm mē ma kutā mra. Hāmri nē mra nē mē hkaxpa nē Jejus pumu nē kām:

—Pa? Kwa na pōristi krāhtūmta ā awýr karō anē. Na mē inhmā: “E kēr ka mē mra nē nhýri Jejus kaxpa nē kām awjarē kē ām ata rūm kapēr pix o inhmā à xwýnhnta o mex. Kīnh ā ixpē Ijaew kēt jakamā ixte amnhī kuk ā ixpijaàm týx. Jakamā kot paj pam hwýr ixtēm kēt nē. Kwa kām anē kē ata rūm kapēr pix o inhmā akupým ho mex.

⁷⁻⁸Ixpē mē hkrāhtūm jakamā na pa hte inhō pōristi mā mēmoj tā karō nhūm mē inhmar xà hkôt inhmā mēmoj tanhmā hipēx to. Na pa hte mē kām: ‘E mē ma mra nē ā amnhī nhīpēx anē.’ Anē nhūm mē inhma nē ma mrar kurē kumrēx. Rý pa mē kām: ‘E mē amnē ixwýr mra nē ā amnhī nhīpēx anē.’ Anē nhūm mē inhma nē ixwýr mra. No kēt Jejus na hte ixrom tanhmā mē à kuteja mā kapēr nhūm kuma nē mē kēp

hapōj nē ma mrar kurē kumrēx. Jakamā koja ata rūm kapēr pix o inhmā ho mex.” Anhýr o awýr karō. Jakamā na pa mē akutā mra nē akaxpa nē ā amā kapēr jarēnh anē. Anē.

⁹Hāmri nhūm Jejus amnhī jaēr pē mē kapēr ma nē hkīnh nē. Hāmri nē hkôt mē kot mar o pa xwýnhjē mā kām:

—Kwa xà na ka mē ā kot ixwýr karō xwýnh jamaxpēr anhýrta ā ama? Mē pahkīnhā kēp Ijaew kēt tā mē arom amnhī kaxyw inhmā hamaxpēr týx nē. Aa mē atō urāk nē ate amnhī kaxyw ā inhmā jamaxpēr týx anhýr kēt tā nhūm mē arom kām àpēnh xwýnh kaxyw inhmā hamaxpēr týx nē. Anē.

¹⁰Nhūm pre ā mē kām kapēr anē hāmri nhūm pōristi krāhtūm krāmnhwýjaja kuma nē awjanā nē ma akupým hkrāhtūm nhōrkwýja wýr mra. Nhūm ra Jejus kām àpēnh xwýnhnta akupým ho mex nhūm mex nē ri mra. Hāmri nhūm mē akupým pōj nē akupým mex ā omu.

Jejus kot akupým mēhō hkra ho htīr ā harēnh

Juāw 11.1-46

¹¹Tā nhūm Jejus ma krī pē Naī hwýr hkôt mē pa ho mē pa xwýnhjē mērohā mō nhūm mē ohtō nē mē hkôt mra.

¹²Nhūm mē ra Naī hwýr hpōx o mō. Nē hwýr agjē. Axpēr kām agjē nē mō nhūm kēp mjēn htyk xwýnhja mē kutā tē. Nhūm hkra myja ham kēp ty. Kra pyxi htā kēp ty nhūm mē kasāw kamā kuxà nē kumý nē kot haxàr kaxyw o mō nhūm katorxà mē hkôt mýr o mō. Nhūm krī nhō xwýnh kwýjaja ma hkôt mō. Piitā hkaprī nē hkôt mýr o mō.

¹³Tā nhūm Jejus mē hkwyja mē mō nē mē hkaxpa nē katorxà mýr ā omu nhūm Jejus kām hkaprī nē. Hāmri nē xa nē kām:

—Pa? Kwa amýr kēt nē. Anē.

¹⁴Hāmri nē kasāwta wýr tē nē hā ĩhkra xi nhūm mē kot mýnh xwýnhjaja omu nē amarī kām o xa. Hāmri nhūm htyk xwýnhnta mā kapēr nē kām:

—E kwa kànhmā nhý. Anē.

¹⁵Pu nhūm kànhmā ýr kurē kumrēx. Nē kapēr o nhý. Hāmri nhūm Jejus nita mā kām:

—E ota akrata. Na akupým amā htīr. Anē.

Hāmri nhūm akupŷm htīr ā omu nē hkīnh tŷx kumrēx.

¹⁶ Hāmri nhūm mē kot omunh xwŷnhjaja amnhī jaēr pē akupŷm hkra htīr kām omu nē ŷ hā haxwŷja hkīnh nē. Nē Tīrtūm mā mex o mex ā harē nē axpēn mā:

—Kwa ām hāmri na Tīrtūm ā mē panhīpēx anē nē mē pahwŷr ŷ hā kapēr jarēnh xwŷnhhta mē nhūm mē pahwŷr mō. Tīrtūm mē pakamā ukapŷrī jakamā na ā mē panhīpēx anē. Nā ām hāmri na ā mē panhīpēx anē. Anē.

¹⁷ Hāmri nē piitā ma pikaja rūm mē kām harēnh o hprōt nhūm mē piitā harēnh ma.

Juāw Paxis tee ri Jejus kukamā hamaxpēr ā harēnh

Matēwre 11.2-6, 11.22; Rukre 4.16-21

¹⁸ Rōm nhūm Juāw Paxisja kēp prēs nē hkrī nhūm hte hkōt mē pa xwŷnhjaja hwŷr mra nē kām Jejus kot tanhmā amnhī nhīpēx to ho pa hā harē. Hāmri nhūm harēnh ma nē tee ri hkukamā hamaxpēr. Hāmri nē hkōt mē pa xwŷnh wa ho axkrut nē wa kuta

¹⁹ nē Jejus wŷr wa kumē nē wa kām:

—Kwa wa ma hwŷr tē nē hkukja. Nē kām: “Xà ka na pre Tīrtūm mē ixwŷr amē nà? Nà xà kormā axtem hō na pa mē kormā amnhī wŷr hamār o ri ixpa?” Anē. E wa ma hwŷr tē nē ā hkukjēr anē nē tanhmā kot amnhī jarēnh to hā ama hāmri nē man akupŷn tē nē inhmā harē. Anē.

²⁰⁻²¹ Hāmri nhūm wa kuma nē ma hwŷr tē. Nhūm Jejus kormā mē ho mex o xa. Mē nohkre xwŷnhjaja nhūm akupŷm mē no ho mex. Nē mēkarōmnuti kot mē hwŷr gjēx xwŷnhjaja nhūm mē nē mē hapōx o ām rāhā nhūm wa ra hwŷr tē nē kormā hā mē omunh o xa. Hāmri nē kām Juāw Paxis kapēr jarē.

²² Hāmri nhūm wa kuma nē wa kām:

—Tŷ. Nā ām hāmri na ja hā ijarē. Ixpē mē ate ixkamā ajamak o apa xwŷnhhta na pa. Jakamā e. Wa kam nē tanhmā ixte amnhī nhīpēx to hā ixpumu hāmri nē ma akupŷm hwŷr tē nē aprī hā kām ijarē. Mē nohkre xwŷnhjaja na pa akupŷm mē no ho mex. Nē mē hkānhy xwŷnhjaja pa akupŷm mē hkā ho mex. Nē mē hyk o mē pa xwŷnhjaja pa akupŷm mē ho mex. Nē mē htyk xwŷnhjaja pa akupŷm mē ho htīr. Nē mē kēp amrakati

nē ri mē pa xwŷnhjē mā mēmoj mex jarēnh o ri ixpa. Na pa hte ā mē ho mex o ri mē hkōt ixpa anē. Jakamā e kwa wa ma akupŷm hwŷr tē nē ā kām ijarēnh anē.

²³ Kē ijarēnh ma nē arī amnhī kaxyw ixkōt hamaxpēr tŷx rāhā nē. Koja ā amnhī nhīpēx anē nē hamakētkati nē ri pa. Nē tee ri ijarēnh kukamā hamaxpēr kēt nē. E wa tokyx ma akupŷm hwŷr tē nē ā kām ijarēnh anē. Anē.

Jejus kot Juāw Paxis mex ā harēnh

Matēwre 11.7-19

²⁴⁻²⁵ Nhūm pre ā Jejus wa kām amnhī jarēnh anē nhūm wa kuma nē ma akupŷm Juāw Paxis wŷr tē. Hāmri nhūm Jejus mē kot mar o kuhē xwŷnhjē mā tanhmā Juāw Paxis jarēnh to nē mē kām:

—Na ka prem kapōt ā mar kaxyw ma hwŷr mra. Nom ē mex ā omunh kaxyw rŷ hpiaàm kām tanhmā kapēr to hā mar kaxyw hwŷr amrar kēt nē.

²⁶ Kēp Tīrtūm nhŷ hā kapēr xwŷnh jakamā na ka prem mar kaxyw ma hwŷr mra. Tīrtūm nhŷ hā kot ixkukamā ijarēnh o pa xwŷnh na. Ixpē Tīrtūm kot mē akaxyw ixām xwŷnh ā na pre mē amā ijarēnh o pa. Nē hprī hā tanhmā mē amā ijarēnh to. Jakamā na kapēr mex o kot wam Tīrtūm nhŷ hā kapēr jarēnh o mē pa xwŷnhjē kapēr jakrenh.

²⁷ Tīrtūm kapēr ā kagā htūm kot Juāw kukamā tanhmā harēnh to nē harēnh kot: Kot paj Ixkra hkukamā ma mē hwŷr harēnh o pa xwŷnh mē kē ma ri hkukamā mē kām harēnh o ri pa. Kē mē kuma nē kutēp tām amnhī nhīpēx.

Anhŷr o Tīrtūm Juāw Paxis kukamā harē nhūm mē hā kagā. Tā nhūm mē awŷr kumē.

²⁸ Juāwja mex kumrēx. Na pre hprī hā ixkukamā tanhmā ijarēnh to ho pa. Nom ixkōt mē pa ho mē pa xwŷnhjē hkīnhā ixkōt pa ho pa hkēt ām ixkukamā ijarēnh o pa. Jakamā ixkōt mē pa ho mē pa xwŷnhjaja na mex o kot Juāw Paxisja jakrenh. Mē kot ixkōt hprī hā inhmar o pa jakamā mē mex o kot hakrenh. Anē.

²⁹ Nhūm pre ā Jejus mē kām Juāw Paxis jarēnh anē. Mē kot Juāw mar o kuhē xwŷnh kwŷjaja na pre htem tanhmā amnhī tom-nuj to ho pa. Tā Juāw kot mē kām Tīrtūm

kapër jarënh ma nê axpën mã Tirtũm mex ã harë. Nê axpën mã:

—Nà ãm hãmri. Tirtũm kapër na mex kumrëx. Anë.

Hãmri nê amnhĩ tomnuj kaga nê Tirtũm kôt amnhĩ xunhwý. Jakamã nhũm Juãw Paxis Tirtũm mã mẽ hkrã kumrã.

³⁰ No nhũm Parijew nhõ xwýnhjê mẽ Tirtũm kapër tũm o mẽ ahkre ho mẽ pa xwýnhjaja jajê hkĩnhã Juãw Paxis kaga kumrëx. Jakamã nhũm mẽ hkrã kumrãr kêt nê. Mẽ kot Tirtũm kapër kaga jakamã na pre htem Jejus kapër ma nê ãm kuma.

³¹ Hãmri nhũm Jejus mẽ kãm:

—E pa mẽ amã mẽ piitã htýx ri hamaxpër ã tanhmã mẽ harënh to ka mẽ kot amnhĩ nhĩpêx ã mẽ harënh ma.

³² Te mẽ kot mēhprĩre kot amnhĩ nhĩpêx pyrãk. Mēhprĩrejaja na htem ōrkwý kapem hije nê mẽmoj to amnhĩkati ho hkrĩ. Nê tee ri hkwýjê kot amnhĩ nhĩpêx pumu nê mẽ kãm:

Kwa na pa mẽ amã gre htã ka mẽ ixkutã anhõkrepôx kêt nê. Pa mẽ ja hã mẽ apumu nê hpãnhã mẽ amã mẽ htyk jarë htã ka mẽ akaprĩ nê amýr kêt nê. Kwa mẽ ri ã amnhĩ nhĩpêx anhýr kêt nê.

Anhýr o axpën mã kapër. Tã te mẽ ate mẽ urãk. Tirtũm kot mẽ awýr ý hã kapër xwýnhjê rënh tã ka mẽ te mẽhprĩre kot amnhĩ nhĩpêxta pyrã nê mẽ ama ãm mẽ ama nê mẽ hkôt amnhĩ nhĩpêx kêt nê.

³³ —Juãw Paxis na pre mẽ awýr mō mẽ ixpyrà nê apkur mex o ri pa hkêt nê. Nê ixpyrà nê wĩhti ho hkõm kêt nê pa. Tã ka mẽ ja hã omu nê hkaga nê atýx ri Satanasti nhý hã kot tanhmã amnhĩ nhĩpêx to ho pa hã hkamnhĩx nê ri harënh o ri apa. Hãmri nê mẽhprĩre kot amnhĩ nhĩpêx pyrã nê hkôt amnhĩ nhĩpêx kêt nê.

³⁴ Tã pa Juãw pãnhã mẽ awýr mō. Nê kurom apkati mẽ ixãpkur mex o ri ixpa. Nê kurom wĩhti hkwý ho ixkõm o ri ixpa. Ka mẽ ja hã ixpumu nê atýx ri ixãpkur rũnh nê ixpipãnh o ri ixpa hã ixkamnhĩx nê ã axpën mã ixto akapër anhýr o ri apa. Nê mẽ kot amnhĩ tomnuj xwýnhjê hkôt ri ixpa hã axpën mã ijarënh o ri apa. Æ na ka htem axpën mã ijarënh anë. Jao te mẽ ate Juãw Paxis nhĩpêx pyrã nê ixkaga

nê ixkôt amnhĩ nhĩpêx kêt nê. Na hte ã htýx ri tanhmã mẽ hamaxpër to ho mẽ pa xwýnhjaja amnhĩ nhĩpêx anhýr o ri pa.

³⁵ —No tãm ri mẽ hamaxpër o mẽ pa xwýnhjaja na htem ahpýnhã Juãw mẽ wa ixte amnhĩ nhĩpêx ã wa ixpumu nê axpën mã wa ijarënh o: “Nà ahpýnhã wa kot amnhĩ nhĩpêx tã wa hamë ãm hãmri Tirtũm nhý hã kapër jarënh mex o pa. E pu mẽ wa urãk nê Tirtũm kôt amnhĩ xunhwý.” Anhýr o axpën mã wa ijarënh o pa. Anë.

Parijew nhõ xwýnh pē Simãwre jarënh

Matêwre 26.6-13; Makre 14.3-9; Juãw 12.1-8

³⁶ Tã nhũm Parijew nhõ xwýnh pē Simãwreja amnhĩ nhõrkwý hwýr Jejus mẽ hkôt mẽ pa ho pa xwýnhjê mẽ kuwý. Mẽ kot kutã apkur kaxyw amnhĩ wýr mẽ kuwý nhũm mẽ ōrkwý hwýr mra nê mẽ hwýr agjê nê apkur kaxyw hkrĩ.

³⁷ Hãmri nhũm mēhō nija mẽ hwýr axà. Na pre hte amnhĩ tomnuj pix o pa. Hãmri nê Jejus ō krĩ hwýr hpôx nê Simãwre nhõrkwý kamã apkur ã harënh ma nê ma hwýr tē. Mẽ hkuxwaxà hã à py nê ma hwýr o tē.

³⁸ Hãmri nê hwýr axà nê Jejus pumu nê hwýr tē nê pum xa. Nê tee ri tanhmã kot amnhĩ tomnuj to ho paja mã hamaxpër nê hpijaam nê hkaprĩ nê mýr o xa. Hãmri nê Jejus kutã hkõn krã ho tēm nê nhý nê no kagô ho hpar go. Hãmri nê amnhĩ krã kĩ ho hpar grã nê kupã hãmri nê hpãnhã mẽ hkuxwa xà ho kuxwa. Kãm hkĩnh xàj ã hipêx anë.

³⁹ Hãmri nhũm Simãwre tee ri ja hã omu nê hamaxpër o:

—Tk. Kwa jahti kot amnhĩ tomnuj pix o pa xwýnh tã mẽ ixwýr axà nê ã Jejus nhĩpêx anë nhũm amnhĩ nê hanor kêt nê. Kêp ãm hãmri Tirtũm nhý hã kapër jarënh o pa xwýnh ronhýx ja hã omu nê amnhĩ nê hanor kurê kumrëx. Anë.

⁴⁰ Hãmri nhũm Jejus amnhĩ tã hamaxpër ã omu nê hêx rom kãm kapër nê kãm:

—E Simãwre. Pa amã awjarë ka inhma. Anë.

Hãmri nhũm kãm:

—Tõe. Mex. Mãmri inhmã awjarë pa ama. Anë.

⁴¹ Hãmri nhũm kãm:

—Nà koja mēhō my wa hamēxkrut. Nhūm hōja mēhō pē kàxpore ho rax kumrēx nē ho ĩpresta. Nhūm hōja ām kēp ho grire nē ho ĩpresta. Hāmri nē wa hamē kàxpore ho hapēx pa.

⁴² Hāmri nē akupŷm kot kēp ho ĩpresta xwŷnhhta mā hpānhā ōr kaxyw tee ri amnhī kukamā hamaxpēr. Ra kot ho hapēx par jakamā tee ri amnhī kukamā hamaxpēr. Tā nhūm kot wa kām ho ĩpresta xwŷnhhta wa hwŷr tē nē wa kām: “Kwa wa tee ri amnhī kukamā ajamaxpēr kēt nē. Na pa ra war ate ixto tewēn ā kagāta kaxōnh pa nhūm ja hapēx. Kot paj axte kām ijamaxpēr kēt nē. Jakamā wa māmri ajamakētkati nē axāmnhīx ri apa.” Anhŷr o wa kām kapēr. Ā mē ujarēnh kot anhŷr. Anē.

Nhūm pre ā Jejus Simāwre mā ujarēnh anē. Hāmri nē hā hkukja nē kām:

—E nhŷ myja koja we kām ho tewēn xwŷnhhta kīnh tŷx nē wehe? Anē.

⁴³ Hāmri nhūm kām:

—Nà kot kēp ho rax nē ho ĩpresta xwŷnhhta koja kām hkīnh tŷx o hōta jakre. Anē.

Hāmri nhūm kām:

—Tŷ. Nā ām hāmri na ka ā harēnh anē.

⁴⁴ Tā mān ka ni kot ā inhīpēx anhŷr xwŷnhhta pumu. Na ka amnhī nhōrkwŷ hwŷr ixwŷ pa axā nom ka inhmā gō hwŷy pa ho amnhī par kuhōnh kēt nē. Tā nhūm nija arom ā inhīpēx anē nē no kagō ho ixpar kuhō nē amnhī krā kī ho grā ho nhŷ.

⁴⁵ —Nē anhōrkwŷ hwŷr ixārta ā ka ixkahti hkōt inhmŷnh nē ixpār kēt nē. Tā kēt nija arom xatā ixpar pār o nhŷ.

⁴⁶ Nē ate orti ho ixkrā gregrer kēt tā nhūm arom mē hkuxwaxā ho ixpar kuxwa ho nhŷ. Mēhkukwaxā hā kàxpore xohtō htā nhūm àmnhīx ho ixpar kuxwa ho nhŷ.

⁴⁷ ām hāmri na pa amā ja jarē. Nija kot amnhī tomnuj tŷx tā pa ra nē kot amnhī tomnuj o ijapēx pa. Ra kot amnhī tomnuj tŷx xwŷnh ā amnhī pumunh jakamā na amnhī kaxyw inhmā hamaxpēr pē kām ixkīnh nē ā inhīpēx anē. No ka na ka hte urāk nē amnhī tomnuj tŷx o apa htā urāk nē tee ri ja hā amnhī pumunh kēt nē. Tā nita kīnhā ate amnhī tomnuj kaga hkēt jakamā na ka ām amā ixkīnh grire. Anē.

Nhūm pre ā Jejus Simāwre mā kapēr anē.

⁴⁸⁻⁵⁰ Hāmri nē nija mā kapēr nē kām:

—E kànhmā xa. Ra ate amnhī kaxyw inhmā ajamaxpēr jakamā na pa ra ate amnhī tomnuj piitā amnhī katut kōt rēnh pa. Kot paj axte kām ijamaxpēr kēt nē. Jakamā māmri ma ajamakētkati nē axāmnhīx anhōrkwŷ hwŷr tē. Anē.

Hāmri nhūm mē kot axpēn kutā apkur xwŷnhjaja tee ri kot kām kapēr anhŷrja ā kuma nhūm ja mē kām mex kēt nē. Jakamā nhūm mē ri axpēn mā harēnh o:

—Tk. Kwa mēhō na hte ri kot Tirtūm kot amnhī nhīpēx pyrāk o amnhī nhīpēx nē mē kot amnhī tomnuj o hapēx ā amnhī jarēnh o we ri pahti? Anē.

8

Mēnijē hwŷy kot Jejus kōt pa hā mē harēnh

Makre 15.40-41, 16.9

¹ Tā nhūm Jejus ma mē piitā mē kām Tirtūm kapēr o mē ahkre ho ri mē hkōt pa. Krī rūnh kamā nē krī hkryre kamā. Mē kot amnhī tomnuj kaga nē Tirtūm kōt amnhī xunhwŷr nhūm kot amnhī tā mē omunh nē mē ho hkra kaxyw nhūm ri mē hkōt mē kām harēnh o pa. Nhūm ŷ hā mē ahkre ho mē pa xwŷnh pē 12jaja ma hkōt ri pa.

² Nē mēni hwŷyja. Na pre ra Jejus mē hwŷyja nē mēkarōmnuti japōj. Nē mē hwŷyja tanhmā mē à kute xwŷnhjaja nhūm akupŷm mē ho mex. Xwŷnhjaja nhūm prem haxwŷja ma hkōt ri pa. Hō pē na pre Marir Matarēn nhūm pre ra Jejus nē mēkarōmnuti ho 7 nē hapōj.

³ Nē Joanā. Joanā mjēn Kujahti na pre kēp pahiti Erox mā mē àpēnh xwŷnhjē krāhtūm. Nē Sujānre. Nē kaxyw mēnijē ohtō nē Jejus kōt tanhmā mē ho ajuta hto ho mē hkōt pa. Jao mē hikàxpore ho mēmoj japrō nē ho mē kām mē ō nhīpēx o ri mē hkōt pa.

Mēmo hy hkre xwŷnh

Matēwre 13.1-9; Makre 4.1-9

⁴ Tā nhūm mē ra krī piitā rūm Jejus wŷr akuprō. Jakamā nhūm mē ohtō rax kumrēx nhūm Jejus mē kām ujarēnh o nhŷ. No ām hprī hā ujarēnh kēt nē. Mē kot Tirtūm kapēr mar nē tanhmā hkōt amnhī nhīpēx

to nhũm hã kuxi nẽ mẽ kãm hã ujarẽnh o nhỹ.

⁵ Nẽ mẽ kãm:

—E mẽ inhma. Koja mẽhõ ma pur mã mõ nẽ pur kãm mẽmo hy ho ukapêr o ri pa. Nom nhũm piitã amex kãm rôrôk kêt nẽ. Kwỳ ahpỹnhã nhỹri rôrôk. Hãmri nhũm hkwy aptỳx kãm rôrôk nhũm kuwênhre omu nẽ hwỳr mra nẽ hkrêr pa.

⁶ —Nẽ kẽn kãm hy hkwy rôrôk nẽ higrôt kutã nojarêt nẽ higrôt pa. No nhũm kamã aptỳx nẽ kamã kêp pika hkryre jakamã nhũm higrôt nhũm hã myt apha nẽ arĩgro htỳx mẽ nhũm grã pa. Kamã kẽn nhũm amgo mex kêt jakamã nhũm grã pa.

⁷ —Nẽ mrõnhĩ kamã rôrôk xwỳnhja haxwỳja higrôt tã no nhũm utĩ kêp amýtã nhũm ô hkêt nẽ.

⁸ —No hirã kamã pika mex kãm rôrôk xwỳnhja. Hãmri hirã kamã rôrôk nẽ higrôt mex nẽ piitã ô rax nẽ. Piitã kamã ô kêp 100. ã mẽ ujarẽnh kot anhỹr. E kwa mẽ ixujarẽnh ma nẽ kãm ajamxpêr tỳx rãhã ho ri apa. Anẽ.

⁹ Nhũm pre ã Jejus mẽ kãm ujarẽnh anẽ. Hãmri nhũm hkôt mẽ pa ho mẽ pa xwỳnhjaja kuma nẽ tee ri hkukamã hamaxpêr nẽ kãm:

—Kwa na pa mẽ ixprĩ hã axujarẽnh kôt mẽmoj pumunh kêt nẽ. Aprĩ hã mẽ inhmã tanhmã harẽnh to pa mẽ ixprĩ hã kuma nã? Anẽ.

¹⁰ Hãmri nhũm mẽ kãm:

—Tõe. Nà kot paj mẽ amã harẽ. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harẽ. Mẽ kot amnhĩ tomnuj kaga nhũm Tĩrtũm kot ja hã mẽ omunh nẽ mẽ ho hkra. Ja na pa harẽ.

—No mũjjaja na mẽ akĩnhã kãm mar prãm nõkati. Jakamã na htem ixujarẽnh ma nẽ ãm kuma nẽ htỳx ri pa. Anẽ.

*Jejus kot prĩ hã mẽmo hy jarẽnh
Matêwre 13.18-23; Makre 4.13-20*

¹¹ Hãmri nhũm Jejus hkôt mẽ pa ho mẽ pa xwỳnhjê mã:

—E kot paj ixprĩ hã mẽ amã mẽmo hy ho ukapêr ã mẽ ujarẽnh ta jarẽ ka mẽ inhma.

—Nà mẽmo hyta te kêp Tĩrtũm kapêr pyrãk. Nẽ ahpỹnhã hy rôrôk ã pikata te kêp

ahpỹnhã mẽ kot Tĩrtũm kapêr mar xwỳnhjê kot amnhĩ nhĩpêx pyrãk.

¹² Mẽ kot mar xwỳnh kwỳjaja te kot aptỳx kãm hy rôrôk nhũm kuwênh kot hwỳr mra nẽ hkrêr par xwỳnh ta pyrãk. Jao Tĩrtũm kapêr ma nhũm Satanasti te kuwênh kot hy hkrêr parta pyrà nẽ mẽ kot amnhĩ kaxyw Tĩrtũm kapêr kôt hamaxpêr nẽ hkôt amnhĩ xunhwỳr pymaj tanhmã nẽ mẽ hkrã hto. Jakamã nhũm mẽ kapêr ma nom ho hamakêtkati tokyx anẽ nẽ axte kãm hamaxpêr nẽ hkôt amnhĩ nhĩpêx kêt nẽ.

¹³ —Nẽ mẽ kot mar xwỳnh kwỳjaja te kot kẽnre kamã hkwy rôrôk nẽ higrôt nẽ grã par tokyx anhỹr xwỳnh ta pyrãk. Jao Tĩrtũm kapêr ma nẽ hkĩnh nẽ. Nẽ kãm mar prãm nẽ. Tã nhũm mẽhõ tẽ nẽ Tĩrtũm nẽ tanhmã kãm kapêr to nhũm mẽ kuma nẽ Tĩrtũm kaga. Te mẽmo hy higrôt nẽ grã par tokyx anhỹr ta pyrãk.

¹⁴ —Nẽ mẽ kot mar xwỳnh kwỳjaja te kot mrõnhĩ kamã hkwy rôrôk nẽ higrôt nhũm mrõnhĩ kot kêp àmnar xwỳnh ta pyrãk. Jao kãm Tĩrtũm kapêr mar prãm nẽ. No ãm mããnẽn kãm hikukrêx rax nẽ hikãxpore rax prãm xaj ãm ja pix mã hamaxpêr o pa. Nẽ gaa nẽ ra gryk ã axte Tĩrtũm kapêr mã hamaxpêr nẽ hkôt amnhĩ nhĩpêx kêt nẽ.

¹⁵ —Nẽ mẽ kot mar xwỳnh kwỳjaja te hirã kamã pika mex kãm hy hkwy rôrôk nẽ higrôt nẽ ô rax ta pyrãk. Nẽ ixkapêr ma nẽ amnhĩ krã him hagjênh tỳx nẽ ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyrãk. E. ã ixujarẽnh kot anhỹr. Anẽ.

Kanê mẽ guhkrax wa harẽnh

Makre 4.21-25

¹⁶ Nhũm Jejus arĩ mẽ kãm ujarẽnh o nhỹ nẽ mẽ kãm:

—E mẽ inhma. Xà na htem kanê hpôk hãmri nẽ guhkrax o hpro rỳ par krak ri unhwỳ? Nà na htem ã hipêx anhỹr kêt nẽ. Na htem hpôk nẽ kỳxpê kuhê xà kamã unhwỳ nhũm hirã mex o kuhê. Nhũm htem ixkrem agjê nẽ hirã kamã mẽmoj pumunh mex nẽ. Ja pyrà nẽ na pa hte mẽ ate inhmar tỳx kaxyw ixprĩ hã mẽ amã awjarẽ.

¹⁷ Kormã mẽ ate mẽmoj pumunh nẽ aprĩ hã mar kêt tã kot kaj mẽ tokyx aprĩ hã omu nẽ ama. Te mẽmoj kot mẽ apê hpimxur

pyràk tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê hpòk kãm aprĩ hã mẽmoj pumunh mexta pyràk.

¹⁸ Jakamã kêr ka mẽ ixkapêr mar tỳx nê hkôt ajamaxpêr rãhã ho ri apa. Jao ixkapêr piitã mar tỳx nê. Nom kot ka mẽ mar tỳx kêt nê hã ano hkêt pa nê axte kãm ajamaxpêr o apa hkêt nê. Anê.

Jejus kot tanhmã katorxà mẽ htôjê jarênh to hã harênh

Matêwre 12.46-50; Makre 3.31-35; mãânênh Eprêw 2.11-12

¹⁹ Nhũm Jejus arĩ mẽ ahkre ho nhỹ. Rôm nhũm katorxà nê htôjaja nhỹhỹnh hwỳr mōn pōj. No nhũm mẽ kot mẽ hã htu rax jakamã nhũm mẽ tee ri hwỳr gjêx kaxyw nê kormã kapôt ã kuhê.

²⁰ Hãmri nhũm mẽhōja mẽ omu nê Jejus mã mẽ harê nê kãm:

—Kwa Pahihti. Ota ra akatorxà mẽ atōjaja awỳr pōj nê tee ri awỳr gjêx mã. O mũj mẽ kormã kapôt ã kuhê. Anê.

²¹ Hãmri nhũm mẽ kuma nê mẽ kãm:

—Tôe pa ixkato nê mẽ omu. Inhmã mẽ hapêê. Nom kot kaj mẽ atō Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtō rỳ ixkatorxà kot amnhĩ nhĩpêx pyràk o pu mẽ axpênh nhĩpêx. Pa te inhmã mẽ hapê pyrà nê inhmã mẽ ajapê nê. Anê.

Jejus kot kòk mã kapêr ã harênh

Matêwre 8.23-27; Makre 4.35-41

²² Tã nhũm apkati hō hã nhũm Jejus himô rax ã rêr kaxyw nojarêr nê hkôt mẽ pa ho mẽ pa xwỳnhjê mã kãm:

—E kot puj mẽ jarãhã ma xarmã mō. Anê.

Hãmri nê mẽ pàr mã gjêx pa nê ma xarmã mō. Garirej rũm kato nê ma xarmã pika hō hwỳr kormã mō.

²³ Nhũm ra Jejus òtxwa nê pàr kre kamã gōr nê nō. Pu nhũm kòk àpêr tỳx nê nhũm gô axpênh tak tỳx nê kànhmã harĩ. Nê pàr kre kamã pikapĩr rax nhũm pàrta mẽ kãm àr o mō nhũm mẽ tee ri amnhĩ nhĩpêx. No nhũm Jejus arĩ htỳx gōr nê nō.

²⁴ Hãmri nhũm mẽ tee ri amnhĩ kukamã hamaxpêr nê kumra nê kãm:

—Kwa Pahihti kànhmã nhỹ. Kot puj mẽ jarãhã pahtyk pa. Anê.

Hãmri nhũm kànhmã nhỹ nê kòk mã kapêr nê kãm:

—E. Kwa hãmri anhĩkrê. Anê.

Hãmri nhũm hpinhkrênh par mẽ nhũm gô tãm nōr kurê kumrêx.

²⁵ Hãmri nhũm Jejus hkwyjê hwỳr apkjê nê mẽ kãm:

—Kwa kormã te mẽ ate amnhĩ kaxyw Tirtũm mẽ wa inhmã ajamaxpêr tỳx kêt pyràk. Anê.

Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu nê no hawênh rũnh nê tee ri axpênh pumunh pê hamaxpêr o kuhê nê axpênh mã:

—Kokỹỹ. Jejus kêp mẽ panhĩo hkêt. Mẽ pahtō kot pu we te kot amnhĩ nhĩpêx pyrà nê we kòk mã pakapêr nhũm we pama anhĩkrê? Nà Jejus mẽ parom àhpumunh tỳx o àhpumunh tỳx. Jakamã na ã anê. Anê.

Jejus kot mẽhō nê mẽkarōmnuti kator ã harênh

Matêwre 8.28-34; Makre 5.1-20

²⁶ Tã nhũm mẽ ra himô nhĩhkjê hã krĩ pê Geras wỳr rê. Himô nhĩkjê hã na pre pika pê Garirej. Nê Garirej nhĩkjê hã na Gerasja. Jakamã nhũm mẽ ra hwỳr rê.

²⁷⁻²⁹ Hãmri nê pàr kre rũm hapôj nê api nê mra nhũm mẽhō myja mẽ kutã tẽ. Na pre ra hwỳr mẽkarōmnuti hkwy agjê nhũm mẽ ÿ hã oprê htỳx nê hkênh nê ri mra. Nê òrkwỹ kamã hkrĩ hkêt nê. Âm ri kapôt ã pa ho pa. Mẽ htykjê hã pika kamã kên kre kaêx kôt ri pa. Na pre ra krĩ nhō xwỳnhjaja xatã tee ri unê nê hkaxpre. Tee ri kàx o ri hkaxpre htã no nhũm amnhĩ nê rênh pa. Nhũm mẽkarōmnutija tanhmã hkrã hto nhũm kapôt pix ã ri mra. Jakamã nhũm Jejus mẽ pàr rũm hapôj nê api nhũm mẽ omu nê mẽ kutã tẽ nê Jejus kaxpa. Nhũm amnhĩ wỳr omu nê nê tanhmã mẽkarōmnuti mã kapêr to. Hãmri nhũm my xoprêja hwỳr tẽ nê kutã hkôn krã ho tēm nê nhỹ. Hãmri nê kàxpêê amnhĩ tã kãm kapêr. Nom tãm kapêr kêt nê. Mẽkarōmnuti nhỹ hã kãm kapêr nê kãm:

—Pa Tirtũm Kra Jejus? Kwa mo kaxyw na ka mẽ ixwỳr tẽ? Kwa tanhmã mẽ ixtō hkêt nê. Anê.

³⁰ Hãmri nhũm mẽ kãm:

—Kwa tanhmã na mẽ anhĩxi kute? Anê. Nhũm mẽ kãm:

—Nà mẽ ixpê Měohtôhti. Aně.

Měkarōmnuti ra kot hwÿr ohtô nê gjêx jakamã na prem ã kãm amnhĩ nhĩxi jarênh aně.

³¹⁻³² Hãmri nê Jejus mã:

—Kwa jahti nê mẽ ijapôj nê mẽ kot amnhĩ xà htÿx kamã hamak tũm xà hwÿr mẽ ixrênh kêt nê. Hagrô hkwy mũj wÿr mãn mẽ ixrê pa mẽ hpãnhã hwÿr mãn hagjê nà? Aně.

Hagrôja kii mẽ kêp amÿm hixêt ã ri apkur o pa nhũm mẽ ã Jejus mã mẽ hwÿr amnhĩ to hwÿr aně. Hãmri nhũm mẽ kãm:

—Tôe. Tô mẽ tãm hwÿr mãn mra. Aně.

³³ Hãmri nhũm mẽ kuma nê myta pê hapôj nê ma hagrôja wÿr mrar kurê kumrêx nê mẽ kãm gjêx pa. Hãmri nhũm myja akupÿm tãm hkrã. No nhũm hagrôja mẽkarōmnuti pymaj amÿra nê axkahkũm nê hprôt nê himô hã krã hixêt ã axpum rôrôk nê gôx kãm mrô nê pikaprãr pa.

³⁴ Hãmri nhũm hagrô jamãr xwÿnhjaja tee ri omu hãmri nê ma mẽ õ patrãw wÿr akupÿm mẽ piitã mẽ kãm harênh o hprôt nê mra.

³⁵⁻³⁶ Nhũm mẽ tee ri mẽ kuma hãmri nê ma kot Jejus pumunh mã hwÿr mra nê hkaxpa. Nê kuri myta pumu nhũm ra akupÿm tãm hkrã nê tãm amnhĩ nhĩpêx nê ê kamã mex nê nhÿ. Nhũm mẽ kot hã omunh xwÿnhjaja mẽ kãm ujarênh pa. Nhũm mẽ kuma nê tee ri amnhĩ kukamã hamaxpêr o ra kãm ma nê.

³⁷⁻³⁹ Hãmri nê amnhĩ nê Jejus mã kapêr nê kãm:

—E kwa mẽ tokyj ma akupÿm amrar kurê kumrêx. Aně.

Hãmri nhũm mẽ kuma nê awjanã nê ma akupÿm pãr wÿr mra nê agjê. Nhũm akupÿm mex xwÿnhhta mẽ hkôt hkrã nom nhũm Jejus kãm:

—Nà kot kaj mẽ ixkôt amôr kêt nê. Ma akupÿm anhô krĩ hwÿr mãn tẽ nê Tĩrtũm kot tanhmã akupÿm ato mex to hã mẽ kãm amnhĩ jarênh o ri mẽ hkôt apa. Aně.

Hãmri nhũm kuma nê ma akupÿm krĩm tẽ nê ri mẽ kãm Jejus kot tanhmã ho mex to hã harênh ri mẽ hkôt pa.

Jejus kot wa ho axkrut nê wa ho mex ã harênh

Matêwre 9.18-26; Makre 5.21-43

⁴⁰ Tã nhũm Jejus mẽ ma akupÿm xarmã mō nê rê nê mẽ kutêp mẽ pikuprōnh xwÿnhjê pumu. Nhũm mẽ ra amnhĩ wÿr mẽ omu nê mẽ kutêp gô jakax ã pikuprōnh rax nê. Jakamã nhũm mẽ mẽ hwÿr pōj nhũm mẽ amnhĩ wÿr Jejus pumu nê hkĩnh nê.

⁴¹⁻⁴² Hãmri nhũm Jajti ma hwÿr tẽ. Ijaew nhô Tĩrtũm kapêr o mẽ ahkre xà hã ixkre jamãr xwÿnh na pre. Nhũm pre hkra ni pyxire. Hã amgrã pê 12. Tã ra kêp à htÿx nê htyk kaxyw nê nõ. Hãmri nhũm hipêêxaja tee ri omu hãmri nê Jejus wÿr tẽ nê kutã hkônkrã ho tẽm nê nhÿ nê ho kuwÿ nê kãm:

—Pa akupÿm mẽ ixto mex xwÿnh maati. E awÿr na pa tẽ. Na ra ixkra ixpê htyk kaxyw. Pa tee ri omu nê kaxyw amã ija-maxpêr nê awÿr tẽ. Kwa ma ixkôt inhōrkwy hwÿr tẽ nê inhmã omu nê tokyx inhmã ho mex nà? Aně.

Hãmri nhũm kuma nê ma hkôt tẽ. Nhũm mẽ ohtô nê wa hkôt pry hã mra nê axpên nhĩgã nê axpên kujahêk o hkôt mra.

⁴³ Hãmri nhũm mēhō nija haxwÿja wa hkôt tẽ. Na pre hte hkamrô hkryre rãhã ho pa hã ra amgrã kêp 12. Nhũm tótô tee ri kot ho mex kaxyw hkane kaprÿ ho pa.

⁴⁴ Jakamã nhũm tee ri amnhĩ kukamã hamaxpêr hãmri nê Jejus jarênh ma nê ma mẽ hkôt hwÿr htẽm kurê kumrêx. Nom nhũm mẽ ohtô rax nê hkôt mōr jakamã nhũm mẽ hkaêx kôt hwÿr tẽ nê hkatut kôt kêp ê nhĩrê kupê. Hãmri nê ãm kêp ê pix kupênh tã akupÿm mex.

⁴⁵ Hãmri nhũm Jejus kot kêp ê kupênh ã amnhĩ tã omunh tã hêx rom mẽ ho hakêx nê mẽ omu nê mẽ kãm:

—Kwa mẽ atō na ka ri amnhĩ kaxyw inhmã ajamaxpêr tÿx pê ixpê ixê kupê? Aně.

Hãmri nhũm mẽ piitã tee ri axpên pumu nê kãm amnhĩ tã aprã. Hãmri nhũm Simãw Pêtre kãm:

—Mẽ kot apê amnãr griã kot ka kêt ri mēhō kot apê hkupênh xwÿnh ã ri mẽ hkukja. Kwa mãn ãm mēhō amarĩ apê hkupê. Aně.

⁴⁶ Hãmri nhũm kãm:

—Nã mēhōja amarĩ hkupênh kêt nê. Na amnhĩ kaxyw inhmã hamaxpêr tÿx pê ixpê hkupê. Tã ixãhpumunh tÿx xãja kôt na akupÿm mex. Nom ixte mēhō kot ixpê

hkupênh xwÿnhja pumunh jakamã na pa ixêx rom ã amnhĩ tã ri mẽ hkukjêr anê. Kwa mẽ atõ inhmã amnhĩ jarê. Anê.

⁴⁷ Hãmri nhũm mẽhõ nita kuma nê tee ri kêp kot amnhĩ to hpimxur prãm kaprÿ. Hãmri nê hpijaàm kãm hwÿr htertet o tẽ nê kutã hkõn krã ho tẽm nê nhÿ nê kãm amnhĩ jarê nê kãm:

—Ma pa na pa inhmã inhmex prãm xàj apê axê kupê. Tã na pa akupÿm inhmex. Anê.

⁴⁸ Hãmri nhũm Jejus kuma nê kãm:

—Tõe. Nà ra ate amnhĩ kaxyw inhmã ajamaxpêr tÿx kôt ate ã amnhĩ nhĩpêx anhÿr jakamã na ka akupÿm amex. E mãmri ajamakêtkati nê ma akupÿm tẽ. Anê.

Hãmri nhũm kuma nê hkĩnh nê ma akupÿm tẽ.

⁴⁹ Rôm nhũm Jajti mã àpênh xwÿnhjê hõ òrkwÿ rùm ma ò patrãw kutã tẽ nê wa hkaxpa nê Jajti mã kãm:

—Kwa na ra apê akra ty. Jakamã mo kaxyw kot ka kêt amnhĩ kôt hwÿr Jejus o mõi? Kwãr mãmri ma akupÿm tẽ. Anê.

⁵⁰ Hãmri nhũm Jejus kuma nê Jajti mã kãm:

—Kwa tee ri akra hkukamã ajamaxpêr kêt nê. Kaxyw inhmã mãn ajamaxpêr tÿx nê. Koja te ra apê htyk tã koja akupÿm amã htĩr. Anê.

⁵¹⁻⁵³ Hãmri nhũm mẽ mõi nê òrkwÿ hwÿr pøj nê hwÿr axà nê mẽ omu nhũm mẽ ra htyk xwÿnhhta ã htu rax nê. Nê omũj ri mur. Hãmri nhũm Jejus mẽ hwÿr axà nê mẽ mÿr ã mẽ omu nê mẽ kãm:

—Kwa mẽ hãmri amÿr kêt nê. Na nireta mẽ apê htyk kêt na ãm gõr nê nõ. Anê.

Hãmri nhũm ra mẽ kot htyk ã omunh mex jakamã kuma nê ãm kuma nê axtem nê ri axpên mã hã hpêr o axkê. Hãmri nhũm Jejus htyk xwÿnhhta wÿr hitom wÿr àr kaxyw nê amnhĩ kôt Juãw nê Xiakre nê Pêtre nê kaxyw htyk xwÿnh katorxà nê hipêêxàja. Jajê pix na pre amnhĩ kôt mẽ ho agjê.

⁵⁴ Hãmri nê htyk xwÿnhhta wÿr tẽ nê hpa hã kupy nê kãm:

—Pa? Kwa tokyx kãnhmã nhÿ. Anê.

⁵⁵ Hãmri nhũm akupÿm htĩr nê kãnhmã ÿr kurê kumrêx. Hãmri nhũm Jejus mẽ kãm:

—E kwa mẽ tokyx kãm mẽmoj japêr kê kukrê. Mãn ra kãm prãm nê. Anê.

⁵⁶ Hãmri nhũm katorxà mẽ hipêêxà wa amnhĩ jaêr pê akupÿm htĩr kãm omu nê kamã no puma ho hkĩnh tÿx nê. Hãmri nhũm Jejus wa kãm:

—E wa inhma. Kêr ka wa akupÿm ixte war amã ho htĩr ã ri mẽ kãm ijarênh o ri apa hkêt nê. ãm kwarĩ ho kwarĩ. Anê.

9

Jejus kot mẽ ho 12 nê ahpÿnhã mẽ rênh ã harênh

Matêwre 10.1, 10.5-15; Makre 6.7-13; Rukre 10.1-12; mããnên Atre 13.49-50, 18.6

¹⁻² Tã nhũm Jejus hkôt mẽ pa ho mẽ pa xwÿnh pê 12jê mã kapêr nê mẽ kãm:

—E mẽ amnê ixwÿr mra nê ixkapêr ma. Na pa ra mẽ amã ixàhpumunh tÿx xà hkwy gõ. Jakamã kêr ka mẽ inhÿ hã ma ri akwÿjê hkôt tanhmã mẽ ho mex to ho ri mẽ hkôt apa. Mẽ à xwÿnhjê ho mex o ri mẽ hkôt apa. Nê mẽ hkwyjê nê mẽkarõmnuti japøj. Nê mẽ piitã mẽ kãm anê kê mẽ tokyx Tĩrtũm kôt amnhĩ xunhwÿ kê mẽ ho hkra.

³ Nom kêr ka mẽ amnhĩ kôt akukrêx ho ohtõ nê ri ho apa hkêt nê. Nê amnhĩ kaxpar xà hã kô ho apa hkêt nê. Nê kawà htur nê ho apa hkêt nê. Nê amnhĩ kôt axàpkur xà hã anhõ ho apa hkêt nê. Rÿ akàxpore rax nê ho apa hkêt nê. ãm mẽ anhõ kamıs ho pixi nê haxà nê ri hã apa. Nê anhÿ kamã ã ri mẽ hkôt apa anê. Kê mẽ kot mẽ akapêr mar xwÿnhjaja tãm mãn mẽ amã mẽ anhõ ho pa.

⁴ —Nê kêr ka mẽ nhÿri krĩ hõ hwÿr pøj nê apõx xà kamã mẽhõ nhòrkwÿ kamã hkôt ri apikamênh tãmtã kurũm akupÿm ajapøj nê ma hpãnhã nhãm krĩ hõ hwÿr apa. Nom atÿx ri nhãm mẽ hwÿr amrar nê nhãm mẽ hwÿr amrar kêt nê.

⁵ —Nê koja mẽ nhÿri mẽ akapêr kaga ka mẽ amnhĩ tã mẽ kamã ama nê tokyx mẽ kurũm ajapøj nê ma nhãm apa. Nê anojarêr nê mẽ noo mã akuhê nê amnhĩ par ã aw-jagrô kapĩ. Mẽ kot Tĩrtũm kaga hã amnhĩ pumunh nhũm Tĩrtũm kot amnhĩ pyrã nê mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpêx anê. Hãmri nê ma hpãnhã krĩ hõ hwÿr apa. Anê.

⁶ Nhũm pre ã Jejus mẽ kãm mẽ àpênh ã karõ anê. Nhũm mẽ kuma hãmri nê hapôj nê ma mẽ hkôt pa. Ma krĩ piitã hkôt akupỹm mẽ à xwýnhjê ho mex nê Tĩrtũm kapêr o tanhmã mẽ ahkre hto ho ri mẽ hkôt pa.

Pahi Erox tee ri kot Jejus kukamã hamaxpêr ã harênh

Matêwre 14.1-12; Makre 6.14-29

⁷⁻⁸ Hãmri nhũm pika pê Garirej kamã mẽ piitã Jejus jarênh ma nê ahpỹnhã ri tanhmã axpên mã harênh to. Mẽ hkwyjaja kêp finat Juãw Paxis akupỹm htĩr ã ri harê. Nhũm mẽ hkwyjaja amnepêm mẽ hkukamã Tĩrtũm nhỹ hã kapêr jarênh xwýnhjê hõ ra akupỹm htĩr ã harê. Nhũm mẽ hkwyjaja kêp finat Eris ã axpên mã harê. Jakamã nhũm pahшти Eroxja mẽ kot ahpỹnhã tanhmã ri harênh toja ma nê tee ri hkukamã hamaxpêr.

⁹ Nê hamaxpêr o:

—Kwa mẽhõ na hte we ri ã amnhĩ nhĩpêx anhỹr o pa wehe? Nà finat Juãw Paxis kêt. Ra ixte amnepêm hã ixàmnhênh nhũm mẽ kot inhmã mut krãhyr nê hpĩr kênã. Kwa mẽhõ na hte we ri ã amnhĩ nhĩpêx anê?

Anhỹr o hamaxpêr hãmri nê kãm omunh prãm nê.

Jejus kot mẽ ho ohtõ nê mẽ kãm mẽ õ hã harênh

Matêwre 14.13-21; Makre 6.30-44; Juãw 6.1-14

¹⁰ Tã nhũm Jejus nhỹ hã kapêr o mẽ pa xwýnhjaja akupỹn hwýr mran pøj nê mẽ kot ri tanhmã amnhĩ nhĩpêx to ho pa hã kãm amnhĩ jarê. Hãmri nhũm mẽ kuma nê ma krĩ pê Pesêj wýr kormã mẽ o mõ.

¹¹ Hãmri nhũm krĩ hkwy nhõ xwýnhjaja ra ma mẽ mõi ã mẽ harênh ma nê ohtõ nê ma mẽ hkôt mra nê nhỹri mẽ hkôt pøj. Nhũm Jejus amnhĩ kôt mẽ omu hãmri nê tanhmã mẽ ho mex to ho xa. Kôt mẽ à nê mẽ pa xwýnhjaja nhũm akupỹm mẽ ho mex. Hãmri nê Tĩrtũm kapêr o mẽ ahkre nê mẽ kãm:

—E kot kaj mẽ atõ amã amnhĩ tomnuj kaga hprãm xàj Tĩrtũm kôt amnhĩ xãm nhũm amnhĩ tã apumu nê ato hkra. Hãmri ka ajamakêtkati nê amex nê axàmnhĩx ri apa.

Anhỹr o mẽ kãm kapêr pê mẽ ahkre ho xa.

¹² Tã nhũm myt àr kaxyw nhũm Jejus nhỹ hã mẽ ahkre ho mẽ pa xwýnhjê pê 12jaja hwýr mra nê kãm:

—Kwa na ra kamàt o mõ. Mẽ hano kê mẽ amnhĩ to krĩ hõ japêr nê tokyx amnhĩm mẽmoj japrõ nê kuku nê hikwỹ nê gõi. Mo mẽ panhõ? ãm jar kapôt pix kênã. Anê.

¹³⁻¹⁴ Hãmri nhũm mẽ kuma nê mẽ kãm:

—Kwa ka mẽ kamjaja mẽ kãm mẽmoj gõi kê mẽ kuku. Anê.

Nhũm mẽ ohtõ rax nê mẽ hkôt mra. Memyjaja kêp 5.000 nê kaxyw mẽ hprõ nê mẽ hkrajaja. Jakamã nhũm mẽ kêp 12jaja Jejus kot ã mẽ kãm kapêr anhỹrja ma nê tee ri mẽ hkukamã hamaxpêr nê kãm:

—Kwa nà mo mẽ panhõ rax? Mẽ panhõ pãwti kêp sĩk nê kaxyw tep grà axkrut্রে kênã kot kêt we mẽ piitã mẽ hipêx pa. Xà kot paj mẽ ma mra nê nhỹri mẽ kãm mẽ apkur xà japrõ nhũm mẽ kuku? Anê.

Hãmri nhũm mẽ kãm:

—Nà pu mẽ kãm mẽmoj japrõr kêt nê. Mẽ panhõta kot puj mẽ kãm ho angrà. E mẽ kãm anê kê mẽ ahpỹnhã ri hije nê hkrĩ nê apku. Anê.

¹⁵ Hãmri nhũm mẽ kuma nê mẽ kãm anê nhũm mẽ piitã hkrĩ pa.

¹⁶ Hãmri nhũm Jejus pãwti mẽ tepta jamý nê kànhmã kaxkwa hwýr rĩt nê kànhmã kupê nê Tĩrtũm mã harê nê kãm:

—Pa Papaj? Apê mẽ inhmã mẽ inhõ xwýnhjê jakamã amex o amex. Anê.

Hãmri nê mẽ kãm ho hkry hpa nê hkôt mẽ pa ho mẽ pa xwýnhjê mã kugõ nhũm mẽ õ ri ho xa nê ho mẽ hipêx par kumrêx.

¹⁷ Nhũm mẽ piitã apkur mex o hkrĩ. Mějõja mẽ kêp grire htã nhũm Jejus tanhmã mẽ kãm ho rax to nhũm mẽ ohtõ rax tã piitã kuku nê ho õhy htu hpa. Nhũm arĩ mẽõ jakrêx prã nhũm Jejus kôt mẽ pa ho mẽ pa xwýnhjaja akupỹm hakrêx o pikuprõnh pa nê ho kawà ho 12 nê ho nýt pa.

Jejus kot amnhĩ tã hkôt mẽ pa xwýnhjê kukjêr ã harênh

Matêwre 16.13-19; Makre 8.27-29

¹⁸ Tã nhũm arĩgro hõ hã nhũm Jejus nhỹri ahte Tĩrtũm mã amnhĩ jarênh o nhỹ nhũm hkôt ri mẽ pa ho mẽ pa xwýnhjaja ma hwýr mra. Hãmri nhũm amnhĩ wýr mẽ omu nê amnhĩ tã tanhmã mẽ hkukjêr to nê mẽ kãm:

—Kwa mẽ inhmã mẽmoj jarẽ. Tanhmã na htem ahpÿnhã xepẽn mã ijarẽnh to wehe? Anẽ.

¹⁹ Hãmri nhũm mẽ kãm:

—Nà na htem ahpÿnhã tanhmã ajarẽnh to. Na hte kamã mẽ hkwÿjaja ato finat Juãw Paxis ã ajarẽ. Nhũm kamã mẽ hkwÿjaja ato finat Eris ã ajarẽ nhũm mẽ hkwÿjaja tõhã apê Tirtũm nhÿ hã kapẽr jarẽnh xwÿnhjê hõ ra akupÿm htĩr ã ajarẽ. ã na htem ahpÿnhã ajarẽnh anẽ. Anẽ.

²⁰ Hãmri nhũm mẽ kuma nẽ mẽ kãm:

—No mẽ kajaja? Ixpê mẽhõ hã na ka htem ixkamnhĩx? Anẽ.

Hãmri nhũm Simãw Pẽtre kãm:

—Nà mẽ pajaja na pa htem apê Tirtũm kot mẽ ixkaxyw axãm nẽ mẽ ixwÿr amẽnh xwÿnh ã ajarẽ. Nẽ apê mẽ ixpiitã mẽ inhõ Pahi Maati hã ajarẽ. ã na pa htem ajarẽnh anẽ. Anẽ.

²¹ Hãmri nhũm mẽ kuma nẽ mẽ kãm:

—Tÿ. Nà ãm hãmri na ka htem ã ijarẽnh anẽ. ã ixte anhÿr kẽnã. Nom kër ka mẽ inhmar kumrẽx. Kër ka mẽ kormã ã akwÿjê mã ijarẽnh anhÿr o ri apa hkêt nẽ. Anẽ.

*Jejus kot amnhĩ kukamã amnhĩ jarẽnh
Matẽwre 16.21; Makre 8.31-33*

²² Nhũm Jejus arĩ hkõt mẽ pa ho pa xwÿnhjê mã kapẽr nẽ hprĩ hã tanhmã mẽ kãm amnhĩ jarẽnh to nẽ mẽ kãm:

—Nà ãm hãmri na Simãw Pẽtre ijarẽ. Mẽ kajaja ra mẽ ate ja hã ixpumunh mex. No mẽ pahkwÿjaja na mẽ akĩnhã mẽ kãm ja hã ijarẽnh mar nẽ ja hã ixpumunh prãm kêt. Ijaew pigêtjaja nẽ Tirtũm kapẽr tũm o mẽ ahkre o mẽ pa xwÿnhjaja nẽ patre krãhtũmjaja mẽ kãm ja hã ixpumunh prãm kêt. Jakamã koja mẽ nhÿrmã ixpynê nẽ ixtak rax nẽ. Hãmri nẽ ixpĩ. Nom kot paj ixtyk ã apkati axkrunẽpxi nhũm Tirtũm akupÿm ixtõ ixtĩr. Anẽ.

*Jejus krajaja tanhmã kot amnhĩ nhĩpêx to
hã mẽ harẽnh*

Matẽwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnẽn Karatas 5.24; Piripos 2.4; Wam Pẽtre 4.1-2; Apokarip 2.10-12

²³ Nhũm pre ã Jejus amnhĩ kukamã hkõt mẽ pa ho mẽ pa xwÿnhjê mã amnhĩ jarẽnh

anẽ hãmri nẽ hpãnhã mẽ kot mar o kuhê xwÿnh piitã mẽ kãm kapẽr nẽ mẽ kãm:

—E kot ka mẽ atõ ate ixkõt amnhĩ xãm ã amnhĩ jarẽ hãmri nẽ mããnẽn ã amnhĩ jarẽnh anẽ nẽ amnhĩ jarẽnh o: “Jejus kęp inhõ Pahihti jakamã kot paj kapẽr kõt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã hã inhĩpêx to.” Anhÿr o apkati mẽ ã amnhĩ jarẽnh anẽ.

²⁴ —Koja mẽ ixtã mẽ atõx pĩ rÿ tanhmã mẽ atõ hto ka ty. Tã koja akaxwÿnh ma inhõ krĩ mex wÿr àpir kurê kumrẽx. Hãmri nẽ kamã atĩr tũm nẽ amex rãhã apa ho apa. Nom kot kaj mẽ jar atĩr prãm xàj ixkaga hãmri nẽ hwÿr axàpir kêt nẽ.

²⁵ —Nẽ koja mẽhõ hikukrẽx rax gryk ã Tirtũm kaga. Hã koja nhÿrmã ty nẽ ÿ kamã kuwy hwÿr ma mẽ nẽ amnhĩ kõt hikukrẽx õ hpyr nẽ o mõr kêt nẽ. Koja tee ri kuwy hwÿr mõr pymaj amnhĩ nẽ hikukrẽx rax o amnhĩ pãnhã amnhĩrer prãm kaprÿ.

²⁶ —Nẽ koja mẽhõ ixte mẽ ahkre hã inhma nhũm ja kęp omnuj nhũm ixkaga japêr. Hã kot paj nhÿrmã akupÿn mẽ ato amnhĩptãr kaxyw akupÿn wrÿ nẽ amnhĩ xwar kot ixkaga xwÿnhhta kaga. ãm hãmri na pa ã mẽ amã amnhĩ jarẽnh anẽ. Kot paj nhÿrmã man akupÿn inhõ Papaj nhÿ hã ixte mẽ ho amnhĩptãr kaxyw akupÿn wrÿ. Nhũm kapẽr o mẽ wrÿk xwÿnhjaja man ixkõt wrÿ. Pa mẽ wrÿ hãmri nẽ mẽ kot ixkaga xwÿnhjaja pa amnhĩ pyrã nẽ mẽ hkaga.

²⁷ ãm hãmri na pa ã mẽ amã amnhĩ jarẽnh anẽ. Kot paj nhÿrmã akupÿn ixte mẽ ato amnhĩptãr kaxyw mẽ awÿr wrÿ. Tã kot kaj mẽ akwÿjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anẽ.

*Jejus kot kẽn prêk nhĩmõk ã hirã kamã ãm
ã harẽnh*

Matẽwre 17.1-8; Makre 9.2-8; mããnẽn Sikũn Pẽtre 1.16-18

²⁸ Tã nhũm semãnja hapêx nhũm Jejus Simãw Pẽtre nẽ Xiakre nẽ Juãw wa mẽ kãm kapẽr nẽ mẽ kãm:

—E pu mẽ ma hixêt prêk mũj wÿr mẽ nẽ hwÿr api nẽ himõk ã Tirtũm mã amnhĩ jarẽ. Anẽ.

Hãmri nẽ ma amnhĩ kõt hwÿr mẽ o mẽ nẽ hwÿr mẽ ho api.

29-32 Hāmri nhūm Jejus Tirtūm mā amnhī jarēnh o xa. Nom nhūm hkôt hixēt wÿr mẽ mōr xwÿnhjaja ôtxwa htÿx nē ra gōr nē hikwÿ. Pu nhūm Jejus axtem hkuk nē xa. Nē ē haka htÿx nē xa. Hāmri nhūm ja wa kaxkwa rūm wrÿ nē kuri kām kapēr o xa. Finat Mojes mẽ finat Erisja wa kuri kām kapēr o xa. Na pre ra amnepēm Tirtūm amnhī wÿr wa ho api. Tā nhūm wa ra akupÿn wrÿ nē Jejus mā kapēr o xa. Mē hpimràatā hirā htÿx kām axpēn mā kapēr o kuhê. Jejus kormā krī pē Jerujarē kapem mẽ kot hpīr kêt ri nhūm wa mẽ axpēn mā htyk kukamā harēnh o kuhê. Nhūm wa kām:

—Nà Tirtūm jamaxpēr xà hkôt kot kaj ā amnhī nhīpēx anē.

Anhÿr o Jejus tyk kukamā kām hamaxpēr o hihtÿx o wa xa.

Rôm nhūm mẽ ôtxwÿnhjaja hkrā hapôj nē tee ri Jejus pumu. Nhūm mex kumrēx nē hirā htÿx kām xa nhūm mẽ omu nē kuri wa âm xwÿnhhta wa omu.

33 Hāmri nhūm Mojes mẽ Eris wa ra akupÿm nojarēt nhūm Simāw Pêtre tee ri ja hā wa omu nē Jejus mā kām:

—Kwa Pahihti. Nà âm hāmri na pu mẽ amnē mō. Kwa pu mẽ kritpēm jar axkamē nē tokyx panojarēt kêt nē. Pa mẽ amā pô nhīrōnh o axkrunēpxi nē hipēx. Amā hō nhīpēx nē Mojes mā hō nhīpēx nē Eris mā hō nhīpēx ka mẽ kamā akrī. E kwa pa mẽ amā ho anē nà? Anē.

Nhūm amnhī krā hkôt ā kām kapēr anē.

34 Hāmri nē kormā kām kapēr rôm nhūm kakrā jaka tÿxja wrÿ nē mẽ hkunor nhūm wa mẽ kamā kuhê. Hāmri nhūm Simāw Pêtre mẽ Juāw mẽ Xiakreja mẽ tee ri kakrā kot amnhī nhīpēx ā omu nē kām ma nē.

35 Hāmri nhūm kakrā kamā Tirtūm mẽ kām kapēr nē mẽ kām:

—E ota Ixkra xa. Mē ate kamā ajamak o apa xwÿnhhta na. Inhmā hapêê. Kêr ka mẽ âm tapxipix kapēr mar tÿx o ri apa. Anē.

36 Hāmri nhūm mẽ kuma nē kànhmā rīt nē âm Jejus pix pumu nhūm ahte xa. Nhūm kuri wa âm xwÿnhhta wa ra ma akupÿm api nhūm mẽ Jejus pix pumu.

Mē tapxipixjaja na prem ā Jejus kot amnhī nhīpēx anhÿr ā omu nom taxy kormā nhām hkwyjê mã harēnh kêt nē.

Âm axpēn pix mã harēnh pē hkukamā hamaxpēr o ri Jejus kôt pa.

Jejus kot mēhō nē mēkarōmnuti janor ā harēnh

Matêwre 17.14-21; Makre 9.14-29

37 Tā nhūm apkati nhūm mẽ ma akupÿm ahparmā hkwyjê hwÿr wrÿk o mō. Nē mẽ hwÿr hpôx o mō nhūm mẽ ra mẽ kutêp pikuprōnh rax nē kuhê.

38 Hāmri nhūm mēhō myja amnhī wÿr mẽ omu nē mẽ kutā tē nē mẽ hkaxpa nē Jejus pumu nē kām:

—Pa Jejus. Kwa ixkamā axukapri nē inhmā ixkra ho mex. Âm ixpê pyxire.

39 Na hte mēkarōmnuti xatā ixpê tanhmā ho nhūm ÿ hā amÿra nē mra nē rôrôk nē hakwa jamrô ho hikwÿ nhūm tokyx kām urer kêt nē. Nhūm ra ixpê homnuj tÿx nē.

40 Hāmri pa akôt mẽ pa ho mẽ pa xwÿnhjê hwÿr o tē nhūm mẽ kot inhmā ho mex kaxyw tee ri tanhmā ho hkapyrÿ. Anē.

41 Hāmri nhūm kuma nē hkôt mẽ pa ho pa xwÿnhjê mã kām:

—Hêxta waa nē. Na ka mẽ ra ixte Tirtūm nhÿ hā mẽ ho mex ā ixpumunh o ixkôt apa rÿy tā kormā ixpyrà nē ā mẽ hipēx anhÿr kêt nē. Mân ka mẽ kormā mẽ kaxyw Tirtūm kôt ajamaxpēr tÿx kêt nē. Anē.

Hāmri nē myta mã kām:

—E amnē ixwÿr akra ho tē pa inhno ho omu. Anē.

42 Hāmri nhūm hwÿr o tē nhūm mēkarōmnuti axte kêp ho pika kura nhūm amÿra nē tēm nē nō. Hāmri nhūm Jejus omu nē nē mēkarōmnuti kator nhūm akupÿm mex nē kànhmā nhÿ. Hāmri nhūm akupÿm hipêêxà mã kugō.

43 Hāmri nhūm mẽ amnhī jaêr pē Jejus kot ā hipēx anhÿrja ā omu nē ri axpēn mã harēnh o:

—Kokÿÿ. Hêxta waa nē. Pêr âm Tirtūmja âm àhpumunh o àhpumunh. Anē.

Jejus kot htyk kukamā amnhī jarēnh

Matêwre 17.22-23; Makre 9.30-32

44 Hāmri nhūm Jejus hkôt mẽ pa ho mẽ pa xwÿnhjê mã kām:

—E kot paj mẽ amā tanhmā amnhī jarēnh to ka mẽ inhmar tÿx nē. Na pa pre mẽ ate aa mẽmoj pumunh kêt kwÿ ho anhÿr o ixpa pix kaxyw mẽ awÿr ixwrÿk kêt nē. Koja mẽ

tokyx mẽ kãm ixtã amÿnê nhũm mẽ ixpĩ. E kwa kêr ka mẽ ja ma nẽ hã anohtÿx nẽ ho apa. Anẽ.

⁴⁵ Hãmri nhũm mẽ tee ri kot ã amnhĩ jarẽnh anhÿrja ma nẽ axpẽn mã:

–Kwa mo na pẽr ri ã amnhĩ jarẽnh anẽ? Kêp mẽ panhõ Pahi Maati hã kot amnhĩ jarẽnh kênã kot kêt mẽhõ kupĩ.

Anhÿr o axpẽn mã ri harẽnh o kuhê. Hãmri nẽ mẽ kãm ã kot amnhĩ jarẽnh anhÿrja mar prãm kêt jakamã hprĩ hã tanhmã hã hkukjêr to hkêt nẽ. ãm akryk mar o kuhê.

Mẽ kot amnhĩ to rũnh xwÿnhjê jarẽnh

Matêwre 18.1-5; Makre 9.33-37; Rukre 22.24-27; mãânẽn Piripos 2.3-9; Wam Pêtre 5.5

⁴⁶ Tã nhũm Jejus kôt mẽ pa ho mẽ pa xwÿnhjaja tanhmã amnhĩ kukamã hamaxpêr to hãmri nẽ axpẽn mã:

–Kwa mẽ pahtõ kot puj we nhÿrmã pahpê pahi nẽ mẽ ho amnhĩptar rax o pahkwÿjakre? Anẽ.

Hãmri nẽ ja hã axpẽn kukjêr o Jejus kôt mō nẽ axpẽn mã: “Nà pa.” Nhũm mẽ hkwyja: “Nà kêt pa.” Anhÿr o hkôt mō.

⁴⁷ Hãmri nhũm Jejus mẽ kuma nẽ mẽ hamaxpêr kôt mẽ omu. Hãmri nẽ xa nẽ amnhĩ wÿr mẽhprĩjê mã hpa ho apê nhũm hwÿr tẽ nẽ kuri xa.

⁴⁸ Hãmri nhũm Jejus hkôt mẽ pa ho pa xwÿnhjê mã tanhmã harẽnh to nẽ mẽ kãm:

–E mẽ inhma. Kêr ka mẽ apê pahi pyrãk o tanhmã amnhĩ jarẽnh to ho ri apa hkêt nẽ. ãm te amarĩ ri mẽ apa pyrãk o amnhĩ nhĩpêx o ri apa. Jao nhÿri mẽhprĩre hõ pumu nẽ kamã axukapri ho kãm mẽmoj tanhmã ho rÿ kãm mẽmoj gō. Hãmri nẽ te pa ate tanhmã ixto mex to pyrãk o amnhĩ nhĩpêx. Nẽ kot ka mẽ atõ pa tanhmã ixto mex to nẽ te ate Tirtũm tanhmã ho mex to pyrãk o amnhĩ nhĩpêx. Kot kaj mẽ ã amnhĩ nhĩpêx anhÿr o ri apa nhũm Tirtũm ja hã mẽ apumu nẽ mẽ ate amnhĩ to rũnh kêt tã nhũm tãm mẽ ate amnhĩ to rũnh xwÿnh ã mẽ ajarê. E kot kaj mẽ amã amnhĩ to rũnh prãm nẽ ã amnhĩ nhĩpêx anhÿr o ri apa. Anẽ.

Mẽhõ kot Jejus nhÿ hã tanhmã amnhĩ nhĩpêx to hã harẽnh

Makre 9.38-41

⁴⁹ Hãmri nhũm Jejus kôt mẽ pa ho pa xwÿnhjê hõ pẽ Juãwja nhÿhÿnh hwÿr hpõx o tẽ nẽ kãm:

–Kwa Pahihti. O mÿj mẽhõ kêp mẽ pahkwÿ hkêt tã anhĩxi jarẽnh kôt mẽ nẽ mẽkarõmnuti janor o pa. Pa mẽ tee ri kot ã amnhĩ nhĩpêx anhÿr ã omu nẽ nẽ kãm ixkapêr. Kêp mẽ pahkwÿ hkêt kênã kot kêt ã mẽ hanor anhÿr o pa. Anẽ.

⁵⁰ Hãmri nhũm kuma nẽ kãm:

–Kwa nà ja nẽ tanhmã kãm nẽ hkêt nẽ. Koja mẽhõ mẽ pahkwÿm ri tanhmã mẽ ahkre hto hkêt nẽ hãmri nẽ kêp mẽ panhĩõ. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nẽ tanhmã kãm akapêr to hkêt nẽ. Kwãr mãmrĩ ã amnhĩ nhĩpêx anhÿr o ri pa. Ja mex kênã. Anẽ.

Samar nhõ xwÿnhjaja kot Jejus kaga hã mẽ harẽnh

Atre 8.14-15

⁵¹ Hãmri nhũm Jejus akupÿm kaxkwa hwÿr àpir kaxyw ra hwÿr apkati grêre ho mōr jakamã nhũm hamaxpêr o:

–E pa ma akupÿm Jerujarê hwÿr mō. Nà kot paj anẽ. Mẽ kot kamã tanhmã ixto mã tã kot paj ma akupÿm mẽ hwÿr mō. Anẽ.

⁵² Hãmri nẽ amnhĩ kukamã mẽ hkwyjê rẽ nhũm mẽ ma mẽ hkukamã Samar nhõ krĩ kamã nhÿri mẽ kot amnhĩm hikranh xà japêr o mō.

⁵³ Nom nhũm Samar nhõ xwÿnhjaja kêp Jerujarê nhõ xwÿnhjê hprãm nõkati jakamã Jerujarê hwÿr mōr ã mẽ harẽnh ma nẽ amnhĩ nẽ mẽ hkurê.

⁵⁴ Hãmri nhũm mẽ tee ri amnhĩ tã mẽ kuma nẽ awjanã nẽ akupÿm Jejus wÿr mra nẽ kãm mẽ harê. Hãmri nhũm Juãw mẽ Xiakre wa mẽ harẽnh ma nẽ mẽ kamã gryk nẽ nẽ Jejus mã:

–Kwa Pahihti. Nà na mẽ axtem nẽ amnhĩ nẽ mẽ pahkurê. Jakamã e kwa pu mẽ kaxkwa rũm mẽ hipy kuwy hpõk kwÿ rẽ kê mẽ hkaxar pa nà? Anẽ.

⁵⁵ Hãmri nhũm wa kuma nẽ wa kãm:

–Tk. Kwa nà wa ajamaxpêrja mex kêt. Pu mẽ ã ri mẽ hipêx anhÿr kêt nẽ. Koja Tirtũm kãm ja ho anhÿr prãm nẽ rĩ tãm tanhmã mẽ ho. No mẽ papajaja pu mẽ ri

mě kamã pagryk xàj tanhmã mẽ hipêx to hkêt nê. Pu mẽ ã mẽ hipêx anê nê ra amnhĩ tomnuj tỳx nê. Kwa wa ri ã ajamaxpêr anhỹr kêt nê. Anê.

⁵⁶ Hãmri nê mẽ ma Samar rũm hapôj nê hpãnhã nhãm krĩ hõ hwỳr pa.

Mẽ hkwỳjaja kãm Jejus kôt pa hprãm ã mẽ harênh

Matêwre 8.18-22

⁵⁷ Tã nhũm Jejus mẽ kormã mõi ri nhũm mẽhõja hwỳr tẽ nê kãm:

—Pa Jejus? E kot paj ma akôt ixpa ho ixpa. Anê.

⁵⁸ Hãmri nhũm kuma nê kãm:

—Ko ka mã. Kam nê rĩ ma ixkôt ri apa ho apa. Nom kêr ka inhmar kumrêx nê rĩ kormã ixkôt apa. Na hte xore pika hkre kamã hikwỹ xà. Nê kuwênhre pĩ nhĩmõk ã hikwỹ xà. No pa na Tĩrtũm kot mẽ awỳr inhmênh xwỳnh tã jajê hkĩnhã inhõrkwỹ hkêt. Na pa hte ãm nhãm krĩ hõ hwỳr ixpa nê nhãm ixpa. Tã xà kot kaj ixpyrà nê ã amnhĩ nhĩpêx anhỹr o ri apa nà? Anê.

⁵⁹ Nhũm pre ã kãm kapêr anê hãmri nê nhãm mẽhõja wỳr apkjê nê kãm:

—Pa? No ka? Xà kot ka ma ixkôt apa ho apa nà? Anê.

Hãmri nhũm kãm:

—Tỳ no ãm kormã. Kojã nhỹrmã inhĩpêêxàja tanhmã amnhĩ to nê ty mãn. Pa haxà hãmri nê rĩ kormã ma akôt ixpa ho ixpa. Anê.

⁶⁰ Hãmri nhũm Jejus kuma nê kãm:

—Kwa nà ri ã ajamaxpêr anhỹr kêt nê. Ma ixkôt apa ho apa kurê kumrêx. Kê mẽmoj ano kupyr rỳ inhnê apê amnàr kêt nê. Kwãr mẽ htĩr tũm nê mẽ pa hkêt mã xwỳnhjaja mãn axwakre kamã amã anhĩpêêxà jamãr o pa nhũm nhỹrmã ty kê mẽ amã haxà. Ka mãmrĩ ma Tĩrtũm kapêr o mẽ ahkre ho ri mẽ hkôt apa. Kê mẽ ama nê mẽ hkwỳjaja hkôt amnhĩ xunhwỳ nhũm mẽ ho hkra. Anê.

⁶¹ Nhũm pre ã kãm kapêr anê hãmri nhũm nhãm mẽhõ myja haxwỳja hwỳr tẽ nê kãm:

—E. Pa kot pa ma akôt ri ixpa ho ixpa. Nom kormã. Pa ma akupỹm tẽ nê ixkwỳjê mã amnhĩ jarê nê tanhmã amnhĩ to hpa mãn. Hãmri nê mẽmo arĩgro hã rĩ kormã ma akôt ixpa ho ixpa. Anê.

⁶² Hãmri nhũm tee ri kuma nê kãm:

—Kwa nà. Kot kaj ã ajamaxpêr anê hãmri nê ixkôt apa htã te amnhĩ katut kôt arĩt rãhã ho ri apa pyrãk o amnhĩ nhĩpêx. Kwa ã ajamaxpêr anhỹr kêt nê ma ixkôt apa kurê kumrêx. Anê.

10

Jejus kot mẽ hwỳr mẽ kêp 72 rênh ã harênh
Matêwre 10.1, 10.5-15; Makre 6.7-13;
Rukre 9.1-6, 9.10-11; mãânê Atre 13.50-51, 18.6

¹ Tã nhũm Jejus axte amnhĩ kaxyw mẽ ho 72 nê mẽ kurê. Hãmri nê mẽ ho axkrut kapêr nê ma nhỹhỹm krĩ hkwỳ hkôt amnhĩ kukamã mẽ kurê. Mẽ kot mẽ hkôt ri Tĩrtũm kapêr o mẽ ahkre ho pa kaxyw.

² Hãmri nê mẽ kãm:

—Na mẽ ohtô rax nê kormã Tĩrtũm kapêr mar kêt nê. No ãm kormã mẽ ate mẽ kãm harênh o apa kaxyw mẽ agrêre. Te pur kãm harôj kamrêk pa nê ãm tã no ãm kaxyw hikênh xwỳnh grêre pyrãk. Jakamã kwa mẽ ho Tĩrtũm wỳ kê axte mẽ kaxyw mẽ hkwỳjê rê.

³ —E kot paj ma mẽ hwỳr mẽ arê. Ma mẽ hkôt mẽ ate Tĩrtũm kapêr o mẽ ahkre ho ri apa kaxyw. Jakamã kot kaj mẽ te ate ôwêhti kot mry xoprê hwỳr amnhĩ to mrrar nhũm kot hkwỳ hpar pyrãk o amnhĩ nhĩpêx. Kojã mẽ hkwỳjaja mẽ ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamaxpêr nê amã mẽ uma hkêt nê.

⁴ —Nê kêr ka mẽ hwỳr anojarêr nê amnhĩ kôt amrykà rỳ akawà rỳ aparkà hõ ho apa hkêt nê. ãm anhỹ kamã ma mẽ hwỳr apa. Nê mẽ hwỳr mra nhũm mẽ nhỹri pry hã mẽ atô kaxpa nê amã kapêr o xa ka wa axpên mã akapêr ry hkêt nê. Anojarêr kãm kãm akapêr krãnre nê mẽ hakre nê ma krĩm apa.

⁵ —Nê kêr ka mẽ hwỳr pøj nê nhỹri mẽ õrkwỹ hwỳr agjê nê mẽ kãm: “Xà kot paj mẽ ato Tĩrtũm wỳ kê mẽ ato mex nê ka mẽ ajamakêtkati nê ri apa?” Anê.

⁶ Hãmri nhũm mẽ ama nhũm ja mẽ kãm mex japêr nhũm mẽ hkĩnh nê amã: “ỳ kam nê mãmrĩ mẽ ixto awỳ.” Anê. Hãmri ka mẽ ama nê tanhmã mẽ ho Tĩrtũm wỳr to. No kojã mẽ apê ja kaga ka mẽ ho hwỳr kêt nê.

⁷ —Nê kêr ka mẽ nhỹri mẽ õrkwỹ kamã mẽ hwỳr pøj hãmri nê mẽ hkôt ri apikamênh

tãmtã nẽ akupÿm mẽ kurũm ajapôj nẽ ma hpãnhã krĩ hõ hwÿr apa. Nẽ mẽ axãmnhĩx mẽ kuri axàpkur o ri apa. Mẽmoj to akõm o ri apa. Ra mẽ ate mẽ ho mex pẽ mẽ kãm Tĩrtũm kapẽr o mẽ ahkre ho apa kẽnã. Jakamã kwãr mẽ mãmrĩ amnhĩ pãnhã mẽ amã mẽ axàpkur xà gõ ka mẽ kuri mẽ apku.

⁸—Nẽ kêr ka mẽ nhÿri mẽ hwÿr pøj nhũm mẽ ato mex nẽ. Nẽ mẽ amã mẽmo mẽ apkur xà gõ ka mẽ mãmrĩ axãmnhĩx aku. Aa kormã mẽ ate mẽmojta kur kêt tã mãmrĩ ajamakêtkati nẽ aku. No tee ri amnhĩ kukamã tanhmã ajamaxpẽr to hkêt nẽ.

⁹—Nẽ kêr ka mẽ ã mẽ kãm akapẽr anẽ nẽ mẽ kãm: “Tĩrtũm kãm mẽ ato hkra hprãm. Na hte amnhĩ wÿr mẽ awÿ.” Anẽ hãmri nẽ akupÿm mẽ kãm mẽ à xwÿnhjê ho mex. ã kot kaj mẽ mẽ kãm amnhĩ nhĩpêx anhÿr o ri mẽ hkôt apa.

¹⁰—Nẽ kêr ka mẽ nhÿri mẽ hwÿr pøj nhũm mẽ ãm mẽ apumu nẽ amnhĩ nhõrkwÿ hwÿr mẽ awÿr kêt japêr. Hãmri ka mẽ tee ri amnhĩ tã mẽ omu hãmri nẽ ra ma nhãm apa kaxyw.

¹¹ Hãmri nẽ anojarêt nẽ mẽ kãm: “E mẽ inhma. Tĩrtũm kot mẽ pahwÿr mẽnh xwÿnhhta na mẽ awÿr wa inhmẽ pa wa mẽ awÿr mõi. Wa ixte Tĩrtũm kapẽr o mẽ ajahkre kaxyw. Kãm mẽ ato hkra hprãm nhũm wa ixte mẽ amã harênh kaxyw na pa pre wa ã mẽ awÿr inhmõr anẽ. Tã ka mẽ harênh ma nẽ wa ixkaga. Jakamã kot paj wa jar mẽ anhõ krĩ kamã amnhĩ par kà hã awjagrõ kapĩ. Mẽ ate Tĩrtũm kaga hã amnhĩ pumunh nhũm Tĩrtũm kot amnhĩ pyrã nẽ mẽ akaga hã mẽ ate omunh kaxyw kot paj wa mẽ anoo mã ã amnhĩ par kà hã awjagrõ kapĩr anẽ. Kot kaj mẽ nhÿrmã tee ri ã amnhĩ nhĩpêx anhÿrja mã ajamaxpẽr nẽ akapĩr htÿx kumrêx kãm ga. ãm hãmri na pa wa mẽ amã ja jarẽ.” Anhÿr o mẽ kãm akapẽr nẽ mẽ kęp ajapôj nẽ ma hpãnhã nhãm krĩ hõ hwÿr apa kurê kumrêx.

¹²—Koja nhÿrmã Tĩrtũm mẽ kot amnhĩ tomnuj mÿrapê tanhmã mẽ ho. Na pre ra ã krĩ pẽ Sotõ nhõ xwÿnhjê nhĩpêx anẽ. Na prem amnhĩ tomnuj tÿx o pa nhũm Tĩrtũm tanhmã mẽ kot amnhĩ tomnuj tÿx ã tanhmã mẽ ho. Tã jar mẽ kot kãm ixkapẽr mar prãm kêt nẽ mẽ kot ixkaga xwÿnhjaja.

Koja Tĩrtũm ixtã mẽ omu nẽ kot Sotõ nhõ xwÿnhjê nhĩpêx pyrãk o mẽ hipêx nom tanhmã mẽ ho htÿx o mẽ hakre.

—E kêr ka mẽ ma krĩ hkwy hkôt apa nẽ ã mẽ kãm akapẽr anhÿr o ri apa. Anẽ.

Mẽ kot Tĩrtũm kôt hamaxpẽr kêt xwÿnhjê jarênh

Matêwre 11.20-24

¹³⁻¹⁴ Tã nhũm Jejus krĩ hkwy nhõ xwÿnhjê mã kapẽr o xa nẽ mẽ kot amnhĩ tomnuj ã mẽ kãm akir. Krĩ pẽ Korajĩ mẽ Pesêj nhõ xwÿnhjê kumrêx mã kapẽr nẽ mẽ kãm:

—E mẽ inhma. Amnepêm krĩ pẽ Sitõ mẽ Xir wa kamã mẽ pa xwÿnhjaja na prem tanhmã amnhĩ tomnuj tÿx to ho pa nhũm Tĩrtũm mẽ omu nẽ hã mẽ homnuj tÿx nẽ. Tã kwa mẽ o kora Korajĩ mẽ Pesêj wa kamã mẽ apa xwÿnhjaja. Ra ixte mẽ amã mẽ ate mẽmoj pumunh kêt o anhÿr rax o ixpa htã ka mẽ omu nẽ arĩ amnhĩ tomnuj o ri apa nẽ tokyx amnhĩ tomnuj kaga hkêt nẽ. Jakamã kot kaj mẽ amex kêt nẽ. Kop apu Sitõ rÿ Xir kamã mãn ixte mẽ kãm aa mẽ kot mẽmoj pumunh kêt kwÿ ho anhÿr o ri ixpa ronhÿx mẽ omu nẽ mẽ arom amnhĩ kaxyw ixkôt hamaxpẽr kurê kumrêx. Nẽ tee ri tanhmã amnhĩ tomnuj to ho pa hã amnhĩ pumu nẽ hkapĩr nẽ ã amnhĩ nhĩpêx anhÿr kaga hpa. No mẽ kajaja na pa tee ri mẽ amã tanhmã amnhĩ nhĩpêx to ho ri ixpa kaprÿ. Ka mẽ ja hã ixpumu nẽ ãm ixpumu nẽ amnhĩ tomnuj kaga hkêt nẽ. Tã koja nhÿrmã Tĩrtũm mẽ piitã mẽ kot amnhĩ tomnuj mÿrapê tanhmã mẽ hipêx to. Hãmri nẽ tanhmã Sitõ mẽ Xir wa kamã mẽ pa xwÿnhjê jarênh to nhũm mẽ kot amnhĩ tomnuj mÿrapê amnhĩ xà htÿx kamã hamak o ri pa. No mẽ kajaja mẽ ate amnhĩ tomnuj tÿx o mẽ hakrenh jakamã koja Tĩrtũm mẽ hkĩnhã mẽ atomnuj tÿx o mẽ atomnuj tÿx. Ka mẽ amnhĩ xà htÿx kamã ajamak rãhã ho ri apa ho apa. Anẽ.

¹⁵ Nhũm pre ã Jejus mẽ kãm kapẽr anẽ. Hãmri nẽ hpãnhã Kapanaũ nhõ xwÿnhjê mã kapẽr nẽ mẽ kãm:

—No mẽ apê Kapanaũ nhõ xwÿnhjaja. Kot kaj mẽ ajaxwÿja mẽ amex kêt nẽ. Mẽ ate amnhĩ tomnuj kagare pyrã nẽ Tĩrtũm nhõ krĩ hwÿr akrã ho apa. Nom kot kaj mẽ atõ

hwÿr axàpir kêt nê. Kot kaj mẽ ma kuwy maati hwÿr ajapêx pa kãm ga.

16 Anhÿr o mẽ kãm kapêr hãmri nê hpãnhã hkôt mẽ pa ho mẽ pa xwÿnhjê mã kapêr nê mẽ kãm:

—Kot kaj mẽ Tirtũm kapêr o mẽ ahkre ho ri apa nhũm mēhõ ama nê akapêr kôt amnhĩ nhĩpêx. Hã koja te pa kot ixkôt amnhĩ nhĩpêx pyrãk o amnhĩ nhĩpêx. No koja amar kêt nê akaga hãmri nê te pa kot inhmar kêt nê ixkaga pyrãk o amnhĩ nhĩpêx. Jao mãânēn Tirtũm kaga.

Anê hãmri nhũm mẽ kuma hãmri nê angrà nê axkrut kapēn nê ma ahpÿnhã krĩ hkôt angrà.

*Mẽ hkĩnh nê ri mẽ pa xwÿnhjê jarēnh
Apokarip 3.5*

17 Tã nhũm mẽ kêp 72jaja krĩ hkwy rūm akupÿn Jejus wÿr pøj. Piitã hkĩnh nê hpõx pa. Hãmri nê kãm:

—Kwa Pahiti. Na pa prem anhÿr hã mẽ nê mẽkarõmnuti japõx rax nê. Na pa prem mẽ nê mẽ hano nhũm mẽ ãm mẽ kurũm hapõx kurê kumrêx. Anê.

18 Hãmri nhũm mẽ kuma nê mẽ kãm:

—Tõe. Ixàhpumunh tÿx o ixte Satanasti jakrenh jakamã na ka htem inhÿr hã mẽ hano nhũm mẽ tee ri mẽ akutã hihtÿx prãm. Hãmri nê te na haxēnh prēprēk pyrãk o amnhĩ nhĩpêx nê mẽ kurũm hapõx kurê kumrêx pa ja hã mẽ omu.

19-20 Mēkarõmnuti te kot kagã xoprê rÿ te kot makre pyrãk. Tã ra ixte mẽ amã ixàhpumunh tÿx xà hkwy nhõr jakamã na ka prem mẽ kãm akapêr nhũm mẽ tee ri akutã tanhmã amnhĩ tÿx to hprãm. Tã koja Satanasti tee ri mẽ ate nhÿrmã Tirtũm mẽ wa ixri atĩr tũm nê apa pymaj tanhmã mẽ ano kupyry to kaprÿ. Ra Tirtũm kot õ kagã kamã mẽ atĩr tũm nê mẽ apa kaxyw mẽ anhixi hã kagã kēnã. Jakamã kwa mẽ jam ajamaxpêr o akĩnh nê ajamakētkati nê ri apa. No kêt mẽkarõmnuti kot mẽ akapêr mar nê mẽ kurũm hapõxta ã mẽ omunh xà hkôt pix mã akĩnh nê ri apa hkêt nê. Anê.

*Jejus kĩnh kãm kot Hipêxã mã amnhĩ
jarēnh*

Matêwre 11.25-27

21 Tã nhũm Tirtũm Karõ tanhmã Jejus to nhũm ÿ hã hkĩnh nê xa. Hãmri nê Tirtũm mã kapêr nê kãm:

—Pa Papaj? Nà apê mẽ ixpiitã mẽ inhõ Pahi Maati na ka. Pikap ri mẽ pa xwÿnhjaja nê kaxkwa kamã mẽ pa xwÿnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tÿx ã mẽ kot amnhĩ jarēnh xwÿnhjê mã axàhpumunh tÿx o amnhĩrit kêt nê. ãm mẽ àhpumunh kêt ã mẽ kot amnhĩ jarēnh xwÿnhjê pix mã na ka hte ja ho amnhĩrit nhũm mẽ tapxipixjaja ja hã apumu. ãm hãmri na ka hte amã hprãm xà hkôt ã mẽ piitã mẽ hipêx anhÿr o ri apa. Jakamã mẽ kot amnhĩ to hkryre xwÿnh pixjaja na htem ate amnhĩ nhĩpêx ã apumunh o pa.

22 —Na ka pre inhĩhkra kamã mẽmoj piitã haxàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xwÿnhjaja na mẽ kot ja hã ixpumunh kêt. Nê mãânēn papxipix na ixte ate tanhmã amnhĩ nhĩpêx to hã apumunh par. Jakamã na pa hte ã amnhĩ nhĩpêx anê nê inhmã hprãm xà hkôt mẽ hkwyjê mã ato amnhĩrit o ri ixpa nhũm mẽ ixpyrà nê ate tanhmã amnhĩ nhĩpêx to ho apa hkôt apumu. Anê.

*Jejus kôt mẽ pa xwÿnhjaja kot hkôt omunh
o pa hã mẽ harēnh*

Matêwre 13.16-17

23-24 Nhũm pre Jejus ã Tirtũm mã amnhĩ jarēnh anê hãmri nê hpãnhã hkôt mẽ pa ho mẽ pa xwÿnhjê mã kapêr nê mẽ kãm:

—E na ka htem ixkôt mẽ ano ho ixte tanhmã amnhĩ nhĩpêx to hã ixpumunh o ri apa. Nê mẽ ajamak o ixkapêr mar o ri ixkôt apa. No amnepēm mẽ akukamã pahijaja nê Tirtũm nhÿ hã kapêr jarēnh o ri mẽ pa xwÿnhjaja kãm ixpumunh prãm tÿx o pa htã mẽ akĩnhã ixpumunh kêt rãhã htyk pa. Kormã ixwryk nê jar ixkator kêt jakamã na prem ixpumunh kêt rãhã ty. Nê mẽ kãm ixkapêr mar prãm tã mẽ akĩnhã ixkapêr mar kêt nê. ãm mẽ kapxipixjaja na ka mẽ mÿr pē ixte amnhĩ nhĩpêx ã ixpumunh nê ixkapêr mar o ixkôt apa. Tã mẽ kurom mẽ ate ano ho ixpumunh nê ajamak o ixkapêr

mar jakamã kwa mẽ ja hã amnhĩ pumu nê tãm amnhĩ nhĩpêx o akĩnh nê ri apa. Anê.

Samar nhõ xwỳnh jarēnh

Matêwre 22.34-40; Makre 12.28-34; mãănēn Wam Juãw 3.17-18

²⁵ Tã nhũm Tĩrtũm kapēr tũm o mẽ ahkre o mẽ pa xwỳnhja Jejus wỳr tẽ nê hêx rom kot kamã hamak kaxyw kãm:

—Pa? E kwa inhmã mẽmoj jarē. Tanhmã kot paj we nhỹrmã Tĩrtũm ri ixtĩr tũm nê ixpa kaxyw amnhĩ nhĩpêx to wehe? Anê.

²⁶ Hãmri nhũm kãm:

—Tanhmã na ka hte Tĩrtũm kapēr ã kagà htũm kot mẽ htĩr tũm nê pa hã kagà kamã harēnh nê mar to? Anê.

²⁷ Hãmri nhũm kãm:

—Nà harēnh kot:

Kêr ka mẽ anhi piitã ho amã Tĩrtũm kĩnh o ri apa. Mẽ amã hkĩnh tỳx o mẽmoj piitã hakrenh par o ri apa.

Nê kêr ka mẽ amã mẽ piitã hã ma ho te ka amã amnhĩ tã ma pyrãk o mẽ hipêx o ri apa. Jao tãm mẽ hipêx o ri apa. Anê.

Ã Tĩrtũm kapēr ã kagà htũm kamã ja jarēnh kot anhỹr. Anê.

²⁸ Hãmri nhũm Jejus kuma nê kãm:

—Tỳ. Nà ãm hãmri na ka harē. Kot kaj ã mẽ hipêx anhỹr o ri apa nê nhỹrmã Tĩrtũm mẽ wa ixri atĩr tũm nê apa ho apa. Anê.

²⁹ Hãmri nhũm kuma nom kãm mẽ piitã mẽ ho mex prãm kêt nê. ãm amnhĩ kwỳ pixjaja nhũm kãm mẽ ho mex o pa hprãm. Jakamã hêx rom kãm:

—Kwa no mẽmojaja kot pa we ri ã mẽ hipêx anhỹr o ri ixpa? Xà mẽ pahkwỳ pẽ Ijaew pixjaja nà? Anê.

³⁰ Hãmri nhũm kuma nê tanhmã kãm ujarēnh to. Nom hã kuxi nê kãm awjarē nê kãm:

—E pa amã awjarē ka inhma. Koja Ijaew nhõ xwỳnhja ma Jerujarē rũm Jeriko hwỳr ahpar mã ma mõi. Mõi nhũm ra mẽ ahkĩnh xwỳnhjaja kutã mra. Hãmri nê pry kahti ri hwỳr kato nê unê nê htak rax nê. Nê kêp ê hkwrỳnh pa nê ma kurũm hprõt nê mra nê akunok nhũm mẽ kot htak o hkà rēnh rãhã ra htyk kaxyw nê nõ.

³¹ Hãmri nhũm patreja tẽ nê omu. No ãm omunh o hãnh tẽ nê hkupu nê ma tẽ. Urãk nê kêp Ijaew tã ãm omu nê tanhmã ho ajuta

hto hkêt nê hãnh omunh o tẽ nê hkupu nê ma tẽ.

³² Hãmri nhũm patre ho ajuta xwỳnhja mãănēn tẽ. Nê patre pyrã nê omu nê ãm omu nê hkupu nê ma tẽ. Urãk nê kêp Ijaew tã omu nê ãm omu nê hkupu nê ma tẽ.

³³ —Tã nhũm Samar nhõ xwỳnhja mãănēn mõi. Samar nhõ xwỳnhjê mẽ Ijaew na prem kãm axpēn kĩnh kêt tã nhũm mõi nê omu nê kamã ukapĩ nê. Kêp Ijaew ã omunh tã tee ri omu nê kamã ukapĩ nê.

³⁴ Hãmri nê hwỳr tẽ nê omu nê kãm mẽ kot htak o hkà rēnh xà kane nê kãm hkupu pa. Hãmri nê kãnhmã ãm nê hkrit jumēnre hã kumẽ nê ma nhỹri mẽ kot amnhĩm hikranh xà hã ixkre hwỳr o mõi nê hwỳr o pøj. Hãmri nê omunh mex o apkati.

³⁵ Hãmri nê akupỹm nojarēt nê kãxpore hkwy jamỳ nê o tẽ nê kot mẽ kãm õ xwỳnhja mã kugõ nê kãm: “E kot paj hãmri ma mõi. Ota ixkãxporeta. Kêr ka inhmã à xwỳnhhta tãnopxar mex nê. Nê inhmã omunh mex kê akupỹm mex. Koja kãxporeja apẽ grire hã kot paj nhỹrmã akupỹn mõi nê axte hkõt amã hkwy gõi.” Anhỹr o kãm kapēr nê ma akupỹm mõi. ã mẽ ujarēnh kot anhỹr. Anê.

³⁶ Nhũm pre ã Jejus kãm ujarēnh anê. Hãmri nê kãm:

—E nhỹ na pre kãm mẽ kot htak xwỳnhhta kapĩ ho te tãm kãm amnhĩ tã ma pyrãk wehe? Anê.

Hãmri nhũm Tĩrtũm kapēr tũm o mẽ ahkre xwỳnhhta kãm:

—Nà kot kamã ukapĩ xwỳnhhta na pre omu nê kamã ukapĩ nê ho mex o te tãm kãm amnhĩ tã ma pyrãk o hipêx. Anê.

³⁷ Hãmri nhũm Jejus kãm:

—Tỳ. Nà ãm hãmri na ka harē. Urãk nê kêp Ijaew kêt tã kamã ukapĩ nê ho mex nê. Tã kêr ka urãk nê ã mẽ piitã mẽ hipêx anhỹr o ri apa. Urãk nê mẽ kêp akwỳ hkêt tã mẽ kamã axukapĩ ho ri apa. Anê.

Jejus kot Matre mẽ Marir wa hwỳr mõi ã harēnh

Rukre 12.29-31

³⁸ Tã nhũm Jejus krĩ rũm kato hãmri nê hkõt mẽ pa ho mẽ pa xwỳnhjê mẽ mẽ ma nhãm krĩ hõ hwỳr mõi. Mõi nê hwỳr pøj. Hãmri nhũm Matre mẽ omu nê amnhĩ nhõrkwỳ hwỳr mẽ kuwỳ nhũm mẽ ma hwỳr mõi nê õrkwỳ hwỳr pøj.

³⁹ Hāmri nhūm Jejus mẽ ahkre ho nhỹ nhūm Matre htõx Marirja arĩ hpar pẽ mar o nhỹ.

⁴⁰ Hāmri nhūm Matre mẽ hwỳr axà nẽ omu. Nẽ tee ri àpênh rax kukamã hamaxpẽr nẽ Jejus wỳr tẽ nẽ kãm:

—Xê ma Pahihti. Kormã ixàpênh rax tã nhūm Marir ixto ajuta hkêt nẽ. ãm akapẽr pix mar gryk ã ixkõt htẽm nẽ ixto ajuta hkêt nẽ. Pa ahte mẽ panhõ hã ixàpênh o xa. Xà amã ja mex? Xê kãm anẽ kê tokyx ixkõt tẽ pa wa hã axkrut nẽ mẽ panhõ hã ixàpênh tokyx anẽ. Anẽ.

⁴¹ Hāmri nhūm tee ri kuma nẽ kãm:

—Kwa Matre. Na ka ãm mẽ panhõ pix kukamã ri ajamaxpẽr nẽ gryk ã tee ri amnhĩ nhĩpêx.

⁴² ãm hāmri na Marir kãm ixkapẽr mar prãm nẽ. Jakamã kot paj ri amnhĩ nẽ akõt hanor kêt nẽ. Anẽ.

11

Mẽ pahte tanhmã Tĩrtũm mã amnhĩ jarẽnh to hã mẽ pamã karõ

Matêwre 6.9-13, 7.7-11

¹ Tã nhūm apkati hõ hã nhūm Jejus nhỹri Tĩrtũm mã amnhĩ jarẽnh o nhỹ. Nẽ kãm amnhĩ jarẽnh pa nhūm hkõt mẽ pa ho mẽ pa xwỳnhjaja kot kãm amnhĩ jarẽnh ã omu nẽ hwỳr mra nẽ kãm:

—Kwa Pahihti. Amnhĩ pyrà nẽ mẽ ixte Tĩrtũm mã amnhĩ jarẽnh kaxyw tanhmã mẽ ijahkre hto. Kêr pa mẽ apyrà nẽ tanhmã kãm amnhĩ jarẽnh to ho ri ixpa. Na pre finat Juãw Paxisja hkõt mẽ pa ho mẽ pa xwỳnhjê mã ja jahkre nhūm mẽ kuma nẽ tãm kãm amnhĩ jarẽ. E kwa mẽ inhmã tanhmã ja jahkre hto nà? Anẽ.

² Hāmri nhūm mẽ kãm:

—Tõe. Nà kêr ka mẽ kãm amnhĩ jarẽnh kaxyw nẽ mãmri amnhĩ krã hkõt tanhmã kãm amnhĩ jarẽnh to. Rỳ kãm amnhĩ jarẽnh o:

Pa Mẽinhĩpêêxà maati? Nà amex o amex Tĩrtũm.

Apê mẽ ijamãr mex xwỳnh maati na ka.

³ Nẽ kwa kêr ka apkati mẽ mẽ inhmã mẽmo gõ pa mẽ akukwak ri ho ixàpkur o ri ixpa.

⁴ Nẽ na pa hte tõhã amnhĩ tomnuj nẽ Tĩrtũm. Nom mẽ kot tanhmã ixtomnuj to xwỳnhjaja na pa hte ãm mẽ omu nẽ amnhĩ tã tanhmã mẽ ho hkêt nẽ. Nẽ ja ho ijamakêtkati kurẽ kumrẽx. ã na pa hte amnhĩ nhĩpêx anhỹr o ri ixpa.

Jakamã kwa kêr ka ja hã ixpumu nẽ ixpyrà nẽ ixte tanhmã amnhĩ tomnuj to hã ixpumu nẽ hã tanhmã ixto hkêt nẽ. ãm ho ajamakêtkati kurẽ kumrẽx nẽ axte kãm ajamaxpẽr kêt nẽ.

Nẽ kot paj tanhmã amnhĩ tomnuj to kaxyw japêr ka ja hã ixpumu nẽ ixte ã amnhĩ nhĩpêx anhỹrja nẽ ixto htỳx nẽ pa ja ho anhỹr kêt nẽ.

E ãm ja pix na hapêx. Anẽ.

E kêr ka mẽ ã Tĩrtũm mã amnhĩ jarẽnh anhỹr o ri apa. Anẽ.

Mẽ pahte amnhĩ to Tĩrtũm wỳr rãhã hã mẽ pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mããnẽn Rõmãn 12.12; Epes 6.18; Wam Tesarõn 5.17-18

⁵⁻⁶ Nhūm Jejus arĩ hkõt mẽ pa ho pa xwỳnhjê jahkre ho nhỹ nẽ mẽ kãm:

—Nẽ ja. Kojã mẽ akrãmnhwỳjê hõ. Nhūm kõt ã kamàt nhūm nhỹhỹnh awỳr mõn pøj. Ka anhõ mẽmoj kêt hāmri nẽ anhĩjuk ri akrãmnhwỳ hwỳr tẽ. Hāmri nhūm ra amnhĩ tã kahê nẽ nõ. Ka tee ri omu hāmri nẽ hakwa krem xa nẽ kãm akapẽr nẽ kãm: “Pa ixkrãmnhwỳ. Na ka mẽ ra gõr? Kwa kãnhmã nhỹ nẽ inhmã anhõ mẽmoj japêr. Na ra ham ixkrãmnhwỳta mõn pøj. Nẽ kãm prãm tỳx nẽ mõ nom kaxyw inhõ hkêt. Kwa kãnhmã nhỹ nẽ inhmã anhõ mẽmoj japêr nẽ inhmã hkwy pa ma o tẽ kê kukrẽ. ãm inhõ hkêt kumrẽx. ãm hāmri na pa amã amnhĩ jarẽ. Kwa tokyj kãnhmã nhỹ nẽ inhmã mẽmoj japêr nà?” Anhỹr o kãm akapẽr.

⁷ Hāmri nhūm ama nom kãm kãnhmã ÿr prãm kêt nẽ. Nẽ amã: “Tk. Nà ra mẽ ixte amnhĩ tã kahê hpar nẽ inhĩkwỹ kẽnã kot pa kêt kãnhmã nhỹ nẽ amã mẽmoj japêr.” Anẽ.

⁸ Ka tee ri ama nẽ xatã kãm: “Kwa ã inhĩpêx anhỹr kêt nẽ ixkrãmnhwỳ. Kwa tokyx.” Anhỹr o xa. Nẽ xatã kãm anojarêt o xa. Hāmri nhūm ra kãm amar kaga hāmri nẽ tã kãnhmã nhỹ nẽ amã ate ho presija

xwýnhta gô. No ãm kêp akràmnhwý hã ate hã axàhwýr tipxi hã amã òr kêt nê. ãm xatã ate ho presija htýx xwýnhja mã hamaxpêr nê tã kànhmã nhý nê amã kugô. ã mē ujarênh kot anhýr.

9-10 —Tã kêr ka mē ja pyrã nê amnhĩ to Tĩrtũm wýr rãhã ho ri apa nhũm ama nê ate mēmoj tã hwýrta amã kugô. ãm xatã ate hã axàhwýr o ri apa nhũm amã kugô. ãm mēmoj to hwýr rãhã ho ri apa nhũm ama hãmri nê amã mēmoj tanhmã hipêx to. Te ho mēhõ kãm tep xành nê gôx kãm xatã tep rênh xà rênh o ãm pyrã nê xatã mēmoj tã hwýr o ri apa. Hãmri nhũm ama nê amã hprãm xwýnhta gô. Te ho tep kanhêr xwýnhta tã kot tep ô kanhêr pyrãk o anhĩpêx nê amã mēmoj prãm xwýnhta gô. Anê.

Tĩrtũm kot hkrajê mã mēmoj mex nhõr ã harênh

Makre 7.9-11

11 Nhũm Jejus arĩ hkôt mē pa ho mē pa xwýnhjê jahkre nê mē kãm:

—Nê xà koja akra kãm tep xành nê hã awý ka ama nê axtem nê kãm kagã xoprê hõ py nê agõ?

12 Rý nhũm krãhyre gre hã awý ka axtem nê kãm makre hõ py nê agõ? Nà na ka htem ã akrajê nhĩpêx anhýr kêt nê. Na ka htem mē kot mēmoj tã àhwýr xà hkôt kãm mēmoj gô.

13 Mē kamjaja mē ate amnhĩ tomnuj o ri apa htã ka htem akrajê ho mex o ri apa. Tã kaxkwa kamã Tĩrtũmja na hte mē pahto mex o mē ate mē akrajê ho mexta jakrenh. Kãm mē pajapê htýx kôt na hte mē pamã mēmoj mex nhõr o pa. Nê mããnen amnhĩ Karõja na hte mē pamã kugô. Jakamã kot kaj mē atõ Karõ hã awý nhũm ama nê awýr kumê nhũm wrý nê akarõ mã axà. ã na hte Tĩrtũm kãm mē pajapê xàj mē pamã mēmoj mex nhõr o pa anê. Anê.

Jejus mē Satanasti wa harênh

Matêwre 12.22-32; Makre 3.20-30

14 Tã nhũm Jejus nhýri axte mēhõ nê mēkarõmnuti kator. Na pre ra mēkarõmnuti tanhmã ho nhũm kapêr kêt nê pa. Hãmri nhũm Jejus omu nê nê kator nhũm akupým kapêr mex nê. Nhũm mē piitã amnhĩ jaêr

pê omu nê no hawênh rũnh nê omunh o kuhê.

15 Nom nhũm mē hkwyjaja Jejus kot ã hipêx anhýr ã omu nê htýx ho kêp mēkarõmnuti hkwy hã hkamnhĩx nê axpên mã harênh o:

—Tk pêr hinhu nhĩkôôti nhý hã na hte mē nê amnhĩ kwýjê japôx o pa. Anê.

Hinhu nhĩkôôti nhĩxi hõ pê Satanasti nhũm prem Satanasti nhý hã Jejus kot ã amnhĩ nhĩpêx anhýr o pa hã hkamnhĩx.

16 Jakamã nhũm mē hkwyjaja hwýr mra nê kãm:

—Kwa mē inhmã aa mē ixte mēmoj pumunh kêt ô ho anê. Pa mē omu nê ate Tĩrtũm nhý hã tanhmã amnhĩ nhĩpêx to ho apa hã apumunh kurê kumrêx. Anê.

Nom hêx rom mē kot kamã hamak kaxyw ã kãm kapêr anê.

17 Nhũm ra Jejus mē hamaxpêr kôt mē omunh mex jakamã mē kapêr ma nê mē kãm:

—Kwa mē inhma mē ate ixpê Satanasti hkwy hã ixkamnhĩx xwýnhjaja. Koja pika nhõ xwýnhjaja axpên kutã amnhĩ xunhwý nê axpu hãmri nê anhgrã nê ma ahpýnhã ri pa. Hãmri nê amnhĩ krã hkôt ri tanhmã amnhĩ to ho ri pa. Jakamã nhũm mē ô pahi mē hamãr o pa hkêt nê. Rý koja krĩ nhõ xwýnhjaja. Mē kot axpên to hkwy xwýnhjaja mēmoj tã axpên kãm gryk nê axpên kutã amnhĩ xunhwý hãmri nê axpên pê anhgrã nê ahpýnhã pa hãmri nhũm mē ô pahi tee ri kãm mē hamãr o pa hprãm. Mo ô krĩ kamã mē hkwy kot ri mē hamãr o pa? No na pre mē ô pahi tãm amnhĩ nê mē hanor kêt nê.

18 —Tã ja pyrã nê ixte Satanasti nhý hã tanhmã amnhĩ nhĩpêx to ho ixpa ronhýx pa mē nê amnhĩ kwýjê janor o ri ixpa hkêt nê. Nhýx Satanasti ixte mē nê mē hanor kaxyw tanhmã inhmã nê hkêt nê.

19 —No kêt mē akwyjaja? Xà Satanasti nhý hã na htem mē nê mē hapôx o pa nã? Kêp apu pa ixte ý hã mē nê mē hapôx ronhýx mē akwyjaja ixpyrà nê ý hã mē nê mē hapôx o pa. Nã Tĩrtũm nhý hã mē ixte mē nê mē hapôx o mē ixpa kênã. Jakamã ã mē ate ijarênh anhýr o apaja mex kêt.

20 Tĩrtũm Karõ nhý hã ixte mē nê mē hapôx o ri ixpa kênã. Jakamã kwa mē ja hã ixpumu nê Tĩrtũm kot ixte mē ato

amnhĩptàr kaxyw mẽ awỳr inhmēnh kôt
ixpumunh kurê kumrēx kêt wehe. Pa na ka
htem ixkamã ajamak o apa.

21-22 —Satanastija àhpumunh tỳx jakamã
na htem tee ri kêp mẽ kot hkôt amnhĩ
xunhwỳr xwỳnhjê pytâr kaxyw nhũm mẽ
nê mẽ omunh mex nê. Nom ixàhpumunh
tỳx o ixte Satanasti jakrenh jakamã pa na
pa hte kêp mẽ utà nhũm mẽ hpãnhã ixkôt ri
amnhĩ nhĩpêx.

23 —Mẽ amã ixkapêr mar prãm tã na
ka mẽ kormã ixkôt amnhĩ xunhwỳr kêt
nê. Kwa wem ma amnhĩ to amôr gri
nê tokyx ixkôt amnhĩ xunhwỳ kêt wehe.
Kot kaj mẽ anhỳr kêt nê hãmri nê te mẽ
ate ixkutã amnhĩ xunhwỳr xwỳnh pyrak o
amnhĩ nhĩpêx.

24 Mẽ ate ixkôt amnhĩ xunhwỳr kêt
xwỳnhjaja te mẽ ate mēhō nê mēkarōmnuti
japōx xwỳnh pyrak. Nhũm te kêp kator nê
ma mō nê nhỹri amgrà kamã ri pa. Nhũm ja
kêp omnuj nhũm tee ri kamã nhỹri hkôkôt
xà japêr o pa. Nom tee ri hapêr o pa nê
hamaxpêr o: “E kot paj ma akupỹm mẽ kot
nê ixkator xwỳnhhta wỳr tē nê hwỳr axà nê
hkôt măn ixpa.” Anê.

25 Hãmri nê ma akupỹm hwỳr tē. Nom
kormã akupỹm hwỳr àr kêt ri nhũm kamã
amrakati nê pa.

26 Jakamã nhũm ma akupỹm hwỳr tēn
axà. Nom ahte àr kêt nê. Ra amnhĩ kôt
amnhĩ kwỳjê ho 7 nê hwỳr mẽ ho agjê.
Nê hwỳr gjêx pa. Mẽ kêp 7jaja nê wamta
mẽ nhũm mẽ piitã hwỳr gjêx pa. No mẽ
kêp 7jaja omnuj tỳx o kot wamta jakrenh
jakamã nhũm mẽ kot hwỳr gjêx xwỳnhhta
mẽ ỹ hã amnhĩ tomnuj tỳx o pa. Oprê htỳx
nê. Wam pyxire nê kot hwỳr àr nhỹ hã
amnhĩ tomnuj o ri pa nom ãm kawax pē
oprê. Tã axte hwỳr mẽ ohtô nê gjêxta nhỹ
hã oprê htỳx kumrēx. Ja pyrã nê kot kaj mẽ
tokyx ixkôt amnhĩ xunhwỳr kêt nê hãmri
nê ãm amnhĩ tomnuj tỳx pix o ri apa. Anê.

Mẽ hkĩnh nê mẽ pa xwỳnhjê jarēnh

Rukre 8.19-21

27 Nhũm pre ã Jejus mẽ ahkre anê nhũm
mēhō nija kuma nê kãm:

—Hêxta gàà nê. Măn akatorxà ã ate
amnhĩ nhĩpêx anhỳr o apa hã apumu nê
hkĩnh nê. Anê.

28 Hãmri nhũm kãm:

—Tỳ. Nà kot anhỳr kēnã. Nom kot ka
mẽ atō Tĩrtũm kapêr ma nê hkôt amnhĩ
nhĩpêx hãmri nê akĩnh rax o ixkatorxà kot
ixpumunh nê hkĩnhhta jakre. Anê.

Jejus kot tanhmã Jōhti jarēnh to

Matêwre 12.38-42; Makre 8.12

29 Tã nhũm mẽ ohtô nê Jejus ã akuprō nê
mēmoj tã kuwỳ nê kãm:

—Pa. Kwa mẽ inhmã aa mẽ ixte mēmoj
pumunh kêt ô ho anê pa mẽ omu. Anê.

Hãmri nhũm mẽ kuma nê mẽ kãm:

—Tk. Kwa mẽ ajamaxpêr punuj pix o na
ka htem ri ajamaxpêr o apa. Ixpê Tĩrtũm
kot mẽ awỳr inhmēnh xwỳnh tã ka mẽ ja hã
ixkôt ajamaxpêr kêt nê. Tã mẽ ate aa mēmoj
pumunh kêt kwỳ ixte mẽ amã ho anhỳr
kaxyw hã inhmã karō. Nà kot paj kormã
mẽ amã ho anhỳr kêt nê. Kot paj nhỹrmã
te amnepê m finat Jōhti kot amnhĩ nhĩpêx
pyrak o amnhĩ nhĩpêx ka mẽ hã ijarēnh ma
nê kormã ja hã ixpumu.

30 Tĩrtũm nhỹ hã kapêr xwỳnh pē Jōhtija
amnepê m na pre tep rax kukrē. Tã nom
nhũm htĩr rãhã õxàhkre rũm kato nhũm mẽ
omu nê Tĩrtũm kot mẽ hwỳr mēnh ã omu.
Tã kot paj nhỹrmã Jōhti pyrã nê tanhmã
amnhĩ nhĩpêx to nhũm mẽ ja hã ixpumu
nê Tĩrtũm kot mẽ awỳr inhmēnh xwỳnh ã
ixpumunh kurê kumrēx.

31 —Nê koja nhỹrmã Tĩrtũm akupỹm mẽ
htyk nê mẽ hikwỳ xwỳnh piitã akupỹm mẽ
ho htĩr hãmri nhũm mẽ piitã Inhĩpēēxà mẽ
wa ixkutã hkrĩ. Pa wa mẽ piitã tanhmã
mẽ harēnh to. Tĩrtũm mẽ wa ixkuri mẽ
htĩr tũm nê mẽ pa ho mẽ pa mã xwỳnh ã
mẽ hkwyjê jarē. Nê wa ixkuri mẽ pa ho
mẽ pa hkêt xwỳnhjê jarē. Mẽ piitã ã mẽ
harēnh anê. Amarĩ mẽ pa xwỳnhjaja nê
mẽ ô pahijaja. Hãmri nhũm sur kãm mẽ ô
pahi niti Tĩrtũm mã tanhmã amnhĩ jarēnh
to hãmri nê hpãnhã tanhmã mẽ ajarēnh to
nê kãm mẽ ajarēnh o: “Na pa pre inhmã
pahi Sarumãw kot anhỹ hã àhpumunh tỳx
ã harēnh ma hãmri nê inhmã mar prãm
xàj ma awry hã ô pika hwỳr ixpa nê omu
nê kapêr ma. Hãmri nê ma akupỹm inhō
pika hwỳr ixpa nê ixkwỳjê mã àhpumunh
tỳx ã harēnh o ixpa. Tã Akra Jejus na
àhpumunh tỳx o pahi Sarumãw jakrenh tã
or war akutã mẽ hkrĩ xwỳnh kwỳ mũj na

prem kapêr ma no âm ixkĩnhã kãm mar prãm kêt nê. Na prem kuma nê âm kuma.” Anhÿr o wa inhmã mē ajarē. Hãmri nê ja hã mē amã akir ka mē tee ri mar o akrĩ nê amnhĩ kamã agryk o akrĩ.

³² —Hãmri nhũm hpãnhã Nĩnĩwe nhõ xwÿnhjaja wa inhmã tanhmã amnhĩ jarēnh to. Jõhti kot mē hwÿr mōr nê mē kãm Tĩrtũm kapêr jarēnh o pa xwÿnhjaja nhũm mē tanhmã wa inhmã amnhĩ jarēnh to. Hãmri nê pahi nita pyrã nê wa inhmã tanhmã mē ajarēnh to nê wa inhmã: “Na pre Jõhti man mē inhõ krĩ hwÿr mō nê mē inhmã akapêr jarēnh o ri mē ixkõt pa. Pa prem kuma nê mē ixte amnhĩ tomnuj kaga nê akõt amnhĩ xunhwÿr kurê kumrēx Tĩrtũm. Nom or war akutã mē hkrĩ xwÿnh kwÿ mũj na pre Akra Jejus tãm mē hwÿr mō nê mē kãm kapêr o ri mē hkõt pa nhũm prem kuma no âm mē ixkĩnhã amnhĩ tomnuj kaga nê hkõt amnhĩ xunhwÿr kêt nê. Mē kot Akra mar tã amnhĩ kaxyw kãm hamaxpêr kêt nê.” Anhÿr o koja mē wa inhmã mē ajarē ka mē tee ri mē ama nê amnhĩ kamã agryk tÿx nê. Jakamã e kwa ixte mē amã ã ixkapêr anhÿrja ma nê kãm ajamaxpêr tÿx rãhã ho ri apa. Anê.

Mē pajamaxpêr mex te kot kanê hpõk mex pyrãk ã harēnh

Matêwre 5.15, 6.22-23

³³ Nhũm Jejus arĩ mē ahkre ho nhÿ nê mē kãm:

—Xà na htem kanê hpõk nê poti ho hpro? Nà na htem ho anhÿr kêt nê. Na htem hpõk nê kÿx pē mēmoj nhĩmõk ã unhwÿ nhũm mē piitã mē kãm hirã mex nhũm htem ixkrem agjê nê hirã kamã mēmoj pumunh mex o mra.

³⁴ Ja pyrã nê kot ka mē atõ ixkapêr ma nê ixkõt amnhĩ nhĩpêx nê tãm amnhĩ nhĩpêx o ri apa. Nê tãm mē hipêx o ri apa. Jao te hirã kamã mē rĩt mex xwÿnhjaja kot amnhĩ nhĩpêx pyrãk. Nom koja mēhõ inhma nê âm inhma nê ixkwÿm ri tanhmã amnhĩ nhĩpêx to ho pa. Jao te kamãt kô kamã mē rĩt mex kêt xwÿnhjaja kot htÿx amnhĩ nhĩpêx o pa pyrãk o amnhĩ nhĩpêx.

³⁵ —E kêt ka mē ã amnhĩ nhĩpêx anhÿr pymaj ixkapêr ma nê kãm ajamaxpêr tÿx rãhã ho ri apa.

³⁶ Kot kaj mē ixkapêr ma nê ixkõt amnhĩ nhĩpêx. Hãmri nê te mē ate kanê hpõk

mex nhĩrã kamã ri apa pyrãk o amnhĩ nhĩpêx. Jao aprĩ hã ixkapêr ma nê aprĩ hã ixte tanhmã amnhĩ nhĩpêx to hã ixpumunh mex nê. Anê.

Jejus kot tanhmã Parijew nhõ xwÿnhjê jarēnh to

Matêwre 23.25-26

³⁷ Tã nhũm Jejus ra mē ahkre pa. Hãmri nhũm Parijew nhõ xwÿnhja hwÿr tē nê kãm:

—Pa. E kwa ma ixkõt tē nê mē ixkutã apku. Anê.

Hãmri nhũm kuma nê kãm:

—Tõe. Nà kot paj ma akõt tē. Anê

Hãmri nê ma hkõt tē nê õrkwÿ hwÿr axà nê apkur kaxyw mē ãhkõ hã nhÿ.

³⁸ No âm mē hkukamã mē hpãmjê pyrã nê amnhĩ nhĩhkra kuhõnh ryy hkêt nê. Âm amnhĩ nhĩhkra htyk pix kuhõnh tokyx anê nê nhÿ. Nê õ prat kuhõnh ryy hkêt rãhã apkur kaxyw nhÿ. Jakamã nhũm kot amnhĩ kõt hwÿr xwÿnhhta tee ri ja hã omu nê hamaxpêr o:

—Tk. Kwa na hte mē ixte amnhĩ nhĩpêx kõt amnhĩ nhĩpêx mex kêt nê.

³⁹ Anê nhũm Jejus amnhĩ tã hamaxpêr ã omu nê kãm:

—Nà mē apê Parijew nhõ xwÿnhjaja te mē ate mē kot apkur kaxyw prat kre kuhõnh punuj tã mex ã harēnh pyrãk o amnhĩ nhĩpêx. Nê âm mē akrã hkã rũm pix mã na mē amex. Nê mē noo mã te mē amex pyrãk no âm mē anhõxàhkre kaxwÿnh kãm mē ajamaxpêr mex kêt. Âm mē akapêr prãm. Nê mē axàhkurêê. Nê mē anhõxÿy.

⁴⁰ Mē ate atÿx ri amnhĩ nhĩpêx o ri mē apa xwÿnh kênã. Kwa kêt ka mē âm akrãhkã pix rũm amex nê ri apa hkêt nê. Mē mãñnēn anhõxàhkre kaxwÿnh kãm ajamaxpêr mex o ri apa. Nê tãm mē piitã mē hipêx o ri apa.

⁴¹ Kêt ka mē tãm ajamaxpêr o tãm mē hipêx o ri apa. Nê axãmnhĩx ri mē kēp amrakati xwÿnhjê mã mēmoj nhõr o ri apa. Kot kaj mē ã amnhĩ nhĩpêx anê hãmri nhũm Tĩrtũm ja hã mē apumu nê amnhĩm mē amex ã mē ajarē. No na ka htem mē amã mē amnhĩ to mex prãm xaj tee ri amnhĩ kuhõnh japjê kaprÿ. Anê.

Jejus kot Parijew nhõ xwýnhjaja mex kêt kukamã mẽ harênh

Matêwre 23.4, 23.7, 23.13-24, 23.27-38; Makre 12.38-39

⁴² Nhũm Jejus arĩ Parijew nhõ xwýnhjê jahkre nẽ mẽ kãm:

—Kwa mẽ okora Parijew nhõ xwýnhjaja. Kot kaj mẽ amex kêt nẽ. Na ka htem Tĩrtũm kapêr piitã hkõt amnhĩ nhĩpêx o apa hkêt nẽ ãm hkwy kõt pix mã amnhĩ nhĩpêx o ri apa. Nẽ ãm kapêr o hpýnhre nẽ hkõt amnhĩ nhĩpêx hãmri nẽ hã amnhĩ pumu nẽ ate amnhĩ to mex xwýnh ã amnhĩ to jarkrar o ri apa. Nom Tĩrtũm kãm hprãm xã piitã hkõt amnhĩ nhĩpêx hkêt nẽ. Mẽ ate tãm mẽ piitã mẽ hipêx o ri apa hã kot mẽ amã karõja. Nẽ mẽ amã Tĩrtũm kĩnh ã kapêr kõt amnhĩ nhĩpêx o ri apa hã karõja mẽ ate mar mex tã hkõt amnhĩ nhĩpêx kêt nẽ. Mẽ ate kapêr piitã hkõt amnhĩ nhĩpêx ronhỹx ja mẽ amã mex kumrêx.

⁴³ —Kwa mẽ o kora. Mẽ piitã mẽ kot amnhĩm mẽ ate amnhĩ to rũnh xwýnh ã amnhĩm mẽ ajarênhja na mẽ amã hprãm. Nẽ mẽ piitã mẽ kot amnhĩm mẽ apê mẽ ahkre mex xwýnh maati hã mẽ ajarênhja na mẽ amã hprãm.

⁴⁴ —Kwa mẽ o kora. Kot ka mẽ amex kêt nẽ. Mẽ kot mẽ akapêr mar nẽ mẽ akõt amnhĩ nhĩpêx xwýnhjaja te mẽ kot htýx ri mẽ hã pika nhĩmõk ã ri mẽ pa xwýnh kot amnhĩ nhĩpêx pyrãk. Jao mẽ ate amnhĩ to mex ã amnhĩ kamnhĩx nom mẽ ate amnhĩ to mex kêt. Te mẽ kot pika mex ã hkamnhĩx nẽ htýx ri mẽ hã pika nhĩmõk ã ri mẽ pata pyrãk o na htem amnhĩ nhĩpêx. Anẽ.

Nhũm pre ã Jejus Parijew nhõ xwýnhjê mã mẽ kot amnhĩ nhĩpêx jarênh anẽ.

Jejus kot Tĩrtũm kapêr tũm o mẽ ahkre xwýnhjê mã kapêr

Matêwre 23.1-4, 23.13, 23.29-36

⁴⁵ Hãmri nhũm Tĩrtũm kapêr tũm o mẽ ahkre ho pa xwýnhja kuma nẽ kãnhmã xa nẽ kãm:

—Kwa na ka ã Parijew nhõ xwýnhjê jarênh punuj anhỹr jao mããnên ã mẽ paja jarênh anẽ nã? Mẽ ixte amnhĩ nhĩpêxja ãm tipxi kênã. Anẽ.

⁴⁶ Hãmri nhũm kãm:

—Tỳ. Mããnên mẽ kajaja. Kwa o kora mẽ apê Tĩrtũm kapêr tũm o mẽ ahkre

xwýnhjaja. Kot kaj mẽ uràk nẽ amex kêt nẽ. Na ka htem mẽ kãm mẽmoj tã karõ ho ri apa nẽ mẽ kãm: “E kêt ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhỹr tã no ãm mẽ kajaja amnhĩ kapêrja kõt amnhĩ nhĩpêx kêt nẽ. Te mẽ ate mẽhõ kot mẽ katut ã mẽ kãm mẽ jênh pytĩ janhõr tã mẽ ho ajuta nẽ hkwy htur kêeta pyrãk o na ka htem amnhĩ nhĩpêx o ri apa.

⁴⁷⁻⁴⁹ —Na pre Tĩrtũm amnepêm mẽ pahpãmjê hkukamã tanhmã mẽ harênh to. ãhpumunh týx xã hkõt tanhmã mẽ hkukamã mẽ harênh to nẽ mẽ harênh o: “Kot paj ma mẽ hwýr inhỹ hã ixkapêr jarênh xwýnhjê rê. Nom koja mẽ omu nẽ ãm mẽ omu nẽ kêp mẽ hprãm nõkati nẽ tanhmã mẽ hipêx to ho pa. Nẽ ixpê mẽ hkwyjê hpar o pa. ã koja mẽ inhỹ hã ixkapêr jarênh xwýnhjê nhĩpêx anẽ.” Anhỹr o mẽ hkukamã mẽ harê. Tã ã mẽ harênh anhỹr xã hkõt nhũm prem ã mẽ hipêx anẽ nẽ mẽ hkwyjê hpa nẽ mẽ hkwyjê pynê nẽ mẽ hagjê.

—Amnepêm mẽ akukamã mẽ kot ã mẽ hipêx anhỹr nhũm mẽ ate mẽ ano ho ja hã mẽ omunh kêt tã ka htem arĩ mẽ hã pika ho mex o ri apa. Te mẽ amã mẽ hapê nẽ mẽ ho ajamak pyrã nẽ mẽ hã pika ho mex o ri apa. Nom mẽ amã mẽ hapê hã ho mex hkêt nẽ. ãm ra mẽ htyk nẽ hapêx nẽ mẽ amã Tĩrtũm kapêr jarênh o pa hkêtja ã na ka htem akĩnh nẽ ã axêx rom mẽ hã pika ho mex anhỹr o ri apa.

⁵⁰⁻⁵¹ —Na prem Tĩrtũm nhỹ hã kapêr jarênh o mẽ pa xwýnhjê nhĩmex rax nẽ. Amnepêm panhĩ kator krax rũm finat Atãw kra finat Apewja na pre Tĩrtũm nhỹ hã kapêr o pa nhũm htõ kãm mar prãm kêt nẽ kupĩ. Tã nhũm Tĩrtũm axte mẽ hwýr ý hã kapêr jarênh o mẽ pa xwýnh kwýjê rẽ nhũm prem mã mẽ ho anẽ nẽ mẽ hkwyjê nhĩmex. Nhũm pre xatã mẽ hwýr mẽ hkwyjê rẽ nhũm mẽ xatã mẽ kupa. ã Apew rũm finat Jakaris wýr na prem mẽ himex rax anẽ. Nẽ hpãnhã Jakarisja nhũm prem Tĩrtũm mã amnhĩ jarênh xã hã ixkre kamã kupĩ. Tã ka mẽ ajaxwýja amã Tĩrtũm kapêr mar prãm kêt nẽ mẽ uràk nẽ amã ý hã kapêr jarênh o mẽ pa xwýnhjê nhĩmex prãm. Tã ã mẽ pahpãmjê mẽ ato hpimràatã mẽ ate mẽ

hipêx anhÿrja mÿrapê koja Tÿrtÿm ja hã mē apê mē hkanrêhã mē htãmnhwÿjaja tanhmã mē ato htÿx to ka mē amnhÿ xà htÿx kamã ajamak o ri apa rãhã nē kãm ga.

⁵²—Jakamã kwa mē o kora mē apê Tÿrtÿm kapêr tÿm o mē ahkre xwÿnhjaja. Mē ajaxwÿja na ka htem Parijew nhõ xwÿnhjê pyrã nē Tÿrtÿm kapêr o mē ahkre ho apa. Nē aprÿ hã mar mex tã no ãm amnhÿ kaxyw hkôt ajamaxpêr nē hkôt amnhÿ nhÿpêx kêt nē. Hãmri nē mē kot mē amar o pa xwÿnhjê mã atÿx ri tanhmã mē ahkre hto nhÿm htem mē ama nē mē apyrã nē amnhÿ kaxyw Tÿrtÿm kôt hamaxpêr nē hkôt amnhÿ nhÿpêx kêt nē. Mē kãm hprÿ hã kapêr mar mex prãm tã mē amar xà hkôt mē ate amnhÿ nhÿpêx pyrãk o amnhÿ nhÿpêx o pa. Nom mē kajaja na ka htem mē kãm mē hamaxpêr mex nhõr kêtja mÿrapê nhÿm htem ã amnhÿ nhÿpêx anhÿr o pa. Jakamã kwa mē o kora kot kaj mē amex kêt nē. Anē.

Nhÿm pre ã Jejus mē kãm kapêr anē.

⁵³⁻⁵⁴ Hãmri nē kato nē ma tē. Nhÿm Tÿrtÿm kapêr tÿm o mē ahkre ho mē pa xwÿnhjê mē Parijew nhõ xwÿnhjaja hãmri kot tanhmã mē kãm kapêr toja ma nē kamã gryk tÿx nē. Jakamã ma hkôt mra. Hêx rom mēmoj tã hkukjêr o hkôt mra. Nē hã hkukjêr kãm hihtÿx o hkôt mra. Kot tanhmã mē kãm ujarênh to nhÿm mē kot mar nē ra hã àmnênh kaxyw ma hkôt àhkukjêr o mra.

12

Mē pahte Tÿrtÿm pē mē pajamaxpêr punuj o pahpimxur kêt

Matêwre 10.26-33

¹⁻³ Tã nhÿm mē Jejus ã htu rax kumrêx nē hã axpên nhÿgãnh o kuhê. No nhÿm kormã mē kãm tanhmã kapêr to hkêt nē. ãm kormã hkôt mē pa ho mē pa xwÿnhjê kumrêx mã kapêr nē mē kãm:

—Mē piitã kãm amnhÿ kwÿjê pē hamaxpêr punuj o hpimxur hprãm tã koja nhÿrmã mē hamaxpêr piitã amnhÿrÿt pa. Nē mēmoj piitã ra hpimxur mex tã koja nhÿrmã piitã amnhÿrÿt pa. Nē mē kot kamãt kô kamã hpimxur pē mēmoj jarênh tã koja mē piitã nhÿrmã kot mēmoj jarênh ta ma. Nē mē kot hitom kãm kawax pē axpên mã

mēmoj punuj jarênh tã koja nhÿrmã mē piitã mēmoj jarênh ta ma. Jakamã kwa kêr ka mē tanhmã Parijew nhõ xwÿnhjaja kot amnhÿ nhÿpêx to ho pa hã mē omu nē ãm mē omu nē mē hkôt amnhÿ nhÿpêx kêt nē. Te mē kot tãm amnhÿ nhÿpêx pyrãk o amnhÿ nhÿpêx tã no ãm tãm amnhÿ nhÿpêx o pa hkêt. Na htem ãm htÿx ri tanhmã amnhÿ to hêx to ho pa. Tã kêr ka mē urãk nē ã amnhÿ nhÿpêx anhÿr kêt nē. Anē.

Mē pahte pahkwÿjê pumaj Tÿrtÿm kaga hkêt ã mē pamã karõ

Matêwre 10.28-31

⁴ Nhÿm Jejus arÿ hkôt mē pa ho mē pa xwÿnhjê mã kapêr nē mē kãm:

—E ixkrãmnhwÿjaja. Kêr ka mē amã akwÿjê puma rÿ nhãm mē hkwÿjê puma ho ri apa hkêt nē. Koja mē apar tã ãm mē anhÿ pix pa nom tanhmã mē akarõ hto hkêt nē.

⁵ Tÿrtÿmja tapxipix na hte mē ï nē mē hkarõ ho hpimràatã mē kot amnhÿ xà htÿx kamã hamak tÿm xà hwÿr mē kurê. Tã kêr ka mē ja pumaj Tÿrtÿm kapêr kwÿm tanhmã ri amnhÿ nhÿpêx to ho apa hkêt nē.

⁶⁻⁷ —Nē Tÿrtÿm kot mē pahto hapêx par pumunh tã mãânên kot mē pajamãr pumunh mex. Mãn ka htem kuwênhre pumu. Na hte Tÿrtÿm hamãr mex o pa. Mē piitã mē kot ãm kuwênhre pumunh o pa htã nhÿm Tÿrtÿm mē kurom hamãr mex o pa. Nē htãnopxar rãhã ho pa. Nom kãm mē pajapê htÿx o kuwênhre jakrenh jakamã kwa mē tee ri amnhÿ kukamã ajamaxpêr o ri akaprÿ nē apa hkêt nē. Koja Tÿrtÿm mē pahtãnopxar rãhã ho pa. Ra kot tanhmã mē pakute hã mē pahpumunh par. Nē ahpÿnhã tanhmã mē pahkrã hkÿ kute hkôt mē pahpumunh par. Tã kot mē pahtãnopxar rãhã jakamã mo kaxyw kot kaj kêt mē ri amã mēhõ puma ho ri apa?

⁸ —Jakamã kwa mē mãmrÿ mē kãm mē apê ixkra hã amnhÿ jarênh o ri apa nē amã mē uma xàj tee ri amnhÿ nhÿpêx o ri apa hkêt nē. Kot ka mē kãm ra mē ate ixkôt amnhÿ xunhwÿr ã amnhÿ jarê. Pa ja hã mē apumu hãmri nē mē apyrã nē kaxkwa kamã Tÿrtÿm kapêr o mē wrÿk xwÿnhjê mã ra mē ate ixkôt amnhÿ xunhwÿr ã mē ajarê.

⁹ Nom kot ka mē kot ixtã tanhmã mē ato pymaj apê ixkwÿ hã amnhÿ jarênh kêt

japêr. Pa ja hã mẽ apumu hãmri nẽ nhỹrmã amnhĩ xwar mẽ kãm mẽ apê ixkwý hkêt ã mẽ ajarê. Jakamã kwa mẽ mãmri mẽ kãm apê ixkwý hã amnhĩ jarênh o ri mẽ hkôt apa kê mẽ ama nẽ tanhmã inhmã hamaxpêr to.

¹⁰ Koja mẽ ama nẽ ãm ama nẽ kãm ixprãm kêt japêr. Hãmri nhũm Tĩrtũm ixtã mẽ omu nom tokyx ixtã tanhmã mẽ ho hkêt nẽ. Koja kormã amnhĩ tã mẽ hamãr o pa. Karõ kot axte mẽ kãm ijarênh o amnhĩrit nhũm mẽ hkwýjaja kot mar nẽ kãm ixprãm nẽ ixkôt amnhĩ xunhwýr kaxyw nhũm kormã amnhĩ tã mẽ hamãr o pa. Nom koja Karõ xatã mẽ kãm ixto amnhĩrit tã nhũm mẽ kuma nẽ ãm kuma nẽ te mẽ kot kêp amnhĩ jamak pro pyrãk o amnhĩ nhĩpêx o pa. Jao Karõ hã hpijaãm kêt mýrapê koja Tĩrtũm nhỹrmã amnhĩ xwar te kot mẽ kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprý. Hãmri nẽ amnhĩ xà htýx kamã hamak tũm xàta wýr ma pa nẽ kamã pa ho pa. Jakamã kwa mẽ mãmri mẽ kãm mẽ apê ixkra hã amnhĩ jarênh o ri mẽ hkôt apa nẽ tanhmã mẽ kãm ijarênh to ho ri apa.

¹¹ Koja mẽ ama nẽ kãm mẽ amar prãm kêt japêr hãmri nẽ ixtã mẽ apynê nẽ tanhmã mẽ anhĩpêx to kaxyw. Nẽ Ijaew nhõ Tĩrtũm kapêr o mẽ ahkre xà hã ixkre hwýr mẽ ato mrrar japêr. Rý mẽ õ pahi hwýr mẽ ato mrrar nẽ tanhmã kãm mẽ ato hêx to. Nom kêr ka mẽ mẽ kãm amnhĩ jarênh kaxyw nẽ tee ri amnhĩ kukamã ajamaxpêr o amã mẽ uma kêt nẽ.

¹² Koja Tĩrtũm Karõ ja kaxyw mẽ amã mẽ ajamaxpêr mex gõ hãmri ka mẽ ô ri mẽ kãm amnhĩ jarê. Jakamã kwa mẽ tee ri mẽ kãm amnhĩ jarênh kukamã ajamaxpêr o ri mẽ amã mẽ uma ho apa hkêt nẽ. Anê.

Mẽ hikukrêx rũnh pix kukamã hamaxpêr xwýnhjê jarênh

Wam Ximotre 6.9-10; Xiakre 4.13-17, 5.1-6

¹³ Nhũm Jejus arĩ mẽ ahkre o xa nhũm mẽ mar o kuhê. Rôm nhũm mẽhõ myja hwýr tẽ nẽ kãm kapêr nẽ kãm:

—Pa? Kwa ot pa awýr amã mẽmoj jarênh mã tẽ. Na pre inhĩpêxà ty nhũm ixtõ ixrom amnhĩm õ mẽmoj piitã ho àrĩk pa. Õ pika nẽ hkrit nẽ hikukrêx nẽ ãm mẽmoj piitã ho àrĩk

par kumrêx. Kwa ma ixkôt tẽ nẽ kãm anê pa wa amnhĩm ho axkjê nà? Anê.

¹⁴ Hãmri nhũm kuma nẽ kãm:

—Tk. Koký. Na pa pre mẽ amã mẽ mẽmoj to ixpikjêr kaxyw mẽ awýr ixwrýk kêt nẽ. Anê.

¹⁵ Hãmri nẽ mẽ kot mar o kuhê xwýnh piitã mẽ kãm kapêr nẽ mẽ kãm:

—Kwa kêr ka mẽ amã anhõ mẽmoj rũnh prãm o ri apa hkêt nẽ. Na htem mẽmoj rũnh kukwak ri Tĩrtũm wýr apir kêt nẽ. Mẽmojta kêp pika pix nhõ xwýnh na.

¹⁶ Anhýr o mẽ kãm kapêr hãmri nẽ mẽ kãm awjarê. Mẽ hkukrêx rax ã kuxi nẽ mẽ kãm awjarê nẽ mẽ kãm:

—Nà koja mẽhõ õ mẽmoj rax nẽ. Nẽ hpur kãm õ rax nẽ. No ãm õ jaxwýr xà hã ixkre kêp grire.

¹⁷ Hãmri nhũm tee ri hpur kãm õ rax kukamã hamaxpêr nẽ hamaxpêr o: “Kwa tanhmã kot pa amnhĩ to nẽ ja piitã nhỹri haxwý wehe? Inhmã amarĩ mẽ kêp amrakati xwýnhjê mã hkwy nhõr prãm kêt. Kot paj ãm amnhĩm piitã ir pa nẽ kritpêm hkur o ixpa. Nom ixpê haxwýr xà hã ixkreja ixpê grire.” Anê.

¹⁸ —Hãmri nẽ hamaxpêr o: “Nà na pa ra ijamaxpêr. Kot paj ixkre gireta grã nẽ hpãnhã rax õ nhĩpêx. Hãmri nẽ ixpur kãm inhõta jamý nẽ kamã ir pa. Nẽ ixápênh xà hã ixkukrêx piitã kamã haxwýr pa. Nà kot paj ho anê.” Anê.

¹⁹ —Hãmri nẽ ra ixkreja grãnh pa nẽ hpãnhã rax õ nhĩpêx. Nẽ hipêx pa hãmri nẽ kamã hpur kãm õta xir pa. Nẽ ápênh xà hã hikukrêx piitã kamã unhwý. Hãmri nẽ omu nẽ hkĩnh nẽ. Nẽ hamaxpêr o: “Nà hãmri. Kot paj tokyx axte mẽmoj tã ixápênh kêt nẽ. Ra inhõ rax kumrêx kênã. Kot paj kritpêm ho ixàpkur mex o ixpa. Nà ãm hãmri na pa amnhĩ kukamã ijamaxpêr mex pẽ ixkre rax nhĩpêx.” Anê.

²⁰ Tã nhũm Tĩrtũm tee ri ã kot amnhĩ nhĩpêx anhýr ã omu nhũm ja kãm mex kêt nẽ. Hãmri nhũm hã kãm kapêr nẽ kãm: “Nà na ka atýx ri anhõ rax mẽ akukrêx rax o apikuprõnh kaprý. Na ka ãm amnhĩ pix kukamã ajamaxpêr o apa pẽ ã amnhĩ nhĩpêx anê. Nom kot kaj kamãt ja kamã ty nẽ anhý kamã ma mõ nẽ amnhĩ kôt anhõ mẽmoj rax õ ho amõr kêt nẽ. Koja hpãnhã

mêhõ amÿr pê ho amnhĩptàr pa ka rĩ amnhĩ pumu.” Anê. Nhũm ã Tĩrtũm kãm kapêr anê. ã mẽ ujarênh kot anhÿr.

²¹—Mê kot amnhĩ nhõ nê amnhĩ kukamã pix mã hamaxpêr o mẽ pa xwÿnhjaja na htem myja pyrã nê Tĩrtũm mã hamaxpêr o pa hkêr nê. Jakamã koja mẽ nhÿrmã ty hãmri nê hkukrêx pix kukamã hamaxpêr nê amnhĩ mã pix mã hamaxpêr o paja mÿrapê Tĩrtũm mẽ wa ixri htĩr tũm nê mex nê pa ho pa hkêr nê. Mê kot amnhĩ nhõ pix kukamã hamaxpêr xwÿnhjaja nê amnhĩ kukamã pix mã mẽ hamaxpêr xwÿnhjaja nê mẽ kamã ukapĩrĩ hkêr xwÿnhjaja mẽ õ mẽmoj rũnh tã koja mẽ nhÿrmã ty hãmri nê amnhĩ kôt hõ ho pixi nê o mõi kêt nê. Koja mẽ mẽmoj piitã rer pa nê ma ÿ kamã ma mõi. Jakamã kwa kêr ka mẽ jajê pyrã nê anhõ mẽmoj to anhõxÿ ho ri apa hkêr nê. Anê.

Mê pahte tee ri amnhĩ kukamã pajamaxpêr kêt ã mẽ pamã karõ

Matêwre 6.25-34; mãânên Wam Pêtre 1.3-9

²²Tã nhũm Jejus hpãnhã tanhmã hkôt mẽ pa ho mẽ pa xwÿnhjê jahkre hto nê mẽ kãm:

—Kwa kêr ka mẽ tee ri amnhĩ kukamã ajamaxpêr o ri apa hkêr nê. Amnhĩ xàpkur xà rÿ axê ka mẽ tee ri hkukamã ajamaxpêr kêt nê. Nê mẽ ãm mẽmoj piitã hkukamã tee ri ajamaxpêr kêt nê.

²³Tĩrtũm àhpumunh tÿx o àhpumunh tÿx xwÿnh na. Na pre àhpumunh tÿx o mẽ anhĩpêx ka mẽ kukwak ri atĩr nê apa. Tã xà kot mẽ amã mẽ anhõ ho pa hkukamã àhpumunh kêt? Nã ja kukamã àhpumunh xihtÿx kênã. Kêp mẽ anhĩpêx xwÿnh jakamã mãânên kêp mẽ amã mẽ anhõ ho pa xwÿnh. Nê kêp mẽ amã mẽ axê nhõr o pa xwÿnh.

²⁴—Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkapĩrĩ nê ri pa hkêr nê. Na hte Tĩrtũm tãm kot kãm õ ho pa. Tã kãm mẽ pajapê htÿx o kuwênhre jakrenh jakamã koja urak nê mẽ pamã mẽ panhõ mex o pa rãhã nê.

²⁵⁻²⁶Jakamã kwa kêr ka mẽ mẽmo arĩgro hã axàpkur xà hkryre pumu nê ate amnhĩ pê hkrêr par nê amã prãm o akapĩrĩ nê apa hkukamã tee ri ajamaxpêr kêt nê. ãm Tĩrtũm kamnàr rom axàmnhĩx anhõ

hkryreta ku nê akĩnh kãm tanhmã amnhĩ nhĩpêx to ho ri apa. Xà kot ka anhõ mry grire pumu nê akapĩrĩre nhũm ra tanhmã amã amnhĩ to rax to? Na htem ãm tee ri mẽmo hkukamã hamaxpêr o hkapĩrĩ nê pa kaprÿ. Jakamã kêr ka mẽ ã ri ajamaxpêr anhÿr o akapĩrĩ nê apa hkêr nê.

²⁷—Mãn ka htem akunĩ kamã pixôràre pumu. Na hte tee ri tanhmã amnhĩ kute hkukamã hamaxpêr o hkapĩrĩ nê harir kêt tã muxre nê harir ka mẽ omu. Te ho amnepêm finat pahĩti Sarumãw xê mex pyrak nom ãm mex o kot hakrenh.

²⁸—Pixôràreja arĩgro ja hã htĩr nê muxre nê harir tã koja mẽmo arĩgro hã grã pa nê hapêx. Kêp pixôrà pix nê hapêx tokyx anhÿr tã na hte Tĩrtũm ho mex nê nhũm mux nê harir. Nom mẽ pajaja na hte mẽ pahto mex o pixôràre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê hkukamã ajamaxpêr o akapĩrĩ nê apa? Nã kot kaj mẽ anê nê amnhĩ kaxyw Tĩrtũm mã ajamaxpêr tÿx kêt nê.

²⁹—Kwa mẽ tee ri amnhĩ xàpkur xà hkukamã ajamaxpêr rãhã o ri akapĩrĩ nê apa hkêr nê. Nê mẽ tee ri amnhĩ kukamã tanhmã ajamaxpêr to ho ri akapĩrĩ nê apa hkêr nê.

³⁰Mê kot Tĩrtũm kôt amnhĩ xunhwÿr kêt xwÿnhjaja na htem ã ri hamaxpêr anhÿr o hkapĩrĩ nê pa. Tã kêr ka mẽ ho mẽ urak kêt nê. Tĩrtũm kot mẽ panhõ mẽmoj kêt kôt mẽ pahpumunh mex kênã.

³¹Jakamã kêr ka mẽ ãm hkôt ri amnhĩ nhĩpêx rãhã nê. Nê amã ja pix kukamã ajamaxpêr o ri apa hprãm. Hãmri nhũm amnhĩ tã mẽ apumu hãmri nê apkati mẽ tãm mẽ amã mẽmoj nhõr o pa. Anê.

Kaxkwa kamã mẽ pakukrêx rax jarênh

Matêwre 6.19-21; mãânên Sikũn Ximotre 4.8; Eprêw 10.34; Wam Pêtre 1.4

³²Nhũm Jejus arĩ mẽ kãm kapêr nê mẽ kãm:

—E mẽ ate ixkôt amnhĩ xunhwÿr xwÿnhjaja. Ra Tĩrtũm kot mẽ ato hkra jakamã kwa mẽ axàmnhĩx hkamnàr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nê hkĩnh nê. Koja nhÿrmã kaxkwa kamã õ krĩ hwÿr mẽ ato api ka mẽ kamã wa ixkuri amex nê atĩr tũm nê apa ho apa. Ja na mex o kot jar

pika ja kôt mẽ õ mẽmoj rûnh nê pa xwÿnhhta jakrenh.

³³ Jakamã kêr ka mẽ axàmnhĩx ri akukrêx kwÿ ho wênê nê hpãnhã kàxpore jamÿ nê mẽ kêp amrakati xwÿnhjê mã ho apigrãnh o ri mẽ hkôt apa. Kot kaj mẽ ã amnhĩ nhĩpêx anê hãmri nê kaxkwa kamã akukrêx rax nê. Mo kaxkwa kamã mẽ àhkĩnh xwÿnh koja mẽ apê ho ahkĩ? Nê kamã mo amnhôre kot mẽ apê homnu? Kaxkwa kamã ja amrakati kumrêx. Jakamã Tirtũm kot mẽ amã mẽ akukrêx nhôr mã xwÿnhhta koja aa apê omnuj nê hapêx kêt kumrêx.

³⁴ Kot kaj mẽ jar pika ja kamã akukrêx rax hãmri nê tanhmã apê omnu hto pix kukamã ajamaxpêr rãhã ho ri apa. Nom kot kaj mẽ apê Tirtũm kra hã kot kaj mẽ jar akukrêx rax kêt tâ kaxkwa kamã akukrêx pix kukamã ajamaxpêr rãhã ho ra akĩnh nê ri apa. Anê.

Mẽ pahte Jejus kutêp tanhmã amnhĩ nhĩpêx to hã mẽ pamã karõ

Matêwre 24.42-43; Makre 13.32-37; Rukre 21.34-36; mãânên Wam Tesarõn 5.4-8

³⁵ Nhũm pre Jejus arĩ mẽ ahkre nê mẽ kãm:

—E na pa pre ra mẽ apê ixkôt mẽ apa ho apa xwÿnhjê mã tanhmã amnhĩ kukamã amnhĩ jarênh to. Ixtyk nê akupÿm ixtĩr nê ma akupÿm ixàpir hãmri nê mẽmo arĩgro hã akupÿn mẽ awÿr ixwÿrkja na pa pre ra mẽ amã ja hã amnhĩ jarê. Tã kwa kêr ka mẽ ixwakre kamã ixte mẽ amã ã amnhĩ jarênh anhÿrja mã ajamaxpêr tÿx pê ixkôt amnhĩ nhĩpêx rãhã ho ri apa.

³⁶⁻³⁸ —Te mẽ õ patrãw mã mẽ àpênh mex xwÿnhjaja kot amnhĩ nhĩpêx pyrãk o amnhĩ nhĩpêx o ri apa. Koja mẽ õ patrãw ma mẽ kot axpên mã wa rer mã xwÿnh pumunh mã ma nhÿhÿm tẽ. Hãmri nhũm kãm mẽ àpênh xwÿnhjaja arĩ kutêp òrkwÿ kamã hkrĩ. Axkãm hamak rom nê kutêp hkrĩ. Akupÿn htêm nhũm mẽ kot amnhĩ wÿr mar nê kãm kahê xà mênh tokyx anhÿr kaxyw arĩ kutêp òt kêt nê hkrĩ. Kôt ã kamãt nhũm akupÿn hpôx o htêm rÿ arĩgro hwÿr hpôx o htêm nhũm mẽ kot amnhĩ wÿr mar nê kãm kahê xà mênh tokyx anhÿr kaxyw kutêp òt kêt nê hkrĩ. Akupÿn hpôx ã omunh hãmri nê tokyx apkur kaxyw kãm õ nhĩpêx kaxyw. Kêr kê akupÿn pøj nê ã mẽ kot amnhĩ nhĩpêx

anhÿr ã mẽ omu nê hkĩnh nê. Tã kêr ka mẽ àpênh xwÿnhhtajê pyrã nê ixwakre kamã inhmã ajamaxpêr rãhã ho ri apa. Jao ixkamã ajamak o apa ho ixkôt amnhĩ nhĩpêx mex rãhã nê. No kot paj akupÿn mẽ awÿr wÿr hãmri ka mẽ àpênh xwÿnhjê pyrã nê inhmã mẽmoj nhôr kêt nê. Kêt pa kot paj mẽ õ patrãwta kurom mẽ amã mẽmoj mex gõ.

³⁹ —Na htem mẽ kêp àhkĩnh pymaj amnhĩ nhòrkwÿ jamãr rãhã ho pa.

⁴⁰ Ja pyrã nê mẽ ate akupÿn ixwÿrk xà hã arĩgro pumunh kêt jakamã kêr ka mẽ òrkwÿ nhô dônta pyrã nê ixkutêp axkãm ajamak rom rãhã nê ri apa. Jao tãm amnhĩ nhĩpêx rãhã nê. Anê.

Mẽ õ patrãw mã mẽ àpênh mex xwÿnhjê jarênh

Matêwre 24.45

⁴¹ Nhũm pre ã Jejus hkôt mẽ pa ho pa xwÿnhjê jahkre anê. Hãmri nhũm Simãw Pêtre kuma nê kãm:

—Kwa Pahihti. Xàn ka mẽ piitã mẽ kãm ã akapêr anê nà? Xà ãm mẽ papxipixjê mã? Anê.

⁴² Hãmri nhũm kãm:

—Nà ãm ixwakre kamã mẽ ate ixkôt tanhmã inhmã amnhĩ nhĩpêx to ho mẽ apa xwÿnh piitã mẽ amã na pa ã ixkapêr anê. Koja mẽ àpênh xwÿnhjê hõ õ patrãw mã àpênh mex o pa nhũm amnhĩ tã omu nê ma nhÿhÿm mõi kaxyw nê ìhkram mẽmoj piitã haxàr pa. Hãmri nê kãm: “E kêr ka ixwakre kamã inhmã inhòrkwÿ htãnopxa. Nê mẽ àpênh xwÿnhjê mã õ mex kê mẽ apkur mex o pa.” Anê. Koja ã kãm mẽmoj tã karõ anê hãmri nê kato nê ma nhÿhÿm mõi.

⁴³ Hãmri nhũm kãm àpênh mex xwÿnhhta wakre kamã kãm àpênh mex o pa. Jakamã nhũm õ patrãw akupÿn hpôx o mõi nhũm amnhĩ wÿr harênh ma nê hkĩnh nê. Nê mẽmoj tã amnhĩ tã kamã kahak kêt nê. Rÿ tee ri wakre kamã kãm àpênh punuj ã amnhĩ pumu nê tee amnhĩ kukamã hamaxpêr kêt nê. Kot wakre kamã kutêp àpênh mex jakamã akupÿn hpôx ã harênh ma nê hkĩnh nê.

⁴⁴ —Jakamã nhũm õ patrãwja akupÿn pøj nê kot kãm àpênh mex ã omu nê haxwÿja hkĩnh nê. Hãmri nê kot kãm hamãr o pa kaxyw kãm mẽmoj piitã ìhkram haxàr pa.

⁴⁵ Nom koja kãm àpênh xwýnhhta axtem nê wakre kamã kãm àpênh mex kêt nê. Nê tokyx akupÿn mör kêt ã hkamnhĩx nê wakre kamã kãm mē àpênh xwýnhjê htaak nê pipãnh pix nê mē kãm gô xành xwýnhjê kôt pix mã pa japêr.

⁴⁶ Hãmri nhũm õ patrãw haêr pê akupÿn pøj nê tee ri ã amnhĩ nhĩpêx anhÿr ã omu. Hãmri nê gryk tÿx nê tanhmã homnuj to. Hãmri nê kãm mē àpênh punuj xwýnhjê mē mē ho pimràatã amnhĩ nê mē hanor pa. Tã kêt ka mē ixwakre kamã ho mē urak kêt nê. Mē kurom ixkapêr kôt tãm amnhĩ nhĩpêx mex rãhã ho ri apa.

⁴⁷⁻⁴⁸ —Nê koja mēhõ kormã Tĩrtũm kapêr mar kêt nê htÿx ri tanhmã amnhĩ tomnuj to ho pa. Hã koja Tĩrtũm ja hã omu nê nhÿrmã kot amnhĩ tomnuj o pata mÿrapê tanhmã ho nhũm amnhĩ xà htÿx kamã hamak tũm xà kamã pa. Nom akrãnhmã amnhĩ xà kamã hamak o pa. Aa kot Tĩrtũm kapêr mar kêt jakamã koja ãm akrãnhmã amnhĩ xà kamã hamak o pa. Nom koja mēhõ kapêr mar mex tã ãm kuma nê hkôt amnhĩ nhĩpêx kêt nê. Nê xatã hirõp kuhê nê tanhmã amnhĩ tomnuj to. Hã koja Tĩrtũm tee ri ja hã omu nê nhÿrmã tanhmã homnuj tÿx to. Hãmri nhũm wantajê pyrã nê amnhĩ xà htÿx kamã hamak tũm xãta kamã pa ho pa nom mē kĩnhã amnhĩ xà htÿx kamã hamak rãhã ho pa. Anê.

Jejus kot nhÿrmã mē kot amnhĩ tomnuj xà ho hapêx ã harênh

Matêwre 10.34-36

⁴⁹ Nhũm Jejus arĩ hkôt mē pa ho mē pa xwýnhjê jahkre nê mē kãm:

—Nà ixte mē omnu xà piitã ho ijapêx par nê mē kot tanhmã amnhĩ tomnuj to piitã ho ijapêx par kaxyw na pa pre wrÿ. Tã ra ixte piitã ho ijapêx par o inhmör ronhÿx ja inhmã mex kumrêx. Nom kormã.

⁵⁰ Kot paj amnhĩ xà htÿx kãm ijamak rax o mē kot amnhĩ tomnuj o ijapêx o hkrax. Hãmri nê nhÿrmã ho ijapêx pa. Na pa ra ixtyk kaxyw ixte amnhĩ kã xà kamã ijamak kukamã ijamapêr o ra amnhĩ kamã ixkahak nê ri ixpa. Tã kot paj ja ho ijapêx pa nê ixkĩnh tÿx kumrêx. Anê.

Mê kot Jejus ã axpên kutã amnhĩ xunhwÿr ã mē harênh

Matêwre 10.21, 10.34-35

⁵¹ Nhũm Jejus arĩ mē ahkre nê mē kãm:

—Nê ra mē awÿr ixwryk tã koja mē piitã ixkukwak ri hamakêtkati nê àmnhĩx ri pa hkêt nê. Kormã. Koja mē akwÿjaja ixkapêr ma nê mē apyrã nê amnhĩ kaxyw ixkôt hamapêr. No nhũm mē akwÿjaja mē akĩnhã kuma nê ãm kuma. Hãmri nê ixtã tanhmã mē anhĩpêx to ka mē ixpyrã nê amnhĩ xà htÿx kamã ajamak o ri apa.

⁵² —Nê koja tanhmãn ixkre pyxi kamã mēmojaja ohtõn pa. Nhũm war axkrutre nê ixkôt amnhĩ xunhwÿr nhũm mē axkrutepxi nê ixkwÿm ri amnhĩ nhĩpêx nê ixkutã amnhĩ xunhwÿr.

⁵³ Nhũm mē hipêxã hkra my mē wa ixtã axpên kutã amnhĩ xunhwÿr. Nhũm mē katorxã hkra ni mē wa ixtã axpên kutã amnhĩ xunhwÿr. Nhũm mē wÿj umregêx mē wa haxwÿja ixtã axpên kutã amnhĩ xunhwÿr. Koja mē ã ixtã axpên nhĩpêx anhÿr o pa. Anê.

Mê pahte amnhĩ tomnuj kaga nê Tĩrtũm kôt amnhĩ nhĩpêx ã mē pamã karõ

Matêwre 5.25-26, 16.2-4

⁵⁴ Nhũm Jejus hpãnhã mē kot hkôt amnhĩ xunhwÿr kêt xwýnhjê mã kapêr nê mē kãm:

—Kwa mē inhma mē ate ixkôt amnhĩ xunhwÿr kêt xwýnhjaja. Na htem kaxkwa kamã na htyk rax pumu nê na wrÿk mã hamapêr kurê kumrêx. Hãmri nhũm na wrÿ.

⁵⁵ Nê amgrã pê kôk krihkritja nhũm htem kuma nê arĩgro htÿx mã hamapêr kurê kumrêx. Hãmri nhũm arĩgro htÿx nê.

⁵⁶⁻⁵⁷ ã na ka htem aprĩ hã mēmoj pumunh kôt mēmoj kukamã ajamapêr mex o ri apa anê. Nom nhũm Tĩrtũmja mē ate tanhmã amnhĩ tomnuj to mÿrapê tanhmã mē ato kaxyw nhũm mē ate ja hã amnhĩ pumunh tã tokyx amnhĩ tomnuj kaga hkêt nê.

⁵⁸⁻⁵⁹ —Na htem tanhmã axpên tomnuj to. Hãmri nhũm kot tanhmã war axpên to xwýnhhta pahi hwÿr htêm nê kãm tanhmã kot ho xwýnhhta jarênh kaxyw. Hãmri nhũm kamã gryk xwýnhhta kot pahi mã harênh kaxyw ã harênh ma nê hãmri tokyx hwÿr tẽ nê wa tãm akupÿm axpên xãm. Na htem ã amnhĩ nhĩpêx anê. Pahi kot ja mar nê

tanhmã mẽ ho pymaj na htem ã amnhĩ nhĩpêx anê nê tokyx akupÿm tãm axpên xunhwÿ. No koja mẽ ã amnhĩ nhĩpêx anhÿr kêt nê nhũm pahija mẽ harênh ma hãmri nê tanhmã kot hõ ho xwÿnhhta pynê nê haxà nhũm tee kãm kator prãm o hkrĩ kaprÿ. Hãmri nê tanhmã amnhĩ to nê amnhĩ pãnhã kãm amnhĩ rer pa nhũm pahihija kormã mẽ kãm anê nhũm mẽ kãm ure nhũm kato. Ja pyrã nê kêr ka mẽ Tĩrtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nê hkõt amnhĩ nhĩpêx rãhã ho ri apa. Anê.

13

¹ Tã nhũm axtem mẽ hkwÿjaja Jejus wÿr mra nê kãm:

—Pa? Kwa xàn ka ra Garirej nhõ xwÿnh kwÿjê jarênh ma nà? Na xep prem Jerujarê hwÿr mra nê ham mẽ kot Tĩrtũm mã amnhĩ jarênh xà hã ixkre kamã kãm amnhĩ jarênh kaxyw kormã kãm mry hpar o kuhê nhũm xep pahihiti Piratja mẽ harênh ma nê mẽ hã amÿnê nhũm mẽ ma mẽ hwÿr mra nê mẽ himex pa. Kwa mãn mẽ kot amnhĩ tomnuj tÿx o mẽ pajakrenh ã na prem mẽ himex nã? Anê.

²⁻³ Hãmri nhũm mẽ kãm:

—Nà mẽ kot amnhĩ tomnuj tÿx mÿrapê mẽ kot mẽ himex kêt. Mẽ apiitã mẽ ate amnhĩ tomnuj o axpên pyrãk kênã. Tã kot ka mẽ amnhĩ tomnuj kaga nê Tĩrtũm kõt amnhĩ xunhwÿr kêt hã kot ka mẽ nhÿrmã ty hãmri nê õ krĩ hwÿr axàpir kêt nê.

⁴ No Jerujarê kamã ixkre prêkja mẽ kot kãm “Siroe” anhÿr xwÿnhhta mẽ ho 18 nê mẽ hipy htem nê mẽ himex par xwÿnhjaja. Xà mẽ kot amnhĩ tomnuj tÿx mÿrapê na prem ty? Xà mẽ kot amnhĩ tomnuj tÿx o Jerujarê kamã arĩ mẽ htĩr xwÿnhjê jakrenh?

⁵ Nà kot anhÿr kêt. Mẽ apiitã mẽ ate amnhĩ tomnuj o axpên pyrãk. Jakamã kot kaj mẽ ã amnhĩ nhĩpêx anhÿr kaga nê Tĩrtũm kõt amnhĩ nhĩpêx kêt nê hãmri nê mẽ urãk nê nhÿrmã ty hãmri nê Tĩrtũm nhõ krĩ hwÿr axàpir kêt nê. Jakamã kwa mẽ ixkapêr ma nê kãm ajamaxpêr tÿx rãhã ho ri apa. Anê.

Tĩrtũm kot mẽ pakamã gryk tokyx anhÿr kêt ã harênh
Rõmãn 2.4; Sikũn Pêtre 3.8-9

⁶ Tã nhũm Jejus kê axte tanhmã mẽ ahkre hto. Nê Tĩrtũm kot tanhmã mẽ panhĩpêx to hã kuxi nê mẽ kãm awjarê nê mẽ kãm:

—Koja hpur nhõ dõn mẽmo pãr kre nhũm ra hprêk mex nê ô mã tãm nê. Tã aa ô hkêt ã ra hã amgrã axkrunêpxi.

⁷ Hãmri nhũm kot hkre xwÿnhja tee ri omu nê kãm àpênh xwÿnh wÿr tẽ nê kãm: “E kwa ma tẽ nê mẽmo pãr mũj krãhta nê amê. Mexiti hã. Ra ô hkêt ã amgrã axkrunêpxi kênã. Koja pêr aa ô hkêt nê. Mo kaxyw kot kêt ô hkêt tã ô mex xwÿnh kaêx ã mẽ kêp àmnãr o kuhê? E hwÿr tẽ nê krãhta nê amê.” Anê.

⁸⁻⁹ Hãmri nhũm tee ri kot kãm hã karõja ma nê kãm: “Kwa nà kormã. Pa kop ixãmnhix pãr krax ã mẽmo japõk kwÿ kapĩ nê kop hamã mãn. Kê axte hã amgrã pyxi nê hapêx nê ô hkêt pa kormã krãhta nê kumê. Koja amgrã ja kamã amã ô japêr ka omu nê akĩnh nê.” Anê. ã mẽ ujarênh kot anhÿr. Anê.

Nhũm Jejus ã mẽ kãm ujarênh anê. Mẽ kot amnhĩ tomnuj tÿx o pa htã nhũm Tĩrtũm kot pur nhõ dõn mã àpênh xwÿnhhta pyrã nê mẽ kamã gryk tokyx anhÿr kêt ã nhũm ã hã kuxi nê mẽ kãm ujarênh anê.

Jejus kot arĩgromnu hã mēhõ ho mex ã harênh

Rukre 14.1-6; Juãw 5.16-17

¹⁰ Tã nhũm mẽ õ arĩgromnu pê sap kato nhũm Jejus Ijaew pikuprõnh xà hã ixkre hwÿr axà nê kamã Tĩrtũm kapêr o mẽ ahkre ho nhÿ.

¹¹ Nhũm kamã mēhõ ni hikõt rãhã nê pa xwÿnhja nhÿ. Na pre ra amnepêm mẽkarõmnuti tanhmã ho nhũm katàt nê ri mrrar kêt kumrêx. ãm hikõt rãhã nê ri pa hã ra hã amgrã pê 18.

¹²⁻¹³ Hãmri nhũm Jejus omu nê amnhĩ wÿr kãm hpa ho apê nhũm hwÿr tẽ nhũm hã ìhkra xi nê kãm:

—E na ka ra akupÿm amex.

Anê nhũm akupÿm katàt nê mex kurê kumrêx. Hãmri nê amnhĩ pumu nê hkĩnh tÿx nê Tĩrtũm mã mex o mex ã harênh o xa.

¹⁴ Nom nhũm mẽ pikuprõnh xà hã ixkre jamãr xwÿnh maatija tee ri ja hã omu hãmri nê Jejus kamã gryk tÿx nê. Mẽ õ arĩgromnu hã akupÿm kot ho mex jakamã

nhũm kamã gryk tỳx nẽ. Hãmri nẽ mẽ pikuprõnh xwỳnhjê mã kãm:

—Tk. Kwa semãn ã mẽ àpênh xà hã arĩgro xohtôô. Kêp 6. Kot kaj mẽ mãmri tòmĩk nẽ sikũn nẽ tês nẽ kwata nẽ kĩa nẽ sêsta ja ã ka mẽ apê rỳ mãmri Jejus wỳr amnhĩ to mra kê akupỹm tanhmã mẽ ato mex to. No sap ã kwari. Sap kêp mẽ pahpê Ijaew nhõ arĩgromnu kênã. Na pu htem hã paxàpênh kêt nẽ. Jakamã arĩgro ja hã kot akupỹm mẽ ato mexja mex kêt. Anẽ.

¹⁵ Hãmri nhũm Jejus kuma nẽ kãm:

—Kwa xà mẽ kajaja na ka htem sap ã axàpênh kêt nẽ apa? Nà mẽ ate hã axàpênh kênã. Xàn ka htem sap ã akrit kawar nẽ akrit môx ma mẽ ho apa nẽ mẽ hkõm kêt nẽ? Nà na ka htem ma mẽ ho apa nhũm htem ixkõ. Mot ka kêt mẽ ri axtem nẽ mẽ kot sap ã tanhmã amnhĩ toja nẽ mẽ kãm akapêr?

¹⁶ Ixte ni ho mex xwỳnhhta mẽ pahpyrà nẽ kêp finat Apraãw kagrõt nyw õ na. Nhũm pre Satanasti te kot kãm ê nẽ ri o pa pyrãk o hipêx jakamã nhũm ã hã hikõt nẽ ri paja ã ra hã amgrà kêp 18. Tã pa nê te ixte Satanasti ho ixkrihkrit nẽ ixte kêp utar pyrãk o hipêx nẽ akupỹm ho mex. Mo kot pa kêt ri omu nẽ ãm omu nẽ arĩgromnu hã ho mex kêt nẽ? Nà ixte arĩgro piitã hã akupỹm mẽ ho mex o ixpa xwỳnh kênã. Anẽ.

¹⁷ Hãmri nhũm mẽ kot kãm kapêr mar prãm kêt xwỳnhjaja kuma nẽ kamã gryk nẽ. Te ho mēhprijê mã mẽ hamaxpêr nhõr pyrãk o mẽ hipêx pyrãk jakamã nhũm mẽ amnhĩ tã kuma nẽ kamã gryk nẽ. No nhũm mẽ kot ra ã amnhĩ nhĩpêx anhỹr o pa hã omunh xwỳnhjaja ja hã omu nẽ kãm hkĩnh nẽ.

Jejus te kot mẽmo hy pyrãk ã harênh
Matêwre 13.31-33; Makre 4.30-32

¹⁸⁻¹⁹ Nhũm Jejus arĩ mẽ ahkre nẽ tanhmã mẽ kãm amnhĩ tã ujarênh to nẽ mẽ kãm:

—Nẽ Tĩrtũm kot mẽ awỳr ixte mẽ ato amnhĩptar kaxyw inhmênh ã ijarênhja. Te ixte mẽmo hy pixire pyrãk. Na htem hkre nhũm higrõt. Nẽ gaa nẽ rĩ hprêk. Hãmri nẽ pa anhrã nhũm kuwênhre hwỳr mra nẽ hô pytĩ kamã amnhĩm haê nhĩpêx. Tã kot paj nhỹrmã mẽmo hy jarênhhta pyrã nẽ ixpaxi

htã kot paj pika piitã hkõt mẽ ho amnhĩpta nẽ mẽ omunh mex rãhã ho ri ixpa. Anẽ.

Jejus te kot pãwti kaxkrit xà pyrãk ã harênh

Matêwre 13.33-35

²⁰⁻²¹ Nhũm Jejus arĩ mẽ ahkre ho xa. Nom hprĩ hã amnhĩ jarênh kêt nẽ. ãm amnhĩ tã kuxi nẽ mẽ kãm awjarê nẽ mẽ kãm:

—E kot pa hpãnhã tanhmã mẽ amã pãwti kaxkrit xà jarênh to. Koja mēnijê hõ ãm hkwy ho grire nẽ kupy nẽ kaxyw mẽmo xõm kãm kumê nẽ ho pihkàr pa nẽ ho pãwti nhĩpêx. Nhũm kaxkrit xàja grire htã pãwti piitã ho kaxkrit mex nẽ. Ja pyrã nẽ kot paj ixpyxi htã koja mẽ nhỹrmã pika piitã hkõt ixkõt amnhĩ nhĩpêx mex o pa. Anẽ.

Nhũm pre ã Jejus mẽ kãm amnhĩ tã pãw kaxkrit xàja xi nẽ harênh anẽ.

Kaxkwa hwỳr hakwa kre kahê xà jarênh
Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pẽ Jerujarê hwỳr krĩ hkõt ri mẽ ahkre ho mẽ hkõt ri pa.

²³ Hãmri nhũm mēhõ myja hwỳr tẽ nẽ mẽmoj tã hkukja nẽ kãm:

—Pa. Kwa inhmã mẽmoj jarê. Xà koja mẽ ohtõ nẽ nhỹrmã Tĩrtũm ri htĩr tũm nẽ papa ho nà koja mẽ grêre? Anẽ.

²⁴ Hãmri nhũm kuma nẽ mẽ kot mar o kuhê xwỳnh piitã kãm:

—Nà mẽ kot Tĩrtũm kõt amnhĩ xunhwỳr xwỳnhjê pix koja mẽ õ krĩ hwỳr agjê. Wỳr mẽ gjêx xàja ãm pixii nom koja mẽ ohtõ nẽ kãm hkõt wỳr gjêx prãm kêt nẽ. Na htem te hwỳr mẽ gjêx xà hõ japêr o pa pyrãk. Nom pa na te ixpê hwỳr mẽ gjêx xà pixita pyrãk. Jakamã kwa kêr ka mẽ tokyx ixkõt amnhĩ xunhwỳr tỳx nẽ ixkõt ri amnhĩ nhĩpêx o ri apa. Na htem ohtõ nẽ kãm ixkõt amnhĩ xunhwỳr prãm kêt nẽ. Ixte amnhĩ nhĩpêxja mẽ kêp hihtỳx jakamã nhũm htem ixkaga.

²⁵ —Tã koja mẽ nhỹrmã ty nẽ tee ri kãm Tĩrtũm wỳr gjêx prãm kaprỳ. Kot paj te mẽ kêp kahê pyrãk o mẽ hipêx nhũm mẽ kapõt ã kuhê nẽ tee ri amnhĩ tã ixpumu nẽ inhmã: “Kwa mẽ inhmã kahê xà mẽ pa mẽ awỳr agjê Pahihtĩ.” Anẽ. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurê.” Anẽ.

²⁶ —Hãmri nhũm mẽ tee ri inhma nẽ inhmã: “Kwa nà ra ate mẽ ixpumunh mex

kênã. Na ka pre mẽ inhõ krĩ kamã mẽ ijahkre ho ri apa nẽ mẽ ixkutã axàpkur o ri apa.” Anẽ.

²⁷ Hãmri pa mẽ kãm: “Tk. Ixte mẽ akutã ixàpkur tã mẽ ate ixkõt amnhĩ xunhwýyẽre hã. Jakamã e mẽ ma mra. Mẽ ate amnhĩ tomnuj pix o mẽ apa xwýnh jakamã kot kaj mẽ ixwýr agjêx kêt nẽ.” Anẽ. Kot paj ã mẽ kãm ixkapêr anẽ.

²⁸ —Hãmri nhũm mẽ amým ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nẽ ri mẽ inhmex nẽ ixpa hã amým mẽ ixpumunh o kuhê. Apraãw nẽ Ijak nẽ Jako nẽ Tĩrtũm kapêr jarênh o mẽ pa xwýnh piitã nhũm mẽ amým mẽ ixkĩnh nẽ mẽ ixàpkur mex ã mẽ ixpumunh o kuhê. Hãmri nẽ tee ri mẽ ixwýr kãm gjêx prãm kaprý nẽ hkaprĩ nẽ mur nẽ amnhĩ krã hkĩ jarê nẽ amnhĩ kà nhê nẽ amnhĩ kamã gryk tỳx nẽ. No ãm tee ri amnhĩ kamã gryk kaprý. Æ koja mẽ amnhĩ nhĩpêx anẽ.

²⁹ Nom Tĩrtũm kõt mẽ kot amnhĩ xunhwýr xwýnhjaja koja mẽ kurom pika piitã kurũm axpên wýr akuprõ nẽ Tĩrtũm wýr agjê nẽ kuri hkĩnh nẽ apkur mex o hkrĩ. Mẽ akwýjaja nẽ pika piitã kurũm hohtô rax nẽ axpên wýr akuprõ nẽ hwýr agjê nẽ kuri apkur mex nẽ hkĩnh nẽ pa ho pa.

³⁰ —Mẽ apê Ijaewjaja mẽ amã Ijaew kêt xwýnhjê hprãm nõkati htã koja mẽ hkwyjaja mẽ akwýjê rom Tĩrtũm ri axpên wýr akuprõ nẽ hkĩnh nẽ axpên kutã apkur mex o hkrĩ. Jakamã kwa kot kaj mẽ urak nẽ amã Tĩrtũm mẽ wa ixwýr agjêx prãm hã kot kaj mẽ ixkõt amnhĩ xunhwý nẽ ixkapêr kõt amnhĩ nhĩpêx mex o ri apa. Anẽ.

Jejus kãm Jerujarê nhõ xwýnhjê japê hã harênh

Matêwre 23.37-39

³¹ Hãmri nhũm Parijew nhõ xwýnh kwýjaja Jesus wýr mra nẽ kãm:

—Pa. E ot pa mẽ awýr mra. Kwa kêt ka ma Jerujarê hwýr amõr kêt nẽ. Na ra mẽ hkĩnh wýr pahi Eroxa pøj nẽ kot tanhmã ato kaxyw atã amnhĩ jarê pa mẽ kuma. Jakamã kwa mẽ hwýr amõr kêt nẽ. Nhãm krĩ hõ hwýr mãn mõ. Anẽ.

³² Hãmri nhũm mẽ kuma nẽ mẽ kãm:

—Tk. Nà kot pa umaj nhãm krĩ hõ hwýr inhmõr kêt nẽ. Kot paj ma mẽ hkwyjê nẽ

mêkarõmnuti japôx pê mẽ hkwyjê ho mex o ma hwýr mõ. Pahi Eroxa kãm mẽ hpar pix prãm. E mẽ mãmri ma akupým hwýr mra nẽ ã kãm ixkapêr jarênh anẽ. No kot paj umaj nhỹhým ixprõt nẽ ixtêm nẽ kêt ixpimxur kêt nẽ. Ra ixte õ krĩ hwýr inhno-jarê kênã. Anẽ.

³³ Hãmri nẽ mẽ kot mar xwýnhjê mã amnhĩ jarê nẽ mẽ kãm:

—Kot paj tanhmã amnhĩ nhĩpêx to ho ri ixpa rãhã Jerujarê hwýr mõn pøj nẽ kamã ty. Kamã na htem mẽ kot Tĩrtũm nhỹ hã kapêr jarênh xwýnhjê nhĩmex. Tã hwýr kot paj mõ. Anẽ.

Nhũm pre ã Jesus mẽ kãm amnhĩ jarênh anẽ.

³⁴ Hãmri nẽ te ra kot Jerujarê nhõ xwýnhjê pumunh o ãm nẽ mẽ kãm kapêr pyrak o kapêr nẽ mẽ kãm:

—Hêxta waa nẽ mẽ apê Jerujarê nhõ xwýnhjaja. Tĩrtũmja xatã mẽ awýr ý hã kapêr jarênh o mẽ pa xwýnhjê rênh tã ka mẽ kapêr mar kêt nẽ. Nẽ axtem nẽ kên o mẽ htao o mẽ himex o apa. Na ka htem ã amnhĩ tomnuj o apa anẽ. Tã arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwý pyrak o na pa inhmã mẽ anhĩpêx prãm tã ka mẽ apê ixprãm nõkati nẽ ixkaga.

³⁵ Mýrapê koja Tĩrtũm mẽ anhõ krĩ jamãr kêt nẽ. Kot paj tokyx ty nẽ mẽ apiitã mẽ are nẽ ma akupým api ka mẽ axte ixpumunh kêt nẽ. Æm akupýn ixwrýk xã hã arĩgrota pix ã koja mẽ akwýjaja mẽ amýr pê krĩ ja hwýr ixwrýk kãm ixpumu. Hãmri nẽ mẽ akurom ixpumu nẽ hkĩnh tỳx nẽ. Nẽ tã ixkõt amnhĩ xunhwý nẽ axpên mã ijarênh o:

E ota Tĩrtũm kot mẽ pahwýr mênh xwýnhhta pøj. Nà ãm hãmri na mẽ pahwýr wrý. Na mex kumrêx. Anẽ.

14

Jejus kot axte arĩgromnu hã mēhõ ho mex ã harênh

Rukre 13.10-17

¹ Tã nhũm sap nhũm Jesus ma Parijew nhõ xwýnhjê krãhtũm kutã apkur kaxyw õrkwý hwýr tẽ. Hãmri nhũm mẽ wa hã htu rax nẽ Jesus apkur ã tânopxar o kuhê. Mẽ kot amnhĩ nhĩpêx kwým ri tanhmã amnhĩ nhĩpêx to nhũm mẽ kot hã omunh nẽ ra hã

àmnhênh kaxyw nhũm mẽ kuri htãnopxar o kuhê.

² Nhũm ixkreja kamã mẽhõ my hte hikot xwýnh mẽ kuri xa.

³ Hãmri nhũm Jejus omu nẽ hã Parijew nhõ xwýnhjê mẽ Tĩrtũm kapêr tũm o mẽ ahkre xwýnhjê kukja nẽ mẽ kãm:

—Kwa mẽ inhmã mẽmoj jarẽ. Jarãhã na mẽ panhõ arĩgromnu pẽ sap. Tanhmã na pre finat Mojesja Tĩrtũm nhỹ hã mẽ pahte sap ã tanhmã amnhĩ nhĩpêx to hã mẽ pamã karõ hto? Xà kot puj mẽ akupỹm mẽ ho mex nà? Kot puj mẽ ãm mẽ omu nẽ akupỹm mẽ ho mex kêt nẽ? E mẽ atõ inhmã ja jarẽ. Anẽ.

⁴ Hãmri nhũm mẽ kuma nẽ tanhmã kutã kãm nẽ hkêt nẽ. ãm akryk mar o kuhê. Mẽ kot tanhmã kãm nẽ nhũm kot ta pãnhã mẽ kãm tanhmã nẽ pymaj nhũm mẽ akryk mar o kuhê nẽ tanhmã kutã kãm nẽ hkêt nẽ. Hãmri nhũm tee ri mẽ omu hãmri nẽ myja ã ãhkra xi nẽ akupỹm ho mex. Hãmri nẽ hano nhũm ma akupỹm mex nẽ hkĩnh nẽ ma tẽ.

⁵ Hãmri nhũm Jejus mẽ kãm:

—E mẽ inhma. Xà koja mẽ akra sap ã mẽ apê ahkrehti xupỹm kãm tẽm ka mẽ ãm omu nẽ arĩgro mex jamãr pẽ tokyx ho axàpir kêt nẽ? Nà kot kaj mẽ ho axàpir kurê kumrêx. Rỳ koja akrit moux gyw mã axà xat ka mẽ omu nẽ ãm omu nẽ arĩgro mex jamãr pẽ tokyx hkaxàr kêt nẽ? Nà kot kaj mẽ hkaxàr kurê kumrêx. Na htem sap ã tanhmã mẽ ho mex to ho pa. Mẽ panhõ arĩgromnu htã pu htem hã tanhmã mẽ ho mex to. Jakamã na pa ã hã myta ho mex kurê kumrêx anẽ nẽ ri arĩgro mex jamãr kêt nẽ. Anẽ.

⁶ Nhũm pre ã Jejus mẽ kãm amnhĩ jarênh anẽ nhũm mẽ kuma nom kutã kãm mẽmoj jarênh kêt nẽ. Ra kot akupỹm ho mex jakamã nhũm mẽ tanhmã hã kãm nẽ hkêt nẽ kuhê.

Mẽ pahte amnhĩ to hkryre hã mẽ pa-jarênh

Matêwre 23.6-14; Rukre 6.32-36; mããnẽn Xiakre 4.10; Wam Pêtre 5.5-6

⁷ Hãmri nhũm mẽ apkur kaxyw mẽ hkrĩ xà hã hkrĩ hpa. Nhũm mẽ hkwýjaja hkwýjê pẽ amnhĩ to wa nẽ mẽ hkrĩ xà mex kãm hkrĩ hpa. Hãmri nhũm Jejus ja hã mẽ omunh o xa nẽ axte mẽ kãm mẽmoj jarẽ. No

ãm mẽmoj tã kuxi nẽ mẽ kãm awjarẽ nẽ mẽ kãm:

⁸—Nà koja mẽ axpẽn mã mẽhõ rer kaxyw nẽ amnhĩ wýr mẽ atã karõ. Mẽ ate kutã axàpkur kaxyw. Hãmri kêt ka mẽ hwýr mra nẽ axàpkur kaxyw nẽ kupĩp kãm akrĩ kurê kumrêx. No kot kaj mẽ kêp amnhĩ to wa nẽ mẽ hkrĩ xà mex pytã nẽ hã akrĩ nhũm ra kot amnhĩ to rax xwýnhjê hõja hapu hã mẽ akõt tẽn axã.

⁹ Hãmri nhũm ixkre nhõ dõn kot amnhĩ wýr mẽ awýr xwýnhta mẽ hkrĩ xà mexta ã mẽ awý nẽ mẽ amã: “Kwa mẽ atõ kãnhmã xa nẽ kãm mẽ hkrĩ xà kaprã.” Anẽ. Hãmri ka nhãm xa nẽ kãm anhýr xàta gõ. Hãmri nẽ apijaãm kãm hpãnhã kupĩp kãm nhỹ.

¹⁰ Ja pymaj kêt ka mẽ kupĩp kãm akrĩ kurê kumrêx. Kê ixkre nhõ dõnja tee ri ja hã mẽ apumu nẽ mẽ amã: “Tk. Kwa ixkrãmnhwýjaja. Mẽ kupĩp kãm akrĩ hkêt nẽ. Kwa mẽ mra nẽ jar mẽ hkrĩ xà mex ã mãn akrĩ.” Anẽ hãmri nhũm ja mẽ amã mex nẽ. Nhũm mẽ piitã kot mẽ ato mex ã mẽ atã omu ka mẽ ajaxwýja amnhĩ tã omu nẽ akĩnh nẽ ajamakêtkati nẽ akrĩ.

¹¹—Nẽ koja mẽhõ te amnhĩ to rax o hkwýjê jakrenh pyrãk o amnhĩ nhĩpêx o ri pa hãmri nhũm Tĩrtũm ja hã omu nẽ tanhmã hã ho. Hãmri nhũm ra amnhĩ to grire hã amnhĩ pumunh o ri pa nẽ rĩ amnhĩ pumu. Nom koja mẽhõ amnhĩ to rax o hkwýjê jakrenh pyrãk o amnhĩ nhĩpêx o ri pa hkêt nhũm Tĩrtũm ja hã omu hãmri nẽ tãm amnhĩm kot amnhĩ to rax xwýnh ã harẽ. Anẽ.

Mẽ pahte mẽ kêp amrakati xwýnhjê ho mex ã mẽ pamã karõ

¹² Nhũm pre ã Jejus mẽ ahkre anẽ hãmri nẽ hpãnhã mẽ apkur xà hã ixkre nhõ dõnja mã kapêr nẽ kãm:

—Nà na ka hte amnhĩ wýr akwýjê pix wý. Atõjê hwý nẽ akrãmnhwýjê hwý. Nẽ mẽ hikãxpore rũnh xwýnhjê hwý. Nom nhỹrmã mẽ kot amnhĩ xwar amnhĩ nhõrkwý hwýr awýr pix kaxyw na ka hte ã amnhĩ wýr mẽ hwýr anẽ.

¹³ No kêt amnhĩ wýr mẽ no kre xwýnhjê mãn wý. Nẽ mẽ hyk o mẽ pa xwýnhjê mãn wý. Nẽ mẽ hkrã pipãnh puro xwýnhjê mãn wý. Nẽ mẽ hpigêx tỳx xwýnhjê mãn wý. Nẽ mẽ hirot nẽ àpênh kêt xwýnhjê mãn wý. Kêr

ka amnhĩ wÿr jajê mǎn wÿ kē mē awÿr mra nē akutǎ apku.

14 Mo mē kot amnhĩ xwar awÿr kaxyw mē ō mēmoj? Mē kēp amrakati. Tǎ kot kaj mǎmrĩ amnhĩ wÿr mē awÿ nhũm Tĩrtũm mē hǎ apumu hǎmri nē nhÿrmǎ kot akupÿm mē ho htĩr xǎ hǎ arĩgrota ǎ mē hǎ amǎ mēmoj mex gō nē ato mex nē. Hǎmri ka akĩnh nē. Anē.

Tĩrtũm kutǎ mē paxǎpkur xǎ maati jarēnh Matēwre 8.11, 25.1-10, 26.29; mǎǎnēn Apokarip 19.9

15 Hǎmri nhũm mē apkur kaxyw hkrĩ pa nhũm Jejus nhĩhkō hǎ mē apkur o mē krĩ xwÿnhjē hōja tanhmǎ Jejus mǎ kapēr to nē kām:

—Hēxta waa nē. Kot puj mē nhÿrmǎ Tĩrtũm nhō krĩ hwÿr api nē kutǎ paxǎpkur o pahkrĩ nē pahkĩnh tÿx kumrēx. Anē.

16 Hǎmri nhũm kuma nē kē axte mē ahkre. Mē kot Tĩrtũm kutǎ apkur kaxyw kot amnhĩ wÿr mē hwÿrta ǎ nhũm mē ahkre. No ǎm hǎ kuxi nē tanhmǎ mē kām ujarēnh to nē mē kām:

—Koja mēhō amnhĩ wÿr mē ho ohtō nē mē kot kutǎ mē apkur mex kaxyw mē kuwÿ.

17 Hǎmri nē mē hwÿr kām àpēnh xwÿnh mē nē kām: “E ma tē nē mē kām awjarē kē mē tokyx mra pa mē apku.” Anē.

18 Hǎmri nhũm kuma nē ma mē hwÿr mē kām ujarēnh o tē. Hǎmri nē wamta mǎ anē nhũm kuma hǎmri nē hitōt nē kām: “Nǎ kot paj hwÿr ixtēm kēt nē. Na pa ham amnhĩm pika hkwÿ japrō. Jakamǎ kot paj ma hwÿr tē nē ixprĩ hǎ omu mǎn. Kwa kēr ka kām ijarē kē ixte tanhmǎ hǎ nē xǎ hkōt ǎ ixte amnhĩ nhĩpēx anhÿrja mǎ hamaxpēr kēt nē.” Anē.

19 —Hǎmri nhũm kuma nē hpǎnhǎ nhǎm ja wÿr tē nē kām awjarē nhũm kuma nē haxwÿja hitōt nē kām: “Nǎ kot paj hwÿr ixtēm kēt nē. Na pa ham amnhĩm mōx o 10 nē haprō. Jakamǎ kot paj ma hwÿr tē nē ixprĩ hǎ ri omu mǎn. Kwa kēr ka kām ijarē kē tee ri tanhmǎ hamaxpēr to hkēt nē. Ixte tanhmǎ hǎ nē xǎ hkōt ǎ ixte amnhĩ nhĩpēx anhÿr kēt.” Anē.

20 —Hǎmri nhũm kuma nē hpǎnhǎ ma ihōta wÿr tē nē kām awjarē nhũm kuma nē haxwÿja hitōt nē kām: “Nǎ kot pa hwÿr

ixtēm kēt nē. Na pa kormǎ ham ixprō. Kormǎ ixprō nyw nē inhmǎ rer prǎm kēt jakamǎ kot paj ma hwÿr ixtēm kēt nē.” Anē.

21 —Hǎmri nhũm kām àpēnh xwÿnhta tee ri mē kuma nē awjanǎ nē ma akupÿm tē. Kot ma mē hwÿr mēnh xwÿnhta wÿr ma akupÿm tē nē kām mē harē. Hǎmri nhũm tee ri mē harēnh ma nē mē kamǎ gryk nē. Hǎmri nē hpǎnhǎ mē kēp amrakati xwÿnhjē hwÿr kām àpēnh xwÿnhta mē. Mē hkrǎ pipǎnh puro xwÿnhjē hwÿr kumē. Nē mē hpigēx tÿx xwÿnhjē hwÿr kumē. Nē mē hīrot nē àpēnh hkēt xwÿnhjē hwÿr kumē nhũm ma mē kām ujarēnh o tē. Hǎmri nē amnhĩ kōt mē kuwÿ nhũm mē kuma nē wamtajē rom hkōt mrar kurē kumrēx. Hǎmri nē agjē nē apkur kaxyw mē hkrĩ xǎ kamǎ hkrĩ hpa.

22 Hǎmri nhũm kām àpēnh xwÿnhja ō patrǎw wÿr tē nē kām mē harē nē kām: “E ate mē hǎ karō xǎta kōt na mē ra hkrĩ hpa htǎ arĩ mē hkrĩ xǎ hkwÿ hkaprÿ.” Anē.

23 —Hǎmri nhũm kuma nē kām: “Hēxta waa nē. Kēt ǎm mē hkrĩ xǎta hipu mex ronhÿx pa omu nē ixkĩnh nē. No ǎm kormǎ piitǎ hipu hkēt. Kwa ma krĩ pu hǎ ri mē hapēr o mra. Nē nhÿri mē hkwÿjē pumu nē mē haprō nē man amnhĩ kōt mē o mra kē mē hkrĩxǎ ho hipu hpa.

24 No kēt wam ixte amnhĩ wÿr mē hwÿr xwÿnhtaja. Mē hitōt xwÿnhjaja kot paj axte amnhĩ wÿr mē hwÿr kēt nē.” Anē. ǎ mē ujarēnh kot anhÿr. Na hte ǎ Tĩrtũm amnhĩ wÿr mē piitǎ mē hwÿr anē. Anē.

Mē pamǎ Jejus kĩnh tÿx ǎ mē pamǎ karō Matēwre 10.37-38; Makre 8.34; Rukre 9.23-25; Juǎw 12.26

25 Tǎ nhũm Jejus mē ōrkwÿ rũm kato nē kormǎ Jerujarē hwÿr mō nhũm mē hohtō rax nē hkōt mō. Hǎmri nhũm Jejus xa nē mē ho hakēx nē mē omu nē mē kām:

26 —E kot ka mē atō amǎ ixkōt amnhĩ xǎm prǎm nē ǎ amnhĩ nhĩpēx anē. Nē amǎ atō nē atōx nē anhĩpēxǎ nē akatorxǎ japē htÿx tǎ kēr ka amǎ ixkĩnh tÿx o wa mē hakrenh pa. Nē amǎ aprō nē akrajē japē htÿx tǎ kēr ka amǎ ixkĩnh tÿx o wa mē piitǎ mē hakrenh pa. Nē amǎ ixkĩnh tÿx o amǎ amnhĩ japē jakre. Kēr ka mē atō ixkōt amnhĩ xǎm kaxyw nē ǎ amnhĩ nhĩpēx anē.

27 —Koja mẽ xipĩ pa mẽ anê ty. Tã mẽ ate ixkôt amnhĩ nhĩpêx o mẽ apa xwýnhjaja. Koja mẽ ixtã mẽ apar mã tã kêr ka mẽ amã ixkĩnh tỳx o mẽ umaj ixkaga hkêt nê. Kwâr mẽ mãmri tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xã kamã ajamak kêr nê atĩr tũm nê amex rãhã apa ho apa. Nom kot kaj mẽ ixkĩnhã jar pika ja kamã amã amex nê apa hprãm xaj ixkaga hãmri nê nhỹrmã wa ixri atĩr tũm nê apa hkêt nê. Anê.

Mẽ pahte amnhĩ kukamã pajamaxpêr mex ã mẽ pamã karõ

28 Nhũm Jejus arĩ mẽ kãm kapêr nê mẽ kãm:

—Kwa kêr ka mẽ ixkôt amnhĩ xunhwýr kaxyw nê amnhĩ kukamã ajamaxpêr mex nê. Na htem amnhĩm òrkwỹ rũnh nhĩpêx kaxyw hãmri nê hkukamã hamaxpêr mex nê. Nê kaxyw krax mã kuhê xã hkukamã hamaxpêr. Nê kaxyw kýx pê kãm hikwỹ xàja kukamã hamaxpêr. Nê òkwaêja kukamã hamaxpêr. Nê hã pòja kukamã hamaxpêr. ã na htem amnhĩm òrkwỹ rũnh nhĩpêx kaxyw hkukamã hamaxpêr mex anê.

29 Nom kot kaj mẽ hkukamã ajamaxpêr mex kêr nê ãm kaxyw pĩ ho grêre nê hakà. Rỳ ra hã axapênh rax kurê ra amã ho anhỹr kaga nê hkaga hpa nê hatur xàm mẽnh kêr nê. Hãmri nhũm mẽ hkwyjaja hãnh mra nê omu nê atã hpêr o axkê.

30 Nê axpên mã ri ajarênh o: “E ga mẽ ixkre mũj pumu. Na pre hipêx xwýnhja hkurê kãm kaga nê hipêx par kêr nê.” Anhỹr o axpên mã ajarê. Ja pyrã nê kêr ka mẽ ixkôt amnhĩ xunhwýr kaxyw nê amnhĩ kukamã ajamaxpêr mex nê. Nê ajamaxpêr o: “Nà mẽ kot Jejus ã tanhmã ixto htỳx tã kot paj hkaga hkêt nê. Kot paj hkôt amnhĩ nhĩpêx rãhã ho ri ixpa.” Anhỹr o amnhĩ kukamã ajamaxpêr. Hãmri nê rĩ kormã ixkôt amnhĩ xãm. No kot ka mẽ umaj ixkaga hkukamã ajamaxpêr hãmri nê ixkôt amnhĩ xãm kêr kurê kumrêx.

31 —Nê koja krĩ hõ kamã pahшти nhõ pòristi xohtõ nê. Nê kutã nhãm krĩ hõ kamã pahшти nhõ pòristija grêre. Tã nhũm wa hpijapu kaxyw nhũm krĩ hõ rũm pahшти nhõ pòristi xohtõja mẽ grêreta wýr mra. Hãmri

nhũm kutã krĩ hõ kamã mẽ ò pòristi grêre nhõ pahшти nhỹ nê tee ri mẽ amnhĩ kukamã hamaxpêr nê hamaxpêr o: “Kwa koja apu krĩ hõ rũm pòristi xohtõ raxja nhũm inhõ pòristi grêreja mẽ axpên kutã kuhê nê axpu nhũm mẽ inhnê mẽ himex. Nà inhõ pòristi grêre kênã.” Anhỹr o hamaxpêr.

32 —Hãmri nê pahшти hõta wýr ò kòwenatõ mẽ. Kormã krĩ hõ rũm mẽ hohtõtaja mẽ htêp kêr nhũm mẽ kutã kumê nhũm ma mẽ kutã tẽ. Hãmri nê awry hã mẽ hkaxpa nê mẽ ò pahшти mã kãm: “E na mẽ inhõ pahшти akutã inhmê pa tẽ. Na inhmã: ‘Ma tẽ nê mẽ kãm awjarê. Kot puj pêr mẽ papijapu hkêt nê. Kwari. Kot puj mẽ tãm axpên xunhwý.’ Anhỹr o kapêr nê mẽ akutã inhmê pa tẽ.” ã mẽ ujarênh kot anhỹr. Ja pyrã nê na htem mẽmoj kukamã hamaxpêr mex nê rĩ kormã tanhmã amnhĩ nhĩpêx to.

33 —Tã kêr ka mẽ atõ amã ixkôt amnhĩ xãm prãm hãmri nê pahшти pyrã nê amnhĩ kukamã ajamaxpêr tỳx nê rĩ kormã tanhmã amnhĩ nhĩpêx to. Kêr ka ate inhmã tanhmã amnhĩ nhĩpêx to ho apa kaxyw hãmri nê inhgryk ã te ate amã amnhĩ japê hkêt pyrãk o mẽmoj piitã mã anhĩkra karo pyrãk o amnhĩ nhĩpêx. Hãmri nê rĩ kormã ixkôt amnhĩ xãm.

34-35 No kot kaj mẽ amnhĩ kukamã ajamaxpêr kêr nê atỳx ri ixkôt amnhĩ xunhwýr japêr. Hãmri nê mẽmo arĩgro hã mẽ kot ixtã tanhmã mẽ ato xwýnhjê pymaj ra ixkaga mã. Hã kot kaj mẽ te mẽ ate kaxwa punu pyrãk o amnhĩ nhĩpêx. Kaxwaja mẽ apkur xã kamã mex. Na htem amnhĩm ho ò xành nê kuku. Nom koja mẽhõ kamã pika hkwy mẽ nê ho ahkà hãmri tanhmã kot mẽ ho nê akupỹm ho mex? ãm mẽ kot hkapĩr pix kaxyw koja mex. Ja pyrã nê kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nê amã ixkôt amnhĩ nhĩpêx prãm nõkati. Hãmri nê ra te ate kaxwa punu kapĩr mã tãmta pyrãk. E kwa mẽ mẽmoj tã ixujarênhja ma nê mẽ urak nê amnhĩ kukamã ajamaxpêr mex nê. Anê.

15

*òwêhti pikunor jarênh
Matêwre 18.12-14*

¹ Tã nhũm mẽ kot pahшти mã hkwyjê pê kàxpore hkwy jamýnh xwýnhjê mẽ mẽ kot amnhĩ tomnuj xwýnhjaja Jejus kapêr mar kaxyw hwýr mra.

² Hãmri nhũm Parijew nhõ xwýnhjê mẽ mẽ kot Tirtũm kapêr tũm o mẽ ahkre xwýnhjaja mẽ hã Jejus pumu. Hãmri nê kê wem axte axpên mã tanhmã ho kapêr punuj to nê axpên mã:

—Tk. Kwa na hte mũjti axtem nê mẽ kot amnhĩ tomnuj xwýnhjaja amnhĩ wýr mẽ kuwý nê tõhã mẽ kutã apku. Kwa mẽ kot amnhĩ tomnuj xwýnh kênã kot kêt mẽ kutã apkur o pa. Anê.

³ Hãmri nhũm Jejus amnhĩ tã mẽ kuma nê tanhmã mẽ kãm kapêr to. Nom hprĩ hã mẽ kãm kapêr kêt nê. Kê ãm amnhĩ tã kuxi nê mẽ kãm ôwêhti pikunor jarê nê mẽ kãm:

⁴ —Koja mēhõ õ ôwêhti xohtõ nê. Nê ma nhýri hamãr o pa. Hãmri nhũm pyxire nê hkwy kaga nê ma nhýhým ahte tẽ nê akunok. Hãmri nhũm õ dõnja ma kot akupým piitã o mõi kaxyw hkwy ho pikuprõnh pa hãmri nê tee ri hkwy kaêx ã pikunor xwýnhhta japêr. Hãmri nê ma hkwy ho mõi nê nhýri kure. Kot nhýri kutêp apkur o ri pa kaxyw kure hãmri nê ma akupým pikunor xwýnhhta japêr o tẽ. Hãmri nê hapêr ryy nê nhýri hwýr kato.

⁵ Nê omu nê hkĩnh týx nê. Hãmri nê amnhĩ kre hã kumẽ nê ma akupým hkwy hwýr o tẽ.

⁶ Hãmri nê mẽ ãhkõ hã kumẽ nê hkĩnh nê hkrãmnhwýjê ho akuprõ nê õrkwý htã mẽ õrkwý xwýnhjê ho akuprõ nê mẽ kãm: “Kwa na pre ixpê ixkriita õ akunok. Pa pre hapêr kãm ixihýtýx nê kãm ixkato nê omu nê ixkĩnh nê. Jakamã kwa wem mããnên inhý hã akĩnh.” Anê.

—Ã mẽ ujarênh kot anhýr.

⁷ Ja pyrã nê koja mẽ kot amnhĩ tomnuj týx xwýnhjê hõ tee ri amnhĩ pumu nê kot amnhĩ tomnuj kaga nê Tirtũm kõt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh týx nê. Te ho my kot ôwêhti hpikunor xwýnh mã kator nê hkĩnh týxta pyrãk. Na hte Tirtũm tãm mẽ kot amnhĩ nhĩpêx o mẽ pa xwýnhjê pumu nê hkĩnh nê. Tã koja mēhõ kot amnhĩ tomnuj týx tã ã amnhĩ nhĩpêx anhýrja kaga nê

Tirtũm kõt amnhĩ xãm hãmri nhũm amnhĩ tã omu nê hkĩnh týx nê. Jakamã na pa hte mẽ akurom ã mẽ kot amnhĩ tomnuj xwýnhjê hkõt Tirtũm kapêr o mẽ ahkre rãhã ho ri ixpa. Anê.

Nhũm pre ã Jejus mẽ kot tanhmã ho kapêr punuj to xwýnhjê mã amnhĩ jarênh anê.

Kàxpore pikunor jarênh

⁸ Nhũm Jejus arĩ mẽ kãm awjarê nê mẽ kãm:

—Nê ja. Koja mēhõ ni hikàxpore kêp 10. àpênh o arĩgro pê 10 pãnhã kàxpore kêp 10. Tã ho pyxi nê ho akunok. Hãmri nê tee ri hapêr nê hkaprĩ nê. Hãmri nê kanê hpõk nê hitom kapõnh pê hprĩ hã hapêr o ri pa nê kãm kato.

⁹ Hãmri nê kupy nê hkĩnh nê hkrãmnhwýjê ho akuprõ nê õrkwý htã mẽ õrkwý xwýnhjê ho akuprõ nê mẽ kãm amnhĩ jarê nê mẽ kãm: “Xê na pre ixpê ixkàxpore hõta akunok pa tee ri hapêr tã akupým kãm ixkato nê kupy nê ixkĩnh nê. Jakamã xê wem inhý hã mããnên akĩnh.” ã mẽ ujarênh kot anhýr.

¹⁰ —Ja pyrã nê koja mẽ kot amnhĩ tomnuj xwýnhjê hõ pyxire nê amnhĩ tomnuj kaga nê ixkõt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh nê. Te mēhõ ni kot kàxpore pikunor xwýnh mã kator nê hkĩnhhta pyrãk. Anê.

Mẽ hkra pikunor jarênh

¹¹ Nhũm Jejus arĩ mẽ ahkre ho xa. Tirtũm kãm mẽ piitã mẽ hapê htýx ã mẽ ahkre ho xa. No kê ãm hã kuxi nê kê we tanhmã mẽ kãm ujarênh to nê mẽ kãm:

—Nê koja mēhõ hkra my wa axkrut.

¹² Hãmri nhũm kot hapu õ papaj wýr tẽ nê kãm: “E papaj. Ot pa awýr tẽ. Kot kaj nhýrmã ty pa wa amýr pê akukrêx o ixarĩk. Jakamã e kwa tokyx atĩr ri amnhĩ kamã wa inhmã ho axkjê pa inhõ ho amnhĩptãr kurê kumrêx nã?” Anê. Hãmri nhũm kuma nê wa kãm hikukrêx o axkjê. Kot wa mã hkwy gõ nê kot hapu mã hkwy gõ.

¹³ Hãmri nhũm kot haputa ãm ri hipêêxã hkõt pa hkrãre hãmri nê kot kãm hikukrêx nhõr jamýnh pa nê ma nhýhým o mõi nê ho wênê hpa. Hãmri nê hpãnhã kàxpore jamý nê ma nhýhým mõi. Nhýhým awry hã pika hõ hwýr ma mõi. Mõi hãmri nê krĩ hõ kamã htýx ri tanhmã amnhĩ tomnuj to ho ri pa.

Hāmri nē gaa nē ra mē hkuprýjê hã kàxpore ho hapêx pa. Nē kagôxyhti hã ho hapêx pa. Nē gaa hāmri nē hikàxpore hkêt nē ri pa.

14 –Rôm nhũm pikaja kamã mē hã na wrýk kêt ry rax nē. Nē gaa nhũm mē hpur kãm mē kēp mē apkur xà hã mēōja hapêx pa. Jakamã nhũm mē hkra kot haputa kēp amrakati nē kãm prãm týx nē ri pa. Hāmri nē tee ri amnhĩ kukamã hamaxpēr.

15 Hāmri nē amnhĩ to krĩ nhõ xwýnhjê mar o ri pa. Kot mē kãm tanhmã àpênh to nē hpãnhã apkur kaxyw. Hāmri nhũm mēhõ kot kãm hkrit hagrô jamãr kaxyw hã kumē nhũm ma hwýr tē nē kãm hamãr o pa. Nom kot kãm hamãr o pata pãnhã ãm kãm mēmoj nhõr kryre nhũm arĩ kãm prãm týx kumrêx.

16 Nē tee ri kot hagrô kutã òta kur prãm nē tee ri omunh o pa.

17 –Nē gaa hāmri nē tanhmã hamaxpēr to. Nē tee ri kot tanhmã amnhĩ tomnuj toja ã amnhĩ pumu nē hamaxpēr o: “Hêxta waa nē. Mãn mūtãr inhõ krĩ kamã inhõ papaj mã mē àpênh xwýnhjaja ixrom apkur mex o pa. àpkur mex nē nhũm mēō jakrêx prãr rũnh tã pa jar mē hkĩnhã prãm xàj ra ixyk o mō.

18 Nà kot paj ma akupým mō. Hāmri nē inhõ papaj pumu nē ã kãm amnhĩ jarênh anē nē kãm: ‘Kwa Papaj. Na pa pre ixpê akra hã amnhĩ tomnuj týx kumrêx nhũm ja apê omnuj nē. Nhũm Tirtũm pē ja omnuj nē.

19 Jakamã na pa ixpê akra hã amã amnhĩ jarênh ã ixpijaãm nē. Ixte tãm kêt kumrêx. Jakamã kwa xà kot pa amã mēmoj tã ixàpênh o ri ixpa ka hpãnhã inhmã inhõ pa apku nà?’ Anhýr o kot pa kãm amnhĩ jarê. Nà kot paj anē.”

20 –Anhýr o amnhĩ kukamã hamaxpēr hāmri nē ma akupým mō. Mōõ nē ra hpôx o mō. Nē kormã amým mōr ri nhũm ò papaj hwýr rĩt nē omu nē amnhĩ kra hã omunh kurê kumrêx nē hkĩnh nē ma kutã hprôt nē tē. Omu nē kãm hkaprĩ nē. Nē hwýr hprôt nē hkaxpa nē kahti hkôt kumý.

21 Hāmri nhũm kãm amnhĩ jarê nē kãm: “Kwa papaj. Na pa pre amnhĩ tomnuj nē nhũm ja apê omnuj nē. Nē Tirtũm pē ja omnuj nē. Jakamã ixte ixpê akra hã

amã amnhĩ jarênh ã ixpijaãm. Ixte tãm kêt kumrêx.” Anē.

22 Nom kormã kãm amnhĩ jarênh par kêt ri nhũm hipêêxà kãm mē àpênh xwýnhjê mã akir nē mē kãm: “E kwa mē atõ ma tē nē kãm è mex ò py nē akupým ixkrata wýr ho aprôt nē kãm haxà. Nē hpar kà nē ìhkra kamã kàx nē amnē kãm hamý nē ho aprôt.

23 Nē akupým aprôt nē mōx kra htwým mexta ò pumu nē unē nē apĩ. Nē mē ho anē pu mē ixkra hã pahkĩnh nē apku. E mē amnhĩ prêprêk nē tokyx ã amnhĩ nhĩpêx anē.

24 Na pre ma ixpê mōr o te ixpê htyk pyrãk. Tã akupým mō nē ixwýr pøj nē te akupým inhmã htĩr pyrãk. Jakamã e mē tokyj.” Anhýr jakamã nhũm mē hã mōx kra pĩ nē ho anē nē hkĩnh nē hã apkur o hkrĩ.

25 –Rôm nhũm hkra kot wata kormã pur kãm htýx àpênh o xa. àpênh o ãm tã akupým hpôx o tē. Hāmri nē amnhĩ kukamã mē kot ri mēmoj tatak nē mē grer ma.

26 Hāmri nē tee ri hamaxpēr o tē nē òrkwý hwýr pøj nē kormã kapem xa nē mē hã mē àpênh xwýnhjê hõ kukja nē kãm: “Kwa mēmoj tã na ka wem ã akĩnh rax anē?”

27 Anē nhũm kãm: “Nà mēhõ hkêt. Atõ na akupým pøj nhũm anhĩpêêxà omu nē hkĩnh týx nē. Nē mē inhmã anē pa mē hã mōx kra htwým mexja pĩ nē hã ho anē nē hã ixkĩnh nē hkur o ixkrĩ.” Anē.

28 Hāmri nhũm tee ri htõ jarênh ma nē gryk týx nē. Hāmri nē gryk xàj kapem hkuk punuj o mē omunh o xa nē mē hwýr àr kêt nē. Hāmri nhũm hipêêxàja tee ri omu nē hwýr kato nē tee ri kot mē hwýr ho àr kaxyw ho anhýr kaprý.

29 Hāmri nhũm kãm: “Tk. Kwa na pa hte amã ixàpênh rũnh rãhã ho ri ixpa hã ra ixtã amgrã xohtõ nē. Nē aa akapêr nhĩrôp tanhmã ixãm to hkêt. Tã ka hte ixpumunh nē akĩnh nē ixtã mēmoj tōx pĩr kêt nē.

30 Tã nhũm akra kot haputa apê akukrêx kwý jamýnh pa nē ma o mō nē axtem nē mē hkuprýjê mã òr par tã akupým mō nē pøj. Ka omu nē akĩnh nē hã mōx kra twýmta pĩ. Nà kot paj mē awýr ixàr kêt nē.” Anē.

–Hāmri nē gryk týx nē xa.

31 Hāmri nhũm ò papaj tee ri kuma nē kãm: “Kwa nà ri ã akapêr anhýr kêt nē.

Inhmã ajapê kênã. Na ka hte ixkôt apa ho apa rãhã nê. Nê ixkukrêx piitã kêp anhõõ.

³²No atõja na pre te ixpê htyk pyrãk tã arĩ htĩr. Nê te pikunor pyrãk tã te ra akupỹm kator pyrãk jakamã na pa omu nê ixkĩnh nê. Nê inhmã hapê ho te mãânên inhmã ajapê pyrãk.” Anê.

—Ã mẽ ujarênh kot anhỹr. Ja pyrã nê koja mẽhõ te kot amnhĩ tomnuj tỳx o ri pa htã amnhĩ kaxyw Tĩrtũm mã hamaxpêr nê amnhĩ to kuwỹ nê hkôt amnhĩ xãm. Hãmri nhũm amnhĩ tã omu nê hkĩnh nê. Nê kãm hprãm nê. No mẽ kajaja. Mẽ apê Parijew nhõ xwỹnhjê mẽ Tĩrtũm kapêr tũm o mẽ ahkre xwỹnhjaja. Na ka htem mẽ kot amnhĩ tomnuj xwỹnhjaja kot Tĩrtũm kapêr mar o kuhê hã mẽ omu nê Tĩrtũm kĩnhã akĩnh kêt nê. Nê te hkra kot wata jamaxpêr pyrãk o ajamaxpêr nê tee ri ja hã mẽ omu nê mẽ kamã agryk nê. Nê mẽ amã mẽ hprãm nõkati. Anê.

16

Mẽ panhõxy nê Jesus kot mẽ pamã karõ

¹Tã nhũm kê Jejus axte hkôt ri mẽ pa ho mẽ pa xwỹnhjê jahkre. No ãm mẽmoj tã kuxi nê mẽ kãm tanhmã ujarênh to nê mẽ kãm:

—Nà koja mẽhõ hikàxpore rax xwỹnhja kãm àpênh xwỹnh mã mẽmoj to wênê ho pa kaxyw ãm. No nhũm kãm ho mex kêt nê. Axtem nê kêp amarĩ mẽ kãm mẽmoj to fiat par o mõ. Hãmri nhũm ra mẽhõ kot ã amnhĩ nhĩpêx anhỹr ã omu nê ma õ patrãw wỹr tẽ nê kãm harê.

²Hãmri nhũm tee ri harênh ma nê amnhĩ wỹr hã karõ. Hãmri nhũm hwỹr tẽ nê axã nhũm kãm: “Pa. Kwa xã ãm hãmri na mẽ inhmã ajarê? Kwa nã mon ka ri axtem nê ã ixpê inhõ mẽmoj nhĩpêx anê? E inhmã ate mẽ kãm ho fiat par xwỹnhjê nhĩxi hã kagã nê inhmã agõ hãmri nê ma tẽ. Kot ka axte inhmã axãpênh kêt nê rĩ amnhĩ pumu.” Anê.

³—Hãmri nhũm kuma nê tee ri amnhĩ kukamã hamaxpêr nê hamaxpêr o: “Hêxta waa nê. Tanhmã kot paj amnhĩ to? Ixihtỳxre hã kot pa mẽhõ mã pur ã apê. Nom inhmã amarĩ ri ixãhwỹr o ri ixpa hprãm kêt. Ixte amnhĩ kuk ã ixpĩaam.” Anê.

⁴Hãmri nê tanhmã amnhĩ kukamã hamaxpêr to nê hamaxpêr o: “Nà kot paj amnhĩ wỹr ixte mẽ kãm ho fiat xwỹnhjê hã karõ. Nê mẽ kãm mẽ õ kõõta ahpar mã hkamê kê mẽ ãm inhõ patrãw mã hkwy pix gõ. Kêr kê mẽ amnhĩ tã ixpumu nê kãm ixkĩnh nê. Hãmri nê inhõ patrãw kot ixkaga hã ixtã harênh ma nê ixkamã ukapri japêr. Hãmri nê amnhĩ wỹr ixwỹ pa ahpỹnhã mẽ kutã ixãpkur o ri ixpa nhũm prãm ixpĩr kêt nê. Nà kot paj anê.” Anê.

⁵Hãmri nê amnhĩ wỹr mẽ hã karõ nhũm mẽ hwỹr mra. Nhũm mẽ omu nê ja mã kãm: “E tanhmã na ka pre inhõ patrãw pẽ mẽmoj to fiat to? E inhmã harê.” Anê.

⁶Hãmri nhũm kãm: “Na pa pre kêp orti hã à ho 100 nê ho fiat. Ota hã kagãta. Tã pa kormã kãm amnhĩrer kêt nê.” Anê nhũm kuma nê kãm: “Tõe ka inhma. Kot paj amã anhõ kôt o gri ka ãm kãm ho 50 pix nê agõ pa ixte anhõ kôt ho ijapêx par pyrãk o anhĩpêx.” Anê.

⁷Hãmri nê hpãnhã nhãm ja mã kãm: “No ka. Tanhmã na ka pre kêp mẽmoj to fiat to?” Anê nhũm kãm: “Nã pa pre kêp pãy hã xak o 1.000 nê ho fiat. Tã pa kormã hpãnhã kãm amnhĩrer kêt nê.” Anê nhũm kãm: “Tõe. Kot paj hãmri amã anhõ kôt o gri ka ãm kãm ho 800 pix nê agõ pa ixte anhõ kôt ho ijapêx par pyrãk o anhĩpêx.” Anê. Nhũm ã mẽ hipêx anê. Hãmri nê hamaxpêr o: “E. Na pa mẽ kãm mẽ õ kôt o hkry pa. Koja mẽ amnhĩ tã kãm ixkĩnh japêr.” Anê.

⁸—Hãmri nhũm õ patrãwja ã kot mẽ hipêx anhỹr ã harênh ma nê kãm: “Tk. Kwa ate pa ixkukamã ajamaxpêr nê inhmã mẽmoj to anhỹr mex kêt tã ka amnhĩ kukamã ajamaxpêr mex pẽ ã mẽ hipêx mex anê.” Anê. ã mẽ ujarênh kot anhỹr. Anê.

Nhũm pre ã Jejus mẽ kãm ujarênh anê. Hãmri nê mẽ kãm:

—Tã ja pyrã nê na hte mẽ kot Tĩrtũm kôt amnhĩ xunhwỹr kêt xwỹnhjaja ãm amnhĩ pix kukamã hamaxpêr mex o pa. Jao amnhĩ kaxyw pix mã mẽ piitã tanhmã mẽ ho mex to ho pa. Mẽ kot amnhĩ tã mẽ omunh nê mẽ kãm mẽ hkĩnh nê amnhĩ xwar tanhmã mẽ ho mex to kaxyw nhũm htem ã amnhĩ nhĩpêx anhỹr o pa. Tã mẽ ate ixkôt amnhĩ xunhwỹr xwỹnhjaja. Tĩrtũm kot tanhmã mẽ ate amnhĩ kwỹjê ho mex

to hã amnhĩm mẽ ajarēnh kaxyw kêr ka mẽ amnhĩ mẽ mẽ piitã mẽ hkukamã ajamaxpēr mex nē. Pê tanhmã mẽ ho mex to ho ri apa. Ā mẽ ate amnhĩ nhĩpêx anhỹrja na mex. Nom kormã mẽ ate ã amnhĩ nhĩpêx anhỹr kêt.

⁹—Hêxta waa nē. Mon ka htem mẽ uràk nē ã axpēn to mex anhỹr kêt nē? Kwa mẽ àpēnh xwýnhhta kot amnhĩ nhĩpêx pyrã nē tanhmã axpēn to mex to o ri apa hkêt wehe. Jao akukrêx nē akàxpore ho anhõxý hkêt nē. Kêr ka nhỹrmã ty nē Tĩrtũm wýr api nhũm ja hã mẽ ato mex rax nē. Te ho kot ô patrãw mã àpēnh xwýnhhta kot tanhmã mẽ ho mex to xwýnhjê hwýr mrar nhũm mẽ kot amnhĩ xwar tanhmã ho mex tota pyrãk.

¹⁰⁻¹¹—Na hte Tĩrtũm tanhmã mẽ pakute hã mẽ pahpumunh mex nē. Koja mẽ amã mẽmoj gō ka mẽ kãm hprãm xà hkôt ho anhõxý hkêt nhũm ja hã mẽ apumu nē axte mẽ amã mẽmoj gō. Nom hpãnhã mẽ amã õr rax o wamta jakre nē kugō. Nom kot ka mẽ ri mẽmojta o anhõxý ho ri apa nhũm tee ri ja hã mẽ apumu nē axte mẽ amã mẽmoj nhõr kêt nē. Koja mẽ amã mẽmoj gō ka mẽ ho anhõxý ho ri apa nhũm ja kêp homnuj nē.

¹²—Nē kot kaj mẽ jar Tĩrtũm kot mẽ amã mẽmoj nhõr xwýnhja ho anhõxý ho ri apa. Hã koja nhỹrmã kaxkwa kamã mẽ amã mẽmoj mex nhõr kêt nē.

¹³—Nē kot kaj apyxi nē anhõ patrãw hamēxkrut nē arĩgro pyxi hã hamē wa kãm axàpēnh o amýkry hkêt nē. Kot kaj anē nē hõ gryk ã hõ kaga. Ja pyrã nē kot kaj mẽ jar pika ja kamã akàxpore nē akukrêx pix kukamã ajamaxpēr o ri apa hã kot kaj mẽ amã hapê htýx nē mẽ kêp ho anhõxý ho ri apa. Nē akukrêx rax gryk ã Tĩrtũm kãm hprãm xà hkôt akukrêx o tanhmã axpēn to ajuta hto ho ri apa hkêt nē. Ja pymaj kwa kêr ka mẽ ãm Tĩrtũm pix mã mãn ajamaxpēr rãhã ho ri apa. Jao te akukrêx nē akàxpore mã axãmnhĩx ri anhĩhkra karo ho ri apa pyrãk. Anē.

Nhũm pre ã Jejus mẽ ahkre anē.

¹⁴ Hãmri nhũm Parijew nhõ xwýnhjaja mar o kuhê. Na prem ra mẽ hikàxpore rax gryk ã Jejus kaga. Jakamã ã kot mẽ kãm kàxpore jarēnh anhỹrja ma nhũm ja mẽ kêp

omnuj nē nhũm mẽ hã hpēr o pikēnh o kuhê.

¹⁵ Hãmri nhũm amnhĩ tã mẽ kuma nē mẽ kãm:

—Nà na ka htem te mẽ ate tãm mẽ kot amnhĩ nhĩpêx xwýnh pyrãk o amnhĩ nhĩpêx nom ri mẽ kãm amnhĩ to axêx o ri apa. No nhũm Tĩrtũmja kot tanhmã mẽ ate amnhĩ nhĩpêx to nē tanhmã mẽ ajamaxpēr to hkôt mẽ apumunh par. Nē hprĩ hã mẽ anhõxý hã mẽ apumu. Te mẽ ate tãm amnhĩ nhĩpêx pyrãk nom mẽ anhõxý kamã na ka htem apa. Mẽmoj te mex pyrãk nhũm htem omu nē mex ã hkamnhĩx. No nhũm Tĩrtũm àhpumunh týx xà hkôt hprĩ hã mẽmojta pumu nhũm kêp omnuj nē. Mẽ akurom omnuj ã omunh kurê kumrêx. Na hte hprĩ hã mẽ ate amnhĩ nhĩpêx ã mẽ apumu. Anē.

*Tĩrtũm kapēr aa hapêx kêt ã harēnh
Matêwre 5.17-18*

¹⁶ Nhũm Jejus arĩ mẽ ahkre nē mẽ kãm:

—Nē na pre finat Mojesja kumrêx mẽ kãm Tĩrtũm kapēr kwý hã kagà. Tã nhũm hpãnhã Tĩrtũm nhỹ hã kapēr jarēnh xwýnh kwýjaja mãänēn mẽ kãm hkwy hã kagà. Nhũm prem kuma nē mẽ hkôt amnhĩ nhĩpêx o ri pa. Tã nhũm finat Juãw Paxisja mẽ hpãnhã kato nē Tĩrtũm kapēr o mẽ ahkre ho ri pa. Tã pa hpãnhã ho mẽ ajahkre ho ri ixpa nhũm mẽ ohtô nē ixkôt amnhĩ xunhwý nē kãm ixkapēr kôt pix mã amnhĩ nhĩpêx o ri pa hprãm nē.

¹⁷—Tĩrtũm kapēr tũmja mex o mex. Koja aa hapêx kêt nē. Koja nhỹrmã kaxkwa nē pika wa hapêx pa no nhũm Tĩrtũm kapēr tũmja aa hapêx kêt nē. Koja rãhã ho rãhã nē aa ihkjê ho mēnh kêt nē. Anē.

*Mẽ pahte axpēn kaga hkêt ã mẽ pamã
karõ*

Matêwre 5.31-32, 19.9-12; Makre 10.2-12

¹⁸ Nhũm Jejus arĩ mẽ ahkre nē mẽ kãm:

—Nē kêr ka mẽ aprõ kaga hkêt nē apa. Kot kaj mẽ hkaga nē hpãnhã nhãm hõ ho aprõ nhũm Tĩrtũm noo mã te ate wam aprõ kamã nhãm ho amnhĩkati pyrãk. Nhũm ja kêp omnuj nē. Rý ka ra mēhõ kot hprõ kaga xwýnhhta ka hpãnhã ho aprõ. Nhũm Tĩrtũm noo mã te ate wam mjên pê ho amnhĩkati pyrãk. Nhũm Tĩrtũm pê ja omnuj nē. Anē.

Hikàxpore rax xwýnh mẽ kệp amrakati xwýnh wa harênh

Rukre 6.20-26

19 Nhũm Jejus arĩ mẽ ahkre kamã mẽ kãm awjarẽ nẽ mẽ kãm:

—Koja mẽhõ kàxpore rax xwýnh ê mex pix kãm ri pa. Nẽ apkati mẽ apkur mex o pa.

20 Nhũm amrakati xwýnh pê Rajareja hkà nhyre nẽ arĩ pry kamã àhwýr o hkrĩ. Nhũm htem hamý nẽ ma o pa nẽ hikàxpore rax xwýnh nhõrkwý jakwakrem haxwý.

21 Nhũm õ jakrêx kwý hkrêr prãm xà hakwa krem àhwýr o hkrĩ. Nhũm rop hwýr mra nẽ hkà nhy kunhnwýnh o kuhê.

22 —Tã nhũm Rajare ty nhũm Tĩrtũm kapêr o mẽ wrýk xwýnhjaja hwýr wrý nẽ ma akupým kaxkwa hwýr hkarõ ho mõ nẽ ho api. Hãmri nhũm kaxkwa kamã mẽ pahpãm Apraãw nhĩkhõ hã hkĩnh nẽ apkur mex o hkrĩ.

—Tã nhũm hikàxpore rax xwýnhhta mãănẽn hkõt ty. Nhũm hkwýjaja hã akuprõ nẽ hã mur nẽ ma o tẽ nẽ haxã.

23 Hãmri nhũm hkarõ ma mẽ kot amnhĩ xà htýx kamã hamak tũm xà pê kuwy maatita wýr ma mõ. Nẽ kamã amnhĩ xà htýx kãm hamak rãhã ho pa. Hãmri nẽ amnhĩ xà hã maj kãnhmã rĩt nẽ kaxkwa kamã Apraãw pumu. Nhũm Rajare ra kuri mex nẽ nhỹ.

24 Hãmri nhũm tee ri wa omu nẽ Apraãw mã akapêr nẽ kãm: “Kwa Apraãw. Kwa we ixkamã axukapri nẽ ixwýr Rajare mẽ kê ixwýr tẽ nẽ ìhkrakrã ho gõ htok nẽ ho inhõhto jakry. Na pa kuwy kamã amnhĩ xà htýx kãm ijamak týx kumrêx.” Anẽ.

25 Hãmri nhũm kuma nẽ kãm: “Tk. Nà kot pa awýr mẽnh kêt nẽ. Na ka pre atĩr ri amex nẽ akĩnh nẽ ri apa. No nhũm Rajare akĩnhã hkà nhy rax nẽ amnhĩ xà htýx kãm hamak rãhã ho ri pa. Tã ra jar inhĩkhõ hã hkĩnh nẽ pa. Ka pre kurom amex nẽ apa htã kot kaj hpãnhã amnhĩ xà htýx kãm ajamak rãhã ho ri apa.

26 Nẽ pahkaêx kãm ahkaprý griã. Jakamã nhỹhỹnh kot kêt awýr rê? Ka ajaxwýja nhỹhỹnh kot ka kêt mẽ ixwýr rê?” Anẽ.

27 —Nhũm ã kãm kapêr anẽ nhũm tee ri kuma nẽ kãm: “Kwa tõ ma inhõ krĩ hwýr mãn amẽ kê ma ixkwýjê hwýr wrý.

28 O mũj arĩ inhõ krĩ kamã ixtõ kệp 5 nẽ arĩ htĩr nẽ pa. Kê wa mẽ kãm awjarẽ kê mẽ amnẽ kuwy hwýr pa pymaj tokyx amnhĩ tomnuj kaga nẽ Tĩrtũm kõt mãn amnhĩ xunhwý nẽ hkõt ri amnhĩ nhĩpêx o pa.” Anẽ.

29 —Hãmri nhũm Apraãw kãm: “Nà pa mẽ hwýr mẽnh kêt nẽ. Ra mẽ kuri Tĩrtũm kapêr jarênh xwýnhjê mẽ Mojес kot Tĩrtũm kapêr ã kagã kênã. Kê mẽ kamã harẽ nẽ ja ma nẽ rĩ tãm tanhmã amnhĩ nhĩpêx to.” Anẽ.

30 Hãmri nhũm tee ri kuma nẽ kãm: “Kwa nã. Koja mẽ kagãja mar kêt nẽ. No kêt Rajare na pre ra htyk tã akupým htĩr jakamã koja mẽ hwýr wrý nẽ mẽ kãm awjarẽ nhũm mẽ akupým htĩr ã omu nẽ kapêr ma hãmri nẽ amnhĩ tomnuj kaga kurê kumrêx. Kwa nã ã ri anhýr kêt nẽ mẽ hwýr amẽ hêxta waa nẽ.” Anẽ.

31 —No nhũm kãm: “Nà koja mẽ Tĩrtũm kapêr ã kagã mar kêt ã koja mẽ mãănẽn Rajare tyk nẽ akupým htĩr nẽ mẽ hwýr wrýk nẽ kot mẽ kãm tanhmã ujarênh to hã mar kêt nẽ. Jakamã kwarĩ pa mẽ hwýr mẽnh kêt nẽ. Kot paj ho anẽ nẽ ãm ixte mẽ hwýr mẽnh kaprý pyrãk o amnhĩ nhĩpêx.” Anẽ. ã mẽ ujarênh kot anhýr. Anẽ.

17

Mẽ kot Jejus nẽ mẽ no kupyř ã mẽ harênh Matêwre 18.6; Makre 9.42; mãănẽn Rõmãn 1.32; Sikũn Pêtre 2.1, 2.18

1-2 Tã nhũm Jejus hkõt mẽ pa ho mẽ pa xwýnhjê jahkre ho nhỹ nẽ mẽ kãm:

—E kot paj mẽ kot ixkõt amnhĩ xunhwýr tohtuj anhýr xwýnhjê jarẽ ka mẽ inhma. Nà koja mẽhõ mẽ hwýr tẽ nẽ inhnẽ mẽ kãm kapêr. Mẽ kot mẽ mar nẽ amnhĩ tomnuj prãm xàj tanhmã mẽ kãm kapêr to. Hãmri nhũm mẽ mar xà hkõt tanhmã amnhĩ tomnuj to. Hã koja Tĩrtũm ja hã omu nẽ kot inhnẽ tanhmã kãm nẽ xwýnhhta pumu nẽ ja hã homnuj týx nẽ. Te mẽ kot mẽhõ pynênh nẽ mut ã kên pytĩ hõ nhõr nẽ ma o htêm nẽ gõ rax kãm mẽnh pyrãk o koja hipêx. Te ho ja pyrãk no ãm homnuj týx o ja jakre. Jakamã kwa mẽ ixkapêr ma nẽ kãm ajamãxpêr týx rãhã ho ri apa. Anẽ.

Mě pahte amnhĩ tã tanhmã mēhõ hto hkêt ã mē pamã karõ

Matêwre 18.21; Makre 11.25-26; mãänēn Epes 4.32; Korosẽ 3.13

³ Nhũm Jejus arĩ mē ahkre nē mē kãm:

—Ně koja ixkõt atõjê hõ tanhmã atomnuj to. Ka amnhĩ tã omu hãmri nē ma hwỳr tẽ nē ja hã kãm akapēr nē kãm: “Kwa mon ka axtem nē ri ã inhĩpêx anē ixtõ? Kwa nà ri ã inhĩpêx anhỹr kêt nē.” Anē hãmri nhũm amnhĩ tã ama nē amã: “Nà na pa tee ri ixte tanhmã atota ã amnhĩ pumu nē ixkaprĩ nē. Nà kot paj axte ã ri anhĩpêx anhỹr kêt nē. Kwa kêr ka axte tanhmã ja mã ajamaxpēr to hkêt nē. Te ate amnhĩ katut kõt mēnh pyrãk o hipêx pu akupỹm tãm axpēn nhĩpêx o papa.” Anē. Koja ã amã kapēr anē ka amnhĩ tã ama hãmri nē axte tanhmã kot atoja mã ajamaxpēr kêt nē.

⁴—Koja arĩgro pyxi hã xatã tanhmã atomnuj to japēr. Hãmri nē xatã tee ri ja hã amnhĩ pumu nē awỳr mra nē xatã amnhĩ tã amã kapēr nē amã: “Pa ot pa awỳr tẽ. Na pa ra ixkaprĩ nē. Kwa ixte ã anhĩpêx anhỹrja pumu nē ãm omu. Kot paj axte hkêt nē.” Anhỹr o xatã amã kapēr. Nē ra axte tanhmã atomnuj to nē kê axte awỳr tẽ nē ã amnhĩ tã amã kapēr anē. Nom kêr ka ama nē kamã agryk kêt nē. ãm xatã kãm: “Nà kot puj anē nē akupỹm tãm axpēn nhĩpêx. Kot paj axte tanhmã ate ixtota mã ijamaxpēr kêt nē. Kot puj ja ho pajapêx nē tãm axpēn nhĩpêx o akupỹm papa.” Anhỹr o kêr ka mē xatã axpēn nhĩpêx anhỹr rãhã ho ri apa nē aa jam anhũrer kêt nē. Anē.

Mě pahte mēmoj tã Tĩrtũm wỳr hã mē pajarēnh

Matêwre 17.20-21, 21.21-22; Makre 11.23

⁵ Tã nhũm Jejus nhỹ hã mē ahkre ho mē pa xwỳnhjaja hãmri kãm:

—Kwa Pahihti. Tanhmã mē ixto pa mē amnhĩ kaxyw Tĩrtũm kõt ijamaxpēr tỳx rãhã ho ri ixpa. Anē.

⁶ Hãmri nhũm mē kãm:

—Nà ra mē ate amnhĩ kaxyw hkõt ajamaxpēr jakamã na ra amnhĩ tã mē apumu. Jakamã mē ate hkõt amnhĩ nhĩpêx kukwak ri na ka htem mēmoj tã awỳ nhũm mē ate mēmoj tã hwỳr xà hkõt mē amã tanhmã mēmoj nhĩpêx to. Te mē ate pĩ hpār mũj mã

akapēr nē kãm: “E amnhĩ jarê nē ma tẽ nē gõ xujanār kãm mãn mrõ.” Anē nhũm kot amar nē amar xà hkõt ã kot amnhĩ nhĩpêx anhỹrta pyrãk. Ja pyrã nē kot kaj mē ate Tĩrtũm kõt amnhĩ nhĩpêx o apa kukwak ri mēmoj tã awỳ nhũm mē ama nē mē amã mēmoj tanhmã ho. Rỳ mē amã mēmoj gõ. Anē.

Te mē pahpê Tĩrtũm mã paxàpēnh xwỳnh pyrãk

⁷ Nhũm Jejus arĩ mē ahkre nē mē kãm:

—Ně ja. Kot kaj mē amã mē àpēnh xwỳnh kwỳjaja nhũm hõ amã mēmoj tã àpēnh o pa ě ho anhỹr pa. Hãmri tanhmã kot kaj kãm akapēr to wehe? Xà kot kaj kãm: “E hãmri axàpēnhta kaga nē tẽ nē nhỹ nē apku.” Anhỹr o kãm akapēr?

⁸ Nà kot kaj kãm anhỹr kêt nē. Kot kaj kãm: “E kwatokyx tẽ nē hpãnhã inhã inhõ hã apê. Kot pa ixàpkur pa ka ixpãnhã nhỹ nē apku.” Anhỹr kãm akapēr. Kêp amã àpēnh xwỳnh jakamã ka ã kãm akapēr anē.

⁹ Ja pyrã nē kot puj mē Tĩrtũm kot mē pamã mēmoj tã karõ xà hkõt tanhmã kãm amnhĩ nhĩpêx to ho ri papa. Mē õ patrãwta pyrã nē kot tanhmã mē pamã karõ hto xà hkõt pu mē amnhĩ nhĩpêx.

—Xà na htem mē õ patrãw mã mēmoj tã àpēnh pa hãmri nē hkwỳjê mã amnhĩ to jarkrar o ri pa nē mē kãm: “E ka mē ixpumu. Na pa hte inhõ patrãw mã ixàpēnh mex o mē hakre ka mē ja hã ixpumu. Hẽxta waa nē. Mon pa hte ri axtem ã amnhĩ nhĩpêx anē?” Anhỹr o xà kot kaj mē kãm amnhĩ to jarkrar o ri apa? Nà na ka htem ã amnhĩ nhĩpêx anhỹr kêt nē.

¹⁰ —Tã pa hte mē õ patrãwta pyrã nē tanhmã mē amã mēmoj tã karõ hto ho ixpa. Jakamã kêr ka mē inhma nē ixte mē amã mēmoj tã karõ xà hkõt tanhmã inhã amnhĩ nhĩpêx to ho ri apa. Hãmri nē hã amnhĩ to jarkrar pē amnhĩ jarēnh o: “ãm hãmri na pa ã Jejus mã amnhĩ nhĩpêx anē. Hẽxta waa nē. Ixpê Jejus mã tanhmã ixte amnhĩ nhĩpêx to mex xwỳnh na pa.” Anhỹr o amnhĩ to jarkrar kêt nē. Kêt ãm amnhĩ jarēnh o: “Nà ixte kãm tanhmã amnhĩ nhĩpêx to ho ixpa xwỳnh pix na pa. Na hte mēmoj tã inhã karõ pa kuma nē ÿ hã tanhmã kãm amnhĩ nhĩpêx to.” Anhỹr o

amnhĩ jarēnh o ri apa. No ri amnhĩ krā hkôt atýx tanhmā amnhĩ to jarkrar to ho ri apa hkêt nē. Anē.

Jejus kot mē ho 10 nē akupým mē ho mex ã harēnh

Matêwre 8.1-4

¹¹ Tã nhũm Jejus arĩ Garirej rũm pika pē Samar hkàx ã Jerujarē hwýr kormã mō.

¹² Nē nhýri krĩ hō htêp o mōr mē nhũm krĩ pu hã ri mē pa xwýnhjaja kēp 10 nē kutã mra. Mē hkànhy hkro htýx xwýnhjaja kutã mra nē hkaxpa nē amým kuhê nē omu.

¹³ Hãmri nē kãm:

—Pa Pahihti. Kwa mē ixpumu nē mē ixkamã axukaprĩ nē tanhmã mē ixto mex to. Anē.

¹⁴ Hãmri nhũm mē kãm:

—Tôe. Nà kot paj mē ato mex. E mē mãmri awjanã nē ma akupým mē anhō patrejê hwýr mra kē mē akupým mē akã mex ã mē apumu. Anē.

Hãmri nhũm mē kuma nē kapēr mar xà hkôt awjanã. Kà nhy rãhã awjanã nē ma akupým patre hwýr mra. Nē kormã akupým hwýr pry hã mrar rãhã piitã hkã mex pa.

¹⁵ Hãmri nhũm ãm pyxi nē hkwyjê rom awjanã nē akupým Jejus wýr Tirtũm mã mex o mex ã harēnh o hwýr tē.

¹⁶ Hãmri nē Jejus kaxpa nē kutã hkõnkrã ho tēm nē nhý nē amnhĩ tã kãm kot ho mex ã kãm amnhĩ jarē. Kwýjê hkĩnhã kēp Ijaew kêt axtem kēp Samar nhõ xwýnh tã mē kurom akupýn hwýr tē nē kãm mex o mex ã harē.

¹⁷⁻¹⁹ Hãmri nhũm amnhĩ tã kuma nē kãm:

—No mē akwýjaja? Ixte mē ato 10 nē mē ato mex tã ka ãm kapxipix awjanã nē akupýn ixwýr tē. Akwýjê hkĩnhã apê Ijaew kêt tã akupým amnhĩ mex ã amnhĩ pumu hãmri nē mē kurom awjanã nē Tirtũm mã mex o mex ã harēnh o ixwýr tē. Hêxta waa nē. Mo na hte ixkwýjaja apyrã nē amnhĩ kaxyw ixkôt hamaxpēr kêt nē? E kãnhmã xa nē mãmri ma ajamakêtkati nē akĩnh nē ma akupým tē. Anē.

Jejus akupýn wryk xà hã arĩgro jarēnh

Matêwre 24.23-24, 24.37-44; Makre 13.32-37; mãänēn Wam Tesarõn 5.2-8; Sikũn Pêtre 3.3-10

²⁰⁻²¹ Tã nhũm Parijew nhõ xwýnh kwýjaja Jejus wýr mra nē omu nē kãm:

—Kwa mē inhmã mēmoj jarē. Xà koja apu Tirtũm tokyx kot mē pahwýr mēnh mã xwýnhhta mē nhũm mē pahwýr wry nē mē pahto amnhĩptar kurê kumrēx nã kormã? Anē.

Hãmri nhũm mē kuma nē mē kãm amnhĩ jarē. Te ho nhãm mēhõ jarēnh pyrã nē mē kãm:

—Nà ra kot mē ho amnhĩptar o pa kēnã. Nom nhýri hkrĩ xà kamã mē ho amnhĩptar o hkrĩ hkêt nē. Na htem amnhĩ kaxyw hkôt hamaxpēr nē hkôt amnhĩ xunhwý hãmri nhũm kēp mē õ pahihti hã mē ho amnhĩptar o pa. Nē mē kãm mē hamaxpēr mex gõ nhũm htem hkôt ri hamaxpēr mex o pa. Anē.

²² Hãmri nē hpãnhã hkôt mē pa ho mē pa xwýnhjê mã kapēr. Mē kot nhýrmã tee ri kamã hamak o pa hã mē kãm kapēr nē mē kãm:

—Kot kaj mē nhýrmã tee ri amã tokyx akupýn ixwryk nē ixte mē ato amnhĩptar prãm xà tee ri inhmã anojarêt kapry ho ri apa. Nē axpēn mã ri ijarēnh o: “Hêxta waa nē. Mo na we Pahihti tokyx akupýn mē pahwýr wryk kêt nē?” Anhýr o inhmã anojarêt o ri apa pē ixkamã ajamak rãhã ho apa.

²³ —Nē koja mē ra akupýn ixwryk ã tanhmã mē amã ixto hêx to ho pa. Nhýri ixkuhê nhũm mē kot ixpumunh ã mē amã ixto hêx o pa. Nom kêt ka mē ama nē ãm mē ama.

²⁴ Kot paj nhýrmã akupýn mē awýr ixwryk kaxyw nhũm mē pika piitã hkôt akupýn ixwryk kãm anhĩpê ixpumu. Te mē piitã mē kot anhĩpê na jaxēnh pumunh pyrãk o kot kaj mē apiitã ixpumu.

²⁵ Nom kormã jar pika ja kamã ixpa ri koja mē ohtõ nē ixkaga pa amnhĩ xà htýx kamã ijamak kãm ty. Hãmri nē mēmo arĩgro hã ma akupým kaxkwa hwýr api. Hãmri nē nhýrmã akupýn mē awýr wry.

²⁶ —Nà kot paj nhýrmã man akupýn mē awýr wry. Akupýn ixwryk xà hã arĩgrota ã koja jar pika ja kamã mē pa xwýnhjaja htýx ri tanhmã amnhĩ tomnuj to ho pa. Te amnepēm finat Noehiti htĩr ri mē kot htýx

ri tanhmã amnhĩ tomnuj to ho pa pyrãk o koja mẽ amnhĩ nhĩpêx o pa.

27 Na prem amnhĩ kaxyw Tĩrtũm mã hamaxpêr o pa hkêt nê. Nê ãm jar pika ja kamã mẽ kot amnhĩ nhĩpêx pix kukamã hamaxpêr o ri paja o ãm kôt pix mã tanhmã ri amnhĩ nhĩpêx to ho pa. Rôm nhũm Noehi gô htãm pymaj pãr raxja nhĩpêx nê kãm axà. Nhũm prem hã omu nê ãm omunh o pa nê tanhmã ri amnhĩ kukamã hamaxpêr to hkêt nê. Tã nhũm nata mẽ haêr pê wrỳ. Hãmri nê wrỳk rax o ra pika piitã hanhi nhũm mẽ piitã pikaprãr pa.

28 –Akupỹn ixwrỳk xà hã arĩgrota ã koja mẽ mããnên te amnepêr Sotô nhõ xwỹnhjaja kot htỳx ri tanhmã amnhĩ tomnuj to pyrãk o amnhĩ nhĩpêx. Finat Rohti kormã htĩr ri mẽ kot htỳx ri tanhmã amnhĩ tomnuj to ho pata pyrãk o koja mẽ amnhĩ nhĩpêx. Na pre hte Sotô nhõ xwỹnhjaja ãm pika ja kamã mẽ kot amnhĩ nhĩpêx pix kukamã hamaxpêr o ri pa. Nê ãm kôt pix mã ri amnhĩ nhĩpêx o pa. Nê htỳx ri amnhĩ xàpkur xà pix kukamã hamaxpêr. Nê mẽ hpur kãm ri àpênh pix kukamã hamaxpêr. Nê ri amnhĩ xujaprôr pix kukamã hamaxpêr nê axpên mã mẽmoj to wênê pix kukamã hamaxpêr. Nê amnhĩm òrkwỹ nhĩpêx pix kukamã hamaxpêr. ã na prem pika ja kamã mẽ kot amnhĩ nhĩpêx pix kukamã hamaxpêr o ri pa anhỹrja o amnhĩ kaxyw Tĩrtũm mã hamaxpêr o pa hkêt nê.

29 –Tã nhũm Rohti mẽ ò krĩ rũm kator mẽ nhũm Tĩrtũm krĩ nhõ xwỹnhjaja kot amnhĩ tomnuj tỳx o paja mỳrapê mẽ himex pa. Jao kaxkwa rũm mẽ hipy mẽmo hpòk kwỳ rê nhũm mẽ hkaxàr pa.

30 Tã akupỹn mẽ awỳr ixwrỳkja mẽ koja mẽ te Rohti nhõ krĩ kamã mẽ kot amnhĩ nhĩpêx pyrã nê htỳx ri amnhĩ tomnuj pix o pa.

31 –Nê akupỹn ixwrỳyta ã ka mẽ anhòrkwỹ nhĩmòk ã hkrãmnhên o akrĩ japêr nê akupỹn ixwrỳk kãm ixpumu. Hãmri nê akukrêx wỳr axàr nê hõ hpyr mã ajamaxpêr kêt nê. Rỳ ka mẽ apur kãm axàpênh o akuhê japêr nê akupỹn ixwrỳk kãm ixpumu. Hãmri nê akupỹm anhòrkwỹ hwỳr atêm mã ajamaxpêr kêt nê. Mo kaxyw kot ka kêt hwỳr tễ? Kêt ãm inhmã

mẽ ajapê hã akupỹn mẽ awỳr ixwrỳk mã ajamaxpêr o akĩnh nê ixpumunh o akuhê.

32 –Nê kêt ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tĩrtũm kapêr nhĩròp xa nê amnhĩ katut kôt Sotôta wỳr rĩt hãmri nê ã amnhĩ nhĩpêx anhỹrja mỳrapê htyk kurê kumrêx. Tã kêt ka mẽ ho urãk nê amã akukrêx rax japê xàj ixkôt amòr kaxyw anhĩtôt kêt nê.

33 –Nê kwa kêt ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nê. Nê mẽ akukrêx rax pix kukamã ajamaxpêr kêt nê. Koja nhỹrmã ja piitã mẽ apê hapêx pa. Mẽ ate kãm anhĩkra karo hpar pyrãk o piitã hipêx hãmri nhũm Tĩrtũm ja hã mẽ apumu nê hpãnhã nhỹrmã mẽ amã mẽmoj mex nhõr rax nê.

34 –Nê kot paj kamãt kãm akupỹn ixwrỳk japêr nhũm nhỹri mễhõ ra ixkôt amnhĩ xãm xwỹnh mẽ mễhõ kot ixkôt amnhĩ xãm kêt xwỹnh wa par kãm nòr japêr. Hãmri pa amnhĩ wỳr ra ixkôt kot amnhĩ xãm xwỹnhta o api nhũm kot ixkôt amnhĩ xãm kêt xwỹnhta arĩ gòr nê nò.

35 Rỳ pa arĩgro hã akupỹn ixwrỳk japêr nhũm mễnịjê hõ wa hamêxkrut nê haròj kahuk o ãm japêr. Hãmri pa ra kot ixkôt amnhĩ xãm xwỹnhja ho api nhũm kot ixkôt amnhĩ xãm kêt xwỹnhja ahte arĩ haròj kahuk o xa. Hãmri nê hamaxpêr mex kêt kumrêx o xa.

36 Rỳ koja mẽmyjê hõ wa axkrut nê hpur kãm àpênh o ãm japêr. Pu pa amnhĩ wỳr kot ixkôt amnhĩ xãm xwỹnhta o api nhũm kot ixkôt amnhĩ xãm kêt xwỹnhta pur kãm ahte arĩ apênh o xa. Hãmri nê tee ri hkrãmnhwỳ hkukamã hamaxpêr o xa. Anê.

Nhũm pre ã Jesus hkôt mẽ pa ho mẽ pa xwỹnhjê mã amnhĩ jarênh anê.

37 Hãmri nhũm mẽ kuma nê kãm:

–Kwa nhỹri koja mẽmoj ã amnhĩ nhĩpêx anê? Anê.

Hãmri nhũm mẽ kãm:

–Nà koja nhỹri mẽmojja ã amnhĩ nhĩpêx anê ka mẽ omunh kurê kumrêx. Te nhỹri mẽmoj kro nê nòr nhũm nhônhti kot omunh nê hã htor nê hpinhĩpanh nhũm mẽ kot hã omunh kurê kumrêxta pyrãk. Anê.

18

Mē pahte Tirtūm mā amnhī jarēnh rāhā ho papa hā mē pamā karō

Rukre 11.5-8; määnēn Wam Tesarōn 5.17

¹ Tā nhūm Jejus hkôt mē pa ho mē pa xwýnhjê mā mēmoj tā karō. Mē kot tanhmā Tirtūm mā amnhī jarēnh to hā mē kām karō. Mē kot xatā kām amnhī jarēnh o pa nē amnhī kaxyw kām hamaxpēr rāhā ho pa kaxyw. No ām hā kuxi nē tanhmā mē kām hā ujarēnh to nē mē kām:

² —Koja nhýri krī hō kamā juistija kām Tirtūm prām nōkati. Nē määnēn kām amnhī kwýjê hprām nōkati htā kēp juisti nē tanhmā mē kām kapēr to ho hkrī.

³ Jakamā nhūm mēhō ni pé mjên htyk xwýnh. Nhūm hte mēhō xatā tanhmā kēp ō mēmoj to ho pa. Hāmri nhūm tee ri amnhī tā omu nē xatā juistita wýr mra nē kām harē nē kām: “Xê gāà nē. Na hte pahkwýjê hōja ixtomnuj rāhā ho pa. Xê ixtā tanhmā kām akapēr to kē tām inhīpêx.” Anē. Nē xatā hwýr mra nē amnhī to kuwý nē xatā hwýr mra nē amnhī to kuwý.

⁴⁻⁵ No nhūm kuma nē ām kuma. Kām hkwyjê ho ajuta hprām kêt jakamā ām kuma. Tā nhūm xatā hwýr mra. Gaa nhūm rī kām mar kaga nē. Hāmri nē hamaxpēr o: “Tk. Hêxta waa nē. Jahti na hte xatā ixwýr mra nē tanhmā inhmā amnhī jarēnh to. Nē ām xatā ixwýr mra. Nà na pa ra inhmā mar kagyk nē. E pa tokyx tanhmā nē kot tanhmā ho xwýnhhta mā ixkapēr to. Inhmā Tirtūm puma kamā rý inhmā ixkwýjê kaprī kamā pa tanhmā nē kām nē hkêt tā kot pa anhýr kêt nhūm amnhī tā inhmā harēnh pix nē pa ra mar kurê ixkrā tātāk nē.” Anhýr o hamaxpēr. Ā mē ujarēnh kot anhýr.

⁶ —Juisti tām hamaxpēr kêt tā nhūm nija xatā hwýr mra nē amnhī to hwýr jakamā nhūm jatā tanhmā ho ajuta hto.

⁷⁻⁸ No kêt Tirtūmja. Xàn ka htem mēmoj tā awý nhūm juisti punutita pyrā nē mē ama nē ām mē ama? Nà koja ā amnhī nhīpêx anhýr kêt nē. Kot ka mēmoj tā kām amnhī jarē nhūm ama nē tanhmā amā mēmoj to rý tanhmā amā amnhī nhīpêx to. Juistita rom mē pakamā ukaprī xwýnh na. Tā kot paj nhýrmā akupýn wrý nē mē apumu ka mē arī amnhī kaxyw hkôt ajamaxpēr mex

pē kām amnhī jarēnh rāhā ho ri apa pa ja hā mē apumu nē ixkīnh týt nē. Ja na inhmā hprām. Anē.

Tanhmā mē kot Tirtūm mā amnhī jarēnh to hā mē harēnh

Matêwre 6.5-8; määnēn Wam Pêtre 5.5-6

⁹ Tā nhūm Jejus mē kot amnhī to mex o hkwyjê jakrenh ā amnhī to jarkrar o ri mē pa xwýnhjê pumu nē tanhmā mē kām kapēr to. Nom mē kot amnhī to jarkrarta ā kuxi nē mē kām awjarē nē mē kām:

¹⁰ —Koja mēhō wa hamēxkrut nē Tirtūm mā amnhī jarēnh kaxyw wa tē. Ja kēp Parijew nhō xwýnh nhūm hōja kēp mē ō pahī mā hkwyjê pé kàxpore hkwy jamýnh xwýnh. Nhūm wa Tirtūm mā amnhī jarēnh xā hā ixkre hwýr wa tēn axā.

¹¹⁻¹² Hāmri nhūm Parijew nhō xwýnhhta kumrēx tē nē nhýri mē piitā mē noo mā Tirtūm mā amnhī jarē. Nē amnhī to jarkrar pé kām amnhī jarēnh o: “Pa Tirtūm. E ra ate ixpumunh mex. Na pa hte amnhī to mex pix o ri ixpa. Ra ate ja hā ixpumunh mex. Na pa hte kàxpore hkwy jamýnh xwýnh nēj rom tām amnhī nhīpêx. Nē semān piitā hā ixàpkur kêt rāhā amā amnhī jarēnh rāhā ho ixtā apkati axkrut. Nom ja pix kêt. Na pa hte määnēn ixàpēnh pānhā kàxpore jamý nē mē kot amā tanhmā amnhī nhīpêx to ho pa xwýnhjê mā hkwy nhōr o ixpa. Nē na pa hte ri ixàhkīnh o ri ixpa hkêt nē. Nē nhām mē kēp mē hprō ho amnhīkati ho ri ixpa hkêt nē. Na pa hte mē piitā mē kurom tām amnhī nhīpêx ā amnhī pumu nē ixkīnh týt kumrēx. Hêxta waa nē. Mon pa hte ri ā amnhī to mex o ixpa anē?” Anhýr o Tirtūm mā amnhī to jarkrar pé kām amnhī jarēnh o xa.

¹³ —Hāmri nhūm hpānhā mē kēp kàxpore hkwy jamýnh xwýnhhta haxwýja Tirtūm mā amnhī jarē. No ām Parijew nhō xwýnhhta rom ki hkwyjê pé awry nē ahte hipō nē kām amnhī jarē. Nē kām amnhī jarēnh pé amnhī tak nē mur nē kām: “Kwa Tirtūm. Na pa hte amnhī tomnuj týt o ri ixpa. Nē ixtýt ri amā prām xā kuhpa hā tanhmā amnhī nhīpêx to. Na pa tee ri ja hā amnhī pumu nē ixkaprī htýt nē. Ā inhmā amnhī nhīpêx anhýr o ri ixpa hprām kêt tā pa hte ā amnhī nhīpêx anhýr o ri ixpa. Kwa xā

kot ka ixkamã axukaprĩ nẽ amnhĩ katut kôt ixte amnhĩ tomnuj rēnh pa Tĩrtũm?” Anhỹr o kãm amnhĩ jarẽ.

¹⁴—Hãmri nhũm Tĩrtũm hamẽ wa kot kãm amnhĩ jarēnh ma no ãm wamta ma nẽ ãm kuma. No kêt hkôt hõja ma hãmri nẽ kot kãm amnhĩ tã àhwỳr xà hkôt amnhĩ katut kôt kot amnhĩ tomnuj rēnh pa nẽ ho hkra. Jakamã nhũm mex nẽ hkĩnh nẽ pa. Ra tãm hkrã hãmri nẽ hkĩnh nẽ ma htem kurẽ kumrẽx. ã mẽ ujarēnh kot anhỹr. ãm hãmri na pa mẽ amã ja jarẽ. Koja mēhõ Parijew nhõ xwỳnhhta pyrã nẽ kot amnhĩ to mex xwỳnh ã amnhĩ kamnhĩx hãmri nẽ Tĩrtũm kot amnhĩ katut kôt kot amnhĩ tomnuj rēnh kaxyw amnhĩ to hwỳr kêt nẽ. Koja ãm kãm amnhĩ to jarkrar pix nẽ. Jakamã koja Tĩrtũm te kot mar nẽ ãm mar pyrãk o hipêx. No koja mēhõ kot kàxpore hkwy jamỳnh xwỳnhhta pyrã nẽ tee ri tanhmã amnhĩ tomnuj to hã amnhĩ pumu nẽ hkaprĩ nẽ. Hãmri nẽ amnhĩ to Tĩrtũm wỳ nhũm kuma nẽ tanhmã ho mex to. Anẽ.

Jejus kot amnhĩ wỳr mēhprĩrejẽ hwỳr ã harēnh

Matêwre 19.13-15; Makre 10.13-16

¹⁵ Tã nhũm Jejus mẽ hkôt mẽ pa ho mẽ pa xwỳnhjaja arĩ pry hã Jerujarẽ hwỳr mō nhũm Ijaew kwỳjaja mẽ omu nẽ mẽ hkrare jamỳ nẽ Jejus wỳr mẽ o mra. Kot mẽ hã ihkra jaxwỳr nẽ mẽ ho Tĩrtũm wỳr kaxyw. Hãmri nhũm hkôt mẽ pa ho mẽ pa xwỳnhjaja tee ri ja hã mẽ omu nẽ nẽ mẽ kãm kapēr nẽ mẽ kãm:

—Tk. Kwa mẽ ma akupỹm mẽ akrata o mra nã? Mo kaxyw na ka mẽ Jejus wỳr mẽ o mra? Kormã mẽ ràxre kēnã. Anẽ.

¹⁶ Hãmri nhũm amnhĩ tã mẽ kuma nẽ mẽ kãm:

—Tk. Kwa nã mẽ ri inhnẽ mēhprĩjẽ kurẽ hkêt nẽ. Kwãr mẽ mãmri ixwỳr mẽ o mra. Anẽ.

Hãmri nẽ amnhĩ wỳr mẽ kãm hpa ho apẽ nhũm mẽ hwỳr mẽ o mra nhũm mẽ kuri kuhẽ. Hãmri nhũm hkôt mẽ pa ho mẽ pa xwỳnhjẽ mã kãm:

—E mẽ jareja mẽ omu. Na htem hamakêtkati nẽ hkĩnh nẽ ri pare. Nẽ kãm amnhĩ to rũnh prãm kêt nẽ ri pa. Tã Tĩrtũm kôt mẽ kot amnhĩ nhĩpêx xwỳnhjaja na

htem mẽ urãk nẽ kãm amnhĩ to rũnh prãm kêt nẽ ri pa.

¹⁷—Jarejaja na htem hipêxã nẽ katorxã wa kapēr ma nẽ wa hkôt ri amnhĩ nhĩpêx mex o ri pa. Tã ixpê Tĩrtũm kot mẽ awỳr inhmēnh xwỳnh kot ka mẽ amã ixkôt amnhĩ xunhwỳr prãm. Hã kot kaj mẽ te ho jarejẽ kot amnhĩ nhĩpêx pyrãk o amnhĩ nhĩpêx. Jao ixkapēr ma nẽ ixkôt ri tanhmã amnhĩ nhĩpêx mex to ho ri apa. Anẽ.

Kàxpore rax xwỳnh jarēnh

Matêwre 19.16-30; Makre 10.17-31; mããnēn Wam Ximotre 6.6

¹⁸ Tã nhũm Ijaew nhõ pahihtĩ hõja Jejus wỳr tẽ nẽ kãm kapēr nẽ kãm:

—Pa? Mẽ ijahkre xwỳnh maati? Kwa inhmã mēmoj jarẽ. Tanhmã kot pa we nhỹrmã Tĩrtũm ri ixtĩr tũm nẽ ixpa kaxyw amnhĩ nhĩpêx mex to ho ri ixpa wehe? Anẽ.

¹⁹ Hãmri nhũm kãm:

—Xã ate ixpê Tĩrtũm kwỳ hã ixpumunh kôt na ka ixte urãk nẽ amnhĩ to mex xwỳnh ã ijarẽ? Tĩrtũm pix na kot amnhĩ to mex rãhã xwỳnh jakamã kot kaj ã ijarēnh anhỹr jao ixpê Kra hã ijarẽ. Nẽ urãk nẽ ixte amnhĩ to mex xwỳnh ã ijarẽ. Nã xãn ka ãm atỹx ri amnhĩ krã hkôt ã ijarēnh anẽ?

²⁰—Tĩrtũmja mex o mex xwỳnh jakamã kot kaj amã nhỹrmã kuri atĩr tũm nẽ apa hprãm hãmri nẽ ra kot mēmoj tã mẽ amã karõ xà hkôt amnhĩ nhĩpêx o ri apa. Ra ate mar mex kēnã. Na pre mẽ amã:

Kêr ka mẽ axpẽn pẽ axàhkĩnh hkêt nẽ.

Nẽ mẽ axpẽn par kêt nẽ.

Nẽ mẽ axpẽn to axêx o ri apa hkêt nẽ.

Nẽ mẽ axpẽn pẽ aprõ ho amnhĩkati hkêt nẽ.

Nẽ mẽ anhĩpêxã mẽ akatorxã wa hã apijaãm pẽ wa kutã anojarêt pix o ri apa.

E kot kaj amã nhỹrmã Tĩrtũm kuri atĩr tũm nẽ apa hprãm hã kêr ka ã amnhĩ nhĩpêx anhỹr o ri apa. Anẽ.

²¹ Nhũm pre ã Jejus kãm kapēr anẽ nhũm kuma nẽ kãm:

—Kwa ixprĩre ri ra ã ixte amnhĩ nhĩpêx anhỹr o ri ixpa kēnã. Nom ixte ixtĩr tũm nẽ ixpa kaxyw kormã ixte tãm kêt pyrãk. Anẽ.

²² Hãmri nhũm Jejus kãm:

—Nã kormã mēmoj pyxire nẽ arĩk. Na ka amã akukrẽx rax japê htỹx o Tĩrtũm jakre.

Jakamã kêr ka ma akupÿm tẽ nẽ akukrêx o wẽnê hpa nẽ hpãnhã kàxpore jamÿ hãmri nẽ ma mẽ kêp amrakati xwÿnhjê mã õr pa. Hãmri nẽ rĩ akupÿn ixwÿr tẽ nẽ ixkõt apa ho apa. Anẽ.

²³ Hãmri nhũm kuma nẽ tee ri amnhĩ kukamã hamaxpêr. Kãm kukrêx rax japê nẽ kãm ìhkra karo hprãm kêt nẽ. Jakamã tee ri Jejus kot ã kãm hã karõ anhÿrja ma nẽ awjanã nẽ ma akupÿm tẽ.

²⁴ Hãmri nhũm tee ri ja hã omu nẽ hã mẽ kot mar xwÿnhjê mã kapêr nẽ mẽ kãm:

—Hêxta waa nẽ. Koja mẽ hikukrêx rũnh xwÿnhjaja ohtô nẽ kãm mẽ hikukrêx japê xàj Tĩrtũm mẽ wa ixri htĩr tũm nẽ pa ho papa hkêt nẽ. Wa ixte amnhĩ nhĩpêxja mẽ kêp hihtÿx.

²⁵ Na htem kãm hikukrêx rax mã ìhkra karo hprãm kêt rãhã tee ri kãm Tĩrtũm kõt amnhĩ nhĩpêx prãm kaprÿ. Te ho mẽhõ kot menh kagõ hã hkre nẽ kãm kagõ katõk prãm kêt rãhã kãm guhkrax kãm àr prãm kaprÿta pyræk. Anẽ.

Nhũm pre ã Jejus mẽ kãm kapêr anẽ.

²⁶ Hãmri nhũm mẽ kuma nẽ tee ri amnhĩ kukamã hamaxpêr nẽ kãm:

—Kwa nom mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhÿrmã war ari ixtĩr tũm nẽ ixpa ho ixpa hkêt nẽ nà? Anẽ.

²⁷ Hãmri nhũm mẽ kãm:

—Nà kot kaj mẽ amnhĩ krã hkõt mẽ amã mẽ akukrêx japêja mã anhũrer kêt nẽ. Tĩrtũm pix na hte ã mẽ kot amnhĩ nhĩpêx anhÿr kaxyw tanhmã mẽ hkrã hto nhũm mẽ kãm mẽ hikukrêx japê htÿx kêt nẽ. Jao mẽ kêp Tĩrtũm mẽ wa ixri htĩr tũm nẽ mẽ pa ho pa mã xwÿnh. Anẽ.

²⁸ Hãmri nhũm Simãw Pêtre kãm:

—Kwa Pahiti no mẽ pajaja? Na pa prem agryk ã mẽmoj piitã hkaga hpa nẽ akõt ixpa ho ixpa. Jakamã kot paj mẽ nhÿrmã war ari ixtĩr tũm nẽ ixpa ho ixpa nà? Anẽ.

²⁹ Hãmri nhũm kãm:

—Tÿ. Nà ka mẽ atõ inhmã tanhmã amnhĩ nhĩpêx to ho apa kaxyw akwÿjê re nẽ ma inhmã tanhmã amnhĩ nhĩpêx to ho ri apa. Anhõrkwÿ re rÿ atõ rÿ atõx rÿ aprõ nẽ akrajê re. Rÿ akatorxà nẽ anhĩpêxà war are. Rÿ akukrêx piitã rer pa hãmri nẽ ma

ixkapêr o mẽ piitã mẽ ahkre ho ri mẽ hkõt apa.

³⁰ Hã kot paj ja hã mẽ apumu nẽ mẽ ato mex rax nẽ. Hãmri ka mẽ ma nhÿhÿm apa nẽ nhÿri mẽ kãm ixkapêr jarênh o ri mẽ hkõt apa nhũm mẽ kot mẽ amar xwÿnh kwÿjaja mẽ ama nẽ ra kãm mẽ akĩnh nẽ. Nẽ ra mẽ ate akwÿjê rer par tã nhũm mẽ tãmjaja te mẽ apê mẽ hkra rÿ mẽ htõ rÿ mẽ htõx pyræk o mẽ anhĩpêx nẽ tanhmã mẽ ato mex to ho pa. Hãmri ka mẽ nhÿrmã ty nẽ ma Tĩrtũm mẽ wa inhõ krĩ hwÿr api hãmri nẽ wa ixkuri amex kumrêx nẽ atĩr tũm nẽ apa ho apa. Anẽ.

Nhũm pre ã Jejus Simãw Pêtre mẽ hkwÿjê mã kapêr anẽ.

Jejus kot axte htyk kukamã amnhĩ jarênh Matêwre 20.17-19; Makre 10.32-34

³¹ Tã nhũm Jejus mẽ kot ÿ hã kapêr jarênh o mẽ pa xwÿnh pê 12jaja mẽ hkwyjê pê mẽ ho kato. Nẽ nhÿri mẽ hkàx ã mẽ o xa nẽ tanhmã mẽ kãm amnhĩ jarênh to nẽ mẽ kãm:

—Amnepêm Tĩrtũm nhÿ hã kapêr jarênh xwÿnhjaja na prem ixkukamã tanhmã mẽ kot inhĩpêx to hã ijarê nẽ ixtã kagà. Tã pu mẽ ra Jerujarê hwÿr mõ. Kamã koja mẽ tanhmã ixto rax nẽ. Ra mẽ kot ixkukamã ijarênh nẽ ixtã kagà xà hkõt koja mẽ ixto anẽ.

³²⁻³³ Koja mẽ kãm ixkurê xwÿnhjaja ixpynê nẽ Rõm nhõ xwÿnhjê nhõ pôristi hwÿr ixto tẽ nẽ mẽ kãm ixto hêx nhũm mẽ kuma nẽ mẽ mar xà hkõt tanhmã inhĩpêx to. Nẽ mẽ hkwyjaja ixtã hpêr o axkê nẽ akunha. Nẽ mẽ hkwyjaja ixto kapêr punuj nẽ ijapry nẽ ixtã argõx rẽ nẽ ixtak. Hãmri nẽ ixpĩ. ã koja mẽ inhĩpêx anẽ. Nom kot paj ãm ixtÿk ã apkati axkrunêpxi nhũm Tĩrtũmja akupÿm ixto ixtĩr. Anẽ.

³⁴ Hãmri nhũm mẽ kuma nẽ tee ri htyk nẽ akupÿm htĩrja kukamã hamaxpêr no ãm hprĩ hã hkõt hamaxpêr kêt nẽ.

Jejus kot no hkre xwÿnh o mex ã harênh Matêwre 20.29-34; Makre 10.46-52

³⁵ Tã nhũm Jejus mẽ kormã Jerujarê hwÿr Jerikoja tẽp o mõ. Hãmri nhũm pry nhĩhkjê hã no hkre xwÿnhja àhwÿr o nhÿ.

³⁶ Hāmri nē amnhī wỳr mẽ mrar ma. Mẽ ohtô nē Jejus kôt mẽ mrar xwỳnhjê mrar ma mẽ mẽ kām:

—Kwa mẽmo ri? Mẽmoj wỳr na ka mẽ axohtô nē mra? Anẽ.

³⁷ Hāmri nhũm mẽ kām:

—Nà Jejus pẽ Najare nhõ xwỳnh kôt na pa mẽ mẽ. Anẽ.

³⁸ Hāmri nhũm mẽ kuma nẽ kàx pẽ Jejus mã kapẽr nẽ kām:

—Pa Jejus? Apê mẽ inhõ Pahihti mex na ka. Te apê amnepẽm anhĩgêt pahihti Tawi kot amnhĩ nhĩpêx pyræk. Jakamã kwa ixkamã axukapri nẽ akupỹm ixto mex kêt wehe. Ixte amnhĩ kaxyw akôt ijamaxpẽr xwỳnhjê hõ na pa. Anẽ.

³⁹ Hāmri nhũm Jejus kukamã mẽ mrar xwỳnhjaja tee ri kuma nẽ kām:

—Tk. Kwa akapẽr kêt nẽ nhỹ nà. Anẽ.

Tã no nhũm ãm mẽ kuma nẽ xatã amnhĩ to hwỳr o nhỹ. Kàx pẽ kãm kapẽr o nhỹ.

⁴⁰ Hāmri nhũm Jejus kuma nẽ xa nẽ amnhĩ wỳr hã karõ nhũm mẽ hpa hã kupy nẽ hwỳr o tẽ nhũm kãm:

⁴¹ —Pa mo na? Tanhmã kot pa ato? Anẽ.

Nhũm kãm:

—Nà akupỹm inhmã ixrit mex prãm. Anẽ.

⁴² Hāmri nhũm kãm:

—Tõe. Nà ra ate amnhĩ kaxyw inhmã ajamaxpẽr tỳx jakamã kot kaj akupỹm ri rit. Anẽ.

⁴³ Hāmri nhũm akupỹm rit mex kurẽ kumrẽx nẽ ja hã amnhĩ pumu nẽ hkĩnh tỳx nẽ. Hāmri nẽ ma Jejus kôt Tirtũm mã mex o mex ã harẽnh o mẽ hkôt tẽ. Hāmri nhũm mẽ kot hã omunh xwỳnhjaja haxwỳja Tirtũm mã mex o mex ã harẽnh o Jejus kôt mẽ.

19

Jakew kãm Jejus pumunh prãm ã harẽnh Rukre 3.8, 3.12-13

¹ Tã nhũm Jejus arĩ Jerujarẽ hwỳr mẽ nẽ Jeriko hwỳr pøj. Hāmri nẽ krĩ kahti hkôt pry hã mẽ.

² Nhũm mẽ ra hkôt htu rax nẽ hkôt omunh o mẽ. Jakamã nhũm Jakew pẽ Rõm nhõ pahi mã kwỳjê pẽ kàxpore hkwy jamỳnh xwỳnhjê krãhtũm xwỳnhja. Na pre hikàxpore rax nẽ.

³ Tã haxwỳja kãm Jejus pumunh prãm nẽ. Nom ãm hakooti nẽ hprĩhti jakamã tee ri

kot omunh kaxyw amnhĩ nhĩpêx nhũm mẽ kẽp àmnàr rax nẽ.

⁴ Hāmri nhũm ra hamaxpẽr nẽ ma kukamã hprõt nẽ tẽ nẽ nhỹri pry mỳri pĩ xãm pumu nẽ hã api nẽ kutêp ajêt. Hāmri nhũm Jejus mẽ nẽ hapa.

⁵ Nẽ kànhmã rit nẽ omu nẽ kãm:

—Pa Jakew. E kwa tokyx tẽn wrỳ pa ma akôt anhõrkwy hwỳr tẽn nẽ ari amnhĩm hikra. Anẽ.

⁶ Hāmri nhũm kuma nẽ hkĩnh nẽ. Nẽ wrỳk kurẽ kumrẽx nẽ ma amnhĩ kôt nẽ o tẽ.

⁷ Hāmri nhũm mẽ kot omunh o kuhẽ xwỳnhjaja tee ri ja hã omu nhũm ja mẽ kẽp omnuj nẽ nhũm mẽ axpẽn mã harẽnh o:

—Tk. Kwa nà. Jakew kot amnhĩ tomnuj xwỳnh tã nhũm Jejus ma hkôt tẽn nẽ kuri pøj. Anẽ.

⁸ Hāmri nhũm wa õrkwy hwỳr axà nẽ nhỹ nhũm Jakew Jejus mã amnhĩ jarẽnh o:

—E. Nà ra ixte pahihti mã kàxpore jamỳnh xwỳnhnta na pa pre hte ho prês jakre nẽ amnhĩm hamỳnh rax nẽ. Tã kot paj akupỹm mẽ kãm õr pa. Na pa pre hte mẽ hkwyjê pẽ ho 10 nẽ hamỳ. Tã kot paj hipy ho 40 nẽ kurẽ nẽ akupỹm mẽ kãm ho ixpigrãnh pa. ã kot paj mẽ hipêx anẽ. Nẽ ixkàxpore jakrẽx kot paj ho axkjê nẽ mẽ kẽp amrakati xwỳnhjê mã ho ixpigrãnh pa. Anẽ.

⁹ Hāmri nhũm kuma nhũm ja kãm mex nẽ. Jakamã nhũm kãm:

—Nà ãm hāmri. Ate pahkukamã panhĩgêt Apraãw pyrã nẽ jarãhã ate amnhĩ tomnuj kaga jakamã na ra jarãhã anhõrkwy hwỳr mẽ mex xà axà. Kojã Tirtũm jarãhã amnhĩ katut kôt ate amnhĩ tomnuj rẽnh pa nẽ axte kãm hamaxpẽr kêt nẽ.

¹⁰⁻¹¹ Mẽ ate amnhĩ tomnuj xwỳnhjê hwỳr na pre Tirtũm inhmẽ pa wrỳ. Te nhỹri mẽ apikunor nhũm ixte mẽ ajapêr o ixpa kaxyw Tirtũm kot mẽ awỳr inhmẽnh nhũm ixwrỳk nẽ nhỹri ixte mẽ ajapêr o ixpa nẽ mẽ amã ixkator nẽ ixkĩnh nẽ ma akupỹm hwỳr mẽ ato inhmõrta pyræk. Anẽ.

Mẽ pahte Tirtũm mã tanhmã amnhĩ nhĩpêx to

Matêwre 25.14-30

Hāmri nhũm mẽ ohtô nẽ Jejus mar o hkôt Jerujarẽ hwỳr mra. Na prem htỳx tanhmã

kot amnhĩ nhĩpêx to hã hkamnhĩx o hkôt mō nē axpēn mǎ:

—E ma pu mē hkôt. Koja Jerujarē hwýr pōj hāmri nē kēp mē pahpē Ijaew nhō pahi nē mē pahto amnhĩptār kurē kumrēx. E kwa ma pu mē hkôt. Anē.

12 Nhūm Jejus mē hamaxpēr kôt mē omunh mex nē. Jakamā kot mē piitā mē ho amnhĩptār xā hã arīgro hã mē kām amnhĩ jarēnh kaxyw. Kormā Jerujarē hwýr ahtēp kēt ri mē kām amnhĩ jarēnh kaxyw. Nom hprī hã mē kām hã amnhĩ jarēnh kēt nē. Ām amnhĩ tā kuxi nē mē kām awjarē nē mē kām:

—Koja nhýri krī hō kamā mēhō myja. Kot amnhĩ to rax o hkwyjē jakrenh xwýnhja. Nē krī hō kamā krī piitā hkôt pahi nhō pahihtija hāmri harēnh ma nē amnhĩ wýr kuwý. Kot ma hwýr mōr nhūm ō krī kamā nē mǎānēn krī hkwy kamā kēp mē ō pahi kaxyw kot ām kaxyw nhūm hwýr nojarēt.

13 Hāmri nē amnhĩ wýr kām mē àpēnh xwýnhjē ho 10 nē tanhmā mē hã karō hto. Nhūm mē hwýr mra nhūm mē kām amnhĩ jarē nē mē piitā mē kām kàxpore hkwy gō. Ahpýnhā mē kām hpýnh nē kugō nē mē kām: “E ota ixkàxpore hkwyta. Kot kaj mē ixkutēp tanhmā ri inhmā ho rax to. Kēr pa mēmo arīgro hã akupýn mō kē ra ixahā inhmā ho ohtō nē pa hamý.” Anhýr o mē kām kapēr hāmri nē ma mō.

14 Hāmri nhūm ō krī nhō xwýnhjaja ra kēp mē ō pahi kaxyw harēnh ma nhūm ja mē kēp omnuj nē. Nē mē kām hkīnh kēt jakamā ma krī hō kamā kot mē kaxyw ām xwýnhta wýr hkwy rē nhūm mē ma hwýr mra nē hwýr pōj. Hāmri nē kot mē kaxyw ām mǎ xwýnhta pumu nē kām: “Pa. E ot pa mē awýr mra. Kwa na ka xep ra mē ixkaxyw mē inhīōja xām kaxyw. Kwa nà mē inhmā jahti hkīnhti hã. Kwa mē ixkaxyw ām kēt nē nà?” Anhýr o kām kapēr.

15 —Tā no nhūm ām mē kuma nē ām mē kuma nhūm mē awjanā nē mǎ akupým mra. Hāmri nhūm pahija mē kaxyw mē kām hkīnh kēt xwýnhta xām nhūm ma akupým ō krī hwýr mō. Mōō nē ra pōj hāmri nē amnhĩ wýr kām mē àpēnh xwýnhjē hã karō nē mē kām: “E no ixte mē amā kàxpore nhōr xwýnhta? Tanhmā na ka

prem ixkutēp inhmā ho rax to? E mē inhmā agō pa omu.” Anē.

16 —Hāmri nhūm wamta kām: “Ota akàxpore ate inhmā ōr xwýnhta. Na ka pre inhmā ho pyxi nē agō pa kupy nē ho mēmo hy hkwy japrō nē hkre. Nhūm ō pa mē kām ho wēné ho ri ixpa nē hpānhā kàxpore jamý nē hipy amā kurē nhūm ra kēp 10. Ota. E amý.” Anē.

17 —Hāmri nhūm kuma nē hkīnh nē. Hāmri nē kām: “Nà ām hāmri na ka ā inhmā ho rax anē. Ixte amā ho pyxi nē ōr tā ka pre inhmā hamār mex nē nhūm kànhmā axkamē nē ra kēp 10. Tā ra ixpē krī hkwy kamā mē ō pahi jakamā kot ka inhmā krī ho 10 nē inhmā hamār o ri apa. Jakamā kwa māmri amnhīm kàxporeta o arīk.” Anē.

18 —Hāmri nhūm hpānhā hōja hwýr tē nē kām: “E ota akàxporeta. Na pa pre ho mēmo hy hkwy japrō nē hkre nhūm ō pa mē kām ho wēné nē hpānhā kàxpore jamý nē hipy amā kurē nhūm ra kēp 5. Tā ota. E amý.” Anē.

19 Hāmri nhūm kuma nē kām: “Nà ām hāmri. Hāmri na ka ā inhmā ho rax anē. Jakamā kot kaj hpānhā inhmā krī ho 5 nē ho amnhĩptār o apa. E māmri amnhīm kàxporeta o arīk.” Anē.

20-21 —Hāmri nhūm hpānhā hkôt hōta tē. Nom hkwyjē hkīnhā ō patrāw mǎ tanhmā kàxpore ho rax to hkēt nē. Ām tanhmā hamaxpēr punuj to nē htýx ri kot kēp ho ōxy nē amnhīm piitā hamýnh par nē akupým kām hkwy nhōr kēt ā hkamnhĩx. Jakamā tanhmā kām ho rax to hkēt nē. Ām hkupu nē o tē nē nhýri kutēp kuxi. Hāmri nhūm ō patrāw amnhĩ wýr hã karō nhūm hwýr tē nē amnhĩ nē kām kapēr punuj nē kām: “Tk. Ota akàxporeta. Ixte amā tanhmā ho rax tore hã. Ixte amā ho rax ronhýx ka amnhīm piitā hamýnh pa nē akupýn inhmā hkwy nhōr kēt nē. Rý ixte tanhmā apē homnuj to ronhýx ka hã inhmā akir. Jakamā na pa tanhmā amā ho rax to hkēt nē. Ām hkupu nē o tē nē ho amūxu nhūm arī akutēp hikwý. Tā ota.” Anhýr o amnhĩ nē ō patrāw mǎ kapēr punuj nē.

22-23 Hāmri nhūm tee ri amnhĩ tā kuma. Kot amnhĩ to mex xwýnh nē kām mē àpēnh xwýnhjē ho mex o pa xwýnh tā ā kām àpēnh xwýnh kot kām kapēr anhýrja ma nē amnhĩ

tã kamã gryk nê. Hãmri nê kãm: “Tk. Kwa xà ã ixte amnhĩ nhĩpêx anhÿr? Nà ixte ã amnhĩ nhĩpêx anhÿr kêt. Á ixte amnhĩ nhĩpêx anhÿr nhũm amã ixpuma ronhÿx ka pre amã ixpuma xàj ixkàxporeta py nê ixwakre kamã amnhĩ krã hkôt tanhmã inhmã ho rax to. Tã nhÿx pa pre ra akupÿn awÿr tẽ nê hamÿ. Nà na ka ã ijarênh anhÿr o axêx nê amnhĩ krã hkôt tanhmã inhmã ho rax to hkêt nê. Mÿrapê kot paj atomnuj tÿx nê ka rĩ amnhĩ pumu. Pêr ãm ajamaxpêr punuj.”

²⁴—Nhũm pre ã kãm kapêr anê hãmri nê mẽ kot mar o kuhê xwÿnhjê mã kãm: “E mẽ atõ kêp kàxpore py nê wam kot ho 10 nê hamÿnh xwÿnhta mã agõ.” Anê.

²⁵Hãmri nhũm mẽ tee ri kuma nhũm ja mẽ kêp omnuj nhũm mẽ kãm: “Kwa nà ra hikàxpore rax kênã. Ra ate kãm ho 10 nê òr kênã.” Anê.

²⁶Hãmri nhũm mẽ kãm: “ÿÿ nom tãã. Mãmrĩ kãm agõ. Koja mēhō inhmã àpēnh mex pa amnhĩ tã omu nê kot inhmã àpēnh mexta pãnhã ho mex nê. No koja inhmã àpēnh mex kêt nê pa tee ri ja hã omu nê ho mex kêt nê. E mãmrĩ kãm agõ.” Anê.

²⁷Hãmri nê hpãnhã mẽ kãm: “E hpãnhã mẽ kãm ixprãm nõkati xwÿnhjaja. Ixte mẽ ho amnhĩptàr mã tã mẽ kãm ixprãm nõkati xwÿnhjaja. Mẽ ma mẽ hwÿr mra nê mẽ ho akuprõ nê akupÿn amnê ixwÿr mẽ o mra nê inhnoo mã mẽ himex pa.” Anê. Á mẽ ujarênh kot anhÿr. Anê.

Nhũm pre Jejus ã mẽ kãm ujarênh anê. Te tãm kêp patrãwta pyrã nê ã amnhĩ jarênh anê. Mẽ kot tanhmã amnhĩ nhĩpêx to ho pa hã mẽ omunh xà hkôt tanhmã mẽ hipêx to hã amnhĩ jarê.

Jejus kot Jerujarê hwÿr àr ã harênh

Matêwre 12.1-11; Makre 11.1-11; Juãw 12.12-19

²⁸Nhũm Jejus kormã Jerujarê hwÿr mō.

²⁹Hãmri nê ra Petake mẽ Petãn wa htêp o mō. Hixêt pê Oriwêhti kahti ri na krĩ wa xa. Jakamã nhũm Jejus hkôt mẽ pa ho mẽ pa xwÿnh wa ho axkrut nê amnhĩ kukamã wa kumê.

³⁰Nê wa kãm:

—E. Wa ma krĩ mÿj wÿr mẽ ixkukamã wa tẽ. Nê wa hwÿr pøj nê nhÿri jumênre nyw mã ê nê ãm ata pumu. Kormã mẽ kot hã

hkrĩ hkêt xwÿnhta. Ka wa omu nê kãm ê xà hpôt nê man akupÿn ixwÿr o tẽ.

³¹Nhũm mēhō ja hã war apumu nê hã tanhmã war amã kapêr to ka wa kãm ã ijarênh anê nê kãm: “Mẽ panhō Pahihti na hã karō pa wa hwÿr tẽ.” Anhÿr o wa kãm ijarê. E wa ma hwÿr tẽ. Anê.

³²Hãmri nhũm wa kuma nê ma hwÿr htêm kurê kumrêx. Nê wa krĩm pøj nhũm Jejus kot wa kãm harênh xà hkôt jumênreta pumu.

³³Hãmri nê kãm ê xà hpôt o xa nhũm ò dõnjaja mra nê hã wa omu nê wa kãm:

—Tk. Kwa mo kaxyw na ka wa ri mẽ ixpê mẽ ixkrit mã ê xà pôt o wa xa? Kwa xà kot kaj wa mẽ ixpê ho ahkĩ nà? Anê.

³⁴Hãmri nhũm wa mẽ kãm:

—Nà mẽ panhō Pahihti na wa inhmã anê pa wa tẽ. Wa ixte ma akupÿm kutã ho inhmōr kaxyw. Anê.

Hãmri nhũm mẽ wa kuma nê wa kãm:

—Tõe. Nà wa mãmrĩ ma kãm o tẽ. Anê.

³⁵Hãmri nhũm wa ma akupÿm Jejus wÿr o tẽ. Hãmri nê kaxyw amnhĩ xê hkwÿ hopøj nê kãm ho hkô kahty nê kãm ho htÿx nê o xa nhũm hã nhÿ nê mō.

³⁶Kormã Jerujarê hwÿr hixêt ã àpir o mō. Nhũm mẽ kot omunh o mrrar xwÿnhjaja hkĩnh nê ma hkukamã kot pry ho mex kaxyw amnhĩ xê hkwÿptyr o mō.

³⁷Hãmri nhũm mẽ hixêt ã api nê kormã ahpar mã wrÿk o mō. Hãmri nhũm Jejus kôt mẽ pa ho pa xwÿnhjaja kàx pê Tĩrtũm mex o mex ã harênh o hkôt mō. Ra mẽ kot hkôt pikamênh ry nê kot mẽ kãm aa mēmoj pumunh kêt kwÿ ho anhÿr rax ã omunh jakamã hkĩnh nê nê Tĩrtũm mex o mex ã harênh o hkôt mō.

³⁸Nê harênh o:

E ota Tĩrtũm kot mẽ pahwÿr mēnh xwÿnhta na ra pøj.

ãm hãmri na mẽ pahwÿr wrÿ. Na mex kumrêx.

Kêp mẽ panhō Pahihti mex na. ãm hãmri na pre Tĩrtũm mẽ pahwÿr kumê.

Tĩrtũmja mex kumrêx. Mex o mex. Kukwak ri pix mã na pu htem pajamakêtkati nê paxãmnhix ri papa rãhã ho papa.

Anhÿr o Jejus kôt harênh o mō. Ra kot mẽ ho amnhĩptàr kurê kumrêx ã hkamnhix jakamã hkĩnh nê hkôt ã kapêr o mōr anê.

³⁹ Hāmri nhūm Parijew nhō xwýnh kwýjaja mẽ hkôt mra nē tee ri mẽ kuma hāmri nē Jejus mã kām:

—Kwa Jejus. Mẽ kām anē kē mẽ anhĩkrê nà? Anē.

⁴⁰ Hāmri nhūm mẽ kām:

—Tk. Nà kot paj mẽ kām anhỹr kêt nē. ã mẽ kapēr anhỹrja na inhmã mar hprãm. Kwār mẽ māmri Tĩrtũm mã mex o mex ã harēnh o ixkôt mō. Kot mẽ anhỹr kêt nhūm ra pikap kēn nhĩkwỹ xwýnhja tee ri ja hã mẽ omu hāmri nē tãm tanhmã amnhĩ nhĩpêx to nē mẽ hpãnhã tãm Tĩrtũm mã mex o mex ã harēnh o hikwỹ. Jakamã kwār mẽ māmri kapēr anē. Anē.

Jejus tee ri kot Jerujarē hkukamã hamaxpēr ã harēnh

Rukre 23.27-31

⁴¹ Nhūm mẽ kormã Jerujarē hwýr hpôx o mō. Kormã hixêt rŭm ahpar mã hwýr wrýk o mō. Hāmri nhūm Jejus amým amnhĩ hkukamã Jerujarē nhō xwýnhjê pumunh o mō nē mẽ hkukamã hamaxpēr o hkaprĩ nē. Hāmri nē hkaprĩ xàj mýr o mō.

⁴² Hāmri nē te kot mẽ kuri mẽ omunh o ri pa pē mẽ kām kapēr pyræk o mẽ kām kapēr nē mẽ kām:

—Hêxta waa nē Jerujarē nhō xwýnhjaja. Kot kaj mẽ amex kêt nē. Mẽ ate amnhĩ kukamã axàhpumunh mex ronhỹx ka mẽ ra mẽ kām mẽ akurê xwýnhjê pumaj ixkôt amnhĩ xunhwýr kurê kumrêx nhūm mẽ tee ri tanhmã mẽ ato mã. Ka mẽ ra ixkukwak ri amex nē ajamakêtkati nē akĩnh nē ri apa ho apa.

⁴³⁻⁴⁴ Tĩrtũm tãm kot mẽ awýr inhmēnh tã ka mẽ amã ixprãm kêt nē. Jakamã koja nhỹrmã mẽ kām mẽ akurê xwýnhjaja mẽ awýr mra nē mẽ anhō krĩm hipôk pa. Hāmri ka mẽ amnhĩ wýr mẽ omu nē tee ri ajapôx kaxyw nhūm mẽ awýr agjê nē mẽ anhĩmex pa nē mẽ anhō krĩja grành pa. Nē ahpỹnhã ri mẽ anhōrkwỹ grành pa. ã koja mẽ mẽmoj piitã grành par anē. Anē.

Jejus kot Tĩrtũm nhōrkwỹ hwýr àr ã harēnh
Matêwre 21.12-17; Makre 11.15-19; Juãw 2.13-22

⁴⁵⁻⁴⁶ Tã nhūm Jejus Jerujarē hwýr axà nē jumēnre rŭm wrý hāmri nē ma Tĩrtũm mã amnhĩ jarēnh xà hã ixkreja wýr tē. Hāmri nē hwýr axà nē tee ri kamã mẽ pa xwýnhjê

pumunh o xa. Nhūm mẽ ra axtem nē môx nē ôwêhti nē tuuti ho wēnê ho kuhê. Mẽ kot haprôr nē Tĩrtũm mã hpar nē kām ôr pē kām amnhĩ jarēnh kaxyw mẽ kām ho wēnê ho kuhê. Nē axtem nē mẽ kām hã ohtô rax kām mẽ kām ho wēnê. Hāmri nhūm Jejus mẽ hwýr axà nē tee ri mẽ omu mẽ kām akir nē mẽ kām:

—Tk. Kwa nà. Tĩrtũm kapēr ã kagà htũm kot ôrkwỹ jarēnh kot:

Inhōrkwỹja ãm mẽ ate inhmã amnhĩ jarēnh xà hã ixkre pix kaxyw na.

Anhỹr o kot harēnh tã ka mẽ axtem nē kamã ã amnhĩ nhĩpêx anhỹr o apa. E mẽ ajapôj nē ma ajapêx tokyx anē.

Anhỹr o mẽ kām kapēr hāmri nē ixkre nē mẽ kator nhūm mẽ ma hapêx pa.

⁴⁷ Tã nhūm Jejus apkati mẽ Tĩrtũm mã amnhĩ jarēnh xà hã ixkreja wýr mra nē kamã mẽ ahkre ho hkrĩ. Hāmri nhūm mẽ ô patre krãhtũm mẽ Tĩrtũm kapēr tũm o mẽ ahkre xwýnhjê mẽ mẽ kot amnhĩ to rŭnh xwýnhjaja kot mẽ ahkre ma nhūm ja mẽ kēp omnuj nē nhūm mẽ kām hpĩr prãm nē.

⁴⁸ Nom nhūm amarĩ mẽ pa xwýnhjaja mẽ kurom kām mar prãm nē akryk mar o kuhê. Jakamã nhūm mẽ tee ri ja hã mẽ omu nē tanhmã mẽ kot hpĩr to hkukamã hã axpēn ma.

20

Mêhō nhỹ hã Jejus kot mẽ ahkre hã harēnh

Matêwre 21.23-27; Makre 11.27-33

¹ Nhūm arĩgro hō hã nhūm Jejus kē axte Tĩrtũm mã amnhĩ jarēnh xà hã ixkreja wýr axà nē mẽ ahkre ho nhỹ. Tanhmã mẽ kot amnhĩ nhĩpêx to nē nhỹrmã Tĩrtũm mẽ wa kuri htĩr tũm nē pa hã mẽ kām kapēr o nhỹ. Hāmri nhūm Ijaew nhō pahijê mẽ mẽ kot Tĩrtũm kapēr tũm o mẽ ahkre xwýnhjê mẽ mẽ ô patre krãhtũmjaja hêx rom mar o kuhê.

² Hāmri nē kām:

—Kwa mẽ inhmã amnhĩ jarē. Mêhō nhỹ hã na ka hte ã amnhĩ nhĩpêx anhỹr o ri apa? Na ka hte akupým mẽ ho mex o apa nē tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anē nà? Anē.

³ Hāmri nhūm mẽ kām:

—Nà ixkumrêx kot paj mẽmoj tâ mẽ akukja. Ka mẽ inhma nê inhmã harê pa rĩ kormã tanhmã mẽ amã amnhĩ jarênh to.

⁴ Finat Juãw Paxisja ã kot paj mẽ akukja. Mẽhõ nhỹ hã na pre mẽ hkrã kumrãr o pa? Xà amnhĩ krã hkôt nà xà Tĩrtũm nhỹ hã? E mẽ atõ inhmã harê. Anê.

⁵⁻⁶ Hãmri nhũm mẽ kuma nê tee ri kot tanhmã kutã kãm harênh to hkukamã hamaxpêr nê axpêñ mã:

—Kwa tanhmã kot puj mẽ kãm harênh to? Jar mẽ kot mar xwýnhjaja na htem kêp Tĩrtũm nhỹ hã kapêr jarênh o pa xwýnh ã harênh o pa. Tã kot puj mẽ kãm kot amnhĩ krã hkôt mẽ hkrã kumrãr o pa hã harê nhũm mẽ tee ri mẽ pama nê mẽ pakamã gryk tỳx nê. Nê mẽ paxêx rom mẽ pahte kãm pakapêr ã mẽ pahpumunh kurê kumrêx nê kên o mẽ pahtak o mẽ panhĩmex. Nom kot puj mẽ kãm Tĩrtũm nhỹ hã mẽ hkrã kumrãr ã harê nhũm mẽ pamã kapêr o: “ã kot anhỹr kênã na ka prem kapêr ma nê ra ixkôt amnhĩ xunhwýr kêt nê?” Anê. Nà kot puj mẽ kãm tanhmã harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê.

Mẽ kot tanhmã kãm nê nhũm kot ta pãnhã tanhmã mẽ kãm nê pymaj nhũm mẽ ãm tee ri kãm tanhmã nê hprãm kaprý o kuhê.

⁷ Hãmri nê kãm:

—Konên. Mẽ ixte mẽhõ nhỹ hã kapêr o pa hã omunhre hã. Anê.

⁸ Hãmri nhũm mẽ kuma nê mẽ kãm:

—Tk. Tôe kot pa xep ijaxwýja mẽ amã tanhmã amnhĩ jarênh to hkêt nê. Ijaxwýja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anê.

Mẽ àpênh punuj xwýnhjê jarênh

Matêwre 21.33-46; Makre 12.1-12

⁹ Nhũm Jesus arĩ Ijaew nhõ pahijê mã kapêr. Nê mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tâ kuxi nê mẽ kãm awjarê nê mẽ kãm:

—Koja mẽhõ hpur ã hkwyjê kot kamã kãm àpênh kaxyw mẽ kãm karõ. Hãmri nhũm mẽ ma hwýr mra nê kamã mẽmo hy hkre nê hkre pa. Hãmri nhũm ra hpur nhõ dõnja nhỹhỹm nojarêt nê kãm mẽ àpênh xwýnhjê mã tanhmã hpur jarênh to nê mẽ

kãm: “E or ixpur nõ. Kê kamã mẽmoj hkà hpa ka mẽ mãmrĩ kamã axujamýnh pa nê ho axkjê. Nê ixkutêp inhõ jaxwý nê mãmrĩ mẽ anhõ tanhmã ho hprãm xà hkôt tanhmã ho.” Anê.

—Nhũm ã mẽ kãm kapêr anê hãmri nê ma nhỹhỹm mẽ.

¹⁰ —Tã nhũm ra hkà hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpênh xwýnhjê hõja nhũm akupým mẽ hwýr kumê. Mẽ kot kãm kwý nhõr nhũm ma kot kãm o mõi kaxyw ma mẽ hwýr kumê nhũm ma mẽ hwýr mẽ. Mõi nê mẽ hwýr pøj nhũm mẽ omu nê axtem nê unê nê htak nê akupým hano nhũm ma akupým ý kamã mẽ.

¹¹ Hãmri nê pøj nhũm õ patrãwja tee ri omu nê hpãnhã ja mẽ nhũm ma mẽ hwýr mẽ. Mõi nê mẽ hwýr pøj nhũm kê wem mã ho anê nê unê nê htak nê akupým hano nhũm wamta pyrã nê ma akupým ý kamã mẽ.

¹² —Hãmri nhũm kê axte hkôt ja mẽ nhũm ma mẽ hwýr mãänên mẽ. Ma mẽ hwýr mẽ nê pøj nhũm mẽ te ho wamta wa hipêx pyrãk o hipêx nê unê nê htak rax nê amnhĩ nê hano nê pur nê kapôt ã kumê. Hãmri nhũm ma akupým mãänên ý kamã mẽ.

¹³ Nhũm mẽ õ patrãw tee ri mẽ omu nê hamaxpêr o: “Hêxta waa nê. Tanhmã kot paj amnhĩ nhĩpêx to? Nà kot paj mẽ hwýr ixkra mãn mẽ. Inhmã hapê htã kot paj mẽ hwýr kumê kê ma mẽ hwýr mẽ. Hãmri nhũm mẽ kêp ixkra hã omu nê tanhmã ixpê ho hkêt nê. Nê tâ inhmã kãm inhõja kwý gõ.” Anhỹr o hamaxpêr hãmri nê ma mẽ hwýr kumê nhũm ma mẽ hwýr mẽ.

¹⁴ —Tã ra mẽ hwýr hpõx o mẽ nhũm mẽ amým amnhĩ wýr omu nê kêp hkra hã omu nê hã axpêñ mã amýnê nê axpêñ mã: “E onêj hpur nhõ dõn krata tẽ. Koja nhỹrmã õ papaj mýr pẽ amnhĩm pur ã pyka pytã nê ho õ. Kwa pu mẽ hpĩr kurê kumrêx nê kêp hpurja o panhõ. E tokyj pu mẽ kupĩ ri.” Anê.

¹⁵ —Hãmri nhũm tẽ nê mẽ hwýr pøj nhũm mẽ unê nê pur nê ho kato nê ma o tẽ nê kupĩ. ã mẽ ujarênh kot anhỹr. Anê.

Nhũm pre ã Jesus mẽ kãm ujarênh anê nê hã tanhmã mẽ hkukjêr to nê mẽ kãm:

—E koja hpur nhõ dõnja hkra jarënh ma hãmri nê tãm mẽ hwÿr mō nê tanhmã mẽ hipêx to wehe?

¹⁶ Kojã ma mẽ hwÿr mō hãmri nê mẽ himex pa. Hãmri nê hpãnhã hpur ã nhãm mẽmojjê rē nhũm mẽ tã kãm hamãr mex o pa. Anê.

Nhũm pre ã Jejus mẽ kãm ujarënh anê hãmri nhũm mẽ kot mar xwÿnhhtaja ujarënh kamã amnhĩ jarënh mar kurê kumrêx. Mẽ kot Tĩrtũm kot mẽ hwÿr rēnh xwÿnhjê kapêr mar kêt nhũm mÿrapê mẽ kãm mẽ hkurê xwÿnhjaja kot mẽ kêp mẽ õ pika pytar nê mẽ himex par ã amnhĩ jarënh ma nhũm ja mẽ kêp omnuj tÿx nê. Hãmri nê hêx rom Jejus mã kãm:

—Tk. Kwa nã nhÿx pre kêt pur nhõ dõnja ã mẽ hipêx anhÿr kêt nê. Anê.

¹⁷ Hãmri nhũm mẽ kuma nê mẽ omunh o xa. Nê mẽ omunh pê mẽ no kagà mã mẽ kãm kapêr nê mẽ kãm:

—Nã ã mẽ hipêx anhÿr mã mẽ tãm kênã. Mãn ka prem ra Tĩrtũm kapêr ã kagà htũm kot ja jarënh ma. Harënh kot:

Mẽ kot kên o amnhĩm õrkwÿ nhĩpêx kaxyw nê kên maati pumu nê htÿx omnuj ã hkamnhĩx nê hkaga.

Mẽ kot hkaga htã Tĩrtũm mẽ kurom mex o kot kên piitã hakrenh par ã omunh kurê kumrêx. Anê.

Ã Tĩrtũm kapêr ã kagà htũm kot mẽ ajarënh te mẽ kot kên maati punuj ã hkamnhĩx nê hkaga xwÿnhjê jarënh pyràk o ã mẽ ajarënh kot anhÿr. Anê.

¹⁸ Nhũm pre ã Jejus mẽ kãm te kêp kên maati pyràk o mẽ kãm amnhĩ jarënh anê. Hãmri nê axte amnhĩ tã kuxi nê mẽ kãm axte kên jarënhhta pyrà nê mẽ kãm:

—Nã kot kaj mẽ atõ ixkaga hãmri nê te mẽhõ htÿx htēm nê kên pumunh kêt nê hã hték nê tēm pyràk o amnhĩ nhĩpêx. Jao ixkutã amnhĩ xãm. Rÿ ka tanhmã amnhĩ to nê ixkaga nhũm te kên maati hõ htēm nê kot anhĩpy htēm nê axôm par pyràk o anhĩpêx ka amex kêt nê. Anê.

¹⁹ Nhũm pre ã Jejus mẽ kãm ujarënh kãm mẽ harënh anê. Hãmri nhũm Tĩrtũm kapêr tũm o mẽ ahkre xwÿnhjê mẽ mẽ õ patre krãhtũmjaja kot mẽ kãm kên jarënh o te mẽ tãm harënh pyràkja ma nhũm ja mẽ kêp omnuj tÿx nê. Jakamã nhũm mẽ kãm Jejus

pyrënh nê haxàr prãm nê. Nom amnhĩ tã kãm mẽ kot mar o kuhê xwÿnhjê puma nê.

Mẽ kot hêx rom Jejus kukjêr ã mẽ harënh Matêwre 22.15-22; Makre 12.13-17; mãânên Rômãn 12.1, 13.6-7

²⁰ Hãmri nhũm Tĩrtũm kapêr tũm o mẽ ahkre xwÿnhjê mẽ mẽ õ patre krãhtũmjaja Jejus tãnopxar o kuhê. Hãmri nê ra amnhĩ wÿr mẽmy hkwy hã karõ nê mẽ kãm:

—E. Mẽ ma Jejus wÿr mra nê te mẽ ate hkôt amnhĩ xunhwÿr kaxyw pyràk o amnhĩ nhĩpêx nê mẽmoj tã ri hkukja. Mẽmoj tã hkukjêr rax nê. Kêr kê Rôm nhõ pahi Sesti kapêr kwÿm ri tanhmã mẽ amã kapêr to ka mẽ ama nê man akupÿn mra nê mẽ inhmã harënh kurê kumrêx. Pa mẽ ama nê ma hwÿr mra nê hã unê nê ma Sesti nhÿ hã mẽ pahto amnhĩptar xwÿnhhta wÿr o tē nê ìhkram haxà. Anê.

²¹ Hãmri nhũm mẽ kuma nê mẽ kãm:

—Tõe. Nã kot paj mẽ anê. Anê.

Hãmri nê ma hwÿr mra nê hêx rom kãm kapêr nê kãm:

—Pa Jejus? Nã ãm hãmri na ka hte Tĩrtũm kapêr o mẽ ahkre mex o ri apa. Na ka hte mẽ kamã akahak kêt nê. Nê mẽ kot tee ri tanhmã ato kapêr punuj to htã ka aprĩ hã mẽ ahkre mex o ri apa.

²² Kwa mẽ inhmã mẽmoj jarê. Rôm nhõ pahihiti kot mẽ pahte kãm kàxpore hkwy nhõr ã mẽ pahpê Ijaew mã karõta. Kwa xà we ja amã mex nã? Xà kot pu mẽ kãm kugõ nã xà kot pu mẽ kãm õr kêt nê? E kwa mẽ inhmã tanhmã harënh to. Anê.

²³ Nhũm prem ã hêx rom kãm kapêr anhÿr tã nhũm ra mẽ hamaxpêr ã mẽ omu nê mẽ kãm:

²⁴ —E mẽ atõ anhõ kàxpore htÿxre japêr nê inhmã hõ gõ pa omu. Anê.

Hãmri nhũm mẽ kãm ja gõ nhũm kupy nê omu nê kãnhmã mẽ kãm kupê nê mẽ kãm:

—E mẽhõ nhĩxi nê mẽhõ karõ na ja hã? Anê.

Hãmri nhũm mẽ kãm:

—Pahi Sesti karõ nê hixi na hã kênã. Anê.

²⁵ Hãmri nhũm mẽ kuma nê mẽ kãm:

—Tÿ. Tõ kêr ka mẽ mãmrĩ kãm hkwy nhõr o apa. Hã hkarõ nê hã hixi. Tãm kot hipêx xwÿnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anê.

²⁶ Nhũm pre ã Jejus mẽ kãm kapêr anê nhũm mẽ piitã mar o kuhê. Nhũm mẽ kot hêx rom kãm kapêr mã xwýnhjaja amnhĩ jaêr pê ã kot kãxpore jarênh anhÿrja ma. Hãmri nê tee ri axte mẽmoj tã hkukjêr nhũm kot pahi Sesti kwým ri kot tanhmã harênh to kaxyw ãm tee ri tanhmã hkukjêr to kaprÿ. Hãmri nê axte tanhmã kãm nê hkêt nê ãm akryk omunh pê mar o kuhê.

Akupÿm mẽ htĩr jarênh

Matêwre 22.23-33; Makre 12.18-27; Juãw 5.21, 6.39; mãânên Wam Korĩt 6.14, 15.12-28; Wam Tesarôn 4.13-18; Apokarip 20.4

²⁷ Tã nhũm Satusew nhõ xwýnh kwýjaja. Mẽ kot akupÿm mẽ htĩr mã hamaxpêr kêt jakamã mẽ htyk nê mẽ hapêx ã mẽ hkamnhĩx. Jakamã na prem tanhmã axpên mã Jejus jarênh to nê axpên mã:

—E kwa pu mẽ ma hwÿr mra nê mẽmoj xihtÿx ã hkukja kê mẽ pama nê tee ri tanhmã mẽ pamã harênh to hkukamã hamaxpêr. Hãmri nhũm mẽ piitã ja hã omu nê àhpumunh tÿx kêt ã omunh kurê kumrêx. E ma pu mẽ hwÿr.

Anê nê ma hwÿr mra nê Parijew nhõ xwýnhjê pyrã nê hêx rom ahkukja nê kãm:

²⁸ —Pa Jejus? Kwa mẽ inhmã mẽmoj jarê. Na pre finat Mojesja Tĩrtũm nhÿ hã mẽ panhĩgêt mã ã karõ anê. Mẽ hkra hkêt rãhã mẽ pa nê mẽ htyk xwýnhjaja nhũm mẽ harênh o:

Koja mẽhõ hprõ nê kormã kamã hkra hkêt rãhã pa nê ty. Hã koja hkôt htõja hpãnhã hprõta o hprõ nê kamã hkra. Hãmri nhũm kato nê te kêp htõ htyk xwýnhhta hkra pyrãk. Anê.

Na pre ã Mojes mẽ kãm karõ anê.

²⁹ Jakamã kwa ga mẽ ixujarênh ma. Koja mẽ kot axpên to htõ xwýnhjaja kêp 7. Nhũm kot waja mẽhõ ho hprõ nê wa pa nhũm kamã hkra hkêt rãhã ty. Nhũm hkôt htõ hõta hpãnhã hprõ ho hprõ

³⁰ nê wa axpên to pa. Nhũm mãânên ty. Kamã hkra hkêt rãhã ty.

³¹ —Nhũm htõ hõta. Haxwýja hpãnhã tãm o hprõ nê wa axpên to pa grille nhũm haxwýja kamã hkra hkêt rãhã ty. Hãmri nhũm htõ hkwyjaja piitã nija pyxi nê axpên pãnhã ho hprõ hpa. No ãm mẽhõ kamã hkra hkêt rãhã ra htyk pa.

³² Hãmri nhũm mẽ hprõta mẽ hkôt amnhĩ to hapu nê ty.

³³ Tã Tĩrtũm kot akupÿm nhÿrmã mẽ ho htĩr ronhÿx nhÿ nhÿx kêp nija mjên kumrêx? Ra piitã kot ho hprõ kênã. E mẽ inhmã ja jarê. Anê.

³⁴ Hãmri nhũm Jejus mẽ kãm:

—Nã kaxkwa kamã mẽ kot amnhĩ nhĩpêxja axtem na. Pika ja kamã na htem pa nê ãptar nhũm mẽ axpên mã mẽ kure. Ja mex.

³⁵ No mẽ kot Tĩrtũm kôt amnhĩ xunhwÿr xwýnhjaja na htem ty hãmri nê Tĩrtũm nhõ krĩ kamã kuri axte kãm hprõ hprãm kêt nê ri pa. Rÿ ni japêr nê kãm mjên prãm kêt nê ri pa.

³⁶ Hãmri nê Tĩrtũm kapêr o mẽ wrÿk xwýnhjê pyrã nê axte htyk kêt nê. ãm htĩr tũm rãhã nê pa ho pa. Tĩrtũm ra akupÿm kot mẽ ho htĩr jakamã koja mẽ kêp hkra nê kuri htĩr tũm nê mex nê pa ho pa nê axte kãm hprõ rÿ mjên prãm kêt nê ri pa.

³⁷ —Nom mẽ ate akupÿm mẽ htĩr mã aja-maxpêr kêt ã harênhja kot paj mẽ amã harê. Amnepêm na pre Tĩrtũmja pĩ hpõk kamã Mojes mã kapêr nê kãm:

Ixpê Apraãw nhõ Tĩrtũm na pa. Nê mãânên
ixpê Apraãw kra Ijak mẽ htãmnhwÿ
Jako wa õ Tĩrtũm na pa.

Anhÿr o Mojes mã amnhĩ jarê nhũm kuma nê hã kagã.

³⁸ Kêp apu arĩ mẽ htyk rãhã nhÿx pre ã mẽ harênh anhÿr kêt nê. Nhÿx pre mẽ harênh o: “Amnepêm Apraãw nê hkra nê htãmnhwÿ mẽ htĩr ri ixpê mẽ õ Tĩrtũm na pa pre.” Anhÿr o nhÿx pre mẽ harê. Nom na pre ã amnhĩ jarênh anhÿr kêt nê. Mẽ pamã te Apraãwja mẽ htyk nê mẽ hapêx pyrãk. Nom nhũm prem ra Tĩrtũm ri akupÿm htĩr nê mex nê pa ho pa. Tã ka htem Tĩrtũm kapêr kwým ri akupÿm mẽ htĩr kêt ã mẽ harênh o apa. Anê.

³⁹ Nhũm pre ã Jejus mẽ kãm kapêr anê. Hãmri nhũm Tĩrtũm kapêr tũm o mẽ ahkre ho mẽ pa xwýnh kwýjaja kuma nê tee ri axte tanhmã kãm nê hprãm kaprÿ nê kãm:

—Tÿ. Nã ãm hãmri na ka ã ja jarênh anê. Anê.

⁴⁰ Hãmri nhũm mẽ axte mẽmoj tã hkukjêr kêt nê. Tanhmã kot wem amnhĩ to nê hamaxpêr o hakre? Na prem ãm tee ri kãm

hamaxpër o hakrenh prãm kaprÿ ho kuhê. Jejus kot mẽmoj piitã hkukamã àhpumunh tÿx o àhpumunh tÿx.

Jejus kệp pahi finat Tawi nhõ Pahihti hã kot amnhĩ jarênh

Matêwre 22.41-46; Makre 12.35-37; mããnên Rômãn 1.3-4

⁴¹ Tã nhũm Jejus kànhmã xa nê amnhĩ tã tanhmã mẽ kot mar o kuhê xwÿnhjê hkukjêr to. Nom te nhãm mễhõ hã mẽ hkukjêr pyrã nê mẽ kãm:

—E kwa mẽ inhmã mẽmoj jarê. Tĩrtũm kot mẽ akaxyw ãm mã xwÿnhta ã na pa mẽ akukja. Mo na htem axpên mã kệp finat pahi Tawi kanrêhã htãmnhwÿ pix ã harê nê mããnên kệp õ pahihti hã harênh kêt nê?

⁴² Na pre Tawi Tĩrtũm kapêr kwÿ hã kagã nê tanhmã harênh to. Tĩrtũm mex ã mẽ grer xãja kwÿ kamã harê nê hã kagã nê hã kagã ho:

Na pre Tĩrtũm inhõ Pahihti mã ã kapêr anê nê kãm: “E amnê ixwÿr tẽ nê inhĩhkõ hã nhÿ nê inhmã mẽ ho amnhĩptãr o akrĩ.

⁴³ Kot paj mẽ kot kãm akurê xwÿnh piitã mẽ unênh pa nê awÿr mẽ o mra nê anhĩhkram mẽ haxãr pa.” Anhÿr o pre kãm kapêr. Anê.

⁴⁴ Na pre ã Tawija Tĩrtũm kot Kris mã kapêr jarênh anê. Mễ kajaja na ka htem ãm kệp Tawi kanrêhã tãmnhwÿ pix ã ri axpên mã harênh o ri apa. No kêt Tawi na pre kệp õ Pahihti hã harênh o pa. Anê.

Jejus kot tanhmã Tĩrtũm kapêr tũm o mẽ ahkre xwÿnhjê jarênh to

Matêwre 23.1-12; Makre 12.38-40

⁴⁵ Nhũm pre ã Jejus mẽ kãm kapêr anê nhũm mẽ piitã mar o kuhê. Hãmri nhũm hpãnhã hkõt mẽ pa ho mẽ pa xwÿnhjê mã kapêr nê mẽ kãm:

—Kwa mẽ o kora. Kêr ka mẽ Tĩrtũm kapêr tũm o mẽ ahkre xwÿnhjê kot amnhĩ nhĩpêx o amnhĩ nhĩpêx kêt nê. ãm mẽ omu nê ãm mẽ omu nê mẽ kot amnhĩ nhĩpêx kõt amnhĩ nhĩpêx o ri apa hkêt nê.

⁴⁶ Na htem mẽ piitã mẽ kot mẽ hã hpijaãm kaxyw mẽ ê mex pix kãm ri pa. Nê mẽ kãm mẽ piitã mẽ kot amnhĩm mẽ rũnh xwÿnh ã mẽ harênh o mẽ paja na mẽ kãm hprãm. Nê mẽ panhõ Tĩrtũm kapêr o mẽ

ahkre xã hã ixkre kamã mẽ kãm amnhĩ to rũnh xwÿnhjê hkrĩ xã mex pix ã na mẽ kãm mẽ hkrĩ hprãm. Nê mẽmoj tã mẽ hkĩnh ã arĩgro hã nhũm htem mẽ apkur xã hã ixkre hwÿr akuprõ nê mẽ kãm mẽ kot amnhĩ to rũnh xwÿnhjê hkrĩ xã mex pix ã mẽ kãm mẽ hkrĩ hprãm. ã na htem amnhĩ nhĩpêx anhÿr o pa.

⁴⁷ —Nê mẽ kệp mẽ mjên htyk xwÿnhjê ho ajuta ho pa hã amnhĩ jarênh tã ãm amnhĩ to hêx nê axtem nê mẽ nokupyr pê mẽ kệp mẽ hikukrêx piitã ho hapêx par o pa. Nê mẽ kệp mẽ òrkwÿ pytã. Nê mẽ hêx rom te tãm mẽ kot amnhĩ nhĩpêx pyrã nê Tĩrtũm mã amnhĩ jarênh japjêê ho kuhê. Mÿrapê koja mẽ mex kêt nê. Koja Tĩrtũm tanhmã ja hã mẽ hipêx to rax nê. Jakamã kwa kêr ka mẽ ã mẽ kot amnhĩ nhĩpêx anhÿr xwÿnhjê hkõt amnhĩ nhĩpêx o apa hkêt nê. ãm kwarĩ ho kwarĩ. Anê.

21

*Kệp mjên htyk xwÿnh jarênh
Makre 12.41-44*

¹ Nhũm Jejus kormã Tĩrtũm mã amnhĩ jarênh xã hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwy nhõr o pa. Jakamã nhũm mẽ hikàxpore rũnh xwÿnhjaja hwÿr agjê nê kamã kàxpore gjênh xã kamã hkwy gjê nê ma akupÿm mra.

² Jakamã nhũm mễhõ ni pê mjên htyk xwÿnh haxwÿja hwÿr axã. Kệp amrakati kumrêx nê hikàxpore tÿxre ãm axkruttre htã mẽ hpãnhã hwÿr axã. Nê kãm Tĩrtũm kĩnh xãj hamê kamã kuxã hãmri nê kato nê ma akupÿm tẽ.

³⁻⁴ Hãmri nhũm Jejus arĩ omunh o xa. Kot ã amnhĩ nhĩpêx anhÿr ã omunh o xa nhũm ja kãm mex nê. Hãmri nê hkõt mẽ pa ho pa xwÿnhjê mã harê nê mẽ kãm:

—E mãn ka mênire htêm mũj pumu. Kệp amrakati nê hikàxpore ãm kệp grire htã amnhĩ pê òr pa. Kwÿjê rom kãm Tĩrtũm kĩnh xãj amnhĩ pê òr par kumrêx. Apkur xã hã hikàxpore na. Mễ hkwyjaja na htem hikàxpore hkwy ho mra nê kugjê nom arĩ mẽ hikàxpore rax. No nhũm nire nêj mẽ kurom kãm hikàxpore japê hkêt nê. Nê ho

õxy hkêt nê àmnhĩx piitã Tirtũm mã õr pa. Anê.

Mê kot amnhĩ tomnuj xwýnhjê hkukamã mẽ harênh

Matêwre 24.1-2; Makre 13.1-2

⁵Tã hãmri nhũm Jejus kôt mẽ pa ho mẽ pa xwýnhjaja kormã Tirtũm mã amnhĩ jarênh xà hã ixkre kaxwýnh pumunh o kuhê nê axpên mã harê nê axpên mã harênh o:

—Hêxta waa nê. Ixkreja mex kumrêx. Kên rũnh o mẽ kot hipêx jakamã mex o mex. Nê mẽ kot ri Tirtũm mã hkĩnh xà nhõr nêj haxwýja piitã mex. Anê.

Hãmri nhũm Jejus mẽ kuma nê mẽ kãm:

⁶—Nà mex tã koja nhỹrmã mẽ kãm Tirtũm kurê xwýnhjaja grãnh pa. Koja arĩ kên õ axkrutre nê axpên mýnh nê nõr kêt nê. Koja piitã anhgrã nê ahpýnhã ri hikwý. Anê.

⁷Nhũm pre ã mẽ kot hipêx anhỹrja kukamã mẽ kãm mẽ harênh anê nhũm mẽ tee ri hkukamã hamaxpêr nê kãm:

—Kwa xà koja mẽ ã hipêx anê? Kwa mẽ inhmã aprĩ hã mẽ kot ixkre grãnh parta jarê. Xà koja mẽ tokyx ho anê nà xà kormã? Kwa mẽmo koja wýj ri tanhmã amnhĩ nhĩpêx to? Anê.

⁸Hãmri nhũm mẽ kãm:

—Nà nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtõ nê mẽ apê ixkrajê hwýr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê amnhĩ jarênh o: “E mẽ ixpumu. Pa na pre Tirtũm mẽ awýr inhmê. Ixpê kaxkwa rũm ixwryk xwýnh na pa.” Anhỹr o mẽ akôt mẽ amã amnhĩ to hêx o pa. Hãmri nê mẽ amã: “E ot pa ra mẽ ato amnhĩptàr kaxyw mẽ awýr wrý.” Anhỹr o amnhĩ jarênh o mẽ akôt pa. Nom kêr ka mẽ ãm mẽ ama nê ãm mẽ ama. ãm mẽ kot mẽ amã amnhĩ to hêx o pa kênã. Kormã akupýn ixpõx xà hã arĩgrota kormã.

⁹—Nê koja mẽ nhỹri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx kukamã ajamaxpêr kêt nê. Mẽmoj piitã hapêx xà hã arĩgrota kormã.

¹⁰Koja mẽmoj piitã hapêx kaxyw nhũm ahpýnhã ri pika piitã hkôt mẽ pa

xwýnhjaja axpên kutã amnhĩ xunhwý nê pijapu nê axpên pa.

¹¹Nê koja pika piitã hkôt tanhmã ahpýnhã mẽ à kute mẽ hamý nhũm mẽ amnhĩ xà htýx kamã hamak o pa.

Nê koja pikaja tertet týx nê.

Nê koja mẽ nhỹri pika hkwy kamã prãm xaj hpikaprãr pa.

Nê koja kaxkwa kamã mẽmoj tanhmã amnhĩ anhĩpêx to nhũm pika nhõ xwýnhjaja tee ri omu nê kãm ma htýx kumrêx nê htertet o kuhê.

Koja mẽmoj ã amnhĩ nhĩpêx anê pa rĩ kormã akupýn mẽ awýr wrý nhũm mẽmoj piitã hapêx pa. Koja mẽmoj ã amnhĩ nhĩpêx anê.

¹²—E Tirtũm mã amnhĩ jarênh xà hã ixkre grãnh par xwýj ri mẽmoj tanhmã hkukamã kot amnhĩ nhĩpêx to hã mẽ ate ixkukjêr xwýnhta kot paj hpãnhã mẽ amã harê ka mẽ inhma. Koja mẽ kãm ixkurê xwýnhjaja mẽ awýr mra nê ixtã mẽ apynê nê tanhmã ixtã mẽ anhĩpêx to. Nê ma mẽ pikuprõnh xà hã ixkreja wýr mẽ ato mra nê kamã mẽ kãm tanhmã mẽ ato kapêr punuj to. Nhũm mẽ kuma hãmri nê ma mẽ ato mra nê mẽ ajagjê. Mẽ ate ixkôt apa ho apa jakamã koja mẽ ã mẽ anhĩpêx anê. Nê mẽ õ pahiti hwýr mẽ ato mra nê mẽ kãm tanhmã mẽ ato kapêr punuj to.

¹³Tã kêr ka mẽ kutã akrĩ nê axãmnhĩx mãmrĩ tanhmã mẽ kãm ijarênh to ho akrĩ.

¹⁴—Nom kwa kêr ka mẽ kãm tanhmã amnhĩ jarênh to hkukamã tee ri ajamaxpêr o ri mẽ amã mẽ uma hkêt nê. Rý mẽ ajamaxpêr o: “Hêxta waa nê. Tanhmã koja we mẽ kot ixkukjêr ã arĩgrota ã pa we ri mẽ kãm ixkapêr to?” Anhỹr o tee ri amnhĩ kukamã ajamaxpêr kêt nê. ãm amnhĩ kaxyw inhmã pix mã ajamaxpêr týx rãhã nê.

¹⁵Tanhmã mẽ kot mẽ anhĩpêx to hã arĩgrota ã kot paj tanhmã mẽ akrã hto ka mẽ inhỹ hã tanhmã mẽ kãm amnhĩ jarênh to. Hãmri nhũm mẽ amnhĩ tã mẽ ama nê axte tanhmã mẽ ato kapêr to hkukamã tee ri hamaxpêr o kuhê.

¹⁶—Nê koja mẽ anhĩpêxà nê mẽ akatorxà nê mẽ atõ nê mẽ akrãmnhwýjaja. Nê kaxyw krĩ hkôt mẽ akwýjaja ixtã mẽ atã amýnê nê ma mẽ õ pahĩ hwýr mẽ ato mra nhũm mẽ ajagjê nê mẽ akwýjê pa.

¹⁷ Koja mẽ piitã ixtã mẽ akamã gryk nẽ kãm mẽ akurê nẽ.

¹⁸⁻¹⁹ Nom mẽ kot ã mẽ anhĩpêx anhÿr mã tã kêr ka mẽ amnhĩ to htÿx nẽ ixkaga hkêt nẽ. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri nẽ ã mẽ kot mẽ anhĩpêx anhÿr xwÿnhjê rom Tĩrtũm mẽ wa ixri atĩr tũm nẽ amex rãhã apa ho apa. Mẽ kot tanhmã mẽ ato htã mẽ ate kaxkwa kamã atĩr tũm nẽ apa mã xwÿnh jakamã kwa kêr ka mẽ tee ri amnhĩ kukamã ajamexpêr o ri apa hkêt nẽ.

²⁰ –Koja nhÿrmã nhÿhÿnh pôristi ohtô nẽ mra nẽ Jerujarê hwÿr pøj hãmri nẽ mẽ kãm hipôk pa nẽ kuhê. Ka mẽ ja hã mẽ omu nẽ mẽ kot krĩja grãnh par mã ajamexpêr kurê kumrêx.

²¹ Koja mẽ ã amnhĩ nhĩpêx anẽ ka mẽ amÿm amnhĩ wÿr mẽ omu hãmri nẽ ajapôj nẽ ma aprôt nẽ amrar kurê kumrêx. Mẽ apê jar pika pê Jutej kamã mẽ apa xwÿnhjaja ka mẽ omu nẽ mẽ kot mẽ apar pymaj ma aprôt nẽ amrar kurê kumrêx. Hixêt prêk wÿr ajapôj nẽ aprôt nẽ ma mra.

–Nẽ kê Jerujarê nhõ xwÿnhjaja mẽ umaj haxwÿja hapôj nẽ ma hprôt nẽ ma mrar o mra.

–Nẽ jar kapôt ã ri mẽ pa xwÿnhjaja kê mẽ akupÿm krĩ hwÿr gjêx kêt nẽ. ãm ma mẽ umaj hprôt nẽ mrar kurê kumrêx.

²² –Mẽ kot amnhĩ tomnuj mÿrapê koja Tĩrtũm ã mẽ hwÿr mẽ kãm mẽ hkurê xwÿnhjê rênh anẽ. Kapêr ã kagã htũm ra kot mẽ hkukamã ja jarênh kot anhÿr. Jakamã koja mẽ nhÿrmã mẽ hkukamã mẽ harênh xãja kôt ã mẽ hipêx anẽ.

²³ –No mẽ htujarô xwÿnhjaja nẽ mẽ hkra karãre xwÿnhjaja koja mẽ kêp mẽmoj omnuj tÿx nẽ. Tanhmã kot mẽ amnhĩ to nẽ hprôt tÿx? Nã pika ja kamã koja mẽ piitã mex kêt nẽ. Mẽ kot amnhĩ tomnuj mÿrapê koja Tĩrtũm ã mẽ hipêx anẽ.

²⁴ Koja mẽ nhÿhÿnh krĩ hõ rũm mẽ hwÿr mra nẽ mẽ unê nẽ mẽ hkamnhwÿr o mẽ kupa. Nẽ mẽ hkwyjê pynê nẽ ma nhÿhÿm ahpÿnhã mẽ õ pika hwÿr amnhĩ kôt mẽ o pa nhũm mẽ kamã mẽ hkôt pa ho pa. Koja mẽ kêp Ijaew kêt xwÿnhjaja Jerujarê o amnhĩptã nẽ ã mẽ hipêx anẽ. Nẽ kamã pa ho pa rãhã nhũm Tĩrtũm nhÿrmã akupÿm nẽ mẽ kator pa. Tã koja mẽ nẽ mẽ kator

parja o pa ra akupÿn mẽ awÿr inhnojarê. Anẽ.

Nhũm pre ã Jejus mẽ kãm mẽ kot Jerujarê grãnh par xwÿnhjê hkukamã harênh anẽ.

Akupÿn Jejus wrÿk xwÿj ri mẽmoj kot tanhmã amnhĩ nhĩpêx to

Matêwre 24.29-35; Makre 13.24-31; mããnên Sikũn Pêtre 3.10; Apokarip 1.7

²⁵ Nhũm Jejus arĩ hkôt mẽ pa ho pa xwÿnhjê mã kapêr nẽ mẽ kãm:

–Nẽ kot paj nhÿrmã akupÿn mẽ awÿr inhnojarê nhũm kaxkwa kamã kanhêti nẽ myyti nẽ mytwrÿre axtem tanhmã ri amnhĩ nhĩpêx to. Nhũm gõ xujanãr haxwÿja hkoko htÿx jao axpên tak tÿx nẽ. Hãmri nhũm pika piitã hkôt mẽ pa xwÿnhjaja kuma nẽ omu nẽ nẽ kãm ma htÿx nẽ mur nẽ htertet nẽ tee ri amnhĩ kukamã hamexpêr.

²⁶ –Nẽ koja Tĩrtũm tanhmã kaxkwa ho àk to nhũm kanhêti piitã pikarêr pa. Hãmri nhũm pika hkôt ri mẽ pa xwÿnhjaja omu nẽ tee ri amnhĩ kukamã hamexpêr o amnhĩ japrãr pa nẽ hikwÿ.

²⁷⁻²⁸ Koja ã mẽmoj amnhĩ nhĩpêx anẽ ka mẽ ja hã omu nẽ akupÿn mẽ awÿr inhnojarê mã ajamexpêr kurê kumrêx. Hãmri nẽ mẽ kot ixkôt amnhĩ xunhwÿr kêt xwÿnhjê rom akĩnh kãm ijapêr arĩt o akuhê.

–Nã kot paj akupÿn mẽ awÿr wrÿ. Kakraã kamã hirã htÿx kãm akupÿn ixihtÿx kãm mẽ awÿr wrÿ. Hãmri ka mẽ apiitã pika piitã hkôt ano ho ixpumu. Kot paj ã ixwrÿk anẽ hãmri nẽ mẽmoj punuj piitã pê mẽ apytãr pa. Jakamã ka mẽ ã mẽmoj kot amnhĩ nhĩpêx anhÿrja ã omu hãmri nẽ tokyx ixkôt axãpirta mã ajamexpêr nẽ akĩnh tÿx nẽ. Anẽ.

²⁹ –E ga mẽ pĩ hpãr mÿj pumu.

³⁰ Na hte mẽmo mytwrÿ hã rã nhũm mẽ omu nẽ ô hkukamã hamexpêr.

³¹ Ja pyrã nẽ koja ã mẽmoj amnhĩ nhĩpêx par anhÿr mẽ ka mẽ omu nẽ akupÿn mẽ awÿr ixwrÿkja mã ajamexpêr kurê kumrêx.

³² Koja akupÿn ixpôx kêt ri mẽ kot ã mẽmoj kot amnhĩ nhĩpêx anhÿr pumunh xwÿnhjaja kormã piitã htyk kêt ri pa ra akupÿn wrÿ.

³³ –Nẽ koja nhÿrmã pika nẽ kaxkwa wa hapêx pa. Tã no ãm ixkapêr koja wa urãk nẽ

aa hapêx kêt nê. Koja âm rãhã ho rãhã. Kot paj aa ihkjê ho tanhmã mênh to hkêt nê.

³⁴⁻³⁵ —Nê kwa mê o kora. Mê axkãm ajamak rom. Mê kot ixkôt amnhĩ xunhwÿr kêt xwÿnhjaja na htem kãm tanhmã amnhĩ nhĩpêx to hprãm xà hkôt pix mã tanhmã amnhĩ nhĩpêx to ho ri pa. Jao âm amnhĩ xàpkur xà nê amnhĩ to mex xà nê kàxpore pix kukamã hamaxpêr o pa. Nê htÿx ri tanhmã amnhĩ tomnuj to ho pa. Nê pipãnh kãm tanhmã amnhĩ to ho pa. Tã koja mê ã amnhĩ nhĩpêx anhÿr o pa rãhã pa ra mê haêr pê akupÿn wrÿ nhũm mê tee ri ixpumu nê kãm ma htÿx kumrêx. Te tutre htÿx ri harôj kajyr o pa nê rapuuti hwÿr àr nhũm kot haê nê unênh nhũm tee kãm kator prãm pyræk. Koja mê ã amnhĩ nhĩpêx anê. Nom kêr ka mê ho mê uræk kêt nê. Âm pa inhmã hprãm xà hkôt pix mã tanhmã inhmã amnhĩ nhĩpêx to rãhã ho ri apa.

³⁶ —Tã kêr ka mê ã mê kot amnhĩ tomnuj o pa anhÿrja kôt amnhĩ nhĩpêx o apa pymaj amnhĩ to Tirtũm wÿr rãhã ho apa. Kê tanhmã mê ato hihtÿx to ka mê ÿ hã ho mê uræk kêt nê. Kêr pa nhÿrmã akupÿn wrÿ ka mê ixpumu nê mê kurom amnhĩ kamã akahak kêt nê akĩnh tÿx nê man ixwÿr mra. Anê.

Nhũm pre ã Jejus hkôt mê pa ho mê pa xwÿnhjê jahkre anê.

³⁷ Hãmri nê apkati mê Tirtũm mã amnhĩ jarênh xà hã ixkre kamã mê pikuprõnh xwÿnhjê jahkre ho hkrĩ. Nhũm kamãt nhũm hkôt mê pa ho mê pa xwÿnhjê mê mê krĩ rũm hapôj nê ma hixêt prêk pê Oriwêhti hwÿr mra nê kamã amnhĩm hikra nê hikwÿ.

³⁸ Nhũm kwÿhtã nhũm mê kãnhmã hkrĩ nê ma akupÿm krĩm mra nê ixkreja wÿr agjê. Hãmri nhũm mê piitã hã akuprõ nê kot mê ahkre hã mar o hkrĩ.

22

Mê kot Jejus ã àmnênh ã mê harênh

Matêwre 26.14-16; Makre 14.1-2; Juãw 11.47-57

¹ Tã nhũm Ijaew kĩnhã arĩgro pê Pasja àhtêp o mô. Pas ã na htem amnepêem Tirtũm kot pika pê Ejit pê mê hpãmje kator mã hamaxpêr kaxyw axpên wÿr akuprõ nê hã hkĩnh. Na htem arĩgroja jarênh o: “Pas”

anhÿr ã harê. Nê mãânên harênh o: “Mê pahte pãw kaxkrit kêt kur ã arĩgro.” Anhÿr o harê.

² Jakamã nhũm mê õ patre krãhtũmjê mê Tirtũm kapêr tũm o mê ahkre xwÿnhjaja ra kãm Jejus pĩr prãm nê. No mê kãm hkôt mê kot kapêr mar xwÿnhjê pyma nê. Nê tee ri kot tanhmã ho hkukamã hamaxpêr nê axpên mã:

—Hêxta waa nê. Kwa tanhmã kot puj wem ho nê mê kêp kupĩ? Kot puj mê noo mã tanhmã ho nhũm mê hã mê pakamã gryk tÿx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴ Tã nhũm Jut Kariotja. Jejus nhÿ hã mê ahkre ho pa xwÿnh pê 12 hõ na pre. Tã axtem nê tanhmã hamaxpêr to nê Satanasti nhÿ hã ma mê õ patre krãhtũm mê Tirtũm mã amnhĩ jarênh xà hã ixkre jamãr xwÿnh krãhtũmjê hwÿr tẽ. Hãmri nê tanhmã Jejus o mê mar to nê mê kãm:

—E ot pa mê amã Jejus jarênh o tẽ. Xà kot paj mê amã hã amÿnê ka mê hpãnhã inhmã amnhĩre nã? Anê.

⁵ Hãmri nhũm mê kuma nê hkĩnh nê. Hãmri nê kãm:

—Nà kot paj mê amã amnhĩre.

⁶ Hãmri nhũm mê kot kãm amnhĩrer ã harênh ma nê hkĩnh nê mê kãm:

—Tõe. Nà kot paj mê amã ho anê. Anê.

Hãmri nê ma tẽ nê kato. Nê Jejus pynênh kaxyw htãnopxar o ri hkôt pa. Mê kot mar o pa xwÿnhjê hkàx ã nhÿri unênh nê ma mê hwÿr o htêm kaxyw.

Jejus kot ÿ hã mê ahkre xwÿnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷ Tã nhũm Pasja kato. Amnepêem Ijaewjê nhĩgêjtaja na prem ôwêhti hkrare hkwy hpar o pa. Tirtũm kot ja hã mê omunh nê Ejit kãm mê kãm mê hkurê xwÿnhjê nhĩhkra nê mê kator kaxyw nhũm prem ã amnhĩ nhĩpêx anê. Jakamã na htem arĩ mê kêp mê hkanrêhã mê htãmnhwÿjaja arĩgro pê Pas ã axpên wÿr akuprõ nê mê kãm hamaxpêr pê mê uræk nê ôwêhti hkrare hkwy hpa. Hãmri nê pãwti kaxkrit kêt kãm kuku.

⁸ Jakamã nhũm Jejus ý hã mẽ ahkre ho mẽ pa xwýnhjê wa ho axkrut nê mẽ amnhĩ kukamã wa kumê. Simãw Pêtre mẽ Juãwja nhũm wa mẽ amnhĩ kukamã wa kumê nê wa kãm:

—E wa ma mẽ ixkukamã tẽ nê mẽ ixkutêp Pas ã mẽ panhõ hã apê. Anê.

⁹ Hãmri nhũm wa kuma hãmri nê kãm:

—Tõe. Nhỹri kot paj we wa tẽ nê mẽ akutêp hã apê? Anê.

¹⁰ Hãmri nhũm wa kãm:

—Nà wa mãmrĩ ma Jerujarẽ hwýr wa tẽ. Nê hwýr axà nê mēhõ mytita pumunh kurê kumrêx. Nhũm amnhĩm gô ru nê amnhĩ kre hã poti xãm nê o tẽ. Ka wa omu nê hã ajêt nê ma hkôt ôrkwý hwýr tẽ.

¹¹ Hãmri nê ixkre nhõ dôn pumu nê kãm: “E jar na pa wa awýr tẽ. Jejus na wa inhmẽ pa wa awýr tẽ. Na awýr pēr mēnh o: ‘Nhỹri kot paj ixkôt ri mẽ pa ho mẽ pa xwýnhjê mẽ axpēn kutã Pas ã apku?’ Anê. Na ã awýr hpēr mēnh anê.” Anê.

¹² —E ã kãm akapēr anê kê war ama nê ra war amã ôrkwý nhĩmõk ã ixkre rax õ jahkre. Kamã ra kaxyw mẽ paxàpkur xà hã mẽmoj piitã. Ka wa omu hãmri nê mãmrĩ mẽ ixkutêp kamã mẽmoj tã apê. Anê.

¹³ Hãmri nhũm wa kuma nê ma krĩm tẽ. Ma tẽ nê hwýr axà hãmri nê ra kot wa kãm mẽmoj jarēnh xà hkôt mẽmoj piitã omu hãmri nê mẽ kutêp mẽõ hã àpēnh o wa xa.

¹⁴ Tã nhũm myt axà nhũm mẽ wa hkôt mō nê ixkreta wýr àpir pa. Hãmri nê apkur kaxyw hkrĩ hpa nhũm Jejus mẽ ìhkô hã nhỹ.

¹⁵ Hãmri nê mẽ kãm tanhmã amnhĩ jarēnh to nê mẽ kãm:

—E na pa inhmã Pas ã mẽ anhĩhkô hã ixàpkur prãm nê. Kormã ixte amnhĩ xà htýx kãm ijamak xwýj ri.

¹⁶ Kwa mẽ inhma. Kot paj axte mẽ akutã Pas ã ixàpkur kêt ry rax nê. Nom koja nhỹrmã Tĩrtũm akupýn ixte mẽ ato amnhĩptar kaxyw inhmẽ hãmri pu mẽ rĩ kormã axte arĩgro mex maatija ã pahkĩnh kãm axpēn kutã paxàpkur rax nê. Anê.

¹⁷ Nhũm ã mẽ kãm amnhĩ jarēnh anê nê hpãnhã wĩhti py nê o xa nê Tĩrtũm mã harẽ nê kãm:

—Pa Papaj. Nà ãm hãmri na ka hte mẽ inhnê mẽ kãm mẽ ixkurê xwýnhjê pumunh

mex nê mẽ ìhkra pē mẽ ijapôj. Amex o amex. Anê.

Hãmri nê hpãnhã hkôt mẽ pa ho mẽ pa xwýnhjê hõ mã kugõ nê kãm:

—E mĩ. Apy nê mẽ axpēn pãnhã hkwý ho ixkõ.

¹⁸ ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhũm nhỹrmã Inhõ Papaj akupýn mẽ awýr inhmẽ. Hãmri pu mẽ rĩ kormã akupýn ixpõx xà hã arĩgrota ã pahkĩnh rax nê. No ãm ra axtem tanhmã hã mẽ pahkĩnh to. Anê.

¹⁹ Hãmri nê hpãnhã pãwti py nê mã ho anê nê Tĩrtũm mã harẽ. Hãmri nê ho hkry hpa nê mẽ piitã mẽ kãm ôr pa nê mẽ kãm:

—E na pa ã pãwti ho hkry nê mẽ amã ôr anê. Koja mẽ ã inhĩpêx anê nê te mẽ kot ixto hkry hpar pyrãk o inhĩpêx pa amnhĩ xà htýx kamã ijamak kãm ty. Nom mẽ anê kot paj ty. Jakamã kêr ka mẽ ixwakre kamã tōhã axpēn wýr akuprõ nê ixte mẽ ate amnhĩ tomnuj pãnhã amnhĩrer kaxyw mẽ anê ixtykja mã ajamaxpēr pē akĩnh nê pãwti hkur o akrĩ. E mẽ mãmrĩ axãmnhĩx aku. Anê.

Nhũm pre ã mẽ kãm amnhĩ jarēnh anê nhũm mẽ mar pē pãwtita hkur o hkrĩ.

²⁰ Hãmri nê ra hkur pa. Hãmri nhũm Jejus axte kopta py nê mẽ kãm:

—Mẽ kot ixpĩr xà hã arĩgro hã koja ixkamrõ axkapĩ. Nom koja mẽ amarĩ ixpĩr nhũm ixkamrõ amarĩ hpikapĩr kêt nê. ãm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anê. Koja ixkamrõ axkapĩ nhũm Tĩrtũm omu nê ixkukwak ri mẽ anê mẽ ate amnhĩ tomnuj piitã te amnhĩ katut kôt rēnh par pyrãk o hipêx nê mẽ ato hkra. Amnepēm kot ja hã amnhĩ jarēnh xà hkôt. Jakamã e mẽ ixkamrõ pikapĩrta mã ajamaxpēr pē wĩhti hkwý ho ixkõ. Anê.

*Jejus ã mẽ kãm àmnēnh xwýnh jarēnh
Matêwre 26.21-25; Makre 14.18-21; Juãw
13.18-19*

²¹ Nhũm Jejus arĩ mẽ kãm kapēr nê mẽ kãm:

—Nê kot mẽ kãm ixtã àmnēnh mã xwýnhhta na jar mẽ pahkaêx ã mẽ pakutã apkur o nhỹ.

22 Tirtũm kãm hprãm xà hkõt koja mẽ tanhmã ixto rax nẽ xipĩ. Nom kot mẽ kãm ixtã àmnênh mã xwýnhta hêxta waa nẽ. ã kot inhĩpêx anhỹrja mýrapê koja amnhĩ xà htýx kãm hamak rax kumrêx. Anẽ.

23 Nhũm pre ã Jejus mẽ kãm amnhĩ jarênh anẽ. Nhũm mẽ kuma nẽ tee ri axpên pumunh o hkrĩ. Hãmri nẽ ri axpên kukja nẽ axpên mã:

—Kwa nà mẽ pahtõ kot pu we ã ri hipêx anẽ? Nà pa hkêt.

Anhỹr o tee ri axpên kukjêr o hkrĩ.

Mẽ pamã amnhĩ to rũnh prãm kêt ã mẽ pamã karõ

Matêwre 20.20-28; Makre 10.35-45; mãânên Rômãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

24 Tã nhũm Jejus nhỹ hã mẽ ahkre ho mẽ pa xwýnhjaja axpên mã tanhmã kapêr to ho hkrĩ nẽ axpên mã:

—Kwa mẽ pahtõ kot puj wem nhỹrmã pahpê pahi nẽ mẽ ho amnhĩptâr rax o ri papa? Anẽ.

Hãmri nẽ mẽ axpên mã: “Nà pa.” Anẽ nẽ nhãnh axpên mã: “Nà kêt paa.” Anẽ. Hãmri nhũm mẽ nêtãnh axpên mã: “Nà kêt pa kênã.”

25 Anhỹr o axpên mã kapêr o hkrĩ. Hãmri nhũm Jejus tee ri axpên tã mẽ kuma nhũm mẽ ã hamaxpêr anhỹrja kêp omnuj nẽ nhũm mẽ kãm tanhmã hã kapêr to nẽ mẽ kãm:

—E mẽ inhma. Na hte Ijaew kêt xwýnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh týx jakamã na htem amarĩ ixkre hkre jakry kamã kãm mẽ àpênh xwýnhjê mã mẽmo mẽ àpênh ã karõ ho hkrĩ. Na htem ã amnhĩ nhĩpêx anhỹr o pa. Nẽ mẽ kot amnhĩm mex ã harênh kaxyw tanhmã mẽ ho mex to ho pa.

26-27 Tã kêr ka mẽ ho mẽ uràk kêt nẽ. Kêt ãm te amarĩ ri mẽ apa xwýnh pyrãk o axpên nhĩpêx. Ixpyrà nẽ amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptâr rax kukamã ajamaxpêr kêt nẽ.

28 Na prem axpên mã ixto hêx nẽ tanhmã ixto kapêr punuj to htã ka mẽ ama nẽ ãm mẽ ama nẽ arĩ ixkõt ri apa rãhã nẽ. ãm hãmri na ka htem arĩ ixkõt ri apa anẽ.

29-30 Kot paj amnhĩ tã mẽ ato mex rax nẽ. Na pre ra Tirtũm nhỹrmã ixte mẽ ato amnhĩptâr o ixkrĩ kaxyw ixãm. Tã ot pa amnhĩ pyrã nẽ mẽ pahkwý Ijaew kaxyw mẽ axunhwý ka mẽ nhỹrmã mẽ piitã mẽ ho amnhĩptâr o apa. Nẽ mẽ apê ixkrãmnhwý hã nhỹrmã ixkutã axàpkur o apa. Anẽ.

Jejus kot Simãw Pêtre mã kapêr ã harênh Matêwre 26.31-35; Makre 14.27-31; Juãw 13.36-38

31 Tã nhũm Jejus Simãw Pêtre mã kapêr nẽ kãm:

—Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm nẽ. Tanhmã kot mẽ akrã hto nhũm mẽ ate mẽ kãm ixkurê xwýnhjê pumaj ixkaga hã kãm mẽ akamã hamak prãm týx nẽ. Jakamã ã kot mẽ anhĩpêx anhỹr kaxyw na pre ra amnhĩ to Inhõ Papaj ma nhũm kãm: “Tõe. Kam nẽ mãmrĩ tanhmã mẽ kamã ajamak to.” Anẽ.

32 —Tã ate mẽ umaj ixkaga nẽ axte ate amnhĩ kaxyw inhmã ajamaxpêr kêt pymaj na pa ra ato Inhõ Papaj wýr kãm ixihitýx nẽ Simãw Pêtre. Jakamã kêr ka mẽmo arĩgro hã tee ri ixkaga hã amnhĩ pumu hãmri nẽ tokyx tãm akupým ixkõt amnhĩ xãm týx nẽ. Kêr kê nhỹrmã akwýjê hõ tanhmã amnhĩ tomnuj to nẽ tee ri amnhĩ kukamã hamaxpêr ka ja hã omu hãmri nẽ kãm ate tanhmã amnhĩ tomnuj tota jarê. Kê mẽ ã ate amnhĩ nhĩpêx anhỹr ã ajarênh ma nẽ apyrã nẽ tokyx akupým tãm ixkõt amnhĩ xãm týx kurê kumrêx. E kêr ka ã akupým ixkõt mẽ piitã mẽ hipêx anhỹr o ri apa Simãw Pêtre. Anẽ.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anẽ.

33 Hãmri nhũm tee ri amnhĩ tã kuma nẽ kãm:

—Kwa nà Pahihti. Kot paj ri akwým tanhmã amnhĩ tomnuj to hkêt nẽ. Koja mẽ te ajaxà nẽ apĩ htã kot paj arĩ akõt ri ixpa ho ixpa nhũm mẽ pahto amýrà nẽ tanhmã pahto. Anẽ.

34 Hãmri nhũm kuma nẽ kãm:

—Nà koja apkati hkõt krãhyre hkàr kêt ri ka ra mẽ umaj ate ixkõt apa hkêt ã mẽ kãm amnhĩ tã axàprãr o axkrunêpxi kãm ga. Anẽ.

*Jejus kot hkwyjê mã mẽmoj tâ karõ
Matêwre 10.5-15; Rukre 9.1-3*

³⁵ Hãmri nhũm Jejus arĩ hkõt mẽ pa ho pa xwýnhjê mã kapër nê mẽ kãm:

—E wam ixte mẽ hwýr mẽ arẽnhta ã na ka prem amnhĩ kõt aparkà hkwy ho apa hkêt nê. Nê kawà jamàn nê ho apa hkêt nê. Nê mrykà jamàn nê amnhĩ kõt ho apa hkêt nê. ãm mẽ anhỹ kamã mẽ hwýr apa hã na pa pre mẽ amã karõ. Tã xàn ka prem ã mẽ hwýr apa anê nhũm mẽ amnhĩ wýr awýr kêt nê? Nà xà na prem amnhĩ wýr mẽ awý? Anê.

Hãmri nhũm mẽ kãm:

—Tý na prem amnhĩ wýr mẽ ixwý. Mẽ ixte amnhĩ kõt mẽmoj to ixpa hkêt tâ na pa prem amarĩ mẽ kutã ixàpkur mex o ri mẽ hkõt ixpa. Anê.

³⁶⁻³⁷ Hãmri nhũm mẽ kãm:

—Tõe. Nà mẽ kot mẽ ato mex tâ nom koja mẽ hpãnhã axtem hõ ho mẽ anhĩpêx. Jakamã kêr ka mẽ akupým mẽ kãm ijarênh o apa kaxyw anojarêt hãmri nê anhõ mrykà rý akawà htu nê ma amnhĩ kõt ho apa. Nê awapo. Kot kaj mẽ awapo hkêt japêr hãmri nê apipro xà ho wênê nê amnhĩm hõ japrõ nê ma amnhĩ kõt ho apa. E kêr ka mẽ ã amnhĩ nhĩpêx anê.

—Nê Tirtũm kapër ã kagà htũm kot ra ixkukamã tanhmã ijarênh to nê kot ijarênh kot:

Koja mẽ hipêx o te mẽ kot amnhĩ tomnuj tỳx xwýnh nhĩpêx pyræk. Anê.

Ã mẽ kot inhĩpêx anhỹr kukamã ijarênh kot anhỹr. Tã na mẽ ra ã inhĩpêx anhỹr kaxyw. Anê.

³⁸ Nhũm pre ã Jejus mẽ kãm kapër anê nhũm mẽ kuma nê kãm:

—Ota mẽ panhõ wapohti hamêxkrut Pahihti. Anê.

Hãmri nhũm mẽ kãm:

—Tõe. Nà hãmri. Mẽ amnhĩm axi nê ho amnhĩm mẽmoj to anê. Anê.

*Jejus kot Tirtũm mã amnhĩ jarênh
Matêwre 26.36-46; Makre 14.32-42*

³⁹ Tã nhũm Jejus kê axte krĩja rũm kato nê hixêt pê Oriwêhti hwýr tẽ nê api nhũm hkõt mẽ pa ho mẽ pa xwýnhjaja ma hkõt mra.

⁴⁰ Hãmri nê nhỹri hixêt kahti ri hkrĩ nhũm Jejus mẽ kãm:

—E kwa kêr ka mẽ ixkutêp amnhĩ to Inhõ Papaj wýr o akrĩ. Kê mẽ ixkõt tanhmã mẽ ato htã ka mẽ amã mẽ uma xàj ixkaga hkêt nê. Arĩ mẽ kutã amnhĩ to htỳx nê akuhê. Anê.

⁴¹ Hãmri nê mẽ kurũm htêm grire nê Tirtũm mã amnhĩ jarênh kaxyw hkõn krã ho tẽm nê nhỹ.

⁴² Hãmri nê kãm:

—Kwa Papaj. Nà na pa ra amnhĩ xà htỳx kukamã ijamaxpêr nê amnhĩ kamã ixkahak tỳx kumrêx. Inhmã amnhĩ xà kamã ijamak prãm kêt o ijamak prãm kêt. Jakamã kot kaj amã inhnê ho ajapêx prãm nê mãmrĩ inhnê ho ajapêx nhũm mẽ kãm ixkurê xwýnhjaja tanhmã ixto hkêt nê. Rý ko. Kot kaj amã mẽ kot tanhmã ixto hprãm hã kê mẽ mãmrĩ tanhmã inhĩpêx to. Nom pam inhmã hprãm xà hkõt kêt. Anê.

Nhũm pre ã Jejus amnhĩ to Hipêêxà Tirtũm wýr anê.

⁴³ Hãmri nhũm kuma nê hwýr kapër o wryk xwýnhja mẽ nhũm hwýr wry nê kuri xa. Hãmri nê õxàhkre kaxwýnh kãm tanhmã ho hihtỳx to.

⁴⁴ Nhũm kê axte amnhĩ to Hipêêxà hwýr kãm hihtỳx nê. Tee ri amnhĩ kukamã hamaxpêr pê amnhĩ kamã kahak tỳx kumrêx. Jao hã gô rax nê te hkamrõ xàhàr pyræk o pikap ahà.

⁴⁵ Hãmri nê kànhmã xa nê akupým hkõt mẽ pa ho mẽ pa xwýnhjê hwýr tẽ nê mẽ omu nhũm mẽ ra õt pa nê hikwý. Mẽ kot tee ri Jejus kot mẽ kãm amnhĩ jarênhja kukamã hamaxpêr o hkaprĩ nê õt pa nê hikwý.

⁴⁶ Hãmri nhũm Jejus tẽ nê tee ri mẽ omu nê mẽ kumra nê mẽ kãm:

—Kwa nà. Mẽ ri ã amnhĩ nhĩpêx anhỹr kêt nê. Kwa mẽ kànhmã akrĩ nê amnhĩ to Inhõ Papaj wýr kê mẽ ato mẽ axihtỳx. Hãmri nhũm mẽ tanhmã ixkõt mẽ ato ka mẽ inhỹ hã mẽ kutã amnhĩ to htỳx nê akuhê. Anê.

*Mẽ kot Jejus pynênh ã mẽ harênh
Matêwre 26.47-56; Makre 14.43-50; Juãw
18.1-11*

⁴⁷ Nhũm pre ã Jejus mẽ kãm kapër anhỹr rôm nhũm hkõt pa ho pa xwýnh pê Jut Kariotja amnhĩ kõt mẽ kot Jejus pynênh xwýnhjê ho tẽ. Mẽ ho htêm rax nê. Hãmri nê kot Jejus kahti hkõt mýnh kaxyw hwýr tẽ

⁴⁸ nhũm amnhĩ tã omu nẽ kãm:

—Kwa Jut. Xà mẽ kahti hkôt mẽ hamýnh nẽ mẽ hpār o na htem mẽ kãm mẽ hã amýnẽ? Anẽ.

⁴⁹ Hãmri nhũm hkôt mẽ pa ho mẽ pa xwýnhjê hõja tee ri mẽ kot amnhĩ nhĩpêx ã mẽ omu hãmri mẽ õ wapota mã hamaxpêr kurê kumrêx nẽ Jejus mã:

—Kwa Pahihti. Xà kot paj mẽ panhõ wapohti py nẽ ho mẽ panê mẽ hkwý hpa? Anẽ.

⁵⁰ Hãmri nhũm hõta kuma nẽ mẽ kaxyw ja kapa. Nhũm mẽ õ patre maati mã àpênh xwýnhja mẽ hkôt tẽ nhũm omu nẽ kãm wapo ho apê. Nẽ kot ho hkrã nhĩpôn mã tã kuhpaw nẽ ho upôk rũm hamak nhĩkjê pix krãhta.

⁵¹ Hãmri nhũm Jejus omu nẽ nẽ kãm kapêr nẽ kãm:

—Kwa nà ri ã amnhĩ nhĩpêx anhýr kêt nẽ. Amarĩ xa. Anẽ.

Hãmri nẽ hamakja py nẽ akupým kãm hamak ã kuxi nẽ ho mex.

⁵²⁻⁵³ Hãmri nẽ mẽ kot unênh mã xwýnhjê mã tanhmã kapêr to. Mẽ õ patre krãhtũmjê mẽ Tĩrtũm mã amnhĩ jarênh xà hã ixkre jamār xwýnhjê krãhtũm mẽ Ijaew nhõ pahijê mẽ nhũm mẽ ho pimràatã mẽ kãm kapêr nẽ mẽ kãm:

—Kwa na pa pre apkati mẽ Tĩrtũm nhõrkwý kamã mẽ kãm ixkapêr o ixpa ka prem tokyx ixpynênh kêt tã jarãhã te ixte amnhĩ tomnuj xwýnh pyrãk o inhĩpêx nẽ ixwýr wapo nẽ kô hã akapên nẽ ixwýr ã atêm rax anẽ. No ãm ra mẽ ate tanhmã ixto kaxyw arĩgro kator kênã. Jakamã kot kaj mẽ mãmri tanhmã amã ixto hprãm xà hkôt mãmri tanhmã ixto. Satanasti nhỹ hã ã mẽ ate inhĩpêx anhýr mã kênã. Anẽ.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mẽ Jejus pynê nẽ ma o tẽ. Ma mẽ õ patre maati nhõrkwý hwýr o tẽ. Nhũm Simãw Pêtre ma hapu hã mẽ hkôt hã mẽ omunh o tẽ.

⁵⁵ Nhũm mẽ patre maati nhõrkwý hwýr Jejus o axà nẽ hkôt gjêx pa hãmri nhũm Simãw Pêtre kítare hwýr axà nẽ mẽ kuri xa.

Nhũm mẽ kítare kamã amnhĩm kuto nẽ hã ànhunh o hkrĩ nhũm

⁵⁶ mẽ lhkô hã ànhunh o nhỹ. Hãmri nhũm mẽ kãm àpênh xwýnh niti hirã kamã hprĩ hã omunh kurê kumrêx nẽ mẽ kãm:

—Xê pêr myti ja kêp Jejus kôt mẽ pa ho mẽ pa xwýnhjê hõ na. Anẽ.

⁵⁷ Hãmri nhũm tee ri amnhĩ tã kuma nẽ kãm mẽ uma nẽ mẽ kãm amnhĩ tã aprã nẽ kãm:

—Tk. Kokỹ. Ixte mēhõ my ata pumunhre hã. Anẽ.

⁵⁸ Tã nhũm hpãnhã mēhõ myja kãm:

—Kwa nà. ãm hãmri na ajarê. Apê Jejus kôt ri mẽ pa xwýnhjê hõ na ka.

Anẽ nhũm kuma nẽ kê axte kãm:

—Kwa mẽ ri ã amnhĩ krã hkôt ri ixto axêx anhýr kêt nẽ. ãm ixte aa mēhõta pumunh kêt kumrêx. Anẽ.

⁵⁹ Tã nhũm ja haxwýja axte omu nẽ kãm:

—Kwa ãm hãmri na mẽ ajarê. Apê Jejus kwý hõ na ka. Urãk nẽ te apê Garirej nhõ xwýnh pyrãk kênã. Anẽ.

⁶⁰ Hãmri nhũm tee ri kuma nẽ mẽ kãm amnhĩ tã aprãr kãm hihtýx nẽ mẽ kãm:

—Tk. Ixpê Garirej nhõ xwýnh kêt. ãm ixte mēhõ mũj pumunh kêt kumrêx tã ka mẽ ãm xatã hkôt ixpa ho ixpa xwýnh ã ixkamnhĩx o akuhê.

Anhýrja o ra mẽ kãm amnhĩ tã aprãr o axkrunêpxi mẽ nhũm krãhyre kà.

⁶¹ Hãmri nhũm Jejus arĩ ixkre kamã ãm tã Simãw Pêtre ho hakêx nẽ omu. Hãmri nhũm amnhĩ tã no pumu nẽ kot hkukamã kãm ã amnhĩ nhĩpêx anhýr jarênhja mã hamaxpêr kurê kumrêx. Krãhyre hkàr kêt ri kot mẽ kãm amnhĩ tã aprãr o axkrunêpxi hã harênhja mã hamaxpêr nẽ kànhmã hakry hpar o tẽ nẽ hkaprĩ htýx nẽ.

⁶² Hãmri nẽ hkaprĩ xàj kítare pê kato nẽ tẽ nẽ awry hã xa nẽ mýr rax kumrêx.

Mẽ kot Jejus tak ã mẽ harênh

Matêwre 26.67-68; Makre 14.65

⁶³ Hãmri nhũm mẽ kot Jejus pumunh o kuhê xwýnhjaja hã hpêr o axkê nẽ htak o kuhê.

⁶⁴ Nẽ no hpro nẽ htak nẽ kãm:

—E atak xwýnh nhĩxi jarê. Apê Tĩrtũm Kra hã ate amnhĩ jarênh jakamã mãn urãk nẽ axàhpumunh týx. Jakamã e hixi jarê. Anẽ.

⁶⁵ Hãmri nẽ xatã hapry nẽ kãm kapêr punuj nẽ.

Mê kot mê hkrähtüm wÿr Jejus o htêm ã mê harênh

Matêwre 26.57-68; Makre 14.53-65; Juãw 18.19-24

⁶⁶ Tã nhũm myt kator o mör mê nhũm Ijaew nhõ pahijê mê patre krähtümjê mê Tirtüm kapêr tùm o mê ahkre xwÿnhjaja axpên wÿr pikuprõnh pa. Hãmri nhũm mê ma mê hwÿr Jejus o tẽ.

⁶⁷⁻⁶⁸ Nhũm mê omu nê tanhmã kot amnhĩ jarênh to hã hkukja nê kãm:

—Kwa mê inhmã amnhĩ jarê. Xà ka na apê Tirtüm kot mê ixkaxyw axãm xwÿnhnta? Xà ka kot kaj Röm nhõ xwÿnhjê pê mê ixpytã nê mê ixto amnhĩptãr o apa? Anê.

Hãmri nhũm mê kãm:

—Nà kot paj tanhmã mê amã amnhĩ jarênh to ka mê ixkõt ajamaxpêr kêt nê. Ixte ãm hãmri mê amã amnhĩ jarênh tã ka mê inhma nê ãm inhma. Nê kot pa amnhĩ xwar mêmoj tã mê akukja ka mê amnhĩ xwar inhmã tanhmã harênh to hkêt nê. ãm mê axêx rom mê ate ã ixkukjêr anhÿr kênã.

⁶⁹ Tã nom kot paj tokyx ma akupÿm Inhĩpêxã Tirtüm wÿr api. Hihtÿx o hihtÿx rãhã nê pa ho pa xwÿnh na. Jakamã kot paj hwÿr api nhũm amnhĩ nhĩhkô hã inhÿr pa upök rüm mê apiitã mê ato amnhĩptãr o ixkrĩ. Hãmri nê nhÿrmã paa tanhmã mê ajarênh to. Anê.

⁷⁰ Hãmri nhũm mê tee ri kot ã amnhĩ jarênh anhÿrja ma nê kãm:

—Tk. Kwa akatãt kõt mê inhmã amnhĩ jarê nã. Xà apê Tirtüm Kra na ka? Anê.

Hãmri nhũm mê kãm:

—Tÿ ixpê Kra na pa. Anê.

⁷¹ Hãmri nhũm mê tee ri ã amnhĩ jarênh anhÿrja ã kuma nê axpên mã:

—Kwa mo kaxyw kot puj mê axte mê hkwyjê japêr nhũm mê tanhmã kot amnhĩ tomnuj to hã harê? Tãm kêp Tirtüm Kra hã amnhĩ to hêx nhũm mê pahte pahpiitã mar kênã. E kwa tokyx pu mê ma Röm nhõ pahihiti hwÿr o tẽ kê mê pamã hã amÿnê nê mê pamã kupĩ. Anê.

23

Mê kot pahi Pirat wÿr Jejus o htêm ã mê harênh

Matêwre 27.1-2, 27.11-26; Makre 15.1-5; Juãw 18.28-38

¹ Tã nhũm mê Jejus o kato nê nhãm Pahihti Pirat wÿr o tẽ.

² Hãmri nê kutã ãm nê tanhmã kãm ho hêx to nê kãm:

—E ot pa mê awÿr jahti ho tẽ. Na hte mê inhmã hêx rÿnh o pa. Mê ixte Pahihti Sesti kapêr kwÿm ri amnhĩ nhĩpêx prãm xaj tanhmã mê inhmã mêmoj tã karõ hto ho pa. Nê axtem nê mê ixte Sesti mã kãxpore hkwy nhõr kêt ã mê inhmã karõ. Nê Tirtüm kot mê pakaxyw kêp mê panhõ pahi hã ãm xwÿnh ã amnhĩ jarê. ã na hte mê inhmã amnhĩ to hêx anhÿr o pa. Anê.

³ Hãmri nhũm Pirat mê kuma nê Jejus pumu nê kãm:

—E kwa inhmã amnhĩ jarê. Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Anê.

Hãmri nhũm kãm:

—Nà ãm hãmri na ka ã ijarênh anê. Anê.

⁴ Hãmri nhũm Pirat tanhmã hkukjêr to nê tee ri kot amnhĩ jarênh ã kuma hãmri nê patre krähtümjê mã kãm:

—Kwa mêmoj myrapê kot pa tanhmã mê amã hã ixãmnhênh to? Kot tanhmã amnhĩ tomnuj tore hã. Nà kot pa kãm inhÿre. Anê.

⁵ Hãmri nhũm mê tee ri kuma nê kot mê kãm hã ãmnhênh prãm xaj hã kãm kapêr kãm hihtÿx nê. Nê kãm:

—Kwa nã. Na pre hte pika pê Jutej kamã tanhmã mê kãm hêx to ho pa. Hãmri nhũm mê ra hã axpên kutã amnhĩ xunhwÿ nê hã pijapu rÿnh o pa. Tã mãnhên Garirej kamã ã amnhĩ nhĩpêx anhÿr o hkrax nê hpãnhã amnê mê pahwÿr ã amnhĩ nhĩpêx anhÿr kaxyw mör anê. Anê.

Mê kot Eroxo wÿr Jejus o htêm ã mê harênh Rukre 9.7-9

⁶ Hãmri nhũm Pahi Pirat mê kuma nê mê kãm:

—Kwa xã kêp Garirej nhõ xwÿnh na? Anê.

Hãmri nhũm mê kãm:

—Tÿ. Kêp Garirej nhõ xwÿnh kênã.

⁷ Anê nhũm mê kãm:

—Tô mê ma pahihiti Eroxo ãxipas wÿr mãn o tẽ. Kêp Garirej nhõ xwÿnhjê nhõ pahi na. Tã ra jar Jerujarê kamã ham pøj. No axtem ixpê Jutej kamã mê pa xwÿnhjê nhõ pahi jakamã kwa mê ma õ pahita wÿr mãn o tẽ kê tãm tanhmã mê amã ho. Anê.

⁸ Hāmri nhūm mẽ kuma nẽ ma pahi Erox āxipas wỳr o tẽ. Na pre ra Erox āxipasja xatã Jejus jarẽnh ma nẽ kãm omunh prãm nẽ. Kãm aa kot mẽmoj pumunh kêt õ ho anhỳr ã omunh prãm tỳx jakamã nhūm mẽ ma hwỳr o tẽ nhūm omu nẽ hkĩnh nẽ.

⁹ Hāmri nẽ tee ri mẽmoj tã hkukja no nhūm akryk xa nẽ tanhmã kãm nẽ hkêt nẽ.

¹⁰ Hāmri nhūm mẽ õ patre krãhtũmjẽ mẽ Tĩrtũm kapẽr tũm o mẽ ahkre xwỳnhjaja kãm ho kapẽr punuj nẽ ho hẽx kãm hihtỳx nẽ.

¹¹ Hāmri nhūm pahi Erox āxipas mẽ kuma hāmri nẽ õ pòristi mẽ wa kãm kapẽr punuj nẽ hã hpẽr o axkẽ nẽ tanhmã ri haprỳ to. Hāmri nẽ hã hpẽr o pikẽnh kãm kẽp pahi hã mẽ ê mexja py nẽ kãm haxà nẽ akupỳm pahi Pirat wỳr kumẽ.

¹² Na pre Pahi Pirat mẽ Pahi Erox āxipasja wa kãm axpẽn kĩnh kêt nẽ. Tã hāmri nhūm Erox āxipasja tee ri Jejus kot kãm tanhmã amnhĩ jarẽnh to hã mar prãm xàj tee ri hkukamã hamaxpẽr hāmri nẽ Pirat ã hpijaam kaxyw akupỳm hwỳr kumẽ. Hāmri nhūm amnhĩ tã omu hāmri nẽ wa ra akupỳm kãm axpẽn kĩnh nẽ. Nẽ akupỳm axpẽn mã hpẽr o axkẽ nẽ pikunhar o pa pẽ akupỳm axpẽn to hkrãmnhwỳ.

Pirat kot Jejus pĩr ã àmnênh

Matêwre 27.15-26; Makre 15.6-15; Juãw 18.39-19.16; mããnẽn Atre 3.13-14

¹³ Tã nhūm Pirat akupỳm amnhĩ wỳr mẽ hã karõ. Ijaew kwỳjaja nẽ mẽ õ pahijaja nẽ mẽ õ patre krãhtũmjaja nhūm akupỳm amnhĩ wỳr mẽ piitã mẽ hã karõ.

¹⁴ Hāmri nhūm mẽ akupỳm hwỳr gjêx pa nẽ kuhẽ nhūm mẽ kãm:

—E na ka mẽ ixwỳr mytita o tẽ nẽ tanhmã inhmã harẽnh to. Kot mẽ akwỳjẽ mã tanhmã hẽx to ho pa hã harẽ. Tã pa ra jar mẽ anoo mã tanhmã hkukjêr to nẽ tee ri kot inhmã tanhmã amnhĩ jarẽnh to hã kuma. Te kot amnhĩ to mex xwỳnh pyræk. Mẽ ate tanhmã ho akapẽr to htã nom kot anhỳr kêt. Kot amnhĩ to mex xwỳnh na.

¹⁵ Pahi Eroxja ra ixpyrà nẽ tee ri tanhmã hkukjêr to nom nhūm tanhmã kãm nẽ hkêt nẽ. Nhūm tee ri ja hã omu nẽ akupỳn ixwỳr kumẽ. Jakamã kwa mẽmo myrapê kot paj

mẽ amã hã amỳnẽ nhūm mẽ amã kupĩ? Tanhmã kot amnhĩ tomnuj tore hã.

¹⁶ Kot paj ãm mẽ kãm anẽ kê mẽ htak nẽ kãm ure kê mãmrĩ ma tẽ. Anẽ.

¹⁷ Arĩgro pẽ Pas ã na pre hte mẽ õ pahi mẽ kot mẽ ho prẽs nhūm mẽ hkrĩ xwỳnhjaja nhūm pre htem mẽ ho hpỳnh nẽ mẽ kãm ure. Jakamã na pre ã mẽ kãm kapẽr anẽ nẽ kot Jejus tak nẽ kãm urer mã.

¹⁸⁻¹⁹ Nom nhūm mẽ kuma nhūm ja mẽ kẽp omnuj nẽ nhūm mẽ kãm:

—Kwa nà. Apĩ ri. Apĩ nẽ mẽ inhmã Parapas mã mãn anhũre. Anẽ.

Parapas na pre mẽ õ krĩ kamã õ pòristi mẽ pahi Piratja mẽ kutã amnhĩ xãm nẽ kẽp õ pòristi hõxpĩ. Mỳrapê na prem ra haxà nhūm hkrĩ ho hkrĩ. Jakamã nhūm mẽ Pirat kot kãm urer kaxyw ã kãm kapẽr anẽ.

²⁰ Nom nhūm kãm Jejus mã urer prãm jakamã axte hã mẽ hkukja nẽ mẽ kãm:

—Kwa nom mẽmoj mỳrapê kot paj mẽ kãm hã amỳnẽ nhūm mẽ amã kupĩ?

²¹ Anhỳr tã nhūm mẽ kuma nẽ ãm kuma. Nẽ xatã kãm:

—Kwa tokyx pĩ kahpa hã anhõ kê ty. Anẽ.

²² Hāmri nhūm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt hã kunhõ nhūm ty. Nà kot paj ãm mẽ kãm anẽ kê mẽ htak nẽ kãm ure kê ma tẽ. Anẽ.

²³ Hāmri nhūm mẽ xatã hã kãm kapẽr kãm hihtỳx nẽ kãm:

—Kwa nà. Pĩ kahpa hã mãn anhõ kê ty.

Anhỳr o ãm xatã kàx pẽ àmra kamã kãm hã amỳnẽ.

²⁴ Hāmri nhūm Pirat tee ri mẽ kuma hāmri nẽ tã mẽ kãm hprãm xà hkõt mẽ kãm ã amỳnẽ.

²⁵ Hāmri nẽ mẽ kãm Parapas mã ure. Ra kot pahi Pirat pẽ õ pòristi kutã amnhĩ xãm nẽ kẽp hõx pĩr tã nhūm mẽ kãm hprãm xà hkõt akupỳm kãm ure. Hāmri nẽ mẽ ìhkram Jejus jaxà. Mẽ kãm hprãm xà hkõt ri mẽ kot tanhmã hipêx to kaxyw.

Mẽ kot pĩ kahpa hã Jejus nhõr ã mẽ harẽnh

Matêwre 27.31-43; Makre 15.21-32; Juãw 19.17-20, 19.27-31; mããnẽn Atre 7.59-8.1

²⁶ Tã nhūm pòristijaja Jejus o kato nẽ ma kapõt mã o tẽ. Nẽ kãm õ pĩ kahpa gõ nhūm

amnhĩ kaxyw kumy nẽ o tẽ. Nom mẽ kot htax rax kurẽ nhũm hirot tỳx nẽ nhũm mẽ ja hã omu nẽ mẽhõ kot ho ajuta kaxyw mẽ hkapi ho xa. Hãmri nẽ Sirẽn nhõ xwỳnh Simãw hkà htyk pumu. Nhũm pre htỳx hamakêtkati nẽ mẽ kutã krĩm tẽ. Hãmri nhũm mẽ haer pẽ unẽ nẽ kãm Jejus o ajuta kaxyw hã karõ nhũm kãm õ pĩ kahpaja mỳ nẽ mẽ hkõt o tẽ.

²⁷ Hãmri nhũm mẽ ohtõ nẽ Jerujarẽ rũm Jejus kõt mõ. Nhũm mẽni hkwyjaja omu nẽ kãm hkaprĩ xàj mỳr o hkõt mõ.

²⁸ Hãmri nhũm mẽ mỳr ã mẽ kuma nẽ mẽ ho hakẽx nẽ mẽ omu nẽ mẽ kãm:

—Kwa nã Jerujarẽ nhõ xwỳnhjaja. Mẽ amã ixkaprĩ xàj amỳr kêt nẽ. Kêt mẽ kamjaja amã amnhĩ kaprĩ xàj mãn mur. Nẽ mẽ akrajẽ kamã axukaprĩ xàj mãn mur.

²⁹ Koja mẽ nhỹrmã mẽ apẽ mẽ anhõ krĩ grãnh pa ka mẽ apunuj nẽ amnhĩ xà htỳx kamã ajamak o ri apa. Nẽ tee ri mẽ akrajẽ hkukamã tanhmã ajamaxpẽr to nẽ ajamaxpẽr o: “Hêxta gãa nẽ. Na ixkrajaja ixpẽ amnhĩ xà htỳx kãm hamak o pa. Kẽp apu mẽ hkra hkêt xwỳnhjẽ pyrã nẽ ixkra hkêt nẽ ixpa ro nhỹx inhmã mex nẽ. Nhỹx pa ixkĩnh nẽ.” Anhỹr o kot kaj mẽ nhỹrmã ajamaxpẽr nom ã ajamaxpẽr anhỹr kaprỹ.

³⁰ —Nẽ kot kaj mẽ apiitã mẽmo punujta pymaj tee ri amã tokyx atyk nẽ ajapẽx par prãm kaprỹ nẽ axpẽn mã akapẽr o: “Hêxta gãa nẽ. Kot kẽn prẽk mũj mẽ panhĩpy rôrõk nẽ tokyx mẽ panhĩmex par ronhỹx mẽ pamã ja mex.” Anhỹr tã no ãm tee ri ã ajamaxpẽr anhỹr kaprỹ.

³¹ Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpẽx anẽ. Nom mẽ ate amnhĩ tomnuj mỳrapẽ koja mẽ nhỹrmã tanhmã mẽ ato rax o ã mẽ kot inhĩpẽx anhỹrja jakrenh pa. Hêxta waa nẽ. Na pa mẽ akukamã ijamaxpẽr nẽ ixkaprĩ htỳx nẽ. Anẽ.

³² Tã nhũm mẽ ja wa ho hamẽxkrut nẽ tanhmã wa kot amnhĩ tomnuj toja mỳrapẽ Jejus kõt wa hpĩr kaxyw hkõt mããnẽn wa o tẽ.

³³ Jakamã nhũm mẽ ra kẽn nhĩxêt te kot mẽ hkrã hi pyrãk xwỳnhhta wỳr mẽ o põj. Mẽ kot kãm “mẽ hkrã hi xà” anhỹr jarẽnhja wỳr mẽ o põj. Hãmri nẽ Jejus pẽ ê kapa nẽ pĩ kahpa hã kuxi nẽ prek o ãhkra nẽ hpar o

htỳx pa. Hãmri nẽ kãnhmã pĩ kahpa xãm nẽ ho htỳx nhũm xa. Hãmri nhũm mẽ hpãnhã wa kot amnhĩ tomnuj xwỳnhhta mã wa ho anẽ nẽ. Nẽ prek o wa ãhkra nẽ wa hpar o htỳx pa hãmri nẽ akutã ho Jejus nhĩjẽ nẽ wa ãm nhũm wa ajêt.

³⁴ Hãmri nhũm Jejus kỳx pẽ amnhĩ xà htỳx kumrẽx kamã hamak o jêt rãhã mẽ ho Tĩrtũm wỳ nẽ kãm:

—Kwa Papaj. ãm ixtã jajẽ pumu. Mẽ kot mẽmoj mex pumunh kêt jakamã na mẽ ã inhĩpẽx anẽ. Jakamã ãm ixtã mẽ omu nẽ mẽ kamã axukaprĩ nẽ. Anẽ.

Hãmri nhũm hparpẽ põristi hkwyjaja axpẽn mã ê hkwy ho pigrãnh kaxyw hã kẽnre ho jõka ho hkrĩ.

³⁵ Nhũm mẽ ohtõ rax nẽ Jejus parpẽ omunh o kuhẽ. Nhũm mẽ õ pahijaja mẽ noo mã hã hpẽr o axkẽ nẽ mẽ kãm:

—E jahti na pre te kẽp mẽ pakaprĩ xwỳnh ã amnhĩ jarẽn o ri pa. Nẽ Tĩrtũm kot mẽ pakaxyw ãm xwỳnh ã amnhĩ jarẽn o ri pa. Jakamã e kwa pu mẽ xa nẽ kot amnhĩ kaxãr nẽ wrỹk kãm omu. Anẽ.

³⁶ Nhũm põristi mããnẽn tanhmã hã hpẽr o pikẽn to. Nẽ hparpẽ kãm wĩhti punuti jahkre nẽ kãm:

—Kwa wrỹ nẽ mẽ ixkutã ja hkwy ho ixkõ nã. Anẽ.

³⁷ Hãmri nẽ kãm:

—E apẽ Ijaew nhõ pahi hã kot kaj amnhĩ kapa nẽ akupỹn wrỹ. Kwa tokyx pa mẽ ja hã apumu. Anẽ.

³⁸ Nhũm põristija tapti hõ py nẽ tanhmã hã kagã hto. Nẽ hã kagã ho:

IJAEW NHÕ PAHI NA JA

Anhỹr o hã kagã hãmri nẽ Jejus wỳr api nẽ mỳ ri kunhõ.

Wa kot Jejus nhĩjẽ nẽ wa jêt xwỳnh wa harẽn

Matêwre 27.44; Makre 15.32

³⁹ Hãmri nhũm wa kot ãhkõ hã jêt xwỳnhhta õ haxwỳja kãm kapẽr punuj nẽ kãm:

—Kwa kot kaj apẽ Tĩrtũm kot mẽ ixkaxyw axãm xwỳnh hã kot kaj amnhĩ kapa nẽ wrỹ. Nẽ mããnẽn amnhĩ kõt wa ixto wrỹ. Anẽ.

⁴⁰⁻⁴¹ Hãmri nhũm ihõta kuma nẽ hã kãm akir nẽ kãm:

—Tk. Kwa amarĩ ajêt. Xà amã Tĩrtũm pyma hkêt ã na ka ã kẽp Krata mã akapẽr

anê? Nà koja kãm wrÿk prãm nê kot wrÿ. No pajamê pahte amnhĩ tomnuj mÿrapê koja mē pahpĩ. No tãm kot tanhmã amnhĩ tomnuj to hkêt tâ nhũm mē amarĩ ã hipêx anê.

⁴² Anhÿr o kãm kapêr hãmri nê Jejus mã kãm:

—Kwa Jejus. Kêr ka nhÿrmã mē ixto amnhĩptã hãmri nê inhmã ajamexpêr nê ixkamã axukaprĩ nê ixto mex nê. Anê.

⁴³ Hãmri nhũm kãm:

—Nà kot kaj jarãhã ma ixkôt kaxkwa hwÿr api nê hpãnhã ixkuri amex nê atĩr tũm nê apa ho apa. ãm hãmri na pa ã amã ixkapêr anê. Anê.

Jejus tyk ã harênh

Matêwre 27.45-56; Makre 15.33-41; Juãw 19.28-30

⁴⁴ Tã nhũm kaxkwa nhĩpôk ri myt nhÿr mē nhũm te ra kamãt pyrãk nhũm kamãt kô rax kumrêx. Nê kamãt kô ho ra hã awry nê. Ja mē nhũm akupÿm myt katêr o mō.

⁴⁵⁻⁴⁶ Nom nhũm kormã kamãt kôta ã nhũm Jejus ra htyk kaxyw nê ãmra kamã Tĩrtũm mã kapêr nê kãm:

—E Papaj. Mãmrĩ ixkarō ho amnhĩptã.

Anhÿrja kôt hãmri ty. Pu nhũm Tĩrtũm mã amnhĩ jarênh xã hã ixkre kamã hakwakre hã kupêxêja axkjê nê amnhĩ kahê xã mēnh kurê kumrêx. Utĩ rax tâ kôt ã axkjê nê amnhĩ kahê xã mē. Te Jejus htyk o kot mē pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xã mēnh pyrãk o ã amnhĩ nhĩpêx anê.

⁴⁷⁻⁴⁹ Hãmri nhũm mē piitã mēmoj ã kot amnhĩ nhĩpêx anhÿr ã omunh o kuhê xwÿnhjaja. Nê kaxyw Jejus krãmnhwÿjaja nhũm mē amÿm omunh o kuhê. Nê Garirej rũm mēni kot Jejus kôt mē pa ho mē pa xwÿnhjaja mããnên mē kuri amÿm hkaprĩ nê omunh o kuhê. Nhũm pôristi krãhtũmjê hõja ã mēmoj kot amnhĩ nhĩpêx anhÿr ã omu nê tee ri hamaxpêr o:

—Hêxta waa nê. Pêr ãm hãmri na pre hte tãm amnhĩ nhĩpêx o pa. Tã pa mē amarĩ mē mar xã hkôt ixtÿx kupĩ. Anê.

Nhũm ã hamaxpêr anhÿrja kôt Tĩrtũm mã mex o mex ã harênh o xa. Nhũm amarĩ mē kuhê xwÿnhjaja mããnên mēmoj ã kot amnhĩ nhĩpêx anhÿrta pumu nê tee ri hkukamã hamaxpêr o ra kãm ma htÿx nê. Hãmri

nê awjanã nê ma akupÿm krĩm mrrar kurê kumrêx.

Mê kot Jejus jaxàr ã mē harênh

Matêwre 27.57-61; Makre 15.42-47; Juãw 19.38-42

⁵⁰⁻⁵¹ Tã nhũm axtem Juje pê Arimatej nhõ xwÿnhja. Arimatejja pika pê Ijaew kamã na. Nhũm Jujeja kot amnhĩ to mex jakamã Tĩrtũm kôt amnhĩ nhĩpêx o pa. Jakamã na pre hkwyjê rom Tĩrtũm kot mē pahwÿr Jejus mēnh xwÿnh ã omu nê hkôt hamaxpêr. Kêp Ijaew nhõ pahi hõ htã hkwyjê hkôt hamaxpêr kêt nê. Jakamã nhũm prem kot Jejus pĩr ã amÿnê nhũm tee ri harênh ma nhũm ja kêp omnuj nê.

⁵² Jakamã nhũm Jejus ty nhũm Juje ma pahi Pirat wÿr tē nē ĩ hã kuwÿ nē kãm:

—Pa? E ot pa awÿr tē. Kwa inhmã htyk xwÿnhnta gō pa ma o tē nē haxã. Anê.

⁵³ Hãmri nhũm kuma nê kãm kugō nhũm ma o tē nē haxã. Kaxyw kupêxê hõ py nê ho hkupu nê ma o tē nē kēn kre kaprÿ kamã haxã. Mē kot kormã kamã mēhõ jaxàr kêt nhũm mē kamã Jejus jaxã.

⁵⁴ Arĩgro pê sêsta hã nhũm prem kupĩ nhũm myt xãr o mōr mē nhũm Juje ma o tē nē haxã. Ijaew kôt xã hã arĩgromnuja wÿr haxã.

⁵⁵ Nhũm Garirej rũm mēni hkwy kot Jejus kôt pa xwÿnhjaja ma hkôt mra nê kot haxàr kãm omu. Mē hkuxwaxã ho gregrer kêt rãhã haxàr kãm omu.

⁵⁶ Hãmri nê ma akupÿm krĩm mra nê kaxyw mē hkuxwaxã hkwy ho anê.

Tã nhũm apkati nhũm mē ò arĩgromnu pê sap kator jakamã nhũm mē kormã akupÿm hwÿr mrrar kêt nê. Hãmri arĩgro mex jamãr pê arĩ hkôkôt o hkrĩ.

24

Jejus akupÿm htĩr jarênh

Matêwre 28.1-10; Makre 16.1-8; Juãw 20.1-10

¹ Tã nhũm apkati nhũm tōmĩk. Hãmri nhũm mēnijaja kwÿhtã kãnhmã hkrĩ nê ma akupÿm kēn kreta wÿr mē hkuxwaxã ho mra.

² Hãmri nê hwÿr àhtêp o mra nhũm ra hakwakre kahê xã raxta kahê xã hkax ã xa nhũm mē tee ri omu.

³ Hāmri nē kēn kre wỳr agjē nē kamā tee ri Jejus japēr no nhūm kamā amrakati.

⁴ Nhūm mē tee ri axpēn pumunh pē hkukamā hamaxpēr.

Hāmri nhūm Tirtūm kapēr o wrỳk xwỳnh wa axkrut nē mē haēr pē mē hwỳr kato nē wa xa. Wa ê jaka nē hirã htỳx kãm wa xa.

⁵ Nhūm mē tee ri wa omu nē kãm wa uma htỳx nē. Nē wa umaj hkōn krã ho rôrōk nē hkrĩ hpa. Nhūm wa mē omu nē mē kãm:

—Kwa mon ka mē ri mē htykjē kamā ra akupỹm htĩr xwỳnhhta japēr o ri apa?

⁶ Jar amrakati. Na ra akupỹm htĩr. Kormã Garirej kamā pa ri kot mē amã amnhĩ jarēnh xà hkôt na ra akupỹm htĩr. Mãn ka mē arĩ kot ã mē amã amnhĩ jarēnh anhỹrja ã anohtỳx japēr.

⁷ Mē kot unēnh nē pĩ kahpa hã nhôr nhūm htyk nē htyk ã apkati axkrunēpxi hāmri nē akupỹm htĩr ã kot mē amã amnhĩ jarēnhhta mãn ka mē arĩ hã anohtỳx japēr.

⁸ Anhỹr o mē kãm kapēr nhūm mē kuma hāmri nē ra Jejus kot mē kãm ã amnhĩ jarēnh anhỹrja mã hamaxpēr kurē kumrēx.

⁹ Hāmri nē awjanã nē ma akupỹm krĩm hkĩnh nē mra. Nē hwỳr pōj nē mē kot Jejus nhỹ hã mē ahkre ho mē pa xwỳnhjē mã awjarē. Mē kēp 11 xwỳnhhtajē mē kaxyw hkwyjē mã awjarē.

¹⁰ Mēni kot mē kãm ujarēnh xwỳnhhtajē nhĩxi na pre Marir Matarēn nhūm ja kēp Joanã. Nē Xiakre katorxà Marir ôta. Nē kaxyw mēni hōja. Jakamã nhūm mē ma akupỹm Jejus nhỹ hã mē ahkre ho mē pa xwỳnhjē hwỳr mra nē mē kãm awjarē.

¹¹ Nom nhūm mē kuma nē ãm mē kuma nē htỳx ho amnhĩ krã hkôt mē kot ri ã harēnh anhỹr ã mē hkamnhĩx nē ãm mē kuma.

¹² Nhūm Simãw Pētre hamaxpēr hāmri nē kãnhmã xa nē ma kēn kreta wỳr hprôt nē htēm kurē kumrēx. Hāmri nē tee ri kēn kre kaprỳ kamunh o xa nē kamã Jejus kupu xà pix pumu nē tee ri hkukamã hamaxpēr hāmri nē ma akupỹm tē.

Jejus kot Emau hwỳr wa mōr xwỳnh wa hwỳr kator ã harēnh

Makre 16.12-13

¹³ Tã nhūm ra amỹkry ho mō nhūm Jejus kwỳjē hō wa hamēxkrut nē Jerujarē rùm

kato nē ma akupỹm wa ã krĩ pē Emau hwỳr wa mō. Jerujarē rùm Emau hwỳr ahkrãre.

¹⁴ Jakamã nhūm wa hwỳr pry hã axpēn mã tanhmã Jejus jarēnh to ho mō. Kēn kre kamã mē kot haxàr nhūm ra ã pikunorja nhūm wa axpēn mã harēnh o wa mō. Nē tee ri hkukamã hamaxpēr o wa mō.

¹⁵ Hāmri nhūm Jejus tãm tē nē wa hã ajēt nē wa hkôt tē.

¹⁶ Nom nhūm wa hprĩ hã omunh kêt nē. Tỳx ho nhãm mēhō hã hkamnhĩx nē wa arĩ axpēn mã harēnh o wa mō.

¹⁷ Hāmri nhūm Jejus hēx rom wa kãm:

—Kwa mēmon ka wa axpēn mã harēnh o wa mō? Anē.

Hāmri nhūm wa hkaprĩ kamã kãm harē.

¹⁸ Ihō pē Kruptija kãm:

—Kwa xà na ka Jerujarē kamã ri apa htã kamã mē kot tanhmã amnhĩ nhĩpēx toja jarēnh mar kêt nē? Kurùm amōr kēnã na ka ri mēmoj mar kêt nē ri apa. Anē.

¹⁹ Hāmri nhūm wa kãm:

—Nà amrakati ixte mēmoj maare hã. Kwa mo na wehe? Kwa war aprĩ hã inhmã harē pa kuma. Anē.

Hāmri nhūm wa kãm:

—Nà mē kot mē ixpē tanhmã Jejus pē Najare nhō xwỳnhhta to kēnã. Kēp Tirtūm nhỹ hã kapēr jarēnh o pa xwỳnh na pre. Nē Tirtūm nhỹ hã tanhmã amnhĩ nhĩpēx to ho pa nhūm prem piitã amnhĩm mex ã harē.

²⁰ Tã nhūm mē panhō patre krãhtũmjē mē mē panhō pahijaja axtem nē mē kãm hã amỹnē. Mē kot pĩ kahpa hã nhôr nhūm htyk kaxyw mē kãm hã amỹnē.

²¹ Pa prem ixtỳx ho kēp Tirtūm kot mē pahwỳr mēnh xwỳnh ã hkamnhĩx nē kot Rôm nhō xwỳnhjē pē mē ixpytãr ã hkamnhĩx tã nhūm prem mē ixpē kupĩ. Jãã na prem ã hipēx anē nē kupĩ. Na ra htyk ã apkati axkrunēpxi.

²²⁻²³ —Nē jarãhã kwỳhtã mēni hkwyjaja ma haxàr xà hã kēn kre hwỳr mra nē xep tee kamã hapēr nē omunh kêt nē. Xep ãm Tirtūm kapēr o wrỳk xwỳnhja wa ho axkrut nē wa omu nhūm wa xa. Nhūm mē kãm ra akupỹm htĩr ã harē nhūm mē akupỹn mē ixwỳr mra nē mē ijaēr pē mē inhmã harē.

²⁴ Hāmri nhūm mē ixkwỳjaja ma mē hpãnhã kēn kreta wỳr mra nhūm ra mē

kot harēnh xà hkôt tee ri kamã hapêr nom nhũm kamã amrakati kumrêx. Anê.

²⁵ Hãmri nhũm Jejus amnhĩ tã wa kuma nê wa kãm tanhmã amnhĩ jarēnh to nê wa kãm:

—Hêxta waa nê. Pêr ãm mẽ ate mẽmoj mã ajamaxpêr tỳx mex kêt kumrêx. Na pre ra Tirtũm nhỹ hã kapêr jarēnh xwỳnhjaja Tirtũm kapêr ã kagà htũm kamã ã kot amnhĩ nhĩpêx anhỹrja kukamã hprĩ hã harê nê hã kagà. Mẽ akukamã mẽ anhĩgêjtê mã harê nê hã kagà. Tã ka mẽ kormã aprĩ hã mar tỳx kêt nê.

²⁶ Kêt mẽ anê na Tirtũm kot ãm xwỳnhnta ty. Tã ra akupỹm htĩr nê akupỹm kaxkwa hwỳr àpir kaxyw. Kot mẽ ato amnhĩptàr kaxyw ra akupỹm hwỳr àpir mã.

²⁷ Amnepêr na pre finat Mojesja tanhmã hkukamã mẽ anhĩgêjtê mã harēnh to nê hã kagà. Nê hprĩ hã harēnh o pa. Nhũm hpãnhã Tirtũm nhỹ hã kapêr jarēnh o mẽ pa xwỳnhjaja ma anê nê mẽ kãm harēnh o pa. Anê.

Nhũm pre ã Jejus wa hkôt hprĩ hã wa kãm amnhĩ jarēnh anhỹr o tẽ. Tẽ ho nhãm mẽhõ jarēnh pyrak nom tãm wa kãm amnhĩ jarēnh o wa hkôt tẽ. No nhũm kormã wa hprĩ hã kêt Jejus ã omunh kêt nê.

²⁸⁻²⁹ Nhũm ã wa kãm amnhĩ jarēnh anhỹr o mõi rãhã nhũm mẽ ra wa õ krĩ hwỳr hpõx o mõi. Nhũm ra kamãtre nhũm Jejus te kot wa rer nê nhỹhỹm ma htẽm kaxyw pyrak o amnhĩ nhĩpêx nhũm wa tee ri omu nê kãm:

—Kwa xà kot kaj wa ixre nê ma tẽ? Ra kamãt o mõi kênã. Kwa ma wa ixkôt tẽ nê wa inhõrkwỹ kamã mãn wa ixri põi. Anê.

Hãmri nhũm wa kuma nê ma wa hkôt tẽ.

³⁰ Nê mẽ wa õrkwỹ hwỳr põi nê hwỳr agjê. Hãmri nê apkur kaxyw hkrĩ nhũm Jejus tãm pãwti py nê Tirtũm mã harê nê hpãnhã ho axkjê nê wa kãm kugõ.

³¹ Hãmri nhũm wa atã kêt Jejus ã omunh kurê kumrêx. Jao nhũm wa kêt akunok nhũm wa tee ýr xà kamã hapêr nhũm hkapyr mex nê xa.

³² Hãmri nhũm wa tee ri axpên pumu nê ri hkukamã hamaxpêr nê axpên mã:

—Hêxta waa nê. Xep tãm na. Tãm na pahkôt mõi nê pry hã hprĩ hã pamã Tirtũm kapêr ã kagà jarê pu hkôt pahkĩnh nê mar o mõi. Hêxta waa nê. Xep tãm na. Anê.

³³⁻³⁵ Hãmri nê wa kãnhmã xa nê kato nê ujanãr kurê kumrêx. Hãmri nê ma akupỹm Jerujarê hwỳr wa hkwỳjê hwỳr tẽ. Nê mẽ hwỳr põi nê axà. Nhũm Jejus nhỹ hã mẽ ahkre ho mẽ pa xwỳnh pẽ 11jaja ra axpên wỳr akuprõ nê hkrĩ. Mẽ hkwỳjê mẽ axpên wỳr akuprõ nê axpên mã tanhmã Jejus jarēnh to ho hkrĩ. Hãmri nhũm wa mẽ hwỳr axà nhũm mẽ wa omu nê wa kãm:

—Kwa na xep ra Jejus akupỹm htĩr nê Simãw Pêtre hwỳr kato. Anê.

Hãmri nhũm wa mẽ kuma nê mẽ kãm:

—Tỳ na akupỹm htĩr kênã. Na pa wa ijaxwỳja ham omu. Na pry hã wa ixtã ajêt nê ma wa ixkôt mõi nê wa inhõrkwỹ kamã põi. Hãmri pa mẽ ixãpkur kaxyw ixkrĩ nhũm pãwti py nê Tirtũm mã harê nê ho axkjê nê wa inhmã kugõ pa wa ixprĩ hã kêt Jejus ã omunh kurê kumrêx. Ixprĩ hã omunh jao nhũm wa ixpê hapêx. Anê.

Jejus kot hkwỳjê piitã hwỳr kator ã harēnh

Matêwre 28.16-17; Makre 16.14; Juãw 20.19-23

³⁶ Nhũm mẽ kormã axpên mã Jejus jarēnh o hkrĩ rôm nhũm tãm nhỹhỹnh mẽ hwỳr axà nê xa. Mẽ haêr pẽ mẽ hwỳr nhỹhỹnh axà nê mẽ kãm:

—Pa? Xàn ka mẽ arĩ akrĩ? Anê.

³⁷ Hãmri nhũm mẽ amnhĩ jaêr pẽ omunh jao kãnhmã hakry hpar o mra. Jao hakryk kãm ma htỳx kãm omunh o hkrĩ.

³⁸ Hãmri nhũm mẽ kãm:

—Kwa mon ka mẽ amã ixpyma kamã tee ri ixpumunh o akrĩ? Kwa mẽ ixkarõ hã ixkamnhĩx nê amã ixpyma hkêt nê.

³⁹ Na pa akupỹn inhĩ ho mẽ awỳr ixkato nê xa. Ga mẽ inhĩhkra kamã prek tatak xãja pumu. Nê ixpar kãm omu. Kwa mẽ amã ixpyma hkêt nê. E mẽ mãmrĩ mra nê anhĩhkra ho ixkupê. Kêt apu ixkarõ hpix ronhỹx ka mẽ inhĩ kupênh kêt nê. Mo mẽhkarõja ã? Nà na pa akupỹm ixtĩr nê inhĩ ho mẽ awỳr ixkato. Anê.

⁴⁰ Hãmri nê mẽ kãm amnhĩ nhĩhkra hpê nê mẽ kãm amnhĩ par pẽ.

⁴¹ Tã nom nhũm mẽ arĩ akryk omunh o hkrĩ. Mẽ kot omunh nê hkĩnh tã tee ri omunh o hkrĩ. Hãmri nhũm tee ri ja hã mẽ omu nê mẽ kãm:

—E kwa mẽ inhmã mẽmoj japêr pa kukrê. Anê.

⁴² Hāmri nhūm mẽ kām tep gōj kām āmta gō

⁴³ nhūm kupy nē hkur o nhỹ nhūm mẽ arĩ hā omunh o hkrĩ. Jao ra akupỹm htĩr ā omunh kurē kumrēx.

Jejus akupỹm nojarēt nē hkwỳjê mã mẽmoj tã karō

Matêwre 28.18-20; Makre 16.15-18; mãănēn Atre 1.6-8

⁴⁴⁻⁴⁵ Hāmri nhūm Jejus hprĩ hā mẽ kām Tĩrtũm kapēr ā kagà htũm kot hkukamā harēnh ā amnhĩ jarē nē mẽ kām:

—Nà kormā ixytk kêt ri na pa pre ixprĩ hā mẽ amā amnhĩ kukamā amnhĩ jarē. Tĩrtũm kapēr ā kagà htũm kot tanhmā mẽ kot inhĩpêx to hkukamā ijarēnhja. Na pre finat Mojes Tĩrtũm nhỹ hā ixkukamā tanhmā ijarēnh to. Nē Tĩrtũm nhỹ hā kapēr jarēnh o mẽ pa xwỳnhjaja Mojes mỳr pē haxwỳja ixkukamā tanhmā ijarēnh to. Nē Tĩrtũm mex o mex ā mẽ grer ā kagà xwỳnhjaja haxwỳja ixkukamā tanhmā ijarēnh to. Jajē piitã na prem Tĩrtũm kapēr ā kagà htũm kamā ixkukamā ijarē.

⁴⁶ Nē ijarēnh o:

Tĩrtũm kot mẽ pakaxyw ãm xwỳnh pē Krisja koja nhỹrmã ty. Nē htyk o apkati axkrunēpxi nē akupỹm htĩr.

Anhỹr o mẽ kot ijarēnh. Tã pa ra mẽ kot ixkukamā ijarēnh xà hkôt ā mẽ anē amnhĩ nhĩpêx anē.

⁴⁷ —No ãm Tĩrtũm kapēr ā kagà htũm kot papxipix ixkukamā ijarēnh kêt. Kamā mãănēn mẽ kajaja tanhmā mẽ akukamā mẽ ajarēnh kute. Mẽ apê ixkôt amnhĩ xunhwỳr xwỳnhjaja ixwakre kamā tanhmā mẽ ate inhmā amnhĩ nhĩpêx to ho apa hkukamā tanhmā mẽ ajarēnh kute. Nē mẽ ajarēnh kot:

E mẽ ate ixkôt amnhĩ xunhwỳr xwỳnhjaja.

Kêr ka mẽ ma pika piitã hkôt mẽ kām Tĩrtũm kot mẽ awỳr mēnh xwỳnhhta jarēnh o ri mẽ hkôt apa. Mẽ kot mẽ amar nē amnhĩ tomnuj kaga nē Tĩrtũm kôt amnhĩ xunhwỳr kaxyw. Kêr kê Tĩrtũm ja hā mẽ omu nē amnhĩ katut kôt mẽ kot amnhĩ tomnuj rēnh pa. E kêr ka mẽ ma krĩ piitã hkôt mẽ kām ā ja jarēnh anhỹr o ri mẽ hkôt apa. Krĩ pē Jerujarē kumrēx kām hāmri nē rĩ kormã pu hā

krĩ kuhê xwỳnh piitã hkôt ajapôj nē mẽ kām harēnh o ri apa. Anē.

Ā Tĩrtũm kapēr ā kagà htũm kot mẽ akukamā mẽ ajarēnh kot anhỹr.

⁴⁸ Tã kêr ka mẽ ā mẽ kām tanhmā ijarēnh to ho ri apa anē.

⁴⁹ No ãm kormã. Kêr paj ma akupỹm kaxkwa hwỳr api hāmri nē amnhĩ pãnhã mẽ awỳr Tĩrtũm Karō rē mãn. Tĩrtũm kot ixte amnhĩ nhĩpêx ā ijarēnh xà hkôt kot paj amnhĩ pãnhã mẽ awỳr kurē. Tã kêr ka mẽ kormã krĩ ja kamā kutêp apa. Kêr kê mẽ awỳr wrỳ nē mẽ amā agjê ka mẽ rĩ kormã anhgrà nē ma ŷ hā mẽ kām ijarēnh o ri mẽ hkôt apa. Anē.

Jejus kot akupỹm kaxkwa hwỳr àpir ā harēnh

Makre 16.19-20; mãănēn Atre 1.9-11

⁵⁰ Tã nhūm Jejus Jerujarē rũm hkôt mẽ pa ho pa xwỳnhjê kator nē ma krĩ pē Petãn wỳr mẽ o mō. Nē kormã hwỳr mẽ o mōr ri nhỹri mẽ o xa nē kãnhmã ìhkra pē nē mẽ ho Tĩrtũm wỳ.

⁵¹ ā mẽ ho hwỳr anhỹrja rôm nhūm Tĩrtũm amnhĩ wỳr ho àpir o mō nhūm mẽ noo mã ma akupỹm tēn api.

⁵² Hāmri nhūm mẽ kām mex o mex ā harēnh pē ma akupỹm àpir kām omunh o kuhê. Nhūm ma tē nē mẽ kêp kakrãm axà nē mẽ kêp akunok. Hāmri nhūm mẽ awjanã nē ma akupỹm Jerujarē hwỳr hkĩnh nē pa.

⁵³ Hāmri nē apkati mẽ Tĩrtũm mã amnhĩ jarēnh xà hā ixkre hwỳr agjê nē kamã Tĩrtũm mã mex o mex ā harēnh o hkrĩ rãhã nē.

Tã ãm ja pix ixkrãmnhwỳ Teopre. Ixpê Rukre na pa awỳr kagàja nhĩpêx nē kamã Jejus kot tanhmā amnhĩ nhĩpêx to hā harē nē hā kagà nē awỳr kumē.

Juãw Juãw kot tanhmã Jesus kot amnhĩ nhĩpêx to ho pa hã kagà

Juãw na pre kagàja nhĩpêx. Na pre mãänên Wam Juãw nê Sikün Juãw nê Hapuhã Juãw nê Apokarip nhĩpêx. Juãw Paxis kêt axtem Juãw õ. Nê Jesus kôt mẽ pa ho mẽ pa xwýnhjê hõ na pre. Nê ý hã mẽ ahkre ho pa xwýnhjê hõ na pre. Nom kormã ã amnhĩ nhĩpêx anhÿr o pa hkêt ri na pre kêp tep kanhêr xwýnh. Nê kêp Jesus kràmnhwý mex na pre. Jakamã na pre kagàja nhĩpêx nê kamã Jesus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jesus kêp Tirtüm Kra hã harê nê hã kagà. Nê ãm pix kukwak ri Tirtüm wa kuri mẽ pahpĩr tùm nê mẽ papa ho mẽ papa hã harê nê hã kagà. ã na pre Juãwja mẽ pamã Jesus jarê nê hã kagà anê.

Jesus te kot Tirtüm pyrãk ã harênh

Matêwre 1.23; Juãw 8.12, 8.58, 10.30, 20.28; mãänên Atre 10.36; Sikün Korõt 4.4; Piripos 2.6-11; Korosê 1.13-17, 2.9; Xitre 2.13; Eprêw 1.1-4; Wam Juãw 1.1-4, 5.20; Apokarip 1.17-18

¹ Amnepê mã kormã mẽmoj kêt ri nhũm kot Tirtüm kapêr o amnhĩrĩt xwýnhja Tirtüm kôt pa ho pa. Te kêp uràk nê pa. Wa kot amnhĩ nhĩpêxja ãm tipxi. Nê wa àhpumunh ãm tipxi. Nê wa hkarõ mãänên ãm tipxi. ãm wa tipxi rãhã nê pa ho pa.

² Kormã mẽmoj kêt ri na pre Tirtüm kapêr o amnhĩrĩt xwýnhhta Tirtüm kôt ri pa ho pa.

³ Nê Tirtüm nhỹ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tirtüm nhỹ hã ho kator pa. Kop apu mẽmoj to kator kêt ronhỹx mẽmoj amrakati kumrêx.

⁴ Nê Tirtüm o amnhĩrĩt xwýnhhta pix kukwak ri na hte mẽmoj piitã htĩr nê pa. Nê ãm pix kukwak ri na htem Tirtüm ri htĩr tùm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj

piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamexpêr nyw o amnhĩrĩt pu mẽ pahpĩrĩ hã mar mex nê.

⁵ Ja kaxyw na pre wrý nê ri mẽ kãm Tirtüm kapêr jarênh o ri mẽ hkôt pa. Jao mẽ kot amnhĩ nhĩpêx nyw jarê nhũm mẽ kot amnhĩ tomnuj xwýnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprý.

Juãw Paxis kumrêx kot tanhmã Jesus jarênh to hã harênh

Matêwre 3.1-3; Makre 1.1-4; Rukre 3.2-6

⁶ Tã nhũm kormã Jesus mẽ kãm kapêr o pa hkêt ri nhũm Juãw Paxis kumrêx mõ nê hkukamã Tirtüm nhỹ hã mẽ kãm tanhmã harênh to ho pa.

⁷ Mẽ kãm mẽ kot amnhĩ nhĩpêx nyw nhõr xwýnh pê Jesus Kris kukamã mẽ kãm harênh o ri mẽ hkôt pa. Mẽ kot mar nê amnhĩ kaxyw Jesus kôt hamaxpêr kaxyw.

⁸ No Juãw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nê. Na pre ãm kot mẽ kãm õr xwýnhhta kukamã mẽ kãm harênh o pa.

⁹ Jakamã na pre hte mẽ kãm harênh o ri pa nê mẽ kãm harênh o:

—E ot pa mẽ amã mēhõ jarênh o ri ixpa. Kot mẽ pamã mẽ pahte amnhĩ nhĩpêx nyw nhõr xwýnhhta. Koja tokyx mẽ pakamã pøj pu mẽ omu. Koja pøj nê mẽ piitã mẽ kãm Tirtüm kapêr jarênh o ri pa. Mẽ pahte pahpĩrĩ hã mar mex kaxyw. Anê.

Tirtüm kot mẽ ho hkra hprãm xwýnhjê jarênh

Rõmãn 8.14; Karatas 3.26; Epes 1.5

¹⁰ Tã nhũm Jesus man kot mẽmoj piitã ho kator xwýnhhta wýr wrý nê mẽ hkôt ri pa. No nhũm mẽ kot kêp mẽmoj piitã ho kator xwýnh ã omunh kêt jakamã na prem kapêr ma nê ãm kuma nê amnhĩ kaxyw hkôt hamaxpêr kêt nê.

¹¹ Na pre wrý nê mẽ pakamã ï ho kato. Kêp mẽ pahpiitã mẽ pahto kator xwýnh tã nhũm mẽ ohtõ nê omu nê ãm omu nê hkôt amnhĩ nhĩpêx kêt nê.

¹² Na prem ãm grêre nê kuma nê amnhĩ kaxyw hkôt hamaxpêr nê hkôt amnhĩ xunhwý. Hãmri nhũm amnhĩ tã mẽ omu nê mẽ kãm:

—E nà ãm hāmri. Ra mẽ ate amnhĩ kaxyw ixkôt ajamxpēr nē ixkôt amnhĩ xunhwýr jakamã na ka mẽ ixkukwak ri apê Tĩrtũm kraa. Anē.

¹³ Na htem ã kēp Tĩrtũm kra hprãm xàj Jejus kôt amnhĩ xunhwýr anē. No na htem mẽ katorxà nhõxà hkre rũm hapôx kôt kēp Tĩrtũm kra hkêt nē. Rỳ amnhĩ krã hkôt tanhmã amnhĩ nhĩpêx to kukwak ri kēp hkra hkêt nē. ãm Tĩrtũm tãm kot mẽ ho hkra pix kukwak ri na htem kēp hkra.

Jejus wryk nē ĩ ho kator ã harēnh

*Matêwre 1.20; mãânēn Rômãn 1.2-4; Piri-
pos 2.6-7; Eprêw 2.9, 4.15; Wam Juāw 4.2*

¹⁴ Jakamã na pre Tĩrtũm o amnhĩrĩt xwýnhhta mẽ pahwýr wry nē mẽ pakamã ĩ ho kato nē mẽ pakamã pa. Kēp Tĩrtũm Kra hã pixi mex na pre. Nē kot amnhĩ nhĩpêxja te Tĩrtũm kot amnhĩ nhĩpêx pyrãk. Urãk nē mex o mex. Nē urãk nē mẽ pakutã nojarêt xwýnh. Na pre hte katãt kôt Tĩrtũm kapēr jarēnh o ri mẽ hkôt pa. Pa prem kuma nē mex o mex ã omu.

¹⁵ Nhũm Juāw Paxis na pre hkukamã mẽ kãm harēnh o ri pa nē mẽ kãm:

—E ra ixte mẽ amã harēnh o ri ixpa xwýnhhta na ra pøj. Te pa ixte wa nē ixkator pyrãk nom amnepê mã kormã ixkêt ri nhũm htĩr rãhã nē pa ho pa. Ham ĩ ho kator tã kēp Tĩrtũm Kra jakamã urãk nē rãhã ho rãhã hã pa xwýnh na. Jakamã kot amnhĩ to rax o kot ijakrenh par. Anē.

¹⁶ Nē kēp mẽ pakutã nojarêt rãhã nē pa ho pa xwýnh jakamã na hte mẽ pahto mex rãhã pu mẽ kukwak ri pamex nē ri papa ho papa.

¹⁷ Na pre finat Mojesja mẽ panhĩgêjtjê mã Tĩrtũm kapēr jarēnh o ri mẽ hkôt pa nē mẽ kãm:

—Na pre Tĩrtũm mẽ pahte tãm amnhĩ nhĩpêx o papa hã mẽ pamã karõ. Jakamã kot puj mẽ kot mẽ pamã mẽmoj tã karõ xã hkôt ã amnhĩ nhĩpêx anhýr o papa nē ra tãm amnhĩ nhĩpêx o papa. Anē.

Nhũm pre Mojesja ã mẽ kãm kapēr o pa anē. Hãmri nhũm mẽ kuma no ãm tee ri kãm Tĩrtũm kôt tãm amnhĩ nhĩpêx o pa hprãm kaprỳ. Jakamã nhũm hpãnhã Jejus Krisja wry nē mẽ pamã kapēr õ ho kapēr o pa nē mẽ pamã:

—E mẽ ate Tĩrtũm kôt amnhĩ nhĩpêx o apa hkêt tã nhũm arĩ kãm mẽ ajapê nē. Nē kãm mẽ ato mex prãm. Jakamã kot kaj mẽ amnhĩ to awý nhũm tanhmã mẽ akrã hto ka mẽ ra tãm ri amnhĩ nhĩpêx o apa. ãm hãmri na pa ã mẽ amã ja jarēnh anē.

Anhýr o mẽ pamã Tĩrtũm kapēr jarēnh o pa. Tĩrtũm kapēr na mex o mex.

¹⁸ Nē aa mẽ pahtõ mẽ pahte pano ho Tĩrtũm pumunh kêt. ãm Kraja pix na kot no ho omunh. Kaxkwa kamã kuri ri pa ho pa jakamã kot omunh mex. Nē te kot Hipêêxãja pyrãk jakamã na pre wry nē hprĩ hã tanhmã kute hã mẽ pamã harēnh o pa. Jakamã na pu mẽ ra pahpiitã Tĩrtũm kot amnhĩ nhĩpêx ã omu nē mar mex nē.

*Juāw Paxis kot mẽ kãm Jejus jarēnh o pa
hã harēnh*

*Matêwre 3.1-12; Makre 1.1-8; Rukre 3.15-
17; mãânēn Atre 19.4*

¹⁹⁻²⁸ Na pre Juāw Paxis ma hkwýjê hkôt mẽ kãm Jejus jarēnh o pa nhũm mẽ hkwýjaja kuma nē amnhĩ kaxyw Jejus kôt hamaxpēr nē hkôt amnhĩ xunhwý. Hãmri nhũm Juāw Paxis ja hã mẽ omu nē Tĩrtũm mã mẽ hkrã kumrã. Pyhti pē Jotãw nhĩkjê hã krĩ pē Petãn tã ri mẽ hkrã kumrãr o pa. Hãmri nhũm krĩ pē Jerujarê kamã Ijaew krãhtũmjaja harēnh ma nē ma hwýr hkwýjê rē. Mē kot tanhmã hkukjêr to nhũm kot mẽ kãm tanhmã amnhĩ jarēnh to kaxyw. Jakamã nhũm mẽõ patre hkwýjê mẽ Tĩrtũm mã amnhĩ jarēnh xã hã ixkre kamã mẽ ho ajuta xwýnh kwýjê mẽ Parijew nhõ xwýnh kwýjê mẽ nhũm mẽ ma hwýr mra. Juāw Paxis wýr mra nē omu nē kãm:

—Pa. E ot pa mẽ awýr mra. Kwa mẽ inhmã amnhĩ jarē. Apê mẽ atõ na ka we? Xã ka na apê Tĩrtũm kot mẽ ixkaxyw axãm mã xwýnhhta na ka nà? Xã ka na pa htem amnhĩ wýr akamã ijamak o ixpa? Anē.

Hãmri nhũm mẽ kuma nē mẽ kãm: “Nà pa hkêt.” Anē hãmri nhũm mẽ kãm:

—Tõ mãn xep apê amnepê mã Tĩrtũm nhỹ hã kapēr jarēnh xwýnh pē finat Erisja. Hã na ka tanhmã amnhĩ to nē akupým atĩr nē mẽ ixkôt apa nà? Anē.

Hãmri nhũm mẽ kãm:

—Nà ixpê Eris kêt. Anē.

Hãmri nhũm mẽ kãm:

—Tô mãn xep apê finat Mojes kot mē kãm harēnh o pa xwýnhhta na ka nà? Anē.

Hãmri nhũm mē kuma nē kê axte mē kãm:

—Nà ixpê tãm kêt. Anē.

Hãmri nhũm mē tee ri kot ã amnhĩ tã aprâr anhÿrja ma nē kãm:

—Kwa apê jajê hõ hkêt tã na ka hte mē hkrã kumrãr o ri apa. Kwa nà akatàt kôt mē inhmã amnhĩ jarē. Pa mē ama nē ma akupÿm mra nē mē kot awÿr mē ixrēnh xwýnhjê mã tanhmã ajarēnh to. Tanhmã na ka hte mē kãm amnhĩ jarēnh to ho ri apa? E kwa mē inhmã amnhĩ jarē pa mē ama. Anē.

Hãmri nhũm tã hprĩ hã mē kãm amnhĩ jarē. Amnepê mã mē hkukamã Tirtũm nhÿ hã kapēr jarēnh xwýnh pē finat Ijais kot hkukamã tanhmã harēnh to nē hã kagà xà hkôt nhũm mē kãm amnhĩ jarē nē mē kãm:

—Tôe. Nà kot paj ixprĩ hã mē amã amnhĩ jarē ka mē inhma. Amnepēm Tirtũm kapēr jarēnh xwýnhjê hõ pē finat Ijaisja na pre hte mē kãm mēhõ hkukamã harēnh o ri pa. Mēhõ kot mē panhõ Pahihti hkukamã htēm nē kapôt ã kutêp mē kãm harēnh o pa xwýnhhta nhũm pre hkukamã harēnh o ri pa. Nē mē kãm harēnh o:

Koja nhÿrmã mēhõja kapôt ã mōn pōj nē mē kãm tanhmã ujarēnh to ho ri pa. Nē mē kãm ujarēnh o: “E mē inhma. Koja Tirtũm tokyx mē pahwÿr mē panhõ Pahihti mē nhũm wrÿ nhũm mē piitã omu. Jakamã kwa mē tokyx kutêp tãm amnhĩ nhĩpêx o ri apa. Te ho mē kot mēhõ kutêp pry ho mex pyrãk o amnhĩ nhĩpêx o ri pa. Jao amnhĩ nhĩ ho tãm amnhĩ nhĩpêx nē tãm axpēn nhĩpêx o ri apa. Pahihtita kutêp.”

—Anhÿr o na pre hte finat Ijaisja kot Pahihti hkukamã harēnh o ri pa xwýnhhta kukamã harēnh anē. Tã paa. Pa na pre Ijaisja ã ixkukamã ijarēnh anhÿr o pa. Pa na pa hte ã Pahihti kutêp mē kãm harēnh o ri ixpa anē. Tã ã ixte harēnh anhÿr xwýnhhta na ra mē pakamã pa ka mē kormã ja hã omunh kêt nē. Kukamã na pa hte mē piitã mē kot hkôt amnhĩ xunhwÿr ã mē omunh kaxyw gô pix o mē hkrã kumrãr o ri mē hkôt ixpa. Nom na pre ra mē pahwÿr Tirtũm kot mē

pakaxyw ãm xwýnhhta tãm mē pahwÿr wrÿ. Àhpumunh tÿx o kot ijakrenh jakamã na pa hte ãm kukwak ri ixpa nē amnhĩ tã hã ixpijaàm o ri ixpa. Anē.

Juãw Paxis kot mē kãm Jejus jahkre hã harēnh

Matêwre 3.11; Makre 1.10; Rukre 3.22

²⁹ Tã nhũm apkati nhũm Juãw Paxis amnhĩ wÿr Jejus pumu nē mē kot mar o kuhê xwýnhjê mã ìhkra ho ahkre nē mē kãm:

—E. Oněj Tirtũm kot mē pakaxyw ãm xwýnhhta tē. Mē pahpê Ijaew na pu htem xatã pahte amnhĩ tomnuj pãnhã amnhĩrer kaxyw Tirtũm mã pahkrit ôwēhti hkra nyw kwÿ hpa nē ho amnhĩ pãnhã kãm amnhĩrer o papa. No kêt htēm nēj koja nhÿrmã kãm mē pahpiitã mē pahte amnhĩ tomnuj pãnhã amnhĩrer pa.

³⁰ Na pa pre ra mē amã harēnh o: “Te pa ixte wa nē ixkator nē ixtir nē ixpa pyrãk. Nom amnepēm kormã ixkêt ri na pre htir rãhã nē pa ho pa. Nē ì ho wrÿk nē jar kator tã kēp Tirtũm Kra jakamã uràk nē rãhã nē pa ho pa xwýnh na. Jakamã kot amnhĩ to rax o kot ijakrenh par.” Anhÿr o pa pre mē amã harēnh o ri ixpa ka prem inhma.

³¹ —Ixte mē amã ã harēnh anhÿr tã ijaxwÿja kormã ixte kēp Tirtũm Kra hã omunh kêt nē ãm hkukamã Tirtũm nhÿ hã mē amã ã harēnh anhÿr o ri ixpa. Nē hkukamã Tirtũm mã mē akrã kumrãr o ri ixpa. Tã na pa kēp Tirtũm Kra hã omu nē ã mē amã ahkre anē ka mē omu. Anē.

³²⁻³³ Nhũm pre ã Juãw Paxis mē kãm Jejus jahkre anē nē mē kãm:

—Nà Tirtũm na pre ixte mē akrã kumrãr o ixpa kaxyw inhmã hã karõ. Tã na inhmã kot mē pakaxyw ãm xwýnhhta o amnhĩrit nē inhmã harēnh o: “Koja nhÿrmã Ixkarõja mēhõ hwÿr wrÿ nē kuri arìk. Ka ja hã omu nē kēp Ixkra hã omunh kurê kumrêx. Koja amnhĩ xô ri amnhĩ pyrã nē mē kãm Ixkarõ nhõr o pa nhũm mē hkarõ mã agjê.” Anhÿr o inhmã harē. Tã na pa ra omu. Na pre Tirtũm Karõ kaxkwa rùm te tuuti pyrã nē hwÿr wrÿk o tē nē ìkre hã xa.

³⁴ Pa ã kot hipêx anhÿr ã omu nē kēp Tirtũm Kra hã omunh kurê kumrêx.

Jakamã na pa ã mẽ amã ahkre nẽ mẽ amã harẽnh anẽ. Anẽ.

Juãw Paxis kôt pa xwýnh wa kot Jejus kôt pa hã wa harẽnh

Atre 19.4

³⁵ Tã nhũm apkati nhũm Juãw Paxis axte Jejus pumu. Kot hkôt ri pa ho pa xwýnh mẽ wa nhỹri xa nẽ omunh o xa.

³⁶ Nhũm ra mẽ hãnh tẽ nhũm Juãw Paxis omu nẽ hkôt ri pa xwýnh wa kãm:

–E oněj Tĩrtũm kot mẽ pakaxyw ãm xwýnhhta tẽ. Něj koja mẽ pahte amnhĩ tom-nuj pãnhã amnhĩre. Anẽ.

³⁷ Hãmri nhũm wa kuma nẽ omu nẽ ma hkôt tẽ nẽ hã ajêt.

³⁸ Nhũm wa omu nẽ wa kãm: “Pa mo na?” Anẽ nhũm wa kot kęp mẽ ahkre xwýnh ã omunh jakamã kãm:

–Nà wa ixte ma akôt ixtẽm nẽ nhỹri anhõrkwỹ pumunh mã na pa wa akôt tẽ. Anẽ.

³⁹ Hãmri nhũm wa kãm:

–Tõe. Nà wa kam nẽ rĩ ma ixkôt tẽ. Anẽ.

Hãmri nhũm wa kuma nẽ ma hkôt wa tẽ nẽ õrkwỹ hwýr pøj nhũm ra amýkry nhũm wa hkôt axà nẽ kuri ýr o kamát hãmri nẽ kato nẽ ma akupým tẽ.

⁴⁰ Kôt htẽm xwýnhjê hõta na pre kęp Andre. Simãw Pêtre htõ na pre. Nẽ kaxyw hõja. Wa kumã na pre Juãw Paxis Jejus jahkre nẽ harẽ nhũm wa ma hkôt tẽ. Tã wa ra akupým wa tẽ.

⁴¹ Hãmri nhũm Andreja htõ Simãw wýr tẽ nẽ kãm:

–Kwa na pa wa jarãhã Tĩrtũm kot mẽ pakaxyw ãm xwýnhhta pumu. Ma pu hwýr ka wa ixwar ano ho omu nà. Anẽ.

Ijaew kapër kãm “Tĩrtũm kot mẽ pakaxyw ãm xwýnh” anhỹrja te kot Gres kapër kãm “Kris” anhỹr jarẽnh pyræk. Ijaew na prem ã Jejus jarẽnh anẽ nẽ harẽnh o: “Tĩrtũm kot mẽ pakaxyw ãm xwýnh.” Anhỹr o harẽ.

⁴² Jakamã nhũm ã Andreja htõ mã harẽnh anẽ nẽ ma akupým hwýr o tẽ. Nẽ wa hwýr pøj nhũm wa omu. Wa kęp Juãw kra hã wa omu hãmri nẽ Simãw mã kapër nẽ kãm:

–Pa Simãw. Nà apê Simãw tã kot paj axte atã anhĩxi hõ mẽ. Kot kaj mããnhẽn apê Septi. Anẽ.

Mẽ pakapër kãm Septija te kęp “kẽn” jarẽnh pyræk. No Gres kapër kãm te kęp “Pêtre” jarẽnh pyræk. No Ijaew kapër kãm kęp “Septi.” Jakamã nhũm pre Jejus ã Simãw Pêtre hã hixi mẽnh anẽ.

Jejus kot amnhĩ kôt Firipti mẽ Natãnaew wa hwýr ã harẽnh

⁴³⁻⁴⁴ Tã nhũm apkati nhũm ra Jejus pyka pê Garirej wýr nojarêt nẽ nhỹri Firipti pumu. Firiptija Andre mẽ Simãw Pêtre wa uræk nẽ krĩ pê Pesêj nhõ xwýnh na pre. Jakamã nhũm Jejus nhỹri omu nẽ amnhĩ kôt kuwý nẽ kãm:

–E kwa ma ri ixkôt apa ho apa. Anẽ.

⁴⁵ Hãmri nhũm kuma nẽ ma tẽ nẽ nhỹri Natãnaew pumu nhũm nhỹri pĩ hpàr parpê nhỹ nhũm omu nẽ kãm:

–Kwa na pa jarãhã finat Mojes kot amnepêm mẽhõ hã kagà xwýnhhta pumu. Tĩrtũm kot mẽ pakaxyw ãm xwýnhhta na. Tĩrtũm nhỹ hã kapër jarẽnh o mẽ pa xwýnhjaja kot hkukamã harẽnh nẽ hã kagà xwýnhhta. Kęp Najare nhõ xwýnh nẽ mããnhẽn kęp finat Juje hkra. E kwa tokyx pu hwýr ka ixkuxwar ano ho omu. Anẽ.

⁴⁶ Hãmri nhũm tee ri kot tanhmã harẽnh toja ma nẽ kãm:

–Tk. Kokỹ. Najare nhõ xwýnh piitã kot amnhĩ to mexti hã kot kêt we hõ kęp Tĩrtũm kot mẽ pakaxyw ãm xwýnh. Anẽ.

Hãmri nhũm kãm:

–Kwa nà ã akapër anhỹr kêt nẽ. Ma ixkôt tẽ nẽ ixpyrà nẽ ano ho omu mãn. Nẽ rĩ ã ri akapër anẽ. Anẽ.

Hãmri nhũm kuma nẽ ma hkôt tẽ.

⁴⁷ Hãmri nhũm Jejus amnhĩ wýr wa omu nẽ kuri mẽ kuhê xwýnhjê mã Natãnaew jarẽnh kurê kumrêx nẽ harẽnh o:

–E oněj Ijaew õja mẽ pahwýr hpõx o tẽ. ãm hãmri na hte tãm amnhĩ nhĩpêx o pa. Na hte higêt finat Jako kurom hêx rom ri tanhmã mẽ kãm amnhĩ to hêx to ho pa hkêt nẽ. Na hte ãm kapër mex pix o ri kapër o pa. Anẽ.

⁴⁸ Hãmri nhũm tee ri amnhĩ tã kuma nẽ kãm:

–Kwa mẽhõ na pre ã amã ijarẽnh anẽ? Aa ixte nhỹri apumunh kêt kumrêx tã ka ri ãm hãmri ã ijarẽnh anẽ. Anẽ.

Hãmri nhũm kãm:

—Nà mēhō kot tanhmā inhmā ajarēnh to hkēt. Ām pa na pa hte inhno ho apumunh o ixa. Kormā Firipti kot awȳr htēm nē amā ijarēnh kēt ri pa ra ixprī hā inhno ho apumu. Na ka kormā pīta parpē nhỹ pa apumu. Anē.

⁴⁹ Hāmri nhūm tee ri kot hprī hā harēnh ā amnhī tā kuma nē kām:

—Kwa mē ijahkre xwýnh. Pēr ām hāmri apē Tirtūm Kra kumrēx jakamā na ka ā ijarēnh anē. Xep ka na mē ixte amnhī wýr akām ijamak o ixa xwýnhhta na ka. Nà ka na apē mē ixpē Ijaew nhō Pahihti. Anē.

⁵⁰ Hāmri nhūm Jejus kuma nē kām:

—Nà ām hāmri na ka ixte pī hpar pē apumunh ā ajarēnhja ma nē hkōt pix mā ixpē Tirtūm Kra hā ixpumu. Tā kot kaj ja nhīrō pē axte mēmoj mex o kot ja jakrenh pumu.

⁵¹ Koja nhỹrmā kaxkwa axkjē nhūm Tirtūm kapēr o mē wrýk xwýnhjaja kurūm axpēn japa ka mē omu. Finat Jako pyrā nē mē omu. Ixte Tirtūm kot mē akaxyw ixām xwýnh wýr koja mē ā wrýk nē amnhī nhīpēx anē ka ja hā mē omu. Kwa jam ajamexpēr tỳx rāhā ho apa. Anē.

2

Jejus kot gō ho mē kām wīhti nhīpēx ā harēnh

¹ Tā nhūm apkati axkrut nē hapēx nhūm Jejus arī Garirej kamā pa. Nhūm krī pē Kanā kamā axpēn mā wahōj wa rer kaxyw nhūm Jejus katorxà ma mē hwýr mō.

² Hāmri nhūm mē amnhī wýr Jejus mē hkōt ri mē ixa xwýnhjē wý pa mē ijaxwýja ma mē hwýr mō nē ra mē hwýr pōj.

³ Hāmri nē mē hkōt wa hā ixkīnh nē apku nē wīhti hkwý ho ixkōm o ixkrī. Tā nhūm ra wīhti mē kēp hapēx nhūm Jejus katorxàja harēnh ma nē Jejus mā harē nē kām:

—Xē Jejus. Na xep ra mē kēp wīhti hapēx pa. Xāt ka tanhmā mē ho ajuta hto mē? Anē.

⁴ Hāmri nhūm kām:

—Tōe. Kwa tee ri ajamexpēr kēt nē. Kot paj tanhmā mē kām ho. Nom kot paj kormā ixpē Tirtūm kot mē akaxyw ixām xwýnh ā pa kormā amnhī to amnhīrīt kēt nē. Anē.

⁵ Hāmri nhūm katorxà kuma nē mē kām mē àpēnh xwýnhjē hwýr tē nē mē kām:

—An koja Jejus mē awȳr tē nē tanhmā mē amā mēmoj tā karō hto ka mē ama nē kām ho anhýr kurē kumrēx. Anē.

⁶ Nhūm mē kuri kēn o poti kēp 6 nē kuhē. Piitā umpým rūnh kumrēx. Koja hō pyxi nē nyt nē kamā gō kēp 80 rit nē hkwý kamā kēp 100 rit. Ijaew na htem apkur kaxyw nē amnhī nhīhkra kuhōnh japjē rūnh nē kormā apku. Nē apkur pa nē axte amnhī nhīhkra kuhō. Ā mē kot xatā amnhī nhīhkra kuhōnh jakamā nhūm pre htem amnhī ri ā poti rūnh kwý xunhwýr anē. No nhūm ra hkapyr nē kuhē.

⁷ Hāmri nhūm Jejus tē nē omu mē àpēnh xwýnhjē mā kām:

—E mē ma mra nē gō ru nē ho poti kuhē mūj piitā ho nyt pa. Anē.

Nhūm mē kuma nē ma mra nē ho nyt pa.

⁸ Hāmri nhūm mē kām:

—Nà hāmri. Pānhā hō kamā gō hkwý janhi nē o tē nē mē anhō patrāw mā agō kē hkwý ho ixkō nē kamā ama. Anē.

Hāmri nhūm mē mar xà hkōt kām hkwý janhi nē hwýr o tē nē kām kugō.

⁹⁻¹⁰ Nom nhūm gōja arī kēp gō kumrēx kēt nē. Jejus kot tanhmā ho jakamā nhūm ra hpānhā kēp wīhti. Jakamā nhūm mēō patrāw wýr hkwý ho tē nē kām kugō nhūm hkaki nē kamā ama. Nom Jejus kot gō ho hipēx ā omunh kēt nē. Ām htỳx ho wīhti kumrēx ā hkamnhīx nē mex kumrēx ā hkaki. Hāmri nē amnhī wýr mjēn nyw xwýnh mā hpa ho apē nhūm hwýr tē nhūm kām:

—Kwa na htem wīhti mex o wa nē mē kām kugō hāmri nhūm mē hpenh pa nhūm mē rī kormā hkōt omnu ho hapu nē mē kām kugō. Tā ka pēr mē axtem nē wam mē kām omnu nhōr pa hāmri nē kormā mex kumrēxja o hapu nē mē kām agō. Kēt wīhti ja na mex kumrēx. Ām mex o mex. Anē.

Jejus kot gō ho hipēx ā omunh kēt jakamā nhūm ā kām kapēr anē. Ām mē àpēnh xwýnh pixjaja na prem ja hā omu.

¹¹ Nhūm Jejus kormā mē kām aa mē kot mēmoj pumunh kēt ō ho anhýr kēt tā krī pē Kanā kamā ā mē kām amnhī nhīpēx anhýr o hkra. Jao amnhī to rax o amnhī to rax ā mē inhmā amnhī to amnhīrīt. Pa mē ixpē hkōt ri ixa xwýnhjaja ā kot amnhī nhīpēx

anhÿr ã omu hãmri nê kêp Tirtûm kot mē pakaxyw ãm xwÿnh ã omunh kurê kumrêx.

¹² Tã nhûm Jejus hpãnhã ma krî pē Kapanau hwÿr mō. Pa mē hkôt ri ixpa xwÿnhjaja nê katorxà nê htōjaja pa mē ma ixpiitã hkôt mō. Hãmri nê hwÿr pōj nê kamã mē hkôt ixpa hã ixtã apkati grêre nê ma hpãnhã krî hō hwÿr ixpa.

Jejus kot Tirtûm nhōrkwÿ hwÿr ãr ã harênh Matêwre 21.12-13; Makre 11.15-19; Rukre 19.45-46

¹³ Tã nhûm ra arîgro pē Pas ahtêp o mō. Pasja ã mē ixpê Ijaew na pa htem amnepê m Tirtûm kot pika pē Ejit rûm mē inhîgêjtê kator mã ijamaxpêr kaxyw axpên wÿr akuprō nê hã ixkînh. Jakamã nhûm Jejus ma hkwyjê hkôt krî pē Jerujarê hwÿr mō. Pa mē ixpê hkôt ri ixpa xwÿnhjaja pa mē ma hkôt ixpa. Hãmri nê hwÿr pōj

¹⁴ nê Tirtûm mã amnhî jarênh xà hã ixkre hwÿr mra nê ixkre puhã kahêja wÿr agjê. Nhûm mē kamã axtem nê mēmoj to wênê ho kuhê. Mōx o wênê nê ôwêhti ho wênê nê tutre ho wênê ho kuhê. Mē kot haprôr nê ho Tirtûm mã hkînh xà kaxyw mē kãm ho wênê. Nê kàxpore ho pinhpanh xwÿnhjaja haxwÿja mē kuri hkrî.

¹⁵ Hãmri pa mē Jejus kôt mē hwÿr agjê nê ja hã mē omu hãmri nhûm Jejus pē ja omnuj tÿx nê. Jakamã nhûm tee ri mē omu hãmri nê amnhîm mry hkà ho mē htak xà nhîpêx nê ho ixkreja nê mē piitã mē kator pa. Nê mōx nê ôwêhti nê mēmoj piitã kator pa. Nê kàxpore ho pinhpanh xwÿnhjaja nhûm mē kêp mē ô mēsti rênh pa nhûm mē hikàxpore pykap rôrôk pa nê anhgrà nê hikwÿ.

¹⁶ Hãmri nhûm Jejus tutre ho wênê xwÿnhjê mã kãm:

—Kwa mē anhō tutre jamÿ nê tokyx ma mra. Na htem Inhîpêêxà nhōrkwÿ kamã mēmoj to wênê hkêti nê. Kêp mē uaprôr xà hã ixkre hkêti. E kwa mē tokyx ma mra. Anê.

Nhûm pre ã mē kãm kapêr anê nhûm mē tee ri kuma hãmri nê ma mrar kurê kumrêx.

¹⁷ Pa mē hkôt mē ixpa ho ixpa xwÿnhjaja ã kot mē hipêx anhÿr ã omu hãmri nê ra Tirtûm kapêr ã kagà htûm kot ã amnhî nhîpêx anhÿrja kukamã hã kagàta mã ijamaxpêr kurê kumrêx. Kagà kot amnepê m

Jejus kukamã te ra ã kapêr anhÿr pyrâk o harênh. Nê harênh kot:

Na pa hte Tirtûm nhōrkwÿ ho mex rãhã ho ixpa. Nhûm mēmoj punuj hwÿr axà pa omu nhûm ja inhmã mex kêt nê.

Anhÿr o kot hkukamã harênh jakamã na pa mē ã Jejus kot mē hipêx anhÿrja ã omu hãmri nê ra hkukamã hã kagàta mã ijamaxpêr kurê kumrêx.

Ijaew krãhtûmjaja kot Jejus kukjêr ã mē harênh

¹⁸ Tã nhûm Ijaew krãhtûmjaja tee ri Jejus kot ixkreja nê mē kator ã omu hãmri nê hwÿr mra nê kãm:

—Pa. Kwa mon ka ri ã Tirtûm mã amnhî jarênh xà hã ixkreja nê mē kator anê? Mêhō na we mē ixwÿr amê ka ÿ hã ã mē hipêx anêhti? Nà xà Tirtûm na mē ixwÿr amê? E mē inhmã aa mē ixte mēmoj pumunh kêt ô ho anê. Pa mē ja hã apumu hãmri nê Tirtûm kot mē ixwÿr amênh xwÿnh ã apumunh kurê kumrêx. E kwa tokyx mē inhmã ho anê. Anê.

¹⁹ Hãmri nhûm mē kuma nê mē kãm amnhî jarê. Nom amnhî tã kuxi nê mē kãm awjarê nê mē kãm:

—Nà kot paj aa mē ate mēmoj pumunh kêt ô ho pixi nê mē amã ho anê ka mē omu. Tirtûm nhōrkwÿ jaa. Kot kaj mē agrà pa ixtã apkati axkrunêpxi nê akupÿm hipêx ka mē ja hã ixpumu.

²⁰⁻²² Anhÿr o mē kãm kapêr. No ãm ixkreja jarênh kêt nê. Na pre ãm amnhî tã kuxi nê ã mē kãm kapêr anê. Mē kot hpîr nhûm htyk ã apkati axkrunêpxi nê akupÿm htîr ã mē kãm ã amnhî jarênh anê. Te mē kot Tirtûm mã amnhî jarênh xà hã ixkreta grãnh nhûm hã apkati axkrunêpxi nê akupÿm kot hipêx parta pyrâk ã hã kuxi nê ã mē kãm amnhî jarênh anê. Jakamã nhûm mēhprî hã mar mex kêt nê. ãm tee ri kuma nê kãm:

—Tk. Kwa ixkre ja na prem hipêx kaxyw nê hã amgrà xohtô rax nê hipêx. Hã amgrà pē 46 nê hipêx par kênã kot ka kêt atã apkati axkrunêpxi pix nê akupÿm hipêx. Anê.

Mē kot hprî hã mar kêt jakamã na prem ã kãm kapêr anê. Pa mē hkôt mē ixpa ho ixpa xwÿnhjaja ã mē kãm kapêr anhÿrja ã kuma nê hã inhnohtÿx rãhã ho ri ixpa. Tã nhûm

mê kot Jejus pîr nhũm hã apkati axkrunêpxi nê akupÿm htîr nhõ arîgrota ã pa mê kot ã amnhî jarênh anhÿrja mã ijamaxpêr kurê kumrêx. Nê axpên mã:

—Hêxta waa nê. Xep ãm hãmri na pre Pahihtî amnhî kukamã ã amnhî jarênh anê. Mê kot hpîr nhũm htyk ã apkati axkrunêpxi nê akupÿm htîr ã amnhî kukamã amnhî jarênh mex nê. Te mê kot Tîrtũm nhõrkwy grãnh par nhũm hã apkati axkrunêpxi nê akupÿm hipêx ã amnhî jarênh pyrãk. ãm hãmri na pre amnhî kukamã ã amnhî jarênh anê. Anê.

Jejus kot mê pajamaxpêr kôt mê pah-pumunh ã harênh

²³ Tã nhũm Jejus mê hkôt mê ixpa ho ixpa xwÿnhjaja arî Jerujarê kamã ri ixpa ho ixpa. Nhũm ra arîgro pê Pasja kato nhũm mê piitã hkînh kaxyw axpên wÿr akuprõ. Nhũm Jejus mê kãm aa mê kot mêmoj pumunh kêt kwÿ ho anhÿr o ri mê hkôt pa. Nhũm mê omu nhũm mê hkwyjaja Tîrtũm kot mê pakaxyw ãm xwÿnh ã hkôt hamaxpêr tã no ãm hkôt hamaxpêr tÿx kêt nê.

²⁴ Jakamã nhũm Jejus amnhî tã mê hamaxpêr ã mê omu nê hamaxpêr o:

—Nà mê kot ixkôt hamaxpêr kryre xwÿnhjaja koja mê hã apkati grêre nê ixto hamakêtkati nê htÿx ri pa. Anê.

²⁵ Jejus kot mê pahte pahtÿx ri amnhî tomnuj o papa hã mê pahpumunh par. Nê pahtÿx ri pajamaxpêr punuj o papa hã mê pahpumunh par. Jakamã na pre ã mê harênh anê.

3

Jejus mê Nîkotê wa kot axpên mã kapêr ã wa harênh

Juãw 1.12-13; mãânên Wam Pêtre 1.23

¹ Tã nhũm Parijew nhõ xwÿnhjê õ pê Nîkotê. Mãânên kêp Ijaew krãhtũmjê hõ.

² Jakamã na pre Jejus jarênh ma nê kãm omunh prãm nê. Hãmri nê hkwy pymaj kamãt kãm hwÿr tẽ nê omu nê kãm:

—Pa mê ijahkre xwÿnh. E ot pa awÿr tẽ. Ra mê ixte apumunh mex. Tîrtũm na pre ate mê ijahkre ho apa kaxyw mê ixwÿr amê ka mê ixwÿr wrÿ. Mêhõ koja apyrã nê aa mê inh mã mê kot mêmoj pumunh kêt kwÿ ho anhÿr o pa? Nà amrakati kumrêx. Kop

apu Tîrtũm kot mê ixwÿr amênh kêt ronhÿx ka ã amnhî nhîpêx anhÿr kêt nê. Anê.

³ Hãmri nhũm kuma nê tanhmã kãm kapêr to. No ãm amnhî tã kuxi nê kãm awjarê nê kãm:

—Na htem piitã mê katorxã nhõxã hkre rũm hapôj. Tã Tîrtũm kãm mê piitã axte mê hapôx prãm. Jakamã kot kaj mê akator o axkrut kêt nê hãmri nê nhÿrmã Tîrtũm ri atîr tũm nê apa ho apa hkêt nê. ãm hkrajê pix na htem kuri htîr tũm nê pa ho pa. Jakamã kwa jam ajamaxpêr tÿx nê ri ho apa. Anê.

⁴ Hãmri nhũm Nîkotêja kuma nê tee ri ã kot kãm kapêr anhÿrja kukamã hamaxpêr nê kãm:

—Kwa ra ixaptãr kênã kot pa kêt tanhmã amnhî to nê akupÿm ixkatorxã nhõxã hkre hwÿr axã nê axte kurũm ixkato. Anê.

⁵⁻⁷ Hãmri nhũm Jejus kãm:

—Nà na hte mê hkrarejaja mê katorxã nhõxã hkre rũm kagô hkôt hapôj hãmri nê kêp katorxã mê hipêêxã wa hkwyÿ. Jao wa kot amnhî nhîpêx kôt amnhî nhîpêx o pa. Ja pyrã nê ka mê atõ amã apê Tîrtũm kra hprãm hã kot kaj amnhî to awÿ nhũm wa Ixkarõja akarõ mã axã hãmri ka ra apê hkraa. Te ra axte akator pyrãk o amnhî nhîpêx. Nê te mê hkra kot katorxã nê hipêêxã wa kot amnhî nhîpêx kôt amnhî nhîpêx o pata pyrã nê apãm Tîrtũm kot amnhî nhîpêx kôt amnhî nhîpêx o ri apa. Nom koja Tîrtũm mê wa Ixkarõja akarõ mã àr kêt nê ka apê hkra hkêt nê. Jao te axte akator kêt pyrãk o amnhî nhîpêx. Jakamã na pa amã te ate akator pijakrut o amnhî nhîpêx pyrãk o amã ã ja jarênh anê. Kwa jam ajamaxpêr tÿx rãhã ho ri apa. No ama nê tee ri amnhî kukamã ajamaxpêr kêt nê.

⁸ —E pa ixprî hã amã ja jarê ka inhma. Na hte kôk kãm nhÿhÿm àpêr prãm xã hkôt àpêr o pa. Pu mê kamã ama no ãm pano ho nhÿhÿnh mör xã hkôt omunh kêt nê. Nê nhÿhÿm ma mör xã hkôt omunh kêt nê. Ja pyrã nê na hte Tîrtũm mê wa Ixkarõja mê hkaxwÿnh mã agjê nê mê ho Tîrtũm kra nom nhũm mêhprî hã kot tanhmã mê ho hã amnhî tã omunh kêt nê. Anê.

⁹ Hãmri nhũm Nîkotê ã Jejus kot kãm kapêr anhÿr ã kuma nê tee ri hamaxpêr nê kãm:

—Kwa na pa ixprĩ hã amar kêt nẽ. Anẽ.

¹⁰ Hãmri nhũm kãm:

—Kwa mon ka hte Tĩrtũm kapẽr tũm o Ijaew jahkre ho apa tã aprĩ hã ixkapẽr mar kêt nẽ?

¹¹ Ixte mẽmoj pumunh xà hkõt ixte mẽ amã harẽnh o ixpa htã ka mẽ apẽ Ijaew krãhtũmjaja mẽ amã ixkapẽr mar prãm kêt nẽ. ã mẽ ate anhỹr kumrẽx. Kwa jam ajamaxpẽr tỳx nẽ.

¹² Na pa ra Tĩrtũm kot jar tanhmã amnhĩ nhĩpẽx to hã harẽnh o ixpa htã ka mẽ ãm ama nẽ ixkõt ajamaxpẽr kêt nẽ. Jakamã xà kot pa hpãnhã mẽ amã kaxkwa kamã tanhmã kot amnhĩ nhĩpẽx to hã harẽ ka mẽ ama nẽ mar tỳx nẽ? Nà kot ka mẽ ama nẽ ãm ama nẽ hkõt ajamaxpẽr kêt nẽ.

¹³ Mẽhõ na we ra ma kaxkwa hwỳr api nẽ kamã mẽmoj mex pumu nẽ man akupỹn mẽ awỳr wrỳ nẽ mẽ amã tanhmã harẽnh to? Nà amrakati kumrẽx. ãm paxipix ixpẽ Tĩrtũm kot mẽ akaxyw ixãm xwỳnh na pa pre amnẽ kurũm mẽ awỳr wrỳ hãmri nẽ ixprĩ hã mẽ amã tanhmã harẽnh to ho ri ixpa.

¹⁴—Amnepẽm finat Mojesja kormã kapõt ã mẽ o pa ri na pre mẽ kãm kax o kagã karõja nhĩpẽx nẽ kỳxpẽ mẽ kãm kunhõ. Kagã kot mẽ hkamnhar xwỳnhjaja kot hwỳr rĩt nẽ omunh nẽ akupỹm mex kaxyw mẽ kãm kunhõ. Tã ixpẽ Tĩrtũm kot mẽ akaxyw ixãm xwỳnh kot paj nhỹrmã kagã karõta pyrã nẽ kỳx pẽ pĩ kahpa hã ajêt.

¹⁵ Ka mẽ te mẽ kot kagã karõ pumunh nẽ akupỹm mexta pyrã nẽ amnhĩ kaxyw inhmã ajamaxpẽr nẽ ixkõt amnhĩ xunhwỳ hãmri nẽ nhỹrmã Tĩrtũm mẽ wa ixri atĩr tũm nẽ amex rãhã nẽ apa ho apa.

¹⁶—Tĩrtũm kãm pika piitã hkõt mẽ apiitã mẽ ajapẽ htỳx. Nẽ mẽ ajapẽ xàj na pre ixpẽ Kra hã ixpyxi hã mẽ awỳr inhmẽ. Ka mẽ atõ amnhĩ kaxyw ixkõt ajamaxpẽr nẽ ixkõt amnhĩ xãm. Hãmri nẽ nhỹrmã atyk tã nhũm Tĩrtũm akupỹm ato atĩr ka wa ixkuri atĩr tũm nẽ amex rãhã nẽ apa ho apa. Hãmri nhũm Tĩrtũm aa amnhĩ nẽ nhỹhỹm amẽnh kêt kumrẽx.

¹⁷ No mẽ ate amnhĩ tomnuj mỳrapẽ tanhmã ixte mẽ anhĩpẽx to kaxyw na pre mẽ awỳr inhmẽnh kêt nẽ. ãm ixkukwak ri

mẽ atĩr tũm nẽ mẽ amex rãhã apa ho apa hprãm xàj na pre mẽ awỳr inhmẽ pa mẽ awỳr wrỳ.

¹⁸ Jakamã kot ka mẽ atõ amnhĩ kaxyw ixpẽ Tĩrtũm Kra hã ixkõt ajamaxpẽr nẽ ixkõt amnhĩ xãm nhũm Tĩrtũm ixtã apumu nẽ ate amnhĩ tomnuj mỳrapẽ tanhmã anhĩpẽx to hkõt nẽ. No kêt mẽ kot ixkõt amnhĩ xunhwỳr kêt xwỳnhjaja na Tĩrtũm ma mẽ kot amnhĩ xà htỳx kamã hamak tũm xà hwỳr mẽ pa mã xwỳnhjẽ hã mẽ harẽ. Mẽ kot ixkõt amnhĩ xunhwỳr kêt mỳrapẽ. Anẽ.

Mẽ kot amnhĩ tomnuj o hpimxur prãm kaprỳ ã mẽ harẽnh

¹⁹ Nhũm Jejus arĩ Nĩkotẽ mã kapẽr nẽ kãm:

—Na pre Tĩrtũm amnẽ pika hwỳr mẽ awỳr inhmẽ. Mẽ ate amnhĩ tomnuj xwỳnh ã amnhĩ pumunh kaxyw mẽ awỳr inhmẽ. Tã nhũm mẽ ohtõ nẽ amnhĩ tomnuj gryk ã kãm kapẽr mar prãm kêt nẽ. Jao ixkaga nẽ kãm ixkapẽr mar prãm kêt nẽ.

²⁰ Ra ixprĩ hã ixte mẽ kot tanhmã amnhĩ tomnuj to ho pa hã mẽ omunh mex jakamã mẽ kãm ixkapẽr mar prãm kêt. Nẽ ixte mẽ kot tanhmã amnhĩ tomnuj to ho pa hã mẽ harẽnh pymaj ixkõt kãm pa hprãm hkõt nẽ.

²¹ No kêt mẽ kot ixkõt amnhĩ xunhwỳr xwỳnhjaja na mẽ kot amnhĩ nhĩpẽx o pa hã hpijaam kêt. Na htem amnhix ixkõt amnhĩ nhĩpẽx o pa. Jakamã koja mẽ piitã ja hã mẽ omu nẽ Tĩrtũm kot tanhmã mẽ hkrã hto nhũm mẽ ra kãm hkõt pix mã amnhĩ nhĩpẽx ho pa hprãm ã mẽ omunh kurẽ kumrẽx. Anẽ.

Nhũm pre ã Jejus Nĩkotẽja mã kapẽr anẽ.

*Juãw Paxis kot Jejus jarẽnh o pa hã harẽnh
Juãw 1.19-28*

²² Tã pa mẽ ixpẽ Jejus kõt ri ixpa ho ixpa xwỳnhjaja Jejus kõt Jerujarẽ rũm ijapõj nẽ pika pẽ Jutej kwỳ kamã ixpa. Jejus nhỹ hã Tĩrtũm mã mẽ hkrã kumrãr o ri mẽ hkõt ixpa.

²³ Nhũm finat Juãw Paxis haxwỳja mẽ ixpyrã nẽ mẽ hkrã kumrãr o pa. Krĩ pẽ Sarĩ htã krĩ pẽ Enõ mỳri pyhti rax jakamã nhũm pre htem hwỳr mra nhũm kamã mẽ hkrã kumrã.

²⁴ Kormã mẽ kot haxàr kêt ri nhũm kamã mẽ hkrã kumrãr o pa.

²⁵ Rôm nhũm Ijaew hõja Juãw Paxis kôt mẽ pa ho mẽ pa xwýnhjê hwýr tẽ nẽ Juãw Paxis kot mẽ hkrã kumrãr ã tanhmã mẽ hkukjêr to nhũm mẽ kuma nẽ tee ri hã axpẽn kukjêr o kuhê.

²⁶ Hãmri nẽ akupým Juãw Paxis wýr tẽ nẽ kãm:

—Kwa mẽ ijahkre xwýnh. Pyhti pê Jotãw nhĩkjê hã ate mẽhõ pumunh nẽ tanhmã mẽ inhmã harẽnh to xwýnhhta kôt mẽ pa ho mẽ pa xwýnhjaja na xep htem apyrã nẽ mẽ hkrã kumrãr o pa nhũm xep mẽ ra ohtô nẽ mẽ pahkaga nẽ mẽ hkôt pa. Kwa xà ja amã mex nã? Anẽ.

²⁷ Hãmri nhũm mẽ kuma nẽ mẽ kãm:

—Tý ja mex kênã. Tĩrtũm kãm hprãm xà hkôt na htem mẽ hwýr mra nhũm mẽ ixpãnhã mẽ hkrã kumrã. Nã ja mex.

²⁸ Ixpê Tĩrtũm kot mẽ pakaxyw ãm xwýnh kêt. Na pa pre ra mẽ amã ja hã amnhĩ jarẽ ka prem inhma. ãm hkukamã na pre Tĩrtũm amnẽ inhmẽ pa mõi nẽ ã jar ri ixpa anẽ.

²⁹ —Te ixte mẽ umre kot amnhĩ nhĩpêx pyrãk. Na htem axpẽn mã mẽ rer kaxyw nhũm mẽ umreja myta wýr tẽ nẽ hpa hã kupy nẽ ma ni hwýr o tẽ nẽ axpẽn mã wa kure. Hãmri nhũm hpãnhã mẽhõja axpẽn tã wa hakre. Nhũm umreja wa kuri hkĩnh nẽ mar o xa. Tã te ixte mẽ umre kot amnhĩ nhĩpêx pyrãk jakamã koja mẽ ma Tĩrtũm kot mẽ pakaxyw ãm xwýnhhta wýr mra nẽ kapêr ma pa mẽ harẽnh ma nẽ ixkĩnh nẽ.

³⁰ Na htem mẽ umre hã hkĩnh kêt nẽ. Mjên nyw xwýnhja ã na htem hkĩnh. Tã ja pyrã nẽ koja mẽ axte ixte mẽ kãm Jejus jarẽnh mar kaxyw ixwýr mrar kêt nẽ. ãm hwýr koja mẽ hpãnhã mra nẽ tãm mar o kuhê. Ja mex kumrêx.

³¹ Jejus kêp kaxkwa rũm amnẽ mẽ pahwýr wrýk xwýnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwýnh jakamã Jejus kĩnhã mẽ pahte mẽmoj piitã omunh tohtuj anhýr. Nẽ pika nhõ xwýnhjê jamaxpêr pix o pajamaxpêr o ri papa.

³² —Na hte Jejus mẽ kãm kaxkwa kamã kot mẽmoj pumunh xwýnh kwýjê jarẽnh o pa. Nẽ kamã kot mẽmoj mar xwýnh kwý jarẽnh tã nhũm mẽ ohtô nẽ kuma nẽ ãm kuma.

³³ No mẽ kot mar nẽ amnhĩ kaxyw hkôt hamaxpêr xwýnhjaja na htem kuma nẽ axpẽn mã harẽnh o: “Nã ãm hãmri na ã Tĩrtũm kapêr jarẽnh anẽ. Nã Tĩrtũm kapêr mex kumrêx.” Anhýr o axpẽn mã harẽ.

³⁴ —Tĩrtũm na pre mẽ pahwýr Jejus mẽ nhũm amnẽ mẽ pahwýr wrý nẽ Tĩrtũm Karõ nhý hã mẽ pamã kapêr jarẽnh o ri mẽ pahkôt pa.

³⁵ Tĩrtũm kãm Krata japê htýx kumrêx jakamã na pre ãhkram mẽmoj piitã haxàr pa nhũm urãk nẽ hihtýx o hihtýx nẽ mẽmoj piitã ho amnhĩptàr o pa.

³⁶ Jakamã mẽ kot amnhĩ kaxyw hkôt hamaxpêr nẽ hkôt amnhĩ xunhwýr xwýnhjaja koja mẽ nhýrmã wa kuri htĩr tũm nẽ mex rãhã nẽ pa ho pa. No mẽ kot hkaga xwýnhjaja koja mẽ ã amnhĩ nhĩpêx anhýr kêt nẽ. Koja Tĩrtũm mẽ kot amnhĩ xà htýx kamã hamak tũm xàta wýr mẽ rẽnh pa. Anẽ.

4

¹ Tã nhũm Parijew nhõ xwýnhjaja Jejus jarẽnh ma. Nẽ hkôt mẽ pa xwýnhjaja ohtô rax o Juãw Paxis kôt mẽ pa xwýnhjê jakrenh ã mẽ harẽnh ma. Nẽ Jejus kot mẽ hkrã kumrãr rax o Juãw Paxis jakrenh ã harẽnh ma.

² Nom Jejus na pre mẽ hkrã kumrãr kêt nẽ. ãm mẽ ixte hkôt ri mẽ ixpa ho mẽ ixpa xwýnhjaja na pa prem kãm mẽ hkrã kumrãr o ri ixpa.

³ Jakamã nhũm Jejus amnhĩ tã Parijew nhõ xwýnhjê jarẽnh ma hãmri nẽ mẽ kêp kato nẽ hpãnhã ma akupým Garirej wýr mõi pa mẽ ma hkôt ixpa.

Mẽhõ ni kot amnhĩ nhĩpêx nyw o amnhĩ nhĩpêx ã harẽnh

Juãw 7.37-39; mãänën Apokarip 22.1, 22.17

⁴ Tã pa mẽ mõi nẽ kormã pyka pê Samar mã axà nẽ hkôt ixpa.

⁵ Hãmri nẽ krĩ pê Sika hwýr ixpôx o mõi. Amnepêm finat Jako kot hkra Juje mã pyka nhõr xwýnh tã krĩja xa pa mẽ ra hwýr ixpôx o mõi.

⁶ Nẽ amnepêm Jako kot gôm kakwýnhhta wýr pøj. Nhũm ra kaxkwa nhĩpêk ri myt nhýr mẽ nhũm Jejus ra mrar ryy kurê

hkẽngrà nê. Hãmri nê gôm kakwýnh mý ri tẽm nê hkôkôt o nhý.

⁷⁻⁸ Hãmri pa mẽ kure nê mẽ ixàpkur xà japrôr kaxyw ma krĩm ijapêx.

Rôm nhũm Samar nhõ xwýnh nija amnhĩm gô runh mã tẽ nhũm Jejus omu nê kãm:

—Kwa inhmã anhõ gôta kwý pa ho ixkõ. Anê.

⁹ Nhũm amnhĩ jaêr pê amnhĩ tã kuma. Ijaew na pre htem Samar nhõ xwýnhjê kutã apkur rý mẽ hkôt ri pa rý mẽ ho mjên kêt nê. Rý mẽ kutã hkôm kêt nê. Tã nhũm Jejus ã gô hã nija wýr anê nhũm tee ri amnhĩ tã kuma nê kãm:

—Xê pẽr apê Ijaew tã axtem nê ri gô hã ixwý. Xà ate ixpê Samar nhõ xwýnh ã ixpumunh kêt? Hãn ka ri hã ixwý. Anê.

¹⁰ Hãmri nhũm kuma nê kãm amnhĩ jarê. No ãm amnhĩ tã kuxi nê kãm kapêr nê kãm:

—Nà aprĩ hã ate ixpumunh ro nhýx ka kam gô hã ixwý pa amã hkwy. Inhõ gô na axte mã. Tĩrtũm kãm amarĩ mẽ amã ôr prãm. Na htem ho ixkõ hãmri nê mex nê htĩr tũm nê pa ho pa. Anê.

¹¹ Hãmri nhũm tee ri kot ã õ gô jarênh anhýrja ã kuma nê htýx ho gôm kakwýnh kamã gô hã hkamnhĩx nê tee ri hkukamã hamaxpêr nê kãm:

—Xê tanhmã kot ka kêt amnhĩ to nê inhmã gôta kwý janhi? Mo kaxyw anhõ gô janhir xà? Gôm kakwýnh ta upým rax kênã kot ka kêt tanhmã amnhĩ to nê hkwy janhi. Nhýhýnh kot ka anhõ gô jarênh xwýnh ta kwý janhi pa ho ixkõ hãmri nê ixtĩr tũm nê ixpa ho ixpa?

¹² Mẽ inhõ gôm kakwýnhja amnepê mã mẽ panhĩgêt finat Jako nhõ gôm kakwýnh na pre. Jako hkwyjaja na prem hkakwý nhũm kamã gô kato nhũm pre htem hanhi nê ho hkôm o pa. Nê hkrajaja nê hkrit piitã ho hkôm o pa. Jakamã na pre mẽ ixpê hkanrêhã htãmnhwýjê mã hkaga. Tã xep axtem anhõ gô. Mẽ kot ho hkôm nê htĩr tũm kaxyw na xep. Jakamã xê xà ate amnhĩ to rax o mẽ panhĩgêt Jako jakrenh mê? Anê.

¹³ Hãmri nhũm Jejus kãm:

—Nà mẽ anhõ gôta na htem ho ixkõ nê arĩ kãm kôr o pa.

¹⁴ No ixte amã gô jarênh xwýnh ta kot ka hkwy ho ixkõ hãmri nê axte amã kôr

kêt kumrêx nê apa. Nhũm te akaxwýnh kãm hinore hprôt pyrãk o ka amnhĩ nhĩpêx. Hãmri nê te hinore kamã gôja aa grã hkêt pyrã nê aa ajapêx kêt kumrêx. Nhýrmã atyk tã akupým atĩr nê atĩr tũm nê amex rãhã apa ho apa. Anê.

¹⁵ Nhũm nija kuma hãmri nê kãm:

—Xôwehe? Xê tô tokyx inhmã anhõ gôta kwý. Pa ho ixkõ nê axte inhmã kôr kêt nê ixpa. Nê axte amnê amnhĩm gô janhir mã inhmrar kêt nê. Xê tokyx inhmã hkwy mê? Anê.

Týx gô kumrêx ã hkamnhĩx nê ã hã àhwýr anê.

¹⁶ Hãmri nhũm kãm:

—Tô ma akupým krĩm tẽ nê amjên japrô nê man akupým ixwýr wa tẽ. Anê.

¹⁷ Hãmri nhũm tee ri kuma nê kãm:

—Ma mo inhmjên? Inhmjên kêt na pa hte ri ixpa. Anê.

Hãmri nhũm kãm:

—Tý. Nà ãm hãmri na ka ã amnhĩ jarênh anê.

¹⁸ Na ka pre ra amjên kêp 5. Nê my mẽ ri war apa xwýnh ata te kêp amjên pyrãk nom kêp amjên kumrêx kêt. Anê.

¹⁹ Hãmri nhũm amnhĩ jaêr pê kot ã kãm kapêr anhýrja ma hãmri nê kãm:

—Xê pẽr aprĩ hã ate ixpumunh par pyrãk. Mãn apê Tĩrtũm nhý hã kapêr jarênh o mẽ pa xwýnhjê hõ mãn ka mê?

²⁰ Xê inhmã mẽmoj jarê. Nhýhým kot paj wem axpên kôt mra nê Tĩrtũm mã mex o mex ã harê? Amnepê mã mẽ panhĩgêtjaja na prem hixêt mũj nhĩmõk ã api nê hã kãm amnhĩ jarê nê kãm mex o mex ã harê. No mẽ apê Ijaew na ka htem krĩ pê Jerujarê pix kãm mẽ ixte axpên kôt mrar nê ã amnhĩ nhĩpêx anhýr ã mẽ inhmã karõ. Xà hixêt nhĩmõk ã mẽ ixte kãm amnhĩ jarênhja xà apê omnuj mê? Ma xà apê omnuj kêt? Anê.

²¹ Hãmri nhũm Jejus kãm:

—Nà kot kaj mẽ nhýrmã ãm Jerujarê pix kãm rý hixêt mũj nhĩmõk pix ã axpên wýr akuprõ nê Tĩrtũm mã amnhĩ jarênh kêt nê.

²² Mẽ apê Samar nhõ xwýnhjaja mẽ ate Tĩrtũm mã mex o mex ã harênh o apa htã aprĩ hã kot amnhĩ nhĩpêx ã omunh kêt. Nê tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nê tanhmã

hamaxpēr to hã omunh mex. Mě inhĩ kukwak ri koja Tĩrtũm mẽ kot hkõt amnhĩ xunhwỳr xwỳnh piitã nẽ mẽ kot amnhĩ tomnuj rẽn pa.

²³ Tã koja mẽ piitã Měpahpãm Tĩrtũm mã mex o mex ã harẽn kaxyw nhỹhỹm pa hkết nẽ. Koja mẽ nhỹri pa xà kamã mẽ õpinh xà kaxwỳnh kãm ã kãm amnhĩ jarẽn anhỹr o pa. Ja na Tĩrtũm kãm hprãm. No nhỹhỹm mrar nẽ nhỹri kuhê xà pix kamã kãm amnhĩ jarẽnja nhũm kãm hprãm kết nẽ.

²⁴ —Nẽ Tĩrtũmja mẽ pahpyrà nẽ ì hkết jakamã na te kaxkwa nẽ pika piitã hkết pa ho pa. Jakamã na htem nhỹri pa nẽ õpinh xà kaxwỳnh kãm amnhĩ kaxyw kãm hamaxpēr nẽ kãm mex o mex ã harẽ nhũm ra amnhĩ tã mẽ kuma. ã mẽ kot amnhĩ nhĩpêx anhỹrja na kãm hprãm. Anẽ.

²⁵ Nhũm pre ã Jesus nija mã kapēr anẽ nhũm kuma nẽ kãm:

—Ma koja xep nhỹrmã Tĩrtũm kot mẽ pakaxyw ãm mã xwỳnh pẽ Krisja mẽ pahwỳr wrỳ hãmri nẽ hprĩ hã mẽ pamã mẽmoj piitã ho amnhĩrit pu mẽ kuma. Anẽ.

²⁶ Hãmri nhũm kãm:

—Kwa nhũm paa. Ixte amã ixkapēr xwỳnhja ixpê Kris na pa. Jakamã na pa ixprĩ hã amã ã ixkapēr anẽ. Anẽ.

²⁷ Nhũm pre ã kãm amnhĩ jarẽn anhỹrja rôm pa mẽ ixte hkết ri mẽ ixpa ho ixpa xwỳnhjaja ra ixujaprôr pa nẽ akupỹn hwỳr ixpôx o mra. Hãmri nẽ amnhĩ jaêr pẽ kot Samar nhõ xwỳnh nita mã kapēr ã omu nẽ tee ri hkukamã ijamaxpēr nom tanhmã hã hkukjêr to hkết nẽ. Nija kêp Samar nhõ xwỳnh tã nhũm àmnhĩx kãm kapēr o nhỹ. Pa mẽ omu nẽ ãm omu nẽ tanhmã hã kãm nẽ hkết nẽ.

²⁸ Hãmri nhũm nita gôm kakwỳnh mỳr ri õ poti re nẽ ma akupỹm krĩm tẽ nẽ hkwỳjẽ mã awjarẽ.

²⁹ Nẽ mẽ kãm:

—Xê mẽ tokyx ma ixkôt gôm kakwỳnh wỳr mra nẽ mỳ ri mẽhõ my mũj pumu. Tĩrtũm kot mẽ pahwỳr mẽnh mã xwỳnhnta na. Aa kot nhỹri ixpumunh kết tã kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nẽ ixpyrà nẽ kapēr ã ama. Anẽ.

³⁰ Hãmri nhũm mẽ kuma nẽ ma hkõt Jesus wỳr mrar kurê kumrêx.

³¹ Rôm pa mẽ ixte Jesus kôt ri ixpa ho ixpa xwỳnhjaja tee ri mẽ ixàpkur xà ho Jesus ma nẽ kãm:

—E ota mẽ panhõta. Kwa mẽmoj py nẽ aku mãn.

³² Anhỹr tã nhũm mẽ inhma nẽ tanhmã mẽ inhmã amnhĩ jarẽn to. Nom amnhĩ tã kuxi nẽ amnhĩ jarẽ nẽ mẽ inhmã:

—Nà kormã. Inhõja axtem na. Mẽ ate inhõja pumunh kết. Anẽ.

³³ Hãmri pa mẽ kuma nẽ tee ri hã axpẽn kukja nẽ axpẽn mã:

—Kwa mãn ra mẽhõ mẽ paxwakre kamã kãm mẽmoj to tẽ nhũm kukrê nà? Anẽ.

³⁴ Hãmri nhũm mẽ inhma nẽ mẽ inhmã:

—Nà mẽhõ kot kết ri inhmã mẽmoj to mra pa kuku? Kot paj kot mẽ awỳr inhmẽn xwỳnhnta mã tanhmã amnhĩ nhĩpêx to hãmri nẽ te ra ixàpkur mex nẽ hã ixihtỳx mex pyràk o amnhĩ nhĩpêx. Tã kot paj ã kãm amnhĩ nhĩpêx anhỹr o ri ixpa rãhã ho ijapêx pa. Jao te ixàpkur rax pyràk.

³⁵ Anhỹr o mẽ inhmã amnhĩ jarẽ. Hãmri nẽ ra Samar nhõ xwỳnhjaja mẽ ixwỳr mrar ã mẽ omu nẽ mẽ inhmã tanhmã mẽ harẽn to nom mẽ hã kuxi nẽ mẽ harẽ nẽ mẽ harẽn o:

—Kot kaj mẽ axte mẽ atã mytwrỳ kêp 4 hãmri nhũm ra mẽ apur kãm mẽ anhõja hamỳnh mã tãm nẽ. Nom kormã. E ka mẽ pahwỳr mẽ mrar xwỳnh nẽj pumu. Ra mẽ kot amnhĩ kaxyw ixkôt hamaxpēr nẽ ixkôt amnhĩ xunhwỳr mã tãm jakamã te mẽ apur kãm ra mẽ anhõ jamỳnh mã tãm pyràk. Jakamã ka mẽ atõ ma mẽ hwỳr mō nẽ mẽ kot amnhĩ kaxyw ixkôt hamaxpēr nẽ ixkôt amnhĩ xunhwỳr kaxyw mẽ kãm ijarẽ. Hãmri nẽ te ate ixpur kãm inhmã inhõ jamỳnh xwỳnh pyràk o amnhĩ nhĩpêx.

³⁶ —Jakamã koja mẽhõ kumrêx mẽ hwỳr tẽ nẽ mẽ kãm Tĩrtũm kapēr jarẽ hãmri nẽ te kêp õ pahi mã hpur kãm ahkre ho pa pyràk. Nhũm mẽ kot mar xwỳnhjaja kuma nom kormã hprĩ hã mar tỳx kết nẽ. Tã kot kaj mẽ atõ wamta kôt mẽ hwỳr tẽ nẽ mẽ kot ixkôt amnhĩ xunhwỳr kaxyw aprĩ hã mẽ kãm ijarẽn o mẽ hkết apa hãmri nẽ te apê mẽ anhõ pahi mã hpur kãm axujamỳnh xwỳnh pyràk. Hãmri nhũm mẽ hkwỳjaja mẽ

ama nê ixkôt amnhĩ xunhwý nê ixkôt ri amnhĩ nhĩpêx o pa. Hã koja nhỹrmã mẽ apyrà nê Tĩrtũm mẽ wa ixri mex rãhã nê htĩr tũm nê pa ho pa. Ka mẽ amnhĩ tã mẽ omu nê akĩnh nê apa. Te mẽ kot mẽ hpur kãm ahkre xwýnhjaja nê mẽ kot hamýnh xwýnhjaja mẽõ rũnh pumunh nê hkĩnhhta pyræk.

³⁷ —Na htem tũhã ã mẽ pur kãm mẽ àpênh xwýnhjê jarênh anê nê mẽ harênh o: “Axtem mẽ ahkre xwýnhjaja nê axtem mẽ kot hamýnh xwýnhjaja.” Anê. Tã te mẽ ate mẽ ujarênh ja pyræk.

³⁸ Na pa pre ra ma mẽ hwýr mẽ arê. Mẽ ate aprĩ hã mẽ kãm ijarênh nhũm mẽ kot mẽ amar nê amnhĩ kaxyw ixkôt hamaxpêr nê ixkôt amnhĩ xunhwýr kaxyw. Nom mẽ kajaja na ka prem akumrêx mẽ hwýr amrar nê mẽ kãm ijarênh kêt nê. Tĩrtũm kapêr jarênh o mẽ pa xwýnhjaja na prem kumrêx mẽ hwýr mra nê ixkukamã mẽ kãm ijarênh o ri mẽ hkôt pa. Te mẽ kot hpur kãm ahkre ho pata pyræk. Tã kot kaj mẽ hpãnhã mẽ kot amnhĩ kaxyw ixkôt amnhĩ xunhwýr kaxyw aprĩ hã mẽ kãm ijarênh o apa. Jakamã te mẽ ate mẽ hpur kãm mẽõ jamýnh xwýnh kot amnhĩ nhĩpêxta pyræk. Anê.

Mẽ hkwy kot amnhĩ nhĩpêx nyw o amnhĩ nhĩpêx ã mẽ harênh

Sikũn Korĩt 5.17; Wam Juãw 4.14

³⁹ Rũm nhũm Samar nhõ xwýnh kwýjaja nija kot mẽ kãm amnhĩ jarênh ma hãmri nê uræk nê amnhĩ kaxyw Jejus kôt hamaxpêr. Na pre ra amnhĩ tã tanhmã mẽ kãm Jejus jarênh to nê mẽ kãm harênh o:

—Ma aa kot nhỹri ixpumunh kêt tã ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhỹr jakamã nhũm mẽ kuma nê uræk nê amnhĩ kaxyw hkôt hamaxpêr kurê kumrêx.

⁴⁰ Hãmri nê man mẽ ixwýr mra nê Jejus pumu nê amnhĩ wýr kuwý nê kãm:

—Pa. E kwa mẽ tokyx anojarêt kêt nê. Mẽ ma mẽ ixkôt mẽ inhõ krĩ hwýr mõ nê mẽ ixkôt ri apa grire nê arĩ ma mõ. Anê.

Hãmri nhũm mẽ kuma nê mẽ kãm:

—Tõe. Nà kot paj mẽ anê. Anê.

Hãmri pa mẽ ma mẽ hkôt mõ nê mẽ õ krĩ kamã mẽ hkôt ri ixpa hã apkati axkrut.

⁴¹ Nhũm Jejus mẽ kãm Tĩrtũm kapêr jarênh o ri mẽ hkôt pa nhũm mẽ axte ohtõ nê kuma nê nita pyrà nê hkôt amnhĩ xunhwý.

⁴² Hãmri nê nita wýr mra nê kãm:

—E nã ãm hãmri. Akumrêx na ka mẽ inhmã Jejus o amnhĩrit. Pa mẽ akôt ma hwýr mra nê mẽ pam omu nê kapêr ã kuma. Jao apyrà nê amnhĩ kaxyw hkôt ijamaxpêr nê hkôt amnhĩ xunhwý. Pêr ãm hãmri kêp pyka piitã hkôt mẽ pahte amnhĩ tomnuj pãnhã amnhĩrer mã xwýnhhta na. Anê.

Garirej nhõ xwýnhjaja kot Jejus pumunh ã mẽ harênh

Matêwre 13.57

⁴³ Tã pa mẽ Jejus kôt Samar rũm ixkato nê ma pika pê Garirej wýr mõ. Kamã Jejus nhõ krĩ pê Najare htã pa mẽ hwýr inhmõr kêt nê.

⁴⁴ Na pre ra Jejus mẽ inhmã tanhmã õ krĩ nhõ xwýnhjê jarênh to nê mẽ harênh o:

—Tĩrtũm nhỹ hã kapêr jarênh o mẽ pa xwýnhjaja na htem amnhĩ nhõ krĩ kamã mẽ kãm Tĩrtũm kapêr jarênh o pa nhũm mẽ kuma nê ãm kuma. Jakamã kot paj Najare hwýr inhmõr kêt nê. Mẽ kãm ixkapêr mar prãmre hã.

⁴⁵ Anhỹr jakamã na pa prem hwýr inhmõr kêt nê. Pãnhã nhãm krĩ hõ hwýr mõ nê hwýr pøj hãmri nhũm mẽ amnhĩ wýr Jejus pumu nê hkĩnh nê. Na prem ra krĩ pê Jerujarê kamã arĩgro pê Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wýr omu nê hkĩnh nê.

Jejus kot mẽhõ hkra ho mex ã harênh

⁴⁶ Tã pa mẽ kormã Garirej kamã ixpa nê akupým krĩ pê Kanã hwýr mõ. Kamã na pre Jejus mẽ kãm gô ho wĩhti nhĩpêx. Jakamã pa mẽ akupým mẽ hwýr mõ. Nhũm mẽõ pahi nhõ kôwenatôjê hõ hkra myja kêp à htýx nê nõ. Nom Kanã kamã hkêt axtem krĩ hõ pê Kapanaũ kamã.

⁴⁷ Jakamã nhũm hipêêxàja tee ri hkra pumu hãmri nê ra Jejus kot Jutej rũm Kanã hwýr hpôx ã harênh ma nê hkra kaxyw kãm hamaxpêr nê ma hwýr mõr kurê kumrêx.

Hãmri nê nhÿri omu nê hwÿr tẽ nê kãm kapêr kãm hihtÿx nê kãm:

—Pa. E ot pa awÿr tẽ. Na ra ixkra ixpê htyk kaxyw. Kwa ixkamã axukapri nê ma ixkôt mô nê akupÿm inhmã ho mex. Anê.

⁴⁸ Hãmri nhÿm kuma nê kãm:

—Kwa pêr ãm ixte mẽ amã aa mẽ ate mẽmoj pumunh kêt kwÿ ho anhÿr ã ix-pumunh kôt pix mã na ka htem amnhÿ kaxyw ixkôt ajamaxpêr. Nom amarÿ amnhÿ kaxyw ixkôt ajamaxpêr kêt nê. Anê.

⁴⁹ Hãmri nhÿm tee ri kuma nê kãm:

—Kwa tokyx. Kot kaj tokyx ixkôt amôr kêt koja ixpê ty. Anê.

⁵⁰ Hãmri nhÿm kãm:

—Nà koja apê htyk kêt nê. Ra ixte akupÿm amã ho mex kênã. Mãmri ma akupÿm mô nê tokyx omu. Na ra akupÿm amã mex. Anê.

Hãmri nhÿm kuma nê kaxyw hkôt hamaxpêr kurê kumrêx nê ma akupÿm hwÿr mô. Nê môr o apkati.

⁵¹ Nê kormã ô krÿ hwÿr hpôx o môr ri nhÿm ra kãm mẽ ãpênh xwÿnhjaja kutã mra nê nhÿri pry hã hkaxpa nê kãm:

—Pa. Kwa na ra akra hkà hakry nê akupÿm amã mex. Anê.

⁵² Hãmri nhÿm mẽ kuma nê hkÿnh tÿx nê. Nê mẽ kãm:

—Kwa xô wehe? Mẽmo ore hã na pre we ra hkà hakry? Anê.

Nhÿm mẽ kãm:

—Nà jãã na pre kaxkwa nhÿpôk ri myt nhÿ nhÿm hkà hakry nê akupÿm amã mex kurê kumrêx. Anê.

⁵³ Hãmri nhÿm mẽ kuma nê mẽ kãm:

—Hêxta waa nê. Kwa pêr ãm hãmri Jejus kot inhmã akupÿm mex ã harênh xà hã ore kamã na pre akupÿm inhmã mex. Nà ãm hãmri. Anê.

Hãmri nê amnhÿ kaxyw Jejus kôt hamaxpêr kurê kumrêx. Nhÿm ôrkwÿ kamã ri mẽ pa xwÿnhjaja uràk nê amnhÿ kaxyw hkôt hamaxpêr.

⁵⁴ Nhÿm Jejus ã kãm hkra ho mex anê. Na pre ra pika pê Garirej kamã mẽ kot mẽmoj pumunh kêt ô ho anhÿr o tipxi nê mẽ kãm gô pix o wÿhti nhÿpêx. Tã ra pyka pê Jutej rÿm akupÿm mẽ hwÿr mô nê ã akupÿm mẽ hkrata o mex anê.

5

Jejus kot himô my ri akupÿm mẽhõ ho mex ã harênh

Juãw 7.23, 10.30-33

¹ Tã mẽ ixpê Ijaew mẽ ixte Tÿrtÿm ã ixkÿnh kaxyw Jerujarê hwÿr akuprô nhÿm Jejus haxwÿja ma hwÿr mô. Pa mẽ hkôt mẽ ixpa ho mẽ ixpa xwÿnhjaja ma hkôt mô.

² Jerujarê kamã na himôja hikwÿ. Nhÿhÿnh mẽ kot krÿ hwÿr ôwêhti ho gjêx xà htã hikwÿ. Himôja nhÿxi pê na Petes. Nê pu hã mẽ à xwÿnhjê nhÿkwÿ xà hã ixkre kêp 5.

³ Piitã kamã na pre hte tanhmã mẽ à kute xwÿnhjaja hikwÿ. Mẽ nohkre xwÿnhjaja nê mẽ hyk o mẽ pa xwÿnhjaja nê mẽ ÿ kamã mẽ htyk xwÿnhjaja. ãm ahpÿnhã tanhmã mẽ à kute xwÿnhjaja ixkre hkwyja kamã akupÿm mex prãm xàj hikwÿ.

⁴ Na pre hte Tÿrtÿm kapêr o mẽ wrÿk xwÿnhja tõhã himô hwÿr wrÿ nê gô xok. Hãmri nhÿm mẽ à xwÿnhjê hõ kot amnhÿ to wa nê kumrêx hwÿr wrÿk nê kamã mrôr xwÿnhja akupÿm mex. Kwÿjê rom akupÿm mex kurê kumrêx. Jakamã nhÿm pre hte mẽ à xwÿnhjaja akupÿm mex prãm xàj gô xok jamãr o hikwÿ.

⁵ Jakamã nhÿm mẽhõ myja ixkre hõ kamã hikwÿ. Te omnuj nê arÿ hikwÿ hã amgrà xohtô rax nê. Ra hã amgrà kêp 38.

⁶ Jakamã nhÿm Jejus mẽ hwÿr tẽ nê omu. Nê hprÿ hã omu nê hamaxpêr o:

—Kwa mÿj na hte omnuj nê ri pa hkêt ã amgrà xohtô rax nê. E pa akupÿm ho mex.

Anhÿr o hamaxpêr hãmri nê kãm:

—Pa. E kwa inhmã amnhÿ jarê. Xà amã akupÿm amex prãm? Anê.

⁷ Hãmri nhÿm kuma nê kãm:

—Ku nhÿm. Inhmã tokyx akupÿm inhmex prãm tÿx kumrêx kênã. No mẽhõ kot tokyx inhmÿ nê mẽ kêp ixto wa nê ixkumrêx gô xok kamã inhmrôr? Na pa tee ri ixkumrêx hwÿr ixtêm nê inhmã inhmrôr prãm nhÿm mẽ xatã ixpê amnhÿ to wa nê mra nê kamã mrõ. Anê.

⁸ Hãmri nhÿm Jejus kãm:

—Tÿ? Tôe. E na ka akupÿm amex. E kãnhmã xa nê akupÿm py nê ma akupÿm anhôrkwÿ hwÿr tẽ. Anê.

⁹ Hāmri nhũm kuma nẽ ra akupỹm mex nẽ kànhmã xa nẽ ri mra. Nẽ hkĩnh tỳx nẽ hikupĩp py nẽ ma akupỹm òrkwỹ hwỳr tẽ. Ijaew nhõ arĩgromnu pẽ sap ã nhũm Jejus kot akupỹm ho mex

¹⁰ nhũm ma akupỹm pry hã hikupĩp py nẽ o tẽ. Nhũm Ijaew nhõ pahi hkwỳja nhỹhỹnh mra nẽ tee ri kot sap ã hpyr nẽ o htẽm ã omu nẽ kãm:

—Tk. Kwa mẽ pahpê Ijaew na pu htem mẽ panhõ arĩgromnu hã paxàpênh kêt nẽ. Finat Mojes kot ja nẽ mẽ pahkurê htã ka axtem nẽ akupĩpta py nẽ nhỹhỹm o tẽ. Anẽ.

¹¹ Hāmri nhũm mẽ kuma nẽ mẽ kãm:

—Tỳ. Kot anhỹr tã kot ixto mex xwỳnhnta na ã inhmã kapêr anẽ pa mar xà hkôt kupy nẽ akupỹm inhòrkwỹ hwỳr tẽ. Anẽ.

¹² Hāmri nhũm mẽ tee ri kuma nẽ kãm:

—Kwa mẽhõ na we ã ri amã karõ anẽ? Anẽ.

¹³ Nhũm kormã kot Jejus nhĩxi mar kêt jakamã kot mẽ kãm ahkre kaxyw hakêx nẽ tee ri hkwỳjê kaêx ã hapêr rĩt o xa. Nom nhũm mẽ ohtõ nẽ pry hã mrar jakamã nhũm tee ri hapêr nhũm Jejus ra ma nhỹhỹm tẽ.

¹⁴ Tã nhũm hã ahtũmre nhũm Jejus Tĩrtũm mã amnhĩ jarênh xà hã ixkre hwỳr tẽ nẽ axà nẽ kot ho mex xwỳnhnta pumu nẽ kãm:

—Pa. E na ka ra akupỹm amex. Nom kwa kêt ka axte tanhmã amnhĩ tomnuj to ho ri apa hkêt nẽ. Kot kaj axte ã amnhĩ nhĩpêx anẽ hãmri nẽ apunuj tỳx o wam ate apunujta jakre kãm ga. Anẽ.

¹⁵ Hāmri nhũm kuma nẽ ma tẽ nẽ kato. Nẽ ma mẽ õ pahijê hwỳr tẽ nẽ mẽ kãm:

—E na pa ra kot ixto mex xwỳnhnta nhĩxi ma. Xep kêt Jejus. Anẽ.

¹⁶ Hāmri nhũm mẽ hixi ma nẽ hã tanhmã axpên mã ho kapêr punuj to. Mẽ õ arĩgromnu hã kot mẽ ho mex o pa jakamã nhũm mẽ axpên jakwa kamã ri hixi ho rê nẽ nhỹri omu nẽ tanhmã hã kãm àkjêr to.

¹⁷ Hāmri nhũm amnhĩ tã mẽ kuma nẽ mẽ kãm:

—Ku nhũm. Inhĩpêêxà Tĩrtũm na hte apkati mẽ tanhmã mẽ pahto mex to ho pa. Jakamã pa hte uràk nẽ ã mẽ ho mex rãhã ho ri ixpa anẽ nẽ aa mẽmo arĩgro hã ja ho anhỹr kaga hkêt nẽ.

¹⁸ Anhỹr o mẽ kãm amnhĩ jarê nhũm mẽ kuma nẽ kamã gryk tỳx nẽ. Nom mẽ õ

arĩgromnu hã kot mẽ ho mexja pix mỳrapê kamã gryk kêt. Mãânên Tĩrtũm kêt hipêêxà hã harênhja mỳrapê nhũm prem kamã gryk tỳx kumrêx nẽ axpên mã:

—Tk. Kwa na ã amnhĩ jarênh anhỹr jao te kêt Tĩrtũm pyràk ã amnhĩ jarê. E kwa pu mẽ kupĩ ri. Anẽ.

Tĩrtũm Kra kot Hipêêxà nhỹ hã amnhĩ nhĩpêx ã harênh

Juāw 14.10-13

¹⁹ Hāmri nhũm Jejus axte mẽ kêt Ijaew nhõ pahijê mã kapêr nẽ mẽ kãm:

—Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nẽ. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nẽ mẽ ho mex o ri ixpa. Kwa mẽ amnhĩ krã him ja jaxà nẽ kãm ajamaxpêr tỳx nẽ ho apa.

²⁰ —Inhĩpêêxàja kãm ijapêê. Na hte inhmã kot tanhmã mẽ ho mex to piitã ho amnhĩrĩt. Ixte omunh nẽ uràk nẽ ý hã tanhmã mẽ ho mex to ho ri ixpa kaxyw. Jakamã kot paj ãm akupỹm mẽ à xwỳnhjê ho mex pix o ri ixpa hkêt nẽ. Kot paj mãânên mẽ kãm mẽmoj mex o ja jakrenh o anhỹr o ri ixpa ka mẽ hã ixpumu nẽ ixkamã ano puma ho apa.

²¹ —Nẽ Inhĩpêêxà kot akupỹm mẽ htyk xwỳnhjê ho htĩr jakamã kot paj uràk nẽ akupỹm mẽ htyk xwỳnhjê ho htĩr o ri ixpa. Anẽ.

Mẽ htĩr tũm nẽ mẽ pa mã xwỳnhjê jarênh

Juāw 3.16-17, 3.36, 6.27, 6.40, 6.60, 10.28, 17.2-3; Rõmãn 6.23; Karatas 6.8; Xitre 1.2; Wam Juāw 2.25, 5.11-13

²² Nhũm Jejus arĩ mẽ kêt Ijaew nhõ pahijê mã kapêr nẽ mẽ kãm:

—Koja nhỹrmã Inhĩpêêxàja mẽ htĩr tũm nẽ mẽ pa ho mẽ pa mã xwỳnhjê jarênh kêt nẽ. Ja kaxyw na pre pa ixãm.

²³ Tã mẽ piitã mẽ kot ja hã ixpumunh nẽ ixtã hpijaàm o ri pa kaxyw na pre mẽ kaxyw ixãm. Te mẽ kot Inhĩpêêxà hã hpijaàmta pyrà nẽ pa ixtã hpijaàm o pa kaxyw. Jakamã koja mẽhõ ixtã hpijaàm kêt nẽ hãmri nẽ mãânên Inhĩpêêxà hã hpijaàm kêt ã amnhĩ to amnhĩrĩt. Tãm kot mẽ awỳr inhmênh kênã.

²⁴ Jakamã koja mẽhõ ixkapêr ma nẽ amnhĩ kaxyw kot mẽ awỳr inhmênh

xwýnhhta kôt hamaxpêr nê ixkôt amnhî xãm. Hã koja nhÿrmã htyk tã ma mẽ kot amnhî xà htÿx kamã hamak o pa htũm xàta wÿr môr kêt nê. Koja Inhîpêêxà akupÿm ho htîr nhũm wa ixri htîr tũm nê mex kumrêx nê pa ho pa. Jakamã koja mẽhõ ixkôt amnhî xãm hãmri nê ra kêp wa ixri htîr tũm nê pa ho pa mã xwýnh. Kwa mẽ jam ajamaxpêr tÿx rãhã ho apa.

25 –No mẽ kãm ixkapêr mar prãm kêt xwýnhjaja kêp Inhîpêêxà mẽ wa ixri mẽ htîr tũm nê mẽ pa mã xwýnh kêt. Tã ixpê Tîrtũm Kra jakamã koja mẽ ixkapêr ma nê ixkôt amnhî xunhwÿ. Hã kot paj amnhî tã mẽ omu nê mẽ htîr tũm nê mẽ pa mã xwýnh ã mẽ harê nhũm mẽ àmnhîx ri hkînh nê pa ho pa. Kwa mẽ jam ajamaxpêr tÿx rãhã ho apa.

26 –Nê Inhîpêêxà tãm kêp mẽ ho mẽ htîr xwýnh. Tã ixpê Kra jakamã na pre amnhî pyrã nê ja kaxyw ixãm.

27 –Ra kot mẽ akaxyw ixãm jakamã na pre mãânên ixte tanhmã mẽ ajarênh to kaxyw ixãm. Wa ixri mẽ atîr tũm nê apa ho apa mã xwýnhjê hã mẽ ajarênh rÿ wa ixri mẽ atîr tũm nê apa hkêt mã xwýnhjê hã mẽ ajarênh kaxyw.

28-30 Jakamã kot paj nhÿrmã ra mẽ htyk nê mẽ hikwÿ xwýnh piitã mẽ kãm ixkapêr nhũm mẽ inhma. Koja mẽ ixkapêr ma hãmri nê akupÿm htîr nê pika rũm hapôx pa. Hãmri nhũm mẽ kot kormã htîr ri Tîrtũm kapêr kôt amnhî nhîpêx hkêt xwýnhjaja mẽ kot amnhî tomnuj mÿrapê ma mẽ kot amnhî xà htÿx kamã hamak tũm xàta wÿr ma hapêx pa. Nom nhũm mẽ kot amnhî to mex xwýnhjaja. Ra mẽ kot Tîrtũm kôt amnhî nhîpêx jakamã koja mẽ ma Tîrtũm mẽ wa ixwÿr api nê wa ixri mex nê hkînh rãhã htîr tũm nê pa ho pa.

–Kot paj ja kaxyw tanhmã mẽ apiitã mẽ ajarênh to. Nom kot paj amnhî krã hkôt inhma hprãm xà hkôt tanhmã mẽ ajarênh to hkêt nê. Kot paj Inhîpêêxà kot mẽ awÿr inhmênh xwýnhhta nhÿ hã àhpumunh tÿx xà hkôt tanhmã mẽ ajarênh to. Jao ãm hãmri mẽ ajarê. Kwa mẽ jam ajamaxpêr tÿx nê. No ã ixte mẽ amã amnhî jarênh anhÿrja ma nê tee ri ajamaxpêr kêt nê. Anê.

Mê kot Jejus kêp Tîrtũm Kra hã harênh xwýnhjê jarênh

Juãw 8.18; Wam Juãw 5.6-8

31 Nhũm Jejus arî mẽ kêp Ijaew nhõ pahijê mã kapêr nê mẽ kãm:

–E na pa ra tanhmã mẽ amã amnhî jarênh to. Nom kop ãm papxipix ixte ã amnhî jarênh anhÿr ronhÿx ka mẽ inhma nê ajamaxpêr o: “Ko. Na apu ãm hãmri ã mẽ inhma amnhî jarênh anê rÿ apu ãm amnhî to hêx.” Anhÿr o ajamaxpêr.

32 Nom papxipix na pa hte ã amnhî jarênh anhÿr kêt nê. Inhîpêêxà haxwÿja na hte ã ijarênh anê. Nê ãm hãmri na hte tanhmã ijarênh to ho pa. Tîrtũmja hêx kêt.

33 No mẽ amã pika nhõ xwýnhjê pix kapêr mar prãm jakamã na ka prem finat Juãw Paxisja wÿr akwÿjê rê nhũm mẽ ma hwÿr mra nê ixtã hkukja nhũm mẽ kãm tanhmã ijarênh to. Nê hprî hã mẽ kãm ijarê.

34 No mẽ apê pika nhõ xwýnhjaja mẽ ate xpên mã tanhmã ijarênh toja na ixpê tanhmã kute hkêt. Koja mẽhõ tanhmã ixto kapêr punuj to rÿ tanhmã ijarênh mex to pa amnhî jarênh ma nê tee ri amnhî kukamã ijamaxpêr o ixkaprî hkêt nê. Tã nom Juãw Paxis kapêrja mẽ amã mex jakamã na pa ã mẽ amã harênh anê. Ka mẽ ra kot tanhmã ijarênh toja ma nê amnhî kaxyw ixkôt ajamaxpêr nê ixkôt amnhî xunhwÿ nê nhÿrmã ty nê ma mẽ kot amnhî xà htÿx kamã hamak tũm xàta wÿr apa hkêt nê.

35 –Juãw Paxis na pre te kanê hpôk mex nê mẽmoj to amnhîrît mex pyrã nê mẽ amã Tîrtũm kapêr o amnhîrît mex o pa. Ka prem te maripôtre kot kanê hã htu pyrã nê hwÿr akuprô nê mar o akuhê. Nom hkôt ajamaxpêr tÿx kêt nê.

36 Na pre hprî hã mẽ amã ijarênh o ri pa.

–Tã pa pam mẽ awÿr wrÿ nê Inhîpêêxà nhÿ hã mẽ akamã aa mẽ ate mẽmoj pumunh kêt kwÿ ho anhÿr o ri ixpa. Mẽ ate ja hã ixpumunh nê Inhîpêêxà tãm kot mẽ awÿr inhmênh kôt ixpumunh kaxyw.

37 –Nê Inhîpêêxaja mãânên ixpê Kra hã mẽ amã ixto amnhîrît. Ra mẽ anhôpinh xà kaxwýnh kãm kot mẽ amã ixto amnhîrît tã ka mẽ ama nê ãm ama nê ixkôt ajamaxpêr kêt nê.

³⁸ Mē amā mē ate hkôt amnhĩ nhĩpêx o apa hprām kêt. Mē ate kapêr mar tỳx ronhỹx ka mē ixkapêr ma nē amnhĩ kaxyw ixkôt ajamaxpêr kurê kumrêx. Ixpê Tirtũm kot mē awỳr inhmēnh xwỳnh kēnā.

³⁹ —Nē Tirtũm kapêr ã kagà htũm haxwỳja kot tanhmā ijarēnh to. Ka htem wa ixri atĩr tũm nē apa ho apa hprām xàj kamā harēnh rāhā ho ri apa. Nē kot tanhmā pa ijarēnh to htā ka mē ixkapêr ma nē amnhĩ kaxyw ixkôt ajamaxpêr kêt nē. Anē.

Ijaew nhõ pahijaja kot Jejus kaga hã mē harēnh

⁴⁰ Nhũm Jejus arĩ mē kêp Ijaew nhõ pahijê mã kapêr nē mē kām:

—Nē pa na ixte Inhĩpêxà mē wa ixri ixte mē ho mē htĩr tũm nē mē pa mã xwỳnh ã mē harēnh tã ka mē amnhĩ kaxyw ixkôt ajamaxpêr kêt nē.

⁴¹ Nom mē ate inhmex ã ijarēnh kêt tã ja ixpê tanhmā kute hkêt. ãm Inhĩpêxà pix kot inhmex ã ijarēnhja na inhmā hprām.

⁴² Ra ixte mē apumunh mex. Mē amā Tirtũm kĩnh kêt.

⁴³ Tãm kot mē awỳr inhmēnh tã ka mē ixpumu nē ixkaga nē ixkôt amnhĩ nhĩpêx kêt nē. Nom koja mēhõ amnhĩ krā hkôt mē awỳr tē nē tanhmā mē ajahkre hto ka mē ama nē hkôt amnhĩ nhĩpêx kurê kumrêx.

⁴⁴ —ãm pika nhõ xwỳnh pixjaja kot mē amex ã mē ajarēnhja na mē amā hprām. No Tirtũm kot amnhĩm mē amex ã mē ajarēnhja mē amā hprām ã mē ate amnhĩ jarēnh tã mē amā ja prām kêt. Jakamā na ka htem ixkaga kumrêx.

⁴⁵⁻⁴⁶ Tã nom kot paj pam nhỹrmā Tirtũm mã mē apê ixkwỳ hkêt ã mē ajarēnh kêt nē. Mo kaxyw kot pa kêt ri ã kām mē ajarēnh anē? Finat Mojes tãm koja ja hã kām mē ajarē. Na ka htem tanhmā ajamaxpêr to nē ajamaxpêr o: “Kot paj finat Mojes kot mē inhmā tanhmā kapêr to hkôt amnhĩ nhĩpêx o ri ixpa hãmri nē nhỹrmā Tirtũm ri ixtĩr tũm nē inhmex nē ixpa ho ixpa.” Anhỹr o ajamaxpêr nom hkôt amnhĩ nhĩpêx kêt nē. Mojes na pre hte pa ijarēnh o pa. Tã mē ate kapêr kôt amnhĩ nhĩpêx ronhỹx ka mē amnhĩ kaxyw ixkôt ajamaxpêr nē ixkôt amnhĩ xunhwỳ. No mē ate ixkaga jakamā

koja Mojes tãm Tirtũm mã mē apê ixkwỳ hkêt ã mē ajarē.

⁴⁷ Mē ate Mojes kapêr kôt amnhĩ nhĩpêx kêt jakamā kot kaj mē mãānēn ixkôt amnhĩ nhĩpêx hkêt nē. Anē.

Nhũm pre ã Jejus Ijaew nhõ pahijê mã kapêr anē.

6

Jejus kot mē ho 5.000 nē mē kām mē õ hã harēnh

Matêwre 14.13-21; Makre 6.30-44; Rukre 9.10-17

¹⁻⁴ Tã nhũm ra arĩgro pê Pas ahtêp o mō. Pasja ã mē ixpê Ijaewjaja na pa htem axpēn wỳr akuprõ nē hã õwēhti hkra nyw kwỳ pa nē ã hkur o ixkrĩ. Amnepēm Tirtũm kot pika pê Ejit rũm mē inhĩgêtjê kator kaxyw nhũm prem nojarêr nē ã hkwy hpar nē ã hkur anē. Tã arĩ mē ixpê mē hkanrēhã mē htãmnhwỳjaja jam ijamaxpêr pê ixkĩnh kaxyw ã amnhĩ nhĩpêx anē. Jakamā nhũm Jejus pàr krem axà nē ma himô pê Garirej ã rêr kaxyw ma xarmã mō nē rē. Himôja nhĩxi hõ pê na Tipe nhũm hã xarmã mō nē rē. Pa mē hkôt ixpa ho ixpa xwỳnhjaja ma hkôt ixpa.

Hãmri nhũm pika nhõ xwỳnh kwỳjaja Jejus ma mōr kām omu hãmri nē ma gô kape hã pikap mē inhĩhkrep mra. Na pre ra Jejus mē kamã mē ã xwỳnhjê ohtô nē akupỹm mē ho mex nhũm mē axte omu hãmri nē ma mē inhĩhkrep gô mỳ ri hpar o pa.

Tã pa mē xarmã rē nē pàr rũm ijarôj nē gô mỳ ri kỳxpê ixkrĩ hpa.

⁵ Hãmri nhũm mē inhĩhkrep mē mrar xwỳnhjaja mē ixwỳr hpôx o mra nhũm Jejus amnhĩ wỳr mē omu nē mē inhĩõ pê Firipti mã kapêr nē kām:

—Kwa Firip. Mějmoj kot puj mē pahwỳr mē mōr nējje mã ho anē nhũm mē kuku? Tanhmā kot puj mē amnhĩ to nē nhỹri mē kām mějmoj japrô nhũm mē kuku? Anē.

⁶ Ra tãm kot tanhmā mē kām õ hto hã amnhĩ pumunh mex tã ã mē hã Firipti kamã hamak kaxyw mē hã hkukjêr anē.

⁷ Hãmri nhũm kuma nē tee ri mē hkukamã hamaxpêr nē kām:

—Konēn. Měj ohtô rax kumrêx kēnā. Mo mē kaxyw mē pakàxpore rax? Kot pu mē pakàxpore ho 200 nē ho mē kām mějmoj

japrôr tâ nhũm mẽ ãm ho hkryre nẽ kuku nẽ ho õhy htu hkêt nẽ. Mẽ ohtô rax o mẽ ohtô rax kênã. Anẽ.

⁸⁻⁹ Hãmri nhũm mẽ inhĩõja kuma nẽ Jejus wỳr tẽ nẽ kãm kapêr. Simāw Pêtre htõ Andreja hwỳr tẽ nẽ kãm:

—E ota mẽhõ hkrata amnhĩ kôt õ hwỳ ho mõ. No ãm grire. Na pãwti kệp 5 nẽ kaxyw õ tep axkrutre. No mẽ ohtô gri ã kot kêt mẽ hipêx pa. Anẽ.

¹⁰ Hãmri nhũm kuma nẽ hkôt mẽ ixpa ho mẽ ixpa xwỳnhjê mã kapêr nẽ mẽ inhmã:

—Tõe. Nà hãmri. E mẽ kãm anẽ kê mẽ hkrĩ pa. Anẽ.

Hãmri pa mẽ kãm anẽ nhũm mẽ põ kamã hkrĩ hpa. Na prem ohtô kumrêx. Mẽmyjê pixjaja kệp 5.000. Nẽ kaxyw mẽ hprõ nẽ mẽ hkrajaja. Na prem ohtô ho ohtô. Tã piitã hkrĩ pa.

¹¹⁻¹² Hãmri nhũm Jejus mẽhõ hkrata pê õ pãwti jamỳ nẽ o xa nẽ Tĩrtũm mã harẽ nẽ kãm:

—Pa Papaj. Na ka hte mẽ inhmã mẽ inhõ ho apa. ãm kapxipix amex o amex. Anẽ.

Hãmri nẽ mẽ inhmã pãwtija gõ pa mẽ õ ri mẽ hkrĩ xwỳnhjê mã õr o mra nẽ ho mẽ piitã mẽ hipêx pa. Pãwtija ãm hkryre htã nhũm Jejus tanhmã ho nhũm ra ohtô rax kumrêx. Jakamã pa mẽ õ ri mẽ kãm õr o mra nẽ ho mẽ piitã mẽ hipêx pa. Nhũm Jejus hpãnhã tep axkrutreta py nẽ mã ho anẽ nẽ Tĩrtũm mã harẽ hãmri nẽ amnhĩ xõ ri mẽ inhmã kugõ pa mẽ mã ho anẽ nẽ. Te ho pãwti nhĩpêx pyrã nẽ ho mẽ piitã mẽ hipêx. Hãmri pa mẽ ixpiitã apku nẽ inhõhy htu nhũm arĩ mẽõ jakrêx kwỳ hprã. Hãmri nhũm Jejus mẽ inhmã:

—E kwa mẽ hkôt mra nẽ mẽõ jakrêx o akuprõ kê omnu hkêt nẽ. Anẽ.

¹³ Hãmri pa mẽ kuma nẽ ho akuprõ nẽ kawà o 12 nẽ ho nỳt. Pãwti hkryreja ãm kệp 5 pix tã nhũm Jejus tanhmã ho nhũm rũnh kumrêx. Jakamã pa mẽ hakrêx prãr o kawà ho 12 nẽ ho nỳt pa.

¹⁴ Hãmri nhũm mẽ inhĩhkrep mẽ mõi xwỳnhjaja amnhĩ jaer pê Jejus kot mẽ kãm mẽõ ho rax ã omu nẽ ri axpẽn mã harẽnh o:

—Kokỹỹ. Tãm mãn pre finat Mojesja amnepêm mẽ panhĩgêjtê mã harẽnh o ri pa. Tã ra mẽ pahwỳr wrỳ nà?

¹⁵ Kwa pu mẽ kãm pakapêr kãm paxihtỳx nẽ ma akupỳm amnhĩ kôt o mõ nẽ amnhĩ kaxyw ãm kê mẽ pahto amnhĩptar o pa. Anẽ.

Hãmri nhũm Jejus amnhĩ tã mẽ kapêr ma nhũm ja kệp omnuj nẽ. Jakamã nhũm mẽ kệp kato nẽ ma hpãnhã ahte nhỹri hixêt õ hwỳr tẽ.

*Jejus kot gõ krãhkã hã htẽm ã harẽnh
Matêwre 14.22-27; Makre 6.45-52*

¹⁶ Tã nhũm ra kamàtre pa mẽ Jejus kôt ri ixpa ho ixpa xwỳnhjaja ma akupỳm himõ hwỳr mra.

¹⁷ Nhũm kormã Jejus mẽ ixwỳr akupỳn htẽm kêt jakamã pa mẽ tee ri kamã ama hãmri nẽ akupỳm pàr mã axà nẽ ma akupỳm Kapanaũ hwỳr xarmã ixrêr o mõ.

¹⁸ Pu nhũm ra kôk àpêr tỳx nhũm gõ xatã kànhmã harĩ nẽ axpẽn wỳr mra nẽ axpẽn tak tỳx nẽ.

¹⁹ Pa mẽ kormã gõ nhĩpôk ri mõ. Nẽ tee ri rrẽmti ho gõ rẽn nhĩpêx kaprỳ nom kormã ixrêr kêt nẽ. Nẽ kormã inhmõi o ixtã 5 kirõm pix nẽ. Hãmri nhũm ra Jejus gõ krãhkã hã hpar o mẽ ixkôt tẽ. Pa mẽ ixprĩ hã amnhĩ wỳr omunh mex kêt nẽ ixtỳx mẽkarõ hã hkamnhĩx nẽ mẽ inhmã uma htỳx kumrêx.

²⁰ Tã nhũm mẽ inhmã ixkapêr nẽ mẽ inhmã:

—Tk. Kwa mẽ amã ma hkêt nẽ. Pa na pa mẽ akôt tẽ. Anẽ.

²¹ Hãmri pa mẽ kapêr ma nẽ ixkĩnh nẽ. Nẽ amnhĩ wỳr pàr kre hwỳr ho api nhũm axà pa mẽ xarmã ixrêr kurẽ kumrêx nẽ pàr kre rũm ijapõx pa.

Mẽ kot Jejus japêr mrrar ã mẽ harẽnh

²² Tã nhũm apkati nhũm xarpê mẽ kot Jejus wỳr mrrar nhũm kot mẽ kãm õ xwỳnhjaja tee ri hapêr o pa nẽ axpẽn mã:

—Kwa nhỹhỹm mãn pre we tẽẽ? Na pre hkôt ri mẽ pa xwỳnhjaja pix mẽ õ pàr kãm ma akupỳm xarmã mõ nom nhũm Jejusja mẽ hkôt htẽm kêt nẽ. Nà mãn kormã jar nhỹhỹm ri mrrar jakamã pu mẽ kormã omunh kêt nẽ. Anẽ.

²³ Rõm nhũm Tipe rũm pàr kwỳja mẽ hwỳr pøj. Jejus kot mẽ apkur xà ho Tĩrtũm wỳr nẽ mẽ kãm ho rax xà hã pikata wỳr nhũm mõn pøj.

²⁴Hāmri nhūm mẽ amnhĩ wỳr omu nẽ tee ri pàr kām Jejus mẽ hkôt mẽ ixpa ho mẽ ixpa xwỳnhjê japêr hāmri nẽ axpên mã:

—E kwa pu mẽ ma mẽ hkôt xarmã mō nẽ Kapanaũ kamã mẽ hapêr. Anẽ.

Hāmri nẽ mẽ kām amnhĩ jarẽ nẽ mẽ õ pàr kwỳ hwỳr agjê nẽ ma mẽ hkôt xarmã mōn rê.

²⁵Hāmri nẽ ra mẽ ixwỳr rê nẽ mẽ ixkôt pøj nẽ mẽ ixkaêx ã Jejus pumu nẽ hwỳr mra nẽ kām:

—Pa mẽ ijahkre xwỳnh. Kwa na pa prem tee ri xarpê ajapêr hāmri nẽ man akôt mōn rê. Kwa tanhmã na ka pre we amnhĩ to nẽ man tẽn rê? Anẽ.

²⁶Hāmri nhūm mẽ kām:

—Nà mẽmo kaxyw na ka wem ri ijapêr o ri ixkôt apa? ãm jãã mẽ ate ixkutã axàpkur nẽ anhōhy htu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhĩpêx anhỹr ã ixpumu nẽ ixpê Tĩrtũm Kra hã ixkôt ajamaxpêr kêt nẽ. Kwa mẽ ixpê Kra hã inhmã ajamaxpêr tỳx nẽ kêt wehe. Anẽ.

Jejus te kêp kaxkwa rũm mẽ paxàpkur xà maati pyrãk ã kot amnhĩ jarênh

²⁷Nhūm Jejus arĩ hwỳr mẽ mrrar xwỳnhjê mã kapêr nẽ mẽ kām:

—Kwa kêt ka mẽ ri axàpkur xà pix kukamã ajamaxpêr o ri apa hkêt nẽ. Na htem mẽ apkur xà kukwak ri Tĩrtũm mẽ wa ixri htĩr tũm nẽ pa ho pa hkêt nẽ. No kot kaj mẽ amnhĩ kaxyw pa ixkôt ajamaxpêr nẽ ixkôt amnhĩ xunhwỳ. Hã kot kaj mẽ ixkukwak ri nhỹrmã atĩr tũm nẽ wa ixri amex nẽ apa ho apa. Te ixpê mẽ kot mẽ apkur xà hkur nẽ y hã htĩr tũm nẽ pa ho pa xwỳnh pyrãk. Ja kaxyw na pre Inhĩpêêxà Tĩrtũm mẽ awỳr papxipix inhmẽ pa mẽ awỳr wrỳ. Anẽ.

²⁸Hāmri nhūm mẽ kuma nẽ kām:

—Kwa tanhmã kot paj wem amnhĩ nhĩpêx to nhūm Tĩrtũm hã mẽ ixpumu nẽ mẽ ixto mex nẽ? Anẽ.

²⁹Hāmri nhūm mẽ kuma nẽ axte mẽ kām amnhĩ jarẽ nẽ mẽ kām:

—Nà kot kaj mẽ amnhĩ kaxyw pa Tĩrtũm kot mẽ awỳr inhmẽnh xwỳnh kôt ajamaxpêr hāmri nhūm ixtã mẽ apumu nẽ tanhmã mẽ akrã hto ka mẽ ajamakêtkati nẽ

axàmnhĩx akĩnh nẽ tanhmã amnhĩ nhĩpêx to ho ri apa. Anẽ.

³⁰Hāmri nhūm mẽ kuma nẽ kām:

—Tõe. Kwa axte mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu nẽ amnhĩ kaxyw akôt ijamaxpêr kurê kumrêx. E mẽmo kot ka mẽ inhmã ho anẽ? Kwa tokyx mẽ inhmã axte mẽmoj tanhmã ho pa mẽ omu.

³¹Amnepê m finat Mojes pyrã kot kapôt ã mẽ panhĩgêjtjê ho pa ri na pre hte apkati mẽ mẽ kām mẽõ mẽ kot kām “manã” anhỹr xwỳnhhta gō nhūm pre htem hkur o pa. Tĩrtũm kapêr ã kagà htũm kot ja jarênh kot:

Na pre kaxkwa rũm mẽ hwỳr mẽ apkur xà rẽ nhūm mẽ hkur o pa.

Anhỹr o kot harênh. Tã kot kaj Mojes nẽ apkati mẽ mẽ inhmã mẽ inhõ ho ri apa pa mẽ ja hã apumu nẽ rĩ kormã amnhĩ kaxyw akôt ijamaxpêr japêr. Anẽ.

³²Hāmri nhūm mẽ kām:

—Xà Mojes na pre hte mẽ kām kaxkwa rũm mẽ apkur xà rênh o pa? Nà tãm kêt. Inhĩpêêxà na pre hte mẽ hwỳr kurê nhūm mẽ hkawrà nẽ kuku nẽ kukwak ri hihtỳx nẽ htĩr nẽ pa. Tã nhūm ra mẽ awỳr hpãnhã pa ixpê Kra hã inhmẽ. Kwa mẽ ixkapêr ma nẽ amnhĩ krãm haxàr tỳx nẽ.

³³Na pre Tĩrtũm inhĩpêx o te amnepê m kot mẽ hwỳr kaxkwa rũm mẽ apkur xà rênhhta pyrã nẽ amnẽ pika hwỳr inhmẽ. Jakamã te ixpê kaxkwa rũm mẽ apkur xà maati wrỳk xwỳnhhta pyrãk. Mẽ ate amnhĩ kaxyw ixkôt ajamaxpêr nẽ ixkôt amnhĩ xunhwỳr hāmri nẽ ixkukwak ri wa ixri atĩr tũm nẽ apa ho apa kaxyw. Anẽ.

³⁴Nhūm pre ã Jejus mẽ kām amnhĩ jarênh anẽ nhūm mẽ kuma nom hprĩ hã mar mex kêt nẽ. ãm htỳx ho axtem mẽ apkur xà mex pix ã harênh ã hkamnhĩx nẽ kām:

—Kwa tô mẽ inhmã mẽ apkur xà maatita kwỳ gō pa mẽ apkati mẽ hkur o ri ixpa. Anẽ.

³⁵Hāmri nhūm mẽ kuma nẽ amnhĩ tã mẽ kām:

—Nà mẽ apkur xà kumrêxja ãm paa. Te ixpê mẽ apkur xà maati pyrãk. Jakamã kot kaj mẽ atõ amnhĩ kaxyw ixkôt ajamaxpêr nẽ ixkôt amnhĩ nhĩpêx o apa hã kot kaj mẽ akĩnh nẽ apa. Te ra axàpkur nẽ anhōhy

htu nē akīnh o ri apa pyrāk. Jao amnhī tā ixpumu nē akīnh nē ajamakêtkati nē ri apa.

³⁶ —Ra mē ate ixpumunh mex tā kormā amnhī kaxyw ixkôt ajamaxpēr kêt nē. Kwa mē ixkapēr ma nē amnhī krām haxàr tỳx nē.

³⁷ Tirtūm kot inhmā mē òr mā xwỳnhjaja koja mē ixpumu nē amnhī kaxyw ixkôt hamaxpēr mex kurê kumrēx. Ā mē kot amnhī nhīpēx anhỹr xwỳnhjaja kot paj aa amnhī nē mē hanor kêt nē.

³⁸ —Nē ixte amnhī krā hkôt kaxkwa rŭm ixwryk nē inhmā hprām xà hkôt tanhmā amnhī nhīpēx to ho ixpa kaxyw na pa pre ixwryk kêt nē. Inhīpēxà kot mē awyr inhmēnh jakamā kām hprām xà hkôt pix mā na pa hte tanhmā amnhī nhīpēx to ho ri ixpa.

³⁹ —Tā mo na hte Inhīpēxà kām hprām? Nà kot inhmā mē òr mā xwỳnh piitā nhỹrmā wa ixkuri htīr tŭm nē mex nē pa ho paja na kām hprām. Jakamā nhỹrmā akupỹm mē htīr ā arīgrota ā ixte akupỹm mē ho htīr nhŭm ixte ām pixire nē ho ixpikunor kêtja na kām hprām.

⁴⁰ —Tā kot ka mē atō ixpē Tirtūm Kra hā ixpumu nē amnhī kaxyw ixkôt ajamaxpēr nē ixkôt amnhī xām. Hā kot kaj nhỹrmā atyk tā pa akupỹm mē atīr xà hā arīgrota ā akupỹm ato atīr ka wa ixkuri atīr tŭm nē amex nē apa ho apa. Ja na Inhīpēxàja kām hprām. Anē.

Nhŭm pre ā Jejus mē kām amnhī jarēnh anē.

⁴¹ Hāmri nhŭm Ijaew nhō pahijaja mē kuri mar o kuhē nē tee ri kēp kaxkwa rŭm mē apkur xà maati pyrāk ā amnhī jarēnh ma nhŭm ja mē kām mex kêt nhŭm mē kamā gryk nē.

⁴² Jakamā axpēn mā ri harēnh o:

—Tk. Kwa mo na ri ā amnhī jarēnh anē? Kēp mē panhīō kēnā kot kêt ri kēp kaxkwa nhō xwỳnh ā amnhī jarē. Kēp Juje mē Marir wa hkra na. Mē pahte katorxà mē hipēxà wa omunh mex kēnā kot kêt axtem nē kēp kaxkwa nhō xwỳnh ā amnhī jarē. Anē.

⁴³ Hāmri nhŭm amnhī tā mē kuma nē mē kām:

—Kwa mē ā ijarēnh anhỹr kêt nē.

⁴⁴ Koja Inhīpēxà kot mē awyr inhmēnh xwỳnhhta tanhmā mē hkrā hto nhŭm mē rī

kormā amnhī tā ja hā ixpumu nē amnhī kaxyw ixkôt hamaxpēr. Tā ā mē kot amnhī nhīpēx anhỹr xwỳnhjaja koja mē nhỹrmā htyk tā pa akupỹm mē ho mē htīr nhŭm mē wa ixri htīr tŭm nē mex kumrēx nē pa ho pa.

⁴⁵ —Amnepēm Tirtūm kapēr jarēnh o mē pa xwỳnhjaja na prem ā ja jarēnh anhỹr o: Koja Tirtūm mē hkrā kaxwỳnh kām tanhmā mē kām kapēr o amnhīrīt to ho pa.

Anhỹr o harēnh. Jakamā mē kot Tirtūm kapēr mar nē hkôt amnhī nhīpēx xwỳnhjaja koja mē māānēn amnhī kaxyw pa ixkôt hamaxpēr nē ixkôt ri amnhī nhīpēx o pa.

⁴⁶ —Nē mē apē pika nhō xwỳnhjē hō aa mē ate ixkīnhā ano ho Inhīpēxà pumunh kêt. Ām papxipix na ixte omunh. Kurŭm na pa pre mē awyr wry.

⁴⁷ Tā kot ka mē atō amnhī kaxyw ixkôt ajamaxpēr. Hā kot kaj nhỹrmā wa ixkuri atīr tŭm nē amex nē apa ho apa. Kwa mē jam ajamaxpēr tỳx nē.

⁴⁸ —Nē ixpē mē axàpkurxà maati jakamā pa na ixpē akupỹm mē ho mē htīr xwỳnh.

⁴⁹ Amnepēm mē panhīgētjaja kormā kapôt ā mē pa ri mē kot “manā” anhỹr xwỳnhhta kur o ri pata ā na prem kukwak ri htīr tŭm nē pa ho pa hkêt nē. Na prem ri pa nē gaa nē rī hpigēt nē htyk pa.

⁵⁰ Axtem kaxkwa rŭm mē apkur xà maati jarēnh xwỳnhhta pix kukwak ri na htem nhỹrmā htyk tā akupỹm htīr nē wa ixri htīr tŭm nē mex nē pa ho pa.

⁵¹ Ām paa. Pa na htem inhī hkwỳ hkrē hāmri nē wa ixri htīr tŭm nē mex nē pa ho pa. Na pa pre ra amnhī grōnh kôt mē awyr wry. Jakamā ka mē atō inhī hkwỳ hkrē hāmri nē nhỹrmā atyk tā pa akupỹm ato atīr ka Tirtūm mē wa ixri atīr tŭm nē amex nē apa ho apa. Anē.

⁵² Nhŭm pre ā Jejus Ijaew mā amnhī jarēnh anē. No ām mē kām amnhī tā kuxi nē amnhī jarē. Jakamā nhŭm mē tee ri kuma hāmri nē tanhmā hā axpēn mā kapēr to. Mē kot hprī hā mar kêt nē ām mē kot ĩ hkwỳ hkrērja pix jarēnh mar jakamā tee ri hamaxpēr nē axpēn mā:

—Kwa tanhmā kot kêt we amnhī to nē mē pamā amnhī nhī hkwỳ gō pu mē kuku? Anē.

⁵³⁻⁵⁴ HãMRI nhũM amnhĩ tã mẽ kuma nẽ mẽ kãm:

—Nà mẽ kot inhĩ hkwỳ hkrēr nẽ ixkamrô hkwỳ ho hkôm xwỳnh pixjaja koja mẽ nhỹrmã Tĩrtũm mẽ wa ixri htĩr tũm nẽ pa ho pa. Ixte akupỹm mẽ ho mẽ htĩr xà hã arĩgrota ã kot paj mẽ ho mẽ htĩr nhũm mẽ wa ixri htĩr tũm nẽ mex nẽ pa ho pa. No kot kaj mẽ inhĩ hkwỳ hkrēr kêt nẽ ixkamrô hkwỳ ho akôm kêt hãmri nẽ wa ixri atĩr tũm nẽ amex nẽ apa ho apa hkêt nẽ. Kwa mẽ jam ajamaxpēr tỳx rãhã nẽ.

⁵⁵ Kêt inhĩja kęp mẽ apkur xà maati na. Nẽ ixkamrôja kęp mẽ hkôm xà maati na. Jakamã na htem inhĩ hkwỳ hkrē nẽ ixkamrô hkwỳ ho ixkô nẽ ra kęp wa ixri mẽ htĩr tũm nẽ mẽ pa ho mẽ pa mã xwỳnh.

⁵⁶ Jakamã kot ka mẽ atô inhĩ hkwỳ hkrē nẽ ixkamrô hkwỳ ho ixkô. Hãmri pa amnhĩ tã apumu nẽ akarô mã axà ka te apê pa pyrãk o amnhĩ nhĩpêx o apa.

⁵⁷ Inhĩpêxà kot mẽ awỳr inhmēnh xwỳnhhta kukwak ri na pa hte ixtĩr tũm nẽ ixpa ho ixpa. Tã ja pyrã nẽ kot kaj mẽ inhĩ hkwỳ hkrē hãmri nẽ ixkukwak ri wa ixri atĩr tũm nẽ apa ho apa mã xwỳnh.

⁵⁸ —Jakamã na pa ã mẽ amã ixpê kaxkwa rũm mẽ axàpkur xà maati hã amnhĩ jarēnh anē. Amnepēm mẽ panhĩgêtjaja na pre htem kapôt ã mẽôta kur o pa hãmri nẽ gaa nẽ hpigêt nẽ htyk pa. No kêt pa koja mẽ inhĩ hkwỳ hkrē hãmri nẽ mẽ kurom wa ixri htĩr tũm nẽ mex nẽ pa ho pa. Anē.

⁵⁹ Nhũm pre ã JeJus mẽ kãm amnhĩ jarēnh anē. Kormã Kapanaũ kamã Tĩrtũm kapēr o mẽ ahkre xà hã ixkre kamã ã mẽ ahkre anhỹr o xa.

Mẽ ohtô nẽ mẽ kot JeJus kaga hã mẽ harēnh

Sikũn Korĩt 3.6; Sikũn Pêtre 3.16

⁶⁰ Hãmri nhũm mẽ kot JeJus kôt mar o mẽ pa xwỳnhjaja ohtô nẽ ã kapēr anhỹrja ma nẽ tee ri amnhĩ kukamã hamaxpēr nẽ hã axpēn mã:

—Tk. Kwa pēr kapērja ãm ri katii. Mēhō koja we kuma nẽ hkôt hamaxpēr nẽ hkamrô nẽ ĩ kur o ri hkôt pa? Nà mẽ piitã mẽ kãm ja mexti hã. Anē.

⁶¹ Hãmri nhũm amnhĩ tã mẽ kuma nẽ mẽ kãm:

—Kwa xà ixkapērja mẽ apê omnuj?

⁶² Nà kot paj nhỹrmã ma akupỹm kaxkwa hwỳr api. Ixpê Tĩrtũm kot mẽ akaxyw ixãm xwỳnh ã ma akupỹm hwỳr api. Hãmri ka mẽ ã ixte amnhĩ nhĩpêx anhỹr ã ixpumu nẽ rĩ kormã ixkôt amnhĩ xunhwỳr japēr.

⁶³ Na htem mẽmoj kur kukwak ri kęp Tĩrtũm mẽ wa ixri htĩr tũm nẽ pa ho pa xwỳnh kêt nẽ. Rỳ amnhĩ krã hkôt tanhmã amnhĩ nhĩpêx to ho kęp wa ixri htĩr tũm nẽ pa ho pa mã xwỳnh kêt nẽ. Tĩrtũm mẽ wa Ixkarô tãm na hte mẽ hkarô mã agjê nẽ mẽ ho Tĩrtũm wa ixkuri mẽ htĩr tũm nẽ mẽ pa ho mẽ pa mã xwỳnh. Tã ỹ hã na pa ã mẽ amã ixkapēr anē. Nom mẽ amã amnhĩ tã kuxi nẽ amnhĩ jarē. Tã kot kaj mẽ ixkapēr ma nẽ ixkôt amnhĩ nhĩpêx. Hã kot kaj mẽ nhỹrmã wa ixri atĩr tũm nẽ amex nẽ apa ho apa.

⁶⁴⁻⁶⁵ No mẽ akwỳjaja na ka mẽ ixkapēr ma nẽ ãm ama nẽ ixkôt ajamaxpēr kêt nẽ. Jakamã na pa ã mẽ amã ixkapēr anē nẽ mẽ amã: “Koja Inhĩpêxàja tanhmã mẽ akrã hto ka mẽ rĩ kormã amnhĩ tã ixpumu nẽ amnhĩ kaxyw ixkôt ajamaxpēr.” Anhỹr o mẽ amã ixkapēr. Anē.

Nhũm ã JeJus mẽ kãm kapēr anē. Ra kot mẽ hkukamã mẽ omunh mex. Ra kot amnhĩ kaxyw mẽ kot hkôt hamaxpēr mã xwỳnhjê pumunh nẽ mãânēn mẽ kamã kot mẽô pahĩ nhĩhkram haxàr mã xwỳnhja nhũm mãânēn ra kot amnhĩ kukamã omunh mex. Jakamã nhũm ã mẽ kãm kapēr anē.

⁶⁶ Hãmri nhũm mẽ kot hkôt kapēr mar o mẽ pa xwỳnh kwỳjaja tee ri kuma hãmri nẽ hkaga nẽ axte hkôt pa hkêt nẽ.

⁶⁷ Hãmri nhũm tee ri mẽ kot hkaga nẽ ma mẽ mrar ã mẽ omu nẽ mẽ ixpê hkôt ixpa ho ixpa xwỳnh pē 12jê mã kapēr nẽ mẽ inhmã:

—Pa? No mẽ kajaja. Xà kot kaj mẽ urãk nẽ ixkaga nẽ ma akupỹm mra nã? Anē.

⁶⁸ Hãmri nhũm Simãw Pêtre kãm:

—Nà kot paj mẽ akaga hkêt nẽ. Kapxipix na htem amnhĩ kaxyw akôt hamaxpēr jao kęp Tĩrtũm mẽ war akuri htĩr tũm nẽ pa ho pa mã xwỳnh.

⁶⁹ Ka na pre Tĩrtũm mẽ ixwỳr amē. Jakamã na pa mẽ amnhĩ kaxyw akôt ijamaxpēr o ri ixpa. Nà kot paj mẽ aa akaga hkêt nẽ. Anē.

⁷⁰ Hãmri nhũm kuma nẽ kãm:

—Nà ixte amnhĩ kaxyw mẽ apê 12jê rênh tâ na ka mẽ atõ akwýjê hkĩnhã axtem nê Satanasti hkôt amnhĩ xãm. Anê.

⁷¹ Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anê. Mẽ inhĩ õ na pre. Nê kêp Simãw Kariot kra na pre. Tã ra kot mẽ ìhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anê.

7

Jejus tõjaja kot mẽ hkĩnh wýr amnhĩ kôt hwýr ã mẽ harênh

Matêwre 10.36, 13.57-58

¹ Tã nhũm Jejus arĩ Garirej kamã ri pa nê kormã akupým Jutej wýr mõi kêt nê. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwýr mõi kêt nê.

² Tã mẽ ixpê Ijaew mẽ ixte ixkre hkryre nhĩpêx nê hã ixkĩnh ã arĩgroja ra ahtêp o mõi. Mẽ ixkĩnhã ã na pa pre htem ixpiitã Jutej wýr axpên wýr akuprõ nê ahpýnhã ri amnhĩm ixkre hkryre nhĩpêx nê kamã ixkrĩ.

³ Jakamã nhũm Jejus tõjaja hwýr mra nê kãm nojarêt nê amnhĩ kôt kuwý nê kãm:

—E kwa tokyx pu mẽ pahkwýjê hkôt. Ka mẽ kãm aa mẽ kot mẽmoj pumunh kêt kwý ho anhýr o ri mẽ hkôt apa kê mẽ kãm akapêr mar prãm xwýnhjaja ja hã apumu.

⁴ Na ka hte jar te apimxur pyrãk o amnhĩ nhĩpêx. E kwa tokyx ma pu mẽ hkôt. Anê.

⁵ Katorxà hkôt mẽ kêp Jejus tõ htã kormã amnhĩ kaxyw hkôt hamaxpêr kêt jakamã na prem ã kãm kapêr anê.

⁶ Hãmri nhũm mẽ kãm:

—Nà kormã. Kormã ixte mẽ kãm amnhĩ to amnhĩrĩt xà hã arĩgro kormã kator kêt. Jakamã kot ka mẽ amã mẽ hkôt amrar prãm nê mãmrĩ ma mẽ hkôt mra.

⁷ Koja mẽ apumu nê kãm mẽ akurê hkêt nê. Nê mẽ akamã gryk kêt ka mẽ ri tanhmã amnhĩ nhĩpêx to ho mẽ hkôt apa. No pa kot paj mẽ hwýr mõi nê mẽ kãm mẽ kot amnhĩ tomnuj o pa hã mẽ harênh o ri mẽ hkôt ixpa nhũm mẽ tee ri amnhĩ tã inhma nê ixkamã gryk nê.

⁸ Jakamã mẽ mãmrĩ ma mẽ hkôt mõi. Kot paj kormã. Kormã ixte mẽ kãm amnhĩ to amnhĩrĩt xà hã arĩgroja kormã kator kêt.

⁹ Anê nhũm mẽ tee ri kuma hãmri nê kure nê ma mẽ hkwýjê hkôt Jutej wýr mõi. Nhũm Jejus kormã Garirej kamã ri pa hã apkati grêre.

¹⁰ Hãmri nê kormã ma hapu hã mẽ hkôt mõi. Pa mẽ hkôt ri ixpa ho ixpa xwýnhjaja ma hkôt ixpa.

Mẽ kot ahpýnhã tanhmã Jejus jarênh to hã mẽ harênh

Juãw 7.37-44, 9.22, 10.19-21, 12.42-43

¹¹ Rôm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwýnhjê kaêx ã Jejus japêr o ri mra. Nê hã axpên kukjêr o mra nê axpên mã:

—Kwa nok? Nhýri mãn we? Anê.

¹² Nhũm Ijaew piitã tanhmã axpên mã Jejus jarênh to ho pa. Nê kamã mẽ hkwýjaja harênh o:

—Nà kot amnhĩ to mex o pa xwýnh na.

Anhýr o harênh o pa. Nê kamã mẽ hkwýjaja axtem nê harê nê harênh o:

—Tk. Kot mẽ no kupyri o pa xwýnh kênã. Anê.

¹³ Nom mẽ õ pahi pymaj mẽ piitã mẽ nom tanhmã harênh to hkêt nê. ãm axpên mã pix mã tanhmã harênh to ho pa.

Jejus kot mẽ hkĩnh xwýnhjê jahkre hã harênh

Makre 3.22; Juãw 5.16

¹⁴ Tã pa mẽ mẽ hwýr pøj. Jejus mẽ pa mẽ hkôt ixpa ho ixpa xwýnhjaja mẽ hwýr pøj. Kormã mẽ hkĩnhja hapêx kêt ri. Hãmri pa mẽ Jejus kôt Tĩrtũm mã amnhĩ jarênh xà hã ixkreja wýr mra nê agjê nhũm Jejus mẽ ahkre ho nhý.

¹⁵ Hãmri nhũm mẽ inhõ pahijaja tee ri kot tanhmã mẽ ahkre hto hã kuma nê hã axpên kukja nê axpên mã:

—Kwa mẽ pahkĩnhã kot Tĩrtũm kapêr o istuda hkêt tã ã mẽ ahkre anê. Anê.

¹⁶ Hãmri nhũm amnhĩ tã mẽ kuma nê mẽ kãm:

—Nà na pa hte amnhĩ krã hkôt tanhmã ri mẽ ajahkre hto hkêt nê. ãm kot mẽ awýr inhmênh xwýnhã nhý hã na pa hte ã mẽ ajahkre anhýr o ri mẽ akôt ixpa.

17 Tã kot kaj mẽ amã Tĩrtũm kãm hprãm xà hkõt amnhĩ nhĩpêx prãm hã kot kaj mẽ ixte ý hã ixkapêr ã ixpumunh kurê kumrêx.

18 Amnhĩ krã hkõt mẽ kãm kapêr o ri mẽ pa xwýnhjaja na htem mẽ kot mẽ mar mẽ mẽ hã hpijaàm pix kaxyw tanhmã mẽ kãm kapêr to ho ri pa. No kêt pa na mẽ ate ixkapêr mar mẽ kot mẽ awýr inhmênh xwýnhhta ã apijaàm pix kaxyw na pa hte tanhmã mẽ amã ixkapêr to ho ri ixpa. Jakamã ãm hãmri na pa hte mẽ amã ixkapêr o ri ixpa.

19 –Finat Mojes na pre mẽ panhĩgêjtaja kot tanhmã amnhĩ nhĩpêx to ho pa nhũm Tĩrtũm kot mẽ kãm hã karõ jarênh o ri mẽ hkõt pa htã ka mẽ hkõt amnhĩ nhĩpêx kêt mẽ. Tã ixte hkõt amnhĩ nhĩpêx kêt ã ixto axêx mẽ mẽ ate ixpĩr kaxyw ixtã amnhĩ jarênh ri apa. Anê.

20 Hãmri nhũm mẽ ã Jejus kot mẽ kãm kapêr anhýrja ma mẽ hêx rom kãm:

–Kwa mẽ ixtõ na pa apĩr mã ka ri ã mẽ ijarênh anê? Amrakati kênã. Kwa mãn ka akrã axpã nà? Hã na ka ã ri akapêr anê. Anê.

21 Hãmri nhũm mẽ kãm:

–Nà ixte mẽ pahkõt xà hã arĩgro hã akupým mẽhõ myta ho mex jakamã na ka prem ja hã ixpumu nhũm ja mẽ apê omnuj mẽ. Nê te ixte mẽ pahkõt xà hã arĩgro hã ixpijaàm kêt xwýnh pyrãk ã ijarê.

22 Nom na ka htem ixpyrà mẽ mẽ panhõ arĩgromnu hã mẽmoj tã axapênh o ri apa. E pa mẽ amã mẽmoj jarê ka mẽ inhma. Na pre finat Mojes mẽ pamã mẽ pahte mẽ pahkra myre pê my kwryt kã jakàr ã mẽ pamã karõ. Kukamã higêjtaja kot kãm ja hã karõ xà hkõt. Jakamã na htem mẽ hkra myre hapôj mẽ hã semãn pyxi mẽ hapêx nhũm mẽ kêt mẽmy hkwrýt kã jakà.

23 Mẽ pahkõt xà hã arĩgro hã hõ kator tãã nhũm mẽ hã semãn pyxi mẽ mẽ panhõ arĩgromnu hõ hã kêt my kwryt kã hkwy krãhta. Mojes kot Tĩrtũm nhỹ hã ja hã mẽ pamã karõ xà hkõt. Jao mẽ panhõ arĩgromnu hã apê. Tã pa pre mẽ apyrã mẽ arĩgromnu hã ixapênh pê akupým mẽhõ myta ho mex ka mẽ ja hã ixpumu mẽ axtem mẽ ixtýx ri ixte amnhĩ nhĩpêx o ixpa xwýnh ã ijarê mẽ mẽ ate ixpĩr kaxyw ã amnhĩ jarê.

24 Kwa mẽ amnhĩ krã hkõt tanhmã mẽ harênh to ho ri apa hkêt mẽ. Am mẽ kot tanhmã amnhĩ nhĩpêx to ho pa hã mẽ omu mẽ ajamaxpêr o: “Kwa xà we Tĩrtũm kãm ja mex nà?” Anhýr o mãn kêt mẽ ajamaxpêr mẽ rĩ kormã tanhmã mẽ harênh to. Anê.

25 Hãmri nhũm Jerujarê nhõ xwýnh kwýjaja ja hã kuma mẽ tee ri hkukamã hamaxpêr. Hãmri mẽ hã axpên kukja mẽ axpên mã:

–Kwa xà tãm na mẽ panhõ pahijaja mẽ kot hpĩr kaxyw hã amýnê?

26 Ota jar mẽ pakamã ri pa htã nhũm mẽ ãm omu mẽ kãm tanhmã mẽ hkêt mẽ. Mãn mẽ ãm hãmri kêt Kris ã hkamnhix jakamã kapêr ma mẽ ãm kuma mẽ kêt Kris ã tanhmã ho hkêt mẽ. Anê.

27 Hãmri nhũm mẽhõja kuma mẽ kãm:

–Tk. Nà kêt Tĩrtũm kot mẽ pahwýr mẽnh xwýnhre hã. Kêt Najare nhõ xwýnh kênã. Mẽ pahte hipêêxà mẽ katorxà wa omunh mex. No kêt Tĩrtũm kot mẽ pahwýr mẽnh mã xwýnhhta koja xep mẽ pahwýr kato pu mẽ nhỹhýnh htêm xà hkõt omunh kêt mẽ. Anê.

28 Rôm nhũm Jejus arĩ Tĩrtũm mã amnhĩ jarênh xà hã ixkreja kamã mẽ ahkre ho nhỹ. Jakamã mẽ kot axpên mã harênh ã amnhĩ tã mẽ kuma mẽ mẽ kãm:

–Xà mẽ ate aprĩ hã ixpumunh mẽ nhỹhýnh ixtêm xà hkõt ixpumunh? Nà mẽ ate ja hã ixpumunh kêt. Na pa pre amnhĩ hkrã hkõt mẽ awýr inhmõr kêt mẽ. Na pre mẽhõ mẽ awýr inhmẽ. Nom kot mẽ awýr inhmênh xwýnhja kormã mẽ ate omunh kêt.

29 ãm papxipix na ixte omunh. Kurũm ixwryk xwýnh na pa. Kot mẽ awýr inhmênh nhũm kurũm ixwryk jakamã ixte ixprĩ hã omunh par. Anê.

30 Hãmri nhũm mẽ hkwyjaja tee ri ã kot amnhĩ jarênh anhýrja ma mẽ ri axpên mã harênh o:

–Kwa Tĩrtũm kot mẽ pahwýr mẽnh ã kot amnhĩ to hêx kênã. E kwa pu mẽ ã kot amnhĩ to hêx anhýr ja ã unê mẽ haxà nà?

Anhýr o axpên mã hã amýnê. Nom kormã mẽ kot unênh mẽ haxàr xà hã arĩgroja kormã kator kêt jakamã nhũm Tĩrtũmja mẽ mẽ omunh mex mẽ nhũm mẽ ãm kãm unênh prãm kapry.

³¹ No nhũm mẽ hkwyja mẽ kurom kuma nẽ kęp Tĩrtũm kot mẽ pakaxyw ăm xwỳnh ă omunh kurê kumrêx nẽ amnhĩ kaxyw hkôt hamaxpêr. Hãmri nẽ axpên mã harênh o:

—Kwa măn kęp Tĩrtũm kot mẽ pahwỳr mẽnh mã xwỳnhhta măn nà? Mẽ pahtô kot pu uràk nẽ aa mẽ kãm mẽ kot mẽmoj pumunh kêt o anhỳr rax o ri papa? Amrakati kumrêx. Nà pêr tãm kênã. Anê.

Pôristi hkwy kot Jejus pynênh kaxyw ă mẽ harênh

³² Nhũm prem ă axpên mã Jejus jarênh anhỳr o kuhê hãmri nhũm Parijew nhô xwỳnhjaja hã mẽ kuma. Hãmri nẽ patre krăhtũmjê mẽ mẽ ma Jejus wỳr mẽo pôristi hkwy rê nẽ mẽ kãm:

—E mẽ ma Jejus wỳr mra nẽ unê nẽ man akupỳn o tẽ. Anê.

³³ Hãmri nhũm mẽ kuma nẽ ma hwỳr mra nẽ omu nom tokyx unênh kêt nẽ. Kormã kapêr ă mar o kuhê. Nhũm Jejus arĩ mẽ kãm kapêr o xa nẽ mẽ kãm:

—Nà kot paj jar mẽ akôt ri ixpa hã mytwrỳ grêre hãmri nẽ ma akupỳm kot mẽ awỳr inhmênh xwỳnhhta wỳr api.

³⁴ Ka mẽ tee ri jar ijapêr o ri apa nom nhỹri ixpumunh kêt nẽ. Nẽ ma inhmôr xàta wỳr kot kaj mẽ atô ma ixkôt amôr kêt nẽ. Anê.

³⁵ Hãmri nhũm mẽ tee ri ă kot amnhĩ jarênh anhỳrja ma nẽ axpên mã:

—Kwa nhỹhỹm koja we ma mỗ pu mẽ hkôt papa hkêt nẽ? Măn mẽ pahkwỳjaja kot Gresjê kamã mẽ pa xwỳnhjê hwỳr koja ma mỗ nẽ hpănã mẽ hkôt mẽ ahkre ho pa nà? Hã na ă mẽ pamã amnhĩ jarênh anê?

³⁶ Mo na ri mẽ pahte tee ri hapêr o papa hã mẽ pajarê nẽ mẽ pahte hkôt pamrar kêt ă mẽ pajarê? Anê.

Tĩrtũm Karô te kęp gô nyw pyrăk ă harênh Juāw 4.13-14; Apokarip 22.1, 22.17

³⁷ Tã nhũm ra mẽ hkĩnhja hapêx kaxyw hitep xà hã arĩgro maatija kato. Jakamã nhũm Jejus kànãmã xa nẽ kỳxpê mẽ hpikuprôn h xwỳnhjê mã kapêr nẽ mẽ kãm:

—E te mẽ amã kôr o apa pyrăk xwỳnhjaja. Mẽ amnê ixwỳr akuprô. Kot kaj mẽ amnhĩ kaxyw ixkôt ajamaxpêr pa tanhmã mẽ ato ka mẽ apê Tĩrtũm mẽ wa ixri atĩr tũm nẽ apa ho apa mã xwỳnh.

³⁸ —Kot kaj mẽ ja hã amnhĩ pumu hãmri nẽ ma mẽ kãm ixkapêr jarênh o ri mẽ hkôt apa. Te mẽ kãm kôr nhũm mẽ ate mẽ kãm gô hkwy nhũm mẽ kot ho hkôm pyrăk o mẽ hipêx o ri mẽ hkôt apa. Hãmri nhũm mẽ ama nẽ mẽ apyrà nẽ amnhĩ kaxyw ixkôt hamaxpêr. Pa ixte tanhmã mẽ atoja pyrà nẽ tanhmã mẽ ho nhũm mẽ apyrà nẽ kęp wa ixri htĩr tũm nẽ pa ho pa mã xwỳnh. Anê.

³⁹ Nhũm pre ă Jejus mẽ kãm kapêr anê. No ăm hã kuxi nẽ mẽ kãm kapêr nẽ hprĩ hã harênh kêt nẽ. Tĩrtũm Karô kot nhỹrmã mẽ kot amnhĩ kaxyw Jejus mã hamaxpêr xwỳnhjê karô mã gjêxja nhũm ă mẽ kãm hã kuxi nẽ harênh anê. No kormã akupỳm kaxkwa hwỳr àpir nẽ mex o mex nẽ hkrĩ hkêt jakamã kormã mẽ hwỳr Karô rên h kêt nẽ.

Mẽ kot ahpỳnhã tanhmã Jejus jarênh to hã mẽ harênh

Juāw 7.11-13, 7.25, 10.19-21

⁴⁰ Hãmri nhũm mẽ kot Jejus mar o hkrĩ xwỳnhjaja ă kapêr anhỳrja ă kuma nẽ ahpỳnhã tanhmã harênh to nẽ harênh o:

—Kwa finat Mojes pyrà nẽ kęp Tĩrtũm nhỹ hã kapêr jarênh o pa xwỳnh na nà? Anê.

⁴¹ Nhũm kamã mẽ hkwyjaja mẽ kãm:

—Nà Tĩrtũm kot mẽ pakaxyw ăm xwỳnhhta na. Anê.

Nhũm kamã mẽ hkwyjaja ja hã mẽ kuma nẽ mẽ kãm:

—Tk. Nà kęp Garirej nhô xwỳnh kênã kot kêt Tĩrtũm mẽ pakaxyw ăm.

⁴² Tĩrtũm kapêr ă kagà htũm kot kęp Garirej nhô xwỳnh ă harênh kêt. Kęp Pahi Tawi hkanrêhã hkagrôt nyw jakamã koja uràk nẽ Jutej kamã krĩ pê Perêj kamã kato. Jao koja uràk nẽ kęp Jutej nhô xwỳnh.

Anhỳr o ri axpên mã harê. Mẽ kot htỳx Jejus pika pê Garirej kamã kator ă hkamnhĩx jakamã ă axpên mã harênh anê. Nom pika pê Jutej kamã na pre kato. Krĩ pê Perêj kamã. Tã no nhũm mẽ hkwyjaja ja hã mar kêt jakamã kęp Tĩrtũm kot mẽ pahwỳr mẽnh xwỳnh kêt ă hkamnhĩx.

⁴³ Jakamã nhũm mẽ ă ahpỳnhã axpên mã harênh anê.

⁴⁴ Nhũm mẽ hkwyjaja ra kot unênh kaxyw tã tokyx unênh kêt nẽ.

*Pôristi kot Jejus pynênh kêt ã mẽ harênh
Matêwre 7.28-29*

⁴⁵ Tã nhũm patre nhõ pôristijaja. Mẽ kot Jejus pynênh mã hwỳr mrar tã hãmri ã kapêr anhỳrja ã kuma nê tee ri hamaxpêr nê unênh kêt nê. Nê awjanã nê ahte ỹ kamã ma akupỹm patre krãhtũmjê mẽ Parijew nhõ xwỳnhjê hwỳr mra. Hãmri nhũm mẽ omu nê mẽ kãm:

—Pa nok? Tanhmã na ka mẽ amnhĩ to nê unênh nê ho amõr kêt nê? Anê.

⁴⁶ Hãmri nhũm mẽ kãm:

—Nà na pa mẽ unênh kêt nê. Kapêr mex kênã. Te kot mẽ pakapêr pyrãk kêt jakamã pa mẽ tee ri kapêr ã kuma nê unênh kêt nê. Anê.

⁴⁷ Hãmri nhũm Parijew nhõ xwỳnhjaja mẽ kuma nê mẽ kãm:

—Tk. Kwa mãn ka mẽ ra mẽ urãk nê tanhmã kot amnhĩ to hêx toja ma nê hkõt ajamaxpêr nã?

⁴⁸ Mẽ ixpê Parijew nhõ xwỳnhjaja nê mẽ panhõ pahijaja na pa htem hkõt ijamaxpêr kêt nê.

⁴⁹ No kêt mẽ kot mar nê hkõt hamaxpêr xwỳnhhtijaja na htem mẽ ixkĩnhã finat Mojes kapêr mar kêt nê. ãm Jejus kapêr pix na htem kuma nê hkõt hamaxpêr. Mỳrapê koja Tĩrtũm tanhmã mẽ homnuj tỳx to nhũm mẽ rĩ amnhĩ pumu. Anê.

*Nĩkotê kot Jejus xyr pê kapêr ã harênh
Juāw 3.1-21*

⁵⁰ Hãmri nhũm Nĩkotêja mẽ mar o xa. Mẽ urãk nê kêp Parijew nhõ xwỳnh tã na pre ra kamãt õ hã Jejus wỳr tẽ nê kãm kapêr. Jakamã tee ri hã mẽ kapêr ma hãmri nê yr pê mẽ kãm kapêr nê mẽ kãm:

⁵¹ —Tk. Kwa kormã mẽ pahte pahprĩ hã kapêr mar nê tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhỹ hã mẽ panhĩgêjtjê mã ja jarênh o:

Kêr ka mẽ aprĩ hã mẽ kapêr ã mẽ ama nê mẽ kot amnhĩ nhĩpêx ã mẽ omu nê rĩ kormã tanhmã mẽ harênh to.

Anhỹr tã ka mẽ kormã aprĩ hã Jejus kot amnhĩ nhĩpêx ã omunh kêt tã ra kot amnhĩ tomnuj xwỳnh ã harê. Anê.

⁵² Hãmri nhũm mẽ tee ri kuma nê kãm:

—Tk. Kwa xã we urãk nê apê Garirej nhõ xwỳnh hã na ka ã yr pê akapêr anê? Xã Tĩrtũm kapêr ã kagã htũm kot Garirej

nhõ xwỳnhjê hõ kêp ỹ hã kapêr jarênh o pa xwỳnh ã harênh? Nã ã kot harênh anhỹr kêt. Anê.

⁵³ Nhũm mẽ ã Nĩkotê mã kapêr anê hãmri nê anhrã nê Tĩrtũm nhõrkwỹ rũm hapõj nê ma akupỹm õrkwỹ hwỳr àhkurê ho mra.

8

*Mêhõ ni kot nhãm mẽ mjên o amnhĩkati hã
harênh*

Xiakre 2.10-13

¹ Tã nhũm Jejus Tĩrtũm nhõrkwỹ kamã mẽ ahkre hpa hãmri nê kato nê ma hixêr prêk pê Oriwêhti hwỳr tẽ. Hãmri nê hã api nê nhỹri nõ nê ra gõr.

² Tã nhũm apkati nê myt kator o mõr mẽ nhũm kãnhmã nhỹ nê akupỹm wrỳ nê Tĩrtũm mã amnhĩ jarênh xã hã ixkre hwỳr tẽ. No ãm kormã ixkre pu hã kahê hkre kamã nhỹ. Nhũm krĩ nhõ xwỳnhjaja omu nê hã htũ rax nê nhũm tanhmã mẽ ahkre hto ho nhỹ.

³ Hãmri nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja hwỳr mêhõ nija o tẽ. Na ra ham mêhõ pê mjên o amnhĩkati ho nõ nhũm mẽ ja hã omu nê unê nê hpa hã kupy nê ma Jejus wỳr hkjênh o mõ. Hãmri nê mẽ kot mar o kuhê xwỳnhjê kutã ãm nhũm xa.

⁴ Hãmri nhũm mẽ Jejus mã:

—E ot pa mẽ awỳr jahti ho tẽ ka omu. Na ham mêhõ pê mjên o amnhĩkati ho nõ. Pa mẽ ja hã omu nê unê nê man awỳr o tẽ.

⁵ E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêjtjê mã ja jarênh o:

Koja mênijê hõ axtem nê nhãm mêhõ pê mjên o amnhĩkati ho nõ ka mẽ ja hã omu nê apiitã ahpỹnhã kên rũnh jamỹ nê ho htak o apĩ.

Anhỹr o kot harênh. No ka? Tanhmã kot kaj mẽ inhmã ja jarênh to? Tanhmã kot paj mẽ hipêx to nhũm amã mex nê? E mẽ inhmã tanhmã mẽ ixte hipêx to jarê. Anê.

⁶ Nhũm mẽ ã hêx rom nija ã Jejus kukjêr anê. Kot mẽ kot hpĩr nê mẽ kãm kapêr nhũm mẽ kot hã mar nê mẽ hkrãhtũmjê hwỳr mõr nê kãm kot Mojes kapêr kwỹm ri mẽ ahkre hã harênh kaxyw nhũm mẽ hêx rom ã hkukjêr anê. Hãmri nhũm mẽ kuma

ně tanhmã hã mẽ kãm nẽ hkêt nẽ. ãm htỳx hikôt nẽ ìhkrakrà ho pyka kagà ho nhỹ.

⁷ Nhũm mẽ tee ri omu nẽ axte hã hkukja nhũm kànhmã xa nẽ mẽ kãm:

—Tõe. Nà kot ka mẽ atõ aa tanhmã amnhĩ tomnuj to hkêt kumrẽx ã amnhĩ pumu hãmri nẽ kam nẽ rĩ kaxyw kẽn õ py nẽ akumrẽx ho hkura. Kê akwỳjaja rĩ kormã akôt hkwỳ jamỳ nẽ ho htak. Anẽ.

⁸ Hãmri nẽ akupỹm hikôt nẽ pyka kagà ho nhỹ.

⁹ Hãmri nhũm mẽ tee ri kapërja kôt kuma hãmri nẽ mẽ kot mar o kuhê xwỳnhjê rũm anhgrà nẽ ma mra. Mẽ piitã mẽ kot amnhĩ tomnuj xwỳnh ã amnhĩ pumunh mex jakamã tee ri ã kot mẽ kãm kapër anhỹrja ma nẽ anhgrà nẽ ma akupỹm hpỹnh nẽ axpẽn kôt mrar o xa. Mẽhpigêt kumrẽx nẽ hpãnhã mẽ nywjaja nhũm mẽ hpỹnh nẽ ma axpẽn kôt mrar o ãm kãm hapêx. Nhũm Jejus mënija pix wa ahte mẽ kot mar xwỳnhjê kutã wa arĩk.

¹⁰ Hãmri nhũm Jejus kànhmã xa nẽ nita mã kapër nẽ kãm:

—Pa? No mẽ kot ato kapër xwỳnhhta mẽ? Xà na mẽhõ kẽn o akuranh kêt nẽ? Anẽ.

¹¹ Nhũm kãm: “Ma amrakati.” Anẽ nhũm kãm:

—Tõe. Nà kot paj ijaxwỳja tanhmã ato hkêt nẽ. E mamrĩ ma akupỹm anhõrkwỳ hwỳr tẽ. No ãm kêt ka axte ã amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

Jejus kot hprĩ hã amnhĩ jarẽnh

Juãw 1.4; Rõmãn 13.12-14; Epes 5.8-14; Wam Tesarõn 5.5-8

¹² Tã nhũm arĩgro hõ hã nhũm Jejus axte Tĩrtũm nhõrkwỳ hwỳr tẽ nẽ kamã mẽ ahkre ho nhỹ nẽ mẽ kãm:

—Nà te ixpê mẽ piitã mẽ õ kanê pyræk. Na hte kanêja mẽ kãm hirã mex nẽ nhũm mẽ kamã rĩt mex o pa. Jao kamàt kô kamã ri pa hkêt nẽ. Ja pyrã nẽ na pa hte Tĩrtũm kot amnhĩ nhĩpêx o amnhĩrĩt mex o ri ixpa. Kot ka mẽ atõ amnhĩ kaxyw inhmã ajamaxpër nẽ ixkôt amnhĩ xãm hãmri nẽ tanhmã amnhĩ tomnuj to ho apa hkêt nẽ. ãm Tĩrtũm kãm hprãm xà kôt pix mã tanhmã ri amnhĩ nhĩpêx to ho ri apa. Jao te ate kanê hpõk nhĩrã kamã arĩt mex pyrã nẽ apê wa ixri atĩr tũm nẽ apa ho apa mã xwỳnh. Anẽ.

¹³ Hãmri nhũm Parijew nhõ xwỳnhjaja tee ri ã kapër anhỹr ã kuma nẽ kãm:

—Tk. Kapxipix na ka ã amnhĩ jarẽnh anẽ. Mẽhõ kot ã ate amnhĩ jarẽnh anhỹrja kôt kot mẽ inhmã ajarẽnhre hã. Jakamã kot paj mẽ ama nẽ ãm ama. Anẽ.

¹⁴ Hãmri nhũm mẽ kãm:

—Nà mẽhõ kot ã ijarẽnh anhỹr kêt tã no ãm hãmri na pa mẽ amã amnhĩ jarẽ. Ixêx kêt. Mẽ arom ixte nhỹhỹnh ixwryk xà hã amnhĩ pumunh mex. Nẽ mẽ arom ma akupỹm nhỹhỹm ixàpir xà hã amnhĩ pumunh mex. Jakamã ãm hãmri na pa ã mẽ amã amnhĩ jarẽnh anẽ.

¹⁵ Na ka htem amnhĩ krã hkôt tanhmã ri ijarẽnh to. No pa na pa kormã amnhĩ swar tanhmã mẽ ajarẽnh to hkêt nẽ.

¹⁶ Ixte tanhmã mẽ ajarẽnh to ronhỹx pa ãm hãmri mẽ ajarẽ. Nhỹx pa ãm papxipix amnhĩ krã hkôt tanhmã mẽ ajarẽnh to hkêt nẽ. Nhỹx mãânẽn Inhĩpêxà pê kot mẽ awỳr inhmẽn xwỳnhhta inhĩhkõ hã pa wa ãm hãmri axpẽn kôt tanhmã mẽ ajarẽnh to. Mẽ ate amnhĩ to mex ã mẽ ajarẽ rỳ mẽ ate amnhĩ tomnuj ã mẽ ajarẽ.

¹⁷ Tĩrtũm kapër ã kagà htũm kot ja jarẽnh kot:

Koja mẽhõ wa hamẽxkrut nẽ tanhmã mẽmoj jarẽnh to nẽ ãm axpẽn kôt harẽnh o htipxi. Hã kot kaj mẽ wa ama nẽ ãm hãmri wa kot harẽnh kôt ajamaxpër kurê kumrẽx.

¹⁸ Anhỹr o kot harẽnh. Tã pa ã amnhĩ jarẽnh anẽ nhũm Inhĩpêxà kot mẽ awỳr inhmẽn xwỳnhhta mãânẽn ã ijarẽnh anẽ. Wa ixpijakrut tã ã wa ixte axpẽn kôt amnhĩ jarẽnh anhỹr jakamã kwa mẽ ixte tanhmã amnhĩ jarẽnh toja ma nẽ ixkôt ajamaxpër kêt wehe. Anẽ.

¹⁹ Nhũm pre ã Jejus mẽ kãm kapër anẽ. Hãmri nhũm mẽ kuma nẽ kãm:

—No nhỹri na we anhĩpêxà ja? Anẽ.

Hãmri nhũm mẽ kãm:

—Nà mẽ ate Inhĩpêxà pumunhre hã. Mẽ ate aprĩ hã ixpumunh ronhỹx ka mẽ mãânẽn aprĩ hã Inhĩpêxà pumunh mex kurê kumrẽx. Nom mẽ ate ixpumunh mex kêt jakamã na ka mẽ mãânẽn omunh mex kêt nẽ. Anẽ.

²⁰ Nhũm pre ã Jejus mẽ kãm kapër anẽ. Arĩ Tĩrtũm mã amnhĩ jarẽnh xà hã ixkreja kamã mẽ ahkre ho xa. Mẽ kot kàxpore

gjênh xà kuri mẽ ahkre ho xa. Nhũm mẽ kãm hkurê xwýnhjaja tee ri kot tanhmã mẽ ahkre htoja ma nê kãm unênh nê haxàr prãm nê. Nom kormã mẽ kot ã hipêx anhÿr ã arĩgro kormã kator kêt jakamã nhũm Tĩrtũmja nê mẽ omunh mex nê nhũm mẽ ãm kãm unênh prãm kaprÿ.

²¹ Hãmri nhũm Jejus arĩ mẽ kãm kapêr o xa nê mẽ kãm:

—Nà kot paj nhÿrmã mẽ arũm ixkato nê ma akupÿm api. Ka mẽ tee ri ijapêr nom nhÿri ixpumunh kêt nê. Hãmri nê mẽ ate amnhĩ tomnuj o apa rãhã ty nê mẽ atõ ixwÿr axàpir kêt nê. Anê.

²² Hãmri nhũm Ijaew nhõ pahijaja tee ri ã kapêr anhÿrja ã kuma nê axpên mã hã hpêr o pikênh o kuhê nê axpên mã:

—Kwa mãn ra kot amnhĩ pĩr kaxyw ã na ri hkôt mẽ paxàpir kêt ã mẽ pajarênh anê nà? Anê.

²³ Hãmri nhũm amnhĩ tã mẽ kuma nê mẽ kãm:

—Nà mẽ kajaja mẽ apê pyka nhõ xwýnh na ka mẽ. No pa na mẽ arom ixpê kaxkwa nhõ xwýnh jakamã mẽ pajamaxpêr kot axpên pyræk kêt.

²⁴ Kot kaj mẽ ixpê kaxkwa rũm ixwÿrk xwýnh ã ixpumu nê amnhĩ kaxyw inhmã ajamaxpêr nê ixkôt amnhĩ xunhwÿr kêt hã kot kaj mẽ ate amnhĩ tomnuj o apa rãhã nhÿrmã atyk o mẽ kamjaja Tĩrtũm mã amnhĩ pãnhã amnhĩre. Anê.

²⁵ Nhũm Jejus ã mẽ inhõ pahijê hkukamã mẽ kot amnhĩ nhĩpêx jarênh anê nhũm mẽ tee ri amnhĩ tã kuma nê kãm:

—Kwa mẽ atõ na ka we ri ã mẽ inhmã akapêr anê? Anê.

Hãmri nhũm mẽ kãm:

—Nà ra ixte mẽ amã amnhĩ jarênh kênã. Xàn ka mẽ kormã aprĩ hã inhmar kêt nê?

²⁶ Kot paj nhÿrmã mẽ amã mẽ ate amnhĩ tomnuj piitã ho amnhĩrit pa. Na pa kot mẽ awÿr inhmênh xwýnhhta pix xô ri tanhmã mẽ amã ixkapêr to ho ri ixpa. ãm hãmri na hte tanhmã mẽmoj jarênh tõ. Na hte hêx kêt nê. Anê.

²⁷ Nhũm pre ã Jejus mẽ kãm Hipêêxà kot mẽ hwÿr mẽnh ã harênh anhÿr tã no nhũm mẽ Hipêêxà kêp Tĩrtũm ã hkôt hamaxpêr kêt nê.

²⁸ Jakamã nhũm mẽ kãm:

—Nà koja mẽ nhÿrmã pĩ kahpa hã inhõ ka mẽ rĩ kormã aprĩ hã ixpê Tĩrtũm rũm mẽ awÿr ixwÿrk xwýnh ã ixpumu. Nê ixte amnhĩ krã hkôt ixkapêr o ri ixpa hkêt ã ixpumu. Nê ãm Inhĩpêêxà xô ri ixprĩ hã ixkapêr o ri ixpa hã ixpumu.

²⁹ Ixte kãm hprãm xà hkôt pix mã tanhmã ri amnhĩ nhĩpêx to ho ri ixpa jakamã na hte ixtãnopxar mex o ixkôt pa ho pa. Koja aa ixkaga hkêt nê. Anê.

³⁰ Hãmri nhũm mẽ hkwyja kuma nê hkwyjê rom kapêr kôt hamaxpêr

³¹ nhũm amnhĩ tã mẽ omu nê mẽ kãm:

—Nà ãm hãmri na ka mẽ tã ixkôt aja-maxpêr. Tã kêr ka mẽ ixkôt amnhĩ xunhwÿr nê ixkapêr kôt pix mã ri amnhĩ nhĩpêx mex o ri apa. Hãmri pa ja hã mẽ apumu nê mẽ apê ixkwÿ kumrêx ã mẽ ajarê.

³² ãm hãmri na pa hte ã ixkapêr anhÿr o ri ixpa. Tã kot kaj mẽ ixkôt ri amnhĩ nhĩpêx o ri apa hãmri nê aprĩ hã inhmar tÿx nê. Nom na hte kormã mẽmoj kot amnhĩ tã mẽ ato htÿx pyræk o mẽ anhĩpêx ka mẽ tee ri amnhĩ krã hkôt kãm anhÿrer prãm kaprÿ. Tã kot kaj mẽ ixkôt amnhĩ xunhwÿr nê ixkôt ri amnhĩ nhĩpêx hãmri nê Tĩrtũm nhÿ hã tãm amnhĩ nhĩpêx. Jao ÿ hã ate amnhĩ tomnuj mã anhÿre. Anê.

³³ Nhũm pre ã Jejus mẽ kãm kapêr anê hãmri nhũm mẽ tee ri kuma nê kãm:

—Kwa mẽ ixpê mẽ pahpàr krax finat Apraãw kanrêhã htãmnhwÿr kênã. Na pre mẽmoj te kot amnhĩ tã ho htÿx pyræk o hipêx kêt nê. Jakamã mẽmo kot we mẽ ixpê hkanrêhã htãmnhwÿjê ho htÿx ka we ri ã mẽ ijarênh anê? Nà amrakati kênã. Tã kwa mon ka ã mẽ ijarênh anê? Anê.

³⁴ Hãmri nhũm Jejus hprĩ hã mẽ kãm aw-jarê nê mẽ kãm:

—Kwa mẽ ixkapêr ma nê amnhĩ krãm haxàr tÿx nê. Nà mẽ kot amnhĩ tomnuj o mẽ pa xwýnhjaja te mẽ kot amnhĩ tomnuj tãm ri kot amnhĩ tã mẽ ho htÿx pyræk o mẽ hipêx. Jakamã nhũm mẽ urer kêt rãhã nê pa ho pa. Nê ã amnhĩ nhĩpêx anhÿr rãhã ho pa.

³⁵ Jakamã ixkĩnhã mẽ kêp Tĩrtũm kwÿ hkêt. No pa na ixpê Tĩrtũm Kra jakamã mãânên ixpê hkwy na pa.

³⁶ Tã mẽ kajaja. Kot kaj mẽ ixpê Tĩrtũm Kra hã ixkôt amnhĩ xunhwÿr hã kot pa

tanhmã mẽ ato ka mẽ ixpyrà nẽ apê wa ixkwỳy. Hãmri nhũm mẽ ate amnhĩ tomnuj te kot mẽ amã urer pyræk o mẽ anhĩpêx ka mẽ ra wa ixkôt amnhĩ nhĩpêx o ri apa. Anẽ.

Mẽ kêp Tĩrtũm kra hkêt xwỳnhjê jarẽnh

³⁷ Nhũm Jejus arĩ mẽ kãm kapêr nẽ mẽ kãm:

—Nà ãm hãmri na ka mẽ apê finat Apraãw kanrêhã htàmnhwỳ hã amnhĩ jarẽ. Nom mẽ apê hkanrêhã htàmnhwỳ htã uræk nẽ amnhĩ kaxyw Tĩrtũm kôt ajamaxpêr kêt nẽ. Jakamã na ka htem ixkapêr ma nẽ ãm ama nẽ ixkaga. Nẽ axtem nẽ ixpĩr mã. Kop apu Apraãw arĩ mẽ akamã pa ronhỹx ã inhĩpêx anhỹr kêt nẽ.

³⁸ Na pa hte Inhĩpêêxà hkôt pix mã ri amnhĩ nhĩpêx o ri ixpa. No mẽ kajaja axtem nẽ mẽ ate nhãm mẽ kapêr kôt amnhĩ nhĩpêx jakamã na ka htem ixkĩnhã Inhĩpêêxà hkôt amnhĩ nhĩpêx kêt nẽ. Anẽ.

³⁹ Hãmri nhũm mẽ tee ri amnhĩ tã kuma nẽ kãm:

—Tk. Kwa mon ka ã mẽ ijarẽnh anẽ? Mẽ ixte Apraãw kôt amnhĩ nhĩpêx o ri ixpa kênã. Anẽ.

Hãmri nhũm mẽ kãm:

—Nà. Mẽ ate hkôt ri amnhĩ nhĩpêx o apa ronhỹx ka mẽ uræk nẽ Inhĩpêêxà kapêr kôt amnhĩ nhĩpêx.

⁴⁰ No na ka mẽ ra axtem nẽ ixpĩr mã. ãm hãmri na pre Tĩrtũm inhmã awjarẽ pa ô ri tanhmã mẽ amã mẽmoj jarẽnh to ho ri ixpa htã ka mẽ ra axtem nẽ ixpĩr mã. Kwa xà na pre Apraãwja ã mẽ hipêx anhỹr o pa? Nà na pre ã mẽ hipêx anhỹr kêt nẽ.

⁴¹ Mẽ ate hkôt amnhĩ nhĩpêx xwỳnhhta axtem na. Kêp Apraãw kêt. Nẽ mããnẽn kêp Tĩrtũm kêt. Anẽ.

Hãmri nhũm mẽ tee ri kuma nẽ kãm:

—Tk. Kwa nà ã mẽ ijarẽnh anhỹr kêt nẽ. Mẽ ixte Apraãw kôt amnhĩ nhĩpêx xwỳnh kênã. Tã ka ri axtem nẽ ã mẽ ijarẽnh anẽ. Mẽhõ hkôt kot pa kêt wem ri axtem amnhĩ nhĩpêx o ri ixpa? Anẽ.

⁴² Hãmri nhũm mẽ kãm:

—Nà mẽ ate Apraãw kôt amnhĩ nhĩpêx ronhỹx ka mẽ ixpumu nẽ uræk nẽ amã ixprãm nẽ. Apraãw kot hkôt amnhĩ nhĩpêx o pa xwỳnhhta tãm kot mẽ awỳr inhmẽnh nhũm mẽ awỳr ixwrỳk kênã. Na pa pre

amnhĩ krã hkôt man mẽ awỳr ixwrỳk kêt nẽ. Tãm na pre mẽ awỳr inhmẽ pa wrỳ.

⁴³ Kwa mon ka mẽ aprĩ hã ixkapêr mar mex kêt nẽ? Nà mẽ amã ixkôt amnhĩ nhĩpêx prãm kêt jakamã na ka mẽ tee ri ixkapêr ma nẽ aprĩ hã mar mex kêt nẽ.

⁴⁴ Mẽ ate hkôt amnhĩ nhĩpêx xwỳnhhta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwỳnhjê hpãm maati na. Nẽ kêp mẽ kãm hêx o pa xwỳnhjê pãm maati na. ã kot amnhĩ nhĩpêx kot anhỹr. Nẽ kãm mẽ kapêr mex mar prãm kêt o pa. Nẽ ãm hêx pix o pa jakamã kêp mẽ hêx xwỳnhjê pãm. ã kot amnhĩ nhĩpêx anhỹr xwỳnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hãmri ixkapêr o ri ixpa. No mẽ kajaja mẽ apê hêx nhi xwỳnh maati ja hkra jakamã mẽ amã ixkapêr mar prãm kêt.

⁴⁶ Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwỳnh na pa. Nẽ tãm ixkapêr o ri ixpa xwỳnh tã ka mẽ inhma nẽ ãm inhma nẽ ixkôt ajamaxpêr kêt nẽ. Kwa mon ka mẽ ja hã ixpumunh nẽ ixkôt ajamaxpêr nẽ ixkôt amnhĩ xunhwỳr kêt nẽ?

⁴⁷ Tĩrtũm krajaja na htem kapêr mar tỳx nẽ hkôt amnhĩ nhĩpêx o pa. No mẽ apê hkra hkêt jakamã mẽ amã kapêr mar prãm kêt. Anẽ.

Mẽ kot Jejus kêp Satanasti hkwỳ hã harẽnh

⁴⁸ Hãmri nhũm mẽ ã Jejus kot mẽ harẽnh anhỹrja ma nẽ kamã gryk tỳx kumrêx. Hãmri nẽ kãm:

—Tk. Kwa ate amnhĩ tomnuj o apa xwỳnhhti kênã. Ra Satanasti hkwỳ pẽ mẽkarõmnuti tanhmã kot akrã hto jakamã na ka ã mẽ inhmã akapêr anẽ. Anẽ.

⁴⁹ Hãmri nhũm mẽ kãm:

—Nà mẽkarõmnuti kot tanhmã ixto hkêt. Na pa hte Inhĩpêêxà hã ixpijaàm pix o ri ixpa. Tã mẽ ate ixkĩnhã hã apijaàm kêt jakamã mããnẽn pa ixtã apijaàm kêt nẽ.

⁵⁰ Na pa hte amnhĩ krã hkôt mẽ piitã mẽ kot ixtã hpijaàm prãm xaj tanhmã mẽ kãm ixkapêr to hkêt nẽ. No mẽ piitã mẽ kot ixtã hpijaàm o paja na Inhĩpêêxà kãm hprãm. Tã koja nhỹrmã amnhĩ nẽ ixtã mẽ hpijaàm

kêt xwýnhjaja mẽ kot amnhĩ xà htỳx kamã hamak tũm xàta wỳr mẽ rẽn pa.

⁵¹ —Nẽ kot ka mẽ atõ wa ixkapẽr ma nẽ ixkõt amnhĩ nhĩpêx. Hã kot kaj wa ixri atĩr tũm nẽ apa ho apa. Kwa mẽ ixkapẽr ma nẽ amnhĩ krãm haxàr tỳx nẽ. Anẽ.

Nhũm pre ã Jejus Ijaew nhõ pahijê mã kapẽr anẽ.

⁵² Nhũm mẽ kuma nẽ kãm:

—Kwa pẽr ãm hãmri na ka hte Satanasti nhỹ hã ã mẽ htĩr tũm nẽ mẽ pa ho pa hã mẽ harẽn anhỹr o ri axêx o ri apa. Finat Apraãw na pre ri paa nẽ ty. Tã mẽ kot Tĩrtũm nhỹ hã kapẽr jarẽn o mẽ pa xwýnhjaja na prem urak nẽ ri paa nẽ mããnẽn htyk pa. Tã ka axtem nẽ mẽ kot akapẽr kõt amnhĩ nhĩpêx o mẽ pa xwýnhjaja ari htĩr tũm nẽ pa ho pa hã mẽ harẽ. Nà na ka ãm mẽ inhmã mẽ ho axêx o xa.

⁵³ Na pre mẽ pahpãm Apraãwja kot amnhĩ to rax tã ty nẽ hapêx. Nhũm mẽ kot Tĩrtũm nhỹ hã kapẽr jarẽn xwýnhjaja mããnẽn mẽ kot amnhĩ to rũnh tã htyk pa nẽ hapêx. Mẽ kot amnhĩ to rũnh tã htyk pa nẽ hapêx kẽnã kot kêt mẽ tanhmã amnhĩ to nẽ ari htĩr tũm nẽ pa. ãm mẽ ixte akapẽr mar nẽ atã xpijaãm pix prãm xàj na ka ã mẽ inhmã mẽ htĩr tũm nẽ pa hã mẽ harẽn anẽ. Nom na ka ã mẽ harẽn anhỹr kaprỳ. Kot paj mẽ ri akapẽr mar kêt nẽ. Anẽ.

⁵⁴ Hãmri nhũm mẽ kuma nẽ mẽ kãm:

—Nà na pa hte amnhĩ krã hkõt mẽ ate ixtã apijaãm hprãm xàj tanhmã mẽ amã ixkapẽr to hkêt nẽ. Kot paj anẽ nẽ ãm ixtỳx ã amnhĩ nhĩpêx anhỹr kaprỳ. No Inhĩpêxà tãm kãm mẽ apiitã mẽ ate ixtã apijaãm o apaja nhũm kãm hprãm. Mẽ ate Tĩrtũm kõt amnhĩ nhĩpêx o apa hã amnhĩ to axêx xwýnhhta tãm na kãm mẽ ate ixtã apijaãmja nhũm kãm hprãm. Tã ka htem ã amnhĩ nhĩpêx anhỹr kêt nẽ. Na ka htem ixkuk pumu nẽ axtem nẽ ixte Satanasti nhỹ hã mẽ amã ixêx o ri ixpa hã ijarẽ.

⁵⁵ Mẽ ate Inhĩpêxà hkõt amnhĩ nhĩpêx ã amnhĩ jarẽn tã ãm amnhĩ to axêx o ri apa. No pa na pa hte mẽ arom ãm hãmri hkõt amnhĩ nhĩpêx mex o ri ixpa.

⁵⁶ Amnepêm mẽ pahpàr krax Apraãwja na pre mẽ awỳr ixwryk kukamã ijarẽn ma nẽ mẽ arom inhỹ hã hkĩnh tỳx nẽ pa. Anẽ.

Nhũm pre ã Jejus mẽ kãm amnhĩ jarẽn anẽ.

⁵⁷ Hãmri nhũm mẽ kuma nẽ tee ri kot mẽ kãm tanhmã Apraãw jarẽn toja ma nẽ kãm:

—Tk. Xà na ka pre finat Apraãwja ano ho omu? Nà kormã anyw kẽnã. Apraãw amnepêm htyk nẽ hapêx kẽnã kot ka kêt kot akukamã ajarẽn mar nẽ hkĩnh tỳx ã harẽ. Xàn ka pre ano ho omu? Kormã akator kêt ri na pre amnepêm htyk nhũm mẽ haxàr kẽnã. Nà na ka ãm mẽ inhmã amnhĩ to axêx. Te amnepêm mẽ hkukamã apa nẽ ate mẽ omunh nẽ mẽ harẽn pyrak. Kwa akatàt kõt mẽ inhmã awjarẽ. Anẽ.

Jejus kệp rãhã ho rãhã xwýnh ã harẽn

⁵⁸ Hãmri nhũm Jejus mẽ kãm:

—Nà ixêx kêt. ãm hãmri na pa ã mẽ amã amnhĩ jarẽn anẽ. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwýnh jakamã na pa pre hte inhno ho Apraãw pumunh mex o ri ixpa. Kwa mẽ ixkapẽr ma nẽ amnhĩ krã him haxàr tỳx nẽ. Anẽ.

⁵⁹ Hãmri nhũm mẽ tee ri kot ã amnhĩ jarẽn anhỹrja ã kuma nẽ kamã gryk tỳx nẽ. Nẽ axpẽn mã:

—Kwa tanhmã kot we amnhĩ to nẽ amnepêm rãhã nẽ pa ho pa xwýnh ã amnhĩ jarẽ? Tĩrtũm pix na rãhã ho rãhã pa xwýnh. Anẽ.

Hãmri nẽ kamã gryk xàj kẽn rũnh kwỳ kawrà ho ri hprõt nẽ kot ho htak o hpĩr kaxyw. Nom nhũm ra amnhĩ tã mẽ omu nẽ mẽ kệp akunok nẽ Tĩrtũm mã amnhĩ jarẽn xà hã ixkreja rũm kato nẽ ma tẽ.

9

Jejus kot no hkre xwýnh o mex ã harẽn

Makre 8.22-26

¹ Hãmri nhũm Jejus ma tẽ pa mẽ hkõt ri mẽ ixpa ho mẽ ixpa xwýnhjaja ma hkõt mra. Hãmri nẽ nhỹri no hkre xwýnh pumu. Katorxà nhõxà hkre rũm na pre no hkre nẽ kato. Hãmri nẽ ra hprêk nẽ hpri kamã àhwỳr o hkrĩ.

² Tã hãmri pa mẽ mra nẽ omu nẽ hã Jejus kukja nẽ kãm:

—Kwa mẽmoj mỳrapê na pre we myti něj no hkre nẽ kato? Xà tãm kot tanhmã

amnhĩ tomnuj to mýrapê nà? Xà katorxà rý hipêêxà kot amnhĩ tomnuj mýrapê na pre ã no hkre nê kator anê? Anê.

³ Hāmri nhũm mẽ inhmã:

—Nà mēhō kot tanhmã amnhĩ tomnuj to mýrapê no hkre nê kator kêt. Ām Tĩrtũm kot ho mex nhũm mẽ kot ja hã omunh kaxyw na pre ã no hkren kator anê. Tã kot paj Tĩrtũm nhỹ hã no ho mex ka mẽ ja hã ixpumu. Na pa hte kormã jar pikap ri ixpa ri Tĩrtũm mã tanhmã amnhĩ nhĩpêx mex to ho ri ixpa.

⁴ Na htem arĩgro hã mẽmoj tã apê nhũm kamàt nhũm mẽ kãm ure nê àpênh kêt nê. Ja pyrã nê na pu htem kormã pahtĩr ri jar pikap ri papa ri Tĩrtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hāmri nê axte jar ã amnhĩ nhĩpêx anhỹr kêt nê. Jakamã kwa kêt pu mẽ ri jar pikap ri papa ri kãm tanhmã amnhĩ nhĩpêx mex to ho ri papa.

⁵ Na pa hte ã kãm amnhĩ nhĩpêx anhỹr jao te kanê hirã mex pyrã nê ixprĩ hã mẽ kãm Tĩrtũm kot amnhĩ nhĩpêx o amnhĩrĩt mex o ri ixpa. Anê.

⁶ Nhũm pre ã Jejus mẽ inhmã amnhĩ jarênh anê. Hāmri nê kot nohkre xwýnhta no o mex kaxyw hikôt nê argôx mẽ nê ho gyw kwý nhĩpêx nê kànhmã xa nê ho no kukō.

⁷ Hāmri nê kãm:

—E ma gō gjênh xà pê Siroe hwýr tẽ nê kamã amnhĩ no kuhō. Anê.

Mẽ pakapêr kãm Siroeja mẽ kot kãm: “Nhỹhỹm mẽnh xwýnh” anhỹr jarênh pyrãk. Tã nhũm Jejus hwýr kumẽ nhũm ma hwýr tẽ. Hāmri nê kamã amnhĩ no hã gyw kuhōnh pa jao rĩt mex kurê kumrêx. Hāmri nê rĩt mex ã amnhĩ pumu nê hkĩnh tỹx nê ma akupỹm ōrkwỹ hwýr tẽ.

⁸ Hāmri nhũm ōrkwỹ kuri mẽ ōrkwỹ xwýnhjaja nê mẽ kot pry kamã ahwýr o hkrĩ hã omunh xwýnhjaja amnhĩ jaêr pê ra rĩt mex ã omu nê tee ri hã axpên kukja nê axpên mã:

—Kwa pêr pry kamã àhwýr o hkrĩ xwýnhta na nà? Anê.

⁹ Hāmri nhũm kamã mẽ hkwýjaja mẽ kãm:

—Tỳ. Tãm na. Anê.

Nhũm kamã mẽ hkwýjaja mẽ kãm:

—Nà tãm kêt. Axtem mẽhō na. Te kot uràk nom tãm kêt. Anê.

Anhỹr o ri axpên mã harê. Tã nhũm tãm mẽ kãm amnhĩ jarê nê mẽ kãm:

—Tỳ pa kênã. Pa na pa pre hte inhno hkre nê ri ixpa htã ra ixrĩt mex. Anê.

¹⁰ Hāmri nhũm mẽ tee ri kuma nê kãm:

—Kwa no tanhmã na ka we amnhĩ to nê ra arĩt mex?

¹¹ Anê nhũm mẽ kãm:

—Nà mẽ kot kãm “Jesús” anhỹr xwýnhta na ixwýr tẽ nê ixkaxyw gyw kwý kagō nê ho inhno kukō. Hāmri nê mẽ kot gō mã: “Siroe” anhỹr xwýnhta kamã ixte amnhĩ no kuhōnh kaxyw hwýr inhmã anê pa ma hwýr tẽ nê kamã amnhĩ no kuhō nê ixrĩt mex kurê kumrêx. Anê.

¹² Hāmri nhũm mẽ kuma nê kãm:

—No nhỹhỹm na ato mex xwýnhja ma tẽ? Anê.

Hāmri nhũm mẽ kãm:

—Konên. Ixte nhỹhỹm htêm xà hkôt omunhre hã. Anê.

¹³ Hāmri nhũm mẽ kuma nê ma Parijew nhō xwýnhjê hwýr o mō nê mẽ kãm harê.

¹⁴ Nê mẽ kãm:

—E ot pa mẽ awýr jahti ho tẽ. Na xep Jejusja jarãhã akupỹm kãm no ho mex. Mẽ panhō arĩgromnu htã nhũm hã no ho mex. Anê.

¹⁵ Hāmri nhũm mẽ tee ri mẽ kuma nê myta pumu nê kãm:

—E mẽ inhmã amnhĩ jarê. Tanhmã na ka pre we amnhĩ to nê anohkre nê akrĩ htã ra ano mex nê? Anê.

Hāmri nhũm mẽ kãm:

—Nà na pre Jejus gyw o inhno kukō nê inhmã anê pa gō ho amnhĩ no kuhō nê ixrĩt kurê kumrêx. Anê.

¹⁶ Hāmri nhũm mẽ kuma nê tee ri Jejus ã axpên kukjêr o kuhê nê axpên mã harênh o:

—Kwa mẽ panhō arĩgromnu hã kot ho mex jakamã kêt Tĩrtũm rũm mẽ pahwýr wrýk xwýnh kêt. Ām kot amnhĩ tomnuj xwýnh kênã. Anê.

Nhũm mẽ hkwýjaja harênh o:

—Kwa nà. Kot amnhĩ tomnuj xwýnh ronhỹx àhpumunh tỹx kôt no ho mex kêt nê. Anê.

¹⁷ Hāmri nê hpãnhã no mex xwýnhta mã kãm:

—No ka? Ate kot ano ho mex xwýnh ã amnhĩ tã harēnh jakamã mēhõ hã na ka hkamnhĩx? Mēhõ na wehe? Anē.

Hāmri nhũm mẽ kãm:

—Konēn. Mãn kēp Tĩrtũm kapēr jarēnh o ri mẽ pa xwýnh mãn. Hã na ã inhno ho mex anē. Anē.

¹⁸ Hāmri nhũm mẽ tee ri kuma nē axpēn mã:

—Kwa pēr aa nohkre hkēt kēnã. Na pre ãm amnhĩ to hēx o pa. E kwa pu mẽ amnhĩ wýr katorxà nē hipēêxà wa hã karõ kê wa man tē nē tanhmã mẽ pamã harēnh to. Anē.

Hāmri nē wa hã karõ

¹⁹ nhũm wa mẽ hwýr tēn axà nhũm mẽ wa kãm:

—Pa. E mẽ inhmã mẽmoj jarē. Xà we wa akrata na ãm ja nà? Xà tãm na ka hte wa nohkre nē kator ã harē? Kwa tanhmã na we amnhĩ to nē ra rīt mex? Anē.

²⁰ Hāmri nhũm wa mẽ kãm:

—ÿy wa ixkra kēnã. Na pre wa ixpē nohkre nē kato.

²¹ Tã ra tanhmã amnhĩ to nē ra rīt mex. No wa ixte kot ho mex xwýnhnta pumunh kēt. Kwa mẽ tãm mãn hkukja nē ama. Ra àptàr kēnã. Kē tãm mãn mẽ amã tanhmã amnhĩ jarēnh to ka mẽ ama.

²² Anhýr o mẽ kãm wa hkrata jarē. No ãm wa kãm mẽ uma nē ã mẽ kãm kapēr anē nē mẽ kãm Jejus nhĩxi jarēnh kēt nē. Na pre Parijew nhõ xwýnhjaja ra Jejus nē mẽ kãm kapēr nē mẽ kãm:

—Ka mẽ atõ Tĩrtũm kot mẽ pakaxyw Jejus xãm ã harē hāmri nē axte Tĩrtũm kapēr o mẽ ahkre xà hã ixkreja wýr agjêx kēt kumrêx nē rĩ amnhĩ pumu.

²³ Anhýr o nē mẽ hkurê jakamã nhũm wa mẽ umaj ã mẽ kãm hkra jarēnh anē nē kot ho mex xwýnh nhĩxi jarēnh kēt nē.

²⁴ Hāmri nhũm mẽ axte amnhĩ wýr no mex xwýnhnta ã karõ nē kãm:

—Kwa akatàt kôt mẽ inhmã amnhĩ jarē. Ate kot ano ho mex ã harēnh xwýnhnta na kot amnhĩ tomnuj pix o pa xwýnh kēnã kot kēt ano ho mex. Jakamã kwa Tĩrtũm noo mã akatàt kôt mẽ inhmã amnhĩ jarē nē axêx kēt nē. Anē.

²⁵ Hāmri nhũm mẽ kãm:

—Ko ixte ja hã omunh kēt. ãm ja pix na ixte omunh. Na pa pre inhno hkre nē ri ixpa htã ra ixrīt mex nē. Anē.

²⁶ Hāmri nhũm mẽ tee ri kot amnhĩ jarēnhja ã kuma nē kãm:

—No tanhmã na we mytita amnhĩ to nē amã ano ho mex? Anē.

²⁷ Hāmri nhũm mẽ tee ri axte mẽ kot hã hkukjêr ã mẽ kuma nē mẽ kãm:

—Kwa ra ixte mẽ amã ãm hāmri amnhĩ jarēnh griã. Tã ka mẽ inhma nē ãm inhma nē arĩ hã ixkukja. Mãn ka mẽ amã hkôt amnhĩ xunhwýr prãm hã na ka mẽ aprĩ hã ixkukja nà? Mē ate kot amnhĩ nhĩpêx ã aprĩ hã harēnh mar nē hkôt amnhĩ xunhwýr prãm xàj na ka mẽ aprĩ hã amã harēnh prãm nē. Anē.

²⁸ Hāmri nhũm mẽ tee ri kuma nē kamã gryk nē. Nē hã kãm akir nē kãm:

—Tk. Ka na ka hte kapēr kôt amnhĩ nhĩpêx. No kēt mẽ pajaja na pa htem finat Mojes kapēr kôt pix mã amnhĩ nhĩpêx.

²⁹ Mojes mã na pre hte Tĩrtũm kapēr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harēnh xwýnhnta mẽ ixte omunh kēt. Nē mēhõ nhỹ hã kot tanhmã amnhĩ nhĩpêx to ho pa xwýnhja mẽ ixte omunh kēt. Anē.

³⁰ Hāmri nhũm mẽ tee ri mẽ kuma nē mẽ kãm:

—Kwa kot inhmã inhno ho mex nhũm ra ixrīt mex tã ka mẽ tee ri hkukamã ajamaxpēr nē mēhõ nhỹ hã kot ã amnhĩ nhĩpêx anhýr o pa hã omunh kēt ã amnhĩ jarē.

³¹ Mē pahte Tĩrtũm kot amnhĩ nhĩpêx ã omunh mex. Kojã mēhõ kot amnhĩ tomnuj xwýnh mẽmoj tã kuwý nhũm kuma nē ãm kuma. No kēt mẽ kot hkôt ri amnhĩ nhĩpêx xwýnhjaja. Nē mẽ kot kãm mex o mex ã harēnh xwýnhjaja na htem mẽmoj tã kuwý nhũm mẽ kuma nē mẽ kãm tanhmã mẽmoj nhĩpêx to rý mẽ kãm mẽmoj gõ.

³² Tã aa mẽ pahte mēhõ kot mẽ no ho mex ã harēnh mar kēt tã nhũm ã Jejus inhmã inhno ho mex anē.

³³ Kēp Tĩrtũm kwý hkēt ronhỹx pre inhno ho mex kēt nē. Anē.

³⁴ Hāmri nhũm mẽ kuma hāmri nē kãm:

—Tk. Kwa pēr ãm akator kôt ate amnhĩ tomnuj o ri apa htã na ka ã mẽ inhmã akapēr anē. Kwa ixkreja rũm akato nē ma atēm kurê kumrêx.

Anhýr o kãm kapēr hāmri nē mẽ amnhĩ nē hano nhũm kato nē ma tē.

³⁵ Tã nhũm Jejus ra mẽ kot amnhĩ nê hanor ã harênh ma nê ma hapêr o tẽ nê nhỹri omu. Hãmri nê amnhĩ tã hkukja nom te nhãm mēhō hã hkukjêr pyrã nê kãm:

—Pa? Xàn ka ra Tĩrtũm kot mẽ awỳr mēnh xwỳnhhta amnhĩ kaxyw hkôt ajamaxpêr nà? Anê.

³⁶ Hãmri nhũm kormã kot no ho omunh kêt jakamã kêp Jejus ã omunh kêt nê. Na pre kormã no hkre nê ãm kapêr pix ma. Tã ra akupỹm rĩt mex nom kormã no ho omunh kêt nê. Jakamã nhũm Jejus hwỳr tẽ nê ã kãm kapêr anê nhũm omu nê kormã kêp Jejus ã omunh kêt nê kãm:

—Tỳ kot kaj inhmã ahkre pa omu nê hkôt amnhĩ xãm kurê kumrêx. Anê.

³⁷ Hãmri nhũm kãm:

—Kwa paa. Ixte amã ixkapêr xwỳnhhta pa na pa. Anê.

³⁸ Hãmri nhũm kãm:

—Kwa xôwehe Pahihti? Nà kot paj amnhĩ kaxyw akôt pix mã ijamaxpêr nê akôt pix mã amnhĩ nhĩpêx o ri ixpa. Anê.

Hãmri nê kutã hkôn krã ho tẽm nê nhỹ nê kãm mex o mex ã harênh o nhỹ.

³⁹ Hãmri nhũm Jejus kãm:

—Nà ixte mẽ apiitã tanhmã mẽ ajarênh to kaxyw na pa pre kaxkwa rũm man mẽ awỳr wrỳ. Ahpỹnhã mẽ amã ixprãm xwỳnhjê jarênh nê ahpỹnhã mẽ kãm ixprãm kêt xwỳnhjê jarênh kaxyw. Mẽ kãm ixprãm kêt xwỳnhjaja kot hprĩ hã Tĩrtũm kapêr mar mex kêt tã na htem htỳx ri kot mar mex ã amnhĩ jarênh o pa. Jakamã te mẽ nohkre xwỳnhjaja kot amnhĩ nhĩpêx pyrãk. Nom koja mẽ Tĩrtũm kapêr ma nê ixkôt amnhĩ xunhwỳr japêr. Hãmri nê te ra rĩt mex pyrãk o amnhĩ nhĩpêx. Jao ra hprĩ hã Tĩrtũm kapêr mar mex o pa. Anê.

⁴⁰ Nhũm pre ã Jejus kãm kapêr anê. Nhũm Parijew nhō xwỳnh kwỳjaja kot kuri mar o kuhê xwỳnhjaja ã kapêr anhỹr ã kuma nê amnhĩ tã kãm:

—Kwa nà. Xà we mẽ pajaja na ka ã mẽ inhnokre hã mẽ ijarênh anê? Xà mẽ ixte ixprĩ hã Tĩrtũm kapêr mar mex kêt ã na ka mẽ ijarê nà? Anê.

⁴¹ Hãmri nhũm mẽ kãm:

—Ỗy kop apu mẽ ate aprĩ hã kapêr mar mex kêt ã amnhĩ jarênh ronhỹx ja mẽ amã mex nê. Tã mẽ ate aprĩ hã mar mex ã

amnhĩ to axêx o apa jakamã na ka mẽ ra amnhĩ tomnuj tỳx nê. Na hte Tĩrtũm ja hã mẽ apumu nê amnhĩm mẽ ate amnhĩ tomnuj xwỳnh ã mẽ ajarê. Anê.

10

ôwêhti jarênh

Matêwre 9.36, 12.11-12; Rukre 15.3-7

¹ Nhũm Jejus arĩ Ijaew mã kapêr nê mẽ kãm:

—E pa mẽ amã awjarê ka mẽ inhma nê amnhĩ krã him haxàr tỳx nê ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwỳnhjaja ôwêhti apkur kaxyw mẽ o pa hãmri nhũm kamàt nhũm akupỹm kahê hwỳr mẽ o pa. Kahê jakwakreja ãm pixii. Tã koja mēhō kahê xà hkôt hwỳr àr kêt nê axtem nê tẽ nê nhỹhỹnh kahê hã api nê ôwêhti hwỳr àr japêr nhũm mẽ omu nê kot hkwy ho àhkĩnh ã omunh kurê kumrêx.

² —No ôwêhti jamãr o pa xwỳnhja na hte mẽ kurom katàt kôt kahê jakwakre rũm ôwêhti hwỳr agjê.

³ Nhũm kahê xà jamãr xwỳnhja amnhĩ wỳr omu nê kãm kahê xà rênh kurê kumrêx nhũm axà. Na hte apkati mẽ ma nhỹhỹm apkur kaxyw mẽ o pa. Nê nojarêt nê mẽ kãm akir. Ahpỹnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nê hwỳr mra nê hã pikuprõnh pa nhũm mẽ ho hapôj nê ma nhỹhỹm ri mẽ apkur kaxyw mẽ o pa.

⁴ Ma mẽ apkur kaxyw nhỹhỹm mẽ o pa. Nhũm ôwêhti ra kot kapêr mar mex jakamã ma àmnhĩx ri hkôt apkur o pa.

⁵ —Na hte hamãr o pa xwỳnh pix kapêr ma nê hkôt pa nê nhãm mēhō hkôt ri pa hkêt nê. Kot kapêr mar kêt jakamã tee ri kuma nê umaj axkahkũm nê hprõt nê ma mra. Na hte ôwêhti ã amnhĩ nhĩpêx anê. Anê.

Jejus te kêp ôwêhti gjênh xà hã hakwakre pyrãk

⁶ Nhũm pre ã Jejus mẽ kãm ujarênh anê. Nê ujarênhja kamã amnhĩ kwỳjê jarê nê määnên tãm amnhĩ jarê. Nom mẽ amnhĩ tã kuxi nê mẽ kãm amnhĩ jarênh o te ho ôwêhti jarênh pyrãk nhũm mẽ tee ri kuma nê mar mex kêt nê.

⁷ Jakamã nhũm axte mẽ kãm awjarẽ nõ mẽ kãm:

—E pa ixprĩ hã mẽ amã ixujarẽnhhta jarẽ ka mẽ inhma. Te ixpê ôwêhti jagjênh xà hã hakwakre pyrãk. Kwa mẽ ja ma nõ amnhĩ krã him haxãr tỳx nõ.

⁸ Na pre ra ixkukamã mẽ ohtô nõ te ãm hãmri mẽ amã Tĩrtũm kapêr jarênh pyrãk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwỳnhhta kot amnhĩ nhĩpêx pyrãk. Nom na hte ôwêhtija ãm hamãr xwỳnh pix kapêr ma nõ nhãm mẽhõ kapêr mar kêt nõ. Ja pyrã nõ mẽ kot ixkôt amnhĩ xunhwỳr xwỳnhjaja na htem Tĩrtũm kapêr o hêx o mẽ pa xwỳnhjê ma nõ ãm mẽ kuma nõ mẽ hkôt amnhĩ nhĩpêx kêt nõ. Na htem ãm ixkapêr pix ma nõ ixkôt pix mã amnhĩ nhĩpêx o pa.

⁹⁻¹⁰ —Te ixpê ôwêhti gjênh xà hã hakwakre pyrãk. Na hte ôwêhti mẽmoj punuj pymaj kahê hwỳr agjê nõ kamã mex nõ kuhê. Nê kurũm hapõj nõ ma apkur o pa. Ja pyrã nõ mẽ kot ixkôt amnhĩ xunhwỳr xwỳnhjaja koja mẽ ixkukwak ri hkĩnh nõ mex nõ hamakêtkati nõ pa ho pa. Nê nhỹrmã Tĩrtũm mẽ wa ixri htĩr tũm nõ pa ho pa. Ja kaxyw na pa pre man mẽ awỳr pika hwỳr wrỳ.

—No ôwêhti ho àhkĩnh xwỳnhjaja na htem amnhĩm ho ahkĩ nõ kupa nõ ma amnhĩm o pa. Tã mẽ kot Tĩrtũm kapêr o hêx o mẽ pa xwỳnhjaja te mẽ kot jajaja kot amnhĩ nhĩpêx pyrãk. Anê.

*Jejus te kêp ôwêhti jamãr xwỳnh pyrãk
Eprêw 13.20; Apokarip 7.17*

¹¹ —Nê ôwêhti jamãr mex xwỳnhja koja nhỹri mẽhõ kêp ôwêhti hõxpĩr kaxyw hwỳr htẽm ã omu nõ wa hã axpu. Nhũm ho àhkĩnh mã xwỳnhhta ôwêhti jamãr xwỳnh pĩ nhũm ôwêhti nê ty. Tã ixkwỳjaja hamakêtkati nõ mex nõ pa kaxyw na pa pre amnhĩ grõnh kôt mẽ hwỳr wrỳ. Jakamã kot paj te ôwêhti jamãr xwỳnh kot amnhĩ nhĩpêx pyrãk o amnhĩ nhĩpêx.

¹²⁻¹³ —Nê na htem tõhã ôwêhti jamãr xwỳnh nhỹhỹm pa kaxyw nõ mẽhõ mã amnhĩre nhũm wakre kamã kãm hkrit jamãr o pa. Kãxpore pix prãm xàj kãm hamãr o pa. Jakamã koja nhỹhỹnh mry xoprê ra hwỳr kato nhũm amnhĩ wỳr omu

nê umaj ôwêhti re nõ ma hprõt nõ tẽ. Kãm ôwêhti japê hkêt ãm kãm htĩr pix prãm xàj ôwêhti mã hamaxpêr kêt nõ rer pa nõ ma tẽ. Nhũm mry xoprêta ôwêhti hwỳr hprõt nõ hkwy pynê nhũm hkwy umaj axkahkũm nõ hprõt nõ ma mra. No kêt pa na te ixte ôwêhti mã hamaxpêr kêt nõ kot rer nõ ma hprõt nõ htẽm xwỳnhhta pyrãk kêt. Kot paj aa ixkwỳjê rer kêt nõ. Kot paj mẽ hkôt ixpa ho ixpa rãhã nõ.

¹⁴⁻¹⁵ —Te ixte ôwêhti jamãr xwỳnh mex pyrãk jakamã na pa hte urãk nõ ahpỳnhã mẽ kot ixkôt amnhĩ xunhwỳr xwỳnhjê pumunh mex o ri mẽ hkôt ixpa. Te mẽ kêp ixkrit ôwêhti pyrãk nhũm te ixpê mẽ hamãr mex o ri mẽ hkôt ixpa nõ aa mẽ rer kêt xwỳnhhta pyrãk.

—Nê mẽ kot ixkôt amnhĩ xunhwỳr xwỳnhjaja ra mẽ ixte amnhĩ nhĩpêx kôt axpên pumunh mex. Nê mẽ inhmã axpên japêê. Te Inhipeêxã mẽ wa inhmã axpên japê pyrãk. Tã kot paj nhỹrmã mẽ nê tanhmã amnhĩ nhĩpêx to.

¹⁶ —Mẽ kot ixkôt amnhĩ xunhwỳr xwỳnhjaja piitã kêp Ijaew pix kêt. Koja Ijaew kêt xwỳnh kwỳjaja mããnên ixkapêr ma nõ ixkôt amnhĩ xunhwỳr nõ ixkôt amnhĩ nhĩpêx. Jao ra te kêp ixkrit ôwêhti pyrãk. Tã kot paj mẽ ho ixpimràa tã mẽ ho tipxi nõ mẽ hamãr o ri mẽ hkôt ixpa.

¹⁷ —Nê mẽ kot ixkôt amnhĩ nhĩpêx o mẽ pa xwỳnhjaja mẽ mex kaxyw na pa pre amnhĩ grõnh kôt mẽ hwỳr wrỳ. Jakamã kot paj nhỹrmã mẽ nê ty. Tã inhmã mẽ nê ixtyk puma hkêt jakamã na Inhipeêxã kãm ijapêê. Koja akupỹm ixto ixtĩr.

¹⁸ Kop apu inhmã mẽ nê ixtyk prãm kêt ronhỹx mẽ kãm ixkurê xwỳnhjaja tee ri kãm ixpĩr prãm kaprỳ. Nom ixte mẽ kot ixkôt amnhĩ nhĩpêx xwỳnhjê nê amnhĩ grõnh kôt mẽ hwỳr ixwryk kênã. Jakamã kot paj arĩ mẽ kãm amnhĩ grõnh kôt amnhĩ gõ nõ arĩ mẽ kãm xa nhũm mẽ ixpĩ. Nom kot paj akupỹm ixtĩr. Mẽhõ koja tanhmã ixto nõ ixpĩr o ixpĩ? Nã koja mẽhõ ixpĩr o ixpĩr kêt nõ. Inhipeêxã nhỹ hã kot paj nhỹrmã ã amnhĩ nhĩpêx anê nõ akupỹm ixtĩr. Anê.

Nhũm pre ã Jejus mẽ kãm amnhĩ jarênh anê.

19 Hāmri nhūm Ijaew tee ri ã kot amnhĩ jarēnh anhÿr ã kuma nē kē axte axpēn kwÿm ri tanhmā harēnh to ho kuhē.

20 Nē kamā mẽ hkwÿjaja harēnh o:

—Tk. Kwa mẽ mar kēt nē. Satanasti nhÿ hā na hte htÿx ri ã mẽ pamā amnhĩ jarēnh anhÿr o pa. Anē.

21 Hāmri nhūm mẽ hkwÿjaja mẽ kuma nē mẽ kām:

—Nà kot anhÿr kēt. Xà na htem Satanasti nhÿ hā ã kapēr mex anē nē ã mẽ no hkre xwÿnhjē ho mex anē? Nà kot anhÿr kēt. Satanastija ukaprire hā. Anē.

Ijaew nhō pahijaja kot Jejus kaga hā mẽ harēnh

Juāw 5.18, 8.59

22 Tā nhūm ra amgrā hapēx pa mẽ ixpē Ijaew akupÿm krī pē Jerujarē kamā axpēn wÿr akuprō. Axte mẽ ixte mẽ ixkĩnh kaxyw axpēn wÿr akuprō. Amnepēm mẽ inhĩgētjaja kot akupÿm Tĩrtūm mã amnhĩ jarēnh xà hā ixkre ho mex pa nē ho Tĩrtūm wÿr mã hamaxpēr nē hā ixkĩnh ã arĩgroja ã pa mẽ hwÿr akuprō.

23 Hāmri nhūm Jejus ma mẽ ixkōt Tĩrtūm mã amnhĩ jarēnh xà hā ixkreta wÿr tē no ãm hwÿr àr kēt nē. ãm ixkre hpu hā kahē xà kape hā ri pa. Mē kot kām: “Pahi finat Sarumāw pa xà” anhÿr xwÿnhhta kamā ri pa.

24 Hāmri nhūm kē ra mẽ inhō pahijaja omu nē hā akuprō nē hēx rom kām kapēr nē kām:

—Kwa tokyx aprĩ hā mẽ inhmā amnhĩ jarē. Xà apē Tĩrtūm Kra na ka nà? Xà ka na pre Tĩrtūm mẽ ixkaxyw axām? Kwa aprĩ hā mẽ inhmā amnhĩ jarē pa mẽ ama. Mon ka hte aprĩ hā mẽ inhmā amnhĩ jarēnh kēt nē? Na pa mẽ tee ri ate amnhĩ nhĩpēx ã apumu nē akukamā ijamaxpēr rūnh kumrēx o ri ixpa. Xà ãm hāmri apē Tĩrtūm kot mẽ ixkaxyw axām xwÿnhhta na ka? Anē.

25 Hāmri nhūm mẽ kām:

—Tk. Ra ixte mẽ amā amnhĩ jarēnh xohtō htā ka mẽ inhma nē ãm inhma. Na pa hte xatā Inhĩpēêxà nhÿ hā mẽ amā mẽ ate aa mẽmoj pumunh kēt kwÿ ho anhÿr o ri ixpa ka mẽ ja hā ixpumu nē ãm ixpumu nē ixkōt ijamaxpēr kēt nē.

26 Mē apē ixkwÿ hkēt jakamā na ka mẽ ixkōt ajamaxpēr kēt nē. Te mẽ apē ixkrit ôwēhti pyrāk kēt.

27 Ixkwÿjaja na te ho ôwēhti kot hamār xwÿnh kapēr mar nē hkōt ri pata pyrā nē ixkapēr ma nē ixkōt amnhĩ nhĩpēx o pa. Ixpē mẽ ò pahihtĩ hā mẽ kot ixpumunh mex jakamā na htem ixkōt amnhĩ nhĩpēx mex o pa. Ixte ja hā mẽ omunh mex nē.

28 Koja mẽ nhÿrmā htyk tā no ãm ixkukwak ri akupÿm htĩr hāmri nē Tĩrtūm mẽ wa ixri htĩr tūm nē pa ho pa nē aa hapēx kēt nhūm mēhō ixpē mẽ utār kēt nē. Te inhĩhkra hpo nhĩpōk ri mẽ hkrĩ nhūm te mẽ hā inhĩhkra pikamÿr pyrāk nhūm mẽmoj tee ri ixpē tanhmā mẽ ho hprām kaprÿ.

29-30 Inhĩpēêxà tām kot inhmā mẽ òr kēnā. Hihtÿx o kot mẽ piitā mẽ hakrenh par jakamā koja mẽ inhĩhkra po nhĩpōk ri hkrĩ nē mãānēn Inhĩpēêxà nhĩhkra hpo nhĩpōk ri hkrĩ. Te ixpē Inhĩpēêxà Tĩrtūm pyrāk jakamā mēhō kot wa ixpē wa inhĩhkra rūm mẽ utā? Nà amrakati kumrēx.

Anhÿr o mẽ kām amnhĩ jarē.

31 Hāmri nhūm mẽ te kēp Tĩrtūm pyrāk ã amnhĩ jarēnh ã kuma nē kamā gryk tÿx nē. Hāmri nē kot kēn o htak kaxyw ra kaxyw hkwÿ kawrà ho ri hprōt.

32 Hāmri nhūm amnhĩ tā mẽ omu nē mẽ kām:

—Kwa ra ixte Inhĩpēêxà nhÿ hā mẽ amā aa mẽ ate mẽmoj pumunh kēt kwÿ ho anhÿr rax o ixpa. Jao tanhmā mẽ ho mex to pix o ri ixpa. Tā ka mẽ axtem nē ã inhĩpēx anhÿr kaxyw. Anē.

33 Hāmri nhūm mẽ kām:

—Nà ã ate amnhĩ nhĩpēx anhÿr ja mÿrapē hkēt. Kēt apē mẽ inhĩō htā ri axtem nē te apē Tĩrtūm pyrāk ã amnhĩ jarēnhja mÿrapē na pa mẽ kēn o atak kaxyw. Na pu htem ã amnhĩ jarēnh anhÿr o papa hkēt nē. Anē

34 Hāmri nhūm mẽ kām:

—No ãm hāmri ixte ã amnhĩ jarēnh anhÿr kēnā. Tanhmā na Tĩrtūm kapēr ã kagā htūm kot ja jarēnh to wehe? Na pre Tĩrtūm Ijaew nhō pahijē mã kapēr nē mẽ kām:

E mẽ ate inhÿ hā mẽ ho amnhĩptār jakamā te mẽ apē pa ixpē Tĩrtūm pyrāk.

Anhÿr o kot mẽ harēnh.

35 ãm hāmri na Tĩrtūm kapērja. Tām kot ã mẽ harēnh kot anhÿr. Mē kot ÿ hā mẽ kām

kapēr jakamā te mē kēp urāk ā mē harēnh anhyr kēnā.

³⁶ Tā tām kot ā mē harēnh anhyr tā hpānhā mē akaxyw pa ixpē Kra hā ixām nē mē awyr inhmēnh nhūm ixwryk nē ixpē Kra hā amnhī jarēnh tā ka mē ja hā inhma nē ām inhma nē ixkôt ajamaxpēr kēt nē. Kwa mon ka mē ja hā ixpumunh nē ixkôt ajamaxpēr kēt nē?

³⁷ Kot paj Inhīpēēxā mē wa ixāhpumunh kôt mē amā aa mē ate mēmoj pumunh kēt kwý ho anhyr kēt ka mē ja hā ixpumu nē mē rī kam nē māmri ixkôt ajamaxpēr kēt nē.

³⁸ Mē amā ixkapēr mar prām kēt tā kwa ixte Tirtūm pyrā nē aa mē ate mēmoj pumunh kēt kwý ho anhyr ā ixpumu nē Inhīpēēxā mē wa ixte amnhī nhīpēx tipxi hkôt ajamaxpēr. Anē.

³⁹ Hāmri nhūm mē kuma nhūm ja mē kēp omnuj týx nē. Te kot Tirtūm pyrāk ā amnhī jarēnhja nhūm mē kēp omnuj nē. Jakamā nhūm mē ra kot unēnh nē ixkre rūm ho kator nē kapôt ā mēnh nē kēn ho htak kaxyw nhūm kē axte mē kēp akunok nē ma nhýhým tē.

Jejus kot Jotāw nhūhkjē hā ri pa hā harēnh

⁴⁰ Tā nhūm Jejus ma tē nē pyhti pē Jotāw ā rē. Pa mē hkôt ri ixpa ho ixpa xwýnhjaja ma hkôt mō. Finat Juāw Paxis kot Tirtūm mā wam mē hkrā kumrār o pa xāta wýr.

⁴¹ Hāmri nhūm mē ohtō nē mē ixwýr mra nē Jejus kapēr ma nē kot tanhmā amnhī nhīpēx to hā omunh o kuhē. Hāmri nē hā tanhmā axpēn mā kapēr to nē axpēn mā:

—Kwa ām hāmri na pre finat Juāw Paxisja mē pamā Jejus jarēnh o pa. Aa kot mē pamā mē pahte mēmoj pumunh kēt kwý ho anhyr kēt tā ām xatā hkukamā mē pamā harēnh o pa. Kēp Tirtūm Kra hā Juāw rom hihtýx o hihtýx ā harēnh o pa. Nē Tirtūm kot mē pakaxyw ām xwýnh ā nhūm mē pamā harēnh o pa. Nā ām hāmri na pre ā mē pamā harēnh anē. Anē.

⁴² Hāmri nhūm mē ohtō nē amnhī kaxyw Jejus kôt hamaxpēr nē hkôt amnhī xunhwý.

11

*Rajare htyk jarēnh
Juāw 5.21-29, 6.40*

¹ Rôm nhūm krī pē Petān kamā mēhō my pē Rajareja ra à htýx nē nō. Na pre htōx wa hamēxkrut. Hō kēp Matre nhūm hō kēp Marir.

² Marir na pre kormā arīgro hō hā kot Jejus o mex kaxyw mē hkuxwaxà ho hkuxwa nē amnhī kī ho hpar pōnh kaxyw. Nom kormā. Jakamā nhūm wa hkamyja wa kēp à htýx nē nō.

³ Hāmri nhūm wa tee ri hkukamā hamaxpēr nē ma krī hō hwýr Jejus wýr mēhō mē nhūm ma hwýr tē. Nē hwýr pōj nē omu nē kām:

—Pa Pahihti. E ot pa awýr tē. Na ra amā akrāmnhwý japē htýx xwýnhnta à htýx nē nō nhūm htōx wa tee ri hkukamā hamaxpēr nē awýr inhmē pa tē. Kwa tokyx pu ma hwýr tē ka akupým wa kām ho mex nà? Anē.

⁴ Hāmri nhūm kuma nē kām:

—Nā à htýx nē nōr tā koja akupým mex. Mē kot akupým mex ā harēnh mar hāmri nē Tirtūm mē wa ixtā hpijaām nē wa ixihtýx o wa ixihtýx ā wa ixpumunh kaxyw na ā à htýx nē nōr anē. Nē pa ixpē Tirtūm Kra hā akupým ho mex ā ixpumunh nē ixkôt hamaxpēr kaxyw na ā à htýx nē nōr anē. Anē.

⁵ Na pre Jejus kām Rajare mē htōx wa mē hapē nē.

⁶ Tā à htýx ā harēnh ma nē hwýr mōr tokyx anhyr kēt nē. Pa mē arī amnhīm hikranh xā kamā ri ixpaja o ixtā axte apkati axkrut.

⁷ Hāmri nhūm rī kormā hwýr nojarēt nē mē inhmā:

—E ma pu mē jarāhā akupým Jutej kamā Rajare hwýr mō nē omu. Anē.

⁸ Hāmri pa mē tee ri ja hā kuma nē kām:

—Kwa ham mē panhō pahijaja kot kēn o atak o apīr mā tā ka ra akupým mē hwýr akrā. Kwa pu mē hwýr pamōr kēt nē nà? Anē.

⁹ Hāmri nhūm mē inhmā:

—Nā koja mē kormā tanhmā ixto hkēt nē. Kormā ixte Tirtūm mā tanhmā amnhī nhīpēx to jatur xām mēnhre hā. Te ixte kormā arīgro hā ixrīt mex nē ixpa pyrā nē kormā Tirtūm kot mēmoj tā inhmā karō xā hkôt pix mā tanhmā amnhī nhīpēx to ho ri ixpa.

10 Tã kot paj hatur xàm kumẽ nhũm te myt àr nhũm ra kamàt kô pyràk nhũm mẽ rĩ kormã tanhmã ixto nẽ xipĩ. Jakamã e ma pu mẽ hwỳr. Koja mẽ tokyx tanhmã ixto hkêt nẽ. Anẽ.

11 Hãmri nẽ mẽ inhmã Rajare jarẽnh o:

—Na mẽ pahkràmnhwỳ Rajareta ra gõr nẽ nõ. Tã kot puj mẽ ma hwỳr mỗ pa kumra. Anẽ.

12-13 Ra htyk ã omunh tã ã mẽ inhmã harẽnh anẽ. Pa mẽ kuma nẽ ixtỳx ho ãm õt nẽ nõr ã hkamnhĩx nẽ kãm:

—Kwa mãn ra akupỹm amnhĩ kãm hamak o mõi jakamã na ra amnhĩ krit nẽ gõr nẽ nõ. Kwa pu mẽ awjanã nẽ hwỳr pamõi kêt nẽ nà? Anẽ.

14 Hãmri nhũm mẽ inhma nẽ hprĩ hã mẽ inhmã harẽ nẽ mẽ inhmã:

—Nà na pre ty.

15 Nom kormã à nẽ hikwỳta ã na pa hwỳr inhmõi kêt nẽ. Tã kot paj ma hwỳr mỗ nẽ hã mẽ amã ixàhpumunh tỳx ã amnhĩ to amnhĩrit. Ka mẽ ja hã ixpumu nẽ amnhĩ kaxyw ixkõt ajamxpěr tỳx o ri apa. ã mẽ ate amnhĩ nhĩpêx anhỹr kaxyw na pa kormã à nẽ nõr ã hwỳr inhmõi kêt nẽ. E ma pu mẽ hwỳr. Anẽ.

16 Hãmri nhũm mẽ inhĩõ pẽ Tomas pih-pohti tee ri ã kapěr anhỹrja ã kuma nẽ mẽ inhmã:

—Tõe ma pu mẽ hkõt. Kẽ mẽ mamrĩ hkõt mẽ pahto hpimràatã mẽ panhĩmex pa ri. Anẽ.

17 Tã pa mẽ ma hkõt mẽ hwỳr mỗ nẽ ra Rajare nhõ krĩ hwỳr ixpõx o mỗ hãmri nẽ harẽnh ma. Ra htyk nhũm mẽ kot haxàr ã arĩgro pẽ kwat ã harẽnh ma.

18-19 Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarẽ rũm ma wa hwỳr mra. Mẽ kot wa kãm kapěr nhũm tokyx akupỹm tãm wa hkrã kaxyw nhũm mẽ wa hwỳr mra. Wa õ krĩ pẽ Petãnja Jerujarẽ hwỳr ãm 3 kirõm pix jakamã nhũm mẽ ma wa hwỳr mra nẽ wa kuri wa kãm kapěr o hkrĩ.

20 Rõm nhũm Matre Jesus hpõx o mõi ã harẽnh ma nẽ kànhmã xa nẽ man mẽ ixkutã tẽ. No nhũm Marir arĩ mỳr o nhỹ nẽ hkõt htẽm kêt nẽ.

21 Hãmri nhũm Matre mẽ ixkutã tẽ nẽ mẽ ixkaxpa nẽ Jesus pumu nẽ mỳr kamã kãm kapěr nẽ kãm:

—Hêxta gàu nẽ Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhỹx pre htyk kêt nẽ. Xẽ mon ka pre we tokyx mẽ ixwỳr atẽmre hkêt nẽ?

22 Tã na pa arĩ akõt ijamxpěr tỳx nẽ. Kot kaj mẽmoj tã tanhmã Tĩrtũm wỳr to nhũm ama nẽ tanhmã amã mẽmoj to. Ra ixte ja hã apumunh mex kẽnã. Anẽ.

23 Hãmri nhũm Jesus kuma nẽ kãm:

—Kwa tee ri ajamxpěr nẽ akaprĩ hkêt nẽ. Koja akamy akupỹm war amã htĩr kãm ga. Anẽ.

24 Hãmri nhũm kuma nẽ kãm:

—Ma koja anẽ. Nhỹrmã Tĩrtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anẽ.

Kamy akupỹm htĩr ã harẽnh mar tã Jesus kot akupỹm ho htĩr tokyx anhỹr ã hkamnhĩx kêt nẽ ã kãm kapěr anẽ.

25-26 Jakamã nhũm kãm:

—Nà pa na ixpê akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkõt hamaxpěr nẽ ixkõt amnhĩ xunhwỳr xwỳnhjaja koja mẽ htyk tã koja mẽ hkarõ Tĩrtũm mẽ wa ixri htĩr tũm nẽ mex nẽ pa ho pa. Xà ate ja kaxyw ixkõt ajamxpěr tỳx nã? Anẽ.

27 Hãmri nhũm Matre kuma nẽ kãm:

—Xẽ nhũm. Apẽ Tĩrtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anẽ.

Hãmri nhũm Jesus kãm:

—Nà ãm hãmri na ka ã ijarẽnh anẽ. E ma akupỹm tẽ nẽ atõx mã anẽ kẽ tokyx man ixwỳr tẽ pa omu. Anẽ.

28 Hãmri nhũm kuma nẽ ma akupỹm tẽ. Hãmri nẽ Marir wỳr axà nẽ kãm Jesus jarẽ. Kõt mẽ hkrĩ xwỳnhjẽ hkàx ã kãm harẽ nẽ kãm:

—An xẽ hãmri amỳr kêt nẽ. Na ra mẽ pajahkre xwỳnhhta hpõx o mỗ nẽ mũtar nhỹ nẽ atã karõ. Anẽ.

29 Hãmri nhũm kuma nẽ kànhmã xa nẽ ma mẽ ixwỳr htẽm kurẽ kumrẽx.

30 Hãmri pa mẽ kormã krĩm ixpõx kêt nẽ. Arĩ Matreja Jesus wỳr htẽm xà kamã arĩ ixkrĩ.

31 Jakamã nhũm Matre ma tẽ nẽ Marir mã Jesus jarẽ nhũm kato nẽ man mẽ ixwỳr

tē. Hāmri nhūm Jerujarē rūm wa hwÿr mē mrar xwÿnhjaja omu nē htÿx kot hkamy hā pika pumunh nē mÿr kaxyw htēm ā hkamnhÿx nē man hkôt mra.

³² Hāmri nhūm Marir mē hkukamā mē ixwÿr tē nē Jejus pumu nē hpar pē tēm nē kām kapēr pē hipō nē mÿr o nhÿ. Nē kām:

—Héxta gāa nē Pahшти. Na pre ra wa ixkamy wa ixpē ty. Kop apu jar mē ixkôt ri apa ronhÿx pre htyk kêt nē. Hô mon ka pre we tokyx man mē ixwÿr atēmre hkêt nē? Anē.

³³ Hāmri nhūm Jejus kuma nē mÿr ā omu. Nē hkôt mē mrar xwÿnhjaja mē mÿr ā mē omu nē kām mē hkaprī nē.

³⁴ Hāmri nē mē kām:

—Nhÿri na ka prem haxà? E mē hwÿr ixto tē pa omu. Anē.

Hāmri nhūm mē kuma nē ma hā pyka hwÿr mē ixto mō

³⁵ nhūm Jejus mē urāk nē hwÿr mÿr o tē

³⁶ nhūm mē ja hā omu nē axpēn mā:

—Kwa mǎn kām hapê htÿx. Hā na ho ama nē hwÿr mÿr o tē. Anē.

³⁷ Nom nhūm mē hkwÿjaja axtem nē mē kām:

—Tk. Ra kot no hkre xwÿnhta o mex tā mo na we tokyx man kormā htÿr ri hwÿr htēm nē omunh nē akupÿm ho mex kêt nē? Anē.

Jejus kot akupÿm Rajare ho htÿr ā harēnh

³⁸ Tā pa mē ra kēn kre kamā mē kot Rajare jaxār xàta wÿr ixpōx o mō nhūm Jejus hkaprī nē hwÿr tē nē omu. Nhūm prem ra kēn rax o hitom

³⁹ nhūm omu nē mē kām:

—E mē akwÿjaja nhām inhmā nē kahê xà mē. Anē.

Hāmri nhūm Matre kuma nē tee ri hamaxpēr nē kām:

—Xê ma Jejus. Mē ri ā anhÿr kêt nē. Ra htyk ā arĭgro kēp 4 kēnā. Mǎn ra hkatōk nē hkro htÿx kumrēx. Anē.

⁴⁰ Hāmri nhūm kuma nē kām:

—Kwa ri ā ajamaxpēr anhÿr kêt nē Matre. Na pa ra amā ixkapēr nē amā ixkapēr o: “Kot kaj amnhÿ kaxyw ixkôt ajamaxpēr tÿx nē. Hā kot kaj Tÿrtūm mē wa ixihtÿx o wa ixihtÿx xàja pumu.” Anhÿr o amā ixkapēr. Jakamā kwa ja kaxyw Tÿrtūm mē wa ixkôt mǎn ajamaxpēr tÿx nē hkêt wehe. Anē.

Hāmri nhūm kuma nē kām:

—Ma ām hāmri na ka inhmā akapēr. Ma kot paj kaxyw war amā ijamaxpēr tÿx nē. Anē.

⁴¹ Rôm nhūm mē kām nhām kēn jakwa kre kahê xà mē. Hāmri nhūm Jejus Tÿrtūm mā amnhÿ jarēnh kaxyw kànhmā kaxkwa hwÿr rĭt nē kām:

—Pa Papaj. Nà na pa hte tanhmā mēmoj tā awÿr to ka inhma nē tanhmā inhmā mēmoj nhÿpēx to. Amex o amex Papaj.

⁴² Na ka hte ā inhmā amnhÿ nhÿpēx anē. Tā pa jajē noo mā ā amā ixkapēr anē. Ate inhmar nē tanhmā Rajare hto nhūm mē kot ja hā ixpumunh nē ixte anhÿ hā pix mā tanhmā amnhÿ nhÿpēx to ho ri ixpa hā ixpumunh kaxyw. Nē ka ate mē hwÿr inhmēnh ā apumunh kaxyw. Anē.

⁴³ Nhūm pre ā Tÿrtūm mā kapēr anē. Hāmri nē kÿx pē Rajare mā kapēr nē kām:

—Pa Rajare. Kwa tokyx kànhmā nhÿ nē annē mē ixwÿr tē nē akato. Anē.

⁴⁴ Puh nhūm akupÿm htÿr nē hkupu xà rāhā tē nē mē ixwÿr kato nē xa. Arĭ hkuk nē ĩhkra nē hpar kupu rāhā mē ixwÿr kato nē xa. Hāmri nhūm Jejus mē kām:

—Kwa mē atō nē kupu xà hpôt kē ma akupÿm ōrkwÿ hwÿr tē. Anē.

⁴⁵ Hāmri nhūm mē kot Marir mē Matre wa hwÿr mrar xwÿnh kwÿjaja ā Jejus kot Rajare nhÿpēx anhÿr ā omu nē amnhÿ kaxyw hkôt hamaxpēr nē hkôt amnhÿ xunhwÿr kurē kumrēx.

⁴⁶ Nom nhūm mē hkwÿjaja axtem nē omu nhūm ja mē kēp omnuy nē. Jakamā nhūm mē ma Parijew nhō xwÿnhjē hwÿr mra nē mē kām harē.

Mē kot Jejus pÿr ā amnhÿ grōnh

Matêwre 26.1-5; Makre 14.1-2; Rukre 22.1-2

⁴⁷ Hāmri nhūm Parijew nhō xwÿnhjaja tee ri Jejus kot akupÿm Rajare ho htÿr ā harēnh ma hāmri nē patre krāhtūmjē mē amnhÿ wÿr mē inhō juisti ho akuprō nē axpēn mā Jejus o kapēr punuj pē hā axpēn mar o hkrĭ. Hāmri nhūm mēhō mē kām:

—Kwa tanhmā kot puj mē ho? Na ra mē kām mēmoj pumunh kêt kwÿ ho anhÿr rax o pa.

⁴⁸ Kot puj mē ām omu nē tanhmā ho hkêt nhūm mē pahkwÿjaja kot ā amnhÿ nhÿpēx anhÿr ā omu nē htÿx ām hāmri ā kot amnhÿ

nhípêx anhÿr ã hkamnhĩx. Hãmri nê amnhĩ kaxyw hkôt hamaxpêr nê hkôt amnhĩ xunhwÿ. Jao ra amnhĩ kaxyw kêp mē ò pahihiti hã ãm. Koja mē ã amnhĩ nhípêx anê nhũm Rôm kamã pahihiti mē kot kator nê hpãnhã Jejus xãm ã harênh ma. Hãmri nê gryk xàj mē pahwÿr ò pôristi hkwy rê nhũm mē pahwÿr mra nê mē panhĩmex pa nê Tĩrtũm nhõrkwÿ grãnh pa. Kwa tanhmã kot puj wem tokyx amnhĩ nê ho? Anê.

⁴⁹ Hãmri nhũm Kajpas mē kãm kapêr. Kapjasja na pre amgrãja kamã kêp mē ò patre nhõ pahi maati. Jakamã mē kãm:

—Nà na pa ra ijamaxpêr. Kwa mē inhma.

⁵⁰ Nà kot puj mē hpĩr tokyx anê kê tapxipix ty pu mē arĩ mÿrpê pahpiitã pajamakêtkati nê ri papa. Anê.

⁵¹ Nhũm pre ã mē kãm kapêr anê. Nom amnhĩ krã hkôt ã mē kãm kapêr anhÿr kêt nê. Arĩ kêp mē ò patre krãhtũmjê nhõ pahi maati jakamã Tĩrtũm nhÿ hã Jejus kot Ijaew nê tykja kukamã ã harênh anê. Nom ja hã amnhĩ pumunh kêt nê.

⁵² Na pre Jejus mē ixpê Ijaew pix nê htyk kêt nê. Krĩ piitã hkôt Tĩrtũm krajê nê na pre ty. Mē piitã mē kot axpên to hkwy nê ri axpên to pa kaxyw na pre mē nê ty.

⁵³ Hãmri nhũm ã Kajpas mē kãm kapêr anê nhũm mē inhõ pahijaja kuma nhũm ja mē kãm mex nê. Jakamã nhũm mē kot tanhmã Jejus ã àmnênh to nhũm mē kot mē kãm tanhmã hpĩr to kaxyw ã axpên mar anhÿr o pa.

⁵⁴ Jakamã nhũm Jejus axte mē noo mã ri pa hkêt nê. Hãmri ma krĩ pê Epraĩ hwÿr ma mō. Pa mē hkôt ixpa ho ixpa xwÿnhjaja ma hkôt ixpa. Epraĩja kapôt ã krĩ na pre. Jakamã pa mē ma hwÿr mō hãmri nê kamã ri ixpa.

⁵⁵ Tã nhũm arĩgro pê Pasja ra ahtêp o mō. Amnepê m finat Mojes kot Ejit rũm mē panhĩgêjtê kator mã hamaxpêr kaxyw na pa pre htem hã ixkĩnh kaxyw Pas ã Jerujarê hwÿr akuprō. Na pa pre htem hwÿr pōj nê kamã Tĩrtũm noo mã mē inhmex kaxyw tanhmã amnhĩ nhípêx to.

⁵⁶⁻⁵⁷ Jakamã nhũm ra Ijaew ohtô nê ma Jerujarê hwÿr pa. Nê kãm Jejus pumunh prãm xàj Tĩrtũm mã amnhĩ jarênh xà hã

ixkre wÿr mra nê hwÿr agjê nê kamã hapêr nê axpên mã:

—Kwa nok? Xà koja mē hpakĩnh wÿr mōr kêt nê nà? Anê.

Nhũm Parijew nhõ xwÿnhjê mē mē inhõ patre krãhtũmjaja haxwÿja hapêr o kuhê. Nom mē kot axtem nê unê nê haxàr kaxyw. Jakamã mē kãm hã karō nê mē kãm:

—E kêr ka mē nhÿri Jejus pumu nê man mē ixwÿr mra nê mē inhmã harênh kurê kumrêx. Anê.

12

Marir kot Jejus kuxwa hã harênh

Matêwre 26.6-13; Makre 14.3-9; Rukre 7.36-50

¹ Tã nhũm ra Pas wÿr apkati grêre. Ra hwÿr apkati kêp 6. Jakamã pa mē ma akupÿm krĩ pê Petãn wÿr Jejus kôt mō. Jejus kot akupÿm Rajare ho htĩr xwÿnhta mē ò krĩ hwÿr pa mē akupÿm mō nê Rajare nhõrkwÿ hwÿr pōj nê mē hwÿr agjê.

² Hãmri nhũm mē Jejus pumu nê hkĩnh nê. Nê mē inhmã mēmoj mex nhípêx pa mē ixàpkur o ixkrĩ. Nhũm Rajare haxwÿja mē ixkutã apkur o nhÿ. Nhũm htōx Matre mē inhmã mē ò ho pa nê mēsti hã unhwÿr o xa.

³ Hãmri nhũm wa htōx Marir Jejus kukamã tanhmã hamaxpêr to nê hamaxpêr o:

—Ma kot paj tokyx mē kot mē ixpê hpĩr kukamã mē hkuxwaxà ho hkuxwa. Anê.

Hãmri nê kàx rax kãm mē hkuxwaxàja py nê o tē. Ra rit kahti hkôt hitep xà nhũm kupy nê hwÿr o tē. Mē kot mēmo htwÿm o mē hkuxwaxà mex nhípêxja na pre hã kàxpore xohtô rax kumrêx. Jakamã nhũm kupy nê Jejus wÿr o tē nê hpar ã hkapĩr pa nê amnhĩ krã hkĩ ho hpar grã ho nhÿ nhũm ra ixkre kuxwa htÿx kumrêx.

⁴ Hãmri nhũm mē inhõ pê Jut Kariotja. Kot kormã mē ìhkram Jejus nhõr mã xwÿnhta tee ri ã kot amnhĩ nhípêx anhÿr ã omu nhũm ja kêp omnuj nê

⁵ nhũm mē inhmã:

—Tk. Kwa pêr mē hkuxwaxà hã kàxpore xohtô rax kumrêx tã nhũm ri axtem nê Jejus par ã hkapĩr pa. Mo na ma o htêm nê ho wênê nê hpãnhã kàxpore ho rax nê hpyr nê ho mē kêp amrakati xwÿnhjê nhípêx kêt nê? Kot ho wênê ronhÿx hpãnhã kàxpore

ho rax kumrēx nē kupy nē ho mēmoj japrô rax o rax. Tã axtem nē amarī Jejus par ā hkapīr pa. Anē.

⁶ Te kām mē kēp amrakati xwýnhjê japê pyrāk tã kām mē hapê hkêt. Ām hêx rom ā kapēr anē. Na pre hte mē inhmã mē ixkàxpore jamý nē mē ixkôt mē inhmã hamār o pa. Nom tōhã axtem nē mē ixpê hkwý ho ahkī nē ho amnhīm mēmoj japrô. Jakamã Marir kot mē hkuxwaxà ho hapêx par ā omu nē tee ri hpãnhã kàxpore rax mã hamaxpēr nē kamã gryk nē ā mē inhmã kapēr anē.

⁷ Hāmri nhūm Jejus amnhī tã hamaxpēr ā omu nē kām:

—Tk. Kwa tanhmã kām akapēr to hkêt nē. Ixtyk nhūm mē kot ixkuxwa hkukamã na ā inhīpêx anē.

⁸ Na hte mē kēp amrakati xwýnhjaja mē akôt pa rãhã nē. Ka mē amã mēmo arīgro hã tanhmã mē ho ajuta hto hprãm nē rī mē ho ajuta nē mē kām mēmoj gō. No kêt pa kot paj ri mē akôt ixpa ka mē ixto mex ry ho apa hkêt nē. Kot paj tokyx mē apiitã mē are. Jakamã ãm hāmri na ā inhīpêx anē. Anē.

Patre krãhtūmjaja kot Rajare hã àmnênh ã harênh

⁹ Rôm nhūm Jerujarê nhō xwýnhjaja ra Jejus Petãn wýr hpôx ã harênh ma nē kot omunh mã ma hwýr mra. No ãm tapxipix pumunh mã hwýr mrrar kêt nē. Mãânên kot akupým ho htír xwýnhhta pumunh mã nhūm mē ma hwýr mra.

¹⁰⁻¹¹ Na pre ra Ijaew ohtô nē Jejus kot akupým Rajare ho htír ã harênh ma hāmri nē mē inhō patre kaga nē Jejus kôt amnhī xunhwý. Jakamã nhūm patre krãhtūmjaja tee ri ja hã mē omu nē axpên mã:

—Nà kot puj mē Jejus pix pír kêt nē. Kot puj mē mãânên hkôt Rajare pī hāmri nhūm wa hixi hamē mē kēp hapêx japêr. Anē.

Jejus kot Jerujarê hwýr àr ã harênh
Matêwre 21.1-11; Makre 11.1-11; Rukre 19.28-40

¹² Tã nhūm apkati nhūm Ijaew Jerujarê kamã mē hkīnhja kryx nē Jejus ra mē hwýr àhtêp o mōr ã harênh ma.

¹³ Hāmri nē axpên mã:

—Kwa ma pu mē mō nē pô hkwý jakà nē kutã ho mra. Anē.

Hāmri nē hkwý jakà nē hamý nē ma kutã ho mra. Hāmri nē ra hkaxpa nē omu nē hkīnh nē. Nē kām:

Pa. Nà ãm hāmri na ka mē ixwýr mō. Tirtūm na pre mē ixwýr amē ka ã amōr anē.

Tirtūmjaja mex o mex. Ām hāmri na pre mē ixwýr amē.

Kot kaj mē inhō pahi hpãnhã mē ixto amnhīptār o ri apa. Anē.

¹⁴ Hāmri nhūm Jejus nhýri jumênre pumu nē hwýr tē nē hã nhý nhūm mē pimràatã ma akupým Jerujarê hwýr mō. Tirtūm kapēr ã kagà htūm ra kot ja jarênh kot:

¹⁵ Pa Jerujarê nhō xwýnhjaja. Kwa mē tee ri amnhī kukamã ajamaxpēr ho amã ma hkêt nē.

Ota mē anhō pahi nyw ra mē awýr jumênre hã nhý nē hpôx o tē. Anē.

¹⁶ No Jejus kôt mē ixpa ho mē ixpa xwýnhjaja pa mē ã kot amnhī nhīpêx anhýrja ã omu nē tee ri hkukamã ijamaxpēr nē axpên mã:

—Kwa mo na ri ã amnhī nhīpêx anē nē jumênre hã nhý nē mē hkôt mō? Anē.

Tã nhūm arīgro hō hã ty nē akupým kaxkwa hwýr api pa prem hã omu hāmri nē kormã Tirtūm kapēr ã kagà htūm kot hkukamã ã harênh kot anhýrja mã ijamaxpēr kurê kumrēx. Hāmri nē axpên mã harênh o:

—Kwa ãm hāmri na Tirtūm kapēr ã kagà htūm kot ra ã Kraja jumênre hã ýr nē mē hkôt mōr ã hkukamã kot harênh anhýrta. Anē.

¹⁷ Hāmri nhūm Jejus kot Rajare mã kapēr pē akupým ho htír ã omunh xwýnhjaja arī nhãm mē hkwýjê mã ujarênh o pa.

¹⁸ Nhūm mē kuma nē ma Jejus wýr omunh mã mra.

¹⁹ Hāmri nhūm Parijew nhō xwýnhjaja tee ri ja hã mē omu nē axpên mã:

—Kwa na pu mē tee ri Jejus nē mē kām pakapēr kaprý nhūm mē pamar kêt nē ra piitã hkôt amnhī nhīpêx o pa. Kwa nà. Anē.

Ijaew kêt xwýnhjê jarênh

²⁰ Tã nhūm ra Gres kwýjaja Ijaew kôt hkīnh kaxyw ma Jerujarê hwýr mē hkôt mra nē mē ìhkô hã Tirtūm mã mex o mex ã harênh o hkôt mra.

²¹ Jakamā nhūm mē nhÿri mē inhĩō pē Firipti pumu nē hwÿr mra. Firipti kēp pyka pē Garirej kamā krī pē Pesēj nhō xwÿnh nhūm Gres nhō xwÿnhjaja omu nē hwÿr mra nē kām:

—Pa. Kwa na pa mē inhmā Jejus pumunh prām nē. Tanhmā kot pa wem amnhĩ to nē omu nē kām ixkapēr? Anē.

²² Hāmri nhūm mē kuma nē ma Andre hwÿr mē o mra nē kām mē harē. Hāmri nē wa ma Jejus wÿr mē o mra nē kām mē harē nē kām:

—Pa Pahiiti. Ota Gres nhō xwÿnhjaja kām apumunh prām nē awÿr mō. Mē pahkīnhā mē kēp Ijaew kēt tā mē kām apumunh prām nē. Anē.

Jejus kot amnhĩ kukamā amnhĩ jarēnh
Matêwre 16.24-28; mǎānēn Apokarip
2.10, 12.11

²³ Hāmri nhūm Jejus mē omu nē mē kām tanhmā amnhĩ jarēnh to. Kot mē ohtō nē mē nē htyk nhūm mē kukwak ri Tirtūm wa kuri htīr tūm nē pa ho pa hā mē kām amnhĩ jarē nē mē kām:

—Nà na ra ixtyk ā arīgro hwÿr apkati grēre. Ixpē Tirtūm kot mē akaxyw ixām xwÿnh jakamā kot paj mē apiitā mē anē ty hāmri nē akupÿm ixtīr nē ma kaxkwa hwÿr akupÿm api.

²⁴ Mē axohtō nē nhÿrmā Tirtūm mē wa ixri atīr tūm nē apa ho apa kaxyw kot paj ā amnhĩ nhĩpēx anē. Kwa mē ā ixte amnhĩ jarēnh anhÿrja ma nē mē amnhĩ krām haxār tÿx nē ri hā apa. Te ixte mēmo hy kot amnhĩ nhĩpēx pyrāk. Na htem pikap hagjē nhūm te htyk pyrā nē pika kaxwÿnh kām hikwÿ. Tā gaa nē higrōt nē hprēk nē ô. Nē ô rax kumrēx. Hyja pyxire nē hikwÿ htā kamā ô rax kumrēx. Nom koja mē hkre hkēt nē nhūm ô hkēt nē. Na hte ā mēmo hyja amnhĩ nhĩpēx anē. Ja pyrā nē kot paj mē anē ixtyk kēt nē te mē kot mēmo hy hkre hkēt nhūm hprēk nē ô hkēeta pyrāk ka mē ixkukwak ri Tirtūm mē wa ixri atīr tūm nē apa hkēt nē. Jakamā kot paj mē anē ty nhūm mē ijaxà. Hāmri pa akupÿm ixtīr ka mē axohtō nē ixkukwak ri wa ixri atīr tūm nē apa ho apa.

²⁵ —Nē koja mē ixpī pa mē anē ty. Tā mē ate ixkōt amnhĩ nhĩpēx o apa xwÿnhjaja. Kojā mē ixtā mē apar mā tā kwa kēr ka mē

atyk pymaj ixkaga hkēt nē. Kwār mē māmri tanhmā ixtā mē ato ka mē nhÿrmā Tirtūm mē wa ixri axte amnhĩ xà kamā ajamak kēt kumrēx nē atīr tūm nē amex nē apa ho apa. No kot kaj mē ixkīnhā jar amā amex pix prām hāmri nē nhÿrmā wa ixri atīr tūm nē apa hkēt nē.

²⁶ Kot kaj mē ā ixkōt amnhĩ nhĩpēx anhÿr o ri apa hāmri nhūm mē kot inhĩpēx pyrāk o mē anhĩpēx. Hāmri ka mē nhÿrmā ma ixkōt kaxkwa hwÿr api nē kamā ixri atīr tūm nē apa ho apa. Hāmri nhūm Inhĩpēxà ixtā mē apumu nē mē ato mex kumrēx. Anē.

Tirtūm kot Jejus mā kapēr ā harēnh
Matêwre 3.17, 17.5

²⁷ Tā nhūm Jejus tee ri amnhĩ kukamā htyk mā hamaxpēr nē hkaprī htÿx nē. Nē hkōt mē ixpa ho mē ixpa xwÿnhjē mā amnhĩ jarē nē mē inhmā:

—Hēxta waa nē. Na pa tee ri amnhĩ kukamā ijamaxpēr. Nē tee ri amnhĩ xà htÿx kamā ijamak kukamā ijamaxpēr pē ra amnhĩ kamā ixkahak nē. Nom ixte pika piitā hkōt mē kot ixkōt amnhĩ xunhwÿr xwÿnhjē nē ixtyk kaxyw ixwÿr kēnā. Jakamā kot paj Inhĩpēxà kot mē kēp ixpytār kaxyw tanhmā amnhĩ to hwÿr to hkēt nē. Anē.

²⁸ Hāmri nē hpānhā Hipēxà mā kapēr nē kām:

—Pa Papaj. Ām mēmoj pixi na inhmā hprām. Kē mē piitā ixkukwak ri amex o amex ā apumu. Ja na kēt inhmā hprām tÿx kumrēx.

Anhÿr o Tirtūm mā amnhĩ jarē. Hāmri nhūm kuma nē kaxkwa rūm kām kapēr. Kÿxpē kām kapēr nē kām:

—Nà na pa pre ra ā mē kām amnhĩ to amnhĩrīt anē nhūm mē ja hā ixpumu. Tā kot paj axte akukwak ri amnhĩ to amnhĩrīt nhūm mē piitā axte inhmex o inhmex ā ixpumu. Anē.

²⁹ Nhūm pre ā Tirtūm Jejus mā kapēr anē. Hāmri nhūm mē kot mē ixkuri mar o kuhē xwÿnhjaja kuma no ām hprī hā kot kām tanhmā kapēr toja mar mex kēt nē. Nē htÿx ho ām mēmoj tā hkamnhix. Jakamā nhūm mē hkwyjaja axpēn mā:

—Kwa mo na wehe? Na mǎn katōtōk nà? Anē.

Nhūm mē hkwyjaja mē kām:

—Nà na katõtòk kêt. Tĩrtũm kapēr o wrỳk xwỳnh mǎn tanhmǎ kǎm kapēr to. Anē.

³⁰ Hāmri nhũm Jejus mẽ kǎm:

—Nà Tĩrtũm tǎm na inhmǎ kapēr. Nom pa ixte mar kaxyw inhmǎ kapēr kêt nē. Mē kajaja mẽ ate ixtǎ mar kaxyw na kỳx pē ã inhmǎ kapēr anē. Anē.

Hāmri nē mẽ kǎm:

³¹ —E hāmri. Kot paj tokyx mẽ apiitǎ mẽ ate amnhĩ tomnuj pǎnhǎ amnhĩrer kaxyw tanhmǎ amnhĩ nhĩpêx to. Jao mǎnēn Satanasti pē hihtỳx xǎ ho ijapêx.

³² Koja mẽ pĩ kahpa hǎ inhô pa kỳxpê ajêt. Tĩrtũm kot mẽ awỳr inhmēnh tǎ nhũm mẽ ã inhĩpêx anē pa ty. Jakamǎ koja pika piitǎ hkôt mẽ ohtô nē ixkôt amnhĩ xunhwỳ nē amnhĩ kaxyw inhmǎ hamaxpēr rǎhǎ ho pa. Anē.

³³ Mē ixte tanhmǎ htyk to hǎ harēnh mar kaxyw nhũm pre ã mẽ inhmǎ amnhĩ jarēnh anē.

³⁴ Hāmri nhũm mẽ kot mẽ ixkuri mar o kuhê xwỳnhjaja tee ri kot htyk ã amnhĩ jarēnhja ma nē kǎm:

—Kwa mẽ ixte amnhĩ wỳr kamǎ ijamak o ixpa xwỳnhja htĩr tũm nē pa ho pa xwỳnh na. Tĩrtũm kapēr ã kagà htũm kot ã harēnh kot anhỳr tǎ ka ã ri mẽ kot apĩr nhũm atyk ã amnhĩ jarēnh anē. Ate Tĩrtũm kot mẽ ixwỳr amēnh xwỳnh ã amnhĩ jarēnh tǎ ã ri atyk ã amnhĩ jarēnh anē. Kwa xǎ apê mẽ ixte amnhĩ wỳr kamǎ ijamak o ixpa xwỳnh kêt? Anē.

³⁵ Hāmri nhũm mẽ kuma nē amnhĩ tǎ mẽ kǎm:

—Tỳ ixpê tǎm kēnǎ. Tǎ kot paj tokyx mẽ are. Jakamǎ kēr ka mẽ ixte arĩ mẽ akamǎ ixpa ri ixkôt amnhĩ xunhwỳ nē amnhĩ kaxyw ixkôt ajamaxpēr o ri apa. Te ixpê kanê hpôk pyrǎk jakamǎ na pa hte mẽ kǎm Tĩrtũm kapēr o mẽ ahkre o ri ixpa. Nom kot paj kritpēm mẽ akôt ixpa ry hkêt nē. Jakamǎ kwa kēr ka mẽ tokyx te mẽ kot kanê hpôk nhĩrǎ kamǎ ri mẽ pa xwỳnh kot amnhĩ nhĩpêx pyrǎ nē Tĩrtũm kôt amnhĩ nhĩpêx o ri apa. Kormǎ mẽ akôt ixpa ri. Kot paj tokyx ma mō nhũm te ra kamàt kô pyrǎk. Na hte kamàt kô kamǎ mẽ pa xwỳnhjaja tee ri rĩt mex mǎ nom rĩt mex kêt nē. Nē mẽmoj pumunh mex kêt nē.

³⁶ Jakamǎ kwa mẽ tokyx ixte arĩ mẽ akamǎ ixpa ri amnhĩ kaxyw inhmǎ ajamaxpēr nē ixkôt amnhĩ xunhwỳ. Te ixpê kanê hpôk nhũm kamǎ mẽ arĩt mex pyrǎk. Jao ixpyrǎ nē te mẽ apê kanê hpôk nhĩrǎ mex pyrǎk o amnhĩ nhĩpêx. Nē ixpyrǎ nē tǎm ri amnhĩ nhĩpêx o apa. Anē.

Nhũm pre ã mẽ kǎm kapēr anē hāmri pa mẽ kēp ixkato nē ma nhām mō.

Mē hkwỳjaja kot Jejus kôt hamaxpēr kêt ã mẽ harēnh

³⁷ Na pre hte Jejus mẽ noo mǎ mẽ kot aa mẽmoj pumunh kêt kwỳ ho anhỳr rax o pa. Tǎ nom nhũm mẽ ohtô nē hǎ omu nē ãm hǎ omu nē kēp Tĩrtũm kot mẽ pahwỳr mēnh xwỳnh ã hkôt hamaxpēr kêt nē.

³⁸ Nom ra mẽ hkukamǎ Tĩrtũm nhỹ hǎ kapēr jarēnh o pa xwỳnh pē finat Ijaisja mẽ hkukamǎ ja hǎ mẽ harē nē hǎ kagà. Nē hǎ kagàja o:

Pa Pahi Maati. Nà ra ixte mẽ kǎm ajarēnh o ixpa ryy htǎ no nhũm mẽ inhma nē ãm inhma.

Nē mẽ kot axihtỳx o axihtỳx ã ajarēnh mar tǎ no ãm ajarēnh ma nē amnhĩ kaxyw akôt hamaxpēr kêt nē. Anē.

³⁹ Mē kǎm Tĩrtũm kapēr mar prǎm kêt jakamǎ na prem mǎnēn Jejus kēp Tĩrtũm kot mẽ pahwỳr mēnh xwỳnh hkôt hamaxpēr kêt nē. Nhũm pre finat Ijaisja axte mẽ hkukamǎ ja hǎ mẽ harē nē mẽ hǎ kagà. Nē hǎ kagà ho:

⁴⁰ Na pre Tĩrtũmja tanhmǎ amnhĩ nē mẽ hkrǎ hto nhũm mẽ hkôt hamaxpēr kêt nē.

Ra mẽ kot hihtỳx o hihtỳx ã omunh tǎ omu nē ãm omu.

Nē mẽ kot kapēr mar tǎ amnhĩ tomnuj kaga hkêt nē.

Nē Tĩrtũm kot mẽ nē mẽ kot amnhĩ tomnuj o hapêx prǎm xǎj hkôt amnhĩ xunhwỳr kêt nē. Anē.

⁴¹ Kormǎ Jejus mẽ hwỳr wrỳk kêt ri nhũm finat Ijaisja hpimtir kǎm kot amnhĩ to rax kumrēx ã omu nē hkukamǎ ã harēnh nē hǎ kagà anē.

⁴² Hāmri nhũm Ijaew krǎhtũm kwỳjaja hkwỳjê rom amnhĩ kaxyw Jejus kôt hamaxpēr nē hkôt amnhĩ xunhwỳ. Tǎ Parijew nhō xwỳnhjaja kot ã mẽ kot amnhĩ nhĩpêx anhỳr ã mẽ harēnh mar pymaj ja hǎ

amnhĩ to amnhĩrīt kêt nê. Mẽ kot Tĩrtũm kapêr o mẽ ahkre xà hã ixkreja nê mẽ kator pymaj nhũm mẽ kãm amnhĩ to amnhĩrīt kêt nê.

⁴³ Na prem hamaxpêr o:

—Nà kot paj ja hã amnhĩ to amnhĩrīt nhũm mẽ amnhĩ nê ixtomnuj nê. Hãmri nê amnhĩ pyrà nê axpên mã inhmex ã ijarênh kêt nê.

Anhỹr o mẽ umaj amnhĩ kukamã hamaxpêr o pa. Nom Tĩrtũm tãm kot amnhĩm mẽ mex ã mẽ harênhja nhũm mẽ hkukamã hamaxpêr kêt nê.

Jejus kot Hipêêxà nhỹ hã kapêr ã harênh

⁴⁴ Nhũm Jejus axte mẽ kãm kapêr nê kỳx pê kapêr nê mẽ kãm:

—Nà koja mēhō amnhĩ kaxyw ixkôt hamaxpêr hãmri nê ixkôt pix mã hamaxpêr kêt nê. Määnēn amnhĩ kaxyw kot mẽ awỳr inhmēnh xwỳnhja kôt hamaxpêr.

⁴⁵ Wa ixte amnhĩ nhĩpêxja te tipxi pyràk jakamã koja mẽ tanhmã ixte amnhĩ nhĩpêx to hã ixpumu nê te kot Tĩrtũm kot amnhĩ nhĩpêx ã omunh pyràk.

⁴⁶ —Nê te ixpê kanê hpôk nhũm inhĩrã kamã mẽ apa pyràk kaxyw na pre Inhĩpêêxà mẽ awỳr inhmē pa mẽ awỳr wrỳ. Ixte kapêr o mẽ ajahkre ho ri mẽ akôt ixpa kaxyw. Jakamã koja mēhō amnhĩ kaxyw ixkôt hamaxpêr nê ixkôt amnhĩ xãm hãmri nê te kanê hpôk nhĩrã kamã rīt mex o pa pyràk o amnhĩ nhĩpêx. Jao amnhĩ nhĩpêx nyw o amnhĩ nhĩpêx o pa.

⁴⁷⁻⁴⁸ No mẽ kot ixkapêr mar nê ãm mar xwỳnhjaja te määnēn Inhĩpêêxà kapêr mar nê ãm mar pyràk. Mỳrapê koja mẽ nhỹrmã ma kuwy hwỳr pa nê mẽ kot amnhĩ tomnuj mỳrapê kamã pa ho pa. Tã no ã mẽ ate amnhĩ nhĩpêx anhỹr o ri mẽ apa kaxyw na pa pre mẽ awỳr ixwrỳk kêt nê. Ixte mẽ ate amnhĩ tomnuj pãnhã amnhĩrer par kaxyw na pa pre mẽ awỳr wrỳ.

⁴⁹ —Nê na pa hte amnhĩ krã hkôt tanhmã ri mẽ amã ixkapêr to ho ri ixpa hkêt nê. ãm kot mẽ awỳr inhmēnh xwỳnhja nhỹ hã na pa hte tanhmã mẽ amã ixkapêr to ho ri mẽ akôt ixpa.

⁵⁰ Tã mẽ kot Tĩrtũm kapêr mar nê amnhĩ kaxyw hkôt hamaxpêr xwỳnhjaja koja mẽ nhỹrmã wa ixri hĩr tũm nê mex nê pa ho

pa. Jakamã na pa hte tanhmã kot inhmã karō hto xà hkôt pix mã tanhmã mẽ amã ixkapêr to ho ri ixpa. Anê.

13

Jejus kot hkwỳjê hpar kuhōnh ã harênh
Rukre 22.24-27

¹ Tã nhũm ra Pas ã mẽ ixkĩnhta ahtêp. Pas ã na hte mẽ ixpê Ijaewjaja axpên wỳr akuprō nê hã ôwêhti hkra nyw pa nê ho anê nê hkur o ixkrĩ. Amnepêm Tĩrtũm kot pika pê Ejit rũm mẽ inhĩgêxjê kator kaxyw nhũm mẽ nojarêt nê ã hkwỳ hpar nê ho anhỹr nê hkwỳ hkurta pyràk. Na prem nojarêt nê mẽ hkra my kot wa mẽ kêp htyk pumaj ôwêhti hkra nyw kwỳ hpa nê ho anê nê ã hku. Jakamã nhũm arĩ mẽ ixpê mẽ hkanrêhã mẽ htãmnhwỳjaja ã mẽ kot amnhĩ nhĩpêx anhỹrja mã ijamaxpêr nê hã ixkĩnh kaxyw mẽ uràk nê hkwỳ hpa nê kuku. Jakamã nhũm ra Pas ahtêp nhũm Jejus amnhĩ kukamã tanhmã hamaxpêr to kurê kumrêx. Ra ma akupỳm Hipêêxà hwỳr àpir xà hã arĩgro hwỳr apkati grêre. Jakamã nhũm akupỳm nojarêt ã amnhĩ pumu nê kãm mẽ pahte hkôt amnhĩ xunhwỳr xwỳnhjê japê jakamã kãm mẽ pajapê rãhã mẽ panê htyk mã.

² Tã nhũm myt axà pa mẽ Pas ã ixàpkur o ixkrĩ. Nhũm Simãw Kariot kra Jut Kariotja määnēn mẽ ixkutã apkur o nhỹ. Kêp mẽ ixkwỳ htã nhũm pre Satanasti tanhmã hkrã hto nhũm ra axtem nê kot mẽ kãm Jejus kurê xwỳnhjê nhĩhkram haxàr kaxyw.

³⁻⁴ Tã pa mẽ kormã axpên kutã ixàpkur kaxyw ixkrĩ hpa nhũm Jejus kãnhmã xa nê hinôkà kapa nê toajti py nê ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pê tanhmã ri mẽ inhnoo mã amnhĩ nhĩpêx to ho pa hkêt. Kêp mẽ inhō pahi htã te kêp mẽ inhmã àpênh xwỳnh pyràk o amnhĩ nhĩpêx o pa.

⁵ Jakamã toajti py nê ho amnhĩ krax pre nê pasiiti hō py nê kamã gō hkwỳ ru nê ho mẽ ixpar kuhō nê toajti o mẽ ixpar grã ho mō.

⁶ ã mẽ inhĩpêx anhỹr o mō. Pê ra hpãnhã Simãw Pêtre hpar kuhōnh kaxyw nhũm tee ri amnhĩ tã omu nê kãm:

—Tk. Kwa apê inhmã axàpênh xwỳnh kêt kênã kot ka kêt ri axtem nê ixpar kuhō

Pahihti. Apê mē inhõ Pahi kênã kot ka kêt ã mē inhĩpêx anê. Anê.

⁷ Hāmri nhũm kām:

—Kwa nà. Kormã ate ja hã amnhĩ tã ixpumunh mex kêt. Nom kot kaj nhỹrmã aprĩ hã amnhĩ tã ixpumu. Anê.

⁸ Hāmri nhũm kām:

—Nà nom kot kaj ãm ixpar kuhõnh kêt nê. Kwarĩ. Anê.

Hāmri nhũm Jejus kām:

—Tõe. Kot paj apar kuhõnh kêt nê ka te apê ixkwỳ hkêt pyrãk. Anê.

⁹ Hāmri nhũm tee ri kuma nê kām:

—Tõe mamrĩ ixpar kuhõ. Nom ixpar pix kuhõnh kêt nê. Mããnen inhĩhkra kuhõ nê ixkuk kuhõ. Inhmã ixte apyrãk prãm tỳx kumrêx kênã. Anê.

¹⁰ Hāmri nhũm Jejus kām:

—Nà amỹkry hkõt mē wỳr xwỳnhjaja na htem mex nê axte wỳr kêt rãhã hikwỳ. Na htem ãm amnhĩ par pix kuhõ nê hikwỳ. Ja pyrã nê Tĩrtũm kot mē anê mē ate amnhĩ tomnuj ho hapêx par xwỳnhjaja te amỹkry hwỳr mē axwỳr nê amex pyrãk. Ka mē te mē kot amnhĩ par pix kuhõnhta pyrã nê axte tanhmã amnhĩ tomnuj to hãmri nê Tĩrtũm mã amnhĩ jarênh kurê kumrêx kê anê amnhĩ katut kõt ate amnhĩ tomnujta mē nê ho hapêx. Na pre ra mē anê mē ate amnhĩ tomnuj o hapêx. No ãm mē apiitã hkêt. Ota arĩ mē anhĩõja pyxire nê arĩ amnhĩ tomnuj rãhã ri pa. Jakamã te wỳr kêt nê arĩ grã htyk rax kãm ri pa pyrãk. Anê.

¹¹ Nhũm pre ã Jejus mē inhmã kapêr anê. Ra kot hprĩ hã mē kot kãm hkurê xwỳnhjê mã õr mã xwỳnhja pumunh jakamã te wỳr kêt nê arĩ grã htyk rax kãm ri pa pyrãk ã ã harênh anê.

¹² Tã mē ixpar kuhõnh pa nê akupỹm hinõkã py nê haxà nê nhỹ hãmri nê mē inhmã:

—E mēmo kaxyw na pa we ã mē apar kuhõnh anê? Kot paj ixprĩ hã mē amã amnhĩ jarê ka mē inhma.

¹³⁻¹⁴ Na ka htem ixto “mē ijahkre xwỳnh” nê ixto “pahihti” anhỹr o ijarênh o ri apa. ãm hãmri na ka htem ã axpên mã ijarênh anê. Ixpê mē ajahkre xwỳnh nê mããnen ixpê mē anhõ pahihti htã inhmã mē ate tanhmã axpên nhĩpêx to ho apa hprãm xàj na pa ã mē apar kuhõnh anê. Tã kêr ka

mē ixpyrà nê tanhmã axpên to mex to ho ri apa.

¹⁵ Jao amnhĩ kuxwar axpên to mex pê mēmoj to axpên kutã anojarêt rãhã ho ri apa.

¹⁶ Kwa mē ixkapêr ma nê kãm amnhĩ krãm haxàr tỳx rãhã ho ri apa. Mē ate amnhĩ to rax o ijakrenh kêt. Te ixpê mē anhõ patrãw nhũm mē ate inhmã tanhmã amnhĩ nhĩpêx to ho apa xwỳnh pyrãk. Nê te ixte mēmoj tã mē amã karõ nhũm mē ate inhmar nê inhmã tanhmã mēmoj nhĩpêx to pyrãk. Tã te ixpê mē anhõ patrãw pyrãk tã pa ã mē apar kuhõnh anê. Ka mē amnhĩ tã ixpumu hãmri nê amnhĩ xwar tanhmã axpên to ajuta hto ho ri apa. No ri axpên pumu nê ajamaxpêr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhỹr o ajamaxpêr o ri apa hkêt nê.

¹⁷ —E na pa ã mē amã ixujarênh anê. Kot kaj mē inhma nê ixujarênh kõt ã axpên nhĩpêx anhỹr o ri apa. Hã kot kaj mē akĩnh nê ri apa. Anê.

Jejus kot amnhĩ tã hã àmnênh xwỳnh o amnhĩrĩt ã harênh

Matêwre 26.20-25; Makre 14.17-21; Rukre 22.21-23

¹⁸ Nhũm Jejus arĩ mē inhmã kapêr nê mē inhmã:

—Kot kaj mē apiitã mē akĩnh nê apa hkêt nê. Ixte mē arênh xwỳnhjaja mē apiitã mē apumunh mex. Jakamã na pa Tĩrtũm kot mē apiitã mē ate amnhĩ tomnuj o hapêx par kêt ã mē anhĩõja jarê. Tĩrtũm kapêr ã kagã htũm kot harênh kot:

Ixkutã apkur o ỹr xwỳnhjê hõ koja axtem nê mē kot kãm ixkurê xwỳnhjê nhĩhkram ijaxà. Kêp ixkõt pa ho pa xwỳnh tã koja axtem nê ã inhĩpêx anê.

Anhỹr o kot harênh. Tã koja tokyx ã inhĩpêx anê.

¹⁹ Nom kormã kot ã inhĩpêx anhỹr kêt ri na pa hkukamã mē amã harê. Jakamã koja ã inhĩpêx anê ka mē ja hã ixpumu nê ra ixte amnhĩ kukamã mē amã amnhĩ jarênhhta mã ajamaxpêr nê ixpê Tĩrtũm rũm mē awỳr ixwryk xwỳnh kõt ajamaxpêr tỳx kurê kumrêx.

20 —Kwa mẽ ixkapēr ma nē amnhĩ krã kamã kãm ajamaxpēr tỳx o ri apa. Koja mēhō ixte mẽ hwỳr mẽ arēnh xwỳnhjê hã tanhmã mẽ ato mex to. Hãmri nē te pa kot tanhmã ixto mex to pyræk. Nē koja mēhō tanhmã pa ixto mex to nē mãänēn te kot mẽ awỳr inhmēnh xwỳnhhta tanhmã ho mex to pyræk. Anē.

21 Nhũm pre ã Jejus mẽ inhmã kapēr anē. Hãmri nē tee ri amnhĩ kukamã hamaxpēr nē hkaprĩ nē mẽ inhmã:

—Hêxta waa nē. Nà kot kaj mẽ atō mẽ kot kãm ixkurê xwỳnhjê nhĩhkram ijaxà. Kwa mẽ amnhĩ krã kamã ixkapērja mã ajamaxpēr tỳx nē. Anē.

22 Hãmri pa mẽ amnhĩ tã kuma nē tee ri axpēn pumunh o ixkrĩ.

23 Ixpê Juāw na pa pre ixpê Jejus krãmnhwỳ mex ã ìhkô hã ixàpkur o inhỳr

24 nhũm Simãw Pêtreja ixpumu nē inhmã nomgõr nē kawax pē inhmã:

—Kwa mẽ pahtõ nhĩxi hã hkukja nà? Anē.

25 Hãmri pa kuma nē Jejus mã kãm:

—Kwa Pahihtĩ. Mẽ ixtõ koja we ã anhĩpêx anē? Anē.

26 Hãmri nhũm mẽ inhmã:

—Nà kot paj pãwti hõ py nē guhkrax kãm ho mry kagô nhek nē kot mẽ ìhkram ijaxàr mã xwỳnhhta mã kugõ ka mẽ hkôt omu. Anē.

Hãmri nē kupy nē ho mry kagô nhek nē Simãw Kariot kra Jut Kariotja mã kugõ nhũm kupy.

27 Pyrja kôt nhũm Satanasti tanhmã hkrã hto. Hãmri nhũm Jejus te kot kãm amnhĩ to nojarêt pyræk o amnhĩ tã kãm kapēr nē kãm:

—E kwa tokyx nà. Anē.

28-30 Hãmri nhũm kuma nē kato nē ma kamàt kô kamã htēm kurê kumrêx. Hãmri pa mẽ ixàpkur o ixkrĩ xwỳnhjaja Jejus kot ã kãm kapēr anhỳrja ã kuma nē tee ri hkukamã ijamaxpēr. Hãmri nē kot ma mẽ hkĩnh ã mẽõ hkwy japrôr kaxyw ma htēm ã hkamnhĩx. Nhũm mẽ ixkwỳjaja axtem Jejus kot mẽ kêp amrakati xwỳnhjê mã mẽmoj nhõr ã kãm karõ nhũm ma mẽ hwỳr htēm ã hkamnhĩx. Kêp mẽ inhmã mẽ ixkàxpore jamãr o pa xwỳnh jakamã pa mẽ ã ixtỳx mẽmoj tã hkamnhĩx anē.

Jejus akupỳm nojarêt nē mẽ kãm mẽmoj tã karõ hã harēnh

Matêwre 22.39-40; mãänēn Wam Juāw 3.11-24

31-32 Hãmri nhũm Jejus mẽ inhmã:

—Nà kot kaj mẽ tokyx mẽmoj pumu nē Tĩrtũm mã mex o mex ã harē nē ijaxwỳja inhmã inhmex o inhmex ã ijarē. Kot kaj mẽ tokyx mẽmojta pumu kãm ga.

33 —Te mẽ apê ixkra pyræk tã kot paj arĩ ri mẽ akôt ixpa grire hãmri nē ma akupỳm api. Kot kaj mẽ tee ri jar ijapêr o ri apa nom nhỳri ixpumunh kêt nē. Nē kormã tokyx ma ixkôt apa hkêt nē.

34 —E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpēn kĩnh o ri apa. Te pa inhmã mẽ ajapê pyræk o axpēn nhĩpêx rãhã ho ri apa.

35 Kot kaj mẽ ã amnhĩ nhĩpêx anē nhũm mẽ akwỳjaja ja hã mẽ apumu nē mẽ apê ixkwỳ hã mẽ apumunh kurê kumrêx. Anē.

Simãw Pêtre kot Jejus ã amnhĩ to hêx kukamã harēnh

Matêwre 26.31-35; Makre 14.27-31; Rukre 22.31-34

36 Nhũm Jejus ã kot mẽ ixrer nē ma nhỹhỹm mõr ã amnhĩ jarēnh anē hãmri nhũm Simãw Pêtre tee ri kot amnhĩ jarēnh ma nē kãm:

—Kwa Pahihtĩ. Nhỹhỹm kot kaj kêt mõ pa mẽ akôt ixpa hkêt nē? Anē.

Hãmri nhũm kãm:

—Nà ma inhmõr xàta wỳr kot kaj mẽ kormã ma ixkôt apa hkêt nē. Nom kot kaj mẽ nhỹrmã ma ixkôt apa. Anē.

37 Hãmri nhũm Simãw Pêtre kãm:

—Kwa mo kot pa mẽ omu nē tokyx ma akôt inhmrar kêt nē? Inhmã akôt ixtyk puma hkêt kênã. Kwãr mẽ mãmrĩ atã xpi. Inhmã ajapê htỳx kumrêx kênã. Anē.

38 Hãmri nhũm Jejus kãm:

—Xà ãm hãmri na ka ã inhmã amnhĩ jarēnh anē Simãw Pêtre? Xà amã ixkôt atyk puma hkêt? Kwa o kora. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã amnhĩ tã axàprãr o axkrunēpxi kãm ga. Kwa amnhĩ krã kamã ixkapērja mã ajamaxpēr tỳx nē. Anē.

14

Jejus kot Tirtūm nhō krī jarēnh Eprēw 11.16

¹ Nhūm Jejus arī mẽ inhmā kapēr nē mẽ inhmā:

—Kwa ā ixte mẽ amā amnhī jarēnh anhỹrja ma nē tee ri amnhī kukamā ajamaxpēr nē akaprī hkēt nē. Arī amnhī kaxyw Tirtūm mẽ wa inhmā ajamaxpēr tỳx rāhā ho ri apa.

² Inhīpêêxà nhō krī kamā ixkre xohtôô. Ām hāmri na pa ā mẽ amā harēnh anē. Tā kot paj ma akupỹm hwỳr api nē mẽ akutêp mã amā mẽ anhōrkwỹ ho mex.

³ Hāmri nē ho mex pa nē rī man akupỹn mẽ awỳr wrỳ. Hāmri nē ma akupỹm amnhī kôt mẽ ato ixàpir pa ka mẽ Tirtūm mẽ wa ixkôt apa rāhā apa ho apa. Jakamā kwa mẽ ri akaprī nē apa hkēt nē. Anē.

Jejus te kêp Tirtūm wỳr pry pyrāk Epes 2.18

⁴ —Nē ma nhỹhỹm inhmōr xàta ra mẽ ate harēnh mar mex. Nē hwỳr pryja mãânēn mẽ ate harēnh mar mex. Anē.

⁵ Hāmri nhūm Tomas tee ri kuma nē kām:
—Kwa mẽ ixte nhỹhỹm amōr xàta pumunhre hā kot pa kêt mẽ hwỳr pryja pumu. Anē.

⁶ Hāmri nhūm kām:
—Kwa paa. Te ixpê Inhīpêêxà hwỳr pry pyrāk. Na htem amnhī kaxyw inhmā hamaxpēr nē ixkôt amnhī xunhwỹ hāmri nē nhỹrmā ixkukwak ri pix mã ma Inhīpêêxà mẽ wa inhō krī hwỳr api. Ixkukwak ri pix mã na htem hprī hā Tirtūm kapēr ma. Nē ixkukwak ri pix mã na htem wa ixri htīr tūm nē pa ho pa.

⁷ Kot kaj mẽ aprī hā ixpumu nē mãânēn te aprī hā Inhīpêêxà pumunh pyrāk. Tā ra mẽ ate tanhmā ixte amnhī nhīpêx to hā ixpumunh mex jakamā mãânēn te ra mẽ ate Inhīpêêxà kot amnhī nhīpêx ã omunh mex pyrāk. Anē.

Jejus mẽ Tirtūm wa kot amnhī nhīpêx tipxi hā wa harēnh

Juāw 1.1, 10.30; Piripos 2.6; Korosē 2.9

⁸ Nhūm Jejus ã mẽ inhmā kapēr anē nhūm Firipti kuma nē kām:

—Kwa nom mẽ inhmā inhno ho Anhīpêêxà pumunh prām. Kot pa mẽ omu nē ixkīnh tỳx kumrêx. Anē.

⁹ Hāmri nhūm Jejus kām:

—Kwa na pa pre ra mẽ akôt ri ixpa ryy nē. Ka mẽ aprī hā ixpumunh mex nē. Kêt ra mẽ kot ixpumunh mex xwỳnhaja te mẽ kot mãânēn Inhīpêêxàja no ho omunh mex pyrāk.

¹⁰ Wa ixte amnhī nhīpêxja ãm tipxi. Xà ate kormā amnhī krā hi mã ixkapēr jaxàr tỳx kêt? Inhīpêêxà mẽ wa ixte amnhī nhīpêxja ãm tipxi. Nē kot axpēn pyrāk. Jakamā na pa hte amnhī krā hkôt ri tanhmā amnhī nhīpêx to ho ri ixpa hkēt nē. Ām Inhīpêêxà nhỹ hā na pa hte ri tanhmā mẽ amā ixkapēr to ho ri ixpa. Nē hihtỳx xà ho tanhmā amnhī nhīpêx to ho ri ixpa. Ka mẽ ja hā ixpumu nē te ano ho Inhīpêêxà pumunh pyrāk.

¹¹ Kwa mẽ ixkapēr ma nē hkôt ajamaxpēr tỳx nē. Inhīpêêxà mẽ wa ixte amnhī nhīpêxja ãm tipxi. Nē kot axpēn pyrāk. Rỳ ka mẽ tee ri ja kukamā ajamaxpēr japēr hāmri nē ixte aa mẽ ate mẽmoj pumunh kêt kwỳ ho anhỹr ã mãn ixpumu nē ja hā wa ixte amnhī nhīpêx tipxi kôt ajamaxpēr.

¹² —Kwa mẽ ixkapēr ma nē amnhī krā kamā amnhī krām haxàr tỳx nē. Mẽ ate amnhī kaxyw ixkôt ajamaxpēr xwỳnhaja kot kaj mẽ ixte tanhmā amnhī nhīpêx to ho ixpa hā ixpumu nē ixkôt ã amnhī nhīpêx anhỹr o ri apa. Kot paj akupỹm Inhīpêêxà hwỳr api nē kuri ixpa ho ixpa. Ka mẽ ixwakre kamā ixihtỳx xà ho tanhmā mẽ akwỳjê mã amnhī nhīpêx to ho ri apa.

¹³ —Nē kot kaj mẽ apê ixkwỳ hā tanhmā mẽmoj tã ixwỳr to pa mẽ ama nē mẽ amā tanhmā mẽmoj nhīpêx to. Mẽ kot omunh nē Inhīpêêxà mex o mex ã omunh kurê kumrêx kaxyw.

¹⁴ Nà kot kaj mẽ apê ixkwỳ hā mẽmoj tã ixwỳ pa mẽ ama nē mẽ amā tanhmā mẽmoj to. Anē.

Jejus kot mẽ pahwỳr Tirtūm mẽ wa Karō rēnh ã kot amnhī jarēnh

Juāw 7.37-39, 16.7-17; Atre 2.1-4; mãânēn Rōmān 5.5; Wam Korīt 12.7-11; Epes 3.16; Wam Juāw 2.27

15 Nhūm Jejus arī mẽ inhmã kapēr nẽ mẽ inhmã:

—Nà kot kaj mẽ amã ixkĩnh hã kot kaj mẽ ixkapēr kôt pix mã ri amnhĩ nhĩpêx rãhã ho ri apa.

16 —Kot paj akupỹm kaxkwa hwỳr api hãmri nẽ mẽ ato Inhĩpêxà wỳ nhūm inhma nẽ mẽ awỳr kot mẽ ato ajuta xwỳnh maatita rẽ nhūm man mẽ awỳr wrỳ nẽ mẽ akaxwỳnh mã agjê. Hãmri nẽ mẽ akôt tanhmã mẽ ato ajuta hto ho pa rãhã ho pa.

17 Wa Ixkarō koja mẽ awỳr kurẽ nhūm mẽ amã agjê. Hãmri nẽ hprĩ hã mẽ amã Tĩrtũm kapēr o amnhĩrĩt o mẽ akôt pa ka mẽ aprĩ hã mar mex nẽ. No mẽ kệp Tĩrtũm kra hkêt xwỳnhjaja koja hprĩ hã wa Ixkarō jarēnh mar kêt nẽ. Mẽ kot wa ixkôt amnhĩ xunhwỳr kêt jakamã koja mẽ hkarō mã gjêx kêt nẽ. Âm mẽ ate ixkôt amnhĩ nhĩpêx o apa xwỳnhjê pix wỳr koja wrỳ nẽ mẽ awỳr agjê nẽ mẽ akamã pa ho pa.

18 —Nẽ ixte mẽ arer nẽ ma inhmōr mã tã kot kaj mẽ te mẽ hã awrãre pyrã nẽ ahte atỳx ri apa pyrãk kêt nẽ. Kot paj te pa akupỹn mẽ awỳr ixwrỳk pyrã nẽ mẽ awỳr wa Ixkarō rẽ nhūm mẽ akãm agjê nẽ mẽ akamã pa ho pa.

19 —Nẽ koja tokyx mẽ kot amnhĩ kaxyw Tĩrtũm mã hamaxpēr kêt xwỳnhjaja axte ixpumunh kêt nẽ. No mẽ papajaja kot puj mẽ tokyx axte nhỹri axpẽn pumu.

—Nẽ kot paj akupỹm ixtĩr hãmri nẽ ixtĩr tũm nẽ ixpa ho ixpa ka mẽ ixkukwak ri ajaxwỳja nhỹrmã Tĩrtũm mẽ wa ixri atĩr tũm nẽ apa ho apa.

20 —Tã koja wa Ixkarō mẽ awỳr wrỳ nẽ mẽ akarō mã agjê ka mẽ aprĩ hã Tĩrtũm mẽ wa ixte amnhĩ nhĩpêx ã wa ixpumunh mex kurê kumrêx. Te wa ixte amnhĩ nhĩpêx tipxi pyrãk o ka mẽ hã wa ixpumu. Nẽ mããnẽn mẽ papajaja te ra mẽ pahtipxi nẽ ri mẽ papa pyrãk ka mẽ hã amnhĩ pumunh mex kurê kumrêx.

21 —Nẽ mẽ kãm ixkĩnh xwỳnhjaja na htem ixkapēr ma nẽ hkôt amnhĩ nhĩpêx o pa. Jakamã nhūm Tĩrtũm ixtã mẽ omu nẽ kãm mẽ hapê htỳx nẽ. Pa mããnẽn amnhĩ tã mẽ omu nẽ inhmã mẽ hapê htỳx nẽ. Jakamã kot paj mẽ kãm amnhĩ to amnhĩrĩt nhūm te mẽ kot no ho ixpumunh pyrãk. Anẽ.

Nhūm pre ã Jejus hkôt mẽ ixpa ho mẽ ixpa xwỳnhjê mã amnhĩ jarēnh anẽ.

22 Hãmri nhūm Jutre hōja. Jut Kariot kêt axtem Jutre hōja Jejus axte kot mẽ inhmã pix mã kot amnhĩ to amnhĩrĩt ã harēnhja ma nẽ kãm:

—Kwa aprĩ hã mẽ inhmã mẽmoj jarẽ mẽ ijahkre xwỳnh. Mon ka mẽ kệp akwỳ hkêt xwỳnhjê mã axte amnhĩ to amnhĩrĩt kêt ã amnhĩ jarẽ? Nẽ âm mẽ papxipix mã amnhĩ to amnhĩrĩt ã amnhĩ jarẽ? Anẽ.

23 Hãmri nhūm kãm:

—Nã mẽ amã ixkĩnh xwỳnhjaja na ka htem ixkapēr ma nẽ hkôt amnhĩ nhĩpêx. Nhūm Inhĩpêxà ja hã mẽ apumu nẽ ixtã kãm mẽ ajapê htỳx nẽ. Hãmri pa wa mẽ akôt ixpa ho ixpa. Jao mẽ amã amnhĩ to amnhĩrĩt mex o ixpa.

24 Na pa hte amnhĩ krã hkôt ri mẽ kãm ixkapēr o ixpa hkêt nẽ. Âm Inhĩpêxà nhỹ hã na pa hte mẽ kãm ixkapēr o ri ixpa. Kot mẽ awỳr inhmēnh xwỳnhhta nhỹ hã. Tã nhūm mẽ kãm inhmar prãm kêt jakamã na pa hte wa mẽ kãm mẽ apyrã nẽ amnhĩ to amnhĩrĩt o ixpa hkêt nẽ.

25 —E na pa kormã ixte mẽ akôt ri ixpa ri ã mẽ amã amnhĩ jarēnh anẽ.

26 Tã koja Inhĩpêxà ixpãnhã mẽ awỳr wa Ixkarō rẽ. Ixte hã mẽ amã ixãhwỳr xà hkôt. Hãmri nhūm man mẽ awỳr wrỳ nẽ mẽ akaxwỳnh mã agjê nẽ mẽ akôt ri tanhmã mẽ ato ajuta hto ho pa. Nẽ ra ixte ã mẽ amã ixkapēr anhỹrja koja hprĩ hã mẽ amã ho amnhĩrĩt mex nẽ. Ka mẽ amnhĩ krã kamã kãm ajamaxpēr nẽ hã ano htỳx nẽ ho apa. Anẽ.

Jejus kệp mẽ pajamakêtkati nhõr xwỳnh Rômãn 5.1; Karatas 5.22; Piriapos 4.7; Koroosê 3.15

27 Nhūm Jejus arī mẽ inhmã kapēr nẽ mẽ inhmã:

—Nẽ mẽ kệp ixkwỳ hkêt xwỳnhjaja na htem tee ri amnhĩ kukamã hamaxpēr o ri pa. Jao hkaprĩ nẽ pa. No pa na pa hte mẽ kurom ijamakêtkati nẽ ixkĩnh nẽ ri ixpa ho ixpa. Tã kot paj tanhmã mẽ ato ka mẽ ixpyrã nẽ ajamakêtkati nẽ axãmnhĩx akĩnh nẽ ri apa. Jakamã kwa mẽ ixte amnhĩ jarēnh ma nẽ tee ri amnhĩ kukamã ajamaxpēr o amã ma ho ri apa hkêt nẽ.

28 –Na pa pre ra mẽ amã ma ixàpir nê nhỹrmã man akupỹn mẽ awýr ixwryk ã mẽ amã amnhĩ jarẽ. Tã na pa ra ma akupỹm Inhĩpêêxà hwýr ixàpir mã. Kot amnhĩ to rax o kot ijakrenh. Kot paj akupỹm hwýr api nê kuri inhmex nê ixpa ho ixpa. Tã ka mẽ amã ixkĩnh hã kot kaj mẽ ma akupỹm hwýr ixàpir ã ijarẽnh ma nê inhỹ hã akĩnh nê.

29 –Kormã ma akupỹm ixàpir kêt ri na pa ã mẽ amã amnhĩ kukamã amnhĩ jarẽnh anê. Kêr pa mẽmo arĩgro hã ma akupỹm api ka mẽ ja hã ixpumu nê ajamaxpêr o: “Nà ãm hãmri na pre mẽ inhmã amnhĩ kukamã akupỹm Hipêêxà hwýr àpir ã amnhĩ jarẽ.” Anhỹr o ajamaxpêr. Jao ixkôt ajamaxpêr tỳx rãhã ho ri apa.

30 –Kot paj tokyx axte tanhmã mẽ amã ixkapêr to hkêt nê. Mẽ kêp ixkwý hkêt xwýnhjê nhõ pahшти Satanastija na ra kot tanhmã ixto kaxyw. Nom koja tee ri tanhmã kãm ixto hprãm kaprý. Kurom ixihtỳx o ixihtỳx o ixte hakrenh par jakamã koja tanhmã ixto hkêt nê.

31 Kwār kãm tanhmã ixto hprãm xà hkôt tanhmã ixto pa omu. Inhmã Inhĩpêêxà hkôt ixte amnhĩ nhĩpêx prãm jakamã kot paj jahti mã arĩ xa nhũm te tanhmã kot ixto pyræk o inhĩpêx nom tanhmã ixto hkêt nê. Mẽ ate inhmã Inhĩpêêxà japê htỳx ã ixpumunh kaxyw kot paj ã mẽ anoo mã amnhĩ nhĩpêx anê. Nê mẽ ate ixte kãm tanhmã amnhĩ nhĩpêx to ho ri ixpa rãhã mẽ kot ixpĩr ã ixpumunh kaxyw. E hãmri. Ma pu mẽ mō nê amnhĩ to Tĩrtũm wý. Anê.

Nhũm pre ã Jejus hkôt mẽ ixpa ho mẽ ixpa xwýnhjê mã kapêr anê. Pa mẽ kuma nê kànhmã ixkuhê nê inhnojarêt nhũm axte mẽ inhmã awjarẽ.

15

*Jejus te kêp mẽmo krô pyræk
Karatas 2.20; Wam Juāw 2.28*

1 Nhũm Jejus arĩ mẽ inhmã kapêr nê mẽ inhmã:

–Nà te ixpê mẽmo pĩ pê “uwa” anhỹr xwýnhta kahkô maati pyræk. Nê Inhĩpêêxàja te kot uwa hkre nê hamãr o pa xwýnhta pyræk.

2 Nê mẽ kot ixkôt amnhĩ xunhwýr xwýnhjaja te mẽ kot uwa kahkô rũm krô pyræk. Na hte mẽ hkwyjaja htỳx ri kêp ixkwý hã amnhĩ jarẽnh ã amnhĩ to hêx. Jao te kot krôja rã htã ô hkêt pyræk. Koja rã htã ô hkêt nê nhũm kot hamãr xwýnhja tee ri omu nê kahkô nê krãhta nê kumê. No koja ô mex nê nhũm omu nê hkĩnh nê. Hãmri nê rã nê ô rax kaxyw tanhmã ho mex to. Tã na hte Tĩrtũm uwa krô jamãr xwýnhta pyrã nê ã mẽ ate ixkôt amnhĩ xunhwýr xwýnhjê nhĩpêx anê.

3 No mẽ kajaja na ka prem mẽ kot ixkwý hã amnhĩ to hêx xwýnhjê rom ixkapêr mar tỳx nê. Nê amnhĩ kaxyw inhmã ajamaxpêr nê ixkôt amnhĩ nhĩpêx mex o apa. Jao te mẽ ate krô rã nê ô rũnh pyræk o amnhĩ nhĩpêx.

4 –Na hte krôja amnhĩ krã hkôt ô hkêt nê. ãm kahkô pix kukwak ri na hte rã nê ô. Ja pyrã nê kot kaj mẽ ixkukwak ri pix mã inhmã hprãm xà hkôt ri tanhmã amnhĩ nhĩpêx to ho apa. Jakamã kwa kêr ka mẽ ixkapêr pix mãn mar o apa pa mẽ akôt ixpa ho ixpa.

5 Te ixpê kahkô nhũm te mẽ apê krô pyræk jakamã kot kaj mẽ inhmã hprãm xà hkôt tanhmã amnhĩ nhĩpêx to ho ri apa nê te krô rã nê ô rũnh pyræk o amnhĩ nhĩpêx. No kot kaj mẽ amnhĩ krã hkôt ri amnhĩ nhĩpêx o ri apa nê te krô grã nê ô hkêt pyræk o amnhĩ nhĩpêx.

6 Na hte uwa krô nhõ dõnja nhỹri hã krô grã pumu hãmri nê kahkô nê hakà nê ma o mra nê kuwy kamã kurê nê ho hxêt pa. Ja pyrã nê mẽ kot htỳx ri ixkôt amnhĩ xunhwýr ã amnhĩ jarẽnh xwýnhjaja koja mẽ nhỹrmã amnhĩ xà htỳx kamã hamak rãhã ho pa.

7 –Tã no mẽ kajaja. Kêr ka mẽ ixkapêr kôt pix mã amnhĩ nhĩpêx rãhã ho ri apa. Te mẽ pahtixi nê ri papa pyræk o amnhĩ nhĩpêx. Hãmri nê mãmri amã hprãm xà hkôt mẽmoj tã Tĩrtũm wý nhũm ama nê amã mẽmoj tã ate hwýr xàta kôt kugõ.

8 Kot kaj mẽ Inhĩpêêxà mẽ wa ixkapêr kôt amnhĩ nhĩpêx o ri apa nhũm mẽ piitã ja hã mẽ apumu nê hamaxpêr o: “Hêxta waa nê. Jajaja na htem Tĩrtũm kot amnhĩ nhĩpêx o amnhĩ nhĩpêx o pa. Mãn Tĩrtũmja mex o mex.” Anhỹr o hamaxpêr.

⁹ —Ně na pa hte Inhĩpêêxà kãm ijapê pyràk o inhmã mẽ ajapê ně. Tã kêr ka mẽ amarĩ inhmã mẽ ajapê hã ri ixkôt amnhĩ nhĩpêx mex o apa.

¹⁰ Na pa hte ãm Inhĩpêêxà kapêr kôt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh ně ri ixpa. Tã kêr ka mẽ ixpyrà ně ixkapêr kôt pix mã tanhmã amnhĩ nhĩpêx to ho ri apa. Ně ixpyrà ně inhmã mẽ ajapê hã amnhĩ pumu ně akĩnh ně ri apa.

¹¹ —E na pa ã mẽ amã ixkapêr aně. Mě ate inhmar ně ixpyrà ně axãmnhĩx ajamakêtkati ně akĩnh ně ri apa kaxyw. Tã kêr ka mẽ ã amnhĩ nhĩpêx aně ně te pa ixte ã amnhĩ nhĩpêx anhÿr pyràk. Aně.

Jejus kot mẽ pamã axpên kĩnh tÿx ã mẽ pamã karõ

¹² Nhũm Jejus arĩ mẽ inhmã kapêr ně mẽ inhmã:

—E kêr ka mẽ te inhmã mẽ ajapê pyràk o mẽ amã axpên japê ho mẽ amã axpên kĩnh o ri apa. Jao axpên to mex o ri axpên kôt apa.

¹³ Koja mēhõ kãm hkrãmnhwÿ japê htÿx ně nhũm ra mēhõ mẽmo mÿrapê kot kēp hpĩr mã nhũm tee ri hã omu ně nē kãm amnhĩ mẽ nhũm kupĩ. Hãmri nhũm mẽ ja hã omu ně kãm hkrãmnhwÿ japê htÿx ã nē htyk ã axpên mã harē.

¹⁴⁻¹⁵ —E kot paj axte mẽ apê inhmã mẽ axapênh xwÿnh ã mẽ ajarēnh kêt ně. Na hte mẽ õ patrãwjaja hprĩ hã kãm mẽ apênh xwÿnhjê mã amnhĩ jarēnh kêt ně. Na htem ãm mẽ apênh pix ã mẽ kurē. Nom mẽ kajaja mẽ ate ixkapêr mar ně hkôt pix mã amnhĩ nhĩpêx jakamã kot paj hpãnhã mẽ apê ixkrãmnhwÿ hã mẽ ajarē. Na htem axpên to hkrãmnhwÿ ně ma nhÿhÿm pa kaxyw ně tanhmã amnhĩ kukamã hkrãmnhwÿ mã amnhĩ jarēnh to. Tã mẽ apê ixkrãmnhwÿ jakamã na pa hte ã amnhĩ kukamã mẽ amã amnhĩ jarēnh aně. Nom ja pix jarēnh kêt ně. Na pa hte mããnēn Inhĩpêêxà xõ ri mẽ amã mẽmoj piitã ho amnhĩrĩt o mẽ akôt ixpa.

¹⁶ —Ně mẽ kajaja na ka prem ixpê mẽ akrãmnhwÿ kaxyw ixãm kêt ně. Pa na pa pre amnhĩ kaxyw inhmã mẽ aprãm. Ixkapêr kôt pix mã ri mẽ ate tanhmã amnhĩ nhĩpêx to ho apa kaxyw. Te uwa krõ ô rũnh

ně aa grã hkêeta pyràk. Jakamã kot kaj mẽ mẽmoj tã Inhĩpêêxà wÿ nhũm mẽ ama ně mẽ ate mẽmoj tã hwÿr xà hkôt amã kugõ.

¹⁷ —E. Kwa kêr ka mẽ amã axpên kĩnh ně tanhmã axpên to ajuta hto ho axpên mã mẽmoj kutã anojarêt pix o mãn kêt ri apa. Nã ja na kêt inhmã hprãm. Aně.

Mě kot Jejus kwÿjê kamã gryk xwÿnhjê jarēnh

Matêwre 10.22; mããnēn Juãw 7.7, 17.14; Wam Juãw 3.13

¹⁸ —Ně koja ixkwÿ hkêt xwÿnhjaja kãm mẽ aprãm nõkati. Tã kêr ka mẽ amnhĩ tã mẽ omu ně tee ri amnhĩ kukamã ajamaxpêr kêt ně. Ixkumrēx na prem kãm ixprãm nõkati. Tã koja mẽ mã ixtã mẽ ato aně ně kãm mẽ aprãm kêt ně.

¹⁹ Mě apê mẽ hkwÿ ronhÿx mẽ amnhĩ tã mẽ apumu ně kãm mẽ ajapê ně. Nom apê mẽ hkwÿ hkêt. Ra ixte amnhĩ kaxyw mẽ arēnh jakamã na htem tee ixtã mẽ apumu ně kãm mẽ akĩnh kêt o kãm mẽ akurē ně.

²⁰ Koja mẽ ixtã hpijaàm kêt ně ně mããnēn mẽ atã hpijaàm kêt ně. Ně mẽ anhĩpêx o te mẽ kot pa ixpê mẽ anhõ patrãw nhĩpêx pyràk. Ka mẽ ixpyrà ně amnhĩ xà htÿx kãm ajamak o ri apa. Na pa pre ra mẽ amã ja jarē. Nom koja mẽ akwÿjaja jajê rom te ra mẽ kot ixkapêr mar ně hkôt amnhĩ nhĩpêxta pyrã ně mããnēn mẽ akapêr ma ně hkôt amnhĩ nhĩpêx o pa. Kwa kêr ka mẽ ixkapêrja mã mãn ajamaxpêr tÿx rãhã ho ri apa.

²¹ —Koja mẽ ixtã tanhmã mẽ anhĩpêx to. Mě kot Tĩrtũm kapêr kôt amnhĩ nhĩpêx kêt jakamã koja mẽ ã ixtã mẽ anhĩpêx aně. Tĩrtũm kot mẽ awÿr inhmēnh kôt hamaxpêr kêt ně ã mẽ anhĩpêx aně.

²² Ixwrÿk ně mẽ kãm Tĩrtũm kapêr jarēnh o ri ixpa htã nhũm mẽ inhma ně ãm inhma ně ixkôt amnhĩ nhĩpêx kêt ně. Jakamã koja mẽ kot amnhĩ tomnuj xwÿnh ã amnhĩ to hpimxur kêt ně.

²³ —Ně koja mēhõ kēp ixprãm nõkati ně mããnēn te kēp Inhĩpêêxà prãm nõkati pyràk.

²⁴ Na pa pre mẽ piitã mẽ hkôt aa mẽ kot mẽmoj pumunh kêt kwÿ ho anhÿr o ri mẽ hkôt ixpa nhũm mẽ hã ixpumu. ãm papxpix na pa pre ã amnhĩ nhĩpêx anhÿr o ri

mě hkôt ixpa nhūm mẽ hã ixpumu. Kêp âm mẽ kot ja hã ixpumunh kêt ronhỹx prem axpên mã ijarênh o: “Tk. Mẽ pahte mēhōja nhỹhỹnh mẽ pahwỳr hpôx ã omunhre hã kot puj kêt mẽ ri hã pahpijaàm o ri papa.” Anhỹr o nhỹx prem axpên mã ijarê. Tã ra mẽ kot ja hã ixpumunh mex tã axtem nê Inhĩpêêxà mẽ wa mẽ kãm wa ixkurê nê. Jao mẽ kot amnhĩ tomnuj xwỳnh ã amnhĩ to hpimxur kêt nê.

²⁵ No Tĩrtũm kapêr ã kagà htũm kot mẽ hkukamã mẽ harênh nê mẽ hã kagà nê kot mẽ hã kagà kot:

Mẽmo tanhmã kute mỳrapê na htem kãm ixkurê? Nà âm amarĩ na htem kãm ixkurê ho pa. Anê.

Tã ã ixtã kagà kot anhỹr xà hkôt na htem ã kãm ixkurê anê. Jakamã koja mẽ mãânên ixtã kãm mẽ akurê nê. Nom kêr ka mẽ arĩ mẽ kãm ixkapêr jarênh o ri mẽ hkôt apa nê tee ri amnhĩ kukamã ajamaxpêr kêt nê.

²⁶ —Nê tokyx ma akupỹm Inhĩpêêxà hwỳr ixàpir mã tã kot paj hwỳr pôj nê aa mẽ ato ijamakêtkati hkêt nê. Kot paj amnhĩ pãnhã mẽ awỳr wa Ixkarô rê. Mẽ kot kãm: “Mẽ kutã nojarêr xwỳnh maati” anhỹr xwỳnh ta kot paj mẽ awỳr kurê nhūm ixpãnhã mẽ awỳr wrỳ nê mẽ amã agjê nê hprĩ hã mẽ amã Tĩrtũm mẽ wa ixto amnhĩrĩt o ri mẽ akôt pa.

²⁷ Kot kaj mẽ ama hãmri nê ma mẽ piitã mẽ hkôt ri mẽ kãm ixkapêr jarênh o ri apa. Na pa pre ra mẽ kãm Tĩrtũm kapêr jarênh ryy ho mẽ hkôt ri ixpa ka mẽ ixkôt ri inhmar o apa ry nê. Jakamã kêr ka mẽ ixwakre kamã arĩ mẽ kãm ixkapêr jarênh o ri mẽ hkôt ri apa. Anê.

16

¹ Nhūm Jejus arĩ mẽ inhmã kapêr nê mẽ inhmã:

—Nê mẽ kot nhỹrmã ixtã tanhmã mẽ anhĩpêx to nhūm mẽ ate tee ri amnhĩ kukamã ajamaxpêr nê mẽ umaj ixkaga py-maj na pa hte ã mẽ amã ixprĩ hã mẽmoj jarênh ry anê.

² Kot kaj mẽ kãm ixkapêr jarênh o ri apa nhūm mẽ hkwyjaja tee ri mẽ ama nhūm ja mẽ kêp omnuj nê. Nhūm mẽ Tĩrtũm kapêr o mẽ ahkre xà hã ixkreja rũm amnhĩ nê mẽ ajano nê mẽ akwỳjê hpar o pa. Hãmri

nê hamaxpêr o: “E pu mẽ axte mẽ hkwyjê pynê nê mẽ kupa. Tĩrtũm kãm ja mex kênã.” Anhỹr o htỹx hamaxpêr o pa.

³ Mẽ kot hprĩ hã Inhĩpêêxà mẽ wa ixkapêr mar mex kêt nê ã htỹx wa inhmã ja mex ã wa ijarênh anê.

⁴ Nom mẽ ate ixkôt amnhĩ xunhwỳrta krax kãm na pa pre ã mẽ amã mẽ harênh anhỹr kêt nê. Arĩ mẽ akôt ixpa kênã. Kot ka mẽ ixkôt apa rãhã amã mẽ uma hkêt nê. Tã pa ra akupỹm inhnojarêr nê ã mẽ amã mẽ harênh anê. Jakamã koja mẽ nhỹrmã ã mẽ anhĩpêx anê ka mẽ amnhĩ tã mẽ omu nê ra ixte mẽ akukamã ã mẽ harênh anhỹrja mã ajamaxpêr kurê kumrêx nê tee ri amnhĩ kukamã ajamaxpêr kêt nê. E kwa ixkapêrja mãn mẽ amnhĩ krã him haxàr tỹx nê ri hã apa. Anê.

Jejus mẽ Tĩrtũm wa hkarô jarênh

⁵⁻⁶ Nhūm Jejus arĩ mẽ inhmã kapêr nê mẽ inhmã:

—E na pa ra kot mẽ awỳr inhmênh xwỳnh ta wỳr ra akupỹm inhnojarêr ka mẽ ixte amnhĩ jarênh ã inhma nê akaprĩ nê. Nê tee ri amnhĩ kukamã ajamaxpêr tã mẽ atõ aprĩ hã ma inhmôr xà ã ixkukjêr kêt nê. Rỳ inhmã: “Kwa mo kaxyw kot kaj kêt mẽ ixre nê ma akupỹm mō? Xà we ja amã mex?” Anhỹr o mẽ atõ ixkukjêr kêt nê.

⁷ Kêt ma akupỹm ixàpirja mẽ amã mex kumrêx. Kop âm akupỹm ixàpir kêt ronhỹx mẽ amã mẽmoj kutã nojarêr xwỳnh ta ixpãnhã mẽ awỳr wrỳk kêt nê. Tã kot paj ma akupỹm api nê amnhĩ pãnhã mẽ awỳr kurê. Jakamã kwa mẽ ja ma nê tãm ajamaxpêr o ri apa.

⁸ Koja ixpãnhã mẽ awỳr wrỳ hãmri nê mẽ kêp ixkwỳ hkêt xwỳnhjê mã mẽmoj to axkrunêpxi nê ho amnhĩrĩt. Koja mẽ kãm mẽ kot tanhmã amnhĩ tomnuj to xà ho amnhĩrĩt. Nê mãânên mẽ kãm tanhmã mẽ kot amnhĩ to mex to xà ho amnhĩrĩt. Nê mãânên Tĩrtũm kot nhỹrmã mẽ kot amnhĩ tomnuj mỳrapê tanhmã mẽ homnuj to xàta nhūm mãânên mẽ kãm ho amnhĩrĩt. Koja mẽ kãm ja piitã ho amnhĩrĩt.

⁹ —Jakamã koja mẽ ja kukamã tanhmã hamaxpêr to nê hamaxpêr o: “Kwa kot paj xep amnhĩ tomnuj kaga nê amnhĩ kaxyw Tĩrtũm Kra Jejus mã ijamaxpêr nê hkôt

amnhĩ xãm kêt nhũm Tĩrtũm nhỹrmã ixte amnhĩ tomnuj myrapê tanhmã ixto.

¹⁰ Nà kot paj hkôt amnhĩ xãm hãmri nê ra uràk nê Tĩrtũm kapêr kôt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tĩrtũm amnhĩ wỳr ho api pa mẽ axte jar nhỹri omunh kêt nê.

¹¹ Na xep Tĩrtũm nhỹrmã kot ma kuwy hwỳr mẽ kêp Jejus kwỳ hkêt xwỳnhjê nhõ pahĩ maatija mênh ã ra amnhĩ kukamã hã amnhĩ jarê. Jakamã kwa arĩ ixpê hkwỳ jakamã kot paj tokyx Jejus kôt amnhĩ xãm kêt nhũm hkôt kuwy hwỳr inhmẽ.” Anhỹr o hamaxpêr. Koja ã wa Ixkarõja mẽ kêp ixkwỳ hkêt xwỳnhjê mã mẽmoj to amnhĩrĩt mex anê.

¹² —Nê na pa kormã mẽ amã mẽmoj piitã ho amnhĩrĩt kêt nê. Kormã mẽ ate aprĩ hã mẽmoj pumunh nê mar mã tãm kêt.

¹³ Tã koja ixpãnhã wa Ixkarõ mẽ awỳr wrỳ nê mẽ akarõ mã agjê hãmri nê hprĩ hã mẽ amã Tĩrtũm kot amnhĩ nhĩpêx o amnhĩrĩt o mẽ akôt pa ho pa. Nom koja amnhĩ krã hkôt tanhmã mẽ amã ho amnhĩrĩt to hkêt nê. Koja ãm Tĩrtũm pix xô ri mẽ amã ho amnhĩrĩt o mẽ akôt pa. Jao hprĩ hã mẽ amã ixkôt mẽ ate amnhĩ nhĩpêx nyw o mẽ amã amnhĩrĩt o mẽ akôt pa. ã koja hprĩ hã ra ixte mẽ amã ixujarênh xà hkôt axte mẽ amã mẽmoj to amnhĩrĩt mex o pa anê.

¹⁴ —Nê koja hprĩ hã mẽ amã pa ixto amnhĩrĩt o pa. Jao mẽ amã inhmex o inhmex ã ixto amnhĩrĩt o mẽ akôt pa.

¹⁵ Inhipeêxà mẽ wa ixkapêrja ãm htipxi. Tã koja wa Ixkarõ ixkapêr xô ri ã mẽ amã mẽmoj to amnhĩrĩt anê. Jao ra wa ijamê wa ixkapêr o amnhĩrĩt mex o pa. Koja ã wa mẽ apê ixkwỳ hã mẽ ato mex o pa anê. Anê.

Mẽ kot akupỹm Jejus tĩr ã omunh ã mẽ harênh

¹⁶ Nhũm Jejus arĩ mẽ inhmã kapêr nê mẽ inhmã:

—Nê kot paj tokyx mẽ ano pê akunok ka mẽ axte amnhĩ kaêx ã ixpumunh kêt nê. Nom kwa kêr ka mẽ tee ri ixkapêrja kukamã ajamaxpêr kêt nê. Kot paj ixtã apkati grêre ka mẽ axte ixpumu. Anê.

¹⁷⁻¹⁸ Nhũm pre ã Jejus hkôt mẽ ixpa ho mẽ ixpa xwỳnhjê mã kapêr anê. Pa mẽ tee ri ã kapêr anhỹr ã kuma nê axpên mã:

—Kwa mo na ri ã amnhĩ jarênh anê? Nê tokyx mẽ pano pê pikunor tã hã apkati grêre nhũm axte mẽ pahte omunh ã amnhĩ jarê nê akupỹm Hipêêxà hwỳr àpir ã amnhĩ jarê. Pêr kapêrja ãm ri katii. Anê.

¹⁹ Nhũm amnhĩ tã mẽ inhma nê mẽ inhmã:

—Kwa xà na ka mẽ kormã aprĩ hã ixkapêr ã inhmar kêt nê?

²⁰ Kot paj ty nhũm mẽ kêp ixkwỳ hkêt xwỳnhjaja ijarênh ma nê hkĩnh nê. No mẽ kajaja kot kaj mẽ akaprĩ nê amỳr o apa. Nê gaa nê akupỹm akĩnh nê. Kwa mẽ ixkapêrja ma nê kãm ajamaxpêr tỳx o apa.

²¹ Te mẽ ate mẽ hpijagri xwỳnh kot amnhĩ nhĩpêx pyràk. Na htem õhy xà nê gaa nê ra õhy xà htỳx nê. Nê hkĩnh kêt nê tee ri amnhĩ nhĩpêx o hikwỳ. Tã gaa nê hpijagri nhũm hkrare kato nhũm omu nê akupỹm hkĩnh nê axte õhy xà htỳx mã hamaxpêr kêt nê.

²² Tã ã mẽ ate amnhĩ nhĩpêx anhỹr kaxyw. Kot kaj mẽ akĩnh kêt nê ri apa. Tã kot paj akupỹm tokyx ixtĩr nê axte mẽ awỳr ixkato ka mẽ ixpumu nê akĩnh nê. Hãmri nê akĩnh rãhã ri apa ho apa. Nhũm mēhõ mẽ apumu nê tee ri tanhmã mẽ akĩnh nê mẽ ato kaprỳ ka mẽ arĩ akĩnh rãhã ri apa ho apa.

²³ —Nê ixte akupỹm kaxkwa hwỳr ixàpir nê amnhĩ pãnhã mẽ awỳr wa Ixkarõ rênh nhũm mẽ awỳr wrỳk nê hprĩ hã mẽ amã mẽmoj piitã ho amnhĩrĩt jakamã kot kaj mẽ axte amã mẽmoj tã ixkukjêr prãm kêt nê. Anê.

Jejus kwỳjaja kot àmnhĩx mẽmoj tã Tĩrtũm wỳr

Matêwre 18.19-20; Juãw 14.13-14

Nhũm Jejus arĩ mẽ inhmã kapêr nê mẽ inhmã:

—E kwa mẽ ã ixkapêr anhỹrja ma nê amnhĩ krã kamã kãm ajamaxpêr tỳx nê ho apa. Kot kaj mẽ apê ixkwỳ hã mẽmoj tã Inhipeêxà wỳ nhũm mẽ ama nê mẽ ate hã axàhwỳr xà hkôt mẽ amã mẽmoj tanhmã ho rỳ mẽ amã mẽmoj gõ.

24 Na ka mẽ kormã apê ixkwỳ hã mẽmoj tã axàhwỳr kêt nê. Tã kêt ka mẽ amã mẽmoj tã hwỳr prãm nê mãmri mẽmoj tã hwỳr o apa. Kê mẽ ama hãmri nê tanhmã mẽ amã mẽmoj nhĩpêx to ka mẽ amnhĩ tã omu nê akĩnh nê.

25 –Nê na pa pre mẽ amã mẽmoj jarênh kaxyw nê mẽmoj tã haxwỳ nê mẽ amã ixu-jarênh rax nê. Nom kot paj axte ã mẽ amã ri ixujarênh anhỳr kêt nê. Kot paj tã ixprĩ hã mẽ amã tanhmã Inhiĩpêxà jarênh to ka mẽ aprĩ hã mar mex kurê kumrêx.

26 Hãmri nê mẽ kamjaja mẽ apê ixkwỳ hã tanhmã amnhĩ to hwỳr to ho apa. Jakamã mo kaxyw kot pa kêt axte tanhmã mẽ ato hwỳr to? Kot kaj mẽ kamjaja amnhĩ to hwỳr jakamã arĩ ixte mẽ ato hwỳr kaxyw ixto presija hkêt nê.

27 –Na ka mẽ ra amã ijapê nê. Nê ixte Inhiĩpêxà rùm mẽ awỳr ixwryk ã ixpumu. Jakamã nhũm Inhiĩpêxàja ixtã mãânên kãm mẽ ajapê nê. Tã kot kaj mẽ kamjaja mẽmoj tã amnhĩ to hwỳr o apa nhũm mẽ ama nê kãm mẽ ajapê htỳx kãm mẽ amã mẽmoj gô.

28 –Na pa pre Inhiĩpêxà rùm amnê mẽ awỳr wry. Hãmri nê kãm hprãm xà hkôt tanhmã amnhĩ nhĩpêx to hpar o mỗ nê ra akupỳm hwỳr inhnojarêt kaxyw. Anê.

Nhũm pre ã Jejus mẽ inhmã amnhĩ jarênh anê.

29 Pa mẽ tã ixprĩ hã mar mex nê. Hãmri nê kãm:

–Tỳ. Nà na pa mẽ tã ixprĩ hã ate amnhĩ jarênh ma. Ka amnhĩ tã haxwỳr nê axu-jarênh kêt jakamã pa mẽ tã ixprĩ hã amar mex nê.

30 Pêr ãm ate mẽmoj piitã omunh par xwỳnh na ka. Jakamã ate mẽ ijamaxpêr pi-itã hkôt aprĩ hã mẽ ixpumunh par kumrêx kênã kot ka tanhmã mẽ ijamaxpêr to hã mẽ ixkukja. ãm hãmri na ka Tirtũm rùm awryk ã amnhĩ jarê. Anê.

31 Hãmri nhũm mẽ inhma nê mẽ inhmã:

–Xà ãm hãmri na ka mẽ ixkôt ajamaxpêr tỳx nê?

32 Kwa mẽ o kora. Kot kaj mẽ tokyx mẽ umaj ixre nê anhrà nê ma ahpỳnhã mẽ anhõ krĩ hwỳr mra. Mẽ kot ixkôt tanhmã mẽ anhĩmex to pymaj kot kaj mẽ ã amnhĩ nhĩpêx anê kãm ga. Kot paj ahte mẽ kãm

ixãm pyrak o amnhĩ nhĩpêx nom ahte ixãm kêt nê. Inhiĩpêxà aa kot ixrere hã.

33 –E ixkukwak ri mẽ ajamakêtkati nê axàmnhĩx mẽ apa kaxyw na pa ã mẽ amã ixkapêr anê. Nom mẽ kêp ixkwỳ hkêt xwỳnhjaja koja nhỹrmã ixtã mẽ atomnuj tỳx o pa. Tã kêt ka mẽ amã mẽ uma nê tee ri amnhĩ kukamã ajamaxpêr o ri apa hkêt nê. Nhỹrmã ixte mẽmoj punuj piitã ho ijapêx par ã arĩgrota ã kot paj mẽ atã mẽ ho ijapêx par kumrêx. Anê.

17

Jejus kot amnhĩ to Tirtũm wỳr ã harênh Rômãn 8.34; Eprêw 7.25

1 Tã nhũm Jejus mẽ inhmã kapêr pa nê hpãnã kaxkwa hwỳr rĩt nê Tirtũm mã amnhĩ jarê nê kãm:

“Pa Papaj. E na pa ra amã hprãm xà hkôt tanhmã amã amnhĩ nhĩpêx to hpar o mỗ nê akupỳm awỳr inhnojarêt kaxyw. Jakamã kot kaj ixpê Akra hã ma akupỳm amnhĩ wỳr ixto api. Mẽ kot ja hã ixpumunh nê amã amex o amex ã ajarênh o pa kaxyw.

2 Na ra pyka piitã hkôt ri mẽ pa xwỳnh kwỳjaja amnhĩ kaxyw ixkôt hamaxpêr nê ixkôt amnhĩ xunhwỳ nom ka na ka pre inhmã mẽ agô. Ixte mẽ htĩr tũm nê mẽ pa mã xwỳnh ã mẽ harênh kaxyw. Jakamã koja mẽ nhỹrmã ixkukwak ri pakuri htĩr tũm nê pa ho pa.

3 Na mẽ ra ixkapêr mar mex nê. Nê ixpê Jejus Kris pê ate mẽ hwỳr inhmênh xwỳnhja kôt hamaxpêr mex nê. Nê apê Tirtũm ã ãm apyxi mex ã mãânên akôt hamaxpêr mex nê. Nê amex o amex ã akôt hamaxpêr nê kãm akĩnh nê. Jakamã koja mẽ nhỹrmã pakuri htĩr tũm nê pa ho pa. Nà koja mẽ anê.

4 Amnepêm amnê pyka ja hwỳr inhnojarêt nhũm ate tanhmã ixte amnhĩ nhĩpêx to hã inhmã karôta na pa ra hatur xàm mênh kaxyw. Na pa xatã mẽ kãm akapêr jarênh o ri mẽ hkôt ixpa. Jao ra mẽ kãm apê Pahi Maati hã apixi mex ã ajarê nê amex o amex nê axàhpumunh o axàhpumunh ã mẽ kãm ajarênh o ri ixpa.

5 Jakamã e Papaj. Kêr ka tokyx ixpê akra hã ma akupỳm amnhĩ wỳr ixto api.

Pa akupỹm awỳr pōj nē te amnepēm akuri ixpaja pyrà nē axte akuri ixpa ho ixpa.” Anē.

Jejus kot hkwỳjê ho Tĩrtũm wỳr ã harēnh

Nhũm Jejus arĩ Tĩrtũm mã kapēr nē kãm:

⁶ “E Papaj. Nà ra ate pyka hkôt inhmã mẽ òr xwỳnhjaja na pa ra mẽ kãm akapēr jarēnh ryy ho ri mẽ hkôt ixpa nhũm mẽ akapēr kôt pix mã amnhĩ nhĩpêx o pa.

⁷ Tã ixte anhỹ hã tanhmã amnhĩ nhĩpêx to ho ri ixpaja ra mẽ kot ja hã ixpumunh mex.

⁸ Na pa pre hte axô ri mẽ ahkre ho ri ixpa nhũm mẽ amnhĩ kaxyw ixkôt hamaxpēr mex nē. Nē ate mẽ hwỳr inhmēnh nhũm mẽ hwỳr ixwrỳkja ã mẽ kot ixpumunh mex.

⁹⁻¹⁰ Tã ot pa mẽ ho awỳr o xa. Nom na pa mẽ kêp ixkwỳ hkêt xwỳnhjê ho awỳr kêt nē. ãm ate inhmã mẽ òr xwỳnhjê pix o na pa awỳ. Mẽ kêp akra jakamã mããnēn mẽ kêp ixkraa. Jakamã na htem pamã pamex o pamex ã pajarēnh o ri pa.

¹¹ Axihtỳx o axihtỳx jakamã na ka pre amnhĩ xwar inhmã axihtỳx xà hkwỳ gō pa te ixte axihtỳx pyrāk. Tã na pa ra akupỹm awỳr inhnojarêt kaxyw. Kot paj jar pyka hkôt ri ixpa ry hkêt nē. Nom ixkwỳjaja koja mẽ arĩ kamã pa jakamã kwa Papaj. Kêr ka inhmã mẽ omunh mex nē kê mẽ inhỹ hã tãm ri amnhĩ nhĩpêx o pa. Nē pahpyrà nē te ixkre tipxi kamã mẽ htipxi nē mẽ pa pyrāk o axpēn kôt pa.

¹² Kormã mẽ kamã ixpata ã ate inhmã axihtỳx xà hkwỳ nhōrta o pa mẽ htānopxar mex o ri mẽ hkôt ixpa. Jakamã nhũm mẽ ri ixkôt amnhĩ nhĩpêx o pa. ãm Jut Kariot pix koja mẽ hkĩnhã tanhmã amnhĩ tomnuj to nē hapêx. No ãm ra akapēr ã kagà kot hkukamã ã kot amnhĩ nhĩpêx anhỹr ã harēnh xàja kôt koja ã amnhĩ nhĩpêx anē nē hapêx.

¹³ Tã na pa ra akupỹm awỳr inhnojarêt kaxyw jakamã na pa ixte tokyx mẽ rer mã xwỳnhjê ho awỳr o xa. Kormã mẽ hkôt ri ixpa ri. Mẽ kot inhmar nē ixpyrà nē hkĩnh nē hamakêtkati nē ri pa kaxyw.

¹⁴ Na pa pre ra mẽ kãm akapēr jarēnh ry nē nhũm mẽ ixpyrà nē akôt pix mã

amnhĩ nhĩpêx o ri pa. Jakamã nhũm hte mẽ kêp ixkwỳ hkêt xwỳnhjaja tee ri ja hã mẽ omu nē axtem nē kãm mẽ hkurê nē. Nom mẽ kêp mẽ hkwỳ hkêt jakamã na htem ã mẽ kamã gryk anē.

¹⁵ Tã na pa ã mẽ ho awỳr anhỹr o xa. Nom mẽ kot amnhĩ tomnuj xwỳnhjê hkàx ã mẽ pa kaxyw na pa mẽ ho awỳr kêt nē. Koja mẽ arĩ mẽ hkôt ri pa. Nom mẽ uràk nē amnhĩ tomnuj o pa pumaj na pa ã mẽ ho awỳr anē.

¹⁶ Mẽ kêp mẽ hkwỳ hkêt. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyrāk jakamã kê mẽ amarĩ mẽ hkôt pa htã mẽ kot amnhĩ nhĩpêx kôt amnhĩ nhĩpêx o pa hkêt nē. ãm pahkôt pix mã amnhĩ nhĩpêx o pa.

¹⁷ Akapēr pix na mex o mex jakamã koja mẽ hkôt amnhĩ nhĩpêx o pa nē gaa nē te pahte amnhĩ nhĩpêx pyrāk o amnhĩ nhĩpêx.

¹⁸ Na ka pre amnē mẽ hwỳr inhmē pa pre ixte mẽ kãm akapēr jarēnh o ri ixpa kaxyw mẽ hwỳr wrỳ. Nē amnhĩ pyrà nē mẽ kot akapēr jarēnh o mẽ hkôt pa kaxyw pa mẽ kurê nē ma mẽ hwỳr mẽ kurê.

¹⁹ Inhmã mẽ hapê jakamã kot paj amnhĩ grōnh kôt nhãm mẽ kot axpēn mã ri inhgrōnh o pa xwỳnhjê mã amnhĩ gō. Amã hprãm xà hkôt. Ixkwỳjaja kot ja hã ixpumunh nē ixpyrà nē amã hprãm xà hkôt pix mã tanhmã amnhĩ nhĩpêx to ho pa kaxyw.” Anē.

Jejus kot hkrajê piitã ho Tĩrtũm wỳr

²⁰ Nhũm Jejus arĩ Tĩrtũm mã amnhĩ jarē nē kãm:

“Tã na pa ã jajê ho awỳr anē Papaj. Nom ixkôt mẽ pa ho mẽ pa xwỳnhjê pix o na pa awỳr kêt nē. Mããnēn mẽ ô ri nhỹrmã mẽ kot ixkôt amnhĩ xunhwỳr mã xwỳnhjaja na pa mẽ ho ixpimràa tã mẽ ho awỳ.

²¹ Kê mẽ pahpyrà nē te hamaxpēr tipxi pyrà nē ri axpēn to pa. Nē pahte amnhĩ nhĩpêx kôt pix mã amnhĩ nhĩpêx o pa. Koja mẽ ã amnhĩ nhĩpêx anhỹr o pa nhũm mẽ kêp pahkwỳ hkêt xwỳnhjaja pahtã mẽ omu nē ate mẽ hwỳr inhmēnh ã apumunh kurê kumrêx.

²² Nê koja mẽ ixkukwak ri panhỹ hã te pahpyrà nê hamaxpêr tipxi nê ri pa pyrãk o amnhĩ nhĩpêx o pa.

²³ Na pa htem te ixkre tipxi kamã mẽ ixtipxi pyrãk o axpên nhĩpêx o ri ixpa. Te pahte axpên nhĩpêxta pyrãk. Tã koja mẽ ixwakre kamã ã axpên nhĩpêx anhỹr o pa nhũm mẽ kêp pahkwỳ hkêt xwỳnhjaja ja hã mẽ omu nê hamaxpêr o: ‘Nà pêr ãm hãmri na pre Tĩrtũm tãm mẽ pahwỳr Jejus mẽ. Kãm hapê htỳx tã mẽ pahwỳr kumẽ nhũm wrỳ nê amnhĩ xwar kãm hkwỳjê japê nê.’ Anhỹr o koja axpên mã pajarênh o pa.

²⁴ Amnepêm amrakati ri pa pre amã ijapê hã ri ixpa. Tã ot pa jajê ho awỳ. Ka na ka pre inhmã mẽ agõ. Tã ma awỳr inhmõr mã xàta wỳr na pa inhmã mẽ àpir prãm nê. Koja mẽ nhỹrmã ma pahwỳr api pu mẽ pahpiitã pahpimràatã pamã axpên japê hã ri papa ho papa.

²⁵ E Papaj. Amex o amex tã mẽ kêp ixkwỳ hkêt xwỳnhjaja na kormã ate mẽ hwỳr inhmênh xwỳnh ã ixkõt hamaxpêr kêt nê. Nom mẽ kot ixkõt amnhĩ xunhwỳr xwỳnhjaja na mẽ kurom ja hã ixkõt hamaxpêr mex nê.

²⁶ Na pa ra ixprĩ hã mẽ kãm akapêr o amnhĩrit o ri ixpa. Tã kot paj axte mẽ kãm akapêr kwỳ jarê. Amã ijapêta pyrã nê mẽ kãm axpên kĩnh ã axpên to pa kaxyw na pa mẽ kãm hã karõ. Kot paj inhĩ hã mẽ hkõt ixpa hkêt tã koja Pahkarõja mẽ hwỳr wrỳ nê mẽ hkarõ mã agjê nê te pa mẽ hkõt ixpa pyrãk o mẽ hipêx. Ja na pa inhmã hprãm. Tã koja anê. Jakamã na pa ã mẽ ho awỳr anê. Tã ãm ja pix Papaj.” Anê.
Nhũm pre ã Jejus õ Papaj mã mẽ inhnoo mã amnhĩ jarênh anê pa mẽ ixpiitã hã kuma.

18

*Mẽ kot Jejus pynênh ã mẽ harênh
Matêwre 26.47-56; Makre 14.43-50;
Rukre 22.47-53*

¹ Tã nhũm Jejus mẽ ixto Hipêêxà hwỳr pa. Hãmri nê ixkreja rũm ma tẽ nê Jerujarê rũm kato nê ma gõ pê Kirõ hwỳr tẽ pa mẽ hkõt ixpa ho ixpa xwỳnhjaja ma hkõt mra. Nê gõ hã rê nê hikjê hã mẽ kot mẽmo pĩ hkõ hkre xwỳnhja wỳr mra nê parpê ixkrĩ hpa.

² Na pre hte Jejus xatã hwỳr amnhĩ kõt mẽ ixto pa ho kuhê. Jakamã nhũm Jut Kariot kot mẽ kãm òr mã xwỳnhnta ra kot hwỳr mẽ ixpa ho ixkuhê xàta pumunh mex.

³ Jakamã pa mẽ hwỳr pøj nê ixkrĩ hpa nhũm mẽ mẽ ixwỳr mra. Jut Kariot mẽ pôristijaja. Rõm nhõ xwỳnhjê nhõ pôristijê mẽ patre nhõ pôristijaja nhũm mẽ mẽ ixwỳr Jut Kariot kõt mra. Ijaew nhõ pahijê nhỹ hã mẽ ixwỳr mra. Piitã wapohti jamỳ nê pô hpòk nê kanê jamỳ nê mẽ ixwỳr hpòk o kato.

⁴⁻⁵ Hãmri nhũm Jejus amnhĩ wỳr mẽ omu nê kànhmã xa nê ma mẽ kutã tẽ. Jut Kariot kot mẽ kãm òr kaxyw nhũm amnhĩ tã omunh mex jakamã amnhĩ wỳr mẽ omu nê ma mẽ kutã tẽ. Hãmri nê mẽ hkaxpa nê mẽ omunh o xa nhũm Jut Kariot mẽ kuri xa nhũm Jejus mẽ omu nê mẽ kãm:

–Pa. Mẽmoj japêr na ka mẽ pô hpòk o ri apa? Anê.

Hãmri nhũm mẽ kãm:

–Nà Jejus pê Najare nhõ xwỳnh japêr o na pa mẽ ri ixpa. Anê.

Hãmri nhũm mẽ kãm:

–Tỳ ot pa xa. Pa na ixpê Jejus. Anê.

⁶ Hãmri nhũm mẽ kuma nê tee ri axpên pumu nê umaj katê ho axkamê nê kuhê. Nom katê ho pikamênh o ra rôròk pa nê hikwỹ.

⁷ Hãmri nê kànhmã kuhê hpa nhũm Jejus axte mẽ kãm:

–Kwa mẽ inhmã amnhĩ jarê. Mẽhõ japêr o na ka mẽ apa? Anê.

Hãmri nhũm mẽ kãm:

–Jejus pê Najare nhõ xwỳnhnta japêr o na mẽ ri ixpa kênã. Anê.

⁸ Hãmri nhũm mẽ kãm:

–Kwa ra ixte mẽ amã amnhĩ jarênh kênã. Paa. Ijapêr o na ka mẽ ri apa. Jakamã kwa kêr ka mẽ ixkõt ri mẽ pa xwỳnhntaja tanhmã mẽ ho hkêt nê. Kê mẽ mãmrĩ angrà nê ma mra.

⁹ Anhỹr o mẽ inhnê mẽ kãm kapêr. Na pre ra ham Hipêêxà mã mẽ ixtã kãm amnhĩ jarê nê kãm:

–Kormã mẽ kamã ixpa ri ate inhmã ixihtỳx xà nhõrta o na pa mẽ htãnopxar mex o ri mẽ hkõt ixpa.

Anhỹr o mẽ ixtã kãm amnhĩ jarênh jakamã nhũm ã mẽ inhnê mẽ kot unênh mã xwỳnhjê mã kapêr anê.

Simāw Pêtre kot mēhō pē hamak krāhyr ā harēnh

Matêwre 26.51-54; Makre 14.47; Rukre 22.49-51

¹⁰ Hāmri nhūm Simāw Pêtre tee ri Jejus ā mē omu hāmri nē ō wapo kapa nē jam ho apē nē ho hamak nhīkjē krāhta. Mawti jamak krāhta. Mawtija mēō patre mā apēnh xwýnhjē hō na pre nhūm Simāw Pêtre hamak krāhta.

¹¹ Hāmri nhūm Jejus ja hā omu nē nē kām kapēr nē kām:

—Tk. Kwa nà amarī xa nē akupým awapota hkàm haxà. Ixte mē anē amnhī xà htỳx kamā ijamak kaxyw na pa pre Inhīpēxà rūm amnē mē awýr pika hwýr wrý. Kēt inhmā kām hprām xà hkôt pix mā na inhmā tanhmā amnhī nhīpēx to ho ixpa hprām. Jakamā kwār mē māmri tanhmā kām ixto hprām xà hkôt māmri tanhmā ixto. Anē.

Mē kot Anas wýr Jejus o htēm ā mē harēnh

Matêwre 26.57-58; Makre 14.53-54; Rukre 22.54

¹² Tā nhūm pōristi mē mē hkrāhtūm nē mēō patre nhō pōristijaja Jejus pynē nē hpa hpre hpa

¹³ nē ma Anas wýr o tē. Anasja Kajpas pi-inhō na pre. Nhūm Kajpas kormā amgràja ā Anas pyrà nē kēp mēō patre maati.

¹⁴ Jakamā na pre ra Ijaew nhō pahijē mā Jejus jarēnh o:

—Nà kot puj mē Jejus pīr tokyx anē. Kē tapxipix ty pu mē arī mýrpē pahpiitā pajamakētkati nē ri papa. Anē.

Jakamā nhūm mē Jejus pynē nē kormā ma patre maati hwýr o tē.

Simāw Pêtre kot Jejus kôt pa hkêt ā kot amnhī jarēnh

Matêwre 26.69-75; Makre 14.66-72; Rukre 22.54-62

¹⁵ Hāmri pa ixpē Juāw mē ixkràmnhwý Simāw Pêtre mē pa wa ma mē hkôt wa tē. Nhūm mē ra mē inhō patre maati nhōrkwý hwýr Jejus o axà. Nhūm patre maati kot ix-pumunh jakamā nhūm kām àpēnh xwýnhja ixpumu nē inhmā anē pa mē hkôt axà.

¹⁶ Nom nhūm Simāw Pêtre arī kapôt ā hakwa krem xa. Hāmri pa omu nē akupým hwýr tē nē mēhō niti kot hakwa kre jamār o

ām xwýnhja mā anē nhūm kām kahē xà mē nhūm mē ixkôt axà.

¹⁷ Hāmri nhūm nita hprī hā omu nē kām: —Xêê. Pēr apē mē kot unēnh nē o mōr mūj kôt ri mē pa xwýnhjē hō na ka mē? Anē.

Hāmri nhūm kuma nē kām:

—Tk. Nà ixte mēhō myti ata pumunhre hā. Anē.

¹⁸ Hāmri nhūm ra kôt ā kamàt nē ra kryy nē nhūm mē àpēnh xwýnh kwý mē mēō patre nhō pōristi hkwyjaja amnhīm kuto nē hā ànhunh o kuhê. Nhūm Simāw Pêtre mē omu nē mē hwýr tē nē mē ìhkô hā ànhunh o xa.

Patre maati kot Jejus kukjêr ā harēnh

Matêwre 26.59-66; Makre 14.55-64; Rukre 22.66-71

¹⁹ Rōm nhūm Anasja hēx rom tanhmā Jejus kukjêr to nē kām:

—E kwa inhmā amnhī jarē. Tanhmā na ka hte we akôt mē pa ho mē pa xwýnhjē jahkre hto ho apa wehe? Anē.

²⁰ Hāmri nhūm amnhī tā kām:

—Nà na pa hte mē piitā mē noo mā ri mē kām ixkapēr o ixpa. Tīrtūm kapēr o mē ahkre xà hā ixkre kamā nē Tīrtūm mā amnhī jarēnh xà hā ixkre kamā pa hte mē piitā mē noo mā ri mē kām tanhmā ixkapēr to ho ri ixpa. Na pa hte nhýri ixpimxur pē ri mē kām tanhmā ixkapēr to ho ri ixpa hkêt nē.

²¹ Tā ka ixtā mē kot inhmar o kuhê xwýnhjaja tanhmā ixtā mē hkukjêr to hkêt nē. Ām papxipix ri ixkukja. Kwa ixtā mē hkukja kē mē kot tanhmā ixkapēr mar to xà hkôt tanhmā amā ijarēnh to nà? Anē.

²² Hāmri nhūm patre nhō pōristi hōja kuma nē hwýr tē nē kām:

—Tk. Kwa na htem ā patre maati mā kapēr anhýr kêt nē. Na htem hā hpjiaàm o kām kapēr. Tā na ka axtem nē ri ā kām akapēr anē. Anē.

Hāmri nē hinep hkura.

²³ Hāmri nhūm Jejus amnhī tā omu nē kām:

—Kwa kot pa tanhmā mē amā amnhī to ixēx to ka mē hā inhma nē rī kormā tanhmā axpēn mā ixto akapēr to rý hā ixtak. Nom ām hāmri ixte mē amā amnhī jarēnh tā ka axtem nē ri inhīnep ixtak. Anē.

²⁴ Hāmri nhūm Anas tanhmā mar to hpa hāmri nē umre Kajpas wýr kumē. Na

pre Kajpasja kormã hitom kãm ri tanhmã amnhĩ nhĩpêx to ho nhỹ nhũm Anas mẽ kãm anẽ nhũm mẽ kuma nẽ hwýr Jejus o tẽ nẽ ho axà. Arĩ hpa hpre rãhã hwýr o tẽ nẽ ho axà nhũm xa nẽ kãm amnhĩ jarẽ.

Simãw Pêtre kot axte Jejus kôt pa hkêt ã amnhĩ tã aprãr ã harẽnh

Matêwre 26.71-75; Makre 14.69-72; Rukre 22.58-62

²⁵ Nhũm Simãw Pêtre arĩ mẽ ãhkô hã ànhunh o xa nhũm mēhōja kãm kapēr nẽ kãm:

—Kwa pēr apê Jejus kôt ri mẽ pa xwýnhjê hõ na ka. Anẽ.

Hãmri nhũm kuma nẽ kãm:

—Tk. Kokỹ ixte mēhō nēj pumunhre hã. Anẽ.

²⁶ Hãmri nhũm hpãnhã mẽõ patre maati mã àpênh xwýnhja mãânēn omu. Simãw Pêtre kot kêp hamak krãhyr xwýnhhta kwý na pre. Jakamã nhũm hprĩ hã omunh mex kurê kumrêx nẽ kãm:

—Kwa nã ka na ka mütar pĩ hkôta kamã mẽ ãhkô hã xa pa apumu. Anẽ.

²⁷ Hãmri nhũm tee ri kuma nẽ axte mẽ kãm amnhĩ tã aprãr kãm hihtýx nẽ. Jao ra mẽ kãm amnhĩ tã aprãr o axkrunēpxija mẽ nhũm krãhyre hkàr kurê kumrêx. Ra Jejus kot hkukamã harẽnh xà hkôt kêp hkwy ãhkêt ã amnhĩ tã aprãr o axkrunēpxi.

Jejus kot Pirat mã amnhĩ jarẽnh

Matêwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hãmri nhũm mẽ ixpê Ijaew hkrãhtũmjaja ra Kajpas rũm Jejus o kato nẽ ma Pirat wýr o tẽ. Piratja na pre te Rõmjê nhõ pahi pẽ Sesti mã mẽ ixpê Ijaew jamãr o pa nhũm mẽ ma hwýr o tẽ. Nhũm ra myt kator grire nhũm mẽ hwýr o tẽ nẽ òrkwý kapem o xa. Pirat kêp Ijaew kêt jakamã nhũm mẽ òrkwý hwýr gjêx kêt nẽ kapôt ã kuhê. Na hte Ijaew kormã Pas ã hkĩnh hãmri nẽ nhãm mẽ kêp Ijaew kêt xwýnhjê nhõrkwy hwýr gjêx kêt nẽ. Koja mẽ hwýr agjê nẽ amnhĩ tomnu nẽ Pas ã apkur kêt nẽ. Jakamã nhũm mẽ Pirat wýr Jejus o tẽ no ãm hwýr o àr kêt nẽ. ãm ixkre kapem o xa.

²⁹ Hãmri nhũm Pirat mẽ hwýr kato nẽ omu nẽ hã mẽ hkukja nẽ mẽ kãm:

—Kwa tanhmã na we amnhĩ tomnuj to ka mẽ ixwýr o tẽ? Anẽ.

³⁰ Hãmri nhũm mẽ kãm:

—Nã kot amnhĩ tomnuj o pa xwýnh kênã. Jakamã na pa mẽ awýr o tẽ. Ate tanhmã kot amnhĩ tomnuj to hã harẽnh mar nẽ mýrapê tanhmã ho kaxyw. Anẽ.

³¹ Hãmri nhũm mẽ kuma nẽ mẽ kãm:

—Tk. Kwa mẽ kamjaja ma amnhĩ kôt o tẽ nẽ amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anẽ.

Hãmri nhũm mẽ tee ri kuma nẽ kãm:

—Kwa amnepēm mẽ ixpê Ijaewjaja na pa pre htem kên o mẽ kot amnhĩ tomnuj xwýnhjê tak o mẽ kupa. Tã na ra Rõm nhõ pahihtija mẽ pamjaja mẽ ixte mẽ hpar nẽ mẽ ixkurê. Tapxipix kãm mẽ hpar ã àmnēnh prãm. Jakamã kot kaj ý hã mẽ inhmã tanhmã hã axàmnēnh to kē mẽ kupĩ. Ra ja kaxyw mẽ kot mẽ ixkaxyw axãm kênã. Anẽ.

³² Rõm nhõ xwýnhjaja na htem mẽ kot amnhĩ tomnuj xwýnhjê hpar kaxyw nẽ pĩ kahpa hã mẽ hanhō nẽ mẽ kupa. Nhũm Jejus amnhĩ kukamã tanhmã mẽ kot hpĩr to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harẽ. Jakamã nhũm pre ã Ijaew Pirat kot mẽ kãm hpĩr prãm xaj ã kãm kapēr kãm xihtýx anẽ.

³³ Hãmri nhũm mẽ kuma nẽ akupým òrkwý hwýr axà nẽ amnhĩ wýr Jejus ã karõ nhũm hwýr axà nhũm kãm:

—E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wýr akãm hamak o pa? Anẽ.

³⁴⁻³⁶ Hãmri nhũm kãm:

—Tý ãm hãmri na ka ã ijarēnh anẽ. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anẽ? Xà na pre mēhō ixte mẽ anhõ pahi Sesti kutã ixãm ã amã ijarẽ ka ama nẽ tee ri ixkukamã ajamxpēr? Nã xà ãm hãmri amã Tirtũm kot Ijaew wýr inhmēnh ã ixpumunh prãm? Mo kaxyw na ka ã ixkukjêr anẽ? Anẽ.

Hãmri nhũm tee ri kuma nẽ kãm:

—Tk. Mo kot pa kêt ri axtem nẽ Tirtũm kot Ijaew wýr amēnh ã akukja? Mẽ apyrà nẽ ixpê Ijaew kêt kênã. Mẽ kot ixwýr ato htēm xwýnhjaja na mẽ ã ate amnhĩ jarēnh anhýr ã ajarēnh anẽ. Nã mẽ akwýjê mẽ mẽ anhõ patre krãhtũmjaja na mẽ ã inhmã ajarēnh anẽ. Jakamã e aprĩ hã inhmã amnhĩ jarẽ.

Tanhmã na ka we amnhĩ tomnuj to nhũm mẽ ixwýr ato tẽ? Anẽ.

Hãmri nhũm kuma nẽ kê axte kãm:

—Nà ixpê pyka ja kamã mẽ õ pahi hkêt. Kop ãm ixpê pyka ja kôt mẽ õ pahi ronhỹx ra ixkôt ri mẽ pa xwýnhjaja tanhmã ixtã mẽ ato. Nom jar ixpê mẽ õ pahi hkêt. ãm axtem ixpê mẽ õ pahi na pa. ãm hãmri na pa ã amã amnhĩ jarẽnh anẽ. Anẽ.

³⁷ Nhũm ã kãm amnhĩ jarẽnh anẽ hãmri nhũm tee ri kuma nẽ kãm:

—Xà apê mẽ õ pahi hõ na ka? Anẽ.

Hãmri nhũm kãm:

—Tý. Nà ãm hãmri na ka ã ijarẽnh anẽ. Na pa pre amnẽ pikaja wýr wrý nẽ jar mẽ akamã ixkato nẽ mẽ akamã ixãptãr. Ixte tanhmã mẽ kãm ixkapêr to ho ri ixpa kaxyw na pa pre wrý nẽ mẽ akamã ixpa nẽ ãm hãmri mẽ kãm ixkapêr o ri ixpa. Na pa hte tãm ixkapêr o ri ixpa. Tã mẽ kot ixkapêr mar nẽ ixkôt ri amnhĩ nhĩpêx o mẽ pa xwýnhjaja na htem ixpê mẽ õ pahihti hã ijarẽnh o pa. Anẽ.

³⁸ Hãmri nhũm Pirat kot tãm kãm kapêr ã amnhĩ jarẽnhja ã kuma nẽ kãm:

—Tk. Aa ixte pika ja kamã mẽhõ pumunh nhũm tãm kapêr o pare hã. Anẽ.

Hãmri nẽ kapêr ã kuma nẽ tee ri hkukamã hamaxpêr. Hãmri nẽ akupým Ijaew wýr ho kato nẽ mẽ kutã o xa nẽ mẽ kãm:

—Kwa tanhmã kot amnhĩ tomnuj tore hã.

³⁹ E mẽ inhma. Na pa hte amgrã mẽ arĩgro pẽ Pas kãm mẽ amã mẽ hagjênh xã rũm mẽ akwýjê ho hpýnh nẽ mẽ hapôj nhũm mẽ hamakêtkati nẽ amnhĩx ri pa. Ka mẽ ja hã omu nẽ Pas ã akĩnh nẽ. Jakamã e. Pa mẽ amã mẽ anhõ “pahihti” jarẽnhja mã inhũre. E na pa ra kãm inhũre. Anẽ.

⁴⁰ Hãmri nhũm mẽ tee ri ã kapêr anhýr ã kuma nhũm ja mẽ kêp omnuj týx nẽ. Nhũm mẽ hã kàx pẽ gryk kamã kãm kapêr kãm hihtýx nẽ kãm:

—Tk. Kwa nà kãm anhũrer kêt nẽ. Kêt Parapas mã mãn anhũre. Anẽ.

Parapasja na pre hte tanhmã amnhĩ tomnuj týx to ho ri pa nhũm prem mýrapê unê nẽ haxà. Tã nhũm mẽ axtem nẽ Pirat kot kãm urer prãm xaj Jejus kaga.

19

Mẽ kot Jejus tak ã mẽ harẽnh

Matêwre 27.27-31; Makre 15.16-21; Rukre 23.20-25

¹ Tã nhũm Pirat akupým õrkwỹ hwýr Jejus o axà nẽ õ pòristijê mã hã amýnê nhũm mẽ hwýr mra nẽ htak o kuhê.

² Hãmri nẽ kêp pahi hã hpêr o pikênh kaxyw kãm pahi hã mẽ ahkà nhĩpêx nẽ hkrãm haxà. Nom axtem mẽmo mrônhi te kot ronh kanêre pyrãk xwýnhja nhũm mẽ hikãx nẽ hkrãm haxà. Nẽ kêp pahi hã mẽ ê kamrêk py nẽ kãm haxà.

³ Hãmri nẽ xatã hwýr mra nẽ hinep htak nẽ hã hpêr o pikênh o xa nẽ kãm:

—E apê Ijaew nhõ pahi punuti na ka. Anẽ.

⁴ Hãmri nhũm Piratja akupým Ijaew wýr kato nẽ mẽ kãm:

—E koja inhõ pòristi akupým mẽ awýr ho kato ka mẽ omu. Na pa tee ri kot tanhmã amnhĩ tomnuj to hã hkukja. Pêr tanhmã kot amnhĩ tomnuj to hkêt kênã. Anẽ.

⁵ Hãmri nhũm Jejus kato nẽ arĩ pahi hã àhkà tu nẽ ê kamrêk jaxà nẽ o xa nhũm Pirat mẽ kãm:

—E kwa mẽ omu nẽ kamã axukaprĩ hkêt wehe. Anẽ.

⁶ Hãmri nhũm patre krãhtũmjê mẽ mẽõ pòristijaja tee ri ja hã kuma nhũm ja mẽ kêp omnuj nẽ. Hãmri nẽ hã kãm kapêr kãm hihtýx nẽ kãm:

—Tk. Kwa nà pĩ kahpa hã mãn anhõ. Kê pĩ kahpa hã mãn ajêt nẽ ty. Anẽ.

Hãmri nhũm tee ri hã mẽ kuma nẽ mẽ kãm:

—Nà mẽ kam nẽ ma amnhĩm o tẽ nẽ mẽ kam amnhĩm ho anẽ. No pa kot paj ho anhýr kêt nẽ. Mo mýrapê kot pa kêt hã amýnê nhũm mẽ kupĩ? Nà kwarĩ kot pa ho anhýr kêt nẽ. Anẽ.

⁷ Hãmri nhũm mẽ tee ri kuma nẽ kãm:

—Kwa kêp Tĩrtũm Kra hã amnhĩ jarẽnh kênã. Mẽ inhĩgêjtaja na prem ã mẽ ixte amnhĩ jarẽnh anhýrja nẽ mẽ inhmã kapêr pa htem ã amnhĩ jarẽnh anhýr kêt nẽ. Koja mẽhõ ã ri amnhĩ jarẽnh anẽ nhũm mẽ ja mýrapê kupĩ. Anẽ.

⁸ Hãmri nhũm Pirat tee ri Jejus kêp Tĩrtũm Kra hã amnhĩ jarẽnhja ma nẽ kãm uma nẽ kãm tanhmã ho hprãm kêt nẽ.

⁹ Hāmri nē akupŷm ōrkwŷ hwŷr ho axà nē axte hkukja nē kām:

—Kwa aprī hā inhmā amnhī jarē. Nhŷhŷnh na ka pre mē ixwŷr mō? Anē.

Nom nhŷm axte tanhmā kām nē hkêt nē. Ām arī akryk mar o xa.

¹⁰ Nhŷm tee ri omu hāmri nē kām:

—Kwa xà ate ixpumunh kêt? Inhŷ hā na htem mē kupa nē inhŷ hā akupŷm mē hapōj. Tā ka pēr aprī hā inhmā tanhmā amnhī jarēnh to hkêt nē ri akryk akuhē. Anē.

¹¹ Hāmri nhŷm Jejus kām:

—Nom Tīrtŷm nhŷ hā pix mā na ka hte ā amnhī nhīpēx anē. Kêp ām Tīrtŷm kām ja prām kêt ronhŷx ka tee ri tanhmā amā ixto hprām hkapyrŷ. Tām kot mē ixkaxyw axām kēnā. Tā mē kot awŷr inhmēnh nē ri ixtyk ā ijarēnh xwŷnh pē Ijaew nhō pahijaja. Ra mē kot ixkaga jakamā na mē ā amā ijarēnh anē. Jakamā mē kot amnhī tomnuj tŷx o ajakrenh. Anē.

¹² Hāmri nhŷm Piratja tee ri ā kapēr anhŷr ā kuma nē kot kām urer prām nē. Hāmri nē akupŷm Ijaew wŷr kato nē hā mē kām kapēr nhŷm mē tee ri kot kām urer kaxyw ā amnhī jarēnhja ma nē kām ja prām kêt kumrēx. Jakamā kaxpē nē kām kapēr nē kām:

—Kwa nà ra kêp mē inhō pahi hā kot amnhī to hēx kēnā. Kot mēhō ā ri amnhī jarēnh anē nhŷm Rōm kamā mē panhō pahi Sestija ja hā harēnh ma nē kamā gryk tŷx nē. Tā kot kaj kām anhŷre nhŷm ajarēnh ma nē akamā gryk nē. Anē.

¹³ Hāmri nhŷm tee ri mē kuma hāmri nē ma pahi kot tanhmā mē harēnh to xà hā kēn pota wŷr ma tē nē hā nhŷ. Mē ixpē Ijaew kapēr kām mē ixte kām: “Kapata” jarēnh xwŷnhhta wŷr kot tanhmā Jejus jarēnh to kaxyw ma hwŷr tē nē hā nhŷ nhŷm mē hwŷr o tē.

¹⁴ Hāmri nhŷm ra arīgro pē sēsta. Mē ixpē Ijaewjaja mē ixte Pas ā amnhī tomnuj mŷrapē mry hkwy hpar nē Tīrtŷm kôt pix mā amnhī nhīpēx ā amnhī jarēnh xà hā arīgroja kato. Jakamā nhŷm kaxkwa nhīpōk ri myt nhŷ nhŷm Piratja mē kot Jejus kator ā harēnh prām xà arī mē kām ho mē ō pahi hā harē nē mē kām:

—E ota mē anhō Pahihtita. Anē.

¹⁵ Hāmri nhŷm mē tee ri ā harēnh anhŷrja ā kuma nē kām:

—Kwa apī ri. Ma o tē nē pī kahpa hā anhō kê tokyx ty.

Anē nhŷm tee ri mē kuma nē mē kām:

—Kwa nà. Kêp mē anhō pahi kēnā kot paj kêt ri axtem nē mē apē kupī. Anē.

Hāmri nhŷm mē kām:

—Nà kêp mē inhō pahi hkêt. Pahi Sesti pix na kêp mē inhō pahi. Anē.

Mē kām Sesti hkŷnh kêt tā ā kām Jejus htyk prām xà ri harēnh anē.

¹⁶ Hāmri nhŷm Pirat tee ri ja hā mē kuma nē tā Jejus ā pōristi mā karō nē mē kām:

—E mē māmri ma o tē nē pī kahpa hā anhō kê ty. Anē.

Hāmri nhŷm mē kuma nē ma o tē.

Mē kot pī kahpa hā Jejus nhō ā mē harēnh

Matêwre 27.32-44; Makre 15.21-32; Rukre 23.26-43

¹⁷ Hāmri nhŷm pōristija Jejus mā ō pī kahpa gō nhŷm kutu nē ma mē hkôt hkjēnh o mō. Nhŷm mē krī rūm ho kato nē ma hixêt prêk wŷr o tē. Hixêt prêkja mē kot harēnh o: “Korkot” anē. No mē ixpē Ijaewjē kapēr kām na pa pre htem harēnh o “Mē hkrā hi xà” anhŷr xwŷnhhta wŷr nhŷm mē ma o tē nē hā ho api.

¹⁸ Hāmri nē pikap pī kahpa xi nē hā Jejus xi nhŷm hā nō nhŷm mē prek o ĩhkra ho htŷx nē hpar o htŷx. Hāmri nē kaxyw hkakwŷ nē hkakwŷnh pa nē kamā pī kahpata xām nē hity hpa nhŷm Jejus kŷx pē ajêt. Hāmri nhŷm mē määnēn wa ho hamēxkrut nē pī kahpa hā wa kunhō nhŷm wa kuri ajêt. Wa kot tanhmā amnhī tomnuj to xwŷnhja wa ho akutā Jejus nhŷjē nhŷm wa urāk nē kŷxpē ajêt.

¹⁹ Hāmri nhŷm Piratja ō pōristi mā anē nhŷm mē tap ō py nē hā tanhmā kagà hto nē kagà ho:

IJA EW NHŌ PAHI JEJUS NA JA

KÊP NAJARE NHŌ XWŷNH

²⁰ Nom mē ixpē Ijaew kapēr pix kām hā kagà hkêt nē. Määnēn Gresjē kapēr kām nē Raxijē kapēr kām nhŷm mē määnēn hā kagà nē Jejus mŷri kunhō. Hāmri nhŷm Ijaew kwŷjaja Jerujarē rūm hwŷr mra nē mē kot ā hā kagà nhīpēx anhŷrta pumu nē kamā harē. Jerujarēja hixêt prēeta wŷr

jawý jakamã nhũm mẽ kurũm ohtô nẽ hwýr mra nẽ omunh o kuhê.

²¹ Hãmri nhũm patre hkrãhtũmjaja tee ri ã Jejus jarênh anhýr ã kagàta pumu nhũm ja mẽ kêp omnuj nẽ. Jakamã nhũm mẽ ma Pirat wýr mra nẽ kãm:

—Kwa mon ka ri hã mẽ kãm anẽ nhũm mẽ axtem nẽ ã ri kagà nhĩpêx anẽ? Kwa nà kêp mẽ inhõ pahi hkêt. ãm htýx ri kot ã kot amnhĩ jarênh anhýr o pa kênã. Kwa hã kagàja o anhĩpa nẽ hpãnhã hã kagà ho: “Kêp Ijaew nhõ pahi hã kot amnhĩ to hêx xwýnh.” Anhýr o hpãnhã hã hipêx nẽ anhõ nà? Anẽ.

²² Hãmri nhũm mẽ kuma nẽ mẽ kãm:

—Tk. Nà pa ho ixpinhpanh kêt nẽ. Ra ixte hã kagà hpar kênã. Anẽ.

Pôristijaja kot axpên mã Jejus xê ho pi-grành

Matêwre 27.35-36, 27.55-56; Makre 15.24; Rukre 23.34

²³ Hãmri nhũm pôristijaja kot axpên mã Jejus xê o pigrành kaxyw amnhĩ tã haxwýr o tẽ. Mẽ kêp 4 no nhũm Jejus xê kêp 5 jakamã nhũm mẽ amnhĩ kôt ho 4 nẽ haxwý nhũm pyxi nẽ hprã. ê rytita. Na pre hipêx muxre. Nhýhýnh hkayr xà pumunh kêt kumrêx.

²⁴ Jakamã nhũm mẽ omu nẽ kãm hkĩnh nẽ. Hãmri nhũm hõ kot amnhĩm hpyr nẽ ho arĩk kaxyw nhũm mẽ hã kênre ho jôka. Na pre ra Tĩrtũm kapêr ã kagà htũm kot mẽ hkukamã ja hã mẽ harênh nẽ mẽ harênh kot:

Na prem axpên mã ixê o anhgrà nẽ hã kênre ho jôka ho hkrĩ.

Anhýr o kot mẽ hkukamã mẽ harênh. Tã nhũm mẽ ra hkôt ã amnhĩ nhĩpêx anhýr o hkrĩ.

Jejus kot Juãw nhĩhkram katorxà jaxàr ã harênh

²⁵ Nhũm Jejus par pẽ katorxà xa. Nẽ htõx nẽ Kropti hprõ Marir nẽ Marir Matarên mẽ nhũm mẽ Jejus katorxà nhĩhkô hã Jejus pumunh o kuhê. Nhũm amnhĩ tã mẽ omu

²⁶ nẽ mẽ kuri pa ixpê Juãw pumu. Hãmri nẽ kêp ixkrãmnhwý mex ã ixtã katorxà mã kapêr nẽ kãm:

—E ota Juãwta. Koja ixpãnhã te kêp akra pyrãk o anhĩpêx nẽ tanhmã ato ajuta hto ho pa. Anẽ.

²⁷ Hãmri nẽ hpãnhã pa inhmã kapêr nẽ inhmã:

—E Juãw. Kêr ka te kêp akatorxà pyrãk o inhmã hipêx mex o ri apa.

Anhýr jakamã pa kuma nẽ kot inhmã hã karõ xà hkôt inhõrkwy hwýr haxà nẽ amnhĩ kôt ri ho ixpa.

Jejus htyk ã harênh

Matêwre 27.45-56; Makre 15.33-41; Rukre 23.44-49

²⁸ Tã nhũm Jejus ra amnhĩ pumu hãmri nẽ hamaxpêr o:

—Nà Inhĩpêxà kot mẽmoj tã inhmã karõta na pa ra kãm ho anhýr o hitep xà xir kaxyw. Anẽ.

Hãmri nẽ kãm kôr ã amnhĩ jarê. Nom ra hkukamã Tĩrtũm kapêr ã kagà htũm kot htyk kaxyw nẽ kãm kôr kukamã harênh jakamã nhũm ã amnhĩ jarênh anẽ nẽ kapêr o:

Nà na pa ra inhmã kôr nẽ. Anẽ.

²⁹ Nhũm hpar pẽ guhkrax kãm wĩhti punureta ãm jakamã nhũm mẽ ã kot amnhĩ jarênh anhýrja ma nẽ kaxyw mẽmo rerek py nẽ o tẽ nẽ kaxyw pĩ ryti hõ py nẽ ho hkanhwý. Nẽ akupýn o tẽ nẽ ho wĩhti mã haxà nẽ kãm kupê.

³⁰ Nhũm hkaô nẽ hkaôr pa hãmri nẽ kapêr o:

E nã hãmri na pa ra mẽ piitã mẽ kot amnhĩ tomnuj pãnhã amnhĩrer pa. Jao ra Inhĩpêxà kãm hprãm xà hkôt kãm tanhmã amnhĩ nhĩpêx to jatur xàm kumê.

Anhýr o amnhĩ jarênhja kôt ahpar mã hkrã nẽ ty.

Mẽ kot kô xwa ho Jejus kamnhwýr ã harênh

Wam Juãw 5.6-8

³¹ Nhũm ra sêsta nhũm apkati nhũm mẽ inhõ arĩgromnu pẽ sap kaxyw. Sapja ã na hte mẽ ixpê Ijaew mẽ ixkĩnh pẽ Pas ã ixkĩnh rũnh o ixpa. Nhũm mẽ kãm sap ã arĩ mẽ htyk nẽ mẽ harir xwýnhjê pumunh prãm kêt jakamã nhũm Ijaew krãhtũmjaja ma Pirat wýr mra nẽ kãm:

—Kwa pôristi mã anẽ kê mẽ tokyx mẽ hte hi kukê kê mẽ htyk tokyx anẽ. Kê mẽ tokyx mẽ o wrý nẽ ma mẽ o mra nẽ mẽ hagjê. Kormã sap kêt ri. Anẽ.

³² Hāmri nhūm mẽ kuma nẽ õ pōristijẽ mã anẽ nhūm mẽ ma mẽ hwỳr mra nẽ akutã wa kot Jejus nhĩjẽ nẽ jêt xwỳnhhta wa kumrẽx wa hte hi hkwỳr.

³³ Hāmri nẽ hpãnhã Jejus wỳr tẽ nẽ omu nhūm ra htyk mex nẽ ajêt nhūm mẽ ja hã omu nẽ kęp hte hi hkwỳnh kêt nẽ.

³⁴ Nhūm pōristi hõja kô xwa py nẽ ho ihkjẽ rūm hkanhwỳ nhūm hkamrô mẽ ì kagô ahkã nẽ hprôt nhūm mẽ hkwỳja omunh o kuhê.

³⁵ Nẽ ixpê Juāw na pa pre ijaxwỳja mẽ ìhkô hã xa nẽ ja hã omunh jakamã pa ã mẽ amã hã kagã anẽ. ãm hāmri na pa mẽ amã harẽ nẽ hã kagã. Mẽ ate kamã harẽnh nẽ harẽnh mar nẽ hkôt ajamaxpër kaxyw.

³⁶ Na pre ra Tĩrtũm kapër ã kagã htũm kamã ra hkukamã tanhmã kot mẽ pahwỳr mẽnh xwỳnhhta jarẽnh to nẽ hã kagã. Nẽ hã kagã kot:

Koja mẽ nhỹhỹnh hi hkwỳnh kêt nẽ. Anẽ. Tã nhūm mẽ ra hã kagãja kôt ã hipêx anẽ nẽ kęp hi hkwỳnh kêt nẽ.

³⁷ Nẽ Tĩrtũm kapër ã kagã htũmja mããnẽn ja hã harẽnh kot:

Mẽ kot hpĩr nẽ hkanhwỳr xwỳnhja koja mẽ hpar pẽ omunh o kuhê. Anẽ.

Tĩrtũm kapër ã kagã htũm kamã ã Jejus tyk kukamã harẽnh kot anhỹr.

Mẽ kot Jejus jaxàr ã mẽ harẽnh

Matêwre 27.57-61; Makre 15.42-47; Rukre 23.50-56

³⁸ Tã nhūm Juje pẽ Arimatej nhõ xwỳnhja Jejus ra htyk ã omu nẽ ma Pirat wỳr tẽ nẽ hã kãm kapër. Kot ma o mõi nẽ tokyx haxàr kaxyw. Na pre ra Jejus kôt amnhĩ xãm nom Ijaew krãhtũmjẽ pymaj mẽ kãm amnhĩ to amnhĩrit kêt nẽ. Jakamã nhūm ma Pirat wỳr tẽ nẽ hã kãm kapër nẽ kãm:

—Pa e ot pa awỳr tẽ. Ixte mẽmoj tã amã ixkapër kaxyw. Kot kaj apu inhmã “ỳ” anhỹr japêr. Kwa xà kot pa ma Jejus o mõi nẽ haxà? Anẽ.

Hāmri nhūm kuma nẽ kãm: “Nã mãmrĩ ho anẽ.” Anẽ hāmri nhūm ma hwỳr tẽ nẽ ho wrỳ nẽ kumỳ nẽ ma haxàr mã o mõi.

³⁹ Nhūm Nĩkotẽja ma hkôt tẽ. Amnepẽ mã kot kamãt kãm Jejus wỳr htẽm nẽ wa axpẽn mã kapër o ỳr xwỳnhhta. Jakamã ma Juje hkôt tẽ. Nẽ amnhĩ kôt mẽ hkuxwa xà

hkwỳ ho mõi. ãm ho mõi rax kumrẽx. Ho 34 kir nẽ kutu nẽ o mõi. Mẽ hkuxwa xàja na pre mẽ kot mẽmo kuxwa xà mã “mĩa” nẽ “aroe” anhỹr jarẽnhja nhūm kaxyw hkwỳ jakã nẽ ho ahkã nẽ ho mẽ hkuxwa xà nhĩpêx. Hāmri nẽ kutu nẽ ma Juje kot Jejus jaxàr nhūm kot ho hkuxwa kaxyw hkôt o mõi.

⁴⁰ Hāmri nhūm wa ho kupêxê kukõnh pa nẽ ho Jejus kupu. Mẽ ixpê Ijaew mẽ ixte mẽ htykjẽ jagiẽn kaxyw ã mẽ hipêx anhỹr xà hkôt nhūm wa ã hipêx anẽ nẽ haxà.

⁴¹ Nhūm ra mẽ kot pĩ kahpa hã nhõr xà tã mẽ kot mẽmo pĩ ho pa nẽ hkre xwỳnh kwỳ kuhê. Nẽ kamã kẽn kre nyw. Kormã mẽ kot kamã mẽ htykjẽ hõ jaxàr kêt xwỳnhhta.

⁴² Jakamã nhūm wa omu nẽ axpẽn mã: —E kwa pu hwỳr Jejus o tẽ nẽ kamã mãn tokyx haxà. Kêr pu kormã sap kêt ri ra tanhmã amnhĩ to hpa. Anẽ.

Hāmri nẽ hwỳr kumỳ nẽ o tẽ nẽ kamã haxà nẽ hã hitom pa hāmri nẽ ma akupỹm krĩm wa tẽ.

20

Jejus akupỹm htĩr ã harẽnh

Matêwre 28.1-10; Makre 16.1-8; Rukre 24.1-12

¹ Tã nhūm sap tẽ nẽ hapêx nẽ hpãnhã semãn nyw krax xà pẽ tømĩk. Hāmri nhūm Marir Matarẽn kwỳhtã kãnhmã nhỹ. Kormã myt kator kêt ri kãnhmã nhỹ nẽ ma kẽn kreta wỳr tẽ. Nẽ hwỳr pøj nẽ tee ri hitom xà hã kẽn rax pumu. Nhūm ra nhãm hakwa kre kuhpa hã ri hikwỳ nhūm omu nẽ tee ri hkukamã hamaxpër pẽ omunh o xa.

² Hāmri nẽ awjanã nẽ ma akupỹm hprôt nẽ nhỹri Simãw Pêtre nẽ pa ixpê Jejus krãmnhwỳ mex ã wa ixpumu nẽ hkaprĩ kamã wa inhmã harẽ nẽ wa inhmã:

—Xê na pěr mẽ pahpẽ mẽ panhõ Pahihti kapa nẽ nhỹhỹm ma o tẽ. Xê nhỹhỹm mãn pre wem o tẽ? Anẽ.

³ Hāmri pa wa kuma nẽ hwỳr ixprôt kurê kumrẽx.

⁴ Hāmri pa Simãw Pêtre mã wa nẽ ixkumrẽx hwỳr pøj.

⁵ Nom kormã kẽn kre hwỳr ixàr kêt ri kormã hakwa krem inhĩkôt nẽ kaxwỳnh kãm nõi xà kamã Jejus japêr ixrĩt o xa. Nhūm kupêxê nhĩrê pix nõ pa omu.

⁶ Hāmri nhūm Simāw Pêtre ixkôt tē nē ixrom krem àr kurê kumrêx nē kupêxê nhîrêta pumu.

⁷ Nē hkrā kupu xà pumu nhūm axtem hkrā muxre nē ahte nō.

⁸ Hāmri pa hkôt axà nē nōr xà kaprÿ pumu nē ijamaxpêr o:

—Hêxta waa nē. Nà mǎn akupÿm htîr. Hā na nōr xà hkaprÿ mex nē. Nà mǎn akupÿm htîr kām ga. Anē.

⁹ Ra Tîrtūm kapêr ā kagà htūm kot ja kukamā akupÿm htîr ā harênh tā pa wa kormā ixprî hā ja hā omunh kêt nē. Tā kên kre kaprÿ pumu nē kām ijamaxpêr kurê kumrêx.

¹⁰ Hāmri nē wa ixkato nē awjanā nē ma akupÿm wa ixkwÿjê hwÿr wa tē.

Jejus kot Marir Matarên wÿr kator ā harênh

Makre 16.9-11

¹¹ No nhūm Marir Matarênja arî kên kre kapem hkaprî nē mÿr o xa. Nē mÿr pê hikôt nē kên kre kamu

¹² nē kamā Tîrtūm kapêr o wrÿk xwÿnh wa ho axkrut nē wa omu. Nhūm wa ê jakajre kamā wa nhÿ. Nhūm hōja hkrām nhÿ nhūm hōja htem nhÿ.

¹³ Hāmri nē wa Marir Matarên mā kapêr nē kām:

—Kwa mon ka ri omu nē amÿr o xa? Anē.

Nhūm kām:

—Xê nhūm. Na prem ma nhÿhÿm mē ixpê mē inhō Pahitija mÿ nē ma o tē nē hpānhā nhÿri kuxi. Anē.

¹⁴ Rôm nhūm Jejus tām tē nē hkatut kôt xa nhūm Marir Matarên ho hakêx nē omu nom hprî hā omunh kêt nē. Omu nē htÿx ho axtem mēhō hā hkamnhîx.

¹⁵ Hāmri nhūm kām:

—Kwa mon ka ri amÿr o xa? Mēhō na ka ri hapêr arî tē pē amÿr o xa? Anē.

Hāmri nhūm kuma nē htÿx ho pî hkre jamār xwÿnh ā hkamnhîx nē kām:

—Xê xà ka na ka mē ixpê mē inhō Pahititi ho ahkî nē ma o tē nē nhÿri axi mē? Xê ka japêr nē akatàt kôt inhmā harê. Nhÿri inhmā nōr xà jarê pa ma hwÿr tē nē kumÿ nē man akupÿn o tē nē akupÿm kên kre kamā kuxi. Anē.

¹⁶ Hāmri nhūm Jejus kām hixi jarê nē kām:

—Kwa Marir Matarên. Amnē ixpumu nē arî ā akapêr anē nà. Anē.

Hāmri nhūm jatā hprî hā kuma nē ho hakêx nē amnhî jaêr pē hprî hā omu nē kām:

—Xê Pahititi. Xep ka na ka. Hêxta gà nē. Anē.

Nom mē ixpê Ijaew kapêr kām Pahita jarênh o: “Raponî” anē. Nhūm ā kām kapêr anē hāmri nē axte ma nhÿhÿm kêp htêm pymaj hpa hā kupy.

¹⁷ Hāmri nhūm kām:

—Kwa inhmā anhûre. Na pa kormā ma akupÿm Inhîpêêxà hwÿr ixàpir kêt nē. E tokyx ma akupÿm tē nē ixtō nē ixtōxjê mā ijarê. Na ka prem apê ixkràmnhwÿ pix tā ra mē apê ixtō nē ixtōx na ka mē. Jakamā ma akupÿm mē hwÿr tē nē mē kām ijarê. Nē mē kām: “Na Jejus mē awÿr pêr mēnh o: ‘Kot paj tokyx ma akupÿm Inhîpêêxà Tîrtūm wÿr api. Nom kêp pa Inhîpêêxà pix kêt mǎânênh kêp mē Anhîpêêxà na. Nē mǎânênh kêp mē anhō Tîrtūm na.’ Anhÿr o mē awÿr pêr mē.” Anē. E ma akupÿm mē hwÿr tē nē tokyx ā mē kām ijarênh anē. Anē.

¹⁸ Hāmri nhūm kuma nē ma akupÿm mē ixwÿr tē nē mē inhmā awjarê nē mē inhmā:

—Xê na pa ham mē panhō Pahititi pumu. Na akupÿm mē pamā htîr. Anē.

Hāmri nē mē inhmā kot tanhmā kām kapêr to hā harê pa mē kuma nē tee ri hkukamā ijamaxpêr.

Jejus kot hkwÿjê hwÿr kator ā harênh

Rukre 24.36-43

¹⁹ Tā nhūm tōmîk nē kamàt pa mē Jejus kôt ixpa ho ixpa xwÿnhjaja axpên wÿr akuprō hāmri nē Ijaew krāhtūmjê pymaj hakwakre kahê hpa nē axpên mā ixkapêr o ixkrî. Nhūm Jejus mē ijaêr pē nhÿhÿnh mē ixwÿr axà nē mē ixkuri xa nē mē inhmā:

—Pa. Xà kormā mē anhôt kêt? Anē.

²⁰ Hāmri nē mē inhmā amnhî nhîhkra kamā prek tatak xà jahkre nē hakÿx kôt mē kot hkanhwÿr xàja nhūm mē inhmā hahkre. Pa mē akupÿm htîr kām omu nē ixkînh tÿx kumrêx.

²¹ Hāmri nhūm mē inhmā:

—E kwa kêt ka mē tee ri amnhî kukamā ajamaxpêr o amā ma ho ri apa hkêt nē. Na pre Inhîpêêxàja mē awÿr inhmē pa pre wrÿ. Tā kot paj amnhî pyrā nē mē piitā mē hwÿr mē arê. Anē.

²² Hãmri nê mẽ ixkaxyw htyyxà mẽ nê mẽ inhmã Tirtũm mẽ wa Karõ jarẽ nê mẽ inhmã:

—E koja Tirtũm mẽ wa Ixkarõja wry nê mẽ akarõ mã gjêx pa.

²³ Ka mẽ ý hã ma mẽ piitã mẽ hwýr apa nê mẽ kãm Tirtũm kapêr jarênh o ri mẽ hkõt apa. Nê nhýri mēhõ pumu nê inhý hã kãm: “Kot kaj Tirtũm kõt amnhĩ xãm nhũm amnhĩ tã apumu nê anê ate amnhĩ tomnuj rênh pa.” Anê. Ka mẽ ã kãm akapêr anê nhũm mẽ ama nê hkõt amnhĩ xãm nhũm Tirtũm amnhĩ tã omu nê nê kot amnhĩ tomnuj rênh pa. Nom koja mẽ ama nê ãm mẽ ama nê hkõt amnhĩ xãm kêt japêr ka mẽ inhý hã kãm: “Nà kot kaj Tirtũm kõt amnhĩ xãm kêt nê nhũm anê ate amnhĩ tomnuj rênh kêt nê.” Anhýr o kãm akapêr nhũm Tirtũm ho anê nê nê rênh kêt nê. E kêt ka mẽ ã inhý hã amnhĩ nhĩpêx anhýr o ri apa. Anê.

Nhũm pre ã Jesus mẽ inhmã kapêr anê hãmri nê kato nê ma nhýhým tẽ.

*Jesus kot Tomas mã kapêr ã harênh
Matêwre 28.17*

²⁴ No nhũm mẽ inhĩõ pê Tomas pihpohtita kormã mẽ ixkĩnhã akupým Jesus htĩr kãm omunh kêt nê. Na pre ma kape hã tẽ nhũm wakre kamã mẽ ixwýr axà nê mẽ inhmã kapêr hãmri nê ma nhýhým tẽ. Jakamã nhũm Tomas akupýn mẽ ixwýr tẽ nê axà pa mẽ kãm harẽ nhũm tee ri mẽ inhma nê mẽ ixkõt hamaxpêr kêt nê.

²⁵ Nê mẽ inhmã:

—Nà kot pa ãhkra kamã prek tatak xà pumu nê kamã inhĩhkra hkrã jaxà. Nê hakýx kõt hkanhwýr xàta pa mã ho anê nê omu nê kamã inhĩhkra hkrã jaxà nê rĩ kormã akupým htĩr kõt ijamaxpêr. Anê.

²⁶ Tã nhũm semãn pyxi nê hapêx pa mẽ axte axpên wýr akuprõ nê axte Ijaew krãhtũmjê pymaj amnhĩ tã kahê htýx nê ixkrĩ. Nhũm Tomas tã mẽ ixkuri nhý. Hãmri nhũm Jesus axte nhýhýnh mẽ ixwýr axà nê mẽ inhmã:

—Pa. Na ka mẽ rĩ akrĩ. Anê.

²⁷ Hãmri nê Tomas pumu nê hwýr tẽ nê kãm ãhkra pẽ nê kãm:

—E ota inhĩhkra kamã prek tatak xàta. Mãmrĩ kamã anhĩhkra hkrã jaxà. Nê hpãnhã ijakýx kõt mẽ kot ixkanhwýr xà

kamã mã ho anê nê haxà nê akupým ixtĩr kõt ixpumunh kurê kumrêx. Anê.

²⁸ Hãmri nhũm kuma nê kãm:

—Nà pêr ãm hãmri apê inhõ Pahihti Tirtũm na ka. Anê.

²⁹ Hãmri nhũm kãm:

—Tý. ãm ano ho ixpumunh kõt pix mã na ka ixkõt ajamaxpêr. Tã no ãm koja mẽ nhýrmã mẽ amýr pẽ mẽ pa xwýnhjaja mẽ akĩnhã mẽ no ho ixpumunh kêt tã akupým ixtĩr ã ijarênh mar pix tã ixkõt hamaxpêr. Ja na mex kumrêx. Anê.

Juãw kot tanhmã amnhĩ jarênh to hã harênh

Rõmãn 15.4; Wam Juãw 5.13

³⁰ Na pre Jesus kormã mẽ ixto pa ri mẽ inhnoo mã mẽmoj tanhmã hipêx to rax nê nom kot paj kagàja kamã piitã hã kagà hpar kêt nê.

³¹ ãm hkwý pix na pa mẽ amã hã kagà. Mẽ ate mẽ ixpyrà nê omunh nê kêp Tirtũm Kra hã kot mẽ pakaxyw ãm xwýnh ã omunh nê hkõt amnhĩ xunhwýr kaxyw na pa ã mẽ amã harênh nê hã kagà anê. Tã kot kaj mẽ amnhĩ kaxyw hkõt ajamaxpêr nê hkõt amnhĩ xunhwý hãmri nê nhýrmã atyk tã nhũm akupým mẽ ato mẽ atĩr ka mẽ ixpyrà nê kuri amex nê atĩr tũm nê apa ho apa. Tã pa ã mẽ amã mẽmoj piitã harênh nê hã kagà anê.

21

*Jesus kot hkwýjê hwýr kator ã harênh
Matêwre 26.32, 28.7, 28.10*

¹ Tã nhũm Jesus axte hkõt mẽ ixpa ho mẽ ixpa xwýnh kwýjê hwýr kato. Himõ pê Tipeja mýri.

² Pa mẽ ixpê 7 nê axpên wýr akuprõ. Na pre Simãw Pêtre nê Tomas pihpohti nê Natãnaew. Natãnaewja Garirej kamã krĩ pê Kanã nhõ xwýnh na pre. Nê wa pa wa ixpê Jepetew krata wa nê wa inhĩõ wa pijakruuta wa. Pa prem wa mẽ nhýri axpên wýr akuprõ.

³ Hãmri nhũm Simãw Pêtre mẽ inhmã:

—E pa jarãhã ma tep wýr tẽ nê hkwýmñê. Anê.

Pa mẽ kuma nê kãm:

—Tõe. Nà pa mẽ ijaxwýja ma akõt mõ. Anê.

Hāmri nē mẽ ma himô rax pê Tipeja wỳr mō nē kanôre mã agjê nē gôx kām kryhti rēnh o ixkuhê. Nom tee ri ho tep ômnēnh kaxyw rēnh o ixkuhê nē hōmnēnh kêt nē ixtã apkati nhũm tep amrakati kumrêx.

⁴ Tã nhũm myt kato nhũm Jejus gô mỳri xa. Pa mẽ ixpiitã omu no ãm ixprĩ hã kêp Jejus ã omunh kêt nē. Tã no nhũm tãm xa.

⁵ Hāmri nē mẽ inhmã kapêr nē mẽ inhmã: —Pa. E mãn ka mẽ ra tep kwỳmnēnh rax nē nà? Anê.

Hāmri pa mẽ kãm:

—Tk. Nà mo tep? Amrakati kumrêx kênã. Anê.

⁶ Hāmri nhũm mẽ inhmã;

—Xô wehe? Tôe. Axte mẽ axupôk rũm kryhti mẽ nē omu. Anê.

Hāmri pa mẽ mar xà hkôt ho anê nē kumê. Hāmri nhũm kamã tep hipu rax kumrêx nhũm utĩ rax nē. Pa mẽ tee ri ixte ho ixàpir kaxyw ri hkukjê.

⁷ Hāmri pa kêp Jejus ã omunh kurê kumrêx nē Simãw Pêtre mã kãm:

—Kwa pêr mẽ panhõ Pahihitita na. Anê.

Hāmri nhũm inhma nē hkĩnh tỳx nē akupỳm hinôkà jaxà nē gôx kãm mrô nē ma hwỳr ho nana ho tẽ.

⁸ Hāmri pa mẽ hkôt kanôre kamã kryhti kjênh o mō. Ra amgrà hwỳr amgrire. Wỳr 100 met pix jakamã pa mẽ hwỳr ixpôx tokyx anê.

⁹ Nê pàr o hkre kura nē kuxi nē ijapôx pa nē Jejus wỳr ixprôt nē mra. Nhũm ra mẽ ixkutêp kuto nē par nhĩpêx nē nhỹhỹnh tep kwỳ par kãm haxwỳ nē ho àr o nhỹ. Nê kaxyw pãwti nē amnhĩ ri haxwỳ nē o nhỹ.

¹⁰ Hāmri nē mẽ ixpumu nē mẽ inhmã:

—E mẽ amnê anhõ tep o mra pu mẽ hkuxôt nē kuku. Anê.

¹¹ Hāmri nhũm Simãw Pêtre akupỳm pàr wỳr tẽ nē kryhti ho htỳx xà hpôt nē amgrà hwỳr hkjênh o mō. Kamã tep rũnh pix. Nê ohtô nē. Kamã kêp 153 nē hikwỹ htã nhũm nhỹhỹnh kryhti hkwỳ pikaxônh kêt nē.

¹² Hāmri nhũm Jejus mẽ inhmã:

—E kwa mẽ tokyx mra pu mẽ apku. Anê.

Hāmri pa mẽ kuma nē hwỳr mra nē ixkrĩ pa. Hāmri nē tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhỹr ã omu nē kêp mẽ inhõ Pahihiti hkôt omunh kurê kumrêx jakamã

hixi hã hkukjêr kêt nē. ãm akryk omunh o ixkrĩ.

¹³ Hāmri nhũm mẽ inhmã pãwti ho hkry pa. Nê hpãnhã tep jamỳ nē mã ho anê nē ho hkry pa nē ho mẽ inhĩpêx pa pa mẽ ixàpkur o ixkrĩ.

¹⁴ Nhũm Jejus akupỳm htĩr kãm ra ahpỹnhã mẽ ixwỳr hapôx o axkrunêpxi.

Jejus kot akupỳm tãm Simãw Pêtre xãm Atre 20.28-31; Wam Pêtre 5.1-4

¹⁵ Tã pa mẽ ra ixàpkur pa nē kànhmã ixkuhê nē gô mỳ ri mra. Hāmri nhũm Jejus Juāw hkra Simãw Pêtre mã tanhmã kapêr to. Nom ixpê Juāw nhũm kêp ixkra hkêt axtem Juāw ô hkra na pre. Jakamã nhũm Jejus kãm kapêr nē kãm:

—Kwa Simãw. Xà we amã ijapê ho ate pika hkôt mẽmoj piitã hakrenh par nà? Anê.

Hāmri nhũm kuma nē kãm:

—Tỳ inhmã ajapê htỳx kênã Pahihiti. Ra ate ja hã amnhĩ tã ixpumunh mex. Inhmã ajapêê. Anê.

Hāmri nhũm kuma nē kãm:

—Tôe. Nà kêr ka inhmã mẽ kot ixkôt amnhĩ xunhwỳr xwỳnhjê jahkre mex o ri mẽ hkôt apa. Te ho ôwêhti hkrare jamâr xwỳnh kot hamâr mex o ri hkôt pata pyræk. Anê.

Hāmri nhũm kãm:

—Tôe. Nà kot paj amã mẽ ho anê. Anê.

¹⁶ Tã nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê. Xà we amã ijapêê nà? Anê.

Hāmri nhũm kãm:

—Tỳ. Ra ate inhmã ajapê hã ixpumunh kênã. Anê.

Hāmri nhũm kê axte kãm:

—Tôe. Kêr ka inhmã mẽ kot ixkôt amnhĩ xunhwỳr mã xwỳnhjê jahkre mex o ri mẽ hkôt apa. Te ho ôwêhti jamâr xwỳnh kot ôwêhti jamâr mex o hkôt pa xwỳnh kot amnhĩ nhĩpêx pyræk. Anê.

Hāmri nhũm kãm:

—Nà kot paj amã mẽ ahkre mex o ri mẽ hkôt ixpa. Anê.

¹⁷ Tã hãmri nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê? Xà we amã ijapê htỳx kumrêx nà? Anê.

Hāmri nhūm tee ri amnhĩ tã kuma nē hkaprĩ nē. Ra kot amnhĩ tã hkukjêr o axkrunēpxi jakamã nhūm hkaprĩ nē tee ri hamaxpêr. Hāmri nē kãm:

—Kwa Pahihti. Ate mēmoj piitã omunh par. Nē ate inhmã ajapê htỳx ã ixpumunh par kênã. Anē.

Hāmri nhūm kê axte kãm:

—Tôe. Kêr ka inhmã mē kot ixkôt amnhĩ xunhwỳr mã xwỳnhjê jahkre mex o ri mē hkôt apa. Te ho ôwêhti jamãr xwỳnh kot hamãr mex o ri pata pyrãk. Anē.

Hāmri nhūm kãm:

—Nà kot paj amã mē ho anē Pahihti. Anē.

Simãw Pêtre tanhmã htyk to hkukamã harênh

¹⁸ Nhūm Jejus arĩ Simãw Pêtre mã kapêr nē kãm tanhmã htyk to hkukamã harênh to nē kãm:

—Kwa ixkapêr ma nē amnhĩ krã him haxàr tỳx nē hã apa Simãw Pêtre. Nà kormã anyw ri na ka pre hte ma nhỹhỹm apa kaxyw nē anojarêr hãmri nē anhĩnôhkã mex jagjê nē ma nhỹhỹm amã apa hprãm xà hkôt ri apa. Tã kot kaj apigêt nhūm mē apynê nē akahti hpre nē apa hpre nē ma nhỹhỹm ato mō ka mē kãm amnhĩ gō nē amnhĩ nē tanhmã mē kãm nē hkêt nē. Amã mē hkôt amōr prãm kêt tã mãmri mē kãm amnhĩ gō kê mē ma nhỹhỹm ato mō.

¹⁹ Tã kêr ka arĩ ixkôt amnhĩ xãm tỳx nē atĩr prãm xàj mē umaj axte ixkaga hkêt nē. Hāmri nhūm mē apĩ nē tanhmã atyk to hã apumu nē amã Tĩrtũm kĩnh ã apumunh mex kurê kumrêx. Hāmri nē atã Pahi Maati Tĩrtũm mex o mex ã harê. Anē.

Nhūm pre ã Jejus Simãw Pêtre tyk kukamã kãm ujarênh anē. Hāmri nē kãm:

—E kêr ka ixte amnhĩ to htỳx nē amarĩ mē kãm ixãm nhūm mē kot ixpĩrja pyrã nē ã amnhĩ nhĩpêx anē. Anē.

Hāmri nhūm kuma nē kãm:

—Tôe. Nà kot paj hãmri tã ã amnhĩ nhĩpêx anē Pahihti. Anē.

Juāw tyk kukamã tanhmã harênh to hkêt ã harênh

²⁰ Nhūm pre ã Jejus Simãw Pêtre mã tanhmã htyk to hkukamã harênh anē. Hāmri nhūm kuma nē ixpê Juāw ã ixto hakêx nē ixpê Jejus krãmnhwỳ mex ã ixpumu. Kormã Jejus htyk kêt ri kamãt kãm mē ixàpkur o ixkrĩta ã na pa pre ãhkô hã

ixàpkur o nhỹ nē kot mē kãm ôr mã xwỳnhnta nhĩxi hã hkukja.

²¹ Jakamã nhūm Simãw Pêtre ixto hakêx nē ixpumu nē ixtã Jejus kukja nē kãm:

—Kwa no pêr pahkôt mōr mũj? Tanhmã koja we htyk to? Anē.

Hāmri nhūm kãm:

²² —Nà kot paj amã tanhmã htyk to hkukamã harênh hkêt nē. Kot pa inhmã arĩ kritpêm pa rãhã pa akupỳn ixwryk prãm nhūm arĩ pa nē htyk kêt rãhã pa akupỳn wrỳ. Kêr ka ri htyk kukamã tee ri tanhmã ajamaxpêr to hkêt nē. ãm ixkôt pix mã ate amnhĩ nhĩpêx tỳx pix kukamã mãn ajamaxpêr o ri apa.

²³ Anhỹr o kãm ijarênh jakamã nhūm mē ixkwỳjaja kot ã ijarênh anhỹrja ã kuma ma nē htỳx nhỹrmã ixtyk kêt ã ixkamnhĩx. Nē gaa nē rĩ piitã axpên mã ã ijarênh anhỹr o pa. Nom na pre ã ijarênh anhỹr kêt nē. Na kêt pre ijarênh o:

—Kot pa inhmã arĩ ri kritpêm pa rãhã pa akupỳn ixwryk prãm nhūm arĩ pa nē htyk kêt rãhã pa akupỳn wrỳ.

Anhỹr o ijarê. Nom ãm hãmri ixtyk kêt rãhã nhūm akupỳn wrỳk ã ijarênh kêt nē.

Juāw kot Jejus kot tanhmã amnhĩ to hã kagà hpar kêt ã kot amnhĩ jarênh

Juāw 20.30-31

²⁴ E na pa mē amã Jejus kot tanhmã amnhĩ nhĩpêx to ho pa hã harê nē hã kagà. Ixpê hkôt ri ixpa ho ixpa xwỳnhjê hō na pa ãm hãmri ã hã kagà anē. Ka mē kamã harê nē ama nē ãm hãmri ixte kagà nhĩpêx kôt ixpumunh mex kurê kumrêx.

²⁵ No na pre Jejus ãm ja pix o anhỹr o pa hkêt nē. Na pa ãm mē amã hkwy pix jarê nē hã kagà. Na pre tanhmã ri mēmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhỹx hã kagàja katutxô rax kumrêx. Jao te ra kaxkwa htêp o mōr pyrãk.

Tã ãm ja pix. Na hapêx.

Atre Jejus nhÿ hã mē ahkre ho mē pa xwÿnhjaja kot tanhmã amnhÿ nhÿpêx to ho pa hã mē harēnh

Rukre na pre kagàja nhÿpêx. Na pre kèp tâtô nē hkwÿjê kane ho pa. Nē Jejus nhÿ hã mē ahkre ho pa xwÿnhjaja pē Pawre kôt pa ho pa. Hãmri nē hamaxpêr nē hkràmnhwÿ Teopre mã kagàja nhÿpêx nē hwÿr kumē. Nē kagàja kamã Jejus nhÿ hã mē ahkre ho mē pa xwÿnhjaja kot Jejus mÿr pē tanhmã amnhÿ nhÿpêx to ho pa hã mē harē.

Nē Ijaew nhô patrejaja nē mē hkwÿ pē Parijew nhô xwÿnhjaja nē mē hkwÿ pē Satusew nhô xwÿnhjaja kot Tÿrtùm kapêr ã kagà htùm kamã harēnh nē mar nē hkôt amnhÿ nhÿpêx tã Tÿrtùm Kra Jejus kôt amnhÿ nhÿpêx kêt ã mē harē. Mē kot kèp Tÿrtùm Kra hkêt ã hkamnhÿx jakamã na prem kãm mē kot hkôt amnhÿ xunhwÿr xwÿnhjê kurê nē. Tã nhùm Simãw Pêtre mē Pawre mē Jejus nhÿ hã mē ahkre ho mē pa xwÿnhjaja mē urak nē kèp Ijaew tã mē kurom Jejus hkôt amnhÿ xunhwÿr nhùm mē tee ri ja hã mē omu mē kamã gryk tÿx nē tanhmã mē hipêx to ho pa. Tã nom nhùm mē tee ri amnhÿ kukamã hamaxpêr nē Jejus kaga hkêt nē. Mē kot mē hipêx kati htã na prem arÿ Tÿrtùm Karô nhÿ hã mē piitã mē kãm tanhmã Jejus kot mē panē amnhÿ nhÿpêx to hã harēnh o pa. Kam nē kapit 1 kamã wesik 8 japêr nē kamã harē. Hãmri nhùm Rukre ã mē kot amnhÿ nhÿpêx anhÿrja piitã hã kagà nē Teopre hwÿr kumē. Nē kãm mē harēnh o:

Tÿrtùm Karô jarēnh

Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awÿr kagà nhÿpêx nē kumē. Nà wam ixte awÿr kagà nhÿpêx nē mēnhta kamã na pa pre amã Jejus kot tanhmã amnhÿ nhÿpêx to hã harē nē hã kagà. Kot tanhmã amnhÿ nhÿpêx to ho pa nē tanhmã mē ahkre hto ho paja krax rùm pa pre piitã hã kagà hpa nē awÿr kumē.

²⁻⁴ Kormã akupÿm kaxkwa hwÿr àpir xwÿj ri na pre ÿ hã mē ahkre ho pa kaxyw hkôt mē pa xwÿnhjaja kupÿ nhùm amnhÿ xà htÿx kãm hamak rax kãm ty. Hãmri nhùm Tÿrtùm akupÿm ho htÿr. Nom nhùm ma akupÿm kaxkwa hwÿr àpir kurê kumrêx kêt nē. Na pre xatã mē kot ÿ hã mē ahkre ho mē pa xwÿnhjaja maatijê hwÿr hapôj nhùm mē akupÿm htÿr kãm omu. Na pre hte nhÿri mē hwÿr hapôj nē tanhmã mē ahkre hto nē mē kãm:

—Na pre Tÿrtùm mē ato hkra nē tãm mē ate amnhÿ nhÿpêx o apa kaxyw mē axunhwÿ.

Anhÿr o mē ahkre hã arÿgro ho 40. Hãmri nē kormã mē kamã pa ri axte tanhmã mē kãm kapêr to. Tÿrtùm Karô nhÿ hã mē kãm kapêr nē mē kãm:

—E kêt ka mē krÿ ja kamã ri apa nē tokyx ma nhÿhÿm apa hkêt nē. Kê Inhÿpêxà Tÿrtùm mē awÿr amnhÿ Karô rē mãn. Ra ixte mē amã harēnh xà hkôt koja mē awÿr kurê nhùm mē awÿr wrÿ nē mē akarô mã agjê ka mē rÿ kormã anhgrà nē ma nhÿhÿm krÿ hkôt ri mē kãm kapêr jarēnh o ri mē hkôt apa.

⁵ —Juãw Paxis na pre hte Tÿrtùm mã gôx kãm mē hkrã kumrãr o pa. Tã koja Tÿrtùm tokyx mē awÿr amnhÿ Karô rē. Kot ixpãnhã amnhÿ kaxyw mē ato mē amã ma hkêt kaxyw mē awÿr kurê. Koja hã apkati grêre nhùm mē awÿr kurê nhùm ixpãnhã mē awÿr wrÿ nē mē amã agjê nē mē akamã mē akôt pa ho pa. Ka mē rÿ kormã Jerujarê rùm ajapôj nē ma mē kãm Tÿrtùm kapêr jarēnh o ri mē hkôt apa. Anē.

*Jejus akupÿm kaxkwa hwÿr àpir ã harēnh
Makre 16.19; Rukre 24.50*

⁶ Tã nhùm mē axte akuprô. Jejus nē ÿ hã mē ahkre ho mē pa xwÿnhjaja nhùm mē hixêt pē Oriwêhti nhÿmôk ã axte axpên wÿr akuprô. Hãmri nhùm mē amnhÿ tã Jejus kukja nē kãm:

—Kwa Pahihti mē inhmã mēmoj jarē. Xà kot kaj tokyx apê Tÿrtùm kot mē ixwÿr amēnh xwÿnh ã amnhÿ jarē nē Rôm nhô xwÿnhjê nē mē pahpê Ijaew kator nà? Hãmri pa mē pamjaja amnhÿ to amnhÿptar o ri ixpa. Anē.

⁷ Hāmri nhūm mē kām:

—Nà Inhīpêxà pix na ã mēmoj kot anhÿrja kukamã àhpumunh. Tapxipix na kot mēmoj tanhmã ho hã arïgro nē mēmoj tanhmã ho hã mytwrÿ pumunh mex. No mē kajaja mo kaxyw kot ka mē amnhī katorta kukamã amnhī jarēnh ma?

⁸ Nà kot paj ãm mē amã mēmoj to pyxire nē hkukamã harē. Kojã Tirtūm tokyx mē awÿr amnhī Karō rē nhūm ixpãnhã kot mē ato amnhīptār kaxyw mē akarō mã agjê. Hāmri ka mē ma pyka piitã hkôt anhrã nē ma mē kãm ixkapēr jarēnh o ri mē hkôt apa. Jar Jerujarē kamã nē pika pē Jutej kôt nē nhãm pika pē Samar kamã nē pika piitã hkôt mē kãm ijarēnh o ri mē hkôt apa. Á mē ate amnhī nhīpêx anhÿr pix kukamã kot paj mē amã harē. Anē.

⁹ Nhūm pre ã Jejus mē kãm kapēr anē hāmri nē mē kēp kãnhmã àpir o tē nē mē noo mã ma kaxkwa hwÿr àpir o tē nē kakrãm axà nē mē kēp akunok.

¹⁰ Hāmri nhūm mē tee ri hapêr o kuhê rãhã nhūm mēhō myja wa axkrut nē mē hwÿr wrÿ nē mē kutã wa xa. Wa ê hakaj nē wa xa.

¹¹ Hāmri nē mē kãm:

—Pa Garirej nhō xwÿnhjaja? Kwa mo kaxyw na ka mē tee ri kaxkwa pumunh o akuhê? Tirtūm na akupÿm amnhī wÿr Kra Jejus o api ka mē àpir kãm omu. E mē tee ri hkukamã ajamaxpēr kêt nē. Kojã nhÿrmã man akupÿn mē awÿr wrÿ. Te mē arūm kaxkwa hwÿr àpirja pyrã nē akupÿn mē awÿr wrÿ ka mē omu. Anē.

Akupÿm Jerujarē hwÿr mē mrar ã mē harēnh

Rukre 24.52

¹² Tã nhūm Jejus nhÿ hã mē ahkre ho mē pa xwÿnh maatijaja wa kuma nē awjanã nē ma akupÿm krīm mra. Hixêt pē Oriwêhti rūm ma akupÿm Jerujarē hwÿr mra. Wÿr jawÿ nhūm mē akupÿm hpôx tokyx anē.

¹³ Hāmri nē akupÿm kÿx pē ixkreja wÿr api nē agjê. Na pre

Simãw Pêtre nē

Juãw nē

Xiakre nē

Andrehti nē

Firipti nē

Tomas nē

Patoromew nē

Matêwre nē

Xiakre hō pē Apew kraja nē

Simãw Jerox nē

Jut pē Xiakre hkraja.

Mē piitã Jejus nhÿ hã mē ahkre ho mē pa xwÿnh maatijaja na pre mē.

¹⁴ Nē mãânēn mē hkôt mē hkwyjaja. Jejus katorxã Marir nē Jejus tōjaja nē Jejus kot tanhmã mēni ho mex to xwÿnh kwÿjaja nhūm prem kÿx pē ixkreja wÿr Jejus nhÿ hã mē ahkre ho mē pa xwÿnh maatijê hkôt gjêx pa. Hāmri nē xatã axpēn wÿr akuprō nē Tirtūm mã amnhī jarēnh o hkrī.

Tirtūm kot Jut Kariot pãnhã mēhō xãm ã harēnh

Matêwre 27.3-10; Juãw 15.27

¹⁵⁻¹⁹ Tã nhūm mē kot Jejus kôt amnhī xunhwÿr xwÿnhjaja ra kēp 120. Jakamã nhūm mēmo arïgro hã axpēn wÿr akuprō nē hkrī. Nhūm Simãw Pêtre kãnhmã xa nē tanhmã mē kãm Jut Kariot jarēnh to nē mē kãm:

—E Jejus kôt ixtō nē ixtōxjaja. Pa mē amã tanhmã finat Jut Kariot jarēnh to ka mē inhma. Na pre axtem nē mē pahkwÿjê mã Jejus ã amÿnê nē hpãnhã kãxpore hkwy jamÿ nē o tē nē ho amnhīm pyka hkwy japrō. Tã tanhmã amnhī to nē nhÿri ô pyka kamã tēm nē amnhī tu katōk nē hkrêx kato nē ty nē hkamrô ho ô pyka xy hpa. Jakamã nhūm Jerujarē nhō xwÿnhjaja harēnh ma nē pykaja ã hixi mē nhūm kēp “pyka kamrôhti.” No mē pahpê Ijaew kapēr kãm kēp “Ajetãm.” Amnepēm na pre Tirtūm Karō finat Tawi mã Jut Kariot kukamã tanhmã harēnh to. Kormã kator nē kot tanhmã amnhī to hkêt tã nhūm ra hkukamã omu nē Tawi mã harē. Kot axtem nē mē kãm Jejus ã àmnênhja nhūm hkukamã omu nē Tawi mã harē nhūm kuma nē ô ri hã kagã. Tã nhūm kot hkukamã hã kagã hkôt nhūm ã Jejus nhīpêx anē. Jut Kariotja mē panhīo na pre. Na pre Jejus mē pahpyrà nē amnhīm kuta. Mē pahpyrà nē ÿ hã kapēr jarēnh o pa kaxyw. Tã nhūm axtem nē ã hipêx anē.

²⁰ Nom na pre Tawi kot Tirtūm mex ã grer ã kagã kot ra hkukamã tanhmã harēnh to. Kagã hkwy pē Sam kamã kot harēnh kot:

Kot amnhĩ tomnuj xwỳnhhta nhõrkwỹ koja hkaprỳn kuhê ho kuhê nhũm mēhõj mỳr pē kamā pa hkēt kumrēx. Koja am arĩ hkaprỳn kuhê ho kuhê.

Nom kot Jejus mā tanhmā amnhĩ nhĩpēx to ho paja kē mēhõ mỳr pē ho amnhĩptā nē hpānhā Jejus nhỹ hā mē ahkre ho pa. Anē.

Ā Tĩrtũm kapēr ā kagā htũm kot Jut Kariot kukamā harēnh kot anhỹr.

²¹ Jakamā e ixkwỳjaja. Kot puj mē hpānhā mē atõ xām ka Jut mỳr pē mē pahpē Jejus nhỹ hā mē ahkre ho ixpa xwỳnhjē hkõt Jejus akupỹm htĩr ā harēnh o apa.

²² E mē atõ na ka pre mē ixpyràn finat Juāw Paxis kot Jejus hkrā kumrār ā omu? Nē Jejus kot ri tanhmā amnhĩ nhĩpēx to ho pa xà hkrax rũm ka mē ixkõt ri omunh o ri apa? Nē htyk kām omu nē akupỹm htĩr kām omu nē ma akupỹm kaxkwa hwỳr àpir kām omu? E mē atõ na ka pre mē ixpyràn ā kot amnhĩ nhĩpēx anhỹr ā omunh par o ri hkõt apa? ā mē ate kot amnhĩ nhĩpēx anhỹr ā omunh o apa xwỳnhjē hõ kot paj mē ata ka Jut Kariot mỳr pē mē ixpyràn ma mē kām Jejus akupỹm htĩr ā harēnh o ri apa. Anē.

²³ Nhũm pre ā Simāw Pētre mē kām kapēr anē. Hāmri nhũm mē kuma nē axpēn pumunh o hkrĩ hāmri nē Maxitre mē Jujere wa kām hamaxpēr. Jujere na pre hixi axkrunēpxi. Na pre kēp Jujere nē kēp Pasapas nē kēp Justi.

²⁴⁻²⁵ Hāmri nhũm mē wa hā Tĩrtũm kukja nē kām:

—Pa Tĩrtũm? Nà na pre finat Jut Kariotja Jejus kaga nē ty nē kot amnhĩ tomnuj mỳrapē ma mē kot amnhĩ xà htỳx kamā hamak tũm xàta wỳr ma mō. Tā ot pa mē ixte mēhõ kot mỳr pē mē ixpyrā nē Jejus nhỹ hā mē ahkre ho pa kaxyw mēhõ hā akukjēr kaxyw akuprō. Ate mē ixpiitā tanhmā mē ixte amnhĩ nhĩpēx to ho ixpa hā mē ixpumunh par Tĩrtũm. Ate mē ijamaxpēr kõt mē ixpumunh par nē mē ixte tanhmā amnhĩ nhĩpēx to hā mē ixpumunh par. Jakamā e. Ota Maxitre mē Jujereja wa nhỹ. Nhỹ kot kaj amnhĩm ata? Kot paj mē kēn pijakrutja ā wa hixi xi nē ho àk nē hõ py. Hāmri ka amā hprām xwỳnhhta ta. Kēr pa mē kēn pumunh kēt rāhā hõ py

nē hā hixi pumu nē amā hprām xwỳnh kõt omunh kurē kumrēx. Anē.

²⁶ Nhũm prem ā Tĩrtũm mā kapēr anē hāmri nē kēnja o axkamur nē ho àk nē omunh kēt rāhā ja py nē omu nhũm hā Maxitre nhĩxi nō. Jakamā nhũm Jejus nhỹ hā mē ahkre ho mē pa xwỳnh maatijaja amnhĩ kõt kumē nhũm mē akupỹm kēp 12.

2

Tĩrtũm Karō kot mē hwỳr wrỳk ā harēnh Rukre 24.49; Atre 4.31, 8.15, 10.44, 19.2

¹ Tā nhũm mē hkĩnh pē Pētekos kato nhũm mē kot Jejus kõt amnhĩ xunhwỳr xwỳnhjaja nhỹri axpēn wỳr akuprō nē hā hkĩnh. Pētekosja ā na pre hte Ijaew mē hpur kām mēō rũnh ā hkĩnh kaxyw axpēn wỳr akuprō nē hā hkĩnh. Jakamā nhũm mē kot Jejus kõt amnhĩ xunhwỳr xwỳnhjaja haxwỳja axpēn wỳr akuprō.

² Hāmri nē kaxkwa kamā mēmoj ma. Nhũm mēmoj te kōk xàpēr tỳx krihkrit pyrāk o mē hwỳr wrỳk o mō nē mē pikuprōnh xà hā ixkreja wỳr axà nhũm mē piitā kuma.

³ Hāmri nhũm mēmoj te kuwy jakrax pyrākja ahpỳnhā mē hwỳr angrā nē mē hkrā nhĩmōk ā hikwỹ.

⁴⁻¹³ Tĩrtũm Karō na pre. Tām mē hwỳr wrỳk jakamā ā ri mē hipēx anē. Hāmri nē kot mē ho amnhĩptār kaxyw mē hkarōm gjēx pa nhũm mē y hā tanhmā kapēr to ho kuhê. Nom mē kapēr o kapēr kēt nē. Axtem mē kapēr kwỳ ho kapēr. Tĩrtũm Karō kot tanhmā mē ho jakamā nhũm mē axtem mē kapēr kwỳ ho kapēr. Jao ahpỳnhā mē kapēr kwỳ ho Tĩrtũm mā mex o mex ā harē. Na pre Ijaew kwỳjaja ahpỳnhā pyka hõ kamā ri mē hkõt pa nē mē kapēr ma nē ho kapēr o pa. Tā akupỹm Jerujarē hwỳr pan pōj nē kamā ri pa ho pa. Hāmri nē mēmojta ma nē ma Jejus kwỳjē hwỳr hprōt nē ahpỳnhā mē kapēr ā mē kuma nē tee ri mē omunh o kuhê. Amnhĩ jaēr pē mē kuma nē tanhmā axpēn mā mē harēnh to ho:

—Kokỹỹ. Garirej nhõ xwỳnhjaja kot mē pakapēr mar kēt tā ra tanhmā amnhĩ to nē ahpỳnhā ri mē pakapēr o kapēr. Ahpỳnhā mē pakapēr nē ahpỳnhā mē panhõ pyka htā nhũm mē ā ri mē pakapēr o kapēr anē.

Na pika pê Pat
 nê Met
 nê Erãw
 nê Mēsopotãm
 nê Jutej
 nê Kapatos
 nê Põt
 nê As
 nê Prik
 nê Pãpir
 nê Ejit
 nê Sirên wÿr Ripja
 nê krĩ pê Rõm
 nê gô hipòk pê Kret
 nê Arap.

Nê mẽ pahkwÿjaja mẽ pahpê Ijaew
 kumrêx
 nê mẽ pahkwÿjaja amarĩ ri amnhĩ to
 Ijaew.

Ăm ahpÿnhã mẽ panhõ pyka nê ahpÿnhã ri
 mẽ pakapêr.

—Tã pu mẽ ahpÿnhã mẽ pakapêr kãm mẽ
 kapêr ma. Tĩrtũm mex ã mẽ kot axpên mã
 harênhja pu mẽ hã mẽ mar mex nê. Anê.

Nhũm prem ã axpên mã mẽ harênh anê
 nê tee ri mẽ omunh o kuhê. Amnhĩ jaêr
 pê amnhĩ kapêr kãm mẽ kapêr ma nê tee ri
 hamaxpêr nê axpên mã:

—Kokÿÿ. Tanhmã mãn pre wem amnhĩ
 to nê ra mẽ pakapêr ma nê mẽ pakapêr o
 kapêr? Anê.

Nhũm mẽ hkwyjaja axtem nê ri mẽ hã
 hpêr o axkê nê axpên mã:

—Tk. Ăm mẽ pipãnh ã ã ri mẽ kot amnhĩ
 nhĩpêx anhÿr kênã. Anê.

Simãw Pêtre kot mẽ kãm ujarênh

Atre 3.12-26

¹⁴ Hãmri nhũm Simãw Pêtre ã mẽ kapêr
 anhÿrja ma hãmri nê kÿx pê mẽ kãm kapêr
 nê mẽ kãm:

—E Jerujarê nhõ xwÿnhjaja nê mẽ apê
 ixkwÿ Ijaew. Pa mẽ amã mẽmoj jarê ka mẽ
 inhma nê inhmar tÿx nê.

¹⁵ Na ka mẽ atÿx ri mẽ ixpipãnh ã mẽ
 ixkamnhix. Mẽ ixkrã pipãnh kêt. Kormã
 myt kaxkwa nhĩpòk wÿr htêm kênã. Na hte
 Ijaew kwÿhtã kagôxÿhti ho hkôm kêt nê.

¹⁶ Ja na pre Tĩrtũm amnepê mã ã mẽ ixte
 amnhĩ nhĩpêx anhÿrja kukamã mẽ ijarê
 nhũm ÿ hã kapêr o pa xwÿnh finat Joew mẽ
 ixkukamã hã kagà. Nê hã kagà ho:

¹⁷ Koja nhÿrmã mẽmoj piitã hapêx kaxyw
 pa mẽ piitã mẽ hwÿr Ixkarõ rê nhũm
 ma mẽ hwÿr wrÿ nê mẽ hkarõ mã
 agjê. Hãmri nhũm mẽ hkanrêhã mẽ
 hkra xàptàr nywjaja ma mẽ kãm
 ixkapêr jarênh o ri mẽ hkôt pa. Koja
 mẽ hpimtir kãm amnhĩ kukamã
 mẽmoj pumu. Nê mẽhpgêtjaja
 haxwÿja. Kot paj mẽ hpimtir kãm
 tanhmã mẽ kãm ixkapêr to.

¹⁸ Nê kot paj mẽ kot ixkôt ri tanhmã amnhĩ
 nhĩpêx to ho mẽ pa xwÿnhjê hwÿr
 Ixkarõ rê nhũm mẽ ÿ hã ma mẽ kãm
 tanhmã ixkapêr jarênh to ho ri mẽ
 hkôt pa.

¹⁹ Kot paj kaxkwa kamã nê pyka kamã aa
 mẽ kot mẽmoj pumunh kêt kwÿ ho
 anê nhũm mẽ amnhĩ jaêr pê omu.
 Jao nhÿri mẽ hkamrô pumu nê kuwy
 pumu nê kuwy hkũm pumu hãmri
 nê tee ri amnhĩ kukamã hamaxpêr.

²⁰ Nê koja myyti ahtyk nhũm mytwÿre
 haxwÿja te mry kamrô pyrãk. Pahi-
 hti Jejus akupÿn hpòx xà hã arĩgro
 xwÿj ri koja mẽmoj ã amnhĩ nhĩpêx
 anê. Akupÿn hpòx xà hã arĩgro koja
 mex kumrêx.

²¹ Tã koja mẽhõ mẽmoj kot ã amnhĩ nhĩpêx
 anhÿr ã omu nê amnhĩ kaxyw
 inhmã hamaxpêr nê amnhĩ to ixwÿ
 pa kuma nê ho ixkra nê mẽmoj
 punujta pê utà. Anê.

Na pre ã Tĩrtũm kapêr anê nhũm finat
 Joewja mẽ pamã hã kagà.

²² E pa mẽ amã tanhmã Jejus jarênh to ka
 mẽ inhma. Nà Najare nhõ xwÿnh na pre.
 Mẽ pahte Tĩrtũm nhÿ hã kot tanhmã amnhĩ
 nhĩpêx to ho pa hã omunh kaxyw na pre
 Tĩrtũm mẽ pahwÿr kumê nhũm ÿ hã mẽ
 panoo mã tanhmã amnhĩ nhĩpêx to ho pa.
 Nê aa mẽ pahte mẽmoj pumunh kêt kwÿ ho
 anhÿr o pa pu prem hã omu.

²³ —Tã ka prem tanhmã kaxyw aja-
 maxpêr punuj to nê apĩ. Tĩrtũm ra kot
 amnepê mã ja kukamã ja hã mẽ apumunh
 mex tã mẽ pahwÿr kumê ka mẽ axtem nê
 apĩ. Jao mẽ kot htÿx ri amnhĩ nhĩpêx o
 mẽ pa xwÿnhjê mã agõ nhũm mẽ kupĩ. Pĩ
 kahpa hã kunhõ nhũm ty. No ãm mẽ kajaja
 na ka prem mẽ kãm hã amÿnê nhũm mẽ

ã mẽ amã hprãm xà hkôt hipêx anê nê mẽ amã kupĩ.

²⁴ —Tã nhũm Tĩrtũm akupỹm ho htĩr nhũm akupỹm htĩr o htĩr nhũm mẽ htykja tee ri kot amnhĩ kôt mênh prãm kaprỹ.

²⁵ Amnepêm na pre finat Tawija Jejus akupỹm htĩr kukamã harê. Te Jejus tãm kapêr pyrãk o kapêr nê kapêr o:

Na hte Pahi Maati ixkôt pa ho pa rãhã nê. Kot inhĩhkô hã ixtãnopxar o pa jakamã kot paj inhmã ma hkêt nê ri ixãmnhĩx ijamakêtkati nê ri ixpa.

²⁶⁻²⁷ Pa Tĩrtũm? Nà kot paj nhỹrmã ixytk tã arĩ amnhĩ wỹr akãm ama. Kot kaj mẽ htykjê kamã ixkarõ rer kêt nê. Ixte akapêr kôt amnhĩ nhĩpêx mex o ri ixpa jakamã koja inhĩ kormã omnu nê hkro hkêt ri ka akupỹm ixto ixtĩr. Jakamã na pa inhmã ixytk pyma hkêt nê ixkĩnh nê ijamakêtkati nê ri ixpa. Nê amnhĩ kĩnh jarênh rãhã ho ri ixpa.

²⁸ Na ka pre akupỹm ixto ixtĩr ã amnhĩ jarê pa ixtĩr tũm nê ixpa ho ixpa kaxyw. Tã ate ixkôt ri apa rãhã jakamã pa ixkĩnh nê ri ixpa. Anê.

²⁹ ã na pre mẽ panhĩgêt finat Pahi Tawija Jejus htyk nê akupỹm htĩr kukamã harênh anê. No tãm amnhĩ jarênh kêt nê. Tawija na pre ty nhũm mẽ haxà nhũm htem arĩ haxà xà hã pika ho mex o pa. Tã tãm ã kot amnhĩ jarênh anhỹr ro nhỹx akupỹm htĩr nhũm mẽ arĩ haxà xà kaprỹ ho mex o pa hkêt nê.

³⁰ Pahi Tawi kêp Tĩrtũm nhỹ hã kapêr jarênh o pa xwỹnh jakamã nhũm Tĩrtũm kãm hkanrêhã htãmnhwỹ Jejusja kukamã harê nê kãm:

Koja nhỹrmã akanrêhã atãmnhwỹjê hõ amỹr pê apyrã nê mẽ ho amnhĩptãr o pa. ãm hãmri na pa amã ja jarê. Anê.

³¹ Nhũm pre ã Tĩrtũm Tawi mã mẽ pakaxyw ãm mã xwỹnhnta jarênh anê nhũm kuma. Nê mar tỹx jakamã hkukamã htyk nê akupỹm htĩr ã harê nê hã kagà. Nê hã kagà ho:

Koja Tĩrtũm mẽ htykjê kamã hkarõ rer kêt nê nhũm aa ĩ omnu nê hkro kêt. Anê.

ã na pre finat Tawija Jejus Kris kukamã harê nê hã kagà anê.

³² Kot harênh xwỹnh Jejusja tãm na pre Tĩrtũm akupỹm ho htĩr pa mẽ pamjaja

akupỹm htĩr kãm omu. Hãmri nê mẽ ixte omunh xà hkôt ã mẽ amã harênh anê. Anê.

Nhũm pre ã Simãw Pêtre mẽ kãm Jejus jarênh anê. Hãmri nê mẽ kãm:

³³ —Na pre Tĩrtũm akupỹm amnhĩ wỹr Kra Jejus o api. Hãmri nê kãm anê nhũm ĩhkô hã mẽmoj piitã ho amnhĩptãr o hkrĩ. Hãmri nhũm Tĩrtũm kot kãm amnhĩ jarênh xà hkôt kãm amnhĩ Karõ gõ. Tã nhũm ra amnhĩ pyrã nê mẽ ixwỹr kurê nhũm jarãhã mẽ ixwỹr te kuwy jakrax pyrã nê mẽ ixwỹr wrỹ nê mẽ ixkarõ hwỹr gjêx pa. Hãmri pa mẽ ĩ hã ahpỹnhã mẽ akapêr o ixkapêr ka mẽ inhma. Tã mẽ akwỹjaja axtem nê mẽ xpipãnh ã mẽ ixkamnhĩx.

³⁴ No finat Tawija na pre tãm kaxkwa hwỹr àpir ã amnhĩ jarênh kêt nê. Jejus kot ĩ ho kaxkwa hwỹr àpirja na pre harê nê harênh o:

Na pre Tĩrtũm inhõ Pahihti mã kapêr nê kãm:

³⁵ “E jar inhĩhkô hã nhỹ.

Pa amã mẽ kãm akurê xwỹnhjê gõ ka mẽ ho amnhĩptãr o akrĩ.” Anê.

ã na pre finat Tawija Tĩrtũm kapêr jarênh anê. Nom tãm ĩ rãhã kaxkwa hwỹr àpir ã amnhĩ jarênh kêt nê. Pahihti Jejus na pre ã hã harênh anê.

³⁶ Jakamã kwa ixkwỹ Ijaew. Mẽ inhma nê inhmar tỹx nê. Mẽ ate Jejus ã axãmnhênh nhũm mẽ kot mẽ amã pĩ kahpa hã hpĩr xwỹnhnta. Tãm na pre Tĩrtũmja kêp mẽ panhõ Pahihti kaxyw ãm. Nê kêp mẽ papytãr xwỹnh kaxyw mẽ pakaxyw ãm. Anê.

³⁷ Nhũm pre ã Simãw Pêtre mẽ kãm ujarênh anhỹr o xa. Hãmri nhũm mẽ tee ri ujarênhja ma nê hkaprĩ nê. Nê tee ri amnhĩ kukamã hamaxpêr nê hamaxpêr o:

—Hêxta waa nê. Pêr ãm hãmri na pre Jejus mẽ pamã amnhĩ jarênh tã pu prem amnhĩ kaxyw hkôt pajamaxpêr kêt nê axtem nê kupĩ. Anê.

Hãmri nê amnhĩ tã mẽ hkukja nê Simãw Pêtre mã:

—Kwa ã kot anhỹr jakamã tanhmã kot paj mẽ amnhĩ nhĩpêx to? Anê.

³⁸ Hãmri nhũm mẽ kãm:

—Nà kêt ka mẽ tee ri ate amnhĩ tomnuj mã ajamaxpêr nê akaprĩ nê. Hãmri nê Jejus Kris kôt amnhĩ xunhwỹ. Pa mẽ ja hã mẽ apumu nê Jejus nhỹ hã mẽ akrã kumrã.

Hāmri nhūm Tīrtūm ja hā mẽ apumu nē te amnhĩ katut kōt mẽ ate amnhĩ tomnuj piitā rēnh par pyrā nē axte kām hamaxpēr kēt nē. Hāmri nē mẽ ixkuxwar mẽ awȳr amnhĩ Karō rē.

³⁹ Kām mẽ awȳr rēnh prām. Mẽ amā nē mẽ akanrēhā mẽ akra nē mẽ atāmnhwỳjē mǎ nē mẽ kot kormā Tīrtūm kapēr mar kēt xwỳnhjē mǎ. Ām mẽ kot amnhĩ to hwỳr xwỳnh piitā nhūm kām mẽ hwỳr rēnh prām. Anē.

⁴⁰ Nhūm pre ã Simāw Pētre mẽ kām ujarēnh anē. Mẽ kām kapēr xihtỳx o kapēr ry nē. Hāmri nē mẽ kām:

—Koja nhỹrmā Tīrtūm mẽ kot tanhmā amnhĩ tomnuj to ho mẽ pa xwỳnhjaja tanhmā mẽ homnuj tỳx to. Jakamā kwa mẽ tokyx mẽ ate amnhĩ tomnuj kaga kē tanhmā mẽ ato hkēt nē. Anē.

⁴¹ Hāmri nhūm mẽ hkwȳjaja kapēr mar tỳx nē amnhĩ kaxyw Jejus kōt hamaxpēr nē hkōt amnhĩ xunhwỳ. Mẽ ohtō rax nē hkōt amnhĩ xunhwỳ. Mẽ kēp 3.000 nē hkōt amnhĩ xunhwỳ. Hāmri nhūm mẽ kot Jejus nhỹ hā kapēr jarēnh o mẽ pa xwỳnhjaja mẽ hkrā kumrār pa. Mẽ kēp Jejus kwỳ hā amnhĩ to amnhĩrīt kaxyw mẽ hkrā kumrār pa.

⁴² Hāmri nhūm mẽ ra mẽ kot Jejus kōt amnhĩ nhĩpēx xwỳnhjē hkōt amnhĩ nhĩpēx o pa nhūm Jejus nhỹ hā mẽ ahkre xwỳnh maatijaja apkati mẽ Jejus kapēr o mẽ ahkre nhūm mẽ mar tỳx nē ra Jejus kōt amnhĩ nhĩpēx mex o mō. Nē gaa nē hkōt amnhĩ nhĩpēx mex o pa. Mẽ kām kapēr mar prām tỳx jakamā na pre htem axpēn wỳr akuprō nē axpēn kutā apku nē Tīrtūm mǎ amnhĩ jarēnh o hkrī. Nē mẽ kām axpēn to mex pix prām o axpēn kōt pa ho pa.

Jejus kwỳ kot tanhmā amnhĩ nhĩpēx to hā mẽ harēnh

Atre 4.32-35

⁴³ Tā nhūm Jejus nhỹ hā mẽ ahkre ho mẽ pa xwỳnh maatijaja xatā Tīrtūm nhỹ hā aa mẽ kot mẽmoj pumunh kēt kwỳ ho anhỹr o ri krī nhō xwỳnhjē hkōt pa nhūm mẽ piitā ja hā mẽ omu. Amnhĩ jaēr pē mẽ omu nē mẽ kamā no pyma ho tee ri tanhmā Tīrtūm mǎ hamaxpēr to.

⁴⁴ Nhūm mẽ kot Jejus kōt amnhĩ xunhwỳr xwỳnh piitā mẽmoj to axpēn kutā nojarēt o pa. Jao axpēn pē ri mẽmoj to õxỳ hkēt nē pa.

⁴⁵ Jakamā nhūm mẽhō kēp amrakati nhūm mẽ ja hā omu hāmri nē õ pyka hkwȳ ho wēnē rỳ mẽ hikukrēx kwỳ ho wēnē nē kàxpore jamỳ nē ma o mra nē mẽ kām kugō. Na pre hte ã mẽ kot Jejus kōt amnhĩ xunhwỳr xwỳnhjaja axpēn nhĩpēx anhỹr o pa.

⁴⁶ Hāmri nē apkati mẽ Tīrtūm mǎ amnhĩ jarēnh xà hā ixkre hwỳr mra nē kām mex o mex ã harē. Nē hamakētkati nē àmnhĩx ri hkīnh kām axpēn nhōrkwȳ hkōt ri apkur o pa.

⁴⁷ Pē Tīrtūm mǎ mex o mex ã harēnh o ri axpēn kōt pa. Ā mẽ kot amnhĩ nhĩpēx anhỹr o pa jakamā nhūm krī nhō xwỳnh piitā kām mẽ hkīnh nē. Nē mẽ hkwȳjaja apkati mẽ mẽ hwỳr mra nē mẽ hkōt axkamē nē mẽ urāk nē Jejus kōt amnhĩ xunhwỳ nhūm Tīrtūm ja hā mẽ omu nē mẽ ho hkra. Jakamā nhūm mẽ ra ohtō rax kumrēx o mō.

3

Te grà xwỳnh jarēnh

Juāw 14.12-14; Atre 14.8-10

¹ Tā nhūm apkati hō hā nhūm Simāw Pētre mẽ Juāw wa ma Tīrtūm mǎ amnhĩ jarēnh xà hā ixkre hwỳr wa tē. Na pre hte myt àhpanh grire nhūm mẽ piitā kot Tīrtūm mǎ amnhĩ jarēnh kaxyw hwỳr mra. Jakamā nhūm Simāw Pētre mẽ Juāw wa haxwỳja ma hwỳr wa mra.

² Nhūm mẽhōja hakwakrem hkrī. Katorxà nhōxà hkre rūm hte grà nē kator xwỳnhnta. Nē arī hkrī ho hkrī nē aa kànhmā ãm nē ri pa hkēt nē. Nhūm hte hkràmnhwỳjaja apkati mẽ hamỳ nē ma o pa nē Tīrtūm mǎ amnhĩ jarēnh xà hā ixkre jakwakrem hkrī nhūm mẽ hwỳr o hkrī. Hakwakreja mẽ kot kām: “Mẽ gjēx xà mex” anhỹr xwỳnhnta kapem hwỳr mẽ mrar xwỳnhjē hwỳr o hkrī.

³ Tā nhūm Simāw Pētre mẽ Juāw wa tē nē ixkreja wỳr wa àr o tē nhūm hte grà xwỳnhnta wa omu nē kàxpore hā wa kuwỳ

⁴ nhūm Simāw Pētre omu nē kām:

—E amnē wa ixpumu. Anē.

⁵ Hāmri nhūm kuma nē htỳx ho wa kot kām kàxpore hkwȳ nhōr ã wa hkamnhĩx nē wa omu

⁶ nhũm Simãw Pêtre kãm:

—Nà ixkàxpore hkêt. Nom kot paj Jejus Kris xàhpumunh xà ho tanhmã anhîpêx to. E pa Jejus Kris pê Najare nhõ xwýnhhta nhỹ hã amã ixkapêr jakamã tokyx kànhmã xa nê ri mra. Anê.

⁷ Hãmri nê upôk rûm hpa hã kupy nê kànhmã ãm nhũm hte mex nê kànhmã xa nê amnhî te karo ho ri mra.

⁸ Hãmri nê hte mex ã amnhî pumu nê hkînh týx nê. Nê hkînh xàj ma wa hkôt harĩ ho tẽ nê wa hkôt ixkrem axà. Tĩrtũm mã mex o mex ã harênh pê harĩ ho wa hkôt tẽn axà.

⁹ Hãmri nhũm mẽ piitã amnhî jaêr pê akupỹm mex ã omu nê kamã no puma nê.

¹⁰ Nê axpẽn mã:

—Kokỹỹ mũjti na pre hte mẽ gjêx xà mex kamã mẽ hwýr rãhã ho hkrĩ htã nhũm Tĩrtũm tanhmã ho nhũm kànhmã xa nê ri mrar mex kurê kumrêx. Hêxta waa nê. Anê.

Simãw Pêtre kot mẽ kãm ujarênh

Rukre 24.46-47; Atre 2.14-36

¹¹ Hãmri nhũm hte mex xwýnhja Simãw Pêtre mẽ Juãw wa hkôt ixkre hwýr axà nê wa kuri xa. Nhũm mẽ piitã amnhî jaêr pê harênh ma nê hwýr hprôt nê agjê nê omu. Mẽ kot ixkre nhĩkjê jarênh o: “Pahi Sarumãw nhõ” anhỹr xwýnh jarênhja wýr nhũm mẽ hprôt nê hte mex xwýnhhta kamã no puma ho kuhê. Nê kuri Simãw Pêtre mẽ Juãw wa omu nê axpẽn mã wa harênh o:

—Hêxta waa nê. Tanhmã na we wa amnhî to nê akupỹm kãm hte ho mex nhũm ri mra?

Anê nê wa kamã no puma nê.

¹² Hãmri nhũm Simãw Pêtre mẽ kuma nê mẽ kãm:

—Pa ixkwýjaja. Kwa mẽmo na ka mẽ ri mẽ ixkamã ano puma ho akuhê? Xà wa ixàhpumunh týx xà ho na pa wa ho mex? Nà ja kot anhỹr kêt. Rý xà wa ixte Tĩrtũm kôt amnhî nhîpêx mex o ixpaja o na pa wa ho mex? Nà mãânên ja kot anhỹr kêt.

¹³⁻¹⁷ Mẽ ate omunh xwýnhhta Jejus tãm kot ho mex kênã. Kot amnhî kaxyw kãm hamaxpêr týx jakamã nhũm akupỹm ho mex ka mẽ omu.

—Finat Apraãw nê Ijak nê Jako mẽ hkwýjaja kot hkôt amnhî nhîpêx o pa xwýnh pê Tĩrtũmja. Tãm na pre akupỹm Kra Jejus

o htĩr nê mex o mex ã harê. Mẽ ate hã axàmnhênh nhũm mẽ kot hpĩr xwýnhhta. Pahihti Pirat kot kãm urer kaxyw tã ka mẽ nê kãm akapêr kãm axihtýx nê. Nom Jejus tãm kot amnhî nhîpêx o pa xwýnh na pre. Na pre hte amnhî nhîpêx mex rãhã ho pa htã ka mẽ axtem nê hkaga. Nhũm pahihti Pirat mẽ ate kot kãm urer kêt ã axihtýx nhũm kãm urer kêt nê õ pôristi mã kugõ nhũm mẽ amã kupĩ. Mẽ kajaja mẽ amã hprãm xà hkôt mẽ amã kupĩ. Tĩrtũm kot mẽ pahwýr mẽnh tã ka mẽ axtem nê apĩ.

—Nom mẽ ate kêp Tĩrtũm Kra hã omunh kêt jakamã na ka prem ã hipêx anê. Mẽ kot mẽ ato amnhîptar xwýnhjê mẽ na ka prem amarĩ apĩ. Na prem mẽ axàmnhênh xà hkôt mẽ amã pĩ kahpa hã kunhõ nê ã hpĩr anê. Kêp akupỹm mẽ pahto mẽ pahĩr xwýnh tã ka prem axtem nê apĩ. No nhũm Tĩrtũm akupỹm ho htĩr pa prem akupỹm htĩr kãm omu.

¹⁸ —Amnepêmh Tĩrtũm nhỹ hã kapêr jarênh o mẽ pa xwýnhjaja na prem Tĩrtũm kot mẽ pakaxyw ãm xwýnhja kukamã tanhmã harênh to nê hã kagã nê mẽ kãm harênh o pa. Kot amnhî xà htýx kãm hamak kãm htykja kukamã nhũm pre htem harênh o pa. Tã ã Tĩrtũm kot kukamã harênh anhỹr xàja kôt ka mẽ ã hipêx anê nê apĩ.

¹⁹ —Jakamã kwa mẽ tee ri mẽ ate amnhî tomnuj ã amnhî pumu nê tokyx hkaga. Hãmri nê amnhî to Tĩrtũm wý kê mẽ anê mẽ ate amnhî tomnuj piitã amnhî katut kôt rênh pa.

²⁰ Hãmri nê mẽ ato mex nê ka mẽ kukwak ri akĩnh nê ajamakêtkati nê axàmnhĩx ri apa. Koja nhỹrmã akupỹn mẽ pahwýr Jejus mẽ. Ra kot mẽ pakaxyw ãm kênã.

²¹ —Nom koja tokyx akupỹn wrýk kêt nê. Koja kormã kaxkwa kamã pa rãhã nhũm Tĩrtũm akupỹm kot mẽmoj piitã ho mex par mẽ nhũm rĩ kormã akupỹn mẽ pahwýr wrý. Amnepêmh Tĩrtũm nhỹ hã kapêr jarênh o pa xwýnhjaja kot ja kukamã harênh nê hã kagã xà hkôt.

²² —Na pre finat Mojes haxwýja Tĩrtũm nhỹ hã mẽ pahpãmjê mã tanhmã ja jarênh to nê harênh o:

Koja nhỹrmã mẽ panhõ Pahi Maati Tĩrtũmja te kot ra mẽ akaxyw pa ixãmja pyrà nê axte mẽ panhĩõ xãm. Mẽ panhĩõ

koja. Koja nhÿrmã inhmÿr p  m n p j n  m  am  T rt m kap r jar nh o pa. Ka m  kap r ma n  mar t x n  kap r k t amnh  nh p x o ri apa.

²³ Koja m h  kuma n   m kuma n  hk t amnh  nh p x k t n  nh m T rt m tee ri ja h  omu n  k p hkra hk t   har nh kur  kumr x. An .

²⁴   na pre finat Mojesja m  k m Jejus kukam  ujar nh an . No  m tapxipix na pre   har nh anh r k t n . T rt m nh  h  m  kap r o m  pa xw nh piit  na prem   m  k m har nh anh r o pa. Kot har nh o pa xw nh kot wa finat S muewja n  hk t m  hkw j  piit    Jejus kukam  hkw j  m  har nh anh r o pa.

²⁵ –T  m  pahp  m  hkamr  hkw  na pu m . M  pahp  m  hkanr h  m  ht mnhw y . M  pakaxyw na pre T rt m   m  k m kap r an . N  Kraja kukam  finat Apra w m  k m:

Koja nhÿrm  akanr h  at mnhw j  h  pyka piit  hk t m  piit  m  ho mex o pa nh m m  kukwak ri mex kumr x n  ri pa. An .

²⁶   kot Kra hkukam  har nh anh r t  m  pakumr xj  hw r na pre kum . Kot m  pahto mex nh m m  pahte amnh  tomnuj kaga kaxyw nh m m  pahp  Ijaew kumr xj  hw r kum . An .

Nh m pre   Sim w P treja hte gr  xw nh pumunh o m  kuh  xw nhj  m  ujar nh an .

4

Sim w P tre m  Ju w wa kot m   pt r t mj  m  kap r   wa har nh

Rukre 21.12-13

¹⁻⁴ Nh m Sim w P tre m  Ju w wa ar  m  k m T rt m kap r jar nh o wa xa n  m  k m:

–Na na pre Jejus ty nh m T rt m akup m ho ht r. T  kot akup m ho ht r jakam  koja nhÿrm  ur k n  akup m m  htyk xw nh piit  m  ho ht r pa. An .

H mri nh m m  kot wa mar o kuh  xw nh kw jaja wa kuma n  wa hk t hamaxp r n  wa ur  n  Jejus k t amnh  xunhw y . Jakam  nh m ra m  kot Jejus k t amnh  xunhw r xw nhjaja oht  rax kumr x. Ra m  k p 5.000.

H mri nh m axtem m  hkw jaja wa hw r mra n  wa mar o kuh . M    patre nh  p risti kr ht m m  Satusew nh  xw nh kw j  m  nh m m  ma Sim w P tre m  Ju w wa hw r mra n  tee ri wa kot m  ahkre h  wa mar o kuh . N  m  k m akup m m  ht r jar nhja ma n  wa kam  gryk n . Satusew nh  xw nhjaja na pre htem akup m m  ht r k t hamaxp r k t jakam  nh m wa akup m m  ht r jar  nh m m  tee ri wa kuma n  hamaxp r punuj n  wa kam  gryk kato. H mri n  wa h  am n  nh m m  wa un  n  ma wa o t  n  m  hagi nh x  kam  wa hax . Ra myt grire nh m m  wa hax . Wa kot m  hagi nh x  kam  h  apkati nh m r  korm  m  kot ujar nh   tanhm  wa ho kaxyw.

⁵⁻⁶ T  nh m apkati nh m m  oht  n  wa ujar nh   wa mar kaxyw Jerujar  kam  axp n w r akupr . Ijaew pig tjaja n  m   pt r t m kw jaja. N  m  kot finat Mojes kap r o m  ahkre ho m  pa xw nhjaja. N  m    patre maati Anas m  hkw ja. N  Ijaew nh  juisti Kajpas m  Ju w   m  Ares nja. Nh m m  kot Sim w P tre m  Ju w wa mar kaxyw axp n w r akupr .

⁷ H mri n  wa h  kar  nh m p risti wa hw r t  n  wa hapr  n  ma m  hw r wa o t  n  wa ho ax  n  m  kut  wa  r nh m wa nh . H mri nh m m  wa omu n  wa k m:

–E m  inhm  amnh  jar . M h  x hpumunh x  ho na ka pre wa hte gr  xw nhhta ho mex? M h  na pre hw r war am  ka wa ho mex? An .

⁸ H mri nh m Sim w P tre m  k m awjar . T rt m Kar  kot k m hamaxp r o hiht x jakam  nh m   h  Ijaew pig tj  m  m   pt r t mj  m  awjar  n  m  k m:

⁹ –T e m h  kot ho mex xw nhja   m  ate wa ixkukj r

¹⁰ jakam  kot paj m  am  har  ka m  ixte har nhja ma. Wa ixpyr  n  m  ap  Ijaew k r ka m  wa ixkap r mar t x n . Jejus Kris p  Najare nh  xw nhhta. M  ate hp r nh m T rt m kot akup m ho ht r xw nhhta. T m na pre  hpumunh t x o akup m hte gr  xw nhhta o mex.   h  ixte kaxyw k m ixkap r nh m t m akup m ho mex.

¹¹ T rt m kot mex o mex   har nh n  m  pakaxyw  m t  ka prem axtem n  hkaga. Nom T rt m kap r   kaga ht m kot ra m 

akukamã ã mẽ ate amnhĩ nhĩpêx anhÿr ã mẽ ajarênh nê mẽ ajarênh kot:

Mê kot kên o amnhĩm òrkwÿ nhĩpêx kaxyw nê nhÿri kên maati pumu nê htÿx omnuj ã hkamnhĩx nê hkaga. Mẽ kot hkaga htã nhũm Tirtũm mẽ kurom mex o kot kên piitã hakrenh par ã omunh kurê kumrêx.

Anhÿr o kot mẽ ajarênh. Te mẽ ate kên maati kaga xwÿnh ã mẽ ajarênh pyrãk. Tã ka mẽ ã mẽ kot mẽ akukamã mẽ ajarênh anhÿrja kôt te mẽ ate kên maati kaga pyrã nê Jesus kaga nê apĩ. Tirtũm kot amnhĩm mex o mex ã omunh nê harênh tã ka prem axtem nê hkaga.

¹² Tapxipix na hte mẽ panê mẽ pahte amnhĩ tomnuj rê. Mẽhõ koja urãk nê àhpumunh tÿx o mẽ panê kurê? Mẽhõ koja ahpÿnhã pyka piitã hkôt urãk nê ã mẽ panhĩpêx mex anê? Nà ãm amrakati kumrêx. ãm Jesus pix. Tapxipix na pre Tirtũm ja kaxyw ãm jakamã tapxipix na kêp mẽ pahkaprĩ xwÿnh maati. Anê.

¹³ Nhũm pre ã Simãw Pêtreja mẽ kãm kapêr anê. Hãmri nhũm mẽ amnhĩ jaêr pê kuma nê axpên mã:

—Kwa wa kãm mẽ pahpyma wa hã hkwÿ jêt kêt kumrêx. Te ri wa htÿx ri wa pa pyrãk tã wa hamaxpêr tÿx kumrêx. Mãn wa kêp Jesus kôt mẽ pa ho mẽ pa xwÿnh kwÿ jakamã na wa ã kapêr anê nà? Anê.

¹⁴ Hãmri nê tee ri kot tanhmã mẽmoj tã wa kãm àkjêr to hkukamã hamaxpêr. No nhũm hte grã xwÿnh ra kot mẽ hwÿr àr nê Simãw Pêtre wa kuri mex nê ãm nhũm mẽ kot no ho omunh jakamã wa kãm àkjêr kêt nê.

¹⁵ Hãmri nê wa kãm anê nhũm wa mẽ kêp kato nê kapôt ã xa nhũm mẽ tanhmã wa kãm nê kaxyw wa hã axpên ma nê axpên mã:

¹⁶ —Kwa tanhmã kot puj mẽ wa ho? Ra jar Jerujarê kamã mẽ piitã mẽ kot akupÿm hte grã xwÿnh ta mex ã wa omunh kênã kot puj kêt mẽ kãm wa kot ho mex hkêt ã wa harê.

¹⁷ Tã mẽ kot harênh o hprôt pymaj kot puj mẽ axte Jesus jarênh o pa nê wa hkurê. Kê hte grã xwÿnh jarênhja ãm jar mẽ pakamã hapêx. Nà kot puj mẽ ã wa kãm karõ anê. Anê.

¹⁸ Nhũm mẽ wa hã axpên mar pa hãmri nê akupÿn wa hã karõ nhũm wa akupÿn mẽ hwÿr axà nhũm mẽ wa kãm:

—E Simãw Pêtre mẽ Juãw wa. Wa mãmrĩ ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jesus jarênh to ho ri apa hkêt nê. ãm kwarĩ ho kwarĩ. Anê.

¹⁹ Hãmri nhũm wa tee ri mẽ kuma nê mẽ kãm:

—Nà Tirtũm tãm kot ja hã wa inhmã karõ kênã kot pa kêt wa mẽ akapêr ma nê harênh o ixpa hkêt nê.

²⁰ Na pa pre wa Jesus kôt ri ixpa nê xatã kot tanhmã amnhĩ nhĩpêx to hã omunh o hkôt ixpa. Nê xatã tanhmã mẽ ahkre hto hã mar o hkôt ixpa. Nê akupÿm htĩr kãm omu. Jakamã tanhmã kot pa wa amnhĩ to nê mẽ kãm ja jarênh kêt nê? Nà kot pa wa mẽ akapêr mar xà hkôt ã amnhĩ nhĩpêx anhÿr hkêt nê. Anê.

²¹⁻²² Hãmri nhũm mẽ kuma nê tee ri mẽ kot tanhmã wa ho kaxyw. Te grã xwÿnh ta hte grã nê hkrĩ ho hã amgrã pê 40 tã ra akupÿm mex nhũm mẽ piitã ja hã omu nê hã axpên mã Tirtũm mex o mex ã harênh o ri pa. Jakamã nhũm mẽ utàr xwÿnhjaja mẽ kuma nê kãm mẽ uma nê. Hãmri nê mẽ umaj tanhmã Simãw Pêtre mẽ Juãw wa ho hkêt nê. ãm axte wa kot Jesus jarênh o pa nê wa kãm kapêr kãm hihtÿx nê wa hano nhũm wa ma tẽ.

Mẽ kot amnhĩ to Tirtũm wÿr ã mẽ harênh Matêwre 18.19-20

²³ Tã nhũm Simãw Pêtre mẽ Juãw wa ma akupÿm Jesus kôt htõ nê htõxjê hwÿr wa tẽ nê mẽ kãm amnhĩ jarê. Nê patre krãhtũmjê mẽ mẽ àptàr tũmjaja kot Jesus kapêr jarênh nê wa hkurê kamã hihtÿxja nhũm amnhĩ tã mẽ kãm mẽ harê.

²⁴ Hãmri nhũm mẽ wa kuma nê amnhĩ to Tirtũm wÿr kurê kumrêx nê kãm:

—Pa Pahi Maati? Nà mẽmoj piitã ho akator xwÿnh ta na ka. Na ka pre kaxkwa ho akato nê pyka ho akato nê gô xujanãr o akato. Hãmri nê kamã mẽmoj piitã ho akator pa.

²⁵⁻²⁶ Amnepêm na pre mẽ inhìgêt Tawija amã tanhmã amnhĩ nhĩpêx to ho pa. Nê Akarõ nhÿ hã akapêr kwÿ jarê nê hã kagã. Nê kagãja kamã mẽ kot Pahihti Jesus kutã

amnhĩ xunhwÿr xwÿnhjê jarê nê mẽ hã kagà. Mẽ hkukamã mẽ hã kagà nê mẽ hã kagà ho:

Mẽmo mÿrapê na prem Ijaew kêt xwÿnhjaja Tirtũm kutã amnhĩ xunhwÿ?

Nê Ijaew haxwÿja. Mẽmo mÿrapê na prem htÿx ri hamaxpêr o ri pa?

Nê pyka piitã hkôt pahijaja na prem Pahi Maati kutã amnhĩ xunhwÿr pa.

Nê kot mẽ pakaxyw ãm xwÿnh Jejus Krisja nhũm mẽ mãânên kutã amnhĩ xunhwÿr pa.

Nê mẽ kot hpĩr kaxyw mẽ kãm hã amÿnê.

Kwa mẽmo mÿrapê na prem axtem nê ã amnhĩ nhĩpêx anê? Anê.

Ã na pre finat Tawija Akarõ nhÿ hã mẽ harê nê hã kagà anê Tirtũm.

²⁷ ãm hãmri na pre mẽ hkukamã mẽ hã kagà. Ra mẽ kot ã amnhĩ nhĩpêx anhÿr kênã. Krĩ ja kamã na prem ã amnhĩ nhĩpêx anhÿr kaxyw axpên wÿr akuprõ. Pahi Erox nê pahi Põn Pirat nê mẽ ixkwÿjaja nê mẽ kêp Ijaew kêt xwÿnhjaja axpên wÿr akuprõ nê Akra Jejus kutã amnhĩ xunhwÿ nê mẽ kot hpĩr kaxyw hã amÿnê. Kot tãm amnhĩ nhĩpêx o pa nhũm ate mẽ ixkaxyw ãm xwÿnhja nhũm mẽ axtem nê kutã amnhĩ xunhwÿ.

²⁸ —Nom amnepêm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhÿr ã mẽ omu. Mẽ kot tanhmã apê Akra Jejus to nê hpĩrta kukamã ka pre hã mẽ omu. Tã mẽ ixwÿr amê nhũm prem kupĩ. No ãm ajamaxpêr xà hkôt.

²⁹ —Tã ka mẽ omu. Na mẽ Jejus ã mẽ ixkamã gryk tÿx nê tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwÿnhjaja ka tanhmã mẽ ixkrã hto pa mẽ inhmã mẽ uma hkêt nê mẽ hkôt ixpa ho ixpa. Mẽ kot tanhmã mẽ ixto hã mẽ ixkagrõnh tã pa mẽ inhmã mẽ uma hkêt nê ixãmnhĩx ri ixkĩnh nê ri ixpa. Nê anhÿ hã mẽ kutã amnhĩ to htÿx nê arĩ mẽ kãm akapêr jarênh o ri mẽ hkôt ixpa. Mẽ kot Jejus ã tanhmã mẽ ixto htãã.

³⁰ —Akra Jejus mex o mex jakamã kot paj mẽ ãhpumunh tÿx xà ho tanhmã mẽ piitã mẽ ho mex to ho ri mẽ hkôt ixpa. Mẽ ã xwÿnhjaja akupÿm mẽ o mex. Nê mẽ kot

aa mẽmoj pumunh kêt kwÿ ho anê. Kê mẽ omu nê axãhpumunh o axãhpumunh ã apumunh mex kurê kumrêx. E ãm ja pix na ra hapêx. Anê.

³¹ Nhũm prem ã amnhĩ to Tirtũm wÿr anê. Puh nhũm ixkreja mẽ kãm htertet tÿx nê nhũm Tirtũm Karõ axte tanhmã mẽ hkrã hto nhũm mẽ ÿ hã kãm mẽ uma hkêt nê. ãm amnhĩ to htÿx nê mẽ kãm Tirtũm kapêr jarênh rãhã ho ri mẽ hkôt pa.

Jejus kwÿjaja tanhmã kot axpên nhĩpêx to hã mẽ harênh
Atre 2.42-47

³²⁻³³ Nhũm Jejus nhÿ hã mẽ ahkre ho mẽ pa xwÿnh maati jaja. Na pre Tirtũmja mẽ ho mẽ kãm ma hkêt jakamã nhũm pre htem akupÿm Jejus htĩr kôt mẽ kãm harênh o ri mẽ hkôt pa. Nhũm Tirtũm mẽ kot Jejus kôt amnhĩ xunhwÿr xwÿnh piitã mẽ kutã nojarêr rãhã ho pa nhũm mẽ ra ohtô rax nê. Nê mẽ kãm axpên to mex pix prãm o ri axpên kôt pa. Mẽ ohtô htã te mẽ tipxi pyrãk. Nê axpên pê mẽmoj to õxÿ hkêt nê. Na pre htem axpên mã mẽ hikukrêx nê mẽ apkur xà jarênh o: “Inhõ pix kêt mẽ pahpiitã mẽ panhõ na.” Anhÿr o ri mẽmoj tã axpên kutã nojarêr o ri pa. No kêt axpên mã mẽmoj jarênh o: “Tk. Nà ãm inhõ pix na.” Anhÿr o harênh kêt nê.

³⁴⁻³⁵ Na pre htem tõhã õ ixkre hõ ho wênê. Rÿ õ pyka hkwÿ ho wênê nê kãxpore jamÿ nê ma o mra nê Jejus nhÿ hã mẽ ahkre ho mẽ pa xwÿnhjê mã kugõ nhũm mẽ hamÿ nê mẽ kêp amrakati xwÿnhjê mã ho angrã. Hãmri nhũm mẽ amnhĩm hamÿ nê ho amnhĩm awjaprõ. Jakamã na pre hte mẽ hkwÿjaja kãm prãm nê ri pa rÿ ê hkêt nê ri pa hkêt nê.

³⁶⁻³⁷ Jujere na pre ã amnhĩ nhĩpêx anê nê mẽ kaxyw õ pika hkwÿ ho wênê. Hãmri nê kãxpore py nê o tẽ nê Jejus nhÿ hã mẽ ahkre xwÿnh maati jê mã kugõ. Jujereja Ijaew nhõ patre ho ajuta xwÿnh na pre. Gõ hipòk pê Sipre kamã na pre kato. Kêp Jujere htã no nhũm Jejus nhÿ hã mẽ ahkre ho mẽ pa xwÿnhjaja na prem kãm: “Panãpe” Anê. Mẽ kapêr kãm Panãpeja te kêp “mẽ hamaxpêr o mẽ hihtÿx o pa xwÿnh” anhÿr pyrãk. Jakamã nhũm õ pika hkwÿ ho wênê nê kãxpore py nê o tẽ nê Jejus nhÿ hã mẽ

ahkre xwýnhjê mã kugõ nhũm mẽ kupy nê mẽ kêp amrakati xwýnhjê mã ho anhgrà.

5

Ananıs mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

¹ Tã nhũm Ananıs mẽ hprõ Sapire wa Jujere jarênh ma nê uràk nê õ pyka hkwy ho wênê.

² Hãmri nê kàxpore py. Nom na pre wa ra hã axpên ma. Jakamã nhũm Ananıs Jujere kĩnhã kàxpore hkwy pix py nê o tẽ nê Jesus nhỹ hã mẽ ahkre xwýnh maatijê mã kugõ. Nom katàt kôt mẽ kãm õr ã amnhĩ jarênh kêt nê. Kot kàxpore ho pikjêr nê amnhĩm hkwy ho arĩk ã amnhĩ jarênh kêt nê. ãm mẽ kãm amnhĩ jarênh o hêx. Te piitã õr par pyràk o amnhĩ nhĩpêx nê mẽ kãm:

—E ota ixkàxporeta. Na pa wa inhõ pika hkwy ho wênê nê kàxpore hpy nê hpãnhã Jujere pyrã nê man mẽ awýr piitã o tẽ. Anê.

³ Hãmri nhũm Simãw Pêtre ra ã kot amnhĩ nhĩpêx anhỹr ã omu hãmri nê kãm:

—Tk. Kwa mon ka axtem nê Satanasti kapêr ma nê hkôt amnhĩ nhĩpêx nê te akàxpore piitã õr pyrãk ã amnhĩ to axêx anê? Te ate piitã õr pyrãk tã no ãm hkwy pix gõ. Hêxta waa nê. Na ka axtem nê Tirtũm Karõ mã akàxpore nhõr par o axêx.

⁴ Anhõ pyka kênã. Nê hpãnhã kàxporeja anhõ kênã. Kot kaj amã tanhmã ho hprãm xà hkôt mãmrĩ tanhmã ho. Amã piitã ho axàrĩk prãm nê mãmrĩ piitã ho arĩk. Rỳ amã hkwy hpix nhõr prãm nê mãmrĩ hkwy pix gõ. No ri ate õr par pyrãk o amnhĩ to axêx kêt nê. Te ate mẽ inhmã pix mã axêx pyrãk nom mẽ inhmã pix mã hkêt. Na ka mãânên te Tirtũm mã axêx pyrãk. Anê.

⁵⁻⁶ Nhũm pre ã Simãw Pêtre Ananıs mã kapêr anê nhũm kuma nê pykap tẽm nê htyk kurê kumrêx. Hãmri nhũm mẽ àptàr nywjaja hwýr tẽ nê kupêxê ho hkupu nê kumý nê ma o tẽ nê haxà. Hãmri nhũm mẽ kot ã kot amnhĩ nhĩpêx anhỹr ã harênh mar xwýnhjaja tee ri harênh ma nê kãm ma htýx nê.

⁷ Tã nhũm ra hã ahtũm nê. Ra hã 3 ore nê hapêx nhũm Ananıs prõ Sapireja htýx hamakêtkati nê mẽ hwýr tẽ nê axà. Kormã

mjên htyk ã harênh mar kêt nê hamakêtkati nê hkĩnh nê mẽ hwýr tẽ nê axà.

⁸ Hãmri nhũm Simãw Pêtre omu nê hêx rom hkukja nê kãm:

—Pa? E kwa inhmã mẽmoj jarê. Tanhmã na prem war anhõ pykaja pãnhã war amã amnhĩrer to? Xà ãm hãmri na amjên mẽ inhmã harê nà? Anê.

Hãmri nhũm kuma nê mjên pyrã nê kãm ho hêx nê kãm:

—ỖỖ. ãm hãmri kot amã harênh kênã. Anê.

⁹ Hãmri nhũm Simãw Pêtre tee ri kuma nê kãm:

—Tk. Hêxta waa nê. Kwa mon ka war ajamẽ war akàxpore ho te Tirtũm mã axêx pyrãk? Mãn ka wa ajamaxpêr o: “Koja Tirtũm ja hã wa ixpumu nê ãm hã wa ixpumu nê tanhmã hã wa ixto hkêt nê.” Anhỹr o mãn ka wa ajamaxpêr nà? Nom na ka wa ãm kãm axêx kaprý. Onêj ra mẽ kot amjên jaxàr xwýnhjaja akupýn hpôx o mra. Koja mẽ anhĩpêx o te hipêx pyrã nê mãânên ato tẽ nê ajaxà ka rĩ amnhĩ pumu.

¹⁰ Anê nhũm kuma nê mjên pyrã nê pykap tẽm nê htyk kurê kumrêx. Hãmri nhũm mẽ kot mjên jaxàr xwýnhjaja mra nê mẽ hwýr agjê nê omu nhũm ra htyk mex nê nõ nhũm mẽ kumý nê ma o tẽ nê mjên nhĩhkô hã haxà.

¹¹ Hãmri nhũm mẽ piitã wa harênh ma nê kãm ma htýx nê. Mẽ kot Jesus kôt amnhĩ xunhwýr xwýnhjê mẽ amarĩ ri mẽ pa xwýnhjaja nhũm mẽ tee ri wa hkukamã hamaxpêr o kãm ma htýx kumrêx.

Mẽ kot aa mẽmoj pumunh kêt kwý ho anhỹr ã mẽ harênh

Makre 16.17-20; Atre 19.11-12

¹²⁻¹⁴ Na pre hte Jesus kôt mẽ kot amnhĩ xunhwýr xwýnhjaja xatã Tirtũm mã amnhĩ jarênh xà hã ixkre hwýr akuprõ. Mẽ kot ixkre nhĩkjê mã: “Pahi Sarumãw nhõ” anhỹr xwýnh jarênhja wýr nhũm pre htem akuprõ. Nhũm mẽ piitã kãm mẽ hkĩnh nê mẽ ohtô nê mẽ hkôt akuprõ nê mẽ uràk nê Jesus kôt amnhĩ xunhwý. Mênijaja nê mẽmyjaja. No nhũm mẽ hkwyja Ananıs mẽ Sapire wa kot amnhĩ nhĩpêxja mã hamaxpêr nê kãm mẽ hkôt mrar pyma nê. Kãm mẽ hkĩnh tã kãm mẽ hkôt mrar pyma nê.

Nhũm pre hte Jejus nhỹ hã mẽ ahkre ho mẽ pa xwýnhjaja aa mẽ kot mẽmoj pumunh kêt kwý ho anhỹr o ri mẽ piitã mẽ hkôt pa.

¹⁵ Jakamã nhũm pre htem mẽ à xwýnhjê jamý nẽ ma mẽ hwýr mẽ o mra nẽ Simãw Pêtre kutêp pry kamã mẽ haxwý nẽ mẽ kãm:

—E mẽ jar anhĩkwỹ. Kê Simãw Pêtre ja kôt mẽ ajãnh tẽ nẽ mẽ akupênh o akupỹm mẽ ato mex rý nhũm hkarô pix mẽ atã harir ka mẽ akupỹm amex japêr.

Anhỹr o mẽ kãm kapêr hãmri nhũm mẽ kupĩp kãm kutêp hikwỹ.

¹⁶ Nẽ Jerujarê pu hã krĩ hkwý kamã. Mẽ à xwýnhjaja nẽ mẽkarômnuti kot tanhmã mẽ ho xwýnhjaja nhũm pre htem mẽ hamý nẽ ma mẽ ìhkrep mẽ o mra nhũm mẽ piitã akupỹm mex pa.

*Mẽ kot Jejus kwýjê jagjênh ã mẽ harênh
Rukre 21.12-15; Juãw 15.26-27; Atre 4.1-*

22

¹⁷ Tã nhũm mẽ õ patre maati mẽ hkrãmnhwý Satusew nhõ xwýnhjaja tee ri akupỹm mẽ mex ã mẽ harênh ma nẽ axpên mã:

—Tk. Kwa na mẽ ra ohtô nẽ Jejus gryk ã mẽ pahte mẽ ahkre kaga nẽ ãm hkôt pix mã ri amnhĩ nhĩpêx o pa. Anẽ.

Hãmri nẽ Jejus nhỹ hã mẽ ahkre maati xwýnhjê kamã gryk nẽ ra tanhmã mẽ ho kaxyw.

¹⁸ Hãmri mẽ unê nẽ mẽ hagjê nhũm mẽ hagjênh xà kamã hkrĩ hpa.

¹⁹ Tã nhũm kamàt nhũm Tĩrtũm kapêr o mẽ wrýk xwýnhja ma mẽ hagjênh xà hwýr mẽ hwýr wrý nẽ mẽ hwýr axà nẽ mẽ kãm hakwakre kahê xà mẽ nẽ mẽ kator pa. Hãmri nẽ mẽ kãm:

²⁰ —E mẽ ma akupỹm Tĩrtũm mã amnhĩ jarênh xà hã ixkre hwýr mra nẽ axte mẽ kãm awjarê. Tanhmã mẽ kot amnhĩ nhĩpêx to nẽ Jejus kôt amnhĩ nhĩpêx nyw o amnhĩ nhĩpêx ã mẽ kãm hã karô kê mẽ ama. Anẽ.

²¹ Hãmri nhũm mẽ kuma nẽ ma akupỹm hwýr hapêx kurê kumrêx. Nhũm myt kator o mõi mẽ nhũm mẽ hwýr agjê nẽ mẽ kãm Tĩrtũm kapêr jarênh o kuhê.

Tã nhũm mẽõ patre maati mẽ hkôt ri mẽ pa xwýnhjaja amnhĩ wýr mẽ ãptar tũm xwýnhjê hwý nhũm mẽ piitã axpên wýr

pikuprõnh pa. Hãmri nẽ htýx arĩ Jejus kwýjaja mẽ hagjênh xà kamã mẽ hkrĩ hã mẽ hkamnhĩx nẽ amnhĩ wýr mẽ hã karô.

²² Nhũm pôristijaja ma kot mẽ haprôr kaxyw mẽ hagjênh xà hã ixkre hwýr mra nẽ tee ri kamã mẽ hapêr nhũm mẽ kamã amrakati. Hãmri nhũm mẽ akupỹm mẽ pikuprõnh xwýnhjê hwýr hprôt nẽ mẽ kãm:

²³ —Nà na pôristi hkwýjaja arĩ hakwakrem ixkre jamãr mex nhũm hakwakre arĩ kahê htýx nẽ xa. Tã pa mẽ hwýr agjê nẽ tee ri hkre kamã mẽ hapêr nhũm mẽ kamã amrakati kumrêx. Anẽ.

²⁴ Hãmri nhũm mẽ kuma nẽ tee ri hamaxpêr.

²⁵ Rôm nhũm ja mẽ hwýr tẽn axàn mẽ kãm:

—Kwa jãã mẽ ate mẽ hagjênh xwýnhjaja na mẽ axte Tĩrtũm mã amnhĩ jarênh xà hã ixkre kamã mẽ ahkre ho kuhê pa ham mẽ omu nẽ mẽ kurũm tẽ. Anẽ.

²⁶ Hãmri nhũm patre nhõ pôristi krãhtũmja kuma nẽ mẽ hwýr pôristi hkwýr rẽ nhũm mẽ ma mẽ hwýr mra nẽ mẽ hwýr agjê nẽ kê axte mẽ unê nẽ akupỹm mẽ o mra. Nom tanhmã mẽ ho hkêt nẽ. Mẽ kot hkôt ri mẽ pikamênh xwýnhjê pymaj mẽ ho mex nẽ mẽ o mõi. Nẽ mẽ hã axpên mã:

—Nà kot puj mẽ tanhmã mẽ ho nhũm mẽ ja hã mẽ pahpumu nẽ kẽn o mẽ pahkapê nẽ tanhmã amnhĩ to nẽ hã mẽ panhĩmex. Anẽ.

²⁷ Hãmri nẽ mẽ ho mex nẽ akupỹm mẽ o mõi mẽ hwýr mẽ ho agjê nẽ mẽ pikuprõnh xwýnhjê kutã mẽ hkrĩ. Hãmri nhũm mẽõ patre maatija mẽ kãm:

²⁸ —Kwa ra mẽ ixte Jejus kapêr jarênh nẽ mẽ akurê htã ka xep mẽ ãm mẽ inhma nẽ arĩ mẽ kãm harênh o ri apa. Nẽ jar Jerujarê kamã mẽ piitã mẽ kãm harê. Nẽ mẽ pajaja mẽ ixte Jejus pĩr ã ka mẽ ri mẽ kãm mẽ ijarênh o apa. Anẽ.

²⁹ Hãmri nhũm Simãw Pêtre mẽ kuma nẽ mẽ amnhĩ tã mẽ kãm kapêr nẽ mẽ kãm:

—Tý kot kaj mẽ Tĩrtũm kapêr kuhpa hã mẽ inhma mẽmoj tã karô pa mẽ ama nẽ ãm mẽ ama nẽ ãm Tĩrtũm kapêr pix ma nẽ hkôt ri amnhĩ nhĩpêx.

³⁰ Amnepêm mẽ panhĩgêjtaja na prem Tĩrtũm kôt pix mã amnhĩ nhĩpêx o pa. Tã ka prem axtem nẽ kêp mẽ kãm Kra Jejus

ã amÿnê nhũm mẽ pĩ kahpa hã kunhõ nê kupĩ. Nom nhũm Tĩrtũm akupÿm ho htĩr

³¹ nê kêp mẽ panhõ Pahihti hã harê. Nê kêp mẽ pahkaprĩ xwÿnh mex ã harê. Hãmri nê ra amnhĩ ri ÿr nhũm ìhkõ hã mẽmoj piitã ho amnhĩptàr o hkrĩ. Nhũm kãm: “Koja Ijaew mẽ kot amnhĩ tomnuj kaga nê akõt amnhĩ xunhwÿ pa ja hã mẽ omu nê amnhĩ katut kõt mẽ kot amnhĩ tomnuj rênh pa nê mẽ ho ixkra.” Anê.

³² Tã mẽ pajaja mẽ ixte Jejus htyk nê akupÿm htĩr ã omunh mex jakamã na pa hte Tĩrtũm Karõ nhÿ hã ã mẽ amã harênh anê. Karõja na pre Tĩrtũm mẽ ixte hkõt amnhĩ nhĩpêx xwÿnhjê hwÿr kurê nhũm mẽ ixwÿr wrÿ nê mẽ ixkarõ mã agjê. Tã ÿ hã na pa htem ri ã harênh anhÿr o ri mẽ akõt ixpa. Anê.

³³ Hãmri nhũm mẽ kuma nê mẽ kamã gryk tÿx nê. Nê mẽ kãm mẽ himex prãm nê mẽ kãm mẽ hã amÿnê.

³⁴ Hãmri nhũm Kamariewtija tee ri ja hã mẽ omu hãmri nê kãnhmã xa nê Jejus nhÿ hã mẽ ahkre xwÿnh maatijê xyr pê hkwÿjê mã kapêr. Parijew nhõ xwÿnh na pre. Nê kêp Tĩrtũm kapêr ã kagã htũm o mẽ ahkre ho pa xwÿnhjê hõ na pre. Nhũm mẽ piitã kãm hkĩnh nê. Jakamã nhũm kãnhmã xa nê pôristi mã anê nhũm mẽ amnhĩ nê Jejus nhÿ hã mẽ ahkre ho mẽ pa xwÿnhjê kator nhũm mẽ kapõt ã kuhê.

³⁵ Hãmri nhũm Kamariewtija mẽ nê tanhmã mẽ kãm kapêr to nê mẽ kãm:

—E ixkwÿjaja. Kwa kêr pu mẽ tanhmã mẽ ho hkukamã pajamaxpêr mex nê.

³⁶ Mãn arĩ mẽ ate finat Tetastija jarênh ã anohtÿx nê ho apa japêr. Mytwrÿ hõ hã na pre mẽ kãm amnhĩ to rax ã amnhĩ jarênh o pa. Hãmri nhũm hkõt ri mẽ pa xwÿnhjaja ohtõ nê. Mẽ kêp 400. Tã nhũm prem mẽ kêp Tetasti pĩ nhũm hkõt ri mẽ pa xwÿnhjaja axpên pê anhrã nê ma hapêx.

³⁷ —Tã nhũm mẽ kot mẽ piitã mẽ ho kõta xà hã arĩgroja ã nhũm Garirej nhõ xwÿnh pê finat Jut haxwÿja hkõt mẽ pa xwÿnhjaja ohtõ nê. Tã nhũm mẽ mãânên mẽ kêp kupĩ nhũm hkõt ri mẽ pa xwÿnhjaja haxwÿja axpên pê anhrã nê ma hapêx.

³⁸ —Jakamã kwa pu mẽ tanhmã jajê ho hkõt nê. Pu mẽ ãm mẽ omu. Koja mẽ amnhĩ

krã hkõt ã ujarênh anhÿr o pa japêr hã koja Tetasti mẽ Jut wa hkõt pa xwÿnhjê pyrã nê tokyx axpên pê anhrã nhũm Jejus jarênh o paja hapêx o hapêx.

³⁹ Nom koja mẽ ãm hãmri Tĩrtũm nhÿ hã ã mẽ ahkre ho pa anhÿr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nê te mẽ pahte Tĩrtũm kutã amnhĩ xunhwÿr pyrãk. Anê.

Nhũm pre ã Kamariewti Jejus nhÿ hã mẽ ahkre ho mẽ pa xwÿnh maatijê xyr pê hkwÿjê mã kapêr anê.

⁴⁰ Hãmri nhũm mẽ kuma nê kãm:

—Tÿ nã ãm hãmri na ka ã akapêr anê. Kot puj xep mẽ tanhmã mẽ ho hkêt nê. Anê.

Hãmri nê akupÿn mẽ hã karõ nhũm mẽ akupÿn mẽ hwÿr agjê. Hãmri nhũm mẽ pôristi mã mẽ hã amÿnê nhũm mẽ htak. Hãmri nhũm mẽ àptàr tũmrejaja mẽ kãm:

—E mẽ mãmrĩ ma akupÿm mra. Nom kêr ka mẽ axte mẽ kãm Jejus kapêr jarênh o ri apa hkêt kumrêx. Anê.

⁴¹ Hãmri nhũm mẽ kãm ure nhũm mẽ ma mra. Kĩnh nê ma mra nê axpên mã:

—Nã kwãr mẽ Jejus ã mẽ pahtak nê tanhmã hã mẽ pahto. Kwãr mẽ mãmrĩ ã hã mẽ pahto anê. Kot pu mẽ hkaga hkêt nê. Ra Tĩrtũm kot ja hã mẽ pahpumunh mex kênã.

Anhÿr o axpên mã kapêr o axpên ja-maxpêr o hihtÿx mex o pa.

⁴² Hãmri nê arĩ apkati mẽ hkwÿjê mã Jejus kapêr jarênh o mẽ ahkre ho mẽ hkõt pa. Tĩrtũm mã amnhĩ jarênh xà hã ixkre kamã nê nhãm mẽ òrkwÿ kamã ri mẽ ahkre ho pa. Tĩrtũm kot mẽ pakaxyw Jejus xãm ã mẽ kãm harênh o ri mẽ hkõt pa.

6

Mẽ kêp mẽ mjên htyk xwÿnhjê jarênh Wam Ximotre 3.8-9

¹ Tã nhũm mẽ kot Jejus kõt amnhĩ xunhwÿr xwÿnhjaja ohtõ rax kumrêx o mõ. Mẽ piitã kêp Ijaew no nhũm mẽ hkwÿjaja axtem Gres kapêr o kapêr nhũm mẽ hkwÿjaja Ijaew kapêr o kapêr. Na pre hte Ijaew kapêr o kapêr xwÿnhjaja apkati mẽ mẽ kêp mẽ mjên htyk xwÿnhjê mã mẽõ ho pa. No ãm mẽ piitã mẽ hipêx o axpên pyrãk kêt jakamã nhũm Gres kapêr o mẽ kapêr xwÿnhjaja tee ri ã mẽ kot amnhĩ nhĩpêx

anhÿr ã mẽ omu nẽ mẽ kamã gryk nẽ. Hãmri nẽ mẽ kãm:

—Kwa na ka htem amnhĩ kamã mẽ kệp mẽ mjên htyk xwÿnhjê mã mẽõ ho rũnh nẽ agõ. No mẽ ixkamã jajê mã na ka htem ãm ho hkryre nẽ agõ. Kwa mẽ ri ã mẽ hipêx anhÿr kêt nẽ. Mẽ hipêx o axpên pyræk nà. Anẽ.

² Hãmri nhũm Jejus nhÿ hã mẽ ahkre xwÿnh maatijaja mẽ hã mẽ kapêr ma hãmri nẽ mẽ piitã mẽ ho akuprõ nẽ mẽ kãm:

—Kwa kêr ka mẽ ja hã axpên mã axàkjêr kêt nẽ. E pu mẽ kot mẽ kệp mẽ mjên htyk xwÿnhjê mã õ ho pa kaxyw mẽ akwÿjê rê. No mẽ pajaja kot paj ja ho anhÿr o ri ixpa hkêt nẽ. Kot pa mẽ anẽ nẽ Jejus kapêr o ri mẽ ajahkre hkêt nẽ nhũm ja mex kêt nẽ. Jakamã mẽ atõ kot kaj mẽ akatàt kôt mẽ kãm mẽ õ ho apa?

³ E mẽ amnhĩ kamã mẽ ho 7 nẽ mẽ arê pu mẽ kệp mẽ mjên tyk xwÿnhjê mã õ ho pa kaxyw mẽ unhwÿ.

Tãm mẽ hamaxpêr xwÿnhjaja.

Nẽ mẽ ate axpên mã mẽ mex ã mẽ harênh xwÿnhjaja.

Nẽ Tĩrtũm Karõ nhÿ hã mẽ kot amnhĩ nhĩpêx o mẽ pa xwÿnhjaja.

Ã mẽ kot amnhĩ nhĩpêx anhÿr xwÿnhjaja ka mẽ ho 7 nẽ arê pu mẽ kaxyw mẽ unhwÿ.

⁴ Nom mẽ pajaja kot paj mẽ akôt arĩ mẽ amã Tĩrtũm kapêr jarênh o ri mẽ ajahkre pix tânopxar o ri ixpa. Anẽ.

⁵ Hãmri nhũm mẽ kuma nhũm ja mẽ kãm mex nẽ. Nhũm mẽ ma mra nẽ axpên mã hkwyjê nhĩxi jarê hãmri nẽ mẽ ho 7 nẽ mẽ kurê. ã mẽ hixi kot anhÿr.

Estewãw. Estewãwja na pre Jejus kôt amnhĩ nhĩpêx mex o pa. Tĩrtũm Karõ kaxwÿnh mã àr nẽ ho amnhĩptàr jakamã nhũm pre hte tãm ri amnhĩ nhĩpêx o pa.

Nẽ kaxyw Firipti

nẽ Prokot

nẽ Nĩkanõ

nẽ Timã

nẽ Parmënti

nẽ Nĩkoraw. Nĩkorawja krĩ pê ãxiok nhõ xwÿnh na pre. Kệp Ijaew kêt tã kãm Tĩrtũm kĩnh o pa. Tã ra mãänên Kra Jejus kôt amnhĩ xãm.

⁶ Jakamã nhũm mẽ mẽ kệp 7tajê rê nẽ Jejus nhÿ hã mẽ ahkre xwÿnh maatijê hwÿr mẽ o mra. Hãmri nhũm mẽ omu nẽ mẽ ãpênh ã mẽ unhwÿr kaxyw mẽ hã ìhkra jaxwÿ nẽ mẽ ho Tĩrtũm wÿ. Hãmri nhũm mẽ kệp mẽ mjên htyk xwÿnhjê mã mẽ õ ho pa nẽ mẽ piitã mẽ hipêx o axpên pyræk.

⁷ Tã nhũm mẽ ra ohtõ rax nẽ Tĩrtũm kapêr ma nẽ hkôt amnhĩ nhĩpêx o pa. Jakamã nhũm Jerujarê kamã mẽ kot Jejus kôt amnhĩ xunhwÿr xwÿnhjaja ra ohtõ rax kumrêx. Nẽ mẽ õ patre hkwy haxwÿja ohtõ nẽ mẽ uræk nẽ amnhĩ kaxyw hkôt hamaxpêr nẽ hkôt amnhĩ xunhwÿ.

Mẽ kot Estewãw pynênh ã mẽ harênh Rukre 21.14-15

⁸ Tã nhũm Estewãwja. Kot mẽ kệp mẽ mjên htyk xwÿnhjê mã mẽ õ ho pa xwÿnhjê hõja. Tĩrtũm kot kutã nojarêt mex jakamã na pre hte ÿ hã àhpumunh tÿx o aa mẽmoj pumunh kêt kwÿ ho anhÿr o ri mẽ hkôt pa.

⁹ Hãmri nhũm Ijaew kwÿjaja tee ri ja hã omu nhũm ja mẽ kệp omnuj tÿx nẽ nhũm mẽ hã kãm akir. Uræk nẽ mẽ kệp Ijaew nẽ Jerujarê kamã ri mẽ hkôt pa htã ahpÿnhã mẽ õ pyka. Mẽ kot kãm “Ripetat” xwÿnh kwÿ na pre mẽ. Nẽ ahpÿnhã mẽ õ krĩ.

Mẽ hkwyjaja kệp Sirên nhõ xwÿnh.

Nẽ mẽ hkwyjaja kệp Aresãn nhõ xwÿnh.

Nẽ mẽ hkwyjaja kệp Siris nhõ xwÿnh.

Nẽ mẽ hkwyjaja kệp As nhõ xwÿnh.

Ahpÿnhã mẽõ pika nẽ mẽ õ krĩ htã na prem Jerujarê kamã ri axpên kôt pa ho pa. Tã Estewãw kot ã amnhĩ nhĩpêx anhÿr o pa hã omu nhũm ja mẽ kệp omnuj tÿx nẽ nhũm mẽ hã kãm akir.

¹⁰ No nhũm Tĩrtũm Karõ nhÿ hã hamaxpêr tÿx o mẽ kãm kapêr nhũm mẽ kuma nẽ tee ri kutã tanhmã kãm nẽ hprãm kaprÿ.

¹¹ Hãmri nẽ ma mra nẽ tanhmã ho hêx to kaxyw amnhĩ kwÿjê rê nẽ mẽ kãm hã amÿnê nẽ mẽ kãm:

—E kêr ka mẽ krĩ nhõ xwÿnhjê mã Estewãw o axêx nẽ tanhmã mẽ kãm ho akapêr punuj to ho ri mẽ hkôt apa. Kê mẽ ama nẽ kamã gryk kato. Kot kaj mẽ ã amnhĩ nhĩpêx anê pa mẽ hpãnhã mẽ amã amnhĩre. Anẽ.

Hãmri nhũm mẽ kuma nẽ ma mra nẽ hapôj nẽ ma krĩ nhõ xwÿnhjê mã tanhmã ho hêx to ho ri mẽ hkôt pa nẽ mẽ kãm:

—E mẽ amnẽ akuprõ nẽ mẽ inhma. Kwa kêr ka mẽ Estewãwti kapêr mar kêt nẽ. Na hte finat Mojes mẽ Tirtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anẽ.

¹² Hãmri nhũm mẽ kuma. Krĩ nhõ xwýnhjê mẽ nẽ mẽ àptâr tũmrejê mẽ Tirtũm kapêr tũm o mẽ ahkre ho mẽ pa xwýnhjaja nhũm mẽ tee ri mẽ kot Estewãw o hêxja ma nẽ kamã gryk nẽ. Hãmri nẽ ma hwýr mra nẽ unẽ nẽ ma mẽ õ juisti hwýr o tẽ.

¹³ Hãmri nhũm mẽ kãm ho hêx xwýnhjaja mẽ hkõt mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tirtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tirtũm mã amnhĩ jarênh xà hã ixkreja nhũm tanhmã ho hêx to pa mẽ kuma.

¹⁴ Na hte mẽ kãm: “Koja nhỹrmã Jejus pẽ Najare nhõ xwýnh Tirtũm mã amnhĩ jarênh xà hã ixkreja grãnh pa kãm ga.” Anhýr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nẽ mẽ pahkurê pa prem kuma. Anẽ.

¹⁵ Nhũm prem ã mẽõ juisti mã Estewãw o hêx anẽ. Hãmri nhũm mẽ kuma nẽ Estewãw wýr rít nẽ hkuk pumu nhũm te kot Tirtũm kapêr o mẽ wrýk xwýnhjê kuk nhĩrã rax pyrã nẽ xa nhũm mẽ tee ri omu nẽ kamã no puma nẽ.

7

Estewãw kot juistijê mã ujarênh

¹ Hãmri nhũm mẽ õ patre maatija Estewãw mã kapêr nẽ kãm:

—E mẽ inhma amnhĩ jarê. Xà ãm hãmri na mẽ ri ã ajarênh anẽ nã? Anẽ.

² Hãmri nhũm kuma nẽ mẽ piitã mẽ kãm kapêr. Mẽ kãm kapêr ryy nẽ mẽ kãm:

—Tõe kot paj mẽ amã mẽ panhigêt finat Apraãw tanhmã harênh to ka mẽ inhma. Amnepêm na pre Tirtũm maatija Apraãw wýr kato. Kormã pyka pẽ Mêsopotãm kamã pa ri. Kormã kot ma krĩ pẽ Arã hwýr mör kêt ri nhũm hwýr kato nẽ kãm:

³ “E kêr ka mẽ anhõ krĩ pẽ akato nẽ akwýjê re nẽ ma mõ. Kot paj ma nhỹhým hpãnhã pyka hõ hwýr mẽ ato mõ.” Anẽ.

⁴ —Hãmri nhũm kuma nẽ amnhĩ to akuprõ nẽ ma mõ. Õ pyka pẽ Katej pẽ

kato nẽ ma krĩ pẽ Arã hwýr mõ nẽ hpãnhã kamã pa. Tã nhũm hipêêxã Terahti kêt ty nhũm Tirtũm amnẽ jar mẽ panhõ pyka hwýr kumẽ. Jar mẽ papapxã hwýr kumẽ.

⁵ —Nom nhũm kormã kãm pykaja nhõr kêt nẽ. Kormã kãm hkwy ho greire nẽ õr kêt nẽ. Na pre ãm kãm:

E kot paj nhỹrmã amã pykaja gõ. Amã nẽ akanrêhã akra nẽ atãmnhwýjê mã kugõ ka mẽ kamã ri apa ho apa.

Anhýr o kãm mẽ panhõ pika pẽ Kanaãja jarê. Apraãw kormã hkra hkêt ri nhũm ã kãm kapêr anẽ.

⁶ Hãmri nẽ kãm:

Koja akanrêhã atãmnhwýjaja nhỹrmã ma nhỹhým pyka hõ hwýr pa nẽ hpãnhã kamã pa. Mẽ õ pyka kamã pa hkêt tã nhãm pyka hõ kamã pa hãmri nẽ pika nhõ xwýnhjê mã àpênh rũnh o pa nhũm pyka nhõ xwýnhjaja mẽ hipêx kati rũnh o pa. Nẽ mẽ àpênh ã mẽ kãm amnhĩrer kêt nẽ. ãm mẽ homnuj o pa hã amgrã xohtõ rax kumrêx. Nhũm mẽ hã amgrã pẽ 400.

⁷ Nom kot paj mẽ hã mẽ homnuj týx nẽ. Akanrêhã atãmnhwýjê hã mẽ homnuj týx nẽ nhũm mẽ rĩ kormã mẽ kurũm kato nẽ man akupýn pa nẽ jar pøj. Hãmri nẽ jar inhma inhmex o inhmex ã ijarênh rãhã ho pa. Anẽ.

⁸ Hãmri nẽ kãm:

E pu axpên ma. Koja ka nẽ akanrêhã akra nẽ atãmnhwýjaja ka mẽ ixkõt ri amnhĩ nhĩpêx o apa hã kot paj mẽ ato ixkra. Tã koja ja amã mex japêr hã kêr ka mẽ amnhĩ my kwryt kã hkwy jakã. Nẽ koja mẽ akrajaja hapøj nẽ my ka mẽ mã mẽ ho anẽ nẽ mẽ kêt mẽmy kwryt kã hkwy jakã. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhĩ nhĩpêx anẽ.

Anhýr o Apraãw mã kapêr nhũm kuma nẽ mar xà hkõt hkra Ijak my kwryt kã hkwy krãhta. Kormã hkarãre ri. Kormã hã arĩgro pẽ 8 pix ri nhũm kêt hkwy krãhta.

—Tã nhũm Ijak hprêk nẽ hprõ nẽ hkra. Hãmri nẽ mã hkra Jako ho anẽ nẽ. Nhũm Jako hprêk nẽ mã hkra pẽ 12jê ho anẽ nẽ mẽ piitã mẽmy kwryt kã hkwy jakã pa. ã

na pre mẽ pahpàr kraxjaja amnhĩ nhĩpêx anhỹr o pa.

9 –Jako hkrajê hõ na pre kêp Juje. Nhũm Juje htõjaja hipêêxà hkõt kamã gryk nẽ axtem nẽ mẽ urojê mã ho wênê nhũm mẽ kêp haprõ nẽ ma pyka pê Ejit wỳr o mõ. Amarĩ Ejit nhõ xwỳnhjê mã àpênh o pa kaxyw. Tã no nhũm Tĩrtũm arĩ tãnopxar rãhã ho hkõt pa.

10 Hãmri nẽ Ejit kãm mẽ kot homnuj xwỳnhjê nhĩhkra rũm hkapa nẽ tanhmã hkrã hto nhũm àhpumunh tỳx nẽ hamaxpêr mex nẽ. Jakamã nhũm Ejit nhõ xwỳnhjê nhõ pahi Paraohtija omu nẽ kãm hkĩnh nẽ. Kot tãm amnhĩ nhĩpêx nẽ àhpumunh tỳx kõt omu nẽ kãm hkĩnh nẽ. Hãmri nẽ amnhĩ ri kumẽ nhũm ìhkõ hã àpênh o pa. Kãm òrkwỹ pumu nẽ Ejit nhõ xwỳnhjê ho amnhĩptàr o pa.

11 –Rõm nhũm mẽ hpur kãm mẽmoj nhĩgrõt mex kêt nẽ nhũm mẽ kêp mẽ apkur xà hã mẽ õja ra ri mẽ kêp kryre. Ejit kamã nẽ jar Kanaã kamã nhũm mẽ apkur xà hã mẽ õja mẽ kêp hapêx par o mõ. Nhũm mẽ piitã prãm xàj ra hiire nẽ kãm prãm tỳx o pa nhũm mẽ panhĩgêjtaja hãmri prãm xàj tee ri amnhĩ xàpkur xà hã mẽmoj japêr.

12 –Tã nhũm Jakoja Ejit kãm arĩ mẽ apkur xà hã mẽ õ rax ã harênh ma nẽ ma hwỳr hkra hkwỳjê rê. Mẽ panhĩgêjtaja nhũm ma mẽ hwỳr mẽ kurê nhũm mẽ ma mẽ hwỳr mra. Hãmri nẽ mẽ hwỳr pøj nẽ mẽ kêp mẽmo hy hkwỳ japrõ nẽ ma akupỹm o mra. Wam mẽ mõrta ã mẽ kêp mẽmoj japrõ nẽ ma akupỹm o mra.

13 –Tã nhũm mẽ kêp mẽmo hy japrõr xwỳnhja hapêx nhũm mẽ axte akupỹm mẽ hwỳr mra. Hãmri nhũm mẽ htõ Juje mẽ kãm amnhĩ to amnhĩrĩt nẽ kêp mẽ htõ hã mẽ kãm amnhĩ jarê. Mẽ kot ra htyk ã hkamnhĩx tã nhũm mẽ kãm amnhĩ jarê. Hãmri nhũm Paraohti mẽ kêp Juje htõ hã mẽ harênh ma.

14 –Tã nhũm Juje amnhĩ wỳr hipêêxà Jako mẽ htãmnhwỳjaja mẽ hã karõ nhũm mẽ piitã ma Ejit wỳr hapêx. Mẽ kêp 75 nẽ ma Ejit kamã Juje hwỳr hapêx hãmri nẽ kamã pa ho pa.

15 –Ã kot anhỹr jakamã nhũm Jakoja ma Ejit wỳr mõ nẽ hpãnhã kamã pa ho pa. Tã

hãmri kamã ty. Nhũm hkrajê piitã Ejit kãm pa hãmri nẽ gaa nẽ htyk pa.

16 Hãmri nhũm mẽ hkanrêhã mẽ hkrajaja mẽ hamỳ nẽ ma akupỹm Kanaã hwỳr krĩ pê Sikê hwỳr mẽ o pa nẽ kamã mẽ hagjê. Na pre mẽ hkukamã finat Apraãw kot Amõr krajê pê kênkre japrõ nẽ kamã hprõ jaxà. Jakamã nhũm prem mỳr pê ma hwỳr mẽ o pa nẽ kamã mẽ hagjê hãmri nẽ ma akupỹm Ejit wỳr pa.

17 –Tã gaa nẽ rĩ ohtõ rax kumrêx o mõ. Mẽ panhĩgêjtaja ohtõ rax kumrêx o mõ. Hãmri nhũm Tĩrtũm kot Apraãw mã mẽ õ pyka jarênh xwỳnhja nhũm kot mẽ kãm òr kaxyw.

18 No nhũm Ejit nhõ pahi kot Juje ho mex xwỳnhta na pre ra ty nhũm axtem hpãnhã hõja mẽ ho amnhĩptàr o pa. Nẽ aa Juje jarênh mar kêt nẽ. Kormã pahi xàr nyw kêt ri htyk jakamã nhũm mỳr pê harênh mar kêt nẽ.

19 Hãmri nẽ hkwỳjê homnuj o pa. Tanhmã mẽ panhĩgêjtê nhĩpêx to ho pa. Nẽ mẽ kãm mẽ hkra my hapõx xwỳnhjê hã amỹnê. Mẽ hapõx nhũm mẽ kot pikap mẽ rênh nhũm mẽ htyk kaxyw nhũm mẽ kãm mẽ hã amỹnê.

20 –Rõm nhũm finat Mojesja kato. Nẽ mexre. Hãmri nhũm katorxà Ejit nhõ xwỳnhjê kot kêp hpĩr pymaj òrkwỹ kamã ri mẽ kêp ho hpimxur o pa hã mytwrỹ axkrunêpxi.

21 –Tã nhũm ra htỳxre nhũm katorxà mẽ hipêêxà wa tee ri hkukamã hamaxpêr hãmri nẽ mẽ kot wa kêp hpĩr pymaj kumỳ nẽ ma o tẽ nẽ kaxyw à nhĩpêx nẽ nhỹri gõ nhĩpõk ri põ kamã ho amũxu. Tã nhũm Paraohti hkra nija ra gõx mã wỳr mã tẽ nẽ ra omu hãmri nẽ amnhĩm kumỳ nẽ ma o tẽ nẽ ho hkra.

22 Jakamã nhũm Mojes Ejit nhõ xwỳnhjê kamã hprêk. Hãmri nẽ mẽ àhpumunh xà hã kagà pumunh pa. Nẽ hihtỳx nẽ mẽ kãm kapêr kãm hihtỳx mex o pa.

23 –Tã hãmri ra hã amgrà pê 40 nẽ hapêx nhũm Mojes hamaxpêr nẽ ra kãm amnhĩ kwỳ pê Ijaewjê pumunh prãm nẽ ma mẽ hwỳr tẽ.

24-25 Hãmri nẽ htêm kõt ja wa omu. Nhũm Ejit nhõ xwỳnhja Ijaewja homnuj o xa

nhũm Mojes tẽn tee ri hã omu nẽ hamaxpër o: “E pa ma wa hwÿr tẽn nẽ ixkwÿ mÿj ã Ejit nhõ xwÿnhhta pĩ kẽ ixkwÿjaja ja hã ixpumu nẽ Tirtũm kot mẽ hwÿr inhmẽnh ã ixpumu. Ixte Ejit nhõ xwÿnhjẽ nẽ mẽ kator kaxyw mẽ ja hã ixpumunh kurẽ kumrẽx.”

—Anhÿr o hamaxpër hãmri nẽ wa hwÿr tẽn nẽ amnhĩõja nẽ Ejit nhõ xwÿnh pĩ. Tã no nhũm hkwÿjaja kot hpĩr ã harẽnh mar tã tanhmã amnhĩ kaxyw kãm hamaxpër to hkêt nẽ.

²⁶ Nhũm apkati nhũm mẽhõja war axkrut nẽ axte pijapu ho wa xa. Hamẽ wa kęp Ijaew. Jakamã nhũm Mojes akupÿm mẽ hwÿr tẽn nẽ tee ri axpẽn tã wa omu nhũm ja kęp omnuj nẽ. Hãmri nhũm wa hwÿr tẽn nẽ axpẽn nẽ wa kãm kapër nẽ wa kãm: “Pa? Kwa war ajamẽ war apẽ Ijaew kẽnã na ka wa ri axtem nẽ ã axpẽn nhĩpẽx anẽ.” Anẽ.

²⁷ Hãmri nhũm kot amnhĩ kaxyw hkryx xwÿnhja kuma nẽ nhãm amnhĩ nẽ hkujate nẽ kãm: “Tk. Kwa xà apẽ mẽ inhõ pahi hã na ka ã wa inhmã akapër anẽ? Nà apẽ mẽ inhõ pahi hkêt kẽnã.

²⁸ Kot kaj inhĩpẽx o te ate Ejit nhõ xwÿnhhta nhĩpẽx pyrã nẽ wa ixtõ hpĩr kêt nẽ.” Anẽ.

²⁹ —Hãmri nhũm tee ri kuma nẽ ra kãm ma nẽ Ejit rũm kator kurẽ kumrẽx nẽ ma pyka pẽ Mijiã hwÿr mõi nẽ kamã hpãnhã pa. Kamã hprõ nẽ hkra. Nhũm hkra myja wa hamẽxkrut.

³⁰ —Tã nhũm Mijiã kamã pa hã axte hã amgrã pẽ 40. Hãmri nẽ mẽmo arĩgro hã kapõt ã krã hakÿx pẽ Sinai kape hã ri pa nhũm Tirtũm kãm kapër. Nom nhũm Mojes omunh kêt nẽ. ãm utĩ kaõk kamã kuwy hpõk pix pumu.

³¹ Amnhĩ jaer pẽ ã kot amnhĩ nhĩpẽx anhÿr ã omu hãmri nẽ amnhĩ tã hprĩ hã omunh kaxyw hwÿr tẽn nhũm Tirtũm kãm:

³² Pa Mojes? E ixpẽ Tirtũm na pa. Ixpẽ akukamã anhĩgêt Apraãw nhõ Tirtũm na pa. Nẽ ixpẽ Apraãw kra Ijak mẽ htãmnhwÿ jako wa õ Tirtũm na pa. Anẽ.

Hãmri nhũm tee ri kuma nẽ kãm ma xàj htertet tÿx nẽ. Hãmri nẽ umaj axte pĩ hpõkja wÿr rĩt kêt nẽ. ãm nhãm hkrã nẽ rĩt o xa.

³³ Hãmri nhũm Tirtũm kãm:

E kwa ixpẽ Tirtũm maati hã ixtã apijaam ã aparkã kapa nẽ apar kẽn nẽ xa.

³⁴ Na pa ra ixkra Ijaewjaja Ejit kãm mẽ omu. Na ra Ejit nhõ xwÿnhjaja ixpẽ mẽ homnuj tÿx kumrẽx rãhã ho pa nhũm mẽ amnhĩ xà hã maj tee ri amnhĩ nhĩpẽx. Pa ja hã mẽ omu nẽ inhmã mẽ hkaprĩ nẽ. Jakamã kot paj Ejit nhõ xwÿnhjẽ nhĩhkra rũm mẽ kator pa. E ka kot paj mẽ hwÿr amẽ ka ma akupÿm mẽ hwÿr mõi nẽ mẽ kurũm mẽ kator.

Anhÿr o kãm mẽ kaxyw karõ.

³⁵ Ra Ijaew kot Mojes hkaga tã nhũm mẽ kaxyw ãm nẽ ma akupÿm kot mẽ hwÿr mẽnh kaxyw. Na prem ra omu nẽ hkaga. Te mẽ ate Jejus kagaja pyrã nẽ hkaga. Jakamã nhũm pijapu xwÿnhhta tee ri amnhĩ tã omu nẽ kamã gryk nẽ amnhĩ nẽ kãm kapër nẽ kãm: “Tk. Kwa xà apẽ mẽ inhõ pahi hã na ka ã wa inhmã akapër anẽ? Nà apẽ mẽ inhõ pahi kêt.” Anhÿr tã nhũm Tirtũm mẽ kaxyw tãm xãm. Kot mẽ ho amnhĩptar nẽ Ejit nhõ xwÿnhjẽ rũm mẽ kator kaxyw. Ja kaxyw na pre pĩ hpõk kamã kãm kapër nẽ mẽ kaxyw ãm.

³⁶ —Jakamã nhũm Mojes ma akupÿm Ejit wÿr mõi nẽ mẽ kurũm hkwÿjẽ kator nẽ ma mẽ o pa. Na pre mẽ ho mex nẽ Tirtũm nhÿ hã mẽ kãm aa mẽ kot mẽmoj pumunh kêt kwÿ ho anhÿr o ri mẽ o pa. Ejit kamã nẽ mããnẽn mẽ kot gõ xujanãr mã: “Gõ kamrẽk” anhÿr xwÿnhhta kamã. Nẽ kapõt ã mẽ kãm ã amnhĩ nhĩpẽx anhÿr o mẽ o pa. Nẽ kapõt ã ri mẽ o pa ho ra hã amgrã pẽ 40.

³⁷ —Tã tãm na pre mẽ panhĩgêtjẽ mã mẽhõ hkukamã mẽ kãm tanhmã harẽnh to nẽ mẽ kãm harẽnh o: “Koja Tirtũm nhÿrmã te ra mẽ akaxyw pa ixãm pyrã nẽ inhmÿr pẽ mẽ panhĩõ xãm. Ý hã mẽ amã kapër jarẽnh o pa kaxyw nhũm nhÿrmã mẽ akaxyw ãm ka mẽ omu.”

—Anhÿr o ã Jejus kukamã harẽnh anẽ.

³⁸ Na pre Mojes kapõt ã mẽ panhĩgêtjẽ ho pa nhũm mẽ krã hakÿx pẽ Sinaija wÿr pa. Mẽ panhĩgêtjaja hãmri hwÿr pa nhũm Tirtũm kapër o mẽ wrÿk xwÿnhja mẽ kaxyw Mojes mã kapër nhũm õ ri mẽ kãm awjarẽ nẽ hã kagã. Mẽ kot mar nẽ hkõt amnhĩ nhĩpẽx nyw o amnhĩ nhĩpẽx o pa kaxyw nhũm mẽ kãm Tirtũm kapër jarẽnh o pa.

Ně mẽ pajaxwỳja. Mě pahte hkôt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagà.

³⁹ Tã no nhũm mẽ panhĩgêjtaja Mojes ma nẽ ãm kuma nẽ hkaga kumrêx nẽ akupỹm Ejit wỳr hkrà.

⁴⁰ Jakamã nhũm Mojes kormã nhỹri mẽ kaxyw Tĩrtũm mã kapêr o ãm rôm nhũm mẽ wakre kamã htõ Arãw wỳr mra nẽ kãm: “Kwa Mojes ra kot tanhmã amnhĩ to kênã. Kot Ejit rũm mẽ pakator nẽ mẽ pahto mõi tã ra nhỹri arĩk nẽ tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kê tãm ma akupỹm Ejit wỳr mẽ pahto pa.” Anẽ.

⁴¹ —Hãmri nhũm mẽ kuma nẽ mẽ kãm kax o môx krare karõ ho sãnti nhĩpêx nẽ mẽ kãm ãm. Hãmri nhũm mẽ axtem nẽ te ho Tĩrtũm nhĩpêx pyrãk o hipêx nẽ kãm ôwêhti hkwỳ pa nẽ kãm haxwỳ nẽ hã apku. Hãmri nẽ ã amnhĩ nhĩpêx anhỹr ã amnhĩ pumu nẽ hkĩnh nẽ.

⁴² Hãmri nhũm Tĩrtũm tee ri ja hã mẽ omu nhũm ja kêp omnuj tỳx nẽ nhũm mẽ hkaga hpa. Jakamã nhũm prem amnhĩ krã hkôt ri myyti nẽ mytwrỳre nẽ kanhêti karõ nhĩpêx nẽ te mẽ kot Tĩrtũm nhĩpêx pyrãk o hipêx o pa. Hãmri nẽ amnhĩ kaxyw kumã pix mã hamaxpêr o pa hã amgrà xohtõ nẽ. Tã nhũm Tĩrtũm nhỹ hã kapêr jarênh o mẽ pa xwỳnhjaja tanhmã mẽ kãm kapêr to nẽ mẽ hã kagà. Te Tĩrtũm tãm mẽ kãm kapêr pyrãk o mẽ kãm kapêr nẽ hã kagà kot:

Pa mẽ apê Ijaewjaja? E mẽ inhma. Amnepêm mẽ ate kapôt ã ri mẽ apa hã amgrà pê 40ta ã. Xà we inhmã na ka prem akrit kwỳ hpar o apa?

⁴³ Nà inhmã hkêt. Na ka prem axtem nẽ ri amnhĩ krã hkôt amnhĩm mẽmo karõ nhĩpêx nẽ hipêx o te mẽ ate pa inhĩpêx pyrãk. Pê kãm akrit kwỳ hpar nẽ õr o ri apa.

Mě anhõ mẽmo karõ nhĩpêxta mẽ ate amnhĩm hã hixi pê Mõrok mênh xwỳnhja ka pre htem à kamã amnhĩ kôt ho apa.

Ně amnhĩm kanhêti karõ nhĩpêx nẽ hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harênh o ri apa.

Tã ã mẽ ate amnhĩ nhĩpêx anhỹrja mỳrapê kot paj pãnhã nhỹhỹm mẽ arẽ.

Koja mẽ akutã amnhĩ xunhwỳr xwỳnhjaja mẽ apynê nẽ ma pyka pê Papirõn rũm hamũ mẽ ato hapêx ka mẽ amarĩ mẽ kãm axapênh rũnh o ri apa kãm ga. Anẽ.

Ã na pre Tĩrtũm mẽ panhĩgêjtê mã kapêr anẽ nhũm ý hã kapêr jarênh o pa xwỳnhja mẽ kãm hã kagà.

⁴⁴ —Tã nhũm mẽ panhĩgêjtaja kormã kapôt ã ri pa ri amnhĩ kôt mry kã ho ixkre ho pa. Tĩrtũm mã kapêr xà hã ixkreja nhũm prem amnhĩ kôt ri o pa. Mě kot kãm “Tĩrtũm nhõrkwỳ kaàkre” anhỹr xwỳnhja. Tĩrtũm kot mẽ kãm hã karõ xà hkôt nhũm mẽ hipêx nẽ amnhĩ kôt ri o pa. Na pre Tĩrtũm hprĩ hã Mojes mã tanhmã kot hipêx to hã karõ nhũm mẽ hkôt hipêx nẽ amnhĩ kôt ri o pa.

⁴⁵ —Tã nhũm Mojes ty nhũm hpãnhã Jójueja amnhĩ kôt mẽ o pa. Ma Tĩrtũm kot mẽ kãm pyka mex nhõrta wỳr Mojes mỳr pê mẽ o pa. Hãmri nẽ hwỳr mẽ o pøj nhũm Tĩrtũm mẽ nẽ mẽ kot ra kamã mẽ pa ho mẽ pa xwỳnhjê japøj nhũm mẽ pãnhã kamã pa ho pa. Nẽ amnhĩ kôt Tĩrtũm nhõrkwỳ kaàkreta o pa. Rãhã nhũm finat Tawija mẽ hpãnhã mẽ ho amnhĩptà.

⁴⁶ Na pre Tĩrtũm Tawi kot tanhmã amnhĩ nhĩpêx to ho pa hã omu nẽ kãm hapê nẽ. Jakamã nhũm Tawi kãm kapêr nẽ kãm: “Pa Tĩrtũm? Kwa xà kot paj amã ixkre mex õ nhĩpêx nà? Mě ixpê Ijaewjaja mẽ ixte kamã amã amex o amex ã ajarênh o ixkrĩ kaxyw pa hipêx. Xà kot paj amã hipêx?” Anhỹr tã no nhũm Tĩrtũm kormã kãm ja prãm kêt nẽ.

⁴⁷ Jakamã nhũm Tawi hkra Sarumãwja hipêxà mỳr pê hpãnhã kêp mẽ õ pahi nẽ kãm hipêx.

⁴⁸ Nom xà na hte Tĩrtũm maatija mẽ pahte kãm panhĩhkra ho ixkre nhĩpêx xwỳnh kamã hkrĩ? Nà kaxkwa kamã na hkrĩ xà. Na pre ra Tĩrtũm nhỹ hã kapêr jarênh o pa xwỳnhja Tĩrtũm kot tanhmã mẽ pajamãr to ho pa hã kagà nẽ hã kagà ho:

⁴⁹ Na pa hte kaxkwa rũm pyka hkôt mẽ piitã mẽ hamãr mex o ixkrĩ.

Tã tanhmã kot paj amnhĩ to nẽ mẽ ìhkra ho mẽ kot inhmã ixkre nhĩpêxta wỳr axà nẽ kamã ixpa ho ixpa?

50 Nà ixte mẽmoj piitã ho ixkator xwýnh kênã kot pa kêt ã amnhĩ nhĩpêx anê. Anê.

Nhũm pre ã Tĩrtũm amnhĩ tã mẽ kãm kapêr anê nhũm ý hã kapêr jarênh xwýnhja ô ri mẽ pamã hã kagà.

51 –E kwa mẽ inhma ixkwýjaja. Mẽ akrã hihtýx kumrêx jakamã mẽ amã Tĩrtũm kapêr mar prãm kêt. Na ka htem mẽ panhĩgêjtê pyrã nê amnhĩ nê Tĩrtũm Karõ kaga nê kapêr mar kêt nê.

52 Na pre hte Tĩrtũm nhỹ hã kapêr o mẽ pa xwýnhjaja mẽ panhĩgêjtê hwýr mra nê mẽ kãm kapêr jarênh o ri mẽ hkôt pa. Tã nhũm mẽ hkaga nê mẽ hipêx kati ho pa. Na pre htem Jejus wrýk kukamã mẽ kãm: “E koja nhỹrmã kot Tĩrtũm kapêr mar nê hkôt amnhĩ nhĩpêx mex rãhã xwýnh maatija mẽ pahwýr wrý.” Anhỹr o mẽ kãm harênh o pa. Tã no nhũm mẽ kãm ja mar prãm kêt jakamã axtem nê hã mẽ hpar o pa. Mẽ kot mẽ kãm Jejus jarênh o mẽ pa xwýnhjê hpar o pa. Tã nhũm tãm mẽ pahwýr wrý ka mẽ omu nê mẽ kot amnhĩ nhĩpêxta pyrã nê hã amýnê nhũm prem mẽ amã kupĩ.

53 –Tĩrtũm kapêr o mẽ wrýk xwýnhjaja kot Tĩrtũm nhỹ hã tanhmã mẽ pahte amnhĩ nhĩpêx to ho papa hã mẽ pamã karõ nhũm mẽ ate mar tã mẽ apê hprãm nõkati. Nê ama nê ãm ama nê hkôt amnhĩ nhĩpêx o ri apa hkêt nê. Anê.

*Mẽ kot Estewãw pĩr ã mẽ harênh
Rukre 21.16-19, 23.34; Atre 22.20*

54 Hãmri nhũm juistijaja tee ri Estewãw xujarênh ma nê kamã gryk týx nê kãm kapêr punuj nê.

55 Nom nhũm Tĩrtũm Karõja tanhmã hkrã hto nhũm kãm mẽ uma hkêt nê. Hãmri nê kãnhmã rĩt nê kaxkwa pumunh o xa nê kamã Tĩrtũm rũm hirã rax pumu. Nhũm Jejus Tĩrtũm nhĩkhô hã xa nhũm omu nê hkĩnh nê mẽ kãm:

56 –Kokýỹ. Na kaxkwa axkjê nhũm kamã Tĩrtũm nhỹ pa omu. Nhũm kuri kot mẽ pahwýr mẽnh xwýnh Jejusja xa. Hêxta waa nê. Nà na pa jarãhã wa omu nê ixkĩnh týx kumrêx. Anê.

57 Hãmri nhũm mẽ kuma nê kamã gryk týx nê. Hãmri nê kãm mar prãm kêt nê kêp amnhĩ jamak pro. Hãmri nê gryk xàj ãmra htýx nê hwýr hprõt

58 nê unê nê krĩ pê ho kato nê ma o tẽ nê nhỹri o xa. Hãmri nê kên o htak o hpĩr kaxyw amnhĩ nhĩnôkã hkwrý nê mẽhõ my pê Sawti mã kugõ nhũm mẽ kãm hamý. Hãmri nhũm mẽ kên rũnh kwý jamý nê o mra nê Estewãw wýr rênh prêprêk o kuhê. Nê ho ã kamã htak nê hkrãx pê htak.

59 Hãmri nhũm ra htyk kaxyw nê Jejus mã amnhĩ jarê nê kãm:

–Pa Pahihti Jejus? E koja ixkarõ awýr api ka ixto amnhĩptã. Anê.

60 Hãmri nê hkõn krã ho tẽm nê nhỹ nê axte kãm amnhĩ jarê nê mẽ kot hpĩr xwýnhjê nê kãm kapêr nê kãm:

–Kwa Pahihti. Mẽ kot ixpĩr tã kwa tanhmã ixtã mẽ ho hkêt nê.

Anhỹr o mẽ nê Jejus mã kapêrja kôt ra ty.

8

*Mẽ kot Estewãw jaxàr ã mẽ harênh
Atre 22.4, 26.9-11*

1-2 Hãmri nhũm mẽ kot Jejus kôt amnhĩ nhĩpêx xwýnhjaja Estewãw wýr mra nê htyk kãm omu nê hkaprĩ nê. Nê mur nê kumý nê ma o mõi nê haxà. Nom nhũm Sawtija mẽ kot hpĩr ã omu nhũm ja kãm mex nê.

*Sawti kot Jejus kwýjê nhĩpêx kati ho pa hã
harênh*

Atre 1.8

Tã nhũm Jerujarê kamã Ijaewjaja mẽ kot Jejus kôt amnhĩ xunhwýr xwýnhjê homnuj týx o pa. Hãmri nhũm mẽ tee ri amnhĩ kukamã hamaxpêr nê mẽ hkwyjaja mẽ umaj hapôj nê ma pika hkwy hkôt hpigrãnh pa. Mẽ hkwyjaja Jutej wýr ma pa nhũm mẽ hkwyjaja Samar hwýr ma pa. ã na prem mẽ umaj nhỹhým hpigrãnh par anê. ãm Jejus nhỹ hã mẽ ahkre xwýnh maati pixjaja na prem Jerujarê kamã arĩk nê nhỹhým mõi kêt nê. Simãw Pêtre nê Juãw nê Xiakre nê Andre nê Firipti nê Patomew nê Matêwre nê Makre nê Tomas nê Xiakre hõja nê Simãw õ nê Maxitreja. ãm jajaja pix na prem arĩk.

3 Nhũm Sawti haxwýja Jejus kôt mẽ kot amnhĩ xunhwýr xwýnhjê homnuj o pa. Mẽ kot Jejus kaga hprãm xàj tanhmã mẽ hipêx to ho pa. Na pre hte mẽ òrkwý hwýr agjê nê mẽ unê. Memyjê pynê nê mênijê pynê nê ma mẽ o mra nê mẽ hagjênh xà kamã mẽ

hagjê. Mě uràk nê kêp Ijaew tã ã mẽ hipêx anhÿr o pa.

⁴ Tã nhũm mẽ umaj Jerujarê rũm pika hõ hwÿr mẽ hpigranh xwÿnhtaja amarĩ pika hkwỳ hkõt ri pa hkêt nê. Na prem ma mẽ piitã mẽ kãm Jejus kapêr jarênh o ri mẽ hkõt pa. Kêp Tĩrtũm kot mẽ pakaxyw ãm xwÿnh ã harênh rãhã ho ri mẽ hkõt pa.

Wajaga kot amnhĩ tã Firipti mar ã harênh

Juãw 2.23-24

⁵⁻¹² Tã nhũm Firipti haxwÿja ma mõ. Ma krĩ pê Samar hwÿr mõ nê kamã mẽ kãm Tĩrtũm kot mẽ pakaxyw ãm xwÿnhta jarênh o pa. Samar kamã na pre wajaga Simãwti ri Samar nhõ xwÿnhjê hkõt mẽ no kupyw rãhã ho ri mẽ hkõt pa. Nê àhpumunh tÿx ã amnhĩ to jarkrar o ri pa. Jakamã nhũm mẽ kot amnhĩ nhĩpêx ã omu nê kamã no puma nê. Nê htÿx ho ãm hãmri kot amnhĩ jarênh ã hkamnhĩx. Jakamã nhũm pre mẽ kãm tanhmã ri amnhĩ to hêx to ho pa pê mẽ no kupyw rãhã ho ri pa nhũm mẽ amnhĩ jaêr pê omu. Mẽ kot amnhĩ to hkryre xwÿnhjaja nê mẽ kot amnhĩ to rũnh xwÿnhjaja nhũm mẽ amnhĩ jaêr pê kot tanhmã amnhĩ nhĩpêx to hã omunh o hkõt pa. Nê ri axpên mã harênh o:

—Kokÿÿ. Wajagaja àhpumunh tÿx kumrêx. Tĩrtũm nhÿ hã mãn te ã amnhĩ nhĩpêx anhÿr o pa nà? Mãn pre Tĩrtũm kãm àhpumunh xà hkwỳ gõ nhũm ÿ hã ã amnhĩ nhĩpêx anhÿr o pa. Anê.

Hãmri nê hkõt hamaxpêr o ri hkõt amnhĩ nhĩpêx o pa.

Tã nhũm Firipti mẽ õ krĩ hwÿr mõ nê mẽ kãm Jejus Kris jarênh o ri mẽ hkõt pa nê mẽ kãm:

—Jesús kêp Tĩrtũm kot mẽ pahwÿr mẽnh xwÿnh jakamã kot kaj mẽ amnhĩ kaxyw hkõt ajamaxpêr nê hkõt amnhĩ xunhwÿ nhũm Tĩrtũm hã mẽ apumu nê mẽ ato hkra. Anê.

Hãmri nê Tĩrtũm nhÿ hã akupÿm tanhmã mẽ kute xwÿnhjê ho mex to ho pa. Mẽ ì kamã mẽ htyk xwÿnhjaja nê mẽ hyk o mẽ pa xwÿnhjaja nhũm mẽ ohtô nê akupÿm mẽ ho mex o pa. Nê mẽ hkwỳjê nê mẽkarõmnuti hkwỳ jano nhũm mẽ ãmra htÿx o mẽ hkaga nê ma mẽ kurũm hapôx nê mra. ã Firiptija

Jejus nhÿ hã mẽ ho mex o pa anê nhũm mẽ piitã ja hã omu nê kapêr ma nê hkĩnh nê. Nê kapêr mar tÿx nê hkõt hamaxpêr. Jao wajaga Simãwti kaga nê hpãnhã amnhĩ kaxyw Jejus kõt pix mã hamaxpêr nê hkõt amnhĩ xunhwÿ. Hãmri nhũm Firipti ja hã mẽ omu nê mẽ hkrã kumrã. Měmyjaja nê mẽnijaja nê mẽ piitã mẽ hkrã kumrã. Ra mẽ kot Jejus kõt amnhĩ xunhwÿr ã mẽ piitã mẽ kãm amnhĩ to amnhĩrit kaxyw nhũm mẽ hkrã kumrãr pa.

¹³ Hãmri nhũm wajaga Simãwti haxwÿja Jejus kapêr ma nê mẽ uràk nê amnhĩ kaxyw hkõt hamaxpêr nê hkõt amnhĩ xãm nhũm Firipti hkrã kumrã. Hãmri nhũm hkĩnh nê Firipti hkõt ri pa. Nê aa mẽ kot mẽmoj pumunh kêt kwÿ ho anhÿr o ri pa hã omu nê kamã no puma ho hkõt ri pa. Nê kot Tĩrtũm nhÿ hã akupÿm mẽ ho mex ã omu nê tee ri hamaxpêr.

¹⁴ Tã hãmri nhũm Jerujarê kamã Jejus nhÿ hã mẽ ahkre xwÿnh maatijaja Samar nhõ xwÿnhjê jarênh ma. Ra mẽ kot Tĩrtũm kapêr kõt amnhĩ nhĩpêx ã mẽ harênh ma nê hkĩnh nê. Hãmri nê ma mẽ hwÿr Simãw Pêtre mẽ Juãw wa kumê.

¹⁵⁻¹⁷ Hãmri nhũm wa ma mẽ hwÿr wa mõ nê pøj. Hãmri nhũm Firipti wa omu nê wa kãm krĩ nhõ xwÿnhjê jarê nê wa kãm:

—Nà na pa pre mẽ kãm Jejus kapêr jarê nhũm mẽ inhma nê hkõt amnhĩ xunhwÿ. Jakamã pa pre mẽ hkrã kumrã. Nom na kormã Tĩrtũm Karõja mẽ hkarõ mã gjêx kêt nê. Anê.

Hãmri nhũm wa mẽ harênh ma nê mẽ himõk ã wa ìhkra jaxwÿr o ri mẽ hkõt mra. Ja kõt nhũm Tĩrtũm Karõ mẽ hwÿr wrÿ nê mẽ hkarõ mã gjêx pa.

¹⁸⁻¹⁹ Hãmri nhũm wajaga Simãwja mẽ amnhĩ tã wa omunh o xa nê hamaxpêr o:

—Kokÿÿ. Kwa wa kot mẽ hã ìhkra jaxwÿrja kõt na hte Tĩrtũm Karõ mẽ hkarõ mã agjê. Hêxta waa nê. Inhmã ã mẽ hipêx anhÿr o ri ixpa hprãm tÿx. E pa ixkàxpore hkwỳ jamÿ nê o tẽ nê wa kãm kugõ kê wa tanhmã ixto pa wa uràk nê ã mẽ hipêx anhÿr o ri ixpa. Nà kot paj anê. Anê.

Hãmri nê wa hwÿr tẽ nê wa kãm:

—E ota ixkàxporeta. Kwa amnhĩm apy nê hpãnhã tanhmã ixto pa war apyrà nê mẽ hã inhìhkra jaxwÿr o ri mẽ hkõt ixpa kê

Tirtũm Karõja mẽ hkarõ mã agjê. Inhmã ja ho anhÿr prãm tÿx. Anê.

²⁰⁻²³ Hãmri nhũm wa tee ri ã kapêr anhÿrja ã omu nhũm Pêtre kãm:

—Tk. Kwa ajamaxpêrja mex kêt. Xà na htem kàxpore ho Tirtũm mã amnhÿrer pê ÿ hã mẽ ho hwÿr o pa nhũm Karõ mẽ hwÿr agjê? Nà na htem kàxpore ho Tirtũm Karõ japrôr kêt nê. Kot kaj wa ixpyrà nê ã mẽ hipêx anhÿr kêt nê. Ajamaxpêrja mexre hã. Kormã ate Tirtũm kôt amnhÿ xãm tÿx kêt jakamã na ka atÿx ã ri ajamaxpêr anê.

—Na ka ã wa ixte Tirtũm nhÿ hã mẽ hipêx anhÿr ã wa ixpumu nê amã wa ixpyrà nê ã mẽ hipêx anhÿr o ri apa hprãm xaj ajamaxpêr punuj nê. Nhũm ajamaxpêr punuj te kot apa hã apyr ka tee ate kêp amnhÿ kjênh pyræk. Kwa tokyx ajamaxpêr punuj ã amnhÿ pumu nê akaprÿ nê tokyx hkaga. Hãmri nê amnhÿ to Tirtũm wÿ kê amnhÿ katut kôt ajamaxpêr punujja mẽ ka axte ã ajamaxpêr anhÿr kêt nê. ã mẽ hamaxpêr punuj anhÿr xwÿnhjaja koja mẽ nhÿrmã ma kuwy hwÿr pa. Anê.

²⁴ Hãmri nhũm tee ri amnhÿ tã kuma nê hkaprÿ nê wa kãm:

—Kwa xà wehe? Tô tokyx ixto Tirtũm wÿ kê ã ijamaxpêr anhÿrja mÿrapê hwÿr inhmênh kêt nê. Anê.

²⁵ Tã nhũm Simãw Pêtre mẽ Juãw wa Samar nhõ xwÿnhjê mã Pahihti Jejus kapêr jarênh pê ho mẽ ahkre hãmri nê ma akupÿm Jerujarê hwÿr mõi. Ma pyka pê Samar hkôt mẽ kãm Jejus kapêr jarênh o ma akupÿm mõi.

Firipti mẽ Exiop nhõ xwÿnh wa harênh Ijais 53.7-8

²⁶ Hãmri nhũm Firipti arÿ Samar kamã arÿk. Hãmri nhũm Tirtũm kapêr o mẽ wrÿk xwÿnhja hwÿr wrÿ nê kãm:

—Pa? E ot pa awÿr wrÿ nê tẽ. Nà kêr ka tokyx akato nê ma mõi nê Jerujarê rũm kãnhmã Kas wÿr pry kahpêr ta nê hã juk nê ma hã mõi. Kapôt ã pry nõrta kahpêr ta nê hã mõi. E kwa tokyj.

Anhÿr o kãm kapêr hãmri nê ma akupÿm tẽ nê kaxkwa hwÿr api.

²⁷ Hãmri nhũm Firipti kuma nê kato nê ma hwÿr mõi kurê kumrêx. Mõi hãmri nê pryja kahpêr ta nê hã mõi.

Hãmri nhũm ra mẽhõ myja mõi. Exiop nhõ xwÿnh na pre. Exiop kamã mẽõ pahì na pre niti. Hixi pê na pre Kãtatre. Nhũm pry hã mõi xwÿnhja kêp kãm kàxpore jamãr o pa xwÿnh. Exiop kamã te kêp mẽ õ kôwenatõ pyræk. Tã kot Tirtũm mã mex o mex ã harênh kaxyw ma Jerujarê hwÿr mõi.

²⁸ Hãmri nê akupÿm Exiop wÿr kormã mõi. Õ pãr kãm nhÿ nê Tirtũm kapêr ã kagã htũm kamã kapêr o mõi. Tirtũm nhÿ hã kapêr o pa xwÿnh pê Ijais kot Tirtũm kapêr ã kagã htũmja nhũm kamã kapêr o mõi.

²⁹ Hãmri nhũm Tirtũm Karõ Firipti mã harê nê kãm:

—E mẽhõ mÿj wÿr aprõt nê tẽ nê hã ajêt nê ma hkôt tẽ. Anê.

³⁰ Hãmri nhũm kuma nê ma hwÿr hprõt nê hã ajêt nê kot kagã kamã kapêr ã kuma. Ijais kot Tirtũm kapêr ã kagã htũm kamã kapêr ã kuma nê kãm:

—Pa? Mãn ka aprÿ hã ate kamã akapêr xwÿnhta ma nà? Anê.

³¹ Hãmri nhũm kãm:

—Nà ixte maare hã. Mẽhõ kot hprÿ hã inhmã harê pa ixprÿ hã kuma? Xàt ka ixwÿr api nê ixri nhÿ nê aprÿ hã inhmã harênh o ixkôt mõi nà? Anê.

Hãmri nhũm kuma nê hwÿr api nê ÿkhõ hã nhÿ nê kagãta pumunh o nhÿ.

³² Nhũm hã kagã kot:

Na htem ôwêhti par kaxyw nhũm amarÿ mẽ kãm akryk kuhê.

Nê mẽ kot kêp hkÿ jakãr kaxyw nhũm ma anê nê amarÿ mẽ kãm akryk kuhê.

Tã na pre mẽhõja ôwêhti kot amnhÿ nhÿpêx pyræk o amnhÿ nhÿpêx.

Jakamã nhũm mẽ kot tanhmã hipêx to htã no nhũm arÿ mẽ kãm akryk xa. Amnhÿ nê tanhmã mẽ kãm kapêr punuj to hkêt nê. ãm arÿ mẽ kãm xa.

³³ Na prem homnuj tÿx nê ri hipêx kati rax nê.

Aa kot tanhmã amnhÿ tomnuj to hkêt kumrêx tã nhũm mẽ ã hipêx anê nhũm mẽhõ yr pê tanhmã nê mẽ kãm kapêr to hkêt nhũm prem kupÿ.

Nhũm amnhÿ kanrêhã hkra hkêt rãhã ty. Jakamã kot puj mẽ hkrajê nhÿxi mar kêt nê. Kra hkêt rãhã htyk kênã. Anê.

³⁴ Nhũm pre ã Exiop nhõ xwÿnh Tirtũm kapêr ã kagã htũm kamã harênh anê. Hãmri

nē tee ri ã kot mēhō jarēnh anhÿrja kukamã hamaxpēr nē hã Firipti kukja nē kãm:

—Kwa aprĩ hã inhmã mēhōja jarē. Mēhō na prem ã hipêx rax anē? Xà kot kagã xwÿnhhta na prem ã hipêx anē nà xà nhãm mēhō na prem ã hipêx anē? E kwa aprĩ hã inhmã harē pa ã mē kot hipêx anhÿr xwÿnh kôt omu. Anē.

³⁵ Hãmri nhũm kãm:

—Tõe kot paj amã harē. Nà Jejus na prem ã hipêx anē nhũm prem hã kagã. Anē.

Hãmri nē hprĩ hã kãm kot kamã harēnh xwÿnhhta jarē. Jejus kot tanhmã mē panē amnhĩ nhĩpêx toja nhũm hprĩ hã kãm harēnh o hkôt mō.

³⁶ Hãmri nhũm wa kormã mō nē pry htã himô hãnh mō nhũm Exiop nhõ xwÿnh omu nē Firipti mã kãm:

—E mÿj gô mÿj nō. Xà kot kaj kamã ixkrã kumrã nã? Anē.

³⁷ Nhũm kãm:

—Nà kot kaj amnhĩ kaxyw Jejus Kris kôt ajamaxpēr nē hkôt amnhĩ xãm hã kot paj akrã kumrãr kurê kumrêx. Anē.

Hãmri nhũm kãm:

—Tÿ. Kêp Tĩrtũm Kra kēnã kot paj kêt amnhĩ kaxyw hkôt ijamaxpēr kêt. Anē.

³⁸ Hãmri nē pãr o mrrar xwÿnh mã anē nhũm pãr o nō nhũm wa kato nē himô hwÿr wrÿ nhũm Firipti hkrã kumrã. Kot Jejus kôt amnhĩ xãm ã hkrã kumrã.

³⁹ Hãmri nē wa akupÿm api nhũm Tĩrtũm Karõ Firipti mÿ nē ma nhÿhÿm o mō nhũm Exiop nhõ xwÿnhja axte omunh kêt nē. Hãmri nē ma akupÿm papxã hwÿr mō. Ra kot Jejus kôt amnhĩ xãm jakamã hkĩnh nē ma akupÿm mō.

⁴⁰ Rôm nhũm Firipti krĩ pē Ajõt kamã pøj. Tĩrtũm Karõ kot Exiop nhõ xwÿnh pē kator nē tanhmã ho nē Ajõt wÿr o mō hãmri nē kamã kumē. Hãmri nhũm mē kãm Jejus kot tanhmã mē panē amnhĩ nhĩpêx to hã harēnh pē ma krĩ hõ hwÿr mē kãm ujarēnh anhÿr o pa rãhã krĩ pē Sejarej wÿr mō nē pøj.

9

*Sawti kot Jejus kôt amnhĩ xãm ã harēnh
Atre 22.6-11, 26.12-18*

¹ Rôm nhũm Sawtija xatã Jerujarē kamã Pahihti Jejus kôt mē kot amnhĩ xunhwÿr xwÿnhjaja tanhmã mē homnuj tÿx to ho

ri mē hkôt pa. Kãm mē himex par prãm jakamã na pre hte ã amnhĩ nhĩpêx anhÿr pix o pa. Tã ra hamaxpēr nē ma patre maati hwÿr tē nē mē hã amnhĩ jarē nē kãm:

² —E ot pa awÿr tē. Kwa inhmã kagã nhĩpêx pa kupy nē ma krĩ pē Tamas kãm mē pahpê Ijaew xàptàr tũmrejê hwÿr o mō nē mē kãm kugō. Kê mē kamã harē nē omu hãmri nē hkôt inhĩhkra kamã Jejus kôt mē kot amnhĩ nhĩpêx xwÿnhjê jagjê. Mēnijaja nē mēmyjaja. Hãmri pa mē unē nē man akupÿn awÿr mē o mō ka mē omu nē kam tanhmã mē hipêx to. Anē.

Hãmri nhũm kuma nhũm ja kãm mex nē. Hãmri nhũm kãm kagã nhĩpêx nē kugō nhũm kupy nē hkôt mē pa xwÿnhjê mē ro hã ma Tamas wÿr mē hwÿr mōr kurê kumrêx.

³ Mōo mē ra hpôx o mōr mē nhũm puh kaxkwa rũm hirã rax kumrêx wrÿ nē hã ajêt nhũm hipôk ri xa.

⁴ Hãmri nē tee ri omu nē kãm ma xàj pykap tēm nē akryk nō. Hãmri nhũm kaxkwa rũm mēhō kãm kapēr nē kãm:

—Pa Sawti? Hēxtã waa nē. Kwa mon ka hte ixtomnuj tÿx o ri apa? Anē.

⁵ Hãmri nhũm amnhĩ jaer pē kuma nē kãm:

—Kwa mē atō na ka ã inhmã akapēr anē pahihti? Anē.

Hãmri nhũm kãm:

—Kwa nhũm ixpê Jejus ixte amã ixkapēr kēnã. Pa na ka hte ixpê ixkôt mē kot amnhĩ xunhwÿr xwÿnhjê nhĩpêx kati ho apa. Jao te pa ate ixtomnuj tÿx pyrãk.

⁶ Nom kot kaj axte ã amnhĩ nhĩpêx anhÿr kêt kumrêx. E kãnhmã xa nē mãmri ma krĩ hwÿr tē. Kot kaj hwÿr pøj nhũm mēhō awÿr tē nē mēmoj tã amã karõ ka ama nē hkôt amnhĩ nhĩpêx. Anē.

⁷ Nhũm pre ã Jejus Sawti mã kapēr anē. Nhũm hkôt mē pa xwÿnhjaja mēmoja ma no ãm hprĩ mar nē mēmoj pumunh kêt nē. Hãmri nē tee ri hamaxpēr nē kãm ma xàj akryk kapēr kêt kumrêx nē kuhê.

⁸ Hãmri nhũm Sawti kãnhmã xa nom rĩt kêt nē tee ri rĩt mã nhũm mē hpa hã kupy nē ma krĩm o mō.

⁹ Nē Tamas wÿr o pøj nē nhÿri mēhō nhõrkwy hwÿr ho axã nhũm kamã nohkre nē arĩ hkrĩ. Tee ri amnhĩ kukamã

hamaxpêr o hkrî. Nê apkur kêt nê hkôm kêt o ra hã apkati axkrunêpxi.

¹⁰ Tamas kamã na pre mēhō my pē Ananīsjā pa. Kot Jejus kôt amnhī xunhwūr xwūnhjē hō na pre. Jakamã nhūm Jejus hwūr kato nē kām kapêr. Te hpimtir kām hwūr kator nē kām kapêr pyrā nē kām:

—Pa Ananīs? Anē.

Nhūm kām:

—ÿ? Ot pa xa. Mo na Pahihiti? Anē.

¹¹ Nhūm Jejus kām:

—E kêr ka akato nē ma mē kot kām: “Pry katāt” anhūr xwūnhta wūr tē. Hāmri nē kamã Jut nhōrkwūr japêr. Kamã na Tas nhō xwūnh pē Sawtija hkrî. Na no hkre nē inhmã amnhī jarēnh o hkrî. Ka hwūr axā nē omu.

¹² Ate hwūr atēm nē inhūr hã hã anhīhkra xir nhūm akupēm rīt mex kaxyw na ato amūr. Jakamã e ma hwūr tē nē ã hipêx anē. Anē.

¹³ Hāmri nhūm Ananīs tee ri kuma nē kām Sawti puma ho amnhī kamã kahak nē. Hāmri nē kām:

—Kwa nã Pahihiti. Tãm na xep hte Jeru-jarē kamã mē kot amnhī kaxyw akôt mē hamaxpêr xwūnhjē nhīpêx kati ho pa. Pa ra mē hã harēnh ma.

¹⁴ Tã na xep ra jar Tamas wūr pōj. Patre krāhtūm kapêr nhūr hã kot mē ixpê akôt amnhī xunhwūr xwūnhjē pynēnh nē ma akupēm hwūr mē ixto mōr kaxyw. Tãn ka ri hwūr ijano. Kwa nã ri ixto anhūr kêt nē Pahihiti. Anē.

¹⁵ Nhūm Jejus kām:

—Nã mamrī ma hwūr tē. Ra ixte amnhī kaxyw ãm kēnã. Jakamã koja ã mē anhīpêx anhūrta hpānhã ma mē piitã mē kām ixkapêr jarēnh o pa. Mē apê Ijaew mã nē mē anhō pahi hkwūrjē mã nē mē kēp Ijaew kêt xwūnhjē mã. Koja mē piitã mē kām ixkapêr jarēnh mex o ri mē hkôt pa.

¹⁶ Koja mē ixtã homnuj tūr nē nhūm amnhī xà htūr kamã hamak o pa. Nom kot paj ixprī hã mē kot tanhmã ixtã hipêx to hkukamã kām ixujarēnh pa nhūm amnhī kukamã amnhī jarēnh ma. E tokyx māmri ma axāmnhix hwūr tē. Anē.

¹⁷ Hāmri nhūm kuma nē kato nē ma Sawti hwūr htēm kurê kumrêx. Hāmri nē ixkre hwūr axā nē omu nē hkrã hã ihkra xi nē kām:

—Pa Jejus kôt ixtō Sawti? E na Pahihiti Jejus awūr inhmē pa awūr tē. Pry kahti ri kot awūr kator xwūnhta. Tã akupēm arīt nhūm Tirtūm Karō kot akarō mã ãr kaxyw na awūr inhmē pa tē. Anē.

¹⁸ Hāmri nhūm mēmoj te tep kã pyrākja Sawti no rūm hapōj nē rōrōk nhūm akupēm rīt mex kurê kumrêx. Hāmri nē kãnhmã xa nhūm Ananīs hkrã kumrã. Ra amnhī kaxyw Jejus kôt hamaxpêr ã hkrã kumrã.

¹⁹ Hāmri nhūm nhūr nē apku nē akupēm hihtūr.

Sawti kot Tamas kamã Jejus kapêr jarēnh Sikūn Korīt 11.22-23

Nhūm Sawti Tamas kām mē kot Jejus kôt amnhī xunhwūr xwūnhjē hkôt amnhī xãm nē mē hkôt ri pa nē tokyx ma akupēm mōr kêt nē.

²⁰ Kormã mē hkôt ri pa nē Ijaew nhō Tirtūm kapêr o mē ahkre xã hã ixkre hwūr mra nē kamã mē kām Jejus kapêr jarē. Kēp Tirtūm Kra hã harēnh o kuhē.

²¹ Hāmri nhūm mē amnhī jaêr pē ã harēnh anhūrja ma nē tee ri hamaxpêr nē axpēn mã:

—Kokūr. Kwa tãm na xep pre Jeru-jarē kamã amnhī kaxyw Jejus kôt mē kot amnhī xunhwūr xwūnhjē homnuj tūr o pa. Tã xep jar kot mē hkwūrjē pynēnh nē ma mē o mōr nē Jeru-jarē kamã patre krāhtūmjē mã mē ōr kaxyw na pre man mē pahwūr mō. Tã ra tanhmã hamaxpêr to nē axtem nē mē pamã Jejus kapêr jarēnh o mē pajahkre ho pa. Anē.

²² Hāmri nhūm Sawti arī Tamas kām Ijaew mã tanhmã Jejus jarēnh to kamã hihtūr o mē hkôt pa nē mē kām:

—Nã Jejus Krisja na pre Tirtūm mē pakaxyw ãm nē mē pahwūr kumē. ãm hāmri na pa mē amã ja jarē. Anē.

Hāmri nhūm mē kuma nē tee ri kutã tanhmã kapêr to hkukamã hamaxpêr.

²³ Tã ra hã apkati xohtō nē nhūm Tamas kām Ijaew kwūrjaja kot Sawti pūr kaxyw hã axpēn ma.

²⁴ Hāmri nhūm mēhōja hã ama nē Sawti hwūr tē nē kām mē harē nē kām:

—Kwa Sawti kêr ka axkãm ajamak rom. Na mē pahkwūrjaja atã amūr. Na mē ra krī puhã kahê xã hã hakwakre piitã hamãr

ho kuhê. Kot kaj nhÿhÿm akato nhÿm mē apumu nē apynē nē apī. Anē.

²⁵ Jakamā nhÿm kamāt nhÿm Sawti hkôt ri mē pa xwÿnhjaja kawà rax ò mÿ nē hwÿr o tē nē kām ãm nhÿm hwÿr axà nē nhÿ. Hāmri nhÿm mē hkagrī nē kēn o krī puhā kahêja nhÿrô pē ho wrÿ nhÿm mē kēp kato nē ma mō.

Sawti kot Jejus kwÿjê hkôt pikamēnh ã harēnh

Karatas 1.15-24

²⁶ Tā nhÿm Sawti krī pē Tamas rÿm kato nē ma akupÿm Jerujarē hwÿr mō hāmri nē hwÿr pōj. Hāmri nē mē kot Jejus kôt amnhÿ xunhwÿr xwÿnhjê hkôt amnhÿ jarēnh kaxyw mē hwÿr tē. Hāmri nhÿm mē tee ri amnhÿ wÿr omu nē kot Jejus kôt amnhÿ xām ã amnhÿ to hēx ã hkamnhÿx hāmri nē amnhÿ kamā kahak o amnhÿ nē hkurē nē mē piitā kām uma nē.

²⁷ ãm Panāpe pix ãm hāmri kot Jejus kôt amnhÿ xām kôt hamaxpēr. Hāmri nē ma hwÿr tē nē haprô nē ma Jejus nhÿ hā mē ahkre xwÿnh maatijê hwÿr o tē nē yr pē mē kām kapēr nē mē kām:

—Kwa ãm hāmri na Sawti amnhÿ jarē. Na ra mē pahpyrà nē Jejus kôt amnhÿ xām. Na xep pre Tamas wÿr pry hā kormā mō nhÿm xep Pahihti Jejus hwÿr kato nē kaxkwa rÿm kām kapēr nhÿm kuma nē hkôt amnhÿ xām. Jakamā nhÿm xep ra axtem kot amnhÿ nhÿpêx nyw o Tamas nhō xwÿnhjê mē Jejus kapēr jarēnh o ri mē hkôt pa. Ra amnhÿ kamā kām mē uma hkêt nē ãmnhÿx ri mē kām harēnh o ri mē hkôt pa. Anē.

²⁸ Hāmri nhÿm mē kuma nē amnhÿ kôt Sawti mē nhÿm mē hkôt ri pa. Hāmri nē Jerujarē kamā mē piitā mē kām Jejus kapēr jarēnh o pa. Kām Jejus kôt amnhÿ xunhwÿr kêt xwÿnhjê puma hkêt nē ãmnhÿx ri mē kām kapēr jarēnh o ri mē hkôt pa.

²⁹ Nē Ijaew kwÿ pē Gresjê kapēr o mē kapēr xwÿnhjê mē nhÿm xatā mē kām Jejus jarēnh o ri mē hkôt pa. Kēp Tirtÿm kot mē pakaxyw ãm xwÿnh ã harēnh rāhā ho ri mē hkôt pa. No nhÿm mē kām mar prām kêt nē ra kot Jejus ã hpÿr mē.

³⁰ Hāmri nhÿm mē kot Jejus kôt amnhÿ xunhwÿr xwÿnh kwÿjaja mē harēnh ma nē mē kēp ho kato nē ma krī pē Sejarej wÿr o

mō. Hāmri nē kurÿm ma akupÿm ò krī pē Tas wÿr kumē nhÿm ma akupÿm mō.

³¹ Tā ra Sawti kot Jejus kôt amnhÿ xām jakamā nhÿm mē kām mē hkurē xwÿnhjaja axte Jejus ã tanhmā hkwÿjê hto hkêt nhÿm mē piitā hamakêtkati nē ãmnhÿx ri pa. Pika pē Jutej kamā nē Garirej kamā nē Samar kamā nhÿm mē piitā hamakêtkati nē ãmnhÿx ri pa. Hāmri nē Tirtÿm mē mex o mex ã harēnh o ri pa. Nhÿm Tirtÿm Karō tanhmā mē hkrā hto nhÿm mē ra kapēr kôt amnhÿ nhÿpêx mex o mō. Hāmri nhÿm mē ohtô rax nē mē urāk nē Jejus kôt amnhÿ xunhwÿr nē hkwÿjê hkôt axkamē.

Enejti akupÿm mex ã harēnh

Atre 3.1-10

³² Tā nhÿm Simāw Pêtreja ma mē kot Jejus kôt amnhÿ xunhwÿr xwÿnhjê mē Tirtÿm kapēr jarēnh o mē ahkre kaxyw ma krī piitā hkôt pa. Jakamā krī pē Rit wÿr mō

³³ nē hwÿr pōj nē kamā Enejti pumu. Nhÿm ï kamā htyk pa nē kupÿp kām hikwÿ rāhā hā amgrà pē 8.

³⁴ Hāmri nhÿm Simāw Pêtre omu nē Jejus nhÿ hā kām kapēr nē kām:

—Pa Enejti? E na Jejus Kris akupÿm ato mex. Jakamā e kànhmā xa nē akupÿpta py. Anē.

Hāmri nhÿm akupÿm mex nē kànhmā xa nē amnhÿ pumu nē hkÿnh o hkÿnh.

³⁵ Hāmri nhÿm krÿja kamā nē krī hō pē Sarō kamā mē piitā harēnh ma nē mē kot amnhÿ tomnuj kaga hpa nē hpānhā Jejus kôt amnhÿ xunhwÿr nē hkôt amnhÿ nhÿpêx o pa.

Tapitre akupÿm htÿr ã harēnh

Rukre 8.49-56; Atre 20.7-12

³⁶ Nhÿm Tapitreja krī pē Jope kamā na pre pa. Gres kapēr kām hixi pē Nokre. Mē kapēr kām Nokreja te kēp “karà” anhÿr jarēnh pyrāk. Na pre ra Tapitre pē Nokreja Jejus kôt amnhÿ xām nē mē piitā mē ho mex o ri mē hkôt pa. Nē mē kēp amrakati xwÿnhjê kamā ukaprÿ ho ri mēmoj to mē kutā nojarêt o ri mē hkôt pa.

³⁷ Tā ra à htÿx nē hāmri ty. Hāmri nhÿm mē tee ri omu nē hkaprÿ nē mÿr rax nē. Nē kumÿ nē kuhō hāmri nē kormā haxàr kêt ri kÿx pē ixkre kamā kuxi nē kuri mÿr o hkrÿ.

³⁸ Nhũm Simãw Pêtre kormã krĩ hõ pê Rit kamã ri pa. Rit rũm Jope hwÿr jawÿ jakamã nhũm Jope kamã mẽ kot Jejus kôt amnhĩ xunhwÿr xwÿnhjaja Simãw Pêtre jarênh ma hãmri nê hwÿr ja wa ho hamëxkrut nê wa kumê. Nhũm wa ma hwÿr tẽ nê hwÿr pøj nê omu nê kãm:

—Pa? E jar na pa wa awÿr tẽ. Na Jejus kôt mẽ pahtõx Tapitre ham mẽ pahpê ty. Kwa tokyx kormã mẽ kot haxàr kêt ri ma wa ixkôt hwÿr tẽn omu nà? Anê.

³⁹ Hãmri nhũm wa kuma nê ma wa hkôt htẽm kurê kumrêx. Hãmri nê Jope hwÿr pøj nê mẽ hwÿr tẽ nhũm mẽ kÿx pê htyk nê nõr xwÿnhja wÿr ho api nhũm hwÿr axà. Nhũm kuri mẽ kêp mẽ mjên htyk xwÿnhjaja hkaprĩ nê mÿr o hkrĩ. Hãmri nhũm Simãw Pêtre mẽ hwÿr axà nhũm mẽ omu nê kãm Tapitre kormã htĩr ri kot tanhmã mẽ ho mex to hã harê. Nê mẽ ê hkwÿ jamÿ nê kãm kupê nê kãm:

—Ga ja pumu. Tyk xwÿnhhta na pre mẽ inhmã hkay nê kugõ. Na pre hte mẽ ixto mex o pa. Tã mẽ ixpê ty. Hêxta gàa nê. Na pa mẽ ixkaprĩ htÿx kumrêx. Anê.

⁴⁰ Hãmri nhũm mẽ kuma nê mẽ kator pa hãmri nê htyk xwÿnhhta ri hkõn krã ho nhÿ nê ho Tĩrtũm wÿ. Hãmri nê htyk xwÿnhhta mã kapêr nê kãm:

—Pa Tapitre? E kwa kànhmã nhÿ. Anê.

Pu nhũm no amra nê Simãw Pêtre pumu nê kànhmã nhÿ.

⁴¹ Hãmri nhũm hpa hã kupy nê kànhmã ãm nê kapôt ã mẽ kuhê xwÿnhjê mã anê nhũm mẽ akupÿm wa hwÿr agjê nhũm mẽ kãm:

—E ota. Na Tĩrtũm akupÿm mẽ amã ho htĩr. Anê.

Hãmri nhũm mẽ amnhĩ jaêr pê omu nê hkĩnh tÿx nê.

⁴² Hãmri nhũm Jope kamã mẽ piitã harênh ma nê mẽ ohtõ nê amnhĩ kaxyw Jejus kôt hamaxpêr nê hkôt amnhĩ xunhwÿ.

⁴³ Hãmri nhũm Simãw Pêtre Jope kamã ri pa hã apkati xohtõ nê tokyx mẽ kurũm kato nê ma krĩ hõ hwÿr mõi kêt nê. Na pre mry kà ho mẽmoj nhĩpêx o pa xwÿnh pê Simãw ri pøj nê kuri pa hã apkati xohtõ nê.

10

Konêre kot Simãw Pêtre hã karõ hã harênh Rukre 7.1-10

¹ Tã nhũm Ijaew kêt xwÿnh Konêre. Kêp Rõmjê nhõ pôristi krãhtũm na pre. Ô pôristija pika pê Itar nhõ xwÿnh na pre mẽ nhũm Konêre kêp mẽ hkrãhtũm. Krĩ pê Sejarej kamã.

² Konêreja kot amnhĩ to mex o pa xwÿnh na pre. Kêp Ijaew kêt tã na pre hte õrkwÿ kamã hkwÿjê mẽ Tĩrtũm ã hpijaàm nê kãm mex o mex ã harênh o pa. Apkati mẽ kãm amnhĩ jarê. Nê mẽ kêp amrakati xwÿnhjê mã kãxpore hkwÿ nhõr o pa.

³ Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrã nê kaxkwa kamã Tĩrtũm kapêr o wrÿk xwÿnh pumu. Nhũm hwÿr wrÿ nê tanhmã kãm kapêr to nê kãm:

—Pa Konêre? Anê.

⁴ Nhũm tee ri omu nê kãm ma htÿx kumrêx. Hãmri nê kãm:

—Mo na? Anê.

Hãmri nhũm kãm:

—Nà ate amnhĩ to Tĩrtũm wÿr o apaja nhũm ra amnhĩ tã ama nhũm ja kãm mex nê. Nê ate mẽ kêp amrakati xwÿnhjê mã kãxpore hkwÿ nhõr o apaja nhũm ja mããnên kãm mex nê.

⁵ —Jakamã e inhma. Kêr ka ma Jope hwÿr amã mẽ àpênh xwÿnh kwÿ rê kê mẽ ma hwÿr mra nê kamã mẽhõ pê Simãw Pêtre japrõ nê man akupÿn awÿr o mõi.

⁶ Simãw kot mry kà ho mẽmoj nhĩpêx o pa xwÿnhhta nhõrkwÿ kamã na hte pa. Õrkwÿja gõ mÿ ri na. E hwÿr mẽ arê kê mẽ ma hwÿr mõi nê haprõ nê man awÿr o mõi kê amã mẽmoj mex jarê ka ama. Anê.

⁷ Nhũm pre ã Tĩrtũm kapêr o wrÿk xwÿnhjaja Konêre mã kapêr anê hãmri nê kato nê ma akupÿm api. Hãmri nhũm kot mar xà hkôt jajê rê nê Simãw Pêtre hwÿr mẽ kurê. Kãm àpênh xwÿnhjê ho hamëxkrut nê kaxyw õ pôristi hõ. Pôristija na pre hte Konêre pyrã nê Tĩrtũm ã hpijaàm o pa.

⁸ Jakamã nhũm mẽ kurê nê mẽ kãm kapêr hãmri nê ma Jope hwÿr Simãw Pêtre hwÿr mẽ kurê nhũm mẽ kato nê ma hwÿr mõi.

⁹ Hāmri nhūm apkati nhūm kaxkwa nhīpōk ri myt nhỹ nhūm mẽ hwỳr hpōx o mō.

Simāw Pêtre tanhmā hpimtir to hā harēnh Atre 11.5; Karatas 2.11-21

Rôm nhūm Simāw Pêtre kot Tīrtūm mā amnhī jarēnh kaxyw ixkre nhīmōk ā api nē himōk po hā kām amnhī jarēnh o nhỹ.

¹⁰ Hāmri nē ra kām prām nē nom nhūm mẽ kormā kām ō hā àpēnh jakamā nhūm arī ixkre nhīmōk ā Tīrtūm mā amnhī jarē.

Hāmri nē Konēre pyrā nē te hpimtir kām kot mẽmoj pumunh pyrā nē mẽmoj pumu nhūm Tīrtūm Konēre hkukamā tanhmā kām mẽmoj to amnhīrīt to. No ām hā kuxi nē kām harēnh jakamā nhūm Simāw Pêtre te hpimtir kām kot mẽmoj pumunh pyrā nē mẽmoj pumu.

¹¹ Nhūm kaxkwa katēr nhūm kurūm mẽmoj te kot mẽ hpiro xā pyrāk xwýnhja pyka hwỳr wrýk o mō. Nē hatur xā piitā axpēn tā akuprō nē ajēt nē wrýk o mō nhūm omu.

¹² Mē hpiro xāta kamā mẽmo mry piitā hikwỹ. Mẽmo mry hpar o ri pa xwýnhjaja nē htu mýr pē ri pa xwýnhjaja nē mẽmo àk kýx pē htor o ri mrrar xwýnh piitā mẽ hpiro xāja kamā hikwỹ nhūm omu.

¹³ Hāmri nhūm Tīrtūm kām:

—Pa Simāw Pêtre? Mān ka ra amā prām nē nà? E kànhmā xa nē axàmnhīx māmri mryta ō kapi nē apī nē ho anē nē aku. Piitā mẽ ate hkur mā mex. Anē.

¹⁴ Hāmri nhūm tee ri kuma nē kām:

—Kwa nà Pahi Maati. Mē ixpē Ijaew mẽ ixte mry piitā hkur kêt. Ām hkwy pix na pa htem kuku. No mry jaja aa mẽ ixte hō hkwy hkrēr kêt. Anē.

¹⁵ Hāmri nhūm Tīrtūm kām:

—Nà kot anhỹr tā kot paj pam amā mẽmoj jarē ka kamā anhōkre kahak kêt nē. Māmri amnhīm hō kapi nē apī nē ho anē nē axàmnhīx hkwy hkre. Anē.

¹⁶ Nhūm pre ā kām mry hā karō anhỹr o axkrunēpxi. Simāw Pêtre kot māmri Ijaew kêt xwýnhjê hkôt pa nē àmnhīx ri mẽ kutā apkur nhūm Tīrtūm kām ja mex nhūm kot hā amnhī pumunh kaxyw nhūm ā kām harēnh anhỹr o axkrunēpxi. Hāmri nhūm mẽ hpiro xāja ma akupým kaxkwa hwỳr àpir o mō nē akunok.

¹⁷ Hāmri nhūm Pêtre te hkrākator pyrāk jao tee ri hpimtir kukamā hamaxpēr o nhỹ nē hamaxpēr o:

—Kwa mo kaxyw na Tīrtūm ā inhmā ja hā karō anē? Anē.

Rôm nhūm Konēre kot hwỳr mẽ rēnh xwýnhjaja ra hwỳr hpōx o mō. Ijaew kêt xwýnhjtaja Simāw nhōrkwỹ hā mẽ hkukjêr o mō nē hwỳr pōj nē hakwakrem kuhê.

¹⁸ Hāmri nē ōrkwỹ nhō xwýnhjê mā kām:

—Pa na ka mẽ arī akrī? E Simāw Pêtre hwỳr na pa mẽ mō. Xā jar na hte pa nà? Anē.

Hāmri nhūm mẽ kām: —Tỳ. Omũj kýx pē ixkre nhīmōk ā na nhỹ. Anē.

¹⁹ Nhūm Simāw Pêtre arī kot mẽmoj pumunhta kukamā hamaxpēr o nhỹ nhūm Tīrtūm Karō kām mẽ hpōx xwýnhjê jarē nē kām:

—E Simāw Pêtre. Ota Ijaew kêt xwýnhjaja axkrunēpxi nē ajapēr o mō nē ra anhōrkwỹ hwỳr pōj.

²⁰ Mē hwỳr wrý nē mẽ kot amā mẽmoj jarēnh ma nē māmri axàmnhīx ma mẽ hkôt mō. Tanhmā ajamaxpēr to hkêt nē. Pa na pa awýr mẽ kumē nhūm mẽ mō. Anē.

²¹ Hāmri nhūm kuma nē mẽ hwỳr wrý nē mẽ omu nē mẽ kām:

—Pa? Xā pa na ka mẽ ijapēr o mō? E ot pa xa. Kam nē mẽ inhmā mẽmoj jarē pa mẽ ama. Mẽmo kaxyw na ka mẽ ixwýr mō? Anē.

²² Hāmri nhūm mẽ kām:

—Nà mẽ inhō patrāw Konēre na awýr mẽ inhmē pa mẽ mō. Na hte tām amnhī nhīpēx o pa. Nē Tīrtūm ā hpijaam nē kām mex o mex ā harēnh o pa. Nhūm mẽ inhō krī kamā Ijaew kām hkīnh nē. Tā na Tīrtūm kapēr o wrýk xwýnhja ham hwỳr wrý nē kām ajarē. Kot amnhī wýr atā karō nhūm ate hwỳr amōr nē kām axujarēnh kaxyw kām ajarēnh jakamā nhūm mẽ ixte ajaprōr kaxyw awýr mẽ inhmē pa mẽ man awýr mō. Anē.

²³ Hāmri nhūm mẽ kuma nē mẽ kām:

—Tōe nà na pa mẽ ama. E mẽ agjê nē akrī nē jar mẽ ixri nō kê apkati pu mẽ rī ma akupým mō. Anē.

Hāmri nhūm mẽ kuma nē mẽ hwỳr agjê.

Tā nhūm apkati nhūm mẽ akupým no-jarēt nhūm Simāw Pêtre ma mẽ hkôt mō. Nhūm Jope kamā mẽ kot Jesus kôt amnhī

xunhwÿr xwÿnh kwÿjaja ma mẽ hkôt mỗ. Nhũm mẽ mỗr o kamăt.

²⁴ Hămri nhũm apkati nhũm mẽ Sejarej wÿr hpôx o mỗ. Nhũm ra Konëre mẽ kutêp amnhĩ wÿr hkwÿjê ho akuprô nhũm mẽ Simăw Pêtre kutêp ôrkwÿ kamă akuprô nê hkrĩ.

²⁵ Hămri nhũm mẽ hwÿr pôj nê mẽ hwÿr àr kaxyw nhũm Konëre amnhĩ wÿr omu nê kànhmă xa nê kută tē nê hpar pē hkônkră ho tēm nê nhÿ.

²⁶ Hămri nhũm tee ri ja hă omu nê pa hă kupy nê kànhmă âm nê kăm:

—Kwa kànhmă xa. Ixpê Tirtũm kêt tă ka ri ã inhĩpêx anê. Anê.

²⁷ Hămri nê hkôt ôrkwÿ hwÿr axà nê kutêp mẽ pikuprôn nhũm xwÿnhjê pumu nê mẽ kăm:

²⁸ —Pa na ka mẽ arĩ akrĩ? E măn ra mẽ ate mẽ ixpê Ijaew kot amnhĩ nhĩpêx ã mẽ ixpumunh mex. Na pa htem mẽ apê axtem nhô xwÿnhjê hkôt ri ixpa hkêt nê. Nê mẽ anhôrkwÿ hwÿr inhgiêx kêt nê. Tă ham Tirtũm inhmă mẽ ixte ã amnhĩ nhĩpêx anhÿr o ixpaja nê ixkurê nê inhmă: “Kot paj pam mẽ hkwÿjaja mex ã mẽ harê ka mẽ kamă anhôkre kahak kêt nê.”

²⁹ —Anhÿr jakamă ka xep pre ixtă karô pa inhĩtôt kêt nê man mẽ awÿr inhmôr kurê kumrêx. E mẽ inhmă mẽmoj jarê pa mẽ ama. Mêmô kaxyw na ka mẽ ixtă karô? Anê.

³⁰ Hămri nhũm Konëre kăm:

—Nă jăă na pa pre jar inhôrkwÿ kamă Tirtũm mă amnhĩ jarênh o nhÿ. Ra myt xapanh grire pa kăm amnhĩ jarê. Hămri nhũm Tirtũm kapêr o wrÿk xwÿnh ixwÿr wrÿ nê hiră rax kăm xa.

³¹ Hămri nê inhmă: “Pa Konëre? E na hte Tirtũm ate kăm amnhĩ jarênh ta mar o hkrĩ. Nê ate mẽ kêp amrakati xwÿnhjê ho mex o apaja nhũm hă apumu.

³² Jakamă e ma Jope hwÿr amă mẽ àpênh xwÿnh kwÿ rē kē mẽ ma hwÿr mỗ nê kamă Simăw Pêtre japrô nê man akupÿn awÿr o mỗ. Mry kà ho mẽmoj nhĩpêx o pa xwÿnh Simăw nhôrkwÿ kamă na hte pa. Ôrkwÿja gô mÿ ri na.” Anê.

³³ —Ă kot inhmă kapêr anhÿr jakamă na pa kuma hămri nê awÿr jajê rēnh kurê kumrêx. Tă ka mẽ hkôt man mẽ ixwÿr mỗ nê ã apôx anê. Âm hămri na ka mẽ hkôt mỗ.

Mê apê Ijaew kot amnhĩ nhĩpêx kuhpa hă amnhĩ nhĩpêx nê axàmnhĩx man mẽ ixwÿr mỗ. Tă ot pa mẽ Tirtũm noo mă ixkrĩ. Kam nê mămri ŷ hă mẽ inhmă mẽmoj jarê pa mẽ ama. Anê.

Simăw Pêtre kot Konëre mă ujarênh

³⁴ Hămri nhũm Simăw Pêtre Konëre kot kăm amnhĩ jarênhja ma nê mẽ kăm awjarê nê mẽ kăm:

—Nă âm hămri na Tirtũm mẽ akukamă tanhmă inhmă kapêr to. Xep kăm mẽ ixpê Ijaew pix japê hkêt. Kăm mẽ pahpiită mẽ pajapê nê mẽ panhĩpêx o axpên pyrăk.

³⁵ Koja ahpÿnhă pyka piită hkôt mēhō mẽ ixpyră nê kêp Ijaew kêt tăă hkôt amnhĩ xăm nê hă hpijaam pē kăm mex o mex ã harê nê tăm amnhĩ nhĩpêx. Hămri nhũm Tirtũm ja hă omu nhũm ja kăm mex nê.

³⁶ —Na pre ra mẽ ixpê Ijaew mă tanhmă Kra Jejus Kris jarênh to. Jejus kot mẽ panê htyk kukwak ri na hte mẽ ixte hkôt amnhĩ xunhwÿr xwÿnhjê ho hkra. Tă ra măănēn ã mẽ apê Ijaew kêt xwÿnhjê mă ã amnhĩ jarênh anê nê Jejus htyk kukwak ri mẽ ate mẽ ixpyră nê hkôt amnhĩ xunhwÿr xwÿnhjê ho hkra. Jakamă Jejus Krisja kêp mẽ pahpiită mẽ panhō Pahiht.

³⁷⁻³⁸ —Măn ka prem ra harênh ma. Mẽ ixpê Ijaew nhô pika pē Jutej kumrêx kăm na pre Juăw Paxisja Jejus kukamă mẽ kăm harê nê mẽ hkră kumrăr o pa. Mẽ piită mẽ kot amnhĩ tomnuj kaga nê Tirtũm kôt amnhĩ xunhwÿr ã mẽ omunh xà hkôt mẽ hkră kumră. Jejusja krĩ pē Najare kamă na pre hprêk. Tă hwÿr na pre Tirtũm amnhĩ Karô mẽ nhũm wrÿ nê hkarô mă axà nê hkôt pa ho pa. Jakamă nhũm àhpumunh o àhpumunh nê ma krĩ piită hkôt tanhmă mẽ ho mex to ho ri mẽ hkôt pa. Pika pē Garirej kumrêx kamă mẽ piită ri mẽ kăm Tirtũm kapêr jarênh o pa. Nê mẽkarômnuti kot Satanasti nhÿ hă tanhmă mẽ ho xwÿnhjaja nhũm mẽ nê mẽkarômnuti japôx o pa. Ă na pre Tirtũm nhÿ hă amnhĩ nhĩpêx anhÿr o pa.

³⁹ —Tă Jejus nhÿ hă hkrajê jahkre ho mẽ ixpa xwÿnhjaja na pa prem kot ri tanhmă amnhĩ to ho pa hă omunh par o ri hkôt ixpa. Mẽ ixpê Ijaew nhô pyka kamă nê mẽ inhô krĩ pē Jerujarê kamă kot ri tanhmă amnhĩ nhĩpêx to ho paja pa prem piită

omunh o hkôt ri ixpa. Tã nhùm prem axtem nê mẽ ixpê pĩ kahpa hã kunhô nê kupĩ.

⁴⁰ Hãmri nhùm htyk o apkati axkrunêpxi nhùm Tĩrtũm akupỹm ho htĩr nê akupỹm mẽ ixwỳr kumẽ pa prem akupỹm htĩr kãm omu.

⁴¹ No nhùm mẽ piitã akupỹm htĩr kãm omunh kêt nê. ãm mẽ ixwỳr pix na pre kato nê mẽ ixkutã apku pa mẽ papxipixjaja akupỹm htĩr ã omu. Hãmri nhùm Tĩrtũm mẽ ixte ma mẽ piitã mẽ kãm akupỹm htĩr ã harênh o ri ixpa kaxyw mẽ ixrê.

⁴²⁻⁴³ Amnepêm Tĩrtũm nhỹ hã kapêr jarênh o mẽ pa xwỳnhjaja na prem Jejus kukamã tanhmã hã kagã hto nê mẽ kãm harênh o pa. Nê mẽ kãm:

Koja nhỹrmã mēhōja man mẽ pahwỳr wrỹ nê mẽ panê tanhmã amnhĩ nhĩpêx to. Ka mẽ atō amnhĩ kaxyw hkôt ajamaxpêr nê hkôt amnhĩ xãm hã koja Tĩrtũm ja hã apumu nê mēhō kot tanhmã mẽ panê amnhĩ nhĩpêx to xwỳnhhta kukwak ri amnhĩ katut kôt ate amnhĩ tomnuj rēnh pa nê axte kãm hamaxpêr kêt nê. Anê.

Na pre Tĩrtũm nhỹ hã kapêr jarênh o mẽ pa xwỳnhjaja Jejus kukamã ã harênh nê hã kagã anê. Tã koja Jejus nhỹrmã akupỹn wrỹ hãmri nê mẽ htyk xwỳnhjê nê arĩ mẽ htĩr xwỳnhjê mẽ pahto pimràatã tanhmã mẽ pajarênh to. Mẽ pahte tanhmã amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Hãmri nê Tĩrtũm mẽ wa kuri mẽ pahtĩr tũm nê mẽ papa ho papa mã xwỳnhjê jarê nê mãânēn wa kuri mẽ htĩr tũm kêt xwỳnhjê jarê. Mẽ pahpiitã tanhmã mẽ pajarênh to kaxyw na pre Tĩrtũm mẽ pakaxyw Jejus xãm. Tã ã kot mẽ pajarênh anhỹrja kukamã na pre mẽ ixte mẽ amã tanhmã harênh to ho ixpa kaxyw mẽ awỳr mẽ ixrê. Mẽ ate kapêr mar nê tokyx Jejus kôt amnhĩ xunhwỳr kaxyw. Anê.

⁴⁴ Nhùm Simãw Pêtre ã mẽ kãm ujarênh anhỹr rôm nhùm Tĩrtũm mẽ kot mar o hkrĩ xwỳnhjê hwỳr amnhĩ Karō rē nhùm mẽ hwỳr wrỹ nê mẽ hkarō mã gjêx pa.

⁴⁵⁻⁴⁶ Hãmri nhùm mẽ Tĩrtũm mã mex o mex ã harênh o hkrĩ. No ãm mẽ kapêr kãm harênh kêt nê. Mẽ kapêr kwỳ hō ho kãm

mex o mex ã harê. Aa mẽ kot mẽ kapêr mar kêt tã ra ho kapêr mex nê. Jakamã nhùm Jope rũm mẽ kot Simãw Pêtre hkôt mẽ mōr xwỳnhjaja. Ijaew kwỳ kot ra Jejus kôt amnhĩ xunhwỳr xwỳnhjaja amnhĩ jaêr pē ja hã mẽ omu nê axpēn mã:

—Hêxta waa nê. Mẽ kêp Ijaew kêt tã nhùm Tĩrtũm kot mẽ panhĩpêx pahpyrà nê mẽ hwỳr amnhĩ Karō rē nhùm mẽ hwỳr wrỹ nê mẽ kãm agjê. Nà ãm hãmri na mẽ pahpyrà nê ã mẽ hipêx anê. Anê.

Hãmri nhùm Simãw Pêtre mẽ kuma nê mẽ kãm:

⁴⁷ —Kwa pu mẽ hkrã kumrãr kurê kumrêx. Ra Tĩrtũm Karō kot mẽ pahpyrà nê mẽ hkarō mã gjêx kēnã kot kêt mēhō mẽ nê tanhmã mẽ pahpê àmnàr to. Ra mẽ kot mẽ pahpyrà nê Jejus kôt amnhĩ xunhwỳr kēnã. Anê.

⁴⁸ Hãmri nê Konêre mẽ hkwỳjê mã kãm:

—E kot paj mẽ ate Jejus Kris kôt amnhĩ xunhwỳr ã mẽ akrã kumrã. Anê.

Hãmri nê mẽ hkrã kumrãr pa nhùm mẽ Simãw Pêtre mã kãm:

—Kwa kormã anojarêt kêt nê. Kritpêm ri mẽ ixkôt ri apa hã atã apkati grêre nê kormã ma akupỹm mō. Anê.

Hãmri nhùm mẽ kuma nê mẽ hkôt ri pa hã apkati grêre hãmri nê nojarêt nê ma akupỹm mō.

11

Simãw Pêtre kot hkwỳjê mã Konêre jarênh Atre 10.1-48

¹⁻² Hãmri nhùm Simãw Pêtre ma akupỹm mō. Jutej kamã krĩ pē Jerujarê wỳr ma akupỹm mō hãmri nê pōj. Hãmri nhùm Jutej kamã Jejus nhỹ hã mẽ ahkre xwỳnh maatijê mẽ mẽ kot Jejus kôt amnhĩ xunhwỳr xwỳnhjaja Ijaew kêt xwỳnhjê jarênh ma. Konêre mẽ hkwỳ kot mẽ urak nê Jejus kôt amnhĩ xunhwỳr ã mẽ harênh ma. Jakamã nhùm Simãw Pêtre akupỹm mẽ hwỳr pōj nhùm mẽ omu nê mẽ hã àhkukjêr kurê kumrêx. Hãmri nhùm mẽ hkwỳjaja mẽ hã kãm akir nê kãm:

³ —Kwa mẽ pahpê Ijaew pyrà nê mẽ kot amnhĩ my kwỳt kã jakar kêt tã ka mẽmo hwỳr mẽ hwỳr mō mẽ kuri pōj nê mẽ kutã apku. Anê.

⁴ Hāmri nhūm Pêtre tee ri mẽ kuma hāmri nē hprī hā mẽ kām amnhī jarē. Nē tanhmā Tirtūm kot kām Ijaew kêt xwýnhjê jarēnh to hā mẽ kām harē nē mẽ kām:

⁵ —Kwa mẽ ã ri ajamaxpēr anhýr kêt nē. E pa mẽ amā amnhī jarē ka mẽ inhma mǎn. Nà na pa pre jāã Jope kamā Tirtūm mã amnhī jarēnh o nhý nē te ixpimtir kām mẽmoj pumunh pyrək. Nhūm mẽmojja te mẽ hpipro xà pyrà nē kaxkwa rūm ixwýr wrýk o mõ pa ixprī hā omu.

⁶ Nhūm kamā mry piitāã. Mry xoprê nē mry xuwapô nē mry hpar o ri pa xwýnhjaja nē mry htumýr pê ri pa xwýnhjaja nē àk. Nē mẽ pahte hkur xwýnhjaja nē mẽ pahte hkur kêt xwýnhjaja.

⁷ Kamā mry piitā pa omu. Hāmri nhūm Tirtūm inhmā: “Pa Simāw Pêtre? Mǎn ka ra amā prām nē nà? E kànhmā xa nē axàmnhīx māmri mryta ô kapi nē apī nē ho anē nē aku. Piitā mẽ ate hkur mã mex.” Anē.

⁸ —Pa tee ri kuma nē kām: “Kwa Pahi Maati. Mẽ ixpê Ijaewjaja mẽ ixte mryja piitā hkur kêt. ãm hkwy hpix na pa htem kuku. No ja hkwy aa mẽ ixte hō hkwy hkrēr kêt.” Anē.

⁹ Nhūm inhmā: “Nà nom kot anhýr tǎã. Kot paj pam amā mẽmoj jarē ka kamā anhōkre kahak kêt nē. Jakamā e māmri amnhīm hō kapi nē apī nē ho anē nē axàmnhīx hkwy hkrē.” Anē.

¹⁰ —Na pre ã Ijaew kêt xwýnhjê hwýr inhmōr kukamā inhmā karō ho axkrunēpxi anē. Nom hā kuxi nē inhmā mẽ pahte mry kur kêeta jarē. Hāmri nhūm mẽ hpipro xàja ma akupým kaxkwa hwýr api nē kakrām axà nē akunok.

¹¹ Hāmri nhūm Ijaew kêt xwýnhjaja mẽ ixwýr axkrunēpxi nē mra nē pøj. Konēreja Sejarej rūm ixwýr mẽ rēnh xwýnhjaja nhūm mẽ mra nē ixwýr pøj.

¹² Hāmri nhūm Tirtūm Karō ma mẽ hkôt inhmē. Mẽ kēp Ijaew kêt tǎ nhūm ixàmnhīx ma mẽ hkôt ixpa kaxyw mẽ hkôt inhmē pa ma mẽ hkôt mõ. Nhūm Jope kamā mẽ kot Jejus kôt amnhī xunhwýr xwýnh kwýjaja kēp 6ja ma mẽ ixkôt mõ. Pa mẽ mõ nē Sejarej kamā Konēreja wýr pøj.

¹³ Hāmri nhūm mẽ ixpumu nē mẽ inhmā amnhī jarē. Tirtūm kapēr o wrýk xwýnh kot hwýr wrýk nē òrkwy hwýr àr nē tanhmā

kām kapēr toja nhūm inhmā harē. Na xep pre kām: “E kêr ka ma Jope hwýr amā mẽ àpēnh xwýnh kwýjê rē kē mẽ ma hwýr mõ. Hāmri nē kamā Simāw Pêtre japrô nē man akupým awýr o mõ kē tanhmā mẽ amā ujarēnh to.

¹⁴ Koja mẽ amā tanhmā mẽ apê Tirtūm kra hprām xàj tanhmā mẽ ate amnhī nhīpêx to hā mẽ amā karō ka mẽ ama nē mar týt nē hkôt amnhī nhīpêx. Ka mẽ anhōrkwy kamā akwýjê mẽ apimràatã ama nē mar týt nē. Hāmri nē kot mẽ amā hā karō xà hkôt amnhī nhīpêx nhūm Jejus mẽ ate amnhī tomnuj pê mẽ apytàr pa.” Anē.

—Na xep pre ã Tirtūm kapēr o wrýk xwýnhja kām ijarēnh anē. Jakamā nhūm ixwýr jajê rē pa ma mẽ hkôt mõ.

¹⁵ Hāmri nē kormā mẽ kām tanhmā Jejus jarēnh to. Tanhmā kot mẽ panê amnhī nhīpêx to hā harē. Nē kormā mẽ kām ixujarēnh o ixām rôm nhūm Tirtūm Karō te wam kot mẽ panhīpêxta pyrà nē mẽ hwýr wrý nē mẽ hkarō mã gjêx pa.

¹⁶ Pa ja hā mẽ omu nē Pahihti Jejus kot akupým kaxkwa hwýr nojarêt nē tanhmā mẽ pamā kapēr tota mã ijamaxpēr kurê kumrêx. Na pre mẽ pamā: “Finat Juāw Paxis na pre hte gô ho mẽ hkrā kumrār o pa. Tǎ koja Tirtūm ta hpānhã mẽ awýr amnhī Karō rē nhūm mẽ akarō mã agjê.” Anē.

—ã na pre Pahihti Jejus akupým nojarêt nē mẽ pamā kapēr anē. Jakamā pa ã kot mẽ hipêx anhýr ã mẽ omu nē ã kapēr anhýrja mã ijamaxpēr kurê kumrêx.

¹⁷ Na pu prem Pahihti Jejus Kris kôt amnhī xunhwý nhūm Tirtūm ja hā mẽ pahpumu nē mẽ pahwýr amnhī Karō rē. Tǎ te kot mẽ panhīpêxta pyrà nē mãânēn Ijaew kêt xwýnhjtajê hwýr kurê nhūm mẽ hkarō mã agjê. Mẽ kēp Ijaew kêt tǎ nhūm mẽ pahpyrà nē mẽ hwýr kurê nhūm mẽ hkarō mã agjê. Tirtūm tǎm kot amnhī krā hkôt mẽ hwýr rēnh kēnã kot pa kêt mẽ nē tanhmā kēp ixàmnr to. Anē.

¹⁸ Nhūm pre ã Simāw Pêtre mẽ kām amnhī jarēnh anē nhūm mẽ kuma nē tǎm hamaxpēr nē hkīnh nē. Nē axte mẽ hā tanhmā kām nē hkêt nē. ãm mẽ hā Tirtūm mã mex o mex ã harē. Hāmri nē axpēn mã:

—Nà ãm hãmri. Mẽ kêp Ijaew kêt tâ na prem Jejus kôt amnhĩ xunhwỳ nhũm Tĩrtũm kot mẽ panhĩpêxta pyrà nẽ amnhĩ katut kôt mẽ kot amnhĩ tomnuj rênh pa. Nhỹrmã wa hkuri mẽ pahpyrà nẽ htĩr tũm nẽ pa ho pa kaxyw nhũm ã mẽ hipêx anẽ. Nà ãm hãmri na ã kot mẽ panhĩpêx pyrà nẽ mẽ hipêx anẽ. Anẽ.

ãxiok kamã Jejus kwỳ jarênh
Atre 4.36-37

¹⁹ Tã ra mẽ kot kên o Estewãw kapêr o hpĩr xwỳj ri mẽ kot ã hipêx anhỹrta pyrà nẽ mẽ kot Jejus kôt amnhĩ xunhwỳr xwỳnhjaja omnuj tỳx o pa. Jakamã nhũm mẽ hkwỳjaja mẽ umaj ma ahpỹnhã krĩ hkwỳ hkôt pi-granh pa. Wẽnĩs wỳr nẽ Sipre hwỳr nẽ ãxiok hwỳr nhũm mẽ ma ahpỹnhã krĩ hkwỳ hkôt angrã nẽ kamã pa ho pa. Nẽ mẽ kãm tanhmã Pahihti Jejus kot mẽ panê amnhĩ nhĩpêx to hã harênh o ri mẽ hkôt pa. No ãm kormã Ijaew pix mã harênh o pa.

²⁰ Tã hãmri nhũm mẽ hkwỳjaja Sipre mẽ Sirên rũm ãxiok hwỳr pan pôj. Hãmri nẽ kamã mẽ kêp Ijaew kêt xwỳnhjê mã Pahihti Jejus kot amnhĩ nhĩpêx jarênh o pa. ã mẽ kot amnhĩ nhĩpêx anhỹr jakamã na mẽ ra ahpỹnhã ri mẽ kãm harênh o ri pa. Ijaew mã nẽ mãânên Ijaew kêt xwỳnhjê mã

²¹ nhũm mẽ ma mẽ hkôt ri Pahihti Jejus nhỹ hã mẽ kãm kapêr jarênh o ri mẽ hkôt pa. Hãmri nhũm mẽ ohtô nẽ amnhĩ nhĩpêx tũm kaga hpa nẽ hpãnhã amnhĩ kaxyw Jejus kôt hamaxpêr nẽ hkôt amnhĩ xunhwỳ.

²² Hãmri nhũm Jerujarê kamã Jejus kwỳjaja mẽ harênh ma nẽ mẽ hwỳr Panãpe mẽ. ãxiok hwỳr mẽ hwỳr kumẽ. Ma mẽ hwỳr mõi nẽ Jejus kôt mẽ hamaxpêr o hihtỳx kaxyw.

²³ Hãmri nhũm ma mẽ hwỳr mõi nẽ mẽ hwỳr pøj nẽ mẽ omu. Tĩrtũm kot mẽ ho mex ã mẽ omu hãmri nẽ mẽ ã hã hkĩnh nẽ. Nẽ mẽ kãm:

—Nà ãm hãmri na ka mẽ ra Jejus kôt amnhĩ xunhwỳ nẽ hkôt amnhĩ nhĩpêx mex o ri apa. Tã kêt ka mẽ ãm kapêr kôt pix mã ri amnhĩ nhĩpêx rãhã ho ri apa nẽ aa hkaga hkêt nẽ. Anẽ.

²⁴ Panãpeja na pre tãm amnhĩ nhĩpêx o pa. Nẽ amnhĩ kaxyw Jejus kôt pix mã hamaxpêr mex o pa. Nẽ Tĩrtũm Karõ hkôt

amnhĩ nhĩpêx rãhã jakamã na pre hte ã hã mẽ kãm Pahihti Jejus kot mẽ panê tanhmã amnhĩ nhĩpêx to hã harênh o ri mẽ hkôt pa. Hãmri nhũm mẽ kuma nẽ ohtô nẽ Jejus kôt amnhĩ xunhwỳ.

²⁵ Tã nhũm Panãpe ãxiok rũm kato nẽ kot Sawti japrôr kaxyw ma krĩ pê Tas hwỳr mõi.

²⁶ Hãmri nẽ hwỳr pøj nẽ Sawti pumu nẽ haprô nẽ ma akupỹm amnhĩ kôt ãxiok hwỳr o mõi. Hãmri nẽ kamã mẽ kot Jejus kôt amnhĩ xunhwỳr xwỳnhjê hkôt wa ri pa hã angrã pyxi nẽ hapêx. Nẽ mẽ ho ohtô nẽ ri mẽ kãm Jejus kapêr o mẽ ahkre ho ri mẽ hkôt pa. Jakamã nhũm krĩ nhõ xwỳnhjaja mẽ kot Jejus kôt amnhĩ nhĩpêx xwỳnhjê pumu nẽ mẽ hã mẽ hixi rẽ nẽ mẽ harênh o: “Kris tõi nẽ htõxjaja” anhỹr o mẽ harê. ãxiok kumrêx kãm na prem ã mẽ kot Jejus kôt amnhĩ xunhwỳr xwỳnhjê jarênh anẽ. Jakamã nhũm mẽ piitã ã mẽ harênh anhỹr o pa.

²⁷ Tã nhũm Panãpe mẽ Sawti wa kormã ãxiok kamã paja rôm nhũm Tĩrtũm nhỹ hã kapêr jarênh xwỳnh kwỳjaja mẽ hwỳr mran pøj. Jerujarê rũm mẽ hwỳr mran pøj.

²⁸ Hãmri nhũm mẽ piitã mẽ kot mẽ kapêr mar kaxyw mẽ hwỳr akuprõ. Jakamã nhũm hõ pê Akapõja kãnhmã xa nẽ tanhmã mẽ kãm ujarênh to. Tĩrtũm Karõ nhỹ hã mẽmoj kukamã mẽ kãm awjarê nẽ mẽ kãm:

—Kwa okora kêt ka mẽ axkãm ajamak rom. Koja tokyx pika piitã hkôt mẽ apkur xã hã mẽõja mẽ kêp hkryre nẽ mẽ piitã mẽ hipêx kêt nẽ. Anẽ.

Tã nhũm gaa nẽ ujarênh xàja kôt mẽmoj ã amnhĩ nhĩpêx anẽ. Kormã Pahihti Krawti kot mẽ ho amnhĩptar ri nhũm mẽmoj ã amnhĩ nhĩpêx anẽ. No nhũm kormã ã amnhĩ nhĩpêx anhỹr kêt ri nhũm Akapõja kukamã ã mẽ kãm ujarênh anẽ.

²⁹ Hãmri nhũm mẽ kuma nẽ tee ri Jutej kamã Jejus kôt mẽ hkwỳjê hkukamã hamaxpêr nẽ axpên mã:

—E kwa pu mẽ Jutej kamã Jejus kôt mẽ pahtõi nẽ pahtõxjê mã pahkãxpore hkwỳ gõ kê mẽ ho amnhĩm awjaprõ nẽ hkur o pa. Anẽ.

Hãmri nẽ mẽ kaxyw kãxpore hkwỳ ho akuprõ. Nhũm mẽ hikãxpore hkryre xwỳnhjaja ãm mẽ kãm ho hkryre nẽ kugõ

nhũm mẽ hikàxpore rũnh xwýnhja mẽ kãm ho rũnh nẽ kugõ.

³⁰ Jakamã nhũm mẽ ho hpikuprõnh pa nẽ Panãpe mẽ Sawti wa kot mẽ hwýr o mõi nẽ mẽ kãm õr kaxyw wa kãm kugõ. Hãmri nhũm wa hamý nẽ ma Jutej kamã Jerujarẽ hwýr mẽ hwýr o mõi. Hãmri nẽ hwýr põi nẽ mẽ kot Jejus kapër o mẽ ahkre xwýnhjẽ mã kugõ. Hãmri nhũm mẽ kãm Jejus kõt mẽ htõ nẽ htõxjẽ mã o anhrã nhũm mẽ hamý nẽ hkĩnh nẽ ho amnhĩm awjaprõ.

12

Mẽ kot Simãw Pêtre pynênh nẽ haxãr ã mẽ harênh

Matêwre 18.19-20

¹ Tã nhũm mẽ õ pahi Eroxa õ põiристи mã Kris kwýjẽ mã amýnê nhũm mẽ mẽ hipêx kati nẽ nhũm mẽ amnhĩ xã htýx kamã hamak o pa.

² Juãw tõi Xiakreja nhũm mẽ pahi Erox nhý mã unê nẽ hkanhwýr o kupĩ.

³ Hãmri nhũm Ijaew kãm ja mex jakamã nhũm pahi Erox hpãnhã mẽ kãm Simãw Pêtre mã amýnê nhũm unê nẽ haxã. Mẽ kot pãwti kaxkrit kêt kur ã mẽ hkĩnh xã mã arĩgro pẽ Pasja ã nhũm prem unê.

⁴ Na pre Erox Simãw Pêtre hkukamã hamaxpër o:

—Nã koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anẽ.

Hãmri nhũm põiристи kot Simãw Pêtre jamãr xwýnhjaja kęp 16. Nhũm mẽ axpẽn pãnhã kęp 4 kapẽn nẽ hamãr rãhã ho kuhê.

⁵ Nhũm arĩ mẽ hagjênh xã kamã hkrĩ ho hkrĩ. Hãmri nhũm Kris kõt htõ nẽ htõxjaja harênh ma nẽ tee ri hkukamã hamaxpër hãmri nẽ axpẽn wýr akuprõ nẽ ho Tĩrtũm wýr rãhã ho hkrĩ.

Tĩrtũm kapër o wryk xwýnh kot Simãw Pêtre kator ã harênh

⁶ Tã nhũm ra mẽ hkĩnh hapêx nhũm kamãt. Hãmri nhũm pahi Erox kot tanhmã Simãw Pêtre ho xã mã arĩgroja wýr nhũm kamãt nhũm põiристijaja arĩ mẽ hagjênh xã kamã hamãr mex o kuhê. Nhũm kuri wa hamêxkrut nẽ akutã hijê nẽ hamãr o nõ. Kãx o akutã kãm ê nẽ wa ho nõ nhũm wa hkaêx kãm htýx gõi nẽ nõ. Nhũm ja wa hakwa krem mããnhẽn hamãr o xa.

⁷ Puh nhũm Tĩrtũm kapër o wryk xwýnhjẽ hõja mẽ hwýr axã nẽ wryhtak rax kãm xa. Hãmri nẽ Simãw Pêtre grêk nẽ kumra nẽ kãm:

—Pa Simãw Pêtre? E kwa tokyj kãnhmã xa pu mõi. Anẽ.

Hãmri nhũm hkrãkato nẽ omu nẽ kãnhmã ãm kurê kumrêx nhũm kaxprexã mã kãxja axrê nẽ pykap rõirok nẽ hikwý. No nhũm kuri põiристи wa nõr xwýnhja wa mar kêt nẽ. Wa arĩ õt týx nẽ nõ.

⁸ Hãmri nhũm Tĩrtũm kapër o wryk xwýnhja Simãw Pêtre mã:

—E tokyx anhõ kamĩs jaxã nẽ amnẽ ixkõt tẽ pu pakato nẽ ma tẽ. Anẽ.

⁹ Hãmri nhũm kamĩs nẽ hparkã jaxã nẽ ma hkõt tẽ. No ãm kormã amnhĩ pumunh mex kêt nẽ. Te hpimtir kãm ã kot amnhĩ nhĩpêx anhýr pyrãk ã amnhĩ kamnhĩx.

¹⁰ Hãmri nhũm wa hakwakrem põiристи wa kot hamãr o wa ãm xwýnhja hãnh wa tẽ nẽ wa hakre nẽ hpãnhã ihõja wa hãnh wa tẽ no nhũm mẽ õt týx nẽ hkrĩ nẽ wa omunh kêt nẽ. Nhũm wa hakwakre nhĩtep xã hkõt wa tẽn kato nẽ hpãnhã krĩ nẽ kahê xã mã hakwakreja wýr wa tẽ. Hãmri nhũm tãm wa kãm amnhĩ kahê xã mẽ nhũm wa kato nẽ pry mã tẽ. Ja kõt nhũm Tĩrtũm kapër o wryk xwýnhja akunok nhũm Simãw Pêtre axte omunh kêt nẽ.

¹¹ Hãmri nẽ hprĩ mã amnhĩ pumunh kurê kumrêx nẽ hamaxpër o:

—Kwa te ixpimtir kãm ã ixte amnhĩ nhĩpêx anhýr pyrãk mã xep ixpimtir kêt. Tĩrtũm na ixwýr kapër o wryk xwýnhja mẽ nhũm ixwýr wry nẽ mẽ kęp ixkator. Pahi Erox ra kot ixpĩr nhũm ixkwý Ijaew kãm ja prãm mã nhũm mẽ kęp ixkator. Nã ãm hãmri na Tĩrtũm ã mẽ kęp ixkator anẽ. Anẽ.

¹² Hãmri nẽ Marir nhõrkwý hwýr htẽm kurê kumrêx. Juãw Makre katorxã Marirja nhũm õrkwý hwýr tẽ nhũm mẽ ra kamã hpikuprõnh rax nẽ ho Tĩrtũm wýr o hkrĩ nhũm tãm mẽ hwýr tẽ.

¹³ Hãmri nẽ kormã kapõt ã hakwa krem mẽ kãm kahê xã tatak o xa nhũm ixkre kamã mẽ kãm ãpênh xwýnh Rotreja kuma nẽ hwýr tẽ.

¹⁴ Hãmri nhũm kãm kapër nhũm amnhĩ jaer pẽ kuma nẽ hkĩnh nẽ. Nẽ kormã kãm kahê xã mẽnẽ kêt ri ma akupým tẽ nẽ mẽ

kot ho Tirtũm wÿr xwÿnhjê hwÿr axà nê mẽ kãm:

—Xê pěr Simãw Pêtre na tẽ nê kapôt ã hakwakrem xa nê inhmã kapěr.

¹⁵ Hãmri nhũm mẽ tee ri kuma nê kãm:

—Kwa arĩ mẽ hagjênh xà kamã hkrĩ kênã.

Mãn ka tanhmã amnhĩ krã amnhĩ to hã na ka ri atÿx ã akapěr anê. Anê.

Hãmri nhũm mẽ kãm:

—Ma tanhmã kot pa kêt ri ixkrã amnhĩ to? ãm hãmri na pa mẽ amã harê. Mẽ kam nê mra nê omu. Anê.

Nom nhũm mẽ kuma nê ãm kuma nê kãm:

—Nà tãm kêt. Kaxkwa rũm Tirtũm mã hamãr o pa xwÿnh mãm amã kapěr nom tãm kêt. Anê.

¹⁶ Rôm nhũm Simãw Pêtre arĩ hakwakre tatak o xa. Hãmri nhũm mẽ jatã hwÿr mra nê kãm kahê xà mẽ nê amnhĩ jaêr pê omu nê hkĩnh nê.

¹⁷ Hãmri nhũm kànhmã mẽ kãm ãhkra hpẽ nê mẽ ho hpinhkrênh pa nê mẽ kãm:

—Nà Tirtũm na ixwÿr kapěr o wrÿk xwÿnhja mẽ nhũm ixwÿr wrÿ nê pôristi pê ixkator. Anê.

Hãmri nê mẽ kãm:

—E kêr ka mẽ Xiakre nê Jejus kôt mẽ pahtõ nê pahtõxjê mã ijarê kê mẽ ijarênh mar kurê kumrêx. Nom kot paj ixkato nê ma krĩ hõ hwÿr mō. Anê.

Hãmri nê mẽ kêp kato nê ma mō.

¹⁸ Tã nhũm apkati nhũm pôristi kot hamãr o hkrĩ xwÿnhjaja hkrã hapõj nê tee hapêr nê nhÿri omunh kêt nê. Hãmri nê tee ri amnhĩ kukamã hamaxpêr o kãm ma htÿx kumrêx nê axpên mã:

—Kwa tanhmã na pre we amnhĩ to nê mẽ pahpê akunok? Tanhmã koja we pahi Erox hã mẽ pahkukja pu mẽ harênh to? Anê.

¹⁹ Hãmri nhũm pahi Erox hpikunor ã harênh ma nê axtem pôristi hkwyjê mã anê nhũm mẽ mra nê tee ri mẽ hagjênh xà kamã hapêr nom nhÿri omunh kêt nê. Hãmri nhũm Erox mẽ kot hamãr xwÿnhjê kamã gryk tÿx kumrêx nê amnhĩ wÿr mẽ hã karõ nê mẽ kãm:

—Kwa nok? Mẽ ate hamãr rãhã ho akuhê hã ixte mẽ amã karõ htã nhũm tanhmã amnhĩ to nê akunok. Nà kot paj mẽ anhĩmex ka mẽ rĩ amnhĩ pumu. Anê.

Hãmri nhũm mẽ tee ri kãm amnhĩ tã aprãr kaprÿ nhũm mẽ hã amÿnê nhũm mẽ

ho kator nê ma mẽ o mra nê mẽ himex. Hãmri nhũm pahi Erox Jutej rũm kato nê ma Sejarej wÿr mō nê hpãnhã kamã pa ho pa.

Pahi Erox tanhmã htyk to hã harênh

Wam Pêtre 1.24-25

²⁰ Krĩ pê Xir mẽ Sito wa kamã mẽ pa xwÿnhjaja na pre htem pahi Erox nhõ pyka hwÿr pa nê mẽ kêp amnhĩm apkur xà hã mẽõ japrôr o pa. Tã nhũm Erox kot mẽmoj mÿrapê mẽ kamã gryk jakamã nhũm mẽ tee ri mẽ kêp ujaprôr kaxyw mẽ hwÿr mra nom nhũm mẽ kãm mẽmoj kwÿ ho wênê hkêt nê. Hãmri nhũm mẽ tee ri amnhĩ kukamã hamaxpêr nê pahi Erox nhõ kôwenatô Pratôja wÿr mra nê kãm:

—E awÿr na pa mẽ mra. Kwa mẽ ixyr pê pahi Erox mã tanhmã akapêr to kê ama nê mẽ ixkamã gryk kêt nê. Pa mẽ axte mẽ awÿr mra nê mẽ apê mẽmoj kwÿ japrôr o ri ixpa. Anê.

²¹ Hãmri nhũm mẽ kuma nê hwÿr tẽ nê mẽ yr pê tanhmã kãm kapêr to nhũm kuma hãmri nê kot tanhmã mẽ kãm kapêr to kaxyw mẽ kãm arĩgro hta.

Tã nhũm ra kot arĩgro hyr xwÿnhhta kato nhũm Erox kêp pahi hã ê mex jaxà nê tẽ nê kêp pahi hã mẽ hkrĩ xà kamã nhÿ nê tanhmã mẽ kãm kapêr to.

²² Mẽ kãm kapêr rÿy nê. Hãmri nhũm mẽ kuma nê hêx rom kãm mex o mex ã harê. Nê kÿx pêê axpên mã harê nê harênh o:

—Kwa pahi Erox kêp mẽ panhĩõ hkêt. Pêr kaxkwa rũm Mẽpahpãm na pre mẽ pahwÿr wrÿ nê ã mẽ pamã kapêr mex anê. Anê.

Hãmri nê te kêp Tirtũm pyrãk o hipêx nê kãm mex o mex ã harê. Nom hêx rom ã harênh anê. Kot mẽ mar nê kãm mẽ hkĩnh nê akupÿm mẽ kãm mẽmoj to wênê hprãm xàj nhũm mẽ hêx rom ã axpên mã mex ã harênh anê.

²³ Hãmri nhũm mẽ kuma nhũm ja kãm mex nê nhũm hkĩnh nê mẽ mar o nhÿ nê kêp Tirtũm pyrãk ã harênhja nê tanhmã mẽ kãm nê hkêt nê. Jakamã nhũm tee ri amnhĩ tã omu nê hwÿr kapêr o wrÿk xwÿnhjê hõ mẽ nhũm hwÿr wrÿ nê tanhmã ho nhũm õhy kamã kutõj rax nê htyk tokyx anê.

Panãpe mẽ Sawti wa akupÿm ãxiok hwÿr mōr ã wa harênh
Atre 11.27-30

²⁴ Tã nhũm mẽ ra ohtô nẽ Tĩrtũm Kra Jejus kot tanhmã mẽ panê amnhĩ nhĩpêx to hã harênh ma nẽ hkôt amnhĩ xunhwỳ.

²⁵ Hãmri nhũm Panãpe mẽ Sawti wa ra Kris kôt htõ nẽ htõxjê mã kàxporeta jamỳ nẽ ma Jerujarê hwỳr o mỗ nẽ mẽ kãm kugõ. Hãmri nẽ ma akupỹm ãxiok hwỳr nojarê nẽ war amnhĩ kôt Juãw Makre o mỗ. Hãmri nẽ mẽ ma mỗ nẽ akupỹm mẽ hwỳr pỏj.

13

Tĩrtũm kot Panãpe mẽ Sawti wa hyr Atre 9.15-16; Rõmãn 1.1

¹ ãxiok kamã Kris kôt mẽ kot axpẽn to htõjaja kot Tĩrtũm nhỹ hã kapêr o mẽ ahkre ho pa xwỳnhjê nhĩxi ã kot anhỹr. Na pre Panãpe nẽ Sawti nẽ Simeãw kà htykre nẽ Rusti pê Sirên nhõ xwỳnh nẽ pahi Erox kràmnhwỳ Mãnahẽja.

² Jakamã nhũm prem mẽmo arĩgro hã axpẽn wỳr akuprõ nẽ Tĩrtũm mã mex o mex ã harênh kaxyw apkur kêt rãhã kãm amnhĩ jarênh o hkrĩ. Hãmri nhũm Tĩrtũm Karõ mẽ kãm tanhmã kapêr o amnhĩrit to nẽ mẽ kãm:

—E kêt ka mẽ Panãpe mẽ Sawti war ata nẽ wa kot inhmã tanhmã amnhĩ nhĩpêx to ho pa kaxyw wa ãm. Anẽ.

³ Hãmri nhũm mẽ kuma nẽ wa hyr kurê kumrêx nẽ wa himõk ã mẽ ìhkra jaxwỳ nẽ wa ho Tĩrtũm wỳ. Hãmri nẽ wa kot Tĩrtũm mã tanhmã amnhĩ nhĩpêx to ho pa kaxyw wa kumẽ nhũm wa ma mỗ.

Wajaga kot Jejus nẽ hkràmnhwỳ kurê hã harênh

Atre 8.9-24

⁴⁻⁵ Tã nhũm Tĩrtũm Karõ krĩ pê Serêw wỳr Panãpe mẽ Sawti wa kumẽ nhũm wa ma hwỳr mỗ. Nẽ amnhĩ kôt Juãw Makre ho mỗ. Kot tanhmã wa ho ajuta hto ho wa hkôt pa kaxyw. Hãmri nẽ wa mẽ mỗ nẽ Serêw wỳr pỏj nẽ pàr krem axà nẽ ma gỏ hipỏk pê Sipre hwỳr mỗ. Hãmri nẽ gỏ hipỏk ã krĩ pê Saramĩn wỳr pỏj nẽ Ijaew nhõ Tĩrtũm kapêr o mẽ ahkre xà hã ixkre hwỳr tẽ nẽ kamã Jejus kot mẽ panê tanhmã amnhĩ nhĩpêx to hã mẽ kãm harênh o wa xa.

⁶⁻⁸ Tã nhũm mẽ krĩja rũm kato nẽ hpãnãhã gỏ hipỏk kôt mỗ nẽ hatur xà kamã krĩ pê Papos wỳr pỏj. Hãmri nẽ kamã wajaga Pajejus pumu. Gresjê kapêr kãm hixi pê

Erĩm. Erĩm haxwỳja kêp Ijaew. Na pre hte hêx rom te kêp Tĩrtũm nhỹ hã kapêr jarênh o pa xwỳnh pyrak o amnhĩ nhĩpêx nẽ ma mẽ kãm ujarênh o ri mẽ hkôt pa. No ãm mẽ kãm amnhĩ to hêx o pa. Gỏ hipỏkja ã pahi Sejupaw hkràmnhwỳ na pre. Pahi Sejupawja àhpumunh tỳx jakamã na pre Panãpe mẽ Sawti wa harênh ma nẽ kãm wa kapêr mar prãm nẽ wa kot kãm Tĩrtũm kapêr jarênh kaxyw amnhĩ wỳr wa kuwỳ. Nom nhũm hkràmnhwỳ wajaga Erĩmja kãm wa hkrĩnh kêt nẽ wa nê kãm kapêr kãm hihtỳx nẽ kãm:

—Kwa nà wa kapêr mar kêt nẽ. Kot kaj war ama nẽ wa urak nẽ amnhĩ kaxyw Jejus kôt ajamaxpêr nẽ hkôt amnhĩ xãm. Kwarĩ wa kapêr mar kêt nẽ. Anẽ.

⁹ Hãmri nhũm Sawti ra axtem pãnãhã hixi. Ra hpãnãhã kêp Pawre. Nhũm Tĩrtũm Karõ ra hkarõ mã àr jakamã nhũm ã hã wajagata pumu nẽ wa nê hkràmnhwỳ mã kapêr ã kãm akir nẽ kãm:

¹⁰ —Tk. Kwa pêr apê Satanasti hkwy hã na ka ã wa inhnê kãm akapêr anẽ. Na ka hte mẽmoj punuj pix kukamã ajamaxpêr nẽ mẽmoj mex nẽ mẽ no kupyur o apa. Tĩrtũm kapêr mex kumrêx tã ka axtem nẽ nẽ mẽ hkurê ho ri apa.

¹¹ ã ate amnhĩ nhĩpêx anhỹrja mỳrapê koja Tĩrtũm tanhmã ato ka ano hkre nẽ arĩt kêt o atã apkati xohtõ nẽ kãm ga. Anẽ.

Hãmri nhũm no hkre kurê kumrêx nẽ tee ri rĩt kaxyw no pikrar pỹnh o xa nom mẽmoj pumunh kêt nẽ. Hãmri nẽ mẽhõ kot hpa hã hpyr nẽ ỏrkwỹ hwỳr ho mỏr kaxyw ri amnhĩ pu hã mẽ hapêr pênh o xa.

¹² Hãmri nhũm hkràmnhwỳ pahihtija tee ri ja hã omu nẽ amnhĩ kaxyw Jejus kôt hamaxpêr nẽ hkôt amnhĩ xãm kurê kumrêx. Hãmri nẽ Pawre mẽ Panãpe wa kot tanhmã Tĩrtũm kapêr jarênh to hã wa kuma nẽ hamaxpêr o:

—Hêxta waa nẽ. Aa ixte ã mẽhõ kapêr kot anhỹr mar kêt tã pa jarãhã kuma. Nà ãm hãmri na Jejus jarênhja. Anẽ.

Pawre mẽ Panãpe ãxiok õ hwỳr wa mỏr ã wa harênh

Atre 15.38

¹³ Tã nhũm Pawre mẽ Panãpe mẽ Juãw Makre wa mẽ krĩ pê Papos rũm kato nẽ

hpānhã ma pyka hõ hwÿr mō. Pār kām ma pyka pē Pāpir wÿr mō nē kamã krī pē Perke hwÿr pōj. Hāmri nhūm Juāw Makre tanhmã hamaxpēr to nē tee ri axte wa hkôt mōr kukamã hamaxpēr hāmri nē wa hkaga nē awjanã nē ma akupÿm Jerujarē hwÿr ahte mō.

¹⁴ Jakamã nhūm Pawre mē Panāpe wa ahte Perke rūm kato nē hamū pika pē Pisit kām krī pē āxiok wÿr mō nē hwÿr pōj. Nhūm Ijaew nhõ arīgromnu pē sap kato nhūm wa Tirtūm kapēr o mē ahkre xà hã ixkre hwÿr wa tē nē hwÿr axà nē nhÿ.

¹⁵ Hāmri nhūm mēhõ mē kām Tirtūm kapēr ā kagà htūm kwÿ kamã harēnh o xa. Mojes mē Tirtūm nhÿ hã kapēr o mē pa xwÿnh kot kapēr ā kagà hkwy kamã nhūm mē kām kamã harēnh o xa. Hāmri nē kamã harēnh pa nhūm mē ahkre xwÿnhjaja Pawreja wa omu nē wa hwÿr mēhõ mē nhūm wa hwÿr tē nē wa kām:

—E na mē ijahkre xwÿnhjaja war ate mē inhmã axujarēnh prām nē māmri mē inhmã mēmoj jarēnh kaxyw nhūm mē war atã anē. Anē.

¹⁶ Hāmri nhūm wa kuma nhūm Pawre kànhmã xa nē mē hpinhkrēnh kaxyw mē kām kànhmã ihkra nhūm mē omu nē hpinhkrēnh pa nhūm mē kām awjarē. Amnhĩ kwÿ pē Ijaewjē mē mē kēp Ijaew kēt xwÿnhjē kām Tirtūm kīnh xwÿnhjē mã nhūm mē kām awjarē. Nē mē kām kapēr ryy nē. Tirtūm kot tanhmã mē hkukamã Ijaew nhīgēt nē pāmjē nhīpēx to hã mē kām awjarē nē mē kām:

—E kot paj mē amã awjarē ka mē inhma.

¹⁷ Nà mē ixpē Ijaew nhõ Tirtūmjaja amnepēm na pre mē ixpē Ijaew pāmjē rē. Kormã Ejit kām mē pa ri nhūm amnhĩ kaxyw mē kurē nē mē ho ohtō rax kumrēx. Hāmri nē mē kaxyw hihtÿx jakamã Ejit rūm mē kator pa.

¹⁸ Hāmri nē mē ho mex ryy ho mē hkôt pa. Mē kot kapôt ā ri pa hã amgrà pē 40 kamã mē kot htÿx ri tanhmã amnhĩ nhīpēx to ho pa htã nhūm mē kamã ukapri ryy ho mē hkôt pa.

¹⁹⁻²⁰ Na pre mē kām pyka pē Kanaã kamã mē pa xwÿnhjē nhīmex pa. Kanaã kamã mē pa xwÿnhjaja ahpÿnhã axpēn kaxyw mēō krī pē 7ja nhūm mē kām mē ho hapēx pa.

Hāmri nē hpānhã mē inhīgētjē mã pykaja o hpigrānh pa. Mē ixpē Ijaew nhīgētjē mã ho hpigrānh pa nhūm mē kamã pa hã amgrà xohtō nē. Hã amgrà pē 450. Tã nhūm Tirtūm hpānhã mē kām juisti hkwy rē nē mē kaxyw mē unhwÿ nhūm mē ho pa. Tã nhūm hpānhã Sāmuew mē ho amnhĩptã nē mē o pa. Kēp Tirtūm nhÿ hã kapēr jarēnh o pa xwÿnhjē hõ nhūm Tirtūm mē kaxyw ãm.

²¹ —Tã nhūm mē ixpāmjaja axpēn ma nē ra te krī hkwy kamã mē urak nē mēō pahi kot Sāmuew pānhã mē ho amnhĩptār o pa hprām xàj amnhĩ to Tirtūm wÿ nē kām: “Pa Tirtūm. Kwa mē ixkaxyw pahi hõ xām kē mē ixto amnhĩptār o pa nã. Ja na mē inhmã hprām tÿx kumrēx.”

—Anhÿr o amnhĩ to hwÿr jakamã nhūm mē kuma nē mē kaxyw Sawti xām. Kisti hkra na pre. Nē mē inhīgēt Pējamĩ kanrēhã htāmnhwÿ na pre. Hāmri nhūm Tirtūm mē kaxyw ãm nhūm kēp mēō pahi nē mē ho amnhĩptār o pa hã amgrà pē 40.

²² Tã nhūm Tirtūm kator nē hpānhã mē kaxyw Tawi xām. Hāmri nē harēnh o: “Nà Jese hkra Tawija na hte inhmã hprām xà hkôt amnhĩ nhīpēx mex o pa.” Anē.

²³ —Tã Jejus kēp Tawi hkanrēhã htāmnhwÿ na pre. Kukamã na pre Tirtūm mē ixpē Ijaew nhīgētjē mã harē nē harēnh o: “Koja nhÿrmã Tawi hkanrēhã htāmnhwÿjē hõ mē ate amnhĩ tomnuj pē mē apytã.” Anhÿr o hkukamã mē kām harē.

²⁴ No nhūm kormã Jejus kot mē ixpē Ijaewjē mã amnhĩ to amnhĩrit kēt ri nhūm Juāw Paxis kumrēx hkukamã mē ixwÿr mō nē mē inhmã Tirtūm kapēr jarēnh o ri mē ixkôt pa. Nē mē ixte amnhĩ tomnuj kaga nē hpānhã tām amnhĩ nhīpēx o ixpa hã mē ixpumunh kôt mē ixkrã kumrār ā mē inhmã karō ho pa.

²⁵ —Tã mē kām kapēr o pa ryy nē ra hatur xām mēnh kaxyw nē amnhĩ tã tanhmã mē inhmã kapēr to nē mē inhmã: “Na ka mē ixpumu nē atÿx Tirtūm kot mē akaxyw pa ixām ā ixkamnhix nom pa hkēt. Kot mē pakaxyw ãm mã xwÿnhhta kukamã na pa pre mō. Tãm kot amnhĩ to rax o ijakrenh. Nē kot amnhĩ to mex o kot ijakrenh. Jakamã na pa hte ãm kukwak ri ixpa nē amnhĩ tã hã ixpijãam o ixpa.” Anē.

—Na pre ã Juãw Paxisja mẽ inhmã Jejus jarënh anhÿr o pa.

²⁶ —Tã kwa mẽ inhma mẽ apê Apraãw kanrêhã htãmnhwÿjaja nê mẽ apê Ijaew kêt xwÿnh kãm Tirtũm kĩnh xwÿnhjaja. E mẽ apiitã ixkapêr ma nê kãm ajamaxpêr tÿx rãhã ho ri apa. Nà mẽ pahpiitã mẽ pakaxyw na Tirtũm kapêrja. Kot mẽ pahte amnhĩ tomnuj pê mẽ papytãr ã amnhĩ jarënhja mẽ ixpê Ijaew pix kaxyw kêt. Mẽ pahpiitã mẽ pakaxyw na. Mẽ pahpiitã mẽ pahte ja mar nê hkôt amnhĩ nhĩpêxja na Tirtũm kãm hprãm.

²⁷ Nom Jerujarê nhõ xwÿnhjê mẽ mẽ àptãr tũmrejaja na prem Jejus kêp Tirtũm kot mẽ pakaxyw ãm xwÿnh ã harënh mar tã hkôt hamaxpêr kêt nê. Na pre htem mẽ inhõ arĩgromnu pê sap ã akuprõ nê axpên mã Tirtũm kapêr ã kagà htũm kamã ujarënh o hkrĩ. Kagàja kamã Tirtũm nhÿ hã mẽ kapêr o mẽ pa xwÿnhjaja kot hprĩ hã Jejus jarënh nê hã kagà nhũm mẽ kot mar tã hprĩ hã mar tÿx kêt nê. Jakamã na prem axtem nê mẽ kãm hã amÿnê. Tirtũm nhÿ hã kapêr jarënh xwÿnhjaja kot mẽ hkukamã mẽ harënh xàja kôt nhũm mẽ kot hpĩr kaxyw mẽ kãm hã amÿnê.

²⁸⁻²⁹ Kot tanhmã amnhĩ tomnuj to hkêt tã nhũm mẽ amarĩ hã pahi Pirat wÿ. Kot mẽ kãm hã àmnênh nhũm õ pôristijaja kot hpĩr kaxyw nhũm mẽ hã kuwÿ nhũm mẽ kãm kupĩ. Ra Tirtũm kapêr ã kagà htũm kot mẽ hkukamã mẽ harënh xà hkôt. Hãmri nhũm mẽ kot hkôt pa ho pa xwÿnhjaja pĩ kahpa nê ho wrÿ nê ma o tẽ nê kën kre kamã haxà.

³⁰ Tã nhũm Tirtũm akupÿm ho htĩr

³¹ nhũm xatã hkôt mẽ pa ho pa xwÿnhjê hwÿr hapôj. Kormã htyk kêt ri ra Garirej rũm Jerujarê hwÿr hkôt mẽ pa ho mẽ pa xwÿnhjê hwÿr xatã mẽ hwÿr hapôx o pa. Jao hã arĩgro xohtô nê nhũm prem piitã omu. Tã mẽ tãmjaja na htem mẽ ixpê Ijaew mã harënh o pa.

³²⁻³³ —Amnepêm Tirtũm na pre mẽ ixpê Ijaew nhĩgêjtê mã tanhmã Kra Jejus jarënh to. Kormã mẽ pahwÿr wrÿk kêt ri tanhmã mẽ kãm harënh to. Jakamã ra kot hkukamã harënh xà hkôt nhũm pre mẽ pahwÿr wrÿ nê tanhmã mẽ panê amnhĩ nhĩpêx to. Tã mẽ ate harënh mar kaxyw na pa wa man

mẽ awÿr mõi. Amnepêm finat Tawi na pre Tirtũm kapêr kwÿ hã kagà. Tirtũm mex ã mẽ grer xà pê Sam 2ja kamã hã kagà. Te Tirtũm tãm Jejus mã kapêr pyrãk o hã kagà nê hã kagà ho:

Apê Ixkra na ka.

Tã mẽ piitã mẽ kot apê Ixkra hã apumunh kurê kumrêx kaxyw na pa jarãhã mẽ kãm ato amnhĩr. Anê.

Nhũm pre ã Tirtũm Jejus mã kapêr anê nhũm Tawi ô ri mẽ pamã hã kagà.

³⁴ —Amnepêm na pre Tirtũm tanhmã Kra Jejus kukamã harënh to. Mẽ kot hpĩr nhũm kot akupÿm ho htĩr kukamã hã amnhĩ jarê. ĩ hkro pymaj kot mẽ htykjê pê hkaxàr nê akupÿm ho htĩr ã nhũm hkukamã hã amnhĩ jarê. Te Kraja mã amnhĩ jarënh pyrã nê amnhĩ jarënh o:

E kot paj ato mex rax nê. Ixte Tawi mã amnhĩ jarënh xà hkôt.

Anhÿr o hkukamã harënh xà hkôt akupÿm ho htĩr nhũm axte htyk kêt ã harê.

³⁵ —Nê kagàja nhãm hô hõ kot tanhmã Jejus jarënh kute. Te Jejus tãm Tirtũm mã kapêr pyrã nê harënh o:

Ixpê Akra hã ixte akapêr kôt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nê. Anê.

Tirtũm kapêr ã kagà htũm kot ã Jejus jarënh kot anhÿr.

³⁶ Nom ã Tawi jarënh anhÿr kêt nê. Tawi na pre Tirtũm kapêr kôt amnhĩ nhĩpêx mex o pa hãmri nê ty nhũm prem mẽ panhĩgêjtê nhĩhkô hã haxà hãmri nhũm ĩ hkro nê hapêx.

³⁷ —Tã no Jejusja Tirtũm kot akupÿm ho htĩr jakamã nhũm Tawi pyrãn ĩ hkro nê hapêx kêt nê.

³⁸ —E mẽ inhmar tÿx nê ixkwÿjaja. Kra Jejus pix kukwak na hte Tirtũm amnhĩ katut kôt mẽ pahte amnhĩ tomnuj rê.

³⁹ Jakamã kot kaj mẽ ãm Mojes kapêr kôt pix mã ri amnhĩ nhĩpêx nhũm Tirtũm tee ri ja hã mẽ apumu nê amnhĩ katut kôt mẽ ate amnhĩ tomnuj rênh kêt nê. Jejusja tapxipix na pre htyk o Tirtũm mã mẽ pahte amnhĩ tomnuj piitã hpãnhã amnhĩrer pa.

⁴⁰⁻⁴¹ Amnepêm na pre Tirtũm kapêr nhÿ hã kapêr xwÿnhjê hõja mẽ kãm Tirtũm kapêr jarê nê hã kagà. Te Tirtũm tãm mẽ kot

kapër ã hpër o pikënh xwýnhjê mã kapër pyrà nê mẽ kãm:

E kot paj aa mẽ ate mẽmoj pumunh kêt ô ho anê.

Nhũm mẽhõ mẽ amã harê ka mẽ harënh ma nê ãm ama.

Nhũm mẽ kot omunh mex xwýnhjê hõ kot hprĩ hã mẽ amã harënh tã ka mẽ ãm ama nê hkôt ajamaxpër kêt nê.

Hãmri nê tee ri tanhmã kãm ajamaxpër to ho ri apa. Anê.

Ã Tĩrtũm mẽ kãm kapër anhÿr jakamã kwa mẽ o kora. Apu mẽ kajaja na pre ã mẽ ajarënh anê ry ko. Anê.

⁴² Nhũm pre ã Pawre mẽ kãm ujarënh ryy anê. Hãmri nê Panãpe mẽ wa ixkreta rũm kator kaxyw nhũm mẽ kot mar o hkrĩ xwýnhjaja tee ri ma wa mör ã wa omu nê ma wa hkôt mra nê wa kãm:

—Kwa war axujarënhja na mex kumrëx. Mẽ inhmã axte mar prãm. Xà koja axte sap kato ka wa akupÿn mẽ ixwÿr wa tẽ nê axte mẽ inhmã awjarê? Anê.

Hãmri nhũm wa mẽ kãm:

—Tõe. Nà kot paj war anê. Anê.

⁴³ Hãmri nê wa ma tẽ nhũm mẽ hkwyjaja ma wa hkôt mra. Ijaew kwýjaja nê Ijaew kêt xwýnh kãm Tĩrtũm kĩnh xwýnhjaja nhũm mẽ ma wa hkôt mra. Hãmri nhũm wa pry hã mẽ kãm kapër o mō. Tĩrtũm kot mẽ kutã nojarêt rãhã ho pa nhũm mẽ kot amnhĩ tã omunh nê hkôt amnhĩ nhĩpêx tÿx rãhã ho pa nê hkaga hkêt ã mẽ kãm kapër o mō.

⁴⁴ Tã nhũm axte sap nhũm krĩ nhõ xwýnh piitã axte Tĩrtũm kapër mar kaxyw ixkre wÿr akuprõ. Ijaewjaja nê Ijaew kêt xwýnhjaja.

⁴⁵ Hãmri nhũm Ijaew kwýjaja tee ri mẽ amnhĩ wÿr Ijaew kêt xwýnhjê pumu nê mẽ hã Pawre mẽ Panãpe wa kamã gryk nê. Mẽ kãm Ijaew kêt xwýnhjaja kot Tĩrtũm kapër mar prãm kêt jakamã mẽ hã wa kamã gryk nê. Hãmri nê Pawre kapër ma nê xatã kãm kapër punuj nê kãm:

—Tk. Kwa na ka Tĩrtũm kapër jarënh o axêx. Ja kot anhÿr kêt. Anê.

⁴⁶ Nom nhũm wa kãm mẽ uma hkêt nê. Wa ãm Tĩrtũm Karõ nhÿ hã amnhĩ to htÿx nê wa mẽ kãm kapër. Nê amnhĩ tã tanhmã mẽ kãm kapër to nê mẽ kãm:

—Nà wa ixpyrà nê mẽ apê Ijaew jakamã na pa mẽ akumrëxjê mã Tĩrtũm kot mẽ pakaxyw Jejus xãm ã harê. Tã ka mẽ ama nê ãm ama nê te mẽ ate hkaga pyrà nê ã wa inhmã akapër anê nê wa ixte kapër o ixêx ã wa ijarê. Për ãm mẽ ate mẽ amã Tĩrtũm mẽ Kra wa kuri mẽ atĩr tũm nê mẽ apa hprãm kêt. Jakamã kot paj wa mẽ apê ixkato nê hpãnhã ma Ijaew kêt xwýnhjê mã Jejus kapër jarënh o ri mẽ hkôt ixpa.

⁴⁷ Tĩrtũm kapër ã kagà htũm ã kot mẽ ixte amnhĩ nhĩpêx anhÿrja kukamã mẽ ijarê nê mẽ ijarënh o:

Mẽ ate Ijaew kêt xwýnhjê mã ixkapër jarënh o ri apa kaxyw na pa pre mẽ kaxyw mẽ arê.

Jakamã koja pyka piitã hkôt mẽ pa xwýnhjaja ohtô nê mẽ akapër ma nê ixkra hkôt amnhĩ xunhwÿ.

Koja mẽ ã amnhĩ nhĩpêx anê pa ja hã mẽ omu nê mẽ ho ixkra. Anê.

Tĩrtũm kot ã ja kukamã mẽ ijarënh anhÿr jakamã kot paj wa mẽ apê ixkato nê mẽ apãnhã ma Ijaew kêt xwýnhjê mã Tĩrtũm kapër jarënh o ri mẽ hkôt ixpa. Anê.

⁴⁸ Hãmri nhũm Ijaew kêt xwýnhjaja amnhĩ tã wa kapërja ma nê hkĩnh nê Tĩrtũm kapër mex o mex ã harê. Hãmri nhũm ra Tĩrtũm kot nhÿrmã amnhĩ ri mẽ htĩr tũm nê mẽ pa ho mẽ pa kaxyw mẽ rënh xwýnhjaja amnhĩ kaxyw Pahiiti Jejus kôt hamaxpër nê hkôt amnhĩ xunhwÿ.

⁴⁹ Tã nhũm pika pê ãxiok kamã mẽ piitã Tĩrtũm kapër jarënh ma.

⁵⁰ Nom nhũm Ijaew xaptàr tũmrejaja kãm Pawre mẽ Panãpe wa hkĩnh kêt jakamã na prem krĩ hkôt mẽ kot amnhĩ to rũnh xwýnhjê mã wa ho kapër punuj o pa. Mẽ ô pahi mẽ mẽni kot amnhĩ to rũnh xwýnhjaja nhũm mẽ kãm tanhmã wa ho kapër to nhũm mẽ kuma nê mẽ hkôt hamaxpër. Mënijaja kãm Tĩrtũm prãm tã amnhĩ kaxyw Jejus kôt hamaxpër kêt jakamã tanhmã mẽ kot Pawre mẽ Panãpe wa ho hêx toja ma nê hkôt hamaxpër nê wa kamã gryk nê. Jakamã nhũm mẽ ohtô nê tanhmã wa hipêx to nê amnhĩ nê wa hano.

⁵¹ Hãmri nhũm wa mẽ kêp kato nê xa nê mẽ kot Tĩrtũm kapër kaga hã amnhĩ pumunh kaxyw mẽ noo mã wa hparkã kapa nê nê awjagrô kapĩ nê ma wa tẽ.

Hāmri nē ma krī pé Ikōn wūr hpānhā wa mō.

⁵² Hāmri nhūm āxiok kamā mẽ kot Jejus kōt amnhī xunhwūr xwūnhjaja hkīnh nē ri pa. Tīrtūm Karō kot mẽ hkarō mā gjêx jakamā nhūm mẽ hkīnh nē ri pa ho pa.

14

Pawre mẽ Panāpe wa kot Ikōn wūr mōr ā wa harēnh

Matēwre 10.34-35

¹ Hāmri nhūm Pawre mẽ Panāpeja wa āxiok rūm kato nē hpānhā ma krī pé Ikōn wūr wa mō. Hāmri nē hwūr pōj nē Ijaew nhō Tīrtūm kapēr o mẽ ahkre xā hā ixkre hwūr wa tē nē kamā mẽ kām Jejus jarēnh o nhỹ. Mẽ kām harēnh kām hihtỳx jakamā nhūm mẽ hkwyjaja wa kuma nē amnhī kaxyw hkōt hamaxpēr nē hkōt amnhī xunhwūr. Ijaew kwỳjaja nē mẽ kēp Ijaew kēt xwūnh kwỳjaja nhūm mẽ ohtō nē Jejus kōt amnhī xunhwūr.

² Tā nhūm mẽ hkwyjaja kām Jejus jarēnh mar prām kēt nē. Hāmri nē kato nē ma Ijaew kēt xwūnh kwỳjê hwūr mra nē tanhmā mẽ kām Pawre mẽ Panāpe wa ho hēx to nē wa ho kapēr punuj nē nhūm mẽ mar xā hkōt wa kamā gryk nē.

³ Nom nhūm wa tokyx kator nē ma mōr kēt nē arī Tīrtūm Karō nhỹ hā amnhī to htỳx nē mẽ kām Tīrtūm kapēr jarēnh o ri mẽ hkōt pa. Nē kēp mẽ kutā nojarēt xwūnh ā harēnh o pa. Nē ỹ hā mẽ kām aa mẽ kot mẽmoj pumunh kēt kwỳ ho anhỹr o ri mẽ hkōt pa. Jakamā nhūm mẽ hkwyjaja ja hā wa omu nē wa kapēr ma nē hamaxpēr o:

—Kwa âm hāmri na wa Tīrtūm kēp mẽ pakamā ukapri xwūnh ā harē. Pēr ỹ hā wa kot ā amnhī nhīpêx anhỹr o pa kēnā. Anē.

⁴ Hāmri nhūm Ijaew kēt xwūnh kwỳjaja wa hkōt hamaxpēr nē wa hkōt amnhī xunhwūr. No nhūm mẽ hkwyjaja wa hkōt hamaxpēr kēt nē. Ra mẽ kot Ijaew kwỳ kot tanhmā wa ho kapēr punuj toja ma nē mẽ hkōt hamaxpēr jakamā nhūm krī nhō xwūnhjaja axpēn kwỳm ri tanhmā wa hkōt hamaxpēr to ho pa. Jao axpēn kwỳm ri wa hkōt hamaxpēr o pa.

⁵ Tā nhūm wa hkōt hamaxpēr kēt xwūnhjaja axpēn wūr akuprō nē wa hā amỹnê. Ijaew kwỳjaja nē Ijaew kēt xwūnh

kwỳjaja nē mẽ õ pahijaja nhūm mẽ kot kēn o wa htak o wa hpīr kaxyw wa hā amỹnê.

⁶ Hāmri nhūm wa amnhī tā ama nē mẽ kēp kato nē hpānhā ma pika hō hwūr mō. Ma Rikōn kām krī hkwy hwūr hpānhā mō. Risti wūr nē Tepe wūr nē pu hā krī hkwy hwūr wa mō.

⁷ Wa mō nē pōj nē ma mẽ kām Jejus kot tanhmā mẽ panê amnhī nhīpêx to hā harēnh o ri mẽ hkōt pa.

Te grà xwūnh jarēnh

Atre 3.1-10

⁸ Nhūm Risti kamā mēhō my hte grà nē hkrī xwūnhja. Katorxà nhōxà kre rūm hte grà nē kator jakamā ri pa hkēt nē arī hkrī xā kamā hkrī ho hkrī.

⁹ Jakamā nhūm Pawre mẽ kām ujarēnh o xa nhūm kuri mar o nhỹ. Hāmri nē hamaxpēr o:

—Nà pēr Tīrtūm àhpumunh o àhpumunh. Mān kot ixto mex kaxyw àhpumunh tỳx. Nà koja ixto mex. Anē.

Hāmri nhūm Pawre ā hamaxpēr anhỹr ā omu

¹⁰ nē kàx pé kām kapēr nē kām:

—E kwa kànhmā xa. Anē.

Hāmri nhūm kuma nē kànhmā âm kurê kumrêx nē ri mra. Nē amnhī te kamā hamak o ri mra nē hkīnh tỳx kumrêx.

¹¹ Hāmri nhūm kuri mẽ kuhê xwūnhjaja Pawre kot ā hipêx anhỹrja ā omu nē htỳx wa kēp kaxkwa kamā mēhpām ā wa hkamnhīx nē hkīnh nē axpēn mā:

—Kwa pēr mēpahpām na wa. Mēpahpām Jupti mẽ Mēkurtija na wa panhī hā amnhī jahkre nē mẽ pahwūr wrỳ. Nà âm hāmri na wa mẽ pahwūr wrỳ. Anē.

Nom mẽ kapēr pé Rikaôn o axpēn mā kapēr jakamā nhūm Pawre mẽ Panāpe wa mẽ mar kēt nē. Wa kot mẽ kapēr mar kēt jakamā ā mẽ kot wa harēnh anhỹrja mar kēt nē htỳx wa xa.

¹² Nhūm mẽ ā wa kēp mēhpām ā wa harēnh anē nē hkīnh tỳx nē. Panāpeja nhūm prem kēp mẽ hpām Jupti hā hkamnhīx no Pawreja nhūm prem kēp mēhpām Mēkurti hā hkamnhīx. Pawreja Mēkurti pyrā nē kapēr japjê rūnh jakamā nhūm mẽ kēp hā hkamnhīx.

¹³ Na prem krī htā mēhpām Juptija mā amnhī jarēnh xā hā ixkre nhīpêx nē hkarō

nhîpêx. Hâmri nê hwÿr akuprô nê kãm mex o mex ã harê nê amnhî to hwÿr o pa. Jakamã nhũm Jupti nhô patrejaja Pawre mē Panāpe wa kēp mēhpām ã wa harēnh ma hāmri nê wa hã hkwÿjê mã kãm:

—Kwa pu mē wa kãm môx kwÿ hpa nê pixôrà hkwÿ rê. Hâmri nê wa kãm wa mex o wa mex ã wa harê nê wa kēp mēpahpām ã amnhî to wa kuwÿ. Wa kēp mēpahpām kēnã. Anê.

Hâmri nê ra ã wa hipêx anhÿr kaxyw

¹⁴ nhũm wa tee ri mē kot amnhî nhîpêx ã mē omu nhũm ja wa kēp omnuj tÿx nê. Jakamã nhũm wa amnhî pé hinôkã kaxôn pa nê mē kutã hprôt nê ã mē kot wa hipêx anhÿrja nê mē kãm kapēr kãm hihtÿx nê.

¹⁵ Nê mē kãm:

—Kwa mē ri ã wa inhîpêx anhÿr kêt nê. Wa ixpê mēapām kêt kēnã kot ka kêt mē ã wa inhîpêx anê. Nom mēapāmja na ka htem ãm amnhî to hwÿr kaprÿ nê kãm mex o mex ã harēnh kaprÿ o ri apa. Tã mē ate ã amnhî nhîpêx anhÿr kaga nê hpãnhã Tîrtũm kôt amnhî xunhwÿr nê amnhî to pix wÿr o apa kaxyw na pa pre wa mē awÿr mō nê pøj. Tîrtũmja mē ate mē apãm jarēnh ta rom htîr o htîr. Na pre mēmoj piitã ho kato. Kaxkwa ho kato nê pyka ho kato nê gô xujanãr o kato. Nê kamã ri mēmoj piitã ho kator pa.

¹⁶ —Amnepêm mē pa xwÿnhjaja na pre htem amnhî krã hkôt pix mã tanhmã ri amnhî nhîpêx to ho pa nhũm Tîrtũm ja hã mē omu nê ãm mē omu nê tanhmã mē ho hkêt nê.

¹⁷ Mē pahte amnhî tã omunh kaxyw na hte amarî tanhmã mē pahto mex to ho pa. Na hte mē pahwÿr na rê nhũm mē pahpur go mex nê. Nhũm mē pamã tanhmã mē pahpur kãm mēmo hyja to nhũm ra mē pamã ô rûnh nê. Pu htem hamÿ nê ho paxàpkur mex nê pahkînh nê ri papa. Tîrtũm pix kukwak ri na pu htem ã amnhî nhîpêx anhÿr o ri papa. Anê.

¹⁸ Nhũm pre ã Pawre mē kot wa kãm môx parja nê mē kãm kapēr kãm hihtÿx anê. No nhũm mē kuma nê ãm kuma nê wa kãm mry hkwÿ hpar kaxyw wa hã hihtÿx nê. Jakamã kritpêm nhÿx prem wa kãm hkwÿ pa. Tã tanhmã hamaxpēr to nê hkaga nê wa kãm hpar kêt nê.

Mē kot Pawre pÿr ã àmnênh ã mē harēnh Sikũn Ximotre 3.10-11

¹⁹ Tã nhũm Ijaew kwÿjaja mē hwÿr mran pøj. Krî pé ãxiok mē Ikôn rûm ma mē hwÿr mran pøj nê mē kãm Pawre ho hêx o mē hkôt pa nhũm mē kuma nê axtem nê Pawre kamã gryk kato. Hâmri nê mē kot hpîr kaxyw kên runh kwÿ jamÿ nê ho htak prêprêk o kuhê. Hâmri nhũm amnhî xã htÿx kamã ama nê tēm nê akryk nô nhũm mē omu nê htÿx ho ra htyk ã hkamnhîx. Hâmri nê hwÿr tē nê hpa hã kupy nê ma hkjênh o mō nê krî pum kumē nê ma akupÿm mra.

²⁰ Hâmri nhũm Jejus kôt mē kot axpên to htôjaja tee ri ã mē kot hipêx anhÿr ã omu nê hkaprî htÿx nê hwÿr hprôt nê omu nê mÿr o kuhê. Hâmri nhũm te htyk pyrã nê nôr tã Jejus nhÿ hã akupÿm hihtÿx mex nê kãnhmã nhÿ hāmri nê ma akupÿm mē hkôt krîm tē.

Tã nhũm apkati nhũm Panāpe mē wa krîja rûm kato nê ma wa mō. Pãnhã ma krî pé Tepe hwÿr wa mō.

Pawre mē Panāpe akupÿm ãxiok wÿr wa mōr ã wa harēnh

²¹⁻²² Tã nhũm wa ma Tepe hwÿr mō nê pøj. Hâmri nê kamã mē kãm Jejus tanhmã kot mē panê amnhî nhîpêx to hã harēnh o ri mē hkôt wa pa nhũm mē wa kuma nê ohtô nê Jejus kôt amnhî xunhwÿ.

Tã nhũm wa kato nê awjanã nê ma akupÿm pika pé Pisit wÿr wa mō. Nê kamã krî hkwÿ hkôt ri ra mē kot Jejus kôt amnhî xunhwÿr xwÿnhjê jahkre ho ri mē hkôt pa. Krî pé Risti nê Ikôn nê ãxiokja kôt. Nê mē ahkre kamã Jejus kôt mē ho mē hihtÿx o wa pa nê mē kãm:

—E ra mē ate Jejus kôt amnhî xunhwÿr jakamã koja mē kãm Jejus kurê xwÿnhjaja tee ri ja hã mē apumu nê hã tanhmã mē anhîpêx to. Tã kēr ka mē ãm amnhî tã mē omu nê ãm mē omu nê Jejus kaga hkêt nê. Nê arî hkôt amnhî nhîpêx mex o ri apa rãhã nhÿrmã ma ô krî hwÿr api nê Tîrtũm wa kuri amex kumrêx nê atîr tũm nê apa ho apa. Anê.

²³ Hâmri nê ahpÿnhã krî piitã hkôt ri mē kot pastô nhÿ hã mē ahkre kaxyw mē hkwÿjê rê nê mē kaxyw mē unhwÿ nê mē

ho Tirtüm wỳ. àpkur kêt rāhā mẽ ho kuwỳ nẽ kām:

—Pa Tirtüm? E jajê pumu. Mẽ kot krī ja kamā pastô nhỹ hā akrajê jahkre ho pa kaxyw na pa wa mẽ unhwỳ. Jakamā e kër ka mẽ kutā anojarêt rāhā ho ri mẽ hkôt apa. Anẽ.

Hāmri nẽ wa mẽ kệp kato nẽ ma hpānhā nhỹhỹm wa mō.

²⁴ Pyka pê Pisit kamā mō nẽ hpānhā nhām pyka pê Pāpir kôt mō. Wa ma mẽ kām tanhmā Jejus kapër jarēnh to ho mẽ hkôt mō.

²⁵ Hāmri nẽ krī pê Perke hwỳr wa pøj nẽ kamā mẽ kām Jejus kot tanhmā amnhĩ nhĩpêx to hā harẽ hāmri nẽ mẽ kurũm kato nẽ axte mō. Pānhā ma krī pê Atari hwỳr wa mō.

²⁶ Hāmri nẽ hwỳr pøj nẽ hpānhā kurũm akupỹm āxiok wỳr wa mō. Pār rax kām ma akupỹm mō. Āxiokja kamā na pre wa nojarêt nhũm Jejus kôt wa htõ nẽ wa htõxjaja wa ho Tirtüm wỳ nẽ ma krī hkwy hwỳr wa kumẽ. Wa kot ma mẽ hkôt tanhmā Jejus kot mẽ panê amnhĩ nhĩpêx to hā harēnh o wa pa kaxyw wa kumẽ. Jakamā nhũm wa ra ja ho anhỹr pa nẽ akupỹm mẽ hwỳr wa mō.

²⁷ Hāmri nẽ wa akupỹm pøj nẽ Jejus kôt mẽ kot axpẽn to htõ nẽ htõxjê ho akuprõ nẽ mẽ kām amnhĩ jarẽ nẽ mẽ kām:

—Nà âm hāmri na pa wa ra ixkàhkĩnh pê akupỹn mẽ awỳr pøj. Na pre Tirtüm wa ixkutā nojarêt rāhā ho wa inhĩhkô hā pa. Jakamā pa pre wa ma y hā Ijaew kêt xwỳnhjê mā Jejus jarēnh o ixpa nhũm mẽ hkwyjaja wa inhma nẽ hkôt amnhĩ xunhwỳ.

²⁸ Anhỹr o wa mẽ kām kapër hāmri nẽ wa tokyx ma nhỹhỹm krī hõ hwỳr axte mōr kêt nẽ. War arĩ āxiok kamā Jejus kôt wa htõ nẽ htõxjê hkôt ri pa.

15

Jerujarẽ kamā Jejus kwỳ hpikuprõnh ã mẽ harēnh

Matêwre 23.1-4; Karatas 2.1-5, 5.1-16

¹ Tã hāmri nhũm Ijaew kwỳjaja āxiok wỳr Jejus kwỳ pê Ijaew kêt xwỳnhjê hwỳr mõn pøj. Pika pê Jutej rũm mẽ hwỳr pøj nẽ tanhmā mẽ ahkre hto ho pa. Nom axtem

nẽ Tirtüm kapër kuhpa hā mẽ ahkre nẽ mẽ kām:

—Kot ka mẽ amã Jejus kôt amnhĩ xunhwỳr prām hāmri nẽ mẽ ixpyrà nẽ finat Mojes kot mẽ pamã karõ xà hkôt amnhĩ my kwỳr kà kwỳ jakà nẽ ri kormã hkôt amnhĩ xunhwỳ. Kot kaj mẽ ã amnhĩ nhĩpêx anhỹr kêt nẽ nhũm Tirtüm tee ri ja hā mẽ apumu nẽ amnhĩ katut kôt mẽ ate amnhĩ tomnuj rēnh nẽ mẽ ato hkra hkêt nẽ. Anẽ.

² Hāmri nhũm Pawre mẽ Panāpe tee ri mẽ kapër anhỹrja ma nhũm wa kệp ja omnuj tỳx nẽ. Hāmri nhũm wa mẽ kām:

—Tk. Kwa kot anhỹr kêt. Na hte Tirtüm mẽ pahte amnhĩ my kwỳr kà jakà ã mẽ pahpumunh kôt mẽ pahto hkra hkêt nẽ. Anẽ.

Hāmri nẽ tee ri mẽ kapërja nẽ mẽ kām kapër no nhũm mẽ âm wa kuma nẽ wa hkôt hamaxpër kêt nẽ. Nẽ arĩ ã mẽ ahkre anhỹr o mẽ hkôt pa. Jakamā nhũm mẽ ja hā axpẽn mã kapër rax nẽ. Hāmri nhũm Jejus kwỳ pê Ijaew kêt xwỳnhjaja amnhĩ tã Pawre mẽ Panāpe wa hkukja nẽ wa kām:

—Kwa xà kot paj mẽ apyrã nẽ amnhĩ my kwỳr kà jakà nhũm Tirtüm kām ja mex nẽ nà? Kwa wa ma akupỹm Jerujarẽ hwỳr mō nẽ ja hā Jejus nhỹ hā mẽ ahkre xwỳnhjê maatijê mẽ mẽ kot Jejus kwỳ jahkre xwỳnhjê kukja nẽ hā mẽ ama. Nẽ ota mẽ ixkwỳjaja koja ma war akôt mra. Kê mẽ tanhmā mẽ amã ja jarēnh to ka mẽ ama nẽ man akupỹn mẽ ixwỳr mra nẽ tanhmā mẽ inhmã mẽ kapër jarēnh to. Anẽ.

Hāmri nhũm wa mẽ kām: “Tõe. Nà kot paj mẽ anẽ.” Anẽ.

³ Hāmri nẽ wa mẽ ma Jerujarẽ hwỳr mō. Ma pyka pê Wẽnĩs mẽ Samar hkôt ma hwỳr mō. Hāmri nẽ nhỹri Jejus kôt mẽ htõ nẽ htõxjê pumu nẽ mẽ kām Ijaew kêt xwỳnhjê jarẽ. Mẽ hkwyjaja mẽ urak nẽ Jejus kôt amnhĩ xunhwỳr ã mẽ harēnh o mō. Hāmri nhũm mẽ harēnh ma nẽ mẽ y hā hkĩnh nẽ.

⁴ Hāmri nhũm mẽ ra Jerujarẽ hwỳr Jejus kôt mẽ htõjê hwỳr mõn pøj. Hāmri nẽ mẽ ahkre xwỳnhjê mẽ Jejus nhỹ hā mẽ ahkre xwỳnhjê maatijê pumu nhũm mẽ haxwỳja amnhĩ wỳr mẽ omu nẽ hkĩnh nẽ. Nẽ tanhmā mẽ ho mex to nẽ mẽ kām kapër mex nẽ. Hāmri nhũm Pawre mẽ Panāpe wa mẽ kām amnhĩ jarẽ. Tirtüm kot wa ãhkô

hã wa hkôt pa nhũm wa ÿ hã kot Ijaew kêt xwýnhjê mã kapêr o pa nhũm mẽ hkwyja kot wa mar nê Jesus kôt amnhĩ xunhwýr ã nhũm wa mẽ kãm amnhĩ jarê.

⁵ Nhũm Jesus kwýjê kamã mẽ kêp Parijew nhõ xwýnh kwýjaja. Mẽ kêp Parijew mã hkwyjê rom Jesus kôt amnhĩ xunhwý. Jakamã nhũm mẽ tee ri Pawre mẽ Panãpe wa kot Ijaew kêt xwýnhjê jarênh ma nê kãnhmã kuhê nê wa kãm:

—Kwa kê mẽ pahpyrà nê amnhĩ my kwýrýt kà jakà nê finat Mojes kot Tirtũm nhỹ hã mẽ pamã mẽmoj mã karõ hkôt amnhĩ nhĩpêx o pa. No kot mẽ ã amnhĩ nhĩpêx anhýr kêt nhũm ja mẽ pahpê omnuj nê. Anê.

⁶ Hãmri nhũm Jesus nhỹ hã mẽ ahkre xwýnh maatijê mẽ mẽ hkwyjê jahkre xwýnhjaja mẽ kuma nê hapôj nê nhỹri akuprõ. Ijaew kêt xwýnh kot Jesus kôt amnhĩ xunhwýr xwýnhjaja kot tanhmã amnhĩ nhĩpêx to hã axpên mar kaxyw nhỹri akuprõ.

⁷ Hãmri nê mẽ hã axpên mar ryy nê. Hãmri nhũm Simãw Pêtre mã kãnhmã xa nê mẽ kãm:

—Nà na pre Tirtũm mẽ pahkapi nê Ijaew kêt xwýnhjê kaxyw pa ixta. Ixte mẽ kãm Jesus kot tanhmã mẽ panê amnhĩ nhĩpêx to hã harênh o ri mẽ hkôt ixpa nhũm mẽ kot inhmar nê hkôt amnhĩ xunhwýr kaxyw nhũm mẽ kaxyw ixta. Ra mẽ ate ja hã ixpumunh mex.

⁸⁻⁹ Tirtũm kot tanhmã ri mẽ pakute hkôt mẽ pahpumunh par jakamã te kot ra mẽ panhĩpêxta pyrà nê mãânên Ijaew kêt xwýnhjê nhĩpêx. Mẽ kot mẽ pahpyrà nê amnhĩ kaxyw Jesus kôt hamaxpêr jakamã nhũm Tirtũm te ra mẽ panhĩpêx pyrà nê amnhĩ katut kôt mẽ kot amnhĩ tomnuj rê nê mẽ ho hkra. Hãmri nê mẽ hwýr amnhĩ Karõ rê nhũm mẽ hkarõ mã agjê. Tirtũm mã kot amnhĩm mẽ rênh kênã.

¹⁰ —Tã xà mẽ pahpê Ijaew na pu htem wam Tirtũm kot finat Mojes mã kapêr kôt amnhĩ nhĩpêx mex o papa? Nà na pu htem hkôt amnhĩ nhĩpêx mex kêt nê. Nê mẽ panhĩgêjtaja na xep prem haxwýja hkôt amnhĩ nhĩpêx mex o pa hkêt nê. Mẽ pahpiitã mẽ pahpê hihtýx kênã. Tã Ijaew kêt xwýnhjaja kot hkôt amnhĩ nhĩpêx o pa hã

ka mẽ ra mẽ kãm karõ kaxyw. Kwa kot kaj mẽ anê nhũm Tirtũm tee ri ja hã mẽ apumu nhũm ja kêp omnuj nê. Kãm ja prãm kêt.

¹¹ Kwa mẽ ã mẽ kãm hã karõ anhýr kêt nê. Mẽ panhõ pahihtti Jesus na hte mẽ pahpiitã mẽ pakutã nojarêt o axpên pyràk. Jakamã Ijaew kêt xwýnhjaja nê mẽ pahpê Ijaewjaja kot puj mẽ amnhĩ kaxyw hkôt pajamaxpêr nê hkôt amnhĩ xunhwý. Hãmri nhũm Tirtũm ja hã mẽ pahpumu nê mẽ panhĩpêx o axpên pyrà nê Jesus kukwak ri amnhĩ katut kôt mẽ pahte amnhĩ tomnuj rê nê mẽ pahto hkra. No na hte mẽ pahte amnhĩ my kwýrýt kà jakà rý finat Mojes kapêr kôt amnhĩ nhĩpêx ã mẽ pahpumunh kôt mẽ pahto hkra hkêt nê. Anê.

¹² Nhũm pre ã Simãw Pêtre mẽ kãm kapêr anê. Hãmri nhũm hpãnhã Panãpe mẽ Pawreja mẽ kãm amnhĩ jarê. Tirtũm kot tanhmã wa ho nhũm wa kot Ijaew kêt xwýnhjê hwýr wa mõi ã amnhĩ jarê. Nê Tirtũm nhỹ hã mẽ kãm aa mẽ kot mẽmoj pumunh kêt kwý ho anhýr o ri mẽ hkôt pa hã mẽ kãm amnhĩ jarê nhũm mẽ piitã akryk wa mar o hkrĩ nê wa ujarênhta hkukamã hamaxpêr.

¹³ Hãmri nhũm Simãw Pêtre mẽ Panãpe wa mẽ kãm ujarênh pa hãmri nhũm Xiakre wa hpãnhã kãnhmã xa nê mẽ kãm kãnhmã ãhkra pê nê mẽ kãm:

¹⁴ —E pa ijaxwýja mẽ amã ixkapêr ka mẽ inhma. Nà na pu mẽ ra Simãw Pêtre kapêr ma. Tirtũm kot wam amnhĩ kaxyw Ijaew kêt xwýnh kwýjê rênh ã mẽ harênhja pu mẽ ra kuma.

¹⁵ Æm hãmri na ã mẽ harênh anê. Amnepêm Tirtũm kapêr nhỹ hã mẽ kapêr o mẽ pa xwýnhjaja na prem ra ja kukamã Tirtũm kot tanhmã mẽ hipêx to hã amnhĩ jarênh kukamã hã kagà. Te ho mãm kot kãm kapêr pyrà nê hã kagà ho:

¹⁶ Amnepêm finat Tawija na pre hte inhmã amnhĩ kwýjê ho amnhĩptar o pa.

Mẽ kêp Ijaewjaja nhũm pre inhmã mẽ ho amnhĩptar o pa.

Hãmri nhũm mẽ gaa nê axpên pê anhgrà nê ahpýnhã ri pa.

Tã ixpê Tirtũm kot paj nhỹrmã ma mẽ hwýr wrý nê axte mẽ ho akuprõ nê mãm mẽ unhwýr pa.

17 Jakamã Ijaewjê kukwak ri koja Ijaew kêt xwýnh kwýjaja mãânên ixkôt amnhĩ xunhwý.

Pa te ixte Ijaewjê nhĩpêx pyrã nê mẽ ho ixkra.

18 ã mẽ hkukamã ijamaxpêr anhýr xà hkôt.

19 Anhýr o mẽ harênh jakamã nhũm ra mẽ hkwyjaja mẽ higêt kot amnhĩ nhĩpêx kaga hpa nê hpãnhã Tirtũm kôt amnhĩ xunhwý. Jakamã kwa kêr pu mẽ axte ja nhĩjuk ri mẽ kãm mẽmoj tã karõ hkêt nê. Ja pix na mex.

20 ãm ja pix kot puj mẽ kãm hã karõ nê hã kagã nê mẽ hwýr kumê:

Mẽ kot sãnti hã mẽ õ hkur nê kot puj mẽ hkurê.

Nê mẽ kot mẽmo mry hpar nê hkamrõ runh kêt rãhã hkur nê mẽ hkurê.

Nê mẽ kot mẽmo mry kamrõ kur nê mãânên mẽ hkurê.

Nê mẽmyjaja kot amnhĩ prõ pix tãnopxar ã mẽ kãm karõ.

Nê mẽnijaja haxwýja kot amnhĩ mjên pix tãnopxar ã mẽ kãm karõ.

—ãm ja pix kot puj mẽ kãm hã kagã nê mẽ kãm hã karõ.

21 Mẽ panhĩgêjtê mã finat Mojes kot ã mẽ kãm karõ anhýrja na htem arĩ krĩ piitã hkôt ã mẽ kãm hã karõ anê. Mẽ panhõ arĩgromnu pẽ sap ã na htem arĩ ri Tirtũm kapêr o mẽ ahkre xà hã ixkre kamã ã mẽ kãm hã karõ anê. Anê.

Mẽ kot Ijaew kêt xwýnhjê hwýr kagã mẽnh ã mẽ harênh

Karatas 5.1

22 Hãmri nhũm mẽ Xiakre kapêr mar o hkrĩ. Jejus nhỹ hã mẽ ahkre ho mẽ pa xwýnh maatijaja nê mẽ kot hkwyjê jahkre xwýnhjaja nê Kris kwýjê piitã Xiakre kapêr ma nhũm ja mẽ kãm mex nê. Jakamã nhũm mẽ axpên mã:

—Tõe. Nã ãm hãmri na Xiakre ã Ijaew kêt xwýnhjê jarênh anê. Nã ja mex. Pu mẽ ã ãxiok nhõ xwýnhjê mã ja hã kagã anê hãmri nê mẽ hwýr kumê. Koja Pawre mẽ Panãpeja wa kupy nê ma akupým mẽ hwýr o mẽ nê mẽ kãm kugõ. E mẽ pahtõ kot puj mẽ ma wa hkôt mẽ hwýr mẽ? Anê.

Hãmri nhũm mẽ kuma nê Siras mẽ Jut Pasapas wa kuta. Jejus kôt mẽ kot axpên to htõ nê htõxjaja kot axpên mã hamẽ wa kot amnhĩ to mex xwýnh ã wa harênh jakamã

nhũm mẽ ma Pawre mẽ Panãpe wa hkôt mõi kaxyw wa kuta.

23 Hãmri nê ãxiok kamã Kris kwý pẽ Ijaew kêt xwýnhjê kaxyw kagã nhĩpêx nê kamã ã mẽ kãm kapêr anê nê mẽ kãm:

Pa? ãxiok mẽ Sir mẽ Siris kamã Ijaew kêt xwýnhjaja? Xà mẽ amex? Mẽ ixpê Jejus kôt mẽ atõjaja na pa mẽ awýr kagãja nhĩpêx nê mẽ awýr kumê. Mẽ ixpê Jejus kôt mẽ kot amnhĩ xunhwýr xwýnhjê jahkre ho ixpa xwýnhjaja nê Jejus nhỹ hã mẽ ahkre ho mẽ pa xwýnh maatijaja pa mẽ awýr kumê.

24 Na xep ra ja rũm mẽ ixkwýjaja ma mẽ awýr mẽ nê mẽmoj tã tanhmã mẽ amã karõ hto. Mẽ ate amnhĩ my kwýr kã jakar nê amnepêm mẽ inhĩgêt Mojes kapêr kôt amnhĩ nhĩpêx o apa hã mẽ amã karõ. Ka xep mẽ tee ri ja kukamã ajamaxpêr. No mẽ pajaja na pa prem mẽ awýr mẽ rênh kêt nê. ãm amnhĩ krã hkôt na prem mẽ awýr mẽ ã mẽ amã ja hã karõ anê.

25 Tã pa tee ri mẽ harênh ma nhũm ja mẽ ixpê omnuj týx nê. Jakamã na pa mẽ jar akuprõ nê mẽ akaxyw mẽ inhĩõja wa kuta. Wa kot ma Panãpe mẽ Pawre wa hkôt mẽ awýr wa mẽ nê mẽ amã mẽ ixkapêr jarênh kaxyw. Panãpe mẽ Pawreja mẽ inhmã wa hapê htýx.

26 Na hte mẽ amã Pahihti Jejus Kris kapêr jarênh o pa kaxyw wa amnhĩ grõnh kôt mẽ amã harênh o pa.

27 Tã pa mẽ akupým mẽ awýr wa kumê nê wa hkôt mẽ pahtõ Jut mẽ Siras wa kumê. Mẽ ixte mẽ amã kagã kamã mẽ ixkapêrja nhũm wa kot hprĩ hã mẽ amã harênh kaxyw pa mẽ wa hkôt mẽ awýr wa kumê.

28-29 E ja pix nê kot paj mẽ akurê:

Kêr ka mẽ sãnti hã mẽ õ hkur kêt nê.

Nê mẽmo mry kamrõ kur kêt nê. Jao mẽmo mry pa nê hkamrõ runh kêt rãhã hkur kêt nê. Kamrõ runh pa nê rĩ kormã tanhmã ho nê aku.

Nê kêr ka mẽ amyjaja amnhĩ prõ pix tãnopxar o apa.

Nê mẽ anijaja ajaxwýja amnhĩ mjên pix tãnopxar o apa.

E ãm ja pix kot paj mẽ amã hã karõ. Tirtũm Karõ kãm ja mex. Nê mẽ inhmã

mãänën ja mex. Kot kaj mẽ ã amnhĩ nhĩpêx anhÿr o ri apa nẽ amex nẽ apa.

Tã ãm ja pix. Mẽ ixpê Jejus kwÿjê jahkre xwÿnhjê mẽ Jejus nhÿ hã mẽ ahkre xwÿnh maatijê mẽ pa mẽ mẽ awÿr kagàja nhĩpêx nẽ kumẽ. E kêr ka mẽ amex nẽ akĩnh nẽ ri axpën kôt apa. ãm ja pix na hapêx. Anẽ.

Nhũm prem ã kagà kamã mẽ kãm mẽmoj tã karõ anẽ.

³⁰ Hãmri nẽ Jut wa mẽ kãm kugõ nẽ ma ãxiok wÿr wa mẽ kumẽ nhũm wa mẽ ma akupÿm hwÿr o mõ. Jut nẽ Siras nẽ Pawre nẽ Panãpeja nhũm wa mẽ ma akupÿm mẽ hwÿr o mẽ mõ. Mõõ hãmri nẽ mẽ hwÿr pøj. Hãmri nẽ Jejus kwÿjê ho akuprõ nẽ mẽ kãm kagàja gõ

³¹ nhũm mẽ kupy nẽ kamã harẽ nẽ kuma. Kamã mẽ kot mẽ kãm mẽmoj tã karõ kamã harẽ nẽ kuma nẽ ÿ hã hkĩnh nẽ akupÿm tãm hamaxpër.

³² Jut mẽ Siras wa kęp Tĩrtũm nhÿ hã kapër o pa xwÿnh na pre wa. Jakamã na prem mẽ hwÿr mõn pøj hãmri mẽ kãm tanhmã ujarënh to ho pa. Mẽ kot Jejus kôt pix mã hamaxpër o pa kaxyw mẽ kãm ujarënh o pa nẽ mẽ kãm:

—E kêr ka mẽ mãmrĩ Jejus kôt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

³³ Hãmri nẽ mẽ hkôt ri pa hã apkati xohtõ nẽ. Hãmri nẽ wa akupÿm Jerujarẽ hwÿr nojarêt nẽ mẽ kãm amnhĩ jarẽ nhũm mẽ wa kuma nẽ wa kãm:

—Tõe. Nà wa mãmrĩ ma akupÿm mõ. Kojã Tĩrtũm war apumunh mex nẽ ka wa ma akupÿm amex nẽ akà hkĩnh pẽ akwÿjê hwÿr akato. Anẽ.

³⁴ Hãmri nhũm wa nojarêt tã nhũm Siras tanhmã hamaxpër to nẽ hitõt nẽ mẽ kuri arĩk nhũm Jut Pasapas pix ma akupÿm hkwyjê kot mẽ hwÿr wa mẽnh xwÿnhjê hwÿr mõ.

³⁵ Hãmri nhũm Pawre mẽ Panãpe wa Siras pyrã nẽ kormã ãxiok kamã pa. Hãmri nẽ Jejus kôt mẽ htõ hkwyjê mẽ pimràatã mẽ ahkre ho pa. Tĩrtũm kapër o mẽ hkôt mẽ ahkre ho pa.

Pawre mẽ Panãpe wa kot axpën pẽ pikjêr ã wa harënh

Atre 13.13; Korosẽ 4.10

³⁶ Hãmri nhũm Pawre mẽ Panãpe war arĩ mẽ hkôt ri pa hã apkati xohtõ nẽ. Tã nhũm Pawre hamaxpër nẽ Panãpe mã:

—Kwa ma pu ma akupÿm ra pahte krĩ hkwyjê hkôt mẽ kãm Jejus jarënh o papa xwÿnhjê hkôt akupÿm mõ. Pu ma mẽ hwÿr mõ nẽ Jejus kôt pahtõ nẽ pahtõxjê kot tanhmã ri amnhĩ nhĩpêx to hã mẽ omu. Anẽ.

³⁷ Hãmri nhũm kuma nẽ kãm:

—Tõe. Nà pu ma mõ. Nom kêr pu ma amnhĩ kôt Juãw Makre ho mõ kê axte pahto ajuta ho pahkôt mõ. Anẽ.

³⁸ Hãmri nhũm Pawre tee ri kuma nhũm ja kęp omnuj nẽ nhũm kãm:

—Tk. Kwa na pre pahkôt pa htã Pãpir kamã tanhmã hamaxpër to nẽ pahkaga nẽ ma akupÿm Jerujarẽ hwÿr mõ. Jakamã kwarĩ koja axte pahkôt mõr kêt nẽ. Anẽ.

³⁹ Hãmri nhũm Panãpe tee ri hã hihtÿx no nhũm kęp hkaga kumrêx. Jakamã nhũm wa ja hã axpën pẽ axkjê nẽ ma ahpÿnhã mõ. Nhũm Panãpe amnhĩ kôt Juãw Makre ho mõ nẽ wa ma pàr kãm gõ hipòk pẽ Sipre hwÿr wa mẽ.

⁴⁰ Nhũm Pawre axtem amnhĩ kôt Siras wÿ nẽ ma wa mẽ. Hãmri nẽ wa nojarêt nhũm Jejus kôt wa htõjaja wa ho Tĩrtũm wÿ nẽ kãm:

—Pa Tĩrtũm. E koja Pawre mẽ Siras wa ma krĩ hkwyjê hkôt mẽ kãm akapër jarënh o ri wa pa. Jakamã kêr ka wa htãnopxar o ri wa hkôt apa. Anẽ.

Hãmri nhũm wa kato nẽ ma krĩ hkôt ri Jejus kapër o mẽ ahkre ho wa pa.

⁴¹ Wa ma pyka pẽ Sir mẽ Siris kôt Jejus kôt mẽ htõ nẽ mẽ htõxjê pumunh nẽ Jejus kôt mẽ ho mẽ hihtÿx o wa pa kaxyw.

16

Ximotre kot Pawre mẽ Siras wa hkôt ri pa hã harënh

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mẽ Siras wa ma akupÿm krĩ pẽ Tepe hwÿr wa mẽ nẽ hwÿr pøj nẽ hpãnhã kurũm ma Risti hwÿr mẽ. Hãmri nẽ wa hwÿr pøj nẽ kamã Ximotre pumu. Ximotre na pre ra katorxã pyrã nẽ

Jejus kôt amnhĩ xãm nhũm mẽ kot Jejus kôt axpẽn to htõ xwýnhjaja kãm hapê nê. Nê kot Jejus kapêr kôt amnhĩ nhĩpêx mex o pa hã axpẽn mã harê.

Krĩ pê Risti mẽ Ikõn kamã nhũm prem ã axpẽn mã Ximotre jarênh anhỹr o pa. Jakamã nhũm Pawre mẽ Siras wa mõi nê mẽ hwýr pøj nê Ximotre kot amnhĩ nhĩpêx ã omu nhũm Pawre kãm war amnhĩ kôt o mõi prãm nê. Nom Ximotre hkamrô pihkàr na pre. Katorxà kệp Ijaew nhũm hipêêxà kệp Gres jakamã nhũm ã Ximotre hkamrô pihkàr anê. Nhũm Ijaew kot katorxà hkôt kệp Ijaew ã omunh jakamã nhũm Pawre hamaxpêr nê mẽ kaxyw kệp my kwýt kà krãhta nê arĩ kormã mẽ hwýr amnhĩ kôt o mõi.

⁴ Hãmri nê mẽ ma krĩ hkwy hkôt mõi. Mõi nê Ijaew kêt xwýnhjaja ra kot amnhĩ kaxyw Jejus kôt hamaxpêr xwýnhjê jahkre ho mẽ hkôt pa. Ra Jerujarê kãm mẽ kot Jejus kwýjê jahkre ho pa xwýnhjê mẽ Jejus nhỹ hã mẽ ahkre xwýnh maatijaja mẽ kot mẽ kãm mẽmoj tã karõta nhũm mẽ ma mẽ kãm harênh o ri mẽ hkôt pa.

⁵ Hãmri nhũm mẽ kuma nê ra Jejus kôt amnhĩ nhĩpêx mex o mõi. Hãmri nhũm apkati mẽ krĩ nhõ xwýnh kwýjaja mẽ uràk nê Jejus kôt amnhĩ xunhwý. Jakamã nhũm mẽ ra ohtõ rax o mõi.

*Pawre tanhmã hpimtir to hã harênh
Rõmãn 15.18-21*

⁶ Tã nhũm Pawre mẽ Siras mẽ Ximotre mẽ ma pyka pê As wýr nojarêt. Mẽ kot mẽ kãm tanhmã Jejus jarênh to ho pa kaxyw mẽ hwýr nojarêt tã nhũm Tirtũm Karõ kormã mẽ nê mẽ hkurê. Jakamã nhũm mẽ hpãnhã ma pyka hkwy pê Prik mẽ Karatas wa hkôt pa. Ixpê Rukre na pa pre mẽ hã ajêt nê ma mẽ hkôt ixpa ho ixpa.

⁷ Hãmri nê mẽ pyka pê Mĩs ã mõi nê hpãnhã ma Pitĩn wýr inhmõr mã tã no nhũm Tirtũm Karõ axte kê mẽ nê mẽ ixkurê.

⁸ Jakamã pa mẽ arĩ Mĩs jakàr ã mõi nê gõ xujanãr mý ri krĩ pê Tôx wýr pøj.

⁹ Tã nhũm kamàt pa mẽ ixpiitã gõr nê inhĩkwý nhũm Pawre tanhmã hpimtir to. Nhũm xep pika pê Masetõn nhõ xwýnhja mẽ amnhĩ wýr hwýr kãm hihtýx o xa nhũm

hpri hã omu nê kapêr ma. Nhũm xep pre kãm:

—Pa Pawre? Kwa amnê Masetõn wýr mẽ ixwýr mõi nê tanhmã mẽ iahkre hto. Anê.

¹⁰ Hãmri nhũm Pawre hkrãkato nê mẽ inhmã hpimtir jarê. Pa mẽ kuma nê axpẽn mã:

—Tõ kwa tokyx pu mẽ hwýr. Tirtũm kot mẽ hwýr mẽ parênh kênã. E pu mẽ ma mẽ hwýr mõi nê mẽ kãm Jejus jarênh o mẽ ahkre. Anê.

Hãmri nê amnhĩ to akuprõ nê mẽ hwýr inhnojarêt kurê kumrêx.

*Ritre kot Jejus kôt amnhĩ xãm ã harênh
Piripos 1.1*

¹¹ Hãmri pa mẽ ma Masetõn wýr mõi. Tôx rũm ma pàr kãm hwýr mõi. Hãmri nê gõ nhĩpøk pê Samõtas wýr pøj nhũm mẽ hã pàr nhõ. Hãmri nhũm apkati pa mẽ axte mõi nê Masetõn kamã krĩ pê Nêap wýr pøj.

¹² Hãmri nê pàr rũm ijaepøj nê hpãnhã kurũm hamũ krĩ pê Piripos wýr ixpar o mõi. Piriposja Masetõn kamã krĩ maati na. Rõm nhõ xwýnhjaja na prem ho kato. Jakamã pa prem ma hwýr mõi nê pøj nê tokyx axte kurũm nhỹhỹm inhmõr kêt nê.

¹³ Hãmri nhũm sap kato pa mẽ axpẽn mã: —Kwa pyhti mýri mãn hte Ijaewjaja axpẽn wýr akuprõ nê Tirtũm mã amnhĩ jarênh o hkrĩ nã. E kwa pu mẽ hwýr nê gõ mýri mẽ hapêr o ri papa. Anê.

Hãmri nê ma hwýr mra nê mẽ hapêr o ri ixpa nhũm ãm mẽni pixjaja axpẽn wýr akuprõ. Pa mẽ omu nê mẽ kuri ixkrĩ nê mẽ kãm Jejus kapêr jarênh o mẽ ahkre o ixkrĩ.

¹⁴ Nhũm mẽ kot mẽ inhmar o hkrĩ xwýnhjê hõ pê Ritreja. Krĩ pê Xijaxir nhõ xwýnh na pre. Nê kệp kupêxê mex o wênê xwýnh. Na pre hte kãm Tirtũm prãm o pa. Jakamã nhũm Pawre kot mẽ ahkre ho ýrja rôm nhũm Pahiiti Jejus tanhmã Ritre hkrã hto nhũm hpri hã Pawre kapêr mar týx nê.

¹⁵ Hãmri nê amnhĩ kaxyw Jejus kôt hamaxpêr nê hkôt amnhĩ xãm kurê kumrêx. Örkwý kamã hkwyjê mẽ nhũm mẽ hkôt amnhĩ xunhwýr pa. Jakamã pa mẽ kệp Jejus kwý hã mẽ hkrã kumrã. Mẽ piitã mẽ kot mẽ kệp Tirtũm kra hã mẽ omunh kaxyw. Hãmri nhũm Ritre amnhĩ kôt mẽ ixwýr nê mẽ inhmã:

—An kot kaj mẽ ixte Jejus kôt amnhĩ xãm tỳx ã ixpumu hã kot kaj mẽ ma ixkôt mỗ nẽ hpãnhã inhõrkwy kamã pỏj nẽ apa. Anẽ.

Pa mẽ kuma nẽ ma hkôt mỗ.

Mẽ kot Pawre mẽ Siras wa haxàr ã mẽ harẽnh

Makre 1.23-26, 1.34

¹⁶ Tã nhũm arĩgro hõ hã pa mẽ Tĩrtũm mã amnhĩ jarẽnh kaxyw axte pyhti mỳri mẽ pikuprõnh xàja wỳr mỗ. Hãmri nẽ pry kamã mẽ kãm àpẽnh xwỳnh nija pumu. Ra mẽkarõmnuti kot tanhmã hkrã hto nhũm ỹ hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã ujarẽnh to ho pa. Jakamã nhũm õ patrãwjaja kukwak ri ujamỳnh rũnh pẽ hkĩnh nẽ pa.

¹⁷ Jakamã pa mẽ mỗ nhũm nija mẽ ixpumu nẽ mẽ ixtã ajết nẽ ma mẽ ixkôt mỗ. Hãmri nẽ mẽ kãm mẽ ijarẽnh o mẽ ixkôt mỗ nẽ mẽ kãm:

—Xê mẽ mran jajê pumu. Na htem Tĩrtũm maati mã tanhmã amnhĩ nhĩpêx mex to ho pa. Tĩrtũm kot mẽ ate amnhĩ tomnuj pẽ tanhmã mẽ apytàr to hã mẽ amã ujarẽnh kaxyw na mẽ awỳr mra. Anẽ.

¹⁸ Nẽ ãm xatã mẽ kãm mẽ ijarẽnh o mẽ ixkôt paja o ra hã apkati xohtô nẽ. Tã nhũm Pawre ra kãm mar kaga nẽ nẽ mẽkarõmnuti mã kapêr nẽ kãm:

—Tk. Kwa kêp akato nẽ ma tẽ. Pa Jejus Kris nhỹ hã amã ixkapêr ka inhma nẽ kêp akato nẽ ma atẽm kurê kumrẽx. Anẽ.

Hãmri nhũm kuma nẽ kêp kato nhũm akupỹm tãm hkrã.

¹⁹ Jakamã nhũm õ patrãwjaja tee ri ja hã omu nẽ gryk tỳx nẽ axpẽn mã:

—Kwa ra mẽkarõmnutijaja kêp kator jakamã koja axte mẽmoj kukamã tanhmã ujarẽnh to hkết nẽ. Pu mẽ kukwak ri axte paxujamỳnh kêt nẽ. Anẽ.

Hãmri nẽ Pawre mẽ Siras wa kamã gryk tỳx nẽ. Hãmri nẽ wa unê nẽ ma mẽ kot axpẽn mar xà hã ixkre hwỳr wa hkjẽnh o tẽ

²⁰ nẽ mẽ kot mẽ ho amnhĩptàr xwỳnhjê mã tanhmã wa ho hêx to nẽ mẽ kãm:

—Kwa mẽ amnẽ Ijaewja wa omu. Na hte wa mẽ panhõ krĩ kamã hêx pix o pa nhũm mẽ tee ri wa kapêr ma nẽ wa kamã gryk tỳx nẽ.

²¹ Mẽ ixte amnhĩ nhĩpêx te kot axpẽn pyrak kêt tã nhũm wa mẽ kot amnhĩ nhĩpêx o mẽ pajahkre kaxyw nhỹhỹnh mẽ pahwỳr mỗ. Nom mẽ pahpê Rõm nhõ xwỳnhjaja axtem mẽ pahte amnhĩ nhĩpêx kẽnã kot pu kêt wa kuma nẽ wa kapêr kôt amnhĩ nhĩpêx. Anẽ.

²² Hãmri nhũm mẽ kuma nẽ piitã wa kamã gryk tỳx nẽ. Hãmri nhũm mẽ ho amnhĩptàr xwỳnhjaja wa kêp wa ê kaxõnh o hkapa nẽ wa hã mẽ õ pỏristi mã amỹnê nẽ mẽ kãm:

—E mẽ ma wa o tẽ nẽ mẽ htao xà ho wa htao. Anẽ.

²³ Hãmri nhũm mẽ kuma nẽ ma wa o tẽ nẽ wa htao rax nẽ. Hãmri nẽ wa haxà nẽ mẽ hagjẽnh xà jamãr xwỳnh mã kãm:

—E kêr ka ja wa omunh mex nẽ kê wa kator kêt nẽ. Anẽ.

²⁴ Hãmri nhũm mẽ kuma nẽ wa o tẽ nẽ ixkre jatur xà kamã wa haxà nẽ wa kator pymaj hamẽ wa htem pĩ jaxà nẽ ho htỳx nhũm wa arĩ hte tỳx nẽ nhỹ.

²⁵ Tã nhũm kamàt. Nẽ kôt ã kamàt nhũm wa Tĩrtũm mã amnhĩ jarẽ nẽ mex o mex ã wa grer o wa nhỹ nhũm wa urak nẽ mẽ hagjẽnh xwỳnhjaja wa mar o hkrĩ.

²⁶ Puh nhũm pyka mẽ kãm htertet tỳx nẽ nhũm mẽ hã ixkreja amnhĩ to àpêr tỳx nẽ amnhĩ kahê xà rẽnh pa. Nhũm mẽ hagjẽnh xwỳnhjê kaxpre xà piitã mẽ nẽ pirẽnh pa.

²⁷ Hãmri nhũm mẽ hamãr o kuhê xwỳnhja pika tertet kamã ama nẽ hkrãkato. Hãmri nẽ mẽ hã ixkre jakwakre kahê xà rẽnh parja pumu nẽ mẽ hagjẽnh xwỳnhjaja hapỏx par ã mẽ hkamnhĩx nẽ tee ri amnhĩ kukamã hamaxpêr. Hãmri nẽ pahĩ kot mẽ hã hpĩr pymaj õ wapo kapa nẽ ra tãm kot ho amnhĩ pĩr kaxyw.

²⁸ Hãmri nhũm Pawre tee ri ja hã omu nẽ kax pẽ kãm amỹra nẽ kãm:

—Kwa amnhĩ pĩr kêt nẽ. Ot pa mẽ arĩ ixpiitã ixkuhê. Na pa mẽ ixtõ ixkator nẽ ixprõt kêt nẽ. Anẽ.

²⁹ Hãmri nhũm kuma nẽ kanê hã ahwỳ nẽ kuwy nẽ mẽ hwỳr axà nẽ mẽ piitã mẽ omu. Hãmri nẽ Pawre mẽ Sirasja wa omu nẽ wa hwỳr kãm ma ho htertet o tẽ. Hãmri nẽ wa hã hpijaam kaxyw wa kutã tẽm nẽ hkõnkrã ho nhỹ.

³⁰ Hãmri nẽ kànhmã xa nẽ wa ho kato nẽ ixkre kapem wa o xa nẽ wa kãm:

—Kwa tanhmã kot pa amnhĩ nhĩpêx to kê Tĩrtũm war apyrà nê ixte amnhĩ tomnuj pê ixpytà? Anê.

³¹ Hãmri nhũm wa kãm:

—Nà kot kaj amnhĩ kaxyw Jejus Kris kôt ajamaxpêr nê hkôt amnhĩ xãm nhũm Tĩrtũm ja hã apumu nê amnhĩ katut kôt ate amnhĩ tomnuj piitã rênh pa. Nhũm anhõrkwy kamã akwýjaja apyrà nê Jejus kôt amnhĩ xunhwý nhũm ã mẽ hipêx anê. Anê.

³² Hãmri nê wa ma hkôt õrkwy hwýr tẽ nê hprĩ hã mẽ kãm Tĩrtũm kapêr jarẽ nhũm mẽ wa mar o hkrĩ.

³³ Hãmri nhũm mẽ hagjênh xà jamãr xwýnhja wa kãm wa htak xà kuhõ. Kormã kamãt kô hkwy kamã wa kãm kuhõ nê hkane. Hãmri nhũm wa mẽ kot Jejus kôt amnhĩ xunhwýr par ã mẽ omu nê mẽ hkrã kumrã. Mẽ hamãr xwýnh mẽ hkwyjê mẽ hkrã kumrãr pa.

³⁴ Hãmri nhũm mẽ kot amnhĩ kaxyw Tĩrtũm kôt hamaxpêr jakamã piitã hkĩnh nê. Hãmri nhũm mẽ hamãr xwýnhja õrkwy hwýr Pawre mẽ Siras wa o tẽ nê wa kãm õ nhũm wa apku nhũm ma akupým mẽ hagjênh xà hwýr wa o tẽ nê akupým wa haxã.

Mẽ kot Pawre mẽ Siras wa kãm urer ã mẽ harênh

Atre 22.25-29

³⁵ Hãmri nhũm apkati nhũm krĩ pytãr xwýnhjaja mẽ õ põristi mã anê nhũm mẽ hagjênh jamãr xwýnh wýr tẽ nê kãm:

—E na mẽ papytãr xwýnhjaja ate Pawre mẽ Siras wa kãm anhũrer nhũm wa mãmrĩ ma akupým htẽm kaxyw hã karõ. Anê.

³⁶ Hãmri nhũm mẽ kuma nê wa hwýr axà nê wa kãm:

—E na krĩ pytãr xwýnhjaja ixte war akator kaxyw war atã inhmã karõ. Jakamã e wa mãmrĩ axãmnhĩx ma mẽ. Anê.

³⁷ Hãmri nhũm Pawre kãm:

—Nà wa ixte tanhmã amnhĩ tomnuj to hkêt tã nhũm mẽ kot wa ixpynênh nê wa ixtak. Wa ijaxwýja wa ixpê Rõm nhõ xwýnh tã nhũm prem axtem nê mẽ piitã mẽ noo mã wa ixtak nê wa ijaxã. Mẽ kot amarĩ Rõm nhõ xwýnh tak nê mẽ hagjênh kêt tã nhũm mẽ ã mẽ noo mã ã wa inhĩpêx anê. Kormã wa ixte tanhmã amnhĩ tã ixãprãr to hkêt tã nhũm mẽ ã wa inhĩpêx anê. Jakamã kwarĩ

kot kaj mẽ no hkàx ã wa ixkator kêt nê. Kê mẽ kot wa ijaxãr xwýnhjaja tãm man mra nê wa ixkator pa war arĩ ma mẽ. Anê.

³⁸ Hãmri nhũm põristija kuma nê ma akupým mẽ hwýr mra nê mẽ kãm wa kapêr jarẽ. Hãmri nhũm mẽ tee ri mẽ uràn wa kêp Rõm nhõ xwýnh ã wa harênh ma nê kãm ma htýx nê.

³⁹ Hãmri nê ma wa hwýr tẽ nê wa hwýr axà nê wa kãm:

—Pa? E mãmrĩ war akato nê axãmnhĩx ma mẽ. Na pa prem war anhĩpêx kati rax nê. Tã kêr ka wa axte ja mã ajamaxpêr hkêt nê. Kê ja ãm jar mẽ pakamã hapêx. Anê.

Hãmri nê wa kator nê wa kãm:

—E kwa wa mẽ inhõ krĩ pê akato nê ma nhýhým mẽ. Anê.

⁴⁰ Hãmri nhũm wa kuma nê kato nê ma akupým Ritre nhõrkwy hwýr wa tẽ. Hãmri nê Jejus kôt wa mẽ htõjê pumu nê wa mẽ kãm amnhĩ jarẽ nê mẽ kãm:

—E kot paj hãmri wa mã mẽ. Nom kêr ka mẽ arĩ Jejus Kris kôt amnhĩ nhĩpêx mex rãhã ho ri apa nê aa hkaga hkêt nê. Anê.

Hãmri nê wa mẽ kurũm kato nê ma krĩ hõ hwýr wa mẽ.

17

Tesarõn kamã mẽ kot wa kamã gryk ã mẽ harênh

Wam Tesarõn 1.1, 2.13-14

¹⁻² Tã nhũm Pawre mẽ Sirasja wa ma krĩ hkwy hkôt pa. Piripos rũm ma Apiporip mẽ Apõrõn kôt wa mẽ hãmri nê ra Tesarõn wýr wa pøj. Na pre hte Pawre nhýri pøj nê Ijaew nhõ Tĩrtũm kapêr o mẽ ahkre xà hã ixkre hwýr agjê nê kamã mẽ kãm Jejus kapêr jarênh o kuhê. Jakamã nhũm wa mẽ nê Tesarõn wýr pøj nê ixkre hwýr mẽ hwýr tẽ nê mẽ kãm ujarênh o xa. Nê mẽ kãm ujarênh o hã arĩgromnu pê sap o axkrunêpxi.

³ Nê hprĩ hã mẽ kãm tanhmã Tĩrtũm kapêr jarênh to nê mẽ kãm:

—Nà Tĩrtũm kapêr ã kagã htũm kot mẽ pakaxyw ãm xwýnh jarênh. Amnhĩ xà htýx kamã hamak kãm htyk hãmri nê akupým htĩr ã nhũm kot hkukamã harênh. Tã na pre Jejusja ã amnhĩ nhĩpêx anê. Tãm kêp Krisja. Tĩrtũm kot mẽ pakaxyw ãm xwýnhhta na. Anê.

⁴ Hāmri nhūm mē hkwyja kuma nē wa hkôt hamaxpēr nē wa urāk nē Jejus kôt amnhī xunhwý. Ijaew kwýjê nē Ijaew kêt xwýnh kwýjaja nē mēni kot amnhī to rūnh xwýnh kwýjaja nhūm mē ohtô nē amnhī kaxyw Jejus kôt hamaxpēr nē hkôt amnhī xunhwý.

⁵ Tã nhūm Ijaew kwýjaja tee ri hkwy kot wa hkôt amnhī xunhwýr ā mē omu nē mē hã Pawre mē Siras wa kamã gryk týx nē. Hāmri nē ma mra nē wa kaxyw mē kot amnhī tomnuj týx xwýnh kwýjê ho akuprô nē mē kãm wa hã amýnê. Jakamã nhūm mē ma kapēr punuj pē wa hapēr o ri mra nhūm mē piitã mē omu nē mē kuma. Hāmri nhūm mē wa hapēr o ra Jasãw nhõrkwý hwýr mra. Nē mē kot Pawre mē Siras pynênh nē ma mē utar xwýnhjê hwýr wa o htēm kaxyw mē kēp kahé xà mē nē mē hwýr agjê.

⁶ Hāmri nē tee ri õrkwý kamã wa hapēr nhūm wa kamã amrakati. Jakamã nhūm mē Jasãw mē kot Jejus kôt axpēn to htõ xwýnh kwýjê pynê nē ma mē kot mē ho amnhīptar xwýnhjê hwýr mē o mra. Hāmri nē mē kãm tanhmã Pawre mē Siras wa ho hêx to. Ām kapēr punuj kãm kax pē mē kãm wa harē nē mē kãm:

—Kwa na hte Pawre mē Siras wa pyka piitã hkôt mē kãm ri mēmoj to hêx o pa. Tã wa ra mē panhõ krī hwýr pøj nē jar mē pamã ri tanhmã hêx to ho ri mē pahkôt pa.

⁷ Jasãw nhõrkwý kamã na pre wa pøj nhūm amnhī wýr wa kuwý. Na hte wa hkôt mē hamaxpēr xwýnhjaja pahiht Sesti kapēr kwým ri kuhpa hã kapēr o pa nē axtem nē mēõ pahi pē “Jesús” anhýr xwýnhjaja kapēr kôt amnhī nhīpêx o pa. Anê.

⁸ Hāmri nhūm mē kot mē ho amnhīptar xwýnhjê mē krī nhõ xwýnhjaja mē kuma nē gryk týx kumrêx.

⁹ Hāmri nē Jasãw mã kãm:

—E kot paj mē apê mē akàxpore hkwy jamý. Ka mē ajapøj nē ma mē panê Pawre mē Siras wa hano nhūm wa kato nē ma mō pa rī akupým mē amã kugõ. Anê.

Hāmri nē mē kēp mē hikàxpore hkwy jamý.

Pawre mē Siras kot Perej wýr mōr ā wa harēnh

¹⁰ Tã nhūm ra kamàt nhūm mē kot Jejus kôt axpēn to htõjaja hāmri Pawre mē Sirasja wa ma krī pē Perej wýr wa kumê. Hāmri nhūm wa kato nē ma hwýr mō nē hwýr pøj. Hāmri nē Ijaew nhõ Tirtüm kapēr o mē ahkre xà hã ixkre hwýr htēm kurê kumrêx nē wa axà.

¹¹ Perej kamã Ijaew na pre te mē kot Tesarõn kamã Ijaew pyrāk kêt nē. Mē kurom mē kãm Tirtüm kapēr mar prãm nē. Jakamã nhūm pre Pawre mē Siras Tirtüm kapēr o mē ahkre ho pa. Apkati mē mē ahkre mex o pa nhūm mē wa kuma nē hkīnh nē. Nē Tirtüm kapēr ā kagà htüm kamã wa kot mē ahkreta japêr nē kamã omu nē axpēn mã wa harēnh o:

—Nã ãm hāmri na wa ā Tirtüm kapēr o mē pajahkre anê. Tirtüm kapēr ā kagà htüm hkôt na hte wa mē pajahkre. Anê.

¹² Hāmri nē ohtô nē Jejus kôt amnhī xunhwý. Ijaew kwý nē Ijaew kêt xwýnh kwý nē mēni kot amnhī to rūnh xwýnhjaja nhūm mē ohtô nē Jejus kôt amnhī xunhwý.

¹³ Tã nhūm Tesarõn kãm Ijaewjaja Pawre jarēnh ma. Kot Perej nhõ xwýnhjê mã Tirtüm kapēr jarēnh o pa hã harēnh ma. Hāmri nē ma mē hwýr mra nē mē kãm tanhmã ho hêx to nhūm krī nhõ xwýnhjaja mē kuma nē ra Pawre kamã gryk týx nē.

¹⁴ Jakamã nhūm Jejus kôt mē htõjaja mē harēnh ma nē mē umaj Pawre kator nē ma gõ xujanãr wýr o mō. No nhūm Siras mē Ximotre wa Perej kamã mē kuri arīk.

¹⁵ Hāmri nhūm mē hkwyjaja ma Pawre o mō. Ma krī pē Atenas wýr o mō. Hāmri nē hwýr o pøj nē kamã kure. Hāmri nē ra akupým Perej wýr nojarêt nhūm Pawre mē kãm:

—E kêr ka mē ma akupým mō nē Siras mē Ximotre wa kãm ijarê kê war amnhīm nojarêt nē tokyx man ixkôt wa mō. Anê.

Pawre kot Atenas nhõ xwýnhjê mã kapēr ā harēnh

Rõmãn 1.18-20

¹⁶ Tã nhūm Pawreja kormã Atenas kamã pa. Siras mē Ximotre wa kamã hamak o ri kormã kamã mē kot amnhī nhīpêx ā mē omunh o pa. Na pre Atenas nhõ xwýnhjaja sãnti ho ohtô rax nē mē õ krī kamã unhwý nhūm Pawre ri omunh o ri kuhê ho pa. Na

pre htem ahpÿnhã mẽmo karõ nhÿpêxja o te Tÿrtũm nhÿpêx pyrã nẽ kutã hkõn krã ho rôrõk nẽ hkrÿ nẽ kãm mex o mex ã harênh o pa. Hãmri nhũm Pawre tee ri ja hã mẽ omunh o ri mẽ hkõt pa nẽ hkaprÿ nẽ.

¹⁷ Hãmri nẽ ma amnhÿ kwÿjê nhõ Tÿrtũm kapêr o mẽ ahkre xã hã ixkre hwÿr pa nẽ kamã mẽ ahkre ho kuhê. Ijaewjê mẽ Ijaew kêt xwÿnh kot Tÿrtũm ã hpijaãm xwÿnhjê mã nhũm Tÿrtũm kapêr jarênh o kuhê. Nẽ apkati mẽ mẽ kot mẽmoj to wênê xã hwÿr mra nẽ mẽ ujaarôr xwÿnhjê mã Tÿrtũm kapêr jarênh o kuhê.

¹⁸ Hãmri nhũm mẽ mar o pa. Atenas nhõ xwÿnhjaja na prem axpên kõt amnhÿ nhÿpêx o pa hkêt nẽ. Mẽ hkwÿjaja kêp Epikure hkõt amnhÿ nhÿpêx xwÿnh. Nẽ mẽ hkwÿjaja axtem kêp Etok kõt amnhÿ nhÿpêx xwÿnh. Hãmri nhũm Pawre mẽ kãm Jesus kot tanhmã mẽ panê amnhÿ nhÿpêx to hã harênh o pa nẽ akupÿm htÿr ã harênh o pa. Hãmri nhũm mẽ tee ri kuma nẽ hã axpên kujêr o kuhê nẽ axpên mã:

—Tk. Kwa mo na hte myti ata harênh o pa? Anê.

Nhũm mẽ hkwÿja mẽ kãm:

—Ko. Axtem mẽpahpãm õ na hte tanhmã harênh to. Anê.

¹⁹⁻²¹ Atenas nhõ xwÿnhjê mẽ axtem krÿ hõ nhõ xwÿnhjaja na prem kãm mẽ ujarênh nyw mar prãm nẽ. Jakamã nhũm prem mẽmoj jarênh nyw ma hãmri nẽ ãm axpên mã harênh pix o ri pa. Tã ra Pawre xujarênh nyw ma nẽ ma amnhÿ kõt mẽ kot axpên mar xã hã ixkre hwÿr o tẽ. Ixkre pê Areopja wÿr nhũm prem amnhÿ kõt o tẽ nẽ kãm:

—E kwa aprÿ hã mẽ inhmã ate mẽmo jarênh nywta jarê pa mẽ ama. Mẽ inhmã mar prãm. Anê.

²² Hãmri nhũm mẽ kuma nẽ mẽ kãm ujarênh o xa. Mẽ kot axpên mar xã hã ixkre kamã Atenas nhõ xwÿnhjê mã awjarê nẽ mẽ kãm:

—E nã na ka htem anhõ mẽmo karõ nhÿpêx xohtõta ã apijaãm pê kãm amnhÿ jagrer o ri apa. Pa hte ja hã mẽ apumunh o mẽ akõt ixpa.

²³ Na pa ra mẽ anhõ sãnti piitã hkõt omunh o ri ixpa nẽ o mũj hõ kuhê xã

kaprÿja wÿr ixkato. Nhũm himõk ã mẽmo karõ nhÿpêx amrakati nom à hã kagã kot:

MËPAHPÂM PUMUNH KÊT KUHÊ XÃ NA JA ã mẽ ate hã kagã kot anhÿr. Mẽ ate omunh kêt tã ka htem arÿ hã apijaãm o ri apa. No pa na ixte mẽhõja jarênh mar mex. Tã kot paj mẽ amã harê ka mẽ inhma.

²⁴ —Mẽpahpãm mẽ ate omunh kêt ã amnhÿ jarênhhta Tÿrtũm na. Tãm na pre pyka ho kato nẽ kamã mẽmoj piitã ho kator pa. Gõ ho kato nẽ mry ho kato nẽ panhÿ ho kato. ãm mẽmoj piitã ho kator par kumrêx. Na hte pika kamã nẽ kaxkwa kamã mẽmoj piitã ho amnhÿptar mex rãhã ho pa. Jakamã mẽmo kaxyw kot puj mẽ jar kãm õrkwÿ nhÿpêx? Tãm kêp mẽmoj piitã ho kator xwÿnh jakamã kot mẽmoj to presija hkêt.

²⁵ Kêp mẽmoj piitã hpãm jakamã mẽmoj piitã õ na. Jakamã tanhmã kot pu wem amnhÿ to nẽ kãm mẽmoj gõ? Tãm kot mẽmoj piitã ho kator nẽ ho htÿr nẽ kot mẽmoj piitã õr kênã kot puj kêt mẽ amnhÿ pyrã nẽ kãm mẽmoj gõ.

²⁶ Na pre mẽ pahkukamã ahpÿnhã mẽ pahpiitã mẽ papapxã jarê nẽ mẽ pakator hã arÿgro jarê. Na pre mẽ pahpãm kot wa Atãwja nhÿpêx. Jakamã nhũm Atãw kêp mẽ pahpiitã mẽ pahpãr krax.

²⁷ —Tã mẽmo kaxyw na pre ã Tÿrtũm mẽ panhÿpêx mex anê? Nã ãm mẽ pahte amnhÿ kaxyw hkõt pajamxpêr nẽ hkõt amnhÿ xunhwÿr kaxyw na pre mẽ panhÿpêx. Ja mẽ pahpê hihtÿx kêt. Koja mẽhõ kãm Tÿrtũm prãm nhũm amnhÿ tã omunh kurê kumrêx.

²⁸ —Nẽ Tÿrtũm pix kukwak ri na pu htem pahtÿr nẽ tanhmã amnhÿ nhÿpêx to ho ri papa. Mẽ akwÿ kot kagã jahkre xwÿnhja na pre ja hã kagã nẽ hã kagã ho: “Mẽ pahpê mẽpahpãm kra na pu htem papa.” Anê. ã hã kagã kot anhÿr.

²⁹ —Tã ka prem amnhÿm mẽmo karõ nhÿpêx. õr o hkwÿ nhÿpêx nẽ prat o hkwÿ nhÿpêx nẽ kên o hkwÿ nhÿpêx. Hãmri nẽ hipêx pa nẽ ho mẽpahpãm ã harê nẽ ri hã apijaãm o apa. No mẽ ãm amnhÿ krã hkõt mẽ ate hipêx. Tÿrtũm te kot ja pyrãk kêt.

³⁰ —Amnepêm mẽ pa xwÿnhjaja na prem mẽ apyrã nẽ ã mẽmoj nhÿpêx anhÿr o pa

nhũm Tĩrtũm ja hã mẽ omu nẽ ãm mẽ omu nẽ hã tanhmã mẽ hipêx to hkêt nẽ. Kormã mẽ kot kapêr mar kêt jakamã nhũm pre ja hã mẽ omu nẽ ãm mẽ omu. Tã na ra mẽ pahte mẽmo karõ nhĩpêx o mẽpahpãm nẽ mẽ pamã kapêr. Mẽ pahte hpãnhã amnhĩ kaxyw ãm kôt pix mã pajamaxpêr o papaja na kãm hprãm.

³¹ Koja nhỹrmã tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Nẽ amnhĩ ri mẽ htĩr tũm nẽ mẽ pa ho pa xwýnhjê jarê nẽ amnhĩ ri mẽ pa hkêt xwýnhjê jarê. Na pre ra ã mẽ harênh anhỹr kaxyw arĩgrohta. Arĩgrota ã kot hprĩ hã kãm tanhmã mẽ pajarênh to kaxyw na pre ra Jejusja xãm. Kaxyw na pre akupỹm ho htĩr. Nẽ akupỹm ho htĩr jao kot nhỹrmã kãm tanhmã mẽ pajarênh to xwýnh ã ho amnhĩrĩt. Anẽ.

³² Nhũm pre ã Pawre mẽ kãm Tĩrtũm kapêr jarênh anẽ nhũm mẽ mar o kuhê. Kot mẽ kãm Jejus tyk nẽ akupỹm htĩr ã harê nhũm mẽ mar o kuhê. Nhũm mẽ hkwyjaja kuma nẽ ãm kuma nẽ axtem nẽ ri hã akunha. Nom nhũm mẽ hkwyjaja mẽ kurom mar tỳx nẽ Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarê pa mẽ ixprĩ hã mar mex nẽ. Anẽ.

³³ Hãmri nhũm Pawre akupỹm nhỹri hpõx xà hã ixkre hwýr ma tẽ.

³⁴ Hãmri nhũm Xiõnĩs pẽ Areop kãm mẽ kãm kapêr xwýnh nẽ mẽhõ ni pẽ Tãmaris nẽ mẽ hkwyjaja kapêr mar tỳx nẽ amnhĩ kaxyw Jejus kôt hamaxpêr nẽ hkôt amnhĩ xunhwý. Hãmri nẽ Pawre kôt pa.

18

Pawre Korĩt wýr mõi ã harênh Wam Korĩt 1.1-3

¹ Tã nhũm Pawre krĩ pẽ Atenas rũm kato nẽ ma krĩ pẽ Korĩt wýr mõi nẽ pøj.

² Hãmri nẽ nhỹri Akirti pumu. Haxwýja kęp Ijaew. Krĩ pẽ Põt kamã na pre kato. Tã ma pyka pẽ Itar wýr mõi nẽ Itar kamã krĩ pẽ Rõm kamã hpãnhã pa. Pa ho pa htã nhũm mẽ õ pahihiti Krawti tanhmã hamaxpêr to hãmri nẽ mẽ amnhĩ nẽ Ijaew piitã mẽ hanor pa. Jakamã nhũm Akirti kato nẽ hprõ Prisire mẽ wa ma Korĩt wýr mõi. Hãmri nẽ hwýr pøj nẽ kamã pa ho pa.

Jakamã nhũm Pawre Korĩt wýr pøj nẽ wa omu

³ nẽ wa kuri pøj nẽ wa hkôt ri pa. Nẽ Siras mẽ Ximotre wa kamã hamak pẽ wa ãhkõ hã ãpênh o pa. Wa urak nẽ kupêxê pytĩ ho ixkre nhĩpêx nẽ ho wênê ho ri wa hkôt pa.

⁴ Hãmri nhũm sap kato nhũm ma Tĩrtũm kapêr o mẽ ahkre xà hã ixkre hwýr pa nẽ kamã mẽ kãm Tĩrtũm kapêr jarênh o hkrĩ. Ijaew mẽ Ijaew kêt xwýnhjê mã nhũm mẽ kãm ujarênh o hkrĩ. Nẽ mẽ kãm Jejus kot mẽ panê tanhmã amnhĩ nhĩpêx to hã harê.

⁵ Tã nhũm Siras mẽ Ximotre wa ma Masetõn rũm Pawre wýr mõi pøj. Jakamã nhũm Pawre axte ixkre nhĩpêx ã ãpênh kêt nẽ. Pãnhã apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkôt pa. Kęp Tĩrtũm kot mẽ pakaxyw ãm xwýnh ã harênh o ri mẽ hkôt pa. Xatã mẽ kãm ujarênh o pa.

⁶ Nom nhũm mẽ kãm mar prãm kêt nẽ kamã gryk kato nẽ kãm kapêr punuj nẽ. Nhũm Pawre tee ri amnhĩ tã mẽ kuma nẽ mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harênh tã ka mẽ amã mar prãm kêt nẽ. Nà mẽ kam nẽ mẽ mãmri ate amnhĩ tomnuj kãm ty nẽ arĩ kam amnhĩ pumu no ãm amnhĩ tã tanhmã inhmã nẽ hkêt nẽ. Ra mẽ ate Tĩrtũm kapêr kaga kênã. Nà kot paj mẽ akaga nẽ ma hpãnhã Ijaew kêt xwýnhjê hkôt ri mẽ kãm ja jarênh o ri ixpa. Anẽ.

Hãmri nẽ kãnhmã xa nẽ hinõkã kapa nẽ ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anẽ.

⁷ Hãmri nẽ ixkre rũm kato nẽ hijuk ri Ijaew kêt xwýnh pẽ Xijutre nhõrkwý hwýr tẽ nẽ hpãnhã Xijutre hkôt pa ho pa. Xijutre kęp Ijaew kêt tã amnhĩ kaxyw Tĩrtũm mã hamaxpêr rãhã ho pa.

⁸ Tã nhũm Ijaew õ pẽ Kriptija hkwyjê rom amnhĩ kaxyw Pahihti Jejus kôt hamaxpêr nẽ hkôt amnhĩ xãm. Kęp Ijaew nhõ Tĩrtũm kapêr o mẽ ahkre xà hã ixkre kamã mẽ ahkre xwýnh na pre. Jakamã õrkwý kamã hkwyjê mẽ mẽ hpimràatã Pahihti Jejus kôt amnhĩ xunhwýr pa. Nẽ krĩja kamã ra Ijaew kêt xwýnh ohtõ nẽ Kripti pyrà nẽ amnhĩ kaxyw Jejus kôt hamaxpêr nẽ hkôt amnhĩ

xunhwỳ. Jakamã nhũm Pawre mẽ kêp Je-
jus kwỳ hã mẽ piitã mẽ hkrã kumrã.

⁹ Tã nhũm kamàt nhũm Pawre gõr nê
nõ nê amỳti nhũm kêwe Pahihti Je-
jus axte hwỳr kato nê kãm kapêr nê kãm:

—Pa Pawre? E kwa kêr ka mãmri
axàmnhĩx ri atar mẽ kãm ijarênh rãhã ho ri
apa nê amnhĩ kamã akahak o ri mẽ hkôt
apa hkêt nê.

¹⁰ Kot paj atãnopxa nhũm mēhõ tanhmã
ato hkêt nê. Krĩ ja kamã koja mẽ ohtô nê
ixkôt amnhĩ xunhwỳ. Anê.

¹¹ Nhũm pre ã Pahihti Je-
jus Pawre hpimtir kãm kãm kapêr anê.
Jakamã nhũm Korĩt kãm arĩ ri mẽ hkôt pa
ryy nê. Arĩ mẽ hkôt pa hã amgrà pyxi
nê hkôt mytwrỳ kêp 6. Jao Tĩrtũm
kapêr o mẽ ahkre ho ri mẽ hkôt pa.

¹² Tã nhũm Korĩt nhõ xwỳnhjê
nhõ pika pê Gres kamã mẽ ho amnhĩptàr
xwỳnh nyw Gartija. Korĩt kãm pa
jakamã nhũm Ijaew xàptàr tũmrejaja
Pawre pynê nê ma hwỳr o tẽ nê kãm
tanhmã ho hêx to.

¹³ Jakamã nhũm Ijaew pikuprõnh
xà hã ixkre kamã mẽ kãm kapêr xwỳnh
Sostenesja Garti mã Pawre o hêx nê kãm:

—Kwa jahti na hte mẽ ixpê Ijaew
kot amnhĩ nhĩpêx kwỳm ri mẽ ahkre ho pa.
Jao mẽ ixte axtem nê tanhmã Tĩrtũm
kôt ri amnhĩ nhĩpêx to ho ri ixpa kaxyw
mẽ inhmã karõ ho pa. Nom mẽ ixte
amnhĩ nhĩpêx kuhpa hã mẽ inhmã karõ.
Anê.

¹⁴ Hãmri nhũm ra Pawre kot Garti
mã amnhĩ jarênh mã tã nhũm Garti
amnhĩ to wa nê hã mẽ kãm kapêr nê mẽ kãm:

—Tk. Kwa kot tanhmã amnhĩ
tomnuj tore hã. Kot tanhmã amnhĩ
tomnuj to nhũm mẽ ate inhmã harênh
ronhỹx pa arĩ mẽ ama nê tanhmã mẽ
amã hipêx to.

¹⁵ No xep ãm kot mẽ axàptàr tũmrejaja
kot amnhĩ nhĩpêx kuhpa hã pix mã kot
amnhĩ nhĩpêx o pa kênã. Nê mẽ ate mẽ
ahkre kuhpa hã kot ri mẽ ahkreja
pix mỳrapê na ka mẽ kamã agryk nê ã
inhmã ho akapêr anê. Nà kot paj ja
hã tanhmã ho hkêt nê. Ka mẽ kam
nê amnhĩ krã hkôt tanhmã ho hprãm
xà hkôt tanhmã ho. Anê.

¹⁶ Hãmri nê amnhĩ nê mẽ hano.

¹⁷ Hãmri nhũm mẽ tee ri kuma nê ra
Sostenes kamã gryk nê. Kot Garti mã
tanhmã Pawre jarênh to htã nhũm kuma

nê ãm mar jakamã nhũm mẽ hã
Sostenes kamã gryk. Hãmri nê unê nê
Garti noo mã htak o xa. Nê htak rax nê.
Nom nhũm hã mẽ omu nê ãm mẽ omu nê
nê tanhmã mẽ kãm nê hkêt nê.

Pawre kot akupỳm ãxiok wỳr mõi ã harênh

¹⁸ Tã nhũm Pawre arĩ Korĩt kamã mẽ
hkôt pa nê gaa nê nojarêt nê Je-
jus kôt htõjê mã amnhĩ jarê nê mẽ kãm:

—E kot paj ma akupỳm pika pê
Sir wỳr mõi. Anê.

Hãmri nê mẽ kêp kato nê ma
hwỳr mõi. Nê ma amnhĩ kôt Akirti mẽ
hprõ Prisire wa o mõi. Mõi nê krĩ pê
Sênkrej wỳr pøj. Nhũm Pawre amnhĩ
kukamã mẽmoj tã tanhmã Tĩrtũm mã
amnhĩ jarênh to nê amnhĩ jarênh
xà hkôt amnhĩ krã hkênh pa. Ijaew
kot amnhĩ nhĩpêx xà hkôt ã amnhĩ
nhĩpêx anê. Hãmri nê mẽ pàr wỳr
agjê nê Sênkrej rũm kato nê ma Sir
wỳr mõi.

¹⁹⁻²¹ Mõi nê krĩ pê Epes wỳr pøj.
Hãmri nhũm Pawre mẽ hkwỳjaja pàr
rũm hapøj nê krĩ hwỳr agjê nê Ijaew
nhõ Tĩrtũm kapêr o mẽ ahkre xà hã
ixkre hwỳr mra nê hwỳr agjê nhũm
Pawre mẽ kãm Tĩrtũm kapêr jarênh
o nhỹ. Hãmri nhũm mẽ kuma nê kãm
mar prãm nê. Nê kãm:

—Kwa anojarêt kêt nê. Kritpêm
mẽ ixkôt ri apa ryre nê Tĩrtũm kapêr
o mẽ ijahkre. Mẽ inhmã ja mar prãm.

Anhỹr tã no nhũm mẽ kãm:

—Nà kot paj ma mõi. Nom koja
Tĩrtũm nhỹrmã akupỳn mẽ awỳr inhmẽ
pa man akupỳn mẽ awỳr mõi nê axte
kapêr o mẽ ajahkre. Anê.

Hãmri nê ma mõi. Ma Epes rũm
pàr kãm mõi. Nom nhũm Akirti mẽ
Prisireja wa Epes kamã arĩk nê
hpãnhã kamã pa ho pa.

²² Tã nhũm Pawre krĩ pê Se-
jarej wỳr pøj. Hãmri nê hpãnhã
kurũm ma akupỳm Jeru-jarê hwỳr
mõi. Kot Je-
sus kôt htõjê pumunh mã ma mẽ
hwỳr mõi. Hãmri nê mẽ hwỳr pøj
nê mẽ omu nê tanhmã mẽ kãm
amnhĩ jarênh to nê mẽ kêp kato nê
ma akupỳm ãxiok wỳr mõi.

²³ Hãmri nê hwỳr pøj nê kamã mẽ
hkôt ri pa ryy nê mẽ kurũm kato nê
hpãnhã ma akupỳm pyka pê Prik mẽ
Karatas wa hwỳr mõi. Nê kamã mẽ
kot Je-
sus kôt amnhĩ xun-
hwỳr xwỳnhjê jahkre ho pa. Mẽ kot
Je-
sus

kôt amnhĩ nhĩpêx tỳx rãhã ho pa kaxyw mẽ hkôt mẽ ahkre mex o ri mẽ hkôt pa.

*Apor kot Epes kãm Tĩrtũm kapêr jarênh
Epes 1.1-2; Wam Korĩt 3.6-9*

²⁴ Tã nhũm Epes wỳr Ijaew ò pè Aporja mỗ nê hwỳr pỏj. Krĩ pè Aresãn kamã na pre kato. Na pre hte amnhĩ kaxyw Tĩrtũm kôt pix mã hamaxpêr nê kapêr ã kagà htũm mar tỳx nê. Jakamã mẽ kãm harênh mex o pa nhũm mẽ piitã kãm mar prãm nê.

²⁵ Nom kormã Jejus jarênh jatur xà mar kêt jakamã ãm mẽ kãm hkrax pix jarênh o pa. Juãw Paxis kot tanhmã mẽ ahkre htoja nhũm mar tỳx nê. Nê tanhmã kot mẽ hkrã kumrãr to ho paja nhũm mãănênh mar tỳx nê. Jakamã na pre hte mẽ kãm ja pix jarênh o pa. No Jejus kêp Tĩrtũm kot mẽ pahwỳr mẽnh xwỳnh ã harênhja nhũm kormã mar kêt nê. Tã Epes wỳr mỗ nê pỏj.

²⁶ Hãmri nê Ijaew nhõ Tĩrtũm kapêr o mẽ ahkre xà hã ixkre hwỳr axà nê kamã mẽ kãm ujarênh o nhỹ. Amnhĩ kamã kahak kêt nê àmnhĩx ri mẽ kãm ujarênh mex nê. Hãmri nhũm Prisire mẽ Akirti wa kot mẽ kãm ujarênh ã kuma nê war axpên mã:

—Kwa mãn kormã Jejus jarênh piitã mar kêt. E pu amnhĩ kôt panhõrkwy hwỳr o tẽ nê pahprĩ hã kãm harênh jatur xàm kumẽ kê hprĩ hã mar pa. Anê.

Hãmri nê war amnhĩ kôt kuwỳ nê hprĩ hã kãm ujarênh jatur xàm kumẽ nhũm hprĩ hã harênh piitã mar tỳx nê.

²⁷ Tã ra pyka pè Gres wỳr nojarêr nê Jejus kôt htỏjê mã amnhĩ jarẽ nhũm mẽ kuma nhũm ja mẽ kãm mex nê. Hãmri nê Gres kamã Jejus kôt mẽ htỏjê mã kagà nhĩpêx. Apor kot mẽ hwỳr amnhĩ kôt o mỗr nê mẽ kãm òr nhũm mẽ kot omunh nê kamã harênh nê ho mex kaxyw mẽ kãm hipêx. Hãmri nê hipêx pa nê kãm kugõ nhũm kupy nê mẽ kurũm kato nê ma mẽ hwỳr mỗ. Hãmri nê mẽ hwỳr pỏj. Gres nhõ xwỳnh kwỳjaja na prem ra Jejus kôt amnhĩ xunhwỳ. Tĩrtũm kot mẽ kutã nojarêr jakamã nhũm mẽ ra hkôt amnhĩ xunhwỳ. Jakamã nhũm Apor mẽ hwỳr pỏj hãmri nê mẽ ìhkõ hã tanhmã mẽ ho ajuta hto ho pa.

²⁸ Nê xatã Ijaew mã tanhmã Jejus jarênh to kamã hihtỳx o mẽ hkôt pa nê mẽ kãm:

—Nà Jejusja tãm na pre Tĩrtũm mẽ pakaxyw ãm. Tĩrtũm kapêr ã kagà htũm kamã ã harênh kot anhỹr. Anê.

19

*Pawre akupỳm Epes wỳr mỗr ã harênh
Rukre 3.15-16*

¹ Tã nhũm Apor kormã Korĩt kãm pa ri nhũm Pawre ma akupỳm Epes wỳr mỗ. Ma krãhakỳx kôt akupỳm hwỳr mỗ. Hãmri nê hwỳr pỏj nê mẽ kot Jejus kôt amnhĩ nhĩpêx o mẽ pa xwỳnhjê pumu. Nhũm mẽ kormã Jejus jarênh jatur xà mar kêt nê.

² Jakamã nhũm Pawre mẽ hwỳr mỗ nê mẽ omu nê Tĩrtũm Karõ hã mẽ hkukja nê mẽ kãm:

—Kwa mẽ ate Jejus kôt amnhĩ xunhwỳr xà hã arĩgrota ã xà na pre Tĩrtũm Karõ mẽ akarõ mã agjê? Anê.

Hãmri nhũm mẽ kuma nê kãm:

—Nà mẽ ixte Tĩrtũm Karõ jarênh mar kêt. Anê.

³ Hãmri nhũm mẽ kãm:

—No mẽmoj kôt na prem mẽ akrã kumrã? Anê.

Nhũm mẽ kãm:

—Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anê.

⁴ Hãmri nhũm Pawre mẽ kãm:

—Nà Juãw Paxis na pre Ijaew mã kapêr o: “Kot kaj mẽ mẽ ate amnhĩ tomnuj kaga nê hpãnhã tãm amnhĩ nhĩpêx pa hã mẽ akrã kumrã.” Anhỹr o mẽ kãm kapêr o pa. Nê mẽ kãm Jejus jarênh o: “Koja tokyx mẽhõ ixkôt hapu hã mẽ pahwỳr kato nê tanhmã amnhĩ nhĩpêx to ho pa. Ka mẽ omu nê amnhĩ kaxyw hkôt ajamaxpêr nê hkôt amnhĩ xunhwỳ.” Anê. Tã Jejusja na pre ã mẽ kãm harênh anhỹr o pa. Anê.

⁵ Nhũm pre ã Pawre mẽ kãm Juãw Paxis mẽ Jejus wa harênh anê nê hpãnhã Jejus nhỹ hã mẽ hkrã kumrã.

⁶ Hãmri nê hpãnhã mẽ hã ìhkra jaxwỳ nhũm Tĩrtũm Karõ mẽ hwỳr wrỳ nê mẽ hkarõ mã gjêx pa. Hãmri nhũm mẽ ÿ hã ahpỳnhã axtem mẽ kapêr kwỳ ho kapêr nê ÿ hã Tĩrtũm mex o mex ã harênh o kuhê.

⁷ ã mẽ kot amnhĩ nhĩpêx anhỹr xwỳnhjaja kêp 12.

⁸ Tã nhũm Pawre Epes kãm Ijaew nhõ Tĩrtũm kapêr o mẽ ahkre xà hã ixkre hwỳr

mrar ã mytwrÿ axkrunëpxi. Amnhĩ kamã kahakkêt nê hprĩhã Ijaew mã hprĩhã Jejus jarë nê mẽ kãm:

—E pa mẽ amã Jejus jarë ka mẽ inhma. Nà Tĩrtũm kot mẽ pahwÿr mēnh xwÿnhhta na. Nê mẽ pahte kamã pajamak o papa xwÿnhhta na. Jakamã kot ka mẽ amnhĩ kaxyw hkôt ajamaxpēr nê hkôt amnhĩ xunhwÿ nhũm Tĩrtũm ja hã mẽ apumu nê mẽ ato hkra. Anë.

Hãmri nhũm mẽ hkwyjaja kuma nê hkôt hamaxpēr kurê kumrëx.

⁹ Nom nhũm mẽ hkwyjaja kuma nê ãm kuma nê Jejus o kapēr punuj nê. Mẽ piitã mẽ noo mã kuhê nê ho kapēr punuj tÿx nê. Nhũm Pawre tee ri ja mẽ omu hãmri nê mẽ kurũm kato. Mẽ pikuprõnh xà hã ixkreta rũm kato nê hpãnhã nhãm mẽ kot kãm “Xirãn kot mẽ ahkre xà hã ixkre” anhÿr xwÿnhja wÿr hpãnhã mō. Nê amnhĩ kôt mẽ kot Jejus kôt amnhĩ xunhwÿr xwÿnhjê ho pa nê hpãnhã ixkreta kamã mẽ ahkre ho pa. Apkati mẽ hwÿr mra nê mẽ ahkre.

¹⁰ Jao hã amgrà axkrut. Jakamã nhũm pyka pē As kamã mẽ piitã Pahihti Jejus jarēnh ma. Ijaew nê Ijaew kêt xwÿnhjaja nhũm mẽ piitã harēnh ma.

Wajaga hkwy jarēnh

¹¹ Tã nhũm Pawre Tĩrtũm nhÿ hã mẽ kãm aa mẽ kot mẽmoj pumunh kêt kwÿ ho anhÿr o ri mẽ hkôt pa.

¹² Jakamã nhũm pre htem hwÿr mra nê kēp é hkwy jamÿ nê ma mẽ à xwÿnhjê hwÿr o mra nê mẽ hã haxwÿ nhũm mẽ akupÿm mex. Nê mẽkarõmnuti kot tanhmã mẽ ho ho pa xwÿnhjê hã nhũm prem mãânēn mẽ hã é kwÿ jaxwÿ nhũm mẽkarõmnutija mẽ kurũm hapôj nê ma mrar kurê kumrëx nhũm mẽ akupÿm tãm hkrã.

¹³⁻¹⁴ Tã nhũm mẽõ patre maati Sewahtija hkra my kēp 7 nê piitã kēp wajaga. Hãmri nê mẽ kãm Pawre pyrã nê mẽ nê mẽkarõmnuti japôx o pa hprãm nê. Jakamã kormã Jejus kôt amnhĩ xunhwÿr kêt tã mẽ kot ÿ hã Pawre pyrã nê mẽhõ nê hkwy janor kaxyw nê kãm:

—E Pawre kot Jejus jarēnh o ri pa xwÿnhhta nhÿ hã kot paj amã ixkapēr. Jakamã e kwa tokyw myta rũm akato nê ma tē. Anë.

¹⁵ Hãmri nhũm mẽkarõmnutija mẽ kuma nê ãm mẽ kuma nê mẽ kãm:

—Tk. Mẽ apē Jejus mẽ Pawre wa hkwy hkêt tã mẽ nê ã mẽ inhmã akapēr anhÿr o apa. Nà Jejus mẽ hkwy pixjaja na htem Tĩrtũm nhÿ hã mẽ kēp mẽ ijapôx o pa. Mẽ apē mẽ hkwy hkêt kēnã. Nà pa ixkatoore kaxyw ã. Anë.

¹⁶ Hãmri nhũm mẽkarõmnuti kot tanhmã ho xwÿnhhta mẽkarõmnuti nhÿ hã wajagajê pynê nê mẽ htak rax o kēp mẽ ê kaxônh pa nhũm mẽ tee ri amnhĩ nhĩpêx. Hãmri nê hkēnh nê òrkwy rũm hapôj nê ma umaj hprôt nê mra.

¹⁷ Hãmri nhũm Epes kamã mẽ piitã ã kot mẽ hipêx anhÿr ã mẽ harēnh ma nê tee ri hamaxpēr nê kãm ma nê. Ijaew nê Ijaew kêt xwÿnhjaja nhũm mẽ piitã tee ri kãm hamaxpēr o pa. Nê Pahihti Jejus mã mex o mex ã harē.

¹⁸ Jakamã nhũm mẽ kot Jejus kôt amnhĩ xunhwÿr nyw xwÿnhjaja piitã tanhmã amnhĩ jarēnh to. Nê mẽ hkwyjaja amnhĩ jarēnh o:

—Nà kormã ixte Jejus kôt amnhĩ xãm kêt ri na pa pre ã amnhĩ tomnuj anhÿr o ri ixpa. Tã Jejus kôt amnhĩ xãm hãmri nê axte ã amnhĩ nhĩpêx anhÿr kêt nê. Anë.

Nhũm mẽ hkwyjaja kēp wajaga htã mẽ urak nê Jejus kôt amnhĩ xunhwÿ hãmri nê amnhĩ jarēnh o:

—Nà ijaxwÿja kormã Jejus kôt amnhĩ xãm kêt ri na pa pre hte nê mẽ no kupyri nê mẽ y pix o ri mẽ hkôt ixpa. Tã Jejus kôt amnhĩ xãm hãmri nê axte ã amnhĩ nhĩpêx anhÿr kêt nê. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anë.

¹⁹ Hãmri mẽ õ wajaga xàhpumunh xà hã kagà jamÿ nê ma o mra nê kaxyw kuto nê kamã rēnh pa nê mẽ piitã mẽ noo mã ho xêt pa. Wajaga xàhpumunh xà hã kagàja ã kãxpore xohtô rax kumrëx tã nhũm mẽ Jejus gryk ã hamÿ nê o mra nê ho hxêt pa nhũm hapêx.

²⁰ Hãmri nhũm krĩ nhõ xwÿnhjaja ã mẽ kot amnhĩ nhĩpêx anhÿr ã mẽ omu nê ohtô rax nê mẽ urak nê Jejus kôt amnhĩ xunhwÿ.

Pawre kot Rõm wÿr hkrã hã harēnh Rõmãn 1.13-15, 15.22-29

21 Tã nhũm Pawre ra akupÿm Jerujarẽ hwÿr nojarêt nẽ hamaxpẽr o:

—E kot paj ixkato nẽ hpãnhã ma Masetõn mẽ Gres wa hkõt ma akupÿm Jerujarẽ hwÿr mõ. Ma mẽ kot Jejus kõt amnhĩ xunhwÿr xwÿnhjẽ pumunh o mẽ hkõt mõ. Hãmri nẽ Jerujarẽ hwÿr pøj nẽ kamã tanhmã amnhĩ to hpa hãmri nẽ hpãnhã ma Rõm wÿr mõ. Anẽ.

22 Hãmri nẽ hkõt ho ajuta ho wa pa xwÿnh Ximotre mẽ Eras wa kãm amnhĩ jarẽ nẽ wa kãm:

—E kêr ka wa ma ixkukamã Masetõn wÿr wa mõ. Kot paj kormã jar As kamã ixpa grille hãmri nẽ ma war akõt mõ pu mẽ hamũ ma Jerujarẽ hwÿr mõ. Anẽ.

Hãmri nhũm wa kuma nẽ kato nẽ ma hkukamã Masetõn wÿr mõ.

Mẽ kot sãnti hã Pawre mã àkjêr ã mẽ harẽnh

Sikũn Korõt 1.8-9

23 Rõm nhũm Epes nhõ xwÿnhjaja tee ri Pawre kot tanhmã Pahihti Jejus jarẽnh to hã kuma nhũm ja mẽ kêp omnuj nẽ. Nhũm mẽ Jejus ã kamã gryk tÿx nẽ.

24 Na prem amnhĩ kaxyw Tirtũm kõt hamaxpẽr kêt nẽ. Na prem axtem sãnti ho mẽ hpãm nẽ amnhĩ to hwÿr pê hã hpijaàm nẽ kãm mex o mex ã harẽnh o pa. Mẽ õ sãntija ni Xiãre na pre. Nhũm mẽ kãm ixkre nhĩpêx nẽ kamã hkarõ nhĩpêx xãm. Hãmri nẽ hwÿr akuprõ nẽ hã hkĩnh nẽ hkarõ hã hpijaàm nẽ kãm mex o mex ã harẽ. Nhũm pre hte Temêtja Xiãre nhõrkwÿ karõ hkryre hkwy nhĩpêx nẽ mẽ kãm ho wẽnê ho pa. Prat o hipêx nẽ ho wẽnê ho pa. Jao ra hã mẽ àpênh xwÿnhjẽ mẽ nhũm mẽ kot haprõr xwÿnhjẽ kukwak ri kàxpore jamÿnh rũnh o pa.

25 —Jakamã nhũm Pawre mẽ hwÿr mõ nẽ pøj nẽ mẽ kãm Mẽpahpãm Tirtũm jarẽnh o ri mẽ hkõt pa nhũm Temêt tee ri kuma nhũm ja kêp omnuj nẽ. Hãmri nhũm hamaxpẽr nẽ mẽ kot urak nẽ Xiãre nhõrkwÿ karõ hkryre nhĩpêx nẽ ho wẽnê ho pa xwÿnhjẽ ho akuprõ nẽ mẽ kãm:

—E kwa mẽ inhma. Na pu htem mẽpanã Xiãre nhõrkwÿ karõ hkryre pãnhã kàxpore jamÿnh rũnh o papa.

26 Tã mãn ka mẽ ra ham hpõx xwÿnh Pawreja pumu nẽ kapẽr ma. Na hte jar

mẽ panhõ krĩ kamã nẽ As piitã hkõt mẽ kãm mẽpanã Xiãre karõ nẽ mẽ kãm kapẽr o pa. Xep mẽ pahte mẽ hkarõ nhĩpêxja kêp mẽpanã kumrêx kêt ã mẽ kãm harẽnh o pa nhũm xep mẽ ohtõ nẽ kuma nẽ ra hkõt hamaxpẽr.

27 —Kwa ja mex kêt. Koja mẽ kapẽr ma nẽ hkõt amnhĩ nhĩpêx hãmri nẽ axte mẽ pahte ixkre karõ hkryre nhĩpêx xwÿnhhta japrõr kêt nẽ. Hãmri nẽ mẽ paxàpênh o kapẽr punuj nẽ. No ãm ja pix omnuj kêt. Koja mẽpanã Xiãre mã amnhĩ jarẽnh xà hã ixkreja kaga hpa. Nẽ haxwÿja karõja kaga. Mẽ piitã kãm hapê kênã. As kamã nẽ pyka piitã hkõt mẽ piitã kãm hapê nẽ hwÿr mra nẽ amnhĩ to hwÿr o pa. Kêp mẽpanã mex kumrêx tã koja mẽ Pawre kapẽr gryk ã hkaga hpa nẽ axte kãm hamaxpẽr kêt nẽ. Hãmri pu mẽ axte mẽ kukwak ri pakàxpore rax nẽ papa hkêt nẽ. Kwa tanhmã kot puj mẽ amnhĩ nhĩpêx to? Anẽ.

28 Hãmri nhũm mẽ tee ri ã kapẽr anhÿr ã kuma nẽ Pawre kamã gryk tÿx kumrêx. Nẽ gryk xàj kàx pèê kapẽr nẽ xatã kapẽr tÿx kãm kapẽr punuj nẽ. Nẽ kapẽr o:

—Xiãre na mex kumrêx. Kêp mẽ pahpê Epes nhõ xwÿnhjẽ nã maati na.

Anhÿr o kàxpèê kapẽr o kuhê.

29 Hãmri nhũm krĩ nhõ xwÿnh piitã mẽ kuma nẽ mẽ hwÿr hprõt nẽ haxwÿja gryk nẽ kàxpèê mẽ hkõt ã harẽnh anhÿr o kuhê. Hãmri nẽ gryk xàj Pawre hkõt ri wa pa xwÿnhja wa unê nẽ ma mẽ kot axpên mar xà hã ixkre hwÿr wa hkjênh o tẽ. Masetõn nhõ xwÿnh wa kêp Gajore mẽ Aristakja nhũm mẽ wa unê.

30 Hãmri nhũm Pawre mẽ kot wa unênh ã mẽ omu nẽ tee ri wa hkukamã hamaxpẽr nẽ mẽ hkõt hprõt nẽ mẽ kãm tanhmã kapẽr to kaxyw nom nhũm mẽ kot Jejus kõt amnhĩ xunhwÿr xwÿnhjaja ja nẽ kãm kapẽr kãm hihtÿx nẽ.

31 Hãmri nhũm As kamã mẽ kot mẽ ho amnhĩptar xwÿnh kwÿjaja ã mẽ kot amnhĩ nhĩpêx anhÿr ã mẽ omu nẽ Pawre hwÿr hpẽr mẽ. Mẽ kãm hkĩnh jakamã kot mẽ hkõt htêm nhũm mẽ kot hpĩr pymaj hwÿr hpẽr mẽ nẽ mẽ hkõt htêm nẽ hkurê kamã hihtÿx nẽ.

32 Rõm nhũm mẽ piitã mẽ kot axpên mar xà hã ixkre hwÿr pikuprõnh pa nẽ kàx pè

kapër punuj o kuhê. Nom axpên kôt kapër kêt nê. ãm axpên kwým ri kàx pê tanhmã kapër punuj to ho. Nhũm mẽ hkwyjaja hprĩ hã mẽ mar kêt tã amarĩ amnhĩ krã hkôt kàx pê kapër punuj nê.

³³ Nhũm Ijaew kwýjaja tee ri ja hã mẽ omu nê axpên mã:

—Tk. Kwa okora. Koja mẽ nã Xiãre hã gryk hãmri nê tanhmã mẽ pahpê Ijaew to nã? Anê.

Hãmri nê hamaxpër nê mẽ hwýr amnhĩõ pê Aresãnja mẽ nê kãm:

—Kwa ma mẽ hwýr tẽ nê mẽ kãm tanhmã mẽ pahtã axàprãr to. Pawre kêp mẽ pahkwý htã tãm na mẽ kãm mẽ gryk jaxà. No mẽ papajaja na pu mẽ kãm mẽ gryk jaxàr kêt nê. Anê.

Hãmri nhũm mẽ kuma nê mẽ hwýr tẽ nê xa nê tee ri kot mẽ ho hpinhkrênh kaxyw kãnhmã mẽ kãm ìhkra pěr kaprý.

³⁴ Nhũm mẽ omu mẽ nom hpinhkrênh kêt nê arĩ kàx pêt kapër punuj ã 2 or. Nê kàx pê kapër o:

—Mẽpanã Xiãreja mex o mex. Kêp mẽ pahpê Epes nhõ xwýnhjê nã mex na. Anê.

³⁵ Tã nhũm mẽ õ pahi nhõ kôwenatõ jatã tanhmã Epes nhõ xwýnhjê ho hpinhkrênh to hãmri nê ja nê mẽ kãm kapër nê mẽ kãm:

—Kwa mẽ anhĩkrê. Mẽ piitã kot Xiãre mex o mex ã omunh kênã. Nê mẽ pahpê kãm amnhĩ jarênh xà hã ixkre jamãr xwýnh ã mẽ kot mẽ pahpumunh mex. Nê kaxkwa rũm karõ kot mẽ pahwýr tẽm nhũm mẽ pahpê hamãr o papa xwýnh ã nhũm mẽ kot mẽ pahpumunh mex.

³⁶ Jakamã mẽhõ kot kêt we mẽ pahpê hamãr xwýnh kêt ã mẽ pajarê? Ra mẽ piitã mẽ kot ja hã mẽ pahpumunh jakamã kwa mẽ anhĩkrê nê ri ã akapër anhýr kêt nê.

³⁷ No mẽ ate wa unênh nê amnhĩ kôt wa ho atẽm xwýnhta wa. Wa kot tanhmã mẽpanã Xiãre ho kapër punuj to rý kêp õ ixkre kamã àhkĩnh kêt tã ka mẽ amarĩ wa unê nê amnẽ amnhĩ kôt wa o tẽ.

³⁸ —Kwa kê Temêt mẽ hkwyjaja kãm tanhmã wa ho kapër to hprãm nê ma pahihiti hwýr wa o tẽ nê kumã mãn tanhmã wa ho kapër to. Mẽmoj tã axpên mã mẽ kapër xà hã arĩgrota ãã.

³⁹ Rý ka mẽ amã mẽmoj jarênh prãm nê arĩgroja ã mãn rĩ kormã mẽmoj jarê.

⁴⁰ No jarãhã mẽ ate amnhĩ nhĩpêxja te mẽ ate pahihiti kutã amnhĩ xunhwýr nê ho akapër punuj pyrãk. Koja Rõm nhõ xwýnhjê nhõ pahi mẽ ajarênh ma hãmri nê mẽ ate kamã agryk ã amnhĩ kamnhĩx. Hãmri nê mẽ atã ixkukja pa tanhmã kãm mẽ ajarênh to? Mẽhõ nhý hã na ka mẽ ã apikuprõnh nê amnhĩ nhĩpêx anê? Nà amnhĩ krã hkôt na ka mẽ akuprõ nê ã amnhĩ nhĩpêx anê. Anê.

⁴¹ Hãmri nê mẽ kãm kapër pa nê mẽ hano nhũm mẽ angrã nê ma akupým õrkwý hwýr hapêx.

20

Pawre ma Masetõn mẽ Gres wa hwýr mõi ã harênh

¹ Hãmri nhũm Pawre ra nojarêt. Jerujarê hwýr mõi mã nom kormã pika pê Masetõn kumrêx wýr mõi nê kurũm ma akupým Jerujarê hwýr mõi mã. Hãmri nê nojarêt nê mẽ kot Jesus kôt amnhĩ xunhwýr xwýnhjê ho akuprõ nê mẽ kãm amnhĩ jarê nê mẽ kãm:

—E kot paj ma mõi. Nom kêr ka mẽ arĩ ixwakre kamã Tirtũm kapër kôt amnhĩ nhĩpêx mex rãhã ho ri apa nê aa hkaga hkêt nê. Anê.

Hãmri nê mẽ kãm:

—E mẽ mãmrĩ ixwa kre kamã axãmnhĩx ajamakêtkati nê ri apa. Anê.

Hãmri nê kato nê ma Masetõn wýr mõi.

² Nê hwýr pøj nê kamã krĩ hkwy hkôt mõi nê nhýri mẽ kot Jesus kôt amnhĩ xunhwýr xwýnhjê pumu nê Tirtũm kapër o mẽ ahkre. Mẽ kot hkôt amnhĩ nhĩpêx mex nê kãm hprãm xà hkôt pix mã amnhĩ nhĩpêx kaxyw mẽ kãm kapër o ri mẽ hkôt pa. Hãmri nê kato nê ma mõi nê pyka pê Gres wýr pøj.

³ Nê kamã mẽ hkôt pa hã mytwrý axkrunêpxi hãmri nê akupým pyka pê Sir wýr nojarêt. Nê ma pãr kãm hwýr mõi kaxyw nê amnhĩ tã Sir kamã Ijaew kwý kot tanhmã harênh to hã amnhĩ jarênh ma. Na prem ra hã axpên mã amýnê nê axpên mã:

—E koja amnẽ mẽ pahwýr mõi pu mẽ nhýri omu nê hpĩr kurê kumrêx. Anê.

Hãmri nhũm Pawre amnhĩ tã mẽ kapër ma nê pãr kaga nê mẽ hwýr mõi kêt nê.

Hāmri nē awjanā nē Jerujarē hwÿr Masetōn kamā pa.

⁴ Nhūm Jejus kōt htō hkwÿjaja ma hkōt mō. Ā mē hixi kot anhÿr.

Perej nhō xwÿnh Sopatōja. Piro hkra na pre.

Nē Tesarōn nhō xwÿnh Aristak mē Sikūn wa.

Nē Tepe nhō xwÿnh Gajoreja.

Nē As nhō xwÿnh Xikitre mē Torow wa.

Nē Ximotreja.

Jajaja na prem ma Pawre hkōt Jerujarē hwÿr mō.

⁵ Nē pa ixpē Rukre ixte mē amā ja jarēnh nē hā kagā xwÿnhja na pa axte Pawre hā ajēt nē hkōt mō. Jakamā nhūm jajaja piitā ma wa ixkukamā Tōx wÿr mō nē kamā wa ixkām hamak o pa.

⁶ Tā pa wa ma krī pē Piripos rūm ixkato nē pàr kām ma mē hkōt mō. Arīgro pē Pas jakānh mē ma mē hkōt mō.

Tā wa ixtā arīgro pē 5 nē mē hkōt Tōx wÿr pōj nē kamā mē omu nē mē hkōt ixpa hā ixtā ũ semān.

Pawre kot akupÿm Exik o htÿr ā harēnh Juāw 5.21; Atre 9.36-43

⁷ Tā nhūm sap nē kamāt pa mē kot Jejus kōt amnhī xunhwÿr xwÿnhjē hkōt akuprō nē axpēn kutā apku nhūm Pawre mē kām kapēr. Ra apkati hkōt mē inhnojarēt kaxyw jakamā nhūm mē kām Tirtūm kapēr jarēnh ryy nē. Ra kōt ā kamāt nhūm arī mē kām harēnh o nhÿ.

⁸⁻⁹ Ixkre hprēk axpēn nhīpy axkrunēpxi nhītep xā kamā na pa prem akuprō nē mar o ixkrī. Ixkreja kamā kanē ohtō nē hpōk o harir. Jakamā nhūm Pawre arī mē kām ujarēnh o nhÿ nhūm mēhō xāptār nyw Exikja ra ōtxwa htÿx nē mē ixkuri ōt o nhÿ. Janere hā ōt o nhÿ. Tā ra gōr nē janere pē kato nē ahparmā tē nē pykap tēm. Pa mē tee ri omu nē ahparmā hwÿr ixprōt nē wrÿ nē omu nhūm htyk mex nē nō. Kÿj rūm ahpar mā htēm ryy jakamā htyk mex nē nō. Hāmri nhūm hkwÿjaja tee ri omu nē hkaprī htÿx nē kumÿ nē mÿr o hkrī.

¹⁰ Hāmri nhūm Pawre mē ixkōt wrÿ nē hwÿr tē nē htyk ā omu nē kumÿ nē mē kām: –E mē amÿr kēt nē. Ra htyk tā koja Tirtūm akupÿm mē pamā ho htÿr.

Anhÿrja kōt nhūm akupÿm htÿr.

¹¹⁻¹² Hāmri nhūm mē akupÿm htÿr ā omu nē hkÿnh tÿx kumrēx. Hāmri pa mē akupÿm kÿx pē ixkre hwÿr api nhūm Pawre mē inhmā pāwti hkwÿ nhÿrē nē mē inhmā kugō pa mē Jejus kot mē panē htyk mā ijamaxpēr pē kuku. Hāmri nhūm Pawre axte mē kām kapēr o ÿr rāhā nhūm myt kato pa mē kēp anhgrā nē ma ixpa.

Pawre Mīrēt wÿr mōr ā harēnh

¹³ Hāmri pa mē inhnojarēt nhūm Pawre mē ixte hkōt mē inhmōr xwÿnhjē mā:

–E kēr ka mē ma pàr kām ixkukamā mō. Kot paj ahte ma kÿx pē mē akōt ixpar o Asōt wÿr mō. Hāmri nē hwÿr pōj nē mē anhō pàr mā axā pu mē ma pahpimràatā ma hamū mō. Anē.

¹⁴ Hāmri pa mē kuma nē ma mō nē mēmo arīgro hā Asōt kamā axpēn wÿr pōj. Hāmri nhūm Pawre mē ixkōt pàr wÿr axā pa mē ma krī pē Mītirēn wÿr mō.

¹⁵ Nē hwÿr pōj nē kurūm kormā mō nhūm apkati pa mē gō hipōk pē Kiw jakrenh o mō. Nē hakre nē mō nhūm apkati pa mē gō hipōk pē Sām wÿr pōj nē hā pàr nhō. Hāmri nhūm apkati pa mē axte mō nē Mīrēt wÿr pōj.

¹⁶ Nom nhūm ra Pawre nojarēt nē. Kām tokyx As rūm kator nē Jerujarē hwÿr mōr nē tokyx hpōx prām nē. Kām mē hkÿnh pē Pētekos xwÿj ri hwÿr hpōx prām jakamā nojarēt tÿx pa mē Epes wÿr inhmōr kēt nē.

Pawre kot Epes kamā Kris kwÿjē mā amnhī jarēnh

¹⁷ Tā pa mē Mīrēt wÿr pōj nhūm Pawre amnhī wÿr Epes wÿr Jejus kwÿ jahkre ho mē pa xwÿnhjē hā karō.

¹⁸ Hāmri nhūm mē man mē ixwÿr mō nhūm Pawre mē omu nē mē kām amnhī jarē nē mē kām:

–Nā ixte mē amā amnhī jarēnh kaxyw na pa mē atā karō. Ra mē ate tanhmā ixte amnhī nhīpēx to hā ixpumunh mex. Wam mē awÿr As wÿr ixpōxta ā ka prem aprī hā ixpumunh mex nē.

¹⁹ Na pa pre mē akōt ri mē amā tanhmā amnhī nhīpēx to ho ri ixpa. Te ixpē mē amā ixāpēnh xwÿnh pyrāk. Nē Pahшти Jejus mā tanhmā amnhī nhīpēx to ho ri mē akōt ixpa. Nē ixkwÿ Ijaew kwÿ kot Jejus kapēr

kaga hã mẽ omu nẽ ixkaprĩ nẽ inhmÿr o ixa. Nhũm prem Jejus ã ixtomnuj pa amnhĩ xà htÿx kamã ijamak o ri mẽ hkôt ixa.

²⁰ Nom arĩ ri Tĩrtũm kapẽr o mẽ ajahkre ho ri mẽ akôt ixa rãhã nẽ aa hkaga hkêt nẽ. Mẽ anhõrkwÿ kamã nẽ mẽ ahkre xà hã ixkre kamã. Mẽ ate tãm amnhĩ nhĩpêx prãm xàj pa pre ã mẽ ajahkre mex anhÿr rãhã ho ri mẽ akôt ixa.

²¹ —Nẽ mẽ ixpê Ijaewjê mẽ mẽ apê Ijaew kêt xwÿnhjê mẽ pa pre mẽ ajahkre ho axpẽn pyræk. Mẽ apiitã mẽ ate amnhĩ tomnuj kaga nẽ hpãnhã Tĩrtũm kôt amnhĩ nhĩpêx kaxyw. Nẽ amnhĩ kaxyw mẽ panhõ Pahшти Jejus Kris kôt ajamxpêr kaxyw na pa pre mẽ akôt ri mẽ ajahkre rãhã ho ri ixa.

²² —Tã ra Tĩrtũm Karõ kot akupÿm Jerujarê hwÿr inhmẽnh jakamã pa kormã hwÿr mõ. Kot paj hwÿr pøj nhũm krĩ nhõ xwÿnhjaja Jejus ã ixtomnuj nẽ nom tanhmã mẽ kot ixtoja kukamã ixte ixprĩ hã ixàhpumunh kêt.

²³ Ja pix na ixte omunh. Na pa hte nhÿri pøj nhũm htem Jejus ã ixpynê nẽ mẽ hagjênh xà kamã ijagjê nẽ tanhmã inhĩpêx to. Tĩrtũm Karõ na pre ra ã mẽ kot inhĩpêx anhÿrja kukamã inhmã mẽ harê. Jakamã ixte amnhĩ kukamã amnhĩ tã ixàhpumunh mex. Kot paj xep akupÿm Jerujarê hwÿr pøj nhũm mẽ ixpumu nẽ Jejus ã tanhmã inhĩpêx to.

²⁴ Tã no pa amnhĩ kamã ixkahak kêt o inhmã mẽ uma hkêt nẽ. Kojã mẽ kãm ixpĩr prãm nẽ mãmri ixpĩ. Inhmã ixtyk pyma hkêt. ãm mẽmoj pixi na inhmã hprãm. Ra Pahшти Jejus kot mẽmoj tã inhmã karõ xàja na inhmã kormã ixtĩr ri hatur xàm mẽnh prãm. Tĩrtũm kãm mẽ pajapê hã kot mẽ pahto mex prãm xàj mẽ pahwÿr Kra Jejus mẽnh nhũm mẽ panê tanhmã amnhĩ nhĩpêx to hã harênhja na inhmã mẽ piitã mẽ kãm harênh jatur xàm mẽnh prãm.

²⁵ —Tã e ixkràmnhwÿjaja. Na pa pre mẽ akôt mẽ ajahkre rãhã ho ri ixa. Mẽ ate Jejus kôt amnhĩ nhĩpêx mex rãhã ho ri apa kaxyw. Tã kot puj pêr mẽ axte axpẽn pumunh kêt nẽ.

²⁶⁻²⁷ —Na pa pre ra mẽ amã Tĩrtũm kapẽr piitã harênh pa. Mẽ ate mar tÿx nẽ hkôt pix mã amnhĩ nhĩpêx o apa kaxyw. Jakamã kojã mẽ anhõ krĩ nhõ xwÿnhjê hõ amnhĩ kaxyw Jejus kôt hamaxpêr prãm kêt nẽ rĩ tãm. Kwãr mãmri kot amnhĩ tomnuj kamã ty nẽ arĩ tãm amnhĩ pumu no ãm kê amnhĩ tã tanhmã inhmã nẽ hkêt nẽ.

²⁸ —E mẽ ate Kris kwÿ jahkre ho apa xwÿnhjaja. Kêr ka mẽ amnhĩ pumunh mex o ri apa. Nẽ mẽ kot Jejus kôt amnhĩ xunhwÿr xwÿnhjê jamãr mex o ri apa. Ja kaxyw na pre Tĩrtũm Karõ mẽ kaxyw mẽ axunhwÿ. Tĩrtũm Kra Jejus kot htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamãr xwÿnh kot ôwêhti jamãr mex o ri pata pyræk.

²⁹ —Kot paj ma mõ nhũm mẽmojjaja ixpãnhã mẽ awÿr pøj nẽ mẽ ate Jejus kaga hprãm xàj tanhmã mẽ amã hêx to ho ri mẽ akôt pa.

³⁰ Nẽ mẽ akwÿjaja mẽ urà nẽ tanhmã hamaxpêr punuj to nẽ mẽ ate Jejus kaga hprãm xàj hêx rom tanhmã mẽ amã kapêr to ho ri mẽ akôt pa.

³¹ Jakamã kwa mẽ o kora. Kêr ka mẽ axkãm ajamak rom nẽ ri apa. Kê jajaja nhÿrmã ã mẽ amã kapêr anê ka mẽ ama nẽ mẽ hkôt ajamxpêr kêt nẽ. Mẽ ate mẽ mar nẽ mẽ hkôt ajamxpêr pymaj na pa pre mẽ akôt ri mẽ ajahkre ho ri ixa hã ixtã amgrã axkrunêpxi. Arĩgro hã nẽ kamãt kãm mẽ ajahkre rũnh o ri ixa. Nẽ mẽ ate mẽ amã mẽ hêx xwÿnhjê hkôt amnhĩ xunhwÿr pymaj mẽ ajahkre pê te inhmÿr pyræk o ri mẽ akôt ixa.

³² —E kot paj Tĩrtũm nhĩhkram mẽ ajagjênh pa. Kojã mẽ atãnopxar o ri mẽ akôt pa nẽ mẽ akutã nojarêr rãhã ho pa. Hãmri ka mẽ ãm hkôt pix mã amnhĩ nhĩpêx. Jao Jejus kaga hkêt nẽ. Hãmri nhũm nhÿrmã Tĩrtũm mẽ pahpê hkrajê piitã tanhmã mẽ pahto mex to.

³³ —Na pa pre mẽ akôt ixa ry htã no ãm aa mẽmoj tã mẽ awÿr kêt nẽ. Mẽ axê hkwy hã mẽ awÿr rÿ mẽ akàxpore hã mẽ awÿr o ri ixa hkêt nẽ.

³⁴ Na pa pre amnhĩ pa kukwak ri amnhĩm ixujaprõr pẽ ixàpkur o ri mẽ akõt ixpa. Nẽ ixkõt mẽ pa xwýnhjẽ mã ixujaprõr o ri ixpa. Ra mẽ ate ja hã ixpumunh mex.

³⁵ –Tã mẽmo kaxyw na pa pre ã mẽ akõt amnhĩ nhĩpêx anhỹr o ri ixpa? Nà mẽ ate ja hã ixpumunh mẽ ixpyrà mẽ ã amnhĩ nhĩpêx anhỹr o ri apa kaxyw. Nẽ ixpyrà mẽ tanhmã mẽ kute xwýnhjẽ ho ajuta hto ho ri mẽ apa kaxyw. Na pre Pahihti Jejus ja jarẽnh o: “Koja mẽhõ amã mẽmoj gõ ka amnhĩm apy mẽ akĩnh mẽ. Nom kot kaj kam nhãm mẽhõ mã mẽmoj gõ hãmri mẽ akĩnh tỳx o ate mẽhõ mã mẽmoj nhõrta jakre.” Anẽ.

³⁶ Na pre ã Pawre mẽ kãm ujarẽnh anhỹr pa hãmri pa mẽ ra inhnojarêt. Hãmri nhũm mẽ piitã hkõnkrã ho hkrĩ pa nhũm Pawre mẽ ho Tĩrtũm wỳ.

³⁷⁻³⁸ Hãmri nhũm mẽ piitã kãm Pawre hkĩnh tỳx jakamã mỳr rax o kuhê. Tee ri kot axte mẽ kot axpẽn pumunh kêt ã mẽ kãm amnhĩ jarẽnhja ma mẽ hkaprĩ htỳx mẽ. Nẽ hkaprĩ xàj kahti hkõt hamỳ mẽ mur. Hãmri mẽ ma Jerujarẽ hwỳr hkujaêk kaxyw mẽ ixkõt pàr wỳr hkaprĩ mẽ mẽ ixkõt mỳr o mẽ.

21

Pawre kot Jerujarẽ hwỳr hpõx ã harẽnh

¹ Tã pa mẽ gõ mỳri Jejus kõt mẽ ixtõjẽ re mẽ pàr krem agjẽ mẽ axte mẽ. Ma gõ hipòk pẽ Kosti hwỳr ixkatat kõt mẽ mẽ hã ajêt. Hãmri nhũm apkati pa mẽ axte hamũ mẽ mẽ hpãnhã gõ hipòk pẽ Roxti hwỳr mẽ mẽ hwỳr pøj mẽ mẽ hã pàr xi. Hãmri mẽ hpãnhã axte krĩ pẽ Patar wỳr mẽ.

² Hãmri mẽ hwỳr pøj mẽ mẽ pàr rũm ijapøj mẽ mẽ pàr õ pumu. Nhũm ra pyka pẽ Wẽnĩs wỳr nojarêt pa mẽ hwỳr agjẽ mẽ mẽ kamã axte mẽ.

³ Mõõ mẽ amỳm amnhĩ kukamã gõ hipòk pẽ Sipre pumu. Hãmri mẽ upòk rũm hakrenh mã mẽ mẽ pyka pẽ Sir wỳr mẽ mẽ kamã Xir hwỳr pøj mẽ mẽ pàr nhõ. Pàr pãm kot krĩ kamã pàr kukrêx rer kaxyw pa mẽ kormã hã ajêt mẽ tokyx axte nhãm inhmõr kêt mẽ.

⁴ Hãmri pa mẽ kutêp api mẽ mẽ krĩ kamã mẽ mẽ kot Jejus kõt axpẽn to htõ mẽ htõx xwýnhjẽ japêr o mẽ. Hãmri mẽ nhỹri mẽ omu mẽ mẽ mẽ hkõt ri ixpa ho ixtã ù semã. Nhũm prem

Tĩrtũm Karõ nhỹ hã Pawre mã kapêr mẽ mẽ kãm:

–Kwa Pawre mẽ inhma. Kot ka Jerujarẽ hwỳr pøj nhũm xep mẽ mẽ kãm akurẽ xwýnhjaja tanhmã anhĩpêx to. Tĩrtũm Karõ na ã akukamã mẽ inhmã ajarẽnh anẽ. Jakamã kwa hwỳr amõr kêt mẽ. Na pa mẽ mẽ tee ri akukamã ijamaxpêr. Anẽ.

⁵ Hãmri nhũm amnhĩ tã mẽ kuma mẽ mẽ am mẽ kuma mẽ Jerujarẽ wỳr hkrã kamã hihtỳx mẽ. Jakamã nhũm semã hapêx pa mẽ axte inhnojarêt. Axte Jerujarẽ hwỳr kormã inhmõr kaxyw inhnojarêt. Nhũm Jejus kõt mẽ ixtõjaja mẽ mẽ kot mẽ ixkujaêk kaxyw piitã pàr wỳr mẽ mẽ ixkõt mẽ. Mẽ hprõ mẽ mẽ hkrajẽ mẽ nhũm mẽ pimràatã mẽ mẽ ixkõt mẽ. Hãmri pa mẽ mẽ pàr wỳr pøj mẽ mẽ gõ mỳ ri ixpiitã ixkõnkrã ho ixkrĩ hpa mẽ mẽ amnhĩ to Tĩrtũm wỳ.

⁶ Hãmri mẽ mẽ mẽ kãm amnhĩ jarẽnh pa mẽ mẽ mẽ noo mã pàr krem agjẽ mẽ mẽ ma axte mẽ nhũm mẽ awjanã mẽ mẽ akupỳm òrkwỳ hwỳr hapêx. Hãmri pa mẽ mẽ kurũm kormã ma Jerujarẽ hwỳr mẽ.

⁷ Mõõ mẽ mẽ krĩ pẽ Poremax wỳr pøj mẽ mẽ hã ajêt. Hãmri mẽ mẽ pàr rũm ijapøj mẽ mẽ axte krĩ kamã Jejus kõt mẽ mẽ ixtõ mẽ mẽ ixtõxjẽ japêr o mẽ mẽ nhỹri mẽ mẽ omu mẽ mẽ mẽ kuri amnhĩm hikra.

⁸ Tã nhũm apkati pa mẽ mẽ axte mẽ. Pãnhã ma krĩ pẽ Sejarej wỳr mẽ. Hãmri mẽ mẽ hwỳr pøj mẽ mẽ Firipti kuri pøj. Firiptija kormã nyw ri mẽ mẽ kot Jerujarẽ kamã mẽ mẽ mjên htyk xwýnhjẽ mã mẽ mẽ apkur xà nhõr ho pa kaxyw mẽ mẽ ho 7 mẽ mẽ unhwỳr xwýnhjtajẽ hõ na pre. Tã hpãnhã kệp Tĩrtũm kapêr jarẽnh o pa xwýnh.

⁹ Nhũm hkra nijaja kệp kwat. Piitã mjên kêt mẽ mẽ hkukrit rãhã pa. Mẽ mẽ kệp Tĩrtũm nhỹ hã kapêr o mẽ mẽ pa xwýnh na pre mẽ. Jakamã pa mẽ mẽ mẽ kuri pøj.

¹⁰ Hãmri mẽ mẽ mẽ hkõt ri ixpa hã ixtã apkati grêre nhũm Akapõ Jutej rũm man mẽ mẽ ixwỳr mõn pøj. Kệp Tĩrtũm nhỹ hã kapêr jarẽnh o pa xwýnh na pre.

¹¹ Hãmri mẽ mẽ mẽ ixwỳr pøj mẽ mẽ Pawre pumu mẽ mẽ hkukamã kot tanhmã harẽnh to kaxyw hwỳr tẽn kệp hprexà kapa mẽ mẽ ho amnhĩ te hpre mẽ mẽ ho amnhĩ pa hpre mẽ mẽ xa. Hãmri mẽ mẽ mẽ inhnoo mã mẽ Tĩrtũm Karõ nhỹ hã mẽ mẽ kot

tanhmã hipêx to hkukamã kãm awjarê nê kãm:

—E kot kaj Jerujarê hwÿr pøj nhũm Ijaew xàptàr tùmjaja apumu nê ã anhîpêx anê nê apa hpre nê ate hpre hãmri nê Ijaew kêt xwÿnhjê nhîhkram ajaxà. Koja mẽ ã anhîpêx anê. Anê.

¹² Hãmri pa mẽ tee ri ã ujarênh anhÿrja ma nê Pawre kamã ixkahak tÿx nê ixkaprî nê inhmyr o ixkrî. Nê xatã kot mẽ hwÿr mör nê kãm ixkapêr kãm ixihÿtÿx nê kãm:

—Kwa mẽ ixkapêr ma Pawre. Mẽ hwÿr amör kêt o mẽ hwÿr amör kêt. Anê.

¹³ Hãmri nhũm mẽ inhmã:

—Tk. Kwa mẽ amÿr kêt nê. Na pa mẽ apumu nê ixkaprî nê. Nà kot paj ma mẽ hwÿr mō. Kwär mẽ mãmri Pahihti Jejus ã tanhmã ixto rÿ hã ixpî. Ixte amnhî kamã ixkahak kêt. Anê.

¹⁴ Hãmri pa mẽ tee ri mẽ hwÿr mör nê hkurê kaprÿ nê kãm:

—Tõe. Nà kam nê Tirtüm kãm hprãm xà hkôt mãmri mẽ hwÿr mō rÿ mẽ hwÿr amör kêt nê. Anê.

¹⁵ Tã pa mẽ ra inhnojarê nê amnhî to ixpikuprõnh pa nê ma Pawre hkôt Jerujarê hwÿr tã ma mō.

¹⁶ Hãmri nhũm Sejarrej kamã Jejus kêt mẽ ixtō hkwÿjaja ma mẽ ixkôt mō. Pa mẽ mōõ nê Jerujarê hwÿr pøj. Hãmri nhũm mẽ ixkôt mẽ mör xwÿnhjaja mẽ ixto mō nê Mênasō nhörkwÿ hwÿr mẽ ixto pøj. Mênasōja Sipre kamã na pre kato. Tã hpãnhã Jerujarê hwÿr ahpa nê kamã ri pa ho pa. Na pre ra Jejus kêt amnhî xãm ã hã amgrà xohtō nê. Tã pa mẽ kuri pøj.

Pawre mẽ Xiakre wa harênh

Atre 15.3-21; Wam Korît 9.19-22, 10.32-

33

¹⁷ Tã pa mẽ Jerujarê hwÿr pøj nhũm Jejus kêt mẽ ixtōjaja mẽ ixpumu nê hkînh nê.

¹⁸ Hãmri nhũm apkati pa mẽ ma Pawre hkôt Xiakre hwÿr mō. Nhũm mẽ kot Tirtüm kapêr o mẽ ahkre xwÿnh piitã ra kuri akuprō nê mẽ ixkutêp hkrî.

¹⁹ Jakamã nhũm Pawre mẽ hwÿr axà nê mẽ kãm tanhmã amnhî nhîpêx to ho pa hã amnhî jarê nê mẽ kãm:

—Pa na ka mẽ rî akrî. E ot pa axte mẽ apumunh mã mō. Ixte mẽ amã amnhî jarênh ã amnhî jarênh kaxyw. Nà na pa pre

ma Ijaew kêt xwÿnhjê hkôt ixpa nê mẽ kãm Jejus kot mẽ panê tanhmã amnhî nhîpêx to jarênh o ri mẽ hkôt ixpa. Nhũm Tirtüm inhîhkô hã ixkutã nojarê mex jakamã nhũm prem inhma nê ohtō rax nê mẽ pahpyrà nê Jejus kêt amnhî xunhwÿ. Anê.

²⁰⁻²⁵ Hãmri nhũm mẽ Ijaew kêt xwÿnh kwÿjaja kot Jejus kêt amnhî xunhwÿr ã mẽ harênh ma nê mẽ ÿ hã hkînh nê mẽ hã Tirtüm mã mex o mex ã harê. Hãmri nê Pawre mã kãm:

—Nà na pa prem ra mẽ harênh ma. Hãmri nê mẽ kãm kagà nhîpêx nê mẽmoj tã mẽ kãm karō nê mẽ hwÿr kumê. Mẽ kot omunh nê kamã harênh nê hkôt amnhî nhîpêx o pa kaxyw.

Na pa prem kagàja kamã mẽ kot sãnti nhō hkur nê mẽ hkurê.

Nê mry kamrō hkur nê mẽ hkurê.

Nê mẽmo mry hpar nê hkamrō runh kêt rãhã hkur nê mẽ hkurê.

Nê mẽ kot amnhî prō pix tãnopxar kaxyw mẽ kãm hã karō.

Nê mênijaja kot amnhî mjên pix tãnopxar kaxyw mẽ kãm hã karō.

Nê nhãm mẽ kot axpên to amnhîkati nê mẽ hkurê.

Ã na pa prem ja hã kagà nê mẽ hwÿr mênh anê. Jakamã e mẽ inhma. Na ra mẽ pahpê Ijaew kwÿjaja ohtō rax kumrêx nê mẽ pahpyrà nê Jejus kêt amnhî xunhwÿ. Mãn ka pre mẽ harênh ma. Na htem Jejus kêt amnhî nhîpêx o pa jao mãânên Tirtüm nhÿ hã Mojes kapêr kêt amnhî nhîpêx mex o pa. Tã nhÿri mẽ kot tanhmã ato hêx to hã ajarênh ma. Na ka xep hte Ijaew kêt xwÿnhjê nhō krî kamã pøj hãmri nê mẽ õ krî kamã Ijaew kwÿjê pumu nê mẽmoj nê tanhmã mẽ kãm akapêr to ho ri apa. Nom Ijaew kêt xwÿnhjê mã ka xep hte ã mẽmoj nê akapêr anhÿr kêt nê. Am Ijaew mã pix mã ka xep hte mẽ kot finat Mojes kapêr kêt amnhî nhîpêx nê mẽ hkurê ho ri apa. Nê mẽ panhîgêt kot amnhî nhîpêx kuhpa hã mẽ kot mẽ hkra my kwÿt kà jakàr nê ka xep hte mẽ hkurê ho ri apa. Nê mẽ kot mẽ panhîgêt kêt amnhî nhîpêx nê ka xep hte mãânên mẽ hkurê ho ri apa. Mẽ kêp Ijaew tã ka xep pre hte ã mẽmoj nê mẽ hkurê anhÿr ho ri apa. Na prem jar ã Ijaewjê mã ato hêx o pa anê nhũm mẽ kuma nê mẽ

hkôt hamaxpêr kurê kumrêx. Jao ra ate mē pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx.

—Tã ra mē kot apôx ã ajarênh mar jakamã tanhmã kot kaj we mē kãm amnhĩ tã axaprâr to? Nê tanhmã kot kaj we mē noo mã amnhĩ nhĩpêx to kê mē arĩ mē pahte amnhĩ nhĩpêx kôt ate amnhĩ nhĩpêx o apa hã apumu? E na pa mē ra ijamaxpêr. Kot ka ã amnhĩ nhĩpêx anê. Na ra jar mē pahkwýjaja kêt kwat nê Tirtũm mã tanhmã amnhĩ jarênh to jatur xãm mênh kaxyw amnhĩ krã hkênh mã. Jakamã e kêr ka ma mē hkôt tē nē mē urak nê amnhĩ krã hkênh nê kam nē mē ate amnhĩ krã kênhta pãnhã amnhĩre. Kot kaj ã mē hkôt amnhĩ nhĩpêx anê hãmri nhũm mē pahkwýjaja arĩ mē pahte amnhĩ nhĩpêx o ate amnhĩ nhĩpêx o apa hã apumu nē mē kot ato hêx ã apumunh kurê kumrêx. Nê arĩ ate finat Mojes kapêr kôt amnhĩ nhĩpêx o ri apa hã apumu. Anê.

²⁶ Hãmri nhũm Pawre mē kuma nē mē kãm:

—Tôe. Nã ãm hãmri na ka mē inhmã awjarê. Nã kot paj ã amnhĩ nhĩpêx anê. Anê.

Jakamã nhũm apkati nhũm ma mē kêt 4tajê o mō nē mē mex kaxyw tanhmã amnhĩ nhĩpêx to. Hãmri nê Tirtũm mã amnhĩ jarênh xã hã ixkre hwýr mra nê agjê nē mē ô patre mã mē amnhĩ jarê nē kãm:

—E ot pa mē awýr mra. Na pa prem ra mēmoj tã tanhmã Tirtũm mã amnhĩ jarênh to. Tã kot paj mē axte ixtã ù semãn hãmri nê hatur xãm mênh kaxyw akupýn awýr mra nê amã mēmoj gō ka mē inhmã Tirtũm mã agō nê hkôt kãm mē ijarê. Nê pa kot paj mē ixpiitã hpãnhã amã amnhĩre. Anê.

*Mē kot Pawre pynênh ã mē harênh
Atre 24.12*

²⁷ Tã nhũm semãnja hapêx kaxyw nhũm pika pê As rũm Ijaew kwýjaja ma mra nê Tirtũm mã amnhĩ jarênh xã hã ixkre hwýr agjê. Hãmri nê kamã Pawre pumu nê kamã gryk týx nê hwýr hprôt nê unê nê tanhmã hkwyjê mã ho hêx to nê ho kapêr punuj nê. Nê mē kãm:

²⁸ —E mē amnê mra nê jahti pumu. Na hte krĩ piitã hkôt ri mē pahkwýjê mã tanhmã ri hêx to ho pa. Tirtũm nhỹ hã finat

Mojes kapêr nhũm mē kãm ho kapêr punuj o pa. Nê mē pahte Tirtũm mã amnhĩ jarênh xã hã ixkreja nhũm hte mãânên tanhmã mē kãm ho kapêr punuj to. Mē pahpyrà nê kêt Ijaew tã mē pahpê hkwy ho kapêr o pa. Tã ra axtem nê amnhĩ kôt Tirtũm nhõ ixkre hwýr Ijaew kêt xwýnh kwýjê ho agjê. Mē kot hwýr gjêx kêt kumrêx tã nhũm axtem nê amnhĩ kôt mē ho agjê. Anê.

²⁹ Na pre krĩja kamã Ijaew kêt xwýnh Topija Pawre hkôt pa nhũm mē omu. Kêt Epes nhõ xwýnh nhũm mē kot pry ã Pawre hkôt pa hã omu. Tã hã ahtũm nê Tirtũm mã amnhĩ jarênh xã hã ixkre kamã Pawre pumu nê htýx amnhĩ kôt Topi ho àr ã hkamnhĩx nê ã mē kãm harênh anê.

³⁰ Hãmri nhũm mē kuma nê Pawre kamã gryk týx nê. Nê hwýr hprôt nê unê nê ixkre rũm ho kato nê kêt hakwa kre kahê.

³¹⁻³² Hãmri nê ma o tē nē htak rax nê. Ra mē kot htak o hpír mã tã nhũm mēhōja pôristi krãhtũm wýr hprôt nê kãm awjarê nê kãm:

—Kwa o mũj mē ra kot axpên nhĩmex kaxyw pijapu ho kuhê. Anê.

Hãmri nhũm tee ri kuma nê pôristi hkwyjê mã anê nê mē ma mē hwýr hprôt kurê kumrêx. Nhũm mē arĩ Pawre htak tã amnhĩ wýr mē omu nê mē umaj kãm ure.

³³ Hãmri nhũm pôristi krãhtũm Pawre hã amýnê nhũm pôristijaja unê nê kàx o mē hkaxprexã ho axkrut nê ho hkaxpre pa. Hãmri nhũm mē hkrãhtũm Pawre hã mē hkukja nê mē kãm:

—Kwa mē atō inhmã jahti jarê. Tanhmã na hixi te? Tanhmã na we amnhĩ tomnuj to hã na ka mē ã hipêx anê? Anê.

³⁴ Hãmri nhũm mē kuma nê piitã anhĩpê kãxpê kãm tanhmã harênh to. Nom axpên kwým tanhmã ri kãm harênh to. Hãmri nhũm tee ri hprĩ hã kot mē mar kaxyw hãmri nê pôristi mã anê nhũm mē kêt Pawre ho kato nê ma mē àpênh xã hã ixkre hwýr o tē.

³⁵⁻³⁶ Hãmri nhũm Ijaew kwý ohtô nê pry hã axpên nhĩgãnh o hkôt mra. Nê gryk xàj kapêr punuj týx o mē hkôt mō nê kàx pê pôristi mã kapêr nê mē kãm:

—Kwa mē apĩhti ri. Mexti hã. Mēmo kaxyw na ka mē ri amã hapê ho apahti? Anê.

Jakamã nhũm pôristija tee ri mẽ kuma hãmri nẽ mẽ kot tanhmã ho pymaj kumy nẽ kyx pẽ mẽ kệp kupẽ nẽ o mỗ. Jao ixkreja wỳr mẽ àpir xà hã ho àpir o mỗ.

³⁷ Nẽ kot ho àr kaxyw tã nhũm Pawre mẽ hkrãhtũm mã kãm:

—E pa amã mẽmoj jarẽ ka inhma. Anẽ.

Mẽ kapẽr o kãm kapẽr hãmri nhũm amnhĩ jaẽr pẽ kuma nẽ kãm:

—Kwa xà na ka mẽ ixpyrà nẽ Gresjê kapẽr o akapẽr?

³⁸ Na pa ixtỳx apê Ejit nhõ xwỳnh pẽ mẽ hpar o apa xwỳnhta ã akamnhĩx. Ham na pre mẽ inhõ pahшти kutã amnhĩ xãm nẽ kot hkurê kaxàr kaxyw mẽ ho ajuta xwỳnhjê ho 4.000 nẽ mẽ hkurê nẽ ma kapôt ã mẽ o pa. Nom tãm na xep Gresjê kapẽr o kapẽr kêt nẽ. Anẽ.

³⁹ Hãmri nhũm Pawre kãm:

—Nà ixpê Ejit nhõ xwỳnhta kêt. Ixpê Ijaew na pa. Pyka pẽ Siris kamã krĩ rax pẽ Tas kamã na pa pre ixkato. E xà kot paj ixkôt mẽ mỗr xwỳnh něj mã ixkapẽr nà? Anẽ.

⁴⁰ Hãmri nhũm kãm:

—Tõe. Kam nẽ mãmrĩ tanhmã mẽ kãm akapẽr to. Anẽ.

Hãmri nhũm mẽ àpir xàta ã kyx pẽ mẽ mỳri xa nẽ kànhmã mẽ kãm ìhkra pẽ nhũm mẽ omu nẽ hpinhkrênh pa nhũm mẽ kãm amnhĩ jarẽ.

22

Pawre kot kãm hkurê xwỳnhjê mã amnhĩ jarênh

Atre 9.1-19, 26.1-23

¹⁻² Nhũm Pawre amnhĩ kwỳ Ijaew kapẽr o mẽ kãm kapẽr nẽ mẽ kãm:

—E ixkwỳjaja. Pa mẽ amã amnhĩ jarẽ ka mẽ inhma. Anẽ.

Hãmri nhũm kot mẽ kapẽr o kapẽr ma nẽ hpinhkrênh pa nẽ akryk mar o kuhê nhũm mẽ kãm:

³ —Nà ixpê mẽ anhĩõ na pa. Ijaxwỳja ixpê Ijaew. Pyka pẽ Siris kamã krĩ pẽ Tas kamã na pa pre ixkato no ãm jar Jerujarẽ kamã na pa pre ixaptàr. Kamariew na pre hte ijahkre ho pa. Finat Mojes kot Tirtũm nhỹ hã mẽ panhĩgêjtjê mã kapẽrja nhũm pre hprĩ hã ho ijahkre ho pa. Na pa pre mẽ apyrà nẽ inhmã Tirtũm kôt amnhĩ nhĩpêx prãm nẽ.

⁴ —Jakamã na pa pre mẽ pahkwỳ kot Jejus kôt amnhĩ xunhwỳr xwỳnhjê japêr o ixpa nẽ nhỹri mẽ kãm ixkato nẽ mẽ unẽ. Mẽmyjê pynê nẽ mênijê pynê. Hãmri nẽ mẽ kot mẽ hpar kaxyw mẽ hãgjênh o ri ixpa.

⁵ Na pa pre ã mẽ hipêx o ri ixpa anẽ. Mẽ panhõ patre maati nẽ mẽ àptàr tũmrejaja ra mẽ kot ja hã ixpumunh mex. Mẽ tãmjaja na prem krĩ pẽ Tamas kãm mẽ pahkwỳjê kaxyw kagà nhĩpêx nẽ inhmã kugõ pa kupy nẽ ma mẽ hwỳr o mỗ. Ixte mẽ õ krĩ kamã Jejus kwỳjê pynênh par nẽ man akupỳn Jerujarẽ hwỳr mẽ ho inhmõr nhũm mẽ kot tanhmã mẽ ho kaxyw.

⁶ —Tã ra myt ahpa pa mẽ hwỳr ixàhtêp o mỗ. Puh nhũm kaxkwa rũm hirã rax kumrêxja ixwỳr wrỳ nẽ ixtã ajêt pa hipòk ri xa.

⁷ Hãmri nẽ umaj pykap tẽm nhũm mẽhõ kapẽr nẽ inhmã: “Pa Sawti? Hêxta waa nẽ. Kwa mon ka hte axtem nẽ ixtomnuj tỳx o ri apa?” Anẽ.

⁸ Hãmri pa kãm: “Kwa mẽ atõ na ka ri ã inhmã akapẽr anẽ pahшти?” Anẽ nhũm inhmã: “Ixpê Najare nhõ xwỳnh Jejus. Pa na ka hte ixpê ixkôt mẽ kot amnhĩ xunhwỳr xwỳnhjê homnuj tỳx o ri apa. Jao te pa ixtomnuj pyràk.”

⁹ —Anhỹr o inhmã kapẽr nhũm ixkôt mẽ pa xwỳnhjaja kuma no ãm hprĩ hã mar mex kêt nẽ. ãm hirã raxta pix pumu.

¹⁰ Tã pa kãm: “No tanhmã kot pa we amnhĩ to Pahшти?” Anẽ nhũm inhmã: “E kànhmã xa nẽ mãmrĩ ma Tamas wỳr mỗ. Kot kaj hwỳr pøj nhũm mẽhõ awỳr tẽ nẽ mẽmoj tã amã karõ ka ama nẽ hkôt amnhĩ nhĩpêx.” Anẽ.

¹¹ —Nhũm pre ã inhmã kapẽr anẽ. Hãmri pa hirã rax pumunh o ixãm kurê ra inhno hkre nẽ ixrĩt kêt nhũm ixkôt mẽ pa xwỳnhjaja ixpa hã ixpy nẽ ma Tamas wỳr ixto mỗ nẽ ixto pøj.

¹² —Tã nhũm Tamas nhõ xwỳnh pẽ ãnãnti ixwỳr tẽ. Na pre hte Tirtũm kapẽr ã kagà htũm kôt amnhĩ nhĩpêx mex nhũm Tamas kamã Ijaew piitã kãm hkĩnh nẽ axpên mã mex ã harẽ.

¹³ Jakamã nhũm ixwỳr tẽ nẽ inhmã: “Pa Jejus kôt ixtõ Sawti? E akupỳm rĩt.” Anhỹrja kôt pa akupỳm ixrĩt mex kurê kumrêx nẽ omu.

¹⁴Hāmri nhūm inhmā: “Nà mẽ panhīgêjtê nhõ Tirtūm na amnhĩ kaxyw ata. Ate kapēr mar nẽ hkõt tanhmā amnhĩ nhĩpêx to ho apa kaxyw. Nẽ ate kaxkwa kamā Kra mex pumunh nẽ kapēr mar kaxyw. Tã ka xep ham hirã rax kamā omu nẽ kapēr ma.

¹⁵Jakamã kêr ka ma mẽ piitã mẽ kãm ate omunh xwýnhja jarēnh o ari mẽ hkõt apa. Nẽ mẽ kãm kapēr jarēnh o mẽ ahkre ho ri apa.

¹⁶E tokyx kànhmã xa nẽ Jejus mã amnhĩ jarē nẽ hkõt amnhĩ xãm kê anê ate amnhĩ tomnuj rēnh pa. Hāmri pa apê hkwy hã akrã kumrã ka ma mẽ kãm kapēr jarēnh o ri apa.” Anẽ.

—Nhūm pre ã ãnãñsti inhmã kapēr anẽ.

¹⁷—Tã pa man akupýn jar Jerujarē hwýr mẽ awýr mō. Hāmri nẽ jar Tirtūm mã amnhĩ jarēnh xà hã ixkre kamã kãm amnhĩ jarēnh o ixãm rôm axte mẽmoj pumu.

¹⁸Nhūm Jejus axte ixwýr kato nẽ xa nẽ inhmã kapēr nẽ inhmã: “E inhma. Jerujarē nhõ xwýnhjaja kãm ixkapēr mar prãm kêt jakamã kot kaj mẽ kãm ixkapēr jarē nhūm mẽ amar kêt nẽ. Jakamã kwa tokyx akato nẽ hpãnhã ma nhýhým mō.” Anẽ.

—Hāmri pa tee ri ã kapēr anhýrja ã kuma nẽ kãm:

¹⁹“Kwa nà koja mẽ inhma Pahihti. Ra mẽ kot ixte amnhĩ nhĩpêx ã ixpumunh mex. Ixte amnhĩ nhĩpêx tũmta kõt mẽ kot ixpumunh mex. Na pa pre hte krĩ piitã hkõt mra nẽ Tirtūm kapēr o mẽ ahkre xà hã ixkre kamã mẽ kot akõt amnhĩ kaxyw hamaxpēr xwýnhjê pynê nẽ mẽ htak nẽ mẽ hagjēnh xà kamã mẽ hagjê nhūm mẽ kot ja hã ixpumunh mex.

²⁰Nhūm mẽ kot akapēr jarēnh o pa xwýnh Estewãw pĩrta pa pre hã mẽ omu nhūm ja inhmã mex pa mẽ kãm mẽ hinõkã jamýnh o hã mẽ omunh o xa. Na pa pre ã amnhĩ nhĩpêx anhýr o ri ixpa. Tã hpãnhã akõt amnhĩ xãm hāmri nẽ akõt amnhĩ nhĩpêx o ri ixpa. Jakamã koja mẽ ixte amnhĩ nhĩpêx nyw ã ijarēnh ma nẽ kãm ixkapēr mar prãm nẽ.” Anẽ.

²¹—Pa pre ã Jejus mã amnhĩ jarēnh anẽ nhūm inhmã: “Nà. Kêr ka mãmrĩ krĩja rũm akato nẽ ma nhýhým mō. Kot paj hpãnhã ma Ijaew kêt xwýnhjê hwýr amẽ ka

hpãnhã ma mẽ hwýr mō nẽ mẽ hkõt mẽ kãm ixkapēr jarēnh o ri apa.” Anẽ.

²²Nhūm pre Pawre ã amnhĩ hkwyjê mã amnhĩ jarēnh anẽ nhūm mẽ arĩ mar o kuhê rãhã Ijaew kêt xwýnhjê jarēnh ma nẽ kamã gryk týx nẽ. Ijaew kêt xwýnhjaja kot mẽ urak nẽ Tirtūm kapēr marja nhūm mẽ kãm hprãm kêt jakamã nhūm Pawre ã mẽ harēnh anẽ nhūm mẽ kuma nẽ kamã gryk týx kumrēx. Nẽ gryk xàj kapēr punuj nẽ kapēr o:

—Kwa mẽ mãmrĩ apĩhti ri. ãm hpĩr mã htãmti kēnã. Anẽ.

²³Hāmri nẽ gryk xàj amnhĩ nhĩnõkã hkwrý nẽ ho apê nẽ pyka jamý nẽ kànhmã ri ho ahkapê.

Pawre kot pôristi krãhtũm mã amnhĩ jarēnh

Atre 16.35-39

²⁴Hāmri nhūm pôristi krãhtũmja tee ri ã mẽ kot amnhĩ nhĩpêx anhýr ã mẽ omu nẽ mẽ kapēr ma nẽ pôristijê mã kapēr nẽ mẽ kãm:

—Kwa tanhmã na we jahti amnhĩ tomnuj to nhūm mẽ ã kamã gryk týx anẽ? E mẽ tokyx ixkre hwýr ho axà nẽ mẽ htak xà ho htak kê mẽ pamã tanhmã amnhĩ jarēnh to. Anẽ.

²⁵Hāmri nhūm mẽ kuma nẽ ho axà nẽ htak kaxyw kormã hpre ho xa. Hāmri nhūm pôristi krãhtũm nhõ kōwenatõja mẽ hkõt axà nẽ hã mẽ omunh o xa nhūm Pawre omu nẽ amnhĩ tã kãm kapēr nẽ kãm:

—Kwa kormã ixte tanhmã mẽ amã amnhĩ jarēnh to hkêt tã ka mẽ ixtak kaxyw. Ixpê Ijaew tã mããnēn ixpê Rõm nhõ xwýnh kēnã. Xà na htem ã Rõm nhõ xwýnhjê nhĩpêx anẽ? Anẽ.

²⁶Hāmri nhūm tee ri ã amnhĩ jarēnh anhýrja ã kuma nẽ pôristi krãhtũmja wýr hprõt nẽ kãm:

—Kwa taxy pu mẽ tanhmã ho hkêt nẽ. Xep kēp Rõm nhõ xwýnh kēnã. Anẽ.

²⁷Hāmri nhūm tee ri kuma nẽ Pawre hwýr axà nẽ kãm:

—Kwa xà ãm hāmri na ka amnhĩ jarē? Xà apê Rõm nhõ xwýnh na ka? Anẽ.

Hāmri nhūm kãm:

—Tý. ãm hāmri ixte mẽ amã amnhĩ jarēnh kēnã. Ixpê Rõm nhõ xwýnh na pa. Anẽ.

²⁸ Hāmri nhūm kām:

–Kwa pa na pa pre amnhī to Rōm nhō xwýnh prām xāj amnhī pānhā mẽ kām amnhīrer rax nē. Anē.

Nhūm Pawre kām:

–Tỳ nom pa na pa pre amnhī pānhā mẽ kām amnhīrer kêt nē. Inhīpêxà hkôt ixpê Rōm nhō xwýnh na pa. Anē.

²⁹ Hāmri nhūm mẽ kuma nē tee ri hamaxpêr o kām ma nē. Nē kām ma ho hkaga kurê kumrêx. Nhūm mẽ hkrāhtūm nhō pahija määnēn kām ma nē. Kêp Rōm nhō xwýnh tã nhūm mẽ axtem nē kot unēnh nē kàx o hkaxpreja mã hamaxpêr nē kām ma nē. Na htem ã Rōm nhō xwýnhjê nhīpêx anhÿr kêt nē. Na htem tanhmã mẽ hkukjêr to nē hprī hã mẽ kuma nē rī kormã tanhmã mẽ hipêx to.

Pawre kot Ijaew xàptàr tūmrejê mã amnhī jarēnh

Matêwre 23.27-28

³⁰ Tã nhūm apkati nhūm pōristi krāhtūmjaja Ijaew kwý ho akuprō. Mēō patre maati nē patre krāhtūmjaja nē mẽ àptàr tūmrejaja nhūm kot mẽ kām tanhmã Pawre jarēnh to kaxyw mẽ ho hpikuprōnh pa. Hāmri nē Pawre pē hkaxpre xà rê nē ma mẽ hwýr o tē nē mẽ kutã ÿr.

23

¹ Hāmri nhūm mẽ omu nē mẽ kām amnhī jarē nē mẽ kām:

–E ixkwýjaja. Pa mẽ amã amnhī jarē ka mẽ inhma. Na pa hte Tirtūm nom tãm amnhī nhīpêx o ixpa nē mẽ pahpê Ijaew mẽ pahte amnhī nhīpêx kwým ri tanhmã amnhī nhīpêx to hkêt nē. Anē.

² Hāmri nhūm mẽ ò patre maati ãnãñisti kuma nē kamã gryk nē. Axtem ãnãñisti hō na pre. Hāmri nē ã Pawre kot amnhī jarēnh anhÿrja ã kuma nē kamã gryk nē. Hāmri nē mẽ kot mar o kuhê xwýnhjê mã kām:

–Kwa mẽ atō hakwap hkurahti ri. Tãm kot amnhī nhīpêxti hã. Na ãm mẽ pamã amnhī to hêx o xa. Anē.

³ Hāmri nhūm Pawre kuma nē hwýr rīt nē omu nē kām:

–Nà ka koja Tirtūm akura kām ga. Te ate finat Mojes kot ÿ hã kapêr kôt amnhī nhīpêx pyrãk tã ri axtem nē ri mẽ kot

ijakwap ixkuranh kaxyw ri mẽ kām ixtã amýnê. Anē.

⁴ Hāmri nhūm kuri mẽ kuhê xwýnhja tee ri ã kām kapêr anhÿrja ã kuma nē kām:

–Kwa kêp patre maati kênã kot ka kêt ri ã kām akapêr anē. Anē.

⁵ Hāmri nhūm amnhī jaêr pē ja hã kuma nē kām:

–Kwa ixte ja hã omunh kêt jakamã na pa ã ixtýx kām ixkapêr anē. Ixte kêp patre maati hã omunh ronhÿx pa ã kām ixkapêr anhÿr kêt nē. Tirtūm kapêr ã kagã htūm kot ja nē mẽ pamã kapêr kênã. Mẽ pahte tanhmã mẽ panhō pahi ho pakapêr punuj to nē mẽ pamã kapêr. Tã pa ãm ixtýx ã kām ixkapêr anē. Anē.

⁶⁻⁸ Hāmri nē hprī hã mẽ kot mar o hkrī xwýnhjê pumu. Nhūm mẽ kamã Satusew nhō xwýnh kwý nē Parijew nhō xwýnh kwý. Satusew mẽ Parijew nhō xwýnhjaja na htem axpên kwým ri tanhmã mẽ htykjê jarēnh to. Satusew nhō xwýnhjaja na htem mẽ htyk nē mẽ hkarō mẽ ro hã mẽ hapêx o mẽ hapêx ã mẽ hkamnhīx. Nē Tirtūm kapêr o mẽ wrýk xwýnh kêt ã mẽ harēnh o pa. No Parijewjaja na hte mẽ kurom mẽ htyk nē akupým mẽ htír ã mẽ hkamnhīx nē Tirtūm kapêr o mẽ wrýk xwýnh ã mẽ hkamnhīx. Nhūm Pawre kot ja hã mẽ omunh jakamã tanhmã hamaxpêr to hāmri nē mẽ kām kapêr. Na pre Parijew nhō xwýnhjê pyrã nē mẽ htyk nē akupým mẽ htír kôt hamaxpêr nē Tirtūm kapêr o mẽ wrýk xwýnh kôt hamaxpêr. Jakamã mẽ omu nē kàx pē mẽ kām kapêr nē mẽ kām:

–Nà ijaxwýja ixpê Parijew nhō xwýnh. Nhūm inhīpêxà haxwýja kêp Parijew nhō xwýnh. Jakamã na pa hte mẽ apê Parijew nhō xwýnhjê pyrã nē mẽ htyk nē akupým mẽ htír kôt ijamaxpêr. Tã ãm ja pix mýrapê na ka mẽ ixpynê nē ã inhīpêx anē. Anē.

Hāmri nhūm Parijew mẽ Satusew nhō xwýnhjaja kuma nē ja hã axpên kām gryk nē. Nē hã axpên mã akir.

⁹ Hāmri nē ra axpên mã àkjêr rax nē. Hāmri nhūm Parijew kwý pē Mojes kapêr o mẽ ahkre ho mẽ pa xwýnhjaja kãnhmã kuhê nē mẽ kām Pawre hã àprãr kām hihtýx nē mẽ kām:

–Kwa pêr tanhmã kot amnhī tomnuj tore hã. Mãn ãm hpimtir kām na pre ã

ri kaxkwa kamã mẽmoj mar anẽ. Rỳ apu Tirtũm kapẽr o wryk xwỳnh kãm tanhmã kapẽr to nhũm pre Tamas wỳr pry kamã mar o xa rỳ ko. Anẽ.

¹⁰ Hãmri nhũm Satusew nhõ xwỳnhjaja tee ri Tirtũm kapẽr o mẽ wryk xwỳnh kot kãm kapẽr ã harẽnhja ma nẽ hã axpẽn mã àkjêr rax nẽ. Hãmri nhũm pôristi krãhtũmjaja tee ri mẽ kot axpẽn mã àkjêr ã mẽ omu hãmri nẽ pôristi mã kãm:

—Kwa mẽ Pawre hwỳr tẽ nẽ mẽ kêp utà nẽ ma akupỹm o tẽ nẽ haxà. Kot ka mẽ ho anhỳr kêt nhũm mẽ tanhmã hamaxpẽr to nẽ gryk xàj axpẽn nhĩhkra kamã hkaxôn pa. Anẽ.

Hãmri nhũm mẽ kuma nẽ hwỳr tẽ nẽ mẽ kêp utà nẽ akupỹm o tẽ nẽ ixkre hwỳr ho axà.

Jejus kot Pawre jamaxpẽr o hihtỳx ã harẽnh

Atre 18.9-10

¹¹ Tã nhũm kamàt nhũm Jejus tãm Pawre hwỳr kato nẽ kãm:

—Pa Pawre? Kwa tee ri amnhĩ kukamã ajamaxpẽr o amnhĩ kamã akahak kêt nẽ. Kot kaj te ra ate jar Jerujarẽ kamã mẽ kãm ijarẽnhta pyrà nẽ ma krĩ pê Rõm wỳr mõ nẽ krĩ nhõ xwỳnhjê mã ijarẽ. Anẽ.

Mẽ kot Pawre hã àmnênh ã mẽ harẽnh

Sikũn Ximotre 4.18

¹²⁻¹³ Tã nhũm apkati nhũm Ijaew kwỳjaja axpẽn wỳr akuprõ. Mẽmyjaja kêp 40 nẽ axte hkõt mẽ hkwyjaja axpẽn wỳr akuprõ. Mẽ kot Pawre pĩr kaxyw hã axpẽn mar kaxyw hã akuprõ nẽ hã axpẽn mã amỳnê nẽ axpẽn mã:

—Tõe. Nà kot puj mẽ hpĩr kaxyw amnhĩ jagri htỳx o paxàpkur kêt rãhã kupĩ nẽ rĩ kormã apku nẽ ixkõ. Nà kot puj mẽ ho anẽ. Ra Tirtũm noo mã mẽ pahte ja hã amnhĩ jarẽnh kẽnã. Anẽ.

¹⁴ Hãmri nẽ mẽ ma mẽ õ patre krãhtũmjê mẽ mẽ àptàr tũmrejê hwỳr mra nẽ mẽ kãm hã amnhĩ jarẽ nẽ mẽ kãm:

—Ot pa mẽ amã amnhĩ jarẽnh mã mra. Nà kot paj mẽ tã Pawre pĩ. Kot paj mẽ kormã hpĩr kêt ri ixàpkur kêt rãhã kupĩ. Ra mẽ ixte Tirtũm noo mã ja hã amnhĩ jarẽnh xà hkõt.

¹⁵ Jakamã e mẽ inhma. Kêr ka mẽ axêx rom pôristi krãhtũm mã anẽ kê apkati kê

man mẽ awỳr Pawre ho tẽ. Te mẽ ate aprĩ hã hkukjêr kaxyw pyràk o kãm axêx. Koja mẽ kormã mẽ awỳr ho hpõx kêt ri pa mẽ unên kupĩ. Anẽ.

¹⁶ Hãmri nhũm Pawre tàmnhwỳ mẽ kot ã hã amnhĩ jarẽnh anhỳrja ma hãmri nẽ ma pôristi xàpênh xà hã ixkrej wỳr Pawre hwỳr hprõt nẽ kãm mẽ harẽ.

¹⁷ Hãmri nhũm kuma nẽ amnhĩ wỳr pôristi krãhtũm nhỹ hã mẽ hamãr xwỳnh ã karõ nẽ kãm:

—Kwa ma mẽ akrãhtũm wỳr ixtàmnhwỳta o tẽ kê kãm mẽmoj jarẽ nà? Anẽ.

¹⁸ Hãmri nhũm kuma nẽ ma hwỳr o tẽ nẽ kãm:

—E Pawre na inhmã anẽ pa awỳr htàmnhwỳ ho tẽ. Kot tanhmã amã ujarẽnh to kaxyw. Anẽ.

¹⁹ Hãmri nhũm omu nẽ hpa hã kupy nẽ o tẽ nẽ ahte mẽ hkàx ã o xa nẽ kãm:

—E mãmrĩ inhmã mẽmoj jarẽ pa ama. Mẽmo na ka te inhmã harẽnh kaxyw? Anẽ.

²⁰⁻²¹ Hãmri nhũm kãm:

—Nà Ijaew xàptàr tũmrejaja na mẽ kot inhĩgêt Pawre pĩr kaxyw hã amnhĩ jarẽ pa amã harẽnh o tẽ. Koja xep mẽ hã awỳ. Xep apkati nhũm ate ma mẽ hwỳr mẽ hkukjêr xà hã ixkre hwỳr ho amõr nhũm mẽ kot hprĩ hã kot amnhĩ nhĩpêx ã hkukjêr kaxyw. Nom koja mẽ am amã amnhĩ to hêx. Koja xep mẽ kêp 40 nẽ pry kamã kutêp amũxu nẽ kuhê. Na mẽ ra hã axpẽn mar pa nẽ axpẽn mã: “Kot puj mẽ paxàpkur kêt rãhã Pawre pĩ nẽ rĩ kormã apku nẽ ixkõ.” Anhỳr o amnhĩ jarẽ pa mẽ kuma. Jakamã na mẽ kormã ate mẽ hwỳr mênh kaxyw akãm ama. Kwa mẽ hwỳr ho amõr kêt nẽ. Anẽ.

²² Hãmri nhũm kuma nẽ kãm:

—Tõe. Nà na pa ra ama. Mãmrĩ ma akupỹm tẽ. Nom kêr ka inhmar kumrêx. Kêr ka nhãm mēhõ mã ja jarẽnh kêt kumrêx. ãm kwarĩ ho kwarĩ. Anẽ.

Hãmri nhũm kuma nẽ kato nẽ ma akupỹm tẽ.

Mẽ kot Ijaew pymaj nhỹhỹm Pawre mênh ã mẽ harẽnh

²³⁻²⁴ Tã nhũm pôristi krãhtũmjaja amnhĩ wỳr y hã pôristi jamãr o mẽ pa xwỳnh wa ho hamẽxkrut nẽ wa hã karõ nẽ wa kãm:

—E wa inhma. Koja kôt ã kamàt ka wa ma krĩ pē Sejarej wýr Pawre ho mō kē hkā hkĩnh pē pahihiti Peris wýr pōj.

Nē amnhĩ kôt pōristi ho 200 nē o mō.

Nē kē mē kēp 70 nē kawar ã hkrĩ nē mē akôt mō.

Nē kē mē kēp 200 nē wapo jamý nē mē akôt o mō.

Kē mē ã ohtō rax anē.

Nē Pawre kot kawar ã ýr nē mōr kaxyw ka mē kām hō ho mō.

E kēr ka mē ã axohtō nē hkôt amōr anē kē hkā hkĩnh pē pahihiti Peris wýr pōj. Anē.

²⁵ Hāmri nē pahihiti Peris mã kagà nhĩpêx nē kamã kām Pawre jarē nē kām:

²⁶ Pa pahihiti Peris? Xà amex? Ixpê Kraw Risas na pa awýr kagà mē.

²⁷ E ot pa awýr Ijaew pē Pawre mē. Na pre hkwýja kot hpĩr kaxyw unēnh tã pa mãânēn kēp Rōm nhō xwýnh ã harēnh ma hāmri nē hwýr inhō pōristi rē nhũm mē hwýr hprôt nē mē kēp utà.

²⁸ Hāmri nē Ijaew xàptàr tũmrejê hwýr o tē. Mē kot inhmã tanhmã kot amnhĩ tomnuj to hã harēnh kaxyw.

²⁹ Tanhmã kot amnhĩ tomnuj to nhũm mē kot haxàr rý hpĩr ronhỹx ja mex nē. No xep ãm kot mē higêtjê kot amnhĩ nhĩpêx kôt amnhĩ nhĩpêx kêt pix mýrapê na mē kamã gryk.

³⁰ Tã pa mē kot hpĩr kaxyw hã mē harēnh ma nē mē umaj awýr kumē. Hāmri nē kamã mē gryk xwýnhjê mã ajarē. Jakamã koja mē mēmo arĩgro hã awýr pōj nē tanhmã kot amnhĩ nhĩpêx to hã amã harē ka kam ja hã mē ama nē tanhmã ho.

Tã ãm ja pix na pa amã harē. Ixpê Kraw Risas na pa awýr kagàja mē. Tã mãn ka arĩ ixte amã harēnhja ma. Anē.

³¹ Tã nhũm kamàt nhũm mē hkrãhtũm kot mē kām karō xà hkôt nhũm pōristijaja ma Pawre o mō. Hāmri nē krĩ pē ãxipat wýr pōj nē kamã amnhĩm hikra.

³² Nhũm apkati nhũm mē kot mē hkôt pykap mōr xwýnhjaja mē ò pahi kot mē kām hã karō xà hkôt awjanã nē ma akupým mō nhũm kawar ã mē mōr xwýnh pixjaja ma Pawre ho mō.

³³ Hāmri nē mō nē Sejarej wýr pōj nē pahihiti Peris nhĩhkram Pawre jaxà nē kām kagàja gō nē awjanã nē ma akupým hapêx.

³⁴ Hāmri nhũm Perisa kagàja py nē omu. Nē omunh pa nē Pawre mã kām:

—E inhmã amnhĩ jarē. Tanhmã na anhō pyka hixi te? Anē.

Nhũm kām:

—Kēp Siris. Anē.

³⁵ Nhũm kām:

—Tōe. Kē mē kot ato kapēr xwýnhjaja pōj pa kormã ixprĩ hã mē kot tanhmã ajarēnh to ma mãn. Anē.

Hāmri nē ò pōristi mã anē nhũm mē ma Pawre o tē. Ma pahi Eroxo htyk xwýnh nhōrkwý hwýr o tē nē kamã haxà nhũm hkrĩ ho hkrĩ.

24

Ijaew kot tanhmã Pawre ho kapēr punuj to hã mē harēnh

Rukre 21.12-13; Atre 25.7

¹ Tã nhũm arĩgro kēp 5 nē hapêx nhũm Ijaew kwýjaja Sejarej wýr pōj. Mē ò patre maati ãnãnísti nē Tetur nē kaxyw mē àptàr tũmrejaja nhũm mē ma hwýr mō nē pōj. Tetur kēp axiwôkat ã mē yr pē kapēr xwýnh jakamã nhũm mē kot tanhmã Pawre o kapēr punuj to kaxyw pahi Peris wýr amnhĩ kôt o mō.

² Hāmri nhũm mē amnhĩ wýr Pawre hã karō nhũm pōristi haprô nē mē hwýr o tēn ho axà. Hāmri nhũm Teturja pahihiti Peris mã Pawre kot tanhmã amnhĩ tomnuj to hã harē nē kām:

—E pahihiti inhma. Nà na ka hte tãm mē inhĩpêx nē mē ixto mex o apa. Jakamã nhũm hte nhãm pika hkwý nhō xwýnhjaja mē ixkurê kaxàr kaxyw mē ixwýr hprôt kêt nē. Pa htem ixpiitã akukwak ri ija-makêtkati nē ixãmnhĩx inhmex nē ixpa.

³ Nē mē ixkĩnh rãhã ho ixpa. Hêxta waa nē. Mē ixpiitã inhmã akĩnh.

⁴ E kot paj amã awjarē ka inhma. Kot paj ixujarēnh o hakotre ka inhma nē tokyx ma akupým tē.

⁵ Nà Pawre na hte amnhĩ tomnuj pix o pa. Kēp Jejus pē Najare nhō xwýnhhta kôt amnhĩ nhĩpêx o mē pa xwýnhjê nhō pahi na. Jakamã na hte pyka piitã hkôt mē ixpê Ijaew tanhmã axpēn kaxyw mē ixkryx to ho pa.

⁶ Jãã na pre Tĩrtũm mã amnhĩ jarēnh xà hã ixkre hwýr amnhĩ kôt mē kēp Ijaew kêt

xwýnh kwýjê ho agjê nê mẽ ixpê ixkreja omnu kaxyw mã tâ pa mẽ omu nê unê.

⁷ Tã nhũm pôristi krãhtũm Risasja mẽ ixpê utà

⁸ nê awýr mẽ ixte tanhmã amã harênh to xwýnhjê rê. Tã ot pa mẽ ixkrĩ. Nê ota Pawre nhỹ. Kam kot amnhĩ nhĩpêx ã hkukja kê tanhmã amã amnhĩ jarênh to ka ama nê ixte amã harênh xà hkôt tanhmã mar to. Anê.

⁹ Hãmri nhũm Ijaew hkwý haxwýja kãm: —Nà ãm hãmri na ã amã harênh anê pahihti. Anê.

Pawre kot pahihti mã amnhĩ jarênh Rukre 21.14-19

¹⁰ Hãmri nhũm pahihti Peris Pawre mã anê nhũm kot kãm amnhĩ tâ àprãr kaxyw kãnhmã xa nê kãm:

—Nà na ka ra inhõ pyka kamã mẽ ixto amnhĩptàr mex o atã amgrà xohtô nê pahihti. Jakamã na pa pre ate ixkapêr mar kaxyw ã ajarênh ma nê ixkĩnh nê.

¹¹ —E kot paj amã amnhĩ jarê ka inhma. Ham na pa pre Jerujarê hwýr mō nê pōj. Na pa hwýr ixpōx ã ixtã arĩgro pē 12 pix. Kam nê ixtã ixkwýjê kukja nê mẽ ama. Ixte Tĩrtũm mã amnhĩ jarênh xà hã ixkre kamã Tĩrtũm mã mex o mex ã harênh kaxyw na pa pre hwýr mō.

¹² No na pa pre nhỹri axpēn kaxyw tanhmã ri mẽ hkryx to hkêt nê. Nê mẽ ixte Tĩrtũm mã amnhĩ jarênh xà hã ixkre kamã rý kapêr o mẽ ahkre xà hã ixkre kamã rý nhỹri pry kamã tanhmã axpēn kaxyw ri mẽ hkryx to hkêt nê. ãm amrakati ho amrakati.

¹³ Mẽ kot ã ri ijarênh anhỹrja amrakati kumrêx. Mẽhõ kot ã ixte amnhĩ nhĩpêx anhỹr ã ixpumunh kêt tâ na htem amnhĩ krã hkôt amã ijarênh o hêx.

¹⁴ Na htem mẽ ixte Jesus kôt amnhĩ nhĩpêx xwýnhjaja mẽ ixte amnhĩ nhĩpêx mex kêt ã mẽ ijarê nom kot anhỹr kêt. ãm mẽ inhĩgêtjê nhõ Tĩrtũm kapêr nywja kôt na pa hte amnhĩ nhĩpêx mex o ri ixpa rãhã nê. Nhũm ixkwýjaja htýx axtem kapêr õ hkôt ixte amnhĩ nhĩpêx o ixpa hã ixkamnhĩx no ãm kapêr õ hkêt. Ijaxwýja na pa hte mẽ uràk nê finat Mojes kapêr ã kagà mar o ixpa. Nê Tĩrtũm nhỹ hã mẽ kapêr o mẽ pa

xwýnh kot kapêr ã kagàja pa hte mẽ uràk nê hkôt amnhĩ nhĩpêx mex o ri ixpa.

¹⁵ Nê mẽ uràk nê Tĩrtũm kot nhỹrmã akupým mẽ ho htĩr kôt pa hte ijaxwýja ijamaxpêr týx nê. Mẽ htyk xwýnh piitãã. Mẽ kot amnhĩ to mex xwýnhjê mẽ mẽ kot amnhĩ tomnuj xwýnhjê mẽ mẽ ho hpimrãatã akupým mẽ ho htĩrja kôt pa hte mẽ uràk nê ijamaxpêr týx o ri ixpa.

¹⁶ Jakamã na pa hte tãm amnhĩ nhĩpêx rãhã nê. Tĩrtũm noo mã nê mẽ piitã mẽ noo mã tãm ri amnhĩ nhĩpêx mex rãhã nê.

¹⁷ —Tã na pa pre pyka hkwý hkôt ri ixpa hã ixtã amgrà xohtô nê. Hãmri nê ma akupým Jerujarê hwýr ixkwýjê hwýr mō. Amarĩ ixte mẽ kãm kàxpore hkwý nhõr kaxyw pa akupým mẽ hwýr mō. Nê mããnen Tĩrtũm mã mẽmoj nhõr kaxyw.

¹⁸ Hãmri nê mẽ ixte amnhĩ nhĩpêx xà hkôt pa mẽ amnhĩ to mex pa nê ma tēn Tĩrtũm mã amnhĩ jarênh xà hã ixkre hwýr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt nê. Rý tanhmã ixkapêr punuj to hkêt nê. Na pa prem ãm inhgrêre nê akryk ixkuhê nhũm mẽ ixpumu.

¹⁹ Pika pē As rũm Ijaew kwýjaja na prem ixkre kamã ixpumu. Nar mẽ tãmjaja mãn awýr mra nê tanhmã amã ijarênh to.

²⁰ —Nê jar mẽ kot ixto kapêr xwýnhjaja. Na pa pre mẽ àptàr tũmrejê mã amnhĩ jarênh pa nhũm mẽ inhma nê tanhmã inhmã nê hkêt nê. Kam nê ja hã mẽ hkukja nê mẽ ama.

²¹ Rý ko. Koja apu mẽ amã ãm ja pix ã ijarênh japêr. Na pa pre mẽ kãm ixkapêr nê mẽ kãm: “Na pa hte mẽ htyk nê akupým mẽ htĩr kôt ijamaxpêr týx nê. Tã ja pix mýrapê na ka prem ixpynê nê ã inhĩpêx anê.” Anhỹr o mẽ kãm ixujarênh jakamã nhũm apu mẽ hkwýjaja kêp ja omnuj nê. Jakamã koja apu mẽ amã ja hã ijarênh japêr. Nom ja pix jarê. Anê.

ã na pre Pawreja pahi Peris mã amnhĩ jarênh anê.

Peris mẽ hprõ wa kot Pawre mar ã wa harênh

²² Tã nhũm pahihti Peris kot mẽ kot Jesus kôt amnhĩ xunhwýr xwýnhjê kot amnhĩ nhĩpêx ã mẽ omunh mex jakamã hãmri

Pawre mar pa nê ho kapêr xwýnhjê mã kãm:

—Nà hãmri. Na pa ra mẽ ama. E mẽ mamrĩ ma mra. Kê pôristi krãhtũm Risasja mō nê pōj pa wa ixprĩ hã mẽ ate tanhmã harênh toja ma nê rĩ kormã tanhmã Pawre jarênh to. Anê.

²³ Hãmri nê hpãnhã pôristi pytàr xwýnh mã Pawre jarê nê kãm:

—E mẽ ma akupỹm ixkre hwýr o tẽ nê kamã hamãr o apa. No ãm kwãr mãmrĩ àmnhĩx ri ixkre kamã tanhmã amnhĩ to ho ri pa. Nê kê hkrãmnhwýjaja mãmrĩ hwýr mẽmoj to mra kê kuku. Anê.

Hãmri nhũm mẽ kuma nê ma o tẽ nê akupỹm ixkre hwýr ho axà nhũm kamã pa ho pa.

²⁴ Tã ra hã apkati grêre nhũm Peris mẽ hprõ wa ma Pawre hwýr tẽ. Prõ haxwýja kêp Ijaew. Hixi pẽ na pre Turujire. Jakamã nhũm wa ma Pawre nhõrkwý hwýr wa tẽ. Nhũm Peris Pawre hã karõ nhũm kato nê wa hwýr tẽ nê wa kãm awjarê. Tanhmã wa kot amnhĩ to nê amnhĩ kaxyw Jejus Kris kôt hamaxpêr nê hkôt amnhĩ xãm prãm xàj hprĩ hã wa kãm harê.

²⁵ Nê wa kãm:

—Nà na htem Jejus Kris kôt amnhĩ nhĩpêx nê tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhýr kêt nê. Nê arĩ Jejus kot amnhĩ nhĩpêx kôt amnhĩ nhĩpêx o pa. Kojã Tĩrtũm nhỹrmã mẽ pahpiitã mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarênh to. Mẽ pahte tãm amnhĩ nhĩpêx xwýnh ã mẽ pajarê rý mẽ pahte amnhĩ tomnuj xwýnh ã mẽ pajarê. Anê.

Nhũm pre ã Pawre Peris mẽ Turujire wa kãm kapêr anê. Hãmri nhũm Peris tee ri ujarênhja ma nê kãm ma nê. Kot amnhĩ tomnuj o pa xwýnh ã amnhĩ pumu nê ã kãm kapêr anhýrja mar puma nê. Hãmri nê Pawre mã kãm:

—E hãmri. Nà na pa wa ra ama. Mamrĩ ma akupỹm tẽn axà. Kot paj mẽmo arĩgro hã mẽmoj to anhýr kêt nê axte amnhĩ wýr atã karõ ka axte tanhmã wa inhmã axujarênh to. Anê.

²⁶ Nê htýx hamaxpêr o:

—Nà kot paj mẽmo arĩgro hã axte amnhĩ wýr hã karõ kê ixwýr tẽ nê ixte kator prãm xàj inhmã amnhĩrer japêr. Anê.

Hãmri nê xatã amnhĩ wýr hã karõ htã no nhũm aa kot kator kaxyw tanhmã kãm nê hkêt nê.

²⁷ Tã nhũm amgrà axkrut nê hapêx nhũm Pos Pesti pahi Peristi hpãnhã kêp mẽ õ pahi nê mẽ ho amnhĩptã. Jakamã nhũm Peris akupỹm õ krĩ hwýr nojarêt nê Pawre mã ãhkra karo hkêt rãhã ma mō. Na pre hamaxpêr o:

—Nà kot paj Pawre kator nhũm Ijaew ja hã ijarênh ma nê ixkamã gryk nê. Nà kwãr mẽ hagjênh xà hã ixkre kamã hkrĩ ho hkrĩ. Kot paj kator kêt nê. Anê.

Hãmri nê kãm ãhkra karo hkêt rãhã ma akupỹm õ krĩ hwýr mō. Jakamã nhũm Pawre arĩ ixkre kamã kêp prês nê hkrĩ ho hkrĩ.

25

Pawre Rõm wýr hkrã ã harênh

¹ Tã nhũm pahi nyw Pos Pesti krĩ pẽ Sejarej wýr mōn pōj. Hãmri nê kamã ri pa hã apkati axkrunêpxi pix nê ma Jerujarê hwýr mō.

² Hãmri nê hwýr pōj nhũm Ijaew kwýjaja omu nê hwýr mra nê kãm Pawre ho kapêr nê hã hwýr kurê kumrêx. Mẽõ patre krãhtũmjê mẽ Ijaew xàptàr tũmrejaja nhũm mẽ hwýr mra nê kãm:

³ —Pa pahĩti? E ot pa mẽ awýr mra. Kwa xà kot ka Pawre hã karõ kê man awýr mō ka jar kot tanhmã amnhĩ tomnuj to hã hkukja nê ama? Anê.

No ãm hêx rom ã hã kãm kapêr anê. Kot hã karõ nhũm mẽ kot pry hã hpĩr kaxyw nhũm mẽ hêx rom ã kãm kapêr anê.

⁴ Hãmri nhũm mẽ kuma nê mẽ kãm:

—Tk. Kwa ra Sejarej kamã kêp prês nê hkrĩ kênã kot pa kêt amnhĩ wýr hã karõ. Kot pa tokyx ma akupỹm hwýr mō.

⁵ Jakamã kêr ka mẽ axàptàr tũmjaja ma ixkôt mra. Hãmri nê Sejarej kamã inhmã tanhmã kot amnhĩ tomnuj to hã harênh to pa mẽ ama nê rĩ kormã tanhmã harênh to. Anê.

⁶ Hãmri nê mẽ kamã pa hã apkati grêre nê ma akupỹm Sejarej wýr mō. Hãmri nê hwýr pōj nhũm apkati nhũm mẽ hkukjêr xà

hã ixkre hwÿr tẽ nẽ mẽ kot mẽ mar xà hã mẽ hkrĩ xà kamã nhÿ nẽ amnhĩ wÿr Pawre hã karõ.

⁷ Nhũm mẽ hwÿr o tẽ nẽ ÿr nhũm hkwÿ kot Jerujarẽ rũm mẽ mõr xwÿnhjaja kãm hipõk nẽ pahi Pos Pesti mã tanhmã ho kapër to nẽ ho kapër punuj tÿx nẽ. Kot tanhmã amnhĩ tomnuj to ho pa hã ho kapër o kuhê. Nom mẽ kot ã kot amnhĩ nhĩpêx anhÿr ã omunh kêt tã ãm amnhĩ hkrã hkõt ri tanhmã ho hêx to.

⁸ Jakamã nhũm Pawre tee ri amnhĩ tã mẽ kot ho hêxja ma nẽ kãnhmã xa nẽ Pos Pesti mã amnhĩ tã aprã nẽ mẽ kãm:

—Nà aa ixte ã amnhĩ nhĩpêx anhÿr kêt. Na pa finat Mojes kot Tirtũm nhÿ hã kapër nhĩrõp ixãm nẽ hkwÿm ri tanhmã amnhĩ nhĩpêx to hkêt nẽ. Nẽ mẽ ixte Tirtũm mã amnhĩ jarênh xà hã ixkre kamã ri tanhmã ixtÿx ri amnhĩ nhĩpêx to hkêt. Nẽ pahihiti Sesti kapërja pa pre hirõp ixãm nẽ tanhmã amnhĩ tomnuj to hkêt nẽ. Aa ixte ã amnhĩ nhĩpêx anhÿr kêt kumrêx. Anẽ.

⁹ Hãmri nhũm Pos Pesti kuma nẽ tanhmã hkukamã hamaxpër to nẽ hamaxpër o:

—Kwa nhÿ krĩ kamã kot pa we Pawre kot inhmã tanhmã amnhĩ jarênh toja ma nhũm Ijaew ja hã kãm ixkĩnh japêr? Nà mẽõ krĩ pẽ Jerujarẽ hwÿr kot paj akupÿm mẽ hwÿr o mõ nẽ kamã mãn hkukja nẽ kuma. Nà ja na mex. Nà kot paj anẽ. Anẽ.

Hãmri nẽ Pawre mã kãm:

—E xà kot puj ma akupÿm Jerujarẽ hwÿr mõ pa kamã axte mẽ kot ajarênh ma nẽ tanhmã ajarênh to nà? Anẽ.

¹⁰ Hãmri nhũm kãm:

—Nà jar ixte pahihiti Sesti nhÿ hã mẽ kot mẽ hkukjêr xà hã ixkre kamã inhÿr nẽ amnhĩ jarênh kênã. Jar na htem mẽ hkukja nẽ tanhmã ri mẽ mar to. Na pa pre tanhmã ixkwÿjê ho hkêt nẽ. Mẽmo kaxyw kot pa akupÿm mẽ hwÿr mõ nẽ axte mẽ kãm amnhĩ jarê?

¹¹ Kop apu pa tanhmã ixte amnhĩ tomnuj to ronhÿx mẽ mãmrĩ ja hã ixpĩ pa mẽ kęp tanhmã ri amnhĩ to hkêt nẽ. Nom mẽ kot ixto hêx pix o ã ijarênh anhÿr kênã. Jakamã mẽmo mÿrapê kot kaj mẽ ïhkram ijaxà? E Rõm kãm pahi maati Sesti hwÿr mãn inhmẽ pa kumã mãn amnhĩ jarê. Anẽ.

Pahi Sesti kęp pyka piitã hkõt mẽ ho amnhĩptàr xwÿnh maati jakamã nhũm Pawre kot mar kaxyw hwÿr hkrã.

¹² Hãmri nhũm Pos Pesti kuma nẽ ma tẽ nẽ hã õ kõwenatõjê ma. Hãmri nẽ hã axpèn mar pa nẽ akupÿm hwÿr tẽ nẽ kãm:

—Tõe. Nà kot paj pahi maati Sesti wÿr amẽ. Ra hwÿr akrã kênã. Anẽ.

Pos Pesti kot Akrip mã Pawre jarênh

¹³ Tã nhũm apkati grêre nẽ hapêx nhũm pahi hõ pẽ Akripja ma Pos Pesti hwÿr mõ. Tõx Perênĩs mẽ wa mõ.

¹⁴ Hãmri nẽ wa hwÿr pøj nẽ kuri wa pa hã apkati grêre nhũm Pos Pesti wa kãm Pawre jarê nẽ wa kãm:

—E pa war amã mẽhõ jarê. Na pre pahi Perisja mẽ hagjênh xà kamã mẽhõ jaxà nẽ kormã kator kêt ri nhũm mẽ àpênh nẽ kator pa hpãnhã àpênh o amnhĩptã.

¹⁵ Tã ra ma Jerujarẽ hwÿr mõ nhũm Ijaew nhõ patre krãhtũmjê mẽ mẽ àptàr tũmrejaja inhmã ho kapër punuj rax nẽ. Nẽ ixte mẽ kãm hpĩr kaxyw inhmã hã àmnênh kãm hihtÿx nẽ.

¹⁶ Nom pa mẽ kęp ja kaga nẽ mẽ kãm: “Nà mẽ ixpê Rõm nhõ xwÿnhjaja na pa htem ã mẽ hipêx anhÿr kêt nẽ. Na pa htem mẽ kot ho kapër xwÿnh noo mã tanhmã hkukjêr to nhũm tanhmã amnhĩ tã aprãr to pa htem kuma nẽ rĩ kormã tanhmã mẽ ho. No na pa htem kormã mẽ kot tanhmã amnhĩ jarênh to hkêt ri tanhmã mẽ ho hkêt nẽ.” Anẽ.

¹⁷ —Jakamã nhũm prem kaxyw Sejarej wÿr pøj nhũm apkati pa hã mẽ hkukjêr kurê kumrêx. Nẽ mẽ kot mẽ hkukjêr xà hã mẽ hkrĩ xà kamã nhÿ nẽ ixte hkukjêr kaxyw amnhĩ wÿr Pawre hã karõ.

¹⁸ Na pa pre ijamaxpër o: “Mãn pre tanhmã amnhĩ tomnuj tÿx to hã na mẽ inhmã harênh kaxyw.”

¹⁹ Anhÿr ã hkamnhĩx tã te kot amnhĩ to mex xwÿnh pyrãk. ãm kot mẽ hkõt amnhĩ nhĩpêx kêt pix ã nhũm mẽ inhmã harê. Nẽ kaxyw mẽhõ htyk xwÿnh jarê. Mẽ kot kãm “Jejus” anhÿr xwÿnhja na xep hte mẽ kãm akupÿm htĩr ã harênh o pa. ãm ja pix na prem inhmã harê.

²⁰ Pa tee ri ixte nhÿri ixprĩ hã tanhmã mẽ kot harênh to hã mẽ mar kaxyw hkukamã ijamaxpër. Hãmri nẽ hã Pawre kukja nẽ

kãm: “Xà kot puj ma akupÿm Jerujarê hwÿr mō pa axte akwÿ kot tanhmã ajarênh to ma nê rî kormã tanhmã ajarênh to nà?”

²¹ Anhÿr tâ no nhÿm akupÿm Jerujarê hwÿr mōr kaga kumrêx nê amnhÿm Rōm kãm pahi maati Sesti jarê. Ixte ma hwÿr mênh nhÿm kot kãm amnhÿ jarênh nhÿm kot mar nê tãm tanhmã harênh to kaxyw. Jakamã pa kormã ixte hwÿr mênh kaxyw amnhÿ xa hã akupÿm mē hagjênh xà kamã haxà nhÿm arî hkrî ho hkrî. Anê.

²² Hãmri nhÿm Akrip kuma nê kãm:

—Xôwehe? Kwa na pa inhmã tanhmã kapêr to mar prãm nê. Anê.

Hãmri nhÿm kãm:

—Tôe. Nà kê apkati pa hã karō ka tanhmã kapêr mar to. Anê.

²³ Jakamã nhÿm apkati nhÿm Akrip mē htōx Perênîs wa pahi hã mē ê mex jagjê nê ma mē hkukjêr xà hã ixkre hwÿr wa tē. Pôristi krâhtÿm kwÿjê mē Sejarej kamã mē kot amnhÿ to rÿnh xwÿnh kwÿjê mē nhÿm mē hwÿr akuprō. Nhÿm mē piitã Akrip mē htōx wa kêp pahi hã wa ê mex ã wa omu nê wa kamã no puma nê. Hãmri nhÿm Pos Pesti Pawre hã karō nhÿm mē haprō nê ma mē hwÿr o tē.

²⁴ Hãmri nhÿm Pos Pesti omu nê Akrip mē htōx mē mē kot mar o hkrî xwÿnhjê mã kãm:

—E pahihiti Akrip mē mē apikuprōnh xwÿnhjaja. Ota Pawre xa. Jerujarê kamã nê jar Sejarej kamã na pre hkwyjaja inhmã ho kapêr rax nê. Hãmri nê ixte hpîr kaxyw inhmã hã àmnênh kãm hihtÿx nê.

²⁵ Nom mēmoj mÿrapê kot pa kêt kupî? Tã nhÿm amnhÿm pahi maati Sesti jarê pa ma hwÿr mênh kaxyw.

²⁶⁻²⁷ Nom na htem amarî pahi maati Sesti hwÿr mē rênh kêt nê. Nà htem kãm mē kot tanhmã amnhÿ tomnuj to hã kagà nê hwÿr kagà mē ro hã mē kurê. No jahti kot tanhmã amnhÿ tomnuj toja na ixte omunh kêt. Te inhmã tanhmã kot amnhÿ tomnuj to hkêt pyrâk. Jakamã na pa mē awÿr o tē. Mē ate kapêr mar nê kot tanhmã amnhÿ tomnuj to hã inhmã harênh nhÿm ixte hã kagà nê pahi Sesti hwÿr mênh kaxyw. Jakamã e mē kam nê hkukja nê ama nê tanhmã mar to. Anê.

26

Pawre kot pahihiti Akrip mã amnhÿ jarênh

Atre 8.3, 9.1-19, 22.1-21

¹ Hãmri nhÿm Akrip Pos Pesti kot tanhmã Pawre jarênh toja ma nê Pawre mã kãm:

—E mãmri mē inhmã amnhÿ jarê pa mē ama. Anê.

Hãmri nhÿm kuma nê kãm amnhÿ jarênh kaxyw kãnhmã kãm ïhkra pē nê kãm:

²⁻³ —Hêxta waa nê. Nà na pa amã amnhÿ jarênh kaxyw nê ixkÿnh nê pahi Akrip. Ra ate mē ixpê Ijaew kot amnhÿ nhîpêx ã mē ixpumunh mex. Nê mē ixte tanhmã amnhÿ nhîpêx to hã mē ixte expên kukjêrta ate hã mē ixpumunh mex. Jakamã na pa amã amnhÿ jarênh kaxyw nê ixkÿnh nê. E tokyx anojarêt kêt nê inhma. Pa amã ixujarênh jatur xãm kumê ka aprî hã inhma.

⁴ Nà ixkwÿjaja ra mē kot ixte amnhÿ nhîpêx ã ixpumunh mex. Ixprire rÿm ixpapxà kamã nê mãânên Jerujarê kamã ixte tanhmã amnhÿ nhîpêx to ho ixpaja mē kot hã ixpumunh mex.

⁵ Ixpê mē hkwy pē Parijew nhō xwÿnh kwÿjê hã mē kot ixpumunh. Koja mē apu ja hã amã ijarênh japêr rÿ ko. Mē ixpê Parijew nhō xwÿnhjaja na pa htem amnepêm finat Mojes kot Tirtÿm nhÿ hã mē inhîgêjtê mã mēmoj tã karō xà hkôt amnhÿ nhîpêx mex o ixkwÿjê jakre.

⁶ —Amnepêm na pre Tirtÿm mē inhîgêjtê mã tanhmã amnhÿ jarênh to. Kot nhÿrmã mē piitã akupÿm mē ho htîr ã amnhÿ jarê. Tã ixte ja kôt ijamaxpêr pix mÿrapê na prem kot hã amã ixto kapêr kaxyw awÿr ixto mō.

⁷ Mē ixpê Ijaew nhîgêjtê piitã na prem Tirtÿm kapêr kôt hamaxpêr o ri pa. Kot nhÿrmã akupÿm mē ho htîr ã amnhÿ jarênh kôt hamaxpêr tÿx o pa. Amnepêm finat Jako mē hkra pē 12jaja na prem hkôt hamaxpêr. Nê ixpê mē hkanrêhã mē htãmnhwÿ na pa hte ijaxwÿja ja kôt ijamaxpêr tÿx rãhã ho ri ixpa. Tã ãm mēmoj pixi mÿrapê na ixkwÿjaja ã amã ixto kapêr punuj anê.

⁸ Mē kot ixpyrà nê ja kôt hamaxpêr ã amnhÿ jarênh tã nhÿm pre Tirtÿm akupÿm Kra Jejus o htîr nom nhÿm mē ixkÿnhã ja kôt

hamaxpër kêt. Nom Tirtûm kêp akupÿm mẽ pahto pahtîr xwÿnh kênã.

⁹—Amnepêm kormã Jesus kôt ijamaxpër kêt ri na pa pre ijaxwÿja mẽ urak mẽ akupÿm htîr kôt ijamaxpër kêt mẽ. Nẽ ixtÿx ijamaxpër o: “Kot paj Jesus pê Najare nhõ xwÿnh kôt mẽ kot amnhî xunhwÿr xwÿnhjê nhîpêx kati ho ixpa nhũm Tirtûm ja hã ixpumu nhũm ja kãm mex mẽ.”

¹⁰—Anhÿr jakamã pa pre hte tanhmã mẽ homnuj tÿx to ho ri ixpa. Jao Jerujarẽ kamã mẽ inhõ patre krãhtûmjê nhÿ hã mẽ unê mẽ mẽ hagjênh xà kamã mẽ hagjênh o ixpa nhũm mẽ kot mẽ himex kaxyw mẽ hã inhmã amnhî jarẽ nhũm ja inhmã mex mẽ. Pa mẽ harênh ma mẽ ixkînh mẽ.

¹¹ Pa pre hte xatã tanhmã mẽ hipêx to mẽ mẽ kot Jesus kaga hprãm xaj mẽ hipêx kati rûnh mẽ. Tirtûm kapêr o mẽ ahkre xà hã ixkre piitã kamã pa pre hte ã mẽ hipêx anê. Nẽ mẽ kamã inhgryk tÿx jakamã ma krî hkwÿ hkôt mẽ hapêr o ri ixpa. ã na pa pre mẽ hipêx anhÿr o ri ixpa.

¹²—Tã axte ixte mẽ hkwÿjê pynênh mẽ mẽ hagjênh kaxyw ma Tamas wÿr mõi. Mẽ inhõ patre krãhtûmjê nhÿ hã ma mẽ hwÿr mõi.

¹³ Hãmri nhũm ra kaxkwa nhîpøk ri myt nhÿ pa kormã pry hã inhmõr ri kaxkwa rûm mẽmo nhîrãja pumu. Nhũm hirã htÿx o myt jakre mẽ ixtã ajêt pa ixkôt ri mẽ pa xwÿnhjê mẽ hipøk ri ixkuhê.

¹⁴ Hãmri mẽ mẽ inhmã ma xaj pykap ixrôrøk pa nhũm kaxkwa rûm mẽhøj inhmã kapêr. Mẽ ixpê Ijaew kapêr o kapêr mẽ inhmã: “Pa Sawti? Hêxta waa mẽ. Kwa mon ka hte axtem mẽ ixtomnuj tÿx o ri apa? Nom na ka tee ri ã amnhî nhîpêx anhÿr kaprÿ.” Anê.

¹⁵ Hãmri pa tee ri kuma mẽ kãm: “Kwa mẽ atõ na ka ã inhmã akapêr anê?” Anê.

—Hãmri nhũm inhmã: “Ixpê Jesus na pa amã ixkapêr. Pa na ka hte ixpê ixkôt mẽ kot amnhî xunhwÿr xwÿnhjê homnuj tÿx o apa ho te pa ixtomnuj tÿx pyræk.

¹⁶ E kãnhmã xa. Ate inhmã tanhmã amnhî nhîpêx to ho apa kaxyw na pa amã amnhî to amnhîrît. Jarãhã ate ixpumunh xà hkôt ate mẽ kãm ma ijarênh mẽ mẽ kãm ixkapêr jarênh o mẽ ahkre ho ri mẽ hkôt apa kaxyw na pa amnhî kaxyw ata. Kot paj

nhÿrmã axte awÿr ixkato mẽ tanhmã amã ixkapêr to ka inhma mẽ ma mẽ kãm ixkapêr jarênh o ri mẽ hkôt apa. Ja kaxyw na pa amnhîm ata.” Anhÿr o inhmã kapêr.

¹⁷ Hãmri mẽ inhmã: “E kot paj Ijaew mẽ Ijaew kêt xwÿnhjê hwÿr amê mẽ anê mẽ omunh mex mẽ nhũm mẽhõ apîr kêt mẽ.

¹⁸ Kêr ka ma mẽ hkôt mẽ kãm ixkapêr jarênh o ri apa kê mẽhprî hã kuma. Mẽ kot amnhî tomnuj kaga mẽ amnhî kaxyw ixkôt hamaxpêr mẽ ixkôt amnhî xunhwÿr kaxyw. Hãmri nhũm Tirtûm ja hã mẽ omu mẽ ixkukwak ri amnhî katut kôt mẽ kot amnhî tomnuj piitã rênh pa mẽ axte kãm hamaxpêr kêt mẽ. Hãmri mẽ mẽ ho hkra. Koja mẽ ã amnhî nhîpêx anê hãmri mẽ axte Satanasti nhÿ hã tanhmã amnhî nhîpêx to hkêt mẽ. Pãnhã Tirtûm kôt pix mã amnhî nhîpêx o pa.” Anê.

¹⁹—ã na pre Pahihti Jesus inhmã kapêr anê. Tã kot kaxkwa rûm inhmã ixapênh jarênh ã karõja pa pre mar tÿx mẽ hkôt amnhî nhîpêx rãhã ho ri ixpa pahi Akrip.

²⁰ Jakamã na pa pre ma mẽ hkôt mẽ kãm kapêr jarênh o ri ixpa. Tamas kumrêx hwÿr mẽ hpãnhã Jerujarẽ hwÿr mẽ hpãnhã pika pê Jutej piitã hkôt Ijaew mã kapêr jarênh o ri ixpa. Tã hpãnhã Ijaew kêt xwÿnhjê mã harê. Na pa hte mẽ kãm ixkapêr o: “Kwa mẽ ate amnhî tomnuj kaga mẽ hpãnhã Tirtûm kôt amnhî xunhwÿ. Hãmri mẽ hkôt pix mã amnhî nhîpêx o ri apa. Mẽ piitã mẽ kot apê hkwÿ hã mẽ apumunh kaxyw.” Anê.

²¹—ãm ja pix mÿrapê na pre ixkwÿjaja ixpynê. Tirtûm mã amnhî jarênh xà hã ixkre kamã ixpynê mẽ ra mẽ kot ixpîr kaxyw.

²²⁻²³ Nom na hte Tirtûm ixtãnopxa mẽ ixto ixihtÿx mex rãhã ho pa pa arî mẽ kãm harênh o ri ixpa. Mẽ kot amnhî to rûnh xwÿnhjê mã mẽ mẽ kêp amrakati xwÿnhjê mã mẽ mẽ piitã mẽ kãm harênh o ri ixpa. Finat Mojes mẽ Tirtûm nhÿ hã kapêr jarênh o mẽ pa xwÿnhjaja kot ra hkukamã tanhmã harênh to xà hkôt pa hte mẽ kãm harênh o ri ixpa. Nẽ mẽ kãm: “Tirtûm kot mẽ pakaxyw ãm xwÿnhnta na pre amnhî xà htÿx kamã hamak kãm ty. Tã nhũm Tirtûm akupÿm ho htîr. Kumrêx na pre akupÿm ho htîr jakamã kumrêx na pre tanhmã mẽ kãm kapêr to ho

ri mẽ hkôt pa. Mẽ kot amnhĩ kaxyw hkôt hamaxpẽr nẽ hkôt amnhĩ xunhwỳr xwỳnh piitã uràk nẽ nhỹrmã Tĩrtũm mẽ wa õ krĩ kamã htĩr tũm nẽ pa ho pa hprãm xàj mẽ harẽnh o pa. Mẽ ixpê Ijaew nẽ mããnẽn mẽ apê Ijaew kêt xwỳnhjaja nhũm pre ã mẽ pajarẽn anẽ.” Anhỹr o pa hte mẽ kãm harẽn o ri mẽ hkôt ixpa pahi Akrip. Anẽ.

²⁴ Nhũm Pawre kormã kot mẽ kãm amnhĩ jarẽn par kêt ri nhũm Pos Pesti tee ri tanhmã Jejus jarẽn to hã kuma nẽ kàx pẽ kãm kapẽr nẽ kãm:

—Kwa na ka akrã axpã nà? Pẽr ate kagã pumunh tỳx kurê akrã pipãnh pyràk o ri atỳx ã ri mẽ inhmã axujarẽn anẽ. Anẽ.

²⁵ Hãmri nhũm kãm:

—Nà ixkrã pipãnh kêt. ãm hãmri na pa mẽ amã awjarẽ.

²⁶ Jerujarẽ kamã na prem Jejus pĩ nhũm mẽ piitã omu. Tã nhũm akupỹm htĩr hãmri nẽ hpimxur pẽ ri pa hkêt nẽ. Na pre mẽ ohtô nẽ akupỹm htĩr kãm omu. Pahi Akrip ra kot ja mar mex jakamã na pa ixãmnhĩx ã mẽ amã harẽn anẽ.

²⁷ Anhỹr o kãm kapẽr hãmri nẽ pahi Akrip wỳr rĩt nẽ kãm:

—Kwa pahi Akrip. Xà Tĩrtũm nhỹ hã kapẽr jarẽn o mẽ pa xwỳnhjaja kot Jejus kukamã tanhmã harẽn toja kôt na ka hte ajamaxpẽr? Nà ra hkôt ajamaxpẽr kênã. Ra ixte ajamaxpẽr kôt apumunh mex. Anẽ.

²⁸ Hãmri nhũm tee ri kuma nẽ kãm:

—Tk. Kwa xà kot kaj ã inhmã akapẽr anẽ pa ama nẽ apyrã nẽ amnhĩ kaxyw Jejus kôt ijamaxpẽr? Nà na ka ixte ã ate Jejus jarẽn anhỹrja kôt ijamaxpẽr ã ixkamnhĩx kaprỳ. Anẽ.

²⁹ Hãmri nhũm Pawre kãm:

—Ko. Kot kaj ixpyrã nẽ amnhĩ kaxyw hkôt ajamaxpẽr pa ixkĩnh nẽ. Nom kaxipix kêt. Mẽ apiitã mẽ ate inhmar o akrĩ xwỳnhjaja mããnẽn. Mẽ ate mẽ ixpyrã nẽ Jejus kôt amnhĩ xunhwỳr na inhmã hprãm. ãm ixpyrã nẽ mẽ apê prês pix na inhmã hprãm kêt. Anẽ.

³⁰ Hãmri nhũm pahi Akrip nẽ htõx Perênĩs nẽ pahi Pox Pesti nẽ mẽ hkôt mẽ mõi xwỳnhjaja kãnhmã kuhê nẽ ma mrar kaxyw.

³¹ Nẽ nojarêt nẽ Pawre hã axpẽn mã:

—Kwa tanhmã kot amnhĩ tomnuj to hkêt kênã kot kêt mẽ haxà rỳ kupĩ. Anẽ.

³² Hãmri nhũm Akripja Pos Pesti mã kãm:

—Kwa kop apu kot amnhĩ kaxyw pahi maati Sesti hwỳr hkrã hkêt ronhỹx pu mẽ ra kator. Anẽ.

27

Mẽ kot Rõm wỳr Pawre mẽnh ã mẽ harẽn Atre 23.11, 25.12

¹ Tã nhũm mẽ pyka pẽ Itar wỳr pahi maati Sesti hwỳr Pawre mẽnh kaxyw. Itar kamã mẽ õ krĩ maati na pre kệp Rõm. Jakamã nhũm Pawre mẽ mẽ kot mẽ hagjẽn xà kamã mẽ hkrĩ xwỳnh mẽ ho hpimràatã ma mẽ o mra nẽ põiستی krãhtũm Jurti nhĩhkram mẽ haxàr pa. Kot ma Rõm wỳr mẽ o mõi kaxyw. Jurtija kệp Itar kamã mẽ õ pahi maati hã põiستی krãhtũm nhũm prem ma mẽ kãm mẽ o mõi kaxyw ãhkram mẽ hagjẽn pa. Ixpê Rukre na pa pre inhmã Pawre hkôt inhmõi prãm nẽ mẽ hã ajêt nẽ mẽ hkôt mõi.

² Tã pa mẽ ra inhnojarêt nhũm Aristak haxwỳja ma mẽ ixkôt mõi. Pyka pẽ Masetõn nhõ xwỳnh na pre. Õ krĩ pẽ na pre Tesarõn. Jakamã nhũm ma wa ixkôt mõi. Hãmri nhũm pãrja nojarêt. Atamĩx rũm pãr nhũm ra As wỳr nojarêt pa mẽ hwỳr inhgjêx pa nẽ ma kamã mõi.

³ Hãmri nhũm apkati pa mẽ krĩ pẽ Sito hwỳr pøj nẽ hã pãr xi. Nhũm põiستی krãhtũm Jurtija Pawre ho mex jakamã pa mẽ Sito hwỳr pøj nhũm Pawre mã anẽ pa mẽ ixkato nẽ ma ixkrãmnhwỳjê hwỳr mra nẽ mẽ kutã apku nẽ ma akupỹm pãr wỳr mra.

⁴ Tã pa mẽ axte mõi. Nom nhũm kôk mẽ ixkutã àpêr tỳx jakamã pa mẽ umaj juk nẽ gô hipôk kupu ho mõi. Gô hipôk pẽ Sipreja pa mẽ upôk rũm ma hkupu ho mõi nhũm mẽ inhnê kôk pẽ àmnàr mex nẽ.

⁵ Hãmri pa mẽ mõi nẽ pyka pẽ Siris mẽ Pãpir wa hakrenh o mõi nẽ pyka pẽ Ris kamã Mira hwỳr pøj nẽ hã pãr xi nẽ ijapôx pa.

⁶ Hãmri nhũm põiستی krãhtũmja Aresãnrir rũm pãr pumu nhũm ra Itar wỳr nojarêt. Pa mẽ hwỳr inhgjêx kurê kumrêx hãmri nẽ ma kamã axte mõi.

⁷ Hāmri nhūm pàrja kôk kutā tee ri mōr prēprēk kaxyw nē ãm amnhīm hprī nē mōr ã apkati xohtô nē pa mē tokyx ixpôx kêt nē. Tã Sito hwÿr ixàhtēp o mō nom nhūm kôk mē ixkutā hihtÿx rax kumrēx. Jakamã pa mē juk nē gô hipôk pē Kret jatur xà jahpa nē ma kape hã mō nhūm mē inhnē kôk pē àmnàr mex nē. Hāmri pa mē ma Sarmōn jakrenh o mō

⁸ nhūm pàr kôk kutā amnhīm hprī nē kape hã mō. Pa mē mō nē jatã Rasej tã pàr nhīkwÿ xà mex wÿr pøj nē kamã pàr xi.

⁹ Nom pàr kot amnhīm hprī nē mōr jakamã nhūm ra kôk xàpēr tÿx nē kamã kry htÿx ã mytwrÿ mē ixtã kato. Mytwrÿja ã mē kot kôk xàpēr tÿx pymaj nhÿhÿm pàr kãm mrrar kêt. Jakamã nhūm Pawre tokyx mē inhmōr nē pàr nhō xwÿnhjē mã kapēr kãm hihtÿx nē mē kãm:

¹⁰ —Kwa pu mē jar kôk xàpēr tÿx jamãr o ri papa nã. Kê kôk mē kry htÿxja hapēx pu mē rĩ kormã axte mō. Kot puj mē anhÿr kêt nē kôk xàpēr tÿx kãm mō nhūm nhÿri pàrja mē pahpē axà nhūm gô mē apē mē akukrēx o hapēx pa. Pu mē pajaxwÿja axkaprã.

¹¹ Anhÿr o mē kãm kapēr tã no nhūm mē kuma nē ãm kuma. Pàr pãm mē pàr o mrrar xwÿnh wa nojarēt tÿx nē kapēr ma nē ãm kuma. Nhūm pôristi krãhtÿm wa nojarēt ã wa kuma nē haxwÿja Pawre mar kêt nē.

¹² Nhūm mē kot pàr nhīkwÿ xà mex jarēnhja mē kot mex ã harēnh tã mē kēp omnuj nē. Hã na wrÿk nē kôk xàpēr tÿx nhūm mē kēp omnuj tÿx nē. Jakamã nhūm mē piitã Pawre rom ra nojarēt nē. Mē kãm tokyx krī pē Wēnīs wÿr hpôx prãm jakamã nojarēt tÿx nē. Gô hipôk pē Kret kamã na Wēnīsja. Nē kamã kôk xàpēr tÿx kêt jakamã nhūm mē hwÿr nojarēt nē axpēn mã:

—E kwa pu mē tokyx Wēnīs wÿr mō nē kamã mãn kôk xàpēr tÿx japēx jamãr o papa. Anē.

Hāmri nē piitã hwÿr nojarēt.

Kôk kot pàr o àpēr tÿx ã harēnh

¹³ Tã nhūm kahpa hkôt kôk xàpērja katat kôt kawax pē apē nhūm mē kamã ama nē axpēn mã:

—E hāmri. Tokyx pu mē mō. Anē.

Jakamã pa mē pàr o htÿx xà ho api nē axte mō. Ma gô hipôk pē Kret jakàr ã mō.

¹⁴ Puh nhūm na wrÿ nē kôk àpēr tÿx kumrēx. Mē kot kãm “kôk xàpēr tÿx maati” anhÿr xwÿnhja gô hipôk rùm mē ixto àpēr tÿx kumrēx o mō.

¹⁵ Hāmri nē mē ixkutā àpēr tÿx nhūm pàr tee ri kutã hkarôt. Pa mē kormã Wēnīs wÿr ixpôx kêt ri ra ho awjanã nhūm amnhī krã hkôt kôk kôt mō.

¹⁶⁻¹⁷ Hāmri nē mō nē gô hipôk pē Krawti jahpa nē hakàr ã mō nhūm mē inhnē kôk pē amÿtà nhūm amnhīm hprī nē kawax pē apē. Hāmri pa mē pàr krare kot mē ixkôt mōr xwÿnhja pa mē kumÿ nē pàr rax kãm kumē. Ra kamã gô rax tã pa mē ixkarôt tÿx nē nē hkapīr pa nē ho api nē pàr rax kãm kumē nē ho htÿx. Hāmri nē hpãnhã kôk xàpēr tÿx pymaj pàr rax kaxpre hpa. Hāmri nē kôk kot pykahti grã maati pē Sirteja wÿr pàr mēnh nhūm kot amnhī to pykahti xãm o htēm pymaj nhūm mē kot ho mrrar xà hã kupēxē rax o wrÿ nhūm pàr amnhī krã hkôt ma kôk kôt mō.

¹⁸ Tã nhūm apkati nhūm kôk arī mē ixpē pàr o àpēr tÿx nē arī na wrÿk rax rãhã nē. Jakamã pa mē pàr àr pymaj nē mē hikukrēx kwÿ gôx kãm rēnh pa. Kaxkritre nē àr kêt kaxyw.

¹⁹ Tã nhūm apkati pa mē hpãnhã pàr kre kamã ri nē hikukrēx kwÿ rē nē gôx kãm kurē.

²⁰ Nhūm kôk arī àpēr tÿx kumrēx ã apkati xohtô nē. Nē na wrÿk rax rãhã jakamã pa mē kanhēti pumunh kêt nē myt pumunh kêt o mē ixtã apkati xohtô rax kumrēx. Hāmri nē tee ri ahkapi nē tee ri amnhī kukamã ijamaxpēr. Nē ixtyk par pix kukamã ijamaxpēr o ixkaprī nē ixkrī.

²¹ Hāmri nē mē inhmã ma xà ixàpkur kêt rÿy nē. Hāmri nhūm Pawre tee ri ja hã mē ixpumu nē pàr nhō xwÿnh wa kãm kapēr nē wa kãm:

—Kwa na pa pre tee ri Kret kãm man mē pamōr nē war amã ixkapēr. Kop apu mÿtar mãn mē kuri arī ri mē hkôt mē papa ronhÿx pu mē pajamakêtkati nē paxàmnhix ri papa. Tã nhÿx pu mē ri mē hikukrēxja gôx kãm rēnh par kêt nē.

²² Nom kwa kēr ka mē tee ri amnhī kukamã ajamaxpēr kêt nē. Kot puj mē pahtō pahtÿk kêt nē. ãm pàrja pix koja axà nē hapēx.

²³ Ixpê Tirtüm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwỳr kapêr o wrỳk xwỳnhjê hõ mẽ nhũm ixwỳr wrỳ nê inhmã awjarê

²⁴ nê inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nê. Kot kaj akà hkĩnh pê ma Itar kamã Rõm wỳr mõi nê põi nê pahĩ maati Sesti pumu nê kãm amnhĩ jarê. Jakamã koja Tirtüm akõt mẽ mõi xwỳnh piitã omunh mex nê ka mẽ atõ tanhmã amnhĩ to hkêt nê.” Anê.

²⁵ —Ã kot inhmã kapêr anhỳr jakamã kwa mẽ amnhĩ to htỳx nê tee ri amnhĩ kukamã ajamaxpêr kêt nê. Tirtüm kapêr o wrỳk xwỳnh kot inhmã ujarênh xà hkõt koja Tirtüm ã mẽ panhĩpêx anê. Ixte ja hã omunh mex kênã.

²⁶ Koja xep kòkja nhỹri gõ hipòk ã pàr krakrak pa. Nom mẽ papajaja kot puj mẽ pahkà hkĩnh pê hwỳr pahpòx pa. Anê.

²⁷ Tã pa mẽ mõi nê ã inhmõi anhỳrja ã ixtã semãn axkrut nê ra gõ rax pê Ariax kõt axà. Kamàt kãm hkõt axà nhũm kòkja arĩ pàr o apêr tỳx rãhã ho mõi. Hãmri nhũm kõt ã kamàt nhũm pàr o mrar xwỳnhja ra pàr kot pykahti grà htêp ã hkamnhĩx.

²⁸ Jakamã nhũm mẽ gõ xupỳm pumunh xà ho gõ pumu nhũm upỳm kêp 36 met. Hãmri nhũm hã ahtũmre nê axte omu nhũm ra hpãnhã kêp 27 met pix. Jao ra pàr kot gõ kokwe htêp o mõi ã omu.

²⁹ Hãmri nê kot kên kuranh nê hã pikrakrak pymaj katê rùm ho htỳx xà ho 4 nê gõx kãm kurê nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ.

³⁰ Hãmri nhũm pàr kãm mẽ àpênh xwỳnhjaja tanhmã hamaxpêr to nê hêx rom pàr krare ho wrỳk o tẽ. Mẽ kot mẽ ixrer nê ahte xarmã mõi nê rêr nê tokyx gõ hipòk wỳr hpòx kaxyw. No ãm hêx rom te mẽ kot axte pàr krã rùm ho htỳx xà hõ mẽnh kaxyw pyræk o amnhĩ nhĩpêx nê kaxyw ho wrỳk o tẽ.

³¹ Nom nhũm Pawre mẽ hamaxpêr ã mẽ omu hãmri nê pòristi mẽ mẽ hkrãhtũm mã mẽ harê nê mẽ kãm:

—Kwa koja mũjjaja mẽ pare nê ahte pàr krare kamã xarmã mõi rê ka mẽ apikaprãr pa kãm ga. Anê.

³² Hãmri nhũm mẽ tee ri kuma nê mẽ hwỳr hprõt nê mẽ kêp pàr krare pê hkaxpre xà jakà nhũm gõx kãm tẽm nê ma gõ hkõt hkaprỳn mõi.

³³ Tã hãmri nhũm ra myt kator o mõi nhũm Pawre akupỳm mẽ piitã mẽ ho mẽ hamaxpêr o hihtỳx kaxyw mẽ kãm:

—Kwa na ka mẽ tee ri amnhĩ kukamã ajamaxpêr o akaprĩ nê axàpkur kêt o atã semãn axkrut.

³⁴ E pu mẽ mẽmoj krê nê ho amnhĩ xihtỳx. Kot puj mẽ pahtõ pahtyk kêt nê. ãm hãmri na pa mẽ amã ixkapêr. Anê.

³⁵ Hãmri nê mẽmoj py nê mẽ noo mã Tirtüm mã harê nê hkur o xa

³⁶ nhũm mẽ ja hã omunh xà hkõt akupỳm tãm hamaxpêr o mõi. Hãmri nê amnhĩm mẽõ hkwỳ jamỳ nê kumẽ kuku.

³⁷ Pàr kãm mẽ inhmõi xwỳnhjaja na pa prem ixpê 276.

³⁸ Tã pa mẽ ra ixàpkur pa. Hãmri nê pàr kaxkrit kaxyw mẽ apkur xà hã mẽmoj y jakrêxja gõx kãm hkapĩr pa.

Pàr mẽ kêp pikrakrak ã harênh

³⁹ Tã nhũm ra myt kator mex nê nhũm mẽ amnhĩ kukamã gõ hipòk pumu nê axpên mã:

—Kwa nhỹ pika na mũj wehe? Anê.

Hãmri nê nhỹri hakàx ã amnhĩm nõi xà mex pumu nê hwỳr pàr o mõi kaxyw hã axpên ma.

⁴⁰ Hãmri nê kaxyw pàr o htỳx xà jakà nhũm axrê nê gõx kãm rôròk pa. Nê pĩ ho pàr o juk xà nhõ xê xàja nhũm mẽ mãânên krãhta. Hãmri nê akupỳm mrar xà hã kupêxê nhõ nhũm kòk ho hikot nê ma gõ jakàx wỳr o mõi.

⁴¹ Nom nhũm pàr kormã hakàx pê awry hã mõi ri amnhĩ to kokwe kura nê pyka nhĩmòk ã nõ nhũm mẽ tee ri kot hkaxàr nê akupỳm gõ xupỳm mã mẽnh kaxyw. Nom nhũm gõ kot pàr nhĩxò htak tỳx kurê nhũm mẽ ixpê pikrakrak par o mõi.

⁴² Jakamã nhũm pòristijaja tee ri omu hãmri nê ra mẽ kêp prêsjê nhĩmex kaxyw. Mẽ kot gõx kãm rôròk nê gõ hipòk wỳr hpa ho nana nê mẽ kêp pikunor pymaj kot mẽ himex kaxyw.

⁴³ Nom nhũm mẽ hkrãhtũmja kãm Pawre pĩr prãm kêt jakamã ja nê mẽ hkurê nê mẽ inhmã:

—E mẽ ate apa ho gô rēnh mex xwýnhjaja. Akumrēx mra nē mrō nē ho nana ho mra nē rē.

⁴⁴ No mẽ ate apa ho nana punuj xwýnhjaja kêr ka mẽ tapti rý pàr kukrēx ò mý nē hã ajēt nē hã ma mōn rē. Anē.

Hāmri pa mẽ ã amnhĩ nhĩpêx anē nē xpiitã ixkà hkĩnh pê ixrêr pa.

28

Gô hipôk pê Maw kamã mẽ pa hã mẽ harēnh

Makre 16.17-18

¹ Tã pa mẽ xpiitã ixkà hkĩnh pê ixrêr pa. Nhũm gô hipôk ã mẽ pa xwýnhjaja mẽ inhmã gô hipôk nhĩxi jarē nhũm xep kêp Maw.

² Nhũm Maw nhõ xwýnhjaja mẽ ixto mex nē. Nhũm axte na wrýk rax nē nhũm kry htýx kumrēx nhũm mẽ ixkamã ukaprĩ nē mẽ inhmã kuto nē mẽ inhmã kapêr mex nē.

³ Hāmri nhũm Pawre kuwy kaxyw ri pĩ kawrà ho mra nē kuwy hwýr o tē nē hã haxwýr o xa. Hāmri nhũm kagã xoprê ò wēnēn xihtýxja kuwy kagro pymaj pĩ rũm kato nē ìhkra hã kunha nē hã àpêr o ajēt.

⁴⁻⁵ Hāmri nhũm Pawre omu nē amnhĩ nē ho apē nē kuwy kamã kumē nhũm kamã tēm nē xēt pa. Hāmri nhũm gô hipôk nhõ xwýnhjaja tee ri ja hã omu nē axpēn mã:

—Kwa ga mẽmyti mũj pumu. Mãn kêp mẽ hpar o pa xwýnh na. Hã na kagã ò wēnēn xihtýxta kunha. Nà koja ty nē rĩ amnhĩ pumu. Ra hkà hkĩnh pê gô rũm mẽ pahwýr rêr tã koja tã ty kãm ga. Anē.

⁶ Hāmri nhũm mẽ tee ri kot tanhmã amnhĩ to hã hkamnhĩx nē hamãr o kuhê. à htýx nē ìhkra hikot rý htyk kurê kumrēx ã hkamnhĩx tã nhũm tanhmã amnhĩ kamã hamak to hkêt nē. Âm htýx ri hkĩnh nē kapêr nē hpikunhar o ri mra. Hāmri nhũm mẽ tee ri omu nē axpēn mã:

—Kwa tanhmã kot amnhĩ tore hã. Kêp mẽ hpar o pa xwýnh kêt. Mãn kêp kaxkwa kamã mẽpahpãmjê hõ nà? Hã na kagã kunha nhũm tanhĩ to hkêt nē. Anē.

⁷ Nhũm gô hipôk ã mẽ ò pahihtĩ pê Pup-tija. Òrkwý hã jawý jakamã nhũm amnhĩ kôt mẽ ixwý pa mẽ ma hkôt mō nē kuri hkôt ixpa ho ixtã apkati axkrunēpxi nhũm mẽ ixto mex nē.

⁸ Nhũm ra Pupti nhĩpêêxà kêp à nē nō. Kà kagro htýx nē haòk. Hāmri nhũm Pawre hwýr tē nē omu nē hã ìhkra xi nē ho Tĩrtũm wý nhũm akupým ho mex kurê kumrēx.

⁹ Hāmri nhũm gô hipôk nhõ xwýnhja harēnh ma nē Pawre hwýr mẽ à xwýnh piitã o mra nhũm mẽ omu nē Tĩrtũm nhỹ hã akupým mẽ ho mex pa.

¹⁰⁻¹¹ Hāmri nhũm gô hipôk nhõ xwýnhjaja mẽ ixto mex rax nē.

Pawre axte Rõm wýr nojarêt ã harēnh

Rõmãn 1.10-12, 15.30-32

Tã pa mẽ gô hipôta kamã ixpa hã mytwrý axkrunēpxi. Hāmri nhũm kôk xàpêr týxta hapêx pa mẽ axte inhnojarêt nē ma mō. Pàr ò kamã hpãnhã mō. Aresãnrir rũm pàrja pa mẽ hpãnhã kamã mō. Mē kot kãm “sãnti pihpo” anhýr xwýnhhta kamã. Na pre gô hipôk kamã haxwýja kôk xàpêr týx hapêx jamãr xa hã hikwý htã ra axte nojarêt. Hāmri nhũm gô hipôk nhõ xwýnhja ma mẽ inhmōr xà hã mẽ inhmã mẽ ixàpkur xà hkwy nhõr rax nē. Hāmri pa mẽ pàr wýr inhgìx pa nē ma kamã mō.

¹² Mōõ nē Sirakus wýr pøj nē hã pàr xi. Hāmri nē krĩja kamã mẽ ixtã apkati axkrunēpxi nē axte mō.

¹³ Mōõ hāmri nē Rekre hwýr pøj nē hã pàr xi. Hāmri nē kamã mẽ ixtã apkati. Nhũm ra kahpa hkôt kôkja kawax pê àpêr mex jakamã pa mẽ ma hkôt mō. Nē mẽ ixtã apkati axkrut nē Potew wýr pøj nē hã pàr xi.

¹⁴ Hāmri nē pàr rũm ijapøj nē krĩ kamã Jejus kôt mẽ ixtõ nē htõx kwýjê pumu nhũm mẽ amnhĩ wýr mẽ ixwý. Pa mẽ ma mẽ hkôt mra nē mẽ hkôt ri ixpa hã ixtã ù semãn. Hāmri nē ma Rõm wýr hpãnhã ixpar o mō.

¹⁵ Hāmri nē kormã amým inhmōr ri nhũm Rõm kãm Jejus kôt mẽ ixtõ nē ixtõxjaja mẽ ijarēnh ma nē man mẽ ixkutã mra. Ma krĩ pê Prasxi Apja mẽ “Wēn Pijakrunēpxi” anhýr xwýnh jarēnhja wa hwýr mẽ ixkutã mra. Hāmri pa mẽ axpēn kaxpa nhũm Pawre mẽ omu nē hkĩnh nē. Nē mẽ hã Tĩrtũm mã amnhĩ jarē nē kãm:

—Pa Tĩrtũm? Nà âm hāmri na ka mẽ ixkutã jajê rē. Na pa mẽ omu nē ixkĩnh nē. Nà amex o amex Tĩrtũm. Anē.

16 Hāmri pa mẽ ma mẽ hkôt Rôm wÿr mō nē pōj. Jatā Itar kām Rôm wÿr pōj. Hāmri nhūm pōristi krāhtūm Pawre mǎ:

—E kot paj mẽ hagjēnh xà kamā ajaxàr kêt nē. Kot kaj amā nhÿri ixkre kamā apa hprām nē mamrī kamā apa. Nom koja pōristi hō akôt pa ho pa.

Anhÿr jakamā nhūm nhÿri ixkre kamā pahшти Sesti kot mar kaxyw kamā hamak o pa.

Pawre kot Rôm kamā tanhmā amnhī nhÿpēx to hā harēnh

Atre 17.5-6

17 Tā nhūm Pawre Rôm kamā hā apkati axkrunēpxi nē amnhī wÿr Ijaew xàptàr tūmrejē hwÿ nhūm mẽ hā akuprō nhūm mẽ kām amnhī jarē nē mẽ kām:

—E ixkwÿjaja. Pa mẽ amā amnhī jarē ka mẽ inhma. Nà na pa pre mẽ panhīgētjē kapēr nhÿrōp tanhmā ixām to hkêt nē rÿ ixte tanhmā mẽ pahkwÿjē hō hto hkêt tā nhūm mẽ pahkwÿjaja amarī ixpynē. Jeru-jarē kamā ixpynē nē Rôm nhō xwÿnhjē nhÿhkram ijaxà.

18 Hāmri nhūm mẽ ixte amnhī nhÿpēx ā ixkukja nē tee ri mẽ kot mẽmoj mÿrapē ixpÿr kaxyw tanhmā ixkukjēr to kaprÿ. Jakamā nhūm mẽ kām ixkator prām nē.

19 Nom nhūm mẽ pahkwÿjaja kām ja mex kêt jakamā pa pre jar pahì maati Sesti kot ixte kām amnhī jarēnh ā inhmar kaxyw amnhīm harē nē man hwÿr mō. Kot paj tanhmā kām mẽ pahkwÿjē ho ixkapēr punuj to hkêt nē. Ām ixte amnhī tā tanhmā mar to hpix kaxyw na pa hwÿr mō.

20 —Tā pa amnhī wÿr mẽ awÿ. Ixte mẽ amā amnhī jarēnh kaxyw. Mē pahkaprī xwÿnhhta. Mē pahte kormā kamā pajamak o papa xwÿnh Jejusta. Ām ixte amnhī kaxyw hkôt ijamaxpēr pix mÿrapē na prem ā kàx o ixkaxpre anē. Anē.

21 Hāmri nhūm mẽ kuma nē kām:

—Nà jar tanhmā ajarēnh kute hkêt. Na pre Jutej kamā mẽ pahkwÿjaja tanhmā ajarēnh to hā kagà nē mẽ ixwÿr mēnh kêt nē. Nē ham mẽ kurūm mẽ hpōx xwÿnhjaja na prem tanhmā mẽ inhma ajarēnh to hkêt nē.

22 No na xep hte pyka piitā hkôt mẽ kām mẽ ate Jejus kôt amnhī xunhwÿr xwÿnhjē

kurē nē. Na pa pre mẽ ajarēnh ma nē mẽ inhma axujarēnh mar prām nē. Anē.

23 Hāmri nhūm mẽ kot mar kaxyw arĭgro hta.

Tā nhūm mẽ kot arĭgro hyr kato nhūm mẽ Pawre nhōrkwÿ hwÿr pikuprōnh rax nē nhūm mẽ kām awjarē. Mē kām ujarēnh ry nē. Nē ho kamàt. Nē mẽ kām:

—Nà mẽ pahte amnhī wÿr kamā pajamak o papa xwÿnh Jejusja. Kot kaj mẽ atō amnhī kaxyw hkôt ajamaxpēr nē hkôt amnhī xām nhūm Tĭrtūm ja hā apumu nē ato hkra. Anē.

Nhūm pre ā mẽ kām kapēr anē. Nē finat Mojes kot Tĭrtūm nhÿ hā Jejus kukamā tanhmā hā kagà htoja nhūm mẽ kām harē. Nē Tĭrtūm nhÿ hā kapēr jarēnh o mẽ pa xwÿnhjaja kot tanhmā hā kagà htoja nhūm mẽ kām harē.

24 Hāmri nhūm mẽ hkwyjaja kuma nē hkôt hamaxpēr nē amnhī kaxyw Jejus kôt hamaxpēr nē hkôt amnhī xunhwÿ. No nhūm mẽ hkwyjaja kuma nē ām kuma nē kām axte mar prām kêt nē.

25-29 Jakamā kànhmā kuhē nē nojarēt nhūm Pawre mẽ kām:

—Nà amnepēm na pre Tĭrtūm finat Ijaisti mǎ tanhmā kapēr to. ŷ hā kot mẽ panhīgētjē mǎ tanhmā kapēr jarēnh to kaxyw. Tĭrtūm Karō nhÿ hā kot mẽ kām kapēr nē tanhmā mẽ harēnh to kaxyw. Te Tĭrtūm tām mẽ kām kapēr pyrāk mẽ kām kapēr. Nē ām hāmri tanhmā mẽ pahkwÿjē jarēnh to. Na pre mẽ kām:

E Ijaisti. Kēr ka ma akwÿjē hkôt ri mẽ kām tanhmā ixkapēr jarēnh to ho ri apa.

Nē mẽ kām: “Kot kaj mẽ ajamak o axumar tÿx tā aprĭ hā ixkapēr mar kêt nē.

Nē mẽ ano ho arĭt tÿx tā aprĭ hā ixte amnhī nhÿpēx ā ixpumunh kêt nē.

Mē amā ixkapēr mar prām kêt jakamā te mẽ ate mar pymaj amnhī jamak pro pyrāk o amnhī nhÿpēx o ri apa.

Nē mẽ amā ixte amnhī nhÿpēx ā ixpumunh prām kêt jakamā te mẽ ate ixte amnhī nhÿpēx ā ixpumunh pymaj te mẽ anomhōt pyrāk o amnhī nhÿpēx o ri apa.

Ja o amnhī kaxyw ixkôt ajamaxpēr kêt nē.

Kop mẽ amā ixkapēr mar prām ronhÿx ka mẽ aprĭ hā inhmar tÿx nē.

Ně aprĩ hã ixte amnhĩ nhĩpêx ã ixpumunh
mex nẽ.

Jaο amnhĩ tomnuj kaga hpa nẽ ixkõt amnhĩ
xunhwỳ.

Pa ja hã mẽ apumu nẽ mẽ ato mex nẽ.

Tã ka mẽ ã amnhĩ nhĩpêx anhỹr kêt nẽ.”

Anhỹr o kër ka mẽ kãm ixkapër
jarënh o ri mẽ hkõt apa Ijaisti. Anẽ.

Na pre ã Tĩrtũm mẽ panhĩgêtjê kaxyw
Ijaisti mã kapër anẽ nhũm ô ri mẽ kãm
ujarënh o pa nẽ mẽ pamã hã kagà. Jakamã
kwa mẽ okora. Kër ka mẽ jajê pyrà
nẽ ã amnhĩ nhĩpêx anhỹr hkêt nẽ. Kwa
mẽ inhma nẽ inhmar tỳx nẽ. Ijaew kêt
xwỳnhjaja kot kapër marja na ra Tĩrtũm
kãm hprãm nẽ. Jakamã koja mẽ hwỳr mẽ
kot kapër jarënh o mẽ pa xwỳnh kwỳjê rẽ
nhũm mẽ hkõt mẽ kãm ujarënh o pa nhũm
mẽ kuma nẽ mẽ akurom kãm mar prãm nẽ.
Anẽ.

Hãmri nhũm mẽ kuma nẽ hapôx pa nẽ ma
akupỹm axpën mã tanhmã kapër jarënh to
ho mra.

³⁰ Hãmri nhũm pahi maati Sesti tokyx
amnhĩ wỳr Pawre hwỳ nẽ tanhmã mar to
hkêt nhũm òrkwỹ kamã kęp prês nẽ pa ho
hã amgrà axkrut. Nẽ tãm òrkwỹ pãnhã mẽ
kãm amnhĩre. Nhũm pre krĩ nhõ xwỳnhjaja
ohtô nẽ hwỳr mra nhũm amnhĩ wỳr mẽ
omu nẽ hkĩnh nẽ.

³¹ Na pre hte amnhĩ wỳr mẽ kuwỳ nẽ
mẽ kãm Tĩrtũm kapër jarënh o hkrĩ. Mẽ
kot Tĩrtũm Kra Pahihti Jejus Kris kõt amnhĩ
xunhwỳr nhũm Tĩrtũm kot ja hã mẽ omunh
nẽ amnhĩ katut kõt mẽ kot amnhĩ tomnuj
rënh par nẽ mẽ ho hkra hã mẽ kãm ujarënh
o hkrĩ. Nẽ mẽ kot hkõt amnhĩ xunhwỳr
xwỳnhjê jahkre. Tanhmã mẽ kot Jejus kõt
amnhĩ nhĩpêx mex to ho pa hã mẽ kãm karõ
ho hkrĩ. Hãmri nhũm mẽhõ ja nẽ tanhmã
kãm kapër to hkêt nẽ.

Tã ãm ja pix Teopre. Ixpê Rukre na pa
awỳr kagàja nhĩpêx nẽ kumẽ. Nẽ kamã amã
tanhmã mẽ pahkwỳjê jarënh to. Tã ãm ja
pix na hapêx.

Rômân Pawre kot Rôm kãm Jejus kôt hkwÿjê hwÿr kagà nê mênh

Kagà ja na pre Pawre hipêx. Kêp Jejus nhÿ hã mē ahkre ho pa xwÿnh na pre. Na pre hte mry kà ho ixkre nhÿpêx nê mē kãm ho wênê ho mē hkôt pa pē mē piitã mē kãm Tirtûm kapêr jarênh o pa. Tã krÿ pē Rôm kamã mē kot Jejus kôt amnhÿ xunhwÿr xwÿnhjê hwÿr kagàja nhÿpêx nê mē hwÿr kumê. Kormã ma mē hwÿr môr nê mē omunh kêt ri.

Nê Jejus kêp Tirtûm mã tanhmã mē pa-jarênh to xwÿnh ã nhÿm pre mē kãm harê nê hã kagà. Jejus kot mē pahte amnhÿ tomnuj pãnhã mē panê htyk jakamã na hte Tirtûm mē pahte hkôt amnhÿ xunhwÿr ã mē pahpumu nê Jejus kukwak ri mē pahte amnhÿ to mex xwÿnh ã mē pajarê.

Nê Tirtûm Karô nhÿ hã mē kot amnhÿ nhÿpêx nyw nê hamaxpêr nyw o pa hã nhÿm Pawre mē kãm karô nê hã kagà. ã na pre mē kãm mēmoj jarê nê hã kagà anê. Nê hã kagà ho:

¹ Pa Rôm nhô xwÿnhjaja? Xà mē amex? E ot pa mē awÿr kagà nhÿpêx nê kumê. Tirtûm na pre mē akaxyw ixãm. Ixte mē amã Jejus kot tanhmã mē panê amnhÿ nhÿpêx to hã harênh o ri ixpa kaxyw. Na pre ixpê Pawre hã ixpumu nê ixãm. Jakamã na pa ã mē awÿr kagà nhÿpêx nê mênh anê. Ixte Jejus nhÿ hã mē ahkre ho ri ixpa xwÿnh na pa. Na pa hte kãm tanhmã amnhÿ nhÿpêx to ho ri ixpa. Tã ã mē awÿr kagà nhÿpêx nê mênh anê.

² Amnepê m na pre Tirtûm nhÿ hã kapêr jarênh o ri mē pa xwÿnhjaja mē pakukamã mē panhÿgêjtê mã Jejus kukamã tanhmã harênh to ho ri pa. Nê mē kãm kapêr jarênh o mē hkôt pa nê mē kãm:

—Koja nhÿrmã Tirtûm mē pahpiitã mē panê tanhmã kot amnhÿ nhÿpêx to mã xwÿnh mē nhÿm mē hpiitã hprÿ hã harênh ma nê omu. Anê.

Nhÿm prem ã Jejus kukamã mē kãm harênh anhÿr o ri mē hkôt pa. Tirtûm kapêr

ã kagà htûm kamã harênh xà hkôt tanhmã mē kãm harênh to.

³ Tirtûm Kra Jejus Krisja na pre mē kãm harênh o ri mē hkôt pa. Mē panhõ Pahiht na. Kêp Tirtûm Kra htã na pre mē pahpyrà nê ï ho amnhÿ nhÿpêx nê wrÿ nê katorxà nhôxà hkre rûm kato. Jakamã kêp Tirtûm Kra pix kêt mãânên katorxà hkôt kêp higêt Tawi hkanrêhã htãmnhwÿ.

⁴ Kêp Tirtûm Kra htã nhÿm prem axtem nê tanhmã hamaxpêr to nê kupÿ. Nom nhÿm Tirtûm kêp amnhÿ Kra hã akupÿm ho htÿr. Jakamã na pu htem harênh ma nê kãm pajamaxpêr o:

—Jesús kêp Tirtûm Kraa. Mē kot kêp hpÿr tã nhÿm akupÿm ho htÿr. Jakamã nhÿm Tirtûm pyrã nê hihtÿx o hihtÿx. Anê.

⁵ Tã ã Tirtûm kot Kra nhÿpêx anhÿrja ri na mãânên pa ixto mex nê mē akaxyw ixãm. Jakamã na pa hte ma krÿ piitã hkôt mē kãm tanhmã Jejus Kris jarênh to ho ri mē hkôt ixpa. Ijaew mã nê Ijaew kêt xwÿnhjê mã. Mē kot harênh mar nê amnhÿ kaxyw kãm hamaxpêr nê kapêr kôt pix mã amnhÿ nhÿpêx mex kaxyw.

⁶⁻⁷ Nê mē apê Rôm nhô xwÿnhjaja. Na ka prem Jejus kôt amnhÿ xunhwÿ nhÿm Tirtûm ja hã mē apumu nê mē ato hkra nê mē apê Jejus mē wa hkwÿ hã mē ajarê. Mē ate hkôt amnhÿ nhÿpêx kaxyw nhÿm pre ã mē ajarênh anê.

Tã ot pa kagà nhÿpêx nê mē awÿr mênh kaxyw. Tirtûm kot mē ato hkra xwÿnhjê hwÿr. Tirtûm kãm mē ajapêê.

Na pa hte mē ato mē panhÿpêxã maati Tirtûm mē Pahiht Jejus Kris wa hwÿr rãhã ri ixpa. Nê mē ato wa hwÿr o:

—Kwa kêr ka wa Rôm kamã war akrajê pumunh mex nê mē kutã anojarêr rãhã nê. Kê mē hamakêtkati nê amnhÿx ri tanhmã amnhÿ nhÿpêx to ho ri pa. Anê.

*Pawre kot Rôm nhô xwÿnhjê pumunh
prãm ã amnhÿ jarênh*

Atre 28.15-16; Rômân 15.22-29

⁸ Nê na ka prem amnhÿ kaxyw Jejus Kris mã ajamaxpêr nê hkôt amnhÿ xunhwÿ nhÿm krÿ piitã hkôt mē pa xwÿnhjaja mē ajarênh ma. Nê mē ate amnhÿ nhÿpêx nyw ã mē ajarênh ma nê axpên mã tanhmã mē ajarênh to ho pa. Nê mē ajarênh o:

—Kwa na xep Rôm kãm mẽ hkwỳjaja amnhĩ kaxyw Jejus mã hamaxpēr tỳx nẽ. Nẽ hkôt amnhĩ nhĩpêx mex rãhã ho ri pa. Anẽ.

Pa ã mẽ kot mẽ ajarēnh anhỹrja ma nẽ ixkĩnh tỳx nẽ. Nẽ Tĩrtũm mã mẽ anhỹ hã ixkĩnh ã amnhĩ jarēnh o ri ixpa.

⁹ Na pa hte mẽ ato hwỳr rãhã ho ri ixpa. Nẽ nhỹri mẽ kãm Tĩrtũm Kra Jejus kapēr jarēnh o ri ixpa nẽ mẽ amã ijamaxpēr nẽ mẽ ato kuwỳ. Nẽ tanhmã Tĩrtũm mã amnhĩ nhĩpêx to ho ixpa pẽ mẽ amã ijamaxpēr nẽ mẽ ato kuwỳ. Tĩrtũm kot ja hã ixpumunh mex.

¹⁰ Na pa hte tanhmã kãm amnhĩ jarēnh to kaxyw nẽ mẽ akaxyw amnhĩ to kuma nẽ kãm:

—Pa Tĩrtũm? Na pa ra inhmã ma Rôm wỳr inhmōr nẽ kamã akôt ixkwỳjê pumunh prãm tỳx kumrêx. Xà kot ka tokyx mẽ hwỳr inhmẽ nà? Anẽ.

¹¹ Na pa ra inhmã mẽ awỳr inhmōr prãm tỳx nẽ. Na pre Tĩrtũm Karō tanhmã ixkrã hto pa ý hã kapēr ã kagà mar tỳx nẽ. Nẽ hkôt mẽmoj mex pumunh rax nẽ. Tã ra inhmã ma mẽ awỳr inhmōr nẽ amnhĩ xô ri mẽ amã harēnh prãm nẽ. Mẽ ate inhmar nẽ aprĩ hã Jejus Kris kôt amnhĩ xunhwỳr tỳx nẽ hkôt amnhĩ nhĩpêx mex rãhã ho ri apa kaxyw.

¹² Kot paj nhỹrmã ma mẽ awỳr mō. Nẽ mẽ awỳr pōj pu mẽ axpēn pumu nẽ pahkĩnh nẽ. Mẽ pahte amnhĩ kaxyw Jejus Kris mã pajamaxpēr mex o papa hã axpēn pumu nẽ pahkĩnh nẽ. Nẽ mẽ pahpiitã hkôt amnhĩ nhĩpêx mex o ri papa.

¹³ E ixkwỳjaja. Xatã ixte mẽ awỳr ixkrã htã nhũm mẽmoj xatã tanhmã ixpê àmtàr to pa kormã jar ixpa. Nom kot paj nhỹrmã ma mẽ awỳr mō. Mẽ ate ja hã inhmar kaxyw na pa ã Tĩrtũm noo mã mẽ amã amnhĩ jarēnh anẽ. Na pa pre krĩ hkwỳ kamã mẽ apê Ijaew kêt xwỳnh kwỳjê hwỳr ixpa. Nẽ mẽ kãm Jejus kot mẽ panê tanhmã amnhĩ nhĩpêx to hã harēnh o ri mẽ hkôt ixpa. Nhũm mẽ hkwỳjaja inhma nẽ hkôt amnhĩ xunhwỳ. Ja kaxyw na pa inhmã ma mẽ anhō krĩ hwỳr inhmōr prãm nẽ. Mẽ akwỳjaja kot ixkapēr mar nẽ mẽ apyrã nẽ Jejus kôt amnhĩ xunhwỳr kaxyw.

¹⁴ Na pre ra Tĩrtũm ixte kapēr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwỳnhjê kaxyw. Mẽ kãm ma ho mẽ pa xwỳnhjê mẽ mẽ kãm ma hkêt o mẽ pa xwỳnhjê mã. Nẽ mẽ kot kagà pumunh xwỳnhjê mẽ mẽ kot kagà pumunh kêt xwỳnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harēnh o ri mẽ hkôt ixpa kaxyw.

¹⁵ Jakamã na pa ra inhmã mẽ apê Rôm nhō xwỳnhjê hwỳr inhmōr prãm nẽ. Ixte mẽ anhō krĩ kamã mẽ piitã mẽ kãm ja jarēnh o ri ixpa nhũm mẽ kot inhmar nẽ mẽ pahpyrà nẽ Jejus kôt amnhĩ xunhwỳr kaxyw.

*Jejus kot mẽ panê htyk ã harēnh
Sikũn Ximotre 1.6-12*

¹⁶ Nẽ Jejus kot mẽ panê htyk ã harēnhja ãm hãmri na. Harēnhja mex o mex. Na htem kuma nẽ kãm hamaxpēr nẽ amnhĩ kaxyw hkôt hamaxpēr nẽ hkôt amnhĩ xunhwỳ. Hãmri nhũm Tĩrtũm ja hã mẽ omu nẽ mẽ nẽ mẽ kot amnhĩ tomnuj o hapêx pa nẽ mẽ ho hkra. Nom mẽ ixpê Ijaew nhō xwỳnhjê pix kêt. Mããnēn mẽ apê Ijaew kêt xwỳnhjaja nhũm kãm mẽ pajapê ho axpēn pyràk. Jakamã na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu nẽ mẽ pahto hkra. Ja kaxyw àhpumunh tỳx o àhpumunh tỳx.

¹⁷ ãm mẽ kot amnhĩ kaxyw Jejus mã hamaxpēr xwỳnh pixjaja na hte mẽ ho hkra. Kapēr ã kagà htũm kot tanhmã ja jarēnh to nẽ harēnh kot:

Na hte Tĩrtũm mẽ kot amnhĩ kaxyw Kra mã hamaxpēr ã mẽ omunh xà hkôt mẽ ho hkra nhũm mẽ amnhĩ kaxyw kãm hamaxpēr rãhã ho pa. Jao ra ô ri tãm amnhĩ nhĩpêx o pa. Anẽ.

*Mẽ pahpiitã mẽ pahte amnhĩ tomnuj
xwỳnh ã mẽ pajarēnh
Atre 14.15, 17.22-29; Apokarip 9.20-21*

¹⁸ Nẽ mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harēnh to. Na htem Tĩrtũm kapēr ma nom amnhĩ tomnuj gryk ã ãm kuma. Nẽ mẽ hkwỳjaja kot kapēr mar pymaj kapēr ô ho

mê kêp àmnàr rãhã ho ri pa nhũm Tĩrtũm ja hã mẽ omu nhũm ja kêp omnuj nẽ.

¹⁹⁻²⁰ Te mẽ kot Tĩrtũm kot amnhĩ nhĩpêx ã omunh kêt pyrãk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrit mex. Pu mẽ pano ho omunh kêt tã no ãm kot amnhĩ nhĩpêx kôt ra kêp Tĩrtũm ã omunh mex nẽ. Nẽ kêp mẽmoj piitã ho kator xwýnh ã omunh mex nẽ. Nẽ mex o mex ã omu nẽ hihtýx o hihtýx hã omu. Tĩrtũm kot amnhĩ nhĩpêx kot amnhĩrit mex nhũm mẽ kot omunh mex tã hkôt amnhĩ xunhwýr kêt nẽ. Nẽ axtem nẽ hamaxpêr o:

–Tk. Tĩrtũm kot inhmã amnhĩ to amnhĩritre hã kot pa kêt ri hkôt amnhĩ nhĩpêx. Kot pa inhno ho omu nẽ rĩ kormã hkôt amnhĩ nhĩpêx japêr. Anẽ.

Ra mẽ kot amnhĩ nhĩpêx ã omunh mex tã ri ã hamaxpêr anẽ. Jakamã nhũm Tĩrtũm tee ri ja hã mẽ omu nhũm ja kêp omnuj týx nẽ.

²¹ Mẽ kot amnhĩ nhĩpêx ã omunh mex tã amnhĩ kaxyw tanhmã kãm hamaxpêr hto hkêt. Rý arĩ hamaxpêr japêr nẽ kãm:

–Nà Tĩrtũm. ãm hãmri amex kumrêx. ãm amex o amex. Apê Tĩrtũm ã ãm apixi mex kumrêx na ka. ãm hãmri na ka hte mẽ ixto mex o apa.

Anhýr o amnhĩ kaxyw kãm kapêr kêt nẽ. Nẽ ãm htýx tanhmã hamaxpêr punuj to pix o ri pa. Te kamãt kô kamã ri mẽ pa xwýnhjê kot amnhĩ nhĩpêx pyrã nẽ mẽmoj mex pumunh kêt nẽ.

²² Mẽ kot àhpumunh týx ã amnhĩ to jarkrar o ri pa htã no ãm te mẽ hkrã kanhĩn kêt nẽ mẽ hamaxpêr kêt pyrãk o amnhĩ nhĩpêx.

²³ Jakamã na htem amnhĩm mẽmo karõ nhĩpêx. Mẽmo htyk mã xwýnhjê hõ karõ nhĩpêx. Tanhmã panhĩ karõ rý mẽmo mry karõ rý mẽmo kuwênh karõ. Rý mẽmo kagã karõ nhĩpêx. Hãmri nẽ ho õ sãnti nẽ te ri ho Tĩrtũm nhĩpêx pyrãk o hipêx. Jao hpar pê hkõn krã ho rôrôk nẽ amnhĩ to kuwý nẽ kãm amnhĩ jagrer pê kãm mex o mex ã harẽ. Tĩrtũmja sãnti rom htĩr o htĩr tã nhũm mẽ axtem nẽ sãnti gryk ã hkaga nẽ ã amnhĩ nhĩpêx o pa anẽ.

²⁴ Jakamã nhũm tee ri ã mẽ kot amnhĩ nhĩpêx anhýr ã mẽ omu nẽ amnhĩ pyrã nẽ

mẽ hkaga nẽ ãm mẽ omu. Jakamã nhũm mẽ ãm amnhĩ krã hkôt tanhmã ri amnhĩ tomnuj to ho pa. Nẽ axpên kãm ri tanhmã hpijaàm kêt to. ã na htem htýx ri amnhĩ tomnuj anhýr o pa.

²⁵ Tĩrtũm kapêrja ãm hãmri htã nhũm mẽ axtem nẽ te amnhĩ pum rênh pyrãk o hipêx nẽ kãm hamaxpêr kêt nẽ. Nẽ hpãnhã ri mẽ hêx xwýnhjê kapêr pix ma nhũm ja te mẽ kãm mex pyrãk. Na htem ã amnhĩ nhĩpêx anẽ hãmri nẽ axtem nẽ Tĩrtũm kot mẽmoj nhĩpêx pix parpê rôrôk nẽ amnhĩm mex o mex ã harẽ. Nom kot hipêx xwýnh Tĩrtũm parpê mãn ã amnhĩ nhĩpêx anhýr kêt nẽ. Nom kot mẽmoj nhĩpêx xwýnhhta mex o mex jakamã koja mẽ kot hkôt amnhĩ nhĩpêx xwýnhjaja jajê rom kãm mex o mex ã harênh tũm rãhã ho ri pa.

²⁶ No mẽ kot amnhĩ tomnuj xwýnhjaja na hte Tĩrtũm amnhĩ pyrã nẽ mẽ hkaga nhũm mẽ htýx amnhĩ krã hkôt ri tanhmã amnhĩ tomnuj to ho ri pa. Jao mẽni hkwyjaja axtem nẽ axpên gryk ã mjên kaga nẽ axpên nhĩõ ho mjên.

²⁷ Nhũm mẽmy hkwyjaja mãänên axtem nẽ amnhĩ kwýjé my gryk ã hprõ kaga nẽ axpên nhĩõ ho hprõ. Na htem ã axpên kamã hpijaàm kêt o pa anẽ. Mýrapê koja mẽ à pix kãm amnhĩ xà htýx kamã hamak o pa.

²⁸ Na htem amnhĩ tomnuj gryk ã Tĩrtũm mã hamaxpêr kêt nhũm tee ri amnhĩ tã mẽ omu nẽ hamaxpêr o:

–Mẽ kãm amnhĩ tomnuj pix prãm jakamã kwãr mẽ mãmrĩ ã amnhĩ nhĩpêx anẽ. Kot paj axte ja nê tanhmã mẽ kãm ixkapêr to hkêt nẽ. Anẽ.

Jakamã nhũm mẽ arĩ htýx ri amnhĩ krã hkôt tanhmã amnhĩ tomnuj to ho ri pa rãhã nẽ.

²⁹ Hãmri nẽ mẽmoj punuj pix mã hamaxpêr.

Nẽ kãm amnhĩ mex pix prãm mã hamaxpêr.

Nẽ kãm axpên tomnuj pix prãm.

Nẽ mẽmoj tã axpên kãm gryk pix prãm.

Nẽ mẽ kãm axpên par pix prãm.

Nẽ mẽmoj tã ri kãm axpên mã àkjêr prãm.

Nẽ mẽmoj tã kãm axpên mã hêx prãm.

Nẽ kãm axpên kaxyw tanhmã hamaxpêr punuj to pix prãm.

Ně kãm tanhmã axpën to kapër punuj to pix prãm.

³⁰ Ně kãm mẽmoj tã axpën to hêx pix prãm.

Ně kãm Tirtũm prãm kêt o ri pa.

Ně mẽmoj tã axpën mã àkjêr o ri pa.

Ně mẽmoj tã amnhĩ to jarkrar rãhã ho ri pa.

Ně tanhmã amnhĩ tomnuj to pix kukamã hamaxpër. Nhũm mẽ katorxà nẽ mẽ hipêêxã tee ri ja nê tanhmã mẽ kãm kapër to no nhũm mẽ mar kêt kumrêx.

³¹ ã mẽ kot amnhĩ nhĩpêx anhÿr o ri mẽ pa xwÿnhjaja na hte Tirtũm kãm mẽmoj mex nhũm mẽ kêp omnuj nẽ nhũm Tirtũm kêp mẽmoj omnuj nhũm mẽ kãm mex nẽ. Nẽ axpën mã mẽmoj tanhmã ho hã amnhĩ jarênh tã ho anhÿr kêt nẽ. Nẽ axpën kãm ukapri ho ri pa hkêt nẽ.

³² Tirtũm kapër ã kagà htũm kot tanhmã mẽ hkukamã mẽ harênh to nẽ mẽ harênh kot: ã mẽ kot amnhĩ nhĩpêx anhÿr o ri mẽ pa xwÿnhjaja koja mẽ nhÿrmã ty hãmri nẽ amnhĩ xà htÿx kamã hamak rãhã ho ri pa ho pa. Anẽ.

Nhũm mẽ kot amnhĩ tã ja mar tÿx tã aa amnhĩ tomnuj kaga hkêt nẽ. Arĩ ã amnhĩ nhĩpêx anhÿr o pa rãhã nẽ. Nhũm mẽ hkwyjaja mẽ kot amnhĩ tomnuj ã mẽ omu nẽ mẽ uràk nẽ ã amnhĩ nhĩpêx anhÿr o ri mẽ hkôt pa nhũm mẽ amnhĩ pyrà nẽ mẽ omu nẽ hkĩnh nẽ. Na htem ã amnhĩ nhĩpêx anhÿrja gryk ã Tirtũm kaga nhũm tee ri amnhĩ tã mẽ omu nẽ amnhĩ pyrà nẽ mẽ hkaga nẽ ãm mẽ omu. Jakamã nhũm mẽ amnhĩ tomnuj tÿx pix rãhã ho pa.

2

Mẽ kot amnhĩ tomnuj xwÿnhjê hkukamã mẽ harênh

Matêwre 7.1-5; Sikũn Tesarõn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Nẽ kot ka mẽ atõ ã mẽ kot amnhĩ tomnuj anhÿr xwÿnhjê kot amnhĩ nhĩpêx ã mẽ harênh ma nẽ ã ajamaxpër anẽ nẽ ajamaxpër o:

–Tk. Mẽ kot amnhĩ tomnuj pix o ri pa xwÿnh kênã. No pa na ã ixte amnhĩ nhĩpêx anhÿr o ri ixpa hkêt. Mẽ kurom ixte tãm amnhĩ nhĩpêx o ri ixpa xwÿnh na pa.

Anhÿr o amnhĩ jarê. Kwa nà mẽ ã ajamaxpër anhÿr kêt nẽ. Mẽ pajaxwÿja na pu htem tõiã mẽ uràk nẽ tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harênh anẽ nẽ te ka ate amnhĩ jarênh pyrãk.

² Tirtũm kapër ã kagà htũm kot mẽ kot amnhĩ tomnuj o ri mẽ pa xwÿnhjê jarênh kot:

Mẽ kot amnhĩ tomnuj mÿrapê koja mẽ nhÿrmã amnhĩ xà htÿx kamã hamak rãhã ho ri pa. Anẽ.

ãm hãmri ã mẽ harênh kot anhÿr.

³ Mãn ka mẽ atõ tanhmã amnhĩ kukamã ajamaxpër to nẽ ajamaxpër o:

–Nà koja Tirtũm nhÿrmã amnhĩ nê kuwy hwÿr mẽ kot amnhĩ tomnuj xwÿnhjê rê. No pa koja hwÿr inhmênh kêt nẽ. Anẽ.

Kwa mẽ ã ajamaxpër anhÿr kêt nẽ. Kot ka mẽ ã amnhĩ kukamã ajamaxpër anhÿr tã tõiã mẽ uràk nẽ tanhmã amnhĩ tomnuj to. Jakamã koja Tirtũm mẽ uràk nẽ hã tanhmã mẽ ato.

⁴ Kot kaj mẽ atõ tanhmã amnhĩ tomnuj to hãmri nẽ ãm ja hã amnhĩ pumu nẽ ajamaxpër o:

–Ixte amnhĩ tomnuj xwÿnh tã na hte Tirtũm ja hã ixpumu nẽ ãm ixpumu nẽ hã tanhmã ixto hkêt nẽ. Kêp mẽ ixkamã ukapri xwÿnh jakamã na hte gryk tokyx anhÿr kêt nẽ. Jakamã kot paj arĩ tanhmã amnhĩ tomnuj to ho ri ixpa nẽ aa jam inhÿrer kêt nẽ. Tirtũm kot ja hã tanhmã ixtore kaxyw hã.

Anhÿr o ajamaxpër. No ãm ja kot anhÿr kêt. Na hte Tirtũm kormã amnhĩ tã mẽ pajamã. Mẽ pahte amnhĩ tomnuj kaga nẽ hpãnhã hkôt amnhĩ xunhwÿr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nẽ.

⁵ Mẽ akrã hihtÿx jakamã mẽ amã hkôt amnhĩ xunhwÿr prãm kêt. Na ka htem tanhmã amnhĩ tomnuj to pix kukamã ajamaxpër o ri apa. Nẽ gaa nẽ ra anhÿr kumrêx. Nhũm Tirtũm tee ri ja hã mẽ apumu nhũm ja kêp omnuj tÿx o mõi. Jakamã koja nhÿrmã tanhmã mẽ ajarênh to nẽ gryk tÿx kãm tanhmã mẽ atomnuj tÿx to. ãm hãmri na hte mẽ pahte amnhĩ nhĩpêx ã

mê pahpumunh xà hkôt ahpÿnhã tanhmã mê panhîpêx to.

⁶ Koja nhÿrmã mê pahpiitã kormã mê pahÿr ri mê pahte amnhî nhîpêx ã mê pahpumunh xà hkôt tanhmã mê panhîpêx to. Mê kot amnhî to mex o ri mê pa xwÿnhjaja nhÿm mê ho mex nê. Nê mê kot amnhî tomnuj o ri mê pa xwÿnhjaja nhÿm mê homnuj nê. Koja nhÿrmã mê pahpiitã mê pahto hpimràatã ã mê panhîpêx anê.

⁷ Mê kot hkôt tãm ri amnhî nhîpêx o pa pê kãm Tîrtûm kot amnhîm mê mex ã mê harênh prãm xwÿnhjaja koja nhÿrmã amnhîm mê mex ã mê harê. Hãmri nhÿm mê kuri htîr tûm nê hkînh nê mex kumrêx nê pa ho pa.

⁸ Nom mê kot amnhî mã pix mã ri hamaxpêr o ri mê pa xwÿnhjaja. Nê mê kot tanhmã amnhî tomnuj to gryk ã Tîrtûm kapêr kaga xwÿnhjaja koja kãm mê hkînh kêt nê tanhmã mê homnuj tÿx to.

⁹ Mê kot amnhî tomnuj xwÿnh piitã koja mê nhÿrmã amnhî xà htÿx kamã hamak rãhã nê pa ho pa. Ijaew kumrêxjaja nê hpãnhã Ijaew kêt xwÿnhjaja nhÿm mê amnhî xà htÿx kamã hamak rãhã nê pa ho pa. Mê kot amnhî tomnuj tÿx o paja mÿrapê.

¹⁰ No kêt tãm mê kot amnhî nhîpêx xwÿnhjaja koja Tîrtûm mê ho mex rax rãhã ho pa ho pa. Nê amnhîm mê kot amnhî to mex xwÿnhjê hã mê harê. Nê tanhmã mê ho mex to nhÿm mê kamã amnhî krit nê pa ho pa. Hamakêtkati nê hkînh nê àmnhîx ri pa ho pa. Ijaew kwÿ kumrêxjaja nê mãânên Ijaew kêt xwÿnh kwÿjaja nhÿm mê mex nê hamakêtkati nê hkînh nê àmnhîx ri pa ho pa.

¹¹ Koja Tîrtûm nhÿrmã ahpÿnhã mê pahte amnhî nhîpêx ã mê pahpumunh xà hkôt tanhmã mê pajarênh to pê tanhmã mê panhîpêx to. Mê ixpê Ijaewjaja nê mê apê Ijaew kêt xwÿnhjaja nhÿm ã mê pahpiitã mê panhîpêx anê.

¹² Amnepêm na pre finat Mojes mã tanhmã kapêr to nhÿm kuma nê ô ri hã kagã hpa. Mê ixpê Ijaew ri na kapêr ã kagãja. Ra mê ixte mar tÿx jakamã koja mê ixtô ra kapêr mar tÿx tã hkôt amnhî nhîpêx kêt hãmri nhÿm Tîrtûm tee ri amnhî tã omu nê ã amnhî nhîpêx anhÿrja mÿrapê nhÿrmã ma mê kot amnhî xà htÿx kamã hamak tûm

xàta wÿr kumê. Kot kapêr mar tÿx tã hkôt amnhî nhîpêx kêt mÿrapê nhÿm ã hipêx anê. No kêt mê apê Ijaew kêt xwÿnhjaja mê ixkînhã mê ari Tîrtûm kapêr ã kagã hkêt jakamã koja mê ate kapêr nhîrôp mê akuhê hã mê apumunh kôt tanhmã mê anhîpêx to hkêt nê. Koja hpãnhã mê ate tanhmã amnhî tomnuj to ho apa mÿrapê mê kot amnhî xà htÿx kamã hamak o pa tûm xàta wÿr mê arê.

¹³ Na hte mê kot kapêr mar ã mê omunh xà hkôt amnhîm mê kot amnhî to mex xwÿnh ã mê harênh kêt nê. Âm mê kot kapêr kôt amnhî nhîpêx ã mê omunh xà hkôt pix mã na hte amnhîm mê kot amnhî to mex xwÿnh ã mê harê.

¹⁴ No mê hkwyjaja kormã kot kapêr mar kêt tã te ra mê kot mar mex pyrãk o amnhî nhîpêx. Jao amnhî krã hkôt tãm ri amnhî nhîpêx kurê kumrêx. Te kot Ijaew pyrã nê Tîrtûm kapêr mar tÿx nê hkôt amnhî nhîpêx o ri pata pyrãk.

¹⁵ Na htem amnhî krã hkôt tanhmã amnhî nhîpêx mex to. Te Tîrtûm kapêr kot mê hkrãm gjêx pyrãk o amnhî nhîpêx o pa. Jakamã tee ri tanhmã amnhî tomnuj to hã amnhî pumu nê hkaprî nê. Nê tãm amnhî nhîpêx ã amnhî pumu nê hkînh nê.

¹⁶ Tã koja nhÿrmã Tîrtûm Jejus Kris mã anê nhÿm kuma hãmri nê mê piitã kormã mê htîr ri tanhmã mê kot amnhî nhîpêx to hã mê omunh xà hkôt tanhmã mê harênh to. Nê mê hamaxpêr kêt mê omunh mex xà hkôt tanhmã mê harênh to. Mê papa-jaja mê pahte axpên jamaxpêr kôt axpên pumunh kêt tã Jejus kot mê pajamaxpêr kôt mê pahpumunh par.

Tã na pa hte mê kãm Jejus kot tanhmã amnhî nhîpêx to hã harênh o ixpa pê ã mê kãm ixujarênh anhÿr o ri ixpa.

*Pawre kot hkwyjê mã kapêr
Rômân 3.19-20*

¹⁷ Nê ixpyrà nê mê apê Ijaew kwÿjaja na ka mê axtem nê Ijaew kêt xwÿnhjê mã tanhmã amnhî to jarkrar o ri apa nê mê kãm:

—Nà mê ixpê Ijaew ri Tîrtûm kapêr ã kagã jakamã âm mê papxipixjaja na hte Tîrtûm amnhîm mê inhmex ã mê ijarê. Nê âm mê papxipixjaja na hte mê ixto hkra.

18 Nē mẽ papxipixjaja na mẽ ixte Tĩrtũm kām hprām xà hkôt mẽmoj pumunh par nē mẽ kot amnhĩ to mex xà pumunh par nē mẽ kot amnhĩ tomnuj xà pumunh par. Mẽ apê Ijaew kêt xwỳnhjê rom mẽ ixte mẽmoj piitā omunh par kumrêx. Anẽ.

19-20 Nẽ amnhĩ jarênh o:

—Nà te mẽ ixpê mẽ nohkre xwỳnhjê pa hã mẽ hamỳnh nê ri mẽ ho ixpa xwỳnh pyrāk. Jakamā Ijaew kêt xwỳnh pê htỳx ri mẽ pa xwỳnhjaja na pa htem mẽ kām Tĩrtũm kapêr tũm o mẽ ahkre mex o ri ixpa. Kormā mẽ kot hprĩ hã mar kêt jakamā na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kênā.

21 Anhỹr ã amnhĩ jarênh nê mẽ ate kapêr o mẽ ahkre ho apa htã hkôt amnhĩ nhĩpêx kêt nê.

Nẽ mẽ ate mẽ kot axpên pê àhkĩnh nê mẽ hkurê htã no ãm mẽ kamjaja axpên pê axàhkĩnh o ri apa.

22 Nẽ mẽ amā sãnti hkĩnh kêt ã amnhĩ jarênh tã axtem nê hwỳr agjê nê hpar pê kàxpore nhĩkwỳ xwỳnh o axàhkĩnh o ri apa.

Nẽ mẽ kot axpên prõ ho amnhĩkati nê mẽ hkurê ho apa htã mẽ kamjaja ã ri amnhĩ nhĩpêx anhỹr o ri apa.

23 Nẽ mẽ ate Tĩrtũm kapêr ã kagà mex o mex ã harênh tã hkôt amnhĩ nhĩpêx hkêt nê. Jakamā nhũm mẽ akwỳjaja ja hã mẽ apumu nê mẽ apyrà nê Tĩrtũm ã hpijaàm kêt o pa.

24 Tĩrtũm kapêr ã kagà htũm kot tanhmā mẽ ate amnhĩ nhĩpêx ã mẽ ajarênh to nê mẽ ajarênh kot:

Mẽ kêp Ijaew kêt xwỳnhjaja na htem Ijaew kot htỳx ri amnhĩ nhĩpêx o ri mẽ pa hã mẽ omu nê mẽ ý hã tanhmā Tĩrtũm o kapêr punuj to ho ri pa. Anẽ.

25 Mẽ pahpê Ijaew na pu htem mẽ pahkrajaja mẽ hapôx kôt kormā mẽ hkryre ri pu htem mẽ kêp mẽmy kwryt kà jakà. Finat Mojes kot Tĩrtũm nhỹ hã mẽ panhĩgêjtjê mã hã karõ xà hkôt na pu htem ã mẽ hipêx anẽ. Mẽ pahte Tĩrtũm mã mẽ pahkrajê nhõr ã amnhĩ to amnhĩrit kaxyw. Jakamā na pu htem arĩ Mojes kapêr kôt ã mẽ hipêx anẽ nhũm Tĩrtũm kām ja mex nê. Nom kot pu mẽ kapêr kwỳm ri tanhmā amnhĩ nhĩpêx to

ho papa nhũm ja kêp omnuj tỳx nê hãmri pu mẽ tee ri mẽ pahkrajê my kwryt kà jakàr kaprỳ. Na hte Tĩrtũm ã mẽ pahkrajê nhĩpêx anhỹr ã mẽ pahpumunh kôt amnhĩm mẽ pamex ã mẽ pajarênh kêt nê. Nom mẽ pahte kapêr kôt amnhĩ nhĩpêx mex o papa pê mẽmy kwryt kà jakàrja nhũm kām mex nê.

26 Ijaew kêt xwỳnhjaja kot ã mẽ hkrajê nhĩpêx anhỹr kêt tã ra mẽ hkwỳjaja Tĩrtũm kapêr ma nê hkôt amnhĩ nhĩpêx o ri pa. Jao te mẽ kot amnhĩ my kwryt kà jakàr pyrāk o amnhĩ nhĩpêx. Jakamā nhũm Tĩrtũm ja hã mẽ omu nê mẽ kām:

—Nà ãm hãmri. Mẽ ate amnhĩ my kwryt kà jakàr kêt tã mẽ apê ixkra na ka mẽ. Anẽ.

27 Mẽ kot amnhĩ jakàr kêt tã Tĩrtũm kapêr kôt amnhĩ nhĩpêx mex o ri pa nhũm amnhĩ tã mẽ omu nê mẽ arom amnhĩm mẽ kot amnhĩ to mex xwỳnh ã mẽ harê. Mẽ kot amnhĩ jakàr kêt tã.

No mẽ kajaja mẽ ate Tĩrtũm nhỹ hã Mojes kapêr ã kagà mar tỳx tã hkôt amnhĩ nhĩpêx kêt nê. Ja mỳrapê koja ja hã mẽ apumu nê Ijaew kêt xwỳnhjê kĩnhã mẽ ate amnhĩ tomnuj xwỳnh ã mẽ ajarê. Ra mẽ ate amnhĩ jakàr tã mẽ ate amnhĩ tomnuj xwỳnh ã mẽ ajarê.

28 Nẽ kot ka mẽ atõ tanhmā amnhĩ to jarkrar to nê amnhĩ jarênh o:

—Nà ixpê Ijaew jakamā na hte Tĩrtũm mẽ kot inhmy kwryt kà krãhyr kôt ixto kraa. Anẽ.

Nom xà na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra? Nà kot anhỹr kêt. Na htem ãm htỳx ã amnhĩ to jarkrar anhỹr kaprỳ ho pa.

29 Nẽ Tĩrtũm Karõ kot mẽ hkarõ mã gjêx xwỳnhjaja kêp Tĩrtũm kra jakamā na htem Tĩrtũm kām hprām xà hkôt amnhĩ nhĩpêx. Nom ri amnhĩ krã hkôt tanhmā amnhĩ nhĩpêx to ho pa hkêt nê. Rỳ htỳx hamaxpêr o:

—Nà kot paj Mojes kapêr ã kagà hkôt amnhĩ nhĩpêx nhũm Tĩrtũm ja hã ixpumu nê amnhĩm inhmex ã ijarê nê ixto hkra.

Anhỹr o hamaxpêr kêt nê. Na htem hamaxpêr o:

—Nà ra Tĩrtũm Karõ kot ixkarõm àr jakamā ixpê hkra nhũm amnhĩm inhmex ã ijarê. Jakamā kot paj ãm kôt pix mã ri

amnhĩ nhĩpêx o ri ixpa rāhā ty. Kwār māmri
ixkwỳjaja amnhĩm inhmex kêt ā ijarē. Anē.

Kêr ka mē ā ajamxpêr anhỹr o ri pa. Ā
mē hamxpêr anhỹr na mex o mex.

3

¹ Nē măn ka mē ra tee ri tanhmā amnhĩ
kukamā ajamxpêr to nē ajamxpêr o:

—Kwa mo kaxyw na pa ixpê Ijaew? Mon
pa pre we ixpê Ijaew kêtne hkêt nē? Mē kêt
Ijaew kêt xwỳnhjaja kot amnhĩ jakàr kêt tā
nhũm Tĩrtũm mē pahpyrà nē mē ho hkra.
Anē.

Kwa mē ā ri ajamxpêr anhỹr kêt nē.

² Mē pahpê Ijaew na pre Tĩrtũm Ijaew kêt
xwỳnhjê rom mē pahto mex rax nē. Na
pre amnepê mē mē panhĩgêt mē tanhmā
kapêr to. Mē pahpiitā mē pahte mar nē
hkôt amnhĩ nhĩpêx kaxyw. Nom Ijaew
kêt xwỳnhjê nhĩgêt mē ā kapêr anhỹr kêt
nē. Ām mē pahpê Ijaew nhĩgêt pix mē
kapêr. Jakamā mē pahpê Ijaew mē ja mex
kumrêx.

³ Nom kot kaj mē atō ja ma nē ajamxpêr
o:

—Nà Tĩrtũm kot mē ixto mex mē mē ixtā
amnhĩ jarênh tā no nhũm xep mē inhĩgêt
kwỳjaja hkôt amnhĩ nhĩpêx kêt nē. Na
xep prem kapêr kwỳm ri amnhĩ tomnuj
o pa. Jakamā ko. Koja Tĩrtũm mē ixpê
mē hkanrêhā mē htamnhwỳjaja tanhmā mē
ixto mex to japêr ko. Anē.

⁴ Kwa mē ri ā ajamxpêr anhỹr kêt nē.
Tĩrtũm na hte mē pahpiitā mē pakurom
mēmoj tā amnhĩ jarênh o hêx kêt nē. Tā
ra kot tanhmā mē pahtā amnhĩ jarênh to
xà hkôt koja ā mē pahto mex anē. Kapêr
ā kagà htũm kot mēhō tanhmā Tĩrtũm mē
kapêr to nē harênh kot:

Pa Tĩrtũm. Nà ām kapxipix na ka hte mēmoj
tā amnhĩ jarênh xà hkôt amnhĩ
nhĩpêx o ri apa.

Jakamā na htem ām axpên mē axêx ā
akapêr ā ajarênh kaprỳ. Anhỹr o
harê.

⁵ No kot ka mē atō atỳx ajamxpêr nē aja-
maxpêr o:

—Xà koja Tĩrtũm tanhmā mē ixte amnhĩ
tomnuj to hā mē ixpumu nē gryk? Nà koja
gryk kêt nē. Jakamā kot paj arĩ amnhĩ
tomnuj o ri ixpa. Kê mē piitā ja hā ixpumu

nē ixrom Tĩrtũm tapxipix kot amnhĩ to mex
o pa xwỳnh ā harênh o pa. Nà ja mex.
Jakamā kot paj arĩ amnhĩ tomnuj rāhā ho ri
ixpa nhũm mē Tĩrtũm pix mē măn kot tām
amnhĩ nhĩpêx xwỳnh ā harê. Hāmri nhũm
Tĩrtũm amnhĩ tā ixpumu nē tanhmā ixto
hkêt nē. Koja tanhmā ixto japêr hāmri nē
ixpyrà nē amnhĩ tomnuj nē. Anē.

Kot kaj mē ā ajamxpêr anē nē ām amnhĩ
krā hkôt ā ajamxpêr anhỹr kaprỳ. Nom
ā ajamxpêr anhỹrja Tĩrtũm jamxpêr kôt
kêt.

⁶ Kwa mē ri ā ajamxpêr punuj anhỹr
kêt nē. Tĩrtũm kot mē pahpyrà nē aa kot
amnhĩ tomnujre hā. Kop ām mē pahpyrà
nē tanhmā kot amnhĩ tomnuj to ronhỹx
tanhmā kot we amnhĩ to nē mē pahte
amnhĩ tomnuj xwỳnh ā mē pajarê? Nhỹx
mē pahpyrà nē ā amnhĩ jarênh anē. Nà ā
mē ajamxpêr anhỹrja mex kêt.

⁷⁻⁸ E pa ixprĩ hā mē amā ja jarê ka mē
inhma. Kot kaj mē atō amnhĩ kukamā
ajamxpêr o:

—E kot paj māmri ri mēmoj tā ixêx o ri
ixpa kê mē ixêx nhi hā ixpumu nē ixrom
Tĩrtũm pix mē măn kot amnhĩ to mex ā
harê. Nē ām pix mē măn hêx kêt xwỳnh ā
harê. Hāmri nhũm Tĩrtũm amnhĩ tā ixpumu
nē mē ā mē kot harênh anhỹrja ma nhũm ja
kām mex nē nhũm hkĩnh nē. Jakamā ixêx o
ri ixpaja ā tanhmā ixto hkêt nē. Ra mē kot
ixrom tām kot amnhĩ nhĩpêx o pa xwỳnh ā
harênh jakamā nhũm ixêx nhita ā tanhmā
ixto hkêt japêr. Jakamā kot paj ixte amnhĩ
tomnuj o ri ixpaja mē inhũrer kêt nē. Kêr kē
mē ja hā ixpumu nē ixrom Tĩrtũm tapxipix
kot amnhĩ to mex xwỳnh ā harê.

Anhỹr o ajamxpêr nom mē ajamxpêrja
kot anhỹr kêt. Na hte akwỳjaja pa ixpê
Pawre ixêx o ixpa hā ri axpên mē ijarê no
na pa hte ixêx o ri ixpa hkêt nē. Ā mē
ajamxpêr anhỹr o ri apa xwỳnhjaja koja
Tĩrtũm mē atomnuj tỳx nē kām ga.

*Mē mē pahte amnhĩ tomnuj xwỳnh ā mē
pajarênh*

Wam Korĩt 6.9; Karatas 3.22; Xitre 3.3

⁹ Tā tanhmā kot puj mē pahpê Ijaew
amnhĩ jarênh to? Xà kot pu mē pahte
amnhĩ to mex o Ijaew kêt xwỳnhjê jakrenh
ā amnhĩ jarê? Nà mē pahte ā amnhĩ nhĩpêx

anhÿyre hā. Mē pahpê Ijaew nē Ijaew kêt xwÿnhjaja. Mē pahpiitā mē pahte amnhī tomnuj o axpēn pyrāk. Na pa pre ra mē amā ja jarē.

¹⁰ Tirtūm kapēr ā kagà htūm kot ja jarēnh kot:

Mēhō na we aa kot amnhī tomnuj kêt kumrēx nē pa?

¹¹ Nē mēhō na we kot mēmoj mex piitā omunh par?

Nē mēhō na kām Tirtūm prām?

¹² Nà amrakati kumrēx. Na mē ra piitā hkaga hpa.

Nē kapēr kwÿm ri tanhmā amnhī tomnuj to ho pa.

Ām mēhō pyxire nē amnhī to mex o ri pa hkêt kumrēx.

¹³ Na htem kapēr punuj pix o ri pa.

Jakamā Tirtūm noo mā mē kot amnhī nhīpēxja te kot mēmoj tyk nē hkro punuj pyrāk.

Na htem ām ri hēx pix kukamā ri hamaxpēr o pa. Tanhmā mē hēx to xàja te kēp kagā xoprē nhō wenēn xihitÿx pyrāk.

¹⁴ Nē na htem mē piitā mēmoj nhīxi ho ri axpēn mā mē hixi jarēnh o pa. Nē ri tanhmā axpēn japrÿ hto ho pa.

¹⁵ Nē tanhmā kapēr mā gēt kām mē kām kapēr to.

¹⁶ Nē tanhmā mē hkwÿjê homnuj to. Jakamā nhūm mē piitā ri hkaprī nē mex kêt nē pa.

¹⁷ Nhūm htem ām axpēn mā mē gryk xà pix o kapēr o pa.

¹⁸ Nē Tirtūm ā hpijaām kêt o pa. Na htem kapēr ma nē ām kuma nē kām hkīnh kêt o pa.

Ā na htem amnhī nhīpēx anhÿr rāhā ho pa. Anē.

Ā Tirtūm kapēr ā kagà htūm kot mē pajarēnh anhÿr.

¹⁹ Mē pahpê Ijaew ra mē pahte ja jarēnh mar tÿx. Tirtūm kapēr ā kagà htūm kwÿ na. Na hte ā mē kot amnhī tomnuj xwÿnhjê jarēnh anē. Nē määnēn mē papajaja. Mē pahpê Ijaew na hte ā mē pajarēnh anē. No ām mē papapxipix hkêt. Krī piitā hkôt ri mē pa xwÿnhjaja nhūm ā mē harēnh kot anhÿr. Ijaew kêt xwÿnhjaja nē mē pahpê

Ijaew. Mē pahpiitā mē pahte amnhī tomnuj xwÿnh jakamā mēmo kaxyw kot pu mē pahte amnhī tomnuj kêt ā ri amnhī to jarkrar o papa? Kot puj mē ā amnhī jarēnh anhÿr kaprÿ. Jakamā koja Tirtūm mē pahpiitā mē pahte amnhī tomnuj mÿrapê tanhmā mē panhīpēx to.

²⁰ Mē pahtō koja mē pahte kapēr kôt pix mā amnhī nhīpēx o papa hā mē pajarē? Nē mē pahtō mā koja mē pamā kapēr nē mē pamā:

—Nà na ka hte akatāt kôt ixkapēr kôt pix mā amnhī nhīpēx mex nē. Ām hāmri na ka hte ā amnhī nhīpēx anhÿr o apa.

Anhÿr o mē pahtō mā kot we ā kapēr anē? Nà aa kot mē pahtō mā kapēr anhÿr kêt. Na pu htem ām kapēr ma nē tee ri amnhī kukamā pajamaxpēr. Mē pahte amnhī tomnuj ā amnhī pumunh kaxyw na pre mē pamā kapēr ā kagà htūmja gō. Mē pahtō mē pahte kapēr ā kagà hkôt amnhī nhīpēx mex o papa hkêt kēnā kot kêt ri amnhīm mē pahte amnhī to mex xwÿnh ā mē pajarē.

Tanhmā Tirtūm kot mē pahto hkra to hā harēnh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nē na hte Tirtūm mē pahte kapēr kôt amnhī nhīpēx ā mē pahpumunh kôt amnhīm mē pahte amnhī to mex xwÿnh ā mē pajarēnh kêt nē. Jakamā mēhō kukwak ri koja we ā mē pajarēnh anē? Nà nhām mēhō kot tām amnhī nhīpēx rāhā ho pa hā omunh pix kukwak ri koja ā mē pajarēnh anē. Tā mēhō kukwak ri kot ā mē pajarēnh anhÿr xwÿnhhta na pre ra mē pamā ho amnhīrīt. Amnepēm Tirtūm kapēr ā kagà htūm kamā na pre mēhō hkukamā tanhmā harēnh to. Nē Tirtūm nhÿ hā mē kapēr jarēnh o pa xwÿnhjaja haxwÿja kukamā tanhmā harēnh to ho pa.

²² Jejus Krisja na prem hkukamā harēnh o pa. Tām na pu htem hkôt amnhī xunhwÿ nē amnhī kaxyw kām pajamaxpēr rāhā ho papa nhūm Tirtūm ja pix ā mē pahpumunh kôt amnhīm mē pahte amnhī to mex xwÿnh ā mē pajarē. Mē kot Jejus kôt amnhī xunhwÿr xwÿnh piitāā. Mē ixpê Ijaew nē mē apê Ijaew kêt xwÿnhjaja. Mē pahpiitā mē pahte axpēn pyrāk jakamā kot puj mē

pahtô Jejus kôt amnhî xãm nhũm Tĩrtũm Kra Jejus kot amnhî to mex pix o pa kukwak ri mẽ pahpumu nẽ amnhĩm pajarẽnh o:

—Nà ãm hãmri. Ra kot ixkra Jejus kôt amnhî xãm jakamã ra inhmã te Jejus kot amnhî nhĩpêx pyrã nẽ amnhî to mex o pa. Anẽ.

²³ No mẽ pahtô na mẽ pahte Tĩrtũm mẽ Jejus wa urãk nẽ amnhî nhĩpêx mex rãhã ho ri papa? Nà amrakati kumrẽx. Mẽ pahpiitã mẽ pahte amnhî tomnuj xwỳnh kẽnã.

²⁴ Tã Tĩrtũm kot mẽmoj tã mẽ pakutã nojarêt rãhã jakamã na hte Jejus Kris kukwak ri amarĩ amnhĩm mẽ pahte amnhî to mex xwỳnh ã mẽ pajarẽnh o pa. Mẽ pahte Jejus kôt amnhî xunhwỳr xwỳnh piitã ã nhũm ã mẽ pajarẽnh anẽ. Ra Jejus kot htyk o mẽ pahte amnhî tomnuj piitã hpãnhã amnhĩrer par jakamã na hte Tĩrtũm Jejus kukwak ri amarĩ mẽ pahte amnhî to mex xwỳnhjê hã mẽ pajarẽ. Te mẽ pahte amnhî tomnuj kêt kumrẽx pyrãk mẽ pajarẽ.

²⁵⁻²⁶ Na pre mẽ pahwỳr Jejus mẽ nhũm mẽ pahwỳr wrỳ nẽ mẽ panê ty nẽ htyk o mẽ pahte amnhî tomnuj piitã hpãnhã amnhĩrer pa. Jakamã kot pu mẽ pahtô amnhî kaxyw hkôt pajamexpêr nhũm Tĩrtũm ja hã mẽ pahpumu nẽ Kra kukwak ri amnhî katut kôt mẽ pahte amnhî tomnuj piitã rẽnh pa. Jao te aa mẽ pahte amnhî tomnuj kêt kumrẽx pyrãk ã mẽ pahpumu.

No kêt amnepêm kormã Jejus wrỳk nẽ mẽ panê htyk kêt ri mẽ pa xwỳnhjaja. Tanhmã na pre Tĩrtũm mẽ kot hkôt amnhî xunhwỳr xwỳnhjê nhĩpêx to? Kormã Jejus mẽ panê htyk kêt ri mẽ pa xwỳnhjaja tanhmã na pre mẽ hipêx to? Nà na pre mẽ hkwỳjaja amnhî kaxyw Tĩrtũm kôt hamaxpêr nẽ hkôt amnhî xunhwỳ nhũm amnhî tã mẽ omu nẽ amnhĩm mẽ harẽnh o:

—Nà ãm hãmri. Koja nhỹrmã Ixkra ma mẽ hwỳr wrỳ nẽ mẽ nê ty nẽ htyk o mẽ kot amnhî tomnuj pãnhã amnhĩrer pa. Jakamã koja mẽ tãmjaja amnhî tomnuj pãnhã amnhĩrer kêt nẽ. Anẽ.

Tã nhũm Jejus tãm mẽ pahwỳr wrỳ nẽ mẽ pahpiitã mẽ panê ty. Jakamã nhũm Tĩrtũm ra mẽ pahte hkôt amnhî xunhwỳr xwỳnhjaja Kra kukwak ri amnhî katut kôt

mẽ pahte amnhî tomnuj piitã rẽnh pa. No na hte amarĩ ã mẽ panhĩpêx anhỹr kêt nẽ. ãm Jejus tyk pix kukwak ri na hte ã mẽ panhĩpêx anẽ. ãm hãmri na hte ã mẽ panhĩpêx mex anẽ. Na hte tãm mẽ panhĩpêx rãhã ho pa.

²⁷ Jakamã kot puj mẽ ã pajamexpêr anẽ nẽ pajamexpêr o:

—Nà na pa hte amnhî to mex rãhã o ri ixpa. Amnhî to mex o mẽ piitã mẽ hakrenh pa.

Anhỹr o pajamexpêr kêt nẽ. Koja mẽhõ ã hamaxpêr anẽ nẽ ãm amnhî jarẽnh o hêx. Na hte Tĩrtũm mẽ pahte amnhî to mex ã mẽ pahpumunh kôt amnhĩm mẽ pahte amnhî to mex xwỳnh ã mẽ pajarẽnh kêt nẽ. Mẽ pahte amnhî to mex rãhãre hã. Nom na pu htem amnhî kaxyw Jejus mã pajamexpêr nẽ hkôt amnhî xunhwỳ nhũm ja hã mẽ pahpumu nẽ rĩ kormã amnhĩm mẽ pamex ã mẽ pajarẽ.

²⁸ E pa axte tanhmã mẽ amã ja jarẽnh to ka mẽ aprĩ hã inhma. Mẽmoj pumunh kôt na hte Tĩrtũm mẽ pahte amnhî to mex xwỳnh ã mẽ pajarẽnh wehe? Xà mẽ pahte kapêr tũm kôt amnhî nhĩpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarẽnh anhỹr kêt nẽ. Mẽ pahte hkôt amnhî nhĩpêx rãhã ho papare hã. ãm mẽ pahte amnhî kaxyw Kra Jejus kôt pajamexpêr nẽ hkôt amnhî xunhwỳr ã mẽ pahpumunh kôt pix mã na hte mẽ pahte amnhî to mex xwỳnh ã mẽ pajarẽ. Ja pix ã mẽ pahpumunh kôt na hte ã mẽ pajarẽnh anẽ.

²⁹ Nẽ xà Tĩrtũm kêp mẽ ixpê Ijaew pix nhõ Tĩrtũm pix na? Nà kêp mẽ ixpê nhõ Tĩrtũm kêt. Kêp mẽ ixpê Ijaew nhõ Tĩrtũm nẽ mããnẽn kêp mẽ apê Ijaew kêt xwỳnhjê nhõ Tĩrtũm.

³⁰ Nẽ Tĩrtũm ãm pyxi mex. Axtem hõ kêt. Na hte mẽ pahpiitã mẽ panhĩpêx o axpên pyrãk. Jakamã na hte mẽ kot amnhî kaxyw Jejus kôt hamaxpêr o mẽ pa xwỳnhjê pumu nẽ mẽ kot amnhî to mex xwỳnh ã mẽ harẽ. Mẽ ixpê Ijaew nẽ mããnẽn mẽ apê Ijaew kêt xwỳnhjaja.

³¹ Tã koja mẽhõ htỳx hamaxpêr o:

—Nà ixte amnhî kaxyw Jejus kôt ijamaxpêr mex o ixpa nhũm Tĩrtũm kot

amnhîm inhmex ã ijarênh jakamã kot paj axte kapêr kôt amnhî nhîpêx kêt nê. Kot paj ãm amnhî krã hkôt amnhî nhîpêx o ri ixpa. Ra Tîrtûm kot ixto hkra kênã.

Anhÿr o ajamaxpêr japêr. Kwa mê ã ri ajamaxpêr anhÿr kêt nê. Na htem amnhî kaxyw Jejus kôt hamaxpêr hãmri nê kãm hkôt amnhî nhîpêx prãm rãhã nê pa ho pa.

4

Apraãw kot amnhî kaxyw Tîrtûm kôt hamaxpêr

Karatas 3.6-18; Xiakre 2.23

¹ Nê mê panhîgêt finat Apraãwja kêp mê pahpê Ijaew pàr krax. Tã mëmoj tã na pre Tîrtûm omu nê kot amnhî to mex xwÿnh ã harê?

² Xà kot kãm tanhmã amnhî nhîpêx to hã karõ xà hkôt amnhî nhîpêx mex ã omunh xà hkôt nhùm pre ã harênh anê? Nà ja kôt kêt. Kop apu ja kôt ã kot harênh anhÿr ronhÿx Apraãw amnhî tã omu nê Tîrtûm mã amnhî to jarkrar nê kãm:

—Pa Tîrtûm? E mãn ka ixpumu. Na pa hte akapêr kôt amnhî nhîpêx mex o ri ixpa.

Anhÿr o nhÿx pre kãm amnhî to jarkrar. No na pre tanhmã kãm amnhî to jarkrar to hkêt nê.

³ Tã mëmoj tã omunh xà hkôt na pre Tîrtûm amnhîm mex ã harê? Nà Tîrtûm kapêr ã kagã htûm kot tanhmã Apraãw jarênh to kot:

Na pre Apraãw amnhî kaxyw Tîrtûm kôt hamaxpêr nê hkôt amnhî xãm nhùm amnhî tã omu nê amnhîm mex ã harê. Anê.

⁴ Mê õ patrãwjaja na htem kãm mê àpênh xwÿnhjaja àpênh mex ã mê omunh xà hkôt mê kãm amnhîre.

⁵ No Tîrtûm na hte ã mê panhîpêx anhÿr kêt nê. Na hte mê pahte tãm amnhî nhîpêx ã mê pahpumunh kôt amnhîm mê pahte amnhî to mex xwÿnh ã mê pajarênh kêt nê. ãm mê pahte amnhî kaxyw Kra Jejus kôt pajamaxpêr nê hkôt amnhî xunhwÿr ã mê pahpumunh kôt pix mã na hte amnhîm ã mê pajarênh anê. Ra mê pahte amnhî tomnuj o ri papa htã hpãnhã amnhî kaxyw Jejus kôt pajamaxpêr xwÿnh pixjaja na hte ã mê pajarênh anê.

⁶ Jakamã na hte mê pamã amnhî jarênh o:

—Ixte mê amex ã mê ajarênh tã no ãm mê ate amnhî to mex kôt mê apumunh kôt na pa ã mê ajarênh anhÿr kêt nê. ãm mê ate amnhî kaxyw Ixkra mê wa ixkôt ajamaxpêr nê wa ixkôt amnhî xunhwÿr ã mê apumunh kôt na pa hte ã mê ajarênh anê. Anê.

Pu mê ã kot pamã kapêr anhÿr ã amnhî tã kuma nê pahkînh nê. Pahi finat Tawi na pre haxwÿja ja jarênh o:

⁷ Na hte Tîrtûm amnhî katut kôt mê pahte amnhî tomnuj piitã rênh pa nê axte kãm hamaxpêr kêt nê.

Jakamã pu mê ja hã amnhî pumu nê pahkînh nê.

⁸ Nê amnhî kukamã pajamaxpêr o: “Hêxta waa nê. Na pa pre amnhî tomnuj o ixpa nê tee ri ja hã amnhî pumu nê ixkaprî nê.

Hãmri nê amnhî to Tîrtûm wÿ nhùm inhma nê ixte amnhî tomnuj o hapêx pa nê axte kãm hamaxpêr kêt nê.

Nà ãm hãmri. Ja mex kumrêx.” Anê.

⁹ Tã mê kot ja hã amnhî pumunh nê hkînh xwÿnhjaja mëmojaja na mê? Xà mê kot amnhî my kwÿt kã jakàr xwÿnh pix kwÿjaja na pre pahi Tawija ã mê harênh anê nã? Nà mê tapxipixjaja kêt. Mãânênh mê kot amnhî jakàr kêt xwÿnh kwÿjaja. Tanhmã na pre ra Tîrtûm kapêr ã kagã htûm kot finat Apraãw jarênh to? Na pre harênh o:

Na pre Apraãw amnhî kaxyw Tîrtûm kôt hamaxpêr nê hkôt amnhî xãm nhùm amnhî tã omu nê amnhîm mex ã harê. Anê.

¹⁰ Xà Apraãw ra kot amnhî my kwÿt kã krãhyr nhîrô pê na pre Tîrtûm amnhîm mex ã harê? Nà kormã kot amnhî krãhyr kêt ri na pre ã harênh anê.

¹¹ Kormã kot amnhî krãhyr kêt ri kãm kapêr nê kãm:

—E ate amnhî kaxyw inhmã ajamaxpêr nê ixkôt amnhî xãm ã ixte apumunh kôt na pa amnhîm amex ã ajarê.

Anhÿr o kãm kapêr hãmri nê rî kormã kãm tanhmã amnhî krãhyr to hã kãm karõ nhùm kuma nê mar xà hkôt amnhî my kwÿt kã hkwy krãhta. Kot Tîrtûm mã

amnhĩ nhõr ã amnhĩ to amnhĩrīt kaxyw ã amnhĩ nhĩpêx anē.

Nom kormã amnhĩ krāhyr kêt ri na pre Tĩrtũm amnhĩm mex ã harē. Tã Ijaew kêt xwýnhjaja kot amnhĩ jakàr kêt tã mẽ hkwyjaja Apraãw pyrã nē amnhĩ kaxyw Tĩrtũm mã hamaxpêr nē kãm amnhĩ nhõr jakamã Apraãw te kêp mẽ hpàr krax maati pyræk.

¹² Nē mãânēn mẽ pahpê Ijaew. Kot puj mẽ pahtõ amnhĩ kaxyw Tĩrtũm kôt pajamaxpêr nhũm amnhĩ tã mẽ pahpumu nē mẽ pamex ã mẽ pajarē. No ãm mẽ pahte amnhĩ jakàr ã mẽ pahpumunh kôt ã mẽ pajarēnh anhỹr kêt nē. ãm Apraãw pyrã nē amnhĩ kaxyw Tĩrtũm kôt pajamaxpêr pix ã mẽ pahpumunh kôt na hte mẽ pamex ã mẽ pajarē. Kormã Apraãw kot amnhĩ my kwryt kã krāhyr kêt ri ra kot amnhĩ kaxyw Tĩrtũm mã hamaxpêr jakamã kêp mẽ pahpê Ijaew mẽ pahte uræk nē amnhĩ kaxyw Tĩrtũm mã pajamaxpêr xwýnhjê hpàr krax maati. Ijaew kêt xwýnhjê pyrã nē kêp mẽ pahpàr krax maati.

Tĩrtũm kot Apraãw mã mẽmoj mex jarēnh Karatas 3.22

¹³ Amnepêm na pre Tĩrtũm Apraãw mã tanhmã kapêr to nē kãm:

—E koja nhỹrmã akanrêhã akra nē atãmnhwýjaja amýrpê apyrã nē krĩ piitã hkôt mẽ kêp mẽ õ pahi. Anē.

Tã tanhmã Apraãw kot amnhĩ nhĩpêx to hã omunh xà hkôt na pre ã kãm kapêr anē? Xà kot kãm tanhmã amnhĩ nhĩpêx to hã karõ nhũm kot hkôt amnhĩ nhĩpêx mex ã omunh xà hkôt na pre hkĩnh nē ã kãm kapêr anē? Nà kot anhỹr kêt. Mẽ pahtõ kot pu we Tĩrtũm kapêr xà hkôt pix mã amnhĩ nhĩpêx mex rãhã ho ri papa? Mẽ pahpê hihtýx kênã. ãm kot amnhĩ kaxyw Tĩrtũm kôt hamaxpêr nhũm kot amnhĩ tã omunh nē amnhĩm mex ã harēnh kôt pix mã na pre ã kãm kapêr anē.

¹⁴ Kop apu kot kãm tanhmã kapêr to nē kãm:

—E Apraãw. Kot kaj ixkapêr piitã ama nē hkôt amnhĩ nhĩpêx mex rãhã ho ri apa. Hã koja nhỹrmã akanrêhã akra nē atãmnhwýjaja kêp krĩ piitã hkôt mẽõ pahihtĩ.

Anhỹr o kãm kapêr ronhỹx ãm kãm ã kapêr anhỹr kaprý. Apraãw aa kot kapêr piitã hkôt amnhĩ nhĩpêx mex o pare hã. Kop apu ã kãm kapêr anhỹr ronhỹx pre kuma nē tee ri amnhĩ kukamã hamaxpêr nē hamaxpêr o:

—Kwa nà. Ra ixte Tĩrtũm kôt amnhĩ xãm tã tanhmã kot pa amnhĩ to nē kapêr piitã hkôt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhỹr o ixpa hprãm kaprý. Jakamã koja nhỹrmã ixkanrêhã ixkra nē ixtãmnhwýjaja kêp mẽ õ pahi hkêt nē pa. Hêxta waa nē.

¹⁵ Koja Tĩrtũm ixte kapêr kwým ri tanhmã ixte amnhĩ tomnuj to hã ixpumu nē tanhmã ixtomnuj to. No mẽhõ kot we kapêr piitã hkôt amnhĩ nhĩpêx mex rãhã ho pa? Nà amrakati kumrêx.

Anhỹr o nhỹx pre hamaxpêr.

¹⁶ No na pre Tĩrtũm ã kãm kapêr anhỹr kêt nē. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm:

—E ate amnhĩ kaxyw ixkôt ajamaxpêr nē ixkôt amnhĩ xãm jakamã kot paj amarĩ ato mex nē. Anē.

Tĩrtũm na hte mẽmoj tã amnhĩ jarēnh o amnhĩ to hêx kêt nē. Na hte mẽmoj tã amnhĩ jarēnh xà hkôt tanhmã mẽmoj nhĩpêx to ho ri pa. Jakamã koja mẽ pahte Apraãw pyrã nē amnhĩ kaxyw hkôt pajamaxpêr xwýnh piitã mẽ pahto mex nē.

Nē xà na pre ã mẽ pamã kapêr anē nē mẽ pamã:

—E kot kaj mẽ ixkapêr kôt pix mã ri amnhĩ nhĩpêx o ri apa hã kot paj mẽ ato mex rax nē.

Anhỹr o mẽ pamã kapêr? Nà na pre ã mẽ pamã kapêr anhỹr kêt nē. Na pre mẽ pamã:

—Kot kaj mẽ finat Apraãw pyrã nē amnhĩ kaxyw ixkôt ajamaxpêr nē ixkôt amnhĩ xunhwý hã kot paj mẽ ato mex nē.

Anhỹr o mẽ pamã kapêr. Tã Apraãw kumrêx kot mẽ pakukamã amnhĩ kaxyw hkôt hamaxpêr jakamã te kêp mẽ pahpiitã mẽ pahte uræk nē ã amnhĩ nhĩpêx anhỹr xwýnhjê pàr krax maati pyræk.

¹⁷ Amnepêm na pre Tĩrtũm tanhmã Apraãw mã kapêr to. Kot tanhmã kãm kapêr toja Tĩrtũm kapêr ã kagà htũm kamã na. Na pre kãm:

Kot kaj apê ahpÿnhã ri mẽ urojê hpàr krax.
Anê.

Kormã Apraãw kra hkêt tâ nhũm hkra hkukamã ã kãm kapêr anê. Hãmri nhũm kuma nê hkôt hamaxpêr kurê kumrêx nê hamaxpêr o:

—Hêxta waa nê. Ra ixprô mẽ wa ijamê wa ixpigêt tÿx nê wa ixkra hkêt kumrêx. Kot paj wa tanhmã amnhĩ to nê tokyx ty. Tã ra Tirtũm kot ixkra nê ixtãmnhwÿjê hkukamã ã inhmã mẽ harênh anhÿr kênã. Jakamã kot pa xep wa ixpigêt tÿx tâ tanhmã amnhĩ to nê ixkra. Nã kot pa xep wa anê. Nê koja ixkrajã tanhmã amnhĩ to nê ixpê htyk japêr tâ koja Tirtũm akupÿm inhmã ho htĩr. Nã koja inhmã ho anê. Ra kot inhmã ixkra nê ixkanrêhã ixtãmnhwÿ xohtô jarênh kênã. Anê.

¹⁸⁻¹⁹ Na pre ra hpigêt tÿx nê. Ra hã amgrã pê 100 nê hkurê kêt nê pa. Nhũm hprô mããnên hpigêx tÿx nê. Nê ôhy kamã hkra hkêt kumrêx. Kormã wa hkra hkêt tâ nhũm Tirtũm Apraãw mã hkra nê htãmnhwÿ xohtô hã harê. Nê kêp mẽ urojê xohtôjê pàr krax ã kãm harê. Hãmri nhũm kuma nê amnhĩ kaxyw hkôt hamaxpêr tÿx kurê kumrêx.

²⁰ Nê ã amnhĩ nhĩpêx anhÿr rãhã ho pa. Na pre war amnhĩ kra hã amnhĩ jarênh ma nê tee ri amnhĩ kukamã hamaxpêr kêt nê. ãm Tirtũm tãm kot wa kãm wa hkra jarênh pix mã hamaxpêr pê amnhĩ kaxyw kãm hamaxpêr tÿx o ri wa pa. Nê hamaxpêr o:

—Nã ra wa ixpigêt tÿx kumrêx tâ koja xep Tirtũm wa inhmã wa ixkra hõ gõ. Nã koja wa inhmã kugõ. Hêxta waa nê. ãm hãmri Tirtũmja mex o mex.

²¹ Nã kot wa inhmã wa ixkra jarênh xà hkôt koja wa inhmã kugõ. Ja kaxyw àhpumunh o àhpumunh. Tirtũmja hêx kêt. Anê.

²² Hãmri nhũm Tirtũm ã hamaxpêr anhÿr ã omu nê amnhĩm mex ã harê. Nê kot kãm amnhĩ jarênh xà hkôt wa kãm wa hkrajã gõ.

²³ Nom na pre amnhĩm Apraãwja pix mex ã harênh kêt nê.

²⁴ Kot puj mẽ pahtõ uràk nê amnhĩ kaxyw hkôt pajamaxpêr nhũm amnhĩ tâ mẽ pahpumu nê ra kot Apraãw jarênhta pyrã nê amnhĩm mẽ pamex ã mẽ pajarê. Na pre mẽ panhõ Pahihti Jesus ty nhũm

Tirtũm akupÿm ho htĩr. Tã mẽ papajaja na pu prem amnhĩ kaxyw Jesus kôt pajamaxpêr nhũm Tirtũmja hã mẽ pahpumunh kôt mẽ pahte amnhĩ to mex xwÿnh ã mẽ pajarê.

²⁵ Na pre mẽ pahwÿr Kra Jesus mẽ nhũm mẽ pahwÿr wrÿ. Tã nhũm mẽ axtem nê kupĩ nom nhũm amarĩ htyk kêt nê. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tirtũm mẽ pahwÿr kumê. Jakamã nhũm prem kupĩ nhũm akupÿm ho htĩr. Tã mẽmo kaxyw na pre Tirtũm ã mẽ pahwÿr Kraja mẽnh nhũm mẽ panê htyk anê nhũm akupÿm ho htĩr? ãm kot kukwak ri amnhĩm mẽ pahte amnhĩ kaxyw hkôt pajamaxpêr xwÿnhaja mẽ pahte amnhĩ to mex xwÿnh ã mẽ pajarênh pix kaxyw.

5

*Tirtũm kot mẽ pahto hkwy hã harênh
Matêwre 5.12; Sikũn Korĩt 4.8, 5.18-21;
Xiakre 1.2-4; Wam Pêtre 4.12, 5.9*

¹ Nê na pu prem amnhĩ tomnuj o ri papa nhũm Tirtũm ja hã mẽ pahpumu nhũm ja kêp omnuj nê. Jakamã nhũm Jesus amnhĩ grõnh kôt wrÿ nê mẽ panê ty. Nhũm Tirtũm htykja kukwak ri mẽ pahto hkwy. Mẽ pahte amnhĩ kaxyw hkôt pajamaxpêr nê hkôt amnhĩ xunhwÿr ã mẽ pahpumu hãmri nê ã mẽ panhĩpêx anê pu mẽ ra pahpê hkwy hã papa.

² Na pre Jesus Tirtũm mã mẽ pajarênh o:

—E jajê pumu. Na mẽ ra amnhĩ kaxyw pamã hamaxpêr nê pahkôt amnhĩ xunhwÿ. Anê.

Hãmri nhũm kuma nê mẽ pahto mex nê mẽ pakutã nojarêt rãhã ho pa. Tã kot puj mẽ pahpê hkrajaja nhÿrmã pano ho Tirtũm mex o mex xwÿnhja pumu. Jakamã na pu htem amnhĩ kukamã ã pajamaxpêr anhÿr o pahkĩnh nê papa nê pajamaxpêr o:

—Hêxta waa nê. Kot paj nhÿrmã inhno ho Tirtũm mex o mex ã omu nê kuri ixpa ho ixpa. Nã ãm hãmri. Inhmã omunh prãm tÿx kumrêx. Anê.

³⁻⁴ Nê na htem Jesus ã mẽ pahtomnuj nê pu mẽ pahpunuj nê ri papa. Pamex kêt nê tâ tee ri amnhĩ kukamã pajamaxpêr o ri pahkaprĩ nê papa hkêt nê. Kwãr mẽ mãmrĩ

ã mẽ panhîpêx anê. Pu mẽ pahpunuj kurê Jejus kôt amnhî xunhwÿr tÿx o kormã mō. Nê mẽ umaj hkaga hkêt nê. Arî amnhî wÿr kamã pajamak o papa. Jao amnhî kaxyw kumã pix mã kãm pajamaxpêr tÿx rãhã pahkînh nê ri papa.

Kot puj mẽ ã amnhî nhîpêx anhÿr o ri papa nhûm Tîrtûm ja hã mẽ pahpumu nhûm ja kãm mex nê. Hãmri nhûm ja kaxyw tanhmã mẽ pahto paxihtÿx to pu mẽ pahpunuj tã hkôt pajamaxpêr tÿx rãhã nê.

⁵ Nê ra mẽ kot Jejus ã tanhmã mẽ panhîpêx to htã pu mẽ amnhî kaxyw tee ri kãm pajamaxpêr kaprÿ hkêt nê. Ra kot mẽ pamã amnhî Karō nhôr nhûm kot mẽ pahkarō mã gjêx kênã kot pu kêt mẽ ri tee ri amnhî kaxyw kãm pajamaxpêr kaprÿ. Na hte Karōja mẽ pahkarō kamã mẽ pamã Tîrtûm kapêr jarênh o amnhîrit nê kãm mẽ pajapê htÿx ã harênh o amnhîrit rãhã nê.

⁶ Amnepê mã na pre mẽ piitã amnhî tomnuj o ri pa nê tee ri kãm amnhî to mex rãhã hprãm kaprÿ. Mêhō kot we ja kaxyw tanhmã mẽ hkrã hto? Jakamã nhûm Tîrtûm ja hã mẽ omu hãmri nê mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhî tomnuj to ho paja ã ma mẽ hwÿr wrÿ. Ixte mẽ nê atyk kaxyw agrôn timer kôt mẽ hwÿr amênh jakamã kot kaj wrÿ nê mẽ kãm ixkapêr jarênh o ri mẽ hkôt apa. Rãhã nhûm mẽ hkwÿjaja apî ka mẽ piitã mẽ nê ty. Anê.

Hãmri nhûm kuma nê kãm:

—Tôe. Nà kot paj amã hprãm xà hkôt ã amnhî nhîpêx anê. Anê.

Hãmri nê man amnhî grôn timer kôt mẽ pahwÿr wrÿ.

⁷⁻⁸ Xà koja mêhō kãm axpên japê xàj axpên nê ty nà? Xà kot mêhō tãm kot amnhî nhîpêx xwÿnh tã nhûm mẽ kot hpîr kaxyw nhûm hkrãmnhwÿja kãm hapê nê. Nê nê amnhî grôn timer kôt mẽ kãm xa nhûm mẽ kupî nhûm nê ty? Nà kot apu nê htyk japêr ko. No mẽ papajaja. Na pu htem mêhō hkrãmnhwÿta kînhã arî amnhî tomnuj rãhã ho ri papa htã nhûm Tîrtûmja arî kãm mẽ pajapê nê. Nê kãm mẽ pajapê xàj mẽ pahwÿr Kris mẽ nhûm mẽ panê ty. Arî mẽ pahte amnhî tomnuj rãhã ho papa tãã.

Na pre ã Tîrtûmja kãm mẽ pajapê hã ã mẽ pahwÿr mênh anê.

⁹ Na pre ty nhûm hkamrô hkwÿ axkapî nhûm Tîrtûm ja hã omunh xà hkôt tãm amnhîm mẽ paxunhwÿ. Tã Jejus kukwak ri koja ma mẽ kot amnhî xà htÿx kamã hamak tûm xàta wÿr mẽ parênh kêt nê. Mẽ pahpê hkwÿ kênã kot kêt hwÿr mẽ parê.

¹⁰ Nom kormã mẽ pahpê hkwÿ hkêt ri na pu prem te ra kutã amnhî xunhwÿr pyrak o amnhî nhîpêx. Tã nhûm Kra mẽ panê ty pu mẽ hkôt amnhî xunhwÿ. Jakamã nhûm Tîrtûm Jejus tyk kukwak ri mẽ pahto hkwÿ. Nê ra akupÿm Kra ho htîr jakamã kot puj mẽ pahte hkôt amnhî xunhwÿr xwÿnhjaja nhÿrmã wa urak nê wa kuri pahtîr tûm nê pamex kumrêx nê papa ho papa.

¹¹ Nê mẽ pahpê kuwy rax wÿr mẽ papa mã xwÿnh kêt jakamã na pu htem pahkînh nê pajamakêtkati nê ri papa. Nom ja pix ã na pu htem ã amnhî nhîpêx anhÿr kêt nê. Mẽ pahpê Tîrtûm krãmnhwÿ jakamã na pu htem mãânênh pahkînh nê ri papa. Pahihti Jejus Kris kot mẽ panê htyk ã omunh xà hkôt na pre Tîrtûm mẽ pahte hkôt amnhî xunhwÿr xwÿnhjê ho hkwÿ jakamã na pu htem pahkînh nê pajamakêtkati nê ri papa.

*Atãw mẽ Kris wa harênh
Wam Korîit 15.20-22, 45-49*

¹²⁻¹³ Nê amnepêm na pre Tîrtûm finat Mojes mã tanhmã kapêr to. Hãmri nhûm kuma nê Ijaew kot tanhmã amnhî nhîpêx to ho pa kaxyw mẽ kãm mẽmojta ã karō nê mẽ kãm hã hkagà. Mẽ kot kamã harênh nê mar nê Tîrtûm kôt amnhî nhîpêx kaxyw. Hãmri nhûm mẽ tee ri ã kot mẽ kãm mẽmoj tã karōja ma nê tanhmã axpên mã kapêr to nê axpên mã:

—Kwa na pu htem ã amnhî nhîpêx anhÿr kêt nê. Na pu htem ãm amnhî tomnuj tÿx kumrêx o ri papa nê amnhî to mex kêt kumrêx. Anê.

ãm hãmri na prem ã amnhî jarênh anê. Mẽ pahpiitã mẽ pahte amnhî tomnuj xwÿnh kênã. My kot wa pê finat Atãwja kumrêx na pre tanhmã mẽ pahte amnhî tomnuj to ho hkrax. Mÿrapê na pre htîr tûm nê ri pa ho pa hkêt nê. Na pre ri pa nê gaa nê rî hpigêt tÿx nê ty. Tã mÿr pê ri mẽ papa xwÿnhjaja na pu htem urak

nê tanhmã amnhĩ tomnuj to ho ri papa. Mýrapê na pu htem ri papa nê gaa nê Atãw pyrã nê pahtyk pa. Tĩrtũm kot mẽ pahtã Atãw mã kapêr xã hkôt.

14-19 Jakamã na prem kormã Mojes kator xwýj ri pika piitã hkôt ri pa nê gaa nê haxwýja htyk pa. Mẽ kot amnhĩ tomnuj mýrapê ty. Atãw pyrã nê Tĩrtũm kot mẽmo xõ nê hkurê xwýnhta krêr kêt tã urak nê tanhmã amnhĩ tomnuj to ho ri pa. Hãmri nê mýrapê ty.

Na pre ã Atãwja mẽ pahpiitã mẽ pamã Tĩrtũm kapêr nhĩrôp ãm nê amnhĩ tomnuj o hkrax anê nê mẽmo xõta krê. Jao te mẽ pahpiitã mẽ pahte urak nê kumê hkur pyrãk o mẽ panhĩpêx. Mýrapê nhũm htem arĩ pika piitã hkôt hapôj nê kormã hprĩre htã ra Atãw pyrã nê tanhmã amnhĩ tomnuj to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xã hkôt mẽ pakukamã hamaxpêr o:

—Nã koja mẽ Atãw pyrã nê amnhĩ tomnuj o ri pa. Mýrapê kot paj ma mẽ kot amnhĩ xã htýx kamã hamak tũm xãta wýr mẽ rênh pa. Anê.

Tã Jejus Kris mẽ Atãw wa harênhja kot axpên pyrãk jakamã na hte Atãw kanrêhã hkra nê htãmnhwýjaja Atãw kot amnhĩ nhĩpêx kôt amnhĩ nhĩpêx o ri pa rãhã nê. Urak nê amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwýr xwýnhjaja Jejus kôt amnhĩ nhĩpêx rãhã ho ri pa. Te mẽ kêp hkanrêhã hkra nê htãmnhwýjê pyrã nê urak nê tãm amnhĩ nhĩpêx. Na htem ã ahpýnhã amnhĩ nhĩpêx anhýr o ri pa. Na pre Jejus mẽ pahte amnhĩ tomnuj pãnhã amnhĩrer par kaxyw mẽ panê ty. Jakamã mẽ pahte hkôt amnhĩ xunhwýr xwýnhjaja na hte Tĩrtũm ja hã mẽ pahpumunh kôt mẽ pahto hkra. Kot puj mẽ nhýrmã pahtyk tã nhũm akupým mẽ pahto mẽ pahťir pu mẽ wa kuri pahťir tũm nê papa ho papa.

Atãw kot Tĩrtũm kapêr nhĩrôp ãm jakamã na hte Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarê. Nom nhũm Jejus Atãw rom kot Tĩrtũm kapêr mar nê hkôt amnhĩ nhĩpêx rãhã jakamã na hte Tĩrtũm mẽ pahte hkôt amnhĩ xunhwýr xwýnhjaja

amnhĩm mẽ pahte amnhĩ to mex xwýnh ã mẽ pajarê.

Nhũm Atãw kot Jejus kĩnhã Tĩrtũm kapêr nhĩrôp ãm mýrapê na hte mýr pê mẽ pa xwýnhjaja ohtõ nê pa nê gaa nê Atãw pyrã nê htyk pa. Hãmri nê kormã htĩr ri amnhĩ to mex o pa hkêt mýrapê ma mẽ kot amnhĩ xã htýx kamã hamak tũm xãta wýr ma hapêx. Tã nhũm Tĩrtũmja mex o mex jakamã na hte Jejus Kris mẽ wa mẽ pakamã ukaprĩ nê. Jakamã na pre mẽ pahwýr Jejus mẽ nhũm mẽ pahwýr wrý hãmri nê htyk o mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhýr kukwak ri mẽ pahte hkôt amnhĩ xunhwýr xwýnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarê. Tã nhũm Jejus mẽ pakamã ukaprĩ nê mẽ panê ty nhũm Tĩrtũm ja hã omunh xã hkôt ra mẽ pahte amnhĩ kaxyw hkôt pajamaxpêr xwýnhjaja te mẽ pahte aa tanhmã amnhĩ tomnuj to hkêt pyrãk o mẽ panhĩpêx. Na hte amarĩ ã mẽ panhĩpêx anê.

Nê Atãw kot amnhĩ tomnuj mýrapê na htem piitã ri pa nê tanhmã amnhĩ to nê ty rý ri pa nê gaa nê wejre nê ty. No na pre Jejus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwýr xwýnhjê kutã nojarêr rãhã nê mẽ pakukamã hamaxpêr o:

—Nã mẽ kot Ixkra hkôt amnhĩ xunhwýr xwýnhjaja na pa mẽ omunh pa. Tã kot paj Ixkrata kukwak ri tãm mẽ unhwý nhũm mẽ nhýrmã wa ixri mex nê htĩr tũm nê pa ho pa. Anê.

20-21 Nê na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. Hãmri nê mẽ kot kapêr mar nê hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma nê amnhĩ xõ ri mẽ kãm hã kagã nê mẽ kãm harênh o ri mẽ hkôt pa. No nhũm prem kapêr ma nê ãm kuma nê hkwým pix mã ri tanhmã amnhĩ tomnuj to ho pa. Nê pika piitã hkôt ja arĩ rãhãã. Ja mýrapê koja mẽ nhýrmã ty nê ma mẽ kot amnhĩ xã htýx kamã hamak

tũm xàta wỳr ma pa. Nom Tĩrtũm arĩ kãm pika piitã hkõt mẽ papa xwỳnhjê japê nê. Mẽ pahte amnhĩ tomnuj o papa tã nhũm kãm mẽ pahto mex prãm nê. Jakamã na pre mẽ pahwỳr Kra Jejus Kris mẽ nhũm mẽ pahwỳr wrỳ. Mẽ panê htyk o kot mẽ pahte amnhĩ tomnuj pãnhã amnhĩrer kaxyw. Tã kukwak ri kot puj mẽ pahte amnhĩ kaxyw hkõt pajamexpêr xwỳnhjaja nhỹrmã Tĩrtũm mẽ wa kuri pahĩr tũm nê pa mex nê papa ho papa.

6

Mẽ kot mẽ pahkrã kumrãr ã mẽ harênh Sikũn Korĩt 5.17; Karatas 2.19-20, 5.24, 6.14; Epes 4.17-24; Korosê 3.1-11; Wam Pêtre 4.1-6

¹ Nê mẽ pahte arĩ tũhã tanhmã amnhĩ tomnuj to htã nhũm Tĩrtũm arĩ kãm mẽ pajapê nê. Nê arĩ mẽ pakutã nojarêt rãhã nê. Jakamã xà kot kaj mẽ atõ ã harênh anhỹrja ma nê atỳx ri ã ajamexpêr anê nê ajamexpêr o:

—Nà Tĩrtũm kãm ijapê nê kot ixkutã nojarêt rãhã ho ri pa jakamã mo kaxyw kot pa Jejus kõt amnhĩ nhĩpêx o ri ixpa? Nà kot paj ho anhỹr kêt nê. Anê.

Ka ã mẽ atõ atỳx ri ajamexpêr anhỹr japêr. Kwa xà ajamexpêrja mex? Nà mex kêt.

² ã ajamexpêr anhỹrja mẽ hamexpêr mex xà hkõt kêt. Ra mẽ pahte Jejus kõt amnhĩ xunhwỳr nê mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyrãk. Jakamã kot puj mẽ arĩ tanhmã amnhĩ tomnuj to ho ri papa hkêt nê.

³ Mẽmo kaxyw na htem Tĩrtũm mã mẽ pahkrã kumrã? Nà mẽ pahte ra Jejus kõt amnhĩ xunhwỳr ã amnhĩ to amnhĩrĩt kaxyw. Te Jejus htyk nhũm mẽ pahte amnhĩ tomnujja haxwỳja hkõt htyk nê hapêx par pyrãk o amnhĩrĩt kaxyw. Jakamã na pu htem pajamexpêr o:

—Nà kot paj axte tanhmã amnhĩ tomnuj to ho ri ixpa hkêt nê. Anê.

⁴ Na htem Tĩrtũm mã gõx kãm mẽ pahkrã kumrã nhũm mẽ pahte amnhĩ nhĩpêx tũmja te mẽ kot Jejus kõt haxwỳja haxàr pyrãk. Hãmri nhũm mẽ akupỳm mẽ pahto api.

Te Tĩrtũm hihtỳx o hihtỳx o kot akupỳm Kra Jejus ho htĩr pyrãk. Te mẽ pahtyk tã nhũm akupỳm kot mẽ pahto mẽ pahĩr pyrãk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw.

⁵ Nhũm mẽ pahte amnhĩ nhĩpêx tũmja te Jejus kõt htyk nê hapêx par pyrãk. Nê mẽ pahte amnhĩ nhĩpêx nywja te Jejus akupỳm htĩr pyrãk o amnhĩ nhĩpêx.

⁶ Amnepêm na pu pre htem amnhĩ tomnuj rãhã ho ri papa. Te mẽ kãm mẽ àpênh xwỳnhjaja kot mẽ õ patrãw mã àpênh rãhãta pyrãk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nê ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamexpêr punujja te pĩ kahpa hã Jejus kõt harir nê htyk nê hapêx par pyrãk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nê mẽ pajamexpêr nyw pix o pajamexpêr papa kaxyw.

⁷ Na hte mẽ htyk xwỳnhjaja axte tanhmã amnhĩ tomnuj to hkêt nê. Tã kêt pu mẽ urãk nê axte ã amnhĩ nhĩpêx anhỹr kêt nê.

⁸ Na pu prem Jejus kot mẽ panê htyk ã harênh ma nê pajamexpêr o:

—Nà ra Jejus kot mẽ panê htyk jakamã kot paj ixte amnhĩ nhĩpêx tũm kaga hpa nê hpãnhã kot amnhĩ nhĩpêx kõt pix mã ri amnhĩ nhĩpêx o ri ixpa. Te ra ixtyk nê axte tanhmã ixte amnhĩ tomnuj to ho ri ixpa hkêt pyrãk. Jao amnhĩ nhĩpêx nyw pix o amnhĩ nhĩpêx o ri ixpa. Anê.

⁹ Nê Jejus htyk nhũm Tĩrtũm akupỳm ho htĩr jakamã koja axte htyk kêt nê. Ra mẽ pahte ja mar mex.

¹⁰ Na pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupỳm htĩr o htĩr nê kaxkwa kamã Tĩrtũm mã tanhmã amnhĩ nhĩpêx to ho ri pa.

¹¹ Tã mẽ papajaja kot puj mẽ ã kot amnhĩ nhĩpêx anhỹrja ma nê ã pajamexpêr anê nê pajamexpêr o:

—Nà ãm hãmri. Te ixte Jejus pyrã nê ra ixtyk pyrãk jakamã kot paj axte amnhĩ tomnuj o ri ixpa hkêt nê. Te ixte Jejus pyrã nê akupỳm ixtĩr nê ãm Tĩrtũm kõt pix mã amnhĩ nhĩpêx o ri ixpata pyrãk o kot paj hpãnhã amnhĩ nhĩpêx o ri ixpa. Anê.

¹² Jakamã kot ka mẽ atõ nhÿrmã tanhmã amnhĩ kukamã ajamaxpêr punuj to japêr hãmri nê ajamaxpêr o:

—Nà inhmã ã amnhĩ tomnuj anhÿr prãm nê. Omnuj tã kot paj ho anê. Nà ixte ho anhÿr mã kênã.

Anhÿr o ajamaxpêr japêr tã kwa mẽ ã ajamaxpêr anhÿr kêt nê.

¹³ Kêt Tĩrtũm mã mãn amnhĩ gõ nê hkõt amnhĩ nhĩpêx o ri apa. Hãmri nê amnhĩ krã kamã mẽmoj mex pix mã ajamaxpêr nê tãm akapêr. Nê mẽ kot amnhĩ to mex xwÿnhjê kõt pix mã mãn ri apa.

Na ka pre htem akapêr punuj nê.

Nê ajamaxpêr punuj nê.

Nê mẽ kot amnhĩ tomnuj o mẽ pa xwÿnhjê hkõt ri apa.

Nê kagôxÿhti japrô nê ho akõm o ri mẽ hkõt apa.

Tã ra hpãnhã Tĩrtũm mã amnhĩ gõ nê axte ã amnhĩ nhĩpêx anhÿr kêt nê.

¹⁴ Amnepêm na pu prem tanhmã mẽ pahte amnhĩ nhĩpêx to ho papa hkukamã pajamaxpêr nê pajamaxpêr o:

—Nà kot paj Tĩrtũm kapêr kõt pix mã mãn ri amnhĩ nhĩpêx o ri ixpa nê amnhĩ to mex o ri ixpa nhũm Tĩrtũm ja hã ixpumu nê amnhĩm inhmex ã ijarê. Nà kot paj anê.

Anhÿr tã no ãm tee ri mẽ pamã hkõt amnhĩ nhĩpêx o ri papa hprãm kaprÿ nê arĩ ri kapêr kwÿm tanhmã amnhĩ nhĩpêx to ho ri papa. Tã ra hpãnhã axtem pajamaxpêr o:

—Nà Tĩrtũm kot ixkutã nojarêt rãhã ho pa xwÿnh. Tã ra ixte hkõt amnhĩ xãm jakamã koja tanhmã ixto pa hkõt amnhĩ nhĩpêx mex o ri ixpa. Nà koja ixto anê.

Anhÿr jakamã ra amnhĩ kaxyw kãm pajamaxpêr tÿx o mẽmoj punuj kutã amnhĩ to htÿx nê.

Mẽ pahte Tĩrtũm mã tanhmã amnhĩ nhĩpêx to hã mẽ pajarênh

Juãw 8.34

¹⁵ Tã ã kot anhÿr jakamã tanhmã kot paj wem pajamaxpêr to? Xà kot pu mẽ ã pajamaxpêr anê nê pajamaxpêr o:

—Nà na hte Tĩrtũmja ixte kapêr kõt amnhĩ nhĩpêx o ixpa hã ixpumunh kõt amnhĩm inhmex ã ijarênh kêt nê. ãm kêp ixkutã nojarêt rãhã nê amarĩ amnhĩm inhmex ã

ijarênh xwÿnh jakamã kot paj arĩ amnhĩ tomnuj rãhã nê aa ja kaga hkêt nê.

Anhÿr o kot paj mẽ pajamaxpêr? Nà kot paj mẽ ã pajamaxpêr anhÿr kêt nê. ã mẽ pajamaxpêr anhÿrja mex kêt.

¹⁶ Koja mẽhõ nhÿri kot amnhĩ tomnuj tÿx xwÿnhjê hõ pumu nê kãm amnhĩ jarênh japêr nê kãm:

—E inhma. Kot paj ãm akõt pix mã tanhmã amnhĩ nhĩpêx to ho ri ixpa. Jakamã e inhmã mẽmoj tã karõ pa ama nê amã tanhmã ho ho ri ixpa.

Anhÿr o kãm kapêr japêr. Hãmri nê ã amnhĩ nhĩpêx anhÿr tã amnhĩ tomnuj pix o ri pa. Tã ã mẽ kot amnhĩ nhĩpêx anhÿr o mẽ pa xwÿnhjaja koja nhÿrmã ty hãmri mẽ kot amnhĩ xà htÿx kamã hamak tũm xàta wÿr ma hapêx.

No koja mẽhõ Tĩrtũm mã amnhĩ jarênh nê kãm:

—Pa Tĩrtũm. E kot paj ãm akapêr kõt pix mã ri amnhĩ nhĩpêx o ri ixpa.

Anhÿr o kãm amnhĩ jarê nê hkõt amnhĩ nhĩpêx mex o pa. Nê tãm amnhĩ nhĩpêx o ri pa. Hãmri nê nhÿrmã ty nê ma õ krĩ hwÿr api nê Jejus mẽ Tĩrtũm wa kuri htĩr tũm nê mex rãhã nê pa ho pa.

¹⁷ Tã mẽ kajaja na ka xep prem tee ri mẽ amã mẽ ate amnhĩ tomnuj mã anhÿrer prãm tã nhũm te tãm kot amnhĩ tã mẽ ato htÿx pyrãk o mẽ anhĩpêx ka mẽ tee ri kãm anhÿrer prãm kaprÿ. Tã nhũm Tĩrtũm tanhmã mẽ akrã hto ka mẽ kapêr ma nê amnhĩ kaxyw hkõt ajamaxpêr tÿx nê ãm hkõt pix mã amnhĩ nhĩpêx. Pa ja hã mẽ ajarênh ma nê mẽ anhÿ hã ixkĩnh nê. Nê Tĩrtũm mã ixte mẽ ajarênh mar nê mẽ anhÿ hã ixkĩnh ã amnhĩ jarê.

¹⁸ Na pre Tĩrtũm tanhmã mẽ akrã hto ka mẽ amnhĩ tomnuj mã anhÿrer pa nê hpãnhã hkõt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarênh to. Te ixte ixkrajê jahkre pyrãk o kot paj mẽ amã awjarê. Nà amnepêm na ka prem ajamaxpêr punuj kõt amnhĩ tomnuj o ri apa. Nê gaa nê ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhÿr kêt nê. Pãnhã tãm ri ajamaxpêr o ri apa. Jao gaa nê ra Tĩrtũm

kãm hprãm xà hkôt tãm amnhĩ nhĩpêx mex nê.

²⁰ Na ka prem tee ri amã amnhĩ tomnuj mã anhũrer prãm kaprÿ. Te tãm kot amnhĩ tã mẽ ato htÿx nê amnhĩ kôt mẽ ato pa pyræk o mẽ anhĩpêx.

²¹ Xàn ka prem ã amnhĩ tomnuj anhÿr o apa nê akĩnh nê ajamakêtkati nê ri apa? Nà na ka prem akĩnh nê apa hkêt nê. Tã na ka prem Jejus kôt amnhĩ xunhwÿ nê tee ri ate tanhmã amnhĩ tomnuj to hã amnhĩ pumu nê akaprĩ nê apijaàm nê. ã mẽ kot amnhĩ tomnuj anhÿr o pa xwÿnhjaja na htem ja mÿrapê ty nê ma mẽ kot amnhĩ xà htÿx kamã hamak tũm xàta wÿr pa.

²² No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htÿx nê amnhĩ kôt mẽ ato pa pyræk ka mẽ ra ãm hkôt pix mã amnhĩ nhĩpêx mex o ri apa. Nê hpãnhã amã kapêr kôt pix mã amnhĩ nhĩpêx mex prãm. Nê hkôt pix mã amnhĩ nhĩpêx hprãm. Jakamã kot kaj mẽ nhÿrmã kuri amex kumrêx nê atĩr tũm nê ri apa ho apa.

²³ Na hte mẽ kãm àpênh o ri mẽ pa xwÿnhjaja mẽ kãm mẽmoj tã apê nê àpênh pa nê hpãnhã amnhĩrer xà jamÿ. Ja pyrã nê koja mẽ kot amnhĩ tomnuj xwÿnhjaja nhÿrmã ty hãmri nê ma mẽ kot amnhĩ xà htÿx kamã hamak tũm xàta wÿr ma pa.

No mẽ pahte amnhĩ kaxyw Jejus Kris kôt pajamaxpêr xwÿnhjaja na hte Tĩrtũm ja hã mẽ pahpumu nê mẽ pajarênh o:

—Nà ãm hãmri. Jajaja koja nhÿrmã Ixkra mẽ wa Ixkuri mex kumrêx nê htĩr tũm nê pa ho pa. Hêxta waa nê. Nà ãm hãmri koja mẽ anê. Anê.

Xà tãm mẽ pahte amnhĩ nhĩpêx ã mẽ pahpumunh kôt na hte ã mẽ pajarênh anê? Nà ãm mẽ pahte Kra Jejus Kris kôt amnhĩ xunhwÿr ã mẽ pahpumunh kôt pix mã na hte ã mẽ pajarênh anê.

7

Mẽ pahte amnhĩ tomnuj kot axte amnhĩ tã mẽ pahto htÿx kêt ã harênh

Rômân 8.2, 10.4; Karatas 4.1; Epes 2.2; Korosê 3.7

¹ E Jejus kôt ixkwÿjaja. Nà Tĩrtũm kot mẽ pakaxyw tanhmã Mojes mã kapêr tota na

ka mẽ ra mar tÿx nê. Na pu htem kormã pahĩr ri hkôt amnhĩ nhĩpêx o ri papa. Tã ty hãmri nê axte hkôt amnhĩ nhĩpêx kêt nê. Ra mẽ ate ja mar tÿx. E pa mẽ amã ja hã ejêp jarê ka mẽ inhma.

² Nà finat Mojes kot Tĩrtũm nhÿ hã mênijaja kot tanhmã amnhĩ nhĩpêx to ho pa hã mẽ kãm karõja. Koja mẽhõ ho mjên hãmri nê ãm kôt pix mã ri pa ho pa nê aa hkaga hkêt nê. No koja nhÿrmã mjên kêp ty nhũm ahte ri pa. Hãmri nê kãm axte mẽhõ ho mjên prãm nê mãmrĩ axte mẽhõ ho mjên. Ja tanhmã kute hkêt.

³ Nom koja wam mjên arĩ htĩr japêr nhũm hprõ tanhmã hamaxpêr to nê hkaga nê hpãnhã nhãm mẽhõ ho mjên. Hã koja Tĩrtũm pê ja homnuj nê. Nom koja mjên ra kêp ty nhũm mÿrpê axte kãm mẽhõ ho mjên prãm nê mãmrĩ ho mjên. Ja na Tĩrtũm pê homnuj kêt. Ra wam mjênja htyk kênã. ã Tĩrtũm kot Mojes mã mẽ pakaxyw mẽmoj tã karõ kot anhÿr.

⁴ Tã ja pyrã nê na pu prem amnepêm pajamaxpêr o:

—Ixte Tĩrtũm kapêr kôt pix mã amnhĩ nhĩpêx o ri ixpa jakamã nhũm Tĩrtũm ja hã ixpumu nê amnhĩm inhmex ã ijarê. Anê.

Tã pu mẽ ra tanhmã pajamaxpêr to nê hpãnhã pajamaxpêr õ ho pajamaxpêr o:

—Nà na xep hte Tĩrtũm mẽ ixte kapêr kôt amnhĩ nhĩpêx ã mẽ ixpumunh kôt amnhĩm mẽ inhmex xwÿnh ã mẽ ijarênh kêt nê. Mẽ ixte hkôt amnhĩ nhĩpêx mex o ri ixpare hã. Kêt ãm Kris kot mẽ inhnê htyk nhũm mẽ ixte amnhĩ kaxyw hkôt ijamaxpêr nê hkôt amnhĩ xunhwÿr pix ã mẽ ixpumunh kôt na hte mẽ inhmex ã mẽ ijarê. ãm ja pix ã mẽ ixpumunh kôt na hte mẽ ixto hkra nê mẽ ixkutã nojarêt o pa. Kra Jejus pix kukwak ri na hte ã mẽ inhĩpêx anhÿr o pa. Anê.

ã mẽ pajamaxpêr nyw kot anhÿr. Jakamã te mẽ pahte mẽhõ kot mjên nyw xwÿnh gryk ã axte mjên htyk xwÿnh mã hamaxpêr kêeta pyræk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nê Tĩrtũm noo mã tãm ri amnhĩ nhĩpêx. Nê axte mẽ pahte amnhĩ tomnuj kukamã tanhmã pajamaxpêr to hkêt nê.

⁵ Nē amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tĩrtũm kapêr mar tỳx tã kuma nê ãm kuma nê ri papa nê ri hkôt amnhĩ nhĩpêx kêt nê. Mỳrapê nhũm Tĩrtũm tee ri ja hã mẽ pahpumu nê mẽ pahtyk nê ma mẽ kot amnhĩ xà htỳx kamã hamak tũm xà hwỳr papa mã xwỳnhjê hã mẽ pajarê.

⁶ Nē amnepê na pu pre htem ã pajamaxpêr anhỳr o:

—Nà kot paj Tĩrtũm kapêr kôt pix mã amnhĩ nhĩpêx o ri ixpa nhũm amnhĩ tã ixpumu nê ixte amnhĩ tomnuj kêt xwỳnh ã ijarê.

Anhỳr o pajamaxpêr no ãm tee ri ã pajamaxpêr anhỳr kaprỳ. Nê arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyrãk o amnhĩ nhĩpêx nê hpãnhã Karõ nhỹ hã tãm amnhĩ nhĩpêx. Jao ra tee ri mẽ pamã Tĩrtũm kapêr kôt amnhĩ nhĩpêx prãm kaprỳ hkêt nê. Ra Tĩrtũm Karõ nhỹ hã amnhĩ nhĩpêx nyw o amnhĩ nhĩpêx mex o ri papa.

Tĩrtũm kapêr ã kagà htũm kot tanhmã mẽ pajarênh to

Römân 3.20, 5.20; Karatas 3.23-24

⁷ Tã Tĩrtũm mẽ pahte kapêr kôt ri amnhĩ nhĩpêx ã mẽ pahpumunh kôt amnhĩm mẽ pamex ã mẽ pajarênh kêt jakamã mẽmo kaxyw na kapêr ã kagà htũmja? Nà mẽ pahte mar nê pahprĩ hã Tĩrtũm noo mã mẽ kot amnhĩ tomnuj xà jarênh mar nê omunh mex kaxyw na. Na hte mẽ pahkwỳjê kukrêx kĩnh o pamã ho panhõ hprãm nê mẽ pamã karõ. ã kot mẽmoj punuj piitã nê mẽ pamã karõ kot anhỳr. Tã mẽ pahte ja mar kêt ronhỳx pu mẽ Tĩrtũm kêp ja homnuj ã harênh mar kêt nê.

⁸ Tã ra mẽ pahte harênh mar nê kêp ja homnuj ã harênh ma. Mẽ pamã axpên kukrêx kĩnh o ho pamã panhõ hprãmja mããnên kêp ja homnuj ã harênh mar tã nom aa hkaga hkêt nê arĩ pamã axpên kukrêx kĩnh o pamã ho panhõ hprãm tỳx rãhã ho ri papa. Kop ãm Tĩrtũm kapêr kêt ronhỳx pu mẽ kot amnhĩ tomnuj xàja aa mar kêt kumrêx nhũm te mẽ pamã am-rakati pyrãk.

⁹ Amnepê mã ixte Tĩrtũm kapêr mar kêt ri na pa pre ixtỳx ri amnhĩ kukamã ijamaxpêr o ri ixpa nê ijamaxpêr o:

—E kot paj nhỹrmã Tĩrtũm ri ixtĩr tũm nê inhmex nê ixpa ho ixpa.

Anhỳr tã hpãnhã pamã axpên kukrêx kĩnh o ho pamã panhõ hprãm nê kapêrta ma nê ja hã amnhĩ pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

—Hêxta waa nê. Nà ã ixte amnhĩ nhĩpêx anhỳr o ixpa jakamã kot paj nhỹrmã ty nhũm Tĩrtũm akupỳm ixto ixtĩr pa kuri ixtĩr tũm nê ixpa ho ixpa hkêt nê. Hêxta waa nê. Ixte amnhĩ tomnuj xwỳnh na pa. Kot paj nhỹrmã ty nhũm Tĩrtũm ma mẽ kot amnhĩ xà htỳx kamã hamak tũm xàta wỳr amnhĩ nê inhmẽ. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixpa.

¹⁰ Tã hpãnhã axtem ijamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa hãmri nê nhỹrmã ixtyk tã hwỳr api nê kuri ixtĩr tũm nê inhmex nê ixpa ho ixpa. Nà kot paj anê.

Anhỳr ã ijamaxpêr tã no ãm tee ri inhmã hkôt amnhĩ nhĩpêx o ixpa hprãm kaprỳ. Na pa pre xatã kapêr nhĩrõp ixkuhê nê tee ri ja hã amnhĩ pumu nê ijamaxpêr o:

—Kwa tanhmã kot pa amnhĩ nhĩpêx to nê ãm Tĩrtũm kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhỳr prãm tỳx kaprỳ. ãm ixte amnhĩ tomnuj pix o ri ixpa xwỳnh jakamã ãm hãmri koja amnhĩ nê kuwyta wỳr inhmẽ. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mẽhõ koja Tĩrtũm kapêr kôt amnhĩ nhĩpêx mex o ri pa? Na pu htem pahpiitã tee ri pamã ho anhỳr prãm kaprỳ. Mẽ pahpê hihtỳx kumrêx jakamã na pa pre ixtỳx ixte Tĩrtũm kuri ixtĩr tũm nê ri ixpa hã amnhĩ kukamã amnhĩ jarênh kaprỳ. ãm xatã kapêr nhĩrõp ixkuhê nê amnhĩ tomnuj pix o ri ixpaja mỳrapê koja mẽ kot amnhĩ xà htỳx kamã hamak tũm xàta wỳr amnhĩ nê inhmẽ.

¹² Kot anhỳr tã tanhmã kot puj mẽ Tĩrtũm kapêr ã kagà htũmta jarênh to? Nà kot mẽ

pamã mẽ pahte amnhĩ nhĩpêx ã karõta mex kumrêx. Mex o mex.

¹³ Mex kumrêx tâ na htem kuma nê tee ri kãm hkõt amnhĩ nhĩpêx hprãm kaprÿ. Jao nhÿrmã ty nê ma kuwy hwÿr pa. Kêt pa na pa pre ra mar nê omunh mex tâ hkõt amnhĩ nhĩpêx mex kêt nê. Jao ra ixte amnhĩ tomnuj xwÿnh ã amnhĩ pumu. Na pa pre tee ri inhmã hkõt amnhĩ nhĩpêx o ri ixpa hprãm tâ no ãm xatã kapêr nhĩrôp ixkuhê nê hkwÿm ri amnhĩ nhĩpêx rãhã ho ri ixpa. Tã ra tee ri ja hã amnhĩ pumu nê amnhĩ kukamã ijamaxpêr o:

—Nà na pa hte ãm tee ri inhmã Tirtũm kõt amnhĩ nhĩpêx prãm kaprÿ no ãm ho anhÿr kêt nê. ãm ixte amnhĩ tomnuj pix o ixpa xwÿnh na pa. Ja mÿrapê koja Tirtũm amnhĩ nê ma kuwy hwÿr inhmê. Nà koja ixto anê. Anê.

Mẽ pahte mẽ pamã amnhĩ tomnuj kaga hprãm kaprÿ hã mẽ pajarênh

Karatas 5.17

¹⁴ Nê Tirtũm kapêr ã kagã htũmta Tirtũm kapêr na. Nê Tirtũm kĩnhã ãm inhĩ pix na pa ri ixpa jakamã tanhmã kot pa amnhĩ to nê kapêr kõt ri amnhĩ nhĩpêx mex o ri ixpa?

¹⁵ Inhmã tãm ixte amnhĩ nhĩpêx prãm tâ no ãm amnhĩ tomnuj pix o ri ixpa. Mẽmoj ixpê omnuj tâ pa hte ra hkõt tanhmã amnhĩ tomnuj to ho ri ixpa. Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhÿr o ri ixpa? Mẽmoj ixpê omnuj nhũm inhmã ho anhÿr prãm kêt tâ ra ho anê. Nhũm mẽmoj mex nhũm inhmã ho anhÿr prãm tâ ho anhÿr kêt nê. Mon pa hte axtem nê ã amnhĩ nhĩpêx anhÿr o ri ixpa? Anê.

¹⁶ ã ixte amnhĩ nhĩpêx anhÿr o ri ixpa htã ra Tirtũm kapêr mexta ma hãmri nê ra ijamaxpêr o:

—Nà Tirtũm kapêrja mex kumrêx tâ pa tee ri inhmã hkõt amnhĩ nhĩpêx mex hprãm kaprÿ ho ri ixpa. Hêxta waa nê. Anê.

¹⁷ Inhmã amnhĩ tomnuj prãm kêt tâ arĩ ixkaxwÿnh kãm ijamaxpêr punuj nhÿ hã ã amnhĩ nhĩpêx anhÿr o ri ixpa.

¹⁸ Nê inhmã tãm amnhĩ nhĩpêx prãm tâ no ãm tee ri ã inhmã amnhĩ nhĩpêx anhÿr

prãm kaprÿ. Tanhmã kot pa amnhĩ to nê tãm amnhĩ nhĩpêx o ri ixpa? Na pa tee ri inhmã ja ho anhÿr prãm kaprÿ. Ixte amnhĩ tomnuj xwÿnh na pa. Nê aa ixte amnhĩ to mex kêt kumrêx xwÿnh.

¹⁹ Inhmã mẽmoj mex kõt pix mã amnhĩ nhĩpêx prãm tâ no ãm ã amnhĩ nhĩpêx anhÿr kêt nê. Nê ãm hkwÿm ri tanhmã amnhĩ tomnuj to ho ri ixpa. Mẽmoj ixpê omnuj tâ pa hkõt amnhĩ nhĩpêx o ri ixpa.

²⁰ Ixte Tirtũm kapêr kõt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mẽmoj ixpê omnuj pa inhmã ho anhÿr prãm kêt tâ ra hkõt amnhĩ nhĩpêx. Ixte Tirtũm kapêr kõt amnhĩ nhĩpêx kêt jakamã ã amnhĩ nhĩpêx anhÿr o ri ixpa.

²¹ Nê mẽmoj mex nhũm inhmã hkõt amnhĩ nhĩpêx prãm tâ ra hkwÿm ri amnhĩ nhĩpêx. ã ixte amnhĩ nhĩpêx anhÿr xwÿnh na pa.

²² Nê inhmã Tirtũm kapêr mar nê hkõt ri amnhĩ nhĩpêx prãm tâ

²³ nom ixte amnhĩ tomnuj xwÿnh jakamã hkõt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa.

Anhÿr tâ no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwÿnh jakamã na pa hte ã amnhĩ nhĩpêx anhÿr rãhã ho ri ixpa nê tee ri inhmã amnhĩ tomnuj kaga hprãm kaprÿ.

²⁴ Hêxta waa nê. Na pa ixkaprĩ htÿx nê ri ixpa. ã ixte amnhĩ nhĩpêx anhÿr o ri ixpaja mÿrapê kot paj nhÿrmã ty nê ma mẽ kot amnhĩ xã htÿx kamã hamak tũm xãta wÿr ma mō. Mēhō kot tanhmã ixkrã hto pa ã amnhĩ nhĩpêx anhÿrja kaga?

²⁵ Nà mẽ panhō Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihÿtÿx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri ixpa nê Tirtũm mã kãm:

—Pa Tirtũm. Nà ãm hãmri amex o amex. Anê.

Tã ra ixte Jejus Kris kõt amnhĩ xãm jakamã koja tãm tanhmã ixto ixihÿtÿx to pa rĩ kormã Tirtũm kapêr kõt amnhĩ nhĩpêx mex o ri ixpa. No kot pa pam amnhĩ krã

hkôt amnhĩ tomnuj rãhã ho ri ixpa. ã ixte anhÿr xwÿnh na pa.

8

Tĩrtũm Karõ kot mẽ pahto tãm mẽ pahte amnhĩ nhĩpêx xwÿnh ã harênh

Karatas 5.16-26

¹ Nê Jejus Kris kêp mẽmoj punuj kutã mẽ pahto mẽ paxihtÿx xwÿnh jakamã mẽ pahte hkôt amnhĩ xunhwÿr xwÿnhjaja na pu htem ÿ hã amnhĩ tomnuj o ri papa hkêt nê. Jao mẽ pahte kuwy hwÿr papa mã xwÿnh kêt.

² Te ra mẽ pahtyk nhũm Tĩrtũm kot akupÿm mẽ pahto mẽ pahtĩr pyrãk jakamã nhũm Karõja mẽ pahkarõ mã agjê pu mẽ ÿ hã tãm amnhĩ nhĩpêx o ri papa. Te tãm kot amnhĩ nhĩpêx pyrãk o amnhĩ nhĩpêx nhũm Karõ mẽmoj punuj piitã kutã mẽ pahto mẽ paxihtÿx. Kêp mẽ pajamãxpêr punuj kutã mẽ pahto mẽ paxihtÿx xwÿnh jakamã kot puj mẽ nhÿrmã mẽ kot amnhĩ xà htÿx kamã hamak tũm xàta wÿr papa hkêt nê.

³ Nom kormã mẽ pahte Jejus kôt amnhĩ xunhwÿr kêt ri na pu prem tee ri pamã Tĩrtũm kapêr piitã hkôt amnhĩ nhĩpêx prãm kaprÿ nhũm mẽ pahpê hihtÿx kumrêx. Jakamã tanhmã koja Tĩrtũm amnhĩ to nê amnhĩ mã mẽ pamek xwÿnh ã mẽ pajarê? Na pre tee ri amnhĩ tã mẽ pajamã hãmri nê mẽ pahwÿr Kraja mẽ nhũm man mẽ pahwÿr wrÿ nê mẽ pahpyrà nê ï ho mẽ pakamã kato. Nom mẽ parom aa tanhmã amnhĩ tomnuj to hkêt kumrêx nê ri pa. Tã mẽ kot hpĩr tã nhũm amarĩ htyk kêt nê. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamãxpêr punuj kutã mẽ pahto paxihtÿx xwÿnh. Na pu htem hkôt amnhĩ xunhwÿ hãmri nê kukwak ri amnhĩ tomnuj o ri papa hkêt nê.

⁴ Pãnhã Tĩrtũm kot amnhĩ nhĩpêx kôt amnhĩ nhĩpêx o ri papa nê axte mẽ pahte amnhĩ nhĩpêx tũm kôt amnhĩ nhĩpêx kêt nê. Hãmri hpãnhã Tĩrtũm Karõ kot amnhĩ nhĩpêx kôt pix mã amnhĩ nhĩpêx. Nê hamãxpêr kôt pix mã pajamãxpêr. Ja kaxyw na pre Tĩrtũm mẽ pahwÿr Kraja mẽ nhũm wrÿ nê mẽ pahpiitã mẽ panê ty.

⁵ Nê mẽ kot amnhĩ krã hkôt tanhmã amnhĩ nhĩpêx to ho ri mẽ pa xwÿnhjaja na htem htÿx ri tanhmã hamãxpêr to xà hkôt amnhĩ nhĩpêx o ri pa. No kêt Tĩrtũm Karõ kot mẽ pahkarõ mã gjêx xwÿnhjaja na pu htem mẽ kurom te Jejus jamãxpêr pyrãk o pajamãxpêr o papa.

⁶ Nê mẽ kot amnhĩ krã hkôt amnhĩ nhĩpêx xwÿnhjaja koja mẽ nhÿrmã ty nê ma kuwy hwÿr pa nê kamã pa ho pa. No mẽ pahte Tĩrtũm Karõ hkôt amnhĩ nhĩpêx xwÿnhjaja kot puj mẽ pajamãxpêr nyw o pajamãxpêr nê amnhĩ nhĩpêx nyw o amnhĩ nhĩpêx. Jao paxãmnhĩx ri pajamakêtkati nê ri papa. Nê nhÿrmã ty hãmri nê Tĩrtũm mẽ Jejus wa kuri akupÿm pahtĩr tũm nê pamek kumrêx nê papa ho papa.

⁷ Nê mẽ kot amnhĩ krã hkôt ri amnhĩ nhĩpêx xwÿnhjaja kãm Tĩrtũm kĩnh kêt. Nê kãm kapêr mar prãm kêt jakamã tanhmã kot mẽ amnhĩ to nê hkôt amnhĩ nhĩpêx?

⁸ Koja mẽhõ amnhĩ krã hkôt kãm hprãm xà hkôt pix mã amnhĩ nhĩpêx hãmri nhũm Tĩrtũm tee ri ja hã omu nê hkĩnh kêt nê.

⁹ No mẽ papajaja na pu htem mẽ urãk nê ã amnhĩ nhĩpêx anhÿr kêt nê. Ra Tĩrtũm Karõ kot mẽ pahkarõ mã gjêx jakamã na pu htem hkôt pix mã amnhĩ nhĩpêx hprãm. No koja Tĩrtũm Karõ mẽhõ kaxwÿnh mã àr kêt nê nhũm kêp hkra hkêt nê.

¹⁰⁻¹¹ Tã mẽ papajaja. Mẽ pahte amnhĩ tomnuj mÿrapê koja mẽ pakrãhkãja nhÿrmã ty. No nhũm Tĩrtũm ra kot amnhĩ mẽ pahte amnhĩ to mex xwÿnh ã mẽ pajarênh nhũm Kris Karõ kot mẽ pahkarõ mã gjêx jakamã koja mẽ pahkarõja htyk kêt nê. Mẽ pakrãhkã pix koja ty nhũm mẽ pahkarõja ma kaxkwa hwÿr àpir kurê kumrêx. Tã nhũm nhÿrmã Tĩrtũm akupÿm mẽ pakrãhkã ho htĩr nê akupÿm mẽ pahkarõja mẽ pakrãhkãm hagjê pu mẽ wa kuri pahtĩr tũm nê papa ho papa.

¹² Jakamã e kwa ixkwÿjaja. Kêr pu mẽ axte ri mẽ pajamãxpêr tũm kôt amnhĩ nhĩpêx o ri papa hkêt nê.

¹³ Kot puj mẽ arĩ ã amnhĩ nhĩpêx anhÿr o ri papa hãmri nê nhÿrmã ty nê ma mẽ kot amnhĩ xà htÿx kamã hamak tũm xàta wÿr papa. Jakamã kêr pu mẽ mẽmo arĩgro hã pamã tanhmã amnhĩ tomnuj to hprãm hãmri nê amnhĩ kukamã pajamãxpêr o:

—Nà inhmã ã amnhĩ nhĩpêx anhÿr prãm tâ kot paj Tĩrtũm Karõ nhÿ hã ja kutã amnhĩ to htÿx nê ho anhÿr kêt nê. Anê.

Kot puj mẽ ã pajamaxpêr anê hãmri nê nhÿrmã kuwy wÿr papa hkêt nê. Pãnhã Tĩrtũm mẽ Jesus wa kuri pamex nê pahtĩr tũm nê ri papa ho papa.

¹⁴ Mẽ kot Tĩrtũm Karõ hkôt amnhĩ nhĩpêx xwÿnhjaja kêp Tĩrtũm kraa.

¹⁵ Nom amnepê m kormã mẽ pahte hkôt amnhĩ xunhwÿr kêt ri. Nê kormã mẽ pamã kapêr mar prãm kêt ri nhũm kot amnhĩ tâ mẽ pahpumunh nê tanhmã mẽ pahto pumaj na pu prem pamã uma ho ri papa. Tã hkôt amnhĩ xunhwÿ nhũm Karõja mẽ pahkarõ mã gjêx jakamã na pu htem ra pamã uma hkêt nê ri papa. Karõ kot mẽ pahpê Tĩrtũm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nê ri papa. Nê paxãmnhĩx pajamakêtkati nê kãm amnhĩ jarê nê kãm amnhĩ jarênh o:

—Pa Inhĩpêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ijamaxpêr. Anê.

Jao ra mẽ pamã uma hkêt nê ri papa.

¹⁶ Karõ kot mẽ pahkarõ mã gjêx nhũm mẽ pahte amnhĩ tâ omunh jakamã na pu htem pajamaxpêr o:

—Nà Tĩrtũm Karõ kot ixkarõ mã àr jakamã ixpê hkra na pa. Anê.

Nhÿrmã mẽmoj piitã akupÿm mex par ã harênh

Sikũn Korõt 4.16-18; Korosê 3.4; Wam Pêtre 4.13

¹⁷ Nê mẽ kãm Tĩrtũm prãm kêt xwÿnhjaja na htem te mẽ kot Tĩrtũm Kra Jesus nhĩpêx pyrãk o mẽ panhĩpêx pu mẽ pahpunuj nê ri papa. Nom kot puj mẽ nhÿrmã Tĩrtũm mex o mex xwÿnhja kuri pamex kumrêx nê papa. Mẽ pahpê hkra jakamã kot puj mẽ Kra Jesus pyrã nê õ krĩ kamã kuri pamex kumrêx nê ri papa ho papa.

¹⁸ Jar Jesus ã mẽ pahpunuj nê ri papa htã kot puj mẽ nhÿrmã kuri pamex kumrêx nê papa ho papa. Hãmri nê mẽ pamex o pamex ã amnhĩ pumu nê jar pika ja kamã tanhmã mẽ pahpunuj toja mã axte pajamaxpêr kêt kumrêx.

¹⁹ Nê pika hkôt Tĩrtũm kot mẽmoj ho kator xwÿnhjaja na htem Tĩrtũm kot mẽ pahto mex par jatur xãm mênh ã arĩgro jamãr rãhã ho pa. àk nê mry nê pĩ nê gô nê mẽmoj piitã mẽ pajamãr o pa. Te kot mẽ pakukamã hamaxpêr o:

—Kwa mẽmo arĩgro hã koja Tĩrtũm hkrajê piitã ho amnhĩrĩt nê mẽ ho mex par jatur xãm kumê pu mẽ ja hã mẽ omu? Hêxta waa nê. Inhmã tokyx ja hã mẽ omunh prãm tÿx. Koja tokyx ã mẽ hipêx anê pa ixkĩnh tÿx kumrêx.

Anhÿr o hamaxpêr pyrãk.

²⁰ Mẽmo kaxyw na hte mryja ã mẽ pakukamã hamaxpêr anê? Nà amnepê mã Tĩrtũm kot mẽmoj piitã ho katorta ã nhũm pre piitã mex o mex. Pĩ nê mry nê gô. Mẽmoj piitã mex kumrêx rãhã nê. Aa grã nê htyk kêt kumrêx. Tã Atãw kot amnhĩ tomnuj mÿrapê nhũm ra ÿ hã mẽmoj piitã homnu par jakamã na hte mẽmoj htĩr nê pa nê gaa nê ty nê hapêx. Nê mẽ pahpur kãm ahkagrõt punuj hapôj. Atãw kot amnhĩ tomnuj mÿrapê nhũm Tĩrtũm kapêr xà hkôt ã mẽmoj omnu hpar anê.

²¹ Nom koja arĩ rãhã ho rãhã hkêt nê. Koja nhÿrmã Tĩrtũm akupÿm mẽmoj piitã ho mex pa nhũm mex o mex nê axte grã rÿ axte htyk nê hapêx kêt nê. Nê axte omnu nê hikwÿ hkêt nê. Koja mẽ pahpyrà nê mex o mex. Jakamã na htem Tĩrtũm kot mẽ pahto mex par jatur xãm mênh xã hã arĩgro jamãr rãhã ho pa.

²² Te mēhõ ni hpijagri kaxyw õhy xã htÿx nê tokyx kãm hpijagri hprãm xaj àmra ho nõr pyrãk o amnhĩ nhĩpêx pẽ mẽ pahto mex jatur xãm mênh ã arĩgrotã jamãr o pa.

²³ Nê mẽ papajaja na pu htem tanhmã pahpunuj to nê jajê pyrã nê te amnhĩ kamnhêr o ri papa pyrãk. Rÿ tanhmã paxà kute nê ri papa. Rÿ pamã prãm nê paxà nê ri papa. Nê tanhmã mẽ pahpunuj to nê ri papa. Jao te pĩ nê gô nê mryja pyrã nê amnhĩ tâ Tĩrtũm kot mẽ pahto mex par jatur xãm mênh ã arĩgro jamãr rãhã ho ri papa.

Na pre Tĩrtũm mẽ pahwÿr Karõ rê nhũm mẽ pahkarõ mã agjê nê mẽ pakukamã Tĩrtũm tanhmã kot mẽ pahto mex to hã mẽ pamã ho amnhĩrĩt nê mẽ pamã ho amnhĩrĩt o:

—Koja nhÿrmã Tÿrtÿm mẽ ato mex par jatur xàm kumẽ nẽ mẽ piitã mẽ kãm mẽ apê hkra hã mẽ ato amnhÿrit. Hãmri nẽ mẽ amã mẽ anhÿ nyw gô ka mẽ axte axà nẽ ri apa nẽ atyk kêt nẽ. Hãmri nẽ Tÿrtÿm ri amex kumrêx nẽ ri apa ho apa. Nà kot kaj mẽ nhÿrmã ã amnhÿ nhÿpêx anẽ. Anẽ.

Á Tÿrtÿm Karõ kot mẽ pakukamã mẽ pajarênh anhÿr jakamã na pu htem amnhÿ tã kot mẽ pahto mex jatur xàm mênh pix jamãr o ri papa.

²⁴ Nom na kormã ã mẽ pahto mex anhÿr kêt nẽ. Kormã mẽ pamã mẽ panhÿ nyw nhõr kêt nẽ. Nom ra kot mẽ pahto hkra jakamã pu mẽ ja hã amnhÿ pumu nẽ pajamaxpêr o:

—Nà ra Tÿrtÿm kot ixto hkra jakamã koja nhÿrmã mãânên inhmã inhÿ nyw gô. Nà koja inhmã kugô.

²⁵ Anhÿr o pajamaxpêr tã kormã. Na pu htem kormã amnhÿ tã hamãr rãhã ho ri papa nẽ aa hkaga hkêt nẽ papa.

Mẽ pahte Tÿrtÿm Karõ nhÿ hã Tÿrtÿm mã amnhÿ jarênh

²⁶ Nẽ na pu htem Tÿrtÿm mã amnhÿ jarênh kaxyw nhÿm hte Karõja mẽ pahto ajuta pu mẽ ÿ hã pakatàt kôt kãm tanhmã amnhÿ jarênh to. No kot puj mẽ amnhÿ krã hkôt kãm amnhÿ jarênh mex kêt nẽ. Na pu htem ja kaxyw tee ri amnhÿ kukamã pajamaxpêr o:

—Kwa tanhmã kot pa Tÿrtÿm mã amnhÿ jarênh to? Tanhmã kot pa mẽmoj tã ixàhwÿr to rÿ amnhÿ to hwÿr to? Nà kot paj amnhÿ krã hkôt ja ho anhÿr mex kêt nẽ. Hêxta waa nẽ. Anẽ.

No nhÿm Tÿrtÿm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ÿ hã kãm amnhÿ jarênh mex nẽ pakatàt kôt mẽmoj tã kuwÿ. Te Karõja tanhmã mẽ pakute hã mẽ pahpumunh nẽ mẽ pakamã ukapri xàj tãm mẽ pahto hwÿr pyrãk.

²⁷ Jakamã pu mẽ ÿ hã tanhmã Tÿrtÿm mã amnhÿ jarênh to nhÿm mẽ pamar kurê kumrêx. Ra kot mẽ pajamaxpêr kôt mẽ pahpumunh par kênã. Nhÿm ra Karõ kot mẽ pahkarõ mã gjêx jakamã na pu htem kãm hprãm xà hkôt kãm amnhÿ jarẽ nẽ tanhmã amnhÿ to paxàhwÿr to.

Tÿrtÿm kot mẽ pamã mẽmoj piitã ho mex ã harênh

Rômân 8.37; Piripos 1.12; Wam Pêtre 5.10

²⁸ Nẽ mẽ pamã Tÿrtÿm kÿnh xwÿnhjaja. Tÿrtÿm kot mẽ pahto hkra xwÿnhjaja. Koja mẽmoj mẽ pakamã tanhmã amnhÿ to htã kêr pu mẽ ãm ja hã amnhÿ pumu nẽ tee ri amnhÿ kukamã pajamaxpêr kêt nẽ. Koja te mẽ pahpê omnuj pyrãk tã koja nhÿrmã hpãnhã mẽ pamã mex nẽ. Koja Tÿrtÿm nhÿrmã tanhmã mẽ pamã mẽmojta o mex to.

²⁹ Amnepê mã mẽmoj piitã hkêt ri na pre Tÿrtÿm mẽ pakukamã tanhmã mẽ pajarênh to nẽ mẽ pajarênh o:

—E kot paj nhÿrmã mẽ kot Ixkra Jejus kôt amnhÿ xunhwÿr xwÿnhjê ho ixkra jakamã nhÿm mẽ Jejus pyrã nẽ kêp ixkraa. Nẽ uràk nẽ ixkapêr kôt amnhÿ nhÿpêx o pa. Jao pa ra ixkra xohtô nẽ. Nà ja na inhmã hprãm. Anẽ.

³⁰ Tã pu htem pajapôj nẽ ri papa. Hãmri nẽ kapêr ma nẽ amnhÿ kaxyw Kra Jejus kôt pajamaxpêr nẽ hkôt amnhÿ xunhwÿ. Hãmri nhÿm Tÿrtÿm ja hã mẽ pahpumu nẽ pahto hkra nẽ amnhÿm mẽ pamex xwÿnh ã mẽ pajarẽ nẽ mẽ pahto mex nẽ. Nẽ te ho Kra Jejus nhÿpêx pyrãk o mẽ panhÿpêx. Jao nhÿrmã wa kuri mẽ pahfir tÿm nẽ papa ho papa mã xwÿnh ã mẽ pajarẽ.

Mêhõ kot Tÿrtÿm pê aa mẽ papytãr kêt ã harênh

Rômân 5.1

³¹ Tã ã Tÿrtÿm kãm mẽ pajapê nẽ mẽ pahto mex kot anhÿr. Á kot mẽ panhÿpêx mex anhÿr jakamã ra mẽ pahkôt pa ho pa rãhãã. Jakamã mêhõ koja ÿhkra pê mẽ pahpytã? Nẽ mêhõ koja tanhmã ri kêp mẽ pahto? Nà koja kêp mẽ papytãr rÿ tanhmã kêp mẽ pahto hkêt nẽ.

³² Tÿrtÿm kãm Kra Jejus japê htÿx tã na pre mẽ pahpê nẽ hkêt nẽ mẽ pahwÿr kumẽ. Te kot mẽ pamã òr pyrãk o hipêx nhÿm mẽ pahwÿr wrÿ nẽ mẽ panê ty. Tã ra Tÿrtÿm kot mẽ pamã òr jakamã koja mãânên kãm mẽ pahte Kra hkôt amnhÿ xunhwÿr xwÿnhjê japê nẽ mẽ pahto mex rãhã ho ri pa. Nà koja ã mẽ pahto mex anẽ.

³³ Jakamã mêhõ koja kãm mẽ pahte amnhÿ tomnuj xwÿnh ã mẽ pajarẽ? Ra tãm kot mẽ pahto hkra nẽ mẽ pahte amnhÿ

to mex xwÿnh ã mẽ pajarênh kênã kot kêt mēhō kām tanhmã mẽ pahto kapêr punuj to nhũm mẽ kuma. Koja mẽ tee ri kām tanhmã mẽ pahto kapêr to kaprÿ.

³⁴ Na pre ra Jejus Kris mẽ pahte amnhĩ tomnuj pãnhã amnhĩrer kaxyw mẽ panê ty nhũm Tĩrtũm akupÿm ho htĩr. Hãmri nhũm ma akupÿm kaxkwa hwÿr api nê Pahi Maati krĩ xà kamã Tĩrtũm nhĩhkô hã hkrĩ ho hkrĩ. Nê Tĩrtũm mã mẽ pakutã nojarêt rãhã ho kuri hkrĩ ho hkrĩ. Jakamã mēhō koja kēp mẽ kot amnhĩ xà htÿx kamã hamak tũm xàta wÿr mẽ pajano? Nà amrakati kumrêx.

³⁵ Nê Krisja kaxkwa kamã Tĩrtũm nhĩhkô hã hkrĩ ho hkrĩ htã mãânên jar mẽ pahkôt pa ho pa. Kãm mẽ pajapê htÿx jakamã kot puj mẽ tanhmã pahpunuj to htã nhũm arĩ kãm mẽ pajapê nê mẽ pahkôt pa ho pa.

Rÿ nhũm mẽ kot hkôt amnhĩ xunhwÿr kêt xwÿnhjaja tanhmã hã mẽ pahto htã nhũm arĩ kãm mẽ pajapê kamã mẽ pahkôt pa ho pa.

Rÿ mẽ pamã prãm nê ri papa. Rÿ mẽ paxê hkêt nê pamã kry nê ri papa htã nhũm arĩ kãm mẽ pajapê kamã mẽ pahkôt pa ho pa.

Rÿ ra mẽ kot hã mẽ panhĩmex kaxyw rÿ hã mẽ pahpar kumrêx. Tã nhũm arĩ kãm mẽ pajapê kamã mẽ pahkôt pa ho pa rãhã nê.

Kãm mẽ pajapê kamã mẽ pahkôt pa ho pa rãhã jakamã pu mẽ tee ri amnhĩ kukamã pajamexpêr kêt nê. ãm hkôt paxamnhĩx ri pajamakêtkati nê ri papa ho papa.

³⁶ Tĩrtũm kapêr ã kagã htũm te mẽ papajaja mẽ pahte kãm tanhmã amnhĩ jarênh to pyrã nê mẽ pajarênh kot:

Pa Tĩrtũm. Na htem atã mẽ ixtomnuj tÿx o pa.

Nê ra mẽ kot mẽ inhĩmex kaxyw.

Nê mẽ inhĩpêx o te mẽ kot ôwêhti ho mōr nê hpar kaxyw tanhmã hipêx to pyrãk.

Jakamã na pa mẽ ra ixtyk kaxyw.

Anhÿr o kot mẽ pajarênh.

³⁷ Tã kwãr mẽ ã mẽ panhĩpêx anê. Arĩ Kris kãm mẽ pajapê kamã mẽ pahkôt pa ho pa rãhã jakamã mẽ kot tanhmã mẽ pahto htã pu mẽ arĩ amnhĩ kaxyw kãm pajamexpêr tÿx rãhã ho ri papa. Nhũm arĩ mẽ kutã mẽ pahto paxihtÿx pu mẽ arĩ mẽ kãm pakuhê.

³⁸ Mẽmoj koja tanhmã mẽ pahto nhũm Tĩrtũm tee ri ja hã mẽ pahpumu nê kãm mẽ pajapê hkêt nê? Nà amrakati kumrêx. Koja mēhō rÿ mẽmoj mẽ pahpê àmnàr kêt nê. Na hte jar pika ja kamã Kris kãm mẽ pajapê kamã mẽ pahkôt pa ho pa. Nê kot puj mẽ nhÿrmã ty nhũm arĩ kãm mẽ pajapê kamã mẽ pahkôt pa ho pa rãhã nê. Jakamã koja mẽkarō rÿ mẽkarōmnuti rÿ jar pika ja kamã mẽ kãm Tĩrtũm prãm kêt xwÿnhjaja mẽ pahpê àmnàr kêt nê. Rÿ mẽmoj tanhmã kute. Rÿ kormã hapu hã mẽmoj tanhmã kute. Koja mẽmoj piitã tee ri tanhmã kēp mẽ pahto htã nhũm Kris arĩ kãm mẽ pajapê kamã mẽ pahkôt pa ho pa rãhã nê nhũm mẽmoj tee ri mẽ pahpê àmnàr kaprÿ.

³⁹ Nê koja kÿj rũm mẽmoj wrÿ nê tanhmã kēp mẽ pahto japêr. Rÿ pyka rũm mẽmoj kato nê tanhmã kēp mẽ pahto japêr. Rÿ kuwy rÿ kōk xapêr tÿx tanhmã kēp mẽ pahto. Tã nhũm mẽ panhō Pahihti Jejus Kris arĩ kãm mẽ pajapê kamã mẽ pahkôt pa ho pa rãhã nê. Te Tĩrtũm kãm mẽ pajapê pyrãk o kãm mẽ pajapê htÿx kãm mẽ pahkôt pa ho pa rãhã jakamã nhũm mẽmoj tee ri mẽ pahpê àmnàr kaprÿ.

9

Ijaew jarênh

Atre 3.25; Rômân 3.1-2

¹⁻² Nê na pa tee ri ixkwÿ Ijaew kot tanhmã amnhĩ nhĩpêx to ho pa hã mẽ omu nê ixkaprĩ nê. Ixpyrà nê mẽ kēp Ijaew tã ixkĩnhã amnhĩ kaxyw Kris kôt hamaxpêr kêt jakamã nhũm Kris tee ri kãm mẽ hamakêtkati nê àmnhĩx ri mẽ pa hprãm kaprÿ. Pa tee ri mẽ hkukamã ijamexpêr nê ixkaprĩ nê ri ixpa. Nê aa ixkaprĩ ixpê kator kêt kumrêx. Mẽ kot inhmã mẽ hkĩnh kêt ã amnhĩ tã ijarênh tã inhmã mẽ hkĩnh kênã. ãm hãmri na pa ã amnhĩ jarênh anê. Tĩrtũm Karō kot ja hã ixpumunh mex nê inhmã:

—Nà ãm hãmri na ka amã mẽ hkĩnh ã amnhĩ jarê. Anê.

³ Mẽ kēp ixkwÿ na mẽ. Mẽ ixpàr kraxja ãm pixi mex. Tã nhũm mẽ ixkĩnhã amnhĩ kaxyw Kris kôt hamaxpêr kêt jakamã kop ãm Tĩrtũm kot mẽ nê kuwy hwÿr pa inhmēnh ronhÿx ja inhmã mex. Nhÿx pa kãm:

—Kwa Tirtūm. Amnhĩ nê kuwy hwÿr ixkwÿjê rēnh kêt nê. Inhmã mẽ hapê htÿx kumrêx. Mẽ hpānhã pa mǎn mẽ nê hwÿr inhmẽ nà.

Anhÿr o nhÿx pa kām ixkapêr. Nom kot paj amnhĩ to ã ixàhwÿr anhÿr kaprÿ. Tirtūm kot mẽ kamã ukaprĩ htã no nhũm mẽ amnhĩ kaxyw Kris mã hamaxpêr kêt jakamã tanhmã koja amnhĩ to nê mẽ hpānhã pa mẽ nê kuwy wÿr inhmẽ nhũm mẽ ixrom kuri htĩr tũm nê pa ho pa? Mẽ kot hkôt amnhĩ xunhwÿÿre hã.

⁴ Mẽ ixpê Ijaew nhĩgêjtjaja na pre Tirtūm amnepê mã mẽ ho mex rax nê. Nê kām mẽ ho hkra hprãm nê. Nhũm prem tanhmã kot amnhĩ nhĩpêx mex to hã no ho omunh o pa. Nê hirã htÿx kām ri pa hã omu nhũm mẽ kām:

—E kot kaj mẽ ixkapêr ma nê ixkôt amnhĩ nhĩpêx o ri apa. Hã kot paj mẽ akôt ixpa ho ixpa nê mẽ ato mex nê ka mẽ axpên kanrêhã axàmnàr rax nê. Hãmri pa mẽ amã pika mex gō ka mẽ kamã ajamakêtkati nê axàmnhĩx ri apa ho apa.

Anhÿr o mẽ kām kapêr. Hãmri nê mẽ kaxyw Mojes mã tanhmã kapêr to nê mẽ kaxyw kām mẽmoj piitã hã karō. Mẽ kot tanhmã amnhĩ tomnuj to hãmri nê tee ri ja hã amnhĩ pumunh nê tanhmã amnhĩ to Tirtūm wÿr to nhũm kot mẽ mar nê mẽ nê ja ho hapêx par kaxyw. Finat Mojes kot amnhĩ xō ri mẽ kām ujarēnh nhũm mẽ kot mar nê hkôt amnhĩ nhĩpêx mex o ri pa kaxyw.

⁵ Mẽ ixkukamã mẽ ixpāmjaja. Apraãw nê Ijak nê Jako kanrêhã mẽ hkra nê mẽ htàmnhwÿjaja na pre mẽ. Mẽ hwÿr na pre Tirtūmja Kra Jejus Kris mẽ nhũm mẽ hwÿr wrÿ nê mẽ kamã ĩ ho ĩ ho kator jakamã haxwÿja kêp Ijaew na pre. Kêp Mèpahpām nê mex o mex nê hihtÿx o hihtÿx tã Ijaew wÿr wrÿ nê mẽ kamã kato. Hãmri nhũm Ijaew kêt xwÿnhjaja harēnh ma nê tee ri hamaxpêr nê hamaxpêr o:

—Hêxta waa nê. Kêp ãm Jejus mẽ papa kamã mǎn kator ronhÿx mẽ pamã mex kumrêx. Anê.

⁶ No nhũm kormã Ijaew hwÿr wrÿk kêt ri nhũm Tirtūm ra kot mẽ ho hkra kaxyw mẽ hã amnhĩ jarē nhũm mẽ hkwÿja kām ja prãm kêt nê hkaga. Tã xà na pre Tirtūm

kot mẽ ho hkra hã amnhĩ jarēnh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarē nê hã amnhĩ to hêx. Jakamã na pre mẽ hkwÿjaja hkwÿjê rom hkaga hkêt nê nhũm amnhĩ tã mẽ omu nê mẽ ho hkra. Nom mẽ piitã mẽ ho hkra hkêt nê. Mẽ hkwÿjaja kot hkaga jakamã nhũm ãm mẽ hkwÿjê pix o hkra.

⁷ Nê finat Apraãwja na pre hkanrêhã hkra nê htàmnhwÿ xohtō nê. Tã xà na pre Tirtūm htàmnhwÿ piitã mẽ ho hkra hã amnhĩ jarē? Nà mẽ piitã ã mẽ harēnh anhÿr kêt nê. ãm mẽ hkwÿjê pix na pre mẽ ho hkra hã mẽ harē. Apraãw kra Ijak kôt hkanrêhã htàmnhwÿ pixjaja nhũm kot mẽ ho hkra hã mẽ harē.

⁸⁻⁹ Nê Apraãw kormã hprō kamã hkra hkêt ri na pre kām àpēnh xwÿnh kamã hkra nhũm kato nê myre nê hixi pē Ismael. Nom kêp Apraãw prō kumrêx kamã hkra hkêt. Prō kuprÿ kamã hkra na pre. Tã nhũm Tirtūm kām hkra kumrêx kukamã harē nê kām:

—E kot paj ma tē hãmri nê mẽmo arĩgro hã akupÿn awÿr tē nhũm ra aprō hpijagri nhũm war akra myre. Anê.

Tã nhũm hprō Saraja htujarō. Nê gaa nê hpijagri nhũm hkraja myre. Hixi pē Ijak. Kêp Apraãw prō kamã hkra jakamã Tirtūm nom kêp Apraãw kra kumrêx. Jakamã hkra Ijak kanrêhã htàmnhwÿjaja na pre Tirtūm kot mẽ ho hkra hã mẽ harē. Ra kot Apraãw mã ja hã amnhĩ jarēnh xà hkôt.

¹⁰ Tã nhũm Ijakja hprêk nê Repek o hprō. Nê gaa nê ra haxwÿja wa hkra nhũm hkraja wa ahpo nê kato nê wa hamē my. Kot wa pē Ejau nhũm kot hapu pē Jako.

¹¹⁻¹² Nom nhũm kormã wa kator kêt ri nhũm Tirtūm wa hkukamã tanhmã wa harēnh to. àhpumunh xà hkôt wa katorxà mã wa harē nê kām:

—E kot paj amã war akra wa hkukamã tanhmã wa harēnh to ka inhma. Nà koja wa kato nê gaa nê hprêk hãmri nhũm kot haputa amnhĩ to rax o kot wa jakre. Anê.

Kot wata koja kot hapu kĩnhã amnhĩ to grire nê ri pa nhũm ã wa hkukamã wa harēnh anê. Kām wa kot tanhmã amnhĩ nhĩpêx to hprãm xà hkôt ã wa harēnh anê. Kormã wa kot tanhmã amnhĩ tomnuj to rÿ tanhmã amnhĩ to mex to hã kot wa omunh

kêt tâ kãm hprãm xà hkôt ã wa hkukamã wa harênh anê.

¹³ Tĩrtũm kapêr ã kagà htũm kot wa harênh nê wa hã kagà kot:

Ejau rom Jako kanrêhã hkra nê htãmnhwý pixjaja na pre Tĩrtũm amnhĩm mẽ ho hkra. Anê.

¹⁴ Mãn ka mẽ Tĩrtũm kot ã wa harênh anhỹrja ma nê ajamaxpêr o:

–Tk. Kwa ja mexti hã. Mo na pre hamê wa hkanrêhã wa hkra nê wa htãmnhwý piitã ho hkra hkêt nê? Anê.

Kwa mẽ ã ajamaxpêr anhỹr kêt nê. Tĩrtũm na hte kãm hprãm xà hkôt tanhmã mẽ panhĩpêx to ho pa pu mẽ kot tanhmã mẽ panhĩpêx to hã omu nê ãm omu nê amnhĩ tâ tanhmã kãm nê hkêt nê.

¹⁵ Na pre finat Mojes mã amnhĩ jarênh o: Inhmã hprãm xà hkôt na pa hte mẽ omu nê tanhmã mẽ kamã ixukaprĩ hto ho ri ixpa.

Nê inhmã hprãm xà hkôt na pa hte ahpỹnhã tanhmã mẽ hipêx to ho ri ixpa.

Anhỹr o kãm amnhĩ jarê.

¹⁶ Nom tanhmã mẽ pahte amnhĩ nhĩpêx to hã mẽ pahpumunh kôt na hte mẽ pakamã ukaprĩ hkêt nê. ãm tãm kãm hprãm xà hkôt na hte tanhmã mẽ pakamã ukaprĩ hto ho pa.

¹⁷ Amnepê mã Ejit kãm mẽ õ pahihti Paraohti hwýr na pre Mojes mẽ nhũm ma hwýr mõi nê kãm tanhmã Tĩrtũm kapêr jarênh to nê kãm:

–E Tĩrtũm na awýr inhmẽ pa mõi. Tãm na pre apê Ejit nhõ xwýnhjê nhõ pahi kaxyw axãm. Akrã hihtýx tâ nhũm mẽ kaxyw axãm. Tã ra xatã àhpumunh týx o tanhmã anhĩpêx to. Krĩ piitã hkôt ri mẽ pa xwýnhjaja kot atã harênh mar nê àhpumunh o àhpumunh ã omunh kaxyw. Tã ixte amã ja jarênh kaxyw na pre awýr inhmẽ pa man awýr mõi. Anê.

¹⁸ ã na hte Tĩrtũm kãm hprãm xà hkôt tanhmã mẽ panhĩpêx anhỹr to ho pa. Jao mẽ hkwýjê kamã ukaprĩ ho pa. No mẽ hkwýjaja nhũm tee ri mẽ hkrã hihtýx ã mẽ omu nê ãm mẽ omu nhũm mẽ amnhĩ krã hkôt ri tanhmã amnhĩ tomnuj to ho ri pa.

Tĩrtũm kêp mẽ pakamã ukaprĩ xwýnh ã harênh

¹⁹ Nê kot kaj mẽ atõ Tĩrtũm kot ã mẽ hipêx anhỹrja ã harênh ma nê tanhmã hã ixkukjêr to nê inhmã:

–Kwa na xep hte Tĩrtũm ahpỹnhã tanhmã mẽ hipêx to. Nê mẽ hkwýjê kamã ukaprĩ ho pa nê mẽ hkwýjaja mẽ hkrã hihtýx ã mẽ omu nê ãm mẽ omu nê mẽ kamã ukaprĩ hkêt nê. Jakamã kwa mo na hte mẽ kot amnhĩ tomnuj xwýnh ã mẽ harê? Tãm kot ã mẽ hipêx anhỹr kênã kot kêt mẽ kot amnhĩ tomnuj xwýnh ã mẽ harê.

Anhỹr o ajamaxpêr japêr.

²⁰ Kwa mẽ ri ã atýx Tĩrtũm jarênh anhỹr kêt nê. E pa mẽ amã ejêp jarê ka mẽ inhma. Xà kot mēhõ gyw kwý ho amnhĩm poti nhĩpêx nhũm tee ri amnhĩ tâ omu nê amnhĩ tâ tanhmã kãm kapêr to nê kãm: “Tk. Kwa mon ka ri ã inhĩpêx anê?” Anhỹr o amnhĩ tâ kãm kapêr? Nã koja kãm tanhmã nê hkêt nê.

²¹ Hipêx xwýnh kãm hprãm xà hkôt kot ã hipêx anhỹr kênã kot kêt amnhĩ tâ kãm akir. Koja amnhĩm gyw kwý kakwý nê ho poti ho axkrut nê hipêx. Nê hõ ho muxre. Ho mex kumrêx nhũm xa. Nhũm ihõja mã ho anê nê hipêx no ãm wamta kĩnhã ho hanhãjti nhũm omnajti nê xa. No ãm tãm kot hamê wa hipêx prãm xà hkôt wa hipêx kênã.

²² Tã na hte ã Tĩrtũm mẽ panhĩpêx anê. Te poti pynajre pyrã nê mẽ pahkwýjê nhĩpêx nhũm mẽ kãm kapêr mar prãm kêt nê htýx ri tanhmã amnhĩ tomnuj to ho ri pa. Hãmri nhũm amnhĩ tâ mẽ omu nê te amnhĩ nê mẽ rênh kaxyw pyrãk o mẽ hipêx no ãm kormã hamaxpêr o:

–Nã kot paj nhỹrmã mẽ kot amnhĩ tomnuj mýrapê mẽ ho ijapêx pa nhũm mẽ piitã ja hã ixpumunh nê inhmã ixàhpumunh o ixàhpumunh ã ijarê. Nê inhmã mẽmoj punuj piitã hkĩnh kêt kumrêx ã axpên mã ijarê. Anê.

²³ Nom na hte jajê rom mẽ pahkwýjê nhĩpêx o te poti mexta nhĩpêx pyrã nê amnhĩ kaxyw mẽ paxunhwý nê mẽ pahto hkra kaxyw. Nê mẽ pajarênh o:

–Nã koja mẽ amnhĩ kaxyw Ixkra Jejus mã hamaxpêr nê hkôt amnhĩ xunhwý pa ja hã mẽ omu nê mẽ kamã ixukaprĩ ho ri ixpa. Nê mẽ ho mex pê mẽ kutã inhnojarêr rãhã ho ri ixpa. Hãmri nhũm mẽ nhỹrmã

Ixkra mẽ wa ixri htîr tûm nê mex nê pa ho pa. Kot paj ã mẽ ho mex anê nhûm mẽ amnhî tâ ixpumu nê inhmã inhmex o inhmex ã ijarênh o pa. Anê.

Ã na hte Tîrtûm ahpÿnhã mẽ pahpiitã mẽ panhîpêx anê.

²⁴ Nê na hte mẽ ixpê Ijaew pix o hkra hkêt nê. Na hte mãânên mẽ apê Ijaew kêt xwÿnhjê ho hkra.

²⁵ Amnepê mã mẽ kãm kapêr jarênh o ri mẽ pa xwÿnhjê hõ pê finat Ojejja na pre te Tîrtûm tãm kot Ijaew kêt xwÿnhjê jarênh pyrã nê mẽ harênh o:

Amnepêm na pa pre mẽ ho ixkra hkêt tâ kot paj mẽ hkwyjê ho ixkra.

Na pa pre mẽ kamã ixukaprî hkêt tâ pa ra inhmã mẽ hapê nê.

²⁶ Nê ixte mẽ kêp ixkra hkêt ã mẽ harênh tâ kot paj ra mẽ kêp ixkra hã mẽ harê.

Ixpê mẽõ Tîrtûm kot paj ã mẽ harênh anê. Anê.

²⁷ Hãmri nhûm finat Ijais Ojej pãnhã tanhmã Ijaew jarênh to. Ijaisja Tîrtûm nhÿ hã kapêr jarênh o ri pa xwÿnhjê hõ na pre. Jakamã nhûm Tîrtûm kãm tanhmã mẽ ijarênh to nhûm kuma nê ô ri mẽ ixkukamã mẽ inhîgêxjê mã ujarênh o pa nê hã kagã. Nê hã kagã ho:

Ijaew na mẽ ohtô rax kumrêx.

Te gô xujanâr mÿri pykahti grã hkryre xohô pyrãk.

Tã koja mẽ piitã ixkôt amnhî xunhwÿr kêt nê.

Koja mẽ ãm grêre nê amnhî kaxyw inhmã hamaxpêr nê ixkôt amnhî xunhwÿ.

Jakamã mẽ tapxipixjaja koja hkwyjê rom nhÿrmã inhô krî hwÿr api.

²⁸ No mẽ kot amnhî kaxyw inhmã mẽ hamaxpêr kêt xwÿnhjaja kot paj tokyx tanhmã mẽ harênh to.

Mê kot amnhî tomnuj mÿrapê tanhmã mẽ harênh to nhûm mẽ ma mẽ kot amnhî xã htÿx kamã hamak tûm xãta wÿr ma pa.

Nã kot paj tokyx ã mẽ hipêx anê.

Anhÿr o mẽ harê.

²⁹ Nom nhûm kormã ã mẽ harênh anhÿr kêt ri nhûm ra wam tanhmã mẽ harênh to nê mẽ harênh o:

Amnepêm Sotô mẽ Komo kamã mẽ pa xwÿnhjaja na prem amnhî tomnuj tÿx rãhã ho ri pa.

Mÿrapê nhûm Tîrtûm xãhpumunh o ãhpumunh xwÿnhja tee ri ja hã mẽ omu hãmri nê kaxkwa rûm mẽ ô krî wa hipy mẽmoj pôôta rê.

Nhûm mẽ hã rôrôk nê mẽ ho hkaxàr pa nhûm mẽ hapêx.

Tã na pu htem mẽ uràk nê amnhî tomnuj o ri papa.

Jakamã kop ãm Tîrtûm kot mẽ pahkwÿjê kamã ukaprî kêt ronhÿx pu mẽ ra mẽ uràk nê pahpiitã pajapêx pa. Anê.

Ijaew kwÿ kot Jejus kôt amnhî xunhwÿr kêt ã mẽ harênh

Rômân 10.1-4

³⁰ Nê Ijaew kêt xwÿnhjaja na prem Ijaew pyrã nê kãm Tîrtûm prãm kêt tâ Jejus jarênh ma nê Ijaew rom amnhî kaxyw hkôt hamaxpêr nê hkôt amnhî xunhwÿ. Hãmri nhûm Tîrtûm ja hã mẽ omu nê mẽ ho hkra nê mẽ kot amnhî to mex xwÿnhjê hã mẽ harê.

³¹⁻³² Hãmri nhûm Ijaew tee ri mẽ kot Jejus kôt amnhî xunhwÿr ã mẽ omu nhûm ja mẽ kãm mex kêt nê. Hãmri nhûm mẽ hamaxpêr o:

—Tk. Kwa ra mẽ ixte finat Mojes kapêr kôt amnhî nhîpêx mex o ri mẽ ixpa xwÿnh jakamã koja Tîrtûm ja hã mẽ ixpumu nê mẽ ixte amnhî to mex xwÿnhjê hã mẽ ijarê nê mẽ inhnê mẽ ixte amnhî tomnuj rênh pa. No kot paj mẽ Ijaew kêt xwÿnhjê pyrã nê Jejus kôt amnhî xunhwÿr kêt nê. ãm kwarî ho kwarî.

Anhÿr ã amnhî jarê. No ãm ã mẽ hamaxpêr anhÿrja mex kêt. Na prem htÿx Tîrtûm noo mã kot amnhî to mex ã amnhî jarênh kaprÿ nê arî ri tanhmã amnhî tomnuj to ho ri pa. Te pry kamã kên nôr nhûm mẽ kot nhãm nê mênh kaxyw hkamnâr nê ho amnhî par krã hi kukênh pyrãk o na htem amnhî nhîpêx. Jao amnhî krã hkôt tanhmã amnhî nhîpêx to ho pa hprãm xàj te Jejus kapêrja nhãm amnhî nê rênh pyrãk o hipêx. Jakamã koja mẽ Tîrtûm nhô krî hwÿr àpir kêt nê.

³³ Tîrtûm kapêr ã kagã htûm kot ja jarênh kot:

E mẽ inhma. Kot paj nhÿrmã Ijaewjê hwÿr mēhō mẽ nhũm mẽ hkôt kapēr o pa. Nom koja mẽ kapēr mar kêt nē. Koja mẽ kuma nē ãm kuma.

Te pry kamã kēn nōr nhũm mẽ kot nhãm pry nē mēnh kaxyw hkamnār nē ho amnhĩ par krã hi kukēnh pyrāk o koja mẽ amnhĩ nhĩpêx.

No te mẽ kot nhãm pry nē mēnh kaxyw hkamnār kêt pyrāk xwÿnhjaja koja mẽ kurom nhÿrmã ma Tĩrtũm nhō krĩ hwÿr api.

Hãmri nē hkĩnh nē pa ho pa. Anē.

Nom kēn kumrēx jarēnh kêt nē. Na prem Jejus ã kuxi nē ã harēnh anē. Ijaew te mẽ kot kēn nhĩpêx pyrāk o Jejus nhĩpêx nē amnhĩ kaxyw hkôt hamaxpēr kêt nē axtem nē hkaga nē ãm kamã gryk pix o ri pata ã nhũm mẽ harē. No mẽ kot amnhĩ kaxyw hkôt hamaxpēr ronhÿx Jejus te kēn kot mẽ kēp àmnār pyrāk kêt nē. Jakamã ã mẽ harēnh kot anhÿr.

10

¹ Hēxta waa nē. Ijaxwÿja ixpê Ijaew. Mē kēp ixkwÿ jakamã kēp apu mẽ kot amnhĩ kaxyw Jejus mã hamaxpēr nē hkôt amnhĩ xunhwÿr ronhÿx pa ixkĩnh tÿx kumrēx. Inhmã mẽ kēp Tĩrtũm kra hprãm tÿx kumrēx kēnã. Inhmã ja prãm xàj na pa hte mẽ ho Tĩrtũm wÿr rãhã ho ri ixpa.

² Ra ixte mẽ omunh mex. Mē kãm Tĩrtũm mã tanhmã amnhĩ nhĩpêx to hprãm tã no ãm mẽ kot hprĩ hã kapēr mar kêt. Jakamã na htem tee ri tanhmã kãm amnhĩ nhĩpêx to ho ri pa hprãm kaprÿ.

³ Nhũm pre Tĩrtũm tee ri amnhĩ tã mẽ omu nē hamaxpēr o:

—Koja mēhō amnhĩ kaxyw Ixkra Kris kôt hamaxpēr nē hkôt amnhĩ xãm pa ja hã omu nē kot amnhĩ to mex xwÿnh ã harē nē ho ixkra kurê kumrēx. Nom na hte Ijaew ohtō nē ã amnhĩ nhĩpêx anhÿr kêt nē.

Anhÿr o mẽ harē. ãm hãmri na ã mẽ harēnh anē. Na htem ãm axtem nē hamaxpēr o:

—Tk. Kot paj amnhĩ kaxyw Kris kôt ijaxpēr nē hkôt amnhĩ xãm kêt nē. Kot paj ãm pam amnhĩ krã hkôt tãm ri amnhĩ nhĩpêx o ri ixpa. Mē ixpê Ijaewjê mẽ ixte amnhĩ nhĩpêx xà hkôt. Hãmri nhũm Tĩrtũm

ja hã ixpumu nē amnhĩm inhmex ã ijarē. Nom kot paj Kris kôt amnhĩ xãm kêt nē. ãm kwarĩ ho kwarĩ.

Anhÿr ã amnhĩ jarē.

⁴ Nom na htem ãm htÿx ri amnhĩ krã hkôt amnhĩ to mex o pa hã amnhĩ kamnhĩx kaprÿ. Koja mẽ tee ri kãm finat Mojes kapēr kôt amnhĩ nhĩpêx o ri pa hprãm kaprÿ. Jejus tapxipix na pre tãm amnhĩ nhĩpêx mex rãhã ho pa. Na pre Tĩrtũm kapēr kôt amnhĩ nhĩpêx mex o ri pa nē aa kapēr ò nhĩrôp ãm nē hkwȳm ri tanhmã amnhĩ tomnuj to hkêt nē. Kot amnhĩ tomnuj kêt xwÿnh ã ãm pixi mex na. Jakamã tapxipix kukwak ri na hte Tĩrtũm amnhĩm mẽ pahte amnhĩ to mex xwÿnh ã mẽ pajarē.

Tĩrtũm kãm mẽ pahpiitã mẽ pahto hkra hprãm ã harēnh

⁵ Nē amnepēm na pre finat Mojes Tĩrtũm nhÿ hã Ijaew mã tanhmã ujarēnh to nē hã kaga. Nē mẽ kãm ujarēnh o:

—E kot kaj mẽ atō Tĩrtũm nhÿ hã ixu-jarēnh ma nē hkôt amnhĩ nhĩpêx mex o ri apa nē hkwȳm ri tanhmã amnhĩ nhĩpêx to hkêt nē. Hã koja Tĩrtũm hã apumu nē amnhĩm ate amnhĩ to mex xwÿnh ã ajarē ka nhÿrmã kuri atĩr tũm nē amex nē apa ho apa. Anē.

⁶ ã mẽ kãm kapēr anhÿr tã mẽ pahte Mojes kapēr xà hkôt amnhĩ nhĩpêx o papaja na mẽ pahpê hihtÿx kumrēx. Tĩrtũm kapēr tũm na. Kapēr ã kaga kamã kot mẽ pamã mẽ pahte tanhmã amnhĩ nhĩpêx to hã karōja ohtō rax kumrēx jakamã pu mẽ tee ri pamã piitã hkôt amnhĩ nhĩpêx prãm kaprÿ. Nhũm Tĩrtũm tee ri amnhĩ tã mẽ pajamã hãmri nē mẽ pahwÿr Kra Jejus mẽ. Jakamã na pu htem amnhĩ kaxyw hkôt pajamaxpēr nē hkôt amnhĩ xunhwÿ nhũm Tĩrtũm hã mẽ pahpumu nē kukwak ri mẽ pahto hkra kurê kumrēx. Kra kukwak ri kot mẽ pahto hkra kaxyw kot mẽ pahwÿr mēnh nhũm mẽ kot hpĩr nhũm akupÿm ho htĩr jakamã na pu htem harēnhja ma nē pajamaxpēr o:

—Nà na xep pre Jejus ixto ixpê Tĩrtũm kra. Anē.

Nom xà na hte Tĩrtũmja ã mẽ pamã kapēr anē nē mẽ pamã:

—E kot kaj mẽ ma kaxkwa hwỳr api nê Kris japrô nê man amnhĩ kôt akupỹn o wrỳ pa ja hã mẽ apumu nê mẽ ato ixkra.

Anhỳr o mẽ pamã kapêr? Nà na hte ã mẽ pamã kapêr anhỳr kêt nê. Tanhmã kot puj mẽ amnhĩ to nê ã amnhĩ nhĩpêx anê?

⁷ Rỳ xà na hte ã mẽ pamã kapêr anê nê mẽ pamã:

—E na pre Krisja ty. Jakamã mẽ kam nê ma hwỳr mra nê akupỹm amnhĩm ho htĩr. Hãmri pa ja hã mẽ apumu nê mẽ ato ixkra.

Anhỳr o mẽ pamã kapêr? Nà na hte ã mẽ pamã kapêr anhỳr kêt nê. Tanhmã kot pu mẽ amnhĩ to nê akupỹm ho htĩr? Ja pyrã nê na hte Tĩrtũm mẽ pamã mẽmoj tã karõ pu mẽ kãm ho anhỳr nhũm ja hã mẽ pahpumunh kôt mẽ pahto hkra hkêt nê.

⁸ ãm mẽ pahte amnhĩ kaxyw Jejus kôt pajamxpêr nê hkôt amnhĩ xunhwỳr ã mẽ pahpumunh kôt pix mã na hte mẽ pahto hkra. Hãmri nê mẽ pahwỳr Karõ rê nhũm mẽ pahkarõ mã gjêx jakamã mẽ pahte Tĩrtũm kãm hprãm xà hkôt amnhĩ nhĩpêx o papaja na mẽ pahpê hihtỳx kêt. Te kapêr ra mẽ pahkrã hi kaxwỳnh kãm hikwỹ pyrãk o pu mẽ piitã mẽ kãm harênh o ri mẽ hkôt papa. Jakamã na pa hte mẽ piitã mẽ kot amnhĩ kaxyw Jejus kôt hamaxpêr kaxyw tanhmã mẽ kãm harênh to ho ri mẽ hkôt ixpa nê mẽ kãm:

⁹ —Kot ka mẽ atõ Jejus kêp anhõ Pahihti hã harê nê Tĩrtũm kot akupỹm ho htĩr kôt ajamxpêr. Hã koja Tĩrtũm ja hã apumu nê anê ate amnhĩ tomnuj o hapêx nê ato hkra. ãm ja pix ã mẽ pahpumunh kôt na hte mẽ pahto hkra. Anê.

¹⁰ Nê na pu htem mẽ pahkrãhi kaxwỳnh kãm amnhĩ kaxyw Jejus mã pajamxpêr. Nê mẽ pajakwa ho kêp mẽ panhõ Pahihti hã harê. Hãmri nhũm Tĩrtũm ja hã mẽ pahpumu nê amnhĩm mẽ pahte amnhĩ to mex xwỳnh ã mẽ pajarê nê mẽ pahto hkra.

¹¹⁻¹³ Tã mẽ pahte amnhĩ kaxyw Jejus kôt pajamxpêr nê hkôt amnhĩ xunhwỳr xwỳnhjaja kot puj mẽ pahkĩnh nê papa ho papa. Mẽ pahpiitã. Ijaew nê Ijaew kêt xwỳnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjê hõ rỳ Ijaew kêt xwỳnhjê hõ amnhĩ

to kuwỳ nhũm kuma nê ho hkra. Kapêr ã kagà htũm kot ja jarênh kot:

Mẽ kãm kêp Tĩrtũm kra hprãm xwỳnhjaja koja mẽ amnhĩ to Tĩrtũm wỳ nhũm mẽ kuma nê Jejus kot mẽ nê htyk kukwak ri mẽ nê mẽ kot amnhĩ tomnuj o hapêx nê mẽ ho hkra nhũm mẽ hkĩnh nê pa. Anê.

¹⁴⁻¹⁵ Xà na htem kormã amnhĩ kaxyw Kris mã hamaxpêr kêt rãhã amnhĩ to Tĩrtũm wỳ nhũm mẽ kuma nê mẽ ho hkra? Nà tanhmã kot wem amnhĩ to nê amnhĩ kaxyw kãm hamaxpêr kêt rãhã amnhĩ to kuwỳ? Na hte Tĩrtũm ma mẽ hwỳr mẽ hkwỳjê rê nhũm mẽ ma mẽ hwỳr mra nê Tĩrtũm kapêr o mẽ ahkre ho ri mẽ hkôt pa. Nhũm mẽ hkwỳjaja mẽ kuma nê amnhĩ kaxyw Jejus kôt hamaxpêr nê amnhĩ to Tĩrtũm wỳ. Kapêr ã kagà htũm kot ja jarênh kot:

Koja mẽmoj mex jarênh xwỳnhjaja ma mẽ hwỳr mra.

Nê mẽ hwỳr hpôx o mō nhũm mẽ amỹm amnhĩ wỳr mẽ omu nê hkĩnh nê. Anê.

¹⁶ Tã ra mẽ piitã kot kapêr mar tã piitã amnhĩ kaxyw hkôt hamaxpêr kêt nê. Jakamã nhũm finat Ijais tee ri ja hã mẽ omu nê Tĩrtũm mã mẽ harênh o:

Pa Pahi Maati. Kwa ra mẽ kot akapêr mar tỳx tã akôt amnhĩ nhĩpêx kêt nê. Mẽ kãm akapêr kôt amnhĩ nhĩpêx o pa hprãm kêt. Na htem ãm grêre nê akôt amnhĩ xunhwỳ nê akôt amnhĩ nhĩpêx o ri pa. Anê.

¹⁷ Kot anhỳr tã ãm mẽ kot Kris kapêr jarênh mar kôt pix mã na htem amnhĩ kaxyw hkôt hamaxpêr. Koja mẽ harênh mar kêt tã tanhmã koja wem amnhĩ to nê amnhĩ kaxyw hkôt hamaxpêr nê hkôt amnhĩ xunhwỳ?

¹⁸ Mãn ka mẽ atõ atỳx ã ajamxpêr anhỳr o:

—Ko mãn Ijaew kormã Jejus kot mẽ panê tanhmã amnhĩ nhĩpêx to hã harênh mar kêt jakamã na mẽ kormã hkôt amnhĩ xunhwỳr kêt nê.

Anhỳr o ajamxpêr. Nom ja kot anhỳr kêt. Ijaew piitã ra mẽ kot harênh mar kênã. Tĩrtũm kapêr ã kagà htũm kot ja hã mẽ harênh kot:

Na prem ma mẽ piitã mẽ kãm ja jarênh o ri mẽ hkôt pa nhũm mẽ piitã kuma.

Anê.

¹⁹ Tã măn ka prem ra ja ma nê atỳx aja-maxpêr o:

—Kot anhỹr tã no măn kormã hprĩ hã Jus jarênh mar kêt jakamã mẽ hkôt amnhĩ xunhwỳr kêt nê. Anê.

Nom ja haxwỳja kot anhỹr kêt. Ra mẽ kot hprĩ hã harênh mar mex tã kuma nê ãm kuma nê amnhĩ kaxyw kãm hamaxpêr kêt nê. No mẽ apê Ijaew kêt xwỳnh kwỳjaja na ka mẽ kurom harênh ma nê amnhĩ kaxyw hkôt ajamaxpêr nê hkôt amnhĩ xunhwỳr kurê kumrêx. Hãmri nhũm Ijaew tee ri ja hã mẽ apumu nê mẽ akamã gryk tỳx nê. Nom ra Tĩrtũm kot ã mẽ hkukamã mẽ kot amnhĩ nhĩpêx anhỹr ã mẽ omunh nê mẽ harênh kot anhỹr kênã. Na pre finat Mojes mẽ kãm tanhmã hã kagà hto. Te Tĩrtũm tãm kot mẽ hã kagà pyrã nê kapêr ã kagà htũm kamã kot mẽ harênh kot:

Mẽ ate mẽ kamã mẽ akahak o apa xwỳnhjaja.

Mẽ kot htỳx ri amnhĩ nhĩpêx o mẽ pa hã mẽ ate mẽ harênh tã no kot paj mẽ arom amnhĩm mẽ kot amnhĩ to mex xwỳnhjê hã mẽ harê.

Kot kaj mẽ tee ri ja hã mẽ omu nê mẽ kamã agryk tỳx kumrêx.

Nê mãănê pa ixte mẽ ho mex ã ixpumu nê mẽ hã ixkamã agryk nê. Anê.

²⁰ Nê finat Ijais na pre haxwỳja ã mẽ harênh anê. Na pre kãm amnhĩ kwỳ pê Ijaew puma hkêt nê xatã Tĩrtũm nhỹ hã tanhmã mẽ kãm Ijaew kêt xwỳnhjê jarênh to ho pa. Te Tĩrtũm tãm kot mẽ harênh pyrãk o mẽ kãm: Nà Ijaew kêt xwỳnhjaja kot Tĩrtũm japêr kêt tã koja tãm mẽ kãm amnhĩ to amnhĩrit nhũm mẽ hkôt amnhĩ xunhwỳ.

Mẽ kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrit. Anê.

²¹ ã Ijaew kêt xwỳnhjê jarênh kot anhỹr. Nê axte mã tanhmã Ijaewjê jarênh to kot:

Te mẽ katorxà kot tanhmã hkrajê ho mex to kaxyw tee ri amnhĩ wỳr mẽ kãm àkjêr pyrãk o na hte Tĩrtũm Ijaewjê nhĩpêx o pa.

Jaoo tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nê ãm kuma nê hkôt amnhĩ nhĩpêx kêt nê. Anê.

11

Tĩrtũm kot Ijaew kamã ukaprĩ hã harênh Matêwre 13.10-17

¹ Tã ra Ijaew kot Tĩrtũm kaga jakamã măn ka mẽ atõ mẽ harênh ma nê ajamaxpêr o:

—Măn pre Tĩrtũm tee ri amnhĩ tã mẽ omu nê amnhĩ pyrã nê mẽ hkaga.

Anhỹr o ajamaxpêr. Nom na pre mẽ hkaga hkêt nê. Ijaxwỳja ixpê Ijaew na pa. Mẽ urak nê ixpê Ijaew pãr krax pê finat Apraãw kanrêhã htãmnhwỳ Pêjamĩ kanrêhã hõ na pa. Tã xà na pre Tĩrtũm ixkaga? Nà kot ixkaga hkêt.

² Amnepêem kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarê. Tã nhũm amgrã xohtõ nê hapêx nhũm mẽ hapôj hãmri nê Tĩrtũm kôt amnhĩ nhĩpêx o pa hkêt nê. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nê Tĩrtũm mã tanhmã mẽ harênh to nê mẽ hã kagà. Nê hã kagà ho:

³ Kwa Tĩrtũm. Mẽ ixte amã amnhĩ jarênh xà hã mêtĩ hkwy na prem ra hkrakrak pa. Nê anhỹ hã akapêr jarênh o ri mẽ pa xwỳnh kwỳ nhĩmex rax nê. ãm papxipix na pa arĩ ixtĩr nê ri ixpa nom nhũm mẽ ra kot ixpĩr kaxyw ixtã amnhĩ jarê. Anê.

⁴ Tã tanhmã na Tĩrtũm kutã kãm kapêr to? Na pre kãm:

Nà kapxipix na ka arĩ atĩr kêt nê. Arĩ mẽ ohtõ nê apyrã nê amnhĩ kaxyw ixkôt hamaxpêr. Mẽ ohtõ. Arĩ mẽ kêp 7.000 nê akwỳjê rom ri sãnti Paaw kutã hkõnkrã ho hkrĩ nê kãm mex ã harênh kêt nê. Anê.

⁵ Tã arĩ ã jarãhã mẽ kot ã amnhĩ nhĩpêx anhỹr kênã. Tĩrtũm kãm Ijaew japê jakamã mẽ kamã ukaprĩ. Jakamã nhũm ra mẽ hkwyjaja mẽ pahpyrã nê amnhĩ kaxyw Kris kôt hamaxpêr nhũm Tĩrtũm mẽ ho hkra.

⁶ Nom mẽ kot amnhĩ to mex ã mẽ omunh xà hkôt mẽ ho hkra hkêt nê. Amarĩ kãm mẽ hapê htũm xà hkôt na hte mẽ ho hkra. Kop apu mẽ kot amnhĩ to mex ã mẽ omunh xà hkôt kot mẽ ho hkra ronhỹx amarĩ mẽ ho

hkra hkêt nê. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

⁷ Ijaew piitã Tĩrtũm kot amnhĩm mẽ mex ã mẽ harênh prãm tâ no ãm mẽ grêre nê hamaxpêr xà hkôt Jejus kôt amnhĩ xunhwỳ. Na htem ohtô rax nê kapêr ma nê ãm kuma nê tee ri kot amnhĩm mẽ mex ã mẽ harênh prãm xàj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jejus kaga jakamã ã amnhĩ nhĩpêx anhỹr kaprỳ. Mẽ kot hkaga jakamã te ri mẽ hamak kro nê Tĩrtũm kapêr mar kêt pyrã nê pa.

⁸ Tĩrtũm kapêr ã kagà htũm kot mẽ harênh kot:

Tĩrtũm na hte mẽ kãm kapêr mar prãm kêt xwỳnhjê pumu nê ãm mẽ omu nhũm htem htỹx ri pa ho pa. Nê Tĩrtũm mã hamaxpêr kêt o ri pa. Mẽ kot kapêr mar tâ hprĩ hã mar tỹx kêt nê. Nê mẽ kot kapêr ã kagà kamã harênh tâ hprĩ hã mar tỹx kêt nê. Jakamã na htem amnhĩ kaxyw hkôt hamaxpêr kêt o pa.

Tã na htem arĩ jarãhã ã amnhĩ nhĩpêx anhỹr o ri pa. Te mẽ nohkre nê mẽ hamak kro xwỳnh kot amnhĩ nhĩpêx pyrãk. Anê.

⁹ Nê amnepêr na pre pahi finat Tawija amnhĩ kwỳ Ijaew jarênh o:

Na htem htỹx ri hkĩnh kãm apkur o pa.

Te tutre kãm prãm nê kot rapuuti hwỳr àr nê tee ri kãm kator prãm kaprỳ pyrãk.

Ja pyrã nê mẽ kot Tĩrtũm kapêr mar kêt mỳrapê koja Tĩrtũm tanhmã mẽ ho nhũm mẽ tee ri kãm mex prãm kaprỳ.

¹⁰ Te mẽ nohkre xwỳnhjaja tee ri mẽ hpa nhĩpêx o pa pyrãk.

Nê omnuj nê à nê ho gjêx o ri pa pyrãk o amnhĩ nhĩpêx o ri pa.

Anhỹr o mẽ harê.

¹¹ Tã arĩ Ijaew Jejus kaga nê kãm kapêr mar prãm kêt jakamã xà na Tĩrtũm tee ri ja hã mẽ omu nê mẽ hkaga kumrêx? Nà kot mẽ hkaga hkêt. ãm mẽ tãmjaja kêp Jejus prãm nōkati jakamã nhũm tee ri ja hã mẽ omu nê mẽ hpãnhã Ijaew kêt xwỳnhjê mã amnhĩ to amnhĩrĩt nê mẽ hkwỳjê ho hkra. Jakamã

koja Ijaew kwỳjaja ja hã mẽ omu nê tee ri hamaxpêr nê hamaxpêr o:

—Kwa na xep Ijaew kêt xwỳnh kwỳjaja Jejus kôt amnhĩ xunhwỳ nhũm Tĩrtũm ja hã mẽ omu nê mẽ ho hkra. Kwa mon pu prem axtem nê ri Jejus kaga? E pu mẽ kuxwar amnhĩ kaxyw hkôt mãn pajamaxpêr nê hkôt amnhĩ xunhwỳ kê Tĩrtũm ja hã mẽ pahpumu nê Ijaew kêt xwỳnhjê pyrã nê mẽ pahto hkra. Hãmri nê amnhĩ mã mẽ pahte amnhĩ to mex xwỳnh ã mẽ pajarê. Anê.

ã Ijaewjaja hamaxpêr anhỹr kaxyw na pre Tĩrtũm Ijaew kêt xwỳnhjê mã amnhĩ to amnhĩrĩt.

¹² Hãmri nhũm mẽ amnhĩ tâ omu nê hkĩnh nê pa. No nhũm Ijaew kwỳjaja. Mẽ kãm Jejus prãm nōkati ho mẽ pa xwỳnhjaja mẽ hkĩnhã hkaprĩ nê pa. Tã koja mẽ nhỹrmã amnhĩ kaprĩ hã amnhĩ pumu nê amnhĩ kĩnh kêt ã amnhĩ pumu hãmri nê Tĩrtũm kôt amnhĩ xunhwỳr nê amnhĩ kaxyw Kra Jejus Kris mã hamaxpêr japêr. Koja mẽ ã amnhĩ nhĩpêx anê hãmri nê Ijaew kêt xwỳnhjê pyrã nê hkĩnh nê ri pa. Hãmri nhũm Tĩrtũm ja hã mẽ omu nê Ijaew kêt xwỳnhjê mẽ mẽ ho hpimràatã mẽ ho mex rax nê nhũm mẽ hkĩnh nê hamakêtkati nê pa ho pa.

Tĩrtũm kot Ijaew kêt xwỳnhjê ho hkra hã harênh

¹³ E kot paj hpãnhã mẽ apê Ijaew kêt xwỳnhjê mã ixkapêr nê mẽ atã kagà. Na pre Jejus ma mẽ awỳr inhmê. ỹ hã ixte mẽ ajahkre ho ri mẽ akôt ixpa kaxyw. Pa pre ma krĩ hkwy kamã mẽ akwỳjê hwỳr mō nê ixkĩnh kãm mẽ kãm kapêr jarênh o ri mẽ hkôt ixpa. Nhũm mẽ hkwyjaja inhma nê amnhĩ kaxyw Jejus kôt hamaxpêr nê hkôt amnhĩ xunhwỳ.

¹⁴ Tã koja apu ixkwỳjaja mẽ harênh mar japêr. Ijaew tee ri mẽ apê Ijaew kêt xwỳnhjê jarênhja ma hãmri nê ra amnhĩ kamã gryk japêr. Jao mẽ apyrã nê Jejus kôt amnhĩ xunhwỳ nê nhỹrmã kuri htĩr tũm nê mex nê pa ho pa.

¹⁵ Kormã mẽ kot amnhĩ kaxyw kãm hamaxpêr kêt jakamã na pre Tĩrtũm hpãnhã mẽ apê Ijaew kêt xwỳnhjê mã amnhĩ to amnhĩrĩt. Ka mẽ ra krĩ piitã hkôt axohtô nê hkôt amnhĩ xunhwỳ nê

hkôt amnhî nhîpêx mex o ri apa. Tã koja Ijaewjaja nhÿrmã amnhî kaxyw Tÿrtÿm mã hamaxpêr nê mẽ apyrà nê Jesus kôt amnhî xunhwÿr japêr. Hãmri nê te mēhō hkra kēp htyk nhÿm hkaprî htã nhÿm hkraja tanhmã amnhî to nê akupÿm kãm htÿr nhÿm kot omunh nê hkÿnh tÿx kumrēxta pyrāk o amnhî nhîpêx. Jao Tÿrtÿm mẽ kot hkôt amnhî xunhwÿr ã mẽ omu nê hkÿnh nê. Pu mẽ pahpimràatã urāk nê pahkÿnh nê ri papa.

¹⁶ E pa mẽ amã mẽ ujarēnhja ã ejēp kwÿ jarē. Koja mẽmo pÿ hpār jarē mex nê hã koja pàr mex nê xa. Ja pyrà nê Ijaew pàr krax finat Apraãwja kumrēx na pre amnhî kaxyw Tÿrtÿm mã hamaxpêr nhÿm ho hkra. Jakamã koja nhÿrmã hkanrēhã htãmnhwÿjaja urāk nê amnhî kaxyw kãm hamaxpêr nhÿm mã mẽ ho anē nê mãânēn mẽ ho hkra nhÿm mẽ mex nê pa. Te kot mẽmo pÿ hpār jarē mexja nhÿ hã pàr mexta pyrāk.

¹⁷ Nê na htem akunî kamã mẽmo pÿ hpa jakà nê hamÿ nê ma amnhî kôt o mra. Nê ixkre kapem ra mẽ kot mẽmo pÿ hkreja hpa jakàr nê rēnh xwÿnh xwakre kamã wam pÿ hpa jakàr xwÿnhhta nhô nê axpēn tã hkaxpre nê gaa nê axpēn jamÿnh mex nê grã hkēt nê. Nê arî htÿr mex nê. Te kēp hpa kumrēx pyrāk. Tã Ijaew kwÿ kot amnhî kaxyw Jesus kôt hamaxpêr xwÿnhjaja te mẽ kēp ixkre kapem pÿ hpārta pyrāk. No mẽ hkwyjaja mẽ kot Jesus kaga xwÿnhjaja te mẽ kēp mẽ kot kēp hpa jakàr nê rēnhhta pyrāk. Jakamã nhÿm Tÿrtÿm te mẽ kot pàr pē hpa jakàr nê rēnhhta pyrāk o mẽ hipêx nê mẽ hkaga. Nê axtem te mẽ kot mẽmoj pàr pa jakàr nê hpãnhã kamã axtem pÿ hpa janhōr nê hã hkaxpreta pyrāk o mẽ apē Ijaew kēt xwÿnhjē nhîpêx nê mẽ amã amnhî to amnhîrît. Ka mẽ ra amnhî kaxyw Jesus mã ajamxpêr nê hkôt amnhî xunhwÿr nhÿm Tÿrtÿm mẽ ato mex nê.

¹⁸ Tã kēr ka mẽ arî Ijaew o mex o ri apa. Tanhmã ri mẽ hipêx to mã ajamxpêr to hkēt nê. Rÿ ajamxpêr o:

—Nã ãm hãmri na Tÿrtÿm mẽ hkaga nê ãm kãm mẽ papxipixjê japê.

Anhÿr o ajamxpêr kēt nê. Ijaew te ixkre kapem pÿ hpār mexta pyrāk. No mẽ kajaja

te mẽ ate akunî rÿm pÿ hpa kot ixkre kapem pàr mex pix kukwak ri htÿr nê hã harirta pyrāk. Kēt akunî rÿm pÿ hpa jakàr kukwak ri na hte ixkre kapem pàrta htÿr nê kuhē hkēt nê. Kop apu pàrta mex kēt ronhÿx ra akunî rÿm hpaja grã pa. Ja pyrà nê Ijaew kukwak ri kot kaj mẽ nhÿrmã Tÿrtÿm ri atÿr tÿm nê apa ho apa. Jakamã kwa kēr ka mẽ ate amnhî to rÿnh o mẽ hakrenh ã amnhî to jarkrar kēt nê.

¹⁹ Mãn ka mẽ atō ajamxpêr o:

—Ra Tÿrtÿm kot Ijaew kaga nê hpãnhã mẽ pajaja mẽ ixto hkra jakamã mãn kãm mẽ ijapê ho mẽ hakre. Ra mẽ hpãnhã mẽ ixto hkra kēnã. Anē.

²⁰ Nã ãm hãmri na pre Tÿrtÿm Ijaew kwÿ kaga. Mẽ kot Jesus kôt amnhî xunhwÿr kēt mÿrapê na pre te mẽmo pÿ hpa jakàr nê rēnhhta pyrāk o mẽ hipêx. Ka mẽ ra mẽ kurom amnhî kaxyw hkôt ajamxpêr jakamã nhÿm Tÿrtÿm te kot akunî kamã pÿ hpa jakàr nê ho htēm nê ixkre kapem pÿ hpār mex ã hanhōr nê hã hkaxpre pyrāk o mẽ anhîpêx. Nom kwa kēr ka mẽ ja hã amnhî pumu nê ri hã Ijaewjē mã amnhî to jarkrar kēt nê. ãm amnhî to mex nê Tÿrtÿm kapêr kôt amnhî nhîpêx mex o ri apa. No kot kaj mẽ ã amnhî nhîpêx anhÿr kēt nhÿm amnhî tã mẽ apumu nê ra kot Ijaew kwÿ nhîpêxta pyrà nê tanhmã mẽ ato nê mẽ akaga.

²¹ ã Ijaew jarēnh kot anhÿr. Te mẽ kēp pàr mex pyrāk. Tã nhÿm mẽ kot Jesus kôt amnhî xunhwÿr kēt jakamã nhÿm Tÿrtÿm te kot pÿ hpa jakàr nê rēnhhta pyrāk o mẽ hipêx nê mẽ homnuj nê. Kot kaj mẽ urāk nê ã amnhî nhîpêx anē nhÿm mã mẽ ato anē nê.

²² Ijaew kot Jesus kôt amnhî xunhwÿr kēt jakamã nhÿm Tÿrtÿm mẽ hpãnhã mẽ apē Ijaew kēt xwÿnhjē mã amnhî to amnhîrît. Tã ka mẽ Ijaew rom amã Jesus prãm nhÿm Tÿrtÿm ja hã mẽ apumu nê amnhî pyrà nê kãm mẽ aprãm nê mẽ akamã ukaprî rãhã nê pa ho pa. Tã kwa mẽ okora. Kēr ka mẽ hkôt pix mã amnhî nhîpêx o ri apa rãhã ty. Kot kaj mẽ hkaga nhÿm amnhî tã mẽ apumu nê te Ijaew kot hkaga xwÿnhjē nhîpêx pyrāk o mẽ anhîpêx nê mẽ akaga.

²³ Koja Ijaew nhÿrmã Jesus kôt amnhî xunhwÿr japêr nhÿm Tÿrtÿm ja hã mẽ omu

ně mẽ ho hkra. Te mẽ kot pàr pa jakàr nē rēnh nhũm grà par xwýnh nhũm kot akupým amnhĩm hamýnh nē ixkre kapem pàr wýr o htēm nē akupým hã hanhōr nē hã hkaxpre ho htýx nhũm kukwak ri akupým htírta pyràk. Ja kēp tanhmã kute hkēt. Kot ã hipêx anhýr kaxyw àhpumunh týt.

²⁴ Mě apê Ijaew kêt xwýnhjaja te mẽ ate akunĩ kamã pĩ hpa jakàr nē ixkre kapem pàr ã hanhōr nē hã kaxpreta pyràk. Jao Jejus kôt amnhĩ xunhwý nhũm mẽ ato hkra kurê kumrēx. No Ijaew te mẽ kēp ixkre kapem pàrta pyràk jakamã Tirtũm kot akupým hanhōrta tanhmã kēp kute hkēt. Kēp Tirtũm kēnã kot tanhmã kēp kute. Jakamã koja mẽ hkôt amnhĩ xunhwý nhũm amnhĩ tã mẽ omu nē mẽ ho hkra kurê kumrēx.

Tirtũm kot mẽ piitã mẽ kamã ukapřĩ hã harēnh

Matêwre 23.37-39; Rukre 21.24; Juãw 10.16

²⁵ E kot paj mẽ amã mẽmoj to amnhĩrit ka mẽ inhma. Nà na pa ra mẽ amã Ijaew krã xihtýt xwýnhjê jarē ka mẽ harēnh ma. Ra mẽ kot Jejus kaga hã mẽ harēnhja. Tã koja mẽ ã amnhĩ nhĩpêx anhýr o pa rãhã hkēt nē. Na hte Tirtũm kormã amnhĩ tã mẽ apê Ijaew kêt xwýnhjê jamãr o pa. Amnepēm na pre amnhĩ kaxyw mẽ akukamã tanhmã mẽ akwýjê jarēnh to. Tã kot kaj mẽ kot tanhmã mẽ ajarēnh to xwýnh piitã Jejus kôt amnhĩ xunhwýr pa nhũm rĩ Ijaew amnhĩ to hapu nē kormã hkôt amnhĩ xunhwý. Æ mẽ kot amnhĩ nhĩpêx anhýr kaxyw. Jakamã kwa kêr ka mẽ ri ja hã amnhĩ to jarkrar o ri mẽ hkôt apa hkēt nē. Mě pahpyrà nē mẽ kot Jejus kôt amnhĩ xunhwýr mã xwýnh kēnã.

²⁶ Koja Tirtũm nhýrmã Ijaew piitã ho hkra. Kapēr ã kagà htũm kot mẽ harēnh kot:

Nhýrmã kot mẽ ate amnhĩ tomnuj pē mẽ apytàr mã xwýnhja Ijaew õ koja.

Jako hkanrēhã htàmnhwýjê hõ koja.

Koja nhýrmã wrý nē mẽ ate amnhĩ tomnuj pē mẽ apytà nē mẽ ate amnhĩ tomnuj o hapêx pa. Anē.

Anhýr o kot harēnh.

²⁷ Nē mãänēn ja:

Kot paj mẽ nē mẽ kot amnhĩ tomnuj o ijapêx pa.

Amnepê mã ixte mẽ hkukamã mẽ hã amnhĩ jarēnh xà hkôt. Anē.

²⁸ Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwýr pyràk o amnhĩ nhĩpêx. Tã ã mẽ kot amnhĩ nhĩpêx anhýrja ri ka mẽ kamjaja mẽ hpãnhã mẽ apê Tirtũm kra. Nom nhũm Tirtũm arĩ kãm mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarēnh to. Mě hpàr kraxjê mã tanhmã mẽ hã amnhĩ jarēnh to. Finat Apraãw mẽ Ijak mẽ Jakoja mã mẽ hkanrēhã mẽ htàmnhwýjê hã tanhmã amnhĩ jarēnh to.

²⁹ Na hte Tirtũm mẽmoj tã tanhmã amnhĩ jarēnh to nē ãm hãmri hã amnhĩ jarē nē amnhĩ jarēnh xà hkôt tanhmã hipêx to. No na hte mẽmoj tã amnhĩ jarēnh tã gaa nē ho hamakêtkati hkēt nē. Rý hpãnhã axtem tanhmã hipêx to hkēt nē. Na hte mẽmoj tã amnhĩ jarēnh xà hkôt tanhmã hipêx to. Tã ra amnepê mã kot Ijaew o mex ã amnhĩ jarēnh jakamã koja nhýrmã mẽ ho mex rax nē ã mẽ hipêx anhýrja o hamakêtkati hkēt nē.

³⁰ No mẽ kajaja mẽ apê Ijaew kêt xwýnhjaja. Amnepēm na ka prem ajaxwýja Tirtũm kôt amnhĩ nhĩpêx kêt nē. Tã nhũm mẽ akamã ukapřĩ nē kãm mẽ ajapê nē. Ka mẽ ra harēnh ma nē hkôt amnhĩ xunhwý nē hkôt amnhĩ nhĩpêx mex nē. No ãm Ijaew kukwak ri. Mě kot kapēr kôt amnhĩ nhĩpêx o pa hkēt jakamã nhũm Tirtũm mẽ hpãnhã nhãm mẽ amã amnhĩ to amnhĩrit nē mẽ ato mex rax nē. Jakamã te Ijaew kukwak ri mẽ amex nē ri mẽ apa pyràk.

³¹ Tã koja nhýrmã kot mẽ anhĩpêxta pyrà nē Ijaew ho hkra. Nē mẽ apyrà nē mẽ kamã ukapřĩ nē. Mě kot mẽ apyrà nē amnhĩ kaxyw Kra hkôt hamaxpēr xwýnhjaja nhũm mẽ apyrà nē mẽ ho hkra nē mẽ ho mex nē.

³² Mě apê Ijaew kêt xwýnhjaja nē mẽ ixpê Ijaew mẽ pahte axpēn pyràk. Na pu htem pahpiitã Tirtũm kapēr piitã hkôt amnhĩ nhĩpêx rãhã ho ri papa hkēt nē. Tã kot puj mẽ tee ri ja hã amnhĩ pumu nē amnhĩ to kuwý nhũm mẽ pama nē amarĩ mẽ pakamã ukapřĩ nē mẽ pahto mex nē.

*Pawre kot Tirtûm mex o mex ã harênh
Epes 3.20; Korosê 1.16; Wam Korît 2.9,
2.16*

³³ Tirtûmja àhpumunh tỳx o àhpumunh tỳx. Nê ukaprî ho ukaprî nê mex o mex. Mê pahtô na pu urak nê ã amnhî nhîpêx anhÿr o papa? Nà amrakati kumrêx. Nê mê pahtô na pahte Tirtûm jamaxpêr kôt omunh? Nà mê pahte hamaxpêr kôt omunh kêt.

³⁴ Kapêr ã kagà htûm kot ja jarênh kot: Mê pahte Tirtûm jamaxpêr kôt omunh kêt. Nê kot pu mê pahtô mêmoy tâ hakre hkêt nê. Mê parom àhpumunh o àhpumunh xwÿnh kênã.

³⁵ Nê mê pahtô kot puj we kãm pakapêr nê kãm: “Kwa Tirtûm. Ra ixte amã mêmoy nhôrta pãnhã kwa amnhî xwar inhmã mêmoy gô.” Anê.

Nà mêmoy piitã õ kênã kot puj kêt ri ã kãm mêmoy nhôr ã amnhî jarênh anê. Anê.

³⁶ Tãm na pre amnhî kaxyw mêmoy piitã ho kator pa. Nê ãm pix kukwak ri na mêmoy piitã htîr nê pa. Jakamã kwa pu mê kãm mex o mex ã mãn harênh rãhã ho ri papa.

12

Mê pahte Tirtûm mã amnhî nhôr ã mê pajarênh

Wam Korît 6.20; Epes 4.1; Piripos 4.8-9; Korosê 1.10; Wam Tesarôn 4.1-3; Wam Pêtre 2.11

¹ Kwa Jejus kôt ixkwÿjaja. Tirtûm na hte mê pahto mex nê mê pakamã ukaprî rãhã jakamã na pa ã mê amã ixkapêr anê. Kwa mê tokyx kãm amnhî jarê nê kãm amnhî gô. Te mê ate kãm hkînh xà nhôr pyrak o amnhî nhîpêx nê kãm amnhî gô. Jao mê amã kapêr kôt pix mã amnhî nhîpêx o ri apa hprãm ã kãm amnhî jarê. Nê kãm hprãm xà hkôt pix mã tanhmã amã amnhî nhîpêx to ho ri apa hprãm ã kãm amnhî jarê. Kot kaj mê ã kãm amnhî jarênh anê nhûm amnhî tâ mê ama nê hkînh nê. ã mê pahte kãm amnhî jarênh anhÿrja na kãm mar prãm.

² Nê kêr ka mê kãm Tirtûm prãm kêt xwÿnhjaja kot amnhî nhîpêx o ri amnhî nhîpêx o ri apa hkêt nê. Nê mê amnhî to Tirtûm mãn wÿ kê mê amã mê ajamaxpêr mex jagjê. Koja mê ama nê mê amã hagjê ka mê ra aprî hã hamaxpêr xà hkôt mê

pahte amnhî to mex xà pumunh mex nê. Na pu htem hkôt amnhî nhîpêx o ri papa nhûm amnhî tâ mê pahpumu nê hkînh nê. Pu mê pajaxwÿja ÿ hã pahkînh nê ri papa.

Kris kwÿjaja kot tanhmã axpên nhîpêx to hã mê kãm karô

Rômân 12.1-11; Epes 4.11-16; Wam Pêtre 4.10-11

³ Nê na pre Tirtûm ixto mex nê. Nê mê akaxyw ixãm. Ixte mê amã Kra Jejus kot tanhmã mê panê amnhî nhîpêx to hã harênh o ri mê akôt ixpa kaxyw. Tã na pa ã kagãja kamã mê amã harênh anê.

Jakamã kwa kêr ka mê amnhî to jarkrar o ri mê kãm apa hkêt nê. ãm kwarî ho kwarî. Rÿ atỳx ri ajamaxpêr o:

–Nà pa na ixte amnhî to mex o ixte ixkwÿjê piitã mê hakrenh par.

Anhÿr ã amnhî to jarkrar o ri mê hkôt apa hkêt nê. Kêt mê ãm amnhî jarênh o:

–Na pa pre amnhî kaxyw Jejus kôt ijamaxpêr nhûm Tirtûm ixpumu nê ixto hkra. Jakamã na pa hte Jejus Kris pix kukwak ri tãm amnhî nhîpêx o ri ixpa. No amnhî krã hkôt ã amnhî nhîpêx anhÿr kêt nê. Anê.

⁴ E pa mê amã mêmoy jarê ka mê inhma. Nà mê panhîja pyxi htã kamã mêmoy xoh-tôô. Na kamã mê pano nê mê pajakwa. Nê kamã mê pajamak nê mê pahte. Na pu htem mê pano ho rît nê mê pajakwa ho pakapêr. Nê mê pajamak o ri ama nê mê pahte ho ri mra.

⁵ Ja pyrã nê Kris kôt mê pahte amnhî xunhwÿr xwÿnhja ãm pyxi tâ hkôt mê pahte amnhî xunhwÿr xwÿnhjaja mê paxoh-tôô. Jakamã na pu htem ahpÿnhã tanhmã axpên to mex to ho ri papa. Jao Kris kôt axpên to pahtô nê pahtôx o papa.

⁶ Tirtûm na hte mê pahpê hkwÿ hã ahpÿnhã mê pamã tanhmã mêmoy tâ karô to nê kaxyw mê pahto mê paxihtỳx. Tã kêr pu mê ra kot mê pamã mêmoy tâ karô xà hkôt kãm amnhî nhîpêx rãhã ho ri papa. Jakamã koja mêmô ate Tirtûm kapêr jarênh o ri apa kaxyw axãm nê amã anê ka Tirtûm kamnàr rom mê kãm kapêr jarênh mex o ri mê hkôt apa.

⁷ Rÿ ate akwÿjê mã tanhmã axapênh to ho ri apa kaxyw axãm ka mê kãm axapênh mex o ri mê hkôt apa.

Rỳ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rỳ ate Tĩrtũm kapêr o ri Jejus kôt mẽ akwỳjê jamaxpêr o hihtỳx o ri apa kaxyw axãm ka mẽ kãm kapêr jarênh pê mẽ ho mẽ hihtỳx mex o ri mẽ hkôt apa.

Rỳ ka mẽ atõ akukrêx rax japêr nê ate mẽ kêp amrakati xwỳnhjê mã mẽmoj nhõr o ri apa kaxyw axãm ka axãmnhĩx ri mẽ kãm mẽmoj nhõr o ri mẽ hkôt apa.

Rỳ ate akwỳjê ho amnhĩptâr kaxyw axãm ka mẽ ho amnhĩptâr mex o ri apa.

Rỳ ate tanhmã mẽ akwỳjê ho mex to nê mẽmoj to mẽ kutã anojarêt o ri apa kaxyw axãm ka akĩnh kãm ã mẽ hipêx anhỹr rãhã ho ri apa nê tanhmã akapêr punuj to hkukamã ri ajamaxpêr o ri mẽ hkôt apa hkêt nê.

⁹ Nê kêr ka mẽ apiitã amã axpên kĩnh kãm axpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mẽ kot amnhĩ tomnuj xà piitã hkaga hpa nê hpãnhã mẽ kot amnhĩ to mex xà pix pyr tỳx nê hkôt amnhĩ nhĩpêx rãhã ho ri apa.

¹⁰ Nê mẽ apê Kris kwỳ hã amã axpên kĩnh kãm tãm axpên nhĩpêx o ri apa. Nê mẽ akwỳjaja mẽ kot amnhĩ to mex xwỳnh ã mẽ harênh o ri mẽ hkôt apa. No mẽ ri atỳx ajamaxpêr o:

—Nà koja mẽhõ ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỹr o ajamaxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

¹¹ Nê kêr ka mẽ Tĩrtũm mã mẽmoj to anhỹr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nê.

¹² Nê mẽ nhỹrmã Tĩrtũm kot kaxkwa kamã mẽ ato mex rax kukamã ajamaxpêr nê akĩnh rãhã kãm mẽmoj to anhỹr o ri apa.

Nê kêr ka mẽ tanhmã amnhĩ to rỳ nhũm mẽhõ tanhmã mẽ ato ka mẽ akapri nê ri apa htã no ãm tee ri amnhĩ kukamã ajamaxpêr o Tĩrtũm kaga hkêt nê. Arĩ amnhĩ to hwỳr rãhã ho ri apa.

¹³ Nê koja Kris kôt atõjê hõ kêp amrakati ka mẽ ja hã omu nê anhõ mẽmoj japêr nê mãmri kãm hkwỳ gõ. Nê amnhĩ wỳr awỳ nê tanhmã ho mex to.

¹⁴ Nê mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nê agryk nê wajaga kot tanhmã amã ho kaxyw hwỳr atêm nê kãm tanhmã hã axãmnhênh to hkêt nê. Kêt ãm ho Tĩrtũm pix wỳ nê kãm:

—Pa mẽ ijamãr mex xwỳnh maati. Nà na ixkwỳjê hõja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhỹr o mãn mẽ ho awỳ.

¹⁵ Nê koja akwỳjê hõ mẽmoj tã hkĩnh nê. Ka omu nê urak nê ã hã akĩnh nê. No koja mẽmoj tã hkapri nê mỳr o nhỹ ka omu nê ra urak nê ã hã akapri nê.

¹⁶ Nê kêr ka mẽ piitã mẽ hipêx o axpên pyrak o ri apa. Te mẽ ate amnhĩ to rax o akwỳjê jakrenh o te mẽmoj kamã akahak o amnhĩ nhĩpêx pyrak kêt nê. Nê axãhpumunh tỳx o ate mẽ piitã mẽ hakrenh par pyrak o ri amnhĩ nhĩpêx o ri apa hkêt nê.

¹⁷ Nê koja mẽhõ tanhmã ato htã ka ãm amnhĩ tã omu nê tanhmã amnhĩ tã ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nê kêr ka mẽ tãm ri axpên mã akapêr rãhã ho ri apa.

Nê kot kaj akrãmnhwỳ mẽ wa tanhmã axpên nhĩpêx to. Hãmri ka wa akupỳm tãm axpên xãm kaxyw kãm akapêr tã nhũm ama nê ãm ama nê akaga. Ka ãm amnhĩ tã omu nê kamã agryk kêt nê. Koja Tĩrtũm tãm tanhmã atã ho. Kapêr ã kagã htũm kot ja jarênh kot:

Kêr ka mẽ amnhĩ tã tanhmã kot ato xwỳnh to hkêt nê. Pa kot paj mẽ atã tanhmã ho. Anê.

Nê harênh kot:

²⁰ Kêr ka mẽ amã mẽ kãm mẽ akurê xwỳnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukapri nê mẽ kãm mẽmoj kwỳ gõ kê mẽ kuku.

Rỳ nhũm mẽ kãm kôr ka mẽ kãm gô hkwỳ kê mẽ ho ixkõ.

Kot kaj mẽ ã amnhĩ tã mẽ hipêx mex anê nhũm mẽ tee ri amnhĩ tã mẽ apumu

nê amnhî kamã hpijaàm jao mẽ atã amnhî kamã gryk nê. Anê.

²¹ Nom kot kaj mẽ amnhî tâ tanhmã mẽ homnuj to hãmri nê ajaxwýja urak nê amnhî tomnuj nê. Ja pymaj kêr ka mẽ amnhî rom tãm mẽ hipêx. Hãmri nhũm mẽ amnhî tâ mẽ apumu nê mẽ apyrà nê tãm mẽ anhîpêx japêr.

E kêr ka mẽ ã axpên nhîpêx o ri apa anê.

13

Mẽ pahto amnhîptâr xwýnhjê jarênh

Matêwre 22.21; Xitre 3.1; Wam Pêtre 2.13-

17

¹ Nê kêr ka mẽ kot mẽ ato amnhîptâr xwýnhjê kapêr ma nê kapêr kôt ri amnhî nhîpêx rãhã ho ri apa. Tirtũm kot mẽ pakaxyw mẽ unhwýr kênã. Mẽ kot mẽ pahto amnhîptâr o pa kaxyw na hte mẽ unhwý.

² Jakamã koja mēhõ mẽ kapêr ma nê ãm kuma nê hkôt amnhî nhîpêx kêt nê hãmri nê te kot Tirtũm kapêr mar nê ãm mar pyrak o amnhî nhîpêx. Hãmri nhũm Tirtũm tee ri ja hã omu nê nhýrmã tanhmã hã ho.

³ Xà na hte tãm mẽ kot amnhî nhîpêx xwýnhjê pama ho pa? Nà na htem kãm mẽ uma hkêt kãm ri pa. ãm mẽ kot amnhî tomnuj xwýnh pixjaja na amnhî kamã kãm mẽ uma ho pa. Tã ka mẽ amã mẽ kot mẽ ato amnhîptâr xwýnhjê pama hprãm kêt xwýnhjê kêt ka mẽ kapêr ma nê hkôt amnhî nhîpêx kê amnhî tâ mẽ apumu nê hkĩnh nê. Nê amnhĩm mẽ ate amnhĩ to mex xwýnh ã mẽ ajarê.

⁴ Tirtũm nhý hã mẽ panhõ pahi kot mẽ pahto amnhîptâr jakamã na htem mẽ kãm mẽ pahto mex prãm nê. Nê kot pu mẽ pahõ axtem nê tanhmã amnhî tomnuj to hãmri nhũm tee ri ja hã pajarênh ma nê tanhmã hã mẽ pahto. ãm hãmri na hte ã mẽ pahto amnhîptâr xwýnhjê mẽ panhîpêx anê. Tirtũm kãm hprãm xà hkôt.

⁵ Jakamã kwa mẽ kapêr ma nê hkôt ri amnhî nhîpêx mex rãhã ho ri apa. Nom amã kot tanhmã ato pix pymaj hkôt ri amnhî nhîpêx kêt nê. Mãânên ã amnhî kukamã ajamaxpêr anê nê ajamaxpêr o:

—Nà Tirtũm kot mẽ ixkaxyw unhwýr jakamã na pa hte kapêr ma nê hkôt amnhî nhîpêx mex o ri ixpa.

Anhýr o ajamaxpêr.

⁶ Nê mẽ pahto amnhîptâr xwýnhjê kot Tirtũm nhý hã tanhmã mẽ panhîpêx to ho pa jakamã na pu htem mẽ àpênh pãnhã mẽ kãm amnhîre. Mẽ pahpiitã axpên kaxyw kãm kàxpore ho hkryre nê kugõ. Tanhmã kot ho mẽ pamã mẽmoj to mex to kaxyw.

⁷ Jakamã kêr ka mẽ hã apijaàm o ri apa kamã mãmrĩ mẽ kãm kàxpore hkwý ho hkryre nê òr o ri apa. Mẽ kot hã àhwýr xà hkôt.

Mẽ pahte tanhmã axpên nhîpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸ Nê kêr ka mēhõ ho tewên japêr nê tokyx kãm amnhîre. Nê mẽ amã axpên kĩnh o aa ho ajamakêtkati hkêt nê. Jao mẽmoj to axpên kutã anojarêt rãhã ho ri apa. Kot kaj mẽ ã axpên nhîpêx anê nê Tirtũm kapêr piitã hkôt amnhî nhîpêx mex o ri apa.

⁹ Amnepê mã na pre finat Mojesja Tirtũm nhý hã Ijaew mã mẽmoj tâ karõ nê mẽ kãm: Kêr ka mẽ aprõ pix tânopxa nê nhãm mēnijê hõ kamã ri akurê ho apijaàm kêt o apa hkêt nê.

Nê mẽ anijaja mẽ amjên pix tânopxa nê nhãm ri mēmyjê hõ kamã akurê ho apijaàm kêt o ri apa hkêt nê.

Nê mẽ ri axpên par kêt nê.

Nê mẽ ri axpên pē axàhkĩnh o ri apa hkêt nê.

Nê mẽ amã ri axpên kukrêx kĩnh o ri amã ho anhõ hprãm o ri apa hkêt nê. Anê.

Nê mãânên ja:

Kêr ka mẽ nhãm mẽ axpên nhîpêx o te ka amã amnhî tâ ma pyrak. Jao tãm axpên nhîpêx o ri apa. Anê.

ã kot mẽ kãm hã karõ kot anhýr. Kot puj mẽ ã pamã pahkwýjê kĩnh anê nê mãânên wam finat Mojes kot mẽmoj tâ mẽ panhîgêjtjê mã karõ hkôt amnhî nhîpêx o ri papa rãhã nê. Jao axpên par kêt nê. Nê axpên pē paxàhkĩnh kêt nê. Nê axpên kutã panojarêt rãhã nê.

¹⁰ Koja mēhõ kãm amnhî tâ ma pyrak o hkwýjê nhîpêx nê mẽ ho mex pix o pa.

Jakamā kot kaj mē amā ri axpēn kīnh nē mēmoj to axpēn kutā anojarēt pix nē. Jao Tīrtūm kapēr piitā hkôt amnhī nhīpēx mex o ri apa.

¹¹ Amnepē mā mē pahte amnhī kaxyw Jejus kôt pajamaxpēr xà hā arīgrota ā na pre kormā akupŷn mē pahwŷr hpôx xà hā arīgro kormā hwŷr awry rax nē. Tā ra hwŷr ahtēp o mō. Koja tokyx akupŷn mē pahwŷr wrŷ nē ma akupŷm kaxkwa hwŷr mē pahto apī. Jakamā kwa kēr pu mē arī hamār rāhā ho ri apa. Jao tanhmā amnhī tomnuj to kaxyw nē pajamaxpēr o:

—Kwa koja Jejus tanhmā amnhī to nē jarāhā akupŷn wrŷk japēr. Tā kot pa ri ā amnhī nhīpēx anē nhūm wrŷ nē tee ri ja hā ixpumu pa amnhī kamā xpijaàm tŷx nē. Nà kot paj ā amnhī tomnuj anhŷr kēt nē. Anē.

Hāmri nē Jejus kamā ajamak pē kutēp Tīrtūm kapēr kôt pix mā ri amnhī nhīpēx mex rāhā ho ri papa.

¹² Na pu htem kamāt kām gōr nē arīgro jamār pē kamā pajamak o panhīkwŷ. Arīgro te kēp Jejus akupŷn wrŷk pyrāk. Jakamā kwa pu mē kamā pajamak pē kām panojarēt rāhā ho ri papa nē amnhī nē tanhmā mē omnu xà kute pumunh mex o ri papa. Te ho pōristi kot amnhī nē mē kot kām mē hkurē xwŷnhjē pumunh mex pyrāk o Jejus kutēp tām amnhī nhīpēx o ri papa. Na pre tanhmā mē pahkrā hto pu mē ŷ hā tām ri amnhī nhīpēx. Tā kēr pu mē arī ā amnhī nhīpēx anhŷr o ri papa nē te mē pahte arīgro hā mē pa xwŷnhjē kot amnhī nhīpēx pyrāk o amnhī nhīpēx.

¹³ Kot puj mē ā amnhī nhīpēx anē nē mē piitā mē noo mā tee ri tanhmā mē pahte amnhī tomnuj to mā pajamaxpēr kēt nē. Jao amnhī kamā pahpijaàm nē ri papa hkēt nē. Nē pajamakētkati nē paxàmnhīx ri papa. Te ho hirā kamā ri mē pa xwŷnhjē kot amnhī nhīpēx pyrā nē ām ri paxàmnhīx tām amnhī nhīpēx o ri papa.

Nē mē pahprō pix tănopxar o ri papa.

Nē mē pahpipānh nē ri papijapu ho ri papa hkēt nē.

Nē mēmoj tā axpēn mā paxàkjēr hkēt nē.

Nē mēmoj tā axpēn kām pagryk kēt nē.

¹⁴ Nom kot puj mē axtem nē ā amnhī tomnuj anē nē mē pahte amnhī nhīpēx tūm

kôt pix mā amnhī nhīpēx. Tā kēr pu mē ā amnhī nhīpēx anhŷr pumaj hpānhā amnhī to Pahihti Jejus Kris wŷ nē kām:

—Pa Jejus. Nà kormā jar apa ri na ka pre mē kot tanhmā amnhī tomnuj to kutā axihtŷx o axihtŷx nē aa tanhmā amnhī tomnuj to hkēt nē. Tā inhmā apyrā nē ixte amnhī tomnuj kutā ixihtŷx o ixihtŷx o ixpa hprām. Anē.

Jao mē pajamaxpēr tūmja te ra kot amnhī tā mē pahto htŷx kēt pyrāk o pu mē amnhī nhīpēx o ri papa.

14

Mē pahte Kris kôt pahkwŷjē mā paxàkjēr kēt ā mē pamā karō

Matêwre 7.1-5; Rōmān 2.1; Wam Korīt 10.23-33; Xiakre 4.11

¹ Nē koja mēhō kormā Jejus kôt amnhī xām nyw ri kormā hkôt hamaxpēr tohtuj anē. Hāmri nē htŷx tanhmā hamaxpēr to nē mēmoj mex kaga. Ka mē ja hā omu nē ām omu nē hā tanhmā kām nē hkēt nē. Kwār māmri ā amnhī nhīpēx anē. Koja gaa nē rī hprī hā Tīrtūm kapēr mar tŷx nē hāmri nē hkôt mēmojta pumunh mex nē.

² Jakamā koja Jejus kôt akwŷjē hō mē apkur xà piitā hkur pymaj tanhmā hō kute hā harē nē hkaga nē hamaxpēr o:

—Nà kot pa ja hkur kēt nē. Kot pa apu kuku nē hkur o amnhī tomnuj nē. Anē.

Kwār māmri ā hamaxpēr anē nē hkur kēt nē. Nom mē pahte Jejus kôt amnhī xunhwŷr tŷx xwŷnhjaja na pu htem paxàmnhīx Jejus kamnār rom mēmoj piitā kuku. Nom mē pahkīnhā ham mē kot hkôt amnhī xunhwŷr xwŷnhjaja kormā kapēr piitā mar kēt jakamā kwār mē māmri anē nē mēmoj kur kēt nē.

³ Nom kēr ka mē ri tanhmā hā mē kām akapēr to hkēt nē. Rŷ mē kām:

—Kwa mē ixpyrā nē mēmoj piitā aku.

Anhŷr o mē kām akapēr kēt nē. Ano ho ām hā mē omu.

Nē mē ate mēmoj piitā hkur kēt xwŷnhjaja kēr ka mē ajaxwŷja mē ixte mēmoj piitā hkur ā tanhmā mē inhmā axàkjēr to hkēt nē. Mē ixte mēmoj piitā hkur o ixpa hā mē ixpumu nē ām hā mē ixpumu nē hā tanhmā mē inhmā axàkjēr to hkēt nē. Rŷ hā mē inhmā:

—Kwa na kot kaj mẽ ja kur o amnhĩ tomnuj nẽ.

Anhỹr o hã mẽ inhmã akapẽr kêt nẽ. Ano ho ãm ja hã mẽ ixpumu. Mẽ pahte ahpỹnhã tanhmã paxàpkur to htã Tĩrtũm kot mẽ pahte Kra Jejus kôt amnhĩ xunhwỳr xwỳnh piitã mẽ pahto hkra kênã.

⁴ Jakamã kwa mẽmoj tã tanhmã axpẽn mã axàkjẽr to ho ri apa hkêt nẽ. Koja Kris kôt atõjẽ hõ axtem tanhmã hamaxpẽr to ka mẽ tee ri ja hã omu nẽ tanhmã hã kãm nẽ hkêt nẽ. Rỳ ajamaxpẽr o:

—Tk. Na hte ã ri amnhĩ nhĩpêx anhỹr o pa. Ja omnuj. Pa na pa hte ã amnhĩ nhĩpêx anhỹr kêt nẽ.

Anhỹr o ri axpẽn kukamã ajamaxpẽr hkêt nẽ. Mẽ pahpê Tĩrtũm kêt kênã kot pu kêt mẽ ã ri axpẽn kukamã pajamaxpẽr anẽ. Tĩrtũm pix na hte tanhmã mẽ pajarẽnh to xwỳnh. àhpumunh o àhpumunh xwỳnh jakamã koja tanhmã mẽ hkrã hto nhũm mẽ rĩ kormã tãm hamaxpẽr pẽ àmnhĩx ri tanhmã amnhĩ nhĩpêx to ho pa.

⁵ Nẽ koja Jejus kôt atõjẽ hõ mẽmo arĩgromnu jarẽ nẽ hã àpênh kêt nẽ. Ka mẽ apê hkwyjaja tee ri ja hã omu nẽ ajamaxpẽr o:

—Nà arĩgro piitã mẽ pamã mex kênã. Kot paj mãmrĩ arĩgro piitã hã apê.

Anhỹr o ajamaxpẽr japêr. Nom kêr ka mẽ ja hã axpẽn mã tanhmã axàkjẽr to hkêt nẽ. Na pu htem ahpỹnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpẽn mã paxàkjẽr to ho ri papa hkêt nẽ.

⁶ Kêt mẽ kot arĩgromnu jarẽnh xwỳnhjê mẽ mẽ pahte arĩgro piitã mex ã harẽnh xwỳnhjaja mẽ pahpiitã mẽ pahpê Tĩrtũm kraa. Jakamã mẽ pahpiitã na pu htem pajamaxpẽr o:

—Na pa hte Tĩrtũm kãm hprãm xà hkôt ã amnhĩ nhĩpêx anhỹr o ri ixpa. Anẽ.

Nẽ mẽ pahte mẽmoj piitã hkur xwỳnhjaja nẽ mẽ kot mẽmoj kwỳ hkur kêt xwỳnh piitã mẽ pahpê Tĩrtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nẽ Tĩrtũm mã amnhĩ jarẽ nẽ kãm:

—Pa mẽ ijamãr mex xwỳnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tĩrtũm.

Anhỹr o kãm amnhĩ jarẽ. Hãmri nẽ kormã hkamnàr rom paxàmnhĩx ri tanhmã mẽõ kuteta ku.

⁷⁻⁸ Mẽ pahpê Tĩrtũm kra jakamã na pre ra mẽ pakukamã tanhmã mẽ pajarẽnh to. Mẽ pakukamã pahtyk ã arĩgro jarẽ nẽ mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpẽr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt.

⁹ Jakamã na pre Kris ja hã mẽ pahpumu nẽ tãm mẽ pakaxyw amnhĩ to kệp mẽ panhõ Pahihti nẽ mẽ panê ty. Hãmri nẽ akupỹm htĩr. Kệp mẽ panhõ Pahihti hã akupỹm htĩr. Kệp mẽ pahte hkôt amnhĩ xunhwỳr xwỳnhjê nhõ Pahihti kaxyw. Jakamã kệp ra mẽ pahkwỳ htyk xwỳnhjê nhõ Pahihti nẽ mããnẽn kệp arĩ mẽ pahtĩr xwỳnhjê nhõ Pahihti.

¹⁰ No mẽ papajaja mẽ pahpê Kris kôt mẽ pahkwỳjê nhõ pahi hkêt jakamã kêr mẽ Kris kôt akwỳjê hõ tanhmã amnhĩ nhĩpêx to hã omu hãmri nẽ tanhmã ho akapêr to hkêt nẽ. Rỳ ajamaxpẽr o:

—Kwa na ã amnhĩ nhĩpêx anẽ. Inhmã ja mex kêt.

Anhỹr o ajamaxpẽr kêt nẽ. Koja nhỹrmã Tĩrtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarẽnh to. Nom kêr pu mẽ papajaja amnhĩ hkrã hkôt ã axpẽn jarẽnh anhỹr kêt nẽ.

¹¹⁻¹² Kot puj mẽ nhỹrmã pahpiitã Tĩrtũm kutã pahkrĩ nẽ kãm tanhmã amnhĩ jarẽnh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarẽ. Kê mẽ pama nẽ tanhmã mẽ pajarẽnh to. Kapêr ã kagà htũm kot mẽ pakukamã mẽ pajarẽnh kot:

Koja nhỹrmã mẽ piitã ixpê mẽ õ pahi hã ixkutã hkõn krã ho rôròk nẽ hkrĩ nẽ inhmã inhmex o inhmex ã ijarẽ.

Nẽ mẽ piitã ixpê Tĩrtũm ã ixpyxi mex ã ijarẽ. ãm hãmri na pa ã mẽ hkukamã mẽ harẽnh anẽ. Anẽ.

Mẽ pahte Kris kôt pahkwỳjê ho mex ã mẽ pamã karõ

Wam Korĩt 8.9-13

¹³ Nẽ kwa kêr ka mẽ akwỳ kot Jejus kôt amnhĩ xunhwỳr tohtuj anhỹr xwỳnhjaja

tanhmā mẽ kot amnhĩ nhĩpêx to ho pa hã mẽ omu nẽ ja nẽ tanhmā mẽ kãm akapêr to hkêt nẽ. ãm mẽ noo mã tãm ri amnhĩ nhĩpêx rãhã ho ri apa. Mẽ kot ja hã mẽ apumunh nẽ mẽ akôt amnhĩ nhĩpêx kaxyw. No kot ka mẽ kot tanhmā amnhĩ nhĩpêx toja ã kãm akapêr nhũm ama nẽ tee ri amnhĩ kukamã hamaxpêr nẽ hkaprĩ nẽ.

14 E kot pa hpãnhã mẽ paxàpkur xà hã tanhmā mẽ panhõ jarênh to. Ixte Pahihti Jejus jamaxpêr xà hkôt tanhmā ijamaxpêr to ho ri ixpa jakamã kot paj ixkatat kôt mẽ amã tanhmā mẽ panhõ jarênh to nẽ ãm hãmri harẽ. Nà mẽ paxàpkur xàja ãm pixi nẽ omnu hkêt. Piitã mex o mex. Nom koja mēhõ tee ri mēmo mẽ apkur xà hõ pumu nẽ hamaxpêr o:

—Nà kot paj ja hkur kêt nẽ. Kot paj apu kuku nẽ ho amnhĩ tomnuj nẽ. Anẽ.

Hãmri nẽ hkur kêt nẽ. Tã kwãr mãmrĩ ã hamaxpêr anẽ nẽ hkur kêt nẽ. Nom na ãm amnhĩ krã hkôt Tĩrtũm kêp ja omnuj ã hkamnhĩx. Kêp omnuj kêt. Ra kot mēmo mẽ paxàpkur xà piitã mex ã harênh.

15 Tã kot kaj mẽ kot mēmoj kur kêt xwỳnhnta py nẽ o tẽ nẽ kot hkaga xwỳnh noo mã hkur o xa nhũm apumu nẽ tee ri hamaxpêr nẽ hkaprĩ nẽ. Jakamã kot ka mẽ ã noo mã amnhĩ nhĩpêx anhỹrja o ho mex kêt nẽ. Kwa mẽ ã ri axpên nhĩpêx anhỹr hkêt nẽ. Kot ka mẽ ã axpên nhĩpêx anẽ nẽ te amnhĩ pix kukamã ajamaxpêr pyrak o amnhĩ nhĩpêx. Jao akwỳjê ho mex kukamã ajamaxpêr kêt nẽ. Kris kãm mẽ hapê htyx kôt mẽ kot amnhĩ tomnuj pãnhã amnhĩrer kaxyw ra nẽ htyk kênã kot ka kêt mẽ axtem nẽ ri ã mẽ noo mã mẽ kot mēmoj kur kêeta kur anẽ. Rỳ koja apu tee ri kot mēmoj kur kêeta kur ã mẽ apumu nẽ tanhmā amnhĩ tomnuj to. Jao Kris kaga japêr. Jakamã kwa mẽ ã mẽ noo mã mēmojta kur kêt nẽ.

16 Mēmo mẽ apkur xàja mex tã nhũm mẽ akwỳjê hõ kãm mex kêt japêr ka mẽ noo mã hkur kêt nẽ. Nẽ tanhmā hã kãm nẽ hkêt nẽ. Kot kaj mẽ anẽ nhũm Kris kra hkêt xwỳnhjaja tee ri ja hã mẽ apumu nẽ tanhmā axpên mã mẽ apê Kris kwỳjê ho kapêr punuj to.

17 Mẽ pahpê Tĩrtũm krajaja na pu htem paxàpkur xà nẽ pahkõm xà pix kukamã pajamaxpêr o ri papa hkêt nẽ. Na pu htem

amnhĩ mẽ pahkwỳjê mex kukamã pajamaxpêr. Nẽ mẽ pahte tãm amnhĩ nhĩpêx kukamã pajamaxpêr. Nẽ tãm axpên nhĩpêx kukamã pajamaxpêr. Kot puj mẽ ã amnhĩ nhĩpêx anẽ nhũm Tĩrtũm Karõ ja hã mẽ pahpumu nẽ mẽ pahto mẽ pahkĩnh nẽ. Pu mẽ pahkĩnh nẽ pajamakêtkati nẽ ri axpên kôt papa.

18 Tã kot puj mẽ ã Kris mã tanhmā amnhĩ nhĩpêx to ho ri papa anẽ nhũm Tĩrtũm ja hã mẽ pahpumu nhũm ja kãm mex nẽ. Nẽ Kris kôt mẽ pahkwỳjê mã haxwỳja ja mex nẽ.

19 Jakamã kêr pu mẽ tãm axpên mã pakapêr o ri papa. Nẽ pajamakêtkati nẽ axpên kôt ri pajapõj. Nẽ Kris kôt tanhmā axpên to paxihtyx to ho ri papa.

20 No kot ka mẽ axàpkur xà gryk ã akwỳ hkukamã ajamaxpêr kêt nẽ atyx ri mēhõ noo mã mēmoj kur japêr. Kêp omnuj tã ka mẽ ãm amnhĩ pix kukamã ajamaxpêr nẽ noo mã hkur japêr. Hãmri nhũm ja hã mẽ apumu nẽ ra kot Tĩrtũm kaga mã. Ra kêp hkra jakamã kwa mẽ noo mã mẽ kot mēmoj punuj ã harênh xwỳnhnta kur kêt nẽ. Nom mẽ paxàpkur xàja piitã mex. Tĩrtũm kot mẽ pamã õr jakamã piitã mẽ panhõõ. Tã koja akwỳjê hõ Tĩrtũm kêp mēmoj omnuj ã hkamnhĩx tã ka mẽ noo mã aku nẽ ho amnhĩ tomnuj nẽ.

21 Kêr pu mẽ pahkwỳjaja tanhmā kot amnhĩ tomnuj to pymaj pu mẽ pahte amnhĩ nhĩpêx kukamã pajamaxpêr mex o papa. Mēmo mẽõ nẽ mēmo kagõ pẽ wĩhtija. Tĩrtũm kot mẽ pamã mēmoj piitã õr tã no nhũm mẽ pahkwỳjaja kêp ja omnuj nẽ pu mẽ noo mã hkur rỳ ho pahkõm kêt nẽ. Mēmo mry nẽ mēmo wĩhti pu mẽ noo mã hkur rỳ ho pahkõm kêt nẽ.

22 Nẽ kêr ka mẽ atõ mēmoj krêr kaxyw nẽ hkukamã ajamaxpêr o:

—Nà kot paj ja krê. Tĩrtũm kãm ja mex kênã. Anẽ.

Hãmri nẽ mãmrĩ Tĩrtũm kamnàr rom axamnhĩx akrê. Kãm ja mex kênã kot ka kêt ri tee ri hkrêr kaxyw hkukamã ajamaxpêr nẽ hkaga.

23 No kot kaj mẽ atõ mēmoj to anhỹr kaxyw nẽ tee ri amnhĩ kukamã ajamaxpêr nẽ ajamaxpêr o:

—Ko kot paj apu ja ho anê nhũm Tĩrtũm hã ixpumu nhũm ja kêp omnuj nê rỳ ko. Anê.

Hãmri nê tee ri amnhĩ kukamã ajamaxpêr. Tã ra ã amnhĩ nhĩpêx anê nê akre rỳ mẽmoj to anê. Hãmri nhũm Tĩrtũm tee ri ã ate amnhĩ nhĩpêx anhỹr ã apumu nhũm ja kêp omnuj nê. Ate hkamnàr rom mẽmoj to anhỹr kêt nê amarĩ amnhĩ krã hkôt ho anhỹr jakamã ho amnhĩ tomnuj nê.

15

Mẽ pahte amnhĩ pix kukamã pajamaxpêr kêt ã mẽ pamã karõ

Makre 10.45; Wam Korĩt 10.24; Piripos 2.3-5

¹ Nê kêr pu mẽ pahte ra Jejus kôt amnhĩ xunhwỳr tỳx xwỳnhjaja amnhĩ kôt kormã mẽ kot Jejus kôt amnhĩ xunhwỳr totuj janhỹr xwỳnhjê jamãr mex nê. Jao mẽ kamã pagryk tokyx anhỹr kêt nê. ãm mẽ kutã panojarêt pix o papa. Jao ra amnhĩ pix kukamã pajamaxpêr kêt nê.

² Mããnên amnhĩ mẽ Kris kôt mẽ pahkwỳjê hkukamã mãn mẽ pajamaxpêr. Jao mẽ kot tãm amnhĩ nhĩpêx kaxyw mẽ ho mex o ri papa.

³ Kris na pre jar pa ri amnhĩ pix kukamã hamaxpêr kêt nê. Na pre mããnên õ Papaj kukamã hamaxpêr. Jakamã Tĩrtũm kapêr ã kagà htũm kot kãm kapêr jarênh kot:

Pa Papaj. Na hte mẽ pahkurê xwỳnhjaja ixto kapêr punuj nê. Nom mããnên ã ato kapêr o pa anê. Anê.

⁴ Mẽ pakaxyw na Tĩrtũm kapêr ã kagàja. Mẽ pahte kamã harênh nê mar nê amnhĩ kaxyw hkôt pajamaxpêr tỳx o ri papa kaxyw. Jakamã na pu htem tanhmã pahpunuj to htã kapêr kwỳ ma nê pahkĩnh nê. Jao tee ri amnhĩ kukamã pajamaxpêr o ri pahkaprĩ hkêt nê. ãm nhỹrmã Tĩrtũm kot mẽ pahto mex kukamã pajamaxpêr o akupỹm paxihtỳx nê pahkĩnh nê ri papa. Mẽ pahkĩnh nê ri papa kaxyw na Tĩrtũm kapêr ã kagàja.

⁵⁻⁶ Na pu htem Tĩrtũm kamnàr rom pahkĩnh nê. Nê axpên kamã paxukaprĩ ho ri papa. Jakamã na pa hte tanhmã mẽ ato Tĩrtũm wỳr to nê kãm:

—Pa Tĩrtũm. Apê mẽ ijamãr xwỳnh maati na ka. Nê apê mẽ inhõ Pahihti Jejus Kris nhõ Papaj na ka. Nà xep ra Rôm nhõ xwỳnh kwỳjaja kãm akapêr kôt amnhĩ nhĩpêx prãm jakamã kwa tanhmã mẽ hkrã ho mex to kê mẽ hamakêtkati nê ajamaxpêr kôt hamaxpêr rãhã ho ri akôt pa. Hãmri nhũm mẽ amnhĩ tã apumu nê piitã amex o amex ã ajarê.

Anhỹr o pa hte mẽ ato kuwỳ.

Ijaew kêt xwỳnhjê jarênh

Atre 10.34; Rômân 9.24; Karatas 3.28

⁷ Nê kwa kêr ka mẽ amã axpên tã ma ho ri apa. Te ho Kris kãm mẽ pahtã mata pyrãk. Jao axpên to mex pix o apa. Kot kaj mẽ ã axpên nhĩpêx anê nhũm mẽ piitã axpên tã mẽ apumu nê mẽ anhỹ hã Tĩrtũm mã mex o mex ã harê.

⁸ Amnepêem Tĩrtũm Ijaew mã tanhmã Kris jarênh to. Kormã pika hwỳr wrỳk kêt ri nhũm hkukamã nhỹrmã mẽ hwỳr wrỳk nê mẽ kamã kator ã harê.

Tã nhũm mẽ hwỳr wrỳ nê mẽ kamã kato. Ijaew hkanrêhã htãmnhwỳjê kamã kato nê mẽ ho mex o ri mẽ hkôt pa. Mẽ kot amnhĩ tã omunh nê ã hamaxpêr anhỹr kaxyw. Nê hamaxpêr o:

—Amnepêem Tĩrtũm kot mẽ panhĩgêt mã hkukamã harênh xà hkôt na mẽ ixwỳr Kraja mẽ nhũm wrỳ nê mẽ ixto mex o ri pa. Nà ãm hãmri na pre mẽ ixwỳr kumê.

Anhỹr o hamaxpêr kaxyw.

⁹ Nê mẽ apê Ijaew kêt xwỳnhjaja mẽ ajaxwỳja mẽ ate tanhmã kot amnhĩ nhĩpêx to hã harênh mar nê Tĩrtũm mã mex o mex ã harênh kaxyw. Nê Tĩrtũm kot mẽ akamã ukaprĩ hã mẽ ate amnhĩ tã omunh nê mex o mex ã harênh kaxyw na pre wrỳ. Tĩrtũm kapêr ã kagà htũm kot tanhmã mẽ ixpê Ijaew jarênh to nê mããnên tanhmã mẽ apê Ijaew kêt xwỳnhjê jarênh to nê mẽ pajarênh kot:

Kot paj Ijaew kêt xwỳnhjê jamak mã amã amex ã ajarênh o ri mẽ hkôt ixpa.

Nê amex ã inhgrer o ri mẽ hkôt ixpa. Anê.

¹⁰ Nê ja:

Kwa mẽ apê Ijaew kêt xwỳnh mẽ mẽ apê Ijaew. Kêr ka mẽ apiitã Tĩrtũm nhỹ hã akĩnh nê ri apa. Anê.

¹¹ Nê mããnên ja:

E kêr ka mẽ apê Ijaew kêt xwýnhjaja nê krĩ piitã hkôt mẽ apa xwýnhjaja mẽ api-itã Tĩrtũm mã mex o mex ã harênh o ri apa.

Anhỹr o kot harênh.

¹² Nê Tĩrtũm nhỹ hã kapêr o pa xwýnh finat Ijais haxwýja Ijaew mã Jejus jarênh o:

Koja nhỹrmã Jese kanrêhã htàmnhwýjê hõja mẽ pahwýr kato.

Hãmri nê mẽ pahpê Ijaew mẽ Ijaew kêt xwýnhjê ho amnhĩptàr o pa.

Jakamã nhũm mẽ amnhĩ kaxyw hkôt hamaxpêr o pa. Anê.

¹³ Nê na pa hte tanhmã mẽ ato Tĩrtũm wýr to ho ri ixpa nê kãm:

—Pa Tĩrtũm. Kwa kêr ka Rôm nhõ xwýnhjê ho mex kê mẽ amnhĩ kaxyw Akra hkôt hamaxpêr mex o ri pa. Jao hkôt hkĩnh nê hamakêtkati nê ri axpên to pa. Nê kê Akarõ mẽ ho mẽ hihtýx o pa kê mẽ amnhĩ kaxyw amã mãn hamaxpêr týx rãhã ho ri pa. Anê.

Pawre kot hprĩ hã amnhĩ jarênh

Sikũn Pêtre 1.12-13

¹⁴ E Kris kôt ixkwýjaja. Nã ra ixte mẽ ajarênh mar mex. Na ka xep htem amnhĩ to mex o ri apa. Nê mẽmoj to axpên kutã anojarêr rãhã ho ri apa. Nê mẽ kot tanhmã Tĩrtũm kapêr kôt amnhĩ nhĩpêx to xãja ka mẽ omunh mex nê ho axpên jahkre ho ri apa.

¹⁵ Tã ot pa kagã ja kamã mẽ amã ixu-jarênh kãm ixihtýx nê. Tĩrtũm nhỹ hã. Ra mẽ ate mẽmoj mar mex tã pa axte mẽ amã harê. Mẽ ate mar týx nê hã anohtýx kaxyw. Nã ã ixte amnhĩ nhĩpêx anhỹr kaxyw na pre Tĩrtũm mẽ akaxyw ixãm.

¹⁶ Ixte Jejus Kris mã mẽ apê Ijaew kêt xwýnhjê mã kapêr jarênh o ri mẽ akôt ixpa kaxyw. Nê mẽ ato hwýr o ri ixpa kaxyw. Tã pa hte krĩ hkwy kamã ã mẽ akwýjê mã harênh anhỹr o ri mẽ hkôt ixpa. Nê Jejus jarênhja pa hte mẽ hkôt mẽ kãm harênh o ri ixpa. Mẽ kot mar nê hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mẽ kãm mẽ hamaxpêr nyw jagjê nhũm Tĩrtũm hã mẽ omu nhũm ja kãm mex nê nhũm hkĩnh nê hamaxpêr o:

—Nã ãm hãmri. Koja mẽ nhỹrmã wa ixri htĩr tũm nê mex nê pa ho pa. Anê.

¹⁷ Tã na pa ixte Jejus Kris nhỹ hã Tĩrtũm mã tanhmã amnhĩ nhĩpêx to ho ixpa hã amnhĩ pumu nê ixkĩnh nê.

¹⁸⁻¹⁹ Na pa hte ý hã mẽ apê Ijaew kêt xwýnhjê mã Tĩrtũm kapêr jarênh o ri mẽ akôt ixpa. Nê mẽ anoo mã tanhmã ri Kris kot mẽ amã amnhĩ nhĩpêx to hã harê. Nê mẽ amã aa mẽ kot mẽmoj pumunh kêt kwý ho anhỹr o ri mẽ akôt ixpa. Tĩrtũm Karõ nhỹ hã. Nhũm hte mẽ akwýjaja amnhĩ jaêr pê omu nê kamã no puma nê. Hãmri nê mẽ pahpyrà nê Jejus kôt amnhĩ xunhwý. Nom pa hte ã amnhĩ nhĩpêx anhỹr ã amnhĩ pumu nê ri hã amnhĩ to jarkrar kêt nê. ãm ixte Kris pix nhỹ hã mẽ kãm ixkapêr ã mẽ kãm amnhĩ jarênh o ri mẽ hkôt ixpa. Tã pa ra Jerujarê rũm Irir wýr krĩ piitã hkôt mẽ kãm Kris kapêr jarê. Tĩrtũm Karõ kot tanhmã ixto hihtýx to jakamã pa mẽ piitã mẽ kãm harênh mex nê.

²⁰ Na pa hte mẽ hwýr inhnojarêr nê ã ijamaxpêr anê nê ijamaxpêr o:

—Kormã mẽ kot Kris jarênh mar kêt xwýnhjê hwýr kot paj mõi. Nom ra mẽ kot harênh mar xwýnhjê nhõ krĩ hwýr inhmõrja inhmã prãm kêt. Anê.

²¹ Tĩrtũm kapêr ã kagã htũm kot kapêr mar kêt xwýnhjê jarênh kot:

Kormã mẽ kot Tĩrtũm kapêr mar kêt xwýnhjaja koja mẽ kuma nê hprĩ hã mar týx nê. Anê.

Pawre kot Rôm wýr hkrã hã amnhĩ jarênh Rômân 1.8-15

²² Hêxta waa nê. Inhmã mẽ apumunh prãm týx nê Rôm kãm Jejus kôt ixkwýjaja. Na pa hte xatã mẽ awýr ixkrã nom kormã mẽ awýr inhmõr kêt nê. Kormã ixte krĩ hkwy kamã mẽ kãm Kris jarênh o ri ixpa jakamã kormã mẽ awýr inhmõr kêt nê.

²³ Na pa ra xatã mẽ awýr ixkrã hã ixtã amgrã xohtõ nê. Tã ra jar mẽ kãm Kris kot mẽ panê tanhmã amnhĩ nhĩpêx toja jarênh pa.

²⁴ Jakamã kot paj tokyx ma mẽ awýr mõi. Hãmri nê mẽ awýr pøj pu mẽ axpên pumu nê pahkĩnh nê axpên mã pakapêr o papa. Pa mẽ akôt ri ixpa tãmtã hamũ pyka pê Espãnhã wýr ma mõi. Nê kot paj inhnojarêr ka mẽ ixto Tĩrtũm wýr nê inhmã ixàpkur xã hkwy gõ pa ma mẽ hwýr pry hã hkur o mõi.

25-26 No na pa kormã mẽ awÿr inhnojarêt kêt nê. Kot paj ja rûm awjanã nê akupÿm Jerujarê hwÿr mō. Kamã Kris kôt mẽ pahkwÿjaja kêp amrakati nê ri pa nhûm pika pê Gres mẽ Masetôn kamã Kris kôt mẽ pahkwÿjaja mẽ harênh ma nê mẽ kãm kàxpore hkwy ho akuprō nê mẽ kaxyw inhmã kugō. Tã kot paj ma mẽ hwÿr o mō nê mẽ kãm kure nê rî kormã ma mẽ awÿr mō.

27 Jerujarê kamã Kris kôt mẽ pahkwÿjaja Ijaew na mẽ. Mẽ kumrêx na prem Kris kôt amnhĩ xunhwÿ. Hãmri nhûm mẽ hkwyjaja ma mẽ apê Ijaew kêt xwÿnhjê mã kapêr jarênh o ri mẽ akwy hkôt pa. Hãmri nhûm pika pê Gres kamã mẽ pa xwÿnhjaja mẽ kapêr ma nê mẽ urak nê Kris kôt amnhĩ xunhwÿr kurê kumrêx. Jakamã amnhĩ xwar kãm nhãm krî hō kamã Kris kôt mẽ pahkwÿjê ho mex prãm nê. Hãmri mẽ kãm kàxpore hkwy ho akuprō nê mẽ kaxyw inhmã kugō.

28-29 Tã kot paj ma Jerujarê hwÿr mẽ kãm o mō nê mẽ kãm kure hãmri nê awjanã nê rî kormã ma Rôm wÿr mẽ awÿr mō. Hãmri nê mẽ awÿr pōj pu mẽ axpên pumu nê pahkĩnh nê. Nê axpên mã Jejus Kris mex o mex ã harê nê kãm tanhmã amnhĩ jarênh to ho papa. Jao pahkĩnh nê papa. Tã pa hpãnhã hamũ ma Espãnhã wÿr mō.

30 Nê na pu prem Jejus Kris o panhō Pahihtî. Jao te mẽ pahpê hkôt axpên to pahtō nê pahtōx pyrak o axpên nhĩpêx. Nê Karō nhỹ hã pamã axpên kĩnh nê. Jakamã kwa Jejus kôt ixkwÿjaja. Kêr ka mẽ ixpê mẽ atō hã ixto Tirtũm wÿr kãm axihtÿx nê.

31 Kêr pa ma pyka pê Jutej kamã Jerujarê kamã Kris kôt mẽ pahkwÿjê hwÿr mō nê mẽ kãm kàxporeta gō nhûm mẽ omu nê Ijaew kêt xwÿnhjê kot mẽ kãm òr ã mẽ omunh tã tee ri hamaxpêr kêt nê. ãm hkĩnh kãm mãmrî àmnhĩx hamÿ nê ho amnhĩm awjaprō.

Nê kêr ka mẽ ixto awÿr kê inhnê mẽ kêp mẽ pahkwÿ hkêt xwÿnhjê pumunh mex nê.

32 E kêr ka mẽ ã ixto Tirtũm wÿr anê. Kê ixte ma Jerujarê rûm ma Rôm wÿr pàr kãm inhmōrta ã kê ixpumunh mex nê. Pa inhmex pê mẽ kurũm ma mẽ awÿr mōn pōj pu mẽ tokyx axpên pumu nê pahkĩnh nê.

Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akôt ri ixpa nê ixkĩnh nê.

33 Tã ãm ja pix. Kê Tirtũm mẽ akôt pa ho pa. Tãm na hte tanhmã mẽ pahto pu mẽ ÿ hã pajamakêtkati paxàmnhĩx ri pahkĩnh nê ri papa.

16

Pawre kot ahpÿnhã hkràmnhwÿjê mã kapêr

1 Ku nê mãânên ja. Ot pa mẽ awÿr Kris kôt pahtōx Pepreja mẽ awÿr kumê. Na hte krî pê Sênkrej kamã Kris kôt mẽ pahkwÿjê tanhmã mẽ ho mex to ho ri mẽ hkôt pa.

2 Nê mãânên pa na hte tanhmã ixto mex to. Tã kê mẽmo arĩgro hã mẽ awÿr pōj ka mẽ kêp Kris kôt mẽ pahtōx ã omu nê ho mex nê tanhmã ho ajuta hto.

3 Nê kêr ka mẽ atar Kris kôt ixkràmnhwÿjê mã ijarê. Na pa hte mẽ kãm ijamaxpêr rãhã ho ri ixpa. Nê Akirti mẽ hprō Prisireta ka mẽ wa kãm ijarê. Na pre hte wa inhĩhkô hã Jejus Kris mã tanhmã amnhĩ nhĩpêx mex to ho wa pa.

4 Jao wa amnhĩ grōnh kôt mẽ kãm ixkurê xwÿnhjê pê ixpytã. Pa amnhĩ tã wa omu nê inhmã wa hkĩnh nê. No ãm papxipix inhmã wa hkĩnh kêt nê. Na pre Ijaew kêt xwÿnh kwÿ pê Kris kwÿjaja ixtã wa harênh ma nê haxwÿja kãm wa hkĩnh nê.

5 Nê na hte Kris kwÿjaja wa òrkwÿ kamã axpên wÿr akuprō. Mẽ kot Tirtũm mã amnhĩ jarênh nê kapêr ã kagã hkwy mar kaxyw axpên wÿr akuprō. Tã kêr ka mẽ mẽ kãm ijarê.

Nê Kris kôt mẽ pahtō Epênre mã ijarê. Kêp ixkràmnhwÿ mex na. Inhmã hkĩnh. Kumrêx na pre jar pika pê As kamã amnhĩ kaxyw Kris kôt hamaxpêr nê hkôt amnhĩ xãm.

6 Nê Kris kôt mẽ pahtōx Marir ka mẽ kãm ijarê. Na xep hte tanhmã mẽ ato mex to rũnh o pa.

7 Nê Kris kôt mẽ pahtō ãrōhti mẽ Jũhti wa kãm ijarê. Ixpyrà nê wa kêp Ijaew na wa. Kormã ixte Kris kôt amnhĩ xãm kêt ri na pre wa kumrêx hkôt amnhĩ xãm. Na hte Jejus nhỹ hã mẽ ahkre ho mẽ pa xwÿnhjaja wa kot Kris kapêr jarênh mex ã wa harê. Tã ã amnhĩ nhĩpêx anhÿrja mÿrapê na pre

mê hkwýjaja wa unê nê wa haxà pa prem
ixpimrààtã ixpê prês nê mê hagdênh xà
kamã ixkrî.

⁸ Nê Kris kôt mê pahtõ ãpřitre mã ka mê
ijarê. Kêp Kris kôt ixkràmnhwý mex na.

⁹ Nê Kris kôt mê pahtõ Upãnre mã ijarê.
Na hte ixpyrà nê Kris mã tanhmã amnhĩ
nhĩpêx to ho ri pa.

Nê Kris kôt mê pahtõ Etaki mê ijarê. Kêp
ixkràmnhwý mex na.

¹⁰ Nê Kris kôt mê pahtõ Apes ka mê kãm
ijarê. Na prem ra Kris ã hipêx punuj nê no
nhũm mê kutã amnhĩ to htýx nê Kris kaga
hkêt nê.

Nê Aristopti nhõrkwý kamã hkwýjê mã
ijarê.

¹¹ Nê Kris kôt mê pahtõ Erojäwti mã ijarê.
Ixpyrà nê kêp Ijaew na.

Nê Nasisti nhõrkwý kamã Kris kwýjaja ka
mê kãm ijarê.

¹² Nê Kris kôt mê pahtõx Xiripêre mê
Xiripos wa kãm ijarê. Wa kêp Pahihti Jejus
mã tanhmã amnhĩ nhĩpêx mex to xwýnh na
wa.

Nê Kris kôt mê pahtõx Pesixti mã ijarê.
Haxwýja kêp ixkràmnhwý na. Na hte Pahi-
hti Jejus mã tanhmã amnhĩ nhĩpêx mex to
ho ri pa.

¹³ Nê Kris kôt mê pahtõ Rupti mã ijarê.
Na hte Kris kôt amnhĩ nhĩpêx mex o ri pa.
Nê katorxà mã ijarê. Na pre te ixpê hkra
nhĩpêx pyrãk o inhĩpêx.

¹⁴ Nê Kris kôt mê pahtõ Asĩnre mã nê
Prekõxti nê Emes nê Patopas nê Emas
mê. Jajê piitã mê pahkwý kot mê hwýr
pikuprõnh xwýnhjê mê mê ho apimrààtã
mê kãm ijarê.

¹⁵ Nê Kris kôt mê pahtõ Pirorti mã nê
mê pahtõx Juure mê Nêrew wa nê htõxja nê
mê pahtõ Orĩpti wa mê kãm ijarê. Nê mê
pahkwý kot mê hwýr pikuprõnh xwýnhjê
mê mê ho apimrààtã mê kãm ijarê.

E kêr ka mê jajê piitã mê kãm ijarê. Na pa
hte mê kãm ijamaxpêr rãhã ho ri ixa.

¹⁶ Nom mê tapxipixjaja kêt. ã mê apiitã
mã na pa hte ijamaxpêr rãhã ho ixa.

Nê ota jar Kris kwýjaja mê awýr hpêr mê.

¹⁷ Kwa ixkràmnhwýjaja. Na ka mê ra
aprĩ hã Tĩrtũm kapêr mar týx nê. Tã kêr
ka mê amnhĩ nê mê kot Tĩrtũm kapêr o
hêx xwýnhjê pumunh mex o apa. Mê kãm

axpên nê mê ato hpigrãnh par prãm. Nê
mê ate Kris kaga nê hpãnhã mê kot amnhĩ
nhĩpêx o amnhĩ nhĩpêxja mê kãm hprãm
jakamã kwa mê amnhĩ nê mê omunh mex
nê axkãm ajamak rom.

¹⁸ Na htem ã amnhĩ nhĩpêx anhýr o Pahi-
hti Kris mã tanhmã amnhĩ nhĩpêx to ho pa
hkêt nê. ãm amnhĩ hkrã hkôt tanhmã ri
hkwýjê jahkre hto ho pa. Kot mê no kupy-
r kaxyw tanhmã mê kãm hêx to ho ri mê hkôt
pa. Te mê ahkre mex pyrãk tã mê ahkre
mex kêt nê. Jakamã nhũm htýx ri mê pa
xwýnhjaja mê kot mê ahkreja ma nhũm te
mê kãm mex pyrãk. Jakamã kwa mê okora
mê amnhĩ nê mê omunh mex nê.

¹⁹ Na ka htem mê kurom Kris kôt amnhĩ
nhĩpêx mex nê nhũm xep mê piitã mê
apumu nê axpên mã ja hã mê ajarênh o ri
pa. Pa mê ajarênh ma nê ixkĩnh nê. Tã
kêr ka mê arĩ ajamaxpêr mex rãhã ho ri
ajamaxpêr o apa. Nê amnhĩ nhĩpêx mex
rãhã nê. No tanhmã ajamaxpêr punuj to ho
ri amnhĩ tomnuj o ri apa hkêt nê. ã mê ate
amnhĩ nhĩpêx anhýrja na inhmã hprãm.

²⁰ Nê na hte Satanasti mê hkwýjaja mê
ate Jejus kaga hprãm xàj mê akôt tanhmã
ri mê anhĩpêx to ho ri pa htã kêr ka mê
amnhĩ tã mê omu nê tee ri amnhĩ kukamã
ajamaxpêr kêt nê. Koja gaa nhũm Tĩrtũm
mê hipêx o te mê kot kagã xoprê hkrã xôm
nê hpĩr pyrãk o mê hipêx. Jakamã ã mê
kot mê anhĩpêx anhýr tã koja Tĩrtũm mê
amã mê ajamakêtkati xàja gõ. Tapxipix
na kot mê pajamakêtkati xà nhõr kaxyw
àhpumunh týx.

Nê na pa hte mê ato Pahihti Jejus wý nê
kãm:

—Pa Pahihti. Kwa kêr ka Rõm kãm akwýjê
pumu nê mê ho mex nê mêmoj to mê kutã
anojarêt rãhã ho ri apa. Anê.

²¹ Nê ota mê pahtõ Ximotreja mê awýr
hpêr mê. Na hte inhĩhkô hã Kris mã
tanhmã amnhĩ nhĩpêx to ho ri pa. Nê ixtõ
Rusti mê Jasãwti mê Sosipa wa mê haxwýja
mê awýr hpêr mê.

²² Nê kot inhmã ixkapêr ã kagã xwýnh
Testi haxwýja mê awýr hpêr mê. Kêp Kris
kôt mê pahtõ na.

²³ Nê Kris kôt mê pahtõ Gajre haxwýja
mê awýr hpêr mê. Õrkwý kamã na hte Kris
kwýjaja axpên wýr akuprõ nê kamã Tĩrtũm

mã amnhĩ jarẽ nẽ kapër ã kagà kamã harẽ nẽ mar o hkrĩ. Ōrkwỹ kamã na pa pre pôj.

Nẽ mẽ pahtõ Eras haxwýja mẽ awýr pēr mẽ. Na hte jar krĩ ja kamã Rôm nhõ pahĩhti mã õ kàxpore jamãr pê ho mẽmoj to anhỹr o pa.

Nẽ Kris kôt pahtõ Kwatre haxwýja mẽ awýr hpēr mẽ. E jajaja piitã na mẽ awýr hpēr rẽ.

²⁴ E kê Pahĩhti Jejus Krisja mẽ akutã no-jarêt rãhã ho pa.

*Pawre kot Tĩrtũm mex o mex ã harẽnh
Epes 1.3, 3.20-21; Wam Ximotre 1.17;
Eprẽw 13.20; Jutre 24-25*

²⁵ Nẽ kwa kêr pu mẽ Tĩrtũm mã mex ã harẽnh rãhã ho ri papa.

Nẽ ixte mẽ amã Jejus Kris jarẽnhã ã ka prem ama nẽ hkôt amnhĩ xunhwý. Tã koja mẽ ato mẽ axihtýx ka mẽ hkôt axihtýx kãm hkôt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêt xwýnhjê ho hkra kaxyw hã amnhĩ jarẽnh kêt nẽ. Kormã ja ho hpimxur ryy nẽ.

²⁶ Tã ã mẽ anhĩpêx anhỹrja o amnhĩrĩt nẽ ý hã mẽ kapër jarẽnh o ri pa xwýnhjê mã kapër nẽ mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagà kê mẽ pyka piitã hkôt kamã harẽ nẽ kuma. Nom kê Ijaew pixjaja mar kêt nẽ. Kê pika piitã hkôt kamã harẽ nẽ kuma. Panhĩ nẽ kupẽ nẽ kupẽ hkà htykre nẽ mẽ hkà haka nẽ mẽ hkà kamrêkjaja. Kê mẽ piitã Jejus jarẽnh ma nẽ amnhĩ kaxyw hkôt hamaxpēr nẽ hkôt amnhĩ xunhwý. Hãmri nẽ hkôt amnhĩ nhĩpêx mex o ri pa. Anẽ.

Nhũm pre ã mẽ pakaxyw mẽ kãm kapër anẽ nhũm prem kuma nẽ hã kagà.

²⁷ Nã Tĩrtũmja tapxipix na àhpumunh týt xwýnh ã ãm pyxi mex. Nẽ tapxipix kêp mẽ pahpiitã Mẽpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harẽnh rãhã ho papa.

Tã ãm ja pix. Ixpê Pawre na pa ã mẽ awýr ixpēr mẽnh anẽ. Na hapêx.

Wam Korît

Pawre kot Korît kãm Jejus kôt hkwýjê hwýr kagà nê mênh

Pawre na pre kagàja nhîpêx. Jejus nhý hã kapêr jarênh o pa xwýnhjê hô na pre. Na pre hipêx nê ma krî pê Korît kãm Jejus krajê hwýr kumê. Nê kagàja kamã mē kãm tanhmã mēmoj tã karõ hto. Na pre mē kot àhpumunh tỳx ã amnhî to jarkrar o pa nê mē kãm kapêr. Nê tanhmã amnhî tomnuj to nê mē kãm kapêr. Nê mē hprõ nê mē mjên xwýnhjaja tanhmã wa kot axpên nhîpêx to hã mē kãm karõ. Nê mē kot Tirtũm mã mex o mex ã harênh kaxyw axpên wýr mē pikuprõnh nê tanhmã amnhî nhîpêx to hã nhũm mē kãm karõ. ã na pre Pawre mē kãm mēmoj tã karõ nê hã kagà anê. Nê mē kãm:

¹ Pa Korît kãm Jejus kôt ixkwýjaja. Xà mē amex? Ot pa mē awýr kagàja nhîpêx nê kumê. Ixpê Pawre na pa Kris kôt mē pahtõ Sostenes mē wa awýr ixpêr mē. Tã kagàja nhîpêx nê mē awýr kumê. Tirtũm na pre ixte Jejus Kris nhý hã mē ajahkre ho ri ixpa kaxyw ixãm.

² Tã ot pa mē awýr kagà nhîpêx nê mênh mã. Korît kãm ixpyrà nê mē apê Tirtũm krajê hwýr.

Tirtũm kot amnhî kaxyw mē axunhwýr jakamã na ka prem amnhî tomnuj kaga nê Kris kôt amnhî xunhwý nê hkôt amnhî nhîpêx mex o ri apa. Krî piitã hkôt mē kot amnhî to Jejus Kris wýr o mē pa xwýnhjê pyrà nê. Mē panhõ Pahihti Jejus Krisja ãm pixi mex na.

³ Nê Tirtũm kêp Mēpahpãm maati nê Jejus Kris kêp mē panhõ Pahihti jakamã na pa hte mē ato wa hwýr rãhã o ri ixpa nê mē ato wa hwýr o:

—Kwa Tirtũm mē Jejus wa. Kêr ka wa Korît nhõ xwýnhjê kutã anojarêt rãhã ho wa ri apa. Nê mē ho mex rãhã nê. Kê mē amnhî tã war apumunh kôt ri hamakêtkati nê hkĩnh nê ãmnhix tanhmã ri amnhî nhîpêx to ho ri pa. Anê.

Tirtũm kot Jejus Kris kukwak ri mē pahto mex ã harênh

Sikũn Pêtre 1.2; Wam Tesarõn 5.23-24

⁴ Nê mē ate amnhî kaxyw Jejus Kris kôt ajamaxpêr o ri apa jakamã na hte Tirtũm mē ato mex nê. Tã pa hte kãm amnhî jarênh kaxyw nê kãm mē ajarênh o:

—Pa Tirtũm. ãm hãmri na ka pre Korît nhõ xwýnh kwýjê ho akra. Nã ja mex o mex. Anê.

⁵ Nê ra mē ate Kris kôt amnhî xunhwýr jakamã na ka mē ra amex kumrêx nê ri apa. Nê aprî hã Kris kot amnhî nhîpêx pumunh mex nê aprî hã akwýjê mã harênh o ri mē hkôt apa.

⁶ Na pa pre mē awýr mō nê mē amã Kris kot amnhî nhîpêx ã harênh o ri mē akôt ixpa. Ka prem inhma nê hkôt amnhî xunhwýr tỳx kurê kumrêx.

⁷ Jakamã nhũm Tirtũm mē ate kãm tanhmã amnhî nhîpêx to ho apa kaxyw mē ato mē axihtỳx. Nê kaxyw mē amã mē ate axpên to mex xà piitã mē amã kugõ. Mē ate Jejus kot akupýn mē pahwýr wrýk jamãr pê hapêr arît o apa pê tanhmã kãm axpên nhîpêx to ho apa kaxyw.

⁸ Koja Tirtũm tanhmã mē akrã hto ka mē hkôt pix mã ri amnhî nhîpêx rãhã nhũm Pahihti Jejus Krisja akupýn mē pahwýr wrý. Hãmri nê mē ate amnhî nhîpêx ã mē apumu nê mē ajarênh o:

—Nã ãm hãmri na hte jajaja amnhî to mex pix o ri pa. Anê.

⁹ Nê koja Tirtũm ra kot amnhî jarênh xà hkôt mē ato mex nê. Ra kot mē ate Pahihti Jejus Kris kôt apa kaxyw amnhim mē axunhwýr jakamã koja ra kot amnhî jarênh xà hkôt mē ato mex rãhã nê.

Mē pahte mēmoj tã axpên pê pahpigrãnh kêt ã mē pamã karõ

Rõmãn 15.5-6; Sikũn Korît 13.11; Epes 4.1-6; Piripos 2.1-4; Wam Pêtre 3.8

¹⁰⁻¹¹ E Kris kôt ixkwýjaja. Na ka xep htem mēmoj tã axpên mã axàkjêr pix o ri apa nhũm pre Krojre hkwýjaja amnê ixwýr pøj nê inhma mē ajarê. Kwa nã mē ã amnhî nhîpêx anhýr kêt nê. Kêr ka mē axpên kôt ri amnhî nhîpêx rãhã ho ri apa. Nê axpên kôt ri ajamaxpêr rãhã nê. Te ixkre típxi kamã mē ri apa pyràk o mãn kêt mē axpên

nhîpêx o ri axpên kôt apa. Nê mẽ axpên kutã anojarêt rãhã ho ri apa. No mẽmoj tã axpên mã axàkjêr pê axpên pê apigrànkh kêt nê. Na pa Pahihiti Jejus Kris nhỹ hã mẽ amã ã ja hã karõ anê.

¹² Nê na ka xep htem ahpÿnhã ri mẽ apê mẽ ixkwÿ hã amnhĩ jarênh o ri apa. Jao mẽ akwÿjaja pa ixkôt ri amnhĩ nhîpêx xwÿnh ã amnhĩ jarê. Nê mẽ akwÿjaja axtem Apor kôt ri amnhĩ nhîpêx xwÿnh ã amnhĩ jarê. Nê mẽ akwÿjaja axtem Simãw Pêtre hkôt amnhĩ nhîpêx xwÿnh ã amnhĩ jarê. Nê mẽ akwÿjaja axtem Kris kôt amnhĩ nhîpêx o ri apa xwÿnh ã amnhĩ jarê. ã na ka xep htem ahpÿnhã amnhĩ jarênh anhÿr o ri pa.

¹³ Kwa nã ka mẽ ã ahpÿnhã amnhĩ jarênh anê nê te mẽ ate Kris o apigrànkh pyrãk o hipêx. Kwa mon ka hte mẽ akwÿjaja apê ixkwÿ hã amnhĩ jarê? Xà pa na pa pre pĩ kahpa hã ajêt nê mẽ anê ty? Nã Kris pix na pre mẽ panê hã ajêt nê ty. Xà mẽ apê pa ixkwÿ hã amnhĩ jarênh kaxyw na prem mẽ akrã kumrã? Nã mẽ apê Kris kwÿ hã amnhĩ jarênh kaxyw na prem ã mẽ anhîpêx anê. Mẽ kot ja hã mẽ apumunh xwÿnhjaja kot mẽ apê Kris kwÿ hã mẽ apumunh kaxyw. Tã na ka xep htem axtem nê ã ri ahpÿnhã mẽ kãm amnhĩ jarênh anhÿr o ri apa.

¹⁴⁻¹⁵ Kop ãm ixte amnhĩ kôt mẽ axunhwÿr prãm ronhÿx pa mẽ ato mẽ axohtô nê mẽ akrã kumrã nê mẽ amã: “E ra mẽ apê ixkwÿ na ka mẽ.” Anê. Nom na pa pre ã mẽ amã ixkapêr anhÿr kêt nê. ãm hãmri na pa pre ãm mẽ ato grêre nê mẽ akrã kumrã. ãm Kripti mẽ Gajre wa pix.

¹⁶ Ku nê xep mããnhn Estepti nê kaxyw mẽ hkwÿjaja. ãm jajê pixjaja. Nom ko apu axte mẽ hkwÿ ko. Ixte mẽ hkrã kumrãr xwÿnhjê mã ijamaxpêr tÿx kêt.

¹⁷ Na pre Kris ixte mẽ hkrã kumrãr o ri ixpa kaxyw ixãm kêt nê. ãm ixte mẽ kãm kapêr jarênh o ri mẽ hkôt ixpa pix kaxyw na pre ixãm.

Nê na pa hte amnhĩ krã hkôt ri ixujarênh o ri mẽ akôt ixpa hkêt nê. Kot pa ã amnhĩ nhîpêx anê nhũm mẽ ixkapêr mex ã inhma nê pa ixkôt amnhĩ xunhwÿ. Ja pymaj na pa hte amnhĩ krã hkôt ri tanhmã ixujarênh to ho ri ixpa hkêt nê. Na pa hte ãm ixprĩ hã Kris kot tanhmã mẽ panê amnhĩ nhîpêx

to hã harênh o ri mẽ hkôt ixpa. Mẽ pahpiitã mẽ panê htyk ã harênhja pa hte mẽ kãm harê. Mẽ kot hprĩ hã mar nê hkôt amnhĩ xunhwÿr kaxyw. Jao amnhĩ krãm mẽ ujarênh mexta jagjênh nê hã no htÿx kaxyw. Pa ja hã mẽ omu nê ixkĩnh nê ijamaxpêr o:

—Na htem ixkapêr ma nê Jejus kôt amnhĩ xunhwÿr kurê kumrêx. Nã ãm hãmri na pa hte mẽ kãm ixkapêr kaprÿ ho ri ixpa hkêt nê. Anê.

¹⁸ No kêt mẽ pahte Tirtũm kot mẽ pahto hkra xwÿnhjaja ra mẽ pahte Kris pĩ kahpa hã mẽ panê htyk ã harênh mar nê pahkĩnh nê papa xwÿnh na pu mẽ. Jakamã na pu htem pajamaxpêr o:

—Nã ãm hãmri na Tirtũm Kraja htyk kukwak ri mẽ ixto mex nê mẽ ixto hkra. Mẽ ujarênhja mex kumrêx. Anê.

No kêt mẽ kêp hkra hkêt xwÿnhjaja na htem tee ri Kris tyk ã harênh ma nê hamaxpêr o:

—Tk. Tanhmã kot kêt we amnhĩ to nê mẽ panê ty? ãm amarĩ mẽ kot amnhĩ krã hkôt pĩ kahpa hã nhôr nê hpĩr kênã. Anê.

*Tirtũm kra hkêt xwÿnhjê jarênh
Matêwre 11.25-26; Wam Korît 3.19*

¹⁹ Nê Tirtũm kapêr ã kagã htũm kot mẽ kêp hkra hkêt xwÿnhjê jarênh kot:

Mẽ kot htÿx ri àhpumunh tÿx ã amnhĩ to jarkrar o pa htã kot paj mẽ kêp ja ho ijapêx pa nhũm mẽ ã amnhĩ jarênh anhÿr kaprÿ. Anê.

²⁰ Jakamã mẽ àhpumunh tÿx ã mẽ kot amnhĩ to jarkrar xwÿnhjaja nê mẽ kot Mojes kapêr o mẽ ahkre ho ri mẽ pa xwÿnhjaja nê mẽ kapêr rũnh xwÿnhjaja. Mẽ kot Tirtũm Kra hkôt amnhĩ xunhwÿr kêt jakamã te mẽ àhpumunh kêt pyrãk. Tirtũm kra hkêt xwÿnhjaja kot mẽ àhpumunh tÿx ã mẽ harênh tã no ãm Tirtũm noo mã te mẽ àhpumunh kêt pyrãk. Nê te htÿx ri mẽ kot amnhĩ nhîpêx o pa pyrãk.

²¹ Tirtũm àhpumunh o àhpumunh jakamã na pre ra mẽ hkukamã hamaxpêr o:

—Nã kot paj mẽ àhpumunh tÿx ã mẽ omunh xà hkôt mẽ ho ixkra hkêt nê. ãm mẽ kot ixkra Jejus kot mẽ nê htyk ã harênh mar nê amnhĩ kaxyw hkôt hamaxpêr pix ã mẽ omunh xà hkôt kot paj mẽ ho ixkra. Anê.

22-24 No Ijaewjaja kām amnhĩ krā hkôt pix mā amnhĩ nhĩpêx prām jakamā na pa hte mẽ ixpê Jesus kwỳjaja mẽ hwỳr mra nê mẽ kām Kris kapêr jarênh o ri ixpa nhũm mẽ inhma nê âm mẽ inhma. Nê te mẽ kot mẽ inhmar kêt pyrā nê mẽ inhmā:

—Tk. Nà kot paj mẽ tokyx axujarênh kôt amnhĩ nhĩpêx kêt nê. Kot kaj mẽ inhmā mẽ ixte aa mẽmoj pumunh kêt ô ho anê pa mẽ ja hã apumu nê axihtỳx ã apumu nê rĩ kormā hkôt amnhĩ nhĩpêx.

Anhỳr o inhmā kapêr. Tã no pa mẽ kām ã amnhĩ nhĩpêx anhỳr kêt nê. Âm Kris kot mẽ panê pĩ kahpa hã htykja pix pa htem mẽ kām harênh o ri ixpa. Ja kamā nhũm mẽ hkwỳjaja mẽ inhma nê âm mẽ inhma nê Kris xihỳx kêt ã âm amarĩ htyk ã harê. No mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ kurom mẽ inhma nê ra mẽ inhmar tỳx kurê kumrêx. Nê mẽ inhmā kapêr o:

—Nà âm hãmri na Krisja Tĩrtũm pyrā nê hihtỳx o hihtỳx. Âm hãmri na ka ã harênh anê. Anê.

No Ijaew kêt xwỳnhjaja na Ijaew pyrā nê kām amnhĩ krā hkôt amnhĩ nhĩpêx o pa hprām kêt nê. Nê mẽ kām mẽ àhpumunh tỳx pix prām o pa. Jakamā na pa htem mẽ kām Kris kapêr jarênh o ri mẽ hkôt ixpa nhũm mẽ hkwỳjaja mẽ inhma nê Ijaew kwỳjê pyrā nê âm mẽ inhma nê mẽ inhmā:

—Tk. Nà na ka htem âm ri axêx o ri apa. Kot pa mẽ akapêr mar kêt nê. Kot paj mẽ axàhpumunh tỳx ã mẽ apumu nê rĩ kormā mẽ ama nê mẽ akôt amnhĩ nhĩpêx.

Anhỳr tã pa mẽ âm arĩ Kris kot mẽ panê htykja pix pa mẽ kām harênh o ri mẽ hkôt ixpa. Nhũm mẽ hkwỳjaja mẽ inhma nê mẽ inhmā:

—Nà mẽ axàhpumunh kêt jakamā na ka htem atỳx ri ã ja jarênh anê.

Anhỳr tã no nhũm mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ inhma nê mẽ inhmā kapêr o:

—Nà âm hãmri na ka mẽ ã Krisja jarênh anê. Tĩrtũm pyrā nê àhpumunh o àhpumunh kênã. Anê.

25 Tĩrtũm mẽ Jesus wa mẽ pakurom àhpumunh o àhpumunh nê hihtỳx o hihtỳx.

Tĩrtũm mẽ parom hihtỳx o hihtỳx ã harênh Matêwre 11.25; Sikũn Korit 12.7-10; Xi-akre 2.5

26 E Kris kôt ixtô nê ixtôxjaja. Amnepê mẽ Tĩrtũm kot amnhĩm mẽ axunhwỳrta ã tanhmā na ka prem amnhĩ nhĩpêx to ho ri apa? Nà na ka prem axohtô nê jar mẽ noo mẽ axàhpumunh kêt nê ri apa. Nê mẽ apê pahi hkêt nê ri apa. Mẽ axohtô nê amnhĩ to hkryre nê ri apa.

27 Tã nhũm Tĩrtũm amnhĩ kôt mẽ ate amnhĩ to hkryre xwỳnhjê xunhwỳ. Kojã nhỹrmā kot tanhmā mẽ pahpiitã mẽ pajarênh to xà hã arĩgrota kato hãmri nhũm mẽ àhpumunh tỳx ã amnhĩ to jarkrar xwỳnhjaja Tĩrtũm kot mẽ kurom mẽ pahto hkra hã mẽ pahpumu hãmri nê tee ri amnhĩ kukamā hamaxpêr nê amnhĩ kamā hpijaàm tỳx nê. Nê mẽ hihtỳx ã amnhĩ to jarkrar xwỳnhjaja haxwỳja. Nhũm Tĩrtũm kot mẽ kurom mẽ pahto hkra hã mẽ pahpumu nê tee ri amnhĩ kukamā hamaxpêr nê amnhĩ kamā hpijaàm tỳx nê.

28 Na hte Tĩrtũm amnhĩ kaxyw mẽ kot amnhĩ to hkryre xwỳnhjê xunhwỳ. Nê mẽ kot mẽ kamā kahak o pa xwỳnhjê xunhwỳ. Jar pyka ja kamā mẽ hkwỳ kot mẽ hkaga htã nhũm Tĩrtũm amnhĩ mã mẽ unhwỳ. Mẽmo kaxyw na hte ã amnhĩm mẽ unhwỳr anê? Nà mẽ kot nhỹrmā tee ri mẽ àhpumunh tỳx ã amnhĩ jarênh xwỳnhjê pumunh nê axpên mã mẽ harênh o:

—Kwa mẽ pahte mẽ àhpumunh tỳx ã mẽ harênh tã nhũm Tĩrtũm mẽ pahpyrā nê amnhĩ kaxyw mẽ unhwỳr kêt nê. Nà te mẽ àhpumunh kêt pyrāk.

Anhỳr o axpên mã mẽ harênh kaxyw na pre Tĩrtũm amnhĩm mẽ kot amnhĩ to hkryre xwỳnhjê xunhwỳ.

29 Jakamā kot puj mẽ nhỹrmā Tĩrtũm mã amnhĩ to jarkrar pê tanhmā kām amnhĩ jarênh to hkêt nê. Rỳ kām:

—Kwa ga ixpumu Tĩrtũm. Na pa hte ã amnhĩ nhĩpêx anê nê ã amnhĩ nhĩpêx anê. Kwa ja hã ixpumu nê ixto akra nà?

Anhỳr o amnhĩ to hwỳr kêt nê.

30 Âm Jesus pix kukwak ri na hte Tĩrtũm mẽ pahto hkra. Tãm na pre Tĩrtũm noo mã amnhĩm mẽ paxunhwỳ. Mẽ pahte urāk nê pahpê hkra kaxyw. Jakamā na pu htem âm pix kukwak ri amnhĩ nhĩpêx mex o ri papa.

Nhũm mẽ pamã àhpumunh tỳx xà hkwỳ gõ. Tã ra kot mẽ pahte amnhĩ tomnuj pẽ mẽ papytãr jakamã kot puj mẽ nhỹrmã pahtyk tã no ãm akupỹm pahĩr nẽ Tĩrtũm mẽ wa kuri pahĩr tũm nẽ pamex kumrẽx nẽ papa ho papa.

³¹ Tã ã Jejus kot mẽ panhĩpẽx kot anhỹr jakamã Tĩrtũm kapẽr ã kagã htũm kot ja jarẽnh kot:

Kot ka mẽ amã mẽmoj tã jarkrar prãm nom kêr ka mẽ kamjaja amnhĩ to jarkrar kêt nẽ. Mẽ panhõ Pahĩti ra kot mẽ panẽ tanhmã amnhĩ nhĩpẽx toja pix ã tanhmã ho jarkrar to ho ri apa. Anẽ.

2

Pawre kot tanhmã Kris jarẽnh to hã harẽnh

Sikũn Korit 4.1-7; Wam Pẽtre 3.15

¹⁻² E Kris kôt ixtõ nẽ ixtõxjaja. Amnepẽ mã ixte mẽ awỳr inhmõrta ã na pa pre inhnojarẽt nẽ ijamaxpẽr o:

—Kot paj ma mẽ hwỳr mõ nẽ mẽ kãm Kris kapẽr jarẽ. Kot amnhĩ grõnh kôt mẽ inhnẽ htykja pa mẽ kãm harẽ. ãm ja pix jarẽnh o ri mẽ hkôt ixpa. Nom kot paj mẽ kapẽr japjẽ xwỳnhjẽ pyrã nẽ mẽ kãm ixkapẽr japjẽ hkêt nẽ. Rỳ mẽ urak nẽ te ixàhpumunh tỳx o ri ixkapẽr japjẽ pyrak o ri mẽ kãm ixkapẽr japjẽ hkêt nẽ. Kot paj ãm ixkatat kôt ri mẽ kãm tanhmã Jejus jarẽnh to pix o ri mẽ hkôt ixpa.

Anhỹr o mẽ akukamã ijamaxpẽr. Hãmri nẽ ma mẽ awỳr mõ nẽ mẽ awỳr pøj nẽ mẽ amã Jejus kot mẽ panẽ htyk nẽ akupỹm htĩrja pix jarẽnh rãhã ho ri ixpa.

³ Na pa pre tee ri amnhĩ kukamã ijamaxpẽr nẽ ijamaxpẽr o:

—Hẽxta waa nẽ. Tanhmã kot pa we mẽ kãm Tĩrtũm kapẽr jarẽnh to nhũm mẽ inhmar tỳx nẽ hkôt amnhĩ xunhwỳr kurẽ kumrẽx wehe? Kot paj amnhĩ krã hkôt mẽ kãm harẽnh kêt nẽ. Ja kaxyw ijamaxpẽr tỳx kêt kẽnã. Kot paj amnhĩ krã hkôt mẽ kãm harẽ nhũm mẽ ãm inhma nẽ hkôt amnhĩ xunhwỳr kêt nẽ. Nà kot paj Tĩrtũm nhỹ hã mẽ kãm tanhmã ixkapẽr to kê tãm tanhmã mẽ hkrã hto kê mẽ inhma nẽ hkôt amnhĩ xunhwỳr japẽr.

Anhỹr o ijamaxpẽr.

⁴ Nẽ mẽ ate inhmar kaxyw na pa pre ixêx rom tanhmã mẽ ano kupyw to ho ri ixpa hkêt nẽ. Rỳ mẽ pajaja mẽ ixàhpumunh xà hkôt tanhmã mẽ amã ixkapẽr to hkêt nẽ. Na pa pre ãm Tĩrtũm Karõ nhỹ hã mẽ amã awjarẽ. Mẽ ate mar nẽ hihtỳx o hihtỳx ã omunh kaxyw.

⁵ Jakamã na ka prem Tĩrtũm xihtỳx ã omu nẽ amnhĩ kaxyw hkôt ajamaxpẽr kurẽ kumrẽx. No pa ixàhpumunh tỳx ã ixpumunh kôt ixkôt ajamaxpẽr kêt nẽ. Na ka prem ixkapẽr ma nẽ ajamaxpẽr o:

—Nà Tĩrtũm na mẽ parom àhpumunh o àhpumunh nẽ hihtỳx o hihtỳx.

Anhỹr o ajamaxpẽr kôt ajamaxpẽr kurẽ kumrẽx.

Tĩrtũm Karõ kot mẽ pamã àhpumunh xà nhõr ã harẽnh

Matêwre 7.6; Juãw 14.22, 16.13-15; Xiakre 3.13-18

⁶ Nẽ na hte Tĩrtũm kra hkwỳjaja Tĩrtũm kot amnhĩ nhĩpẽx ã omunh mex. Nẽ hamaxpẽr ã omunh mex. Jakamã na pa hte mẽ ahkre japjẽ ho mẽ hkôt ixpa. Nom jar pika ja kamã mẽ pajamaxpẽr tỳx xà ho mẽ ahkre hkêt nẽ. Rỳ pika piitã hkôt mẽ utar xwỳnhjẽ jamaxpẽr tỳx xà ho ri mẽ ahkre ho ri ixpa hkêt nẽ. Kojã nhỹrmã mẽ àhpumunh xãja mẽ kęp hapẽx pa.

⁷ Jakamã na pa hte ãm Tĩrtũm xàhpumunh xà pix o mẽ ahkre o ri ixpa.

Amnepẽ mã kormã mẽmoj piitã hkêt ri na pre Tĩrtũm amnhĩ kukamã amnhĩ jarẽnh o:

—Mẽ kot amnhĩ kaxyw Ixkra hkôt mẽ hamaxpẽr o mẽ pa xwỳnhjaja kot paj mẽ ho ixkra nhũm mẽ mex kumrẽx nẽ pa ho pa.

Anhỹr o mẽ harẽ. Nom mẽ kot hkôt amnhĩ xunhwỳr kêt xwỳnhjaja nhũm kormã mẽ kãm ja ho amnhĩrĩt kêt nẽ. Tã ja na pa hte ra mẽ kãm harẽnh rãhã ho ri mẽ hkôt ixpa nhũm mẽ Tĩrtũm kãm mẽ pahto hkra hprãm hã harẽnh ma.

⁸ Nom pika piitã hkôt mẽ ho amnhĩptar xwỳnhjaja na mẽ kormã ja mar kêt nẽ. Kęp apu mẽ kot mar ronhỹx prem pĩ kahpa hã mẽ panhõ Pahĩti nhõr nẽ hpĩr kêt nẽ. Mex o mex tã nhũm prem axtem nẽ ã hipẽx anẽ.

⁹ Mě kot mẽmoj mex pumunh kêt tâ Tirtûm kapër ã kagà htûm kot mẽmoj mex jarënh kot:

Na pre Tirtûm mẽ kãm hkĩnh xwýnhjê kutêp mẽmoj mex kwý jaxwý nhũm mex o mex nẽ mẽ ahã hikwý.

Aa mẽhõ kot mẽmoj mex o mexja pumunh kêt.

Nẽ aa mẽhõ kot ã mẽmoj kot anhýr pumunh kêt.

Nẽ aa ã mẽmoj mex kot anhýr kukamã hamaxpër kêt.

Tã nhũm Tirtûm mẽ kutêp hkwy jaxwý.

Anhýr o kot harënh tâ no nhũm mẽ kot hkôt amnhĩ xunhwýr kêt xwýnhjaja ã kapër anhýrja mar kêt nẽ.

¹⁰ Mě pamã na pre Tirtûm ja ho amnhĩrít. Na pre ra mẽ pamã Karõ gõ nhũm mẽ pamã gjêx o mẽ pamã mẽmoj to amnhĩrít mex nẽ. Tirtûm Karõja àhpumunh týx o àhpumunh týx. Nẽ kot hprĩ hã Tirtûm jamaxpër pumunh par.

¹¹ No mẽ papajaja na pu htem axpën jamaxpër kôt axpën pumunh kêt nẽ. Na pu htem papam amnhĩ jamaxpër ã amnhĩ pumu. Ja pyrã nẽ Tirtûm Karõ pix na hte Tirtûm jamaxpër pumunh.

¹² No mẽ pahpê hkrajaja na hte mẽ pahkarõja pix mẽ pakamã pa hkêt nẽ. Na hte mãânën Tirtûm Karõja mẽ pakamã pa nẽ mẽ pamã tanhmã mẽmoj to amnhĩrít to ho mẽ pahkôt pa. Nẽ Tirtûm kot mẽ pakutêp mẽmoj mex jaxwýrja nhũm ja kukamã mẽ pamã harënh o amnhĩrít.

¹³ Jakamã na pa htem amnhĩ krã hkôt ri mẽ kãm ixujarënh kêt nẽ. ãm Tirtûm Karõ nhý hã na pa hte ixprĩ hã mẽ kãm kapër jarënh o ri mẽ hkôt ixpa. Ra Tirtûm Karõ kot mẽ amã gjêx xwýnhjê mã pa ý hã ixkapër.

¹⁴ No mẽ kãm Tirtûm Karõ kapër mar prãm kêt xwýnhjaja na htem Tirtûm kot amnhĩ nhĩpêx pumu nẽ hprĩ hã omunh kêt nẽ. Mě kãm kapër mar prãm kêt jakamã na htem ri kot tanhmã mẽ pahto mex to hã harënh ma nẽ hamaxpër o:

—Tk. Kwa mo kaxyw na htem ri ã Tirtûm jarënh anẽ? Tanhmã kot we amnhĩ to nẽ mẽ pahto mex? Nã kot anhýr kêt. Anẽ.

¹⁵ Nom mẽ pahpê Tirtûm kra hkwy hã mẽ pahte Karõ kapër mar mex xwýnhjaja na pu

hte mẽ kurom Tirtûm kot amnhĩ nhĩpêx ã omunh mex nẽ. Nẽ Karõ xô ri mar mex nẽ nhũm mẽ kot Karõ kapër mar kêt xwýnhjaja tee ri ã mẽ pahte amnhĩ nhĩpêx anhýr ã mẽ pahpumu. Nom hprĩ hã mẽ pahte Tirtûm kôt amnhĩ nhĩpêx pumunh kêt nẽ.

¹⁶ Tirtûm kapër ã kagà htûm kot ja jarënh kot:

Mẽhõ na kot Tirtûm jamaxpër pumunh?

Nẽ mẽhõ na pre we kãm hamaxpër gõ?

Nã amrakati kumrêx. Tapxipix na àhpumunh týx o àhpumunh týx. Anẽ.

Tã mẽ papajaja mẽ pahte Tirtûm Karõ kapër mar týx xwýnhjaja na pu htem Kris xô ri pahprĩ hã hamaxpër kôt omunh mex nẽ.

3

Mě kot Tirtûm mã tanhmã amnhĩ nhĩpêx to xwýnhjê jarënh

Wam Korît 14.20; Karatas 5.16-21; Epes 4.14; Eprêw 5.11

¹ E Kris kôt ixtõ nẽ ixtõxjaja. Pa mẽ amã mẽmoj jarë ka mẽ inhma nẽ kãm ajamaxpër. Nã amnepê mã kormã mẽ ate Kris kôt amnhĩ nhĩpêx tohtuj anhýrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamaxpër tûm kôt pix mã amnhĩ nhĩpêx. Kormã mẽ ate Tirtûm Karõ hkôt amnhĩ nhĩpêx mex kêt jakamã na ka pre htem mẽhprĩre kot amnhĩ nhĩpêx pyrãk o amnhĩ nhĩpêx. Nẽ mẽ urãk nẽ kormã mẽmoj piitã omunh kêt nẽ. Jakamã na pa pre mẽ amã ixujarënh kaxyw nẽ te mẽ ate kormã Tirtûm kapër mar kêt xwýnhjê pyrãk o mẽ anhĩpêx nẽ mẽ amã tanhmã ixujarënh to.

² Mě hkaràre na htem mẽ hkà kagô pix kaô nẽ kormã mẽ apkur xà mex kur kêt nẽ. Ja pyrã nẽ na pa pre te ixte mẽ ato hpjaôr pyrã nẽ mẽ amã Tirtûm kapër piitã harënh par kurê kumrêx kêt nẽ. ãm mẽ amã hkwy pix jarë ka prem ama nẽ Jesus kôt amnhĩ xunhwý. Tã na pa hte arĩ mẽ amã hkwy pix jarënh o ri ixpa nẽ kormã piitã ho mẽ ajahkre jatur xãm mênh kêt nẽ.

³ Na ka htem arĩ te mẽ apê Kris kwý hkêt pyrãk o amnhĩ nhĩpêx o apa. Nẽ mẽmoj kôt axpën kãm agryk axpën mã axàkjêr o apa. ã amnhĩ nhĩpêx anhýr jao arĩ mẽ ate amnhĩ nhĩpêx tûm kôt amnhĩ nhĩpêx rãhã nẽ.

4 Na hte mẽ akwỳjaja amnhĩ jarēnh o: “Ixpê Pawre hkwy na pa.” Anē. Nē mẽ akwỳjaja amnhĩ jarēnh o: “Pa na ixpê Apor kwỳ na pa.” Anē. Kwa na ka htem ã amnhĩ jarēnh anhỳr o te mẽ apê Kris kwỳ hkēt pyrāk.

5 Apor mẽ pa ãm wa ixte Tirtũm kapēr o mẽ ajahkre xwỳnh pix na pa wa. Wa ixpê mẽ anhō pahihiti hkēt kēnã kot ka kēt mẽ axtem nē mẽ apê ahpỳnhã wa ixkwỳ hã amnhĩ jarē. Na pa pre wa mẽ amã Tirtũm kapēr jarēnh o ri mẽ akôt ixpa ka prem wa inhma nē amnhĩ kaxyw hkôt ajamaxpēr tỳx nē. Nē hkôt amnhĩ xunhwỳ nom wa pa wa ixkôt amnhĩ xunhwỳr kēt nē. Na pa wa ãm Tirtũm kapēr o mẽ ajahkre nom amnhĩ kôt mẽ axunhwỳr kēt nē.

6-9 E pa ixprĩ hã mẽ amã war amnhĩ jarē ka mẽ inhma. Te wa ixpê Tirtũm pur kãm wa ixàpēnh xwỳnh pyrāk no mẽ kajaja te mẽ apê hpur pyrāk. Na htem hpur karē nhũm hirã nhũm mẽ kamã ahkre ho pa. Ja pyrã nē na pa pre ixkumrēx mẽ awỳr ixpa nē mẽ amã Tirtũm kapēr jarēnh o ri mẽ akôt ixpa. Te mẽ kot pur kãm ahkre ho ri pata pyrāk. Tã nhũm Apor ixpãnhã ma mẽ awỳr pa nē te mẽ kot pur karēta pyrāk o mẽ anhĩpēx nē mẽ amã Tirtũm kapēr o mẽ ajahkre mex o ri pa. Xà na hte pur karēr xwỳnhja rỳ kamã ahkre xwỳnhja tãm tanhmã mẽmo hy hto nhũm ra higrōt nē hprēk nē ô? Nà na htem ãm ahkre hpa nhũm arĩ hikwỳ. Nhũm Tirtũm tãm tanhmã hyta to nhũm higrōt nē hprēk nē ô. Ja pyrã nē na hte Tirtũm mẽ ho hkra nē tanhmã mẽ ho nhũm mẽ amnhĩ kaxyw hkôt hamaxpēr tỳx nē hkôt amnhĩ nhĩpēx mex o pa. Nom mẽ kãm harēnh o pa xwỳnhhta kôt amnhĩ xunhwỳr kēt nē.

Nē na hte pur karēr xwỳnh rỳ kamã ahkre xwỳnhja tãm tanhmã hyta to nē ho htĩr kēt nē. Tirtũm pix na hte tanhmã ho nhũm higrōt. Ja pyrã nē na pa hte Tirtũm kapēr o mẽ ajahkre o ri mẽ akôt ixpa nom pa tanhmã mẽ ato ka mẽ apê Tirtũm kra nē ri apa hkēt nē. Tanhmã kot pa mẽ ato ka mẽ apê hkra? Tapxipix na kot mẽ pahto hkra kaxyw àhpumunh. Nē tapxipix na hte tanhmã mẽ pahkrã hto pu mẽ kãm hprãm xà hkôt amnhĩ nhĩpēx mex o ri papa.

Nē pur karēr xwỳnh mẽ pur kãm ahkre xwỳnhja wa. Hamē wa àpēnh mex jakamã koja hamē wa kot pur kãm àpēnh pãnhã amnhĩm ujamỳnh rax nē. Ja pyrã nē kot paj mẽ ixte Tirtũm kapēr o mẽ ajahkre ho ri mẽ akôt ixpa xwỳnhjaja nhũm Tirtũm nhỹrmã mẽ ixàpēnh pãnhã mẽ inhmã amnhĩrer mex nē.

Nē te mẽ ate Tirtũm nhõ ixkre pyrāk.

10 Nē pa te ixpê Tirtũm mã ixkre hã ixàpēnh xwỳnh pyrāk jakamã na pre Tirtũm mẽ akaxyw tanhmã ixto pa mẽ amã tanhmã kot amnhĩ nhĩpēx to hã harēnh o ri mẽ akôt ixpa. Te ixte ò ixkre kaxyw ãm xà maati xãm pyrāk o mẽ anhĩpēx. Jao mẽ amã kapēr jarēnh o ri mẽ akôt ixpa. Mē ate amnhĩ kaxyw hkôt ajamaxpēr nē hkôt amnhĩ xunhwỳr kaxyw. Tã na ka prem hkôt amnhĩ xunhwỳ nhũm ixpãnhã Tirtũm kapēr o mẽ ahkre ho mẽ pa xwỳnh kwỳjaja mẽ awỳr mra nē mẽ amã kapēr jarēnh jatur xãm kurē. Nē hprĩ hã ho mẽ ajahkre ho ri mẽ akôt pa. Te ho mẽ kot ixkre krax nhĩpēx pyrāk o mẽ anhĩpēx.

Nē kwa mẽ ate mẽ ahkre o mẽ apa xwỳnhjaja kēr ka mẽ akatàt kôt mẽ ahkre mex rãhã ho ri mẽ hkôt apa.

11 Nē Jesus Kris tapxipix na pu htem hkôt amnhĩ xunhwỳ nhũm mẽ panē mẽ pahte amnhĩ tomnuj o hapēx. Jakamã te kēp kỳxpē ixkre nhĩmōk ã nōr xà maatita pyrāk.

12 Nē na htem tōhã ixkre nhĩpēx kaxyw nē pĩ htỳx jakà nē ho hipēx nhũm kritpēm mẽ kãm mex ry nē kuhé. No na htem tōhã nojarēt kãm ixkre hã apē nē pĩ rerek o hipēx nhũm mẽ kãm mex ry hkēt nē. Koja rôr nhyre hwỳr mra nē mẽ kēp hapōk nē homnu. Ja pyrã nē na hte Tirtũm kapēr o mẽ ahkre ho ri mẽ pa xwỳnh kwỳjaja te mẽ kot katàt kôt pĩ htỳx o ixkre nhĩpēxta pyrã nē katàt kôt mẽ ahkre ho ri mẽ hkôt pa. No nhũm mẽ hkwỳjaja axtem nē te mẽ kot pĩ rerek o ixkre nhĩpēxta pyrāk o amnhĩ nhĩpēx nē htỳx ri Tirtũm kapēr kwỳm ri tanhmã mẽ ahkre hto ho pa. Jao hkwỳm ri amnhĩ nhĩpēx rãhã ho ri pa.

13 Nē koja mēhō pĩ htỳx pix o amnhĩm òrkwỳ nhĩpēx hãmri nhũm mẽmo arĩgro hã tanhmã amnhĩ to nē kēp pōr. No ãm hã pōja pix xēt pa nhũm kãm hikwỳ xà nē òkwa

êja arĩ piitã mex nhũm ixkre hpãm axte hã pô janhôr o nyw. No koja pĩ rerek o hipêx nhũm mẽmo arĩgro hã kêp pôr hãmri nê piitã kêp kaxàr pa. Ja pyrã nê koja nhỹrmã Krisja akupỹn mẽ pahwỳr wrỳ hãmri nê mẽ pahte kãm tanhmã amnhĩ nhĩpêx to ho papaja piitã hã mẽ pahpumunh kôt tanhmã mẽ pajarênh to. Koja mẽ pahkwỳjaja mẽ pahte mẽ kot pĩ htỳx o ixkre nhĩpêxta pyrã nê Tĩrtũm mã mẽ pahte amnhĩ nhĩpêx mex o mẽ papa xwỳnhjê xàpênh pumu nê mẽ pahte amnhĩ to mex xwỳnh ã mẽ pajarê. Hãmri nê hpãnhã mẽ kot pĩ rerek o ixkre nhĩpêxta pyrã nê mẽ kot kãm amnhĩ nhĩpêx mex kêt xwỳnhjê pumu nê mẽ kot amnhĩ to mex kêt xwỳnh hã mẽ harê.

¹⁴ Nê pĩ htỳxja na hte tanhmã amnhĩ to nê hpôr no ãm arĩ mex nê kuhê nhũm mẽ piitã arĩ mex ã omu. Ja pyrã nê koja Krisja mẽ kot kãm tanhmã amnhĩ nhĩpêx mex to ho mẽ pa xwỳnhjê pumu nê mẽ kot tanhmã kãm amnhĩ nhĩpêx to hpãnhã mẽ kãm amnhĩre nhũm mẽ piitã mẽ kot amnhĩ to mex ã mẽ omu.

¹⁵ No pĩ rerekja na hte pôr nê kaxàr pa. Ja pyrã nê mẽ kot Kris mã amnhĩ nhĩpêx mex hkêt xwỳnhjaja koja Tĩrtũm mẽ kãm amnhĩrer kêt nê. Nom arĩ mẽ kêp hkra jakamã koja mẽ arĩ kuri htĩr tũm nê pa. No ãm mẽ kot Tĩrtũm mã amnhĩ nhĩpêx mex kêt jakamã koja mẽ hkwyjê hkĩnh ã amnhĩm mẽmoj mex kwỳ jamỳnh kêt nê. Te mẽhõ nhõrkwyjê kêp hpôr nhũm mẽ hkukrêx kwỳ jamỳnh kêt nê ý kamã kurũm hapôx pyrãk.

¹⁶⁻¹⁷ E pa mẽ amã mẽmoj jarê. Ra mẽ ate mar tã mãn ka mẽ ra tanhmã amnhĩ to nê hã ano hkêt rỳ ko. Nà te mẽ pahpê Tĩrtũm nhõrkwyjê pyrãk. Tĩrtũm nhõrkwyjê ò na. Tã mẽ pahpê hkra nhũm Karõ kot mẽ pakaxwỳnh mã gjêx jakamã te mẽ pahpê òrkwyjê pyrãk. Jakamã mẽ kot kapêr kwỳm ri mẽ ajahkre o ri mẽ pa xwỳnhjaja te mẽ kot Tĩrtũm nhõrkwyjê grãnh xwỳnh pyrãk. Koja mẽ nhỹrmã amnhĩ xà htỳx kamã hamak o pa.

Mẽ pahte amnhĩ to jarkrar kêt ã mẽ pamã karõ

Wam Korit 1.10-25

¹⁸ Nê kot kaj mẽ atõ axàhpumunh tỳx o amnhĩ to jarkrar o ri apa japêr. Kwa

mẽ jam anhũre nê axte ri ã amnhĩ nhĩpêx anhỹr kêt nê. Nê te mẽ ate amnhĩ nê axàhpumunh tỳx xàja nhãm rênh par pyrãk o amnhĩ nhĩpêx. Mẽ paxàhpumunh xàja pika kamã mẽ àhpumunh pix jakamã kêt ka mẽ te amnhĩ nê nhãm rênh pyrã nê hpãnhã Tĩrtũm xàhpumunh xà hkôt pix mã amnhĩ nhĩpêx o ri apa.

¹⁹ No pika kamã mẽ àhpumunh xwỳnhjaja Tĩrtũm noo mã te mẽ hkrã pipãnh nê htỳx ri pata pyrãk. Tĩrtũm kapêr ã kagã htũm kot mẽ harênh kot:

Pika ja kamã mẽ àhpumunh tỳx ã mẽ kot amnhĩ to jarkrar xwỳnhjaja Tĩrtũm noo mã te mẽ kot amnhĩ to hêx o pa pyrãk. Anê.

²⁰ Nê mããnen mẽ harênh kot:

Mẽ kot amnhĩ xàhpumunh tỳx ã amnhĩ to jarkrar o ri mẽ pa xwỳnhjaja na hte Tĩrtũm mẽ omu nê mẽ kot ã amnhĩ jarênh anhỹr kaprỳ hã mẽ harê. Anê.

²¹⁻²² Jakamã kwa kêt ka mẽ axte mẽ apê ixkwỳ rỳ mẽ apê Apor kwỳ hã amnhĩ jarênh o ri apa hkêt nê. Mẽ apê wa ixkwỳ hkêt kênã. Nê mẽ apê nhãm mẽhõ hkwyjê hkêt. Mẽ pahpiitã mẽ pahpê Kris kwỳ na pu mẽ.

Nê kot puj mẽ nhỹrmã pahtyk tã akupỹm pahtĩr nê Tĩrtũm mẽ Jesus wa kuri pamex nê pahtĩr tũm nê ri papa. Jakamã kwa mẽ tee ri amnhĩ kukamã ajamaxpêr kêt nê.

Nê jarãhã mẽmoj piitã mẽ panhõ. Nê kormã mẽmoj kot amnhĩrĩt kêt xwỳnhjaja haxwỳja mẽ panhõ na. ãm mẽmoj piitã mẽ panhõ jakamã te mẽ pahpê mẽmoj piitã mẽo pahi pyrãk.

²³ No mẽ papajaja axtem Kris kêp mẽ panhõ Pahihti. Nê Tĩrtũm kêp Kris nhõ Pahihti.

4

Tĩrtũm pix kot tanhmã mẽ pajarênh to xwỳnh ã harênh
Eprêw 13.17

¹ Nê mẽ pajaja mẽ ixpê mẽ anhõ pahi hkêt. ãm mẽ ixte Kris mã tanhmã amnhĩ nhĩpêx to ho ixpa xwỳnh pix jakamã Tĩrtũm kormã kapêr kwỳ ho amnhĩrĩt kêtja na pa htem mẽ amã ho amnhĩrĩt o ri mẽ akôt ixpa. Ja kaxyw na pre mẽ ixunhwỳ.

² Na pre Kris tanhmã mẽ inhmã kapêr to nê mẽ inhmã:

—E kêr ka mẽ ixkapêr pix o mãn mẽ ahkre ho ri mẽ hkôt apa. Anê.

³⁻⁴ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kôt tanhmã ijarênh to. Ixte kãm amnhĩ nhĩpêx mex ã ijarê rỳ ixte kãm amnhĩ nhĩpêx mex kêt ã ijarê. ãm tapxipix koja tanhmã ijarênh to. No koja nhãm mēhō rỳ mẽ atō ã ijarênh anê pa ama nê ãm ama. Rỳ papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nê ãm ixtỳx kãm ã amnhĩ nhĩpêx anhỹr ã amnhĩ jarênh kaprỳ. Pahihti Kris pix kot hprĩ hã mẽ pahte amnhĩ nhĩpêx kôt pahpumunh jakamã tapxipix koja tanhmã mẽ pajarênh to.

⁵ Jakamã kwa kêr ka mẽ ri mẽ kot Tĩrtũm mã tanhmã amnhĩ nhĩpêx to hã mẽ omunh xà hkôt tanhmã mẽ harênh to hkêt nê. Koja nhỹrmã Pahihti Krisja akupỹn mẽ pahwỹr wrỳ nê rĩ tãm tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nê mẽ kot hpimxur pê tanhmã amnhĩ tomnuj to ho mẽ pa xwỹnhjaja nhũm mẽ piitã mẽ noo mã mẽ kãm ja ho amnhĩrit nhũm mẽ ja hã mẽ omu. Nê mẽ pahpiitã mẽ pajamaxpêr xà ho amnhĩrit nhũm mẽ piitã hprĩ hã ja hã expên pumu. Hãmri nhũm Tĩrtũm rĩ kormã mẽ pahte kãm tanhmã amnhĩ nhĩpêx mex to ho pa xwỹnhjê jarê.

⁶ E Jejus kôt ixkwỹjaja. Nà na pa ã mẽ amã Apor mẽ wa amnhĩ jarênh anê. Mẽ ate inhmar nê Tĩrtũm kapêr ã kagà hkôt tanhmã wa ijarênh to kaxyw. Kot kaj mẽ ã amnhĩ nhĩpêx anê hãmri nê ahpỹnhã tanhmã mẽ ixte Kris kapêr jarênh xwỹnhjê jarênh to hkêt nê. Nê expên mã mẽ ijarênh o:

—Nà tãm kot Kris kapêr jarênh mex o kot hkwỹjê jakrenh jakamã kot paj hkôt pix mã mãn ri ixpa.

Anhỹr o expên mã mẽ ixtō jarênh kêt nê. Kot kaj mẽ ã mẽ ixtō jarênh anê nê te mẽ ixto jarkrar pyrãk o amnhĩ nhĩpêx.

⁷ Kwa mēhō na pre mẽ amã tanhmã ri mẽ ijarênh to ka mẽ mar xà hkôt ã mẽ ijarênh anê? Nê mẽ ixkapêr mex ã mẽ ixkwỹjê jarê nê mẽ ixkapêr mex kêt ã mẽ ixkwỹjê

jarê. Nà na ka mẽ ãm amnhĩ krã hkôt ã mẽ ijarênh anê nom Kris xàhpumunh xà ho ã mẽ ijarênh anhỹr kêt nê. ãm mẽ ixte Tĩrtũm kapêr o mẽ ajahkre xwỹnhjaja na pa prem mẽ amã mẽmoj jarê ka mẽ ama nê mẽ inhỹ hã hkôt axàhpumunh mex nê. No amnhĩ krã hkôt mẽ axàhpumunh kêt kênã kot ka kêt mẽ ã ahpỹnhã tanhmã mẽ ixto jarkrar anhỹr to ho ri apa.

⁸ Te mẽ ate Apor mẽ wa ixrom Tĩrtũm kapêr mar par nê hkôt amnhĩ nhĩpêx mex pyrãk. Te wa ixrom mẽ ate Jejus nhĩkhô hã mẽ ho amnhĩptar pyrãk. Hêxta waa nê. Kop apu ãm hãmri mẽ ate ĩkhô hã mẽ ho amnhĩptar ronhỹx pa ijaxwỹja mẽ apyrà nê ã amnhĩ nhĩpêx anê. Hãmri nê ixkĩnh tỳx kumrêx.

⁹ Nom ja kot anhỹr kêt.

*Jejus nhỹ hã mẽ ahkre xwỹnhjê jarênh
Sikũn Korît 4.8-10; Eprêw 12.1*

Nê mẽ ixpê Jejus nhỹ hã mẽ ajahkre ho mẽ ixpa xwỹnhjaja te Tĩrtũmja axtem tanhmã mẽ inhĩpêx to pyrãk pa mẽ inhmex kêt nê ixpa. Te mẽ ixte gyw kãm amnhĩ rênh nhũm mẽ kot mẽ ixkamã òkre kahak pyrãk o na htem mẽ inhĩpêx. Jakamã na hte mẽ hkwỹjaja mẽ ixpumu nê mẽ ixkapêr ma nê ãm mẽ inhma nê expên mã mẽ ijarênh o:

—Tk. Kot mẽ ahkreja mexti hã. Kwa pu mẽ himex ri.

Anhỹr jakamã te ra mẽ ixtyk nê mẽ inhĩkwỹ nhũm mẽ piitã mẽ ixtã htu nê mẽ ixpumunh nê ma pa pyrãk o amnhĩ nhĩpêx. Jakamã na htem mẽ ixte mẽ ahkre ma nê ãm kuma nê ma pa. Nom Tĩrtũm kapêr o mẽ wrỳk xwỹnhjaja na htem ja hã mẽ pahpumu nê expên mã mẽ pajarênh o:

—Kwa mẽ kot Jejus ã mẽ hipêx kati htã nhũm mẽ arĩ hkôt amnhĩ nhĩpêx mex nê aa hkaga hkêt nê. Hêxta waa nê. Nà ãm hãmri na htem ã amnhĩ nhĩpêx anhỹr o pa. Anê.

¹⁰ Na hte mẽ kot mẽ ixkapêr mar xwỹnh kwỹjaja kãm mẽ ixkĩnh kêt nê tanhmã mẽ ixto kapêr punuj to. No mẽ kajaja nhũm mẽ ã mẽ ato kapêr anhỹr kêt nê. Na htem mẽ ixkrã pipãnh ã mẽ ijarê no mẽ kajaja nhũm mẽ Kris nhỹ hã mẽ axàhpumunh tỳx ã mẽ ajarê. Nê mẽ ixte Tĩrtũm kapêr kôt amnhĩ nhĩpêx mex kêt ã mẽ ijarê no mẽ kajaja na htem Tĩrtũm kôt mẽ ate amnhĩ nhĩpêx

mex ã mẽ ajarẽ. Nẽ mẽ kot mẽ ixkamã òkre kahak tỳx tã mẽ akamã òkre kahak kêt nẽ mẽ kãm mẽ akapẽr mar prãm nẽ.

¹¹ Na pa htem arĩ Kris ã ixpunuj nẽ ixpa. Nẽ mẽ inhmã prãm nẽ mẽ inhmã kôr nẽ ri ixpa. Nẽ mẽ ixê pikaxônhre nẽ ri ixpa. Nhũm htem Kris ã mẽ ixtak rũnh nẽ. Pa mẽ inhõrkwỳ hkêt nẽ nhãm ri ixpa nẽ nhãm ri ixpa. Na pa htem arĩ ã amnhĩ nhĩpêx anhỹr o ri ixpa.

¹²⁻¹³ Nẽ ixàpkur xà kaxyw ixàpênh rũnh o ri ixpa. Nhũm hte mẽ kãm Jejus prãm kêt xwỳnhjaja mẽ ijapry ho pa htã pa mẽ amnhĩ kurom mẽ kãm ixkapẽr mex nẽ mẽ kãm:

—E kê Tĩrtũm mẽ ato mex nẽ ka mẽ amex nẽ apa. Anẽ.

Nẽ mẽ kot mẽ inhĩpêx kati htã pa htem mẽ kutã amnhĩ to htỳx nẽ arĩ mẽ hkôt ixpa. Na htem te mẽ kot ahpunuj nhĩpêx pyræk o mẽ inhĩpêx nẽ mẽ ixwỳr mrar kêt nẽ. ã na htem mẽ ixte Jejus nhỹ hã mẽ ahkre o mẽ ixpa xwỳnhjê nhĩpêx anẽ.

Pawre te kêp mẽ hpãm pyræk ã kot amnhĩ jarênh

Wam Tesarõn 2.11-12

¹⁴⁻¹⁵ E Kris kôt ixkwỳjaja. Na pa ã mẽ amã kagà nẽ mẽnh anẽ. Nom mẽ ate inhma nẽ amnhĩ kamã apijaàm kaxyw kêt. Inhmã mẽ ajapê jakamã na pa ã mẽ amã ixkapẽr nẽ hã kagà nẽ mẽnh anẽ. Na mẽ ra ohtô nẽ ixpãnhã mẽ awỳr pa nẽ mẽ amã Tĩrtũm kapẽr o mẽ ajahkre. Nom ixkumrêx na pa pre mẽ amã kapẽr jarẽ ka prem inhma nẽ Kris hkôt amnhĩ xunhwỳ nẽ amnhĩ kaxyw hkôt ajamaxpẽr tỳx nẽ. Jakamã paxipix te ixpê mẽ apãm nhũm te mẽ apê ixkra pyræk.

¹⁶ Jakamã kwa mẽ ixte amnhĩ nhĩpêx kôt ixpumu nẽ ixkôt mãn kêt mẽ amnhĩ nhĩpêx o ri apa.

¹⁷ ã mẽ ate amnhĩ nhĩpêx anhỹr kaxyw na pa pre ijamaxpẽr nẽ ma mẽ awỳr Ximotre mẽ. Haxwỳja Kris kôt te kêp ixkra pyræk. Nẽ inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awỳr kumẽ. Koja ma mẽ awỳr mō nẽ pōj nẽ mẽ amã Kris kapẽr jarênh o ri mẽ akôt pa. Nẽ mẽ amã tanhmã ijarênh to nẽ mẽ amã:

—Nà Pawre na hte Jejus Kris jamaxpẽr kôt hamaxpẽr o pa. Nẽ kot amnhĩ nhĩpêx

kôt amnhĩ nhĩpêx o pa. Nẽ krĩ piitã hkôt mẽ kot uræk nẽ ã amnhĩ nhĩpêx o pa anhỹr kaxyw mẽ ahkre mex o pa. Anẽ.

¹⁸ Nẽ na xep mẽ akwỳjaja te ra àhpumunh tỳx pyrà nẽ tanhmã ijarênh to nẽ ijarênh o:

—Pawreja akupỳn mẽ pahwỳr mōr ã amnhĩ jarênh tã koja akupỳn mōr kêt nẽ kãm ga. ãm kapẽr kati xwỳnh na.

¹⁹ Anhỹr ã ijarênh tã koja Tĩrtũm kãm tokyx ma mẽ awỳr inhmōr prãm hã kot pa ma mẽ awỳr inhmōr kurê kumrêx. Hãmri nẽ pōj nẽ ixprĩ hã ã mẽ kot ixto kapẽr anhỹr xwỳnhjtajê pumu. Nẽ mẽhō kot ã mẽ kãm ijarênh anhỹr xwỳnhta ã ahkukja.

²⁰ Tĩrtũm krajaja na htem hkôt pix mã amnhĩ nhĩpêx jakamã na htem hkôt tanhmã amnhĩ nhĩpêx to hã mẽ omu nẽ rĩ kormã kêp hkra hã mẽ harẽ. Tã kot paj nhỹrmã mẽ awỳr pōj nẽ ã ixto kapẽr anhỹr xwỳnhjê pumu nẽ ixprĩ hã mẽ kot amnhĩ nhĩpêx ã mẽ omu nẽ rĩ kormã tanhmã mẽ harênh to. Jao Tĩrtũm nhỹ hã mẽ kot mẽ ajahkre hã mẽ omu rỳ amnhĩ krã hkôt mẽ kot mẽ ajahkre hã mẽ omu nẽ rĩ kormã tanhmã mẽ harênh to.

²¹ Jakamã kwa mẽ tokyx ixkutêp tãm amnhĩ nhĩpêx o ri apa. Kêr pa mō nẽ mẽ awỳr pōj nẽ mẽ ate tãm amnhĩ nhĩpêx ã mẽ apumu nẽ ixkĩnh nẽ. Nẽ mẽmoj tã mẽ amã ixàkjêr kêt nẽ. Nẽ mẽ amã ixkapẽr mex pix o ri mẽ amã ixkapẽr. Te mẽ hipêêxà kot hkrajê mã kapẽr mex pyræk o mẽ amã ixkapẽr mex nẽ. Hãmri pu mẽ axpên pumu nẽ pahkĩnh nẽ.

5

Mêhō kot tanhmã amnhĩ tomnuj to hã harênh

Sikũn Korît 2.5-11

¹ Nẽ kwa na pa pre tee ri mẽ anhĩõja jarênh ma nẽ ixkaprĩ htỳx nẽ. Na xep hte amnhĩ tomnuj tỳx pê nã puro hã hpijaàm kêt o pa. Kwa mẽ pahpê Kris kwỳjaja mẽ pahte ã amnhĩ nhĩpêx anhỹr kêt nhũm mẽ kot Kris kôt amnhĩ xunhwỳr kêt xwỳnhjaja haxwỳja ã amnhĩ nhĩpêx anhỹr kêt tã nhũm ra mẽ anhĩõja kot Kris kôt amnhĩ xãm tã ã amnhĩ nhĩpêx anẽ. Kwa ja omnuj tỳx kumrêx.

² Na xep ri ã amnhĩ nhĩpêx anhỹr o pa ka mẽ ja hã omu nẽ ãm omu nẽ nẽ tanhmã

kãm nê hkêt nê. Amarĩ hã omunh o ri hkôt apa. Mẽ ate Tirtũm kôt axãhpumunh tỳx ã amnhĩ jarẽnh tã no ãm ja hã omu nê ãm hã omu nê nê tanhmã kãm nê hkêt nê. Kwa nã. Mẽ tee ri kot ã amnhĩ nhĩpêx anhỹrja ã omu nê akaprĩ nê hkêt wehe. Nê mẽ tokyx amnhĩ nê hano kê mẽ akôt Tirtũm mã amnhĩ jarẽnh xã hã ixkre hwỳr axte mrar kêt nê.

³⁻⁵ Ixte mẽ apê awry htã ã kot amnhĩ nhĩpêx anhỹr ã harẽnh ma nê hkukamã tanhmã ijamaxpêr to. Nã ra ixte mẽ awỳr ixpôx ronhỹx pa mẽ ato akuprõ. Pahihti Jejus nhỹ hã mẽ ato akuprõ nê mẽ amã kot amnhĩ tomnuj xwỳnhhta jarẽ nê mẽ anê hanor kurê kumrêx. Jakamã e kêr ka mẽ mãmri ã amnhĩ nê hipêx anê. Mẽ panhõ Pahihti Jejus nhỹ hã amnhĩ nê hano nê te Satanasti mã rer pyrãk kê tee ri ja hã amnhĩ pumu nê tokyx kãm urer japêr. Hãmri nê akupỹm tãm amnhĩ nhĩpêx. Kê nhỹrmã Pahihti akupỹn mẽ pahwỳr wrỳ nhũm ma mẽ pahkôt õ krĩ hwỳr api.

⁶ Mẽ ate Tirtũm kapêr jarẽnh mar mex ã amnhĩ jarẽnh tã kormã amnhĩ nê ã kot amnhĩ nhĩpêx anhỹr xwỳnhhta janor kêt nê. Kwa mẽ tokyx amnhĩ nê hano. Na htem pãwti nhĩpêx kaxyw nê kamã kot ho hikot xã ho hkryre nê kamã kurê nê gaa nê rĩ ho piitã hikot pa. Ja pyrã nê kot ka mẽ amnhĩ nê kot amnhĩ tomnuj xwỳnhhta janor kêt nê hãmri nê gaa nê ra urãk nê apiitã ã amnhĩ nhĩpêx anhỹr o ri apa.

⁷ Kwa mẽ tokyx amnhĩ nê hano. Kêr ka mẽ arĩ amnhĩ to mex pix o ri axpên kôt apa nê tãm ri amnhĩ nhĩpêx o ri axpên kôt apa. Na pre ra Jejus Kris mẽ pahte amnhĩ to mex o papa kaxyw mẽ panê ty. Mẽ pahpiitã mẽ panê ty.

⁸ Jakamã na pu htem ãm amnhĩ to mex pix o ri papa. Nê tãm amnhĩ nhĩpêx o ri papa. Jao tanhmã amnhĩ tomnuj to ho ri papa hkêt nê.

⁹ Nê wam ixte mẽ awỳr kagã nê mênhta kamã na pa pre mẽ amã:

—Kêr ka mẽ nhãm mẽ kot mênijê kamã hpijaàm kêt o mẽ pa xwỳnhjê hkôt ri apa hkêt nê. ãm ri mẽ hkàx ã apa.

Anhỹr o mẽ amã hã karõ.

¹⁰⁻¹¹ Nom na pa pre mẽ piitã ã mẽ nê mẽ akurê anhỹr kêt nê. ãm mẽ kêp Kris kwỳ hã amnhĩ jarẽnh tã ã ri amnhĩ tomnuj anhỹr xwỳnh pixjaja na pa pre mẽ nê mẽ akurê. Koja mẽhõ kêp Kris kôt mẽ pahtõ rỳ mẽ pahtõx ã amnhĩ jarẽnh tã mẽ kamã hpijaàm kêt o ri pa ka mẽ ja hã omu nê hkôt ri apa hkêt kurê kumrêx.

Nê mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja.

Nê sãnti kutã hkõn krã ho rôrõk nê hkrĩ nê kãm mex ã harẽnh o ri mẽ pa xwỳnhjaja.

Nê mẽ kot axpên to kapêr punuj o ri mẽ pa xwỳnhjaja.

Nê mẽ pipãnh o ri mẽ pa xwỳnhjaja.

Nê axpên pê ri mẽ àhkĩnh o mẽ pa xwỳnhjaja.

Koja mẽhõ kêp Kris kwỳ hã amnhĩ jarẽnh tã ã amnhĩ nhĩpêx anhỹr o ri pa ka mẽ ja hã mẽ omu nê hkôt ri apa hkêt kumrêx. Nê mẽ kutã axãpkur kêt nê. ãm mẽ hkàx ã ri mra.

No mẽ kêp Kris kwỳ hkêt xwỳnhjê nê na pa pre ã mẽ akurê anhỹr kêt nê. Mẽ piitã ã mẽ kot amnhĩ nhĩpêx anhỹr o pa kênã. Na htem axpên kãm hpijaàm kêt o ri pa.

Nê mẽ kãm axpên kukrêx kĩnh o kãm ho õ hprãm o ri pa.

Nê sãnti kutã hkõn krã ho rôrõk nê hkrĩ nê kãm amnhĩ jagrer pê amnhĩ to hwỳr o pa.

Nê mẽ axpên pê àhkĩnh pix o pa.

Kris kwỳ hkêt xwỳnhjaja na htem ã amnhĩ nhĩpêx anhỹr o pa. Tã tanhmã kot ka wem amnhĩ to nê mẽ hkàx ã ri apa? Mẽ piitã ã mẽ kot amnhĩ nhĩpêx anhỹr kênã. Kot puj mẽ nhỹrmã Tirtũm nhõ krĩ mex wỳr api nê rĩ kormã mẽ hkàx ã ri papa.

¹²⁻¹³ Nê mẽ kêp Kris kwỳ hkêt xwỳnhjaja na pa hte mẽ kot amnhĩ tomnuj ã mẽ omu nê ãm mẽ omu nê tanhmã hã mẽ kãm nê hkêt nê. Tirtũm tãm koja nhỹrmã ja hã tanhmã mẽ hipêx to. No koja Kris kôt mẽ pahtõ rỳ mẽ pahtõxjê hõ tanhmã amnhĩ tomnuj to ho pa pu mẽ pahtõ ja hã omu nê nê tanhmã kãm pakapêr to kurê kumrêx. Tirtũm kapêr ã kagã htũm kot ja jarẽnh kot: Kêr ka mẽ amnhĩ nê Kris kôt akwỳjê hõ kot tanhmã amnhĩ tomnuj to ho pa xwỳnhjê jano. ã harẽnh kot anhỹr.

6

*Mě pahte Kris kwýjê ho pakapër kêt
Matêwre 5.38-40*

¹ Nê na ka xep htem Kris kôt atõ rý atõxjê hõ mẽ ka wa tanhmã axpên tomnuj to nê axtem nê juisti hwýr axpên to mra. Mě apyrã nê kêp Kris kwý hkêt tã ka htem ma hwýr amnhĩ to mra nhũm war axpên tã war ama nê tanhmã war ajarênh to. Kwa mon ka htem axtem nê ã Kris kwý hkêt xwýnhjê hwýr mẽ amnhĩ to amrar anê? Kêt mẽ Kris kôt anhĩõ hwýr mãn kêt mẽ amnhĩ to mra nê kumã mãn amnhĩ jarê kêt axpên tã war ama nê axpên tã tanhmã war amã kapër to.

² Ra mẽ ate ja mar tỳx tã hkôt amnhĩ nhĩpêx kêt nê. Měmoj ãm grire htã ka wa tokyx akupým hã tãm axpên xãm kêt nê. Rý Kris kôt war atõjê hõ hwýr wa amnhĩ to atêm nhũm akupým tãm axpên tã war axãm kêt nê. ãm axtem nê mẽ kêp Kris kôt mẽ atõ hkêt xwýnhjê hwýr amnhĩ to mra. Kwa mẽ ã amnhĩ nhĩpêx anhýr kêt nê. Mě pahpê Kris kwýjaja kot puj mẽ nhýrmã Kris nhĩhkô hã mẽ kêp hkwy hkêt xwýnhjê tanhmã mẽ harênh to.

³ Nê Tirtũm kapër o mẽ wryk xwýnhjaja kot puj mẽ mãânên nhýrmã tanhmã mẽ harênh to ho pahkrĩ. Jakamã kwa mãmrĩ ã mẽ pahte amnhĩ nhĩpêx anhýrja kukamã akupým tanhmã axpên xunhwýr to ho apa. Měmoj tã mẽ atõjê hõ wa kot tanhmã axpên to hã wa omu nê tokyx akupým axpên tã wa kãm akapër kêt wa tokyx akupým tãm axpên nhĩpêx. ã mẽ kot axpên nhĩpêx anhýr o paja na kêt mex.

⁴ No na ka xep htem arĩ Kris kôt mẽ akwý hkêt xwýnhjê hwýr axpên to mra nê mẽ kãm amnhĩ jarê. Kwa mẽ ri ã amnhĩ nhĩpêx anhýr kêt nê.

⁵ Mě tokyx tee ri ja hã amnhĩ pumu nê amnhĩ kamã apijaãm kêt wehe. Xà mẽ akamã Kris kôt mẽ atõjê hõ pixire nê kot tãm akupým mẽ axunhwýr kaxyw am-rakati kumrêx?

⁶ Na ka xep htem mẽmoj tã axpu. Kris kôt mẽ atõjê hõ mẽ mẽmoj tã axpu nê ra mẽ kêp Kris kwý hkêt xwýnhjê hwýr amnhĩ to mra. Kot tãm akupým mẽ unhwýr xwýnhjê hwýr amnhĩ to mra.

⁷ Mě apijapu ho apa jakamã na ka mẽ amnhĩ tomnuj tỳx nê. Hãmri nê te mẽ apê Kris kwý hkêt xwýnh pyrà nê mẽ hwýr amnhĩ to mra. Kwa kwãr Kris kôt anhĩõ mãmrĩ apê ahkĩ rý tanhmã anhĩpêx to. Ka mẽ ãm amnhĩ tã omu kêt tapxipix tanhmã amnhĩ tomnuj to.

⁸ Ja mex tã mẽ ate ã amnhĩ nhĩpêx anhýr kêt. Na ka htem axpên pê ahkĩ. Mě ate Kris kôt axpên to atõ nê atõx tã axtem nê ã axpên nhĩpêx anê. Te mẽ apijaãm kêt pyrãk o amnhĩ nhĩpêx o ri apa.

⁹⁻¹⁰ Mě kot tanhmã amnhĩ tomnuj to xwýnhjaja koja mẽ nhýrmã ma Tirtũm nhõ krĩ mex wýr àpir kêt nê. Ra mẽ ate ja jarênh mar tỳx.

Měmyjê hõ kot nhãm mẽnijê hõ ho amnhĩ kati xwýnhjaja.

Nê mẽnijê hõ kot nhãm mẽmyjê hõ ho amnhĩ kati xwýnhjaja.

Nê mẽnijaja axtem nê mẽ kot amnhĩõ ho mjên o ri mẽ pa xwýnhjaja.

Nê mẽmyjaja haxwýja axtem nê amnhĩõ ho hprõ ho ri mẽ pa xwýnhjaja.

Nê mẽ àhkĩnh o ri mẽ pa xwýnhjaja.

Nê mẽ kãm nhãm mẽ hkukrêx kĩnh o kãm ho õ hprãm o ri mẽ pa xwýnhjaja.

Nê ri mẽ pipãnh o mẽ pa xwýnhjaja.

Nê ri axpên to kapër punuj o mẽ pa xwýnhjaja.

Nê mẽ kot amnhĩ to sãnti hwýr o mẽ pa xwýnhjaja.

ã mẽ kot amnhĩ nhĩpêx anhýr xwýnh piitã koja mẽ Tirtũm nhõ krĩ hwýr àpir kêt nê.

¹¹ Kormã mẽ ate Kris kôt amnhĩ xunhwýr kêt ri na ka pre mẽ akwýjaja ã amnhĩ nhĩpêx anhýr o ri apa. Tã amnhĩ kaxyw Jejus kôt ajamaxpêr nê hkôt amnhĩ xunhwý. Hãmri nhũm Tirtũm Karõ mẽ Pahihti Jejus Krisja wa mẽ anê mẽ ate amnhĩ tomnuj piitã rên pa nê mẽ apê Tirtũm kra hã mẽ axunhwý nê amnhĩ mẽ ate amnhĩ to mex xwýnh ã mẽ ajarê.

*Mě pahte tãm amnhĩ nhĩpêx o papa hã mẽ
pamã karõ*

*Matêwre 5.27; Rõmãn 12.1-2; Epes 5.3;
Korosẽ 3.5; Wam Tesarõn 4.1-8*

¹² Nê na ka hte mẽ akwýjaja amnhĩ jarênh o:

—Nà na pa hte pa inhmã tanhmã amnhĩ nhĩpêx to hprãm xà hkôt amnhĩ krã hkôt amnhĩ nhĩpêx o ri ixpa. Anê.

Mê ate ã amnhĩ jarênh anhÿr tâ no ãm mê ate amnhĩ jarênhja mex kêt. Mëmoj piitã mê pamã mex kêt. Na pu htem pamã hprãm xà hkôt mëmoj to anê nê gaa nê ra ho amnhĩ pyrã nê ho anhÿr pix o papa. Nê gaa nê kãm panhÿrer kêt kumrêx. Jao ra pahpipãnh pix o ri papa. Rÿ paxêx pix o ri papa. Rÿ paxãhkĩnh pix o ri papa. Jakamã kêr pu mê pamã tanhmã amnhĩ nhĩpêx to hprãm xà hkôt tanhmã amnhĩ nhĩpêx to ho papa hkêt nê. ãm amnhĩ mê amnhĩ kaxyw Jejus mã pajamaxpêr pix nê.

¹³ Nê na htem amnhĩ jarênh o:

—Nà kot paj inhmã prãm nê mãmrĩ mëmoj ku. Nê inhmã nhãm mëhõ kamã ix-pijaam kêt prãm nê mãmrĩ ã amnhĩ nhĩpêx anê. Ja tanhmã inhmã kute hkêt. Anê.

Tã koja nhÿrmã Tirtũm mê panhĩja o hapêx pa. Na pre mê pahte nhãm mê kamã pahpijaam kêt o papa kaxyw mê panhĩpêx kêt nê. ãm mê pahte mê panhĩpêx xwÿnh maatija mã tanhmã amnhĩ nhĩpêx mex to ho papa pix kaxyw na pre mê panhĩpêx.

¹⁴ Nê na pre Pahihtija ty nhũm Tirtũm akupÿm ho htĩr. Ja pyrã nê kot puj mê nhÿrmã mê pajaxwÿja ty nhũm akupÿm mê pahto mê pahĩr. Ja kaxyw tapxipix pix na àhpumunh tÿx o àhpumunh tÿx.

¹⁵ Na pu htem Kris kôt amnhĩ xunhwÿr kôt pahpê hkwÿ nê te pahpê ì pyrãk. Jakamã kwa mê ja hã anohtÿx nê axte nhãm mê hkuprÿjê hwÿr amrar nê mê ho amnhĩkati hkêt nê. Tirtũm kêp ja omnuj. Te mê pahte Kris nhĩ pyrãk jakamã kot kaj mê ã amnhĩ nhĩpêx anhÿr jao te Kris tãm kot ã amnhĩ nhĩpêx anhÿr o pa pyrãk. Kwa ja mex kêt. Xà kot we Krisja ã amnhĩ nhĩpêx anê? Nà koja ã amnhĩ nhĩpêx anhÿr kêt nê.

¹⁶ Tirtũm kapêr ã kagà htũm kot ja jarênh kot:

Kot ka mê atõ mênijê hõ ho aprõ nhũm kêp aprõ kumrêx. Hãmri nê te ra war atipxi pyrãk o axpên nhĩpêx. Anê.

ã kot aprõ mê wa ajarênh anhÿr jakamã kwa kêr ka mê atÿx ri nhãm mê hkuprÿjê hwÿr apa hkêt nê. Kot kaj mê ã amnhĩ nhĩpêx anê nê Tirtũm noo mã te ate aprõ

kuhpa hã hkuprÿta o aprõ pyrãk. Te wam aprõta kuhpa hã war atipxi pyrãk.

¹⁷ Na pu htem Pahihti Jejus Kris kôt amnhĩ xunhwÿr nhũm amnhĩ tâ mê pahpumu nê mê pamã Karõ gõ nhũm mê pamã agjê. Pu mê ra Karõja kôt te ra Jejus mê wa pahpumu nê ri papa pyrãk o axpên nhĩpêx. Jao Kris jamaxpêr mê mê pajamaxpêrja te wa kot axpên pyrãk. Nê Kris kot amnhĩ nhĩpêx mê mê pahte amnhĩ nhĩpêxja te kot axpên pyrãk.

¹⁸ Jakamã kwa kêr ka mê amnhĩ prõ pix tãnopxar o ri apa. Nê mê anijaja amjên pix tãnopxar o ri apa. No mê nhãm mëmyjê ho amnhĩkati ho ri apa hkêt nê. Nê mê amyjaja nhãm mênijê ho amnhĩkati ho ri apa hkêt nê. Kot ka mê nhãm mëmoj tanhmã omnuj kute ho anê no ãm amnhĩ nhĩ homnu hkêt nê. Nom kot kaj mê nhãm mênijê ho amnhĩkati rÿ nhãm mëmyjê ho amnhĩkati hãmri nê ra amnhĩ nhĩ homnu hpa.

¹⁹ Mê panhĩ kamã na hte Tirtũm Karõ agjê nê kamã hkrĩ. Tirtũm na pre mê pahwÿr kurê nhũm mê pahkarõ mã agjê pu mê te mê pahpê òrkwÿ pyrãk. Jakamã na pu htem amnhĩ krã hkôt pahpÿx ri mëmoj tanhmã ho ho papa hkêt nê. ãm Tirtũm jamaxpêr xà hkôt pix mã na pu htem tanhmã mëmoj nhĩpêx to ho papa.

²⁰ Na pre ra Jejus mê pahte amnhĩ tomnuj pãnhã amnhĩrer kaxyw mê pahpiitã mê panê ty. Te htyk o amnhĩm mê pajaprõr pyrãk o mê panhĩpêx. Jakamã kwa kêr pu mê ãm hkôt pix mã mãn ri amnhĩ nhĩpêx rãhã ho ri papa. Kê mê pahkwÿjaja ja hã mê pahpumunh kôt Tirtũm mã mex o mex ã harênh o ri pa.

7

Mê mjên mê më hprõ wa kot axpên to mex ã më pamã karõ

Epes 5.22; Korosê 3.18; Eprêw 13.4

¹ Nê ota mê ate ixwÿr kagà nê mênhta na pre ixwÿr pøj pa omu. Nê kamã mê ate mê aprõ hã ixkukjêr xwÿnhhta pa kamã harê nê omu. Tã kot paj mê amã tanhmã harênh to ka mê inhma.

Nà kot ka mê amyjê hõ amã aprõ hkêt nê ahte ri apa hprãm nê kam nê aprõ hkêt

apa. Ja tanhmã kute hkêt. Nom kêr ka mẽ hkuprýjê ho presija ho ri apa hkêt nê.

² Na htem tõhã kãm hprõ hprãm kêt nê ri pa nê gaa nê mẽ hkuprýjê hõ pumu rý mẽ kêp mẽ hprõjê hõ pumu nê kamã hpijaàm kêt o ri pa. Ja pymaj kêr ka mẽ amyjaja mãmri aprõ nê mẽ anijaja mãmri amjên.

³ Nê mẽ anijaja. Koja mẽ amjên akamã hkurê ka mẽ mãmri kãm amnhĩ gõ kê mẽ anĩ. Nê mẽ amyjaja mãänên. Koja mẽ aprõ mẽ akamã hkurê ka mẽ mãmri mẽ anĩ.

⁴ Am ka amã tanhmã amnhĩ nhĩpêx to hprãm xà hkôt pix mã amnhĩ nhĩpêx kêt nê. Mãänên amã aprõ kot kãm tanhmã amnhĩ nhĩpêx to hprãm xà hkôt mãänên hkôt kãm amnhĩ nhĩpêx.

⁵ Nê kot kaj mẽ mẽmo arĩgro hã amã Tirtũm mã amnhĩ jarênh ryy hprãm japêr. Hãmri nê aprõ mã:

—E kot puj jarãhã axpên to amnhĩkati hkêt nê. Kot puj am Tirtũm pix mã amnhĩ jarênh o amýkry. Anê.

Hãmri nê mãmri ã amnhĩ nhĩpêx anê. No kwa kêr ka mẽ am ja ho anhýr o apkati pixi nê kãm anhũre. Nhũm jãã ka mẽ amã axpên to amnhĩkati hprãm nê mãmri tanhmã axpên nhĩpêx to. No kot kaj mẽ ã amnhĩ nhĩpêx anhýr kêt o hã atã apkati xohtõ nê gaa nê ra akurê xà axtem nê Satanasti jamaxpêr o ajamaxpêr. Jao nhãm mēhõ ni hwýr mra nê aprõ kuhpa hã kamã akurê ho kamã apijaàm kêt. Rý nhũm mēnijaja nhãm mēmyjê hõ hwýr mra nê mjên kuhpa hã kamã hkurê ho war axpên kamã hpijaàm kêt.

⁶ E mẽ ate ja hã ixkukjêr jakamã na pa ã ixprĩ hã mẽ amã ja jarênh anê. Ka mẽ akwýjaja amã aprõ hprãm nê mãmri aprõ nê ri apa. Nê mẽ akwýjaja amã aprõ hprãm kêt nê mãmri aprõ hkêt nê ri apa. Nom kot pa paa mẽ amã mẽ aprõ hã ixàmnhên kêt nê. Ka mẽ kam amnhĩ krã hkôt ajamaxpêr xà hkôt tanhmã amnhĩ nhĩpêx to.

⁷ Na pa hte ixprõ hkêt nê ri ixpa nom inhmã ja mex pa hte ahte ixpa.

Mẽ mjên kêt nê mẽ hprõ kêt xwýnhjê jarênh

Nê kormã mẽ aprõ hkêt xwýnhjaja. Ka mẽ ixpyrà nê aprõ hkêt nê ri apa ronhýx inhmã ja mex nê. Na hte mẽmy hkwyjaja

hprõ kêt nê ri pa nhũm Tirtũm ja hã mẽ omu nê tanhmã mẽ ho nhũm mẽ mex nê ri pa nê mēnijê kamã hkurê ho mẽ kamã hpijaàm kêt o ri pa hkêt nê. No na hte mẽ hkwyjaja hprõ hkêt nê ri pa nê gaa nê ra hkurê xà mēnijê kamã hpijaàm kêt. ã mẽ ate amnhĩ nhĩpêx anhýr pymaj kêr ka mẽ amã aprõ hprãm nê mãmri aprõ. Tirtũm mã ja mex kênã.

⁸ E mẽ aprõ hkêt nê mẽ amjên kêt xwýnhjaja. Nê ra mẽ apê mẽ aprõ htyk rý mẽ amjên htyk xwýnhjaja. Pa mẽ amã mẽmoj jarê. Nà kot kaj mẽ ixpyrà nê mẽ aprõ hkêt nê ri apa rý mẽ amjên kêt nê ri apa nhũm ja inhmã mex nê.

⁹ No kot ka mẽ atõ ra akurê japêr nê mãmri aprõ rý mãmri amjên. Ja mãänên tanhmã kute hkêt.

Mẽ pahte axpên kaga hkêt ã mẽ pamã karõ

Matêwre 5.31, 19.3-9; Makre 10.2

¹⁰ E kot paj hpãnhã ra mẽ ate axpên to amjên nê axpên to aprõ xwýnhjê mã ixkapêr. Nom kot paj amnhĩ krã hkôt tanhmã ixkapêr to hkêt nê. Pahihti Jesus Kris kapêr xà hkôt kot paj mẽ amã ixkapêr. Jakamã e kêr ka mẽ anijaja mẽ amjên kaga hkêt nê.

¹¹ Nom kot kaj mẽ tanhmã ajamaxpêr to nê hkaga japêr hãmri nê ahte ri apa nê axte nhãm mēhõ ho amjên kêt nê. Rý tee ri amnhĩ kukamã ajamaxpêr nê mãmri akupým amjênta wýr tē nê akupým hkôt ri apa. No kêr ka mẽ axte nhãm mēhõ ho amjên kêt nê.

Nê ra mẽ amyjaja kêr ka mẽ ajaxwýja ã amnhĩ nhĩpêx anê nê mẽ aprõ kaga hkêt nê. E kêr ka mẽ ã amnhĩ nhĩpêx anhýr o ri apa.

¹² Nê mẽ ate ixwýr kagã mēnh kamã axpên tã ixkukjêrta kot paj hpãnhã mẽ amã harê. Na Pahihti Jesusja ja hã tanhmã inhmã nê hkêt nê. Am amnhĩ krã hkôt kot paj mẽ amã tanhmã harênh to ka mẽ inhma.

Ka mẽ amyjê hõ ra Kris kôt amnhĩ xãm nom nhũm aprõ kormã hkôt amnhĩ xãm kêt japêr. Nom koja kãm arĩ ri akôt pa hprãm ka hkaga hkêt nê. Kê arĩ ri akôt pa.

¹³ Nê mẽ anijaja. Ka mẽ ajaxwýja ra apê Kris kwý hã ri apa nhũm amjên kêp hkwy

hkêt tâ arĩ ri akôt pa hprãm nẽ arĩ ri akôt pa ka hkaga hkêt nẽ.

14 Kêp Kris kwỳ hkêt tâ koja akôt Kris kwỳjê hkôt ri pa. Rỳ mẽ aprõ kêp Kris kwỳ hkêt tâ koja akôt Kris kwỳjê hkôt ri pa. Jao Tirtũm kapêr mar o pa nẽ gaa nẽ apyrà nẽ hkôt amnhĩ xãm japêr. Nẽ mẽ akra kêp Kris kwỳ hkêt xwỳnhjaja haxwỳja mẽ akôt Kris kwỳjê hkôt ri pa nẽ Tirtũm kapêr mar o pa nẽ gaa nẽ akôt Jejus kôt amnhĩ xunhwỳr japêr.

15 Nom koja aprõ kêp Kris kwỳ hkêt ã kãm akaga hprãm nẽ rĩ tãm mãmri akaga. Rỳ amjên kêp Kris kwỳ hkêt ã kãm akaga hprãm nẽ rĩ tãm mãmri akaga. Kêr ka mẽ kot akaga nẽ tee ri kãm tanhmã akapêr to hkêt nẽ. Kwâr mãmri akaga ka ahte ajamakêtkati nẽ axãmnhĩx ri apa. Mẽ pajamakêtkati nẽ mẽ pamex nẽ ri papaja na Tirtũm kãm hprãm.

16 No koja amjên kêp Kris kwỳ hkêt tâ kãm mẽ akaga hprãm kêt nẽ ka mẽ hkaga hkêt nẽ. Rỳ aprõ kêp Kris kwỳ hkêt tâ ka mẽ kam hkaga hkêt nẽ. Koja arĩ ate amnhĩ nhĩpêx ã apumunh o ri akôt pa nẽ gaa nẽ rĩ apyrà nẽ Kris kôt amnhĩ xãm japêr.

17 Jakamã kot ka mẽ aprõ rỳ amjên ra Kris kôt ahte amnhĩ xãm. Hãmri nẽ wa arĩ ri xypên kôt ri apa ho apa. Na pa hte krĩ piitã hkôt Jejus kôt mẽ pahkwỳjê mã ã ixujarênh anhỹr o ri ixpa. Tã kêr ka mẽ ã amnhĩ nhĩpêx anhỹr o ri apa.

Kris kôt amnhĩ xunhwỳr kêt ri tanhmã mẽ pakute hã mẽ pajarênh

18 Ja pyrà nẽ kot kaj mẽ ra amy kwryt kà jakàr japêr. Tã ra Kris kôt amnhĩ xãm nẽ arĩ arãhã ri apa. Rỳ amnhĩ jakàr kêt rãhã hkôt amnhĩ xãm japêr nẽ arĩ arãhã ri apa. Mo kaxyw kot ka kêt amnhĩ jakà?

19 Tirtũm na hte mẽ pahte amnhĩ my kwryt kà jakàr ã mẽ pahpumunh kôt tanhmã mẽ pajarênh to hkêt nẽ. Rỳ mẽ pahte amnhĩ jakàr kêt ã mẽ pahpumunh kôt mãänên tanhmã mẽ pajarênh to hkêt nẽ. ãm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarênh to.

20 Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteja arĩ rãhã ri papa.

21 Ka mẽ akwỳjaja ate nhãm mẽ kãm mẽ axapênh o apa htã Jejus kôt amnhĩ xunhwỳ. Tã kêr ka mẽ mãmri mẽ kãm axapênh o ri apa. Nom koja anhõ patrãwja amnhĩ nẽ mẽ ajano ka mẽ mãmri ma mra nẽ amnhĩ mã tanhmã axapênh to ho ri apa.

22 Nẽ koja mẽhõ Kris kôt amnhĩ xãm. Tanhmãn kêp mẽ õ patrãw rỳ kot mẽ kãm mẽ apênh xwỳnhjê hõ. Tã Kris kôt amnhĩ xãm hãmri nẽ arĩ amnhĩ nhĩpêx tũm kôt ri amnhĩ nhĩpêx o pa hkêt nẽ. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nẽ. Te kot õ patrãw punuj kaga nẽ hpãnhã õ patrãw mex kapêr kôt amnhĩ nhĩpêx pix o pa pyrãk.

23 Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprõr pyrãk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nẽ. Mẽ mãänên Tirtũm kapêr kôt amnhĩ nhĩpêx o ri apa.

24 Jakamã kêr pu mẽ pahte Kris kôt amnhĩ xunhwỳr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rỳ mẽ pahte amnhĩ jakàr kêt.

Rỳ ra mẽ pahte nhãm mẽhõ mã paxapênh o papa rỳ amnhĩ mã paxapênh o papa.

Rỳ ra mẽ pahprõ nẽ ri papa rỳ mẽ pahprõ hkêt nẽ ri papa.

Pu mẽ pahte Kris kôt amnhĩ xunhwỳr kêt ri tanhmã mẽ pakuteta ãm arĩ rãhã hã ri papa. Jao Tirtũm kãm hprãm xã kôt pix mã amnhĩ nhĩpêx o ri papa.

Mẽ hprõ nẽ mẽ mjên kêt xwỳnhjê jarênh

Matêwre 19.10-12

25 Nẽ mẽ ate ixwỳr kaga mênhta kamã na ka mẽ mãänên kormã mẽ hprõ hkêt xwỳnhjê hã ixkukja. Tã kot paj mẽ amã tanhmã mẽ harênh to. Nom Pahihti Jejus Kris na pre ja hã tanhmã inhmã nẽ hkêt nẽ. ãm pa kot paj ãm amnhĩ krã hkôt tanhmã hã mẽ amã ixkapêr to. Na pre Pahihti mẽ akaxyw tanhmã ixkrã hto pa hte ý hã tanhmã mẽ amã mẽmoj tã karõ hto ho ri ixpa. Jakamã e mẽ inhma nẽ inhmar tỳx nẽ.

26-27 Nà ra mẽ kãm mẽ pahkurê xwýnhjaja Kris ã mẽ pahomnuj o pa jakamã koja ixpyrà nẽ mẽ hprõ hkêt rãhã mẽ pa xwýnhjaja ahte ri pa nhũm ja mex nẽ. Nhũm mẽ umaj amnhĩ pix tãnopxar o ri pa. Nẽ mẽ aprõ xwýnhjaja kër ka mẽ kãm mẽ pahkurê xwýnhjê pymaj mẽ aprõ kaga hkêt nẽ. ãm pix tãnopxar o ri apa.

28 Tã kot ka mẽ atõ amã aprõ hprãm nẽ mãmrĩ aprõ. Ja mãänën tanhmã ixpê kute hkêt. Nẽ mẽ anijaja mẽ amã amjên prãm nẽ mãmrĩ amjên. Ja tanhmã ixpê kute hkêt. Nom kot ka mẽ akwýjê pyrà nẽ aprõ rý amjên. Nẽ gaa nẽ akra. Hãmri nẽ tanhmã mẽmoj kute kamã ka tee ri wa mẽ amnhĩ kukamã ri ajamxpêr o ri apa. Ja pymaj na pa hte mẽ amjên kêt nẽ mẽ aprõ hkêt ã mẽ amã awjarẽ.

29 Nẽ Kris tokyx akupýn mẽ pahwýr wrýk kaxyw jakamã kwa ra mẽ aprõ nẽ apa xwýnhjaja. Kër ka mẽ amnhĩ prõ nẽ amnhĩ kra pix kukamã ajamxpêr o ri apa hkêt nẽ. Te ho mẽ hprõ hkêt nẽ mẽ pa xwýnhjaja kot amnhĩ nhĩpêx pyrà nẽ Kris kutêp kumrêx mã ajamxpêr pê tanhmã amnhĩ nhĩpêx to ho apa nẽ arĩ kormã aprõ nẽ akrajê ho hapu nẽ tanhmã mẽ kutã anojarêt to ho apa.

30 Kris kot tokyx akupýn mẽ pahwýr wrýk jakamã kwa mẽ ri amýr o ri mẽ apa xwýnhjaja. Kër ka mẽ kutêp tee ri amnhĩ kaprĩ pix mã ajamxpêr o akaprĩ nẽ ri apa hkêt nẽ. Nẽ mẽ akĩnh nẽ ri apikunhar o ri mẽ apa xwýnhjaja kër ka mẽ Kris kutêp amnhĩ kĩnh xà pix mã ajamxpêr o ri apa hkêt nẽ. Nẽ ri mẽ axujaprõr o ri mẽ apa xwýnhjaja kër ka mẽ Kris kutêp tanhmã axujaprõr to pix kukamã ri ajamxpêr kêt nẽ.

31 Nẽ mẽ apê mẽ ate mẽmoj to wênê ho ri mẽ apa xwýnhjaja Kris kutêp ãm ri mẽ akukrêx pix kukamã ajamxpêr kêt nẽ. Koja mẽ panhõ pika piitã hkôt mẽ pakukrêxja nẽ mẽmoj piitã arĩ rãhã hkêt nẽ.

32 Jakamã kot kaj mẽ akukrêx pix kukamã ajamxpêr nẽ amnhĩ pix kukamã ajamxpêr nhũm ja apê omnuj nẽ. Kris kwý pê mẽ hprõ hkêt xwýnhjaja na htem Pahihtu Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa

hprãm. Jao ãm pix kutã tanhmã nojarêt to rãhã ho ri pa.

33 No kêt ra mẽ hprõ nẽ mẽ pa xwýnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa.

34 Mẽ kãm Tirtũm kapêr kôt amnhĩ nhĩpêx prãm tã no ãm mãänën kãm hprõ kapêr mar nẽ hkôt kãm tanhmã amnhĩ nhĩpêx to ho ri pa hprãm.

Nẽ mẽnijaja kot Jejus kôt amnhĩ nhĩpêx nẽ kormã mẽ mjên kêt xwýnhjaja na htem kãm Pahihtu Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nẽ ãm pix mã hamxpêr o pa. Nẽ ãm hkôt pix mã amnhĩ nhĩpêx o pa. No ra mẽ mjên nẽ mẽ pa xwýnhjaja na htem arĩ ri mẽ hikukrêx tãnopxar o pa. Nẽ mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nẽ Jejus kãm prãm xà hkôt pix mã amnhĩ nhĩpêx o pa?

35 E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mẽhõ ho aprõ nẽ mẽ akurê hkêt nẽ. ãm mẽ ate Tirtũm kapêr kôt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamxpêr o ri apa pix kaxyw. Nẽ kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

Mẽ kot mẽ hprõ mã xwýnhjê jarênh

36 E kot paj hpãnhã mẽ ate mẽhõ ho aprõ mã xwýnhjê mã ixkapêr ka mẽ ixkapêr ma. Nà kot kaj mẽ atõ ate ho aprõ mã xwýnhhta kukamã ajamxpêr o:

—Nà kot paj ho ixprõ hkêt nẽ. Inhmã hkĩnh tỳx tã kot paj ho ixprõ hkêt nẽ. Kot paj ãm ixprõ hkêt nẽ ahte ri ixpa. Anê.

Hãmri nẽ ahte ri apa. Tã ra tee amnhĩ kurê kamã ama nẽ ajamxpêr o:

—Hêxta waa nẽ. Mon pa pre ho ixprõ hkêt nẽ ahte ri ixpa? Anê.

Hãmri nẽ mãmrĩ ma hwýr tẽ nẽ kãm amnhĩ jarê nẽ ho aprõ. Ra ate aprõ hkêt nẽ ahte ri apa hã amnhĩ jarênh tã no ãm mãmrĩ ho aprõ. Ja tanhmã kute hkêt kênã.

37 Nom kot kaj ho aprõ hkêt ã amnhĩ jarê nẽ mãänën akurê hkêt nẽ ri apa. Hãmri nẽ

mãmrĩ ho aprõ hkêt nẽ ri ahte ri apa. Ja mããnẽn tanhmã kute hkêt.

³⁸ Kot ka ho aprõ nẽ war amex nẽ apa. Rỳ kot ka ho aprõ kêt nẽ mããnẽn amex kumrẽx nẽ ri apa. Ja na mex o ate mẽhõ ho aprõ nẽ ho apata jakrenh.

Mẽ kęp mẽ mjên tyk xwỳnhjê jarẽnh

³⁹ E kot paj hpãnhã mẽ apê mẽ amjên tyk xwỳnhjê mã ixkapêr. Nà koja amjên arĩ htĩr ri ka ãm hkôt pix mã axkamẽ nẽ hkaga hkêt nẽ. No koja nhỹrmã apê ty hãmri ka tee ri amnhĩ kukamã ajamaxpêr hãmri nẽ amã axte amjên prãm nẽ mãmrĩ axte amjên. Nom kwa kër ka mẽ amnhĩ pyrã nẽ Kris kôt akwỳjê hõ pix o amjên. No mamrĩ nhãm mẽhõ ho amjên kêt nẽ.

⁴⁰ No kot ka mẽ axte amjên kêt nẽ ahte ri apa hãmri nẽ axãmnhĩx ri ajamakêtkati nẽ apa. No na pa ãm amnhĩ krã hkôt mẽ amã ã ja jarẽnh anẽ. Mãn Tirtũm Karõ mã mããnẽn ja mex nẽ.

8

Sãnti hã mẽ apkur xà jarẽnh

Rõmãn 14.13-23; Wam Korit 10.14-22, 13.2; Karatas 5.13; Wam Pêtre 4.8; Wam Juãw 3.18

¹ Nẽ mẽ ate ixwỳr kagã mẽnhta kamã na ka prem mããnẽn sãnti hã mẽ apkur xà hã ixkukja. Tã kot paj mẽ amã tanhmã ja jarẽnh to ka mẽ inhma.

Nà na hte Kris kôt pahkwỳ hkêt xwỳnhjaja mẽmo karõ ho sãnti nhĩpêx mã mẽõ hkwỳ nhĩpêx nẽ hwỳr o mra. Hãmri nẽ hpar pê haxwỳ nẽ kutã hkõn krã ho rõrõk nẽ hkrĩ nẽ kãm mex o mex ã harẽ nẽ kãm amnhĩ jagrer pê amnhĩ to kuwỳ. Hãmri nẽ kãm amnhĩ jagrer pa nẽ akupỹm amnhĩm mẽõta jamỳ nẽ ma o mra nẽ hkwỳjê mã ho wẽnê. Na htem ã amnhĩ nhĩpêx anhỹr o pa. Tã na ka prem kagãta kamã mẽ ate mẽ kęp mẽõ japrõr nẽ hkur ã ixkukja. Nà ra mẽ ate sãnti pumunh mex. ãm mẽ kot ìhkra pix o hipêx ã omunh mex jakamã na pu htem hã pamã mẽ apkur xàta hkur prãm nẽ mãmrĩ paxãmnhĩx ri kuku. Ja tanhmã Tirtũm pê kute hkêt. Ra mẽ pahte ja pumunh mex. Tã nom kwa kër pu mẽ ja hã Kris kôt mẽ pahkwỳjê mã amnhĩ to jarkrar o ri papa hkêt nẽ. Nẽ ja hã mẽ kurom paxàhpumunh

tỳx ã mẽ kãm amnhĩ to jarkrar hkêt nẽ. Kot pu mẽ ã amnhĩ nhĩpêx anhỹr o mẽ hamaxpêr o hihtỳx hkêt nẽ. Kër pu mẽ ãm mẽ kamã paxukapri pê tanhmã mẽ ho mex to ho papa. Nẽ Kris kôt mẽ hamaxpêr o hihtỳx o papa. ã mẽ pa hte amnhĩ nhĩpêxja na Tirtũm kãm hprãm.

² No koja mẽhõ mẽmoj pumunh tỳx ã amnhĩ to jarkrar o ri pa nẽ ãm tee ri ã amnhĩ jarẽnh anhỹr kaprỳ.

³ No koja mẽhõ àhpumunh tỳx kêt tã kãm Tirtũm kĩnh nhũm amnhĩ tã omu nẽ kãm hapê nẽ ho hkra. Kêt ja na mex o mex.

⁴ E kot paj ixpri hã mẽ amã tanhmã sãnti hã mẽ apkur xàta jarẽnh to ka mẽ inhma. Nà Mẽpahpãmja pixii. Axtem hõ hkêt. Nom mẽ kot sãnti nhĩpêxta ãm mẽ kot ìhkra o hipêx jakamã htĩr kêt. Ra mẽ pahte ja jarẽnh mar tỳx nẽ omunh mex.

⁵ Na htem ohtõ nẽ ri sãnti kęp Mẽpahpãm ã hkamnhĩx o pa. Kaxkwa kamã mẽmo karõ nhĩpêxja nẽ pika kamã mẽmo karõ nhĩpêxja nhũm htem kęp Mẽpahpãm ã harẽnh ho pa. Nom ja kot anhỹr kêt.

⁶ Mẽpahpãmja ãm pixi ho pixi mex. Mẽ panhõ Tirtũmja. Tãm na pre mẽmoj piitã ho kator pa. Jakamã na pu htem kapêr kôt pix mã amnhĩ nhĩpêx o ri papa.

Nẽ mẽ panhõ Pahihti haxwỳja pixii. Pahihti Jejus Krisja. Na pre Tirtũm nhĩhkõ hã mẽmoj piitã ho kator pa. Na pu htem ja hã omunh xà hkôt ri pamex nẽ ri papa. Ra mẽ pahte ja jarẽnh mar tỳx nẽ omunh mex. Jakamã na pu htem paxãmnhĩx ri mẽmoj piitã hkur o papa. Tirtũm kot mẽmoj piitã ho kator par kẽnã.

⁷ Tã no ãm ham mẽ kot Kris kôt amnhĩ xunhwỳr xwỳnhjaja na htem mẽ pahkĩnhã kãm sãnti hã mẽ apkur xà hkur puma nẽ. Ham mẽ kot sãnti kaga nẽ amnhĩ kaxyw Kris kôt amnhĩ xunhwỳr jakamã kormã Tirtũm kôt amnhĩ nhĩpêx tohtuj anẽ. Jakamã na htem tee ri sãnti hã mẽ apkur xàja pumu nẽ hamaxpêr o:

—Nà kot paj ja kur kêt nẽ. Kot paj anẽ nhũm apu Tirtũmja pê ja omnuj nẽ. Anẽ.

⁸ Nom na kêt hte Tirtũm mẽ paxàpkur xà hã mẽ pahpumunh kôt mẽ pahte amnhĩ to mex xwỳnh ã mẽ pajarẽnh kêt nẽ. Kot puj mẽ mẽmoj ku rỳ mẽmoj kur kêt nẽ nhũm ja

hã mẽ pahpumunh kôt tanhmã mẽ pamex ã pajarênh to hkêt nê. Jakamã na pu htem mãmri paxàmnhix ri mẽmoj tâ mẽ apkur xà hkur o papa nê tanhmã amnhĩ to hkêt nê.

9-10 Nom kwa mẽ okora. Kêr ka mẽ sãnti mã amnhĩ jarênh xà hã ixkre hwÿr agjêx nê kamã axàpkur hkêt nê. Kot kaj mẽ atõ ã amnhĩ nhĩpêx anê nhũm mēhõ kormã kot Kris kôt amnhĩ xãm tohtuj anhÿr xwÿnhja ja hã mẽ apumu nê tee ri hamaxpêr. Axàhpumunh tÿx ã ate amnhĩ jarênh tâ sãnti nhõrkwÿ kamã axàpkur o nhÿ nhũm ja hã apumu nê tanhmã amnhĩ nhĩpêx to wehe? Koja ja kêp omnuj tâ apyrà nê tē nê axà nê mẽ kutã apku. Hãmri nê apkur pa nê tee ri amnhĩ kukamã hamaxpêr o:

—Hêxta waa nê. Kwa mon pa axtem nê ri ã mẽmojja kur anê? Nà na pa anê nê ra amnhĩ tomnuj tÿx nê. Anê.

Hãmri nê hkaprĩ nê pa.

11 Ate axàhpumunh tÿx ã amnhĩ jarênh tâ amnhĩ kôt atõja mex kukamã ajamaxpêr kêt nê. Kris ra mÿrapê htyk tâ nhũm ã ate sãnti hã mẽõ hkur ã apumu nê tee ri hamaxpêr o Jejus hkôt amnhĩ nhĩpêx mex kêt nê.

12 Kormã kot Kris kôt amnhĩ xãm tÿx kêt tâ tee ri ja hã mẽ apumu nê hamaxpêr mex kêt nê. Jakamã ka Kris noo mã amnhĩ tomnuj nê.

13 Tã ã ixte Kris kôt ixkwÿjê nhĩpêx anhÿr pymaj koja ixtõjê hõ kãm mẽmoj kur puma nê. Nê htÿx ho Tirtũm kêp omnuj ã hkamnhix. Pa ja hã omu nê ijaxwÿja axte hkur kêt nê. Ixte mex ã omunh tâ no ãm kot tee ri ja hã ixpumunh nê hamaxpêr o:

—Kwa Tirtũm kêp ja mex kêt tâ nhũm Pawreja ri kuku. Jakamã kot paj ijaxwÿja uràk nê kuku. Omnuj tãã.

Anhÿr o hamaxpêr pymaj kot paj uràk nê mẽmota kur kêt nê. Na pa hte ã Kris kôt ixtõjê mex kukamã ri ijamaxpêr anhÿr o ixpa.

9

Pawre kot amarĩ Tirtũm kapêr o mẽ ahkre hã amnhĩ jarênh

Atre 9.1-18, 20.33-35; Sikũn Korit 11.7-9

1 Nê ixte Jejus nhÿ hã mẽ ahkre ho mẽ pa xwÿnhjê hõ jakamã na pa hte Tirtũm kapêr o mẽ ajahkre ho ri ixpa. Na pa pre inhno ho

mẽ panhõ Pahihti Jejus pumu nê mẽ amã harênh o ri mẽ akôt ixpa ka prem inhma nê hkôt amnhĩ xunhwÿ.

2 Mẽ hkwÿjaja kot axpên mã ixpê Jejus nhÿ hã mẽ ahkre xwÿnh kêt ã ijarênh tâ mẽ kajaja mẽ ate ja hã ixpumunh mex. Ixte mẽ amã mẽ ujarênh mexja jarênh nhũm mẽ ate mar nê hkôt amnhĩ xunhwÿrja kukwak ri na ka mẽ apê Jejus kwÿy.

3 Jakamã koja mẽ atã ixto kapêr japêr kot paj ã mẽ kãm mẽ ajarênh anê.

4 Nê ixte Jejus nhÿ hã kapêr jahkre o ixpa xwÿnh jakamã kot paj inhã Kris kwÿjê kutã amarĩ ixàpkur prãm nê mãmri mẽ kutã apku. Ja tanhmã kute hkêt tâ kot paj ã amnhĩ nhĩpêx anhÿr kêt nê. Kot paj ixàpkur kaxyw nê amnhĩ pãnhã amnhĩre nê rĩ kormã apku. Na pa hte ã amnhĩ nhĩpêx anhÿr o ri mẽ akôt ixpa.

5 Rÿ kot pa ixkwÿjê pyrã nê inhã Kris kôt ixkwÿjê hõ ho ixprõ hprãm nê mãmri ho ixprõ. Nê wa ma krĩ piitã hkôt Kris kwÿjê kukwak ri ixàpkur o ixpa hprãm nê wa mãmri ã amnhĩ nhĩpêx anhÿr o ixpa. Ja mex kênã. Na hte ã Simãw Pêtre mẽ Jejus tõ kot hapujaja amnhĩ nhĩpêx anhÿr o pa nhũm ja tanhmã kêp kute hkêt. No ãm mẽ hkĩnhã ixprõ hkêt na pa hte ri ixpa.

6 Nê ixkwÿjaja na htem apkur xà hpãnhã àpênh o pa hkêt nê. Na htem Jejus nhÿ hã kapêr jarênh o ri pa nhũm hte Jejus kwÿjaja mẽ kãm mẽ apkur xà gõ nhũm mẽ amarĩ hkur o pa. Tã no pa na pa hte Panãpe mẽ wa ã amnhĩ nhĩpêx anhÿr kêt nê. Na pa hte wa mry kà ho ixkre nhĩpêx nê mẽ kãm ho wênê nê hpãnhã amnhĩm awjaprõ. Na pa hte wa ã amnhĩ pa kukwak ri ixujaprõr nê ho ixàpkur o ri ixpa anê.

7 Mẽ kãm pur kãm harõj jamÿnh o mẽ pa xwÿnhjaja na htem amarĩ hkwÿ jamÿ nê ho apkur o pa. Nê motre jamãr o mẽ pa xwÿnhjaja haxwÿja amarĩ hkã kagõ janê nê ho hkõm o pa. Nê pôristijaja na hte mẽ õ pahija mẽ àpênh pãnhã mẽ kãm amnhĩrer o pa. Jajê piitã na htem mẽ àpênh pãnhã mẽ kãm amnhĩrer o pa. Ja pyrã nê te ixpê mẽ amã ixàpênh o ixpa xwÿnh pyrãk jakamã ixte mẽ ajahkreta pãnhã kot ka mẽ inhã inhõ ho apa nhũm ja mãânên mex nê.

8 No ãm papxipix na pa hte ja mex ã

harënh kêt nê. Tirtüm kapër ã kagà htüm haxwýja kot ja mex ã harënh.

⁹ Kamã na pre finat Mojesja Tirtüm nhÿ hã harënh kot:

Koja akrit amã àpênh o pa ka omu nê ho mex nê. Kãm õ mex nê.

Anhÿr o kot harënh. Xà na pre Tirtümja ãm mẽ pahkrit pix kukamã ukaprĩ nê ã harënh anê nà? Nà kot anhÿr kêt.

¹⁰ Määnên mẽ pahpê panhĩ kaxyw na pre ã ja jarënh anê. Mẽ pahte mẽ hpur kãm paxàhkre xwýnhjaja nê mẽ pahte kamã paxujamýnh o papa xwýnhjaja. Jajê kaxyw mẽ pahte pur kukwak ri amarĩ paxàpkur o ri papa kaxyw ã pre ã ja jarënh anê.

¹¹ Tã ja pyrà nê na pa hte mẽ awÿr mō nê mẽ amã Tirtüm kapër jarënh o ri mẽ akôt ixpa. Nê mẽ akôt ho mẽ ajahkre ho ri ixpa ka htem inhmã ixàpênhta pãnhã amnhĩrer kêt nê. Ixkwýjaja kot Tirtüm kapër o mẽ ajahkre hpãnhã mẽ ate mẽ kãm amnhĩrer tã pa inhmã amnhĩrer kêt nê. Na pa pre mẽ ajahkreta pãnhã mẽmoj tã mẽ awÿr kêt nê. Æm nhãm ixàpênh õta kukwak ri na pa hte ixàpkur o ri ixpa.

¹² Nê na hte mẽ ixkwýjaja mẽ awÿr mra nê Tirtüm kapër o mẽ ajahkre o ri mẽ akôt pa. Hãmri nê hpãnhã mẽ apkur xà hã mẽ awÿ ka mẽ kãm mẽmoj gō. No kêt pa na pa hte mẽ uràk nê ixàpkur xà hã mẽ awÿr kêt nê. Kot pa apu hã mẽ awÿ ka mẽ tanhmã ixto akapër to nê axpên mã ijarënh o:

–Pêr ãm mẽ pahte kãm amnhĩrer pix kaxyw na hte Pawre mẽ pahwÿr mra nê mẽ pamã Jejus Kris kot tanhmã mẽ panê amnhĩ nhĩpêx to hã harënh o pa. Pêr ãm apkur xà pix prãm xàj ã kot mẽ pamã ujarënh anhÿr o pa. Jakamã kot puj mẽ kuma nê ãm kuma.

Anhÿr o axpên mã ijarënh pymaj na pa hte mẽ ajahkre hpãnhã mẽmoj tã mẽ awÿr kêt nê. Na pa hte ãm mry kà ho ixkre nhĩpêx nê ho wênê nê ja pix kukwak ri ixàpkur o ri ixpa. Nê amarĩ ri mẽ ajahkre ho ri mẽ akôt ixpa.

¹³ Nê Tirtüm mã amnhĩ jarënh xà hã ixkre kamã mẽ àpênh xwýnhjaja na htem hwÿr mẽ mrar xwýnhjaja mẽ àpênh pãnhã mẽ kãm amnhĩre. Nê mẽ kot mẽ kãm Tirtüm mã mẽmoj nhõr o kuhê xwýnhjaja na htem määnên mẽ àpênh pãnhã mẽ kãm amnhĩre.

¹⁴ Nê Pahihti Krisja na pre ja hã mẽ pakukamã pahatã karõ kot:

–Kêr ka mẽ kot tanhmã mẽ amã ijarënh to ho ri mẽ pa xwýnhjê mã amnhĩrer o ri apa. Anê.

¹⁵ Tã no na pa hte aa mẽmoj tã ixàhwÿr kêt nê. Nê mẽ ate inhmã amnhĩrer kaxyw pa mẽ amã ja jarënh kêt nê. Aa ixte mẽmoj tã mẽ awÿr kêt. Kot paj apu anê nê ixpijaam nê. Rÿ kot pa apu anê nê mẽ akukwak ri ixàpkur o ri ixpa hãmri nhùm mẽ akwýjaja ja hã ixpumu nê hã ijarënh o:

–Tk. Na hte amarĩ mẽ pajahkre o ri pa hkêt nê. Æm mẽ apkur xà pix prãm xàj na hte ã mẽ pajahkre ho pa anê. Anê.

Jakamã na pa hte mẽmoj tã mẽ awÿr kêt nê.

¹⁶ Ixte mẽ amã mẽ ujarënh mexja jarënh o ri ixpa htã na pa hte ja hã amnhĩ to jarkrar o ri ixpa hkêt nê. Pahihti Jejus na pre ja hã inhmã karõ pa hte kãm ho anhÿr o ri ixpa. Kot paj kãm ho anhÿr kêt nê ixpunuj nê ri ixpa.

¹⁷ Kêp ãm amnhĩ krã hkôt mãn tanhmã mẽ amã ixujarënh to ho mẽ akôt ri ixpa ronhÿx pa hpãnhã ixàmnhĩx kàxpore hã mẽ awÿ. No ãm ã ixte amnhĩ nhĩpêx anhÿr kêt. Tirtüm tãm kot inhmã ja hã karõ jakamã na pa hte amarĩ ixàmnhĩx ri mẽ amã kapër jarënh o mẽ ajahkre ho ri mẽ akôt ixpa nê mẽmoj tã ixàhwÿr o ri ixpa hkêt nê.

¹⁸ Ixte amarĩ ri mẽ amã mẽ ujarënh mexta jarënh o ri ixpaja na inhmã hprãm. Ja na inhmã mex. Na pa hte ã amnhĩ nhĩpêx anhÿr o ri ixpa nhùm ja inhmã mex pa ixkĩnh nê ri ixpa. Jakamã na pa hte hpãnhã ixàhwÿr kêt nê. Nê inhmã mẽmoj prãm o ri ixpa hkêt nê.

¹⁹ Nê nhãm mẽ kãm tanhmã ixàpênh to ho ixpa hkêt tã pa hte mẽ piitã tanhmã mẽ kãm amnhĩ nhĩpêx to ho ri ixpa. Pê mẽ kãm Jejus kapër jarënh o ri ixpa. Jakamã na mẽ ra ohtô nê ixujarënh ma nê amnhĩ kaxyw Jejus kôt hamaxpêr nê hkôt amnhĩ xunhwÿ.

Pawre kot tãm mẽ piitã mẽ hipêx o pa hã amnhĩ jarënh

Wam Korit 10.33

²⁰ Nê na pa hte Ijaewjê hwÿr ixpa nê mẽ kot amnhĩ nhĩpêx kôt amnhĩ nhĩpêx o ri

mě hkôt ixpa. Ixte mě kurom Tirtüm kot finat Mojes mã mẽmoj tã karõ hkôt amnhĩ nhĩpêx o ixpa hkêt tã mẽ hkôt ri ixpa nẽ mẽ uràk nẽ hkôt amnhĩ nhĩpêx o ri ixpa. Mẽ kot ja hã ixpumunh nẽ ixte mẽ kãm Jejus jarēnh mar nẽ ixpyrà nẽ amnhĩ kaxyw hkôt hamaxpēr kaxyw.

²¹ Tã pa hpãnhã mẽ kêp Ijaew kêt xwýnhjê hwýr ixpa nẽ mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Mẽ kot ja hã ixpumunh nẽ ixkapēr mar nẽ ixpyrà nẽ amnhĩ kaxyw Jejus kôt hamaxpēr kaxyw. Tirtüm mẽ Kris wa hamaxpēr xà hkôt na pa hte ahpýnhã mẽ kot amnhĩ nhĩpêx xwýnhjê hwýr mra nẽ ã amnhĩ nhĩpêx anhýr o ri mẽ hkôt ixpa.

²² Nẽ na pa hte kormã mẽ kot Kris kôt amnhĩ xunhwýr tohtuj anhýr xwýnhjê hkôt ri ixpa nẽ te ixte ho mẽ uràk nẽ kormã hkôt amnhĩ xãm nyw pyràk o amnhĩ nhĩpêx o ri mẽ hkôt ixpa. Mẽ kot ja hã ixpumunh nẽ ixkapēr mar nẽ hkôt amnhĩ nhĩpêx mex kaxyw. ã na pa hte mẽ piitã mẽ hkôt ri ixpa nẽ mẽ hkôt amnhĩ nhĩpêx o ri ixpa anẽ. Mẽ kot ja hã ixpumunh nẽ inhmar nẽ ixpyrà nẽ Kris kôt amnhĩ nhĩpêx tỳx kaxyw.

²³ Mẽ kot mẽ ujarēnh mex mar kaxyw na pa hte mẽ piitã mẽ hkôt ã amnhĩ nhĩpêx anhýr o ri ixpa. Tirtüm kot mẽ ho hkra nẽ mẽ ho mex kaxyw. Nẽ mãânēn pa kot mẽ hã ixto mex kaxyw.

Pawre kot htỳx ri amnhĩ nhĩpêx kêt ã kot amnhĩ jarēnh

Sikũn Ximotre 4.7; Eprêw 12.1-3

²⁴ Mẽ hprõt xwýnhjaja na htem hprõt tỳx no nhũm mēhõ pixi nẽ wam hkwýjê re nẽ wam tēn pōj nhũm htem ja hã omu nẽ kãm mẽ hkĩnhxà gõ. Ja pyrà nẽ kêr ka mẽ apiitã tãm amnhĩ nhĩpêx mex rãhã ho ri apa kê Tirtüm mẽ apumu nẽ nhýrmã ja pãnhã mẽ amã mẽmoj mex gõ.

²⁵ Nẽ mẽ hprõt xwýnhjaja na htem mẽ hkĩnhxà hpyr prãm xàj mẽ hprõt xà hã arĩgro hwýr apkati mẽ hprõt o kuhê. Prõt tỳx prãm xàj. Tã mẽ hprõt xà hã arĩgrota ã nhũm hkwýjê pē amnhĩ to wa nẽ amnhĩm hkĩnhxà py. Nom koja hkĩnhxàja kritpēm kãm mex ry hkêt nẽ. Koja gaa nẽ hapêx tokyx anẽ. Tã nom kot puj mẽ Tirtüm kapēr kôt amnhĩ nhĩpêx mex o ri papa.

Nẽ mẽ hprõt xwýnhjê kot hkĩnhxà hpyr prãm xàj apkati mẽ hprõt o kuhêta pyrà nẽ apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nẽ nhýrmã mẽ pamã hkĩnhxà mex õ gõ. No ãm jar hkĩnhxà kurom koja aa mẽ pahpê hapêx kêt nẽ. Koja mẽ pamã mex rãhã ho rãhã.

²⁶ Nẽ na hte mẽ hprõt xwýnhjaja htỳx ri tanhmã hprõt to ho pa hkêt nẽ. Na htem hkwýjê pē amnhĩ to wa kaxyw hprõt nẽ nhýri mẽ àhuk xàta pix pumunh pē hwýr hprõt nẽ mra hãmri nẽ kamã ahtwý. Nẽ kamã àhuk pix kukamã hamaxpēr o hprõt tỳx nẽ mra. Ja pyrà nẽ na pa hte apkati mẽ Tirtüm kôt pix mã amnhĩ nhĩpêx o ri ixpa. Nhýrmã kot inhmã mẽmoj mex nhõr kaxyw.

Nẽ mẽ pijapu mex xwýnhjaja na htem htỳx ri nhýhýnh axpēn tak kêt nẽ. Na htem nhýhýnh kot mẽ htak o mẽ rēnh xà pix kamã mẽ htak o mẽ rēnh kukamã hamaxpēr pē kamã mẽ htak. Ja pyrà nẽ na pa hte ixtỳx ri tanhmã amnhĩ nhĩpêx to ho ri ixpa hkêt nẽ. Na pa hte Tirtüm mã ijamaxpēr pē tanhmã amnhĩ nhĩpêx to rãhã ho ixpa. Kot nhýrmã inhmã mẽmoj mex nhõr kaxyw.

²⁷ No na pa hte ixtỳx ri amnhĩ jamaxpēr xà hkôt tanhmã amnhĩ nhĩpêx to ho ri ixpa hkêt nẽ. Kot pa ã amnhĩ nhĩpêx anẽ nẽ ixte mẽ kãm Jejus kapēr jarēnh o ri ixpa htã ãm ri ixtỳx ri ã amnhĩ nhĩpêx anhýr kaprý nhũm Tirtümja tee ri ja hã ixpumu nẽ inhmã mẽmoj mex nhõr kêt nẽ.

10

Ijaew kot amnhĩ nhĩpêx

Rõmãn 15.4; Eprêw 3.8-11; Jutre 5

¹ E Kris kôt ixkwýjaja. Kot paj mẽ amã amnepê mã mẽ ixpê Ijaew hkukamã mẽ inhĩgêtjaja tanhmã mẽ harēnh to ka mẽ inhma. Mẽ kot pahi finat Mojes kôt ri mẽ pa xwýnhjaja kot paj mẽ amã harē. Mẽ pahte mẽ uràk nẽ pahtỳx ri amnhĩ nhĩpêx pymaj kot paj mẽ amã tanhmã mẽ harēnh to ka mẽ inhma. Mãn ka mẽ arĩ mẽ harēnh ã anohtỳx japēr. Na prem piitã pika pē Ejit kamã pa htã kurũm kator pa. Hãmri nẽ ma kapôt ã kakrã pumunh o hkôt pa

ho pa. Pry hkêt jakamã nhùm pre Tirtùm tanhmã kakrã hto nhùm ma mẽ hkukamã pa nhùm mẽ omu nê hkôt pa. Hãmri nê ra gô xujanâr mẽ kot kãm: “Gô kamrêk” anhÿr xwÿnhja wÿr pøj nê tee ri rêr prãm xaj amnhĩ kukamã hamaxpêr. Hãmri nhùm Tirtùm mẽ kãm hkôt ã ho amgrà nhùm mẽ hkôt mex pê rêr pa nê axte kakrã hkôt pa ho pa.

² Finat Mojes kot mẽ o pa jakamã nhùm prem kêp hkwÿ hã amnhĩ jarê nê kãm amnhĩ jarênh o:

—Nà kot paj mẽ akapêr ma nê akôt ri amnhĩ nhĩpêx o ixpa. Anê.

Te mẽ pahpê Kris kwÿ hã amnhĩ jarênh kaxyw mẽ kot gôx kãm mẽ pahkrã kumrâr nhùm mẽ pahte Kris mã amnhĩ jarênh ta pyræk.

³ Na prem kapôt ã ri pa nhùm Tirtùm tãm kaxkwa rùm mẽ hwÿr mẽ apkur xà rê nhùm mẽ hkawrà nê ho apkur o pa.

⁴ Tã ra kôr xaj hirot nhùm Tirtùm tanhmã mẽ kãm kên prêkja to nhùm kurùm mẽ kãm gô axkapĩ nhùm mẽ ho ixkô nê akupÿm hihtÿx. Æ Krisja mẽ hkôt mẽ ho mẽ hihtÿx o pa anê. Mẽ kot no ho omunh kêt tã nhùm mẽ hkôt mẽ ho mẽ hihtÿx o pa.

⁵ Tã no nhùm mẽ ohtô nê Tirtùm kôt amnhĩ nhĩpêx kêt nê. Kot mẽ ho mex kumrêx tã nhùm mẽ ãm amnhĩ tã omu nê ãm omu nê kapêr kôt amnhĩ nhĩpêx kêt nê. Æm kapêr kwÿm ri tanhmã amnhĩ tomnuj to ho pa nhùm tee ri amnhĩ tã mẽ omu nê tanhmã mẽ ho nhùm mẽ hkwÿja hpikaprâr pa. Hãmri nhùm arĩ mẽ htĩr xwÿnhjaja kapôt ã mẽ hagjênh pa nê axte ma pa.

⁶ Jakamã kwa kêr pu mẽ kot ã amnhĩ nhĩpêx anhÿr ã mẽ harênh ma nê hã pano htÿx nê ho papa hãmri nê ho mẽ uræk kêt nê. Mẽ uræk nê pahtÿx ri tanhmã amnhĩ nhĩpêx to ho ri papa hkêt nê.

⁷ Nê na pre mẽ hkwÿjaja sãnti kutã hkôn krã ho rôrôk nê hkrĩ nê kãm amnhĩ jagrer pê amnhĩ to kuwÿ. Tirtùm kapêr ã kagà htùm kot mẽ kot amnhĩ nhĩpêx anhÿr ã mẽ harênh kot:

Na prem sãnti kutã apkur o hkrĩ nê kãm amnhĩ jagrer o hkrĩ nê gaa nê pipãnh pix o pa. Jao axpên kamã hpijaàm kêt o pa.

Anhÿr jakamã kwa kêr pu mẽ ã mẽ kot amnhĩ nhĩpêx anhÿrja ã pano htÿx nê ho mẽ uræk hkêt nê.

⁸ Nê na pre mẽ hkwÿjaja htÿx ri mjên nê hprô kuhpa hã nhãm ri mẽ kamã hpijaàm kêt o pa. Mÿrapê nhùm arĩgro pixi hã mẽ ohtô rax kumrêx nê axkaprã. Mẽ kêp 23.000 nê pikaprâr pa. Tã ã Tirtùm kot mẽ panhĩpêx anhÿr pymaj kêr pu mẽ ja hã pano htÿx nê ho mẽ uræk kêt nê. Æm kwarĩ ho kwarĩ.

⁹ Nê na pre mẽ hkwÿjaja axtem nê htÿx ri tanhmã axpên mã Tirtùm jarênh to nê harênh o:

—Nà Tirtùmja gryk tokyx anhÿr kêt jakamã kwa pu mẽ ã amnhĩ tomnuj anhÿr o papa. Koja mẽ pahpumu nê tanhmã mẽ pahto hkêt nê.

Anhÿr tã nhùm tee ri ja hã mẽ kuma nê mẽ omu nhùm ja kãm mex kêt nê nhùm mẽ hwÿr kagã xoprê nhõ wenên xihtÿx kwÿ rê nhùm mẽ hwÿr mra nê mẽ hkamnhar o mẽ hkwÿjê pa. Tã ã kot mẽ panhĩpêx anhÿr pymaj kwa kêr pu mẽ ja hã pano htÿx nê mẽ uræk nê amnhĩ tã Tirtùm kamã pajamak o papa hkêt nê. Kwarĩ ho kwarĩ.

¹⁰ Nê na pre mẽ hkwÿjaja axtem nê Tirtùm o kapêr punuj nê nhùm tee ri amnhĩ tã mẽ kuma nê mẽ hwÿr kapêr o wrÿk xwÿnh mẽ nhùm ma mẽ hwÿr wrÿ nê ÿ hã mẽ hkwÿjê nhĩmex. Tã ã kot mẽ panhĩpêx anhÿr pymaj kwa kêr pu mẽ ja hã pano htÿx nê ho mẽ uræk nê Tirtùm o pakapêr punuj kêt nê.

¹¹ Na pre mẽ ixpê Ijaew nhĩgêjtaja ã htÿx ri amnhĩ nhĩpêx o pa anê. Tirtùm kapêr ã kagà htùm kot ã mẽ kot amnhĩ nhĩpêx anhÿr piitã harênh par. Mẽ panhõ ejêp kaxyw. Mẽ pahte kamã harênh nê mẽ harênh mar tÿx nê mẽ uræk nê ã amnhĩ nhĩpêx anhÿr kêt kaxyw. Ra Jejus akupÿn mẽ pahwÿr wrÿk xà hã arĩgro hkukamã grêre jakamã kwa kêr pu mẽ kutêp mẽ kurom kapêr kôt pix mã ri amnhĩ nhĩpêx mex rãhã ho ri papa.

Mẽ pahte mẽmoj punuj nê amnhĩ to htÿx ã mẽ pamã karõ

Matêwre 4.1, 6.9-13; Wam Korît 1.8; Sikũn Pêtre 2.9; Jutre 24

12 Tã kêr ka mẽ ã Ijaew kot amnhĩ nhĩpêx anhỹr ã mẽ harênhja ma nê ã ajamaxpêr anhỹr kêt nê. Rỳ mẽ ajamaxpêr o:

—Nà mẽmoj piitã kutã ixihýt̄x kênã kot pa hkêr mẽ uràk nê ã amnhĩ nhĩpêx anhỹr o ri ixpa.

Anhỹr o mẽ ajamaxpêr kêt nê. Kot kaj mẽ ã amnhĩ jarênh anê nê ra mẽ uràk nê tanhmã amnhĩ tomnuj to.

13 Nê na prem kapôt ã pare ri omnuj nê ri pa. Nhũm mẽkarõmnuti tanhmã mẽ hkrã hto nhũm mẽ tanhmã amnhĩ tomnuj to ho pa. Ja pyrã nê na hte arĩ mẽ pahte amnhĩ tomnuj hprãm xàj tanhmã mẽ pahkrã hto ho pa. Mẽ pahpiitã ã mẽ pahto anhỹr o ri mẽ pahkôt pa. Nom nhũm Tĩrtũm ra kot mẽ pamã amnhĩ jarênh xà hkôt mẽ panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamaxpêr nhũm ja hã mẽ pahpumu nê mẽ panê mẽkarõmnuti mã kapêr. Nê kutã mẽ pahto paxihýt̄x nê pu mẽ ỹ hã amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

Mẽ kot sãnti mã mẽmoj nhõr xwýnhjê jarênh

Wam Korīt 8.1-13; Karatas 4.8; Apokarip 9.20

14 Jakamã e Kris kôt ixkwýjaja. Kêr ka mẽ amnhĩ kaxyw sãnti hkôt ajamaxpêr o ri apa hkêr nê. Nê amnhĩ to hwýr kêt nê. ãm kwarĩ ho kwarĩ.

15 E mẽ axãhpumunh tỳx ã amnhĩ jarênh jakamã kot paj mẽ amã mẽmoj jarê ka mẽ aprĩ hã inhmar tỳx japêr.

16 Nà na pu htem tõhã Jejus kot mẽ panê htyk mã pajamaxpêr kaxyw axpên wýr akuprõ. Hãmri nê mẽmo kagô hkwý ru nê Tĩrtũm mã mex ã harê nê mẽmoj o pahkõm pê Jejus kot mẽ panê hkamrõ pikapĩr mã pajamaxpêr. Nê hpãnhã pãwti hõ py nê axpên mã ho hkry nê mẽ kot Kris pĩr nê ĩ kamã hkamnhwýr nhũm mẽ panê htykja mã pajamaxpêr pê kuku.

17 Pãwtita ãm pixire htã pu htem axpên mã ho hkry nê pahpiitã kuku. Mẽ pahpê Kris kwý hã mẽ pahte amnhĩ jarênh nhũm mẽ pahkwý kot ja hã mẽ pahpumunh kaxyw. Te mẽ pahtipxi nê ri mẽ papa pyrãk nê pãwti pixire htã pu mẽ pahpiitã kuku.

18 E kot paj hpãnhã mẽ amã amnepê mã Ijaew kot tanhmã amnhĩ nhĩpêx to jarê ka mẽ inhma. Na pre htem Tĩrtũm mã mex ã harênh nê kãm amnhĩ nhõr ã kot amnhĩ tã mẽ omunh kaxyw nhũm prem tanhmã amnhĩ nhĩpêx to. Jao kãm mẽ apkur xà hkwý gõ nê kãm mex o mex ã harê. Hãmri nê amnhĩ mã mẽmojta kwý xà nê hkur o hkrĩ. Jao ra Tĩrtũm mã mex o mex ã harê nê kãm kêp hkra hã amnhĩ jarê.

19 Nom mẽ kot sãnti mã mẽmoj nhõr xwýnhjaja na htem kãm mẽmo mẽ apkur xà hkwý gõ nom ãm kãm õr kaprý. Tanhmã kot we amnhĩ to nê amnhĩ tã mẽ omu? Mo rĩt kaxyw no? ãm mẽ ĩhkra ho mẽ kot amnhĩm hipêx kênã. Jakamã na htem ãm kãm mẽ apkur xà hkwý nhõr kaprý.

20 Mẽ kot sãnti mã mẽmoj nhõr xwýnhjaja na htem Tĩrtũm mã õr kêt nê. Mẽkarõmnuti mã na htem kugõ. Jakamã kot kaj mẽ uràk nê sãnti mã mẽmoj gõ nê apê mẽkarõmnuti hkwý hã amnhĩ to amnhĩrĩt nê apê hkwý hã ri apa. Jakamã mẽ ate sãnti mã mẽmoj nhõrta na inhma hprãm kêt kumrêx.

21 Kot kaj mẽ panhõ Pahihti Jejus kot mẽ panê htyk ã mẽmoj kagô hkwý ho ixkõ hãmri nê ma mra nê hpãnhã sãnti pê mẽkarõmnuti hã mẽmoj to ixkõ. Hãmri nhũm Tĩrtũmja tee ri ja hã mẽ apumu nhũm ja kêp omnuj tỳx nê. Rỳ ka mẽ Pahihti Jejus kot mẽ panê htyk ã pãwti hkwý hku nê hpãnhã ma mra nê sãnti pê mẽkarõmnuti hã mẽmoj hku. Hãmri nhũm Tĩrtũm kêp ja omnuj tỳx nê. Mẽ pahte ã amnhĩ nhĩpêx anhỹrja na axpên kuhpa hã.

22 Jakamã kot ka mẽ ã amnhĩ nhĩpêx anê nê te ra mẽ amã mẽkarõmnuti hkĩnh nê mããnên amã Tĩrtũm kĩnh pyrãk o amnhĩ nhĩpêx. Nê te Tĩrtũm kurom mẽ kajaja mẽ axãhpumunh tỳx pyrãk o amnhĩ nhĩpêx. Nhũm tee ri amnhĩ tã mẽ apumu nê mẽ akamã gryk tỳx nê. Kwa mẽ okora. Koja Tĩrtũm akamã gryk ka amex kêt kumrêx.

Mẽ pamã Kris kôt mẽ pahkwýjê hkĩnh pê mẽ ho mex ã mẽ pamã karõ

Matêwre 20.28; Rõmãn 14.1-15.7; Piripos 2.1-4

23 Nê na htem tõhã amnhĩ jarênh o:

—Nà kot pa inhma mẽmoj to anhỹr prãm nê ixãmnhĩx ã amnhĩ nhĩpêx anhỹr o ri ixpa. Anê.

Tã no ãm mẽmoj piitã mẽ pamã mex kêt. Na htem kãm mẽmoj to anhÿr prãm xà hkôt mẽmoj piitã tanhmã ho ho ri pa nê tanhmã amnhĩ tomnuj to. Hãmri nhũm mẽ hkwÿjaja ja hã mẽ omu nê mẽ uràk nê tanhmã ri amnhĩ tomnuj to. Jao Kris kôt amnhĩ xunhwÿr tÿx kêt nê.

²⁴ Jakamã kwa kêr pu mẽ amnhĩ pix kukamã pajamxpêr pê tanhmã amnhĩ nhĩpêx to ho papa hkêt nê. Mãânên amnhĩ kwÿjê hkukamã pajamxpêr pê tanhmã mẽ ho mex to ho ri papa pê tãm ri amnhĩ nhĩpêx o papa.

²⁵ Nê kot kaj mẽ amnhĩ xàpkur xà japrôr kaxyw ma nhÿhÿm mra nê mãmrĩ axãmnhĩx ri amã mẽmoj prãm xà hkôt mẽmoj japrô. Nom kêr ka mẽ axujaprôrja kêp sãnti xàpkur xà hã mẽ hkukjêr kêt nê. ãm axãmnhĩx ri mẽ kêp mẽmoj japrôr o ri apa.

²⁶ Tirtũm kapêr ã kagà htũm kot ja jarênh kot:

Pika piitã hkôt mẽmoj piitã kêp Tirtũm nhõ na. Anê.

Jakamã mẽ mãmrĩ axãmnhĩx ri mẽmoj piitã haprô nê mẽmoj piitã hkur o apa.

²⁷ Tã koja mẽ kêp Kris kwÿ hkêt xwÿnhjê hõ ate kutã axàpkur kaxyw amnhĩ wÿr awÿ ka amã hwÿr amôr prãm nê mãmrĩ ma hwÿr mō. Nhũm mẽmoj to amã anhõ ka axãmnhĩx ri mãmrĩ aku. No ri tee ri amnhĩ kukamã ajamxpêr nê tanhmã hã hkukjêr to hkêt nê. Rÿ kãm:

—Kwa xà we mryja sãnti hã mẽ apkur xà na nà?

Anhÿr o hã mẽ hkukjêr kêt nê. ãm mãmrĩ axãmnhĩx hkur o akrĩ.

²⁸⁻²⁹ Nom koja Kris kôt mẽ kot amnhĩ xãm tohtuj anhÿr xwÿnhjê hõ mẽ awÿr axà nê tee ri ja hã apumu nê amã:

—Kwa sãnti hã mẽ apkur xà na ka ri mẽ kutã hkur o akrĩ.

Anhÿr o amã kapêr ka ama nê hkaga kurê kumrêx nê hkur kêt nê. Amã mex tã Kris kôt atõja kêp omnuij jakamã ka hkaga nê hkur kêt nê. No kot ka ãm ama nê arĩ hkur o anhÿr japêr. Kot amã harênh xwÿnhjta kêp omnuij tã ka arĩ noo mã hkur japêr. Nhũm ja hã apumu nê tee ri Tirtũm kapêr kukamã tanhmã hamxpêr

to. Hãmri nê apyrà nê kuku nê gaa nê tee ri amnhĩ kukamã hamxpêr nê amnhĩ mã:

—Hêxta waa nê. Sãnti nhõja mex kêt tã pa ri kuku. Kwa na pa pêr hkurja o amnhĩ tomnuj nê. Hêxta waa nê. Anê.

Hãmri nê tee ri amnhĩ kukamã hamxpêr o hkaprĩ nê. ã kot amnhĩ nhĩpêx anhÿr pymaj koja mēhõ ã mẽmo mẽ apkur xà nê amã kapêr anê ka ama nê hkaga kurê kumrêx. Jao amnhĩ pix kukamã ajamxpêr kêt nê. Mãânên Kris kôt atõ nê atõxjê mex kukamã ajamxpêr. Nom koja amã kêp sãnti hã mẽ apkur xà hã harê ka ama nê ã ajamxpêr anhÿr japêr nê ajamxpêr o:

—Nà kêp omnuij tã kot paj mamrĩ kuku. Ja inhmã mex kênã.

³⁰ Ra ixte Tirtũm mã harênh nê ixãmnhĩx hkur o inhÿr kênã kot kêt ã nê inhmã kapêr anê. Anê.

Kwa mẽ ã ajamxpêr anhÿr kêt. Kot kaj mẽ ã ajamxpêr anê hãmri nê Kris kôt atõ rÿ atõx mex kukamã ajamxpêr kêt nê.

³¹ Jakamã kêr ka mẽ tãm tanhmã amnhĩ nhĩpêx to ho ri apa. Nê axàpênh mex nê. Kêr kê mẽ piitã ja hã mẽ apumu nê mẽ apumunh kôt amnhĩm Tirtũm mex ã harê.

³² Nê kêr ka mẽ piitã mẽ noo mã tãm ri amnhĩ nhĩpêx o apa. Ijaew noo mã nê Ijaew kêt xwÿnhjê noo mã. Nê Jejus kwÿjê noo mã. Mẽ piitã mẽ noo mã tãm ri amnhĩ nhĩpêx rãhã ho ri apa. Mẽ kot tee ri mẽmoj tã mẽ apumunh nê hpijaam pymaj ka mẽ tãm ri mẽ piitã mẽ noo mã tanhmã amnhĩ nhĩpêx mex to ho ri apa.

³³ Na pa hte ã amnhĩ nhĩpêx anhÿr o ri ixpa. No na pa hte pa amnhĩ pix kukamã ijamxpêr kêt nê. Mẽ piitã mẽ mex kukamã na pa hte ijamxpêr o ri ixpa. Pê tanhmã amnhĩ nhĩpêx to ho ri ixpa. Mẽ kot ja hã ixpumunh nê ixpyrà nê Jejus kôt amnhĩ xunhwÿr nê ãm kôt pix mã ri amnhĩ nhĩpêx o pa kaxyw.

11

¹ Na pre hte Kris ã ã amnhĩ nhĩpêx anê nê mẽ piitã mẽ mex kukamã hamxpêr rãhã ho ri pa. Tã na pa hte uràk nê ã amnhĩ nhĩpêx anê. Jakamã kwa kêr ka mẽ ixpyrà nê ã amnhĩ nhĩpêx anhÿr o mãn ri apa.

Mēnijaja mē mjên ã hpijaàm ã mē kām karō

Epes 5.22; Wam Pêtre 3.1-6

² Nē na ka xep htem arī ra ixte tanhmā mē amā ixkapēr toja mā ajamaxpēr tỳx o ri apa. Na pa pre Kris kôt mē pahtō nē mē pahtōxjaja axpēn wỳr pikuprōnh nē tanhmā amnhī nhīpêx to hā mē amā karō ka prem inhma nē mē urāk nē ã amnhī nhīpêx anē. Ām hāmri na ka htem ã amnhī nhīpêx anhỳr o apa. Ja na inhmā mex.

³ Na pa pre krī hō kamā mēnijaja kot amnhī krā hpro hā mē amā mē harē. Ka prem inhma nhūm mē akwỳjaja kām ja mex nē nhūm mē akwỳjaja tee ri ja kukamā ajamaxpēr. No mēmo kaxyw na hte mēnijaja amnhī krā hpro? E kot paj ixprī hā mē amā ja jarē ka mē inhma. Nà Tirtūm kēp Kris jamār xwỳnh nhūm Kris kēp Tirtūm mā mē inhmyjē jamār xwỳnh. No mē anijaja mē amjên kēp Kris mā mē ajamār xwỳnh. Na hte mēnijaja ohtō nē ra mē mjên ã amnhī to amnhīrīt kaxyw amnhī krā hpro nē ri pa. No mē inhmyjaja na pa htem ã amnhī nhīpêx anhỳr kêt nē. Na pa htem amarī ixkrā hkênh nē ixpa.

⁴ Jakamā na pa htem Tirtūm kapēr mar xà hā ixkre hwỳr axpēn wỳr akuprō nē Tirtūm nhỹ hā mē anijē mā kapēr jarēnh o ixkuhē. Rỳ Tirtūm mā tanhmā mē pajarēnh to. No ãm amnhī krā hpro hkêt rāhā kām mē ajahkre rỳ kām mē pajarē. Kot pa mē amnhī krā hpro nē te mē apē ixprōjaja mē apē mē ijamār xwỳnh ã mē ajarēnh pyrāk. Jao te mē ixte mē ijamār xwỳnh Kris ã xpijaàm kêt pyrāk o amnhī nhīpêx.

⁵ No mē anijaja mē ixte Kris mā mē ajamār xwỳnh jakamā na ka htem Tirtūm nhỹ hā mē inhmā kapēr jarēnh rỳ kām mē pajarēnh kaxyw nē amnhī krā hpro. Mē ixte Kris mā mē ajamār xwỳnhjē hā apijaàm kaxyw ã amnhī nhīpêx anē nē mē amnhī krā hpro. Kot ka mē ã amnhī nhīpêx anhỳr kêt nē te mē ate mē ixtā apijaàm kêt pyrāk o amnhī nhīpêx nhūm mē amjên tee ri ja hā apumu nē hpijaàm nē. Te ate amnhī krā hkênh nē ri apa nhūm tee ri apumunh nē hpijaàm pyrāk.

⁶ Kot kaj mē amnhī krā hkênh nē ri apa nē amnhī kamā apijaàm nē ri apa. Mē anijaja

na ka htem akrā hkī japjē nē kamā amex nē ri apa. No kot ka mē amnhīm akrā hkênh nē apunuj nē amnhī kamā apijaàm nē ri apa. Jakamā kēr ka mē Tirtūm mā amnhī jarēnh kaxyw nē amnhī krā hpro. Nom kot ka mē amjên ã apijaàm kêt nē ri apa hprām japēr nē mamrī amnhīm akrā hkênh nē ri amnhī kuk ã apijaàm kêt nē ri apa.

⁷ No mē inhmyjaja na pa htem amnhī krā hpro hkêt nē. Te mē ixpē Tirtūm pyrāk nhūm mē anijaja te mē apē Tirtūm kra pyrāk o na pu htem axpēn nhīpêx. Tirtūm krajaja na htem mēmoj tā Tirtūm mā karō hkêt nē. Ja pyrā nē mē anijaja na ka htem mē inhmyjē mā mēmoj tā karō kamā axihtỳx o apa hkêt nē. Na ka htem mē ixtā apijaàm kām mēmoj tā mē ixwỳ.

⁸ Amnepē mā Tirtūm kot mēmoj to kator kraxrūm na pre myja kumrēx nhīpêx hāmri nē kēp ōkwa i hō kapa nē ho kām hprō nhīpêx. No na pre nija kumrēx nhīpêx nē ōkwa i ho kām mjên nhīpêx kêt nē.

⁹ Myja mā na pre hprō nhīpêx. No nija mā mjên nhīpêx kêt nē.

¹⁰ Jakamā kēr ka mē anijaja amjên ã apijaàm ã amnhī to amnhīrīt kaxyw hāmri nē mē inhmā Tirtūm nhỹ hā tanhmā akapēr jarēnh to kaxyw rỳ kām amnhī jarēnh kaxyw hāmri nē amnhī krā hpro nē akuhē. Hāmri nhūm Tirtūm kapēr o mē wrỳk xwỳnhjaja ja hā mē apumu nē hkīnh nē tee ri mē akukamā hamaxpēr kêt nē.

¹¹⁻¹² Nē wam ni kator xwỳnhhta na pre myja rūm kato. Tā na pa htem jarāhā mē inhmyjaja hpānhā mē anijē rūm ijapōj. Tirtūm jamaxpēr xà hkôt. Tām na pre ã mē pahte amnhī nhīpêx anhỳr kaxyw ã mē panhīpêx anē. Tā mē ixpē Pahihti Kris kwỳ hā mē inhmyjaja nē mē anijaja na pu htem ri ahte papa hkêt nē. Na pu htem axpēn kutā pamā axpēn hkīnh o papa nē mēmoj to axpēn kutā panojarēt o ri papa. Nē axpēn to presija ho papa. Na hte mē anijaja mē amjên o presija ho apa. Nē mē amyjaja na ka htem mē aprō ho presija ho apa. Tā kēr ka mē anijaja mē amjên ã apijaàm o ri hkôt apa.

¹³ Jakamā kwa mē kot amnhī krā hproja kukamā ajamaxpēr tỳx nē. Xà mē anhō krī kamā mēnijaja mē mjên ã hpijaàm ã

amnhĩ to amnhĩrit kaxyw amnhĩ krã hpro nã? Koja mẽ ja kaxyw ã amnhĩ nhĩpêx anhÿr japêr kê mẽ rĩ mẽ anoo mã Tĩrtũm mã amnhĩ jarênh kaxyw nê kupê xê hkwÿ ho amnhĩ krã hprõ nê rĩ kãm amnhĩ jarê. Nom koja mẽ ã amnhĩ nhĩpêx anhÿr kêt nhũm mẽmyjaja tee ri ja hã mẽ omunh nê ho kapêr hkêt japêr hãmri kê mẽ rĩ amnhĩ krã hpro hkêt nê ri pa.

14 Mẽ kot mẽ pahte amnhĩ nhĩpêx ã mẽ pahpumunh nê hkĩnh kaxyw na pu htem tanhmã amnhĩ nhĩpêx to ho ri papa. Na htem mẽ pahkrã hkĩ jarênh o: “Koja mẽmyjaja hkrã hkĩ japjê nê ri pa nê ra kamã omnajti.” Anhÿr jakamã na pa htem amnhĩ krã hkênh nê ri xpa.

15 No mẽ anijaja na htem mẽ ajarênh o: “Mẽnijaja na htem hkrã hkĩ japjê nê ri pa nê kamã muxti.” Anhÿr jakamã na ka htem akrã hkĩ japjê nê ri apa. Mẽ akĩ te kêp mẽ akrã hpro xà pyrãk. Na ka htem ã amnhĩ nhĩpêx anhÿr o apa.

16 E na pa ra mẽ amã krĩ hkwÿ kamã Kris kwÿ nijaja kot mjên ã hpijaam ã amnhĩ to amnhĩrit kaxyw tanhmã amnhĩ nhĩpêx to hã mẽ harê. Tã koja mẽhõ nija tee ri ja ma nhũm ja kêp omnuj japêr. Nhũm amnhĩ jarênh o:

–Kêt. Kot paj tanhmã inhmã amnhĩ nhĩpêx to hprãm xà hkôt tanhmã ri amnhĩ nhĩpêx to ho ri xpa. Koja inhmjên ja hã xpumumu nê hpijaam nê rĩ tãm.

Anhÿr ã amnhĩ jarê ka mẽ tee ri ã kot amnhĩ jarênh anhÿrja ã ama nê kãm:

–Kwa nã ã ri ajamaxpêr anhÿr kêt nê. Na hte Kris kwÿjaja ã hamaxpêr anhÿr kêt nê. Anê.

Jejus tyk mã mẽ pajamaxpêr pê tanhmã mẽ pahte amnhĩ to hã mẽ pajarênh

Matêwre 26.26-30; Makre 14.22-26; Rukre 22.19-20

17 Nê na ka xep htem Tĩrtũm mã amnhĩ jarênh xà hã ixkre hwÿr axpên wÿr akuprõ nê kamã amnhĩ to mex kêt nê. Na ka htem tanhmã amnhĩ tomnuj to pa tee ri mẽ ajarênh ma nê ixkaprĩ nê. Nê amnhĩm mẽ amex ã mẽ ajarênh kêt nê.

18 Na ka xep htem axpên wÿr akuprõ nê mẽmoj tã axpên mã akir nê axpên pê anhgrã. Nê ahpÿnhã mẽmoj mã ajamaxpêr jao ra mẽ amã axpên kĩnh kêt nê. Na pa tee

ri ã mẽ ajarênh anhÿrja ma nê ixkaprĩ htÿx nê.

19 Xà na hte Tĩrtũm ahpÿnhã tanhmã mẽ pahte amnhĩ anhĩpêx to hã mẽ pahpumunh kôt kãm mẽ pajapê hkêt ã amnhĩ jarê? Nã na hte ã amnhĩ nhĩpêx anhÿr kêt nê. Kãm mẽ pajapê ho axpên pyrãk kênã.

20 Nê na hte Kris kwÿjê piitã tõiã axpên wÿr akuprõ nê Jejus tyk mã hamaxpêr kaxyw pãwti hkwÿ hku. Tã mẽ kajaja na ka xep htem ja kaxyw axpên wÿr akuprõ nom axtem nê Jejus tyk mã ajamaxpêr pê axãpkur kêt nê. ãm mẽ axãpkur pix kukamã ajamaxpêr nê axtem nê axãpkur rũnh o akrĩ.

21 Jao amnhĩ pix kukamã ajamaxpêr. Mẽ akwÿjaja wam mrar nê hpõx nê mẽ apkur xà hã mẽ hkrĩ xwÿnhjaja na xep htem hkwÿjê rom mẽõta pinh pa. Nê wĩhtija nhũm mẽ mãânên hpenh pa nê axtem nê ho axpã. Jakamã nhũm mẽ akwÿjaja kot amnhĩ to hapu nê hpõx xwÿnhjaja mẽmojta ã hprãr pa.

22 Kwa mon ka mẽ amã hprãm nê anhõrkwÿ kamã axãpkur kêt nê? Mẽ kot Tĩrtũm mã amnhĩ jarênh xà hã ixkre kamã na htem apkur rũnh hkêt nê. Ka mẽ ã amnhĩ nhĩpêx anê nhũm mẽõ hkêt xwÿnhjaja amnhĩ to hapu nê mra nê mẽõ hã prã nê amnhĩ kamã hpijaam nê. Kwa xà kot pa ã mẽ ate amnhĩ nhĩpêx anhÿr ã mẽ ajarênh ma nê ixkĩnh nê mẽ ate amnhĩ nhĩpêx mex ã mẽ ajarê? Nã kot paj ã mẽ ajarênh anhÿr kêt nê.

23 Pahihti Jejus na pre ja hã tanhmã inhmã kapêr to nê inhmã:

–Kêr ka mẽ tõiã axpên wÿr akuprõ nê axãpkur pê ixtyk mã mãn mẽ ajamaxpêr pê ã amnhĩ nhĩpêx anê nê ã amnhĩ nhĩpêx anê. Anê.

Jakamã kot paj ixprĩ hã amnhĩ xõ ri mẽ amã kot tanhmã inhmã kapêr tota jarê ka mẽ inhma. Nã Jejus kormã htyk kêt ri Jut Kariot ra kot pôristi mã hã àmnênh kaxyw nhũm kamãt nhũm Jejus mẽ ÿ hã mẽ ahkre xwÿnhjê mẽ apkur kaxyw hkrĩ hpa. Hãmri nhũm Jejus pãwti hõ py nê o xa

24 nê Tĩrtũm mã harê nê kãm:

–Pa Papaj. Nã ãm hãmri na ka hte mẽ inhmã mẽ inhõ mex o apa. Anê.

Ně hpānhã pāwja o hkry pa ně ho mẽ kot ÿ hã mẽ ahkre ho mẽ pa xwýnhjê nhĩpêx pa ně mẽ kãm:

—E na pa ã pāwti ho hkry ně mẽ amã õr anê. Koja mẽ ã inhĩpêx anê ně te mẽ kot ixto hkry hpar pyrãk o inhĩpêx pa amnhĩ xà htýx kamã ijamak kãm ty. Nom mẽ anê kot paj ty. Jakamã e kêr ka mẽ ixwakre kamã tõhã axpên wýr akuprõ ně ixte mẽ ate amnhĩ tomnuj pānhã amnhĩrer kaxyw mẽ anê ixtyk mã ajamexpêr pê akĩnh ně pāwta kur o akrĩ. E mẽ māmri axãmnhĩx aku. Anê.

²⁵ Hāmri ně hpānhã kop kãm wĩhtita py ně o xa ně mẽ kãm:

—E kop kãm wĩhtija te kêp Tĩrtũm kot mẽ atã amnhĩ jarēnh nyw xà jarēnh pyrãk. Ixtyk kukwak ri koja mẽ ato hkra. Kot paj ty nhũm ixkamrõ mẽ anê axkapĩ. Jakamã e. Mẽ kopja kamã wĩhti ho akõm o axpên nhĩpêx. Ně ho akõm pê ixte mẽ anê ixtyk mã ajamexpêr. Anê.

²⁶ Tã ã kot amnhĩ jarēnh anhýr jakamã na pu htem axpên wýr akuprõ ně pāwti hkwý hku ně mẽmo kagõ hkwý o ixkõ. Ně ho pahkõm pê axpên mã Jejus tyk jarēnh o pahkrĩ. Tã kêr pu mẽ arĩ ã amnhĩ nhĩpêx anhýr o ri papa rãhã nhũm Jejus akupýn mẽ pahwýr wrý.

²⁷ Jakamã kot kaj mẽ tõhã mẽmo arĩgro hã kot mẽ panê htykja mã ajamexpêr kaxyw axpên wýr akuprõ. Hāmri nhũm mẽ anhĩõ mẽ awýr axà ně nhý. Nom axtem ně Jejus tyk mã hamaxpêr kêt japêr. Ně htýx pāwti kur o nhý. Ně hkõt amarĩ mẽmo kagõ ho hkõm o nhý. Koja ã htyk mã hamaxpêr kêt rãhã amnhĩ nhĩpêx anê ně te Jejus o kapêr pyrãk o amnhĩ nhĩpêx. Te ho kapêr o:

—Nà Jejus amarĩ htyk nhũm hkamrõ amarĩ hpikapĩr kēnã. Na pre mẽ panê htyk kêt ně.

Anhýr o ho kapêr pyrãk.

²⁸ Jakamã kwa kêr ka mẽ ate pāwta kur kaxyw ně taxonomy kormã tanhmã ate amnhĩ nhĩpêx to mã ajamexpêr ně ajamexpêr o:

—Kwa mãn pa Tĩrtũm kapêr kõt amnhĩ nhĩpêx mex rãhã ho ri ixpa nã?

Anhýr o mãn ajamexpêr. Hāmri ně ate hkõt amnhĩ nhĩpêx mex ã amnhĩ pumu ně amarĩ axãmnhĩx aku. No kot ka mẽ kormã mẽmoj punuj kaga hkêt ně arĩ ri ho anhýr

o pa hāmri ně kãm ajamexpêr ně hkur kêt ně. Rý tanhmãn tee ri tanhmã ate amnhĩ tomnuj tota mã ajamexpêr ně akaprĩ ně. Hāmri ně tokyx Tĩrtũm mã amnhĩ jarê ně amnhĩ to mex prãm xàj amnhĩ to awý hāmri ně arĩ kormã axãmnhĩx pāwtita ku.

²⁹ Koja mẽhõ mẽ akõt axà ně mẽmoj kukamã hamaxpêr pê htýx pāwti nhĩrēnhã õ py hkur o nhý. Hāmri nhũm Tĩrtũm tee ri ja hã omu ně hã tanhmã ho.

³⁰ Na ka mẽ ra axohtõ ně ã amnhĩ nhĩpêx anê ně atýx ri mẽmoj kukamã ajamexpêr pê pāwta ku. Jejus kot mẽ panê htykja mã ajamexpêr kêt pê atýx tanhmã ajamexpêr to pê hkwý hkur o akrĩ. Mýrapê na ka mẽ ra ja hã axà ně ri apa. Ně mẽ akwýjaja ra htyk rax ně.

³¹ Nom kot ka mẽ axpên wýr akuprõ hāmri ně akupým tãm axpên kõt ajamexpêr ně axpên kõt amnhĩ nhĩpêx ně rĩ kormã pāwtita ku. Hāmri nhũm Tĩrtũm ja hã mẽ apumu ně tanhmã mẽ ato hkêt ně.

³² Na hte mẽ pahte tanhmã amnhĩ tomnuj to hã mẽ pahpumu ně hã tanhmã mẽ pahto. Mẽ pahte ja hã amnhĩ pumunh ně axte ã amnhĩ nhĩpêx anhýr kêt kaxyw na hte ã mẽ pahpê hkrajê nhĩpêx anê. Jakamã kot puj mẽ nhýrmã mẽ kêp hkra hkêt xwýnhjê hkõt kuwyta wýr ma papa hkêt ně.

³³ Jakamã e Kris kõt ixtõ ně ixtõxjaja. Kêr ka mẽ axte Pahihti Jejus tyk mã ajamexpêr kaxyw axpên wýr akuprõ. Hāmri ně ra axpên wýr apikuprõnh pa hã axpên pumu ně rĩ kormã pāwti hkwý hku ně hkur pê Jejus kot mẽ panê htyk mã ajamexpêr o akrĩ.

³⁴ Ně ka mẽ atõ ra amã prãm japêr ně anhõrkwý kamã apku ně rĩ kormã mẽ hkõt tẽ. Jao ra anhõhy htu ně ajamakêtkati ně akwýjê jamãr o nhý. Kê mẽ hpõx pa ka mẽ atipxi ně Pahihti Jejus tyk mã ajamexpêr pê hkur o akrĩ. Hāmri nhũm Tĩrtũm ja hã mẽ apumu ně hkĩnh ně tanhmã mẽ ato hkêt ně.

Na ka prem mẽ ate inhmã kagà ně mēnhã kamã mẽmoj tã ixkukjêr rax ně. Tã na pa ra kagà ja kamã mẽ amã hkwý jarēnh rax ně. Nom kot paj piitã harēnh par kêt ně. Kot paj ãm mẽ amã hkwý pix jarê. Hāmri ně nhýrmã ma mẽ awýr mõ ně mẽ apumu

nē kormã axte mẽ amã harēnh jatur xàm kumẽ.

12

Mẽ kot Tĩrtũm kapēr o hêx xwỳnhjê jarēnh Rômãn 12.6-8; Wam Korīt 14.29; Wam Pêtre 4.10-11; Wam Juãw 4.1-2

¹ Nē kot paj hpãnhã mẽ amã tanhmã Tĩrtũm Karõ jarēnh to ka mẽ inhma. Tanhmã kot mẽ pahkrã hto nhũm mẽ pahte ahpỳnhã tanhmã kãm amnhĩ nhĩpêx to ho papaja kot paj mẽ amã harẽ.

² Amnepê mã kormã mẽ ate Kris kôt amnhĩ xunhwỳr kêt ri na ka prem sãnti hkôt ri amnhĩ nhĩpêx o ri apa. Kapēr kêt tã ka prem hkôt ri amnhĩ nhĩpêx rãhã ho ri apa. Te kot mẽ ano kupyw pyrãk ka mẽ kãm mex o mex ã harēnh o ri apa. Nē kãm amnhĩ jagrer pê amnhĩ to hwỳr o ri apa. ã na ka prem amnhĩ nhĩpêx anhỳr o ri apa.

³ Tã ra hpãnhã Tĩrtũm kôt amnhĩ xunhwỳ.

Na htem ohtô nē Tĩrtũm nhỹ hã kapēr jarēnh o pa hã amnhĩ jarēnh tã no ãm mẽ hkwỳjaja ja hã amnhĩ to hêx. Tã kot paj ixprĩ hã mẽ amã tanhmã mẽ harēnh to. Koja mẽhõ mẽ kãm Tĩrtũm nhỹ hã kapēr jarēnh o pa hã amnhĩ jarẽ hã koja Jejus o kapēr punuj o pa hkêt nē. Koja harēnh o:

–Jesús kêp mẽ panhõ Pahihti jakamã kwa pu mẽ hkôt amnhĩ xunhwỳ nē hkôt amnhĩ nhĩpêx o ri papa.

Anhỳr o harẽ. Koja mẽhõ ã mẽ amã kapēr anê ka mẽ ama nē mẽ kot Tĩrtũm nhỹ hã kapēr jarēnh o pa xwỳnh ã omunh kurê kumrêx. No koja mẽ amã ã kapēr anhỳr kêt nē ka mẽ ama nē Tĩrtũm kapēr o hêx o pa hã omunh kurê kumrêx.

Tĩrtũm Karõ kãm mẽ pahte axpên to mex prãm ã harēnh

Rômãn 12.6; Epes 4.7; Wam Pêtre 4.10

⁴ Nē ahpỳnhã kot tanhmã mẽ panhĩpêx to xwỳnhja ãm pixii. Kêp Tĩrtũm Karõ. Na hte mẽ pahkarõ mã agjê nē ahpỳnhã tanhmã mẽ pahte axpên to mex kaxyw tanhmã mẽ panhĩpêx to. Kot tanhmã mẽ panhĩpêx to xàja ohtô. Mẽ pahte ahpỳnhã ri tanhmã kãm amnhĩ nhĩpêx to nē tanhmã axpên to mex to ho ri papa kaxyw na. Tĩrtũm Karõ na hte ja kaxyw tanhmã mẽ pahkrã hto.

⁵ Nē mẽ pahte kãm tanhmã amnhĩ nhĩpêx to ho papa xwỳnhja haxwỳja ãm pixii. Kêp Pahihti Jejus. Tã na pu htem ahpỳnhã kãm tanhmã amnhĩ nhĩpêx to ho ri papa.

⁶ Nē kot mẽ pahto ajuta nhũm mẽ pahte ahpỳnhã tanhmã axpên to mex to ho papa xwỳnhja haxwỳja ãm pyxii. Kêp Tĩrtũm. Na pu htem ahpỳnhã tanhmã hkôt axpên xunhwỳr tỳx to kaxyw tanhmã axpên to mex to ho papa.

⁷ Nē Karõja na hte ahpỳnhã tanhmã axpên kaxyw mẽ panhĩpêx to pu mẽ axpên to ajuta mex o ri papa.

⁸ Jakamã na pu hte mẽ pahkwỳjaja Tĩrtũm Karõ nhỹ hã ma mẽ pahkwỳjê mã Tĩrtũm kapēr jarēnh o ri mẽ hkôt papa. Nē mẽ pahkwỳjaja ma ã hã paxàhpumunh mex pê ma ri kapēr o mẽ ahkre ho mẽ hkôt papa.

⁹ Nē mẽ pahkwỳjaja Karõ nhỹ hã Tĩrtũm kot tanhmã mẽ pahto ajuta hto kaxyw hkôt pajamaxpêr tỳx nē.

Nē mẽ pahkwỳjaja akupỳm mẽ à xwỳnhjê ho mex o papa nhũm mẽ akupỳm mex nē pa.

¹⁰ Nē mẽ pahkwỳjaja aa mẽ kot mẽmoj pumunh kêt kwỳ ho anhỳr o ri mẽ hkôt papa.

Nē mẽ pahkwỳjaja Tĩrtũm kapēr mar tỳx nē ô ri mẽ kãm harēnh o mẽ hkôt ri papa.

Nē mẽ pahkwỳjaja Tĩrtũm Karõ nhỹ hã tanhmã mẽ kot amnhĩ nhĩpêx to hã mẽ omunh o papa. Rỳ pahprĩ hã mẽkarõmnuti nhỹ hã mẽ kot amnhĩ nhĩpêx ã mẽ omunh o papa.

Nē mẽ pahkwỳjaja nhãm mẽ kapēr mar kêt tã ra mẽ kapēr o pakapêr.

Nē mẽ pahkwỳjaja mẽ kapēr o pakapêrja ma nē mẽ kot mar kêt xwỳnhjê mã harẽ. Kormã aa pahte mar kêt tã ra pahprĩ hã mar mex nē mẽ kãm harẽ.

¹¹ ã na hte Tĩrtũm Karõ kãm hprãm xà hkôt tanhmã mẽ panhĩpêx to pu mẽ ahpỳnhã ã hã ã axpên nhĩpêx anhỳr o ri axpên kôt papa.

Te mẽ pahpê Kris nhĩ pyrãk ã mẽ pajarēnh Rômãn 12.3-8; Epes 1.22-23, 4.11-16; Korosê 3.15

¹² E pa hpānhā mẽ amā mẽ panhī kamā tanhmā mẽmoj jarēnh to ka mẽ inhma nē hā anohtýx nē. Mẽ panhīja âm pixi htā no âm kamā mẽmoj xohtôô. Kamā mẽ pahte nē kamā mẽ pahpa nē kamā mẽ pajakwa. Nē mẽ panhīnhu nē mẽ pano. Ā mẽ panhī kamā mẽmoj xohtô kot anhÿr. Ja pyrā nē Kris nhīja âm pixi htā te mẽ pahpê ĩ kamā mẽmoj xohtôta pyrāk. Mẽ pahkwýjaja te mẽ pahpê hte pyrāk. Nē mẽ pahkwýjaja te mẽ pahpê ĩhkra pyrāk. Nē mẽ pahkwýjaja te mẽ pahpê no pyrāk.

¹³ Mẽ pahpê Kris kwýjaja axpēn kaxyw mẽ paxohtôô. Mẽ ixpê Ijaewjaja nē mẽ apê Ijaew kêt xwýnhjaja. Nē amarĩ ri mẽ kām mẽ axápēnh o mẽ apa xwýnhjaja nē amnhĩ mã ri mẽ axápēnh o mẽ apa xwýnhjaja. Ā ahpýnhā mẽ paxohtô kot anhÿr tā nhũm Tĩrtũm Karō te mẽ pahpê Kris nhĩ pixi pyrāk o mẽ panhĩpêx. Nhũm Krisja mẽ pahpiitā mẽ pamā Karō gō nhũm mẽ pahkarō mã agjê. Pixi htā mẽ pahpiitā mẽ pahkarō mã agjê.

¹⁴ Nē mẽ panhīja pixi tā kamā tanhmā mẽ pakute xàja ohtôô. Tā Kris nhīja te kot mẽ panhīja pyrāk. Urāk nē kamā mẽ paxohtôô. Jakamā na pu htem ahpýnhā tanhmā kām amnhĩ nhĩpêx to ho ri papa. Karō kot tanhmā amnhĩ kaxyw mẽ panhĩpêx to xà hkôt.

¹⁵ Nē kop âm mẽ pahparja kapēr ronhÿx tee ri mẽ panhĩhkra pumu nē amnhĩ mã:

—Hêxta waa nē. Kêp âm ixpê mẽ ĩhkra ronhÿx pa inhmex nē ijarir. No âm ixpê mẽ hpar pix jakamā pēr âm mẽ hkĩnhā ixpê mẽ hkwy hkêt âm ixpê mẽ hatur xà pix na pa.

Anhÿr o amnhĩ jarēnh japêr. Nom ja kot anhÿr kêt. Axtem nhÿhÿm kot mẽ pahto pa kaxyw na mẽ pahparja. Nē axtem mẽmoj tā mẽ paxápēnh rý mẽmoj jamýnh kaxyw na mẽ panhĩhkraja. Na pu htem hamē wa ho presija rāhā ho papa. Ja pyrā nē kot puj mẽ pahkwýjê hō mẽ parom Tĩrtũm Karō nhÿ hā mẽmoj tā àpēnh týx ā omu nē hkĩnhā mẽ pahte amnhĩ to warê hkêt ā amnhĩ jarēnh o papa hkêt nē.

¹⁶ Nē mẽ pajamakja kapēr ronhÿx kapēr o:

—Hêxta waa nē. Kêp apu ixpê mẽ no ronhÿx pa inhmex nē ijarir. No âm ixpê mẽ

umar xà pix jakamā pēr âm ixte ho warê hkêt kumrêx.

Anhÿr o amnhĩ jarēnh japêr. Nom ja kot anhÿr kêt. Hamē wa mex kēnā. Axtem ho mẽ paxumar kaxyw na mẽ pajamakja. Nē axtem ho mẽ parĩt kaxyw na mẽ panoja.

¹⁷ Kêp âm mẽ pano pix ronhÿx pu mẽ parĩt pix nē paxumar kêt nē ri papa. Rý kêp âm pajamak pix ronhÿx pu mẽ paxumar pix nē parĩt kêt nē mẽ paxupār kêt nē ri papa.

¹⁸ Mẽ panhīja pixi htā kamā hikukrêx xohtôô. Na pre Tĩrtũm amnhĩ krā hkôt kamā mẽmoj piitā hipêx nē hanhō.

¹⁹ Kêp âm mẽ panhīja kamā âm mẽmoj pixi ronhÿx pu mẽ pamex kêt nē papa.

²⁰ Tā no âm kot anhÿr kêt. Mẽ panhīja âm pixi htā kamā hikukrêx xohtôô.

²¹ Jakamā na hte mẽ panoja amnhĩ nē mẽ panhĩhkra mã kām:

—Tk kwa ma tē. Ixte ato presijare hā.

Anhÿr o kām kapēr kêt nē. Rý mẽ pahkrāja amnhĩ nē mẽ pahpar mã kām:

—Tk kwa ma tē. Na pa ato presija hkêt nē.

Anhÿr o kām kapēr kêt nē. Ja pyrā nē kot puj mẽ nhÿri Kris kôt panhĩõ pumu nē pamex o pahte hakrenh ā amnhĩ jarēnh kêt nē.

²² Nē mẽ panhī kamā mẽmoj kwý te hirerek pyrāk tā no pu mẽ arĩ pamā hapê nē. Ja pyrā nē kêt pu mẽ kormā mẽ kot Kris kôt amnhĩ xunhwÿr tohtuj anhÿr xwýnhjaja pu mẽ pamā mẽ hkĩnh kām tanhmā mẽ kutā panojarêt to ho ri papa.

²³⁻²⁴ Nē na pu htem mẽ panhī kamā mẽ pakukrêx kwý hā pahpijaàm nē hpro nē ri ho papa. Nē hkwy hā pahpijaàm kêt nē hpro hkêt nē ho ri papa. Nē hkwy mẽ pahpê omnajti htā pu mẽ ho mex nē ri ho papa. Tĩrtũm kot ā mẽ panhĩpêx anhÿr jakamā na pu htem mẽ pakamā mẽ pakukrêx kwý mẽ pahpê omnajti htā pu mẽ ho mex nē ri ho papa. Ja pyrā nē kêt pu mẽ Tĩrtũm kôt mẽ pahtō nē mẽ pahtōx piitā ho mex o ri papa. Nē tām mẽ hipêx. Mẽ pahkwýjaja muxre nē mẽ pahkwýjaja omnajti htā. Tanhmā mẽ kute htā pu mẽ kêp mẽ Jesus kôt mẽ pahtō nē mẽ pahtōx ā mẽ ho mex o ri apa.

²⁵ Nē na hte mẽ panhī kamā mẽ pahpar nē mẽ panhĩhkra nē piitā axpēn kôt àpēnh

mex o pa. No na hte mẽ pahparja nhÿhÿm ma mra nhÿm ihõja hkwÿm nhÿhÿm ma mrar kêt nẽ. Na hte wa axpẽn kôt àpênh mex o pa. Ja pyrà nẽ kër pu mẽ pahpê Tirtÿm krajaja axpẽn kôt amnhÿ nhÿpêx rãhã ho ri papa. Nẽ axpẽn to mex rãhã ho ri papa. No ri axpẽn kwÿm ri tanhmã amnhÿ nhÿpêx to ho ri papa hkêt nẽ.

²⁶ Na pu htem tõhã nhÿhÿnh panhÿ kamã paxà nẽ ri papa. Pahkrã tãtãk rÿ pakatut gêk. Jao te mẽ panhÿ piitã kamã mẽ paxà pyrãk. Nẽ nhÿhÿnh akupÿm pamex nẽ te panhÿ piitã hkôt akupÿm pamex pyrãk. Ja pyrà nẽ koja Kris kôt panhÿõ nhÿhÿnh à nẽ ri pa. Rÿ tanhmã amnhÿ to nẽ ra hkaprÿ nẽ ri pa pu mẽ ja hã omu nẽ ÿ hã pahkaprÿ nẽ papa. No koja mẽmoj tã hkÿnh nẽ pa pu mẽ ja hã omu nẽ ÿ hã pahkÿnh nẽ papa.

Te mẽ pahpê Kris nhÿ pixi pyrãk ã mẽ pa jarênh

²⁷ Nẽ mẽ pahpê Kris kwÿjaja te mẽ pahpê Kris nhÿ pixi pyrãk. Ahpÿnhã mẽ pahte tanhmã amnhÿ nhÿpêx to ho papa htã mẽ pahpê Kris kwÿ jakamã te mẽ pahpê ÿ pixi pyrãk.

²⁸ Nẽ mẽ pahte Kris kôt tanhmã pahkwÿjê ho ajuta hto ho papa kaxyw na pre Kris ahpÿnhã tanhmã mẽ paxunhwÿr to.

Mẽ pahkwÿjaja mẽ pahte ÿ hã nhãm mẽ kãm kapêr jarênh o papa kaxyw mẽ paxunhwÿ.

Nẽ mẽ pahkwÿjaja mẽ pahte ÿ hã tanhmã kapêr jarênh to ho ri papa kaxyw mẽ paxunhwÿ.

Nẽ mẽ pahkwÿjaja Tirtÿm kapêr jarênh o mẽ ahkre ho ri mẽ papa kaxyw mẽ paxunhwÿ.

Nẽ mẽ pahkwÿjaja mẽ pahte aa mẽ kot mẽmoj pumunh kêt kwÿ ho anhÿr o ri papa kaxyw mẽ pa xunhwÿ.

Nẽ mẽ pahkwÿjaja akupÿm mẽ à xwÿnhjê ho mex o mẽ papa kaxyw mẽ pa xunhwÿ.

Nẽ mẽ pahkwÿjaja mẽ kapêr o mẽ hihtÿx o mẽ papa kaxyw mẽ pa xunhwÿ.

Nẽ mẽ pahkwÿjaja mẽ pahte tanhmã mẽ ho ajuta ho ho ri papa kaxyw mẽ pa xunhwÿ.

Nẽ mẽ pahkwÿjaja nhãm mẽ kapêr õ ho mẽ pakapêr o mẽ papa kaxyw mẽ pa xunhwÿ.

Ã na pre ahpÿnhã mẽ pahpê hkwÿjê piitã mẽ paxunhwÿr anẽ.

²⁹ No na pu htem pahpiitã axpẽn kôt Tirtÿm kapêr o mẽ ahkre ho ri papa hkêt nẽ.

Nẽ mẽ pahpiitã ÿ hã tanhmã pakapêr to ho ri papa hkêt nẽ.

Nẽ mẽ pahpiitã kapêr jarênh o ri papa hkêt nẽ.

Nẽ mẽ pahpiitã aa mẽ kot mẽmoj pumunh kêt kwÿ ho anhÿr o ri papa hkêt nẽ.

³⁰ Nẽ mẽ pahpiitã akupÿm mẽ à xwÿnhjê ho mex o ri papa hkêt nẽ.

Nẽ mẽ pahpiitã mẽ kapêr õ ho ri pakapêr o ri papa hkêt nẽ.

Nẽ mẽ pahpiitã ri mẽ kapêrja ma nẽ pakapêr kãm pahkwÿjê mã harênh o ri papa hkêt nẽ.

Na pu htem ahpÿnhã tanhmã Kris kôt mẽ pahkwÿjê ho ajuta hto ho ri papa.

³¹ Tã kër pu mẽ pahpiitã pamã axpẽn kÿnh pê tanhmã axpẽn to mex to ho ri papa. Ja na mex o kot mẽmoj piitã hakrenh par. E kot paj ixprÿ hã tanhmã mẽ amã ja jarênh to ka mẽ inhma.

13

Mẽ pahte axpẽn kamã paxukaprÿ ho papa hã mẽ pamã karõ

Juãw 13.31-35; Karatas 5.13-15; Korosẽ 3.12-14

¹ Kot pa ma mẽ piitã ahpÿnhã mẽ kapêr kãm mẽ kãm Tirtÿm kapêr jarênh o ri ixpa japêr. ãm mẽ piitã mẽ kapêr o ixkapêr mex o mẽ kãm harênh o ri ixpa japêr. Nẽ Tirtÿm kapêr o mẽ wrÿk xwÿnhjê kapêr o mẽ ahkre ho ri ixkwÿjê hkôt ixpa japêr. Tã inhã mẽ hkÿnh kêt kãm ixte mẽ ahkre ho ri ixpa ronhÿx mẽ inhma nẽ ãm inhma. Nhÿm ixkapêrja te ixte rat tatak pyrãk o pa tee ri Tirtÿm kapêr o mẽ ahkre kaprÿ ho ri mẽ hkôt ixpa nhÿm Tirtÿm tee ri inhã mẽ hkÿnh kêt ã ixpumu nẽ inhã:

—Nà amã mẽ hkÿnh kêt jakamã na ka tee ri ixkapêr o mẽ ahkre kaprÿ. Anẽ.

² Rÿ kot paj Tirtÿm xãhpumunh tÿx o mẽ kãm kapêr pimxur kwÿ jarênh o ri ixpa japêr. Rÿ Tirtÿm mẽ kurom inhã mẽmoj

to amnhĩrīt pa omu nē mē kām harēnh o ri ixpa japēr. Rỳ pa Tĩrtũm kot amnhĩ nhĩpēx piitā omunh par japēr. Rỳ ixte amnhĩ kaxyw hkõt ijamaxpēr tỳx kõt ỳ hā kēn krā hprēk ò mã ixkapēr nhũm kot inhmar nē inhmar xà hkõt nhām pikamēnh japēr. Tā inh mā ixkwỳjē hkĩnh kēt kām ã amnhĩ nhĩpēx anē nhũm Tĩrtũm tee ri ja hā ixpumu nē inh mā:

—Nà amā mē hkĩnh kēt jakamā te axàhpumunh tỳx kēt kumrēx pyrāk. Na ka tee ri ã mē kām ixkapēr jarēnh anhỹr o ri apa kaprỳ. Anē.

³ Rỳ pa mē kēp amrakati xwỳnhjē mã ixkukrēx nhõr par japēr. Rỳ Kris ã mē kām amnhĩ grõnh kõt mē kām xa nhũm mē hā ixpĩr japēr. Tā inh mā mē hkĩnh kēt kām ã amnhĩ nhĩpēx anē nhũm Tĩrtũm tee ri ja hā ixpumu nē inh mā:

—Nà ã ate mē kām amnhĩ nhĩpēx anhỹr o ri apa htā amā mē hkĩnh kēt jakamā na ka tee ri ã mē kām amnhĩ nhĩpēx anhỹr kaprỳ. Anē.

⁴ Kot puj mē pamā axpēn kĩnh hā kot puj mē kritpēm mē piitā mē kām pahprĩ ho papa.

Jao axpēn kām pagryk tokyx anhỹr kēt nē. Nē pamā axpēn to mex pix prām.

Nē mēmoj tā axpēn kamā pagryk kurē kumrēx kēt nē. Nē mēmoj tā amnhĩ to jarkrar o ri papa hkēt nē.

Kot puj mē pamā axpēn kĩnh hā kot puj mē ã amnhĩ nhĩpēx anhỹr o ri papa hkēt nē.

⁵ Nē kot puj mē axpēn kamā paxukaprĩ ho papa hā kot puj mē tām axpēn nhĩpēx rāhā ho papa. Jao amnhĩ pix kukamā pajamaxpēr o ri papa hkēt nē. Nē mē pagryk tokyx anhỹr kēt nē. Rỳ axpēn kām pagryk tokyx anhỹr hkēt nē. Rỳ koja mēhõ tanhmā mē panhĩpēx kati hto pu mē ãm amnhĩ tā omu nē axte kot tanhmā mē panhĩpēx tota mã pajamaxpēr kēt nē.

⁶ Nē kot puj mē pamā axpēn kĩnh o papa hā kot puj mē tee ri mēhõ kot tanhmā amnhĩ tomnuj to hā omu nē pahkaprĩ nē. Rỳ tanhmā kot amnhĩ to mex to hā omu nē pahkĩnh nē.

⁷ Nē kot puj mē pamā axpēn kĩnh o papa hā kot puj mē arĩ Tĩrtũm kot mē pahto mex par jatur xà mēnh xà hā arĩgro jamār

rāhā ho ri papa. Nē mē kot Kris ã tanhmā mē pahto htā pu mē tee ri amnhĩ kukamā tanhmā pajamaxpēr to hkēt nē. ãm mē kutā amnhĩ to htỳx nē mē kām pakuhē nē arĩ amnhĩ kaxyw Tĩrtũm mã pajamaxpēr tỳx rāhā nē.

⁸ Nē kot puj mē pamā axpēn kĩnh o papa hāmri nē aa mē pahte ã amnhĩ nhĩpēx anhỹrja mã panhũrer kēt nē. Nē arĩ mē pamā axpēn kĩnh rāhā ho papa ho papa. Jar pika ja kamā mē pahte Tĩrtũm nhỹ hā mē kām kapēr jarēnh o ri papa htā kot puj mē nhỹrmā ma ò krĩ hwỳr api hāmri nē kuri axte ã kām amnhĩ nhĩpēx anhỹr kēt nē. Mo kaxyw kot puj mē axte ri mēhõ mã kapēr jarē? Kot puj mē ò krĩ hwỳr api nē ra mē pahpiitā paxàhpumunh o axpēn pyrāk.

Nē na pu htem tōhā mē kapēr ò ho pakapēr o ri papa. Nom kot puj mē nhỹrmā Tĩrtũm nhõ krĩ hwỳr api hāmri nē kuri axte nhām ri mē kapēr o pakapēr kēt nē.

Nē na pu htem jar mē pahkwỳjaja mē paxàhpumunh mex kõt Tĩrtũm kapēr jarēnh o ri papa. Tā kot puj mē nhỹrmā ò krĩ hwỳr api hāmri nē axte ã amnhĩ nhĩpēx anhỹr kēt nē. ãm mē pamā axpēn kĩnh pixja kot puj mē arĩ ò krĩ kamā mē pamā axpēn kĩnh tũm rāhā papa ho papa.

⁹ Jar mē pahpiitā mē paxàhpumunh tohtuj anhỹr o pakapēr jakamā na pu htem kormā Tĩrtũm kapēr jarēnh tohtuj anhỹr o ri papa.

¹⁰ Tā kot puj mē nhỹrmā ò krĩ hwỳr api nē kuri paxàhpumunh jatur xàm mēnh pa. Jakamā nhũm jar mē paxàhpumunh tohtuj anhỹr xwỳnhta mē pahpē hapēx.

¹¹ E pa mē amā ja hā ejēp jarē ka mē inhma. Nà amnepē mã ixprĩre ri na pa pre ixtỳx ri mēhprĩjē kot amnhĩ nhĩpēx o amnhĩ nhĩpēx nē mē hamaxpēr o ijamaxpēr. Nē mē kapēr mex kēt o ixkapēr o ri ixpa. Tā ra ixàptār hāmri nē mē àptàrjē jamaxpēr o ijamaxpēr o ri ixpa. Te ra mē pahte kaxkwa kamā mē paxàhpumunh jatur xàm mēnh parta pyrāk mē aptàrjē jamaxpēr o ijamaxpēr o ri ixpa.

¹² Ja pyrā nē na pu htem kormā Tĩrtũm kot amnhĩ nhĩpēx ã omunh tohtuj anhỹr. Te mē pahte amnhĩ pumunh xà pynajre kamā pahprĩ hā amnhĩ pumunh mex kēeta pyrāk. Nom kot puj mē nhỹrmā ò krĩ hwỳr

api hāmri nē pahprī hā paxàhpumunh jatur xàm kumē. Te Tirtūm kot hprī hā tanhmā mẽ pakute hā mẽ pahpumunh parja pyrək.

¹³ E arī mẽ pahte Tirtūm kôt amnhī nhīpêx o papa xàja na axkrunēpxi. Mẽ pahte hkôt amnhī nhīpêx o papa rāhā ho papa kaxyw. Wamta na ja: Kêr pu mẽ arī amnhī kaxyw Tirtūm mã pajamaxpêr mex rāhā ho ri papa. Nē hkôt ja: Kêr pu mẽ arī Tirtūm kot mẽ pahto mex par jatur xà mẽnh xà hā arīgro jamār rāhā ho papa. Nē hkôt ja: Kêr pu mẽ arī pamā axpên kīnh pē tanhmā axpên to mex to rāhā ho papa. Ja na mex o kot wamta wa hakrenh. E kêr pu mẽ ã amnhī nhīpêx anhÿr rāhā ho ri papa.

14

Tirtūm Karō kot mẽ pahto mẽ paxihtÿx ã harēnh

Wam Korit 12.7-11, 12.27-31

¹ E kêr ka mẽ arī amā axpên kīnh pē axpên to mex rāhā ho ri apa nē aa jam anhÿrer nē ho ajamakêtkati hkêt nē. Nē amnhī to Tirtūm Karō mãn amnhī to awÿ kê mẽ amā tanhmā mẽ ajamaxpêr to ka mẽ ahpÿnhā tanhmā axpên to mex to ho ri axpên kôt apa. Nē kêr ka mẽ ã ajamaxpêr anē nē ajamaxpêr o:

–Inhmā mẽ hkīnh o ri ixpa hprām tÿx. Nē Tirtūm Karō kot tanhmā ixto nhūm ixte ahpÿnhā tanhmā mẽ ho ajuta hto ho ixpaja pa mãānēn inhmā ho anhÿr prām. Nē kot tanhmā ijakwa hto nhūm ixte ahpÿnhā mẽ kapêr ò ho ixkapêrja pa mãānēn inhmā ho anhÿr hprām. No kêt ixte Tirtūm nhÿ hā mẽ kām kapêr jarēnhja na inhmā ho anhÿr prām tÿx kumrêx. Anē.

²⁻⁴ Mẽ pakamā mẽ kapêr ò ho Tirtūm mã kapêr xwÿnhjaja na htem Tirtūm Karō nhÿ hā ãm kumā pix mã kapêr òta o kām kapêr nhūm tapxipix mẽ kuma. No mẽ papajaja na pu htem tee ri mar o pahkrī nom mar kêt nē. ãm kapêr xwÿnhhta pix koja mẽ pakurom amnhī ma. Nom koja mẽ pakapêr kām Tirtūm mã amnhī jarē pu mẽ mar mex nē. Nhūm mẽ pakapêr kām Tirtūm nhÿ hā mẽ pamā kapêr jarē pu mẽ pahprī hā kuma. Jao mẽ pamā kapêr kôt amnhī nhīpêx prām nē. Nē mẽmoj tã pahkaprī nē

ri papa htā mẽ kuma nē amnhī kaxwÿnh kām amnhī to paxihtÿx.

⁵ Mẽ apiitā mẽ ate nhām mẽ kapêr ò ho Tirtūm mã amnhī jarēnhja na mex. Nom mẽ ate mẽ akapêr o mẽ akwÿjê mã Tirtūm kapêr jarēnh o ri mẽ apaja na mex o wamta jakre. Kot ka mẽ nhām mẽ kapêr ò ho Tirtūm mã amnhī jarē nhūm mẽ akwÿjaja mẽ amar kêt jakamā ka mẽ ã akapêr anhÿrja o Kris kôt mẽ ho mẽ hamaxpêr o hihtÿx kêt nē. ãm kapxipix amnhī ma. Rÿ koja kapêr òja mar mex xwÿnhjê hō amar japêr nē mẽ akapêr kām akwÿjê mã harē. Hā koja ja mex nē. Nom kot kaj mẽ apiitā ma mẽ kapêr kām mẽ kām Tirtūm kapêr jarēnh o ri apa nhūm mẽ piitā hprī hā amar mex nē. Nē amar xà hkôt Tirtūm kapêr kôt amnhī nhīpêx mex nē.

⁶ Jakamā e Kris kôt ixtō nē ixtōxjaja. Kot paj apu nhÿrmā ma mẽ awÿr mō hāmri nē nhām mẽ kapêr ò ho mẽ amā ixkapêr japêr ka mẽ inhmar kêt nē. Nom kot paj mẽ akapêr o mẽ amā ixkapêr ka mẽ apiitā aprī hā inhmar mex nē. Pa Tirtūm nhÿ hā mẽ amā mẽmoj jarē rÿ tanhmā kot amnhī nhīpêx toja pa mẽ amā harē. Rÿ Karō nhÿ hā mẽ amā mẽmoj jarēnh o ã mẽ amā Tirtūm kapêr jarēnh anē ka mẽ aprī hā inhmar mex nē.

⁷ Nom mẽ kapêr ò ho mẽ kapêr o mẽ akôt ri mẽ pa xwÿnhjaja te mēhō kot htÿx ri wiorāwti kakrēnh xwÿnh pyrək. Koja htÿx ri hkakrēnh o xa nhūm mẽ tee ri kot grer mar mã. Rÿ nhūm mēhō htÿx ri pifti kakôr o xa nhūm mẽ tee ri mẽmo mẽ grer mar mã.

⁸ Pôristijaja na htem amarī ri tanhmā amnhī nhīpêx to ho pa nhūm mẽ hkrāhtūmja mẽ kām pifti kakô nhūm mẽ kuma nē mẽ pijapu mã hamaxpêr kurê kumrêx nē hwÿr hprôt. Nom koja kawax pē hkakô rÿ htÿx ri tanhmā hkakôr to nhūm mẽ kuma nē ãm kuma.

⁹ Ja pyrā nē kot kaj mẽ kapêr ò ho akwÿjê mã akapêr nhūm mẽ ama nē ãm mẽ ama. Ka te ãm mẽ kām ajakwa momok pyrək o axām o amnhī nhīpêx.

¹⁰ Nē ahpÿnhā mẽ pakapêr xohtôô. Na htem ahpÿnhā mẽ kapêr o amnhī kwÿjê mã kapêr nē axpên mar mex nē.

11 Nom koja mēhō nhỹhỹnh pika hō rŭm ixwÿr mō nē mē kapēr o inh mā kapēr pa mar kêt nē. Nē amnhĩ xwar kutā ixkapēr o kām ixkapēr nhŭm ixpyrà nē inhmar kêt nē.

12 Jakamā kot kaj mē amā Tĩrtŭm Karō xih tÿx xà ho amā tanhmā kām amnhĩ nhĩpêx to ho apa hprām hā kot kaj mē amnhĩ to awÿ nē kām:

–Kwa amnhĩ kôt ijamaxpēr o axihtÿx Tĩrtŭm. Pa anhỹ hā ixkapēr o ma Kris kôt ixkwÿjê ho mē hamaxpēr o ixihtÿx o ri mē hkôt ixpa. Kê mē akapēr ma nē Kris kôt amnhĩ xunhwÿr tÿx nē. Nē hkôt amnhĩ nhĩpêx mex o ri pa. Anē.

13 Nē kēr ka mē nhām mē kapēr ò ho Tĩrtŭm mā amnhĩ jarēnh xwÿnhjaja amnhĩ to Tĩrtŭm Karō wÿ nē kām:

–Ixte mē kapēr ò ho ixkapēr tā ixte amnhĩ mar kêt. Jakamā kwa tanhmā ixto ijamaxpēr mex to pa amnhĩ mar mex nē ixkapēr kām ixprĩ hā Kris kôt ixkwÿjê mā ja jarē kê mē inhmar tÿx nē. Anē.

14 Nom kot paj nhām mē kapēr ò ho Tĩrtŭm mā mex ā harēnh tā amnhĩ mar kêt nē. Te ixpimtir kām ixkarō pix kapēr pyrāk. No kot paj pam amnhĩ krā hkôt ixkapēr o kām mex ā harē hāmri nē ra amnhĩ mar mex nē.

15 Nà ja na inh mā mex jakamā kot paj nhām mē kapēr ò ho Tĩrtŭm mā mex ā harē nē kām gre. Nē määnēn ijamaxpēr xà hkôt ixkapēr o määnēn kām mex ā harē nē kām gre. Nà ja na inh mā mex.

16 Nom kot puj mē ma mē kot Tĩrtŭm kapēr mar xà hā ixkre hwÿr mra nē kamā Tĩrtŭm mā mex ā harē. Tā pa nhām mē kapēr ò ho kām ixkapēr japêr. Ka mē ate inhmar o akrĩ xwÿnhjaja tee ri inhma. Jakamā tee ri inhma nē ixkôt Tĩrtŭm mā akapēr kêt nē. Rÿ kām:

–Nà am hāmri na ā amex ā ajarēnh anē Tĩrtŭm.

Anhÿr o kām akapēr kêt nē. Mē ate inhmaare hā kot ka mē ā kām akapēr anē. Jakamā kot paj ri mē akamā mē kapēr ò ho ixkapēr kêt nē. Am mē akapēr pix o mē anom Tĩrtŭm mā mex ā harē.

17 Kot paj mē kapēr ò ho Tĩrtŭm mā mex o mex ā harēnh mex tā ka mē mēmo mē

kapērja aprĩ hā mar kêt jakamā inhmar pē Tĩrtŭm kôt amnhĩ xunhwÿr tÿx kêt nē.

18 Na pa hte tōhā mē arom nhām mē kapēr ò ho Tĩrtŭm mā amnhĩ jarē. Nom nhÿri ahte nhỹ nē ā kām amnhĩ jarēnh anē. Am hāmri na pre Tĩrtŭm ja kaxyw tanhmā ixto pa hte ā amnhĩ nhĩpêx anhÿr o ri ixpa.

19 Tā na pu htem Tĩrtŭm mā mex o mex ā harēnh kaxyw nē ma mē kot kām amnhĩ jarēnh xà hā ixkreta wÿr axpēn wÿr mra pa mē pikuprōnh xwÿnhjê kapēr o mē kām ixkapēr. Nom kot paj nhām mē kapēr ò ho mē kām ixkapēr ry rax kumrēx tā no nhŭm mē inhmar kêt nē. Nom kot paj mē kapēr o am ixkapēr krānre htā no nhŭm mē inhmar mex kurē kumrēx. Ja na inh mā mex.

20 Kwa mē ixkapēr ma nē mar tÿx nē. Nē mēhprĩrejê jamaxpēr o ajamaxpēr kêt nē. Am Kris kôt mē aptār tŭmjê jamaxpēr o mām kêt mē ajamaxpēr o ri apa. Am mēmoj pixire hkôt kot kaj mē am hāmri te mēhprĩjê jamaxpēr pyrāk o ajamaxpēr. Mēhprĩjaja na htem mēmoj punuj kukamā hamaxpēr kêt nē. Na htem am htÿx pa. Tā kēr ka mē urāk nē mēmoj punuj kukamā ajamaxpēr o ri apa hkêt nē.

21 Annepēm na pre Tĩrtŭm tanhmā Ijaewjê mā kapēr to. Mē kapēr o mē kām kapēr tā no nhŭm mē kuma nē am kuma. Jakamā nhŭm tee ri ja hā mē omu nē amnhĩ tā tanhmā mē harēnh to. Tanhmā mē harēnh toja Tĩrtŭm kapēr ā kagà htŭm kamā na. Kot mē harēnh kot:

E kot paj ma mē hwÿr axtem pika hō rŭm pōristi hkwÿ rē kê mē ma mē hwÿr mra nē mē unē. Hāmri nē amnhĩ kapēr o mē kām kapēr nhŭm mē tee ri mē kuma no am hkôt mēmoj pumunh kêt nē.

Koja mē ā mē hipêx anhÿr tā nhŭm mē arĩ kām ixkapēr mar nē amnhĩ kaxyw ixkôt hamaxpēr prām kêt nē. Anē.

Tĩrtŭm kapēr ā kagà htŭm kot ā mē harēnh kot anhÿr.

22 Jakamā kot kaj mē Tĩrtŭm mā amnhĩ jarēnh xà hā ixkre hwÿr akuprō nē mē kapēr ò ho Tĩrtŭm mā amnhĩ jarēnh japêr. Nhŭm Kris kôt amnhĩ xunhwÿr kêt xwÿnhjaja mē akôt agjê nē hkrĩ nē tee ri mē akapēr ma nē Kris kôt amnhĩ xunhwÿr

kêt nê. Tanhmã kot mẽ amnhĩ to nê hkôt amnhĩ xunhwý? Mẽ kot akapêrta maare hã. No kot ka mẽ akapêr o Tirtũm nhỹ hã mẽ kãm akapêr nhũm mẽhprĩ hã amar mex nê. Jao tanhmã hamaxpêr to nê mẽ apyrã nê Kris kôt amnhĩ xunhwýr japêr.

²³ Nom kot ka mẽ apiitã nhãm mẽ kapêr õ ho Tirtũm mã mex ã harẽ nhũm amarĩ ri mẽ pa xwýnhjaja mẽ awýr agjê nê mẽ akapêr ã mẽ ama nê hã mẽ apumu. Hãmri nê tee ri hamaxpêr nê mẽ akrã pipãnh ã axpên mã mẽ ajarẽ.

²⁴ Nom koja mẽ awýr agjê ka mẽ akatãt kôt mẽ amnhĩ kapêr o Tirtũm kapêr jarênh o akuhê nhũm mẽhprĩ hã mẽ amar mex nê. Hãmri nê amnhĩ kapêr o akapêr ma nê hamaxpêr o:

—Hêxta waa nê. Xep ixte amnhĩ tomnuj xwýnh na pa. Nà ãm hãmri na mẽ Tirtũm kapêr jarẽ. Nà ãm hãmri na kêt ja. Anẽ.

²⁵ Hãmri nê mẽ amã tanhmã kot amnhĩ tomnuj to hã amnhĩ jarênh pa hãmri nê hkaga nê Jejus kôt amnhĩ xunhwý. Nê hkõnkrã ho htêm nê hkrĩ nê Tirtũm mã mex o mex ã harẽ. Hãmri nê mẽ amã:

—Nà ãm hãmri na hte Tirtũm mẽ akamã pa ho pa. Anẽ.

Tirtũm nhõrkwý kamã mẽ pahte tanhmã amnhĩ nhĩpêx to hã mẽ pamã karõ

Atre 2.42, 5.12-13; Eprêw 10.25

²⁶ E Jejus kôt ixkwýjaja. Kot paj hpãnhã axtem mẽ amã mẽmoj tã karõ. Mẽ kot Tirtũm mã amnhĩ jarênh xã hã ixkre kamã tanhmã mẽ ate amnhĩ nhĩpêx to hã karõ ka mẽ inhma.

Nà kêt ka mẽ axpên wýr akuprõ nê akrĩ ka mẽ atõ amã Tirtũm mã mex ã harênh ã mẽ grer o agrer prãm hãmri nê mãmrĩ kãm ho gre. Hãmri nê agrer pa kê apãnhã mẽhõ kãnhmã xa nê Tirtũm kapêr kwý ho mẽ ajahkre. Nê ho anhýr pa nhũm hpãnhã mẽhõ kãnhmã xa nê Tirtũm kot tanhmã ho mex to hã mẽ amã amnhĩ jarẽ. Nê amnhĩ jarênh pa hãmri nhũm mẽhõ nhãm mẽ kapêr õ ho mẽ amã ujarênh japêr. Hãmri nê ujarênh pa kê mẽhõ hpãnhã mẽ akapêr o hprĩ hã mẽ amã kapêrta jarẽ.

E kêt ka mẽ axpên wýr akuprõ nê Kris kôt axpên to axihtýx kaxyw ã axpên pãnhã amnhĩ nhĩpêx anẽ.

²⁷ Nê ka mẽ atõ amã nhãm mẽ kapêr õ ho mẽ kãm akapêr prãm japêr. Nom kêt ka mẽ axohtõ nê ã mẽ kãm amnhĩ nhĩpêx anhýr kêt nê. ãm mẽ atõ wa axkrutre rý axkrunêpxire nê mẽ kapêr õ ho mẽ kãm akapêr. Hãmri nê axpên pãnhã akapêr pa kê mẽhõ kot hprĩ hã mẽ kapêr õta mar japêr nê mẽ apãnhã xa nê mẽ akapêr o mẽ kãm harẽ kê mẽhprĩ hã mar mex nê.

²⁸ Nom koja ja kaxyw mẽhõ amrakati japêr ka mẽ kapêr õ ho akapêr kêt nê. ãm kapxipix nhýri ahte Tirtũm mã akapêr.

²⁹ Nê kê Tirtũm nhỹ hã kapêr jarênh xwýnhjê hõ wa axkrut rý axkrunêpxi nê mẽ ajahkre ka mẽ aprĩ hã mar o akrĩ. Hãmri nê mar pa nê tanhmã mẽ harênh to. ãm hãmri Tirtũm nhỹ hã kapêr ã mẽ harẽ rý ho hêx ã mẽ harẽ.

³⁰ Nê koja mẽhõ Tirtũm nhỹ hã mẽmoj jarênh o xa. Rõm nhũm Tirtũm mẽ kaxyw mẽ atõ mã ajamaxpêr kwý gõ. Ka kapêr o ãm xwýnhta mã kãnhmã anhĩhkra pẽ kê apumu nê anhĩkrê. Hãmri ka hpãnhã xa nê mẽ kãm tanhmã ajamaxpêr tota jarẽ.

³¹ Nom kêt ka mẽ anhĩpê mẽ kãm akapêr hkêt nê. ãm axpên pãnhã Tirtũm kapêr o axpên jahkre nê ho axpên jamaxpêr o axihtýx. Ja mex.

³²⁻³⁴ Nom kêt ka mẽ axpên wýr akuprõ nê apiitã anhĩpê atýx ri akapêr kêt nê. Ja na Tirtũm kêt hprãm nõkati. Mẽ ate axpên pãnhã axpên mã akapêrja na kãm hprãm. Jakamã kê mẽ kot Tirtũm nhỹ hã mẽ kapêr jarênh o pa xwýnhjaja taxy axpên jahkre hã axpên jamã. Nhũm mẽhõ kumrêx kapêr pa hãmri ka hpãnhã mẽ kãm akapêr.

Nê kê mẽnijaja amarĩ mẽ ahkreja mar o hkrĩ. Ijaew kot amnhĩ nhĩpêx xã hkôt. Jakamã kwa mẽ anijaja. Kêt ka mẽ amarĩ akryk mẽ mar o akrĩ nê axpên mã akapêr o akrĩ hkêt nê.

³⁵ No kot kaj mẽ tee ri mẽmoj ma nê mar mex kêt japêr tã hã axpên kukjêr kêt nê. ãm akryk arĩ mar o akrĩ. Hãmri nê akupým anhõrkwý hwýr tẽ nê rĩ kormã hã amjên kukja. Nom kot ka mẽ apikuprõnh xã hã ixkre kamã axpên mã akapêr o akrĩ nhũm mẽ amjênjaja tee ri ja hã mẽ apumu nê hpijaam nê.

³⁶ E na pa ã Tîrtûm mã amnhî jarênh xà hã ixkre kamã tanhmã mẽ pahte amnhî nhîpêx to hã mẽ amã karõ anê. Tã te mẽ apê ja mex kêt pyræk. Kwa mon ka wem ja ma nhũm mẽ apê omnuj nê? Xà mẽ ate Tîrtûm kapêr mar mex o ijakrenh kôt na ka mẽ ã ajamaxpêr anê? Xà na pre Tîrtûm mẽ akumrêx mã kapêr? Hã na ka mẽ ã ajamaxpêr anê? Rỳ xà mẽ kapxipix mã na pre kapêr? Hã na ka mẽ ixkapêr ma nhũm mẽ apê omnuj nê? Nà ixkumrêx na pa pre mẽ awỳr inhmõr nê mẽ amã Tîrtûm kapêr jarênh kênã kot ka kêt mẽ axtem nê ã ajamaxpêr anê.

³⁷ Kot kaj mẽ atõ ã ajamaxpêr anhỳr japêr nê ajamaxpêr o:

—Nà na pre Tîrtûm tanhmã inhmã kapêr to pa ô ri mẽ kãm ixujarênh mex o ri ixpa.

Anhỳr o ajamaxpêr. Rỳ ajamaxpêr o:

—Nà na pre Tîrtûm Karõ mẽ kaxyw tanhmã ixto pa ỳ hã tanhmã mẽ ho mex to ho ri ixpa.

Anhỳr o ajamaxpêr. Kot kaj mẽ ã ajamaxpêr anê hãmri nê mãânên pa ã ixte amnhî nhîpêx anhỳr ã ixpumunh mex kurê kumrêx. Amnhî pyrà nê ixte Tîrtûm nhỹ hã mẽ kãm ixkapêr xwỳnh ã ixpumunh nê hã ijarênh kurê kumrêx.

³⁸ Nom koja ja hã ijarênh kêt ka mẽ ja hã omu hãmri nê tanhmã kot mẽ amã kapêr toja ma nê ãm ama.

³⁹ E Kris kôt ixtõ nê ixtõxjaja. Kêr ka mẽ amnhî to Tîrtûm Karõ wỳ kê ma mẽ ate mẽ kãm Tîrtûm kapêr jarênh o ri apa kaxyw mẽ ato mẽ axihtỳx.

Nê koja mễhõ kãm nhãm mẽ kapêr õ ho kapêr prãm ka mẽ ja nê kãm akapêr kêt nê. Kwãr mãmrĩ ã amnhî nhîpêx anê.

⁴⁰ Nom kêr ka mẽ ate Tîrtûm mã amnhî jarênh xà hã ixkre kamã axpên pãnhã axpên mã akapêr nom anhîpê kãm akapêr hkêt nê.

15

*Kris akupỳm htĩr kumrêx ã harênh
Atre 2.23-36, 10.39-41; Wam Korît 6.14*

¹ E Kris kôt ixkwỳjaja. Kot paj axte mẽ amã Jesus kot mẽ panê tanhmã amnhî nhîpêx to hã harê ka mẽ inhma. Na pa pre ra mẽ amã ja jarê ka mẽ ama nê hkôt

amnhî xunhwỳ. Nê hkôt amnhî nhîpêx mex o ri apa.

² Na pa pre mẽ amã harê ka mẽ amnhî kaxyw kãm ajamaxpêr tỳx nê nhũm Tîrtûm mẽ ato hkra. Tã ka htem arĩ kapêr kôt amnhî nhîpêx mex o ri apa. Koja mễhõ kot Tîrtûm kapêr mar tã amnhî kaxyw hkôt hamaxpêr kêt nê nhũm Tîrtûm tee ri amnhî tã omu nê ho hkra hkêt nê.

³ Na pa pre amnhî krã hkôt mẽ amã tanhmã Kris jarênh to hkêt nê. Ixte kapêr mar xà hkôt na pa hte amnhî xõ ri mẽ amã tanhmã harênh to ho ri ixpa. Jesus jarênhja na mex o kot mẽ ujarênh piitã hakrenh par kumrêx. Tã tãm kot paj mẽ amã harê. Na pre Krisja mẽ pahte amnhî tomnuj pãnhã amnhĩrer kaxyw mẽ panê ty. Tîrtûm kapêr ã kagà htũm kot hkukamã harênh xà hkôt.

⁴ Hãmri nhũm mẽ kên kre kamã haxà nhũm kamã nõr o apkati. Nê axte hã apkati. Hãmri nhũm Tîrtûm akupỳm ho htĩr. Kapêr ã kagà htũm kot hkukamã harênh xà hkôt.

⁵ Tã nhũm Simãw Pêtre kumrêx akupỳm htĩr ã omu nhũm hpãnhã Jesus nhỹ hã mẽ ahkre ho mẽ pa xwỳnh maati jaja haxwỳja omu.

⁶ Hãmri nhũm mẽ kot hkôt mẽ pa xwỳnh pê 500 jakrenh xwỳnh piitã anhîpê haxwỳja akupỳm htĩr kãm omu. Na pre ra mẽ hkwyjaja ty nhũm mẽ hkwyjaja arĩ htĩr nê pa.

⁷ Jakamã nhũm prem ra akupỳm htĩr kãm omu. Hãmri nhũm hpãnhã Xiakreja omu. Nhũm hpãnhã ỳ hã mẽ ahkre o mẽ pa xwỳnh piitã omu. Akupỳm htĩr kãm omu.

⁸ Tã pa na pa pre ijaxwỳja amnhî to hapu nê akupỳm htĩr kãm omu. Te ixpê mẽ hkra kot hapu pyrà nê amnhî to hapu nê omu. Na pre kaxkwa kamã inhmã kapêr o xa pa ixprĩ hã omu.

⁹ No mẽ kot ixpyrà nê Kris nhỹ hã mẽ ahkre ho mẽ pa xwỳnh maati hkwyjaja na mẽ mex o kot ijakrenh. Na pa pre hte mẽ hkĩnhã amnhî tomnuj tỳx nê. Jao Kris pê hkrajê homnuj tỳx o ri ixpa. Tã hkôt amnhî xãm hãmri nê tee ri ã amnhî nhîpêx anhỳr ã amnhî pumu nê amnhî kamã xpijaàm tỳx nê. Jakamã na pa hte Kris nhỹ hã kapêr jarênh o ixpa hã amnhî pumu nê ixte hkôt amnhî xãm kêt ri tanhmã ixte amnhî

nhîpêx toja mã ijamaxpêr nê xpijaàm nê.

¹⁰ Na pa pre amnhî tomnuj tỳx o ixpa htã nhũm Tirtũm arĩ kãm ijapê nê. Nê ixkamã ukaprĩ nê. Pa pre hkôt amnhî xãm nhũm ixto hkra pa ra kãm tanhmã amnhî nhîpêx to mex rãhã ho ixpa. Jakamã na hte tee ri amnhî tã ixpumu nê tanhmã hamaxpêr to hkêt nê. Rỳ hamaxpêr o:

—Hêxta waa nê. Inhmã Pawre japê nê ixte ho mex tã nhũm ixkôt amnhî nhîpêx kêt kumrêx.

Anhỹr o tee ri hamaxpêr kêt nê. Na pa hte kãm tanhmã amnhî nhîpêx to ho ixpa rũnh o ỹ hã mẽ kapêr o pa xwỳnh kwỳjê jakre ho ixpa. Nom amnhî krã hkôt mẽ ahkre hkêt nê. Ja kaxyw na pre Tirtũmja ixto ixihitỳx pa ỹ hã kãm tanhmã amnhî nhîpêx to ho ri ixpa nhũm ja hã ixpumu nê hkĩnh nê.

¹¹ Nê Jejus jarênhja ãm pixii. Axtem hõ hkêt. Nê ỹ hã mẽ ahkre ho mẽ pa xwỳnhjê kapêrja nê pa ixte mẽ amã harênhja kot xpên pyrãk. Harênh tipxi. Kris kot mẽ pahte amnhî tomnuj mỳrapê mẽ panê htyk nhũm Tirtũm kot akupỹm ho htĩr ã wa harênhja na pa hte pix jarênh o ri mẽ akôt ixpa. Ka prem inhma nê amnhî kaxyw hkôt ajamaxpêr tỳx nê.

Tirtũm kot akupỹm mẽ pahto mẽ pahtĩr ã harênh

Rukre 20.37

¹² Nê kwa ra ixte mẽ amã Kris htyk nê akupỹm htĩr ã harênh tã ka xep mẽ akwỳjaja axtem nê mẽ htyk nê akupỹm mẽ htĩr kêt ã mẽ hkamnhĩx o ri apa.

¹³ Kwa mẽ ajamaxpêrja mex kêt. Kêp apu ãm hãmri mẽ ate ã mẽ harênh anhỹr ronhỹx pre Kris haxwỳja akupỹm htĩr kêt nê. Nhỹx pre htyk o ty.

¹⁴ Nê kêp apu Kris akupỹm htĩr kêt ronhỹx pa mẽ ãm mẽ amã kapêr jarênh o ixpa kaprỳ. Ka mẽ ajaxwỳja amnhî kaxyw hkôt ajamaxpêr kaprỳ.

¹⁵ Nê kêp ãm akupỹm mẽ htĩr kêt ronhỹx pa mẽ ixte mẽ amã Tirtũm kapêr jarênh o ri ixpa xwỳnhjaja mẽ amã ho ixêx o ri ixpa. Na pa htem mẽ amã Tirtũm ra kot akupỹm Jejus o htĩr ã harênh o mẽ akôt ixpa. Tã kêp apu akupỹm mẽ htĩr kêt ronhỹx pa mẽ ãm mẽ amã harênh o ixêx.

¹⁶ Nê kêp apu akupỹm mẽ htĩr kêt ronhỹx pre Kris haxwỳja akupỹm htĩr kêt nê. Nhỹx pre ãm amarĩ tyn hapêx.

¹⁷ Nê Kris amarĩ htyk nê hapêx ronhỹx kot pu mẽ ri amnhî kaxyw hkôt pajamaxpêr nê hkôt amnhî xunhwỳr kaprỳ.

Nê Kris amarĩ htyk nê hapêx ronhỹx pre Tirtũm Jejus kukwak ri mẽ panê mẽ pahte amnhî tomnuj o hapêx kêt nê. Nhỹx pu mẽ pahpiitã nhỹrmã ma kuwy hwỳr pajapêx pa.

¹⁸ Nê kêp apu Kris htyk nê hapêx ronhỹx ra mẽ kot amnhî kaxyw hkôt hamaxpêr tã ra htyk xwỳnhjaja ma mẽ kot amnhî tomnuj mỳrapê kuwyta wỳr hapêx.

¹⁹ Nê kêp apu Kris htyk kumrêx nê hapêx ronhỹx pu mẽ kormã pahtyk kêt xwỳnhjaja tee ri amnhî wỳr kamã pajamak o ri papa kaprỳ. Nê pahpê hkra hã amnhî jarênh kaprỳ. Jao pahkaprĩ htỳx o mẽmoj piitã hakrenh par kumrêx nê ri papa.

Kris kumrêx akupỹm htĩr ã harênh

Atre 26.23; Sikũn Korit 4.14; Piripos 3.10-11; Wam Tesarõn 4.15-18; Apokarip 20.1-15

²⁰ Nã mẽ htyk nê nhỹrmã akupỹm mẽ htĩr kêt ã mẽ harênhja kot anhỹr kêt. Ra Tirtũm kot akupỹm Kris o htĩr jakamã koja mããnên hkra htyk xwỳnhjaja nhũm mẽ piitã Jejus pyrã nê nhỹrmã akupỹm mẽ ho htĩr pa. Jakamã na pu htem Kris akupỹm htĩrja mã pajamaxpêr nê amnhî kukamã pajamaxpêr o:

—Nã ra Tirtũm kot akupỹm Jejus o htĩr jakamã koja urãk nê nhỹrmã akupỹm mẽ pahte hkôt amnhî xunhwỳr xwỳnh piitã mẽ pahto mẽ pahtĩr. Nã koja ã mẽ panhîpêx anê. Ja kaxyw àhpumunh tỳx kumrêx xwỳnh kênã. Anê.

²¹ Nê amnepêm na pre Tirtũm my kot waja nhîpêx. Hãmri nhũm kot tanhmã amnhî tomnuj to ho ra mẽ htykja o hkra. Tã nhũm wamta kôt my hõta wamta rom amnhî to mex o mẽ htyk tã akupỹm mẽ ho htĩr o hkra.

²²⁻²³ Tã mẽ pahpê wam my pê Atãw kanrêhã tãmnhwỳ jakamã kot puj mẽ urãk nê nhỹrmã ty. No ãm mããnên mẽ pahpê

Kris kraa. Kris kumrêx na pre akupÿm htîr. Tã koja nhÿrmã akupÿn mẽ pahwÿr wrÿ hãmri nhÿm Tîrtÿmja kot hipêx pyrã nê akupÿm mẽ pahto mẽ pahîr. Mẽ pahte hkôt amnhî xunhwÿr ã mẽ pahpumunh kôt akupÿm mẽ pahto mẽ pahîr pa. No ãm kormã.

Kris nhÿrmã kot mẽ htyk o hapêx ã harênh Juãw 11.25; Rômãn 6.23; Wam Korīt 15.54; Sikÿn Ximotre 1.10; Eprêw 2.14; Apokarip 20.14

²⁴⁻²⁸ Nê koja Kris arî mẽ ho amnhîptâr rãhã nhÿm Tîrtÿm mẽ kot kutã amnhî xunhwÿr xwÿnhjê pê mẽ hihtÿx xã ho hapêx pa. Kapêr ã kagã htÿm kot ja jarênh kot:

Koja nhÿrmã Tîrtÿm Kris kot kãm mẽ ho amnhîptâr kaxyw ãm. Anê.

Jakamã Jejus tapxipix koja mẽ ho amnhîptâr o pa. Koja Tîrtÿm pix mẽ ho amnhîptâr kêt nê. Nom koja pahi hkwyjê hõ axte nhãm mẽ ho amnhîptâr kêt kumrêx.

Tã mẽ kot mẽkarõmnuti hkôt kãm tanhmã amnhî to ho mẽ pa xwÿnhjaja koja Tîrtÿm ma amnhî nê kuwy hwÿr mẽ rênh pa. Nê mẽhtykja o hapêx nhÿm mẽhõ axte htyk kêt kumrêx. Jakamã koja Jejus Kris mẽmoj punuj piitã ho hapêx nê Mẽpahpãm Tîrtÿm nhîhkram akupÿm mẽmoj piitã haxâr pa. Tîrtÿm jamaxpêr xã hkôt ã mẽmoj to anhÿr par anê hãmri nê ìhkram mẽmoj jaxâr pa. Nê mãânên tãm kãm amnhî gõ. Jakamã nhÿm Tîrtÿm tapxipix mẽmoj piitã ho amnhîptâr pa.

Mẽ htyk xwÿnhjê jarênh

²⁹ Nê na hte mẽ pahkwÿjaja kormã kêp Tîrtÿm kra hkêt tã Jejus kôt mẽ kot amnhî xunhwÿr nê mẽ htyk xwÿnhjê mã hamaxpêr o pa. Hãmri nê mẽ kãm nhÿrmã axte mẽ omunh prãm xaj mẽ urak nê Jejus kôt amnhî xunhwÿr nhÿm mẽ hkrã kumrã. Tã akupÿm mẽ htîr kêt ronhÿx mẽ ãm ã pajamaxpêr anhÿr kaprÿ.

³⁰ Nê paa. Na pa hte ma mẽ kãm Tîrtÿm kapêr jarênh o ri mẽ hkôt ixpa. Nhÿm mẽ hkwyjaja ja hã inhma nê ixkamã gryk nê ixtã amÿnê pa mẽ mÿrapê ixpunuj nê ri ixpa. No ãm amnhî to htÿx nê arî ri mẽ kãm Kris kapêr jarênh o ri mẽ hkôt ixpa. Tã kêp

ãm nhÿrmã akupÿm ixtîr mã kêt ronhÿx pa tee ri ã amnhî nhîpêx anhÿr o ri ixpa kaprÿ.

³¹ Na htem apkati mẽ ixtã tanhmã àmnênh to ho ri pa. ãm hãmri na pa mẽ amã ã mẽ harênh anê. Nom na pa hte tee ri amnhî kukamã ijamaxpêr o ri ixkaprî nê ixpa hkêt nê. Mẽ kot ixpîr mã tã pa hte mẽ ate Pahihti Jejus Kris kôt amnhî nhîpêx mex ã mẽ apumunh kôt ixkînh nê ri ixpa. Nhÿm te ixkamã mẽmoj kêt pyrak pa hte ri ixpa.

³² Na pa hte jar Epes kamã mẽ oprê xwÿnhjê kutã amnhî to htÿx pê mẽ kãm Jejus kapêr jarênh o ri mẽ hkôt ixpa nhÿm mẽ kãm mar prãm kêt jakamã hã ixtomnuj tÿx nê. No nhÿrmã ixyk nê akupÿm ixtîr mã kêt ronhÿx pa mẽ kêp Kris kwÿ hkêt xwÿnhjê jamaxpêr o ijamaxpêr nê mẽ urak nê ijamaxpêr o:

Ixte ixyk ã arîgro pumunh kêt jakamã kot paj mãmrî mẽmoj piitã hkur o ri ixpa.

Nê mãmrî mẽmoj piitã ho ixkõm o ri ixpa.

Nê mãmrî mẽmoj piitã ri tanhmã ho ho ri ixpa.

Ixyk nê axte ixte ã amnhî nhîpêx anhÿr o ixpare kaxyw ã.

Anhÿr o nhÿx pa ijamaxpêr o ixpa. Kêp ãm Tîrtÿm kot akupÿm mẽ pahto mẽ pahîr mã kêt ronhÿx pu mẽ ã mẽ kêp Kris kwÿ hkêt xwÿnhjê jamaxpêr anhÿrja kôt pajamaxpêr pix o ri papa. No ãm ja kot anhÿr kêt.

³³ Na htem mẽmoj jarênh o:

–Mẽ kot htÿx ri amnhî tomnuj xwÿnhjê hkôt ri mẽ pa xwÿnhjaja koja mẽ gaa nê mẽ kot amnhî nhîpêx kôt amnhî nhîpêx o ri pa. Anê.

ãm hãmri na ã mẽ harênh anhÿrja. Jakamã kwa mẽ okora. Kêr ka mẽ ã amnhî nê mẽ kot amnhî nhîpêx anhÿr o mẽ pa xwÿnhjê pumunh mex o ri apa.

³⁴ Kwa mẽ tokyx mẽ ate tanhmã amnhî tomnuj to hã amnhî pumu nê axte ã amnhî nhîpêx anhÿr kêt nê. Nê mẽ ate Tîrtÿm kot akupÿm mẽ ho htîr kêt ã harênh xwÿnhjaja. Te mẽ ate Tîrtÿm kot amnhî nhîpêx ã omunh kêt pyrak. Tã mẽ ate tokyx ja hã amnhî pumunh nê amnhî kamã apijaam kaxyw na pa ã mẽ amã ixkapêr anê.

Mě panhĩ nyw jarěnh

Rukre 20.34-36; Rōmān 8.10-11; Sikūn Korit 5.1; Piripos 3.20-21

³⁵ Ně mǎn ka mẽ atō akupỹm mẽ htĩr ā mẽ harěnh ma ně tee ri mẽ hkukamā ajamaxpěr ně hā ri tanhmā axpěn kukjêr to ně axpěn mǎ:

—Kwa tanhmā koja we Tĩrtũm akupỹm hkra htyk xwỹnhjê ho htĩr to? Ra mẽ htyk ně mẽ ĩ katōk ně hapêx par mǎ kēnǎ. Tanhmā kot wem amnhĩ to ně akupỹm htĩr? Ně tanhmā koja we mẽ ĩ nywja kute wehe? Aně.

³⁶ Nǎ na ka mẽ atỹx ri ā ajamaxpěr aně ně tee ri mẽ hkukamā ajamaxpěr. E kot paj ixprĩ hā ja hā ejêp jarě ka mẽ inhma. Nǎ na htem mẽmo y hkre. Te mẽ kot mẽ htyk jaxàr pyrāk o hipêx ně hkre nhũm hikwỹ ně gaa ně higrōt hapōj. Nom te kêp mẽmo yta pyrāk kêt.

³⁷ Ām hy pix na htem hkre. No higrōt kre hkêt ně. Rỳ tanhmǎn pǎr nywja kre hkêt ně. Ām hy pix na htem hkre. Tǎ nhũm higrōt hapōj ně hprêk ně gaa ně ô.

³⁸ Tĩrtũm na hte hamaxpěr xà hkôt tanhmā ho nhũm higrōt hapōj ně hprêk ně ô. Tǎ ja pyrà ně kot puj mẽ Tĩrtũm jamaxpěr xà hkôt pahtyk tǎ koja akupỹm mẽ pahto mẽ pahtĩr ně mẽ pamā mẽ panhĩ nyw gō.

³⁹ Ně mẽmo hy piitǎ te kot axpěn pyrāk kêt. Ahpỹnhǎ na. Ja pyrà ně ahpỹnhǎ ri mẽmoj piitǎ ĩ. Na axtem mẽ panhĩ ně axtem mry nhĩ ně axtem àk nhĩ ně axtem tep nhĩ. Měmoj piitǎ ahpỹnhǎ ri ĩ.

⁴⁰⁻⁴¹ Ně kaxkwa kamā haxwỳja mẽmoj piitǎ ahpỹnhǎ no ām muxre. Myytija mex. Ně mytwrỳreja axte mǎ no ām haxwỳja mex. Ně kanhêti haxwỳja mex. Haxwỳja axte mǎ. Kamā hkwy hpôk kryre ně kamā hkwy hpôk rũnhti no ām piitǎ mex.

Ně jar pika ja kamā haxwỳja mẽmoj piitǎ mex. No ām te kot kaxkwa kamā mẽmoj jarir xwỹnhja mex pyrāk kêt. Axtem na raa.

⁴² Tǎ koja mẽ panhĩ nywja haxwỳja axte mǎ. Te kot panhĩ htũm pyrāk kêt. Na htem ty nhũm mẽ ma mẽ o mra ně mẽ hagdê. Nhũm mẽ hikwỹ ně gaa ně ĩ rerek ně hapêx. Tǎ koja Tĩrtũm akupỹm tanhmā mẽ pahto mẽ pahtĩr to pu mẽ hpǎnhǎ pamex kumrêx.

Hāmri ně axte mǎ mẽ panhĩ nyw mex o mex jakamā koja axte htyk ně ĩ rerek kêt ně.

⁴³ Na htem ty nhũm mẽ hagdê nhũm htyk xwỹnhja tanhmā amnhĩ to hkêt ně amarĩ hikwỹ. Omnuj ně ĩ nhenhek ně hikwỹ. Tǎ koja Tĩrtũm akupỹm mẽ ho mẽ htĩr ně mẽ kām mẽ ĩ nyw gō nhũm mẽ hpǎnhǎ mex kumrêx ně hihtỹx ně Tĩrtũm nhō krĩ kamā pa ho pa.

⁴⁴ Mě htyk nhũm mẽ kot mẽ hagdênh xwỹnhjaja na htem arĩ ĩ htũm ā hikwỹ. Ām jar pika ja pix kām ri mẽ papa kaxyw na mẽ panhĩ htũmja. No mẽ panhĩ nywja axtem Tĩrtũm nhō krĩ kamā ri mẽ papa kaxyw jakamā koja mẽ panhĩ nywja axte mǎ. Tĩrtũm Karō koja mẽ pamā kugō.

Mě panhĩ nyw te kot Kris nhĩ pyrāk ā harěnh

Rukre 20.34-36

⁴⁵⁻⁴⁶ Ně Tĩrtũm kapěr ā kagà htũm kot Atǎw jarěnh kot:

Na pre Tĩrtũm my kot wa Atǎwja nhĩpêx. Jakamā Atǎw kêp pika nhō xwỹnh na pre. Aně.

Ā Atǎw jarěnh kot anhỹr. Ja pyrà ně na pu htem pakatorxà nhōhy rũm pajapōj ně Atǎw pyrà ně pahpê pika nhō xwỹnh. Tǎ nhũm Atǎwja pa ně gaa ně hpigêt ně ty. Jakamā kot puj mẽ urāk ně papa ně gaa ně ty. Nom nhũm Krisja Atǎw kurom kêp akupỹm mẽ ho mẽ htĩr xwỹnh jakamā kot puj mẽ pahpê hkwyjaja Atǎw pyrà ně nhỹrmā mẽ pahtyk tǎ nhũm Kris akupỹm mẽ pahto mẽ pahtĩr. Hāmri nhũm Tĩrtũm Karō mẽ pamā mẽ panhĩ nyw gō pu mẽ axte pahtyk kêt ně. Pǎnhǎ axte mǎ mẽ pahpê kaxkwa nhō xwỹnh.

⁴⁷ Ně Atǎw na pre Tĩrtũm pika ho hipêx ně ho htĩr nhũm ri pa. Nom Kris na pre Atǎw rom kaxkwa rũm mẽ pahwỳr wrỳ.

⁴⁸ Tǎ mẽ pahpê pika nhō xwỹnhjaja te mẽ pahpê Tĩrtũm kot wam my nhĩpêx xwỹnhja pyrāk. No mẽ pahte kaxkwa hwỳr ma papa mǎ xwỹnhjaja te mẽ pahte kaxkwa rũm my kot mẽ pahwỳr wrỳk xwỹnh Krista pyrāk.

⁴⁹ Tǎ kormā mẽ pahpê pika nhō xwỹnh jakamā te mẽ pahpê my pika ho hipêx xwỹnhja nhĩ pyrāk. Nom kot puj mẽ nhỹrmā ty hāmri ně hpǎnhǎ te pahpê

kaxkwa rûm my kot mẽ pahwÿr wrÿk xwÿnhnta nhÿ pyræk.

Axte mẽ pahtyk kêt kumrêx ã mẽ pajarênh

Juãw 11.25; Sikûn Korît 5.4; Wam Tesarôn 4.13-18

⁵⁰ Nê kot puj mẽ panhÿ htûm rãhã Tÿrtûm nhõ krÿ hwÿr paxàpir kêt nê. Panhÿ htûm na hte ty nê rerek nê hapêx. Jakamã koja Tÿrtûm Karõ mẽ pamã mẽ panhÿ nyw gõ pu mẽ rÿ kormã ma õ krÿ hwÿr pajapêx pa nê kamã papa ho papa.

⁵¹⁻⁵² E mẽ inhma. Na pre kormã Tÿrtûm mẽ amã mẽmoj to amnhÿrÿt kêt tâ ra inhmã ho amnhÿrÿt. Jakamã kot paj ÿ hã mẽ amã harê ka mẽ inhma. Nã kot puj mẽ pahpiitã mẽ pahtyk kêt nê. Koja nhÿrmã Tÿrtûm kapêr o mẽ wrÿk xwÿnhjê hõja mẽ pamã pifti kakõ. Mẽ pajaêr pê hkakõ. Hãmri nhÿm Tÿrtûm kra ra mẽ htyk nê mẽ hikwÿ xwÿnhjaja akupÿm ÿ nyw o htÿr kurê kumrêx. Nê kormã mẽ pahtyk kêt xwÿnhjaja kot pu mẽ mẽ pahtyk kêt ri mẽ uræk nê panhÿ nyw kurê kumrêx. Hãmri pu mẽ pahpiitã pahtÿr o pahtÿr tûm nê papa.

⁵³ Koja Tÿrtûm mẽ panhÿpêx o te mẽ pahte paxê htûm o papinhÿpanh nê hpãnhã paxê nyw jagjênh pyræk. Jao mẽ panhÿ htûm o hapêx nê hpãnhã mẽ pamã mẽ panhÿ nyw gõ pu mẽ axte pahtyk kêt kumrêx nê ri papa ho papa.

⁵⁴ Tÿrtûm kapêr ã kagà htûm kot ja jarênh kot:

Na ra Tÿrtûmja mẽhtyk ho hapêx pa. Anê. Te ra kot ho hapêx par pyræk o ã harênh kot anhÿr. No ãm kormã. Jakamã kot puj mẽ nhÿrmã panhÿ nyw nê ri papa nê mẽ pahtõ axte pahtyk kêt kumrêx.

⁵⁵ Mẽ pahtykja te mẽ kot makre par nhÿm axte kot mẽ hkamnhwÿr kêtja pyræk. Urà nê koja Tÿrtûm akupÿm mẽ pahto mẽ pahtÿr pu mẽ axte pahtyk kêt nê. Nê axte ri pamã ma hkêt nê papa. Nê axte paxà hkêt nê.

⁵⁶ Tÿrtûm kapêr ã kagà htûmja ã mẽ pakukamã mẽ pajarênh kot anhÿr. Mẽ pahte amnhÿ tomnuj xwÿnh jakamã kot puj mẽ nhÿrmã ty.

⁵⁷ Nom nhÿm Tÿrtûm àhpumunh tÿx o àhpumunh tÿx jakamã na hte Pahihti Jejus Kris kukwak ri mẽ pahte hkôt amnhÿ

xunhwÿr xwÿnhjê nê mẽ pahte amnhÿ tomnuj rênh pa. Pu mẽ nhÿrmã mẽ pahtyk tâ nhÿm akupÿm mẽ pahto pahtÿr.

Mẽ pahte Jejus mã tanhmã amnhÿ nhÿpêx mex to hã mẽ pamã karõ

Karatas 6.9; Korosê 1.10

⁵⁸ Jakamã e kwa Jejus kôt ixkwÿjaja. Kêr ka mẽ arÿ Pahihti Jejus kôt mãn amnhÿ xunhwÿr tÿx rãhã ho ri apa. Nê kapêr kôt pix mã ri amnhÿ nhÿpêx rãhã nê kãm tanhmã amnhÿ nhÿpêx mex to ho ri apa. Kot kaj mẽ ã amnhÿ nhÿpêx anê hãmri nê kãm tanhmã amnhÿ nhÿpêx to kaprÿ ho ri apa hkêt nê. ãm hãmri kãm mẽmoj to anhÿr mex rãhã ho ri apa.

16

Mẽ kêp amrakati xwÿnhjê jarênh

Atre 11.27-30; Rômãn 15.25-27; Sikûn Korît 8.1-24, 9.1-5; Wam Ximotre 6.18

¹ Nê na pa pre krÿ pê Karatas kamã tanhmã Jerujarê kamã Kris kwÿjê jarênh to. Ijaew kwÿ kot mẽ pahpyrà nê Jejus kôt amnhÿ xunhwÿr ã mẽ harê nê mẽ kêp amrakati hã mẽ harê hãmri nê mẽ kãm:

—E. Kwa kêr ka mẽ kãm mẽ akàxpore hkwy ho akuprõ nê ma mẽ hwÿr amê.

Anhÿr o mẽ kãm ixkapêr. Jakamã kwa kêr ka mẽ uræk nê mẽ kaxyw mẽ kãm kàxpore hkwy ho akuprõ.

² Mẽ panhõ arÿgromnu pê sap ã hkwy ho akuprõ. Kot kaj mẽ akàxpore rax japêr nê mẽ kaxyw hkwy ho rax nê axi. Nom kot kaj akàxpore grire japêr nê mẽ kaxyw mẽ kãm ho grire nê agõ. Kêr pa mẽmo arÿgro hã ma mẽ awÿr mõ ka mẽ ra mẽ kaxyw ho apikuprõnh rax nê.

³ Nê ma mẽ kot mẽ kãm ho mõi mã xwÿnhjaja ka mẽ ixkutêp mẽ akwÿjê rê. Kêr pa põi nê mẽ omu hãmri nê mẽ kaxyw kagà nhÿpêx nê kamã mẽ harê. Nê mẽ kãm kugõ nhÿm mẽ ma Jerujarê hwÿr kàxpore mẽ ro hã amnhÿ kôt o mõi nê mẽ kãm kugõ. Mẽ kot kamã harênh nê mar hãmri nê mẽ kamjaja mẽ ate mẽ kaxyw mẽ rênh ã mẽ ajarênh ma.

⁴ Rÿ kot ka mẽ amã mẽ hkôt inhmênh prãm nê mãmrÿ mẽ hkôt inhmê pa ma mẽ hkôt mõi.

Pawre kot amnhÿ kukamã amnhÿ jarênh Atre 19.21-22

⁵ Nom kot paj tokyx mẽ awÿr inhmõr kêt nẽ. Kot paj ja rũm ixkato nẽ hpãnhã ma pika pê Masetõn wÿr mõ. Hãmri nẽ mẽ hkõt ixpa grire nẽ ma kormã mẽ awÿr Korīt wÿr mõ.

⁶ Hãmri nẽ pøj nẽ mẽ akõt ri ixpa ryy nẽ. Nẽ ixtã amgrã pixi nẽ hapêx nẽ rĩ kormã ma axte nhãm krĩ hõ hwÿr mõ. Nẽ inhnojarêt ka mẽ ixto Tĩrtũm wÿ nẽ inhmã ixàpkur xà hkwȳ gõ pa ma mẽ hwÿr pry hã hkur o mõ.

⁷ No ixte mẽ awÿr ixpõx nẽ tokyx mẽ akurũm ixkator nẽ hpãnhã ma nhãm krĩ hõ hwÿr inhmõrja na inhmã hprãm kêt. Jakamã koja Tĩrtũm kãm ja mex pa arĩ ri mẽ akõt ri ixpa hã ixtã mytwrÿ xohtõ nẽ tokyx ma nhãm inhmõr kêt nẽ.

⁸ Kot paj kormã jar Epes kamã ri ixpa rãhã nhũm mẽ hkĩnh pê Pêtekos kato nẽ hapêx pa rĩ kormã ma Masetõn wÿr mõ.

⁹ Na pa hte jar kormã mẽ kãm Jejus kapêr jarênh o ri mẽ hkõt ixpa nhũm mẽ ohtõ nẽ inhmar o pa. Mẽ kãm mar prãm. Tã no nhũm mẽ hkwȳjaja ohtõ nẽ mẽ kêp ja omnuj nẽ nhũm mẽ hã ixkamã gryk nẽ ixtomnu o pa.

*Mẽ kot Ximotre ho mex ã mẽ harênh
Hapuhã Juãw 5*

¹⁰ Nẽ kwa koja Ximotre mẽmo arĩgro hã mẽ awÿr pøj ka mẽ omu nẽ ho mex nẽ. Nẽ mẽ amnhĩ nhõrkwÿ hwÿr awÿ kê mẽ akutã apkur o pa. Na hte ixpyrà nẽ Pahihti Jejus mã tanhmã amnhĩ nhĩpêx to mex o pa.

¹¹ Kormã mẽ pahkĩnhã nyw tã kêr ka mẽ tee ri ja hã omu nẽ ri axpên mã tanhmã harênh to hkêt nẽ. Mẽ ãm akapêr mex pix o kãm akapêr. Nẽ koja akupÿn nojarêt ka mẽ pry hã kãm apkur xà hkwȳ gõ kê mex pê man akupÿn ixwÿr mõ pa tokyx omu. Kot paj jar mẽ pahkwÿjê mẽ akupÿn hpõx kamã ijamak o ixpa.

¹² Nẽ na pa hte xatã jar mẽ pahtõ Aporja ma mẽ awÿr mõr kaxyw mẽ awÿr hano. Kot jar mẽ pahtõ hkwȳjê mẽ ma mẽ awÿr mõr kaxyw. Nom kormã. Koja xep mẽ jar tanhmã amnhĩ to hpa nẽ rĩ kormã ma mẽ awÿr mõ.

Kagà jatur xà kamã Pawre kot mẽmoj tã karõ

Epes 6.10-12; Sikũn Ximotre 1.7; Wam Pêtre 5.8-9

¹³ E kwa kêr ka mẽ arĩ amnhĩ wÿr Jejus kamã ajamak rãhã ho ri apa. Nẽ hamãr pê kutêp tãm amnhĩ nhĩpêx o ri apa. Nẽ amnhĩ kaxyw hkõt ajamaxpêr tÿx rãhã nẽ.

¹⁴ Nẽ mẽ amã axpên kĩnh pê tanhmã axpên to mex to.

¹⁵ Mãn ka mẽ ra Estepti mẽ hkwȳjê jarênh ma. Mẽ hkumrêxjaja na prem pika pê Gres kamã Kris kõt amnhĩ xunhwÿ. Tã xep mẽ ra Kris kõt hkwȳjê ho mex o ri mẽ hkõt pa.

¹⁶ Kêr ka mẽ ã mẽ kot amnhĩ nhĩpêx anhÿr xwÿnhjê kapêr ma nẽ hkõt ri amnhĩ nhĩpêx o ri apa. Mẽ kot Kris mã mẽ ajamãr xwÿnh piitã kêr ka mẽ kapêr ma nẽ mẽ hkõt ri amnhĩ nhĩpêx mex nẽ.

¹⁷ Nẽ ota Estepti nẽ Akajkre nẽ Putunatretra na mẽ ra jar pøj. Pa mẽ Sostenes mẽ wa mẽ omu nẽ wa ixkĩnh nẽ. Te ixte mẽ apumunh nẽ ixkĩnh tÿxta pyrãk.

¹⁸ Na xep prem ma mẽ awÿr mõ nẽ tanhmã mẽ amã kapêr to ka prem mẽ ama nẽ akĩnh nẽ. Tã mẽ ra amnẽ ixwÿr mõ nẽ tanhmã inhmã kapêr mex to pa mẽ kuma nẽ ijaxwÿja ixkĩnh nẽ. Kwa kêr pu mẽ ã mẽ kot mẽ panhĩpêx anhÿr xwÿnhjê ho mex o papa.

¹⁹⁻²⁰ Nẽ ota jar pika pê As kamã Kris kõt mẽ pahkwÿjaja piitã mẽ awÿr hpêr mẽ. Nẽ Akir mẽ hprõ Prisireja wa. Nẽ wa õrkwÿ kamã mẽ kot Tĩrtũm mã amnhĩ jarênh kaxyw mẽ pikuprõnh xwÿnh piitã mẽ awÿr hpêr mẽ.

Nẽ kêr ka mẽ nhÿri axpên pumu nẽ mẽ apê Kris kõt mẽ ate axpên to atõ nẽ atõx ã axpên mã akapêr mex nẽ akĩnh nẽ.

²¹ E kot paj kagà jatur xà kamã inhĩhkra ho mẽ amã amnhĩ nhĩxi nhĩpêx ka mẽ omu. Koja inhmã ixkapêr ã kagà xwÿnhhta ja hã kagà hkêt nẽ. Pa kot paj hipêx. Ixpê Pawre na pa ã amnhĩ nhĩxi nhĩpêx anẽ ka mẽ omu.

²² Nẽ kwa kêr ka mẽ arĩ amã Pahihti Jejus kĩnh o ri apa. Koja mẽhõ kãm hkĩnh kêt hã koja Tĩrtũm ja hã homnuj tÿx kumrêx.

E “maranat.” Mẽ pakapêr kãm na htem maranat jarênh o: “Kwa tokyx akupÿn mẽ ixwÿr wrÿ Pahihti.” Anẽ.

²³ E kê Pahîti Jejus Krisja mẽ ato mex mẽ
mẽ akutã nojarêť rãhã ho pa.

²⁴ Ixpyrà mẽ mẽ apê Jejus Kris kwỳ
jakamã na pa hte inhmã mẽ akĩnh mẽ.

Tã ãm ja pix. Ixpê Pawre na pa ã mẽ awỳr
kagà nhĩpêx mẽ mẽnh anẽ.

Sikūn Korīt
Pawre wam Korīt kām Jejus
kôt hkwỳjê hwỳr kagà nē
mēnh kôt kagà hō mēnh

Pawre na pre kagàja nhīpêx. Kêp mry hkà ho ixkre nhīpêx nē ho wēnê ho pa xwỳnh na pre. Tā hpānhā kêp Jejus nhỹ hā hkrajê jahkre ho pa xwỳnh. Jakamā na pre kagàja nhīpêx nē Korīt kām mē kot Jejus kôt amnhĩ xunhwỳr xwỳnhjê hwỳr kumē. Na pre ra mē hwỳr wamta nhīpêx nē kumē. Wam kagà nhīxi pē Wam Korīt. Tā axte hkôt ja nhīpêx nē mē hwỳr mēnh jakamā kagà nhīxi pē Sikūn Korīt.

Na pre Korīt kām Jejus kôt mē htōjê hō axtem nē nā puro kamā hpijaàm kêt o pa nhūm Pawre tee ri harēnh ma nē mē hwỳr wam kagàta mē nē kamā tanhmā mē kot hipêx to hā mē kām karō. Tā kagà ja kamā axte tanhmā hā mē kām karō hto.

Na pre ra Korīt wỳr mē kêp Kris nhỹ hā mē ahkre hā amnhĩ to hêx xwỳnhjaja mē hwỳr pōj nē tanhmā mē kām kapêr jarēnh to ho mē hkôt pa. Nē tanhmā mē kām Pawre ho hêx to. Jakamā nhūm kagàja kamā tanhmā mē kām amnhĩ tā àprār to nē kām mē hkĩnh tỳx ā amnhĩ jarē. Ā na pre Pawre mē kām mēmoj jarēnh nē hā kagà anē. Nē mē kām hā kagà ho:

¹ Pa Korīt kām Tirtūm krajaja. Xà mē apiitā mē amex na ka mē apa? E ot pa mē awỳr kagà nhīpêx nē kumē. Mē amā nē mē anhō pika pē Gres kamā Tirtūm krajê mē mē ato ixpimràatā mē awỳr hipêx nē kumē. Ixpê Pawre na pa hte Tirtūm jamaxpêr xà hkôt ma Jejus Kris nhỹ hā krī piitā hkôt hkrajê jahkre ho ri ixpa. Tā Kris kôt mē pahtō Ximotre mē wa mē awỳr hipêx nē kumē.

² E kê Mēpahpām Tirtūm mē Pahihti Jejus Kris wa mē ato mex rāhā ho pa. Nē mēmoj to mē akutā nojarêt rāhā ho pa. Ka mē wa kukwak ri ajamakêtkati nē amex nē ri akĩnh nē apa ho apa.

Pawre kām amnhĩ xà htỳx kamā hamak pyma hkêt ā harēnh

Rōmān 1.11-12; Korosē 1.11; Sikūn Tesarōn 2.16

³⁻⁴ Nā Tirtūm kêp mē panhō Pahihti Jejus Kris nhīpêxà na. Nē kêp Mēpahpām maati jakamā na hte mē pakamā ukapri nē tanhmā mē pahto mex to ho pa. Kot puj mē mēmoj tā tanhmā amnhĩ to nē pahkapri nē ri papa nhūm ja hā mē pahpumu hāmri nē hamaxpêr pix o akupyēm mē pahto mē paxihtỳx. Mēmo kaxyw na hte ā mē pahto mex anē? Nā mē pahte amnhĩ tā omunh nē amnhĩ pyrāk mē hkapri nē ri mē pa xwỳnhjê jamaxpêr o hihtỳx o mē hkôt papa kaxyw. Ja kaxyw na hte mē pajamaxpêr o hihtỳx. Jakamā kwa pu mē kām mex o mex ā mǎn harēnh rāhā ho pa.

⁵ Na htem tōhā ixto Kris nhīpêx pyrā nē tanhmā ixto pa amnhĩ xà htỳx kamā ijamak o ri ixpa. Tā nhūm Tirtūm inhīpêx o te Kris nhīpêx pyrā nē hamaxpêr pix o tanhmā ixkrā hto pa mē kutā amnhĩ to htỳx nē arī mē hkôt ixpa.

⁶⁻⁷ Na pa hte mē amā Kris kapêr jarēnh o ixpa. Mē ate inhmar nē hkôt amnhĩ nhīpêx kaxyw. Jakamā na hte mē kām Tirtūm kapêr mar prām kêt xwỳnhjaja tōhā mē atā ixtomnuj nē pa amnhĩ xà htỳx kamā ijamak o ri ixpa. Tā kwār mē māmri ā inhīpêx anē. Mē ate Jejus kôt amnhĩ xunhwỳr tỳxja na inhmā hprām. Na htem tanhmā Kris ā inhīpêx to nhūm Tirtūm mē hā ixpumu nē tanhmā ixkrā hto pa inhmā amnhĩ xà htỳx kamā ijamak pyma hkêt nē ixpa. Nē arī mē hkôt mē kām kapêr jarēnh rāhā ho ri ixpa. Na hte Tirtūm amarī ā inhīpêx anhỹr kêt nē. Mē ate ā kot inhīpêx anhỹr ā ixpumunh nē ixpyrā nē amnhĩ kaxyw kām ajamaxpêr tỳx kaxyw na hte ā inhīpêx anē. Mē ate ja hā ixpumunh nē ā ajamaxpêr anhỹr kaxyw nē mē ajamaxpêr o:

—Nā kot pa nhỹrmā Pawre pyrā nē tōhā mē mỳrapê amnhĩ xà htỳx kamā ijamak o ixpa. Hāmri nhūm Tirtūm ja hā ixpumu nē te ho Pawre nhīpêx pyrā nē tanhmā ixto pa inhmā amnhĩ xà htỳx kamā ijamak pyma hkêt nē ixpa. Nā koja ā inhīpêx anē.

Anhỹr o mē ajamaxpêr kaxyw na hte Tirtūm mē kutā ixto ixihtỳx. Mē ate ja hā ixpumunh nē akupyēm tām ajamaxpêr

pê Karō nhỹ hã amnhĩ to axihtỳx kaxyw. Jakamã na pa tee ri mẽ akukamã ijamaxpêr kêt nê.

Tĩrtũm kêp mẽ papytâr xwỳnh ã harênh

⁸ E Kris kôt ixkwỳjaja. Kot paj ixprĩ hã mẽ amã tanhmã amnhĩ jarênh to ka mẽ inhma. Na pa pre ma pika pê As wỳr mō nê mẽ kãm Jejus kapêr jarênh o ri mẽ hkôt ixpa. Hãmri nhũm mẽ hkwỳjaja ja hã ixtomnuj tỳx nê pa amnhĩ xà htỳx kamã ijamak pê mẽ hkôt ixpa. Kironhỳx pa pre mẽ kamã ty.

⁹ Na pa pre tee ri amnhĩ kukamã ijamaxpêr o:

—Koja pêr mẽ ixpĩ. Tanhmã kot pa we amnhĩ to nê tokyx mẽ kêp amnhĩ pytã? Kot paj tee ri inhma mẽ kêp amnhĩptâr prãm. Tĩrtũm pix na ja kaxyw mẽ kutã àhpumunh tỳx. Rỳ nhũm mẽ kot ixpĩr tã nhũm kot akupỳm ixto ixtĩr kaxyw tapxipix na àhpumunh tỳx. Nà kot paj amnhĩ kaxyw tapxipix mã mãn ijamaxpêr o ri ixpa nhũm amnhĩ tã ixpumu nê hkĩnh nê. ã ixte amnhĩ nhĩpêx anhỳr o ixpaja na kãm hprãm. Anê.

¹⁰ Tã nhũm pre ã inhĩpêx anê nê xatã mẽ kêp ixpytâr o ixkôt pa. Koja ã mẽ kêp inhĩpêx anhỳr rãhã ho pa. Nà ã kot inhĩpêx anhỳr mã kênã.

¹¹ Nom kwa kêr ka mẽ apiitã arĩ ixto Tĩrtũm wỳr rãhã ho ri apa kê mẽ ama nê mẽ kãm ixkurê xwỳnhjê kutã ixto ixihtỳx rãhã ho pa. Nê ixto mex rãhã nê. Hãmri nhũm mẽ ohtô nê kot mẽ kêp tanhmã ixpytâr to hã ixtã omu nê ixtã kãm mex o mex ã harê.

Pawre kot mẽ kãm amnhĩ tã aprãr ã harênh

Wam Korīt 2.1-5

¹² Nê na xep pre atar Kris kôt mẽ pahkwỳjaja tanhmã ixto kapêr punuj to nê Jejus kot mẽ awỳr inhmênh kêt ã mẽ amã ixto hêx. Nê ijakwa nhĩkjê ho inhma mẽ akĩnh nê ijakwa nhĩkjê ho mẽ ato ixkapêr punuj ã ijarênh o ri pa. Nom ixte ã amnhĩ nhĩpêx anhỳr kêt. Aa ixte tanhmã mẽ ano kupyrr to hkêt. ãm hãmri na pa mẽ amã amnhĩ jarê nê tãm mẽ amã ixkapêr o ri ixpa nê tãm ri mẽ anhĩpêx o ri ixpa. No ijamaxpêr tũm kôt tanhmã mẽ anhĩpêx to hkêt nê. ãm Tĩrtũm kot mẽmoj to mẽ pakutã nojarêr ã omunh xà hkôt pix mã na pa hte

ỹ hã mẽ ato mex o ri ixpa. Ijamaxpêr nyw o. Na pa hte Tĩrtũm pyrã nê mẽ piitã mẽ ho mex nê. No mẽ kajaja ixpyrãn mẽ apê hkra jakamã na pa hte mẽ ato mex kumrêx o ri ixpa.

¹³ Na pa hte mẽ amã kagà hkwy nhĩpêx nê ixprĩ hã mẽ amã tanhmã mẽmoj jarênh to. Mẽ ate kamã harênh nê mar mex kurê kumrêx kaxyw. No na pa hte mẽ amã tanhmã ixêx to rỳ tanhmã mẽ ano kupyrr to hkêt nê.

¹⁴ ã ixte amnhĩ nhĩpêx anhỳr o ri ixpa htã kormã mẽ apiitã ja hã ixpumunh mex kêt nê. Nê Jejus kot mẽ awỳr inhmênh ã ixpumunh mex kêt nê. Jakamã na hte mẽ akwỳjaja ixto akapêr punuj o pa. Tã kot kaj mẽ nhỹrmã ãm hãmri Jejus kot mẽ awỳr inhmênh ã axpên mã ijarê pa mẽ ama nê ixkĩnh nê. Hãmri nhũm nhỹrmã mẽ panhō Pahihtĩ Jejus mẽ pahwỳr akupỳn wrỳ pa kãm mẽ ajarê nê kãm:

—E Pahihtĩ. Jajê mã na pa pre akapêr jarênh o ixpa nhũm mẽ inhma nê akôt amnhĩ xunhwỳr kurê kumrêx nê tãm amnhĩ nhĩpêx mex o pa.

Anhỳr o kãm mẽ ajarê. Hãmri nê ã mẽ ate amnhĩ nhĩpêx anhỳr ã mẽ apumunh kôt ixkĩnh nê. Ka mẽ ajaxwỳja akĩnh pê tanhmã kãm ijarênh to ho akuhê.

Pawre hêx kêt ã kot amnhĩ jarênh

Wam Korīt 16.5-6

¹⁵⁻¹⁶ Nê na pa pre ra mẽ awỳr ixkrã. Ixte ma mẽ awỳr inhmōr nhũm mẽ ate ixpumunh nê akĩnh ã mẽ akamnhĩx nê mẽ awỳr ixkrã nê ijamaxpêr o:

—Nà ma Masetōn wỳr inhmōr xwỳj ri kot paj ma Korīt kumrêx wỳr mō. Hãmri nê Kris kôt ixkwỳjê pumu nê rĩ kormã hamũ Masetōn wỳr mō. Nê mẽ kamã ri ixpa tãmtã awjanã nê akupỳn Korīt wỳr mō nê axte mẽ omu. Jao Tĩrtũm kapêr o mẽ ahkre ho axkrut nhũm mẽ amnhĩ tã ixpumu nê hkĩnh nê. Hãmri pa akupỳm Jutej wỳr inhnojarêr nhũm mẽ pry hã ixàpkur xà hã inhma mẽmoj kwỳ nhōr japêr.

Anhỳr o ijamaxpêr.

¹⁷ Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wỳr ixkãm ama nê axpên mã ijarênh o:

–Kwa Pawre kot ra mẽ pahwỳr nojarêt ã amnhĩ jarēnh tã amnhĩm nojarêt kêt kumrēx. Mãn pre ãm mẽ pamã amnhĩ to hēx nà? Ra kot mẽ pamã amnhĩ jarēnh tã tokyx hpòx kêtne hã. Anē.

¹⁸ Kwa mẽ ri ã inhmã ajamaxpēr anhỳr kêt nē. Na pa pre mẽ amã ixêx kêt nē. Na pa hte Tĩrtũm noo mã ãm hãmri mẽmoj jarēnh o ri ixpa nē mẽ amã mẽmoj jarēnh o ixêx kêt nē. Nà ãm hãmri na pa pre ma mẽ awỳr inhmõr ã amnhĩ jarē.

¹⁹ Na pa pre ra Ximotre mẽ Siras mẽ wa mẽ amã Jejus Kris jarēnh o ri mẽ akõt ixpa. Jejus kēp Tĩrtũm Kra hã harē nē kot amnhĩ nhĩpēx te kot Tĩrtũm kot amnhĩ nhĩpēx pyræk ã harēnh o ri ixpa. Jejus haxwỳja amnhĩ to hēx kêt. Kot mẽmoj tã amnhĩ jarēnh xà hkõt na hte ãm hãmri tanhmã amnhĩ nhĩpēx to. Tã ã kot amnhĩ nhĩpēx anhỳrja kõt na pa inhmã ixte amnhĩ nhĩpēx o ixpa hprãm nē.

²⁰ Ra Tĩrtũm Jejus Kris kukwak ri kot mẽ pahto mex ã amnhĩ jarēnh jakamã na pu htem axpēn mã harēnh o:

–Koja Tĩrtũm Jejus kukwak ri mẽ pahto mex rax nē. Ra kot mẽ pahtã amnhĩ jarēnh xà hkõt. Nà Tĩrtũm mex o mex. Anē.

Tĩrtũm kot mẽ pa hwỳr Karõ rēnh ã harēnh Rõmãn 8.14; Epes 1.13

²¹ Nà Tĩrtũmja mex o mex. Kot mẽ pahpê hkra kaxyw amnhĩm mẽ paxunhwỳr jakamã na hte tanhmã mẽ pahkrã hto pu mẽ Kris kõt amnhĩ nhĩpēx mex o papã.

²² Na pu htem Kris kõt amnhĩ xunhwỳ nhũm Tĩrtũm ja hã mẽ pahpumu nē mẽ pahwỳr Karõ rē nhũm mẽ pahwỳr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrēx kagà hto nhũm mẽ kot kēp õ dõn ã omunhta pyræk. Tã koja Tĩrtũm Karõ mẽ pakamã hkrĩ pu mẽ ja hã amnhĩ pumunh kõt Tĩrtũm kot nhỹrmã mẽ pahto mex rax ã amnhĩ tã omunh kurê kumrēx. Ra kot mẽ pahto mex tã koja nhỹrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjēr prãm kêt ã kot amnhĩ jarēnh

Wam Korīt 4.21; Sikūn Korīt 10.1-2

²³ E Kris kõt ixtõ nē ixtõxjaja. Kot paj kormã ma mẽ awỳr inhmõr kêt ri ixprĩ hã mẽ amã tanhmã amnhĩ jarēnh to ka mẽ ixte amnhĩ jarēnh ma. Tĩrtũm tãm mẽ arom kot ijamaxpēr kõt ixpumunh mex jakamã kot paj noo mã ixprĩ hã mẽ amã tanhmã amnhĩ jarēnh to ka mẽ inhma.

Na pa pre ra mẽ awỳr inhnnojarêt tã no ãm tee ri amnhĩ kukamã ijamaxpēr nē ijamaxpēr o:

–Nà kot paj taxy kormã ma mẽ hwỳr inhmõr kêt nē. Kot paj tokyx mẽ hwỳr mõn pøj nē kot amnhĩ tomnuj xwỳnhta ã mẽ kãm akir nē nē tanhmã mẽ kãm ixkapēr to. Hãmri nhũm mẽ amnhĩ tã inhma nē hkaprĩ nē tee ri amnhĩ kukamã hamaxpēr. ã mẽ kot amnhĩ nhĩpēx anhỳr pymaj kot paj kormã mẽ hwỳr inhmõr kêt nē.

Anhỳr o ijamaxpēr.

²⁴ Inhmã ma mẽ awỳr inhmõr nē tanhmã mẽ ate amnhĩ nhĩpēx to hã axte mẽ amã karõ kamã ixihýtýx prãm kêt. Mẽ akwỳjê rom ra mẽ ate Kris hkõt amnhĩ xunhwỳr tỳx kēnã. Tã mẽ ate hkõt amnhĩ nhĩpēx mex o akĩnh nē apaja na inhmã hprãm.

2

¹ Na pa pre ma mẽ awỳr mõ nē mẽmoj tã mẽ amã akir nē nē tanhmã mẽ amã ixkapēr to ka prem inhma nē akaprĩ nē ri apa. Tã inhmã akupým mẽ awỳr inhmõr nē axte mẽ amã ixàkjēr prãm kêt jakamã na pa kormã mẽ awỳr inhmõr kêt nē.

² Kot kaj mẽ akĩnh nē apa pa ijaxwỳja ixkĩnh nē ixpa. No kot paj ma mẽ awỳr mõ nē mẽmoj tã mẽ amã akir ka mẽ tee ri inhma nē akaprĩ nē. Pa mẽ apumu nē ijaxwỳja ixkaprĩ nē.

³ Ja pymaj na pa pre wam ixte mẽ awỳr kagà mēnhta kamã mẽmoj nē tanhmã mẽ amã ixàkjēr to. Mẽ ate kamã harēnh nē mar nē tokyx kormã mẽ awỳr inhmõr xwỳj ri tanhmã mẽ ate amnhĩ tomnuj tota kaga nē tãm amnhĩ nhĩpēx kaxyw. Kēr pa mẽmo arĩgro hã ma mẽ awỳr mõn pøj nē mẽ ate tãm amnhĩ nhĩpēx o apa hã mẽ apumu nē ixkaprĩ hkêt nē ixkĩnh nē. Ka mẽ ajaxwỳja ixpumu nē akĩnh nē.

⁴ Jakamã na pa pre ã mẽ amã kagàta nhĩpēx nē mẽ awỳr mēnh anē. Nē kamã mẽmojta nē tanhmã mẽ amã ixàkjēr to.

Na pa pre ixkaprī htỳx nē tee ri mē akukamā ijamaxpēr o inhmýr rax pē mē amā mēmojta ā kagà. No ãm mē akaprī kaxyw na pa pre mē amā hipêx kêt nē. ãm mē ate kamā harēnh nē inhmar nē ajamaxpēr o:

—Hêxta waa nē. Nà Pawre na kām mē pahkīnh tỳx kumrēx. Hã na pre mē pahte tanhmā amnhī tomnuj to hã mē pajarēnh ma nē tee ri mē pakukamā hamaxpēr pē kagàja kamā hã mē pamā akir nē mē pahwýr kumē. Nà kām mē pahkīnh tỳx kām na ã mē pamā kapēr kām hihtỳx anē.

Anhýr o ajamaxpēr kaxyw na pa pre hipêx nē mē awýr kumē.

Mē kot axte amnhī tomnuj mā hamaxpēr kêt ã mē kām karō

Rukre 17.3-4; Wam Korīt 5.1-13; Karatas 6.1-2

⁵⁻⁹ Nē wam kagàta kamā na pa pre mē amā mē akwýjê hō kot nã kaàkre kamā hpijaàm kêeta pa mē amā tanhmā hã karō hto. Ra mē ate harēnh mar tã nē kām akapēr kêt nē. Tã mē ate inhmar nē nē tanhmā kām akapēr to nē amnhī nē hanor kaxyw na pa pre mē awýr kagàja mē. Hãmri nē ijamaxpēr o:

—Ko. Kojã mē ixkapēr mar xà hkôt amnhī nē hanor japêr. Anē.

Tã ka xep prem kamā harē nē ama nē tee ri ja hã amnhī pumu nē akaprī nē. Nē ixpyrà nē apijaàm nē. Hãmri nē ijamaxpēr xà hkôt amnhī nē hanor kām axihtỳx nē. ãm hãmri na ka prem ã hipêx anē. Nhũm xep tee ri ja hã amnhī pumu nē hkaprī nē hkaprī xàj ri mýr o pa. Jao ra ã amnhī nhīpêx anhýrta kaga nē akupým tãm amnhī nhīpêx. Tã ra ã kot amnhī nhīpêx anhýr jakamā kwa mē tokyx akupým amnhī wýr awý kē axte mē awýr mra nē mē akôt pa. Ra kot amnhī tomnujta kaga jakamā kēr ka mē axte kām ajamaxpēr kêt nē. Akupým tãm kām akapēr kē tokyx akupým tãm hamaxpēr nē hkīnh nē pa. Kot kaj mē tokyx ã hipêx anhýr kêt nē nhũm tee ri amnhī kukamā hamaxpēr nē hkaprī nē pa. Ja pymaj kwa mē amā hkīnh ã kām amnhī jarē nē akupým tãm kām akapēr pē tãm hipêx o ri apa. Kē amnhī tã mē apumu nē akupým hkīnh nē tãm hamaxpēr.

¹⁰ E kêr ka mē axte kot tanhmā amnhī tomnuj tota mã ajamaxpēr kêt nē. Kwarī ho kwarī. Kot kaj mē ã hipêx anē pa ijaxwýja ma hipêx anē. No pa na pre tanhmā ixtomnuj to hkêt nē. ãm Jejus kapēr kwým na pre ri ã amnhī nhīpêx anē. Tã ra kot amnhī tomnujta kaga jakamā kot paj Jejus nhý hã akupým tãm hipêx nē kot amnhī tomnujta o ijamakêtkati tokyx anē nē axte kām ijamaxpēr kêt nē. Mē apiitã mē amex nē ri mē apa kaxyw. Jakamā kêr ka mē ajaxwýja mē amex nē apa kaxyw ã amnhī nhīpêx anē nē axte kām ajamaxpēr kêt nē.

¹¹ Kwa mē tokyx ja ho ajamakêtkati. Kê Satanasti tee ri ja hã mē apumu nē mē amā mē ate tanhmā amnhī tomnuj to hprãm xàj tee ri tanhmā ri mē ato ho pa kaprý. Kêr pu mē Satanasti kot amnhī nhīpêx kôt amnhī nhīpêx o ri papa hkêt nē. Ra mē pahte Tirtüm kapēr kuhpa hã tanhmā kot amnhī nhīpêx to ho pa hã omunh mex kênã.

Pawre kot Xitre japêr o pa hã harēnh

¹² Nē na pa pre ja rüm ixkato nē ma Tôx wýr mō. Ixte mē kām Kris jarēnh o mē hkôt ixpa kaxyw ma mē hwýr mō. Nhũm Pahihti Kris ixkukamā tanhmā mē hkrã hto jakamā pa pre mē hwýr pōj nhũm mē piitã kām ixujarēnh mar prãm nē. Pa pre mē kām Tirtüm kapêr jarēnh ryy ho mē hkôt ixpa.

¹³ Na pa pre Xitre ra mē hwýr ixkukamā hpôx ã hkamnhīx tã nhýri omunh kêt nē. Hãmri nē ijamaxpēr o:

—Hêxta waa nē. Inhmã Korīt kām Jejus kwýjê jarēnh mar prãm. Na pa tee ri mē hkukamā ijamaxpēr o ixpa. Nom kormã Xitre mē kurüm akupýn hpôx kêt. Mãn kormã Masetõn kamã pa.

Anhýr o ijamaxpēr hãmri nē mē kām amnhī jarē nē ixkato nē ma Masetõn wýr krī hkwy hkôt hapêr o mō. Tã ra hwýr ixkato nē omu.

Te mē pahpê mēhkuxwa xà pyràk ã mē pajarēnh

Epes 5.2; Piripos 4.18

¹⁴⁻¹⁶ Nà Tirtümja mex o mex. Na hte mē pahto mex rãhã ho pa. Nē mē kot mē panē ãmnãr xwýnhjaja nhũm hte tanhmã mē ho pu mē ma paxãmnhīx ri mē hkôt mē kām

Kris kapêr jarênh o ri papa. Te mê pahte mê hkuxwa xà ho ri mê hkuxwa ho papa pyrâk. Mê pahte Kris kôt amnhî nhîpêx jakamâ Tîrtûm mâ te mê pahkuxware nê ri mê papa pyrâk. Nê te mê kâm Kris jarênh o ri papa pê te mê hkuxwa xà ho mê hkuxwa ho ri mê hkôt papa pyrâk. Nhûm hte mê hkwýjaja mê pama nê kâm mar prâm nê. Nê mê paxujarênhja haxwýja te kot mê hkuxwa xà kuxwa mex nhûm htem hpâr nê kâm ho amnhî kuxwa hprâm pyrâk. Jao kâm mê pamar prâm nê Kris kôt amnhî xunhwý. No nhûm mê hkwýjaja axtem nê mê kêp mê pamar prâm nôkati. Mê kumâ Tîrtûm kapêrja te kêp wenên kuxý htýx nhûm mê kot hpâr nê htyk pymaj amým kuhê pyrâk. Jao kapêr kaga nê kêp amým amnhî xunhwý.

Nê na pu htem amnhî krâ hkôt mê kâm Kris kapêr jarênh o ri papa hkôt nê. Âm Tîrtûm nhý hã pix mã tanhmã harênh to ho papa.

Pawre kot katàt kôt Tîrtûm kapêr o mê ahkre hã harênh

¹⁷ Na hte mê kot mê kêp Kris nhý hã mê ahkre hã amnhî to hêx xwýnhjaja te Tîrtûm kapêr o wênê pyrâk o mê hkôt pa. Jao kàxpore hprâm xàj amnhî krâ hkôt tanhmã mê kâm harênh to nhûm htem mê kuma nê hpânhã tanhmã mê kâm amnhîrer to. Nom pa na pa hte ã amnhî nhîpêx anhýr kêt nê. Nê mê urâk nê amnhî krâ hkôt Tîrtûm kapêr jahkre ho ixpa hkôt nê. Tîrtûm kot mê akaxyw ixâm jakamâ na pa hte ixkatàt kôt Kris nhý hã amarî mê amâ kapêr jarênh o ri mê akôt ixpa. No mê urâk nê kàxpore prâm xàj mê amâ harênh kêt nê. Tîrtûm kot ja hã ixpumunh mex.

3

¹ Mê kêp Kris nhý hã mê ahkre hã amnhî to hêx xwýnhjaja na htem nhýhým nojarêt nê mê kot mar xwýnhjê mã:

—E kot paj ma nhâm krî hõ hwýr mô nê Tîrtûm kapêr o mê ahkre. Jakamâ kwa mê kaxyw inhmã kagà nhîpêx nê kamã ixte Tîrtûm kapêr o mê ajahkre mex xwýnh ã ijarê nê hã kagà. Hâmri nê inhmã agõ pa ma amnhî kôt o mô nê mê kot inhmar mã xwýnhjê mã kugõ kê mê kamã harê nê ijarênh ma nê kâm ixkapêr mar prâm nê.

Anhýr o na htem amnhî to mê hwýr o pa. No pa na inhmã ã amnhî nhîpêx anhýr prâm kêt. Inhmã nhâm mê kâm amnhî to jarkrar prâm kêt. Mê ate ja hã ixpumunh mex. Ra mê piitã mê kot ixkatàt kôt ixte Tîrtûm kapêr jarênh mex ã ixpumunh mex jakamâ mo kaxyw kot pa ri amnhî kôt kagà jamý nê ho ixpa? Nà kot pa amnhî kôt hõ ho inhmõr kaxyw hã ixàhwýr kêt nê.

²⁻³ Mê kajaja te mê apê inhõ kagà pyrâk. Na ka prem ixte mê ajahkre ma nê Jejus kôt amnhî xunhwýr kurê kumrêx. Hâmri nhûm Tîrtûm mê amâ amnhî Karõ rê nhûm mê amâ agjê ka mê ý hã amnhî nhîpêx nyw o amnhî nhîpêx o apa. Hâmri nhûm mê akwýjaja amnhî jaêr pê mê ate amnhî nhîpêx nyw ã mê apumu nê mê atã axpên mã ijarênh o:

—Hêxta waa nê. Pêr ãm hãmri na pre Kris mê hwýr Pawre mê. Na pre ma mê hwýr mô nê mê kâm Tîrtûm kapêr o mê ahkre nhûm mê kuma nê amnhî tomnuj kaga hpa nê hpânhã Tîrtûm kapêr kôt amnhî nhîpêx nê tãm ri amnhî nhîpêx o pa. Âm hãmri na hte Pawre mê ahkre mex o pa. Hêxta waa nê.

Anhýr o mê atã ijarênh jakamâ mo kaxyw kot pa kagà hkwý jamý nê amnhî kôt ho ixpa? Nà mê kajaja te mê apê inhõ kagà pyrâk.

⁴ Na pa pre Jejus kôt amnhî xãm nhûm Tîrtûm ja hã ixpumu nê tanhmã inhmã kapêr o amnhîrit to nê inhmã:

—E Pawre. Kêr ka ma mê kâm ixkapêr jarênh o ri mê hkôt apa.

Anhýr jakamâ na pa hte Tîrtûm kamnàr rom ã amnhî nhîpêx anhýr o ri mê hkôt ixpa.

⁵ Nom amnhî krâ hkôt mê ahkre hkôt nê. Tanhmã kot pa we amnhî to nê amnhî krâ hkôt mê kâm kapêr o mê ahkre mex nê? Nà Tîrtûm pix na hte ja kaxyw tanhmã ixkrâ hto pa ô ri mê ahkre ho ri ixpa.

Tîrtûm kapêr nyw jarênh

⁶ Nê Tîrtûm na hte tanhmã ixkrâ hto pa Karõ nhý hã mê piitã mê kâm kapêr nyw jarênh o ri ixpa. Amnepêm Tîrtûm kot Ijaew mã mêmoy tâ karõ xwýnhhta. Mojes kot kapêr tûm jarênh o pa xwýnhhta mex tâ no nhûm mê tee ri hkôt kâm amnhî nhîpêx

prām o pa. Nē xatā kamā harē nē omunh tā tee ri kot hkôt kām amnhī nhīpêx prām. Tā mẽ kot hkôt amnhī nhīpêx kêt mýrapê na prem pikaprār pan hapêx. No kêt Tirtūm kapēr nywja. Jejus jarēnhja. Na hte Tirtūm Karō tanhmā mẽ pahkrā hto pu mẽ Jejus kôt amnhī nhīpêx o ri papa. Jao mẽ pahpê pahťir tūm nē papa mā xwýnh. No na hte nhām mẽ hkwýjaja kām harēnhja mar prām kêt nē amnhī jarēnh o:

—Nà kot paj amnhī krā hkôt ã amnhī nhīpêx anē nē ã amnhī nhīpêx anē nhūm Tirtūm ja hã ixpumu nē ixtír tūm nē ixpa mā xwýnh ã ijarē.

Anhýr tā no ãm ã amnhī jarēnh anhýr kaprý. Tirtūm Karō nhý hã mẽ kot amnhī to mex o mẽ pa xwýnh pixjaja koja mẽ htír tūm nē pa ho pa.

⁷ Nē Tirtūm kapēr tūmta na pre Mojes mẽ kām harēnh kaxyw nhūm mẽmoj tanhmā amnhī nhīpêx to rax kumrêx. Naja hkrakrak nē haxēnh nē kamā kamāt kô htyk. Hāmri nhūm Tirtūm mẽ kot hkôt amnhī nhīpêx kaxyw kēn po hã mẽ kām mẽmoj tā karō nhūm Mojes kumý nē mẽ hwýr o wrý nē mẽ kām kamā harē. Tirtūm kot hirā htýx kamā kām kapēr nhūm kuri mar o ãm jakamā uràk nē ý hã hkuk nhīrā htýx kumrêx nē mẽ kām kapēr jarēnh o xa. Jakamā nhūm mẽ tee ri kot hprī hã omunh mex kaxyw no ãm nom gêk týx nē. Tā gaa nhūm hkuk kām hirāja amnhīm hprī nē hapêx o mō. Na pre ã Tirtūm Ijaewjê mã kapēr tūm nhōr anē. Hāmri nhūm Mojesja ô ri mẽ kām kamā harē nē harēnh pa hāmri nē mẽ kām:

—E kēr ka mẽ Tirtūm kapēr mar týx nē hkôt amnhī nhīpêx mex rāhã ho ri apa. Kēr ka mẽ nhýrmā atyk tā kē akupým mẽ ato mẽ atír ka mẽ ô krī kamā kuri atír tūm nē amex nē apa ho apa. Anē.

Hāmri nhūm mẽ kuma nē kām:

—Tôe. Nà kot paj mẽ hkôt pix mã ri amnhī nhīpêx mex rāhã ho ri ixpa.

Anhýr ã amnhī jarēnh tā no ãm hkôt amnhī nhīpêx kêt nē nhūm Mojes tee ri mẽ kot amnhī nhīpêx ã mẽ omu nē mẽ kām:

—Nà mẽ ate Tirtūm kapēr kôt amnhī nhīpêx kêt jakamā kot kaj mẽ nhýrmā ty nē Tirtūm pê awry rax kumrêx nē ri apa. Anē.

⁸ Tā na hte Tirtūm jarāhã axtem tanhmā mẽ pamā kapēr to. Pānhã kapēr nyw o kapēr nē mẽ pamā:

—Kot kaj mẽ Ixkra Jejus kôt amnhī xunhwý pa hã mẽ apumu nē mẽ ato ixkra. Hāmri nhūm Ixkarō mẽ amā agjê. Anē.

Kapēr ja na mex kumrêx o kot kapēr tūm jakrenh.

⁹ Kapēr tūmja mex tā nhūm htem hkôt amnhī nhīpêx kêt nē. Jakamā na htem ty nē Tirtūm pê awry rax ã ri pa. No kapēr nywja na tūmta rom mex o mex. Na hte Tirtūm mẽ pamā kapēr nywja jarēnh o:

—Kot paj tanhmā mẽ akrā hto ka mẽ amnhī to mex pix o ri apa. Jao ixkôt ri amnhī nhīpêx mex o ri apa. Anē.

¹⁰ Nē kapēr tūmja te kot kané hpôk kryre pyrāk. No kapēr nywja mex o kot tūm jakrenh jakamā te kot mẽmo hpôk rūnh o kané hpôk kryre jakrenh pyrāk. Jakamā nhūm mẽ kot hirā rax kām ri mrar gryk ã hpôk grire nhīrā kamā mrar kêt pyrāk.

¹¹ Tirtūm kapēr tūm te kot Mojes kuk pyrāk. Na pre kamā hirā rax tā gaa nē amnhīm hprī nē kamā hirā hapêx o mō. Nē gaa nē hapêx. No kêt Tirtūm kapēr nywja te kot Tirtūm nhīrā htýx rāhã ho rāhãta pyrāk. Koja uràk nē aa hapêx kêt kumrêx.

Ijaewjê jarēnh *Rōmān 11.7-10*

¹² Nē Tirtūm kapēr nywja mex o mex jakamā na pa hte ixamnhīx mẽ kām harēnh o ri ixpa.

¹³ Te ixte Mojes kot amnhī nhīpêx pyrāk kêt. Na pre hte Mojes ixkīnhã ãmnhīx Ijaewjê mã Tirtūm kapēr jarēnh o ri pa hkêt nē. Mẽ kot hkuk kām hirāta ra hapêx o mōr ã omunh nhūm hpijaàm pymaj na pre kupêxê puroore ho amnhī kuk pro nē ri mẽ hkôt pa.

¹⁴ Jakamā nhūm prem hprī hã hkuk kām hirā pumunh mex kêt nē. Nē Tirtūm kapēr ã kagà htūmja nhūm prem mãānēn hprī hã mar mex kêt nē. Mẽ hkrā hihtýx jakamā te mẽ kot amnhī jamak pro nē mẽmoj mar mex kêt pyrāk jakamā mẽ kot mar tā hprī hã mar kêt nē. Nē hkôt ri amnhī nhīpêx mex kêt nē. No mẽ kot Kris kôt amnhī xunhwýr xwýnhjaja na hte Tirtūm amnhī tā mẽ omu nē te mẽ nē mẽ hamak hpro xàta

rênh par nê rênh pyrək o mẽ hipêx nhũm mẽhprĩ hã kapêr mar tỳx nê.

¹⁵ Tã na hte Ijaewjaja arĩ jarãhã Mojes kot Tĩrtũm kapêr ã kagà htũm kamã harênh o pa. Nom arĩ mẽ hkrã hihtỳx jakamã te mẽ kot amnhĩ jamak pro nê kamã harênh o pa pyrək o amnhĩ nhĩpêx jakamã kormã hprĩ hã mar kêt nê.

¹⁶ Tã koja mẽ hkwỳjaja Pahihti Jejus Kris kôt amnhĩ xunhwỳ nhũm amnhĩ tã omu nê te kot mẽ hamak nê hpro xà hpyr nê mẽnh pyrək o mẽ hipêx nhũm mẽhprĩ hã kapêr nyw mar tỳx nê.

¹⁷ Pahihti mẽ Karōja wa htipxi jakamã na hte mẽ pakamã agiê nê hprĩ hã mẽ pamã kapêr o amnhĩrĩt o pa.

¹⁸ Ra mẽ pahte Pahihti Kris kôt amnhĩ xunhwỳr jakamã te mẽ pahte mẽ kot amnhĩ jamak pro xwỳnh kot amnhĩ nhĩpêx pyrək kêt. Nhũm Pahihti Karōja tanhmã mẽ panhĩpêx to pu mẽ ra hkôt amnhĩ nhĩpêx mex o mỗ. Jakamã na htem mẽ pahte amnhĩ nhĩpêx nyw pumunh kôt Tĩrtũm kot tãm amnhĩ nhĩpêx ã omunh kurê kumrêx. Kormã mẽ pahte hkôt amnhĩ nhĩpêx mex kumrêx kêt tã ra hkôt amnhĩ nhĩpêx mex o mỗ. Jao te tãm kot amnhĩ nhĩpêx pyrək o amnhĩ nhĩpêx o mỗ.

4

*Jejus kapêr te kêp kanê pyrək ã harênh
Wam Korīt 2.1-5; Sikūn Korīt 1.12; Wam
Tesarôn 2.1*

¹ Nê na pre Tĩrtũm ixto mex nê tanhmã kãm ixàpênh to hã inhmã karō. Ixte ma mẽ kãm kapêr jarênh o ri mẽ hkôt ixpa kaxyw. Jakamã na pa hte ixàmnhĩx mẽ hkôt mẽ kãm harênh o ri ixpa.

² Nhũm mẽ hkwỳjaja axtem nê ixêx o ri ixpa hã ijarênh tã ixte ã amnhĩ nhĩpêx anhỳr kêt. Na pa hte amnhĩ tomnuj o ri ixpa hkêt nê. Mẽ hkwỳjaja kot mẽ no kupyw kaxyw mẽ kãm Tĩrtũm kapêr o hêx o pa htã pa na pa hte ã amnhĩ nhĩpêx anhỳr kêt nê. Ixprĩ hã mẽ kãm harênh o ixpaja na inhmã hprãm jakamã na pa hte ixkatat kôt harênh o ri mẽ hkôt ixpa. Mẽ piitã mẽ kot ixêx kêt kôt ixpumunh mex kaxyw. Tĩrtũm kot ixêx kêt kôt ixpumunh mex.

³ No nhỹrmã mẽ htyk nê ma kuwy hwỳr mẽ pa mã xwỳnh pixjaja na htem hprĩ hã ixkapêr mar mex kêt nê.

⁴⁻⁶ Satanasti tãm kêp mẽ hpãm. Kêp mẽ kãm Tĩrtũm kapêr mar prãm kêt xwỳnh pitã mẽ hpãm. Jakamã na pa hte mẽ kãm tanhmã Jejus jarênh to. Kêp Tĩrtũm Kra hã harê nê te kot Tĩrtũm kot amnhĩ nhĩpêx pyrək ã harênh o ri ixpa. Hãmri nhũm Satanasti tee ri ja hã ixpumu nhũm ja kêp omnuj nê. Jakamã nhũm tanhmã Tĩrtũm nê mẽ hkrã hto nê te mẽ hamak pro pyrək o mẽ hipêx. Mẽ kot hprĩ hã Jejus jarênh mar nê hkôt amnhĩ xunhwỳr pymaj nhũm ã nê mẽ hipêx anê. Jejus jarênh te kêp kanê hpôk mex pyrək jakamã mẽ kot mar kêt xwỳnhjaja te kamat kô kamã ri mẽ pa pyrək. No nhũm Satanasti tãm kot nê mẽ no kupyw jakamã nhũm htem ã ri kamat kô kamã mẽ pa pyrək o amnhĩ nhĩpêx anê.

Amnepê mã kormã mẽmoj kêt ri nhũm kamat kô pix. Tã nhũm Tĩrtũm tanhmã kapêr to nê kapêr o:

—E kê hirã kato. Anê.

Hãmri nhũm ra kapêr xà hkôt hirã kator kurê kumrêx. Tã ja pyrã nê na pa pre kamat kô kamã ixtỳx ri ixpa pyrək nhũm Tĩrtũm te kot inhmã kanê hpôk nhũm hirã pyrək o inhĩpêx pa mex o mex ã omunh kurê kumrêx. Hãmri nê Jejus Kris kot amnhĩ nhĩpêx ã omu nê te Tĩrtũm kot amnhĩ nhĩpêx ã omunh pyrək. Wa kot amnhĩ nhĩpêx te kot axpên pyrək.

Nê na pa hte pam tanhmã amnhĩ jarênh to ho ri ixpa hkêt nê. ãm Jejus Krisja pix na pa hte harê. Tapxipix na kêp mẽ panhō Pahihti. Jakamã hkĩnhã te ixpê mẽ amã ixàpênh xwỳnh pyrək o na pa hte mẽ amã kapêr jarênh o ri mẽ akôt ixpa.

*Pawre te kêp poti grãre nhĩpêx pyrək ã
harênh*

Wam Korīt 2.4-5; Sikūn Korīt 11.23, 12.9

⁷ Nê Tĩrtũm ixrom hihtỳx o hihtỳx. No pa na hkĩnhã ixihtỳx kêt. Te ixpê poti grãre nhĩpêx pyrək jakamã na pa hte Tĩrtũm xihhtỳx xwỳnh pix nhỹ hã mẽ kãm kapêr jarênh o ri mẽ hkôt ixpa. Nhũm htem inhma nê ãm hãmri ixte y hã ixkapêr ã ixpumunh kurê kumrêx. No pa ixte amnhĩ krã hkôt ixkapêr ã ijarênh kêt nê.

⁸ Na pa hte mẽ hkôt mẽ kām Jejus jarēnh o ri ixpa nhūm mẽ hkwỳja tōhã inhma nē ja hã inhīpêx kati nē pa amnhī xà htỳx kamã ama. Nom nhūm Tirtūm mẽ kutã tanhmã ixkrã hto pa inhmã amnhī xà kamã ijamak pyma hkêt nē arī mẽ kām kapēr jarēnh o ri mẽ hkôt ixpa. Nē amnhī kaxyw Jejus kôt pix mã ijamaxpēr tỳx rãhã pē tee ri amnhī kukamã ijamaxpēr o ri ixpa hkêt nē.

⁹ Nē mẽ kām ixkurê xwỳnhjaja ohtôô. Na htem xatã Jejus ã tanhmã ixtomnuj to htã pa kormã ixtyk kêt nē. Na pa hte Tirtūm kamnār rom arī mẽ hkôt ixpa nhūm Tirtūm ixkôt pa ho pa.

¹⁰ Na htem Jejus pyrã nē ixpīr kaxyw tanhmã inhīpêx to. No ãm ko. Koja mẽ nhỹrmã ixpī rỳ ko. Ixte amnhī kukamã ixãhpumunh kêt. Kot paj ãm arī ixtīr ri mẽ kām Jejus jarēnh o ri mẽ hkôt ixpa. Kēr kē mẽ hkwỳjaja ixkapēr ma nē axpēn mã tanhmã Jejus jarēnh to nē harēnh o:

—Nà pēr ãm hāmri na pre Jejus akupỹm htīr nē tanhmã hkwỳjê ho mex to. Æm hāmri na hte Pawre ja hã harē. Anē.

¹¹ Mẽ kot Jejus ã ixpīr mã tã pa arī mẽ kām akupỹm htīr ã harē. Tirtūm na hte ja kaxyw tanhmã ixkrã hto pa arī mẽ kām harēnh o ri mẽ hkôt ixpa.

¹² Na pa pre ra mẽ amã harē ka prem inhma nē Jejus kôt amnhī xunhwỳr kurê kumrêx nē amnhī nhīpêx nyw o amnhī nhīpêx o ri apa. Jakamã ixpyrã nē mẽ apê atīr tūm nē apa mã xwỳnh. Nhūm htem piitã mẽ ate Jejus kôt amnhī xunhwỳr ã mẽ apumu. Tã nhūm mẽ kot Jejus ã ixpīr kaxyw. Nom kwār mẽ māmri ixpī. Ja inhmã tanhmã kute hkêt. Mẽ kot ixpīr mã tã kot paj arī Jejus kapēr jarēnh o ri ixpa rãhã ty. Ra mẽ kot ixkapēr mar nē Jejus kôt amnhī xunhwỳr xwỳnhjaja mẽ pahpyrã nē kēp htīr tūm nē pa ho pa mã xwỳnh kēnã.

¹³ Jakamã kwār mẽ māmri ixpī. Na pa hte arī amnhī kaxyw Tirtūm kôt ijamaxpēr mex rãhã nē. Amnepê mã na pre Pahi finat Tawija tanhmã Tirtūm kapēr jarēnh to nē harēnh o:

Æm hāmri na Tirtūm kapērja. Hêx kêt jakamã na pa hte mẽ kām harēnh rãhã ho ri ixpa. Anē.

Tã pa hte Tawi pyrã nē mẽ piitã mẽ kām Tirtūm kapēr jarēnh o ri ixpa. Tirtūm kot mẽ pamã tanhmã mẽmoj to hêx to hkêt.

¹⁴ Ra kot amnhī jarēnh xà hkôt akupỹm Pahihti Jejus o htīr jakamã kot puj mẽ nhỹrmã urak nē ty nhūm akupỹm mẽ pahto mẽ pahtīr nē ma war amnhī wỳr mẽ pahto api.

¹⁵ Amnepêm na pa pre ma mẽ awỳr mō nē mẽ akôt mẽ amã Tirtūm kapēr jarēnh o ri ixpa. Ka prem inhma nē Jejus kôt amnhī xunhwỳ nē ixpyrã nē Tirtūm mã mex o mex ã harē. Jakamã kwār mẽ māmri Jejus ã tanhmã inhīpêx to. Koja mẽ gaa nē rī mẽ hkwỳjaja mẽ pahpyrã nē Jejus kôt amnhī xunhwỳ nē Tirtūm mã mex o mex ã harē.

Pawre tee ri amnhī kukamã hamaxpēr kêt ã kot amnhī jarēnh

Rômãn 8.17; Sikūn Korīt 1.7; Wam Pêtre 1.3-9, 4.12-16, 5.10

¹⁶ Jakamã na pa tee ri amnhī kukamã ijamaxpēr o ixkapri nē ixpa hkêt nē. Mẽ kot Jejus ã tanhmã ixtomnuj to htãã pa hte ixãmnhīx kapēr jarēnh o ri ixpa. Ra ixpigêt nē ixirerek o inhmōr tã inhōpinh xà kaxwỳnh kām ijamaxpēr o Jejus kôt amnhī nhīpêx mex o mō.

¹⁷ Mẽ kām ixkurê xwỳnhjaja na htem Jejus ã inhīpêx kati htã ã inhīpêx anhỹr japjê hkêt nē. Nom kot paj nhỹrmã ty nhūm Jejus akupỹm ixto ixtīr pa Tirtūm mẽ wa kuri inhmex kumrêx nē ixpa ho ixpa. Mẽ kot ixtomnujja na mẽ ho apkati grêre no kot paj nhỹrmã Tirtūm mẽ Krata wa kuri inhmex kumrêx nē ixtīr tūm nē ri ixpa ho ixpa. Jao rãhã ho rãhã.

¹⁸ Jakamã na pa tee ri mẽ kot tanhmã ixtomnuj tota kukamã ijamaxpēr o ri ixpa hkêt nē. Ja koja tokyx hapêx. Na pa hte ãm nhỹrmã Tirtūm nhō krī kamã inhmex nē ixkīnh rãhã ri ixpaja pix kukamã ijamaxpēr o ri ixpa.

5

Mẽ panhī nyw jarēnh

Piripos 3.21; Sikūn Pêtre 1.13-14

¹ Nē mẽ panhīja te kot tyrti hô ho ixkre pyrãk. Na htem tyrti hô ho ixkre nhīpêx nhūm gaa nē hapêx. Tã mẽ panhīja na hte urak nē hapêx tokyx anē. Na pu htem

ri papa nē gaa nē pawej nē ty. Tã nhūm Tirtūm hpānhã mē pahpê hkrajê mã mē panhĩ nyw gō pu mē kuri ō krī kamã pamex kumrêx nē pahtir tūm nē papa ho papa.

²⁻³ Na pu htem jar pahpunuj nē papa. Nē mē paxà nhi nē mē pahkaprĩ nē. Mē panhĩ htūmja te kot mē paxê htūm pyrāk jakamã na pu htem ty nē te paxê htūm kwryñh nē hpānhã nyw jagjēnh pyrāk o amnhĩ nhĩpêx. Tã na pu htem amnhĩ kukamã panhĩ nywja mã pajamxpēr o ri papa. Kot pu mē kaxkwa kamã pahkarō pix nē ri papa hkêt nē. Mē panhĩ nyw ã kot puj mē ri papa ho papa.

⁴ Nē na pu htem jar pahpunuj nē pamex kêt nē ri papa. Nē tokyx mē pahtyk nē panhĩ htūm o pajapêx nē hpānhã panhĩ nyw ã mē papa hprãm. Tã koja Jejus tokyx akupÿn wrÿk japêr pu mē pahtyk kêt rãhã tokyx panhĩ nywta o panhĩ nyw. Nom koja tokyx akupÿn wrÿk kêt japêr pu mē nhÿrmã ty nhūm Tirtūm akupÿm mē pahto mē pahtir nē mē pamã mē panhĩ nyw gō pu mē ho panhĩ nyw.

⁵⁻⁶ Na pre ra Tirtūm mē panhĩ nyw kukamã hamaxpēr nē mē pahtã tanhmã amnhĩ jarēnh to. Nē mē pahwÿr Karō rē nhūm mē pahkarō mã agjê pu mē ja hã amnhĩ pumu nē pahkĩnh nē pajamxpēr o:

–Nà ra Tirtūm kot ixwÿr amnhĩ Karō mēnh nhūm ixkarō mã àr jakamã koja mãānēnh nhÿrmã inhmã inhĩ nyw gō. Kormã inhĩ htūm kamã ixpa nē Pahihti Jejus mē wa ō krī kamã ixpa hkêt tã koja nhÿrmã inhmã inhĩ nywja gō pa inhĩ nyw o wa kuri ixpa ho ixpa. Nà koja ã inhĩpêx anē.

Anhÿr o pajamxpēr pē pahkĩnh nē papa.

⁷ Nē mē pahte jar pano ho nhÿri Jejus pumunh kêt tã no ãm panhōpinh xà kaxwÿnh kãm kãm pajamxpēr mex nē.

⁸ Jakamã na pu mē tee ri amnhĩ kukamã pajamxpēr o papa hkêt nē. Na pu htem ãm tokyx mē pahtyk nē ma Pahihti Jejus nhō krī hwÿr paxàpir jamãr o papa. Ō krīja kēp mē papaxà kumrêx jakamã na pu htem ma hwÿr paxàpir pix kukamã pajamxpēr rãhã nē.

⁹ No ãm mē pamã ja pix prãm kêt. Na pu htem mãānēnh pamã Jejus mã hprãm xà hkôt nhÿri tanhmã kãm amnhĩ nhĩpêx to ho

ri papa hprãm o papa. Jar mē panhĩ htūm rãhã rÿ mūtãr kuri ō krī mex kãm mē panhĩ nyw ã tanhmã kãm amnhĩ nhĩpêx to ho ri papaja na mē pamã hprãm.

¹⁰ Nē na hte Krisja jar mē pahte tanhmã amnhĩ nhĩpêx to hã mē pahpumunh o hkrĩ. Mē pahte tãm amnhĩ nhĩpêxja nē mē pahte amnhĩ tomnuja nhūm hte hã mē pahpumunh rãhã ho hkrĩ. Tã koja nhÿrmã kot mē pahte tanhmã amnhĩ nhĩpêx to hã mē pahpumunh kôt tanhmã mē panhĩpêx to. Mē pahte tãm amnhĩ nhĩpêx o ri papa xwÿnhjaja koja ra mē panê htyk kukwak ri mē pahto mex nē. No mē kot amnhĩ tomnuj o mē pa xwÿnhjaja koja mē homnuj tÿx nē. Jakamã na pa inhmã kãm hprãm xà hkôt pix mã amnhĩ nhĩpêx o ixpa hprãm nē.

Mē pajamxpēr nyw jarēnh

Rômãn 6.4-6; Sikūn Korīt 4.2; Epes 4.22-24; Korosē 3.9-10

¹¹ Nē Tirtūm kot hprĩ hã mē pahpumunh rãhã ho hkrĩ jakamã inhmã kãm hprãm xà hkôt pix mã amnhĩ nhĩpêx o ri ixpa hprãm. Mãn ka mē ra ja hã ixpumunh mex nē rÿ ko. Mē piitã mē kot hkôt amnhĩ xunhwÿr prãm xàj na pa hte mē kãm kapêr jarēnh o ri ixpa.

¹² Nom ixte ja hã amnhĩ to jarkrar o ri ixpa hkêt. ãm mē ate inhmar nē mē kēp Kris nhÿ hã mē ahkre hã amnhĩ to hēx xwÿnhjê mã tanhmã ijarēnh to kaxyw na pa ã mē amã amnhĩ jarēnh anē. Mē kot Tirtūm kapêr jahkre mex kumrêx ã amnhĩ to jarkrar tã na htem hkôt amnhĩ nhĩpêx kêt nē. Tã mē ate aprĩ hã ixte Tirtūm kapêr kôt amnhĩ nhĩpêx mex ã ixpumunh nē tanhmã mē kãm ijarēnh to kaxyw na pa ã te ixte amnhĩ to jarkrar pyrāk o mē amã amnhĩ jarēnh anē.

¹³⁻¹⁴ Mē kot ixkrã pipãnh ã ijarēnh tã Tirtūm na mē akaxyw ixãm pa hte mē amã kapêr jarēnh o ri mē akôt ixpa. Ixkrã pipãnh kêt. Ixte Tirtūm kãm hprãm xà hkôt tanhmã amnhĩ nhĩpêx to xwÿnh na pa. Tã mēmo kaxyw na pa hte ã kapêr jarēnh rũnh anhÿr o ri mē akôt ixpa? Nà inhmã mē akĩnh kēnã. Mē ate Tirtūm kôt tãm amnhĩ nhĩpêx prãm xàj na pa hte ã mē amã kapêr jarēnh anhÿr rãhã nē. Kris na pre tanhmã ixto pa inhmã mē akĩnh nē. Te tãm kãm

mē ajapê pyrāk. Na pre Kris amnhĩ grônh kôt mē pahpiitã mē nê ty. Tĩrtũm kot mē pahte amnhĩ tomnuj mýrapê tanhmã mē pahto pymaj nhũm mē pahpiitã mē panê ty. Jakamã te mē pahpiitã Jejus kôt mē pahtyk pyrāk o na pu htem amnhĩ nhĩpêx. Jao te mē pahte amnhĩ nhĩpêx tũmja mē pahpê hapêx par pyrāk o pu mē amnhĩ nhĩpêx nyw o amnhĩ nhĩpêx o ri papa.

¹⁵ Mē pajamxpêr nyw o tãm mē pahte amnhĩ nhĩpêx o papa kaxyw na pre Jejus mē panê ty. Jakamã na pu htem axte amnhĩ pix kukamã ri pamã mēmoj prãm o ri papa hkêt nê. Na pu htem mãânên Tĩrtũm kãm hprãm xà hkôt tanhmã kãm amnhĩ nhĩpêx to ho ri papa. Ja kaxyw na pre Tĩrtũm akupým Kris o htĩr pu mē kukwak ri pajamxpêr nyw o amnhĩ nhĩpêx o papa.

¹⁶ Jao mē piitã mē hkrã hkà hã mē omunh xà hkôt pix mã tanhmã mē harênh to hkêt nê. Mē kot amnhĩ tomnuj ã mē harênh rý mē kot amnhĩ to mex ã mē harênh kêt nê. Amnepê mã na pa pre ã Kris jarênh anê nê harênh o:

—Nà Krisja na hte mē pahte amnhĩ nhĩpêx kôt amnhĩ nhĩpêx kêt nê. Æm ri kot mē pahte amnhĩ nhĩpêx kwým ri amnhĩ nhĩpêx jakamã kot amnhĩ tomnuj tỳx xwýnh na.

Anhýr ã harênh o ixpa. Tã axte ã harênh anhýr hkêt nê. Kot amnhĩ tomnuj xwýnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

Mē pahpê Tĩrtũm krãmnhwý hã mē pajarênh

Rômãn 5.1, 5.10; Epes 6.20; Korosê 1.20

¹⁷ Nê koja mēhõ Kris kôt amnhĩ xãm nhũm kot amnhĩ nhĩpêx tũmja kêp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nê hamaxpêr nyw pix o hamaxpêr.

¹⁸ Tĩrtũm na hte tanhmã mē pahto pu mē ã amnhĩ nhĩpêx anhýr o ri papa. Na pu prem pamã hkurê htã nhũm Kris kukwak ri mē pahte hkôt amnhĩ nhĩpêx xwýnhjê ho hkrãmnhwý. Hãmri nê tanhmã mē pahte amnhĩ nhĩpêx to hã mē pamã karõ nê mē pamã:

—E kêt ka mē ma krĩ piitã hkôt ri mē kãm ixkapêr jarênh o ri apa kêt mē ama nê mē

apyrã nê Kris kôt amnhĩ xunhwý. Pa ja hã mē omu nê ixte mē anhĩpêx pyrã nê mē ho ixkrãmnhwý. Anê.

¹⁹ Jakamã na pa hte ma mē kãm kapêr jarênh o ri mē hkôt ixpa nê mē kãm:

—E pa mē amã mēmoj mex jarê ka mē inhma. Nà na pre Krisja mē pahte amnhĩ tomnuj mýrapê mē panê ty. Nê htyk o Tĩrtũm mã mē pahpãnhã amnhĩrer par kumrêx. Jakamã na ra Tĩrtũmja Kris kukwak ri kãm mē pahpiitã mē pahto hkrãmnhwý prãm. Koja kukwak ri mē pahte amnhĩ tomnuj piitã ho hamakêtkati nê axte kãm hamaxpêr kêt kumrêx. Kãm mē pahto hkrãmnhwý hprãm jakamã koja ã mē panhĩpêx anê. Jakamã e kwa mē tokyx Kris kôt amnhĩ xunhwý kêt Tĩrtũm kot inhĩpêx pyrã nê mē ato hkra nê mē ato hkrãmnhwý.

Anhýr o mē kãm harênh o ri mē hkôt ixpa.

²⁰ Kris kot mē apiitã mē awýr inhmênh jakamã na pa hte ý hã mē amã kapêr jarênh o ri mē akôt ixpa nê mē amã:

—E Tĩrtũm kãm mē ajapê jakamã na mē awýr inhmê pa mō. Jakamã kwa mē tokyx amnhĩ tomnuj kaga nê hkôt amnhĩ xunhwý. Kê amnhĩ tã mē apumu nê mē ato hkrãmnhwý. Anê.

²¹ Krisja aa kot tanhmã amnhĩ tomnuj to hkêt kumrêx tã nhũm pre Tĩrtũmja te mē kot amnhĩ tomnuj tỳx kumrêx xwýnh pyrāk o hipêx. Tã mēmo kaxyw na pre ã hipêx anê? Nà mē panê kênã. Mē pahte hkôt amnhĩ xunhwýr nhũm kot mē panhĩpêx o te aa mē pahte amnhĩ tomnuj kêt kumrêx xwýnh pyrāk o mē panhĩpêx kaxyw na pre ã mē panê Krata nhĩpêx anê.

6

¹ Tã kot ã Kra nhĩpêx anhýr jakamã kwa mē ixkapêr ma nê mar tỳx nê. No mē ama nê ãm mar kêt nê. Tĩrtũm kãm mē pajapê htỳx jakamã mē pakutã nojarêr rãhã ho pa. Kumã na pa hte ã mē amã kapêr jarênh anhýr o ri mē akôt ixpa.

² Amnepê mã na pre Ijaew mã kapêr nê mē kãm:

Na ka prem amex kêt nê ri apa nê amnhĩ to ixwý pa pre mē ama nê mēmojta pê mē apytã nê mē ato mex nê. Anê.

Jakamã kwa mẽ inhma. Tĩrtũm kãm mẽ ate amnhĩ tomnuj pẽ mẽ apytàr prãm tỳx jakamã kwa mẽ tokyx amnhĩ to awỳ kẹ ã kẹp mẽ apytàr anẽ.

Mẽ kot Kris ã tanhmã Pawre nhĩpêx to hã mẽ harẽnh

Sikün Korît 4.7, 11.23-33; Korosẽ 1.10

³⁻⁴ Nẽ mẽ kot Tĩrtũm kapẽr mar nẽ hã ixtomnuj tã pa hte amnhĩ katut kõt mẽ kot tanhmã ixtomnuj toja rẽ nẽ ho ijamakêtkati tokyx anẽ. Nẽ arĩ mẽ kãm kapẽr jarẽnh rãhã ho ri mẽ hkõt ixpa. Mẽ kot mar nẽ ãm mar nẽ hkaga pymaj na pa hte ã amnhĩ nhĩpêx anhỹr rãhã nẽ. Mẽ kot ja hã inhĩpêx punuj tã pa arĩ mẽ kãm harẽnh o ri mẽ hkõt ixpa.

⁵ Mẽ kot Kris ã ixtak nẽ ijagjênh nẽ tanhmã ixto kaxyw ixtã htu htã pa hte mẽ kutã amnhĩ to htỳx nẽ ixkuhê. Na pa pre hte Tĩrtũm mã mẽ kãm kapẽr jarẽnh rax nẽ. Jao tõhã inhõt kêt nẽ inhõt xwa ho ri mẽ hkõt ixpa. Nẽ tõhã inhãmã prãm tỳx nẽ ri ixpa. Tã no ãm arĩ mẽ kãm kapẽr jarẽnh rãhã nẽ.

⁶ Inhãmã tanhmã ixte amnhĩ tomnuj to hprãm kêt. Inhãmã Tĩrtũm kot amnhĩ nhĩpêx kõt pix mã amnhĩ nhĩpêx prãm. Nẽ inhãmã inhgryk tokyx anhỹr prãm kêt. ãm inhãmã mẽ piitã mẽ hkĩnh kãm mẽ ho mex pix prãm. ã na pa hte Tĩrtũm Karõ nhỹ hã amnhĩ nhĩpêx anhỹr o ri mẽ hkõt ixpa. Mẽ kot ja hã ixpumunh nẽ ra Tĩrtũm kapẽr ma nẽ hkõt amnhĩ xunhwỳr kaxyw.

⁷ Na pa hte ixkatat kõt mẽ kãm ixkapẽr mex pix nẽ. Tĩrtũm xihtỳx xwỳnhja nhỹ hã ri mẽ kãm kapẽr jarẽnh jao tãm amnhĩ nhĩpêx nẽ tãm ri ijamaxpẽr o ri mẽ hkõt ixpa. Jakamã na htem ja hã ixpumu nẽ ixte Tĩrtũm kapẽr jarẽnh ma nẽ hkõt amnhĩ xunhwỳ.

⁸ Na hte mẽ hkwỳjaja kãm ixkĩnh nẽ nhũm mẽ hkwỳjaja axtem kãm ixkurê nẽ. Nẽ mẽ hkwỳjaja amnhĩm inhmex ã ijarẽ nhũm mẽ hkwỳjaja axtem axpẽn mã tanhmã ixto kapẽr punuj to. Mẽ kot ixêx nhi hã ijarẽnh tã pa hte ixkatat kõt mẽ kãm ixkapẽr o ri ixpa. Nom kwãr mẽ mãmrĩ tanhmã ri ixto kapẽr to. Ja tanhmã inhãmã kute hkêt.

⁹ Na hte mẽ hkwỳjaja ixkamã õkre kahak nẽ pika piitã hkõt axpẽn mã tanhmã ijarẽnh to ho pa. Mẽ kãm ixpĩr prãm tã no

pa arĩ ixtĩr nẽ ixpa. Mẽ kot Jejus ã ixtomnuj tỳx tã kormã ixpĩr kêt nẽ pa ri ixtĩr nẽ ixpa.

¹⁰ Ixte Kris ã amnhĩ xà htỳx kamã ijamak o ri ixpa htã arĩ ixkĩnh nẽ ixpa. Nẽ ixkàxpore hkêt tã nhũm mẽ ohtô nẽ ixte mẽ kãm Jejus kapẽr jarẽnh kukwak ri mex nẽ pa. Nẽ ixkukrêx rax kêt tã nhũm Tĩrtũm ixto mex nẽ pa inhmex nẽ ixpa. Tã kot paj nhỹrmã õ krĩ kamã kuri inhmex kumrêx nẽ ixtĩr tũm nẽ ixpa ho ixpa. Jakamã na pa hte arĩ mẽ kãm Jejus kapẽr jarẽnh o ri mẽ hkõt ixpa.

¹¹ E Korît kãm ixkràmnhwỳjaja. Na pa ixprĩ hã mẽ amã amnhĩ nhĩpêx jarẽnh par kumrêx.

¹² Inhãmã mẽ akĩnh tỳx tã te mẽ amã ixkĩnh kêt pyræk.

¹³ Kwa te mẽ ate ixto mẽ akatut nẽ akuhê pyræk o inhĩpêx kêt nẽ. Amnhĩ pyrã nẽ amã ixkĩnh nẽ hkêt wehe. Te mẽ apê ixkra pyræk o na pa ã mẽ amã ixkapẽr anẽ.

Te mẽ pahpê Tĩrtũm nhõrkwỳ pyræk ã mẽ pajarẽnh

Wam Korît 10.20-22, 15.33; Epes 5.3-14; Sikün Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nẽ kêt ka mẽ kot Kris kõt amnhĩ xunhwỳr kêt xwỳnhjê mẽ mẽ mẽmoj tã tanhmã axpẽn mar to hkêt nẽ. Rỳ mẽhõ ho amjên rỳ mẽhõ ho aprõ hkêt nẽ. Ahpỳnhã mẽ pajamaxpẽr kênã. Tanhmã kot we mẽ hamaxpẽr nyw xwỳnhjaja nẽ mẽ hamaxpẽr tũm xwỳnhjaja amnhĩ to nẽ axpẽn kõt hamaxpẽr nẽ ri axpẽn kõt pa? Nà koja mẽ ã amnhĩ nhĩpêx anhỹr kêt nẽ. Ahpỳnhã mẽ pajamaxpẽr. Na hte hirã htỳxja kamat kô mẽ pihkàr kêt nẽ.

¹⁵ Xà na hte Kris mẽ Satanasti wa axpẽn kõt hamaxpẽr? Nà wa kot axpẽn kõt hamaxpẽr kêt. Ahpỳnhã wa hamaxpẽr nẽ ahpỳnhã wa kot amnhĩ nhĩpêx. Nẽ ahpỳnhã hirã nẽ ahpỳnhã kamat kô. Nẽ mẽ pahpê Kris kwỳjaja nẽ mẽ kẹp hkwỳ hkêt xwỳnhjaja ahpỳnhã mẽ pajamaxpẽr nẽ ahpỳnhã mẽ pahte amnhĩ nhĩpêx.

¹⁶ Na pu htem Tĩrtũm mã amnhĩ jarẽnh xà hã ixkre kamã sãnti xunhwỳr nẽ amnhĩ to hwỳr pẽ kãm mex o mex ã harẽnh kêt nẽ. Axtem na sãntija. Mẽ panhõ Tĩrtũmja sãnti rom htĩr tũm rãhã nẽ pa ho pa xwỳnh. Nẽ

mē papajaja te mē pahpē Tirtūm nhōrkwỹ pyrāk. Kapēr ā kagà htūm kot ja jarēnh kot: Ixkrajaja te kēp inhōrkwỹ nhūm ixpē ō dōn pyrāk. Te ixpē inhōrkwỹ kamā ixpa xwỹnh pyrāk jakamā kot paj ixkrajē kamā ri ixpa ho ixpa. Ixpē Mēhpām na pa. Anē.

17-18 ā Tirtūm xihtỳx xwỹnhja kot amnhī jarēnh anhỹr jakamā na hte mē kot amnhī tomnuj xwỹnhjē nē mē pahkurē ho:

Kēr ka mē hkôt ri apa hkēt nē. Kwarī ho kwarī.

Nē mē hkôt ri amnhī nhīpēx o apa hkēt nē. Kot kaj mē ixkapēr ma nē ixkôt amnhī nhīpēx hā kot paj amnhī wỳr mē awỳ nē mē ato ixkra.

Nē pa kot paj ixpē Mēapām maati. Anē.

7

1 Tā ā Tirtūm kot mē pahto hkra nē mē pahkôt pa ho pa hā amnhī jarēnh kot anhỹr jakamā kwa ixkrāmnhwỳjaja. Kēr pu mē kapēr ma nē tanhmā amnhī tomnuj to hkēt nē. Nē mēmoj punuj kukamā pajamaxpēr kēt nē. Nē ām kapēr kôt pix mā amnhī nhīpēx mex rāhā nē.

Pawre kot Korīt nhō xwỹnhjē nhỹ hā hkĩnh ā harēnh

2 Nē kwa Kris kôt ixtō nē ixtōxjaja. Kēr ka mē tee ri amnhī tā tanhmā inhmā ajamaxpēr to hkēt nē. Na pa pre tanhmā mē atō hto hkēt nē. Rỳ tanhmā mē atō hto ka mē ja hā ixpumu nē ixkôt tanhmā amnhī tomnuj to hkēt nē. Rỳ pa pre ixēx rom tanhmā mē anokupyr to ho ri ixpa hkēt nē. Kwa mē amā ixkĩnh nē tokyx ixkôt ajamaxpēr kēt wehe.

3 Mē ate inhmar nē amnhī tā apijaàm kaxyw na pa ā mē amā ixkapēr anhỹr kēt nē. Inhmā mē akĩnh kēnā. Na pa pre inhmā mē akĩnh ā amnhī jarēnh rax nē. Inhmā ri mē akôt ixpa rāhā ho ixpa hprām. Rỳ ka mē nhỹrmā apiitā apikaprār par japēr pa inhmā mē akôt ixtyk prām nē.

4 Na pa hte ra mē amā ijamaxpēr pē ixkĩnh nē ixpa. Nà kot kaj mē ixkapēr ma nē Jejus kôt amnhī nhīpēx mex nē. Tā kēr ka mē ā amnhī nhīpēx anhỹr rāhā nē. Na pa hte jar ra amnhī xà htỳx kamā ijamak o ri ixpa htā no ām mē amā ijamaxpēr nē ixkĩnh nē.

5 Nē na pa pre amnē Masetōn wỳr kormā Xitre japēr o mō. Hāmri nē Masetōnja wỳr pōj nē hapēr pē mē kām Jejus kapēr jarēnh o ri mē hkôt ixpa. Hāmri nhūm mē kām ixkurē xwỹnhjaja Kris ā inhīpēx punuj nē hā inhmā àkjēr pix o pa. Hāmri nē ma Masetōn kamā krī piitā hkôt ri mē kām ixto kapēr punuj nē pa amnhī tā mē mar o ri mē hkôt ixpa. Nē mē kajaja mē ate Kris kaga nē nhām mē hamaxpēr kôt amnhī nhīpēx pymaj na pa pre tee ri mē akukamā ijamaxpēr o ri mē hkôt ixkaprī nē ixpa.

6 Tā Tirtūm kēp mē hkaprī xwỹnhjē pumunh nē akupỳm mē ho mē hkĩnh xwỹnh jakamā na pre ixkaprī hā ixpumu nē ixwỳr Xitre mē. Pa pre omu nē akupỳm ixkĩnh nē tām ijamaxpēr.

7 No ām Xitre pumunh kôt pix mā ixkĩnh kēt. Na pre ixwỳr pōj nē tanhmā inhmā mē ajarēnh to nē mē ate tanhmā ho mex to hā mē ajarē. Nē mē amā ixpumunh prām tỳx ā mē ajarē. Nē Kris kôt mē atōta hpijaàm kēt o pa nhūm ixte kagà kamā hā mē amā ixàkjēr nhūm mē ate ja hā omunh nē ra amnhī kamā apijaàm o akaprī htỳx ā mē ajarē. Nhūm Tirtūm kot inhnē mē kām ixkurē xwỹnhjē pumunh mex kaxyw mē ate ixto hwỳr ā mē ajarē. Na pre ā inhmā mē ajarēnh anē pa kuma nē mē anhỹ hā ixkĩnh tỳx kumrēx.

8-9 Nē wam ixte mē amā kagàta nhīpēx kēt ri na pa pre tee ri mē ate amnhī nhīpēx ā mē ajarēnh ma nē mē akaxyw hipēx. Nē kamā mē ate hpijaàm kēt xwỹnhhta kot tanhmā amnhī nhīpēx to hā omunh nē ām omunh o arī hkôt apa hā kagàta kamā mē amā akir hāmri nē Xitre mā kugō nhūm kupy nē ma mē awỳr o mō. Tā ka xep prem kamā harē nē ama nē amnhī kamā apijaàm nē. Nē akaprī nē ajamaxpēr o:

—Hēxta waa nē. Ām hāmri na Pawre ā mē ijarēnh anē. Na pa mē ā amnhī nhīpēx anē nē amnhī tomnuj tỳx nē. Anē.

Tā nhūm Xitre akupỳn ixwỳr pōj nē inhmā mē ajarē. Pa mē ajarēnh ma nē tee ri ijamaxpēr nē ijamaxpēr o:

—Hēxta waa nē. Mon pa pre axtem nē ā ri mē kām ixàkjēr anē? Nà na xep prem kagàta kamā harē nē kuma nē hkaprī htỳx nē. Anē.

Tā ām hāmri na pa pre ā mẽ akaxyw hipêx nê mẽmojta ā mẽ amā ixàkjêr anê. Na ka xep prem kamā harê nê ama nê tee ri ajamxpêr o ra akaprī nê. Nom Tirtūm kām hprām xà hkôt na ka prem ja hā amnhī pumu nê ā akaprī anê. Tā xep ra akupỹm tām amnhī nhīpêx nê akupỹm Tirtūm kôt amnhī nhīpêx mex nê. Jao akupỹm akīnh nê ri apa. Jakamā ām hāmri na pa pre mẽ awýr wam kagàta mēnh nê mẽmoj tā ā mẽ amā ixàkjêr anê.

¹⁰ Koja Tirtūm krajê hō tanhmā amnhī tomnuj to. Hāmri nê tee ri ja hā amnhī pumu nê amnhī kamā hpijaàm nê akupỹm Tirtūm kôt tām amnhī nhīpêx. Hāmri nê akupỹm mex nê tām hamaxpêr pê hkīnh nê ri pa. Nê axte tee ri amnhī kukamā hamaxpêr hkêt nê. Ja na Tirtūm kām hprām. Tā koja mẽ kêp hkra hkêt xwýnhjê pyrā nê tanhmā amnhī tomnuj to nê ra hpijaàm japêr. Nom hkwýjaja kot ja hā omunh pix mýrapê hpijaàm nê arī Tirtūm kôt amnhī nhīpêx kêt japêr. Hā koja nhýrmā ty nê Tirtūm kra kot akupỹm hkôt tām amnhī nhīpêx xwýnhjê kīnhā Tirtūm pê awry rax kumrêx nê ri pa.

¹¹ Mẽ pahte Tirtūm kapêr kwým ri tanhmā amnhī nhīpêx to hā tee ri amnhī pumunh nê amnhī kamā hpijaàm nê akupỹm tām amnhī nhīpêxja na Tirtūm kām hprām. Tā na ka xep ā amnhī nhīpêx anê. Wam ixte mẽ awýr kagà mēnhhta na ka xep prem kamā tanhmā ixte nā puro kamā hpijaàm kêt xwýnhhta ā mẽ amā ixàkjêr tota kamā akapêr nê ama. Hāmri nê tee ri mẽ ate kormā kot amnhī tomnuj ā kām axàkjêr kêt ā amnhī kukamā ajamxpêr nê amnhī kamā apijaàm nê. Nom Tirtūm kām hprām xà hkôt. Mẽ ate jam ajamxpêr pê amnhī kamā apijaàmja na kām hprām. Tā ka mẽ hpijaàm xwýnhhta kamā agryk nê kām akapêr o:

—Kwa mẽ pahpê Jejus kwýjaja mẽ pahte ā amnhī nhīpêx anhýr kêt tā ka ā amnhī nhīpêx anê. Nà na ka amnhī tomnuj tỳx kumrêx. Kot kaj ā amnhī nhīpêx anê pa mẽ hā apumu nê gaa nê apyrā nê ā amnhī tomnuj anê. Kwa ja kaga nê axte ā amnhī nhīpêx anhýr kêt nê. Nê akupỹm Tirtūm kôt amnhī xām tỳx nê hkôt amnhī nhīpêx rāhā

ho ri apa. Anê.

Hāmri nhūm krī nhō xwýnhjaja ja hā mẽ ajarēnh ma nê mẽ apê jamnuj ā mẽ apumunh kurê kumrêx. Ām hāmri na ka prem ā kām akapêr anê.

¹² Nê ixte mẽ awýr kagà nê mēnhhta kamā na pa pre nā puro kamā hpijaàm kêt xwýnhhta mā tanhmā ixàkjêr to hkêt nê. Rý nā purota mā tanhmā ixàkjêr to hkêt nê. Na pa pre mẽ apê Kris kwýjê hwýr kagà nhīpêx nê kamā tanhmā mẽ amā hpijaàm xwýnhhta ā karō hto. Mẽ ate kamā harēnh hāmri nê inhý hā amnhī nê hanor nhūm Korīt nhō xwýnh piitā kot ā mẽ ate amnhī nhīpêx anhýr ā mẽ apumunh kaxyw. Nê mẽ ate Tirtūm nom ā hipêx anhýr jao mẽ amā ixkīnh pê ixkapêr kôt ā hipêx anhýr ā amnhī pumunh kaxyw.

¹³ Tā nhūm Xitre ixwýr pój nê tanhmā inhmā mẽ ajarēnh to. Na xep pre mẽ awýr nojarêt nê tee ri amnhī kukamā hamaxpêr. Mẽ ate kagàta kamā harēnh nê ijarēnh mar nê kamā agryk pymaj tee ri amnhī kukamā hamaxpêr. Tā ma mẽ awýr mōn pój nê mã amā kugō. Ka xep prem kamā harê nê ama nê hkôt amnhī nhīpêx kurê kumrêx nhūm mẽ ate amnhī nhīpêx ā mẽ apumu nê hkīnh nê. Hāmri nê tām hamaxpêr. Tā ra akupỹn ixwýr mō nê inhmā mẽ ajarē pa mẽ ajarēnh ma nê ijaxwýja ixkīnh nê.

¹⁴ Na pre kormā mẽ awýr nojarêt pa kām tanhmā mẽ amex ā mẽ ajarēnh to. Tā nhūm xep ma mẽ awýr mōn pój nê mẽ apumu nê hamaxpêr o:

—Nà pēr ām hāmri na pre Pawre inhmā mẽ mex ā harê. Mẽ mex kēnā. Anê.

¹⁵ Tā nhūm pre mẽ arūm kato nê ra man akupỹn ixwýr mōn pój nê inhmā mẽ ajarēnh o:

—Na pa pre ma mẽ hwýr mō nê mẽ kām ixkapêr o ri mẽ hkôt ixpa nhūm mẽ ixkapêr ma nê ixkôt amnhī nhīpêx kurê kumrêx nê ixto mex nê. Kormā ixte mẽ hwýr inhmōr kêt tā mẽ harēnh ma nê inhmā mẽ hkīnh nê. Tā pa ma mẽ hwýr mō nhūm mẽ ixto mex rax nê pa ra inhmā mẽ hkīnh tỳx kumrêx. Anê.

¹⁶ Ā inhmā mẽ ajarēnh anê pa mẽ ajarēnh ma nê ixkīnh tỳx nê. Ām hāmri na ka htem

mêmoj tâ amnhî jarênh xà hkôt tanhmã amnhî nhîpêx to ho apa.

8

Mê kot Kris kôt mê hkwýjê pé õxy hkêt ã mê kãm karõ

Atre 11.27-30; Rõmãn 15.25-27; Wam Korîit 16.1-4

¹ E Kris kôt ixkwýjaja. Kot paj hpãnhã mê amã jar Masetõn kamã tanhmã Jejus kwýjaja kot amnhî nhîpêx to hã mê harê ka mê harênh ma. Na hte Tirtûm mê kutã nojarêt nhûm mê mex nê pa.

² Mê hkwýjaja kot Kris ã mê hipêx kati nhûm mê kot amnhî xà htýx kãm hamak o pa htã hkînh nê hamakêtkati nê ri pa. Nê mê hkàxpore hkryre htã ho õxy hkêt nê pa. Na htem àmnhîx ri mê kêp amrakati xwýnhjê mã hkwý nhõr o pa.

³⁻⁴ Tã na prem Jerujarê kamã Kris kôt mê pahkwýjê jarênh ma. Mê kêp amrakati hã mê harênh ma nê kãm mê hkaprî nê. Nê mê kãm mê hwýr mêmoj rênh nê mê ho ajuta hprãm nê. No ãm pa ixte mê kãm hã karõ xà hkôt kêt. Mê tãmjaja mê hamaxpêr xà hkôt na prem ã hamaxpêr anê nê mê kaxyw kàxpore ho pikuprõnh rax nê. Hãmri nê inhmã kugõ nê inhmã:

—Kwa na pa prem Jerujarê kamã Kris kôt mê pahkwýjê jarênh ma nê mê inhmã mê hkaprî nê mê kãm mê ixkàxpore hkwý ho akuprõ. Jakamã e amý nê ma mê hwýr o mõi nê mê kãm agõ kê mê tokyx ho amnhîm awjaprõ nê kuku. Anê.

⁵ Pa mê kuma nê ixtýx ho ãm kàxpore grire hã hkamnhîx nê ijamaxpêr o:

—Kwa mo mê hikàxpore rax koja mê ri ho akuprõ nê mê kãm kugõ? ãm mê hikàxpore hkryre kênã.

Anhýr o ijamaxpêr tâ no nhûm mê kaxyw ho rax nê ho akuprõ. Mê hikàxpore hkryre htã mê kãm õr rax nê. Hãmri nê inhmã amnhî jarênh o:

—Na pa mê ra Pahihti Jejus Kris mã amnhî gõ. Mê ixte tanhmã kãm amnhî nhîpêx to ho ri ixpa kaxyw. Jakamã e tanhmã mê inhmã mêmoj tâ karõ hto. Kot pa mê ama nê akapêr kôt amnhî nhîpêx. Ja na pa mê inhmã hprãm nhûm Tirtûm haxwýja kãm ja prãm. Anê.

⁶ Na pa pre ã mê kot amnhî nhîpêx anhýr ã mê omu nê mê apê Korîit nhõ xwýnhjê mã ijamaxpêr kurê kumrêx. Hãmri nê Xitre mã mê ajarê. Na pre mê awýr mõi nê mê amã Jerujarê nhõ xwýnhjê jarê. Mê ate mê kãm kàxpore hkwý ho apikuprõnh kaxyw. Tã pa pre jam ijamaxpêr nê ra akupým mê awýr mênh mã nê kãm:

—Kwa ma akupým Korîit wýr mõi nê mê kãm anê kê mê ra kot amnhî jarênh xà hkôt Jerujarê nhõ xwýnhjê kaxyw kàxpore hkwý ho akuprõ nê tokyx mê hwýr kumê. Ra mê kãm Kris kôt mê hkwýjê hkînh ã amnhî jarênh kênã. E kwa tokyj. Anê.

⁷ Na ka htem amnhî to mex o ri apa. Nê amnhî kaxyw Kris hkôt ajamaxpêr týx nê. Nê ma mê kãm Tirtûm kapêr jarênh mex o ri mê hkôt apa. Nê mê ajamaxpêr mex nê. Nê mê piitã mê ho mex o ri apa. Nê mê amã ixkînh o ri apa. Jakamã kwa kêr ka mê axàmnhîx mê kêp amrakati xwýnhjê mã mê akàxpore hkwý nhõr o apa. Jao mê amã Tirtûm kînh týx ã amnhî to amnhîrit.

⁸ Ixte ã mê amã ja hã karõ anhýr tâ hã mê atã ixihtýx kêt nê. ãm mê kamã axukaprî hkôt mê ate mê kãm axàmnhõr o apa kaxyw na pa ã mê amã ixkapêr anê. Masetõn kamã mê pahkwýjaja kot amnhî nhîpêxta pyrã nê.

⁹ Ra mê ate Jejus Kris kãm mê pajapê hã kot tanhmã amnhî nhîpêx to hã mar mex. Amnepêem na pre kaxkwa kamã mex kumrêx nê ri pa ho pa nhûm mêmoj piitã kêp õ htã nhûm rer pa nê mê pahwýr wrý nê mê pakamã kêp amrakati nê ri pa. Hikàxpore hkêt nê ri pa. Tã mêmo kaxyw na pre ã mêmoj mex piitã rer par nê mê pahwýr wrýk anê? ãm kot mê pahto mex pix kaxyw. Kot mê pahto mex nhûm mê pahte kukwak ri mê paxàmnhîx ri mê pajamakêtkati nê mê papa kaxyw na pre ã amnhî nhîpêx anê. Mê pahte nhýrmã urak nê kaxkwa kamã pamex kumrêx nê ri papa ho papa kaxyw.

¹⁰ E kwa kêr ka mê tokyx kàxpore hkwý ho apikuprõnh pa nê Jerujarê nhõ xwýnhjê hwýr amê. Mê akumrêxjaja na ka prem ham amgrã hapêxta kamã ra mê kaxyw ho apikuprõnhja krax. Mê amã mê ho mex

prâm xàj ham ho hkrax tâ no ãm kormã hatur xàm mênh nê mê hwÿr mênh kêt nê.

¹¹ Kwa mê tokyx ja ho ajapêx nà. Na ka prem ate ho anhÿr krax ã akînh pê kàxpore hkwy ho apikuprõnh o apa. Tã kêr ka mê arî akînh rãhã ho apikuprõnh par jatur xàm amê. No mê ri atÿx tanhmã ajamexpêr to hkêt nê. Rÿ mê ajamexpêr o:

—Nà kormã. Kot paj nhÿrmã ixkàxpore rax nê rî kormã mê hwÿr hkwy mê.

Anhÿr o mê ri ajamexpêr hkêt nê. Mê ate tanhmã akàxpore hkre kamã kute hã omunh xà hkôt mê kãm hkwy pix gô.

¹² Kêr ka mê axàmnhÿx akînh kãm mê kãm ho akuprô. Ate amnhÿ kàxpore pumunh xà hkôt. Ka mê akàxpore rax nê mê kãm ho rax nê agô. Rÿ mê akàxpore grire nê mê kãm ho grire nê agô. Ja na kêt mex.

¹³ No mê ate mê kãm ôr par nhÿm mê arom mê hikàxpore rax nê ri paja mex kêt.

¹⁴ Nom ra mê akàxpore rûnh jakamã kwa mê amnhÿ kutã mê kãm hkwy ho hkryre nê ho akuprô kê mê apyrã nê hikàxpore nê ri pa. Kêr ka mê nhÿrmã tanhmã amnhÿ to nê axà nê nhÿm akàxpore apê hapêx nhÿm mê ajarênh ma nê amnhÿ kuxwar mê ato ajuta nê mê amã hkwy ho akuprô nê mê awÿr kumê. Ka mê akàxpore ho axpên pyrã nê ri apa.

¹⁵ Amnepê m Tirtûm kot kaxkwa rûm Ijaewjê hwÿr mēō rēnh nhÿm mê kot apkati mê amnhÿm hkawrà nê ho apkur o pata ã na pre Tirtûm kapêr ã kagã htûmja ã mê harênh anê nê mê harênh kot:

Na pre mê hkra xohtô xwÿnhjaja mê apkur xà hkawrà rûnh nê. Nê gôj kãm unhwÿ nê kuku nê piitã ho ôhy htu. Nhÿm mê hkra grêre xwÿnhjaja haxwÿja hkwy kawrà no ãm ho hkryre nê hkawrà. Nê gôj kãm unhwÿ nê kuku nê haxwÿja ho ôhy htu hpa. Na pre htem apkati mê ã amnhÿ nhÿpêx anhÿr o pa. Anê.

Ja pyrã nê kêr ka mê akàxpore ho axpên pyrãk o ri ho apa.

Xitre mê hkràmnhwÿjê jarênh

¹⁶ Nê Xitre na pre ixpyrã nê kãm mê ato ajuta hprãm nê. Na pre inhmã mê atã amnhÿ jarê pa pre kuma nhÿm ja inhmã mex nê pa ixkînh nê. Nê ijamexpêr o:

—Nà ãm hãmri na Tirtûm tanhmã Xitre hkrã hto nhÿm ã hamaxpêr mex anê. Anê.

¹⁷ Tã pa ma akupÿm mê awÿr môr ã hkukja nhÿm inhma nê hkînh nê mê awÿr nojarêr kurê kumrêx. Nom kormã ixte kãm mê ajarênh kêt ri nhÿm tãm amnhÿ kukamã hamaxpêr nê mê awÿr hkrã.

¹⁸ Tã na ra nojarêr kaxyw. Kot paj ma hkôt Kris kôt mê pahtôjê hō mê kê ma hkôt mō. Kôt ixte mēnh xwÿnhta na hte mê kãm Tirtûm kapêr jarênh mex nê nhÿm htem amnhÿm mex ã harê.

¹⁹ Na pre jar Jejus kwÿjaja kot ma ixkôt Jerujarê hwÿr kàxpore hkwy ho môr kaxyw nhÿm prem amnhÿm mê kurê. Tã koja Xitre mê wa mê awÿr mōn pōj ka mê kãm kàxporeta gō nhÿm man akupÿn o mō pa wa rî kormã ma Jerujarê hwÿr mê kãm o mō. Mê kot hamÿnh nê mê pamã mê hkînh ã kot amnhÿ tã mê pahpumunh kaxyw. Nê Tirtûm mã mex o mex ã harênh kaxyw.

²⁰⁻²¹ Nom kàxpore rax nhÿm ixte mê hwÿr o inhmôr nhÿm mê kot hã ixkamnhÿx py-maj kot paj ma amnhÿ kôt Kris kôt mê pahtôta o mō. Ixte Xitre hkôt mê awÿr mēnh xwÿnhta pa ma amnhÿ kôt o mō. Nom ixàhkînh o ixpare hã. Tirtûm kot ja kôt ixpumunh mex tã kot paj ma amnhÿ kôt o mō.

²² Nê ot pa ma Xitreta wa hkôt axte mê awÿr ja mê. Kêr kê mê axkrunêpxi nê ma ixkukamã mê awÿr mō. Ixte wa hkôt mēnh xwÿnhta ixte kot amnhÿ nhÿpêx ã omunh mex. Na hte kãm mê piitã mê ho ajuta ho pa hprãm nê. Tã mê ajarênh ma nê inhmã mê ajarênh o:

—Nà koja mê Jerujarê nhō xwÿnhjê mã kàxpore nhōr rax nê kãm ga. Mê kot amnhÿ to mex kēnã. Anê.

Jakamã ra mê awÿr hkrã. Tã koja ma Xitre wa hkôt mō nê mê ato ajuta ka mê tokyx kàxpore ho apikuprõnh pa.

²³ Nê koja mēhō tanhmã Xitre hã mê akukjêr to ka mê kêp ixkràmnhwÿ mex ã harê. Nê kot inhÿhkô hã mê ho ajuta mex o pa hã harê. Na pre ra jar Kris kwÿjaja mê akaxyw kuta nê ma mê awÿr kumê. Jakamã koja ma mê awÿr mō nhÿm Kris kôt mê pahtôjê hō wa pijakrutja wa ma hkôt mō. Na hte wa haxwÿja Kris kôt amnhÿ nhÿpêx mex o pa.

²⁴ Koja mẽ awÿr pøj ka mẽ omu nẽ mẽ ho mex nẽ. Nẽ mẽ amã mẽ hkĩnh nẽ. Kê krĩ piitã hkôt Kris kôt mẽ pahkwÿjê piitã mẽ hã mẽ ajarẽnh ma nẽ axpẽn mã mẽ amex ã mẽ ajarẽ. Nẽ mẽ ajarẽnh o:

—Pêr ãm hãmri na pre Pawreja mẽ pamã Korîit kãm mẽ pahkwÿjê jarẽ. Na xep pre Xitre mẽ hkwÿta ma mẽ hwÿr mō nhũm mẽ ho mex rax nẽ. Ra Pawre kot mẽ pamã mẽ harẽnh xà hkôt. Anẽ.

9

Mẽ kot kàxpore ho pikuprõnh ã mẽ harẽnh

¹⁻² Kwa ixkràmnhwÿjaja. Kot paj Jerujarẽ nhõ xwÿnhjê kaxyw mẽ atã ixihýtÿx kêt nẽ. Ra mẽ amã mẽ ho ajuta hprãm jakamã na pa pre Masetõn kamã Kris kôt mẽ pahkwÿjê mã mẽ ajarẽnh o:

—Pika pê Gres kamã Kris kôt mẽ pahkwÿjaja na prem ham amgrã hapêxta kamã Jerujarẽ kamã mẽ pahkwÿjê jarẽnh ma nẽ kãm mẽ ho ajuta hprãm. Anẽ.

Hãmri nhũm mẽ ajarẽnh ma nẽ mẽ apyrã nẽ kãm tanhmã mẽ ho ajuta hto hprãm.

³⁻⁴ Tã ot pa mẽ awÿr Xitre mẽ hõta wa mẽ ho ixpimràatã wa mẽ kumẽ. Mẽ kot kàxpore hã mẽ akukjêr kaxyw. Kêr pa mytwrÿ hõ hã ma Masetõn nhõ xwÿnh kwÿjê mẽ mẽ awÿr mō nẽ ra ixte mẽ kãm kàxpore hkwÿ ho mẽ apikuprõnh ã mẽ ajarẽnh kôt mẽ ate ho apikuprõnh rax ã mẽ apumu nẽ ixkĩnh nẽ. Nom kot pa mō nẽ tee ri hapêr nẽ te ixte Masetõn nhõ xwÿnhjê mã mẽ ato ixêx pyrã nẽ ixpijaãm nẽ. Ka mẽ ajaxwÿja amnhĩ kamã apijaãm nẽ.

⁵ ã mẽ pahte amnhĩ nhĩpêx anhÿr pymaj na pa ã mẽ amã kagãja nhĩpêx nẽ Xitre mã õr nẽ ma amnhĩ kukamã mẽ awÿr mẽnã anẽ. Nẽ hkôt wa mōr mã xwÿnhhta mẽ ho ixpimràatãã amnhĩ kukamã wa mẽ kumẽ. Tã kê mẽ awÿr pøj nẽ mẽ amã kagãja gõ ka mẽ kamã harẽ nẽ ama nẽ tokyx kàxpore ho apikuprõnh jatur xãm amẽ. Kêr pa mẽ hapu hã mẽ awÿr mō ka mẽ ra mẽ ixkutêp ho apikuprõnh pa nẽ mẽ kãm agõ nẽ ajamakêtkati nẽ apa. No pa ixte mẽ amã mẽ ate ho apikuprõnh kaxyw mẽ atã ixihýtÿx kêt.

⁶ Na htem piitã ã hamaxpêr anhÿr o pa nẽ hamaxpêr o:

—Kot ka apur rax nẽ kamã anhõ rax nẽ. Nom kot ka apur grire nẽ kamã anhõ grire.

Anhÿr o hamaxpêr jakamã kêr ka mẽ apitã ajamakêtkati nẽ Jerujarẽ nhõ xwÿnhjê mã kàxpore nhõr mex nẽ. Kêr ka mẽ ho apikuprõnh pa nhũm rax nẽ. Te mẽhõ ihpur rax nẽ kamã õ raxta pyrãk. Kê Tirtũm ã mẽ ate amnhĩ nhĩpêx anhÿr ã mẽ apumu nẽ nhÿrmã mẽ ato mex nẽ.

⁷ Nom kêr ka mẽ anhõxÿ kamã mẽ kãm õr kêt nẽ. Mẽ pahte pahkĩnh kãm panhõxÿ hkêt kãm mẽ kêp amrakati xwÿnhjê mã mẽmoj nhõr o papaja na Tirtũm kãm hprãm.

⁸⁻⁹ Koja mẽ hã mẽ apumu hãmri nẽ amnhĩm mẽ amex ã mẽ ajarẽnh rãhã ho pa. Mẽ kãm Tirtũm kĩnh xwÿnhjaja na htem àmnhĩx ri mẽ kêp amrakati xwÿnhjê mã mẽmoj nhõr o pa. Te Tirtũm kot amnhĩ nhĩpêx pyrãk. Na hte àmnhĩx ri mẽ pamã mẽmoj nhõr o pa. Mẽ pahwÿr na rẽ nhũm wrÿ. Nhũm mẽ pamã mẽ paxàpkur xà nhõr o pa. Nẽ tanhmã mẽ pahto pu mẽ paxà hkêt nẽ pajamakêtkati nẽ paxàpênh o papa. Nẽ pamex nẽ ri papa. Panhõ rũnh nẽ ri papa. Jakamã kwa pu mẽ urãk nẽ paxàmnhĩx ri mẽ kêp amrakati xwÿnhjê mã mẽmoj nhõr o papã.

¹⁰ E pa ixprĩ hã mẽ amã ja jarẽ ka mẽ inhma. Nà na hte ã Tirtũm mẽ pamã mẽ paxàpkur xà nhõr o pa anẽ. Kot kaj apur kãm ahkre nhũm tanhmã amã mẽmo hyta nhĩpêx to nhũm amã hapôx mex nẽ amã ô rũnh nẽ ka anhõ rax nẽ. Nẽ hkwÿ ho axàpkur o apa nẽ axte hkwÿ hkre. Tã kêr ka mẽ ã Tirtũm kot mẽ ato mex anhÿr ã amnhĩ pumu hãmri nẽ urãk nẽ axàmnhĩx ri mẽ kêp amrakati xwÿnhjê mã axàmnhõr pê mẽ ho mex o ri apa. Nhũm Tirtũm mẽ hã mẽ apumu nẽ mẽ amã mẽmoj nhõr rãhã nẽ. Ka mẽ amnhĩ pyrã nẽ mẽ kêp amrakati xwÿnhjê mã hkwÿ nhõr o apa.

¹¹ Koja Tirtũm mẽ ato mex rax nẽ ka mẽ anhõ mẽmoj rax nẽ. Ja o amnhĩ xwar mẽ kêp amrakati xwÿnhjê kaxyw kàxpore hkwÿjaxwÿ. Kêr pa mẽ amã hkwÿ jamÿ nẽ ma Tirtũm kôt mẽ pahkwÿjê mã o mō nẽ mẽ kãm kugõ kê mẽ omu nẽ hkĩnh nẽ. Nẽ mẽ atã Tirtũm mã mex o mex ã harẽ.

¹² Hãmri nẽ mẽ akukwak ri mex nẽ ri pa. Nẽ axpẽn mã Tirtũm mex o mex ã harẽnh o ri pa.

¹³ Koja mẽ amnhĩ tã mẽ apumu nẽ hkĩnh nẽ. Hãmri nẽ Tĩrtũm mã amnhĩ tã tanhmã mẽ ajarẽnh to nẽ kãm:

—Pa Tĩrtũm. Nà ãm hãmri na pre Korīt kãm akõt mẽ ixkwỳjaja amnhĩ jarẽ. Na htem akõt pix mã amnhĩ nhĩpẽx mex o ri pa. Jao mẽ ixpẽ õxỳ hkêt nẽ mẽ inhmã kàxpore hkwỳ nhõr rax nẽ. àmnhĩx ri hamakêtcati nẽ mẽ inhmã hkwỳ nhõr rax nẽ. No ãm mẽ papxipix na htem ã mẽ inhĩpẽx anhỹr kêt nẽ. Na htem mẽ kęp amrakati xwỳnh piitã ã mẽ hipẽx anhỹr o pa. ãm hãmri na ka pre tanhmã mẽ hkrã hto nhũm mẽ anhỹ hã ã amnhĩ nhĩpẽx anhỹr o pa. Amex o amex Tĩrtũm. Anẽ.

¹⁴ Hãmri nẽ mẽ ato hwỳr o:

—Pa Tĩrtũm. ãm hãmri na hte Korīt nhõ xwỳnhjaja amnhĩ pyrã nẽ mẽmoj to mẽ ixkutã nojarêt o pa. Jakamã aa mẽ ixte amnhĩ tã mẽ inhno ho mẽ omunh kêt tã mẽ inhmã mẽ hkĩnh nẽ. Kwa kêt ka mẽ ixtã mẽmoj to mẽ kutã anojarêt rãhã ho apa Tĩrtũm.

Anhỹr o mẽ ato kuwỳ.

¹⁵ Tĩrtũmja mex o mex. Nom na hte mẽ pahto mex pẽ mẽ pamã kàxpore nhõr kêt nẽ. Kra Jesusja na pre mẽ pamã kugõ. Kãm mẽ pajapẽ ho mẽ pahwỳr kumẽ nhũm mẽ pahwỳr wrỳ nẽ mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panẽ ty. Ja na mex o kot mẽ pamã kàxpore nhõr jakrenh. Mẽhõ koja urak nẽ ã mẽ panẽ htyk anẽ? Nà amrakati ho amrakati. ãm Jesus pix na pre ã amnhĩ nhĩpẽx anẽ.

10

Pawre kęp Tĩrtũm Karõ nhỹ hã kapẽr xwỳnh ã harẽnh

Epes 6.10-20; Wam Tesarõn 5.8

¹ E Kris kõt ixkwỳjaja. Nà ixpẽ Pawre kot paj mẽ akwỳ kot tanhmã ixto kapẽr to xwỳnhjẽ mã amnhĩ jarẽ ka mẽ apiitã inhma. Nà na hte Kris mẽ pakamã gryk tokyx anhỹr kêt nẽ. Na hte mẽ pahto mex japjẽ nẽ. Tã inhmã urak nẽ ã mẽ anhĩpẽx anhỹr prãm nẽ. No na hte mẽ akwỳjaja axpẽn mã tanhmã ixto kapẽr punuj to nẽ ri axpẽn mã:

—Pawre na hte nhỹri krĩ kamã pa nẽ mẽ pamã kagã nhĩpẽx nẽ mẽ pahwỳr kurẽ nẽ kamã mẽmoj tã mẽ pamã kapẽr kãm hihtỳx

nẽ hã mẽ pamã akir. Tã amnẽ mẽ pahwỳr mõ hãmri nẽ te kãm mẽ pahpyma pyrak o mẽ pamã kapẽr o pa.

Anhỹr o ijarẽ.

² Nom inhmã mẽ awỳr inhmõr nẽ mẽmoj tã mẽ amã ixakjẽr prãm kêt tã kot paj nhỹrmã mẽ awỳr mõ ka mẽ tanhmã amnhĩ tomnuj to ho apa japẽr. Pa ja hã mẽ apumu nẽ hã mẽ amã akir kãm ga.

³ Na pa htem jar pika ja kamã Tĩrtũm kwỳ hkêt xwỳnhjẽ kaẽx ã ri ixpa nom mẽ urak nẽ amnhĩ krã hkõt tanhmã amnhĩ nhĩpẽx to ho ixpa hkêt nẽ. Nẽ mẽ urak nẽ amnhĩ krã hkõt tanhmã ijamaxpẽr to ho ixpa hkêt nẽ. Na pa htem Tĩrtũm Karõ nhỹ hã àhpumunh xà ho amnhĩ nhĩpẽx o ri ixpa.

⁴ Nẽ Tĩrtũm xàhpumunh tỳx xà ho mẽ kãm kapẽr jarẽnh o ri ixpa. Mẽ kot mar nẽ hkõt amnhĩ nhĩpẽx kaxyw. Nẽ àhpumunh tỳx o na pa htem mẽ kot Tĩrtũm kõt amnhĩ xunhwỳr pymaj mẽ kęp àmnar xwỳnhjaja tanhmã mẽ nẽ mẽ ho.

⁵ Na htem htỳx ri tanhmã Tĩrtũm nẽ hkwỳjẽ mã kapẽr to ho pa. Amnhĩ kaxyw hkõt mẽ hamaxpẽr kêt kaxyw tanhmã nẽ mẽ kãm kapẽr to. Na pa htem ja hã mẽ omu nẽ Tĩrtũm xàhpumunh tỳx xà ho tanhmã mẽ kãm ixkapẽr to nhũm mẽ tee ri inhma nẽ axte mẽ kęp àmnar kêt nẽ. Pa mẽ kãm Tĩrtũm kapẽr jarẽ nhũm mẽ ohtõ nẽ kuma nẽ Kris kõt amnhĩ xunhwỳ nẽ hkõt amnhĩ nhĩpẽx o pa.

⁶ Tã mẽ kajaja kot kaj mẽ Tĩrtũm kõt amnhĩ nhĩpẽx mex tã mẽ atõ ra kapẽr nhĩrõp xa nẽ tanhmã amnhĩ tomnuj to. Pa ja hã apumu rỳ hã ajarẽnh ma nẽ hã amã akir.

⁷ Mẽ ate Tĩrtũm kot mẽ awỳr inhmẽnh kêt ã axpẽn mã ijarẽnh tã kot kaj mẽ atõ ãm hãmri apẽ Kris kwỳ hã amnhĩ pumu nẽ ra mããnẽn pa ixpẽ hkwỳ hã ixpumunh kurẽ kumrẽx. Mẽ apyrã nẽ ixpẽ hkwỳ kẽnã.

⁸ Na pa pre ma mẽ awỳr mõ nẽ tanhmã mẽ amã amnhĩ jarẽnh to nẽ mẽ amã:

—Tĩrtũm na pre mẽ awỳr inhmẽ pa mõ. Ixte ý hã mẽ amã kapẽr jarẽnh o ri mẽ akõt ixpa kaxyw. Anẽ.

Tã pa hte arĩ ã amnhĩ jarẽnh anhỹr o ri ixpa. ãm hãmri na pre Tĩrtũm mẽ awỳr inhmẽ pa hte ãm hãmri mẽ amã kapẽr jarẽnh o ri mẽ akõt ixpa. Na pa hte Tĩrtũm

nhỹ hã mẽ amã ixkapēr nẽ kapēr o ixêx o amnhĩ to jarkrar kêt nẽ. Ixte tanhmã mẽ atomnuj to ho ri ixpa kaxyw na pre Tĩrtũm mẽ awỳr inhmēnh kêt. Mẽ amã ixkapēr mex nhũm mẽ ate inhmar nẽ Kris kapēr kôt amnhĩ nhĩpêx mex o apa kaxyw na pre mẽ awỳr inhmẽ.

⁹ E kwa Kris kôt ixkwỳjaja. Na pa hte mẽ amã ixpuma kaxyw mẽ awỳr kagà rēnh kêt nẽ. Mẽ ate kamã harēnh nẽ tee ri amnhĩ kukamã ajamaxpēr o amnhĩ kamã amã ma kaxyw kêt.

¹⁰ Mẽ akamã mẽ kãm ixkĩnh kêt xwỳnhjaja na htem ijarēnh o:

—Pawre na hte awry hã pa nẽ mẽ pahwỳr kagà rēnh nẽ kamã te kēp pahi ho amnhĩ nhĩpêx pyrà nẽ mẽmoj tã mẽ pamã kapēr kãm hihtỳx nẽ. Tã mẽ pahwỳr pōj hãmri nẽ kapēr kaxyw nom kapēr kãm hihtỳx o kapēr kêt nẽ. Jakamã mo kaxyw kot puj mẽ hwỳr mra nẽ kapēr ma?

Anhỹr o ijarē.

¹¹ Nom ã ixte anhỹr kêt. Kwa mẽ inhma. Kot paj nhỹrmã ma mẽ awỳr mō hãmri nẽ te kagà ja kamã mẽ amã ixkapēr pyrāk o mẽ amã ixkapēr nẽ ixkapēr xihtỳx o mẽ amã ixkapēr kãm ga.

¹² Na hte mẽ akwỳjaja kot amnhĩ to mex o mẽ ajakrenh ã amnhĩ to jarkrar o ri pa. No ãm amnhĩ krã hkôt pix mã na htem ã ri amnhĩ jarēnh anẽ. Na hte Tĩrtũm ã mẽ harēnh anhỹr kêt nẽ.

¹³ Tã inhmã mẽ urāk nẽ ã amnhĩ jarēnh anhỹr prãm kêt. ãm ixte Tĩrtũm kot tanhmã inhmã karō hto xà hkôt amnhĩ nhĩpêx o ixpaja na inhmã hprãm. Tã mẽ kajaja mẽ awỳr na pre inhmẽ.

¹⁴ Ra kot mẽ awỳr inhmēnh jakamã ixkumrēx na pa pre mẽ awỳr mō nẽ mẽ akôt ri mẽ amã tanhmã Kris jarēnh to ho ri ixpa. Tĩrtũm kãm nhỹhỹm ixpa hprãm xà pix wỳr na inhmã ixpa hprãm.

¹⁵ No kêt mẽ kot amnhĩ krã hkôt htỳx ri Tĩrtũm kapēr jahkre o mẽ pa xwỳnhjaja na htem nhỹri krĩ kamã mẽ kot Kris kôt amnhĩ xunhwỳr ã mẽ harēnh ma nẽ mẽ hã amnhĩ to jarkrar o ri pa. Te tãm kot mẽ hwỳr mōr nẽ mẽ kãm ujarēnh nhũm mẽ kot mẽ mar xà hkôt Kris kôt amnhĩ xunhwỳr pyrāk. Nẽ mẽ hã amnhĩ to jarkrar o:

—E na pa pre ma mẽ hwỳr mō nẽ mẽ kãm Tĩrtũm kapēr jarē nhũm mẽ inhma nẽ hkôt amnhĩ xunhwỳr kurê kumrēx. Ixkukwak ri na prem ã amnhĩ nhĩpêx anẽ. Anẽ.

Nom ã amnhĩ nhĩpêx anhỹrja ã amnhĩ to hêx. No pa na pa hte ho mẽ urāk kêt nẽ. Koja Tĩrtũm ma nhỹri krĩ hwỳr ixkwỳjê hō mẽ nhũm ma hwỳr mō nẽ mẽ kãm Kris kapēr jarē. Hãmri nhũm mẽ kuma nẽ Kris kôt amnhĩ xunhwỳ. Pa mẽ harēnh ma nẽ mẽ ý hã ixkĩnh nẽ nom pa ixkukwak ri mẽ kot hkôt amnhĩ xunhwỳr ã amnhĩ to jarkrar kêt nẽ. Ixte mẽ hwỳr ixpa nẽ mẽ kãm ixujarēnhre hã kot pa hkêt mẽ hã amnhĩ to jarkrar. ãm Tĩrtũm kãm nhỹhỹm ixpa hprãm xà pix wỳr na pa hte ixpa nẽ mẽ kãm kapēr jarē. Jakamã kot kaj mẽ nhỹrmã Kris kôt amnhĩ nhĩpêx mex o ri apa pa ja hã mẽ apumu nẽ mẽ are nẽ hpãnhã ma krĩ hō hwỳr Kris kot mẽ hwỳr inhmēnh xà hō hwỳr mō. Ka mẽ ja hã ixto Tĩrtũm wỳr o apa.

¹⁶ Kot paj mẽ anhō krĩ kamã mẽ piitã mẽ kãm Jejus kapēr jarēnh pa hãmri nẽ hpãnhã ma krĩ hkwy hkôt ijapôx o ri ixpa nẽ kamã mẽ kãm harēnh o ri mẽ hkôt ixpa. Kormã aa mẽ kot mar kêt kumrēx xwỳnhjê mã harēnh o ri mẽ hkôt ixpa. Na pa hte ã mẽ hwỳr ixpa nẽ mẽ kãm ixujarēnh anẽ. Jakamã nhũm mẽ ja hã ixpumu nẽ mẽ kot Tĩrtũm kapēr mar xwỳnhjê pix wỳr ixpa hã ijarēnh kêt nẽ.

¹⁷ Nẽ Tĩrtũm kapēr ã kagà htũm kot mẽmoj tã mẽ kot amnhĩ to jarkrar ã harēnh kot:

Kêr ka mẽ kamjaja amnhĩ mex ã amnhĩ to jarkrar kêt nẽ. ãm Tĩrtũm pix mã mãn mex o mex ã harēnh o ri ho jarkrar o ri apa. Anẽ.

¹⁸ Kot pu mẽ Tĩrtũm noo mã amnhĩ to mex ã amnhĩ to jarkrar nẽ ãm amnhĩ to jarkrar kaprỳ. Nom koja Tĩrtũm tãm ja hã mẽ pahto jarkrar nẽ ãm hãmri mẽ pahte amnhĩ to mex xwỳnh ã pahto jarkrar.

11

Jejus kot mẽ hwỳr mẽ rēnh ã amnhĩ to hêx xwỳnhjê jarēnh

Matêwre 7.15; Rômãn 16.17; Karatas 1.6-9; Korosê 2.8; Sikūn Pêtre 2.1

¹ E kot paj te mẽ hkrã pipãnh xwỳnh kot htỳx ri amnhĩ jarēnh pyrāk o tanhmã mẽ

amã amnhĩ to jarkrar to. Kwa mẽ inhma nẽ ixkamã agryk kêt nẽ. No mẽ ixkapër kumrẽx mãn ma.

² Inhmã mẽ akĩnh. Te ho Měpahpãm Tĩrtũm kãm mẽ akĩnh ta pyrãk. Te mẽ apẽ mēhõ kukrit kãm my hkĩnh nẽ kot ho mjẽn prãm xwỳnh ta pyrãk. Kãm mẽmyjẽ piitã mẽ hkĩnh kêt ãm kãm pix kĩnh. Ja pyrã nẽ kêt ka mẽ amã Kris kĩnh o nhãm amã mẽ hkĩnh xwỳnhjẽ jakre. Te ho mēhõ ni kot kãm myta pix kĩnh nẽ kãm ho mjẽn prãm xwỳnh ta pyrãk. Ja na pa inhmã hprãm.

³ Ra mẽ amã Kris kĩnh tỳx o apa nẽ hkõt amnhĩ nhĩpẽx mex o ri apa htã nhũm mẽ kot amnhĩ krã hkõt htỳx ri Tĩrtũm kapër jahkre ho mẽ pa xwỳnhjaja tee ri ja hã mẽ ajarẽnh ma nẽ axpẽn mã mẽ ajarẽnh o:

–Kwa nã ja mex kêt. Koja mẽ Pawre kapër ma nẽ ãm kuma nhũm ja mex nẽ. No mẽ pahkõt mẽ kot amnhĩ nhĩpẽxja na mẽ pamã mex. Ja na kêt mẽ pamã mex o mex. Anẽ.

Hãmri nẽ ra kot Kris nẽ tanhmã mẽ amã hẽx to kaxyw. Te amnepẽ mã kagã kot mẽ panã kot wa pẽ Ewa mã hẽx nhũm kot mar nẽ hkõt amnhĩ nhĩpẽx ta pyrãk.

⁴ Na pa pre ra mẽ awỳr mõ nẽ mẽ amã tanhmã Jesus jarẽnh to. Nẽ tanhmã mẽ amã Tĩrtũm Karõ jarẽnh to. Nẽ tanhmã wa kot mẽ pahto hkra hto hã mẽ amã wa harẽ ka prem inhma nẽ mar tỳx nẽ. Tã nhũm ra mẽ kot htỳx ri Tĩrtũm kapër jahkre xwỳnhjaja ixpãnhã mẽ awỳr mõ nẽ Jesus kapër kwỳm ri tanhmã mẽ amã ujarẽnh to nẽ mẽ amã harẽnh o hẽx rãhã ho pa. Nẽ Tĩrtũm Karõja nhũm mẽ amã tanhmã ho hẽx to. Nẽ ixte mẽ amã Tĩrtũm kapër jarẽnh kwỳm ri ixpãnhã tanhmã mẽ amã harẽnh to ho pa. Nã ka prem mẽ ama nẽ ãm hãmri harẽnh ã hkamnhĩx. Kwa kêt ka mẽ ri mẽ ujarẽnh piitã mar nẽ hkõt amnhĩ nhĩpẽx kêt nẽ. Mẽ kot Jesus jarẽnh tã no ãm katãt kõt harẽnh kêt nẽ. ãm ri ho hẽx o pa. Ka htem ama nẽ ãm hãmri harẽnh ã hkamnhĩx nẽ mẽ amã mẽ mar prãm nẽ. Mẽ kot mẽ amã harẽnh o hẽx o pa htã ka mẽ ama nẽ ra mẽ hkõt amnhĩ nhĩpẽx kaxyw. Kwa mẽ ri ã amnhĩ nhĩpẽx anhỳr hkêt nẽ.

⁵ Kris kot mẽ awỳr mẽ rẽnh ã mẽ kot amnhĩ jarẽnh tã amnhĩ to hẽx. Ka prem ama nẽ ãm hãmri mẽ kot mẽ amã harẽnh ã

mẽ hkamnhĩx. Nom na pre Krisja mẽ awỳr mẽ rẽnh kêt nẽ. Kêt pa na pre mẽ awỳr inhmẽ.

⁶ Mẽ hkĩnhã ixkapër krõr pyrãk tã no ãm ixte Tĩrtũm kapër mar tỳx. Nẽ kot amnhĩ nhĩpẽxja na ixte omunh par. Ra mẽ ate ja hã ixpumunh mex.

⁷ Na pa pre mẽ akõt ri mẽ amã Jesus jarẽnh o ri ixpa no ãm hpãnhã mẽmoj tã mẽ awỳr o ri ixpa hkêt nẽ. Xã amarĩ ixte mẽ amã harẽnh nẽ hpãnhã mẽmoj tã mẽ awỳr kêtja mẽ apẽ omnuj?

⁸⁻⁹ Kormã ixte mẽ amã Tĩrtũm kapër jarẽnh o ri ixpata ã na pa pre hte tõtã kãxpore ho presija no ãm aa hã mẽ awỳr kêt nẽ. Jar Masetõn kamã Kris kõt mẽ pahkwỳjaja na prem ixwỳr hkwy rẽnh o pa pa ho ixãpkur xã japrõr o ri mẽ akõt ixpa. Mẽ kumã ixte Tĩrtũm kapër jarẽnh o ri ixpa hkêt tã pa hte mẽ kukwak ri mẽ akõt ho ixãpkur o ri ixpa. Tã kot paj arĩ ã mẽ akõt ixpa nẽ ã amnhĩ nhĩpẽx anẽ nẽ mẽmoj tã mẽ awỳr o ri ixpa hkêt nẽ.

¹⁰ Ja inhmã mex. Jakamã kot paj amarĩ mẽ anhõ pika pẽ Gres kãm ã mẽ amã Tĩrtũm kapër jarẽnh o ixpa anẽ nẽ mẽmoj tã mẽ awỳr kêt nẽ. ãm hãmri na pa ã mẽ amã amnhĩ jarẽnh anẽ. Kris pyrã nẽ ixẽx kêt kẽnã.

¹¹ Xã we inhmã mẽ akĩnh kêt kõt na pa hte ã mẽ amã Tĩrtũm kapër jarẽnh pãnhã mẽ awỳr kêt anẽ? Nã inhmã mẽ akĩnh jakamã na pa hte kapër jarẽnh pãnhã mẽ awỳr o ri ixpa hkêt nẽ. Inhmã mẽ akĩnh tỳx kẽnã. Tĩrtũm kot ja hã ixpumunh mex.

¹² No mẽ kot amnhĩ krã hkõt htỳx ri Tĩrtũm kapër jahkre xwỳnhjaja na htem mẽ ajahkre hpãnhã kãxpore hã mẽ awỳr pix o pa. Nẽ mẽ amã tanhmã amnhĩ to hẽx to nẽ mẽ amã:

–Nã mẽ ixte Pawre kot amnhĩ nhĩpẽx pyrãk. Mẽ ixte amnhĩ nhĩpẽxja kot axpẽn pyrãk.

Anhỳr o mẽ amã amnhĩ to hẽx. Nom ixte ho mẽ urãk kêt kumrẽx. Mẽ ixte amnhĩ nhĩpẽx kot axpẽn pyrãk ronhỹx pa mẽ urãk nẽ kãxpore hã mẽ awỳr o ri ixpa. Nom ixte ã amnhĩ nhĩpẽx anhỳr kêt. Kot paj aa ã amnhĩ nhĩpẽx anhỳr o ixpa hkêt nẽ.

¹³ ã mẽ kot amnhĩ nhĩpẽx anhỳr xwỳnhjaja na pre Tĩrtũm mẽ awỳr mẽ rẽnh

kêt nê. Mě kot Kris nhỹ hã mẽ ahkre xwýnh ã amnhĩ jarēnh tã ãm amnhĩ to hêx.

14 Mě õ pahi Satanastija te mẽmoj mex jarēnh pyrək tã no ãm na hte mẽ pano kupyř pẽ mẽ pamã tanhmã hêx to ho mẽ pahkõt pa. Te kot mẽmoj mex ã ãm hãmri kot harēnh pyrək tã no ãm ho hêx.

15 Tã hkõt mẽ kot amnhĩ nhĩpêx xwýnhjaja na htem urək nê te tãm mẽ kot amnhĩ nhĩpêx xwýnhjê pyrà nê mẽ pahwýr mra nê tanhmã mẽ pamã hêx to. Satanasti pyrà nê mẽ pano kupyř kaxyw tanhmã mẽ pamã hêx to. Nom koja Tirtũm nhỹrmã mẽ pahtã mẽ homnuj tỳx kumrêx nhũm mẽ rĩ amnhĩ pumu.

Tanhmã mẽ kot Kris ã Pawre nhĩpêx to ã mẽ harēnh

Atre 9.23-25

16 E kot paj axte te ixtỳx ri amnhĩ to jarkrar pyrək o mẽ amã tanhmã amnhĩ jarēnh to ka mẽ inhma nê ixkamã agryk kêt nê.

17 Pahihti Kris nhỹ hã kot paj mẽ amã amnhĩ jarēnh kêt ãm amnhĩ krã hkõt kot paj mẽ amã amnhĩ jarē.

18 Na htem ohtõ nê mẽ ate mẽ hã apijaàm kaxyw tanhmã mẽ amã amnhĩ to jarkrar to ho pa. Tã kot paj mẽ urək nê amnhĩ krã hkõt mẽ amã amnhĩ to jarkrar ka mẽ inhma.

19 Mě ate amnhĩ xàhpumunh tỳx ã amnhĩ jarēnh tã ka htem htỳx ri mẽ kot amnhĩ to jarkrar o ri mẽ pa xwýnhjê kapêr ma nê mẽ hkõt ajamaxpêr nê mẽ hkõt amnhĩ nhĩpêx kurê kumrêx.

20 Mě kot Kris nhỹ hã mẽ ahkre hã amnhĩ to hêx xwýnhjaja mẽ pakurom mẽ kot amnhĩ to rax xwýnh ã amnhĩ jarēnh jakamã na htem mẽmoj tã mẽ amã karõ ho pa.

Nê mẽ kãm hprãm xà hkõt nhỹhỹm mẽ arẽ nê nhỹhỹm mẽ arẽ.

Nê mẽ apa pix kukwak ri apkur o pa.

Nê mẽmoj tã mẽ ajakwap mẽ atak o pa.

Ã mẽ kot mẽ anhĩpêx anhỹr tã ka te mẽ ate atũm kêt pyrà nê atỳx ri mẽ kapêr ma nê mẽ hkõt amnhĩ nhĩpêx o ri apa.

21 Tã ixte mẽ urək nê ã mẽ anhĩpêx anhỹr kêt tã kot paj mẽ urək nê mẽ amã tanhmã amnhĩ to jarkrar to ka mẽ inhmar japêr. Te ixtỳx ri amnhĩ jarēnh pyrək o kot paj

mẽ amã amnhĩ jarē nom ãm hãmri mẽ amã amnhĩ jarē.

22 Mě kot Jejus nhỹ hã mẽ ahkre hã amnhĩ to mẽ hêx xwýnhjaja na htem mẽ amã tanhmã amnhĩ to jarkrar to nê mẽ amã:

–E mẽ inhma. Mě ixpê Ijaew na pa mẽ. Mě arom mẽ ixpê finat Apraãw kanrêhã htãmnhwý jakamã kwa mẽ ixkapêr ma nê mẽ ixkõt amnhĩ nhĩpêx. Anê.

Nom ijaxwýja ixpê Ijaew tã pa hte mẽ urək nê ja hã amnhĩ to jarkrar hkêt nê.

23 Nê mẽ kot Kris kapêr jarēnh mex o pa hã amnhĩ jarēnh tã pa na pa hte harēnh mex o mẽ hakre. Te ixkrã pipãnh pyrək o ã mẽ amã amnhĩ jarēnh anhỹr tãã.

E pa mẽ amã tanhmã amnhĩ jarēnh to ka mẽ inhma. Nà na pre Kris ã mẽ kãm ixkurê xwýnhjaja mẽ kot amnhĩ to jarkrar xwýnhjê hkĩnhã Kris ã ixpynênh nê ijagjênh xohtõ nê. Nê mẽ hkĩnhã tõhã ixtak rũnh kumrêx. Pa mẽ hkĩnhã xatã mẽ kot tanhmã ixto hã kritpêm ronhỹx pa pre ty.

24 Na pre Ijaew krãhtũmjaja Kris ã ixkatut kãm ixtak rũnh nê. Nê ixtak xàja pĩ hã mry kà janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rũnh o ixkatut kà rê. Ixtak o 39 hãmri nê rĩ kormã mẽ kot ixpĩr pymaj inhmã ure. Na pre htem nhỹri ixpynê nê ã inhĩpêx anê. Na prem ã inhĩpêx anhỹr o 5 wês.

25 Nê na prem ra mẽ kot ixpĩr kaxyw nê kên rũnh kwý jamý nê ho ixtak o kuhê. Nê Rõm nhõ xwýnhjaja haxwýja pĩ ho ixtak rax kumrêx. ã inhĩpêx anhỹr o axkrunêpxi.

Nê na pa pre hte gô xujanãr kãm nhỹhỹm Jejus jarēnh o ri ixpa kaxyw pàr kãm mẽ hwýr ixpa nhũm pàrja tanhmã amnhĩ to nê agjê. Kritpêm nhỹx pre hte gõja ixpĩ. Pa pre ã amnhĩ nhĩpêx anhỹr o axkrut. Tã arĩgro hõ hã kê axte pàr õ mã axà nê ma axte krĩ hõ hwýr mō. Nhũm kê pàrta axte mẽ ixpê axà nhũm gõja nhỹx kê axte ixpĩ. Pa pàr jakà hã kumý nê hã ijêt o amỹkry. Nê ho apkati. Tã nhũm nhỹhỹnh pàr õja mō nhũm kamã mẽ mōr xwýnhjaja ixpumu nê ixwýr pàr o mō nê amnhĩ wýr ixto api nê ma amnhĩ kõt ixto mō.

26 Na pa pre amnhĩ xà htỳx kamã ijamak o ri ã mẽ kãm Kris kapêr jarēnh o ri ixpa anê. Kironhỹx pre gô tãmja ixpĩ. Nhũm mẽ àhkĩnh nhi xwýnhjaja kironhỹx

prem määnēn ixpī. Nē Ijaew nē Ijaew kêt xwýnhjaja tōhã tanhmã ixtomnuj to ho pa. Pa pre krī hkwý hwýr ixpa rý kapôt ã ixpa nhūm mẽ ixtã amýnē. Pa pre gô xujanār kãm pàr kãm ri ixpa nē nhýx kamã ty. Nhūm mẽ kêp Kris kwý hã amnhĩ to hêx xwýnhjaja haxwýja tanhmã ixtomnuj to pa mẽ ý hã amnhĩ xà htýx kamã ijamak o ri ixpa. Æ na prem Kris ã inhĩpêx anhýr o pa.

²⁷ Nē na pa Jejus kapêr jarēnh o ri ixpa kurê ixkēngrà nē ri ixpa. Nē tōhã inhôt kêt ã ixtã apkati. Nē tōhã inhmã prãm nē inhmã kôr nē ri ixpa. Nē tōhã ixê mex kêt nē inhmã kry nē ri ixpa.

²⁸ Na pa hte Kris kapêr jarēnh o ri ixpa pē ã amnhĩ nhĩpêx anē. Nom ja pix kêt. Na pa hte krī piitã hkôt Kris kwýjê hkukamã tee ri ijamaxpêr nē ijamaxpêr o:

—Hêxta waa nē. Mãn mẽ arĩ Kris kôt amnhĩ nhĩpêx mex japêr rý ko. Mãn mẽ ra kapêr kwým ri tanhmã amnhĩ tomnuj to rý ra hkaga.

Anhýr o ijamaxpêr o ixpa.

²⁹ Nē na hte mēhō Tirtūm kapêr nhĩrôp xa nē tanhmã amnhĩ tomnuj to pa tee ri omu nē ixkaprĩ htýx kumrêx. Koja mēhō tanhmã Tirtūm nē mēhō mã kapêr to nhūm kuma nē Tirtūm kôt amnhĩ nhĩpêx kêt pa tee ri ja hã omu nē nē kêp àmnàr xwýnhta kamã inhgryk týt kumrêx.

³⁰ E Kris kôt ixkwýjaja. Na pa ã mẽ amã amnhĩ jarēnh anē. Te ixte amnhĩ to ijarerar pyràk no ãm mẽ ate ixirerek xwýnh ã ixpumunh pix kaxyw.

³¹ Æm hãmri na pa ã mẽ amã amnhĩ jarēnh anē. Ixêx kêt. Pahihti Jejus nhĩpêxã Tirtūm kot ja hã ixpumunh mex. Tirtūmja mex o mex. Koja mex o mex tūm nē pa rãhã ho pa. Tãm kot ixirerek ã ixpumunh mex.

³² Kormã krī pē Tamas kãm ixpare ri na pre mẽ õ pahi Arêtja mẽ kãm ixtã amýnē nhūm pôristijaja krī hpu hã kahê xà nhō hakwakre piitã kãm hipôk pa nē ixkãm hamak o kuhê. Pa tee inhmã nhýhýnh ixkator nē ma mẽ umaj ixprôt nē ixtēm prãm nē ixirerek xwýnh ã amnhĩ pumunh kurê kumrêx.

³³ Tã nhūm Kris kôt mẽ pahkwýjaja hamaxpêr nē kawà rax mý nē o tē nē inhmã ãm pa hwýr axà nē kamã nhý. Hãmri

nhūm mẽ pàr nhōr o kahê nhĩrô pē ixto wrý pa ixkato nē mẽ kêp amūxu nē amnhĩm ixprĩ nē ma tē nē mẽ kêp akunok. Æ na pre Tirtūm ixirerek xwýnh ã inhmã ixto amnhĩrīt anē.

12

Tirtūm kot Pawre mã mẽmoj to amnhĩrīt ã harēnh

¹ E Kris kôt ixkwýjaja. Nà inhmã amnhĩ to jarkrar hprãm kêt tã kot paj tanhmã mẽ amã amnhĩ jarēnh to ka mẽ inhma nē hã ixtã apijaam japêr. Na hte Tirtūm tōhã inhôt kãm ixkarō mã tanhmã kapêr to.

²⁻³ Amnepê mã amgrà hō hã na pre tanhmã ixkrã hto nē õ krī hwýr amnhĩ wýr ixto api. Na pre ra hã amgrà pē 14 ãn. Apu inhĩ rãhã ixto api rý apu ãm ixkarō pix o api rý ko. Ixte ja hã amnhĩ pumunh mex kêt. Tirtūm pix kot ja hã ixpumunh.

⁴ Na pre ixto api pa pōj nē õ krī kamã axtem tanhmã mẽ kapêr to hã mẽ kuma. Na prem mẽmoj mex kumrêx jarē pa kuma nē ixkĩnh nē. Nē inhmã mar prãm nē. Hãmri nē ijamaxpêr o:

—Hêxta waa nē. Mẽmoj jarēnhja mex kumrêx. Nà kot paj akupým wrý nē ixkwýjê mã harê kê mẽ ixpyrà nē kuma. Nà kot paj anē.

Anhýr tã nhūm Tirtūm Karō ja nē ixkurê nē inhmã:

—Nà kêt ka mẽ kãm ja jarēnh kêt nē. Æm kapxipix kot kaj ama nē ri hã apa.

⁵ Anhýr jakamã pa pre paxipix mẽ arom mẽmojja pumu nē kuma nom kot paj ri hã amnhĩ to jarkrar kêt nē. Kot paj ãm Jejus pix tanhmã harēnh to ho ri ixpa. Jao ixrom mex o mex ã harê. Nē ixrom hihtýt o hihtýt nē àhpumunh o àhpumunh ã harēnh o ri ixpa.

⁶ Nē ixte Tirtūm nhō krī hwýr ixàpirja ãm hãmri ixte hã amnhĩ jarēnh tã kot paj ja hã amnhĩ to jarkrar o ri ixpa hkêt nē. Mẽ ate ja hã inhmar kôt inhmex ã ijarēnhja na inhmã hprãm kêt. Nom kot ka mẽ ixte tãm amnhĩ nhĩpêx ã ixpumu nē tãm ixkapêr ã inhma hãmri nē rĩ kormã inhmã inhmex ã ijarē. Æ mẽ ate amnhĩ nhĩpêx anhýrja na inhmã hprãm.

⁷ Na pre Tirtūm inhōt kām inhmā mẽmoj mex kwỳ jarēnh rax nē. Hāmri nē hpānhā inhmā:

—E na ka akwỳjē rom inhō krī hwỳr api nē mẽ kurom mẽmoj mex pumunh rax nē. Tā ate ja hā amnhī pumunh nē ma mẽ kām hā amnhī to jarkrar o ri apa pymaj kot paj Satanasti mǎ anē nhūm inhma nē tanhmā atomnuj to ho pa. Nom ijamaxpēr xà hkōt koja ā anhīpēx anē.

Anhỳr jakamā nhūm tanhmā inhīpēx to pa inhmex kēt nē ixpa. Te mrōnhī rax nhỹhỹnh kot ixkamnhwỳr nhūm inhmā tee ri hkaxàr prām kaprỳ nē ỹ hā ho inhgjēx rāhā nē ixpaja pyrāk.

⁸ Tā pa tee ri ja hā amnhī pumu nē amnhī to Jejus wỳ nē kām:

—Kwa Pahihti. Na pa ra mẽmojta nhỹ hā ixpunuj nē ixirerek nē ixpa. Kwa inhnē ata pa akupỹm ixihỳx nē ijamakētkati nē ri ixpa nà?

Anhỳr o amnhī to hwỳr o axkrunēpxi.

⁹ Hāmri nhūm inhmā:

—Nà kot paj anē hyr kēt nē. Kot paj ām akutā inhnojarēt rāhā ho ri akōt ixpa. Ka axirerek nē apa htā ixihỳx xwỳnh ā ixpumunh kōt ixkamnàr rom tanhmā inhỹ hā amnhī nhīpēx to ho ri apa. Anē.

Ā inhmā kapēr anhỳr jakamā na pa ixpunuj nē ri inhīrot nē ixpa htā ixrom hihtỳx xwỳnh ta nhỹ hā ixkīnh nē ixpa. Nē kurom ixirerek xwỳnh pix ā amnhī to jarkrar o ri ixpa.

¹⁰ Jakamā kot paj Kris ā ixpunuj nē ri ixpa htā ixkīnh nē ijamakētkati nē ri ixpa. Kwār mẽ māmri hā tanhmā ixto kapēr to nē tanhmā hā inhīpēx to pa amnhī xà htỳx kamā ijamak o ri ixpa. Nē ixpē amrakati nē inhīrot nē ri ixpa htā Kris nhỹ hā tanhmā kām amnhī nhīpēx mex to rāhā ho ri ixpa.

Pawre kot tee ri mẽ hkukamā hamaxpēr ā harēnh

¹¹ Tā mẽmo kaxyw na pa ā mẽ amā amnhī jarēnh anē? Nà mẽ ate ixtā apijaām kēt jakamā na pa ā mẽ amā amnhī jarēnh anē. Mē kēp Kris nhỹ hā mẽ ajahkre xwỳnh ā amnhī to hēx xwỳnhjaja na ka htem ixrom kot amnhī to rūnh xwỳnh ā mẽ harē nē mẽ hā apijaām o ri apa. Nom ixte amnhī

to grire xwỳnh tā mẽ kot amnhī to rūnh o ijakrenh kēt.

¹² Na pa pre mẽ akamā ri ixpa nē Tirtūm nhỹ hā aa mẽ ate mẽmoj pumunh kēt kwỳ ho anhỳr rax o ri mẽ akōt ixpa. Nē ỹ hā akupỹm mẽ à xwỳnhjē ho mex. Nē mẽ nohkre xwỳnhjē no ho mex. Na pa pre hte ā mẽ amā mẽmoj nhīpēx anhỳr o ri mẽ akōt ixpa. Amnhī xà htỳx kamā ijamak o ri ixpa htā Tirtūm xihtỳx xà ho amnhī to htỳx nē ā mẽ amā mẽmoj to anhỳr o ri mẽ akōt ixpa. Mē ate omunh nē Tirtūm àhpumunh tỳx ā omunh kurē kumrēx kaxyw. Nē ixpē Kris nhỹ hā mẽ ajahkre hā ixpumunh kurē kumrēx kaxyw na pa pre ā mẽ amā amnhī nhīpēx anhỳr o ri mẽ akōt ixpa.

¹³ Xàn pa pre nhām krī hkwy kamā Kris kōt mẽ pahkwỳjē ho mex tā mẽ kajaja tanhmā mẽ ato mex to hkēt nē? Nà na pa pre hte mẽ anhīpēx o axpēn pyrāk. Ām mẽmoj pixire na pa pre mẽ urāk nē mẽ awỳr kēt nē. Nhām krī hkwy kamā ixpata ā na pa pre mẽmoj to presija nhūm prem inhmā ōr o pa. Tā pa pre mẽ mō nē mẽ akōt ixpa nē mẽmoj to presija htā hā mẽ awỳr kēt nē. Kwa mẽ ā ixte amnhī jarēnh anhỳrja ma nē ixkamā agryk kēt nē.

¹⁴ Tā ot pa ra akupỹm mẽ awỳr inhnojarēt kaxyw. Na pa pre ra mẽ awỳr inhmōr o axkrut. Tā ra axte mẽ awỳr inhnojarēt kaxyw. Kot paj mẽ awỳr mō nē mẽ akōt ixpa nom te wam ixtēmta pyrā nē mẽmoj tā ri mẽ awỳr kēt nē. Ām mẽ amā ixkīnh pix na inhmā hprām. Mē apiitā te mẽ apē ixkra pyrāk. Na hte mẽ hkrarejaja mẽ katorxà nē mẽ hipēêxà mǎ ujaprōr o pa hkēt nē. Mē hipēêxà nē mẽ katorxà na hte hkrare mǎ kot mẽmoj to presija xà hkōt kām haprōr o pa nom mẽmoj tā hwỳr kēt nē. Ja pyrā nē kot paj mẽ apē ixkra pyrāk ā mẽmoj tā mẽ awỳr kēt nē.

¹⁵ Kot kaj mẽ mẽmoj to presija japēr nē inhmā harē pa ixamnhīx ixkīnh kām mẽ amā ixkàxpore piitā ōr par pyrāk o amnhī nhīpēx. Nē mẽ amā tanhmā amnhī nhīpēx to ho ixpa rāhā ixtykja na inhmā hprām. Inhmā mẽ akīnh tỳx kumrēx tā mẽ kajaja mẽ amā ixkīnhja mẽ atā hkwy jēt kēt kumrēx.

¹⁶ Ixte amnhī mǎ mẽmoj tā mẽ awỳr kēt

tā na hte mẽ akwỳjaja ixêx rom ixte nhām mẽ kêp amrakati xwỳnhjê mã kàxpore hã mẽ awỳr o ixpa hã ixkamnhĩx.

17 Kwa tanhmã na pa pre ri mẽ ano kupyri to? Xà ja kaxyw na pa pre mẽ awỳr ixkràmnhwỳta wa kumẽ?

18 Na pa pre Xitre hã ixihitỳx mẽ mẽ awỳr kumẽ. Nẽ Kris kôt mẽ pahōja pa Xitre hkôt kumẽ nhũm wa ma mẽ awỳr mō. Tã xà na pre Xitre tanhmã mẽ ano kupyri to? Nà na pre ã mẽ anhĩpêx anhỳr kêt mẽ. Tã wa ixte amnhĩ nhĩpêx mẽ wa ijamaxpêrja kot axpên pyrək. Nà na pa hte urək mẽ mẽ ano kupyri o ri ixpa hkêt mẽ.

19 Mãn ka mẽ axpên mã mẽ ijarênh o:

—Nà Pawre mẽ hkwỳjaja mẽ kãm amnhĩ to rũnh xwỳnh prãm jakamã na ã Pawre kagàja kamã mẽ pamã amnhĩ tã àprār anẽ.

Anhỳr o mẽ ijarênh japêr nom mẽ inhmã amnhĩ tã tanhmã ixàprār to hprãm kêt. ãm mẽ inhmã mẽ akĩnh mẽ mẽ ato mex prãm jakamã na pa htem tanhmã mẽ amã amnhĩ nhĩpêx to ho ri ixpa. Na pa Tĩrtũm noo mã Kris nhỹ hã ã mẽ amã mẽ amnhĩ jarênh anẽ.

20 Tã kot paj jatã ma mẽ awỳr mō ka mẽ akwỳjaja tanhmã amnhĩ tomnuj to japêr.

Mẽmoj tã axpên mã axàkjêr o apa.

Rỳ mẽmoj tã axpên kãm agryk.

Rỳ axpên kãm agryk tokyx anhỳr o apa.

Rỳ axpên pê anhōxỳ.

Rỳ axpên to akapêr punuj o apa.

Rỳ mẽ ajakwa kamã nhām mẽ hixi ho rêr o ri apa.

Rỳ amnhĩ to rũnh prãm xàj anhmã amnhĩ nhĩpêx to ho apa.

Kot kaj mẽ ã amnhĩ nhĩpêx anhỳr o ri apa pa ja hã mẽ apumu mẽ ixkaprĩ htỳx kumrêx ka mẽ tee ri amnhĩ tã ixpumu.

21 Xà kot paj mẽ awỳr mō mẽ mẽ apumu ka mẽ akwỳjaja arĩ mẽ aprō kuhpa hã nhām mẽnijê ho amnhĩkati ho ri apa? Rỳ arĩ tanhmã ajamaxpêr punuj to ho apa? Rỳ atỳx ri apijaàm kêt o apa? Kot ka mẽ arĩ ã amnhĩ nhĩpêx anẽ pa ja hã mẽ apumu mẽ ixkaprĩ xàj inhmỳr rax mẽ. Nẽ mẽ anhỹ hã Tĩrtũm noo mã ixpijaàm tỳx kumrêx.

13

Pawre kot tanhmã amnhĩ kukamã mẽ kãm karō hto

1 Tĩrtũm kapêr ã kagà htũm tanhmã mẽ kot amnhĩ tomnuj to xwỳnhjê jarênh kot:

Koja mẽhō tanhmã amnhĩ tomnuj to nhũm mẽhō pyxi mẽ ã amnhĩ nhĩpêx anhỳr ã omu mẽ awỳr tẽ mẽ amã harê ka mẽ ama mẽ ãm ama mẽ hkôt ajamaxpêr kêt mẽ. No koja mẽmojaja axkrut rỳ axkrunêpxi mẽ hã omu mẽ awỳr mra mẽ axpên kôt amã harê ka mẽ ama mẽ mẽ hkôt ajamaxpêr kurê kumrêx. Anẽ.

Tã ra mẽ awỳr inhmōr o axkrut tã kot paj akupỳm mẽ awỳr mō mẽ mẽ apumu.

2 Hapu hã mẽ awỳr inhmōrta ã na pa pre mẽ akwỳ kot tanhmã amnhĩ tomnuj to hã mẽ omu mẽ hã mẽ kãm akir mẽ mẽ kãm:

—Kot kaj mẽ amnhĩ tomnuj kaga mẽ tãm amnhĩ nhĩpêx kêt kot paj nhỹrmã akupỳn mẽ awỳr mō mẽ ã mẽ ate amnhĩ nhĩpêx anhỳr ã mẽ apumu mẽ hã mẽ atomnuj tỳx kumrêx kãm ga. Anẽ.

Jakamã kot paj mẽ ma mẽ awỳr mō nhũm mẽ akwỳjaja arĩ mẽ ate amnhĩ tomnuj o apa hã inhmã mẽ ajarê pa mẽ atã mẽ kuma mẽ tanhmã mẽ ato htỳx mẽ.

3 Kot kaj mẽ ja hã ixpumu mẽ aprĩ hã ixte Kris nhỹ hã ixkapêr xwỳnh ã ixpumunh tỳx kurê kumrêx. Kris ixrom hihtỳx o hihtỳx. Na pre ra mẽ ate amnhĩ tomnuj o apata mỳrapê tanhmã mẽ anhĩpêx to. Tã kot kaj mẽ kormã ã ate amnhĩ nhĩpêx anhỳrja kaga hkêt hã koja tee ri ja hã mẽ apumu mẽ mẽ anhĩpêx kati mẽ.

4 Amnepêm na pre Krisja te hihtỳx kêt pyrà mẽ ãm arĩ mẽ kãm xa nhũm mẽ unê mẽ pĩ kahpa ã kunhō mẽ kupĩ. Tã nhũm Tĩrtũmja àhpumunh tỳx o akupỳm ho htĩr nhũm akupỳm htĩr o htĩr mẽ Tĩrtũm nhỹ hã hihtỳx o hihtỳx ã amnhĩ to amnhĩrit. Ja pyrà mẽ wam mẽ awỳr inhmōrta ã na pa pre hte mẽ akamã te Kris kormã htyk kêt ri hihtỳx kêeta pyrà mẽ mẽ akôt ixpa. Tã kot paj ma akupỳm mẽ awỳr mō hãmri mẽ te Kris ra akupỳm htĩr mẽ hihtỳx o hihtỳxta pyrà mẽ Tĩrtũm xihtỳx xà ho tanhmã mẽ kot amnhĩ tomnuj xwỳnhjê nhĩpêx to. Hãmri nhũm mẽ amnhĩ tã ixpumu mẽ Tĩrtũm nhỹ hã ijamaxpêr tỳx ã ixpumunh kurê kumrêx.

⁵ Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kôt ajamaxpêr o ri apa nà? Kot kaj mẽ apê hkwỳ hã koja mẽ akaxwỳnh kãm mẽ akamã hkrĩ rãhã nẽ. Nom koja mẽ akaxwỳnh kãm mẽ akamã hkrĩ hkêt ka mẽ ãm apê hkwỳ hã amnhĩ jarênh kaprỳ.

⁶ No pa na ixte ja hã amnhĩ pumunh mex. Ixpê Jejus kwỳ na pa. Ra ixkamã hkrĩ nẽ ixkôt pa ho pa jakamã ixpê hkwỳ na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwỳ hã amnhĩ jarênh kaprỳ hkêt nẽ.

⁷ Nẽ na pa hte mẽ ato tanhmã Tĩrtũm wỳr to ho ri ixpa nẽ mẽ ato hwỳr o:

—Pa Tĩrtũm. Kwa tanhmã Korīt nhõ xwỳnhjê hkrã hto kê mẽ tanhmã amnhĩ tomnuj to ho pa hkêt nẽ.

Anhỹr o mẽ ato kuwỳ. Mẽmo kaxyw na pa hte ã mẽ ato hwỳr anẽ? Ixte mẽ ajahkre mex ã amnhĩ to amnhĩrĩt kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhỹr o ri apa hãmri nhũm axtem mẽhõ mẽ awỳr mõn pøj nẽ tanhmã mẽ amã mẽ ijarênh to nẽ mẽ ijarênh o:

—Kwa Pawre mẽ hkwỳjaja na htem Tĩrtũm kapêr kwỳm ri Korīt nhõ xwỳnhjê jahkre ho pa.

Anhỹr tã pa amnhĩ tã mẽ kuma nẽ ãm mẽ kuma.

⁸ Na pa hte Tĩrtũm kapêr kutã amnhĩ xunhwỳr kêt nẽ. Na pa hte ãm mẽ ate hkôt amnhĩ nhĩpêx o ri apa hã mẽ amã karõ kamã ixihitỳx rãhã ho ri mẽ akôt ixpa.

⁹ Jakamã kot kaj mẽ hkôt amnhĩ nhĩpêx mex o apa pa ja hã mẽ apumu nẽ ixkĩnh nẽ. Mẽ kot axpên mã ixirerek ã ijarênh o pa htãã. ã mẽ ate amnhĩ nhĩpêx anhỹr o apa kaxyw na pa hte mẽ ato Tĩrtũm wỳr o ri ixpa nẽ kãm:

—Pa Tĩrtũm. Kwa tanhmã Korīt nhõ xwỳnhjê hkrã hto kê mẽ kot amnhĩ tomnuj kaga hpa nẽ hpãnhã akapêr kôt pix mã mãn amnhĩ nhĩpêx rãhã nẽ. Anẽ.

¹⁰ Tã pa kormã mẽ awỳr inhmõr xwỳj ri ã amnhĩ kukamã kagã nhĩpêx nẽ mẽnh anẽ. Mẽ ate kamã harênh nẽ mar nẽ tokyx akupỳm tãm amnhĩ nhĩpêx kaxyw. Kot pa

mẽ awỳr mõ nẽ Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixãkjêr anhỹr prãm kêt. ãm ÿ hã kapêr o mẽ ajahkre mex nhũm mẽ ate inhmar nẽ hkôt amnhĩ nhĩpêx rãhã ho apaja na inhmã hprãm.

¹¹ E Kris kôt ixkwỳjaja. ãm ja pix. Kwa kêt ka mẽ ixkapêr mar tỳx nẽ hkôt amnhĩ nhĩpêx mex nẽ. Nẽ Tĩrtũm kôt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpên kôt ajamakêtkati nẽ akĩnh nẽ axãmnhĩx ri apa. Kot kaj mẽ ã amnhĩ nhĩpêx anhỹr o apa nhũm Tĩrtũm mẽ akôt pa ho pa. Kãm mẽ pajapê htỳx kumrêx. Kêp mẽ pamã mẽ pahkĩnh nẽ mẽ pajamakêtkati jagjênh xwỳnh.

¹²⁻¹⁴ Nẽ ota jar Kris kôt mẽ pahkwỳjaja pa mẽ ixpimràatã mẽ awỳr ixpêr mẽ. Mẽ ixpiitã mẽ inhmã mẽ akĩnh tỳx jakamã na pa mẽ awỳr ixpêr mẽ.

Nẽ kê Pahihti Jejus Kris mẽmoj to mẽ akutã nojarêt rãhã ho pa. Nhũm Tĩrtũm arĩ kãm mẽ ajapê rãhã ho pa. Nhũm Karõ tanhmã mẽ akrã hto ka mẽ axpên to mex pix kukamã mãn ajamaxpêr o apa.

Tã e ixkwỳjaja. ãm ja pix. Ixpê Pawre na pa mẽ awỳr kagãja nhĩpêx nẽ ã mẽnh anẽ.

Karatas Pawre kot Karatas kamã Jejus kôt hkwÿjê hwÿr kagã nê mênh

Pawre na pre kagãja nhîpêx nê pika pè Karatas kamã Kris kwÿjê hwÿr kumê. Na pre ra Ijaew kwÿjaja mē hwÿr mra nê Tirtüm kapêr kwÿm ri mē ahkre ho pa nê mē kãm:

—Kot kaj mē amnhî kaxyw Jejus Kris kôt ajamaxpêr hãmri nê mãânên mē ixpê Ijaew nhîgêt kot amnhî nhîpêx kôt amnhî nhîpêx. Kê Tirtüm ja hã mē apumu nê mē ato hkra. Anê.

Nom ã mē kapêr anhÿrja kot anhÿr kêt. Mē pahte amnhî kaxyw Jejus Kris kôt pajamaxpêr nê hkôt amnhî xunhwÿr pix ã mē pahpumunh kôt na hte Tirtüm mē pahto hkra. Tã nhüm prem ã mē kãm ho hêx anhÿr o pa nhüm Pawre tee ri ã mē kapêr anhÿrja ã mē harênh ma nhüm ja kèp omnuij nê. Jakamã nhüm Karatas nhõ xwÿnhjê mã kagãja nhîpêx nê mē hwÿr kumê. Nê kamã hprî hã Tirtüm kot mē ho hkra kaxyw tanhmã amnhî nhîpêx to hã mē kãm harê nê hã kagã. Nê mē kãm:

1-2 Pa Karatas nhõ xwÿnhjaja? Xà mē amex? Ixpê Pawre na pa mē awÿr ixpêr mē nê mēmoj tã mē amã karõ.

Mêpahpãm Tirtüm mē Jejus Kris na pre wa mē akaxyw ixãm. Ixte wa ÿ hã ma ri mē akôt mē ajahkre o ri ixpa kaxyw. Na pre Jejus ty nhüm Tirtüm akupÿm ho htîr. Hãmri nhüm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtüm mē Jejus Kris na pre wa ixãm. Jakamã na pa ã mē awÿr kagã nhîpêx nê mênh anê. Mē apê Tirtüm krajê hwÿr.

Nê ota jar krî ja kamã ixpyrà nê Kris kôt mē pahkwÿjaja mē awÿr hpêr mē.

³ E kê Mêpahpãm Tirtüm mē Pahihti Jejus Kris wa mēmoj to mē akutã nojarêr rãhã ho pa. Nê mē ato mex rãhã nê. Ka mē wa ÿ hã akînh nê ajamakêtkati nê axãmnhîx ri apa.

⁴ Nà na pre Krisja amnhî grônh kôt mē pahwÿr wrÿ nê mē panê ty. Mē pahte amnhî tomnuj pãnhã amnhîrer kaxyw mē panê ty. Mêpahpãm Tirtüm kãm hprãm xà

hkôt. Tã mēmo kaxyw na pre ã mē panê amnhî nhîpêx anê? Nà pika ja kamã mē kot amnhî nhîpêxja omnuij tÿx jakamã nhüm amnhî grônh kôt te mē kot amnhî tomnuj pè mē papytâr pyræk o mē panhîpêx nê ã mē panê htyk anê.

⁵ Jakamã kwa kêr pu mē Tirtüm mã mex o mex ã mãn harênh o ri papa. Nà kot puj mē ã amnhî nhîpêx anhÿr rãhã ho ri papa.

Mê ujarênh pixi ãm hãmri hã harênh

Rômãn 16.17; Sikün Korît 11.3-4; Epes 4.14; Korosê 2.8; Sikün Pêtre 2.1-3

⁶ Kwa ixkrãmnhwÿjaja. Na pa pre mē ate tanhmã amnhî nhîpêx to hã mē ajarênh ma nê ixkaprî nê tee ri mē akukamã ijaxmaxpêr. Na pre Tirtümja Kris kukwak ri mē ato mex nê. Nê mē ate hkôt amnhî nhîpêx o apa hprãm xàj te kot amnhî wÿr mē awÿr pyræk o mē anhîpêx ka mē hkôt amnhî xunhwÿ. Tã xep tanhmã mē ajamaxpêr to nê ra hkaga kaxyw. Ra axtem mē ujarênh ôja ma nê gryk ã Tirtüm kaga kaxyw. Pa tee ri mē ajarênh ma nê ixkaprî nê. Kwa mon ka mē axtem nê ri ã amnhî nhîpêx anhÿr mã?

⁷ Jejus jarênh pix na ãm hãmri. Mo mē ujarênh mex õ kot ka kêt mē ama nê hkôt amnhî nhîpêx? Nà amrakati kumrêx. Æ mē amã ujarênh anhÿr xwÿnhjaja na htem Kris kapêr o pihkâr rûnh kumrêx o pa nê katât kôt harênh kêt nê. Ka xep mē ama nê ajamaxpêr kati rûnh nê.

⁸ Na pa pre ma mē awÿr mō nê ãm hãmri mē amã Jejus kot tanhmã mē panê amnhî nhîpêx to hã harê ka prem inhma. Tã koja mēhõ mē awÿr mō nê mē amã nhãm mē ujarênh õ jarê nhüm Tirtüm ja hã omu nê nhÿrmã ma mē kot amnhî xà htÿx kamã hamak tùm xà hwÿr kumê nhüm ma hwÿr mō nê aa kator kêt nê. Mē pahtõ rÿ Tirtüm kapêr o wrÿk xwÿnhjê hõ koja ã amnhî nhîpêx anê nhüm ja hã omu nê ma kuwy pè himôta wÿr amnhî nê kumê.

⁹ E kot paj axte mē amã ja jarê ka mē aprî hã inhma. Koja mēhõ mē awÿr mō nê mē ate hkôt amnhî xunhwÿr xwÿnhhta kwÿm ri tanhmã mē amã ujarênh to. Hã koja Tirtüm omu nê nhÿrmã ma mē kot amnhî xà htÿx kamã hamak tùm xà hwÿr kumê nhüm ma

hwÿr mō nē kamā pa ho pa nē aa kator kêt kumrêx.

Tÿrtÿm pix kām Pawre hkÿnh hprām ā kot jarēnh

Juāw 5.44; Atre 26.9-20; Karatas 2.6

¹⁰ Nē koja mēmojaja ixkapēr ma nē kām mar prām kêt o kām ixkÿnh kêt japēr nē māmri kām ixkÿnh kêt. Tÿrtÿm kām ixkÿnhja pix na inhmā hprām. Kop apu mē piitā kām ixkÿnhja mān inhmā hprām ronhÿx pa Kris nhÿ hā kapēr jarēnh o ri ixpa hkêt nē.

Tÿrtÿm kot Pawre mā Kra Jejus o amnhÿrīt ā harēnh

Sikÿn Korīt 1.12; Wam Tesarōn 2.4

¹¹⁻¹² E Jejus kôt ixkrāmnhwÿjaja. Nā ixte mē ujarēnh mex jarēnh o ixpaja na pre jar pika ja kamā mēhō amnhÿ krā hkôt inhmā harēnh rÿ inhmā ahkre hkêt nē. Jejus Kris tām na pre ixwÿr kato nē inhmā ho amnhÿrīt. Jakamā mex o kot pika jakamā mē ujarēnh piitā hakrenh par.

¹³⁻¹⁵ E kot paj ixprÿ hā mē amā tanhmā amnhÿ jarēnh to ka mē inhma. Tanhmā Tÿrtÿm kot amnhÿ kaxyw ixām to hā pa mē amā amnhÿ jarē. Nā na pre kormā ixkêt ri ixkukamā hamaxpēr nē amnhÿm ixta nē amnhÿ kaxyw ixām nē kot ixto mex ā ixtā amnhÿ jarē. Tā pa pre ixkato nē gaa nē ixāptār nom kormā Jejus Kris kôt amnhÿ xām kêt nē. Na pa pre axtem nē inhmā mē ixpē Ijaew kot amnhÿ nhÿpêx kôt pix mā amnhÿ nhÿpêx o ri ixpa hprām nē. Nhÿm pre ixpyrà nē arÿ mē nywjaja haxwÿja kām mē hkôt pix mā ri amnhÿ nhÿpêx o pa hprām nē. No inhmā mē hkôt amnhÿ nhÿpêx mex o mē hakrenh par prām jakamā na pa pre mē inhÿgêt kôt amnhÿ nhÿpêx mex kumrêx o ri ixpa. Mē kapēr piitāā hkôt amnhÿ nhÿpêx mex nē. Tā ā amnhÿ nhÿpêx anhÿr o ixpa kaprÿ. Na pa pre axtem nē mē kot Tÿrtÿm Kra Jejus Kris kôt amnhÿ xunhwÿr xwÿnhjē nhÿpêx kati ho ri mē hkôt ixpa nē inhmā mē himex prām tÿx kumrêx. Ā na pa pre amnhÿ nhÿpêx anhÿr o ri ixpa. Ra mē ate ja hā ixpumunh mex.

¹⁶⁻¹⁷ Tā pa pre ma Tamas wÿr mō. Kamā tanhmā Kris kwÿjē nhÿpêx to kaxyw ma mē hwÿr mō. Hāmri nē kormā mē hwÿr ixāhtêp o inhmōr mē nhÿm Tÿrtÿm tanhmā ixto nē inhmā Kra Jejus o amnhÿrīt pa jatā omu.

Kêp Tÿrtÿm Kra hā pa ixprÿ hā omu. Nhÿm inhmā kapēr nē ixte kām tanhmā amnhÿ nhÿpêx to ho ri ixpa kaxyw ixāpênh ā inhmā karō nē Ijaew kêt xwÿnhjē hwÿr inhmē. Ixkwÿ Ijaew wÿr inhmēnh kêt nē. Na pre inhmā:

—E kēr ka ma Ijaew kêt xwÿnhjē hkôt ri mē kām ixkapēr jarēnh o ri apa.

Anhÿr jakamā pa pre kuma nē hkôt amnhÿ xām kurē kumrêx nē ā amnhÿ nhÿpêx anhÿr o ri ixpa. Jao tanhmā ixte kêp hkwÿjē nhÿpêx tota kaga nē ma pyka pē Arap wÿr mō. Nom tanhmā amnhÿ tā Jejus kwÿjē kukjêr to hkêt nē. Nē Jerujarē hwÿr inhmōr nē Jejus nhÿ hā mē ahkre xwÿnh maatijaja tanhmā amnhÿ tā mē kukjêr to hkêt nē. Ām Tÿrtÿm kot inhmā hā karō xā hkôt ma Arap wÿr mō nē kamā kapôt ā ri ixpa. Kamā na pre Tÿrtÿmja inhmā Jejus Kris kot tanhmā amnhÿ nhÿpêx to ho amnhÿrīt o pa. Hāmri nē inhmā kapēr pa amnhÿ tā kuma hāmri nē ma akupÿm Tamas wÿr mō.

¹⁸ Tā nhÿm ra amgrā axkrunēpxi nē hapêx pa Tamas rÿm ixkato nē ma Jerujarē hwÿr Simāw Pêtre hwÿr mō. Hāmri nē kuri pōj nē hkôt ixpikamēnh ā ixtā semān axkrut.

¹⁹ Nom mē kot Jejus nhÿ hā hkwÿjē jahkre ho mē pa xwÿnh maati hkwÿjē hō pumunh kêt kumrêx. Ām Simāw Pêtre mē Pahihti Jejus tō Xiakreja pix wa omu.

²⁰ ām hāmri na pa ā amnhÿ jarēnh anē. Tÿrtÿm kot ja hā ixpumunh mex.

²¹ Tā pa pre mē kurÿm ixkato nē hpānhā ma pika hkwÿ hkôt ijapôx o mē hkôt ixpa. Ma pika pē Sir mē Sirisja wa hwÿr mō.

Mē kot amnhÿ jaêr pé Pawre kot amnhÿ nhÿpêx nyw ā omunh ā mē harēnh

²² Nom Jutej kamā Kris kwÿjaja na prem kormā ixpumunh kêt nē. Ām Simāw Pêtre mē Xiakre pix na pre wa ixpumu.

²³ Na pre ra mē hkwÿjaja tanhmā hkwÿjē kot axpēn mā ijarēnh toja ma. Na prem ijarēnh o:

—Kwa Jejus ā mē panhÿpêx kati htÿx o pa xwÿnhta na pre tanhmā hamaxpēr to nē hpānhā mē kām Jejus kapēr jarēnh o ri mē hkôt pa. Mē kot amnhÿ kaxyw hkôt hamaxpēr kaxyw. Ra kot Jejus nē mē

pahkurê htã hpãnhã mẽ kãm kapêr jarênh o ri mẽ hkôt pa. Anê.

²⁴Hãmri nhũm Kris kwỳjaja amnhĩ jaêr pê ijarênh ma nê inhỹ hã hkĩnh nê. Nê ixtã Tĩrtũm mã mex o mex ã harê.

2

Pawre kot Kris kwỳ hkrãhtũmjê mã amnhĩ jarênh

Atre 15.1-11

¹⁻²Tã nhũm amgrã pê 14 nê hapêx nhũm Tĩrtũm akupỹm Jerujarê hwỳr inhmẽ pa ma akupỹm mō. Panãpe nê Xitre mẽ pa mẽ mō nê mẽ hwỳr pōj. Hãmri nê Kris kwỳ hkrãhtũmjê hwỳr mra nê mẽ kãm amnhĩ jarê. Mẽ tapxipixjê mã amnhĩ jarê nê ixte Ijaew kêt xwỳnhjê mã Jejus kapêr jarênh o ixpa hã amnhĩ jarê. Na pa pre ra amnhĩ kukamã ijamaxpêr o:

—Koonên. Kot pa apu mẽ kãm amnhĩ jarê nhũm mẽ inhma nê ixte Tĩrtũm kapêr kwỳm ri mẽ ahkre ho ixpa hã ixkamnhĩx rỳ hã inhmã akir. Na pa hte Ijaew kêt xwỳnhjê mã Kris jarênh o ixpa no ãm mẽ ixpê Ijaew pyrã nê finat Mojes kapêr kôt mẽ kot amnhĩ my kwỳrýt kà jakàr ã mẽ kãm karō hkêt nê. ãm mẽ kot Kris kôt amnhĩ xunhwỳr pix kaxyw na pa hte mẽ kãm hã karō ho ixpa. Tã kot paj Kris kôt mẽ ixkrãhtũmjê mã ja hã amnhĩ jarê nhũm mẽ inhma nê tanhmã hamaxpêr to nhũm ja mẽ kêp omnuj japêr nhũm mẽ tanhmã amnhĩ to nê ixte Kris kapêr jarênh o ixpaja nê ixkurê. Jakamã nhũm ra ixte mẽ kãm Kris kapêr jarênh o ixpa nhũm mẽ kot inhmar xwỳnhjaja ijarênh ma nê tee amnhĩ kukamã hamaxpêr o ra hkaprĩ nê pa.

Anhỹr o ijamaxpêr.

³Tã na prem ixte amnhĩ jarênhja ma nê ja nê tanhmã inhmã nê hkêt nê. Pa mẽ kãm amnhĩ jarênh pa nhũm mẽ inhma nhũm Ijaew kêt xwỳnhjaja kot amnhĩ jakàr kêtja nhũm mẽ kãm mex nê. Mẽ kêp tanhmã kute hkêt nê. Nhũm Ijaew kêt xwỳnh Xitre ixkôt pa nhũm mẽ kot omunh tã kot mẽ ixpyrã nê amnhĩ my kwỳrýt kà krãhyr ã kãm karō hkêt nê.

⁴Tã nhũm mẽ kêp Jejus kwỳ hã amnhĩ jarênh o hêx xwỳnhjaja mẽ ixtã akuprō. Nom hêx rom mẽ ixte Kris kôt amnhĩ nhĩpêx ã mẽ ixpumunh pix kaxyw. Hãmri

nê ixkapêr ma nê Xitre hã inhmã akir nê inhmã:

—Kwa na pre Xitre Jejus kôt pix mã amnhĩ xãm nom finat Mojes kot mẽ pahpê Ijaew kot amnhĩ nhĩpêx ã karō hkôt amnhĩ nhĩpêx kêt nê. Kwa ja mex kêt. Na htem Jejus kôt amnhĩ xunhwỳ nê mããnên finat Mojes kapêr kôt amnhĩ nhĩpêx. Jakamã kwa kãm anê kê amnhĩ my kwỳrýt kà krãhta. Finat Mojes kot mẽ panhĩgêjtjê mã hã karō xà hkôt.

⁵Anhỹr tã pa prem mẽ kuma nê ãm mẽ kuma. Kot pa ri mẽ kãm ja hã karō hkêt nê. ãm Jejus kapêr kôt pix mã kot puj mẽ amnhĩ nhĩpêx o papa nê finat Mojes kapêr mẽ Jejus kapêr o papihkàr kêt nê. Kot puj mẽ anhỹr o Jejus kapêr o ahkà nhũm ja mex kêt nê. Jejus kapêr kãm mo mẽ kot mẽmy kwỳrýt kà jakàr ã mẽ kãm karō? Amrakati. Jakamã na pa pre ãm mẽ pano kupyrr o mẽ pa xwỳnhtajê kapêr ma nê ãm mẽ kuma.

⁶Tã pa pre ra Ijaew kwỳ pê Jejus kôt ixkwỳ hkrãhtũmjê mã amnhĩ jarênh pa. Tanhmã ixte Ijaew kêt xwỳnhjê mã Jejus kapêr jarênh to hã mẽ kãm amnhĩ jarê nhũm mẽ inhma nhũm ja mẽ kãm mex nê. Jakamã Ijaew kêt xwỳnhjaja kot mẽ ixpê Ijaew pyrã nê finat Mojes kapêr kôt amnhĩ nhĩpêxja nhũm mẽ tanhmã mẽ kaxyw inhmã hã karō hto hkêt nê. Tĩrtũm na hte mẽ kêp mẽ hkrãhtũm ã mẽ omunh xà hkôt mẽ hkwyjê rom tanhmã mẽ ho mex to hkêt nê. Na hte mẽ pahpiitã mẽ panhĩpêx o axpên pyrãk. Jakamã na pa hte ijaxwỳja Jejus kôt mẽ ixkrãhtũmjaja kot amnhĩ to rax o ijakrenh ã tanhmã ijamaxpêr to hkêt nê.

⁷Na pa pre mẽ kãm amnhĩ jarênh pa nhũm mẽ inhma nê axpên mã:

—Nà ãm hãmri na pre Tĩrtũm ahpỹnhã Pawre mẽ Simãw Pêtre wa kãm wa ãpênh ã karō nê Ijaewjê hwỳr Simãw Pêtre mẽ nê axtem Ijaew kêt xwỳnhjê hwỳr Pawre mẽ. Wa kot ahpỹnhã mẽ hkôt mẽ kãm Jejus kapêr jarênh o ri pa kaxyw. Nà ãm hãmri na hte wa ã amnhĩ nhĩpêx anhỹr o pa. Nà ja mex. Anê.

⁸Ra Tĩrtũm kot Ijaew wỳr Simãw Pêtre mênh tã hpãnhã Ijaew kêt xwỳnhjê kaxyw pa ixãm. ỹ hã wa ixte mẽ kãm Jejus kapêr jarênh o ri mẽ hkôt wa ixpa kaxyw.

⁹ Jakamã nhũm mẽ ixkrãhtũm Xiakre mẽ Simãw Pêtre mẽ Juãwja ixte mẽ kãm amnhĩ jarẽnh ma nẽ hkĩnh nẽ. Tĩrtũm kot ixto mex nẽ Ijaew kêt xwýnhjê hwýr inhmẽnh ã ixte amnhĩ jarẽnhja ma nẽ hkĩnh nẽ. Hãmri nẽ Panãpe mẽ wa inhmã kapẽr nẽ wa inhmã:

—Nà ãm hãmri. Kot puj xep mẽ anẽ. Ka mẽ Panãpe wa kot kaj wa ma Ijaew kêt xwýnhjê hkõt mẽ kãm Jejus kapẽr jarẽnh o ri apa. No mẽ pajaja kot paj mẽ axtem mẽ pahkwý Ijaew kêt harẽnh o ri ixpa. Æ kot puj mẽ ahpýnhã mẽ hwýr papa anẽ.

¹⁰ Nom kêt ka wa inhmar kumrẽx. Kêt ka wa mẽ ixpyrà nẽ Kris kêt mẽ pahkwýjê pẽ amrakati xwýnhjê ho mex o ri apa. Mẽmoj to mẽ kutã anojarêt rãhã ho ri apa.

Anhýr o wa inhmã kapẽr pa wa mẽ kuma nẽ mẽ kãm:

—Tõe. Nà kot paj wa anẽ. Ra ã wa ixte amnhĩ nhĩpêx anhýr kaxyw kênã. Anẽ.

Pawre kot Simãw Pêtre mã àkjêr ã harẽnh Atre 10; Rõmãn 3.21-31, 6.1-14

¹¹⁻¹⁴ Tã nhũm Simãw Pêtreja man mẽ ixwýr krĩ pẽ ãxiok wýr mõi. Nẽ jar mẽ ixkõt ri pa. Ixpyrà nẽ kêt Ijaew tã Kris kêt Ijaew kêt xwýnhjê hkõt pa nẽ mẽ kutã apkur o pa. Ixpyrà nẽ àmnhĩx ri mẽ kutã apkur o ri mẽ hkõt pa. Ijaew kêt xwýnhjaja kot amnhĩ my kwýrýt kà jakàr kêt jakamã na pa htem mẽ kutã ixàpkur kêt nẽ. Tã ra mẽ ixte Kris kêt amnhĩ xunhwýr jakamã ja mẽ ixpê tanhmã kute hkêt. Na pa htem ixàmnhĩx mẽ hkõt ixpa nẽ mẽ kutã apku. Ra mẽ ixte Kris kêt amnhĩ xunhwýr kênã kot pa hkêt ri mẽ hkõt ixpa hkêt. Na pa htem ixàmnhĩx mẽ hkõt tanhmã amnhĩ nhĩpêx to ho ri ixpa.

Tã nhũm Xiakre kot mẽ ixwýr mẽ rẽnh xwýnhjaja haxwýja mẽ ixwýr mõi. Mẽ ixpyrà nẽ mẽ kêt Ijaew tã mẽ ixpyrà nẽ Kris kêt amnhĩ xunhwý. Jakamã ra mõi nẽ mẽ ixwýr pøj. Hãmri nhũm Simãw Pêtre mẽ omu nẽ mẽ umaj axte Ijaew kêt xwýnhjê kutã apkur kêt nẽ. Axtem nẽ õja py nẽ o tẽ nẽ mẽ hkàx ã ahte apkur o nhý. Hãmri nhũm ra mẽ ixri Ijaew kwý pẽ Kris kêt mẽ pahkwýjaja ja hã omu nẽ piitã uràk nẽ ã amnhĩ nhĩpêx anẽ nẽ Simãw Pêtre ri Ijaew kêt xwýnhjê hkàx ã apkur o hkrĩ. Nhũm ixkõt pa xwýnh Panãpeja haxwýja ja hã mẽ

omu nẽ mẽ uràk nẽ ã amnhĩ nhĩpêx anẽ nẽ mẽ hkàx ã apku. Hãmri pa tee ri ja hã mẽ omu nhũm ja inhmã mex kêt nẽ. Na prem ã amnhĩ nhĩpêx anhýr o Tĩrtũm kapẽr ã kagà htũm kamã mẽ ujarẽnh mex kwým ri amnhĩ nhĩpêx. Jakamã pa ã mẽ kot amnhĩ nhĩpêx anhýrja nẽ Simãw Pêtre mã ixkapẽr. Mẽ piitã mẽ noo mã xa nẽ ã kot amnhĩ nhĩpêx anhýrja nẽ kãm ixkapẽr nẽ kãm:

—Tk. Kwa nà Simãw Pêtre. Ri ã amnhĩ nhĩpêx anhýr kêt nẽ. Pahpê Ijaew tã kormã pahkwýjaja hpôx kêt ri ka hte ixpyrà nẽ axàmnhĩx Ijaew kêt xwýnhjê kutã axàpkur o ri apa. Tã amnhĩ wýr mẽ pahkwýjê pumu nẽ axtem nẽ mẽ hkàx ã axàpkur o akrĩ. Kwa nà na ka ã amnhĩ nhĩpêx anẽ nẽ ra axtem amnhĩ nhĩpêx. Te ate mẽ kãm akapẽr nẽ mẽ kãm: “Kot kaj mẽ ixpyrà nẽ amnhĩ my kwýrýt kà jakà pa rĩ mẽ akõt ri ixpa nẽ mẽ akutã ixàpkur o ixpa.” Anhýr pyràk. Kwa ja mex kêt.

¹⁵ —Mẽ pahpê Ijaew na pu htem mẽ kêt Ijaew kêt xwýnhjê jarẽnh o: “Mẽ kot mẽ pahte amnhĩ nhĩpêx kêt amnhĩ nhĩpêx kêt xwýnhjaja.” Anẽ.

¹⁶ Tã mẽ pahpê Ijaew tã na hte Tĩrtũmja mẽ pahte mẽ panhĩgêt kot amnhĩ nhĩpêx kêt mẽ pahte amnhĩ nhĩpêx ã mẽ pahpumpunh kêt mẽ pahto hkra hkêt nẽ. Ra mẽ pahte ja pumunh mex. Æm mẽ pahte amnhĩ kaxyw Jejus Kris kêt pajamxpêr ã mẽ pahpumpunh kêt pix mã na hte mẽ pahto hkra. Kot pu mẽ amnhĩ kaxyw hkõt pajamxpêr nhũm ja hã mẽ pahpumpunh kêt pix mã mẽ pahto hkra.

¹⁷ —Mẽ pahpê Kris kwý jakamã na hte Tĩrtũm amnhĩm mẽ pamex ã mẽ pajarẽ nẽ mẽ pahte amnhĩ tomnuj xwýnh kêt ã mẽ pajarẽ. Jakamã na pu htem paxàmnhĩx ri Ijaew kêt xwýnhjê kot Kris kêt amnhĩ xunhwýr xwýnhjê hkõt ri papa ho papa. Ra Tĩrtũm kot mẽ pahpyrà nẽ amnhĩm mẽ mex ã mẽ harẽnh kênã. Tã koja mẽhõ kormã ja mar kêt nẽ tanhmã hã mẽ pajarẽnh to nẽ mẽ pajarẽnh o: “Tk. Ra mẽ kot amnhĩ kaxyw Kris kêt hamaxpêr tã axtem nẽ Ijaew kêt xwýnhjê hkõt ri pa. Jakamã arĩ mẽ kot amnhĩ tomnuj xwýnh kênã.” Anhýr o mẽ pajarẽnh japêr. Nom ãm mẽ pahte amnhĩ tomnuj xwýnh ã mẽ pajarẽnh kaprý.

Na pu htem Kris kôt amnhĩ nhĩpêx nê ra tãm amnhĩ nhĩpêx mex o papa.

¹⁸ No kot pu mẽ hkôt ri amnhĩ nhĩpêx o papa htã tanhmã pajamxpêr to nê pahte amnhĩ nhĩpêx tũm o awjanã hãmri nê amnhĩ tomnuj tỳx kumrêx.

¹⁹ –Tã tanhmã kot puj wem amnhĩ to nê mẽ panhĩgêt kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamxpêr o: “Kot paj ã amnhĩ nhĩpêx anê nê ã amnhĩ nhĩpêx anê nhũm Tĩrtũm ja hã ixpumu nê amnhĩm inhmex ã ijarê.” Anhỹr o pajamxpêr. Hãmri nê finat Mojes kot mẽ panhĩgêjtjê mã kapêr piitã hkôt ri mnhĩ nhĩpêx o papa nom tũhã hkwỳm ri tanhmã amnhĩ tomnuj to. Jakamã nhũm Tĩrtũm ja hã mẽ pahpumunh kôt mẽ pamex ã mẽ pajarênh kêt nê. Kapêr ã kagã htũm kot ã ja jarênh kot anhỹr. Nom kot puj mẽ amnhĩ kaxyw Kris kôt pajamxpêr nhũm ja hã mẽ pahpumunh kôt amnhĩm mẽ pamex ã mẽ pajarê. Hãmri pu mẽ Tĩrtũm kôt amnhĩ nhĩpêx o ri papa nê axte mẽ pahpê Ijaew nhĩgêjtjê kot amnhĩ nhĩpêx kôt amnhĩ nhĩpêx hkêt nê. Te ra mẽ pahtyk nê axte hkôt amnhĩ nhĩpêx kêt pyrã nê pãnhã Tĩrtũm kapêr kôt pix mã ri amnhĩ nhĩpêx o ri papa.

²⁰ –Nê na prem pĩ kahpa hã Kris nhô nê kupĩ nhũm mẽ pahte amnhĩ tomnuj te ãhkô hã jêt nê haxwỳja htyk pyrãk. Jakamã na pu htem amnhĩ tomnuj kaga nê Kris kôt amnhĩ xunhwỳ nhũm Karõ mẽ pahkarõm agjê pu mẽ te Jejus Kris kot amnhĩ nhĩpêx pyrãk o amnhĩ nhĩpêx o papa. Jao hpãnhã mẽ pahte amnhĩ nhĩpêx nyw pix o amnhĩ nhĩpêx o ri papa. Kris kãm hprãm xà hkôt pix mã tanhmã ri amnhĩ nhĩpêx to ho papa. Kris kêp Tĩrtũm Kra htã kãm mẽ pajapê kamã mẽ panê htyk jakamã na pu htem amnhĩ kaxyw kôt pix mã pajamxpêr rãhã ho papa.

²¹ –Ãm hãmri na pre Tĩrtũm mẽ pahto mex kumrêx nê mẽ pahwỳr Krisja mẽ nhũm mẽ pahwỳr wrỳ nê mẽ panê ty. Tã na pa pre kapêrja ma nê mar tỳx nê hã ri ixpa nê ho ijamakêtkati hkêt nê. Tã kop apu Tĩrtũm kot mẽ pahte mẽ panhĩgêjtjê kot amnhĩ nhĩpêx o amnhĩ nhĩpêx ã mẽ pahpumunh kôt mẽ pamex ã mẽ pajarênh

ronhỹx pre Krisja ãm mẽ panê htyk kaprỳ. Mo kaxyw nhỹx pre mẽ panê ty? Anê.

Ã na pa Simãw Pêtre mã ixkapêr anê nhũm mẽ piitã apkur pê hã inhmar o hkrĩ.

3

Mẽ pahte amnhĩ krã hkôt pahpê Tĩrtũm kra hkêt ã mẽ pajarênh

Karatas 5.16-23; Epes 2.8; Piripos 3.9; Sikũn Ximotre 1.9; Xitre 3.4-7

¹ Kwa Karatas nhõ xwỳnhjaja. Te ri mẽ ajamxpêr kêt kumrêx pyrãk. Amnepê mã mẽ awỳr inhmõrta ã na pa pre mẽ amã tanhmã Kris htykja jarênh to. Pĩ kahpa hã mẽ panê htyk ã harê ka mẽ aprĩ hã inhma. Tã nhũm Tĩrtũm kapêr jarênh o mẽ hêx xwỳnhjaja ixpãnhã mẽ awỳr mra nê tanhmã mẽ amã ujarênh to ka mẽ ama nê mẽ ajamxpêr o apihkàr rax nê. Jao axte Kris tyk mã ajamxpêr kêt nê.

² E mẽ inhmã mẽmoj jarê. Mẽmoj tã mẽ apumunh kôt na pre Tĩrtũm mẽ awỳr amnhĩ Karõ rê nhũm mẽ awỳr agjê? Xà mẽ anhĩgêt kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt? Nà na pre ja hã mẽ apumunh kôt mẽ awỳr rênh kêt nê. Na ka prem Kris jarênh ma nê amnhĩ kaxyw hkôt ajamxpêr nhũm ja hã mẽ apumunh kôt mẽ awỳr kurê nhũm mẽ awỳr agjê.

³ Na pu htem amnhĩ krã hkôt tanhmã amnhĩ nhĩpêx to ho pahpê Tĩrtũm kra hkêt nê. Tĩrtũm Karõ pix kukwak ri na pu htem pahpê hkra. Tã ka mẽ axtem nê ajamxpêr o:

–Nà Tĩrtũm ra kot ixto hkra jakamã kot paj arĩ ri mẽ inhĩgêt kot amnhĩ nhĩpêx kôt amnhĩ nhĩpêx o ixpa rãhã nê inhmex kumrêx nê ri ixpa. Anê.

Kwa ã mẽ ajamxpêr anhỹrja mex kêt.

⁴ Mẽ akwỳ kot Kris ã mẽ atomnuj tã ka mẽ amnhĩ xà htỳx kamã ajamak o ri apa htã Kris kaga hkêt nê. Tã ra axtem nê mẽ kapêr o mẽ hêx xwỳnhjê jamxpêr kôt ajamxpêr o te Kris ã amnhĩ xà kamã ajamak kaprỳ pyrãk. Kwa nà mẽ ri mẽ hkôt ajamxpêr kêt nê.

⁵ Na pre Tĩrtũm mẽ awỳr amnhĩ Karõ rê nhũm mẽ awỳr agjê nê mẽ amã aa mẽ ate mẽmoj pumunh kêt kwỳ ho anhỹr o ri mẽ akamã pa ho pa. Xà mẽ anhĩgêt kot

amnhĩ nhĩpêx kôt mẽ ate amnhĩ nhĩpêx ã mẽ apumunh kôt na pre ã mẽ amã amnhĩ nhĩpêx anê? Nà ja kôt kêt. ãm mẽ ate Kris kapêr mar nê amnhĩ kaxyw hkôt ajamaxpêr ã mẽ apumunh kôt pix mã na pre ã mẽ amã amnhĩ nhĩpêx anê.

Tĩrtũm kot amnhĩ tã finat Apraãw pumunh kôt mex ã harênh

Rõmãn 4.1-25; Xiakre 2.23

⁶ Nê mẽ ixpê Ijaew pàr krax finat Apraãw na pre amnhĩ kaxyw Tĩrtũm kôt hamaxpêr nhũm amnhĩ tã omu nê kãm:

Nà ate amnhĩ kaxyw inhmã ajamaxpêr tỳx jakamã na pa amnhĩm amex ã ajarê.

Amex kumrêx Apraãw.

⁷ Anhỹr o kãm kapêr jakamã mẽ pahte uràk nê amnhĩ kaxyw hkôt pajamaxpêr xwỳnhjaja te mẽ pahpê Apraãw tàmnhwỳ pyràk.

⁸ Nê mẽ apê Ijaew kêt xwỳnhjaja. Na hte Tĩrtũm mẽ pahto hpimràk tã mẽ pahte amnhĩ kaxyw kãm pajamaxpêr ã mẽ pahpumunh kôt amnhĩm mẽ pamex ã mẽ pajarê nê mẽ pahto hkra. Amnepêm na pre Apraãw mã kapêr nê kãm:

E ate amnhĩ kaxyw ixkôt ajamaxpêr jakamã kot paj akukwak ri pyka piitã hkôt mẽ piitã mẽ ho mex nê.

Anhỹr o kãm kapêr jao mãänê nê mẽ apê Ijaew kêt xwỳnhjê jarê.

⁹ Jakamã mẽ pahte Apraãw pyrã nê amnhĩ kaxyw Tĩrtũm kôt pajamaxpêr xwỳnhjaja kot puj mẽ pahpiitã uràk nê pamex kumrêx nê papa ho papa.

Tanhmã Tĩrtũm kot mẽ panê pĩ kahpa hã jêt xwỳnh nhĩpêx to hã harênh

Rõmãn 4.14, 7.10; Wam Korõt 15.56

¹⁰ Nê koja mễhõ hamaxpêr o:

—E kot paj finat Mojes kapêr kôt ri amnhĩ nhĩpêx o ri ixpa nhũm Tĩrtũm ja hã ixpumu nê amnhĩm inhmex ã ijarê nê ixto hkra. Anê.

No ãm ja kot anhỹr kêt. Tĩrtũm kapêr ã kagà htũm kot ja jarênh kot:

Ixte amnhĩm mẽ mex ã mẽ harênh kaxyw mẽ kot Mojes kapêr kôt amnhĩ nhĩpêx xwỳnhjaja koja mẽ ãm mẽmoj pixire nê hirôp kuhê. Rỳ mẽmoj pixire nê hkôt amnhĩ nhĩpêx kêt pa

ja hã mẽ omu nê hã mẽ homnuj tỳx kumrêx.

Anhỹr jakamã tanhmã kot pu mẽ amnhĩ to nê Mojes kapêr piitã hkôt amnhĩ nhĩpêx nê aa ho pixi nê hirôp pakuhe hkêt? Nà kot puj mẽ ho anhỹr kêt nê. Kot puj mẽ tee ri pamã ja ho anhỹr prãm kaprỳ. Jakamã Tĩrtũm kot amnhĩm mẽ mex ã mẽ harênh kaxyw mẽ kot ã amnhĩ nhĩpêx anhỹr mã xwỳnhjaja koja mẽ mex kêt nê.

¹¹ Na hte Tĩrtũm mẽ kot finat Mojes kapêr kôt amnhĩ nhĩpêx o mẽ pa hã mẽ omunh xà hkôt mẽ mex ã mẽ harênh kêt nê. ãm mẽ kot amnhĩ kaxyw hkôt hamaxpêr xwỳnh pixjaja na hte ã mẽ harênh anê. Kapêr ã kagà htũm kot mẽ harênh kot:

Mẽ kot amnhĩ kaxyw ixkôt hamaxpêr xwỳnhjaja na pa hte mẽ mex ã mẽ harênh o ixpa. Mẽ tapxipixjaja koja mẽ nhỹrmã Ixkra mẽ wa ixri mex kumrêx nê htĩr tũm nê pa ho pa. Anê.

¹² Nom na htem amnhĩ kaxyw Tĩrtũm mã hamaxpêr pê finat Mojes kapêr kôt amnhĩ nhĩpêx o pa hkêt nê. Mojes kapêr ã kagà kot ja jarênh kot:

Mẽ kot ixkapêr piitã hkôt amnhĩ nhĩpêx mex o mẽ pa xwỳnh pixjaja koja mẽ htĩr tũm nê pa ho pa. Anê.

¹³ Tã kot pu mẽ ãm kapêr o pixire nê hirôp pakuhe hãmri nê mỳrapê pahtĩr tũm nê papa hkêt nê. Nê hpãnhã mẽ kot amnhĩ xà htỳx kamã hamak tũm xàta hwỳr ma papa. Ja pymaj na pre Krisja ì ho mẽ pahwỳr wrỳ nê mẽ pahte amnhĩ tomnuj mỳrapê mẽ panê ty. Tĩrtũm kot mẽ pahte amnhĩ tomnuj mỳrapê tanhmã mẽ pahto pymaj ã mẽ panê htyk anê. Jakamã nhũm Tĩrtũm mẽ pahte amnhĩ tomnuj ã mẽ pahpumunh kôt mẽ pakuhe hã Kraja homnuj nê. Kapêr ã kagà htũm kot ja jarênh kot:

Pĩ kahpa hã jêt xwỳnhhta na pre Tĩrtũm homnuj tỳx kumrêx. Anê.

Mẽ kot amnhĩ kaxyw Kris kôt mẽ hamaxpêr xwỳnhjê jarênh

¹⁴ Tã ã Jesus Kris kot mẽ panê amnhĩ nhĩpêx anhỹr kukwak ri na pre Tĩrtũm kot Apraãw nhĩpêx pyrã nê mẽ ixpê Ijaew pix o mex kêt nê. Mãänê nê mẽ apê Ijaew kêt xwỳnhjê ho mex nê. Jakamã koja mễhõ Ijaew õ rỳ Ijaew kêt xwỳnhjê hõ amnhĩ

kaxyw Kris kôt hamaxpêr nhũm Tĩrtũm hã omu nê ho hkra nê hwȳr Karõ mē nhũm kãm axà.

Tĩrtũm kot finat Mojes kukamã mē pahto mex ã harēnh

Rõmãn 3.19-20, 5.20-21, 11.32; Eprêw 6.13-18

¹⁵ E ixkrãmnhwȳjaja. Kot paj ixprĩ hã mē amã ja jarē ka mē inhma. Nà koja mēhõ wa hamēxkrut nê mēmoj tã axpēn ma. Pika hã war axpēn ma rȳ mēmoj tã war axpēn ma. Hãmri nê wa hã axpēn mar pa nhũm ja ãm hãmri nê ãm rãhãã. Koja nhãm mēhõ tē nê axtem tanhmã harēnh to hkêt nê.

¹⁶ Ja pyrã nê na hte ã Tĩrtũm mēmoj tã amnhĩ jarēnh anē. Na hte mēmoj jarē nhũm arĩ rãhãã. Na hte jarãhã mēmoj jarē nhũm jãã nhũm axtem hijuk ri mēmoj jarēnh kêt nê. Na hte ãm kapêr pȳnh nê. Tã na pre Apraãw mã hkanrēhã htãmnhwȳjê hõ kukwak ri Apraãw o mex ã amnhĩ jarē. Tãmnhwȳ piitã kukwak ri ho mex ã amnhĩ jarēnh kêt nê. ãm kanrēhã htãmnhwȳ Krisja pixkukwak ri ã Apraãw o mex ã kãm amnhĩ jarēnh anē.

¹⁷ E kot paj hpãnhã axtem tanhmã mē amã harēnh to. Na hte Tĩrtũm kot mēmoj tã amnhĩ jarēnh xà hkôt tanhmã mēmoj to ho pa rãhã nê. ã na pre finat Apraãw mã kot ho mex ã amnhĩ jarēnh anē. Tã ra hã amgrã pē 430 nê hapêx nhũm hpãnhã finat Mojes mã kapêr. Kot mar nê amnhĩ xõ ri Ijaew mã harēnh o ri mē hkôt pa kaxyw. Tã no nhũm ra kot Apraãw mã mēmoj jarēnh ta arĩ hã no htȳx rãhã nê aa ho hamakêtkati hkêt nê. Nê kot Mojes mã tanhmã kapêr toja nê Apraãw mã tanhmã kapêr toja nhũm hamē wa ho hamakêtkati hkêt nê. Nhũm wa hamē arĩ rãhã ho rãhã.

¹⁸ Tã mē ano kupyr o ri mē pa xwȳnhjaja na htem htȳx tanhmã mē amã harēnh to nê mē amã harēnh o:

—Kwa kot puj mē Mojes kapêr kôt amnhĩ nhĩpêx o papa hkêt nê nhũm Tĩrtũm tee ri ja hã mē pahpumu nê mē pahto mex kêt nê. Anē.

Nom ja kot anhȳr kêt. Kop apu ã kot anhȳr ronhȳx Tĩrtũm ra wam kot tanhmã Apraãw mã kapêr tota ra ho hamakêtkati. Nom na hte arĩ kãm hamaxpêr rãhã nê ho

pigrãnh nê ho hapêx kêt nê. Na pre Apraãw mã kãm:

Kot kaj amnhĩ kaxyw ixkôt ajamaxpêr hã kot paj ato mex kumrêx. Anē.

Tã kot ho mex ã amnhĩ jarēnhja arĩ rãhãã. Na hte arĩ mē kot amnhĩ kaxyw hkôt hamaxpêr xwȳnhjê ho mex nê. Nom mē kot Mojes kapêr kôt amnhĩ nhĩpêx o pa hã mē omunh xà hkôt mē ho mex kêt nê. ãm mē kot amnhĩ kaxyw hkôt hamaxpêr xwȳnh pixjaja na hte mē ho mex.

Mo kaxyw na Mojes kapêr ã kagã?

Rõmãn 3.20, 5.20, 7.7

¹⁹⁻²⁰ Tã mo kaxyw na Mojes kapêr ã kagãja? Nà mē pahte tanhmã amnhĩ tomnuj to ho papa hã amnhĩ pumunh nhũm Tĩrtũm kot ã mē pahte amnhĩ nhĩpêx anhȳrja nê mē pahkurê kaxyw. Na pre Mojes Tĩrtũm nhȳ hã mēmoj nê mē pahkurê. Mē pahte axpēn pē paxãhkĩnh nê mē pahkurê. Nê mē pahte axpēn mã paxêx o ri papa nê mē pahkurê. ã mēmoj nê mē pahkurê anē. Mē pahprĩ hã kapêr mar nê tãm amnhĩ nhĩpêx o papa kaxyw. Ja kaxyw na pre Tĩrtũm Ijaew kaxyw Mojes mã kapêr gõ. Na pre kaxkwa rũm kapêr o wryk xwȳnhjaja kumrêx kãm harē nhũm kuma nê Ijaew mã hã kagã. Jakamã na htem harēnh o: “Mojes kapêr” anhȳr o harē.

Tã Apraãw kanrēhã htãmnhwȳ Krisja kormã kator kêt ri nhũm Ijaew Mojes kapêr ma nê hkôt ri amnhĩ nhĩpêx o pa. Tã nhũm Krisja kator o Mojes kapêr o hapêx. Ra Tĩrtũm kot Kris kukamã ho mex ã amnhĩ jarēnh xà hã arĩgrota kator mē nhũm Mojes kapêr hapêx.

No na pre Tĩrtũm Ijaew mã ujarēnh kaxyw tãm mē kãm ujarēnh kêt nê. Kapêr o wryk xwȳnhjê mã na pre harē nhũm mē amnhĩ xõ ri Mojes mã mē kaxyw kãm awjarē. Kot mē ô ri mē kãm harēnh kaxyw. No Apraãw mã na pre Tĩrtũm tãm kapêr. Na pre hwȳr kapêr o wryk xwȳnhjê hõ mēnh kêt nê. Tãm kot kãm kapêr jakamã kapêrja na mex o Ijaew kaxyw Mojes mã kapêr jakrenh.

²¹ Nê na pre Tĩrtũm tanhmã mē pamã kapêr o amnhĩrit to nê mē pamã:

—E kot paj amnhĩ kaxyw ixkõt mẽ aja-maxpěr ã mẽ apumunh kõt pix mã mẽ amex ã mẽ ajarẽ.

Anhỹr o mẽ pamã kapěr. Tã xà na pre kapěrja nhĩjuk ri axte amnhĩ jarẽ nẽ amnhĩ jarẽnh o:

—E kot paj mẽ ate Mojes kapěr kõt amnhĩ nhĩpêx mex o apa hã mẽ apumunh kõt mẽ amex ã mẽ ajarẽ.

Anhỹr o mẽ pamã kapěr? Xà na hte mẽmoj jarẽ nhũm jãã nhũm ra hijuk ri axtem mẽmoj jarẽ? Nà Tĩrtũm kapěr ãm hpỹnh kênã. Kop ãm mẽ pahte Mojes kapěr kõt amnhĩ nhĩpêx o papa hã mẽ pahpumunh kõt mẽ pamex ã mẽ pajarẽnh ronhỹx mẽ pamã:

—Ãm ja pix ã mẽ apumunh kõt kot paj mẽ amex ã mẽ ajarẽ. Anẽ.

²² Nom na pre ã kapěr anhỹr kêt nẽ. Kapěr ã kagà htũm kot ja jarẽnh o:

Mẽ apiitã mẽ ate amnhĩ tomnuj o mẽ apa xwỹnh na ka mẽ.

Anhỹr jakamã tanhmã kot puj mẽ amnhĩ to nẽ Mojes kapěr kõt amnhĩ nhĩpêx mex o papa? Mẽ pahpiitã mẽ pahte amnhĩ tomnuj xwỹnh kênã. Mẽ pahte kapěr piitã hkõt amnhĩ nhĩpêx kêt jakamã koja Tĩrtũm ja hã mẽ pahpumunh kõt mẽ pamex ã mẽ pajarẽnh kêt nẽ. Koja ãm mẽ pamã kapěr o:

—Kot kaj mẽ amnhĩ kaxyw Jejus Kris mã ajamaxpěr pa ja hã mẽ apumunh kõt mẽ amex ã mẽ ajarẽ nẽ mẽ ato ixkra nẽ mẽ ato mex o ri ixpa. Anẽ.

Mojes kapěr te kệp Kris xwỹj ri mẽ hamãr xwỹnh pyrãk ã harẽnh

Rõmãn 10.4; Karatas 4.1

²³ Nẽ kormã Kris kot mẽ pahwỹr wrỹk nẽ mẽ panê htyk xwỹj ri na pre Ijaew Mojes kapěr ma nẽ hkõt amnhĩ nhĩpêx o ri pa. Nhũm kapěrja te kot amnhĩm mẽ unẽnh nhũm mẽ kot hkõt pix mã amnhĩ nhĩpêx o ri pa pyrãk. Na prem Tĩrtũm kot mẽ mex ã mẽ harẽnh prãm xãy ãm pix ma nẽ hkõt amnhĩ nhĩpêx o pa. Nom kapěr piitã hkõt amnhĩ nhĩpêx mex kêt nẽ.

²⁴ Te mẽhprĩre nhũm Mojes kapěr te kệp mẽ hamãr xwỹnh pyrãk. Mẽhprĩ jamãr xwỹnhjaja na htem mẽhprĩjê pumu nẽ tãm mẽ kot amnhĩ nhĩpêx kaxyw tanhmã mẽ ahkre hto ho mẽ hkõt pa. Ja pyrã nẽ na pre

Ijaew tãm amnhĩ nhĩpêx o pa kaxyw Mojes kapěr ma nẽ hkõt amnhĩ nhĩpêx o ri pa. Jejus Kris kutêp ã amnhĩ nhĩpêx anhỹr o ri pa. Tã nhũm Jejus tãm kaxkwa rũm wrỹ pa mẽ ixkwỹ pixjaja mẽ ixkwỹjê rom amnhĩ kaxyw hkõt ijamaxpěr. Hãmri nhũm Tĩrtũm ja hã mẽ ixpumunh kõt mẽ inhmex ã mẽ ijarẽnh kurê kumrẽx.

Jejus kukwak ri mẽ pahpê Tĩrtũm kra ã mẽ pajarẽnh

Juãw 1.12; Rõmãn 8.14; Epes 1.5

²⁵⁻²⁶ Tã ra mẽ ixte amnhĩ kaxyw Kris kõt ijamaxpěr jakamã na pre Tĩrtũm mẽ ixto hkra pa mẽ ra te ixpê hkra xaptàr pyrãk o amnhĩ nhĩpêx nẽ kapěr kõt amnhĩ nhĩpêx mex o ri ixpa. Jao Mojes kapěr kaga. Te mẽhprĩre ra mẽ ahkre kamã mẽ aptàr nẽ kot mẽ ahkre xwỹnh kaga pyrãk. Hãmri pa mẽ ixpê Tĩrtũm kra xaptàrjaja hãmri axte Mojes kapěr kõt amnhĩ nhĩpêx hkêt nẽ.

²⁷ Tã mẽ kajaja na ka pre mẽ ixpyrà nẽ amnhĩ kaxyw Kris kõt ajamaxpěr nhũm mẽ akwỹ kot mẽ apê Jejus kwỹ hã mẽ apumunh kaxyw nhũm mẽ akrã kumrã. Hãmri ka mẽ Jejus kot amnhĩ nhĩpêx kõt pix mã amnhĩ nhĩpêx o ri apa.

²⁸ Tã ra mẽ pahpê Jejus Kris kõt amnhĩ xunhwỹr xwỹnh jakamã na hte Tĩrtũm ahpỹnhã ri tanhmã mẽ pakute hkõt mẽ pahpumunh kêt nẽ. Mẽ pahpê Ijaew rỹ mẽ pahpê Ijaew kêt xwỹnhjaja. Rỹ mẽ pahpê nhãm mẽ kãm paxápênh xwỹnh rỹ amnhĩ mã mẽ paxápênh xwỹnh nhũm hte ja hã mẽ pahpumunh kõt tanhmã mẽ pajarẽnh to hkêt nẽ. Rỹ mẽ anijê hkõt rỹ mẽ inhmyjê hkõt mẽ pahpumunh kõt tanhmã mẽ pajarẽnh to kêt nẽ. ãm mẽ pahte Jejus Kris kõt amnhĩ xunhwỹr ã mẽ pahpumunh kõt pix mã na hte ã mẽ pahpumunh o pa anẽ.

²⁹ Nẽ na pre Tĩrtũm Apraãw mã hkanrêhã htãmnhwỹ Jejus Kris o mex ã amnhĩ jarẽ. Tã Kris kệp mẽ panhõ Pahihti jakamã pu mẽ Tĩrtũm noo mã urãk nẽ te mẽ pahpê Apraãw tãmnhwỹ pyrãk. Jakamã koja Apraãw nhĩpêxta pyrã nẽ mẽ pahto mex rax nẽ.

4

Mojes kapěr te axte mẽ pahpynênh kêt pyrãk ã harẽnh

Rõmãn 7.1, 8.14-17; Karatas 3.23

¹ E kot paj axte mẽ amã tanhmã mẽhprjê jarênh to ka mẽ inhma. Koja mẽhõ ra hkra mã mẽmo hikukrêx nhõr kaxyw. Hikukrêx nê õ pika. Õ mẽmoj piitã õr kaxyw. No nhũm hkraja kormã hprĩre nê hamaxpêr mex kêt jakamã nhũm kormã hprêk jamãr o pa. Nhũm hkraja arĩ te kãm àpênh o pa xwýnh kot amnhĩ nhĩpêx pyrã nê amnhĩ krã hkõt ri amnhĩ nhĩpêx o pa hkêt nê. Kormã hipêêxà kapêr kõt ri amnhĩ nhĩpêx o pa. Nhũm hipêêxàja kot kãm õ mẽmoj piitã õr kaxyw no ãm kormã hprêk jamã.

² Tã kormã hkraja hprĩre ri nhũm hipêêxà tanhmã amnhĩ to nê ty. Nom nhũm hkraja mýr pê kormã õ mẽmoj o amnhĩptàr kêt nê. Kormã hprĩre jakamã nhũm hipêêxà mýr pê kot kãm hamãr o pa xwýnhja kormã kãm hamãr o pa. Tã nhũm hipêêxà kot kãm amgrã jarênh xwýnhata kato nhũm tãm mẽmoj piitã ho amnhĩptã. Ra àptàr mex nê hamaxpêr mex nê amnhĩm ho amnhĩptàr pa.

³ Tã Ijaew na prem ã amnhĩ nhĩpêx anê. Amnepêk kormã mẽ kot Mojes kapêr kõt ri amnhĩ nhĩpêx o pata ã na prem te mẽhprĩre hamaxpêr kêeta pyrãk. Te kormã mẽ àptàr kêt pyrã nê jar pika ja kamã mẽ kot amnhĩ nhĩpêx tũm kõt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm mẽ unênh nê mẽ kãm ê pyrãk o mẽ hipêx nhũm mẽ hkõt pix mã amnhĩ nhĩpêx o ri pa.

⁴ Tã nhũm Tirtũm kot Kra hkukamã mẽ pahwýr mẽnh xà hã arĩgrota kato hãmri nhũm mẽ pahwýr kumẽ nhũm mẽ pahwýr wrý nê mẽ pahpyrà nê mẽhõ nhõhy rũm kato. Nê mẽ pahpyrà nê gaa nê hprêk nê mẽ ixpê Ijaew rom Mojes kapêr piitã hkõt amnhĩ nhĩpêx mex kumrêx o ri pa.

⁵ Jao te kot Mojes kapêr pê mẽ papytãr pyrãk o mẽ panhĩpêx pu mẽ hpãnhã pahpê Tirtũm kra kaxyw.

⁶ Tã mẽ ixpê Ijaew kwýjaja nê mẽ apê Ijaew kêt xwýnh kwýjaja ra mẽ pahpê Tirtũm kra jakamã na pre mẽ pahwýr Kra Jejus Karõja rê nhũm mẽ pamã agjê. Hãmri nê mẽ pamã kapêr o:

—Ra mẽ apê Tirtũm kra jakamã kêt ka mẽ kãm amnhĩ jarênh kaxyw nê kãm: “Pa Papaj” anê. Kêr ka mẽ ã kãm akapêr anê. Anê.

⁷ Jakamã na pu mẽ ra te pahpê mẽ kãm paxàpênh xwýnh pyrãk kêt nê. Ra mẽ pahpê Tirtũm kra jakamã na hte mẽ panhĩpêx o te Kra Jejus nhĩpêx pyrã nê mẽ pahto mex nê.

Mojes kapêr kõt mẽ kot amnhĩ nhĩpêx xwýnhjê jarênh

Sikũn Korõt 11.3-4; Korosê 2.16-19; Eprêw 6.1; Wam Pêtre 1.14

⁸ Nê amnepê mã kormã mẽ ate amnhĩ kaxyw Jejus kõt ajamaxpêr kêt ri na ka prem Tirtũm jarênh mar kêt nê. ãm atýx ri sãnti mã mex ã harê nê kãm amnhĩ jagrer o ri apa. Nê amã mẽmoj kĩnh nê amã hprãm xaj tanhmã amnhĩ to hwýr to ho ri apa. Te mẽ kãm mẽ àpênh o mẽ pa xwýnhjaja kot amnhĩ nhĩpêx pyrã nê sãnti mã tanhmã amnhĩ nhĩpêx to ho ri apa. Nom sãntija kêp Tirtũm kêt.

⁹ Tã ka prem Tirtũm jarênh ma nê hkõt amnhĩ xunhwý nhũm amnhĩ tã mẽ apumu. Tã tãm kot amnhĩ kaxyw mẽ paxunhwýr jakamã kwa mon ka mẽ ra axtem nê akupým sãnti hkõt amnhĩ nhĩpêx kaxyw? Nã mẽ ajamaxpêrja mex kêt. Sãnti nhĩpêxta tanhmã koja amnhĩ to nê mẽ ato ajuta? ãm mẽ kot ìhkra ho hipêx pix jakamã hihtýxti hã. Amarĩ kuhê xà kamã kuhê ho kuhê xwýnh kênã. Tã te kot akupým amnhĩ kõt mẽ arênh kaxyw pyrãk o mẽ anhĩpêx ka mẽ ra axtem nê akupým hkõt amnhĩ nhĩpêx kaxyw. Kwa nã mẽ ã ri amnhĩ nhĩpêx anhýr kêt nê.

¹⁰ Nê na ka htem amnhĩ kukamã ajamaxpêr o:

—Na pre hte Ijaewjaja Mojes kapêr xà hkõt arĩgro hkwy hã axtem tanhmã amnhĩ nhĩpêx to nê mẽmo mytwrý hã tanhmã amnhĩ nhĩpêx to nê mẽmo amgrã hã tanhmã amnhĩ nhĩpêx to. Tã kot paj mẽ urãk nê ã amnhĩ nhĩpêx anhýr o ixpa. Kê Tirtũm ja hã ixpumu nê inhmex ã ijarê. Anê.

Kwa mẽ ã ajamaxpêr anhýr kêt nê. Mon ka htem axtem nê ri ã ajamaxpêr anê? Na hte Tirtũm ã mẽ pahte amnhĩ nhĩpêx anhýr ã mẽ pahpumunh kõt mẽ pamex ã mẽ pajarênh kêt nê.

11 Na pa ja hã mẽ ajarẽnh ma nẽ tee ri mẽ akukamã ijamaxpẽr. Te ixte Tĩrtũm kapẽr o mẽ ajahkre kaprỹ ho ri ixpa pyrãk.

Karatas nhõ xwỳnhjaja kot Pawre ho mex ã mẽ harẽnh

Wam Korĩt 9.21-23

12 Kwa ixkrãmnhwỳjaja. Ixpê Ijaew tã te ixpê Ijaew kêt pyrãk o amnhĩ nhĩpêx o ri mẽ apê Ijaew kêt xwỳnhjê hkõt ri ixpa. Jao Kris kapẽr gryk ã mẽ inhĩgêjtjaja kot amnhĩ nhĩpêx kaga nẽ axte hkõt amnhĩ nhĩpêx kêt nẽ. Tã kwa mẽ ixpyrà nẽ ã amnhĩ nhĩpêx anẽ. Wem ma amnhĩ to amõr gri kêt wehe. Wam ixte mẽ awỳr inhmõrta ã na pa pre mẽ amã Tĩrtũm kapẽr jarẽnh o ri mẽ akõt ixpa ka prem inhma nhũm ja mẽ amã mex nẽ ka mẽ ja hã tanhmã ixto hkêt nẽ.

13 Na pa pre ixàà nẽ mẽ awỳr mõ nhũm ixàja ixto htỳx nẽ pa tokyx ixkator nẽ ma akupỹm mẽ arũm inhmõr kêt nẽ arĩ mẽ amã Tĩrtũm kapẽr jarẽnh o ixpa.

14 Kormã ixà nẽ tanhmã ixkute htã ka prem ja hã ixpumu nẽ ixto mex nẽ ixkamã anhõkre kahak kêt nẽ. Na ka prem te ixto Jesus Kris nhĩpêx pyrãk o inhĩpêx. Nẽ te ixto Tĩrtũm kapẽr o wrỹk xwỳnh nhĩpêx pyrãk o inhĩpêx.

15 Jao mẽ amã ixkĩnh nẽ ã inhĩpêx anẽ nẽ mẽ amã ixto mex pix prãm. Nẽ nhỹri ixpumu nẽ ixkamã axukaprĩ nẽ inhmã akapẽr o:

—Hêxta waa nẽ. Anopxàà. Inhmã amnhĩ no kaxàr nẽ amã õr prãm nom tanhmã kot pa mẽ amnhĩ to nẽ hkapa nẽ amã kugõ? Anẽ.

Nẽ mẽ amã inhmã mẽmoj mex pix nhõr prãm. Tã ra tanhmã ajamaxpẽr to nẽ axtem nẽ te mẽ amã ixkĩnh kêt pyrãk o inhĩpêx.

Mẽ no kupyw xwỳnhjaja kot mẽ hamaxpẽr o pihkàr ã mẽ harẽnh

16 Nẽ na pa pre ãm hãmri mẽ amã Tĩrtũm kapẽr jarẽnh o ri mẽ akõt ixpa. Nom ra mẽ amã mar prãm kêt jakamã na ka mẽ axtem nẽ inhĩpêx o te ixte mẽ akutã amnhĩ xãm pyrãk.

17 Mẽ amã Tĩrtũm kapẽr o mẽ hêx xwỳnhjaja te mẽ kãm mẽ akĩnh pyrãk o mẽ anhĩpêx no ãm mẽ kãm akĩnh kêt. Na htem mẽ amex kaxyw tanhmã mẽ amã kapẽr to hkêt nẽ. ãm mẽ ate mẽ mar nẽ mẽ gryk ã

ixkaga nẽ mẽ hkõt ri amnhĩ nhĩpêx o apa pix prãm xàj na htem mẽ akõt tanhmã mẽ amã hêx to ho pa.

18 Pa mẽ harẽnh ma hãmri nẽ mẽ kamã inhgryk o ã mẽ amã mẽ harẽnh anhỹr kêt nẽ. Koja mẽhõ mẽ awỳr mra nẽ ixwakre kamã rỳ inhnoo mã mẽ amã mẽmoj mex jarẽ nhũm ja inhmã mex nẽ. No nhũm mẽ amã mẽ hêx xwỳnhjaja axtem nẽ mẽ ajamaxpẽr o pihkàr pix kaxyw na htem mẽ awỳr mrar nẽ mẽ amã ã ujarẽnh o pa anẽ.

Pawre kot tee ri mẽ hkukamã hamaxpẽr ã harẽnh

19 Te mẽ apê ixkra pyrãk jakamã na pa hte mẽ ate amnhĩ nhĩpêx ã mẽ apumu nẽ tee ri ijamaxpẽr nẽ ixkaprĩ htỳx nẽ. Te nhỹhỹnh ixà htỳx nẽ ixte amnhĩ xà htỳx kamã ijamak o ri ixpaja pyrãk. Rỳ te mẽ hpijagri ho mẽ hikwỳ xwỳnh õhy xà htỳxta pyrãk. Mẽ ate Kris kõt amnhĩ nhĩpêx mex o apa hprãm xàj na pa hte ã amnhĩ nhĩpêx anhỹr o ri ixpa.

20 Hêxta waa nẽ. Kop apu ra mẽ awỳr ixpõx nẽ mẽ akõt ixpa ronhỹx pa ixkĩnh tỳx kumrêx. Nhỹx pa ra ixprĩ hã mẽ amã ixkapẽr ka mẽ inhma. Nẽ amnhĩ tã inhmã mẽ akĩnh tỳx ã mẽ akamã inhgryk kêt ã ixpumunh kurê kumrêx. No kagà pix kãm ixkapẽrja ka mẽ kamã harẽ nom aprĩ hã inhmar mex kêt nẽ. Na pa tee ri mẽ akukamã ijamaxpẽr o ixkaprĩ htỳx nẽ ixpa.

Mojes kapẽr kõt mẽ kot amnhĩ nhĩpêx xwỳnhjê jarẽnh

Eprêw 12.18-29

21 Kwa mẽ amã arĩ Mojes kapẽr kõt amnhĩ nhĩpêx o ri mẽ apa hprãm xwỳnhjaja. Mãn ka mẽ kormã aprĩ hã Mojes kapẽr piitã mar par kêt jakamã na ka mẽ amã hkõt amnhĩ nhĩpêx prãm. E pa ixprĩ hã mẽ amã tanhmã harẽnh to ka mẽ inhma.

22 Nà Tĩrtũm kapẽr ã kagà htũm kot finat Apraãw jarẽnhja. Na pre hkra myja wa hamêxkrut. Prõ Sara kamã ja nẽ kot amnhĩm haprõr nhũm ri kãm àpênh o pa xwỳnh Aga kamã ja.

23 Kãm àpênh xwỳnh kamã ja na pre mẽ pahpiitã mẽ pahpyrà nẽ amarĩ kato. No hprõ Sara kamã ja. Sara na pre ra hpigêx tỳx nẽ. Ra hkamrõ hkêt ryy nẽ pa htã nhũm Tĩrtũm kot wa hkra hkukamã wa

kām ujarēnh xà hkôt nhūm Apraāwja htu nhūm wa hkrata kato. Tīrtūm kot hkukamā wa kām harēnh xà hkôt nhūm kamā hkra nhūm kato.

²⁴⁻²⁵ Tā wa nita ā wa harēnh kot anhÿr. Na pre Tīrtūm mēmoj jarē. Te ho wa urāk o wa harē no ām hā kuxi nē ā wa harēnh anē. Jakamā ni wa harēnhja te kot Tīrtūm kapēr pijakruuta pyrāk. Wam ni Agata te kot hixēt prēk pē Sinai nhīmōk ā Tīrtūm kot Mojes mā kapēta pyrāk. Hixētja pika pē Arap kamā na pre. Jakamā nhūm Tīrtūm Ijaew kaxyw Mojes mā kapēr nhūm kuma nē amnhī xō ri mē kām hā kagà. Tā na hte arī jarāhā mē hkwyjaja hamaxpēr o:

—E kot paj mē panhīgēt finat Mojes kapēr kôt amnhī nhīpēx o ri ixpa nhūm Tīrtūm ja hā ixpumu nē amnhīm inhmex ā ijarē nē ixto hkra.

Anhÿr o hamaxpēr no ām ā hamaxpēr anhÿr kaprÿ. Ā mē hamaxpēr anhÿr xwÿnhjaja te mē kēp Apraāw mā àpēnh xwÿnh Aga hkrata pyrāk. Nē krī pē Jeru-jarē kēp Ijaew nhō krī jakamā haxwÿja te kēp Agata pyrāk. Nhūm krī nhō xwÿnhjaja haxwÿja te mē kēp Aga hkrata pyrāk. Na htem htÿx Tīrtūm kot mē omunh nē mē ho hkra hprām xàj Mojes kapēr kôt amnhī nhīpēx o pa hā amnhī jarēnh kaprÿ. Jakamā haxwÿja te mē kēp mē kām mē àpēnh o pa xwÿnh pyrāk.

Jejus kôt mē kot amnhī kaxyw hamaxpēr xwÿnhjē jarēnh

²⁶ Nē hapu hā Tīrtūm kapēta. Apraāw prō kumrēx Saraja te kēp kaxkwa kamā Jeru-jarē oja pyrāk. Krī ja kamā mē pa mā xwÿnhjaja te mē kēp mē kām mē àpēnh xwÿnhjē pyrāk kêt. Ra mē kot amnhī kaxyw Kris mā hamaxpēr nē hkôt amnhī xunhwÿr jakamā na htem hamaxpēr o:

—Ixte amnhī kaxyw Kris mā ijamaxpēr nē hkôt amnhī xām jakamā na Tīrtūm ixpumu nē amnhīm inhmex ā ijarē nē ixto hkra. Anē.

Ām hāmri na mē ā wantajē rom hamaxpēr anē. Tā ā mē hamaxpēr anhÿr xwÿnhjaja te mē kēp Sara hkra pyrāk.

²⁷ Tīrtūm kapēr ā kagà htūm kot ja jarēnh kot:

E kormā akra hkêt nē apa htā kêt ka māmri akīnh nē ri apa.

Nē kormā apijagri hkêt tā kêt ka akīnh tÿx nē ri apa.

Kormā amjēn kot akamā hkra hkêt nē te kot akaga pyrāk tā kot kaj akra nē akanrēhā atāmnhwÿ xohtō rax nē.

Mē ohtō rax o ra amjēn kot nhām hprō hō kamā hkrata jakre. Anē.

Ā kapēr kot anhÿr o mē kot amnhī kaxyw Kris kôt hamaxpēr xwÿnhjē hkukamā mē ohtō hā mē harē.

²⁸ E ixkrāmnhwÿjaja. Te mē apē Ijak kanrēhā htāmnhwÿ pyrāk. Koja mēhō amnhī kaxyw Kris kôt hamaxpēr hāmri nē te kēp Apraāw mē hprō Sara wa hkra Ijak kanrēhā htāmnhwÿ pyrāk. Na pre Tīrtūm amnepē mā kormā Ijak kator kêt ri ra hkukamā hamaxpēr nē Apraāw mā harē. Nē mē papajaja nhūm Tīrtūm Ijak pyrā nē mē pakukamā mē pamā hamaxpēr nē amnhīm mē paxunhwÿr ā amnhī jarē. Tā ra mē ate amnhī kaxyw Kris kôt ajamaxpēr jakamā te mē apē Ijak kanrēhā htāmnhwÿ pyrāk.

²⁹ Nhūm Apraāw kot Aga kamā hkra Ismaewja na pre hprō kumrēx kamā hkrata pumu nē kām hkīnh kêt nē kamā gryk pix o pa. Nē tanhmā hipēx to pē ri haprÿ ho ri hkôt pa. Tā mē kot amnhī krā hkôt amnhī to Tīrtūm kra hprām xwÿnhjaja na htem ā mē pahte Kris kôt amnhī xunhwÿr xwÿnhjē nhīpēx anhÿr o pa. Na htem Tīrtūm kot mē pahto hkra hā mē pahpumu nē Ismaew kot Ijak nhīpēx pyrā nē mē pakamā gryk pix o pa. Nē tanhmā mē pahtomnuj to pē mē pahto kapēr o ri pa.

³⁰ Tā no ām kwār mē māmri ā mē panhīpēx anē. Koja mē pahpyrā nē nhÿrmā Tīrtūm nhō krī hwÿr àpir kêt nē. Tīrtūm kapēr ā kagà htūm kot mē harēnh kot:

Na pre Tīrtūm Apraāw mā kapēr nē kām: “E kêt ka amnhī nē ate haprōr nhūm kot amā àpēnh o ri pa xwÿnh mē hkrata wa hano. Koja hkrata amÿr pē amnhīm mēmoj to arīk kêt nē.

Ate aprō kumrēx kamā akrata pix koja hōja rom amÿr pē mēmoj piitā ho amnhīptār pa.” Anē.

³¹ Tā te mē pahpē àpēnh xwÿnh kamā hkrata pyrāk kêt. Te mē pahpē Apraāw prō kumrēx kamā hkrata pyrāk. Te Tīrtūm kot

Ijak kukamã hamaxpër pyrãk o na pre mẽ pakukamã hamaxpër.

5

1 Nẽ Kris kot mẽ pahte amnhĩ nhĩpêx tũm pẽ mẽ papytãr jakamã kwa ixkrãmnhwỳjaja. Kêr ka mẽ arĩ ate amnhĩ nhĩpêx tũm kôt amnhĩ nhĩpêx kêt nẽ. Ra Kris kot ja pẽ mẽ papytãr nhũm mẽ paxãmnhĩx ri papa kẽnã.

Mẽ pahpê Tĩrtũm kra hprãm xaj tanhmã mẽ pahte amnhĩ nhĩpêx to

Juãw 8.32, 8.36; Korosẽ 2.20

2 E mẽ inhma. Kot kaj mẽ atõ Tĩrtũm kot ato hkra hprãm xaj amnhĩ my kwryt kã krãhta hã kot kaj mẽ ãm amarĩ ã amnhĩ nhĩpêx anhỹr kaprỹ. Na hte Tĩrtũm ja hã mẽ omu nẽ ãm hã mẽ omu. Kot kaj ã amnhĩ nhĩpêx anẽ nhũm Krisja ãm ate amnhĩ tomnuj mỳrapê anẽ htyk kaprỹ pyrãk o amnhĩ nhĩpêx.

3 Hãmri nhũm Tĩrtũm tee ri ja hã mẽ apumu nẽ te kot ã mẽ amã kapër anhỹr pyrã nẽ mẽ amã kapër o:

–E ra amã apê Kris kwỳ hprãm xaj amnhĩ my kwryt kã krãhyr jakamã kot kaj mããnẽn Mojes kapër piitã hkôt amnhĩ nhĩpêx o ri apa.

Anhỹr o mẽ amã kapër pyrãk.

4 Nom kot kaj mẽ atõ amnhĩ kukamã ajamaxpër o:

–Nã kot paj Mojes kapër piitã hkôt amnhĩ nhĩpêx o ri ixpa nhũm Tĩrtũm ja hã ixpumu nẽ inhmex ã ijarẽ nẽ ixto hkra kãm ga. Anẽ.

No ãm ja kot anhỹr kêt. Na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra hkêt nẽ. Jakamã kot kaj mẽ ã amnhĩ nhĩpêx anẽ nẽ te ate Kris kutã amnhĩ xãm pyrãk nhũm Tĩrtũm ato mex kêt nẽ.

5 Nom kot ka mẽ axtem ajamaxpër o:

–Ra ixte amnhĩ kaxyw Kris kôt ijaxmaxpër nẽ hkôt amnhĩ xãm jakamã koja Tĩrtũm hã ixpumu nẽ inhmex ã ijarẽ. Karõ ra kot ã inhmã ja ho amnhĩrĩt anhỹr kẽnã.

Anhỹr o ajamaxpër. ãm hãmri ã mẽ ajamaxpër anhỹrja.

6 Jakamã mẽ pahpê Kris kôt amnhĩ xunhwỳr xwỳnhjê kamã ra mẽ kot amnhĩ

my kwryt kã jakãr xwỳnhjaja nhũm mẽ pahkwỳjaja ã amnhĩ nhĩpêx anhỹr kêt nẽ. Tã nhũm Tĩrtũm ja hã mẽ pahpumu nhũm ja tanhmã kêp kute hkêt. Na hte mẽ pahte amnhĩ my kwryt kã jakãr ã mẽ pahpumu nẽ ãm hã mẽ pahpumu. No kot pu mẽ Jejus Kris kôt amnhĩ nhĩpêx mex o ri papa. Nẽ amnhĩ kaxyw hkôt pajamaxpër tỳx o ri papa. Nẽ mẽ pamã axpẽn kĩnh pẽ tãm ri axpẽn nhĩpêx o ri papa. Ja na kêt Tĩrtũm kãm hprãm.

7 Ra mẽ ate Kris kôt amnhĩ nhĩpêx mex o ri apa htã nhũm mẽ hêx xwỳnhjaja mẽ awỳr mra nẽ tee ri ã mẽ ate amnhĩ nhĩpêx anhỹr ã mẽ apumu nẽ tanhmã mẽ amã Tĩrtũm kapër o hêx to. Ka mẽ ama nẽ axte Tĩrtũm kôt amnhĩ nhĩpêx mex hkêt nẽ.

8 No ãm ã mẽ kot mẽ amã mẽ ujarẽnh anhỹr xwỳnhjaja na pre Tĩrtũm mẽ awỳr mẽ rẽn kêt nẽ. Tĩrtũm kot amnhĩ wỳr mẽ awỳr xwỳnh kẽnã kot kêt axtem nẽ mẽ awỳr kapër o mẽ amã hêx o mẽ pa xwỳnhjê rẽ.

9 Nẽ koja mẽhõ pixi nẽ tanhmã amnhĩ tomnuj to nhũm mẽ piitã ja hã omu nẽ urãk nẽ kãm tanhmã amnhĩ tomnuj to hprãm.

10 No kêt mẽ apê Kris kwỳ na ka mẽ. Ixte ja hã mẽ apumunh mex. Kot kaj mẽ axte ixkapër ma nẽ akupỳm Kris kôt amnhĩ nhĩpêx mex o ri apa. Nã kot kaj mẽ ã amnhĩ nhĩpêx anẽ nẽ axte mẽ kot mẽ apê ãmnãr xwỳnhjê kapër mar nẽ mẽ hkôt amnhĩ nhĩpêx kêt nẽ. Koja Kris mẽ atã mẽ homnuj tỳx kumrẽx nhũm mẽ rĩ amnhĩ pumu.

Pawre kot mẽ kot amnhĩ jakãr ã mẽ kãm karõ hkêt ã harẽn

11 Nẽ na hte Tĩrtũm kapër o mẽ hêx xwỳnhjaja tanhmã mẽ amã ixto hêx to ho pa. Ixte mẽ kãm Tĩrtũm kot mẽ ho hkra kaxyw mẽ kot amnhĩ my kwryt kã jakãr ã mẽ kãm karõ hã ixto ri hêx o pa. Nom ixte anhỹr kêt ixkrãmnhwỳjaja. Kop apu ixte mẽ kãm ja hã karõ ho ixpa ronhỹx Ijaew krãhtũmjaja ja hã ijarẽn ma nhũm ja mẽ kãm mex nẽ nhũm mẽ axte Kris ã tanhmã inhĩpêx to hkêt nẽ. Nom ixte ja hã mẽ kãm karõ hkêt. ãm ixte mẽ kãm Kris kot mẽ panê pĩ kahpa hã htyk jarẽn pix mỳrapê na htem ixkamã gryk nẽ.

12 Hêxta waa nê. Mě kot mẽ amã hêx o pa pẽ mẽ ajamaxpêr o pihkâr xwýnhjaja kop mẽ ãm mẽ anhõ krĩ rûm hapôx nê ma nhỹhỹm hapêx ronhỹx pa ixkĩnh tỳx kumrêx.

Mě pahte axpên to mex o papa hã mẽ pamã karõ

Wam Korõt 13; Eprêw 13.3, 13.16; Wam Pêtre 1.22; Wam Juãw 3.11

13-14 Kwa ixkràmnhwýjaja. Nà na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kôt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhỹr pẽ mẽ papytâr jakamã kêr ka mẽ amnhĩ tã ja ma nê axte atỳx ri amã hprãm xà hkôt tanhmã amnhĩ nhĩpêx to ho ri apa hkêt nê. Mě ãm amã axpên kĩnh pix o ri axpên kôt apa. Nê nhãm mẽ hipêx o te ka amã amnhĩ tã ma pyræk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx anê nê te mẽ ate wam Tĩrtũm kapêr piitã hkôt amnhĩ nhĩpêx pyræk.

15 No kot kaj mẽ axtem nê axpên kãm axoprê ho ri apa hãmri nê te ra mẽ ate axpên to ajapêx par o amõr pyræk o amnhĩ nhĩpêx. Te mry xoprê kot axpên par o pata pyræk. Kwa mẽ ã amnhĩ nhĩpêx anhỹr hkêt nê. Mě ãm axpên to mex pix nê mẽ axpên kãm axukapri ho ri axpên kôt apa.

Mě pahte amnhĩ nhĩpêx nyw jarênh Matêwre 26.41; Rõmãn 8.1-11

16 Nê kwa kêr ka mẽ amnhĩ to Tĩrtũm Karõ wý kê mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt nê. ãm mẽ ate amnhĩ nhĩpêx nyw kôt pix mã mãn amnhĩ nhĩpêx o ri apa.

17 Tĩrtũm Karõ kot amnhĩ nhĩpêxja nê mẽ pahte amnhĩ nhĩpêx tũmja wa kot axpên pyræk kêt. Te wa kot axpên kutã amnhĩ xãm nê wa pijapu pyræk. Jakamã kot puj mẽ pahte amnhĩ nhĩpêx tũm o amnhĩ nhĩpêx nê Tĩrtũm Karõ mã hprãm xà hkôt amnhĩ nhĩpêx hkêt nê.

18 No kot puj mẽ Tĩrtũm Karõ hkôt amnhĩ nhĩpêx nê ra jar pika ja kamã mẽ kot amnhĩ nhĩpêx kôt ri amnhĩ nhĩpêx kêt nê. Ra axtem mẽ pahte amnhĩ nhĩpêx nyw o amnhĩ nhĩpêx.

19 Jar mẽ kot amnhĩ nhĩpêx tũmta mex kêt. Ra mẽ piitã mẽ kot ja pumunh mex.

Na htem htỳx ri hkwýjê kamã hpijaàm kêt o pa.

Jao mẽmyjaja hprõ kuhpa hã nhãm mênijê ho amnhĩkati.

Nhũm mẽ hprõjaja mẽ mjên kuhpa hã nhãm mẽmyjê ho amnhĩkati.

Nê mẽmy hkwýjaja axtem nê mẽmyjê hkwý ho amnhĩkati.

Nê mẽni hkwý haxwýja axtem nê mênijê hkwý ho amnhĩkati.

20 Nê mẽ kãm mẽmoj mẽ hikukrêx japê htỳx o kãm Tĩrtũm kĩnh jakre.

Nê mẽmoj kaxyw ma wajaga hwýr amnhĩ to pa.

Nê hkwýjê kamã oprê ho ri pa.

Nê mẽmoj tã axpên kãm gryk pix nê.

Nê mẽmoj to axpên pẽ õxy nê.

Nê mẽmo mýrapê axpên pẽ anhgrà nê amỳm ahpýnhã ri pa.

21 Nê mẽmoj tã axpên kamnhĩx rãhã ho ri pa.

Nê axpã nê mẽ grer kãm ri axpên kãm hpijaàm kêt o ri pa.

ã na htem mẽ kot amnhĩ nhĩpêx tũm kôt amnhĩ nhĩpêx o ri mẽ pa xwýnhjaja amnhĩ nhĩpêx anê. ã mẽ kot amnhĩ nhĩpêx anhỹr xwýnhjaja koja mẽ Tĩrtũm nhõ krĩ hwýr gjêx kêt nê. Ra ixte mẽ amã ja jarênh tã pa axte mẽ amã harê. Mě ate hã ano htỳx rãhã ho ri apa kaxyw.

22 No mẽ kot amnhĩ nhĩpêx nywja axtem na.

Tĩrtũm Karõ hkôt mẽ kot amnhĩ nhĩpêx nyw o amnhĩ nhĩpêx xwýnhjaja na htem axtem kãm axpên kĩnh nê.

Nê hkĩnh nê ri hamakêtkati nê àmnhĩx ri axpên kôt pa.

Nê gryk tokyx anhỹr hkêt nê. ãm axpên to mex pix o ri axpên kôt pa.

Nê tãm axpên nhĩpêx.

Nê kot mẽmoj tã amnhĩ jarênh xà hkôt tanhmã mẽmoj to.

23 Nê axpên mã kapêr mã hprĩ ho ri axpên mã kapêr.

Nê mẽmoj punuj piitã nê amnhĩ to htỳx o ri pa.

ã na hte mẽ kot Tĩrtũm Karõ hkôt amnhĩ nhĩpêx o mẽ pa xwýnhjaja Karõ nhỹ hã amnhĩ nhĩpêx nyw o amnhĩ nhĩpêx anhỹr

o pa. Jao määnēn Mojes kapēr kwým ri amnhĩ nhĩpêx hkêt nē. Jakamã koja mēhō mē pahte amnhĩ nhĩpêx nyw nē tanhmã mē pahkurê hto hkêt nē.

²⁴ Tã mē pahpê Jejus Kris kwý jakamã na pu mē pahte amnhĩ nhĩpêx tũmja nhĩpêx o te mē pahte amnhĩ nē hpĩr pyrã nē axte hkôt amnhĩ nhĩpêx kêt nē.

Tĩrtũm Karõ hkôt mē pahte amnhĩ nhĩpêx ã mē pamã karõ

Epes 4.23-24; Korosē 3.10

²⁵ Tã ra Tĩrtũm Karõ kot mē pahto hkra jakamã kwa kêt pu mē ãm kôt pix mã amnhĩ nhĩpêx nyw o amnhĩ nhĩpêx o ri papa.

²⁶ Kot puj mē ã amnhĩ nhĩpêx anē hãmri nē mēmoj tã mē pahkwýjê mã amnhĩ to jarkrar o ri papa hkêt nē. Kot puj mē ã amnhĩ nhĩpêx anē nhũm mē pakamã gryk nē. Jakamã kêt pu mē ã amnhĩ nhĩpêx anhÿr o ri papa hkêt nē.

6

Mē pahte tanhmã axpēn to ajuta hto hã mē pamã karõ

Matêwre 18.15-17; Rukre 17.3-4; Sikũn Tesarõn 3.14-15; Xiakre 5.19-20

¹⁻³ Kwa ixkrãmnhwýjaja. Mē apê Tĩrtũm Karõ hkôt amnhĩ nhĩpêx o ri mē apa xwýnhjaja. Koja Kris kôt akwýjê hõ tanhmã amnhĩ tomnuj to ka mē ja hã omu nē ã amnhĩ nhĩpêx anhÿrja nē kãm akapēr. Nom kêt ka mē kamã agryk kamã kãm tanhmã nē hkêt nē. ãm kãm akapēr mã aprĩ ho kãm akapēr nē akupým tãm ãm. Nom kwa kêt ka mē amnhĩ pumunh mex nē urak nē ã amnhĩ tomnuj anhÿr kêt nē.

Kot ka mē atõ ã kot amnhĩ nhĩpêx anhÿr ã omu nē ãm omu nē nē tanhmã kãm akapēr to hkêt nē. Nē ajamaxpēr o:

—Tk. Kwãr mãmrĩ ã amnhĩ nhĩpêx anē. Pa ja nē tanhmã kãm ixkapēr to hkêt nē. Kurom ixte amnhĩ nhĩpêx mex o ri ixpa kênã.

Anhÿr o ajamaxpēr japêr. Kwa mē ã ajamaxpēr anhÿr kêt nē. Kot kaj mē ã ajamaxpēr anē nē nē kãm akapēr kêt nē hãmri nē te ate amnhĩ to mex ã amnhĩ jarēnh kapry pyrãk.

Nē kêt ka mē axpēn to ajuta mex o ri axpēn kôt apa. Jao Kris kôt amnhĩ nhĩpêx mex nē.

⁴⁻⁵ Nē na htem piitã amnhĩm ãpēnh pix tãnopxar o pa. Jakamã kêt ka mē amnhĩ tãnopxar pē tãm amnhĩ nhĩpêx rãhã ho ri apa. Hãmri nē ja hã amnhĩ pumu nē akĩnh nē. Nom kwa kêt ka mē ate amnhĩ nhĩpêx mex o akwýjê jakrenh ã mē kãm amnhĩ to jarkrar o ri apa hkêt nē.

⁶ Nē kêt ka mē kot Tĩrtũm kapēr o mē ajahkre xwýnhjê ho mex nē mē kãm mēmoj nhõr o ri apa.

⁷ Koja Tĩrtũm nhÿrmã mē pahtĩr ri mē pahte amnhĩ nhĩpêx ã mē pahpumunh kôt tanhmã mē pajarēnh to. Hãmri pu mē tee ri amnhĩ kukamã pajamaxpēr nom amnhĩ nē tanhmã kãm paxêx to hkêt nē. Koja mēhõ kãm amnhĩ to hêx nē te tãm kot amnhĩ mã hêx pyrãk nom kot puj mē Tĩrtũm mã amnhĩ nē tanhmã paxêx to hkêt nē.

⁸ Jakamã kot kaj mē amnhĩ krã hkôt tanhmã ri amnhĩ nhĩpêx to rãhã ho apa hãmri nē nhÿrmã ty nē Tĩrtũm pē awry rax ã ri apa. Nom kot kaj mē Tĩrtũm Karõ mã hprãm xã hkôt pix mã amnhĩ nhĩpêx nē nhÿrmã ty nhũm Tĩrtũm akupým ato atĩr ka kuri amex nē ajamakêtkati atĩr tũm nē ri apa ho apa.

Mē pahte axpēn to mex rãhã hã mē pamã karõ

Atre 20.35; Wam Korõt 15.58; Xitre 3.14; Eprêw 13.3, 13.16; Xiakre 1.27

⁹ Jakamã kwa kêt ka mē arĩ tãm ri amnhĩ nhĩpêx nē tãm axpēn nhĩpêx o ri axpēn kôt apa nē jam anhÿrer kêt nē. Mē ã amnhĩ nhĩpêx o ri apa anhÿr rãhã ty nhũm Tĩrtũm nhÿrmã ja hã mē ato mex rax nē.

¹⁰ Tã kêt pu mē arĩ Kris kôt pahtõjê ho mex rãhã ho ri papa. Nom mē tapxipixjê ho mex kêt nē. Pu mē mē piitã mē ho mex o axpēn pyrãk.

¹¹ E ixte mē amã kagã nhĩpêx nē mēnh nhũm mē ate ja hã ixpumunh kaxyw kot paj pam kagã jatur xã hã inhĩkra ho inhĩxi nhĩpêx ka mē ixte inhĩxi hã kagã rũnhtita pumu.

Jejus kot mē panê htyk ã Pawre kãm harēnh prãm ã harēnh

Wam Korõt 1.22-24, 2.1-2

12 Nē mẽ amã Tĩrtũm kapẽr o mẽ hẽx xwỳnhjaja na htem hamaxpẽr o:

—Nà kot paj Karatas nhõ xwỳnhjẽ mã Kris pĩ kahpa hã htyk ã harẽnh o ri ixpa hkẽt nẽ. Kot pa anẽ nhũm mẽ ixpẽ Ijaew kwỳjaja ja hã inhma nẽ hã tanhmã inhĩpẽx to. Ja pymaj kot paj mẽ kãm tanhmã harẽnh to hkẽt nẽ. Kot paj ãm mẽ kot amnhĩ my kwỳt kà jakàr pix ã mẽ kãm karõ kẽ mẽ ixkapẽr xà hkõt ã amnhĩ nhĩpẽx anẽ. Pa hã mẽ omu nẽ ma ixkwỳjẽ mã mẽ hã amnhĩ to jarkrar o ri ixpa. Anẽ.

13 Te mẽ kot finat Mojes kapẽr kõt ri amnhĩ nhĩpẽx pyrãk tã no na htem ã amnhĩ nhĩpẽx anhỹr kẽt nẽ. Ra mẽ kot amnhĩ jakàr tã no ãm Mojes kapẽr piitã hkõt amnhĩ nhĩpẽx hkẽt nẽ. ãm hkwỳ hkõt pix mã amnhĩ nhĩpẽx o pa. Nom kot kaj mẽ ama nẽ mẽ urãk nẽ amnhĩ jakà nhũm mẽ ja hã mẽ apumu nẽ hkĩnh nẽ. Nẽ ma ri mẽ hkwỳjẽ mã mẽ atã amnhĩ to jarkrar o ri pa nẽ mẽ kãm:

—E Karatas nhõ xwỳnhjaja na pa prem mẽ kot amnhĩ my kwỳt kà jakàr ã mẽ kãm karõ nhũm mẽ inhma nẽ mẽ pahpyrà nẽ ã amnhĩ nhĩpẽx anẽ. Anẽ.

14 No pa na pa hte ã mẽ kãm mẽmoj tã karõ anhỹr o ri ixpa hkẽt nẽ. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nẽ htykja pix na pa hte mẽ kãm harẽ. Ra kot inhnẽ htyk jakamã te pa ixte kuri ijẽt nẽ ixtyk pyrãk. Jakamã ra jar pika ja kamã mẽ kot amnhĩ nhĩpẽxja te ixpẽ htyk nẽ hapẽx pyrãk pa axte hkõt amnhĩ nhĩpẽx kẽt pyrãk.

15 No mẽ kot amnhĩ my kwỳt kà jakàr xwỳnhjaja nẽ mẽ kot amnhĩ jakàr kẽt xwỳnhjaja na hte Tĩrtũm ja hã mẽ omu nẽ ãm mẽ omu. ãm mẽ pahte amnhĩ nhĩpẽx nyw o amnhĩ nhĩpẽx o ri papaja pix na kãm hprãm.

16 Kot kaj mẽ ã amnhĩ nhĩpẽx anhỹr o ri apa nẽ apẽ Tĩrtũm kra mex nhũm mẽ ato mex rax nẽ. Nẽ mẽmoj to mẽ akutã nojarẽt rãhã nẽ. Ka mẽ axãmnhĩx ajamakẽtkati nẽ ri apa ho apa.

17 Nẽ na prem Kris ã ixtak rax nẽ nhũm ixkatut ã ixtak xà arĩ rãhã nẽ pa hte hã ixpa. Ixte Jejus Kris mã tanhmã amnhĩ nhĩpẽx to xwỳnh ã ixto amnhĩrĩt xà na. Jakamã kẽ

mẽhõ axte Jejus kot mẽ awỳr inhmẽnh ã tee ri ixpumu nẽ tanhmã hã ixkukjẽr to hkẽt nẽ.

18 E ixkrãmnhwỳjaja. Kẽ Pahihti Jejus Kris mẽmoj to mẽ akutã nojarẽt nẽ mẽ ato mex rãhã ho pa. Nà koja mẽ ato anẽ.

ãm ja pix na hapẽx. Ixpẽ Pawre na pa ã mẽ amã kagà nhĩpẽx nẽ mẽ awỳr mẽnh anẽ.

Epes

Pawre kot Epes kãm Jejus kôt hkwỳjê hwỳr kagà nê mēnh

Pawre na pre kagàja nhĩpêx. Jejus nhỹ hã hkrajê jahkre o pa xwỳnhjê hõ na pre. Jakamã na pre krĩ pê Epes kãm Kris kwỳjê hwỳr hipêx nê kumê. Epes nhõ xwỳnhjaja Ijaew kêt xwỳnh na pre mē. Nhũm pre ra Pawre ma mē hwỳr mō nê mē kãm Tĩrtũm kapêr jarênh o ri mē hkôt pa nhũm mē hkwỳjaja kuma nê Jejus kôt amnhĩ xunhwỳ.

Na pre hte Pawre ma krĩ piitã hkôt ri Tĩrtũm kapêr jarênh o ri mē hkôt pa. Hãmri nhũm mē hkwỳjaja Jejus ã unê nê krĩ pê Rõm wỳr kumê nê kamã haxà nhũm arĩ hkrĩ ho hkrĩ. Nom amarĩ hkrĩ hkêt nê. Na pre hte mē kot hwỳr mrar xwỳnhjê mã Tĩrtũm kapêr jarê. Nê krĩ hkwỳ hkôt Jejus kôt hkwỳjê mã kagà nhĩpêx nê mē hwỳr kurê. Jakamã na pre Epes kamã hkwỳjê hwỳr kagàja nhĩpêx nê mē hwỳr kumê.

Nê kagàja kamã hprĩ hã mē kot Jejus kôt amnhĩ xunhwỳr xwỳnhjê kot tanhmã amnhĩ nhĩpêx to ho pa hã mē kãm karõ. Ra mē kot hkôt amnhĩ xunhwỳr jakamã te mē htipxi nê ri mē pa xwỳnh kot amnhĩ nhĩpêx pyrãk o amnhĩ nhĩpêx o pa hã mē kãm hã karõ. Nê jar pika hkôt te mē kêp Kris nhĩ pyrã nê pa hã mē harê. ã na pre Pawre mē kãm mēmoj jarê nê hã kagà anê nê mē kãm:

¹ Pa Epes kãm Kris kôt ixkwỳjaja. Xà mē amex na ka mē apa? E ot pa mē awỳr kagà nhĩpêx nê kumê. Ixpê Pawre na pa hipêx nê mē awỳr kumê. Ixpê Jejus Kris nhỹ hã mē ahkre ho mē ixpa xwỳnh na pa. Tĩrtũm kãm hprãm xà hkôt. Tã pa ã mē awỳr kagà nhĩpêx nê mē awỳr mēnh anê. Mē apê Tĩrtũm krajê hwỳr. Na ka xep htem Jejus Kris kôt amnhĩ nhĩpêx mex o ri apa. ãm hãmri na ka htem ã amnhĩ nhĩpêx anê.

² E kê Mēpahpãm Tĩrtũm mē Pahihti Jejus Kris wa mē ato mex nê mēmoj to mē akutã nojarêr rãhã ho pa. Ka mē wa ý hã axãmnhĩx ajamakêtkati nê akĩnh pê tanhmã amnhĩ nhĩpêx to ho ri apa.

Tĩrtũm kot mē pakukamã amnhĩm mē parênh ã harênh

Rõmãn 8.28-30; Wam Korĩt 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³ Na hte mē panhõ Pahihti Jejus Kris nhĩpêxà Tĩrtũmja mē pahto mex rãhã ho pa. Mē pahpê Kra Kris kwỳ hã mē pahpumunh kôt tanhmã mē pahto mex to ho pa. Ra wa Karõja mē pahkarõ mã gjêx jakamã te ra mē pahte kaxkwa kamã wa kuri mē pamex nê mē papa pyrãk. Tã ra mē pahte jar pika ja kamã paxãmnhĩx pajamakêtkati mē pamex nê ri papa jakamã kwa kêr pu mē amnhĩm ãm mex o mex ã harênh rãhã nê.

⁴⁻⁵ Amnepê mã kormã mēmoj kêt ri na pre Tĩrtũm mē pakukamã amnhĩm mē parê. Kris kukwak ri amnhĩm mē parê. Tã mēmo kaxyw na pre ã mē pakukamã mē parênh anê? ãm mē pahte kapêr kôt pix mã amnhĩ nhĩpêx o ri papa kaxyw. Jao tãm kot amnhĩ nhĩpêx pyrã nê noo mã tãm amnhĩ nhĩpêx o ri papa. Kãm mē pajapê jakamã na pre mē pakukamã tanhmã hamaxpêr to nê hamaxpêr o:

—Nã Ixkra Jejus Kris koja nhỹrmã ma mē hwỳr wrý nê mē nê ty. Tã mē kot mē nê htyk ã harênh mar nê amnhĩ kaxyw hkôt hamaxpêr xwỳnhjaja kot paj mē ho ixkra. Nã kot paj ã mē hipêx anê. Anê.

⁶ No mē papajaja tanhmã mē pahte amnhĩ nhĩpêx mex to hã mē pahpumunh kôt na pre ã mē pahto hkra hã mē pajarênh anhỹr kêt nê. ãm Kra Kris pix kukwak ri na pre ã mē pajarênh anê. Kãm Kra japê jakamã na hte mēmoj to mē pahpê hkwỳ hã mē pakutã nojarêr rãhã ho pa. Jakamã na pu htem amnhĩ tã kãm mex o mex ã harênh o papa.

⁷⁻⁸ Na pre Krisja mē panê htyk o Tĩrtũm mã mē pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhỹr ã omunh xà hkôt mē pahte hkôt amnhĩ xunhwỳr xwỳnhjê nê mē pahte amnhĩ tomnuj rênh pa. Koja aa tanhmã hã mē pahto hkêt nê. Pu mē axte amnhĩ amnhĩ tomnuj o papa hkêt nê. Hêxta waa nê. Kãm mē pajapê htyx kumrêx jakamã na pre ã mē pahto mex rax anê. ãm mex o mex nê àhpumunh o àhpumunh.

9-10 Amnepêm na pre hamaxpêr o:

—Nà na pa ra kaxkwa ho ixkato nê kamã mëmoj piitã ho ixkato. Nê pika ho ixkato nê kamã mëmoj piitã ho ixkato. Tã koja nhÿrmã Ixkra Kris mëmoj piitã ho amnhÿptâr o pa. Kaxkwa kamã nê pika piitã hkôt mëmoj piitã ho amnhÿptã nê tapxipix inhÿ hã kêp mëo Pahihtî. Koja ã amnhÿ nhÿpêx anhÿr xà hã arÿgro kato nhÿm ã amnhÿ nhÿpêx o pa anê. Nà ja na inhmã hprãm. Anê.

Ã Tÿrtÿm amnhÿ kukamã hamaxpêr anhÿrja kôt na pre Kris kêp më panhõ Pahihtî hã harê. Tã nhÿrmã më pahto amnhÿptâr kaxyw koja më pakaxyw ãm. Amnepêm ri më pa xwÿnhjê mã kot kormã ja ho amnhÿrÿt kêt tã ra jarãhã më pamã ho amnhÿrÿt.

11 Kris kukwak ri na pre amnhÿm më parê. Ra kot më pakukamã më pahtã amnhÿ jarênh xà hkôt.

12 Tã më ixpê Ijaew kwÿ kumrêx më ixte Kris kôt amnhÿ xunhwÿr jakamã koja më piitã më inhÿ hã Tÿrtÿm mã mex o mex ã harênh o ri pa.

13 Nê më kajaja na ka prem më ixpyrà nê Tÿrtÿm kapêr ma nê ajaxwÿja hkôt amnhÿ xunhwÿ. ãm hãmri na Tÿrtÿm kapêrja. Tã ka prem ama nê hkôt amnhÿ xunhwÿ. Hãmri nhÿm amnhÿ tã më apumu nê kot inhÿpêx pyrà nê më anê më ate amnhÿ tomnuj piitã rênh pa nê më ato hkra. Hãmri nê më awÿr Karõ rê nhÿm më awÿr wrÿ nê më akarõ mã agjê nê më akamã pa ho pa. Kris kukwak ri na pre më awÿr kurê. Amnepê mã na pre më pakukamã hamaxpêr o:

—Koja më Ixkra hkôt amnhÿ xunhwÿ pa ja hã më omu nê më ho ixkra nê më hwÿr Ixkarõ rê. Hãmri nhÿm më hkarõ mã agjê nê më kamã hkrÿ ho hkrÿ.

14 Anhÿr jakamã na pre më pahwÿr kurê nhÿm më pahwÿr wrÿ nê më pahwÿr agjê nê më pakamã hkrÿ ho hkrÿ. Pu më ja hã amnhÿ pumu nê pajamaxpêr o:

—Nà ra Tÿrtÿm kot ixwÿr Karõ mênh jakamã na ixkarõ hwÿr axà nê kamã hkrÿ ho hkrÿ. Tã koja ra kot më ixtã amnhÿ jarênh xà hkôt ja hã ixto mex nê. Ra kot ixto hkra kênã. Jakamã koja nhÿrmã ma amnhÿ wÿr ixto api pa kuri inhmex kumrêx

nê ixpa ho ixpa. Hãmri nê kukwak ri axte tanhmã amnhÿ tomnuj to ho ri ixpa hkêt nê. Anê.

Jakamã koja më piitã ã kot më ho mex anhÿr ã amnhÿ tã kamã ama nê amnhÿ tã omu nê kãm mex o mex ã harênh rãhã ho pa.

Pawre kot Epes nhõ xwÿnhjê ho Tÿrtÿm wÿr ã harênh

Piripos 1.9; Korosê 1.9-12; Wam Tesarõn 5.23; Sikÿn Tesarõn 1.11, 2.16; Eprêw 13.20

15 Nê na ka xep htem amnhÿ kaxyw Kris kôt ajamaxpêr tÿx pê amã Tÿrtÿm krajê piitã më hkÿnh o më ho mex o apa. Na pa pre më ajarênh ma nê ixkÿnh tÿx nê.

16-18 Nê xatã më ato Tÿrtÿm wÿr o ri ixpa nê më ato hwÿr o:

—Pa Mëinhÿpêxã maati Tÿrtÿm. Nà amex o amex. Ka na ka pre më ixwÿr më inhõ Pahihtî Jejus Krisja më nhÿm më ixwÿr wrÿ nê hprÿ hã më inhmã ate tanhmã amnhÿ nhÿpêx to ho apa hã ato amnhÿrÿt. Tã Epes kãm akrajaja na xep htem akôt pix mã ri amnhÿ nhÿpêx rãhã ho ri pa. ãm hãmri na htem ã amnhÿ nhÿpêx anê.

—Nê kwa Tÿrtÿm. Kê Akarõ tanhmã më hkrã hto kê mëhprÿ hã akapêr mar tÿx rãhã ho pa. Jao ra ate më ixkukamã më ixtã tanhmã më ixto mex to hã amnhÿ jarênhja kê më kãm hamaxpêr tÿx rãhã ho pa. Nê ate nhÿrmã më ixpê akrajaja më ixpiitã tanhmã më ixto mex to jarênhja kê më kãm hamaxpêr tÿx pê hkÿnh rãhã ho pa ho pa.

19-20 —Nê kê më axãhpumunh o axãhpumunh ã ate akupÿm Akra Kris o htÿr ã apumunh mex nê Tÿrtÿm. Na ka pre axãhpumunh xà ho akupÿm ho htÿr nê ma akupÿm anhõ krÿ hwÿr ho api nê amnhÿ nhÿhkõ hã ÿr nhÿm arÿ hkrÿ ho hkrÿ. Apyrà nê kot më ixto amnhÿptâr kaxyw. ã axãhpumunh xà htÿx kot anhÿr. Tã kê akrajê piitã ja hã apumu nê axãhpumunh tÿx o ate tanhmã më ixto ajuta hto ho apa hã apumu.

Anhÿr o na pa hte më ato hwÿr o ri ixpa.

21 Nê Krisja ãhpumunh tÿx o mëkarõmnuti piitã hakrenh. Nê hihtÿx o më hakrenh jakamã krÿ nhõ xwÿnhjê mã te më ãhpumunh tÿx kêt pyràk o na htem htÿx ri amnhÿ nhÿpêx o pa pyràk. Nê Krisja hihtÿx

o pika piitã hkôt pahi piitã mẽ hakrenh par kumrêx. Nê hihtýx o kot pika piitã hkôt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rý kãm hamaxpêr gõ? Nã amrakati kumrêx. Ra kot ã amnhĩ nhĩpêx anhÿr rãhã nê pa ho pa xwýnh kênã. Nê hihtýx o hihtýx rãhã nê pa ho pa xwýnh. Nê àhpumunh o àhpumunh rãhã nê pa ho pa xwýnh. Nê hihtýx o kot jar pika ja kôt mẽ pajakrenh par nê hihtýx o Tĩrtũm nhõ krĩ kamã mẽ mẽmoj piitã hakrenh par. Tã koja mẽmoj piitã ho amnhĩptàr rãhã htĩr tũm nê pa ho pa.

*Kris te kêp mẽ pahkrã pyrãk ã harênh
Rõmãn 12.4; Wam Korĩt 12.12; Epes 4.16;
Korosẽ 3.25*

²² Na pre Tĩrtũmja Kra Kris nhĩhkram mẽmoj piitã haxàr pa. ý hã kot nhÿrmã ho amnhĩptàr o pa kaxyw. Jakamã kot mẽ pahto amnhĩptàr xwýnh ã kêp mẽ panhõ Pahihti. Nê te kêp mẽ pahkrã pyrãk. Nê mẽ papajaja te mẽ pahpê ì pyrãk jakamã na pu htem hkôt ri amnhĩ nhĩpêx o papa.

²³ Na hte mẽ panhĩja mẽ pahkrã kamã mẽ pajamaxpêr xà hkôt tanhmã amnhĩ nhĩpêx to. Ja pyrã nê na pu htem mẽ pahkrã pyrãk xwýnh Krisja kapêr ma nê hkôt tanhmã ri amnhĩ nhĩpêx to ho ri papa.

Koja mẽhõ ãm hkrã pix nê ì hkêt nê pa hãmri nê mex kêt nê. Na htem hkrã nê mãânên ì nê pa nê mex nê. Ja pyrã nê na hte Kris mẽ pahte hkôt amnhĩ nhĩpêx o papa hã mẽ pahpumu nê hkĩnh nê mex nê pa. Pu mẽ pajaxwýja hkôt ri amnhĩ nhĩpêx ã amnhĩ pumu nê pahkĩnh nê pamex nê papa ho papa.

2

*Tanhmã Tĩrtũm kot mẽ pahto hkra hto ã
harênh*

Wam Korĩt 6.11; Xitre 2.11-3.7

¹ Nê amnepê mã na pu pre htem Tĩrtũm kàx ã tanhmã amnhĩ tomnuj to ho ri papa.

² Nê jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nê mẽkarõmnuti nhõ pahi Satanasti kapêr kôt pix mã ri amnhĩ nhĩpêx rãhã nê. Na pre hte tanhmã mẽ pahkôt mẽ pahto ho pa. Mẽ pahte tanhmã amnhĩ tomnuj to kaxyw

mẽ pamã mẽ pajamaxpêr punuj jagjê. Pu mẽ amnhĩ tã omunh kêt tã ý hã amnhĩ tomnuj o papa. Satanastija kêp mẽ kot Tĩrtũm kapêr kwým ri amnhĩ nhĩpêx o mẽ pa xwýnhjê nhõ pahihti na. Tã pu pre htem pahtýx ri hkôt amnhĩ nhĩpêx pix o ri papa.

³ Mẽ pahpiitã tanhmã amnhĩ tomnuj to hprãm xà hkôt pix mã tanhmã amnhĩ nhĩpêx to. Nê mẽmoj punuj kukamã pajamaxpêr nê ra hkôt ã amnhĩ tomnuj anê. Æ na pu prem mnhĩ nhĩpêx anê nhũm Tĩrtũm ja hã mẽ pahpumu nhũm ja kãm mex kêt nê. Jakamã nhũm tee ri mẽ pakukamã hamaxpêr nê hamaxpêr o:

—Hêxta waa nê. Na htem ixkapêr kwým ri tanhmã amnhĩ tomnuj to rãhã ho pa. Æ mẽ kot amnhĩ nhĩpêx anhÿr o mẽ pa xwýnhjaja koja mẽ nhÿrmã ixri htĩr tũm nê mex nê pa ho pa hkêt nê. Ixkĩnhã mẽ kot amnhĩ tomnuj xwýnh jakamã tanhmã kot mẽ amnhĩ to nê ixri htĩr tũm nê pa ho pa? Nã mẽ kot amnhĩ tomnuj mÿrapê koja mẽ nhÿrmã ma amnhĩ xà htýx kamã hamak tũm xàta wÿr ma hapêx pa. Nã koja mẽ anê. Hêxta waa nê. Inhmã ma hwÿr mẽ pa prãm kêt tã ra ma hwÿr mẽ pa kaxyw.

Anhÿr o hamaxpêr.

⁴⁻⁵ Nê amnepêm kormã mẽ pahte amnhĩ tomnuj o papata ã te mẽ pahte amnhĩ xà htýx kamã pajamak tũm xà hwÿr pryta ã mẽ papa pyrãk. Nom Tĩrtũm kãm mẽ pajapê nê mẽ pakamã ukaprĩ jakamã na pre mẽ pahto mex rax nê. Nê akupÿm Kris o htĩrja ri te ra mẽ pahte amnhĩ xà htýx kamã pajamak tũm xà hwÿr pryta nê mẽ pahto ujanãr pyrãk o mẽ panhĩpêx. Mẽ pakamã ukaprĩ nê kãm mẽ pajapê ho ã mẽ panhĩpêx anê. Amarĩ ã mẽ panhĩpêx anê nê mẽ panê mẽ pahte amnhĩ tomnuj rênh pa. Jakamã kot puj mẽ pahte Kra hkôt amnhĩ xunhwÿr xwýnhjaja nhÿrmã amnhĩ xà htýx kamã mẽ hamak tũm xàta wÿr papa hkêt nê.

⁶ Ra Tĩrtũm akupÿm Jejus Kris o htĩr jakamã te ra Jejus kôt akupÿm mẽ pahpê hkwyjê ho mẽ pahtĩr pyrãk. Jakamã te ra õ krĩ kamã ìhkõ hã mẽ pamex kumrêx nê pahkrĩ pyrãk.

⁷ Mẽmo kaxyw na pre Tĩrtũm kãm mẽ pajapê hkôt ã mẽ pahwÿr Jejus Kris mẽnh nhũm mẽ panê htyk anê? Nã kãm mẽ

pajapê htÿx ã mẽ pahte pahprĩ hã amnhĩ tã omunh kaxyw na pre ã mẽ pahwÿr mẽnh anê. Tã kot puj mẽ nhÿrmã kaxkwa kamã hwÿr pøj nhũm mẽ pamã amnhĩ jarênh o:

—E mẽ amnê ixpumu. Inhmã mẽ ajapê htÿx jakamã na pa pre mẽ akamã ixukapri xàj ma mẽ awÿr Ixkra Jejus Krisja mẽ nhũm amnhĩ grõnh kõt mẽ awÿr wrÿ nê mẽ anê ty. Inhmã mẽ ajapê htÿx jakamã na pa pre ã mẽ awÿr mẽnh nhũm mẽ anê htyk anê. Inhmã mẽ apê ixkrajê japê xàj na pa pre ã mẽ ato mex rax anê.

Anhÿr o mẽ pamã kapêr hãmri nê mẽ pahto mex rãhã ho pa.

⁸⁻⁹ Xà na pu prem pahpê hkra hprãm xàj amnhĩ krã hkõt mẽ papamjaja kãm tanhmã amnhĩ to mex to nê kãm:

—E kwa Tirtũm. Na pa ã amnhĩ to mex anê nê ã amnhĩ to mex anê. Jakamã kwa ja hã ixpumu nê ixto akra nã?

Anhÿr o na pu prem amnhĩ to kuwÿ? Nà na pu prem ã amnhĩ to hwÿr anhÿr kêt nê. Na pu prem amnhĩ kaxyw hkõt pajamaxpêr nê hkõt amnhĩ xunhwÿ nhũm ja pix ã mẽ pahpumunh kõt mẽ panê mẽ pahte amnhĩ tomnuj rê nê mẽ pahto hkra. Kãm mẽ pajapê nê mẽmoj to mẽ pakutã nojarêr rãhã ho pa jakamã na hte ã mẽ panhĩpêx mex anê. Jakamã na pu htem amnhĩ tã omu nê pajamaxpêr o:

—Nà na xep hte Tirtũmja mẽ pahte tanhmã amnhĩ nhĩpêx to ho papa hã mẽ pahpumunh kõt mẽ pahto hkra hkêt nê. ãm mẽ pahte amnhĩ kaxyw kãm pajamaxpêr ã mẽ pahpumunh kõt pix mã na hte mẽ pahto hkra. Anê.

¹⁰ Nê Tirtũm tapxipix na hte tanhmã mẽ pahto pu mẽ amnhĩ to mex rãhã ho papa. Nom kormã kot mẽ pahto hkra hkêt ri na pu prem ã amnhĩ nhĩpêx anhÿr kêt nê. Tã Jejus Kris kõt amnhĩ xunhwÿ nhũm Tirtũm ja hã mẽ pahpumu nê mẽ pamã mẽ pahte amnhĩ nhĩpêx nyw jagjê pu mẽ ÿ hã tãm amnhĩ nhĩpêx o ri papa. Amnepêm tanhmã kot mẽ pakukamã hamaxpêr to xà hkõt. No na hte tanhmã mẽ pahte amnhĩ krã hkõt amnhĩ nhĩpêx to hã mẽ pahpumunh kõt mẽ pahto hkra hkêt nê.

Tirtũm krajaja te kot axpên to htõ nê htõx pyrãk

Karatas 3.28; Korosê 1.21-23

¹¹ E mẽ apê Ijaew kêt xwÿnhjaja. Na ka htem mẽ akatorxà nhõhy rũm ajapøj hãmri nê mẽ ixpê Ijaew pyrã nê amnhĩ my kwÿrÿt kà jakàr kêt nê. Jakamã na pre ixkwÿjaja mẽ akurom amnhĩ jakàr ã amnhĩ to jarkrar o ri pa nê amnhĩ jarênh o:

—Ra mẽ ixte amnhĩ my kwÿrÿt kà jakàr ã mẽ ixpumunh kõt na hte Tirtũm mẽ ixto hkra. Tã Ijaew kêt xwÿnhjaja kot mẽ ixkĩnhã amnhĩ jakàr kêt jakamã mẽ kêp hkra hkêt. Nê mãânên mẽ kêp mẽ pahkwÿ hkêt.

Anhÿr o mẽ ajarênh o pa.

¹² ãm hãmri na prem mẽ apê mẽ ixkwÿ hkêt ã mẽ ajarê. Na pa prem mẽ akurom amnhĩ my kwÿrÿt kà jakà nê mẽ akurom Kris kamã ijamak o ri ixpa. Jakamã nhũm Tirtũm kot mẽ ixto mex ã amnhĩ jarê pa mẽ mẽ apyrã nê tee ri amnhĩ kukamã ijamaxpêr o ri ixpa hkêt nê. Nê mẽ akurom amnhĩ kaxyw Tirtũm mã ijamaxpêr. Nã ãm hãmri na prem mẽ apê mẽ ixkwÿ hkêt ã mẽ ajarê.

¹³ Te Tirtũm kàx ã ri mẽ apa pyrãk tã ka mẽ arĩ ã amnhĩ nhĩpêx anhÿr kêt nê. Jejus Kris kot mẽ panê htyk nhũm mẽ ate hkõt amnhĩ xunhwÿr jakamã ra mẽ apê hkwyÿ. Jao arĩ hkàx ã ri apa hkêt nê. Te mẽ ixpê Ijaew kwÿ pyrã nê hpãnhã kuri ra ri apa pyrãk.

¹⁴ Jakamã na pu htem Kris kukwak ri ra axpên nhĩpêx nyw o axpên nhĩpêx o ri papa. Mẽ ixpê Ijaewjaja nê mẽ apê Ijaew kêt xwÿnhjaja na pu htem te ra ixkre tipxi kamã ri papa pyrãk. Nom amnepêm na pu prem ã axpên nhĩpêx anhÿr kêt nê. Mẽ pahte amnhĩ nhĩpêx tũmja ahpÿnhã na pre. Na pu prem pamã axpên kurê nê axpên kàx ã ri papa. Nê nhÿri axpên pumu nê te pahte axpên pumunh kêt pyrã nê nhãm parĩt o ri mra. Tã nhũm Kris mẽ panê htyk o mẽ pahte amnhĩ tomnuj piitã hpãnhã amnhĩrer pa. Mẽ ixpê Ijaew nê mẽ apê Ijaew kêt xwÿnhjaja. Nê htyk o te ra kot mẽ pahte axpên nhõrkwÿ hwÿr axpên wÿr o papa pyrãk. Jao mẽ pamã axpên kurê ho hapêx nê hpãnhã tãm axpên kaxyw mẽ

paxunhwý pu mẽ hpãnhã axpën to mex rãhã ho ri papa.

¹⁵ Amnepêm Mojes kot Tirtüm nhỹ hã mẽ ixpê Ijaew mẽ ixte tanhmã amnhĩ nhĩpêx to ho ixpa hã karõja. Na pa prem mẽ apê Ijaew kêt xwýnhjaja mẽ ate Tirtüm kôt amnhĩ nhĩpêx kêt ã mẽ apumu nẽ mẽ akamã inhgryk nẽ. Nẽ axpën mã mẽ ajarënh o:

—Nà mẽ pahkĩnhã mẽ kot Mojes kapër kôt amnhĩ nhĩpêx kêt jakamã koja Tirtüm mẽ ho hkra hkêt nẽ.

Anhỹr tã nhũm Kris mẽ pahwýr wrý nẽ mẽ pahpiitã mẽ panê htyk o mẽ pahte hkôt amnhĩ xunhwýr ã mẽ pahpumunh kôt pix mã mẽ pahto Tirtüm kra. Jakamã pa mẽ axte mẽ ate Mojes kapër kôt amnhĩ nhĩpêx kêt ã mẽ apumunh kôt mẽ apê Tirtüm kra hkêt ã mẽ ajarënh kêt nẽ. Hãmri nẽ mẽ ixpê Ijaew nẽ mẽ apê Ijaew kêt xwýnhjaja pu mẽ axte axpën kãm pagryk o ri papa hkêt nẽ. Ra te ixkre tipxi kamã mẽ pahte axpën kôt ri papa pyræk.

¹⁶ Kris na pre pĩ kahpa hã mẽ panê htyk o ã mẽ panhĩpêx anẽ nẽ mẽ pahte axpën kôt amnhĩ nhĩpêx o papa kaxyw mẽ paxunhwý. Nom Tirtüm jamaxpër xà hkôt ã mẽ panhĩpêx anẽ. Jakamã na pu htem arĩ pamã axpën kurê ho papa hkêt nẽ.

¹⁷ Na pre Kris mẽ pahwýr wrý nẽ ã mẽ panhĩpêx anẽ. Mẽ apê Ijaew kêt xwýnhjaja mẽ ate kormã Tirtüm kapër mar kêt xwýnhjaja nẽ mããnën mẽ ixpê Ijaew mẽ ixte kapër mar mex xwýnhjaja nhũm pre akupým tãm mẽ pahte axpën kôt amnhĩ nhĩpêx o papa kaxyw mẽ paxunhwý.

¹⁸ Hãmri nhũm Tirtüm mẽ pahwýr amnhĩ Karõ rẽ nhũm mẽ pahkarõ mã agjê. Kris kukwak ri pix mã mẽ pahwýr kurê pu mẽ ý hã paxãmnhĩx ri kãm tanhmã amnhĩ jarënh to ho ri papa.

¹⁹ Hãmri nẽ te mẽ pahpê nhãm axpën kaxyw mẽ urojê pyrã nẽ axpën kàx ã ri papa hkêt nẽ.

Te mẽ pahpê Tirtüm nhõrkwỹ pyræk ã mẽ pajarënh

Wam Korõt 3.16; Sikũn Korõt 6.16; Wam Pêtre 2.5

²⁰ Nẽ mẽ pahpê Jejus kwý jakamã te mẽ pahte ixkre tipxikamã ri papa pyræk. Nẽ

te mẽ pahpê ixkre nhĩpêx mex pyræk. Nẽ Kris te kêp ixkre hkrax mã kuhê xà nẽ kýxpê kãm nõr xà maatiya pyræk. Nẽ mẽ kot Jejus nhỹ hã mẽ ahkre xwýnhjaja nẽ mẽ kot Tirtüm nhỹ hã kapër o ri mẽ pa xwýnhjaja te mẽ kêp ixkre nhõkwa êja pyræk. Nẽ mẽ papajaja te mẽ pahpê ixkre nhĩmõk ã põja pyræk.

²¹ Ixkre mã kuhê xà nẽ kýxpê kãm nõr xà maati kukwak ri pix mã na hte õkwa ê nẽ hã põja kýxpê mex nẽ axpën tã harir. Ja pyrã nẽ ãm Kris kukwak ri pix mã na pu htem te ixkre tipxi kamã ri papa pyræk o axpën nhĩpêx mex o ri papa. Te mẽ pahpê mẽ kot ixkre rax kumrêx nhĩpêx o mõi nhũm muxre nẽ ãm xwýnhta pyræk.

²² Na htem amnhĩm õrkwỹ nhĩpêx nẽ hipêx pa nẽ hwýr agjê nẽ kamã pa ho pa. Ja pyrã nẽ na hte Tirtüm Karõja mẽ pahpê hkrajê karõ mã agjê nẽ mẽ pakamã pa ho pa. Te mẽ pahpê Tirtüm nhõrkwỹ pyræk. Mẽ ixpê Ijaew nẽ mẽ apê Ijaew kêt xwýnhjaja Tirtüm mã te mẽ pahpê õrkwỹ pyræk.

3

Pawre kot Ijaew kêt xwýnhjê mã mẽmoj to amnhĩrĩt ã harënh

Rõmãn 15.14-21; Korosẽ 1.24-29

¹ Tã te mẽ pahpê Tirtüm nhõrkwỹ pyræk jakamã na pa hte jar mẽ hagiênh xà kamã mẽ ato hwýr rãhã ho ixkrĩ. Na pa pre hte ma mẽ apê Ijaew kêt xwýnhjê hwýr ixpa nẽ ixprĩ hã mẽ amã Jejus kapër jarënh o ri mẽ akôt ixpa. Mýrapê na prem ixpynê nẽ ijaxà pa arĩ jar ixkrĩ ho ixkrĩ. Nom arĩ amnhĩ kaxyw Tirtüm mã ijamaxpër tỳx pẽ mẽ ato hwýr rãhã ho ixkrĩ.

² Na pre kãm ijapê hã mẽ apê Ijaew kêt xwýnhjê kaxyw ixãm. Ma ixte ri mẽ akôt ixpa nẽ mẽ amã kapër jarënh o ri mẽ akôt ixpa kaxyw. Ra mẽ ate ja hã ijarënh mar mex.

³ Na pre mẽ pahto hpimràatã tanhmã mẽ pahto mex to hã inhmã amnhĩ to amnhĩrĩt pa pre omu. Mẽ kajaja nẽ mẽ pajaja. Pika piitã hkôt mẽ piitã tanhmã mẽ ho mex to. Na pre kormã kot mẽhõ mã ja jarënh kêt tã inhmã ho amnhĩrĩt pa pre omu. Tã kagà ja kamã kot paj mẽ amã hkwy ho grêre nẽ ho amnhĩrĩt nẽ mẽ amã hã kagà ka mẽ ixpyrã nẽ kamã harê nẽ ama.

⁴ Jao aprĩ hã mar mex nẽ.

⁵ Amnepê mẽ pahkêt ri mẽ pa xwỳnhjê mã Tĩrtũm kot ja ho amnhĩrĩt kêt tã nhũm Karõ mẽ ixkwỳjê kumrêx mã ho amnhĩrĩt. ỹ hã kapêr o ri mẽ pa xwỳnh mẽ mẽ ixpê Jejus nhỹ hã mẽ ajahkre o mẽ ixpa xwỳnhjê kumrêx mã ho amnhĩrĩt. Mẽ ixte kãm tanhmã amnhĩ nhĩpêx to ho ixpa xwỳnhjê mã ho amnhĩrĩt pa prem omu.

⁶ Na pre mẽ inhmã tanhmã mẽ ato amnhĩrĩt to pa prem ja hã mẽ apumu nẽ mẽ akukamã ijamaxpêr o:

—Nà ãm hãmri koja xep Ijaew kêt xwỳnhjaja mẽ ixpê Ijaew pyrã nẽ Tĩrtũm kapêr ma nẽ Jejus Kris kôt amnhĩ xunhwỳ nhũm Tĩrtũm ã mẽ kot amnhĩ nhĩpêx anhỹr ã mẽ omu nẽ mẽ ixpyrã nẽ mẽ ho hkra nẽ mẽ ho mex o pa. Anẽ.

⁷ Tã nhũm Tĩrtũmja mẽ awỳr inhmẽ. Ixte mẽ amã ja jarênh o ri mẽ akôt ixpa nhũm tokyx mẽ ate mar kaxyw. Na pre ixto mex nẽ kãm hprãm xà hkôt mẽ akaxyw ixãm nẽ ixte ỹ hã kãm tanhmã amnhĩ nhĩpêx to ho ixpa kaxyw ixto ixihitỹx nẽ mẽ awỳr inhmẽ.

⁸ Tã mo kaxyw na pre mẽ akaxyw ixãm? Te ixte ja kaxyw inhmex kêt pyrãk. Ixkwỳjaja ja kaxyw mex o kot ijakrenh tã nhũm pre ixpumu nẽ tanhmã hamaxpêr to nẽ mẽ akaxyw ixãm nẽ mẽ awỳr inhmẽ. Ixte mẽ amã mẽmoj mex kumrêx jarênh o ri mẽ akôt ixpa kaxyw. Na pre inhmã:

—Kêr ka ma Ijaew kêt xwỳnhjê hwỳr mō nẽ mẽ kãm Jejus Kris kapêr jarênh o ri mẽ hkôt apa. Nẽ mẽ kãm: “Kot kaj mẽ Jejus Kris kôt amnhĩ xunhwỳ hãmri nẽ kukwak ri amex nẽ apa.” Anẽ.

⁹ Koja mẽ apê Ijaew kwỳjê pyrã nẽ amnhĩ kaxyw Ixkra Kris kôt hamaxpêr nẽ hkôt amnhĩ xunhwỳ pa hã mẽ omu nẽ mẽ ho ixkra. Kormã aa ixte mẽ kãm ja hã amnhĩ to amnhĩrĩt kêt tã pa akumrêx mã harẽ. E ma mẽ hkôt ri mẽ kãm ã ijarênh anhỹr o ri apa kê mẽ ijarênh ma.

Anhỹr o mẽ pahto kator xwỳnh maatija inhmã kapêr.

¹⁰ Tã mẽmo kaxyw na hte mẽ pahto hpim-ràatã mẽ pahto hkra? Nà kaxkwa kamã kapêr o mẽ wrỳk xwỳnh pytar xwỳnhjaja nẽ mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpên

mã tanhmã Tĩrtũm jarênh to kaxyw. Nẽ harênh o:

—Kokỹỹ. Tĩrtũm àhpumunh tỳx o àhpumunh tỳx jakamã na hte tanhmã mẽ hipêx to nhũm mẽ tãm amnhĩ nhĩpêx mex o pa. Nà Tĩrtũm àhpumunh o àhpumunh nẽ hihtỹx o hihtỹx. Anẽ.

Koja mẽ ate amnhĩ to mex o apa hã mẽ apumu nẽ ã axpên mã Tĩrtũm jarênh anẽ.

¹¹ Amnepê m kormã mẽmoj kêt ri na pre Tĩrtũm mẽ pakukamã mẽ pahtã tanhmã amnhĩ jarênh to hãmri nẽ Jejus kukwak ri ã mẽ panhipêx anẽ. Jao mẽ piitã mẽ kãm àhpumunh o àhpumunh ã amnhĩ to amnhĩrĩt.

¹² Tã pu mẽ ra Jejus kukwak ri amnhĩ kamã pamã Tĩrtũm pyma hkêt nẽ. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxãmnhĩx ri kãm amnhĩ jarênh rãhã ho ri papa. Te ra pahte hwỳr paxàpir nẽ pano ho omunh nẽ kãm pakapêr o pakuhê pyrãk.

¹³ Jakamã kwa kêr ka mẽ kot mẽ atã tanhmã ixtomnuj to hã ijarênhja ma nẽ tee ri ixkukamã ajamaxpêr hkêt nẽ. Kwãr mẽ mãmri tanhmã inhĩpêx to. ãm ixte mẽ amã amnhĩ jarênh ma nẽ axpên mã ijarênh o:

—Hêxta waa nẽ. Mãn Pawre kãm mẽ pajapê hã na pre amnhĩ grõnh kôt mẽ pamex kaxyw mẽ pahwỳr mra nẽ mẽ pamã Tĩrtũm kapêr jarênh o pa. Mẽ kot ja hã tanhmã hipêx kati hto htã nhũm jam urer kêt nẽ. Anẽ.

Kris kãm mẽ pajapê kamã tanhmã mẽ panê amnhĩ nhĩpêx to

Juãw 3.16; Wam Juãw 3.1

¹⁴ Nẽ na pa hte mẽ ato Mẽpanhipêxã maati hwỳr kãm ixihitỹx o ixpa.

¹⁵ Kêp mẽ pahte hkôt amnhĩ xunhwỳr xwỳnhjê nhõ Pahi Maati mex kumrêx na. Kra hkwỳjaja ra kaxkwa kamã kuri htĩr tũm nẽ pa ho pa nẽ arĩ pyka ja kamã mẽ pahpê hkwỳjaja kormã jar papa. Nom te mẽ pahpiitã mẽ pahte ixkre tipxi kamã Tĩrtũm kôt ri papa pyrãk.

¹⁶ Jakamã na pa hte mẽ ato hwỳr o:

—Pa Tĩrtũm. Nà amex o amex. E ot pa Epes nhõ xwỳnhjê ho awỳr o ixkrĩ. Kwa kê Akarõ mẽ kãm axàhpumunh xà hkwỳ gō kê mẽ akôt ri amnhĩ nhĩpêx rãhã ho pa.

17 —Ně kê mẽ amnhĩ kaxyw Kris kôt hamaxpěr tỳx o pa. Te mẽmo pĩ hpàr jarê kot pika kaxwỳnh kãm pimành nê pika jamỳnh tỳxta pyràk. Nhũm kòk xàpêr tỳx tã tee kot kãm mēnh prāmta pyràk. Kê mẽ pĩ hpàr jarê kot pika jamỳnh pyrà nê kãm axpẽn kĩnh o pa. Jao mẽmoj to axpẽn kutã nojarêr rãhã ho pa.

18-19 —Ně kê krĩ piitã hkôt mẽ akrajê pyrà nê amnhĩ tã Kris kãm mẽ hapê htỳx o mẽ hapê htỳx ã amnhĩ pumu. Jao uràk nê mẽ kãm axpẽn kĩnh tỳx o pa. Nê kê mẽ ate amnhĩ nhĩpêx pix o amnhĩ nhĩpêx rãhã ho pa. Nê ajamaxpěr pix o hamaxpěr rãhã ho pa. Jao te mẽmo pĩ hpàrta pyrà nê akôt hihtỳx nê. Anê.

20 Kot puj mẽ ã amnhĩ to Tĩrtũm wỳr anê nhũm mẽ pama nê ra àhpumunh tỳx xà ho ã mẽ panhĩpêx anê. Ra kot mẽ pakamã pa ho pa kênã.

21 ã Tĩrtũm Jesus Kris kukwak ri mẽ pahpê hkrajê nhĩpêx anhỳr jakamã kwa pu mẽ pahpê hkra xwỳnhjaja kêr pu mẽ kãm mex o mex ã harēnh rãhã ho papa. Nà kot puj mẽ ã kãm anhỳr o papa.

4

Te ixkre tipxi kamã axpẽn kôt ri mẽ papa pyràk

Rômãn 15.5; Piripos 2.1-4; Korosê 3.12-17; Wam Pêtre 3.8

1 Nê ra mẽ kot Kris ã ijaxàr nhũm ixkrĩ htã pa ã inhmã mẽ akĩnh xàj mẽ amã ixkapêr nê hã kagà anhỳr o ixkrĩ. Kwa kêr ka mẽ Tĩrtũm kot amnhĩ nhĩpêx kôt amnhĩ nhĩpêx mex rãhã ho ri apa. Ja kaxyw na pre amnhĩ kôt mẽ awỳ ka prem hkôt amnhĩ xunhwỳ.

2 Nê kêr ka mẽ amã amnhĩ to rax o akwỳjê jakrenh prãm o ri apa hkêt nê. Nê mẽ agryk tokyx anhỳr kêt nê. ãm axpẽn kãm axukaprĩ pix o mãn ri axpẽn kôt apa. Kê mẽhõ tee tanhmã ri mẽ ato htã ka mẽ kamã agryk tokyx anhỳr kêt nê. ãm mẽ amã ri axpẽn hkĩnh pix o mãn ri axpẽn kôt apa.

3 Ra Tĩrtũm Karõ kot mẽ pahkarõ mã gjêx par jakamã te mẽ pahte ixkre tipxi kamã axpẽn kôt ri mẽ papa pyràk. Jakamã kêr ka

mẽ axpẽn to mex pix kukamã mãn kêt aja-maxpěr o ri axpẽn kôt apa. Nê tãm axpẽn nhĩpêx. Jao ajamakêtkati nê axàmnhĩx ri axpẽn kôt ri apa ho apa.

4 Te mẽ pahte ixkre tipxi kamã ri axpẽn kôt papa pyràk jakamã mẽ pahpiitã mẽ pahkarõ kamã Tĩrtũm Karõja hkrĩ ho hkrĩ. Jakamã kot puj mẽ nhỹrmã ma õ krĩ hwỳr api nê kamã mẽ pamex rãhã papa ho papa.

5 Nê mẽ panhõ Pahihtija ãm pixii. Na pu prem pahpiitã amnhĩ kaxyw hkôt pajamaxpěr jao ra mẽ pahpê hkraa. Tã mẽ pahpê Kris kwỳ hã amnhĩ to amnhĩrĩt kaxyw na prem Tĩrtũm mã mẽ pahkrã kumrã. ã mẽ panhĩpêx anhỳr o axpẽn pyràk o mẽ panhĩpêx o pa anê.

6 Nê Tĩrtũm haxwỳja ãm pixii. Kêp mẽ pahpiitã mẽ panhĩpêxà maati na. Na hte mẽ pahpê hkrajê mã àhpumunh xà hkwỳ gõ pu mẽ ã hã kãm tanhmã amnhĩ nhĩpêx to ho papa. Nhũm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpẽn kôt papa pyràk.

Kris kot ahpỳnhã tanhmã mẽ pahto mex to hã harēnh

Rômãn 12.3-8; Wam Korĩt 12.1-12; Wam Pêtre 4.10-11

7-8 Nê Tĩrtũm kapêr ã kagà htũm kot Kris jarēnh kot:

Na pre mẽ kot kutã amnhĩ xunhwỳr xwỳnhjê pytãr pa nê ma akupỹm kaxkwa hwỳr api.

Tã arĩ jar pika hkôt mẽ pahpê hkwỳjê mã tanhmã mẽ pahto paxihtỳx to ho pa.

Na hte Krisja tanhmã mẽ pahte ahpỳnhã kãm amnhĩ nhĩpêx to ho papa kaxyw tanhmã mẽ pahto paxàhpumunh to. Kãm hprãm xà hkôt.

9 Tĩrtũm kapêr ã kagà htũm kot akupỹm kaxkwa hwỳr àpir ã harēnh. ãm tapxipix na pre ã pika hwỳr wrỳk nê akupỹm kaxkwa hwỳr àpir anê. Na pre ty nhũm mẽ haxà. Hãmri nhũm akupỹm hĩr nê kato nê ma akupỹm api. Tapxipix na pre ã amnhĩ nhĩpêx anê.

10 Tã akupỹm kaxkwa hwỳr àpir xwỳnhnta na hte kaxkwa kamã nê pika hkôt amnhĩm mẽmoj piitã tanhmã ho ho hkrĩ.

11 Na pre ahpỳnhã tanhmã mẽ pahto mex to. Ahpỳnhã mẽ pahte tanhmã kãm amnhĩ

nhîpêx to ho papa kaxyw na pre mẽ paxunhwý.

Ně mẽ pahkwýjaja mẽ pahte krî piitã hwýr pamrar nê ý hã hkrajê mã kapêr jarênh o papa kaxyw mẽ paxunhwý.

Ně mẽ pahkwýjaja mẽ pahte krî pixi kamã Tirtüm nhý hã hkrajê jahkre ho ri mẽ hkôt papa kaxyw mẽ paxunhwý.

Ně mẽ pahkwýjaja mẽ pahte pahprî hã mẽ piitã mẽ kãm tanhmã mẽ kot amnhî nhîpêx to nê Jejus kôt amnhî xunhwýr ã mẽ kãm harênh o papa kaxyw mẽ paxunhwý.

Ně mẽ pahkwýjaja mẽ pahpê pastô kaxyw mẽ paxunhwý.

Ně mẽ pahkwýjaja mẽ pahte mẽ kãm Tirtüm kapêr ã kagà jarênh o mẽ ahkre ho papa kaxyw mẽ paxunhwý.

¹² ã kot puj mẽ pahpiitã ahpýnhã Kris mã tanhmã amnhî nhîpêx to ho ri papa anê. Kot puj mẽ ã mẽ hipêx anhýr o ri papa nhũm mẽ pamar týx nê. Ně gaa nê mẽ pahpyrà nê Tirtüm mã amnhî nhîpêx mex o pa. Pu mẽ pahpiitã hkôt amnhî nhîpêx mex o papa.

¹³ Ně gaa nê mẽ pahpiitã mẽ pahpê Tirtüm kra hã Jejus kot amnhî nhîpêx kôt omunh mex nê. Ně amnhî kaxyw hkôt pajamaxpêr týx nê. Jao te ra hkôt mẽ paxaptàr mex pyræk. Ně te kot amnhî nhîpêx pyræk o amnhî nhîpêx.

¹⁴ Měhprîrejaja na htem nhãm hamaxpêr nê nhãm hamaxpêr o pa. Te kôk xápêr nê nhãm mẽmoj to mrar nê nhãm mẽmoj to mrar pyræk. Nom kêr pu mẽ ho mẽ uræk kêt nê. ãm Kris kôt pix mã pajamaxpêr týx o papa. Jakamã nhũm mẽ tee ri mẽ pahte hkwým ri tanhmã amnhî tomnuj to hprãm xàj tanhmã mẽ pahto kaprý. Nom kêr pu mẽ mẽ mar kêt nê. ãm pakatàt kôt mẽ aptàr kot amnhî nhîpêx o amnhî nhîpêx o papa. Jao Kris kôt axpên to paxihtýx o papa.

¹⁵ Tãm axpên mã pakapêr nê pamã axpên kînh o axpên mã paxêx kêt nê. Kwa kêr pu mẽ ã amnhî nhîpêx anhýr o mãn papa. Jao te mẽ pahkrã Kris kot amnhî nhîpêx pyræk o amnhî nhîpêx mex o mẽ.

¹⁶ Ně mẽ panhî kamã tanhmã mẽ pakuteja piitã na hte mẽ pahkrã kamã mẽ pajamaxpêr xà hkôt axpên kôt ahpýnhã

tanhmã axpên to ajuta hto. Te ixkre pixi kamã mẽ pahte axpên kôt tanhmã axpên to ajuta hto ho ri papa pyræk.

Kris kôt mẽ pahte amnhî nhîpêx nyw ã mẽ pamã karõ

Korosê 3.5-11; Wam Pêtre 4.7

¹⁷ E kot paj Pahihti nhý hã mẽ amã mẽmoj jarê nê nê mẽ amã ixkapêr kãm ixihtýx nê ka mẽ inhma. Nà kêr ka mẽ axte mẽ kêp Tirtüm kra hkêt xwýnhjê kot amnhî nhîpêx o amnhî nhîpêx o ri apa hkêt nê. Na htem htýx ri tanhmã hamaxpêr punuj to ho ri amnhî tomnuj o pa.

¹⁸ Jao Tirtüm mã hamaxpêr kêt nê pa. Kãm hamaxpêr prãm kêt kumrêx nê pa. Te mẽ kot omunh nê nhãm hkrã pyræk o amnhî nhîpêx. Rý te mẽhõ wa kot axpên kãm gryk kãm axpên nhîpêx pyræk o hipêx. Jao te kamàt kô kamã ri pa pyrã nê Tirtüm kot amnhî nhîpêx pumunh kêt nê pa. Jakamã koja mẽ nhýrmã kuri htîr tùm nê pa hkêt nê.

¹⁹ Na htem tanhmã amnhî tomnuj to htã amnhî kamã hpijaàm kêt nê pa. Ně axpên kamã hpijaàm kêt rãhã ho pa. ãm amnhî pix kukamã hamaxpêr nê tanhmã amnhî tomnuj to ho ri pa.

²⁰⁻²¹ Nom Jejus Krisja ã kot amnhî nhîpêx anhýr kêt. Mě kurom tãm kot amnhî nhîpêx mex o pa xwýnh nê tãm kapêr o pa xwýnh na. Na pa pre ma mẽ awýr mō nê ixprî hã mẽ amã ja hã harê ka prem inhma nê inhmar týx nê.

²² Na pa pre mẽ amã:

—Kwa mẽ ri axte amnhî nhîpêx tùm kôt amnhî nhîpêx o ri apa hkêt nê. Ja na omnuj týx. Na ka prem ã amnhî nhîpêx anê nê ajamaxpêr punuj pix o ri apa. Jao amnhî tomnuj rãhã nê. Tã kêr ka mẽ amnhî nê awry hã mẽnh pyrã nê axte ã amnhî tomnuj anhýr o ri apa hkêt nê.

²³ —Ně kêr ka mẽ axte mẽ ajamaxpêr tùm nê mẽ ate amnhî nhîpêx tùm kôt ri amnhî nhîpêx kêt nê. Ně mẽ ajamaxpêr nyw nê mẽ ate amnhî nhîpêx nyw kôt pix mã ri amnhî nhîpêx o ri apa. Te mẽ kot mẽ ê htùm kwrynh nê rênh nê hpãnhã nyw jagiêx nê ri hã pata pyrã nê ãm amnhî nhîpêx nyw kôt pix mã amnhî nhîpêx o ri apa.

²⁴ Mē ajamaxpēr nyw nē mē ate amnhī nhīpêx nywja axtem na. Te Tirtūm jamaxpēr nē kot amnhī nhīpêxta pyrāk. Jakamā kwa kêr ka mē kām hprām xà hkôt pix mā tanhmā amnhī nhīpêx to ho ri apa. Jao kām amnhī nhīpêx mex o ri apa. Nē kapēr kôt ri amnhī nhīpêx. Anē.

Na pa pre ã mē amā ixkapēr anē. Tã kêr ka mē arī ixkapēr kôt pix mā amnhī nhīpêx.

²⁵ Mē pahpê Kris nhī jakamā te pahte ixkre htipxi kamā axpên kôt amnhī nhīpêx pyrāk jakamā kwa mē axte axpên mā mēmoj to axêx kêt nē. Nē amarī axpên xô ri axpên mā mēmoj to axêx kêt nē. ãm tãm axpên mā mēmoj jarēnh o ri apa.

²⁶ Nē kot kaj mē mēmoj tã agryk japêr. Rý mēhō kamā agryk rý amarī agryk japêr. Tã kêr ka ho ajapêx tokyx anē agryk japjê hkêt nē. Kêr kê kormā kamāt kêt ri ka akupým tãm akrã nhūm ja amā mex nē.

²⁷ Nom kot ka mē arī kamā agryk o ri apa nhūm mēkarōmnuti nhō pahi Satanastija ja hã mē apumu nē te mē ate amnhī tomnujta ã mē apynēnh pyrāk o mē anhīpêx. Ka mē ra hkôt tanhmā amnhī tomnuj to. Ja pymaj kêr ka mē agryk japjê hkêt nē. Satanasti kām hprām xà hkôt ã amnhī nhīpêx anhÿr kêt nē.

²⁸ Nē mē axàhkīnh o mē apa xwýnhjaja kêr ka mē axte mē kêp axàhkīnh hkêt nē. Mēmoj tã apê nē hpãnhã kàxpore jamý nē ho amnhīm awjaprô. Nē mē kêp amrakati xwýnhjê mā mēmoj japrôr o ri apa. Kêr ka mē ate amnhī nhīpêx tūmta pãnhã ã amnhī nhīpêx nyw o amnhī nhīpêx anhÿr o ri apa.

²⁹ Nē kêr ka mē amā axpên kīnh kamā tãm axpên mā akapēr o ri apa. Nē akapēr mā agêt kām ri axpên mā akapēr kêt nē. ãm axpên mā akapēr mā aprī ho axpên mā akapēr. Nē mē amā axpên kīnh nē mē amā axpên to mex pix prām xàj tãm axpên mā ri akapēr o ri apa.

³⁰ Tirtūm na pre mē pahwÿr amnhī Karō rē nhūm mē pahpê hkra hã mē pahkarō mā agjê nē mē pakamā hkrī ho hkrī. Koja mē pakamā hkrī ho hkrī rãhã nhūm nhÿrmã Tirtūm amnhī wÿr mē pahto api pu mē kuri pahtīr tūm nē papa ho papa. Jakamā kwa kêr ka mē tanhmā amnhī tomnuj to ho amnhī kamā Tirtūm Karō mā hkaprī

jagjēnh kêt nē. Nē kām hpijaàm jagjēnh kêt nē. Koja mē pahte amnhī tomnuj ã mē pahpumu nē mē pahkaga hkêt tã tee ri ja hã mē pahpumu nē hkaprī nē. Jakamā kêr pu mē ãm kām hprām xà hkôt pix mā tanhmā ri amnhī nhīpêx to ho ri papa.

³¹ Nē kêr ka mē axte ri axàhkurê ho ri apa hkêt nē. Nē agryk kām axpên mā tanhmā akapēr punuj to hkêt nē. Rý axpên japrý ho ri apa hkêt nē. Nē atÿx ri axpên tã apêr o apikēnh kêt nē. Nē ri axpên tã mē kām axàmnēnh kêt nē.

³² Kêt mē ãm axpên to mex pix nē axpên kām axukaprī ho ri apa. Nhūm mēhō tanhmā mē ato ka mē ãm amnhī tã omu nē tanhmā ho hkêt nē tanhmā kot atoja ho ajamakêtkati kurê kumrêx. Tirtūm na pre Kris kukwak ri mē pahte amnhī tomnuj grãnh pa nē axte kām hamaxpêr kêt nē. Tã kêr ka mē urāk nē mēhō kot tanhmā atomnuj tota tokyx ho ajamakêtkati nē axte kām ajamaxpêr kêt nē.

5

¹ Nē koja mēhō kām hkra japê nhūm amnhī tã omu nē hkīnh nē. Hãmri nē nhÿrmã hkra nē amnhī pyrã nē kām hapê nē. Ja pyrã nē Tirtūm kām mē pahpê hkwyjê japê jakamā kêr pu mē amnhī pyrã nē pamã pahkwýjê hkīnh tÿx o papa.

² Kris haxwýja kām mē pajapê jakamā na pre htyk o mē panê mē pahte amnhī tomnuj pãnhã amnhīrer pa. Kêp Tirtūm Kra htã amnhī mex pix kukamã hamaxpêr kêt nē ã mē panê amnhī nhīpêx anē. Tã ã kām mē pajapê anhÿr jakamã nhūm Tirtūm ja hã omu nhūm ja kām mex nē. Te ho mē hkuxwa xà mex kuxwa pyrāk. Jakamā kêr pu mē amnhī tã omu nē urāk nē pamã axpên kīnh o axpên to mex o mãn ri papa.

Mē pahte amnhī tomnuj kaga hã kot mē pamã karō

Sikūn Korīt 6.14-7.1; Korosē 3.16-17; Wam Juãw 1.5-10, 2.15

³ Nē mē pahpê Tirtūm kra jakamā kêr pu mē pahprô pix tãnopxar o ri papa nē nhãm mēnijê hō kamã pahpijaàm kêt o ri papa hkêt nē.

Nē kêr pu mē amnhī pix kukamã pajamaxpêr kêt nē. ãm ja ho anhÿr hkêt kumrêx. Mē pahpê Tirtūm kra kēnã kot

pu kêt axtem nê ã amnhĩ nhĩpêx anhÿr o ri papa. Tĩrtũm krajaja na htem ã amnhĩ nhĩpêx anhÿr kêt nê.

⁴ Nê mãânên mẽ pakapêrja. Kêr pu mẽ ri tanhmã axpên mã pakapêr punuj to hkêt nê. Nê ri axpên japrỳ hkêt nê. Nê amnhĩ krã hkôt pahtÿx ri tanhmã pakapêr to hkêt nê. ãm tãm axpên mã pakapêr mex nê axpên mã Tĩrtũm mex o mex ã harênh o ri papa.

⁵ Nê Tĩrtũm kapêr kôt amnhĩ nhĩpêx kêt xwÿnhjaja nê axpên kãm mẽ hpijaàm kêt xwÿnhjaja nê amnhĩ pix kukamã mẽ hamaxpêr o pa xwÿnhjaja. ã mẽ kot amnhĩ nhĩpêx anhÿr xwÿnhjaja kêp Tĩrtũm mẽ Kris wa hkra hkêt. Na htem ã amnhĩ nhĩpêx anhÿrja gryk ã wa kãm hamaxpêr kêt nê.

⁶ Nê koja nhÿrmã mēhō mẽ awÿr mō nê mẽ ate tanhmã amnhĩ tomnuj to prãm xaj hêx rom amã kapêr nê mẽ amã:

—Kwa mon ka hte mẽ ixpyrà nê ã amnhĩ nhĩpêx anhÿr kêt nê? Ja mex kênã. Anê.

Koja ã mẽ amã kapêr anê ka mẽ ama nê ãm ama. ã mẽ kot amnhĩ nhĩpêx anhÿr xwÿnhjaja koja Tĩrtũm nhÿrmã ja hã mẽ homnuj tÿx kumrêx.

⁷ Jakamã kwa kêr ka mẽ ate ho mẽ kot amnhĩ nhĩpêx pyrãk pymaj mẽ hkôt ri apa hkêt nê. Kwarĩ ho kwarĩ.

Mẽ pahte amnhĩ nhĩpêx nyw jarênh

Juãw 1.4, 3.19, 8.12, 12.35; Rõmãn 13.12; Wam Tesarõn 5.5; Wam Juãw 1.5

⁸ Amnepêm kormã mẽ ate Tĩrtũm kôt amnhĩ xunhwÿr kêt ri na ka prem te kamàt kô kamã ri apa pyrã nê atÿx ri tanhmã amnhĩ tomnuj to ho ri apa. Tã ra Jejus kôt amnhĩ xunhwÿ hãmri nê te hirã kamã mẽ apa xwÿnh pyrãk. Jakamã kwa kêr ka mẽ hpãnhã Tĩrtũm kãm hprãm xà hkôt pix mã mãn ri amnhĩ nhĩpêx o apa. Ra mẽ apê hirã kamã mẽ apa xwÿnh kênã.

⁹ Kot kaj mẽ ã amnhĩ nhĩpêx anê nê tãm amnhĩ nhĩpêx mex nê tãm akapêr o apa.

¹⁰ Jao Tĩrtũm kãm hprãm xà hkôt pix mã amnhĩ nhĩpêx o ri apa

¹¹⁻¹² nê te kamàt kô kamã ri mẽ pa xwÿnhjaja kot amnhĩ nhĩpêx pyrãk o amnhĩ nhĩpêx kêt nê. ã mẽ kot amnhĩ nhĩpêx anhÿr xwÿnhjaja na htem hpimxur pê tanhmã amnhĩ tomnuj tÿx to ho pa. Nom

kot paj ixprĩ hã mẽ amã tanhmã mẽ kot amnhĩ tomnuj to hã mẽ harênh kêt nê. Kot pa mẽ amã harê nê xpijaàm tÿx nê. Ixte harênh mã xwÿnhja omnuju. Tã kêr ka mẽ urãk nê ã amnhĩ nhĩpêx anhÿr kêt nê. ãm mẽ noo mã tãm ri amnhĩ nhĩpêx o ri apa.

¹³ Mẽ kot ja hã mẽ apumunh nê tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr.

¹⁴ Te mẽ kot kanê hpòk rax kãm mẽmoj piitã omunh mexta pyrãk. Tĩrtũm kapêr ã kagà htũm kot ja jarênh kot:

Mẽ amã Tĩrtũm prãm kêt xwÿnhjaja te ra mẽ atyk nê mẽ anhĩkwÿ pyrãk.

Nê te kamàt kô kamã mẽ anhõt nê mẽ anhĩkwÿ pyrãk.

Jakamã kwa te mẽ akrã hapôx nê kànhmã mẽ akrĩ pyrãk o amnhĩ nhĩpêx nê Tĩrtũm kôt amnhĩ xunhwÿ.

Kê Kris tanhmã mẽ akrã hto ka mẽ te myt kato nhũm mẽ ate arĩgro hã ri apa pyrãk o amnhĩ nhĩpêx. Anê.

Tĩrtũm krajaja kot tanhmã amnhĩ nhĩpêx to hã mẽ kãm karõ

Korosê 4.5; Sikũn Ximotre 4.2

¹⁵ Nê kwa kêr ka mẽ amnhĩ pumunh mex o ri apa. Nê mẽ ri htÿx ri mẽ kot amnhĩ nhĩpêx xwÿnhjê hkôt amnhĩ nhĩpêx kêt nê. Nê ãm amnhĩ to mex pix o ri apa.

¹⁶ Na htem ra Kris ã mẽ pahtomnuj o pa pu mẽ pamex kêt nê ri papa. Tã nom kêr pu mẽ apkati mẽ arĩ Tĩrtũm mã tanhmã amnhĩ nhĩpêx to ho papa mã panhÿrer kêt nê.

¹⁷ Nê ãm Tĩrtũm pix mã amnhĩ jarênh o ri papa nê kãm:

—Pa Tĩrtũm. Inhmã akôt pix mã amnhĩ nhĩpêx prãm jakamã kwa ixte amã mẽmoj to anhÿr kaxyw ixkrãm ijamaxpêr mex jagjê nê ho amnhĩrĩt mex pa tanhmã amã amnhĩ nhĩpêx to ho ri ixpa.

Anhÿr o amnhĩ to kuwÿ. Nom kêr pu mẽ pahtÿx ri pajamaxpêr kôt tanhmã kãm amnhĩ nhĩpêx to hkêt nê.

¹⁸ Nê kêr pu mẽ ri pahpipãnh o papa hkêt nê. Kwarĩ ho kwarĩ. Kot puj mẽ ã amnhĩ nhĩpêx anê nê te kagôxyhti kot amnhĩ tã mẽ pahkaxpre pyrãk o mẽ panhĩpêx pu mẽ tee ri pamã hkaga hprãm kaprỳ. Te kot amnhĩm mẽ pahto arĩk pyrãk o mẽ

panhîpêx nhũm ja mex kêt nê. Na htem pipãnh kãm hamaxpêr mex kêt nê ãm htÿx ri tanhmã amnhî nhîpêx to ho pa. Tã kêr pu mê ã amnhî nhîpêx anhÿr hkêt nê ãm Tirtũm Karõ pix hkôt mân ri amnhî nhîpêx o ri papa.

¹⁹ Nê kêr pu mê axpên wÿr akuprõ nê pahkĩnh kãm Tirtũm mã mex o mex ã harênh pê ho pagrer o pahkrĩ.

²⁰ Nê mê pamex nê ri papa rÿ pahpunuj nê ri papa htã arĩ kãm mex o mex ã harênh rãhã ho ri papa. Kêp Měpanhîpêêxã maati jakamã mê pahpê Pahihtĩ Jejus Kris kwÿ hã pu mê kãm mex ã harênh rãhã ho papa nê aa ho pajamakêtkati hkêt nê.

²¹ Nê kêr ka mê Kris ã apijaàm rãhã o ri apa. Jao axpên kôt ajamaxpêr nê axpên kôt ri amnhî nhîpêx mex o ri apa.

Tanhmã mê hprõ nê mê mjên kot axpên nhîpêx to hã mê kãm karõ

Wam Korõt 11.3; Korosê 3.18-19; Wam Pêtre 3.1-7

²² Nê kêr ka mê anijaja mê amjên ã apijaàm o ri apa. Nê mê hamaxpêr mex ã mê omu nê mê hkôt ri amnhî nhîpêx o ri apa. Te mê ate Pahihtĩ Kris kapêr kôt amnhî nhîpêx o ri apata pyræk.

²³ Kris kêp mê pakamã ukaprĩ xwÿnh nê kêp mê papytãr xwÿnh jakamã te kêp mê pahpiitã mê pahkrã pyræk. Nê mê papajaja te mê pahpê ĩ pyræk. Jakamã na pu htem pahpê ĩja te mê pahkrã kot tanhmã hamaxpêr to xã hkôt amnhî nhîpêx o papaja pyræk. Ja pyrã nê kêr ka mê anijaja mê amjên jamaxpêr mex ã mê omu nê mê hkôt amnhî nhîpêx mex nê.

²⁴ Mê pahpê Kris kwÿ jakamã na pu htem hkôt amnhî nhîpêx mex o ri papa. Ja pyrã nê kêr ka mê amjên kôt amnhî nhîpêx mex o ri apa.

²⁵ Nê mê amyjaja. Kêr ka mê amã aprõ hã ma ho ri apa. Te ho Kris kot mê pahtã ma ho pata pyræk. Na pre kãm mê pajapê xàj amnhî grõnh kôt mê pahwÿr wrÿ nê mê panê ty. Tã kêr ka mê uræk nê ã amã aprõ hã ma ho apa anê.

²⁶ Na pre Kris kãm mê pajapê xàj mê pahpê amnhî tomnuj pê mê pahpytã. Te mēhõ my kãm mēhõ ni hkĩnh nê mēmoj punuj pê utãr nê ho hprõta pyræk. Nhũm te

mê kot axpên mã wa rer kaxyw nhũm nija ma gõx mã htēm nê wÿr nê amnhî to mex nhũm mê kot axpên kaxyw wa ho mexta pyræk. Hãmri nê te ra axpên mã wa rer nhũm wa kot axpên kôt pa ho pata pyræk.

Ja pyrã nê na pre Jejus kãm mê pajapê nê kãm amnhî kuri mê papa ho mê papa hprãm xàj mê pahwÿr wrÿ nê mê pahpê amnhî tomnuj pê mê pahpytã nê mê pamã Tirtũm kapêr jarênh o pa. Tã mê pahpê hkrajaja na pu htem kapêr ma nê hkôt amnhî nhîpêx o papa ho amnhî tomnuj kaga. Te gõx kãm mê paxwÿr nê mê pahpê amnhî nê amnhî grã htyk kuhõnh par pyræk. Jao Tirtũm kapêr kôt pix mã amnhî nhîpêx o ri papa. Te ra paxwÿr nê amnhî nê tanhmã mê pahpê amnhî tomnuj to grãnh par pyræk. Nê te mjên mã xwÿnh wÿr nê amnhî to mex pyræk.

²⁷ ã mê pahpê amnhî nhîpêx anhÿr jakamã te mê pamex nê ri papa pyræk. Hãmri nhũm Krisja ja hã mê pahpumu nê kãm mê pajapê htÿx nê. Jakamã koja nhÿrmã akupÿn wrÿ nê ma akupÿm amnhî kôt mê pahto api pu mê kuri pa htĩr tũm nê papa ho papa.

²⁸ Nê xã mê amyjaja mê amã amnhî japêê? Nã mê amã amnhî japê ho na ka htem amã amnhî tã ma ho apa. Tã kêr ka mê aprõ nhîpêx o te ka amã amnhî tã mata pyræk. Jao tãm mê hipêx o ri apa. Te war apixire nê war apa pyræk o wa axpên nhîpêx. Kot kaj mê tanhmã hipêx to nê te ate amnhî nhî tanhmã hipêx to pyræk.

²⁹⁻³⁰ Na htem amnhî nhî ho mex pix o pa nê kamã gryk kêt nê. Nê kãm prãm nê apku. Nê kãm kôr nê ixkõ. Nê nhÿhÿnh ã nê amnhî kane. Na pu htem ã amnhî to mex o ri papa anê. Ja pyrã nê te mê pahpê Kris nhî pyræk jakamã na hte mê pahto mex o pa. Te mê pamã mê papa mê pahpê amnhî nhî hã mata pyræk.

³¹ Tirtũm kapêr ã kagã htũm kot ja jarênh kot:

Koja mēmyjê hõ hprõ kaxyw hãmri nê hipêêxã nê katorxã wa õrkwÿ kaga nê ãm hprõ kôt pix mã hpãnhã ri pa ho pa. Te wa tipxi nê ri pa pyræk o wa axpên nhîpêx o pa. Anê.

³² Na pre Tirtũm ã ja jarẽnh anẽ. Kapẽrja mex tã amnepê mã mẽ pa xwýnhjaja na prem hprĩ hã mar týx kêt nẽ. Na prem htýx mẽ mjên kot tanhmã mẽ hprõ nhĩpêx to pix ã hkamnhĩx no ãm ja pix kêt. Mããnẽn te mẽ pahpê Kris nhĩ pyrã nẽ tãm mẽ pahte amnhĩ nhĩpêx nẽ axpẽn nhĩpêx o papa hã ã mẽ pajarẽnh kot anhỹr. Te ixkre tipxi kamã mẽ pahte Kris kôt mẽ papa pyrãk o ã mẽ pajarẽnh anẽ.

³³ Jakamã kwa kêt ka mẽ amyjaja mẽ amã mẽ aprõ japê ho ri apa. Te ka amã amnhĩ tã ma pyrãk o mẽ hipêx. Jao tãm mẽ hipêx. Nẽ mẽ anijaja kêt ka mẽ ajaxwýja mẽ amjên ã apijaãm o ri apa.

6

Mẽ hkrajaja kot tanhmã hipêêxã nẽ katorxã nhĩpêx to hã mẽ kãm karõ

Korosẽ 3.20-21

¹ Nẽ mẽ apê mẽ hkrajaja kêt ka mẽ anhĩpêêxã nẽ mẽ akatorxã wa kapêr ma nẽ hã ano htýx nẽ wa hkôt ri amnhĩ nhĩpêx rãhã ho ri apa. Mẽ amã Pahihti Kris kôt amnhĩ nhĩpêx prãm xaj ã amnhĩ nhĩpêx anhỹr o ri apa. Kot kaj mẽ ã amnhĩ nhĩpêx anhỹrja o amnhĩ nhĩpêx mex o ri apa.

²⁻³ Tirtũm kapêr ã kagã htũm kot ja jarẽnh kot:

Kêt ka mẽ anhĩpêêxã nẽ mẽ akatorxã wa kapêr ma nẽ wa hkôt ri amnhĩ nhĩpêx. Kot kaj mẽ ã amnhĩ nhĩpêx anẽ nẽ amex nẽ kritpêm atĩr nẽ ri apa ry nẽ.

Anhỹr jakamã kot kaj mẽ amã kritpêm atĩr nẽ ri apa hprãm hã kêt ka mẽ ã amnhĩ nhĩpêx anhỹr o ri apa. Kormã mẽ aprĩre htã ã amnhĩ nhĩpêx anẽ. E kêt ka mẽ ã mẽ anhĩpêêxã nẽ mẽ akatorxã nhĩpêx anhỹr o ri apa.

⁴ Nẽ mẽ apê mẽ hipêêxã nẽ mẽ katorxã kêt ka mẽ akrajê gryk kaxyw mẽ kãm apêr o apikẽnh hkêt nẽ. Tãm mẽ kãm akapêr nẽ Pahihti Jesus kapêr o mẽ ahkre ho ri apa. E kêt ka mẽ ã akrajê nhĩpêx anhỹr o ri apa.

Mẽ pahte mẽ panhõ patrãw kapêr kôt amnhĩ nhĩpêx ã mẽ pamã karõ

Korosẽ 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nẽ mẽ ate mẽ kãm mẽ axapênh o mẽ apa xwýnhjaja kêt ka mẽ anhõ patrãw kapêr ma nẽ hkôt amnhĩ nhĩpêx mex o ri apa. Te mẽ ate Kris kapêr mar nẽ hkôt amnhĩ nhĩpêx pyrãk. Jao mẽ hã apijaãm rãhã nẽ.

⁶ Nom kêt ka mẽ ãm mẽ noo mã pix mã ri mẽ kãm axapênh mex kêt nẽ. Mããnẽn mẽ wa kre kamã mẽ kãm axapênh mex rãhã nẽ. Ja na Tirtũm kãm hprãm. Mẽ apê Tirtũm Kra Kris mã tanhmã amnhĩ nhĩpêx to ho apa xwýnh jakamã kêt ka mẽ anhõ patrãw mã axapênh mex o ri apa.

⁷ Nẽ mẽ akĩnh kãm mẽ kãm axapênh mex nẽ. Te mẽ ate Pahihti mã akĩnh kãm tanhmã kãm amnhĩ nhĩpêx to pyrã nẽ mẽ kãm tãm amnhĩ nhĩpêx pẽ axapênh mex o ri apa.

⁸ Kot puj mẽ amnhĩ kaxyw Tirtũm mã pajamxpêr pẽ pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nẽ nhỹrmã ja hã mẽ pahto mex rax nẽ. Mẽ pahpê hkrajê piitãã. Mẽ pahte mẽ kãm paxapênh xwýnhjaja nẽ amnhĩ mã mẽ paxapênh xwýnhjaja nhũm nhỹrmã mẽ pahpiitã mẽ pahte tãm amnhĩ nhĩpêx xwýnhjê ho mex rax nẽ.

Mẽõ patrãwjaja kot tanhmã kãm mẽ apênh xwýnhjê nhĩpêx to

Korosẽ 4.1

⁹ Nẽ mẽ apê mẽ õ patrãwjaja kêt ka mẽ amã mẽ apênh xwýnhjê ho mex nẽ mẽ apênh ã mẽ kãm axakjêr o ri apa hkêt nẽ. Tãm mẽ hipêx. Kaxkwa kamã mẽ panhõ Pahi Maatija mããnẽn kêp mẽ õ Pahi Maati jakamã ã mẽ hipêx mex anhỹr o ri apa. Tãm na kãm mẽ pahpiitã mẽ pajapê ho axpẽn pyrãk. E kêt ka mẽ ã mẽ hipêx anhỹr o ri apa.

Tanhmã mẽ pahte Satanasti kutã amnhĩ to htýx to hã mẽ pamã karõ

Rõmãn 16.20; Sikũn Korĩt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htýx to jarẽ ka mẽ inhma. Kêt ka mẽ Pahihti nhỹ hã kutã amnhĩ to htýx rãhã nẽ apa. Ate tanhmã amnhĩ tomnuj to hprãm xaj tanhmã kot ato htã ka Tirtũm xihtýx o anhõpinh xã kaxwýnh kãm kutã amnhĩ to htýx nẽ. Rý koja ate mẽmoj mex

o anhÿr nê tanhmã ato ka mẽ amnhĩ tã hamaxpêr ã omu nê ãm omu nê arĩ Tĩrtũm xihtÿx nhÿ hã tãm ajamaxpêr mex rãhã ho ri apa.

¹¹ Na hte p̄ristijaja pijapu kaxyw hãmri nê amnhĩ nê kàx o mẽ ê jagjê nhũm mẽ tee ri kãm mẽ hkamnhwÿr prãm hkaprÿ. Tã ja pyrã nê koja Satanasti mẽ ate kapêr kôt tanhmã amnhĩ nhĩpêx to hprãm xaj tanhmã mẽ ato ka mẽ amnhĩ tã hamaxpêr ã omu hãmri nê Tĩrtũm xihtÿx nhÿ hã kutã amnhĩ to htÿx nê. Jao mẽ ate amnhĩ nhĩpêx nyw pix o amnhĩ nhĩpêx nê mẽ ajamaxpêr nyw pix o ajamaxpêr. Kot kaj mẽ ã amnhĩ nhĩpêx anê nhũm Satanasti tee ri tanhmã kãm mẽ ato hprãm hkaprÿ.

¹² Mẽ pahpê Tĩrtũm kra jakamã mẽ kot mẽ pakutã amnhĩ xunhwÿr xwÿnh maati-jaja axtem na mẽ. Mẽ kêp mẽkarõmnuti jakamã mẽ pahkĩnhã mẽ ĩ hkêt. ãm mẽ hkarõ kaxkrit pix na mẽ. Na htem kôk kôt tanhmã amnhĩ tomnuj tÿx to ho pa. Nê mẽ hihtÿx. Na htem arĩ jar pika ja kamã mẽ kêp Tĩrtũm kra hkêt xwÿnhjê ho amnhĩptã nhũm htem mẽ hkôt ri htÿx tanhmã ri amnhĩ tomnuj tÿx to ho pa. Nom amnhĩ tã mẽ omunh kêt nê.

¹³ Jakamã kwa kêt ka mẽ Tĩrtũm kot mẽ akarõ mã amnhĩ Karõ jagjênh xwÿnhnta kôt pix mã amnhĩ nhĩpêx o apa. Jao mẽ ate amnhĩ nhĩpêx nyw kôt pix mã mãn ri mẽ amnhĩ nhĩpêx. Kêr kê mẽkarõmnuti tee ri kãm tanhmã mẽ ato hprãm kaprÿ ka mẽ arĩ Tĩrtũm Karõ xihtÿx nhÿ hã kutã amnhĩ to htÿx rãhã ho apa.

¹⁴ Jakamã kwa kêt ka mẽ axkãm ajamak rom nê te ho sôrdat kot pijapu kaxyw ê jagjênh pyrãk o amnhĩ nhĩpêx. Na htem amnhĩ nê môx kà ho mẽ ê jagjê nê mẽ hpre xà ho amnhĩ pre hpa. Nê hipy kàx o mẽ hinô kà jagjê. Hãmri nê rĩ kormã ma mẽ kãm mẽ hkurê xwÿnhjê kutã mra nê axpu. No mẽ kajaja kêt ka mẽ kurom amnhĩ krãm Tĩrtũm kapêr jaxar tÿx nê hkôt pix mã ri ajamaxpêr rãhã ho ri apa. Nê hkôt ri amnhĩ nhĩpêx mex nê. Jao te sôrdat pijapu kaxyw kot amnhĩ nhĩpêxta pyrãk.

¹⁵ Na hte sôrdatjaja hpar kà jagjê nê aa hopôx kêt nê. ãm rãhã gôr nê hikwÿ. Jao ra mẽ kutã pijapu kaxyw amnhĩ grõnh rãhã

gôr nê hikwÿ. Tã kêt ka mẽ ma mẽ kãm Jejus kot tanhmã mẽ panê amnhĩ nhĩpêx to hã harênh o apa kaxyw nê sôrdat pyrã nê amnhĩ grõnh kôt ma mẽ hwÿr apa nê amnhĩ kamã akahak kêt nê.

¹⁶ Nê sôrdatjaja na htem amnhĩ nê amnar xà hã kàx po jamÿ nê ho kuhê nhũm mẽ tee ri kãm mẽ hkamnhwÿr prãm kaprÿ. Ja pyrã nê koja Satanasti tanhmã mẽ ato ka mẽ Tĩrtũm kêp mẽ anhõ pahi hã hihtÿx o kot Satanasti jakrenhja mã ajamaxpêr kurê kumrêx nê ãm hkôt pix mã amnhĩ nhĩpêx. Na hte Satanasti te kot mẽ pahwÿr krur rênh pyrãk o mẽ panhĩpêx. Jao xatã mẽ pahte Tĩrtũm kaga hprãm xaj tanhmã mẽ pahto. Nê mẽ pahte Tĩrtũm mã tanhmã amnhĩ nhĩpêx to pymaj xatã tanhmã mẽ pahto kaprÿ. Pu mẽ amnhĩ tã omu hãmri nê Tĩrtũm Karõ xihtÿx nhÿ hã Tĩrtũm kôt pix mã amnhĩ nhĩpêx.

¹⁷ Nê na hte sôrdatjaja kàx o mẽ hkrãjapap jagjê nê pijapu kaxyw mẽ kutã mra nhũm mẽ tee ri mẽ hkrã jayr prãm kaprÿ. Ja pyrã nê kêt ka mẽ amnhĩ kaxyw Tĩrtũm kôt pix mã ajamaxpêr rãhã ho ri apa. Nê ra kot mẽ ato hkra mã ajamaxpêr rãhã nê. Kê Satanasti tee ri kãm mẽ akrã kamã mẽ amã mẽ ajamaxpêr punuj jagjênh prãm hkaprÿ.

Nê sôrdatjaja na htem mẽ kutã wapo jamÿ nê ho kuhê. Nom mẽ papajaja mẽ panhõ wapoja na axtem kêp Tĩrtũm kapêr. Na hte Tĩrtũm Karõ mẽ pahkrã kamã kapêr o amnhĩrit pu htem pix mã pajamaxpêr o papa nhũm Satanasti tee ri kãm mẽ pahkrãm mẽ pajamaxpêr punuj jagjênh prãm kaprÿ. Te mẽ papijapu nhũm mẽ pahte amnhĩ nê ho pakrihkrit pyrãk o hipêx.

¹⁸ ã Satanasti pê mẽ pahte amnhĩ nê amnhĩ nhĩpêx kot anhÿr. Jakamã kêt pu mẽ amnhĩ to Tĩrtũm pix wÿr o ri papa kê Satanasti kutã mẽ pahto paxihtÿx pu mẽ hkôt tanhmã amnhĩ tomnuj to hkêt nê.

Nê kêt pu mẽ mẽmoj to anhÿr kaxyw nê ra Tĩrtũm Karõ nhÿ hã amnhĩ to Tĩrtũm wÿ. Nê kãm amnhĩ jarênh rãhã ho papa nê aa ja ho pajamakêtkati hkêt nê. Nê Tĩrtũm krajê piitã mẽ ho hwÿr rãhã ho ri papa.

¹⁹ Nê kwa kêt ka mẽ mãânên ixto Tĩrtũm wÿr rãhã nê. Kot tanhmã ixto nhũm ixãmnhix ixte mẽ kãm kapêr jarênh mex o ri

mě hkôt ixpa kaxyw. Mě kot ja hã tanhmã ixto htã pa arĩ ixàmnhĩx mẽ kãm harēnh mex o ri mẽ hkôt ixpa. Ně ixprĩ hã mẽ kãm Jejus kot tanhmã mẽ panê amnhĩ nhĩpêx to hã harē. Kormã mẽ kot hprĩ hã ja mar mex kêt.

²⁰ Tã ixte mẽ kãm ja jarēnh kaxyw na pre Tĩrtũm mẽ hwỳr inhmẽ nhũm prem hã ijaxà pa arĩ mẽ hagiēnh xà kamã ixkrĩ ho ixkrĩ. Jakamã kwa mẽ ixto Tĩrtũm wỳ kê tanhmã ixto ixihtỳx to pa arĩ mẽ kãm kapēr jarēnh o ixkrĩ. Ja na Tĩrtũm kãm hprãm nẽ ijaxwỳja inhmã ja prãm.

Kagà jatur xà

Korosẽ 4.7-8

²¹ Nẽ ot pa mẽ awỳr Xikitre mẽ. Kot paj mẽ amã kagàja nhĩpêx pa nẽ kãm kugõ nhũm kupy nẽ ma mẽ awỳr o mõi. Hãmri nẽ mẽ awỳr o pøj nẽ mẽ amã kugõ nẽ mẽ amã tanhmã ijarēnh to ka mẽ ijarēnh ma nẽ akĩnh nẽ. Xikitre na hte Pahihti mã tanhmã amnhĩ nhĩpêx mex to o pa. Kris kôt mẽ pahõtõ na. Nẽ inhmã hapêe.

²² Tã ot pa mẽ awỳr kumẽ. Kê mẽ awỳr pøj nẽ mẽ amã ijarẽ ka mẽ kam ama nẽ akupỳm tãm akrã nẽ tee ri ixkukamã ajamaxpēr kêt nẽ.

²³ E ixkràmnhwỳjaja. Kê Měpahpãm Tĩrtũm mẽ Pahihti Jejus Krisja wa tanhmã mẽ akrã hto ka mẽ ajamakêtkati nẽ axàmnhĩx ri apa. Nẽ mẽ amã axpẽn kĩnh o ri axpẽn kôt apa. Nẽ mẽ apiitã wa hkôt ajamaxpēr mex o ri apa.

²⁴ E mẽ amã mẽ panhõ Pahihti Jejus Kris kĩnh rãhã ho apa xwỳnhjaja. Kê Tĩrtũm mẽ ato mex nẽ mẽmoj to mẽ akutã nojarêt rãhã ho pa.

Tã ãm ja pix na hapêx. Ixpê Pawre na pa mẽ awỳr kagàja nhĩpêx nẽ kumẽ.

Piripos

Pawre kot Piripos kamã Jejus kôt hkwýjê hwýr kagà nê mênh

Pawre na pre kagàja nhîpêx. Jejus nhÿ hã mē ahkre o mē pa xwýnhjê hõ na pre. Na pre Jejus ã mē kãm hkurê xwýnhjaja unê nê ma krî pê Rõm wýr kumê nê kamã haxà nhùm mē hagjênh xà kamã hkrî ho hkrî. Tã nhùm arî hkrî rãhã Piripos kamã Jejus kôt hkwýjê hwýr kagàja nhîpêx nê kumê. Na prem Pawre jarênh ma nê kãm ukaprî nê. Jakamã axpên kaxyw kàxpore hkwý ho akuprõ nê hwýr kumê. Hãmri nhùm omu nê hkînh nê amnhî tã kagàja nhîpêx nê kamã mē kãm amnhî jarê nê mē hwýr kumê. Kot amnhî xà htýx kamã hamak o hkrî htã arî hwýr mē mrar xwýnhjê mã Tirtùm kapêr jarênh rãhã ho hkrî hã amnhî jarê. Nê kãm Jejus kot amnhî nhîpêx kôt pix mã amnhî nhîpêx o pa hprãm ã amnhî jarê. Nê kãm Jejus jamaxpêr kôt pix mã hamaxpêr prãm ã amnhî jarê. ã na pre Pawre kagàja kamã mē kãm amnhî jarênh anê. Nê mē kãm:

1 Pa Piripos kamã Jejus Kris kôt ixkwýjaja. Xà mē amex na ka mē apa? E ixpê Pawre na pa mē amã kagàja nhîpêx nê kamã mē amã amnhî jarê nê mē awýr kumê. Nhùm Ximotre haxwýja kãm ja mex nê. Wa ixpê Jejus mã tanhmã amnhî nhîpêx to ho wa ixpa xwýnh jakamã na pa wa mē awýr hipêx nê kumê. Mē ate Tirtùm kapêr o mē ajahkre xwýnhjê hwýr nê mē kãm mē ate tanhmã amnhî to xwýnhjê hwýr nê mē ate mē mar o akrî xwýnhjê hwýr. Mē apê Kris kôt wa ixtõ nê wa ixtõxjê ho ixpimràatã mē awýr hipêx nê kumê.

2 E kê Mëpanhîpêxã maati Tirtùm mē Pahihtu Jejus Kris wa mëmoj to mē akutã nojarêr rãhã nê ka mē axãmnhix ri aja-makêtkati nê ri apa ho apa.

*Pawre kot Piripos nhõ xwýnhjê ho Tirtùm
wýr ã harênh*
Epes 1.15-19; Korosê 1.9-12

3 Na pa hte xatã mē amã ijamaxpêr o ixkrî nê mē panhõ Tirtùm kot tanhmã mē ato mex toja pa kãm ijamaxpêr nê ixkînh nê ixkrî.

4 Nê Tirtùm mã mē ajarênh nê mē ato kuwý. Ixkînh kãm mē ato kuwý.

5 Wam ixte mē awýr inhmõrta ã na pa pre mē amã Jejus kot mē panê tanhmã amnhî nhîpêx to hã harênh o ri mē akôt ixpa. Ka prem inhma nê hkôt amnhî xunhwýr týx nê hkôt amnhî nhîpêx o ri apa. Jakamã inhmã axpên kaxyw ri kàxpore hkwý nhõr o apa. Te ham mē ate ixwýr mênhta pyrãk pa pre mē akukwak ri amnhîm ho ixu-japrõr o ri ixpa pê nhãm ri mē kãm Jejus jarênh o ri mē hkôt ixpa. Na pa hte arî jam ijamaxpêr rãhã ho ixkînh nê ixkrî. Nê Tirtùm mã mē ate ixto mex ã kãm mē ajarênh o ixkrî.

6 Nê na pa pre ma mē awýr mõ nê mē amã Jejus jarê ka prem inhma nê hkôt amnhî xunhwýr nhùm Tirtùm ja hã mē apumunh mex nê. Hãmri nê mē ate hkôt amnhî to htýx kaxyw tanhmã mē ato mē axihtýx to. Tã koja arî mē ato mē axihtýx rãhã nhùm Jejus Kris nhÿrmã akupýn mē pahwýr wrý. Kõja ã mē ato mex anê.

7 Na hte tanhmã ixto mex tota pyrã nê tanhmã mē ato mex to ho pa nê mē akutã nojarêr rãhã ho pa.

Nê kormã mē kot ijaxàr kêt ri pa pre ma mē piitã mē kãm Jejus jarênh o ri ixpa. Nê ãm hãmri mē kãm harê. Mē kot mar nê hkôt amnhî xunhwýr týx kaxyw pa pre mē hkôt harênh rãhã ho ri ixpa. Ka prem ja kaxyw inhmã kàxpore hkwý gõ pa pre ho amnhîm ixujaprõr pê mē hkôt ri mē kãm harênh o ri ixpa. Tã nhùm prem jar Rõm kamã ijaxà pa arî ixkrî htã ka mē axte ixwýr hkwý mē. Jakamã na pa hte mē amã ijamaxpêr rãhã ho ixkrî nê inhmã mē akînh týx nê.

8 Te Jejus Kris kãm mē ajapê htýx pyrãk. Tirtùm kot ja hã ixpumunh mex.

9-10 Na pa hte mē ato kuwý nê kãm:

—Pa Tirtùm. E Piripos nhõ xwýnhjê pumu. Na mē ra kãm axpên kînh o axpên kôt pa. Kwa tanhmã mē hipêx to kê mē arî kãm axpên kînh týx pix nê. Jao axpên to mex rãhã ho pa. Nê tanhmã mē hkrã hto kê mē amnhî krãm akapêr jaxàr týx nê. Jao tãm amnhî nhîpêx mex nê hamaxpêr mex o

ri pa. Nom kormã mẽ kot ja pumunh tohtuj anhÿr. Tã kêr ka tanhmã mẽ ho kê mẽ ã amnhĩ nhĩpêx anhÿr rãhã Jejus Kris akupÿn mẽ ixwÿr wrÿ.

Anhÿr pa hte mẽ ato hwÿr o ixpa.

¹¹ Nã koja Jejus Kris mẽ akaxwÿnh kãm mẽ ato mẽ axihtÿx ka mẽ ÿ hã axihtÿx pê tãm ri amnhĩ nhĩpêx nê tãm axpên nhĩpêx o ri axpên kôt apa. Nhũm mẽ piitã ja hã mẽ apumu nê axpên mã Tirtũm mex o mex ã harê.

Pawre kãm Kris kôt amnhĩ nhĩpêx prãm ã harênh

Atre 28.30-31; Epes 6.19-20; Sikũn Ximotre 2.9

¹² E Kris kôt ixtõ nê ixtõxjaja. Kot paj mẽ amã tanhmã amnhĩ jarênh to ka mẽ inhma. Na prem ra Jejus ã ixtomnuj tÿx nê hã ijaxã pa amnhĩ xà htÿx kamã ijamak o ixkrĩ. Nom mẽ kot ã inhĩpêx anhÿr tã pa hte arĩ ixkrĩ xà kamã mẽ kãm Jejus jarênh o ixkrĩ. Jakamã na mẽ ra ohtõ nê tanhmã kot mẽ panê amnhĩ nhĩpêx to hã harênh ma.

¹³ Pôristi kot inhĩhkô hã ixtãnopxar xwÿnhjê mẽ ixwÿr mẽ mrar xwÿnh piitã ixte Kris kapêr jahkre ho ixpa pix ã mẽ kot ijaxãr ã ijarênh ma.

¹⁴ Nê jar Kris kôt mẽ pahtõ nê mẽ pahtõxjaja haxwÿja ijarênh ma nê ohtõ nê ixpyrà nê Kris nhÿ hã amnhĩ to htÿx nê arĩ hkwyjê mã kapêr jarênh rãhã ho pa. Ixpyrà nê kãm mẽ uma hkêr nê mẽ kutã amnhĩ to htÿx pê mẽ kãm harênh rãhã ho pa.

¹⁵⁻¹⁸ Nê na pre mẽ hkwyjaja ixte mẽ amã Kris jarênh o ixpa hã ijarênh ma nê hã ixkamã gryk nê axtem hamaxpêr nê ixwakre kamã gryk kãm mẽ kãm Kris kapêr jarênh o pa. Na htem hamaxpêr o:

—E kot paj ma Pawre kot ra mẽ hwÿr mör xwÿnhjê hwÿr mō nê kot ra mẽ kãm Jejus kapêr jarênh nhĩpy axte mẽ kãm harênh o ri mẽ hkôt ixpa. Hãmri nhũm mẽ inhma nê inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarênh ma nê hkaprĩ nê rĩ amnhĩ pumu. Nã kot paj anê.

Anhÿr o hamaxpêr tã pa mẽ harênh ma nê ixkaprĩ hkêr nê. Mẽ kot mẽ amã hprĩ hã Kris kapêr jarênh kênã kot pa kêt tee ri mẽ harênh ma nê ixkaprĩ. Kwãr mẽ mãmrĩ ri ixkamã gryk kãm kapêr jarênh o

ri pa. Pa mẽ harênh ma nê ixkĩnh nê. Nom na hte mẽ hkwyjaja jajê rom kãm ixkĩnh kãm mẽ kãm Kris kapêr jarênh o pa. Nê tãm hamaxpêr pê mẽ kãm harênh o pa. Ra mẽ kot ixpumunh mex jakamã nhũm Tirtũm kot jar mẽ hwÿr inhmênh nhũm ixte ãm hãmri mẽ kãm kapêr mex jarênh o ri ixkrĩ hã ixpumunh mex. Jakamã kwãr mẽ mãmrĩ tanhmã inhmã hamaxpêr to xà hkôt mẽ ujarênh mexja jarênh o pa. Mẽ kãm ixkĩnh kãm harê rÿ ixkamã gryk kãm ri harênh o pa. ãm hãmri Kris kapêr jarênh o pa jakamã pa mẽ harênh ma nê ixkĩnh nê.

¹⁹ Nê ra mẽ ate ixto Tirtũm wÿr o apa jakamã koja Karõja ixkaxyw tanhmã jar Rõm kamã pahiti nhĩpêx to nhũm tokyx ixkator japêr. Pa ixãmnhix ijamakêtkati nê ri ma mẽ akôt ixpa.

²⁰ Nom inhmã Jejus kãm hprãm xà hkôt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh nê arĩ kãm tanhmã amnhĩ nhĩpêx to ho ri ixpa. Nom koja mẽ tanhmã hamaxpêr to nê ixpĩ pa mẽ kutã mẽ kãm amnhĩ to htÿx nê ixãm rãhã nhũm mẽ ixpĩ pa ijamakêtkati nê ty. Kê mẽ ja hã ixpumu nê ixtã Kris mex o mex ã harê. ãm Jejus kãm hprãm xà hkôt pix mã na inhmã amnhĩ nhĩpêx prãm.

²¹ Tã kot paj tanhmã amnhĩ to nê arĩ ixtĩr japêr hã kot paj ãm kôt pix mã amnhĩ nhĩpêx rãhã ho ixpa. Nom koja mẽ tanhmã hamaxpêr to nê hã ixpĩ pa ty nhũm Tirtũm ma kaxkwa hwÿr ixkarõ ho àpir kurê kumrêx. Pa Tirtũm mẽ Krata wa kuri inhmex o inhmex nê wa kuri ixpa ho ixpa.

²²⁻²³ Tã nhÿ na we inhmã mex o hõ jakrenh wehe? Na pa tee ri amnhĩ kukamã ijamaxpêr. Inhmã tokyx ixtyk nê Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nê arĩ mẽ kãm Jejus kot tanhmã mẽ panê amnhĩ nhĩpêx to hã harênh rãhã ho ri ixpa. Ko. Ja mããnên inhmã mex.

²⁴ No mẽ amã na arĩ ixtĩr nê ixpaja mẽ amã hprãm

²⁵ jakamã kot paj pêr tokyx ixtyk kêt nê. Kot paj arĩ ri mẽ amã Kris kôt mẽ ato mẽ axihtÿx o ri mẽ akôt ixpa. Jao ãm ho hkrãre ka mẽ ra amnhĩ kaxyw kãm ajamaxpêr nê hkôt amnhĩ xunhwÿr tÿx nê. Jao akĩnh nê apa.

²⁶ Tã kot paj nhÿrmã akupÿm ixtÿr rãhã mẽ awÿr mõ ka mẽ ixpumu nẽ akÿnh nẽ. Jejus Kris kot akupÿm ixkator ã akÿnh nẽ. Hãmri nẽ ixtã Jejus mã mex o mex ã harẽ.

Mẽ pahte Jejus ã pahpunuj tã mẽ pahte amnhĩ to htÿx ã mẽ pamã karõ

Rukre 6.22; Sikÿn Korÿt 2.14-16; Xiakre 1.12; Jutre 3

²⁷ Jakamã e kër ka mẽ Jejus Kris kapër kôt pix mã amnhĩ nhÿpêx. Nẽ axpën kôt axpën to axihtÿx pẽ mẽ kãm Jejus kot tanhmã mẽ panẽ amnhĩ nhÿpêx to hã harẽnh o ri apa kê mẽ ama nẽ mẽ pahpyrà nẽ hkôt amnhĩ xunhwÿ. E kër ka mẽ ã amnhĩ nhÿpêx anhÿr o ri apa. Kër pa nhÿrmã mẽ hãgÿnh xàja rÿm ixkator japêr nẽ nhÿri ja hã mẽ ajarẽnh ma rÿ ma mẽ anhõ krÿ hwÿr mõ nẽ ja hã mẽ apumu nẽ ixkÿnh nẽ.

²⁸ Nom kwa kër ka mẽ amã mẽ kot Kris ã tanhmã mẽ ato xwÿnhjê puma hkêt nẽ. Mẽ kot tanhmã mẽ anhÿpêx kati hto htã kër ka mẽ kutã amnhĩ to htÿx nẽ mẽ hkôt apa. Kër kê mẽ amnhĩ tã mẽ apumu nẽ tee ri hamaxpêr hãmri nẽ axpën mã:

—Kwa mẽ pahte Kris ã tanhmã mẽ hipêx to htã na htem amnhĩ to htÿx nẽ arÿ mẽ pamã harẽnh o ri pa. Pêr mẽ kãm mẽ pahpuma hkêt. Mãn hte Tÿrtÿm tanhmã mẽ ho nhÿm mẽ ÿ hã kãm mẽ pahpuma hkêt nã? Kwa tanhmã kot puj mẽ ho nhÿm mẽ Jejus kapêr jarẽnh o pata kaga? Nã kot puj mẽ ãm tee ri hã tanhmã mẽ ho kaprÿ. Mãn ãm hãmri na htem nhÿrmã Tÿrtÿm kuri htÿr tÿm nẽ pa ho pa hã amnhĩ jarẽnh o pa nã? Anẽ.

Koja mẽ ã mẽ ajarẽnh anẽ. Tÿrtÿm kot mẽ ato mẽ axihtÿx ã mẽ apumunh kôt.

²⁹ Na pre tanhmã mẽ ato ka mẽ Kris kôt amnhĩ xunhwÿ. Tã mẽ kot tanhmã hã mẽ anhÿpêx to htã na hte Tÿrtÿm mẽ kutã tanhmã mẽ ato ka mẽ ÿ hã amnhĩ to htÿx nẽ apa.

³⁰ Ijaxwÿja na pa hte amnhĩ xà htÿx kamã ijamak o ixkrÿ. Na pre htem Jejus ã ixtomnuj o pa ka prem ja hã ijarẽnh ma nẽ hã ixpumu. Tã ota kê mẽ ra axte tanhmã hã inhÿpêx to. Pa kê amnhĩ xà htÿx kãm ijamak o ixkrÿ ka mẽ ijarẽnh ma. Tã xep mẽ ixpyrà nẽ Kris ã amnhĩ xà htÿx kamã ajamak o apa. Nom kwa kër ka mẽ tee ri

amnhĩ kukamã ajamaxpêr o akaprÿ nẽ apa hkêt nẽ.

2

Jejus kãm mẽ pajapê xàj tanhmã kot amnhĩ nhÿpêx to hã harẽnh

Rõmãn 15.5-6; Epes 4.1-6; Piripos 2.18

¹ Nẽ ra mẽ pahte Jejus kôt amnhĩ xunhwÿr jakamã pu mẽ tee ri amnhĩ kukamã pajamaxpêr o pahkaprÿ nẽ ri papa hkêt nẽ. ãm kãm mẽ pajapêja mã pajamaxpêr rãhã ho pahkÿnh nẽ pajamakêtkati nẽ ri papa. Nhÿm Karõ mẽ pahkarõ mã agjê nẽ mẽ pahto mex nẽ mẽmoj to mẽ pakutã nojarêr o ri mẽ pakamã pa.

² Tã kër ka mẽ axpën mar mex nẽ mẽmoj tã axpën mã axàkjêr o ri apa hkêt nẽ. Te ri ixkre pixi kamã mẽ atipxi nẽ axpën kôt amnhĩ nhÿpêx pyrãk. Nẽ Tÿrtÿm kãm hprãm xà hkôt pix mã ajamaxpêr o ri apa. Nẽ mẽ amã axpën kÿnh o ri apa. Kot kaj mẽ ã amnhĩ nhÿpêx anẽ pa ja hã mẽ apumu rÿ hã mẽ ajarẽnh ma nẽ ixkÿnh tÿx kumrêx.

³ Nẽ kwa kër ka mẽ axpën pumu nẽ ã ajamaxpêr anhÿr kêt nẽ. Mẽ ajamaxpêr o:

—Tk. Kot pa ri tanhmã jahti ho ajuta hto ho ixpa hkêt nẽ. Ixte amnhĩ to rax o hakrenh kênã kot pa hkêt ri ho ajuta. Kê tãm mãn tanhmã ixto ajuta hto.

Anhÿr o ajamaxpêr kêt nẽ. Kêt nhÿri mẽhõ pumu nhÿm tanhmã kute ka hã omu nẽ ajamaxpêr o:

—Hêxta waa nẽ. Kwa tanhmã kot pa we ho ajuta htoo?

Anhÿr o ajamaxpêr hãmri nẽ ajamaxpêr xà hkôt tanhmã ho ajuta hto.

⁴ Jao Jejus pyrã nẽ mẽmoj to axpën kutã anojarêr o ri apa. No ri amnhĩ pix kukamã ajamaxpêr o apa hkêt nẽ.

⁵ Kêr pu mẽ te Jejus tanhmã hamaxpêr toja pyrãk o pajamaxpêr o ri papa.

⁶ Kêp Tÿrtÿm Kra kumrêx jakamã te urãk tã xà na pre ja hã amnhĩ pumu nẽ amnhĩ pix kukamã ã hamaxpêr anẽ nẽ hamaxpêr o:

Te ixte Tÿrtÿm pyrãk jakamã mẽmoj piitã inhõ na. Jakamã kot paj jar kaxkwa kamã inhmex nẽ ixkÿnh nẽ ixpa ho ixpa nẽ aa rer nẽ nhÿhÿm inhmõr kêt

kumrêx. Anhÿr o na pre hamaxpêr?
Nà na pre ã hamaxpêr anhÿr kêt nê.

7-8 Kãm mē pajapê xàj na pre kaxkwa kamã mēmoj mex piitã rer pa nê man mē pahwÿr wrÿ nê mē pahpyrà nê ï ho katorxà nhõhy rÿm kato.

Kêp mē panhõ Pahihti htã te kêp mē panhÿõ nê te kot amnhÿ to grire pyrãk o amnhÿ nhÿpêx o ri pa.

Nê Tÿrtÿm kãm hprãm xà hkõt pix mã amnhÿ nhÿpêx o pa.

Nê ãm kõt pix mã amnhÿ nhÿpêx o pa rãhã nhÿm prem kupÿ nhÿm arÿ mē kãm xa nê tanhmã amnhÿ tã mēhõ hto hkêt nê.

Na prem hipêx kati nê. Te kêp mē kot amnhÿ tomnuj tÿx xwÿnhjê nhÿpêx pyrãk o hipêx nê pÿ kahpa hã kunhõ nê kupÿ.

Tã no nhÿm mē kêp tanhmã amnhÿmnuj to hkêt nê arÿ mē kãm xa. Mē panê na pre ã amnhÿ nhÿpêx anê.

9 Hãmri nhÿm Tÿrtÿm ã kot amnhÿ nhÿpêx anhÿr ã omu nê akupÿm ho htÿr nê akupÿm amnhÿ wÿr ho api.

Nê mex o mex ã harê.

Nê kot nhÿrmã mē pahpiitã mē pahto amnhÿptar kaxyw mē pakaxyw ãm.

10 Jakamã kot puj mē nhÿrmã pahpiitã Jejus kutã pahkõnkrã ho rõrõk nê pahkrÿ hpa nê kàx pêê kãm mex o mex ã harê.

Mē pahpiitãã. Kaxkwa kamã mē pa xwÿnhjaja nê pika piitã hkõt mē papa xwÿnhjaja.

Nê mē htyk xwÿnh piitã koja mē akupÿn htÿr pu mē pahpimràatã Jejus kutã pahkõnkrã ho parõrõk nê pahkrÿ hpa nê kãm mex o mex ã harê.

11 Nê kãm:

Pa Pahihti Jejus. Nà ãm hãmri na apê mē inhõ Pahi Maati hã apyxi mex na ka.

Jakamã mē ixtõ kot paj mēmoj tã tanhmã amã karõ hto? Nà kot paj mē ixtõ ã amnhÿ nhÿpêx anhÿr kêt nê. Anê.

Kot puj mē nhÿrmã ã Jejus mã pakapêr anê. Jao mãânên Tÿrtÿm hihtÿx o hihtÿx nê àhpumunh o àhpumunh ã omu. Nê mex o mex ã omu.

Te mē pahpê kanhêti pyrãk ã mē pajarênh Matêwre 5.14-16

12-13 Tã kwa ixkrãmnhwÿjaja. Inhmã mē akÿnh. Kwa kêr ka mē arÿ Tÿrtÿm kõt amnhÿ nhÿpêx mex rãhã nê. Te ixte mē akamã ixpare ri mē ate amnhÿ nhÿpêx mexta pyrãk o ixwakre kamã amnhÿ nhÿpêx mex o ri apa. Na pre ra Tÿrtÿm mē panê mē pahte amnhÿ tomnuj rê nê tanhmã mē pahto pu mē ÿ hã kapêr kõt amnhÿ nhÿpêx o ri papa. Jakamã kwa kêr pu mē axte tanhmã amnhÿ tomnuj to ho papa hkêt nê. Nê mē pahte Tÿrtÿm kapêr kwÿm ri amnhÿ nhÿpêx pymaj ãm hkõt pix mã amnhÿ nhÿpêx o ri papa.

14 Nê kêr ka mē mēmoj to anhÿr kaxyw nê agryk kãm tanhmã ri ho hkêt nê. Nê mēmoj tã axapênh kaxyw nê ri hã axpên mã akapêr kati kamã ho anhÿr kêt nê.

15-16 Mē kot amnhÿ tomnuj xwÿnhjaja na htem ã amnhÿ nhÿpêx anhÿr o pa. No kêt mē kajaja. Mē ate mē hkõt apa htã kêr ka mē hkõt amnhÿ nhÿpêx kêt nê. Mē kurom mē apê Tÿrtÿm kra jakamã kêr ka mē hkõt pix mã amnhÿ nhÿpêx o ri apa. Nê tanhmã amnhÿ tomnuj to rÿ tanhmã ajamaxpêr punuj to hkêt nê. Mē kot amnhÿ tomnuj xwÿnhjaja te ri kamãt kô kamã ri mē kêp àhkÿnh o ri mē pa xwÿnhjê kot amnhÿ nhÿpêx pyrãk. Tã kot kaj mē hkõt tãm ri amnhÿ nhÿpêx o apa nê te ate kanhêtiija kamãt kô kamã hirã ho harir pyrãk o amnhÿ nhÿpêx. Jao mē kãm Tÿrtÿm kapêr jarênh o ri mē hkõt apa. Mē kot amar nê apyrã nê nhÿrmã kuri htÿr tÿm nê pa ho pa kaxyw. Kot kaj mē ã amnhÿ nhÿpêx anê nhÿm nhÿrmã Jejus Kris akupÿn mē pahwÿr wrÿk ã arÿgrota ã pa mē apumu nê ixkÿnh nê. Nê ixkÿnh kãm Jejus mã mē ajarê nê kãm mē ajarênh o:

—Kwa Pahihti. E jajê pumu. Na pa pre mē kãm akapêr jarênh o ri mē hkõt ixpa nhÿm mē inhmar tÿx nê nê akapêr kõt amnhÿ nhÿpêx o ri pa. Jakamã na pa pre mē kãm akapêr jarênh kaprÿ hkêt nê.

Anhÿr o kãm mē ajarê.

17 Na pa pre mē akõt mē amã Tÿrtÿm kapêr jarênh o ri ixpa ka prem inhma nê hkõt amnhÿ xunhwÿ. Jakamã te ixte Tÿrtÿm mã mē ato ixkÿnh xà nê kãm mē anhõr pyrãk.

Nê koja jar Rõm nhõ pahihtiija tanhmã ixto hkêt japêr. Rÿ tanhmã ixto. Nom kwâr mē mãmrÿ tanhmã kãm ixto hprãm xà

hkôt tanhmã ixto rý ixpĩ. Koja mẽ ã ixte mẽ anhĩpêx anhÿr ã ixpĩ pa ixkĩnh nẽ. Nẽ tanhmã ijamaxpêr to hkêt kãm ty. Jakamã na pa ra ã mẽ kot inhĩpêx anhÿrja kukamã mẽ amã amnhĩ kĩnh ã amnhĩ jarẽ ka mẽ inhma.

¹⁸ Tã kêr ka mẽ ixpyrà nẽ ajaxwÿja ixtã akĩnh nẽ apa.

Ximotre mẽ Eparoxit wa harênh

¹⁹ Nẽ koja Pahihti Jejus kãm ja prãm hã kot paj ma mẽ awÿr Ximotre mẽ nhũm ma mẽ awÿr mō nẽ ri mẽ akôt pa nẽ tanhmã mẽ ate amnhĩ nhĩpêx to hã mẽ apumu. Hãmri nẽ man akupÿn ixwÿr mō nẽ inhmã mẽ ajarẽ pa mẽ ajarênh ma nẽ ixkĩnh nẽ tee ri mẽ akukamã ijamaxpêr o ixkrĩ hkêt nẽ. ãm tãm mẽ akukamã ijamaxpêr o ixkrĩ.

²⁰ Ximotre tapxipix na ixpyrà nẽ kãm mẽ akĩnh nẽ kãm mẽ ato ajuta hprãm. Na hte mẽ ajarênh rãhã ho pa.

²¹ Nom jar mẽ piitã Ximotre kĩnhã amnhĩ mex pix kukamã hamaxpêr o pa nẽ kãm Jejus Kris kôt tanhmã amnhĩ nhĩpêx to ho pa hprãm kêt nẽ.

²² Ximotre te kêp ixkra pyrãk. Na hte ixkôt pa nẽ ixpyrà nẽ Jejus mã tanhmã amnhĩ nhĩpêx mex to ho pa. Pa pre wa ijamẽ mẽ kãm mẽ ujarênh mex jarênh o wa ri mẽ hkôt ixpa.

²³ Tã koja mẽ tanhmã ixtã axpên mar to. Apu mẽ kot ixpĩr ã amnhĩ jarẽ rý ixkator ã amnhĩ jarẽ. Pa tanhmã amnhĩ tã mẽ mar to nẽ rĩ kormã ma mẽ awÿr Ximotre mẽ kê ma mẽ awÿr mō nẽ mẽ amã tanhmã ijarênh to.

²⁴ Nẽ koja Pahihti Jejus kãm ja mex pa ijaxwÿja ma mẽ awÿr mō pu mẽ axte axpên pumu.

²⁵ Nẽ kot paj tokyx ma akupÿm mẽ awÿr Kris kôt mẽ pahtō Eparoxit mẽ. Na ka prem kãm kãxpore gō nhũm man ixwÿr o mō nẽ inhmã kugō. Hãmri nẽ jar inhmã ãpênh rax nẽ ixpyrà nẽ mẽ ujarênh mexja jarênh o pa.

²⁶⁻²⁷ Tã ra à htÿx nẽ. Kironhÿx pre mẽ pahpê ty. Tã nhũm Tĩrtũm omu nẽ kamã ukaprĩ nẽ. Nẽ mãânên pa ixkamã ukaprĩ nẽ. Nẽ tee ri ixte à htÿx ã omunh nẽ ixkaprĩ htÿx pymaj akupÿm inhmã ho mex nhũm ra akupÿm mex nẽ ri pa. Hãmri nẽ kãm mẽ apumunh prãm nẽ. Mẽ ate à htÿx ã harênh

mar nẽ akaprĩ hã mẽ ajarênh ma nẽ tee ri mẽ akukamã hamaxpêr.

²⁸ Jakamã inhmã akupÿm tokyx mẽ awÿr mẽnh prãm. Tã koja mẽmo arĩgro hã mẽ awÿr pōj ka mẽ omu nẽ akĩnh nẽ tãm ajamaxpêr. Pa ijaxwÿja jar ixkĩnh nẽ tãm ijamaxpêr.

²⁹⁻³⁰ Na ka prem ixwÿr amẽ nhũm man ixwÿr mō nẽ jar ixri mẽ kãm Kris kapêr jarênh o ri mẽ hkôt pa rãhã nhÿx hã ty nom kot amnhĩ kamã kahak kêt. Jakamã kê akupÿm mẽ awÿr pōj ka mẽ omu nẽ akĩnh nẽ. Nẽ kahti hkôt amÿ nẽ ho mex nẽ. Kêp Kris kôt mẽ pahtō mex kênã. ã na htem Kris mã mẽ kot tanhmã amnhĩ nhĩpêx to ho mẽ pa xwÿnhjê nhĩpêx mex anhÿr o pa.

3

Mẽmoj tã mẽ pahpumunh kôt Tĩrtũm kot tãm mẽ paxunhwÿr ã harênh Piripos 2.18, 4.4

¹ E Kris kôt ixtō nẽ ixtōxjaja. Kris kêp mẽ panhō Pahihti jakamã kwa mẽ jam ajamaxpêr nẽ akĩnh rãhã ho ri apa.

Na pa ra mẽ amã mẽmoj jarênh rax nẽ. Nẽ hã kagã rax tã kormã inhmã ja ho anhÿr kaga hkêt nẽ. Kot paj axte mẽ amã hkwy hã kagã. Mẽ ate hã ano htÿx nẽ ho apa kaxyw.

² Jakamã e kwa mẽ okora. Kêr ka mẽ amnhĩ nẽ mẽ kot Tĩrtũm kapêr o hêx xwÿnhjê pumunh mex o ri apa. Na htem tanhmã mẽ amã kapêr ho pa nẽ mẽ amã:

—Kot kaj mẽ ixpê Ijaewjê pyrã nẽ amnhĩ my kwÿrýt kã jakã hãmri nẽ apê Tĩrtũm kra. Anẽ.

³ Nom ja kot anhÿr kêt. Mẽ pahte amnhĩ jakàr kôt mẽ pahpê Tĩrtũm kra hkêt. ã kot anhÿr ronhÿx pu mẽ amnhĩ krã hkôt tanhmã amnhĩ nhĩpêx to ho pahpê hkra. Nom ja kot anhÿr kêt. Mẽ ate amnhĩ jakàr kêt tã mẽ ixpyrà nẽ amnhĩ kaxyw Jejus Kris mã ajamaxpêr jakamã mẽ ixpyrà nẽ mẽ apê Tĩrtũm kra na ka mẽ. Na ka htem mẽ ixpyrà nẽ Karō nhÿ hã kãm mex o mex ã harênh o ri apa nẽ mẽ ixpyrà nẽ Jejus kukwak ri akĩnh nẽ ri apa. Nom na pu htem pahpê hkra kaxyw amnhĩ jakàr kêt nẽ.

⁴ Kop ãm amnhĩ krã hkôt mẽ pahte amnhĩ to Tĩrtũm kra ronhÿx pa ra amnepêm amnhĩ to hkra nẽ ri ixpa. Na pa

pre ixpê hkra hprãm xàj amnhĩ krã hkôt tanhmã ri amnhĩ nhĩpêx to rax o ixpa nom ã amnhĩ nhĩpêx anhÿr kaprÿ. E pa ja hã mẽ amã amnhĩ jarê ka mẽ ijarênh ma.

⁵ Na pa pre ixkato nê kormã ixtã semãn pixire nhũm mẽ ixpê Ijaew ã inhmy kwryt kà krãhta. Nom pa ã mẽ kot inhĩpêx anhÿr kôt ixpê Tirtũm kra hkêt nê. Nê inhĩpêxà hkôt ixpê finat Pêjamĩ kanrêhã htãmnhwÿ jakamã ixpê Ijaew mex na pa. Nê Ijaew kapêr o ixkapêr o ri ixpa. Nom ja kôt ixpê Tirtũm kra hkêt. Nê mãânên ixpê Parijew nhõ xwÿnh jakamã na pa pre Tirtũm kot finat Mojes mã mẽ pakaxyw mẽmoj tã karõ kôt pix mã amnhĩ nhĩpêx o ixpa hprãm.

⁶ Jao tee ri mẽ kot Jejus kôt amnhĩ nhĩpêx xwÿnhjê pumu nê mẽ homnuj tÿx o ri ixpa. Na pa pre ijamaxpêr o: “Nà mũjjaja na htem mẽ ixkwÿm ri amnhĩ nhĩpêx o pa.” Anê nê mẽ hipêx kati ho ri ixpa. Nê ijamaxpêr o: “Ra ixte finat Mojes kot Tirtũm nhÿ hã kapêr piitã hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixpa hkêt nê.” Anê.

⁷ ã na pa pre ixpê Tirtũm kra hprãm xàj amnhĩ nhĩpêx anhÿr o ixpa. Tã nom ãm ã amnhĩ nhĩpêx anhÿr hkaprÿ. Na htem ã ri amnhĩ nhĩpêx anhÿr kôt kêp Tirtũm kra hkêt nê. Tã pa hpãnhã amnhĩ kaxyw Kris kôt ijamaxpêr nhũm ixto hkra kurê kumrêx.

⁸ Ra ixte Jejus Kris kôt amnhĩ xãm jakamã Jejus kêp inhõ Pahшти pa inhmã kapêr kôt pix mã amnhĩ nhĩpêx o ri prãm. No hkrax rũm ixte amnhĩ nhĩpêx tũmja na pa ra Jejus gryk ã hkaga hpa. Te ixte mẽmoj punuj pyr nê amnhĩ katut kôt mẽnh nê axte kãm ijamaxpêr kêt pyrãk. Jao amnhĩ kaxyw Jejus kôt pix mã ijamaxpêr o ri ixpa.

⁹ Nom kormã ã ijamaxpêr anhÿr kêt ri na pa pre ixtÿx ri ijamaxpêr o:

—Nà ixte Mojes kot Tirtũm nhÿ hã kapêr kôt amnhĩ nhĩpêx o ixpa jakamã koja Tirtũm ja hã ixpumu nê ixto hkra.

Anhÿr tã nom ja kot anhÿr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tirtũm ãm ja hã mẽ omu nê ãm hã mẽ omu nê mẽ ho hkra hkêt nê. Nom koja mẽ Kris kôt amnhĩ xunhwÿ nhũm ja hã mẽ omu nê mẽ ho hkra kurê kumrêx. Jakamã ixte Kris kôt amnhĩ xãm

ã ixpumunh kôt pix mã na pre ixto hkra nê inhmex ã ijarê.

¹⁰ Hãmri pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupÿm htÿr nê hihtÿx nê àhpumunh tÿx o tanhmã amnhĩ nhĩpêx to ho pa. Tã ijaxwÿja inhmã uràn ã amnhĩ nhĩpêx anhÿr prãm. Nê inhmã uràk nê amnhĩ xà htÿx kutã amnhĩ to htÿx nê ixpa hprãm. Mẽ kot hã ixpÿr mã tã pa uràk nê Tirtũm kapêr kaga hkêt nê ãm kôt pix mã amnhĩ nhĩpêx o ri ixpa rãhã uràk nê hã ty. Ja na inhmã ho anhÿr prãm.

¹¹ Kê Tirtũm kot hipêxta pyrã nê akupÿm ixto ixtÿr pa wa kuri ixtÿr tũm nê ixpa ho ixpa.

¹² Inhmã Kris kôt pix mã amnhĩ nhĩpêx o ixpa hprãm tÿx kumrêx. Kormã ixte hkôt amnhĩ nhĩpêx o inhmõr nê kormã hatur xãm mẽnh kêt tã inhmã tokyx hatur xãm mẽnh prãm. Na pa ã inhmã amnhĩ nhĩpêx anhÿr prãm tÿx kumrêx.

Nê na pa hte ixte amnhĩ tomnuj kêt ã amnhĩ to jarkrar o ri ixpa hkêt nê. Na pa hte arĩ tõhã tanhmã amnhĩ tomnuj to nom inhmã ã amnhĩ nhĩpêx anhÿr prãm kêt. Nê na pa kormã ixprĩ hã Kris kot amnhĩ nhĩpêx mar o inhmõr nê hatur xãm mẽnh kêt tã inhmã hkôt amnhĩ nhĩpêx o inhmõr nê tokyx hatur xãm mẽnh prãm. Ja kaxyw na pre Jejus Kris amnhĩ kaxyw ixta.

¹³ Na pa hte mẽ akurom papxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nê. Nom ra ixte tanhmã amnhĩ tomnuj to ho ixpata pa axte kãm ijamaxpêr kêt nê. Te amnhĩ katut kôt ixte rênh par pyrãk o hipêx nê axte kãm ijamaxpêr kêt nê. Nê Jejus kãm hprãm xà hkôt pix mã amnhĩ nhĩpêx prãm xàj amnhĩ kaxyw kãm ijamaxpêr o ri ixpa.

¹⁴ Koja nhÿrmã Tirtũm ixpê Kris kwÿ hã amnhĩ wÿr ixwÿ nê inhmã:

—E amnê ixwÿr api Pawre. Kot kaj jarãhã amnê mẽ ixwÿr api.

Anhÿr o nhÿrmã inhmã kapêr jakamã na pa hte amnhĩ tã ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mõi. Nà kot paj gaa nê hkôt pix mã amnhĩ nhĩpêx mex o ri ixpa.

¹⁵ Kwa kêr pu mẽ pahpiitã ã pajamexpêr anê. Jao amnhĩ wÿr hamãr pê hkôt pix mã amnhĩ nhĩpêx o ri papa. Mẽ pahpiitã mẽ pahpê Kris kwÿ kênã. Nom kot ka mẽ atõ ja kaxyw tee ri amnhĩ kukamã ajamexpêr nê ajamexpêr o:

—Nà tanhmã kot paj we amnhĩ to nê Jejus kôt amnhĩ nhĩpêx mex rãhã o ri ixpa? Ja kaxyw ixãhpumunh tÿxre hã. Anê.

Hãmri nê ã ajamexpêr anhÿr o apaja apê hihtÿx japêr. Hã koja Tĩrtũm hprĩ hã tanhmã amã ja kukamã harênh to nê kaxyw ato axihtÿx ka ixpyrà nê hkôt pix mã ri amnhĩ nhĩpêx o apa.

¹⁶ Jakamã kêr pu mẽ ãm Tĩrtũm kãm hprãm xã hkôt pix mã tanhmã kãm amnhĩ nhĩpêx to ho papa. Ra mẽ pahte hkôt amnhĩ nhĩpêx o papa xãja kôt pix mã arĩ amnhĩ nhĩpêx rãhã ho papa.

¹⁷ E Kris kôt ixtõ nê ixtõxjaja. Na pa ra mẽ anoo mã Jejus kôt tãm ri amnhĩ nhĩpêx o ri ixpa. Tã kêr ka mẽ ja hã ixpumu nê ixpyrà nê hkôt amnhĩ nhĩpêx o ri apa. Hãmri nê nhÿri mẽ kot ixpyrà nê ã amnhĩ nhĩpêx anhÿr xwÿnhjê hõ pumu nê urak nê ã amnhĩ nhĩpêx anê.

¹⁸⁻¹⁹ Jejus kot mẽ pamã mẽ pahte amnhĩ tomnuj mÿrapê pĩ kahpa hã mẽ panê htykja nhũm mẽ ra ohtõ nê hprĩ hã mar tã hkôt amnhĩ xunhwÿr kêt nê. Mẽ kãm ã kot amnhĩ nhĩpêx anhÿrja ã mar prãm nõkati. Jakamã te mẽ kãm Jejus kurê xwÿnh pyràk. Na htem hã hpijaàm kêt kãm tanhmã ri amnhĩ tomnuj to ho pa. Nê kãm amnhĩ mex pix prãm. Nê tanhmã amnhĩ tomnuj to nê ja hã amnhĩ pumu nê hkĩnh nê. Nom tee ri ja hã amnhĩ pumu nê hkaprĩ nê ri pa hkêt nê. Tã ã mẽ kot amnhĩ nhĩpêx anhÿr jakamã koja mẽ nhÿrmã ma mẽ kot amnhĩ xã htÿx kamã hamak o pa tũm xãta wÿr hapêx. Nà koja mẽ ã amnhĩ nhĩpêx anê. Ra ixte mẽ amã ja hã mẽ harênh rax tã pa axte mẽ amã mẽ harê. Inhmã mẽ hkaprĩ hkôt na pa hte xatã mẽ amã ja hã mẽ harê.

²⁰ Kêt mẽ papajaja mẽ kurom mẽ pahpê kaxkwa nhõ xwÿnh nom kormã. Koja nhÿrmã Jejus Kris akupÿn mẽ pahwÿr kaxkwa rũm wrÿ. Mẽ papytãr xwÿnh maati Pahihtija akupÿn wrÿ hãmri nê ma akupÿm amnhĩ kôt mẽ pahto api. Jakamã na pu

htem arĩ pahkĩnh pê amnhĩ wÿr kamã pajamak rãhã ho ri papa.

²¹ Na pu htem jar pyka ja kamã Jejus kĩnhã paxirerek nê pahpunuj nê ri papa. Nom koja nhÿrmã akupÿn mẽ pahwÿr wrÿ hãmri nê amnhĩ pyrà nê mẽ pamã mẽ panhĩ nyw gõ pu mẽ urak nê paxihtÿx kãm pahtĩr tũm nê papa ho papa. ã kot mẽ panhĩpêx anhÿr kaxyw ãhpumunh o ãhpumunh. Tã koja ãhpumunh tÿx kãm mẽmoj piitã ho amnhĩptãr pa. Pu mẽ pahpiitã hkôt amnhĩ nhĩpêx mex rãhã ho ri papa.

4

*Pawre kot mẽmoj tã mẽ kãm karõ
Epes 4.3; Piripos 2.2; Korosẽ 3.15*

¹ E Kris kôt ixtõ nê ixtõxjaja. Inhmã mẽ ajapêê. Na pa hte mẽ ato ijamak o ixkrĩ nê mẽ amã ijamexpêr nê ixkĩnh nê. Nê jar mẽ pahkwÿjê mã mẽ ajarênh o ri ixkrĩ. E kwa kêr ka mẽ arĩ Pahihti kapêr kôt pix mã mãn amnhĩ nhĩpêx mex rãhã ho ri apa.

² Nê wa ka Ewox mẽ Sïxika wa. Na ka xep hte wa mẽmoj tã axpên kamã agryk rãhã ho ri apa. Kwa wa ã amnhĩ nhĩpêx anhÿrja mã anhÿre nê tãm axpên nhĩpêx. Pahihti Kris kôt war ate axpên to war atõx kênã kot ka kêt wa axtem nê mẽmoj tã axpên kamã agryk o ri apa.

³ Nê ka Xikitre. Apê ixkrãmnhwÿ mex jakamã kêr ka axpên tã wa nita wa kãm akapêr kãm axihtÿx nê kê war ama nê akupÿm tãm axpên nhĩpêx. Na pre wa ra Kremên mẽ hkwÿjê mẽ hpimràatã ixpyrà nê Jejus kot tanhmã mẽ panê amnhĩ nhĩpêx to hã harênh o ri pa. Tĩrtũm nhõ kagã kamã mẽ hixi piitã hikwÿ. Mẽ pahtĩr tũm nê mẽ papa mã xwÿnhjaja ra Tĩrtũm nhõ kagã kamã mẽ panhĩxi jaxwÿr par.

⁴ Nê kêr ka mẽ apê Pahihti hkwÿ hã akĩnh nê ri apa. Mẽ ate ã amnhĩ nhĩpêx anhÿr o apaja na pa inhmã hprãm tÿx jakamã kot paj axte mẽ amã harê. Kwa kêr ka mẽ akĩnh nê ri axpên kôt apa.

⁵ Pahihti Jejus ra akupÿn mẽ pahwÿr nojarêt jakamã kêr ka mẽ kutêp mẽ piitã ri mẽ ho mex o ri mẽ hkôt apa.

⁶ Nê kêr ka mẽ tee ri amnhĩ kukamã ajamexpêr o ri apa hkêt nê. Arĩ amnhĩ to Tĩrtũm wÿr rãhã nê. Kot ka mẽ mẽmo arĩgro

hã apê amrakati japêr nê tee ri ja hã amnhĩ pumu nê amnhĩ to awyê kê mē ama nê mē amã mēmoj gō. Rỳ mē ate mēmoj tã hwỳr xwỳnh̄ta tanhmã mē amã hipêx to ka mē amnhĩ tã omu nê kãm:

—Nà ãm hãmri na ka ã inhĩpêx anê nê inhmã ja gō Tĩrtũm. Amex o amex.

Anhỹr o kãm amnhĩ jarê.

⁷ Kot kaj mē ã amnhĩ to hwỳr anhỹr o ri apa nhũm tanhmã mē akrã hto ka mē mē apê Jejus Kris kwỳ hã ajamakêtkati nê axãmnhĩx ri apa. Hãmri nê mēmoj tã tee ri amnhĩ kukamã ajamexpêr o ri akapřĩ nê apa hkêr nê. ãm akĩnh rãhã ri apa. Tĩrtũm kot tanhmã mē pahto nhũm mē pajamakêtkati nê ri mē papaja mē pahte amnhĩ tã omunh kêt. ãm tapxipix kot ã mē panhĩpêx anhỹr kukamã àhpumunh tỳx.

⁸ E Kris kôt ixtō nê ixtōxjaja. Nà ixkapêr ã kagà jatur xà na ja. Kwa kêr ka mē ixujarênh mar tỳx nê hkôt amnhĩ nhĩpêx o apa.

Nê kêr ka mē axàpênh mex pix kukamã ri ajamexpêr o apa.

Nê mēmoj mex pix kukamã ri ajamexpêr. Nê axpên mã akapêr mex pix kukamã ri ajamexpêr.

Nê akatàt kôt akapêr xàptàr pix o axpên mã akapêr hkukamã ri ajamexpêr o ri apa.

Nê tãm ri amnhĩ nhĩpêx hkukamã mãn ajamexpêr o ri apa.

Nê mē piitã ri mē ho mex o apa hkukamã ajamexpêr.

Nê mē akapêr mex pix kukamã mãn ajamexpêr o ri apa.

E kêr ka mē ã amnhĩ nhĩpêx anhỹrja kukamã ajamexpêr rãhã ho ri apa.

⁹ Nê mē akôt ixpare ri na pa pre Kris kôt amnhĩ to mex pix nê tãm ixkapêr o ri ixpa. Tã kêr ka mē ixpyrà nê ã amnhĩ nhĩpêx anê. Koja Tĩrtũm ja hã mē apumu nê mē akôt ri pa ho pa. Kêp mē pamã mē paxãmnhĩx pajamakêtkati xà nhõr xwỳnh̄ na.

Mê kot Pawre hwỳr mēmoj mēnh nhũm kot omunh nê hkĩnh ã harênh

Sikũn Korĩt 11.7-9; Piripos 1.5

¹⁰ Nê amnepêm na ka prem xatã tanhmã ixto mex to ho ri apa. Tã axte ã inhĩpêx anhỹr prãm nom mē apê awry nê ixpa

jakamã ka xep prem tee ri tanhmã ixto mex to hkukamã ajamexpêr kapřy. Tã jar mē kot ijaxàr ã ijarênh ma nê ixwỳr Eparoxit mē nhũm man ixwỳr mō nê inhmã kàxporeta gō. Mē amã ijapê hã ixwỳr amê pa omu nê ixkĩnh tỳx nê. Nê ixkĩnh kãm Tĩrtũm mã mē ajarê. ãm hãmri na ka prem ixwỳr amê.

¹¹⁻¹² Nê na pa hte tanhmã ixkute htã arĩ ixkĩnh nê ijamakêtkati nê ri ixpa. Jakamã kot pa mēmo arĩgro hã ixpê amrakati nê inhmã prãm japêr tã no ãm tee ri amnhĩ kukamã ijamexpêr o ri ixkapřĩ hkêr nê. Arĩ ixkĩnh rãhã ixãmnhĩx ri ixpa. Rỳ pa inhõ mēmoj rax japêr nê mããnên ixkĩnh nê ixãmnhĩx ri ixpa. Na pa pre tōhã inhõ rax nê ixpa. Nê tōhã inhõ hkêr nê ixpa. Tã arĩ ixkĩnh rãhã nê ixpa ho ixpa.

¹³ Na hte Kris mēmoj piitã hkukamã ixto ixihtỳx pa ã hã mēmoj kutã ixihtỳx nê ixpa. Jao mēmo arĩgro hã inhmã prãm tỳx nê ri ixpa htã ã hã kutã ixihtỳx nê ixãmnhĩx ri ixpa.

¹⁴ Tã jar ixpunuj nê ixkrĩ ka mē ijarênh ma nê ixwỳr kàxpore hkwyê rê. ãm hãmri na ka prem ixwỳr arê.

¹⁵ Amnepêm na pa pre mē anhõ pika pê Masetõn rũm ixkato nê mē piitã mē kãm Jejus kot tanhmã mē panê amnhĩ nhĩpêx to hã harênh o ri ixpa ka mē xatã ixwỳr kàxpore hkwyê rê pa ho amnhĩm ixujaprõr o ri mē hkôt ixpa. Mē apê Piripos kamã Kris kôt ixtō nê ixtōx pixjaja na ka prem ã inhĩpêx anê. Krĩ hkwyê kamã Kris kôt mē pahkwỳjjaja na mē akĩnhã ã inhĩpêx anhỹr kêt nê. ãm mē kapxipix na ka pre ã ixto mex anê.

¹⁶ Tesarõn kamã ixpare ri na pa pre ixpê amrakati kumrêx nê ri mē hkôt ixpa ka mē xatã ixwỳr kàxpore hkwyê rê pa pre ho amnhĩm ixujaprõr rãhã ho ri mē hkôt ixpa.

¹⁷ Nom mē ate ixwỳr hkwyê rênh kaxyw mē akamã ijamak o ri ixpa hkêr nê. Rỳ ijamexpêr o:

—Ko. Koja Piripos nhõ xwỳnh̄jaja ijarênh ma nê kãm ixkapřĩ nê ixwỳr kàxpore hkwyê rênh japêr.

Anhỹr o mē akukamã ijamexpêr kêt nê. Nom ra mē ate ixwỳr hkwyê rênh jakamã koja Tĩrtũm ja hã mē apumu nê mē ato

mex nê. ã mẽ pahte axpên kutã panojarêt anhÿrja na kãm hprãm.

¹⁸ Tã nhũm Eparoxitja ham mẽ arũm kato nê man ixwÿr mō nê inhmã kãxporeta gō. Kwa na ka mẽ inhmã òr rax nê. Kojã tokyx ixpê hapêx kêt pa kritpêm ho ixàpkur o ixkrĩ. Tã ot pa ho kōta nê tanhmã hkre kamã kute pumunh xà hkôt hã kagà nê mẽ awÿr kumê. Nà mẽ ate ixwÿr axãmnhōrta na Tĩrtũm omu nê ixtã mẽ apumu nhũm ja kãm mex kumrêx. Te mẽ kot mẽ hkuxwaxà hpãr nhũm mẽ kãm mexta pyrãk nhũm ja kãm mex nê.

¹⁹ Nã kojã Tĩrtũm mẽ apê Jejus Kris kwÿ hã mẽ amã mẽ ate mẽmoj to presija xà nhōr rãhã ho pa. Mẽmoj piitã kêp ò kênã.

²⁰ E kêr pu mẽ Mẽpanhĩpêêxà maati Tĩrtũm mã mex o mex ã harênh rãhã o papa. Ja na inhmã hprãm.

²¹⁻²² Nê ot pa mẽ jar ixpiitã mẽ apê Jejus Kris kôt mẽ ixkwÿjê hwÿr kagàja kamã mẽ ixpêr mẽ. Mẽ ixpyrà nê mẽ apê Tĩrtũm kra hã. Pa nê Kris kôt mẽ pahtō nê mẽ pahtōxjaja. Nê Rõm nhō pahĩ mã mẽ àpênh xwÿnh kot Kris kôt amnhĩ xunhwÿr xwÿnhjaja mããnên. ãm jar mẽ ixpê Tĩrtũm krajê piitã pa mẽ awÿr ixpêr mẽ.

²³ E kê Pahĩti Jejus Kris mẽmoj to mẽ akutã nojarêt rãhã nê. Jao mẽ ato mex o pa.

Tã ãm ja pix. Ixpê Pawre na pa mẽ awÿr kagàja nhĩpêx nê kumê.

Korosê Pawre kot Koros kamã Jejus kôt hkwýjê hwýr kagà nê mênh

Pawre na pre kagàja nhîpêx. Jejus nhý hã hkrajê jahkre o mẽ pa xwýnhjê hõ na pre. Tã nhũm mẽ kêp Jejus kra hkêt xwýnh kwýjaja Jejus ã unê nê haxà nhũm arĩ hkrĩ ho hkrĩ. Hãmri nê krĩ pê Koros kamã Jejus krajê mã kagà nhîpêx nê mẽ hwýr kumê. Koros kamã Jejus kwýjê kamã Ijaew kwý nê kamã Ijaew kêt xwýnh kwý nhũm Pawre mẽ ho hpimràatã mẽ hwýr kumê. Kormã mẽ hwýr mör nê mẽ omunh kêt tãã. Nê kagàja kamã mẽ kot tanhmã Jejus o hêx to ho pa xwýnhjê jarênh to. Jejus kêp Tirtũm Kra hkêt ã mẽ kot ho hêx xwýnhjê jarê nê mẽ nê mẽ kãm kapêr. Mẽ kot mẽ hkôt amnhĩ nhîpêx kêt kaxyw mẽ kãm kapêr nê hã kagà nê mẽ hwýr kumê nê mẽ kãm:

¹ Pa Koros kamã Kris kôt ixkwýjaja. Xà mẽ amex na ka mẽ apa? Ixpê Pawre na pa mẽ awýr kagàja nhîpêx nê mẽ awýr kumê. Kris kôt mẽ pahtõ Ximotre mẽ wa kumê. Ixte Jejus Kris nhý hã mẽ ahkre ho mẽ ixpa xwýnhjê hõ na pa. Tirtũm kãm hprãm xà hkôt.

² Tã pa mẽ awýr kagà nhîpêx nê kumê. Mẽ apê Kris kôt mẽ ixtõ nê ixtõx na ka mẽ. Na ka xep htem Kris kapêr kôt amnhĩ nhîpêx mex o ri apa. E kê Tirtũm mẽ apê hkra hã mẽ akutã nojarêt rãhã nê. Ka mẽ amex nê ajamakêtkati nê axamnhĩx ri tanhmã amnhĩ nhîpêx ho ri apa.

*Koros nhõ xwýnh kwýjaja kot Jejus kôt
amnhĩ xunhwýr ã mẽ harênh*

Wam Tesarõn 1.2-5

³⁻⁴ Na pa ra Ximotre mẽ wa mẽ ajarênh ma. Mẽ ate amnhĩ kaxyw Jejus Kris kôt ajamaxpêr tỳx nê hkôt amnhĩ nhîpêx mex o apa hã mẽ ajarênhja ma. Nê mẽ kot Tirtũm kôt amnhĩ xunhwýr xwýnh piitã mẽ amã mẽ hkĩnh ã mẽ ho mex o apa hã mẽ ajarênhja ma nê wa ixkĩnh nê. Jakamã na pa wa Pahihti Jejus Nhîpêêxà Tirtũm mã amnhĩ jarênh kaxyw nê kãm mẽ anhý hã wa ixkĩnh ã amnhĩ jarê.

⁵ Na pre Epas ma mẽ awýr mõ nê mẽ amã Jejus kot tanhmã mẽ panê amnhĩ nhîpêx to hã harênh o mẽ akôt pa. ãm hãmri kot mẽ amã harênhja. Tã ka xep prem ama nê amnhĩ kaxyw hkôt ajamaxpêr nê hkôt amnhĩ xunhwý. Hãmri nê amnhĩ wýr Jejus jamãr o ri apa. Kojã nhýrmã akupýn mẽ pahwýr wrý nê amnhĩ pyrã nê ma akupým kaxkwa hwýr mẽ pahto api nê mẽ pahto mex kumrêx o mẽ pahkôt pa ho pa. Tã ka xep htem amnhĩ kaxyw hkôt ajamaxpêr tỳx nê ã kot amnhĩ nhîpêx anhýr kutêp amnhĩ wýr kamã ajamak rãhã nê. Nê mẽ amã mẽ kot Tirtũm kôt amnhĩ xunhwýr xwýnhjê hkĩnh tỳx nê.

⁶ Na hte Tirtũm ãm hãmri mẽ pahto mex pix rãhã ho pa. Nê mẽmoj to mẽ pakutã nojarêt rãhã nê. Tã wam mẽ ate harênh marta ã ka mẽ hkôt amnhĩ xunhwýr kurê kumrêx nê ri kapêr kôt axpên kôt amnhĩ nhîpêx mex pix o ri apa. Jao hkôt pix mã amnhĩ nhîpêx mex nê. Tã na hte pika piitã hkôt ri mẽ pa xwýnh kwýjaja mẽ apyrã nê Jejus jarênh ma nê hkôt amnhĩ xunhwý. Nê mẽ apyrã nê axtem hkôt pix mã amnhĩ nhîpêx nê kapêr kôt amnhĩ nhîpêx mex o ri pa.

⁷ Nê mẽ awýr mörta ã na pre Epasja mẽ amã Tirtũm kapêr jarênh o ri mẽ akôt pa ka prem ama nê amnhĩ kaxyw hkôt ajamaxpêr nê hkôt amnhĩ xunhwý. Epasja wa ixpyrã nê kot Kris mã tanhmã amnhĩ nhîpêx to ho pa xwýnh. Nê wa inhmã hapêê. Na pre katat kôt mẽ amã Tirtũm kapêr jarênh pa. Kot mẽmoj to mẽ pakutã nojarêt rãhã hã harênh o ri mẽ akôt pa.

⁸ Tã man akupýn wa ixwýr mõn pøj nê wa inhmã tanhmã mẽ ajarênh to. Tirtũm Karõ nhý hã mẽ amã Kris kôt atõ nê atõx piitã mẽ hkĩnh o ri apa hã mẽ ajarê. Pa wa mẽ ajarênh ma nê wa ixkĩnh tỳx kumrêx.

*Pawre mẽ Ximotre wa kot Koros kãm
hkwýjê ho Tirtũm wýr ã wa harênh*

*Epes 1.15-23, 3.14-21; Piripos 1.9; Wam
Tesarõn 5.23-24; Sikũn Tesarõn 1.11, 2.16*

⁹ Nê na pre Epas akupýn wa ixwýr pøj nê wa inhmã tanhmã mẽ ajarênh to. Mẽ ate amnhĩ kaxyw Jejus kôt ajamaxpêr o apa nê mẽ amã Kris kôt akwýjê piitã mẽ hkĩnh o ri apaja nhũm wa inhmã mẽ ajarê. Pa wa mẽ

ajarênh ma nê mẽ ato Tirtũm wỳr rãhã o jar mẽ haghênh xà kamã ixkrĩ. Nê arĩ mẽ ato hwỳr rãhã ho ixkrĩ. Nê mẽ ato hwỳr o:

—Pa Tirtũm. Ot pa Ximotre mẽ wa Korosê nhõ xwỳnhjê ho awỳr kaxyw amã mẽ harê. Kwa tanhmã mẽ hamaxpêr to kê mẽ amã hprãm xà hkôt pix mã amã tanhmã amnhĩ nhĩpêx to ho pa. Nê Akarõ nhỹ hã hprĩ hã akapêr ma nê ãm hkôt pix mã tanhmã amnhĩ nhĩpêx to ho pa. Anê.

¹⁰ Na pa hte wa ã mẽ ato Tirtũm wỳr anhỳr rãhã ho ixkrĩ. Kot kaj mẽ ã amnhĩ nhĩpêx anhỳr o ri apa nê Jejus kot amnhĩ nhĩpêx o amnhĩ nhĩpêx mex o ri apa. Nê aprĩ hã Tirtũm kot amnhĩ nhĩpêx ã omunh mex o mõi. Jao mẽmoj to axpên kutã anojarêt pix o ri apa hprãm. Hãmri nhũm Tirtũm ja hã mẽ apumu nê hkĩnh nê.

¹¹ Tirtũmja mẽ pakurom mẽmoj piitã kaxyw àhpumunh o àhpumunh. Nê mẽmoj piitã kaxyw hihtỳx o hihtỳx. Jakamã na pa hte wa mẽ ato hwỳr o:

—Pa Tirtũm. Kwa tanhmã Koros nhõ xwỳnhjê ho kê mẽ axihtỳx nhỹ hã mẽmoj punuj kutã amnhĩ to htỳx nê. Mẽ kot Jejus ã tanhmã mẽ ho nhũm mẽ kot amnhĩ xà kamã hamak tã kê mẽ tee ri amnhĩ kukamã hamaxpêr o hkaprĩ nê ri pa hkêt nê. ãm anhỹ hã mẽ hkurê xwỳnhjê kutã amnhĩ to htỳx nê hkĩnh kãm ri pa ho pa. Anê.

Na pa hte wa ã mẽ ato hwỳr anê.

¹² Na pre ra Tirtũm amnhĩ ri mẽ pakutêp mẽmoj mex kwỳ jaxwỳ. Mẽ pahpê hkrajê mã haxwỳ. Tã ka mẽ ỹ hã tãm amnhĩ nhĩpêx o apa jao mẽ ate mẽmoj mex jamỳnh mã tãm. Õ krĩ nhĩrã rax kumrêx kamãã. Jakamã kwa mẽ kot Jejus ã tanhmã mẽ pahto htã kêr pu mẽ arĩ Tirtũm mã mex o mex ã harênh rãhã ho ri papa.

¹³ Nê Satanasti kêp kamãt kô kamã mẽ kot amnhĩ tomnuj ho mẽ pa xwỳnhjê pãm. Tãm na hte mẽ ho amnhĩptar o pa nê hkôt na pu prem amnhĩ nhĩpêx o papa rãhã nhũm Tirtũm tee ri ja hã mẽ pahpumu. Hãmri nê kãm kêp mẽ papytar prãm xaj mẽ pahwỳr Kra japê htỳx kumrêx xwỳnhja mẽ. Nhũm mẽ pahwỳr wrỳ nê mẽ panê htyk o mẽ pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwỳ nhũm Tirtũm hã mẽ pahpumu nê mẽ panê mẽ pahte amnhĩ tomnuj o hapêx pa. Te

kot amnhĩ katut kôt rênh par pyrãk. Jao Satanasti pê mẽ pahpytã nhũm hpãnhã Jejusja tãm kêp mẽ pahto amnhĩptar o pa xwỳnh.

¹⁴ Ra htyk o mẽ pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwỳ nhũm mẽ pahte amnhĩ tomnuj o hapêx pu mẽ axte Satanasti hkôt ri amnhĩ nhĩpêx kêt nê. ãm Jejus kôt pix mã amnhĩ nhĩpêx o ri papa.

Kris mẽ Tirtũm wa kot amnhĩ nhĩpêx te wa kot axpên pyrãk ã harênh

Juãw 1.1-5; Korosê 2.9; Eprêw 1.1-14

¹⁵ Nê Krisja te kot Tirtũm pyrãk. Mẽ pahte pano ho Tirtũm pumunh kêt tã Kra Kris kot amnhĩ nhĩpêx ã harênh mar kôt mããnên Tirtũm kot amnhĩ nhĩpêx ã omunh mex nê. Amnepê mã kormã mẽmoj kêt ri nhũm Jejus pa ho pa rãhã nê. Jakamã kot amnhĩ to rax o Tirtũm kot mẽmoj to katorja piitã hakrenh par kumrêx.

¹⁶ Na pre hipêêxã Tirtũm nhỹ hã mẽmoj piitã ho kator pa. Kaxkwa kamã nê pika hkôt mẽmoj piitã ho kator pa. Nê kaxkwa kamã mẽ pahte pano ho mẽmoj pumunh par xwỳnhjaja nhũm pre ho kato. Nê kamã mẽ pahte pano ho mẽmoj pumunh kêt xwỳnhjaja nhũm pre mããnên ho kato. Nê kapêr o wrỳk xwỳnhjaja nê mẽ hkrãhtũmjaja nhũm pre mẽ ho kato. Nê pika kamã mẽ ho amnhĩptar xwỳnhjaja nhũm pre mẽ piitã mẽ ho kator pa. Kãm hprãm xà hkôt Tirtũm nhỹ hã mẽmoj piitã ho kator pa.

¹⁷ Tã na hte arĩ kaxkwa kamã nê pika hkôt mẽmoj piitã hamãr rãhã ho pa. Kêp apu kot hamãr kêt ronhỹx mẽmoj piitã akupỳm hapêx pa.

¹⁸ Nê tãm na hte mẽ pahpê hkrajê ho amnhĩptar o pa. Te kêp mẽ pahkrã nhũm te mẽ pahpê ã pyrãk jakamã na pu htem kapêr kôt pix mã amnhĩ nhĩpêx o papa. Kumrêx na pre akupỳm htĩr o htĩr jakamã kot amnhĩ to rax o mẽmoj piitã hakrenh par.

¹⁹ Nê na pre Tirtũm ã hamaxpêr anê nê hamaxpêr o: “Nã Ixkra mẽ wa ixte amnhĩ nhĩpêxja te kot axpên pyrãk. Nê wa ixihitỳx mããnên te kot axpên pyrãk. Nê wa inhmex xà mẽ wa ixàhpumunhja te kot axpên pyrãk.

Ã wa ixte amnhĩ nhĩpêx kot anhÿr. Wa ixte amnhĩ nhĩpêxja na mex kumrêx.” Anê.

²⁰ Tã Jejus kot pĩ kahpa hã mẽ panê tyk nê hkamrô pikapĩr kukwak ri na hte Tĩrtũm mẽ kot hkôt amnhĩ xunhwÿr xwÿnh piitã mẽ ho hkra nhũm mẽ hamakêtkati nê àmnhĩx pa ho pa. Kaxkwa kamã nê pika piitã hkôt mẽ kot Jejus kôt amnhĩ xunhwÿr xwÿnhjaja na htem ã amnhĩ nhĩpêx mex anhÿr o pa. ã Jejus kot mẽ panê htyk anhÿr jakamã kot amnhĩ to rax o kot mẽmoj piitã hakrenh par.

Jejus kêp tãm mẽ paxunhwÿr xwÿnh ã harênh

²¹ Nê mẽ papajaja na pu prem pamã Tĩrtũm prãm kêt o ri papa. Te hkàx ã ri papa pyrã nê kutã amnhĩ xunhwÿ nê pajamaxpêr punuj nê tanhmã amnhĩ tomnuj to pix o ri papa.

²² Tã Jejus kôt amnhĩ xunhwÿ nhũm amnhĩ tã mẽ pahpumu. Hãmri nê ra mẽ panê htyk jakamã amnhĩ tã mẽ pahpumu nê Tĩrtũm noo mã tãm mẽ paxunhwÿ. Te aa mẽ pahte tanhmã amnhĩ tomnuj to hkêt pyrãk o mẽ panhĩpêx nê tãm mẽ paxunhwÿ. Pu mẽ arĩ pahpê Tĩrtũm kutã amnhĩ xunhwÿr xwÿnh kêt nê hpãnhã pahpê hkrãmnhwÿy.

²³ Na pre Tĩrtũm mẽ pahte amnhĩ kaxyw Kra Kris kôt pajamaxpêr nê hkôt amnhĩ xunhwÿr ã mẽ pahpumunh kôt ã mẽ pahto mex anê. Tã kêt pu mẽ arĩ hkôt amnhĩ nhĩpêx o ri papa nê aa hkaga hkêt nê. Mẽ kot Kris ã tanhmã mẽ pahto htã pu mẽ arĩ hkôt amnhĩ nhĩpêx mex rãhã ho ri papa.

Kormã mẽ kot jar ijaxàr kêt ri na pa pre hte mẽ kãm ã harênh anhÿr o ri mẽ hkôt ixpa. Tã ka prem Jejus jarênh ma nê hkôt amnhĩ xunhwÿr kurê kumrêx. Nhũm krĩ piitã hkôt ri mẽ pa xwÿnh kwÿjaja mẽ apyrã nê harênh ma nê hkôt amnhĩ xunhwÿ nê hkôt amnhĩ nhĩpêx o pa.

Pawre kêp Ijaew kêt xwÿnhjê mã Jejus jarênh xwÿnh ã harênh

Epes 3.1-13

²⁴ Nê ixte mẽ amã Kris kot tanhmã mẽ panê amnhĩ nhĩpêx to hã harênh o ixpaja ã na prem tanhmã ixto htÿx nê pa amnhĩ xà htÿx kãm ijamak o ri ixpa. Tã arĩ Tĩrtũm kãm hprãm xà hkôt ã amnhĩ nhĩpêx anhÿr

jakamã na pa ixkĩnh nê jar ixkrĩ. Ixte Kris kwÿjê kaxyw amnhĩ xà kamã ijamak tÿx o ixkrĩ. Te mẽ apê Kris nhĩ pyrãk xwÿnhjê mãã. Tã pa te ixpê Kris kot amnhĩ nhĩpêx pyrãk o mẽ akaxyw amnhĩ xà htÿx kãm ijamak o ixkrĩ.

²⁵ Na pre Tĩrtũm mẽ apê Ijaew kêt xwÿnhjê kaxyw ixãm. Ixte mẽ amã kapêr piitã harênh par nhũm mẽ ate mar nê hkôt amnhĩ nhĩpêx mex o ri apa kaxyw.

²⁶ Na pre kormã mẽhõ mẽ awÿr mōr nê mẽ amã harênh kêt nê. Tã ra Tĩrtũm kãm mẽ ate mar prãm nê. Kãm mẽ apê Ijaew kêt xwÿnhjê mẽ mẽ pahpê Ijaew xwÿnhjê japê o axpên pyrãk. Nom na pre amnepêm ri mẽ pa xwÿnhjê mã kormã ja hã amnhĩ to amnhĩrĩt kêt nê. Tã ra jarãhã mẽ pahpê Kris kwÿjê mã ja ho amnhĩrĩt. Mããnên kãm mẽ apê Ijaew kêt xwÿnhjê japê hã amnhĩ to amnhĩrĩt.

²⁷ Mẽ apê Ijaew kêt tã na ka prem Kris kôt amnhĩ xunhwÿ nhũm Tĩrtũm Karõ mẽ akarõ mã agjê nê mẽ akamã pa ho pa. Ka mẽ ra hkôt amnhĩ nhĩpêx jakamã kot kaj mẽ ixpyrã nê nhÿrmã kuri atĩr tũm nê amex rãhã ho apa ho apa. Ja na mex kumrêx. Tã ja na Tĩrtũm kãm mẽ ate mar prãm nê mẽ akaxyw ixãm.

²⁸ Jakamã na pa pre Ximotre mẽ wa mẽ apiitã mẽ amã Kris kot mẽ panê tanhmã amnhĩ nhĩpêx to hã harênh kãm ixihitÿx o ri mẽ akôt ixpa. Nê kapêr o mẽ ajahkre ho ri mẽ akôt wa ixpa. Nê jar mẽ hagjênh xà kamã krĩ piitã hwÿr kagã nhĩpêx nê mẽ hwÿr kurê. Mẽ kot kamã harênh nê mar nê amnhĩ tomnuj kaga nê hpãnhã Kris kôt amnhĩ xunhwÿr nê ãm kôt pix mã amnhĩ nhĩpêx o pa kaxyw. Kêt pa nhÿrmã kãm mẽ ate inhmar nê hkôt amnhĩ xunhwÿr xwÿnhjê jahkre nê kãm:

—E Pahihti. Ota akwÿjaja. Na htem akôt amnhĩ nhĩpêx mex rãhã ho ri pa. Anê.

²⁹ ã ixte kãm mẽ piitã mẽ harênh anhÿrja na inhmã hprãm. Ja kaxyw na pre Jejus ixto ixihitÿx. Jakamã na pa hte Tĩrtũm nhÿ hã tanhmã kapêr o mẽ ahkre hto ho ri mẽ hkôt ixpa. Jao mẽ ho Tĩrtũm wÿr o ri ixpa nê mẽ kãm kagã nhĩpêx nê mẽ hwÿr kurê nê kamã kapêr o mẽ ahkre o ri ixpa.

2

Pawre kot Jejus kapêr o Koros nhõ xwýnhjê o hihtýx ã harênh

Epes 3.14-19; Piripos 1.9

¹ E kot paj mẽ amã tanhmã amnhĩ jarênh to ka mẽ inhma. Na pa hte mẽ ato Tĩrtũm wýr rãhã ho ixkrĩ. Mẽ kajaja nẽ krĩ pẽ Ratisej kamã Jejus kõt mẽ pahkwýjaja. Korãmã ixte mẽ apumunh kêt tã pa hte mẽ ato Tĩrtũm wýr kãm ixihkýx ãhã ho ixkrĩ.

² Mẽmo kaxyw na pa hte ã mẽ ato hwýr anê? Nẽ mẽmo kaxyw na pa hte mẽ amã kagã nhĩpêx nẽ mẽ awýr kurê? Nã ãm mẽ ate kamã harênh nẽ mar nẽ Jejus kapêr kõt axpên to axihkýx o ri apa kaxyw. Nẽ mẽ amã axpên kĩnh o ri apa kaxyw. Pê te mẽ ate ixkre tipxi kamã axpên kõt amnhĩ nhĩpêx o ri apa pyrãk. Jao aprĩ hã Tĩrtũm kot amnhĩ nhĩpêx pumunh mex nẽ amnhĩ kaxyw hkõt ajamaxpêr týx nẽ. Kot kaj mẽ ã amnhĩ nhĩpêx anê nẽ Kris kot amnhĩ nhĩpêxta pumunh pa. Na pre Tĩrtũm tokyx mẽ kãm Kris o amnhĩrĩt kêt tã ra mẽ pamã ho amnhĩrĩt.

³ Tĩrtũm kot amnhĩ nhĩpêx nẽ kapêrja na pu htem Kris nhỹ hã pahprĩ hã omunh nẽ mar mex nẽ.

⁴ Jakamã koja mẽmojaja mẽ awýr mra hãmri nẽ hêx rom Tĩrtũm kapêr kwým ri tanhmã mẽ amã mẽmoj jarênh to. Te mẽ ãhpumunh týx pyrãk o mẽ amã harê no ãm mẽ ãhpumunh kêt. Ka mẽ ama nẽ ãm mẽ ama nẽ Kris kaga hkêt nẽ.

⁵ Nẽ kormã arĩ Jejus ã ijaxàr nẽ ixkrĩ nẽ kormã mẽ akõt ixpa hkêt tã ot pa hte mẽ amã ijamaxpêr rãhã ho ixkrĩ. Nẽ ra tanhmã mẽ ajarênh mar to. Na ka xep htem Kris kõt amnhĩ nhĩpêx týx o ri apa. Te ahkrô pẽ kukryt mut kuxêti kot pĩ kupu htýxta pyrãk. Nẽ ka xep htem arĩ amnhĩ kaxyw Kris mã ajamaxpêr týx o ri apa. Pa mẽ ajarênh ma nẽ ixkĩnh týx nẽ.

⁶ Na ka prem Pahihtje Jejus Kris kõt amnhĩ xunhwýr pa. Tã kêr ka mẽ arĩ hkõt amnhĩ nhĩpêx mex rãhã ho apa. Kêp mẽ panhõ Pahihtje kênã.

⁷ Jakamã mẽ ãm kõt pix mã amnhĩ xunhwýr týx nẽ aa hkaga hkêt nẽ. Te mẽmo pĩ hpàr jarêja pika kaxwýnh kãm pimãnh nẽ kot pika jamýnh týxta pyrãk. Nhũm kôk

xàpêr týx tã tee kot mẽnh kaxyw pyrãk. Tã kêr ka mẽ pĩ hpàrta pyrã nẽ hkõt amnhĩ xunhwýr týx nẽ hkõt amnhĩ nhĩpêx mex o ri apa. Ra Epas kot mẽ ajahkre ho pa xà hkõt. Nẽ amnhĩ krãm Kris kapêr jaxàr týx nẽ aa ho ajamakêtkati hkêt nẽ. Pê akĩnh kãm Tĩrtũm mã mex o mex ã harênh rãhã ho ri apa.

⁸ Nẽ kwa kêr ka mẽ kot hêx rom mẽ amã tanhmã kapêr to ho mẽ pa xwýnhjaja ka mẽ amnhĩ nẽ mẽ omunh mex nẽ. Nẽ mẽ kapêr mar hkêt nẽ. Mẽ ate Kris kaga hprãm xaj na htem tanhmã mẽ amã hêx to ho ri mẽ akõt pa. Te amnepêm mẽ kot Tĩrtũm kapêr kwým ri tanhmã mẽ ahkre hto xwýnhjê pyrãk. Hinhu hikôoti kapêr kõt na htem tanhmã mẽ amã hêx to nom Kris nhỹ hã mẽ amã kapêr kêt nẽ. Jakamã kwa mẽ amnhĩ nẽ mẽ omunh mex nẽ.

⁹ Nẽ Kris mẽ Tĩrtũm wa kot amnhĩ nhĩpêx kot axpên pyrãk. Nẽ wa hamaxpêr kot axpên pyrãk.

¹⁰ Tã kêr pu mẽ pajaxwýja wa hamaxpêr o pajamaxpêr nẽ wa kot amnhĩ nhĩpêx o amnhĩ nhĩpêx. Jakamã kwa mẽ kot Tĩrtũm kapêr kwým ri tanhmã mẽ kapêr to xwýnhjê kot amnhĩ nhĩpêx o amnhĩ nhĩpêx kêt nẽ. Nẽ mẽ kapêr ma nẽ ãm mẽ ama. Kris na hihtýx o hihtýx o kot mẽkarõmnuti nhõ pahĩ piitã mẽ hakrenh par. Nẽ hihtýx o hihtýx o kot Tĩrtũm kapêr o mẽ wrýk xwýnhjê piitã mẽ hakrenh par. Nẽ ãhpumunh o ãhpumunh o kot mẽmoj piitã hakrenh par jakamã kêr ka mẽ kapêr kõt pix ma nẽ hkõt pix mã ri amnhĩ nhĩpêx o ri apa.

Mẽ pahte amnhĩ nhĩpêx nyw jarênh

Rõmãn 6.3; Karatas 5.24

¹¹ Nẽ na hte ixkwý Ijaewjaja mẽ hkra nhỹrmã hprêk nẽ Tĩrtũm kõt amnhĩ nhĩpêx ã mẽ harênh kaxyw mẽ kêp mẽmy kwryt kã jakã. Tã mẽ kajaja. Mẽ apê Ijaew kêt xwýnhjaja na pre Kris mẽ anhĩpêx o te mẽ kot amnhĩ jakarta pyrãk. Jao te kot mẽ anê mẽ ate amnhĩ nhĩpêx tũm jakàr par pyrãk o mẽ anhĩpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nẽ mẽ ate Jejus kapêr kõt amnhĩ nhĩpêx ã mẽ apumunh kurê kumrêx.

¹² Tã na pu htem jarãhã mẽ pahte Tĩrtũm kõt amnhĩ nhĩpêx o papa hã amnhĩ jarênh

kaxyw amnhĩ jakàr kêt nê. Na pu htem hpãnhã amnhĩ kaxyw Tĩrtũm xihtỳx o hihtỳx xwỳnhja kôt pajamaxpêr. Kot mẽ panê pahte amnhĩ tomnuj rênh par kôt pajamaxpêr hãmri nhũm mẽ gôx kãm mẽ pahkrã kumrà. Te mẽ pahte gôx kãm mẽ pahte amnhĩ nhĩpêx tũm rer par pyrãk o amnhĩ nhĩpêx. Te Jejus htyk nhũm mẽ kot haxàr nhũm nôr nhũm mẽ pahte amnhĩ tomnujja ìhkô hã nôr nê hapêx par pyrãk. Tã pu htem ra gôj rũm pahkrã hapôj. Te Tĩrtũm kot akupỳm Kris o htĩr pyrãk. Jao ra mẽ pahte Kris kôt amnhĩ nhĩpêx nyw o amnhĩ nhĩpêx o papa hkraax ã amnhĩ to amnhĩrĩt.

¹³ Amnepê m kormã mẽ pahte Jejus kôt amnhĩ xunhwỳr kêt ri na pu prem ri amnhĩ tomnuj to nê tanhmã pajamaxpêr punuj to ho ri papa. Tĩrtũm noo mã te ra mẽ pahtyk pyrãk. Tã Tĩrtũm te akupỳm Kris kôt mẽ pahto pahtĩr pyrãk o mẽ panhĩpêx nê mẽ panê mẽ pahte amnhĩ tomnuj piitã ho hapêx nê axte kãm hamaxpêr kêt kumrêx.

¹⁴ Te mẽ pahte tanhmã amnhĩ tomnuj to ho papa nhũm Tĩrtũm kot ja hã mẽ pahpumunh nê mẽ pahte amnhĩ tomnuj piitã hã kagà hpar pyrãk. Nê kot kagàja pyr nê Kris nhĩhkô hã pĩ kahpa hã nhôr pyrãk. Jao te kot mẽ pahte amnhĩ tomnuj ã kagàta hkaxônh nê rênh par pyrãk o hipêx.

¹⁵ Hãmri nhũm Krisja pĩ kahpa hã htykja o mẽkarômnuti mẽ mẽ õ pahi Satanasti wa mẽ ho hirerek pa. Jao hihtỳx o kot mẽ hakrenh par ã amnhĩ to amnhĩrĩt. Te mẽ kot kutã amnhĩ xunhwỳr xwỳnh piitã mẽ noo mã mẽ ho krihkrit par nê ma akupỳm õ krĩ hwỳr hkĩnh nê grer o môrta pyrãk.

¹⁶ Nê koja mẽmojaja mẽ awỳr mra nê tee ri mẽ ate mẽmoj kur o akrĩ hã mẽ apumu nê mẽ amã:

—Kwa na hte Tĩrtũm kôt mẽ kot amnhĩ xunhwỳr xwỳnhjaja ja kur kêt nê. Nê ja ho hkôm kêt nê. Nê mẽ panhõ arĩgromnu pè sap ã ri mẽmoj tã àpênh kêt nê. Nê mytwrỳ nyw ã mẽmoj tã àpênh kêt nê. Na htem ã Tĩrtũm ã hkĩnh o pa anê. Tã ã mẽ ate mẽ ixkôt amnhĩ nhĩpêx anhỳr kêt jakamã mãn mẽ apê Tĩrtũm kra hkêt nà. Anê.

Tã nom kèr ka mẽ kapêr ma nê ãm ama.

¹⁷ Amnepê m kormã mẽ pahte Kris kôt amnhĩ xunhwỳr kêt ri na pu prem ã amnhĩ

nhĩpêx anhỳr o papa. Tã Jejus kôt amnhĩ xunhwỳr hãmri nê axte ã amnhĩ nhĩpêx anhỳr kêt nê. Pãnhã kapêr pix ma nê hkôt pix mã amnhĩ nhĩpêx o ri papa.

Mẽ pahte mẽ kot Tĩrtũm kapêr o mẽ hêx xwỳnhjê mar kêt ã mẽ pamã karõ

¹⁸ Nê koja mẽmojaja mẽ awỳr mra nê hêx rom tanhmã mẽ amã amnhĩ jarênh to nê mẽ amã:

—Na pre Tĩrtũm ãm mẽ papxipix mẽ inhmã amnhĩ to amnhĩrĩt. Jakamã kwa mẽ ixkapêr ma. Kot kaj mẽ inhmar kêt nê hãmri nê mẽ amex kêt nê apa.

Anhỳr o mẽ amã kapêr japêr ka mẽ ama nê ãm mẽ ma. Rỳ nhũm mẽ amã:

—Tĩrtũm mẽ parom kot amnhĩ to rax o kot mẽ pahpiitã mẽ pajakrenh par jakamã kwa mẽ tanhmã amnhĩ to hwỳr to hkêt nê. Kot ka mẽ anê nhũm mẽ ama nê mẽ akamã gryk nê. No kêt mẽ amnhĩ to kapêr o wrỳk xwỳnhjê mãn wỳ. Koja mẽ ama nê mẽ akamã gryk kêt nê tanhmã mẽ amã mẽmoj nhĩpêx to. Anê.

Koja mẽ ã mẽ amã kapêr anê ka mẽ ama nê ãm mẽ ama. Te ho mẽ àhpumunh tỳx kãm mẽ kot ã mẽ amã kapêr anhỳr pyrãk no ãm mẽ kapêrja mex kêt. Na htem amnhĩ krã hkôt te amnhĩ to rax pyrãk o ã mẽ amã kapêr jao mẽ hamaxpêr tũm o hamaxpêr o ri pa. No mẽ apyrã nê mẽ hamaxpêr nyw o hamaxpêr kêt nê.

¹⁹ ãm mẽ kot Tĩrtũm kapêr kwỳm ri mẽ ahkre jakamã mẽ kèp Jejus kwỳ hkêt. No mẽ papajaja mẽ pahpê Jejus kwỳ na pu mẽ. Nhũm Jejus kèp mẽ panhõ Pahihti jakamã na hte tanhmã mẽ pahto paxihtỳx to pu htem kukwak ri tanhmã axpên to ajuta hto ho ri papa. Nê hkôt axpên to paxihtỳx o ri papa. Mẽ pahpiitã mẽ pahte hkôt amnhĩ nhĩpêx mex o ri papa kaxyw. Tĩrtũm kãm hprãm xà hkôt.

Mẽ pahte amnhĩ krã hkôt tãm amnhĩ nhĩpêx kêt ã mẽ pajarênh

Karatas 3.1-5, 5.1-9; Epes 2.8; Piripos 3.9

²⁰⁻²¹ Nê wam mẽ pahte amnhĩ nhĩpêx tũm nê mẽ pajamaxpêr tũmta te kot Kris kôt htyk nê mẽ pahpê hapêx par pyrãk jakamã na pu htem arĩ hkôt amnhĩ nhĩpêx kêt nê. Nê mẽkarômnuti hkôt amnhĩ nhĩpêx kêt nê. Tã no nhũm xep ra mẽhõja mẽ awỳr mō nê

hêx rom mẽmoj nê tanhmã mẽ amã kapêr to nê mẽ amã:

—Kwa mẽ ja jamÿnh kêt nê. Nê ja hkur kêt nê. Nê ja kupênh kêt nê.

Anhÿr o mẽmoj nê mẽ akurê ho pa. Xep mẽ ã mẽmoj nê mẽ akurê anê ka xep mẽ ama nê mẽ hkôt amnhĩ nhĩpêx. Kwa nã mon ka mẽ ri axtem nê mẽ hkôt amnhĩ nhĩpêx?

²² Tĩrtũm kot mẽmojja nê tanhmã mẽ pahkurê htore hã. ãm mẽ kot amnhĩ krã hkôt mẽmoj nê mẽ akurê ka mẽ ama nê mẽ hkôt amnhĩ nhĩpêx. Mẽmoj kur nê mẽ akurê xwÿnhhta na htem kuku nhũm hapêx kurê kumrêx. Mo koja we Tĩrtũm omu nhũm kêp omnuj? Nã ja kot anhÿr kêt kênã. Mẽ ãm amnhĩ krã hkôt mẽ kot ja nê mẽ akurê.

²³ Tã ã mẽmoj nê mẽ akurê anhÿr xwÿnhjaja na ka htem nhÿri mẽ omu nê mẽ kapêr ma nê atÿx ajamaxpêr o:

—Nã te Tĩrtũm kôt amnhĩ nhĩpêx mex o pa pyrãk. Te mẽ àhpumunh tÿx pyrãk o ã mẽ inhmã mẽmoj jarênh anê. Anê.

No ãm mẽ kot mẽmoj jarênhja kot anhÿr kêt. ã mẽ kot amnhĩ nhĩpêx anhÿr xwÿnhjaja kêp Tĩrtũm kra hkêt. Na htem ãm amnhĩ krã hkôt mẽmoj nê mẽ akurê ho pa. Nê hã amnhĩ to jarkrar o ri pa. Mẽ ate ja hã mẽ mar nê mẽ kot amnhĩ to rũnh ã mẽ hkamnhĩx kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No ãm ri ã amnhĩ nhĩpêx anhÿr kaprÿ. Nê ãm htÿx Tĩrtũm kapêr o mẽ wrÿk xwÿnhjê hwÿr kaprÿ ho pa.

3

Mẽ pajamaxpêr nyw nê mẽ pahte amnhĩ nhĩpêx nyw jarênh

Rômãn 6.4-11

¹ Nê na pre Tĩrtũm akupÿm Kris o htĩr nhũm mẽ pahte hkôt amnhĩ xunhwÿr jakamã te Tĩrtũm kot Kris nhĩpêx pyrã nê akupÿm mẽ pahto mẽ pahtĩr pyrãk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra kaxkwa hwÿr paxãpir nê kamã ri papa pyrãk o amnhĩ nhĩpêx. Jao pajamaxpêr nyw pix o pajamaxpêr nê pahte amnhĩ nhĩpêx nyw pix o amnhĩ nhĩpêx o ri papa. Te Kris

kot amnhĩ nhĩpêx pyrãk. Na pre akupÿm kaxkwa hwÿr api nê Tĩrtũm nhĩhkô hã mẽ ho amnhĩptãr xã kamã hkrĩ ho hkrĩ.

²⁻³ Nê ra mẽ pahte Kris kôt amnhĩ xunhwÿr jakamã te jar pika hkôt pajapêx par nê Tĩrtũm wa kuri kaxkwa kamã pamex nê papa ho papa pyrãk. Jakamã kwa kêr pu mẽ pahte amnhĩ nhĩpêx nyw mã mãn pajamaxpêr rãhã ho papa. Nê axte mẽ pahte amnhĩ nhĩpêx tũm mã pajamaxpêr kêt nê.

⁴ Kris kêp akupÿm mẽ pahto mẽ pahtĩr xwÿnh. Koja nhÿrmã akupÿn mẽ pahwÿr wrÿ hãmri nhũm Tĩrtũm te ho mex raxta pyrãk o mẽ panhĩpêx nê mẽ pahto mex rax kumrêx.

Mẽ pahte akupÿm amnhĩ nhĩpêx tũm o paxujanãr kêt ã mẽ pamã karô

Epes 4.17-5.2

⁵ Jakamã kwa kêr ka mẽ axte ate amnhĩ nhĩpêx tũm kôt amnhĩ nhĩpêx kêt nê. Te ra mẽ apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rÿ axpên prô ho amnhĩkati hkêt nê.

Nê nhãm ri mẽmyjê hõ rÿ mênijê hõ ho amnhĩkati hkêt nê.

Nê mẽ amã tanhmã amnhĩ tomnuj to hprãm kêt nê.

Nê mẽ amã akukrêx rax prãm kêt nê.

Kot ka mẽ ã amnhĩ nhĩpêx anê nê gaa nê akukrêx rax gryk ã axte Tĩrtũm mã ajamaxpêr kêt nê.

⁶ ã mẽ kot amnhĩ nhĩpêx anhÿr xwÿnhjaja Tĩrtũm kãm mẽ hprãm kêt. Koja nhÿrmã tanhmã ja hã mẽ homnuj tÿx to.

⁷ Amnepêm kormã mẽ ate Kris kôt amnhĩ xunhwÿr kêt ri na ka prem ã amnhĩ nhĩpêx anhÿr o ri apa.

⁸⁻⁹ Tã kêr ka mẽ axte ã amnhĩ nhĩpêx anhÿr kêt nê.

Nê mẽ ri axpên kãm agryk o ano hkã karôt o axpên pumunh kêt nê.

Nê mẽ axpên kamã axãhkurê hkêt nê. Ri tanhmã axpên tomnuj to ho apa hkêt nê.

Rÿ axpên jakwa kamã mẽmoj ma nê ri axpên xô ri tanhmã ri axpên mã ho axêx to ho ri apa hkêt nê.

Nê mẽ akapêr mã agêt o ri mẽ kãm akapêr kêt nê.

Nê mẽ ri mẽmoj to axpên mã axêx hkêt nê.
 ã mẽ ate amnhĩ nhĩpêx anhỹr tũmta ra mẽ apê hapêx par kênã.

Mẽ pahte amnhĩ nhĩpêx nyw kôt amnhĩ nhĩpêx ã mẽ pamã karõ

Rõmãn 12.2; Epes 4.23; Wam Pêtre 2.11

¹⁰ Nê na ka mẽ ra mẽ ate amnhĩ nhĩpêx nyw o amnhĩ nhĩpêx o ri apa. Jao ra mẽ pahto kator xwýnh maatija kôt amnhĩ nhĩpêx mex o mõ. Kot kaj mẽ gaa nê rĩ hkôt amnhĩ nhĩpêx mex kumrêx o ri apa. Kãm hprãm xà hkôt.

¹¹ Nê mẽ pahpê Kris kwýjaja ahpýnhã na pu mẽ. Na mẽ pakamã Ijaew nê Ijaew kêt xwýnhjaja. Nê mẽ pakamã panhĩ nê kupê. Nê mẽ kãm àpênh xwýnhjaja nê mẽ kot amnhĩ mã ri àpênh xwýnhjaja. ãm ahpýnhã mẽ pahpê Kris kwýjaja mẽ pahte anhỹr tã na hte Tĩrtũm tanhmã mẽ pakute hkôt mẽ pahpumunh kêt nê. Na hte mẽ panhĩpêx o axpên pyrã nê mẽ pahpiitã mẽ pakamã pa ho pa pu htem pahpimràatã hkôt ri amnhĩ nhĩpêx o papa.

¹² Nê Tĩrtũm kãm mẽ pajapê nê kãm mẽ pajapê xàj mẽ pakukamã amnhĩm mẽ parê. Mẽ pahte kãm tanhmã amnhĩ nhĩpêx to ho ri papa kaxyw mẽ pakukamã mẽ parê.

Jakamã kêt ka mẽ axpên kamã axukapri ho ri axpên kôt apa.

Nê axpên to mex pix o ri axpên kôt apa.

Nê mẽ amã amnhĩ to rax o axpên jakrenh prãm kêt nê.

Nê mẽ ãm amnhĩ pix kukamã ri ajamaxpêr kêt nê. Amnhĩ mẽ nhãm mẽ hkukamã ajamaxpêr o ri apa.

Nê mẽ ri agryk tokyx anhỹr kêt nê.

¹³ Nê koja mẽhõ tanhmã mẽ ato ka mẽ amnhĩ tã omu nê tanhmã amnhĩ tã ho hkêt nê. ãm ja ho ajamakêtkati kurê kumrêx nê axte kãm ajamaxpêr o ri apa hkêt nê. Ra Jejus kot mẽ panê mẽ pahte amnhĩ tomnuj piitã rênh par kênã kot pu kêt mẽ amnhĩ tã tanhmã mẽhõ hto. Tã kêt ka mẽ axpên to mex o ri apa nê amnhĩ tã tanhmã axpên to ho ri apa hkêt nê.

¹⁴ E kêt ka mẽ ã axpên nhĩpêx anhỹr o ri apa. No ãm ja pix kêt. Nê mẽ mãânên amã axpên kĩnh pê axpên kutã anojarêt rãhã nê.

Kot kaj mẽ ã amnhĩ nhĩpêx anê nê mãânên ra ixte mẽmoj tã mẽ amã karõta ka mẽ ho anhỹr mex kurê kumrêx. Mẽ pamã axpên kĩnhja na mex kumrêx o kot mẽmoj piitã hakrenh par.

¹⁵ Nê kêt ka mẽ Kris kukwak ri anhõxàhkre kaxwýnh kãm akĩnh nê ajamakêtkati nê tãm ri axpên nhĩpêx o ri axpên kôt apa. Te ixkre tipxi kamã mẽ ate axpên kôt ri amnhĩ nhĩpêx pyrãk. ã mẽ pahte amnhĩ nhĩpêx anhỹr o papa kaxyw na pre Tĩrtũm amnhĩ wýr mẽ pahwý. Mẽ pahte hkôt amnhĩ xunhwýr kaxyw.

Nê kêt ka mẽ Tĩrtũm mã amnhĩ jarênh kaxyw nê kãm Kra Jejus ã akĩnh ã amnhĩ jarênh o ri apa.

Mẽ pahte Tĩrtũm mã mex ã pagrer ã mẽ pamã karõ

Epes 5.19

¹⁶ Nê kêt ka mẽ Kris kapêr piitã hkôt amnhĩ nhĩpêx mex nê. Nê kapêr o axpên jahkre mex o ri axpên kôt apa. Tĩrtũm kot amnhĩ nhĩpêx o axpên jahkre ho ri axpên kôt apa. Nê kãm agrer o ri apa. Kãm mex o mex ã agrer o ri axpên kôt apa. Nê kãm kukwak ri akĩnh ã amnhĩ jarênh o kãm gre.

¹⁷ Nê kêt ka mẽ Mẽpahpãm Tĩrtũm mã amnhĩ jarênh o:

—Pa Tĩrtũm. Nà ãm hãmri na ka pre mẽ ixwýr Akra Jejus mẽ nhũm mẽ ixwýr wrý nê mẽ inhné ty.

Anhỹr o kãm amnhĩ jarê. Hãmri nê ãm Pahihti Jejus kot amnhĩ nhĩpêx kôt pix mã tanhmã ri amnhĩ nhĩpêx to rý ãm kôt pix mã tanhmã akapêr to ho ri apa.

Tanhmã mẽ pahte axpên nhĩpêx to hã mẽ pamã karõ

Epes 5.22-6.9

¹⁸ Nê mẽ anijaja. Tĩrtũm kot myja kumrêx nhĩpêx nê hkôt kãm hprõ nhĩpêx jakamã kêt ka mẽ amjên ã apijaam o apa. Nê mẽ hamaxpêr mex ã mẽ omu nê mẽ hkôt ri amnhĩ nhĩpêx mex nê. ã mẽ ate amnhĩ nhĩpêxja na Tĩrtũm kãm hprãm.

¹⁹ Nê mẽ amyjaja kêt ka mẽ amã mẽ aprõ japê nê. Te amã amnhĩ tã ma pyrãk o mẽ hipêx o ri apa. Jao tanhmã mẽ homnuj to hkêt nê.

²⁰ Nê mẽ apê mẽ hkrajaja kêt ka mẽ anhĩpêxã nê akatorxà wa hã apijaam nê

wa kapêr ma nê wa hkôt ri amnhî nhîpêx. Æ mē ate amnhî nhîpêx anhÿrja na Tîrtûm kām hprām. Koja Æ mē ate amnhî nhîpêx anhÿr Æ mē apumu nê hkînh nê.

²¹ Nê kêr ka mē apê mē hipêêxà nê mē katorxà mē akra gryk kaxyw mē kām apêr o apikênh kêt nê. Kot kaj mē Æ mē hipêx anê nhûm mē tee ri amnhî tâ mē ama nê hkaprî nê.

²² Nê mē ate mē kām tanhmā amnhî nhîpêx to ho ri mē apa xwÿnhjaja kêr ka mē anhō patrāw kapêr ma nê hkôt amnhî nhîpêx. Nê mē noo mē mē kām tanhmā amnhî nhîpêx mex to nê määnên mē wa kre kamā mē kām tanhmā amnhî nhîpêx mex to. Nom mē kot axàpênh Æ apumunh nê hā kām akînh pix kaxyw axàpênh mex kêt nê. Määnên mē amā Pahihti Kris kînh Æ akatāt kôt mē kām mēmoj tâ axàpênh mex nê. Mē noo mē nê määnên mē wakre kamā.

²³ Nê mē akînh kām mē kām axàpênh mex o ri apa. Te mē ate Pahihti mē akînh kām tanhmā kām amnhî nhîpêx to pyrā nê tām amnhî nhîpêx o tām mē kām axàpênh mex o ri apa.

²⁴ Te mē anhō patrāw pix mē axàpênh pyrāk nom kumā pix mē hkêt. Määnên mē panhō Pahihti Krisja mē. Jakamā kot kaj mē Æ amnhî kaxyw Tîrtûm mē ajamaxpêr pē akînh kām anhō patrāw mē mēmoj tâ apê nhûm Pahihtija ja hā mē apumu nê nhÿrmā mē ato mex rax nê.

²⁵ E kêr ka mē Æ mē anhō patrāw mē axàpênh mex o ri apa anê. No kot kaj mē kapêr kwÿm amnhî krā hkôt ri tanhmā amnhî nhîpêx to nhûm Tîrtûm tee ri ja hā mē apumu hāmri nê nhÿrmā tanhmā hā mē anhîpêx to. Na hte Æ mē kot amnhî tomnuj xwÿnhjê piitā mē hipêx anê nê mē hipêx o axpên pyrāk. Jakamā kwa kêr ka mē anhō patrāw mē axàpênh mex rāhā ho ri apa.

4

¹ Nê mē apê mē ò patrāw kêr ka mē kot mē amā mē àpênh xwÿnhjê ho mex nê tanhmā mē homnuj to hkêt nê. Mē urāk nê kaxkwa kamā mē anhō Patrāw maatija hkrî. Kot mē pahte tanhmā amnhî nhîpêx to nê tanhmā mē pajamaxpêr to hā mē pahpumunh rāhā jakamā kêr ka mē noo mē mē ho mex rāhā ho ri apa.

E kêr ka mē apiitā Æ axpên to mex anhÿr o ri apa.

Mē pahte Tîrtûm mē amnhî jarênh rāhā hā mē pamā karō

Matêwre 7.7; Rukre 11.1-8; Atre 1.14; Epes 6.18

² Nê kêr ka mē xatā Tîrtûm mē amnhî jarênh rāhā ho ri apa. Nê tanhmā mēhō kot amnhî nhîpêx to hā harênh ma nê ho Tîrtûm wÿ. Nê mē ate kām amnhî jarênh kamā kām mex o mex Æ harê.

³⁻⁴ Nê määnên ixto awÿ kê mē tokyx ixka-tor japêr. Pa ixamnhîx mē kot kormā Kris jarênh mar kêt xwÿnhjê mē harênh o ri mē hkôt ixpa. Æ ixte amnhî nhîpêx anhÿrta Æ na prem ixpynê nê ijaxà pa kormā jar ixkrî. Jakamā kwa mē māmri ja hā ixto Tîrtûm wÿr o apa.

Mē pahte apkati mē mē pahkwÿjê mē Jejus jarênh Æ mē pamā karō

Epes 5.16

⁵ Nê kêr ka mē kêp Kris kwÿ hkêt xwÿnhjê hkôt nhÿhÿm ri apa nê tām ri Tîrtûm kapêr kôt amnhî nhîpêx o mē hkôt ri apa.

⁶ Nê kê mēhō awÿr tē nê tanhmā Jejus Æ akukjêr to ka amā hkînh Æ aprî hā kām aw-jarê. Ahpÿnhā tanhmā mē kot hā akukjêr to xà hkôt tanhmā mē kām harênh to kê mēhprî hā mar mex nê.

Pawre kot Koros wÿr Xikitre mē Ones wa mēnh Æ harênh

Epes 6.21-22

⁷⁻⁸ Nê ot pa mē awÿr mē pahtō Xikitre mēnh mē. Kot ma mē awÿr ixte mē amā ixkapêr Æ kagà nhîpêx o mōr kaxyw. Na hte ixkôt Tîrtûm mē amnhî nhîpêx o ri pa. Inhmā hapêê. Tā kot paj mē awÿr kumê kê ma mē awÿr mō nê hprî hā mē amā ijarê. Mē ate ijarênh mar nê tām ajamaxpêr nê akînh kaxyw.

⁹ Mē akwÿ Onesti hkôt koja ma mē awÿr mō. Määnên Kris kôt kêp mē pahtō hā mē pamā hapê xwÿnh na. Na hte Tîrtûm kapêr kôt amnhî nhîpêx mex rāhā ho ri pa. Tā Xikitre mē koja wa ma mē awÿr mō. Hāmri nê mē awÿr pōj nê jar tanhmā mē ixte amnhî nhîpêx to hā mē ijarê ka mē ama.

Kris kôt mē hkwy kot mē hwÿr hpêr mēnh Æ mē harênh

¹⁰ Nê ota Aristakja ixpyrà nê kêp prês nê hkrî. Tã mē awÿr hpêr mē. Nê Panãpe htô Juãw Makreja mãânên mē awÿr hpêr mē. Na pa pre ra mē amã Juãw Makre jarê. Tã koja mēmo arîgro hã akupÿn mē awÿr mör japêr ka mē omu nê ho mex nê.

¹¹ Nê Jejus Justija mãânên mē awÿr hpêr mē. Jajaja mē ixpyrà nê kêp Ijaew. Tã mē tapxipixjaja na htem ixpyrà nê mē ixpê Ijaew kwÿjê rom mē kãm Tirtüm kapêr nyw o mē ahkre ho ri mē hkôt pa. Tirtüm kot Kra Kris kôt mē kot amnhî xunhwÿr xwÿnhjê ho hkra hã harênh nywja na htem mē kãm harênh o ri mē hkôt pa. Pa ja hã mē omu nê ixkînh nê.

¹² Nê mē anhîo Epasja mãânên mē awÿr hpêr mē. Na hte Jejus Kris mã tanhmã amnhî nhîpêx mex to ho pa. Nê mē ato Tirtüm wÿr rãhã ho pa nê mē ato hwÿr o:

–Pa Tirtüm. E kwa tanhmã Koros kamã akrajê ho kê mē akôt amnhî xunhwÿr tÿx nê. Nê amã hprãm xà hkôt pix mã amnhî nhîpêx o ri pa. Nê amnhî kaxyw Kris kôt pix mã hamaxpêr tÿx rãhã nê. Anê.

¹³ ãm hãmri na hte mē ato hwÿr o pa. Nom mē kapxipix o hwÿr kêt nê. Mãânên krî pê Ratisej kamã nê krî pê Jerop kamã Kris kôt mē pahtôjê ho hwÿr o ri pa. Mē ate Tirtüm kôt amnhî nhîpêx mex o apa kaxyw. Ixte ja hã omunh mex.

¹⁴ Nê jar mē pahtô tôtô Rukre mē Têmtija wa mãânên mē awÿr hpêr mē. Tôtô Rukreja kêp ixkrãmnhwÿ mex na.

¹⁵ Nê kêr ka mē krî pê Ratisej kamã Kris kôt mē pahkwÿjê mã ijarê. Nê Nîpare mã nê örkwÿ hwÿr mē pikuprönh nê Tirtüm mã mex o mex ã harênh o mē hkrî xwÿnhjê mã mãânên ijarê.

¹⁶ Nê e kêr ka mē ixte mē awÿr kagã mênhja kamã harênh pa nê hpãnhã krî pê Ratisej kamã Kris kôt mē pahkwÿjê hwÿr amê kê mē apyrà nê kamã harê nê piitã kuma. Nê mē kãm anê kê ra ixte mē hwÿr kagã mênh xwÿnhhta kê mē amã kugõ ka mē kuxwar kamã harê nê ama.

¹⁷ Nê kêr ka mē Akip mã ijarê kê ra Tirtüm kot kãm mēmoj tã karõ xwÿnhhta kê ho anhÿr jatur xãm kumê. Kêp hkra hã kê tãm kãm ápênh jatur xãm kumê.

¹⁸ Tã ãm ja pix. E paj pam amnhî nhîhkra ho hatur xà hã kagã. Mē ate ixte mēmoj

tã kagã pumunh nê hkôt inhmã ajamaxpêr kaxyw. Nê ixte mē awÿr mênh ã ijarênh mar kaxyw. Kwa kêr ka mē arî ixpê prês ã ixto Tirtüm wÿr rãhã ho ri apa.

E kê Tirtümja mēmoj to mē akutã nojarêt nê mē ato mex nê ka mē amex nê aja-makêtkati nê apa ho apa. Tã ãm ja pix. Ixpê Pawre na pa mē awÿr kagãja nhîpêx nê ã mē awÿr mênh anê.

Wam Tesarõn Pawre kot Tesarõn kamã Jejus kõt hkwýjê hwýr kagà nê mēnh

Pawre na pre kagàja nhîpêx. Kêp Jejus nhÿ hã mē ahkre ho pa xwýnhjê hõ na pre. Jakamã na pre kagàja nhîpêx nê ma krî pê Tesarõn kamã Jejus kõt hkwýjê hwýr kumê. Tesarõn kamã Jejus ã kãm mē hkurê xwýnhjaja na prem Jejus ã mē homnuj o pa nhũm mē amnhî xà htýx kamã hamak o pa. Hãmri nhũm Pawre mē harēnh ma nê kagàja nhîpêx nê mē hwýr kumê. Kot mē kãm mē hamaxpêr o hihtýx kaxyw mē kot arî Jejus kõt amnhî nhîpêx mex o pa nê aa hkaga hkêt ã mē kãm karõ. Nê nhÿrmã Jejus akupÿn kaxkwa rùm mē pahpê hkwýjê hwýr wrýk nê ma akupÿm amnhî kõt mē pahto àpirja nhũm mē kãm harê. Æ na pre mē kãm mēmoj jarê nê hã kagà anê nê mē kãm:

¹ Pa mē apê Tesarõn kamã Jejus kwý hã axpên wýr mē apikuprõnh xwýnhjaja? Xà mē amex na ka mē apa? Ixpê Pawre na pa mē awýr kagàja nhîpêx nê mē awýr kumê. Siras mē Ximotre mē pa mē awýr kumê. Mē pahpê Mēpanhîpêxà maati Tirtùm mē Pahihti Jejus Kris wa hkwý jakamã na pa htem mē ato Tirtùm wýr rãhã ho ri ixpa. Kot mē akutã nojarêt rãhã nhũm mē ajamakêtkati nê axãmnhîx mē apa kaxyw.

²⁻³ Nà mēmoj kêt. Na pa htem mē amã ijamaxpêr nê mē anhÿ hã ixkînh nê ixpa hãmri nê mē awýr kagàja mē. Na pa htem mē ato Tirtùm wýr rãhã ho ri ixpa nê kãm mē ajarēnh o:

—Pa Tirtùm. E mãn ka Tesarõn kamã akrajê pumu. Æm hãmri na ka pre tanhmã mē hkrã hto nhũm mē akõt amnhî nhîpêx mex o pa. Na htem amnhî kaxyw akõt hamaxpêr tÿx nê. Jao mē piitã mē kamã ukapri kamã tanhmã mē ho ajuta hto ho pa. Nhũm mē kãm mē ixkurê xwýnhjaja Pahihti Jejus Kris ã tanhmã mē ho ho pa htã nhũm mē tee ri amnhî kukamã hamaxpêr o hkapri nê Jejus mē war akaga hkêt nê. Arî war anhÿ hã amnhî to htýx nê Pahihti

Jejus kutêp tanhmã kãm amnhî nhîpêx to ho pa. Æm hãmri na htem ã amnhî nhîpêx anê Tirtùm. Na pa htem mē kot ã amnhî nhîpêx anhÿrja mã ijamaxpêr nê ixkînh nê.

Anhÿr o pa htem mē ato kuwý.

⁴ E Kris kõt ixkwýjaja. Nà Tirtùm kãm mē ajapê jakamã na pre amnhîm mē arê. Kot mē ato hkra nhũm nhÿrmã kuri mē amex nê atir tùm nê apa ho apa kaxyw. Ra mē ixte ja hã mē ajarēnh mar mex.

Mē piitã mē kot Tesarõn nhõ xwýnhjê jarēnh mar ã mē harēnh

⁵ Nê na pa prem ma mē awýr mō nê mē amã Jejus jarēnh o mē akõt ixpa. Kot mē panê tanhmã amnhî nhîpêx to hã harēnh o ri mē akõt ixpa. Nom pa mē amnhî krã hkõt mē amã ixujarēnh kêt nê. Æm Tirtùm Karõ nhÿ hã na pa prem hihtýx xà ho tanhmã mē amã ixkapêr to ka prem mē inhma nê mē ixkõt ajamaxpêr kurê kumrêx. Na pa prem tãm amnhî nhîpêx o ri ixpa ka mē ja hã mē ixpumunh o ri mē ixkõt apa.

⁶ Tã Jejus kõt amnhî xunhwý nê hkõt amnhî nhîpêx mex nê. Nê mē ixkõt amnhî nhîpêx mex nê. Mē kot Jejus ã tanhmã mē ato htã ka htem Tirtùm Karõ nhÿ hã akînh nê hkõt amnhî nhîpêx mex rãhã ho ri apa.

⁷ Tã nhũm pika pê Masetõn mē Gres wa kamã Jejus kõt mē pahkwýjaja ã mē ate amnhî nhîpêx anhÿr ã mē ajarēnh ma nê mē apyrã nê ã amnhî nhîpêx anhÿr o pa.

⁸ Na ka prem tanhmã Jejus kot mē panê amnhî nhîpêx to hã harēnh o ri mē hkõt apa nhũm mē piitã mē akapêr ma. Nom mē tapxipixjaja mar kêt nê. Na mē ra ohtõ nê mē ajarēnh ma nê mē apyrã nê ma mē kãm Jejus jarēnh o pa. Ra mē ate Jejus kõt amnhî xunhwýr ã amnhî jarēnh o ri apa nhũm mē piitã kot mē amar jakamã mē pajaja na pa htem mē kãm ã mē ajarēnh anhÿr kêt nê. Mo kaxyw? Ra mē kot mē ajarēnh mar mex kênã.

⁹ Na pa htem nhÿri krî hõ hwýr pøj nhũm mē ixpumu nê ra mē tãmjaja mē inhã mē ajarēnh kurê kumrêx. Nê mē ajarēnh o:

—Kwa Tesarõn kamã Kris kõt mē pahkwýjaja na xep kãm mē akînh nê. Amnepê m na pre htem amnhîm sãnti nhîpêx nê kêp mēhpãm ã harê nê amnhî to hwýr o pa. Tã ka xep prem ma mē hwýr mō

nê mẽ kãm Tĩrtũm kapêr jarê nhũm mẽ ama nê Tĩrtũmja sãnti rom ãm hãmri hã omunh kurê kumrêx. Hãmri nê gryk ã sãnti kaga hpa nê Tĩrtũm kôt amnhĩ xunhwỳ nê hkôt pix mã amnhĩ nhĩpêx mex o pa.

¹⁰ Nê amnhĩ wỳr Tĩrtũm Kra kamã hamak rãhã ho ri pa. Anê.

Ãm hãmri na ka htem amnhĩ wỳr kamã hamak rãhã ho apa. Na pre ty nhũm Hipêêxà Tĩrtũm akupỳm ho htĩr. Tã koja nhỹrmã akupỳn mẽ pahwỳr kumê nhũm akupỳn mẽ pahwỳr wrỳ. Hãmri pu mẽ ãm pix kukwak ri mẽ kot amnhĩ xà htỳx kãm hamak o pa htũm xàta wỳr papa hkêt nê.

2

Pawre kot amnhĩ jarênh

Sikũn Korĩt 1.12, 4.1-6

¹⁻² Nê kormã mẽ awỳr mẽ inhmõr kêt ri na pa prem kormã Piripos nhõ xwỳnhjê mã Tĩrtũm kapêr jarênh o ri mẽ hkôt ixpa. Nom nhũm mẽ hkwỳjaja kãm mẽ inhmar prãm kêt nê. Na prem Jesus ã mẽ inhmã kapêr punuj nê mẽ inhĩpêx kati pa prem amnhĩ xà htỳx kamã ijamak o mẽ hkôt ixpa. Na ka prem ja hã mẽ ijarênh ma. ã mẽ kot mẽ inhĩpêx anhỹr tã pa mẽ tee ri amnhĩ kukamã ijamaxpêr pê Tĩrtũm kapêr jarênh kaga hkêt nê. Na pa prem arĩ mẽ kãm Jesus kot tanhmã mẽ panê amnhĩ nhĩpêx to hã harênh o ri mẽ hkôt ixpa. Tã mẽ awỳr inhnojarêr nê Tĩrtũm nhỹ hã amnhĩ to htỳx nê ma mẽ awỳr mõi. Hãmri nê mẽ amã tanhmã Jesus jarênh to ho ri ixpa. Ka prem mẽ inhma hãmri nê axohtõ nê hkôt amnhĩ xunhwỳ.

³ Nom pa prem ixêx rom tanhmã mẽ amã ixkapêr to hkêt nê. Rỳ mẽ inhmã mẽmoj prãm xàj mẽ ano kupyrr pê mẽ amã ixkapêr kêt nê.

⁴ Rỳ mẽ ate mẽ ixkapêr mar nê mẽ inhmex ã mẽ ijarênh kaxyw pa tanhmã mẽ amã ixkapêr to hkêt nê. ãm Tĩrtũm kot mẽ inhmar nê tapxipix mẽ inhmex ã mẽ ijarênh pix prãm xàj na pa prem mẽ amã kapêr jarênh o ri mẽ akôt ixpa. Tĩrtũm tapxipix na hte tanhmã mẽ pakute hkôt mẽ pahpumunh rãhã ho pa. Tãm na pre mẽ ixte kapêr jarênh o ri ixpa kaxyw mẽ ixunhwỳ.

⁵ Xàn pa prem mẽ ijakwa nhĩkjê ho mẽ ate tãm amnhĩ nhĩpêx ã mẽ ajarê hãmri nê mẽ ijakwa nhĩkjê ho mẽ ato ixkapêr punuj nê? Nà na pa prem ã amnhĩ nhĩpêx anhỹr kêt nê. Na pa prem ixkatat kôt mẽ ate amnhĩ nhĩpêx ã mẽ apumunh kôt tanhmã mẽ ajarênh to ho ri ixpa.

Nê xà mẽ ate mẽ ixkapêr mar nê akĩnh nê hpãnhã mẽ inhmã amnhĩrer kaxyw na pa prem mẽ awỳr mõi nê mẽ amã Jesus kapêr o mẽ ajahkre? Nà na pa prem kàxpore prãm xàj mẽ amã ixkapêr kêt nê. Tĩrtũm kot ja kôt mẽ ixpumunh mex.

⁶ Rỳ xà mẽ ate mẽ inhmex ã mẽ ixto jarkrar kaxyw na pa prem mẽ awỳr mõi? Nà mãnênh ja kaxyw kêt. ã mẽ ate mẽ ijarênh anhỹr prãm xàj na pa htem Tĩrtũm kapêr o mẽ ajahkre ho ri ixpa hkêt nê.

⁷ Rỳ xàn pa pre mẽ awỳr mõi nê mẽ amã amnhĩ jarênh o:

–E mẽ ixte Jesus nhỹ hã ixkapêr o ixpa xwỳnh jakamã kot paj mẽ amã tanhmã ixkapêr to ka mẽ inhma nê hpãnhã mẽ inhmã amnhĩre.

Anhỹr o mẽ amã ixkapêr? Nà na pa pre ã mẽ amã ixkapêr anhỹr kêt nê. Na pa prem te mẽ katorxà kot hkrajê nhĩpêx pyrak o mẽ anhĩpêx nê amarĩ mẽ ajahkre ho ixpa nê mẽmoj tã mẽ awỳr kêt nê.

⁸ Mẽ inhmã mẽ akĩnh jakamã na pa prem mẽ amã ixprĩ hã Tĩrtũm kapêr piitã harênh par o mẽ akôt ixpa nê mẽ kot ja hã tanhmã mẽ ixto pymaj tee ri amnhĩ kukamã ijamaxpêr o ri ixkaprĩ hkêt nê. ãm ixãmnhĩx ri tanhmã Jesus kot mẽ panê amnhĩ nhĩpêx to hã harênh o mẽ akôt ixpa.

⁹ Mẽ apê mẽ ixkwỳ jakamã na pa prem tanhmã mẽ amã ixkapêr to hpãnhã mẽ ixàpkur xà rỳ mẽmoj tã mẽ awỳr kêt nê. Na pa prem mẽ pamjaja mẽmoj tã ixàpênh pê mẽ amã ixkapêr o ri ixpa. Nê ixàpênh rũnh kumrêx. Arĩgro hã nê kamàt kãm. Mãn arĩ mẽ ate ã mẽ ixte amnhĩ nhĩpêx anhỹrja ã anohtỳx japêr ko.

¹⁰ Na pa prem tãm amnhĩ nhĩpêx o mẽ akôt ixpa. Tĩrtũm kãm hprãm xà hkôt. Jao tanhmã amnhĩ to mex to rãhã ho ri ixpa ka prem amnhĩ tã mẽ ixpumu. Nhũm Tĩrtũm haxwỳja ja hã mẽ ixpumu.

11 Na pa pre mẽ apê mẽ ixkra pyrək mẽ anhîpêx o ri mẽ akôt ixpa.

12 Jao mẽ amã ixkapêr mex nê. Nê mẽ akaprî nê apa xwýnhjaja pa prem akupým mẽ ajamxpêr o mẽ axihtýx hãmri nê mẽ apiitã mẽ amã ixkapêr nê mẽ amã:

—Kwa kêr ka mẽ Tirtüm kôt amnhî nhîpêx mex rãhã ho ri apa nê aa hkaga hkêt nê. Anê.

Tirtüm tãm na pre amnhî wýr mẽ pahwý pu prem hkôt amnhî xunhwý. Tã koja nhýrmã amnhî wýr mẽ pahto api pu mẽ Kra Jejus kukwak ri wa kuri pamex kumrêx nê ri papa ho papa. Jakamã kwa kêr ka mẽ hkôt amnhî nhîpêx mex rãhã ho ri apa.

Jejus kwýjaja kãm Jejus kôt amnhî xunhwýr hkêt xwýnhjê pýma hkêt
Atre 17.1-9

13 Nê ma mẽ awýr mẽ inhmõrta ã na pa prem mẽ amã Tirtüm kapêr jarênh o ri mẽ akôt ixpa ka prem mẽ inhma nê mẽ ixte amnhî krã hkôt mẽ ixkapêr ã mẽ ixkamnhîx kêt nê. Na ka prem ãm hãmri mẽ ixte Tirtüm kapêr jarênh ã mẽ ixpumunh kurê kumrêx nê amnhî kaxyw hkôt ajamxpêr nê Jejus mẽ Hipêêxã wa hkôt amnhî xunhwý. Jakamã na pa hte mẽ amã ijamxpêr nê mẽ anhý hã ixkînh nê. Hãmri nê Tirtüm mã mẽ anhý hã ixkînh jarênh o ri ixpa. Nã na ka htem arî Tirtüm kapêr kôt amnhî nhîpêx mex nê.

14 Nhũm hte mẽ akwýjaja tee ri ja hã mẽ apumu nê Jejus ã mẽ atomnuj nê. Nom mẽ kapxipixjaja ã mẽ anhîpêx anhýr kêt nê. Jutej kamã Ijaew kwýjaja na prem mẽ apyrã nê Jejus kôt amnhî xunhwý nhũm mẽ hkwýjaja tee ri ja hã mẽ omu nê hã mẽ hipêx kati ho pa.

15 Amnepêm Ijaew na prem Tirtüm nhý hã mẽ kãm kapêr o mẽ pa xwýnhjê homnuj nê mẽ hkwyjê hpar o pa. Hãmri nhũm hpãnhã mẽ hkanrêhã mẽ htãmnhwýjaja mẽ urak nê Pahihti Jejusja pî. Tã jarãhã mããnên ã Jejus ã mẽ panhîpêx anê nhũm Tirtüm tee ri mẽ pahtã mẽ omu nhũm ja kêp omnuj týx kumrêx nhũm mẽ pahtã mẽ kamã gryk nê.

Na hte mẽ apê Ijaew kêt xwýnhjê ho hkra nhũm Ijaew kãm ja prãm kêt

16 jakamã na htem mẽ akwý kot Tirtüm kôt amnhî xunhwýr pýmaj mẽ anê mẽ ixkurê nê mẽ inhmã:

—Kwa Ijaew kêt xwýnhjê mã Tirtüm kapêr jarênh kêt nê. Ja mex kêt. Anê.

Mê ate Jejus kôt amnhî xunhwýr nê nhýrmã Tirtüm wa kuri atír tùm nê apaja mẽ kãm hprãm kêt jakamã na htem ã mẽ anê àmnar o pa anhýrja o amnhî tomnuj nê. Mẽ kot amnhî tomnuj týx o mẽ pa xwýnh jakamã na Tirtüm mẽ kamã gryk nê. Koja nhýrmã mẽ kot amnhî xà htýx kamã hamak tùm xà hwýr mẽ rênh pa.

Pawre akupým Tesarōn nhõ xwýnhjê hwýr hkrã hã harênh

Atre 17.10-13

17 Nê ma mẽ awýr mẽ inhmõr tã mẽ anhõ krî kamã mẽ kêp Kris kwý hkêt xwýnhjaja na pre mẽ ixpumu nê mẽ anê mẽ ijano pa prem ijapôj nê hpãnhã ma nhýhým krî hõ hwýr ixpa. Nom arî mẽ amã ijamxpêr rãhã nê mẽ ato ijamak o ri ixpa nê xatã akupým mẽ awýr ixkrã.

18 Na pa prem inhmã akupým mẽ awýr inhmõr prãm týx nê. Ixpê Pawre na pa pre xatã mẽ awýr ixkrã htã nhũm Satanasti tanhmã mẽ anê ixpê amnar to pa kormã mẽ awýr inhmõr kêt nê. ãm tee ri inhmõr prãm kaprý.

19-20 Mẽ inhmã mẽ akînh týx. Mẽ ate Tirtüm kôt amnhî nhîpêx mex jakamã koja nhýrmã Pahihti Jejus akupým mẽ pahwýr wrý pa mẽ akuri xa nê kãm mẽ ajarênh o:

—Pa Pahihti. E Tesarōn nhõ xwýnhjê pumu. Na ka pre mẽ hwýr inhmẽ pa mẽ hwýr mõ nê mẽ kãm ajarê nhũm prem inhma nê amnhî kaxyw akôt hamxpêr týx nê akôt amnhî xunhwý. Tã na htem akôt tãm amnhî nhîpêx rãhã ho pa.

Anhýr o kãm mẽ ajarê nê mẽ anhý hã ixkînh týx kumrêx.

3

Pawre kot Tesarōn wýr Ximotre mênh ã harênh

Atre 17.14-15, 18.5

1-5 Nê kormã mẽ akôt ixpa ri na pa pre Kris kwý hkêt xwýnhjaja kot Kris ã tanhmã mẽ atomnuj to hkukamã mẽ amã mẽ harê ka prem mẽ inhma. Na htem ã Kris ã

mē pahkurê xwýnhjaja mē panhîpêx anhÿr o pa. Tã nhÿm prem ã mē anhîpêx anê pa mē ajarênh ma nê tee ri mē akukamã ijamaxpêr nê axpên mã mē ajarênh o:

—Hêxta waa nê. Kwa mē kot Jejus ã tanhmã mē homnuj toja mÿrapê mãn mē tee ri amnhî kukamã hamaxpêr nê Jejus kaga rÿ ko. Mãn ra Satanasti tanhmã mē kãm Jejus o hêx to nhÿm mē kuma nê tanhmã hamaxpêr to nê hkaga. Kwa mãn pu prem ãm mē kãm Tirtÿm kapêr jarênh kaprÿ nà? Anê.

Hãmri nê tee ri mē akukamã ijamaxpêr nê mē awÿr Ximotre mênh kaxyw nê kãm:

—Mãn ra Tesarōn nhō xwýnhjaja Jejus ã tanhmã mē homnuj to nhÿm mē amnhî xà htÿx kamã hamak o ra tee ri amnhî kukamã hamaxpêr. Kwa ma mē hwÿr mō nê ja hã mē omu. Hãmri nê mē kot Kris kôt amnhî xunhwÿr tÿx kaxyw mē hamaxpêr o axihtÿx. Hãmri nê akupÿn wa ixwÿr mō nê wa inhmã tanhmã mē harênh to. Kot paj Siras mē wa akutêp jar Atenas kamã wa arîk. Anê.

Hãmri nê mē awÿr kumê. Ximotre na hte Siras mē wa inhîhkô hã mē kãm Tirtÿm kapêr jarênh o pa. Nê Kris kot tanhmã mē panê amnhî nhîpêx toja nhÿm wa inhîhkô hã mē kãm harênh o pa. Tã pa pre mē awÿr kumê nhÿm ma mē awÿr mō pa Siras mē wa Atenas kamã kutêp arîk.

Ximotre akupÿn mōr nê Pawre mã mē harênh

⁶ Tã nhÿm ra ham akupÿn mē arÿm wa ixwÿr mō nê wa inhmã tanhmã mē ajarênh to pa wa mē ajarênh ma nê ixkînh nê. Na ka xep htem arî amnhî kaxyw Kris kôt ajamaxpêr tÿx rãhã nê. Jao mē amã mē piitã mē hkînh nê tanhmã mē ho mex to ho ri apa. Nê arî mē inhmã ajamaxpêr nê ixpyrà nê mē amã mē ixpumunh prãm o ri apa.

⁷ Nã ãm hãmri na ka htem ã amnhî nhîpêx anê. Na pa wa ra jar ixpunuj nê ixpa nê Kris ã amnhî xà htÿx kamã ijamak tã mē ajarênh ma nê tãm ijamaxpêr.

⁸ Tesarōn nhō xwýnhjaja kot Kris ã tanhmã mē anhîpêx to htã ka mē arî hkôt amnhî xunhwÿr tÿx rãhã nê. Pa wa mē ajarênh ma nê mē anhÿ hã ixkînh pè

tanhmã Pahihti Jejus mã amnhî nhîpêx to ho ri ixpa.

⁹ Nã na pa hte wa mē anhÿ hã ixkînh nê. Nê xatã Tirtÿm mã mē ajarê nê kãm:

—Pa Tirtÿm. Nã ãm hãmri na ka pre amnhî kôt Tesarōn kãm akwÿjê xunhwÿr tÿx nê nhÿm htem akôt amnhî nhîpêx mex rãhã ho pa. ãm hãmri na ka hte ã mē hipêx anê. Na pa hte mē kot amnhî nhîpêx mã ijamaxpêr o ri ixpa nê ixkînh nê.

Anhÿr o kãm mē ajarê.

¹⁰⁻¹¹ Nom kãm ja pix jarênh kêt nê. Na pa hte wa mãânên arîgro hã nê kamàt kãm amnhî to Mēpanhîpêêxà Tirtÿm mē Pahihti Jejus Kris wa hwÿr kãm ixihtÿx rãhã ho ixpa nê wa kãm:

—Kwa Tirtÿm mē Jejus wa. Na pa wa ra inhmã Tesarōn wÿr inhmōr nê mē pahkwÿjê pumunh prãm tÿx nê. Kormã mē kot akapêr jatur xà mar kêt. Tã wa inhmã akupÿm mē hwÿr wa inhmōr nê mē kãm akapêr jatur xàm mênh prãm. Mē kot mar nê akôt amnhî nhîpêx mex o pa kaxyw. Kwa xat ka wa akupÿm mē hwÿr wa inhmê nà? Anê.

Na pa hte wa ã amnhî to wa hwÿr rãhã ho ixpa anê. Tã koja wa akupÿm mē awÿr wa inhmê pa wa ma mē awÿr inhmōr kurê kumrêx.

¹² Koja Tirtÿm tanhmã mē akrã hto ka mē amã axpên kînh pè tanhmã axpên to ajuta hto ho ri apa. Nê mē amã akwÿjê hã ma ho te mē kam amã amnhî tã ma pyrãk o ri apa. ã kot kaj mē apiitã axpên nhîpêx anê. Te wa inhmã mē akînh pè tanhmã mē ato mex to pyrãk.

¹³ Koja Tirtÿm ja kaxyw tanhmã mē akrã hto ka mē tãm ajamaxpêr mex nê. Kêr kê Jejus nhÿrmã akupÿn wrÿ. Mē kot hkôt amnhî xunhwÿr xwýnhjê mē ro hã akupÿn wrÿ. Hãmri ka mē Mēpanhîpêêxà Tirtÿm kutã amnhî kukamã ajamaxpêr nê tãm mē ate amnhî nhîpêx ã amnhî pumunh kôt akînh nê apikunhar o kuri akuhê. No ri tee ri amnhî kamã ajamaxpêr nê ajakwamna-jre nê akuhê hkêt nê.

4

Tirtÿm kãm mēmoj prãm ã harênh Rōmãn 13.11-14; Êpes 5.3-14

¹ E Jejus kôt ixkwýjaja. Na pa prem ma mẽ awýr mõi nẽ Tirtũm kapër o mẽ ajahkre ho ri mẽ akõt ixpa. Mẽ ate mar nẽ Tirtũm kãm hprãm xà hkõt tanhmã amnhĩ nhĩpêx to kaxyw. Ka prem mẽ inhma nẽ hkõt amnhĩ nhĩpêx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhỹ hã axte mẽmoj tã mẽ amã karõ. Jakamã kwa kêr ka mẽ arĩ Tirtũm kapër kõt pix mã ri amnhĩ nhĩpêx mex nẽ ý hã amnhĩ to htýx pẽ ã amnhĩ nhĩpêx anhýr o ri apa.

² Na pa prem ra Jejus nhỹ hã mẽ amã mẽmoj tã karõ. Mẽ ate hkõt amnhĩ nhĩpêx prãm xàj mẽ amã hã karõ ka prem mẽ inhma.

³ Nã mẽ pahte tãm amnhĩ nhĩpêx o papaja na Tirtũm kãm hprãm. No kêt mẽ pahtýx ri nhãm mēnijê ho amnhĩkati o papaja na kãm hprãm kêt.

⁴ Jakamã kwa kêr ka mẽ amyjaja aprõ pix tãnopxar o ri apa. No mẽ ri nhãm mēnijê ho amnhĩkati ho ri apa hkêt nẽ. Nẽ mẽ anijaja kêr ka mẽ amjên pix tãnopxar o ri apa. No mẽ ri nhãm mẽmyjê ho amnhĩkati ho ri apa hkêt nẽ.

⁵ Jejus kwý hkêt xwýnhjaja kot htýx ri kãm hprãm xà hkõt mēnijê hwýr mrrar nẽ mẽ ho amnhĩkati htã kêr ka mẽ ho mẽ uràk kêt nẽ. Kwarĩ ho kwarĩ.

⁶ ã mẽ kot amnhĩ nhĩpêx anhýr xwýnhjaja koja Tirtũm nhỹrmã mẽ homnuj týx kumrêx. Na pa prem ra mẽ amã ja jarê ka prem mẽ inhma. Jakamã kwa kêr ka mẽ ã amnhĩ nhĩpêx anhýr o ri apa hkêt nẽ.

⁷ Xà na pre Tirtũm ã mẽ pahte amnhĩ nhĩpêx anhýr kaxyw amnhĩ wýr mẽ pahwý nẽ mẽ pahto hkra? Nã ja kaxyw na pre mẽ pahto hkra hkêt nẽ. ãm mẽ pahte tãm amnhĩ nhĩpêx o ri papa kaxyw nẽ tãm ri axpên nhĩpêx o ri papa kaxyw na pre mẽ pahto hkra.

⁸ Jakamã kot kaj mẽ atõ ja hã mẽ inhma nẽ ãm mẽ inhma nẽ arĩ ã amnhĩ nhĩpêx anê. Hãmri nẽ mẽ pajaja mẽ ixkapër nhĩrõp axãm kêt nẽ. Tirtũm kapër nhĩrõp kot kaj xa. Nẽ mãnẽn kot mẽ pahwýr Karõ mēnh xwýnhja kapër nhĩrõp kot kaj xa.

⁹ Nẽ mẽ amã axpên kĩnh pẽ axpên to mex o apa hprãm xàj na pre Tirtũm tanhmã mẽ amã kapër o amnhĩrit to ka htem ã axpên nhĩpêx anhýr o ri apa. Jakamã kot paj mẽ

axte ja hã tanhmã mẽ amã nẽ hkêt nẽ.

¹⁰ Na ka mẽ ra amã axpên kĩnh pẽ te mẽ kam amã amnhĩ tã ma pyràk o axpên nhĩpêx o ri apa. Nẽ pika pẽ Masetõn kamã Kris kõt mẽ akwýjaja ka mẽ mãnẽn amã mẽ hkĩnh pẽ ã mẽ hipêx anê. Tã kêr ka mẽ arĩ ã amnhĩ nhĩpêx anhýr rãhã nẽ.

¹¹ Kot kaj mẽ ã amnhĩ nhĩpêx anê hãmri nẽ ajamakêtkati nẽ axãmnhĩx axápênh pix tãnopxar o ri apa. Jao mẽ hakwa kamã nhãm tanhmã mẽ hixi jarênh to ho ri apa hkêt nẽ. Nẽ ãm amnhĩ pix tãnopxar o ri apa. Nẽ amnhĩ pa kukwak ri axàpkur kaxyw amnhĩm axápênh mex o ri apa. Na pa prem ra ã ja hã mẽ amã karõ anê.

¹² Kot kaj mẽ ã amnhĩ nhĩpêx anê hãmri nẽ amã prãm xàj axàhwýr o ri apa hkêt nẽ. Nhũm Kris kwý hkêt xwýnhjaja mẽ ate amnhĩ nhĩpêx ã mẽ apumu nẽ axpên mã mẽ ate tãm amnhĩ nhĩpêx xwýnhjê hã mẽ ajarênh kurê kumrêx.

Kris kwý htyk xwýnhjê jarênh

Matêwre 24.29-31; Wam Korĩt 15.51-58

¹³ E Kris kõt ixkwýjaja. Na ka xep mẽ tee ri Kris kõt akwý htyk xwýnhjê hkukamã ajamaxpër. Jakamã kot paj ixprĩ hã tanhmã mẽ amã mẽ harênh to ka mẽ inhma. Nã Kris kwý hkêt xwýnhjaja na htem ty nhũm mẽ hkwyjaja tee ri mẽ hkukamã hamaxpër o hkaprĩ nẽ. Mẽ htyk nẽ ma Jejus wýr àpir kêt jakamã na htem mẽ mýr pẽ hkaprĩ htýx nẽ pa. No mẽ papajaja na pu htem ho mẽ uràk kêt nẽ.

¹⁴ Jejus na pre ty nhũm Tirtũm akupým ho htĩr. Tã ra ã kot hipêx anhýr jakamã koja nhỹrmã Jejus akupýn wrý nẽ mẽ kot hkõt amnhĩ xunhwýr nẽ htyk xwýnhjê karõ nhũm man amnhĩ kõt kaxkwa rũm mẽ o wrý. Na pu htem ã ja kõt pajamaxpër anê.

¹⁵⁻¹⁶ Na pre Pahihti Jejus inhma hkõt mẽ pahkwý htyk xwýnhjê jarênh o:

–Kot paj nhỹrmã akupýn mẽ awýr wrý ka mẽ ate ixkõt amnhĩ nhĩpêx xwýnh piitã ma ixkutã axàpir o mõi. Nom kot kaj mẽ arĩ atĩr nẽ apa xwýnhjaja akumrêx axàpir kêt nẽ. Kormã. Koja Tirtũm kapër o mẽ wrýk xwýnh krãhtũmja Tirtũm mã pifti kakõ. Kakõr týx pa ixkwý htyk nẽ hikwý xwýnhjê mã ixkapër nẽ ixãmra kamã mẽ kumra. Nhũm mẽ hkarõ akupýn mẽ hwýr

wrÿ nē mē kām gjêx pa. Hāmri nhūm mē akupÿm htīr nē kànhmā hkrī hpa nē ma kumrêx ixkutā àpir o mō.

¹⁷ Hāmri ka mē ate ixkōt amnhī xunhwÿr xwÿnh arī mē atīr nē apa xwÿnhjaja ka mē hā ajêt nē mē atipxi nē ma ixkutā axàpir o mō pu mē kakrā kamā axpēn kaxpa. Hāmri nē mē pahpimràatā ma kaxkwam api nē inhō krī hwÿr pōj. Kaj mē Tīrtūm mē wa ixkuri amex kumrêx nē atīr tūm nē apa ho apa. Anē.

¹⁸ ā Pahihti Jejus inhmā mē pakukamā mē pajarēnh anē. Jakamā kwa kêr ka mē tee ri mē pahkwÿ htyk xwÿnhjê hkukamā ajamaxpēr hkêt nē. Ā ixujarēnh anhÿrta ā anohtÿx pē axpēn jamaxpēr o axihtÿx o ri axpēn kōt apa.

5

Mē pahte akupÿn Jejus wrÿk xà hā arīgro pumunh kêt ā harēnh

Matêwre 24.32-25.13; Wam Pêtre 3.8-13

¹⁻² Nē mē pahte Jejus akupÿm wrÿk xà hā arīgro pumunh kêt jakamā kot paj mē amā tanhmā hā kagā hto hkêt nē. Koja nhÿrmā akupÿn mē pahwÿr nojarêt hāmri nē te kot mē ahkīnh xwÿnh kot amnhī nhīpêx pyrā nē mē pajaêr pē mē pahwÿr wrÿ.

³ Jakamā koja kormā wrÿk kêt ri nhūm Kris kwÿ hkêt xwÿnh kot amnhī wÿr kamā hamak kêt xwÿnhjaja hāmri mex nē pa hā amnhī pumu nē hkīnh nē pa. Nē axpēn mā kapēr o:

—Nà koja Tīrtūm tanhmā mē pahto hkêt nē. Arī mē pamex nē ri mē papa kēnā. Nà kot puj mē paxàmnhīx ri pajamakêtkati nē ri papa ho papa.

Anhÿr o axpēn mā kapēr rōm nhūm puh Jejus mē haêr pē akupÿn wrÿ. Hāmri nē ma mē kot amnhī xà htÿx kamā hamak o pa htūm xà hwÿr mē rēnh pa nhūm mē tee ri kêp hpimxur prām kaprÿ. Te mē htujarō xwÿnh kot amnhī nhīpêx pyrāk. Na htem mex nē pa htā hpijagri kaxyw ôhy xà htÿx kumrêx nē tee ri kām ôhy xà hkêt prām kaprÿ ho hikwÿ.

⁴ Nom mē kajaja kot kaj mē urā nē amnhī jaêr pē akupÿm wrÿk kām omu nē tee ri amnhī kukamā ajamaxpēr o akaprī hkêt nē.

⁵ Mē pahpê Jejus kwÿ jakamā na pu htem kapēr kōt ri tām amnhī nhīpêx o ri papa. Jao te mē pahte mē kêp Jejus kwÿ hkêt xwÿnhjê kot amnhī nhīpêx pyrāk kêt.

⁶ Na htem mē pahkīnhā akupÿn wrÿk kukamā hamaxpēr kêt nē. Te htÿx ri mē ôt rāhā ho hikwÿ pyrāk. Nom mē papajaja na pu htem akupÿn wrÿk kamā pajamak o papa pē kām tanhmā amnhī nhīpêx mex to rāhā ho ri papa.

⁷ Te kot ja pyrāk. Na htem kamāt kām gōr nē mēmoj mā hamaxpēr kêt nē htÿx hikwÿ. Nē mē hkwyjaja kamāt kām axpā nē htÿx ri tanhmā amnhī tomnuj to ho pa. Jao hamaxpēr mex kêt nē. Tā mē kêp Jejus kwÿ hkêt xwÿnhjaja hte mē urāk nē htÿx ri tanhmā amnhī tomnuj to ho pa nē akupÿn Jejus wrÿk mā hamaxpēr kêt nē.

⁸ No kêt mē papajaja. Mē pahte hkōt amnhī xunhwÿr xwÿnhjaja. Kêr pu mē ho mē urāk kêt nē. Satanasti kām mē pahte amnhī tomnuj prām tā mē pahte kām hprām xà hkōt amnhī nhīpêx pymaj kêr pu mē mēmoj punuj pē amnhī to htÿx rāhā ho ri papa.

Nē amnhī kaxyw Jejus kōt pajamaxpēr tÿx rāhā nē.

Nē mē pamā mē piitā mē hkīnh pē mē kutā panojarêt rāhā ho ri papa.

Nē nhÿrmā Tīrtūm mē hkra Jejus wa kuri pahtīr tūm nē papa ho papa hkukamā mām pajamaxpēr rāhā o ri papa.

Kot puj mē ā amnhī nhīpêx anē hāmri nhūm Satanasti tee ri mē pahte amnhī tomnuj prām xàj mē pahkrām pajamaxpēr punuj jagjēnh kaprÿ.

⁹ Xà na pre Tīrtūm mē pakamā gryk kām mē kot amnhī xà htÿx kamā hamak tūm xà hwÿr mē pajanor kaxyw mē parê? Nà na pre ja kaxyw mē parēnh kêt nē. Ām Pahihti Jejus Kris kukwak ri kot amnhī katut kōt mē pahte amnhī tomnuj rēnh par nē mē pahto hkra kaxyw na pre mē parê.

¹⁰ Tā mēmo kaxyw na pre Krisja mē panē ty? Nà nhÿrmā Tīrtūm mē wa kuri mē pamex kumrêx nē pahtīr tūm nē papa ho papa hprām xàj na pre mē panē ty. Jakamā koja nhÿrmā akupÿm amnhī kōt ma mē pahto àpir kaxyw akupÿn mē pahwÿr wrÿ pu mē amnhī kaxyw hkōt pajamaxpēr

xwýnh piitã ma hkôt kaxkwa hwýr api hãmri nê Tirtũm wa kuri pamex nê pahtĩr tũm nê papa ho papa. Kormã mē pahtĩr ri mē papa xwýnhjaja nê ra mē htyk nê hikwý xwýnhjaja nhũm akupým mē ho htĩr. Hãmri nê mē pahto hpimràatã amnhĩ kôt mē pahto àpir pa. Mē pahte hkôt amnhĩ xunhwýr xwýnh piitã koja Jejus nhýrmã akupýn wrý nê ã mē panhĩpêx mex anê.

¹¹ Tã ã kot anhýr jakamã kwa kêr ka mē jam ajamaxpêr o apa pē axpēn jamaxpêr o hihtýx o ri axpēn kôt apa. Nê Jejus kôt axpēn jamaxpêr o hihtýx o ri axpēn kôt apa. Ra ã mē ate axpēn nhĩpêx anhýr tã kêr ka mē arĩ ho anhýr rãhã ho ri apa nê aa hkaga hkêt nê.

Tirtũm kapêr o mē pajahkre xwýnhjê jarênh

Karatas 6.6; Wam Ximotre 5.17-19

¹² Nê kwa Kris kôt ixkwýjaja. Na hte mē kot Tirtũm kapêr o mē ajahkre xwýnhjaja mē ajahkre mex pē Tirtũm mã mē ajamãr mex o pa. Na htem ã mē anhĩpêx mex anhýr rãhã ho ri mē akôt pa. Tã kwa kêr ka mē amnhĩ tã mē omu nê mē kapêr mar týx nê.

¹³ Nê mē hã apijaàm pē tanhmã mē ho mex to ho apa.

Nê kwa kêr ka mē tãm axpēn nhĩpêx nê axãmnhĩx ri ajamakêtkati nê axpēn kôt ri apa ho apa.

Mē pahte tanhmã Kris kôt mē pahkwýjê nhĩpêx to hã mē pamã karō

Epes 4.1-6

¹⁴ Nê koja Kris kôt mē anhĩõ kãm kaga nê pa ka mē ja hã omu nê kãm anê kê ã amnhĩ nhĩpêx anhýr kêt nê. Kê hpãnhã amnhĩ xàpkur xà kaxyw àpênh o pa.

Nê mē kãm ma ho mē pa xwýnhjaja ka mē kãm mē hamaxpêr o axihtýx o ri mē hkôt apa.

Nê kormã amnhĩ kaxyw Jejus kôt mē hamaxpêr tohtuj anhýr xwýnhjaja ka mē tanhmã Jejus kôt mē ho mē axihtýx to kē mē hkôt amnhĩ nhĩpêx mex o pa.

E kêr ka mē ã mē axpēn nhĩpêx anhýr o ri apa nê axpēn kamã agryk tokyx anhýr kêt nê.

¹⁵ Nê koja mēhõ tanhmã atomnuj to ka mē ãm omu nê amnhĩ tã tanhmã ho hkêt

nê. ãm ho mex o ri apa. Nê mē piitã tanhmã mē ho mex to hpix kukamã ajamaxpêr rãhã nê.

¹⁶ ã mē pahte amnhĩ nhĩpêx anhýr o papaja na Tirtũm kãm hprãm.

Mē pahpê hkra hã pahkĩnh rãhã papaja na kãm hprãm.

¹⁷ Nê mē pahte Tirtũm mã amnhĩ jarênh rãhã ho papaja na mããnên kãm hprãm.

¹⁸ Nê tanhmã mē pakute htã arĩ Tirtũm mã mex o mex ã harênh o papaja na mããnên kãm hprãm. Mē pahkĩnh nê papa kamã kãm mex o mex ã harê. Rý mē pahpunuj nê papa htã arĩ kãm mex o mex ã harê. Rý nhũm mēhõ tanhmã mē panhĩpêx to htã pu mē arĩ kãm mex o mex ã harê.

ã mē pahte amnhĩ nhĩpêx anhýr o papaja na Tirtũm kãm hprãm.

Mē pahte tanhmã Tirtũm Karō nhĩpêx to hã mē pamã karō

¹⁹ Nê koja Tirtũm Karō mē amã mēmoj tã tanhmã kapêr o amnhĩrit to ka mē ama nê hkôt amnhĩ nhĩpêx kurê kumrêx. Rý mēhõ mã tanhmã akapêr to kurê kumrêx. No kêr ka mē ama nê ãm ama nê atýx ri hã apa hkêt nê.

²⁰ Rý nhũm mēhõ Tirtũm Karō nhý hã tanhmã mē amã kapêr to ka mē ama nê agryk nê tanhmã ho akapêr punuj to hkêt nê.

²¹ Koja Tirtũm kapêr kôt tanhmã mē amã mēmoj jarênh to nê ãm hãmri Tirtũm Karō nhý hã harênh ã amnhĩ jarê. Ka mē ama nê hkôt amnhĩ nhĩpêx.

²² No koja Tirtũm kapêr kwým ri tanhmã mēmoj jarênh to hãmri nê Tirtũm Karō nhý hã ja jarênh kêt nê. ãm amnhĩ krã hkôt harê. Ka mē tee ri ama nê amnhĩ krã kamã kapêr xir týx kêt nê. Jao hkôt amnhĩ nhĩpêx kêt nê.

Tanhmã Pawre kot mē ho Tirtũm wýr to hã harênh

Wam Tesarōn 3.3, 16

²³ Nê na pa hte mē ato Tirtũm wýr o ri ixpa nê kãm:

—Pa Tirtũm. Nà ate mē inhmã mē ijamakêtkati xà nhõr jakamã na pa htem anhý hã ixãmnhĩx ijamakêtkati nê ri ixpa. Jakamã kwa kêr ka tanhmã Tesarōn kamã

akwỳjê ho kê mẽ amnhĩ to mex rãhã ri pa.
 Jao tãm amnhĩ nhĩpêx nê tãm ri hamaxpêr
 rãhã nhũm Pahihti Jejus Kris akupỹn mẽ
 ixwỳr wrỳ.

Anhỹr o mẽ ato kuwỳ.

²⁴ Tã koja ã mẽ anhĩpêx anê. Ra kot
 amnhĩ jarênh xà hkôt. ã mẽ anhĩpêx anhỹr
 kaxyw na pre amnhĩm mẽ arê.

Kagà jatur xà

²⁵ E Kris kôt ixkwỳjaja. Kwa kêr ka mẽ
 amnhĩ xwar ixto Tĩrtũm wỳr o apa.

²⁶ Nê kêr ka mẽ atar Kris kôt mẽ
 pahkwỳjê piitã mẽ kãm mẽ ijarê.

²⁷⁻²⁸ Nê kê Pahihti Jejus Kris mẽ akutã
 nojarêr rãhã ho pa. Ixte Pahihti nhỹ hã ã
 mẽ amã ixkapêr nê hã kagà anhỹr jakamã
 kêr ka mẽ atar Kris kwỳjê piitã mẽ kãm
 kamã harê kê mẽ piitã ixkapêr ma.

Tã ãm ja pix na hapêx. Ixpê Pawre na pa ã
 mẽ amã kagà nhĩpêx nê mẽ awỳr mẽnh anê.

Sikûn Tesarôn
Pawre kot Tesarôn kamã
Jejus kôt kwÿjê hwÿr wam
kagà nê mênh kôt hô kagà nê
mênh

Pawre na pre kagàja nhîpêx nê ma Tesarôn kamã Jejus kôt hkwyjê hwÿr kumê. Na pre hte Tesarôn kamã mē kãm Jejus ã mē hkurê xwÿnhjaja Jejus ã tanhmã mē homnuj to nhûm mē amnhî xà htÿx kamã hamak o pa. Hãmri nhûm Pawre mē harênh ma nê kagàja nhîpêx nê mē hwÿr kumê. Nê kamã mē kãm mē hamaxpêr o hihtÿx. Nê mē kot arî Tirtûm kôt amnhî nhîpêx mex o pa nê hamaxpêr kôt hamaxpêr o pa hã mē kãm karô. Nê nhÿrmã Jejus akupÿn kaxkwa rûm mē pahpê hkrajê hwÿr wrÿk nê pika ho hapêx par ã mē kãm harê. Æ na pre Pawre mē kãm kagàja kamã mē kãm ujarênh anê. Nê mē kãm:

¹ Pa Tesarôn nhô xwÿnh kot Tirtûm kapêr mar kaxyw axpên wÿr mē apikuprôn h xwÿnhjaja? Xà mē amex na ka mē apa? Ixpê Pawre na pa axte mē awÿr kagà nhîpêx nê kumê. Siras mē Ximotre mē pa mē awÿr kumê. Nà mē pahpê Mēpanhîpêêxà maati Tirtûm mē Kra Jejus Kris kwÿ na pu mē.

² Jakamã na pa htem mē ato wa hwÿr rãhã ho ri ixpa. Wa kot mē akutã nojarêr rãhã ka mē ajamakêtkati nê apa kaxyw. Nê mēmoj to mē akutã wa nojarêr rãhã ho pa kaxyw.

Tirtûm kot nhÿrmã hkrajê nhîpêx kati xwÿnhjê homnuj tÿx ã harênh

Wam Pêtre 4.12-19

³ Nê na ka htem amnhî kaxyw Tirtûm mã ajamaxpêr tÿx mex o ri apa. Nê axpên kutã anojarêr rãhã nê. Na pa htem ã mē ate amnhî nhîpêx anhÿrja mã ijamaxpêr nê mē anhÿ hã ixkînh nê Tirtûm mã mē anhÿ hã ixkînh ã amnhî jarê.

⁴ Nê nhÿhÿm ixpa nê nhÿri krîm agjê nê kamã Tirtûm kôt mē pahkwÿjê mã mē ato amÿra nê mē kãm:

—E pa mē amã Tesarôn kamã Kris kwÿjê jarê ka mē inhma. Nà mē ô krî kamã mē hkwyjaja na htem Kris ã mē hipêx kati ho

pa nhûm htem amnhî xà htÿx kamã hamak pê mex kêt nê pa. Tã nom tee ri amnhî kukamã hamaxpêr o Jejus kaga hkêt nê. Na htem arî hkôt amnhî nhîpêx mex rãhã ho pa. Anê.

⁵ ã mē ate mē kutã amnhî nhîpêx anhÿr o apaja na hte Tirtûm hã mē apumu nê hkînh nê pa. Nê mē akukamã hamaxpêr o:

—Mê kot Ixkra Jejus ã tanhmã mē hipêx to ho pa htã ãm hãmri na htem mē kutã amnhî to htÿx o pa nê mē umaj wa ixkaga hkêt nê. Na htem ã amnhî nhîpêx anê nê mē kêp ixkra hã amnhî to amnhîrît mex nê. Nà koja mē nhÿrmã wa ixri mex kumrêx nê htîr tûm nê pa ho pa.

Anhÿr o hamaxpêr.

⁶ Nê mē kot Kris ã mē anhîpêx punuj xwÿnhjaja koja Tirtûm nhÿrmã mē atã mē homnuj tÿx nê nhûm mē amnhî xà htÿx kamã hamak rãhã ho pa. Æm hãmri koja ã mē atã mē hipêx anê.

⁷⁻¹⁰ Koja Pahihti Jejusja nhÿrmã man akupÿn pika hwÿr hirã htÿx kãm wrÿ nhûm Tirtûm kapêr o mē wrÿk xwÿnh xihtÿx xwÿnhjaja man hkôt wrÿ. Koja mē wrÿ hãmri nê mē kot amnhî tomnuj xwÿnhjê homnuj tÿx kumrêx. Jao ma mē kot amnhî xà htÿx kamã hamak tûm xàta wÿr mē rênh pa nhûm mē kamã htîr tûm nê amnhî xà htÿx kamã hamak rãhã ho pa ho pa. Koja ã Pahihtija amnhî nê mē kot hkôt amnhî xunhwÿr kêt xwÿnhjê rênh anê nhûm mē pahkînhã Tirtûm mē Krata wa kuri mex nê pa hkêt nê. Nê mē pahkînh ã wa mex o wa mex nê wa hihtÿx o wa hihtÿx ã wa omunh kêt nê. Koja Pahihti Jejus nhÿrmã akupÿn wrÿ nê ã mē panê mē hipêx anê. Koja wrÿ pu mē amnhî kaxyw hkôt pajamaxpêr xwÿnhjaja amnhî wÿr omu nê pahkînh nê. Hãmri nê amnhî nhî nyw ã amnhî pumu nê kãm:

—Hêxta waa nê. Amex o amex Pahihti. Na ka pre mē inhnê ty hãmri nê mē inhmã mē inhî nyw gô. Kot paj mē Tirtûm mē war ari inhmex kumrêx nê ixtîr tûm nê ixpa ho ixpa. Æm hãmri na ka ã mē ixto mex anê. Nà amex kumrêx o amex kumrêx Pahihti. Anê.

Æ kot puj mē pahpê hkwyjaja amnhî tã kãm mex o mex ã harênh anê. Ra mē ate mē ixkapêr mar nê hkôt amnhî xunhwÿr

jakamã kot kaj mẽ ixpyrà nê ã kãm mex o mex ã harênh anê.

Pawre kot Tesarôn nhõ xwýnhjê ho Tirtûm wýr ã harênh

11-12 Nê na pa htem mẽ ato Tirtûm wýr rãhã ho ixpa nê kãm:

—Pa Tirtûm? E Tesarôn kãm akrajaja na pa mẽ ho awý. Na ka hte Akra Pahihti Jejus Kris mẽ wa mẽ ho mex rax o apa. Jao amnhĩm mẽ arê nhũm mẽ ra kãm amnhĩ to mex prãm nê. Na htem amnhĩ kaxyw Jejus mã hamaxpêr rãhã pê mẽmoj to axpên kutã nojarêto o pa. Jakamã kwa tanhmã mẽ hkrã hto kê mẽ akôt ã amnhĩ nhĩpêx anhýr rãhã ho pa. Kêr ka mẽ kot akôt amnhĩ nhĩpêx o pa hã mẽ omu nê akĩnh nê mẽ kãm mẽ mex ã mẽ harê. Nhũm mẽ ate tanhmã mẽ ho mex to hã amnhĩ tã apumu hãmri nê mẽ amnhĩ pyrà nê amã amex o amex ã ajarênh rãhã ho pa. Anê.

2

Kot amnhĩ tomnuj týx kumrêx xwýnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nê koja nhýrmã mẽ panhõ Pahihti Jejus Kris akupýn wrý pu mẽ ma kutã api nê kakrã kamã hkaxpa. Jakamã kwa Jejus kôt ixkwýjaja.

² Koja mēhõ mẽ awýr mō nê mẽ amã Jejus ra akupýn wrýk ã harênh japêr. Rý tanhmã mẽ amã Jejus hpôx xà hã arĩgro jarênh o hêx to nê mẽ amã:

—Kwa na ra Jejus akupýn nojarêto. Koja tokyx akupýn mẽ pahwýr wrý. Semãn ja kamã rý ko. Apu hõ hã koja apu wrý rý ko.

Anhýr o harê. Nê Tirtûm Karõ nhý hã ã kot mẽ amã harênh anhýr ã amnhĩ jarê rý nhãm mēhõ kot ã kãm harênh anhýr ã harê. Rý pa ixte harênh nê hã kagà hã ijarê. Nom kwa kêr ka mẽ kapêr ma nê ãm ama nê hkôt ajamaxpêr kêt nê. Rý ama nê tee ri amnhĩ kukamã ajamaxpêr kêt nê. Koja mēhõ ã mẽ amã Jejus tokyx wrýk ã harênh anê nê ãm amnhĩ krã hkôt ã harênh anhýr o hêx. Nom Tirtûm Karõ nhý hã rý pa inhý hã rý nhãm Kris kôt mẽ panhõ nhý hã ã harênh anhýr kêt nê.

³⁻⁴ Jakamã kêr ka mẽ ãm mẽ kot harênh o hêxja ma nê hkôt ajamaxpêr kêt nê. Kormã Pahihti Jejusja akupýn nojarêto kêt. E kot paj ixprĩ hã mẽ amã ja jarê ka mẽ inhma. Nà kormã Pahihti akupýn nojarêto kêt ri koja mẽ ohtô rax kumrêx nê Tirtûm kutã amnhĩ xunhwý nê kãm hkurê ho pa. Nê amnhĩ tomnuj týx o pa. Hãmri nhũm ra kot amnhĩ tomnuj týx kumrêx xwýnh maatija amnhĩ to amnhĩrit. Nom na pre ra Tirtûm tanhmã kot hipêx to hkukamã hã amnhĩ jarê. Koja xep gaa nê ma mẽ kot amnhĩ xà htýx kamã hamak tũm xàta wýr kumê nhũm kamã amnhĩ xà htýx kamã hamak o pa rãhã nê pa ho pa.

Tã nom kormã Pahihtija akupýn wrýk nê ma hwýr mēnh kêt ri koja mẽ piitã omu nê kēp Mēhpām maati pixi hã harênh kaxyw mẽ kēp mẽ õ sãnti piitã hkrakrak pa. Nê mẽ kot mẽmo karõ ho amnhĩ pãm ã harênh xwýnhja nhũm piitã hkrakrak pa. Hãmri nê axtem nê Tirtûm mã amnhĩ jarênh xà hã ixkre jatur xà kamã hitom wýr axà nê kamã nhý nê hêx rom mẽ piitã mẽ kãm kēp Tirtûm ã amnhĩ to hêx nê mẽ kãm:

—E mẽ amnê ixpumu. Ixpê mẽ anhõ Tirtûm na pa. Pa kot kaj mẽ inhãm inhmex o inhmex ã ijarê. No kêr ka mẽ anhõ sãnti ho apãm o apa hkêt nê. Kwarĩ ho kwarĩ. ãm paxipix ixpê Mēapãm maati nê paxipix ixpê mẽ anhõ Tirtûm.

Anhýr o amnhĩ to hêx.

⁵ Na pa pre arĩ mẽ akôt ixpa ri ã mẽ amã harênh anê. Mãn arĩ mẽ ate ja hã anohtýx rý ko.

⁶ Nom kormã ã kot amnhĩ nhĩpêx anhýr xà hã arĩgrota kormã kator kêt. Mēhõ kormã kot kēp àmnar jakamã nhũm kormã kator kêt nê. Ra mẽ ate kēp àmnar xwýnhja jarênh mar. Tã koja hpôx xà hã arĩgro kato nhũm kēp àmnar xwýnhhta kãm pry kaprã nhũm rĩ kormã mō.

⁷ Nom na hte ra hpimxur pê Tirtûm nê mẽ piitã mẽ hkurê ho pa. Mẽ kot Tirtûm kôt amnhĩ xunhwýr pymaj tanhmã nê mẽ ho ho pa. Nom kormã kēp àmnar xwýnhja kēp àmnar jakamã nhũm hte mẽ noo mã tanhmã mẽ ho hkêt nê. Tã koja Tirtûm nhýrmã kēp àmnar xwýnhja mã anê nhũm kuma nê kãm ure nhũm rĩ kormã amnhĩ

to amnhīrīt nē mē piitā mē noo mā mō nē Tīrtūm nē tanhmā mē kām hēx to ho pa.

8-12 Koja kato nē Satanasti mē wa mē piitā tanhmā mē nokupyr to ho ri mē hkōt pa. Nē hēx rom mē kām aa mē kot mēmoj pumunh kêt kwỳ ho anhỹr o ri pa. Koja wa hēx rom te Tīrtūm kot amnhī nhīpēx pyrāk o ā amnhī nhīpēx anē. Hāmri nhūm mē kot Jejus kōt amnhī xunhwỳr kêt xwỳnhjaja ja hā wa omu nē wa hkōt hamaxpēr kurē kumrēx. Nē ām hāmri wa kapēr ā wa hkamnhīx. Kop apu ra mē kot Tīrtūm kapēr mar nē hkōt amnhī xunhwỳr ronhỹx ra Tīrtūm amnhī tā mē omu nē mē ho hkra. Nom koja mē kām kapēr mar prām kêt nē. Ām wa kot amnhī to hēx o wa pa xwỳnhhta kōt pix mā koja mē kām amnhī nhīpēx prām.

Ja mỳrapē koja Tīrtūm tee ri ja hā mē omu hāmri nē mē nē wa kot amnhī tomnuj tỳx xwỳnhhta wa omunh kêt nhūm wa tanhmā mē kām amnhī nhīpēx to nhūm mē wa omu nē wa hkōt hamaxpēr kurē kumrēx. Hāmri nē wa gryk ā Tīrtūm kaga jakamā nhūm nhỹrmā mē kot amnhī xā htỳx kamā hamak tūm xàja wỳr mē rēnh pa.

Koja Satanasti mē kot amnhī tomnuj tỳx kumrēx xwỳnh maatita ā hēx rom tanhmā mē no kupyr to anhỹr o pa rāhā nhūm Pahihti Jejusja hirā rax kām akupỹn mē pahwỳr wrỳ. Hāmri nē kot amnhī tomnuj tỳx kumrēx xwỳnh maatita ā amỹnē nhūm mē kām hpīr kurē kumrēx nhūm hapēx. Koja ā amnhī nhīpēx anē.

Tīrtūm kot tanhmā mē pahto mex to hā harēnh

Rōmān 8.28-30; Wam Tesarōn 2.13, 5.23-24

13 Nē amnepēm kormā mēmoj kêt ri na pre Tīrtūm amnhīm mē arē. Mē ate kapēr mar nē hkōt amnhī xunhwỳr nhūm kot mē ato hkra kaxyw mē arē. Kām mē ajapēē. Na pre mē awỳr amnhī Karō rē nhūm mē akarō mā agjē nē tanhmā mē ajamaxpēr to ka mē ŷ hā tām amnhī nhīpēx rāhā ho ri apa. Na pa htem ja hā mē amā ijamaxpēr nē mē anhỹ hā ixkīnh kām Tīrtūm mā mē ajarēnh o ri ixpa.

14 Na pre mē awỳr mē ixrē. Mē ixte mē awỳr ixpa nē mē amā tanhmā Jejus kot mē

panē amnhī nhīpēx to hā harēnh o ixpa kaxyw. Mē ate mē inhmar nē Jejus kōt amnhī xunhwỳr nhūm Tīrtūm kot Pahihti Jejus Kris o mex pyrā nē tanhmā mē ato mex to kaxyw.

15 Jakamā kwa kêr ka mē ra mē ixte wam mē awỳr kagā mēnhhta kamā harē nē mar tỳx nē. Nē mē akōt mē ixpa ri tanhmā mē ixte mē ajahkre htoja mā ajamaxpēr mex nē hā ano htỳx nē hkōt amnhī nhīpēx rāhā ho ri apa. Jao Jejus kōt amnhī nhīpēx mex o ri apa Kris kōt ixkwỳjaja.

16 Mēpanhīpēēxā maati mē Pahihti Jejus Kris wa kām mē pajapē htỳx kumrēx. Na hte wa tanhmā mē pajamaxpēr o hihtỳx to ho pa pu mē wa ŷ hā tām pajamaxpēr o ri papa. Nē wa ŷ hā nhỹrmā wa kuri pamex nē pahțir tūm nē papa hkukamā pajamaxpēr kaprỳ ho papa hkêt nē.

17 Na pa htem mē ato wa hwỳr o ixpa nē wa kām:

—Pa Tīrtūm mē Jejus wa? Kwa kêr ka wa tanhmā Tesarōn kamā akrajē mā mē hamaxpēr o hihtỳx to kê mē war anhỹ hā tām amnhī nhīpēx nē tām hamaxpēr. Jao kapēr mex rāhā nē pa ho pa. Anē.

3

Tanhmā mē pahte xypēn to Tīrtūm wỳr to hā kot mē pamā karō

Korosē 4.2-4

1 Nē kwa Kris kōt mē ixtō nē ixtōxjaja. Kêr ka mē amnhī xwar mē ixto Tīrtūm wỳr rāhā ho ri apa. Mē ixte krī piitā hkōt mē kām Jejus jarēnh o ri mē hkōt ixpa nhūm mē kot mē inhmar nē amnhī kaxyw Jejus kōt hamaxpēr kaxyw. Jao mē apyrā nē hkōt amnhī nhīpēx mex o pa kaxyw.

2 Nom koja mē piitā ā amnhī nhīpēx anhỹr kêt nē. Mē hkwỳjaja kām Jejus jarēnh mar prām kêt jakamā kwa mē ixto Tīrtūm wỳ kê mē inhnē mē omunh mex nē nhūm mē Jejus ā tanhmā mē ixto hkêt nē.

3 Nē koja Pahihti tanhmā mē akrā hto ka mē ajamaxpēr mex nē ŷ hā hkōt amnhī xunhwỳr tỳx o ri apa. Jakamā nhūm Satanasti mē ate amnhī tomnuj hprām xàj tee ri tanhmā mē anhīpēx to kaprỳ nhūm Pahihti mē anē omunh mex nē. Ra kot mē atā amnhī jarēnh xā hkōt.

4 Koja ã mẽ anê hipêx anê ka mẽ ÿ hã tanhmã mẽ ixte mẽmoj tâ mẽ amã karõ xà hkôt amnhĩ nhĩpêx mex o ri apa.

5 Tã kê Pahihti tanhmã mẽ akrã hto ka mẽ Tĩrtũm pyrã nê mẽ piitã mẽ kamã axukaprĩ ho ri apa. Nê Pahihti Kris pyrã nê mẽmoj punuj kutã amnhĩ to htỳx nê. Jao hkôt amnhĩ nhĩpêx mex rãhã ho ri apa.

Mẽ kãm kaga xwỳnhjê jarênh

Wam Korĩt 4.12; Epes 4.28; Wam Tesarōn 4.9-12

6 E kot paj hpãnhã Kris kôt mẽ pahkwỳ kãm kaga xwỳnhjê jarê ka mẽ inhma. Pahihti Jejus nhỹ hã kot paj mẽ amã tanhmã mẽ harênh to. Nà koja mẽ akwỳjaja kãm kaga nê amnhĩm mẽmoj tâ àpênh kêt japêr. Nê mẽ ixte mẽ axàpênh mex o apa hã mẽ amã karõja kuhpa hã amnhĩm mẽmoj tâ àpênh kêt japêr. Koja mẽ ã amnhĩ nhĩpêx anê ka mẽ ja hã mẽ omu hãmri nê mẽ hkôt ri apa hkêt nê.

7-8 Xà mẽ pajaja na pa prem ma mẽ awỳr mō nê mẽ akôt inhmã kaga nê mẽmoj tâ ixàpênh kêt nê ri ixpa? Nà na pa prem mẽ apa kukwak ri ixàpkur pymaj ixàpênh rũnh nê amnhĩ pa pix kukwak ri ixàpkur o ri ixpa. Na ka prem mẽ inhmã mẽmo mẽ apkur xà ho mra pa prem amarĩ amnhĩm hamỳnh nê hkur kêt nê. Na pa prem hpãnhã mẽ amã amnhĩre nê kormã kuku. Tã kêr ka mẽ ã amnhĩ nhĩpêx anhỹr o ri axpênh kôt apa nê amnhĩ pa pix kukwak ri apku. Nê mẽ amã kaga hã nhãm akwỳjê hpa kukwak ri axàpkur o ri apa kêt nê.

9 Na pa prem amnhĩ pa pix kukwak ri ixàpkur o ri mẽ akôt ixpa. Mẽ ate ja hã mẽ ixpumunh nê mẽ ixpyrà nê ã amnhĩ nhĩpêx anhỹr kaxyw. Nom mẽ ixte Jejus mã tanhmã mẽ ajahkre hto nhũm mẽ ate mẽ inhmar nê hpãnhã mẽ inhmã mẽ ixàpkur xà nhõrja Jejus mã tanhmã kute hkêt tâ pa prem ã amnhĩ nhĩpêx anhỹr kêt nê. Mẽ ate ja hã mẽ ixpumunh nê mẽ ixpyrà nê ã amnhĩ nhĩpêx anhỹr kaxyw na pa prem amnhĩ pa pix kukwak ri ixàpkur o ri mẽ akôt ixpa.

10 Na pa prem mẽ amã ja hã karõ ho:

—Koja mẽhõ kãm kaga nê àpênh kêt nê ka mẽ ja hã omu nê kãm õ hkêt nê. Kwãr

mãmri apkur kêt nê kãm prãm nê ri pa nê amnhĩ pumu. Anê.

11 Tã xep ra mẽ akwỳjaja ã amnhĩ nhĩpêx anê nê kãm kaga nê àpênh kêt nê amarĩ ri pa. Nê xep htỳx ri axpênh jakwa kamã nhãm mẽ hixi ho rêr o ri pa.

12 Kwa mẽ inhma Jejus kôt ixkwỳjaja. Kot paj Pahihti Jejus nhỹ hã mẽ amã mẽ kot ã amnhĩ nhĩpêx xwỳnhjê jarê ka mẽ inhma nê mẽ inhmar tỳx nê. Kêr ka mẽ kãm kaga xwỳnhjê mã anê kê mẽ jam ure nê hpãnhã àpênh mex o pa. Jao mẽ apyrã nê amnhĩ pa kukwak ri apkur o pa. Kêr ka mẽ ã mẽ kãm ixkapêr jarênh anê.

13 Nê kwa kêr ka mẽ axpênh to mex o apata kaga hkêt nê.

14 E na pa mẽ ã Tĩrtũm nhỹ hã mẽmoj tâ mẽ amã karõ nê hã kagã anê. Tã koja mẽhõ kamã harê nê kuma nê ãm kuma nê hkôt amnhĩ nhĩpêx kêt ka mẽ ja hã omu nê hkôt ri apa hkêt nê. Tokyx kot ja hã amnhĩ pumunh nê amnhĩ tâ hpijaàm kaxyw.

15 Nom arĩ Kris kôt kêp mẽ akwỳ jakamã kêr ka mẽ arĩ kêp mẽ atõ rỳ atõx ã tãm hipêx nê kãm akapêr mex o ri apa. Nom te ho kêp mẽ akwỳ hkêt pyrãk o kãm akapêr kêt nê.

Tanhmã Pawre kot mẽ ho Jejus wỳr to hã harênh

16-18 Nê na pa hte mẽ ato Pahihti Jejus wỳr rãhã ho ixpa. Kot mẽ pamã mẽ pajamakêtkati xà nhõr jakamã na pa htem mẽ ato kuwỳ nê kãm:

—Pa Pahihti? Kwa kêr ka Tesarōn kamã akwỳjê pumu nê mẽmoj to mẽ kutã anojarêr rãhã ho ri mẽ hkôt apa. Kê mẽ hamakêtkati nê àmnhĩx pa ho pa. Anê.

Tã ãm ja pix. Ixpê Pawre na pa kagã jatur xà kamã inhĩhkra ho amnhĩ nhĩxi nhĩpêx. Na hte kagã nhĩpêx xwỳnh inhmã ixkapêr ã kagã. Nê hã kagã hpa pa hpãnhã hatur xà kamã pam inhĩxi nhĩpêx. Tã na hapêx.

Wam Ximotre Pawre kot Ximotre hwÿr kagà nê mēnh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tîrtûm kapêr o Jejus kôt hkwÿjê jahkre ho pa. Hãmri nhÿm Pawre krî hõ kamã pa nê kagàja nhîpêx nê hwÿr kumê. Nê kamã kãm mëmoj tã karõ. Na pre ra Epes kamã më hkwÿjaja Tîrtûm kapêr o hêx o më ahkre ho pa nhÿm Pawre më harênh ma nê kagàja kamã Ximotre mã tanhmã më harênh to. Nê kot Tîrtûm kapêr o Jejus kwÿjê jahkre mex xwÿnhjê xunhwÿr kaxyw kãm karõ. Nê Tîrtûm kãm hprãm xà hkôt pix mã më ahkre ho pa hã kãm karõ nê hwÿr kagà nê kumê. Nê kãm:

¹ Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã më ahkre ho ixpa kaxyw na pre Mëpapytâr xwÿnh Tîrtûm më Jejus Kris wa ixta nê ixãm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkôt Jejus kôt amnhî xãm jakamã te apê ixkra pyrãk Ximotre. Jakamã na pa hte ato Mëpanhîpêêxã maati Tîrtûm më panhõ Pahihti Jejus Kris wa hwÿr o ixpa nê ato wa hwÿr o:

—Pa Tîrtûm më Pahihti wa. E Ximotre ho na pa war awÿr kaxyw. Kwa kêr ka wa kamã axukaprî nê kutã war anojarêr rãhã ho wa ri apa. Kot kaj wa ã ho mex anê nhÿm war anhÿ hã hamakêtkati nê àmnhîx pa ho pa.

Anhÿr o na pa hte war ato kuwÿ

Tîrtûm kapêr o më ahkre xwÿnhjê jarênh Rômãn 16.17; Wam Ximotre 6.3; Sikûn Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetõn wÿr panojarêr nê tee ri Epes kamã Tîrtûm kapêr ho hêx o më ahkre xwÿnhjê kapêr ma. Jakamã na pa pre amã:

—E Ximotre kêr ka Masetõn wÿr ixkôt amõr kêt nê. ãm jar Epes kamã arîk nê ixwakre kamã Tîrtûm kapêr o më hêx

xwÿnhjê mã akapêr nê ã më hêx anhÿrja nê më hkurê ho ri më hkôt apa.

Anhÿr o amã harê hãmri nê Epes kamã are nê ma Masetõn wÿr ahte mõ.

⁴ Më hêx xwÿnhjaja amnepêm panhîgêjtaja kot tanhmã amnhî nhîpêx to nê tanhmã ujarênh toja nhÿm htem më kãm harênh pix o pa. Nê më hixi piitã harênh o pa. Na htem ã amnhî krã hkôt hkwÿjê mã ujarênh anhÿr o pa. Jao axpên kwÿm ri më ahkre nê më hã axpên mã àkjêr o pa. ã më kot amnhî nhîpêx anhÿr jao Tîrtûm nhÿ hã kãm hprãm xà hkôt më ahkre hkêt nê. Kojã mëhõ Tîrtûm nhÿ hã kapêr o më ahkre hãmri nê amnhî kaxyw kãm hamaxpêr tÿx pê tanhmã më ahkre hto. Nom ixte amã më harênh xwÿnhjaja Tîrtûm nhÿ hã më ahkre hkêt jakamã na pa pre inhnojarêr nê ã amã më harênh anê nê më kuri Epes kamã are.

⁵ Tã kêr ka arî më ahkre ho ri më hkôt apa Ximotre. Nê Kris kôt më pahkwÿjê mã anê kê më amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê më kãm anê kê më te kãm amnhî tã ma pyrãk o nhãm kãm më hã ma ho pa.

⁶ Ixte amã më hêx xwÿnh jarênh xwÿnhjaja na htem ã më ahkre anhÿr kêt nê. Na htem htÿx ri amnhî krã hkôt tanhmã më ahkre hto.

⁷ Tîrtûm kot finat Mojes mã mëmoj tã karõja më kot mar tÿx ã amnhî kamnhîx nê ho më ahkre hprãm tã no ãm hprî hã mar kêt nê htÿx ri ho më ahkre ho pa.

⁸ Tîrtûm kot Mojes mã mëmoj tã karõja mex. Më kot mar nê hkôt amnhî nhîpêx o pa kaxyw na pre.

⁹ No na pre më kot tãm amnhî nhîpêx xwÿnhjê mã ã hã karõ anhÿr kêt nê. ãm më kot amnhî tomnuj xwÿnhjê mã na pre hã karõ.

Më kot më õ pahi kapêr mar kêt xwÿnhjê mã.

Nê më kot Tîrtûm kapêr nhîrõp kuhê ho më pa xwÿnhjê mã.

Nê Tîrtûm ã më hpijaàm kêt xwÿnhjê mã. Nê më kot më hipêêxã nê më katorxã hpar xwÿnhjê mã.

¹⁰ Nê më hprõ kuhpa hã nhãm mënijê ho amnhîkati xwÿnhjê mã.

Ně mẽ mjên kuhpa hã nhãm mẽmyjê ho amnhĩkati xwýnhjê mã.

Ně mẽmyjaja kot mēnijê kuhpa hã kãm amnhĩ kwý myjê hkĩnh nẽ mẽ ho amnhĩkati xwýnhjê mã.

Ně mēnijaja kot mẽmyjê kuhpa hã kãm amnhĩ kwý nijê hkĩnh nẽ mẽ ho amnhĩkati xwýnhjê mã.

Ně mẽ kot mẽmoj to àhkĩnh nẽ nhãm mẽ kãm ho wēnê o mẽ pa xwýnhjê mã.

Ně ri mẽ hêx o mẽ pa xwýnhjê mã.

Ã mẽ kot Tĩrtũm kapēr kwým ri amnhĩ nhĩpêx anhỹr o mẽ pa xwýnh piitã mẽ kaxyw na pre Mojes mã mẽmojta ã karõ. Mẽ kãm Jejus prãm kêt xwýnhjê mã. Mẽ kot mar nẽ tãm amnhĩ nhĩpêx kaxyw.

¹¹ Tã pa na pa hte Pahihti kot tanhmã mẽ panê amnhĩ nhĩpêx to hã harēnh o ri mẽ hkôt ixpa. Ja kaxyw na pre Tĩrtũm ixãm. Tĩrtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harēnh

Atre 26.9-18

¹² Nẽ Pahihti Jejus Kris na hte ixto mex rãhã ho pa. Na hte tanhmã ixto pa ý hã mẽ piitã mẽ kãm tanhmã kot mẽ panê amnhĩ nhĩpêx to hã harēnh o ri mẽ hkôt ixpa. Na pre ixte ã amnhĩ nhĩpêx anhỹrja kukamã inhãm ixàpēnh ã karõ nẽ inhãm:

–E ate amnhĩ kaxyw ixkôt ajamaxpēr mex jakamã kēr ka ma mẽ piitã mẽ hkôt ri mẽ kãm ixkapēr jarēnh o ri apa. Anẽ.

¹³ Nom amnepēm na pa pre hkôt ijamaxpēr kêt nẽ. ãm axtem nẽ haprý rũnh nẽ ho ixkapēr punuj o ri ixpa. Nẽ hkwýjê ho ixkrihkrit nẽ mẽ haprý nẽ mẽ htak. Nom kormã amnhĩ kaxyw Kris kôt ijamaxpēr kêt jakamã ixtýx ã mẽ hipêx anhỹr o ixpa nhũm Pahihti ja hã ixpumu nẽ ixkamã ukapři nẽ mẽ hã tanhmã ixto hkêt nẽ.

¹⁴ Nẽ kãm ijapê xàj mẽmoj to ixkutã nojarêt rãhã ho pa nẽ tanhmã ixkrã hto pa ra amnhĩ kaxyw hkôt ijamaxpēr nẽ hkôt amnhĩ xãm. Hãmri nẽ kukwak ri ra inhãm hkwýjê hkĩnh nẽ hpãnhã mẽ ho mex o ri mẽ hkôt ixpa.

¹⁵ Nẽ Jejus Kris ra wrýk nẽ mẽ pahte amnhĩ tomnuj piitã hpãnhã amnhĩrer kaxyw mẽ panê htyk ã harēnhja na pa

hte harēnh o ri ixpa. ã kot amnhĩ nhĩpêx anhỹrja na mex o mex. Kê mẽ piitã kuma nẽ hã nohtýx rãhã ho pa.

Kormã ixte hkôt amnhĩ xãm kêt ri na pa pre amnhĩ tomnuj týtýx kumrēx o mẽ piitã mẽ hakrenh

¹⁶ nhũm Tĩrtũm ixpumu nẽ ixkamã ukapři nẽ. Hãmri nẽ amnhĩ kaxyw ixãm. Mẽ piitã mẽ kot ja hã ixpumunh nẽ axpēn mã ã ijarēnh anhỹr kaxyw. Nẽ ijarēnh o:

–Kwa Pawre na pre amnhĩ tomnuj týtýx kumrēx o pa nhũm Jejus Kris ja hã omu nẽ kamã gryk tokýx anhỹr kêt nẽ. Na pre tanhmã hkrã hto nhũm ra tãm amnhĩ nhĩpêx o pa. Kwa pu mẽ urak nẽ amnhĩ kaxyw Jejus kôt pajamaxpēr nẽ hkôt amnhĩ xunhwý. Kēr pu mẽ Pawre pyrã nẽ nhỹrmã Tĩrtũm mẽ Kraja wa kuri pamex nẽ pahťir tũm nẽ papa ho papa.

Anhỹr o axpēn mã ijarēnh nẽ ixpyrã nẽ Jejus kôt amnhĩ xunhwýr kaxyw na pre Tĩrtũm ã ixto mex anẽ.

¹⁷ Jakamã na pa hte kãm amnhĩ jarēnh kaxyw nẽ kãm:

–Pa Tĩrtũm? Nã kapxipix apê Pahi Maati. Nẽ arãhã ho arãhã nẽ amex o amex. Mẽ ixte inhno ho aa apumunh kêt tã kapxipix apê Měinhĩpêxã maati. Tã koja nhỹrmã mẽ piitã ã amã amex o amex ã ajarēnh anhỹr o pa. Anẽ.

Ximotre kot tanhmã Epes nhõ xwýnhjê jahkre hto hã kãm karõ

Wam Korĩt 5.1-5

¹⁸ Nẽ te apê ixkra pyrãk Ximotre. Tã kot paj mẽmoj tã amã karõ ka inhma nẽ inhmar týtýx nẽ. Nã Pahihti Jejus mã ate tanhmã amnhĩ nhĩpêx to ho apa kaxyw na pa prem axãm nhũm Tĩrtũm nhỹ hã kapēr o mẽ pa xwýnhjaja axàpēnh kukamã amã kapēr nẽ amã:

–E ate ma mẽ kãm Pahihti Jejus jarēnh o apa kaxyw Tĩrtũm kot axãm jakamã kēr ka ã amnhĩ nhĩpêx anhỹr o ri mẽ hkôt apa. Anẽ.

Tã kot paj ijaxwýja kagàja kamã amã ixkapēr nẽ mẽmoj tã amã karõ. Ka mar týtýx nẽ hkôt amnhĩ nhĩpêx mex pē Tĩrtũm mã amnhĩ nhĩpêx mex o ri apa. Jao aprĩ hã mẽ kãm tanhmã Jejus jarēnh to ho ri mẽ hkôt apa.

¹⁹ Nē amnhĩ kaxyw Jejus mã ajamaxpër mex nē. Nē mẽmoj punuj pumu nē amã ho anhÿr prãm tã Jejus nhÿ hã nē amnhĩ to htÿx nē ho anhÿr kêt nē. Jao tãm amnhĩ nhĩpêx ã amnhĩ pumunh mex o ri apa. Nom kot kaj ja nē amnhĩ to htÿx kêt nē tanhmã amnhĩ tomnuj to hãmri nē te ate Pahihti Jejus kaga pyræk. Na pre pahkwÿjaja ã amnhĩ nhĩpêx anhÿr o hkaga nē axte kãm hamaxpër kêt nē.

²⁰ Imēnew mẽ Aresãnja na pre wa ã amnhĩ nhĩpêx anē nē tanhmã Tirtũm o kapër punuj to. Mÿrapê na pa pre Satanasti nhĩhkram wa haxà. Kot tanhmã wa ho nhũm wa kot tee ri amnhĩ tomnujta ã amnhĩ pumunh nē tokyx tãm amnhĩ nhĩpêx nē axte ã amnhĩ nhĩpêx anhÿr kêt kaxyw.

2

Tanhmã mẽ pahte Tirtũm mã amnhĩ jarēnh to hã mẽ pamã karõ

Rukre 11.2-4; Atre 10.34-35; Epes 6.18

¹ E kot paj hpãnhã tanhmã mẽ pahte Tirtũm mã amnhĩ jarēnh to hã amã karõ Ximotre. Ka inhma nē ixõ ri ho mẽ pahkwÿjê jahkre ho ri mẽ hkõt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tirtũm wÿr ho ri pa. Nē kãm mẽ harē nē mẽ kaxyw mẽmoj tã axàhwÿr o ri apa. Kêr kê ama nē tanhmã mẽ ho mex to. Kê mẽ amnhĩ tã omu nē ã kãm kapër anē nē kãm:

—Pa Tirtũm? Nã ãm hãmri na ka ã mẽ ixto mex anē. Amex o amex. Anē.

² Nē mẽ kãm anē kê mẽ õ pahi nē mẽ ho amnhĩptàr xwÿnh piitã mẽ ho ahwÿr o pa ho:

—Pa Tirtũm? Kwa kêr ka mẽ inhõ pahi mẽ mẽ kot mẽ ixto amnhĩptàr xwÿnh piitã tanhmã mẽ ho kê mẽ ixto mex o pa. Kêr pa mẽ ijamakêtkati nē ixãmnhĩx ixpa pê amã tanhmã amnhĩ nhĩpêx to ho ri ixpa. Nē ixãmnhĩx mẽ hkõt tãm amnhĩ nhĩpêx. Anē.

³ Kot puj mẽ ã mẽ ho mẽ papytãr xwÿnh Tirtũmja wÿr o papa anē nhũm mẽ pama nhũm ja kãm mex nē.

E kêr ka ã mẽ kãm ja hã karõ anē Ximotre.

*Tirtũm kãm mẽmoj prãm ã harēnh
Sikũn Pêtre 3.9*

⁴ Nē mẽ piitã mẽ kot kapër mar nē amnhĩ kaxyw Jejus kõt hamaxpër nē hkõt amnhĩ xunhwÿrja na Tirtũm kãm hprãm.

⁵ Ja kaxyw na pre mẽ pahwÿr Kra Jejus mẽ nhũm man mẽ pahwÿr wrÿ. Tirtũmja tapxipix na kêp Měpahpãm. Nē Kra Jejusja tapxipix na kot Tirtũm mã tãm mẽ paxunhwÿr mã xwÿnh. Ja kaxyw na pre amnhĩ grõnh kõt wrÿ mẽ pahpyrà nē ì ho ì nē kato.

⁶ Hãmri nē gaa nē aptàr hãmri nē mẽ pahpiitã mẽ panē ty. Jao Tirtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhÿr ã harēnh mar nē tokyx hkõt amnhĩ xunhwÿrja na Tirtũm kãm hprãm.

⁷ Ja kaxyw na pre ixãm. Ixte Ijaew kêt xwÿnhjê mã Tirtũm kapër jarēnh o ri mẽ hkõt ixpa kaxyw. Nē Jejus nhÿ hã tanhmã mẽ kãm ixkapër to ho ri ixpa kaxyw. Nē tanhmã kot mẽ panē amnhĩ nhĩpêx to hã harēnh kaxyw. ãm hãmri na pa ã amnhĩ jarēnh anē. Ixêx kêt. Na pa hte Ijaew kêt xwÿnhjê hkõt ixpa nē ã mẽ kãm ixkapër anē nē mẽ kãm:

—E mẽ ate Tirtũm Kra Jejus kõt amnhĩ xunhwÿrja na Tirtũm kãm hprãm. Jakamã kwa mẽ tokyx amnhĩ kaxyw hkõt ajamaxpër nē hkõt amnhĩ xunhwÿ. Anē.

Ikrêsti kamã tanhmã mẽ pahte amnhĩ nhĩpêx to hã mẽ pamã karõ

⁸ Nē kot kaj mẽ tõhã Tirtũm kapër mar kaxyw axpën wÿr akuprõ. Hãmri nē Tirtũm mã amnhĩ jarē nom kêr ka mẽ mẽmoj tã axpën kamã agryk kamã kãm amnhĩ jarēnh kêt nē. Rÿ mẽmoj tã axpën mã axàkjêr kamã kãm amnhĩ jarēnh kêt nē. ãm tãm mẽ ajamaxpër pix o kãm amnhĩ jarē. Nē tãm amnhĩ nhĩpêx kamã kãm amnhĩ jarē. Ja na inhmã hprãm. Tã kêr ka ã Epes nhõ xwÿnhjê mã ja hã akarõ anē Ximotre.

Mēnijaja kot tanhmã amnhĩ nhĩpêx to kaxyw mẽ hã kãm karõ

Wam Korõt 14.34; Epes 5.22; Xitre 2.3; Wam Pêtre 3.1-7

⁹ Nē kot paj hpãnhã Kris kõt mẽ pahtõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nã mẽmyjaja kot mẽ omunh nē kãm mẽ hkĩnh prãm xàj kê mẽ htÿx ri mẽ noo mã tanhmã

amnhĩ nhĩpêx to hkêt nê. Nê ja prãm xàj tanhmã ê jagjênh to hkêt nê rý tanhmã ri mrar to hkêt nê. Rý mẽ kãm mẽ hkĩnh prãm xàj òkrexê mex jagjênh rý mẽ ìhkra kamã kàx mex jagjênh nê ri hã mẽ hkôt pa kêt nê. Rý ja kaxyw tanhmã ri amnhĩ kĩ jaxwýr to nê ri hã mẽ hkôt pa kêt nê. Rý mẽ ê mex jagjê nê mẽ noo mã htýx ri hpijaàm kêt o pa hkêt nê. Kê mẽmyjaja kãm mẽ hkĩnh prãm xàj ã htýx ri amnhĩ nhĩpêx anhýr o pa hkêt nê.

¹⁰ Mẽ kãm anê kê mẽ kãm Tirtũm mãn kĩnh xàj mẽ piitã mẽ kutã mẽmoj to nojarêt o pa.

¹¹ Nê mẽ kãm anê kê mẽ Tirtũm kapêr mar kaxyw mẽ pikuprõnh xà hwýr agjê nê akryk Tirtũm kapêr mar o hkrĩ nê htýx ri xapên mã kapêr o hkrĩ kêt nê.

¹² Nê kê mẽ ikrêsti kamã Tirtũm kapêr o mẽmyjê jahkre hkêt nê. Rý kamã mẽmoj tã tanhmã mẽ kãm karõ hto hkêt nê. ãm akryk Tirtũm kapêr mar o hkrĩ.

¹³ Mẽmo myrapê koja mẽ ã amnhĩ nhĩpêx anê? Nà na pre Tirtũm my kot wa finat Atãwja kumrêx nhĩpêx nê kormã hprõ Ewa o hapu nê hipêx.

¹⁴ Nê Atãwja na pre kagã kapêr mar nê hkôt amnhĩ nhĩpêx kêt nê. Prõ na pre mar xà hkôt Tirtũm kapêr nhĩrõp xa nê tanhmã amnhĩ tomnuj to.

¹⁵ Myrapê na htem mẽnijaja hpijagri ho hikwý nhũm mẽ hkrajaja à htýx kãm hapõj. Tã nom koja mẽ Jesus kôt amnhĩ xunhwý nê ã ixte mẽ kaxyw amã mẽmoj tã karõ xà hkôt amnhĩ nhĩpêx hãmri nê nhýrmã mex kumrêx nê htĩr tũm nê pa ho pa. E kêr ka ã mẽnijê mã mẽmoj tã karõ anê Ximotre.

3

Pastô kot tanhmã amnhĩ nhĩpêx to kaxyw mẽ hã kãm karõ

Xitre 1.5-9

¹ E kot paj hpãnhã tanhmã pastô jarênh to. Koja mẽhõ kãm kêp Kris kwýjê nhõ pastô nê Tirtũm kapêr o mẽ ahkre hprãm nê ãm hãmri ã hamaxpêr anê. Ja mex.

² Jakamã koja mẽhõ kãm kêp pastô hprãm hãmri nê ã amnhĩ nhĩpêx anhýr o apa.

Koja mẽ piitã mẽ noo mã tãm ri amnhĩ nhĩpêx.

Nê hprõ pix tânopxar o pa.

Nê mẽmoj punuj kutã amnhĩ to htýx nê.

Nê tãm hamaxpêr.

Nê ãmnhĩx amnhĩ wýr mẽ piitã mẽ kuwý.

Nê Tirtũm kapêr o mẽ ahkre mex nê.

³ No kê mẽ kagõxyhti japrõr nê ho pipãnh o pa hkêt nê.

Nê àhkurê ho pa hkêt nê.

Nê mẽ piitã mẽ kamã ukaprĩ ho ri mẽ hkôt pa. Jao mẽ kutã nojarêt rãhã ho pa.

Nê amnhĩm kàxpore rax o pikuprõnh prãm xàj tanhmã amnhĩ nhĩpêx to hkêt nê.

⁴⁻⁵ Nê hkrajê jahkre mex o pa nhũm mẽ kapêr ma nê hkôt amnhĩ nhĩpêx. Nê hã hpijaàm kãm tãm amnhĩ nhĩpêx.

Koja mẽ hkrajê jahkre mex kêt nê hãmri nê mããnên Kris kwýjê jahkre mex kêt nê. Jakamã nhũm hkrajê mẽ Kris kwýjaja tãm amnhĩ nhĩpêx kêt nê.

⁶⁻⁷ Nê kê mẽ kot Jejus kôt amnhĩ xunhwýr kêt xwýnhjê noo mã tãm amnhĩ nhĩpêx rãhã ho pa.

Mẽ kot ja hã mẽ omunh nê mẽ hã hpijaàm o pa kaxyw. Nom koja mẽ tanhmã amnhĩ tomnuj to nhũm mẽ tee ri ja hã mẽ omu nê mẽ ho kapêr punuj nê. Satanasti kãm hprãm xà hkôt.

Nê kê mẽ kot Kris kôt amnhĩ xunhwýr nyw xwýnhjaja kêp pastô hkêt nê.

Koja mẽ kêp pastô hãmri nê mẽmo arĩgro hã tanhmã hamaxpêr to nê amnhĩ to rax prãm xàj tanhmã amnhĩ to jarkrar to ho pa. Hãmri nhũm Tirtũm tee ri ja hã omu nê te kot Satanasti nhĩpêx pyrãk o hipêx nê tanhmã homnuj to. Ja pymaj kê mẽ kot Kris kôt amnhĩ xunhwýr nyw xwýnhjaja kêp pastô hkêt nê.

E pastô na hte ã amnhĩ nhĩpêx anhýr o pa kamã Jejus kwýjê jahkre nê tanhmã mẽ ho ajuta hto ho mẽ hkôt pa Ximotre.

Mẽ kot Kris kôt hkwyjê ho ajuta xwýnhjê kaxyw mẽ hã kãm karõ

Atre 6.1

⁸ Nê kot paj hpãnhã amã mẽ kot Kris kôt hkwyjê ho ajuta xwýnhjê jarê ka inhma Ximotre. Nà koja mẽhõ kãm Kris kôt hkwyjê

ho ajuta hprãm hã koja ã amnhĩ nhĩpêx anhÿr o pa.

Koja mẽ htÿx ri mẽmoj tã mẽ kãm hpêr o pikênh o pa hkêtnê.

Nê tanhmã mẽmoj to hêx to ho pa hkêtnê. Nê kagôxÿhti japrôr nê ho pipãnh o pa hkêtnê.

Nê amnhĩm kàxpore ho pikuprôn nhê ho rax prãm xaj tanhmã amnhĩ nhĩpêx to hkêtnê.

⁹Nê kê Tĩrtũm kapêr piitã hkôt hamaxpêr o pa. Ra Tĩrtũm kot mẽ pamã kapêr piitã ho amnhĩrit jakamã koja Kris kôt hkwyjê ho ajuta xwÿnhjaja kapêr piitã hkôt hamaxpêr pê hkôt amnhĩ nhĩpêx mex rãhã ho pa.

¹⁰⁻¹³Nê kê mẽ amnhĩ prô pix tãnopxar o pa.

Nê pastô pyrã nê mẽ hkrajê jahkre mex nhũm mẽ hkôt ri amnhĩ nhĩpêx mex o pa.

Nê kê mẽ hprôjaja mjên pyrã nê mẽ piitã mẽ noo mã tãm ri amnhĩ nhĩpêx.

Nê hkwyjê ho kapêr rÿ mẽ axpên jakwa kamã ri axpên mã mẽ hixi ho rêr o pa hkêtnê.

Nê mjên pyrã nê mẽmoj punuj kutã amnhĩ to htÿx o ri pa. Nê amnhĩ to mex rãhã nê.

E koja mẽhõ kãm Kris kwÿjê ho ajuta ho pa hprãm hã koja ã amnhĩ nhĩpêx anhÿr o pa. Nom kêr ka mẽ kot mẽ ho ajuta kaxyw mẽ unhwÿr tokyx anhÿr kêt nê Ximotre. Taxy mẽ kamã ama nê aprĩ hã mẽ kot ri tanhmã amnhĩ nhĩpêx to hã mẽ omu mãn. Hãmri nhũm mẽ piitã mẽ mex ã mẽ harê ka mẽ hã mẽ ama nê rĩ kormã mẽ kot mẽ ho ajuta ho pa kaxyw mẽ unhwÿ. Hãmri nhũm mẽ amnhĩ tã omu nê axpên mã mex ã harê. Nê amnhĩ kaxyw Jejus Kris mã hamaxpêr mex o pa hã mẽ omu nê mẽ hã hpijaãm o pa.

Pawre kot Ximotre mã amnhĩ jarênh

¹⁴Nê inhmã awÿr inhmôr nê apumunh prãm Ximotre. Nom kot pa amnhĩ kukamã ã mẽmoj tã amã karõ nê hã kagã anê.

¹⁵Kêr pa tokyx awÿr inhmôr kêt japêr ka ixte amã mẽmoj ã kagãta kamã harê nê ixkutêp ho mẽ ahkre ho ri apa. Mẽ kot mar nê hprĩ hã mẽ õ pastô nê mẽ kot mẽ ho ajuta ho mẽ pa xwÿnhjaja kot tanhmã amnhĩ nhĩpêx to hã mẽ harênh mar kaxyw.

Mẽ pahpê Kris kwÿjaja mẽ pahpê Tĩrtũm kra jakamã na pu htem kapêr kôt ri amnhĩ nhĩpêx nê pakatãt kôt mẽ piitã mẽ kãm pakapêr o papa. Jao tanhmã mẽ kãm Jejus Kris jarênh to ho ri papa.

Pawre kot Jejus mex o mex ã mẽ grer jarênh

¹⁶Nê Jejusja mex o mex. Amnepêm kormã mẽ pahte harênh mar kêt tã pu prem harênh ma hãmri nê mex o mex ã pagrer o papa. Nê pagrer o:

Kris kêp Mẽpahpãm tã na pre mẽ pahwÿr wrÿ nê mẽ pahpyrà nê ì ho ì nê kato. Nhũm pre Tĩrtũm Karõja mex o mex ã harê. Nhũm Tĩrtũm kapêr o mẽ wrÿk xwÿnhjaja omunh o pa.

Nhũm ahpÿnhã pika piitã hwÿr tanhmã kot mẽ panê amnhĩ nhĩpêx to hã harênhja anhgrã.

Nhũm hte mẽ hkwyjaja harênh ma nê amnhĩ kaxyw hkôt hamaxpêr nê hkôt amnhĩ xunhwÿ.

Tã nhũm pika kamã àpênh jatur xãm kumê nhũm Tĩrtũm akupÿm amnhĩ wÿr ho api.

Na pu htem ã Jejus mex o mex ã pagrer anê.

4

Mẽ kot Tĩrtũm kapêr kwÿm ri tanhmã Kris kwÿjê jahkre hto xwÿnhjê jarênh

Matêwre 24.4-13; Korosê 2.16-19; Sikũn Ximotre 3.1-9; Sikũn Pêtre 2.1-3; Jutre 3-16

¹Nê nhÿrmã Jejus akupÿn mẽ pahwÿr wrÿk kaxyw koja pika nhõ xwÿnh kwÿjaja ma hkwyjê mã tanhmã Tĩrtũm kapêr o hêx to ho pa. Na pre Tĩrtũm Karõ hprĩ hã mẽ hkukamã tanhmã mẽ harênh to. Koja xep Satanasti hkwyjaja Jejus kwÿjê hwÿr mra nê hêx rom tanhmã mẽ kãm kapêr to. Satanasti nhÿ hã mẽ kãm hêx o pa nhũm mẽ hkwyjaja mẽ kuma nê mẽ hkôt hamaxpêr nê Jejus kaga. ã koja mẽ Jejus akupÿn mẽ pahwÿr wrÿk kukamã amnhĩ nhĩpêx anê.

²Nê Satanasti nhÿ hã mẽ kãm mẽmoj to hêx xwÿnhjaja ãm Satanasti pix mar o pa jakamã koja mẽ hamaxpêr mex kêt nê. Koja mẽ mẽmoj punuj pumu nê htÿx mex ã hkamnhĩx.

³Tã koja mẽ Tĩrtũm kapêr kwÿm ri ã Jejus kwÿjê mã hêx ho pa anê nê mẽ kãm:

—Kwa kêr ka mẽ axpên mã ri mẽ rer o apa hkêt nê. Tirtùm kãm ja prãm kêt. Âm ahte ri mẽ papaja na kãm hprãm. Anê.

Nê mẽ kot mẽmoj mex kur ã mẽ omu nê nê mẽ kãm kapêr nê mẽ kãm:

—Kwa na htem ata hkur kêt nê. Tirtùm pê omnuj kênã kot ka kêt ri aku.

Anhÿr o koja mẽ kãm kapêr o pa.

⁴ Nom Tirtùm na pre mẽ pamã mẽ apkur xà piitã ho kato. Mẽ paxàmnhix mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tirtùm mã harê hãmri nê paxàmnhix kuku.

⁵ Tirtùm kot mẽ paxàpkur xà piitã mex ã harênh jakamã na pu htem kãm harênh pê paxàmnhix piitã hkur o papa.

*Pawre kot mẽmoj tã Ximotre mã karõ
Sikũn Ximotre 1.6-14; Xitre 2.1-8*

⁶ E Ximotre. Ixte mẽmoj tã amã karõta kêr ka ho Kris kôt pahkwÿjê jahkre mex o ri mẽ hkôt apa. Kot kaj ã mẽ ahkre anhÿr jao ra Jejus Kris mã axàpênh mex nê. Na ka pre harênh ma nê hkôt amnhĩ xãm hãmri nê hkôt amnhĩ nhĩpêx mex nê. Tã kêr ka arĩ hkôt amnhĩ nhĩpêx mex rãhã kê mẽ piitã ja hã apumu.

⁷ Nê mẽ ujarênhja kot paj tanhmã amã hã karõ hto. Mẽ panhigêt xujarênh kamã mo Tirtùm jarênh? Amrakati kumrêx. Jakamã kêr ka mẽ hkôt ajamxpêr o ri apa hkêt nê. Âm Tirtùm kapêr kôt pix mã ajamxpêr tÿx rãhã ho ri apa. Tirtùm kapêrja âm hãmri na.

⁸ Nê na htem amnhĩ karo hprãm xàj tanhmã amnhĩ karo hto ho pa. Ja mex. Tanhmã kute hkêt. Na htem tanhmã amnhĩ karo hto nê gaa nê ra hkarore nê pa. No kêt mẽ kot Tirtùm kapêr kôt ri amnhĩ nhĩpêx o paja na mex o mẽ hkarota jakre. Na htem Tirtùm kapêr kôt ri amnhĩ nhĩpêx hãmri nê mex nê hkĩnh nê pa ho pa. Hãmri nê nhÿrmã kaxkwa kamã Tirtùm mẽ Kra Jejus wa kuri mex nê htĩr tũm nê pa ho pa. Ja na mex o mex.

⁹ âm hãmri ixte amã ja jarênh jakamã kwa kêr ka ja hã anohtÿx nê ri ho apa Ximotre.

¹⁰ Nê Tirtũmja rãhã ho rãhã. Tã na pu pre amnhĩ kaxyw Kra Jejus kôt pajamxpêr nê hkôt amnhĩ xãm nhũm Tirtùm pahto hkra. Kãm mẽ piitã mẽ ho hkra hprãm jakamã na

htem pahpyrà nê amnhĩ kaxyw Kra hkôt hamaxpêr nê hkôt amnhĩ xunhwÿ nhũm amnhĩ tã mẽ omunh xà hkôt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panê amnhĩ nhĩpêx to hã harênh rãhã o ri mẽ hkôt papa. Jao Tirtùm mã paxàpênh mex nê.

¹¹ E kêr ka ã ja ho pahkwÿjê jahkre anhÿr ho ri mẽ hkôt apa. Mẽ kot amar nê akapêr kôt amnhĩ nhĩpêx mex ho pa kaxyw.

¹² Nê kormã anyw tã kêr ka mẽ piitã mẽ noo mã tãm ri akapêr nê tãm amnhĩ nhĩpêx o apa. Mẽ kot Jejus ã tanhmã ato htã arĩ amnhĩ kaxyw kãm ajamxpêr tÿx nê. Nê mẽ piitã mẽ kutã anojarêt nê ajamxpêr mex pix o ri apa. Kot kaj kormã anyw tã ã mẽ noo mã amnhĩ nhĩpêx anê nhũm mẽ hã apumu nê kãm akapêr mar prãm nê. Anyw ã apumunh tã kãm akapêr mar prãm nê.

¹³ Nê kêr ka mẽ ate Tirtùm kapêr mar kaxyw axpên wÿr akuprõ ka arĩ ixkutêp mẽ kãm Tirtùm kapêr tũm ã kagã kamã akapêr rãhã ho apa. Nê aprĩ hã tanhmã ho mẽ ahkre hto nê ho mẽ ahkre mex nê Ximotre.

¹⁴⁻¹⁵ E kêr ka ã amnhĩ nhĩpêx anhÿr o ri mẽ hkôt apa nê amã ho anhÿr kaga hkêt nê. Mẽ piitã mẽ kot ate Jejus mã amnhĩ nhĩpêx mex o amõr ã apumunh kaxyw. Kormã ate mẽ kãm Jejus jarênh o apa hkêt ri na pre pastõ nhÿ hã mẽ kapêr xwÿnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nê anhĩmõk ã mẽ ìhkra jaxwÿ nê axàpênh kukamã tanhmã ajarênh to nê ato Tirtùm wÿ. Hãmri nhũm ate mẽ kãm kapêr jarênh o ri apa kaxyw amã ajamxpêr o hihtÿx. Tã kêr ka ÿ hã ã kãm amnhĩ nhĩpêx anhÿr rãhã ho ri apa.

¹⁶ Nê kwa kêr ka amnhĩ pumunh mex nê Ximotre. Jao tãm ri amnhĩ nhĩpêx nê akatãt kôt Tirtùm kapêr o mẽ ahkre ho ri mẽ hkôt apa. Kot kaj ã amnhĩ nhĩpêx anê hãmri nhũm mẽ ama nê apyrã nê Jejus kôt amnhĩ xunhwÿ. Hãmri nê pahpyrà nê nhÿrmã Tirtùm wa kuri htĩr tũm nê pa ho pa.

5

*Tanhmã mẽ pahte Kris kôt mẽ pahkwÿjê
nhĩpêx to kaxyw mẽ pamã karõ
Sikũn Ximotre 2.24-25*

1-2 E kot paj hpãnhã Kris kôt pahkwýjê hõ kot tanhmã amnhĩ tomnuj to nhũm ate tanhmã ja nê kãm akapêr to hã amã karõ.

Nà koja mēhõ tanhmã ri amnhĩ tomnuj to ka harēnh ma hāmri nē ma hwýr tē nē ja nē tanhmã kãm akapêr to. Nom kêr ka kãm akapêr mã agêt kêt nē.

Koja mēwejjê õ tanhmã amnhĩ tomnuj to ka te kêp anhĩpêxà rý akatorxà pyrãk o kãm akapêr. Jao hã apijaãm o tanhmã kãm akapêr to.

Rý koja apyrà nē mē nywjê hõ tanhmã amnhĩ tomnuj to ka te kêp atõ pyrãk o kãm akapêr.

Rý mēnijê nyw õ amnhĩ tomnuj japêr ka te kêp atõx pyrãk o kãm akapêr. Jao hã apijaãm o kot amnhĩ tomnujja nē tanhmã kãm akapêr to.

E kêr ka mē kot amnhĩ tomnuj nē ã mē pahkwýjê mã akapêr anhýr o apa Ximotre.

*Mē kêp mē mjên htyk xwýnhjê jarēnh
Xiakre 1.27*

3 Nē kot paj hpãnhã Kris kôt pahkwýjê pē mē mjên htyk xwýnhjê jarē. Nà koja mēhõ nija hkra hkêt nē htãmnhwý hkêt nē pa nhũm mjên kêp ty ka mē apê Kris kôt hkwyjaja ja hã omu nē mēmoj to kutã anojarêt rãhã ho ri apa.

4 Nom koja ra hkra rý ra htãmnhwý japêr kê mē tãmjaja tanhmã ho ajuta hto ho pa. Kãm õ nē kãm mēmoj nhõr o pa. Kormã mēhprĩre ri na pre mē õ wõwõ nē mē katorxà nē mē hipêxà mē hamãr mex pē mē kãm õ ho pa. Tã ra mē àptàr jakamã kê mē amnhĩ pyrà nē mē hamãr mex pē mēmoj to mē kutã nojarêt rãhã ho pa. Ja na Tirtũm kãm hprãm. ã mē kot hkwyjê kamã ukaprĩ ho pa jakamã te mē kot Tirtũm mã àpēnh pyrãk.

5 No koja mēhõ ni ra wejre nē ahte ri pa. Nē hkra nē htãmnhwý hkêt nē ri pa. Tã kê ja hã amnhĩ pumu nē Tirtũm kamnàr rom amnhĩ to hwýr o pa. Nē mē piitã mē ho hwýr o pa. Jao tãm hamaxpêr. Ka mē apê Kris kôt hkwyjaja ja hã omu hāmri nē mē kam nē tanhmã kutã anojarêt to ho ri apa.

6 No koja mē ã amnhĩ nhĩpêx anhýr kêt nē. Nē htýx ri mē grer wýr mra nē hpijaãm kêt o ri mra ka mē ja hã mē omu nē mē ho ajuta hkêt nē. Na htem ã amnhĩ nhĩpêx

anhýr o pa nē arĩ htĩr tã te ra htyk nē hikwý pyrãk.

7 E kêr ka ã ja hã Kris kôt pahkwýjê mã karõ anē. Kê mē ama nē ã mē mjên htyk xwýnhjê nhĩpêx anhýr o pa.

8 Nom koja mēhõ amnhĩ kwýjê ho mex kêt japêr. Nē õrkwý kamã hprõ nē hkra-jaja nē hipêxà nē katorxà nhũm mē kãm mē apkur xà nhõr kêt japêr. Koja mē ã amnhĩ nhĩpêx anhýr jao Jejus kaga nē te mē kot hkôt amnhĩ xunhwýr kêt xwýnhjaja kot amnhĩ nhĩpêx pyrãk o amnhĩ nhĩpêx nom amnhĩ tomnuj týx o mē hakre.

9 Nē mē mjên htyk nē mē hkra nē mē htãmnhwý hkêt xwýnhjaja kêr ka mē tanhmã mē ho ajuta hto kaxyw hāmri nē mē hixi piitã hã kagà. Nom kwa kêr ka aprĩ hã tanhmã mē amnhĩ nhĩpêx to hã mē omu nē rĩ kormã mē hixi hã kagà.

Koja mēhõ kormã mjên htĩr ri tãm hipêx nē nhãm mēmyjê ho amnhĩkati hkêt nē.

Nē ra hã amgrà pē 60 rý ra hã 60 jakre.

10-11 Nē tãm mē piitã mē hipêx o pa.

Nē hkrajaja kormã htĩr ri nhũm mē hamãr mex nē mē ahkre mex o pa.

Nē nhãm krĩ hõ nhõ xwýnhjaja õ krĩ hwýr pøj nhũm mē omu nē amnhĩ nhõrkwý hwýr mē kuwý.

Nē mē kêp amrakati xwýnhjê ho mex o pa.

Koja mē ã amnhĩ nhĩpêx anē ka ja hã mē omu nē rĩ kormã mē ho ajuta kaxyw mē hixi hã kagà. Nom mē hixi hã kagà kaxyw nē mēmoj tã mē hkukja nē mē kãm:

—E kot kaj ã amnhĩ nhĩpêx anhýr o apa hã inhmã amnhĩ jarē pa ama nē rĩ kormã anhĩxi hã kagà.

Kot kaj axte amjên kêt nē.

Nē tanhmã Kris kôt akwýjê ho mex to ho ri apa.

Nhũm mēhõ mēmo mýrapê hkaprĩ nē pa ka ja hã omu nē tanhmã ho ajuta hto.

E kot kaj ã amnhĩ nhĩpêx anhýr o apa hã amnhĩ jarē pa ama nē anhĩxi hã kagà. Hāmri nhũm Kris kôt akwýjaja amã axàpkur xà nhõr o pa. Anē.

ã mē kãm akapêr anē nhũm mē ama nē amã:

—Ý. Ma kot paj ã amnhĩ nhĩpêx anē.

Anhÿr ã amnhĩ jarẽ ka mẽ ama nẽ mẽ hixi hã kagà. No kormã mẽ hã amgrà pê 60 kêt xwÿnhjaja kêt ka kormã mẽ hixi hã kagà hkêt nẽ. Koja mẽ tanhmã mẽ kot amnhĩ nhĩpêx to ho pa hã mẽ kãm karõja ma nẽ wam tajê pyrã nẽ amã:

–ÿ. Ma kot paj ã amnhĩ nhĩpêx anẽ. Na pa Jejus Kris noo mã ã amnhĩ jarẽnh anẽ.

Anhÿr ã amnhĩ jarẽnh tã gaa nẽ ra hkurẽ hapôj nẽ ra kot amnhĩ jarẽnh ta kwÿm ri tanhmã amnhĩ nhĩpêx to nẽ axte mjên.

¹² Ra amnhĩ jarẽnh o:

–Ma kot paj ãm Jejus mã pix mã tanhmã amnhĩ nhĩpêx to ho ri ixpa nẽ axte inhmjên kêt nẽ.

Anhÿr tã tanhmã hamaxpêr to nẽ kot amnhĩ jarẽnh kwÿm ri axte mjên. Jao te Jejus mã amnhĩ to hêx pyrãk nhũm Tirtũm pê jamnuj. Ja pymaj kêt ka mẽ kormã mẽ hã amgrà pê 60 kêt xwÿnhjê nhĩxi hã kagà hkêt nẽ. Kormã mẽ hã amgrà pê 60 kêt xwÿnhjaja arĩ mẽ hkĩnh tÿx

¹³ Jakamã kot kaj mẽ kãm mẽ apkur xã nhõr o apa nhũm mẽ ja hã amnhĩ tã mẽ apumu nẽ axte amnhĩm àpênh kêt nẽ. ãm kãm kaga nẽ htÿx ri nhãm mẽ hwÿr mra nẽ nhãm mẽ hwÿr mra. Nẽ amnhĩ pumunh mex kêt nẽ htÿx ri axpên jakwa kamã ri mẽ hixi ho rêr o pa. Nẽ nhÿri mẽmoj pumu rÿ tanhmã mẽmoj jarẽnh mar to hãmri nẽ ma htÿx ri hkwÿjê mã harẽnh o mra. Koja mẽ ã amnhĩ nhĩpêx anhÿr o pa hãmri nhũm mẽ kêt Kris kwÿ hkêt xwÿnhjaja ja hã mẽ omu nẽ mẽ hkôt mẽ pahpê Kris kôt pahkwÿjê ho kapêr punuj nẽ.

¹⁴ ã mẽ kot amnhĩ nhĩpêx anhÿr o pa pymaj kêt ka kormã mẽ nyw xwÿnhjê mã anẽ kêt mẽ mãmrĩ axte mjên nẽ o pa. Hãmri nẽ hkra nẽ hkrajê jamãr o pa. Ja na inhmã hprãm. Koja mẽ ã amnhĩ nhĩpêx anẽ hãmri nhũm mẽ kêt Kris kôt pahkwÿ hkêt xwÿnhjaja mẽ hkôt tanhmã mẽ pahto kapêr punuj to hkêt nẽ.

¹⁵ Mãn ka ra Kris kôt pahkwÿjê nyw pê mẽ mjên htyk xwÿnh kwÿjaja tanhmã amnhĩ tomnuj to hã mẽ harẽnh ma. Na prem Jejus kaga nẽ Satanasti hkôt amnhĩ nhĩpêx o pa.

¹⁶ E kêt ka mẽ ã Kris kwÿ pê mjên htyk xwÿnhjê nhĩpêx o apa anẽ Ximotre. Nom

koja mẽ akwÿ kamã mẽhõ nhõ wôwô mjên rÿ katorxã mjên kêt ty kêt tãm kãm õ ho pa. Kêt kêt Kris kôt pahkwÿjaja ãm mẽ kêt mẽ mjên htyk xwÿnh pê mẽ hkra nẽ mẽ htãmnhwÿ hkêt nẽ ahte ri mẽ pa xwÿnh pixjaja tanhmã mẽ ho ajuta hto ho pa.

Mẽ pahpê Kris kôt pahkwÿjê hkrãhtũm kaxyw mẽ pahtã kãm karõ

Atre 14.23; Wam Korõt 9.7-14; Karatas 6.6; Wam Tesarõn 5.12; Wam Pêtre 5.1-4

¹⁷⁻¹⁸ Nẽ kot paj hpãnhã amã Kris kôt mẽ pahkrãhtũmjê jarẽ. Tirtũm kapêr ã kagà htũm kot mẽ harẽnh kot:

Kêt ka Tirtũm kapêr o mẽ ajahkre xwÿnhjaja mẽ ahkre pãnhã mẽ kãm amnhĩre. Anẽ.

Nẽ mããnen mẽ harẽnh ã kuxi nẽ mẽ harẽnh o:

Koja akrit amã àpênh o pa ka ho mex nẽ kãm õ mex o apa. Anẽ.

ã ja jarẽnh kot anhÿr jakamã koja Kris kôt mẽ akrãhtũmja Kris mã tanhmã mẽ ato mex to ho pa ka mẽ amnhĩ tã kãm amnhĩrer mex o ri apa. Kot Tirtũm kapêr o mẽ ajahkre mex jakamã ka mẽ amnhĩ tã kãm amnhĩrer mex nẽ.

¹⁹ Nẽ koja mẽhõ pixi nẽ mẽ awÿr tẽ nẽ amã Kris kôt mẽ akrãhtũm kot tanhmã amnhĩ tomnuj to hã harẽnh to ka ama nẽ ãm ama. Nom koja wa hamêxkrut rÿ mẽ axkrunêpxi nẽ mẽ awÿr mra nẽ axpên kôt tanhmã harẽnh to ka mẽ ama nẽ ãm hãmri mẽ kot tanhmã kot amnhĩ tomnuj tota kôt ajamaxpêr.

²⁰ Hãmri nẽ Kris kwÿjê piitã mẽ noo mã kot amnhĩ tomnuj xwÿnh ta mã tanhmã kot amnhĩ tomnuj to nẽ kãm akapêr kêt axte ã amnhĩ nhĩpêx anhÿr kêt nẽ. Mẽ piitã mẽ kot hã amar nẽ nhÿrmã tanhmã amnhĩ tomnuj to nhũm ate urãk nẽ hã tanhmã mẽ kãm axãkjêr to pymaj tanhmã amnhĩ tomnuj to hkêt nẽ.

²¹ E Tirtũm noo mã na pa ã amã mẽ kaxyw mẽmoj tã karõ anẽ Ximotre. Nẽ Jejus Kris mẽ Tirtũm kapêr o mẽ wryk xwÿnhjê noo mã pa ã amã karõ anẽ. Jakamã kêt ka inhmar tÿx nẽ hkôt amnhĩ nhĩpêx o ri apa. Jao mẽ piitã mẽ hipêx o axpên pyrãk. Nom kêt ka akrãmnhwÿ kot tanhmã amnhĩ tomnuj to hã omu nẽ axtem nẽ ãm omu nẽ ajamaxpêr o:

—Nà kêp ixkràmnhwỳ kênã kot paj kêt ja nê tanhmã kãm ixkapêr to. Pa ho anhÿr kêt nê.

Anhÿr o ajamaxpêr kêt nê. Mě piitã mẽ hipêx o axpên pyrãk.

²² Nê kêt ka anojarêt kãm mẽ kot Tirtũm mã tanhmã amnhĩ nhĩpêx to ho mẽ pa kaxyw mẽ unhwỳr kêt nê. Aprĩ hã tanhmã mẽ kot amnhĩ nhĩpêx ã hã mẽ omu nê mẽ hkapi nê rĩ kormã mẽ unhwỳ rỳ tee ri mẽmoj tã mẽ omu nê mẽ hkaga.

Nê koja mẽhõ tanhmã amnhĩ tomnuj to ka ja hã omu rỳ harênh ma hãmri nê urãk nê ã amnhĩ nhĩpêx anhÿr kêt nê. Arĩ Tirtũm kôt amnhĩ nhĩpêx pê tãm ri amnhĩ nhĩpêx pix o apa.

²³⁻²⁵ Na htem tũhã tanhmã amnhĩ tomnuj to nhũm mẽhõ ja hã mẽ omu nê mẽ harênh kurê kumrêx. Kris kôt mẽ hkrãhtũm kormã kot tanhmã hã kãm nê hkêt ri nhũm mẽ ja hã mẽ omu nê tanhmã mẽ harênh to. Nom na htem tũhã hpimxur pê tanhmã amnhĩ tomnuj to nhũm Tirtũm pix ja hã mẽ omu. Tã koja nhÿrmã mẽ piitã mẽ kãm ja ho amnhĩrĩt nhũm mẽ piitã harênh ma nê hkôt omu.

Nê mẽ kot amnhĩ to mex xwỳnhjaja haxwỳja. Na htem tũhã mẽ noo mã tanhmã mẽhõ ho mex to nhũm hkwyjaja ja hã omu nê axpên mã mex ã mẽ harê. Nê tũhã hpimxur pê tanhmã mẽhõ ho mex to nhũm mẽhõ ja hã omunh kêt nê. ãm Tirtũm pix ã kot amnhĩ nhĩpêx anhÿr ã omu. Tã koja nhÿrmã mẽ piitã mẽ kãm ja ho amnhĩrĩt nhũm mẽ piitã harênh ma nê hkôt omu.

Nê kwa Ximotre. Axà nê anhõhymnuj nê ri apa jakamã kwa kêt ka gô pix o akõm o apa hkêt nê. Mããnên wĩhti hkwy ho ixkõ kêt ka anhõhy mex japêr.

6

Mě kãm mẽ àpênh xwỳnhjê kaxyw mẽ hã kãm karõ

Epes 6.5-9; Korosẽ 3.22-4.1; Xitre 2.9-10; Wam Pêtre 2.18-25

¹ E kot paj mẽ akwyjaja mẽ kãm mẽ àpênh o mẽ pa xwỳnhjê kaxyw mẽmoj tã amã karõ. Mě kãm anê kêt mẽ õ patrãw ã hpijaam o ri pa. Jao mẽ kapêr ma nê hkôt kãm àpênh mex nê. Koja mẽ ã amnhĩ nhĩpêx anê nhũm amnhĩ tã mẽ omu nê hamaxpêr o:

—Kwa pêr Tirtũm kapêr na mex kumrêx. Inhmã àpênh xwỳnhja na hte hkôt amnhĩ nhĩpêx pê amnhĩ to mex o pa. Pêr ãm hãmri na hte Pawre ho mẽ ahkre ho pa.

Anhÿr o hamaxpêr.

² Nê koja mẽ õ patrãw ra Kris kôt amnhĩ xãm japêr ka kãm mẽ àpênh xwỳnhjê mã anê kêt Kris kôt mẽ kêt mẽ htõ hã mẽ kãm àpênh mex o ri pa. Nom kêt mẽ urãk nê kêt Kris kôt hkwy hã mẽ omu nê hamaxpêr o:

—Nà Kris kôt ixtõ kênã kot paj kêt ri kapêr kôt amnhĩ nhĩpêx nê kãm ixàpênh mex o ri ixpa.

Anhÿr o hamaxpêr kêt nê. Kê kêt Kris kôt htõ hã kãm ho mex prãm xaj kãm àpênh mex o pa.

E kêt ka mẽ kãm mẽ àpênh o mẽ pa xwỳnhjê mã ã tanhmã mẽ àpênh to ho pa hã karõ anê Ximotre.

Tirtũm kapêr kwỳm ri mẽ ahkre xwỳnhjê jarênh

Rukre 12.13-21; Xiakre 5.1-6

³ Nê na hte Kris kwỳ hkêt xwỳnh kwỳjaja Kris kwỳjê mã Tirtũm kapêr o hêx o pa. Nê htỳx ri Jejus kapêr kwỳm ri tanhmã harênh to ho pa. ãm hãmri na Tirtũm mẽ Pahiti Jejus Kris wa kapêr tã nhũm htem htỳx ri tanhmã ho hêx to ho ri mẽ hkôt pa.

⁴ Mě kot amnhĩ to rũnh xwỳnh ã amnhĩ to jarkrar tã mẽ àhpumunh tỳx kêt. Na htem tanhmã Tirtũm kapêr kute hã axpên mã akir nê mẽmoj tã axpên kãm gryk o pa. Nê axpên mã kapêr punuj nê mẽmoj tã axpên kamnhĩx o pa.

⁵ Nê hamaxpêr mex kêt jakamã mẽmoj tã axpên mã àkjêr pix o pa. Na htem ã amnhĩ nhĩpêx anhÿr o Tirtũm kapêr mar tỳx kêt nê. Hãmri nê htỳx ri hamaxpêr nê hamaxpêr o:

—Kot paj Tirtũm kapêr o mẽ ahkre ho ixpa nhũm mẽ inhma nê inhmã amnhĩrer mex nê pa ixkàxpore rax nê ri ixpa. Nà kot paj ã amnhĩ nhĩpêx anhÿr o ri ixpa. Ja inhmã mex.

Anhÿrja o kãm hikàxpore rũnh prãm o amnhĩ to amnhĩrĩt o pa.

Kàxpore jarênh

⁶⁻⁸ E kot paj hpãnhã amã tanhmã kàxpore jarênh to ka inhma Ximotre. Xà na pu htem pakatorxà nhõhy rũm pajapôj nê amnhĩ kôt kàxpore hkwy jamỳ nê ho pajapôj? Nà na

pu htem pahkênh nê panhỹ kamã pajapôj. Tã kot puj mẽ ja pyrã nê nhỹrmã ty nê mã ho anê nê panhỹ kamã ma papa. Jakamã kêr pu mẽ kormã pika ja kamã pahtĩr nê papa ri paxãpkur xà nê mẽ paxê pix tânopxar pê pahkĩnh nê ri papa. Pakàxpore rũnh kêt tã na pu htem Tĩrtũm kamnàr rom pahkĩnh nê pajamakêtkati nê papa. Jao pajamaxpêr o:

—Nà ixkàxpore rax kêt nê ixkukrêx rax kêt tã na hte Jejus ixkôt pa ho pa nê mẽmoj to ixkutã nojarêt rãhã ho pa. Jakamã ixkàxpore rax kêt tã ixkĩnh nê ijamakêtkati nê ixãmnhĩx ixpa.

Anhỹr o pajamaxpêr o papa.

⁹⁻¹⁰ Mẽ kot amnhĩm kàxpore o pikuprõnh rũnh xwỹnhjaja na htem kàxpore pix kukamã hamaxpêr o pa nê gaa nê kàxpore rũnh gryk ã amnhĩ tomnuj o pa. Na pre mẽ pahkwýjaja kàxpore rũnh prãm xà Jejus kaga. Tã ra mẽ hikàxpore rũnh tã hkĩnh nê hamakêtkati nê pa hkêt nê. Na htem omnuj nê hkaprĩ nê pa. ã na htem mẽ hikàxpore rũnh xwỹnh kwýjaja amnhĩ nhĩpêx anhỹr o pa. Jao kàxpore pix kukamã hamaxpêr nê gaa nê ra gryk ã mẽ kot amnhĩ to mex xà kaga hpa nê htýx ri tanhmã amnhĩ tomnuj to ho pa. Nê tanhmã hkwyjê nhĩpêx punuj to. Te tutre kot harôj xành ã htýx rapuuti hwýr gjêx nê tee ri kãm kator prãm kaprý pyrãk. ã mẽ kot amnhĩ nhĩpêx anhỹr o pa jakamã koja nhỹrmã Tĩrtũm ma mẽ kot amnhĩ xà htýx kamã hamak tũm xà hwýr mẽ kurê.

Pawre kot Ximotre mã mẽmoj tã karõ

Korosê 4.17; Wam Ximotre 4.14; Sikũn Ximotre 2.1-7

¹¹ Nê kwa Ximotre kêr ka mẽ urãk nê kàxpore rax prãm xà amnhĩ tomnuj o apa hkêt nê. Ate Tĩrtũm mã tanhmã amnhĩ nhĩpêx to ho apa xwỹnh jakamã kêr ka kãm hprãm xà hkôt pix mã amnhĩ nhĩpêx o ri apa. Jao Tĩrtũm pyrã nê ate amnhĩ jarênh xà hkôt amnhĩ nhĩpêx o ri apa. Nê amã Kris kôt akwýjê hkĩnh pê mẽmoj to mẽ kutã anojarêt o ri apa. Nê Kris kôt mẽ hkwyjê hkêt xwỹnhjaja kot Kris ã tanhmã ato htã ka arĩ hkôt amnhĩ nhĩpêx mex nê mẽ piitã mẽ ho mex o ri mẽ hkôt apa.

¹² Na ka pre Kris kôt mẽ pahkwýjê noo mã tanhmã amnhĩ jarênh to. Tĩrtũm kot amnhĩ wýr awýr nhũm ate Jejus kôt amnhĩ xãm nê amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mẽ piitã ja hã ama. Jakamã kwa kêr ka arĩ Jejus kôt amnhĩ nhĩpêx mex rãhã ho ri apa. Hãmri nê nhỹrmã Tĩrtũm mẽ Kra wa kuri amex kumrêx nê atĩr tũm nê apa ho apa.

¹³⁻¹⁴ E na pa mẽmoj tã amã karõ rax ka piitã kamã harê nê mar pa. Tã kêr ka inhmã ja hã tanhmã amnhĩ jarênh to. Mẽmoj piitã ho htĩr xwỹnh Tĩrtũm mẽ Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nê àmnhĩx kot Pahi Põn Pirat mã amnhĩ jarênh xwỹnhhta noo mã amnhĩ jarê nê inhmã amnhĩ jarênh o:

—Nà kot paj ate mẽmoj tã inhmã karõ piitã hkôt amnhĩ nhĩpêx rãhã nhũm Pahihti Jejus Kris akupýn mẽ pahwýr wrý. ãm hãmri na pa ã amã amnhĩ jarênh anê Pawre.

Anhỹr o inhmã amnhĩ jarê.

Tĩrtũm mex o mex ã mẽ grer

¹⁵ Nê koja Tĩrtũm akupýn mẽ pahwýr Jejus mênh xà hã arĩgro jarê hãmri nhũm kot harênh xàta wýr pøj nhũm akupýn mẽ pahwýr kumê. Tĩrtũmja mex o mex. Tapxipix kêp mẽmoj piitã ho amnhĩptar xwỹnh maati. Nê kêp jar mẽ ho amnhĩptar xwỹnh piitã mẽ õ Pahi Maati.

¹⁶ Nê tapxipix na rãhã ho rãhã nê mex o mex jakamã puhã hirã rax kumrêx. Tã hkĩnhã mẽ pahte amnhĩ tomnuj xwỹnh jakamã kot puj mẽ puhã hirã raxja kutã hkêt nê. Jao hwýr mẽ pamrar kêt nê.

Nê aa mẽhõ kot no ho Tĩrtũm pumunh kêt tã kwa kêr pu mẽ pahpiitã kãm mex o mex nê hihtýx o hihtýx ã harênh rãhã ho papa.

Axe mẽ hikàxpore rũnh xwỹnhjê jarênh Rukre 16.9

¹⁷ Nê kêr ka Kris kwýjê kamã mẽ hikàxpore rũnh xwỹnhjê mã anê kê mẽ kot amnhĩ to rũnh kôt amnhĩ to àmra ho pa hkêt nê. Nê amnhĩ kaxyw mẽ hikàxpore rũnh kôt hamaxpêr o pa hkêt nê. Kàxpore

na hte hapêx tokyx anê. Mě kãm anê kê mẽ hpãnhã amnhĩ kaxyw Tĩrtũm kôt mãn hamaxpêr tỳx rãhã ho pa. Na hte àmnhĩx tanhmã mẽ pahto mex to ho pa nê mẽ pahpê õxỳ hkêt nê. Jao mẽ pahwỳr na rê nhũm mẽ pahpur go mex nê pu mẽ kamã panhõ rũnh o papa. Nê mẽ pamã myyti ho hirã pu mẽ kukwak ri parĩt mex pê mẽmoj tã paxápênh o papa. Ǻ Tĩrtũm kot mẽ pahto mex kot anhỳr pu mẽ kukwak ri pahkĩnh nê pajamakêtkati nê ri papa. Tã kêr ka mẽ hikàxpore rũnh xwỳnhjê mã anê kê mẽ amnhĩ kaxyw kumã pix mã mãn hamaxpêr rãhã ho pa.

¹⁸ Nê mẽ kãm anê kê mẽ hikàxpore ho hkwyjê pê õxỳ hkêt nê ho tanhmã mẽ ho mex to ho pa. Nê àmnhĩx ho tanhmã mẽ kêp amrakati xwỳnhjê ho ajuta hto ho pa.

¹⁹ Koja mẽ ǻ amnhĩ nhĩpêx anê nhũm Tĩrtũm ja hã mẽ omu nê hkĩnh nê õ krĩ kamã mẽ kutêp mẽ kãm mẽmoj mex o akuprõ. Jakamã nhũm mẽ kormã jar htĩr nê pa ri mex nê pa nê mããnên nhỹrmã kaxkwa kamã mex kumrêx o jar pika ja kamã mex nê pata jakre. E kêr ka ǻ mẽ hikàxpore rũnh xwỳnhjê mã ja hã karõ anê Ximotre.

Pawre kot Ximotre mã mẽmoj tã karõ jatur xà

Korosê 4.17; Wam Ximotre 6.14; Sikũn Ximotre 1.13, 4.5

²⁰ Nê ra Tĩrtũm kot ate kapêr o mẽ ahkre ho apa kaxyw axãm jakamã kêr ka tãm amnhĩ nhĩpêx pê mẽ ahkre mex rãhã ho ri apa. Jao Tĩrtũm kapêr o hêx o ri mẽ ahkre xwỳnhjê hkôt apa hkêt nê. Na htem mẽ kuma nê mẽ kapêr mex ǻ mẽ hkamnhĩx nom mẽ kapêr mex kêt. Jakamã kwa kêr ka mẽ kot tanhmã mẽ ahkre hto hã mẽ ama nê ǻm mẽ ama.

²¹ Na pre ra mẽ pahkwỳjaja mẽ kuma nê mẽ kapêr gryk ǻ Jejus kaga.

E ǻm ja pix. Kê Tĩrtũm mẽ apiitã mẽ akutã nojarêt rãhã ho pa. Ixpê Pawre na pa ǻ amã ixkapêr ǻ kagà anê.

Sikūn Ximotre Pawre kot Ximotre hwỳr wam kagà nē mēnh kôt hō mēnh

Pawre na pre kagàja nhīpêx. Na pre Jejus kwỳ hkêt xwỳnhjaja Jejus ã unê nē krī pê Rôm kamã haxà nhũm arĩ hkrĩ ho hkrĩ. Tã ra mē kot hpĩr kaxyw nhũm Ximotre mã kagàja nhīpêx nē hwỳr kumē. Na pre Ximotre Pawre hkôt pa ho pa hã mytwrỳ xohtô nē. Tã hpãnhã krī pê Epes kamã arĩk nē Tĩrtũm kapêr o Jejus kôt hkwỳjê jahkre ho ri mē hkôt pa. Jakamã nhũm Pawre kagàja nhīpêx nē kamã kãm mēmoj tã karō nē hwỳr kumē. Nē nhỹrmã mē kot Pawre pyrã nē Jejus ã hpĩr mã htã tee ri amnhĩ kukamã hamaxpêr kêt ã kãm karō.

Nē mē hkwỳjaja kêp Tĩrtũm kra hã amnhĩ jarēnh tã nhũm Pawre Tĩrtũm kãm hprãm xà kuhpa hã mē kot tanhmã amnhĩ nhīpêx to ho pa hã Ximotre mã mē harē. Kot mē harēnh mar nē Jejus kwỳjê nē mē omunh mex o pa kaxyw. Nē Ximotre kot Tĩrtũm kãm hprãm xà kot pix mã amnhĩ nhīpêx o pa hã kãm karō. ã na pre Pawreja Ximotre mã mēmoj tã karō kamã hihtỳx nē hã kagà nē hwỳr mēnh anē. Nē kãm:

¹ Pa Ximotre? Xà amex? Ixpê Pawre na pa amã ixkapêr nē hã kagà nē awỳr kumē. Ixpê Jejus nhỹ hã hkwỳjê jahkre ho ixpa xwỳnh na pa. Tĩrtũm na pre ja kaxyw ixãm. Tĩrtũm Kra Jejus Krisja kot puj mē pahpê hkwỳjaja nhỹrmã kukwak ri pamex kumrêx nē pahĩr tũm nē ri papa ho papa.

Pawre kot Ximotre ho Tĩrtũm mē Jejus wa hwỳr ã harēnh

Atre 16.1-2

²⁻³ Te apê ixkra pyrãk Ximotre. Jakamã na pa hte ato Mēpanhīpêêxà maati Tĩrtũm mē Pahĩti Jejus Kris wa hwỳr rãhã ho ri ixpa. Na pa hte mē pakukamã mē panhīgêt pyrã nē tãm ijamaxpêr o ixpa pê Tĩrtũm mã tanhmã amnhĩ nhīpêx to ho ri ixpa. Jakamã na pa hte ato Kra Jejus mē wa hwỳr rãhã ho ri ixpa. Arĩgro hã nē kamãt kãm amã ijamaxpêr nē ato wa kuwỳ nē wa kãm:

—Pa Tĩrtũm mē Pahĩti wa. E ixte ixkra puro Ximotre ho war awỳr kaxyw war amã ijamaxpêr. Na ka hte wa ho mex nhũm war akôt amnhĩ nhīpêx mex o pa. Te õ wôwô mē katorxà wa kot amnhĩ nhīpêx pyrãk. Na pa hte kot amnhĩ nhīpêx o paja mã ijamaxpêr nē ý hã ixkĩnh nē. War ate kamã axukapĩrĩ ho ri apa kaxyw na pa ho war awỳ. War ate kutã war anojarêt rãhã ho ri war apa nhũm hamakêtkati nē àmnhĩx ri pa ho pa kaxyw. Anē.

Pawre kot Ximotre nhỹ hã hkĩnh ã harēnh

⁴ Nē na ka pre hte ixkôt ixto ajuta ho ri ixkôt apa htã pa pre nhỹhỹm inhnojarêt nē axtem axapênh õ hã amã karō hãmri nē Epes kamã are nē ma mō. Ka amã ijapê xaj tee ri ma inhmōr ã ixpumu nē amỳr rax nē. Na pa hte arĩ ja hã inhnohtỳx nē ri ho ixpa Ximotre. Jao ra ato ama nē. Tã kot puj nhỹrmã axte axpên pumu nē pahkĩnh tỳx nē.

⁵ Nē na pa hte akatorxà Enĩtre mē anhō wôwôre Rojti wa kãm ijamaxpêr rãhã ho ri ixpa. Na pre wa kumrêx amnhĩ kaxyw Jejus kôt hamaxpêr nē hkôt amnhĩ xãm. Tã ka wa hkanrêhã wa urak nē ã amnhĩ nhīpêx anē. Ixte ja hã apumunh mex.

⁶ Na pa pre ate tanhmã Jejus mã amnhĩ nhīpêx to ho ri apa kaxyw axãm kaxyw anhĩmōk ã inhĩhkra xi nē ato Tĩrtũm wỳ. Kot tanhmã akrã hto nhũm ate Karō nhỹ hã tanhmã amnhĩ nhīpêx to ho apa kaxyw. Tã kêt ka arĩ ã kãm amnhĩ nhīpêx anhỹr rãhã ho ri apa.

⁷ Na pu htem Tĩrtũm Karō nhỹ hã pamã ma ho papa hkêt nē. Na pu htem ý hã pamã mē piitã mē hkĩnh pê paxãmnhĩx tanhmã mē ho ajuta hto ho papa. Nē ý hã kapêr o mē ahkre htỳx o ri mē hkôt papa. Nē mēmoj punuj kutã amnhĩ to htỳx rãhã nē. Jao amnhĩ to mex pix nē.

⁸ Jakamã kwa kêt ka amã mē kãm Jejus jarēnh o apa pymaj tee ri amnhĩ kukamã ajamaxpêr kêt nē. Nē mē kot Jejus ã ijaxàr nhũm arĩ ixkrĩ hã ijarēnh ma nē mē kot ixkuxwar ajaxàr pymaj mē kãm Tĩrtũm kapêr o mē ahkre hkukamã tee ri ajamaxpêr kêt nē. Mē kot ã anhīpêx anhỹr mã tã kêt ka amnhĩ kamã akahak kêt nē. ãm Tĩrtũm nhỹ hã hihtỳx xà ho amnhĩ to htỳx nē ixpyrà nē ma mē kãm Jejus kot mē

panê tanhmã amnhĩ nhĩpêx to hã harênh to rãhã ho ri mẽ hkôt apa. Mẽ kot tanhmã hã anhĩpêx to htãã.

⁹ Na pu htem Jejus kôt amnhĩ xunhwý nhũm Tĩrtũm ja hã mẽ pahpumu nẽ Jejus kukwak ri amnhĩ katut kôt mẽ pahte amnhĩ tomnuj piitã rênh pa nẽ mẽ pahto hkra. Hãmri nẽ mẽ pahte hkôt pix mã amnhĩ nhĩpêx o papa kaxyw mẽ paxunhwý. ãm Jejus pix kukwak ri na hte mẽ pahto hkra nẽ ã mẽmoj to mẽ pakutã nojarêr rãhã ho pa anẽ. No na hte mẽ pahte amnhĩ to mex ã mẽ pahpumunh kôt mẽ pahto hkra hkêt nẽ. Amnepêm kormã mẽmoj piitã hkêt ri na pre mẽ pakukamã hamaxpêr o:

–Koja mẽ nhỹrmã Ixkra Jejus Kris kôt amnhĩ xunhwý pa ja hã mẽ omu nẽ Ixkra kukwak ri mẽ ho mex nẽ. Anẽ.

¹⁰ Tã kormã mẽ pahte amnhĩ tã ã kot mẽ pajarênh anhỹrja mar kêt jakamã na pre Jejus mẽ pahwýr wrý nẽ tanhmã mẽ pahto mex to. Na pre ty nhũm Tĩrtũm akupým ho htĩr. Jakamã na pu htem ra amnhĩ kaxyw hkôt pajamaxpêr nẽ hkôt amnhĩ xunhwý hãmri nẽ nhỹrmã mẽ pahtyk tã nhũm Tĩrtũm kot Kra Jejus nhĩpêx pyrã nẽ akupým mẽ pahto mẽ pahtĩr pu mẽ Jejus kukwak ri wa kuri pamex nẽ pahtĩr tũm nẽ papa ho papa. Jakamã na pu htem mẽ pamã pahtyk pyma ho papa hkêt nẽ.

¹¹ Amnepêm na pre Tĩrtũm ixãm nẽ tanhmã inhmã ixápênh ã karõ hto nẽ inhmã:

–E Pawre kêt ka Jejus nhỹ hã ma hkwyjê jahkre ho ri mẽ hkôt apa. Nẽ ixkapêr o mẽ ahkre mex nẽ. Kêt ka ã amnhĩ nhĩpêx anhỹr rãhã ho ri mẽ hkôt apa. Anẽ.

¹² Tã ã kot inhmã kapêr anhỹr nhũm ixte kapêr kôt amnhĩ nhĩpêx o ixpaja mýrapê na htem Jejus ã tanhmã inhĩpêx kati hto ho pa. Pa hte ixpunuj nẽ amnhĩ xã htýx kamã ijamak o ri Jejus mã tanhmã amnhĩ nhĩpêx to ho ri mẽ hkôt ixpa. Tã nom tee ri ja hã amnhĩ pumu nẽ amnhĩ kamã xpijaãm nẽ ixkaprĩ hkêt nẽ. Ixte amnhĩ kaxyw hkôt ijamaxpêr xwýnhja na ixte tanhmã kot amnhĩ nhĩpêx to hã omunh mex jakamã kot paj ty nhũm mẽ arĩ inhmýr pẽ Tĩrtũm kapêr mar o pa. Mẽ kot ja hã xpir tã koja

mẽ apê Kris kôt ixkwýjaja inhmýr pẽ arĩ mẽ kãm harênh o apa. Koja mẽ ã axpên mýr pẽ amnhĩ nhĩpêx anhỹr o pa rãhã nhũm Pahihti Jejus akupým mẽ pahwýr wrý.

¹³ Kwa Ximotre. Ra ixte amã mẽmoj tã karõ rax jakamã kêt ka mar týx nẽ hkôt amnhĩ nhĩpêx rãhã o ri apa. Jao Jejus Kris nhỹ hã mẽ piitã mẽ noo mã amnhĩ kaxyw kãm ajamaxpêr týx rãhã nẽ. Nẽ mẽ piitã mẽ ho mex o ri apa.

¹⁴ Ate mẽ kãm tanhmã Jejus jarênh to ho ri apaja ãm hãmri na. Tã koja mēhõ htýx ri tanhmã ho kapêr punuj to rý axtem nẽ tanhmã harênh to ka ja hã ama nẽ nẽ kãm akapêr kãm axihtýx nẽ. Tĩrtũm Karõ ra kot akarõ hwýr àr jakamã kêt ka ý hã ã Jejus jarênhja jamãr mex o ri apa anẽ.

*Pawre kot tanhmã amnhĩ jarênh to
Sikūn Ximotre 4.16-18*

¹⁵ Nẽ mãn ka pre ra pika pẽ As kamã Kris kwý kot ixkaga hã mẽ harênh ma. Na pre Pijerti mẽ Emosti mẽ mẽ ohtõ nẽ tanhmã hamaxpêr to nẽ ixto ajuta hkêt nẽ.

¹⁶⁻¹⁸ ãm Oněspti pix na pre mẽ kurom ijarênh ma nẽ man ixwýr Rõm wýr mõ nẽ ijapêr o ri mẽ hkôt mra nẽ ixwýr kato. Hãmri nẽ xatã ixwýr mra nẽ tanhmã ixto mex to. Jao akupým ijamaxpêr o hihtýx. Ixpê prês nẽ ixkrĩ htã kêt ixkrãmnhwý hã amnhĩ jarênh ã hpijaãm kêt nẽ. Nẽ amnepêm kormã krĩ pẽ Epes kamã ixpa ri na pre mããnên tanhmã ixto mex to ho pa. Tã ã kot inhĩpêx mex anhỹr o pa jakamã na pa hte ho Pahihti Jejus wý nẽ kãm:

–Pa Pahihti? Oněspti o na pa awý. Kot ixto mex rãhã ho pa jakamã kwa kêt ka ixtã omu nẽ kutã anojarêr rãhã ho apa. Nẽ õrkwý kamã hkwyjaja mããnên tanhmã mẽ ho mex to. Hãmri nẽ nhỹrmã akupým mẽ ixwýr wrý nẽ ixtã kamã axukaprĩ hã tanhmã ho mex to. Anẽ.

2

*Mẽ pahte Jejus kôt amnhĩ nhĩpêx pix prãm
ã mẽ pamã karõ*

Wam Ximotre 6.11-16

¹ E Ximotre. Jejus Kris kot mẽmoj to mẽ pakutã nojarêr rãhã jakamã kwa kêt ka ý hã amnhĩ to htýx nẽ kãm tanhmã amnhĩ

nhīpêx to ho apa hã amnhĩ kamã akahak o ri apa hkêt nê.

² Ra ate pa tanhmã Tirtūm kapêr o mē ahkre htoja mar jakamã kêr ka amnhĩ xô ri ã Jejus kôt mē pahkwỳjê jahkre ho apa anê. Mē kot amar nê pahpyràn axpên xô ri ho axpên jahkre ho pa kaxyw.

³⁻⁴ Sôrdat na htem mē hkrãhtūm kãm prãm xà hkôt tanhmã amnhĩ nhīpêx to. Jao tanhmã kute htã kapêr ma nê hkôt amnhĩ nhīpêx. Tanhmãn à rỳ kãm prãm rỳ tanhmã omnuj to htã kutã amnhĩ to htỳx nê mē hkrãhtūm kôt amnhĩ nhīpêx. Na htem amnhĩ xàpênh kukamã tee ri hamaxpêr o pa hkêt nê. ãm mē hkrãhtūm kapêr kôt pix mã amnhĩ nhīpêx o pa hprãm. Tã kêr ka mē uràk nê Pahihti Jejus kôt amnhĩ nhīpêx rãhã ho ri apa hprãm. Mē kot hã tanhmã atomnuj to htãã.

⁵ Nê mē hprôt tỳx xwỳnhjaja na htem hkwyjê pê amnhĩ to wa hprãm xàj ãm ja pix kukamã hamaxpêr. Hãmri nê hprôt tỳx prãm xàj mēmoj kot mē ho hirerek kêt nê amnhĩ jagri htỳx nê. Hãmri nê hprôt tỳx o hkwyjê jakre nê amnhĩ to wa nê pôj nê kot amnhĩ to wa hã mēmoj to kãnja. Tã kêr ka mē uràk nê amã Pahihti Jejus kot amnhĩ nhīpêx kôt pix mã amã amnhĩ nhīpêx prãm.

⁶ Nê pur kãm mē àpênh xwỳnhjaja na htem mē hpur kãm àpênh pix tãnopxar o pa nê àpênh rũnh nê. Kãm kaga hkêt kãm àpênh o pa. Tã àpênh rũnhja kukwak ri ihpur kãm ò rũnh nê ho apkur mex o pa. Nòm koja mē kãm kaga nê àpênh mex kêt nê hãmri nê ò grire nê apkur mex kêt nê. Tã kêr ka pur kãm mē àpênh rũnh xwỳnhjê pyrã nê Pahihti Jejus mã amnhĩ nhīpêx mex o apa. Nê mē uràk nê amã kaga hkêt kãm axàpênh pix tãnopxar o ri apa.

⁷ E na pa ã ajahkre anê Ximotre. Tã kêr ka ixte ajahkreja ma nê kãm ajamaxpêr rãhã nê. Koja Pahihti tanhmã akrã hto ka aprĩ hã mar tỳx nê.

⁸ Nê kêr ka Pahihti Jejus Kris mã ajamaxpêr rãhã ho ri apa. Na pre katorxà hkôt kêp Pahi finat Tawĩ kanrêhã htãmnhwỳ hã mē pahpyrà nê ĩ ho ĩ nê kato nê panhõ pika kamã pa ho pa. Tã nhũm prem kupĩ nhũm amnhĩ xà htỳx kamã hamak kãm tỳ. Hãmri nhũm Tirtūm akupỹm ho htĩr nhũm akupỹm

htĩr o htĩr. ã na pre hte harênh anhỹr rãhã ho ri mē hkôt ixpa.

⁹ Mýrapê na prem ijaxà pa arĩ jar ixkrĩ ho ixkrĩ. Na htem ixte amnhĩ tomnuj xwỳnh pyrãk o inhīpêx nê axte ixte Jejus kapêr jarênh o ixpa pymaj ijaxà. Tã ã mē kot inhīpêx anhỹr tã na hte Kris kôt pahtõjaja arĩ ixpãnhã mē kãm harênh o ri pa. Koja mē tee ri kãm Jejus jarênh o hapêx prãm kaprỳ.

¹⁰ Jakamã kwãr mē mãmri ã inhīpêx anê. Koja mē arĩ Jejus kot tanhmã mē panê amnhĩ nhīpêx toja mar o pa nhũm mē hkwyjaja hkôt amnhĩ xunhwỳ nê nhỹrmã pahpyrà nê kêp Jejus Kris kwỳ hã Tirtūm mē wa kuri mex nê htĩr tũm nê pa ho pa.

Kris kwỳ kot tanhmã amnhĩ tã grer to hã mē harênh

¹¹ Na pu htem mē pahpê Kris kwỳ hã ã amnhĩ tã pagrer anê:

Mē kot Kris ã mē panhĩmex tã kot puj mē akupỹm pahtĩr nê kuri pamex nê pahtĩr tũm nê papa ho papa.

¹² Mē kot tanhmã Kris ã mē pahtomnuj to htã kot puj mē arĩ hkôt amnhĩ nhīpêx o papa rãhã ty nê nhỹrmã ĩhkô hã mē ho amnhĩptãr o papa.

Nom kot puj mē amnhĩ kamã pakahak pê mē pahpê Jejus kwỳ hkêt ã amnhĩ jarê hã koja Jejus amnhĩ xwar mē pahpê hkwyjê hkêt ã mē pajarê.

¹³ Nê mē pahte amnhĩ kaxyw Jejus kôt pajamaxpêr kêê tã tanhmã amnhĩ jarênh to xà hkôt tanhmã amnhĩ nhīpêx to. Aa kot mēmoj tã amnhĩ jarênh kuħpa hã ri tanhmã amnhĩ nhīpêx to hkêt. Anê.

Mē kot Tirtūm kapêr o mē ahkre mex xwỳnhjê jarênh

Wam Pêtre 3.15-16

¹⁴ E Ximotre. Ixte ã mēmoj tã amã karõ anhỹrja kêr ka ho mē ahkre rãhã ho ri mē hkôt apa. Kê mē ama nê kãm hamaxpêr rãhã nê.

Nê mē kãm anê kê mē Tirtūm kapêr o mē ahkre mex o ri pa nê kapêr ã tanhmã axpên mã àkjêr to hkêt nê. Koja mē hã axpên mã akir hãmri nê amnhĩ to mex kêt nê. Hãmri nhũm mē kot mē kapêr mar xwỳnhjaja ja hã mē omu nê tee ri Tirtūm kapêr kukamã hamaxpêr nê hkôt amnhĩ nhīpêx mex kêt nê.

15 Nē na htem mē kām mē àpēnh mex xwýnhjaja mē ò patrāw kapēr ma nē hkôt mēmoj tā àpēnh mex nē. Nhūm ò patrāwja hwýr mra nē àpēnh ā omu. Hāmri nhūm amnhī wýr omu nē àmnhīx noo mā apē. Kām àpēnh mex jakamā amnhī kamā kām uma hkēt nē. Ja pyrā nē kêr ka Tīrtūm noo mā kām amnhī nhīpēx mex rāhā nē aprī hā kapēr o mē ahkre mex o ri mē hkôt apa. Kē ā ate amnhī nhīpēx anhýr ā apumu nē anhý hā hkīnh nē. Ka àpēnh xwýnhhta pyrā nē amnhī kamā amā uma hkēt nē noo mā kām amnhī nhīpēx mex o ri apa.

16 No mē kot Tīrtūm kapēr o hēx o mē pa xwýnhjaja kêr ka mē hkôt ri apa hkēt nē. Nē mē kapēr mar nē ri mē hkôt axām hkēt nē. Na htem mē kapēr ma nē mē hkôt amnhī nhīpēx o pa nē kām Tīrtūm kapēr mar prām kêt nē. Nē gaa nē te kêp mar pumaj amnhī jamak pro pyrāk o amnhī nhīpēx.

17 Týx ri tanhmā mē ahkre hto xāja te kot mē hkānhya aa mex kêt nē ra omnuj týx o mōrja pyrāk. Jao mē kot mē kapēr mar o mē pa xwýnhjaja mē mar pē ra mē hkôt amnhī tomnuj týx o mō. Na hte ra Imēnew mē Pijertija wa ā htýx ri amnhī krā hkôt mē ahkre anhýr o pa.

18 Nē Tīrtūm o hēx o mē hkôt pa nē nhýrmā akupým mē pahto mē pahtīr kêt ā harēnh o pa. Hāmri nhūm mē amnhī tā wa kuma nē tee ri amnhī kukamā hamaxpēr pē Jejus kaga nē axte amnhī kaxyw hkôt hamaxpēr kêt nē. Nom wa kapērja kot anhýr kêt.

19 Kêt Tīrtūm kapērja ām hāmri na. Kot mēmoj to hēx kêt jakamā na pu htem amnhī kaxyw hkôt pajamaxpēr kaprý hkēt nē. Kapēr ā kagā htūm kot tanhmā mē pahpē hkrajē jarēnh to nē harēnh kot:

Tīrtūm na kot hkrajē piitā omunh mex rāhā ho pa xwýnh.

Anhýr o mē pajarēnh. Nē mē pamā mēmoj tā karō kot:

Kē mē kot Jejus kôt amnhī xunhwýr xwýnhjaja amnhī tomnuj o pa hkēt nē. Anē.

Tīrtūm krajaja te kêp prat mex pyrāk ā mē harēnh

20 Nē mē hikàxpore rūnh xwýnhjaja mē ò xijere nē mē ò prat xohtô. Prat kwý

muxre nē hkwy omnajre. Prat pynajre na htem māmri kamā apku no prat muxreja ām mēmoj mex pix kaxyw na htem mēsti hā haxwý nē kamā apku. Kasamēt ā rý mē hkra krā hkēnh ā mē hkīnh nhūm htem mēsti hā haxwý nē kamā apku.

21 Tā mē kot Tīrtūm kapēr o hēx o mē pa xwýnhjē hkôt hamaxpēr kêt nē mē hkôt amnhī tomnuj kêt xwýnhjaja te mē kot prat muxre pyrāk. Na htem tām amnhī nhīpēx nē tanhmā hamaxpēr punuj to ho pa hkēt nē. Hāmri nhūm Tīrtūm ja hā mē omu nē mē ý hā hkīnh nē. Hāmri nē te mē kot prat muxre jaxwýr nē kamā apkur pyrā nē mē kot kām tanhmā amnhī nhīpēx to ho pa kaxyw mē unhwý.

Mē pahte tām amnhī nhīpēx ā mē pamā karō

22 Nē mē àptār nyw jamaxpēr punujja kêr ka te ate hamýnh nē amnhī katut kôt rēnh par pyrāk o hipēx Ximotre. Jao axte ho ajamaxpēr o ri apa hkēt nē. Nom mē hamaxpēr mexja kêr ka hamý nē amnhī krā him hagiē nē ho ajamaxpēr rāhā ho ri apa. Jao tām amnhī nhīpēx nē amnhī kaxyw Tīrtūm kôt ajamaxpēr rāhā nē. Nē amā mē kêp Kris kôt akwýjē hkīnh pē tanhmā mē ho ajuta hto ho ri mē hkôt apa. Jao mēmoj to mē kutā anojarēt rāhā nē. Na hte ā Pahihti Jejus kôt amnhī nhīpēx xwýnhjaja amnhī nhīpēx anhýr o pa.

23 Nē kêr ka mē kot htýx ri amnhī krā hkôt mē ahkre ho mē pa xwýnhjē hkôt apa hkēt nē. Te ate mē kêp awry hā ri apa pyrā nē mē kapēr ma nē ām ama. Na htem mē kapēr mar o pa nē ra hā axpēn mā tanhmā àkjēr to ho pa. Jakamā kwarī mē hkôt ri apa hkēt nē.

24 Mē pahte Tīrtūm mā amnhī nhīpēx o papa xwýnhjaja na pu htem mē kurom mēmoj tā axpēn mā paxàkjēr o ri papa hkēt nē. Na pu htem ām mē piitā mē kamā paxukapri pē mē ho mex nē mē kamā pagryk tokyx anhýr kêt nē. Nē Tīrtūm kapēr o mē ahkre mex nē. Na hte ā mē pahte Tīrtūm mā tanhmā amnhī nhīpēx to xwýnhjaja amnhī nhīpēx o papa anē.

25-26 Jakamā koja mēhō ate Tīrtūm kapēr o mē ahkreja ma nē tanhmā ho amā kapēr to ka ama nē amnhī tā tanhmā kām akapēr

punuj to hkêt nê. Ām kamā axukaprī ho tanhmā hā kām akapēr mex to. Na hte Satanasti te kot amnhīm mē unēnh pyrāk o mē hipêx nê tanhmā mē kām Tirtūm kapēr o hêx to nhūm mē kuma nê hkôt hamaxpēr nê kapēr kôt amnhī nhīpêx. Tā kot kaj mē kamā axukaprī ho mē kām akapēr mex nê nhūm Tirtūm tanhmā mē hkrā hto nhūm mē ama nê hkôt amnhī xunhwÿr japēr. Te Tirtūm kot Satanasti pē amnhīm mē utār pyrāk. Jakamā nhūm mē hpānhā Tirtūm kapēr mex ā harē nê harēnh o:

—Nà pēr ām hāmri na Tirtūm kapērja. Ām mex o mex. Anē.

3

Jejus akupÿn wrÿk kukamā mē kot amnhī tomnuj xwÿnhjê jarēnh

Matêwre 24.4-13; Korosē 2.16-19; Wam Ximotre 4.1-5; Sikūn Pêtre 2.1-3; Jutre 3-16

¹ Nê Jejus akupÿn mē pahwÿr wrÿk xwÿj ri mē kot tanhmā amnhī nhīpêx toja kot paj hpānhā ixprī hā amā harē ka inhmar tÿx nê Ximotre. Koja Jejus akupÿn mē pahwÿr nojarêt pu mē pahpê hkwÿjaja pahpunuj nê papa.

² Nê Kris kwÿ hkêt xwÿnhjaja koja mē amnhī pix kukamā hamaxpēr o pa.

Jao hikàxpore rax o pikuprōnh pix kukamā hamaxpēr pē hkwÿjê pē ôxy htÿx o pa.

Nê mēmoj tā amnhī to jarkrar o pa.

Nê tanhmā hkwÿjê japry hto ho pa.

Nê mē hipêêxà nê mē katorxà hā hpijaàm kêt o pa.

Nê Tirtūm ā hpijaàm kêt o pa.

Nhūm mēhō tanhmā mē ho mex to nhūm mē amnhī tā mē omu nê ām mē omu nê amnhī tā tanhmā mē kām nê hkêt nê. Rÿ mē kām: “Nà ām hāmri na ka ā ixto mex anē. Nà ja mex.” Anhÿr o mē kām kapēr kêt nê.

³ Mē ukaprī hkêt jakamā koja mēhō tanhmā mē homnuj to nhūm amnhī tā mē omu nê kamā gryk kurê kumrêx nê aa gryk o hapêx kêt nê.

Nê amnhī tā tanhmā hkwÿjê ho hêx to ho pa.

Nê htÿx ri kām hprām xà hkôt tanhmā amnhī tomnuj to.

Nê oprê ho pijapu pix kukamā hamaxpēr.

Nê axtem nê kām mēmoj mex pumunh prām rÿ mēmoj mex mar prām kêt nê.

⁴ Nê mēhō ho hkràmnhwÿ htā axtem nê mē kām mē hkurê xwÿnhjê nhīhkram haxà.

Nê hamaxpēr mex kêt o tanhmā amnhī tomnuj to rāhā ho ri pa.

Nê amnhī to rÿnh o mē piitā mē hakrenh par ā amnhī to jarkrar o ri pa.

Nê amnhī krā hkôt kām amnhī nhīpêx prām xà hkôt amnhī nhīpêx o pa nê kām Tirtūm kām prām xà hkôt amnhī nhīpêx prām kêt nê.

⁵ Hāmri nê mē kēp hkra hā amnhī jarēnh o pa htā aa hkôt amnhī nhīpêx kêt. Ā Tirtūm kra hkêt xwÿnhjaja amnhī nhīpêx kot anhÿr jakamā kwa kêr ka ā mē hkôt apa hkêt nê Ximotre.

⁶⁻⁷ Na htem hêx rom hkwÿjê nhōrkwÿ hwÿr agjê nê kamā tanhmā mēnijê mā hêx to. Mē kot mē mar nê tanhmā amnhī tomnuj to hāmri nê ja hā amnhī pumu nê tee ri amnhī kukamā hamaxpēr kaxyw. Nê mē kām mē kapēr nyw mar prām tā nhām mē kapēr ma nê nhām mē kapēr mar nê aa Tirtūm kapēr mar nê amnhī kaxyw hkôt hamaxpēr kêt nê. Jakamā nhūm mē kot amnhī tomnuj xwÿnhjaja hêx rom mē hwÿr mra nê mē ōrkwÿ hwÿr agjê nê tanhmā mē kām mēmoj to hêx to.

⁸ Te kot amnepēm finat Jānre mē finat Jāmtija wa kot amnhī nhīpêxta pyrāk. Na pre finat Mojestija Tirtūm nhÿ hā tanhmā mē ahkre hto ho pa nhūm Jānre mē Jāmti wa kām mar prām kêt nê. Nê tanhmā ja nê hkwÿjê mā kapēr to ho pa. Tā ā mē kot amnhī tomnuj anhÿr o mē pa xwÿnhjaja na htem wa urāk nê kām Tirtūm kapēr mar prām kêt nê kapēr nê tanhmā hkwÿjê mā kapēr to ho pa. Nhūm mē hamaxpēr mex kêt jakamā ām mēmoj punuj pix kukamā hamaxpēr nê mē kuma nê amnhī kaxyw Jejus kôt hamaxpēr kêt nê.

⁹ Tā nom koja mē hkwÿjaja tokyx hprī hā mē kot mēmoj to hêx ā mē omu hāmri nê axte mē hkôt hamaxpēr kêt nê nhūm mē rī amnhī pumu. Te amnepēm mē kot hprī hā Jānre mē Jāmti wa kot tanhmā amnhī tomnuj to hā wa omunhta pyrāk.

Mẽ pahte Jejus ã pahpunuj tã hkaga hkêt ã mẽ pamã karõ

Atre 13.50-14.7, 14.19-22

¹⁰ E Ximotre. Ate ixkõt apa ryy jakamã ra ate tanhmã ixte amnhĩ nhĩpêx ho ixpa hã ixpumunh mex.

Ixte tanhmã Tĩrtũm kapêr o mẽ ahkre hto ho ixpaja.

Nẽ inhmã mẽmoj to anhỹr prãm xwýnhja. Nẽ ixte amnhĩ kaxyw Kris kõt ijamaxpêrja.

Nẽ inhgryk tokyx anhỹr kêtja.

Nẽ ixte tanhmã Kris kõt ixkwýjê ho mex to ho ri ixpaja.

Nẽ ixpunuj nõ ixpa htã arĩ Kris kõt amnhĩ nhĩpêx mex o ixpaja.

Ã ixte amnhĩ nhĩpêx anhỹr o ixpaja ate ixpumunh mex.

¹¹ Na pa pre krĩ pẽ ãxiok nõ Ikõn nõ Ristija kamã mẽ kãm Jejus jarênh o ixpa nhũm mẽ hkwyjaja Jejus ã tanhmã inhĩpêx to pa amnhĩ xã htýx kamã ijamak o ri mẽ hkõt ixpa. Tã nhũm Pahihti Kris xatã mẽ kêp ixpytã pa ixtĩr pẽ mẽ ãhkra rũm ijamapõx o ixpa.

¹² Na hte Kris kwý hkêt xwýnhjaja mẽ pahte Kris kõt amnhĩ nhĩpêx o papa hã mẽ pahomnuj o pa.

¹³ Nẽ mẽ kot Tĩrtũm kapêr o hêx o mẽ pa xwýnhjaja koja arĩ mẽ kêp Kris kwý hã amnhĩ to hêx pẽ mẽ nokupyr. Nẽ mẽ kãm Tĩrtũm kapêr o hêx o pa. Jao ra mẽ tãmjaja amnhĩ nokupyr o pa nõ amnhĩ tomnuj týx kumrêx.

Pawre kot tanhmã Tĩrtũm kapêr ã kagã jarênh to

Rõmãn 15.4; Sikũn Pêtre 1.19-21

¹⁴⁻¹⁵ No ka Ximotre. Amnepêem aprĩre rũm na pa pre mẽ ixohtõ nõ Tĩrtũm kapêr o ajahkre ho ixpa. Akatorxã nõ anhõ wõwõre nõ pa nõ Kris kwýjaja pa prem ho ajahkre rãhã ho akõt ixpa ka mẽ inhmar týx nõ amnhĩ kaxyw Jejus kõt ajamaxpêr. Jakamã kwa kêr ka arĩ hkõt ajamaxpêr mex rãhã ho ri apa. Tĩrtũm kapêrja na htem mar pẽ amnhĩ kaxyw Jejus Kris kõt hamaxpêr nõ hkõt amnhĩ xunhwý nhũm Tĩrtũm ja hã mẽ omunh xã hkõt mẽ ho hkra.

¹⁶ Tĩrtũm kapêr ã kagãja Tĩrtũm kapêr na. Na htem ho mẽ ahkre ho pa. Koja

mẽhõ hkwyõm ri tanhmã amnhĩ tomnuj to nõ kapêr ma nõ tee ri amnhĩ tomnujja kukamã hamaxpêr o ra hkaprĩ nõ. Rý tanhmã amnhĩ tomnuj to htã kapêr ã kagã kamã kapêr nõ Tĩrtũm kot ã kot amnhĩ tomnuj anhỹrja nõ mẽ pamã kapêr ã harênh ma nõ amnhĩ tomnujta kaga kurê kumrêx. Rý kamã kapêr nõ Tĩrtũm kot tanhmã mẽ pahte amnhĩ to mex to hã mẽ pamã karõ kamã harê nõ kuma. Hãmri nõ ý hã hkõt amnhĩ nhĩpêx mex rãhã nõ. ã na hte Tĩrtũm kapêr kagãja mẽ kot mar nõ hkõt amnhĩ nhĩpêx xwýnhjê ho mex anê.

¹⁷ Na hte mẽ kot Tĩrtũm mã amnhĩ nhĩpêx o mẽ pa xwýnhjaja kamã harê nõ hkõt amnhĩ nhĩpêx mex pẽ mẽ piitã mẽ ho mex nõ ho mẽ ahkre mex rãhã ho pa.

4

Pawre kot mẽmoj tã Ximotre mã karõ

Korosê 4.5-6

¹ Nẽ koja nhỹrmã Jejus Krisja akupýn mẽ pahwýr wrý hãmri nõ mẽ pahpiitã tanhmã mẽ pajarênh to. Ra mẽ htyk xwýnhjaja nõ arĩ mẽ pahĩr xwýnhjaja nhũm tanhmã mẽ pahte amnhĩ nhĩpêx to ho papa hã mẽ pahpumunh kõt tanhmã mẽ pajarênh to. Jao Tĩrtũm mẽ wa kuri mẽ pahĩr tũm nõ papa ho papa hã mẽ pajarê rý wa kuri pahĩr tũm nõ papa hkêt ã mẽ pajarê. Jakamã kwa Ximotre kot paj Tĩrtũm mẽ Jejus Krisja wa noo mã mẽmoj tã amã karõ ka inhmar týx nõ.

²⁻⁴ Koja nhỹrmã mẽ kêp Tĩrtũm kra hkêt xwýnhjaja axte kãm Tĩrtũm kapêr mar prãm kêt nõ nhãm mẽ kapêr pix mar prãm o ri pa. Jao amnhĩ kukamã hamaxpêr o:

—Nã inhmã Tĩrtũm kapêr mar prãm kêt. Kot mẽmoj piitã nõ mẽ hkurê kênã. Kot paj hpãnhã mẽhõ kot mẽmoj nõ mẽ hkurê hkêt xwýnhjê kapêr pix mar o ri ixpa. Nã kot paj anê. Ja na inhmã hprãm. Nom kot paj axte Tĩrtũm kapêr mar kêt nõ.

Anhỹr jao kapêr kaga nõ hpãnhã htýx ri nhãm mẽ ujarênh pix ma nõ hkõt hamaxpêr. Koja mẽ ã amnhĩ nhĩpêx anhỹr o pa. Jakamã kwa kêr ka arĩ mẽ kãm Jejus kot tanhmã mẽ panê amnhĩ nhĩpêx to hã harênh rãhã ho ri mẽ hkõt apa Ximotre. Mẽ kãm mar prãm kêt tã mãmrĩ ri mẽ kãm harê.

Nē nh̄yri mēhō pumu nē kām harē. Mē kām mar prām xw̄yñh̄jē mā harē nē mē kām mar prām kêt xw̄yñh̄jaja ka māānēn mē kām harē. Nh̄um mēhō tanhmā amnhī tomnuj to ka hā omu nē tanhmā nē kām akapēr to kê hkaga tokyx anē nē akup̄ym tām amnhī nh̄ip̄ex. R̄y nh̄um mēhō tām amnhī nh̄ip̄ex o pa ka ja hā omu nē hā kām akapēr nē kām:

—Ām hāmri na ka hte Tirtūm kôt amnhī nh̄ip̄ex mex nē. Anē.

Hāmri nē anojarēt kêt kām mē kām Tirtūm kapēr o mē ahkre rāhā ho ri apa.

⁵ Nē tām ri amnhī nh̄ip̄ex rāhā nē. Mē kot Jejus ā tanhmā anh̄ip̄ex to htā kêr ka ŷ hā amnhī to ht̄yx nē arī mē kām kapēr jarēnh o ri mē hkôt apa. Jao Tirtūm mā amnhī nh̄ip̄ex mex rāhā nē. Kêr ka ā mē hkôt amnhī nh̄ip̄ex anh̄yri o ri apa Ximotre.

Pawre kot ra htyk kaxyw ā amnhī jarēnh Atre 20.17-35

⁶ Nē mē kot ixp̄ir xā hā arīgroja ra hw̄yr ahtēp o mō. Kot paj pēr tokyx ty. Amnepēm na prem Tirtūm mā mēmoj nh̄or kaxyw nē mē hkōm xā kamā mēmo kagōja py nē mē kot Tirtūm mā mēmoj nh̄or xā hā mēstija ā hkap̄ir pa nh̄um hap̄ex. Tā te ixp̄e mē hkōm xā kamā mēmo kagō pikap̄irta pyrāk. Kot paj tokyx ty nē jar ijap̄ex.

⁷ Na pa ra Pahihti Jejus mā amnhī nh̄ip̄ex mex o ri ixpa. Mē kot tanhmā hā ixtomnuj to htā pa hkaga hkêt nē arī hkôt amnhī nh̄ip̄ex mex rāhā ra ixtyk kaxyw.

⁸ Ixte Pahihti kām hprām xā hkôt amnhī nh̄ip̄ex mex o ri ixpa jakamā koja amnhī tā tanhmā ixto mex to. Nom papxipix ixto mex kêt nē. Na hte ām hāmri tām mē pahpiitā mē panh̄ip̄ex. Jakamā nh̄yrmā kot mē piitā tanhmā mē harēnh to xā hā arīgrota ā koja mē pahk̄inh pē mē pahte amnhī w̄yr kamā pajamak o papa xw̄yñh̄ piitā mē pamā mā mēmoj mex gō.

Pawre kot amnhī w̄yr Ximotre hw̄yr

⁹ Kwa na pa ra ato ijamak t̄yx nē Ximotre. Kwa kêr ka amnhīm anojarēt nē tokyx tanhmā amnhī to hpa nē man ixw̄yr mō.

¹⁰ Na pre ra Kresēx ma Karatas w̄yr mō nh̄um Xitre ma pika pē Tawmas w̄yr mō. Nh̄um Tēmti ra tanhmā hamaxpēr to nē

āpēnh gryk ā ixkaga nē ma akup̄ym Tesarōn w̄yr mō.

¹¹ ām Rukre pix na arī ixkôt pa jakamā kêr ka anojarēt hāmri nē ahte amōr kêt nē. Makre mā anē kê man akôt ixw̄yr mō nē tanhmā ixto ajuta hto ho pa.

¹² Nē Xikitre na pa pre ra Epes w̄yr kumē.

¹³ Nē Torôt kām Kapti nh̄orkw̄y kamā ixte kry pē inhō kamīs pa hkā ryti rer jakamā kêr ka anojarēt nē inhmā apy nē man inhmā o mō. Nē inhō kagāta ka māānēn inhmā am̄y nē o mō. Nē mēmo mry kà hā ixte mēmoj tā kagāta ka māānēn apy nē m̄an inhmā o mō. E kêr ka anojarēt nē ixkukrēxja jam̄y nē ixw̄yr ho mō.

Tanhmā Aresānti kot Pawre nh̄ip̄ex to hā harēnh

¹⁴⁻¹⁵ Nē na pre k̄ax o mēmoj nh̄ip̄ex xw̄yñh̄ Aresāntija ixtomnuj nē. Pa pre mē kām Tirtūm kapēr o mē ahkre ho ri mē hkôt ixpa nh̄um tee ri inhma nē kām mar prām kêt nē. Hāmri nē ixkutā amnhī xām nē inh̄ip̄ex kati nē. Nom koja Pahihti Jejus ixtā tanhmā ho. Kwa kêr ka amnhī nē omunh mex nē Ximotre.

Pahihti Jejus kot Pawre mā hamaxpēr o hiht̄yx ā harēnh

¹⁶ Nē pahi kot mē mar xā hā ixkre kamā wam ixte mē kām amnhī jarēnh̄ta ā na pre mēhō ixyr pē mē kām tanhmā ijarēnh to hkêt nē. Na prem piitā mē umaj ixkaga hpa. Nom kwār mē māmri ā amnhī nh̄ip̄ex anē. Tirtūm kot ixtā tanhmā mē hoja na inhmā hprām kêt.

¹⁷ ām Pahihti Jejusja pix na pre mē kurom ixkaga hkêt nē. Na pre ixto ixiht̄yx nē pa ŷ hā mē kām tanhmā mē panē kot amnhī nh̄ip̄ex to hā harēnh pa. Nh̄um Ijaew kêt xw̄yñh̄ kot inhmar o hkrī xw̄yñh̄jaja ixujarēnh mar o hkrī nh̄um Tirtūm inhnē tanhmā mē ho nh̄um mē ixp̄ir kêt nē.

¹⁸ Kojā Pahihti mē kutā ixto ixiht̄yx rāhā nē mēmo arīgro hā amnhī w̄yr ixto api. Pa Tirtūm mē wa kuri inh̄mex kumrēx nē ixt̄ir tūm nē ixpa ho ixpa. Pahihti mex o mex jakamā kêr pu mē kām mex o mex ā harēnh rāhā ho papa nē aa jam panh̄urer kêt nē.

Pawre kot tanhmā hkrāmnh̄w̄ȳjē jarēnh to

¹⁹ Nē kēr ka Prisire mē mjên Akir wa kām ijarē. Nē Onēsipti hprō nē hkrajaja ka mǎānēn mē kām ijarē.

²⁰ No Eras kormā Korīt kām pa. Nē Toropti na pre à nē pa Mīrēt kām kure nhūm ixkôt mōr kêt nē.

²¹ Kwa kēr ka amnhīm anojarēt nē amgrà pê man tokyx ixwỳr mō Ximotre.

Nē ota Epti mē Prutēhti mē Rīnre mē Krawreja awỳr hpēr mē. Nē jar Kris kôt pahkwỳjê piitā awỳr hpēr mē.

²² E kê Pahihti Jejus ato mex rāhā nē mē apiitā mē akutā nojarēt rāhā ho pa.

Tā ãm ja pix. Ixpê Pawre na pa awỳr kagàja nhīpêx nē kumē.

Xitre Pawre kot Xitre hwÿr kagà nē mēnh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nhÿm pre Xitre Pawre hkôt pa hã mytwrÿ xohtô nē. Tã kêp Jejus kôt hkwyjê nhõ pastô kaxyw gô hipôk pê Kret ã arîk nē Tirtÿm kapêr o mē ahkre ho mē hkôt pa. Jakamã nhÿm Pawre kãm kagàja nhîpêx nē kamã kãm mēmoj tã karô. Tirtÿm kapêr o mē hêx xwÿnhjaja tanhmã kot ja nē mē hkurê to hã kãm karô. Nē mē kot Tirtÿm kapêr o mē ahkre mex pix xwÿnhjaja Jejus kwÿjê kaxyw kot mē rēnh ã kãm karô. Nē Jejus kwÿjaja kot axpēn to mex o pa hã kot mē kãm karô kaxyw kagàja kamã mē kaxyw kãm hã kagà. Á na pre Pawre Xitre mã mēmoj tã karô nē hã kagà nē hwÿr mēnh anē. Nē kãm:

¹ Pa Xitre? Xà amex? Ixpê Pawre na pa awÿr kagà nhîpêx nē kumê. Na pa hte Tirtÿm mã tanhmã amnhî nhîpêx to ho ixpa. Nē ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nē mē kot hprî hã mar kaxyw Tirtÿm kapêr o mē ahkre mex nē.

² Mē kot inhmar nē nhÿrmã htyk nē ma Tirtÿm mē Jejus wa hwÿr àpir nē wa kuri htîr tÿm nē pa ho pa hã amnhî kukamã hamaxpêr kaxyw. Amnepê m na pre Tirtÿm ã mē pahpê hkrajê hkukamã mē pajarēnh anē. Nē ãm hãmri ã mē pajarēnh anē. Na hte mēmoj tã amnhî to hêx kêt nē.

³ Tã ra mē pakukamã mē pamã mēmoj to amnhîrit nē inhmã kapêr o:

—E Pawre kêr ka ma mē hpiitã mē hkôt ri apa nē mē kãm ixkapêr jarê nē mē kãm: “Kot kaj mē amnhî kaxyw Tirtÿm Kra hkôt ajamaxpêr nē hkôt amnhî xunhwÿ nhÿm Tirtÿm ja hã mē apumu nē mē ato hkra. Ka mē nhÿrmã atyk tã nhÿm amnhî wÿr mē ato api ka mē wa kuri amex kumrêx nē atîr tÿm nē apa ho apa.” Anhÿr o mē kãm ixkapêr jarēnh o ri mē hkôt apa Pawre.

⁴ Anhÿr o inhmã kapêr tã pa ã amã ixkapêr nē hã kagà anē Xitre. Pajamē pahte amnhî kaxyw Jejus kôt pajamaxpêr nē hkôt amnhî xãm jakamã te apê ixkra pyrãk. Jakamã na pa hte ato Mēpanhîpêxã maati Tirtÿm mē mē papytãr xwÿnh Jejus Krisja wa hwÿr rãhã ho ri ixpa nē wa kãm:

—Pa Tirtÿm mē Pahihti wa. Nà Xitre ho na pa wa awÿ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nē àmnhîx pa ho pa. Anē.

Kris kwÿ hkrãhtÿmjaja kot tanhmã amnhî nhîpêx to kaxyw mē hã kãm karô

Wam Ximotre 3.1-13

⁵ Nē na pa pre Kret rÿm inhnojarêt hãmri nē amã axapênh ã karô nē Kret kãm are nē man mō. Na pa pre amã:

—E kêr ka jar arîk nē mē kãm ixkapêr jarēnh jatur xãm mēnh o mē hkôt apa. Nē Kris kôt pahkwÿjê mã mē hkrãhtÿmjê xunhwÿ. Kret kãm krî piitã hkôt. Na pa pre ixprî hã tanhmã amã mē harēnh to. Tã kêr ka ate inhmar xà hkôt mē hkwyjê kapi nē mē unhwÿ. Koja mē ã amnhî nhîpêx anhÿr o pa ka ja hã mē omu nē mē unhwÿ.

⁶ Koja mē tãm amnhî nhîpêx o pa nhÿm mē piitã axpēn mã mē mex ã mē harê. Nē mē hprô pix tãnopxar o pa nē kuhpa hã nhãm mēnijê ho amnhîkati hkêt nē. Nē kê mē hkrajaja hipêxã pyrã nē amnhî kaxyw Jejus kôt hamaxpêr o pa. Jao hipêxã nē katorxã wa kapêr ma nē wa hkôt amnhî nhîpêx. No ri htÿx ri amnhî tomnuj o pa hkêt nē.

Anhÿr o na pa pre mē hã amã karô.

⁷ Jejus kôt pahkwÿjê hkrãhtÿmjaja kot Tirtÿm nhÿ hã hkrajê mã kapêr mex o pa jakamã na htem tãm amnhî nhîpêx o pa.

Nē amnhî pix kukamã hamaxpêr o pa hkêt nē.

Nē gryk tokyx anhÿr kêt nē.

Nē kagôxyhti japrôr nē ho pipãnh o pa hkêt nē.

Nē oprê ho pa hkêt nē.

Nē kãxpore rÿnh prãm xàj hêx rom tanhmã amnhî nhîpêx to hkêt nē.

Na htem ã amnhî nhîpêx anhÿr hkêt nē.

⁸ ãm àmnhîx amnhî nhôrkwÿ hwÿr mē hwÿr o pa.

Nē mē piitã mē kutã nojarêt rãhã nē.

Ně tām hamaxpēr ně tām mẽ piitã mẽ hipêx o pa.

Ně amnhĩ tomnuj pymaj amnhĩ to htỳx pê Tĩrtũm kôt amnhĩ nhĩpêx mex rãhã ho pa.

⁹Ně mẽ kot Tĩrtũm kapēr mar tỳx jakamã kê mẽ arĩ hã nohtỳx ně mar tỳx xà hkôt amnhĩ xô ri ho hkwỳjê jahkre mex o pa.

Ně ho mẽ piitã mẽ hamaxpēr o hihtỳx o pa.

Nhũm mēhõ Tĩrtũm kapēr kwỳm ri tanhmã ujarēnh to nhũm hã kuma ně hprĩ hã kãm tanhmã harēnh to kê mar mex ně.

E Xitre. Na hte ã Jejus kwỳjê hkrãhtũmjaja amnhĩ nhĩpêx anhỹr o pa. Jakamã kêr ka aprĩ hã Kret kãm Jejus kôt pahkwỳjê kapi ně mẽ kot tanhmã amnhĩ nhĩpêx to ho pa hã mẽ omu. Nhũm mēhõ ã amnhĩ nhĩpêx anê ka ja hã omu hãmri ně kêp Jejus kwỳjê hkrãhtũm kaxyw ãm.

Kret nhõ xwỳnhjaja kot tanhmã amnhĩ tomnuj to hã mẽ harēnh

Xitre 3.9-11

¹⁰Ně atar Kret kãm na hte mẽ ohtô ně kãm mẽ õ pahi kapēr mar prãm kêt ně htỳx ri tanhmã Kris kwỳjê mã kapēr to ho pa. Na hte Ijaew kwỳjaja ã amnhĩ nhĩpêx anhỹr o pa. Jao Ijaew kêt xwỳnh kot Jejus kôt amnhĩ xunhwỳr xwỳnhjê mã kãm:

—Kwa mẽ ixpyrà ně mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

¹¹Anhỹr o mẽ kãm kapēr jakamã kwa kêr ka ã mẽ kapēr anhỹrja ně mẽ kãm akapēr kãm axihtỳx ně. Na htem hpijaam kêt o hikàxpore hprãm xàj ã mẽ kãm kapēr anhỹr o pa. Jao mẽ hamaxpēr o ahkà nhũm mẽ kuma ně tee ri hamaxpēr.

¹²Na pre ra mẽ hkwỳjê hõ tanhmã mẽ harēnh to. Mẽ ahkre xwỳnhjê hõja mẽ harēnh o:

—Kret nhõ xwỳnhjaja na htem hêx pix o pa. Ně oprê ně kãm kaga ně apkur xà pix kukamã hamaxpēr o pa. Anê.

¹³ãm hãmri ã mẽ harēnh kot anhỹr. ã mẽ kot amnhĩ nhĩpêx anhỹr jakamã kwa mẽ kot amnhĩ nhĩpêxja ně mẽ kãm akapēr kãm axihtỳx o ri mẽ hkôt apa Xitre. Kê mẽ ã amnhĩ nhĩpêx anhỹr kêt ně. Ně mẽ kãm

anê kê mẽ amnhĩ kaxyw Tĩrtũm kôt mãn hamaxpēr tỳx ně.

¹⁴Ně kê mẽ axte Ijaewjê xujarēnh ně mẽ kot amnhĩ nhĩpêx kôt amnhĩ nhĩpêx kêt ně. ã mẽ kot amnhĩ nhĩpêx o pa hã mẽ kãm karõ xwỳnhjaja na prem Tĩrtũm kapēr kaga hpa.

¹⁵Mẽ kot Jejus kôt amnhĩ xunhwỳr xwỳnhjaja tãm mẽ hamaxpēr o pa jakamã na htem Tĩrtũm kot mẽmoj piitã ho kator xwỳnh pumu ně piitã mex ã harē. No mẽ kêp Jejus kwỳ hket xwỳnhjaja na htem hamaxpēr punuj pix o pa. Ně mẽmoj mex pumu ně mex kêt ã harē. Mex tã nhũm mex kêt ã harēnh o pa.

¹⁶Ně mẽ kêp Tĩrtũm kra hã amnhĩ jarēnh tã amnhĩ tomnuj pix o pa. Jao kêp hkra hã amnhĩ jarēnh o hêx ně kapēr kwỳm ri amnhĩ nhĩpêx pix o pa. Nhũm Tĩrtũm tee ri ja hã mẽ omu ně kãm mẽ hkĩnh kêt ně. Tĩrtũm mã mẽ kot amnhĩ to mex kwỳ mẽ hã jêt kêt kumrêx.

2

¹E Xitre kot paj tanhmã ate mẽ ahkre hto hã amã karõ ka inhma ně amnhĩ xô ri mẽ kãm hã karõ ho ri apa.

Měmy wejjaja kot tanhmã amnhĩ nhĩpêx to kaxyw mẽ hã kãm karõ

²Ně kêr ka mẽmy wejjê mã anê kê mẽ amnhĩ to aptar mex ně pa.

Ně pipãnh ně ri pa hket ně.

Ně mẽ gryk kaxyw htỳx ri hkwỳjê hã hpēr o pikēnh kêt ně.

Kê mẽ tãm hamaxpēr ně tãm amnhĩ nhĩpêx o pa.

Ně amnhĩ kaxyw Jejus kôt hamaxpēr tỳx rãhã ně.

Nhũm mẽ hkwỳjaja kot mẽmoj tã tanhmã mẽ homnuj to htã kê mẽ arĩ tãm amnhĩ nhĩpêx o pa ně amnhĩ tã tanhmã mẽ ho hket ně.

E kêr ka ã mẽmy wejjê mã ja hã akarõ anê.

Měni wejjaja kot tanhmã amnhĩ nhĩpêx to kaxyw mẽ hã kãm karõ

Wam Korĩt 14.34-35; Wam Ximotre 2.9-15, 3.11; Wam Pêtre 3.1-6

³⁻⁴Ně mẽni wejjê mã anê kê mẽ kãm Jejus kĩnh xàj tãm ri amnhĩ nhĩpêx o pa.

Jao axpën jakwa kamã nhãm mẽ hixi ho rêr o pa hkêt nê.

Nê kagôxyhti ho pipãnh o pa hkêt nê.

Nê mẽ kãm anê kê mẽni xàptàr nywjê jahkre mex o pa. Mẽ kot mẽ mar nê mẽ urak nê tãm amnhĩ nhĩpêx kaxyw. Jao mẽ kãm mẽ mjên nê mẽ hkrajê japê hã mẽ kãm mẽmoj to anhÿr o mẽ kutã nojarêt rãhã ho pa.

Kêr ka ã mẽni wejê mã akapêr anê.

Mëni xàptàr nywjaja kot tanhmã amnhĩ nhĩpêx to kaxyw mẽ hã kãm karõ

⁵ Nê mẽni xàptàr nywjê mã anê kê mẽ tãm hamaxpêr pê tãm amnhĩ nhĩpêx o pa.

Nê mẽ òrkwy kamã àpênh mex o pa.

Nê mẽ mjên kapêr ma nê hkôt amnhĩ nhĩpêx.

E. ã mẽni xàptàr nywjê mã karõ anê. Koja mẽ ã amnhĩ nhĩpêx anhÿr o pa hãmri nhũm mẽ piitã mẽ kot amnhĩ nhĩpêx ã mẽ omu nê mẽ harênh o:

—Tĩrtũm kapêrja mex kumrêx. Mẽ kot hkôt amnhĩ nhĩpêx o mẽ pa xwÿnhjaja na htem tãm amnhĩ nhĩpêx mex o pa. Anê.

Mëmy xàptàr nywjaja kot tanhmã amnhĩ nhĩpêx to kaxyw mẽ hã kãm karõ

Wam Ximotre 4.12; Sikũn Ximotre 2.22; Wam Pêtre 5.5

⁶ Nê kêr ka mẽmy xàptàr nywjê mã anê kê mẽ mẽmoj punuj pê amnhĩ to htÿx o pa. Mẽ hamaxpêr punuj nê mẽ kot tanhmã amnhĩ tomnuj to pê amnhĩ to htÿx o pa.

⁷ Nê kêr ka ajaxwÿja tãm amnhĩ nhĩpêx rãhã ho ri mẽ hkôt apa Xitre. Mẽ kot ja hã apumunh nê akôt amnhĩ nhĩpêx o pa kaxyw. Nom kêr ka tanhmã mẽ ahkre hto hkwyòm ri tanhmã amnhĩ nhĩpêx to hkêt nê. ãm Tĩrtũm ã apijaàm o akatàt kôt mẽ kãm kapêr o mẽ ahkre pê tãm amnhĩ nhĩpêx o ri apa.

⁸ Nê kêr ka tãm akapêr rãhã ho ri apa. Kêr kê mẽ kãm mẽ pahkurê xwÿnhjaja ja hã ama nê amnhĩ kamã hpijaàm hãmri nê apê Kris kwÿ hã tanhmã ato kapêr punuj to hkêt japêr.

Mẽ kãm mẽ àpênh xwÿnhjaja kot tanhmã amnhĩ nhĩpêx to kaxyw mẽ hã kãm karõ

Epês 6.5-8; Korosê 3.22-25; Wam Ximotre 6.1-2; Wam Pêtre 2.18-25

⁹ Nê kêr ka mẽ kãm mẽ àpênh o mẽ pa xwÿnhjê mã anê kê mẽ ò patrãw kãm hprãm xà hkôt amnhĩ nhĩpêx o pa.

Jao mẽ kapêr ma nê hkôt amnhĩ nhĩpêx mex nê.

Nê amnhĩ tã tanhmã mẽ kãm kapêr punuj to hkêt nê.

¹⁰ Nê kê mẽ kêp mẽmoj to àhkĩnh kêt nê.

Nê tãm mẽ hipêx rãhã nê.

Nê kãm hkukrêx jamãr mex o pa.

Koja mẽ ã amnhĩ nhĩpêx anhÿr o pa nhũm mẽ ò patrãw amnhĩ tã mẽ omu nê mẽ ÿ hã hkĩnh nê pa. Hãmri nê hamaxpêr o:

—Hêxta waa nê. Inhmã àpênh xwÿnhhta na hte inhmã àpênh mex o pa. Na hte ixkukrêx nê ixkrit jamãr mex nê ixpê mẽmoj to àhkĩnh kêt nê. Nà mẽ kot Tĩrtũm kapêr kôt amnhĩ nhĩpêx o mẽ pa xwÿnhjaja na htem tãm amnhĩ nhĩpêx o pa. Pêr Tĩrtũm kapêr ãm hãmri na. ãm mex o mex. Anê.

E Xitre kêr ka mẽ kãm mẽ àpênh xwÿnhjê mã ã mẽ kot amnhĩ nhĩpêx anhÿr ã karõ.

Tanhmã Jesus kãm mẽ pajapê xaj amnhĩ nhĩpêx to hã harênh

Epês 2.8-10; Wam Tesarõn 1.9-10

¹¹ Nê Tĩrtũm kot mẽmoj to mẽ pakutã nojarêt rãhã ho pa jakamã na hte mẽ pahte Kra hkôt amnhĩ xunhwÿr xwÿnhjê ho hkra pu mẽ nhÿrmã wa kuri pahfĩr tũm nê papa ho papa.

¹² Na hte ã mẽ pamã kapêr o amnhĩrit anê nê mẽ pamã:

—E kêr ka mẽ apê ixkra hã tãm amnhĩ nhĩpêx rãhã ho ri apa nê axte tanhmã amnhĩ tomnuj to nê tanhmã ajamaxpêr punuj to hkêt nê. Mẽ ate amnhĩ tomnuj pê amnhĩ to htÿx nê ixkapêr kôt pix mã ri amnhĩ nhĩpêx rãhã nê. Anê.

¹³ Na pu htem ã amnhĩ nhĩpêx anhÿr o papa jao pahkĩnh nê mẽ papytãr xwÿnh Jesus Kris jamãr o papa. Koja nhÿrmã mẽ panhõ Tĩrtũm xihtÿx xwÿnhja akupÿn mẽ pahwÿr kumê pu mẽ mex o mex ã omu.

¹⁴ Na pre Jesus amnhĩ grõnh kôt mẽ pahwÿr wrÿ nê mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tĩrtũm mã amnhĩrer pa. Mẽmo kaxyw na pre ã mẽ panê amnhĩ nhĩpêx anê? Nà mẽ pahpê hkwyja na kãm hprãm. Nê mẽ pahte tãm ri Tĩrtũm kapêr kôt amnhĩ nhĩpêx o

papaja na kãm hprãm. Nẽ mẽ pahte urak nõ mẽ piitã mẽ kutã panojarêt rãhã ho papaja na kãm hprãm. Jakamã na pre ã mẽ panê amnhĩ nhĩpêx anê.

¹⁵ E Xitre. Ixte mẽmoj tã amã karõja kër ka ho Kris kwỳjê jahkre mex o apa kê mẽ ama nõ kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nõ Tirtũm nhỹ hã tanhmã nõ kãm akapêr to kê axte hkêt nõ. Tã mãn ka inhma. Kër ka ã Kris kwỳjê jahkre mex o apa anê.

3

Tanhmã Kris kwỳ kot amnhĩ nhĩpêx to hã mẽ kãm karõ

Rõmãn 13.1-10; Epes 2.1-10

¹ Nẽ kër ka Kris kôt akwỳjê mã anê kê mẽ ho amnhĩptar xwỳnhjê kapêr ma nõ mẽ hkôt amnhĩ nhĩpêx o pa. Nẽ mẽmoj to mẽ kutã nojarêt rãhã ho pa.

² Nẽ mẽ kãm anê kê mẽ tanhmã hkwỳjê mã kapêr punuj to ho pa hkêt nõ. Rỳ mẽmoj tã mẽ kãm àkjêr kêt nõ. Kê mẽ tãm mẽ hipêx nõ mẽ kamã ukapri pẽ mẽ ho mex rãhã ho pa. Na hte ã Kris kwỳjaja axpẽn nhĩpêx o pa anê.

³ Kormã mẽ pahte hkôt amnhĩ xunhwỳr kêt ri na pu prem ã amnhĩ nhĩpêx anhỹr kêt nõ. Na pu prem Tirtũm mã pajamaxpêr kêt nõ kapêr kôt ri amnhĩ nhĩpêx hkêt nõ. Nẽ amnhĩ tomnuj pix kukamã pajamaxpêr o ri papa. Nẽ amnhĩ pix kukamã pajamaxpêr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nẽ axpẽn tomnuj nõ. Nẽ axpẽn kãm pagryk rãhã ho papa. ã mẽ pahte amnhĩ nhĩpêx anhỹr ho papa jakamã nhũm pre mẽ piitã kãm mẽ pahkĩnh kêt nõ. Pu mẽ pajaxwỳja pamã mẽ hkĩnh kêt nõ.

Tanhmã Tirtũm kot mẽ pahto mex to hã harẽnh

Rõmãn 5.6-8; Epes 2.4-10

⁴ Tã pu prem Tirtũm kệp mẽ papytar xwỳnh ã harẽnh ma. Kot tanhmã mẽ panê amnhĩ nhĩpêx to hã harẽnh ma nõ mex o mex nõ mẽ pakamã ukapri hã harẽnh ma.

⁵⁻⁶ Hãmri nõ amnhĩ kaxyw hkôt pajamaxpêr nõ hkôt amnhĩ xunhwỳ nhũm amnhĩ tã mẽ pahpumu nõ mẽ pahto hkra. Nom mẽ pahte tanhmã amnhĩ to mex to

hã mẽ pahpumunh kôt mẽ pahto hkra hkêt nõ. Mẽ pahte tanhmã amnhĩ to mex tore hã. Na pre mẽ pakamã ukapri nõ ã mẽ papytar anê. Tã tanhmã na pre mẽ papytar to wehe? Nà na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrãk o mẽ panhĩpêx. Hãmri nõ mẽ pahwỳr amnhĩ Karõ rẽ nhũm mẽ pahwỳr agjê nõ mẽ pamã mẽ pahte amnhĩ nhĩpêx nyw gõ. ã na pre Tirtũm Jejus Kris kot mẽ panê htyk kukwak ri mẽ pahto mex rax anê hãmri nõ mẽ pahwỳr amnhĩ Karõ rẽnh anê.

⁷ Tã mẽmo kaxyw na pre ã mẽ pahto mex anê? Nà kãm mẽ pajapê jakamã na pre ã mẽ panhĩpêx anê. Mẽ pahte amnhĩ tomnuj xwỳnh tã kãm mẽ pajapê htỳx nõ kãm tanhmã mẽ pahto hprãm kêt nõ. Nẽ mẽ pahwỳr Kra Jejus mẽ nhũm wrỳ nõ mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpêr nõ hkôt amnhĩ xunhwỳr xwỳnhjaja Jejus kukwak ri mẽ pahpê Tirtũm kraa. ã na pre Jejus mẽ pahto mex anê. Jakamã kot puj mẽ nhỹrmã Tirtũm mẽ wa kuri pahtir tũm nõ pamex nõ papa ho papa. Koja wa nhỹrmã ã mẽ pahto mex anê.

⁸ ãm hãmri na pa amã ã ja jarẽnh anê Xitre. Jakamã kwa kër ka inhma nõ inhmar tỳx nõ. Nẽ ho amnhĩ kaxyw Tirtũm kôt mẽ hamaxpêr xwỳnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

⁹ Nẽ mẽ kot htỳx ri mẽmoj tã axpẽn mã àkjêr o mẽ pa xwỳnhjaja kër ka mẽ hkôt apa hkêt nõ. Nẽ mẽ hkukamã mẽ higêt kôt apa hkêt nõ. Rỳ finat Mojes kot Tirtũm nhỹ hã kapêr ã axpẽn mã mẽ àkjêr xwỳnhjê hkôt apa hkêt nõ. Na htem ã ri axpẽn mã àkjêr anhỹr o pa nõ tãm amnhĩ nhĩpêx kêt nõ.

¹⁰ Nẽ koja mẽ akwỳjê hõ amnhĩ krã hkôt tanhmã hkwỳjê mã kapêr to nhũm mẽ kuma nõ hã axpẽn mã akir nõ axpẽn pẽ pikjêr kaxyw. Ka ja hã omu nõ ã kapêr anhỹrja nõ kãm akapêr kê axte hkêt nõ. Hãmri nhũm ama nõ ãm ama nõ arĩ ã mẽ kãm kapêr anhỹr japêr ka axte nõ kãm akapêr. Tã ra ate nõ kãm akapêr o axkrut tã nhũm arĩ ã kapêr anhỹr o axkrunêpxi japêr ka ja hã omu hãmri nõ mẽ amnhĩ nõ hano

kê axte mẽ apê Kris kwỳjê hkôt ri pa hkêt nê.

¹¹ ã mẽ kot amnhĩ nhĩpêx anhỹr o mẽ pa xwỳnhjaja na mẽ ra Jejus wỳr pry kaga nê htỳx ri tanhmã amnhĩ tomnuj to ho pa. Nê ã amnhĩ nhĩpêx anhỹr o pa jao kêp Kris kwỳ hkêt ã amnhĩ to amnhĩrít.

Pawre kot kagà jatur xà kamã tanhmã Xitre mã kapêr to

¹² Nê kot paj tokyx ma Nĩkop wỳr mỗ. Kêr pa tokyx hwỳr pỏj nê amgrà pê krĩ nhỗ xwỳnhjê hkôt ixpa. Jakamã kot paj tokyx ma awỳr Atêmti rỳ Xikitre mẽ. Kê mỗ nê awỳr pỏj ka tokyx tanhmã amnhĩ to hpa nê man ixwỳr mỗ pu mẽ Nĩkop kamã axpêñ pumu.

¹³ Nê ota mẽ akuri Apor mẽ axiwôkat Jêntija. Koja wa mẽmo arĩgro hã ma krĩ hỡ hwỳr nojarêr ka wa kãm mẽ apkur xà hkwỳ gỏ kê wa ma ỹ kamã mỗr kêr nê.

¹⁴ Nê kêr ka Kris kwỳjê mã anê kê mẽ arĩ ôrkwỹ pix kãm hkrĩ ho hkrĩ hkêt nê. Kê mẽ tanhmã axpêñ to mex to ho axpêñ kôt pa. Nhũm mẽhỡ kêp amrakati kê mẽ tanhmã ho ajuta hto. Mẽ kãm anê kê mẽ ã axpêñ nhĩpêx anhỹr o pa.

¹⁵ Nê ota jar Kris kôt pahkwỳjê piitã awỳr hpêr mẽ Xitre. Nê kêr ka atar Kris kôt mẽ pahkràmnhwỳjê mã mẽ ijarê.

E ãm ja pix. Kê Pahihti Jejus mẽ akutã nojarêr rãhã ho pa. Ixpê Pawre na pa amã ã ixkapêr nê hã kagà nê awỳr mẽnh anê.

Piremõ Pawre kot Piremõ hwÿr kagà nē mēnh

Pawre na pre kagàja nhîpêx nē hkràmnhwÿ Piremõ hwÿr kumē. Na pre Piremõja amnhîm kām àpēnh xwÿnh Onesti japrô. Kàxpore ho haprô nhûm amarî kām àpēnh o pa. Tã tanhmã hamaxpêr to nē hkaga nē ma umaj krî hō hwÿr hprôt nē tēn amûxu nē kamã pa ho pa. Hãmri nē Pawre pumu nē kām amnhî jarē. Pawre arî kēp prēs nē hkrî ho hkrî nhûm Onesti omu nē kām amnhî jarē. Hãmri nhûm Pawre kām Jejus jarē nhûm kuma nē hkôt amnhî xãm kurê kumrêx. Hãmri nhûm Pawre ja hã omu nē hkràmnhwÿ Piremõ mã kagà nhîpêx nē kamã Onesti xyr pē kām kapêr. Hãmri nē hipêx pa nē Onesti mã kugõ nē ma akupÿm õ patrãw Piremõ wÿr kumē nhûm ma mō. Nhûm Pawre kagàja kamã kām kapêr nē kām:

¹ Pa ixkràmnhwÿ Piremõ? Xà amex? Ixpê Pawre na pa awÿr kagà nhîpêx nē kumē. Apê Kris kôt ixtõ hã inhmã akînh. Na ka hte ixpyrà nē Kris mã tanhmã amnhî nhîpêx to ho apa. Ta ot pa awÿr kagàja kamã ixpêr mē.

² Amã nē anhōrkwÿ kamã Tirtûm kapêr mar kaxyw mē kēp Jejus kwÿ hã mē pikuprõnh xwÿnhjê hwÿr. Nē Kris kôt pahõtõ Apti mē Akip wa hwÿr kumē. Akipja na hte mē pahpyrà nē Pahihti Jejus mã tanhmã amnhî nhîpêx to ho pa.

³ Na pa hte mē ato Mēpanhîpêêxà maati Tirtûm mē Pahihti Jejus Kris wa hwÿr rãhã ho ri ixpa. Kot mēmoj to mē akutã nojarêt rãhã nhûm wa ÿ hã mē ajamakêtkati nē axàmnhîx apa ho apa kaxyw.

Pawre kot Piremõ nhÿ hã hkînh ã harēnh

⁴⁻⁵ Na pa pre ajarēnh ma Piremõ. Na htem xatã tanhmã inhmã ajarēnh to nē ajarēnh o:

—Hêxta waa nē. Piremõ na hte amnhî kaxyw Pahihti Jejus Kris kôt hamaxpêr tÿx nē kām mē ixpê Kris kôt hkwyjê piitã hkînh pē tanhmã mē ixto mex to ho ri mē ixkôt pa.

Anhÿr o inhmã ajarē pa mē kuma nē anhÿ hã ixkînh nē ato Tirtûm wÿr rãhã ho ixpa nē ato hwÿr o:

—Pa Tirtûm. Na xep hte Piremõ kām akînh tÿx nē akwyjê ho mex rãhã ho pa. ãm hãmri na hte ã mē hipêx anhÿr o pa.

⁶ Na xep mē piitã mē kām tanhmã Jejus kot mē inhnê amnhî nhîpêx to hã harēnh o ri mē hkôt pa. Jakamã kêr ka tanhmã mē kot mar xwÿnhjê hkrã hto kê mēhprî hã mar tÿx nē Kris kot tanhmã mē ho mex to hã amnhî tã omu.

Anhÿr o ato kuwÿ.

⁷ Ate Kris kwÿjê ho mex o apa jakamã te ate pa ixto mex pyrãk Piremõ. Na htem anhÿ hã hkînh nē pa. Pa ijaxwÿja ajarēnh ma nē anhÿ hã ixkînh tÿx nē jar mē hagjênh xà kamã ixkrî.

Piremõ kot Onesti kamã ukapri hã Pawre kot kãm karõ Rômãn 15.7; Epes 4.31

⁸ Nã ixte amã mēmoj jarēnhja tanhmã kute hkêt. Kot paj ãm amã mēmoj jarē nē hã awÿ. Nom kot paj Kris nhÿ hã amã tanhmã hã karõ hto hkêt nē.

⁹ Kot paj ãm pahte axpēn to pahkràmnhwÿ hã hã awÿ. Ra ixwej tÿx nē Kris ã arî mē hagjênh xà kamã ixkrî htã mēmoj tã awÿ ka inhma nē inhmã ho anhÿr japêr ko.

¹⁰ E amã àpēnh xwÿnh Onestija na ixte amã harēnh kaxyw. Na pre man ixwÿr mō. Ixpê prēs nē ixkrî nhûm ixwÿr mō. Pa omu nē kām Jejus jarē nhûm inhma nē pahpyrà nē amnhî kaxyw hkôt hamaxpêr nē hkôt amnhî xãm. Jakamã te kēp ixkra pyrãk. Hãmri nē ixto ajuta mex o pa.

¹¹ Xep kormã Jejus kôt amnhî xãm kêt ri na pre amã àpēnh mex kêt nē. Nē kām kaga nē htÿx ri tanhmã àpēnh to ho pa. Tã ra Jejus kôt amnhî xãm hãmri nē katàt kôt inhmã àpēnh mex o pa. Nē ixto ajuta mex nē. Koja akupÿm amã apê hãmri nē amã àpēnh mex nē.

¹² Jakamã ot pa akupÿm awÿr kumē ixkràmnhwÿ. Nom inhmã hapê jakamã koja ma akupÿm mō pa ho ama nē. Tã kot paj akupÿm awÿr kumē.

¹³ Kot jar ixri arîk nē apãnhã tanhmã ixto ajuta hto ho paja na inhmã hprãm.

14 Jakamã kot kaj amã akupÿn ixwÿr mēnh prām nē māmri ixwÿr amē. Nom ixte ja pumunh kêt. Kam nē amã hprām xà hkôt tanhmã kãm akapēr to. Kãm anē kē akuri arīk nē amã àpēnh o pa rÿ akupÿn ixwÿr amē.

15 Nom konēn. Mãn akupÿm awÿr mōr nē kēp Kris kôt akwÿr hã amã àpēnh mex kaxyw na pre Tirtūm ixwÿr kumē nhūm ixwÿr mō nē ixri Jejus kôt amnhĩ xãm nē ixri pa hã mytwrÿr hkwÿr hapêx pa akupÿm awÿr kumē.

16 Nom ra kēp amã àpēnh xwÿnh pix kêt mãânēn kēp Kris kôt atōō. Jakamã kot kaj wa atar axpēn kôt Pahihti Jejus kôt tãm amnhĩ nhĩpêx o ri apa. Nom mãânēn kēp ixkrãmnhwÿ mex ã inhmã hapêê.

17 Jakamã kot kaj ixpê Kris kôt akrãmnhwÿr hã ijarē hã kot kaj mãânēn inhmã ho mex o apa.

18 Nē wam amã àpēnh o pata ã mãn pre apê mēmoj to ahkĩ rÿ akàxpore hkwÿr ho ahkĩnh japēr. Tã pa kot paj hpãnhã amã amnhĩre. Ka inhmã tanhmã kàxpore jarēnh to pa amã amnhĩre.

19 Ixpê Pawre kot paj tanhmã kot ato tewēn toja pãnhã amã amnhĩre. E pa amnhĩ nhĩhkra ho ã amã amnhĩ jarēnh ã kagà anē. Nom ajaxwÿja na ka tanhmã ixto tewēn to Piremõ. Na pa pre amã Jejus kot mē panê htyk ã harē ka pre inhmar xà hkôt hkôt amnhĩ xãm. Jao ixpyrà nē atĩr tūm nē apa ho apa mã xwÿnhhta pãnhã te ate ixto tewēn pyrāk.

20 E kwa ixkrãmnhwÿ. Ixpyrà nē apê Kris kwÿr jakamã kēr ka ixkamã axukaprĩ hã inhmã Onesti ho mex nē. Kēr pa ja hã ajarēnh ma nē ixkĩnh nē tãm ijamaxpēr.

21 Nã ra ixte apumunh mex kēnã. Kot kaj ixte hã awÿrta kôt hipêx. Ja kaxyw na pa amã kagàja nhĩpêx nē awÿr kumē. Nom kot kaj ãm ja pix ho anhÿr kêt nē. Kot kaj ixte hã awÿrja kôt amnhĩ krã hkôt tanhmã ho mex to. Nã kot kaj ho anē.

Pawre kãm Piremõ hwÿr mōr nē omunh prām ã harēnh

22 Nē Tirtūm kot mē awÿr inhmēnh kaxyw mē ate ixto hwÿr o apa jakamã koja apu tokyx ma mē awÿr inhmē. Jakamã kwa kēr ka ixkutêp tanhmã mēmoj to mex

to. Kēr pa mēmo arĩgro hã mōn awÿr pōj ka ra ixkutêp tanhmã amnhĩ to hpa nē ãm ixpix kãm ajamak o apa.

23 Nē ota Epasja awÿr hpēr mē. Na hte ixpyrà nē Jejus Kris ã mē hagiēnh xà kamã kēp prēs nē hkrĩ ho hkrĩ.

24 Nē Makre nē Aristak nē Tēmti nē Rukre mē awÿr hpēr mē. Na htem ixpyrà nē Kris mã tanhmã amnhĩ nhĩpêx to ho pa nom ixrom mē kēp prēs kêt.

25 E kē Pahihti Jejus Krisja akutã nojarêr rãhã ho pa. Ta ãm ja pix. Ixpê Pawre na pa amã kagà nē awÿr kumē.

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarênh rax nê tanhmã Jejus jarênh to.

Nê mẽ hkwÿjaja hkwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanâr prãm xàj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tĩrtũm nhōrkwÿ kaàkre hã kagà hto. Nê kaxkwa kamã òrkwÿ mexja nhũm tanhmã hã kagà hto nê mex o òrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepêm Tĩrtũm na pre mẽ panhĩgêtjê hwÿr ý hã kapêr jarênh o ri mẽ pa xwÿnhjê rē nhũm mẽ xatã mẽ kãm kapêr jarênh o ri mẽ hkôt pa. Ahpÿnhã tanhmã mẽ kãm kapêr to ho amnhĩrīt o mẽ hkôt pa. Nhũm Tĩrtũm xatã mẽ hkanrēhã mẽ hkra nê mẽ htãmnhwÿjê hwÿr mẽ hkwÿjê rē nhũm mẽ kãm kapêr jarênh o ri mẽ hkôt pa. Nom mẽ kãm kapêr piitã harēnh kurê kumrēx kêt nê. Na prem ãm hkwÿ pix jarê. Tã nhũm hpãnhã mẽ hkwÿjaja wamtajê mÿr pê mẽ hwÿr mra nê axte mẽ kãm hkwÿ jarênh o ri pa. Jao ra mẽ kãm harēnh jatur xãm mẽnh o mō.

²⁻³ Tã nhũm Tĩrtũm Kraja mẽ pahwÿr wrÿ nê mẽ pamã kapêr jarênh jatur xãm kumê.

Kêp Tĩrtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mãânēn tipxi. Jakamã mẽ pahte pano ho Tĩrtũm pumunh kêt tã Jejus pumunh pê te mẽ pahte Tĩrtũm pumunh pyrãk. Uràk nê kot amnhĩ to rax o mẽ pahpiitã mẽ pajakrenh par. Amnepêm kormã mẽmoj kêt ri nhũm Jejus Tĩrtũm kukwak ri mẽmoj piitã ho kator pa. Tã koja Tĩrtũm nhÿrmã kãm mẽmoj piitã òr pa. Kaxkwa kamã mẽmoj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhĩ tomnuj piitã hpãnhã amnhĩrer par kaxyw mẽ panê ty. Hãmri akupÿm htĩr hãmri nê ma akupÿm kaxkwa hwÿr api. Tĩrtũm xihtÿx o hihtÿx xwÿnhja wÿr akupÿm api. Nê ò krĩ kamã upòk rũm pahi maati hkrĩ xà hã kuri hkrĩ ho hkrĩ. Nê ìhkô hã mẽ pahto amnhĩptàr rãhã ho hkrĩ.

Jejus mẽ Tĩrtũm kapêr o mẽ wrÿk xwÿnhjê jarênh

⁴⁻⁵ Nê Jejus kot amnhĩ to rax o Tĩrtũm kapêr o mẽ wrÿk xwÿnhjê jakrenh jakamã na pre ã Tĩrtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wrÿk xwÿnhjê jakre.

Mê kot inhmã tanhmã amnhĩ nhĩpêx to ho mẽ pa xwÿnh na mẽ.

No mẽ kurom apê Ixkra kumrēx jakamã amex o ate mẽmoj piitã hakrenh par.

Nê apê pika nhō xwÿnhjê hwÿr ixte amēnh mã xwÿnh na ka. Nà apê Ixkra kumrēx.

Kot paj jarãhã ixpê anhĩpêêxã hã mẽ piitã mẽ kãm amnhĩ to amnhĩrīt. Pa na ixpê anhĩpêêxã.

Anhÿr o Kra Jejus mã kapêr. Na pre kapêr o mẽ wrÿk xwÿnhjê mã ã kapêr anhÿr kêt nê. Jejus mã pix mã ã kapêr anê.

⁶ Nê koja nhÿrmã akupÿn mẽ pahwÿr Kra mẽnh kaxyw hãmri nê kapêr o mẽ wrÿk xwÿnhjê mã kãm:

E ota Ixkrata. Ixkra kumrēx na. Kot amnhĩ to rax o mẽ piitã mẽ hakrenh par.

Jakamã kêr ka mẽ apiitã kutã aròròk nê kãm mex o mex ã harê.

Anhÿr o mẽ kãm kapêr.

⁷ Nê kapêr o mē wryk xwýnhjê na pre axtem tanhmã mē harênh to nê mē harênh o:

Ixkapêr o mē wryk xwýnhjaja na pa hte nhÿhÿm mē kurê nhÿm htem inhmar xà hkôt ma nhÿhÿm mra nê inhmã tanhmã amnhĩ nhÿpêx to.

Te ixte ma nhÿhÿm kôk nê kuwyja mēnh nhÿm ixkapêr kôt nhÿhÿm mōrja pyræk.

Anhÿr o mē harê.

⁸ No ã Krata jarênh anhÿr kêt nê. Na pre tanhmã kãm kapêr to nê amnhĩ pyrã nê kêt Tirtûm ã harê nê kãm:

Pa Tirtûm? E ka kot kaj mē ho amnhĩptâr rãhã ho akrĩ. Nê akatãt kôt mē ho amnhĩptã.

⁹ Koja mē tãm amnhĩ nhÿpêx ka ja hã mē omu nhÿm ja amã mex nê.

No koja mē tanhmã amnhĩ tomnuj to ka ja hã mē omu nhÿm ja apê omnuj nê. Mē kot tanhmã amnhĩ tomnuj to ho paja na omnuj tÿx.

Tã ate inhmã hprãm xà hkôt amnhĩ nhÿpêx jakamã na pa mē kaxyw axãm ka akĩnh kãm mē ho amnhĩptã.

Ixpê anhō Tirtûm na pa ã amã ixkapêr anê. Anê.

¹⁰ Hãmri nê kãm:

Pa Pahihti. Nã amnepêm kormã mēmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhĩ nhÿpêx anê.

¹¹ Tã nom koja nhÿrmã hamê wa hapêx pa. ãm kaxipix kot kaj kurom arĩ arãhãã nê aa ajapêx kêt nê.

Kaxkwa nê pika koja wa nhÿrmã te ixkre hã pô htûm kot amnhĩ nhÿpêx pyræk.

¹² Kot kaj wa hipêx o te mē kot ixkre nê pô htûm mã hikranh par nê hpãnhã hã nyw janhôr pyræk.

Jao pika nê kaxkwa htûm o ajapêx pa nê hpãnhã nyw nhÿpêx. Kaxkwa nyw nhÿpêx nê pika nyw nhÿpêx.

Nom kot kaj pika nê kaxkwa tûmta pyrã nê aa awej nê axirerek kêt nê.

Kot kaj arĩ anyw nê axihtÿx rãhã apa ho apa nê aa ajapêx kêt nê. Arãhã atĩr tûm nê apa ho apa xwýnh na ka.

¹³ E jar inhĩhkô hã nhÿ nê inhmã mē ho amnhĩptâr o akrĩ.

Kot paj mē kãm akurê xwýnhjê pynênh pa nê man awÿr mē o mra nê anhĩhkram mē haxàr pa. Anê.

ã na pre Tirtûmja Kra Jejus mã kapêr anê. No kapêr o mē wryk xwýnhjê mã ã kapêr anhÿr kêt nê.

¹⁴ E kot paj hpãnhã ixprĩ hã mē amã Tirtûm kapêr o mē wryk xwýnhjê jarê ka mē inhma. Tirtûm mã na htem tanhmã amnhĩ nhÿpêx to ho pa. Na hte nhÿrmã kuri mē htĩr tûm nê mē pa mã xwýnhjê hwÿr mē kurê nhÿm mē ma mē hwÿr wry nê tanhmã mē ho ajuta hto ho pa. Na htem ã amnhĩ nhÿpêx anhÿr o pa.

2

Mē pahte Jejus kaga hkêt ã mē pamã karō

¹ Tã ã Tirtûmja Kra kot amnhĩ to rax o kapêr o mē wryk xwýnhjê jakrenh ã harênh kot anhÿr jakamã kwa kêr pu mē kapêr mar tÿx rãhã nê hkôt pix mã amnhĩ nhÿpêx o papa. Kot pu mē ho anhÿr kêt hãmri nê gaa nê hkaga.

² Na pre Tirtûm kapêr o mē wryk xwýnhjaja amnepê mã mē panhigêjtjê hwÿr wry nê Tirtûm nhÿ hã mē kot tanhmã amnhĩ nhÿpêx to ho pa hã mē kãm karō nê ma akupÿm api. Nê katãt kôt ri mē kãm Tirtûm kapêr jarênh o pa. Hãmri nhÿm mē kot hkôt amnhĩ nhÿpêx nê mar mex xwýnhjaja nhÿm mēmoj mē kãm mex nê. No nhÿm mē kot mar nê ãm mar xwýnhjaja koja mēmoj mē kêt omnuj nê.

³ Koja nhÿrmã mēmoj mē kêt omnuj tÿx kumrêx nhÿm mē tee ri amnhĩ tã omu nê tee ri kêt amnhĩptâr prãm kaprÿ nê mex kêt nê pa. Nom mē kot Tirtûm kapêr mar tÿx xwýnhjaja koja mēmoj mē kãm mex o mex. Koja Tirtûm amnhĩ katut kôt mē kot amnhĩ tomnuj rênh pa nê axte kãm hamaxpêr kêt nhÿm mē kuri htĩr tûm nê mex rãhã nê pa ho pa. Na pre Pahihti Jejus mē kot kapêr mar o kuhê xwýnhjê kumrêx mã ã ja jarênh anê nê mē kãm:

—Nã kot kaj mē amnhĩ kaxyw inhmã aja-maxpêr nhÿm Tirtûm ixtã mē apumu nê mē anê mē ate amnhĩ tomnuj piitã ho hapêx pa nê axte kãm hamaxpêr kêt nê. Anê.

Hãmri nhÿm mē kot kapêr mar nê hkôt mē pa ho mē pa nê xwýnhjaja mar tÿx nê

amnhĩ xô ri mẽ pamã harênh o ri pa. Nẽ mẽ pamã:

—Nà ãm hãmri. Nà ã ja jarênh kot anhÿr. Anê.

⁴ Hãmri nẽ mẽ pamã aa mẽ pahte mẽmoj pumunh kêt kwÿ ho anhÿr o ri mẽ pahkôt pa. Tirtũm Karõ kot ja kaxyw mẽ ho mẽ àhpumunh tÿx jakamã nhũm mẽ ÿ hã ahpÿnhã tanhmã mẽ pamã amnhĩ nhĩpêx to ho pa. Mẽ pahte ja hã mẽ omunh nẽ kamã pano puma kaxyw. Nẽ ã mẽ pajamaxpêr anê nẽ pajamaxpêr o:

—Nà ãm hãmri na mẽ pamã ã Jejus jarênh anê nẽ ÿ hã ã amnhĩ nhĩpêx anhÿr o pa.

Anhÿr o pajamaxpêr kaxyw na prem ã mẽ pahkôt amnhĩ nhĩpêx anhÿr o pa.

Mẽ pahpê Jejus tõ nẽ htõx ã mẽ pajarênh Juãw 1.14; Rõmãn 8.3-4; Piriapos 2.5-11; Korosẽ 2.9; Wam Juãw 4.2

⁵ Nẽ na pre Tirtũm amnhĩ kukamã tanhmã amnhĩ jarênh to nẽ nhÿrmã kot akupÿm mẽmoj piitã ho nyw nẽ tãm mẽmoj piitã ho amnhĩptâr o pa hã amnhĩ jarê. No na pre kapêr o mẽ wrÿk xwÿnhjê mã ã mẽ kot amnhĩ nhĩpêx anhÿr ã mẽ kãm karõ hkêt nẽ. Kojã jajaja mẽ pahto amnhĩptâr o pa hkêt nẽ.

⁶ Tirtũm kapêr ã kagã htũm kot ja jarênh kot:

Kwa Tirtũm. Nà ãm hãmri na ka hte pika ja kamã ri mẽ ixpa xwÿnhjê jamãr mex rãhã ho apa.

Akĩnhã amarĩ ri mẽ ixpa xwÿnh tã amã mẽ ijapêê.

Nẽ mẽ ixkutã anojarêr rãhã ho apa.

⁷ Na ka hte tanhmã mẽ inhĩpêx to pa mẽ te mẽ ixpê akapêr o mẽ wrÿk xwÿnhjê pyrãk.

Jao mẽ urãk nẽ akukwak ri mẽ inhmex nẽ ixpa ho ixpa.

Mẽ urãn mẽ ixàhpumunh nẽ ixihÿtÿx kêt tã mẽ inhmex nẽ ixpa.

⁸ Na ka pre ra ate mẽmoj to akator xwÿnh piitã mẽ inhĩhkram haxã.

Nà ãm hãmri na ka pre ã mẽ inhĩpêx anê Tirtũm. Amex o amex. Anê.

Na pre ra mẽmoj piitã mẽ panhĩhkram haxã. Pika nẽ kaxkwa nẽ kapêr o mẽ wrÿk xwÿnhjaja nẽ mẽkarõmnuti nẽ kot mẽmoj piitã mẽ hipêxja nhũm mẽ panhĩhkram haxãr

pa. Mẽ pahte ìhkô hã ho amnhĩptâr o papa kaxyw. No na pu mẽ kormã piitã ho amnhĩptâr kêt nẽ.

⁹ No kêt Jejusja na Tirtũm mẽ pakurom ìhkram mẽmoj piitã haxãr par kumrêx. Kormã pika ja kamã ri pare ri na pre tanhmã amnhĩ nhĩpêx to nẽ Tirtũm kapêr o mẽ wrÿk xwÿnhjê hkĩnhã te amnhĩ to grire pyrã nẽ amnhĩ xã htÿx kamã hamak kãm ty. Tirtũm kãm mẽ pahto mex prãm xãj ã mẽ pahpiitã mẽ panê hÿk anê. Tã nhũm Tirtũm akupÿm ho htÿr nẽ akupÿm amnhĩ wÿr ho api nẽ kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anê nhũm Tirtũm ja hã omu nẽ kukwak ri mẽ pahto mex nẽ.

¹⁰ Nẽ Tirtũm kot mẽmoj piitã ho kator jakamã mẽmoj piitã õ na. Na pre mẽ pakukamã hamaxpêr o:

—Inhmã ixkra xohtô hprãm. Kot paj nhÿrmã man amnhĩ wÿr mẽ ho api kê mẽ ixri mex rãhã nẽ pa ho pa. Nà kot paj ã mẽ hipêx anê. Nẽ Ixkra Jejus koja kêp mẽ õ Pahihti. Kojã mẽ urãk nẽ mẽmoj punuj pumunh o pa hãmri nẽ à htÿx kamã hamak o kêp mẽ õ Pahihti mã tãm. Anê.

¹¹ Na hte Jejus mẽ panê mẽ pahte amnhĩ tomnuj rê nẽ hpãnhã mẽ pamã mẽ pahte amnhĩ nhĩpêx nyw jagjê nhũm Tirtũm ja hã mẽ pahpumunh kôt mẽ pahto hkra. Kêp Jejus Nhĩpêxã nẽ kêp Mẽpanhĩpêxã maati jakamã nhũm Jejusja mẽ pahpê htõ nẽ mẽ pahpê htõx ã mẽ pajarê nẽ mẽ panhÿ hã hkĩnh nẽ.

¹² Tirtũm kapêr ã kagã htũm ã mẽ pajarênh kot anhÿr. Kamã Jejusja Mẽpanhĩpêxã maati mã mẽ pajarênh kot:

Kojã ixtõ nẽ ixtõxjaja akapêr mar kaxyw axpên wÿr akuprõ pa ma mẽ hkôt mra nẽ mẽ kãm akapêr jarê nẽ mẽ ìhkô hã amex ã gre. Anê.

¹³ Hãmri nẽ kãm:

Kot paj amnhĩ kaxyw akôt pix mã ijamaxpêr mex o ri ixpa. Anê.

Hãmri nẽ hpãnhã kãm:

Ot pa akrajê hkôt ri ixpa ho ixpa.

Ka na ka pre mẽ kêp ixtõ nẽ ixtõx kaxyw inhmã mẽ agõ.

Kojã mẽ ixpyrà nẽ amnhĩ kaxyw amã hamaxpêr rãhã ho pa Tirtũm. Anê.

14 Nê mē pahpê pika nhõ xwýnhjaja na pu htem âm ri panhĩ pix ã papa. Nê panhĩ kamã pahkamrô hã ri papa. Jakamã na pre Jejus kot mē panê htyk kaxyw mē pahwýr wrý nê mē pahpyrà nê ï ho mē pakamã kato. Tã mēmo kaxyw na pre ï ho ï nê mē pahkôt pa? Nà ï ho htyk o Satanasti pē hihtýx xà ho hapêx par kaxyw na pre ã amnhĩ nhĩpêx anê. Satanasti kêp mē kot amnhĩ tomnuj xwýnhjê hpãm nê kêp mē htyk xwýnhjê hpãm.

15 Jakamã na hte kot mē pahtã ïhkra pikamýr pyrãk o mē panhĩpêx pu mē ý hã pamã pahtyk puma nê ri papa. Tã ra Jejus kot mē pahwýr wrýk nê te kêp mē papytãr pyrãk o mē panhĩpêx jakamã pu mē tee ri pahtyk kukamã pajamxpêr o ri pamã ma ho papa hkêt nê.

16 Nê Tirtüm kapêr o mē wrýk xwýnhjê ho mex kaxyw na pre Jejus pika hwýr wrýk kêt nê. Mē panhĩgêt finat Apraãw pyrã nê mē panhĩ ho panhĩ xwýnhjê ho mex kaxyw na pre wrý.

17 Ijaew nhõ patrejaja na pre htem mē kot amnhĩ tomnuj mýrapê mē hpãnhã Tirtüm mã mry hkwý pa nê hkamrô kapĩ nê mē ho Tirtüm wý. Kot hã mē omunh nê mē mex ã mē harênh kaxyw. Tã nhüm Jejus wrý nê mēmo mryta pyrã nê ã mē panê hkamrô pikapĩr anê. Kaxyw na pre mē pahtõ maatija mē pahwýr ï ho ï nê wrý nê mē pahpyrà nê ni nhõhy rüm kato. Jao kêp mē pahto Tirtüm wýr xwýnh maati. Na pre Tirtüm kãm hprãm xà hkôt mē panê mē pahte amnhĩ tomnuj pãnhã amnhĩrer pa. Tã kot mē pahpyrà nê mēmoj punuj pumunh nê amnhĩ xà htýx kamã hamak o pa jakamã kêp mē pakamã ukapĩr xwýnh ã pixi mex na.

18 Kormã htyk kêt ri na pre mē pahpyrà nê omnuj nê ri pa. Nhüm mēkarõmnuti nhõ pahi kot tanhmã amnhĩ tomnuj to hprãm xà tee ri hkôt kãm ahkrox o pa hkaprý nhüm hkôt amnhĩ nhĩpêx kêt nê amnhĩ nê ho axtem nê. Jakamã koja Satanastija urãk nê tanhmã mē panhĩpêx to nhüm Jejus mē pahtã omu nê amnhĩ pyrã nê tanhmã kêp mē panhĩpêx to pu mē ý hã kutã amnhĩ to htýx nê papa.

3

Jejus kot amnhĩ to rax o Mojes jakrenh ã harênh
Juãw 1.17-18

1 E ixkrãmnhwýjaja. Ra Tirtüm kot mē pahte kapêr mar nê tãm amnhĩ nhĩpêx o ri papa kaxyw mē pahto hkra jakamã kwa kêr ka mē Jejus kot tanhmã mē pamã amnhĩ nhĩpêx toja mã ajamxpêr rãhã ho ri apa. Na pre Tirtüm mē pahwýr kumê nhüm mē pahwýr wrý nê Tirtüm kapêr o mē pajahkre ho ri mē pahkôt pa. Nê te kêp mē panhõ patre pyrã nê mē pahto Tirtüm wýr o pa.

2 Na pre Tirtüm finat Mojes kwý kaxyw Mojesja xãm nhüm kãm hprãm xà hkôt tanhmã mē hipêx to ho pa. Tã nhüm hpãnhã mē pakaxyw Kra Jejusja xãm nhüm Mojes pyrã nê Tirtüm kãm hprãm xà hkôt pix mã tanhmã mē panhĩpêx to ho pa. Hamê na pre wa Tirtüm jamaxpêr xà hkôt tanhmã kãm mē panhĩpêx to ho pa.

3 Koja mēhõ amnhĩm ixkre mex nhĩpêx nê hipêx pa nhüm hkwýjaja hwýr mra nê omu nê mex kumrêx ã harê. Nom kot hipêx xwýnhhta àhpumunh xà hkôt hipêx jakamã tãm na mex o kot ixkreta jakrenh. Ja pyrã nê finat Mojes kot amnhĩ to rax tã nhüm Jejus kot amnhĩ to rax o kot hakrenh. Mojes te kêp ixkre nhĩpêxta pyrãk no Jejus te kêp ixkre nhĩpêx xwýnhhta pyrãk jakamã kot amnhĩ to rax o kot Mojes jakrenh.

4 Nê mē kot ahpýnhã amnhĩ krã hkôt tanhmã ixkre nhĩpêx to jakamã kot hipêx xwýnhhta na mex o ixkreja jakrenh. Tã ja pyrã nê Tirtüm kot mēmoj piitã ho kator jakamã kot amnhĩ to rax o kot mēmoj piitã ho kator xwýnh jakrenh par.

5 Nê finat Mojes na pre hte Tirtüm kãm hprãm xà hkôt tanhmã amnhĩ nhĩpêx to ho pa. Nê ma kãm hkwýjê piitã hkôt mē kãm kapêr jarênh o ri pa. Tirtüm tanhmã kot mē kãm kapêr tota kukamã nhüm mē kãm harênh o mē hkôt pa. No âm Tirtüm mã tanhmã amnhĩ nhĩpêx to ho hpa xwýnh pix na pre.

6 Nê Kris haxwýja na pre hte Tirtüm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tirtüm Kra

kumrêx jakamã kurom kêp mē panhō Pahhti kumrêx. Tã kwa kêr pu mē kãm hprãm xà hkôt pix mã tanhmã kãm amnhĩ nhĩpêx to ho ri papa. Mē kot hã tanhmã mē panhĩpêx to htã pu mē ÿ hã mē kutã amnhĩ to htÿx nē papa nē pajamaxpêr o:

—Nà ixpunuj nē ixpa htã kot paj ixpunuj rãhã ixpa ho ixpa hkêt nē. Koja nhÿrmã Tĩrtũm ixto mex kumrêx pa axte tanhmã ixpunuj to nē ixpa hkêt nē. Hêxta waa nē. Nà ja inhã hprãm tÿx kumrêx.

Anhÿr o amnhĩ kukamã pajamaxpêr o papa.

Mē pahte Tĩrtũm kaga hkêt ã mē pamã karõ

Wam Korõt 10.1-11; Jutre 5

⁷⁻⁸ Amnepê m na pre mēhōja tanhmã Tĩrtũm Karõ nhÿ hã kapêr to nē kapêr o: E kêr ka mē Tĩrtũm kapêr mar tÿx o apa.

No ama nē ãm ama nē ri hã apa hkêt nē. Rÿ kapêr pē akrã hihtÿx o apa hkêt nē.

Mē akukamã mē anhĩgêtjaja na prem ã amnhĩ nhĩpêx anē nē Tĩrtũm kapêr pē hkrã hihtÿx o pa. Kapôt ã Mojes kôt mē pata ã na prem kãm Tĩrtũm kapêr mar prãm kêt nē. Nē tee ri amnhĩ kukamã hamaxpêr nē akupÿm Ejit wÿr hkrã nē axpên mã: “Kwa na pu mē ra pahpunuj tÿx nē papa nhũm Tĩrtũm ãm ja hã mē pahpumu nē tanhmã mē pahto mex to hkêt nē. Mãn ra mē pahkaga nà? E kwa pu mē awjanã nē ma akupÿm Ejit wÿr mãn papa.” Anē.

⁹⁻¹⁰ Na prem ã axpên mã kapêr anhÿr o ri pa hã amgrã pē 40.

Tĩrtũm xatã kot tanhmã mē ho mex to nhũm mē kot amnhĩ tã omunh tã ãm omu nē htÿx ri amnhĩ hkrã hkôt pa.

Nhũm tee ri amnhĩ tã mē omu nē mē kamã gryk nē.

Hãmri nē hamaxpêr o: “Nà pêr mē hamaxpêr kot mē hã hkwÿ jêt kêt kumrêx. Te mē hamak kre hkêt pyrã nē ixkapêr mar kêt nē.” Anhÿr o hamaxpêr.

¹¹ Hãmri nē mē kãm: “E mē inhã. ã mē ate amnhĩ nhĩpêx anhÿrja mÿrapê kot kaj mē ma ixte mē amã pika mex nhõr mã xwÿnhãta wÿr apa hkêt nē.” Anhÿr o mē kãm kapêr. Anē.

ã mēhōja Tĩrtũm Karõ nhÿ hã te Tĩrtũm tãm kot mē kãm kapêr pyrãk o mē harēnh anē.

¹² Jakamã kwa mē okora ixkrãmnhwÿjaja. Kêr ka mē amnhĩ to mex o apa. Tĩrtũm kêp Mēpahpãm ã pixi mex tã kot kaj mē tanhmã ajamaxpêr punuj to rÿ amnhĩ kaxyw hkôt ajamaxpêr kêt hãmri nē te ate amnhĩ katut kôt ãm pyrãk o hipêx nē hkaga. Kwa mē ã amnhĩ nhĩpêx anhÿr kêt nē.

¹³ Kêt mē Kris kôt axpên to axihtÿx o ri apa. Nē apkati mē ã axpên nhĩpêx anhÿr rãhã nē. Kot kaj mē anhÿr kêt hãmri nē mē amã Tĩrtũm kapêr mar prãm kêt ã amnhĩ to amnhĩrīt. Jao tanhmã amnhĩ tomnuj to ho ri apa nē atÿx ajamaxpêr o: —Nà ixte ã amnhĩ tomnuj anhÿr tã nhũm Tĩrtũm ja hã ixpumu nē ãm hã ixpumu.

Anhÿr o ajamaxpêr japêr. Rÿ mē ajamaxpêr o:

—Nà na pa hte ã amnhĩ tomnuj anē nhũm Tĩrtũm ja hã ixpumu nhũm ja kãm mex nē.

Anhÿr o ajamaxpêr japêr.

¹⁴ Kwa mē ri ã ajamaxpêr anhÿr kêt nē. Amnepê mã mē pahte Kris kôt amnhĩ xunhwÿr nhũm kot mē pahto hkrata ã na pu prem amnhĩ kaxyw hkôt pajamaxpêr o papa. Tã kêr pu mē arĩ ã amnhĩ nhĩpêx anhÿr tÿx o papa rãhã ty.

¹⁵ Tĩrtũm kapêr ã kagã htũm kot ja jarēnh kot:

E kêr ka mē Tĩrtũm kapêr ma nē mar tÿx nē. No ama nē ãm mar nē ri hã apa hkêt nē.

Rÿ mē kot hkaga xwÿnhjê pyrã nē kêp akrã hihtÿx kêt nē. Anē.

¹⁶ Mē panhĩgêtjaja na prem Mojes kôt pika pē Ejit rũm kato nē hkĩnh nē ma kapôt ã kormã pika mex wÿr pa. Nom Tĩrtũm kapêr mar nē hkôt amnhĩ nhĩpêx rãhã hkêt nē. Na prem kuma nē hkôt amnhĩ nhĩpêx o hã apkati grêre htã ra mēmoj nhÿ hã omnuj nē pa hã amnhĩ pumu nē tee ri amnhĩ kukamã hamaxpêr.

¹⁷ Jao xatã kapêr nhĩrôp kuhê nē amnhĩ hkrã hkôt pix mã amnhĩ nhĩpêx o pa ho ra hã amgrã pē 40. Hãmri nhũm tee ri amnhĩ tã mē omu nhũm ja kêp omnuj nē. Jakamã nhũm mē piitã kapôt ã ri pa nē gaa nē pikaprãr pa.

¹⁸ Mē kot kapêr mar kêt jakamã nhũm mē kãm:

—Nà ã mẽ ate amnhĩ nhĩpêx anhÿr o ri apaja mÿrapê kot kaj mẽ ixte mẽ amã mẽ amex nhõr mã xwÿnhhta wÿr apa hkêt nê. Anê.

¹⁹ Tã mẽ kot amnhĩ kaxyw Tĩrtũm kõt hamaxpêr o pa hkêt jakamã na prem pika mexta wÿr hpõx kêt rãhã pikaprãr pa. Nhũm mẽ hkra nê mẽ htãmnhwÿjê pixjaja na prem mẽ mÿr pê hwÿr pøj nê kamã pa.

4

Mẽ pahte Tĩrtũm kukwak ri pajamakêtkati nê ri papa hã mẽ pajarênh

¹ Mẽ pahte Tĩrtũm kukwak ri pajamakêtkati nê ri papa ho papaja Tĩrtũm kãm hprãm jakamã kwa kêr pu mẽ amnhĩ pumunh mex o papa. Nê wam mẽ panhĩgêt rom Tĩrtũm kapêr mar tÿx nê hkõt mãn kêt ri amnhĩ nhĩpêx mex rãhã nê. Kêr pu mẽ kurom mẽ pajamak kãm amnhĩ krit xà hã pika mexta wÿr pøj.

² Mẽ kot mẽ pahpyrà nê Tĩrtũm kapêr mar mex tã na htem amnhĩ kaxyw hkõt hamaxpêr kêt nê. Te mẽ kot mar kêt pyrãk.

³ ãm mẽ kot amnhĩ kaxyw Kris mã hamaxpêr xwÿnh pixjaja na htem kukwak ri hamakêtkati nê ri pa ho pa. Amnepê mã mẽmoj piitã hkêt ri na pre Tĩrtũm mẽmoj piitã ho kator pa hãmri nhũm apkati nhũm axte mẽmoj tã ãpênh kêt nê. ãm õ krĩ kamã arĩ hamakêtkati nê hkõkõt o hkrĩ. Tã mẽ pahte urãk nê pajamakêtkati nê papa ho papaja na kãm hprãm. No wam ri mẽ pa xwÿnhjaja mẽ kot amnhĩ tomnuj mÿrapê na pre Tĩrtũm mẽ kot urã nê hamakêtkati nê paja nê mẽ hkurê. Kapêr ã kagã htũm kot harênh kot:

Na pre Tĩrtũm tee ri amnhĩ tã mẽ kot hipêx ã mẽ omu nhũm ja kêp omnuj nê. Hãmri nhũm mẽ kãm: “Nà kot kaj mẽ ixkukwak ri axãmnhĩx ajamakêtkati nê apa hkêt nê.” Anê.

⁴ Nê kot harênh kot:

Na pre Tĩrtũm ãpênh ã arĩgro kêp 6 hãmri nhũm arĩgro pê 7ta ã nhũm axte mẽmoj tã ãpênh kêt nê. Na pre arĩ hkõkõt o nhÿ.

Arĩgro pê 7 ã arĩ hamakêtkati nê hkõkõt o nhÿ. Anê.

⁵ Nê mẽ kot kapêr mar nê ãm mar xwÿnhjê jarênh kot:

Kot kaj mẽ aa ixkukwak ri axãmnhĩx nê ajamakêtkati nê apa hkêt nê. Anê.

⁶ Mẽ panhĩgêjtaja kot amnhĩ kaxyw Tĩrtũm kõt hamaxpêr kêt jakamã na prem hamakêtkati nê ri pa hkêt nê. Tã mẽ papajaja na Tĩrtũm arĩ kãm mẽ paxãmnhĩx nê pajamakêtkati nê papa hprãm.

⁷ Amnepêm Ijaew Tĩrtũm kõt hamaxpêr kêt jakamã na prem kapõt ã pikaprãr pa. Hãmri nhũm amgrã xohtõ nê hapêx nhũm Tĩrtũm mẽ hkanrêhã mẽ htãmnhwÿjê hõ pê finat Tawija mã kapêr nhũm kuma nê mẽ pamã tanhmã kapêr tota ã kagã nê hã kagã kot:

Kwa kêr ka ixkapêr ma nê mar tÿx nê.

No mẽ anhĩgêjtê pyrã nê akrã hihtÿx ho inhma nê ãm inhmar kêt nê. Anê.

Na pa pre ra mẽ amã ã ja jarênh anê.

⁸ Na pre finat Jojueja finat Mojes mÿr pê ma pika pê Kanaã hwÿr mẽ hkanrêhã mẽ hkrajê o pa nê hwÿr mẽ o pøj. Tã nhũm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhĩ nhĩpêx anhÿr ronhÿx Tĩrtũm axte mẽ kãm mẽ hamakêtkati nê mẽ hamak kãm amnhĩ krit nê mẽ pata hkukamã harênh kêt nê.

⁹ Nom mẽ pahte kukwak ri pajamakêtkati nê pajamak kãm amnhĩ krit nê ri papa ho papaja na Tĩrtũm arĩ kãm hprãm.

¹⁰ Na pre arĩgro pê 6ja ã mẽmoj piitã ho kator pa nhũm apkati nhũm hamakêtkati nê hkõkõt o nhÿ. Tã kot puj mẽ pahpê hkrajaja amnhĩ to kuwÿ nhũm tanhmã mẽ pahkrã hto pu mẽ kukwak ri urãk nê paxãmnhĩx nê pajamakêtkati nê papa ho papa. Te Tĩrtũm ãpênh pa nhũm apkati nhũm hamakêtkati nê hkõkõt o ÿrta pyrãk.

¹¹ Jakamã kwa kêr pu mẽ amnhĩ to kuwÿ kê ã mẽ panhĩpêx anê pu mẽ urãk nê ã amnhĩ nhĩpêx anhÿr rãhã ho papa. Nom kot pu mẽ pahkwÿ Ijaewjê pyrã nê kapêr kwÿm amnhĩ nhĩpêx o papa hãmri nê mẽ urã nê paxãmnhĩx pajamakêtkati nê papa hkêt nê.

Tĩrtũm kapêr te kot wapo xwa gix pyrãk ã harênh

¹² Nê Tĩrtũm kapêrja te ã ho tanhmã kot mẽmoj to kaxyw hihtÿx pyrãk. Nê te wapo xwa gix pyrãk. Koja mẽhõ õ wapo xwa mex nê ho mẽmoj jakàr mex nê. Ho mry hi jakàr mex pê kaxwÿnh kãm hi kanhĩn o

amnhîrît. Ja pyrâ nê na hte Tîrtûm kapêr mē pajamaxpêr o amnhîrît nê mex ã harê rÿ omnuj ã harê.

¹³ Nê na htem Tîrtûm pē mēmoj to pimxur kêt nê. Na hte hprî hã mēmoj piitã omunh pa. Nê mē pajamaxpêr kôt mē pahpumunh pa. Na pu htem ã kot mēmoj piitã omunh par anhÿr xwÿnhja noo mã tanhmã amnhî nhîpêx to rãhã ho papa.

Jejus kêp mē panhõ patre maati hã harênh

Eprêw 10.19-25; Wam Juãw 2.1-2

¹⁴ Nê Ijaew nhõ patrejaja na pre htem Tîrtûm mã amnhî jarênh xà hã ixkre hwÿr agjê nê kamã mē ho Tîrtûm wÿr o pa. Ja pyrâ nê na pre ra Jesus Tîrtûm nhõ krî hwÿr api nê kamã mē pahto hwÿr o hkrî. Kêp Kra kumrêx jakamã kêp mē pahto Tîrtûm wÿr xwÿnh maati. Jakamã kwa kêr pu mē amnhî kaxyw hkôt pajamaxpêr tÿx rãhã ho papa.

¹⁵ Satanasti na pre te kot mē panhîpêx pyrâk o Jesus nhîpêx. Nê tee ri kot tanhmã kãm kapêr to nhûm kot mar nê tanhmã amnhî tomnuj to hprãm xaj ãm ri kãm ahkrox kaprÿ nhûm kutã amnhî to htÿx nê hkôt amnhî nhîpêx kêt nê. Tã kot Satanasti kot amnhî nhîpêx ã omunh mex jakamã na hte kêp mē pahtãnopxar mex o pa. Kot mē paxirerek kôt mē pahpumunh mex.

¹⁶ Jakamã kwa kêr pu mē amnhî tã kamã pahpijaam kêt kãm paxãmnhîx ri amnhî to hwÿr o papa. Kêp mē pakutã nojarêt xwÿnh nê kêp mē pakamã ukaprî xwÿnh jakamã kêr pu mē tee ri mēmoj tã amnhî pumu nê amnhî to hwÿr kurê kumrêx. Hãmri nê ÿ hã paxãmnhîx nê pajamakêtkati nê ri papa.

5

¹ Nê mē panhõ patre maati Jesusja Tîrtûm na pre mē pakaxyw ãm. Kêp mē pahkwÿ hã mē pakaxyw ãm nhûm hte mē pahto Tîrtûm wÿr o pa. Nê kãm mē pahkînh xà nhõr o pa. Kot ja hã mē pahpumunh nê mē pahte kapêr kwÿm tanhmã amnhî nhîpêx to ho papa hã mē pakamã gryk o hapêx tokyx anhÿr kaxyw.

² Mē panhîgêttjaja na pre htem mē õ patre maati hwÿr mra nê kãm tanhmã amnhî

tomnuj to hã amnhî jarê nhûm mē kuma nê mē kamã ukaprî nê. Mē urã nê kormã kot Tîrtûm kôt amnhî nhîpêx totuj anhÿr jakamã na pre mē kot tanhmã amnhî jarênh toja ma nê mē kamã ukaprî nê.

³ Hãmri nê mē hpãnhã Tîrtûm mã mēmoj gõ nê mãânên amnhî pãnhã kãm mēmoj gõ. Mē urãk nê kot amnhî tomnuj o paja mÿrapê amnhî pãnhã kãm mēmoj gõ.

⁴ No na pre hte patrejaja amnhî krã hkôt kêp patre maati kaxyw amnhî xunhwÿr kêt nê. Tîrtûm kot mē kaxyw mē unhwÿr jakamã na pre mē kaxyw finat Arãwja xãm nhûm kêp mē õ patre maati hã mē ho Tîrtûm wÿr o pa.

⁵ Nê Kris haxwÿja kêp mē panhõ pahi maati hã tãm kot amnhî xãm kêt. Tîrtûm na pre mē pakaxyw ãm nê tanhmã kãm kapêr to nê kãm:

Nà apê Ixkra na ka.

Kot paj jarãhã ixpê Anhîpêêxã hã mē kãm amnhî jarê. Anê.

⁶ Nê hpãnhã kãm:

Kot kaj Mekijetek pyrã nê apê patre maati hã mē ho ixwÿr rãhã ho ri apa. Anê.

⁷ Jesus kormã pika ja kamã pa ri na pre amnhî to Tîrtûm wÿr rãhã ho pa. Tôhã hkaprî nê tee ri mēmoj tã amnhî pumu nê amnhî to kuwÿ. Nê tee ri mē kot hpîrta kukamã hamaxpêr nê mÿr kãm amnhî to kuwÿ. Kop apu Tîrtûm kãm mē kot kêp hpîr prãm kêt ronhÿx pre tanhmã nê mē kãm hkurê xwÿnhjê ho nhûm mē hpîr kêt nê. Jakamã nhûm pre ã amnhî to hwÿr anê. No ãm Tîrtûm kãm prãm xà hkôt kãm amnhî nhîpêx prãm jakamã nhûm kuma no ãm tanhmã nê mē ho hkôt nhûm prem kupî.

⁸ Kêp Tîrtûm Kra kumrêx tã amnhî xà htÿx kãm hamak kãm ty. Jao Tîrtûm kãm hprãm xà hkôt amnhî nhîpêx ã amnhî pumunh mex nê.

⁹ Na pre amnhî xà htÿx kãm hamak o amnhî mex o amnhî mex ã mē kãm amnhî to amnhîrît. Jakamã na hte mē kot kapêr kôt ri amnhî nhîpêx o mē pa xwÿnhjê mã mē kot amnhî nhîpêx nyw jagjê nê nhÿrmã Tîrtûm mē wa kuri mē htîr tûm nê mē pa mã xwÿnhjê hã mē harê.

¹⁰ Jakamã na pre Tîrtûm Mekijetek pyrã nê kêp patre maati kaxyw ãm.

*Mê pahte Kris kaga nê mê pahkurê
Wam Korî 3.1-2, 13.11, 14.20; Epes 4.11-*

16

11 Nê Jejus kêp mê pahto Tîrtûm wÿr xwÿnh maati hã harênhja inhmã ixprî hã mê amã harênh par prãm tâ ka mê kormã inhmar tÿx kêt nê. Pa tee ri ixprî hã mê amã harênh kaprÿ. Te mê amã mar prãm kêt o amôr pyrâk.

12 Amnepê mã mê ate Kris kôt amnhî xunhwÿr nê kapêr mar tÿx tâ kormã nhãm amnhî xô ri ho amnhî kwÿjê jahkre ho ri apa hkêt nê. Te mê ate hã ano hkêt pyrâk jakamã na pa hte arî mê amã kapêr kot amnhîrît mex xwÿnh kwÿ ho mê ajahkre ho pa. No kot amnhîrît mex kêt xwÿnh o mê ajahkre hkêt nê. Te mê hkaràre kot amnhî nhîpêx pyrâk o na ka htem amnhî nhîpêx o apa. Na hte mê hkaràre mēō mex kur kêt nê. ãm kormã katorxà hkà pix kaô. Ja pyrã nê ãm Tîrtûm kapêr kot amnhîrît mex xwÿnhhta pix na ka mê mar tÿx o apa nom kapêr kot amnhîrît mex kêt xwÿnhja ka mê mar mex kêt nê.

13 Nê mê hkaràre kormã Tîrtûm kapêr mar kêt jakamã na htem kormã mēmoj mex nê mēmoj punuj pumunh kêt nê. Tã te mê ate mê kot amnhî nhîpêx pyrâk.

14 Mê kot Tîrtûm kapêr mar mex xwÿnhjaja na htem hprî hã kapêr piitã mar tÿx nê. Kot amnhîrît mex xwÿnhhta mar tÿx nê mãânên kot amnhîrît mex kêt xwÿnhja nhũm mēhprî hã piitã mar tÿx nê. Te ho mê àptâr kot mēō mex kur o pata pyrâk. Jao ra mê àptâr jamaxpêr o hamaxpêr o ri pa nê hamaxpêr o:

—Kot paj tãm amnhî nhîpêx o ri ixpa nhũm ja inhmã mex nê. Nom kot paj axtem tanhmã amnhî tomnuj to nhũm ja ixpê omnuj nê. Jakamã kot paj tãm amnhî nhîpêx pix o ri ixpa nhũm Tîrtûm mã ja mex nê. Anê.

6

1-2 Na pu prem ra Tîrtûm kapêr kot amnhîrît mex xwÿnhhta kwÿ ma. Tãm na ja: Kris kot mê panê tanhmã amnhî nhîpêx to hã harênhja. Nê mê pahte amnhî tomnuj kaga hã kot mê pamã karôja.

Nê amnhî kaxyw Tîrtûm kôt mê paja-maxpêr ã mê pamã karôja.

Nê mê pahpê Tîrtûm kra hã amnhî to amnhîrît kaxyw mê kot mê pahkrã kumrãr ã pamã karôja.

Nê mê pahte Tîrtûm mã tanhmã amnhî nhîpêx to ho papa hkukamã mê kot mê pahkrã hã ìhkra jaxwÿr nê mê pahto Tîrtûm wÿr ã mê pamã karôja.

Nê mê pahtyk nê akupÿm mê pahtîr ã mê pajarênhja.

Nê Tîrtûm kot nhÿrmã mê kot amnhî xà htÿx kãm hamak tũm xà hwÿr mê kêp hkra hkêt xwÿnhjê janorja.

Mēmojja piitã pu mê ra harênh mar tÿx nê. Prî hã kot amnhîrît mex. Tã kwa kêr pu mê hpãnhã hijuk ri kot amnhîrît mex kêt xwÿnh kwÿ ma. Jao mê pahpê Tîrtûm kra xàptâr mex nê ri papa.

3 Jakamã kwa kêr pu mê kot amnhîrît mex xwÿnh kumrêx kwÿ ma nê hpãnhã hijuk ri kot amnhîrît mex kêt xwÿnh kwÿ ma. Nê axpên mã harênh rãhã ho ri papa. Nã koja Tîrtûm kãm ja prãm pu mê ã amnhî nhîpêx anhÿr rãhã o ri papa.

4-6 Na pre ra mê pahkwÿjaja Kris kaga nê htÿx ri amnhî nhîpêx o pa. Mê kot kapêr mar tÿx tâ axtem nê hkaga jakamã koja mê axte kapêr mar kêt nê. Ra mê kãm mar prãm kêt. Kot puj mê tee ri axte mê kãm harênh o papa kaprÿ. Na prem hprî hã kuma. Tîrtûm kãm mê ho hkra hprãm ã harênhja nhũm prem hprî hã kuma nê kãm mar prãm nê hkôt amnhî xunhwÿ. Hãmri nhũm Tîrtûm Karô te mê panhîpêx pyrã nê mê hkarô mã agjê nê mê kot amnhî to mex o pa kaxyw tanhmã mê hkrã hto nhũm prem ÿ hã tanhmã kãm amnhî nhîpêx to ho pa. Nê kãm Tîrtûm kapêr mar prãm nê. Nê axpên mã mex o mex ã harênh o pa. Nê aa mê kot mēmoj pumunh kêt kwÿ pumu nê axpên mã harênh o:

—Nã Krisja ãm hãmri àhpumunh tÿx o àhpumunh tÿx. Kojã nhÿrmã akupÿn mê pahwÿr wrÿ nê axte mê pamã àhpumunh tÿx o amnhîrît pu mê omu.

Anhÿr o kapêr tâ tanhmã hamaxpêr to nê hkaga. Jakamã te mê kot axte Tîrtûm pê Krata pî hã nhôr nê hpîr pyrâk. Nê te mê piitã mê noo mã tanhmã haprÿ hto nê

tanhmã kãm kapër punuj to pyræk. Jakamã kot pu mẽ tee ri akupÿm tãm mẽ unhwÿr prãm kaprÿ.

⁷ Na hte Tirtũm mẽ pahto mex rãhã ho pa. Jao mẽ pamã mẽ pahpur ã na rë pu mẽ kamã panhõ rũnh nẽ. Jakamã mẽ kot amnhĩ kaxyw Kris kôt hamaxpër nẽ hkôt amnhĩ xunhwÿr prãm xwÿnhjaja te mẽ hpur mex nẽ kamã mẽmoj ô rũnh pyræk. Nẽ uræk nẽ amnhĩ to mex o pa.

⁸ Nom koja mẽ hpur kãm mẽmoj nhĩgrõt mex kêt japër. Kamã mrõnhĩ nẽ kahpare nẽ mẽmoj punuj pix hapôj nhũm mẽ tee ri omu nẽ hkaga kurê kumrêx. Tã mẽ kot Kris kaga xwÿnhjaja te pur punuj kot amnhĩ nhĩpêxta pyræk nhũm Tirtũm te kêp pur nhõ dõn pyræk. Jao tee ri amnhĩ tã mẽ kot amnhĩ nhĩpêx ã mẽ omu nẽ mẽ hkaga kurê kumrêx nẽ ma mẽ kot amnhĩ xà htÿx kãm hamak tũm xà pê kuwyta wÿr mẽ rênh pa.

⁹ E ixkrãmnhwÿjaja. Inhmã mẽ akĩnh jakamã na pa ã mẽ amã mẽ kot Kris kaga xwÿnhjê jarênh anẽ. Nom te mẽ ate mẽ uræk kêt. Kris kôt mẽ ate amnhĩ xunhwÿr xwÿnh mex na ka mẽ. Ra mẽ ate hkôt amnhĩ xunhwÿr tÿx jakamã te mẽ apê pur mexta pyræk.

¹⁰ Na ka htem Kris kôt mẽ akwÿjê ho mex o ri apa. Te mẽ amã amnhĩ tã ma pyræk o axpên nhĩpêx o ri apa nhũm Tirtũm ja hã mẽ apumu. Tã koja tanhmã ja hã mẽ ato mex to. Kot tãm mẽ panhĩpêx o pa jakamã koja tanhmã mẽ ate axpên nhĩpêx mex tota ã tanhmã mẽ ato mex to.

¹¹ Tã kêr ka mẽ arĩ ã axpên nhĩpêx anhÿr o ri apa rãhã ty kê nhÿrmã ja hã mẽ ato mex nẽ. ã mẽ ate amnhĩ nhĩpêx anhÿr o apaja na inhmã hprãm tÿx kumrêx.

¹² Kot kaj mẽ ã amnhĩ nhĩpêx anẽ hãmri nẽ amã kaga nẽ apa hkêt nẽ. Nẽ amnhĩ nhĩpêx o te Tirtũm kra hkwÿ htyk xwÿnhjaja kormã htĩr ri kot amnhĩ nhĩpêxta pyræk. Na prem amnhĩ kaxyw Tirtũm mã hamaxpër tÿx rãhã ho pa. Kot mẽ ho mex ã mẽ hã amnhĩ jarênhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tirtũm ra kot mẽ hã amnhĩ jarênh xà hkôt mẽ ho mex nẽ. Tã kêr ka mẽ uræk nẽ ã amnhĩ nhĩpêx anhÿr o ri apa rãhã ty.

¹³⁻¹⁵ ã na pre finat Apraãwja amnhĩ nhĩpêx anẽ. Kormã hkra hkêt tã nhũm Tirtũm kãm hkra nẽ kanrêhã htãmnhwÿjê hkukamã tanhmã mẽ harênh to nẽ kãm:

—Pa Apraãw. E inhma. Kot paj aprõ mẽ war ato mex nẽ. Kot kaj war akra hãmri nẽ gaa nhũm akanrêhã war atãmnhwÿjaja ohtô rax kumrêx. ãm hãmri na pa ã mẽ hkukamã amã mẽ harênh anẽ. Kot paj amã amnhĩ jarênh xà hkôt ã anhĩpêx anẽ. Ixpê mẽ anhĩpêx xwÿnh na pa ã amã amnhĩ jarênh anẽ. Anẽ.

Tã ã kãm wa hkra jarênh anhÿr tã nhũm wa tokyx hkra hkêt nẽ. Nom tee ri ja hã amnhĩ pumu nẽ Tirtũm kot wa kãm hêx ã hkamnhĩx kêt nẽ. ãm hkamnàr rom ã hamaxpër anẽ nẽ hamaxpër o:

—Nà kot paj wa nhÿrmã ixkra. Tirtũm tãm kot wa inhmã wa ixkra jarênh kênã. Anẽ.

Tã nhũm amgrà xohtô rax kumrêx nẽ hapêx nhũm wa hkra. Nhũm axte amgrà hkwÿ hapêx nhũm wa hkanrêhã htãmnhwÿ hkwÿ. Ra Tirtũm kot mẽ hkukamã Apraãw mã mẽ harênh xà hkôt. Tirtũmja hihtÿx o hihtÿx nẽ àhpumunh o àhpumunh jakamã na pre amnhĩ jarênh xà hkôt ã wa kãm wa hkra nẽ wa htãmnhwÿjê nhõr anẽ. Kot ra wa kãm hã amnhĩ jarênh xà hkôt. No ri nhãm mēhõ nhĩxi jarênh kôt wa kãm wa hkra jarênh kêt nẽ. Mēhõ kot we hihtÿx o hihtÿx o Tirtũm jakre nhũm we ri hixi jarênh kôt ã wa kãm mẽ harênh anẽ? Amrakati kumrêx. Jakamã na pre wa kãm amnhĩ jarênh o:

—Nà ixàhpumunh xà hkôt na pa ã war amã war akra jarênh anẽ. Anẽ.

¹⁶ No pika ja kamã na htem ã amnhĩ jarênh anhÿr kêt nẽ. Na htem mēhõ mã tanhmã mẽmoj tã amnhĩ jarênh to kaxyw nẽ mēhõ hihtÿx o kot hakrenh xwÿnh nhĩxi jarênh kôt amnhĩ jarê. Nẽ amnhĩ jarênh o:

—Nà ixte jahti noo mã ã amã amnhĩ jarênh anhÿr jakamã ãm hãmri na pa ã amnhĩ jarênh anẽ. Anẽ.

Kot hã amnhĩ to hêx nhũm hihtÿx o kot hakrenh xwÿnhhta kot hã harênh mar nẽ hã tanhmã homnuj to pymaj na htem ã mẽ hixi jarênh kôt mẽmoj tã amnhĩ jarênh anẽ. Hãmri nẽ kot tanhmã hã ho pymaj ra kot amnhĩ jarênh xà hkôt tanhmã mẽmoj nhĩpêx to.

¹⁷ Nom Tirtûm na hte urak nê nhâm mēhō nhīxi jarēnh kôt ri mēmoj tā amnhī jarēnh kêt nê. Na hte tām amnhī jarēnh xà hkôt mēmoj to anê nê aa hā amnhī to hēx kêt nê. Na pre mē pahpê hkrajê mā kām:

—Kot paj nhÿrmā mē ato mex rax nê. Ām hāmri na pa mē amā amnhī jarē. Ixte amnhī pumunh xà hkôt na pa ā mē amā amnhī jarēnh anê. Anê.

Mē pahte ām hāmri kot amnhī jarēnhja mar nê amnhī to hēx kêt ā omunh kurē kumrēx kaxyw. Koja Tirtûm mēmoj tā ā amnhī jarēnh anê hāmri nê hijuk ri axtem hpānhā tanhmā amnhī jarēnh to hkêt nê.

¹⁸ Jakamā koja nhÿrmā ma amnhī wÿr mē pahto àpir ā amnhī jarē hāmri nê ām hāmri amnhī jarē nê amnhī jarēnh o:

—Nà ām hāmri ixte amnhī pumunh xà hkôt na pa mē amā ja hā amnhī jarē. Anê.

Koja ā amnhī jarēnh anê hāmri nê hijuk ri axte hpānhā tanhmā mēmoj jarēnh to hkêt nê. Ra kot ā amnhī jarēnh anhÿrja koja arī rāhā nê. Jakamā e kwa kêr ka mē tee ri amnhī kukamā ajamxpêr o ri apa hkêt nê. Ra mē pamex nê ri papa kaxyw Tirtûm kôt amnhī xunhwÿr jakamā kêr pu mē arī kot mē pahto mex rax xà hā arīgrota jamār rāhā ho ri papa.

¹⁹ Na hte kanôre ho htÿx xàja kanôre ho htÿx nhūm ma gō hkôt pa hkêt nê. Ja pyrā nê kot puj mē Tirtûm kot mē pahto mex xà kamā pajamak o papa hāmri nê hkaga hkêt nê.

Amnepê mā na pre hte mē panhō patre maatija Tirtûm mā amnhī jarēnh xà hā ixkre hwÿr agjê nê hkôt ā kupêxê ho hitom maati hwÿr agjê nê kamā mē ho Tirtûm wÿr o kuhê. Tā nhūm Jesus akupÿm kaxkwa hwÿr api nê Tirtûm ri hkrī hāmri nê patre maatita pānhā tām mē pahto hwÿr o hkrī.

²⁰ Na pre ra mē pakukamā kaxkwa hwÿr api nê kamā pa ho pa nê finat Mekijetekja pyrā nê kêp mē panhō patre maati. Tā koja mē pahto Tirtûm wÿr rāhā nê pa ho pa.

7

Patre Mekijetek jarēnh

¹⁻³ E kot paj ixprī hā mē amā tanhmā finat Mekijetekja jarēnh to ka mē inhma. Krī pê Sarē kamā na pre kêp mē ō pahi nê

māānēn kêp mēō patre. Sarēja mē pakapêr kām kêp: “Mē hamakêtkati nê ri mē pa xwÿnhjê nhō krī.” Jakamā Mekijetekja mē pakapêr kām kêp: “Mē hamakêtkati nê ri mē pa xwÿnhjê nhō pahi.” Nê māānēn kêp: “Pahi kot tām amnhī nhÿpêx o pa xwÿnh.” Nê Mekijetek nhÿpêêxà nê katorxà nê higêt nhÿxija mē pahte harēnh mar kêt. Nê kator ā arīgro nê htyk ā arīgroja māānēn mē pahte harēnh mar kêt. Tirtûm kapêr ā kagā htūm kot tanhmā ja jarēnh to hkêt. Ām Jejus pyrā nê kêp patre hā mē ho Tirtûm wÿr rāhā ho pa xwÿnh pix ā kot harēnh. Ām ja pix na mē pahte harēnh mar. Nê kot amnhī to rax xwÿnh jakamā na pre Apraāw nhÿri omu nê hā hpijaām kaxyw kām hikukrêx kwÿ gō. Na pre hkwÿjê mē ra mē urojê kutā amnhī xunhwÿ nê pijapu nê mē kêp mē ō pahi ho 4 nê mē himex. Nê mē kêp mē hikukrêx kwÿptā nê hamÿ nê ma ō krī hwÿr o mō. Nê kormā pry hā mōr ri Mekijetek kaxpa nhūm amnhī wÿr omu nê kām:

—Pa Apraāw? E kê Tirtûm ato mex nê ka amex nê apa. Anê.

Nhūm amnhī tā kuma nê hkÿnh nê. Hāmri nê kām mē hikukrêx kwÿptār xwÿnhhta hkwÿ gō nhūm hamÿ nê ma amnhīm o mō.

⁴ Na pre Apraāw kot amnhī to rax ā omu nê kām mēmojta kwÿ gō. Kêp mē pahpê Ijaew pâr krax jakamā māānēn kot amnhī to rax tā Mekijetekja urak nê kot amnhī to rax ā omu nê kām mēmota kwÿ gō.

⁵ Finat Mojes kot Ijaew mā Tirtûm kapêr jarēnh xà hkôt kām kugō. Na pre mē kām:

—Mē akwÿ pê finat Rewi hkanrêhā htāmnhwÿjaja kêp mē anhō patre jakamā kêr ka mē kām mē akukrêx kwÿ nhōr o ri apa. Kot kaj mē akrit kêp 10 nê kām ho pixi nê agō. Nê mē akàxpore kêp 10 nê kām hō gō. Kêr ka mē ā mē kām mē akukrêx nê mē akrit kwÿ nhōr o apa anê. Nê kêr ka mē kām mēmoj mex pix gō. Mē kêp mē akwÿ na mē. Mē apiitā mē apê Apraāw kanrêhā htāmnhwÿ jakamā kêr ka mē ā mē hipêx anhÿr o apa. Anê.

⁶ Tā Mekijetekja kêp Rewi hkwÿ hkêt tā nhūm Apraāw amarī ā hipêx anê nê kām pahi htyk xwÿnhjê kukrêxta kwÿ gō. Jao hikukrêxta kamā mēmoj kêp 10 nhūm omu nê kamā kām ho hpÿnh nê kugō. Na pre ā

kãm mëmoj nhõr anê. Hãmri nhũm amnhĩm hamỳ nê kãm:

—Nà ãm hãmri koja Tĩrtũm ato mex rax nê. Anê.

Ra Tĩrtũm kot Apraãw kanrêhã kãm htãmnhwỳ ho ohtô nê mẽ hkukamã mẽ harênh jakamã nhũm Mekijetekja ã kãm Tĩrtũm kot ho mex ã harênh anê.

⁷ Mẽ kot amnhĩ to rũnh o mẽ hakrenh xwỳnh pixjaja Tĩrtũm kot mẽ ho mex kaxyw mẽ ho àhwỳr o pa jakamã na pre Apraãw o Tĩrtũm wỳ. Jao kot amnhĩ to rax o kot hakrenh ã amnhĩ to amnhĩrĩt.

⁸ Hãmri nê Rewi hkanrêhã htãmnhwỳ kot amnhĩ nhĩpêx pyrã nê Apraãw o Tĩrtũm wỳ nê kêp mẽmojta jamỳ. Mẽ uràk nê mẽmoj kamã kêp 10ja rũm ho hpỳnh nê amnhĩm hamỳ. Nom kot amnhĩ to rax o Rewi hkanrêhã htãmnhwỳjê jakrenh. Tĩrtũm kapêr ã kagà htũm kot Rewi hkanrêhã htãmnhwỳjê htyk par ã mẽ harênh tã tanhmã Mekijetek htyk ã harênh to hkêt jakamã kot amnhĩ to rax o kot Rewi hkwyjê jakrenh.

⁹⁻¹⁰ Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htãmnhwỳ mã xwỳnh. Jakamã nhũm Apraãwja Mekijetek mã mẽ hikukrêxta kwỳ nhõr jao te Rewi mã õr pyrãk. Tã nhũm amgrà xohtô nê hapêx nhũm Rewi hkanrêhã htãmnhwỳjaja hapôj nê kêp mẽ õ patre nê ri pa. Jao Mekijetek pyrã nê mẽ kêp mẽ hikukrêx kwỳ jamỳnh o ri pa.

¹¹ Nê finat Mojes na pre Ijaewjê mã tanhmã Rewi hkanrêhã htãmnhwỳjê jarênh to. Kormã mẽ hapôx kêt ri nhũm hkwyjê mã tanhmã mẽ harênh to. Mẽ kêp patre hã mẽ harê. Tã nhũm mẽ hapôj nê hprêk nê mẽ ho Tĩrtũm wỳr o ri mẽ hkôt pa. Nom mẽ kot tãm amnhĩ nhĩpêx o pa kaxyw na prem tanhmã mẽ hkrã hto hkêt nê. Tanhmã kot mẽ amnhĩ to nê ã mẽ hipêx anê? Jakamã nhũm Tĩrtũm mẽ hpãnhã mẽ pahwỳr kỳj rũm mēhõja mẽ nhũm mẽ pahwỳr wrỳ. Nom kêp Rewi hkanrêhã htãmnhwỳ hkêt. Nê mããnen kêp Rewi hpãm Arãw kanrêhã htãmnhwỳ hkêt. Axtem te Mekijetek kot amnhĩ nhĩpêx pyrãk xwỳnh na pre. Jejus Krisja. Tãm na pre mẽ pahwỳr wrỳ hãmri

nê tanhmã mẽ pahkrã hto pu mẽ ý hã tãm amnhĩ nhĩpêx o papa.

¹² No Mojes kapêr kot Rewi hkanrêhã htãmnhwỳ pixjaja kêp mẽ ho Tĩrtũm wỳr xwỳnh ã mẽ harênh. Tã nhũm Krisja mẽ pahwỳr wrỳ nê mẽ hpãnhã kêp mẽ pahto àhwỳr o pa xwỳnh. Jakamã na pu htem axte Mojes kapêr kôt amnhĩ nhĩpêx kêt nê. Pãnhã Jejus kapêr kôt pix mã amnhĩ nhĩpêx o papa.

¹³⁻¹⁴ Nê Jejus kêp Rewi hkanrêhã htãmnhwỳ hkêt. Katorxã hkôt kêp Apraãw tãmnhwỳ Juta hkanrêhã htãmnhwỳ na pre. Ra mẽ pahte ja mar mex. Aa Juta hkanrêhã htãmnhwỳjaja kêp patre hkêt. Na pre Tĩrtũm jajê mã mẽ kot mẽmoj nhõr xã hã mēsti kunĩhtita ã kãm mẽmoj nhõr nê hkwyjê ho hwỳr ã mẽ kãm karõ hkêt nê. ãm Apraãw tãmnhwỳ Rewi hkanrêhã htãmnhwỳjê mã pix mã na pre ã mẽ kãm ja hã karõ anê. Tã nhũm Jejus wrỳ nê mẽ hpãnhã mẽ pahto hwỳr o pa. Mẽ uràk nê kêp Rewi hkanrêhã htãmnhwỳ hkêt axtem kêp Juta hkanrêhã htãmnhwỳ htã Rewi hkwyjê hpãnhã mẽ pahto Tĩrtũm wỳr o pa.

Mekijetek pyrã nê mẽ pahto Tĩrtũm wỳr xwỳnh jarênh

¹⁵⁻¹⁹ Nê Ijaewja na prem Mojes kapêr mar tỳx nê hkôt amnhĩ nhĩpêx tã aa amnhĩ to mex kêt nhũm Tĩrtũm tee ri ja hã mẽ omu nê hamaxpêr o:

—Nà Rewi hkanrêhã htãmnhwỳjaja kêp mẽ õ patre nê mẽ ho ixwỳr o pa htã nhũm mẽ arĩ htỳx ri amnhĩ tomnuj pix o pa. Jakamã koja mẽ axte ri mẽ ho ixwỳr o pa hkêt nê. Anê.

Hãmri nê mẽ pakaxyw mẽ pahto àhwỳr xwỳnhja ta nê ãm. Kra Jejusja nhũm kuta nê ãm. Tãm na hte Rewi hkwyjê rom tanhmã mẽ pahkrã hto pu mẽ kukwak ri tãm amnhĩ nhĩpêx nê Tĩrtũm kôt amnhĩ nhĩpêx mex nê. Jao nhỹrmã ma mẽ pahte Tĩrtũm nhõ krĩ hwỳr paxàpirja jamãr o papa.

Jejus na hte Mekijetek pyrã nê kêp mẽ panhõ patre maati nê mẽ pahto Tĩrtũm wỳr rãhã ho pa. Kêp Rewi hkanrêhã htãmnhwỳ hkêt tã Tĩrtũm pyrã nê kêp htĩr tũm nê pa ho pa xwỳnh jakamã na pre Tĩrtũmja mẽ pakaxyw kuta nê mẽ pahwỳr kumê. Kapêr ã kagà htũm kot harênh kot:

Kot kaj Mekijetek pyrâ nê mē ho ixwÿr rāhā ho ri apa. Anē.

20-21 No Rewi hkwÿjê mā na pre ā kapēr anhÿr kêt nê. Ām Jejus pix mā ā kapēr anē nê kām:

E kot kaj apê mē ho ixwÿr rāhā o apa xwÿnh. Kot paj nhÿrmā apānhā axtem mēhō xām kêt nê. Ām kapxipix kot kaj mē ho ixwÿr o apa rāhā ho rāhā. Ām hāmri na pa amā ā ixkapēr anē. Ixpê Pahi Maati hā ā ajarēnh anē.

22 Anhÿr jao Jejus kot amnhī to rax o Rewi hkwÿjê jakrenh par ā ho amnhīrīt. Mē kot Ijaew mā Tirtūm kapēr jarēnh nhūm mē kot mar nom hkôt amnhī nhīpêx kêt jakamā nhūm Tirtūm mē hpānhā Jejus xām. Tapxipix na hte tanhmā mē pahkrā hto pu mē tām amnhī nhīpêx mex o ri papa.

23 Rewi hkwÿjaja na prem axpēn mÿr pē kēp mēō patre nê ri pa htā htyk pa nê hapêx.

24 Nom Jejusja htīr tūm nê pa ho pa xwÿnh jakamā koja mē urāk nê aa hapêx kêt. Koja mē pahto Tirtūm wÿr rāhā ho pa nê aa jam urer kêt nê.

25 ā Jejus kot amnhī nhīpêx anhÿr jakamā te kēp Tirtūm wÿr mē panhō pry pyrāk. Na pu htem hkôt amnhī xunhwÿ nhūm mē panē mē pahte amnhī tomnuj piitā rēnh pa nê mē pahpê Tirtūm kra hā mē pajarē.

26 Nē ām hāmri kēp mē pahto Tirtūm wÿr xwÿnh maati mex na. Mē pakurom tām kot amnhī nhīpêx mex o pa nê aa kot tanhmā amnhī tomnuj to hkêt. Tā ra Tirtūm kot amnhī wÿr ho āpir jakamā nhūm ra kuri mē pahto hwÿr rāhā ho pa.

27 Nē kot amnhī to rax o wam mēō patre maati jê jakrenh. Wamtaja na prem hkwÿjê pyrâ nê amnhī tomnuj o pa. Jakamā na prem apkati mē amnhī tomnuj pānhā Tirtūm mā mēmoj gō nê kām amnhī jarē nê amnhī to kuwÿ. Hāmri nê rī kormā kot nhām mē hwÿr mē mrar xwÿnhjê mā mē ho anē nê mē hpānhā Tirtūm mā mēmoj nhōr pē mē ho kuwÿ. No kêt Jejusja wam patre maati rom aa kot amnhī tomnuj kêt jakamā na pre hte mē urāk nê amnhī tomnuj pānhā Tirtūm mā mēmoj nhōr o pa hkêt nê. Ām mē papajaja na pre mē pahte amnhī tomnuj pānhā htyk o kām

amnhīre. Ām htyk tipxi htā mē pahpiitā mē pahpānhā amnhīrer pa. Jakamā koja axte ā amnhī nhīpêx anhÿr kêt nê. Mo kaxyw kot kêt axte mē panē ty?

28 Mojes kapēr kôt na pre Ijaew amnhīm Rewi hkwÿjê xunhwÿ nhūm mē kēp mē ō patre nê ri pa. Tā no nhūm mē urāk nê arī amnhī tomnuj o pa nhūm Tirtūm tee ri mē omu nê mē hpānhā mē pakaxyw Krata xām nê kām:

—Nā kapxipix mē kurom ate tām amnhī nhīpêx o apa jakamā kapxipix kot kaj mē hpānhā mē ho ixwÿr o apa rāhā ho rāhā. Anē.

8

Jejus kēp mē pahto Tirtūm wÿr xwÿnh maati hā harēnh

Rukre 22.20; Sikūn Korīt 3.6-11

1 E kot paj axtem tanhmā mē amā mē pahto Tirtūm wÿr xwÿnh maati jarēnh to ka mē inhma. Na hte kaxkwa kamā Tirtūm nhīhkô hā hkrī. ĩhkô hā kēp Pahi Maati hā hkrī xā hā upôk rūm hkrī ho hkrī.

2 Wam patre maati jaja na prem Tirtūm nhōrkwÿ kaàkre wÿr mra nê kamā hitom maati kamā mē ho Tirtūm wÿr o pa. Nom nhūm Jejus na hte mē kurom kaxkwa kamā Tirtūm nhōrkwÿ mex kām mē pahto àhwÿr o hkrī. Ōrkwÿ kaàkreja na prem ĩhkra ho hipêx nom kaxkwa kamā ōrkwÿ mexja na pre mēhō ĩhkra ho hipêx kêt nê. Tirtūm na pre tanhmā hipêx to nhūm kamā Jejusja mē pahto hwÿr o hkrī.

3 Nē mē pahpê Ijaew nhō patre maati jaja na prem mē ho hwÿr kaxyw nê mē kot amnhī tomnuj pānhā Tirtūm mā mēmoj nhōr kôt mē ho kuwÿ. No Kris na hte ā amnhī nhīpêx anhÿr kêt nê. Ra htyk o kot kām amnhī nhī nhōr jakamā na hte wam patre maati pyrâ nê xatā kām mēmoj nhōr kêt nê.

4 Tā na hte arī Ijaew Mojes kapēr kôt amnhīm Rewi hkwÿ kēp mē ō patre kaxyw mē unhwÿ nhūm mē ho Tirtūm wÿr o pa. No Jejus kēp Rewi hkanrēhā htāmnhwÿ hkêt. Katorxā hkôt kēp Juta hkanrēhā htāmnhwÿ jakamā kop apu arī jar pika ja kamā htīr nê pa ronhÿx Ijaew nhō patre pyrâ nê kēp mē ho Tirtūm wÿr o pa xwÿnh kêt. Ām Rewi hkanrēhā htāmnhwÿ pixjaja

na htem mē kaxyw kām mēmoj gō nē hkôt mē ho kuwỳ.

⁵ Jar na htem arī ã amnhĩ nhĩpêx anhỹr o pa nom kaxkwa kamã na htem ã amnhĩ nhĩpêx anhỹr hkêt nē.

Nē jar Tĩrtũm nhõrkwỹ kaàkreja te kot kaxkwa kamã õrkwỹ mexta pyrãk. Na pre Mojes õrkwỹ kaàkre nhĩpêx kaxyw nhũm Tĩrtũm tanhmã kãm hã karõ hto nē kãm:

—E jãã hixêt præk nhĩmõk ã axãmta ã na pa pre amã ixkreta kukamã ixprĩ hã tanhmã mē ate hipêx to hã amã karõ. Tã kêr ka ã hipêx anē. Anē.

Hãmri nhũm kuma nē kot kãm hã karõ xà hkôt hipêx. Hãmri nhũm mē õ patre maati ixkreja kamã mē ho Tĩrtũm wỳr o pa. Na prem ã amnhĩ nhĩpêx anhỹr o pa.

⁶ Tã nhũm ra Tĩrtũm axtem mē hpãnhã mē pakaxyw Kris xãm nhũm hte mē pahto hwỳr mex o wamtajê jakre. Na hte kaxkwa kamã mē pahpiitã mē pahpumunh mex rãhã ho hkrĩ nē wamtajê rom tanhmã mē pahkrã hto pu mē tãm amnhĩ nhĩpêx o ri papa. Tĩrtũm kot finat Mojes mã kapêrja mex nē nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mē pahtyk tã akupỹm pahĩr nē nhỹrmã Tĩrtũm mē Jejus wa kuri pamex nē pahĩr tũm nē papa ho papa nē axte pahtyk kêt nē.

⁷ Kêp apu Tĩrtũm kot Mojes mã kapêr kôt mē kot tãm amnhĩ nhĩpêx o pa ronhỹx pre Tĩrtũm axte kapêr nyw ã kagã hkêt nē.

⁸ Nom wam kapêr tũmta na pre mē mar tỳx htã arĩ amnhĩ tomnuj rãhã ho pa nhũm tee ri ja hã mē omu nē mē kãm:

Nà kot paj axte nhỹrmã mē apê Ijaew mã axtem tanhmã ixkapêr to.

⁹ Amnepê mē anhĩgêtjê mã na pa pre ixkapêr.

Na pa pre Ejit pê mē kator nē mē kot tanhmã amnhĩ nhĩpêx to ho pa kaxyw tanhmã hã mē kãm karõ hto.

Nom na prem ixkapêr ma nē ãm kuma nē ixkôt amnhĩ nhĩpêx kêt nē. Pa tee ri ja hã mē omu hãmri nē mē hkaga.

¹⁰ Tã kot paj mē apê mē hkanrêhã mē htãmnhwỳ nywjê mã axtem ixkapêr ka mē ixkapêr nywja ma.

Kot paj nhỹrmã tanhmã mē akrã hto ka mē ixkapêr nyw mar tỳx nē hã ano htỳx nē ho apa.

Nē akĩnh nē apa.

Nē ixkôt ri amnhĩ nhĩpêx mex o pa.

Nē axpên mã ijarênh o: “Nà ãm hãmri Tĩrtũm kêp mē panhõ Tĩrtũm na.” Anhỹr o ri axpên mã ijarênh o apa.

Pa amnhĩ tã mē ama nē mē apumu nē amnhĩ xwar mē apê ixkra hã amnhĩm mē ajarê.

¹¹ Kot kaj mē apiitã ixte amnhĩ nhĩpêx kôt ixpumunh mex o ri apa. Mē akàxpore rũnh xwỳnhjaja nē mē akàxpore hkryre xwỳnhjaja mē apiitã ixpumunh mex jakamã kot kaj mē ri axte ixtã tanhmã axpên kukjêr to ho ri apa hkêt nē.

¹² Nē kot paj mē ato mex rax o ixpa.

Nē axte tanhmã mē ate amnhĩ tomnu hto ho apaja mã ijamaxpêr kêt nē. Anē.

¹³ Nē koja mēmoj ra htũm hãmri nē hapêx tokyx anē. Ja pyrã nē na pre Tĩrtũm mē pamã kapêr tũmta jarênh o:

—E kêr ka mē axte ixkapêr tũm mar kêt nē. Pãnhã ixkapêr nyw pix mãn mar o apa nē ãm kôt pix mã mãn amnhĩ nhĩpêx rãhã ho ri apa. Anē.

9

Tĩrtũm nhõrkwỹ kaàkre jarênh

¹ Nē amnepê mē na pre finat Mojesja mē panhĩgêt nē mē pahpãmjê mã tanhmã Tĩrtũm nhõrkwỹ kaàkre jarênh to. Tanhmã mē kot hipêx to nē kamã tanhmã amnhĩ nhĩpêx to hã mē kãm karõ. Nē kamã tanhmã mē kot amnhĩ to Tĩrtũm wỳr to hã mē kãm karõ. Nē tanhmã mē hkwyjê ho hwỳr toja nhũm pre mãânên mē kãm hã karõ. No Tĩrtũm nhõrkwỹ kaàkreja kêp õrkwỹ kumrêx kêt. ãm mē kot omunh nē kaxkwa kamã õrkwỹ kumrêx mã hamaxpêr kaxyw na pre.

² Jakamã nhũm prem Mojes kapêr ma nē hipêx. Kamã hitom hamêxkrut. Wam hitom kamã na pre kanê hprêeti xãm nē kutã mêsti xãm. Nē mêsti nhĩmõk ã Tĩrtũm mã õ pãwti jaxwỳ. Mē panhõ patre na pre htem Tĩrtũm mã kugõ nē mêsti ã kãm haxwỳ hãmri nē hkwyjê ho kuwỳ. Tã hitom

ja na prem kêp Tirtûm nhõ hitom mex ã harê.

³⁻⁴ Nê hitom wa hkaêx kãm na pre kupêxê ho hakwakre kahê xàja ajêt. Haturxà kamã hitomja na prem Tirtûm nhõ hitom maati hã harê. Tirtûm na pre te hirã htÿx kãm hwÿr wrÿ nê te kamã hkrÿ pyrãk. Nê kamã na pre Tirtûm mã mēhkuxwa xà ho xêt xà hã mēs kunÿhtija kuhê. Na prem ôr o hipêx nê kamã ãm nhÿm kuhê. Nhÿm pre hte mēo patre hwÿr agjê nê kutã kuhê nê mē ho Tirtûm wÿ. Nê mēs kunÿhti haxwÿja hitom maati kamã kuhê. Na prem pÿ ho hipêx nê ôr o hpro nê kamã ãm. Mēstija kaxwÿnh kãm na pre htem mēmoj jagjê.

Tirtûm kot Ijaew mã tanhmã mē kot amnhÿ nhÿpêx to ho pa hã karõ nê kën po hã mē kãm hã kagàja nhÿm prem kamã kuxà nhÿm hikwÿ.

Nê mãânên ôr o xijereja xà nhÿm hikwÿ. Nê xijere kamã amnepê mã Tirtûm kot kaxkwa rÿm mē hwÿr mēo rēnh kwÿ hikwÿ. Mēoja mē kot kãm: “Manã” anhÿr xwÿnhja na prem hkwy hkawrà nê xijere kamã kugjê hãmri nê mēsti kamã kuxà.

Nê finat Arãw nhõ kô kot ho amnhÿ kaxpar xà htÿmta nhÿm prem kamã kuxà. Tirtûm kot tanhmã ho nhÿm kurÿm pixôrà muxre hapôx xwÿnhhta nhÿm prem mãânên mēs kunÿhti kamã kuxà nhÿm hikwÿ.

⁵ Nê himõk ã Tirtûm kapêr o wrÿk xwÿnh wa hkarõ nhÿpêxja wa hamêxkrut nê axpên kutã wa hkõn krã ho hkrÿ. Axpên wÿr hara koror nê wa hkrÿ. Patre maati kot omunh nê Tirtûm kot mē hkôt pa ho paja mã hamaxpêr kaxyw. Nê wa hkaêx kãm ahkaprÿja Tirtûm kot mē nê mē kot amnhÿ tomnuj rēnh mã hamaxpêr xà na pre.

Ã Tirtûm nhõrkwÿ kaàkre kot anhÿr. No kot paj ixprÿ hã mē amã piitã harēnh par kêt nê.

⁶ Na pre hte mēo patre apkati mē wam hitom wÿr agjê nê kamã Ijaew ho Tirtûm wÿr o pa.

⁷ No hitom maatiã ãm mē õ patre maati pix na pre hwÿr agjê. Nom apkati mē hwÿr pa nê gjêx kêt ãm amgrã pÿnh kãm hwÿr gjêx pÿnh nê. Nê hwÿr gjêx kaxyw nê mēmo mry pa nê hkamrô ru nê o pa nê

hitom maati hwÿr ho agjê. Hãmri nê ho mēs kunÿhti nhÿmõk kamã nê Tirtûm mã kãm:

—Pa Tirtûm. E ota mry kamrôta. Mē ixpê akwÿjaja mē ixte amnhÿ tomnuj jakamã na pa mē amnhÿ pãnhã mēmo mry nhõkre jakã nê kupÿ nê hkamrô ru nê man awÿr o mra. Te kot mē ixte amnhÿ tomnuj mÿrapê htyk pyrãk. Jakamã kwa ã mē ixte amnhÿ nhÿpêx anhÿrja ã mē ixpumunh hkôt mē inhnê mē ixte amnhÿ tomnuj rê.

Anhÿr o mē amnhÿ to kuwÿ.

⁸ Nê patre maati pix na pre hitom maatiã wÿr agjê nê mē ho Tirtûm wÿ. Ijaew na prem ixkre kapem hamãr o kuhê nê hwÿr gjêx kêt nê. Tirtûm Karõ kot hã mē kãm karõ xà hkôt. Te Tirtûm pē amÿm kuhê pyrãk. Tã na htem jarãhã arÿ Ijaew kanrêhã mē hkra nê mē htãmnhwÿjaja ã amnhÿ nhÿpêx anhÿr o pa. Jao mē higêtjê pyrà nê Tirtûm pē amÿm kuhê.

⁹ Mē kot arÿ Tirtûm mã mry hpar nê hkamrô ho mēmoj kamÿr nê amnhÿ to hwÿr o pa htã na htem arÿ hamaxpêr punuj pix o pa.

¹⁰ Tirtûm kapêr tÿm kot tanhmã mēmoj tã mē kãm karõ hto.

Na pre tanhmã mē apkur xà hã mē kãm karõ hto nhÿm htem pix kur o pa.

Nê tanhmã mē hkõm xà hã mē kãm karõ hto nhÿm htem pix o hkõm o pa.

Nê tanhmã amnhÿmnuj to hã tanhmã mē kot amnhÿ kuhõnh to hã karõja nhÿm htem hkôt pix mã tanhmã amnhÿ kuhõnh to ho pa.

Nê tanhmã mē kot ri mē hikukrêx kuhõnh to hã mē kãm karõja nhÿm htem kôt pix mã tanhmã kuhõnh to ho pa.

Ã na pre Tirtûm Kris kukamã mē kãm mēmoj tã karõ rax anê. Kris kutêp pix mã ã mē kot amnhÿ nhÿpêx anhÿr kaxyw. No mē pahte arÿ ã amnhÿ nhÿpêx anhÿr kaxyw kêt. Na pre ra Kris mē pahwÿr wrÿ nê Tirtûm kapêr tÿm o hapêx nê hpãnhã mē pamã kapêr nyw jarê pu mē hpãnhã nywta kôt pix mã amnhÿ nhÿpêx o papa. Kapêr nywja mex o mex. Nê mex o wanta jakrenh.

Kris htyk o mē pahte amnhÿ tomnuj pãnhã amnhÿrer ã harēnh

¹¹ Tã na pre Krisja tãm mē pahwÿr wrÿ nê kêp mē pahto Tirtûm wÿr xwÿnh maati

nê patre hpânhã mē pahto hwÿr o pa. Nom jar pika ja kamã mē kot mē ïhkra ho Tïrtûm nhôrkwÿ kaàkre nhïpêxta wÿr àr nê kamã mē pahto hwÿr kaxyw na pre wrÿk kêt nê. Na pre ra akupÿm kaxkwa hwÿr api nê kamã ôrkwÿ mex wÿr axà nê kamã tanhmã mē pahto mex to nê tanhmã mē pahto Tïrtûm wÿr to rãhã ho hkrï.

¹² ã kaxkwa kamã Tïrtûm nhô hitom maatija wÿr àr tipxi htã mē pahpiitã mē pahte amnhï tomnuj pãnhã amnhïrer pa. Nom mēmo mry kamrô ho mē pahpãnhã amnhïrer kêt nê. Môx kamrô rÿ motre kamrô ho mē pahpãnhã amnhïrer kêt nê. Amnhï kamrô ho na pre mē pahpãnhã amnhïre. Tyk nê hkamrô pikapïrta o mē pahpiitã mē pahpãnhã amnhïrer pa.

¹³ Nê amnepê mã Ijaew kot Tïrtûm kapêr tûm kôt amnhï nhïpêx mex o pa hkêt jakamã nhûm tee ri mē omu nê mē kot amnhï tomnuj o mē pa xwÿnh ã mē harê. Jakamã na pre mēo patre xatã mry kamrô ho mē hkamï. Môx kamrô nê motre kamrô ho mē hkamï. Na pre môx krare hkwy hpa nê ho hxêt nê hprã ho hkwyjê kamï. ã na prem xatã mē hipêx anhÿr o pa. Tïrtûm kot ja hã mē omunh nê mē mex ã mē harênh kaxyw. Nom te mē krãhkã pix mex pyrã nê mē hkrã kaxwÿnh kãm arï hamaxpêr punuj o pa.

¹⁴ ã na prem amnhï nhïpêx anhÿr o pa. Nom Krisja mē kurom aa tanhmã amnhï tomnuj to hkêt jakamã na pre mē pahte amnhï tomnuj xwÿnhjê nê ty. Te mē kot amnhï nê môx rÿ motre hpar nê hkamrô runhta pyrãk o amnhï nhïpêx nê mē panê Tïrtûm mã amnhï gô nhûm pre mē kãm hkurê xwÿnhjaja kupï. Na pre Tïrtûm Karôja ã kot mē panê htyk anhÿr kaxyw tanhmã ho hihtÿx to. Karôja aa hapêx kêt kumrêx rãhã nê pa ho pa xwÿnh jakamã na pre Kris tykja kukamã tanhmã ho hihtÿx to nhûm mē panê ty. Tapxipix na mē pahte tãm amnhï nhïpêx o papa kaxyw kêp tanhmã mē pahkrã hto xwÿnh. Jakamã na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmã amnhï krã hkôt tãm amnhï nhïpêx o ixpa hprãm kaprÿ nê ãm amnhï tomnuj pix o ri ixpa. Tã Kris kot inhnê htyk o hkamrô pikapïr ã harênh

ma nê amnhï kaxyw hkôt ijamaxpêr tÿx nê nhûm amnhï tã ixpumu nê ixte tãm amnhï nhïpêx o ixpa kaxyw ixãm. Jakamã kot paj ãm Tïrtûm pix mã kãm tanhmã amnhï nhïpêx to ho ri ixpa. Tïr rãhã nê pa ho pa xwÿnh jakamã kot paj nhÿrmã kuri uràk nê ixtïr tûm nê ixpa ho ixpa. Anê.

¹⁵ Nê amnepê mã na prem piitã Tïrtûm kapêr tûm kôt amnhï nhïpêx mex o pa hkêt nê. Mē kot xatã hkôt amnhï nhïpêx o pa hã amnhï jarênh tã hkôt amnhï nhïpêx kêt nê. Jakamã na pre Kris wrÿ nê mē pahte hkôt amnhï xunhwÿr mã xwÿnhjê mã Tïrtûm kapêr nyw jarê nê mē pamã:

—Kot paj mē anê ty nhûm Tïrtûm ã ixte amnhï nhïpêx anhÿrja kukwak ri mē ato mex rãhã ho pa. Anê.

Hãmri nê amnhï jarênh xà hkôt mē pahte amnhï tomnuj piitã hpãnhã amnhïrer kaxyw mē panê ty.

¹⁶⁻¹⁷ Te jar pika ja kamã mēhô htyk kukamã hkrajê mã tanhmã amnhï jarênh to pyrãk. Na htem htyk kaxyw nê hkrajê mã:

—Nà kot paj mēmo arïgro hã ty ka mē inhmÿr pê ixpê ixkukrêx kwÿ o arïk.

Anhÿr o na htem amnhï jarê. Hãmri nê ty nhûm hkrajaja amnhïm ô mēmoj to àrïk pa. Mē hipêxà kukwak ri mē hikukrêx mex nê mÿr pê o pa. No kormã htïr ri nhûm mē kormã kêp hamÿnh kêt nê. Ja pyrã nê na pre Tïrtûmja Jesus htyk kukwak ri tanhmã mē pahto mex to pu mē kukwak ri mē pamex nê pahkïnh nê ri papa.

¹⁸ Nê Tïrtûm kapêr tûm kôt na pre hte mē ô patre mry pa nê ãm hkamrô runh kôt pix mã mē ho Tïrtûm wÿr o pa nhûm amnhï tã mē omunh xà hkôt mē kuma nê tanhmã mē ho mex to.

¹⁹ Na pre finat Mojesja Ijaew mã Tïrtûm kapêr tûm piitã harê nê harênh pa hãmri nê môx ôxpï nê kaxyw motre hôxpï. Hãmri nê xijere kamã hamê wa hkamrô runh pa nê kamã gô hkwy ru. Hãmri nê kaxyw mēmo pï hpa hkryre pê “isop” jarênhja kwÿ kukê. Nê kaxyw ôwêhti hkï kamrêkre hkwy hpy nê isop mē ho pihkàr pa nê mry kamrô o go. Hãmri nê ho hkwyjê kamï. Nê ho Tïrtûm kapêr ã kagã tûmta kamï.

²⁰⁻²² Hãmri nê ho anhÿr pa nê mē kãm:

—Nà na Tirtũmja ixte mry kamrô ho mē akamĩr pumunh kôt mē pamã kapêr o: “E kot kaj mē ixkapêr kôt amnhĩ nhĩpêx o ri apa hã kot paj tanhmã mē ato mex to rãhã ho ri ixpa ka mē amex nē akĩnh nē ajamakêtkati nē ri apa. Jakamã kêr ka mē mry kamrô ho mēmoj piitã hkamĩr pa. Nē ho amnhĩ kamĩ. Kêr pa ja hã mē apumu hãmri nē axte tanhmã mē ate amnhĩ tomnuj tota mã ijamaxpêr kêt nē.” Anê. Ā na Tirtũm mē pamã kapêr anê. Anê.

Hãmri nē hpãnhã mry kamrôta o ôrkwỹ kaàkre kamĩ. Nē hkre kamã mēmoj kuhê xwỹnh piitã nhũm ho hkamĩr pa. Ā na pre mē ô patre mē mex kaxyw mē hipêx anhỹr o pa. Mē kot tōhã mēmoj to hpỹnhre nē ho hkamĩr kêt jakamã kironhỹx pre mēmoj piitã ā hipêx anhỹr o pa. Kop apu mē kot mry hpar nē hkamrô runh kêt ronhỹx pre Tirtũm arĩ mē kot amnhĩ tomnuj mã hamaxpêr rãhã ho pa.

²³ Na prem ā Tirtũm nhõrkwỹ kaàkre kamã mēmoj kuhê xwỹnh piitã mex kaxyw hipêx anê. Te Tirtũm kot mē pahto mex nhũm mē pahte nhỹrmã ma kaxkwa hwỹr ô krĩ hwỹr paxãpirta pyrã nē. Nom mē kot mry hpar nē hkamrô runhta kukwak ri mē pamex nē papa hkêt. Ām mēhõ kamrô kukwak ri mē pamex xwỹnhhta pix kukwak ri na mē pahpê pahĩr tũm nē papa mã xwỹnh. Ja na mex o mry kamrô piitã hakrenh pa.

²⁴ Jejus Krisja pix kukwak ri. Tãm na pre patre pyrã nē mē pahto Tirtũm wỹr kaxyw mē ĩhkra ho Tirtũm nhõrkwỹ kaàkre nhĩpêxta wỹr gjêx kêt nē. Ām ixkre kaàkre pix na pre. Na pre kaxkwa kamã Tirtũm nhõ krĩ hwỹr axã. Tã arĩ kamã Tirtũm nhĩhkô hã mē pahto hwỹr rãhã ho hkrĩ.

²⁵ Nē Ijaew nhõ patre maati na hte amgrã mē ôrkwỹ kaàkre kamã hitom maati hwỹr gjêx tipxi. Nē amnhĩ kôt mry kamrô ru nē ho agjê. Tirtũm kot hã omunh nē axte mē kot amnhĩ tomnuj mã hamaxpêr hkêt kaxyw. Nom Kris na pre mē urak nē mēmo mry pa nē Tirtũm mã hkamrô kapĩr kêt nē. Kamrô na pre mē panê axkapĩ. Nom patre pyrã nē amgrã mē ā amnhĩ nhĩpêx anhỹr kêt nē. Na pre htyk o Tirtũm mã amnhĩ nhõr tipxi.

²⁶ Kêp apu patre pyrã nē amgrã mē mē panê htyk o pa ronhỹx ra mē panê htyk xohtô rax kumrêx. Nhỹx pre amnepê mã Tirtũm kot mēmoj piitã ho katorta rũm amgrã mē mē panê htyk o pa ho hkrax. Jao xatã htyk o amgrã xohtô rax kumrêx. Nom ja kot anhỹr kêt. Na pre mē pahwỹr wrỹ nē mē panê htyk tipxi htã htykja o mē pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ Ām pahtyk tipxi htã koja Tirtũm nhỹrmã akupỹm mē pahpiitã mē pahto pahĩr nē ahpỹnhã tanhmã mē pajarênh to nē ahpỹnhã tanhmã mē panhĩpêx to. Kormã mē pahĩr ri mē pahte amnhĩ nhĩpêx ā mē pahpumunh xã hkôt tanhmã mē panhĩpêx to.

²⁸ Ja pyrã nē na pre Krisja Ām mē panê htyk tipxi htã mē pahto ohtô nē mē panê mē pahte amnhĩ tomnuj piitã rênh pa. Hãmri nhũm Tirtũm akupỹm ho htĩr nē akupỹm amnhĩ wỹr ho api. Tã koja nhỹrmã akupỹn mē pahwỹr wrỹ. Nom axte mē pahte amnhĩ tomnuj pãnhã amnhĩ rer kaxyw mē panê htyk kaxyw wrỹk kêt nē. Ra kot mē pahte amnhĩ tomnuj pãnhã amnhĩrer kênã. Koja akupỹn wrỹ nē mē pahte amnhĩ wỹr kamã pajamak o papa xwỹnhjaja ma akupỹm amnhĩ kôt kaxkwa hwỹr mē pahto àpir pa. Ra mē pahtyk tã nhũm akupỹm mē pahto mē pahĩr nē ma amnhĩ kôt mē pahto àpir pa pu mē kuri pamex nē pahĩr tũm nē papa ho papa.

10

Kris kot mē panê htyk tipxi hã harênh

¹ Nē arĩ mē kot Tirtũm kapêr tũm kôt amnhĩ nhĩpêx o mē pa xwỹnhjaja kormã hprĩ hã Tirtũm kot tanhmã mē pahto mex to hã harênh mar tỳx kêt. Na prem kormã hkwỹ pix ma. Na hte mē ô patreja amgrã mē kãnhmã kaxkwa hwỹr mry kamrôta pē nē mē amnhĩ to Tirtũm wỹ. Kot ja hã mē omunh nē axte mē kot amnhĩ tomnuj mã hamaxpêr hkêt kaxyw. Tã ā mē kot amnhĩ nhĩpêx anhỹr tã arĩ Tirtũm kapêr kwỹm amnhĩ nhĩpêx rãhã

² jakamã na prem xatã kãm mēmo mry kamrô runh o pa. Kêp apu tãm amnhĩ nhĩpêx nē tãm ri hamaxpêr ronhỹx arĩ ā

amnhĩ nhĩpêx anhÿr o pa hkêt nê. Nê xatã amnhĩ pãnhã mry hpar nê hkamrô ho Tĩrtũm nhõrkwÿ kaàkre kamã mẽmoj kamĩr kêt nê.

³ Nom na prem tãm amnhĩ nhĩpêx o pa hkêt nê. Mẽ kot amgrã mẽ Tĩrtũm kot mẽ nê mẽ kot amnhĩ tomnuj rênh kaxyw mẽ kot kãm mẽmo mry hpar o pa htã no ãm hkôt amnhĩ nhĩpêx xwÿnh ã amnhĩ jarênh kêt nê. Arĩ mẽ kot amnhĩ tomnuj o pa jakamã na prem mry hparta ã amnhĩ pumu nê tee ri amnhĩ kukamã hamaxpêr o hkaprĩ nê pa.

⁴ Nom na hte môx kamrô rÿ motre kamrôja mẽ panê mẽ pahte amnhĩ tomnuj rênh kêt nê.

⁵⁻⁸ Jakamã na pre Krisja mẽ pahwÿr no-jarêt nê Tĩrtũm mã amnhĩ jarênh o:

Pa Tĩrtũm? E kot paj ma mẽ hwÿr wrÿ.

Mẽ kot amnhĩ pãnhã amã mry hparta apê hprãm nõkati nê amã hkĩnh kêt.

Ate mẽ nê mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt. ãm ixkukamã na ka pre ã mẽ kot amnhĩ nhĩpêx anhÿr kaxyw mẽ kãm ja hã karõ.

Mẽ kot mry nhĩpêx o te pa ixte mẽ nê ixtyk nê ixkamrô pikapĩr pyrãk o na prem ixkukamã ã amnhĩ nhĩpêx anê.

Jakamã na ka ra mẽ kaxyw inhmã inhĩ gõ pa mẽ urãk nê inhĩ ho inhĩ.

Tã kot paj ma mẽ hwÿr wrÿ. Ixte amã hprãm xà hkôt pix mã ixte tanhmã amã mnhĩ nhĩpêx to ho ixpa kaxyw. Akapêr ã kagã htũm kot tanhmã ixkukamã ijarênh to xà hkôt kot wrÿ nê ã amã amnhĩ nhĩpêx anê. Anê.

Hãmri nê man mẽ pahwÿr wrÿ.

⁹ Kot Tĩrtũm kapêr tũm o hapêx par nê hpãnhã tãm mẽ panê htyk kaxyw wrÿ. Jakamã na pre nojarêt nê Tĩrtũm mã amnhĩ jarênh o:

—E ixte amã hprãm xà hkôt amnhĩ nhĩpêx kaxyw kot paj ma mẽ hwÿr wrÿ.

¹⁰ Anhÿr jakamã wrÿ nê Tĩrtũm kãm hprãm xà hkôt mẽ panê ty. Na pre nhãm mẽhõ mẽ kãm hkurê xwÿnhjê mã õr nhũm mẽ kot hpĩr nhũm amarĩ htyk kêt nê. Na pre amnhĩ grõnh kôt mẽ kãm amnhĩ gõ nhũm prem kupĩ. Hãmri nhũm htyk o

mẽ pahte hkôt amnhĩ xunhwÿr xwÿnhjê o Tĩrtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

¹¹ Nê mẽ õ patrejaja na htem apkati mẽ Tĩrtũm nhõrkwÿ kaàkre kamã kãm tanhmã amnhĩ nhĩpêx to. Nê apkati mẽ hkwÿjê hpãnhã mry hkwÿ hpa nê hkamrô ru nê mẽ ho Tĩrtũm wÿ. Tã nom ja hã mẽ omunh xà hkôt mẽ nê mẽ kot amnhĩ tomnuj rênh kêt nê.

¹² No kêt Kris na pre mẽ kot xatã mry hpar xwÿnhta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nê ma akupÿm kaxkwa hwÿr api nê Tĩrtũm nhĩhkô hã Pahi Maati hkrĩ xà kamã upòk rũm hkrĩ ho hkrĩ.

¹³ Koja kuri hkrĩ rãhã nhũm Tĩrtũmja ãhkram mẽ kot kutã amnhĩ xunhwÿr xwÿnhjê jaxàr pa. Ja kaxyw na kormã kuri hamãr o hkrĩ.

¹⁴ ãm htyk tipxi htã htykja o mẽ pahte hkôt amnhĩ xunhwÿr xwÿnhjê ho Tĩrtũm kra pu mẽ ra hpãnhã tãm amnhĩ nhĩpêx rãhã ho papa. Nê pajamaxpêr mex o ri papa. Tĩrtũm kãm hprãm xà hkôt.

¹⁵ Amnepêr mẽ kot Tĩrtũm nhÿ hã kapêr jarênh o mẽ pa xwÿnhjaja na prem mẽ panhĩgêjtjê mã kapêr o pa. Tĩrtũm Karõ nhÿ hã mẽ kãm kapêr nê mẽ kãm:

¹⁶ —E na Tĩrtũm mẽ pamã amnhĩ jarê nê amnhĩ jarênh o:

Kot paj nhÿrmã axtem ixkapêr nyw o mẽ amã ixkapêr.

Nê mẽ akrãm hagjê ka mẽ mar tÿx pê hã ano htÿx nê ho apa.

Ixkapêr tũm na pa pre mẽ amã kên pota ã hã kagã.

Nom ixkapêr nyw kot paj axtem mẽ akrãm hagjê.

¹⁷ Nê kot paj axte mẽ ate amnhĩ tomnuj mã ijamaxpêr kêt nê.

Anhÿr o mẽ pamã amnhĩ jarênh. Anê.

¹⁸ Tã ra axte mẽ pahte amnhĩ tomnuj mã hamaxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nê hkamrô runh o papa? Tã mẽ pahkwÿjaja na hte arĩ kãm ja ho anhÿr prãm o pa. E kwa mẽ axte ã amnhĩ nhĩpêx anhÿr kêt nê ixkwÿjaja.

Akupÿm mē pahte amnhī nhīpêx tūm o paxujanār kêt ā mē pamā karō

Matêwre 27.51; Rukre 23.45; Rōmān 5.1-2; Epes 3.12; Eprêw 4.14-16

19-20 E ixkràmnhwÿjaja. Ra Jejus kot mē panê htyk o hkamrô pikapîr jakamā na pu htem arī tee ri amnhī kukamā pajamexpêr hkêt nê. Tîrtūm axte kot mē pahte amnhī tomnuj mā hamaxpêr kêt jakamā na pu htem paxàmnhīx amnhī to hwÿr o papa. Te paxàmnhīx ôrkwÿ kaàkre kamā hitom maati hwÿr pagjêx nê kamā amnhī to hwÿrta pyrāk. Jao ra mē papamjaja amnhī to hwÿr o papa nhūm patre axte mē pahto hwÿr kêt nê. Jejus na pre htyk o mē pamā hitom maati wÿr hakwakre kahêxà hā kupêxêja kôt ā ho axkjê. Jao mē paxàmnhīx hwÿr mē pagjêx kaxyw mē pamā kahê xà mē.

21 Tā ra kêp Tîrtūm nhō krī kamā mē pahto hwÿr xwÿnh maati na. Nê mex kumrêx o jar pika ja kamā patre kot mē ho hwÿr o pa xwÿnhnta jakrenh.

22 Jakamā e kwa kêt pu mē māmri paxàmnhīx amnhī to Tîrtūm wÿr o papa. Ra Jejus kot mē panê htyk nhūm mē pahte amnhī kaxyw hkôt pajamexpêr rāhā ho papa jakamā kêt pu mē axte mē pahpê amnhī tomnuj xwÿnh ā amnhī jarênh kêt nê. Kêt pu mē nhÿrmā tanhmā pajamexpêr punuj to rÿ tanhmā amnhī tomnuj to hāmri nê tee ri ja hā amnhī pumu nê pahkaprī kamā amnhī to Tîrtūm wÿr kurê kumrêx. Jejus ra kot mē pahte amnhī tomnuj pānhā amnhīrer par jakamā kot puj mē Tîrtūm mā tanhmā mē pahte amnhī tomnuj to hā amnhī jarê nhūm mē pama nê axte kām hamaxpêr kêt nê. Pu mē te paxwÿr nê pahte amnhī nê pagrā htyk kuhōnh par nê akupÿm pamex pyrāk. Nê axte paxàmnhīx amnhī to Tîrtūm wÿr o papa.

23 Nê mē kot Kris ā tanhmā mē pahto htā kwa kêt pu mē tee ri amnhī kukamā pajamexpêr kêt nê. Rÿ pajamexpêr o:

—Konên. Koja mē tanhmā hamaxpêr to nê Kris ā ixpī rÿ ko. Pa apu mē kot ixpīr pymaj akupÿm ixte amnhī nhīpêx tūm o awjanā nê akupÿm hkôt amnhī nhīpêx japêr rÿ ko. Anê.

Kwa pu mē tee ri ā pajamexpêr anhÿr hkêt nê. Pu kêt mē pajamexpêr o:

—Nà mē kot Kris ā tanhmā ixto htā kot paj aa hkaga hkêt nê. Mē kot hā ixpīr mā tā kot paj hkaga hkêt kumrêx.

Anhÿr ā amnhī jarê.

24 Nê kêt ka mē akwÿjê mā anê kê mē mēmoj to axpên kutā nojarêt rāhā ho ri axpên kôt pa. Jao tanhmā axpên to mex to o ri axpên kôt pa.

25 Na pre ra mē pahkwÿjaja tanhmā hamaxpêr to nê axte mē pahkôt pikuprōnh nê Tîrtūm kapêr mar o hkrī hkêt nê. No kêt pu mē ho mē urāk kêt nê. Kêt pu mē arī xatā axpên wÿr akuprō nê mē pahte tee ri amnhī kukamā pajamexpêr nê axpên mā pakapêr o papa. Kêt mē panhō Pahihtija ra akupÿn mē pahwÿr wrÿk kaxyw jakamā kwa kêt pu mē kutêp arī axpên mā pajamexpêr mex nhōr pê tām axpên nhīpêx mex rāhā ho i papa.

26 Mē pahkwÿjaja kot Tîrtūm kapêr mar mex tā na htem kuma nê ām kuma. Kwa kêt ka mē ho mē urāk kêt nê. Kris kot mē panê htyk ā harênhja mē kot mar mex tā na htem kuma nê ām kuma nê hkaga kumrêx. Jakamā mēhō koja Kris pyrā nê htyk o mē kot amnhī tomnuj pānhā amnhīre? Nà amrakati kumrêx. Ām Jejus pix na pre Tîrtūm ja kaxyw ām. Tapxipix na pre ā mē panê amnhī nhīpêx anê. Tā nhūm mē kot hkagaja mÿrapê koja mē nhÿrmā mē tāmjaja mē kot amnhī tomnuj pānhā amnhīre.

27 Mē kot Tîrtūm kutā amnhī xunhwÿr xwÿnh na mē. Amnepêm na pre Tîrtūm mē kot kutā amnhī xunhwÿr xwÿnhjê kaxyw mē kot amnhī xà htÿx kamā hamak tūm xāta nhīpêx. Tā ra mē kot Jejus kaga jakamā koja nhÿrmā ma hwÿr mē rēnh pa nhūm mē tee ri kām hwÿr pa hprām kêt kaprÿ.

28 Amnepêm finat Mojesja kormā htîr ri na pre hte mēhō pixi nê kapêr kaga nê akupÿm kot amnhī nhīpêx tūm o awjanā nê tanhmā amnhī tomnuj to nhūm hkwÿjaja ja hā omu. Tanhmān axkrut rÿ axkrunêpxi nê ja hā omu. Hāmri nê ma Mojes wÿr mra nê axpên kôt kām tanhmā kot amnhī tomnuj to hā harê. Hāmri nhūm harênh ma nê mē kām hā amÿnê nhūm tee ri kām htîr prām kaprÿ. Mē kot akupÿm amnhī nhīpêx tūm o ujanār nê amnhī tomnuj o paja mÿrapê na prem mē kupa. Ā na pre htem mē hipêx anhÿr o pa.

²⁹ Nê koja mēhō tanhmā Tirtūm Kra Jejus o kapēr punuj to. Tirtūm kapēr ā kagà htūm kot ra mē kot kêp Tirtūm Kra hā harēnh mar mex tā axtem nē tanhmā ho kapēr punuj to ho pa. Kot mē panē htyk nē hkamrō pikapīr kôt kot mē pahte amnhī tomnuj pānhā amnhīrer ā harēnh mar tā kuma nē ām kuma nē harēnh o:

—Nà mē pahpyrà nē kot amnhī tomnuj xwýnh nhūm mē kot hā hpīr kēnā. Na pre mē panē htyk kêt nē.

Anhÿr ā harē. Nē Tirtūm Karōja nhūm määnēn tanhmā ho kapēr punuj to. Kêp mē pakutā nojarēt xwýnh tā nhūm axtem nē tanhmā ho kapēr punuj to. Mÿrapē koja nhÿrmā Tirtūm tanhmā homnuj tÿx to. Homnuj tÿx o mē kot Mojes kapēr kaga nhūm mÿrapē kot mē hparta jakre. Jakamā kwa kêr ka mē ā amnhī nhīpêx anhÿr hkêt nē.

³⁰ Tirtūm kapēr ā kagà htūm kot ja jarēnh kot:

Ixpê Tirtūm kot paj mē kot amnhī tomnuj xwýnhjê homnuj tÿx nē. Anē.

Nē mē kot tām amnhī nhīpêx xwýnhjê jarēnh kot:

Mē kot amnhī to mex o mē pa xwýnhjaja kot paj nhÿrmā mē ho mex rax nē. No mē kot amnhī tomnuj o mē pa xwýnhjaja kot paj nhÿrmā mē homnuj tÿx nē. Anē.

Ra mē pahte ā kapēr anhÿr xwýnhja kot amnhī nhīpêx ā omunh mex.

³¹ Jakamā kwa mē okora. Kêr ka mē amnhī to mex rāhā ho ri apa. Tirtūm rāhā ho rāhā nē hihtÿx o hihtÿx jakamā koja mēmoj tā akamā gryk ka amex kêt o amex kêt.

³² Nē amnepēm mē ate Jejus kôt amnhī xunhwÿr krax kām na prem Jejus ā mē atomnuj tÿx tā ka prem mē umaj hkaga hkêt nē. Tā kêr ka mē arī ā amnhī nhīpêx anhÿrja kukamā mān ajamxpēr nē hā anohtÿx rāhā ho apa. Jao arī ā amnhī nhīpêx anē nē mē umaj Jejus kaga hkêt nē.

³³ Na prem mē piitā mē noo mā tanhmā mē amā kapēr punuj to nē tanhmā mē anhīpêx to. Nē tōhā tanhmā mē akwÿjê homnuj tÿx to ka mē tee ri ja hā mē omu nē mē kamā axukapri nē. Nē mē hkôt axkamē nhūm prem mā mē ato anē nē.

³⁴ Na prem mē akwÿjê jagjê ka prem ja hā mē omu nē ma mē haggjēnh xà hā ixkre hwÿr mē hwÿr mra nē tanhmā mē ho mex to. Nhūm prem mē apê mē akukrêx kwÿptà nē ma amnhīm o pa ka mē ām amnhī tā mē omu nē ajamxpēr o:

—Kwār mē māmri ma amnhīm hamÿn o pa. Koja nhÿrmā Tirtūm inhmā ixkukrêx mex o kot ja jakrenhta kwÿ nhōr rax nē pa amnhīm hamÿ nhūm aa ixpê hapêx kêt nē. Hāmri nhūm axte mēhō aa ixpê utār kêt nē. Jar mē ixkukrêxta mexti hā. Anē.

Jao mē kot mē apê utār tā ka mē akapri nā apa hkêt nē. Ā amnhī kukamā ajamxpēr anhÿr pē akīnh nē apa. Ām hāmri na ka prem ā amnhī kukamā ajamxpēr anē.

³⁵ Na ka prem mē kutā amnhī to htÿx kām ā apa anē. Tā kwa kêr ka mē arī ā amnhī nhīpêx anhÿr o ri apa. Kêr kê nhÿrmā Tirtūm ja hā mē ato mex rax nē.

³⁶ Nē kêr ka mē arī amnhī kaxyw Tirtūm mā ajamxpēr rāhā ho ri apa. Mē kot Jejus ā tanhmā mē ato htā ka mē hkaga hkêt nē. Kot kaj mē ā amnhī nhīpêx anhÿr o apa nhūm Tirtūm ja hā mē apumu nhūm ja kām mex nē. Hāmri nhūm ra kot amnhī jarēnh xà hkôt nhÿrmā amā mēmoj mex nhōr rax nē. Jakamā kwa mē kot tanhmā mē anhīpêx to hā amnhī pumu nē tee ri amnhī kukamā ajamxpēr o ri akapri hkêt nē. Kot kaj mē Kris ā apunuj rāhā apa hkêt nē.

³⁷ Tirtūm kapēr ā kagà htūm kot Jejus jarēnh kot:

Koja mē pahwÿr wrÿk mā xwýnhhta tokÿx wrÿ. Na ra wrÿk kaxyw nojarēt. Anē.

³⁸ Nē harēnh kot:

Ixxôt mē kot amnhī nhīpêx mex o mē pa xwýnhjaja koja mē amnhī kaxyw ixkôt hamxpēr tÿx rāhā nē. Jao nhÿrmā ixri htīr tūm nē mex rāhā nē pa ho pa.

Nē koja mēhō ixkaga pa tee ri kām ixkīnh kêt ā omu. Anē.

³⁹ No mē papajaja te mē pahte mē kot Jejus kaga nhūm kot amnhī tā mē homnuj mā xwýnhjê pyrāk kêt. Arī mē pahte amnhī kaxyw hkôt pajamxpēr rāhā jakamā koja nhÿrmā amnhī wÿr mē pahto api.

11

Amnhî kaxyw Tîrtûm kôt mẽ hamaxpêr mex xwýnhjê jarênh

Sikûn Pêtre 3.5-7

¹ Nê na htem Kris ã mẽ panhîpêx kati ho pa pu mẽ pahpunuj rãhã nê ri papa. Te Kris kot mẽ pahto mex kêt pyrãk pu htem mẽmoj punuj pix kãm ri papa nê kormã Tîrtûm kot mẽ pahto mex ã amnhî tã omunh kêt nê. Tã ã mẽ pahte anhÿr tã kwa kêt pu mẽ arî kapêr kôt amnhî nhîpêx rãhã ho papa. Mẽ pahte pano ho Tîrtûm pumunh kêt tã kot mẽ pahkôt pa ho pa hã amnhî kaxyw kãm pajamaxpêr tÿx rãhã ho papa. Jakamã na pu htem ãm kapêr kôt pix mã amnhî nhîpêx o papa.

² Amnepê mã mẽ pakukamã mẽ panhîgêjtaja na prem no ho Tîrtûm pumunh kêt tã amnhî kaxyw kãm hamaxpêr nê kapêr kôt amnhî nhîpêx o pa nhũm amnhî tã mẽ omu nhũm ja kãm mex nê.

³ Nê mẽ papajaja na pu htem pajaxwÿja mẽ pano ho omunh kêt tã amnhîm harênh o:

—Nà amnepê m kormã mẽmoj piitã amrakati ri nhũm Tîrtûm ãm kapêr pix o mẽmoj piitã ho kato. Ixte inhno ho ja hã omunh kêt tã kot ã amnhî nhîpêx anhÿr ã amnhî jarênhja jakamã kot paj hkôt ijamaxpêr tÿx rãhã ho ri ixpa. Anê.

⁴ Na pre finat Atãw nhîpêx nê kaxyw hprõ Ewa nhîpêx. Hãmri nhũm wa hkra Apewja htõ Kaï rom amnhî kaxyw Tîrtûm kôt hamaxpêr tÿx o pa. Jakamã nhũm wa Tîrtûm mã mẽmoj gõ. Nhũm Apew kot Kaï rom Tîrtûm kãm hprãm xà hkôt kãm mẽmoj nhõr jakamã nhũm amnhî tã omu nê kot amnhî to mex xwýnh ã harê nê kot kãm õr xwýnhnta nhũm mex ã harê. Tã Apew amnepêm htyk tã pu htem arî harênh mar rãhã ho papa nê kãm pajamaxpêr o:

—Apew na pre hte amnhî kaxyw Tîrtûm kôt hamaxpêr tÿx rãhã ho pa.

Anhÿr ã kãm pajamaxpêr.

⁵ Nê Atãw kanrêhã htãmnhwÿ Enokja na pre haxwÿja amnhî kaxyw Tîrtûm mã hamaxpêr tÿx o pa. Jao hkamnàr rom kãm hprãm xà hkôt pix mã tanhmã kãm amnhî nhîpêx to ho pa nhũm amnhî tã omu nê amnhîm mex ã harê. Jakamã na pre htyk

kêt nê. Na pre Tîrtûm htîr rãhã ma amnhî wÿr ho api nhũm hkwyjaja tee ri hapêr o pa. Jakamã na pu htem arî axpên mã Enok kot amnhî kaxyw Tîrtûm kôt hamaxpêr mex o pa hã harênh o papa.

⁶ Mẽ kot amnhî kaxyw Tîrtûm mã mẽ hamaxpêr kêt xwýnhjaja na hte Tîrtûm mẽ mex ã mẽ harênh kêt nê. Tã mẽ papajaja kêt pu mẽ Enok pyrã nê amnhî kaxyw kãm pajamaxpêr tÿx rãhã ho papa. Nê pajamaxpêr o:

—Tîrtûmja htîr rãhã ho rãhã. Koja nhÿrmã mẽ ixte amnhî kaxyw hkôt ijamaxpêr xwýnhjê ho mex rax nê. Nà koja mẽ ixto anê.

Anhÿr o mẽ pajamaxpêr nhũm Tîrtûm amnhî tã mẽ pajamaxpêr ã mẽ pahpumu nê mẽ pahte amnhî to mex ã mẽ pajarê. No mẽ kot amnhî kaxyw kãm hamaxpêr kêt xwýnhjaja na hte ã mẽ harênh anhÿr kêt nê.

⁷ Nê Enok kanrêhã htãmnhwÿ Noehtija na pre haxwÿja amnhî kaxyw Tîrtûm mã hamaxpêr tÿx o pa. Jao hkamnàr rom amnhîm pàr raxja nhîpêx. Na pre ra Tîrtûm na rax kukamã tanhmã kãm ujarênh to. Kormã aa na wÿk nhũm Noehti kot omunh kêt tã Tîrtûm kapêr ma nê mar xà hkôt amnhîm pàr rax kumrêxta nhîpêx. Õrkwÿ kamã hkwyjê mẽ mẽ amnhîm hipêx. No mẽ kot Tîrtûm kapêr mar nê ãm mar xwýnhjaja na pre Tîrtûm gô tãm o mẽ hanhi nê mẽ himex pa. Nom Noehtija nhũm kot amnhî to mex xwýnh ã harê. Kot amnhî kaxyw hkôt hamaxpêr rãhã ho pa jakamã nhũm pre ã mex ã harênh anê.

⁸ Nê Noehti kanrêhã htãmnhwÿ Apraãwja na pre haxwÿja amnhî kaxyw Tîrtûm mã hamaxpêr tÿx o pa. Na pre Tîrtûm kot kãm pika nhõr ã kãm amnhî jarê nê ra kot ma hwÿr mẽnh kaxyw. Hãmri nhũm Apraãw kuma nê hkamnàr rom õ pika kaga nê ma pika hõja wÿr pa. Aa kot ma hwÿr mõi nê omunh kêt tã Tîrtûm kapêr mar xà hkôt õ pika kaga nê ma hwÿr pa ho pa.

⁹ Hãmri nê hwÿr põi nê omu nhũm Tîrtûm kãm:

—E pika ja kot paj nhÿrmã akanrêhã akra nê atãmnhwÿjê mã kugõ. Anê.

Hãmri nhũm kuma nê pikaja kamã pa ho pa. Ra kamã axtem mẽ uro hkwyjaja ri pa

nhũm Tirtũm kormã mẽ kator kêt ri nhũm mẽ õ pika hwÿr pøj nẽ mẽ kamã pa ho pa. Nom amnhĩm õrkwÿ mex nhĩpêx kêt nẽ. Kormã kêp õ pika kumrêx kêt ã hkamnhĩx jakamã ãm mry kà o ixkre nhĩpêx nẽ kamã pa ho pa. Nẽ nhÿhÿm pa kaxyw nẽ kugrà nẽ ma amnhĩ kôt o pa. Amnhĩ kaxyw Tirtũm mã hamaxpêr rãhã jakamã ã amnhĩ nhĩpêx anhÿr o pa.

Nẽ Apraãw kra Ijak nẽ htãmnhwÿ Jakoja wa Apraãw pyrã nẽ mry kà ho õrkwÿ nẽ ma amnhĩ kôt o pa. Nhũm Tirtũm kot Apraãw mã kapêr pyrã nẽ wa kãm wa hkanrêhã wa hkra nẽ wa htãmnhwÿjê mã pika nhõ ã amnhĩ kukamã wa kãm amnhĩ jarê.

¹⁰ Jakamã nhũm Apraãw kormã Tirtũm nhõ krĩ hwÿr àpir xa hã amnhĩ tã hamãr pè kot ho õ pika mã xwÿnhjê kamã pa ho pa. Kaxkwa hwÿr àpir mã xwÿnhjê mex kumrêx. Tirtũm kot hipêx jakamã koja mry kà ho ixkre nhĩpêxta rom aa hapêx kêt nẽ. Jakamã nhũm Apraãw mẽ pahpyrà nẽ ma kot hwÿr àpir xa hã amnhĩ tã Tirtũm jamãr rãhã ho pa.

¹¹⁻¹² Tã ra hpigêt tÿx nẽ hkurê hkêt nẽ pa. Te ra ri htyk kaxyw pa pyrãk. Nhũm hprõ Sara haxwÿja hpigêx tÿx nẽ. Kamrõ hkêt ã amgrã xohtõ rax kumrêx. Nhũm wa aa hkra hkêt nẽ pa htã nhũm Tirtũm nhÿrmã wa hkra hã wa kãm awjarê nhũm wa kuma nẽ amnhĩ kaxyw hkôt hamaxpêr kurê kumrêx. Nom amnhĩ tã kuma nẽ tee ri amnhĩ kukamã hamaxpêr hkêt nẽ. Na pre wa kuma nẽ xepn mã:

—Nà kot puj xep hãmri tã pahkra. Tirtũm kot hã ã pajarênh anhÿr kênã. Anẽ.

Tã ã wa kot hkra kaxyw Tirtũm mã hamaxpêr anhÿr jakamã na pre Apraãwja hprõ htu. Ra wa hamẽ hpigêt tÿx kumrêx tã nhũm htu. Nhũm wa hkra Ijakja gaa nẽ wa kãm kato. Jakamã nhũm wa gaa nẽ rĩ wa hkanrêhã wa htãmnhwÿ xohtõ rax o ohtõ rax. Ohtõ ho kaxkwa kamã kanhêti xohtõ jakre. Nẽ ohtõ ho gõ xujanãr mÿri pikahti grã hkryre jakre. Jakamã nhũm mẽ tee ri mẽ ho kõtã hpar mã. Nhũm Apraãw kêp mẽ hpàr krax.

¹³ Tã nhũm Apraãw nẽ Ijak nẽ Jakoja mẽ ri pa tãmtã nẽ htyk pa nẽ hapêx. Tirtũm kormã kot mẽ kãm pika jarênhã nhõr xwÿj ri

ra htyk pa. Nom kormã mẽ htĩr ri tanhmã kãm hamaxpêr to nẽ hamaxpêr o:

—Nà kormã Tirtũm kot mẽ inhmã pika jarênhã nhõr kêt tã koja nhÿrmã inhmÿr pè ixkanrêhã ixkra nẽ ixtãmnhwÿjê mã kugõ. Nà koja mẽ kãm kugõ. Ra kot hã inhmã amnhĩ jarênh kênã kot kêt mẽ kãm õr kêt.

Anhÿr o kaxyw kãm hamaxpêr rãhã ho pa. Jao hkĩnh nẽ hamaxpêr o:

—Nà inhõ krĩja axtem na. Na pa hte jar pika ja kamã ri mẽ hkôt ri ixpa. Te ixpê mẽ uro pyrã nẽ ri mẽ hkôt ixpa nom jar inhõ krĩ hkêt. Inhõ krĩ na kêt axte mã. Anẽ.

¹⁴⁻¹⁵ Na prem ã õ krĩ hõ hkukamã hamaxpêr anhÿr o pa. No õ krĩ htũmta mẽ kot hkaga nẽ pika hõ hwÿr mõr xwÿnhjê na prem ã harênh anhÿr kêt nẽ. Kop apu mẽ kot amnhĩm tãm mãn jarênh ronhÿx prem awjanã nẽ ma akupÿm hwÿr pa. Na prem axtem krĩ hõ jarê nẽ kormã hwÿr mõr kêt ã amnhĩ jarênh o pa.

¹⁶ Tã nhÿ krĩ na prem ã harênh anẽ? Nà kaxkwa kamã Tirtũm nhõ krĩja. Tãm na mex kumrêx jakamã nhũm prem kormã hwÿr ma àpir xa hã mẽ pahpyrà nẽ amnhĩ tã Tirtũm jamãr rãhã ho pa nhũm amnhĩ tã mẽ omu nẽ hkĩnh nẽ. Nẽ mẽ kot tãm amnhĩ nhĩpêx ã mẽ omu nẽ mẽ kêp hkra hã mẽ harênh ã hpijaãm kêt nẽ. Hãmri nẽ mẽ kutêp tanhmã õ krĩ ho mex to ho pa.

¹⁷⁻¹⁸ Na pre ra tanhmã Apraãw mã hkra Ijakja jarênh to nẽ kãm:

—Akra Ijak kanrêhã hkra nẽ htãmnhwÿjaja koja mẽ kêp ixkra. Anẽ.

Tã ra kot amnhĩ tã Apraãw kamã hamak kaxyw hkukamã hamaxpêr nẽ hamaxpêr o:

—Xà we Apraãw kãm ixkĩnh tÿx kumrêx nẽ kãm ixkôt amnhĩ nhĩpêx rãhã ho pa hprãm nà? Xà we kãm ixkĩnh tÿx o hkrata jakrenh? E pa kop we ja hã amnhĩ tã kamã ama nẽ omu mãn. Anẽ.

Hãmri nẽ kot hkra hpĩr nẽ kãm õr ã kãm karõ. Hãmri nhũm kuma nẽ ra kot kãm hpĩr kaxyw. Kot Tirtũm kot amnhĩ nhĩpêx ã omunh mex jakamã hkamnãr rom kot kãm hpĩr kaxyw.

¹⁹ Nẽ hamaxpêr o:

—Nà Tirtũm akupÿm kot mẽ ho htĩr xwÿnh kênã.

Anhÿr jakamã kãm hkra hpîr puma hkêt nê ra kot kãm hpîr mã tã nhũm Tîrtũm amnhĩ tã omu nê nê kãm kapêr nhũm kuma nê hpîr kêt nê wa ma akupÿm ôrkwÿ hwÿr mō. Tã ã kot hkra nhîpêx anhÿr jakamã Apraãw mã te ljak htyk nê akupÿm htîr pyræk.

²⁰ Nê ljakja na pre haxwÿja amnhĩ kaxyw Tîrtũm mã hamaxpêr tÿx o pa. Jao hkamnàr rom amnhĩ kra wa kãm Tîrtũm kot wa ho mex kukamã wa kãm harê. Kra Jako mē Ejauta wa kãm harê nê wa kãm:

—E koja nhÿrmã Tîrtũm inhmÿr pê war ato mex rãhã ho pa. Anê.

²¹ Nê Jakoja na pre haxwÿja amnhĩ kaxyw Tîrtũm mã hamaxpêr tÿx o pa. Jao hkamnàr rom hkra Juje mã Tîrtũm kot mē ho mex kukamã harê. Na pre Jakoja hkra nê htãmnhwÿ mē hpimràatã hprãm xàj ma Ejit wÿr pa nê kamã pa ho pa. Tã nhũm Jako hpigêt tÿx nê ra htyk kaxyw. Hãmri nê hkra Juje mē hkra wa mē kãm kapêr nê mē kãm:

—E na pa tee amnhĩ kamã ama. Na pa ra ixyk kaxyw. Nom koja Tîrtũm nhÿrmã inhmÿr pê mē ato mex rax nê. Anê.

Hãmri nê amnhĩ kaxpar xà hã pĩ hã amnhĩ kaxpa nê kãnhmã xa nê Tîrtũm mã mex o mex ã harê. Hãmri nê akupÿm nôr xà kamã nõn ty.

²² Nê Jujeja na pre haxwÿja amnhĩ kaxyw Tîrtũm mã hamaxpêr tÿx o pa. Jao htyk kaxyw nê hkamnàr rom hkwyjê mã tanhmã amnhĩ jarênh to. Ra hpigêt nê htyk kaxyw nê hkwyjê mã tanhmã amnhĩ tã karō hto nê mē kãm:

—E na pa ra ixyk kaxyw. Tã koja Tîrtũm inhmÿr pê nhÿrmã Ejit rùm mē akator nê ma akupÿm mē panhō pika hwÿr mē ato pa. Ra kot mē panhîgêt Apraãw mã amnhĩ jarênh xà hkôt. Jakamã kwa mē inhma. Kêr ka mē akupÿm anojarêt nê ma amnhĩ kôt ixtã kasãwja mÿ nê amnhĩ kôt ixto mō. Hãmri nê mÿtar mē panhō pika kamã mē anhō krĩ htã ijaxà pa jawÿ mē akuri ixtã pyka. Anê.

²³ Nê Mojes katorxà mē hipêêxàja na pre wa haxwÿja jajê pyrã nê amnhĩ kaxyw Tîrtũm mã hamaxpêr tÿx o pa. Juje hkanrêhã htãmnhwÿ na pre wa. Jakamã nhũm Ejit nhō pahija tee ri Ijaew xohtô

rax kumrêx ã mē omu nhũm ja kêp omnuj nê. Hãmri nhũm mē hkra myjaja mē hapôx kôt mē hamÿnh xwÿnhjaja kot mē hpar ã mē kãm karō. Tã nhũm Mojes kato nhũm hipêêxà mē katorxàja wa omu nhũm muxre nhũm wa tee ri hkukamã hamaxpêr. Hãmri nê pahi Paraohti mã mē hkra jamÿnh xwÿnh kot wa kêp hpîr pymaj ho pimxur o hã mytwrÿ axkrunêpxi. Tîrtũm kamnàr rom wa amnhĩ tã kãm uma hkêt nê ã kêp hkra ho hpimxur anê.

²⁴ Nê Mojes na pre haxwÿja amnhĩ kaxyw Tîrtũm mã hamaxpêr tÿx o pa. Kormã karàre ri na pre Paraohti hkra nija omu nê amnhĩm kumÿ nê ho hkra nê amnhĩ kôt o pa. Rãhã nhũm àptàr nhũm Ejit nhō xwÿnhjaja kêp pahi Paraohti htãmnhwÿ hã axpên mã harê. Hãmri nhũm tee ri amnhĩ tã mē kuma nê amnhĩ tã mē kãm aprã nê mē kãm:

—Kwa mē ã ijarênh anhÿr kêt nê. Ixpê mē akwÿ hkêt. Anê.

²⁵ ãm kãm Tîrtũm kwÿjê kôt pix mã ri pa ho pa hprãm. Nê kãm Ejit nhō pahi hkôt amnhĩ tomnuj prãm kêt nê. ãm mē kot amnhĩ tomnuj pix o paja na mē kãm hprãm nhũm ja hã mē omu nê tee ri mē hkukamã hamaxpêr nê hamaxpêr o:

—Nà kot paj mē hkôt ri ixpa hkêt kumrêx. Mē hkînh nê pa htã koja mē gaa nê ty nhũm mē hkînhja mē kêp hapêx. Nà kot paj Tîrtũm kwÿjê hkôt mãn ri ixpa ho ixpa. Mē kot Tîrtũm ã mē inhîpêx kati htã pa arĩ mē hkôt ixpa ho ixpa.

²⁶ Inhmã Ejit nhō xwÿnhjê hkôt ixkukrêx rax nê ri ixpa hprãm kêt. Kwãr mē mãmrĩ Tîrtũm ã tanhmã inhîpêx to. Koja mē ã inhîpêx anê pa ixpunuj nê ri ixpa htã koja Tîrtũm nhÿrmã ixto mex rax nê. Nà kot paj Ejit nhō pahihti hkôt ri ixpa hkêt nê.

Anhÿr jao ra mē pahpyrà nê Kris gryk ã mē hkaga.

²⁷ Tã akupÿm mēō pika hwÿr Ijaewjê ho môr kaxyw nhũm Ejit nhō pahihtija tee ri ja hã omu nê kamã gryk tÿx nê. No nhũm Mojesja amnhĩ kaxyw Tîrtũm kôt hamaxpêr tÿx o hkamnàr rom kãm mē uma hkêt nê. Nê mē kêp hkwyjê kator pa nê ma akupÿm mēō pika hwÿr amnhĩ kôt mē o pa. Tîrtũm kamnàr rom ã mē kêp mē ho kator anê. Aa kot no ho omunh kêt tã amnhĩ kaxyw kãm

hamaxpêr tÿx nê hkamnâr rom mē kator nê hamakêtkati nê mē o pa.

²⁸ Nê hkamnâr rom mē hkînh ã arîgro mē kot kãm “Pas” anhÿr xwÿnhhta ho hkra. Kormã Ejit rûm kator kêt ri. Nê kaxyw amnhî kwÿjê mã hã karõ nê mē kãm:

—E pa mē amã Tirtûm kapêr jarê ka mē inhma. Nà kot puj xep mē jarãhã ôwêhti hkwÿ pa nê hkamrô ru. Nê hkamrô ho panhôrkwÿ jakwakre hã pî kukõ. Hãmri nê ï kuxõt nê kuku. Kojã kamãt nhûm mē kot amnhî tomnuj xwÿnhjê pê mē hkra my kot wa piitã mē hpar mã xwÿnhja mō. Hãmri nê mē pamÿ ri mō nê ã mē pahte mē panhôrkwÿ nhîpêx anhÿrja ã omu nê tanhmã mē pahkrajê ho hkêt nê. Tirtûmja ã mē pahte amnhî nhîpêx anhÿr kaxyw ã inhmã karõ anê. Jakamã e pu mē hkamnâr rom ã amnhî nhîpêx anê kê mē pahkrajaja mē pahpê htyk kêt nê. Anê.

Hãmri nê ã mē kot Ejit rûm kator xã hã arîgrota ã mē hkînh o kator kra. Mē hkînhja na htem kãm “Pas” anê.

²⁹ Nê Ijaewjaja na prem haxwÿja Ejit rûm kormã Mojes kôt mē pa ri urak nê amnhî kaxyw Tirtûm mã hamaxpêr. Jakamã na prem ra gô xujanâr pê “Gô Kamrêk” anhÿr xwÿnhja mÿ ri kuhê nhûm Tirtûm mē kãm ho axkjê. Nê mē kãm hkôt ã ho amgrã nhûm mē hã hkamnâr rom mex nê rêr pa. No nhûm mē hkôt mē kot mē himex kaxyw mē mrrar xwÿnhjaja. Ejit nhô pôristijaja nhûm gôja akupÿm mē hã axkamur nê mē himex pa.

³⁰⁻³¹ Nê Ijaew kot Mojes mÿr pê Jojue hkôt pa ri mē urak nê amnhî kaxyw Tirtûm kôt hamaxpêr o pa. Na prem ra Tirtûm kot mē kãm pika nhôr xwÿnhhta wÿr pøj nhûm Tirtûm krî pê Jeriko hwÿr mē kurê. Mē kot kamã mē pa xwÿnh pê utâr kaxyw mē hwÿr mē kurê. Mēõ krî pu hã kahêja kên tÿx pix o na pre. Nê hprêk rax kumrêx. Nê krî nhô xwÿnhjaja kãm Tirtûm kapêr mar prãm kêt. Hãmri nhûm Tirtûm mē hã Ijaewjê mã amÿnê nê mē kãm:

—E mēõ krîja kot paj mē amã kugõ nom kêr ka mē inhmar kumrêx. Kêr ka mē apkati mē mē õ krî hwÿr mra nê kupu hpÿnh o atã apkati kêp 7 nê rî ma akupÿm mra. Anê.

Hãmri nhûm mē kuma nê mar xã hkôt ma Jeriko hwÿr mra. Hãmri nê hwÿr pøj

nê Tirtûm kamnâr rom krî puhã kahêja kupu hpÿnh o hã apkati kêp 7. Hãmri nhûm apkati pê 7ta ã nhûm kên tÿx o kahêja mē kêp amnhî krakrak nê rôrôk pa. Nhûm mē mra nê hkôt krî hwÿr agjê nê krî nhô xwÿnhjê nhîmex pa. Nom krî kamã kuprÿ pê Raapja Ijaew pyrã nê amnhî kaxyw Tirtûm mã hamaxpêr o pa jakamã nhûm mē kormã mē himex kaxyw mē hwÿr mör kêt ri amnhî kukamã mē hkwÿjaja kot mē hã ukapi ho pa kaxyw mē hwÿr mē kurê. Hãmri nhûm Raapja mē kêp amnhî pyrã nê Tirtûm kôt hamaxpêr ã mē omu nê hkwÿ kot mē himex pymaj amnhî nhôrkwÿ kamã mē kêp mē ho amÿxu nhûm mē hkã hkînh pê ma akupÿm hkwÿjê wÿr mō. Jakamã nhûm mē kot mē himex kaxyw mē hwÿr mra hãmri nê amnhî pyrã nê tanhmã Raap mē õ fãmii ho hkêt nhûm mē arî htîr nê pa. Mē urak nê amnhî kaxyw Tirtûm kôt hamaxpêr o pa hã omunh xã hkôt tanhmã mē ho hkêt nê.

³² ã na pre mē kot amnhî kaxyw Tirtûm kôt mē hamaxpêr xwÿnhjaja Tirtûm kamnâr rom amnhî nhîpêx anhÿr o pa. Nom jajê pixjaja na prem ã amnhî nhîpêx anhÿr hkêt nê. Mãânên Giteãw nê Parak nê Sãõ nê Jepte nê Tawi nê Sãmuew nê Tirtûm nhÿ hã mē kapêr o pa xwÿnhjaja. Jajê piitã na prem wamtajê pyrã nê amnhî kaxyw Tirtûm kôt hamaxpêr tÿx rãhã ho pa. Nom kot paj ixprî hã tanhmã mē kot hkamnâr rom amnhî nhîpêx to hã mē harênh kêt nê. Kot pa anê nê tokyx harênh par kêt nê. Mē ohtô rax kumrêx jakamã na pa ãm hkwÿ pix jarê nê hã kagã.

³³ Na prem hkwÿjaja Tirtûm kamnâr rom ma mē kot amnhî tomnuj xwÿnhjê nhô krî hwÿr mra nê mē kêp mē õ pika pytà. Nê mē hkwÿjaja Tirtûm kamnâr rom mē ho amnhîptâr mex o pa. Nhûm prem kãm Tirtûm kurê xwÿnhjaja mē hkwÿjê pynê nê ahkrehti kamã mry xoprê hkwÿ nhîpy mē kurê. Nhûm prem amnhî tã mē omu nê amnhî kaxyw Tirtûm mã hamaxpêr kurê kumrêx nhûm amnhî tã mē omu mē nê te mry jakwa ho pikamÿr tÿx pyrãk o mē hipêx nhûm ãm mē omunh o kuhê nê tanhmã mē ho hkêt nê. ã na prem Tirtûm kamnâr rom amnhî nhîpêx anhÿr o pa.

³⁴ Nhũm mẽ kot kuwy rax kãm mẽ hkwỳjê rēnh tã nhũm mẽ kot amnhĩ kaxyw Tĩrtũm mã hamaxpēr tỳx nhũm amnhĩ tã mẽ omu nē mẽ nē tanhmã kuwy ho nhũm mẽ hxēt kēt nē. Nhũm pre mẽ hkwỳjaja wapo ho mẽ hkamnhwỳr o mẽ hkwỳjê hpar kaxyw nhũm mẽ amnhĩ kaxyw Tĩrtũm mã hamaxpēr nhũm amnhĩ tã mẽ omu nē mẽ nē tanhmã mẽ ho nhũm mẽ amnhĩ rē nē mẽ umaj hprôt nē ma mra. Mẽ hihtỳx kēt tã Tĩrtũm kamnàr rom ỹ hã hihtỳx nē mẽ kãm mẽ hkurê xwỳnhjê ho krihkrit pa nhũm mẽ ma akupỳm hapêx.

³⁵ Nē mẽni hkwỳjaja na prem haxwỳja amnhĩ kaxyw Tĩrtũm mã hamaxpēr tỳx o pa. Jao mẽ hkrajaja mẽ kệp htyk tã nhũm prem Tĩrtũm kamnàr rom mẽ ho kuwỳ nhũm mẽ kuma nē akupỳm mẽ kãm mẽ ho htĩr.

Ã na prem amnhĩ kaxyw Tĩrtũm mã hamaxpēr pē mex nē pa anē. No na pre mẽ hkwỳjaja mẽ uràk nē amnhĩ kaxyw kãm hamaxpēr tỳx tã nhũm Tĩrtũm tokyx mẽ ho mex kēt nē. Na pre mẽ kãm mẽ hkurê xwỳnhjaja Tĩrtũm ã mẽ par kaxyw. Nē mẽ hkwỳjaja Tĩrtũm ã mẽ hipêx kati ho pa nhũm mẽ amnhĩ xà htỳx kãm hamak kãm ty. Nhũm mẽ himex kaxyw nē mẽ kãm:

—Kwa mẽ Tĩrtũm kaga. Kot kaj mẽ hkaga pa mẽ amã inhũre nē mẽ anhĩmex kēt nē. Anē.

No nhũm mẽ kuma nē ãm mẽ kuma nē amnhĩ kaxyw kãm hamaxpēr tỳx pē mẽ kãm:

—Nà mẽ kam nē mãmri ixpĩ. Inhmã ixtyk pyma hkêt. Kot paj ty nhũm Tĩrtũm akupỳm ixto ixtĩr pa kuri inhmex kumrêx nē ri ixtĩr tũm nē ixpa ho ixpa.

Anhỹr o mẽ kãm amnhĩ jarēnh jakamã hãmri Tĩrtũm kaga hkêt rãhã nhũm mẽ himex.

³⁶ Nē mẽ kãm mẽ hkurê xwỳnhjaja na prem Kris ã mẽ hkwỳjê mã hpēr o pikēnh pē mẽ htak xà ho mẽ htak rũnh o pa. Nē kàx o mẽ hkwỳjê hpa hpre nē mẽ hte hpre nhũm mẽ kệp prēs nē hkrĩ ho hkrĩ.

³⁷⁻³⁸ Nhũm prem kēn rũnh o mẽ hkwỳjê htak o mẽ kupa. Nē mẽ hayr o mẽ hkwỳjê pa. Nē mẽ hkamnhwỳr o mẽ hkwỳjê pa. Ã na prem Kris kôt mẽ hamaxpēr ã mẽ omunh xà hkôt mẽ hipêx anhỹr o pa.

Jakamã na pre mẽ hkwỳjaja mẽ umaj mẽõ krĩ rũm hapôj nē ma hprôt nē mra. Nē te mẽ õ krĩ hkêt pyrà nē kapôt ã kệp amrakati nē ri pa. Mẽ ê hkêt nē ôwēhti hkà ho ê nē ri hã pa. Nē motre kà ho amnhĩ pre nē ri hã pa. Nē kēn prêk ã api nē kre kamã hpimxur o pa. Nē pika hkre kamã hpimxur o pa. Nhũm mẽ kãm mẽ hkurê xwỳnhjaja te mẽ kệp ahpunu nē mẽ kệp ahkro pyràk o mẽ hipêx nē axpēn mã mẽ harēnh o:

—Nà mẽ mexti hã. Kwa pu mẽ piitã mẽ himex paa ri.

Anhỹr o mẽ harēnh tã nhũm Tĩrtũm mẽ uràk nē ã mẽ harēnh anhỹr kēt nē. Na pre mẽ mex kumrêx ã mẽ harē. Nē nhỹrmã kuri mẽ mex nē pa ho pa hkukamã mẽ harē.

³⁹ ã na prem Tĩrtũm kamnàr rom mẽ kãm mẽ hkurê xwỳnhjê kutã amnhĩ to htỳx kãm htyk o pa anē. Nhũm Tĩrtũm ja hã mẽ omu nē hkĩnh nē kãm mẽ hapê htỳx nē. No nhũm mẽ kormã htĩr ri amnhĩm Tĩrtũm kot mẽ ho mex xà jamỳnh kēt rãhã ty.

⁴⁰ Tã mo na pre Tĩrtũm kormã mẽ htĩr ri hkwỳjê pyrà nē mẽ ho mex kēt nē? Nà na pre kormã mẽ hkukamã hamaxpēr o:

—Nà kot paj kormã mẽ ho mex kēt nē. Kot pa mẽ mỳr pē mẽ kot ixkôt amnhĩ xunhwỳr mã xwỳnhjê jamãr grire mãn. Kêr pa inhõ krĩ kamã mẽ ho ixpimràatã mẽ ho mex rax kumrêx. Nà kot paj ã mẽ ho mex anē. Ja na kēt inhmã mex o kormã mẽ htĩr ri ixte mẽ ho mexta jakrenh. Anē.

Jao ra ã mẽ papajaja mẽ pakukamã hamaxpēr anē.

12

Mẽ pahte Jejus pyrà nē mẽmoj kutã amnhĩ to htỳx ã mẽ pamã karõ

Piripos 3.12-21

¹ Na pre mẽ pakukamã mẽ panhĩgêt kwỳjaja amnhĩ kaxyw Tĩrtũm mã hamaxpēr pē ã amnhĩ xà htỳx kamã hamak o pa anē. Tã te ra mẽ kot kỳj rũm kaxkwa rũm mẽ pahpumunh nē tanhmã mẽ pamã kapēr to pyrà nē mẽ pamã kapēr o:

—E mẽ inhma mẽ ixkanrêhã mẽ ixtãmnhwỳjaja. Na pa prem ã Tĩrtũm kamnàr rom amnhĩ nhĩpêx o ixpa anē. Mẽ kot ja hã mẽ inhĩpêx kati htã pa prem Jejus kaga hkêt nē. Tã kêr ka mẽ ixpyrà nē ã mẽ

kãm mẽ akurê xwýnhjê kutã amnhĩ to htýx anê. Nê mẽ ixpyrà nê amnhĩ kaxyw Tirtũm kôt pix mã ajamaxpêr týx rãhã ho ri apa. Anê.

Jakamã kwa kêr pu mẽ urak nê ã amnhĩ nhĩpêx anhÿr rãhã ho mãn ri papa. Te mẽ hprôt xwýnhjaja kot amnhĩ nhĩpêx pyrak o amnhĩ nhĩpêx. Na htem hprôt týx kaxyw mẽmoj pytĩ jamýnh nê ho hprôt hkêt nê. Na htem ý kamã hprôt o hprôt týx nê wam hkwýjê mã wa nê mra. Ja pyrà nê kêr pu mẽ pahte Tirtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xàja te mex pyrak no ãm mex kêt. Te ho mẽ hprôt xwýnh kot axtem nê mẽmoj pytĩ mýnh nê tee ri ho hprôt týxta pyrak. Kot puj mẽ tanhmã amnhĩ tomnuj to ho papa nê Tirtũm kapêr kôt amnhĩ nhĩpêx mex kêt nê. Jakamã kwa kêr pu mẽ Tirtũm kapêr gryk ã amnhĩ tomnuj nê amnhĩ to htýx rãhã ho papa. Te ho mẽ hprôt nê nhÿri mẽ àhuk xà pix kukamã hamaxpêr rãhã hprôt týx xwýnhhta pyrà nê ãm Jejus mã pajamaxpêr týx rãhã ho papa.

² E kot paj mẽ amã Jejus kot tanhmã mẽ panê amnhĩ nhĩpêx toja jarê ka mẽ inhma. Nà kot mẽ panê mẽ pahte amnhĩ tomnuj pãnhã amnhĩrer kaxyw htyk nhũm mẽ pahte hkôt amnhĩ xunhwÿr jakamã na hte mẽ pamã pajamaxpêr nyw gõ pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwýnhjaja kot pĩ kahpa hã nhôr nê hpĩr mã nhũm mẽ kutã mẽ kãm amnhĩ to htýx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tirtũm kaga hkêt nê. Na pre hamaxpêr o:

—Nà kwãr mẽ mãmrĩ ixpĩ. Kot paj ty nhũm Inhĩpêxà akupým ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê.

Tã na ra kaxkwa kamã Tirtũm xupôk rũm mex nê hkrĩ ho hkrĩ.

³ Jakamã kwa kêr pu mẽ kot ã mẽ panê amnhĩ nhĩpêx anhÿrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htýx nê xa. Tã kêr pu mẽ urak nê mẽ kãm mẽ pahkurê xwýnhjê kutã amnhĩ to htýx rãhã ri papa. Jao tee

ri amnhĩ kukamã pajamaxpêr o mẽ umaj Tirtũm kaga hkêt nê.

⁴ Na ka htem ma mẽ kot amnhĩ tomnuj xwýnhjê hwÿr mra nê mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwýjê nhĩpêxta pyrà nê kormã mẽ atôxpĩr kêt nê.

Tirtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

⁵ Nê mãn ka mẽ arĩ Tirtũm kapêr ã kagã htũm kwý hã ano htýx japêr. Mẽ pahpê Tirtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nê mar týx nê mẽmojta kaga kurê kumrêx. No mẽ ama nê tee ri kot nê akurê xwýnhhta kukamã ajamaxpêr o ri akapĩrĩ o axtem nê Tirtũm kaga hkêt nê. Ama nê kot amã mẽmoj nê kapêr xwýnhhta kaga kurê kumrêx.

⁶ Na hte Tirtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

⁷ Jakamã kot kaj mẽ tanhmã amnhĩ tomnuj toja mÿrapê tanhmã apunuj kute nê ri apa htã no ãm tee ri amnhĩ kukamã ajamaxpêr hkêt nê. Kêt mẽ ãm ajamaxpêr o:

—Nà ixte tãm amnhĩ nhĩpêx kaxyw na Tirtũm ã inhĩpêx anê. Ixpê hkra hã ixte amnhĩ to mex o ixpa prãm xàj ã inhĩpêx anê.

Anhÿr o mãn kêt ajamaxpêr. Na hte mẽ hipêxà mẽ hkra kot amnhĩ to mex kaxyw ã mẽ hipêx anê. Tã Tirtũm na hte mẽ urak nê ã mẽ panhĩpêx anê.

⁸ No koja mẽhõ hkra kot tanhmã amnhĩ tomnuj to hã omu nê ãm omu nê hã tanhmã ho hkêt nê. Hã koja hkraja te hipêxà hkêt nê hã awrãre nê ri pa pyrak. Tã mẽ pahpê Tirtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkêt

xwÿnhjaja nhũm hte ja hã mẽ omu nẽ ãm hã mẽ omu nẽ hã kormã tanhmã mẽ hipêx to hkêt nẽ.

⁹ Nẽ na hte mẽ panhĩpêêxà mẽmoj tã mẽ pamã karõ pu htem kuma nẽ hkôt amnhĩ nhĩpêx. Ja mex. Nom kaxkwa kamã Mẽpahpãm maatija mẽ pahte mar nẽ hkôt amnhĩ nhĩpêxja na kêt mex kumrêx. Kot puj mẽ ã amnhĩ nhĩpêx anẽ nẽ nhỹrmã kuri pamex nẽ pahtĩr tũm nẽ papa ho papa.

¹⁰ Nẽ mẽhprĩre na htem hamaakro nhũm mẽ hipêêxà tanhmã hã mẽ ho. Hã mẽ hkaprêprêk rÿ hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nẽ axte hkêt kaxyw. Ja mex. Tã mẽ papajaja. Mẽ pahpê Tĩrtũm kra na pu htem tũhã tanhmã amnhĩ tomnuj to nhũm mẽ pahpumumu nẽ tanhmã hã mẽ pahto. Mẽ pahte amnhĩ pumunh nẽ axte hkêt kaxyw. Uràk nẽ amnhĩ to mex pix o papa kaxyw.

¹¹ Na hte mẽmoj tã tanhmã mẽ panhĩpêx to pu mẽ tee ri amnhĩ pumu nẽ pahkaprĩ nẽ pahkĩnh kêt nẽ ri papa. Nom kot puj mẽ tokyx tanhmã amnhĩ tomnuj tota kaga nẽ akupÿm Tĩrtũm kôt tãm amnhĩ nhĩpêx o papa nẽ akupÿm pahkĩnh nẽ pajamakêtkati nẽ ri papa.

Mẽ pahte Tĩrtũm kaga hkêt ã mẽ pamã karõ

¹² Jakamã e kwa kêt ka mẽ amnhĩ to htÿx nẽ apa. Mẽ kot Kris ã tanhmã mẽ anhĩpêx to htãã. ãm Tĩrtũm kôt pix mã amnhĩ nhĩpêx mex pẽ akĩnh nẽ apa.

¹³ Kêt kê Kris kôt atõjê hõ tee ri mẽmoj tã amnhĩ pumunh kôt ra Tĩrtũm kaga kaxyw tã ã mẽ ate amnhĩ nhĩpêx anhÿr ã mẽ apumu nẽ mẽ apyrà nẽ akupÿm hkôt amnhĩ xãm tÿx nẽ hkaga hkêt nẽ.

¹⁴ Nẽ kêt ka mẽ tãm ri axpẽn nhĩpêx o ri apa. Jao axpẽn kôt ajamakêtkati nẽ ri apa nẽ amnhĩ to mex pix kukamã ajamaxpêr. No kot kaj mẽ anhÿr kêt nẽ nhỹrmã mẽ panhõ Pahi Maati hwÿr axàpir nẽ kuri amex nẽ apa hkêt nẽ.

¹⁵ Na hte Tĩrtũm mẽ pahto mex nẽ mẽmoj to mẽ pakutã nojarêt rãhã o pa. Jakamã kwa kêt ka mẽ hkaga hkêt nẽ. Nẽ tanhmã ri ajamaxpêr punuj to ho ri apa hkêt nẽ. Kot ka mẽ ã amnhĩ nhĩpêx anẽ nhũm Kris

kôt mẽ pahkwÿjaja ja hã mẽ apumu nẽ mẽ apyrà nẽ tanhmã amnhĩ tomnuj.

¹⁶ Nẽ kêt ka mẽ axpẽn kãm apijaàm kêt o ri apa hkêt nẽ. Nẽ te finat Ejau kot amnhĩ nhĩpêx pyràk o ri apa hkêt nẽ. Na pre Tĩrtũm ã hpijaàm kêt nẽ hkwyjê kamã hpijaàm kêt o pa. Nẽ Tĩrtũm mã hamaxpêr kêt kumrêx. Kêp Ijak kra kot wa jakamã koja nhỹrmã hipêêxà mÿr pẽ kêp hikukrêx nẽ õ pika piitã ho àrĩk pa. Hãmri nhũm hipêêxà kot ho Tĩrtũm wÿr nhũm kot ho mex kaxyw mã tã nhũm axtem nẽ mẽmo arĩgro hã kãm prãm xàj kot kêp mẽmoj to àrĩk mã xwÿnhhta htõ Jako mã hkaga hpa. Mankwÿrtre gõj kãm ãm prãm xàj kãm hkaga hpa. Jakamã nhũm Jako hpãnhã te kêp Ijak kra kot wa pyrà nẽ mÿr pẽ õ mẽmoj piitã ho àrĩk mã.

¹⁷ Gaa nhũm Ejau tee ri ã amnhĩ nhĩpêx anhÿrja mã hamaxpêr o hkaprĩ nẽ. Nẽ tee ri kãm Jako kot akupÿm kãm mẽmojta nhõr prãm kaprÿ. Nẽ mur nẽ hã hipêêxà wÿ no nhũm axte kãm mẽmoj nhõr kêt nẽ. Nhũm kot ho Tĩrtũm wÿr kaxyw tee ri amnhĩ to kuwÿ no nhũm kuma nẽ ãm kuma nẽ kãm ho anhÿr kêt nẽ.

¹⁸ Nẽ amnepê mã Tĩrtũm kot mẽ panhĩgêxjê mã kapêr kaxyw na prem hixêt prêk pẽ Sinai jarênhja wÿr akuprõ nẽ hparpê kuhê. Hãmri nhũm hixêt nhĩmõk ã kuwy hpõk rax kumrêx. Nẽ kuwy mÿr ri kakrã htyk ajêt. Nẽ kòk àpêr tÿx nẽ. Nhũm Ijaewjaja hixêt krax ã omu nẽ kãm maa ho htertet o kuhê.

¹⁹⁻²¹ Hãmri nhũm mẽhõ pifti kakõ nhũm Tĩrtũm hixêt nẽ mẽ kãm kapêr nẽ mẽ kãm:

—E mẽ inhma. Kêt ka mẽ hixêt ã axàpir kêt nẽ. Kot kaj mẽ atõ hã api rÿ mẽ akrit õ hã api ka mẽ ja hã omu nẽ kaxyw kên rũnh kwÿ jamÿ nẽ ho htak o apĩ. Anẽ.

Hãmri nhũm mẽ piitã tee ri kuma nẽ kãm ma htÿx kumrêx nẽ amnhĩ nẽ kãm:

—Kwa hãmri Tĩrtũm. Axte mẽ inh mã mẽmoj jarênh kêt nẽ. Mojes pix mã mãn mẽ ixkaxyw tanhmã kãm akapêr to. Anẽ.

Jakamã nhũm Mojes Tĩrtũm mã amnhĩ jarênh nẽ kapêr mar kaxyw hixêtja ã api. Kãm ma nẽ htertet rãhã mõ nẽ hã api.

²² Nom mẽ kãm ma ho Tĩrtũm mã amnhĩ jarênh tã mẽ papajaja na pu htem mẽ kurom paxãmnhĩx kãm amnhĩ jarênh o

papa. Na pu htem kām amnhī jarēnh kaxyw nē hixêt prêk ã paxàpir kêt nē. Te ra mē pahte ma kaxkwa hwÿr ò krī hwÿr paxàpir nē pano ho omunh pê kām amnhī jarēnh pyrāk. Ò krīja mex o mex. Kamã kapêr o mē wrÿk xwÿnhjaja ohtô o ohtô. Na htem kamã hkīnh rãhã ho pa ho pa.

²³ Nē ò krī hwÿr na hte hkra xàpir xwÿnhjaja ri pa. Nē mē papajaja na pu htem kām amnhī jarēnh kaxyw nē te kaxkwa kamã kuri pakuhê nē kām amnhī jarēnh pyrāk o amnhī nhīpêx. Te mē pahpê hkra kot wa pyrāk jakamã mē pamã uma hkêt. Nhūm pre Tirtūm ra ò kagà kamã mē pakutêp amnhīm mē panhīxi hã kagà hpa. Na hte mēmoj piitã hamãr o hkrī. Nē krīja kamã amnepê m kormã Kris kot mē pahwÿr wrÿk kêt ri nhūm ra amnhī kaxyw Tirtūm kôt hamaxpêr mex xwÿnhjaja haxwÿja ra kamã ri pa. Ra Tirtūm kot mē ho hkra jakamã nhūm mē kuri ri pa ho pa.

²⁴ Nē Jesus haxwÿja kamã pa ho pa. Na pre mē panê htyk nē hkamrô pikapīrja o mē pahte amnhī tomnuj pãnhã amnhīre. Jakamã na pu htem hkôt amnhī xunhwÿ nhūm mē pahto hkra pu mē paxàmnhīx ri Tirtūm mã amnhī jarēnh nē amnhī to hwÿr o papa.

Amnepê m na pre Tirtūm tee ri Kaī kot htô Apew pīr nē hkamrô pikapīrja ã omu nē hamaxpêr o:

—Nà ã kot amnhī nhīpêx anhÿr jakamã kot paj hã homnuj tÿx nē. Anē.

Tã ra hpãnhã Jesus kot mē panê htyk nē hkamrô pikapīrja ã omu nē ra axtem hamaxpêr o:

—Nà ãm hãmri na Ixkraja mē nê ty. Jakamã mē kot hkôt amnhī xunhwÿr xwÿnhjaja kot pa Ixkra kukwak ri mē kot amnhī tomnuj mÿrapê tanhmã mē ho hkêt nē.

Anhÿr o mē pakukamã hamaxpêr. Æ hamaxpêr anhÿrja mex o mex.

²⁵ Na pre Mojes Tirtūm nhÿ hã mē panhīgêxjê mã xatã mē kām Tirtūm kapêr jarēnh o ri pa nhūm mē kuma nē hkôt amnhī nhīpêx o pa. Tã gaa nē ra hã nohkêt pa nē akupÿm mē kot amnhī nhīpêx tūm o awjanã nhūm Tirtūm tee ri ja hã mē omu nē mÿrapê tanhmã mē hipêx to. Tã nhūm

Kraja kaxkwa rūm mē pahwÿr wrÿ nē mē pamã kapêr. Jakamã kwa mē okora kêr pu mē panhīgêxjê pyrã nē mē pahte amnhī nhīpêx tūm o paxujanãr kêt nē. Kot puj mē anē nhūm Tirtūm ja hã mē pahpumu nē mē urak nē ja hã tanhmã mē panhīpêx to.

²⁶ Amnepê m Tirtūm kot hixêt prêk pê Sinai kamã mē kām kapêrja. Na pre kapêr tÿx o pika ho àk nhūm htertê tÿx nē. Tã koja nhÿrmã axte pika ho àk nē kaxkwa ho àk nhūm wa hamê htertê tÿx kumrêx. Koja axte ho anhÿr ho pixi nē axte ho anhÿr kêt nē.

²⁷ Tã nhÿrmã axte mēmoj to àk ã amnhī jarēnh jakamã koja mēmoj to kator xwÿnhhta piitã ho àk. Nē mē pahte panhīhkra ho mēmoj nhīpêx xwÿnhja nhūm ho àk nhūm htertê tÿx kām hpigrãnh pa nē hapêx. Nhūm mēmoj htertê nē hpigrãnh kêt xwÿnh pixjaja arī rãhã ho rãhã.

²⁸ No Tirtūm nhô krī koja htertê nē hapêx kêt nē. Nē mē papajaja mē pahpê hkra jakamã te ra kuri ò krī kamã ri mē papa pyrāk. Jakamã kot puj mē mē urak nē pajapêx kêt nē. Jakamã e kwa kêr pu mē amnhī tã Tirtūm mã mex o mex ã harēnh nē hã pahpijaàm rãhã ho papa. Nē tanhmã amnhī tomnuj to hã amnhī pumu nē Tirtūm pumaj mēmojta kaga kurê kumrêx. Æ mē pahte amnhī nhīpêx anhÿr o papaja na Tirtūm kām hprãm.

²⁹ Hihtÿx o hihtÿx jakamã koja mēmoj tã akamã gryk kot kaj amex kêt o amex kêt.

13

Mē pahte Tirtūm kām hprãm xà hkôt amnhī nhīpêx ã mē pamã karô

Rômãn 12.1-2; Epes 4.1-3; Korosê 1.10-11; Wam Tesarôn 4.1-12; Wam Pêtre 2.11-12; Wam Juãw 3.17-18

¹ Nē e kwa Kris kôt ixtô nē ixtôxjaja. Kêr pu mē arī Kris kôt pahkwÿjê ho mex o mãn axpên kôt ri papa. Nē kêr pu mē tanhmã pahpunuj to hã amnhī pumunh tã axpên to mex mã panhÿrer kêt nē. Æ axpên nhīpêx anhÿr rãhã ho papa.

² Nē amnepê mã na pre mēmojaja nhÿhÿnh mra nē mē panhīgêxjê hō hwÿr pøj. Hãmri nhūm mē omu nē htÿx axtem krī hō nhô xwÿnh ã mē hkamnhīx tã no

nhũm mẽ kêp Tĩrtũm kapêr o mẽ wrỳk xwỳnh kwỳ na prem. Hãmri nhũm amnhĩ nhõrkwỹ hwỳr mẽ kuwỳ nhũm mẽ ma hkõt mra nê kuri pøj nê kutã apku. Jakamã kwa koja nhỹhỹnh krĩ hõ rũm mẽmojaja ma mẽ awỳr mõ ka mẽ omu nê axãmnhĩx amnhĩ nhõrkwỹ hwỳr mẽ hwỳr kurê kumrêx kê mẽ ari pøj. ã mẽ hipêx anhỹr o apa hãmri nê nhỹrmã mẽ panhĩgêtja pyrã nê amnhĩ wỳr Tĩrtũm kapêr o mẽ wrỳk xwỳnhjê hõ hwỳr japêr. Mẽ urak nê ja hã mẽ omunh kêt tã atỳx amnhĩ wỳr mẽ awỳ nhũm ja mẽ amã mex o mex.

³ Nê kêr ka mẽ ra mẽ kot Jejus ã mẽ akwỳjê pynênh nê mẽ hagjênh xwỳnhjê mã ajamaxpêr rãhã ho ri apa nê mẽ ho ajamakêtkati hkêt nê. Te mẽ kajaja mẽ ãhkõ hã mẽ hagjênh xà kamã apunuj nê akrĩ pyrak o mẽ kãm ajamaxpêr o ri apa. Jao mẽ kamã axukaprĩ ho mẽ hwỳr mra nê mẽ kãm mẽmoj nhõr o ri apa.

⁴ Nê mẽ kot axpên to hprõja na mex. Nom kêr ka mẽ amyjaja ãm aprõ pix tânopxar o ri apa. Nê mẽ anijaja mẽ ajaxwỳja amjên pix tânopxar o ri apa. No mẽ hkuprỳjê hwỳr mẽ mrar xwỳnhjaja nê nhãm mẽ kêp mẽ hprõ ho amnhĩkati xwỳnhjaja nê nhãm mẽ kêp mẽ mjên o amnhĩkati xwỳnhjaja koja Tĩrtũm ja hã mẽ omu nê mẽ homnuj tỳx kumrêx.

⁵⁻⁶ Nê kêr ka mẽ akàxpore rũnh kêt ã amnhĩ pumu nê tee ri amnhĩ kukamã ajamaxpêr o akaprĩ hkêt nê. Na pre Tĩrtũm mẽ pamã kapêr o:

Kot paj akõt ri ixpa rãhã ho ixpa nê aa arer rỳ akaga hkêt kumrêx.

Anhỹr jakamã kot kaj mẽ akàxpore grire htã akaprĩ nê apa hkêt nê. Aa Tĩrtũm kot mẽ pahkaga hkêt ã amnhĩ jarênh jakamã mẽmoj kot pu wem omu nê pamã nhãm ri mẽ uma ho papa? Tĩrtũm kot mẽ pahkõt pa ho pa kênã. Jakamã na pu htem pajamaxpêr o:

Nà Pahi Maatija ra kot ixkõt pa ho pa xwỳnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kêp ixto?

Anhỹr o pajamaxpêr o papa.

⁷ Nê mẽ kot Kris mã mẽ ajamãr o mẽ pa xwỳnh ra mẽ htyk xwỳnhjaja ka mẽ arĩ mẽ kot tanhmã amnhĩ nhĩpêx to ho paja mã

ajamaxpêr rãhã ho ri apa. Na prem Tĩrtũm kapêr o mẽ ajahkre mex nê. Nê tãm ri amnhĩ nhĩpêx o ri mẽ akõt pa. Nê amnhĩ kaxyw Tĩrtũm kõt pix mã hamaxpêr rãhã ty. Tã kêr ka mẽ urak nê ã amnhĩ nhĩpêx anhỹr o ri apa rãhã ty.

⁸ Nê Jejus Krisja arĩ rãhãã. Nê amnepê mã kot amnhĩ nhĩpêxja mããnên arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nê kwa kêr ka mẽ Tĩrtũm kõt amnhĩ nhĩpêx rãhã ho ri apa. Na hte kapêr o hêx xwỳnhjaja mẽ awỳr mra nê mẽ amã:

—Amnepêm mẽ ate Tĩrtũm kot mẽ amex ã mẽ ajarênh kaxyw mẽ ate kãm mẽmo mry nhõr nê akupỳm hamỳnh nê hkur o apa htã ra ja ho anhỹr kaga. Kwa mẽ ja ho awjanã nê axte ã amnhĩ nhĩpêx anhỹr o ri apa. Kê Tĩrtũm ja hã mẽ apumunh kõt mẽ amex ã mẽ ajarê.

Anhỹr o mẽ amã kapêr. Nom xà na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kõt mẽ pamex ã mẽ pajarê? Xà na htem mẽmo mẽ apkur xà hkur pê amnhĩ kaxyw Jejus kõt hamaxpêr tỳx o pa? Nà na htem anhỹr kêt nê. Na pu htem mẽmoj kur kõt pamã Tĩrtũm kĩnh kêt nê. Kêt mẽ paxàpkur xàja mẽ panhĩ pix o hihtỳx kaxyw na. Na hte Jejus kõt mẽ pahto paxihtỳx kêt nê. ãm Tĩrtũm kot amarĩ kãm mẽ pajapê nê mẽmoj to mẽ pakutã nojarêt jakamã na pu htem ja hã amnhĩ pumu nê amnhĩ kaxyw hkõt pajamaxpêr tỳx o papa.

¹⁰ Tĩrtũmja Jejus kot mẽ panê htyk ã omunh xà hkõt ra kot mẽ pamex ã mẽ pajarênh jakamã mo kaxyw kot pu mẽ axte kot mẽ pamex ã mẽ pajarênh kaxyw kãm mẽmo mry gõ nê hkwy hku? Koja mẽhõ akupỳm Tĩrtũm kapêr tũm o ujanãr jao Jejus kot nê htyk nê hkamrõ pikapĩrja kaga.

¹¹ Amnepêm na pre patre maatijaja tõhã mẽ kãm mẽmo mry hpar xwỳnh hkamrõ ru nê guhkrax kãm kuru nê hamỳ nê ma o mra nê Tĩrtũm nhõrkwỹ kaàkre hwỳr hitom maati hwỳr ho agjê. Tĩrtũm kot mẽ omunh nê axte mẽ kot amnhĩ tomnuj mã hamaxpêr kêt kaxyw. Hãmri nhũm hpãnhã ã mỳ nê krĩ pê ho kato nê ma o mra nê nhỹri amỳm hkwyjê hkax ã ho hxêt pa. Tĩrtũm

kapêr tûm kôt na prem ã amnhĩ nhĩpêx anhÿr o pa.

12 Tã ja pyrã nê na prem ma krĩ pê amÿm Jejus o tẽ nê kupĩ nhũm hkamrô axkapĩ. Kot mẽ pahte amnhĩ tomnuj pãnhã amnhĩrer nê mẽ pahto mẽ pahpê Tĩrtũm kra kaxyw ã htyk nê hkamrô pikapĩr anê.

13 Na prem Tĩrtũm kapêr tûm gryk ã Jejus kaga nê pôristijê mã anê nhũm mẽ ma krĩ pê ho kato nê o tẽ nê kupĩ. Tã kêr pu mẽ jajê rom Jejus gryk ã mãn Tĩrtũm kapêr tûm kaga. Kwãr mẽ mãmrĩ Jejus pyrã nê Tĩrtũm ã tanhmã mẽ pahto nê amnhĩ nê nhÿhÿm mẽ pajano.

14 Kêr jar mẽ papapxàja kêp mẽ papapxà kumrêx kêr. Nê jar mẽ panhõ krĩja kêp mẽ panhõ krĩ kumrêx kêr. Mẽ pamã te kot pô nhĩrõnh o ixkre pix pyrãk. No kêr mẽ panhõ krĩ kumrêx koja jar mẽ panhõ krĩ rom aa hapêx kêr nê. Tã tãm na pu mẽ kormã ma hwÿr papa kaxyw arĩ amnhĩ tã Tĩrtũm jamãr o papa.

15 Nê na htem Ijaew arĩ ohtô nê amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhÿr hkêr nê. Kot puj mẽ ãm Jejus kukwak ri Tĩrtũm mã mex o mex ã harênh rãhã ho mãn papa. Jao te mẽ pahte kãm hkĩnh xà nhõr pyrãk o amnhĩ nhĩpêx.

16 Nê kêr pu mẽ arĩ axpên to mex o ri axpên kôt papa. Nê kêr mẽhõ kêp amrakati japêr ka ja hã omu nê amnhĩ kutã kãm anhõ mẽmoj kwÿ. ã kot puj mẽ axpên nhĩpêx anhÿr rãhã ho ri axpên kôt papa. Kot puj mẽ anê nê te mẽ pahte Tĩrtũm mã hkĩnh xà nhõr pyrãk o amnhĩ nhĩpêx. ã mẽ pahte amnhĩ nhĩpêx anhÿrja na mex o mex.

17 Nê kêr ka mẽ Kris kôt mẽ akrãhtũmjê kapêr ma nê mẽ hkôt amnhĩ nhĩpêx mex nê. Na htem Tĩrtũm mã mẽ ajamãr o ri mẽ akôt pa. Koja mẽ nhÿrmã mẽ kot tanhmã mẽ anhĩpêx to hã Tĩrtũm mã amnhĩ jarê. Jakamã mẽ kãm mẽ ato ajuta prãm. Tã kêr ka mẽ kapêr ma nê mẽ hkôt ri amnhĩ nhĩpêx mex o ri apa. Kêr kêr mẽ amnhĩ tã mẽ apumu nê hkĩnh nê. No kot kaj mẽ ama nê ãm mẽ ama nhũm mẽ tee ri amnhĩ tã mẽ apumu nê hkaprĩ nê. Jao tee ri kot tanhmã mẽ ato ajuta mex to hkukamã hamaxpêr.

18 Nê kwa kêr ka mẽ ixto Tĩrtũm wÿr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêr. ãm inhmã amnhĩ to mex pix o ri ixpa hprãm.

19 Nê kêr ka mẽ ixto awÿ kê tokyx akupÿm mẽ awÿr inhmê. Na pa ra inhmã mẽ apumunh prãm tÿx nê.

Kagã nhĩpêx xwÿnh kot tanhmã mẽ ho Tĩrtũm wÿr to hã harênh

Epes 3.14-19; Piripos 1.0-11; Wam Tesarõn 3.9-13, 5.23; Sikũn Tesarõn 1.11-12, 2.16-17

20 Nê mẽ panhõ Pahihti Jejus Krisja na hte mẽ panhĩpêx o te ôwêhti jamãr xwÿnh kot hkrit jamãr pyrãk o pa. Jakamã kêp mẽ pajamãr xwÿnh maati mex na. Na pre mẽ panê ty nhũm Tĩrtũm akupÿm mẽ pamã ho htĩr nê mẽ pamã harênh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê nhÿrmã ty pa akupÿm mẽ ato mẽ atĩr ka mẽ ixri atĩr tûm nê apa ho apa. Anê.

Tĩrtũm kêp mẽ pahto mẽ pajamakêtkati nê ri mẽ papa xwÿnh na.

21 Tã na pa hte tanhmã mẽ ato hwÿr to ho ixpa nê mẽ ato hwÿr o:

—Pa Tĩrtũm. E kwa tanhmã ixkwÿjê ho mex to kêr mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kêr Jejus haxwÿja tanhmã mẽ ho mex to kêr mẽ war amã hprãm xà hkôt pix mã war amã tanhmã ri amnhĩ nhĩpêx to ho pa. Anê.

E kêr pu mẽ arĩ Jejus Kris mã mex o mex ã harênh rãhã ho papa.

Kagã jatur xà kamã mẽmoj jarênh

22 E Kris kôt ixkrãmnhwÿjaja. Nã na pa ã mẽ amã kagã nhĩpêx anê. Jejus kôt mẽ ato mẽ axihtÿx kaxyw. No na pa ho ry nê hipêx kêr nê. Ixte ho grire nê hipêx jakamã kwa kêr ka mẽ kamã harê nê mar tÿx nê hkôt amnhĩ nhĩpêx mex o ri apa.

23 Nê mãn ka mẽ ra Ximotre jarênh mar japêr. Na pre Kris ã mẽ hagjênh xà kamã hkrĩ hã apkati xohtô nê. Tã nhũm xep mẽ ra kator. Tã koja kormã mẽ awÿr inhmõr xwÿj ri man ixwÿr mō nê hpôx japêr kot paj ma amnhĩ kôt mẽ awÿr o mō ka mẽ omu.

²⁴ Nê kêr ka mẽ kot Kris mã mẽ ajamãr xwýnhjê mã ijarê. Nê atar Tĩrtũm krajê piitã mẽ kãm ijarê.

Nê ota jar Tĩrtũm kra hkwýja piitã mẽ awýr hpêr mẽ.

²⁵ E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.

Xiakre Xiakre kot Jejus kôt hkwyjê piitã hwÿr kagà nê mēnh

Xiakre na pre kagàja nhîpêx. Kêp Jejus tō nê kêp Jerujarê kamã mē kot Jejus kôt amnhî xunhwÿr xwÿnhjê nhō pastô na pre. Nê kêp Ijaew. Jakamã na pre hkwyjê mã kagàja nhîpêx nê krî piitã hkôt urak nê Jejus kôt mē kot amnhî xunhwÿr xwÿnhjê hwÿr kurê. Jejus ã mē kãm mē hkurê xwÿnhjaja na prem mē hipêx kati nhũm mē amnhî xà htÿx kamã hamak o pa. Jakamã nhũm Xiakre kot mē hamaxpêr o mē hihtÿx kaxyw kagàja nhîpêx nê mē hwÿr kurê nê mē kãm:

¹ Pa ixkwÿjaja. Xà mē amex? E ixpê Xiakre na pa. Ixte Tirtũm mē Pahihti Jejus Kris wa kãm tanhmã amnhî nhîpêx to xwÿnh na pa. Jakamã kot paj kagàja nhîpêx nê pika piitã hkôt mē apiitã mē awÿr kurê. Mē apê Tirtũm krajê hwÿr.

Mē pahpunuj tã mē pahte amnhî kaxyw Tirtũm kôt pajamaxpêr

Rukre 6.20-23; Rômãn 5.3-5; Korosê 1.11; Wam Pêtre 4.12-19

²⁻³ E ixkwÿjaja. Kêr ka mē atō tanhmã amnhî to rÿ tanhmã apunuj to. Rÿ mēhō tanhmã Jejus ã mē anhîpêx to. Tã kêr ka mē ja hã amnhî pumu nê tee ri amnhî kukamã ajamaxpêr o ri akaprî hkêt nê. Arî akînh kãm amnhî kaxyw Tirtũm kôt ajamaxpêr tÿx rãhã ho ri apa. Kot kaj mē ã amnhî nhîpêx anê nê gaa nê rî mēmoj punuj pē Jejus kôt amnhî xunhwÿr tÿx nê. Jakamã kwa kêr ka mē tanhmã apunuj to hã amnhî pumu nê ã mē ate amnhî nhîpêx anhÿrja kukamã ajamaxpêr pē akînh nê ri apa.

⁴ Nom kêr ka mē tee ri tanhmã apunuj to hã amnhî pumu nê akaprî xà Tirtũm kaga hkêt nê. ãm amnhî kaxyw hkôt ajamaxpêr tÿx rãhã ho ri apa. Kot kaj mē ã amnhî nhîpêx anê nê gaa nê Tirtũm noo mã tãm amnhî nhîpêx mex o ri apa. Nê kãm hprãm xà hkôt pix mã amnhî nhîpêx o apa.

Mē pahte tanhmã amnhî kute hã amnhî pumunh kôt amnhî to Tirtũm wÿr ã mē pamã karō

Matêwre 21.18-22

⁵ Nê kêr ka mē mēmoj mÿrapê tanhmã apunuj to hãmri nê tee ri ja hã amã Tirtũm mã ajamaxpêr tÿx prãm nhũm apê ja hihtÿx japêr. Rÿ mēmoj tanhmã apê amnhî nhîpêx to ka tee ri hkukamã ajamaxpêr japêr. Kêr ka mē ã ajamaxpêr anhÿr japêr hãmri nê amnhî to Tirtũm wÿr kurê kumrêx. Kot amã ajamaxpêr mex nhōr nhũm ate ÿ hã tãm ajamaxpêr kaxyw amnhî to awÿ. Kot kaj mē ã amnhî to hwÿr anê nhũm amnhî tã mē ama nê mēmojta kutã tanhmã ato axihtÿx to kurê kumrêx ka ÿ hã hkôt ajamaxpêr tÿx mex o ri apa. Jao tanhmã akute htã akînh nê ajamakêtkati nê ri apa. Koja Tirtũm tee ri amã mēmoj kôt ajamaxpêr tÿx prãm kaprÿ hã apumu nê hã amã àkjêr kêt nê. Koja ate amnhî to hwÿrta ma nê tanhmã ato mex to.

⁶ Nom kêr ka mē amnhî to hwÿr kãm tee ri amnhî kukamã ajamaxpêr kati hkêt nê. Rÿ ajamaxpêr o:

—Koonên. Koja apu Tirtũm inhmã ja ho anhÿr japêr.

Anhÿr o tee ri amnhî kukamã ajamaxpêr kati hkêt nê. ãm akînh kãm tanhmã ate amnhî to hwÿr toja kukamã ajamaxpêr o:

—Nà koja inhmã ho anê. Ixte amnhî kaxyw kãm ijamaxpêr nê amnhî to hwÿr xà hkôt koja inhmã tanhmã amnhî nhîpêx to.

Anhÿr o hkamnàr rom ã amnhî kukamã ajamaxpêr anê.

Nom kot kaj mē tanhmã amnhî to hwÿr to nê tee ri amnhî kukamã ajamaxpêr kati nê hkôt ajamaxpêr tÿx kêt nê. Nê te kôk nhãm àpêr nê nhãm àpêrta pyrã nê nhãm ri ajamaxpêr nê nhãm ri ajamaxpêrja o hkôt ajamaxpêr kêt nê. Kot kaj mē ã amnhî nhîpêx anê nhũm Tirtũm tee ri ja hã mē apumu nhũm ja kãm mex kêt nê.

⁷⁻⁸ ã mē hamaxpêr anhÿr xwÿnhjaja na htem nhãm hamaxpêr nê nhãm hamaxpêr jao hamaxpêr mex kêt nê. Jakamã kot kaj mē ã ajamaxpêr anhÿr o amnhî to Tirtũm wÿ hãmri nê ãm amnhî to hwÿr kaprÿ. Koja ama nê ãm ama. Nom kot kaj mē tanhmã akute hã amnhî kaxyw hkôt ajamaxpêr tÿx pē amnhî to awÿ. Nê tee ri amnhî kukamã ajamaxpêr kati hkêt kãm tanhmã amnhî to hwÿr to nhũm amnhî tã ama nê hkînh nê tanhmã amã mēmoj nhîpêx to. Mē ate hã

axàhwÿr xà hkôt tanhmã mẽ amã mẽmoj nhĩpêx to.

Mẽ kêp amrakati xwÿnh mẽ mẽ kot amnhĩ to rÿnh xwÿnhjê jarênh

Eprêw 13.5-6; Wam Pêtre 1.24-25

⁹ Nê kwa mẽ akàxpore hkêt xwÿnhjaja. Jar mẽ apê amrakati htã mẽ apê Tirtũm kra na ka mẽ. Jakamã kêr ka mẽ akàxpore rÿnh kêt tã mẽ apê Tirtũm kra hã amnhĩ pumunh kôt ajamakêtkati nê nê akĩnh nê apa.

¹⁰⁻¹¹ Nê mẽ akàxpore rÿnh xwÿnhjaja. Mẽ akàxpore rÿnh nê mẽ akukrêx rÿnh tã kot kaj mẽ nhÿrmã ty nê piitã rer pa nê mẽ kêp amrakati xwÿnhjê pyrã nê anhÿ kamã Tirtũm kuri akrĩ nhũm tanhmã mẽ ajarênh to. Te mẽ apê mẽmo pixôrà kot amnhĩ nhĩpêx pyrãk. Na hte kwÿhtã axpên pê axpôt nê muxre nê mex nê harir. Tã gaa nê rĩ hã myt xàhpanh mẽ nhũm ra nhôôre. Nê gaa nê ra grã pa nê rôrôk nê hapêx. Tã kot kaj mẽ nhÿrmã uràk nê ty nê akukrêx rer pa. Jakamã kwa kêr ka mẽ akàxpore rÿnh pumunh kôt akĩnh nê ri apa hkêt nê. Kêt ãm mẽ apê Tirtũm kra hã mãn amnhĩ pumunh kôt akĩnh nê apa.

Mẽ pahpunuj kôt pagryk nê mẽ pahkurê

¹² Nê kot kaj mẽ atô tanhmã apunuj to htã arĩ amnhĩ kaxyw Tirtũm mã ajamaxpêr tÿx rãhã ho ri apa. No tanhmã apunuj to hã amnhĩ pumu nê hkaga hkêt nê. Rÿ kot tanhmã ato xwÿnhhta kêr ka mẽ amnhĩ tã kamã agryk nê tanhmã ho hkêt nê. ãm Jejus kôt pix mã amnhĩ nhĩpêx rãhã ho ri apa. Kêr kê Tirtũm amã hkĩnh ã amnhĩ tã apumu nê amex ã ajarê. Ka nhÿrmã kuri amex kumrêx nê atĩr tũm nê apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhÿr pê akĩnh nê apa.

¹³ Nê Tirtũm aa kãm tanhmã amnhĩ tomnuj to hprãm kêt. Nê mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rÿ mẽ pamã mẽ pajamaxpêr punuj jagjênh kêt nê. Jakamã kot ka mẽ atô amã tanhmã amnhĩ tomnuj to hprãm tã kwa kêr ka Tirtũm tãm kot ja kaxyw mẽ akrãm mẽ ajamaxpêr punuj jagjênh to hã hkamnhĩx kêt nê.

¹⁴⁻¹⁵ Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tirtũm Karô na hte mẽ pamã mẽ pajamaxpêr punuj jagjênh kêt nê. Mẽ papamjaja na pu htem pajamaxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhĩpêx anhÿr rãhã ho ri papa. Mẽ kot amnhĩ tomnuj o mẽ pa xwÿnhjaja koja mẽ nhÿrmã ty hãmri nê Tirtũm mẽ Kra wa kuri htĩr tũm nê pa ho pa hkêt nê.

Tirtũm kot tanhmã mẽ pahto mex to hã harênh

Xiakre 3.17-18; Sikũn Pêtre 1.3-4

¹⁶ Nê e ixkwÿjaja. Tirtũm kot mẽ pahte amnhĩ tomnuj prãm xàj mẽ pamã mẽ pajamaxpêr punuj jagjênh kêt jakamã kwa kêr ka mẽ ã ajamaxpêr anhÿr kêt nê.

¹⁷ Na hte mẽ pahto mex pix o pa. Na pre myyti ho kato. Kapêr pix o ho kato. Nê mytwrÿre ho kato. Nê kanhêti ho kato. Ja piitã ho kato nhũm mẽ pamã hirã mex o harir. Na hte mytwrÿre tãhã hirã mex o pa. Nê gaa nê nyw kaxyw nê kamãt kô. Nê gaa nê nyw mẽ nhũm akupÿm hirã. ã na hte amnhĩ nhĩpêx anhÿr o pa. No Tirtũmja ã kot anhÿr kêt. Kot amnhĩ nhĩpêxja ãm rãhã ho rãhã. Na hte mẽ pahto mex pix o pa. No tãhã tanhmã mẽ pahto mex to nhũm jãã nhũm tanhmã mẽ pahtomnuj to hkêt nê.

¹⁸ Tã kapêr pix o kot ã mẽmoj to kator kot anhÿr. Nê mẽ pamã kapêr o amnhĩrĩt. Kãm mẽ pahto hkra hprãm xàj mẽ pamã Jejus kot tanhmã mẽ panê amnhĩ nhĩpêx toja nhũm pre mẽ pamã ho amnhĩrĩt. Na pu prem kuma nê hkôt amnhĩ xunhwÿ nhũm amnhĩ tã mẽ pahpumu nê mẽ pahto hkra. Mẽ pahpê Ijaew kumrêxjaja na pre mẽ pahto hkra.

Mẽ pagryk o papa nê mẽ pahkurê

Rômãn 12.17-21; Epes 4.25-5.2

¹⁹ E ixkwÿjaja. Kwa mẽ ixkapêr ma nê hã anohtÿx nê ho apa. Koja mẽhõ Tirtũm kapêr o mẽ ajahkre kaxyw mẽ awÿr mõi nê mẽ amã kapêr jarê ka mẽ mar tÿx nê. Koja mẽ ate tanhmã amnhĩ tomnuj to nê mẽ amã kapêr ka mẽ amnhĩ tã ama nê kamã agryk kêt nê.

²⁰ Mẽ gryk o mẽ pa xwÿnhjaja na htem Tirtũm kapêr kôt ri amnhĩ nhĩpêx kêt nê.

21 Jakamã kwa kêr ka mẽ axte amnhĩ tomnuj rỳ ajamaxpêr punuj o ri apa hkêt nê. Na htem ohtô nê ã amnhĩ nhĩpêx anhÿr o pa nom kêr ka mẽ kurom Tĩrtũm kapêr mãn amnhĩ krã him haxàr tỳx nê. Kapêr o mẽ ajahkre xwÿnhjaja na htem ho mẽ ajahkre mex o pa. Tã kêr ka mẽ ama nê amã hkôt amnhĩ nhĩpêx prãm rãhã ho ri apa. Na pu htem Tĩrtũm kapêr ma nê hkôt amnhĩ nhĩpêx o papa hãmri nê nhÿrmã Tĩrtũm mẽ Kra wa kuri pahťir tũm nê pa mex nê papa ho papa.

Mẽ pahte Tĩrtũm kapêr kôt amnhĩ nhĩpêx ã mẽ pamã karõ

Matêwre 7.24-27; Wam Juãw 2.3-6

22 Nê kwa mẽ okora. Kêr ka mẽ ãm Tĩrtũm kapêr ma nê ãm mar kêt nê. Mããnên hkôt amnhĩ nhĩpêx rãhã ho ri apa. Kot kaj mẽ ama nê ãm ama nê hkôt amnhĩ nhĩpêx kêt nê hãmri nê apê Tĩrtũm kra hã amnhĩ jarênh kaprÿ. Jao nhÿrmã Tĩrtũm mẽ Kra wa kuri atĩr tũm nê apa hkêt nê.

23-24 Te ho mēhō kot amnhĩ pumunh xà hpyr nê kamã amnhĩ pumunh nê amnhĩ krã hkĩ jaê rỳ amnhĩ kuk tyk pumunh pyrãk. Tã te kot ãm ja hã amnhĩ pumunh nê kot amnhĩ to mex kêt rãhã akupÿm amnhĩ pumunh xà xir nê ma htēm nê axte amnhĩ kuk tyk rỳ amnhĩ krã kĩ jaêrta mã hamaxpêr kêt pyrãk. Mẽ kot Tĩrtũm kapêr mar nê ãm mar nê hkôt amnhĩ nhĩpêx kêt xwÿnhjaja te kot ja jarênh pyrãk.

25 Tã kêr ka mẽ ã amnhĩ nhĩpêx anhÿr kêt nê. Mẽ ate Tĩrtũm kapêr kôt amnhĩ nhĩpêx o apa kaxyw xatã kamã harê nê mar tỳx o apa. Jao hkôt amnhĩ nhĩpêx mex o apa. Tĩrtũm kot mẽ pahte tanhmã amnhĩ nhĩpêx to ho papa hã mẽ pamã karõ xàja ãm hãmri na. Na htem hkôt amnhĩ nhĩpêx nhũm Tĩrtũm ja hã mẽ omu nê mẽ ho mex nê nhũm mẽ ãmnhĩx hamakêtkati nê hkôt amnhĩ nhĩpêx o pa.

26 Nom koja mēhō kēp Tĩrtũm kra hã amnhĩ jarênh tã htỳx ri kapêr punuj o ri pa hãmri nê ãm kēp hkra hã amnhĩ jarênh kaprÿ. Mẽ pahpê Tĩrtũm krajaja na pu htem ã pakapêr anhÿr kêt nê.

27 Axtem mẽ pahte amnhĩ nhĩpêx. Na pu htem mẽ hã awrã rỳ mẽ kēp mẽ mjên tyk xwÿnhjê ho mex nê mẽ hã pahpêr o

pahpikēnh o papa hkêt nê. Nê tanhmã mẽ kute hã mẽ omu nê mẽ ho ajuta ho papa. ã na pu htem pahpê Tĩrtũm krajaja amnhĩ nhĩpêx anhÿr o papa nhũm Mēpanhĩpêxà Maati Tĩrtũm ja hã mẽ pahpumu nê hkĩnh nê. No na pu htem mẽ kot amnhĩ tomnuj o mẽ pa xwÿnhjê hkôt ri amnhĩ nhĩpêx kêt nê ãm Tĩrtũm kapêr xà kôt pix mã amnhĩ nhĩpêx nhũm amnhĩ tã mẽ pahpumu nê hkĩnh nê.

2

Mẽ pahte mẽ piitã mẽ hipêx o axpēn pyrãk ã mẽ pamã karõ

Rômãn 2.11; Korosê 3.25

1 E ixkwÿjaja. Pahihti Jejus Krisja mex o mex. Tã ra mẽ ate hkôt amnhĩ xunhwÿr jakamã kwa kêr ka mẽ apê hkwÿ hã mẽ piitã tãm mẽ hipêx o apa. Nê mẽ hipêx o axpēn pyrãk.

2 Jakamã kot kaj mẽ nhÿrmã Tĩrtũm kapêr mar kaxyw axpēn wÿr akuprõ nhũm hikàxpore rax xwÿnhta mẽ akôt axà. ê mex nê ôr o ìhkra kamã kàx hãmri nê mẽ akôt axà. Nhũm hkôt mēhō pē amrakati xwÿnhja tē nē axà. Nom wamta kĩnhã kēp amrakati nē ê omnajti nē pikaxônhti. Hãmri nē hikàxpore rax xwÿnhta hkôt mẽ awÿr tēn axà.

3 Tã tanhmã kot kaj wem ri wa hipêx to? Xà kot kaj mẽ wa hipêx o axpēn pyrãk nà? Nà xà kot kaj mẽ ã wa hipêx anē nē wam àr xwÿnhta ê mex ã omunh xà hkôt kãm kadêre hō gō nē kãm:

—E ota kadêre. Mãmrĩ hã nhÿ. Anē.

Hãmri nê ê pynajti xwÿnhta pumu nê axtem nê kãm:

—E atar pikap nhÿ.

Anhÿr o ahpÿnhã wa kãm akapêr?

4 Kot kaj mẽ ahpÿnhã ã wa hipêx anē nê amnhĩ tomnuj nê. Wam àr xwÿnhta ka kãm akapêr mex nê tanhmã ho mex to. No hkôt hōta omnajti hã omunh xà hkôt te kamã anhōkre kahak pyrãk o hipêx. Kot kaj mẽ ã ahpÿnhã wa hipêx anē nhũm Tĩrtũm tee ri ja hã mẽ apumu nhũm ja kēp omnuj nê.

5 Kwa mẽ inhma ixkwÿjaja. Mẽ kēp amrakati xwÿnhjaja mẽ hikàxpore hkêt tã na hte mẽ hkwÿjaja amnhĩ kaxyw Tĩrtũm kôt hamaxpêr nê hkôt amnhĩ xunhwÿ nhũm amnhĩ tã mẽ omu nê kot mẽ panhĩpêx pyrã

nê mẽ ho hkra. Jakamã jar mẽ kêp amrakati htã na htem amnhĩ kaxyw Tĩrtũm kôt hamaxpêr tỳx rãhã ho pa. Jakamã koja mẽ nhỹrmã kuri htĩr tũm nê mex kumrêx nê pa ho pa. Mẽ kãm Tĩrtũm kĩnh o mẽ pa xwỳnh piitã koja mẽ nhỹrmã ã mex nê ri pa anê.

⁶ Nom kot kaj mẽ ahpỳnhã mẽ hipêx nê amnhĩ tomnuj nê. E pa mẽmoj tã mẽ akukja. Mẽmojaja na htem tanhmã mẽ ato hêx to? Nê mẽmojaja na htem juisti mã tanhmã mẽ ato kapêr punuj to? Xà mẽ kêp amrakati xwỳnhjaja? Nã mẽ tãm kêt. Mẽ hikàxpore rũnh xwỳnhjaja na htem ã mẽ anhĩpêx anhỹr o pa.

⁷ Nê ra mẽ ate hkôt amnhĩ xunhwỳr xwỳnhja nhũm mẽ axtem nê tanhmã mẽ apê ho kapêr to ho pa. Tã ka htem mẽ kêp amrakati xwỳnhjê rom mẽ kãm akapêr mex nê mẽ kãm kadêre mex gõ nhũm mẽ hã hkri.

⁸ Tĩrtũm kapêr ã kagà htũm kot ja jarênh kot: Kêr ka mẽ piitã mẽ hipêx o te ka amã amnhĩ tã ma pyrãk. Anê.

Ã kot mẽ pamã karõ kot anhỹr. Kapêrja mex kumrêx. Kot puj mẽ ã axpên nhĩpêx anhỹr jao Tĩrtũm kãm hprãm xà hkôt amnhĩ nhĩpêx mex nê.

⁹ Nom kot puj mẽ ã amnhĩ nhĩpêx anhỹr kêt nê ahpỳnhã tanhmã mẽ hikàxpore rũnh xwỳnhjê ho mex to nê ahpỳnhã tanhmã mẽ kêp amrakati xwỳnhjê nhĩpêx to japêr. Hã kot puj mẽ Tĩrtũm kapêr htũmta nhĩrôp pakuhê nê amnhĩ tomnuj nê.

¹⁰ Kot pu mẽ kapêr tũm piitã hkôt ri amnhĩ nhĩpêx mex o ri papa htã ãm pixire nê hirôp pakuhê. Jao te pahte kapêr piitã hirôp pakuhê pyrãk.

¹¹ Na pre Tĩrtũm mẽ pahte mẽ pahprõ pix tãnopxar o papa hã mẽ pamã karõ. Nê mẽ pamjên pix tãnopxar o papa hã mẽ pamã karõ. Nê mẽ pahte axpên par nê mẽ pahkurê. Jakamã kot puj mẽ pahprõ pix tãnopxar mex o ri papa japêr. Nê mẽ pamjên pix tãnopxar mex o ri papa japêr tã tanhmã pajamaxpêr to nê pahkwỳjê hõxpĩ. Jao te Tĩrtũm kapêr tũm piitã hirôp pakuhê hpar pyrãk o amnhĩ nhĩpêx.

¹²⁻¹³ Koja nhỹrmã Tĩrtũm mẽ pahtĩr ri tanhmã axpên nhĩpêx to ho papa hã mẽ

pahpumunh kôt tanhmã mẽ pajarênh to. Mẽ pamã axpên kĩnh ã axpên to mex o papa hã mẽ pahpumunh kôt mẽ pajarê rỳ mẽ pamã axpên kĩnh kêt ã axpên nhĩpêx o papa hã mẽ pahpumunh kôt mẽ pajarê. Jakamã mẽ kamã mẽ ukaprĩ kêt xwỳnhjaja koja nhỹrmã ja hã mẽ omu nê mẽ urãk nê mẽ kamã ukaprĩ hkêt nê. Nom mẽ kamã mẽ ukaprĩ ho mẽ pa xwỳnhjaja koja ja hã mẽ omu nê mẽ urãk nê mẽ kamã ukaprĩ nê mẽ nê mẽ kot amnhĩ tomnuj piitã rênh pa. Jakamã kwa kêr ka mẽ amnhĩ to mex nê tãm axpên nhĩpêx o ri axpên kôt apa. Nê axpên mã akapêr mex nê axpên kamã axukaprĩ pix kukamã ajamaxpêr o apa.

Amnhĩ kaxyw Tĩrtũm kôt mẽ hamaxpêr xwỳnhjê jarênh

Rukre 3.8-14

¹⁴ Nê kwa ixkwỳjaja. Koja mẽhõ kot amnhĩ kaxyw Jejus kôt hamaxpêr nê hkôt amnhĩ xãm ã amnhĩ jarênh tã hkôt ri amnhĩ nhĩpêx kêt nê. Hã koja nhỹrmã ty hãmri nê tanhmã kot we amnhĩ to nê Tĩrtũm mẽ Jejus wa kuri htĩr tũm nê pa ho pa? Nã koja anhỹr kêt nê. Kêp hkra hã amnhĩ jarênh tã hkôt amnhĩ nhĩpêx kêt jakamã koja nhỹrmã wa hwỳr àpir kêt nê.

¹⁵ Nê xà koja mẽhõ kêp amrakati nê ri pa. Nê ê pynajre pix jagjê nê ri hã pa. Nê õ hkêt nê ri kãm prãm nê pa.

¹⁶ Ka mẽ ja hã omu nê tanhmã kãm akapêr to nê kãm:

—Kwa ã amnhĩ nhĩpêx anhỹr kêt nê. Anhõrkwỳ hwỳr tẽn axê mex japêr nê axà nê amnhĩm mẽmoj japêr nê aku. Koja Tĩrtũm ato mex rax nê.

Anhỹr o kãm akapêr tã kãm mẽmoj nhõr kêt nê. Tã xà koja we ama nê amar xà hkôt ê mex jagjê nê apkur mex o ri pa? Nã kot ka mẽ ã kãm akapêr anê nê ho ajuta hkêt nê nhũm arĩ kãm prãm nê ê hkêt nê omnuj nê ri pa. Na htem mẽ kapêr pix o mẽ ho mex kêt nê. Kot kaj mẽ ã kãm akapêr anê nê ãm kãm mẽmoj tã karõ kaprỳ.

¹⁷ Ja pyrã nê koja mẽhõ ra amnhĩ kaxyw Jejus kôt hamaxpêr nê hkôt amnhĩ xãm ã amnhĩ jarênh tã kapêr kôt ri amnhĩ nhĩpêx kêt japêr. Hã koja ãm kêp hkra hã amnhĩ jarênh kaprỳ.

18 Nē kot kaj mē atō ã ajamaxpēr anē nē ajamaxpēr o:

—Nà Jejus kwỳjaja na htem ahpỳnhã tanhmã amnhĩ nhĩpêx to ho pa. Na hte mē hkwỳjaja amnhĩ kaxyw Jejus kôt hamaxpēr tỳx pix o ri pa. Nē mē hkwỳjaja tanhmã hkwỳjê ho mex to ho ri pa. Á na htem ahpỳnhã tanhmã amnhĩ nhĩpêx anhỳr to ho pa. Anē.

Kwa mē ri ã ajamaxpēr anhỳr kêt nē. Mē hkwỳjê ho mex o mē pa xwỳnhjaja na htem Tĩrtũm hkôt hamaxpēr pē mãănēn hkôt amnhĩ nhĩpêx nē hkwỳjê ho mex o pa. Koja mēhõ amnhĩ kaxyw Jejus kôt hamaxpēr hã koja mãănēn hkôt amnhĩ nhĩpêx pē tanhmã hkwỳjê ho mex to ho pa. Na htem amnhĩ kaxyw hkôt hamaxpēr pix o pa hkêt nē. Na htem mãănēn hkôt mē piitã mē ho mex o ri pa.

19 Na ka hte mē akwỳjaja ã ajamaxpēr anē nē ajamaxpēr o:

—Nà Tĩrtũmja pyxi mex o pyxi mex. Tã kot paj jam ijamaxpēr rãhã ho ri ixpa nē ra ixpê hkra hã ri ixpa. Nom kot paj kapēr kôt amnhĩ nhĩpêx o ri ixpa hkêt nē.

Anhỳr o ajamaxpēr nē ã ajamaxpēr anhỳr kaprỳ.

Nē ãm hãmri na ka htem Tĩrtũm pyxi mex o pyxi mex ã harê. Nom na htem jam hamaxpēr kôt pix mã kêp hkra hkêt nē. Mēkarõmnutijaja na htem haxwỳja Tĩrtũm pyxi mex o pyxi mex kôt hamaxpēr tã mē kêp hkra hkêt. Na htem ã hamaxpēr anhỳr pē kãm uma ho pa.

20 ã mē ajamaxpēr anhỳrja mex kêt. Koja mēhõ amnhĩ kaxyw Tĩrtũm kôt hamaxpēr ã amnhĩ jarēnh tã hkôt amnhĩ nhĩpêx o pa hkêt japêr. Hãmri nē ãm amnhĩ kaxyw hkôt hamaxpēr ã amnhĩ jarēnh hkaprỳ. E kot paj ixprĩ hã mē amã ja jarê ka mē inhma.

21 Mē panhĩgêt finat Apraãw na pre amnhĩ kaxyw Tĩrtũm mã hamaxpēr nē hkôt ri amnhĩ nhĩpêx mex o pa. Tã nhũm amnhĩ tã kamã hamak kaxyw hkra Ijak ã kuwỳ nhũm kuma nē ra kot kãm hpĩr nē õr kaxyw nhũm Tĩrtũm amnhĩ tã omu nē amnhĩm mex ã harê. Hãmri nē kot hkra hpĩr nē kãm kapêr.

22 Ra kot amnhĩ kaxyw hkôt hamaxpēr nē hkôt amnhĩ xãm jakamã mãănēn hkôt

amnhĩ nhĩpêx nē ra kot kãm hkra nhõr kaxyw Tĩrtũm amnhĩ tã omu nē amnhĩm mex ã harê. Na pre ã finat Apraãw Tĩrtũm kapêr kôt amnhĩ nhĩpêx mex anhỳr o pa. Jao amnhĩ kaxyw hkôt hamaxpēr mex ã amnhĩ to amnhĩrĩt.

23 Nē kormã Apraãw wa hkra hkêt ri nhũm Tĩrtũm wa kãm hkra jarê nhũm kuma nē hkra hkukamã amnhĩ kaxyw Tĩrtũm kôt hamaxpēr tỳx o pa nhũm amnhĩ tã omu nē mex ã harê. Nē kêp hkrãmnhwỳ hã harê. Kapêr ã kagã htũm kot ja jarēnh kot:

Na pre Apraãw hkra hkukamã amnhĩ kaxyw Tĩrtũm kôt hamaxpēr tỳx nhũm amnhĩ tã omu nē amnhĩm mex ã harê. Anē.

24 ã na pre finat Apraãwja hkra kaxyw Tĩrtũm kôt hamaxpēr anhỳrja o ra hkôt amnhĩ nhĩpêx nē ra kot kãm hpĩr kaxyw. Nom kop apu amnhĩ kaxyw hkôt hamaxpēr pix nē hkôt amnhĩ nhĩpêx kêt ronhỳx pre Tĩrtũm tee ri amnhĩ tã omu nē amnhĩm mex ã harēnh kêt nē. Na htem amnhĩ kaxyw Tĩrtũm mã hamaxpēr nē mãănēn hkôt ri amnhĩ nhĩpêx mex o pa nhũm amnhĩ tã mē omu nē amnhĩm mē mex ã mē harê.

25 Mēhõ ni kuprỳ finat Raapja na pre ã amnhĩ nhĩpêx anē nē amnhĩ kaxyw Tĩrtũm kôt hamaxpēr pē tanhmã hkôt amnhĩ nhĩpêx to ho pa. Na pre Ijaew myja wa hamẽxkrut nē ma Raap nhõ krĩ hwỳr wa tẽ. Mē hã ukapi nē kot mē hkurê kaxàr kaxyw mē hwỳr wa tẽ. Hãmri nhũm Raap Tĩrtũm kot wa mēnh ã wa omunh kurê kumrêx nē põristi kot tanhmã wa ho pymaj amnhĩ nhõrkwỳ kamã mē kêp wa ho amũxu nē wa nē mē kãm tanhmã hêx to. Nē hpãnhã nhãm pry hõ hkôt akupỳm wa kumẽ nhũm wa hkà hkĩnh pē ma akupỳm mex nē tẽ. Hãmri nhũm Tĩrtũm wa hã Raap pumu nē amnhĩm mex ã harê.

26 Tã kot kaj mē atō amnhĩ kaxyw Tĩrtũm kôt ajamaxpēr ã amnhĩ jarēnh tã hkôt amnhĩ nhĩpêx kêt japêr. Hãmri nē apê hkra hã amnhĩ jarēnh kaprỳ. Te ra mēhõ htyk nē nõr tã nhũm mē kot arĩ htĩr ã harēnh kaprỳta pyràk.

3

Mē kot Tĩrtũm kapêr o mē ahkre xwỳnhjê jarēnh

¹ Nē kwa Kris kôh ixkwýjaja. Mē axohtô nē mē amã Tirtũm kapēr o mē ahkre hprãm tã kormã ja kaxyw mē apiitã mē amex kêt. Mē ixte Tirtũm kapēr o mē ajahkre xwýnhjaja kot paj mē tanhmã amnhĩ tomnuj to japēr nhũm Tirtũm ja hã mē ixpumu nhũm ja kēp omnuj nē. Mē ixte kapēr o mē ajahkre ho mē ixpa kēnã kot pa hkêt mē ri tanhmã amnhĩ tomnuj to ho ri ixpa. Jakamã kot kaj mē Tirtũm kapēr piitã hkôt ri amnhĩ nhĩpêx mex nē rĩ kormã ho akwýjê jahkre ho ri apa.

² Nē mē pahpiitã na pu htem tōhã mē pajakwa ho tanhmã amnhĩ tomnuj to. Mēmoj tã axpēn kãm pagryk nē tanhmã mē kãm pakapēr punuj to. Nom koja mēhō tanhmã kapēr punuj toja nē amnhĩ to htýx nē hãmri nē tãm amnhĩ nhĩpêx o pa.

*Mē pajakwa jarēnh
Epes 4.29*

³ Na htem nhýhým kawar o juk kaxyw hakwam kàx jagjê nē kãm nhýhým o htēm prãm xà hkôt ma nhýhým ho juk o tē. Kàxja hkryre nhũm kawar rũnh tã no nhũm kãm ma nhýhým ho mrar prãm xà hkôt ho juk o mra.

⁴ Nē gô xujanār kãm pàr rũnh ta rũnh tã na hte kôk àpēr týx nē ma nhýhým o pa. Nē pĩ ho pàr o juk xàta hkryre htã ma nhýhým ho juk o mō. Nhýhým pàr o mrar xwýnh kãm o mōr prãm xà hkôt o mō.

⁵ Ja pyrã nē mē pajakwaja hkryre htã na htem ho kapēr o tanhmã mē hipêx to ho pa. Tōhã ho kapēr mex nē nhũm mē kuma nē hkĩnh nē. Nē tōhã ho kapēr punuj nē nhũm mē tee ri mē kapēr ã mē kuma nē hkaprĩ nē rý kapēr xwýnh ta kamã gryk nē. Mē pajakwa hkryreja te kot kuwy jakrax kryre pyrãk. Kot ka kuwy jakrax grire ho tē nē nhýri pōti kamã amē nhũm kôk ho apē nhũm hpók rax tokyx anē. Hãmri nē ma pã ho hkaxàr par o mō nē ho hkaxàr pa.

⁶ Mē pajakwaja mã kot anhýr. Kot kaj atýx ri tanhmã ho akapēr punuj to nhũm mē ama nē axpēn mã anhĩxi ho krĩ nhĩpêx ka amex kêt nē apa. Rý ka atýx ri ajakwa ho tanhmã akwýjê ho akapēr to nhũm mē tee ri amnhĩ tã ama nē hkaprĩ nē rý akamã gryk nē. Satanasti nhý hã na htem ã mē hakwa ho kapēr punuj anē.

⁷ Na htem tōhã mēmo mry xoprê pynê nē tanhmã ho nē ra ho kãm ma hkêt. Kagã rý hagrôre rý àati rý gôx kãm mēmo mryja nhũm htem unê nē tanhmã ho nhũm kãm ma hkêt nē mē hkôt pa ho pa. Nom na htem mry piitã ã hipêx anhýr kêt nē.

⁸ Tã mē pajakwa te mē kot tee ri mēmo mry ho kãm ma hkêt kaprý xwýnh ta pyrãk. Na pu htem amnhĩ krã hkôt pajakwa ho pakapēr mex pix kêt nē. Tanhmã kot puj mē pakapēr punuj kêt kaxyw amnhĩ jakwa hto? Mē pakapēr punuj te kot kagã xoprê kot mē hkamnar nē õ wenēn o mē hparta pyrãk.

⁹⁻¹⁰ Na pu htem tōhã pajakwa ho tãm pakapēr nē tōhã pakapēr punuj nē. Nē tōhã Pahi Maati Tirtũm mã mex o mex ã harēnh tã ra axtem nē tanhmã mēhō japrý hto. Tirtũm kot mē pahto amnhĩ pyrã nē mē panhĩpêx tã pu htem axtem nē tanhmã axpēn japrý hto ho ri papa. Jao te pahte Tirtũm japrý pyrãk. Kwa ixkwýjaja. Kêr pu mē pahpê Tirtũm krajaja ã pakapēr punuj anhýr hkêt nē. ãm mē pajakwa ho mēmoj mex pix jarēnh o ri papa.

¹¹⁻¹² Xà koja pã kamã hinore pyxi htã kamã gô xành nē mãānēn kamã gô xēnh nōkati? Nà koja anhýr kêt nē. Na hte kamã gô mex pix nē rý kamã gô xēnh nōkati pix nē.

Nē xà koja jàxô hpàr ã rãrãj harir? Rý ahkrô xô hã mànkwrýtre harir? Nà na hte ahpýnhã hpàr ã harir. Ja pyrã nē kêr pu mē pahpê Tirtũm krajaja pajakwa ho pakapēr punuj pē ho papikamýr týx nē. Nē te hinore kamã gô mex pixta pyrã nē ēmoj mex pix jarēnh o ri papa. No mē pajakwa nhĩkjê ho tãm pakapēr nē hikjê ho pakapēr punuj kêt nē. ãm pakapēr mex pix o pakapēr o ri papa. Kwa kêr pu mē ã amnhĩ nhĩpêx anhýr rãhã ho papa.

*Tirtũm kôh mē àhpumunh xwýnhjê jarēnh
Wam Korĩt 2.6-16*

¹³ Nē kwa mē axàhpumunh týx xwýnhjaja kêr ka mē amnhĩ to mex o ri apa. Nē mē piitã tãm mē hipêx mex nē mē amã axpēn japê hã axpēn to ajuta mex o ri apa. Tirtũm kapēr xà hkôt. Kot kaj mē ã amnhĩ nhĩpêx anē nē axàhpumunh mex ã amnhĩ to amnhĩrĩt.

¹⁴ Nom kot ka mẽ mẽmoj tã axpën kamã agryk o ri apa. Rỳ amnhĩ pix kukamã ajamaxpër o ri apa hãmri nẽ ãm ate Tirtũm kapër kôt amnhĩ nhĩpêx ã amnhĩ jarênh kaprỳ.

¹⁵ ã mẽ kot amnhĩ nhĩpêx anhỹr xwỳnhjaja na htem Tirtũm kôt amnhĩ nhĩpêx kêt nẽ. Mẽ kêp Tirtũm kra hkêt xwỳnh pixjaja na htem ã amnhĩ nhĩpêx anhỹr o pa. Jao mẽkarõmnuti kot amnhĩ nhĩpêx kôt pix mã amnhĩ nhĩpêx o pa.

¹⁶ Axpën kamã mẽ gryk o mẽ pa xwỳnhjaja na htem amnhĩ pix kukamã hamaxpër jao tanhmã amnhĩ tomnuj to ho pa. Nẽ amnhĩ tã mẽ kamã mẽ gryk xwỳnhjê homnuj o pa. Tã ã mẽ pahte amnhĩ nhĩpêx anhỹr pumaj kwa kêr pu mẽ mẽmoj tã axpën kamã pagryk o ri papa hkêt nẽ.

¹⁷ Mẽ kot Tirtũm kôt amnhĩ nhĩpêx xwỳnhjaja na htem jajê rom tãm axpën nhĩpêx rãhã o pa.

Nẽ axpën kamã ukaprĩ pix o ri axpën kôt pa.

Nẽ tãm hamaxpër o pa.

Nẽ mẽ piitã mẽ hipêx o axpën pyræk.

Nẽ axpën tã hpijaãm o ri pa.

Nẽ tanhmã ri axpën no kupyry to hkêt nẽ.

Nẽ ri oprê ho pa hkêt nẽ.

Nẽ mẽ axpën kamã òkre kahak kêt nẽ.

Nẽ mẽ piitã mẽ ho mex o axpën pyræk.

Nẽ tãm mẽ piitã mẽ hipêx rãhã nẽ.

Ã na htem Tirtũm kôt mẽ kot amnhĩ nhĩpêx xwỳnhjaja amnhĩ nhĩpêx anhỹr o pa.

¹⁸ Kot puj mẽ ã amnhĩ nhĩpêx anẽ nẽ pajamakêtkati nẽ paxãmnhĩx pahkĩnh nẽ ri papa. Nhũm nhỹri mẽhõ wa axpën kãm gryk pu mẽ wa omu rỳ wa harênh ma hãmri nẽ mẽ pahtõ ma wa hwỳr tẽ nẽ wa kãm pakapër nẽ tãm akupỹm wa ãm. Hãmri nhũm wa ra mẽ pahpyrà nẽ tãm amnhĩ nhĩpêx pẽ hamakêtkati nẽ wa ri pa. ãmnhĩx ri hkĩnh nẽ wa ri pa.

4

Mẽ kot amnhĩ pix kukamã mẽ hamaxpër xwỳnhjê jarênh

Matêwre 20.20-28; Juãw 16.24

¹ Nẽ kwa mon ka hte mẽ akwỳjaja axpën mã akapër mã agêt o axpën kãm agryk pix o apa? Na ka htem ã amnhĩ nhĩpêx anhỹr

o amnhĩ pix kukamã ajamaxpër. Nẽ mẽ amã amnhĩ jamaxpër kôt pix mã ri amnhĩ nhĩpêx prãm. No Tirtũm kãm hprãm xà hkôt amnhĩ nhĩpêx prãm kêt nẽ.

² Na ka htem nhỹri mẽmoj pumu nẽ tee ri ho amã anhõ hprãm kaprỳ. Nẽ amã ho anhõ hprãm xàj õ xwỳnhta pĩr nẽ kêp utar mã.

Nẽ na ka htem tanhmã axpën kukrêx kute hã omu nẽ amã ho anhõ hprãm nẽ hã õ xwỳnhta mẽ wa axpu. No mẽ amã hprãm xwỳnhta mẽ ate hõ hã Tirtũm wỳr ronhỹx ra mẽ ama nẽ mẽ amã hõ gõ. Tã mẽ ate hã axàhwỳr kêt jakamã nhũm mẽ amã òr kêt nẽ.

³ Rỳ ka mẽ tõiã mẽmoj tã awỳ nhũm kot mẽ amar tã mẽ amã òr kêt nẽ. Kot mẽ amã òr nhũm mẽ ate ho anhõxỳ ho apa pymaj na hte tõiã mẽ amã mẽ ate hã axàhwỳr xwỳnhta nhõr kêt nẽ.

⁴ Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyræk o na ka htem amnhĩ nhĩpêx o apa. Jao mẽ amã mẽ apê Tirtũm kra hprãm tã axtem nẽ mẽ kãm hprãm kêt xwỳnhjê hkôt amnhĩ nhĩpêx o ri apa nẽ mẽ uræk nẽ tanhmã amnhĩ tomnuj to ho ri apa. Nẽ mẽ ate amnhĩ tomnuj gryk ã mẽ amã Tirtũm prãm kêt ã amnhĩ to amnhĩrit.

⁵ Tirtũm kapër ã kagà htũm kot tanhmã Karõ jarênh to nẽ harênh kot:

Na pre Tirtũm mẽ pahwỳr amnhĩ Karõ rẽ nhũm mẽ pahwỳr wrỳ nẽ mẽ pakamã agjê nẽ mẽ pahkôt pa ho pa. Mẽ pahte hkôt pix mã amnhĩ nhĩpêx o papaja na kãm hprãm. Anẽ.

Ãm hãmri ã harênh kot anhỹr jakamã kwa kêr ka mẽ harênh ma nẽ kãm ajamaxpër tỳx rãhã ho ri apa.

⁶ Na hte Tirtũm mẽmoj to mẽ pakutã nojarêt rãhã pu mẽ y hã tãm amnhĩ nhĩpêx o ri papa. Kapër ã kagà kot ja jarênh kot:

Mẽ kãm Tirtũm kôt amnhĩ nhĩpêx prãm kêt xwỳnhjaja na hte Tirtũm amnhĩ tã mẽ omu nẽ mẽ kutã amnhĩ xunhwỳ.

No mẽ kãm hkôt ri amnhĩ nhĩpêx prãm xwỳnhjaja na hte amnhĩ tã mẽ omu nẽ mẽ ho mex o pa nhũm htem hihtỳx xà nhỹ hã mẽ kãm hprãm kêt xwỳnhjê hkôt ri amnhĩ nhĩpêx kêt nẽ. Anẽ.

⁷ Jakamã kwa kêr ka mẽ Tĩrtũm kapêr kôt pix mã mãn ri amnhĩ nhĩpêx o ri apa. Kêr kê Satanasti tanhmã mẽ ate amnhĩ tomnuj to hprãm xàj tanhmã mẽ ato ka mẽ Tĩrtũm Karõ nhỹ hã ãm ama mẽ hkôt amnhĩ nhĩpêx kêt nê. Nhũm tee ri amã àhkrox kaprỹ mẽ akaga mẽ ma tẽ.

⁸ Nê kot kaj mẽ Tĩrtũm kapêr kôt pix mã ri amnhĩ nhĩpêx o apa nhũm amnhĩ tã mẽ apumu nê te kot mẽ apa hã mẽ ajamýnh nê mẽ ato pa pyrãk o mẽ anhĩpêx. Jao mẽ ato mex o ri mẽ akôt pa ho pa. Nê mẽ atãnopxar rãhã ka mẽ ajamakêtkati nê akĩnh nê ri apa.

Nê kêr ka mẽ tanhmã amnhĩ tomnuj to hãmri nê tee ri ja hã amnhĩ pumu nê hkaga kurê kumrêx nê axte ã amnhĩ nhĩpêx anhỹr kêt nê. Rỹ ka mẽ tanhmã ajamaxpêr punuj to hãmri nê ja hã amnhĩ pumu nê hkaga nê hpãnhã tãm ajamaxpêr pix o ri apa. Mẽ apê Tĩrtũm kra hã kêr ka mẽ ãm hkôt pix mã ri tãm amnhĩ nhĩpêx o ri apa.

Mẽ pahte amnhĩ tomnuj ã tanhmã amnhĩ nhĩpêx to hã mẽ pamã karõ

Wam Juãw 1.5-10

⁹ Nê kêr ka mẽ tee ri ate tanhmã amnhĩ tomnuj to hã amnhĩ pumu nê akaprĩ xàj mur nê akĩnh kêt nê. Nê akaprĩ xàj amýr rax nê.

¹⁰ Hãmri nê Tĩrtũm mã amnhĩ jarênh o:

–Pa Tĩrtũm. Na pa ã amnhĩ tomnuj anê. Nom kot paj axte hkêt nê. ãm inhãm akapêr kôt pix mã ri amnhĩ nhĩpêx prãm.

Anhỹr o kãm akapêr kê mẽ ama mẽ mẽ ate amnhĩ tomnujta ã tanhmã mẽ ato hkêt nê. ãm mẽ ato mex nê ka mẽ akupým ajamakêtkati nê axãmnhĩx akĩnh nê ri apa.

Mẽ pahte axpên to pakapêr nê mẽ pahkurê

Matêwre 7.1-5; Rõmãn 2.1-3, 14.10-13; Wam Korĩt 4.5

¹¹ E ixkwýjaja. Kwa kêr ka mẽ anhĩõ kot tanhmã amnhĩ tomnuj to hã omu nê tanhmã ho akapêr punuj to hkêt nê. Tĩrtũm kapêr ã kagã htũm kot ja nê mẽ pahkurê kamã hihtýx jakamã kot ka mẽ ri ã amnhĩ nhĩpêx anê nê te ate Tĩrtũm kapêr tũm kwý omnuj ã harênh pyrãk. Rỹ te axãhpumunh týx o ate Tĩrtũm jakrenh ã amnhĩ to jarkrar pyrãk. Jao kapêr kôt amnhĩ nhĩpêx kêt nê. Na htem Tĩrtũm kapêr ã kagã htũm kwý

mex ã harê nê hkwy omnuj ã harênh kêt nê. Piitã mex kênã.

¹² Nê Tĩrtũmja tapxipix na kêp mẽ pahto amnhĩptãr xwýnh maati. Nê tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwýnh ã mẽ pajarê rỹ mẽ pahte amnhĩ tomnuj xwýnh ã mẽ pajarê. ãm tapxipix kot ã mẽ pajarênh kot anhỹr xwýnh. Tã ka mẽ axtem nê kapêr kwým ri tanhmã akwýjê ho akapêr punuj to ho ri apa.

Mẽ pahte Tĩrtũm mã pajamaxpêr pẽ kãm amnhĩ jarênh ã mẽ pamã karõ

Rukre 12.13-21

¹³ E kwa mẽ inhma ixkwýjaja. Na ka hte mẽ akwýjaja tanhmã amnhĩ kukamã ajamaxpêr to nê akwýjê mã amnhĩ jarênh o:

–Koja apkati pa ma krĩ hõ hwýr mõ nê kamã mẽ kãm ixãpênh o ixpa hã ixtã amgrã pyxi nê hpãnhã kãxpore jamýnh rax nê man akupýn mõ.

Anhỹr o amnhĩ jarê.

¹⁴ Kwa mẽ ã amnhĩ kukamã amnhĩ jarênh anhỹr kêt nê. Mẽ pahtõ mẽ pahte amnhĩ kukamã paxãhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhỹr tã kormã ã amnhĩ nhĩpêx anhỹr kêt ri tanhmã amnhĩ to nê ty. Rỹ tanhmã amnhĩ to nê axã hãmri nê nhỹhým amõr kêt nê. Te mẽ pahpê namê pyrãk na pu htem ri papa nê tanhmã amnhĩ to nê ty nê pajapêx tokyx anê.

¹⁵ Jakamã mẽ ã amnhĩ kukamã amnhĩ jarênh anhỹr kêt nê. Kêt amnhĩ jarênh o:

–Koja Tĩrtũm kãm ja prãm koja apkati pa ã amnhĩ nhĩpêx anê nê ã amnhĩ nhĩpêx anê.

Anhỹr o Tĩrtũm kamnãr o tanhmã amnhĩ kukamã amnhĩ jarênh to.

¹⁶ No mẽ ate amnhĩ krã hkôt amnhĩ kukamã amnhĩ jarênh ta Tĩrtũm jamaxpêr xã hkôt kêt. ãm amnhĩ krã hkôt mẽ ate amnhĩ kukamã amnhĩ jarênh kênã. ã mẽ ate amnhĩ jarênh anhỹrja mex kêt.

¹⁷ Nê mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri nê amnhĩ tomnuj o apa.

5

Mē hikàxpore rūnh xwỳnhjê jarēnh
Rukre 12.13-21; Wam Ximotre 6.9-10;
Apokarip 18.14

¹ Nē kwa mē akàxpore rūnh xwỳnhjaja. Mē inhma nē inhmar tỳx nē. Nhỹrmã mē amex kêt jakamã kwa mē tee ri amnhĩ kukamã ajamaxpēr o ra akaprĩ nē amỳr o apa kurē kumrēx.

² Tĩrtũm noo mã mē akàxpore te ra mē apê hapêx par pyrāk. Te ra mē anhỹ kamã mē ate amnhĩ tomnuj xwỳnh ã kutã akrĩ pyrāk.

³ Mē ate mē akukrēx nē mē akàxpore ho apikuprōnh rūnh tã ka htem mē akwỳjê pē ho anhōxỳ ho ri apa. Mỳrapê koja nhỹrmã tanhmã mē apê amnhĩ to nē omnu pa ka mē ho apikuprōnh rax kaprỳ. Hãmri nē mē ate amnhĩ tomnuj mỳrapê Tĩrtũm mē Kra wa kuri atĩr tũm nē apa ho apa hkêt nē. Ām kuwy kamã mē amnhĩ xà htỳx kamã ajamak rãhã ho ri apa.

⁴ Na ka htem apur kãm mē àpēnh xwỳnhjê mã amnhĩrer kêt nē. Nhũm mē tee ri amnhĩ tã mē ajamã hãmri nē mē atã amnhĩ to Pahi Maati Tĩrtũm xihtỳx xwỳnhhta wỳr o pa nhũm mē atã mē kuma.

⁵ Mē akĩnhã mē kēp amrakati htã ka htem ãm ja hã mē omu nē mē àpēnh pãnhã mē kãm amnhĩrer kêt nē amnhĩ pix kukamã ajamaxpēr. Nē amã prãm xà hpix kukamã amnhĩm mēmoj japrōr pē akĩnh o ri apa. Jao te mē apê mōx htwỳm nhũm mē kot hpĩr nē hkrēr mã mex ã harēnh xwỳnhhta pyrāk. Mỳrapê kot kaj mē mōxta pyrã nē nhỹrmã ty hãmri nē Tĩrtũm mē Kra wa kuri atĩr tũm nē apa ho apa hkêt nē.

⁶ Nom ja pix kêt. Na ka htem mē anhō krĩ kamã mē anhō pahi mã tanhmã akwỳjê ho axêx to ho ri apa. Mē kot tanhmã atomnuj to hkêt tã ka mē kãm mē ho axêx rūnh nē. Tã koja nhỹrmã Tĩrtũm mē hã tanhmã mē ato rax kumrēx ka mē rĩ amnhĩ pumu.

Mē pahte Jesus kutêp amnhĩ kaxyw kãm
pajamaxpēr o papa hã mē pamã karō
Sikũn Pêtre 3.1-13

⁷ E ixkwỳjaja. Koja mēhō tanhmã mē atomnuj to htã ka mē arĩ amnhĩ kaxyw Jesus mã ajamaxpēr rãhã ho ri apa. Pē akupỳn hpôx xà hã arĩgro jamãr rãhã nē. Te pur nhō dōn kot amnhĩ nhĩpêx pyrāk.

Koja hpur kãm ahkre nē ahkre hpa hãmri nē arĩ hamãr o pa nē kãm nojarêt kêt nē hã na wrỳk jamãr o pa. Jao hamakêtkati nē ô jamãr rãhã ho pa.

⁸ Tã kêr ka mē urāk nē arĩ Pahihti akupỳn hpôx xà hã arĩgro jamãr rãhã ho ri apa. Koja tokyx akupỳn mē pahwỳr wrỳ. Jakamã kêr ka mē kutêp mē kot mē atomnuj xwỳnhjê kutã amnhĩ to htỳx nē ri apa. Nom tee ri amnhĩ kukamã ajamaxpēr o Jesus kaga hkêt nē. Arĩ hamãr pē akĩnh nē ajamakêtkati nē ri apa. Koja akupỳn mē pahwỳr wrỳ nē mē pahto mex rax kumrēx.

⁹ Nē kêr ka mē axpēn to akapēr o ri apa hkêt nē. Kot ka mē ã amnhĩ nhĩpêx anē nhũm Tĩrtũm mē ama nē tanhmã mē ajarēnh to. Kot mē pahpumunh xà hkôt tanhmã mē pajarēnh to xwỳnh na. Tã ra tanhmã kot mē pahpiitã mē pajarēnh to xà hã arĩgroja ra ahtêp o mō.

¹⁰ E ixkwỳjaja. Kêr ka mē wam mē kot Tĩrtũm nhỹ hã kapēr jarēnh xwỳnhjaja kot amnhĩ nhĩpêx mã ajamaxpēr rãhã nē. Na prem Tĩrtũm nhỹ hã mē kãm kapēr o ri mē hkôt pa nhũm mē hkwỳjaja ja hã tanhmã mē hĩpêx to nhũm mē amnhĩ xà htỳx kamã hamak rãhã ho pa. Tã tee ri amnhĩ kukamã hamaxpēr pē Tĩrtũm kaga hkêt nē. Na prem arĩ ÿ hã kapēr jarēnh rãhã ho ri mē hkôt pa. Tã kêr ka mē kot amnhĩ nhĩpêx pyrāk o amnhĩ nhĩpêx nē Tĩrtũm kaga hkêt nē.

¹¹ Na prem amnhĩ xà htỳx kamã hamak o pa rãhã ty hãmri nē Tĩrtũm kuri mex nē hkĩnh nē pa ho pa. Ra mē ate finat Johti jarēnh mar mex. Na pre omnuj tỳx nē pa htã amnhĩ tã Pahi Maati Tĩrtũm kamã gryk nē hkaga hkêt nē. Hãmri nhũm amnhĩ tã omu nē gaa nē ho mex rax nē nhũm akupỳm mex kumrēx nē pa. Pahi Maati ja ukaprĩ ho ukaprĩ nē mex o mex jakamã na pre ã Johti ho mex anē. Tã koja ho mexta pyrã nē ã mē pahto mex anē.

Mē pahte tanhmã amnhĩ nhĩpêx to hã mē
pamã karō

Matêwre 5.33-37, 18.15; Rômãn 12.15;
Karatas 6.1-2; Jutre 22-23

¹² E ixkwỳjaja. Pa mē amã mēmoj jarē ka mē inhma nē inhmar tỳx nē. Kêr ka mē mēmoj tã amnhĩ jarēnh kaxyw hãmri

ně akatàt kòt amnhĩ jarēnh kurē kumrēx. Ně amnhĩ jarēnh o: “Nà kot paj ja ho anē.” Anē. Rỳ amnhĩ jarēnh o: “Nà kwarĩ pa ja ho anhỳr kêt nē.” Anhỳr o amnhĩ jarēnh kurē kumrēx. Kê mẽ akwỳjaja ãm hãmri mẽ ate amnhĩ jarēnh ã mẽ apumunh kurē kumrēx nē axêx ã mẽ akamnhĩx kêt nē. Mẽ apê Tĩrtũm kra kēnã kot ka kêt mẽ ri axtem nē amnhĩ jarēnh o axêx.

¹³ Ně koja mẽ anhĩo mẽmoj tã tanhmã amnhĩ to nē omnuj nē. Ka mẽ ja hã omu nē kãm anē kê amnhĩ kaxyw Tĩrtũm mã hamaxpēr pē amnhĩ to hwỳr rãhã ho pa. Rỳ koja hkĩnh nē ri pa ka mẽ ja hã omu nē kãm anē kê hkĩnh kãm mex o mex ã grer o pa.

¹⁴ Rỳ koja à nē nō ka mẽ ja hã omu nē kãm anē kê amnhĩ wỳr pastō nhỹ hã mẽ kapēr xwỳnh kwỳjê hã karō. Kê mẽ hwỳr mra nē Jesus nhỹ hã mẽmo twỳm kwỳ ho hkukō nē ho Tĩrtũm wỳ.

¹⁵ Kê mẽ ã mẽ à xwỳnhjê hwỳr mra nē mẽ ho Tĩrtũm wỳr o pa anē. Koja mẽ ho kuwỳ nhũm mẽ kuma nē akupỹm mẽ ho mex. Nhũm mẽ tanhmã amnhĩ tomnuj to japēr kê mẽ ja hã amnhĩ jarē kê Tĩrtũm mẽ kuma nē ja hã tanhmã mẽ ho hkêt nē.

¹⁶ Jakamã kēr ka mẽ atō tanhmã amnhĩ tomnuj to nē tee ri ja hã amnhĩ pumu hãmri nē tokyx akwỳjê mã amnhĩ jarē kê mẽ tokyx ato Tĩrtũm wỳ. Kê atã mẽ kuma nē tanhmã akrã hto ka axte ã amnhĩ nhĩpêx anhỳr kêt nē. Nē ra amex nē apa.

Ně koja mẽhō Tĩrtũm kòt pix mã amnhĩ nhĩpêx mex rãhã ho pa. Hãmri nē mẽmoj tã kuwỳ nhũm kuma nē kãm tanhmã mẽmoj to.

¹⁷ Te finat Eris kot mẽmoj tã hwỳr nhũm kot mar nē kãm ho anhỳrta pyrāk. Erisja kēp mẽ panhĩo na pre. Tã na pre hkwỳjaja amnhĩ tomnuj pix o pa nhũm tee ri mẽ omu nē mẽ hã na wrỳk kêt kaxyw ho Tĩrtũm wỳr kãm hihtỳx nē. Hãmri nhũm kuma nē kãm ho anē nhũm na wrỳk kêt ry rax kumrēx. Hã amgrà axkrunēpxi nē hkòt mytwrỳ kēp 6. Mẽ kot amnhĩ tomnuj tỳx o paja mỳrapê.

¹⁸ Tã nhũm Eris axte mẽ ho kuwỳ nhũm axte mẽ hwỳr na rē nhũm akupỹm katàt kòt wrỳk mex nē. Nhũm akupỹm mẽ hpur kãm mẽ ôja mẽ kãm mex nē akupỹm mẽ kãm ô rũnh nē. Tã ã Tĩrtũm kot Eris mar nē

kãm mẽmoj nhĩpêx anhỳrta pyrà nē koja mẽ pama nē mẽ pamã mẽmoj tanhmã ho.

¹⁹ Ně e mẽ inhma ixkwỳjaja. Koja mẽhō Tĩrtũm kapēr mar tỳx nē te kēp hkra pyrāk o amnhĩ nhĩpêx. Tã tanhmã hamaxpēr to nē kapēr kaga nē htỳx ri amnhĩ tomnuj pix o pa. Ka mẽ ja hã omu nē hwỳr mra nē kot amnhĩ tomnuj nē kãm akapēr kãm axihtỳx kê tokyx hkaga nē akupỹm Tĩrtũm kòt amnhĩ xãm tỳx nē ãm hkòt pix mã amnhĩ nhĩpêx.

²⁰ Koja amnhĩ tã mẽ ama nē Tĩrtũm kòt amnhĩ xãm tỳx nhũm amnhĩ tã omu nē kot tanhmã amnhĩ tomnuj tota ho hamakêtkati nē amnhĩ katut kòt kurē nhũm nhỹrmã kuri htĩr tũm nē mex nē pa ho pa. Koja amnhĩ tomnuj tỳx o pa htã hkaga hpa nhũm Tĩrtũm ja hã omu nē hã tanhmã ho hkêt nē axte tanhmã kot amnhĩ tomnuj tota mã hamaxpēr kêt nē.

Tã ãm ja pix. Ixpê Xiakre na pa ã mẽ awỳr kagà nhĩpêx nē mēnh anē.

Wam Pêtre Simãw Pêtre kot Jejus kôt hkwÿjê hwÿr kagà nê mênh

Simãw Pêtre na pre kagàja nhîpêx. Kêp tep pynênh o pa xwÿnh tâ hpânã kêp Jejus nhÿ hã hkrajê jahkre ho pa xwÿnh. Nê krî pê Jerujarê kamã kêp Jejus krajê nhõ pastô. Na pre krî piitã hkôt Jejus ã mē kãm mē hkurê xwÿnhjaja tanhmã hã mē hipêx to nhũm Pêtre mē harênh ma nê mē hamaxpêr o hihtÿx kaxyw mē kãm kagàja nhîpêx nê krî piitã hkôt mē hwÿr kurê. Mē kot kamã harênh nê mar nê amnhî kamã kahak kêt nê arî Tirtũm kôt amnhî nhîpêx mex o pa kaxyw. Nê Jejus ã mē kot amnhî xà htÿx kamã hamak tâ nhÿrmã kaxkwa kamã mex nê pa ho pa hã mē kãm awjarê. Æ mē kãm mēmoj jarê nê hã kagà anê. Nê mē kãm:

¹ Pa mē ate Jejus kôt amnhî xunhwÿr nhũm Tirtũm kot mē ato hkra xwÿnhjaja. Xà mē amex? Ot pa mē awÿr kagà nhîpêx nê kumê. Ixpê Simãw Pêtre na pa. Ixte Jejus nhÿ hã hkrajê jahkre ho mē ixpa xwÿnhjê hõ na pa mē awÿr kagà nê kumê.

Na xep pre Kris ã mē kãm mē pahkurê xwÿnhjaja tanhmã mē anhîpêx to ka mē panhõ pika rũm mē umaj anhgrã nê ma ahpÿnhã krî hkôt ri apa.

Jao mē akwÿjaja ma pika pê Põt kamã krî hkwÿjê hkôt apa.

Nê mē akwÿjaja pika pê Karatas wÿr apa.

Nê mē akwÿjaja pika pê Kapatos wÿr apa.

Nê mē akwÿjaja pika pê As wÿr apa.

Nê mē akwÿjaja Pitin wÿr apa.

Æ ahpÿnhã pika hkôt mē apigrãnh par anê. Tã ot pa mē awÿr kagà nhîpêx nê mē apiitã mē awÿr kurê. Mē apÿnh nê mē ate kamã harênh nê ixkapêr mar kaxyw.

² Na pre Mēpahpãm Tirtũmja amnhim mē pahte amnhî kaxyw kãm pajamaxpêr xwÿnhjê rê nê mē pahtã amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mē nê ty nê htyk o hkamrô axkapî nhũm mē harênh ma nê hkôt amnhî xunhwÿ. Tã nhũm Ixkarô mē hkarô mã agjê nhũm mē ra inhmã hprãm xà kôt pix

mã ri inhmã tanhmã amnhî nhîpêx to ho pa.

Anhÿr o mē pahtã amnhî jarênh. Tã kê mē akutã nojarêt rãhã ho ri mē akôt pa ka mē ÿ hã axãmnhix ajamakêtkati nê akinh nê ri apa.

Mē pahte amnhî kukamã pajamaxpêr pê pahkinh o papa hã mē pamã karõ

Rukre 12.32-34; Rõmãn 8.18-25; Sikũn Korõt 4.16-18

³ Nê na pre mē panhõ Pahihti Jejus Krisja ty nhũm Hipêxã Tirtũm akupÿm ho htir. Tã kot mē pakutã nojarêt rãhã ho pa jakamã na pre mē pahpê hkrajê mã mē pajamaxpêr nyw jagjê pu mē ÿ hã pahte amnhî nhîpêx nyw o amnhî nhîpêx o papa. Hãmri nê Jejus akupÿm htirja mã pajamaxpêr nê amnhî kukamã pajamaxpêr o:

—Kot paj nhÿrmã ty nhũm Tirtũm kot Jejus nhîpêx pyrà nê akupÿm ixto ixtir pa wa kuri ixtir tũm nê inhmex kumrêx rãhã ixpa ho ixpa. Nà koja ã inhîpêx anê.

Anhÿr o pajamaxpêr jakamã kwa kêr pu mē Tirtũm mã mex o mex ã mãn harênh rãhã ho papa.

⁴ Na ra mē pakutêp õ krî kamã mēmoj piitã ho mex nê. Õ krî kamã mēmoj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mē kot Kris ã mē atomnuj mÿrapê na ka mē amnhî xà htÿx kamã ajamak o ri apa nom arî amnhî kaxyw Tirtũm mã ajamaxpêr rãhã ho ri apa. Hihtÿx o hihtÿx jakamã koja mē pahkôt pa ho pa nê mē pamã pajamaxpêr o hihtÿx rãhã nhũm nhÿrmã Jejus akupÿm mē pahwÿr wrÿ. Hãmri pu mē hkôt ri amnhî nhîpêx mex rãhã ho ri papa. Ra Tirtũm kot mē pakukamã mē pajarênh xà hkôt.

⁶ Jar mē pahte arî amnhî xà htÿx kãm pajamak o papa htã na pu htem Tirtũm nhÿrmã kot mē pahto mexta kukamã pajamaxpêr hãmri nê tee ri amnhî kukamã pajamaxpêr kêt nê. Mē pahpê mē pahpunuj tũm nê ri papa ho papa mã xwÿnh kêt.

⁷ Na hte Tirtũm mē panhîpêx o te mē kot ôr nhîpêx pyràk. Na htem hprî hã tanhmã ôr kute hã omu. Kêp ôr kumrêx ã omu rÿ mēmoj mē ho pihkãr ã omunh kaxyw kuwy

kamã kurê. Nhũm piitã ôr nê pigãnh pa japêr nhũm mẽ omu nê harênh o:

—Nà ãm hãmri. Kêp ôr kumrêx nê mẽmoj mẽ ho pihkâr kêt. Anê.

Na hte Tĩrtũm ã mẽ panhĩpêx anê. Jakamã mẽ pahpê Jejus kôt amnhĩ nhĩpêx o mẽ papa xwỳnhjaja mẽ pahte tũhã tanhmã pahpunuj to htã no nhũm mẽ panê ja rênh kêt nê. Na hte amnhĩ tã mẽ pahpumu nê hamaxpêr o:

—Kot paj kormã ja hã mẽ hamã nê tokyx akupỹm mẽ ho mex kêt nê. Koja mẽ omnuj nê pa htã tee ri amnhĩ kukamã hamaxpêr nê ixkaga hkêt nê arĩ amnhĩ kaxyw ixkôt hamaxpêr rãhã ho pa. Hãmri nhũm mẽ hkwyjaja ja hã mẽ omu nê mẽ kêp ixkra hã mẽ omunh kurê kumrêx. Te mẽ kot hprĩ hã ôr pumunh nê kêp ôr kumrêx ã omunhta pyrãk. Anê.

Jakamã kêr pu mẽ arĩ amnhĩ kaxyw hkôt pajamaxpêr rãhã ho papa. Mẽmo mỳrapê mẽ pahpunuj nê ri papa htã arĩ hkôt pajamaxpêr rãhã nhũm Jejus nhỹrmã akupỹn mẽ pahwỳr wrỳ. Hãmri nhũm Tĩrtũm mẽ pahpumu nê mẽ pamã:

—Nà ãm hãmri na ka prem amnhĩ kaxyw ixpix mã ajamaxpêr rãhã ho ri apa. Mẽ kot ixtã tanhmã mẽ atomnuj to nhũm mẽ ate amnhĩ xà htỳx kamã ajamak o apa htã aa ixkaga hkêt nê arĩ amnhĩ kaxyw inhmã ajamaxpêr rãhã ho ri apa. Nà ãm hãmri mẽ ate amnhĩ to mex kumrêx xwỳnh na ka mẽ. Kot paj mẽ piitã mẽ kãm ja hã mẽ ajarê.

Anhỹr o mẽ pamã kapêr.

Nê ôr o mẽ hikukrêxja mex tã koja arĩ mex rãhã hkêt nê. Koja mẽhõ kãm tanhmã homnu hto hprãm nê homnu hpa. No mẽ papajaja kot puj mẽ arĩ amnhĩ kaxyw Tĩrtũm mã pajamaxpêr rãhã ho papa hãmri nê ôrta pyrã nê pajapêx kêt nê. Kurom mẽ pamex tũm nê aa pajapêx kêt nê papa ho papa.

⁸⁻⁹ Nê Jejusja aa mẽ ate ano ho omunh kêt tã na ka htem kãm mẽ ajapê htỳx nê kot mẽ panê tanhmã amnhĩ nhĩpêx to hã harênh ma nê mẽ amã hkĩnh nê. Nê amnhĩ kaxyw hkôt ajamaxpêr mex rãhã ho ri apa. Jakamã na pre Tĩrtũm ja hã mẽ apumu nê mẽ ato hkra nê mẽ apê õ krĩ kamã wa kuri amex nê apa mã xwỳnh ã mẽ ajarê. Ja kaxyw na pu prem amnhĩ kaxyw hkôt

pajamaxpêr rãhã jao pahkĩnh nê ri papa. Nê tee ri tanhmã amnhĩ kĩnh tỳx ã amnhĩ jarênh to hkukamã pajamaxpêr. Kormã aa ã mẽ pahkĩnh anhỹr kêt tã mẽ pahkĩnh tỳx nê ri papa.

¹⁰ Nê Tĩrtũm kot mẽ pahto mex pê mẽ panê mẽ pahte amnhĩ tomnuj rênh par nhũm kuri mẽ pahtĩr tũm nê mẽ papa hã mẽ pajarênhja. Amnepê mã Tĩrtũm nhỹ hã kapêr jarênh o ri mẽ pa xwỳnhjaja na pre mẽ pakukamã ã mẽ pajarênh anhỹrja ma nê tee ri hamaxpêr nê tee ri hã axpên kukjêr o ri axpên kôt pa. Nom hprĩ hã mar mex kêt nê. Tã arĩ ri mẽ pakukamã hkwyjê mã ja hã mẽ pajarênh o ri pa.

¹¹ Na pre Tĩrtũm Karõja Kris tyk kukamã mẽ kãm ã mẽ pajarênh anhỹr o amnhĩrĩt. Kormã Kris kaxkwa kamã pa ri. Kormã wrỳk nê katorxà nhõxãhkre rũm kator kêt ri nhũm pre hkukamã mẽ kãm tanhmã ho amnhĩrĩt to. Mẽ kot hpĩr nhũm kot amnhĩ xà htỳx kãm hamak kãm mẽ panê htykja ã hkukamã mẽ kãm harênh o amnhĩrĩt. Nhũm Tĩrtũm kot akupỹm ho htĩr nê kãm mex o mex ã harênhja nhũm hkukamã mẽ kãm harênh o amnhĩrĩt. No ãm hprĩ hã mẽ kãm mẽhõ nhĩxi hkôt harênh kêt jakamã nhũm prem harênh ma nê tee ri hkukamã ri hamaxpêr nê tee ri hã axpên kukjêr o ri axpên kôt pa. Nê hã axpên kukjêr o:

—Kwa mẽhõ koja we ã amnhĩ nhĩpêx anê? Xà koja tokyx ã amnhĩ nhĩpêx anê nà kormã?

Anhỹr o hã axpên kukjêr o ri pa.

¹² Hãmri nhũm Tĩrtũm axte mẽ kãm Jejus jarênh kwỳ ho amnhĩrĩt nê mẽ kãm:

—Nà mẽ anoo mã koja ã amnhĩ nhĩpêx anhỹr hkêt nê. Mẽ amỳr pê mẽ akanrêhã mẽ akra nê mẽ atãmnhwỳjê noo mã koja kato nê mẽ hkôt ã amnhĩ nhĩpêx anhỹr o pa. Anê.

Mẽ papamjaja mẽ panoo mã kator nê ã kot amnhĩ nhĩpêx anhỹr o paja o ã mẽ kãm ho amnhĩrĩt anê.

Amnepêm Tĩrtũm nhỹ hã kapêr o ri mẽ pa xwỳnhjaja nê jarãhã mẽ ixte Jejus nhỹ hã mẽ ahkre ho ri ixpa xwỳnhjaja mẽ ixkapêr ãm pixii. Na pa htem wamtajê pyrã nê Tĩrtũm Karõ nhỹ hã àhpumunh tỳx xà ho mẽ amã tanhmã Jejus jarênh to ho ri mẽ akôt ixpa. Nhũm hte Tĩrtũm kapêr o mẽ

wrÿk xwÿnhjaja mẽ ixkapêr ma nê tee ri hamaxpêr o mẽ pahpyrà nê kãm hprĩ hã harênh mar par prãm nê.

Mẽ pahte Tirtũm pyrà nê tãm amnhĩ nhĩpêx ã mẽ pamã karõ

Epes 4.1-3; Korosẽ 1.10-12; Sikũn Pêtre 3.10-13; Wam Juãw 3.1-6

¹³ E kwa Kris kõt ixtõ nê ixtõxjaja. Kêr ka mẽ Jesus kutêp mẽmoj punuj kutã amnhĩ to htÿx rãhã ho ri apa. Nê Tirtũm mã amnhĩ nhĩpêx mex rãhã nê. Pê tãm ajamaxpêr nê tãm amnhĩ nhĩpêx o apa. Nê mẽ ã ajamaxpêr anhÿr o:

—Nà koja nhÿrmã Jesus akupÿn mẽ ixwÿr wrÿ hãmri nhũm Tirtũm ixto mex rax nê. Nà koja ã inhĩpêx anê. Anê.

¹⁴ Nê kêr ka mẽ Tirtũm kapêr kõt pix mã mãn ri amnhĩ nhĩpêx mex rãhã ho ri apa. Te mẽhprĩre kot mẽ hipêêxà kapêr mar nê hkõt amnhĩ nhĩpêx pyræk. Kormã mẽ ate Kris kõt amnhĩ xunhwÿr kêt ri na ka prem ate amnhĩ nhĩpêx tũm kõt ri tanhmã amnhĩ tomnuj to ho ri apa.

¹⁵ Tã kêr ka mẽ hpãnhã amnhĩ to mex o mãn ajamaxpêr o apa nê Tirtũm pyrà nê amnhĩ tomnuj o apa hkêt nê. Tirtũmja kot amnhĩ to mex pix o pa xwÿnh na.

¹⁶ Kapêr ã kagã htũm kot ja jarênh kot: Kêr ka mẽ ixpyrà nê amnhĩ to mex pix o ri apa. Anê.

¹⁷ Tã koja nhÿrmã kêp Mẽpahpãm maati hã hprĩ hã mẽ pahte amnhĩ nhĩpêx ã mẽ pahpumunh hkõt tanhmã mẽ pajarênh to. Tãm mẽ pahte amnhĩ nhĩpêx kõt mẽ pajarê rÿ mẽ pahte amnhĩ tomnuj kõt mẽ pajarê. Hãmri nê ahpÿnhã mẽ panhĩpêx. Mẽ pahto mex nê rÿ mẽ pahtomnuj nê. Jakamã kwa pu mẽ nhÿrmã kot tanhmã mẽ pahtomnuj to pymaj hkõt pix mã amnhĩ nhĩpêx o ri papa rãhã nê.

¹⁸ Nê kormã mẽ pahte Jesus kõt amnhĩ xunhwÿr kêt ri na pu prem mẽ panhĩgêt pyrà nê pahtÿx ri amnhĩ tomnuj o ri papa. Tã nhũm Krisja te amnhĩm mẽ pajaprõr pyræk o mẽ panhĩpêx. Mẽ pahte hpãnhã kapêr kõt pix mã amnhĩ nhĩpêx o papa kaxyw. No mẽmoj to na pre mẽ pahpãnhã amnhĩre? Nà ra mẽ pahte ja jarênh mar tÿx. Na pre kãxpore ho mẽ pahpãnhã amnhĩrer kêt nê. Rÿ ôr o mẽ hikukrêx ã ohtõ ho mẽ

pahpãnhã amnhĩrer kêt nê. Rÿ prat o mẽ hikukrêx ã ohtõ ho mẽ pahpãnhã amnhĩrer kêt nê. Jajaja hapêx tokyx anhÿr mã xwÿnh na.

¹⁹ Na pre ã mẽ hpãnhã amnhĩrer anê nê tãm mẽ panê ty nê htyk o amnhĩ nhĩ ho mẽ pahpãnhã amnhĩrer pa. Nhũm hkamrõ axkapĩ. Te amnepê mã mẽ panhĩgêt kot amnhĩ pãnhã Tirtũm mã ôwêhti hkrare hpar nhũm hkamrõ pikapĩrta pyræk. ôwêhti krare mexre pix na prem kãm kupa. Mex nê tanhmã kute hkêt xwÿnh pix. Tã Krisja aa tanhmã amnhĩ tomnuj to hkêt kumrêx nê mẽ panê ty nê htyk o Tirtũm mã mẽ pahte amnhĩ tomnuj piitã hpãnhã amnhĩrer pa.

²⁰ Amnepê mã kormã mẽmoj kêt ri na pre Tirtũm kot ã mẽ pahpãnhã amnhĩrer anhÿr kaxyw mẽ pakukamã kuta nê ãm. Tã nhũm amgrã ohtõ nê hapêx nhũm mẽ pahwÿr kumê nhũm man mẽ pahwÿr wrÿ. Kot ã mẽ pahpãnhã amnhĩ nhĩpêx anhÿr kaxyw.

²¹ Tã nhũm prem kupĩ nhũm Tirtũm akupÿm ho htĩr nê mex o mex ã harê. Mẽ pahte ja hã harênh mar kõt amnhĩ kaxyw Tirtũm pix mã pajamaxpêr o ri papa kaxyw. Nê mẽ pahte amnhĩ wÿr Jesus jamãr rãhã ho ri papa kaxyw.

²² Tã pu prem ra kot ã mẽ panê amnhĩ nhĩpêx anhÿr ã harênh ma nê mẽ pahte amnhĩ tomnuj kaga nê hkõt amnhĩ xunhwÿ. Jao amnhĩ to mex pix o ri papa. Nê mẽ pamã Kris kõt mẽ pahkwÿjê hkĩnh o papa. Tã kwa kêr pu mẽ arĩ pamã axpên kĩnh tÿx rãhã ho papa.

Te mẽ pakatorxà rũm mẽ pajapõx pyræk o axte mẽ pajapõx ã mẽ pajarênh

Juãw 3.1-21

²³ Nê na pu prem mẽ pakatorxà nhõxàhkre rũm mẽ pajapõx pyrà nê axte mẽ pajapõx pyræk o amnhĩ nhĩpêx. Jao ra mẽ pahpê Tirtũm kra nê ri papa. Na hte mẽ pakatorxà nê mẽ panhĩpêêxàja wa ri pa nê gaa nê mẽ pahpê ty. No kêt Mẽpanhĩpêêxà maati Tirtũmja wa kurom rãhã ho rãhã. Tã ra mẽ pahte amnhĩ kaxyw kapêr kõt pajamaxpêr o pahpê hkra jakamã kot puj mẽ uræk nê nhÿrmã pahtĩr tũm nê papa rãhã ho papa.

Nê Tirtûm kapêrja Tirtûm pyrâ nê rãhãã.
Koja aa hapêx kêt nê.

²⁴ Kapêr ã kagà htûm kot ja jarênh kot:
Pika piitã hkôt mê pa xwýnhjaja te mê kot
pôti grà pyrâk.

Nê mê kot amnhî to mex xàja te kot kapôt ã
pixôrà pyrâk.

Na hte pôti tokyx grà nê hapêx.

Nê pixôràja haxwýja arïgro htýx mê nhûm
grà tokyx anê nê rarak pa nê hapêx.

²⁵ No Tirtûm kapêr koja pôti mê pixôràta wa
kurom aa hapêx kêt nê. Koja arî rãhã
ho rãhã. Anê.

Tã kapêrja tãm na htem mê pamã kamã
harê pu mê pahpiitã mar o papa.

2

*Mê pahte Tirtûm kot amnhî nhîpêx kôt
amnhî nhîpêx ã mê pamã karô*

*Rômãn 12.2; Wam Korît 3.16-17; Epes
2.19-22*

¹ Nê kwa kêr pu mê axte tanhmã amnhî
tomnuj to ho ri papa hkêt nê.

Rý tanhmã axpên mã paxêx to hkêt nê.

Nê paxêx rom tanhmã ri axpên nokupyr
to hkêt nê.

Nê mëmoj tã axpên kãm pagryk kêt nê.

Nê tanhmã axpên japyrý hto hkêt nê.

Kêr pu mê ã amnhî nhîpêx anhýr o papa
hkêt kumrêx.

² Mê hkaràre na htem ãm kãm pijaôr pix
prãm. Nê gaa nê htýxre nê ra hprêk o mô.
Tã kêr ka mê pijaôr pix prãm xwýnhjê pyrâ
nê amã Tirtûm kapêr mar nê hkôt pix mã
amnhî nhîpêx o apa hprãm. Jao mar týx
pê ra hkôt amnhî nhîpêx mex o mô nê gaa
nê hkôt amnhî nhîpêx mex o apa. Te mê
karàre pijaôr nê gaa nê ra hprêk o môrta
pyrâk.

³ Ra mê ate Jesus kot mê pahto mex ã
omunh mex kênã.

⁴ Nê na htem kên o ixkre nhîpêx kaxyw
hãmri nê hkwý kawrà nê ri hkapi. Nhûm
hõ mex kêt nhûm mê tee ri omu nê
nhãm kumê. Tã ja pyrâ nê na pre mê
pahkwýjaja tee ri Kris pumu nê htýx mex
kêt ã hkamnhîx nê te mê kot kên mênhta
pyrâk o hipêx nê hkaga. No nhûm Tirtûmja
amnhîm Kris mex o mex ã harê. Te ho
mêhõ kot kên mex kêt ã hkamnhîx nê mênh
nhûm mêhõ kot mex ã omunh nê amnhîm
mýnhta pyrâk. Nom Krisja kên rom kêp htîr

tûm nê pa xwýnh jakamã nhûm pre Tirtûm
mê pakaxyw ãm pu prem hkôt amnhî xun-
hwý.

⁵ Nê Tirtûm na hte nhýrmã mê pahtîr
tûm nê wa kuri mê papa mã xwýnh ã mê
pajarê. Te mê pahpê kên nhûm Tirtûm te
kot amnhî Karô mã mê pahto ixkre nhîpêx
pyrâk. Jakamã na hte Jesus Kris tanhmã
mê pahkrã hto pu mê Tirtûm kôt amnhî
nhîpêx mex rãhã ho ri papa. Nê tanhmã
kãm amnhî nhîpêx mex to nhûm ja hã mê
pahpumu nê hkînh nê.

⁶ Tirtûm kapêr ã kagà htûm kot tanhmã
Kris jarênh to. Nê hã kuxi nê tanhmã
harênh to. Te kêp kên pyrâk ã harê nê
harênh kot:

Kot paj nhýrmã Ijaew wýr mêhõ mê nhûm
mê hkôt pa ho pa.

Koja te kêp kên o inhõrkwý nhîpêx kaxyw
kên maati mex kumrêxta pyrâk.

Koja amnhî kaxyw hkôt mê hamaxpêr
xwýnhjaja nhýrmã ma inhõ krî hwýr
api nê hkînh nê mex rãhã nê pa ho
pa. Anê.

⁷ Tã ra amnhî kaxyw hkôt mê pajamaxpêr
xwýnhjaja. Kên pyrâk xwýnh pê Jesusja na
mê pamã mex o mex. No mê kot hkaga
xwýnhjaja na htem hamaxpêr punuj xwýnh
ã hkamnhîx nê hkaga nê kãm hkînh kêt nê.
Tirtûm kapêr ã kagà htûm kot mê harênh
kot:

Na prem kên o amnhîm õrkwý nhîpêx
kaxyw hkawrà ho pa nê kên maatija
pumu nê htýx omnuj ã hkamnhîx nê
hkaga.

Mê kot hkaga htã nhûm Tirtûm mê kurom
mex o kot kên piitã hakrenh par ã
omunh kurê kumrêx. Anê.

⁸ Nê mãânên harênh kot:

Koja mê kapêr mar kêt kumrêx.

Te pry kamã kên nõr nhûm mê kot nhãm
prý nê mênh kaxyw hkamnâr o
amnhî par krã hi kukênh pyrâk o
koja mê amnhî nhîpêx. Anê.

Mê kot Kris kapêr mar tã hkôt amnhî xun-
hwýr kêt jakamã te ho mê kot amnhî nê
kên kamnâr o amnhî par krã hi kukênh
pyrâk o koja mê amnhî nhîpêx. Jakamã
koja nhýrmã Tirtûmja ja hã tanhmã mê ho
htýx kumrêx. Ra kot amnhî kukamã mê
kãm amnhî jarênh xà hkôt.

⁹ No mẽ papajaja na pre Tirtũm jajê rom amnhĩ kôt mẽ paxunhwỳ. Nhỹrmã õ krĩ kamã mẽ papa ho papa kaxyw. Nẽ mẽ pahte mex o mex ã harênh kaxyw. Na pu htem Ijaew nhõ patre pyrã nẽ Pahi Maati Tirtũm mã tanhmã amnhĩ nhĩpêx to ho papa. Nom kormã mẽ pahte Křis kôt amnhĩ xunhwỳr kêt ri te mẽ pahpê kamàt kô kamã mẽ pahtỳx ri mẽ papa xwỳnh pyrãk. Tã Jejus kôt amnhĩ xunhwỳ nẽ hpãnhã te mẽ pahpê hirã mex kãm ri mẽ papa xwỳnh pyrã nẽ tãm amnhĩ nhĩpêx rãhã ho papa. Ra mẽ pahpê Tirtũm kra jakamã na pu htem amnhĩ to mex rãhã ho ri papa. Nẽ Mẽpahpãm maati Tirtũm mã tanhmã amnhĩ nhĩpêx to ho ri papa. Te mẽ kot mẽ ho àhwỳr xwỳnhjaja kot kãm amnhĩ nhĩpêx o pata pyrãk. ã na pre Tirtũm mẽ pahte amnhĩ nhĩpêx anhỹr o papa kaxyw mẽ panhĩpêx.

¹⁰ Amnepêm kormã mẽ pahpê hkra hkêt ri na pre mẽhõ mẽ pakamã ukaprĩ hkêt kumrêx pu htem pahpunuj nẽ ri papa. Tã Jejus kôt amnhĩ xunhwỳ nhũm Tirtũm mẽ pahto hkra pu mẽ pahpê hkra hã ri papa nhũm mẽ pakamã ukaprĩ rãhã ho mẽ pahkôt pa.

Mẽ pahpê Tirtũm mã tanhmã amnhĩ nhĩpêx to xwỳnh ã mẽ pajarênh Rômãn 13.1-7; Xitre 3.1

¹¹ E ixkràmnhwỳjaja. Ra mẽ pahpê Tirtũm kra jakamã mẽ pahpê õ krĩ nhõ xwỳnh. Te mẽ pahpê jar pika nhõ xwỳnh kêt pyrãk jakamã kwa kêt pu mẽ arĩ mẽ pahte amnhĩ nhĩpêx tũm o amnhĩ nhĩpêx kêt nẽ. Nẽ mẽ pajamaxpêr tũm o pajamaxpêr kêt nẽ. Ra axtem mẽ pajamaxpêr nyw nẽ axtem mẽ pahte amnhĩ nhĩpêx nyw kênã. Mẽ pahte amnhĩ nhĩpêx tũmja te kãm akupỹm mẽ pahte hkôt amnhĩ to paxujanãr prãm pyrãk. Mẽ pahte axte hkôt amnhĩ nhĩpêx o ri papa kaxyw. Tã nom kêt pu mẽ anhỹr kêt nẽ.

¹² E kwa kêt ka mẽ anhõ krĩ kamã akwỳ kot Kris kôt amnhĩ xunhwỳr kêt xwỳnhjê noo mã tãm ri amnhĩ nhĩpêx o ri apa. Mẽ kot Kris ã tanhmã mẽ anhĩpêx to rỳ tanhmã hã mẽ ato kapêr punuj to htãã. Kot kaj mẽ ã mẽ hkôt amnhĩ nhĩpêx anhỹr o ri apa hãmri nhũm mẽ tee ri mẽ apumu nẽ hamaxpêr o:

—Kwa mẽ ixte mẽ kot amnhĩ tomnuj xwỳnh ã mẽ harênh tã mẽ kot amnhĩ to mex pix xwỳnh na mẽ. Anẽ.

Hãmri nẽ nhỹrmã mẽ pahpyrà nẽ Tirtũm kôt amnhĩ xunhwỳ nẽ kãm mex o mex ã harê nẽ kãm:

—Kwa Tirtũm. Na pre hte akrajaja anhỹ hã amnhĩ to mex rãhã nẽ pa ho pa pa ja hã mẽ omu. Nã xep amex o amex Tirtũm. Anẽ.

¹³ Nẽ mẽ apê Pahihti Jejus Kris kôt amnhĩ nhĩpêx xwỳnh jakamã kêt ka mẽ anhõ krĩ kamã mẽ anhõ pahihti kapêr ma nẽ kapêr kôt mãn amnhĩ nhĩpêx mex o ri apa. Nẽ mẽ anhõ pika kamã mẽ anhõ prêjitênja ka mẽ kapêr ma nẽ hkôt amnhĩ nhĩpêx. Mẽ kot mẽ ato amnhĩptàr xwỳnhjaja ka mẽ piitã mẽ kapêr ma nẽ mẽ kapêr kôt pix mã amnhĩ nhĩpêx rãhã ho ri apa.

¹⁴ Nẽ mẽ anhõ pahi nhỹ hã mẽ kapêr o mẽ pa xwỳnhjaja na htem mẽ akaxyw mẽ unhwỳ. Mẽ kot amnhĩ tomnuj xwỳnhjaja nhũm tanhmã mẽ kot mẽ ho kaxyw. Nẽ tãm mẽ kot amnhĩ nhĩpêx o ri mẽ pa xwỳnhjaja nhũm mẽ kot mẽ õ pahi mã mex ã mẽ harênh kaxyw.

¹⁵ Tã kêt ka mẽ kapêr ma nẽ mẽ hkôt tãm amnhĩ nhĩpêx rãhã ho ri apa. Hãmri nhũm mẽ ato kapêr punuj xwỳnhjaja ja hã mẽ apumu nẽ axte tanhmã mẽ ato kapêr to hkêt nẽ. ã mẽ ate amnhĩ nhĩpêx anhỹr o apaja na Tirtũm kãm hprãm.

¹⁶ Nẽ mẽ pahpê Tirtũm kra jakamã na pu htem paxàmnhĩx kãm tanhmã amnhĩ nhĩpêx to ho ri papa. Nom kêt pu mẽ pahpê hkra hã pahtỳx ri amnhĩ nhĩpêx kêt nẽ.

¹⁷ Nẽ kêt ka mẽ piitã mẽ ho mex o ri apa. Nẽ mẽ ato amnhĩptàr xwỳnhjê ho mex nẽ mẽ hã apijaàm rãhã ho ri apa.

Nẽ mẽ apê Kris kôt mẽ ate axpên to mẽ atõ nẽ mẽ atõxjê hã amã axpên kĩnh pê axpên to mex nẽ.

Nẽ Tirtũm ã apijaàm rãhã nẽ.

Mẽ kãm mẽ apênh xwỳnhjaja kot tanhmã amnhĩ nhĩpêx to hã mẽ kãm karõ

Epês 6.5-8; Korosê 3.22-25; Wam Ximotre 6.1-2; Xitre 2.9-10

¹⁸ Nẽ mẽ apê mẽ kãm mẽ axapênh xwỳnhjaja kêt ka mẽ anhõ patrãw kapêr ma nẽ hkôt ri amnhĩ nhĩpêx. Kot mẽ ato mex o

pa rÿ mẽ atomnuj o pa htã ka mẽ arĩ mẽ hã apijaam pê hkôt ri amnhĩ nhĩpêx.

¹⁹ Tanhmã kot mẽ anhihpêx punuj to htã ka mẽ arĩ kãm axapênh mex rãhã nê. Kêr kê Tĩrtũm ja hã mẽ apumu nê mẽ ato mex nê ka mẽ ajamakêtkati nê axãmnhĩx ri kãm axapênh o apa.

²⁰ Nom kot kaj tanhmã amnhĩ tomnuj to nhũm anhõ patrãw ja hã apumu nê hã atak ka amnhĩ xà htÿx kamã ama nê rĩ amnhĩ pumu. No kot kaj akatãt kôt kãm axapênh mex tã nhũm amarĩ atak japêr tã kêr ka amnhĩ tã kamã agryk kêt nê. Arĩ kãm amnhĩ to htÿx kamã kãm xa nê amnhĩ tã tanhmã ho hkêr nê. Hãmri nhũm Tĩrtũm ja hã apumu nê ato mex nê.

²¹ Amnepêm na pre mẽ pahte hkôt amnhĩ xunhwÿr xwÿnhjaja Kris pyrã nê mẽ paxã htÿx kamã pajamak o papa hkukamã ja hã mẽ pahpumunh mex. Na pre Kris mẽ pakaxyw amnhĩ xà htÿx kãm hamak tÿx tã amnhĩ to htÿx nê mẽ kãm xa. Tã kêr pu amnhĩ xà htÿx kamã pajamak tã ÿ hã urãk nê amnhĩ to htÿx nê papa.

²² Krisja aa tanhmã amnhĩ tomnuj to hkêr nê pa ho pa. Nê aa mẽmoj tã amnhĩ to hêx o pa hkêr.

²³ Mẽ kot kãm kapêr punuj tã nhũm amnhĩ tã tanhmã mẽ kãm nê hkêr nê. Nê mẽ kãm kapêr punuj kêr nê. Nhũm prem homnuj tÿx kumrêx nhũm amnhĩ xà htÿx kamã hamak tã amnhĩ tã mẽ kãm àkjêr nê tanhmã mẽ haprÿ hto hkêr nê. Na pre ãm hamaxpêr o: “Nã Tĩrtũm kot ixtã mẽ omunh mex kênã. Koja nhÿrmã mẽ piitã tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to. Tãm koja àhpumunh tÿx xà hkôt tanhmã ixtã mẽ harênh to. Mẽ kurom àhpumunh tÿx o àhpumunh tÿx xwÿnh kênã.” Anê.

²⁴ Kris na pre te kawã kamã mẽ pahte amnhĩ tomnuj piitã gjênh nê ho nÿt nê htur rãhã pĩ kahpa hã mẽ panê htyk pyrãk o amnhĩ nhĩpêx. Mẽ pahte axte tanhmã amnhĩ tomnuj to hkêr prãm xaj. Pãnhã mẽ pahte amnhĩ to mex pix o ri papa kaxyw. Tã ã kot amnhĩ xà htÿx kãm hamak anhÿr o jêt jakamã kot puj mẽ pahte hkôt amnhĩ xunhwÿr xwÿnhjaja aa mẽ pahte amnhĩ tomnuj pãnhã amnhĩrer kêr nê. Ra Jejus

htyk o kot mẽ panê amnhĩrer par kênã.

²⁵ Na pu pre te mẽ pahpê ôwêhti pikunor pyrã nê pahtÿx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwÿnh kot ôwêhti pikunor mã katorta pyrãk o mẽ panhihpêx. Pu mẽ hkôt amnhĩ xunhwÿr nê hkôt amnhĩ nhĩpêx mex o ri papa. Jao hkôt papa ho papa.

3

Mẽ mjên mẽ mẽ hprõ kot tanhmã axpên nhĩpêx to hã mẽ kãm karõ

Wam Korõt 7; Epes 5.22-25; Korosê 3.18-19; Wam Ximotre 2.9-15

¹ Nê kêr ka mẽ anijaja mẽ amjên kapêr ma nê hkôt amnhĩ nhĩpêx. Akĩnhã kormã kot Tĩrtũm kôt amnhĩ nhĩpêx kêr japêr tã arĩ kapêr ma nê hkôt amnhĩ nhĩpêx mex o ri apa. Kê mẽ ate amnhĩ nhĩpêx ã mẽ apumu nê mẽ apyrã nê Kris kôt amnhĩ xunhwÿr japêr. Mẽ kãm Tĩrtũm kapêr mar prãm kêr tã koja mẽ ã mẽ ate amnhĩ nhĩpêx anhÿr ã mẽ apumunh kôt mẽ apyrã nê amnhĩ kaxyw hkôt hamaxpêr japêr.

² Na htem mẽ ate Tĩrtũm kapêr kôt tãm ri amnhĩ nhĩpêx o apa hã mẽ apumunh o ri mẽ akôt pa.

³ Jakamã kêr ka mẽ anijaja amnhĩ mex pix kukamã ajamaxpêr o ri apa hkêr nê. Rÿ ajamaxpêr o:

—Ma kot paj mẽ hkuxwaxã ho amnhĩ krã hkĩ kuxwa mex nê inhõkrexê mex jagjê nê ri hã mra. Nê kupêxê mex kwÿ japrõ nê ho amnhĩm ixê mex nhĩpêx hãmri nê hagjê nê ri hã mra. Kot paj ã amnhĩ nhĩpêx anê nhũm mẽ piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê.

Anhÿr o ri amnhĩ kukamã ajamaxpêr kêr nê.

⁴ Tĩrtũm na hte ã mẽ pahte amnhĩ nhĩpêx anhÿr ã mẽ pahpumu nê ãm hã mẽ pahpumu. Mẽ ôkrexê nê mẽ ê mex na hte hapêx tokyx anê. No mẽ panhõpinhxã kaxwÿnh kãm tãm ri mẽ pajamaxpêr nê pakamã amnhĩkrit nê papaja. Kot kaj mẽ ã amnhĩ nhĩpêx anhÿr o ri apa hãmri nhũm Tĩrtũm ja hã mẽ apumu nhũm ja kãm mex nê.

⁵ Amnepê mã mẽ pakukamã mẽ panhõ wôwô nê mẽ panãjaja. Mẽ hkwy kot Tĩrtũm

kôt amnhĩ nhĩpêx xwýnhjaja na prem ã amnhĩ nhĩpêx anhÿr o pa. Mẽ kot mjên kôt amnhĩ nhĩpêx o pa jakamã na prem amnhĩ tã mẽ omu nẽ mẽ ho mex nẽ kãm mẽ hapê nẽ.

⁶ Mẽ panhõ wôwô finat Saraja na pre ã amnhĩ nhĩpêx anhÿr o pa. Jao mjên Apraãw kapêr ma nẽ hkôt amnhĩ nhĩpêx. Nẽ kêp õ pahi hã harẽ nẽ hkôt pix mã amnhĩ nhĩpêx o ri pa. Tã kot kaj mẽ urak nẽ amnhĩ to htÿx nẽ ã amnhĩ nhĩpêx anhÿr o apa. Hãmri nẽ amnhĩ tã amã amjên puma hkêt nẽ apa nẽ te apê Sara hkra pyrak.

⁷ Nẽ mẽ amyjaja kêr ka mẽ tãm mẽ aprõ nhĩpêx o ri mẽ hkôt apa. Mẽ akĩnhã mẽ hihtÿx kêt jakamã mẽ kamã axukaprĩ rãhã ho ri mẽ hkôt apa. War ajamẽ war apê Jejus kukwak ri war atĩr tũm nẽ apa mã xwýnh jakamã kêr ka mẽ ho mex rãhã ho ri mẽ hkôt apa. Tĩrtũm kãm war ajamẽ war ajapê jakamã kot kaj mẽ ã mẽ hipêx anhÿr o ri apa hãmri nẽ ra axãmnhĩx mẽmoj tã amnhĩ to Tĩrtũm wý nhũm mẽ amar kurê kumrêx.

Tĩrtũm krajaja kot amnhĩ xà htÿx kamã hamak ã mẽ harênh

Rõmãn 12.9-21; Korosẽ 1.10; Wam Tesarõn 5.14-15

⁸ E Kris kôt ixkrãmnhwýjaja. Nà ixkapêr jatur xà na ja. Kêr ka mẽ ri axpên kôt ajamaxpêr mex pê axpên to mex rãhã ho ri apa. Nẽ mẽ ate Kris kôt axpên to atõ nẽ atõx ã amã axpên kĩnh o ri apa. Jao axpên kamã axukaprĩ nẽ mẽmoj to axpên kutã anojarêt rãhã nẽ.

⁹ Na pu prem Jejus kôt amnhĩ xunhwý nhũm Tĩrtũm mẽ pahto hkra nẽ mẽ pahto mex ã amnhĩ jarẽ. Tã koja mẽhõ tanhmã mẽ anhĩpêx to rý tanhmã mẽ ato kapêr punuj to. Nom kêr ka mẽ ama nẽ amnhĩ tã tanhmã ho rý tanhmã ho akapêr punuj to hkêt nẽ. ãm te Tĩrtũm kot mẽ panhĩpêx pyrak o mẽ hipêx nẽ mẽ ho mex pix o ri mẽ hkôt apa. Ja na Tĩrtũm kãm hprãm.

¹⁰ Kapêr ã kagã htũm kot ja jarênh kot:

Kot kaj mẽ amã amex nẽ akĩnh nẽ ri apa hprãm hã kot kaj mẽ ã amnhĩ nhĩpêx anẽ:

Kot kaj mẽ ri akapêr punuj o ri apa hkêt nẽ. Nẽ mẽmoj tã amnhĩ to axêx o ri apa hkêt nẽ.

¹¹ Nẽ te mẽ ate amnhĩ katut kôt ate amnhĩ tomnuj rênh o apa pyrã nẽ hpãnhã amnhĩ to mex pix o ri apa.

Nẽ mẽ amã tãm axpên nhĩpêx pix prãm o ri axpên kôt apa.

Nẽ mẽ amã ajamakêtkati nẽ axpên kôt apa hprãm rãhã ho ri apa.

¹² Na hte Tĩrtũmja ã mẽ kot amnhĩ nhĩpêx anhÿr o pa xwýnhjê jamãr mex rãhã ho pa.

Nhũm mẽ tanhmã amnhĩ to hwýr to nhũm mẽ mar kurê kumrêx.

No mẽ kot amnhĩ tomnuj o mẽ pa xwýnhjaja na hte mẽ kutã amnhĩ xãm nẽ ãm mẽ omu nẽ mẽ ho mex kêt nẽ. Anẽ.

Tĩrtũm kapêr ã kagã htũm kot ã mẽ harênh kot anhÿr.

¹³ Nẽ kot kaj mẽ amã amnhĩ to mex pix o apa hprãm nhũm mẽhõ ja hã tanhmã mẽ atomnuj to hkêt nẽ.

¹⁴ No kot kaj mẽ amnhĩ to mex pix o apa htã nhũm mẽhõ ja hã apumu nẽ tanhmã hamaxpêr to nẽ atomnuj ka amnhĩ xà htÿx kamã ajamak japêr. Tã koja Tĩrtũm nhÿrmã ja hã tanhmã mẽ ato mex to. Jakamã kwa kêr ka mẽ tee ri mẽhõ kot tanhmã mẽ atomnuj to hkukamã ajamaxpêr pê amã mẽ uma ho ri apa hkêt nẽ. Nẽ tee ri amnhĩ kukamã ajamaxpêr o akaprĩ nẽ ri apa hkêt nẽ.

¹⁵ ãm amnhĩ kaxyw Kris mã mãn ajamaxpêr tÿx rãhã nẽ mẽ panhõ Pahihti hã apijaãm rãhã ho ri apa. Nhũm mẽhõ ja hã mẽ apumu nẽ tanhmã hã mẽ akukjêr to nẽ mẽ amã:

—Kwa mẽmo kaxyw na ka pre Kris kôt amnhĩ xãm nẽ hkôt ri amnhĩ nhĩpêx o apa? Anẽ.

Ka mẽ ama hãmri nẽ aprĩ hã kãm amnhĩ jarênh kurê kumrêx.

¹⁶ Nom kêr ka mẽ akapêr mã aprĩ kamã kãm amnhĩ jarẽ. Tĩrtũm kapêr kôt amnhĩ nhĩpêx o apa hã mẽ kãm amnhĩ jarẽ. Koja mẽ Kris ã mẽ ato kapêr punuj rý hã mẽ atã hpêr o axkê nẽ pikunhar japêr ka mẽ ãm amnhĩ tã mẽ ama nẽ ãm mẽ ama. Kwãr mẽ mãmrĩ ã mẽ anhĩpêx anẽ. Kêr ka mẽ amnhĩ tã mẽ omu nẽ arĩ amnhĩ to mex rãhã ho ri apa. Kêr kê mẽ tee ri amnhĩ tã mẽ apumu nẽ hpijaãm nẽ.

¹⁷ Nẽ koja mẽ akwýjaja mẽ ate Tĩrtũm kapêr kôt amnhĩ nhĩpêx mex o apa hã mẽ

apumu nê hã tanhmã mẽ anhîpêx to htã kêr ka mẽ arî Tîrtûm kôt amnhî nhîpêx o ri apa. Ja na kãm hprãm. Nom kot kaj mẽ tanhmã amnhî tomnuj to nhûm mẽ ja hã mẽ apumu nê pahihtî mã mẽ ajarê nhûm kuma nê ja hã tanhmã mẽ amã àkjêr to ka mẽ ra apijaàm nê.

¹⁸ Nê Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhîre. Mẽ pakurom aa kot tanhmã amnhî tomnuj to hkêt tã mẽ pahte amnhî tomnuj piitã hpãnhã amnhîrer pa. Mẽ pahte hkôt amnhî xunhwÿr nê nhÿrmã ma Tîrtûm nhõ krî hwÿr paxàpir nê kamã pahtîr tûm nê papa ho papa kaxyw. Mẽ kot hpîr tã nhûm Tîrtûm akupÿm ho htîr nhûm htîr o htîr.

¹⁹⁻²⁰ Nom kormã akupÿm htîr kêr ri na pre hkarõ pix o mẽ htyk xwÿnhjê hwÿr mõi. Ahpunu kamã mẽ hkarõ kêp prês nê hkrî xwÿnhjê hwÿr mõi nê mẽ kot Noehti kapêr mar nê hkôt amnhî nhîpêx kêr nhûm gô htãm kot mẽ hanhir par xwÿnhjê mã kapêr. Tîrtûm kot nhÿrmã mẽ kot amnhî tomnuj mÿrapê kuwy maati wÿr mẽ rênh ã mẽ hkukamã mẽ kãm awjarê. Amnepêm kormã Noehti kot pàr raxta nhîpêx o kuhê ri na prem kãm Tîrtûm kapêr mar prãm kêr nê. Nhûm amnhî tã mẽ omu nê mẽ kamã gryk tokyx anhÿr kêr nê. Arî amnhî tã mẽ hamãr o pa. Mẽ kot hkôt amnhî xunhwÿr nê hkôt amnhî nhîpêx prãm xà arî mẽ hamãr ry ho pa. No ãm tee ri mẽ hamãr kaprÿ nhûm mẽ amnhî kaxyw hkôt hamaxpêr kêr nê htÿx ri amnhî tomnuj o pa. Mẽ ãm grêre nê Noehti kapêr ma nê gô htãm pymaj hkôt pàr raxta wÿr agjê. ãm mẽ kêp 8 pix nê hwÿr agjê nhûm gô htãm mẽ hanhir kêr nê. Tîrtûm na pre mẽ nê omunh mex nê. No mẽ kot amnhî tomnuj xwÿnhjaja nhûm gô htãmja mẽ hanhir o mẽ himex pa. Nhûm mẽ kêp 8ja pix arî htîr nê mex nê pàr raxta kamã gô krãhkã hã mex rãhã pa.

²¹ Gô tãmja kêp hprî hã mẽ pahte Jejus kôt amnhî xunhwÿr ã mẽ pahto amnhîrît xà na. Mẽ pahte amnhî nhîpêx tûm kaga nê hpãnhã amnhî nhîpêx nyw o amnhî nhîpêx o papa hã mẽ pahto amnhîrît xà. Jakamã na htem mẽ pahkrã kumrã. Nom mẽ kot mẽ panê mẽ pagrã kugrãnh kaxyw

kêr ra mẽ pahte Jejus kôt amnhî xunhwÿr ã amnhî to amnhîrît kaxyw na htem mẽ pahkrã kumrã. Ra mẽ pahte Tîrtûm kapêr kôt amnhî nhîpêx o papa hã amnhî to amnhîrît kaxyw. Pu mẽ ra mẽ pahte amnhî nhîpêx nyw o amnhî nhîpêx ã amnhî to amnhîrît. Te mẽ pahte gôx kãm mẽ pahte amnhî tomnuj rer par pyrã nê hpãnhã amnhî nhîpêx nyw o amnhî nhîpêx o papa.

²² Nê na pre Jejus akupÿm htîr nê ma akupÿm Tîrtûm nhõ krî hwÿr api nê Tîrtûm nhîhkô hã pahihtî hã mẽ hkrî xà kamã hkrî ho hkrî. Hãmri nê ra Tîrtûm kapêr o mẽ wrÿk xwÿnh nê pahî piitã mẽ ho amnhîptâr o hkrî.

4

Mẽ pahte amnhî nhîpêx nyw o amnhî nhîpêx ã mẽ pamã karõ

Epes 4.17-24; Korosê 3.1-11

¹ Nê na prem Kris pî nhûm amnhî xà htÿx kãm hamak kãm htyk kaxyw tã arî mẽ kãm xa. Ra kot amnhî xà hkukamã amnhî tã mẽ omunh tã tee ri amnhî kukamã hamaxpêr o amnhî tã tanhmã ri mẽ kot hpîr mã xwÿnhjê homnuj to hkêt nê. Arî mẽ kãm xa nhûm prem kupî. Tã kêr pu mẽ urak nê ã amnhî nhîpêx anhÿr o ri papa. Mẽ kot hã tanhmã mẽ panhîpêx to htã pu mẽ urak nê amnhî xà htÿx kãm pajamak tã tanhmã amnhî tã mẽ ho hkêt nê. Na hte ra mẽ htyk nê mẽ hikwÿ xwÿnhjaja axte amnhî tomnuj kêr nê. Tã kêr pu mẽ urak nê axte tanhmã amnhî tomnuj to ho ri papa hkêt nê.

² Jakamã kêr pu mẽ axte mẽ pahte amnhî nhîpêx tûm kôt amnhî nhîpêx o papa hkêt nê. Nê mẽ pajamaxpêr tûm kôt axte pajamaxpêr o papa hkêt nê. ãm Tîrtûm kãm hprãm xà hkôt pix mã tanhmã amnhî nhîpêx to ho papa rãhã ty.

³ Amnepêm kormã mẽ pahte Jejus kôt amnhî xunhwÿr kêr ri na pu prem mẽ kêp Tîrtûm kra hkêt xwÿnhjê hkôt amnhî nhîpêx.

Jaõ nhãm mênijê pumu nê mẽ kamã pahpijaàm kêr hprãm.

Nê pahpipãnh o ri papa.

Nê mẽ pahpipãnh kaxyw axpên wÿr akuprõ nê mênijê kamã pahpijaàm kêr.

Ně sânti hwÿr pahkõnkrâ ho pahkrĩ ně kãm amnhĩ jagrer.

⁴ Tã Kris kõt amnhĩ xunhwÿ hãmri ně mẽ pahte amnhĩ nhĩpêx nyw o amnhĩ nhĩpêx o papa. Hãmri nhũm arĩ mẽ kot amnhĩ nhĩpêx tũm o amnhĩ nhĩpêx xwÿnhjaja tee ri ja hã mẽ pahpumu ně hêx rom amnhĩ kõt mẽ pamã tanhmã ri àhkrox to ho pa. Pu mẽ axte mẽ hkõt amnhĩ nhĩpêx kêt nhũm mẽ tee ri ja hã mẽ pahpumu ně mẽ pakamã gryk kato ně tanhmã mẽ pahto kapêr punuj to.

⁵ Tã koja Tĩrtũm nhÿrmã amnhĩ wÿr mẽ hã karõ nhũm mẽ ma hwÿr mra ně kutã hkrĩ. Ně kormã mẽ htĩr ri tanhmã mẽ kot amnhĩ nhĩpêx to ho pa hã kãm amnhĩ jarênh pa. Hãmri nhũm mẽ kot amnhĩ nhĩpêx ã tanhmã mẽ hipêx to. Koja mẽ pahpiitã tanhmã mẽ pajarênh to. Mě htyk xwÿnhjaja ně kormã mẽ pahtĩr ně mẽ papa xwÿnhjaja nhũm mẽ pahpiitã tanhmã mẽ pajarênh to.

⁶ Na pre Jejus ty hãmri ně kormã akupÿm htĩr kêt rãhã hkarõ pix o ma amex wÿr tẽ ně kamã mẽ htĩr ri amnhĩ kaxyw Tĩrtũm mã hamaxpêr xwÿnhjê mã awjarẽ. Na prem mẽ kot amnhĩ tomnuj mÿrapê ra wej ně ty ně arĩ amex kãm ri pa. Jakamã nhũm Jejusja hkarõ ho ma mẽ hwÿr tẽ ně mẽ kãm:

—E na pa ra mẽ ate amnhĩ tomnuj pãnhã amnhĩrer pa. Tã kormã mẽ atĩr ri mẽ ate amnhĩ kaxyw Tĩrtũm kõt ajamaxpêr jakamã kot kaj mẽ ma hwÿr api ně wa ixkuri wa ixpyrã ně atĩr tũm ně amex ně apa ho apa. Anẽ.

Mě pahpê Kris kwÿ hã tanhmã mẽ pahte axpên nhĩpêx to hã mẽ pamã karõ

Rõmãn 12.6-8; Wam Korĩt 12.1-11

⁷ Ně koja tokyx mẽ panhõ pikaja mẽ pahpê hapêx ně kamã mẽmoj piitã hapêx pa. Jakamã kwa kêt ka mẽ ate amnhĩ nhĩpêx ã amnhĩ pumunh mex o apa.

Ně mẽ atÿx ri ajamaxpêr ri apa hkêt ně.

Ně mẽmoj punuj ně amnhĩ to htÿx o ri apa ho ajamaxpêr nyw pix o amnhĩ to Tĩrtũm wÿr rãhã ho ri apa.

⁸ Ně kwa kêt ka mẽ amã axpên kĩnh o ri axpên kõt apa. Ja na mex o mex. Kot kaj mẽ ã axpên nhĩpêx anẽ nhũm Kris kõt atõ rÿ atõxjê hõ tanhmã atomnuj to japêr ka

amnhĩ tã omu ně ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpêr kêt ně.

⁹ Ně kêt ka mẽ axãmnhĩx ajamakêtkati ně amnhĩ nhõrkwÿ hwÿr axpên wÿr ně axpên to mex o ri apa. Nom kêt ka mẽ agryk kãm amnhĩ wÿr mẽ hwÿr kêt ně.

¹⁰ Na pre ra Tĩrtũm mẽ pahpê hkra hã ahpÿnhã tanhmã mẽ pamã mẽmoj tã karõ hto ně ã mẽ pahte amnhĩ nhĩpêx anhÿr o papa kaxyw mẽ pahto mẽ paxihtÿx. Mě pahte ahpÿnhã tanhmã axpên to mex to ho ri axpên kõt papa kaxyw. Tã kêt ka mẽ ra kot mẽmoj tã mẽ amã karõ hkõt axpên nhĩpêx o ri axpên kõt apa.

¹¹ Koja ma mẽ ate akwÿjê mã kapêr jarênh o ri apa kaxyw mẽ amã karõ ka mẽ ama ně akatãt kõt ÿ hã mẽ kãm harênh mex o ri mẽ hkõt apa. Rÿ tanhmã axpên to ajuta hto ho ri apa kaxyw mẽ axunhwÿr japêr ka mẽ amnhĩ tã omu ně hkamnãr rom mẽ ho ajuta mex rãhã ho ri apa. Mě apiitã Jejus nhÿ hã ã amnhĩ nhĩpêx anhÿr o ri apa. Kêt kêt Jejus kõt mẽ akwÿjaja amnhĩ tã mẽ apumu ně mẽ anhÿ hã Tĩrtũm mã mex o mex ã harẽ.

Jejus kwÿjaja kot amnhĩ xã htÿx kamã hamak o pa hã mẽ harênh

Rukre 6.20-23; Juãw 16.1-4; Sikũn Tesarõn 1.3-12; Sikũn Ximotre 3.13; Eprêw 12.3; Xiakre 1.2-4

¹² E Kris kõt ixkrãmnhwÿjaja. Koja Kris kwÿ kêt xwÿnhjaja Kris ã tanhmã mẽ anhĩpêx to nom kwa kêt ka mẽ tee ri amnhĩ kukamã ajamaxpêr o akaprĩ ně apa hkêt ně. Kêt mẽ akĩnh rãhã axpên kõt ri apa. Na htem ã mẽ pahpê Kris kwÿjê nhĩpêx anhÿr o pa. Jakamã kwa mẽ amnhĩ tã mẽ omu ně tee ri amnhĩ kukamã ajamaxpêr kêt ně.

¹³ Mě arĩ akĩnh ně ri apa. Mě kot Kris pyrã ně mẽ panhĩpêx punuj tãã. Kêt kêt Jejus nhÿrmã akupÿn mẽ pahwÿr wrÿ pu mẽ omu ně pahkĩnh tÿx o pahkĩnh tÿx.

¹⁴ Kwãr mẽ mãmrĩ mẽ pahpê Kris kwÿ hã tanhmã mẽ panhĩpêx to. Na htem ã Tĩrtũm Karõ kot mẽ pahkarõ mã gjêx xwÿnhjê nhĩpêx o pa anẽ.

¹⁵ Ně mẽ apê Kris kwÿ jakamã kwa kêt ka mẽ amnhĩ to mex rãhã o ri apa. Jao mẽ hpar o ri apa hkêt ně.

Ně ri axàhkĩnh o ri apa hkêt nẽ.

Ně nhãm mẽ hkaêx mã agjêx o ri apa hkêt nẽ.

Ně tanhmã mẽ homnuj to ho ri apa hkêt nẽ.

Kot kaj mẽ ã amnhĩ nhĩpêx anhỹr o ri apa nhũm mẽ anhõ pahihtĩ ja hã tanhmã mẽ ato ka mẽ amnhĩ kamã apijaàm tỳx nẽ.

¹⁶ Nom koja mẽ apê Kris kwỳ hã tanhmã mẽ anhĩpêx to ka mẽ ja hã amnhĩ tã mẽ omu nẽ amnhĩ kamã apijaàm kêt nẽ. ãm Tĩrtũm pix mã amnhĩ jarẽ nẽ kãm:

—Pa Tĩrtũm. Ixpê akra Kris kwỳ hã na mẽ ã ixtomnuj anẽ. Nom ixpê akra jakamã kwãr mẽ mãmri tanhmã inhĩpêx to. Amex o amex o ate ixto akra jakamã kwãr mẽ mãmri ã inhĩpêx anhỹr o pa. Anẽ.

¹⁷ Nẽ koja Tĩrtũm tokyx mẽ pahpiitã tanhmã mẽ pahte amnhĩ nhĩpêx to hã mẽ pahpumu nẽ tanhmã mẽ panhĩpêx to. Mẽ pahpê hkrajaja koja tanhmã mẽ pahte amnhĩ nhĩpêx to hã tanhmã mẽ pahto mex to. Hãmri nẽ hpãnhã mẽ kêp hkra hkêt xwỳnhjê ho hapu nẽ tanhmã mẽ hipêx to. Mẽ kot amnhĩ kaxyw hkôt hamaxpêr kêt jakamã nhũm mẽ pahkĩnhã tanhmã mẽ homnuj tỳx to.

¹⁸ Kapêr ã kagà htũm kot ja hã mẽ pa-jarênh kot:

Mẽ kot Tĩrtũm kapêr kôt amnhĩ to mex xwỳnhjaja na htem ãmnhĩx amnhĩ xà htỳx kamã hamak o pa kamã ty nhũm Tĩrtũm ma õ krĩ hwỳr amnhĩ wỳr mẽ ho àpir kurê kumrêx.

Nom mẽ kot amnhĩ tomnuj xwỳnhjaja koja mẽ hkĩnhã amnhĩ xà htỳx kamã hamak rãhã nẽ pa ho pa nẽ aa mex kêt nẽ. Anẽ.

¹⁹ Tã koja Tĩrtũm kãm ja prãm japêr kwãr mẽ mãmri Kris ã tanhmã mẽ pahtomnuj to. Nom kêt pu mẽ Tĩrtũm kamnàr rom amnhĩ to mex pix o ri papa. Kêp mẽ panhĩpêx xwỳnh maati jakamã ra kot amnhĩ jarênh xà hkôt koja tanhmã ri mẽ pamã amnhĩ nhĩpêx to ho pa.

5

*Tĩrtũm krajaja kot tanhmã amnhĩ nhĩpêx to hã mẽ kãm karõ
Atre 20.28-31*

¹ E kot paj hpãnhã mẽ apê Kris kwỳ hkrãhtũmjê mã ixkapêr ka mẽ inhma. Ijaxwỳja ixpê mẽ akrãhtũmjê hõ na pa. Na pa pre mẽ akurom Kris htyk kãm omu. Nom kot puj mẽ nhỹrmã pahpimràatã mex o mex ã omu nẽ uràk nẽ mẽ pamex nẽ ri papa ho papa.

²⁻³ Jakamã e Kris kôt mẽ hkrãhtũmjaja kêt ka mẽ atar Kris kôt pahkwỳjê jamãr mex nẽ. Ra Tĩrtũm kot mẽ ate kãm hkwỳjê jamãr kaxyw mẽ axunhwỳr jakamã kêt ka mẽ omunh mex rãhã ho mẽ hkôt ri apa. Te ho ôwêhti jamãr xwỳnh kot ôwêhti jamãr mexta pyrãk. Te mẽ kêp Tĩrtũm krit ôwêhti nhũm mẽ ate kãm mẽ hamãr o apa xwỳnh pyrã nẽ kãm mẽ omunh mex rãhã ho ri mẽ hkôt apa. Nẽ akĩnh pê tanhmã ri mẽ ho ajuta hto ho ri mẽ hkôt apa. Ja na Tĩrtũm kãm hprãm. Nom kêt ka mẽ ano hkà karôt kãm mẽ ho ajuta hkêt nẽ. Rỳ kàxpore hprãm xaj mẽ kãm tanhmã amnhĩ nhĩpêx to hkêt nẽ. ãm amarĩ tanhmã mẽ kutã anojarêt to pix kukamã ajamaxpêr o ri mẽ hkôt apa.

Nẽ kêt ka mẽ kãm mẽmoj tã karõ kamã axihtỳx kêt nẽ. Mẽ akapêr mã aprĩ kamã mẽ kãm mẽmoj jarẽ kê mẽ amnhĩ tã mẽ apumu nẽ mẽ apyrã nẽ ã axpên nhĩpêx anhỹr o pa.

⁴ E kêt ka mẽ ã Kris kôt mẽ akwỳjê jamãr mex pê mẽ hipêx o apa anẽ. Hãmri nhũm mẽ pajamãr xwỳnh maati ja hã mẽ apumu nẽ nhỹrmã akupỳn mẽ pahwỳr wrỳ nẽ mẽ ato mex rax nẽ.

⁵ Nẽ e mẽ amy xaptàr nywjaja. Kêt ka mẽ Kris kôt mẽ akrãhtũmjê kapêr ma nẽ mẽ hkôt ri amnhĩ nhĩpêx mex o ri apa.

Nẽ kwa kêt ka mẽ apiitã axpên nhĩpêx o te anhĩõ kot amnhĩ to rax o ajakrenh pyrãk. Tĩrtũm kapêr ã kagà htũm kot ja jarênh kot: Mẽ kot amnhĩ to jarkrar o ri mẽ pa xwỳnhjaja na hte Tĩrtũm mẽ kutã amnhĩ xunhwỳ.

No mẽ kot amnhĩ to hkryre nẽ axpên tã hpijaàm o mẽ pa xwỳnhjaja na hte mẽ ho mex o pa.

⁶ Anhỹr ã mẽ harênh jakamã kwa kêt ka mẽ Tĩrtũm ã apijaàm rãhã ho ri apa ixkwỳjaja. Nẽ axpên mã ri amnhĩ to jarkrar o ri apa hkêt nẽ. Kêt kê Tĩrtũm xihtỳx xwỳnhja ja hã mẽ apumu hãmri nẽ nhỹrmã kot mẽ pahto

mex xà hã arĩgroja kato nhũm mẽ ate amnhĩ to mex xwýnh ã mẽ ajarẽ nẽ mẽ ato mex rax nẽ.

⁷ Nẽ kêr ka mẽ tee ri amnhĩ kukamã ajamxpêr pê akaprĩ ho ri apa hkêt nẽ. Âm te mẽ ate Tĩrtũm mã akaprĩ nhõr pyræk o amnhĩ nhĩpêx nẽ axàmnhĩx akĩnh nẽ akaprĩ hkêt nẽ apa. Tĩrtũm kêp mẽ pajamãr xwýnh maati kênã kot ka kêt mẽ ri akaprĩ nẽ ri apa.

⁸ Nẽ kwa mẽ okora. Kêr ka mẽ amnhĩ nẽ kot mẽ pakutã amnhĩ xunhwýr xwýnh maati Satanastija pumunh mex rãhã ho ri apa. Na hte mẽ panhĩpêx o te ropkror kot akunĩ kamã mry ho krihkrit o ri mrrar pyræk o mẽ panhĩpêx. Jao mẽ pahte Kris kaga hprãm xàj apkati mẽ tanhmã nẽ mẽ pahto ho ri mẽ pahkõt pa.

⁹ Na hte ã pika piitã hkõt Kris kõt mẽ pahtõ nẽ mẽ pahtõxjê nhĩpêx anhýr o pa nhũm mẽ pahpyrà nẽ amnhĩ xà htýx kamã hamak o pa pê omnuj nẽ pa. Jakamã kwa kêr ka mẽ Kris kõt amnhĩ xunhwýr tỳx nẽ kutã amnhĩ to htýx rãhã ho ri apa.

¹⁰ Tĩrtũm kãm mẽ pajapê jakamã na hte mẽmoj to mẽ pakutã nojarêt rãhã ho ri pa. Na pre mẽ pamex nẽ nhýrmã mẽ pahte kuri tãm amnhĩ nhĩpêx o papa mã xwýnh ã mẽ pajarẽ. Kris kukwak ri ã mẽ pajarênh anhýr jakamã mẽ ate jar Kris ã apunuj nẽ ri apa htã kot kaj mẽ kritpêm ã amnhĩ nhĩpêx anhýr ry hkêt nẽ. Kojã Tĩrtũm mẽ akrã kamã mẽ ajamxpêr xihtýx jagjê ka mẽ akupým amex nẽ axihtýx pê ate amnhĩ nhĩpêx nyw o amnhĩ nhĩpêx rãhã ho ri apa.

¹¹ Tĩrtũmja hihtýx o hihtýx nẽ àhpumunh o àhpumunh. Nẽ hihtýx xà nẽ àhpumunh xà kojã aa kêp hirerek nẽ hapêx kêt kumrêx. Âm hãmri na mẽ kot harênh kot anhýrja.

Pêtre kapêr jatur xà

¹² Nẽ ota Kris kõt mẽ pahtõ Sirastija na inhmã mẽ akaxyw kagàja nhĩpêx pa mẽ awýr mẽnh kaxyw. Na pa hte kãm ixkapêr nhũm inhma nẽ inhmã hã kagà. Na hte Kris kapêr kõt amnhĩ nhĩpêx rãhã ho ri pa. Tã inhmã kagàja nhĩpêx. Mẽ ate kamã harênh nẽ mar nẽ tãm ajamxpêr kaxyw. Nẽ Tĩrtũm kãm mẽ ajapê nẽ kot mẽmoj to mẽ akutã nojarêt ã mẽ ate kamã harênh kaxyw. Tã kêr ka mẽ kãm mẽ ajapê hã amnhĩ tã harênh ma nẽ kapêr kõt pix mã

amnhĩ nhĩpêx mex rãhã ho ri apa. Mẽ akwýjaja kot tanhmã hã mẽ ato htãã.

¹³ Nẽ ota jar Papirõn kamã Kris kõt mẽ pahtõ nẽ mẽ pahtõxjaja mẽ awýr hpêr mẽ. Tĩrtũm kot mẽ pahpyrà nẽ mẽ ho hkra jakamã mẽ kêp mẽ atõ nẽ mẽ atõx ã mẽ awýr hpêr mẽ. Nẽ Xiakre mããnen mẽ awýr hpêr mẽ. Te kêp ixkra pyræk.

¹⁴ Nẽ kêr ka mẽ nhýri apê Kris kwý hã axpên pumu nẽ mẽ axpên to atõ nẽ atõx ã axpên mã akapêr mex kurê kumrêx.

È kê Tĩrtũm mẽ apê Kris kwý hã mẽ amã mẽ ajamakêtkati nẽ mẽ apa xà gõ ka mẽ axàmnhĩx ajamakêtkati nẽ amex nẽ ri apa ho apa.

Tã ãm ja pix. Ixpê Simãw Pêtre na pa ã mẽ awýr kagà nẽ mẽnh anẽ.

Sikūn Pêtre
Simāw Pêtre kot Jejus kôt
hkwýjê hwýr wam kagà nē
mēnh kôt hō mēnh

Simāw Pêtre na pre kagàja nhîpêx. Jejus nhî hā hkrajê jahkre ho mē pa xwýnhjê hō na pre. Mē kēp Jejus kra hkêt xwýnhjaja ra kot Jejus ā hpîr kaxyw nhūm pre kagàja nhîpêx nē krî piitā hkôt Jejus kwýjê hwýr kurē nē kamā hprî hā mē kām mēmoj tā karō. Mē kot arî Tirtūm kot amnhî nhîpêx kôt amnhî nhîpêx rāhā ho pa hā mē kām karō. Nē hamaxpēr o mē hamaxpēr rāhā ho pa hā mē kām karō.

Nē mē hkwý kot Tirtūm kôt amnhî nhîpêx ā amnhî jarēnh tā hkôt amnhî nhîpêx kêt xwýnhjaja nhūm pre tanhmā mē harēnh to. Ā na pre mē kām mēmoj jarēnh nē hā kagà nē krî piitā hkôt mē hwýr rēnh anē. Nē mē kām:

¹ Pa Kris kôt ixtō nē ixtōxjaja. Xà mē amex? Ot pa mē awýr kagà nhîpêx nē krî piitā hkôt mē awýr kurē. Ixpê Simāw Pêtre na pa wam ixte kagà nhîpêx nē mē awýr mēnh tā axte hō nhîpêx. Ixte Jejus Kris nhî hā mē ajahkre ho ixpa xwýnh ā mē amā hipêx nē kumē. Na pa hte Jejus mā amnhî nhîpêx mex o ri ixpa.

Nē mē papytār xwýnh Jejus Krisja Tirtūm pyrā nē mex o mex. Nē wa kot amnhî nhîpêxja mex o mex. Jakamā na pre wa tanhmā mē pahkrā hto pu mē amnhî kaxyw wa hkôt pajamaxpēr tỳx rāhā ho ri papa. Na ka htem ixpyrà nē ā amnhî nhîpêx anē. Tā pa mē amā kagàja nhîpêx.

² Nà Tirtūm mē mē panhō Pahihti Jejus wa kot amnhî nhîpêxja na ka mē ra harēnh mar tỳx nē. Wa kot tanhmā amnhî nhîpêx to nē tanhmā wa hamaxpēr toja ka mē mar tỳx nē wa hkôt pix mā amnhî nhîpêx. Tā kēr ka mē arî ā amnhî nhîpêx anhýr rāhā ho ri apa. Jao axāmnhîx ajamakêtkati nē akînh nē apa ho apa. Na pa hte ā mē ato Tirtūm mē Pahihti Jejus Kris wa hwýr o ri ixpa anē. Na hte Tirtūm mē ato mex nē mē akutā nojarêt rāhā ho pa.

Tirtūm kot mē pahto mex o pa hā harēnh
Epes 2.12-13; Wam Tesarōn 1.2-4; Sikūn
Pêtre 3.18

³ Nē Tirtūmja àhpumunh tỳx o àhpumunh tỳx jakamā na pu htem hkôt amnhî xunhwý nhūm amnhî tā mē pahpumu nē mē pamā àhpumunh tỳx xà hkwý gō. Hāmri pu mē ra uràk nē amnhî to mex nē tām amnhî nhîpêx o ri papa. Tā kot puj mē nhýrmā ma ō krî hwýr api.

⁴ Na pre mē pakukamā amnhî jarēnh o:
 –Kot paj nhýrmā ixkrajê mā ixte amnhî nhîpêx mex kwý gō nhūm mē inhý hā ho tām ri amnhî nhîpêx mex o pa. Nē ixpyrà nē hamaxpēr mex o pa.

Anhýr jao te ra mē pamā hkînh xà mex kwý nhōr pyrāk o mē panhîpêx. Nē te ra kot mē pahkrām hamaxpēr mex jagjēnh nē mē pamā kot amnhî nhîpêx mex jagjēnh pyrāk. Mēmo kaxyw na pre ā mē panhîpêx mex anē? Nà uràk nē tām mē pahte amnhî nhîpêx mex rāhā o ri papa kaxyw. Jao mē pahte mē kēp hkwý hkêt xwýnhjê hkôt amnhî nhîpêx kêt nē. Nē mē hamaxpēr punuj o pajamaxpēr kêt nē. Nē hpānhā mē pahte Tirtūm kôt pix mā amnhî nhîpêx rāhā ho papa. Ā mē pahte amnhî nhîpêx anhýrja na mex o mex.

⁵ Tā ā Tirtūm kot mē panhîpêx mex anhýr jakamā kwa kēr ka mē kapēr mar tỳx nē hkôt pix mā amnhî nhîpêx mex o ri apa. Jao amnhî kaxyw hkôt ajamaxpēr rāhā nē. Kot kaj mē ā amā amnhî nhîpêx anhýr o apa hprām hā kot kaj mē mǎānēn amā tām amnhî nhîpêx o apa hprām. Nē mē amā Tirtūm kapēr piitā mar prām o ri apa.

⁶ Hāmri nē piitā mar pa nē mēmoj punuj piitā nē amnhî to htỳx nē. Nhūm mē kēp Kris kwý hkêt xwýnhjaja Kris ā tanhmā mē anhîpêx to htā ka mē ām amnhî tā mē omu nē mē umaj mē amā Kris kaga hprām kêt nē.

Nē mē amā Tirtūm mā amnhî jarēnh rāhā ho apa hprām.

Nē mē amā kapēr mar rāhā ho apa hprām.

⁷ Nē mē amā Kris kôt mē atō nē mē atōxjê ho mex pix o ri apa hprām. Jao te mē amā amnhî tā ma pyrāk o mē piitā mē hipêx o ri mē hkôt apa.

⁸ E kēr ka mē ā amnhî nhîpêx anhýr o ri apa. Kot ka mē ā amnhî nhîpêx anē nē mē panhō

Pahihti Jejus Kris kôt amnhî nhîpêx mex o mō. Hāmri nhūm mẽ akwỳjaja mẽ apumu nē mẽ apê Kris kwỳ hã mẽ ajarēnh kurê kumrêx.

⁹ No kot ka mẽ atō ixkapêr mar tã hkôt amnhî nhîpêx kêt nē hāmri te Tĩrtũm kot anê ate amnhî tomnuj rēnh par mã aja-maxpêr kêt pyræk.

¹⁰⁻¹¹ No na ka htem ã amnhî nhîpêx anhỹr kêt nē. Ra mẽ ate Pahihti Jejus Kris kôt amnhî nhîpêx mex jakamã na htem ja hã mẽ apumu nē Tĩrtũm kot mẽ ato hkra hã mẽ ajarēnh kurê kumrêx. Kot kaj mẽ ã hkôt amnhî nhîpêx anhỹr o apa nē mẽmo arĩgro hã apunuj nē apa htã Jejus kaga hkêt nē. Hāmri nē nhỹrmã ma Tĩrtũm nhõ krĩ hwỳr api nhūm mẽ apumu nē mẽ ato mex rax nē. Hāmri ka mẽ õ krĩ kamã mẽ panhõ Pahihti Jejus Kris wa kuri atĩr tũm nē amex nē apa ho apa.

¹² Nē na ka mẽ ra Tĩrtũm kot amnhî nhîpêx mar tỳx nē amnhî krã kamã kot amnhî nhîpêx mã ajamaxpêr tỳx o ri apa. Tã nom kot paj arĩ mẽ amã ja jarēnh rãhã ho ri ixpa.

¹³ Kormã ixtĩr ri kot paj xatã mẽ amã harēnh o amnhĩrĩt. Ja na kêt inhmã hprãm. Mẽ ate nhỹrmã tanhmã ri ajamaxpêr to nē hkaga pumaj.

¹⁴ Na pre mẽ panhõ Pahihti Jejus Krisja inhmã tokyx ixtyk ã ijarē. Kot paj xep kritpēm ri ixtĩr nē ixpa hkêt nē.

¹⁵ Jakamã na pa kormã ixtĩr ri ã mẽ amã kagã nhîpêx anē. Mẽ ate inhmỳr pē arĩ omunh nē kamã harēnh nē Tĩrtũm kot amnhî nhîpêx mã ajamaxpêr tỳx rãhã ho ri apa kaxyw.

Pêtre kot no ho Jejus pumunh ã amnhĩ jarēnh

Matêwre 17.1-5; Makre 9.1-8; Sikûn Ximotre 3.16-17

¹⁶ Nē na pa pre ra tanhmã mẽ amã mẽ panhõ Pahihti Jejus Krisja jarēnh to. Hihtỳx o hihtỳx ã harē nē àhpumunh tỳx o àhpumunh tỳx ã harē. Nē nhỹrmã akupỳn mẽ pahwỳr wrỳk ã harē. No na pa pre amnhî krã hkôt ã harēnh anhỹr kêt nē. Na pa pre inhno ho Jejus hihtỳx o hihtỳx ã omunh o hkôt ixpa nē ixte omunh xà hkôt ã mẽ amã harēnh anē.

¹⁷⁻¹⁸ Amnepê mã kormã ixkwỳjê mẽ mẽ ixte arĩ hkôt ixpa ri pa prem hkôt hixêt prêk nhĩmōk wỳr api. Pa nē kaxyw Xiakre nē Juãw mẽ pa mẽ hkôt ixpimràatã hixêt ã api nē himōk ã ixkuhê. Hāmri nhūm Tĩrtũm tanhmã Jejus to nhūm hirã htỳx kãm xa. Hāmri nhūm Mēpahpãm Tĩrtũmja mẽ inhmã kapêr. Kaxkwa kamã hirã htỳx rax rũm mẽ inhmã kapêr o:

—E ota Ixkrata xa. Inhmã hapê ho inhmã hapê. Anē.

Tã ra ixte mar xà hkôt pa amnhî xō ri mẽ amã harē nē hã kagã.

¹⁹ Na pa prem ã hixêt prêk nhĩmōk ã Jejus pumunh nē Tĩrtũm kot tanhmã harēnh to hã mar anē. Hāmri nē ijamaxpêr o:

—Nã ãm hāmri na pre amnepēm Tĩrtũm nhỹ hã kapêr jarēnh o mẽ pa xwỳnhjaja Jejus kukamã ã harēnh anhỹr o pa. Anē.

Mẽ kot tanhmã Jejus kukamã harēnh toja te kot kamãt kō kamã kanê hpōk nhĩrã hkryre pyræk. Tã koja nhỹrmã akupỳn wrỳ hāmri nē te myt kator nē hirã mex nhūm mẽ pahte mẽmoj pumunh mex pyræk. Jakamã kwa kêr pu mẽ kot tanhmã Jejus kukamã harēnh toja mar tỳx rãhã nhūm nhỹrmã te myt kator pyrã nē akupỳn mẽ pahwỳr wrỳ.

²⁰ Tĩrtũm kapêr ã kagã htũm kot tanhmã ÿ hã kapêr jarēnh xwỳnhjê jarēnh to. Mẽ kot mẽmoj kukamã ujarēnh ã mẽ harē. Nē Jejus kukamã tanhmã ujarēnh to hã mẽ harē. ã mẽ kot mẽmoj kukamã harēnh kot anhỹr. Nom na pu htem amnhî krã hkôt ã mẽ ujarēnh anhỹrja mar tỳx kêt nē. Koja Tĩrtũm Karõ hprĩ hã mẽ pamã ho amnhĩrĩt pu mẽ rĩ kormã pahprĩ hã mar tỳx nē.

²¹ Na pre ÿ hã kapêr jarēnh o mẽ pa xwỳnhjaja amnhî krã hkôt hkwỳjê mã ujarēnh o pa hkêt nē. Tĩrtũm Karõ na pre tanhmã mẽ hkrã hto nhūm mẽ ÿ hã hkwỳjê mã tanhmã harēnh to ho pa nē ÿ hã mẽ pamã hã kagã.

2

Tĩrtũm kapêr jarēnh o hêx xwỳnhjê jarēnh Korosê 2.16-17; Wam Ximotre 4.1-5; Sikûn Ximotre 3.1-9; Jutre 3-16

¹ Nē amnepēm na pre Ijaew kwỳjaja te mẽ kêp Tĩrtũm nhỹ hã kapêr jarēnh xwỳnh pyræk. Nom Tĩrtũm kapêr kwỳm ri hkwỳjê

mã tanhmã ho hêx to ho pa. Tã koja nhÿrmã mẽmojaja mẽ urak nê mẽ awÿr mra nê ã mẽ amã Tÿrtũm kapêr o hêx o pa anê. Nê kapêr kwÿm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhÿ nhÿpêx nyw kaga nê hpãnhã mẽ kot amnhÿ tomnuj kôt apa hprãm xaj nhũm mẽ hêx rom tanhmã mẽ ajahkre hto ho pa. Pahшти Jejus kot mẽ nê htyk tã nhũm mẽ hkôt amnhÿ nhÿpêx kêt nê axtem nê ri kapêr o hêx o pa. Mÿrapê koja Tÿrtũm tokyx mẽ kot amnhÿ xà htÿx kamã hamak tũm xà hwÿr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhÿ nhÿpêx o pa. Jao ra hpijaàm kêt nê mẽ hkôt htÿx ri tanhmã amnhÿ tomnuj to ho ri pa. Tã ã mẽ kot Tÿrtũm kapêr o mẽ hêx xwÿnhjê mar nê mẽ hkôt amnhÿ nhÿpêx anhÿr jakamã koja mẽ kãm Tÿrtũm kapêr mar prãm xwÿnhjaja mẽ kot amnhÿ nhÿpêx ã mẽ omu nê Tÿrtũm kapêrja mex kêt ã harênh japêr.

³ Tÿrtũm kapêr o mẽ hêx o mẽ pa xwÿnhjaja na htem kàxpore pix prãm xaj mẽ awÿr mra nê tanhmã mẽ amã kapêr jarênh o hêx to ho pa nhũm Tÿrtũm ja hã mẽ omunh rãhã ho hkrÿ. Na hte nhÿhÿm mrrar kêt nê rÿ htÿx ôt o hikwÿ hkêt nê. Na hte arÿ mẽ kot amnhÿ nhÿpêx ã mẽ omunh rãhã ho hkrÿ. Tã koja nhÿrmã ma mẽ kot amnhÿ xà htÿx kamã hamak tũm xàta hwÿr mẽ kurê nhũm mẽ ma hwÿr hapêx pa.

⁴ Nê amnepê mã kaxkwa kamã Tÿrtũm kapêr o mẽ wrÿk xwÿnh kwÿjaja na prem axtem nê Tÿrtũm kapêr nhÿrôp kuhê nhũm tee ri amnhÿ tã mẽ omu hãmri nê amnhÿ nê mẽ kator pa. Mẽ kamã ukapri hkêt nê amnhÿ nê mẽ kator pa hãmri nê mẽ kot amnhÿ xà htÿx kamã hamak tũm xàta wÿr mẽ hano. Nhũm prem ma hwÿr pa nê ahkre xupÿm kãm kamãt kô kamã arÿ hkrÿ ho hkrÿ. Tÿrtũm kot mẽ piitã tanhmã mẽ harênh to xà hã arÿgroja jamãr o hkrÿ. Nê tee ri kãm hapôx prãm kaprÿ ho hkrÿ.

⁵ Nê amnepêm pika kamã ri mẽ pa xwÿnhjaja na prem haxwÿja piitã amnhÿ tomnuj pix o ri pa. Jakamã nhũm Tÿrtũm ja hã mẽ omu nê mẽ kamã ukapri hkêt nê. Nê mẽ hwÿr na rax mẽ. Mẽ kãm kapêr

mar prãm kêt jakamã nhũm mẽ hwÿr kumê nhũm wrÿk rax kumrêx nê mẽ hanhir pa nê mẽ himex. ãm Noehti mẽ hkwy pé 7 pixjaja nhũm mẽ kurom htÿr nê hkà hkÿnh nê mex nê pa. Noehti kormã na xwÿj ri kot mẽ kãm Tÿrtũm kapêr jarênh o ri mẽ hkôt pa htã nhũm mẽ kuma nê ãm kuma. Mÿrapê na prem piitã pikaprãr pa.

⁶ Nê Sotô mẽ Gomo wa kamã mẽ pa xwÿnhjaja haxwÿja na prem amnhÿ tomnuj tÿx kumrêx o pa nhũm Tÿrtũm wantajê pyrã nê mẽ kamã ukapri hkêt nê. Na pre kaxkwa rũm mẽ hipy mẽmo hpôk kwÿ rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nà mẽ piitã mẽ kot mẽ harênh mar nê hamaxpêr o:

—Na hte ã Tÿrtũm mẽ kot amnhÿ tomnuj xwÿnhjê nhÿpêx anê.

Anhÿr o hamaxpêr kaxyw na pre ã mẽ hipêx anê.

⁷⁻⁸ Nom Rohtija na pre Tÿrtũm Sotô nê kator jakamã nhũm htyk kêt nê. Na pre hkwyjê rom tãm amnhÿ nhÿpêx tã mẽ kot amnhÿ tomnuj tÿx xwÿnhjê nhô krÿ kamã ôrkwy nê ri pa. Nê apkati mẽ tee ri mẽ kot amnhÿ nhÿpêx ã mẽ omu nê mẽ ÿ hã hkapri nê tee ri mẽ hkukamã hamaxpêr o pa. No nhũm mẽ amnhÿ tomnuj ã amnhÿ pumunh nê tokyx tãm amnhÿ nhÿpêx kêt nê. Nê apkati mẽ tanhmã amnhÿ tomnuj to nê kapêr punuj o pa nhũm Rohti tee ri mẽ omu nê hkapri htÿx nê pa.

⁹ Tã nhũm Tÿrtũm mẽ himex kaxyw nê mẽ nê kator nê mẽ himex pa. Na hte ã Tÿrtũm mẽmoj punuj pé mẽ kot amnhÿ kaxyw kãm hamaxpêr nê hkôt amnhÿ nhÿpêx xwÿnhjê pytãr anê. No mẽ kot amnhÿ tomnuj xwÿnhjaja na hte axtem mẽ hipêx. Tã koja nhÿrmã mẽ pahpiitã tanhmã mẽ pajarênh to xà hã arÿgro kato nhũm ma mẽ kot amnhÿ xà htÿx kamã hamak tũm xà wÿr mẽ rênh pa. ãm tapxipix kot ã mẽ hipêx anhÿr kaxyw àhpumunh tÿx.

¹⁰ Tã mẽ hpijaàm kêt kãm amnhÿ tomnuj o mẽ pa xwÿnhjaja nê mẽ kot Tÿrtũm kapêr mar nê ãm mar xwÿnhjaja koja nhÿrmã mẽ homnuj tÿx nê.

Nê Tÿrtũm kapêr o hêx o ri mẽ pa xwÿnhjaja na htem amnhÿ to jarkrar pix o pa. Nê Tÿrtũm kapêr o mẽ wrÿk xwÿnhjê hã

hpijaàm kêt nê. Nê axtem nê mẽ ho kapêr punuj pê tanhmã mẽ haprý hto ho pa.

¹¹ Tã nhũm htem amnhĩ tã mẽ kuma nê ãm mẽ kuma. Mẽ kurom mẽ hihtýx kumrêx tã no ãm amnhĩ tã Tĩrtũm mã tanhmã mẽ ho kapêr to hkêt nê.

¹² Nê mry xoprê na hte htýx ri pa ho pa. Tã Tĩrtũm kapêr o mẽ hêx o mẽ pa xwýnhjaja htem mry xoprêta pyrã nê htýx ri hamaxpêr mex kêt o pa. Jao hprĩ hã mẽmoj mar kêt tã htýx ri hijuk ri tanhmã mẽmoj jarênh to.

Nê mry xoprêja htýx pa nhũm mẽ kot hparja pyrã nê mẽ kot Tĩrtũm kapêr o hêx o mẽ pa xwýnhjaja koja Tĩrtũm nhỹrmã kuwy hwýr mẽ ho hapêx nê kamã mẽ rênh pa.

¹³ Nê koja nhỹrmã Tĩrtũm mẽ kot tanhmã mẽ ama hêx to ho pa hã mẽ omunh xà hkôt mẽ homnuj týx nê. Na htem hpijaàm kêt nê mẽ piitã mẽ noo mã tanhmã amnhĩ tomnuj to ho pa. Kamàt kãm nê arĩgro hã. Nê mẽ kãm tanhmã amnhĩ nhĩpêx to hprãm xà hkôt pix mã amnhĩ tomnuj o pa.

Na htem te mẽ kêp Kris kôt mẽ atõjê pyrã nê mẽ akôt Tĩrtũm kapêr mar xà hã ixkre hwýr agjê nê mẽ anhĩhkô hã mẽ kot Jejus tyk mã hamaxpêr kaxyw pãwti hkwy hku. Nom htýx hkur o hkrĩ nê htyk mã hamaxpêr kêt nê. Kãm Jejus kĩnh kêt tã hêx rom hpijaàm kêt kãm mẽ anhĩhkô hã htýx ri hkur o hkrĩ.

¹⁴ Nê nhỹri krĩ hwýr pøj nê mênijê pumu nê kãm mẽ hkĩnh nê. Ra mẽ mjên ri pa htã nhũm mẽ kãm mẽ ho amnhĩkati hprãm nê mẽ kamã hpijaàm kêt o ri pa.

Nê kormã mẽ kot Kris kôt amnhĩ xunhwýr tohtuj anhỹr xwýnhjê hwýr mra nê hêx rom tanhmã mẽ kãm kapêr to pê mẽ no kupyr o ri mẽ hkôt pa. Mẽ kot mẽ mar nê Kris kaga nê mẽ hkôt ri amnhĩ nhĩpêx prãm xàj ã mẽ hipêx anhỹr o pa.

Na htem hikàxpore rũnh o pikuprõnh pix kukamã hamaxpêr o ra ho õxý nê.

Ã na htem amnhĩ nhĩpêx anhỹr o pa. Tã ra Tĩrtũm kot mẽ homnuj týx kaxyw mẽ hã amnhĩ jarê.

¹⁵⁻¹⁶ Te mẽ kot kamàt kô kamã pry juk ã hpikunor nê htýx ri pa pyrãk o na htem amnhĩ nhĩpêx nê kãm Tĩrtũm kapêr mar prãm kêt nê amnhĩ tomnuj pix o pa.

Amnepêm Peo hkra Paraãwta kêp Tĩrtũm nhỹ hã kapêr jarênh o pa xwýnh tã axtem nê kàxpore rax prãm xàj tanhmã amnhĩ tomnuj to kaxyw. Nhũm Tĩrtũm tee ri ja hã omu nê Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tĩrtũm tanhmã hakwa hto nhũm kãm kapêr nê tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nê ã amnhĩ nhĩpêx anhỹr kêt nê. Tã mẽ kot Tĩrtũm kapêr o mẽ hêx ho mẽ pa xwýnhjaja na htem Paraãw pyrã nê kàxpore rax prãm xàj tanhmã amnhĩ tomnuj to pix prãm.

¹⁷ Te hino ra grã nhũm mẽ tee ri kamã gô japêr pyrãk o na htem amnhĩ nhĩpêx. Rý te kakrã hapôx nhũm mẽ kot omunh nê na wrýk ã hkamnhĩx kaprý pyrãk. Tã ra Tĩrtũm mẽ kaxyw kamàt kô htýx pê mẽ kot amnhĩ xà htýx kamã hamak tũm xàta o mẽ nê.

¹⁸ Na htem htýx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mēhõ ra amnhĩ tomnuj kaga kaxyw nhũm mẽ tee ri ja hã omu nê kot ã amnhĩ nhĩpêx anhỹr pymaj tanhmã nê kãm kapêr to nê mẽ kãm:

—Kwa ixte amnhĩ tomnuj o ixpa htã nhũm Tĩrtũm ja hã ixpumu nê ãm ixpumu nê arĩ inhmex ã ijarê. Na pa hte mẽ hkuprýjê hwýr mra nhũm ja hã ixpumu nê ãm ixpumu nê hã tanhmã ixto hkêt nê. Jakamã kwa mẽ ixpyrà nê arĩ ã amnhĩ nhĩpêx anhỹr o ri apa. Koja Tĩrtũm tanhmã hã ato hkêt nê. Anê.

Hãmri nhũm mẽ tee ri kuma nê ra hamaxpêr kati nê.

¹⁹ Na htem mẽ kãm kapêr o:

—Kwa mẽ ixpyrà nê mãmrĩ amã tanhmã amnhĩ tomnuj to hprãm xà hkôt amnhĩ nhĩpêx o ri apa. Mēhõ kot kêt ja nê tanhmã amã kapêr to? Anê.

Mẽ kot amnhĩ tomnuj xàja te kêp mẽ õ patrãw pyrãk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nê gaa nê axte. Nê gaa nê ra ho amnhĩ pyrãk. Hãmri nê tee ri pamã hkaga hprãm kaprý nhũm te kêp mẽ panhõ patrãw pyrãk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

²⁰ Nê koja mēhō ra Tirtūm kapēr ma. Nê mē panhō Pahihti Jejus Kris jarēnhja nhūm hprī hā kuma. Kêp mē pahte amnhī tomnuj pē mē papytār xwýnh ā harēnh ma. Tā nhūm mē kot Tirtūm kapēr o mē hēx xwýnhjaja hwýr mra nē tanhmā kām ho hēx to nhūm mē kuma nē kot amnhī nhīpēx tūm o awjanā. Jao amnhī tomnuj tỳx o kormā kot Tirtūm kapēr mar kêt ri kot amnhī tomnujta jakre.

²¹ Kêp ām aa kot Tirtūm kapēr mar kêt rāhā htyk ronhỹx ja kām mex nē. Nom ra kot mar mex tā ām kuma nē hkaga jakamā koja mex kêt kumrēx.

²² Mē kot ā mē kot amnhī nhīpēx anhỹr ā mē harēnh kot:

Rop na hte ōjaīr nē akupỹm ōjaīrta ku.

Nē hagrō na htem unē nē hkumrā nhūm muxre. Tā nhūm mē kām ure nhūm akupỹm hprōt nē mra nē akupỹm gyw o amnhī tomnu pa. Anē.

Tā mē kot Tirtūm kapēr o mē hēx xwýnhjē mar nē mē hkôt amnhī nhīpēx xwýnhjaja te mē kot rop mē hagrō wa kot amnhī nhīpēxta pyrā nē Tirtūm kapēr kaga nē akupỹm mē kot amnhī nhīpēx tūm o awjanā nē htỳx ri amnhī nhīpēx o pa.

3

Tirtūm kot pika ho hapēx kaxyw kormā amnhī tā mē pajamār ā harēnh

Matēwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkrāmnhwýjaja. Na pa pre ra wam kagāta nhīpēx nē mē awýr kurē. Tā ra axte hkôt ja nhīpēx. Hamē wa kamā na pa mē amā Tirtūm kot tanhmā amnhī nhīpēx to hā harē. Nē Jejus Kris nhỹrmā akupỹn mē pahwýr wrýk ā harē. Mē ate mar nē tām amnhī nhīpēx nē tām ajamaxpēr o kutêp mē apa kaxyw.

² Amnepē mā Tirtūm nhỹ hā kapēr jarēnh o ri mē pa xwýnhjaja na prem Tirtūm kot nhỹrmā mē pahwýr mēhō mēnh mā xwýnhja jarēnh o pa. Kot nhỹrmā mē pahwýr wrýk nē mē pahto amnhīptār o pa hā harēnh o pa. Tā kêt ka mē kapēr ma nē hā ano htỳx nē hkôt ajamaxpēr tỳx rāhā ho ri apa. Nē Jejus kot mē awýr mē rēnh xwýnhjaja ka mē kapēr ma. Mē kot mē amā

mēmoj jarēnh o mē pa xwýnhjaja na htem tanhmā mē amā Pahihti Kris jarēnh to ho ri mē akôt pa. Nē tanhmā kot mē panē amnhī nhīpēx to hā harē. Tā kêt ka mē kapēr ma nē hā ano htỳx nē kām ajamaxpēr tỳx rāhā ho ri apa.

³ Nē kwa mē inhma. Nhỹrmā Kris akupỹn mē pahwýr wrýk xwýj ri koja mē kot amnhī tomnuj tỳx xwýnhjaja mē awýr mra. Mē hpijaām kêt o pa xwýnh jakamā koja mē tanhmā mē akamā amnhī tomnuj to ho pa. Nē mē apē Kris kwý hā mē apumu nē mē atā hpēr o pikēnh o pa.

⁴ Nē htỳx ri Kris ā mē akukja nē mē amā: —Kwa no Krisja? Amnepēm akupỹn wrýk nē mēmoj piitā tanhmā hipēx to hā amnhī jarēnh tā arī Tirtūm kot mēmoj to kator krax rūm mēmoj amarī rāhāā. Ra mē panhīgētjaja pikaprār par tā nhūm kormā akupỹn wrýk kêt nē. Kot mē pamā amnhī to hēx kēnā. Mo kaxyw koja kêt akupỹn mē pahwýr wrý? Kot mē pamā amnhī to hēx kēnā. Anē.

⁵⁻⁶ Nom ā mē kot harēnh anhỹrja kot anhỹr kêt. Tirtūm kot mēmoj to kator krax rūm mēmoj amarī rāhā hā mē kot harēnhja kot anhỹr kêt. Na pre Tirtūm kapēr pix o kaxkwa nē pika ho kato. Nhūm gō hkwýja kapēr mar xā hkôt pika hā amnhī jahkre. Nhūm hpānhā panhī nhīpēx. Tā no nhūm mē kapēr mar kêt kumrēx. Nē mē kot amnhī tomnuj tỳx mýrapē na pre Tirtūm gō ho mē himex pa. Jao mē hwýr na rax mē nhūm mē hanhir o mē ho hapēx. No nhūm mē kot Jejus wrýk ā hpēr o pikēnh xwýnhhtaja kām ā mē harēnh anhỹrja mar prām kêt. Ra mē kot mar tā kām mar prām kêt nē arī mēmoj piitā rāhā hā ri harēnh o pa.

⁷ Pika nē kaxkwaja arī rāhā htā koja Tirtūm nhỹrmā mē pahpiitā mē pahte tanhmā amnhī nhīpēx to hā mē pahpumunh kôt tanhmā mē pajarēnh to. Nē mē kot amnhī xā htỳx kamā hamak tūm xā hwýr mē kot amnhī tomnuj xwýnhjē rēnh pa. Hāmri nhūm rī kormā kaxkwa nē pikaja wa pôr nhūm himōk ā mēmoj piitā hkaxār pa nē hapēx.

⁸ Nē amgrā pé 1.000ja mē pamā amgrā xohtō rax kumrēx no Tirtūm mā te arīgro pixire pyrāk.

⁹ Tã ra kot mẽ pamã tokyx Jejus akupÿn wrÿk ã harënh tã nhũm kormã wrÿk kêt jakamã nhũm htem tõhã tee ri hamãr o pa nẽ hamaxpêr o:

—Hêxta waa nẽ. Tirtũm kot tokyx akupÿn mẽ pahwÿr Jejus mẽnh ã amnhĩ jarënh tã tokyx mẽnh kêt nẽ.

Anhÿr o harënh tã no ãm kot anhÿr kêt. Na kormã amnhĩ tã mẽ kot amnhĩ tomnuj xwÿnhjê jamãr o pa. Mẽ kot amnhĩ tomnuj kaga nẽ hkôt amnhĩ xunhwÿr prãm xaj kormã amnhĩ tã mẽ hamã. Kãm mẽ kot amnhĩ xà htÿx kamã hamak tũm xàta wÿr mẽhõ ho pixire nẽ mõi prãm kêt jakamã na kormã amnhĩ tã mẽ hamã.

¹⁰ Tã koja nhÿrmã mẽ panhõ Pahihtija akupÿn mẽ pahwÿr wrÿ. Te mẽ àhkĩnh xwÿnh kot amnhĩ nhĩpêx pyrãk o mẽ pa-jaêr pẽ akupÿn wrÿ. Pu mẽ pahtÿx ri tanhmã paxápênh to ho ri papa nẽ akupÿn wrÿk ã hkamnhĩx kêt rãhã nhũm mẽ pa-jaêr pẽ akupÿn wrÿ. Hãmri nẽ ma akupÿm amnhĩ kôt mẽ pahte hkôt amnhĩ xunhwÿr xwÿnhjê ho àpir par kuré kumrêx. Hãmri nhũm rĩ kormã kaxkwa kaxàr o hkrihkrit tÿx kãm hapêx pa. Nẽ kanhêti mẽ myt nẽ mytwÿre kaxàr pa. Nẽ pikaja nẽ mããnẽn kamã mẽmoj piitã kaxàr pa.

¹¹⁻¹² Koja nhÿrmã ã mẽmoj hapêx par anẽ. Jakamã kwa kêr pu mẽ Jejus kutêp tãm ri amnhĩ nhĩpêx rãhã ho ri papa. Nẽ Tirtũm kapêr kôt pix mã amnhĩ nhĩpêx rãhã nẽ. Nẽ kãm hprãm xà hkôt tanhmã kãm amnhĩ nhĩpêx to ho ri papa. Kêr kê Jejus akupÿn wrÿ nẽ ã mẽ pahte amnhĩ nhĩpêx anhÿr ã mẽ pahpumu. Koja wrÿ nhũm rĩ kormã kaxkwa nẽ pikaja wa kaxàr pa. Nhũm kuwy mÿri kaxkwa kamã mẽmoj harir xwÿnhja xêr nẽ ôr pa nẽ hapêx.

¹³ Tã kwãr mãmrĩ mẽmoj ã amnhĩ nhĩpêx anẽ. Koja Tirtũm axte mẽmoj mex nhĩpêx. Na pre amnhĩ kukamã ja jarënh o:

Kot paj axte pika nẽ kaxkwa hõ nhĩpêx nhũm mex o mex. Nhũm mẽ kot amnhĩ kaxyw Jejus mã hamaxpêr nẽ hkôt amnhĩ xunhwÿr nhũm ixte mẽ mex ã mẽ harënh xwÿnh pixjaja koja mẽ pika nywja kamã mex nẽ pa ho pa. Anẽ.

¹⁴ Jakamã kwa ixkrãmnhwÿjaja. Kêr ka mẽ Kris kutêp kapêr kôt amnhĩ nhĩpêx mex

rãhã ho ri apa. Jao kutêp ajamakêtkati nẽ axãmnhĩx axpên kôt apa. Kêr ka mẽ nhÿrmã amnhĩ wÿr omu nẽ tee ri amnhĩ kukamã ajamaxpêr kêt nẽ. Ate tãm amnhĩ nhĩpêx o apa hã amnhĩ pumu nẽ akĩnh nẽ amnhĩ wÿr omunh o akuhê.

¹⁵ Nom arĩ Jejus kãm mẽ pahkwÿjê ho hkra hprãm jakamã na kormã amnhĩ tã mẽ hamã nẽ tokyx akupÿn wrÿk kêt nẽ. Na pre Jejus kôt mẽ pahtõ Pawre Tirtũm nhÿ hã ã mẽ pamã ja hã kagà anẽ. Pawreja ixkrãmnhwÿ mex na.

¹⁶ Na hte mẽ pakaxyw kagà nhĩpêx nẽ kamã mẽ pahte Jejus kutêp tãm amnhĩ nhĩpêx o papa hã mẽ pamã karõ. Na hte tõhã mẽmoj tã kagà pu mẽ kamã harë nẽ tee ri pahprĩ hã mar mã no ãm mar mex kêt nẽ. Hãmri nhũm Tirtũm kapêr o mẽ hêx o mẽ pa xwÿnhjtaja haxwÿja kuma hãmri nẽ amnhĩ krã hkôt hijuk ri tanhmã ho hêx to. Te mẽ kot hprĩ hã mar nẽ harënh pyrãk nom hprĩ hã mar kêt nẽ. ã na htem Tirtũm kapêr ã kagà piitã ho hêx o pa anẽ. Mÿrapê koja mẽ nhÿrmã amnhĩ xà kamã hamak tÿx kumrêx.

¹⁷ Tã e Kris kôt ixkrãmnhwÿjaja. Ra mẽ ate mẽ harënh mar jakamã kwa mẽ okora. Mẽ amnhĩ nẽ mẽ omunh mex nẽ mẽ hkôt amnhĩ nhĩpêx kêt nẽ. Kot kaj mẽ anẽ nẽ Tirtũm kôt amnhĩ nhĩpêx mex kêt nẽ.

¹⁸ Na ka htem mẽ papytãr xwÿnh Pahihti Jejus Kris kôt ri amnhĩ nhĩpêx o apa. Tã kêr ka mẽ arĩ hkôt amnhĩ nhĩpêx mex rãhã ho ri apa. Nẽ hkôt amnhĩ xunhwÿr tÿx nẽ. Kêr kê amnhĩ tã mẽ apumu nẽ mẽmoj to mẽ akutã nojarêt nẽ. Krisja mex o mex nẽ hihtÿx o hihtÿx. Tã kêr pu mẽ kãm mex o mex ã mãn harënh rãhã ho ri papa.

Tã ãm ja pix. Ixpê Simãw Pêtre na pa ã mẽ amã ja hã kagà nẽ mẽ awÿr mẽnh anẽ.

Wam Juãw Juãw kot Jejus kôt hkwyjê hwÿr kagà nê mênh

Juãw na pre kagàja nhîpêx. Na pre kagà hkwy nhîpêx rax nê. Na pre mãânên Juãw kot tanhmã Jejus kot amnhî nhîpêx to ho pa ã kagà nê Apokarip nê Sikũn Juãw nê Hapuhã Juãw nhũm pre ja piitã Tirtũm nhÿ hã hã kagà.

Juãwja Jejus nhÿ hã hkrajê jahkre ho mē pa xwÿnhjê hõ na pre. Nê kēp Xiakre htõ na pre. Tã ra hpigēt tÿx nê kagàja nhîpêx. Uràk nê mē kot Tirtũm kôt amnhî xunhwÿr xwÿnhjê mã hipêx. Mē kot kamã harēnh nê mar nê kãm axpēn kīnh o pa kaxyw. Nê mē kot amnhî tomnuj ã amnhî pumunh kôt tanhmã amnhî nhîpêx to hã mē kãm karõ nê hã kagà. ã na pre Juãw mē kãm mēmoj jarēnh nê hã kagà anē nê mē hwÿr kumē. Nê mē kãm:

Jejus kēp Tirtũm kapēr o amnhîrīt xwÿnh ã harēnh

Juãw 1.1-4; Eprêw 1.1-4

¹ Pa ixpyrà nê mē ate Jejus kôt amnhî xunhwÿr xwÿnhjaja? Xà mē amex? E ot pa mē amã kagàja nhîpêx nê mē awÿr kumē. Ixte mē amã Tirtũm kapēr o amnhîrīt xwÿnh jarēnh kaxyw. Amnepê mã kormã mēmoj amrakati ri nhũm pre ra rãhã ri pa ho pa. ãm kukwak ri pix mã na pu htem Tirtũm mē wa kuri pahtîr tũm nê papa ho papa mã xwÿnh. Tã ÿ hã mē ixte kapēr o mē ajahkre ho ri mē ixpa xwÿnhjaja na pa prem ixpiitã kormã akupÿm kaxkwa hwÿr àpir kêt ri inhno ho omunh o ri hkôt ixpa. Nê mē ijamak o kapēr mar o ri hkôt ixpa. Nê mē inhîhkra ho hkupēnh o ri hkôt ixpa.

² Na pre kaxkwa kamã Hipêêxà hkôt ri pa ho pa htã amnē pika hwÿr mē pahwÿr wrÿ. Hãmri nê jar mē pakamã kato pa pre mē ixkwÿjaja omu. Tã mē ixte omunh xà hkôt na pa htem amnhî xõ ri tanhmã mē amã harēnh to. Koja nhÿrmã akupÿm mē pahto mē pahtîr pu mē kuri pahtîr tũm nê pamex nê papa ho papa.

³ Na pa prem tanhmã kapēr to hã mar o ri hkôt ixpa. Nê kot tanhmã mē kãm amnhî nhîpêx to hã omunh o ri hkôt ixpa. Ta kagàja kamã amnhî xõ ri ixprî hã mē amã harē nê hã kagà. Mē ate ixpyrà nê aprî hã kot tanhmã amnhî nhîpêx to ho pa hã harēnh mar kaxyw. Jao mē pahpiitã te ixkre tipxi kamã mē papa pyràk o amnhî nhîpêx o papa nê axpēn kôt pajamaxpēr o ri papa. Jao Mēpanhîpêêxà Maati mē Kra Jejus Kris wa hkôt amnhî nhîpêx mex o ri papa.

⁴ Tã pa mē amã kagàja nhîpêx nê mē awÿr kumē. Mē ate kamã harēnh nê mar hãmri nê mē ixpyrà nê ajamakêtkati nê akīnh nê ri apa kaxyw.

*Tirtũm mex o mex ã harēnh
Juãw 8.12; Epes 5.3-21; Wam Tesarõn 5.5;
Eprêw 4.14-16, 9.11-14*

⁵ Nê Jejus kot tanhmã mē inhmã Tirtũm jarēnh toja kot paj amnhî xõ ri mē amã hã kagà. Nà Tirtũm kot amnhî nhîpêxja mex o mex. Aa kot tanhmã amnhî tomnuj to hkêt. Mex o mex jakamã na hte tanhmã mē kot amnhî tomnuj to mã amnhî jagjēnh kêt. ãm kot amnhî to mex o kot amnhî to mex rãhã nê pa ho pa xwÿnh na.

⁶ Kot mē pahte amnhî tomnuj kêt ã mē pamã karõ jakamã kot puj mē pahpê hkra hã amnhî jarēnh tã amnhî tomnuj pix o ri papa nê ãm pahpê hkra hã amnhî jarēnh kaprÿ nê amnhî to paxêx. Tirtũm krajaja na htem amnhî tomnuj o pa hkêt nê.

⁷ Nom kot puj mē hkôt amnhî nhîpêx nê uràk nê tãm ri amnhî nhîpêx o papa. Nê kapēr kôt ri amnhî nhîpêx. Hãmri nê te ixkre tipxi kamã ri Tirtũm mē Kra Jejus Kris wa hkôt axpēn to papa pyràk o amnhî nhîpêx. Na pre Jejus mē panê ty nê hkamrõ axkapî. Jao mē pahte hkôt amnhî xunhwÿr xwÿnhjaja mē panê mē pahte amnhî tomnuj piitã hpãnhã amnhîrer pa. Jakamã ãm kukwak ri pix mã na pu htem tãm amnhî nhîpêx o ri papa.

*Mē pahpiitã mē pahte amnhî tomnuj
xwÿnh ã mē pajarēnh*

⁸ Nê mē pahte tõhã tanhmã amnhî tomnuj to jakamã kot puj mē aa pahte amnhî tomnuj kêt ã amnhî jarē hãmri nê ã amnhî

jarēnh anhÿr o paxêx. Tirtūm kot mẽ pah-piitã mẽ pahte amnhĩ tomnuj ã mẽ pah-pumunh xwÿnh kênã.

Mẽ pahte amnhĩ tomnuj nẽ tanhmã amnhĩ nhĩpêx to hã mẽ pamã karõ

Xiakre 4.9-10

⁹Nẽ mẽ pahpê Tirtūm krajaja na pu htem tanhmã amnhĩ tomnuj to hãmri nẽ tee ri ja hã amnhĩ pumu nẽ pahkaprĩ nẽ. Nẽ tokyx amnhĩ to Tirtūm wÿ. Hãmri nhũm mẽ pama nẽ Jesus kukwak ri tanhmã hã mẽ pahto hkêt nẽ. ãm amnhĩ katut kôt tanhmã mẽ pahte amnhĩ tomnuj tota rẽ nẽ axte kãm hamaxpêr kêt nẽ. Ra kot mẽ pahtã amnhĩ jarēnh xà hkôt. Na hte Tirtūm amnhĩ jarēnh xà hkôt tanhmã amnhĩ nhĩpêx to. Tã ra kot mẽ pahpê hkrajaja mẽ pahte amnhĩ tomnuj piitã amnhĩ katut kôt rēnh par ã amnhĩ jarēnh jakamã na pre ã mẽ panhĩpêx anẽ. Na hte mẽmoj tã tanhmã amnhĩ jarēnh to hãmri nhũm apkati nhũm ihkjê ho kumẽ nẽ axtem tanhmã mẽmoj jarēnh to hkêt nẽ.

¹⁰Ra kot mẽ pahpiitã mẽ pahte amnhĩ tomnuj xwÿnh ã mẽ pajarēnh jakamã kot puj mẽ pahtõ ã mẽ pajarēnh anhÿrja ma nẽ hkôt pajamaxpêr kêt japêr. Rÿ kuma nẽ ãm kuma nẽ pajamaxpêr o:

—Nà ixte tanhmã amnhĩ tomnuj tore hã.

Anhÿr o amnhĩ jarẽ. Hãmri nẽ te ate Tirtūm hêx xwÿnh ã harēnh pyræk. Jao amã kapêr mar prãm kêt ã amnhĩ to amnhĩrĩt.

2

Jejus kêp mẽ paxyr pê Tirtūm mã kapêr xwÿnh ã harēnh

Wam Ximotre 2.5; Eprêw 9.11-14

¹⁻²E mẽ ate amnhĩ tomnuj o apa hkêt kaxyw na pa ã mẽ amã ixkapêr nẽ hã kagã anẽ. Mẽ ate kamã harēnh nẽ mar hãmri nẽ tanhmã amnhĩ tomnuj to hkêt kaxyw. Jesus Kris na pre mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nẽ te kêp mẽ paxyr pê Tirtūm mã kapêr xwÿnh pyræk o amnhĩ nhĩpêx. Mẽ pakurom aa kot amnhĩ tomnuj kêt jakamã na hte mẽ paxyr pê Tirtūm mã kapêr nhũm kuma. Hãmri nẽ kukwak ri pix mã mẽ pahte tanhmã amnhĩ tomnuj to

piitã amnhĩ katut kôt rēnh pa nẽ axte kãm hamaxpêr kêt nẽ.

Tirtūm krajaja kot Tirtūm kôt amnhĩ nhĩpêx ã mẽ kãm karõ

³Nẽ na pu htem Tirtūm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nẽ.

⁴Nom koja mēhõ kêp hkra hã amnhĩ jarēnh tã hkôt amnhĩ nhĩpêx kêt nẽ ãm kêp hkra hã amnhĩ to hêx.

⁵Na htem Tirtūm kapêr kôt amnhĩ nhĩpêx o pa pê kãm hkĩnh tÿx ã amnhĩ to amnhĩrĩt. Nẽ kêp hkra hã amnhĩ to amnhĩrĩt mex o pa.

⁶Jakamã kêr ka mẽ apê Jesus Kris kwÿ hã amnhĩ jarēnh xwÿnhjaja hkôt pix mã amnhĩ nhĩpêx mex o ri apa.

Mẽ pamã axpên kĩnh ã mẽ pamã karõ Juāw 13.34-35; Wam Juāw 3.14-18

⁷E Kris kôt ixkrãmnhwÿjaja. Inhmã mẽ akĩnh jakamã na pa ã mẽ amã mẽmoj jarēnh nẽ hã kagã anẽ. Kot paj mẽ amã mẽmoj nyw jarēnh kêt nẽ. Ra mẽ ate mẽmoj mar xwÿnhhta kot paj axte mẽ amã harẽ. Mẽ pamã axpên kĩnh nẽ tãm axpên nhĩpêx o papa hã Tirtūm kot mẽ pamã karõta. Ra mẽ ate mar tã kot paj axte mẽ amã harẽ nẽ hã kagã.

⁸Wam Tirtūm kot mẽ pamã axpên kĩnh ã mẽ pamã karõja kormã Jesus kot mẽ panê htyk hkêt ri kot mẽ pamã hã karõta na. Tã ra Jesus kãm mẽ pajapê xàj mẽ panê htyk jakamã na pa axte ã mẽ ate axpên nhĩpêx anhÿr o apa hã mẽ amã karõ nẽ hã kagã. Mẽ ate Kris pyrã nẽ amã axpên kĩnh xàj tanhmã axpên kutã anojarêt to ho ri apa kaxyw. Nom kormã mẽ pahte Jesus kôt amnhĩ xunhwÿr kêt ri na pu prem ã axpên nhĩpêx anhÿr kêt nẽ. Tã hkôt amnhĩ xunhwÿ hãmri nẽ ã axpên to mex o papa anẽ.

⁹⁻¹¹Tã koja mēhõ kot Jesus kôt amnhĩ nhĩpêx ã amnhĩ jarēnh tã kãm hkwyjê hkĩnh kãm àmnhix ri mẽ kutã nojarêt o pa hkêt nẽ. Hãmri nẽ kot Jesus kôt amnhĩ nhĩpêx ã amnhĩ jarēnh ã amnhĩ to hêx. Jao te htÿx ri kamãt kô kamã pa pyræk. No koja mēhõ kãm hkwyjê hkĩnh kãm mẽ kutã nojarêt o pa nẽ mãânên Jesus kôt amnhĩ nhĩpêx mex o pa. Jao te hirã kamã ri pa pyræk. Jakamã

tanhmā hkwỳjê homnuj to ho pa hkêt nê mē piitā mē ho mex o axpēn pyrāk o pa.

Juāw kot mē piitā ahpÿnhā tanhmā mē kām kapēr to

¹²⁻¹⁴ E kot pa ahpÿnhā tanhmā mē amā ixkapēr to nê hā kagà. Mē apiitā te mē apē ixkra pyrāk. Na ka prem Jejus kôt amnhĩ xunhwỳ nhũm Tĩrtũm ja hā mē apumu nê Kra kukwak ri mē ate amnhĩ tomnuj piitā amnhĩ katut kôt rēnh pa nê axte kām hamaxpēr kêt nê. Jakamā ra mē ate Tĩrtũm kēp Mēpanhĩpēêxà Maati hā omunh mex.

Nê mē ate Jejus kôt amnhĩ xunhwỳr ā amgrà xohtō xwỳnhjaja. Amnepēm amrakati ri Jejus ra rāhā ri pa ho pa xwỳnhja kôt mē ate amnhĩ xunhwỳr xwỳnhjaja kot paj mē amā tanhmā ixkapēr to nê hā kagà.

Nê mē akwỳjaja ham Jejus kôt mē ate amnhĩ xunhwỳr xwỳnhjaja ra mē ate Tĩrtũm kapēr mā ajamaxpēr rāhā ho ri apa. Jakamā na hte Satanasti mē ate amnhĩ tomnuj prām xāj tee ri tanhmā mē akrā hto ka mē Jejus nhỹ hā kutā amnhĩ to htỳx pē hkôt amnhĩ nhĩpēx kêt nê.

Mē kot amnhĩ tomnuj xwỳnhjaja tanhmā kot amnhĩ nhĩpēx to

Matêwre 6.24; Eprêw 11.24-26; Xiakre 4.4

¹⁵ Nê kēr ka mē amā Tĩrtũm kôt amnhĩ nhĩpēx prām xāj mē kot amnhĩ tomnuj xwỳnhjê hkôt amnhĩ nhĩpēx kêt nê. Nê mē hamaxpēr punuj xwỳnhjê hkôt ri amnhĩ nhĩpēx kêt nê. Kot kaj mē hkôt amnhĩ nhĩpēx hāmri nê amā Tĩrtũm kĩnh kêt ā amnhĩ to amnhĩrīt.

¹⁶ Mē kot amnhĩ tomnuj xwỳnhjaja na htem mēmoj punuj mā hamaxpēr nê hkôt tanhmā amnhĩ tomnuj to. Nê mēmoj pumu nê ra kām ho õ hprām nom Tĩrtũm pē ja omnuj ā hkamnhĩx kêt nê. Rỳ tanhmā mēhõ kot amnhĩ tomnuj to hā omu nê hkôt kām amnhĩ nhĩpēx prām. Nê tanhmā amnhĩ to jarkrar to ho ri pa. Ā na hte mē kot amnhĩ tomnuj xwỳnhjaja amnhĩ nhĩpēx anhỹr o pa. Mē kot amnhĩ nhĩpēxja Mēpanhĩpēêxà Tĩrtũm kām hprām kêt.

¹⁷ Kojā nhỹrmā mē kot tanhmā amnhĩ tomnuj toja piitā hapēx pa. Nê mē hamaxpēr punujja määnēn nhỹrmā hapēx pa. Nê mē kot amnhĩ tomnuj o mē pa xwỳnhjaja koja mē amnhĩ xà htỳx kamā

hamak rāhā ho pa ho pa. No Tĩrtũm kôt mē kot amnhĩ nhĩpēx o mē pa xwỳnhjaja koja mē kurom kuri htĩr tũm nê mex nê hkĩnh nê pa ho pa.

*Kām Kris kurê xwỳnh maati jarēnh
Wam Juāw 4.1-6; Sikũn Juāw 7-11*

¹⁸ E Kris kôt ixkwỳjaja. Kris akupÿn mē pahwỳr wrỳk kukamā koja mēmoj tanhmā amnhĩ nhĩpēx to. Na pre ra Kris kôt mē panhĩõja mē pamā ā harēnh anē nê harēnh o:

—Kojā mē panhõ Pahшти Kris akupÿn mē pahwỳr wrỳk kaxyw hāmri nhũm kēp Kris ā amnhĩ to hēx xwỳnh maati kumrēx nhỹhỹnh kato. Hāmri nê hēx rom te Kris pyrā nê tanhmā mē kām kapēr to nê tanhmā mē hipēx to ho pa nhũm rĩ kormā Kris akupÿn mē pahwỳr wrỳ. Anē.

Na pre hkukamā ā harēnh anē ka mē harēnh ma. Tā ra mē kēp Kris ā amnhĩ to hēx xwỳnhjaja ohtō nê mra nê kām hkurê xwỳnh maatita kukamā tanhmā amnhĩ nhĩpēx to pē mē kām amnhĩ to hēx o pa. Jakamā na pa ixprĩ hā mē amā tanhmā mē harēnh to. Kojā tokyx kēp Kris ā amnhĩ to hēx xwỳnh maatita nhỹhỹnh mē pahwỳr kato.

¹⁹ Na pre hkwỳjaja mē pahpê Kris kwỳjê hkôt ri pa htā mē pahkĩnhā kēp Kris kwỳ hket. Kēp hkwỳ ronhỹx arĩ mē pahkôt Kris kôt amnhĩ nhĩpēx o pa. Nom axtem nê àhpumunh tỳx pyrā nê mē pahkaga nê htỳx tanhmā amnhĩ tomnuj to ho pa. Jao kēp Jejus kwỳ hket ā amnhĩ to amnhĩrīt.

²⁰ No kêt mē pahpê Tĩrtũm krajaja na pre Jejus mē pahwỳr Karõ rē nhũm mē pahkarõ mā agjê nê mē pahkrām kapēr mex jagjê. Jakamā na pu mē mē kēp Kris kwỳ hket xwỳnhjê rom Tĩrtũm kapēr mar mex nê.

²¹ Xà mē ate Tĩrtũm kapēr ā kagà pumunh kêt kôt na pa ā mē amā ixkapēr nê hā kagà anē? Nà ra mē ate omunh nê mar mex kēnā. Tā mē ate mē kot tanhmā Jejus o hēx to xwỳnhjê pumunh mex nê mē harēnh mar mex kaxyw na pa ā mē awỳr kagà nhĩpēx nê mēnh anē. Kēr kê mē mēmo arĩgro hā mē awỳr agjê nê tanhmā mē amā Jejus o hēx to ka mē aprĩ hā mē omunh mex kurê kumrēx.

²² Tanhmã na htem Jejus o hêx to? E kot paj ixprî hã mẽ amã tanhmã mẽ harênh to ka mẽ inhma. Nà koja mēhõ mẽ amã tanhmã harênh to nê harênh o:

—Nà Jejus kêp Tirtũm Kra hkêt. Tirtũm kot mẽ pahwÿr mēnh kêt tâ ka htem atÿx kapêr kôt ri amnhĩ nhĩpêx o ri apa. Kwa kêt mẽ ixkapêr kôt măn ri amnhĩ nhĩpêx o ri apa.

Anhÿr o mẽ amã kapêr ka mẽ ama nê kãm Kris mẽ Tirtũm wa hkĩnh kêt xwÿnh ã omunh kurê kumrêx.

²³ Koja mēhõ Tirtũm Kra Jejus kaga nê määnēn Hipêêxà kaga. No koja mēhõ Tirtũm Kra hkôt amnhĩ xàm nê määnēn Hipêêxà hkôt amnhĩ xãm.

Mẽ pahte Kris kaga pymaj tanhmã amnhĩ nhĩpêx to hã mẽ pamã karõ

²⁴ Amnepêm mẽ ate Jejus kôt amnhĩ xunhwÿrta ã na ka prem kêp Tirtũm Kra hã Tirtũm kot mẽ pahwÿr mēnh xwÿnh ã harênh ma. Tã kêr ka mẽ arĩ amnhĩ kaxyw hkôt ajamaxpêr nê hkôt pix mã amnhĩ nhĩpêx o ri apa. Kot kaj mẽ anê nê Mēpanhĩpêêxà Maati mẽ Kra wa hkôt amnhĩ nhĩpêx mex o apa rãhã ty.

²⁵ Hãmri nê wa kuri atĩr tũm nê amex kumrêx nê apa ho apa. Ra Jejus kot ja jarênh xà hkôt.

²⁶ Na pa ã mẽ amã ixkapêr nê hã kagã anê. Mẽ aprĩ hã mẽ amã Jejus o hêx xwÿnhjê kapêr mar nê mẽ kot mẽ amã hêx kôt mẽ omunh mex kaxyw.

²⁷ Tirtũm Karõ na pre mẽ akarõ mã gjêx pa nê mẽ amã Tirtũm kapêr piitã o amnhĩrĩt mex o mẽ akôt pa. Jakamã mẽmo kaxyw kot kaj mẽ Tirtũm kapêr o hêx xwÿnhjaja kot tanhmã harênh toja ma? Ra Tirtũm Karõ kot mẽ amã ho amnhĩrĩt o mẽ ajahkre mex o pa kênã kot ka kêt mẽ nhãm mẽ kapêr ma. Na hte Tirtũm Karõja mẽ urã nê Tirtũm kapêr ho hêx kêt nê. ãm katãt kôt kot ho amnhĩrĩt mex jakamã kwa kêr ka mẽ mar tÿx nê hkôt ri amnhĩ nhĩpêx mex rãhã ho ri apa.

Mẽ pahte tãm ri amnhĩ nhĩpêx ã mẽ pamã karõ

Juāw 14.25-26, 15.1-8

²⁸ E Jejus kôt ixkrajaja. Kêr ka mẽ arĩ Kris kôt amnhĩ nhĩpêx mex rãhã ho ri apa.

Kê nhÿrmã akupÿn mẽ pahwÿr wrÿk o tẽ ka mẽ amnhĩ wÿr omu nê akĩnh nê. Nê akĩnh kãm axãmnhĩx kutã mra nê hkaxpa nê amnhĩ kamã amã uma hkêt nê. Rÿ mẽmoj tã amnhĩ tã apijaàm kêt nê. ãm axãmnhĩx akĩnh nê ma kutã mra.

²⁹ Krisja mex o mex jakamã na pu htem urak nê amnhĩ to mex o ri papa. Mẽ pahte amnhĩ to mex o papa xwÿnhjaja urak nê mẽ pahpê Tirtũm kra na pu mẽ.

3

Tirtũm krajê hkukamã tanhmã mẽ harênh to

Rômãn 8.18; Sikũn Korĩt 3.18; Sikũn Pêtre 3.11-14

¹ Nê Mēpanhĩpêêxà Maati kãm mẽ pajapê htÿx kumrêx jakamã na pre mẽ pahte hkôt amnhĩ xunhwÿr ã mẽ pahpumunh kôt mẽ pahpê hkra hã mẽ pajarê pu mẽ pahpê hkra nê ri papa. Ja na mẽ pamã mex o mex. Nom mẽ kot hkôt amnhĩ xunhwÿr kêt xwÿnhjaja kot hprĩ hã ja hã mẽ pahpumunh kêt jakamã na htem mẽ pahte tãm amnhĩ nhĩpêx ã mẽ pahpumu nê tee ri hamaxpêr.

² E Kris kôt ixkwÿjaja. Ra mẽ pahpê Tirtũm kra htã kormã mẽ pahte amnhĩ kukamã mẽ pahprĩ hã ja hã amnhĩ pumunh mex kêt. Koja nhÿrmã Jejus akupÿn mẽ pahwÿr wrÿ pu mẽ pano ho tanhmã kute hã omunh mex nê. Hãmri nê tã te kot amnhĩ nhĩpêx pyrak o amnhĩ nhĩpêx mex o papa. Ra mẽ pahte ja mar mex.

³ ã mẽ pahte amnhĩ kukamã pajamaxpêr anhÿr o papa xwÿnhjaja na pu htem kormã amnhĩ wÿr Jejus kamã pajamak o papa. Pê urak nê mẽmoj punuj mã pajamaxpêr kêt o papa. Nê urak nê tanhmã amnhĩ tomnuj to hkêt nê.

Tirtũm krajaja kot amnhĩ tomnuj o pa hkêt ã mẽ kãm karõ

⁴ Nê mẽ kot amnhĩ tomnuj o mẽ pa xwÿnhjaja na htem Tirtũm kapêr kwÿm ri amnhĩ nhĩpêx o pa. Tã kot puj mẽ tanhmã amnhĩ tomnuj to hãmri nê mẽ urak nê kapêr kwÿm ri amnhĩ nhĩpêx.

⁵ No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwÿr wrÿ. Aa kot amnhĩ tomnuj kêt jakamã tapxipix kot

mē pahpānhā amnhīrer mā tām. Ra mē pahte ja jarēnh mar mex.

⁶ Jakamā mē pahpê hkwỳjaja na pu htem ri pahtỳx tanhmā amnhī tomnuj to ho papa hkêt nē. Ā mē kot amnhī nhīpêx anhỳr xwỳnhjaja kêp hkwỳ hkêt.

⁷ Nom koja mēhō Kris pyrā nē tām amnhī nhīpêx o pa hāmri nē kêp Tīrtūm kraa. Jakamā kwa koja mēhō Tīrtūm kapêr kwỳm ri tanhmā mē amā kapêr to ka mē ama nē ām ama.

⁸ Mē kot amnhī tomnuj o mē pa xwỳnhjaja na htem Satanasti hkôt ā amnhī nhīpêx anhỳr o pa. Satanastija Tīrtūm kot mēmoj to kator krax rūm nhūm ā kot amnhī tomnuj anhỳr o pa xwỳnh na. Tā ā kot amnhī nhīpêx anhỳr o paja o hapêx par kaxyw na pre Tīrtūm Kra Jejusja amnē pika hwỳr wry.

⁹ Nom mē papajaja mē pahpê Tīrtūm kra na pu mē. Na pre mē pahwỳr amnhī Karō rē nhūm mē pahkarō mā gjêx pa nē mē pahkôt pa ho pa. Jakamā tanhmā kot puj wem amnhī to nē Satanasti pyrā nē pahtỳx ri amnhī tomnuj o papa? Nā kot puj mē ā amnhī nhīpêx anhỳr kêt nē.

¹⁰ Koja mēhō tām amnhī nhīpêx kêt nē hāmri nē mēhō hkwỳjê kamā ukapri hkêt nē. Hāmri nē ā amnhī nhīpêx anhỳr o kêp Tīrtūm kra hkêt ā amnhī to amnhīrīt. Ām kêp Satanasti hkra hā amnhī to amnhīrīt kurê kumrêx.

Mē pamā axpēn kīnh o te Jejus kām mē pahkīnh pyrāk ā mē pamā karō

Matêwre 22.39; Rukre 10.25-37; Juāw 13.31-35

¹¹ Nē kêt ka mē arī amā axpēn kīnh pē tām axpēn nhīpêx o ri apa rāhā nē. Te amnepê mā mē ate Jejus kôt amnhī xunhwỳr ā arīgrota ā mē kot mē amā ja hā karō pyrā nē.

¹² No mē ri finat Kaī kot amnhī nhīpêx pyrāk o amnhī nhīpêx kêt nē. Kêp Satanasti hkra jakamā na pre htōja pī. Kurom kot tām amnhī nhīpêx ā omu nē kamā gryk nē kupī.

¹³ Tā koja mē kêp Tīrtūm kra hkêt xwỳnhjaja Kaī pyrā nē kêp mē aprām nōkati nom kêt ka mē amnhī tā mē omu nē tee ri amnhī kukamā ajamaxpêr kêt nē.

¹⁴ Kormā mē pahte Jejus kôt amnhī xunhwỳr kêt ri na pu prem mē urāk nē amnhī

tomnuj o papa. Jao mē pahpê kuwy hwỳr papa mā xwỳnh. Tā mē pahte Jejus kôt amnhī xunhwỳr jakamā ra pahpê Tīrtūm mē Kra wa kuri pahtīr tūm nē papa mā xwỳnh. Jakamā na pu htem mē kêp hkra hkêt xwỳnhjê kurom pamā mē piitā mē hkīnh o tanhmā mē ho mex to ho papa. Mē kām amnhī kwỳjê hkīnh kêt xwỳnhjaja arī mē kêp kuwy hwỳr mē pa mā xwỳnh na mē. Ra mē pahte ja jarēnh mar mex.

¹⁵ Mē kām mē hpar prām o mē pa xwỳnhjaja koja nhỹrmā Tīrtūm mē Kra wa kuri htīr tūm nē pa ho pa hkêt nē. Ra mē pahte mēhō ja mar mex. Jakamā kwa mē amā akwỳjê hprām nōkati ho ri mē apa xwỳnhjaja. Tīrtūm noo mā te ra mē ate mē hpar pyrāk jakamā kot kaj mē arī ā amnhī nhīpêx anhỳr o ri apa hāmri nē nhỹrmā Tīrtūm nhō krī hwỳr axàpir kêt nē.

¹⁶⁻¹⁸ E ixkwỳjaja. Kwa kêt pu mē pajakwa pix o pamā axpēn kīnh ā amnhī jarēnh kêt nē. Mēhō axpēn kutā panojarêt o ri papa. Nē tanhmā axpēn to mex to. Tanhmā na pre Jejus kām mē pajapê hā amnhī nhīpêx to? Nā na pre kām mē pamex prām xàj mē panê ty. Kām amnhī tā ma hkêt kām mē pakamā ukapri xàj mē panê ty. Tā kêt pu mē urāk nē pahkwỳjê kamā paxukapri ho mē kutā panojarêt rāhā ho papa. Jao mē paxàpkur xà hā panhō pumu nē nhỹri pahkwỳjê hō pumu nhūm kêp amrakati. Pu mē tee ri ja hā omu hāmri nē kām mē panhōta kwỳ gō. Kot pu mē ā amnhī nhīpêx anhỳr kêt nē hāmri nē pamā Tīrtūm kīnh ā amnhī jarēnh kapry.

¹⁹ Nē kot puj mē ā axpēn to mex o papa anē nē ra pahte Tīrtūm kôt amnhī nhīpêx mex ā amnhī to amnhīrīt. Hāmri nē ra paxamnhīx kām tanhmā amnhī jarēnh to ho papa. Amnhī kamā pamā uma hkêt nē paxamnhīx pajamakêtkati nē kām tanhmā amnhī jarēnh to.

Mē paxamnhīx amnhī to Tīrtūm wỳr ā mē pamā karō

²⁰ Nē kot puj mē mēmo arīgro hā tanhmā amnhī tomnuj to hāmri nē tee ri ja hā amnhī pumu nē amnhī kamā pagryk nē. Na hte Tīrtūm tanhmā mē pahte amnhī tomnuj to hā mē pahpumu nom arī kām mē pajapê. Mē parom àhpumunh o àhpumunh

jakamā kot mẽ pahte amnhĩ tomnuj prām kêt ã mẽ pahpumunh mex.

²¹ Jakamā puj mẽ ã kām pajamexpēr anē nē amnhĩ kamā pamā uma hkêt kām paxāmnhĩx tanhmā ri amnhĩ to hwÿr to ho ri papa.

²² Kot puj mẽ hkôt amnhĩ nhĩpêx o papa rāhā nē mẽmoj tā kuwÿ. Nē kām hprām xā hkôt amnhĩ nhĩpêx o papa hā amnhĩ pumunh kôt mẽmoj tā kuwÿ. Hāmri nhũm mẽ pama nē tanhmā mẽ pamā mẽmoj to rÿ mẽ pamā mẽmoj gō.

Te ixkre pixi kamā mẽ pahtixi pyrāk ã mẽ pamā karō

²³ Nē tanhmā mẽ pahte amnhĩ nhĩpêx to ho papa hā na hte Tĩrtũm mẽ pamā karō? Nā mẽ pahte amnhĩ kaxyw Kra Jejus Kris kôt pajamexpēr nē hkôt amnhĩ nhĩpêx o papa hā na hte mẽ pamā karō. Nē kapēr xā hkôt pamā axpēn kĩnh o mẽmoj to axpēn kutā panojarēt o papa hā na hte mẽ pamā karō. Na hte ã mẽ pahte amnhĩ nhĩpêx anhÿr ã mẽ pamā karō anē.

²⁴ Jakamā kot puj mẽ kapēr xā hkôt axpēn nhĩpêx o papa nē te ixkre tipxi kamā mẽ pahte axpēn kôt Tĩrtũm kôt ri papa pyrāk. Ra kot mẽ pahwÿr Karō rēnh nhũm kot mẽ pahkarō mã gjêx jakamā na hte mẽ pahkôt pa ho pa hā amnhĩ to amnhĩrīt.

4

Mẽ kot Kris kapēr jarēnh ã amnhĩ to hêx xwÿnhjê jarēnh

Wam Korīt 12.1-3; Wam Juāw 2.18-26; Sikũn Juāw 7-11

¹⁻³ Nē koja mēhō Tĩrtũm kapēr o mẽ ajahkre kaxyw mẽ amā tanhmā Jejus Kris jarēnh to nē ãm hāmri harē nē harēnh o:

—Na pre Tĩrtũm Kra Jejus mẽ pahwÿr wrÿ nē ĩ ho ĩ ho mẽ pakamā kato. Tĩrtũm tām na pre mẽ pahwÿr kumē nhũm wrÿ.

Anhÿr o mẽ amā harē ka mẽ ama nē kapēr kôt ajamexpēr kurē kumrêx. Ām hāmri na hte Tĩrtũm Karō nhÿ ã harēnh anē. No koja Jejus kēp Tĩrtũm Kra hkêt ã harē ka mẽ ama nē ãm ama nē hkôt ajamexpēr kêt nē. Kām Kris kurē xwÿnh maati nhÿ hā kapēr xwÿnhjaja na hte ã harēnh anhÿr o pa. Na ka prem ra kām Kris kurē xwÿnh maatiya tokyx hpôx ã harēnh ma. Tā na

ra ÿ hā kapēr xwÿnhjaja ohtô nē pika piitā hkôt mẽ hkôt pa nē te Tĩrtũm Karō nhÿ hā mẽ kām kapēr pyrāk o amnhĩ nhĩpêx o pa. Nom ãm amnhĩ to hêx o pa. Jakamā e kwa ixkwÿjaja. Koja mēhō mẽ awÿr mra nē tanhmā mẽ amā Tĩrtũm kapēr jarēnh to ka mẽ aprĩ hā ama nē rĩ kormā kēp Tĩrtũm nhÿ hā kapēr jarēnh xwÿnh ã harē rÿ kot amnhĩ to hêx xwÿnh ã harē.

⁴ Kêt mẽ papajaja jajê rom mẽ pahpê Tĩrtũm kra na pu mẽ. Nē Tĩrtũm Karō kot ra mẽ pahkarō mã gjêx xwÿnhhta hihtÿx o jajê piitā mẽ hakrenh. Jakamā na pu htem ÿ hā mẽ kutā amnhĩ to htÿx o papa nhũm mẽ tee ri tanhmā mẽ pamā Jejus o hêx to kaprÿ. Pu mẽ kuma nē ãm mẽ kuma.

⁵ Mē kēp Tĩrtũm kra hkêt jakamā na htem hkôt amnhĩ nhĩpêx kêt nē. Mẽ kot amnhĩ nhĩpêxja axtem na. Jakamā na htem Tĩrtũm kapēr kwÿm ri tanhmā hkra hkêt xwÿnhjê mã kapēr to ho pa nhũm mẽ kuma nē kām mẽ mar prām nē.

⁶ Nom mẽ ixte Tĩrtũm kapēr o mẽ ajahkre xwÿnhjaja na pa htem mẽ kurom Tĩrtũm nhÿ hā ixkatāt kôt ãm hāmri mẽ amā kapēr jarēnh o ri ixpa. Jakamā ka mẽ apê hkra hā mẽ amā mẽ inhmar prām nē. No mẽ kēp hkra hkêt xwÿnhjaja kām mẽ inhmar prām kêt.

Na pu htem pahprĩ hā mẽ kapēr ã mẽ kuma nē rĩ kormā tanhmā mẽ harēnh to. Tĩrtũm nhÿ hā kapēr ã mẽ harē rÿ kām hkurē xwÿnh maati nhÿ hā kapēr ã mẽ harē.

Tĩrtũm kām mẽ pajapê hā tanhmā amnhĩ nhĩpêx to hā harēnh

Juāw 3.16-21; Rōmān 5.5-9, 8.35-37

⁷ E ixkwÿjaja. Na hte Tĩrtũm tanhmā mẽ pahpê hkrajê ho pu mẽ pamā axpēn kĩnh nē. Jakamā kēr pu mẽ ã axpēn nhĩpêx anhÿr jao axpēn to mex pix nē. Ā Tĩrtũm kot mẽ panhĩpêx anhÿr jakamā kēr pu mẽ pahpê hkrajaja ÿ hā ã axpēn nhĩpêx anhÿr o ri papa.

⁸ Koja mēhō Tĩrtũm kĩnhā kām mẽ hkwyjê hkĩnh kêt hāmri nē mẽ kamā ukaprĩ hkêt o pa. Hāmri nē kēp Tĩrtũm kra hkêt ã amnhĩ to amnhĩrīt mex nē.

⁹⁻¹⁰ Tĩrtũm kām mẽ pajapê htÿx kumrêx. Kormā mẽ pamā hkĩnh kêt ri nhũm kumrêx amnhĩ rom kām mẽ pajapê ho pa. Nē

kām mẽ pajapê xàj mẽ pahwỳr Kra pyxita mẽ. Mẽ pahte amnhĩ tomnuj pānhã kot mẽ panê htyk kaxyw. Mẽ pahte kukwak ri amnhĩ nhĩpêx nyw o amnhĩ nhĩpêx nẽ nhỹrmã wa kuri pahtĩr tũm nẽ pamex nẽ papa ho papa kaxyw. ã na pre Tĩrtũm mẽ pahwỳr Kra mẽnh anhỹr o kām mẽ pajapê hã amnhĩ to amnhĩrit.

¹¹ E ixkwỳjaja. Tĩrtũm kām mẽ pajapê htỳx jakamã kwa kêr pu mẽ uràk nẽ pamã axpẽn kĩnh o papa. Nẽ axpẽn kamã paxukapřĩ nẽ.

¹² Aa mẽ pahtõ pahte pano ho Tĩrtũm pumunh kêt tã na hte mẽ pakamã pa ho pa. Pu mẽ kām mẽ pajapêta pyrã nẽ ý hã pamã axpẽn kĩnh o papa.

¹³ Na pre mẽ pahwỳr Karõ rẽ nhũm mẽ pahkarõ mã agjê pu mẽ ý hã kot amnhĩ nhĩpêx o amnhĩ nhĩpêx o papa.

¹⁴ Nẽ mẽ ixpê Jejus nhỹ hã mẽ ajahkre xwỳnhjaja. Mẽ ixte kot amnhĩ nhĩpêx nẽ kot mẽmoj tanhmã ho hã omunh o ri hkôt ixpa jakamã na pa htem ma mẽ piitã mẽ kām harênh o ri mẽ hkôt ixpa. Nẽ mẽ kām harênh o:

–Tĩrtũm na pre mẽ pahwỳr Kraja mẽ. Kot mẽ pahpiitã mẽ panê htyk kaxyw mẽ pahwỳr kumẽ. Anẽ.

¹⁵ Mẽ kot Jejus kêp Tĩrtũm Kra hã harênh o pa xwỳnhjaja na hte Tĩrtũm mẽ kamã pa ho pa nhũm htem ý hã ã Kra jarênh anhỹr o pa.

¹⁶ Na pu mẽ ra pahpřĩ hã Tĩrtũm kām mẽ pajapê hã amnhĩ tã omu. Kām mẽ pajapê htỳx kumrêx ã amnhĩ tã omu. Jakamã kot puj mẽ uràk nẽ ý hã pamã mẽ piitã mẽ hkĩnh o papa. Tĩrtũm mẽ mẽ pahtipxi nẽ ri papa kênã.

Mẽ kām axpẽn kĩnh xwỳnhjaja kām Tĩrtũm puma hkêt ã mẽ harênh

¹⁷ Nẽ kot puj mẽ pamã axpẽn kĩnh o papa nẽ mãânên Kris kôt amnhĩ nhĩpêx ho papa. Hãmri nhũm nhỹrmã Tĩrtũm kot Kra mẽ wa kuri mẽ htĩr tũm nẽ mẽ pa ho mẽ pa mã xwỳnhjê nhĩxi jarênh kaxyw pu mẽ tee ri amnhĩ kukamã pajamaxpêr kêt nẽ. Ra amnhĩ nhĩxi jarênh ma nẽ pahkĩnh nẽ.

¹⁸ Nẽ koja mẽhõ kām hkwyjê hkĩnh kêt nẽ tanhmã hõ homnuj to. Hãmri nẽ kot amnhĩ tã tanhmã ho pymaj kām uma ho

hwỳr mrrar kêt nẽ. No koja kām hkwyjê hkĩnh nẽ tanhmã mẽ ho mex to ho pa nẽ kām mẽ uma hkêt nẽ.

¹⁹ Tĩrtũm kumrêx na pre kām mẽ pajapê nẽ mẽ pakukamã tanhmã mẽ pahto mex to. Tã pu mẽ ra amnhĩ pyrã nẽ pamã hkĩnh o papa. Nẽ pamã mẽ piitã mẽ hkĩnh o papa.

²⁰ Nẽ koja mẽhõ kām Tĩrtũm kĩnh ã amnhĩ jarênh tã kām hkwyjê hõ hprãm nõkati hãmri nẽ ra kām Tĩrtũm prãm kêt ã amnhĩ to amnhĩrit. Kot kaj mẽ ano ho akwyjê pumunh o apa xwỳnhhta amã hkĩnh kêe tã tanhmã kot ka we amnhĩ to nẽ ate ano ho Tĩrtũm pumunh kêeta amã hkĩnh ã amnhĩ jarê? Nã ka ã amnhĩ jarênh anhỹr o amnhĩ to axêx.

²¹ Na pre Tĩrtũm mẽ pamã kapêr o amnhĩrit o:

Kot kaj mẽ amã ixkĩnh hã kot kaj mẽ mãânên amã akwyjê hkĩnh o mẽ ho mex o ri apa. Anẽ.

5

Tĩrtũm nhỹ hã mẽ pamã axpẽn kĩnh ã mẽ pamã karõ

¹ Nẽ Tĩrtũm kot mẽ pahwỳr Jejus mẽnh ã harênhja. Koja mẽhõ kuma nẽ amnhĩ kaxyw hkôt hamaxpêr nẽ Jejus kôt amnhĩ xãm hã koja Tĩrtũm ja hã omu nẽ ho hkra.

Nẽ koja mẽhõ kām Tĩrtũm kĩnh hã koja mãânên kām hkwyjê hkĩnh o pa.

² Ja pyrã nẽ kot puj mẽ pamã Tĩrtũm kĩnh nẽ kapêr kôt amnhĩ nhĩpêx. Hãmri nẽ mãânên pamã krajê piitã mẽ hkĩnh ho papa.

³ Nẽ kot puj mẽ pamã Tĩrtũm kĩnh nẽ nhũm kapêrja mẽ pahpê hihtỳx kêt nẽ. Pu mẽ pamã Tĩrtũm kĩnh ã kapêr kôt amnhĩ nhĩpêx mex o ri papa.

⁴⁻⁵ Na pu prem amnhĩ kaxyw Tĩrtũm Kra Jejus kôt pajamaxpêr nẽ hkôt amnhĩ xunhwỳ nhũm Tĩrtũm ja hã mẽ pahpumu nẽ mẽ pahto hkra pu mẽ ý hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêt nẽ.

Mẽmoj axkrunêpxi nẽ kot Jejus kêp Tĩrtũm Kra hã ho amnhĩrit

Juāw 1.32-34, 3.36, 5.31, 15.26

⁶ Nẽ Jejus pix na pre Tĩrtũm mẽ pakaxyw ãm nhũm kêp Kra hã mẽ pahwỳr wrỳ. Hãmri nhũm Juāw Paxisja pyhti kamã hkrã

kumrā. Kêp Tirtūm Kra hā hkrā kumrā. Tā nhūm Tirtūm kapēr kôt ma tanhmā amnhī nhīpêx to ho pa. Nē ri hkwỳjê mā kapēr jarēnh o ri mē hkôt pa. Tā nhūm mē kupī nhūm kêp Tirtūm Kra hā pī kahpa hā ajêt nē ty nē hkamrô axkapī. Ā mē panē amnhī nhīpêx anē nhūm Tirtūm Karōja kêp Kra hā mē pamā ho amnhīrīt. Ām hāmri na hte ā tanhmā mēmoj to amnhīrīt to anē. Mēmoj to hêx kêt jakamā na pre Jejus kêp Tirtūm Kra hā mē pamā ho amnhīrīt.

⁷ Nē kêp Tirtūm Kra hā mē pamā mēmoj to axkrunēpxi nē ho amnhīrīt.

⁸ Tirtūm Karō na pre kêp Kra hā mē pamā ho amnhīrīt pu prem kêp Kra hā omu. Nē Juāw Paxis kot hkrā kumrārta ā pu mē määnēn kêp Tirtūm Kra hā kot ho amnhīrītja ā omu. Nē määnēn kêp Tirtūm Kra hā pī kahpa hā jêt nē htyk nē hkamrô pikapīrta ā mē pamā ho amnhīrīt pu mē kêp Kra hā omu. E mē pamā mēmoj to axkrunēpxi nē Jejus kêp Tirtūm Kra hā kot ho amnhīrīt xwỳnh na jajaja.

⁹ Nē na pu htem jar pahkwỳjaja kot axpēn mar xā hā ixkre kamā mē kapēr ma nē mē hkôt pajamaxpēr. Tā koja Tirtūm tanhmā mē pamā mēmoj to amnhīrīt to pu mē hkôt pajamaxpēr kurê kumrêx. Kêp Tirtūm kênā kot pu kêt mē kapēr prā nē hkôt pajamaxpēr kêt. Tām na pre mē pamā Jejus kêp Kra hā ā ho amnhīrīt anē.

¹⁰ Jakamā mē pahte Tirtūm Kra hkôt amnhī xunhwỳr xwỳnhjaja na pu prem Jejus kêp Kra hā harēnh ma nē hkôt pajamaxpēr kurê kumrêx. No mē kêp hkra hkêt xwỳnhjaja na htem Tirtūm kot kêp Kra hā harēnh ma nē ām kuma nē amnhī kaxyw hkôt hamaxpēr kêt nē. Jao te Tirtūm kêp Hipêêxā hā amnhī to hêx pyrāk ā harē.

¹¹ E kot paj ixprī hā mē amā tanhmā ja jarēnh to ka mē inhma. Nà na pre Tirtūm Krata mē pahpiitā panē ty. Jakamā kot puj mē pahte hkôt amnhī xunhwỳr xwỳnhjaja nhỹrmā ty nhūm Tirtūm akupỳm mē pahto mē pahťr. Pu mē wa kuri pamex nē pahťr tūm nē papa ho papa.

¹² Mē pahpê Jejus kwỳjaja kot puj mē ā pahťr tūm nē papa anē. No mē kêp hkwỳ hkêt xwỳnhjaja koja mē nhỹrmā ty nē mē pahpyrà nē wa hwỳr àpir kêt nē.

¹³ Na ka prem ixpyrà nē amnhī kaxyw Tirtūm Kra hkôt ajamaxpēr nē hkôt amnhī xunhwỳ. Tā pa ā mē amā kagàja nhīpêx anē. Mē ate kamā harēnh nē mē pahte nhỹrmā Tirtūm mē Kra wa hwỳr mē paxàpir ā mē pajarēnhja mar nē amnhī kaxyw hkôt ajamaxpēr o ri apa kaxyw nē kapēr prār o ri apa hkêt nē.

Mē pahte paxàmnhīx mēmoj tā Tirtūm wỳr ā mē pajarēnh

Juāw 14.13-14

¹⁴ Nē mē pahpê Tirtūm krajaja na pu htem paxàmnhīx pajamakêtkati nē mēmoj tā tanhmā hwỳr to ho papa. Kot puj mē kām hprām xā hkôt mēmoj tā kuwỳ nhūm mē pama.

¹⁵ Na pu htem mēmoj tā kuwỳ nhūm mē pamar mex nē mē pahte mēmoj tā hwỳr xā hkôt tanhmā mē pamā mēmoj nhōr to rỳ tanhmā mēmoj to. Ra mē pahte ja mar mex.

Tirtūm kot tanhmā hkra hkêt xwỳnhjê nhīpêx to hā harēnh

Rukre 22.31-32

¹⁶⁻¹⁷ Nē koja Kris kôt mē anhiō tanhmā amnhī tomnuj to ka mē atō tee ri ja hā omu nē ho Tirtūm wỳ. Ho awỳ kê nē tanhmā kot amnhī tomnuj tota o hapêx nē ja nē ho htỳx kê axte ā amnhī nhīpêx anhỹr kêt nē. Kot puj mē pahťo tanhmā amnhī tomnuj to nhūm Tirtūm tee ri ja hā mē pahpumu nhūm ja kêp omnuj nē. Tā kot puj mē amnhī tomnujta kaga nhūm ja hā mē pahpumunh kôt tanhmā hā mē pahťo hkêt nē. Ām mē kot amnhī nhīpêx pixi koja ho hamakêtkati hkêt nē. Koja mēhō Tirtūm kaga ho hkaga nē aa hkôt amnhī xām kêt nē. Hāmri nhūm tee ri amnhī tā omu nhūm ja kêp omnuj tỳx kumrêx. Jakamā koja aa ho hkra hkêt nē. Nē aa kot hkaga ho hamakêtkati hkêt nē pa ho pa. Jakamā koja hkaga xwỳnhhta nhỹrmā ty nē kuri htīr tūm nē pa ho pa hkêt nē.

¹⁸ Nē mē pahpê Tirtūm krajaja na pu htem amnhī tomnuj o papa hkêt nē. Tirtūm Kra Jejus kot ja pymaj mē panē Satanasti pumunh mex jakamā nhūm tee ri mē pahte tanhmā amnhī tomnuj to hprām xāj mē pano kupyrr kaprỳ ho ri pa. Ra mē pahte ja mar mex.

¹⁹ Mě pahpê Tĩrtũm kra na pu mẽ. No mẽ kệp hkra hkêt xwỳnhjaja Satanasti kot amnhĩ tã mẽ ho htỳx pyràk o mẽ hipêx jakamã nhũm htem tanhmã amnhĩ tomnuj to ho pa. Mě pahte ja mar mex.

²⁰ Nễ mãnễn ja mẽ pahte mar mex. Na pre Tĩrtũm Kra mẽ pahwỳr wrỳ nễ mẽ pamã tanhmã Tĩrtũm o amnhĩrĩt to ho pa. Tapxipix kệp Mễpahpãm ã mẽ pamã ho amnhĩrĩt. Tã Jejus kukwak ri mẽ pahpê Tĩrtũm kra jakamã kot puj mẽ nhỹrmã wa kuri pahtĩr tũm nễ pa mex nễ papa ho papa.

²¹ E Kris kôt ixkwỳjaja. Kêr ka mẽ Tĩrtũm kapêr kôt pix mã mãn ri amnhĩ nhĩpêx o ri apa rãhã nễ. No nhãm mẽ kot Tĩrtũm kapêr kwỳm ri mẽ amã kapêr o hêx xwỳnhjê kapêr ma nễ ãm mẽ ama nễ mẽ hkôt amnhĩ nhĩpêx hkêt nễ.

Tã ãm ja pix. Ixpê Juãw na pa krĩ piitã hkôt mẽ amã kagà nhĩpêx nễ kurẽ.

Sikūn Juāw

Juāw kot Jejus kôt hkwỳjê hwỳr wam kagà nê mēnh kôt hō mēnh

Juāw na pre kagàja nhīpêx. Jejus nhỹ hã hkrajê jahkre ho ri pa xwỳnhjê hō na pre. Jakamã na pre hkrī hō kamã Kris kôt htōx mē õ fãmii mã kagàja nhīpêx nê mē hwỳr kumê. Na pre hte Tirtūm kapêr o mē hêx o pa xwỳnhjê hō mē õ krī hwỳr mra nhũm Juāw kràmnhwỳ nita omu nê htỳx kot mē ahkre mex ã hkamnhĩx. Hãmri nê kot Tirtūm kapêr o hkwỳjê jahkre kaxyw amnhĩ nhōrkwỹ hwỳr kuwỳ. Hãmri nhũm Juāw tee ri harênh ma nê kãm kagàja nhīpêx nê kamã kot amnhĩ wỳr hwỳr nê kãm kapêr nê hprī hã kãm tanhmã mē kot Tirtūm o hêx to ho pa hã tanhmã mē harênh to. Kot kamã harênh nê mē harênh mar hãmri nê mē axkãm hamak rom nê ri pa kaxyw. ã na pre Juāwja hkràmnhwỳ ni mē hkwỳjê mã mēmoj jarênh nê hã kagà nê mē hwỳr mēnh anê. Nê mē kãm:

¹ Pa Jejus kôt ixtōx. Xà mē amex? E ot pa mē amã kagà nhīpêx nê mē awỳr kumê. Akrajaja nê apê mē hktorxà mē mē ato ixpimràatã mē awỳr kumê. Ixpê Juāw pigêtre na pa. Inhmã mē akĩnh nom papxipix inhmã mē akĩnh kêt. Mē pahpyrà nê mē kot Tirtūm kôt amnhĩ xunhwỳr xwỳnhjaja haxwỳja kãm mē akĩnh.

² Mē pahte Tirtūm kapêr kôt ri amnhĩ nhīpêx rãhã ho ri papa jakamã na pu htem pamã axpên kĩnh o ri papa.

³ Na pa hte mē pahto Mēpanhīpêêxã maati Tirtūm wỳr o ixpa nê kãm:

—Pa Tirtūm. Ot pa mē amnhĩ to awỳ. Akra Jejus Kris mē mē amnhĩ to war awỳ. Kêr ka wa mē ixkamã axukapri nê mē ixkutã war anojarêr rãhã ho ri apa. Nê tanhmã mē ixkrã hto pa mē ixãmnhĩx ijamakêtkati nê ixkĩnh nê mē inhmã axpên kĩnh nê axpên to mex o ri axpên kôt ixpa. Nê tãm ri amnhĩ nhīpêx. Anê.

*Mē pamã axpên kĩnh kãm axpên to mex ã
mē pamã karõ*
Juāw 13.34-35; Wam Juāw 2.7-9, 3.14-18

⁴ Nê na pa pre akra hkwỳjê pumu nhũm mē inhmã amnhĩ jarê pa mē kuma nê mē y hã ixkĩnh nê. Na xep prem Tirtūm kôt amnhĩ xunhwỳ nê hkôt ri amnhĩ nhīpêx mex o pa. Mē kot Mēpanhīpêêxã Maati Tirtūm kapêr ã kagà hkôt amnhĩ nhīpêx ã inhmã amnhĩ jarê pa mē kuma nê ixkĩnh nê.

⁵⁻⁶ Jakamã na pa ã amã ixkapêr nê hã kagà anê. E kwa Kris kôt ixtōx. Kêr pu mē pamã axpên kĩnh o ri papa hã mēmoj to axpên kutã panojarêr rãhã ho ri papa. ã ixujarênh anhỹrja nyw kêt. Amnepê mã mē ate Jejus kôt amnhĩ xunhwỳr ã arĩgrota ã na prem ã mē amã karõ anê. Tã kêr pu mē arĩ pamã axpên kĩnh pê Tirtūm kapêr piitã hkôt amnhĩ nhīpêx mex o ri papa. Kapêr ã kagà kot ã mē pahte amnhĩ nhīpêx anhỹr ã mē pamã karõ.

Tirtūm kapêr o mē hêx xwỳnhjê jarênh
Rômãn 16.17-18; Wam Ximotre 5.22;
Wam Juāw 2.18-26, 4.1

⁷ Nê mē kot Tirtūm kapêr o hêx o ri mē pa xwỳnhjaja na mē ra ma krī piitã hkôt mē kãm tanhmã ho hêx to ho pa nê mē kãm:

—Jesús kêp Tirtūm Kra hkêt ãm mē panhĩõ na pre. Na pre Tirtūm mē pahwỳr mēnh kêt nê. ãm mē panhĩõ rũm na pre kato.

Anhỹr o mē kãm ho hêx o pa. Kãm Kris kurê xwỳnh maati ja nhỹ hã na htem ã ri ho hêx o pa anê.

⁸ Jakamã kwa mē amnhĩ nê mē omunh mex nê mē ama nê ãm mē ama. Kot kaj mē kapêr ma nê mē hkôt ajamaxpêr hãmri nê mē ixte Tirtūm kapêr o mē ajahkreta kaga. Kwa mē arĩ mē ate amnhĩ nhīpêx nyw pix o mãn amnhĩ nhīpêx rãhã o ri apa. Nê arĩ mē amã axpên kĩnh kãm tanhmã axpên to ajuta hto rãhã ho ri apa. Kêr kê Tirtūm ja hã mē apumu nê nhỹrmã mē ato mex nê.

⁹ Nom kot kaj mē nhãm mē kapêr punujja kôt amnhĩ nhīpêx nê Kris kôt amnhĩ nhīpêx kêt nê nhũm Tirtūm mē akôt pa hkêt nê. Nom kot ka mē arĩ Kris kôt amnhĩ nhīpêx mex nê hãmri nhũm Tirtūm mē Kra Jejusja wa mē akôt ri pa ho pa rãhã nê.

¹⁰ Jakamã koja ã Tirtūm kapêr ã kagà kuhpa hã Jejus o hêx xwỳnhjaja mēmo arĩgro hã mē anhõ krī hwỳr pøj ka mē omu nê amnhĩ nhōrkwỹ hwỳr mē hwỳr kêt nê. Nê

tanhmã mẽ kãm akapěr to hkêt nẽ. ãm ri mẽ hkàx ã ri mra.

¹¹ No kot kaj mẽ ã mẽ hipêx anhỹr kêt nẽ mẽ hwỳr mra nẽ mẽ mar o akuhê hãmri nẽ te mẽ ate mẽ hkôt amnhĩ nhĩpêx o amnhĩ nhĩpêx pyràk. Ja pumaj kêr ka mẽ nhỹri mẽ omu nẽ mẽ htêp kêt kumrêx.

Kagà jatur xà

Hapuhã Juāw 13-15

¹² E Kris kôt ixtõx. Ixkapěr jatur xà na ja. Ixkapěr ã kagàja ãm hakotre nom inhmã mẽ amã ixkapěr ry hprãm. Jakamã kot paj mẽmo arĩgro hã ma mẽ awỳr mō pu mẽ axpẽn pumu nẽ pahkĩnh nẽ. Pa rĩ kormã mẽ amã ixkapěr jatur xàm kumẽ ka mẽ aprĩ hã inhma.

¹³ Nẽ ota jar Kris kôt atõx krajaja awỳr hpěr mẽ.

E ixpê Juāw pigêtre na pa ã awỳr kagàja nhĩpêx nẽ mẽnh anẽ.

Hapuhã Juãw Juãw kot Jejus kôt hkwýjê hwýr kagà nê mênh o axkrut kôt hõ mênh

Juãw na pre mãânên kagàja nhípêx. Jejus nhý hã hkrajê jahkre ho mẽ pa xwýnhjê hõ na pre. Tã hkràmnhwý Gajore mã kagàja nhípêx nê hwýr kumê. Na pre Jejus kwýjaja ma krĩ piitã hkôt mẽ kãm Jejus kapêr jarênh o ri mẽ hkôt pa. Jao Gajore nhõ krĩ hwýr pøj nhũm Gajore mẽ hpôx ã mẽ harênh ma nê amnhĩ nhõrkwý hwýr mẽ kuwý. Jakamã nhũm pre htem ma õ krĩ hwýr pa hãmri nê kuri pøj. Nhũm Juãw ã Gajore kot amnhĩ nhípêx anhýr ã harênh ma nê hkĩnh nê hwýr kagàja nhípêx nê kumê. Nê kamã kãm mênhõ pê Xotre kot tanhmã amnhĩ tomnuj to ho pa hã harê. ã na pre Juãwja Gajore mã mẽmoj jarênh nê hã kagà nê hwýr mênh anê. Nê kãm:

¹ Pa ixkràmnhwý Gajore? Xà amex? E ot pa awýr kagàja nhípêx nê kumê. Apê ixkràmnhwý mex na ka. Inhmã akĩnh.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tirtũm kôt amnhĩ nhípêx mex rãhã ho ri apa. Pa ajarênh ma nê anhý hã ixkĩnh nê. Nê ato Tirtũm wýr o ixpa. Kot ato mex nhũm amex nê ajamakêtkati nê apa ho apa kaxyw. Nê axà hkêt nê amex nê ri apa kaxyw.

⁴ Ixte Tirtũm kapêr o mẽ ajahkre o ri ixpa jakamã te mẽ apê ixkra pyrãk. Tã pa tanhmã ate mẽ pahkwýjê nhípêx to ho apa hã ajarênh ma nê ixkĩnh nê.

Gajore kot tanhmã Jejus kôt hkwýjê ho mex to hã harênh

Wam Korõt 16.10-11

⁵ E ixkràmnhwý. Na ka xep hte Jejus kôt pahtõjê ho mex o ri apa. Aa ate mẽ omunh kêt tã nhũm htem ma anhõ krĩ hwýr pa ka mẽ omu nê apê Jejus kôt mẽ htõ hã mẽ ho mex nê. ãm hãmri na ka hte ã mẽ hipêx anhýr o ri apa Gajore.

⁶ Na pre ra mẽ hkwýjaja akupýn ixwýr pøj nê mẽ ixpê Kris kwýjê mã amnhĩ tã ajarê. Amã mẽ hkĩnh nê ate tanhmã mẽ ho mex

to hã ajarê. Nhũm prem nojarêt ka xep pre mẽ kãm pry hã mẽ apkur xà hã mẽmoj gõ nhũm mẽ inhmã ajarê. Nà ãm hãmri na ka hte ã mẽ ho mex o apa anê. ã ate mẽ hipêx anhýr o apata ã na hte Tirtũm apumu nê hkĩnh nê.

⁷ Na htem krĩ piitã hkôt mẽ kãm Kris kot tanhmã mẽ panê amnhĩ nhípêx to hã harênh kaxyw ma mẽ hwýr pa. Nom mẽ apkur xà hprãm xaj mẽ kot Kris kôt amnhĩ xunhwýr kêt xwýnhjê hwýr pa hkêt nê.

⁸ Jakamã kwa kêr pu mẽ papajaja mẽ pahpê Jejus kôt mẽ htõ hã mẽ kãm mẽõ hkwý nhõr o papa. Kot puj mẽ ã mẽ ho ajuta anê nê te mẽ pajaxwýja mẽ ãhkõ hã ri mẽ kãm Kris jarênh o ri papa pyrãk.

Xotre kãm Juãw kapêr mar prãm kêt ã harênh

Matêwre 20.25-28, 23.1-12

⁹ Nê ra ixte anhõ krĩ kamã mẽ apê Kris kwýjê mã kagà nê mênh nhũm mẽ ate kamã harênhhta. Na xep pre Xotreja kuma nê ãm kuma. Kêp mẽ akrãhtũm prãm xaj kãm ixkapêr mar prãm kêt nê.

¹⁰ Na xep hte tanhmã ixto hêx to ho pa. Nom papxipix ixto hêx kêt nê. Mãânên Kris kôt mẽ pahtõjaja nhýhýnh krĩ hõ rũm mẽ awýr pan pøj nhũm xep tanhmã mẽ amã mẽ ho hêx to. Nê mẽ hpôx ã mẽ omu nom amnhĩ nhõrkwý hwýr mẽ hwýr kêt nê. Tã ka mẽ kurom amnhĩ nhõrkwý hwýr mẽ awý nhũm xep tee ri ja hã mẽ apumu nê mẽ akamã gryk nê mẽ hã mẽ amã akir nê Tirtũm mã amnhĩ jarênh xà hã ixkre nê mẽ ajano. Na xep hte ã amnhĩ nhípêx anhýr o pa. Jakamã kot paj nhýrmã ma mẽ awýr mõi hãmri nê mẽ apiitã mẽ anoo mã hã kãm akir. Tanhmã kot mẽ ixto hêx to nê tanhmã kot amnhĩ tomnuj to hã kãm akir ka mẽ apiitã hã inhma.

Mê pahte mẽ kot amnhĩ tomnuj xwýnhjê hkôt amnhĩ nhípêx kêt ã mẽ pamã karõ

Rukre 6.45; Rõmãn 12.9

¹¹ E kwa ixkràmnhwý. Kêr ka ã Xotre kot amnhĩ tomnuj o pa anhýrja kôt amnhĩ nhípêx kêt nê. Mẽ kot amnhĩ tomnuj o mẽ pa xwýnhjaja na htem Tirtũm kôt amnhĩ nhípêx kêt nê. No kêt mẽ kot amnhĩ to mex o ri mẽ pa xwýnhjaja na mẽ kêp Tirtũm kra

jakamã kêr ka mẽ ã mẽ kot amnhĩ nhĩpêx
anhÿr xwÿnhjê kôt pix mã amnhĩ nhĩpêx.

Temêtre jarênh

¹² Nê Temêtre na hte tãm ri amnhĩ nhĩpêx
nê ãm hãmri Tĩrtũm kapêr o mẽ ahkre mex
nê nhũm mẽ piitã axpẽn mã mex ã harê. Pa
hte ijaxwÿja mẽ kãm mex ã harênh o ri mẽ
hkôt ixpa ka htem inhma. ãm hãmri na pa
hte tanhmã harênh to ho ri ixpa.

Kagà jatur xà

Sikũn Juãw 12-13

¹³ E kagàja kamã na pa ãm ja pix jarê
nê hã kagà nê awÿr kumê Gajore. Na pa
kormã harênh jatur xà mênh kêt nê.

¹⁴ Nom kot paj tokyx ma awÿr mỗ hãmri
nê rĩ kormã amã hatur xàm kumê.

E kê Tĩrtũm akutã nojarêt rãhã ho pa.

Nê ota jar Kris kôt akràmnhwÿjaja
awÿr hpêr mẽ. Nê kêr ka atar Kris kôt
ixkràmnhwÿjê mã ijarê.

Tã ãm ja pix. Ixpê Juãw pigêtre na pa ã
awÿr kagà nhĩpêx nê mênh anê.

Jutre

Jutre kot Jejus kôt hkwýjê piitã hwýr kagã nê mēnh

Jutre na pre kagàja nhîpêx. Xiakre pyrã nê kêp Jejus tō na pre. Tã kagàja nhîpêx nê krî piitã hkôt Jejus kôt hkwýjê hwýr kurê. Na pre mē hkwýjaja kêp Jejus kwý hã amnhî jarēnh tã axtem nê tanhmã amnhî tomnuj to ho pa. Jakamã nhũm Jutre kagàja kamã Jejus kwýjê mã hprî hã tanhmã mē harēnh to nê mē kot mē hkôt amnhî nhîpêx nê mē kãm kapêr kãm hihtýx nê. Nê mē kãm:

¹ Pa Jejus kôt ixtō nê ixtōxjaja. Xà mē amex? E ot pa mē amã kagã nhîpêx nê mē awýr kurê. Tirtũm kot ixpyrà nê amnhî kaxyw mē axunhwýr xwýnhjê hwýr. Mēpanhîpêxà Maati Tirtũm kãm mē pahpiitã mē pajapê jakamã na hte Kra Jejus Kris mē wa mē pahtãnopxar mex rãhã ho pa.

Ixpê Jutre na pa hte Jejus Kris mã tanhmã amnhî nhîpêx to ho ri ixpa. Nê ixpê Xiakre htō na pa.

² Na pa hte mē ato Tirtũm wýr ho ixpa nê kãm:

–Pa Tirtũm. Kwa mē kot Akra Jejus kôt amnhî xunhwýr xwýnhjê pumu nê amã mē hapê hã mē kamã axukaprî rãhã ho apa. Kê mē kamã amnhî krit nê àmnhîx hamakêtkati nê ri tanhmã amnhî nhîpêx to ho pa. Nê mē kãm axpên kînh o ri axpên kôt pa. Anê.

*Mê kot Tirtũm kapêr o hêx xwýnhjê jarēnh
Wam Ximotre 1.18-20, 6.12*

³ E ixkrãmnhwýjaja. Nà inhmã mē akînh. Na pa pre jãã mē amã kagã hkwý nhîpêx kaxyw. Mē pahte Jejus Kris kukwak ri amnhî nhîpêx nyw ã tanhmã mē pajarēnh to nê hã kagã kaxyw tã kormã harēnh kêt nê. Kot paj axtem mēmoj jarê. Na pre Tirtũm mē pamã kot amnhî nhîpêx o amnhîrit pa. Nê kapêr o amnhîrit pa. Mē pahte mar nê hkôt amnhî nhîpêx kaxyw. Jakamã kêr pu mē kapêr mar týt nê amnhî krã hi kamã haxàr týt nê hã papa. Nom

koja mēhō kapêr kuhpa hã tanhmã mē amã kapêr o hêx to ka mē ama nê ãm ama.

⁴ Na xep ra kapêr o mē hêx xwýnhjaja mē akôt pa nê mē apyrã nê Jejus kôt amnhî xunhwýr ã amnhî jarê nom amnhî to hêx. Ka xep mē aprî hã mē hêx ã mē omunh kêt nê mē kêp Jejus kôt mē atō hã mē hkamnhîx nê atýt amnhî nhōrkwý hwýr mē awý. Nom mē kot Tirtũm kapêr o hêx pix kaxyw na htem mē akôt pa nê mē amã kapêr o:

–Tirtũm kãm mē pajapê htýt kumrêx nê mē pakutã nojarêt ho pa jakamã kwa kêr pu mē mãmri nhãm mēnijê ho amnhîkati ho papa. Koja ja hã mē pahpumu nê tanhmã hã mē pahto hkêt nê. Kãm mē pajapê kênã kot kêt hã tanhmã mē pahto. No kêt Jejus Krisja mē ate kêp mē panhō Pahihti hã harê nom kêp mē panhō patrãw rý kêp mē panhō Pahihti hkêt. Anê.

Ã Tirtũm kapêr kuhpa hã mē amã harēnh anhýr o pa. Tirtũm kapêr ã kagã htũm kot amnepê mē hkukamã tanhmã mē harēnh to nê mē harēnh kot:

Ã mē kapêr anhýr o paja mýrapê koja mē mex kêt nê pa. Koja Tirtũm mē homnuj týt kumrêx.

Anhýr o kot mē harēnh. Tã pa mē amã ixprî hã mē harê nê hã kagã. Mē ate inhmar nê amnhî nê mē omunh mex kaxyw.

*Tirtũm kot tanhmã mē kot amnhî tomnuj
xwýnhjê nhîpêx to hã harēnh*

Sikũn Pêtre 2.1-17; Sikũn Ximotre 3.1-9

⁵ Nê amnepê mã mē panhîgêjtaja kormã Ejit kamã mē pa ri nhũm Tirtũm Ejit nhō xwýnhjê rũm mē kator pa. Hãmri nhũm mē hkwýjaja tanhmã hamaxpêr to nê axtem nê amnhî kaxyw hkôt hamaxpêr kêt nê. Nhũm tee ri amnhî tã mē omu nê ã mē kot amnhî nhîpêx anhýr xwýnhjê nhîmex pa. Ra mē ate mē harēnh mar mex tã pa axte mē amã mē harê.

⁶ Nê Tirtũm kapêr o mē wrýk xwýnh kwýjaja. Na prem Tirtũm nhý hã kapêr o pa htã tanhmã hamaxpêr punuj to nê ra kãm ja ho anhýr prãm nõkati nê Tirtũm kaga. Jakamã nhũm mē hã amýnê nhũm mē unê nê kàx o mē hkaxpre pa. Nê nhýri pika kaxwýnh kãm kamãt kô htyk kãm mē kurê nhũm mē arî kamã hkrî ho hkrî. Nom koja

nhÿrmã Tÿrtÿm kot tanhmã mẽ pahpiitã mẽ pajarënh to xà hã arÿgro kato nhÿm mẽ rÿ kormã hapôx pa. Hãmri nẽ kot amnhÿ tomnuj mÿrapê ma mẽ kot amnhÿ xà htÿx kamã hamak tÿm xàta wÿr ma hapêx.

⁷ Nẽ krÿ pê Sotô nẽ Komo nhô xwÿnhjaja na prem haxwÿja kãm Tÿrtÿm kapêr kôt amnhÿ nhÿpêx prãm kêt nẽ. Nẽ krÿja wa hpuhã krÿ hkwÿ kamã ri mẽ pa xwÿnhjaja haxwÿja mẽ urak nẽ nẽ kãm kapêr mar prãm kêt nẽ. Na prem amnhÿ tomnuj tÿx rãhã ho pa. Nẽ axtem nẽ axpên pê ri mẽ hprô ho amnhÿkati ho pa. Nẽ mẽmy hkwÿjaja ri axtem nẽ axpên to amnhÿkati ho pa. Hãmri nhÿm Tÿrtÿm tee ri mẽ kot amnhÿ nhÿpêxja ã omu nẽ mẽ hipy kuwy hpôk kwÿ rẽ nhÿm mẽ amnhÿ wÿr omu nẽ kãm ma xàj tee ri hprôt kaprÿ. Nẽ hprôt kaxyw ôrkwÿ rÿm hapôj nẽ hxêt pa nẽ hapêx. Na hte ã Tÿrtÿm mẽ kot amnhÿ tomnuj o mẽ pa xwÿnhjê nhÿpêx anẽ. Jakamã koja nhÿrmã kuwy hpôk rãhã xwÿnhhta wÿr mẽ piitã mẽ rënh pa nhÿm mẽ kamã amnhÿ xà htÿx kamã hamak rãhã ho pa ho pa nẽ aa à hapêx kêt nẽ. Nẽ à htÿx rãhã papa ho pa. Tã mẽ pahte Sotô mẽ Komo nhô xwÿnhjê jarënh mar nẽ mẽ pahte amnhÿ tomnuj kaga kurê kumrêx kaxyw na pre Tÿrtÿm ã mẽ pamã mẽ harënh o amnhÿrÿt anẽ.

*Mẽ hpijaàm kêt xwÿnhjê jarënh
Sikÿn Pêtre 2.10*

⁸ Nẽ mẽ kot Tÿrtÿm kapêr o pihkàr xwÿnhjaja na htem ã mẽ kot amnhÿ nhÿpêx anhÿr xwÿnhjê pyrã nẽ amnhÿ tomnuj tÿx pix o ri pa. Jakamã na htem tanhmã hpimtir punuj to hãmri nẽ hkrã hapôj nẽ hpimtir xà hkôt tanhmã amnhÿ tomnuj to. Jao hkwÿjê kamã hpijaàm kêt o pa. Rÿ mënijê hõ rÿ mẽmyjê hõ nhÿm mẽ axpên kãm hpijaàm kêt o pa. Rÿ Tÿrtÿm kapêr o mẽ wrÿk xwÿnhjê ho kapêr punuj nẽ. Kapêr mã gêt o tanhmã mẽ ho kapêr punuj to. ã na htem hpimtir punuj xà hkôt amnhÿ tomnuj o pa anẽ.

⁹ Tÿrtÿm kapêr o mẽ wrÿk xwÿnh krãhtÿm Mikewja. Kêp mẽ hkrãhtÿm tã aa mẽ kãm kapêr mã gêt kêt nẽ. Na pre Mojes ty nhÿm Mikew ra ma hwÿr tẽn wrÿ. Nẽ kuri Satanasti pumu hãmri nẽ Mojes nhÿ nẽ tanhmã kãm kapêr to. Nom kapêr mã gêt o

kãm kapêr kêt nẽ. ãm kapêr mã hprÿ ho kãm kapêr nẽ kãm:

—Kwa ãm omu kê nõ. Kot kaj tanhmã ho nhÿm Tÿrtÿm apumu nẽ hã tanhmã hã ato. Anẽ.

¹⁰⁻¹¹ Nom ixte mẽ amã mẽ hpimtir punuj jarënh xwÿnhjaja. Mẽ kot Tÿrtÿm kapêr o pihkàr xwÿnhjaja kot hprÿ hã Tÿrtÿm kot amnhÿ nhÿpêx ã harënh mar kêt jakamã na htem htÿx ri ho kapêr o haprÿ ho pa. Te ho mry xoprêja hamaxpêr kêt nẽ htÿx ri amnhÿ nhÿpêx o pa pyrãk. Nom koja nhÿrmã Tÿrtÿm mẽ homnuj tÿx nẽ.

Te mẽ kot finat Kaÿ kot amnhÿ tô hpÿr xwÿnh kot amnhÿ nhÿpêxta pyrãk. Nẽ te mẽ kot finat Paraãw kot amnhÿ nhÿpêx pyrã nẽ kàxpore rÿnh prãm xàj Tÿrtÿm kapêr kuhpa hã tanhmã amnhÿ nhÿpêx to ho pa. Nẽ te mẽ kot finat Kore kot amnhÿ nhÿpêx pyrã nẽ Tÿrtÿm kot mẽ kaxyw mẽ ô pahi xãm xwÿnhhta kutã amnhÿ xunhwÿ. Mÿrapê koja mẽ jajê pyrã nẽ kuwy hpôk rãhã xwÿnhhta wÿr ma hapêx pa.

¹² Na ka htem apê Jejus kwÿ hã axpên wÿr akuprô. Nẽ tôhã mẽ apê hkwÿ hã amã axpên kÿnh ã axàpkur kaxyw axpên wÿr akuprô. Nhÿm ixte mẽ amã mẽ harënh xwÿnhjaja mẽ akôt agjê nẽ mẽ akutã apku. Jakamã kwa mẽ o kora mẽ amnhÿ nẽ mẽ omunh mex nẽ. Mẽ hipêx o te mẽ ate mẽ axàpkur xà hã mẽ anhô kamã kënre pumunh nẽ hanhir nẽ rënh pyrã nẽ amnhÿ nhÿhkô hã mẽ pumu nẽ amnhÿ nẽ hanor kurê kumrêx. Na htem hpijaàm kêt kãm amnhÿ pix kukamã hamaxpêr pê apkur rÿnh o pa.

Te na wrÿk kaxyw htyk rax nẽ mör nhÿm mẽ kot omunh nẽ wrÿk ã hkamnhÿx tã nhÿm kôk kot nhãm mën nhÿm wrÿk kêêta pyrãk o na htem amnhÿ nhÿpêx. Jao te mẽ kot ãm hãmri mẽ amã Tÿrtÿm kapêr jarënh mex pyrãk tã mẽ amã ho hêx.

Nẽ te mẽ kêp mẽmo pÿ hpàr ra ô mã tãm tã ãm htÿx rã nẽ aa ô hkêt nhÿm mẽ kot krãhyr nẽ mën nhÿm grã parta pyrãk.

¹³ Nẽ te mẽ kêp gô xujanãr kot amnhÿ nhÿpêx pyrãk. Na hte gô xujanãrja hakax wÿr kapê nẽ mra nhÿm hamrô kýxpê amgrã kamã arÿk nhÿm gô awjanã nẽ ma akupÿm hipôk wÿr mra. Ja pyrãk na htem

ma nhÿhÿm mra nÿ mÿ kãm mÿmoj jarÿ nÿ nhãm mra nÿ mÿ kãm mÿmoj jarÿ nÿ ma akupÿm mÿ kurÿm mra. Nhÿm mÿ mar xà hkôt amnhÿ tomnuj rãhã ho pa.

Nÿ te mÿ kot kaxkwa hã kanhÿre nhÿhÿm htÿm nhÿm mÿ kot nhÿhÿm htÿm xà hkôt omunh kÿeta pyrãk. Jakamã koja Tÿrtÿm nhÿrmã kamãt kô kamã mÿ rÿnh pa nhÿm mÿ aa hapôx kÿt nÿ.

Mÿ kot amnhÿ tomnuj xwÿnhjÿ hkukamã mÿ harÿnh

Apokarip 20.11-15

¹⁴ Nÿ na pre finat Enokja amnepÿ mã ã mÿ kot amnhÿ tomnuj anhÿr xwÿnhjÿ hkukamã tanhmã mÿ harÿnh to. Mÿ kot Tÿrtÿm kapÿr o pihkãr o ri mÿ pa xwÿnhjaja nhÿm mÿ hkukamã mÿ harÿ. Enokja finat Atãw kanrÿhã htãmnhwÿ na pre. Tã ã mÿ kot amnhÿ tomnuj anhÿr xwÿnhjÿ hkukamã mÿ harÿnh o:

Koja nhÿrmã Pahihtija man pika hwÿr akupÿn wrÿ. Kapÿr o mÿ wrÿk xwÿnh xohtô rax mÿ mÿ hpimràatã akupÿn wrÿ.

¹⁵ Hãmri nÿ mÿ pahpiitã kormã mÿ pahtÿr ri mÿ pahte tanhmã amnhÿ nhÿpÿx to ho papa hã mÿ pahpumunh xà hkôt tanhmã mÿ pajarÿnh to. Hãmri nÿ mÿ kot Tÿrtÿm kapÿr o hÿx o pa xwÿnhjÿ pumu nÿ tanhmã mÿ harÿnh to nÿ mÿ harÿnh o: “Jajaja na pre mÿ kãm Inhÿpÿêxã Tÿrtÿm prãm kÿt nÿ ri kapÿr kwÿm pix mã amnhÿ nhÿpÿx o pa. Nÿ kapÿr punuj o pa. ã na prem amnhÿ nhÿpÿx anhÿr rãhã ho pa.” Anhÿr o mÿ harÿ nÿ amnhÿ nÿ kuwy hwÿr mÿ kurÿ nhÿm mÿ amnhÿ xà htÿx kãm hamak o pa rãhã nÿ pa ho pa. Anÿ.

ã na pre finat Enokja mÿ hkukamã mÿ harÿnh anÿ.

¹⁶ ãm hãmri na mÿ harÿ. Tã na hte arÿ mÿ hkwyjaja ã amnhÿ nhÿpÿx anÿ. Nÿ hamaxpÿr mex kÿt nÿ. Na htem nhãm tanhmã mÿ ho kapÿr punuj to pix kukamã hamaxpÿr. Nÿ amnhÿ krã hkôt htÿx ri tanhmã amnhÿ tomnuj to ho pa. Nÿ amnhÿ to jarkrar rãhã nÿ. Nÿ hÿx rom mÿ kÿp mÿmoj jamÿnh kaxyw tanhmã mÿ kãm hÿx to.

¹⁷ E Kris kôt ixkrãmnhwÿjaja. Koja mÿ ã mÿ amã Tÿrtÿm kapÿr o hÿx anhÿr o mÿ akôt pa ka mÿ ama nÿ ãm mÿ ama nÿ mÿ kapÿr

mar kÿt nÿ. ãm mÿ panhõ Pahihti Jejus Kris nhÿ hã mÿ ajahkre o mÿ pa xwÿnhjaja kot tanhmã mÿ amã mÿ harÿnh toja mã mãn kÿt ajamxpÿr tÿx rãhã o ri apa.

¹⁸ Na prem mÿ amã mÿ harÿnh o:

–Jesús akupÿn wrÿk xwÿj ri koja mÿmojaja mÿ awÿr mran pôj. Nom mÿ kot Jesús kapÿr kwÿm amnhÿ krã hkôt tanhmã amnhÿ nhÿpÿx to xwÿnhjaja koja mÿ. Hãmri nÿ mÿ apÿ Jesús kwÿ hã mÿ apumu nÿ mÿ atã akunha nÿ mÿ atã hpÿr o axkÿ nÿ Tÿrtÿm ã hpÿr o axkÿ nÿ kapÿr ã kagã hã hpÿr o axkÿ. Anÿ.

¹⁹ ã mÿ kot amnhÿ nhÿpÿx anhÿr xwÿnhjaja mÿ pahpÿ Jesús kwÿjaja mÿ pahte axpÿn kutã amnhÿ xunhwÿrja na mÿ kãm hprãm. Mÿ kamã Tÿrtÿm Karõ gjÿx kÿt jakamã mÿ kãm amnhÿ krã hkôt pix mã tanhmã amnhÿ tomnuj to ho pa hprãm.

Mÿ pahte Kris akupÿn wrÿk jamãr pÿ tanhmã amnhÿ nhÿpÿx to hã mÿ pamã karõ

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikÿn Pÿtre 3.12-15

²⁰ Kwa mÿ apÿ Jesús kôt ixtõ nÿ ixtõxjaja kÿr ka mÿ ã mÿ kot amnhÿ nhÿpÿx anhÿr o mÿ pa xwÿnhjÿ rom apkati mÿ amnhÿ kaxyw Jesús pix mã mãn ajamxpÿr rãhã ho ri apa. Te mÿ kot mÿ hakre hã ra ãptãr nÿ amnhÿ krãm mÿ hakre xà jagjÿnh tÿxta pyrãk.

Jao Tÿrtÿm kapÿr mar tÿx nÿ hkôt amnhÿ nhÿpÿx mex o ri apa.

Nÿ Karõ nhÿ hã amnhÿ to hwÿr rãhã nÿ.

²¹ Nÿ Tÿrtÿm kãm mÿ pajapÿ hã kãm ajamaxpÿr rãhã ho ri apa.

Nÿ Pahihti Jejus Kris kãm mÿ pajapÿ hã kãm ajamaxpÿr tÿx rãhã ho apa.

Koja nhÿrmã kãm mÿ pajapÿ hã akupÿn mÿ pahwÿr wrÿ nÿ tanhmã mÿ pahto mex to pu mÿ kuri pahtÿr tÿm nÿ pahkÿnh nÿ papa ho papa. Tã kÿr pu mÿ arÿ akupÿn mÿ pahwÿr wrÿk xà hã arÿgro jamãr rãhã ho papa.

²² Nÿ mÿ pahkwÿjaja kormã mÿ kot Jesús kôt amnhÿ xunhwÿr tÿx kÿt xwÿnhjaja kÿr ka mÿ kamã axukaprÿ nÿ aprÿ hã mÿ kãm Tÿrtÿm kapÿr jarÿnh o ri mÿ hkôt apa.

²³ Na pre ra mẽ hkwyjaja mẽ kot Tirtũm kapēr o pihkàr xwỳnhjê kapēr ma nẽ mẽ hkôt amnhĩ nhĩpêx. Jakamã kêr ka mẽ ja hã mẽ omu nẽ te mẽ ate kuwy hpôk rũnh nẽ mẽ hpa hã mẽ hamỳnh nẽ nhãm mẽ rẽn h pyràk o mẽ hipêx. Jao mẽ kot nhỹrmã Tirtũm kapēr o pihkàr xwỳnhjê hkôt kuwy hpôk rũnh ta wỳr pa pymaj mẽ nẽ mẽ kãm akapēr kãm axihtỳx o ri mẽ hkôt apa. Kê mẽ ama nẽ mẽ hkaga nẽ mẽ hkôt ri amnhĩ nhĩpêx kêt nẽ.

Nẽ htỳx ri mẽ kot amnhĩ tomnuj o mẽ pa xwỳnhjaja kêr ka mẽ kamã axukaprĩ ho ri apa nẽ mẽ kamã agryk tokyx anhỹr kêt nẽ. Xatã mẽ kãm Tirtũm kapēr jarẽn h rãhã ho ri mẽ hkôt apa. Nom kwa mẽ okora kêr ka mẽ kot amnhĩ nhĩpêx o amnhĩ nhĩpêx o ri apa hkêt nẽ. Kwarĩ ho kwarĩ.

*Jutre kot Tirtũm mã mex o mex ã harẽn h
Wam Pêtre 1.5-7*

²⁴ Nẽ kêr pu mẽ Tirtũm mã amnhĩ jarẽn h kaxyw nẽ ã kãm amnhĩ jarẽn h anẽ nẽ kãm: –Pa Tirtũm. Nà ãm hãmri na ka hte amnhĩ kôt mẽ ixunhwỳr tỳx nẽ pa mẽ akaga hkêt nẽ akôt amnhĩ nhĩpêx rãhã ho ri ixpa. Kot kaj nhỹrmã amnhĩ wỳr mẽ ixto api pa mẽ Akra mẽ war akuri axte tanhmã amnhĩ tomnuj to hkêt nẽ. Nẽ amnhĩ to mex pê anhĩrã htỳx rax kãm ixpa. Jao ixkĩnh tỳx nẽ ixpa ho ixpa.

²⁵ –Apê mẽ inhõ Tirtũm ã apyxi mex kumrêx na ka. Na ka pre Pahihti Jejus Kris kukwak ri mẽ ixpiitã mẽ ixte amnhĩ tomnuj pê mẽ ixpytã. Nẽ na ka hte anhĩrã htỳx rax rãhã ri apa. Nẽ amex o amex nẽ axihtỳx o axihtỳx nẽ axàhpumunh o axàhpumunh. Nẽ apê mẽ inhõ Pahi Maati hã apyxi mex na ka. Amnepê mã kormã mẽmoj kêt ri ka pre ã amnhĩ nhĩpêx anhỹr o apa rãhã nẽ. Tã arĩ ã ate amnhĩ nhĩpêx anhỹr ho apa ho rãhãã. Nẽ kot kaj apkati mẽ ã ate amnhĩ nhĩpêx anhỹr ho rãhãã. ã ate amnhĩ nhĩpêx anhỹr o apa ho rãhã ho rãhã. Tã ãm ja pix na hapêx. Anẽ.

E kêr pu mẽ ã Tirtũm mã mex o mex ã harẽn h anhỹr o papa.

Ãm ja pix. Ixpê Jutre na pa mẽ awỳr kagàja nhĩpêx nẽ kumẽ.

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwýnhjê hõ pé Juãw na pre hipêx. Na pre Jejus ã mẽ kãm hkurê xwýnhjaja unê nê ma gô hipôk pé Patos wýr kumê nhũm kêp prês nê gô hipôk kãm pa ho pa nê aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrýk xwýnhjê hõ gô hipôkja wýr wrý nê kãm mẽmoj kukamã awjarê nhũm kuma nê hkôt mẽmoj pumu. Te hpimtir kãm mẽmoj pumunh pyrãk. Hãmri nê omu nê kuma nê amnhĩ xô ri mẽ pamã hã kagà. Na pre mẽmoj to axkrunêpxi nê hã kagà. Mẽ kot Jejus kutã amnhĩ xunhwýr xwýnhjaja kot Jejus ã tanhmã kêp hkwyjê to ho pa nhũm mẽ hkwyjaja pikaprãr ã kagà. Nê Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwýr xwýnh piitã ma mẽ kot amnhĩ xà htýx kamã hamak tũm xà hwýr mẽ rênh par ã kagà. Nê Tĩrtũm kot nhỹrmã hkrajê ho mex kumrêx ã nhũm mããnên hã kagà. Hãmri nê mẽ pamã hã kagà o:

¹⁻² E kot paj mẽ amã awjarê nê hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwýnh kot paj mẽmoj jarê nê hã kagà. Na pre Tĩrtũmja Jejus mã mẽmoj kukamã tanhmã ujarênh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwýr xwýnhjê mã harênh kaxyw. Hãmri nhũm kuma nê kot amnhĩ xô ri inhmã ujarênh kaxyw man ixwýr kapêr o wrýk xwýnh mẽ nhũm man ixwýr wrý nê ô ri inhmã mẽmoj to amnhĩrĩt pa. ãm hãmri ã inhmã mẽmoj to amnhĩrĩt anê. Tã kot paj amnhĩ xwar mẽ apê Jejus kôt ri mẽ apa xwýnhjê mã harê nê hã kagà. Mẽ ate mar nê axkãm ajamak rom nê ri apa kaxyw. Nã ixte hã kagà mã xwýnhja koja tanhmã amnhĩ to nê tokyx mẽ pahwýr wrý.

³ Jakamã kwa kêr ka mẽ aprĩ hã kagàja kamã harê nê ama nê hkôt pix mã amnhĩ nhĩpêx nê mẽ piitã mẽ kãm kamã harênh

o ri mẽ hkôt apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ ato mex ka mẽ akĩnh nê apa ho apa. Nê mẽ kot mẽ axujarênh mar nê hkôt amnhĩ nhĩpêx xwýnhjaja koja Tĩrtũm ja hã mẽ omu nê mẽ ho mex nê nhũm mẽ apyrã nê hkĩnh nê pa ho pa.

Juãw kot krĩ pé 7 kôt Jejus kwýjê hwýr kagà rênh

⁴ E ixpê Juãw kot paj atar pika pé As kamã krĩ pé 7 piitã hkôt mẽ apê Jejus kwý hã axpên wýr mẽ apikuprõnh xwýnhjê hwýr kagà nê kurê ka mẽ kamã harê nê ama.

Na pa hte mẽ ato Tĩrtũm wýr rãhã ho ri ixpa. Nê mẽ ato hwýr o:

—Pa Tĩrtũm. Kwa kêr ka pika pé As kamã akrajê ho mex nê mẽmoj to mẽ kutã anojarêt rãhã ho apa. Kê mẽ hamakêtkati nê ãmnhĩx ri pa ho pa. Ja na inhmã hprãm. Anê.

Tĩrtũmja rãhã ho rãhã. Amnepêm kormã mẽmoj kêt ri nhũm pre ra rãhã ho rãhã. Nê koja nhỹrmã mẽmoj akupým hapêx par tã nhũm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptãr ã hkrĩ xà kamã mẽ papytãr rãhã ho hkrĩ.

Nê Tĩrtũm Karõ te kot Tĩrtũm kot mẽ pahto amnhĩptãr xà hã hkrĩ xà kapem kanê maati pixi kamã kwýrít pé 7 xãm xwýnhhta pyrãk. Na hte Tĩrtũm nhĩhkô hã hkrĩ ho hkrĩ. Tã kê mẽ ato mex rãhã ho pa.

⁵ Nê Jejusja na pre hte Tĩrtũm kapêr o mẽ ahkre mex o pa nê aa hkaga hkêt nê. Tã nhũm prem axtem nê kupĩ. Hãmri nhũm Tĩrtũm akupým ho htĩr. Jejus kumrêx ho htĩr nhũm htĩr o htĩr. Nê kêp pika piitã hkôt pahi piitã nhõ Pahihti. Kãm mẽ pajapê htýx jakamã na pre mẽ panê ty nê hkamrôja te mẽ panê hpikapĩr pyrãk o amnhĩ nhĩpêx. Nê htyk o mẽ pahte amnhĩ tomnuj pãnhã amnhĩre. Jao te mẽ pahte amnhĩ tomnuj pé mẽ papytãr par pyrãk o mẽ panhĩpêx.

⁶ Nê na pre mẽ pahpê patre nê mẽ piitã mẽ ho Hipêêxà Tĩrtũm wýr o papa kaxyw mẽ paxunhwý. Nê kêp mẽ panhõ Pahi Maati hã kãm hprãm xà hkôt mẽ pahte kãm tanhmã amnhĩ nhĩpêx to ho papa kaxyw mẽ paxunhwý. Jakamã kwa kêr pu mẽ kãm

mex o mex nê hihtÿx o hihtÿx ã mǎn harênh rǎhǎ ho papa.

⁷ Nê koja tokÿx akupÿn mē pahwÿr kakrǎ kamǎ wrÿ pu mē pahpiitǎ wrÿk kǎm omu. Nhũm mē kot hpÿr xwÿnhjaja tee ri amnhÿ wÿr omu. Nê pika piitǎ hkôt ri mē pa xwÿnhjaja omu nê mē kot amnhÿ tomnuj jakamǎ tee ri amnhÿ kukamǎ hamaxpêr o kǎm ma htÿx kumrêx. Hǎmri nê kǎm ma xà mur nê htertet o kuhê. Koja nhÿrmǎ Jejus akupÿn wrÿ nhũm mē amnhÿ wÿr omu nê ã amnhÿ nhÿpêx anê.

⁸ Nê Tirtũm na hihtÿx o hihtÿx nê àhpumunh o àhpumunh. Nê aa kot mēhō ni rũm kator kêt. Na hte amnhÿ jarênh o:

—Ixrǎhǎ ixpa xwÿnh na pa. Amnepê mǎ kormǎ mēmoj piitǎ hkêt ri pa pre ra ixrǎhǎ ri ixpa ho ixpa. Nê koja nhÿrmǎ mēmoj akupÿm hapêx tǎ pa arÿ ixrǎhǎ. Anê.

Juǎw kot Jejus akupÿm htÿr ã omunh

⁹ Nê ixpê Jejus kôt mē atō Juǎw na pa hte mē apyrǎ nê Jejus kôt amnhÿ nhÿpêx nhũm hte mē kǎm Jejus kurê xwÿnhjaja mē apyrǎ nê hǎ inhÿpêx kati ho pa. Mē pahte hkôt ri amnhÿ nhÿpêx o papa jakamǎ na htem hǎ mē pahtomnuj tÿx rǎhǎ ho pa. Tǎ pu htem ŷ hǎ mē kutǎ amnhÿ to htÿx nê arÿ hkôt amnhÿ nhÿpêx. Jakamǎ na pa pre Tirtũm kapêr o mē ajahkre rǎhǎ ho ri mē akôt ixpa. Nê Jejus kêp mē panhō Pahihti hǎ mē amǎ harê. Mÿrapê na prem hǎ ixpynê nê man amnê ixto tē nê jar gō hipôk pē Patos kǎm inhmē pa kamǎ ixpê prês nê ixpa ho ixpa.

¹⁰ Tǎ nhũm tōmÿk pa Tirtũm mǎ amnhÿ jarênh o nhÿ. Hǎmri nhũm Karō tanhmǎ ixkrǎ hto pa te ixpimtir kǎm mēmoj pumunh pyrǎ nê amnhÿ katut kôt mēhō kapêr ma. Te kot pifti kakôr tÿx pyrǎk pa kuma.

¹¹ Hǎmri nhũm inhmǎ kapêr nê inhmǎ:

—Pa Juǎw? E kot paj amǎ mēmoj to amnhÿrÿt ka omu nê akwÿjê mǎ hǎ kagà. Nê hǎ kagà hpa hǎmri nê ahpÿnhǎ krÿ hkwÿ hkôt mē kêp ixkwÿ hǎ axpên wÿr mē pikuprōnh xwÿnhjê hwÿr arê. Mē kot kamǎ harênh nê mar nê axkǎm hamak rom nê ri pa kaxyw. Epes wÿr nê Emǎnǎ hwÿr nê Pekamō hwÿr nê Xijaxir wÿr nê Satre hwÿr nê Pirate hwÿr nê Raxisej wÿr. Krÿ pē 7ja

piitǎ hwÿr ixkapêr ã kagà nê mē hwÿr arê kē mē apyrǎ nê mēmoj jarênhja ma. Anê.

¹² Hǎmri pa ixte mēhōja pumunh kaxyw ho ijakêx nê kanê hkwÿ pumu. Kanê kêp 7 nê piitǎ ôr o.

¹³ Nê kanê nhÿpôk ri mēhōja te panhÿ pyrǎ nê pahi hǎ ê mex kǎm xa. Éja hpar kôn kôt hitep nhũm xa. Nê pahi hǎ mē hinô hpre xà ho amnhÿ nhÿnô hpre nê xa. Hinô pre xàja ôr pix o.

¹⁴ Nê hkrǎ hkÿ te kaxàt nhÿ jaka pyrǎ nê hakaajre. Nê no te kuwy hpôk pyrǎ nê hkarÿr tÿx nê.

¹⁵ Nê hpar te mēmo kàx karÿr tÿx pyrǎk. Nê kapêr te gō hprôt tÿx koko pyrǎk.

¹⁶ Na pre upôk rũm kanhêti ho 7 nê hamÿ nê o xa. Nê hakwa rũm wapo pôm kato nê akutǎ wa gixre nê ajêt. Nê hkuk kamǎ hirǎ htÿx kumrêx. Te myt kot mē pano hǎ harir nhũm gêk tÿx pyrǎk. ã mēhōja kot anhÿr.

¹⁷ Pa tee ri tanhmǎ kute hǎ omu nê inhmǎ ma htÿx kumrêx nê umaj tēm nê hpar pē te ixytk pyrǎ nê nō. Hǎmri nhũm ixtǎ upôk rũm ðhkraja xi nê inhmǎ kapêr nê inhmǎ:

—Kwa amǎ ixpuma hkêt nê. Pa na pa. Amnepê mǎ kormǎ mēmoj kator kêt ri pa pre raa. Nê ixrǎhǎ. Koja nhÿrmǎ mēmoj akupÿm hapêx pa arÿ ixrǎhǎ ixpa ho ixpa.

¹⁸ —Na pa pre ty tǎ akupÿm ixtÿr. Nê ixtÿr o ixtÿr. Kam ixpumu. Kot paj axte ixytk kêt nê. Ixpê mēhtÿkjê hpǎm jakamǎ papxipix na pa hte mē htyk ã arÿgro jarê nhũm mē hǎ ty nê ma mēhtÿkjê papxà hwÿr ma pa.

¹⁹ —E kêt ka ate mēmoj pumunh xwÿnhhta pumunh tÿx nê akwÿjê mǎ hǎ kagà. Nê mēmoj kormǎ kot amnhÿ nhÿpêx kêt nhũm ate omunh mǎ xwÿnhhta ka inhÿ hǎ mē kǎm hǎ kagà. Mē kot kamǎ harênh nê mar tÿx kaxyw.

²⁰ —Nê kot paj axte ixprÿ hǎ ate mēmoj pumunh xwÿnhhta jarê ka inhma. Nà kanê pē 7ta te mē kot krÿ hkwÿ pē 7 kamǎ mē kêp ixkwÿ hǎ axpên wÿr mē pikuprōnh xwÿnhjê pyrǎk. Nê inhÿkra kamǎ kanhêti pē 7ta te kêp inhmǎ mē kot mē hamǎr xwÿnhjê pyrǎk. Anê.

2

Epes kamǎ Jejus kwÿjê hwÿr kagà

¹ Nhũm Jejus arĩ inhmã kapêr nê inhmã:
—E kêr ka krĩ pê Epes kamã ixkwýjê jamãr xwýnh wýr kagà nê amê. Nê kagàja kamã mē kãm ixkapêr jarê nê mē kãm:

Pa Epes kamã ixkapêr mar kaxyw axpên wýr apikuprõnh xwýnhjaja. Ot pa mē awýr ixpêr mē. Ixpê ixupôk o kanhêti ho 7 nê hamýnh nê ho ixãm xwýnhhta na pa. Nê ixpê ôr o kanê pê 7 nhĩpôk ri ixpa xwýnhhta na pa ã mē awýr ixpêr mênh anê.

² Na pa hte tanhmã mē ate amnhĩ nhĩpêx to ho apa hã mē apumunh mex o ixpa. Na ka htem inhmã amnhĩ nhĩpêx mex nê pa ja hã mē apumu. Mē kot ixtã mē anhĩpêx kati htã ka mē kutã amnhĩ to htýx nê ixkaga hkêti nê. Nê mē kot amnhĩ tomnuj xwýnhjê hkôt amnhĩ nhĩpêx o ri apa hkêti nê. Nhũm ixte mē awýr mē rênh ã amnhĩ to hêx xwýnhjaja mē awýr pan pøj ka mē aprĩ hã mē kot amnhĩ to hêx ã mē omu. Hãmri nê tee ri mē kot amnhĩ nhĩpêx ã mē omu nê amnhĩ nê mē hanor kurê kumrêx. ãm hãmri na ka htem ã mē hipêx anê.

³ Nê mē kãm ixkurê xwýnhjaja kot tanhmã ixtã mē atomnuj týx to htã ka mē kutã amnhĩ to htýx nê aa ixkaga hkêti nê. Nê ixkôt amnhĩ nhĩpêx mex rãhã ho ri apa. ãm hãmri na ka htem ã amnhĩ nhĩpêx anhýr o ri apa.

⁴ ãm mēmoj pixi na ixpê omnuj. Amnepê mã kormã mē ate ixkôt amnhĩ xunhwýr nyw ri na ka prem amã axpên kĩnh nê axpên to mex o ri apa. Nê mē amã axpên tã ma ho te mē amã amnhĩ tã ma pyrãk o axpên nhĩpêx. Tã tanhmã ajamaxpêr to nê axte ã axpên nhĩpêx anhýr kêt nê. Jao te mē amã ixkĩnh kêt pyrãk o amnhĩ nhĩpêx. Pa tee ri ja hã mē apumu nhũm ja inhmã mex kêt nê.

⁵ Kwa mē tokyx ja hã amnhĩ pumu nê akupým mē ate ixkôt amnhĩ xunhwýr nyw ri mē ate axpên nhĩpêxta o akupým axpên nhĩpêx o apa. Kot kaj mē anhýr kêt kot paj te mē apê mē anhõ kanê hpyr nê kapôt ã mênh pyrãk o mē anhĩpêx ka mē ri apa nê gaa nê apikaprãr pa. Tã mēhõ koja mē amýr pê mē anhõ krĩ kamã mē kãm ijarênh o pa?

⁶ Nê mē kêp Nikoraw nhõ xwýnhjaja na

ka htem mē kot tanhmã amnhĩ tomnuj to hã mē omu nê ixpyrà nê apê ja hprãm nõkati nê mē hkôt ri amnhĩ nhĩpêx kêt nê. Pa ja hã mē apumu nê ixkĩnh nê.

⁷ Tã ixte mē amã ixkapêr jatur xà na ja. Kot kaj mē amã ixkapêr mar prãm hã kot kaj mē ã Tĩrtũm mē wa Ixkarõ nhý hã ixte mē amã ixkapêr anhýrja ma nê kãm ajamaxpêr týx rãhã ho ri apa.

Tĩrtũm nhõ krĩ kamã mēmo pĩ hpãr kuhê xwýnh. Mē kot ô hkur nê axte htyk kêt nê pa ho pa mã xwýnhhta. Kot kaj mē ate amnhĩ tomnuj nê amnhĩ to htýx nê arĩ inhmã hprãm xà hkôt amnhĩ nhĩpêx rãhã ty pa akupým mē ato mē atĩr nê ma pĩ hpãrta wýr mē arê. Ka mē ma hwýr mra nê ô hõ hta nê akrê nê axte atyk kêt kumrêx nê apa ho apa.

E ãm ja pix na hapêx. Anê.

—E Juãw. Kêr ka Epes kamã ixkwýjê jamãr o pa xwýnhhta wýr ã ixkapêr ã kagà anê nê mē hwýr amê. Anê.

Hãmri pa kuma nê ô ri mē kãm hã kagà hpa.

Emĩnã kamã Jejus kwýjê hwýr kagà

⁸ Hãmri nhũm hpãnhã Emĩnã nhõ xwýnhjê kaxyw inhmã kapêr nê inhmã:

—Nê hpãnhã Emĩnã kamã ixkwýjê jamãr xwýnh wýr kagà nê mē hwýr amê. Nê mē kãm ixkapêr jarê nê nê mē kãm:

Pa Emĩnã kamã ixkapêr mar kaxyw axpên wýr mē apikuprõnh xwýnhjaja. Ot pa mē awýr ixpêr mē. Ixrãhã ho ixrãhã ixpa xwýnhhta na pa. Amnepêm kormã mēmoj piitã hkêti ri na pa pre ixrãhã nê ri ixpa. Koja nhýrmã mēmoj akupým hapêx pa arĩ ixrãhã ho ixrãhã nê ri ixpa. Na pa pre ty no ãm akupým ixtĩr o ixtĩr. Tã pa ã mē awýr ixpêr mênh anê.

⁹ Nà na pa hte mē ate tanhmã amnhĩ nhĩpêx to ho apa hã mē apumunh rãhã ho ixpa. Na hte mē kãm ixkurê xwýnhjaja ixtã mē atomnuj to ka mē apê amrakati nê ri apa. Nom mē ate tãm amnhĩ nhĩpêx jakamã te mē apê mē hikukrêx rũnh kumrêx xwýnhjê kot amnhĩ nhĩpêx pyrã nê ixkukwak ri akĩnh rãhã ri apa. Na hte mē kêp Ijaew ã amnhĩ to hêx xwýnhjaja mē ato kapêr punuj rũnh o pa. Mē kot Tĩrtũm kôt amnhĩ nhĩpêx ã amnhĩ jarênh

tã no ãm hkôt amnhĩ nhĩpêx kêt nê. ãm Satanasti kôt pix mã na htem amnhĩ nhĩpêx o pa.

¹⁰ Tã mẽ kãm ixkurê xwýnhjaja kot ixtã mẽ atomnuj tỳx o pa htã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Nê arĩ mẽ kutã amnhĩ to htỳx nê. Koja Satanasti mẽ akwýjê pynê nê mẽ ajagjê. Hãmri nê mẽ ate ixkaga hprãm xàj tanhmã mẽ anhiĩpêx kati hto ka mẽ hagjênh xà kamã amnhĩ xà htỳx kamã ajamak o atã arĩgro pê 10. Nom kêr ka mẽ kutã amnhĩ to htỳx nê ixkaga hkêt nê. Mẽ kot mẽ apar mã tã ka mẽ kutã amnhĩ to htỳx nê. Kot kaj mẽ aa ixkaga hkêt nê ixkôt ri amnhĩ nhĩpêx rãhã ty pa akupỹm mẽ ato mẽ atĩr nê ma amnhĩ wỳr mẽ ato api. Hãmri ka mẽ Tĩrtũm mẽ wa ixri amex nê atĩr tũm nê apa ho apa nê axte atyk kêt nê apa.

¹¹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêrja anhỹr ma nê kãm ajamaxpêr tỳx rãhã ho ri apa. Kot kaj mẽ ate amnhĩ tomnuj nê amnhĩ to htỳx nê inhmã hprãm xà hkôt pix mã amnhĩ nhĩpêx rãhã ty. Hã kot paj akupỹm mẽ ato mẽ atĩr ka mẽ ma kuwyta wỳr apa hkêt nê.

E. ãm ja pix. Na hapêx. Anê.

—E Juãw. Kêr ka Emĩnã kamã ã ixkrajê mã ixkapêr ã kagã anê. Anê.

Hãmri pa kuma nê ô ri mẽ kãm hã kagã.

*Pekamõ kamã Jejus kwýjê hwýr kagã
Sikũn Korĩt 6.14-7.1*

¹² Nhũm Jejus arĩ inhmã kapêr nê hpãnhã inhmã:

—E hpãnhã Pekamõ kamã ixkrajê jamãr o pa xwýnhja wỳr kagã nê mẽ hwýr amê. Nê mẽ kãm ixkapêr jarê nê mẽ kãm:

Pa Pekamõ kamã ixkapêr mar kaxyw axpên wỳr mẽ apikuprõnh xwýnhjaja. Ot pa mẽ awỳr ixpêr mẽ. Ixpê ijakwa rũm põm wapo akutã wa gix nê kator nê ãm xwýnhta na pa mẽ awỳr ixpêr mẽ.

¹³ Na pa hte mẽ anhõ krĩ nhõ xwýnhjaja kot tanhmã amnhĩ tomnuj to ho pa hã mẽ omunh mex nê. Mẽ kot Satanasti kôt pix mã ri amnhĩ nhĩpêx o pa jakamã mẽ anhõ krĩ te kêp Satanasti nhõ krĩ pyrãk.

ãxipas kot mẽ hkôt mẽ kãm ixkapêr o mẽ ahkre ho pa nê aa hkaga hkêt tã nhũm prem axtem nê ixtã kupĩ. Ka mẽ ja hã mẽ omunh tã mẽ umaj ixkaga hkêt nê arĩ ixkôt amnhĩ nhĩpêx rãhã ho ri apa. ãm hãmri na ka htem ã amnhĩ nhĩpêx anê.

¹⁴ Mẽmoj pixi na ixpê omnuj. Na hte mẽ akwýjaja axtem nê Paraãw kapêr kôt amnhĩ nhĩpêx o pa. Na pre Paraãwja Parak mã tanhmã kapêr to nhũm kuma nê amnhĩ xõ ri tanhmã mẽ anhĩgêt mã kapêr to ho pa. Nom ixkapêr kôt kêt ixkapêr kuhpa hã tanhmã mẽ kãm kapêr to nê mẽ kãm: “Mẽ mãmrĩ ma sãnti hã mẽ hkĩnh mã xwýnhjê hkôt mra nê sãnti hã apku nê hã akĩnh. Nê mẽ urãk nê axpên pê axpên prõ ho amnhĩkati nê axpên pê ri axpên mjên o amnhĩkati nê mẽ ã ri amnhĩ nhĩpêx anhỹr o ri apa. Ja mex kênã.” Anhỹr o mẽ anhĩgêt mã kapêr o pa nhũm mẽ kuma nê mẽ hkôt amnhĩ nhĩpêx. Tã ka mẽ akwýjaja mẽ urãk nê ã amnhĩ nhĩpêx anhỹr o apa. Kwa ja mex kêt.

¹⁵ Na hte mẽ akwýjaja Nikorawjê kapêr kôt ixkapêr kuhpa hã tanhmã amnhĩ nhĩpêx to ho pa. Ja mããnên mex kêt.

¹⁶ Tã ra mẽ akwýjaja ã amnhĩ tomnuj anhỹr o pa ka mẽ ja hã mẽ omu nê ãm mẽ omu nê nê tanhmã mẽ kãm akapêr to hkêt nê. Kwa mẽ ate ã amnhĩ nhĩpêx anhỹr xwýnhjaja. Kêr ka mẽ tokyx ja kaga nê akupỹm ixkôt ri amnhĩ nhĩpêx mex nê. Kot kaj mẽ anhỹr kêt kot paj tokyx mẽ awỳr wrý nê te ijakwa rũm põm wapo kator xwýnhta o mẽ hkanhwỳr pyrãk o mẽ anhĩpêx. Nom ixkapêr xihtỳx pix o tanhmã mẽ anhĩpêx to.

¹⁷ E kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nê kãm ajamaxpêr tỳx rãhã ho ri apa.

Nê kot kaj mẽ ate amnhĩ tomnuj nê amnhĩ to htỳx nê inhmã hprãm xà hkôt amnhĩ nhĩpêx rãhã ty. Hã kot paj akupỹm mẽ ato mẽ atĩr hãmri nê ra pam mẽ amã mẽ anhõ ka mẽ hkur o apa. Te amnepêm Ijaew kapôt ã pa nhũm ixte mẽ hwýr “manã” anhỹr xwýnhta rênh nhũm mẽ kot hkur o pata pyrãk. Nom ixte mẽ amã

mě anhōja na hpimxur. Ām papxipix na pa hte mẽ kām ōr o ixpa.

Ně kot paj mẽ atā mẽ anhīxi nyw rē. Jao kēn jakare hkwý hā ahpýnhā mẽ anhīxi nyw jaxwý nē mẽ amā kugō. Ka mẽ hamý nē kapxipix amnhī nhīxi nyw pumunh o apa.

E ām ja pix. Na hapêx. Anē.

—E Juāw. Kēr ka Pekamō kamā ixkrajê hwýr ā ixkapêr anhýr ā kagà nē mẽ hwýr amē. Anē.

Hāmri pa kuma nē ô ri mẽ kām hā kagà.

*Xijaxir kamā Jejus kwýjê hwýr kagà
Jutre 3-23*

¹⁸ Nhūm Jejus arī inhmā kapêr nē inhmā:

—E hpānhā Xijaxir kamā ixkwýjê jamār xwýnh wýr kagà nē amē nē mẽ kām ixkapêr jarē nē mẽ kām:

Pa Xijaxir kamā ixkapêr mar kaxyw mẽ apikuprōnh xwýnhjaja. E ot pa mẽ awýr ixpêr mẽ. Ixpê Tirtūm Kra na pa. Ixpê inhno te kot kuwy hpōk karýr týx pyrāk xwýnhhta na pa. Nē ixpê ixpar te kot kax karýr týx pyrāk xwýnhhta na pa mẽ awýr ixpêr mẽ.

¹⁹ Na pa hte mẽ ate amnhī nhīpêx kôt mẽ apumunh mex o ri ixpa. Na ka htem amnhī kaxyw inhmā ajamaxpêr pē inhmā amnhī to mex o ri apa. Mě akwý kot ixtā tanhmā mẽ anhīpêx to htā ka mẽ umaj aa ixkaga hkêt nē. Nē arī amā ixkīnh týx kām tanhmā amnhī nhīpêx to ho ri apa. Nē xepēn to mex nē ixkôt pix mā amnhī nhīpêx o ri apa. Jao ra ixkôt amnhī nhīpêx mex o wam mẽ ate ixkôt amnhī nhīpêxta jakre. Nà ja inhmā mex kumrêx.

²⁰ ām mẽmoj pixi na ixpê omnuj. Mě akôt niti ri pa xwýnh Jejapewtita. Kêp Tirtūm nhý hā kapêr jarēnh o pa xwýnh ā amnhī to hêx xwýnhhta. Na hte ixkapêr kupa hā tanhmā mẽ ajahkre hto ka htem ama nē nē tanhmā kām nē hkêt nē. Na hte mẽ amā: “Xê mẽ māmri ri mẽ hkuprýjê hwýr mra nē mẽ ho amnhīkati. Nē xepēn pē mẽ aprō nē mẽ amjēn o amnhīkati. Nē mẽ kot sânti hā mẽ hkīnh nē hā apkur xwýnhjê hkôt mra nē mẽ hkôt amnhī nhīpêx. Tirtūm kām ja mex kēnā.” Anhýr o mẽ amā kapêr o pa. Nē inhmā ja mex ā ijarē nom inhmā ja mex

kêt. Tā ra mẽ akwýjaja kapêr ma nē hkôt amnhī nhīpêx ka mẽ ja hā mẽ omunh tā amnhī nē nitita janor kêt nē nhūm arī ri mẽ amā hêx o ri mẽ akôt pa.

²¹ Ra kot ā amnhī nhīpêx anhýr o mẽ akôt pa ry rax kumrêx tā pa kormā ja hā tanhmā ho hkêt nē kormā amnhī tā hamā. Kot ā amnhī nhīpêx anhýr kaga kaxyw na pa kormā hamār o ri ixpa. No nhūm aa hkaga hkêt nē.

²² Mýrapê kot paj tokyx tanhmā ho nhūm amnhī xà htýx kamā hamak o hikwý. Tā mẽ kot kapêr mar nē hkôt amnhī nhīpêx xwýnhjaja kot amnhī tomnuj ā amnhī pumu nē hkaga hkêt hā kot paj mā mẽ ho anē nē. Māānēn tanhmā mẽ homnuj to nhūm mẽ nitita pyrā nē amnhī xà htýx kamā hamak o hikwý.

²³ Nē nitita kot paj kêp hkrajê nhīmex pa. Ka mẽ apê ixkrajaja ja hā ixpumu nē ixte mẽ apiitā ahpýnhā tanhmā mẽ ajamaxpêr to hkôt mẽ apumunh ā ixpumu. Nē ixte ahpýnhā mẽ apiitā tanhmā mẽ ate amnhī nhīpêx to ho apa hā mẽ apumunh xà hkôt tanhmā mẽ anhīpêx to hā ixpumu.

²⁴ Na hte mẽ akwýjaja akwýjê rom nita kapêr ma nē ām kuma nē hkôt amnhī nhīpêx kêt nē. Nē mẽ kapêrja mẽ kot kām: “Satanasti kapêr pimxur” anhýr xwýnhhta kôt nhūm mẽ amnhī nhīpêx kêt nē. Na htem ixkôt pix mā amnhī nhīpêx mex o ri pa. Tā ā mẽ ate ixkôt amnhī nhīpêx anhýr o apa xwýnhjaja kot paj mẽ amā ja pix ā karō ka mẽ inhma.

²⁵ Kēr ka mẽ arī ixkôt pix mā amnhī nhīpêx o ri apa rāhā pa akupýn mẽ awýr wrý. Ām ja pix ā kot paj mẽ amā karō.

²⁶ Nē kot kaj mẽ ate amnhī tomnuj nē amnhī to htýx nē arī inhmā hprām xà hkôt amnhī nhīpêx rāhā ty. Hāmri pa ja hā mẽ apumu nē nhýrmā mẽ ate krī hkwý hkôt mẽ pa xwýnhjê ho amnhīptār o apa kaxyw mẽ axunhwý. Ka mẽ apê mẽ ô pahihtti nē inhmā mẽ ho amnhīptār o ri apa.

²⁷ Na pre Inhīpêêxà ixte pika piitā hkôt ri mẽ pa xwýnhjê ho amnhīptār kaxyw ixām.

Tā kot paj nhýrmā amnhī pyrā nē mẽ kaxyw mẽ axunhwý ka mẽ inhmā mẽ

hamār o apa.

Nhũm mēhō ixkapēr kwým ri tanhmā amnhĩ nhĩpêx to ka mẽ ja hã omu nê hã tanhmā ho. Te mẽ kot poti punuj mýnh nê mēnh nê hkrakrak pyrāk.

²⁸ Kot paj ã mẽ ate mẽ hipêx anhỹr o apa kaxyw mẽ axunhwý. No ãm ja pix kêt. Kot paj te ixte mẽ amã kanhêti hō nhõr pyrāk o mẽ anhĩpêx. Arĩgro hkôt kanhêti no hpòk rax japôx xwýnhhta kot paj te ixte mẽ amã õr pyrāk ka mẽ ixri atĩr tũm nê apa ho apa.

²⁹ E ixkrajaja. Kot kaj mẽ amã ixkapēr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapēr anhỹrja ma nê kãm ajamaxpēr tỳx rãhã ho ri apa. Anẽ.

–E Juãw. Kêr ka ã Xijaxir kamã ixkrajê kaxyw ixkapēr ã kagà nê mẽ hwýr mēnh anẽ. Anẽ.

Hãmri pa kuma nê ô ri mẽ kãm hipêx nê mẽ hwýr kumẽ.

3

Satre kamã Jejus kwýjê hwýr kagà

Rukre 12.35-40

¹ Nhũm Jejus arĩ inhmã kapēr nê inhmã:

–E hpãnhã Satre kamã ixkwýjê jamār xwýnh wýr kagà nê mẽ kãm ixkapēr jarẽ nê mẽ kãm:

Pa Satre kamã ixkrajaja. E ot pa mẽ awýr ixpēr mẽ. Ixpê inhĩhkra ho kanhêti pê 7 jamýnh nê xãm xwýnhhta na pa. Nê ixpê inhĩhkra ho Tĩrtũm Karõ ãm pyxi htã te kamã kêp 7 jamýnh nê ho ixãm xwýnhhta na pa mẽ amã ixkapēr.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot axpēn mã mẽ ate ixkôt amnhĩ nhĩpêx ã mẽ ajarēnh tã ã mẽ ate amnhĩ nhĩpêx anhỹr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nê mẽ anhĩkwỹ pyrāk.

² Na ka htem ãm akrãnh mã ixkôt ri amnhĩ nhĩpêx nom Tĩrtũm mẽ wa ixkôt amnhĩ nhĩpêx mex kêt nê. Ra Tĩrtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu nê ate amnhĩ tomnuj mã

anhũre nê wa ixkôt amnhĩ xunhwýr tỳx nê.

³ Kêr ka mẽ amnepê mã kormã mẽ ate ixkôt amnhĩ nhĩpêx nyw ri mẽ kot ixkapēr o tanhmã mẽ ajahkre htoja mã ajamaxpēr nê amnhĩ tomnuj mã anhũre. Nê ixkapēr kôt pix mã mãn amnhĩ nhĩpêx o ri apa. Kot kaj mẽ anhỹr kêt kot paj nhỹrmã mẽ ajaêr pê akupýn mẽ awýr wry nê ja hã tanhmã mẽ ato.

⁴ ãm mẽ agrêre nê amã ixkôt amnhĩ nhĩpêx prãm. Jao tãm ri amnhĩ nhĩpêx nê mẽ kot amnhĩ tomnuj xwýnhjê hkôt amnhĩ nhĩpêx kêt nê. Te mẽ axê jakare kamã apa nê tanhmã amnhĩ pê htyk to hkêt pyrāk. Tã kot kaj mẽ nhỹrmã ixri mẽ axê jakare kamã apa ho apa. Ra mẽ ate ja ho anhỹr mã tãm kēnã. Ja na Tĩrtũm kãm hprãm.

⁵ Nê krĩ piitã hkôt mẽ ate amnhĩ tomnuj nê amnhĩ to htỳx nê inhmã hprãm xã hkôt amnhĩ nhĩpêx rãhã atyk xwýnh piitã kot ka mẽ nhỹrmã Tĩrtũm mẽ wa ixri amex nê atĩr tũm nê apa ho apa. Ra mẽ hixija Mēpahpãm Maati nhõ kagàja kamã na. Kamã mẽ atĩr o mẽ atĩr mã xwýnhjê nhĩxi piitã hã kagà. Kot paj kagàta kamã aa mẽ anhĩxi grãnh kêt nê. Hãmri nê Inhĩpêêxã mẽ kapēr o mẽ wryk xwýnhjê mã mẽ ajarēnh o: “E mẽ jajê pumu. Ixkwý na mẽ.” Anhỹr o mẽ kãm mẽ ajarẽ.

⁶ E ixkwýjaja. Kot kaj mẽ amã ixkapēr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapēr anhỹrja ma nê kãm ajamaxpēr tỳx rãhã ho ri apa.

Tã ãm ja pix. Na hapêx. Anẽ.

–E Juãw. Kêr ka ã Satrejê mã ixkapēr ã kagà nê mẽ hwýr mēnh anẽ. Anẽ.

Hãmri pa kuma nê ô ri mẽ kãm hã kagà.

Pirate kamã Jejus kwýjê hwýr kagà

Wam Tesarõn 2.13-16

⁷ Nhũm Jejus arĩ inhmã kapēr nê inhmã:

–E hpãnhã Pirate kamã ixkwýjê jamār xwýnh hwýr kagà nhĩpêx nê amẽ nê mẽ kãm ixkapēr jarẽ nê mẽ kãm kãm:

Pa Pirate kamã mẽ ate ixkapēr mar kaxyw mẽ apikuprõnh xwýnhjaja. E ot pa mẽ awýr ixpēr mẽ. Inhmex o inhmex

xwýnh na pa. Aa ixêx kêt nê ixpa xwýnh. Amnepê mã na pre mēhōja pahi Tawi mã ōrkwý mex ã saf jamār o pa. Tã pa hte urak nê Inhîpêêxà Tirtũm nhō krī hwýr mē gjêx xà hã saf jamý nê ho ixpa. Æm papxipix inhō saf jakamã papxipix na pa hte mē ate ixkôt amnhî xunhwýr xwýnhjaja mē agjêx kaxyw mē amã kahê xà rē nê ixkra hkêt xwýnhjê pê kahê. Kot paj mē apê ixkrajê mã kahê xà rē ka mē hwýr agjê. Hãmri pa mē atã kahê nhũm ixkra hkêt xwýnhjaja tee ri kãm mē akôt gjêx prãm kaprý.

⁸ Na pa hte tanhmã mē ate amnhî nhîpêx to ho apa hã mē apumunh mex o ri ixpa. Mē agrêre htã na ka htem ixkapêr kôt amnhî nhîpêx mex nê aa ixkaga hkêt nê. Jakamã kot paj te ixte mē amã Tirtũm nhō hakwakre kahê xà mēnh pyrak o mē anhîpêx ka mē axãmnhîx ajamakêtkati nê ma mē kãm Tirtũm kapêr o mē ahkre ho ri mē hkôt apa. Nhũm mē hkwýjaja tee ri ã mē ate amnhî nhîpêx anhýrja nê mē amã kapêr kaprý ka mē arī ho mē ahkre ho ri mē hkôt apa.

⁹ Nê mē anhō krī kamã mē akwýjaja na prem ra Satanasti hkôt amnhî xunhwý nê hêx rom mē amã amnhî to hêx nê mē amã: “E mē ixpê Ijaew mex jakamã kwa mē ixkapêr ma nê mē ixkôt amnhî nhîpêx.” Anhýr o mē amã karō htã no ãm mē kot Satanasti hkôt amnhî nhîpêx xwýnh na mē. Tã kot paj nhýrmã tanhmã mē homnuj to nhũm mē tee ri amnhî pumu nê akupým mē awýr mra nê mē akutã hkõnkrã ho rôrok nê hkrī nê mē amã: “Nà mē kajaja na ka pêr mē ixrom Jesus kôt amnhî nhîpêx. Mãn kãm mē ajapêê.” Anê.

¹⁰ Mē kot ixtã mē atomnuj týt nhũm mē ate amnhî xà htýt kamã ajamak tã aa mē umaj ixkaga hkêt nê. Nê arī ixte mē amã mēmoj tã karō xà hkôt mē kutã amnhî to htýt rãhã arī ixkôt ri amnhî nhîpêx o apa. Jakamã mē kot nhýrmã mē kãm ixkurê xwýnhjaja pika piitã hkôt tanhmã mē homnuj týt to nhũm mē amnhî xà htýt kamã ama. Tã kot paj mē anê mē omunh mex nê nhũm mē tanhmã mē ato hkêt nê ka mē amex nê ri apa ho apa.

¹¹ E kot paj tokyx akupým mē awýr wrý nê mē ate ixkôt pix mã amnhî nhîpêx ã mē ato mex rax kumrêx. Jakamã kwa mē mãmrī ã amnhî nhîpêx anhýr o inhmã hprãm xà hkôt pix mã amnhî nhîpêx rãhã ty. Kot ka mē anhýr kêt kot pa mē amã mēmoj mex nhõr kêt nê.

¹² Nê kot kaj mē kot amnhî tomnuj xwýnhjê kutã amnhî to htýt nê inhmã hprãm xà hkôt pix mã amnhî nhîpêx rãhã ty. Hã kot paj amnhî kôt mē ato mē axihtýt nê ka mē aa ixkaga hkêt nê. Nê kot paj nhýhýnh mē atã mē inhîxi ho axkrunêpxi nê haxwý. Inhîpêêxà nhîxi nê inhîxi nyw nê Inhîpêêxà nhō krī nhîxija kot paj nhýhýnh mē atã haxwý. Tirtũm nhō krī mē kot kãm: “Jeru-jarê nyw” anhýr xwýnhta koja nhýrmã tanhmã amnhî to nê ra kaxkwa rũm pika wýr wrý.

¹³ E ixkwýjaja. Kot kaj mē amã ixkapêr mar prãm hã kot kaj mē ã Tirtũm mē wa Ixkarō nhý hã ixte mē amã ixkapêr anhýrja ma nê kãm ajamaxpêr týt rãhã ho ri apa.

Tã ãm ja pix. Na ra hapêx. Anê.

–E Juãw. Kêr ka ã Pirate kamã ixkrajê mã ixkapêr ã kagà anê. Anê.

Hãmri pa kuma nê ô ri mē kãm hã kagà.

Raxisej kamã Jejus kwýjê hwýr kagà

¹⁴ Nhũm pre Jejus arī inhmã kapêr nê inhmã:

–E hpãnhã krī pê Raxisej kamã ixkrajê jamār xwýnh wýr kagà nhîpêx nê amê. Nê mē kãm ixkapêr jarênh o:

Pa Raxisej kamã ixkrajaja. Ot pa mē awýr ixpêr mē. Æm hãmri ixkapêr o ixpa nê aa ixêx kêt xwýnhta na pa. Jakamã ãm hãmri na pa hte Tirtũm kapêr o mē ajahkre o ixpa nê aa ja kaga hkêt nê. Pa na ixpê mēmoj piitã hpãr krax.

¹⁵⁻¹⁶ Na pa hte mē ate tanhmã amnhî nhîpêx to ho apa hã mē apumunh rãhã ho ixpa. Kop apu mē ate ixkôt amnhî nhîpêx mex ronhýt pa ja hã mē apumu nê ixkĩnh nê. Nom mē ate ã amnhî nhîpêx anhýr kêt. No mãânên aa ixkaga hkêt nê. Na ka htem ri atýt amnhî krã hkôt pix mã tanhmã amnhî nhîpêx to ho apa nhũm ja ixpê omnuj nê. Kot kaj mē arī

ã amnhĩ nhĩpêx anhÿr o apa pa hpãnhã amnhĩ nê mẽ akurê. Te mẽ kot gô xenh nõkati janhir nê tee hkakin nê akupÿm hkapÿr pyrãk.

¹⁷ Mẽ ate inhmã hprãm xà hkôt amnhĩ nhĩpêx ã amnhĩ jarênh tã ã amnhĩ nhĩpêx anhÿr kêt nê. Nê ixkapêr mar tÿx nê amnhĩ kaxyw inhmã ajamaxpêr mex kêt nê.

¹⁸ Kwa mẽ tokyx ja hã amnhĩ pumu nê akupÿm ixkôt amnhĩ xunhwÿr tÿx nê. Kêr pa ja hã mẽ apumu nê amnhĩ katut kôt mẽ ate amnhĩ tomnuj rê nê tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrit to ka mẽ aprĩ hã ixte amnhĩ nhĩpêx ã ixpumunh mex nê ixkôt amnhĩ nhĩpêx mex rãhã o ri apa.

¹⁹ Xà inhmã mẽ ajapê hkêt ã na pa ã mẽ amã ixkapêr anê? Nà inhmã mẽ apiitã mẽ ajapê htÿx kênã. Nom inhmã mẽ ajapê htã ka htem ixkôt amnhĩ nhĩpêx kêt nê. Na pa tee ri amnhĩ tã mẽ apumu nê ja hã tanhmã mẽ atomnuj tÿx to. Tokyx mẽ ate amnhĩ tomnuj mã anhÿrer nê hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga nê akupÿm amnhĩ kaxyw inhmã ajamaxpêr ho ri apa.

²⁰ Na htem hkwyjê nhõrkwÿ hwÿr gjêx kaxyw hakwa krem kãm àkjêr o kuhê nhũm mẽ kuma nê mẽ kãm anê nhũm mẽ hwÿr agjê. Nê mẽ ixkre hkre kamã axpên mã kapêr o hkrĩ rÿ axpên mã kapêr pê mẽmoj to hkõm o hkrĩ. Ja pyrã nê ot pa mẽ ajamãr o ixpa. Mẽ ate inhmã anhÿr nhũm ixte mẽ akôt ixpa ho ixpa nhũm mẽ pahte axpên to mex o papa kaxyw.

²¹ Kormã mẽ kot ixpÿr kêt ri na pa pre mẽ kot amnhĩ tomnuj xwÿnhjê kutã amnhĩ to htÿx o ixpa. Amnhĩ to htÿx nê ri ixpa kamã ixtyk jakamã nhũm Inhĩpêxã akupÿm ixto ixtÿr nê akupÿm amnhĩ wÿr ixto api. Hãmri nê amnhĩ nhĩhkô hã mẽ ho amnhĩptàr ã hkrĩ xà kamã inhÿr pa ixkrĩ ho ixkrĩ nê ìhkô hã mẽ piitã mẽ ho amnhĩptàr o ixkrĩ. Tã kot kaj mẽ atõ ixpyrà nê ate amnhĩ tomnuj nê amnhĩ to htÿx nê. Nê inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ pyrã nê wa ixte mẽ ato amnhĩptàr

ã ixkrĩ xàja kamã amnhĩ nhĩhkô hã mẽ akrĩ ka mẽ wa inhĩhkô hã wa inhmã mẽ ho amnhĩptàr o akrĩ.

²² E ixkwÿjaja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Tã ãm ja pix. Na hapêx. Anê.

—E Juãw. Kêr ka Raxisej kamã ixkrajê mã ixkapêr ã kagà nê mẽ hwÿr amê. Nê kagãja piitã krĩ hkwy kamã ahpÿnhã ixkwÿjê hwÿr arê kê mẽ kamã harê nê ixkapêr ma. Anê.

Nhũm pre ã Jejus inhmã kapêr anê. Pa kuma nê ô ri mẽ piitã mẽ kãm hã kagà hpa.

4

Tirtũm kot mẽ ho amnhĩptàr ã hkrĩ xà jarênh

¹ Tã pa axte mẽmoj pumu nhũm kaxkwa hwÿr mẽ gjêx xà hã hakwakreja amnhĩ kahê xà mẽ pa omu. Hãmri nhũm axte mēhõ kapêr tÿx xwÿnhnta. Te kot pifti kakõr tÿx pyrãk xwÿnhnta axte inhmã kapêr nê inhmã:

—E amnê ixwÿr api pa mẽmoj nhÿrmã kot tanhmã amnhĩ nhĩpêx to hkukamã amã ho amnhĩrit ka omu. Anê.

² Hãmri nhũm Tirtũm Karõ tanhmã ixto nê ixto api pa kaxkwa kamã mẽmoj pumunh o xa. Tirtũm kot mẽ ho amnhĩptàr ã hkrĩ xà maatita pa pre omu. Nhũm kamã mēhõja nhÿ.

³ Kuk kamã hirã htÿx kumrêx. Te mẽmo kên kamrêk karÿr jaxênh tÿx pyrãk. Nê kot mẽ ho amnhĩptàr ã hkrĩ xà puhã màxwÿxti grãgrãreja kãm hipõk nê harir pa omunh o xa.

⁴ Nhũm hkrĩ xà maati puhã mẽ ho amnhĩptàr o hkrĩ xà kêp 24. Kamã mẽ àptàr tũmjaja hkrĩ. Mẽ piitã ôr o mẽ ahkà htu nê ê jakare nê hkrĩ.

⁵ Nê Tirtũm hkrĩ xà maatiija rũm na katõtõk nê hkrakrak nê haxênh japà nê hikwÿ. Nê hkrĩ xà kapem kanê maati pixi kamã kwÿr pê 7ja põk rãhã ho kuhê. Kanêja te Tirtũm Karõ pyrãk.

⁶ Nê hkrĩ xà kapem mẽmo te gô rax pyrãkja hkarÿr jaxênh tÿx kumrêx nê nõ. Te ho kax karÿr jaxênh tÿx pyrã nê hkarÿrre.

Ně hkrĩ xà puhã mẽmoj tĩr ně kuhê pē kwat kuhê. Ně òkwa ně katut piitã hkòt no. Ām no xohtò rax kumrēx. Na pre ã mẽmoj kēp kwatja no xohtò anē pa omu.

⁷ Wamta te kot mry pē rēãwti pyrãk. Ně hkòt ja te kot mōx myti pyrãk. Ně hapu hã hkuk te panhĩ hkuk pyrãk. No hapu hã ja te kot àanhãhti htor kaxyw hara koror pyrãk.

⁸ Ně piitã hara kēp 6. Ně ĩ piitã kamã no. Nhũm prem Tĩrtũm mã mex o mex ã grer rãhã ho kuhê ně aa pinhkrēnh kēt ně. Ně kãm grer o:

Amex o amex Tĩrtũm.
Ně axihtýx o axihtýx.

Ně aa ate amnhĩ tomnuj kēt kumrēx.
Amnepē mã kormã mẽmoj kēt ri ka ra arãhã ri apa. Tã arĩ arãhã ri apa xwýnh na ka. Kot kaj aa ajapêx kēt ně.
ãm hãmri na ka hte mẽ ixto mex rãhã ho apa.

Ně amex o amex Tĩrtũm. Anē.
⁹⁻¹⁰ Nhũm prem xatã mẽ ho amnhĩptãr hkrĩ xà kamã hkrĩ xwýnhja mẽ kot kãm “Rãhã pa xwýnh” anhýr xwýnhhta mã ã grer anhýr o kuhê. Kãm mex o mex ã grer pē tanhmã kot mẽ ho mex to hã harē. Hãmri nhũm mẽ àptãr tũm pē 24jaja mããnēn kutã hkõn krã ho rôròk ně hipò hpa ně hkrĩ. Ně amnhĩ krã rũm ôr o mẽ ahkãja kwry ně hpar pē haxwý. Kēp mẽ õ Pahi Maati hã hã hpijaãm kaxyw wamtajē pyrã ně mex o mex ã harēnh o hkrĩ ně kãm:

¹¹ ãm hãmri na pa htem amex o amex ã ajarē Tĩrtũm
Apē mẽ inhõ Pahi Maati na ka.
Ně apē mẽ inhõ Tĩrtũm na ka.
Na ka pre mẽmoj piitã ho akato.
Axãhpumunh týx ně ajamaxpēr týx o mẽmoj piitã amã hprãm xà hkòt ho akator pa.

Jakamã na pa htem ã amex o amex ã ajarēnh anē. Mě ixrom axihtýx mex kumrēx na ka hte apa Tĩrtũm. Anē.

5

Mě pahte amnhĩ tomnuj pãnhã amnhĩrer xwýnh jarēnh

Juãw 1.29; Piripos 2.5-11

¹ Tã pa pre arĩ te kaxkwa kamã mẽmoj pumu. Mě ho amnhĩptãr ã hkrĩ xà maatita kamã hkrĩ xwýnh nhĩhkra kamã kagã pa

omunh o xa. Upòk rũm omu. No ãm axtem kagã kaxkep na pre. Ně akutã hã kagã ně menh ê ho ho htýx xàja kēp 7.

² Hãmri nhũm Tĩrtũm kapēr o wryk xwýnh xihtýx xwýnhja kapēr týx kãm kapēr o:

—E mẽ atõ na ate kagã mũj pyr ně ho htýx xà hpòt mã tãm? Anē.

³ Hãmri ně tee ri mẽ piitã mẽ hkapi nom nhũm ja kaxyw mẽhõ amrakati kumrēx. Kaxkwa kamã amrakati ně pika kamã mããnēn amrakati ně pika hkrak ri amrakati. Nhýri mẽhõ kot kagã kaxkepta pyr ně hpòt ně omunh mã tãm xwýnhja amrakati ho amrakati.

⁴ Nhũm tee ri mẽhõ japēr nom mẽhõ pumunh kēt ně. Pa tee ri ja hã omu ně ixkaprĩ htýx ně inhmýr o xa.

⁵ Hãmri nhũm pahi hõja ixpumu ně inhmã:

—Kwa amýr kēt ně. E mẽhõ mũj pumu. Juta kanrēhã htãmnhwý xihtýx xwýnhhta. Pahi Tawi kanrēhã htãmnhwý te kēp mry pē rēãw xihtýx pyrãk o hihtýx xwýnh mũj pumu. Kot mẽ kãm hkurē xwýnhjē kutã amnhĩ to htýx ně mẽmoj punuj piitã ho hapêx kaxyw mã xwýnh jakamã tapxipix na kot kagãta hpyr ně ho htýx xà hpòt par mã tãm. E ka omu. Anē.

⁶ Hãmri pa kuma ně hwýr rĩt ně Jejusja pumu. Kot mẽ pahte amnhĩ tomnuj pãnhã amnhĩrer xwýnhhta mẽ ho amnhĩptãr o hkrĩ xà maati kapem xa. Měmoj htĩr pē kwat mẽ àptãr tũm pē 24jē nhĩpòk ri xa. Mě kãm hkurē xwýnhjaja kot hpĩr nhũm ra akupým htĩr ně xa. Nom ra axtem ně xa. àhpumunh týxja te kot pahi xãhpumunh pyrãk. Ně hpãr kēp 7. Ně no mããnēn kēp 7. Noja te Tĩrtũm Karõ pyrã ně kēp pika piitã hkòt pa xwýnh. Ā Jejusja axtem ně ãm anē pa omu.

⁷ Hãmri nhũm mẽ pahto amnhĩptãr o hkrĩ xwýnhhta wýr tē ně ìhkra kamã kēp kagã kaxkepta py.

⁸ Hãmri nhũm mẽ htĩr pē kwat mẽ mẽ àptãr tũmjaja hpar pē hkõn krã ho rôròk ně hkrĩ hpa ně hipò ně hkrĩ. Piitã wiorãwti jamý ně ôr o xijere kamã mẽhkuxwa xà jamý ně o hkrĩ. Nhũm Tĩrtũm krajaja Tĩrtũm mã tanhmã amnhĩ jarēnh to nhũm mẽ mar o hkrĩ. Te xijere kamã mẽhkuxwa xà hpãr o hkrĩ pyrã ně mẽ kuma.

9-10 Jakamã nhũm mẽ hkõn krã ho hkrĩ xwýnhjaja mẽ pahte amnhĩ tomnuj pãnhã amnhĩrer xwýnhhta kutã kãm grer o hkrĩ. Mẽ grer nyw o kãm gre nẽ kãm:

Na prem apĩ ka atyk o mẽ piitã mẽ kot amnhĩ tomnuj pãnhã amnhĩrer pa.

Ahpýnhã pika piitã hkõt mẽ urojê piitã hpãnhã amnhĩrer pa.

Nẽ ahpýnhã ri mẽ kapër xwýnh kwýjê piitã mẽ hpãnhã amnhĩrer pa. Atyk o mẽ kot amnhĩ tomnuj piitã hpãnhã amnhĩrer pa.

Jakamã nhũm mẽ kot akõt amnhĩ xunhwýr xwýnhjaja kęp Tĩrtũm kra nẽ ri pa.

Ka ra mẽ panhõ Tĩrtũm mã mẽ kęp patre kaxyw mẽ unhwý nhũm htem pika piitã hkõt mẽ ho amnhĩptar o pa.

Tã atyk o ate pika piitã hkõt mẽ hpãnhã amnhĩrer jakamã kapxipix na ate kagata pyr nẽ ho htýx xã hpõt mã tãm. Anẽ.

11 Hãmri nhũm Tĩrtũm kapër o mẽ wrýk xwýnhjaja nhýhýnh hapõj nẽ kuhê. Mẽ ohtõ rax o ohtõ rax. Ohtõ rax o mẽ pajamaxpër jakrenh. Hãmri nẽ Tĩrtũm kot mẽ ho amnhĩptar ã hkrĩ xã maatija wýr mra nẽ kãm hipõk pa. Nẽ mẽmoj tĩr nẽ kuhê xwýnhjê mẽ mẽ ãptar tũmjê mã hipõk pa nẽ mẽ pahte amnhĩ tomnuj pãnhã amnhĩrer xwýnhhta mã kapër.

12 Kax pẽ kãm kapër nẽ kãm:

Ãm hãmri na pa htem amex o amex ã ingrer o ixkuhê.

Mẽ ixrom axihtýx o axihtýx.

Nẽ mẽmoj piitã anhõõ.

Nẽ ate mẽmoj piitã hkukamã axàhpumunh par.

Nẽ amex o amex jakamã na pa htem amã amex pix ã ingrer o ri ixpa. Anẽ.

13 Tã nhũm mẽmoj piitã Tĩrtũm mẽ Jejus wa kãm wa mex o wa mex ã harê. Pika hkõt panhĩ nẽ mry nẽ ãk nẽ mẽmoj piitãã. Nẽ pika hkrak ri nẽ gõ hkrak ri mẽmoj piitãã. Nẽ mẽ htykjaja. Nhũm mẽ piitã wa kãm wa mex o wa mex ã wa harê nẽ wa kãm:

E ate mẽ ixto amnhĩptar ã akrĩ xã kamã akrĩ xwýnh mẽ kot mẽ ixte amnhĩ tomnuj pãnhã amnhĩrer xwýnh mẽ war amex o wa amex.

Nẽ war axihtýx o war axihtýx.

Nẽ war axàhpumunh o war axàhpumunh.

Na pa htem ã war ajarënh anhýr rãhã ixpa ho ixpa. Anẽ.

14 Hãmri nhũm mẽmoj tĩr pẽ kwatjaja mẽ kuma nẽ mẽ kãm:

—Nã ãm hãmri na ka mẽ ã wa harënh anẽ. Wa mex o wa mex kumrêx. Anẽ.

Hãmri nhũm mẽ ãptar tũmjaja Tĩrtũm mẽ Jejus wa hpar pẽ hkõn krã ho rôrõk nẽ hkrĩ hpa nẽ haxwýja wa kãm wa mex o wa mex ã wa harê.

6

Kagà ho htýx xã pẽ 7 jarënh

Matêwre 24.3-14; Sikũn Tesarõn 2.3; Wam Juãw 2.18

1 Tã pa arĩ kaxkwa kamã mẽ pahte amnhĩ tomnuj pãnhã amnhĩrer xwýnh kot tanhmã amnhĩ nhĩpêx to hã omunh o xa. Nhũm kagà kaxkepta py nẽ wam ho htýx xã põt. Hãmri nhũm mẽmoj tĩr pẽ kwatjê hõja kapër týx kumrêx. Te na katõtõk týx pyrãk o mẽhõj mã kapër nẽ kãm:

—E amnẽ mẽ ixwýr tẽ. Anẽ.

2 Hãmri nhũm kawar jakajre nhýhýnh hwýr hpõx o tẽ. Nhũm mẽhõja õ kuxê mý nẽ hã nhý nẽ tẽ. Hãmri nhũm nhãm mẽhõja hwýr tẽ nẽ kãm pahi hã mẽ ahkã htu. Hãmri nẽ kãm tanhmã kapër to nhũm kuma nẽ mẽ kot kãm Tĩrtũm mẽ Jejus wa kurê xwýnhjê nhĩmex par kaxyw hakêx nẽ ma pika hwýr tẽn wrý.

3 Hãmri nhũm mẽ pahte amnhĩ tomnuj pãnhã amnhĩrer xwýnhja wam kagà ho htýx xãta kõt axte ja põt. Hãmri nhũm mẽmoj tĩr pẽ kwatjê hõja axtem mẽhõj mã kapër nẽ kãm:

—E amnẽ mẽ ixwýr tẽ. Anẽ.

4 Hãmri nhũm kawar kamrêk mẽ hwýr hpõx o tẽ. Nhũm mẽhõ hã nhý nẽ tẽ. Nhũm nhãm mẽhõja kãm wapo gõ nẽ ma pika hwýr htẽm nẽ wrýk kaxyw hano. Kot hwýr wrýk nẽ pikap mẽ pa xwýnhjê kurê huk kaxyw. Mẽ kot axpën par kaxyw ma mẽ hwýr kumê. Hãmri nhũm kuma nẽ wapota py nẽ hakêx nẽ ma mẽ hwýr tẽn wrý.

5 Hãmri nhũm mẽ pahte amnhĩ tomnuj pãnhã amnhĩrer xwýnhja kagà ho htýx xã hõ põt. Na pre ra ho axkrut nẽ hpõt tã hpãnhã axte hkõt ja põt. Hãmri nhũm mẽmoj tĩr pẽ 4jê hõta mẽhõj mã kapër nẽ kãm:

—E amnë mẽ ixwỳr tẽ. Anẽ

Hãmri nhũm kawar tykre mẽ hwỳr hpôx o tẽ. Nhũm hã ỳr xwỳnhja mẽmoj to peja xà hã paràs mỳ nẽ o tẽ.

⁶ Hãmri nhũm mẽ htĩr pẽ kwatjẽ rũm mẽhõja kãm kapẽr nẽ kãm:

—E kër ka ma pika hwỳr mẽ hwỳr tẽn wry nẽ mẽ kãm myt pyxi kamã mẽ àpênh pãnhã mẽ kãm mẽmoj to hkryre nẽ anhõ parãsta kamã ho peja nẽ mẽ kãm õr o apa. Nom mẽ apkur xà hã orti nẽ wĩhti ka mẽ kęp tanhmã ho hkêt nẽ. Anẽ.

Hãmri nhũm kuma nẽ hakẽx nẽ ma tẽn mẽ hwỳr wry.

⁷ Tã nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho axkrunẽpxi nẽ hpôt tã hpãnhã axte hkôt ja pôt. Hãmri nhũm mẽmoj tĩr pẽ kwat kot hitẽp xwỳnhja mẽhõj mã kãm:

—E amnë mẽ ixwỳr tẽ. Anẽ.

⁸ Hãmri nhũm kawar rãrãare mẽ hwỳr hpôx o tẽ. Nhũm mẽhõ hã nhỹ nẽ tẽ. Hã ỳr xwỳnh nhĩxi na pre kęp “Mẽhtyk” anẽ. Hãmri nhũm mẽhõja kãm kapẽr nẽ kãm:

—E ma pika hwỳr wry nẽ tanhmã mẽ ho kê mẽ ohtõ nẽ tanhmã amnhĩ to nẽ axkaprã. Kê mẽ hkwyjaja pijapu kamã axpẽn pa nẽ mẽ hkwyjaja prãm xàj ty nẽ mẽ hkwyjaja tanhmã à htỳx kute kamã ty. Nẽ mẽmo mry xoprẽja mẽ hkwyjẽ pa. E ma mẽ hwỳr wry nẽ tanhmã mẽ ho ho apa. Anẽ.

Hãmri nhũm kuma nẽ hakẽx nẽ ma pika hwỳr tẽn wry. Hãmri nhũm mẽ htykjẽ papxàja tanhmã amnhĩ to nẽ te kot hã jêt nẽ ma hkôt mõi nẽ pika hwỳr wryk pyràk pa pre arĩ omunh o xa.

⁹ Hãmri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho kwat nẽ hpôt tã hpãnhã axte ja pôt. Hãmri nẽ hpôtja kôt pa ra mẽ kot Tĩrtũm mã mẽmoj nhõr xà hã mẽsti pumu. Nẽ hkrak ri mẽ hkarõjẽ pumu. Mẽ kot hkwyjẽ hkôt ri mẽ kãm Tĩrtũm kapẽr jarẽn nẽ Jejus kęp mẽ õ Pahĩti hã harẽn o pa nhũm mẽ kot hã mẽ hpar xwỳnhjẽ karõja pa pre mẽ omu. Nhũm mẽ mẽsti hkrak ri amnhĩ to Tĩrtũm wỳr o hkrĩ.

¹⁰ Kỳx pẽ kãm kapẽr nẽ kãm:

—Ãm hãmri amex o amex Pahi Maati. Aa ate mẽmoj tã tanhmã amnhĩ to axẽx to hkêt

kumrẽx. Kwa xà kot kaj tokyx pika hkôt mẽ kot mẽ inhĩmex xwỳnhjaja tanhmã mẽ ixtã mẽ ho nà? Anẽ.

¹¹ Hãmri nhũm mẽhõja mẽ hwỳr tẽn nẽ mẽ kãm mẽ ê jakajre gõ nhũm mẽ hagjẽ. Hãmri nhũm mẽ kãm:

—E mẽ mamrĩ atar akõkõt o akrĩ. Kojã Tĩrtũm kormã tanhmã mẽ kot mẽ atomnuj xwỳnhjẽ ho hkêt nẽ. Kê mẽ axte mẽ apyrã nẽ mẽ akwỳjẽ nhĩmex mãn. Kojã mẽ Tĩrtũm jamaxpẽr xà hkôt axte mẽ akwỳjẽ pa nhũm rĩ kormã mẽ ato hpimrãatã tanhmã mẽ atã mẽ hipẽx to. Jakamã e mẽ atar kutẽp mãmrĩ akõkõt o akrĩ. Anẽ.

¹² Hãmri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt pa omu. Na pre ra ho 5 nẽ hpôt tã hpãnhã hkôt axte ja pôt. Hãmri nhũm pika htertẽt tỳx kumrẽx. Nẽ myyti ahtyk nẽ mytwrỹre te kęp mẽ hkamrõ kamrẽk tỳx pyrà nẽ ajêt.

¹³ Nẽ kanhẽti tanhmã amnhĩ to nẽ axrẽ nẽ pikap rõrõk pa. Te kõk xapẽr tỳx nẽ kot pãrerekre kormã rãx tã kot kãm hikranh par pyrà nẽ piitã rẽn pa nhũm rõrõk.

¹⁴ Hãmri nhũm kaxkwaja te kagà kaxkep pyrà nẽ amnhĩ to kaxkep o tẽ. Nẽ pika piitã hkôt kẽn prẽk nẽ hixêt prẽk maati piitã te hkrĩ xà rũm hapõx nẽ mrar nẽ nhãm hkrĩ pyràk. Nhũm gõ hipõk piitã haxwỳja te hikwỹ xà rũm hapõx nẽ mrar nẽ nhãm hikwỹ pyràk. Pika htertẽt tỳx nhỹ hã ã mẽmoj amnhĩ nhĩpẽx anẽ.

¹⁵ Hãmri nhũm pika hkôt mẽ piitã tee ri mẽmoj ã amnhĩ nhĩpẽx anhỹr ã omu nẽ kãm ma nẽ htertẽt tỳx kumrẽx. Mẽ ho amnhĩptãr xwỳnhjaja nẽ põristi krãhtũmjaja nẽ mẽ kot amnhĩ to rũnh xwỳnhjaja nẽ mẽ hihtỳx xwỳnhjaja nẽ mẽ kãm mẽ àpênh xwỳnhjaja nẽ amnhĩ mã mẽ àpênh xwỳnhjaja. ãm piitã mẽmoj ã kot amnhĩ nhĩpẽx anhỹr ã omu nẽ tee ri amnhĩ kukamã hamaxpẽr nẽ kãm ma ho kãm ma. Hãmri nẽ hpimxur kaxyw ma kẽn prẽk kre japẽr o hprõt nẽ mra.

¹⁶⁻¹⁷ Hãmri nẽ amnhĩ to kẽn prẽk wỳ nẽ kãm:

—Kwa na ra mẽ ixto amnhĩptãr ã hkrĩ xà maati kamã hkrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnhja wa mẽ ixkamã gryk tỳx kumrẽx. Ra wa kot

tanhmã mẽ ixtomnuj to xà hã arĩgrota kato. Koja wa mẽ ixtomnuj tỳx nẽ pa mẽ kutã hkêt nẽ. Kwa tokyx mẽ inhĩpy arôrôk nẽ wa kệp mẽ ixto amũxu. Anẽ.

7

Mẽ kot Tĩrtũm mã hkrajê kagà Apokarip 9.4

¹ Tã pa arĩ kaxkwa kamã mẽmoj pumu. Nhũm Tĩrtũm kapër o mẽ wrỳk xwỳnh pẽ kwatja piitã ahpỳnhã pika nhĩtep xà hkôt kôk jatur xà hã hamỳ nẽ ho kuhê. Pika piitã hkôt kôk hpinhkrênh par nẽ àpêr kêt nẽ gô xujanãr kôt àpêr kêt kaxyw hatur xà hã hamỳ nẽ ho kuhê. Nẽ pà piitã hkôt àpêr nẽ tanhmã pĩ hwỳ ho pymaj nhũm mẽ ã amnhĩ nhĩpêx anẽ nẽ hatur xà hã hamỳ nẽ ho kuhê.

² Na pre ra Tĩrtũm ja hã mẽ kãm karõ nẽ mẽ kãm:

—E kêr ka mẽ ma pika hwỳr wrỳ nẽ pika nẽ gô xujanãrja tanhmã wa homnu hto. Anẽ.

Hãmri nhũm mẽ kuma nẽ hwỳr wrỳ nẽ kormã nẽ kôk ho htỳx. Hãmri nhũm Tĩrtũm kapër o wrỳk xwỳnhjê hõja myt japôx xà rũm mẽ hwỳr hpôx o tẽ. Nẽ ãkra kamã mẽ kot Tĩrtũm kra hã mẽ hixi jarênh xà hã kagàta py nẽ o tẽ. Hãmri nẽ kax pẽ mẽ kot pika mẽ gô xujanãr homnu mã xwỳnhjê mã kapër nẽ mẽ kãm:

³—Kwa taxi pa Tĩrtũm krajê nhõkrã kagà hpa mãn. Kêr ka mẽ omu nẽ mẽ tapxipixjaja tanhmã mẽ ho hkêt nẽ. Anẽ.

⁴⁻⁸ Hãmri nẽ mẽ hkagà pa. Ahpỳnhã Ijaew pigrãnh xwỳnhjaja mẽ ho ohtô rax kumrêx nẽ tanhmã mẽ hkagà hto. Pa tanhmã mẽ kute hã mẽ harênh ma nhũm xep mẽ ohtô rax kumrêx.

Juta kamã mẽ kệp 12.000.

Nẽ Rupẽ kamã mẽ kệp 12.000.

Nẽ Gax kamã mẽ kệp 12.000.

Nẽ As kamã mẽ kệp 12.000.

Nẽ Natari kamã mẽ kệp 12.000.

Nẽ Manase kamã mẽ kệp 12.000.

Nẽ Simeãw kamã mẽ kệp 12.000.

Nẽ Rewi kamã mẽ kệp 12.000.

Nẽ Isaka kamã mẽ kệp 12.000.

Nẽ Jepurõ kamã mẽ kệp 12.000.

Nẽ Juje kamã mẽ kệp 12.000.

Nẽ Pẽjamĩ kamã mẽ kệp 12.000.

Ã mẽ ohtô rax kot anhỹr. Hãmri nẽ mẽ piitã mẽ pikamỳr par kãm mẽ kệp 144.000. Piitã kệp Apraãw kanrêhã htãmnhwỳ na pre mẽ. Tã ã axpên kaxyw mẽ ohtô rax kumrêx kot anhỹr tã nhũm mẽ hkagà pa.

Tĩrtũm kra hkwyjê jarênh Apokarip 14.1-5

⁹ Tã pa axtem mẽmoj pumu. Nhũm mẽ ohtô rax nẽ Tĩrtũm nhõ krĩ kamã kuhê. Ahpỳnhã ri pika piitã hkôt mẽ urojaja. Nẽ ahpỳnhã ri mẽ kapër xwỳnhjaja nhũm prem pika piitã kurũm kot mẽ ho amnhĩptar ã hkrĩ xà maatija kamã hkrĩ xwỳnh pẽ Tĩrtũm mẽ mẽ pahte amnhĩ tomnuj pãnhã amnhĩrer xwỳnhja wa kutã kuhê. Mẽ ohtô rax kumrêx jakamã pa tee ri mẽ piitã mẽ ho kôta hpar prãm kaprỳ. Nẽ piitã ê jakare kamã kuhê. Nẽ hkĩnh nẽ hkĩnh xàj pô hkwy jamỳ nẽ ho àpêr o kuhê.

¹⁰ Hãmri nẽ kỳx pêê Tĩrtũm mẽ Jesus wa kãm kapër nẽ wa kãm:

Hêxta waa nẽ. War amex o war amex Pahi Maati.

Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nẽ.

War ajamẽ mẽ ixkamã axukaprĩ rãhã ho apa xwỳnh na ka wa.

Jakamã pa mẽ inhmex nẽ war awỳr api nẽ war akuri inhmex nẽ ijamakêtkati nẽ ixpa ho ixpa.

Ãm hãmri na ka hte wa mẽ ixto mex rax kumrêx o apa. War amex o war amex. Anẽ.

¹¹ Hãmri nhũm Tĩrtũm kapër o mẽ wrỳk xwỳnhjaja Tĩrtũm krĩ xà mã hipôk nẽ hkôn krã ho rôrôk nẽ hkrĩ hpa. Nẽ mẽ àptar tũmjê mẽ mẽ htĩr nẽ kuhê xwỳnhjaja mẽ ãhkô hã kãm hipôk nẽ wam tajê pyrãk nẽ hkôn krã ho rôrôk nẽ hkrĩ. Hãmri nẽ mẽ ohtô kot Tĩrtũm mẽ Jesus wa kãm kapër ã mẽ kuma hãmri nẽ Tĩrtũm ã hpijaãm kaxyw hpar pẽ htu mỳr pẽ hikwỹ hpa nẽ kãm mex o mex ã harẽ nẽ kãm:

¹² “Ãm hãmri na mẽ ã ajarênh anẽ Tĩrtũm. Amex o amex.

Na ka hte mẽ ixto mex o apa.

Mẽ ixrom axàhpumunh o axàhpumunh.

Nẽ mẽ ixrom axihtỳx o axihtỳx.

Jakamã na ka hte mẽ ixpiitã mẽ ixto mex kumrêx rãhã ho apa.

“Å ate anhÿr rãhã o rãhã jakamã na pa htem amã amex o amex ã ajarënh rãhã ho ixpa.” Anë.

¹³ Hãmri pa mē omunh o ixãm rôm nhũm mē ãptâr tũmjê hõja ixwÿr tē nē mē ê jaka kamã mē hkĩnh xàj pô jamÿnh nē ho kuhê xwÿnhjê hã ixkukja nē inhmã:

—E mãn ate mē ê jakare kamã mē kuhê xwÿnh mũjjê pumunh nà? Tanhmã na prem amnhĩ nhĩpêx to nē amnē api? Xà ate mē omunh? Anë.

¹⁴ Hãmri pa kuma nē kãm:

—Nà ixte mē omunh kêt. Kêt ka na ixrom ate mē omunh. Anë.

Hãmri nhũm inhmã mē harënh o:

—Nà na pre mē hkwÿjaja Jejus ã mē homnuj tÿx kumrêx nē mē kupa. Tã mē kêp Jejus kwÿ jakamã na pre mē nē mē kot amnhĩ tomnuj o hapêx nē te amnhĩ kamrô ho mē nē mē kot amnhĩ tomnuj piitã kuhõnh par pyrãk o mē hipêx. Jakamã nhũm mē ê jaka kamã mex nē hkĩnh tÿx nē pa.

¹⁵ Nē Tĩrtũm kot mē pahto amnhĩptâr ã hkrĩ xà maati kutã kãm mex o mex ã harënh rãhã ho kuhê.

Na hte mē ho mex rãhã ho pa. Mē hkôt pa ho pa jakamã koja mēmoj tanhmã kêp mē ho hkêt nē.

¹⁶⁻¹⁷ Nē mē pahte amnhĩ tomnuj pãnhã amnhĩrer xwÿnh kot Tĩrtũm krĩ xà maati kamã ãm xwÿnhhta na hte mē hamãr mex rãhã ho mē hkôt pa.

Te mē kot mē hkrit jamãr mex pyrãk.

Nē te mē kot mē hkrit kôm o pa nhũm htĩr nē pa pyrãk.

Koja mē kuri htĩr tũm nē hkôt pa ho pa.

Nē axte kãm prãm kêt nē.

Nē axte kãm kôr kêt nē.

Nhũm arĩgro htÿxja axte mē hkà ho hxêt kêt nē.

Koja Tĩrtũm te mē kot mē hkra no kagô nhĩnhĩnh par pyrãk o mē hipêx nhũm mē axte hkaprĩ nē mÿr o pa hkêt nē.

Pãnhã hkĩnh nē mex rãhã kuri pa ho pa. Anë.

8

Kagà kaxkep o htÿx xà kot hitep jarënh

¹ Tã pa arĩ kaxkwa kamã mēmoj pumu nhũm mē pahte amnhĩ tomnuj pãnhã amnhĩrer xwÿnhja kagà kaxkep o htÿx xà kot hitepta pô. Hãmri nhũm kaxkwa kamã

mēmoj piitã hpinhkrênh pa nhũm mēhõ kapêr kêt kumrêx. Nē hpinhkrênh par o ra hã ahtũm ry mex nē.

² Hãmri nhũm Tĩrtũm kutã kapêr o wrÿk xwÿnh pê 7 nē mē kuhê xwÿnhjaja. Nhũm kapêr o wrÿk xwÿnhjê hõja mē hwÿr tē nē mē piitã mē kãm pifti gõ.

³⁻⁴ Hãmri nhũm kapêr o wrÿk xwÿnhjê hõja ôr o xijere py nē Tĩrtũm mã mēhkuxwa xà ho xêt xà hã mēs kunĩhti hwÿr o tē. Mē ho amnhĩptâr ã hkrĩ xà maati kutã ôr o mēstija wÿr o tē nē kuri o xa. Hãmri nhũm mē kãm kamã mēhkuxwa xà hkwÿ runh rax nē nhũm mēsti hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarënh to. Jakamã nhũm mēhkuxwa xà xêt kũm mē mē kot Tĩrtũm mã amnhĩ jarënh xàja mē nhũm ahkà nē Tĩrtũm kapêr o wrÿk xwÿnh nhĩhkra kamã xijere rũm Tĩrtũm kutã kàx mã àpir o pa.

⁵ Hãmri nhũm kapêr o wrÿk xwÿnhja xijere kamã kuwy hpôk kwÿ ho nÿt nē ahpar mã pika hwÿr kumē nhũm ma tē nē pikap tēm nhũm pika httert tÿx nē kamã na katõtök nē haxënh nē hkrakrak.

Mē kot pifti kakôr ã mē harënh

⁶ Hãmri nhũm Tĩrtũm kapêr o wrÿk xwÿnh pê 7 kot pifti jamÿnh xwÿnhjaja ra kot pifti kakôr mã.

⁷ Jakamã nhũm wamta ô pifti kakô nhũm na mē te kot jêr krã jakot pyrãk xwÿnh mē kuwy te kot mēmo kamrô kamrêk pyrãk xwÿnhhta pikap rôrôk pa. Nē nhÿhÿnh pika hkwÿ ho rax nē ho kaxàr pa. Nē pôti nē akunĩ hkwÿ ho rax kumrêx nē ho kaxàr pa.

⁸ Hãmri nhũm wam ãm xwÿnh nhĩjuk ri ãm xwÿnhja ô pifti kakô nhũm mēmoj te kên krã hprêk pôk pyrã nē kaxkwa rũm ahpar mã tē nē gô xujanãr nhĩkjê kamã hpôk rãhã tēn mrõ. Hãmri nhũm gô nhĩkjê kamã gõja mēmo hkamrô hã amnhĩ jahkre hpa.

⁹ Jakamã nhũm gôx kãm mēmoj htĩr nē ri mrar xwÿnhjaja pikaprãr pa. Nē gôx kãm pãr gô krãhkà hã pa xwÿnhja haxwÿja gjêx pa. Nē pãr kãm mē pa xwÿnhjaja haxwÿja hagjê nē pikaprãr pa. No nhũm gô mex kãm pãr kãm mē pa xwÿnhjaja mē kurom arĩ htĩr nē.

¹⁰ Tã nhũm wam ãm xwÿnhhta wa hijuk ri ãm xwÿnhja ô pifti kakô. Hãmri nhũm kanhêti rax kumrêxja axta nē hpôk o ma

ahpar mā tēn pikap tēm nē pyhti nē hino hkwỳ ho ohtô nē homnu hpa.

¹¹ Kanhêti nhīxi pē na pre “mēmoj xỳ xà” anhỳr jakamā nhūm tēm nē pyhti nē hino hkwỳ ho ohtô nē homnu pa. Nhūm prem hwỳr mra nē hkwỳ janhi nē ho ixkô nhūm y nē nhūm mē ohtô nē ho ixkô nē axkaprã.

¹² Hāmri nhūm hpānhã Tīrtūm kapēr o wrỳk xwỳnhjê hōja ô pifti kakô. Na pre ra ho axkrunēpxi nē hkakôr tâ hpānhã ra axte hō ja kakô. Hāmri nhūm mēhōja tē nē myyti kura nhūm hkwỳ ahtyk nē hirã hkêt nē. Nhūm mytwrỳre nē kanhêti mā ho anē nē myyti pyrã nē hkwỳ ahtyk nē hirã hkêt nē harir. Jakamā nhūm kamàt kām hirã mex kêt nē. Nē arīgro hã myytija haxwỳja hirã mex kêt nē.

¹³ Hāmri pa kaxkwa kamã ààn Hàhti pumu nhūm kỳx pē ri htor o pa pē tanhmã kapēr to nē kapēr o:

—Hêxta waa nē. Kormã kot pifti kakôr xwỳnhjaja axkrunēpxi nē kormã hkakôr kêt nē. Koja mē tokyx hkakô nhūm pika hkôt ri mē pa xwỳnhjaja amnhĩ xà htỳx kamã hamak tỳx o pa. Na pa tee ri mē hkukamã ijamaxpēr nē inhmã mē hkaprĩ htỳx nē. Hêxta waa nē. Koja mē omnuj tỳx kumrêx. Anē.

9

¹ Tã pa axte mēmoj pumu. Nhūm Tīrtūm kapēr o wrỳk xwỳnhjê hō ô pifti kakô. Na prem ra ho kwat nē hkakôr tâ hpānhã axte hōja ja kakô. Hāmri nhūm kanhêti hō axta nē pikap tēm kurê kumrêx nhūm mēhōja omu nē hwỳr tē nē kām mēmoj tâ saf gō. Satanasti jagjênh xà hã ahkre xupỳm o htỳx xà hã safja nhūm kanhêti mā kugō.

² Hāmri nhūm kupy nē ahkrehtita wỳr o tē nē kahê xà mē nhūm kurūm kuwy hkūm hapôx rax nē. Nē ma kàx mã àpir o pa nē myyti hpro hpa nhūm kamàt kô rax kumrêx.

³⁻¹¹ Nē kuwy hkūmjã rūm mēmoj te krit pyrãk xwỳnh kwỳjaja pikap rôrôk nē kuhê. Te kot krit pyrãk tâ mē hkuk te panhĩ hkuk pyrãk. Nē mē hkrã hkĩ te mēnijê hkrã hkĩ japjê pyrãk. Nē ôr o mē ahkã jagjê. Nē mē wa japjê htỳx kumrêx. Te rêãwti xwa japjê pyrãk. Nē kàx o mē hinô hkã. Nhūm mē htor o hara hkoko htỳx o mra.

Te ho kawar xohtô pijapu kaxyw kot mē hkjênh xà kamã mē htur nē mē hkjênh o hprôt nhūm hkoko htỳx pyrãk. Nē mē hkamnhwỳr o pa kaxyw mē hanhyja te kot makre janhy pyrãk. ã kriitija kot anhỳr. Nē te nhỹhỹm oprê kaxyw nojarêt nē mē hkrit kawar hã hikukrêx mex rēnh pyrãk. Mēo pahija ahkre xupỳmta kamã kēp mē hkrãhtūm. Ijaew kapēr kām hixi pē “Ap-atô.” No Gres kapēr kām kēp “Aporiãw.” No mē pakapēr kām kēp “mē hpar o pa xwỳnh.” Hāmri nhūm Tīrtūm kriiti mā kapēr nē mē kām:

—E kēr ka mē ma pika piitã hkôt te makre kot amnhĩ nhĩpêx pyrã nē ri mē hkôt mē hkamnhwỳr o apa. ã amnhĩ nhĩpêx anhỳr o mē atã mytwrỳ pē sĩk. No ãm kēr ka mē hpar kumrêx kêt nē. ãm mē kot amnhĩ xà htỳx kām hamak pix kaxyw tanhmã mē ho ho apa. Te makre kot mē hkamnhwỳr nhūm à htỳx kumrêxta pyrãk. No mē ate mē hkamnhwỳr nhūm mē hkamnhwỳr xàja koja à htỳx o makre kot mē hkamnhwỳr jakre. Nom ra mē kot Tīrtūm kra hã mē hkagã xwỳnhjaja kēr ka mē omu nē ãm mē omu nē tanhmã mē ho hkêt nē. Mē kēp ixkwỳ na mē. Nē pō nē prãt ka mē ãm omu nē tanhmã ho hkêt nē. ãm mē kot panhĩ nhōkrã kagã hkêt xwỳnh pixjaja ka ã mē hipêx anhỳr o ri mē hkôt apa. Nom kēr ka mē hpar kêt nē. Kê mē tee ri amnhĩ xà hã maj kām tokyx htyk nē hapêx prãm hkaprỳ ho pa. E ma mē hwỳr mra nē ã mē hipêx anhỳr o ri apa. Anē.

Hāmri nhūm mē kuma nē ma mē hwỳr mra.

¹² Na ra pika hkôt wam mē homnu xà pyxi nē hapêx. No ãm arĩ hamêxkrut.

¹³ Jakamã nhūm Tīrtūm kapēr o wrỳk xwỳnhjê hōja axte ô pifti kakô. Na prem ra ho sĩk nē hkakôr tâ axte hkôt hōja hkakô. Nhūm Tīrtūm kutã ôr o mēsti rūm mēhōja tanhmã kapēr to. Mēsti janhá rūm kapēr.

¹⁴ Pifti kakôr xwỳnhhta mã kapēr nē kām:

—E na ra mē kot mē hkwỳjê nhĩmex ã arīgrota kato. Jakamã kēr ka ma pyhti pē Erax wỳr wrỳ nē gō mỳ ri Satanasti mã mē àpēnh xwỳnh pē kwatja pumu. Na prem ra mē hpa hpre nhūm mē gō mỳr ri arĩ hkrĩ ho hkrĩ. Ka mē omu nē mē kām mē hpa hpre

xà hpôt pa kê mẽ ma mẽ hkôt ri mẽ hpar o pa. Anẽ.

¹⁵ Na pre ra Tirtũm mẽ kot mẽ hkwỳjê nhĩmex o pa kaxyw mẽ kurê nẽ gô mỳ ri mẽ unhwỳ nhũm mẽ kormã mẽ hpar xà hã arĩgro jamãr o hkrĩ. Jakamã nhũm ã pifti kakô xwỳnhhta mã mẽ harẽnh anẽ nhũm kuma nẽ ma tẽ nẽ mẽ hwỳr wrỳ nẽ mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nẽ mẽ ho ohtô rax kumrẽx nẽ mẽ himex.

¹⁶ Nẽ ma amnhĩ kôt pôristi ho ohtô rax nẽ o pa. Piitã kawar ã hkrĩ nẽ mẽ hkôt hprôt nẽ hkoko ho mra. Mẽ kệp 200.000.000 hã mẽ harẽ pa mẽ harẽnh ma. Mẽ ohtô rax o mẽ ohtô rax.

¹⁷ Na pa pre arĩ te ixpimtir kãm mẽ omunh pyrãk. Nhũm kawar ã mẽ hkrĩ xwỳnhjaja. Mẽ hinô kàja axtem kàx o. Nẽ hkamrêkja te kuwy hpôk kamrêk pyrãk. Nẽ rãrãrja te mẽ hkurôt kane xà pẽ êsôf rãrãr pyrãk. Nẽ kakrã htyk. ã kàx o mẽ hinô hkà kot anhỹr. Nẽ mẽ hkrit kawarti hkrãja te rêãwti krã pyrãk. Nẽ mẽ hakwa rũm kuwy hpôk mẽ êsôfti mẽ kuwy hkũm axpẽn kôt hapôx o pa.

¹⁸⁻¹⁹ Nẽ kawarti jamy axtem te kệp kagã xoprê hkrã pyrãk nhũm mẽ hamy ho mẽ hkamnhar o mẽ kupa. Nẽ mẽ hakwa rũm kuwy hkũm mẽ kuwy hpôk mẽ êsôfti hapôx xwỳnhhta mã mẽ ho anẽ nẽ. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nẽ mẽ ohtô rax kumrẽx nẽ mẽ himex.

²⁰⁻²¹ Tã nom nhũm arĩ mẽ htĩr nẽ ri mẽ pa xwỳnhjaja. Mẽ kot mẽ hkwỳjê hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pẽ hprô nẽ mjên o amnhĩkati nẽ axpẽn pẽ ahkĩ. Nẽ axpẽn par o ri pa nẽ tanhmã axpẽn xy hto ho pa. ã htỳx ri amnhĩ nhĩpêx anhỹr o pa nẽ kãm urer kêt nẽ. ãm Satanasti hkôt pix mã ri amnhĩ nhĩpêx o pa. Nẽ amnhĩm sãnti hkwỳ nhĩpêx. Pĩ ho hipêx nẽ kàx o hipêx nẽ kẽn o hipêx. Nẽ hipêx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrrar nẽ mẽ ho utàr kaxyw mo hte? Na htem arĩ ã amnhĩ to hwỳr kaprỳ anhỹr o pa.

10

Kagà kaxkep grire jarẽnh

¹ Tã pa arĩ mẽmoj pumu. Nhũm axte Tirtũm kapêr o wrỳk xwỳnh xihtỳxjê hõja pika hwỳr wrỳk o tẽ. Nẽ êja kakrã ho na pre. Nẽ hkrã mỳ ri màxwỳxti ajêt. Nẽ hkuk te myt no kamã hirã htỳx pyrãk. Nẽ akutã hte kamã te kuwy hpôk pyrãk.

² Nẽ ãhkra kamã kagà kaxkep grire ra pipôt nhũm ma o tẽ nẽ o wrỳ nẽ o xa. Nẽ gô xujanãr kãm upôk rũm hte xãm nẽ kỳx pẽ amgrã kamã apke rũm hte xãm nẽ o xa pa ixprĩ hã omu.

³ Hãmri nhũm kàx pêê amỹra. Te rêãw hkàr tỳx pyrãk. Nhũm hpãnhã kaxkwa kamã mẽhõja kãm kapêr. Te na katôtok o 7 wês pyrãk pa ixprĩ hã tanhmã kapêr to hã kuma.

⁴ Hãmri nẽ ra mẽ amã ã kagà kaxyw nhũm mẽ ja nẽ inhmã kapêr nẽ inhmã:

—Kwa nà kwarĩ ja kot kaj hã kagà hkêt nẽ. ãm ja pix kot kaj akwỳjê mã hã kagà hkêt nẽ. ãm kapxipix mãn ama nẽ ri hã apa.

Anhỹr jakamã pa mẽ amã hã kagà hkêt nẽ. ãm papxipix kuma nẽ ri hã ixpa.

⁵ Tã nhũm Tirtũm kapêr o wrỳk xwỳnh kot gô xujanãr kãm upôk rũm hte xãm nẽ apke amgrã kamã ãm xwỳnhhta hãmri Tirtũm nhỹ hã kapêr kaxyw nẽ kãnhmã ãhkra pẽ.

⁶⁻⁷ Tirtũm pẽ kaxkwa nẽ pika nẽ gô xujanãr o kator nẽ kamã kot mẽmoj piitã ho kator xwỳnhja. Nẽ htĩr rãhã nẽ pa ho pa xwỳnhja. Nhũm ã hã kapêr nẽ kapêr o:

—E hãmri. Amnepê mã na pre Tirtũm ã hã mẽ kãm kapêr o ri mẽ pa xwỳnhjê mã tanhmã amnhĩ kukamã amnhĩ jarẽnh to. Tanhmã kot pika piitã hkôt mẽ pa xwỳnhjê nhĩpêx to hã amnhĩ jarẽ. Nẽ mẽmo arĩgro hã mẽ kot amnhĩ tomnuj mỳrapê tanhmã kot mẽ hipêx to hã mẽ hkukamã mẽ hã amnhĩ jarẽ. Tã ra ã mẽ hipêx anhỹr xà hã arĩgro kato. Jakamã koja kapêr o wrỳk xwỳnh kot hitepta ò pifti kakô hãmri nhũm mẽmojja ã amnhĩ nhĩpêx anhỹr kurê kumrẽx. ãm hãmri na pa mẽ amã ja jarẽ. Anẽ.

⁸ Pa mar o ixãm rôm nhũm wam inhmã kapêr xwỳnhhta axte inhmã kapêr nẽ inhmã:

—E ma pika hwỳr wrỳ nẽ gô xujanãr kãm upôk rũm hte xãm nẽ amgrã kamã apke

rũm hte xãm xwỳnhhta wỳr tẽ nẽ kệp kagà kaxkep grire pipôt xwỳnhhta py. Anẽ.

⁹ Hãmri pa kuma nẽ ma hwỳr wrỳ nẽ hã kuwỳ nhũm inhmã kugõ nẽ inhmã:

—E mĩ. Apy nẽ akrẽ. ànhre. Te kot menh xành pyræk. Nom kot kaj akrẽ nẽ anhõhy xà. Nom mãmri apy nẽ akrẽ. E mĩ. Anẽ.

¹⁰ Hãmri pa kệp kupy nẽ hkaki nhũm ànhre. Pa hkrẽr pa hãmri nẽ inhõhy xà kurẽ kumrẽx.

¹¹ Hãmri nhũm kot inhmã õr xwỳnhhta inhmã:

—Nà ãm hãmri na ka apy nẽ akrẽ. Jakamã kêr ka ano ho ate mẽmoj piitã omunh xwỳnhja nẽ ajamak o ate mẽmoj mar xwỳnhja nẽ ate tanhmã Tĩrtũm kapẽr mar toja ka piitã hã kagà hpa. Hãmri nẽ ate omunh xà hkôt akwỳjê mã piitã harẽnh o apa. Mẽ kot nhỹrmã Tĩrtũm kot tanhmã mẽ piitã mẽ hipêx to hã harẽnh mar kaxyw. Ahpỹnhã ri pika piitã hkôt mẽ urojê piitã koja nhỹrmã ã mẽ hipêx anẽ. Ahpỹnhã ri mẽ kapẽr xwỳnh piitã. Nẽ mẽ õ pahijaja. ãm mẽ piitã koja nhỹrmã ã mẽ hipêx anẽ. Anẽ.

11

Tĩrtũm nhỹ hã kapẽr xwỳnh pijakrut wa harẽnh

¹ Tã nhũm mẽhõj inhmã mẽmoj to mĩdi xà hã pĩ ryre gõ nẽ inhmã:

—E ja py nẽ Jerujarẽ hwỳr wrỳ nẽ kamã Tĩrtũm mã amnhĩ jarẽnh xà hã ixkreja o mĩdi. Nẽ ixkre kamã amnepẽm mẽ kot amnhĩ tomnuj pãnhã Tĩrtũm mã õwêhti nhõr xà hã mẽstita mã ho anẽ nẽ ho mĩdi. Nẽ ixkre kamã mẽ kot Tĩrtũm mã amnhĩ jarẽnh o mẽ hkrĩ xwỳnhjaja ka aprĩ hã mẽ ho kõta.

²—No ixkre kapem pikaja ka ho mĩdi hkêt nẽ. Ra Tĩrtũm kot mẽ kot amnhĩ tomnuj xwỳnhjê mã hkaga jakamã koja mẽ htỳx ri kãm hprãm xà hkôt tanhmã homnu hto ho pa. Nẽ Jerujarẽ piitã hkôt ri homnu ho paja ã hã amgrà axkrunẽpxi nẽ hkôt mytwrỳ kệp 6.

³—Koja Tĩrtũm ma ÿ hã kapẽr xwỳnh ho hamẽxkrut nẽ mẽ hwỳr wa kumẽ nhũm wa ma mẽ hwỳr wrỳ nẽ mẽ kãm Tĩrtũm kapẽr jarẽnh o ri mẽ hkôt pa. Hãmri nẽ tee ri mẽ kot tanhmã amnhĩ tomnuj to hã mẽ

omu nẽ hkaprĩ nẽ. Hãmri nẽ wa hkaprĩ xàj xak punure kaxô nẽ haxà nẽ mẽ kãm Tĩrtũm kapẽr jarẽnh o ri wa pa hã amgrà axkrunẽpxi nẽ hkôt mytwrỳ kệp 6. Jakamã e. Pĩja py nẽ ma mẽ hwỳr wrỳ nẽ ixkreta o mĩdi. Anẽ.

⁴ Wa pijakrut wa kot Tĩrtũm nhỹ hã kapẽr jarẽnh o wa pa xwỳnhhta wa. Na htem wa kot amnhĩ nhĩpêx ã wa harẽnh ma nẽ mẽmo pĩ hpàr pẽ oriwêhti kot tanhmã amnhĩ nhĩpêx toja mã hamaxpẽr kurẽ kumrẽx. Nẽ amnepẽm Tĩrtũm nhỹ hã kapẽr o pa xwỳnh pẽ Jakaris kot kanê hpòk xãmta mã mãânẽn hamaxpẽr. Oriwêhti xõja htwỳm rax kumrẽx nhũm htem htwỳm opõj nẽ ho kanê ho nýt nẽ hpòk nẽ kỳx pẽ unhwỳ nhũm mẽ piitã hirã kamã rĩt mex o ri mra. Nẽ kanê hpòk mexja te kot Tĩrtũm kapẽr pyræk. Nẽ kanê xãm xàja te kot Tĩrtũm nhỹ hã kapẽr jarẽnh o wa pa xwỳnhhta wa uræk. Nẽ oriwêhtija haxwỳja te kot wa uræk. Ra Tĩrtũm Karõ kot wa hkarõ mã àr jakamã na hte wa hprĩ hã mẽ kãm Tĩrtũm kapẽr jarẽnh o pa nhũm mẽ kot mar xwỳnhjaja te kanê nhĩrã kamã ri rĩt mex nẽ ri pa pyrã nẽ hprĩ hã mar tỳx nẽ.

⁵ Tã koja mẽhõ tanhmã wa hipêx to kaxyw wa hwỳr tẽ nhũm wa hakwa rũm kuwy hpòk kato nẽ kot tanhmã wa ho mã xwỳnhhta o hxêt o kupĩ.

⁶ Nẽ koja wa Tĩrtũm xàhpumunh tỳx xà ho tanhmã ri mẽ hã mẽmoj nhĩpêx to pẽ mẽ kãm kapẽr jarẽnh o ri mẽ hkôt pa. Jao tanhmã na hto nhũm mẽ hã wrỳk kêt ry nẽ. Rỳ tanhmã mẽ kệp gõ hto nhũm mẽ hkamrõ hã mẽ kệp amnhĩ jahkre. Koja wa ã Tĩrtũm nhỹ hã mẽ kệp mẽmoj nhĩpêx anhỹr ho wa pa. Nẽ xatã wa kãm hprãm xà hkôt tanhmã mẽmoj tomnu hto.

⁷ Nẽ mẽ kãm kapẽr o pa pẽ ã mẽ hipêx anhỹr o wa hã amgrà axkrunẽpxi nẽ hkôt mytwrỳ kệp 6 nẽ rĩ kormã ho hapêx. Hãmri nhũm ahkre xupỳm rũm Satanasti nhõ kôwenatõja kato nẽ ma wa hwỳr tẽ nẽ nhỹri pry kahti ri wa unẽ nẽ wa kupĩ nhũm wa pry kamã ty nẽ nõ.

⁸ Hãmri nhũm mẽ wa haxàr kêt nẽ nhũm wa arĩ pry kamã nõ. Krĩ kapem na prem pĩ kahpa hã Jejus nhõ nẽ kupĩ. Krĩ nhõ xwỳnhjaja mẽ kot amnhĩ tomnuj tỳx xwỳnh na mẽ. Te ho amnepẽm krĩ pẽ Sotõ mẽ pika

pê Ejit kamã mẽ kot amnhĩ tomnuj xwýnhjê kot amnhĩ nhĩpêx pyræk.

⁹ Jakamã nhũm mẽ kot wa haxàr nè axpèn kurê nhũm wa pry kamã arĩ ty nè nõ nhũm mẽ piitã wa hwýr mra nè wa omu. Nè ahpýnhã krĩ piitã hkôt mẽ pa xwýnhjaja tanhmã amnhĩ to nè ja hã wa omu. Ahpýnhã ri pika piitã hkôt mẽ urojaja. Nè ahpýnhã ri mẽ kapër xwýnh piitã. Hãmri arĩ ahpýnhã mẽ õ krĩ kamã pa htã tanhmã amnhĩ to nè wa htyk ã wa omunh ã hã apkati axkrunèpxi nè hkôt hã myt apha.

¹⁰ Koja mẽ wa htyk ã wa omu hãmri nè hkĩnh nè. Nè hkĩnh xàj axpèn mã hkĩnh xà nhõr o pa. Wa kot kormã htĩr ri tanhmã mẽ homnuj to ho ri mẽ hkôt paja mã hamaxpër nè wa htyk ã wa omu nè hkĩnh tỳx nè.

¹¹ Tã koja wa htyk ã apkati axkrunèpxi nè hkôt hã myt apha hãmri nhũm Tĩrtũm wa kamã htyxà rē nè akupým wa ho wa htĩr nhũm wa kànhmã xa nè ri mra. Hãmri nhũm mẽ kot wa omunh xwýnhjaja tee ri hã wa omu nè kãm wa uma htỳx kumrèx. ãm kãm wa uma ho kãm wa uma.

¹² Hãmri nhũm kaxkwa kamã mēhõja wa kãm kapër nè wa kãm:

—E war amnē mẽ ixwýr war api. Anē.

Hãmri nhũm wa kuma nè ma kakrã kamã àpir o mō. Nhũm mẽ kãm wa hkurê xwýnhjaja tee ri wa àpir ã wa omu.

¹³ Hãmri nhũm pika htertèt tỳx nè. Nè krĩ kamã ixkre ohtō nè grành pa nè mẽ hkwy nhĩmex rax nè nhũm mẽ ohtō rax kumrèx nè axkaprã. Mē kèp 7.000 nè pikaprãr pa. Hãmri nhũm arĩ mẽ htĩr nè ri mẽ pa xwýnhjaja tee ri mẽ omu nè kãm ma xàj htertèt tỳx nè axpèn mã:

—Kwa Tĩrtũm mãn ã mẽ panhĩpêx anē. Hihtỳx o hihtỳx jakamã kaxkwa rũm ã mẽ panhĩpêx anē pu mẽ pahpiitã pano ho ixkre pigrành ã omu. Anē.

¹⁴ E na ra amnhĩ xà htỳx kamã hamak xàja hamèxkrut nè hapêx. Tã no ãm arĩ mẽ kaxyw pyxi nè arĩk.

*Mẽ kot pifti kot hitep kakô ã harēnh
Apokarip 4.8, 5.9-14, 7.9-12, 14.2-5, 15.3-4, 19.1-2*

¹⁵ Tã nhũm Tĩrtũm kapër o wrỳk xwýnh kot hitepja õ pifti kakô nhũm kaxkwa kamã mẽ pa xwýnhjaja kàx pē kapër o:

E ãm hãmri. Na ra Mēpahpãm Maati mẽ Jejus Krisja wa kèp krĩ piitã hkôt mẽ piitã mẽ õ Pahihti na wa.

Koja Mēpahpãm Maati kèp Pahi Maati rãhã nè pa ho pa xwýnh. Anē.

¹⁶ Hãmri nhũm mẽ àptàr tũm pē 24jaja. Tĩrtũm kot mẽ pahto amnhĩptàr o hkrĩ xà mã hipòk nè mẽ hkrĩ xwýnhjaja. Hãmri ã mẽ kapër anhýrja ma nè Tĩrtũm ã hpijaàm kaxyw hpar pē rôròk pa nè htu mýr pē hikwý. Hãmri nè kãm mex o mex ã harē nè kãm:

¹⁷ Pa Pahi Maati Tĩrtũm. Nà ãm hãmri mẽ ixrom axàhpumunh o axàhpumunh nè axihtỳx o axihtỳx.

Amnepê mã kormã mēmoj kêt ri na ka pre arãhã apa ho apa.

Tã arĩ arãhã apa ho apa.

ãm hãmri apê mẽ ixpiitã mẽ ixto amnhĩptàr xwýnh. Nà ãm hãmri amex o amex.

¹⁸ Kot kaj tokyx mẽ piitã tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harēnh to.

Nè ra mẽ htyk xwýnhjaja kot kaj mẽ piitã akupým mẽ ho mẽ htĩr pa nhũm mẽ pika rũm hapòx pa nè ma mra nè arĩ mẽ htĩr xwýnhjê nhĩhkô hã akutã hkrĩ pa.

Ka mẽ piitã mẽ omu nè tanhmã mẽ kot amnhĩ nhĩpêx to ho pa hã mẽ omunh hkôt tanhmã mẽ harēnh to.

Mẽ kot amnhĩ tomnuj xwýnhjaja kot kaj ma mẽ kot amnhĩ xà htỳx kamã hamak o pa htũm xà hwýr amnhĩ nè mẽ arē nhũm mẽ ma hwýr hapêx. Hãmri nè tee ri amnhĩ kukamã hamaxpër nè gryk tỳx kumrèx.

Ka hpãnhã mẽ kot akôt amnhĩ xunhwýr nè akapër kôt amnhĩ nhĩpêx o mẽ pa xwýnh piitã mẽ omu nè tanhmã mẽ ho mex to.

Mẽ kot amnhĩ to rũnh xwýnhjaja nè mẽ kot amnhĩ to hkryre xwýnhjaja.

Nè amnepêm mẽ kot anhý hã mẽ kapër o mẽ pa xwýnhjaja.

Akrajê piitã kot atã hpijaàm xwýnhjaja kot kaj kormã mẽ htĩr ri tanhmã amnhĩ to mex hã mẽ omunh xà hkôt tanhmã mẽ ho mex to.

ã kot kaj tokyx mẽ piitã ahpýnhã mẽ omunh xà hkôt mẽ hipêx anē. Anē.

19 Hāmri nhūm kaxkwa kamā Tīrtūm nhōrkwỹ hā hakwakre kahê xà amnhĩ mē pa kamā ôr o mēs kunih̄tita pumu. Pu nhūm na hkatōtōk nē haxēnh nē hkrakrak nē na mē te kot jêr krā hakotre pyrāk xwýnhja pikap rôrōk rax nē. Nē pika htertēt tỳx o htertēt tỳx pa arĩ omunh o xa.

12

Mēhō ni mē kagānuti wa harēnh

1 Tā pa axte mēmoj pumu. Kaxkwa kamā aa mē pahte mēmoj pumunh kêt xwýnhja pa omu. Nhūm mēhō nija xē te myt no mā hirā htỳx pyrāk. Nē hpar nhōkwa kamā mytwrỹre ajêt. Nē kanhêti ho 12 o mē ahkà tu nē o xa.

2 Na ra htujarô nē hpijagri kaxyw ôhy xà nē amnhĩ kamnhêr o xa.

3 Tā pa axte mēmoj pumu. Aa mē pahte mēmoj ã kot anhỹr pumunh kêt xwýnh ôja pa omu. Kagānuti nom âm axtem hkà kamrêk tỳx kumrêx. Nē rax kumrêx. Nē hkrā kêp 7. Nē hkrā piitā kamā ôr o pahi hā mē ahkà htu nē o nō. Nē hkrā kamā pàr kêp 10.

4 Tā nhūm hamy ho apêr o kaxkwa kamā kanhêti ho ohtô nē pikap kurê. Hāmri nē ôhy xà nē amnhĩ kamnhêr o âm xwýnhhta wýr tē nē hkra kator nhūm kot kêp krêr kaxyw kutā hamār o nō.

5 Hāmri nhūm hkra kato nē myre. Hihtỳx o hihtỳx ã kot pika piitā hkôt mē piitā mē ho amnhĩptār mā xwýnh na pre. Nhūm kagānutija kot kêp utār nē hkrêr mā tā nhūm Tīrtūm kapêr o wrýk xwýnhjê hōja hwýr wrý nē kêp kumy nē ma Tīrtūm wýr kaxkwa kamā kot mē pahto amnhĩptār ã hkrĩ xà maatija wýr ho api.

6 Hāmri nhūm kagānuti tee ri ma kot kêp o mōr ã omu nē hpānhā nita o apkjê nē kot tanhmā ho kaxyw nhūm amnhĩ tā omu nē umaj hprôt nē ma tē nē nhỹri kapôt ã amũxu. Ra Tīrtūm kot hkukamā kām hpimxur xà nhĩpêx xà hwýr hprôt nē ma tē nē kamā kêp amũxu. Nhūm Tīrtūmja nē kagā pumunh mex nhūm kêp hpimxur mex ã amgrà axkrunêpxi nē hkôt hā mytwrỹ kêp 6.

Mē kot kaxkwa kamā mēkarōnuti kurê kaxàr ã mē harēnh

7 Tā nhūm mē ra kaxkwa kamā kurê kaxàr kaxyw. Kagānuti mē hkwyjaja nhūm mē ra Tīrtūm kurê kaxàr kaxyw kutā amnhĩ xunhwý. Jakamā nhūm Tīrtūm kapêr o mē wrýk xwýnhjê hkrāhtūm Mikewja ma mē hwýr amnhĩ kôt hkwyjê o mra nē mē pijapu ho kuhê.

8 Hāmri nhūm kagānuti tee mē kutā amnhĩ to htỳx kaprý nhūm Tīrtūm kapêr o mē wrýk xwýnhjaja amnhĩ nē mē ho axtem nē kaxkwa rūm mē kator o mē kator.

9 Satanasti pē kagānutita kagā kot ni kator ewa mā hêx xwýnh na pre. Nē hêx rom tanhmā hêx to ho pa xwýnh. Jakamā nhūm Mikew mē hkwyjaja hkwyjê mē mē ho hpimràatā amnhĩ nē pikap mē rēnh pa.

10 Hāmri nhūm kaxkwa kamā mēhōja axte kàxpê kapêr nē kapêr o:

E âm hāmri. Na ra Tīrtūm hihtỳx o hihtỳx o mē panê mēmoj punuj piitā ho hapêx par kumrêx.

Na pre hte Satanasti pē mēkarōnutija xatā hwýr mra nē kām tanhmā Jejus kwýjê ho kapêr punuj to ho pa.

Tā koja axte mē ho kapêr kêt kumrêx. Ra Tīrtūm kot amnhĩ nē kator o kator nhūm ra ma mōr o mōr kênā.

Koja Tīrtūm pika piitā hkôt mē ho amnhĩptār xwýnhjê japôx pa nē hpānhā mē kaxyw Kra Krisja xām nhūm pika piitā hkôt mē ho amnhĩptār rāhā ho pa.

Nà âm hāmri. Ja mex o mex.

11 Na pre Jejus kôt mē pahtō nē mē pahtōxjaja mēkarōnuti kutā amnhĩ to htỳx nē pa. No âm amnhĩ nhỹ hā ã kutā amnhĩ nhĩpêx anhỹr kêt.

Mē pahte amnhĩ tomnuj pānhā amnhĩrer xwýnhhta na pre ty nē hkamrô ho mē kuhō nē mē nē mē kot amnhĩ tomnuj o hapêx.

Jakamā nhūm prem kukwak ri Satanasti kutā amnhĩ to htỳx rāhā pa.

Nhūm mē kot Jejus ã mē himex par kaxyw tā nhūm mē kām htyk pyma hkêt nē. Âm Jejus kôt arĩ amnhĩ to htỳx nē mē hkôt pa rāhā nē.

Jao arĩ mē kām Jejus kot mē panê tanhmā amnhĩ nhĩpêx to hā harēnh o ri mē hkôt pa.

12 Tã Tĩrtũm ra kot mẽ panê mẽmoj punuj o hapêx par jakamã kwa kaxkwa kamã mẽ apa xwýnhjaja kêr ka mẽ akĩnh nê apa.

Nom gô xujanãr kãm nê pika kamã mẽ pa xwýnhjaja hêxta waa nê. Koja mẽ mex kêt nê.

Nê ra Mikew mẽ hkwýjaja kot amnhĩ nê kaxkwa rũm mẽkarõmnuti mẽ hkwýjê kator nê pikap mẽ rênh par jakamã nhũm Satanastija gryk tỳx kumrêx.

Tĩrtũm kot ma mẽ kot amnhĩ xà htỳx kamã hamak o pa tũm xàta wỳr mênh xà hã arĩgro hwỳr amgrà grêre nhũm tee ri amnhĩ kukamã hamaxpêr nê gryk tỳx o gryk tỳx. Anê.

13 Hãmri nhũm kagãmnutija mẽ kot amnhĩ nê kaxkwa rũm kator ã amnhĩ pumu nê gryk tỳx nê. Nê gryk xàj ma akupỳm ni kot hkra myre ho pijagri xwýnhta wỳr tẽ nê tanhmã ho kaxyw hkôt ho krihkrit.

14-16 Hãmri nhũm Tĩrtũm kapêr o mẽ wrỳk xwýnhjê hõja omu nê nija mã àanhàhti jara gô. Kot kagãmnuti pê ho htor nê ma nhỹri hpimxur xà wỳr htêm kaxyw. Nê kormã htor kaxyw nhũm kagãmnuti omu nê kot gô ho hanhir kaxyw hkôt hakwa rũm gô kapĩ nhũm hpikapĩr rax kumrêx. Te pyhti hprôt tỳx pyrãk. Hãmri nhũm Tĩrtũm omu nê nija nê tanhmã pika hto nhũm kãm axkjê nhũm gô hprôt nê kamã pikapĩr pa. Jakamã nhũm mex pê àanhàhti jara ho to nê ma kapôt ã pimxur xà hwỳr ma tẽ. Nê kamã pa hã amgrà axkrunêpxi nê hkôt mytwrỳ kêp 6 nhũm prem hamãr mex rãhã ho pa.

17 Hãmri nhũm kagãmnuti tee ri kãm hpĩr prãm kaprỳ nê gryk tỳx kumrêx. Hãmri nê ma ni hkwýjê hwỳr mō. Mẽ kot Tĩrtũm mẽ Jesus wa hkôt amnhĩ nhĩpêx o mẽ pa xwýnhjê hwỳr tanhmã mẽ homnuj to kaxyw ma mẽ hwỳr mō. Hãmri nê tanhmã kot mẽ ho kaxyw gô xujanãr mỳ ri nō.

13

Satanasti nhõ kôwenatô wa kot gô xujanãr rũm kator ã wa harênh

Sikũn Tesarõn 2.3-5

1 Tã pa axte mẽmoj pumu. Nhũm gô xujanãr rũm Satanasti nhõ kôwenatôjê hõja te mrymnuti pyrã nê àpir o mō. Kagãmnuti

pyrã nê hkrã kêp 7. Nê urak nê hpàr kêp 10. Nê hpàr piitã kamã pahi hã mẽ ahkà. Nê ahkà piitã hã axtem tanhmã Tĩrtũm o kapêr punuj to nê tanhmã haprỳ hto hã kagãja hikwỳ.

2 Nê hkà te kêp ropkrorti kà pyrãk. Nê hakwa te kot rêãwti jakwa pyrãk. Nê ìhkra te kot pàati nhĩhkra pyrãk. Jakamã na pre kagãmnuti nhỹ hã hihtỳx o kêp pahi hã pika nhõ xwýnhjê ho amnhĩptàr o pa.

3 Nê hkrã hõ te mẽ kot hayr o hpĩr nhũm ra akupỳm htĩr nê arĩ hayr xà wakre rã nyw pyrãk. Jakamã nhũm pika kamã mẽ pa xwýnhjaja amnhĩ jaêr pê omu nê kamã no puma nê. Hãmri nê hkôt amnhĩ nhĩpêx o pa.

4 Hãmri nê kagãmnuti kot tanhmã mrymnuti ho nhũm ÿ hã mẽ ho amnhĩptàr jakamã nhũm mẽ piitã hamê wa hã hpijaam kaxyw wa kãm wa mex o wa mex ã wa harênh o pa. Nê mrymnuti hã axpên mã:

—Hêxta waa nê. Mẽ pahtô na mẽ pahte mrymnutita pyrã nê ã mẽ pahte amnhĩ nhĩpêx kot anhỹr? Mẽ pahtô kot pu kutã xa nê paxihtỳx o hkurê kapa? Nà amrakati kumrêx. Anê.

5-6 Hãmri nhũm Satanasti tanhmã mrymnuti ho nhũm kapêr o ri mẽ hkôt pa nê mẽ ho amnhĩptàr o hã amgrà axkrunêpxi nê hkôt mytwrỳ kêp 6. No ãm axtem nê Tĩrtũm o kapêr punuj o ri mẽ hkôt pa. Nê ri tanhmã haprỳ hto nê õ krĩa mex kêt ã harênh o ri mẽ hkôt pa.

7 Hãmri nhũm Satanasti ra kot mẽ hkurê kaxàr kaxyw kãm anê nhũm axtem nê Tĩrtũm pê hkrajê kutã amnhĩ xãm nê mẽ hwỳr hprôt nê tanhmã hpijapu hto ho pa nê mẽ ho axtem nê mẽ ho krihkrit pa nê ahpýnhã ri pika piitã hkôt mẽ uro hkwýjê ho amnhĩptàr o pa. Nê ahpýnhã mẽ kapêr xwýnh piitã mẽ ho amnhĩptã.

8 Jakamã nhũm mẽ ohtô rax kumrêx nê mrymnuti hkôt amnhĩ nhĩpêx. Nê kutã hkõn krã ho rôrôk nê hkrĩ nê kãm mex o mex ã harê. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwýnh kôt ra mẽ kot amnhĩ xunhwỳr xwýnhjaja tapxipixjaja na prem hkôt amnhĩ xunhwỳr kêt nê. Amnepê mã kormã amrakati ri Tĩrtũm mẽ Jesus wa õ kagã kamã mẽ htĩr tũm nê mẽ pa mã xwýnh nhĩxi

xwýnh pixjaja na prem mrymnuti pumu nê hkwýjê rom hprî hã kot amnhî nhîpêx ã omunh kurê kumrêx nê hkôt amnhî nhîpêx kêt nê.

⁹ E ka mẽ atõ axumar kaxyw ajamak kre hã kot kaj ixujarênh piitã ama nê kãm ajamaxpêr tỳx rãhã ho apa.

¹⁰ Jakamã kwa Tirtũm kôt ixkwýjaja. Kwãr mẽ mãmrî mẽ apynê nê mẽ ajagjê.

Nê kwãr mẽ mãmrî wapo ho mẽ ajayr o mẽ apa.

Nom kêr ka mẽ umaj ixkaga hkêt nê. Ixkaga hkêt o ixkaga hkêt.

Mê ãm ixkôt pix mã amnhî nhîpêx o ri apa rãhã ty.

Pika rũm mrymnuti hõ kator ã harênh Makre 13.22

¹¹ Tã pa mrymnuti hõ pumu. Nom wamta pyrã nê gô xujanãr rũm kator kêt axtem pika rũm kato. Nê ôwêhti hkrare pyrã nê hpàr pijakrutre. Nê te ho kagãmnuti kapêr tỳx pyrã nê kapêr tỳx kumrêx o pa.

¹² Gô xujanãr rũm mrymnuti xàpir xwýnhhta nhỹ hã pika nhõ xwýnhjê mã kapêr tỳx nê mẽ kãm:

—E pika piitã hkôt mẽ apa xwýnhjaja mẽ inhma. Kêr ka mẽ kot hkrã hõ jayr o hpîr nhũm akupỹm htîr xwýnhhta kôt pix mã amnhî nhîpêx rãhã ho ri apa. Nê kãm mex o mex ã harênh rãhã nê.

Anhỹr o mẽ kãm kapêr.

¹³ Hãmri nê Satanasti nhỹ hã mẽ kãm aa mẽ kot mẽmoj pumunh kêt kwý ho anhỹr o pa. Jao kaxkwa rũm tanhmã mẽ kãm kuwy ho wrýk to nhũm pikap rôrôk nhũm mẽ amnhî jaêr pê omu nê kamã no puma nê.

¹⁴ ã ri mẽ noo mã mẽ kãm amnhî nhîpêx anhỹr o ri mẽ hkôt pa. Gô xujanãr rũm mrymnutija noo mã ã hêx rom amnhî nhîpêx anhỹr o mẽ no kupyro pa nhũm mẽ omu nê hkôt amnhî nhîpêx. Hãmri nhũm mẽ kãm mẽmoj tã karõ nê mẽ kãm:

—E wam mrymnutita. Mẽ kot hkrã hõ jayr o hpîr nhũm akupỹm htîr xwýnhhta kêr ka mẽ kãm hkarõ nhîpêx nê ho mẽ anhõ sãnti. Kê mẽ piitã hwýr mra nê kutã hkõn krã ho rôrôk nê hkrî nê amnhî to kuwy nê kãm mex o mex ã harê.

Anhỹr o mẽ kãm hã karõ.

¹⁵ Hãmri nhũm mẽ kuma nê mar xà hkôt hipêx nê ãm nhũm xa. Hãmri nhũm mrymnuti kot hitepta omu nê hwýr tẽ nê tanhmã ho nhũm ra kapêr nê mẽ kãm:

—E kêr ka mẽ kot inhmex ã ijarênh kêt xwýnhjê pynê nê mẽ himex pa. Anê.

¹⁶ Hãmri nhũm pika rũm mrymnuti kator xwýnhhta haxwýja mẽ kãm kapêr nê mẽ kãm:

—E koja ixkwýjaja inhỹ hã mẽ apiitã mẽ apê ixkwý hã mẽ akagã. Mẽ ate amnhî to rũnh xwýnhjaja nê mẽ ate amnhî to hkryre xwýnhjaja. Nê amarî mẽ kãm mẽ axàpênh xwýnhjaja nê amnhî mã mẽ axàpênh xwýnhjaja. Nê mẽ akàxpore rũnh xwýnhjaja nê mẽ apê amrakati xwýnhjaja. Koja mẽ apiitã mẽ akagã hpa. Mẽ akwý nhõkrã kagã nê mẽ akwý xupôk rũm mẽ anhîhkra katut kagã.

¹⁷ —Gô xujanãr rũm mrymnutita nhîxi kot paj mẽ atã hipêx. Rý hixi hã nũm nhîpêx. Hãmri ka mẽ axàpkur xà japrôr kaxyw nhỹhỹm mra nhũm mẽ atã hixita pumu nê rî kormã mẽ amã mẽmoj kwý ho wênê ka mẽ amnhîm haprô nê ho axàpkur o ri apa. Nê mẽ ate mẽmoj to wênê xwýnhjaja koja mẽ apê mẽmoj japrôr kaxyw mẽ awýr mra ka mẽ tee ri nhỹhỹnh mẽ hã hixi japêr hãmri nê mẽ kãm mẽmoj to wênê hkêt nê. ãm nhỹhỹnh mẽ atã hixi hã kagãta pumunh pix kukwak ri kot kaj mẽ awjaprô rý mẽmoj to wênê. Anê.

¹⁸ E kwa kêr ka mẽ ixte mẽmoj pumunh nê mẽ amã hã kagãta pumu nê ama nê kãm ajamaxpêr tỳx o apa. Mrymnutita nhîxi na kêp nũm. Nũmja kêp 666. E kaj mẽ akrã hi mex xwýnhjaja kot kaj mẽ aprî hã ja mar tỳx kurê kumrêx.

14

Tirtũm mex ã mẽ grer Apokarip 7.1-8

¹ Tã pa axte mẽmoj pumu. Nhũm mẽ pahte amnhî tomnuj pãnhã amnhîrer xwýnhja hixêt pê Siãwja nhîmõk ã xa. Nê puhã mẽ ohtô rax kumrêx nê kuhê. Mẽ ohtô ho mẽ ohtô. Piitã kamã mẽ kêp 144.000. Nê piitã ôkrã hã mẽ pahte amnhî tomnuj pãnhã amnhîrer xwýnh mẽ Hipêxã wa hixi jaxwýr pa mẽ omu.

² Nhũm mẽ kaxkwa kamã grer o kuhê. Mẽ grerja mex o mex. Te kot gô hprôt tỳx hkoko htỳx pyræk. Nẽ te na katõtök tỳx pyræk. Nẽ te wiorãw môr xwỳnhjaja kot hkakrênh mex pyræk pa mẽ mar o xa.

³ Nẽ mẽ grer xwỳnhjaja. Jejus puhã mẽ ohtô rax kumrêx nẽ mẽ kuhê xwỳnhjaja na prem Tĩrtũm kot mẽ ho amnhĩptàr ã hkrĩ xàta kuri grer o kuhê. Nẽ mẽmoj tĩr pẽ kwat xwỳnhjê mẽ mẽ àptàr tũm pẽ 24jê kuri grer o kuhê. Mẽ grer nyw o gre. Âm mẽ tapxipixjaja mẽ kot mẽ grer nywja mar. Ra mẽ kệp Tĩrtũm kra hã mẽ kot mẽ ôkrã hã Tĩrtũm mẽ Kra Jejus wa hixi ã kagà nhũm Tĩrtũm kot ra mrymnuti mẽ hõta wa kệp mẽ utàr nẽ amnhĩ wỳr mẽ ho àpir xwỳnh na pre mẽ. Âm mẽ tapxipixjaja mẽ grer nywja ma nẽ wa kãm ho grer o kuhê.

⁴⁻⁵ Na prem tãm amnhĩ nhĩpêx nẽ Tĩrtũm kôt amnhĩ nhĩpêx rãhã ho pa. Te mẽ kot amnhĩ prõ pix tãnopxar rãhã ho pata pyræk. Nẽ ri tanhmã hêx to rỳ tanhmã ri amnhĩ tomnuj to ho pa hkêt nẽ. Âm tãm ri amnhĩ nhĩpêx mex o pa. Mẽ kệp Tĩrtũm mẽ mẽ pahte amnhĩ tomnuj pãnhã amnhĩrer xwỳnh kwỳ jakamã na prem mẽ pahte amnhĩ tomnuj pãnhã amnhĩrer xwỳnhhta kôt pix mã amnhĩ nhĩpêx o pa. Jakamã na prem mrymnuti kutã rôrök nẽ kãm mex o mex ã harênh kêt nẽ. Tã mẽ kumrêxjaja Tĩrtũm mẽ Kra wa kuri wa kãm grer o kuhê.

Tĩrtũm kapêr o wrỳk xwỳnh pijakrunêpxi jarênh

⁶ Tã pa axte Tĩrtũm kapêr o wrỳk xwỳnhjê hõ pumu nhũm kỳx pẽ ri htor o pa. Ahpỳnhã ri pika piitã hkôt mẽ uro hkwỳjê hkôt. Na ahpỳnhã ri mẽ kapêr xwỳnhjê piitã mẽ hkôt mẽ kãm Tĩrtũm kot tanhmã mẽ hipêx to hã harênh kaxyw. Ahpỳnhã mẽ kapêr xwỳnh piitã mẽ kãm harênh o pa. Nẽ htor o pa pẽ kỳx pẽ mẽ kãm kapêr nẽ mẽ kãm:

⁷ “E na ra Tĩrtũm mẽ ate amnhĩ tomnuj mỳrapê tanhmã mẽ ato kaxyw. Jakamã kwa mẽ tokyx hã apijaàm kaxyw akõn krã ho arôrök nẽ akrĩ nẽ kãm mex o mex ã harê. Kệp mẽmoj piitã ho kator xwỳnh na. Na pre kaxkwa ho kato nẽ pika ho kato nẽ gô xujanãr o kato nẽ hino ho kato nẽ mẽmoj piitã ho kator pa. Jakamã kwa kêr ka mẽ

tapxipix ã mãn apijaàm nẽ kãm mex o mex hã harênh rãhã ho apa.”

Anhỹr o mẽ kãm kapêr.

⁸ Hãmri nhũm hõja wamta kôt tẽ nẽ uræk nẽ kỳx pẽ mẽ kãm kapêr o:

—Koja Tĩrtũm tokyx Papirõn grãnh pa. Na hte krĩ nhõ xwỳnhjaja amnhĩ tomnuj pix rãhã ho pa. Mẽ kot amnhĩ nhĩpêx te mẽ kot kagôxyhti ho hkõm nẽ amnhĩ mẽ mẽ piitã mẽ kãm õr nẽ ho mẽ ho pipãnh pyræk. Na htem mênijê piitã ho amnhĩkati o pa. Nẽ amnhĩ kwỳjê pẽ mẽ hprõ ho amnhĩkati. Nẽ amnhĩ mẽ pika piitã hkôt mẽ pa xwỳnhjê mã anhỹr o pa. Mẽ kot mẽ uræk nẽ ã amnhĩ nhĩpêx anhỹr o pa kaxyw mẽ kãm anhỹr o pa. Ja mỳrapê na ra Tĩrtũm kot tanhmã mẽ ho kaxyw mẽ hã amnhĩ jarê. Anê.

⁹ Tã nhũm wa hkôt hõja tẽ nẽ wa uræk nẽ kàx pẽ pika nhõ xwỳnhjê mã kapêr nẽ mẽ kãm:

—E mẽ ate mrymnuti kutã akõn krã ho arôrök nẽ akrĩ nẽ kãm mex ã harênh xwỳnhjaja. Nẽ mẽ ate karõ nhĩpêx nẽ kutã akõn krã ho akrĩ nẽ kãm mex ã harênh xwỳnhjaja. Nẽ mẽ anhõkrã nẽ mẽ anhĩkra hã hixi hã kagà xwỳnhjaja.

¹⁰⁻¹¹ —Tĩrtũm na tee ja hã mẽ apumu nẽ mẽ akamã gryk tỳx kumrêx. Mẽ ate kapêr kuhpa hã mrymnuti hkôt amnhĩ xunhwỳr jakamã nhũm mẽ akamã gryk tỳx o mẽ akamã gryk tỳx. Jakamã koja kuwy hpök rãhã ho rãhã xwỳnhhta kamã mẽ arênh pa ka mẽ amnhĩ xà htỳx kamã ajamak rãhã apa ho apa. Koja kuwy hpökja aa hapêx kêt nẽ kurũm kàx mã hkũm àpir o pa rãhã nẽ. Koja ã mẽ ate amnhĩ tomnuj o mẽ apa xwỳnhjê nhĩpêx anê ka mẽ kamã apa ho apa nẽ aa kurũm ajapôx kêt nẽ kamã amnhĩ xà htỳx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhỹr rãhã apa ho apa. Mẽ ate gôj rũm mrymnuti mẽ hkarõ ho sãnti wa kutã akõn krã ho arôrök nẽ akrĩ nẽ wa kãm wa mex ã wa harênhja mỳrapê kot kaj mẽ ã amnhĩ nhĩpêx anê. Kot mẽ pahte amnhĩ tomnuj pãnhã amnhĩrer xwỳnh mẽ Tĩrtũm kapêr o mẽ wrỳk xwỳnhjê noo mã kot kaj mẽ ã amnhĩ nhĩpêx anhỹr o apa.

¹² Anhỹr o mẽ kãm kapêr jakamã kwa kêr pu mẽ pahte Tĩrtũm kôt amnhĩ xunhwỳr xwỳnhjaja mẽ hkukamã mẽ harênhja ma nẽ

Tirtũm kapẽr kõt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto htã pu mẽ hkaga hkêt nẽ amnhĩ kaxyw Jejus kõt pajamxpêr tỳx rãhã nẽ. Hãmri nẽ nhỹrmã mẽ kurom ma õ krĩ hwỳr api nẽ kamã pamex kumrêx nẽ papa ho papa.

Mẽ kêp Jejus kwỳ hã mẽ htyk xwỳnhjê jarênh

Wam Tesarõn 4.16

¹³ Tã nhũm kaxkwa kamã mẽhõja axte inhmã kapẽr nẽ inhmã:

E Juãw. Kêr ka ã akwỳjê mã mẽmoj tã kagà anẽ nẽ mẽ kãm hã kagà ho: “E mẽ ate Tirtũm kõt ri amnhĩ nhĩpêx xwỳnhjaja. Mẽ kot Tirtũm ã mẽ apar nhũm mẽ atyk tã koja amnhĩ tã mẽ ato mex rax kumrêx.” Anhỹr o mẽ kãm hã kagà.

Anhỹr o inhmã kapẽr. Hãmri nhũm Tirtũm Karõja kuma nẽ kãm:

—Nà ãm hãmri na ka ã mẽ harênh anẽ. Ra Tirtũm kot amnhĩ tã mẽ omunh rãhã ho pa. Mẽ kot kõt pix mã amnhĩ nhĩpêx o pa pẽ mẽ kãm mẽ hkurê xwỳnhjê kutã amnhĩ to htỳx rãhã htykja nhũm Tirtũm kot amnhĩ tã mẽ omunh mex. Koja mẽ ho mex kumrêx. Mẽ kot Jejus ã mẽ hpar tã koja mẽ ho mex rax nẽ nhũm mẽ kuri mex rãhã nẽ pa ho pa nhũm mẽhõ axte tanhmã mẽ ho hkêt nẽ. Anẽ.

Tirtũm kot tanhmã mẽ kãm hkĩnh xwỳnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jakajre pumu. Nẽ kamã mẽhõj te panhĩ pyrã nẽ nhỹ. Nhũm ôr o pahi hã mẽ ahkà htu nẽ kuteere xwagixre py nẽ o nhỹ.

¹⁵ Hãmri nhũm kaxkwa kamã Tirtũm kapẽr o mẽ wrỳk xwỳnhjê hõja Tirtũm mã amnhĩ jarênh xà hã ixkre rũm kato nẽ kakrã jaka kamã ÿr xwỳnhhta mã kapẽr. Kax pẽ kãm kapẽr nẽ kãm:

—E pika nhõ xwỳnhjaja te mẽ hpur kãm mẽmo hy ra hkamrêk nẽ hikênh mã mex pyrãk. Jakamã anhõ kuteere ata py nẽ ma mẽ hkõt tanhmã ri mẽ ho ho ri mẽ hkõt apa. Te mẽ kot mẽmo hy nhĩkênh o ri pa pyrãk o mẽ hipêx nẽ ma ho mẽ himex o ri apa. Anẽ.

¹⁶ Hãmri nhũm kuma nẽ pika piitã mỳri õ kuteere ho apê nẽ te mẽmo hy jakàr pyrãk o mẽ hipêx.

¹⁷ Hãmri nhũm axte Tirtũm mã amnhĩ jarênh xà hã ixkre rũm kapẽr o mẽ wrỳkjê hõja kato. Ìhkra kamã kuteere xwa gixre py nẽ o xa.

¹⁸ Hãmri nhũm axte hõja ixkre rũm kẽ hkõt kato nẽ hkukamã kator xwỳnhhta mã kapẽr. Kax pẽ kãm kapẽr nẽ kãm:

—E na ra Tirtũm tanhmã mẽ kot amnhĩ tomnuj to hã tanhmã mẽ hipêx to kaxyw. Te mẽ kêp mẽ hpur kãm mẽmo xõ pẽ uwa ra hkamrêk nẽ rênh mã tãm pyrãk. Jakamã ma pika hwỳr mẽ hwỳr wrỳ nẽ mẽ hkõt ri anhõ kuteere ho mẽ himex o ri apa. Anẽ.

¹⁹ Hãmri nhũm kuma nẽ ma pika hwỳr wrỳ nẽ mẽ hipêx o te mẽ kot uwa xõ rênh nẽ prês kãm hkapĩr nẽ kagõ janênh pyrã nẽ mẽ hkõt ri kuteere ho mẽ hpar o pa. Tirtũm ra mẽ kamã gryk tỳx o mẽ kamã gryk tỳx jakamã nhũm ã mẽ hkõt mẽ hipêx anhỹr o ri pa.

²⁰ Jakamã nhũm mẽ hkamrõ hpikapĩr rax kumrêx o uwa kagõ jakre. Te ho pyhti hprõt o nõr pyrãk. Jao upỳm o 2 met nẽ hkõt ho mêt met. Nom hprõt xà hkõt ry rax o ry rax. Ho 300 kirõm. Nhũm ã mẽ kamrõ hprõt rax anẽ.

15

Tirtũm mex ã mẽ grer

¹ Tã pa axte kaxkwa kamã mẽmoj pumu. Hãmri nẽ amnhĩ jaêr pẽ omu nẽ tee ri hkukamã ijamxpêr. Aa mẽ pahte mẽmoj ã kot anhỹr pumunh kêt xwỳnh pa pre omu. Nhũm Tirtũm kapẽr o mẽ wrỳk xwỳnh pẽ 7jaja ahpỳnhã pika hkõt mẽ kot amnhĩ tomnuj xwỳnhjê homnuj kaxyw akuprõ nẽ kuhê. ãm jajê pixjaja koja Tirtũm nhỹ hã axte tanhmã mẽ homnuj to nẽ ho anhỹr pa hãmri nhũm ra ja hapêx o hapêx.

² Jakamã pa axte Tirtũm kapem gõ rax pumu. Te kot kax karỳr jaxênh mẽ kuwy hpõk o pihkàr pyrãk xwỳnhja hprõt o nõ. Nhũm Tirtũm kra hkwỳjaja gõ mỳ ri ohtõ rax kumrêx nẽ kuhê. Na pre ra mrymnu-tija tee ri amnhĩ kõt mẽ rênh mã nẽ tee ri mẽ hã amnhĩ nhĩxi hã kagà hprãm kaprỳ nom nhũm mẽ hkaga nẽ Jejus kõt amnhĩ

nhîpêx rãhã ho pa. Nê mrymnuti karõ ho sãnti mã mex ã harênh kêt rãhã ty nê kaxkwa hwÿr api. Jakamã nhũm Tirtũm amnhĩ tã mẽ omu nê mẽ kãm wiorãwti hkwy gõ nhũm mẽ piitã hamý nê gõ rax mý ri ho kuhê.

³ Hãmri nê Tirtũm mã tanhmã amnhĩ to ho pa xwÿnh pê Mojes mẽ mẽ pahte amnhĩ tomnuj pãnhã amnhĩrer xwÿnhhta wa kot Tirtũm mã greerta nhũm mẽ Tirtũm mã ho grer o kuhê nê grer o:

E Pahi Maati Tirtũm. Na pa mẽ ra inhmex pê awÿr ixàpir pa.

ãm hãmri na ka hte tanhmã amnhĩ nhîpêx to ho ri apa.

Aa tanhmã axêx to hkêt.

Nê mẽ ixrom axihtÿx o axihtÿx.

Nê mẽ ixrom axàhpumunh o axàhpumunh.

Jakamã na ka hte mẽ inhmã aa mẽ ixte mẽmoj pumunh kêt kwÿ ho anhÿr o apa.

Pika piitã hkôt ahpÿnhã mẽ ho amnhĩptàr xwÿnhjê nhõ Pahi Maati na ka.

Nê ate tãm amnhĩ nhîpêx xwÿnh na ka.

⁴ Jakamã na htem piitã atã hpijaàm o pa.

Nê amã mẽ kapêr xàptàr pix o amã kapêr.

Nê amã amex o amex ã ajarênh rãhã nê.

ãm hãmri mẽ ixrom kapxipix amex o amex.

Jakamã koja ahpÿnhã pika piitã hkôt akrajê piitã ate tãm amnhĩ nhîpêx nê tãm mẽ piitã tanhmã mẽ harênh to hã ajarênh ma nê awÿr mra nê akutã hkõn krã ho rôrõk nê hkrĩ nê amã amex o amex ã ajarê. Anê.

Mê homnu xà hã xijere jamÿnh xwÿnh jarênh

⁵ Tã na pa axte mẽmoj pumu. Kaxkwa kamã Tirtũm nhõrkwy hã hitom xà piitã amnhĩ kahê xà rã nê kuhê pa omu. Nê ixkre kamã õ hitom mex maati haxwÿja amnhĩ kahê xà mẽ nê xa.

⁶ Hãmri nhũm ixkreja rũm Tirtũm kapêr o mẽ wryk xwÿnh pê 7jaja hapõj nê kuhê. Mẽ ê hakajre nê hirã htÿx kumrêx. Nê mẽ hinõ pre xàja ôr pix o. Nê piitã Tirtũm mã tanhmã kot mẽ homnuj to xà hã xijere pê 7ta jamÿnh kaxyw kuhê.

⁷ Hãmri nhũm mẽmoj tĩr pê kwatjê õja mẽ kãm xijere hkwy jamý nê mẽ hwÿr o tẽ. Xijere kêp 7 nê piitã ôr o. Nhũm hamý nê

Tirtũm kapêr o mẽ wryk xwÿnhhtajê hwÿr o tẽ nê ho mẽ hipêx nhũm mẽ ahpÿnhã hamý. Xijere kamã Tirtũm gryk xà jamý nê o kuhê.

⁸ Pu nhũm Tirtũm rũm kuwy hkũm hapõj. Tirtũm mex nê hihtÿx xwÿnhhta rũm hapõx rax o ixkreta kunor pa nhũm mẽ tee ri hwÿr gjêx prãm kaprÿ.

16

Xijere kamã mẽ homnu xà pê 7 jarênh

¹ Tã pa arĩ mẽmoj pumu nhũm Tirtũm nhõrkwy kamã mẽhõja kapêr o wryk xwÿnh pê 7jê mã kax pê kapêr nê mẽ kãm:

–E na pa ra mẽ kot ixkapêr kwÿm ri amnhĩ nhîpêx xwÿnhjê pumu nhũm ixpê ja omnuj tÿx o ixpê omnuj tÿx. Jakamã e mẽ anhõ xijereta jamý nê ma pika hwÿr mẽ hwÿr wrÿ nê axpên pãnhã mẽ hã xijere kamã mẽ homnu xà kapĩ. E mẽ tokyx ma mẽ hwÿr wrÿ. Anê.

² Hãmri nhũm mẽ kuma nê axpên pãnhã mẽ hwÿr wrÿ. Nhũm wamta kumrêx pika piitã hkôt mẽ homnu xàta kapĩ. Pu nhũm mẽ kot mrymnuti mẽ õ sãnti wa kãm mex ã harênh nê amnhĩ tã wa hixi jaxwÿr xwÿnh piitã hkànhy hpa nê à htÿx kumrêx nê ri pa.

³ Hãmri nhũm wamta kôt hõja õ xijere py nê gõ xujanãr kãm hkapĩr pa nhũm gõ te mẽ htykjê kamrõ pyrã nê kamã mẽmo mry htyyxã rênh xwÿnh piitã pikaprãr pa.

⁴ Tã ra xijere kapĩr xwÿnh o axkrut nê õ xijere kapĩ hãmri nhũm hkôt hõta õ xijere py nê hpãnhã gõ hkryre piitã hkôt hkapĩr pa. Pyhti nê ri hino piitã hkôt hkapĩr pa nhũm piitã gõ xujanãr pyrã nê mẽ hkamrõ hã amnhĩ jahkre hpa.

⁵ Hãmri nhũm axtem Tirtũm kapêr o mẽ wryk xwÿnhjê hõ kot kãm gõ piitã hamãr xwÿnhhta ja hã omu nê Tirtũm mã kãm:

Pa amex rãhã apa ho apa xwÿnh. Nê arãhã apa ho apa xwÿnh.

Nà ãm hãmri na ka ã mẽ kêp gõta nhîpêx anê.

⁶ Na prem mẽ kot akôt amnhĩ nhîpêx xwÿnhjê mẽ mẽ kãm ri akapêr jarênh xwÿnhjê hpar o pa nhũm mẽ hkamrõ hpikapĩr rax nê.

Tã ka ra mẽ hã mẽ kêp mẽ hkõm xà homnu hpa nhũm mẽ kêp mẽ hkamrõ ã amnhĩ jahkre nhũm mẽ tee ri ho

hkôm mã. Nà ãm hãmri na ka ã mẽ
kêp gô nhîpêx anê Tîrtûm. Anê.

7 Hãmri nhùm mẽ kot Tîrtûm mã mẽmoj
nhôr xà hã mêsti hpar pê hkrî xwýnhjê hõja
kuma nê kãm:

Nà ãm hãmri na ã ajarênh anê Tîrtûm.

Ãm hãmri na ka ã akrajê hã mẽ hipêx anê.

Ra ate mẽ hã amnhî jarênh xà hkôt na ka
hte tanhmã mẽ hipêx to.

Nà apê mẽ inhô Tîrtûm Maati na ka.
Mê ixrom axihtýx o axihtýx nê
axàhpumunh o axàhpumunh. Anê.

8 Tã ra axkrunêpxi nê õ xijere kapî. Jakamã
nhùm mẽ hpãnhã hõja õ xijere o tẽ nê myyti
hã hkapîr pa nhùm hkagro htýx nê pika
hkôt mẽ pa xwýnhjê hkà ho hxêt o pa.

9 Kagro htýx o hkagro htýx jakamã mẽ
hkà ho hxêt nhùm mẽ kamã hkà kajê hpa.
Hãmri nê tee ri amnhî pumu nê hamaxpêr
o:

—Nà Tîrtûmtija na ã mẽ pahtomnuj týx
anê. Anê.

Hãmri nê kamã gryk týx nê haprý nê
tanhmã ho kapêr punuj to ho pa. Nom mẽ
kot amnhî tomnuj kaga nê kãm mex o mex
ã harênh kêt nê arî tanhmã amnhî tomnuj
to ho pa.

10 Nhùm ra kêp kwat nê õ xijere kamã
mẽmojja kapî. Jakamã nhùm ra hpãnhã hõja
õ xijere o tẽ nê gôj rûm mrymnuti kot mẽ
ho amnhîptâr xà hã hkrî xà hã hkapîr pa.
Jakamã nhùm ra kot mẽ ho amnhîptâr xà
hã pikaja kamã kamàt kô htyk par kumrêx.
Hãmri nhùm mrymnuti mẽ hkôt mẽ kot
amnhî nhîpêx xwýnhjê hã kamàt kô hpa
nhùm mẽ amnhî xà htýx ã maj amnhî
nham o axpên kamnhar týx kumrêx.

11 Nê ã Tîrtûm kot mẽ hipêx anhÿr ã
amnhî tã omu nê kamã gryk týx nê tanhmã
ho kapêr punuj to ho pa. No ãm kot amnhî
tomnuj xwýnh ã amnhî pumunh nê kot
amnhî tomnuj kaga hkêt nê.

12 Nhùm prem ra kêp sîk nê õ xijere kamã
mẽmoj kapî. Jakamã nhùm hpãnhã hõja õ
xijere kamã mẽmojta o tẽ nê pyhti pê Erax
kamã hkapîr pa nhùm gôja grà pa nê te
kêp pry pyrã nê nõ. Jakamã nhùm myt
japôx xà rûm mẽ ho amnhîptâr xwýnhjaja
nê pôristijaja hãmri pijapu kaxyw Jerujarê
hwÿr nojarêt nê hã hwÿr pa.

13 Tã nhùm kagãmnuti mẽ ÿ hã mẽ kãm
hêx o pa xwýnh mẽ mrymnutita wa mẽ
hakwa rûm mẽmoj te priti pyrã nê hapôx o
pa. No ãm priti hkêt mẽ kêp Satanasti mã
mê àpênh xwýnh kwÿy.

14 Jakamã na prem pika piitã hkôt mẽ
kot aa mẽmoj pumunh kêt kwÿ ho anhÿr
o hêx rom mẽ no kupyw o mẽ hkôt pa. Tã
pika piitã hkôt mẽ ho amnhîptâr xwýnhjê
mê ho pikuprônkh kaxyw mẽ hapêr o pa.
Mê kot Tîrtûm xihtýx o hihtýx kurê kaxàr
kaxyw mẽ pijapu xà hã arîgro kukamã mẽ
ho pikuprônkh o pa.

Jejus kot amnhî kwÿjê mã kapêr ã harênh

15 Tã nhùm Jejus pika hkôt hkrajaja arî
mê htîr nê pa xwýnhjê mã kapêr nê mẽ kãm:
E mẽ inhma ixkwÿjaja. Akupÿm ixte mẽ
awÿr ixwÿyk xà hã arîgroja ã kot
paj te mẽ àhkînh xwýnh kot amnhî
nhîpêx pyrã nê mẽ ajaêr pê mẽ awÿr
wÿr. Jakamã kêr ka mẽ amnhî wÿr
ijamãr rãhã ho apa. Kêr pa akupÿn
wÿr ka mẽ amnhî wÿr ixpumu nê
akînh nê amnhî kamã amã ixpuma
hkêt nê. Anê.

*Mê kot axpên kurê kaxàr kaxyw mẽ
pikuprônkh ã mẽ harênh*

16 Tã nhùm Satanasti hkwyjaja pika pi-
itã hkôt mẽ ho amnhîptâr xwýnhjê ho
pikuprônkh pa nê mẽ hkurê kaxàr kaxyw
ma Ijaew kot kãm “Amaketô” jarênhja wÿr
mra.

17 Hãmri nhùm Tîrtûm kapêr o mẽ wÿk
xwýnh pê 7 kot hitepta õ xijere py nê kàx
mã kamã mẽmoj kapîr pa. Jakamã nhùm
Tîrtûm nhôrkwyjê kamã mẽ ho amnhîptâr ã
hkrî xà rûm Tîrtûm kàx pê kapêr o:

—E hãmri. Na pa ra mẽ kot amnhî tom-
nuj mÿrapê tanhmã mẽ ho jatur xàm mênkh
kaxyw. Anê.

18 Pu nhùm na hkatôtök nê hkrakrak nê
haxênh nhùm pika htertêt týx nê. Aa mẽ
kot pika htertêt týx kot anhÿr ã omunh kêt
kumrêx.

19 Jakamã nhùm Papirônja kajê
axkrunêpxi. Papirôn nhô xwýnhjaja kot
amnhî tomnuj týx o paja mÿrapê nhùm
Tîrtûm ã mẽ hipêx anê. Nê pika htertêt o
pika piitã hkôt krî grànkh pa.

²⁰ Nhũm gô hipôk piitã gôja hã axkamur nhũm hapêx pa. Nê kên prêk nê hkrã hixêt rôrôk nê hpigranh pa. Pika htertet tỳx kumrêx jakamã ã mêmoj amnhĩ nhĩpêx anê.

²¹ Nê na mê pê jêr krã jakootija mê piitã mê hipy rôrôk. No ãm hkrã hkryre hkêt hkrã rũnh kumrêx. ãm hpỹnh nê kamã kêp 40 kir nê mê hã rôrôk nhũm mê tee ri amnhĩ tã ã omu nê Tĩrtũm kamã gryk tỳx nê haprỳ nê ho kapêr punuj nê.

17

Tĩrtũm kra hkêt xwỳnhjê jarênh

¹ Tã pa pre kê axte mêmoj pumu. Nhũm kot xijere jamỳnh xwỳnhjê hõja ixwỳr tẽ nê inhmã:

—E ma ixkôt tẽ nê mêmoj pumu. Anê.

Hãmri pa kuma nê ma hkôt tẽ nhũm inhmã:

—Nà ahpỹnhã gô rax mỳri krĩ nhõ xwỳnhjaja te ho ni hkuprỳ gô mỳ ri ỳr nê kãm mêmjê piitã hkĩnh o ỳr xwỳnhhta pyrãk. Na htem urãk nê Tĩrtũm kapêr kôt ri amnhĩ nhĩpêx kêt nê. ãm htỳx ri tanhmã amnhĩ tomnuj to ho pa. Jakamã koja Tĩrtũm tanhmã mê homnuj tỳx to nê mê ho hapêx.

² Krĩ piitã hkôt mê ho amnhĩptar xwỳnhjaja na hte ma mê õ krĩ hwỳr mra nê te mê kot mê hkuprỳjê ho amnhĩkati pyrãk o amnhĩ nhĩpêx. Nê te pipãnh nê htỳx ri amnhĩ nhĩpêx pyrãk o amnhĩ nhĩpêx o pa. Nhũm krĩ nhõ xwỳnhjaja mê urãk nê amnhĩ krã hkôt pix mã tanhmã amnhĩ tomnuj to ho ri pa. E ma ixkôt tẽ nê ja hã mê omu. Anê.

³⁻⁴ Hãmri nhũm Tĩrtũm Karõ tanhmã ixto nhũm kapêr o wrỳk xwỳnhja ma kapôt wỳr ixto mō pa kapôt ã mrymnuti hkrã kêp 7 nê kamã hpàr kêp 10 xwỳnhhta pumu nhũm hkamrêeti nê xa. Nê ì piitã hã tanhmã Tĩrtũm o kapêr punuj to hã kagà. Nhũm katut ã mēhō ni kuprỳta nhỹ. Mẽ ho amnhĩptar xwỳnh ã mê ê kakrã htyk nê hkamrêk o hkukar jaxà nê hã nhỹ. Nê ôr o ôkrexê. Nê ôr o hinwỳyxê nê ìhkra kamã kàx. ãm ôr pix o hikukrêx. Nê kên mex karỳr pix o amnhĩ jamrêx. Nê ôr o kopti hō py nê hã nhỹ. Kopti kamã ni kuprỳ kot amnhĩ tomnuj xà. ãm kot mê kêp mê mjên

o amnhĩkati ho pa xà pix nhũm kupy nê o nhỹ.

⁵ Nê ôkrã hã amnhĩ nhĩxi hã kagà kot:

Inhĩxi pimxur pê PAPIRÕN RAXTI.

Nê ixpê mê kêp mê mjênjê ho amnhĩkati ho mê pa xwỳnhjê nã na pa.

Nê ixpê mê kot axpên prõ ho amnhĩkati o mê pa xwỳnhjê nã na pa.

Nê ixpê mê kot Tĩrtũm nê mê kãm hêx o ri mê pa xwỳnhjê nã na pa.

Nê ixpê mê kot Tĩrtũm kapêr kôt amnhĩ nhĩpêx o pa hkêt xwỳnhjê nã na pa.

Anhỹr o ôkrã hã amnhĩ nhĩxi hã kagà kot anhỹr.

⁶ Nhũm axpã nê nhỹ pa omu. No ãm kagôxyhti ho hpipãnh kêt. Mẽ kot Jesus kôt amnhĩ xunhwỳr nê ri mê kãm Jesus kêp mê õ pahihtĩ hã harênh xwỳnhjê kamnhwỳr o mê hpar nhũm mê hkamrô pikapĩr xwỳnhjê kamrô ho na pre axpã nê nhỹ. Pa ã kot amnhĩ nhĩpêx anhỹr ã omu nê tee ri ijamaxpêr.

⁷ Hãmri nhũm Tĩrtũm kapêr o wrỳk xwỳnhja inhmã:

—Kwa mon ka ri ja pumu nê tee ri ajamaxpêr? E kot paj ixprĩ hã amã harê ka inhma. Niti mê hã ỳr xwỳnh pê mrymnutita. Krã pê 7 nê kamã hpàr pê 10 xwỳnhhta kot paj ixprĩ hã amã hamê wa harê ka wa harênh ma.

⁸ —Nà mrymnutija na pre htĩr nê ri pa tã ty nê ahkre xupỳmti kamã hikwỹ. Nom koja akupỳm htĩr nê kurũm kato nhũm mê piitã omu nê ahpỹnhã tanhmã hamaxpêr to. Amnepêm kormã amrakati ri Tĩrtũm kot õ kagà kamã mê htĩr tũm nê mê pa mã xwỳnhjê nhĩxi jaxwỳr xwỳnhjaja koja kator ã omu nê ãm omu nê tanhmã hamaxpêr to hkêt nê. No mê kot Jesus kôt amnhĩ xunhwỳr kêt xwỳnhjaja koja mê amnhĩ jaêr pê akupỳm kator ã omu nê tee ri hkukamã hamaxpêr. Hãmri nê axpên mã: “Kwa amnepêm htyk tã ra tanhmã amnhĩ to nê akupỳm htĩr nê api nê mō.” Anhỹr o axpên mã harê. Hãmri nhũm kato nê ma tẽ nhũm Tĩrtũm tã ho hapêx kumrêx nhũm hapêx o hapêx.

⁹ —Kwa inhma nê jam ajamaxpêr tỳx nê. Mrymnuti krã pê 7ta te kêp hixêt prêk pê

7 pyrà nê hã ÿr xwýnh ni kupryta te hixêt prêk pê 7ta ã ÿr pyràk.

10 —Nê mrymnuti hkrã pê 7ja te kêp mē ho amnhĩptàr xwýnh pê 7 pyràk. Nhũm mē ho amnhĩptàr xwýnhjaja te mē kêp 5 nê ra htyk pyràk nhũm hkôt hõja arĩ mē ho amnhĩptàr o pa. No kot hitepta kormã. Nom koja mē ho amnhĩptàr ry hkêt nê.

11 —Mrymnuti htĩr nê pa htã htyk nê ra akupým htĩr nê àpir xwýnhhta koja hkrã hitepta pãnhã mē ho amnhĩptàr o pa. Jakamã te mē ho amnhĩptàr xwýnh pê 7jê hõ pyràk. Koja hkrã pê 7ja mē ho amnhĩptã nê gaa nê htyk mē nhũm hpãnhã mrymnutita hpãnhã mē ho amnhĩptã. Hãmri nhũm rĩ kormã Tĩrtũm tã mē ho hapêx par kumrêx.

12 —Nê ate mrymnuti hkrã kamã pãr pê 10 pumunh xwýnhhta te mē kêp mē ho amnhĩptàr xwýnh pê 10 pyràk. No ãm jaja na kormã mē ho amnhĩptàr kêt nê. Koja mē nhỹrmã anhĩpê mrymnuti nhỹ hã ahpýnhã ri mē ho amnhĩptàr o pa nom mē ho amnhĩptàr japjê hkêt nê.

13 Koja mē tanhmã ja hã axpên mar to hãmri nê mrymnuti mã anê nhũm mē hpãnhã mē piitã mē ho amnhĩptã.

14 —Nê mē ho amnhĩptàr xwýnh pê 10jaja koja mē pahte amnhĩ tomnuj pãnhã amnhĩrer xwýnh kurê kaxàr kaxyw hwýr mra nê kutã pijapu ho kuhê. No ãm tee ri kãm tanhmã ho hprãm hkapyrý nhũm mē ho axtem nê amnhĩ tã mē himex pa. Hihtýx o hihtýx o kot mē ho hpimràatã mē hakrenh par. Nê kêp pika piitã hkôt mē ho amnhĩptàr xwýnhjê nhõ Pahihti. Tãm na pre amnhĩ wýr mē kot hkôt amnhĩ nhĩpêx o mē pa xwýnhjê wý nhũm htem amnhĩ kaxyw hkôt hamaxpêr mex rãhã ho pa.

15 —Nê krĩ pê Papirõn kapem gô xohtô mý ri ni kupry hkrĩ xwýnhhta. Gô xohtõja te kêp ahpýnhã ri pika piitã hkôt mē uro hkwy pyràk. Nê te ahpýnhã ri mē kapêr xwýnh kwý pyràk.

16 —Nê mrymnuti hpàr pê 10ta kêp mē ho amnhĩptàr xwýnh pê 10 pyràk. Jakamã koja mē kãm ni kupryta prãm nõkati nê kamã gryk týx kumrêx. Hãmri nê hwýr mra nê kêp hikukrêx piitã utã nê kêp ê hkwrýnh pa nhũm hkênh mex nê xa. Hãmri nhũm

mē kupĩ nê ĩ hkrêr pa nê kuwy kamã hi rē nhũm kaxàr pa nê hapêx.

17 —Na pre pahi pê 10jaja mrymnuti hkôt amnhĩ xunhwý nhũm Tĩrtũm ãm ja hã mē omu nê tanhmã nê mē kãm nê hkêt nê. Jakamã koja mē ãm hkôt pix mã amnhĩ nhĩpêx o pa rãhã nhũm Tĩrtũm mē ho hapêx. Nê mē ô krĩ mē mē ho hpimràatã mē ho hapêx pa. Hãmri nê mē ho hapêx o mē ho hapêx.

18 —Nê ate mēhõ ni kupry pumunh xwýnhhta te kêp krĩ rax pê Papirõn nhõ xwýnhjê pyràk. Nê mē ho amnhĩptàr xwýnhja pika piitã hkôt mē ho amnhĩptàr xwýnhjê hkrãhtũm na. Anê.

Ã Tĩrtũm kapêr o mē wrýk xwýnhja inhmã mē harênh anê. Pa kuma nê ô ri mē amã hã kagã. Mē ate kamã harênh nê aprĩ hã mar týx kaxyw.

18

Tĩrtũm kot Papirõn grãnh par ã harênh

1 Tã pa kê axte mēmoj pumu. Nhũm axte Tĩrtũm kapêr o mē wrýk xwýnhjê hõja kaxkwa rũm ahpãr mã wrýk o tē. Tĩrtũm nhỹ hã hihtýx nê kamã hirã rax kumrêx o pika piitã hkôt mē kãm hirã pa.

2 Nê ahpãr mã tēn wrý nê kax pê kapêr o: E koja Papirõnja pigrãnh pa nê hpãnhã kêp Satanasti mã mē àpênh xwýnhjê papxã nê kêp nhõnhti papxã. Hãmri nê aa kamã mēmoj mex kêt kumrêx.

3 Krĩ nhõ xwýnhjaja na htem Tĩrtũm kapêr kôt amnhĩ nhĩpêx kêt nê amnhĩ krã hkôt kãm prãm xã hkôt pix mã tanhmã amnhĩ tomnuj to ho pa. Te mēhõ pipãnh nê htýx ri amnhĩ nhĩpêx o pa pyràk.

Nhũm krĩ piitã hkôt mē ho amnhĩptàr xwýnhjaja mē hwýr mra nê mēnijê ho amnhĩkati ho pa.

Nê krĩ nhõ xwýnhjaja mēmoj pumu nê kãm hkĩnh nê haprôr kurê kumrêx o pa nê aa uaprôr o hapêx kêt nê.

Jakamã na hte krĩ hkwy nhõ xwýnhjaja mē hwýr mēmoj to pa nê xatã mē kãm ho wênê nê mē kukwak ri mē hikãxpore rũnh nê pa.

Anhýr o kapêr.

4 Hāmri nhũm Tĩrtũm Papirõn kamã hkrajê mã kapër nê mẽ kãm:

E mẽ tokyx mẽ kot ri htỳx amnhĩ nhĩpêx xwỳnhjê nhõ krĩa rũm ajapõj ixkrajaja.

Kot kaj mẽ anhỹr kêt nê ra mẽ hkõt amnhĩ nhĩpêx pa mẽ ato apimràatã mẽ ate amnhĩ tomnuj ã mẽ atomnuj tỳx nê.

5 Krĩ nhõ xwỳnhjaja na htem amnhĩ tomnuj rũnh o pa.

Mẽ kot amnhĩ tomnuj xà te mẽ kot kên katutxõ nhũm hprêk rax o kot kaxkwa kanhwỳr kaxyw pyræk.

Na pa hte ã mẽ kot amnhĩ nhĩpêx anhỹr ã mẽ omunh rãhã ho ri ixpa. Jakamã kwa ixkrajaja mẽ tokyx mẽ kurũm ajapõj.

Anhỹr o hkrajê mã kapër. Hāmri nê kapër o mẽ wrỳk xwỳnhjê mã kãm:

6 E kwa mẽ ma mẽ hwỳr wrỳ nê tanhmã ixkrajê hã mẽ ho.

No ãm kêr ka mẽ tanhmã mẽ ho htỳx o mẽ kot ra tanhmã ixpê ixkrajê nhĩpêx tota jakre.

Kê mẽ tanhmã ixpê mẽ ho grire htã ka mẽ hã tanhmã mẽ ho htỳx kumrêx o mẽ kot mẽ hipêxta jakre.

7 Krĩ nhõ xwỳnhjaja na prem mex nê pa.

Nê mẽ hikukrêx rũnh nê hkĩnh nê pa.

Nê tanhmã amnhĩ to jarkrar to ho ri pa nê amnhĩ jarênh o:

“Ot pa mẽ te pahi ni kot amnhĩ nhĩpêxta pyrã nê ixkrĩ xà mex pix kãm ixkrĩ pyræk.

Nê te Tĩrtũm kot amnhĩ nhĩpêx pyræk o na pa htem amnhĩ nhĩpêx o ri ixpa.

Nê mẽ ixkĩnh nê mẽ inhmex rãhã ri ixpa.

Ã mẽ ixte amnhĩ nhĩpêx anhỹr xwỳnh na pa mẽ.”

Anhỹr ã amnhĩ to jarkrar o pa.

Tã kêr ka mẽ tanhmã mẽ homnuj to kê mẽ mexta pãnhã omnuj tỳx nê pa.

Nê kê mẽ hkaprĩ nê amnhĩ xà htỳx kãm hamak rãhã nê pa ho pa.

8 E kê mẽ ã amnhĩ nhĩpêx anhỹr o pa.

Jakamã koja mẽ arĩgro hpỳnh kãm mẽ hkwyjaja hpikaprãr rũnh nê nhũm arĩ mẽ htĩr xwỳnhjaja omnuj nê pa.

Nê tee ri amnhĩ pumu nê hkaprĩ xaj mỳr o pa.

Nê amnhĩ xà htỳx kãm hamak o pa.

Nê tee ri amnhĩ nhĩpêx o pa.

Nê kãm prãm nê pa rãhã ty nhũm kuwy mẽ ho hkaxàr pa.

Ixpê Pahi Maati Tĩrtũm kot paj ixihtỳx kãm ã mẽ hipêx anê. Anê.

9 Hāmri nhũm krĩ piitã kurũm mẽ ho amnhĩptar xwỳnhjaja. Mẽ kot mẽ hwỳr mrar nê mẽ hkuprỳjê ho amnhĩkati nê mẽ uræk nê mẽmoj pumunh nê haprõr rãhã ho pa xwỳnhjaja tee ri krĩ kaxàr nê kàx mã kuwy hkũm àpir o paja pumu nê hkaprĩ nê mỳr o kuhê.

10 Nê Tĩrtũm kot mẽ ho hapêx par ã mẽ omu nê kãm ma htỳx kumrêx. Amỳm mẽ omunh o kuhê nê tee ri amnhĩ kukamã hamaxpêr nê htertet tỳx nê. Nê mỳr kãm kapër o:

Hêxta waa nê Papirõn nhõ xwỳnhjaja.

Mẽ amex nê axihtỳx mex nê apa htã nhũm Tĩrtũm mẽ anhĩmex pa. Hêxta waa nê. Anê.

11 Nê mẽ hwỳr mrar nê mẽ kãm mẽmoj to wênê ho mẽ pa xwỳnhjaja haxwỳja krĩ pumu nê tee ri amnhĩ kukamã hamaxpêr nê hkaprĩ nê mỳr o kuhê. Nhỹri koja mẽ tokyx axte mẽmoj to wênê? Mẽ kêp mẽmoj japrõr rũnh xwỳnhjaja hkaxàr par kumrêx kênã.

12 Na prem mẽmoj piitã ho pa nê mẽ kãm ho wênê. Mẽmoj mex piitã. ôr o mẽ hkukrêx nê prat o mẽ hkukrêx nê kên jaxênh ã kàxpore xohtô. Nê kupêxê mex. Kakrã htyk nê hkamrêk nê hkroore nê hã hapjê. Nê mẽmo pĩ kuxware nê pĩ htỳx nê kên jakar nê kàx o ri mẽmo nhĩpêxja nhũm prem mẽ kãm ho wênê ho pa.

13 Nê mẽmo htwỳm nê mẽ hkuxwa xà. Nê mẽ ô ho ành xà nê mẽ ô kuxwa xà nê xwỳgrã nê harõj. Nê môx nê ôwêhti nê kawar nê kaxyw kawarti hkjênh xà hã karrotre. Nê nhỹhỹnh krĩ hõ kamã panhĩ hkwy pynê nê mẽ hwỳr mẽ o pa nê mẽ kãm mẽ ho wênê nhũm mẽ amarĩ mẽ hkõt ri àpênh rũnh o pa. Na prem ã mẽ kãm mẽmoj to wênê anhỹr o pa. Tã ra mẽ kot mẽ haprõr xwỳnh mẽ mẽ pimràatã hapêx pa.

14 Jakamã nhũm mẽ tee ri mẽ hkukamã hamaxpêr nê te kot mẽ kãm kapêr pyrã nê mẽ kãm:

Hêxta waa nê. Mě amã mẽmoj prãm nê amnhĩm haprôr xwýnhhta na mẽ apê hapêx par kumrêx.

Nê mẽ akãxpore rũnh nê mẽ akukrêx rũnhhta mẽ mẽ apimràatã ajapêx pa. Kot kaj mẽ axte tanhmã amnhĩ nhĩpêx to ho apa hkêt nê. Anê.

¹⁵ Hãmri nê amým ri Tĩrtũm kot tanhmã mẽ hipêx to hã mẽ omu nê kãm ma xaj mur nê htertet o kuhê.

¹⁶ Nê mýr kãm kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nê mẽ hikukrêx mex o amnhĩ jamrêx nê ri hã mra.

Nê ôr nê kên mex ã ohtô xwýnh o amnhĩ jamrêx nê ri hã mra.

¹⁷ Tã ra hapêx par kumrêx. Anê.

Hãmri nhũm gô xujanãr kãm pãr nhõ dõn nê mẽ kot mẽ kãm pãr o ri mrrar xwýnhjaja nê mẽ kot kamã tep pynênh xà ho tep pynênh o ri mẽ pa xwýnhjaja nê pãr kãm amarĩ mẽ pa xwýnhjaja hãmri mẽ hwýr mra nê wamtajê pyrã nê tee ri amým ri mẽ õ krĩ pumu nê mýr o kuhê.

¹⁸ Nê kurũm kuwy hkũm xàpir o pa hã omu nê tee ri mẽ hkukamã hamaxpêr nê axpên mã:

Hêxta waa nê. Krĩ mũj na pre mex o mex. Mex o krĩ piitã hakrenh par htã hapêx pa. Anê.

¹⁹ Hãmri nê mur nê hkaprĩ xaj pika hkwý jamý nê ho amnhĩ kamĩ nê mýr kãm kapêr o:

Hêxta waa nê. Krĩ mũj na pre rax o rax.

Nhũm pre nhỹhỹnh pãr kãm mẽmoj to wênê ho pa xwýnhjaja mẽ hwýr mẽmoj to pa nê mẽ kãm ho wênê nê mẽ hkukwak ri hikãxpore rũnh nê ri pa.

Tã hãmri mẽ hapêx pa. Anê.

²⁰ Hãmri nhũm Tĩrtũmja krajê piitã mẽ kãm kapêr nê mẽ kãm:

E ixpê Tĩrtũm na pa ã mẽ hipêx anê.

Mẽ kot mẽ apê ixkrajaja tanhmã mẽ atom-nuj to ho paja mýrapê na pa mẽ atã ã mẽ hipêx anê.

Jakamã e kaxkwa kamã mẽ apê ixri mẽ apa xwýnhjaja.

Nê mẽ ate inhỹ hã ri mẽ kãm ixkapêr jarênh o mẽ apa xwýnhjaja.

Nê Jejus nhỹ hã mẽ akapêr o ri mẽ apa xwýnhjaja. Mẽ apiitã mẽ apê ixkra na ka mẽ.

E mẽ amnhĩ tã ja pumu nê akĩnh nê axpên mã apikunhar o akuhê. Pa na pa mẽ atã ã mẽ ho ijapêx anê. Anê.

²¹ Tã nhũm kapêr o mẽ wrýk xwýnhjê hõja hihtýx o kên rax kumrêxja mý nê o tẽ nê gô xujanãr kamã kãm gêt nê kumê nhũm mrõ nê akunok. Hãmri nhũm kapêr o:

E krĩta koja Tĩrtũm te ho ixte gõx kãm kên mênh nhũm mrõr nê hpikunor pyrãk o hipêx nhũm hapêx par kumrêx.

²²⁻²⁴ Na pre hte krĩja kamã mẽ kot ri mẽ kãm mẽmoj to wênê xwýnhjaja amnhĩ to rũnh o krĩ piitã hkôt mẽ hakrenh pa.

Nê krĩ nhõ xwýnhjaja na prem pika piitã hkôt hêx rom tanhmã mẽ no kupyr to ho ri pa. Jakamã ra mẽmoj to wênê xwýnhjê pyrã nê mẽ hikukrêx rũnh gryk ã Tĩrtũm kaga.

No ãm ja pix kêt. Tĩrtũm krajê mẽ Tĩrtũm nhỹ hã kapêr o mẽ pa xwýnhjaja na prem mẽ himex rax nê. Hãmri nhũm krĩ piitã kamã mẽ pa xwýnhjaja mẽ kot mẽ hipêx ã mẽ omu nê mẽ urãk nê ã mẽ hipêx anhýr o pa.

Tã Papirõn nhõ xwýnhjaja kot mẽ hipêx anhýrja mýrapê koja Tĩrtũm mẽ himex par kumrêx.

Jakamã koja mẽ axte hkĩnh nê hkĩnh xaj ri grer kêt nê.

Nê axte hkĩnh nê grer kãm hakwa kôr o ri pa kêt nê.

Nê axte ri wiorãw kakrênh hkêt nê.

Nê axte ri amnhĩm kawã hyr o hkrĩ hkêt nê.

Nê axte harôj kahuk o kuhê hkêt nê.

Nê axte mẽ ôrkwý kamã kanê hpôk kêt nê.

Nê axte axpên mã ri hkrajê rer o ri pa hkêt nê. Koja ã mẽmoj kot anhýr piitã hapêx pa. Anê.

19

Mẽ kot Tĩrtũm mex ã mẽ harênh

¹ Tã pa kê axte mẽmoj pumu. Nê kaxkwa kamã mẽ kapêr ma nhũm mẽ ohtô rax kumrêx nê tanhmã axpên mã kapêr to. Nê anhĩpê kax pê kapêr týx nê kapêr o:

E pu mẽ pahpiitã Tĩrtũm mã mex o mex ã harê.

Tapxipix na hihtýx o hihtýx.

Ně tapxipix na àhpumunh o àhpumunh.
Ně tapxipix na mex o mex.
Tapxipix na mex o kot mẽmoj piitã hakrenh par.

Ra kot mẽmoj punuj pê mẽ papytãr par jakamã kêp mẽ papytãr xwýnh ã pixi mex na.

² Na hte amnhĩ jarēnh xà hkôt tanhmã mẽmoj to ho pa.

Ně amnhĩ to hēx kēt nē.

Tã ãm hãmri na ã Papirõn nhõ xwýnhjē nhĩpēx anē.

Na prem mẽ kãm Tĩrtũm kapēr jarēnh o mẽ pa xwýnhjē nhĩmex rax kumrēx.

Ně krĩ piitã hkôt ri pa nē amnhĩ kôt mẽ kurē nhũm mẽ kuma nē mẽ hkôt amnhĩ tomnuj o pa.

Nhũm Tĩrtũm tee ri hã mẽ omu nē ã hkrajē hã mẽ hipēx kati anē. ãm hãmri na ã mẽ hipēx anē.

Anhỹr o axpēn mã harē.

³ Hãmri nē xatã axpēn mã:

Nà ãm hãmri na ã mẽ panhõ Tĩrtũmja mẽ hipēx anē nhũm mẽ kurũm kuwy hkũm kàx mã àpir o pa.

Koja krĩ nhõ xwýnhjaja amnhĩ xà htýx kamã hamak rãhã ho pa nē aa à htýx hapēx kēt.

E pu mẽ hã Tĩrtũm mã mex o mex ã harē. Anē.

⁴ Hãmri nhũm mẽ àptãr tũm pê 24 mẽ mẽmoj tĩr pê kwatjaja hãmri Tĩrtũm kot mẽ ho amnhĩptãr ã hkrĩ xà maati kutã rôrõk nē kãm hipõ hpa. Hãmri nē ã mẽ kapēr anhỹr xwýnhjē mã kapēr nē kãm:

Nà ãm hãmri na ka mẽ ã Tĩrtũm mex ã harēnh anē. E pu mẽ pahpiitã kãm mex o mex ã harē. Anē.

⁵ Hãmri nhũm mẽhõja Tĩrtũm krĩ xà maati kamã kapēr o:

E mẽ axte Tĩrtũm mã mex o mex ã harē.

Mě ate Měpahpãm kôt amnhĩ nhĩpēx o mẽ apa xwýnhjaja.

Ně mẽ apē mẽ ho amnhĩptãr xwýnhjaja nē amarĩ ri mẽ apa xwýnhjaja nē mẽ apiitã mẽ ate Tĩrtũm ã apijaãm o mẽ apa xwýnhjaja kãm mex o mex ã harē. Anē.

Kot mẽ pahpãnhã amnhĩrer xwýnh mẽ hkwýjē jarēnh

⁶ Tã pa tanhmã mẽ kapēr to hã mẽ kuma nhũm mẽ kàx pê kapēr týx nē. Te mẽ ohtõ rax kumrēx kapēr pyrãk. Ně te gõ koko htýx rý na katõtõk týx pyrãk. Hãmri nē mẽ kapēr o:

E na ra Tĩrtũm kêp mẽmoj piitã ho amnhĩptãr xwýnh.

Ně kêp mẽ panhõ Pahi Maati.

Ně hihtýx o hihtýx nē àhpumunh o àhpumunh.

E pu mẽ kãm mex o mex ã mãn harē.

⁷⁻⁸ Ně hã pahkĩnh nē.

Ně kãm hihtýx o hihtýx ã harē.

Te mẽ kot axpēn mã mẽ rer xwýnh kot amnhĩ nhĩpēx pyrãk.

Jaõ mẽ pahte amnhĩ tomnuj pãnhã amnhĩrer xwýnhhta te kêp myja pyrãk.

Ně mẽ kot hkôt amnhĩ nhĩpēx xwýnh piitã te mẽ kêp nija pyrãk.

Ně te mẽ kot axpēn mã wa rer nhũm wa kot axpēn kôt pa ho pa pyrãk o koja mẽ amnhĩ nhĩpēx.

Ně te mẽ kot mjēn mã xwýnh mã ê mex jakare nhõr nhũm kot hagjēnh pyrãk. Ně ê mexja te mẽ kot tãm amnhĩ nhĩpēx xà pyrãk. Anē.

⁹ Hãmri nhũm Tĩrtũm kapēr o wrýk xwýnhja inhmã:

—E Juãw. Pa amã mẽmoj jarē ka mar týx nē akwýjē mã hã kagà. Tĩrtũm kapēr kwý kot paj amã harē. Kêp Tĩrtũm kapēr jakamã ãm hãmri na. Na hte mẽmoj jarēnh o hēx kēt nē. E kapēr ã kagà ho:

Na htem axpēn mã mẽ rer kaxyw nē amnhĩ wýr hkwýjē wý nhũm mẽ hwýr mra nē wa hã hkĩnh nē apkur mex nē.

Ja pyrã nē Tĩrtũm kot amnhĩ wýr mẽ hwýr xwýnhjaja koja mẽ nhỹrmã mẽ pahte amnhĩ tomnuj pãnhã amnhĩrer xwýnhhta wýr api nē ã amnhĩ nhĩpēx anē nē hkĩnh nē apkur mex nē.

Hãmri nhũm Tĩrtũm mẽ ho mex rax kumrēx. Anē.

—E kêr ka ã akwýjē mã ja hã kagà anē Juãw. Anē.

Hãmri pa kuma nē kagà ja kamã mẽ amã hã kagà.

¹⁰ Hãmri nē hã kagà hpa nē ra ixte kãm mex o mex ã harēnh kaxyw kutã ixkõn krã ho tēm nē nhỹ nhũm tee ri amnhĩ tã ixpumu nē inhmã:

—Kwa ã ri inhîpêx anhÿr kêt nê. Apyrà nê ixte Jesus mã tanhmã amnhî nhîpêx to xwÿnh kênã. Jesusja apyrã nê kêp inhõ pahikti na. Jesus kapêr na prem hkukamã mẽ kot Tirtũm nhÿ hã kapêr o mẽ pa xwÿnhjaja hã kagã nê mẽ kãm harênh o pa. Jakamã kwa pu mẽ Tirtũm pix kutã mãn pahkõn krã ho parôrõk nê pahkrî nê kãm mex o mex ã harê. Anê.

Kawar jaka hã ÿr xwÿnh jarênh

11-16 Tã pa kê axte mẽmoj pumu. Nhũm kaxkwa axkjê nhũm kamã kawar jakajre xa nhũm mẽhõja hã nhÿ. Hixi na pre kêp “Aa kot Tirtũm kaga hkêt xwÿnh.” Anê nê hixi hõ na pre kêp: “Tirtũm kôt pix mã amnhî nhîpêx o pa xwÿnh.” Anê. Æ hixi kot anhÿr jakamã na hte katat kôt ahpÿnhã mẽ kot amnhî nhîpêx ã mẽ omunh xà hkôt tanhmã mẽ harênh to. Mẽ kot amnhî to mex ã mẽ omunh xà hkôt tanhmã mẽ hkwÿjê jarênh to nê mẽ kot amnhî tomnuj ã mẽ omunh xà hkôt ahpÿnhã tanhmã hkwÿjê jarênh to. Na pre mẽ kot tanhmã hkwÿjê nhîpêx to ho pa xwÿnhjê kutã amnhî xunhwÿ nê mẽ hã tanhmã mẽ ho. Æ na pre kawar ã ÿr xwÿnhja amnhî nhîpêx anhÿr o pa.

Nê no te kot kuwy hpõk pyrãk jakamã hprî hã mẽmoj piitã omu nhũm mẽmoj kêp hpimxur kêt nê. Nê kêp pahi hã mẽ ahkã ho ohtõ nê kutu. Nê nhÿhÿnh ì hã hixi hõ hã kagã nom ãm tapxipix kot amnhî tã amnhî nhîxija pumunh. Na pre ra amnhî kamrõ ho ê xy hpa nê xa. Nê hixi hõ pê:

TIRTŨM KAPÊR O AMNHÎRÎT XWÿNH
Nê ê ryti hã hixi hõ hã kagã. Nê ihkjê hã ãm tãm. Hã kagã jarênh kot:

Ixpê mẽ ho amnhîptâr xwÿnh piitã mẽ õ
Pahi Maati na pa.

Nê hakwa rũm wapo xwa gixre põm katon ajêt. Kot ho tanhmã mẽ kot Tirtũm mẽ wa kutã amnhî xunhwÿr xwÿnhjê nhîpêx to kaxyw. Jakamã ra mẽ piitã mẽ ho pikuprõnh pa nê mẽ hipêx o te mẽ kot prês kãm uwa xõ kagõ janênh pyrãk nhũm mẽ hkamrõ hpikapîr rax kumrêx. Tirtũm xihtÿx xwÿnh kot mẽ kamã gryk tÿx jakamã nhũm ã kãm mẽ hipêx anê. Mẽ kot amnhî tomnuj o paja mÿrapê.

Nhũm õ pôristi piitã urãk nê kawar jakare hã hkrî nê hkôt ri pa. Mẽ ê jaka muxre jagjê nê hã ma hkôt ri pa.

17-18 Tã pa axte Tirtũm kapêr o mẽ wrÿk xwÿnh õja pumu nhũm myyti kutã xa nê kax pê nhõnhti mã kapêr nê mẽ kãm:

—E mẽ amnê mẽ ixwÿr wrÿ nê Tirtũm ã akînh nê mẽ htyk nê mẽ hikwÿ xwÿnhjê hã atu nê aku. Mẽ ho amnhîptâr xwÿnhjaja nê pôristijaja nê mẽ hkrãhtũm nê kawar nê kawar ã mẽ hkrî nê ri mrar xwÿnhjaja nê mẽ kot amnhî to rũnh xwÿnhjaja nê mẽ kot amnhî to hkryre xwÿnhjaja. Nê mẽ kãm mẽ ãpênh xwÿnhjaja nê amnhî mã ri mẽ ãpênh xwÿnhjaja. Æ mẽ htyk nê mẽ hikwÿ xwÿnh mÿj piitã mãmrî mẽ hwÿr wrÿ nê mẽ hã atu nê mẽ aku. E mẽ tokyx nhõnhti. Anê.

19 Tã nhũm mrymnuti nê krî piitã hkôt mẽ õ pahi nê mẽ õ pôristijaja piitã axpên wÿr akuprõ. Wam kawar jakare hã ÿr nê htêm xwÿnh mẽ õ pôristijê hwÿr hprõt nê mẽ hkurê kaxâr kaxyw axpên mar kaxyw akuprõ.

20-21 Hãmri nê mẽ hwÿr mra nê mẽ hkurê kapa. No ãm tee ri amnhî nhîpêx nê tee ri kãm tanhmã mẽ ho hprãm hkaprÿ nhũm wam kawar jakare hã ÿr nê htêm xwÿnhhta hakwa rũm wapo xwagixre kator o mẽ himex pa. Hãmri nhũm mẽ hkwÿjê pyrãn htyk pa nê hikwÿ. Nhũm nhõnhti mẽ omu nê mẽ hwÿr wrÿk o mra nê mẽ kuku hãmri nê kãm mẽ hkur kaga nê mẽ hkaga. No nhũm mrymnuti nê ÿ hã mẽ kãm hêx o pa xwÿnhhta wa nhũm mẽ axtem nê htîr rãhã wa unê nê ma wa o tẽ nê êsõf o kuwy maati kamã wa kumê. Hãmri nhũm wa kamã htîr tũm nê hxêt rãhã nê pa ho pa nê aa htyk kêt nê.

20

Mẽ kot Satanasti hpa hpre hã mẽ harênh Wam Korît 15.20-28

1 Tã pa kê axte mẽmoj pumu. Nhũm Tirtũm kapêr o mẽ wrÿk xwÿnhjê hõja kaxkwa rũm wrÿ nê ahkre xupÿmti hpro xà ho htÿx xà hã safja py nê kax pytÿhti ho mẽ hpre xãja õ py.

2-3 Hãmri nê kagãmnuti pê hêx xwÿnh maati Satanastija pynê. Amnepêm Atãw mẽ Ewa wa kãm hêx xwÿnhhta pynê nê kax

pytĩ o hpa hpre nẽ hte hpre hãmri nẽ ahkre xupÿmti nhĩtom xà mẽ nẽ kamã kumẽ. Hãmri nẽ akupÿm hpro xà ho hpro nẽ saf o hã ho htÿx. Kot pika piitã hkõt mẽ kãm hẽx o pa pymaj ã hipẽx anẽ. Koja tokyx kator kêt ry rax kumrẽx. Koja kamã arĩ hkrĩ hã amgrà xohtô nẽ. Hã amgrà pẽ 1.000 nhũm rĩ kormã Tĩrtũm akupÿm kator nhũm kato nẽ ri pa. Nom pa hkrãnre.

⁴Tã pa mẽ htyk nẽ akupÿm mẽ htĩr xwÿnh kwÿjẽ pumu. Kormã mẽ htĩr ri na prem Tĩrtũm kapẽr kõt pix mã amnhĩ nhĩpẽx o pa. Nẽ Jejus kęp mẽ õ pahĩti hã harẽnh rãhã ho pa. Aa mẽ kot mrymnuti kutã hkõnkrã ho rôrøk nẽ kãm mex ã harẽnh kêt. Nhũm prem tee mẽ õkrã hã nẽ mẽ ãhkra katut ã mrymnuti nhĩxi nhĩpẽx kaxyw nom nhũm prem hkaga kamã hihtÿx nhũm prem kãm mẽ hkurẽ xwÿnhjaja tee ri ja hã mẽ omu nẽ mẽ mut jakàr o mẽ kupa. Hãmri nhũm Tĩrtũm akupÿm mẽ ho mẽ htĩr nẽ mẽ kot mẽ ho amnhĩptãr ã hkrĩ xà kamã mẽ hkrĩ. Jejus nhĩhkõ hã mẽ hkrĩ hã amgrà pẽ 1.000 kaxyw.

⁵Mẽ kumrẽx na pre Tĩrtũm akupÿm mẽ ho mẽ htĩr nhũm mẽ hkwÿjaja mẽ hkĩnh ã arĩ ty nẽ hikwÿ hã amgrà pẽ 1.000 jakre nhũm rĩ kormã akupÿm mẽ ho mẽ htĩr.

⁶Wam akupÿm mẽ htĩr xwÿnhjaja kęp Tĩrtũm kra jakamã koja mẽ Tĩrtũm kra hkêt xwÿnhjẽ kurom hkĩnh nẽ pa ho pa. Nẽ mẽ kurom mẽ kot amnhĩ xà htÿx kamã hamak o pa htũm xà wÿr pa hkêt nẽ. Nẽ mẽ kurom Tĩrtũm mẽ Kra Jejus Kris wa kuri mex kumrẽx nẽ wa kãm tanhmã ri amnhĩ nhĩpẽx to ho pa. Nẽ Jejus nhĩhkõ hã mẽ ho amnhĩptãr o pa hã amgrà pẽ 1.000.

Tĩrtũm kot kuwy hwÿr Satanasti mẽnh ã harẽnh

⁷Tã koja amgrà pẽ 1.000 hapẽx nhũm rĩ kormã Tĩrtũm kapẽr o wÿrk xwÿnhjaja akupÿm ahkre xupÿm wÿr tẽ nẽ Satanasti mã kahẽ xà mẽ nhũm kato.

⁸Hãmri nẽ kẽ axte pika piitã hkõt tanhmã mẽ kãm hẽx to ho ri pa. Gorti nhõ xwÿnhjẽ mã nẽ Makok nhõ xwÿnhjẽ mã nẽ krĩ piitã hkõt Tĩrtũm nẽ tanhmã mẽ kãm hẽx to ho mẽ hkõt pa. Hãmri nẽ mẽ kot Tĩrtũm krajẽ kutã amnhĩ xunhwÿr nẽ mẽ hkurẽ kaxãr kaxyw amnhĩ kwÿjẽ ho akuprõ nhũm mẽ

ohtô rax kumrẽx nẽ axpẽn wÿr akuprõ. Te pikahti grã xohtô pyrãk.

⁹Hãmri nẽ ma Tĩrtũm krajẽ nhĩmex par kaxyw mẽ hwÿr mra nẽ mẽ õ krĩ mã hipøk pa nẽ kuhẽ. Mẽ õ krĩja Tĩrtũm mã mex tã nhũm mẽ kot kęp grãnh par kaxyw ma hwÿr mra. Hãmri nhũm kaxkwa rũm kuwy hpøkja mẽ haer pẽ mẽ hã rôrøk nẽ mẽ ho hxêt pa.

¹⁰No mẽ kãm hẽx xwÿnh maati Satanas-tita nhũm Tĩrtũm kapẽr o wÿrk xwÿnhjaja axte unẽ nẽ ma esõf o kuwy maatita wÿr o tẽ nẽ kamã kumẽ. Ra mẽ kot kamã mrymnuti wa kot Tĩrtũm nẽ mẽ nokupyr o pa xwÿnh wa mẽnh tã wa hkõt Satanasti mã ho anẽ nẽ kamã kumẽ nhũm kamã pa ho pa. Koja mẽ aa kator kêt kumrẽx. Nẽ arĩ kamã amnhĩ xà htÿx kamã hamak rãhã nẽ pa ho pa.

Tĩrtũm kot ahpÿnhã tanhmã mẽ piitã mẽ harẽnh to kaxyw

Matêwre 25.31-46; Juãw 5.25-29

¹¹Tã pa axte mẽmoj pumu nhũm kaxkwa mẽ pikaja wa ra hapẽx pa. Pa Tĩrtũm kot tanhmã mẽ piitã mẽ harẽnh to hã hkrĩ xà raxja pumu. Nhũm hakajre nhũm Tĩrtũm kamã nhÿ.

¹²⁻¹³Hãmri nhũm ra mẽ htyk nẽ mẽ hikwÿ xwÿnh piitã akupÿm hapøk pa nẽ Tĩrtũm kot tanhmã mẽ harẽnh to hã hkrĩ xàta kutã hkrĩ pa. Mẽ piitãã. Mẽ kot amnhĩ to rũnh xwÿnhjaja nẽ mẽ kot amnhĩ to hkryre xwÿnhjaja nẽ mẽ ho amnhĩptãr xwÿnhjaja nẽ gõ xujanãr kãm mẽ mrõr nẽ mẽ htyk xwÿnhjaja. Ra mẽ htyk nhũm mẽ kot mẽ hagjẽnh xwÿnhjaja piitã mẽ htykjẽ papxã rũm hapøk pa nẽ Tĩrtũm kutã ohtô ho ohtô nẽ hkrĩ. Hãmri nhũm Tĩrtũm õ kagã py nẽ kamã mẽ piitã mẽ hixi japêr. Kagã kamã ra mẽ hkukamã mẽ htĩr tũm nẽ mẽ pa ho mẽ pa mã xwÿnhjẽ nhĩxi japêr. Nẽ kagã hõ kamã mẽ htĩr ri tanhmã mẽ kot amnhĩ nhĩpẽx to ho pa hã mẽ piitã mẽ hã kagãja. Nhũm kupy nẽ kamã tanhmã mẽ harẽnh to nẽ hkõt hprĩ hã mẽ piitã mẽ omunh pa nẽ rĩ kormã ahpÿnhã tanhmã mẽ harẽnh to.

¹⁴⁻¹⁵Hãmri nẽ mẽ htĩr tũm nẽ mẽ pa mã xwÿnhjẽ nhĩxi hã kagãja kamã tee ri mẽ hkwÿjẽ nhĩxi japêr nhũm kamã amrakati. Jakamã nhũm mẽ ma kuwy maatita wÿr

mê o mra nê kamã mê rênh pa. Te axte mê htyk nhũm mê kot kuwy kamã mê hagiênh pyrâk nhũm mê kamã rôrôk nê tee ri amnhĩ xà htỳx kamã hamak rãhã nê pa ho pa nê aa kator kêt kumrêx.

21

Pika mê kaxkwa wa nyw jarênh

Sikũn Pêtre 3.8-13

¹ Tã pa axte mêmoj pumu. Nhũm Tĩrtũm ra pika mê kaxkwa nyw wa ho kato. Ra pika nê kaxkwa nê gô xujanãr tũmja hapêx pa nhũm kaxkwa mê pika nyw wa ho kato. Nom axte gô xujanãr o kator kêt nê.

² Hãmri nhũm Tĩrtũm nhõ krĩ mex pê Jerujarê nywja tanhmã amnhĩ to nê pika nyw wỳr wrỳk o mỗ. Krĩa mex kumrêx. Mex o mex. Te mjên mã xwỳnh ê mex jaxàr nê amnhĩ to muxre nê mjên wỳr htêm pyrã nê pika nyw wỳr mex kumrêx nê wrỳk o mỗ.

³ Hãmri nhũm Tĩrtũm kot mê ho amnhĩptàr ã hkrĩ xà maatija kamã mễhõja kapêr o:

—Nà ãm hãmri. Na ra Tĩrtũm hkrajê hkôt pa ho pa. Pika nyw kamã mê hkôt pa ho pa nhũm mê tã no ho omu nê hkôt pa ho pa rãhã nê. Nà ãm hãmri. Ja mex o mex.

⁴ —Koja hkrajaja hkôt pa ho pa nê axte htyk kêt kumrêx. Nhũm Tĩrtũm mê nê mê no kagô nhĩnhĩnh pa nhũm mê axte hkaprĩ nê mỳr kêt nê. Nê ri axte amnhĩ xà kamã hamak kêt nê. Nê axte ri tanhmã omnu hto hkêt nê. Ra mê hkaprĩ nê à nê mỳr o pata hapêx par kumrêx nhũm hpãnhã mêmoj nyw pix. Anê.

⁵ Hãmri nhũm Tĩrtũm tãm tanhmã inhmã kapêr to. Krĩ xà maati kamã ỳr xwỳnhhta tãm inhmã kapêr o:

—E na pa ra akupỳm mêmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mêmoj jarênh anê. Ixêx kêt. Jakamã kêr ka akwỳjê mã piitã hã kagã hpa. Kê mê kamã harê nê tokyx kuma nê hkôt hamaxpêr rãhã ho pa.

⁶ —Ra ixte amnhĩ kukamã mêmoj mã ijamaxpêr xwỳnhja na pa ra ho anhỳr pa. Ixpê mêmoj piitã ho anhỳr o hkra xwỳnh nê mãânên ixpê mêmoj piitã ho ijpêx par xwỳnh. Nê ixrãhã ixpa xwỳnh. Amnepê m kormã mêmoj kator kêt ri na pa

pre ixrãhã ixpa. Nê ot pa arĩ ixrãhã ixpa. Tã mê kãm kôr nê kãm gô hkwy ho hkôm hprãm xwỳnhjê pyrã nê mê kãm ixpax prãm xwỳnhjaja kot paj te mê kãm inhõ hino rũm gô hkwy nhõr nhũm mê kot ho hkôm pyrãk o mê hipêx. Hãmri nhũm mê htĩr tũm nê ixri pa ho pa nê axte htyk kêt nê. Kot paj ã mê hipêx mex anê.

⁷ —Mê ate tanhmã amnhĩ tomnuj to nê amnhĩ to htỳx nê ixkôt pix mã amnhĩ nhĩpêx o mê apa rãhã mê atyk xwỳnhjaja kot paj ã mê anhĩpêx mex anê. Ka mê apê ixkra hã amex nê ixkôt ri apa rãhã ho apa. Pa ixpê mê anhõ Tĩrtũm ã tanhmã mê ato mex to rãhã ho ixpa.

⁸ —No mê kot amnhĩ kaxyw ixkôt hamaxpêr kêt xwỳnhjaja. Nê mê kot amnhĩ tomnuj xwỳnhjaja nê mê kot ri mê hpar prãm xwỳnhjaja. Nê mê kot nhãm ri mênijê ho amnhĩkati xwỳnhjaja. Nê wajagajaja. Nê mê kot amnhĩ to sãnti hwỳr o pa xwỳnhjaja. Nê ri mê hêx nhi xwỳnhjaja. ã mê kot amnhĩ nhĩpêx anhỳr xwỳnh piitã koja mê apê ixkrajê hkĩnhã ma kuwy maati wỳr hapêx par kumrêx. Te axte mê htyk pyrãk nom koja mê axte htyk kêt nê. Anê.

Jerujarê nyw jarênh

Sikũn Korĩt 6.16; Karatas 4.26; Eprêw 12.22-24

⁹ Tã nhũm mê kot xijere pê 7 kamã Tĩrtũm gryk xà jamỳnh xwỳnhjê hõja hãmri ixwỳr tẽ nê inhmã:

—E ma ixkôt tẽ nê mêmoj pumu. Na ra krĩ nywja pika nyw wỳr wrỳk o mỗ. Te mjên mã xwỳnh ê mex jaxàr nê amnhĩ to muxre nê mjên wỳr htêm pyrã nê mex kumrêx nê kaxkwa rũm pika nyw wỳr wrỳk o mỗ. Nê kot ho mjên mã xwỳnhhta te mê pahte amnhĩ tomnuj pãnhã amnhĩrer xwỳnhhta pyrãk. E tokyx tẽ nê omu. Anê.

¹⁰ Hãmri nhũm Tĩrtũm Karõ tanhmã ixto pa ma kot inhmã kapêr xwỳnhhta kôt tẽ nhũm ma ixto mỗ nê kên krã hprêêti hwỳr ixto api nê himõk ã ixãm. Pa Tĩrtũm nhõ krĩ mex pê Jerujarê nywja pumunh o xa. Nhũm mex o mex. ãm hãmri te mjên mã xwỳnh kot ê mex jaxàr nê amnhĩ to muxre nê mjên wỳr htêm pyrã nê ahpar mã wrỳk o mỗ pa ixprĩ hã omu.

11 Na pre rax o rax nê mex o mex. Tirtûm kamã pa ho pa jakamã nhûm kamã hirã htÿx kumrêx. Te kên mex ã kàxpore xohtô jaxênh mex tÿx pyrãk.

12-13 Nê krî puhã kahêja hprêk rax nê. Nê hwÿr mē gjêx xà kêp 12. Na pre myt japôx xà rûm axkrunêpxi. Nê myt gjêx xà rûm haxwÿja axkrunêpxi. Nê akutã kahpa hkôt haxwÿja axkrunêpxi. Nê ahpÿnhã hakwakre hã Tirtûm kapêr o wrÿk xwÿnhjaja hamãr o kuhê. Nê hakwa kre piitã hã Ijaew pê ahpÿnhã mē pikjêr kãm mē kêp 12jaja mē hixi hã kagã.

14 Nê kahê xunhwÿr xà hkukamã kên pytyrja ahpÿnhã kêp 12. Kên pytyrta ã na mē kot Jejus nhÿ hã mē ahkre o mē pa xwÿnh maati pê 12jê nhÿxi hikwÿ.

15 Tã nhûm kot ixto môr nê inhmã mēmoj jahkre xwÿnhhta ôr o mēmo pÿ py nê kot ho krî ho mïdi kaxyw xa. Nê ho kahê piitã ho mïdi kaxyw. Nê mē gjêx xàja ho mïdi kaxyw.

16-17 Hãmri nê ho mïdi hpa. Krîja ry nê kahpa piitã axpên pyrãk. Nê hprêk piitã määñên axpên pyrãk. Kamã mēmoj piitã ahpÿnhã kêp 2.200 kirôm. No puhã kahêja hprêk o 64 met pix nê.

18 Nê kahêja kên jaxênh pix o kot amnhÿ nhÿpêx jakamã mex o mex. Nê hkarÿr tÿx kumrêx. Nê kahê hkre kamã krî kamã ahpÿnhã ri ixkreja ôr pix o kot amnhÿ nhÿpêx. Nê piitã hkarÿr tÿx.

19-20 Nê kahê xunhwÿr xà hkukamã kên pytyrta ahpÿnhã ri kên mex pix o kot amnhÿ nhÿpêx. Piitã mex kumrêx nê hkarÿrti.

Wamta kawax pê grãgrãre.

Nê hkôt ja kawax pê grãgrã kakrã htyk.

Nê hkôt ja kakrã htyk.

Nê hkôt hõja grãgrã karÿr.

Nê hkôt ja hkamrêk pihkãrti.

Nê hkôt ja grãgrã kakrã htyk.

Nê hkôt ja hkamrêk tÿx kumrêx.

Nê hkôt ja ràràare.

Nê hkôt ja grãgrã mē pihkàr.

Nê hkôt ja ràràr mē pihkàr.

Nê hkôt ja grãgrã karÿÿre.

Nê hkôt ja kakrã htyk pihkàr.

Ã kên pytyr mex kot anhÿr.

21 Nê mē gjêx xà hã hakwakre kahê xà pê 12ja mēmo kên jakooti rûnh kumrêx pix o.

Nê krî kahti hkôt pry nhÿkwÿ xwÿnhja ãm ôr pix o. Nê hkarÿÿre.

22 Pa pre tee ri krî kamã Tirtûm mã amnhÿ jarênh xà hã ixkre japêr nhûm amrakati. Mo kaxyw koja mē axte ixkreja hwÿr mra? Ra Pahi Maati Tirtûm xihtÿx xwÿnh mē mē pahte amnhÿ tomnuj pãnhã amnhÿrer xwÿnhhta ra hkrajê kamã pa ho pa kênã kot kêt mē axte ri ixkreta o presija. Koja mē kãm wa mex ã wa kãm harênh prãm nê nhÿri tãm wa hwÿr mra nê ã wa kãm kapêr anê. Te mē pahte pahi hwÿr pamrar nê kãm pakapêrta pyrã nê wa hwÿr mra nê wa kãm kapêr.

23 Nê koja krîja kamã myyti nê mytwÿÿre hkêt. Mo kaxyw kot kêt myyti nê mytwÿÿreja arÿ ri hirã ho pa? Krî kamã Tirtûm pa ho pa jakamã kamã hirã mex kumrêx. Nê mē pahte amnhÿ tomnuj pãnhã amnhÿrer xwÿnhhta haxwÿja kamã pa ho pa. Te kêp kanê hpòk rax kumrêx pyrã nê hirã mex o pa. Kot hirã mex o kot myyti jakrenh. ã Tirtûm mē Kra wa krîja kamã pa ho pa jakamã nhûm mē axte myyti ho presija hkêt nê.

24 Koja krî nhõ xwÿnhjaja hirã mex pix kãm ri pa ho pa nê tãm ri amnhÿ nhÿpêx o ri pa. Tã koja mē ho amnhÿptãr xwÿnhjaja Tirtûm wÿr mra nê amnhÿ rom kãm mex o mex ã harê nê kãm:

—Na pre mē ixkwÿjaja mē ixpê mē ho amnhÿptãr xwÿnh ã axpên mã mē inhmex nê mē ixãhpumunh ã ri axpên mã mē ijarê. Nom mē ixrom amex o amex nê axãhpumunh o axãhpumunh. Jakamã ãm hãmri na htem amã amex o amex ã ajarê Tirtûm. Anê.

25 Nê krî hwÿr hakwakre koja amnhÿ kahê xà rênh rãhã kuhê nê aa amnhÿ kahê hkêt nê. Jar mē panhõ pika kamã na hte kamãt kaxyw nhûm htem amnhÿ tã hakwakre kahê hpa. No mo kaxyw koja mē axte pika nywja kamã ã amnhÿ nhÿpêx anê? Koja kamãt kêt nê hirã rãhã ho rãhã jakamã nhûm mē amnhÿ tã kahê hkêt rãhã nê pa ho pa.

26 Nê koja mē piitã Tirtûm wÿr mra nê kãm mex o mex ã harê nê kãm:

—Pa Tirtûm. Hêxta waa nê. Anhõ krîja mex kumrêx. Mex o mex. Nê mē ixrom amex o amex nê axihtÿx o axihtÿx. Nê

mě ixrom axàhpumunh o axàhpumunh. Ām hāmri na ka ra mẽ ixpê akrajê kamã apa ho apa Tirtũm. Aně.

²⁷ Ně koja mẽmoj punuj krĩja wỳr gjêx kêt kumrêx. Mě hpijaam kêt xwỳnhjaja nẽ ri mẽ hêx xwỳnhjaja hwỳr gjêx kêt nẽ. Ām mẽ pahte amnhĩ tomnuj pãnhã amnhĩrer xwỳnhhta nhõ kagà kamã Tirtũm ri mẽ htĩr tũm nẽ mẽ pa mã xwỳnhjê nhĩxi nhĩpêx xwỳnh pixjaja koja mẽ hwỳr agjê nẽ kamã pa ho pa.

22

¹⁻² Tã pa pre axte mẽmoj pumu. Nhũm Tirtũm kapêr o wrỳk xwỳnhja axte inhmã mẽmoj jahkre. Nhũm Tirtũm mẽ kot mẽ pahpãnhã amnhĩrer xwỳnhja wa kot mẽ ho amnhĩptar ã hkrĩ xà maati rũm pyhti hprõt. Krĩ kahti hkõt pry pohti nõr xwỳnhhta kahti hkõt hprõt o nõ. Pyhti kamã gõja na htem ho ixkõ nẽ htĩr tũm nẽ pa ho pa. Gõ karỳyẽ. Nhũm mẽmo pĩ hpàr muxre xwỳnhja akutã hijê nẽ xa. Pĩ xõja na htem kuwõ nẽ htĩr tũm nẽ pa ho pa. Na hte apkati mẽ õ rãhã nẽ kuhê. Nẽ axtem hõja mẽ piitã mẽ mex nẽ à hkêt kaxyw na hõja.

³ Amnepêm na pre Tirtũm Atãw mã kapêr nẽ kãm:

—Ate amnhĩ tomnuj mỳrapê kot paj tanhmã pika homnu hto nhũm apê mex kêt nẽ. Ka kamã apur nẽ kamã axàpênh rũnh o apa rãhã nẽ rĩ kormã kamã axàpkur o ri apa. Apê jamnuj tã kot kaj mẽ ã amnhĩ nhĩpêx anhỳr o apa rãhã ty. Aně.

Tã ra Tirtũm nhõ krĩ nyw kamã mẽ omnuj xàja amrakati kumrêx. Nẽ Tirtũm mẽ kot mẽ pahpãnhã amnhĩrer xwỳnhhta wa õ krĩ kamã pa ho pa jakamã mẽ pahte kamã mẽ papa xwỳnhjaja kot puj mẽ wa kãm tanhmã amnhĩ nhĩpêx to ho ri papa.

⁴ Kot puj mẽ tã pano ho Tirtũm pumunh o papa. Hāmri nhũm te mẽ pahpiitã mẽ panhõkrã hã amnhĩ nhĩxi nhĩpêx pyrak o mẽ panhĩpêx.

⁵ Nẽ kot puj mẽ Pahi Maati Tirtũm nhĩrã kamã ri papa nẽ axte myyti nhĩrã ho presija hkêt nẽ. Koja kamãt hapêx pa pu mẽ axte kanê ho presija hkêt nẽ. Nẽ Jejus nhĩhkõ hã hirã kamã mẽmoj to amnhĩptar rãhã ho papa.

Jejus tokyx akupỳn wrỳk ã harênh Apokarip 1.1-3

⁶ Tã nhũm Tirtũm kapêr o mẽ wrỳk xwỳnh kot ixto mõi xwỳnhhta axte inhmã kapêr nẽ inhmã:

—E nã ãm hāmri na ixte amã mẽmoj piitã harênh xwỳnhja. Ām hāmri na. Jakamã kwa kêr ka arĩ hã ano htỳx rãhã ho apa. Amnepêm Tirtũmja ý hã mẽ kapêr o pa xwỳnhjê mã tanhmã kapêr o amnhĩrit to. Kot tanhmã amnhĩ nhĩpêx to hkukamã mẽ kãm ho amnhĩrit nhũm prem kuma nẽ õ ri ma hkwỳjê mã harênh o ri mẽ hkõt pa. Tã ra mẽ hpãnhã pa mẽ awỳr inhmẽ. Mě ate Tirtũm mã tanhmã amnhĩ to ho apa xwỳnhjê mã ixte ja jarênh kaxyw Pahihti Tirtũmja mẽ awỳr inhmẽ pa wrỳ. Nã koja mẽmoj tokyx ã amnhĩ nhĩpêx aně.

⁷ Na pre Jejus mẽ amã amnhĩ jarênh o: “Kot paj tokyx akupỳm mẽ awỳr wrỳ. Tã mẽ ate ijarênh ã kagà kamã harênh nẽ mar nẽ amnhĩ kaxyw hkõt ajamexpêr nẽ hkõt amnhĩ nhĩpêx xwỳnhjaja kot kaj mẽ akĩnh nẽ ri apa.” Anhỳr o amnhĩ jarê. Aně.

⁸ Nã ixpê Juãw na pa pre ã inhno ho mẽmoj pumunh aně. Hāmri nẽ omunh pa nẽ Tirtũm kapêr o wrỳk xwỳnh kot inhmã harênh xwỳnhhta kutã ixkõn krã ho ixtẽm nẽ inhỳr kaxyw. Nom nhũm amnhĩ nẽ inhmã kapêr kãm hihtỳx nẽ inhmã:

⁹ —Kwa nã ri ã inhĩpêx anhỳr kêt nẽ. Ām Tirtũm pix kutã na pu htem ã amnhĩ nhĩpêx aně. Apyrà nẽ ixpê Jejus kwỳ kênã. Na pa hte apyrã nẽ ý hã tanhmã amnhĩ nhĩpêx to ho ixpa. Nẽ mẽ apyrã nẽ kapêr ã kagà hkõt pix mã amnhĩ nhĩpêx. Na pu htem axpên kutã pahkõn krã ho parõrõk kêt nẽ. Ām Tirtũm pix kutã na pu htem ã amnhĩ nhĩpêx aně.

¹⁰ —E ã ate mẽmoj pumunh nẽ mar anhỳr xwỳnhja koja tokyx ã amnhĩ nhĩpêx aně. Jakamã kwa kêr ka akwỳjê pẽ ho apimxur kêt nẽ. Piitã hã kagà hpa kê mẽ kamã harê nẽ kuma nẽ mẽmoj kot ã amnhĩ nhĩpêx anhỳr mã xwỳnhhta piitã hkukamã harênh ma. Koja tokyx mẽmoj ã amnhĩ nhĩpêx aně.

¹¹ —Jakamã kwãr mẽ mãmrĩ piitã tanhmã kãm amnhĩ nhĩpêx to ho pa hprãm xà hkõt amnhĩ nhĩpêx o pa. Kwãr mẽ mẽ kot amnhĩ tomnuj xwỳnhjaja ã amnhĩ anhĩpêx anhỳr o

pa. Nē kwār mẽ kot tanhmã kapēr punuj to xwýnhjaja mãmri ã amnhĩ nhĩpêx anhÿr o pa. Nē kwār mẽ kot tãm amnhĩ nhĩpêx o ri mẽ pa xwýnhjaja mãmri Tirtũm kôt pix mã ri tãm amnhĩ nhĩpêx o pa. Anē.

Nhũm pre ã kaxkwa hwÿr ixto àpir xwýnhhta inhmã kapēr anē.

¹² Hãmri nhũm hpãnhã Jejus tãm inhmã kapēr nē inhmã:

—E kot paj tokyx akupÿm mẽ awÿr wrÿ. Nē akupÿm pøj hãmri nē mẽ kot amnhĩ tomnuj o mẽ pa xwýnhjaja pa ja mÿrapê ma mẽ kot amnhĩ xà htÿx kamã hamak tũm xàta wÿr mẽ rēnh pa. No mẽ kot ixkôt amnhĩ nhĩpêx xwýnhjaja kot paj akupÿn inhõ krĩ hwÿr amnhĩ kôt mẽ ho api.

¹³—Nē ixrãhãã xwýnh na pa. Amnepê mã kormã mẽmoj kêt ri na pa pre ra ixrãhãã. Nē koja nhÿrmã mẽmoj piitã akupÿm hapêx pa arĩ ixrãhã nē ixpa ho ixpa.

¹⁴—Nē Tirtũm kot mẽ anē mẽ ate amnhĩ tomnuj kuhõnh par xwýnhjaja kot kaj mẽ amex kumrêx nē apa ho apa. Nē akĩnh nē ajamakêtkati nē ri atÿx apa ho apa. Te ho mẽ kot amnhĩ xê kahõnh nē mex jagiênh nē ri hã pata pyrãk. Koja Tirtũm mẽ amã anē ka mẽ ajamakêtkati nē õ krĩ hwÿr agjê nē kamã ri amex kumrêx nē ri apa ho apa. Nē kamã mẽmo pĩ xô mẽ kot kur nē htĩr tũm nē pa mã xwýnhhta wÿr mra nē amnhĩm ô rê nē hkur o ri apa. Ra mẽ ate Jejus kôt amnhĩ xunhwÿr jakamã kot kaj mẽ axãmnhix hwÿr mra nē amnhĩm hkwÿr rê nē hkur o ri apa. Kot kaj mẽ ã amnhĩ nhĩpêx anē.

¹⁵—Nom mẽ kot amnhĩ tomnuj o mẽ pa xwýnhjaja koja mẽ akĩnhã inhõ krĩ hwÿr gjêx kêt nē. Mẽ kot ri mẽ y ho mẽ pa xwýnhjaja. Nē mẽ kot nhãm ri mēnijê ho amnhĩkati ho mẽ pa xwýnhjaja. Nē mẽ kot ri mẽ hpar o mẽ pa xwýnhjaja. Nē mẽ kot ri sãnti nhĩpêx o te Tirtũm nhĩpêx pyrãk o mẽ pa xwýnhjaja. Nē mẽ kãm ri hêx prãm o ri mẽ pa xwýnhjaja. Koja mẽ akĩnhã inhõ krĩ hwÿr pa hkêt nē.

¹⁶—E Juãw. Nà ixpê Jejus na pa awÿr ixkapêr o mẽ wrÿk xwýnhhta mẽ. Kot ixkwÿjê kaxyw amã ixkapêr jarēnh kaxyw. Ixpê Tawi pàr krax na pa. Te ixpê arĩgro

hkôt kanhêti hpôk rax kot arĩgro ho mõi ã ho amnhĩrit xwýnhhta pyrãk. Anē.

Nhũm pre ã Jejus inhmã kapēr anē.

¹⁷Tirtũm Karõ mẽ Jejus kwÿjaja na htem ã Jejus kot amnhĩ jarēnh anhÿrja ma nē hkĩnh nē. Nē kãm kapêr o:

—Hêxta waa nē. Kwa amnhĩm anojarêt nē tokyx akupÿn mẽ ixwÿr wrÿ Pahihti. Pa mẽ tokyx ã amnhĩ nhĩpêx anhÿr o ri war akôt ixpa. Anē.

Nē mẽ ate ja mar xwýnhjaja kêr ka mẽ urãk nē ã kãm akapêr anē.

Nē te mẽ amã kôr nē ri mẽ apa pyrãk xwýnhjaja kêr ka mẽ te Jejus wÿr amrar nē õ gô ho akôm pyrã nē hkôt amnhĩ xunhwÿ. Te Jejus amarĩ mẽ pamã õ gô nhõr pyrãk o mẽ panhĩpêx pu mẽ hkôt amnhĩ xunhwÿ nē ra pahpê pahĩr tũm nē papa mã xwýnh. Hãmri nē amnhĩ pãnhã tanhmã kãm amnhĩrer to hkêt nē.

Nhÿrmã mẽmoj nyw par ã harēnh jatur xà

¹⁸E ixpê Juãw na pa Jejus nhÿ hã mẽ amã mẽmoj tanhmã kot amnhĩ nhĩpêx to hkukamã ã mẽ amã hã kagã anē. Tã kwa mẽ o kora. Kêr ka mẽ atõ amnhĩ krã hkôt ri ajamaxpêr o te ho ja pyrã nē hijuk ri axte mẽmoj nhĩpêx kêt nē. ãm kwarĩ ho kwarĩ. Kot ka mẽ atõ anē nhũm Tirtũm ja hã apumu nē kagãja kamã tanhmã mẽ hipêx kati hto xàta o tanhmã anhĩpêx to ka arĩ amnhĩ pumu.

¹⁹Rÿ ka mẽ atõ kagã kamã harē nē ama nē tanhmã ajamaxpêr to nē ajamaxpêr o:

—Nà ja kot anhÿr kêt. Na mẽ ãm harēnh o hêx. Kot paj kuma nē ãm kuma.

Anhÿr o ajamaxpêr japêr. Hãmri nhũm Tirtũm amnhĩ tã ama nē kagã mexta kamã kot tanhmã mẽ ho mex toja o ato mex kêt nē. Ka õ krĩ hwÿr axàpir nē mẽmo pĩ xô mẽ kot hkur nē htĩr tũm nē pa kaxyw mã xwýnhhta ka amnhĩm hõ hyr nē hkrêr kêt nē. Jakamã e kwa mẽ o kora. Kêr ka mẽ kagãta kamã ã mẽmoj kot amnhĩ nhĩpêx anhÿr mã xwýnhhta jarēnh ma nē aprĩ hã piitã hkôt ajamaxpêr tÿx rãhã ho ri apa.

²⁰E Jejus kot inhmã mẽmoj kukamã tanhmã ujarēnh to xwýnhhta na pre inhmã amnhĩ jarēnh o: “Kot paj tokyx akupÿn mẽ awÿr wrÿ.” Anē. ãm hãmri na pre ã amnhĩ

jarēnh aně. Koja tokyx akupŷn mẽ pahwŷr
wrŷ hāmri nhŷm mẽmoj piitã mex o mex.
Jakamã kwa kêr ka amnhĩm anojarêť ně
tokyx akupŷn mẽ ixwŷr wrŷ Pahihti
Jejus.

²¹ Ně ixpyrà ně mẽ apê Tĩrtũm krajaja na pa
hte mẽ ato Pahihti Jejus wŷr rãhã ho ri ixpa

ně kãm:

—Kwa akwŷjê pumu ně mẽ kutã anojarêť
rãhã ho ri apa Pahihti. Aně.

E mẽ ujarēnhja na hapêx. Ixpê Juãw na
pa Jejus kot inhmã tanhmã ujarēnh toja pa
amnhĩ xô ri mẽ amã hã kagà hpa. E na
hapêx.